

礼书纲目

江永

文硕阁

wenshuoge.com

目录

关于我们	5
采輯羣書目	7
目錄	10
序	72
卷首上	73
卷首中	78
卷首下	87
卷一	98
卷二	106
卷三	116
卷四	127
卷五	137
卷六	146
卷七	152
卷八	162
卷九	166
卷十	180
卷十一	196
卷十二	203
卷十三	210
卷十四	215
卷十五	235
卷十六	244
卷十七	256
卷十八	266
卷十九	288
卷二十	293
卷二十一	304
卷二十二	310
卷二十三	316
卷二十四	333
卷二十五	343
卷二十六	349
卷二十七	368
卷二十八	381
卷二十九	388

卷三十	400
卷三十一	409
卷三十二	418
卷三十三	430
卷三十四	437
卷三十五	443
卷三十六	455
卷三十七	462
卷三十八	471
卷三十九	478
卷四十	489
卷四十一	496
卷四十二	506
卷四十三	528
卷四十四	530
卷四十五	545
卷四十六	562
卷四十七	574
卷四十八	591
卷四十九	601
卷五十	613
卷五十一	625
卷五十二	631
卷五十三	642
卷五十四	652
卷五十五	662
卷五十六	681
卷五十七	689
卷五十八	704
卷五十九	718
卷六十	732
卷六十一	742
卷六十二	759
卷六十三	773
卷六十四	790
卷六十五	796
卷六十六	812
卷六十七	821

卷六十八	826
卷六十九	830
卷七十	840
卷七十一	856
卷七十二	874
卷七十三	895
卷七十四	907
卷七十五	920
卷七十六	924
卷七十七	943
卷七十八	951
卷七十九	959
卷八十	964
卷八十一	973
卷八十二	982
卷八十三	995
卷八十四	1.005
卷八十五	1.016
附錄卷上	1.022
附錄卷中	1.032
附錄卷下	1.046

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

采輯羣書目

欽定四庫全書 經部四

禮書綱目采輯羣書目 禮類五【通禮之屬】

正經十三部

儀禮【鄭康成注 賈公彥疏】

周禮【鄭康成注 賈公彥疏】

禮記【鄭康成注 孔穎達疏】

易【程子傳 朱子本義】

書【孔安國傳 孔穎達疏 蔡沈集傳】 詩【毛萇傳 鄭康成箋 朱子集傳】

春秋左氏傳【杜預注 孔穎達疏】

春秋公羊傳【何休注 長孫無忌疏】

春秋穀梁傳【范甯注 楊士勛疏】

論語【何晏集解 邢昺疏 朱子集注】

孝經【唐明皇注 邢昺疏 朱子刊誤】

孟子【趙岐注 孫奭疏 朱子集注】

爾雅【郭璞注 邢昺疏】

附經四種

大戴禮【鄭康成注】

國語【韋昭注】

孔子家語【王肅注】

伏生尚書大傳【鄭康成注】

雜書八種

汲冢周書【孔晁注】

呂氏春秋【高誘注】

賈誼新書

劉向說苑

劉向新序

劉向列女傳

劉向世本

班固白虎通

子書五種

管子【房玄齡注】

莊子【郭象注】

荀子【楊倞注】

淮南子【高誘注】

孔叢子

兵書五種

握機經

三略

六韜

司馬法

李靖對

史書四種

史記【司馬貞索隱】

漢書【顏師古注】

後漢書

資治通鑑

類書一種

杜氏通典

字書算書各一種

許慎說文解字

九章算術

宋儒集六種

儀禮經傳通解【朱子編 勉齋黃氏續編】 朱子文集

朱子語類

朱子易學啓蒙

陳祥道禮書

蔡氏律呂新書

凡四十八種

目錄

欽定四庫全書卷

禮書綱目目錄

卷首上

朱子乞修三禮劄子

朱子考定漢書藝文志

孔穎達禮記正義序略

賈公彥儀禮篇次說

賈公彥序周禮廢興錄略

陳祥道禮書序略

楊復序喪祭禮通解

張宓刊喪祭二禮

卷首中

朱子論編禮書

卷首下

朱子論禮綱領

朱子儀禮釋宮

卷一

士冠禮 嘉禮一

筮日

戒賓

筮賓

宿賓

為期

陳器服

即位

迎賓

始加

再加

三加

醴冠者

冠者見母

字冠者

賓出就次

冠者見兄弟贊者及姑姊

奠摯於君及卿大夫鄉先生

醴賓

醯

殺牲醢

孤子冠

庶子冠

母不在

冠義 嘉禮二

卷二

士昏禮 嘉禮三

納采

問名

醴賓

納吉

納徵

請期

陳器饌

親迎

婦至

婦見

醴婦

婦饋

饗婦

饗送者

廟見

壻見婦之父母【記補】

昏義 嘉禮四

卷三

冠昏禮記 嘉禮五

通論

天子諸侯冠禮

冠變禮

女子笄

嫁娶

不娶同姓

天子諸侯大夫昏禮

庶人昏禮

昏變禮

不改嫁

歸寧

出妻

卷四

鄉飲酒禮 嘉禮六

篇目

謀賓介

戒賓介

設席陳器

速賓

迎賓

獻賓

賓酢主人

主人酬賓

主人獻介

介酢主人

主人獻衆賓

一人舉觶

樂賓

立司正

司正舉觶

旅酬

二人舉觶

徹俎

燕

賓出

有遵者

拜禮

息司正

鄉飲酒義 嘉禮七

卷五

燕禮 嘉禮八

戒群臣

陳器饌

即位命賓及執事者

納賓

主人獻賓

賓酢主人

主人獻公

主人受公酢

主人酬賓

媵爵於公

公為賓舉旅

主人獻孤卿

再媵爵

公為卿舉旅

主人獻大夫

樂賓升歌

公為大夫舉旅

樂賓笙間合

立司正

徹俎

燕

主人獻士

射

賓媵爵於公

公為士舉旅

主人獻庶子以下

無算爵

賓出

燕義 嘉禮九

卷六

公食大夫禮 嘉禮十

戒賓賓從

陳器饌

迎賓即位

拜至

舉鼎載俎

設正饌

賓祭正饌

設加饌

賓祭加饌

賓正食

侑幣

卒食

賓出

拜賜

食上大夫禮

不親食

公食大夫義 嘉禮十一

卷七

饗食燕記 嘉禮十二

【總言饗食燕 王朝饗食禮陳設 饗食之饌 饗食之服 饗食之車 入廟 即位及法儀
薦羞獻酬之節 樂舞徹俎歸俎合諸侯饗禮 王不親饗食 王朝燕禮后夫人致飲
諸侯饗食燕賓夫人致饗食 大夫相饗食】

卷八

養老 嘉禮十三

通論歷代養老

養老禮

尚齒

卷九

鄉射禮 嘉禮十四

篇目

戒賓

設席陳器

張侯

速賓

迎賓

獻賓

賓酢

酬賓

獻衆賓

一人舉觶

獻大夫

大夫酢

樂賓

立司正

司正舉觶

請射

誘射

初射獲而未釋獲

取矢

再請射

再射釋獲

賓主大夫衆賓射

取矢視算

飲不勝者

獻獲者及釋獲者

三請射

三射用樂

取矢視算

飲不勝者

三射畢

旅酬

二人舉觶

徹俎

燕

賓出

拜賜

息司正

卷十

大射儀 嘉禮十五

戒百官

張侯

設樂

陳設器席

即位講立賓及執事者

納賓

主人獻賓

賓酢主人

主人獻公

主人受公酢

主人酬賓

媵爵於公

公為賓舉旅

主人獻孤卿

再媵爵

公為賓若孤卿舉旅

主人獻大夫

樂賓

立司正

請射

誘射

初射獲而未釋獲

取矢

再請射

公及諸公卿大夫射

取矢視算

飲不勝者

獻服不

獻釋獲者

三請射

三射用樂

取矢視算

飲不勝者

三射畢

公為大夫舉旅

徹俎

燕

主人獻士及祝史等

賓媵爵於公

公為士舉旅

復射

獻庶子左右正內小臣

無算爵

賓出公入

卷十一

三射記 嘉禮十六

總要【總論三射侯制 論天子大射 天子以下大射之侯 天子賓射 天子以下賓射之法 天子以下燕射之侯 天子以下樂節 天子以下弓制 天子以下中及獲旌之制】

天子射儀

諸侯以下射儀

武射

射義 嘉禮十七

卷十二

投壺 嘉禮十八

請投

就筵

設壺中

請賓及主人

命奏樂

投

數算

飲不勝者

三投慶多馬

嘉事雜記 嘉禮十九

鄉飲【正篇外凡鄉飲酒禮在此】

飲酎大飲

燕食宗族

飫

饗食雜事

歸脤

賀慶

卷十三

士相見禮 賓禮一

請見【凡主賓相見之儀附見于下】

復見

士見大夫

嘗為臣者見

大夫相見

言

視【凡賓主飲食之禮本經不具今以他記附于下】

請退

長者請見

士相見義 賓禮二

卷十四

聘禮 賓禮三

篇目

圖事命使介

具齋幣

授使幣

釋幣于禰及行

受命於朝

遂行

過他國

習儀

及竟

三展幣【致積禮附見于下】

郊勞

至朝

致館

設飧

聘

享

聘享夫人

有言

禮賓

私覲

介私覲

公送賓問勞

卿大夫勞

歸饗餼

問卿

賓私面于卿

介私面于卿

賓問嘗使者

主國大夫有故

夫人歸禮

大夫餼介賓

食饗燕羞獻

大夫饗食賓介

還玉賄禮

主君就賓館

拜賜遂行

贈送

歸反命

禮門及禰

遭主國喪

聘君薨

私喪

賓介卒

小聘

聘義 賓禮四

卷十五

王朝邦國遣使禮 賓禮五

邦國遣使於王朝

王朝遣使於邦國

諸侯相見禮 賓禮六

相朝

會遇

卷十六

覲禮 賓禮七

篇目【凡言朝見之期與待賓客之禮皆附于下】

至郊【諸侯出行及逆積問勞之禮皆附于下】

郊勞

賜舍

戒日

受舍【凡王朝戒令皆附于下】

釋幣於禰

覲

享

請事【王禮賓事附于下】

王勞

賜車服

饗禮【致饗餼等附見于下】

乃歸【還圭附見于下】

朝事義 賓禮八

卷十七

會同禮 賓禮九

總要

戒令

戒具

起徒役

從行儀衛

祭告禱祠

止舍

誥戒

會同盟約

禮賓

反行

小會同

巡守 賓禮十

卷十八

喪服 凶禮一

篇目

斬衰三年

齊衰三年

齊衰杖期

齊衰不杖期

齊衰三月

殤大功九月七月

大功正服九月

總衰既葬除之

小功殤五月

小功正服五月

總麻三月

卷十九

補服 凶禮二

補斬衰

補齊衰三年

補齊衰杖期

補齊衰不杖期

補齊衰三月

補大功

補小功

補總

補五世袒免

補心喪三年

補弔服加麻

補弔服

卷二十

喪服變除 凶禮三

疾病改服

始死變服

飯含變服

小斂變服

奉尸俵於堂變服

大斂變服

成服

筮宅卜日變服

啓殯朝祖柩行變服

葬及反哭變服

虞變服

既虞卒哭受服

卒哭變服

既葬除服

不杖以下各以月數除服

祔變服

練筮日筮尸變服

練受服除服

大祥筮尸變服

大祥除服

禫易服

既孤易服

並有喪服

久不葬服

受弔變服

稅服

雜記喪服之變

卷二十一

喪服制度 凶禮四

總要

冠制

首絰制

弁絰制

笄纓髻髮免髦之制

婦人笄總髻制

衰裳制

婦人衰制

要經帶制

婦人要經帶制

錫衰總衰疑衰之制深衣麻衣長衣中衣之制杖制

履制

喪車之制

卷二十二

喪服義 凶禮五

卷二十三

士喪禮上 凶禮六

篇目

始死

復

楔齒綴足

始死奠帷堂

命赴拜賓

室中位

君使人弔

君使人禭

親友禭

為銘

陳沐浴襲飯含之具

沐浴

飯含襲

設重置銘

陳小斂衣經帶奠

小斂

奉尸俛於堂拜賓襲經

小斂奠

有禭者

設燎

陳大斂衣奠及殯具

徹小斂奠帷堂

大斂

殯

大殮奠

喪次

君視斂

成服

拜君命及賓

朝夕哭

徹大歛奠

朝夕奠

朔月奠薦新

筮宅

井椁

獻明器

卜葬日

卷二十四

士喪禮下 凶禮七

請啓期

陳朝祖奠具

啓

朝祖薦車設奠薦馬

請祖期

載

飾柩

陳器

祖奠薦馬

請葬期

公賵

親賓賵奠賻贈

陳遣奠

遣奠

重出車馬奠器從

讀賵

柩行

公使人賵

至壙

窆

反哭

卷二十五

士虞禮 凶禮八

篇目

陳饌具

門外位

門內位

設饌

饗神

迎尸

尸食

主人酹尸

尸酹主人

主人獻祝

主人獻佐食

主婦亞獻

主婦獻祝佐食

賓長三獻

祝告利成

尸出

陽厭

事畢

卷二十六

喪大記上 凶禮九

總要

始死【嗣君即位附見于下】

復

始死奠

戒臣民

遷尸楔齒綴足帷堂

命赴

哭位

受含襚幣玉

為銘

陳沐浴襲飯含之具

沐浴

飯含襲

受弔

陳小斂衣奠

小斂

奉尸俛於堂拜賓

徹始死奠

襲帶經小斂奠

代哭

設燎

陳大斂衣及殯奠具

徹小斂奠

大斂

殯

大斂奠

成服

殯後受弔

陳寶器

居廬

朝夕哭

徹大歛奠

朝夕奠

朔月月半殷奠

卜宅

井椁

獻明器

卜葬日

卷二十七

喪大記下 凶禮十

陳朝祖奠

啟

朝祖奠薦車馬

載

飾棺

陳明器

祖奠

諡誄【錫命附見于下】

大遣奠

包奠讀贈

柩行

至壙

窆

反哭

虞祭

作主

卷二十八

卒哭祔練祥禫記 凶禮十一

卒哭

祔

練

大祥

禫

吉祭

忌日

卷二十九

喪通禮 凶禮十二

主後

祝相

名位

財用

哀戚

哭踊

容貌

拜拱

言語

飲食

居處

動作

卷三十

奔喪 凶禮十三

奔親喪

奔齊衰以下喪

奔母喪

婦人奔喪

奔親喪不及殯

奔齊衰以下喪不及殯

聞親喪不得奔

除喪後奔喪

齊衰以下為位

哭無服

臣哭君

哭諸侯

喪變禮 凶禮十四

聞喪

並有喪

道有喪

因吉而凶【冠昏朝祭聘之屬】

因凶而吉【冠昏祭世子生】

卷三十一

弔禮 凶禮十五

弔【臨哭附】

贈喪【含禭贈賻奠贈】

執事【助奠助祭治事】

會葬

哀有喪

卷三十二

喪禮義 凶禮十六

卷三十三

災變禮 凶禮十七

總要

天地大裁

凶札

水火

兵寇

亡邑失國

子卯

卷三十四

祭法 吉禮一

卷三十五

天神 吉禮二

祀天【通言一歲祭天 通言祀天禮 冬至祀天 主日配月 郊祀以配祖 祀天玉幣 犧牲酒齊粢盛 器具圭 冕服 車旗 樂舞 祀天禮始終之序 祀天明日致鬼神 孟春祈穀 仲夏大雩 季秋大享 魯之郊】

祀五帝及五人帝五人神

祀日月【祀日月正禮 因郊而祀 因會同而祀 因蜡而祀 因祭而祀】 祀星辰【祀星辰正禮因蜡祭而祀】

祀司中司命飡師雨師

卷三十六

地示 吉禮三

祭地【通言一歲祭地 祭地玉幣 犧牲酒齊粢盛 圭 樂舞 祭地禮始終

之序 祭地明日致百物之神】

祭社稷

祭五祀

祀四望

祭山川

卷三十七

百神 吉禮四

總要

六宗

四方

四類

司民司祿

先帝

先聖先師

有功

無主後

高禘

藉田

田祖

蜡及百物

時及寒暑

司寒

難

侯

燿燹

行及□

先卜

貞卜

牲馬

祭酺

卷三十八

宗廟 吉禮五

廟制【營建宗廟 立廟昭穆之制多少之數廟中制度 修廟 恭敬宗廟 廟災】 妣廟

祖宗

廟主

守藏

卷三十九

特牲饋食禮 吉禮六

篇目

筮日

筮尸

宿尸

宿賓

視濯視牲告期視殺

陳設即位

設陰厭

迎尸正祭

主人醑尸

尸醋主人

主人獻祝佐食

主婦亞獻尸

尸醋主婦

主婦獻祝佐食

賓三奠尸尸奠爵

主婦致爵于主人

主人致爵于主婦

賓終三獻

主人獻賓及衆賓

主人酬賓

主人獻兄弟

主人獻內賓宗婦

長兄弟為加爵

衆賓長為加爵尸奠爵

嗣舉奠

弟子舉觶于長兄弟

告祭設羞

旅酬無算爵【旅酬間衆賓長終加爵】

利獻尸及祝

告利成尸出

簋

徹俎

陽厭事畢

卷四十

少牢饋食禮上 吉禮七

篇目

筮日

筮尸宿尸及宿諸官

為期

視殺視濯

陳設

舉鼎載俎設陰厭

迎尸正祭

主人醑尸

尸醑主人

主人獻祝佐食

主婦亞獻

賓長三獻

告利成尸出廟

徹肝俎行簋

卷四十一

少牢饋食禮下 吉禮八

將儐尸徹饌燂尸俎

議侑

主人迎尸

鼎俎入

主人授尸几

主人獻尸

載俎

尸卒爵

主人獻侑

尸酢主人

主婦獻尸及侑

主婦致爵于主人

尸酢主婦

賓長三獻尸尸奠爵

主人酬尸

設羞

主人獻賓辯

主人酬賓

主人獻兄弟

主人獻內賓

主人獻私人

賓長終三獻

旅酬

兄弟舉觶於長兄弟

衆賓長獻

更為旅酬

無算爵

送尸

不賓尸正祭

主人獻

主婦獻

賓長獻【中間尸止爵主婦致爵于主人】

主人獻衆賓兄弟內賓私人

次賓長獻

無算爵

利獻

告利成尸出徹俎簋

陽厭事畢

卷四十二

天子諸侯廟享 吉禮九

祭主

禘

祫

時祫

時享

養牲

卜日

齋戒

戒具修廟

卜尸

祭前夕滌濯陳設省眡

祭日陳設

入廟即位

祝迎尸

裸

朝踐

饋獻

薦熟

祝祭于祊

朝獻

因祭策命

再獻

獻諸臣及加爵

樂尸

上嗣舉奠

旅酬無算爵

禮畢送尸

餽

徹

繹

報祭

月日之祭

薦新

告朔

祭殤

卷四十三

諸侯遷廟 吉禮十

將遷齋

殯宮告遷

奉主入新廟

祭告

事畢

諸侯釁廟 吉禮十一

卷四十四

祭通禮 吉禮十二

總要

神位

尸

巫祝

卜筮

擇士

戒具

齋戒

禁令

為期

省視

出路

臨祭

容貌

事尸

獻數

祝號

受爵

徹

禮畢送尸

守瘞

致福

不與祭

廢祭

失禮

卷四十五

因祭 吉禮十三

立君建國

巡守

朝會

行師

田獵

生子立嗣

婚嫁

祈禳

天地大裁

六沴

凶旱

疾病

喪葬

盟詛

釁

卷四十六

祭物 吉禮十四

總要

犧牲

粢盛

庶羞

酒齊

祭器

祭服

樂舞

薪茅雜物

殺禮

卷四十七

祭義 吉禮十五

卷四十八

兵制 軍禮一

民兵【傳載周初兵制 魯兵制 齊兵制 晉兵制 楚兵制 鄭兵制 吳兵制

越兵制】

衛兵【官吏士庶子之衛 虎賁旅賁之衛 夷狄四隸之衛】

陳法

卷四十九

武備 軍禮二

馬

兵器總要

車

甲

兵

弓矢

金鼓旌旗

財用

守禦

卷五十

征伐 軍禮三

天子親征總叙

卜出軍

起師

告祭

授兵鬯主器

師行

軍中

誓禁

祈禱

戰陳

告克

賞戮

師有功歸

師不功歸

命將出征

諸侯伐國應敵

卷五十一

軍通禮 軍禮四

總要

兵柄

用兵

軍容

賞罰

卷五十二

田役 軍禮五

通言田役

田

役

大均大封

卷五十三

歷數 通禮一

治歷

占候

壺漏

卷五十四

夏小正 通禮二

周月 通禮三

【歲時常令 每月吉日 月終 四孟月吉日 春 正歲 孟春 中春 季春 夏中夏 秋 中秋 季秋 冬 孟冬 中冬 季冬 歲終 閏月】

卷五十五

月令【附呂氏春秋十二月紀淮南子時則訓通典唐月令】 通禮四

卷五十六

制國 通禮五

分土

建國

遷國

卷五十七

職官上 通禮六

上古官

歷代官制之略

周禮天官之屬

地官之屬

春官之屬

夏官之屬

秋官之屬

冬官

卷五十八

職官下 通禮七

侯國之官

大夫之官

爵祿

任官

卷五十九

封建 通禮八

畿服之制

分封之制

牧伯之制

封國之禮

封帝王後

治邦國之法

黜陟

寓公

都邑

卷六十

內治 通禮九

通論

王宮

內事

親蠶

命臣妻

慎始

后夫人侍君

胎教

生子

立世子

世子事君父

齊家

卷六十一

朝廷禮 通禮十

通論

師保【凡規諫侍御之法皆在此】

朝儀【王視朝之服 王視朝車旗 天子治朝 諸侯治朝 天子燕朝及辭不視

事 諸侯燕朝 天子外朝 天子在外聽朝 大夫士視私朝】

出入僕從之儀

號令復逆

膳羞

聽朔

耕藉

卷六十二

政事上 通禮十一

總要

通言民政

居民

民數

鄉邑之政

農政

工政

卷六十三

政事下 通禮十二

市政

門關之政

道路之政

懷遠之政

凶札之政

恤窮之政

醫藥之政

恤死之政

墳墓之政

火政

水政

酒政

草木禽獸之政

雜禁令

卷六十四

井田 通禮十三

經畧

授田

卷六十五

財賦 通禮十四

三代田稅

虞夏賦貢【賦法 貢法及貢道】

殷周賦法

貢法

財用

泉幣

卷六十六

學制 通禮十五

設學

國學之教

釋奠釋菜

鄉學之教

選舉

卷六十七

學記 通禮十六

大學【存篇目】 通禮十七

中庸【存篇目】 通禮十八

卷六十八

教太子 通禮十九

書數 通禮二十

卷六十九

五宗 通禮二十一

宗法

宗支

宗支服制

宗支祭法

事宗之禮

親親

姓氏

親屬記 通禮二十二

宗族

母黨

妻黨

婚姻

卷七十

名器上 通禮二十三

總要

名號

衣服【歷代服制 冕弁之制 冠制 婦人首服 婦人吉笄之制 通論天子諸侯大夫士之服
冕服之制 爵弁皮弁玄冠玄端服之制 深衣長衣中衣之制 裘制兼論裼襲之異 大帶之制
革帶之制 韍韠之制 笏制佩制 婦人服制 屨及屨制 每月服色 衣服雜制 童子服制
素服雜論衣服之事 澣絲帛染采】

卷七十一

名器下 通禮二十四

宮室

車旗

玉器

摯

節

雜器

制度權衡

卷七十二

刑辟 通禮二十五

刑制

聽斷

赦宥八議

順時令

約劑

復讐

卷七十三

卜筮 通禮二十六

卜筮

筮法

占夢

卷七十四

禮記 通禮二十七

卷七十五

禮樂記 通禮二十八

卷七十六

曲禮 曲禮一

通言

容節

瞻視之容

坐立拜揖步趨奉持之容

居處齋潔之事

言語之禮

飲食之禮

問道之禮

乘車之禮

僕御之禮

從宜從俗

雜記

卷七十七

內則 曲禮二

事親事長

男女之別

夫婦之別

御妻妾

胎教

生子

教子

卷七十八

孝經【依朱子刊誤定】 曲禮三

經一章

傳之首章

傳之二章

傳之三章

傳之四章

傳之五章

傳之六章

傳之七章

傳之八章

傳之九章

傳之十章

傳之十一章

傳之十二章

傳之十三章

傳之十四章

論孝附

卷七十九

少儀 曲禮四

年齒差等

品節

灑埽應對進退

侍食

弟子職 曲禮五

內則

蚤作

受業對客

饌饋

乃食

灑埽

執燭

請衽

退習

卷八十

臣禮 曲禮六

通論

始見

朝君

侍坐侍食獻賜侍疾

恭敬

諫諍

去國

死節

復讐

卷八十一

樂制 樂一

歷代樂制

樂事

卷八十二

鐘律 樂二

造律

十二律長圍徑之數

黃鐘十一律之實

黃鐘生十一律

十二律三分損益上下相生

十二律正變倍半之法

五聲

律生五聲

變聲

旋宮八十四聲圖

六十調圖

候氣

審度

嘉量

謹權衡

鐘律義 樂三

卷八十三

樂器 樂四

總要

金之屬

石之屬

絲之屬

竹之屬

匏之屬

土之屬

革之屬

木之屬

樂縣

卷八十四

歌舞 樂五

樂歌

小雅六詩譜

周南召南六詩譜

樂舞

卷八十五

樂記 樂六

附錄

卷上

論律呂

卷中

論律呂

卷下

深衣考誤

【臣】等謹案禮書綱目八十五卷

國朝江永撰永字慎修休寧人其書大略依經傳通解為之而間有異同多能補所未及如士冠禮屨夏用葛以下五十字本在辭後記前而通解移置經文陳器服節末是書亦因之此其沿襲未改者他如士昏記父醺子命之辭曰以下三十一字通解列在陳器饌節下而是書改列在親迎節下又通解以記文婦入三月然後祭行二句別為祭行一節在奠菜節之前而是書以此二句附于廟見節之末蓋是書廟見即通解之所謂釋奠也揆以禮意較通解為有倫次又通解割士冠記無大夫冠禮而有其婚禮以下四句謂當在家語冠頌內疑錯簡于此經頗涉臆斷是書則仍記文之舊不從通解尤為詳慎蓋通解本朱子未定之書不免小有出入永引據羣經補其罅漏實於禮義有裨即實於朱子為有功視胡炳文輩務博篤信之名而實非朱子之志者識趣相去遠矣乾隆四十三年七月恭校上

總纂官【臣】紀昀【臣】陸錫熊【臣】孫士毅

總校官【臣】陸費墀

序

禮書綱目序

禮樂全經廢缺久矣今其存者惟儀禮十七篇乃禮之本經所謂周監二代郁郁乎文者此其儀法度數之略也周禮為諸司職掌非經曲正篇又逸其冬官蓋周公草創未就之書禮記四十九篇則羣儒所記錄或雜以秦漢儒之言純駁不一其冠昏等義則儀禮之義疏耳自三禮而外殘編逸義亦或頗見於他經論語孟子爾雅春秋內外傳大戴家語孔叢等書諸子則管子荀況漢儒則伏生賈誼劉向班固之徒亦能記其一二然皆紛綸散出無統紀至於聲律器數則又絕無完篇樂記但能言其義已失其數矣夫禮樂之全雖不可復見然以周禮大宗伯攷之禮之大綱有五吉凶軍賓嘉皆有其目其它通論制度之事與夫雜記威儀之細者尚不在此數樂則統于大司樂其律同度數鏗鏘鼓舞亦必別有一經與禮相輔竊意制作之初當如儀禮之例事別為篇綱以統目首尾倫貫條理秩然所謂經禮三百曲禮三千者此也散逸之餘儀禮正篇猶存二戴之記者如投壺奔喪遷廟釁廟之類已不可多覩其他一篇之中雜錄吉凶一事之文散見彼此又或殷周異制傳聞互殊學者末由觀其聚則亦不能會其通夫禮樂之全已病其闕略而存者又疾其紛繁此朱子儀禮經傳通解所為作也朱子之書以儀禮為經以周官戴記及諸經史雜書補之其所自編者曰家禮曰鄉禮曰學禮曰邦國禮曰王朝禮而喪祭二禮屬之勉齋黃氏其編類之法因事而立篇目分章以附傳記宏綱細目於是粲然秦漢而下未有此書也顧朱子之書修於晚歲前後體例亦頗不一王朝禮編自衆手節目闊疎且未入疏義黃氏之書喪禮固詳密亦間有漏落祭禮未及精專修改較喪禮疎密不倫信齋楊氏有祭禮通解議論詳贍而編類亦有未精者蓋纂述若斯之難也永竊謂是書規模極大條理極密別立門目以統之更為凡例以定之蓋哀集經傳欲其該備而無遺釐析篇章欲其有條而不紊尊經之意當以朱子為宗排纂之法當以黃氏喪禮為式竊不自揆為之增損櫟括以成此編其門凡八曰嘉禮【十九篇十二卷】曰賓禮【十篇五卷】曰凶禮【十七篇十六卷】曰吉禮【十五篇十四卷】皆因儀禮所有者而附益之曰軍禮【五篇五卷】曰通禮【二十八篇二十三卷】曰曲禮【六篇五卷】皆補儀禮之所不備樂一門居後【六篇五卷】總百有六篇八十有五卷凡三代以前禮樂制度散見經傳雜書者蒐羅略備而篇章次第較通解尤詳密焉又采漢唐以來諸家序論與朱子所以欲編禮書論列綱領者別為首三卷以提其要深衣為古人法服先儒沿疏有誤別為考誤一卷律學精深有鍾律正篇存古制復為律呂管見二卷皆附書末將俟當世君子論定焉屢易稿成書【總九十一卷】名曰禮書綱目蓋八門為總綱而八篇則綱中之綱也篇分章段為目而事之繁碎者又有細目則目中之目也依朱子例當入釋文音疏與後儒論說依黃氏楊氏例當增喪服圖式喪服古今沿革及宮廟器服儒節儀制等圖其書甚鉅非私家所能就姑繕寫本文及舊註奔藏之異日聖朝有制作命儒臣重加纂輯庶成大備完書是書或可為粉本耳夫禮樂精微廣大所以安上治民移風易俗者在是先儒於煨燼亡軼之餘勤勤補綴具有深指膚學何敢與知顧敢以其謏陋之識輒更已成之緒蓋欲卒朱子晚年惓惓之志兼備他時採擇雖僭妄有不辭也世之君子取通解正續三書參之是編攷其本末究其詳略異同之故或亦諒永之心也夫婺源後學江永序

卷首上

欽定四庫全書

禮書綱目卷首上 婺源江永撰

朱子乞修三禮劄子

臣聞之六經之道同歸而禮樂之用為急遭秦滅學禮樂先壞漢晉以來諸儒補緝竟無全書其頗存者三禮而已周官一書固為禮之綱領至其儀法度數則儀禮乃其本經而禮記郊特牲冠義等篇乃其義疏耳前此猶有三禮通禮學究諸科禮雖不行而士猶得以誦習而知其說熙寧以來王安石變亂舊制廢罷儀禮而獨存禮記之科棄經任傳遺本宗末其失已甚而博士諸生又不過誦其虛文以供應舉至于其間亦有因儀法度數之寔而立文者則咸幽冥而莫知其源一有大議率用耳學臆斷而已若乃樂之為教則又絕無師授律尺短長聲音清濁學士大夫莫有知其說者而不知其為闕也故臣頃在山林嘗與一二學者攷訂其說欲以儀禮為經而取禮記及諸經史雜書所載有及於禮者皆以附於本經之下具列註疏諸儒之說略有端緒而私家無書檢閱無人抄寫久之未成會蒙除用學徒分散遂不能就而鐘律之制則士友間亦有得其遺意者竊欲更加參考別為一書以補六藝之闕而亦未能具也欲望聖明特詔有司許臣就秘書省關借禮樂諸書自行招致舊日學徒十餘人踏逐空閑官屋數間與之居處令其編類雖有官人亦不繫銜請俸但乞逐月量支錢米以給飲食紙札油燭之費其抄寫人即乞下臨安府差撥貼書二十餘名候結局日量支犒設別無推恩則于公家無甚費用而可以興起廢墜垂之永久使士知寔學異時可為聖朝制作之助則斯文幸甚取進止

【按光宗熙寧五年朱子為侍講草此奏未幾去國不果上寧宗慶元二年始修禮書又越五年而朱子卒】朱子考定漢書藝文志【見儀禮經傳目錄】

漢書藝文志禮古經五十六卷經十七篇【后氏戴氏朱子曰按此即今儀禮也十七本作七十臨江劉敞云當作十七計其篇數則然今從之永嘉張淳曰漢初未有儀禮之名疑後漢學者見十七篇中有儀有禮遂合而召之也】記百三十一篇【七十子後學者所記也】明堂陰陽三十三篇【古明堂之遺事】王史氏二十一篇【七十子後學者】曲臺后倉九篇【如淳曰行禮射于曲臺后倉為記故名曰曲臺記】明堂陰陽說五篇周官六篇傳四篇【王莽時劉歆置博士師古曰即今周官禮也亡其冬官以考工記充之傳即周官傳】劉歆曰易曰有夫婦父子君臣上下然後禮義有所錯而帝王質文世有損益至周曲為之防事為之制故曰禮經三百威儀三千【朱子曰按禮經威儀禮器作經禮曲禮而中庸以禮經為禮儀鄭玄等皆曰經禮即周禮三百六十官曲禮即今儀禮冠婚吉凶其中事儀三千以其有委曲威儀故有二名按臣瓚曰周禮三百特官名耳經禮謂冠婚吉凶蓋以儀禮為經禮也而近世括蒼葉夢得曰禮經制之凡也曲禮文之目也先王之世二者蓋皆有書藏于有司祭祀朝覲會同則大史執之以蒞事小史讀之以喻衆而卿大夫受之以教萬民保氏掌之以教國子者亦

此書也愚意禮篇三說禮器為勝諸儒之說瓚葉為長蓋周禮乃制治立法設官分職之書于天下事無不該攝禮典固在其中而非專為禮設也故此志列其經傳之目但曰周官而不曰周禮自不應指其官目以當禮篇之目又況其中或以一官兼掌衆禮或以數官通行一事亦難計其官數以充禮篇之數至于儀禮則其中冠婚喪祭燕射朝聘自為經禮大目亦不容專以曲禮名之也但曲禮之篇未見于今何書為近而三百三千之數又將何以充之耶又嘗考之經禮固今之儀禮其存者十七篇而其逸見于他書者猶有投壺奔喪遷廟釁廟中霤等篇其不可見者又有古經增多三十九篇而明堂陰陽王史氏記數十篇及河間獻王所輯禮樂古事多至五百餘篇倘或猶有逸在其間者大率且以春官所領五禮之目約之則其初固當有三百餘篇亡疑矣所謂曲禮則皆禮之徵文小節如今曲禮少儀內則玉藻弟子職篇所記事親事長起居飲食容貌辭氣之法制器備物宗廟宮室衣冠車旗之等凡所以行乎經禮之中者其篇之全數雖不可知然條而析之亦應不下三千有餘矣若或者專以經禮為常禮曲禮為變禮則如冠禮之不醴而醺用酒殺牲而有折俎若孤子冠母不在之類皆禮之變而未嘗不在經禮篇中坐如尸立如齋毋放飯毋流歎之類雖在曲禮之中而不得謂之變禮其說誤也】及周之衰諸侯將踰法度惡其害已皆滅去其籍自孔子時而不具至秦大壞漢興魯高堂生傳士禮十七篇訖孝宣世后倉最明戴德戴聖慶普皆其弟子三家立于學官【朱子曰此節即上文誤作七十篇者】禮古經者出于魯淹中及孔氏【蘇林曰淹中里名也朱子曰按及孔氏舊註屬下句劉敞云孔氏安國所得壁中書也當屬上句今按此即上文五十六卷者其讀當從劉氏】與十七篇文相似多三十九篇【朱子曰按與本作學十七本作七十劉敞云學當作與七十當作十七五十六卷除十七正多三十九其說是也蓋上文經七十篇本註后氏戴氏又言高堂生傳士禮十七篇后倉二戴皆其弟子則彼所謂后戴之禮即是傳此高堂生之所得而今號儀禮者也況劉氏所考于所增多篇數適合而上文經目又別無高堂生十七篇之禮其證甚明賈公彥疏亦云古文十七篇與高堂生所傳相似是唐初時漢志猶未誤也故知此誤錯三字皆當從劉氏說】及明堂陰陽王史氏記所見多天子諸侯卿大夫之制雖不能備猶瘡倉等推士禮而致於天子之說【師古曰瘡與愈同愈勝也朱子曰按諸記自一百三十一篇以下與經文本不相雜疑今亦多見于本篇後記及二戴之記孔子家語等書特不可考其所自耳又張淳云如歆所言則高堂生所得獨為士禮而今儀禮乃有天子諸侯大夫之禮居其大半疑今儀禮非高堂生之書但數篇偶同耳此則不深考于劉說所訂之誤人不察其所謂士禮者特略舉首篇以明之其曰推而致于天子者蓋指冠婚喪祭而言若燕射朝聘則士豈有是禮而可推耶】

孔穎達禮記正義序略

夫禮者經天地理人倫本其所起在天地未分之前禮者理也其用以治則與天地俱興但於時質略物生則自然而有尊卑若羊羔跪乳鴻雁飛有行列豈由教之者哉是三才既判尊卑自然而有但天地初分之後即應有君臣治國但年代緜遠無文以言案譙周古史考云伏羲制嫁娶以儷皮為禮則嫁娶嘉禮始于伏羲也案帝王世紀云神農始教天下種穀故號曰神農案禮運云夫禮之初始諸飲食燔黍捭豚蕡桴土鼓又明堂位云土鼓鞀籥伊祁氏之樂又郊特牲云伊耆氏始為蜡蜡即田祭與種穀相協土鼓鞀籥又與蕡桴土鼓相當故熊氏云伊耆氏即神農也既云始諸飲食致敬鬼神則祭祀吉禮起于神農也又史記云黃帝與蚩尤戰

於涿鹿則有軍禮也易繫辭黃帝九事章云古者葬諸中野則有凶禮也又論語撰考云軒知地利九牧倡教既有九州之牧當有朝聘是賓禮也若然自伏羲以後至黃帝吉凶賓軍嘉五禮始具其唐堯則舜典云修五禮其文亦見經類于上帝則吉禮也百姓如喪考妣則凶禮也羣后四朝則賓禮也舜征有苗則軍禮也嬪於虞則嘉禮也虞夏商周各有當代之禮夏商亦有五禮但書篇散亡故據周禮有文者而言明堂位云周公攝政六年制禮作樂所制之禮則周官儀禮也儀禮今行於世者唯十七篇而已故漢書藝文志云漢初高堂生傳禮十七篇是也至武帝時河間獻王得古禮五十六篇獻之又鄭康成六藝論云後得孔子壁中古文禮凡五十六篇其十七篇與高堂生所傳同而字多異其十七篇外則逸禮是也其周禮漢書說河間獻王開獻書之路得周官有五篇失其冬官一篇乃購千金不得取考工記以補其闕禮記出自孔氏但正禮殘缺無復能明至孔子沒後七十二之徒共撰所聞以為此記或錄舊禮之義或錄變禮所由或兼記體履或雜序得失中庸是子思伋所作緇衣公孫尼子所撰鄭康成云月令呂不韋所修盧植云王制漢文時博士所錄其餘衆篇未能盡知所記之人也

賈公彥儀禮篇次說

戴德戴聖與劉向別錄十七篇次第皆冠禮第一婚禮第二士相見第三自茲以下則異劉向別錄即此十七篇之次是也【按十七篇之次士冠士婚士相見鄉飲鄉射燕禮大射聘禮公食覲禮喪服士喪既夕士虞特牲少牢有司徹】皆尊卑吉凶次第倫叙故鄭用之至大戴即以士喪第四既夕第五士虞第六特牲第七少牢第八有司第九鄉飲第十鄉射第十一燕禮第十二大射第十三聘禮第十四公食第十五覲禮第十六喪服第十七小戴於鄉飲鄉射燕大射四篇亦依別錄次第而以士虞第八喪服第九特牲第十少牢第十一有司第十二士喪第十三既夕第十四聘禮第十五公食第十六覲禮第十七皆尊卑吉凶雜亂故鄭皆不從之儀禮見行事之法賤者為先故以士冠為先無大夫冠禮諸侯冠禮次之天子冠又次之婚禮亦士為先大夫次之諸侯次之天子為後諸侯鄉飲酒為先天子鄉飲酒次之鄉射燕禮以下皆然又以冠婚士相見為先後者以二十而冠三十而娶四十強而仕即有贊見鄉大夫見己君之等又為鄉大夫州長行鄉飲鄉射之事已下先吉後凶凶盡則行祭祀吉禮次序之法其義可知

賈公彥序周禮廢興錄略

周公制禮之日禮教興行後至幽王禮儀紛亂至于孔子更脩而定之時已不具孔子卒後復更散亂故藝文志云禮經三百威儀三千及周之衰諸侯將踰法度惡其害已滅去其籍自孔子時而不具至秦大壞漢興至高堂生博士傳十七篇孝宣世后倉最明禮戴德戴聖慶普皆其弟子三家立于學官案儒林傳漢興高堂生傳禮十七篇而魯徐生善為容孝文時徐生以容為禮官大夫而瑕丘蕭奮以禮至淮陽太守孟卿東海人也事蕭奮以授后倉后倉說禮數萬言號曰后氏曲臺記授戴德戴聖鄭云五傳弟子則高堂生蕭奮孟卿后倉戴德戴聖是為五也此所傳者謂十七篇即儀禮也周官孝武時始出秘而不傳周禮後出者以其始皇特惡之故也是以馬融傳云秦用商君之法其政酷烈與周官相反故始皇禁挾書搜求焚燒之獨悉是以隱藏百年孝武時始除挾書之律開獻書之路既出于山巖屋壁復入于秘府五家之

儒莫得見焉至孝成皇帝達才通人劉向子歆校理秘書始得列序著于錄略然亡其冬官一篇以考工記足之時衆儒並出共排以為非是唯歆獨識其年尚幼末年乃知其周公致太平之迹迹具在斯遭天下兵革並起弟子死喪有里人河南緱氏杜子春年且九十能通其讀鄭衆賈逵往受業焉衆逵以經書記轉相證明為解多所遺闕融年六十有六念前業未畢者唯周官自力補之鄭玄序云大中大夫鄭少贛名興及子大司農仲師名衆故議郎衛次仲侍中賈君景伯南郡太守馬季長皆作周禮解詁竊觀二三君子之文章其所變易灼然如晦之見明其所彌縫奄然如合符復析然猶有參錯同事相違則就其原文字之聲類考訓詁摭祕逸二鄭同宗之大儒明理于典籍存古字發疑正讀亦信多善今讚而辨之庶成此家世所訓也然則周禮起于成帝劉歆而成於鄭玄附離之者大半故林孝存以為武帝知周官末世瀆亂不驗之書作十論七難以排棄之何休亦以為六國陰謀之書唯有鄭玄徧覽羣書知周禮乃周公致太平之迹故能答林碩之論難使周禮義得條通是以周禮大行

陳祥道禮書序略

先王之治以禮為本其宮室衣服車旗械用有等其冠婚喪祭朝聘射御有儀即器以觀禮無非法象之所寓即文以觀義無非道義之所藏使人思之而知所以教守之而知所以禁奢者不得逞無度之心儉者不得就苟難之節奇者不得以亂常衰者不得以害正此上下所以辨而民志所以定也晚周而下道散於異政之國法亡於殊俗之家君子不得以行禮小人得以行非禮故兩觀大輅朱干玉磬天子之禮在諸侯塞門反坫素衣朱襮諸侯之禮在大夫由是先王之制浸以埽地天下學者亦失其傳故隨武子不知穀烝孟僖子不知相禮范獻子不知問諱曾子不知奠方魯不知尚羔衛不知立市則時之知禮者蓋亦鮮矣漢興叔孫通制禮儀徒規當時之近功而其法失于太卑齊魯二生之論禮樂必期百年然後興其言失于太高賈誼有修禮之志而困於絳灌曹褒有定禮之議而沮於酺攷傳咸極論於晉而誚於流俗劉蕡發策於唐而棄于一時由漢以來千有餘載其間欲起禮法於上者非一君欲成禮法於下者非一臣有是君而下之人不足以副之則禮之道終不明有是臣而上之人不能任之則禮之事終不行此龐政薄俗所以繼作而唐虞三代之治不復見也

楊復序喪祭禮通解

昔文公朱先生既修家鄉邦國王朝禮以喪祭二禮屬勉齋先生編之迨文公屬續之前所與手書尤拳拳以修正禮書為言先生服膺遺訓不敢少忘然其書久未脫藁嘉定己卯先生歸自建鄴奉祠家居先取向來喪禮稿本精專修改至庚辰之夏而書成凡十有五卷復嘗伏而讀之大哉書乎秦漢而下未嘗有也復何足以闢其閫奧然竊聞其略曰禮時為大要當以儀禮為本今儀禮唯有喪服士喪士虞僅存而王侯大夫之禮皆缺近世以來儒生誦習知有禮記而不知有儀禮士大夫好古者知有唐開元以後之禮而不知有儀禮昔之僅存者皆廢矣今因其篇目之僅存者為之分章句附傳記使條理明白而易攷後之言禮者有所依據不至於棄經而任傳遺本而宗末故總包尊卑上下之服則有喪服明士禮之節文次序則有士喪禮上士喪禮下士虞禮【凡上下通用之禮有與士喪禮士虞禮相關者亦附于此】王侯大夫之禮關於綱常者為尤重儀禮既缺其書後世以來處此大變者咸幽冥而莫知其原取具

臨時沿襲鄙陋不經特甚可為慨嘆余因小戴喪大記一篇合周禮禮記諸書以補其缺而王侯大夫之禮于是粲然可考故有喪大記上喪大記下本經士喪士虞補經喪大記皆至虞禮而止而王侯大夫士卒哭附練祥禫之禮又無所稽決故有卒哭附練祥禫記本經喪服之外凡服之散見于傳記註疏者莫得而推尋故有補服衰殺有漸則變除有節其文錯出于經傳者不可不表而出之故有喪服變除喪服當辨其名物衰與其不當物也寧無衰故有喪服制度聖人制服之意文理密察不可以不明故有喪服義喪禮之外三年通行之禮其目不一有喪通禮變禮非常情文尤密故有喪變禮賓吊主人之禮不可以無所考故有弔禮禮之數可陳也其義難知也故有喪禮義于是喪禮之本末經緯莫不悉備既而又念禮條目散闊欲撰儀禮喪服圖式一卷以提其要而附古今沿革於其後草具甫就而先生沒矣嗚呼此千古之遺憾也先生所修祭禮本經則特牲少牢有司徹大戴禮則遷廟釁廟【已上四卷未分章句入注疏】所補者則自天神地祇百神宗廟以至因事而祭者如建國遷都巡狩師田行役祈禳及祭服祭器事序始終其綱目尤為詳備先生嘗為復言祭禮用力甚久規模已定每取其書翻閱而推明之間一二條方欲加意修定而未遂也嗚呼禮莫重於喪祭文公以二書屬之先生其責任至不輕也先生於二書也推明文王周公之典辨正諸儒異同之論掎擊後世蠹壞人心之邪說以示天下後世其正人心扶世教其功至遠也而喪服圖式祭禮遺稿尚有未及訂定之遺憾後之君子有能繼先生之志者出而成之是先生之所望也抑復又聞之先生曰始余創二禮粗就奉而質之先師先師喜謂余曰君所立喪祭禮規模甚善他日取吾所編家鄉邦國王朝禮其悉用此規模更定之嗚呼又文公拳拳之意先生欲任斯責而卒不果也豈不痛哉同門之士以復預聞次輯之略不可以無言也復因敬識其始末如此以告來者喪禮十五卷前已繕寫喪服圖式今別為一卷附于正卷帖之外以俟君子亦先生平日之志云嘉定辛巳七月日門人三山楊復謹序

張慮刊喪祭二禮序

南康舊刊朱文公儀禮經傳與集傳集註而喪禮祭禮俄空焉蓋以屬門人勉齋黃幹俾之類次而未成也慮來南康聞勉齋已下世深恨文公之志不終士友間有言勉齋固嘗脫藁今在南劍陳史君處欲全此書索之南劍可也南劍知之果以其書來且併遺刻者數輩至于是鋟木更一年而後畢是雖喪祭二門而卷帙多前書三之一以是刊造之日長點勘之功鄉貢進士楊用為多又助以王鎮圭童居欽黃嵩三君披閱精彊錯簡脫字往往無之慮生不為晚而不能一識文公文公不可得而見得見勉齋者斯可矣又復失之分符星渚乃文公遺愛之地高山仰止惓惓興懷茲又得全其所欲述之書以畢其平日傳愛之志豈非幸歟第閑習禮度不如式瞻儀刑諷咏遺言不如親承音旨誠有如古人之論撫卷為之三歎也嘉定癸未孟秋上澣四明張慮識

禮書綱目卷首上

卷首中

欽定四庫全書

禮書綱目卷首中 婺源江永撰朱子論編禮書

問呂伯恭三禮篇次

儀禮附記上篇

士冠禮【冠義附】 士昏禮【昏義附】

士相見禮 鄉飲酒禮【鄉飲酒義附】

鄉射禮【射義附】 燕禮【燕義附】

大射禮 聘禮【聘義附】

公食大夫禮 覲禮

儀禮附記下篇

喪服【喪服小記大傳服問閒傳附】 士喪禮

既夕禮 士虞禮【喪大記奔喪問喪曾子問檀弓附】

特牲饋食禮 少牢饋食禮

有司徹【祭義祭統附】

禮記篇次

曲禮內則玉藻少儀投壺深衣【六篇為一類】

王制月令祭法【三篇為一類】

文王世子禮運禮器郊特牲明堂位大傳【與喪小記誤處多當釐正】 樂記【七篇為一篇】

經解哀公問仲尼燕居孔子問居坊記儒行【六篇為一類】學記中庸表記緇衣大學【五篇為一類】

以上恐有未妥幸更詳之

答呂子約

聞子約教學者讀禮甚善然此書無一綱領無下手處頃年欲作一功夫後覺精力向衰遂不敢下手近日潘恭叔討去整頓未知做得如何但禮文今日只憑註疏不過鄭氏一家之說此更合商量耳

禮書已領但喪禮合在祭禮之前乃是只恐不欲改動本書卷帙則且如此亦不妨也但士庶人祭禮都無一字豈脫漏耶若其本無則亦太草草矣鄉人欲者甚多便欲送書坊鏤版以有此疑更俟一報幸早示及也

答潘恭叔

禮記須與儀禮相參通修作一書乃可觀中間伯恭欲令門人為之近見路德章編得兩篇頗有次第然渠輩又若盡力於此反身都無自得處亦覺枉費工夫熹則精力已衰決不敢自下功夫矣恭叔暇日能為成之亦一段有利益事但地遠不得相聚評訂為恨如欲為之可見報當寫樣子去也今有篇目先錄去此又是一例與德章者不同也

禮記如此編甚好但去取太深文字雖少而功力實多恐難得就又有擔負耳儀禮附記似合只依德章本子蓋免得拆碎記文本篇如要逐段參照即於章末結云右第幾章儀禮即云記某篇第幾章當附此【不必載其全文只如此亦自便于檢閱】禮記即云當附儀禮某篇第幾章又如此大戴禮亦合收入可附儀禮者附之不可者分入五類如管子弟子職篇亦合附入曲禮內其他經傳類書說禮文者並合編集別為一書周禮即以祭祀賓客師田喪記之屬事別為門自為一書如此即禮書大備但功力不少須得數人分手乃可成耳

若作集註即諸家說可附入或有己見亦可做溫公揚子法言太玄例也若只用注疏即不必然亦悶人耳分為五類先儒未有此說第一類皆上下大小通用之禮第二類即國家之大制度第三類乃禮樂之說第四類皆論學之精語第五類論學之粗者也【大戴禮亦可依此分之】卷數之說須俟都畢通計其多少而分之今未可定也其書則合為一書者為是但通以禮書名之而以儀禮附記為先禮記分類為後如附記初卷首即云禮書第一本行下寫儀禮附記一【五字】次行云士冠禮第一本行下寫儀禮一【三字】冠義第二本行下寫禮記一【三字】分類初卷首第一行云禮書第幾本行下寫禮記分類一【五字】次行云曲禮上第一本行下寫禮記幾【通前篇數計之】其大戴管子等書亦依此分題之

答余正甫

示喻編禮并示其目三復歎仰不能已前此思慮安排百端終覺未穩今如所定更無可疑雖有少倒置處【如弟子職曲禮少儀不居書首之類】然亦其勢如此無可奈何也喪祭二禮別作兩門居邦國王朝之後亦甚穩當前此疑於家邦更無安頓處也其間只有一二小小疑慮【恐所取太雜其間雜有偽書如孔叢子之類又如國語家語雖非偽書然其詞繁冗恐反足為正書之累又如不附周禮如授田地政等目若不取周禮而雜取何休等說恐無綱領是乃名尊周禮而寔貶之若使便倣朝事篇亦恐在後而非其序此為大矛盾處更告詳之又如不附注疏異議如嫡孫為祖之類云欲以俟學者以三隅反如此則何用更編此書任其縱觀而自得可也此亦一大節目當試思之其他些小俟草沓成徐議未晚此二大節却須先定將來剪貼費力又是一番工夫也】所喻買書以備剪貼恐亦不濟事蓋嘗試為之大小高下既不齊等不免又寫一番不如只就正本籤記起止直授筆吏寫成之為快也又修書之式只可作草卷疏行大字【欲可添注】每段空紙一行【以備剪貼】只似公案摺疊成沓逐卷各以紙索穿其腰背【史院修書例如此取其便于改易也】此其大略也始者唯患未有人可分付如來書所喻二人者其一初不相熟其一恐亦未免顧慮道學之累近忽得劉貴溪書欣然肯為承當此是大奇特事豈非天相此書之窮而欲大振發之乎今以此書託渠奉寄然渠亦只歲杪當代從人不可不早過彼也此間有詹元善大卿舊為周禮學今亦甚留意見禮目之書甚歎伏極欲一見而私居無力不能致甚以為恨也但渠亦好國語等書熹竊以為唯周禮為周道盛時聖賢制作之書若此類者皆衰周末流文字正子貢所謂不賢者識其小者其間又自雜有一時僭竊之禮益以秉筆者脂粉塗澤之謬詞是所以使周道日以下衰不能振起之所由也至於小戴祭法首尾皆出魯語以為禘郊祖宗皆以其有功於民而祝之展轉支蔓殊無義理凡此之類棄之若可惜而存之又不足為訓故小戴殊別其文不使相近讀者猶不甚覺豈亦有所病於其言歟又如祭法所記廟制與王制亦小不同不知以何為正此類非一更望精擇而審處之蓋此雖止是纂述未敢決然去取然其間輕重予奪之微意亦不可全鹵莽也竊意一種繁冗破碎【如國語等及賈子篇之類】假託不真【如孔業之類】今都且寫入類將來別作一外書以收之庶幾稍有甄別不至混亂或今寫淨本時此等可疑者便與別編却依正篇次序排次使足相照亦自省力更在雅意裁決也大學中庸等篇不必寫注疏其它有度數者不可無也此間今夏整頓得數篇今雖多不入類然曲禮玉藻保傅等學禮一條最有功所釐析亦頗詳細又小正月令校得頗詳【小正恐須如此寫方見經傳分明不可以其非古而舍之也】教法及它篇恐亦或有可取者今并附注【凡未粘背者皆是此法最不善故前有摺疊作沓之說】又呂芸閣書及潘恭叔趙致道所編今亦并往恐亦可備採擇【呂書甚精潘趙互有得失】又儀禮之記零卷恐可暫時粘綴今亦附去【別各有目】零卷已無用餘者用畢可附來也其他所須文字建翁必能為轉借如有闕者却即告示喻當悉力為辦去若前書所要剪貼諸書必欲得之亦可致也

今所定例傳記之附注者低一字它書低二字禮記則以篇名別之記之可附經者則附於經不可附者則自仍舊以補經文之缺亦有已附於經而又不欲移動舊文者則兩見之不知此例何如

某昨謂禮經闕略不無待於後人不可謂古經定例一字不可增損來喻以為若遽增損恐啓輕廢禮經之弊熹昨來之意但謂今所編禮書內有古經闕略處須以注疏補之不可專任古

經而直廢傳注耳【如子為父下便合附以嫡孫為祖後及諸侯父有廢疾之類】其有未安則亦且當論其所疑別為一書以俟制作之君子非謂今日便欲筆削其書也【如姨舅嫡婦庶婦兄弟子之婦之服之類古經固未安魏公之論亦有得失】然遂似為慮啓廢經之弊而不敢措一辭於其間則亦非通論矣

禮書後來區別章句附以傳記頗有條理王朝數篇亦頗該備只喪祭兩門已令黃堦携去依例編纂次第非久寄來首尾便略具矣但其間微細尚有漏落傳寫訛舛未能盡正更須費少功夫而附入疏義一事用力尤多亦一面料理分付浙中朋友分手為之度須年歲間方得斷手也不知老兄所續者又作如何規模異時得寄示參合考校早成定本為佳若彼此用功已多不可偏廢即各為一書相輔而行亦不妨也

答黃直卿

喪服篇【所說拆出經傳破碎重複不相聯屬不可行也】

此篇已略修定似有條理且其間有見上條見本條之類尚涉重複然去之又似太疎略可更裁之【或于本條下依重出例注之而逐條之下却皆削去亦自簡便】後有通例一條甚好恐更有可入者當補之

喪服義

此編都未編可更考之恐當以三年間一篇為首蓋其言所以制服行喪出于人情之實最為明切又包三年期功以下皆盡其後乃取諸篇中論喪輕重意義者附之【若此類不多即不若依舊只附前篇作傳記亦得】

士喪禮上下

兩卷略定更詳之

士虞禮

當以士卒哭祥禫之禮附其後而於篇目注云附卒哭祥禫禮附

喪大記上下

自天子達於庶人者居喪之禮也若其送死之節禮文制數則貴賤之等固不同矣今以天子諸侯大夫之禮附於士禮之篇殊不相入自合採集別為一篇但以世俗拘忌不敢別立篇名故欲只因喪大記篇包舉王侯士庶之禮而放士禮次第分其章段凡言禮之法而似經者則依經例雜記與此篇相表裏凡記事實有議論者則依記例似稍明白但恐其間尚有脫漏差

舛可更詳之其虞禮以下尚闕如天子九月而卒哭及九虞七虞等語當別為下篇依士禮次篇編集却于見編卒哭等禮篇內刪出三傳作主等說亦當附入其杜預邪說前輩已有掊擊之者亦當載王侯大夫制度皆入此篇其書禮論語內說諒陰制度及左傳說天子諸侯喪事亦皆依記例隨事附於章目之後如諒陰及后世子皆為三年之類即附祥禫章後譏華元樂舉及仲幾對宋公榘柎藉幹語之屬即附棺槨窆葬等章楚恭王能知其過之類即入誅謚章【如此類更推廣求之可附即附】但顧命康王之誥恐尤不可遺然又不可分只於篇末附入如何奔喪

道喪附此篇之目下依虞禮例並喪恐更有說此所取似疎略可更考之

居喪記

弔喪附此篇之目下依虞禮例

喪議

以檀弓哀戚之至一條為首【此條甚長今注疏皆誤分斷了今當合之】其餘有通說喪禮或治喪事如孔子蚤作子張庶幾等語皆合附入【別紙更有說】又剪下碎段一事恐亦可附【邾婁復以矢天生地藏子羔之襲喪不剝奠之類已削去皆可入】

以上共十篇

重出例不須如來喻但於初見處注尾着圈而注其下曰後某章某章放此【喪服篇說中亦有一例依此可并詳之】士虞禮記既封【至】除之此一項不入例可更詳之

上大夫之虞此條當入大記下篇

周禮喪車更詳之若是上下通用即入喪服通例經中若是王禮即入大記初用車處

凡已剪下重複碎段恐有漏落或當載者可更詳之所記數卷若前此旋次得之即可仔細看今并寄來又值事冗目痛只看得一兩卷子細自既夕以後多不及詳可略加功修此數卷也

卒哭篇附虞禮後以本記補經

始死三日而殯【止】遂卒哭【注】用剛日曰哀薦成事【節注】將旦而祔【止】辭一也【注末云哀薦成事一句未知當附何處】饗辭【止】之饗【注】

右卒哭記【云云】

明日以其班祔【止】尚饗

右祔記【云云】祔杖不升於堂

碁而小祥曰薦此常事

右小祥記【云云】

又碁而大祥曰薦此祥事

右大祥記【云云】

中月而禫【止】未配

右禫記【云云】

注中云見某篇云云者更契勘今所定本恐已刪去隨事改正

禮書想已有次第吳伯豐已寄得祭禮來渠以職事無暇及此只是李寶之編集又不能盡依此中寫去條例其甚者如祭法祭義等篇已送還令其重修特性等篇亦有未入例處旦夕更取家鄉禮參校今歸一却附去煩看過王朝禮已送與子約令附音疏但恐渠亦難得人寫不能得耳

禮書緣遷徙擾擾又城中人事終日汨沒不得功夫點對所編甚詳想多費心力但以王侯之禮雜於士禮之中不相干涉此為大病又所分篇目頗多亦是一病今已拆去大夫以上別為喪大記一篇其間有未及填寫處可一面令人補足更照別紙條目整頓諸篇務令簡潔而無漏落乃為佳耳修定之後可旋寄來看遇仍一面附入音疏速於歲前了却亦是一事蓋衰老疾病旦暮不可保而罪戾之蹤又未知所稅駕兼亦弄了多時人人知有此書若被此曹切害胡寫兩句取去燒了則前功俱廢終為千載之恨矣明州書來亦說前數卷已一面附疏王朝禮初欲自整頓今無心力看得已送子約託其校定仍令一面附疏彼中更有祭禮工夫想亦不多若伯豐寶之能便下手亦只須數月可也但儀禮只有士大夫祭法不可更以王侯之禮雜於其中須如前來所定門目別作廟制九獻及郊社諸篇乃為盡善【已再條具寄之矣】幸亦時為促之并得歲前了當為佳

儀禮疏義已附得冠義一篇令附去看家鄉邦國四類已付明州諸人依此編入其喪祭禮可便依此抄節寫入只覲禮一篇在此須自理會祭禮亦草編得數紙不知所編如何今并附去可更斟酌如已別有規模則亦不須用此也可早為之趁今年秋冬前了却從頭點對并寫得十數本分朋友藏在名山即此身便無事人不妨閉門靜坐作粥飯僧過此殘年也

禮書如何此已了得王朝禮通前幾三十卷矣但欲將冠禮一篇附疏以為諸篇之式分與四明永嘉并子約與劉用之諸人依式附之庶幾易了適已報與子約或就令編此一篇或直卿自為編定此一篇并以見寄當擇其精者用之此本已定即伯豐寶之輩皆可分委也病軀腳氣未動但日益昏恐數月遂不復見物以此急欲了此書及未盲間讀得一過粗償平生心願也得曾致虛書云江東漕司行下南康毀語孟版劉四哥却云被學官回申不可遂已此其勢決難久存只此禮書傳者未廣若被索去燒了便成枉費許多工夫亦不可多向人前說着也

禮書便可下手抄寫此中却得用之相助亦頗有益禮書附疏須節略為佳但勿太略

禮書病起亦怕看

禮書須直卿與二劉到此并手料理方有汗青之日老拙衰病日甚於前目前外事悉已棄置只此事未了為念向使只如余正甫所為則已絕筆久矣不知至後果能踐言否予日望之也

病日益衰甚望賢者之來了却禮書前書所說且從閩宰借人先送定本及諸書來如可用之歲前能上否渠送得冠禮來因得再看一過其間有合修處尚多已略改定【如前書入名器篇者却移不得】及重編得冠義一篇頗穩當然病衰精力少又日短窮日之力只看得三五段如此若非僂促功夫未了絕也以此急欲直卿與用之上來庶可并力此外無他說也

覺得歲月晚病痛深恐不了此一事夢寐為之不寧也近又得正父書目亦有好處其長處是詞語簡嚴近古其短處是粗率不精緻無分別也

祭禮

廟制一【以王制祭法等篇為主說廟制處凡若此類者皆附之自為一篇以補經文之闕】
特性二【依冠昏禮附之及他書親切可証者】

少牢三【同上】

有司四【同上】

祭義五【以本篇言士大夫之祭者為主諸篇似此者皆附之本篇中間有言天子諸侯禮處却移入祭統】

九獻六【以大宗伯篇首掌先王一條為主而以禮運禮之大成一章附之周禮及禮記有如此類者皆附其後如周禮籩人醢人司尊彝之屬正與禮運相表裏禮運篇已送去在直卿處可更攷之依此篇定如禘祫之祭禮春秋纂例中趙伯循之說當收入注疏後】

郊社七【以大宗伯篇首天神地示諸目為主凡諸篇中言此類者皆附其後郊社處亦當收

入注疏後】

祭統八【以本篇言諸侯祭祀之禮者為主凡諸篇言郊廟祀饗之義者皆附其後篇內言士大夫之禮處却移在祭儀篇內】

或別立祭祀一篇凡統言祭禮如王制篇內一段周禮大宗伯祀天神地示享人鬼之目及取禮記祭法篇【但除本篇首數句入祭統】凡似此類者冠於廟制之前不注而逐篇本文再出者乃附注疏如何

王制乃通有夏商之法當為首周禮次之禮記燔柴以下又次之此為總括祭祀之禮而廟制以下各隨事為篇明賤以及貴前數類皆然也

偶讀謾記

禮書此書異時必有兩本其據周禮分經傳不多取國語雜書迂僻蔓衍之說吾書也其黜周禮使事無統紀合經傳使書無間別多取國語雜說使傳者疑而習者蔽非吾書也劉原父嘗病何休以不修春秋百二十國寶書三禮春秋而予反病二書之不傳不得深探聖人筆削之意也異時此書別本必將出於信饒之間石橋之野故箱敗簾之間其亦足以為予筆削之助乎十月十八夜因讀余正甫修禮而書

語類

禮經要須編成門類如冠昏喪祭及他雜碎禮數皆須分門類編出考其異同而訂其當否方見得然今精力已不逮矣姑存與後人趙幾道問禮合如何修曰禮非全書而禮記尤雜今合取儀禮為正然後取禮記諸書之說以類相從更取諸儒剖擊之說各附其下庶便搜閱儀禮之根本而禮記乃記枝葉禮記乃秦漢上下諸儒解釋儀禮之書又有他說附益于其間今欲定作一書先以儀禮篇目置于前而附禮記于後如射禮則附以射義似此類已得二十餘篇若其餘曲禮少儀又自作一項而以類相從若疏中有說制度處亦當采取以益之舊嘗以此列授潘恭叔渠亦曾整理數篇來問禮書曰唯儀禮是古全書若曲禮玉藻諸篇皆戰

國土人及漢儒所哀集王制月令內則是成書要好自將說禮物處如內則王制月令諸篇附儀禮成一書如中間却將曲禮玉藻又附在末後不說禮物處如孔子閒居仲尼燕居表記緇衣儒行諸篇却自成一書周禮自是全書如今禮書欲編入又恐分拆了周禮殊未有所處問今禮書更附入後世變禮亦好曰有此意余正甫欲用國語而不用周禮然周禮豈可不入國語辭多理寡乃衰世之書支離蔓衍大不及左傳

因理會所編禮書分經分傳而言曰經文精確峻潔傳文則詞語泛濫國語所載事跡多如此廖德明問編喪祭禮當依先生指授以儀禮為經戴記為傳周禮作旁証曰和通典也須看就中却有議論更革處葉賀孫問祭禮附祭義如說孝許多如何來得曰便是祭禮難附兼祭義前所說多是天子禮若儀禮所存唯少牢饋食特牲饋食禮是諸侯大夫士禮兼又只是有饋

食若天子祭便合有初間祭腥等事如所謂建設朝事燔燎羶薌若附儀禮此等皆無入頭處意欲將周禮中天子祭禮逐項作一總腦却以禮記附如疏中有說天子處皆編出因云某已衰老其間合要理會文字皆起得箇頭在及見其成與不見其成皆未可知萬一不及見此書之成諸公千萬勉力整理得成此書所係甚大禮編纔到長沙即欲招諸公來同理會後見彼事叢且不為久留計遂止後至都下庶幾事體稍定做個規模盡喚天下識禮者修書如余正甫諸人皆教來今日休矣問禮盡修得有次第否曰散在諸處收拾不聚最苦每日應酬多工夫不得專一若得數月閒更一兩朋友相助則可畢矣頃在朝欲奏乞專創一局召四方朋友習禮者數人編修俟書成將上然後乞朝廷命之以官以酬其勞亦以小助朝廷蒐用遺才之意事未及舉而某去國矣李堯卿臨行稟曰書解乞且放緩願早成禮書以幸萬世曰書解甚易只等蔡三哥來便了禮書大段未也胡泳居喪嘗編次喪禮自始死以至終喪各立門目嘗以門目呈先生臨歸教以編禮亦不可中輟泳曰考禮無味故且放下先生曰橫渠教人學禮呂與叔言如嚼木札今以半日看義理文字半日類禮書亦不妨後蒙賜書云所定禮編恨未之見此間所編喪禮一門福州尚未送來將來若得賢者持彼成書復來參訂庶幾詳審不至差互但恐相去之速難遂此期耳福州謂直卿也看禮書見古人精密處事無細微各各有義理然又須自家工夫到方看得古人意思出若自家工夫未到只見得度數文為之末如此豈能識得深意若白地將自家所見揣摩他本來意思不如此也不濟事兼自家工夫未到只去理會這箇下梢溺於器數一齊都昏倒了如今度未可盡曉其意且要識得大綱

禮書綱目卷首中

卷首下

欽定四庫全書

禮書綱目卷首下 婺源江永撰

朱子論禮綱領

語類

古禮今不復存如周禮自是紀載許多事當時別自有箇禮書如云宗伯掌邦禮這分明自有禮書樂書今亦不可見 禮樂多不可考蓋其為書不全考來考去考得更沒下梢故學禮者多迂濶一緣讀書不廣兼亦無書可讀如周禮仲春教振旅如戰之陳只此一句其間有多少事其陳如何安排皆無處可考究其他禮制皆然大抵存於今者只是箇題目在爾 三代之禮今固難以盡見其略幸散見於他書如儀禮十七篇多是土禮邦國人君者僅存一二遭秦人焚滅之後至河間獻王始得邦國禮五十八篇獻之惜乎不行至唐此書尚在諸儒注疏猶有引為說者及後人無人說著則書亡矣豈不大可惜 禮樂廢壞二千餘年若以大數觀之亦未為遠然已都無稽考處後來須有一箇大大底人出來書數拆洗一番但未知遠近在幾時今世變日下恐必有箇碩果不食之理 古禮於今實難行嘗謂後世有大聖人者作與他整理一番令人甦醒必不一一盡如古人之繁但倣古人之大意 古禮繁縟後人于禮日益疎略然居今而欲行古禮亦恐情文不相稱不若只就今人所行禮中刪修令有節文度數等威足矣古樂亦難遽復且於今樂中去其噍殺促數之音并攷其律呂令得其正更令掌詞命之官製撰樂章其間略述教化訓戒及賓主相與之情及如人主待臣下恩意之類令人歌之亦足以養人心之和平周禮歲時屬民讀法其當時所讀者不知云何若將孝弟忠信等事撰一文字或半歲或三月一次或于城市或于鄉村聚民而讀之就為解說令其通曉及所在立粉壁書寫亦須有益 古禮難行後世苟有作者必須酌古今之宜若是古人如此繁縟如何教今人要行得古人上下習熟不待家至戶曉皆如飢食而渴飲略不見其為難本朝陸農師之徒大抵說禮都要先求其義豈知古人所以講明其義者蓋緣其儀皆在其具並存耳聞目見無非是禮所謂三千三百者較然可知故於此論說其義皆有據依若是如今古禮散失百無一二存者如何懸空於上面說義是說得甚麼義須是將散失諸禮錯綜參考令節文度數一一著實方可推明其義若錯綜得實其義亦不待說而自明矣 禮時為大有聖人者作必將因今之禮而裁酌其中取其簡易易曉而可行必不至復取古人繁縟之禮而施之於今也古禮如此零碎繁冗今豈可行亦且得隨時裁損耳孔子從先進恐已有此意或曰禮之所以亡正以其太繁而難行耳曰然凶服古而吉服今不相抵接釋奠惟三獻法服其餘皆今服百世以下有聖賢出必不 舊本子必須斬新別倣如周禮如此繁密必不可行且以明堂位觀之周人每事皆添四重虞載不過是一水檐相似夏山殷火周龍章皆重添去若聖賢有作必須簡易疏通使見之而易知推之而易行蓋文質相生秦漢初已自趨於質了太史公董仲舒每欲改用夏之忠不知其初蓋已是質也 聖人有作古禮未必盡用須別有箇措置視許多瑣細制度皆若具文

且是要理會大本大原曾子臨死丁寧說君子所貴乎道者三正是大本大原如今所理會許多正是籩豆之事天叙有典天秩有禮這箇典禮自是天禮之當然欠他一毫不得添他一毫不得唯是聖人之心與天合一故行出這禮無一不與天合其他曲折厚薄淺深莫不恰好這都不是聖人白撰出都是天理決定合著如此後之人此心未得似聖人之心只得將聖人已行底聖人所傳於後世底依這樣子做做得合時便是合天理之自然問所編禮書今可一一遵行否曰人不可不知此源流豈能一一盡行後世有聖人出亦須著變夏商周之禮已自不同今只得且把周之禮文行禮時為大使聖賢有作必不一切從古之禮疑只是以古禮減殺從今世俗之禮令稍有防範節文不至太簡而已觀孔子欲從先進又曰行夏之時乘殷之輅便是有意於損周之文從古之朴矣今所集禮書也只是略存古之制度使後人自去減殺求其可行者而已若必欲一一盡如古人衣服冠履之□悉畢備其勢也行不得問溫公所集禮如何曰早是詳了又喪服一節也太詳為人子者方遭喪禍使其一一欲纖悉盡如古人制度有甚麼心情去理會古人此等衣服冠履每日接熟於耳目所以一旦喪禍不待講究便可以如禮今却問時不曾理會一旦荒迷之際欲旋講究勢必難行必不得已且得從俗之禮而已若有識禮者相之可也問葉賀孫所編禮書曰某嘗說使有聖王復興為今日禮怕必不能悉如古制今且要得大綱是若其小處亦難盡用且如喪禮冠服斬衰如此而吉服全不相似却到遭喪時方做一副當如此著也是咤異賀孫問今齊衰尚存此意而齊衰期便太輕大功小功以下又輕且無降殺今若得斟酌古今之儀制為一式庶幾行之無礙方始立得住曰上面既如此下面如何盡整頓得這須是一齊都整頓過方好未說其他瑣細處且如冠便須於祭祀當用如何底於軍旅當用如何底於平居當用如何底於見長上當用如何底於朝廷治事當用如何底天子之制當如何卿大夫之制當如何士當如何庶人當如何這是許多冠都定了更須理會衣服等差須用上衣下裳若佩玉之類只于大朝會大祭祀用之五服亦各有上衣下裳齊斬用粗布期功以下又各為降殺如上領衫一等紕繆鄙陋服色多除了如此便得大綱正今若只去零零碎碎理會些小不濟事如今若考究禮經須是一一自著考究教定問前日承教喻以五服之制乃上有制作之君其等差如此今在下有志之士欲依古禮行之既不可若一向徇俗之鄙陋又覺太不經於心極不安如何曰非天子不議禮不制度這事要整頓便着從頭整頓吉凶皆相稱今吉服既不如古獨於喪服欲如古也不可古禮也須一一考究著所在這裏却始酌今之宜而損益之若今便要理會一二項小小去處不濟事須大著世間多得其宜方好問如今父母喪且如古服如齊衰期乃兄弟祖父母伯叔父母豈可從俗輕薄如此曰自聖賢不得位此事終無由正使鄭康成之徒制作也須略成箇模樣未說待周公出制作如今全然沒理會奈何若有攷禮之人又須得上之人信得及這事行之天下亦不難且如冠制尊卑且以中梁為等差如今天子者用二十四如何安頓所以甚大而不宜要好天子以十二一品以九陞朝以七選人以五士以三庶人只用紗帛裹髻如今道人這自有些意思居父問期之服合如何用上領衫而加衰可乎曰上領衫已不是曰用深衣制而加衰可乎曰深衣於古便服朝玄端夕深衣是簡便之衣吉服依玄端制却於凶服亦做為之則宜矣後世若有聖賢出來如儀禮等書也不應便行得如鄉飲酒之禮若要教天下之人都如此行也未必能只後世太無制度若有聖賢為之就中定其尊卑降殺之數使人可以通行這便是禮為之去其哇淫鄙俚之辭使之不失中和歡悅之意這便是樂禮書如儀禮尚完備如他書儀禮不是古人預作一書如此初間只以義起漸漸相襲行得好只管巧至於情文極細密極周緻處聖人見得此意思好故錄成書問喪祭之禮至周公然後備夏商而上想甚簡略曰然

親親長長貴貴尊賢夏商而上大槩只是親親長長之意到得周來則又添得許多貴貴底禮數如始封之君不臣諸父昆弟封君之子不臣諸父而臣昆弟期之喪天子諸侯絕大夫降然諸侯大夫尊同則亦不絕不降姊妹嫁諸侯者則亦不絕不降此皆貴貴之義上世想皆簡略未有許多降殺貴貴底禮數凡此皆天下之大經前世所未備到得周公搜剔出來立為定制更不可易大抵說制度之書惟周禮儀禮可信禮記便不可深信周公畢竟出於一家謂是周公親筆做成固不可然大綱却是周公意思某所疑者但恐周公立下此法却不曾行得盡周禮只疑有行未盡處看來周禮規模皆是周公做但其言語是他人做今時宰相提舉敕令豈是宰相一一下筆有不是處周公須與改至小可處或未及改或是周公晚年作此

周禮是一箇草本尚未曾行周禮未必是周公自作恐是當時如今日編修官之類為之又官名與他書所見多有不同恐是當時作此書成見設官太多遂不用亦如唐六典今存唐時元不會用周禮一書好看廣大精密周家法度在裏但未敢令學者看

周禮一書也是做得縝密真箇盛水不漏問周禮如何看曰也且循注疏看去第一要見得聖人是個公平底意思如陳君舉說天官之職如膳羞衣服之官皆屬之此是治人主之身此說自是到得中間有官屬相錯綜處皆謂聖人有使之相防察之意這便不是天官是正人主之身兼統百官地官主教民之事大綱已具矣如太史等官屬之宗伯蓋以祝史之事用之祭祀之故職方氏等屬之司馬蓋司馬掌封疆之政最是大大行人等屬之司寇難曉蓋儀禮覲禮諸侯行禮既畢出乃右肉袒于廟門之東王曰伯父無事歸寧乃邦然後再拜稽首出自屏此所謂懷諸侯則天下畏之是也所以屬之司寇如此等處皆自合着如此初非聖人私意大綱要得如此看其間節目有不可曉處如職官之多與子由所疑三處之類只得且缺之問冬官司空掌何事曰次第是管土田之事蓋司馬職方氏存其疆域之定制至於申畫井田創置織悉必屬于司空而今亡矣

周禮一書聖人姑為一代之法爾到不可用法處聖人須別有通變之道

後人皆以周禮非聖人書其細碎處雖可疑其大體直是非聖人做不得今人不信周官若據某言却不恁地蓋古人立法無所不有天下有是事他便立此一官但只是要不失正耳且如女巫之職掌宮中巫祝之事凡宮中祈祝皆在此人如此則便無後世巫蠱之事矣五峰以周禮非周公致太平之書謂如冢宰却管宮闈之事其意只是見後世宰相請託宮闈交結近習以為不可殊不知此正人君治國平天下之本豈可以後世之弊而并廢聖人之良法美意哉周禮亡國之社用刑官為尸一部周禮却是看得天理爛熟也禮記要兼儀禮讀如冠禮喪禮鄉飲酒禮之類儀禮皆載其事禮記只發明其理讀禮記而不讀儀禮許多理皆無安着處荆公廢儀禮而取禮記舍本而取末也許順之說人謂禮記是漢儒說恐不然漢儒最純者莫如董仲舒仲舒之文最純者莫如三策何嘗有禮記中說話來如樂記所謂天高地下萬物散殊而禮制行矣流而不息合同而化而樂興焉仲舒如何說得到這裏想必是古來流傳得此箇文字如此以是知禮記亦出於孔門之徒無疑順之此言極是漢儒說制度有不合者多推從殷禮去大抵古人制度恐不便於今如鄉飲酒禮節文甚繁今強行之畢竟無益不若取今之禮酌而行之欽夫云冠禮難行某荅之云古禮唯冠禮最易行只一家事如昏禮須兩家皆好禮方行得喪禮臨時哀痛中少有心力及之祭禮則終獻之儀煩多長久皆是難行問冠婚喪祭禮曰今日行之正要簡簡則人易從如溫公書儀人已以為難行其馐饌十五味亦難辦舜功云隨家豐儉曰然問冠婚之禮如欲行之當須使冠婚之人易曉其言

乃為有益如三加之辭出門之戒若只以古語告之彼將謂何曰只以今之俗語告之使之易曉乃佳 問喪禮制度節目曰恐怕儀禮也難行如朝夕奠與葬時事尚可未殯以前如何得一一恁子細須是有人相方得孔子曰行夏之時乘殷之輅已是厭周文之煩了怕聖人出來也只隨今風俗立一箇限制須從寬簡而今考得禮子細一一如古固是好如考不得也只得隨俗不礙理底行去 子升問今人平時既不用古服却獨於喪禮服之恐亦非宜曰論來固是如此只如今因喪服尚存古制後世有願治君臣或可因此舉而行之若一向廢了恐後來者愈不識矣

問喪服用古制恐徒駭俗曰駭俗猶些小事但恐考之未必是耳若果考得是用之亦無害 古禮今只是存他一箇大槩令勿散失使人知其意義要之必不可盡行如治喪必欲盡行則必無哀戚哭泣之情況只依今世俗之禮亦未為失但使哀戚之情盡耳古人壙中置物甚多以某觀之禮文之意太備則防患之意反不足要之只當防慮久遠毋使土親膚而已其他禮文皆可略也 祭祀須是用宗子法方不亂不然前面必有不可處置者 大宗法既立不得亦當立小宗法祭自高祖以下親盡則請出高祖就伯叔位服未盡者祭之婢則別處使其子私祭之今世禮全亂了 問祭禮古今事體不同行之多窒礙如何曰有何難行但以誠敬為主其他儀則隨家豐約如一羹一飯皆可自盡其誠據某看來苟有作者興禮樂有簡而易行之理 古祭禮獻神處少只祝酌奠卒祝迎尸以後都是人自食了交相勸酬甚繁且久所以季氏之祭至於繼之以燭竊謂後世有大聖人者作與他整理一過令人蘇醒必不一一如古人之繁但倣古人大意簡而易行耳 古者禮學是專門名家始終理會此事故學者有所傳授終身守而行之凡欲行禮有疑者輒就質問所以上自宗廟朝廷下至士庶鄉黨各各分明漢唐時猶有此意如今直是無人如前者 嘗見劉昭信云禮之趨翔登降揖遜皆須習也是如此漢時如大射等禮雖不行却依舊令人習人自傳得一般今雖是不能行亦須是立科令人習得也是一事今之士大夫問以五音十二律無能曉者要之當立一樂學使士大夫習之久後必有精通者出

朱子儀禮釋宮【攷永樂大典此篇係李如圭作誤入朱子文集】

宮室之名制不盡見於經其可攷者宮必南鄉廟在寢東皆有堂有門其外有大門

周禮建國之神位右社稷左宗廟宮南而廟居左則廟在寢東也寢廟之大門一曰外門其北蓋直寢故士喪禮注以寢門為內門中門凡既入外門其向廟也皆曲而東行又曲而北案士冠禮賓立於外門之外主人迎賓入每曲揖至於廟門注曰入外門將東曲揖直廟將北曲又揖是也又案聘禮公迎賓於大門內每門每曲揖及廟門賈氏曰諸侯五廟太祖之廟居中二昭居東二穆居西每廟之前兩旁有隔牆牆皆有閣門諸侯受聘於太祖廟太祖廟以西隔牆有三大門東行至太祖廟凡經三閣門故曰每門也大夫三廟其牆與門亦然故賓問大夫大夫迎賓入亦每門每曲揖乃及廟門其說當考大夫士之門唯外門內門而已諸侯則三天子則五庠序則唯有一門鄉飲酒射禮主人迎賓於門外入門即三揖至階是也

堂之屋南北五架中脊之架曰棟次棟之架曰楣鄉射禮記曰序則物當棟堂則物當楣注曰是制五架之屋也正中曰棟次曰楣前曰戺賈氏曰中脊為棟棟前一架為楣楣前接簷為戺

今見於經者唯棟與楣而已棟一名阿案士婚禮賓升當阿致命注曰阿棟也又曰入堂深示親親賈氏曰凡賓升皆當楣此深入當棟故云入堂深也又按聘禮賓升亦當楣賈氏曰凡堂皆五架則五架之屋通乎上下而其廣狹隆殺則異爾

後楣以北為室與房

後楣之下以南為堂以北為室與房室與房東西相連為之案少牢饋食禮主人室中獻祝祝拜於席上坐受注曰室中迫狹賈氏曰棟南兩架北亦兩架棟北楣下為室南壁而開戶以兩架之間為室故云迫狹也婚禮賓當阿致命鄭云入堂深明不入室是棟北乃有室也序之制則無室按鄉射禮記曰序則物當棟堂則物當楣注曰序無室可以深也又禮席賓南面注曰不言於戶牖之間者此射於序賈氏曰無室則無戶牖故也釋宮曰無室曰榭即序也

人君左右房大夫士東房西室而已

聘禮記若君不見使大夫受聘升受負右房而立大射儀薦脯醢由左房是人君之房有左右也公食大夫禮記筵出自東房注曰天子諸侯左右房賈氏曰言左對右言東對西大夫士唯東房西室故直云房而已然案聘禮賓館於大夫士君使卿還玉於館也賓亦退負右房則大夫亦有右房矣又鄉飲酒禮記薦出自左房少牢饋食禮主婦薦自東房亦有左房東房之稱當攷

室中西南隅謂之奧

邢昺曰室戶不當中而近東西南隅最為深隱故謂之奧而祭祀及尊者常處焉

東南隅謂之窔【烏弔反】

郭氏曰窔亦隱闇

東北隅謂之窻

郭氏曰窻見禮

西北隅謂之屋漏

詩所謂尚不愧於屋漏是也曾子問謂之當屋之白孫炎曰當室日光所漏入也鄭氏謂當室之白西北隅得戶明者經止曰西北隅

室南其戶戶東而牖西

說文曰戶半門也牖穿壁以木為交窗也月令正義曰古者窟居開其上取明雨因霤之是以後人戶室為中霤開牖者象中霤之取明也牖一名鄉其扇在內按士虞禮祝闔牖戶如食間啓戶啓牖鄉注曰牖先闔後啓扇在內也鄉牖一名是也

戶牖之間謂之依

郭氏曰窗東戶西也覲禮斧辰亦以設之於此而得辰名士婚禮注曰戶西者尊處以尊者及賓客位於此故又曰客位

戶東曰房戶之間

士冠禮注曰房西室戶東也寢廟以室為主故室戶專得戶名凡言戶者皆室戶若房戶則兼言房以別之大夫士房戶之間於堂為東西之中按詩正義曰鄉飲酒義曰尊於房戶之間賓主共之由無西房故以房與室戶之間為中也又鄉飲酒禮席賓于戶牖間而義曰坐賓於西北則大夫士之戶牖間在西而房戶間為正中明矣人君之制經無明證按釋宮曰兩階間謂之鄉郭氏曰人君南鄉當階間則人君之室正中其西為牖房而戶牖間設屨處正中矣又按詩斯干曰築室百堵西南其戶箋曰天子之寢左右房異於一房者之室戶也正義曰大夫唯有一東房故室戶偏東與房相近天子諸侯既有右房則室當在其中其戶正中比一房之室戶為西當攷

房戶之西曰房外

士婚禮記母南面於房外女出於母左士冠禮尊於房戶之間若庶子則冠於房外南面注曰謂尊東也是房戶之西得房外之名也房之戶於房南壁亦當近東士婚禮注曰北堂在房中半以北南北直室東隅東西直房戶與隅間隅間者蓋房東西之中兩隅間也房中之東其南為夾洗直房戶而在房東西之中則房戶在房南壁之東偏可見矣

房中半以北曰北堂有北階

士婚禮記婦洗在北堂直室東隅注曰北堂房中半以北賈氏曰房與室相連謂之房無北壁故得北堂之名按特牲饋食禮記尊兩壺於房中西牖下南上內賓立於其北東面南上宗婦北堂北上內賓在宗婦之北乃云北堂又婦洗在北堂而直室東隅是房中半以北為北堂也婦洗在北堂而士虞禮主婦洗足爵於房中則北堂亦通名房中矣大射儀工人士與梓人升下自北階注曰位在北堂下則北堂有階也

堂之下東西有楹

楹柱也古之築室者以垣墉為基而屋其上唯堂上有兩楹而已楹之設蓋於前楣之下按鄉射禮曰射自楹間注曰謂射於庠也又曰序則物當棟堂則物當楣物畫地為物射時所立處

也堂謂庠之堂也又曰豫則鉤楹內堂則由楹外當物北面揖豫即序也鉤楹繞楹也物當棟而升射者必鉤楹內乃北面就物則棟在楹之內矣物當楣而升射者由楹之外北面就物又鄭氏以為物在楹間則楣在楹之外也又按釋宮曰梁上楹謂之稅侏儒柱也梁楣也侏儒柱在梁之上則楹在楣之下又可知矣

堂東西之中曰兩楹間

公食大夫禮致豆實陳於楹外簠簋陳於楹內兩楹間言楹內外矣又言兩楹間知凡言兩楹間者不必與楹相當謂堂東西之中爾

南北之中曰中堂

聘禮受玉於中堂與東楹之間注曰中堂南北之中也入堂深尊賓事也賈氏曰後楣以南為堂堂凡四架前楣與棟之間為南北堂之中公當楣拜訖更前北侵半架受玉故曰入堂深也按東楹之間侵近東楹非堂東西之中而曰中堂則中間為南北之中明矣又按士喪禮注曰中以南謂之堂賈氏曰堂上行事非專一所若近戶即言戶東戶西近房即言房外房東近楹即言東楹西楹近序即言東序西序近階即言東階西階其堂半以南無所繼屬者即以堂言之祝漸半於堂是也

堂之東西牆謂之序

郭氏曰所以序別內外

序之外謂之夾室

公食大夫禮大夫立于東夾南注曰東于堂賈氏曰序以西為正堂序東有夾室今立于堂下堂東夾是東於堂也又按公食禮宰東夾北西面賈氏曰位在此堂之南與夾室相當特牲饋食禮豆籩鉶在東房注曰東房房中之東當夾北則東夾之北通為房中矣室中之西與右房之制無明文東夾之北為房中則西夾之北蓋通為室中其有兩房者則西夾之北通為右房也歟

夾室之前曰箱亦曰東堂西堂

覲禮記注曰東箱東夾之前相翔傳事之處特牲饋食禮注曰西堂西夾之前近南爾賈氏曰即西箱也釋宮曰室有東西箱曰廟郭氏曰夾室前堂是東箱亦曰東堂西箱亦曰西堂也釋宮又曰無東西廂有室曰寢按書顧命疏寢有東夾西夾士喪禮死於適寢主人降襲經於序東注曰序東東夾前則正寢亦有夾與箱矣釋宮所謂無東西箱者或者謂廟之寢也歟凡無夾室者則序以外通謂之東堂西堂按鄉射禮主人之弓矢在東序東大射儀君之弓矢適東堂大射之東堂即鄉射之東序東也此東西堂堂各有階按雜記夫人奔喪升自側階注曰側

階旁階奔喪曰婦人奔喪升自東階注曰東階東面階東面階則東堂之階其西堂有西面階也

東堂下西堂下曰堂東堂西

大射禮賓之弓矢止于西堂下其將射也賓降取弓矢於堂西堂西即西堂下也特牲饋食禮主婦視饎饔於西堂下記曰饎饔在西壁則自西壁以東皆謂之西堂下矣又按大射儀執事者升自西階注曰羞膳者從而東由堂東升自北階立于房中則東堂下可以達北堂也

堂角有坫

士冠禮注曰坫在堂角賈氏釋士喪禮曰堂隅有坫以土為之或謂堂隅為坫也

堂之側邊曰廉

鄉飲酒禮設席於堂廉注曰側邊曰廉喪大記正義曰堂廉堂基南畔廉稜之上也又按鄉射禮衆弓倚於堂西矢在其上注曰上堂西廉則堂之四周皆有廉也

升堂兩階其東階曰阼階

士冠禮注曰阼酢也東階所以答酢賓客也每階有東西兩廉聘禮饗鼎設於西階前當內廉此則西階之東廉以其近堂之中故曰內廉也士之階三等按士冠禮降三等受爵弁注曰下至地賈氏曰匠人云天子之堂九尺賈馬以為階九等諸侯堂宜七尺階七等大夫宜五尺階五等士宜三尺故階三等也兩階各在楹之外而近序按鄉射禮升階者升自西階繞楹而東燕禮媵爵者二人升自西階序進東楹之西酌散交於楹北注曰楹北西楹之北則西階在西楹之西矣士冠禮冠於東序之筵而記曰冠於阼喪禮櫛置於西序而檀弓曰周人殯于西階之上故知階近序也

堂下至門謂之庭三分庭一在北設碑

聘禮注曰宮必有碑所以識日景知陰陽也賈氏釋士昏禮曰碑在堂下三分庭一在北按聘禮歸饗餼醢醢夾碑米設於中庭注曰庭實固當中庭言中庭者南北之中庭也列當醢醢南列米在醢醢南而當南北之中則三分庭一在北可見矣聘禮注又曰設碑近如堂深堂深謂從堂廉北至房室之壁三分庭一在北設碑而碑如堂深則庭蓋三堂之深也又按鄉射之侯去堂三十丈大射之侯去堂五十四丈則庭之深可知而其降殺之庭從可推矣

堂塗謂之陳

郭氏曰堂下至門徑也其北屬階其南接門內霤按凡入門之後皆三揖至階昏禮注曰三揖

者至內霤將曲揖既曲北面揖當碑入賈氏曰至內霤將曲者至門內霤主人將東賓將西賓主相背時也既曲北面者賓主各至堂塗北行向堂時也至內霤而東西行趨堂塗則堂塗接於霤矣既至堂塗北面至階而不復有曲則堂塗直階矣又按聘禮饗鼎設於西階前陪鼎當內廉注曰辟堂塗也則堂塗在階廉之內矣鄉飲酒禮注三揖曰將進揖當陳揖當碑揖陳即堂塗也

中門屋為門門之中有闌

士冠禮曰席於門中闌西闕外注曰闌櫪也玉藻正義曰闌門之中央所豎短木也釋宮曰櫪在地者謂之臬郭氏曰即門櫪也然則闌者門中所豎短木在地者也其東曰闌東其西曰闌西

門限謂之闕

釋宮曰枋謂之闕郭氏曰闕門限邢昺曰謂門下橫木為內外之限也其門之兩旁木則謂之棖棖闌之間則謂之中門見禮記

闔謂之扉

邢昺曰闔門扉也其東扉曰左扉門之廣狹按士昏禮曰納徵儷皮記曰執皮左首隨入注曰隨入為門中阨狹賈氏曰皮皆橫執之門中阨狹故隨入也匠人云廟門容大扃七箇大扃牛鼎之扃長三尺七箇二丈一尺彼天子廟門此士之廟門降殺甚小故云阨狹也推此則自士以上宮室之制雖同而其廣狹則異矣

夾門之堂謂之塾

釋宮曰門側之堂謂之塾郭氏曰夾門堂也門之內外其東西皆有塾一門而塾四其外塾南鄉按士虞禮陳鼎門外之右匕俎在西塾之西注曰塾有西者是室南鄉又按士冠禮擯者負東塾注曰東塾門內東堂負之北面則內塾北鄉也凡門之內兩塾之間謂之守按聘禮賓問卿大夫迎於外門外及廟門大夫揖入擯者請命賓入三揖並行注曰大夫揖入者省內事也既省俟於宁也凡至門內霤為三揖之始上言揖入下言三揖並行則俟於霤南門內兩塾間可知矣李巡曰宁正門內兩塾間義與鄭同謂之宁者以人君門外有正朝視朝則於此宁立故耳周人門與堂脩廣之數不著於經按匠人云夏后氏世室堂修二七廣四脩一堂脩謂堂南北之深其廣則益以四分脩之一也門堂三之二室三之一門堂通謂門與塾其廣與脩取數于堂得其三之二室三之一者兩室與門各居一分也以夏后氏之制推之則周人之門殺于堂之數亦可得而知矣

門之內外東方曰東門西方曰西門

特牲饋食禮注曰凡鄉內以入為左右鄉外以出為左右士冠禮注又曰出以東為左入以東為右以入為左右則門西為左門東為右鄉飲酒禮賓入門左燕禮卿大夫皆入門右是也以出為左右則門東為左門西為右士冠禮主人迎賓出門左西面士虞禮側亨於廟門之右是也闔東曰闔右亦自入者言之也天子諸侯門外之制其見于經者天子有屏諸侯有朝按覲禮侯氏入門右告聽事出自屏南適門西注曰天子外屏釋宮曰屏謂之樹郭氏曰小墻當門中曲禮正義曰天子外屏屏在路門之外諸侯內屏屏在路門之內此侯氏出門而隱於屏則天子外屏明矣釋宮又曰門屏之門謂之宇在門之內屏之外此屏據諸侯內屏而言也諸侯路寢門外則有正朝大門外則有外朝按聘禮夕幣于寢門外宰入告具于君君朝服出門左南鄉注曰寢門外朝也入告入路門而告賈氏曰此路門外正朝之處也是正朝在寢門外也聘禮又曰賓死介復命柩止于門外若介死惟上介造於朝注曰門外大門外也必以柩造朝達其中心又賓拜饗餼於朝注曰拜于大門外賈氏曰大門外諸侯之外朝也賓拜於朝無入門之文則諸侯外朝在大門外明矣是外朝在大門外也諸侯三朝其燕朝在寢燕禮是也正朝與外朝之制度不見於經蓋不可得而考矣

寢之後有下堂

士喪禮記士處適廟又曰朔月若薦新則不饋于下室注曰下室如今之內堂正寢聽事賈氏曰下室燕寢也然則士之下室於天子諸侯則為小寢也春秋傳曰子太叔之廟在道南其寢在道北其寢廟之寢也廟寢在廟之北則下室在適寢之後可知矣又按喪服傳曰有東宮有西宮有南宮有北宮異宮而同財內則曰由命士以上父子皆異宮賈氏釋士昏禮曰異宮者別有寢若不命之士父子雖大院同居其中亦隔別各有門戶則下室之外又有異宮也

自門以北皆周以墻

聘禮釋幣於行注曰喪禮毀宗躐行出于大門則行神之位在廟門外西方檀弓正義曰毀宗躐行毀廟門西邊墻以出柩也士喪禮為塋于西墻下注曰西墻中庭之西特牲饋食禮主婦視饌饔於西堂下記曰饌饔在西壁注曰西壁堂之西墻下按門之西有墻則墻屬於門矣西墻在中庭之西則墻周乎庭矣西壁在西堂下則墻周乎堂矣墻者墉壁之總名室中謂之墉昏禮尊于室中北墉下是也房與夾亦謂之墉冠禮陳服於房中西墉下聘禮西夾六豆設於西墉下是也堂上謂之序室房與夾謂之墉堂下謂之壁謂之墻其寔一也隨所在而異其名爾堂下之壁闔門在焉按士冠禮冠者降適東壁見于母注曰適東壁者出闔門也時母在闔門之外婦人入廟由闔門士虞禮賓出主人送主婦亦拜賓注曰女賓也不言出不言送拜之闔門之內闔門如今東西掖門釋宮曰宮中之門謂之闔郭氏曰謂相通小門也是正門之外又有闔門而在旁壁也

人君之堂屋為四注大夫士則南北兩下而已

士冠禮設洗直於東榮注曰榮屋翼也周制自卿大夫以下其室為夏屋燕禮設洗當東霤注曰人君為殿屋也按考工記殷四阿重屋注曰四阿若今之四注屋殷人始為四注屋則夏后

氏之屋南北兩下而已周制天子諸侯得為殿屋四注卿大夫以下但為夏屋兩下四注則南北東西皆有霤兩下則唯南北有霤而東西有榮是以燕禮言東霤而大夫士禮則言東榮也霤者說文曰屋水流也徐鍇曰屋簷霤處榮者說文曰屋梠之兩頭起者為榮又曰屋齊謂之檐楚謂之梠郭璞注上林賦曰南榮屋南檐也義與說文同然則檐之東西起者曰榮謂之榮者為屋之榮飾謂之屋翼者言其軒張如翬斯飛耳士喪禮升自前東榮喪大記降自西北榮是屋有四榮也門之屋雖人君亦兩下為之燕禮之門內霤則門屋之北霤也凡屋之檐亦謂之宇按士喪禮為銘置于宇西階上注曰宇梠也說文曰宇屋邊也釋宮曰檐謂之檐郭氏曰屋梠邢昺曰屋檐一名檐一名梠又名宇皆屋之四垂也宇西階上者西階之上上當宇也階之上當宇則堂廉與坳亦當宇矣特牲饋食禮主婦視饌饔于西堂下注曰南齊於坳其記又注曰南北直梠是也階上當宇故階當霤鄉射禮記磬階間縮霤是也霤以東西為從故曰縮霤此霤為堂之南霤也

此其著于經而可考者也

禮經雖亡缺然于覲見天子之禮於燕射聘食見諸侯之禮餘則見大夫士之禮宮室之制則不見其有異特其廣狹降殺不可考耳按書顧命成王崩於路寢其陳位也有設斧扆牖間南鄉則戶牖間也西序東嚮東序西嚮則東西序也西夾南嚮則夾室也東房西房則左右房也賓階西阼階面則兩階前也左塾之前右塾之前則門內之塾也畢門之內則路寢門也西堂庀則堂廉也東堂西堂則東西箱也東垂西垂則東西堂之宇階上也側階則北階也又曰諸侯出廟門俟則與士喪禮殯宮曰廟合也然則鄭氏謂天子廟及路寢如明堂制者蓋未必然明堂位與考工記所記明堂之制度者非出於舊典亦未敢必信也又按書多士傳曰天子之堂廣九雉三分其廣以二為內五分內以一為高東房西房北堂各三雉公侯七雉三分廣以二為內五分內以一為高東房西房北堂各一雉伯子男五雉三分廣以二為內五分內以一為高東房西房北堂各一雉士三雉三分廣以二為內五分內以一為高有室無房堂注曰廣榮間相去也雉長三丈內堂東西序之內也高穹高也此傳說房堂及室與經亦不合然必有所據姑存之以備參攷

禮書綱目卷首下

卷一

<經部,禮類,通禮之屬,禮書綱目

欽定四庫全書

禮書綱目卷一 婺源江永撰

士冠禮 嘉禮一

經【鄭氏目錄云童子任職居士位年二十而冠主人玄冠朝服則是仕于諸侯天子之士朝服皮弁素積古者四民世事士之子恒為士冠于五禮屬嘉禮】

士冠禮筮於廟門【筮者以蓍問日吉凶於易也冠必筮日于廟門者重以成人之禮成子孫也廟謂禰廟不于堂者嫌蓍之靈由廟神】主人玄冠朝服緇帶素鞶即位於門東西面【主人將冠者之父兄也玄冠委貌也朝服者十五升布衣而素裳也衣不言色者衣與冠同也筮必朝服尊蓍龜之道也緇帶黑繒帶也士帶博二寸再繚四寸屈垂三尺素鞶白韋鞶也長三尺上廣一尺下廣二尺其頸五寸肩革帶博二寸天子與其臣玄冕以視朔皮弁以日視朝諸侯與其臣皮弁以視朔朝服以日視朝凡染黑五入為緇七入為緇玄則六入與】有司如主人服即位於西方東面北上【有司羣吏有事者謂主人之吏所自辟除府史以下也今時卒吏及假吏皆是也】筮與席所卦者具饌於西塾【筮所以問吉凶謂蓍也所卦者所以畫地記爻易曰六畫而成卦饌陳也具俱也西塾門外西堂也】布席於門中闔西闔外西面【闔門槩也闔闔也古文闔為槩闔為槩】筮人執筴抽上韝兼執之進受命於主人【筮人有司主三易者也韝藏筴之器也今時藏弓矢者謂之韝凡也兼并也進前也自西方而前受命者當知所筮也】宰自右少退贊命【宰有司主政教者也自由也贊佐也命告也佐主人告所以筮也少儀曰贊幣自左詔辭自右】筮人許諾右還即席坐西面卦者在左【即就也東面受命右還北行就席卦者有司主畫地識爻者也】卒筮書卦執以示主人【卒已也書卦者筮人以方寫所得之卦也】主人受眡反之【反還也】筮人還東面旅占卒進告吉【旅衆也還與其屬共占之古文旅作臚】若不吉則筮遠日如初儀【遠日旬之外】徹筮席【徹去也斂也】宗人告事畢【宗人有司主禮者也】右筮日記凡卜筮日旬之外曰遠某日旬之內曰近某日【旬十日也】吉事先近日【吉事祭祀冠娶之屬也 曲禮】

主人戒賓賓禮辭許【戒警也告也賓主人之僚友古者有吉事則樂與賢者歡成之有凶事則欲與賢者哀戚之今將冠子故就告僚友使來禮辭一辭而許也再辭而許曰固辭三辭曰終辭不許也】主人再拜賓答拜主人退賓拜送【退去也歸也】

右戒賓 戒賓曰某有子某將加布於其首願吾子之教之也【吾子相親之辭吾我也子男子之美稱古文某為謀】賓對曰某不敏恐不能共事以病吾子敢辭【病猶辱也古文病為秉

】主人曰某猶願吾子之終教之也賓對曰吾子重有命某敢不從【敢不從許之辭諸辭本總見經後舊例悉分附本章之左以從簡便今仍之】

前期三日筮賓如求日之儀【前期三日空二日也筮賓筮其可使冠子者賢者恒吉冠義曰古者冠禮筮日筮賓所以敬冠事敬冠事所以重禮重禮所以為國本】

右筮賓

乃宿賓賓如主人服出門左西面再拜主人東面答拜【宿進也宿者必先戒戒不必宿其不宿者為衆賓或悉來或否主人朝服】乃宿賓賓許主人再拜賓答拜主人退賓拜送【乃宿賓者親相見致其辭】宿贊冠者一人亦如之【贊冠者佐賓為冠事者謂賓若他官之屬中士若下士也宿之以筮賓之明日】右宿賓
宿曰某將加布於某之首吾子將蒞之敢宿賓對曰某敢不夙興【蒞臨也今文無對】

厥明夕為期於廟門之外主人立於門東兄弟在其南少退西面北上有司皆如宿服立於西方東面北上【厥其也宿服朝服】擯者請期宰告曰質明行事【擯者有司佐禮者在主人曰擯在客曰介質正也宰告曰旦日正明行冠事】告兄弟及有司【擯者告也】告事畢【宗人告也】擯者告期於賓之家

右為期

夙興設洗直於東榮南北以堂深水在洗東【夙早也興起也洗承盥洗者棄水器也士用鐵榮屋翼也周制自卿大夫以下其室為夏屋水器尊卑皆用金盥及大小異】陳服於房中西墉下東領北上【墉墻】爵弁服纁裳純衣緇帶韎韐【此與君祭之服雜記曰士弁而祭于公爵弁者冕之次其色赤而微黑如爵頭然或謂之緇其布三十升纁裳淺絳裳凡染絳一入謂之緇再入謂之纁三入謂之纁朱則四入與純衣一衣也餘衣皆用布惟冕與爵弁服用絲耳先裳後衣者欲令下近緇明衣與帶同色韎韐緇絨也士緇絨而幽衡合韋為之士染以茅蒐因以名焉今齊人名蒨為韎韐韐之制似韞冠弁者不與衣陳而言於上以冠名服耳今文纁皆作熏字】皮弁服素積緇帶素鞶【此與君視朔之服皮弁者以白鹿皮為冠象上古也積猶辟也以素為裳辟戲其要中皮弁之衣用布十五升其色象焉】玄端玄裳黃裳雜裳可也緇帶爵鞶【此莫夕於朝之服玄端即朝服之衣易其裳耳上士玄裳中士黃裳下士雜裳雜裳者前玄後黃易曰夫玄黃者天地之雜也天玄而地黃士皆爵韋為鞶其爵同不以玄冠名服者是為緇布冠陳之玉藻曰鞶君朱大夫素士爵韋】緇布冠缺項青組纓屬於缺緇纓廣終幅長六尺皮弁笄爵弁笄緇組紘纁邊同篋【缺讀如有頰者弁之頰緇布冠無笄者著頰圍髮際結項中隅為四綴以固冠也項中有 亦由固頰為之耳今未冠笄者著卷幘頰象之所生也滕薛名齒為頰屬猶著纓今之幘梁也終充也纓一幅長六尺足以韜髮而結之矣笄今之簪有笄者屈組為紘垂為飾無笄者纓而結其條纁邊組側赤也同篋謂此以上凡六物隋方曰篋】櫛實於簞【簞筥也】蒲筵二在南【筵席也】側尊一甒醴在服北有篋實勺觶角柶脯醢南上【側猶特也無偶曰側置酒曰尊側者無玄酒服北者纁裳北也篋竹器

如筭者勺尊升所以斟酒也爵三升曰觶栖狀如匕以角為之者欲滑也南上者篚次尊籩豆次篚古文觶作廡】爵弁皮弁緇布冠各一匱執以待於西坫南南面東上賓升則東面【爵弁者制如冕黑色但無纁耳周禮王之皮弁會五采玉璫象邸玉笄諸侯及孤卿大夫之冕皮弁各以其等為之則士之皮弁又無玉象邸飾緇布冠今小吏冠其遺象也匱竹器名今之冠箱也執之者有司也坫在堂角古文匱為簋坫為檐】屨夏用葛玄端黑屨青絢纁純純博寸【屨者順裳色玄端黑屨以玄裳為正也絢之言拘也以為行戒狀如刀衣鼻在屨頭纁縫中紉也純緣也三者皆青博廣也】素積白屨以魁柎之緇絢纁純純博寸【魁蜃蛤柎注也】爵弁纁屨黑絢纁純純博寸【爵弁屨以黑為飾爵弁尊其屨飾以纁次】冬皮屨可也屨總屨【總屨喪屨也縷不灰治曰總按此三屨本在辭後記前今從舊移附此加圈以隔之】

右陳器服

主人玄端爵韞立於阼階下直東序西面【玄端士入廟之服也阼猶酢也東階所以答酢賓客也堂東西牆謂之序】兄弟畢袵玄立於洗東西面北上【兄弟主人親戚也畢猶盡也袵同也玄者玄衣玄裳也緇帶韞位在洗東退于主人不爵韞者降于主人也古文袵為均也】擯者玄端負東塾【東塾門內東堂負之北面】將冠者采衣紒在房中南面【采衣未冠者所服玉藻曰童子緇布衣錦緣錦紳并紐錦束髮皆朱錦也紒結髮古文紒為結】

右即位

賓如主人服贊者玄端從之立於外門之外【外門大門外】擯者告【告者出請入告】主人迎出門左西面再拜賓答拜【左東也出以東為左入以東為右】主人揖贊者與賓揖先入【贊者賤揖之而已又與賓揖先入道之贊者隨賓】每曲揖【周左宗廟入外門將東曲揖直廟將北曲又揖】至於廟門揖入三揖至於階三讓【入門將右曲揖將北曲揖當碑揖】主人升立於序端西面賓西序東面【主人賓俱升立相鄉】贊者盥於洗西升立於房中西面南上【盥於洗西由賓階升也立于房中近其事也南上尊于主人之贊者古文盥皆作洗】

右迎賓

主人之贊者筵於東序少北西面【主人之贊者其屬中士若下士筵布席也東序主人位也適子冠于阼少北辟主人】將冠者出房南面【南面立于房外之西待賓命】贊者奠纁笄櫛於筵南端【贊者賓之贊冠者也奠停也古人櫛為節】賓揖將冠者將冠者即筵坐贊者坐櫛設纁【即就設施】賓降主人降賓辭主人對【主人降為賓將盥不敢安位也辭對之辭未聞】賓盥卒壹揖壹讓升主人升復初位【揖讓皆壹者降于初古文壹皆作一】賓筵前坐正纁興降西階一等執冠者升一等東面受賓【正纁者將加冠宜親之興起也降下也下一等升一等則中等相授冠緇布冠也】賓右手執項左手執前進容乃祝坐如初乃冠興復位贊者卒【進容者行翔而前鵠焉至則立祝坐如初坐筵前興起也復位西席東面卒謂設缺項結纁也】冠者興賓揖之適房服玄端爵韞出房南面【復出房南面者一加禮成觀

衆以容體】

右始加 始加祝曰令月吉日始加元服【令吉皆善也元首也】棄爾幼志順爾成德壽考惟祺介爾景福【爾汝也既冠為成德祺祥也介景皆大也因冠而戒且勸之女如是則有壽考之祥大女之大福也】

賓揖之即筵坐櫛設笄賓盥正纁如初降二等受皮弁右執項左執前進祝加之如初復位贊者卒紼【如初為不見者言也卒紼謂繫屬之】興賓揖之適房服素積素鞞容出房南面【容者再加彌成其儀益繁】

右再加 再加曰吉月令辰乃申爾服【辰子丑也申重也】敬爾威儀淑慎爾德眉壽萬年永受胡福【胡猶遐也遠也遠無窮古文眉作麋】

賓降三等受爵弁加之服纁裳韎韐其他如加皮弁之儀【降三等下至地他謂卒紼容出】徹皮弁冠櫛筵入於房【徹者贊冠者主人之贊者為之】

右三加 三加曰以歲之正以月之令咸加爾服【正猶善也咸皆也皆加女之三服謂緇布冠皮弁爵弁也】兄弟具在以成厥德【厥其】黃耇無疆受天之慶【黃黃髮也耇凍梨也皆壽徵也疆竟】

筵於戶西南面【筵主人之贊者戶西室戶西】贊者洗於房中側酌醴加枳覆之面葉【洗盥而洗爵者昏禮曰房中之洗在北堂直室東隅篚在洗東北面盥側酌者言無為之薦者面前也葉枳大端贊酌者賓尊不入房古文葉為揭】賓揖冠者就筵筵西南面賓受醴於戶東加枳面枋筵前北面【戶東室戶東今文枋為柄】冠者筵西拜受觶賓東面答拜【筵西拜南面拜也賓還答拜於西序之位東面者明成人與為禮異于答主人】薦脯醢【贊冠者也】冠者即筵坐左執觶右祭脯醢以枳祭醴二興筵末坐啐醴捷枳興降筵坐奠觶拜執觶興賓答拜【捷枳扱枳于醴中其拜皆如初古文啐為呼】

右醴冠者 醴辭曰甘醴惟厚嘉薦令芳【嘉善也善薦謂脯醢芳香也】拜受祭之以定爾祥承天之休壽考不忘【休美也不忘長有令名】

冠者奠觶於薦東降筵北面坐取脯降自西階適東壁北面見於母【薦東薦左凡奠爵將舉者于右不舉者于左適東壁者出闔門也時母在闔門之外婦人入廟由闔門】母拜受子拜送母又拜【婦人于丈夫雖其子猶俠拜】

右冠者見母

賓降直西序東面主人降復初位【初位初至階讓升之位】冠者立於西階東南面賓字之冠者對【對應也其辭未聞】

右字冠者 字辭曰禮儀既備令月吉日昭告爾字爰字孔嘉【昭明也爰於也孔甚也】髦士攸宜宜之於假【髦俊也攸所也于猶為也假大也宜之是為大矣】永受保之曰伯某甫仲叔季唯其所當【伯仲叔季長幼之稱甫是丈夫之美稱孔子為尼甫周大夫有嘉甫宋大夫有孔甫是其類甫字或作父】記幼名冠字五十以伯仲死諡周道也【檀弓】

賓出主人送於廟門外【不出外門將醴之】請醴賓賓禮辭許賓就次【此醴當作禮禮賓者欲謝其勤勞也次門外更衣處也以帷幕簟席為之】

右賓出就次

冠者見於兄弟兄弟再拜冠者答拜見贊者西面拜亦如之【見贊者西面拜則見兄弟東面拜贊者後賓出】入見姑姊如見母【入入寢門也廟在寢門之外如見母者亦北面姑姊亦俠拜也不見妹妹卑】

右冠者見兄弟贊者及姑姊

乃易服服玄冠玄端爵韠奠摯見於君遂以摯見於卿大夫鄉先生【易服不朝服者非朝事也摯雉也鄉先生鄉中老人為卿大夫致仕者】右奠摯於君及卿大夫鄉先生 晉趙文子冠【文子趙盾之孫趙朔之子趙武也冠謂以土禮始冠】見欒武子武子曰美哉【武子欒書也禮既冠奠摯于君遂以贊見于卿大夫先生美哉美成人也】昔吾逮事莊主【莊莊子朔之諡也大夫稱主趙朔嘗將下軍欒書佐之】華則榮矣實之不知請務實乎【榮者有色貌實之不知華而不實也】見范文子【文子范變】文子曰而今可以戒矣夫賢者寵至而益戒不足者為寵驕【知不足者得寵而驕】故興王賞諫臣逸王罰之先王疾是驕也見韓獻子【獻子晉卿韓厥】獻子曰戒之此謂成人成人在始與善始與善善進善不善蔑由至矣【蔑無】始與不善不善進不善善亦蔑由至矣如草木之產也各以其物【物類也】人之有冠猶宮室之有牆屋也糞除而已又何加焉【糞除喻自修潔】見智武子武子曰吾子勉之【武子晉卿荀首之子荀營】成子之文宣子之忠其可忘乎吾子勉之有宣子之忠而納之以成子之文事君必濟【濟成也】見張老而語之【張老晉大夫張孟】張老曰善矣從欒伯之言可以滋【滋益也】范叔之教可以大韓子之戒可以成物備矣志在子【物事也人事已備能行與否在子之志】智子之道善矣【道訓也】是先主覆露子也【先主謂成宣露潤也國語晉語】

乃醴賓以一獻之禮【一獻者主人獻賓而已即燕無亞獻者獻酢酬賓主人各兩爵而禮成特牲少牢饋食之禮獻尸此其類也士禮一獻卿大夫三獻賓醴不用枳者沛其體內則曰飲重醴稻醴清糟黍醴清糟梁醴清糟凡醴事質者用糟文者用清】主人酬賓束帛儷皮【飲賓客而從之以財貨曰酬所以申暢厚意束帛十端也儷皮兩鹿皮也古文儷為離】贊者皆與贊冠者為介【贊者衆賓也皆與亦飲酒為衆賓介賓之輔以贊為之尊之飲酒之禮賢者為賓其次為介】賓出主人送於外門外再拜歸賓俎【一獻之禮有薦有俎其牲未聞使人歸諸賓家也】

右醴賓【此章以上正禮已具以下皆禮之變】

若不醴則醺用酒【若不醴謂國有舊俗可行聖人用焉不改者也曲禮曰君子行禮不求變俗祭祀之禮居喪之服哭泣之位皆如其國之故謹修其法而審行之是也酌而無酬酢曰醺醴亦當為禮】尊於房戶之間兩甌有禁玄酒在西加勺南枋【房戶間者房西室戶東也禁承尊之器也名之為禁者因為酒戒也玄酒新水也雖今不用猶設之不忘古也】洗有篚在西南順【洗庭洗當東榮南北以堂深篚亦以盛勺觶陳于洗西南順北為上也】始加醺用脯醢賓降取爵於篚辭降如初卒洗升酌【始加者言一加一醺也加冠於東序醺之於戶西同耳始醺亦薦脯醢賓降者爵在庭酒在堂將自酌也辭降如初如將冠時降盥辭主人降也凡薦出自東房】冠者拜受賓答拜如初【贊者筵於戶西賓升揖冠者就筵乃酌冠者南面拜受賓授爵東面答拜如醴禮也於賓答拜贊者則亦薦之】冠者升筵坐左執爵右祭脯醢祭酒興筵末坐啐酒降筵拜賓答拜冠者奠爵於薦東立於筵西【冠者立俟賓命賓揖之則就東序之筵】徹薦爵筵尊不徹【徹薦與爵者辟後加也不徹筵尊三加可相因由便也】加皮弁如初儀再醺攝酒其他皆如初【攝猶整也整酒謂撓之今文攝為聶】加爵弁如初儀三醺有乾肉折俎嗜之其他如初【乾肉牲體之脯也折其體以為俎嗜嘗之】北面取脯見於母

右醺 醺辭曰旨酒既清嘉薦亶時【亶誠也古文亶為瘡】始加元服兄弟具來孝友時格永乃保之【善父母為孝善兄弟為友時是也格至也永長也保安也行此乃能保之今文格為嘏凡醺者不祝】再醺曰旨酒既清嘉薦伊脯【清清也伊惟也】廼申爾服禮儀有序祭此嘉爵承天之祜【祜福也】三醺曰旨酒令芳籩豆有楚【旨美也楚陳列之貌】咸加爾服肴升折俎【肴升折俎亦謂豚】承天之慶受福無疆

若殺則特豚載合升離肺實於鼎設局鬲【特豚一豚也凡牲皆用左胖煮于鑊曰亨在鼎曰升在俎曰載載合升者明亨與載皆合左右胖離割也割肺者使可祭也可嗜也今文局為鉉古文鬲為密】始醺如初【亦薦脯醢徹薦爵筵尊不徹矣】再醺兩豆葵菹羸醢兩籩栗脯【羸醢蟪蛄醢今文羸為蝸】三醺攝酒如再醺加俎嗜之皆如初嗜肺【攝酒如再醺則再醺亦攝之矣加俎嗜之嗜當為祭字之誤也祭俎如初如祭脯醢】卒醺取籩脯以降如初

右殺牲醺

若孤子則父兄戒宿【父兄諸父諸兄】冠之日主人紛而迎賓拜揖讓立於序端皆如冠主禮於阼【冠主冠者親父若宗兄也古文紛為結今文禮作醴】凡拜北面於阼階上賓亦北面於西階上答拜若殺則舉鼎陳於門外直東塾北面【孤子得申禮盛之父在有鼎不陳於門外】右孤子冠

記父沒而冠則已冠埽地而祭於禰已祭而見伯父叔父而后饗冠者【饗謂禮之 曾子問詳見冠昏記】

若庶子則冠於房外南面遂醺焉【房外謂尊東也不於阼階非代也不醺於客位成而不尊

】

右庶子冠

冠者母不在則使人受脯於西階下

右母不在

冠義 嘉禮二

禮之所尊尊其義也【言禮所以尊尊其有義也】失其義陳其數祝史之事也故其數可陳也其義難知也知其義而敬守之天子之所以治天下也【言政之要盡於禮之義 郊特牲】

凡人之所以為人者禮義也禮義之始在於正容體齊顏色順辭令【言人為禮以此三者始也】容體正顏色齊辭令順而后禮義備以正君臣親父子和長幼【言三始既備乃可求以三行也】君臣正父子親長幼和而后禮義立【立猶成也】故冠而后服備服備而后容體正顏色齊辭令順【言服未備者未可求以三始也童子之服采衣紒】故曰冠者禮之始也是故古者聖王重冠古者冠禮筮日筮賓所以敬冠事敬冠事所以重禮重禮所以為國本也【國以禮為本】故冠於阼以著代也醺於客位三加彌尊加有成也【阼謂主人之北也適子冠於阼若不醺則醺用酒於客位敬而成之也戶西為客位庶子冠於房戶外又因醺焉不代父也冠者初加緇布冠次加皮弁次加爵弁每加益尊所以益成也】已冠而字之成人之道也【字所以相尊也】見於母母拜之見於兄弟兄弟拜之成人而與為禮也玄冠玄端奠摯於君所遂以摯見於鄉大夫鄉先生以成人見也【鄉先生同鄉老致仕者服玄冠玄端異於朝也】成人之者將責成人禮焉也將責為人子為人弟為人臣為人少者之禮行焉將責四者之行於人其禮可不重與【言責人以大禮者已接之不可以苟】故孝弟忠順之行立而后可以為人可以為人而后可以治人也故聖王重禮故曰冠者禮之始也嘉事之重者也是故古者重冠重冠故行之於廟行之於廟者所以尊重事尊重事而不敢擅重事不敢擅重事所以自卑而尊先祖也【嘉事嘉禮也宗伯掌五禮有吉禮有凶禮有賓禮有軍禮有嘉禮而冠屬嘉禮周禮曰以昏冠之禮親成男女也冠義】冠義始冠之緇布之冠也【記注始冠三加先加緇布冠也】大古冠布齊則緇之其綏也孔子曰吾未之聞也【大古唐虞以上綏纓飾未之聞大古質無飾古始冠冠其齊冠白布冠今之喪冠是也記注太古無飾非時人綏也雜記曰大白緇布之冠不綏大白即太古白布冠今喪冠也齊則緇之者鬼神尚幽闇也唐虞以上曰太古也】冠而敝之可也【記注此重古而冠之耳三代改制齊冠不復用也以白布冠質以為喪冠也】適子冠於阼以著代也【記注東序少北近主位也】醺於客位加有成也【每加而有成人之道也成人則益尊醺於客位尊之也記注】三加彌尊喻其志也【記注始加緇布冠次皮弁次爵弁冠益尊則志益大也】冠而字之敬其名也【名者質所受於父母冠成人益文故敬之記注重以未成人之時呼之】委貌周道也章甫殷道也母追夏后氏之道也【或謂委貌為玄冠委猶安也言所以安正容貌章明也殷質言以表明丈夫也甫或為父今文為斧母發聲也追猶堆也夏后氏質以其形名之三冠皆所常服以行道也其

制之異同未之聞 記注常所服以行道之冠也或謂委貌為玄冠也【弁名出於槃槃大也言以自光大也舁名出於幠幠覆也言所以自覆飾也收言所以收斂髮也齊所以服而祭也其制之義未之聞 記注齊所服而祭也】三王共皮弁素積【質不變 記注所不易於先代】無大夫冠禮而有其昏禮古者五十而后爵何大夫冠禮之有【據時有未冠而命為大夫者周之初禮年未五十而有賢才者試以大夫之事猶服士服行士禮二十而冠急成人也五十乃爵重官人也大夫或時改娶有昏禮是也 記注言年五十乃爵為大夫也其有昏禮或改取也】諸侯之有冠禮夏之末造也【造作也自夏初以上諸侯雖父死子繼年未滿五十者亦服士服行士禮五十乃命也至其衰末上下相亂篡弑所由生故作公侯冠禮以正君臣也坊記曰君不與同姓同車與異姓同車不同服示民不嫌也以此坊民民猶得同姓以弑其君 冠記注言夏初以上諸侯雖有幼而即位者猶以士禮冠之亦五十乃爵命也至其衰末未成人者多見篡弑乃更即位則爵命之以正君臣而有諸侯之冠禮】天子之元子士也天下無生而貴者也【元子世子也無生而貴皆由下升 記注儲君副主猶云士也明人有賢行著德乃得貴也】繼世以立諸侯象賢也【象法也為子孫行法先祖之賢故使之繼世也 記注賢者子孫恒能法其先祖德行】以官爵人德之殺也【殺猶衰也德大者爵以大官德小者爵以小官 記注言德益厚官益尊也】死而諡今也古者生無爵死無諡【今謂周衰記之時也古謂殷前士生不為爵死不為諡周制以士為爵死猶不為諡耳下大夫也今記之時死則諡之非也諡之由魯莊公始也 記注古謂殷以前也大夫以上乃謂之爵死有諡也周制爵及命士雖及之猶不諡耳今記時死則諡之非禮也 士冠記郊特牲同】

禮書綱目卷一

卷二

欽定四庫全書

禮書綱目卷二 婺源江永撰

士昏禮 嘉禮三

經【鄭目錄云士娶妻之禮以昏為期因而名焉必以昏者陽往而陰來日入三商為昏於五禮屬嘉禮焉】

昏禮下達納采用鴈【達通達也將欲與彼合昏姻必先使媒氏下通其言女氏許之後乃使人納其采擇之禮詩云娶妻如之何匪媒不得昏必由媒交接設紹介皆所以養廉恥納采而用鴈為摯者取其順陰陽往來】主人筵於戶西西上右几【主人女父也筵為神布席也戶西者尊處將以先祖之遺體許人故受其禮于禰廟也席西上右設几神不統於人席有首尾】使者玄端至【使者夫家之屬若羣吏使往來者玄端士莫夕之服又服以事其廟有司緇裳】摯者出請事入告【摯者有司佐禮者請問也禮不必事雖知猶問之重慎也】主人如賓服迎於門外再拜賓不答拜揖入【門外大門外不答拜者奉使不敢當其盛禮】至於廟門揖入三揖至於階三讓【入三揖者至內霤將曲揖既曲北面揖當碑揖】主人以賓升西面賓升西階當阿東面致命主人阼階上北面再拜【阿棟也入堂深示親親今文阿為廡】授於楹間南面【授於楹間明為合好其節同也南面並授也】賓降出主人降授老鴈【老羣吏之尊者】

右納采 記士昏禮凡行事必用昏昕受諸禰廟【用昕使者用昏壻也】宗子無父母命之親皆沒已躬命之【宗子者適長子也命之命使者母命之在春秋紀裂繻來逆女是也躬猶親也親命之則宋公使公孫壽來納幣是也言宗子無父是有有父者禮七十老而傳八十齊喪之事不及若是者子代其父為宗子其取也父命之】支子則稱其宗【支子庶昆弟也稱其宗子命使者】弟則稱其兄【弟宗子母弟】辭無不腆無辱【腆善也賓不稱幣不善主人不謝來辱】摯不用死【摯鴈也】昏辭曰吾子有惠貺室某也【昏辭摯者請事告之辭吾子謂女父也稱有惠明下達貺賜也室猶妻也某壻名】某有先人之禮使某也請納采【某壻父名也某也使名也】對曰某之子蠢愚又弗能教吾子命之某不敢辭【對曰者摯出納賓之辭某女父名也吾子謂使者古文弗為不無能字】致命曰敢納采

摯者出請【不必賓之事有無】賓執鴈請問名主人許賓入授如初禮【問名者將歸卜其吉凶古文禮為醴】

右問名 記問名主人受鴈還西面對賓受命乃降【受鴈於兩楹間南面還於阼階上對賓以女名】問名曰某既受命將加諸卜敢請女為誰氏【某使者名也誰氏者謙也不必其主人

之女】對曰吾子有命且以備數而擇之某不敢辭【卒曰某氏不記之者明為主人之女】

擯者出請賓告事畢入告出請醴賓【此醴亦當為禮禮賓者欲厚之】賓禮辭許【禮辭一辭】主人徹几改筵東上側尊甌醴於房中【徹几改筵者鄉為神今為人側尊亦言無玄酒側尊於房中亦有簠有籩豆如冠禮之設】主人迎賓於廟門外揖讓如初升主人北面再拜賓西階上北面答拜主人拂几授校拜送賓以几辟北面設於坐左之西階上答拜【拂拭也拭几者尊賓新之也校几足辟逡遁古文校為枝】贊者酌醴加角栖面葉出於房【贊佐也佐主人酌事也贊者亦洗酌加角栖覆之如冠禮矣出房南面待主人迎受古文葉作揭】主人受醴面枋筵前西北面賓拜受醴復位主人阼階上拜送【主人西北面疑立待賓即筵也賓復位於西階上北面明相尊敬此筵不主為飲食起】贊者薦脯醢【薦進】賓即筵坐左執觶祭脯醢以栖祭醴三西階上北面坐啐醴建栖興坐奠觶遂拜主人答拜【即就也左執觶則祭以右手也凡祭於脯醢之豆間必所為祭者謙敬示有所先也啐嘗也嘗之者成主人意建猶扱也興起也奠停也】賓即筵奠於薦左降筵北面坐取脯主人辭【薦左籩豆之東降下也自取脯者尊主人之賜將歸執以反命辭者辭其親徹】賓降授人脯出主人送於門外再拜【人謂使者從者授於階下西面然後出去】

右醴賓 記醴曰子為事故至於某之室某有先人之禮請醴從者【言從者謙不敢斥也今文於為于】對曰某既得將事矣敢辭【將行】先人之禮敢固以請【主人辭固如故】某辭不得命敢不從也【賓辭也不得命者不得許已之命】祭醴始扱壹祭又扱再祭賓右取脯左奉之乃歸執以反命【反命謂使者問名納吉納徵請期還報於壻父】凡使者歸反命曰某既得將事矣敢以禮告【告禮所執脯】主人曰聞命矣

納吉用鴈如納采禮【歸卜於廟得吉兆復使使者往告婚姻之事於是定】

右納吉 記納吉曰吾子有貺命某加諸卜占曰吉使某也敢告【貺賜也賜命謂許以女名也某壻父名】對曰某之子不教唯恐弗堪子有吉我與在某不敢辭【與猶兼也古文與為豫】

納徵玄纁束帛儷皮如納吉禮【徵成也使使者納幣以成昏禮用玄纁者象陰陽備也束帛十端也周禮曰凡嫁女娶妻入幣帛無過五兩儷兩也執束帛以致命兩皮為庭實皮鹿皮今文纁皆作熏】

右納徵 記納徵執皮攝之內文兼執足左首隨入西上參分庭一在南【攝猶辟也兼執足者左手執前兩足右手執後兩足左首象生曲禮曰執禽者左首隨入為門中阨狹西上中庭位併】賓致命釋外足見文主人受幣士受皮者自東出於後自左受遂坐攝皮逆退適東壁【賓致命主人受幣庭實所用為節士謂若中士下士不命者以主人為官長自由也】皮帛必可制【皮帛儷皮束帛也】納幣一束束五兩兩五尋【納幣謂昏禮納徵也十个為束貴成數兩兩者合其卷是謂五兩八尺曰尋五兩五尋每卷二丈也合之則四十尺今謂之匹猶匹偶之云與 雜記】納徵曰吾子有嘉命貺室某也某有先人之禮儷皮束帛使某請納

徵致命曰某敢納徵對曰吾子順先典貺某重禮某不敢辭敢不承命【典常也法也】女子許嫁笄而醴之稱字【許嫁已受納徵禮也笄女之禮猶冠男也使主婦女賓執其禮】祖廟未毀教於公宮三月若祖廟已毀則教於宗室【祖廟女高祖為君者之廟也以有緦麻之親就尊者之宮教以婦德婦言婦容婦功宗室大宗之家】

女子許嫁纓【女子許嫁繫纓有從人之端也曲禮】

教以婦德婦言婦容婦功教成祭之牲用魚芼之以蘋藻【詳見昏義】

請期用鴈主人辭賓許告期如納徵禮【主人辭者陽倡陰和期日宜由夫家來也夫家必先卜之得吉日乃使使者往辭即告之】

右請期 記請期曰吾子有賜命某既申受命矣惟是三族之不虞使某也請吉日【三族謂父昆弟己昆弟子昆弟虞度也不億度謂卒有死喪此三族者己及子皆為服期期服則踰年欲及今之吉也雜記曰大功之末可以冠子嫁子】對曰某既前受命矣唯命是聽【前受命者申前事也】曰某命某聽命於吾子【曰某壻父名也】對曰某固唯命聽使者曰某使某受命吾子不許某敢不告期曰某日【某吉日之甲乙】對曰某敢不敬須【須待也】

期初昏陳三鼎於寢門外東方北面北上其實特豚合升去蹄舉肺脊二祭肺二魚十有四腊一肫髀不升皆飪設局鼎【期取妻之日鼎三者升豚魚腊也寢壻之室也北面鄉內也特猶一也合升合左右肫升於鼎也去蹄蹄甲不用也舉肺脊者食時所先舉也肺者氣之主也周人尚焉脊者體之正也食時則祭之飯必舉之貴之也每皆二者夫婦各一耳凡魚之正十五而鼎減一為十四者欲其敵偶也腊兔腊也肫或作純純全也凡腊用全髀不升者近竅賤也飪孰也局所以扛鼎鼎覆之古文純為鈞髀為脾今文局作鉉鼎皆作密】設洗於阼階東南【洗所以承盥洗之器棄水者】饌於房中醯醬二豆菹醢四豆兼巾之黍稷四敦皆盖【醯醬者以醯和醬生人尚褻味兼巾之者六豆共巾也巾為禦塵盖為尚溫周禮曰食齊視春時】大羹湑在甕【大羹湑煮肉汁也大古之羹無塩菜羹火上周禮曰羹齊視夏時今文湑皆作汁】尊於室中北墉下有禁玄酒在西綌冪加勺皆南枋【墉牆也禁所以廢觶者玄酒不忘古也綌粗葛今文枋作柄】尊於房戶之東無玄酒篚在南實四爵合卺【無玄酒者略之也夫婦酌於內尊其餘酌於外尊合卺破匏也四爵兩卺凡六為夫婦各三醕一升曰爵】右陳器饌 記腊必用鮮魚用鮒必殽全【殽全者不餒敗不剥傷】

主人爵弁纁裳緇袂從者畢玄端乘墨車從車二乘執燭前馬【主人壻也壻為父主爵弁而纁裳玄冕之次大夫以上親迎冕服冕服迎者鬼神之鬼神之者所以重之親之纁裳者衣緇衣不言衣與帶而言袂者空其文明其與袂俱用緇袂謂緣袂之言施以緇緣裳象陽氣下施從者有司也乘二車從行者也畢猶皆也墨車漆車士而乘墨車攝盛也執燭前馬使從役持炬火居前照道】婦車亦如之有褵【亦如之者車同等士妻之車夫家共之大夫以上嫁女則自以車送之褵車裳幃周禮謂之容車有容則固有盖】至於門外【婦家大門之外】主人筵於戶西西上右几【主人女父也筵為神布席】女次純衣纁袿立於房中南面【次首飾也今時髮也周禮追師掌為副編次純衣絲衣女從者畢袿玄則此衣亦玄矣袿亦緣也袿之言任也以纁緣其衣象陰氣上任也凡婦人不常施袿之衣盛昏禮為此服喪大記曰復衣

不以衿明非常】姆纁笄宵衣在其右【姆婦人年五十無子出而不復嫁能以婦道教人者若今時乳母纁緇髮笄今時簪也纁亦廣充幅長六尺宵讀為詩素衣朱綃之綃魯詩以綃為綺屬也姆亦玄衣以綃為領因以為名且相別耳姆在女右當詔以婦禮】女從者畢袵玄纁笄被纁黼在其後【女從者謂姪娣也詩諸娣從之祁祁如雲袵同也同玄者上下皆玄也纁禪也詩云素衣朱襮爾雅云黼領謂之襮周禮曰白與黑謂之黼天子諸侯后夫人狄衣卿大夫之妻刺黼以為領如今偃領矣士妻始嫁施禪黼於領上假盛飾耳言被明非常服】主人玄端迎於門外西面再拜賓東面答拜【賓壻】主人揖入賓執鴈從至於廟門揖入三揖至於階三讓主人升西面賓升北面奠鴈再拜稽首降出婦從降自西階主人不降送【賓升奠鴈拜主人不答明主為授女耳主人不降送禮不參】壻御婦車授綏姆辭不受【壻御者親而下之綏所以引升車者曲禮曰僕人之禮必授人綏】婦乘以几姆加景乃驅御者代【乘以几者尚安舒也景之制蓋如明衣加之以為行道禦塵令衣鮮明也景亦明也驅行也行車輪三周御者乃代壻今文景作憬】壻乘其車先俟於門外【壻車在大門外乘之先者道之也男率女女從男夫婦剛柔之義自此始也俟待也門外婿家大門外】

右親迎 記父醮子【子壻也】命之辭曰往迎爾相承我宗事【相助也宗事宗廟之事】舅帥以敬先妣之嗣若則有常【舅勉也若猶女也勉帥婦道以敬其為先妣之嗣女之行則當有常深戒之詩曰大姒嗣徽音】子曰諾唯恐弗堪不敢忘命 賓至擯者請對曰吾子命某以茲初昏使某將請承命【賓壻也命某某壻父名茲此也將行也使某行昏禮來迎】對曰某固敬具以須 父醮女而俟迎者母南面於房外【女既次純衣父醮之於房中南面蓋母薦焉重昏禮也女奠爵於薦東立於位而俟壻至父出使擯者請事母出南面房外示親授壻且當戒女也】女出於母左父西面戒之必有正焉若衣若笄母戒諸西階上不降【必有正焉者以託戒之使不忘】 父送女命之曰戒之敬之夙夜無違命【夙早也早起夜卧命舅姑之教命古文母為無】母施衿結帨曰勉之敬之夙夜無違宮事【帨佩巾】庶母及門內施鞶申之以父母之命命之曰敬恭聽宗爾父母之言夙夜無愆視諸衿鞶【庶母父之妾也鞶鞶囊也男鞶革女鞶絲所以盛帨巾之屬為謹敬申重也宗尊也愆過也諸之也示之以衿鞶者皆託戒使識之也不示之以衣笄者尊者之戒不嫌忘之視乃正字今文作示俗誤行之】女子之嫁也母命之往送之門戒之曰往之女家必敬必戒無違夫子【女家夫家也婦人內夫家以嫁為歸也夫子夫也 孟子】婿受綏姆辭曰未教不足與為禮也【姆教人者】婦乘以几從者二人坐持几相對【持几者重慎之】 御婦車御輪三周【詳見昏義】

婦至主人揖婦以入及寢門揖入升自西階媵布席於奧夫入於室即席婦尊西南面媵御沃盥交【升自西階道婦入也媵送也謂女從者也御當為迓迓迎也謂壻從者也媵沃壻盥於南洗御沃婦盥於北洗夫婦始接情有廉耻媵御交道其志】贊者徹尊冪舉者盥出除鼎舉鼎入陳於阼階南西面北上 俎從設【執 者執俎者從鼎而入設之匕所以別出牲體也俎所以載也】北面載執而俟【執俎而立俟豆先設】 者逆退復位於門東北面西上【執匕者事畢逆退由便至此乃著其位略賤也】贊者設醬於席前菹醢在其北俎入設於豆東魚次腊特於俎北【豆東且醢之東】贊設黍於醬東稷在其東設酒於醬南【饌要方也】設對醬於東【對醬婦醬也設之當特俎】菹醢在其南北上設黍於腊北其西稷設酒於醬北御布對席贊啟會卻於敦南對敦於北【啟發也今文啟作開古文卻為紿】贊告具揖

婦即對筵皆坐皆祭薦黍稷肺【贊者西面告饌具也壻揖婦使即席薦菹醢】贊爾黍授肺脊皆食以涪醬皆祭舉食舉也【爾移也移置席上便其食也皆食食黍也以用也用者謂用口啜涪用指 醬古文黍作稷】三飯卒食【卒已也同牢示親不主為食起三飯而成禮也】贊洗爵酌醕主人主人拜受贊戶內北面答拜醕婦亦如之皆祭【醕漱也醕之言演也安也漱所以潔口且演安其所食醕酌內尊】贊以肝從皆振祭嚙肝皆實於菹豆【肝肝炙也飲酒宜有肴以安之】卒爵皆拜贊答拜受爵再醕如初無從三醕用盥亦如之【亦無從也】贊洗爵酌於戶外尊入戶西北面奠爵拜皆答拜坐祭卒爵拜皆答拜興【贊酌者自酢也】主人出婦復位【復尊西南面之位】乃徹於房中如設於室尊否【徹室中之饌設於房中為媵御餼之徹尊不設有外尊也】主人說服於房媵受婦說服於室御受姆授巾【巾所以自潔清今文說作稅】御衽於奧媵衽良席在東皆有枕北止【衽卧席也婦人稱夫曰良孟子曰將闢良人之所之止足也古文止作趾】主人入親說婦之纓【入者從房還入室也婦人十五許嫁笄而禮之因著纓明有繫也蓋以五采為之其制未聞】燭出【昏禮畢將卧息】媵餼主人之餘御餼婦餘贊酌外尊醕之【外尊房戶外之東尊】媵侍於戶外呼則聞【為尊者有所徵求今文侍作待】右婦至 記婦入寢門贊者徹尊徹冪酌玄酒三屬於尊棄餘水於堂下階間加勺【屬注也玄酒況水貴新昏禮又貴新故事至乃取之三注於尊中】

夙興婦沐浴纚笄宵衣以俟見【夙早也昏明日之晨興起也俟待也待見於舅姑寢門之外古者命士以上年十五父子異宮】質明贊見婦於舅姑席於阼階舅即席席於房外南面姑即席【質平也房外房戶外之西古文舅皆作咎】婦執笄棗栗自門入升自西階進拜奠於席【笄竹器而衣者其形蓋如今之筥 簠矣進拜者進東面乃拜奠之者舅尊不敢授也】舅坐撫之興答拜婦還又拜【還又拜者還於先拜處拜婦人與丈夫為禮則俠拜】降階受笄媵脩升進北面拜奠於席姑坐舉以興拜授人【人有司姑執笄以起答婦拜授有司徹舅則宰徹之】

右婦見 記笄緇被纁裏加於橋舅答拜宰徹笄【被表也笄有衣者婦見舅姑以飾為敬橋所以履笄其制未聞今文橋為鎬】婦見舅姑兄弟姊妹皆立於堂下西面北上是見已【婦來為供養也其見主於尊者兄弟以下在位是為已見不得特見】見諸父各就其寢【旁尊也亦為見時不來 雜記】

贊醴婦【醴當為禮贊禮婦者以婦道新成親厚之】席於戶牖間【室戶西牖東南面位】側尊甒醴於房中婦疑立於席西【疑正立自定之貌】贊者酌醴加枲面枋出房席前北面婦東面拜受贊西階上北面拜送婦又拜薦脯醢【婦東面拜贊北面答之變於丈夫始冠成人之禮】婦升席左執觶右祭脯醢以枲祭醴三降席東面坐啐醴建枲興拜贊答拜婦又拜奠於薦東北面坐取脯降出授人於門外【奠於薦東升席奠之取脯降出授人親徹且榮得禮人謂婦氏人】

右醴婦 記婦席薦饌於房【詳見饗婦章】

舅姑入於室婦盥饋【饋者婦道既成成以孝養】特豚合升側載無魚腊無稷並南上其他

如取女禮【側載者右胖載之舅俎左胖載之姑俎異尊卑並南上者舅姑共席於奧其饌各以南為上其他謂醬滹菹醢女謂婦也如取婦同牢時今文並當作併】婦贊成祭卒食一醕無從【贊成祭者授處之今文無成也】席於北牖下【牖牆也室中北牆下】婦徹設席前如初西上婦餽舅辭易醬【婦餽者即席將餽也辭易醬者嫌滓汙】婦餽姑之饌御贊祭豆黍肺舉肺脊乃食卒姑醕之婦拜受姑拜送坐祭卒爵姑受奠之【奠之奠於筐】婦徹於房中媵御餽姑醕之雖無娣媵先於是與始飯之錯【古者嫁女必姪娣從謂之媵姪兄之子娣女弟也娣尊姪卑若或無娣猶先媵客之也始飯謂舅姑錯者媵餽舅餘御餽姑餘也古文始為姑】

右婦饋

舅姑共饗婦以一獻之禮舅洗於南洗姑洗於北洗奠酬【以酒食勞人曰饗南洗在庭北洗在北堂設兩洗者獻酬酢以潔清為敬奠酬者明正禮成不復舉凡酬酒皆奠於薦左不舉其燕則更使人舉爵】舅姑先降自西階婦降自阼階【授之室使為主明代已】歸婦俎於婦氏人【言俎則饗禮有牲矣婦氏人丈夫送婦者使有司歸以婦俎當以反命於女之父母明其得禮也】

右饗婦 記婦席薦饌於房【醴婦饗婦之席薦也】饗婦姑薦焉【舅姑共饗婦舅獻爵姑薦脯醢】婦洗在北堂直室東隅筐在東北面盥【洗在北堂所謂北洗北堂房中半以北洗南北直室東隅東西直房戶與隅間】婦酢舅更爵自薦【更爵男女不相因也】不敢辭洗舅降則辟於房不敢拜洗【不敢與尊者為禮】凡婦人相饗無降【姑饗婦人送者於房無降者以北洗筐在上】庶婦則使人醕之婦不饋【庶婦庶子之婦也使人醕之不饗也酒不酬酢曰醕亦有脯醢適婦酌之以醴尊之庶婦酌之以酒卑之其儀則同不饋者共養統於適也】

舅饗送者以一獻之禮酬以束錦【送者女家有司也爵至酬賓又從之以束錦所以相厚古文錦皆作帛】姑饗婦人送者酬以束錦【婦人送者隸子弟之妻妾凡饗速之】若異邦則贈丈夫送者以束錦【贈送也就賓館】

右饗送者

若舅姑既沒則婦入三月乃奠菜【沒終也奠菜者以筐祭菜也蓋用堇】席於廟奧東面右几席於北方南面【廟考妣之廟北方牖下】祝盥婦盥於門外婦執筭菜祝帥婦以入祝告稱婦之姓曰某氏來婦敢奠嘉菜於皇舅某子【帥道也入入室也某氏者齊女則曰姜氏魯女則曰姬氏來婦言來為婦嘉美也皇君也】婦拜扱地坐奠菜於几東席上還又拜如初【扱地手至地也婦人扱地猶男子稽首】婦降堂取筭菜入祝曰某氏來婦敢告於皇姑某氏奠菜於席如初禮【降堂階上也室事交乎戶今降堂者敬也於姑言敢告舅尊於姑】婦出祝闔牖戶【凡廟無事則閉之】老醴婦於房中南面如舅姑醴婦之禮【因於廟見禮之】壻饗婦送者丈夫婦人如舅姑饗禮

右廟見 記婦入三月然後祭行【入夫之室三月之後於祭乃行謂助祭也】

若不親迎則入三月然後壻見曰某以得為外昏姻請覲【女氏稱昏婿氏稱姻覲見也】主人對曰某以得為外昏姻之數某之子未得灌溉於祭祀是以未敢見今吾子辱請吾子之就宮某將走見【主人女婦也以白造緇曰辱】對曰某以非他故不足以辱命請終賜見【非他故彌親之辭命謂將走見之言今文無終賜】對曰某以得為昏姻之故不敢固辭敢不從【不言外亦彌親之辭今文曰外昏姻】主人出門左西面壻入門東面奠摯再拜出【出門出內門入門入大門出內門不出大門者異於賓客也壻見於寢奠摯者壻有子道不敢授也摯雄】擯者以摯出請受【欲使以賓客禮相見也】壻禮辭許受摯入主人再拜受壻再拜送出【出已見女父】見主婦主婦闔扉立於其內【主婦主人之婦也見主婦者兄弟之道宜相親也闔扉者婦人無外事扉左扉】壻立於門外東面主婦一拜壻答再拜主婦又拜壻出【必前一拜者婦人於丈夫必俠拜】主人請醴及揖讓入醴以一獻之禮主婦薦奠酬無幣【及與也無幣異於賓客】壻出主人送再拜

右壻見婦之父母【記補】

昏義 嘉禮四

昏禮者將合二姓之好上以事宗廟而下以繼後世也故君子重之是以昏禮納采問名納吉納徵請期皆主人筵几於廟而拜迎於門外入揖讓而升聽命於廟所以敬慎重正昏禮也【聽命謂主人聽使者所傳壻家之命】父親醮子而命之迎男先於女也子承命以迎主人筵几於廟而拜迎於門外壻執鴈入揖讓升堂再拜奠鴈蓋親受之於父母也降出御婦車而壻授綏御輪三周先俟於門外婦至壻揖婦以入共牢而食合卺而醕所以合體同尊卑以親之也【酌而無酬酢曰醮醮之禮如冠醮與其異者於寢耳壻御婦車輪三周御者代之壻自乘其車先道之歸也共牢而食合卺而醕成婦之義】敬慎重正而后親之禮之大體所以成男女之別而立夫婦之義也男女有別而后夫婦有義夫婦有義而后父子有親父子有親而后君臣有正故曰昏禮者禮之本也【言子受氣性純則孝孝則忠也】夙興婦沐浴以俟見質明贊見婦於舅姑執筭棗栗脯脩以見贊醴婦祭脯醢祭醴成婦禮也【成其為婦之禮也贊醴婦當作禮聲之誤也】舅姑入室婦以特豚饋明婦順也【以饋明婦順者供養之禮主於孝順】厥明舅姑共饗婦以一獻之禮奠酬舅姑先降自西階婦降自阼階以著代也【言既獻之而授之以室事也降者各還其燕寢婦見及饋饗於適寢昏禮不言厥明此言之者容大夫以上禮多或異日】成婦禮明婦順又申之以著代所以重責婦順焉也婦順者順於舅姑和於室人而后當於夫以成絲麻布帛之事以審守委積蓋藏【室人謂女姑女叔諸婦也當猶稱也後言稱夫者不順舅姑不和室人雖有善者猶不為稱夫也】是故婦順備而后內和理內和理而后家可長久也故聖王重之【順備者行和當事成審也】是以古者婦人先嫁三月祖廟未毀教於公宮祖廟既毀教於宗室教以婦德婦言婦容婦功教成祭之牲用魚芼之以蘋藻所以成婦順也【謂天子諸侯同姓者嫁女必就尊者教成之教成之者女師也祖廟女所出之祖也公君也宗室宗子之家也婦德貞順也婦言辭令也婦容婉婉也婦功絲麻也祭之祭其所出之祖也魚蘋藻皆水物陰類也魚為俎寔蘋藻為菜羹祭無牲牢告事耳

其齊盛用黍云君使有司告之宗子之家若其祖廟已毀則為壇而告焉 昏義】天地合而后萬物興焉夫昏禮萬世之始也取於異姓所以附遠厚別也【同姓或取多相褻也】幣必誠辭無不腆【誠信也腆猶善也】告之以直信【直猶正也此二者所以教婦正直信也】信事人也信婦德也【事猶立也】壹與之齊終身不改故夫死不嫁【齊謂共牢而食同尊卑也齊或為醢】男子親迎男先於女剛柔之義也天先乎地君先乎臣其義一也【先謂倡道也】執摯以相見敬章別也【言不敢相褻也摯所奠鴈也】男女有別然後父子親父子親然後義生義生然後禮作禮作然後萬物安【言人倫有別則氣性醇也】無別無義禽獸之道也【言聚麀之亂類也】壻親御授綏親之也親之也者親之也【言己親之所以使之親己】敬而親之先王之所以得天下也【先王若太王文王】出乎大門而先男帥女女從男夫婦之義由此始也【先者居車前也】婦人從人者也幼從父兄嫁從夫夫死從子【從謂順其教令無違逆也】夫也者夫也夫也者以智帥人者也【夫之言丈夫也夫或為傳】玄冕齊戒鬼神陰陽也將以為社稷主為先祖後而可以不致敬乎【玄冕祭服也陰陽謂夫婦也】共牢而食同尊卑也故婦人無爵從夫之爵坐以夫之齒【爵謂夫命為大夫則妻為命婦】器用陶匏尚禮然也【此謂大古之禮器也】三王作牢用陶匏【言太古無共牢之禮三王之世作之而用大古之器重夫婦之始也】厥明婦盥饋舅姑卒食婦餽餘私之也【私之猶言恩也】舅姑降自西階婦降自阼階授之室也【明當為家事之主也】昏禮不用樂幽陰之義也樂陽氣也【幽深也欲使婦深思其義不以陽散之也】昏禮不賀人之序也【序猶代也郊特牲】日月以告君【周禮凡取判妻入子者媒氏書之以告君謂此也】齊戒以告鬼神【昏禮凡受女之禮皆於廟為神席以告鬼神謂此也】為酒食以召鄉黨僚友【會賓客也】以厚其別也【厚重慎也曲禮】孔子曰嫁女之家三夜不息燭思相離也【親骨肉也】取婦之家三日不舉樂思嗣親也【重世變也】三月而廟見稱來婦也擇日而祭於禰成婦之義也【謂舅姑沒者也必祭成婦義者婦有共養之禮猶舅姑存時盥饋特豚於室 曾子問】子云夫禮坊民所淫章民之別使民無嫌以為民紀者也【淫猶貪章明也嫌嫌疑也】故男女無媒不交無幣不相見恐男女之無別也【重男女之會所以遠別之於禽獸也有幣者必有媒有媒者不必有幣仲春之月會男女之時不必待幣】以此坊民民猶有自獻其身【獻進也】昏禮壻親迎見於舅姑舅姑承子以授壻恐事之違也【舅姑妻之父母也妻之父為外舅妻之母為外姑父戒女曰夙夜無違命母戒女曰無違宮事】以此坊民婦猶有不至者【不至不親夫以孝舅姑也春秋成公九年春二月伯姬歸於宋夏五月季孫行父如宋致女是時宋共公不親迎恐其有違而致之也坊記】昏姻之禮所以明男女之別也【昏姻謂嫁取也壻曰昏妻曰姻】昏姻之禮廢則夫婦之道苦而淫辟之罪多矣【苦謂不至不答之屬 經解】孔子曰凡民淫亂者生於男女無別男女無別則夫婦失義昏禮聘饗者所以別男女明夫婦之義也男女既別夫婦既明故雖有淫亂之獄而無陷刑之民其有犯淫亂之獄者則飭昏聘之禮【家語】子張曰女子必漸乎二十而後嫁何也孔子曰十五許嫁而從夫是陽動而陰應男唱而女隨之義也以為績組紉織紵者女子之所有事也黼黻文章之美婦人之所有大功也必十五以往漸乎二十然後可以通乎此事通乎此事然後乃能孝於舅姑下以事夫養子也【孔叢子】哀公問於孔子曰禮男必三十而有室女必二十而有夫也豈不晚哉孔子對曰夫禮言其極也不是過也男子二十冠有為人父之端女子十五許嫁有適人之道於此而往則為昏矣羣生閉藏乎陰而為化育之始【陰謂冬也冬藏物而為化育始】故聖人因時以合偶男女窮天數也【窮極也】霜降而婦功成嫁娶者行焉【季

秋霜降嫁娶者始於此詩云將子無怒秋以為期也【泮散也正月農事起蚕者採桑昏禮始殺言未止也至於二月農事始起會男女之無夫家者奔者期盡此月也詩云士如歸妻迨冰未泮言如欲使妻歸當及冰未泮散之時】男子者任天道而長萬物者也知可為知不可為知可言知不可言知可行知不可行者也是故審其倫而明其別謂之知所以効匹夫之聽也【聽宜作德】女子者順男子之教而長其理者也【為男子長養其理分】是故無專制之義而有三從之道幼從父兄既嫁從夫夫死從子言無再醮之端【始嫁言醮禮無再醮之端言不改事人所以謂夫死不嫁】教令不出於閨門事在供飲食而已無閨外之非儀也【閨門限婦人以自專無閨外之威儀詩云無非無儀唯酒食是議孟子之母曰婦人之職精五飯晷五漿養舅姑縫衣裳而已故有閨門之修而無閨外之志】不越境而奔喪事無擅為行無獨成參知而後動可驗而後言晝不遊庭夜行以火所以効匹婦之德也孔子遂言曰女有五不取逆家子者謂其逆德也【何休曰廢人倫也】亂家子者謂其亂倫【何休曰類不正也】世有刑人者謂其棄於人也有惡疾子者謂其棄於天也喪父長子【何休作喪父長女】謂其無受命也【何休曰無教戒也】婦有七出三不去七出者不順父母出者謂其逆德也無子者謂其絕世也姪僻者謂其亂族嫉妬者謂其亂家惡疾者謂其不可供粢盛多口舌者謂其離親竊盜者謂其反義三不去者謂其有所取無所歸一也【何休取作受又云不窮窮也】與共更三年之喪二也【何休曰不忘恩也】先貧賤後富貴三也【何休曰賤取貴不去不背德也】凡此聖人所以順男女之際重昏姻之始也【家語】哀公曰敢問為政如之何孔子對曰夫婦別父子親君臣嚴三者正則庶物從之矣【庶物猶衆物也】古之為政愛人為大所以治愛人禮為大所以治禮敬為大敬之至矣大昏為大大昏至矣大昏既至冕而親迎親之也親之也者親之也是故君子興敬為親舍敬是遺親也弗愛不親弗敬不正愛與敬其政之本與【大昏國君取禮也至矣言至大也興敬為親言相敬則親】公曰寡人願有言然冕而親迎不已重乎【已猶太也怪親迎乃服祭服】孔子愀然作色而對曰合二姓之好以繼先聖之後以為天地宗廟社稷之主君何謂已重乎【先聖周公也】孔子曰天地不合萬物不生大昏萬世之嗣也君何謂已重焉孔子遂言曰內以治宗廟之禮足以配天地之神明出以治直言之禮足以立上下之敬物耻足以振之國耻足以興之為政先禮禮其政之本與【宗廟之禮祭宗廟也夫婦配天地有日月之象焉禮器曰君在阼夫人在房大明生於東月生於西此陰陽之分夫婦之位也直猶正也正言謂出政教也政教有夫婦之禮焉昏義曰天子聽外治后聽內治教順成俗外內和順國家理治此之謂盛德物猶事也事耻臣耻也振猶救也國耻君耻也君臣之行有可耻者禮足以救之足以興復之】孔子遂言曰昔三代明王之政必敬其妻子也有道妻也者親之主也敢不敬與子也者親之後也敢不敬與君子無不敬也敬身為大身也者親之枝也敢不敬與不能敬其身是傷其親傷其親是傷其本傷其本枝從而亡三者百姓之象也身以及身子以及子妃以及妃君行此三者則愾乎天下矣大王之道也如此國家順矣【愾猶至也大王居豳為狄所伐乃曰土地所以養人也君子不以其所養害所養乃去之岐是言百姓之身猶吾身也百姓之妻子猶吾妻子也不忍以土地之故而害之去之岐而王迹興焉哀公問】既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之本也【言玉女者美言之也君子於玉比德焉祭統】娶妻不先告廟者示不必安也昏禮請期不敢必也遣女於禰廟者重先人之遺支體也不敢自專故告禰也去不辭戒不諾者盖耻之重去也婦入三月然後祭行舅姑既沒亦婦入三月奠菜於廟三月一時物有成者人之善

惡可得知也然後可得事宗廟之禮未廟見而死歸葬於女氏之黨示未成婦也夫有惡行妻不得去者地無去天之義也天子諸侯一娶九女何重國家廣繼嗣也娶九女亦足以承君之施也九而無子百亦無益也王度記曰天子諸侯一娶九女娶一國則兩國媵之皆以姪娣從也或曰天子娶十二女法天有十二月萬物必生也必一娶何防淫佚也為其棄德嗜色故一娶而已人君無再娶之義也備姪娣從者為其不相嫉妬也一人有子三人共之若已有之也不娶兩娣何傳異氣也娶三國女何異類也恐一國血 相似俱無子也姪娣年少猶從適人者明人君無再娶之義還待年於父母之國未任答君子也娶妻如之何卜女之德知相宜否人君及宗子無父母自定娶者卑不主尊賤不主貴也大夫功成受封得備八妾者重國家廣繼嗣也不更聘大國者不忘本適也天子諸侯之世子皆以諸侯禮娶與君同示無再娶之義也不娶同姓者重人倫防淫佚耻與禽獸同也外屬小功以上亦不得娶也王者嫁女必使同姓諸侯主之何婚禮貴和不可相答為傷君臣之義亦欲使女不以天子尊乘諸侯也必使同姓者以其同宗共祖可以主親故使攝父事也卿大夫一妻二妾者何尊賢重繼嗣也不備姪娣何北面之勢不足盡人骨肉之親士一妻一妾何下卿大夫也婦人所以有師何學事人之道也學一時足以成矣與君有緦麻之親者教於公宮三月與君無親者各教於宗廟宗婦之室國君取大夫之妾士之妻老無子而明於婦道者又祿之使教宗室五屬之女大夫士皆有宗族自於宗子之室學事人也女必有傅姆何尊之也【白虎通】魯師春姜曰夫婦人以順從為務貞慤為首故婦人事夫有五平旦纚笄而朝則有君臣之嚴沃盥饋食則有父子之敬報反而行則有兄弟之道受期必誠則有朋友之信寢席之交而後有夫婦之際【列女傳白虎通云婦人學事舅姑不學事夫漱櫛縱笄總而朝君臣之道也惻隱之恩父子之道也會計有無兄弟之道也閨闔之內衽席之上朋友之道也與此小異】

禮書綱目卷二

卷三

<經部,禮類,通禮之屬,禮書綱目

欽定四庫全書

禮書綱目卷三 婺源江永撰

冠昏記 嘉禮五

補

大宗伯以嘉禮親萬民以昏冠之禮親成男女【親其恩成其性春官】
黨正凡其黨之昏冠教其禮事掌其禁戒【其黨之民地官】
男子二十而冠冠而列丈夫三十而娶女子十

五而許嫁二十而嫁【禮二十而冠冠而在丈夫之列譙周曰國不可久無儲貳故天子諸侯十五而冠十五而娶娶必先冠以夫婦之道王教之本不可以童子之道治之禮十五而成童以次成人欲人君之早有繼體故因之以為節書稱成王十五而冠著在金縢周禮媒氏曰令男三十而娶女二十而嫁內則曰女子十五而笄說曰許嫁也是故男自二十以及三十女自十五以及二十皆得以嫁娶先是則速後是則晚凡人嫁娶或以賢淑或以方類豈但年數而已若必差十年乃為夫婦是廢賢淑方類苟比年數而已禮何為然哉則三十而娶二十而嫁說嫁娶之限盖不得復過此爾故舜年三十無室書稱曰鰥周禮云女子年二十未有嫁者仲春之月奔者不禁奔者不待禮聘因媒請嫁而已矣甯謂禮為夫之姊妹服長殤年十九至十六如此男不必三十而娶女不必二十而嫁明矣此又士大夫之禮
文十二年穀梁傳】五廟之孫祖廟未毀雖為庶人冠娶妻必告【告於君也文王世子】

右通論 二月綏多士女綏安也冠子娶婦之時也【夏小正】

始冠緇布冠自諸侯下達冠而敝之可也【本太古耳非時王之法服也】玄冠朱組纓天子之冠也緇布冠纁綏諸侯之冠也【皆始冠之冠也玄冠委貌也諸侯緇布有綏尊者飾也纁或作繪綏或作蕤 玉藻】公冠自為主【家語作公冠則以卿為賓無介公自為主】迎賓揖升自阼立於席【公堂深異於士家語席下有北字】既醴降自阼【君尊故其降也不使就賓階也家語此句上有其醴也則如】

【士饗之以三獻之禮字】其餘自為主者其降也自西階以異【不敢終於正家語作諸侯非公而自為主者其所以異皆降自西階】其餘皆公同也【為迎賓升阼之等家語無此句】公玄端與皮弁皆鞞【玄端緇布冠及玄冠之服也 家語無公皆鞞字下有異

字疑是韡字之誤】朝服素韡【玄端諸侯之服皮弁天子朝服韡從裳色皆素也】公冠四加玄冕【四當為三玄當為袞字之誤

家語冕下有祭字】饗之以三獻之禮【饗賓也士於賓以一獻之禮

家語屬上文】無介【於饗而贊冠者退為衆賓者君禮於臣本無介矣 家語在卿為賓之下】無樂【亦饗時也冠者成人代父始宜盡孝子之感不可以歡樂取之孔子曰取婦之家三日不舉樂思嗣親也然則冠禮一舉樂可也春秋左氏傳曰以金石之樂節之為冠時為節也注一下疑脫日不二字】皆玄端【君臣同服

家語無無樂皆玄端字】其醕幣朱錦采四馬其慶也【其慶賓也如是 家語作其酬幣於賓則束帛乘馬無其慶也字】天子擬焉【擬公禮也】太子與庶子其冠皆自為主【王侯自主之重言天子誤也 天子以下家語作王太子庶子之冠擬焉皆天子自為主按鄭注重言天子恐皆下本有天子字一本作重言太子】其禮與士同饗賓也皆同【家禮作其禮與士無變饗下有食字 大戴禮公冠近本作公符誤也

家語冠頌篇懿子問諸侯之冠其所以為賓主何也孔子答之如此】

右天子諸侯冠禮 邾隱公既即位將冠使大夫因孟懿子問禮於孔子 孔子曰其禮如世子之冠雖天子之元子猶士也其禮無變天子無生而貴者故也懿子曰天子未冠即位長亦冠乎孔子曰古者王世子雖幼其即位則尊為人君人君治成人之事者何冠之有懿子曰然則諸侯之冠異天子與【怪天子無冠禮而諸侯之冠如世子之冠故問之】孔子曰君薨而世子主喪是亦冠也已人君無殊也【諸侯亦人君與天子無異】懿子曰今邾君之冠非禮也【懿子言諸侯無冠則邾君之冠非也】孔子曰諸侯之有冠禮也夏之末造也有自來矣今無譏焉【言有所從來故今無所譏】天子冠者武王崩成王年十有三而嗣立周公居冢宰攝政以治天下明年夏六月既葬【周書曰歲十有二月武王崩元年六月葬】冠成王而朝於祖以見諸侯示有君也周公命祝雍作頌曰達而勿多也【家語勿多作未幼字誤今从大戴鄭曰辭多則史少則不達】祝雍辭曰使王近於民【常得民之心也】遠於年【言壽長】嗇於時【嗇愛也愛於時不以無事棄日也】惠於財【施舍不吝也】親賢而任能其頌曰令月吉日王始加元服去王幼志心是袞職【朱子曰袞天子之盛服袞職謂天子之職業也是字本闕今補或曰當作一心】欽若昊天【欽敬若順】六合是式【天地四方謂之六合言為之法式】率爾祖考永永無極此周公之制也【家語冠頌】襄公九年十二月晉悼公以諸侯之師伐鄭而還公送晉侯晉侯以公宴於河上問公年季武子對曰會於沙隨之歲寡君以生【沙隨在成十六年】晉侯曰十二年矣是謂一終一星終也【歲星十二歲而一周天】國君十五而生子冠而生子禮也【冠成人之服故必冠而後生子】君可以冠矣大夫盍為冠具武子對曰君冠必以裸享之禮行之【裸謂灌鬯酒也享祭先君行將也】以金石之樂節之【以鐘磬為舉動之節】以先君之祧處之【諸侯以始祖之廟為祧】今寡君在行未可具也請及兄弟之國而假備焉晉侯曰諾公還及衛冠於成公之廟【成公今衛獻公之曾祖從衛所處】假鐘磬焉禮也【左氏傳】

曾子問曰將冠子冠者至揖讓而入聞齊衰大功之喪如之何【冠者賓及贊者】孔子曰內喪則廢【內喪同門也】外喪則冠而不醴【不醴不醴子也】徹饌而埽即位而哭如冠者未至則廢【其廢者喪成服因喪而冠】如將冠子而未及期日而有齊衰大功小功之喪則

因喪服而冠【廢吉禮而因喪冠俱成人之服及至也】除喪不改冠乎孔子曰天子賜諸侯大夫冕弁服於太廟歸設奠服賜服於斯乎有冠醺無冠醴【酒為醺冠禮醴重而醺輕此服賜服酌用酒尊賜也不醴明不為改冠改冠當醴之】父沒而冠則已冠埽地而祭於禰已祭而見伯父叔父而后饗冠者【饗謂禮之曾子問】以喪冠者雖三年之喪可也既冠於次入哭踊三者三乃出【言雖者明齊衰以下皆可以喪冠也始遭喪以其冠月則喪服因冠矣非其冠月待變除卒哭而冠次廬也雖或為唯】大功之末可以冠子可以嫁子父小功之末可以冠子可以嫁子可以取婦已雖小功既卒哭可以冠取妻下殤之小功則不可【此皆為可用吉禮之時父大功卒哭而可以冠子嫁子小功卒哭而可以取婦已大功卒哭而可以冠子小功卒哭而可以取妻必偕祭乃行也下殤小功齊衰之親除喪而後可為昏禮凡冠者其時當冠則因喪而冠之 雜記】

右冠變禮

女子十有五年而笄【謂應年許嫁者女子許嫁笄而字之其未許嫁者二十則笄內則】女子許嫁笄而字【以許嫁為成人 曲禮】女子許嫁笄而醴之稱

字【許嫁已受納徵禮也笄女之禮猶冠男也使主婦女賓執其禮 士昏記】女雖未許嫁年二十而笄禮之婦人執其禮【雖未許嫁年二十亦為成人矣禮之酌以成人言婦人執其禮明非許嫁之笄也】燕則髻首【既笄之後去之猶若女有髻紒也 雜記】

右女子笄

子三十而有室【室猶妻也】女子二十而嫁有故二十三年而嫁【故謂父母之喪】聘則為妻【聘問也妻之言齊也以禮見問則得與夫敵體】奔則為妾【妾之言接也聞彼有禮走而往焉以得接見於君子也奔或為衞 內則】婦人謂嫁曰歸【婦人生以父母為家嫁以夫為家故謂嫁曰歸明有二歸之道 隱二年公羊傳】

右嫁娶

繫之以姓而弗別綴之以食而弗殊雖百世而昏姻不通者周道然也【周之禮所建者長也姓正姓也始祖為正姓高祖為庶姓繫之弗別謂若今宗室屬籍也周禮小史掌定世繫辨昭穆 大傳】取妻不取同姓故買妾不知其姓則卜之【為其近禽獸也妾賤或時非媵取之於賤者世無本繫 曲禮】

右不取同姓 司空季子曰昔少典娶於有蟠氏生黃帝炎帝【賈侍中曰少典黃帝之先有蟠諸侯也炎帝神農也虞唐云少典黃帝炎帝之父昭謂申農三皇也在黃帝前黃帝滅其子孫耳明非神農可知也言生者謂二帝本所出也內傳高陽高辛各有才子八人謂其裔子耳賈君得之】黃帝以姬水成炎帝以姜水成【姬姜水名成謂所生長以成功也】成而異德故

黃帝為姬炎帝為姜異姓則異類雖近男女相及以生民也【謂有屬名相及嫁取也】同姓雖遠男女不相及畏黷敬也【畏褻黷其類】黷則生怨怨亂毓災灾毓滅性【毓生也】是故娶妻避其同姓畏亂灾也【國語晉語】衛公使其大夫求婚於季氏桓子問禮於孔子孔子曰同姓為宗有合族之義故繫之以姓而弗別綴之以食而弗殊【君有食族人之禮親盡不異之殊食多少也】雖百世婚姻不得通周道然也桓子曰魯衛之先雖寡兄弟今已絕遠矣可乎孔子曰固非禮也夫上治祖禰以尊尊也下治子孫以親親也旁治昆弟所以敦睦也此先王不易之教也【家語】晉侯有疾子產曰僑聞之內官不及同姓【內官嬪御】其生不殖【殖長也】美先盡矣則相生疾【同姓之相與先美矣美極則盡盡則生病】君子是以惡之故志曰買妾不知其姓則卜之男女辨姓禮之大司也【辨別也】今君內實有四姬焉【同姓姬四人】其無乃是也乎【昭元年左氏傳】取妻不取同姓以厚別也【厚猶遠也】故買妾不知其

姓則卜之【妾言買者以其賤同之於衆物也士庶之妾恒多凡庸有不知其姓故也】以此坊民魯春秋猶去夫人之姓曰吳其死曰孟子卒【吳太伯之後魯同姓也昭公取焉去姬曰吳而已至其死亦略云孟子卒不書夫人某氏薨孟子蓋其且字坊記】陳司敗問昭公知禮乎孔子曰知禮【陳國名司敗官名即司寇也昭公魯君名稠習於威儀之節當時以為知禮故司敗以為問而孔子答之如此】孔子退揖巫馬期而進之曰吾聞君子不黨君子亦黨乎君取於吳為同姓謂之吳孟子君而知禮孰不知禮【巫馬姓期名孔子弟子名施司敗揖而進之也相助匿非曰黨禮不娶同姓而魯與吳皆姬姓謂之吳孟子者諱之使若宋女子姓者然】巫馬期以告子曰丘也幸苟有過人必知之【孔子不可自謂諱君之惡又不可以娶同姓為知禮故受以為過而不辭論語】

天子有后有夫人有世婦有嬪有妻有妾【妻八十一御妻周禮謂之女御以其御序於王之燕寢妾賤者】公侯有夫人有世婦有妻有妾【貶於天子也無后與嬪去上中曲禮】王御不參一族【御婦官也參三也一族一父子也故取姪娣以備三不參一族之女國語周語】典瑞穀圭以聘女【穀圭亦王使之瑞節穀善也其飾若粟文然其聘女則以納徵焉春官】穀圭七寸天子以聘女【納徵加於束帛】邊璋七寸射四寸天子以巡守【射琰出者也】大璋亦如之諸侯以聘女【亦納徵加于束帛也大璋者以大璋之文飾之也亦如之者如邊璋七寸射四寸考工記玉人】國君取夫人之辭曰請君之玉女與寡人共有敝邑事宗廟社稷【言玉女者美言之也君子於玉比德焉祭統】納女於天子曰備百姓於國君曰備酒漿於大夫曰備埽灑【納女猶致女也壻不親迎則女之家遣人致之此其辭也姓之言生也天子皇后以下百二十人廣子姓也酒漿埽灑賤人之職也曲禮】大昏既至冕而親迎【詳見昏義】親迎其禮奈何曰諸侯以履三兩加琮大夫庶人以履二兩加束脩二曰某國寡小君使寡人奉不珍之琮不珍之履禮夫人貞女夫人曰有幽室數辱之產未諭於傅姆之教得承執衣裳之事敢不敬拜祝祝答拜夫人受琮取一兩履以履女正笄衣裳而命之曰往矣善事爾舅姑以順為宮室無二爾心無敢回也女拜乃親引其手授夫於戶夫引手出戶夫行女從拜辭父於堂拜諸母於大門夫先升輿執轡女乃升輿轂三轉然後夫下先行大夫士庶人稱其父曰某之父某之師友使某執不珍之履不珍之束脩敢不敬禮某氏貞女母曰有草茅之產未習於織紵紡績之事得奉箕帚之事敢不敬拜【說苑】

右天子諸侯大夫昏禮 桓公八年冬祭公來遂逆王后於紀【祭公諸侯為天子三公者王使魯主昏故祭公來受命而迎也天子無外故因稱王后卿不書舉重略輕】禮也【天子娶於諸侯使同姓諸侯為之主祭公來受命於魯故曰禮 春秋左氏傳】祭公者何天子之三公也【天子置三公九卿二十七大夫八十一元士凡百二十官下應十二子祭者采也天子三公氏采稱爵】何以不稱使【据宰周公稱使】婚禮不稱主人【時王者有母也】遂者何生事也【生猶造也專事之辭】大夫無遂事此其言遂何成使乎我也【以上來無事知遂成使於我】其成使乎我奈何使我為媒可則因用是往逆矣【婚禮成於五先納采問名納吉納徵請期然後親迎時王者遣祭公來使魯為媒可則因用魯往逆之不復成禮疾王者不重妃匹逆天下之母若逆婢妾將謂海內何哉故譏之】女在其國稱女此其稱王后何王者無外其辭成矣【公羊傳】其不言使焉何也不正其以宗廟之大事即謀於我故弗與使也【時天子命祭公就魯共卜擇紀女可中后者便逆之不復反命】遂繼事之辭也其曰遂逆王后故略之也【以其遂逆無禮故不書逆女而曰王后略之不以禮稱之】或曰天子無外王命之則成矣【四海之濱莫非王臣王命紀女為后則已成王后不如諸侯入國乃稱夫人或說是 春秋左氏說曰王者至尊無敵無親迎之禮祭公逆王后未致京師不稱后知天子不行而禮成也鄭君釋之曰大姒之家在郃之陽在渭之涘文王親迎於渭即天子親迎之明文矣天子雖尊其於后猶夫婦夫婦判合禮同一體所謂無敵豈施此哉禮記哀公問曰冕而親迎不已重乎孔子愀然作色而對曰合二姓之好以繼先聖之後以為天地宗社之主君何謂已重乎此言親迎繼先聖之後為天地宗廟社稷之主非天子則誰乎 穀梁傳】九年春紀季姜歸於京師【季姜桓王后也書字者申父母之尊姜紀姓】為之中者歸之也【中謂關與昏事春秋穀梁傳】其辭成矣則其稱紀季姜何自我言紀父母之於子雖為天王后猶曰吾季姜【明子尊不加於父母書紀姜歸者明魯為媒當有送迎之禮 公羊傳】靈王求后於齊齊侯問對於晏桓子桓子對曰先王之禮有之天子求后於諸侯諸侯對曰夫婦所生若而人【不敢譽亦不敢毀故曰若而人】妾婦之子若而人【言非適也】無女而有姊妹及姑姊妹則曰先守某公之女若而人齊侯許昏王使陰里結之【陰里周大夫結成也為十五年劉夏逆王后傳 襄公十二:left氏傳】劉夏逆王后於齊【劉采地夏名也天子卿書字劉夏非卿故書名天子無外所命則成故不言逆女】官師從單靖公逆王后於齊卿不行非禮也【官師劉夏也天子官師非卿也劉夏獨過魯告昏故不書單靖公天子不親昏使上卿逆而公監之故曰卿不行非禮 襄十五年春秋左氏傳】岳曰有鰥在下曰虞舜帝曰我其試哉女於時觀厥刑於二女釐降二女於嬀汭嬀於虞帝曰欽哉【女以女與人也時是刑法也二女堯二女娥皇女英也此堯言其將試舜之意也釐理降下也嬀水名水北曰汭蓋舜所居之地嬀婦也虞舜氏也史言堯治裝下降二女於嬀水之北使為舜婦於虞氏之家也欽哉堯戒二女之辭即禮所謂往之女家必敬必戒者況以天子之女嫁於匹夫尤不可不深戒之也堯典】何彼穠矣美王姬也雖則王姬亦下嫁於

諸侯車服不繫其夫下王后一等猶執婦道以成肅雝之德也【詩序】莊公元年夏單伯逆王姬逆之者何使我主之也【逆者魯自往之文方使魯為父母主嫁之故與魯使自逆之不言於京師者使魯主之故使若自魯女無使受之】天子嫁女於諸侯必使諸侯同姓者主之【諸侯與天子同姓者】諸侯嫁女於大夫必使大夫同姓者主之【大夫與諸侯同姓者不自為主者尊卑不敵其行昏姻之禮則傷君臣之義行君臣之禮則廢昏姻之好故必使同姓

有血脉之屬宜為父道與所適敵體者主之禮尊者嫁女於卑者必特風旨為卑者不敢先求亦不可斥與之者申陽倡陰和之道天子嫁女於諸侯備姪娣如諸侯之禮義不可以天子之尊絕人繼嗣之路 公羊傳】秋築王姬之館於外【公在諒陰慮齊侯當親迎不忍便以禮接於廟又不敢逆王命故築舍於外】為外禮也【齊強魯弱又委罪於彭生魯不能讐齊然喪制未闕故異其禮得禮之變 春秋左氏傳】築之禮也于外非禮也【以言外知有築內之道也于外非禮也禮同姓本有主嫁女之道必闕地於夫人之下羣公子之上也時魯以將嫁女於讐國故築於外】其築之何以禮【据禮當豫設】主王姬者必為之改築於路寢則不可於寢則嫌【皆所以遠別也】羣公子之舍【謂女公子也】則以卑矣【以為大卑】其道必為之改築者也【以上傳言爾知當築夫人之下羣公子之上 公羊傳】主王姬者必自公門出【公門朝之外門主王姬當設几筵於宗廟以俟迎者故在公門之內築王姬之館】於廟則已尊於寢則已卑為之築節矣築之外變之正也築之外變之為正何也仇讐之人非所以接昏姻也衰麻非所以接弁冕也【親迎服祭服者重昏姻也公時有桓之喪 穀梁傳】文王初載天作之合在洽之陽在渭之涘文王嘉止大邦有子【載年合配也洽水名嘉婚禮也大邦莘國也子大妣也言天於文王之初年而默定其配所以洽陽渭涘當文王將昏之期而大邦有子也盖曰非人之所能為也】大邦有子倪天之妹文定厥祥親迎於渭造舟為梁不顯其光【倪磬也韓詩作磬說文云倪譬也文禮祥吉也言卜得吉而以納幣之禮定其祥也造作梁橋也作船兩兩比之而加版於其上以通行者即今之浮橋也傳曰天子造舟諸侯維舟大夫方舟士特舟張子曰造舟為梁文王所制而周世遂以為天子之禮也 大雅大明】韓侯取妻汾王之甥蹇父之子韓侯迎止於蹇之里百兩彭彭八鸞鏘鏘不顯其光諸娣從之祁祁如雲韓侯顧之爛其盈門【此言韓侯既覲而還遂以親迎也汾王厲王也蹇父周之卿士姑姓也諸娣諸侯一娶九女二國媵之皆有娣姪也祁祁徐覲也如雲衆多也 大雅韓奕】隱公二年九月紀履緌來逆女紀履緌者何紀大夫也【以逆女不稱使知為大夫】何以不稱使婚禮不稱主人【為養廉遠耻也】然則曷稱稱諸父兄師友宋公使公孫壽來納幣則其稱主人何辭窮也辭窮者何無母也【禮有母母當命諸父兄師友稱諸父兄師友以行宋公無母莫使命之辭窮故自命之自命之則不得不稱使】然則紀有母乎曰有【以不稱使知有母】有則何以不稱母【据非主人何不稱母通使文】母不通也【禮婦人無外事但得命諸父兄師友稱諸父兄師友以行耳母命不得達故不得稱母通使文所以遠別也】外逆女不禮書此何以書【据伯姬歸於宋不書逆人】譏何譏爾譏始不親迎也【禮所以必親迎者所以示男先女也於廟者告本也夏后氏逆於庭殷人逆於堂周人逆於戶】始不親迎昉於此乎前此矣【以惠公妃匹不以正嫌無前也】前此則曷為始乎此託始焉爾【焉爾猶於是也】曷為託始焉爾【据納幣不托始】春秋之始也【春秋正夫婦之始也夫婦正則父子親父子親則君臣和君臣和則天下治故夫婦者人道之始王教之端內逆女常書外逆女但疾始不常書者明當先自正躬自厚而薄責於人故略外也】女曷為或稱女或稱婦或稱夫人女在其國稱女【未離父母之辭紀履緌來逆女是也】在塗稱婦【在塗見夫服從之辭公子結媵陳人之婦是也】入國稱夫人【入國則尊尊有臣子之辭夫人姜氏入國也紀無大夫書紀履緌者重昏禮也 公羊傳】

逆女親者也【親者謂自逆之也】使大夫非正也【穀梁傳】桓公三年秋公子翬如齊逆女【禮君有故則使卿逆】脩先君之好故曰公子【昏禮雖奉時君之命其言必稱先君以為辭故公子翬逆女傳稱脩先君之好公子遂逆女傳稱尊君命互舉其義】九月齊侯送姜

氏於謹【謹魯地已去齊國故不言女未至於魯故不稱夫人】齊侯送姜氏非禮也凡公女嫁於敵國姊妹則上卿送之以禮於先君公子則下卿送之於大國雖公子亦上卿送之於天子則諸卿皆行公不自送於小國則上大夫送之【春秋左傳】

諸侯越境送女非禮也【以言姜氏也禮送女父母不下堂姑姊妹不出門公羊傳】禮送女父不下堂母不出祭門諸母兄弟不出闕門【祭門廟門也闕兩觀也在祭門之外】父戒之曰謹慎從爾舅之言母戒之曰謹慎從爾姑之言諸母般申之曰謹慎從爾父母之言【般囊也所以盛朝夕所須以備舅姑之用】送女踰竟非禮也公會齊侯於謹無譏乎【齊侯送女踰竟遠至於謹嫌會非禮之人當有譏】曰為禮也齊侯來也公會逆而會之可也【為親迎之禮】子貢曰冕而親迎不已重乎【冕祭服】孔子曰合二姓之好以繼萬世之後何謂已重乎【穀梁傳】冬齊仲年來聘致夫人也【古者女出嫁又使大夫隨加聘問存謙敬序殷勤也在魯而出則曰致女在他國而來則總曰聘故傳以致夫人釋之左氏傳】齊孝公夫人孟姬華氏長女也齊國稱其貞孝公聞之修禮親迎於華氏之室父母送之不下堂母醮之房中父戒之東階之上諸母戒之兩階之間姑姊妹戒之門內可謂能行禮矣【列女傳】公子結媵陳人之婦於鄆媵者何諸侯娶一國則二國往媵之以姪娣從【言往媵女者禮君不求媵二國自往媵夫人所以一夫人之尊】姪者何兄之子也娣者何弟也諸侯一聘九女諸侯不再娶【必以姪娣從之者欲使一人有子二人喜也所以防嫉妬令重繼嗣也因以備尊尊親親也九者極陽數也不再娶者所以節人情開媵路莊十九年公羊傳】莊公二十二年冬公如齊納幣【納幣者納徵禮也禮曰主人受幣士受儷皮是也禮言納徵春秋言納幣者春秋質也凡昏禮皆用鴈取其知時候唯納徵用玄纁束帛儷皮玄纁取其順天地也儷皮者鹿皮所以重吉也】親納幣非禮也【時莊公實以淫佚大惡不可言故因其有事於納幣以無廉耻為譏不譏喪娶者舉淫為重也春秋公羊傳】納幣大夫之事也禮有納采【采擇女之德性也其禮用鴈為贄者取順陰陽往來】有問名【問女名而卜之知吉凶也其禮如納采】有納徵【徵成也納幣以成昏】有告期【告迎期】四者備而後娶禮也公之親納幣非禮也故譏之【公母喪未再期而圖昏傳無譏文但譏親納幣者喪昏不待貶絕而罪惡見穀梁傳】二十四年夏公如齊逆女親迎恒事也不志此其志何也不正其親迎於齊也秋公至自齊迎者行見諸舍見諸【諸之也言瞻望夫人乘車】先至非正也【春秋穀梁傳】八月丁丑夫人姜氏入戊寅大夫宗婦覲用幣【宗婦同姓大夫之婦禮小君至大夫執贄以見明臣子之道莊公欲奢夸夫人故使大夫宗婦同贄俱見】哀姜至公使宗婦覲用幣非禮也【傳不言大夫唯舉非常】御孫曰男贄大者玉帛【公侯伯子男執玉諸侯世子附庸孤卿執帛】小者禽鳥【卿執羔大夫執鴈士執雉】以章物也【章所執之物別貴賤】女贄不過榛栗棗脩以告虔也【榛小栗脩脯虔敬也皆取其名以示敬】今男女同贄是無別也男女之別國之大節也而由夫人亂之無乃不可乎【春秋左氏傳】用者不宜用也【不宜用幣為贄也】見用幣非禮也【以文在覲下不使賁見知非禮也】然則曷云棗栗云乎脩脩云乎【脩脩者脯也禮婦人見舅姑以棗栗為贄見女姑以脩脩為贄見夫人至尊兼而用之云乎辭也棗栗取其自謹敬脯脩取其斷斷自脩正執此者若其辭云爾所以叙情配志也日者禮夫人至大夫皆郊迎明日大夫宗婦皆見故著其明日也大夫妻言宗婦者大夫為宗子者也公羊傳】禮大夫不見夫人不言及不正其行婦道故列

數之也男子之贄羔鴈雉脍【贄所以至者也上大夫用羔取其從羣帥而不黨也下大夫用

鴈取其知時飛翔有行列也士冬用雉夏用牂取其耿介交有時別有倫也牂腊也雉必用死為其不可生服也夏用牂備腐臭也】婦人之贄棗栗暇脩【棗取其蚤自矜莊栗取其敬栗暇脩取斷斷自脩整】用幣非禮也【穀梁傳】文公二年冬公子遂如齊納幣【傳曰禮也僖公喪終此年十一月則納幣在十二月也士昏六禮其一納采納徵始有玄纁束帛諸侯則謂之納幣其禮與士禮不同蓋公為太子時已行昏禮】禮也凡君即位好舅甥修昏姻娶元妃以奉粢盛孝也【謂諒闇既終嘉好之事通於外內外內之禮始備此除凶之即位也於是遣卿申好舅甥之國修禮以昏姻也元妃嫡夫人奉粢盛共祭祀】孝禮之始也【春秋左氏傳】納幣不書此何以書譏何譏爾譏喪娶也娶在三年之外則何譏乎喪娶【据逆在四年】三年之內不圖婚【僖公以十二月薨至此未滿二十五月又禮先納采問名納吉乃納幣此四者皆在三年之內故云爾】娶者大吉也【合二姓之好傳之於無窮故為大吉】以為有人心焉者則宜於此焉變矣【變者變慟哭泣也有人心念親者聞有欲為已圖婚則當變慟哭泣矣况乃至於納幣成婚哉公羊傳】四年夏迎婦姜于齊【稱婦有姑之辭】卿不行非禮也【禮諸侯有故則使卿逆】君子是以知出姜之不允於魯也【允信也始來不見尊貴故終不為國人所敬信也文公薨而見出故曰出姜】曰貴聘而賤逆之【公子遂納幣是貴聘也】君而卑之立而廢之【君小君也不以夫人禮迎是卑廢之】不允宜哉【春秋左氏傳】成公八年春宋公使華元來聘【昏聘不使卿今華元將命故特書之宋公無主昏者自命之故稱使也】聘共姬也【穆姜之女成公姊妹為宋共公夫人聘不應使卿故傳發其事而已】夏宋公使公孫壽來納幣禮也【納幣應使卿也】冬衛人來媵【古者諸侯娶適夫人及左右媵各有姪娣皆同姓之國國三人凡九女所以廣繼嗣也魯將嫁伯姬於宋故衛來媵之】衛人來媵共姬禮也凡諸侯嫁女同姓媵之異姓則否【必以同姓者參骨肉至親所以息陰訟】九年二月伯姬歸於宋【宋不使卿逆非禮】夏季孫行父如宋致女【女嫁三月又使大夫隨加聘問謂之致女所以致成婦禮篤昏姻之好】晉人來媵【媵伯姬也】禮也【同姓故又明年齊人來媵注異姓來媵非禮也春秋左氏傳】晉韓須如齊逆女【須韓起之子逆少姜】齊陳無宇送女致少姜少姜有寵於晉侯晉侯謂之少齊【為立別號所以寵異之】謂陳無宇非卿【欲使齊以適夫人禮送少姜】執諸中都【中都晉邑】少姜為之請曰送從逆班【班列也】畏大國也猶有所易是以亂作【韓須公族大夫陳無宇上大夫言齊畏晉改易禮制使上大夫送遂致此執辱之罪蓋少姜謙以示譏昭二年左氏傳】鄭公子忽如陳逆婦媵陳鍼子送女先配而後祖鍼子曰是不為夫婦誣其祖矣非禮也何以能育【鍼子陳大夫禮逆婦必先告祖廟而後行故楚公子圍稱告莊共之廟鄭忽先逆婦而後告廟故曰先配而後祖隱八年左氏傳】莊公二十七年莒慶來逆叔姬大夫越竟逆女

非禮也【禮大夫任重為越竟逆女於政事有所損曠故竟內乃得親逆所以屈私赴公也言叔姬者婦人以字通言叔通賤故略與婦同文重乖離也春秋公羊傳】

諸侯之嫁子於大夫主大夫以與之【君不敵臣宣五年注云婚禮主人設几筵於廟以待迎者諸侯大夫尊卑不敵故使大夫為之主】來者接內也不正其接納故不與夫婦之稱也【接內謂與君為禮也夫婦之稱當言迎女穀梁傳宣五年齊高固來逆子叔姬傳同】

宣公五年秋九月齊高固來

迎叔姬【高固齊大夫不書女歸降於諸侯】自為也【適諸侯稱女適大夫稱字所以別尊

卑也】冬齊高固及子叔姬來反馬也【禮送女留其送馬謙不敢自安三月廟見遣使反馬高固遂與叔姬俱寧故經傳具見以示譏春秋左氏傳】楚公子圍聘於鄭且娶於公孫段氏將以衆逆【以兵入逆婦】子產患之使子羽辭曰以敝邑褊小不足以容從者請墀聽命【欲於城外除地為墀行昏禮】令尹命太宰伯州犁對曰君辱貺寡大夫圍謂圍將使豐氏撫有而室【豐氏公孫段也】圍布几筵告於莊共之廟而來【莊王圍之祖共王圍之父】若野賜之是委君貺於草莽也是寡大夫不得列於諸卿也【言不得从卿禮】不寧唯是又使圍蒙其先君【蒙欺也告先君而來不得成禮於女氏之廟故以為欺先君】將不得為寡君老【大臣稱老懼辱命而黜退】其蔑以復矣【昭元年左氏傳】俟我於著乎而充耳以素乎而尚之以瓊華乎而【賦也俟待也我嫁者自謂也著門屏之間也充耳以纁縣瑱所謂紃也尚加也瓊華美石似玉者即所以為瑱也東萊呂氏曰昏禮壻往婦家親迎既奠鴈御輪而先歸俟於門外婦至則揖以入時齊俗不親迎故女至壻門始見其俟已也】俟我於庭乎而充耳以青乎而尚之以瓊瑩乎而【庭在大門之內寢門之外瓊亦美石似玉者呂氏曰此昏禮所謂壻道婦及寢門揖入之時也】俟我於堂乎而充耳以黃乎而尚之以瓊英乎而【瓊英亦美石似玉者呂氏曰升階而後至堂此昏禮所謂升自西階之時也齊風著】

大司徒施十有二教三曰以陰禮教親則民不怨【陰禮謂男女之禮婚姻以時則男不曠女不怨地官】媒氏掌萬民之判【判半也得偶為合主合其半成夫婦也喪服傳曰夫妻判合鄭司農云主萬民之判合】凡男女自成名以上皆書年月日名焉【鄭司農云成名謂子生三月父名之】令男三十而娶女二十而嫁【二三者天地相承覆之數也易曰參天兩地而倚數】凡娶判妻入子者皆書之【書之者以別未成昏禮者鄭司農云入子者謂嫁女者也玄謂言入子者容媵姪娣不聘之者】仲春之月令會男女【中春陰陽交以成昏禮順天時也】於是時也奔者不禁【重天時權許之也】若無故而不用令者罰之【無故謂無喪禍之變也有喪禍者娶得用非中春之月雜記曰已雖小功既卒哭可以冠子娶妻】司男女之無夫家者而會之【司猶察也無夫家謂男女之鰥寡者】凡嫁子娶妻入幣純帛無過五兩【純實緇字也納幣用緇婦人陰也凡于娶禮必用其類五兩十端也必言兩言欲得其配合之名十者象五行十日相成也士大夫乃以玄纁束帛天子加以穀圭諸侯加以大璋同上】黨正凡其黨之昏教其禮事掌其禁戒【詳見首章】

五廟之孫祖廟未毀雖為庶人娶妻必告【同上】

大司徒荒政十有二聚萬民十曰多昏【鄭司農云多昏不備禮而娶昏者多也地官】

右庶人昏禮 雝雝鳴鴈旭日始旦士如歸妻迨冰未泮【賦也雝雝聲之和也鴈鳥名似鵝畏寒秋南春北旭日初出貌昏禮納采用鴈親迎以昏而納采請期以旦歸妻以冰泮而納采請期迨未泮之時邶風匏有苦葉】倉庚于飛熠燿其羽之子于歸皇駁其馬親結其縢九十其儀【倉庚飛昏姻時也熠燿鮮明也黃白曰皇駮白曰駮縢婦人之褱也母戒女而為之施衿結縢也九其儀十其儀言其儀之多也風東山篇】

曾子問曰昏禮既納幣有吉日女之父母死則如之何【吉日取女之吉日】孔子曰壻使人弔如壻之父母死則女之家亦使人弔【必使人弔者未成兄弟】父喪稱父母喪稱母【禮宜各以其敵者也父使人弔之辭云某子聞某之喪某子使某如何不淑母則若云宋蕩伯姬

聞姜之喪伯姬使某如何不淑凡弔辭一耳】父母不在則稱伯父世母【弔禮不可廢也伯父母又不在則稱叔父母也】壻已葬壻之伯父致命女氏曰某之子有父母之喪不得嗣為兄弟使某致命女氏許諾而弗敢嫁禮也【必致命者不敢以累年之喪使人失嘉會之時】壻免喪女之父母使人請壻弗取而后嫁之禮也【請請成昏】女之父母死壻亦如之【女免喪壻之父母亦使人請其已葬時亦致命】曾子問曰親迎女在塗而壻之父母死如之何孔子曰女改服布深衣縞總以趨喪【布深衣縞總婦人始喪未成服之服】女在塗而女之父母死則女反【奔喪服期】如壻親迎女未至而有齊衰大功之喪則如之何孔子曰男不入改服於外次女入改服於內次然後即位而哭【不聞喪即改服者昏禮重于齊衰以下】曾子問曰除喪則不復昏禮乎【復猶償也】孔子曰祭過時不祭禮也又何反於初【重踰輕也同牢及饋饗相飲食之道】曾子問曰女未廟見而死則如之何孔子曰不遷於祖不祔於皇姑壻不杖不菲不次歸葬於女氏之黨示未成婦也【遷朝廟也壻雖不備喪禮猶為之服齊衰也】曾子問曰取女有吉日而女死如之何孔子曰壻齊衰而弔既葬而除之夫死亦如之【未有期三年之恩也女服斬衰 曾子問】大功之末可以嫁子父小功之末可以嫁子可以取婦已雖小功既卒哭可以取妻下殤之小功則不可【詳見冠變禮章】

右昏變禮

壹與之齊終身不改故夫死不嫁【詳見昏義】

右不改嫁 柏舟共姜自誓也衛世子共伯蚤死其妻守義父母欲奪而嫁之誓而弗許故作詩以絕之【共伯僖侯之世子 詩序】汎彼柏舟在彼中河髧彼兩髦實維我儀之死矢靡他母也天只不諒人只【興也中河中于河也髧髮垂貌兩髦者剪髮夾囟子事父母之飾親死然後去之盖指共伯也我共姜自稱也儀匹之至矢誓靡無也只語助辭諒信也言柏舟則在彼中河兩髦則實我之匹雖至於死誓無他心母之于我覆育之恩如天罔極而何其不諒我之心乎不及父者疑時獨母在或非父意耳】汎彼柏舟在彼河側髧彼兩髦實維我特之死矢靡慝母也天只不諒人只【興也特匹也慝邪也以是為慝則其絕之甚矣 鄘風】魯寡陶嬰者魯門之女也少寡養幼孤無強昆弟紡績為產魯人或聞其義將求焉嬰聞之恐不得免作歌明已之不更二也其歌曰悲夫黃鵠之早寡兮七年不雙宛頸獨宿兮不與衆同夜半悲鳴兮想其故雄天命早寡兮獨宿何傷寡婦念此兮泣下數行嗚呼哀哉兮死者不可忘飛鳥尚然兮況于貞良雖有賢雄兮終不重行魯人聞之曰斯女不可得已遂不敢復求嬰寡終身不改【列女傳】梁寡高行者梁之寡婦也其為人榮於色而美於行夫死早寡不嫁梁貴人多爭欲娶之者不能得梁王聞之使相聘焉高行曰妾聞婦人之義壹往而不改以全貞信之節今忘死而趨生是不信也貪貴而忘賤是不貞也棄義而從利無以為人乃援鏡持刀以割其鼻曰妾已刑矣所以不死者不忍幼弱之重孤也於是相以報王大其義而高其行乃復其身尊其號曰高行【同上】

凡諸侯之女歸寧曰來夫人歸寧曰如某【莊二十七:left氏傳】右歸寧 言告師氏言告言歸薄汚我私薄澣我衣害澣害否歸寧父母【言辭也師女師也薄猶少也汚煩擗之以去其汚猶治亂而曰亂也澣則濯之而已私燕服衣禮服也害何也寧安也謂問安也上章既成綰

絺之服矣此章遂告其師氏使告於君子以將歸寧之意且曰盍治其私服之污而澣其禮服之衣乎何者當澣而何者可以未澣乎我將服之以歸寧于父母矣周南葛覃】

莊公二十七年冬杞伯姬來歸寧也【寧問父母安否春秋左氏傳】泉水衛女思歸也嫁於諸侯父母終思歸寧而不得故作詩以自見也【鄭箋云國君夫人父母在則歸寧沒則使大夫寧于兄弟詩序】秦嬴歸於楚【秦景公妹為楚共王夫人】楚司馬子庚聘於秦為夫人寧禮也【子庚莊王子午也諸侯夫人父母既沒歸寧使卿故曰禮襄十二年左右氏傳】

婦有七出不順父母無子姪僻嫉妬惡疾多口舌竊盜【詳見昏義】諸侯出夫人夫人比至於其國以夫人之禮行至以夫人入【行道以夫人之禮者棄妻致命其家乃義絕不用此為始】使者將命曰寡君不敏不能從而事社稷宗廟使使臣某敢告於執事主人對曰寡君固前辭不教矣寡君敢不敬須以俟命【前辭不教謂納采時也此辭賓在門外擯者傳焉賓入致命如初主人卒辭曰敢不聽命】有司官陳器皿主人有司亦官受之【器皿本其所賁物也律棄妻畀所賁】妻出夫使人致之曰某不敏不能從而共粢盛使某也敢告於侍者主人對曰某之子不肖不敢辟誅敢不敬須以俟命使者退主人拜送之【肖似也不肖言不如人誅猶罰也】如舅在則稱舅舅沒則稱兄無兄則稱夫【言棄妻者父兄在則稱之命當由尊者出也唯國君不稱兄】主人之辭曰某之子不肖如姑姊妹亦皆稱之【姑姊妹見棄亦曰某之姑某之姊若妹不肖雜記】

凡諸侯之女出曰來歸夫人出曰歸於某【莊二十七年左右氏傳】

大歸曰來歸【大歸者廢棄來歸也莊二十七年公羊傳】

子甚宜其妻父母不說出【宜猶善也內則】

婦有三不去有所取無所歸一也與共更三年之喪二也先貧賤後富貴三也【詳見昏義】

右出妻曾參後母遇之無恩而供養不衰及其妻以蒸藜不熟因出之人曰非七出也參曰藜蒸小物耳吾欲使熟而不用吾命況大事乎遂出之終身不娶妻其子元請焉參告其子曰高宗以後妻殺孝己尹吉甫以後妻放伯奇吾上不及高宗中不比吉甫庸知其得免于非乎【家語】

禮書綱目卷三

卷四

欽定四庫全書

禮書綱目卷四 婺源江永撰

鄉飲酒禮 嘉禮六

經【鄭目錄云諸侯之鄉大夫三年大比獻賢者能者於其君以禮賓之與之飲酒鄉飲酒於五禮屬嘉禮】

鄉飲酒之禮

右篇目 周禮鄉大夫三年則大比攷其德行道藝而興賢者能者鄉老及鄉大夫帥其吏與其衆寡以禮禮賓之【賢者有德行者能者有道藝者衆寡謂鄉人之善者無多少也鄭司農云興賢者謂若今舉孝廉興能者謂若今舉茂才賓敬也敬所舉賢者能者玄謂變舉言興者謂合衆而尊寵之以鄉飲酒之禮禮而賓之地官】

主人就先生而謀賓介【主人謂諸侯之鄉大夫也先生鄉中致仕者賓介處士賢者周禮大司徒之職以鄉三物教萬民而賓興之一曰六德知仁聖義中和二曰六行孝友睦婣任恤三曰六藝禮樂射御書數鄉大夫以正月之吉受法于司徒退而須之于其鄉吏使各以教其所治以攷其德行道藝及三年大比而興賢者能者鄉老及鄉大夫帥其吏與其衆寡以禮禮賓之厥明獻賢能之書于王是禮乃三年正月而一行也諸侯之鄉大夫貢士于其君盖如此云古者年七十而致仕老于鄉里大夫名曰父師士名曰少師而教學焉恒知鄉人之賢者是以大夫就而謀之賢者為賓其次為介又其次為衆賓而與之飲酒是亦將獻之以禮禮賓之也今郡國十月行此飲酒禮以黨正每歲邦索鬼神而祭祀則以禮屬民而飲酒于序以正齒位之說然此篇無正齒位之事焉凡鄉黨飲酒必于民聚之時欲其見化知尚賢尊長也孟子曰天下有達尊三爵也德也齒也】

右謀賓介 記鄉朝服而謀賓介皆使能【鄉鄉人謂鄉大夫也朝服冠玄端緇帶素鞶白屨今郡國行鄉飲酒之禮玄冠而衣皮弁服與禮異】

主人戒賓賓拜辱主人答拜乃請賓賓禮辭許主人再拜賓答拜【戒警也告也拜辱出拜其自屈辱至己門也請告以其所為來之事不固辭者素所有志】主人退賓拜辱【退猶去也去又拜辱者以送謝之】介亦如之【如戒賓也】右戒賓介
記不宿戒【再戒為宿戒禮將有事先戒而復宿戒】

乃席賓主人介【席敷席也夙興往戒歸而敷席賓席牖前南面主人席阼階上西面介席西

階上東面】衆賓之席皆不屬焉【席衆賓于賓席之西不屬者不相續也皆獨坐明其德各特】尊兩壺於房戶間斯禁有玄酒在西設篚於禁南東肆加二勺於兩壺【斯禁禁切地無足者玄酒在西上也肆陳也】設洗於阼階東南南北以堂深東西當東榮水在洗東篚在洗西南肆【榮屋翼】

右設席陳器 記蒲筵緇布純【筵席也純緣也】尊綌帛賓至徹之【綌葛也帛覆尊巾也】

羹定【肉謂之羹定猶熟也】主人速賓賓拜辱主人答拜還賓拜辱【速召也還猶退】介亦如之【如速賓也】賓及衆賓皆從之【從猶隨也言及衆賓介亦在其中】

右速賓 記其牲狗也【狗取擇人】亨於堂東北【祖陽氣之所始也陽氣主養易曰天地養萬物聖人養賢以及萬民】

主人一相迎於門外再拜賓賓答拜拜介介答拜【相主人之吏贊傳命者】揖衆賓【差益卑也拜介揖衆賓皆西南面】主人揖先入【揖揖賓也先入門而西面】賓厭介入門左介厭衆賓入衆賓皆入門左北上【皆入門西東面賓之屬相厭變于主人也推手曰揖引手曰厭今文皆作揖又曰衆賓皆入左無門】主人與賓三揖至於階三讓主人升賓升主人阼階上當楣北面再拜賓西階上當楣北面答拜【三揖者將進揖當陳揖當碑揖楣前梁也復拜拜賓至此堂尊之】

右迎賓 記立者東面北上若有北面者則東上【賢者衆寡無常也或統于堂或統于門】

主人坐取爵於篚降洗【將獻賓也】賓降【從主人也】主人坐奠爵於階前辭【重以已事煩賓也事同曰讓事異曰辭】賓對【對答也賓主之辭未聞】主人坐取爵興適洗南面坐奠爵於篚下盥洗【已盥乃洗爵致潔敬也今文無奠】賓進東北面辭洗【必進東行示情】主人坐奠爵于篚興對賓復位當西序東面【言復位者明始降時位在此】主人坐取爵沃洗者西北面【沃洗者主人之羣吏】卒洗主人壹揖壹讓升【俱升古文壹作一】賓拜洗主人坐奠爵遂拜降盥【復盥為手垢汙】賓降主人辭賓對復位當西序卒盥揖讓升賓西階上疑立【疑讀為伋然從于趙盾之伋疑然立自定之貌】主人坐取爵實之賓之席前西北面獻賓【獻進也進酒于賓】賓西階上拜主人少退【少退少辟】賓進受爵以復位主人阼階上拜送爵賓少退【復位復西階上位】薦脯醢【薦進也進之者主人有司】賓升席自西方【升由下也升必中席】乃設折俎【牲體枝解節折右俎】主人阼階東疑立賓坐左執爵祭脯醢【坐坐于席祭脯醢者以右手】奠爵於薦西興右手取肺卻左手執本坐弗繚右絕末以祭尚左手嚙之興加于俎【興起也肺離之本端厚大者繚猶紵也大夫以上威儀多紵絕之尚左手者明垂紵之乃絕其末嚙嘗也】坐掄手遂祭酒【掄拭也古文掄作說】興席末坐啐酒【啐亦嘗也】降席坐奠爵拜告旨執爵興主人阼階上答拜【降席席西也旨美也】賓西階上北面坐卒爵興坐奠爵遂拜執爵興主人阼階上答拜【卒盡也于此盡酒者明此席非專為飲食起】右獻賓 記獻用爵其他用觶【爵尊不褻用之】凡舉爵三作而不徒爵【謂獻賓獻大夫獻工皆有薦】

按此條後樂賓章獻上及有遵者章通用當互攷】薦脯五挺橫祭于其上出自左房【挺猶臠也鄉射禮曰祭半臠臠長尺有二寸左在東陽也陽主養房饌陳處也冠禮之饌脯醢南上曲禮曰以脯脩置者左胸右末後凡祭脯醢通用】俎由東壁自西階升【亨狗既孰載之俎饌于東方】賓俎脊脅肩肺主人俎脊脅臂肺介俎脊脅脰肺肺皆離皆右體進腩【凡牲前脰骨三肩臂臠也後脰骨二膊脰也尊者俎尊骨卑者俎卑骨祭統曰凡為俎者以骨為主骨有貴賤凡前貴後賤離猶揜也腩理也進理謂前其本也今文脰作脰

印本脰上有肫字朱子據音疏刪去今從之 後賓酢主人主人獻介其俎實當于此考之】以爵拜者不徒作【作起也言拜既爵者不徒起起必酢主人獻介章通用】坐卒爵者拜既爵立卒爵者不拜既爵【降殺各從其宜不使相錯唯工不從此禮坐卒爵者拜既爵獻介及賓介酢主人通用立卒爵者不拜既爵見獻衆賓章】

賓降洗【將酢主人】主人降【亦从賓也降降立阼階東西面】賓坐奠爵興辭【西階前也】主人對賓坐取爵適洗南北面主人阼階東南面辭洗賓坐奠爵於筐興對主人復阼階東西面賓東北面盥坐取爵卒洗揖讓如初升主人拜洗賓答拜興降盥如主人禮賓實爵主人之席前東南面酢主人主人阼階上拜賓少退主人進受爵復位賓西階上拜送爵薦脯醢主人升席自北方設折俎祭如賓禮【祭者祭薦俎及酒亦嘑啐】不告旨【酒已物也】自席前適阼階上北面坐卒爵興坐奠爵遂拜執爵興賓西階上答拜【自席前者啐酒席末因從北方降由便也】主人坐奠爵於序端阼階上北面再拜崇酒賓西階上答拜【東西牆謂之序崇充也言酒惡相充實】

右賓酢主人 記曰主人介凡升席自北方降自南方【席南上升由下降由上由便凡主介升席降席通用主人唯此章降自北方後皆降自南方又主人之俎見獻賓章】介爵酢爵僎爵皆居右【三爵皆飲爵也介賓之輔也酢所以酢主人也僎謂鄉人為卿大夫來觀禮者酢或為作僎或為駟古文禮僎作遵少儀 獻介章有遵者章通用】

主人坐取觶於筐降洗賓降主人辭降賓不辭洗立當西序東面【不辭洗者以其將自飲】卒洗揖讓升賓西階上疑立主人實觶酬賓阼階上北面坐奠觶遂拜執觶興賓西階上答拜【酬勸酒也酬之言周忠信為周】坐祭遂飲卒觶興坐奠觶遂拜執觶興賓西階上答拜主人降洗賓降辭如獻禮升不拜洗【不拜洗殺于獻】賓西階上立主人實觶賓之席前北面賓西階上拜主人少退卒拜進坐奠觶於薦西【賓已拜主人奠其觶】賓辭坐取觶復位主人阼階上拜送賓北面坐奠觶於薦東復位【酬酒不舉君子不盡人之歡不竭人之忠以全交也】

右主人酬賓 記凡奠者於左【不飲者不欲其妨】將舉於右【便也將舉于右見下一人舉觶二人舉觶章】

客爵居左其飲居右【客爵謂主人所酬賓之爵也以優賓耳不舉奠于薦東是居左也 少儀其飲居右見下一人舉觶二人舉觶章】

主人揖降賓降立於階西當序東面【主人將與介為禮賓謙不敢居堂上】主人以介揖讓

升拜如賓禮主人坐取爵於東序端降洗介降主人辭降介辭洗如賓禮升不拜洗【介禮殺也】介西階上立【不言疑者省文】主人實爵介之席前西南面獻介介西階上北面拜主人少退介進北面受爵復位主人介右北面拜送爵介少退【主人拜於介右降尊以就卑也今文無北面】主人立於西階東薦脯醢介升席自北方設折俎祭如賓禮不嘑肺不啐酒不告旨自南方降席北面坐卒爵興坐奠爵遂拜執爵興主人介右答拜【不嘑啐下賓】

右主人獻介【介俎見獻賓章介爵居右見賓酢主人章】

介降洗主人復阼階降辭如初【如賓酢之時】卒洗主人盥【盥者當為介酌】介揖讓升授主人爵於兩楹之間【就尊南授之介不自酌下賓酒者賓主共之】介西階上立主人實爵酢於西階上介右坐奠爵遂拜執爵興介答拜主人坐祭遂飲卒爵興坐奠爵遂拜執爵興介答拜主人坐奠爵於西楹南介右再拜崇酒介答拜【奠爵西楹南以爵獻衆賓】主人復阼階揖降介降立於賓南

右介酢主人

主人西南面三拜衆賓衆賓皆答壹拜【三拜一拜示偏不備禮也不升拜賤也】主人揖升坐取爵於西楹下降洗升實爵於西階上獻衆賓衆賓之長升拜受者三人【長其老者言三人則衆賓多矣】主人拜送【于衆賓右】坐祭立飲不拜既爵授主人爵降復位【既卒也卒爵不拜立飲立授賤者禮簡】衆賓獻則不拜受爵坐祭立飲【次三人以下也不拜禮彌簡】每一人獻則薦諸其席【謂三人也】衆賓辯有脯醢【亦每獻薦于其位位在下今文辯皆作徧】主人以爵降奠於筐【不復用也】

右主人獻衆賓 記衆賓之長一人辭洗如賓禮【于三人之中復差有尊者餘二人雖為之洗不敢辭其下不洗立卒爵者不拜既爵見獻賓章】樂正與立者皆薦以齒【謂其飲之次也尊樂正同于賓黨不言飲而言】

【薦以明飲也既飲皆薦于其位樂正位西階東北面】主人之贊者西面北上不與【贊佐也謂主人之屬佐助主人禮事徹鼎沃盥設薦俎者西面北上統於堂也與及也不及謂不獻酒】無算爵然後與【燕乃及之】

揖讓升賓厭介升介厭衆賓升衆賓序升即席【序次也即就也今文厭皆為揖】一人洗升舉觶於賓【一人主人之吏發酒端曰舉】實觶西階上坐奠觶遂拜執觶興賓席末答拜坐祭遂飲卒觶興坐奠觶遂拜執觶興賓答拜降洗升實觶立於西階上賓拜【賓拜拜將受觶】進坐奠觶於薦西賓辭坐受以興【舉觶不授下主人也言坐受者明行事相接若親受謙也】舉觶者西階上拜送賓坐奠觶於其所【所薦西也】舉觶者降【事已】

右一人舉觶 記【將舉于右其飲居右見酬賓章】樂作大夫不入【後樂賢者賓若有尊者一人舉觶後乃入其禮詳見篇末及鄉射篇】

設席於堂廉東上【為工布席也側邊曰廉燕禮曰席工于西階上少東樂正先升北面此言樂正先升立于西階東則工席在階東】工四人二瑟瑟先相者二人皆左何瑟後首揜越內弦右手相【四人大夫制也二瑟二人鼓瑟則二人歌也瑟先者將入序在前也相扶工也衆賓之少者為之每工一人鄉射禮曰弟子相工如初入天子相工使視瞭者凡工瞽矇也故有扶之者師冕見及階子曰階也及席子曰席也固相師之道後首者變于君也揜持也相瑟者則為之持瑟其相歌者徒相也越瑟下孔也內弦側擔之者】樂正先升立于西階東【正長也】工入升自西階北面坐相者東面坐遂授瑟乃降【降立于西方近其事】工歌鹿鳴四牡皇皇者華【三者皆小雅篇也鹿鳴君與臣下及四方之賓燕講道修政之樂歌也此采其已有旨酒以召嘉賓嘉賓既來示我以善道又樂嘉賓有孔昭之明德可則倣也四牡君勞使臣之來樂歌也此采其勤苦王事念將父母懷歸傷悲忠孝之至以勞賓也皇皇者華君遣使臣之樂歌也此采其更是勞苦自以為不及欲諮謀于賢知而以自光明也】卒歌主人獻工工左瑟一人拜不興受爵主人阼階上拜送爵【一人工之長也凡工賤不為之洗】薦脯醢使人相祭【使人相者相其祭酒祭薦】工飲不拜既爵授主人爵【坐授之】衆工則不拜受爵祭飲辯有脯醢不祭【祭飲獻酒重無不祭也今文辯為偏】大師則為之洗賓介降主人辭降工不辭洗【大夫若君賜之樂謂之大師則為之洗尊之也賓介降從主人也工大師也上既言獻工矣乃言大師者大師或瑟或歌也其獻之瑟則先歌則後】笙入堂下磬南北面立樂南陔白華華黍【笙吹笙者也以笙吹此詩以為樂也南陔白華華黍小雅篇也今亡其義未聞昔周之興也周公制禮作樂采時世之詩以為樂歌所以通情相風切也其有此篇明矣後世衰微幽厲尤甚禮樂之書稍稍廢棄孔子曰吾自衛反魯然後樂正雅頌各得其所謂當時在者而復重雜亂者也惡能存其亡者乎且正考父校商之名頌十二篇于周大師歸以祀其先王至孔子二百年之間五篇而已此其信也】主人獻之於西階上一人拜盡階不升堂受爵主人拜送爵階前坐祭立飲不拜既爵升授主人爵【一人笙之長者也笙三人和一人凡四人鄉射禮曰笙一人拜于下】衆笙則不拜受爵坐祭立飲辯有脯醢不祭【亦受爵于西階上薦之皆于其位磬南今文辯為偏】乃間歌魚麗笙由庚歌南有嘉魚笙崇丘歌南山有臺笙由儀【間代也謂一歌則一吹六者皆小雅篇也魚麗言太平年豐物多也此采其物多酒旨所以優賓也南有嘉魚言太平君子有酒樂與賢者共之也此采其能以禮下賢者賢者累蔓而歸之與之燕樂也南山有臺言太平之治以賢者為本此采其愛友賢者為邦家之基民之父母既欲其身之壽考又欲其名德之長也由庚崇丘由儀今亡其義未聞】乃合樂周南關雎葛覃卷耳召南鵲巢采芣采蘋【合樂謂歌樂與衆聲俱作周南召南國風篇也王后國君夫人房中之樂歌也關雎言后妃之德葛覃言后妃之職卷耳言后妃之志鵲巢言國君夫人之德采芣言國君夫人不失職采蘋言卿大夫之妻能循其法度昔大王王季居於岐山之陽躬行召南之教以興王業及文王而行周南之教以受命大雅云刑于寡妻至于兄弟以御于家邦謂此也其始一國耳文王作邑于豐以故地為卿士之采地乃分為二國周周公所食召召公所食於時文王三分天下有其二德化被于南土是以前詩有仁賢之風者屬之召南焉有聖人之風者屬之周南焉夫婦之道生民之本王政之端此六篇者其教之原也故國君與其臣下及四方之賓燕用之合樂也鄉樂者風也小雅為諸侯之樂大雅頌為天子之樂鄉飲酒升歌小雅禮盛者可以進取也燕合鄉樂禮輕者可以逮下也春秋傳曰肆夏繁遏渠天子所以享元侯也文王大明緜兩君相見之樂也然則諸侯相與燕升歌大雅合小雅天子與次國小國之君燕亦如之與大國之君燕升歌頌合大雅其笙間之篇未聞】工告

於樂正曰正歌備樂正告於賓乃降【樂正降者以正歌備無事也降立西階東北面】

右樂賓 記獻工與笙取爵於上簠既獻奠於下簠【明其異器敬也如是則獻大夫亦然上簠三爵】其笙則獻諸西階上【謂主人拜送爵也于工拜于阼階上者以其坐于西階東也古文無上 獻賓章舉爵三作而不徒爵此章通用】磬階間縮霤北面鼓之【縮從也霤以東西為從鼓猶擊也大夫而特縣方賓鄉人之賢者从士禮也射則磬在東古文縮為蹙】

主人降席自南方【不由北方由便也】側降【賓介不從】作相為司正司正禮辭許諾主人拜司正答拜【作使也禮樂之正既成將留賓為有懈惰立司正以監之拜拜其許】主人升復席

右立司正

司正洗觶升自西階阼階上北面受命於主人主人曰請安於賓司正告於賓賓禮辭許【為賓欲去留之告賓于西階】司正告于主人主人阼階上再拜賓西階上答拜司正立于楹間以相拜皆揖復席【再拜拜賓許也司正既以賓許告主人遂立楹間以相拜賓主人既拜揖就席】司正實觶降自西階階間北面坐奠觶退共少立【階間北面東西節也其南北當中庭共拱手也少立自正慎其位也已帥以正孰敢不正燕禮曰右還北面】坐取觶不祭遂飲卒觶興坐奠觶遂拜執觶興洗北面坐奠于其所退立于觶南【洗觶奠之示潔敬立于其南以察衆】

右司正舉觶 記司正既舉觶而薦諸其位【司正主人之屬也無獻因其舉觶而薦之】

賓北面坐取俎西之觶阼階上北面酬主人主人降席立于賓東【初起旅酬也凡旅酬者少長以齒終于沃盥者皆弟長而無遺矣】賓坐奠觶遂拜執觶興主人答拜不祭立飲不拜卒觶不洗實觶東南面授主人【賓立飲卒觶因更酌以鄉主人將授】主人阼階上拜賓少退主人受觶賓拜送於主人之西【旅酬同階禮殺】賓揖復席【酬主人訖】主人西階上酬介介降席自南方立于主人之西如賓酬主人之禮主人揖復席【其酌實觶西南面授介自此以下旅酬酌者亦如之】司正升相旅曰某子受酬受酬者降席【旅序也于是介酬衆賓衆賓又以次序相酬某者衆賓姓也同姓則以伯仲別之又同則以其字別之】司正退立于序端東面【辟受酬者又便其贊上贊下也始升相西階西北面】受酬者自介右【由介東也尊介使不失故位】衆受酬者受自左【後將受酬者皆由西變于介也今文無衆酬者】拜興飲皆如賓酬主人之禮【嫌賓以下異也】辯卒受者以觶降坐奠于筐【辯辯衆賓之在下者鄉射禮曰辯遂酬在下者皆升遂受酬于西階上】司正降復位【觶南之位】

右旅酬 記凡旅不洗【敬禮殺也】不洗者不祭【不甚潔也】既旅士不入【後正禮也既旅則將燕矣】

使二人舉觶于賓介洗升實觶于西階上皆坐奠觶遂拜執觶興賓介席末答拜皆坐祭遂飲

卒觶興坐奠觶遂拜執觶興賓介席末答拜【二人亦主人之吏若有大夫則舉觶于賓與大夫燕禮曰媵爵者立于洗南西面北上序進盥洗】逆降洗升實觶皆立于西階上賓介皆拜【于席末拜】皆進薦西奠之賓辭坐取觶以興介則薦南奠之介坐受以興退皆拜送降賓介奠于其所【賓言取介言受尊卑異文今文曰賓受】

右二人舉觶【將舉于右其飲居右見主人酬賓章】

司正升自西階受命于主人主人曰請坐于賓賓辭以俎【至此盛禮俱成酒清肴乾賓主百拜強有力者猶倦焉張而不弛弛而不張非文武之道請坐者將以賓燕也俎者肴之貴者辭之者不敢以禮殺當貴者】主人請徹俎賓許【亦司正傳請告之】司正降階前命弟子俟徹俎【西階前也弟子賓之少者俎者主人之吏設之使弟子俟徹者明徹俎賓之義】司正升立于席端【待事】賓降席北面主人降席阼階上北面介降席西階上北面遵者降席東南面【皆立相須徹俎也遵者謂此鄉之人仕至大夫者也今來助主人樂賓主人所榮而遵法者也因以為名或有無來不來用時事耳今文遵為僕或為全】賓取俎還授司正司正以降賓從之主人取俎還授弟子弟子以降自西階主人降自阼階介取俎還授弟子弟子以降介從之若有諸公大夫則使人受俎如賓禮衆賓皆降【取俎者皆鄉其席既授弟子皆降復初入之位】

右徹俎

記徹俎賓介遵者之俎受者以降遂出授從者【送之】主人之俎以東【藏于東方】

說屨揖讓如初升坐【說屨者謂安燕當坐也必說于下者屨賤不空居堂說屨主人先左賓先右今文說為稅】乃羞【羞進也所進者狗彘醢也鄉設骨體所以致敬也今進羞所以盡愛也敬之愛之所以厚賢也】無算爵【算數也賓主燕飲爵行無數醉而止也鄉射禮曰使二人舉觶于賓與大夫又曰執觶者洗升實觶反奠于賓與大夫皆是】無算樂【燕樂亦無數或間或合盡歡而止也春秋襄二十九年吳公子札來聘請觀于周樂此國君之無算】

右燕【主人之贊者無算爵然後與見獻衆賓章】

賓出奏陔【陔陔夏也陔之言戒也終日燕飲酒罷以陔為節明無失禮也周禮鐘師以鐘鼓奏九夏是奏陔夏則有鐘鼓矣鐘鼓者天子諸侯備用之大夫士鼓而已盖建於阼階之西南鼓鄉射禮曰賓興樂正命奏陔賓降及階陔作賓出衆賓皆出】主人送于門外再拜【門東西面拜也賓介不答拜禮有終也】

右賓出 記樂正命奏陔賓出至于階陔作

賓若有遵者諸公大夫則既一人舉觶乃入【不干主人正禮也尊者諸公大夫也謂之賓者同從外來耳大國有孤四命謂之公】席于賓東公三重大夫再重【席此二者于賓東尊之不與鄉人齒也天子之國三命者不齒于諸侯之國爵為大夫則不齒矣不言遵者尊者亦卿

大夫】公如大夫入主人降賓介降衆賓皆降復初位主人迎揖讓升公升如賓禮辭一席使一人去之【如讀若今之若主人迎之于門內也辭一席謙自同于大夫】大夫則如介禮有諸公則辭加席委于席端主人不徹無諸公則大夫辭加席主人對不去加席【加席上席也大夫席再重】

右有遵者 記若有諸公則大夫於主人之北西面【其西面者北上統于公舉爵三作而不徒爵見獻賓章僎爵居右見賓酢主人章】

明日賓鄉服以拜賜【拜賜謝恩惠鄉服昨日與鄉大夫飲酒之朝服也不言朝服未服以朝也今文曰賓服鄉服】主人如賓服以拜辱【拜賓復自屈辱也鄉射禮曰賓朝服以拜賜于門外主人不見如賓服遂从之拜辱于門外乃退】

右拜禮

主人釋服【釋服釋朝服更玄端也古釋作舍】乃息司正【息勞也勞賜昨日贊執事者獨云司正司正庭長也】無介【勞禮略也司正為賓】不殺【市買若因所有可也不殺則無俎】薦脯醢【羞同也】羞唯所有【在有何物】徵唯所欲【徵召也】以告于先生君子可也【告請也先生不以筋力為禮于是可以來君子國中有盛德者可者召不召唯所欲】賓介不與【禮瀆則褻古文與為預】鄉樂唯欲【鄉樂周南召南六篇之中唯所欲作不從次也不歌鹿鳴魚麗者辟國君也】

右息司正

鄉飲酒義 嘉禮七

鄉飲酒之義主人拜迎賓于庠門之外入三揖而后至階三讓而后升所以致敬讓也【庠鄉學也州黨曰序】盥洗揚觶所以致絜也【揚舉也今禮皆作騰】拜至拜洗拜受拜送拜既所以致敬也【拜至謂始升時拜拜賓至】尊讓絜敬也者君子之所以相接也君子尊讓則不爭絜敬則不慢不慢不爭則遠于鬪辯矣不鬪辯則無暴亂之禍矣斯君子之所以免於人禍也故聖人制之以道【道謂此禮】鄉人士君子尊于房戶之間賓主共之也尊有玄酒貴其質也【鄉人鄉大夫也士州長黨正也君子謂卿大夫士也卿大夫士飲國中賢者亦用此禮也共尊者人臣卑不敢專大惠】羞出自東房主人共之也【羞燕私可以自專也】洗當東榮主人之所以自絜而以事賓也【絜猶清也】賓主象天地也介僎象陰陽也三賓象三光也讓之三也象月之三日而成魄也四面之坐象四時也【陰陽助天地養成萬物之氣也三賓象天三光者係于天也古文禮僎皆作遵】天地嚴凝之氣始於西南而盛於西北此天地之尊嚴氣也此天地之義氣也天地溫厚之氣始於東北而盛於東南此天地之盛德氣也天地之仁氣也【凝猶成也】主人者尊賓故坐賓於西北而坐介於西南以輔賓賓者接人以義者也故坐於西北【賓者接人以義言賓來以成主人之德】主人者接人以仁以德厚者也故坐于東南而坐僎于東北以輔主人也【以僎輔主人以其仕在官也】仁義接賓主

有事俎豆有數曰聖聖立而將之以敬曰禮禮以體長幼曰德【聖通也所以通賓主之意也將猶奉也】德也者得於身也故曰古之學術道者將以得身也是故聖人務焉【術藝也得身者謂成己今名免于刑罰也言學術道則此說賓賢能之禮】祭薦祭酒敬禮也嘑肺嘗禮也啐酒成禮也于席末言是席之正非專為飲食也為行禮也此所以貴禮而賤財也卒饌致實於西階上言是席之上非專為飲食也此先禮而後財之義也先禮而後財則民作敬讓而不爭矣【非專為飲食言主於相敬以禮也致實謂盡酒也酒為觴實祭薦祭酒嘑肺席中唯啐酒于席末也】鄉飲酒之禮六十者坐五十者立侍以聽政役所以明尊長也六十者三豆七十者四豆八十者五豆九十者六豆所以明養老也民知尊長養老而后乃能入孝弟民入孝弟出尊長養老而后成教成教而后國可安也君子之所謂孝者非家至而日見之也合諸鄉射教之鄉飲酒之禮而孝弟之行立矣【此說鄉飲酒謂黨正國索鬼神而祭祀則以禮屬民而飲酒于序以正齒位之禮也其鄉射則州長春秋以禮會民而射于州序之禮也謂之鄉者州黨鄉之屬也或則鄉之所居州黨鄉大夫親為主人焉如今郡國下令長於鄉射飲酒從太守相臨之禮也】孔子曰吾觀於鄉而知王道之易易也【鄉鄉飲酒也易易謂教化之本尊賢尚齒而已】主人親速賓及介而衆賓自從之至於門外主人拜賓及介而衆賓自入貴賤之義別矣【速謂即家召之別猶明也】三揖至於階三讓以賓升拜至獻酬辭讓之節繁及介省矣至於衆賓升受坐祭立飲不酢而降隆殺之義辨矣【繁盛也小減曰省辨別也尊者禮降卑者禮殺尊卑別也】工入升歌三終主人獻之笙入三終主人獻之間歌三終合樂三終工告樂備遂出一人揚觶乃主司正焉知其能和樂而不流也【工謂樂正也樂正既告備而降言遂出者自此至去不復升也流猶失禮也立司正以正禮則禮不失可知一人或為二人】賓酬主人主人酬介介酬衆賓少長以齒終於沃洗者焉知其能弟長而無遺矣【遺脫也忘也】降說屢升坐修爵無數飲酒之節朝不廢朝莫不廢夕賓出主人拜送節文終遂焉知其能安燕而不亂也【朝夕朝暮聽事也不廢之者既朝乃飲先夕則罷其正也終遂猶克備也】貴賤明隆殺辨和樂而不流弟長而無遺安燕而不亂此五行者足以正身安國矣彼國安而天下安故曰吾觀於鄉而知王道之易易也鄉飲酒之義立賓以象天立主以象地設介僎以象日月立三賓以象三光古之制禮也經之以天地紀之以日月參之以三光政教之本也【日出于東僎所在也月生于西介所在也三光三大辰也天之政教出于大辰焉】亨狗于東方祖陽氣之發于東方也【祖猶發也狗所以養賓陽氣生養萬物】洗之在阼其水在洗東祖天地之左海也【海水之委也】尊有玄酒教民不忘本也【太古無酒用水而已】賓必南鄉東方者春春之為言蠢也產萬物者聖也南方者夏夏之為言假也養之長之假之仁也西方者秋秋之為言愁也愁之以時察守義者也北方者冬冬之為言中也中者藏也是以天子之立也左聖鄉仁右義侑藏也【春猶蠢也蠢動生之貌也聖之言生也假大也愁讀為摯摯斂也察猶察察嚴殺之貌也南鄉鄉仁貴長大萬物也察或為殺】介必東鄉介賓主也【獻酬之禮主人將西賓將南介覲其間也】主人必居東方東方者春春之為言蠢也產萬物者也主人者造之產萬物者也【言禮之所共由主人出也】月者三日則成魄三月則成時是以禮有三讓建國必立三卿三賓者政教之本禮之大參也【言禮者陰也大數取象法於月也鄉飲酒義】射鄉之禮所以仁鄉黨也【仁猶存也射鄉食饗存生之善者也仲尼燕居】

鄉飲酒之禮所以明長幼之序也鄉飲酒之禮廢則長幼之序失而爭鬪之獄繁矣【經解】鬪變者生於相陵相陵者生於長幼無序而遺敬讓鄉飲酒之禮者所以明長幼之序而崇敬

讓也長幼必序民懷敬讓故雖有鬪變之獄而無陷刑之民其有犯鬪變之獄者則飭鄉飲酒之禮【家語】所以十月行鄉飲酒之禮何所以復尊卑長幼之義春夏事急浚井次至有子使父弟使兄故以事閒暇復長幼之序也【白虎通】

禮書綱目卷四

卷五

<經部,禮類,通禮之屬,禮書綱目

欽定四庫全書

禮書綱目卷五 婺源江永撰

燕禮 嘉禮八

經【鄭目錄云諸侯無事若卿大夫有勤勞之功與羣臣燕飲以樂之燕禮于五禮屬嘉禮】

燕禮小臣戒與者【小臣相君燕飲之法戒與者謂留羣臣也君以燕禮勞使臣若臣有功故與羣臣樂之小臣則警戒告語焉飲酒以合會為歡也】

右戒羣臣

膳宰具官饌于寢東【膳宰天子曰膳夫掌君飲食膳羞者也具官饌具其官之所饌謂酒也牲也脯醢也寢路寢】樂人縣【縣鐘磬也國君無故不徹縣官縣者為燕新之】設洗篚於阼階東南當東霤壘水在東篚在洗西南肆設膳篚在其北西面【設此不言其官賤也當東霤者人君為殿屋也亦南北以堂深肆陳也膳篚者君象觚所饌也亦南陳言西面尊之異其文】司宮尊于東楹之西兩方壺左玄酒南上公尊瓦大兩有豐罍用綌若錫在尊南南上尊士旅食于門西兩圓壺【司宮天子曰小宰聽酒人之成要者也尊方壺為卿大夫士也臣道直方于東楹之西予君專此酒也玉藻曰唯君面尊玄酒在南順君之面瓦大有虞氏之尊也禮器曰君尊瓦甒豐形似豆卑而大罍用綌若錫冬夏異也在尊南在方壺之南也尊士旅食者用圓壺變于卿大夫也旅衆也士衆食謂未得正祿所謂庶人在官者也今文錫為綌】司宮筵賓于戶西東上無加席也【筵席也席用蒲筵緇布純無加席燕私禮臣屈也諸侯之官無司几筵也】

右陳饌器 記燕朝服于寢【朝服者諸侯與其羣臣日視朝之服也謂冠玄端緇帶素鞞白屨也燕於路寢相親昵也今辟雍十月行此燕禮玄冠而衣皮弁服與禮異也】亨于門外東方【亨于門外臣所掌也 本經記】唯君面尊【面猶鄉也燕禮曰司宮尊于東楹之西兩方壺左玄酒公尊瓦大兩有豐在尊南南上 玉藻】

射人告具【告事具于君射人主此禮以其或射也】小臣設公席于阼階上西鄉設加席公升即位于席西鄉【周禮諸侯酢席莞筵紛純加緇席畫純後設公席者凡禮卑者先即事尊者後也】小臣納卿大夫卿大夫皆入門右北面東上士立于西方東面北上祝史立于門東北面東上小臣師一人在東堂下南面士旅食者立于門西東上【納者以公命引而入也自

士以下從而入即位耳師長也小臣之長一人猶天子太僕正君之服位者也凡入門而右由闌東左則由闌西】公降立于阼階之東南南鄉爾卿卿西面北上爾大夫大夫皆少進【爾近也移也揖而移之近之也大夫猶北面少前】射人請賓【命當由君出也】公曰命某為賓【某大夫也】射人命賓賓少進禮辭【命賓者東面南頤禮辭辭不敏也】反命【射人以賓之辭告于君】又命之賓再拜稽首許諾【又復】射人反命【告賓許】賓出立于門外東面【當更以賓禮入】公揖卿大夫乃升就席【揖之人之也】小臣自阼階下北面請執罍者與羞膳者【執罍者執瓦大之罍也方圓壺無罍羞膳羞于公謂庶羞】乃命執罍者執罍者升自西階立于尊南北面東上【以公命于西階前命之也東上玄酒之罍為上也羞膳者從而東由堂東升自北階房中西面南上不言之者不升堂略之也】膳宰請羞于諸公卿者【小臣不請而使膳宰于卑者彌略也禮以異為敬】

右即位命賓及執事者 記與卿燕則大夫為賓與大夫燕亦大夫為賓【不以所與燕者為賓者燕為序歡心賓主敬也公父文伯飲南宮敬叔酒以露堵父為客此之謂也君但以大夫為賓者大夫卑雖尊之猶遠于君今文無則下無燕】羞膳者與執罍者皆士也【尊君也膳宰卑于士】羞卿者小膳宰也【膳宰之佐也】凡薦與羞者小膳宰也【謂於卿大夫以下也上特言羞卿者小膳宰者欲絕于賓羞賓者亦士】

射人納賓【射人為擯者也今文曰擯者】賓入及庭公降一等揖之【及至也至庭謂既入而左北面時】公升就席【以其將與主人為禮不參之也】賓升自西階主人亦升自西階賓右北面至再拜賓答再拜【主人宰夫也宰夫大宰之屬掌賓客之獻飲者也其位在洗北西面君于其臣雖為賓不親獻以其尊莫敢抗禮也至再拜者拜賓來至也天子膳夫為獻主】

右納賓【若以樂納賓見樂賓後章】

主人降洗洗南西北面【賓將從降鄉之】賓降階西東面主人辭降賓對【對答】主人北面盥坐取觚洗賓少進辭洗主人坐奠觚于筐興對賓反位【賓少進者又辭宜違其位也獻不以爵辟正主也古文觶字非觚字】主人卒洗賓揖乃升【賓每先升尊也】主人升賓拜洗主人賓右奠觚答拜降盥【主人復盥為拜手坩塵也】賓降主人辭賓對卒盥賓揖升主人升坐取觚【取觚將就瓦大酌膳】執罍者舉罍主人酌膳執罍者反罍【君物曰膳膳之言善也酌君尊者尊賓也】主人筵前獻賓賓西階上拜筵前受爵反位主人賓右拜送爵【賓既拜前受觚退反位】膳宰薦脯醢賓升筵膳宰設折俎【折俎牲體骨也鄉飲酒記曰賓俎脊脅肩肺】賓坐左執爵右祭脯醢奠爵于薦右興取肺坐絕祭膾之興加于俎坐掄手執爵遂祭酒興席末坐啐酒降席坐奠爵拜告旨執爵興主人答拜【降席席西也旨美也】賓西階上北面坐卒爵興坐奠爵遂拜主人答拜【遂拜拜既爵也】右主人獻賓 記惟公與賓有俎【主于燕其餘可以無俎】

賓以虛爵降【將酢主人】主人降賓洗南坐奠觚少進辭降主人東面對【上既言爵矣復言觚者嫌易之也大射禮曰主人西階西東面少進對今文從此以下觚皆為爵】賓坐取觚

奠于篚下盥洗【篚下篚南】主人辭洗【謙也今文無洗】賓坐奠觚于篚興對卒洗及階揖升主人升拜洗如賓禮賓降盥主人降賓辭降卒盥揖升酌膳執罍如初以酢主人于西階上主人北面拜受爵賓主人之左拜送爵【賓既南面授爵乃之左】主人坐祭不啐酒【辟正主也未薦者臣也】不拜酒不告旨【主人之義】遂卒爵興坐奠爵拜執爵興賓答拜主人不崇酒以虛爵降奠于篚【崇充也不以酒惡謝賓甘美君物也】賓降立于西階西【既受獻矣不敢安盛】射人升賓賓升立于序內東面【東西牆謂之序大射禮曰擯者以命升賓】

右賓酢主人

主人盥洗象觚升實之東北面獻于公【象觚觚有象骨飾也取象觚者東面】公拜受爵主人降自西階阼階下北面拜送爵士薦脯醢膳宰設折俎升自西階【薦進也大射禮曰宰胥薦脯醢由左房】公祭如賓禮膳宰贊授肺不拜酒立卒爵坐奠爵拜執爵興【凡異者君尊變于賓也】主人答拜升受爵以降奠于膳篚

右主人獻公 記獻公曰臣敢奏爵以聽命【授公釋此辭不敢必受之 賓媵爵于公通用若以樂見樂賓後章】

更爵洗升酌膳酒以降酢于阼階下北面坐奠爵再拜稽首公答再拜【更爵者不敢襲至尊也古文更為受】主人坐祭遂卒爵再拜稽首公答再拜主人奠爵于篚

右主人受公酢

主人盥洗升媵觚于賓酌散西階上坐奠爵拜賓賓降筵北面答拜【媵送也讀或為揚揚舉也酌散者酌方壺酒也于膳為散今文媵皆作騰】主人坐祭遂飲賓辭卒爵拜賓答拜【辭者辭其代君行酒不立飲也此降于正主酬也】主人降洗賓降主人辭降賓辭洗卒洗揖升不拜洗【不拜洗酬而禮殺】主人酌膳賓西階上拜【拜者拜其酌已】受爵于筵前反位主人拜送爵賓升席坐祭酒遂奠于薦東【遂者因坐而奠不北面也奠之者酬不舉也】主人降復位賓降筵西東南面立【賓不立于序內位彌尊也位彌尊者其禮彌卑記所謂一張一弛者是之謂與】

右主人酬賓

小臣自阼階下請媵爵者公命長【命長使選卿大夫之中長幼可使者】小臣作下大夫二人媵爵【作使也卿為上大夫不使之者為其尊】媵爵者阼階下皆北面再拜稽首公答再拜【再拜稽首拜君命也】媵爵者立于洗南西面北上序進盥洗角觶升自西階序進酌散交于楹北降阼階下皆奠觶再拜稽首執觶興公答再拜【序次第也猶代也楹北西楹之北也交而相待于西階上既酌右還而反往來以右為上】媵爵者皆坐祭遂卒觶興坐奠觶再拜稽首執觶興公答再拜媵爵者執觶待于洗南【待君命也】小臣請致者【請使一人與

二人與優君也】若君命皆致則序進奠觶于筐阼階下皆再拜稽首公答再拜媵爵者洗象觶升實之序進坐奠于薦南北上降阼階下皆再拜稽首送觶公答再拜【序進往來由尊北交于東楹之北奠于薦南不敢必君舉也大射禮曰媵爵者皆退反位】

右媵爵于公

公坐取大夫所媵觶興以酬賓賓降西階下再拜稽首公命小臣辭賓升成拜【興以酬賓就其階而酬之也升成拜復再拜稽首也先時君辭之于禮若未成然】公坐奠觶答再拜執觶興立卒觶賓下拜小臣辭賓升再拜稽首【不言成拜者為拜故下實未拜也下不輒拜禮殺也此賓拜于君之左不言之者不敢敵偶于君】公坐奠觶答再拜執觶興賓進受虛爵降奠于筐易觶洗【君尊不酌故也凡爵不相襲者也于尊者言更自敵以下言易更作新易有故之辭進受虛爵尊君也不言公酬賓于西階上及公反位者亦尊君空其文也】公有命則不易不洗反升酌膳觶下拜小臣辭賓升再拜稽首【下拜下亦未拜凡下未拜有二或禮殺或君親辭君親辭則聞命即升升乃拜是以不言成拜】公答再拜【拜于阼階上也于是賓請旅侍臣】賓以旅酬於西階上【旅序也以次序勸卿大夫飲酒】射人作大夫長升受旅【言作大夫則卿存矣長者尊先而卑後】賓大夫之右坐奠觶拜執觶興大夫答拜【賓在右者相飲之位】賓坐祭立飲卒觶不拜【酬而禮殺】若膳觶也則降更觶洗升實散大夫拜受賓拜送【言更觶卿尊也】大夫辯受酬如受賓酬之禮不祭卒受者以虛觶降奠于筐【卒猶後也大射禮曰奠于筐復位今文辯皆作徧】

右公為賓舉旅 記凡公所辭皆栗階【栗蹙也謂越等急趨君命也】凡栗階不過二等【其始升猶聚足連步越二等左右足各一發而升堂凡小臣辭升拜通用】凡公所酬既拜請旅侍臣【既拜謂自酌升拜時】

【也擯者阼階下告于公還西階下告公許旅行也請行酒于羣臣必請者不專惠也公為卿大夫士舉旅通用】

主人洗升實散獻卿于西階上【酬而後獻卿別尊卑也飲酒成于酬也】司宮兼卷重席設于賓左東上【言兼卷則每卿異席也重席重蒲筵緇布純也卿坐東上統于君也席自房來】卿升拜受觶主人拜送觶卿辭重席司宮徹之【徹猶去也重席雖非加猶為其重累去之辟君也】乃薦脯醢卿升席坐左執爵右祭脯醢遂祭酒不啐酒降席西階上北面坐卒爵興坐奠爵拜執爵興主人答拜受爵卿降復位【不酢辟君也卿無俎者燕主于羞】辯獻卿主人以虛爵降奠于筐【今文無奠于筐】射人乃升卿卿皆升就席若有諸公則先卿獻之如獻卿之禮【諸公者謂大國之孤也孤一人言諸者容牧有三監】席于阼階西北面東上無加席【席孤北面為其大尊屈之也亦因阼階西位近君近君則屈親寵苟敬私昵之坐】

右主人獻孤卿

小臣又請媵爵者二大夫媵爵如初【又復】請致者若命長致則媵爵者奠觶于筐一人待

於洗南長致致者阼階下再拜稽首公答再拜【命長致者公或時未能舉自優暇也古文云阼階下北面再拜】洗象觶升實之坐奠于薦南降與立于洗南者二人皆再拜稽首送觶公答再拜【奠于薦南者于公所用酬賓觶之處二人俱拜以其共勸君】

右再媵爵

公又行一爵若賓若長唯公所酬【一爵先媵者之下觶也若賓若長則賓禮殺矣長公卿之尊者也賓則以酬長長則以酬賓】以旅於西階上如初大夫卒受者以虛觶降奠于筐

右公為卿舉旅

主人洗升獻大夫于西階上大夫升拜受觶主人拜送觶大夫坐祭立卒爵不拜既爵主人受爵大夫降復位【既盡也不拜之者禮又殺】胥薦主人于洗北西面脯醢無胾【胾膳宰之吏也主人大夫之下先大夫薦之尊之也不于上者上無其位也胾俎實】辯獻大夫遂薦之繼賓以西東上【徧獻之乃薦略賤也亦獻而后布席也】卒射人乃升大夫大夫皆就席

右主人獻大夫

席工于西階上少東樂正先升北面立於其西【工瞽矇也謂歌諷誦詩者也凡執技藝者稱工少牢饋食禮曰皇尸命工祝樂記師乙曰乙賤工也樂正于天子樂師也凡樂掌其序事樂成則告備】小臣納工工四人二瑟小臣左何瑟面鼓執越內弦右手相入升自西階北面東上坐小臣坐授瑟乃降【工四人者燕禮輕從大夫制也面鼓者燕尚樂可鼓者在前也越瑟下孔也內弦弦為主也相扶工也後二人徒相天子大僕二人也小臣四人祭僕六人御僕十二人皆同官】工歌鹿鳴四牡皇皇者華【三者皆小雅篇也鹿鳴君與臣下及四方之賓宴講道修政之樂歌也此采其已有旨酒以召嘉賓嘉賓既來示我以善道又樂嘉賓有孔昭之明德可則倣也四牡君勞使臣之來樂歌也此采其勤苦王事念將父母懷歸傷悲忠孝之至以勞賓也皇皇者華君遣使臣之樂歌也此采其更是勞苦自以為不及欲諮謀于賢知而以自光明也】卒歌主人洗升獻工工不興左瑟一人拜受爵主人西階上拜送爵【工歌乃獻之賤者先就事也左瑟使其右一人工之長者也工拜于席】薦脯醢【輒薦之變于大夫也】使人相祭【使扶工者相其祭薦祭酒】卒爵不拜【賤不備禮】主人受爵【將復獻衆工故也】衆工不拜受爵坐祭遂卒爵辯有脯醢不祭主人受爵降奠于筐【遂猶因也古文曰卒爵不拜】

右樂賓升歌

公又舉奠觶唯公所賜以旅于西階上如初【言賜者君又彌尊賓長彌卑】卒【旅畢也】

右公為大夫舉旅

笙入立于縣中奏南陔白華華黍【以笙播此三篇之詩縣中縣中央也鄉飲酒禮曰磬南北面奏南陔白華華黍皆小雅篇也今亡其義未聞昔周之興也周公制禮作樂采時世之詩以為樂歌所以通情相風切也其有此篇明矣後世衰微幽屬尤甚禮樂之書稍稍廢棄孔子曰吾自衛反魯然後樂正雅頌各得其所謂當時在者而復重雜亂也惡能存其亡者乎且正考父校商之名頌十二篇于周大師歸以祀其先王至孔子二百年之間五篇而已此其信也】主人洗升獻笙于西階上一人拜盡階不升堂受爵降主人拜送爵階前坐祭立卒爵不拜既爵升授主人【一人笙之長者也鄉射禮曰笙一人拜于下】衆笙不拜受爵降坐祭立卒爵辯有脯醢不祭乃間歌魚麗笙由庚歌南有嘉魚笙崇丘歌南山有臺笙由儀【間代也謂一歌則一吹也六者皆小雅篇也魚麗言太平年豐物多也此采其物多酒旨所以優賓也南有嘉魚言太平君子有酒樂與賢者共之也此采其能以禮下賢者賢者纍蔓而歸之與之宴樂也南山有臺言太平之治以賢者為本也此采其愛友賢者為邦家之基民之父母既欲其身之壽考又欲其名德之長也由庚崇丘由儀今亡其義未聞】遂歌鄉樂周南關雎葛覃卷耳召南鵲巢采芣采蘋【周南召南國風篇也王后國君夫人房中之樂歌也關雎言后妃之德葛覃言后妃之職卷耳言后妃之志鵲巢言國君夫人之德采芣言國君夫人不失職也采蘋言卿大夫之妻能脩其法度也昔大王王季居于岐山之下躬行召南之教以興王業及文王而行周南之教以受命大雅云刑于寡妻至于兄弟以御于家邦謂此也其始一國耳文王作邑于豐以故地為卿士之采地乃分為二國周周公所食也召召公所食也于時文王三分天下有其二德化被于南土是以此詩有仁賢之風者屬之召南焉有聖人之風者屬之周南焉夫婦之道者生民之本王政之端此六篇者其教之原也故國君與其臣下及四方之賓燕用之合樂也鄉樂者風也小雅為諸侯之樂大雅頌為天子之樂鄉飲酒升歌小雅禮盛者可以進取燕合鄉樂者禮輕者可以逮下也春秋傳曰肆夏繁遏渠天子所以享元侯也文王大明緜兩君相見之樂也然則諸侯之相與燕升歌大雅合小雅也天子與次國小國之君燕亦如之與大國之君燕升歌頌合大雅其笙間之篇未聞】大師告樂正曰正歌備【大師上工也掌合陰陽之聲教六詩以六律為之音者也子貢問師乙曰吾聞聲歌各有宜也如賜者宜何歌也是明其掌而知之也正歌者升歌及笙各三終間歌三終合樂三終為一備備亦成也】樂正由楹內東楹之東告于君乃降復位【言由楹內者以其立于堂廉也復位位在東縣之北】

右樂賓笙間合 記若以樂納賓則賓及庭奏肆夏賓拜酒主人答拜而樂闋公拜受爵而奏肆夏公卒爵主人升受爵以下而樂闋【肆夏樂章也今亡以鐘鐃播之鼓磬應之所謂金奏也記曰入門而縣興示易以敬也卿大夫有王事之勞則奏此樂焉】升歌鹿鳴下管新宮笙入三成【新宮小雅逸篇也管之入三成謂三終也】遂合鄉樂【鄉樂周南召南六篇言遂者不間也】若舞則勺【勺頌篇告成大武之樂歌也其詩曰於鑠王師遵養時晦又曰實維爾公允師既合鄉樂萬舞而奏之所以美王侯勸有功也】

射人自阼階下請立司正公許射人遂為司正【君許其請因命用為司正君三舉爵樂備作矣將留賓飲酒更立司正以監之察儀法也射人俱相禮其事同】司正洗角觶南面坐奠于中庭升東楹之東受命西階上北面命卿大夫君曰以我安卿大夫皆對曰諾敢不安【洗奠角觶于中庭明其事以自表威儀多也君意殷勤欲留賓飲酒命卿大夫以我故安或亦其實

不主意于賓也】司正降自西階南坐取觶升酌散降南面坐奠觶右還北面少立坐取觶興坐不祭卒觶奠之興再拜稽首【右還將適觶南先西面也必從觶西為君之在東也少立者自嚴正慎其位也】左還南面坐取觶洗南面反奠于其所【反奠虛觶不空位也】

右立司正

升自西階東楹之東請徹俎降公許告于賓賓北面取俎以出膳宰徹公俎降自阼階以東【膳宰降自阼階以賓親徹若君親徹然】卿大夫皆降東面北上【以將坐降待賓反也】

右徹俎

賓反入及卿大夫皆說屨升就席公以賓及卿大夫皆坐乃安【凡燕坐必說屨屨賤不在堂也禮者尚敬敬多則不親燕安坐相親之心也】羞庶羞【謂 肝膋狗臠醢也骨體所以致敬也庶羞所以盡愛也敬之愛之厚賢之道】大夫祭薦【燕乃祭薦不敢于盛成禮也】司正升受命皆命君曰無不醉賓及卿大夫皆興對曰諾敢不醉皆反坐【皆命者命賓命卿大夫也起對必降席司正退立西序端】右燕
記有內羞【謂羞豆之實醢食糝食羞籩之實糗餌粉飧】

主人洗升獻士于西階上士長升拜受觶主人拜送觶【獻士用觶士賤也今文觶作觚】士坐祭立飲不拜既爵其他不拜坐祭立飲【他謂衆士也亦升受爵不拜】乃薦司正與射人一人司士一人執帗二人立于觶南東上【天子射人司士皆下大夫二人諸侯則上士其人數亦如之司正為上】辯獻士士既獻者立于東方西面北上乃薦士【每已獻而即位于東方蓋尊之畢獻薦于其位】祝史小臣師亦就其位而薦之【次士獻之已不變位位自在東方】主人就旅食之尊而獻之旅食不拜受爵坐祭立飲【北面酌南鄉獻之于尊南不洗者以其賤略之也亦畢獻乃薦之主人執虛爵奠子筐復位】

右主人獻士

若射則大射正為司射如鄉射之禮【大射正射人之長者也如鄉射之禮者燕為樂卿大夫宜從其禮也如者如其告弓矢既具至退中與算也納射器而張侯其告請先于君乃以命賓及卿大夫其為司正者亦為司馬君與賓為耦鄉射記曰自君射至龍旃亦其異者也薦旅食乃射者是燕射主于飲酒】

右射 記君與射則為下射袒朱襦樂作而后就物【君尊】小臣以巾授矢稍屬【君尊不搯矢】不以樂志【辟不敏也】既發則小臣受弓以授弓人【俟復發也不使大射正燕射禮】上射退于物一筈既發則答君而俟若飲君燕則夾爵【謂君在不勝之黨賓飲之如燕媵觚則又夾爵】君在大夫射則肉袒【不纁襦厭于君 本經記】君國中射則皮樹中以翺旌獲白羽與朱羽糒【國中城中也謂燕射也皮樹獸名以翺旌獲尚文德也今文皮樹為繁樹糒為縹古文無以 鄉射記詳見三射記】

賓降洗升腍觚于公酌散下拜公降一等小臣辭賓升再拜稽首公答再拜【此當言腍觚酬之禮皆用觚言觚者字之誤也古者觚字或作角旁氏由此誤耳】賓坐祭卒爵再拜稽首公答再拜賓降洗象觶升酌膳坐奠于薦南降拜小臣辭賓升成拜公答再拜賓反位【反位反席也今文曰洗象觶】

右賓腍爵于公

公坐取賓所腍觶興唯公所賜【至此又言興者明公崇禮不倦也今文觶又為觚】受者如初受酌之禮降更爵洗升酌膳下拜小臣辭升成拜公答拜乃就席坐行之【坐行之若今坐相勸酒】有執爵者【士有盥升主酌授之者】唯受于公者拜【公所賜者也其餘則否】司正命執爵者受辯卒受者興以酬士【欲令惠均】大夫卒受者以爵興西階上酬士士升大夫奠爵拜士答拜【興酬士者士立堂下無坐位】大夫立卒爵卒爵不拜實之士拜受大夫拜送士旅于西階上辯【祝史小臣旅食皆及焉】士旅酌【旅序也士以次序自酌相酬無執爵者】卒

右公為士舉旅

主人洗升自西階獻庶子于阼階上如獻士之禮辯降洗遂獻左右正與內小臣皆于阼階上如獻庶子之禮【庶子掌正六牲之體及舞位使國子修德學道世子之官也而與膳宰樂正聯事樂正亦學國子以舞左右正謂樂正僕人正也小樂正立于西縣之北僕人正僕人師僕人士立于其北北上大樂正立于東縣之北若射則僕人正僕人士陪于工後內小臣奄人掌君陰事陰令后夫人之官也皆獻于阼階上別于外內臣也獻正下及內小臣則磬人鐘人鐃人鼓人僕人之屬盡獻可知也凡獻皆薦也】

右主人獻庶子以下

無算爵【算數也爵行無次無數唯意所勸醉而止】士也有執膳爵者有執散爵者執膳爵者酌以進公公不拜受執散爵者酌以之公命所賜所賜者興受爵降席下奠爵再拜稽首公答拜【席下席西也古文曰公答再拜】受賜爵者以爵就席坐公卒爵然後飲【不敢先虛爵明此勸惠从尊者來也】執膳爵者受公爵酌反奠之【宴歡在于飲酒成其意】受賜爵者興授執散爵執散爵者乃酌行之【予其所勸者】唯受爵於公者拜卒受爵者興以酬士于西階上士升大夫不拜乃飲實爵【乃猶而也】士不拜受爵大夫就席士旅酌亦如之公有命徹罍則卿大夫皆降西階下北面東上再拜稽首公命小臣辭公答再拜大夫皆辟【命徹罍者公意殷勤必盡酒也小臣辭不升成拜明雖醉正臣禮也不言賓賓彌臣也君答拜于上示不虛受也】遂升反坐士終旅于上如初【卿大夫降而爵止于其反席卒之】無算樂【升歌間合無數也取歡而已其樂章亦然】宵則庶子執燭於阼階上司宮執燭於西階上甸人執大燭於庭閹人為大燭於門外【宵夜也燭燹也甸人掌共薪蒸者庭大燭為位廣也閹人門人也為作也作大燭以俟賓客出】

右無算爵

賓醉北面坐取其薦脯以降【取脯重得君賜】奏陔【陔陔夏樂章也賓出奏陔夏以為行節也凡夏以鐘鼓奏之】賓所執脯以賜鐘人於門內霤遂出【必賜鐘人鐘人掌以鐘鼓奏九夏今奏陔以節已用賜脯以報之明雖醉不忘禮古文賜作錫】卿大人皆出【隨賓出也】公不送【賓禮訖是臣也】

右賓出【此後有君與客燕一章及記與四方之賓燕二條見饗食燕記篇】

燕義 嘉禮九

諸侯燕禮之義君立阼階之東南南鄉爾卿大夫皆少進定位也君席阼階之上居主位也君獨升立席上西面特立莫敢適之義也【定位者為其始入蹶蹶揖而安定也】設賓主飲酒之禮也使宰夫為獻主臣莫敢與君亢禮也不以公卿為賓而以大夫為賓為疑也明嫌之義也賓入中庭君降一等而揖之禮之也【設賓主者飲酒致歡也宰夫主膳食之官也天子使膳宰為主人公孤也疑自下上至之辭也公卿尊矣復以為賓則尊與君大相近】君舉旅於賓及君所賜爵皆降再拜稽首升成拜明臣禮也君答拜之禮無不答明君上之禮也臣下竭力盡能以立功於國君必報之以爵祿故臣下皆務竭力盡能以立功是以國安而君寧禮無不答言上之不虛取於下也上必明正道以道民民道之而有功然後取其什一故上用足而下不匱也是以上下和親而不相怨也和寧禮之用也此君臣上下之大義也故曰燕禮者所以明君臣之義也【言聖人制禮因事以託政臣再拜稽首是其竭力也君答拜之是其報以祿惠也】席小卿次上卿大夫次小卿士庶子以次就位于下獻君君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子俎豆牲體薦羞皆有等差所以明貴賤也【牲體俎實也薦謂脯醢也羞庶羞也】古者周天子之官有庶子官庶子官職諸侯卿大夫士之庶子之卒掌其戒令與其教治別其等正其位【職主也庶子猶諸子也周禮諸子之官司馬之屬也卒讀皆為倅諸子副代父者也戒令致于天子之事教治修德學道位朝位也】國有大事則率國子而致於天子唯所用之若有兵甲之事則受之以車甲合其卒伍置其有司以軍法治之司馬弗正【國子諸子也軍法百人為卒五人為伍弗不也國子屬天子司馬雖有軍事不賦也】凡國之政事國子存游卒使之修德學道春合諸學秋合諸射以考其藝而進退之【游卒未仕卒也學大學也射射宮也燕禮有庶子官是以義載此以為說燕義 古者以下本在篇首今依通解移篇末】

禮書綱目卷五

卷六

欽定四庫全書

禮書綱目卷六 婺源江永撰

公食大夫禮 嘉禮十

經【鄭目錄云主國君以禮食小聘大夫之禮公食于五禮屬嘉禮】

公食大夫之禮使大夫戒各以其爵【戒猶告也告之必使同班敵者易以相親敬】上介出請入告【問所以為來事】三辭【為既先受賜不敢當】賓出拜辱【拜使者屈辱來迎已】大夫不答拜將命【不答拜為人使也將猶致也】賓再拜稽首【受命】大夫還【復于右】賓不拜送遂從之【不拜送者為從之不終事】賓朝服即位于大門外如聘【于是朝服則初時玄端如聘亦入于次俟】

右戒賓賓從 記不宿戒【食禮輕也此所以不宿戒者謂前期三日之戒申戒為宿謂前期一日】戒不速【食賓之朝夙興戒之賓則從戒者而來不復召】賓之乘車在大門外西方北面立【賓車不入門廣敬也凡賓即朝中道而往將至下行而後車還立于西方賓及位而止北面卿大夫之位當車前凡朝位賓主之間各以命數為遠近之節也】

即位具【主人也擯者俟君于大門外卿大夫士序及宰夫具其饌物皆于廟門之外】羹定【肉謂之羹定猶孰也著之者下以為節】甸人陳鼎七當門南面西上設扃冪冪若束若編【七鼎一大牢也甸人冢宰之屬兼亨人者南面西上以其為賓統于外也扃鼎扛所以舉之者也凡鼎冪盖以茅為之長則束本短則編其中央今文扃作鉉古文冪作密】設洗如饗【必如饗者先饗後食如其近者也饗禮亡燕禮則設洗于阼階東南古文饗或作鄉】小臣具槃匱在東堂下【為公盥也公尊不就洗小臣于小賓客饗食掌正君服位】宰夫設筵加席几【設筵于戶西南面而左几公不賓至授几者親設湑醬可以略此】無尊【主于食不獻酬】飲酒 飲俟于東房【飲酒清酒也 飲馘 也其俟奠于豐上也飲酒先言飲明非獻酬之酒也 飲先言 別于六飲也】凡宰夫之具饌于東房【凡非一也飲酒之具宰夫所掌也酒 不在凡中者雖無尊猶嫌在堂】

右陳器饌 記不授几【異于禮也】無阼席【公不坐】亨于門外東方【必于門外者大夫之事也東方者主陽】司宮具几與蒲筵常緇布純加萑席尋玄帛純皆卷自末【司宮大宰之屬掌宮廟者也丈六尺曰常半常曰尋純緣也萑細葦也末經所終有以識之必長筵者以有左右饌也今文萑皆為莞】宰夫筵出自東房【筵本在房宰夫敷之也天子諸侯左右房】

公如賓服迎賓于大門內【不出大門降于國君】大夫納賓【大夫謂上擯也納賓以公命】賓入門左公再拜賓辟再拜稽首【左西方賓位也辟逡遁不敢當君拜也】公揖入賓從【揖入道之】及廟門公揖入【廟禰廟也】賓入三揖【每曲揖及當碑揖相人偶】至于階三讓【讓先升】公升二等賓升【遠下人君】大夫立于東夾南西面北上【東夾南東西節也取節于夾明東于堂】士立于門東北面西上【統于門者非其正位辟賓在此】小臣東堂下南面西上宰東夾北西面南上【宰宰夫之屬也古文無南上】內官之士在宰東北西面南上【夫人之官內宰之屬也自卿大夫至此不先即位從君而入者明助君饗食賓自無事】介門西北面西上【西上自統于賓也然則承擯以下立于士西少進東上】

右迎賓即位

公當楣北鄉至再拜賓降也公再拜【楣謂之梁至再拜者興禮俟賓嘉其來也公再拜賓降矣】賓西階東北面答拜【西階東少就主君敬也】擯者辭【辭拜于下】拜也公降一等辭曰寡君從子雖將拜興也【賓降再拜公降擯者釋辭矣賓猶降終其再拜稽首興起也】賓栗階升不拜【自以已拜也栗實栗也不拾級連步趨主國君之命不拾級而下曰走】命之成拜階上北面再拜稽首【賓降拜主君辭之賓雖終拜于主君之意猶為不成】

右拜至 記卿擯由下【不升堂也】

士舉鼎去鬲於外次入陳鼎于碑南南面西上右人抽局坐奠于鼎西南順出自鼎西左人待載【入由東出由西明為賓也今文奠為委古文待為持】雍人以俎入陳于鼎南旅人南面加 于鼎退【旅人雍人之屬旅食者也雍人言入旅人言退文互相備也出入之由亦如舉鼎者匕俎每器一人諸侯官多也】大夫盥洗東南西面北上序進盥退者與進者交於前卒盥序進南面【長以長幼也序猶更也前洗南】載者西面【載者左人也亦序自鼎東西面于其前大夫匕則載之】魚腊飪【飪孰也食禮宜孰饗有腥者】載體進奏【體謂牲與腊也奏謂皮膚之理也進其理本在前下大夫體七个】魚七縮俎寢右【右首也寢右進饗也乾魚進腴多骨鯁】腸胃七同俎【以其同類也不異其牛羊腴賤也此俎實凡二十八】倫膚七【倫理也謂精理 脆者今文倫或作論】腸胃膚皆橫諸俎垂之【順其在牲之性也腸胃垂及俎拒】大夫既 奠于鼎逆退復位【事畢宜由便也士 載者又待設俎】

右舉鼎載俎

公降盥【將設醬】賓降公辭【辭其從已】卒盥公壹揖壹讓公升賓升【揖讓皆壹殺于初古文壹皆作一】宰夫自東房授醯醬【授授公也醯醬以醯和醬】公設之【以其為饌本】賓辭北面坐還而東遷所【東遷所奠之東側其故處】公立于序內西鄉【不立阼階上示親饌】賓立于階西疑立【不立階上以主君離阼也疑正立也自定之貌今文曰西階】宰夫自東房薦豆六設于醬東西上韭菹以東醯醢昌本昌本南麋鸞以西菁菹鹿鸞【醢醢有醢昌本昌蒲本菹也醢有骨謂之鸞菁 菁菹也今文鸞皆作麋】士設俎于豆南西

上牛羊豕魚在牛南腊腸胃亞之【亞次也不言絳錯俎尊也】膚以為特【直豕與腸胃東北特膚者出下牲賤】旅人取 甸人舉鼎順出奠于其所【以其空也其所謂當門】宰夫設黍稷六簋于俎西二以並東北上黍當牛俎其西稷錯以終南陳【並併也今文曰併古文簋皆作軌】大羹滹不和實于鐙宰右執鐙左執盖由門入升自阼階盡階不升堂授公以盖降出入反位【大羹滹煮肉汁也大古之羹不和無塩菜瓦豆謂之鐙宰謂大宰宰夫之長也有盖者饌自外入為風塵今文滹為汁又曰入門自阼階無升】公設之于醬西賓辭坐遷之【亦東遷所】宰夫設鉶四于豆西東上牛以西羊羊南豕豕以東牛【鉶菜和羹之器】飲酒實于觶加于豐【豐所以承觶者也如豆而卑】宰夫右執觶左執豐進設于豆東【食有酒者優賓也設于豆東不舉也燕禮記曰凡奠者于左】宰夫東面坐啟簋會各卻于其西【會簋盖也亦一一合卻之各當其簋之西】

右設正饌 記贊者盥從俎升【俎其所有事】

上贊下大夫也【上謂堂上擯贊者事相近以佐上下為名】

鉶芼牛藿羊苦豕薇皆有 【藿豆葉也苦苦茶也 莖荳之屬今文苦為芼】

贊者負東房南面告具於公【負東房負房戶而立也南面者欲得鄉公與賓也】公再拜揖食【再拜拜賓饌具】賓降拜【答公拜】公辭賓升再拜稽首【不言成拜降未拜】賓升席坐取韭菹以辯擣于醯上豆之間祭【擣猶染也今文無于】贊者東面坐取黍實于左手辯又取稷辯反于右手興以授賓賓祭之【取授以右手便也賓亦興受坐祭之于豆祭也獨云贊興優賓也少儀曰受立授立不坐】三牲之肺不離贊者辯取之壹以授賓【肺不離者???之也不言???????則祭肺也此舉肺不離而???之便賓祭也祭離肺者絕肺祭也壹猶稍也古文壹作一】賓興受坐祭【于是云賓興受坐祭重牲也賓亦每肺興受祭于豆祭】掄手扱上鉶以枲辯擣之上鉶之間祭【扱以口扱其鉶菜也掄拭也拭以巾】祭飲酒於上豆之間魚腊醬滹不祭【不祭者非食物之盛者】

右賓祭正饌

宰夫授公飯梁公設之於滹西賓北面辭坐遷之【既告具矣而又設此殷勤之加也遷之遷而西之以其東上也】公與賓皆復初位【位序內階西】宰夫膳稻于梁西【膳猶進也進稻梁者以簋】土羞庶羞皆有大盖執豆如宰【羞進也庶衆也進衆珍味可進者也大以肥美者特為饗所以祭也魚或謂之膾膾大也唯醢醬無大如宰如其進大羹滹右執豆左執盖】先者反之由門入升自西階【庶羞多羞人不足則相授于階上復出取也】先者一人升設于稻南簋西間容人【簋西黍稷西也必言稻南者明庶羞加不與正豆併也間容人者賓當從間往來也】旁四列西北上【不統于正饌者雖加自是一禮是所謂 載中別】腳以東臠臠牛炙【腳臠臠今時臠也牛曰腳羊曰臠豕曰臠皆香美之名也古文腳作香臠作熏】炙南醢以西牛臠醢牛鮓【先設醢絳之以次也內則謂鮓為膾然則膾用鮓今文鮓作鮓】鮓南羊炙以東羊臠豕炙炙南醢以西豕臠芥醬魚膾【芥醬芥實醬也內則曰膾春用葱秋用芥】衆人騰羞者盡階不升堂授以盖降出【騰當作媵送也授授先者一人】

右設加饌 記簠有盖幕【稻粱將食乃設去會于房盖以幕幕巾也今文或作幕】凡炙無醬【已有醢和】

贊者負東房告備于公【復告庶羞具者以其異饌】贊升賓【以公命命賓升席】賓坐席末取粱即稻祭于醬清間【即就也祭稻粱不以豆祭祭加宜于加】贊者北面坐辯取庶羞之大興一以授賓賓受兼壹祭之【壹壹受之而兼壹祭之庶羞輕也自祭之于腳臚之間以異饌也】

右賓祭加饌

賓降拜【拜庶羞】公辭賓升再拜稽首公答再拜賓北面自間坐左擁簠粱右執清以降【自間坐由兩饌之間也擁抱也必取粱者公所設也以之降者堂尊處欲食于階下然也】公辭賓西面坐奠于階西東面對西面坐取之栗階升北面反奠于其所降辭公【奠而後對成其意也降辭公敬也必辭公者為其尊而親臨也食侍食贊者之事】公許賓升公揖退于箱【箱東夾之前俟事之處】擯者退負東塾而立【無事】賓坐遂卷加席公不辭【贊者以告公公聽之重來優賓】賓三飯以清醬【每飯歡清以肴搗醬食正饌也三飯而止君子食不求飽不言其肴優賓】宰夫執觶 飲與其豐以進【此進漱也非為卒食為將有事緣賓意欲自潔清】賓掙手興受【受觶】宰夫設其豐于稻西【酒在東 在西是所謂左酒右】庭實設【乘皮】賓坐祭遂飲奠于豐上【飲漱】

右賓正食

公受宰夫束帛以侑西鄉立【束帛十端帛也侑猶勸也主國君以為食賓殷勤之意未至復發幣以勸之欲用深安賓也西鄉立序內位也受束帛于序端】賓降筵北面【以君將有命也北面于西階上】擯者進相幣【為君釋幣辭于賓】賓降辭幣升聽命【降辭幣主國君又命之升聽命釋許辭】降拜【當拜受幣】公辭賓升再拜稽首受幣當東楹北面【主國君南面授之當東楹者欲得君行一臣行二也】退西楹西東面立【俟主國君送幣也退不負序以將降】公壹拜賓降也公再拜【賓不敢俟成拜】介逆出【以賓事畢】賓北面揖執庭實以出【揖執者示親受】公降立【俟賓反】上介受賓幣從者訝受皮【從者府史之屬訝迎也今文曰梧受】

右侑幣

賓入門左設霤北面再拜稽首【便退則食禮未卒不退則嫌更入行拜若欲從此退】公辭【止其拜使之卒食】揖讓如初【如初入也】升賓再拜稽首公答再拜【賓拜拜主國君之厚意賓揖介入復位】賓降辭公如初【將復入】賓升公揖退于箱賓卒食會飯三飲【卒已也已食會飯三漱 也會飯謂黍稷此食黍稷則初時食稻粱】不以漿清【不復用正饌也初時食加飯用正饌此食正飯用庶羞互相成也後言清或時後用】掙手興北面坐取粱與醬以降西面坐奠于階西【示親徹也不以出者非所當得又以已得侑幣】東面再拜

稽首【卒食拜也不北面者異于辭】公降再拜【答之也不辭之使升堂明禮有終】

右卒食

介逆出賓出公送于大門內再拜賓不顧【初來揖讓而退不顧退禮略也示難進易退之義擯以賓不顧告公公乃還也】有司 三牲之俎歸於賓館【猶收也無遺之辭也三牲之俎正饌尤尊盡以歸賓尊之至也歸俎者實于筐他時有所釋故】魚腊不與【以三牲之俎無所釋故也禮之有餘為施惠不言腸胃膚者在魚腊下不與可知也古文與作豫】

右賓出

明日賓朝服拜賜于朝拜食與侑幣皆再拜稽首【朝謂大門外】訝聽之【受其言入告出報也此下大夫有士訝】

右拜賜

上大夫八豆八簋六鉶九俎魚腊皆二俎【記公食上大夫異于下大夫之數豆加葵菹蜩醢四四為列俎加鮮魚鮮腊三三為列無特】魚腸胃倫膚若九若十有一下大夫則若七若九【此以命數為差也九謂再命者也十一謂三命者也七謂一命者也九或上或下者再命謂小國之卿次國之大夫也卿則曰上大夫則曰下大夫之孤視子男】庶羞西東毋過四列【謂上下大夫也古文本為無】上大夫庶羞二十加于下大夫以雉兔鶉鴛【鴛音母】

右食上大夫禮 記上大夫蒲筵加萑蓆其純皆如下大夫純【謂三命大夫也孤為賓則莞筵紛純加纁席畫純也】上大夫庶羞酒飲漿飲庶羞可也【于食庶羞宰夫又設酒漿以之食庶羞可也以優賓】拜食與侑幣皆再拜稽首【嫌上大夫不稽首】

若不親食【謂主國君有疾病若他故】使大夫各以其爵朝服以侑幣致之【執幣以將命】豆實實於饗陳于楹外二以並北陳簋實實于筐陳于楹內兩楹間二以並南陳【陳饗筐于楹間者象授受于堂中也南北相當以食饌同列耳饗北陳者變于食饗數如豆醢芥醬從焉筐米四今文並作併】庶羞陳于碑內【生魚也魚腊從焉上大夫加鮮魚鮮腊雉兔鶉鴛不陳于堂辟正饌】庭實陳于碑外【執乘皮者也不參分庭一在南者以言歸宜近內】牛羊豕陳于門內西方東上【為其踐汙館庭使近外】賓朝服以受如受饗禮【朝服食禮輕也】無儔【以已本宜往】明日賓朝服以拜賜于朝訝聽命【賜亦謂食侑幣】

右不親食【此後有大夫相食一章見饗食燕記篇】

公食大夫義 嘉禮十一

補記

食禮公養賓養賢一也親之故愛之愛之故養之養之故食之食而弗愛猶豢之也愛而弗敬猶畜之也饗禮敬之至也食禮愛之至也饗為愛弗勝其敬食為敬弗勝其愛文質之辨也公使大夫戒必以其爵恭也已輕則卑之已重則是以其貴臨之也賓三辭聽命言是禮之貴弗敢當也弗敢當故難進也公迎賓于大門內非不能至于外也所以待人君之禮也臣之意欲尊其君子之意欲尊其父故迎賓于大門內所以順其為尊君之意也三揖至於階三讓而升堂充其意諭其誠也於廟用祭器誠之盡也君子於所尊敬不敢狎不敢狎故神明之神明之故忠臣嘉賓樂盡其心也大夫立于東夾南西面北上士立于門東北面西上小臣東堂下南面西上宰東夾北西面南上百官有司備以樂養賢也設筵加席几致安厚之義也公設醬然後宰夫薦豆菹醢士設俎公設太 然後宰夫設鉶啟簋言以身親之也賓徧祭公設梁宰夫膳稻士膳庶羞為殷勤也賓三飯梁以清漿以君子之厚已也賓必親徹有報之道也庭實乘皮侑以束帛雖備物猶欲其加厚焉也公拜送終之以敬也有司 三牲之俎歸于賓館不敢褻其餘也上大夫八豆八簋六鉶九俎庶羞二十其餘衰見是德之殺也君子言之曰愛人者使人愛之者也敬人者使人敬之者也親人者使人親之者也自卑者使人尊之者也是故公養賓國養賢其義一也未有愛之敬之親之尊之而其位不安者也未有不愛不敬不尊不親而能長有其國者也將由乎好德之君則將怡焉唯恐其不足于禮將由乎驕慢之君則將曰是食於我而已矣故禮君子所不足小人所泰餘也孔子食於少施氏將祭主人辭曰不足祭也將殮主人辭曰不足殮也孔子退曰吾食而飽少施氏有禮哉故君子難親也將親之舍禮何以哉【劉敞補】

禮書綱目卷六

卷七

欽定四庫全書

禮書綱目卷七 婺源江永撰

饗食燕記 嘉禮十二

大宗伯以嘉禮親萬民以饗燕之禮親四方之賓客【賓客謂朝聘者春官】掌客凡諸侯之禮上公三饗三食三燕若弗酌則以幣致之侯伯三饗再食再燕子男壹饗壹食壹燕【若弗酌謂君有故不親饗食燕也不饗則以酬幣致之不食則以侑幣致之 秋官

此二條總言饗食燕】

大司樂凡樂事宿縣遂以聲展之【叩聽其聲具陳次之以知完不春官】典庸器祭祀帥其屬而設筍虞陳庸器饗食亦如之【設筍虞視瞭當以縣樂器焉陳功器以華國也 同上】

笙師凡饗共其鍾笙之樂【鍾笙與鍾聲相應之笙 同上】

職金旅於上帝則共其金版饗諸侯亦如之【鉞金謂之版此版所施未聞 秋官】司几筵大饗王位設黼依依前南鄉設莞筵紛純加縹席畫純加次席黼純左右玉几【斧謂之黼其繡白黑采以絳帛為質依其制如屏風然於依前為王設席左右有几優至尊也紛如綬有文而狹者縹席削蒲莢展之編以五采若今合歡矣畫謂雲氣也次席桃枝席有次列成文】諸侯祭祀昨席莞筵紛純加縹席畫純筵國賓於牖前亦如之左彤几【鄭司農云禮記國賓老臣也為布筵席於牖前玄謂國賓諸侯來朝孤卿大夫來聘後言几者使不蒙如也朝者彤几聘者彤几 春官】

小宗伯辨六尊之名物以待賓客【鄭司農云六尊獻尊象尊壺尊著尊大尊山尊 同上

以上六條王朝饗食禮陳設】宰夫凡賓客掌其飲食【飲食燕饗也 天官】外饗掌外祭祀之割烹共其脯脩刑膾陳其鼎俎實之牲體魚腊凡賓客之飧饗饗食之事亦如之【同上】牛人饗食共其膳羞之牛【羞進也所進賓之膳燕禮小臣請執幂者與羞膳者至獻賓而膳宰設折俎王之膳羞亦猶此地官】獸人賓客共其死獸生獸【共其完者 天官】圉人賓

客共其生獸死獸之物【地官】人凡賓客共其魚之鱸羹【天官】

腊人賓客共其脯腊凡乾肉之事【同上】

亨人祭祀共大羹鉶羹賓客亦如之【大羹肉湑鄭司農云大羹不致五味也鉶羹加鹽菜矣 同上】川衡賓客共川奠【川奠籩豆之實魚鱸蟹之屬 地官】

澤虞賓客共其澤物之奠【亦籩豆之實芹茆菱芡之屬 同上】

場人賓客共其果蓏【同上】籩人賓客之事共其薦籩羞籩【謂饗燕時 天官】醢人凡祭祀共薦羞之豆實賓客亦如之【同上】醢人掌共五齊七菹凡醢物以共祭祀之齊菹凡醢醬之物賓客亦如之【齊菹醬屬醢人者皆須醢成味 同上】

鹽人賓客共其形鹽散鹽【形鹽鹽之似虎形 同上】

凌人賓客共冰【不以鑑往嫌使停膳羞

同上】春人凡饗食共其食米【饗有食米則饗禮兼燕與食 地官】

饗人凡賓客共其簠簋之實饗食亦如之【同上】

世婦賓客之事帥女宮而濯摝為盥盛【摝拭也為猶差擇 天官】寺人若有賓客之事則帥女宮而致於有司【有司謂官卿世婦】佐世婦治禮事【世婦二十七世婦 同上】世婦祭祀比其具【比次也具所濯摝及粢盛之饗】帥六宮之人共盥盛【帥世婦女御】大賓客之饗食亦如之【比帥詔相其事同春官】

舍人祭祀共簠簋實之陳之【方曰簠圓曰簋盛黍稷稻粱器】賓客亦如之【地宮

以上二十一條饗食之饌】司服饗則驚冕【饗饗食賓客驚畫以雉謂華蟲也其衣三章裳四章凡七也】凡大賓客共其衣服而奉之【春官】內司服王后之服展衣素沙【展衣以禮見王及賓客之服字當為褱素沙者今之白縛也】賓客共后之衣服及九嬪世婦凡命婦共其衣服【凡者凡女御與外命婦也外命婦唯王祭祀賓客以禮佐后得服此上服 天官】

追師掌王后之首服為九嬪及外內命婦之首服以待賓客【同上此三條饗食之服】齊僕掌金路以賓【以待賓客】朝覲宗遇饗食皆乘金路其灋儀各以其等為車送迎之節【節謂王乘車迎賓客及送相去遠近之數上公九十步侯伯七十步子男五十步司儀職曰車送拜辱又曰及出車送 夏官】巾車王后之路厭翟勒面纁總【厭翟次其羽使相迫也勒面謂以如王龍勒之韋為當面飾也纁畫文也厭翟后從王賓饗諸侯所乘 春官

此二條饗食之車】士師諸侯為賓則率其屬而蹕於王宮【謂諸侯來朝若燕饗時 秋官】

閹人大祭祀喪紀之事設門燎蹕宮門廟門凡賓客亦如之【燎地燭也蹕止行者廟在中門之內 天官】內豎若有賓客之事則為內人蹕【內人從世婦有事於廟者內豎為六宮蹕者以其掌內小事 同上】九嬪若有賓客則從后【當贊后事同上】

女史凡后之事以禮從【亦如大史之從於王

同上】大司樂祭祀王出入則令奏王夏尸出入則令奏肆

夏牲出入則令奏昭夏【三夏皆樂章名】大饗不入牲其他皆如祭祀【大饗饗賓客也不入牲牲不入亦不奏昭夏也其他謂王出入賓客出入亦奏王夏肆夏 春官已上六條入廟】大僕賓客詔王之服位詔灋儀【詔告也夏官】小臣小賓客饗食掌事如大僕之灋【同上此二條即位及法儀】內小臣若有賓客則擯詔后之禮事相九嬪之禮事正內人之禮事【擯為后傳辭有所求為詔相正者異尊卑也 天官】內宗掌宗廟之祭祀薦加豆籩【加爵之豆籩】及以樂徹則佐傳豆籩【佐傳佐外宗】賓客之饗食亦如之王后有事則從【春官】外宗小祭祀掌事賓客之事亦如之【同上】世婦祭祀詔王后之禮事【薦徹之節】相外內宗之禮事【同姓異姓之女有爵佐后者】大賓客之饗食亦如之【同上】

大饗尚賸脩而已矣【亦不饗味也此大饗饗諸侯也

郊特牲】肆師饗食授祭【授賓祭肺春官】大司馬饗食羞牲魚授

其祭【牲魚魚牲也祭謂賓所以祭也鄭司農云大司馬主進魚牲 夏官】

小司馬凡饗掌其事如大司馬之灋【同上】量人饗賓制其從獻脯燔之數量【鄭司農云從獻者肉殽從酒也玄謂燔從於獻酒之肉炙也數多少也量長短也

同上】琥璜爵【琥璜爵者天子酬諸侯諸侯相酬以此玉將幣也 禮器】內宰凡賓客之獻瑤爵皆贊【謂王同姓及二王之後來朝覲為賓客者獻謂王饗燕亞王獻賓也瑤爵所以亞

王酬賓也坊記曰陽侯殺穆侯而竊其夫人故大饗廢夫人之禮 天官】上公之禮饗禮九獻食禮九舉侯伯之禮饗禮七獻食禮七舉子男之禮饗禮五獻食禮五舉【鄭司農云舉舉樂也玄謂九舉舉牲體九飯也 秋官大行人以上十二條薦羞獻酬之節】
樂師饗食諸侯序其樂事令奏鐘鼓

令相如祭之儀【春官】大師大祭祀帥瞽登歌令奏擊拊【擊拊瞽乃歌也拊形如鼓以韋為之著之以糠】下管播樂器令奏鼓鞀【鼓鞀管乃作也特言管者貴人氣也鼓鞀言擊鞀詩云應鞀縣鼓】大饗亦如之【同上】小師大祭祀登歌擊拊【亦自有拊擊之佐大師令奏】下管擊應鼓【應鼗也應與鞀及朔皆小鼓也其所用別未聞】徹歌【於有司徹而歌雍】大饗亦如之【同上】鐘師掌金奏【金奏擊金以為奏樂之節金謂鐘及鐃】凡樂事以鐘鼓奏九夏【杜子春云王出入奏王夏尸出入奏肆夏四方賓來奏納夏客醉而出奏陔夏】饗食奏燕樂【以鐘鼓奏之 同上】鐃師凡祭祀鼓其金奏之樂饗食亦如之【同上】
韠師

掌教韠樂祭祀則帥其屬而舞之【舞之以東夷之舞】大饗亦如之【同上】
旄人賓客舞其燕樂【同上】
籥師祭祀則鼓羽籥之舞【鼓之者恒為之節】賓客饗食則亦如之【同上】
司干祭祀舞者既陳則授舞器既舞則受之【既已也受取藏之】賓饗亦如之【同上】
以上九條樂舞】膳夫凡王賓客食則徹王之胾俎【膳夫親徹胾俎胾俎最尊也其餘則其屬徹之賓客食而王有胾俎王與賓客禮食主人飲食之俎皆為胾俎見於此矣天官】
大饗既饗卷三牲之俎歸於賓館【既饗歸賓俎所以厚之也雜記 此二條徹俎歸俎】
掌客王合諸侯而饗禮則具十有二

牢庶具百物備諸侯長十有再獻【饗諸侯而用王禮之數者以公侯伯子男盡在是兼饗之莫敵用也諸侯長九命作伯者也獻公侯以下如其命數 秋官
此一條合諸侯饗禮】酒正共賓客之禮酒【禮酒王所致酒也 天官】酒人共賓客之禮酒飲酒而奉之【酒正使之也禮酒饗燕之酒飲酒食之酒此謂給賓客之稍王不親饗燕不親食而使人各以其爵以酬幣侑幣致之則從而以酒往 同上】肆師大朝覲共設匪罍之禮【設於賓客之館公食大夫禮曰若不親食使大夫以侑幣致之豆實實於罍簋食實於筐匪其筐字之誤與禮不親饗則以酬幣致之或者匪以致饗 春官 已上三條王不親饗食】酒正凡王之燕飲酒共其計酒正奉之【共其計者獻酬多少度當足也故書酒正無酒字鄭司農云正奉之酒正奉之也 天官】膳夫王燕飲酒則為獻主【鄭司農云主人當獻賓則膳夫代王為主君不敵臣也燕義曰使宰夫為獻主臣莫敢與君亢禮 同上】
大僕王燕飲則相其灋【相左右夏官】司儀合諸侯王燕則諸侯毛【謂以鬚髮坐也朝事尊尊上爵燕則親親上齒鄭司農云謂老者在上也老者二毛故曰毛
秋官】鞮鞻氏掌四夷之樂與其聲歌祭祀則獻而歌之燕亦如之【吹之以管籥為之聲 春官 以上五條王朝燕禮】酒正共后之致飲於賓客之禮醫酏糟皆使其士奉之【王致酒后致飲夫婦之義糟醫酏不沛者沛曰清不沛曰糟后致飲無醴醫酏不清者與王同體屈也亦因以少為貴士謂酒人漿人奄士 天官】漿人共夫人致飲於賓客之禮清醴醫酏糟而奉

之【亦酒正使之三物有清有糟夫人不體王得備之禮飲醴用柶者糟也不用柶者清也同上此二條后夫人致飲】諸侯之席三重大夫再重【禮器】大饗君三重席而酢焉【言諸侯相饗獻酢禮敵也】三獻之介君專席而酢焉【三獻卿大夫來聘主君饗燕之以介為賓賓為苟敬則徹重席而受酢也專猶單也郊特牲】五獻之尊門外缶門內壺君尊瓦甒【五獻子男之饗禮也壺大一石瓦甒五斗缶大小未聞也易曰尊酒簋贰用缶禮器】反坫出尊【反坫反爵之坫也出尊當尊南也惟兩君為好既獻反爵於其上禮君尊於兩楹之間明堂位】邦君為兩君之好有反坫【好謂好會坫在兩楹之間獻酬飲畢則反爵於其上論語】豆諸公十有六諸侯十有二上大夫八下大夫六【豆之數謂諸侯相食及食大夫公食大夫禮曰宰夫自東房薦豆六設於醬東此食下大夫而豆六則其餘著矣聘禮致饗餼於上大夫堂上八豆設於戶西則凡致饗餼堂上之豆數亦如此周禮公之豆四十其東西夾各十有二侯伯之豆三十有二其東西夾各十子男之豆三十有四其東西夾各六禮器】諸公相為賓饗食如將幣之儀【饗食速賓君如有故不親饗食則使大夫以酬幣侑幣致之】賓之拜禮拜饗食【秋官司儀】公於賓壹食再饗燕無常數賓介皆明日拜於堂上介壹食壹饗【詳見聘禮】其介為介【同上】司儀諸公之臣相為國客饗食如將幣之儀【同上】若不親食使大夫各以其爵朝服致之以侑幣如致饗無償致饗以酬幣亦如之【同上】凡致禮皆用其饗之加籩豆各以其爵朝服【同上】大夫來使無罪饗之過則餼之【同上】有大客後至則先客不饗食致之【同上】無饗者無饗禮【同上】公與客燕【謂四方之使者】曰寡君有不腆之酒以請吾子之與寡君須臾焉使某也以請【君使人戒客辭也禮使人各以其爵寡鮮也猶言少德謙也腆善也上介出請入告古文腆皆作殄今文皆曰不腆酒無之】對曰寡君君之私也君無所辱賜於使臣臣敢辭【上介出答主國使者辭也私謂獨受恩厚也君無所為辱賜於使臣謙不敢當也敢者怖懼用勢決之辭】寡君固曰不腆使某固以請寡君君之私也君無所辱賜於使臣臣敢固辭【重傳命固如故】寡君固曰不腆使某固以請某固辭不得命敢不從【許之也於是出見主國使者辭以見許為得命今文無使某】致命曰寡君使某有不腆之酒以請吾子之與寡君須臾焉【親相見致君命辭也】君貺寡君多矣又辱賜於使臣臣敢拜賜命【貺賜也猶愛也敢拜賜命從使者拜君之賜命猶謙不必辭也燕禮】燕則上介為賓賓為苟敬宰夫獻【詳聘禮】若與四方之賓燕則公迎之於大門內揖讓升【四方之賓謂來聘者也自戒至於拜至皆如公食亦告饌具而後公即席小臣請執帟請羞者乃迎賓也】賓為苟敬席於阼階之西北面有胥不嘑肺不啐酒其介為賓【苟且也假也主國君饗時親進醴於賓今燕又宜獻焉人臣不敢褻煩尊者至此升堂而辭讓欲以臣禮燕為恭敬也於是席之如獻諸公之位言苟敬者賓實主國所宜敬也胥折俎也不嘑啐似若尊者然也介門西北面西上公降迎上介以為賓揖讓升如初禮主人獻賓獻公既獻苟敬乃媵觚羣臣即位如燕也】無膳尊無膳爵【降尊以就卑也燕禮記】若與四方之賓燕媵爵曰臣受賜矣臣請贊執爵者【受賜謂公卿者酬之至燕主人事賓之禮殺賓降洗升媵觶於公答恩惠也】相者對曰吾子無自辱焉【辭之也對答也亦告公以公命答之也】有房中之樂【弦歌周南召南之詩而不用鐘磬之節也謂之房中者后夫人之所諷誦以事其君子同上以上十八條諸侯饗食燕賓公食大夫別有正篇】上公夫人致饗大牢食大牢侯伯夫人致饗大牢【凡夫人之禮皆使下大夫致之於子男云膳視致饗言夫人致膳於小國君以致饗之禮則是不復饗也饗有壺酒秋官掌客此一條夫人致饗食】

大夫於賓一饗一食上介若食若饗若不親饗則公作大夫致之以酬幣致食以侑幣【詳聘禮】大夫相食親戒速【記異於君者也速召也先就告之歸具既具復自召之】迎賓於門外拜至皆如饗拜【饗大夫相饗之禮也今亡古文饗或作鄉】降盥受醬涪侑幣束錦也皆自阼階降堂受授者升一等【皆者謂受醬受涪受幣也侑用束錦大夫文也降堂謂止階上今文無束】賓止也【主人三降賓不從】賓執梁與涪之西序端【不敢食於尊處】主人辭賓反之巷加席主人辭賓反之辭幣降一等主人從【從辭賓降】受侑幣再拜稽首主人送幣亦然【敵也】辭於主人降一等主人從【辭謂辭其臨已食】卒食徹於西序端【亦親徹】東面再拜降出【拜亦拜卒食】其他皆如公食大夫之禮若不親食則公作大夫朝服以侑幣致之【作使也大夫有故君必使其同爵者為之致禮列國之賓來榮辱之事君臣同】賓受於堂無僨【與受君禮同】

公食大夫禮以上二條大夫相饗食【詩小雅魚麗【集傳曰此燕饗通用之樂歌】

南有嘉魚【此亦燕饗通用之樂】南山有臺【此亦燕饗通用之樂】

蓼蕭【諸侯朝於天子天子與之燕以示慈惠故歌此詩】湛露【此亦天子燕諸侯之詩】

彤弓【此天子燕有功諸侯而錫以弓矢之樂歌也】菁菁者莪【此亦燕飲賓客之詩】

桑扈【此亦天子燕諸侯之詩】瓠葉【此亦燕飲之詩】虢公晉侯朝王王饗醴命之宥【王之覲羣后始則行饗禮先置醴酒示不忘古飲燕則命以幣物宥助也所以助歡敬之意言備設】皆賜玉五穀馬三匹非禮也【雙玉為穀】王命諸侯名位不同禮亦異數不以禮假人【侯而與公同賜是借人禮莊十八年左氏傳】晉文公獻楚俘於王鄭伯傅王用平

禮也【傳相也以周平王享晉文侯仇之禮享晉侯】王享醴命晉侯宥【既饗又命晉侯助以束帛以將厚意僖二十八年左氏傳】齊侯使管夷吾平戎於王【平和也】王以上卿之禮饗管仲管仲辭曰臣賤有司也有天子之二守國高在【國子高子天子所命為齊守臣皆上卿也莊二十二年高傒始見經僖二十八年國歸父乃見傳歸父之父曰懿仲高傒之子曰莊子不知今當誰也】若節春秋來承王命何以禮焉【節時也】陪臣敢辭【諸侯之臣曰陪臣】王曰舅氏【伯舅之使故曰舅氏】余嘉乃勲應乃懿德謂督不忘往踐乃職無逆朕命【功勲美德可謂正而不可忘者不言位而言職者管仲位卑而執齊政故欲以職尊之】管仲受下卿之禮而還【管仲不敢以職自高卒受本位之禮】君子曰管仲之世祀也宜哉讓不忘其上詩曰愷悌君子神所勞矣【詩大雅愷樂也悌易也言樂易君子為神所勞來故世祀也管仲之後於齊沒不復見傳亦舉其無驗僖十二 years 左氏傳】晉侯使士會平王室定王享之原襄公相禮【原襄公周大夫相佐也】殽烝【烝升也升殽於俎】武子私問其故【享當體薦而殽烝故怪問之武士會諡季其字】王聞之召武子曰季氏而弗聞乎王享有體薦【享則半解其體而薦之所以示共儉】宴有折俎【體解節折升之於俎物皆可食所以示慈惠也】公當享卿當宴王室之禮也【公謂諸侯】武子歸而講求典禮以修晉國之法【傳言典禮之廢久宣十六年左氏傳】晉侯使隨會聘於周【晉侯晉文公之孫成公之子景公儒也隨會晉正卿士蔣之孫成伯之子士季武子也】定王饗之殽烝【定王周襄王之孫頃王之子定王榆也烝升也升折俎之殽】原公相禮【原公周卿士原襄公也相佐也】范子私於原公【范子隨會也食采於隨范故或曰隨會或曰范會】曰吾聞王室之禮無毀折今此何禮也王見其語也召原公而問之原公以告王召士季【季范子字】曰子弗聞乎禘郊之事則有全烝【全烝全具牲體而升之也凡禘郊皆血牲也】王公立飫則有房烝

【王天子公諸侯也禮之立成者為飫房大俎也詩云籩豆大房謂半解其體升之房也】親戚宴饗則有殽烝【殽烝升體解節折之俎謂之折俎也】今女非他也而叔父使士季實來修舊德以獎王室【獎成也】唯是先王之宴禮欲以貽女【貽遺也】余一人敢設飫禘焉【飫半體禘全體】忠非親禮而干舊職以亂前好【忠厚也親禮親戚宴享之禮也舊職故事前好先王之好也】且夫唯戎翟則有體薦【體委與之也】夫戎翟冒沒輕儻貪而不讓【冒抵觸也沒入也儻進退上下無列也】其血氣不治若禽獸焉其適來班貢不俟馨香嘉味也【適往也班賦也】故坐諸門外而使舌人體委與之【舌人能達異方之志象胥之官也】女今我王室之一二兄弟以時相見【兄弟晉也】將蘇協典禮以示民訓則【協和也典常也】無亦擇其柔嘉【無亦不亦也柔脆也嘉美也】選其馨香潔其酒醴品其百籩【籩竹器容四升其實棗栗糗餌之屬】修其簠簋【修備也簠簋黍稷之器】奉其犧象【犧犧尊飾以犧牛象象尊以象骨為之飾】出其尊【尊皆受酒之器】陳其鼎俎【俎設於左牛羊豕為一列魚腊腸胃為一列膚特於東】靜其巾冪【靜潔也巾冪所以覆尊】敬其祓除【祓除猶掃除也】體解折節而共飲食之於是乎有折俎加豆【加豆謂既食之後所加之豆也其實芹菹兔醢之屬】酬幣宴貨【酬報也聘有酬賓束帛之禮其宴束帛為好謂之燕貨】以示容合好【示容儀合和好也】胡有子然其效戎翟也【子然全體之貌】夫王公諸侯之有飫也將以講事成章【講講軍旅議大事也章章程也】建大德昭大物也【大德大功大物戎器也】故立成禮烝而已【立成不坐也升其備物而已】飫以顯物宴以食好【顯物示物備也】歲飫不倦【歲行飫禮不至於解倦】時宴不淫【一時之間必有宴禮不至於淫湎】月會【會計也計一月之經用】旬修【脩十日之中所成為者】日完不忘【日完一日之所為不忘不忘其禮也】服物昭庸采飾顯明【庸功也冕服旗章所以昭有功采色之飾所以顯明德也】文章比象【黼黻錦繡之文章也比象比文以象山龍華蟲之屬】周旋序順【周旋容止也序次也各以次比順於禮也】容貌有崇【崇飾也容止可觀也】威儀有則【則法也其威可畏其儀可度也】五味實氣【味以實氣氣以行志】五色精心【五色之章所以異賢不肖精其心也】五聲昭德【昭德謂政平者其樂和也亦謂見其樂知其德】五義紀宜【五義謂父義母慈兄友弟恭子孝也】飲食可饗和同可觀【殽烝故可饗以可去不曰和一心不二曰同和同之用行則德義可觀】財用可嘉【酬幣宴貨以將厚意故可嘉也】則順而建德【則法也建立也】古之善禮者將焉用全烝武子遂不敢對而退歸乃講聚三代之典禮【三代夏殷周也】於是乎修執秩以為晉法【秩常也可奉執以為常法者晉文公蒐于被廬作執秩之法自靈公以來闕而不用故武子修之以為晉國之法國語周語】晉侯使鞏朔獻齊捷於周王使委於三吏【委屬也三吏三公也三公者天子之吏也】禮之如侯伯克敵使大夫告慶之禮降於卿禮一等王以鞏伯宴而私賄之使相告之曰非禮也勿籍【相相禮者籍書也王畏晉故私宴賄以慰鞏朔成二年左氏傳】楚子入饗於鄭【為鄭所饗】九獻【用上公之禮九獻酒而禮畢】庭實旅百【庭中所陳品數百也】加籩豆六品【食物六品加於籩豆籩豆禮食品】饗畢夜出【僖二十二年左氏傳】宋成公如楚還入於鄭鄭伯將享之問禮於皇武子【皇武子鄭卿】對曰宋先代之後也於周為客天子有事膳焉【有事祭宗廟也膳祭肉尊之故賜以祭胾】有喪拜焉【宋弔周喪王特拜謝之】豐厚可也鄭伯從之享宋公有加禮也【禮物事事加厚善鄭能尊先代僖二十四年左氏傳】晉公子重耳如楚楚成王以周禮享之九獻庭實旅百【成王楚武王之孫文王之子熊頤也九獻上公之享禮也庭實庭中之陳也百舉成數也周禮上

公出入所享饗餼九牢米百有二十筥醯醢百有二十饗禾三十車芻薪倍禾】公子欲辭【不敢當禮】子犯曰天命也君其饗之【天命天使之也饗食也】亡人而國薦之【薦進也以國君之禮薦進之】非敵而君設之【非體敵而設之如人君也】非天誰啓之心【晉語】宋公享晉侯於楚丘請以桑林【桑林殷天子之樂名】荀罃辭【辭讓之】荀偃士句曰諸侯宋魯於是觀禮【宋王者後魯以周公故皆用天子禮樂故可觀】魯有禘樂賓祭用之【禘三年大祭則作四代之樂別祭群公則用諸侯樂】宋以桑林享君不亦可乎【言俱天子樂也】舞師題以旌夏【師樂師也旌夏大旌也題識也以大旌表識其行列】晉侯懼而退入於房【旌夏非常卒見之人心偶有所畏】去旌卒享而還【襄十年左氏傳】定公會齊侯於夾谷孔丘相【相會儀也】齊侯將享公孔丘謂梁丘據曰齊魯之故吾子何不聞焉【故舊典】事既成矣【會事成】而又享之是勤執事也且犧象不出門嘉樂不野合【犧象酒器犧尊象尊也嘉樂鐘磬也】享而既具是棄禮也若其不具用秕稗也【秕穀不成者稗草之似穀者言享不具禮穢薄若秕稗】用秕稗君辱棄禮名惡子盍圖之夫享所以昭德也不昭不如其已也乃不果享【孔子知齊侯懷詐故以禮距之定十年左氏傳】王使周公閱來聘饗有昌歜白黑形鹽【昌歜菖蒲菹白熬稻黑熬黍形鹽鹽形象虎】辭曰國君文足昭也武可畏也則有備物之饗以象其德薦五味羞嘉穀鹽虎形【嘉穀熬稻黍也以象其文也鹽虎形以象武也】以獻其功吾何以堪之【僖三十年左氏傳】衛甯武子來聘公與之宴爲賦湛露及彤弓【非禮之常公特命樂人以示意故言爲賦湛露彤弓詩小雅】不辭又不答賦使行人私焉【私問之】對曰臣以為肄業及之也【肄習也魯人失所賦甯武子佯不知此其愚不可及】昔諸侯朝正於王【朝而受政教也】王宴樂之於是乎賦湛露則天子當陽諸侯用命也【湛露曰湛湛露斯匪陽不晞晞乾也言露見日而乾猶諸侯稟天子命而行】諸侯敵王所愾而獻其功【敵猶當也愾恨怒也】王於是乎賜之彤弓一彤矢百旅弓矢千以覺報宴【覺明也謂諸侯有四夷之功王賜之弓矢又為歌彤弓以明報功宴樂】今陪臣來繼舊好【方論天子之樂故自稱陪臣】君辱貺之其敢干大禮以自取戾【貺賜也干犯也戾罪也文四年左氏傳】穆叔如晉報知武子之聘也【武子聘在元年】晉侯享之金奏肆夏之三不拜【肆夏樂曲名周禮以鐘鼓奏九夏其二曰肆夏一名樊三曰韶夏一名遏四曰納夏一名渠蓋擊鐘而奏此三夏曲】工歌文王之三又不拜【工樂人也文王之三大雅之首文王大明緜】歌鹿鳴之三三拜【小雅之首鹿鳴四牡皇皇者華】韓獻子使行人子員問之【行人通使之官】曰子以君命辱於敝邑先君之禮藉之以樂以辱吾子【藉薦也】吾子舍其大而重拜其細敢問何禮也對曰三夏天子所以享元侯也使臣弗敢與聞【元侯牧伯】文王兩君相見之樂也臣不敢及【及與也文王之三皆稱文王之德受命作周故諸侯會同以相樂】鹿鳴君所以嘉寡君也敢不拜嘉【晉以叔孫為嘉賓故歌鹿鳴之詩取其我有嘉賓叔孫奉君命而來嘉叔孫乃所以嘉魯君】四牡君所以勞使臣也敢不重拜【詩言使臣乘四牡駢駢然行不止勤勞也晉以叔孫來聘故以此勞之】皇皇者華君教使臣曰必諮於周【皇皇者華君遣使臣之詩言忠臣奉使能光輝君命如華之皇皇然又當諮於忠信以補已不及忠信為周其詩曰周爰諮諏周爰諮謀周爰諮度周爰諮詢言必於忠信之人諮此四事】臣聞之訪問於善為咨【問善道】咨親為詢【問親戚之義】咨禮為度【問禮宜】咨事為諏【問政事】咨難為謀【問患難】臣獲五善敢不重拜【五善謂諮詢度諏謀襄四年左氏傳】叔孫穆子聘於晉【穆子魯卿叔孫得臣之子豹也】晉悼公饗之【以饗禮禮之】樂及鹿鳴之三而後拜樂三【及至也悼公先為穆子作肆夏文王

各三篇而不拜至作鹿鳴之三篇而後拜樂三也】晉侯使行人問焉【行人官名掌賓客之禮傳曰韓獻子使行人子員問焉】曰子以君命鎮撫敝邑【鎮重也撫安也】不腆先君之禮以辱從者【腆厚也稱從者謙也】不腆之樂以節之【以樂節禮也】吾子舍其大而加禮於其細敢問何禮也【大謂肆夏文王細謂鹿鳴也】對曰寡君使豹來繼先君之好君以諸侯之故貺使臣以大禮【貺賜也】夫先樂金奏肆夏繁遏渠天子所以饗元侯也【金奏以鐘奏樂也肆夏一名樊韶夏一名遏納夏一名渠此三夏曲也禮有九夏周禮鐘師掌以鐘鼓奏九夏元侯牧伯也鄭司農云九夏皆篇名頌之類也載在樂章樂崩亦從而亡是以頌不能具也】夫歌文王大明縣則兩君相見之樂也【文王大明縣大雅之首文王之三也此三篇皆美文王武王有聖德天所輔祚其徵應符驗著見於天乃天命非人力也周公欲昭先王之德於天下故兩君相見得以為樂也】皆昭令德以合好也皆非使臣之所敢聞也臣以為肄業及之故不敢拜【肄習也以為樂人自習修其業而及之故不敢拜】今伶簫咏歌及鹿鳴之三【伶伶人樂官也簫樂器編管為之言樂人以簫作此三篇之聲與歌者相應也詩云簫管備舉】君之所以貺使臣臣敢不拜貺夫鹿鳴君之所以嘉先君之好也敢不拜嘉【嘉善也鹿鳴曰我有嘉賓德音孔昭是為嘉善先君之好也】四牡君之所以章使臣之勤也敢不拜章【四牡君勞使臣之樂也章著也言臣奉命勞勤於外述叙其情以歌樂之所以著其勤勞也】皇皇者華君教使臣曰每懷靡及【皇皇者華君遣使臣之樂也皇皇猶煌煌也懷私為每懷靡無也言臣奉使當榮顯其君如華之色煌煌然既受命當思在公每人人懷其私於事將無所及】諏謀度詢必咨於周敢不拜教【此六者皆君之所以教臣也訪問於善為咨忠信為周言諏謀度詢必當咨之於忠信之人】臣聞之曰懷和為每懷【鄭司農云和當為私】咨才為諏【才當為事傳曰咨事為諏】咨事為謀【事當為難傳曰咨難為謀】咨義為度【咨禮義為度度亦謀也】咨親為詢【詢親戚之謀】忠信為周【言當咨之於忠信之人也詩云周爰咨詢】君貺使臣以大禮重之以六德敢不重拜【六德謂誨也謀也度也詢也咨也周也魯語】晉卻至如楚聘楚子享之子反相為地室而縣焉【縣鐘鼓也】卻至將登【登堂】金奏作於下【擊鐘而奏樂】驚而走出子反曰日云莫矣寡君須矣吾子其入也賓曰君不忘先君之好施及下臣貺之以大禮重之以備樂【貺賜也】如天之福兩君相見何以代此下臣不敢【言此兩君相見之禮】子反曰如天之福兩君相見無亦唯是一矢以相加遺焉用樂【言兩君戰乃相見無用此樂】寡君須矣吾子其入也賓曰【傳諸交讓得賓主辭者多曰賓主以明之】若讓之以一矢禍之大者其何福之為世之治也諸侯聞於天子之事則相朝也【王事間缺則修私好】於是乎有享宴之禮享以訓共儉【享有體薦設几而不倚爵盈而不飲肴乾而不食所以訓共儉】宴以示慈惠【宴則折俎相與共食】共儉以行禮而慈惠以布政政以禮成民是以息百官承事朝而不夕【不夕言無事】此公侯之所以扞城其民也【扞蔽也言享宴結好鄰國所以蔽扞其民】天下有道則公侯能為民干城而制其腹心亂則反之【略其武夫以為己腹心爪牙】今吾子之言亂之道也不可以為法然吾子主也臣敢不從遂入卒事【成十二:left氏傳】衛侯饗苦成叔【成叔卻豐】甯惠子相【相佐禮惠子甯殖】苦成叔傲甯子曰苦成家其亡乎古之為享食也以觀威儀省禍福也故詩曰兕觥其觶旨酒思柔【詩小雅言君子好禮飲酒皆思柔德雖設兕觥觶然不用以兕角為觶所以罰不敬觶陳設之貌】彼交匪傲萬福來求【彼之交於事而不惰傲乃萬福之所求】今夫子傲取禍之道也【為十七年卻氏亡成十四年左氏傳】宋人享趙文子叔向為介司馬置折俎禮也【折俎體解節折升之於俎合卿享宴之禮故曰禮

也周禮司馬掌會同之事】仲尼使舉是禮也以為多文辭【宋向戌自美弭兵之意欲逆趙武趙武叔向因享宴之會展賓主之辭故仲尼以為多文辭襄二十七年左氏傳】趙孟叔孫豹曹大夫入於鄭【會罷過鄭】鄭伯兼享之子皮戒趙孟【戒享期】禮終趙孟賦瓠葉【受所戒禮畢而賦詩瓠葉詩小雅義取古人不以微薄廢禮雖瓠葉兔首猶與賓客享之】子皮遂戒穆叔且告之【告以趙孟賦瓠葉】穆叔曰趙孟欲一獻【瓠葉詩義取薄物而以獻酬知欲一獻】子其從之子皮曰敢乎【言不敢】穆叔曰夫人之所欲也又何不敢【夫人趙孟】及享具五獻之籩豆於幕下【朝聘之制大國之卿五獻】趙孟辭【趙孟自以今非聘鄭故辭五獻】私於子產【私語】曰武請於冢宰矣【冢宰子皮請謂賦瓠葉】乃用一獻趙孟為客禮終乃宴【卿會公侯享宴皆折俎不體薦昭元年左氏傳】季孫宿如晉晉侯享之有加籩【籩豆之數多於常禮】武子

退使行人告曰小國之事大國也苟免於討不敢求貺【貺賜也】得貺不過三獻【周禮大夫三獻】今豆有加下臣弗堪無乃戾也【懼以不堪為罪】韓宣子曰寡君以為驩也【以加禮致驩心】對曰寡君猶未敢【未敢當此加也】況下臣君之隸也敢聞加貺固請徹加而後卒事晉人以為知禮重其好貨【宴好之貨昭六年左氏傳】晉羊舌肸聘於周【肸晉大夫羊舌肸之子叔向之名】發幣於大夫及單靖公【發其禮幣於周大夫次及單靖公靖公王卿士單襄公之孫頃公之子】靖公享之儉而敬【享禮薄而身敬也】賓禮贈餞視其上而從之【賓禮所以賓待叔向之禮也送之以物曰贈以飲食曰餞餞郊禮也上位在靖公上也視之不敢踰也】燕無私【無私好貨及籩豆之加也】送不過郊【至郊而反亦言無私】語說昊天有成命【語宴語所及者說樂也昊天有成命周頌篇名周語】邦君為兩君之好有反玷管氏亦有反玷管氏而知禮孰不知禮【此諸侯之禮而管仲僭之不知禮也論語】公父文伯飲南宮敬叔酒【敬叔魯大夫孟僖子之子懿子之弟南宮适也】以露睹父為客【睹父魯大夫客上客也禮飲尊一人以為客】羞鼈焉小【羞進也】睹父怒【怒鼈小也】相延食鼈【延進也衆賓相進以食鼈】辭曰將使鼈長而後食之遂出【此睹父詞】文伯之母聞之怒曰吾聞之先子【先子先舅季悼子也】曰祭養尸饗養上賓【言祭祀之禮尊養尸饗宴之禮養上賓也】鼈於何有【於何有猶何禮有鼈也】而使夫人怒也【魯語】射鄉食饗所以正交接也【樂記】

食饗之禮所以仁賓客也【仁猶存也射鄉食饗存生之善者也仲尼燕居】仲尼燕居子張子貢言游侍縱言至於禮子曰慎聽之女三人者吾語女禮猶有九焉大饗有四焉苟知此矣雖在畎畝之中事之聖人已兩君相見揖讓而入門入門而縣興揖讓而升堂升堂而樂闋升歌清廟下管象武夏籥序興陳其薦俎序其禮樂備其百官如此而後君子知仁焉行中規還中矩和鸞中采齊客出以雍徹以振羽是故君子無物而不在禮矣入門而金作示情也升歌清廟示德也下而管象示事也是故古之君子不必親相與言也以禮樂相示而已【猶有九焉吾所欲語女餘有九也但大饗有四大饗謂饗諸侯來朝者也四者謂金再作升歌清廟下管象也事之謂立置於位也聖人已者是聖人也縣興金作也金再作者獻主君又作也下謂堂下也象舞武舞也夏籥文舞也序更也堂下吹管舞文武之樂更起也知仁焉知禮樂所存也采齊雍振羽皆樂章也振羽振鸞及雍金作示情也賓主人各以情相示也金性內明象人情也示德也相示以德也清廟頌文王之德示事也相示以事也武象武王之大事也同上】賓入大門而奏肆夏示易以敬也【賓朝聘者易和說也】卒爵而樂闋孔子屢歎之【美此

禮也】奠酬而工升歌發德也【以詩之義發明賓主之德】歌者在上匏竹在下貴人聲也
【匏笙也】樂由陽來者也禮由陰作者也陰陽和而萬物得【得得其所郊特性】
大饗君三重席而酢焉三獻之介君專席而酢焉此降尊以就卑也【同上】子云敬則用祭
器【祭器簠豆簋鉶之屬也有敬事於賓客則用之謂饗食也盤盂之屬為燕器】故君子不
以菲廢禮不以美沒禮【言不可以其薄不及禮而不行禮亦不可以其美過禮而去禮禮主
敬廢滅之是不敬】故食禮主人親饋則客祭主人不親饋則客不祭故君子苟無禮雖美不
食焉詩云既醉以酒既飽以德【言君子饗燕非專為酒肴亦以觀威儀講美德】以此示民
民猶爭利而忘義【坊記】子云禮非祭男女不交爵【交爵謂相獻酬】以此坊民陽侯猶
殺繆侯而竊其夫人【同姓也以貪夫人之色至殺君而立其國未聞】故大饗廢夫人之禮
【大饗饗諸侯來朝者也夫人之禮使人攝同上】
大夫而饗君非禮也【其饗君由強且富也郊特性】

禮書綱目卷七

卷八

欽定四庫全書

禮書綱目卷八 婺源江永撰

養老 嘉禮十三

補

凡養老五帝憲【憲法也養之為法其德行】三王有乞言【有讀為又又從之求善言可施行也】五帝憲養氣體而不乞言有善則記之為惇史三王亦憲既養老而后乞言亦微其禮皆有惇史【惇史史惇厚者也微其禮者依違言之求而不切也 內則】有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶老於左學周人養國老於東膠養庶老於虞庠虞庠在國之西郊【皆學名也異者四代相變耳或上西或上東或貴在國或貴在郊上庠右學大學也在西郊下庠左學小學也在國中王宮之東東序東膠亦大學在國中王宮之東西序虞庠亦小學也在西郊膠之言糾也庠之言養也周之小學為有虞氏之庠制是以名庠云其立鄉學亦如之膠或作絃】有虞氏深衣而養老夏后氏燕衣而養老殷人縞衣而養老周人玄衣而養老【凡養老之服皆其時與羣臣燕之服有虞氏質深衣而已夏而改之尚黑而黑衣裳殷尚白而縞衣裳周則兼用之玄衣素裳其冠則牟追章甫委貌也諸侯以天子之燕服為朝服燕禮曰燕朝服服是服也王者之後亦以燕服為之魯季康子朝服以縞僭宋之禮也天子皮弁以日視朝也 王制】凡養老有虞氏以燕禮夏后氏以饗禮殷人以食禮周人修而兼用之【兼用之備陰陽也凡飲養陽氣食養陰氣陽用春夏陰用秋冬 同上】

凡三王養老皆引年【已而引戶校年當行復除也若人衆多非賢者不可皆養 同上】

右通論歷代養老

五十養於鄉六十養於國七十養於學達於諸侯【天子諸侯養老同也國國中小學在王宮之左學大學也在郊小學在國中大學在郊此殷制明矣 王制】天子視學大昕鼓徵衆至然後天子至乃命有司行事興秩節祭先師先聖焉有司卒事反命始之養也適東序釋奠於先老遂設三老五更羣老之席位焉適饌省醴養老之珍具遂發咏焉退修之反登歌清廟既歌而語下管象舞大武大合衆以事有司告以樂闋王乃命公侯伯子男及羣吏曰反養老幼於東序【詳見下傳】

食三老五更於大學天子袒而割牲執醬而饋執爵而醕冕而總干【詳見下傳】凡養老乞言合語之禮皆小樂正詔之於東序【養老乞言養老人之賢者因從乞善言可行者也合語謂鄉射鄉飲酒大射燕射之屬也鄉射記曰古者於旅也語】語說命乞言皆大樂正授數【語說合語之說也數篇數 文王世子】凡大合樂必遂養老【大合樂謂春入學舍菜合舞秋

頒學合聲於是時也天子則視學焉遂養老者謂用其明日也鄉飲酒鄉射之禮明日乃息司正徵唯所欲以告於先生君子可也是養老之象類同上】羅氏中春羅春鳥獻鳩以養國老【春鳥蟄而始出者若今南郡黃雀之屬是時鷹化為鳩鳩與春鳥變舊為新宜以養老助生氣夏官】仲秋養衰老授几杖行糜粥飲食【助老氣也行猶賜也月令】外饗邦饗耆老則掌其割烹之事【王制曰周人養國老於東膠養庶老於虞庠天官】酒正饗耆老共其酒無酌數【要以醉為度同上】甸人若饗耆老共其食【地官】遣人門關之委積以養老孤【門關以養老孤人所出入易以取餼廩也同上】司門以其財養死政之老與其孤【財所謂門關之委積也死政之老死國事者之父母也孤其子同上】

右養老禮天子視學大昕鼓徵所以警衆也【早昧爽擊鼓以召衆也警猶起也周禮凡用樂大胥以鼓徵學士】衆至然後天子至乃命有司行事興秩節祭先師先聖焉【興猶舉也秩常也節猶禮也使有司攝其事舉常禮祭先師先聖不親祭之者視學觀禮耳非為彼報也】有司卒事反命【告祭畢也祭畢天子乃入】始之養也【又之養老之處凡大合樂必遂養老是以往焉言始始立學也】適東序釋奠於先老【親奠之者已所有事也】遂設三老五更羣老之席位焉【三老五更各一人也皆年老更事致仕者也天子以父兄養之示天下之孝弟也名以三五者取象三辰五星天所因以照明天下者羣老無數其禮亡以鄉飲酒禮言之席位之處則三老如賓五更如介羣老如衆賓】適饌省醴養老之珍具【親視其所有也】遂發咏焉退修之以孝養也【發咏謂以樂納之退修之謂既迎而入獻之以醴獻畢而樂闋】反登歌清廟【反謂獻羣老畢皆升就席也反就席乃席工於西階上歌清廟以樂之】既歌而語以成之也言父子君臣長幼之道合德音之致禮之大者也【既歌謂樂正告正歌備也語談說也歌備而旅旅而說父子君臣長幼之道說合樂之所美以成其意鄉射記曰古者於旅也語】下管象舞大武大合衆以事達有神興有德也【象周武王伐紂之樂也詩維清奏象舞是也以管播其聲又為之舞皆於堂下衆謂所合學士達有神明天授命周家之有神也興有德美文王武王有德師樂為用前歌後舞】正君臣之位貴賤之等焉而上下之義行矣【由清廟與武也】有司告以樂闋【闋終也告君以歌舞之樂終此所告者謂無算樂】王乃命公侯伯子男及羣吏曰反養老幼於東序終之以仁也【羣吏鄉遂之官王於燕之末而命諸侯時朝會在此者各反養老如此禮是終其仁心孝經說所謂諸侯歸各帥於國大夫勤於朝州里於邑是也】是故聖人之記事也【謂記序前代事也】慮之以大【謂先本於孝弟之道】愛之以敬【謂省其所以養老之具】行之以禮【謂親迎之如見父兄】修之以孝養【謂親獻之薦之】紀之以義【謂既歌而語之】終之以仁【謂又以命諸侯歸於國復自行之】是故古之人一舉事而衆皆知其德之備也古之君子舉大事必慎其終始而衆安得不喻焉【言其為之本末露見盡可得而知也喻猶曉也】兌命曰念終始典於學【兌當為說說命書篇名殷高宗之臣傳說之所作典常也念事之終始常於學學禮義之府文王世子】食三老五更於大學天子袒而割牲執醬而饋

執爵而醕冕而總干所以教諸侯之弟也【割牲制俎實也醕食罷飲也干盾也冕而總干親在舞位以樂侑食也教諸侯之弟次事親樂記註云三老五更互言之耳皆老人更知三德五事者也冕而總干親在舞位也周名大學曰東膠】是故鄉里有齒而老窮不遺強不犯弱衆不暴寡此由大學來者也【祭義】王者父事三老兄事五更者何欲陳孝悌之德以示天下

也故雖天子必有尊也言有父也必有先也言有兄也天子臨辟雍親袒割牲尊三老父象也竭忠奉几杖授安車濡輪恭綏執授兄事五更寵接禮交加客謙敬順貌也【白虎通】饗禘有樂而食嘗無樂陰陽之義也凡飲養陽氣也凡食養陰氣也故春禘而秋嘗春饗孤子秋食耆老其義一也【郊特牲】

伊耆氏共王之齒杖【王之所以賜老者之杖鄭司農云謂年七十當以王命受杖者今時亦命之為王杖玄謂王制曰五十杖於家六十杖於鄉七十杖於國八十杖於朝 秋官】八十拜君命一坐再至瞽亦如之九十使人受【命謂君不親饗食必以其禮致之】五十異粢六十宿肉七十貳膳八十常珍九十飲食不離寢膳飲從於遊可也【粢糧也貳副也遊謂出入上觀】六十歲制七十時制八十月制九十日修唯絞紵衾冒死而后制【絞紵衾冒一日二日而可為者】五十始衰六十非肉不飽七十非帛不煖八十非人不煖九十雖得人不煖矣【煖溫】五十杖於家六十杖於鄉七十杖於國八十杖於朝九十者天子欲有問焉則就其室以珍從【尊養之】七十不俟朝【大夫士之老者揖君則退】八十月告存【每月致膳】九十日有秩【秩常也有常膳】五十不從力政六十不與服戎七十不與賓客之事八十齊喪之事弗及也【力稍衰也力政城道之役也與及也八十不齊則不祭也子代之祭是謂宗子不孤】五十而爵【賢者命為大夫】六十不親學【不能備弟子禮】七十致政唯衰麻為喪【致政還君事 王制】八十者一子不從政九十者其家不從政【同上】父之齒隨行兄之齒鴈行朋友不相踰【廣敬也謂於塗中】輕任并重任分斑白者不提挈【皆謂以與少者雜色曰斑】君子耆老不徒行庶人耆老不徒食【徒猶空也徒行謂無車徒食謂無肉 同上】天子巡守諸侯待於竟天子先見百年者【問其國君以百年者所在而往見之】八十九十者東行西行者弗敢過西行東行者弗敢過欲言政者君就之可也【弗敢過者謂道經之則見之】壹命齒於鄉里再命齒於族三命不齒族有七十者弗敢先【此謂鄉射飲酒時也齒者謂以年次立若坐也三命列國之卿也不復齒席之於賓東不敢先族之七十者謂既一人舉觶乃入也雖非族亦然承齒乎族故言族爾】七十者不有大故不入朝若有大故而入君必與之揖讓而后及爵者【謂致仕在家者其入朝君先與之為禮而后揖卿大夫士 祭義】大夫七十而致事【致其所掌之事於君而告老】若不得謝【謝猶聽也君必有命勞苦辭謝之其有德尚壯則不聽耳】則必賜之几杖行役以婦人適四方乘安車自稱曰老夫【几杖婦人安車所以養其身體也安車坐乘若今小車也老夫老人稱也亦明君尊賢春秋傳曰老夫耄矣】於其國則稱名【君雖尊異之自稱猶若臣】越國而問焉必告之以其制【鄰國來問必問於老者以答之制法度 曲禮】

右尚齒 昔者有虞氏貴德而尚齒夏后氏貴爵而尚齒殷人貴富而尚齒周人貴親而尚齒【貴謂燕賜有加於諸臣也尚謂有事尊之於其黨也臣能世祿曰富舜時多仁聖有德後德則在小官】虞夏殷周天下之盛王也未有遺年者年之貴乎天下久矣次乎事親也【言其先老也】是故朝廷同爵則尚齒七十杖於朝君問則席八十不俟朝君問則就之而弟達乎朝廷矣【同爵尚齒老者在上也君問則席為之布席於堂上而與之言凡朝位立於庭魯哀公問於孔子命席不俟朝君揖之即退不待朝事畢也就之就其家也老而致仕君或不許異其禮而已】行肩而不併不錯則隨見老者則車徒辟斑白者不以其任行乎道路而弟達乎道路矣【錯鴈行也父黨隨行兄黨鴈行車徒辟乘車步行皆辟老人也斑白者髮雜色也任所

擔持也不以任少者代之】居鄉以齒而老窮不遺強不犯弱衆不暴寡而弟達乎州巷矣【老窮不遺以鄉人尊而長之雖貧且無子孫無棄忘也一鄉者五州巷猶閭也】古之道五十不為甸徒頒禽隆諸長者而弟達乎獫狁矣【四井為邑四邑為丘四丘為甸甸六十四井也以為軍田出役之法五十始衰不從力役之事也頒之言分也隆猶多也及田者分禽多其老者謂竭作未五十者春獵曰獫冬獵曰狁也】軍旅什伍同爵則尚齒而弟達乎軍旅矣【什伍士卒部曲也少儀曰軍尚左卒尚右】孝弟發諸朝廷行乎道路至乎州巷放乎獫狁修乎軍旅衆以義死之而弗敢犯也【死之死此孝弟之禮 祭義

按家語哀公問於孔子曰二三大夫皆勸寡人使隆敬於高年何也孔子對之如此】

子云長民者朝廷敬老則民作孝【長民謂天子諸侯也 坊記】齊宣王問於春子曰寡人欲行孝弟之義為之有道乎【宣王齊君陳敬仲之後也】春子曰昔者衛聞之樂正子【樂正子曾子弟子也】曰文王之治岐也五十者杖於家六十者杖於鄉七十者杖於朝見君揖杖【朝當為國揖當為去】八十者杖於朝見君揖杖【揖挾也】君曰趨見客無俟朝【不欲久停老者也古者七十致仕來者客之也】以朝乘車輜輪御為僕送至於家而孝弟之行義達於諸侯【乘車安車也言輜輪明其小也御君之御也】九十杖而朝見君建杖【建樹也】君曰趨見無俟朝以朝車送之舍天子重鄉養【舍館也重猶尊也養以禮食之也】卜筮巫醫御於前祝嘏祝哽以食乘車輜輪胥與就膳徹【胥樂官也就成也胥成膳徹謂以樂食之也】送至於家君如有欲問明日就其室以珍從而孝弟之義達於四海【明日旦日】此文王之治岐也君如欲行孝弟之大義盍反文王之治岐【尚書大傳】臣年七十懸車致仕者臣以執事趨走為職七

十陽道極耳目不聰明是以退去避賢者所以長廉恥也懸車示不用也卿大夫老有盛德者留賜之几杖不備之以筋力之禮在家者三分其祿以一與之所以厚賢也【白虎通】

禮書綱目卷八

卷九

<經部,禮類,通禮之屬,禮書綱目

欽定四庫全書

禮書綱目卷九 婺源江永撰

鄉射禮 嘉禮十四

經【鄭目錄云州長春秋以禮會民而射於州序之禮謂之鄉者州鄉之屬鄉大夫或在焉不改其禮射於五禮屬嘉禮】

鄉射之禮

右篇目 周禮州長春秋以禮會民而射於州序【序州黨之學也會民而射所以正其志也地官】鄉大夫三年則大比考其德行道藝而興賢者能者退而以鄉射之禮五物詢衆庶一曰和二曰容三曰主皮四曰和容五曰興舞【以用也行鄉射之禮而以五物詢於衆民鄭司農云詢謀也問於衆庶寧復有賢能者和謂閨門之內行也容謂容貌也主皮謂善射射所以觀士也故書舞為無杜子春讀和容為和頌謂能為樂也無讀為舞謂能為六舞玄謂和載六德容包六行庶民無射禮因田獵分禽則有主皮主皮者張皮射之無侯也主皮和容興舞則六藝之射與禮樂與當射之時民必觀焉因詢之也孔子射於矍相之圃蓋觀者如堵牆射至於司馬使子路執弓矢出誓射者又使公罔之裘序點揚觶而語詢衆庶之儀若是乎同上】司徒命鄉簡不帥教者以告元日習射上功【將習禮以化之使之觀焉鄉禮春秋射王制】鄉師正歲稽其鄉器黨共射器鄉共吉凶禮樂之器【射器者弓矢楅中之屬黨正主集為之為州長或時射於此黨也禮樂之器若州黨賓射之器者地官】

主人戒賓賓出迎再拜主人答再拜乃請【主人州長也鄉大夫若在焉則稱鄉大夫也戒猶警也語也出迎出門也請告也告賓以射事不言拜辱此為習民以禮樂不主為賓已也不謀賓者時不獻賢能事輕也今郡國行此禮以季春周禮鄉老及鄉大夫三年正月獻賢能之書於王退而以鄉射之禮五物詢衆庶諸侯之鄉大夫既貢士於其君亦用此禮射而詢衆庶乎】賓禮辭許主人再拜賓答再拜主人退賓送再拜【退還射宮省錄射事】無介【雖先飲酒主於射也其序賓之禮略】

右戒賓 記大夫與則公士為賓【不敢使鄉人加尊於大夫也公士在官之士鄉賓主用處士】使能不宿戒【能者敏於事不待宿戒而習之】

乃席賓南面東上【不言於戶牖之間者此射於序】衆賓之席繼而西【言繼者甫欲習衆

庶未有所殊別】席主人於阼階上西面【阼階東階】尊於賓席之東兩壺斯禁左玄酒皆加勺篚在其南東肆【斯禁禁切地無足者也設尊者北面西曰左尚之也肆陳也】設洗於阼階東南南北以堂深東西當東榮水在洗東篚在洗西南肆【榮屋翼也】縣於洗東北西面【此縣謂磬也縣於東方辟射位也但縣磬者半天子之士無鐘】

右設席陳器 記尊綌冪賓至徹之【以綌為冪取其堅潔】蒲筵緇布純【筵席也純緣】西序之席北上【衆賓純於賓】

乃張侯下綱不及地武【侯謂所射布也綱持舌繩也武迹也中人之迹尺二寸侯象人綱即其足也是以取數焉】不繫左下綱中掩束之【事未至也】乏參侯道居侯黨之一西五步【容謂之乏所以為獲者御矢也侯道五十步此乏去侯北十丈西三丈】右張侯 記【凡侯天子熊侯白質一條入三射記篇】鄉侯上个五尋【上个謂最上幅也八尺曰尋上幅用布四丈】中十尺【方者也用布五丈今官布幅廣二尺二寸旁削一寸考工記曰梓人為侯廣與崇方謂中也】侯道五十弓弓二寸以為侯中【言侯中所取數也量侯道以狸步而云弓者侯之所取數宜於射器也正二寸骹中之博也今文改弓為肱也】倍中以為躬【躬身也謂中之上下幅也用布各二丈】倍躬以為左右舌【謂上个也居兩旁謂之个左右出謂之舌】下舌半上舌【半者半其出於躬者也用布三丈所以半上舌者侯人之形類也上个象臂下个象足中人張臂八尺張足六尺五八四十五六三十以此為衰也凡鄉侯用布十六丈數起侯道五十弓以計道七十弓之侯用布二十五丈二尺道九十弓之侯用布三十六丈】

羹定【肉謂之羹定猶孰也謂狗孰可食】主人朝服乃速賓賓朝服出迎再拜主人答再拜退賓送再拜【速召也射賓輕也戒時玄端今郡國行此鄉射禮皮弁服與禮為異】賓及衆賓遂從之

右速賓 記其牲狗也【狗取擇人】亨於堂東北【鄉飲酒義曰祖陽氣之所發也】

及門主人一相出迎於門外再拜賓答再拜【相主人家臣擯贊傳命者】揖衆賓【差卑禮宜異】主人以賓揖先入【以猶與也先入入門右西面】賓厭衆賓衆賓皆入門左東面北上賓少進【引手曰厭少進差在前也今文皆曰揖衆賓】主人以賓三揖皆行及階三讓主人升一等賓升【三讓而主人先升者是主人先讓於賓不俱升者賓客之道進宜難也】主人阼階上當楣北面再拜賓西階上當楣北面答再拜【主人拜賓至此堂】

右迎賓 記立者東面北上【賓黨】

主人取爵於上篚以降【將獻賓也】賓降【從主人也】主人阼階前西面坐奠爵興辭降【重以主人事煩賓也今文無阼階】賓對【對答】主人坐取爵興適洗南面坐奠爵於篚下盥洗【盥手又洗爵致潔敬也古文盥皆作浣】賓進東北面辭洗【必進者方辭洗宜違位也言東北面則位南於洗矣】主人坐奠爵於篚興對賓反位【反從降之位也鄉飲酒曰當西序東面】主人卒洗壹揖壹讓以賓升賓西階上北面拜洗主人阼階上北面奠爵遂答

拜乃降【乃降將更盥也今文壹皆作一】賓降主人辭降賓對主人卒盥壹揖壹讓升賓升西階上疑立【疑止也有矜莊之色】主人坐取爵實之賓席之前西北面獻賓【進於賓也凡進物曰獻】賓西階上北面拜主人少退【少退猶少辟也】賓進受爵於席前復位【復位西階上位】主人阼階上拜送爵賓少退薦脯醢【薦進】賓升席自西方【賓升降由下也】乃設折俎【牲體枝解節折以實俎也】主人阼階東疑立賓坐左執爵右祭脯醢奠爵於薦西興取肺坐絕祭【卻左手執本右手絕末以祭也肺離上為本下為末】尚左手嚙之【嚙嘗也右手在下絕以授口嘗之】興加於俎坐挽手執爵遂祭酒興席末坐啐酒【挽拭也啐嘗也古文挽作說】降席坐奠爵拜告旨【降席席西也旨美也】執爵興主人阼階上答拜賓西階上北面坐卒爵興坐奠爵遂拜執爵興【卒盡】主人阼階上答拜

右獻賓 記獻用爵其他用觶【爵尊不可褻也】

凡舉爵三作而不徒爵【謂獻賓獻大夫獻工皆有薦 獻大夫獻工通用】薦脯用籩五臠祭半臠橫於上醢以豆出自東房臠長尺二寸【脯用籩籩宜乾物也醢以豆豆宜濡物也臠猶脰也為記者異耳祭橫於上殊之也於人為縮臠廣狹未聞也古文臠為𦍋今文或作植 凡薦通用】俎由東壁自西階升【狗既亨載於東方】賓俎脊脅肩肺主人俎脊脅臂肺肺皆離皆右體也進腍【以骨名肉貴骨也賓俎用肩主人用臂尊賓也離猶揅也腍膚理也進理謂前其本右體周所貴也若有尊者則俎其餘體也 賓酢章主人俎於此考之】

以爵拜者不徒作【以爵拜謂拜既爵徒猶空也作起也不空起言起必酢主人 獻大夫通用】

賓以虛爵降【將洗以酢主人】主人降【從賓也降立阼階東西面當東序】賓西階前東面坐奠爵興辭降主人對賓坐取爵適洗北面坐奠爵於篚下興盥洗【賓北面盥洗自外來】主人阼階之東南面辭洗賓坐奠爵於篚興對主人反位【反位從降之位也主人辭洗進也】賓卒洗揖讓如初升主人拜洗賓答拜興降盥如主人之禮賓升賓爵主人之席前東南面酢主人【酢報】主人阼階上拜賓少退主人進受爵復位賓西階上拜送爵薦脯醢主人升席自北方乃設折俎祭如賓禮【祭薦俎及酒亦嚙啐】不告旨【酒已物】自席前適阼階上北面坐卒爵興坐奠爵遂拜執爵興賓西階上北面答拜【自由也啐酒於席末由前降便也】主人坐奠爵於序端阼階上再拜崇酒賓西階上答再拜【序端東序頭也崇充也謝酒惡相充滿也】

右賓酢【主人之俎見獻賓章】

主人坐取觶於篚以降【將酬賓】賓降主人奠觶辭降賓對東面立主人坐取觶洗賓不辭洗【不辭洗以其將自飲】卒洗揖讓升賓西階上疑立主人實觶酬之阼階上北面坐奠觶遂拜執觶興【酬勸酒】賓西階上北面答拜主人坐祭遂飲卒觶興坐奠觶遂拜執觶興賓西階上北面答拜主人降洗賓降辭如獻禮【以將酌已】升不拜洗【酬禮殺也】賓西階上立主人實觶賓之席前北面【酬賓】賓西階上拜主人坐奠觶於薦西賓辭坐取觶以興反位【賓辭辭主人復親酌已】主人阼階上拜送賓北面坐奠觶於薦東反位【酬酒不舉】主人揖降賓降東面立於西階西當西序【主人將與衆賓為禮賓謙不敢獨居堂】右酬

賓記凡奠者於左【不飲不欲其妨】將舉者於右【使其舉也】
將舉者於右見下一人舉觶二人舉觶章】

主人西南面三拜衆賓衆賓皆答壹拜【三拜示徧也壹拜不備禮也獻賓畢乃與衆賓拜敬不能竝】主人揖升坐取爵於序端降洗升實爵西階上獻衆賓衆賓之長升拜受者三人【長其老者言三人則衆賓多矣國以多德行道藝為榮何常數之有乎】主人拜送【拜送爵於衆賓右】坐祭立飲不拜既爵授主人爵降復位【既盡】衆賓皆不拜受爵坐祭立飲【自第四以下又不拜受爵禮彌略】每一人獻則薦諸其席【諸於】衆賓辯有脯醢【薦於其位】主人以虛爵降奠於筐【不復用】

右獻衆賓記衆賓之長一人辭洗如賓禮【尊之於其黨】
樂正與立者齒【謂其飲之次也尊樂正同於賓黨鄉飲酒記曰與立者皆薦以齒】

揖讓升賓厭衆賓升衆賓皆升就席一人洗舉觶於賓【一人主人之吏】升實觶西階上坐奠觶拜執觶興賓席末答拜舉觶者坐祭遂飲卒觶興坐奠觶拜執觶興賓答拜降洗升實之西階上北面【將進奠觶】賓拜【拜受觶】舉觶者進坐奠觶於薦西【不授賤不敢也】賓辭坐取以興【若親受然】舉觶者西階上拜送賓反奠於其所舉觶者降

右一人舉觶【將舉者於右見上章】

大夫若有遵者則入門左【謂此鄉之人為大夫者也謂之遵者方以禮樂化民欲其遵法之也其士也於旅乃入鄉大夫士非鄉人禮亦然主於鄉人耳今文遵為僎】主人降【迎大夫於門內也不出門別於賓】賓及衆賓皆降復初位【不敢居堂俟大夫入也初位門內東面】主人揖讓以大夫升拜至大夫答拜主人以爵降大夫降主人辭降大夫辭洗如賓禮席於尊東【尊東明與賓夾尊也不言東上統於尊也】升不拜洗主人實爵席前獻於大夫大夫西階上拜進受爵反位主人大夫之右拜送大夫辭加席主人對不去加席【辭之者謙不以已尊加賢者也不去者大夫再重席正也賓一重席】乃薦脯醢大夫升席設折俎祭如賓禮不嚙肺不啐酒不告旨西階上卒爵拜主人答拜【凡所不者殺於賓也大夫升席由東方】右獻大夫記若有諸公則如賓禮大夫如介禮無諸公則大夫如賓禮【尊卑之差諸公大國之孤也】樂作大夫不入【後樂賢也】

大夫降洗【將酢主人也大夫若衆則辯獻長乃酢】主人復阼階降辭如初卒洗主人盥【盥者雖將酌自飲尊大夫不敢褻】揖讓升大夫授主人爵於兩楹間復位主人實爵以酢於西階上坐奠爵拜大夫答拜坐祭卒爵拜大夫答拜主人坐奠爵於西楹南再拜崇酒大夫答拜主人復阼階揖降【將升賓】大夫降立於賓南【雖尊不奪人之正禮】主人揖讓以賓升大夫及衆賓皆升就席

右大夫酢

席工於西階上少東樂正先升北面立於其西【言少東者明樂正西側階不欲大東辟射位】工四人二瑟瑟先相者皆左何瑟面鼓執越內弦右手相入升自西階北面東上工坐相者坐授瑟乃降【瑟先賤者先就事也相扶工也面前也鼓在前變於君也執越內弦右手相由便也越瑟下孔所以發越其聲也前越言執者內有弦結手入之淺也相者降立西方】笙入立於縣中西面【堂下樂相從也縣中磬東立西面】乃合樂周南關雎葛覃卷耳召南鵲巢采芣采蘋【不歌不笙不間志在射略於樂也不略合樂者周南召南之風鄉樂也不可略其正也昔大王王季文王始居岐山之陽躬行以成王業至三分天下乃宣周南召南之化本其德之初刑于寡妻至于兄弟以御于家邦故謂之鄉樂用之房中以及朝廷饗燕鄉射飲酒此六篇其風化之原也是以合金石絲竹而歌之】工不興告於樂正曰正歌備【不興者瞽矇禮略也】樂正告於賓乃降【樂正降者堂上正樂畢也降立西階東北面】主人取爵於上筐獻工大師則為之洗【尊之也君賜大夫樂又從之以其人謂之大師也】賓降主人辭降【大夫不降尊也】工不辭洗卒洗升實爵工不興左瑟一人拜受爵【左瑟辟主人授爵也一人無太師則工之長者】主人阼階上拜送爵薦脯醢使人相祭【人相者】工飲不拜既爵授主人爵衆工不拜受爵祭飲辯有脯醢不祭【祭飲不興受爵坐祭坐飲】不洗遂獻笙於西階上【不洗者賤也衆工而不洗矣而衆笙不洗者笙賤於衆工正君賜之猶不洗也】笙一人拜於下盡階不升堂受爵主人拜送爵階前坐祭立飲不拜既爵升授主人爵衆笙不拜受爵坐祭立飲辯有脯醢不祭主人以爵降奠於筐反升就席【亦揖讓以賓升衆賓皆升】

右樂賓 記三笙一和而成聲【三人吹笙一人吹和凡四人也爾雅曰笙小者謂之和】獻工與笙取爵於上筐既獻奠於下筐其笙則獻諸西階上【奠爵於下筐不復用也今文無與笙】

主人降席自南方【禮殺由便】側降【賓不從降】作相為司正禮辭許諾主人再拜司正答拜【爵備樂畢將留賓以事為有解倦失禮立司正以監之察儀法也詩云既立之監或佐之史】主人升就席

右立司正

司正洗觶升自西階由楹內適阼階上北面受命於主人【洗觶者當酌以表其位顯其事也楹內楹北】西階上北面請安於賓【傳主人之辭】賓禮辭許司正告於主人遂立於楹間以相拜【相謂贊主人及賓相拜之辭】主人阼階上再拜賓西階上答再拜皆揖就席【為已安也今文揖為升】司正實觶降自西階中庭北面坐奠觶興退少立【奠觶表其位也少立自修正慎其位也古文曰少退立】進坐取觶興反坐不祭遂卒觶興坐奠觶拜執觶興洗北面坐奠於其所【今文坐取觶無進又曰坐奠之拜】興少退北面立於觶南【立觶南亦其故擯位】未旅【旅序也未以次序相酬以將射也旅則禮終也】

右司正舉觶 記司正既舉觶而薦諸其位【薦於觶南】

三耦俟於堂西南面東上【司正既立司射選弟子之中德行道藝之高者以為三耦使俟事於此】司射適堂西袒決遂取弓於階西兼挾乘矢升自西階階上北面告於賓曰弓矢既具有司請射【司射主人之吏也於堂西袒決遂者主人無次隱蔽而已袒左免衣也決猶闔也以象骨為之著右大擘指以鉤弦闔體也遂射鞬也以韋為之所以遂弦者也其非射時則謂之拾拾斂也所以蔽膚斂衣也方持弦矢曰挾乘矢四矢也大射曰挾乘矢於弓外見鏃於弣右巨指鉤弦古文挾皆作接】賓對曰某不能為二三子許諾【言某不能謙也二三子謂眾賓已下】司射適阼階上東北面告於主人曰請射於賓賓許司射降自西階階前西面命弟子納射器【弟子賓黨之年少者也納內也射器弓矢決拾旌中籌福豐也賓黨東面主人之吏西面】乃納射器皆在堂西賓與大夫之弓倚於西序矢在弓下北括眾弓倚於堂西矢在其上【上堂西廉矢亦北括】主人之弓矢在東序東【亦倚於東序也矢在其下北括】司射不釋弓矢遂以比三耦於堂西三耦之南北面命上射曰某御於子命下射曰子與某子射【比選次其才相近者也古文曰某從於子】司正為司馬【兼官由便也立司正為涖酒爾今射司正無事】司馬命張侯弟子說束遂繫左下綱【事至也今文說皆作稅】司馬又命獲者倚旌於侯中【為當負侯也獲者亦弟子也謂之獲者以事名之】獲者由西方坐取旌倚於侯中乃退樂正適西方命弟子贊工遷樂於下【當辟射也贊佐也遷徙也】弟子相工如初入降自西階阼階下之東南堂前三筈西面北上坐【筈矢也今文無南】樂正北面立於其南【北面鄉堂不與工序也】右請射記【子路延射事見後二人舉觶章】三耦者使弟子司射前戒之【弟子賓黨之少者也前戒謂先射請戒之】司射之弓矢與扑倚於西階之西【便其事也】司射既袒決遂而升司馬階前命張侯遂命倚旌【著並行也古文曰遂命獲者倚旌】凡挾矢於二指之間橫之【二指謂左右手之第二指此以食指將指挾之】司射在司馬之北司馬無事不執弓【以不主射故也】旌各以其物【旌總名也雜帛為物大夫士之所建也言各者鄉射或於庠或於榭】無物則以白羽與朱羽糅杠長三仞以鴻脰韜上二尋【無物者謂小國之州長也其鄉大夫一命其州長士不命不命者無物此翻旌也翻亦所以進退眾者糅者雜也杠槓也七尺曰仞鴻鳥之長脰者也八尺曰尋今文糅為縮韜為翻】

司射猶挾乘矢以命三耦各與其耦讓取弓矢拾【猶有故之辭拾更也】三耦皆袒決遂有司左執弣右執弦而授弓【有司弟子納射器者也凡納射器者皆執以俟事】遂授矢【受於納矢而授之】三耦皆執弓搯三而挾一个【未違俟處也搯捷也捷於帶右】司射先立於所設中之西南東面三耦皆進由司射之西立於其西南東面北上而俟司射東面立於三耦之北搯三而挾一个【為當誘射也固東面矣復言之者明却時還】揖進當階北面揖及階揖升堂揖豫則鉤楹內堂則由楹外當左物北面揖【鉤楹繞楹而東也序無室可以湊也周立四代之學於國而又以有虞氏之庠為鄉學鄉飲酒義曰主人迎賓於庠門外是也庠之制有堂有室也今言豫者謂州學也讀如成周宣榭災之榭周禮作序凡屋無室曰榭宜從榭州立榭者下鄉也左物下物也今文豫為序序乃夏后氏之學亦非也】及物揖左足履物不方足還視侯中俯正足【方猶併也志在於射左足至右足還併足則是立也南面視侯之中乃俯視併正其足】不去旌【以其不獲】誘射【誘猶教也】將乘矢【將行也行四矢象有事於四方】執弓不挾右執弦【不挾矢盡】南面揖揖如升射降出於其位南適堂西改取一个挾之【改更也不射而挾之示有事也今文曰適序西】遂適階西取扑搯之以反位

【扑所以撻犯教者書云扑作教刑】

右誘射 記射自楹間物長如筈其間容弓距隨長武【自楹間者謂射於庠也楹間中央東西之節也物謂射時所立處也謂之物者物猶事也君子所有事也長如筈者謂從畫之長短也筈矢幹也長三尺與跬相應射者進退之節也間容弓者上下射相去六尺也距隨者物橫畫也始前足至東頭為距從足來合而南面為隨武跡也尺二寸】序則物當棟堂則物當楣【是制五架之屋也正中曰棟次曰楣前曰屨】楚扑長如筈刊本尺【刊其可持處】射者有過則撻之【過謂矢揚中人凡射時矢中人當刑之今鄉會衆賢以禮樂勸民而射者中人本意在侯去傷害之心遠是以輕之以扑撻於中庭而已書曰扑作教刑】

司馬命獲者執旌以負侯【欲令射者見侯與旌深有志於中】獲者適侯執旌負侯而俟【俟待也今文侯為立】司射還當上耦西面作上耦射【還左還也作使也】司射反位上耦揖進上射在左竝行當階北面揖及階揖上射先升三等下射從之中等【中猶間也】上射升堂少左下射升上射揖竝行【竝併也併東行】皆當其物北面揖及物揖皆左足履物還視侯中合足而俟司馬適堂西不決遂袒執弓【不決遂因不射不備】出於司射之南升自西階鉤楹由上射之後西南面立於物間右執簫南揚弓命去侯【鉤楹以當由上射者之後也簫弓末也大射曰左執弣揚猶舉也】獲者執旌許諾聲不絕以至於乏坐東面偃旌興而俟【聲不絕不以宮商不絕而已鄉射威儀省偃猶仆也】司馬出於下射之南還其後降自西階反由司射之南適堂西釋弓襲反位立於司射之南【圍下射者明為二人命去侯】司射進與司馬交於階前相左由堂下西階之東北面視上射命曰無射獲無獵獲上射揖司射退反位【射獲謂矢中人也獵矢從旁】乃射上射既發挾弓矢而后下射射拾發以將乘矢【后後也當從后】獲者坐而獲【射者中則大言獲獲得也射講武田之類是以中為獲也】舉旌以宮偃旌以商【宮為君商為臣聲和律呂相生】獲而未釋獲【但大言獲未釋其算】卒射皆執弓不挾南面揖揖如升射【不挾亦右執弦如司射】上射降三等下射少右從之中等竝行上射於左【降下】與升射者相左交於階前相揖由司馬之南適堂西釋弓說決拾襲而俟於堂西南面東上三耦卒射亦如之司射去扑倚於西階之西升堂北面告於賓曰三耦卒射【去扑乃升不敢佩刑器即尊者之側】賓揖【以揖然之】司射降搢扑反位

右初射獲而未釋獲 記命負侯者由其位【於賤者禮略】上射於右【於右物射】始射獲而未釋獲復釋獲復用樂行之【君子取人以漸】凡適堂西皆出入於司馬之南唯賓與大夫降階遂西取弓矢【尊者宜逸由便也】

司馬適堂西袒執弓由其位南進與司射交於階前相左升自西階鉤楹自右物之後立於物間西南面揖弓命取矢【揖推之也】獲者執旌許諾聲不絕以旌負侯而俟【俟弟子取矢以旌指教之】司馬出於左物之南還其後降自西階遂適堂前北面立於所設楅之南命弟子設楅【楅猶幅也所以承筈齊矢者】乃設楅於中庭南當洗東肆【東肆統於賓】司馬由司射之南退釋弓於堂西襲反位弟子取矢北面坐委於楅北括乃退司馬襲進當楅南北面坐左右撫矢而乘之【撫拊之也就委矢左右手撫而四四數分之也上既言襲矣復言之】

者嫌有事即袒也凡事升堂乃袒】若矢不備則司馬又袒執弓如初升命曰取矢不索【索猶盡也】弟子自西方應曰諾乃復求矢加於楅【增故曰加擲獲者許諾至此弟子曰諾事同互相明】

右取矢 記楅長如筈博三寸厚寸有半龍首其中蛇交韋當【博廣也兩端為龍首中央為蛇身相交也蛇龍君子之類也交者象君子取矢於楅上也直心背之衣曰當以丹韋為之司馬左右撫矢而乘之分委於當】楅髹橫而奉之南面坐而奠之南北當洗【髹赤黑漆也奉本作拳朱子正作奉今從之】

司射倚扑於階西升請射於賓如初賓許諾賓主人大夫若皆與射則遂告於賓適阼階上告於主人主人與賓為耦【言若者或射或否在時欲耳射者釋已之志君子務焉大夫遵者也告賓曰主人御於子告主人曰子與賓射】遂告於大夫大夫雖衆皆與士為耦以耦告於大夫曰某御於子【大夫皆與士為耦謙也來觀禮同爵自相與耦則嫌自尊別也大夫為下射而云御於子尊大夫也士謂衆賓之在下者及羣士來觀禮者也禮一命已下齒於鄉里】西階上北面作衆賓射【作使】司射降搢扑由司馬之南適堂西立比衆耦【衆耦大夫耦及衆賓也命大夫之耦曰子與某子射其命衆耦如三耦】衆賓將與射者皆降由司馬之南適堂西繼三耦而立東上大夫之耦為上若有東面者則北上【言若有者大夫士來觀禮者及衆賓多無數也】賓主人與大夫皆未降【言未降者見其志在射】司射乃比衆耦辯【衆賓射者降比之耦乃徧】遂命三耦拾取矢司射反位【反位者俟其袒決遂來】三耦拾取矢皆袒決遂執弓進立於司馬之西南【必袒決遂者明將有射事】司射作上耦取矢【作之者還當上耦如作射】司射反位上耦揖進當楅北面揖及楅揖【當楅楅正南之東西】上射東面下射西面上射揖進坐橫弓卻手自弓下取一个兼諸弣順羽且興執弦而左還退反位東面揖【橫弓者南踣弓也卻手由弓下取矢者以左手在弓表右手從裏取之便也兼并矢於弣當順羽既又當執弦也順羽者手放而下備不整理也不言毋周在阼非君周可也】下射進坐橫弓覆手自弓上取一个興其他如上射【覆手由弓上取矢者以左手在弓裏右手從表取之亦便】既拾取乘矢揖皆左還南面揖皆少進當楅南皆左還北面搢三挾一个【楅南鄉當楅之位】揖皆左還上射於右【上射轉居右便其反位也下射左還少南行乃西面】與進者相左相揖反位【相左皆由進者之北】三耦拾取矢亦如之後者遂取誘射之矢兼乘矢而取之以授有司於西方而后反位【取誘射之矢挾五个弟子逆受於東面位之後】衆賓未拾取矢皆袒決遂執弓搢三挾一个由堂西進繼三耦之南而立東面北上大夫之耦為上【未猶不也衆賓不拾者未射無楅上矢也言此者嫌衆賓三耦同倫初時有射者後乃射有拾取矢禮也】

右再請射 記取誘射之矢者既拾取矢而後兼誘射之乘矢而取之【謂反位已禮成乃更進取之不相因也】

司射作射如初一耦揖升如初司馬命去侯獲者許諾司馬降釋弓反位司射猶挾一个去扑與司馬夾於階前升請釋獲於賓【猶有故之辭司射既誘射恒執弓挾矢以掌射事備尚未知當教之也今三耦卒射衆足以知之矣猶挾之者君子不必也】賓許降搢扑西面立於所

設中之東北面命釋獲者設中遂視之【視之當教】釋獲者執鹿中一人執算以從之【鹿中謂射於榭也於庠當兕中】釋獲者坐設中南當楅西當西序東面興受算坐實八算於中橫委其餘於中西南末興共而俟【興還北面受算反東面實之】司射遂進由堂下北面命曰不貫不釋【貫猶中也不中正不釋算也古文貫作關】上射揖司射退反位釋獲者坐取中之八算改實八算於中興執而俟【執所取算】乃射若中則釋獲者坐而釋獲每一个釋一算上射於右下射於左若有餘算則反委之【委餘算禮尚異也委之合於中西】又取中之八算改實八算於中興執而俟三耦卒射

右再射釋獲

記鹿中槩前足跪鑿背容八算釋獲者奉之先首【前足跪者象教擾之獸受負也】箭籌八十【箭篠也籌算也籌八十者略以十耦為正貴全數其時衆寡從賓】長尺有握握素【握本所持處也素謂刊之也刊本一作膚】

衆賓不與射者不降【不以無事亂有事今文與為豫】

大夫降立於堂西以俟射【尊大夫不使久列於射位】

賓主人大夫揖皆由其階降揖主人堂東袒決遂執弓搯三挾一个賓於堂西亦如之皆由其階階下揖升堂揖主人為下射皆當其物北面揖及物揖乃射卒南面揖皆由其階階上揖降階揖賓序西主人序東皆釋弓說次拾襲反位升及階揖升堂揖皆就席【或言堂或言序亦為庠榭互言也賓主人射大夫止於堂西】大夫袒決遂執弓搯三挾一个由堂西出於司射之西就其耦大夫為下射揖進耦少退揖如三耦及階耦先升卒射揖如升射耦先降降階耦少退皆釋弓於堂西襲耦遂止於堂西大夫升就席【耦於庭不竝行尊大夫也在堂如上射之儀近其事得申】衆賓繼射釋獲皆如初司射所作唯上耦【於是言唯上耦者嫌賓主人射亦作之大射三耦卒射司射請於公及賓】卒射釋獲者遂以所執餘獲升自西階盡階不升堂告於賓曰左右卒射降反位坐委餘獲於中西興共而俟【司射不告卒射者釋獲者於是有所事宜終之也餘獲餘算也無餘算則空手耳俟俟數也】

右賓主大夫衆賓射 記賓主人射則司射擯升降卒射即席而反位卒事【擯賓主人升降者皆尊之也不使司馬擯其升降主於射】

大夫與士射袒纁襦【不肉袒殊於耦】耦少退於物【下大夫也既發則然】

司馬袒決執弓升命取矢如初獲者許諾以旌負侯如初司馬降釋弓反位弟子委矢如初大夫之矢則兼束之以茅上握焉【兼束大夫矢優之是以不拾也束於握上則兼取之順羽便也握謂中央也不束主人矢不可以殊於賓也言大夫之矢則矢有題識也肅慎氏貢楛矢銘其括今文上作尚】司馬乘矢如初司射遂適西階西釋弓去扑襲進由中東立於中南北面視算【釋弓去扑射事已】釋獲者東面於中西坐先數右獲【固東面矣復言之者為其少南就右獲】二算為純【純猶全也耦陰陽】一純以取實於左手十純則縮而委之【縮從也於數者東西為從古文縮皆為蹙】每委異之【易校數】有餘純則橫於下【又異之也自近為下】一算為奇奇則又縮諸純下【奇猶虧也又從之】興自前適左東面【起由中東就左獲少北於故東面鄉之】坐兼斂算實於左手一純以委十則異之【變於右】其餘

如右獲【謂所縮所橫】司射復位釋獲者遂進取賢獲執以升自西階盡階不升堂告於賓【賢獲勝黨之算也齊之而取其餘】若右勝則曰右賢於左若左勝則曰左賢於右以純數告若有奇者亦曰奇【賢猶勝也言賢者射之以中為雋也假如右勝告曰右賢於左若干純若干奇】若左右鈞則左右皆執一算以告曰左右鈞降復位坐兼斂算實八算於中委其餘於中西興共而俟右取矢視算記司射釋弓矢視算與獻釋獲者釋弓矢【惟此二事休武主文釋弓矢耳然則擯升降不釋】

司射適堂西命弟子設豐【將飲不勝者設豐所以承其爵也豐形蓋似豆而卑】弟子奉豐升設於西楹之西乃降勝者之弟子洗觶升酌南面坐奠於豐上降袒執弓反位【勝者之弟子其少者也耦不酌下無能也酌者不授爵略之也執弓反位不俟其黨已酌有事】司射遂袒執弓挾一个搯扑北面於三耦之南命三耦及衆賓勝者皆袒決遂執張弓【執張弓言能用之也右手執弦如卒射】不勝者皆襲說決拾卻左手右加弛弓於其上遂以執附【固襲說決拾矣復言之者起勝者也執弛弓言不能用之也兩手執附又不得執弦】司射先反位【居前俟所命來】三耦及衆射者皆與其耦進立於射位北上司射作升飲者如作射一耦進揖如升射及階勝者先升堂少右【先升尊賢也少右辟飲者也亦相飲之位】不勝者進北面坐取豐上之觶興少退立卒觶進坐奠於豐下興揖【立卒觶不祭不拜受罰爵不備禮也右手執觶左手執弓】不勝者先降【後升先降略之不由次】與升飲者相左交於階前相揖出於司馬之南遂適堂西釋弓襲而俟【俟復射】有執爵者【主人使贊者代弟子酌也於既升飲而升自西階立於序端】執爵者坐取觶實之反奠於豐上升飲者如初【每者輒酌以至於徧】三耦卒飲賓主人大夫不勝則不執弓執爵者取觶降洗升實之以授於席前【優尊也】受觶以適西階上北面立飲【受罰爵者不宜自尊別】卒觶授執爵者反就席大夫飲則耦不升【以賓主人飲耦在上嫌其升】若大夫之耦不勝則亦執弛弓特升飲【尊者可以孤無能對】衆賓繼飲射爵者辯乃徹豐與觶【徹猶除也設豐者反豐於堂西執爵者反觶於筐】

右飲不勝者記主人亦飲於西階上【就射爵而飲也已無俊才不可以辭罰】

司馬洗爵升實之以降獻獲者於侯【鄉人獲者賤明其主以侯為功得獻也】薦脯醢設折俎俎與薦皆三祭【皆三祭為其將祭侯也祭侯三處也】獲者負侯北面拜受爵司馬西面拜送爵【負侯負侯中也拜送爵不同面者辟正主也其設薦俎西面錯以南為上為受爵於侯薦之於位古文曰再拜受爵】獲者執爵使人執其薦與俎從之適右个設薦俎【獲者以侯為功是以獻焉人謂主人贊者上設薦俎者也為設籩在東豆在西俎當其北也言使設新之】獲者南面坐左執爵祭脯醢執爵興取肺坐祭遂祭酒【為侯祭也亦二手祭酒反注如大射】興適左个中亦如之【先祭左个後中者以外即之至中若神在中也】左个之西北三步東面設薦俎獲者薦右東面立飲不拜既爵【不就乏者明其享侯之餘也立飲薦右近司馬於是司馬北面】司馬受爵奠於筐復位獲者執其薦使人執俎從之辟設於乏南【遷設薦俎就乏明已所得禮也言辟之者不使當位辟舉旌偃旌也設於南右之也凡他薦俎皆當其位之前】獲者負侯而俟司射適階西釋弓矢去扑說決拾襲適洗洗爵升實之以降獻釋獲者於其位少南薦脯醢折俎有祭【不當其位辟中】釋獲者薦右東面拜受爵司射北

面拜送爵釋獲者就其薦坐左執爵祭脯醢興取肺坐祭遂祭酒興司射之西北面立飲不拜既爵司射受爵奠於筐釋獲者少西辟薦反位【辟薦少西之者為復射妨司射視算也亦辟俎】

右獻獲者及釋獲者 記獲者之俎折脊脅肺臠【臠若膊胛截折之以大夫之餘體】東方謂之右个【侯以鄉堂為面也】釋獲者之俎折脊脅肺皆有祭【皆皆獲者也祭祭肺也以言肺謂刲肺不離嫌無祭肺】

司射適堂西袒決遂取弓於階西挾一个摺扑以反位【為將復射】司射去扑倚於階西升請射於賓如初賓許司射降摺扑由司馬之南適堂西命三耦及衆賓皆袒決遂執弓就位【位射位也不言射者以當序取矢】司射先反位【言先三耦及衆賓也既命之即反位不俟之也】臠不言先三耦未有拾取矢位無所先【三耦及衆賓皆袒決遂執弓各以其耦進反於射位【以猶與也今文以為與】司射作拾取矢三耦拾取矢如初反位賓主人大夫降揖如初主人堂東賓堂西皆袒決遂執弓皆進階前揖【南面相俟而揖行也】及楅揖拾取矢如三耦【及楅當楅東西也主人西面賓東面相揖拾取矢不北面揖由便也】卒北面摺三挾一个【亦於三耦為之位】揖退【皆已揖左還各由其塗反位】賓堂西主人堂東皆釋弓矢襲及階揖升堂揖就席【將袒先言主人將襲先言賓尊賓也】大夫袒決遂執弓就其耦【降袒決遂於堂西就其耦於射位與之拾取矢】揖皆進如三耦耦東面大夫西面大夫進坐說矢束【說矢束者下耦以將拾取】興反位而后耦揖進坐兼取乘矢順羽而興反位揖【兼取乘矢者尊大夫不敢與之拾也相下相尊君子之所以相接也】大夫進坐亦兼取乘矢如其耦北面摺三挾一个【亦於三耦為之位】揖退耦反位大夫遂適序西釋弓矢襲升即席【大夫不序於下尊也】衆賓繼拾取矢皆如三耦以反位

右三請射 記大夫說矢束坐說之【明不自尊別也】

司射猶挾一个以進作上射如初一耦揖升如初【進前也臠言還當上耦西面是言進終始互相明也今文或言作升射】司馬升命去侯獲者許諾司馬降釋弓反位司射與司馬交於階前去扑襲升請以樂樂於賓賓許諾司射降摺扑東面命樂正曰請以樂樂於賓賓許【東面於西階之前也不就樂正命之者傳尊者之命於賤者遙號令之可也樂正亦許諾猶北面不還以賓在堂】司射遂適階間堂下北面命曰不鼓不釋【不與鼓節相應不釋算也鄉射之鼓五節歌五終所以將八矢一節之間當拾發四節四拾其一節先以聽也】上射揖司射退反位樂正東面命大師曰奏騶虞間若一【東面者進還鄉大師也騶虞國風召南之詩篇也射義曰騶虞者樂官備也其詩有一發五豝五縱于嗟騶虞之言樂得賢者衆多嘆思至仁之人以充其官此天子之射節也而用之者方有樂賢之志取其宜也其他賓客鄉大夫則歌采蘋間若一者重節】大師不興許諾樂正退反位乃奏騶虞以射三耦卒射賓主人大夫衆賓繼射釋獲如初卒射降【皆應鼓與歌之節乃釋算降者衆賓】釋獲者執餘獲升告左右卒射如初【卒已也今文曰告於賓】

右三射用樂

記歌騶虞若采蘋皆五終射無算【謂衆賓繼射者衆賓無數也每一耦射歌五終也】

司馬升命取矢獲者許諾司馬降釋弓反位弟子委矢司馬乘之皆如初司射釋弓視算如初【算獲算也今文曰視數也】釋獲者以賢獲與鈞告如初降復位

右取矢視算

司射命設豐實觶如初遂命勝者執張弓不勝者執弛弓升飲如初

右飲不勝者

司射猶袒決遂左執弓右執一个兼諸弦面鏃適堂西以命拾取矢如初【側持弦矢曰執面猶尚也并矢於弦尚其鏃將止變於射也】司射反位三耦及賓主人大夫衆賓皆袒決遂拾取矢如初矢不挾兼諸弦附以退不反位遂授有司於堂西【不挾亦謂執之如司射也不以反射位授有司者射禮畢】辯拾取矢揖皆升就席【謂賓大夫及衆賓也相俟堂西進立於西階之前主人以賓揖升大夫及衆賓從升立時少退於大夫三耦及弟子自若留下】司射乃適堂西釋弓去扑說決拾襲反位司馬命弟子說侯之左下綱而釋之【說解也釋之不復射掩束之】命獲者以旌退命弟子退楅司射命釋獲者退中與算而俟【諸所退皆俟堂西備復射也旌言以者旌恒執也獲者釋獲者亦退其薦俎】

右三射畢

司馬反為司正退復觶南而立【當監旅酬】樂正命弟子贊工即位弟子相工如其降也升自西階反坐【贊工遷樂也降時如初入樂正反自西階東北面】賓北面坐取俎西之觶興阼階上北面酬主人主人降席立於賓東賓坐奠觶拜執觶興主人答拜賓不祭卒觶不拜不洗實之進東南面【所不者酬而禮殺也賓立飲】主人阼階上北面拜賓少退【少退少逡巡也】主人進受觶賓主人之西北面拜送【旅酬而同階禮殺也】賓揖就席主人以觶適西階上酬大夫大夫降席立於主人之西如賓酬主人之禮【其既實觶進西南面立鄉所酬】主人揖就席若無大夫則長受酬亦如之【長謂以長幼之次酬衆賓】司正升自西階相旅作受酬者曰某酬某子【某者字也某子者氏也稱酬者之字受酬者曰某子旅酬下為上尊之也春秋傳曰字不若子此言某酬某子者射禮略於飲酒飲酒言某子受酬以飲酒為主】受酬者降席司正退立於西序端東面【退立俟後酬者也始升相立階西北面】衆受酬者拜興飲皆如賓酬主人之禮辯遂酬在下者皆升受酬於西階上【在下謂賓黨也鄉飲酒記曰主人之贊者西面北上不與無算爵然後與此異於賓】卒受者以觶降奠於筐司正降復位

右旅酬 記古者於旅也語【禮成樂備乃可以言語先王禮樂之道也疾今人慢於禮樂之盛言語無節故追古道也】凡旅不洗【敬殺】不洗者不祭【不盛】既旅士不入【從正禮也既旅則將燕矣士入齒於鄉人】

使二人舉觶於賓與大夫【二人主人之贊者】舉觶者皆洗觶升實之西階上北面皆坐奠觶拜執觶興賓與大夫皆席末答拜舉觶者皆坐祭遂飲卒觶興坐奠觶拜執觶興賓與大夫皆答拜舉觶者逆降洗升實觶皆立於西階上北面東上賓與大夫拜舉觶者皆進坐奠於薦右【坐奠之不敢授】賓與大夫辭坐受觶以興【辭辭非坐奠觶】舉觶者退反位皆拜送乃降賓與大夫反奠於其所興【不舉者盛禮已崇古文曰反坐】若無大夫則唯賓【長一人舉觶如燕禮媵爵之為】

右二人舉觶【將舉者於右見酬賓章】孔子射於矍相之圃蓋觀者如堵墻【矍相地名也藝菜蔬曰圃】射至於司馬使子路執弓矢出延射曰賁軍之將亡國之大夫與為人後者不入其餘皆入蓋去者半入者半【先行飲酒禮將射乃以司正為司馬子路執弓矢出延射則為司射也延進也出進觀者欲射者也賁讀為債債猶覆敗也亡國亡君之國者也與猶奇也後人者一人而已既有為者而往奇之是貪財也子路陳此三者而觀者畏其義則或去也延或為誓】又使公罔之裘序點揚觶而語公罔之裘揚觶而語曰幼壯孝弟耆耄好禮不從流俗修身以俟死者不在此位也蓋去者半處者半序點又揚觶而語曰好學不倦好禮不變旃期稱道不亂者不在此位也蓋勵有存者【之發聲也射畢又使此二人舉觶者古者於旅也語語謂說義理也三十曰壯耆耄皆老也流俗失俗也處猶留也八十九十曰旃百年曰期頤稱猶言也道猶行也不字讀作否言有此行否可以在此賓位也序或為徐壯或為將期或為勤今禮揚皆作騰射義】

司正升自西階阼階上受命於主人適西階上北面請坐於賓【請坐欲與賓燕盡殷勤也至此盛禮已成酒清肴乾強有力者猶倦焉】賓辭以俎【俎者肴之貴者也辭之者不敢以燕坐褻貴肴】反命於主人主人曰請徹俎賓許司正降自西階階前命弟子俟徹俎【弟子賓黨也俎者主人贊者設之今賓辭之使其黨俟徹順賓意也上言請坐於賓此言主人曰互相備耳】司正升立於序端賓降席北面主人降席自南方阼階上北面大夫降席席東南面【俟弟子升受俎】賓取俎還授司正司正以降自西階賓從之降遂立於階西東面司正以俎出授從者【授賓家從來者也古者與人飲食必歸其盛者所以厚禮之】主人取俎還授弟子弟子受俎降自西階以東主人降自阼階西面立【以東授主人侍者】大夫取俎還授弟子弟子以降自西階遂出授從者大夫從之降立於賓南【凡言還者明取俎各自鄉其席】衆賓皆降立於大夫之南少退北上【從降亦為將燕】

右徹俎

主人以賓揖讓說屨乃升大夫及衆賓皆說屨升坐【說屨者將坐空屨褻賤不宜在堂也說屨則摳衣為其被地】乃羞【羞進也所進者狗彘醢也燕設啗具所以索酒】無算爵使二人舉觶賓與大夫不興取奠觶飲卒觶不拜【二人謂舉者二人也使之升立於西階上賓與大夫將旅當執觶也卒觶者固不拜矣著之者嫌坐卒爵者拜既爵此坐於席禮既殺不崇】執觶者受觶遂實之賓觶以之主人大夫之觶長受【長衆賓長】而錯皆不拜【錯者實主人之觶以之次賓也實賓長之觶以之次大夫其或多者迭飲於坐而已皆不拜受禮又殺也】辯卒受者興以旅在下者於西階上【衆賓之末飲而酬主人之贊者大夫之末飲而酬賓

黨亦錯焉不使執觶者酌以其將旅酬不以已尊於人也其末若皆衆賓則先酬主人之贊者若皆大夫則先酬賓黨而已執觶者酌在上辯降復位】長受酬酬者不拜乃飲卒觶以實之【言酬者不拜者嫌酬堂下異位當拜也古文曰受酬者不拜】受酬者不拜受【禮殺雖受尊者之酬猶不拜】辯旅皆不拜【主人之贊者於此始旅嫌有拜】執觶者皆與旅【嫌已飲不復飲也上使之勸人耳非逮下之惠也亦自以齒與於旅也】卒受者以虛觶降奠於筐執觶者洗升實觶反奠於賓與大夫【復奠之者燕以飲酒為歡醉乃止主人之意也今文無執觶及賓觶大夫之觶皆為爵實觶觶為之】無算樂【合鄉樂無次數】

右燕

賓興樂正命奏陔【陔陔夏其詩亡周禮賓醉而出奏陔夏陔夏者天子諸侯以鐘鼓大夫士鼓而已】賓降及階陔作賓出衆賓皆出主人送於門外再拜【拜送賓於門東西面賓不答拜禮有終】

右賓出 記大夫後出【下鄉人不干其賓主之禮】主人送於門外再拜【拜送大夫尊之也主人送賓還入門揖大夫乃出拜送之】

明日賓朝服以拜賜於門外【拜賜謝恩惠也】主人不見如賓服遂從之拜辱於門外乃退【不見不褻禮也拜辱謝其自屈辱】

右拜賜

主人釋服乃息司正【釋服說朝服服玄端也息猶勞也勞司正謂賓之與之飲酒以其昨日尤勞倦也月令曰勞農以休息之】無介【勞禮略貶於飲酒也此已下皆記禮之異者】不殺【無俎故也】使人速【速召賓】迎於門外不拜入升不拜至不拜洗薦脯醢無俎賓酢主人主人不崇酒不拜衆賓既獻衆賓一人舉觶遂無算爵【言遂者明其間闕也賓坐奠觶於其所擯者遂受命於主人請坐於賓賓降說屨升坐矣不言遂請坐者請坐主於無算爵】無司正【使擯者而已不立之】賓不與【昨日至尊不可褻也古文與作豫】徵唯所欲【徵召也謂所欲請呼】以告於鄉先生君子可也【告請也鄉先生鄉大夫致仕者也君子有大德行不仕者】羞唯所有【用時見物】鄉樂唯欲【不歌雅頌取周召之詩在所好】

右息司正

禮書綱目卷九

卷十

欽定四庫全書

禮書綱目卷十 婺源江永撰

大射儀 嘉禮十五

經【鄭目錄云諸侯將有祭祀之事與其臣射以觀其禮數中者得與於祭不數中者不得與於祭於五禮屬嘉禮】

大射之儀君有命戒射【將有祭祀之事當射宰告於君君乃命之言君有命政教宜由尊者】宰戒百官有事於射者【宰於天子冢宰治官卿也作大事則掌以君命戒於百官】射人戒諸公卿大夫射司士戒士射與贊者【射人掌以射法治射儀司士掌國中之士治凡其戒令皆司馬之屬也殊戒公卿大夫與士辨貴賤也贊佐也謂士佐執事不射者】前射三日宰夫戒宰及司馬射人宿視滌【宰夫冢宰官屬掌百官之徵令者司馬於天子政官之卿凡大射則合其六耦滌謂溉器埽除射宮】

右戒百官

司馬命量人量侯道與所設乏以狸步大侯九十參七十干五十設乏各去其侯西十北十【量人司馬之屬掌量道巷塗數者侯謂所射布也量侯道謂去堂遠近也容謂之乏所以為獲者之禦矢狸之伺物每舉足者正視遠所為發必中也是以量侯道取象焉鄉射記曰侯道五十弓考工記曰弓之下制六尺則此狸步六尺明矣大侯者熊侯謂之大者與天子熊侯同參讀為糝糝雜也雜侯者豹鵠而麋飾下天子大夫也干讀為豢豢侯者豢鵠豢飾也大夫將祭於已射麋侯士無臣祭不射】遂命量人巾車張三侯大侯之崇見鵠於參參見鵠於干干不及地武不繫左下綱設乏西十北十凡乏用革【巾車於天子宗伯之屬掌裝衣車者亦使張侯侯巾類崇高也高必見鵠鵠所射之主射義曰為人君者以為君鵠為人臣者以為臣鵠為人父者以為父鵠為人子者以為子鵠言射中此乃能任已位也鵠之言較較直也射者所以直已志或曰鵠鳥名射之難中中之為俊是以所射於侯取名也淮南子曰鴻鵠知來然則所云正者正也亦鳥名齊魯之間名題肩為正正鵠皆鳥之捷黠者考工記曰梓人為侯廣與崇方參分其廣而鵠居一焉則大侯之鵠方六尺糝侯之鵠方四尺六寸大半寸豢侯之鵠方三尺三寸少半寸及至也武迹也中人之足長尺二寸以豢侯計之糝侯去地一丈五寸少半寸大侯去地二丈二尺五寸少半寸凡侯北面西方謂之左前射三日張侯設乏欲使有事者豫志焉】

右張侯

樂人宿縣於阼階東笙磬西面其南笙鐘其南鑄皆南陳【笙猶生也東為陽中萬物以生春秋傳曰太簇所以金奏贊陽出滯姑洗所以修絜百物考神納賓是以東方鐘磬謂之笙皆編而縣之周禮曰凡縣鐘磬半為堵全為肆有鐘有磬為全鑄如鐘而大奏樂以鼓鑄為節】建鼓在阼階西南鼓應鼗在其東南鼓【建猶樹也以木貫而載之樹之附也南鼓謂所伐面也應鼗應朔鼗也先擊朔鼗應鼗應之鼗小鼓也在東便其先擊小後擊大也鼓不在東縣南為君也】西階之西頌磬東面其南鐘其南鑄皆南陳一建鼓在其南東鼓朔鼗在其北【言成功曰頌西為陰中萬物之所成春秋傳曰夷則所以詠歌九則平民無忒無射所以宣布哲人之令德示民軌義是以西方鐘磬謂之頌朔始也奏樂先擊西鼗樂為賓所由來也鐘不言頌鼗不言東鼓義同省文也古文頌為庸】一建鼓在西階之東南面【言面者國君於其羣臣備三面爾無鐘磬有鼓而已其為諸侯則軒縣】蕩在建鼓之間【蕩竹也謂笙簫之屬倚於堂】鼗倚於頌磬西紃【鼗如鼓而小有柄賓至搖之以奏樂也紃編磬繩也設鼗於磬西倚於紃也王制曰天子賜諸侯樂則以祝將之賜伯子男樂則以鼗將之】

右設樂

厥明司宮尊於東楹之西兩方壺膳尊兩甔在南有豐罍用錫若絺綴諸箭蓋罍加勺又反之皆玄尊酒在北【膳尊君尊也後陳之尊之也豐以承尊也說者以為若井鹿盧其為字從豆聲近似豆大而卑矣罍覆尊巾也錫細布也絺細葛也箭篠也為罍蓋卷辟綴於篠橫之也又反之為覆勺也皆玄尊二者皆有玄酒之尊重本也酒在北尊統於君南為上也唯君面尊言專惠也今文錫或作絺絺或作綌古文箭或作晉】尊士旅食於西鑄之南北面兩圓壺【旅衆也士衆食未得正祿謂庶人在官者圓壺變於方也賤無玄酒】又尊於大侯之左東北兩壺獻酒【為隸僕人巾車糝侯豻侯之獲者獻讀為沙沙酒濁特沛之必摩沙者也兩壺皆沙酒郊特牲曰汁獻澆於醢酒服不之尊侯時而陳於南統於侯皆東面】設洗於阼階東南疊水在東篚在洗西南陳設膳篚在其北西面【或言南陳或言西面異其文也】又設洗於獲者之尊西北水在洗北篚在南東陳【亦統於侯也無爵因服不也有篚為奠虛爵也服不之洗亦侯時而陳於其南】小臣設公席於阼階上西鄉司宮設賓席於戶西南面有加席卿席賓東東上小卿賓西東上大夫繼而東上若有東面者則北上席工於西階之東東上諸公阼階西北面東上【唯賓及公席布之也其餘樹之於位後耳小卿命於其君者也席於賓西射禮辨貴賤也諸公大國有孤卿一人與君論道亦不典職如公矣】官饌【百官各饌其所當共之物】

右陳設器席

羹定【亨肉孰也射義曰諸侯之射也必先行燕禮燕禮牲用狗】射人告具於公公升即位於席西鄉小臣師納諸公卿大夫諸公卿大夫皆入門右北面東上士西方東面北上大史在干侯之東北北面東上士旅食者在士南北面東上小臣師從者在東堂下南面西上【大史在干侯東北士旅食者在士南為有侯入庭深也小臣師正之佐也正相君出入君之大命】公降立於阼階之東南南鄉小臣師詔揖諸公卿大夫諸公卿大夫西面北上揖大夫大夫皆少進【詔告也變爾言揖亦以其入庭深也上言大夫誤衍耳】大射正擯【大射正射人之

長】擯者請賓公曰命某為賓【某大夫名】擯者命賓賓少進禮辭【命賓者東面南顧辭辭以不敏】反命【以賓之辭告於君】又命之賓再拜稽首受命【又復】擯者反命賓出立於門外北面公揖卿大夫升就席小臣自阼階下北面請執冪者與羞膳者【請士可使執君兩鬴之冪及羞脯醢庶饔於君者方圓壺獻無冪】乃命執冪者執冪者升自西階立於尊南北面東上【命者於西階前以公命命之東上執玄尊之冪為上羞膳者從而東由堂東升自北階立於房中西面南上不言命者不升堂略之】膳宰請羞於諸公卿者【膳宰請者異於君也】

右即位請立賓及執事者

擯者納賓賓及庭公降一等揖賓賓辟【及至也辟逡遁不敢當盛】公升即席【以賓將與主人為禮不參之】奏肆夏【肆夏樂章名今亡呂叔玉云肆夏時邁也時邁者太平巡守祭山川之樂歌其詩曰明昭有周式序在位又曰我求懿德肆於時夏奏此以延賓其著宣王德勸賢與周禮曰賓出入奏肆夏】賓升自西階主人從之賓右北面至再拜賓答再拜【主人宰夫也又掌賓客之獻飲食君於臣雖為賓不親獻以其莫敢亢禮】

右納賓

主人降洗洗南西北面【賓將從降鄉之不於洗北辟正主】賓降階西東面主人辭降賓對【對答】主人北面盥坐取觚洗賓少進辭洗主人坐奠觚於篚興對賓反位【賓少進者所辭異宜違其位也獻不用爵辟正主】主人卒洗賓揖乃升【賓每先升尊也】主人升賓拜洗主人賓右奠觚答拜降盥賓降主人辭降賓對卒盥賓揖升主人升坐取觚【取觚將就瓦鬴酌膳】執冪者舉冪主人酌膳執冪者蓋冪酌者加勺又反之【反之覆勺】筵前獻賓賓西階上拜受爵於筵前反位主人賓右拜送爵【賓既拜於筵前受爵退復位】宰胥薦脯醢【宰胥宰官之吏也不使膳宰薦不主於飲酒變於燕】賓升筵庶子設折俎【庶子司馬之屬掌正六牲之體者也鄉射記曰賓俎脊脅肩肺不使膳宰設俎為射變於燕】賓坐左執觚右祭脯醢奠爵於薦右興取肺坐絕祭嚙之興加於俎坐挽手執爵遂祭酒興席末坐啐酒降席坐奠爵拜告旨執爵興主人答拜【降席席西也旨美也】樂闋【闋止也樂止者尊賓之禮盛於上也】賓西階上北面坐卒爵興坐奠爵拜執爵興主人答拜

右主人獻賓

賓以虛爵降【既卒爵將酢也】主人降賓洗南西北面坐奠觚少進辭降主人西階西東面少進對賓坐取觚奠於篚下盥洗【篚下篚南】主人辭洗賓坐奠觚於篚興對卒洗及階揖升主人升拜洗如賓禮賓降盥主人降賓辭降卒盥揖升酌膳執冪如初以酢主人於西階上主人北面拜受爵賓主人之左拜送爵【賓南面授爵乃於左拜凡授爵鄉所受者】主人坐祭不啐酒【辟正主也未薦者臣也】不拜酒【主人之義燕禮曰不拜酒不告旨】遂卒爵興坐奠爵拜執爵興賓答拜主人不崇酒以虛爵降奠於篚【不崇酒辟正君也崇充也謂謝酒惡相充實】賓降立於西階西東面【既受獻矣不敢安盛】擯者以命升賓賓升立於西

序東面【命公命也東西牆謂之序】

右賓酢主人

主人盥洗象觚升酌膳東北面獻於公【象觚觚有象骨飾者也取象觚東面不言實之變於燕】公拜受爵乃奏肆夏【言乃者其節異於賓】主人降自西階阼階下北面拜送爵宰胥薦脯醢由左房庶子設折俎升自西階【自由也左房東房也人君左右房鄉射記曰主人俎脊脅臂肺也】公祭如賓禮庶子贊授肺不拜酒立卒爵坐奠爵拜執爵興【几異者君尊變於賓】主人答拜樂闋升受爵降奠於篚

右主人獻公

更爵洗升酌散以降酢於阼階下北面坐奠爵再拜稽首公答拜【更易也易爵不敢襲至尊古文更為受】主人坐祭遂卒爵興坐奠爵再拜稽首公答拜主人奠爵於篚

右主人受公酢

主人盥洗升媵觚於賓酌散西階上坐奠爵拜賓西階上北面答拜【媵送也散方壺之酒也古文媵皆作騰】主人坐祭遂飲賓辭卒爵興坐奠爵拜執爵興賓答拜【辭者辭其代君行酒不立飲也比於正主酬也】主人降洗賓降主人辭降賓辭洗卒洗賓揖升不拜洗【不拜洗酬而禮殺也】主人酌膳賓西階上拜受爵於筵前反位主人拜送爵賓升席坐祭酒遂奠於薦東【遂者因坐而奠之不北面也奠之者酬不舉也】主人降復位賓降筵西東南面立【賓不立於序內位彌尊】

右主人酬賓

小臣自阼階下請媵爵者公命長【命之使選於長幼之中也卿則尊士則卑】小臣作下大夫二人媵爵【作使】媵爵者阼階下皆北面再拜稽首公答拜【再拜稽首拜君命】媵爵者立於洗南西面北上序進盥洗角觶升自西階序進酌散交於楹北降適阼階下皆奠觶再拜稽首執觶興公答拜【序次第也猶代也先者既酌右還而反與後酌者交於西楹北相左俟於西階上乃降往來以右為上古文曰降造阼階下】媵爵者皆坐祭遂卒觶興坐奠觶再拜稽首執觶興公答再拜媵爵者執觶待於洗南【待待君命】小臣請致者【請君使一人與二人與不必君命】若命皆致則序進奠觶於篚阼階下皆北面再拜稽首公答拜媵爵者洗象觶升實之序進坐奠於薦南北上降適阼階下皆再拜稽首送觶公答拜【既酌而代進往來由尊北交於東楹北亦相左奠於薦南不敢必君舉】媵爵者皆退反位【反門右北面位】

右媵爵於公

公坐取大夫所腍觶興以酬賓賓降西階下再拜稽首小臣正辭賓升成拜【公起酬賓於西階降尊以就卑也正長也小臣長辭變於燕升成拜復再拜稽首先時君辭之於禮若未成然】公坐奠觶答拜執觶興公卒觶賓下拜小臣正辭賓升再拜稽首【不言成拜者為拜故下實未拜也下不輒拜禮殺也下亦降也發端言降拜因上事言下拜】公坐奠觶答拜執觶興賓進受虛觶降奠於筐易觶興洗【賓進以臣道就君受虛爵君不親酌凡爵不相襲者於尊者言更自敵以下言易更作新易有故之辭也不言公酬賓於西階上及公反位者尊君空其文也】公有命則不易不洗反升酌膳下拜小臣正辭賓升再拜稽首公答拜【不易君義也不洗臣禮也】賓告於擯者請旅諸臣擯者告於公公許【旅序也賓欲以次序勸諸臣酒】賓以旅大夫於西階上擯者作大夫長升受旅【作使也使之以長幼之次先孤卿後大夫】賓大夫之右坐奠觶拜執觶興大夫答拜【賓在右相飲之位】賓坐祭立卒觶不拜【酬而禮殺】若膳觶也則降更觶洗升實散大夫拜受賓拜送遂就席【言更觶尊卿尊卿則賓禮殺】大夫辯受酬如受賓酬之禮不祭酒卒受者以虛觶降奠於筐復位【卒猶已也今文辯作徧】

右公為賓舉旅

主人洗觚升實散獻卿於西階上【酬賓而後獻卿飲酒禮成於酬】司宮兼卷重席設於賓左東上【言兼卷則每卿異席重席蒲筵緇布紃席卿言東上統於君席自房來】卿升拜受觚主人拜送觚卿辭重席司宮徹之【徹猶去也重席雖非加猶為其重累辭之辟君】乃薦脯醢卿升席庶子設折俎【卿折俎未聞盖用脊脅臠折肺卿有俎者射禮尊】卿坐左執爵右祭脯醢奠爵於薦右興取肺坐絕祭不嚙肺興加於俎坐挽手取爵遂祭酒執爵興降席西階上北面坐卒爵興坐奠爵拜執爵興【陳酒肴君之惠也不嚙啐事在射臣之意】主人答拜受爵卿降復位【復西面位不酢辟君】辯獻卿主人以虛爵降奠於筐擯者升卿卿皆升就席若有諸公則先卿獻之如獻卿之禮席於阼階西北面東上無加席【公孤也席之北面為大尊屈之也亦因階上近君近君則親寵苟敬私昵之坐】

右主人獻孤卿

小臣又請腍爵者二大夫腍爵如初請致者若命長致則腍爵者奠觶於筐【命長致者使長者一人致也公或時未能舉自優暇】一人待於洗南【不致者】長致者阼階下再拜稽首公答拜【再拜稽首拜君命】洗象觶升實之坐奠於薦南降與立於洗南者二人皆再拜稽首送觶公答拜【奠於薦南先腍者上觶之處也二人皆拜如初共勸君飲之】

右再腍爵

公又行一爵若賓若長唯公所賜【一爵先腍者之下觶也若賓若長禮殺也長孤卿之尊者也於是言賜射禮明尊卑】以旅於西階上如初【賜賓則以酬長賜長則以酬賓大夫長升受旅以辯】大夫卒受者以虛觶降奠於筐

右公為賓若孤卿舉旅

主人洗觚升獻大夫於西階上大夫升拜受觚主人拜送觚大夫坐祭立卒爵不拜既爵主人受爵大夫降復位【既盡也大夫卒爵不拜賤不備禮】胥薦主人於洗北西面脯醢無胥【胥宰官之吏主人下大夫也先大夫薦之尊之也不薦於上辟正主胥俎實】辯獻大夫遂薦之繼賓以西東上若有東面者則北上卒擯者升大夫大夫皆升就席【辯獻乃薦略賤也亦獻後布席也】

右主人獻大夫

乃席工於西階上少東小臣納工工六人四瑟【工謂瞽矇善歌諷誦詩者也六人太師少師各一人上工四人四瑟者禮大樂衆也】僕人正徒相大師僕人師相少師僕人士相上工【徒空手也僕人正僕人之長師其佐也士其吏也天子視瞭相工諸侯兼官是以僕人掌之大師少師工之長也凡國之瞽矇正焉杜蒯曰曠也大師也於是分別工及相者射禮明貴賤】相者皆左何瑟後首內弦挢越右手相【謂相上工者後首主於射略於此樂也內弦挢越以右手相工由便也越瑟下孔所以發越其聲者也古文後首為後手】後者徒相入【謂相大師少師者也上列官之尊卑此言先後之位亦所以明貴賤凡相者以工出入】小樂正從之【從大師也後升者變於燕也小樂正於天子樂師也】升自西階北面東上【工六人】坐授瑟乃降【相者也降立於西縣之北】小樂正立於西階東【不統於工明工雖衆位猶在此】乃歌鹿鳴三終【鹿鳴小雅篇也人君與臣下及四方之賓燕講道修政之樂歌也言已有旨酒以召嘉賓與之飲者樂嘉賓之來示我以善道又樂嘉賓有孔昭之明德可則倣也歌鹿鳴三終而不歌四牡皇皇者華主於講道略於勞苦與諮事】主人洗升實爵獻工工不興左瑟【工歌而獻之以事報之也洗爵獻工辟正主也獻不用觚工賤異之也工不興不能備禮左瑟使其右大師無瑟於是言左瑟者節也】一人拜受爵【謂大師也言一人者工賤同之也工拜於席】主人西階上拜送爵薦脯醢【輒薦之變於大夫】使人相祭【使人相者相其祭薦祭酒】卒爵不拜主人受虛爵衆工不拜受爵坐祭遂卒爵辯有脯醢不祭【相者相其祭酒而已】主人受爵降奠於筐復位大師及少師上工皆降立於鼓北羣工陪於後【鼓北面縣之北也言鼓北者與鼓齊面餘長在後也羣工陪於後三人為列也於是時小樂正亦降立於其南北面工立僕人立於其側坐則在後考工記曰鼓人為皋陶長六尺有六寸】乃管新宮三終【管謂吹簫以播新宮之樂其篇亡其義未聞笙從工而入既管不獻略下樂也立於東縣之中】卒管大師及少師上工皆東玷之東南西面北上坐【不言縣北統於堂也於是時大樂正還北面立於其南】

右樂賓

擯者自阼階下請立司正【三爵既備上下樂作君將留羣臣而射宜更立司正以監之察儀法也】公許擯者遂為司正【君許其請因命用之不易之者俱相禮其事同也】司正適洗洗角觶南面坐奠於中庭【奠觶者著其位以顯其事威儀多也】升東楹之東受命於公西階上北面命賓諸公卿大夫公曰以我安賓諸公卿大夫皆對曰諾敢不安【以我安者君意

殷勤欲留之以我故安也】司正降自西階南面坐取觶升酌散降南面坐奠觶【奠於中庭故也】興右還北面少立坐取觶興坐不祭卒觶奠之興再拜稽首左還南面坐取觶洗南面反奠於其所北面立【皆所以自昭明於衆也將於觶南北面則右還於觶北南面則左還如是得於觶西往來也必從觶西往來者為君在阼不背之也】

右立司正

司射適次袒決遂執弓挾乘矢於弓外見鏃於弣右巨指鉤弦【司射射人也次若今時更衣處張幃席為之耦次在洗東南袒左免衣也決猶闔也以象骨為之著右巨指所以鉤弦而闔之遂射鞬也以朱韋為之著右臂所以遂弦也方持弦矢曰挾乘矢四矢弣弓把也見鏃焉順其射也右巨指右手大擘以鉤弦弦在旁挾由便也古文挾皆作接】自阼階前曰為政請射【為政謂司馬也司馬政官主射禮】遂告曰大夫與大夫士御於大夫【因告選三耦於君御由侍也大夫與大夫為耦不足則士侍於大夫與為耦也今文於為于】遂適西階前東面右顧命有司納射器【納內也】射器皆入君之弓矢適東堂賓之弓矢與中籌豐皆止於西堂下衆弓矢不挾總衆弓矢楅皆適次而俟【中間中算器也籌算也豐可奠射爵者衆弓矢三耦及卿大夫以下弓矢也司射矢亦止於西堂下衆弓矢不挾則納公與賓弓矢者挾之楅承矢器今文俟作待】工人士與梓人升自北階兩楹之間疏數容弓若丹若墨度尺而午射正蒞之【工人士梓人皆司空之屬能正方圓者一從一橫曰午謂畫物也射正司射之長】卒畫自北階下司宮埽所畫物自北階下【埽物重射事也工人士梓人司宮位在北堂下】大史俟於所設中之西東面以聽正【中未設也大史俟焉將有事也鄉射禮曰設中南當楅西當西序東面】司射西面誓之曰公射大侯大夫射參士射干射者非其侯中之不獲卑者與尊者為耦不異侯大史許諾【誓猶告也古文異作辭】遂比三耦【比選次之也不言面者大夫在門右北面士西方東面】三耦俟於次北西面北上【未知其耦今文俟為立】司射命上射曰某御於子命下射曰子與某子射卒遂命三耦取弓矢於次【取弓矢不捨者次中隱蔽處】

右請射 記君於郊則閭中以旌獲【註見三射記】

司射入於次摺三挾一个出於次西面揖當階北面揖及階揖升堂揖當物北面揖及物揖由下物少退誘射【摺扱也挾一个挾於弦也个猶枚也由下物而少退謙也誘猶教也夫子循循然善誘人】射三侯將乘矢始射干又射參大侯再發【將行也行四矢象有事於四方詩云四矢反兮以禦亂兮】卒射北面揖【揖於當物之處不南面者為不背卿】及階揖降如升射之儀遂適堂西改取一个挾之【改更也不射而挾矢示有事也】遂取朴摺之以立於所設中之西南東面【朴所以撻犯教者也於是言立著其位也鄉射記曰司射之弓矢與朴倚於西階之西】

右誘射

司馬師命負侯者執旌以負侯【司馬師正之佐也命射者見侯與旌深志於侯中也負侯獲

者也天子服不氏下士一人徒四人掌以旌居乏待獲析羽為旌】負侯者皆適侯執旌負侯而侯司射適次作上耦射【作使也】司射反位上耦出次西面揖進上射在左竝行當階北面揖及階揖上射先升三等下射從之中等【上射在左便射位也中猶間也】上射升堂少左下射升上射揖竝行【竝併也併東行】皆當其物北面揖及物揖皆左足履物還視侯中合足而侯【視侯中各視其侯之中大夫耦則視參中參中十四尺士耦則視干中干中十尺】司馬正適次袒決遂執弓右挾之出升自西階適下物立於物間左執弣右執簫南揚弓命去侯【司馬正政官之屬簫弓末揚弓者執下末揚猶舉也適下物由上射後東過也命去侯者將射當獲也鄉射禮曰西南面立於物間】負侯皆許諾以宮趨直西及乏南又諾以商至乏聲止【宮為君商為臣其聲和相生也鄉射禮曰獲者執旌許諾古文聲為磬】授獲者退立於西方獲者興共而侯【大侯服不氏負侯徒一人居乏相代而獲參侯干侯徒負侯居乏不相代鄉射禮曰獲者執旌許諾聲不絕至於乏坐東面偃旌興而侯古文獲皆作護非也】司馬正出於下射之南還其後降自西階遂適次釋弓說決拾襲反位【拾遂也鄉射禮曰司馬反位立於司射之南】司射進與司馬正交於階前相左由堂下西階之東北面視上射命曰毋射獲毋獵獲上射揖司射退反位【射獲矢中乏也從旁為獵】乃射上射既發挾矢而后下射射拾發以將乘矢【拾更也將行也】獲者坐而獲【坐言獲也】舉旌以宮偃旌以商【等言獲也】獲而未釋獲【但言獲未釋算古文釋為舍】卒射右挾之北面揖揖如升射【右挾之右手挾弦】上射降二等下射少右從之中等竝行上射於左與升射者相左交於階前相揖適次釋弓說決拾襲反位【上射於左由下射階上少右乃降待之言襲者凡射皆袒】三耦卒射亦如之

右初射獲而未釋獲

司射去朴倚於階西適阼階下北面告於公曰三耦卒射反摺朴反位司馬正袒決遂執弓右挾之出與司射交於階前相左【出出於次也袒時亦適次】升自西階自右物之後立於物間西南面揖弓命取矢【揖推也】負侯許諾如初去侯皆執旌以負其侯而侯【侯小臣取矢以旌指教之】司馬正降自西階北面命設楅【此出於下射之南還其後而降之】小臣師設楅司馬正東面以弓為畢【畢所以教助執事者鄉射記曰乃設楅於中庭南當洗東肆】既設楅司馬正適次釋弓說決拾襲反位小臣坐委矢於楅北括司馬師坐乘之【乘四四數之】若矢不備則司馬正又袒執弓升命取矢如初曰取矢不索乃復求矢加於楅卒司馬正進坐左右撫之興反位【左右撫分上下射此坐皆北面】

右取矢

司射適西階西倚朴升自西階東面請射於公【倚朴者將即君前不敢佩刑器也升堂者欲諸公卿大夫辯聞也】公許遂適西階上命賓御於公諸公卿則以耦告於上大夫則降即位而后告【告諸公卿於堂上尊之也】司射自西階上北面告於大夫曰請降司射先降摺朴反位大夫從之降適次立於三耦之南西面北上【適次由次前而北西面立】司射東面於大夫之西比耦大夫與大夫命上射曰某御於子命下射曰子與某子射卒遂比衆耦【衆耦士也】衆耦立於大夫之南西面北上若有士與大夫為耦則以大夫之耦為上【為上居羣

士之上】命大夫之耦曰子與某子射告於大夫曰某御於子【士雖為上射其辭猶尊大夫】命衆耦如命三耦之辭諸公卿皆未降【言未降者見其志在射】遂命三耦各與其耦拾取矢皆袒決遂執弓右挾之【此命入次之事也司射既命而反位不言之者上射出當作取矢事未訖】一耦出西面揖當楅北而揖及楅揖【三耦同入次其出也一上射出西面立司射作之乃揖行也當楅正南之東西】上射東面下射西面上射揖進坐橫弓卻手自弓下取一个兼諸弣興順羽且左還毋周反面揖【橫弓者南踣弓也卻手自弓下取矢者以左手在弓表右手從裏取之便也兼并也并矢於弣當順羽既又當執弦順羽者手放而下備不整理也左還反其位毋周右還而反東面也君在阼還周則下射將背之古文且為阻】下射進坐橫弓覆手自弓上取一个兼諸弣興順羽且左還毋周反面揖【橫弓亦南踣弓也人東西鄉以南北為橫覆手自弓上取矢以左手在弓裏右手從表取之便也】既拾取矢梱之【梱齊等之也古文梱作魁】兼挾乘矢皆內還南面揖【內還者上射左下射右不皆右還亦以君在阼嫌下射故左還而背之也上以陽為內下以陰為內因其宜可也】適楅南皆左還北面揖搯三挾一个【楅南鄉當楅之位也】揖以耦左還上射於左【以猶與也言以者耦之事成於此意相人耦也上射轉居左使其反位也上射少北乃東面】退者與進者相左相揖還退釋弓矢於次說決拾襲反位三耦拾取矢亦如之後者遂取誘射之矢兼乘矢而取之以授有司於次中皆襲反位【有司納射器因留主授受之】

右再請射

司射作射如初一耦揖升如初司馬命去侯負侯許諾如初司馬降釋弓反位司射猶挾一个去朴與司馬交於階前適阼階下北面請釋獲於公【猶守故之辭於此言之者司射既誘射恒執弓挾矢以掌射事備尚未知當教之也今三耦卒射衆足以知之矣猶挾之者君子不必也】公許反搯朴遂命釋獲者設中以弓為畢北面【北面立於所設中之南當視之也鄉射禮曰設中南當楅西當西序】太史釋獲小臣師執中先首坐設之東面退太史實八算於中橫委其餘於中西興共而俟【先猶前也命太史而小臣師設之國君官多也小臣師退反東堂下位鄉射禮曰橫委其餘於中西南末】司射西面命曰中離維綱揚觸梱復公則釋獲衆則不與【離猶過也獵也侯有上下綱邪制躬舌之角者為維或曰維當為絹絹為綱耳揚觸者謂矢中他物揚而觸侯也梱復謂矢至侯不著而還復復反也公則釋獲優君也衆當中鵠而著古文梱作魁】唯公所中中三侯皆獲【值中一侯則釋獲】釋獲者命小史小史命獲者【傳告服不使知此司射所命】司射遂進由堂下北面視上射命曰不貫不釋上射揖司射退反位【貫猶中也射不中鵠不釋算古文貫作關】釋獲者坐取中之八算改實八算興執而俟【執所取算】乃射若中則釋獲者每一个釋一算上射於右下射於左若有餘算則反委之【委餘算禮貴異】又取中之八算改釋八算於中興執而俟三耦卒射

右再射釋獲

賓降取弓矢於堂西【不敢與君並俟告取之以升侯君事畢】諸公卿則適次繼三耦以南【言繼三耦明在大夫北】公將射則司馬師命負侯皆執其旌以負其侯而俟【君尊若始焉】司馬師反位隸僕人埽侯道【新之】司射去朴適阼階下告射於公公許適西階東告

於賓【告當射之今文曰阼階下無適】遂搯扑反位小射正一人取公之決拾於東坫上一小射正授弓拂弓皆以俟於東堂【授弓當授大射正拂弓去塵】公將射則賓降適堂西袒決遂執弓搯三挾一个升自西階先待於物北北一筈東面立【不敢與君併筈矢幹東面立鄉君也】司馬升命去侯如初還右乃降釋弓反位【還右還君之右也猶出下射之南還其後也今文曰右還】公就物小射正奉決拾以筈大射正執弓皆以從於物【筈萑葦器大射正舍司正親其職】小射正坐奠筈於物南遂拂以巾取決興贊設決朱極三【極猶放也所以韜指利放弦也以朱葦為之三者食指將指無名指無極放弦契於此指多則痛小指短不用】小臣正贊袒公袒朱襦卒袒小臣正退俟於東堂小射正又坐取拾興贊設拾以筈退奠於坫上復位【既袒乃設拾拾當以韝襦上】大射正執弓以袂順左右隈上再下壹左執弣右執簫以授公公親揉之【順放之也隈弓淵也揉宛之觀其安危也今文順為循古文揉為紐】小臣師以巾內拂矢而授矢於公稍屬【內拂恐塵及君也稍屬不搯矢】大射正立於公後以矢行告於公【若不中使君當知而改其度】下曰留上曰揚左右曰方【留不至也揚過去也方出旁也】公既發大射正受弓而俟拾發以將乘矢【公下射也而先發不留尊也】公卒射小臣師以巾退反位大射正受弓【受弓以授有司於東堂】小射正以筈受決拾退奠於坫上復位大射正退反司正之位小臣正贊襲公還而后賓降釋弓於堂西反位於階西東面【階西東面賓降位】公即席司正以命升賓賓升復筵而后卿大夫繼射諸公卿取弓矢於次中袒決遂執弓搯三挾一个出西面揖揖如三耦升射卒射降如三耦適次釋弓說決拾襲反位衆皆繼射釋獲皆如初【諸公卿言取弓矢衆言釋獲互言也】卒射釋獲者遂以所執餘獲適阼階下北面告於公曰左右卒射【司射不告者釋獲者於是有所事宜終之也餘獲餘算也無餘算則無所執古文曰餘算】反位坐委餘獲於中西興共而俟

右公及諸公卿大夫射 記君射則為下射上射退於物一筈既發則答君而俟【答對也此以下雜記也今文君射則為下】君樂作而后就物君袒朱襦以射【君尊】小臣以巾執矢以授【君尊不搯矢不挾矢授之稍屬 鄉射記】

君在大夫射則肉袒【不袒纁襦厭於君也今文無射 同上】

司馬袒執弓升命取矢如初負侯許諾以旌負侯如初司馬降釋弓如初小臣委矢於楅如初【司馬司馬正於是司馬師亦坐乘矢】賓諸公卿大夫之矢皆異束之以茅卒正坐左右撫之進束反位【異束大夫矢尊殊之也正司馬正也進前也又言束整結之示親也】賓之矢則以授矢人於西堂下【是言矢人則納射器之有司各以其器名官職不言君矢小臣以授矢人於東堂下可知】司馬釋弓反位而后卿大夫升就席【此言其升前小臣委矢於楅】司射適階西釋弓去朴襲進由中東立於中南北面視算【釋弓去朴射事已也】釋獲者東面於中西坐先數右獲【固東面矣復言之者少南就右獲】二算為純【純猶全也耦陰陽也】一純以取實於左手十純則縮而委之【縮從也於數者東西為從古文縮皆作蹙】每委異之【易較數】有餘純則橫諸下【又異之也自近為下】一算為奇奇則又縮諸純下【又從之】興自前適左【從中前北也更端故起】東面坐【少北於故】坐兼斂算實於左手一純以委十則異之【變於右也】其餘如右獲【謂所縮所橫者】司射復位釋獲者遂進取賢獲執之由阼階下北面告於公【賢獲勝黨之算也執之者齊而取其餘】若右勝則曰右賢於左若左勝則曰左賢於右以純數告若有奇者亦曰奇【告曰某賢於某若干純

若干奇】若左右鈞則左右各執一算以告曰左右鈞還復位坐兼斂算實八算於中委其餘於中西興共而俟

右取矢視算

司射命設豐【當飲不勝者射爵】司宮士奉豐由西階升北面坐設於西楹西降復位勝者之弟子洗觶升酌散南面坐奠於豐上降反位【弟子其少者也不授者射爵猶罰爵略之】司射袒執弓挾一个撝朴東面於三耦之西命三耦及衆射者勝者皆袒決遂執張弓【執張弓言能用之也右手挾弦】不勝者皆襲說決拾卻左手右加弛弓於其上遂以執弣【固襲說決拾矣復言之者起勝者也不勝者執弛弓言不能用之也兩手執弣無所挾也】司射先反位【居前俟所命入次而來飲】三耦及衆射者皆升飲射爵於西階上【不勝之黨無不飲】小射正作升飲射爵者如作射一耦出揖如升射及階勝者先升堂少右【先升尊賢也少右辟飲者亦因相飲之禮然】不勝者進北面坐取豐上之觶興少退立卒觶進坐奠於豐下興揖【立卒觶不祭不拜受罰不備禮也右手執觶左手執弓】不勝者先降【後升先降略之不由次也降而少右復並行】與升飲者相左交於階前相揖適次釋弓襲反位僕人師繼酌射爵取觶實之反奠於豐上退俟於序端【僕人師酌者君使之代弟子也自此以下辯為之酌】升飲者如初三耦卒飲若賓諸公卿大夫不勝則不降不執弓耦不升【此耦謂士也諸公卿或闕士為之耦者不升其諸公卿大夫相為耦者不降席重恥尊也】僕人師洗升實觶以授賓諸公卿大夫受觶於席以降適西階上北面立飲卒觶授執爵者反就席【雖尊亦西階上立飲不可以已尊枉正罰也授爵而不奠豐尊大夫也】若飲公則侍射者降洗角觶升酌散降拜【侍射賓也飲君則不敢以為罰從致爵之禮也】公降一等小臣正辭賓升再拜稽首公答再拜賓坐祭卒爵再拜稽首公答再拜賓降洗象觶升酌膳以致下拜小臣正辭升再拜稽首公答再拜公卒觶賓進受觶降洗散觶升實散下拜小臣正辭升再拜稽首公答再拜【賓復酌自飲者夾爵也但如致爵則無以異於燕也夾爵亦所以恥公也所謂若飲君燕則夾爵】賓坐不祭卒觶降奠於筐階西東面立【不祭象射爵】擯者以命升賓賓升就席【擯者司正也今丈席為筵】若諸公卿大夫之耦不勝則亦執弛弓特升飲【此耦亦謂士也特猶獨也以尊為耦而又不勝使之獨飲若無倫匹孤賤也】衆皆繼飲射爵如三耦射爵辯乃徹豐與觶【徹除也】

右飲不勝者 記若飲君如燕則夾爵【謂君在不勝之黨也賓飲君如燕賓媵觶於公之禮則夾爵夾爵者君既卒爵復自酌 鄉射記】

司宮尊侯於服不之東北兩獻酒東面南上皆加勺設洗於尊西北筐在南東肆實一散於筐【為大侯獲者設尊也言尊侯者獲者之功由侯也不於初設之者不敢必君射也君不射則不獻大侯之獲者散爵名容五升】司馬正洗散遂實爵獻服不【言服不者著其官尊大侯也服不司馬之屬掌養猛獸而教擾之者洗酌皆西面】服不侯西北三步北面拜受爵【近其所為獻】司馬正西面拜送爵反位【不侯卒爵略賤也此終言之獻服不之徒乃反位】宰夫有司薦庶子設折俎【宰夫有司宰夫之吏也鄉射記曰獲者之俎折脊脅肺】卒錯獲者適右个薦俎從之【不言服不言獲者國君大侯服不負侯其侯居乏待獲變其文容二人

也司馬正皆獻之薦俎已錯乃適右个明此獻已已歸功於侯也適右个由侯內鄉射記曰東方謂之右个【獲者左執爵右祭薦俎二手祭酒【祭俎不奠爵不備禮也二手祭酒者獲者南面於俎北當為侯祭於豆間爵反注為一手不能正也此薦俎之設如於北面人焉天子祝侯曰唯若寧侯無或若女不寧侯不屬於王所故抗而射女彊飲彊食貽女曾孫諸侯百福諸侯以下祝辭未聞】適左个祭如右个中亦如之【先祭个後中者以外即之至中若神在中鄉射禮曰獻獲者俎與薦皆三祭】卒祭左个之西北三步東面【北鄉受獻之位也不北面者嫌為侯卒爵】設薦俎立卒爵【不言不拜既爵司馬正已反位不拜可知也鄉射禮曰獲者薦右東面立飲】司馬師受虛爵洗獻隸僕人與巾車獲者皆如大侯之禮【隸僕人掃侯道巾車張大侯及參侯干侯之獲者其受獻之禮如服不也隸僕人巾車於服不之位受之功成於大侯也不言量人者此自後以及先可知】卒司馬師受虛爵奠於筐【獲者之筐】獲者皆執其薦庶子執俎從之設於乏少南【少南為復射妨旌也隸僕人巾車量人自服而不南】服不復負侯而俟

右獻服不

司射適階西去朴適堂西釋弓說決拾襲適洗洗觚升實之降獻釋獲者於其位少南【獻釋獲者與獲者異文武不同也去朴者朴不升堂也少南辟中】薦脯醢折俎皆有祭【俎與服不同唯祭一為異】釋獲者薦右東面拜受爵司射北面拜送爵釋獲者就其薦坐左執爵右祭脯醢興取肺坐祭遂祭酒【祭俎不奠爵亦賤不備禮】興司射之西北面立卒爵不拜既爵司射受虛爵奠於筐釋獲者少西辟薦反位【辟薦少西之者為復射妨司射視算亦辟俎也】

右獻釋獲者

司射適堂西袒決遂取弓挾一个適階西搯朴以反位【為將復射】司射倚朴於階西適阼階下北面請射於公如初【不升堂賓諸公卿大夫既射矣聞之可知】反搯朴適次命三耦皆袒決遂執弓序出取矢【擲言拾是言序互言耳】司射先反位【言先先三耦也司射既命三耦以入次之事即反位三耦入次袒決遂執弓挾矢乃出反次外西面位擲不言司射先反位三耦未有次外位無所先也】三耦拾取矢如初小射正作取矢如初【小射正司射之佐作取矢禮殺代之】三耦既拾取矢諸公卿大夫皆降如初位與耦入於次皆袒決遂執弓皆進當楅進坐說矢束上射東面下射西面拾取矢如三耦【皆進當楅進三耦揖之位也凡繼射命耦而已不作射不作取矢從初】若士與大夫為耦士東面大夫西面大夫進坐說矢束退反位【說矢束自同於三耦謙也】耦揖進坐兼取乘矢興順羽且左還毋周反面揖【兼取乘矢不敢與大夫拾】大夫進坐亦兼取乘矢如其耦北面搯三挾一个揖進大夫與其耦皆適次釋弓說決拾襲反位諸公卿升就席【大夫反位諸公卿乃升就席大夫與已上下位】衆射者既拾取矢皆如三耦遂入於次釋弓矢說決拾襲反位

右三請射

司射猶挾一个以作射如初一耦揖升如初司馬升命去侯負侯許諾司馬降釋弓反位司射與司馬交於階前倚朴於階西適阼階下北面請以樂於公公許【請奏樂以為節也始射獲而未釋獲復釋獲復用樂行之君子之於事也始取苟能中課有功終用成法教化之漸也射用應樂為難孔子曰射者何以聽循聲而發發而不失正鵠者其唯賢者乎】司射反摺朴東面命樂正曰命用樂【言君有命用樂射也樂正在工南北面】樂正曰諾司射遂適堂下北面眡上射命曰不鼓不釋【不與鼓節相應不釋算也鼓亦樂之節學記曰鼓無當於五聲五聲不得和凡射之鼓節投壺其存者也周禮射節天子九諸侯七卿大夫以下五】上射揖司射退反位樂正命大師曰奏貍首間若一【樂正西面受命左還東面命大師以大射之樂章使奏之也貍首逸詩曾孫也貍之言不來也其詩有射諸侯首不朝者之言因以名篇後世失之謂之曾孫曾孫者其章頭也射義所載詩曰曾孫侯氏是也以為諸侯射節者采其既有弧矢之威又言小大莫處御於君所以燕以射則燕則譽有樂以時會君事之志也間若一者調其聲之疏數重節】大師不興許諾樂正反位奏貍首以射三耦卒射賓待於物如初公樂作而后就物稍屬不以樂志其他如初儀【不以樂志君之射儀遲速從心其發不必應樂辟不敏也志意所擬度也春秋傳曰吾志其目】卒射如初賓就席諸公卿大夫衆射者皆繼射釋獲如初卒射降反位釋獲者執餘獲進告左右卒射如初

右三射用樂

司馬升命取矢負侯許諾司馬降釋弓反位小臣委矢司馬師乘之皆如初司射釋弓視算如初釋獲者以賢獲與鈞告如初復位

右取矢視算

司射命設豐實觶如初遂命勝者執張弓不勝者執弛弓升飲如初卒退豐與觶如初

右飲不勝者

司射猶袒決遂左執弓右執一个兼諸弦面鏃適次命拾取矢如初【側持弦矢曰執面猶尚也兼矢於弦尚鏃將止變於射也】司射反位三耦及諸公卿大夫衆射者皆袒決遂以拾取矢如初矢不挾兼諸弦面鏃退適次皆授有司弓矢襲反位【不挾亦謂執之如司射】卿大夫升就席司射適次釋弓說決拾去朴襲反位司馬正命退楅解綱小臣師退楅巾車量人解左下綱司馬師命獲者以旌與薦俎退【解猶釋也今文司馬師無司馬】司射命釋獲者退中與算而俟【諸所退射器皆俟備君復射釋獲者亦退其薦俎】

右三射畢

公又舉奠觶唯公所賜若賓若長以旅於西階上如初大夫卒受者以虛觶降奠於筐反位

右公為大夫舉旅

司馬正升自西階東楹之東北面告於公請徹俎公許【射事既畢禮殺人倦宜徹俎燕坐】遂適西階上北面告於賓賓北面取俎以出諸公卿取俎如賓禮遂出授從者於門外【自其從者】大夫降復位【門東北面位】庶子正徹公俎降自阼階以東【降自阼階若親徹也以東去藏】

右徹俎

賓諸公卿皆入門東面北上【諸公卿不入門而右以將燕亦因從賓】司正升賓賓諸公卿大夫皆說屨升就席公以賓及卿大夫皆坐乃安【晡命以我安臣於君尚猶蹢躅至此乃敢安】羞庶羞【羞進也庶衆也所進衆羞謂 肝膋狗臠醢也或有炮鼈膾鯉雉兔鶉鴛】大夫祭薦【燕乃祭薦不敢於盛成禮】司正升受命皆命公曰衆無不醉賓及諸公卿大夫皆興對曰諾敢不醉皆反位坐【皆命者命賓命諸公命卿大夫皆鄉其位也興對必降席故也司正退立西序端】

右燕

主人洗酌獻士於西階上士長升拜受觶主人拜送【獻士用觶士賤也今文觶作觚】士坐祭立飲不拜既爵其他不拜坐祭立飲【其他謂衆士升不拜受爵】乃薦司正與射人於觶南北面東上司正為上【司正射人士也以齒受獻既乃薦之也司正大射正也射人小射正略其佐】辯獻士士既獻者立於東方西面北上乃薦士【士既獻易位者以卿大夫在堂臣位尊東也畢獻薦之略賤】祝史小臣師亦就其位而薦之【亦者亦士也辯獻乃薦也祝史門東北面東上】主人就士旅食之尊而獻之旅食不拜受爵坐祭立飲【主人既酌西面士旅食北面受之不洗者於賤略之】主人執虛爵奠於筐復位

右主人獻士及祝史等

賓降洗升媵觶於公酌散下拜公降一等小臣正辭賓升再拜稽首公答再拜【賓受公賜多矣禮將終宜勸公序厚意也今文觶為觚公答拜無再拜】賓坐祭卒爵再拜稽首公答再拜賓降洗象觶升酌膳坐奠於薦南降拜小臣正辭賓升成拜公答拜賓反位【反位反席也此觶當為觶】

右賓媵爵於公

公坐取賓所媵觶興唯公所賜受者如初受酬之禮降更爵洗升酌膳下再拜稽首小臣正辭升成拜公答拜乃就席坐行之【坐行之若今坐相勸酒】有執爵者【士有盥升主酌授之】唯受於公者拜【公所賜者拜其餘則否】司正命執爵者爵辯卒受者興以酬士【欲令惠均】大夫卒受者以爵興西階上酬士士升大夫奠爵拜士答拜【興酬士者士立堂下與上坐者異也】大夫立卒爵不拜賓之士拜受大夫拜送士旅於西階上辯【祝史小臣師旅食皆及焉】士旅酌【旅序也士以次自酌相酬無執爵者】

右公為士舉旅

若命曰復射則不獻庶子【獻庶子則正禮畢無事】司射命射唯欲【司射命賓及諸公卿大夫射欲者則射不欲者則止可否之事從人心也】卿大夫皆降再拜稽首公答拜【拜君樂與臣下執事無已不言賓賓從羣臣禮在上】壹發中三侯皆獲【其功一也而和者益多尚歡樂也矢揚觸或有參中者】

右復射

主人洗升自西階獻庶子於阼階上如獻士之禮辯獻降洗遂獻左右正與內小臣皆於阼階上如獻庶子之禮【庶子既掌正六牲之體又正舞位授舞器與膳宰樂正聯事又掌國子戒令教治世子之官也左右正謂樂正僕人正也位在中庭之左右小樂正在頌磬之北右也工在西即北面工遷於東則東面大樂正在笙磬之北左也工在西則西面工遷於東則北面僕人正相大師工升堂與其師士降立於小樂正之北北上工遷於東則陪其工後國君無故不釋縣二正君之近官也內小臣奄人掌君陰事陰令后夫人之官也獻三官於阼階別內外臣也同獻更洗以時事不聯也獻正下及內小臣則磬人鍾人鐃人鼓人僕人師僕人士盡獻可知也庶子內小臣位在小臣師之東少退西上】

右獻庶子左右正內小臣

無算爵【算數也爵行無次數唯意所勸醉而止】士也有執膳爵者有執散爵者執膳爵者酌以進公公不拜受執散爵者酌以之公命所賜所賜者興受爵降席下奠爵再拜稽首公答再拜【席下席西】受賜爵者以爵就席坐公卒爵然後飲【酬之禮爵代舉今爵竝行嫌不代也竝行猶代者明勸惠從尊者來】執膳爵者受公爵酌反奠之【燕之歡在飲酒成其意也】受賜者興授執散爵者執散爵者乃酌行之【與其所歡者】唯受於公者拜卒爵者興以酬士於西階上士升大夫不拜乃飲實爵【乃猶而也】士不拜受爵大夫就席士旅酌亦如之公有命徹罍則賓及諸公卿大夫皆降西階下北面東上再拜稽首【命徹罍者公意殷勤欲盡酒】公命小臣正辭公答拜大夫皆辟升反位【升不成拜於將醉正臣禮】士終旅於上如初【卿大夫降而爵止於其反席卒之】無算樂【升歌間合無次數唯意所樂】宵則庶子執燭於阼階上司宮執燭於西階上甸人執大燭於庭閹人為燭於門外【宵夜也燭燋也甸人掌共薪蒸者庭大燭為其位廣也為作也作燭俟賓出】

右無算爵

賓醉北面坐取其薦脯以降【取脯重得君之賜】奏陔【陔夏樂章也其歌頌類也以鐘鼓奏之其篇今亡】賓所執脯以賜鐘人於門內雷遂出【必賜鐘人鐘人以鐘鼓奏陔夏賜之脯明雖醉志禮不忘樂】卿大夫皆出【從賓出】公不送【臣也與之安燕交歡嫌亢禮也】公入驚【驚夏亦樂章也以鐘鼓奏之其詩今亡此公出而言入者射宮在郊以將還為入燕不驚者於路寢無出入也】

右賓出公入

禮書綱目卷十

卷十一

<經部,禮類,通禮之屬,禮書綱目

欽定四庫全書

禮書綱目卷十一 婺源江永撰

三射記 嘉禮十六

補

梓人為侯廣與崇方參分其廣而鵠居一焉【崇高也方猶等也高廣等者謂侯中也天子射禮以九為節侯道九十弓弓二寸以為侯中則天子侯中丈八尺諸侯於其國亦然鵠所射也以皮為之各如其侯也居侯中參分之一則此鵠方六尺惟大射以皮飾侯大射者將祭之射也其餘有賓射燕射】上兩個與其身三下兩個半之【鄭司農云兩個謂布可以維持侯者也上方兩枚與身三設身廣一丈兩個各一丈凡為三丈下兩個半之傳地故短也玄謂个讀若齊人擗幹之幹上个下个皆謂舌也身躬也鄉射禮記曰倍中以為躬倍躬以為左右舌下舌半上舌然則九節之侯身三丈六尺上个七丈二尺下个五丈四尺其制身夾中个夾身在上下各一幅此侯凡用布三十六丈言上个與其身三者明身居一分上个倍之耳亦為下个半上个出也个或謂之舌者取其出而左右也侯制上廣下狹盖取象於人也張臂八尺張足六尺是取象率焉】上綱與下綱出舌尋緼寸焉【綱所以繫侯於植者也上下皆出舌一尋者亦人張手之節也鄭司農云綱連侯繩也緼籠綱者緼讀為竹中皮之緼舌維持侯者】張皮侯而棲鵠則春以功【皮侯以皮所飾之侯司裘職曰王大射則共虎侯熊侯豹侯設其鵠謂此侯也春讀為蠢蠢作也出也天子將祭必與諸侯羣臣射以作其容體出其合於禮樂者與之事鬼神焉】張五采之侯則遠國屬【五采之侯謂以五采畫正之侯也射人職曰以射法治射儀王以六耦射三侯三獲三容樂以騶虞九節五正下曰若王大射則以狸步張三侯明此五正之侯非大射之侯明矣其職又曰諸侯在朝則皆北面遠國屬者若諸侯朝會王張此侯與之射所謂賓射也正之外方如鵠內二尺五采者內朱白次之蒼次之黃次之黑次之其侯之飾又以五采畫雲氣焉】張獸侯則王以息燕【獸侯畫獸之侯也鄉射記曰凡侯天子熊侯白質諸侯麋侯赤質大夫布侯畫以虎豹士布侯畫以鹿豕凡畫者丹質是獸侯之差也息者休農息老物也燕謂勞使臣若與羣臣間暇飲酒而射 考工記

此一條總論三射侯制】天子將祭必先習射於澤澤者所以擇士也已射於澤而后射於射宮射中者得與於祭不中者不得與於祭【詳見射義】古者天子之制諸侯歲獻貢士於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭【同上 此二條是論天子大射】司裘王大射則共虎侯熊侯豹侯設其鵠諸侯則共熊侯豹侯卿大夫則共麋侯皆設其鵠【大射者為祭祀射王將有郊廟之事以射擇諸侯及羣臣與邦國所貢之士可以與祭者射者可以觀德行其容體比於

禮其節比於樂而中多者得與於祭諸侯謂三公及王子弟封於畿內者卿大夫亦皆有采地焉其將祀其先祖亦與羣臣射以擇之凡大射各於其射宮侯者其所射也以虎熊豹麋之皮飾其側又方制之以為 謂之鵠著於侯中所謂皮侯王之大射虎侯王所自射也熊侯諸侯所射豹侯卿大夫以下所射諸侯之大射熊侯諸侯所自射豹侯羣臣所射卿大夫之大射麋侯君臣共射焉凡此侯道虎九十弓熊七十弓豹麋五十弓列國之諸侯大射大侯亦九十參七十干五十遠尊得伸可同耳所射正謂之侯者天子中之則能服諸侯諸侯以下中之則得為諸侯鄭司農云鵠鵠毛也方十尺曰侯四尺曰鵠二尺曰正四寸曰質玄謂侯中之大小取數於侯道鄉射記曰弓二寸以為侯中則九十弓者侯中廣丈八尺七十弓者侯中廣丈四尺五十弓者侯中廣一丈尊卑異等此數明矣考工記曰梓人為侯廣與崇方參分其廣而鵠居一焉然則侯中丈八尺者鵠方六尺侯中丈四尺者鵠方四尺六寸大半寸侯中一丈者鵠方三尺三寸少半寸謂之鵠者取名於鵠鵠鵠小鳥而難中是以中之為雋亦取鵠之言較較者直也射所以直己志用虎熊豹麋之皮示服猛討迷惑者射者大禮故取義衆也士不大射士無臣祭無所擇故書諸侯則共熊侯虎侯杜子春云虎當為豹 天官

此一條論天子以下大射之侯】 大宗伯以嘉禮親萬民以賓射之禮親故舊朋友【射禮雖王亦立賓主也王之故舊朋友為世子時共在學者天子亦有友諸侯之義武王誓曰我友邦冢君是也司寇職有議故之辟議賓之辟 春官 此一條論天子賓射】 射人以射法治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大夫以三耦射一侯一獲一容樂以采蘋五節二正士以三耦射豸侯一獲一容樂以采蘩五節二正【射法王射之禮治射儀謂肆之也鄭司農云三侯虎熊豹也容者乏也待獲者所蔽也九節析羽九重設於長杠也正所射也詩云終日射侯不出正兮二侯熊豹也豸侯豸者獸名也獸有羆豸熊虎玄謂三侯者五正三正二正之侯也二侯者三正二正之侯也一侯者二正而已此皆與賓射於朝之禮也考工梓人職曰張五采之侯則遠國屬遠國謂諸侯來朝者也五采之侯即五正之侯也正之言正也射者內志正則能中焉畫五正之侯中朱次白次蒼次黃玄居外三正損玄黃二正去白蒼而畫以朱綠其外之廣皆居侯中參分之一中二尺今儒家云四尺曰正二尺曰鵠鵠乃用皮其大如正此說失之矣大射禮豸作干讀如宜豸宜獄之豸豸胡犬也士與士射則以豸皮飾侯下大夫也大夫以上與賓射飾侯以雲氣用采各如其正九節七節五節者奏樂以為射節之差言節者容侯道之數也樂記曰明乎其節之志不失其事則功成而德行立 夏官 此一條論天子以下賓射之法】 凡侯天子熊侯白質諸侯麋侯赤質大夫布侯畫以虎豹士布侯畫以鹿豕【此所謂獸侯也燕射則張之鄉射及賓射當張采侯二正而記此者天子諸侯之燕射各以其鄉射之禮而張此侯由是云焉白質赤質者謂采其地其地不采者白布也熊麋虎豹鹿豕皆正面畫其頭象於正鵠之處耳君畫一臣畫二陽奇陰偶之數也燕射射熊虎豹不妄上下相犯射麋鹿豕志在君臣相養也其畫之皆毛物之屬】 凡畫者丹質【賓射之侯燕射之侯皆畫雲氣於側以為飾必先以丹采其地丹淺於赤 鄉射記

此一條論天子以下燕射之侯】 樂師凡射王以騶虞為節諸侯以貍首為節大夫以

采蘋為節士以采蘩為節【騶虞采蘋采蘩皆樂章名在國風召南唯貍首在樂記射義曰騶虞者樂官備也貍首者樂會時也采蘋者樂循法也采蘩者樂不失職也是故天子以備官為節諸侯以時會為節卿大夫以循法為節士以不失職為節鄭司農云以大射禮曰樂正命大

師曰奏貍首問若一大師不興許諾樂正反位奏貍首以射貍首曾孫 春官】
鍾師凡射王奏騶虞諸侯奏貍首卿大夫奏采蘋士奏采蘩【鄭司農云騶虞聖獸 同上
此二條論天子以下樂節】 天子之弓合九而成規諸侯合七而成規大夫合五而成規士合
三而成規【體往來之衰也往體寡來體多則合多往體多來體寡則合少而圓 夏官司弓矢
此一條論天子以下弓制】 君國中射則皮樹中以翺旌獲白羽與朱羽糅【國中城中也謂
燕射也皮樹獸名以翺旌獲尚文德也今文皮樹為繁豎糅為韜古文無以】於郊則閭中以
旌獲【於郊謂大射也大射於大學王制曰小學在於公宮之左大學在郊閭獸名如驢一角
或曰如驢岐蹄周書曰北唐以閭析羽為旌】於竟則虎中龍旌【於竟謂與鄰國君射也畫
龍於旌尚文章也通帛為旌】大夫兕中各以其物獲【兕獸名似牛一角】士鹿中翺旌以
獲【謂小國之州長也用翺為旌以獲無物也古文無以獲】唯君有射於國中其餘否【臣
不習武事於君側也古文有作又今文無其餘否
鄉射記此一條論諸侯以下中及獲旌之制】

右總要

射人若王大射則以貍步張三侯【鄭司農云貍步謂一舉足為一步於今為半步玄謂貍善
搏者也行則止而擬度焉其發必獲是以量侯道法之也侯道者各以弓為度九節者九十弓
七節者七十弓五節者五十弓弓之下制長六尺大射禮曰大侯九十參七十干五十是也三
侯者司裘所共虎熊豹侯也列國之君大射亦張三侯數與天子同大侯熊侯也參讀為糝
糝雜也雜者豹鵠而麋飾下天子大夫夏官】 車僕大射共三乏【鄭司農云乏讀為匱乏之乏
春官】 司常凡射共獲旌【獲旌獲者所持旌 同上】 服不氏射則贊張侯以旌居乏而待
獲【贊佐也大射禮曰命量人巾車張三侯杜子春云待當為持書亦或為持乏讀為匱乏之
乏持獲者所蔽玄謂待獲待射者中舉旌以獲 夏官】

掌次射則張耦次【耦俱升射者次在洗東大射曰遂命三耦取弓矢於次 天官】

笙師凡射共其鍾笙之樂【鐘笙與鐘聲相應之笙 春官】 典庸器祭祀帥其屬而設筍虞陳
庸器賓射亦如之【設筍虞眡瞭當以縣樂器焉陳功器以華國也 同上】 司几筵大射王位
設黼依依前南鄉設莞筵紛純加縹席畫純加次席黼純左右玉几【斧謂之黼其繡白黑采
以絳帛為質依其制如屏風然於依前為王設席左右有几優至尊也鄭司農云紛讀為幽又
讀為和粉之粉謂白繡也純讀為均服之均純緣也縹讀為藻率之藻次席虎皮為席書顧命
曰成王將崩命大保芮伯畢公等被冕服憑玉几玄謂紛如綬有文而狹者縹席削蒲蒻展之
編以五采若今合歡席矣畫謂雲氣也次席桃枝席有次列成文 同上】 牛人賓射共其膳羞
之牛【羞進也所進賓之膳燕禮小臣請執幂者與羞膳者至獻賓而膳宰設折俎 地官】

司服射則鷩冕【射與諸侯射也鷩畫以雉謂草蟲也其衣三章裳四章凡七章 春官】

大司樂大射王出入令奏王夏 眡瞭賓射皆奏其鐘鼓【擊鞀以奏之其登歌大師自奏之】
鐸師祭祀鼓其金奏之樂賓射亦如之【並春官】 射人掌國之三公孤卿大夫之位三公北
面孤東面卿大夫西面其摯三公執璧孤執皮帛卿執羔大夫雁【位將射始入見君之位不
言士者此與諸侯之賓射士不與也燕禮曰公升即位於席西鄉小臣納卿大夫卿大夫皆入
門右北面東上士立於西方東面北上大射亦云則凡朝燕及射臣見於君之禮同】 諸侯在
朝則皆北面詔相其灋【謂諸侯來朝而未歸王與之射於朝者皆北面從三公位法其禮儀

夏官】司弓矢恒矢庫矢用諸散射【恒矢安居之矢也庫矢象焉二者皆可以散射也謂禮射及習射也前後訂其行平也】大射燕射共弓矢如數并夾【如數如當射者之數也每一人一弓乘矢并夾矢籥也同上】大司馬若大射則合諸侯之六耦【大射王將祭射於射宮以選賢也王射三侯以諸侯為六耦】小司馬凡射掌其事如大司馬之灋【並同上】大史凡射事飾中舍算執其禮事【舍讀曰釋鄭司農云中所以盛算也玄謂設算於中以待射時而取之中則釋之鄉射禮曰君國中射則皮豎中於郊則閭中於竟則虎中大夫兕中士鹿中天子之中未聞春官】膳人掌王之用弓矢挾拾【鄭司農云挾者所以縱弦也拾者所以引弦也詩曰決拾既伙詩家說或謂挾謂引弦彊也拾謂鞬扞也玄謂挾挾矢時所以持弦飾也著右手巨指士喪禮曰挾用正王棘若櫟棘則天子用象骨與鞬扞著左臂裏以韋為之】掌詔王射【告王當射之節】贊王弓矢之事【授之受之夏官】

大僕王射則贊弓矢【贊謂授之受之】

小臣賓射掌事如大僕之法【賓射與諸侯來朝者射】射人王射則令去侯立於後以矢行告卒令取矢【鄭司農云射人主令人去侯所而立於後也以矢行告射人主以矢行高下左右告於王也大射禮曰大射正立於公後以矢行告於公下曰留上曰揚左右曰方杜子春說以矢行告告白射事於王王則執矢也杜子春說不與禮經合疑非是也卒令取矢謂射卒射人令當取矢者使取矢也玄謂令去侯者命負侯者去侯也鄉射曰司馬命獲者執旌以負侯】祭侯則為位【祭侯獻服不服不以祭侯為位為服不受獻之位也大射曰服不侯西北三步北面拜受爵】與大史數射中【射中數射者中侯之筭也大射曰司射適階西釋弓去朴襲進由中東立於中南北面視筭】佐司馬治射正【射正射之法儀也】射鳥氏射則取矢矢在侯高則以并夾取之【鄭司農云王射射鳥氏主取其矢矢在侯高者矢著侯高人手不能及則以并夾取之并夾鍼箭具夾讀為甲故司弓矢職曰大射燕射共弓矢并夾並同上】祭侯之禮以酒脯醢【謂司馬實爵而獻獲者於侯薦脯醢折俎獲者執以祭侯】其辭曰惟若寧侯【若猶女也寧安也謂先有功德其鬼有神】毋或若女不寧侯不屬於王所故抗而射女【或有也若如也屬猶朝會也抗舉也張也】強飲強食詒女曾孫諸侯百福【詒遺也曾孫諸侯謂女後世為諸侯者考工梓人】大司樂及射令奏騶虞【騶虞樂章名在召南之卒章王射以騶虞為節】詔諸侯以弓矢舞【舞謂執弓挾矢揖讓進退之儀春官】樂師燕射帥射夫以弓矢舞【射夫衆耦也故書燕為舞帥為率射】

【夫為射矢鄭司農云舞當為燕率當為帥射矢當為射夫】

大師大射帥瞽而歌射節【射節王歌騶虞並同上】

右天子射儀敦弓既堅四鍬既鈞舍矢既均序賓以賢敦弓既句既挾四鍬四鍬如樹序賓以不侮【大雅行葦詳見嘉事雜記篇】

諸侯之射也必先行燕禮卿大夫士之射也必先行鄉飲酒之禮【詳見射義】君與射則為下射袒朱襦樂作而后就物小臣以巾授矢稍屬不以樂志既發則小臣受弓以授弓人上射退於物一筈既發則答君而俟若飲君燕則夾爵君在大夫射則肉袒【詳見燕禮】君使士射不能則辭以疾言曰某有負薪之憂【射者所以觀德唯有疾可以辭也使士射謂以備耦也憂或為疾曲禮】

右諸侯以下射儀【大射鄉射有正篇侯中樂節等已見總要章】賓之初筵左右秩秩籩豆有楚殽核維旅酒既和旨飲酒孔偕鐘鼓既設舉醕逸逸大侯既抗弓矢斯張射夫既同獻爾發功發彼有的以祈爾爵【賦也初筵初即席也左右筵之左右也秩秩有序也楚列貌殽豆實也核籩實也旅陳也和旨謂美也孔甚也偕齊一也設宿設而又遷於下也大射樂人宿縣厥明將射乃遷樂於下以避射位是也舉醕舉所奠之醕爵也逸逸往來有序也大侯君侯也天子熊侯白質諸侯麋侯赤質大夫布侯畫以虎豹士布侯畫以鹿豕天子侯身一丈其中三分居一白質畫熊其外則丹地畫以雲氣抗張也凡射張侯而不繫左下綱中掩束之至將射則司馬命張侯弟子脫束遂繫左下綱也大侯張而弓矢亦張節也射夫既同比其耦也射禮選羣臣為三耦三耦之外其餘各自取匹謂之衆耦獻猶奏也發發矢也的質也祈求也爵射不中者飲豐上之觶也衛武公飲酒悔過而作此詩此章言因射而飲者初筵禮儀之盛酒既調美而飲者齊一至於設鐘鼓舉醕爵抗大侯張弓矢而衆耦拾發各心競云我以此求爵汝也小雅賓之初筵】范獻子來聘公享之展莊叔執幣【公將以酬賓】射者三耦【二人為耦】公臣不足取於家臣家臣展瑕展玉父為一耦公臣公巫召伯仲顏莊叔為一耦鄩鼓父黨叔為一耦【言公室卑微公臣不能備於三耦襄二十九年左氏傳】

司弓矢王弓弧弓以授射甲革楯質者【往禮寡來體多曰王弧甲革革甲也春秋傳曰蹲甲而射之質正也樹楯以為射正射甲與楯試弓習武也】澤共射楯質之弓矢【鄭司農云澤澤宮也所以習射選士之處也射義曰天子將祭必先習射於澤澤者所以擇士也已射於澤而后射於射宮射中者得與於祭夏官】

圉師射則充楯質【杜子春讀楯為齊人言鉄楯之楯楯質所射者習射處同上】禮射不主皮主皮之射勝者又射不勝者降【禮射謂以禮樂也大射賓射燕射是矣不主皮者貴其容體比於禮其節比於樂不待中為雋也言不勝者降則不復升射也主皮者無侯張獸皮而射之主於獲也尚書傳曰戰鬪不可不習故於蒐狩以閑之也閑之者貫之也貫之者習之也凡祭取餘獲陳於澤然後卿大夫相與射也中者雖不中也取不中者雖中也不取何以然所以貴揖讓之取也而賤勇力之取也擲之取也於圉中勇力之取也今之取也於澤宮揖讓之取也澤習禮之處非所以行禮其射又主中此主皮之射與天子大射張皮侯賓射張五采之侯燕射張獸侯鄉射記】

右武射戰鬪不可不習故於蒐狩閑之也閑之者貫之也貫之也者習之也已祭取餘獲陳於澤【澤射宮也】然後卿大夫相與射命中者雖不中取也命不中者雖中不取何以也所以貴揖讓之取而賤勇力之取也擲之取也於國中勇力之取也今之取也於澤宮揖讓之取也【尚書大傳】散軍而郊射左射貍首右射騶虞而貫革之射息也【郊射為射宮於郊也左東學右西學也貍首騶虞所以歌為節也貫革射穿甲革也樂記】

射義 嘉禮十七

古者諸侯之射也必先行燕禮卿大夫士之射也必先行鄉飲酒之禮故燕禮者所以明君臣之義也鄉飲酒之禮者所以明長幼之序也【言別尊卑老穉而後射以觀德行也】故射者進退周旋必中禮內志正外體直然後持弓矢審固持弓矢審固然後可以言中此可以觀德

行矣【內正外直習於禮樂有德行者也正鵠之名出於此也】其節天子以騶虞為節諸侯以貍首為節卿大夫以采蘋為節士以采芣為節騶虞者樂官備也貍首者樂會時也采蘋者樂循法也采芣者樂不失職也是故天子以備官為節諸侯以時會天子為節卿大夫以循法為節士以不失職為節故明乎其節之志以不失其事則功成而德行立德行立則無暴亂之禍矣功成則國安故曰射者所以觀盛德也【騶虞采蘋采芣今詩篇名貍首逸下云曾孫侯氏是也樂官備者謂騶虞曰壹發五豝喻得賢者多也于嗟乎騶虞嘆仁人也樂會時者謂貍首曰小大莫處御於君所樂循法者謂采蘋曰于以采蘋南澗之濱循澗以采蘋喻循法度以成君事也樂不失職者謂采芣曰被之童童夙夜在公】是故古者天子以射選諸侯卿大夫士射者男子之事也因而飾之以禮樂也故事之盡禮樂而可數為以立德行者莫若射故聖王務焉【選士者先德行乃後決之於射男子生而有射事學禮樂以飾之】是故古者天子之制諸侯歲獻貢士於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭數與於祭而君有慶數不與於祭而君有讓數有慶而益地數有讓而削地故曰射者射為諸侯也【歲獻獻國事之書及計偕物也三歲而貢士舊說云大國三人次國二人小國一人】是以諸侯君臣盡志於射以習禮樂夫君臣習禮樂而以流亡者未之有也【流猶放也書曰流共工於幽州】故詩曰曾孫侯氏四正具舉大夫君子凡以庶士小大莫處御於君所以燕以射則燕則譽言君臣相與盡志於射以習禮樂則安則譽也是以天子制之而諸侯務焉此天子之所以養諸侯而兵不用諸侯自為正之具也【此曾孫之詩諸侯之射節也四正正爵四行也四行者獻賓獻公獻卿獻大夫乃後樂作而射也莫處無安居其官次者也御猶侍也以燕以射先行燕禮乃射也則燕則譽言國安則有名譽譽或為與射義】射之為言者繹也或曰舍也繹者各繹己之志也故心平體正持弓矢審固持弓矢審固則射中矣故曰為人父者以為父鵠為人子者以為子鵠為人君者以為君鵠為人臣者以為臣鵠故射者各射己之鵠故天子之大射謂之射侯射侯者射為諸侯也射中則得為諸侯射不中則不得為諸侯【大射將祭擇士之射也以為某鵠者將射還視侯中之時意曰此鵠乃為某之鵠吾中之則成人不中之則不成人也得為諸侯謂有慶也不得為諸侯謂有讓也】天子將祭必先習射於澤澤者所以擇士也已射於澤而后射於射宮射中者得與於祭不中者不得與於祭不得與於祭者有讓削以地得與於祭者有慶益以地進爵紕地是也【澤宮名士謂諸侯朝者諸臣及所貢士也皆先令習射於澤已乃射於射宮課中否也諸侯有慶者先進爵有讓者先削地】故男子生桑弧蓬矢六以射天地四方天地四方者男子之所有事也故必先有志於其所有事然後敢用穀也飯食之謂也【男子生則設弧於門左三日負之又為之射乃食子也】射者仁之道也射求正諸已已正而后發發而不中則不怨勝已者反求諸已而已矣【諸猶於也】孔子曰君子無所爭必也射乎揖讓而升下而飲其爭也君子【必也射乎言君子至於射則有爭也下降也亦揖讓而升降勝者袒決遂執張弓不勝者襲說決拾卻左手右加弛弓於其上而升飲君子恥之是以射則爭中】孔子曰射者何以射何以聽循聲而發發而不失正鵠者其唯賢者乎若夫不肖之人則彼將安能以中【何以言其難也聲謂樂節也畫布曰正棲皮曰鵠正之言正也鵠之言楷也楷直也言人正直乃能中也發或為射郊特牲篇孔子曰射之以樂也何以聽何以射注多其射容與樂節相應也】詩云發彼有的以祈爾爵祈求也求中以辭爵也酒者所以養老也所以養病也求中以辭爵者辭養也【發猶射也的謂所射之識也言射的必欲中之者以求不飲女爵也辭養讓見養也爾或為有同上】子曰射不主皮為力不同科古之道也

【射不主皮鄉射禮文為力不同科孔子解禮之意如此也皮革也布侯而棲革於其中以爲的所謂鹄也科等也古者射以觀德但主於中而不主於貫革蓋以人之力有強弱不同等也記曰武王克商散軍郊射而貫革之射息正謂此也周衰禮廢列國兵爭復尚貫革故孔子歎之論語】

子曰射有似乎君子失諸正鹄反求諸其身【反求於其身不以怨人畫布曰正棲皮曰鹄中庸】孔子曰士使之射不能則辭以疾縣弧之義也【男子生而設弧於門左示有射道而未能也女子設帨郊特牲】天子所以親射何助陽氣達萬物也春氣微弱恐物有窒塞不能自達者夫射自內發外貫堅入剛象物之生故以射達之也含文嘉曰天子射熊諸侯射麋大夫射虎豹士射鹿豕天子所以射熊何示服猛巧佞也熊為獸猛巧者非但當服猛也示當服天下巧佞之臣也諸侯射麋者示達迷惑人也麋之言迷也大夫射虎豹者示服猛也士射鹿豕者示除害也各取德所能服也大夫士兩射者人臣示為君親視事身勞苦也侯者以布為之何用人事之始也本正則末正矣所以名為侯何明諸侯有不朝者則射之所以不射正身何君子重同類不忍射之故畫獸而射之射正何為乎曰射義非一也夫射者執弓堅固心平體正然後中也二人爭勝樂以德養也勝負俱降以崇禮讓可以選士故射選士大夫勝者發近而制遠也其兵短而害長也故可以戒難也所以必因射助陽選士者所以扶助微弱而抑其強和調陰陽戒不虞也因射習禮樂射於堂上何示從上制下也天子射百二十步諸侯九十步大夫七十步士五十步明尊者所服遠卑者所服近也【白虎通】

禮書綱目卷十一

卷十二

欽定四庫全書

禮書綱目卷十二 婺源江永撰

投壺 嘉禮十八

補經【鄭目錄云名曰投壺者以其記主人與客燕飲講論才藝之禮此於別錄屬吉禮亦實曲禮之正篇 疏曰投壺與射為類此於五禮宜屬嘉禮也或云宜屬賓禮】

投壺之禮主人奉矢司射奉中使人執壺【矢所以投者也中士則鹿中也射人奉之者投壺射之類也其奉之西階上北面】主人請曰某有枉矢哨壺請以樂賓賓曰子有旨酒嘉肴某既賜矣又重以樂敢辭【燕飲酒既脫履升坐主人乃請投壺也否則或射所謂燕射也枉哨不正貌為謙辭 大戴禮投壺篇曰請樂賓無以字又無某既賜矣哨皆作峭】主人曰枉矢哨壺不足辭也敢固以請賓曰某既賜矣又重以樂敢固辭【固之言如故也言如故辭者重辭也 大戴無上固字某既賜矣作某賜旨酒嘉肴】主人曰枉矢哨壺不足辭也敢固以請賓曰某固辭不得命敢不敬從【不得命不以命見許 大戴作賓對曰】賓再拜受主人般還曰辟【賓再拜受拜受矢也主人既辟進授矢兩楹之間也 大戴辟皆作避】主人阼階上拜送賓般還曰辟【拜送送矢也辟亦於其階上】

右請投 記籌室中五扶堂上七扶庭中九扶【籌矢也鋪四指曰扶一指案寸春秋傳曰膚寸而合投壺者或於室或於堂或於庭其禮褻隨晏早之宜無常處 大戴云籌八分堂上七扶堂中五扶庭下九扶】壺頸脩七寸腹脩五寸口徑二寸半容斗五升壺中實小豆焉為其矢之躍而出也壺去席二矢半【脩長也腹容斗五升三分益一則為二斗得圓困之象積三百二十四寸也以腹脩五寸約之所得求其圓周二尺七寸有奇是為腹徑九寸有餘也實以小豆取其滑且堅 大戴云壺脰脩七寸口徑二寸半壺高一尺三寸受豆五升壺腹脩五寸又實作置無焉字之字出作去】矢以柘若棘毋去其皮【取其堅且重也舊說云矢大七分或言去其皮節 大戴毋作無皮下有七分字】

已拜受矢進即兩楹間退反位揖賓就筵【主人既拜送矢又自受矢進即兩楹間者言將有事於此也退乃揖賓即席欲與偕進明為偶也賓席主人席皆南鄉間相去如射物】

右就筵

司射進度壺間以二矢半反位設中東面執八算興【度壺度其所設之處也壺去坐二矢半則堂上去賓席主人席邪行各七尺也反位西階上位也設中東面既設中亦實八算於中橫委其餘於中西執算而立以請賓俟投】

大戴無間以二矢半五字又無東面及興字】右設壺中 記算多少視其坐【算用當視坐投壺者之衆寡為數也投壺者人四矢亦人四算大戴算上有既算字】
算長尺二寸【其節三扶可也或曰算長尺有握握素也】

請賓曰順投為入比投不釋勝飲不勝者正爵既行請為勝者立馬一馬從二馬三馬既立請慶多馬請主人亦如之【請猶告也順投矢本入也比投不拾也勝飲不勝言以能養不能也正爵所以正禮之爵也或以罰或以慶馬勝算也謂之馬者若云技藝如此任為將帥乘馬也射投壺皆所以習武因為樂 大戴請下有於字曰下有奏投壺之令曰字釋下有算字不勝下無者字立馬下無一馬從二馬字慶上無請字】右請賓及主人 記魯令弟子辭曰毋幪毋敖毋偕立毋踰言偕立踰言有常爵薛令弟子辭曰毋幪毋敖毋偕立毋踰言若是者浮【弟子賓黨主黨年穉者也為其立堂下相褻慢司射戒令之記魯薛者禮衰乖異不知孰是也幪敖慢也偕立不正鄉前也踰言遠談語也常爵常所以罰人之爵也浮亦謂罰也晏子春秋曰酌者奉觴而進曰君令浮晏子時以罰梁丘據浮或作匏或作符踰或作遙
大戴魯命弟子辭曰無荒無傲無倨立無踰言若是者有常爵無薛令弟子以下】

命弦者曰請奏貍首間若一大師曰諾【弦鼓瑟者也貍首詩篇名也今逸射義所云詩曰曾孫侯氏是也間若一者投壺當以為志取節焉 按大戴禮曾孫侯氏今日泰射於一張侯參之曰今日泰射四正具舉大夫君子凡以庶士小大莫處御於君所以燕以射則燕則譽質參既設執旌既戴大侯既亢中獲既置弓既平張四侯且良決拾有常既順乃讓乃揖乃讓乃躋其堂乃節其行既志乃張射夫命射射者之聲御車之旌既獲卒莫疑此即貍首詩然其文亦頗有缺誤】

右命奏樂 記鼓○□○○□□○○□○○□半○□○○□○○○□□○○○魯鼓○□○○○
○□□○○○○□□○○○○□□○○半○□○○○○□□○○薛鼓【此魯薛擊鼓之節也
圖者擊鼙方者擊鼓古者舉事鼓各有節聞其節則知其事矣】取半以下為投壺禮盡用之
為射禮【投壺之鼓半射節者投壺射之細也射謂燕射】魯鼓○□○○□□○○半○□
○○□○○○○□○○薛鼓○□○○○○□○○□○○○○□○○○○□○○○○□○○半○
□○○○○○○□○【此二者記兩家之異故兼列之】

左右告矢具請拾投有入者則司射坐而釋一算焉賓黨於右主黨於左【拾更也告矢具請更投者司射也司射東面立釋算則坐以南為右北為左也已投者各反其位】

右投 記司射庭長及冠士立者皆屬賓黨樂人及使者童子皆屬主黨【庭長司正也使者主人所使薦羞者樂人國子能為樂者此皆與於投壺
大戴司射上有堂下司正字使者在童子之下】
降揖其阼階及樂事皆與射同節【大戴禮】
侍投則擁矢【不敢釋於地也投投壺也投壺坐 少儀】

卒投司射執算曰左右卒投請數二算為純一純以取一算為奇遂以奇算告曰某賢於某若

干純奇則曰奇鈞則曰左右鈞【卒已也賓主之黨畢已投司射又請數其所釋左右算如數射算一純以取實於左手十純則縮而委之每委異之有餘則橫諸純下一算為奇奇則縮諸純下兼斂左算實於左手一純以委十則異之其他如右獲畢則司射執奇算以告於賓與主人也若告云某賢於某者未斥主黨勝與賓黨勝與以勝為賢尚技藝也鈞猶等也等則左右手各執一算以告大戴執下有餘字遂以奇算告作有勝則司射以其算告某下皆有黨字】

右數算

命酌曰請行 酌者曰諾【司射又請於賓與主人以行正爵酌者勝黨之弟子大戴無命酌至行 六字別云舉手曰請諸勝者之弟子為不勝者酌】當飲者皆跪奉觴曰賜灌勝者跪曰敬養【酌者升酌奠於豐上不勝者坐取乃退而跪飲之灌猶飲也言賜灌者服而為尊敬辭也周禮曰以灌賓客賜灌敬養各與其偶於西階上如飲射爵大戴當上有以酌皆請舉酒六字觴作觚】

右飲不勝者 記勝則洗而以請【洗爵請行觴不敢直飲之】客亦如之【客射若投壺不勝主人亦洗而請之】不角【角謂觥罰爵也於尊長與客如獻酬之爵少儀】

正爵既行請立馬馬各直其算一馬從二馬以慶慶禮曰三馬既備請慶多馬賓主人皆曰諾【飲不勝者畢司射又請為勝者立馬當其所釋算之前三立馬者投壺如射亦三而止也三者一黨不必三勝其一勝者并其馬於再勝者以慶之明一勝不得慶也飲慶爵者偶親酌不使弟子無豐大戴正上有司正曰字請下有為勝者字備作立】正爵既行請徹馬【投壺禮畢可以去其勝算也既徹馬無算爵乃行大戴此下有周則復始字】

右三投慶多馬【春秋傳有諸侯投壺事附見於下】

記不擢馬【擢去也謂徹也已徹馬嫌勝故薄之 少儀】晉侯以齊侯宴中行穆子相【穆子荀吳】投壺晉侯先穆子曰有酒如淮有肉如坻【淮水名坻山名】寡君中此為諸侯師中之齊侯舉矢曰有酒如澠有肉如陵【澠水出齊國臨淄縣北入時水陵大阜也】寡人中此與君代興【代更也】亦中之伯瑕謂穆子【伯瑕士文伯】曰子失辭吾固師諸侯矣壺何為焉其以中僞也【言投壺中不足為僞異】齊侯弱吾君歸弗來矣【欲與晉君代興是弱之】公孫僂趨進曰日旰君勤可以出矣以齊侯出【僂齊大夫傳言晉之衰昭十二年左右氏傳】

嘉事雜記

補

鄉大夫三年則大比考其德行道藝而興賢者能者鄉老及鄉大夫帥其吏與其衆寡以禮禮賓之【注見鄉飲酒】大司徒施十有二教二曰以陽禮教讓則民不爭【陽禮謂鄉射飲酒之禮也 地官】小司徒掌建邦之教灋與其飲食之禁令【同上】黨正國索鬼神而祭祀

則以禮屬民而飲酒於序以正齒位壹命齒於鄉里再命齒於父族三命而不齒【國索鬼神而祭祀謂歲十二月大蜡之時建亥之月也正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者為民三時務農將闕於禮至此農隙而教之尊長養老見孝弟之道也黨正飲酒禮亡以此事屬於鄉飲酒之義微失少矣凡射飲酒此鄉民雖為鄉大夫必來觀禮鄉飲酒鄉射記大夫樂作不入士既旅不入是也齒於鄉里者以年與衆賓相次也齒於父族者父族有為賓者以年與之相次異姓雖有老者居於其上不齒者席於尊東所謂遵】凡其黨之飲酒教其禮事掌其戒禁【其黨之民同上又族師春秋祭酺注云族長無飲酒之禮因祭酺而與其民以長幼相獻酬焉】鄉飲酒之禮六十者坐五十者立侍以聽政役六十者三豆七十者四豆八十者五豆九十者六豆【此說鄉飲酒謂黨正國索鬼神而祭祀則以禮屬民而飲酒於序以正齒位之禮也詳見鄉飲酒義】孟冬天子乃祈來年於天宗大割祠於公社及門閭臘先祖五祀【此周禮所謂蜡祭也】勞農以休息之【黨正屬民飲酒正齒位是也月令】司徒命鄉簡不帥教者以告耆老皆朝於庠元日習射上功習鄉尚齒大司徒帥國之俊士與執事焉【將習禮以化之使之觀焉朝猶會也此庠謂鄉學也鄉謂飲酒也鄉禮春秋射國蜡而飲酒養老王制】鄉師正歲稽其鄉器州共賓器鄉共吉凶禮樂之器【賓器者尊俎笙瑟之屬州長主集為之為鄉大夫或時賓賢能於此州也禮樂之器若州黨賓射之器者地官】酒正以式灋授酒材【式法作酒之灋式鄭司農云授酒人以其材】凡

為公酒者亦如之【謂鄉射飲酒以公事作酒者亦以式法及酒材授之使自釀之天官】卿大夫士之射也必先行鄉飲酒之禮【射義】

右鄉飲【正篇外凡鄉飲酒禮在此】子貢觀於蜡孔子曰賜也樂乎對曰一國之人皆若狂賜未知其樂也【蜡也者索也歲十二月合聚萬物而索饗之祭也國索鬼神而祭祀則黨正以禮屬民而飲酒於序以正齒位於是時民無不醉者如狂矣曰未知其樂怪之】子曰百日之蜡一日之澤非爾所知也【蜡之祭主先嗇也大飲烝勞農以休息之言民皆勤穡有百日之勞喻久也今日使之飲酒燕樂是君之恩澤非女所知言其義大】張而不弛文武弗能也弛而不張文武弗為也一張一弛文武之道也【張弛以弓弩喻人也弓弩久張之則絕其力久弛之則失其體雜記】鄉人飲酒杖者出斯出矣【杖者老人也六十杖於鄉未出不敢先既出不敢後此記孔子居鄉之事鄉黨】

孟夏天子飲酎用禮樂【酌之言醇也謂重釀之酒也春酒至此始成與羣臣以禮樂飲之於朝正尊卑也孟冬云大飲烝此言用禮樂互其文月令】孟冬大飲烝【十月農事畢天子諸侯與其羣臣飲酒於大學以正齒位謂之大飲別之於他其禮亡今天子以燕禮郡國以鄉飲酒禮代之烝謂有牲體為俎也黨正職曰國索鬼神而祭祀則以禮屬民而飲酒於序以正齒位亦謂此時也詩云十月滌場朋酒斯饗曰殺羔羊躋彼公堂稱彼兕觥受福無疆是頌大飲之詩同上】

右飲酎大飲

大宗伯以嘉禮親萬民以飲食之禮親宗族兄弟【親者使之相親人君有食宗族飲酒之禮所以親之也文王世子曰族食世降一等大傳曰繫之以姓而弗別綴之以食而弗殊百世而婚姻不通者周道然也春官】繫之以姓而弗別綴之以食而弗殊【姓正姓也始祖為正姓高祖為庶姓繫之弗別謂若今宗室屬籍也周禮小史掌定繫世辨昭穆大傳】

燕以食好時宴不淫【一時之間必有宴禮不至於淫湎國語周語】燕毛所以序齒也【燕毛既祭而燕也燕以髮色為坐祭時尊賢也至燕親親也齒亦年也中庸】

親戚宴饗則有殽烝【殽烝升體解節折之俎謂之折俎也

國語周語】膳夫王燕飲酒則為獻主【注見饗食燕記】季冬命樂師大合吹而罷【歲將終與族人大飲作樂於大寢以綴恩也言罷者此用禮樂於族人最盛後年若時乃復然也凡用樂必有禮用禮則有不用樂者王居明堂禮季冬命國為酒以合三族君子說小人樂月令】公與族燕則異姓為賓【同宗無相賓客之道】膳宰為主人【君尊不獻酒】公與父兄齒【親親也】族食世降一等【親者稠疏者稀文王世子】右燕食宗族公與族燕則以齒而孝弟之道達矣【以至尊不自異於親之列】其族食世降一等親親之殺也【殺差也文王世子】

因其酒肉聚其宗族以教民睦也【言祭有酒肉羣昭羣穆皆至而獻酬之咸有薦俎坊記】宗室有事族人皆侍終日大宗已侍於賓奠然後燕私【謂卿大夫以下宗室大宗子之家也禮志云別子為祖繼別為大宗繼禰為小宗賓僚友助祭也】燕私者何也祭已而與族人飲不醉而出是不親也醉而不出是渫宗也【出猶去也】出而不止是不忠也【忠厚】親而甚敬忠而不倦若是則兄弟之道備備者成也成者成於宗室也故曰飲而醉者宗室之意也德將無醉族人之志也是故祀禮有讓德族有復義之至也【復反也尚書大傳】敦彼行葦牛羊勿踐履方苞方體維葉泥泥戚戚兄弟莫遠具爾或肆之筵或授之几【興也敦聚貌□萌之時也行道也勿戒止之辭也苞甲而未拆也體成形也泥泥柔澤貌戚戚親也莫猶無也具俱也爾與邇同肆陳也疑此祭畢而燕父兄耆老之詩故言敦彼行葦而牛羊勿踐履則方苞方體而葉泥泥矣戚戚兄弟而莫遠具爾則或肆之筵而或授之几矣此方言其開燕設席之初而慇懃篤厚之意藹然已見於言語之外矣讀者詳之】肆筵設席授几有緝御或獻或酢洗爵奠斝醢醢以薦或燔或炙嘉殽脾臠或歌或嘏【賦也設席重席也緝續御侍也有相續代而侍者言不乏使也進酒於客曰獻客答之曰酢主人又洗爵醢客客受而奠之不舉也斝爵也夏曰醴殷曰斝周曰爵醢醢之多汁者也燔用肉炙用肝臠口上肉也歌者比於琴瑟也徒擊鼓曰嘏言侍御獻醢飲食歌樂之盛也】敦弓既堅四鍤既鈞舍矢既均序賓以賢敦弓既句既挾四鍤四鍤如樹序賓以不侮【賦也敦雕通畫也天子雕弓堅猶勁也鍤金鍤翦羽矢也鈞參亭也謂參分之一在前二在後三訂之而平者前有鐵重也舍釋也謂發矢也均皆中也賢射多中也投壺曰某賢於某若干純奇則曰奇均則曰左右均是也句彀通謂引滿也射禮摺三挾一既挾四鍤則徧釋矣如樹如手就樹之言貫革而堅正也不侮敬也令弟子辭所謂無恤無敖無僭立無踰言者也或曰不以中病不中者也射以中多為雋以不侮為德言既燕而射以為樂也】曾孫維主酒醴維醕酌以大斗以祈黃耇黃耇台背以引以翼壽考維祺以介景福【賦也曾孫主祭者之稱今祭畢而燕故因而稱之也醕厚也大斗柄長三尺祈求也黃耇老人之稱以祈黃耇猶曰以介眉壽云耳古器物欵識云用蘄萬壽用蘄眉壽永命多福用蘄眉壽萬年無疆皆此類也台鮐也大老則背有鮐文引導翼輔祺吉也

此頌禱之辭欲其飲此酒而得老壽又相引導翼輔以享壽祺介景福也大雅行葦】鼓鐘送

尸神保聿歸諸宰君婦廢徹不遲諸父兄弟備言燕私【祭畢既歸賓客之俎同姓則留與之燕以盡私恩所以尊賓客親骨肉也】樂具入奏以綏後祿爾殽既將莫怨具慶既醉既飽小大稽首神嗜飲食使君壽考孔惠孔時維其盡之子子孫孫勿替引之【凡廟之制前廟以奉神後寢以藏衣冠祭於廟而燕於寢故於此將燕而祭時之樂皆入奏於寢也且於祭既受祿矣故以燕為將受後祿而綏之也爾殽既進與燕之人無有怨者而皆歡慶醉飽稽首而言曰向者之祭神既嗜君之飲食矣是以使君壽考也又言君之祭祀甚順甚時無所不盡子子孫孫當不廢而引長之也 小雅楚茨】
小雅常棣【此樂兄弟之樂歌】伐木【此燕朋友故舊之樂歌】
頍弁【此燕兄弟親戚之詩】

王公立飫則有房烝【王天子公諸侯也禮之立成者為飫房大俎也詩云籩豆大房謂半解其體升之房也】飫以顯物【示物備也】歲飫不倦【歲行飫禮不至於解倦 國語周語】右飫 定王曰夫王公諸侯之有飫也將以講事成章【講講軍旅議大事也章章程也】建大德昭大物也【大德大功大物戎器也】故立成禮烝而已【立成不坐也升其備物而已 國語周語】衛彪傒曰周詩有之曰天之所支不可壞也【周詩飫時所歌支拄也】其所壞亦不可支也昔武王克殷而作此詩也以為飫歌名之曰支以遺後之人使永監焉【監觀也】夫禮之立成者為飫【立成立行禮不坐也】昭明大節而已少曲與焉【節體也曲章曲也與類也言飫禮所以教民敬戒昭明大體而已故其詩樂少章曲威儀少比類也】是以為之曰惕其欲教民戒也【惕懼也是以日自恐懼欲民知戒慎也】然則夫支之所道者必盡知天地之為也【知天地之為謂所支壞也】不然不足以遺後之人【同上】公父文伯之母季康子之從祖叔母也祭悼子康子與焉繹不盡飫則退【繹又祭也立曰飫坐曰宴繹畢而飲不盡飫禮而退恐有醉飽之失所以遠嫌也 魯語】

春饗孤子秋食耆老【疏曰皇氏云春是生養之時故饗孤子取長養之義秋是成熟之時故食耆老取老成之義熊氏云春饗孤子亦饗耆老秋食耆老亦食孤子 郊特牲】
酒正凡饗士庶子饗耆老孤子皆共其酒無酌數【要以醉為度 天官】外饗邦饗耆老孤子則掌其割烹之事饗士庶子亦如之【孤子者死王事者之子也士庶子衛王宮者若今時之饗衛士矣王制曰周人養國老於東膠養庶老於虞庠同上】
稟人若饗耆老孤子士庶子共其食【士庶子卿大夫士之】

【子弟宿衛王宮者 地官】 惟饗野人皆酒【飲賤者不備禮 玉藻】

右饗食雜事

大宗伯以嘉禮親萬民以脤膋之禮親兄弟之國【脤膋社稷宗廟之肉以賜同姓之國同福祿也兄弟有共先王者魯定公十四年天王使石尚來歸脤 春官】
大行人歸脤以交諸侯之福【交或往或來者也 秋官】

右歸脤【詳見吉禮祭通禮致福章此存其略】

大宗伯以嘉禮親萬民以賀慶之禮親異姓之國【異姓王昏姻甥舅春官】
大行人賀慶以贊諸侯之喜【贊助也秋官】小行人若國有福事則令慶賀之【同上】士
於大夫不承賀下大夫於上大夫承賀【承受也士有慶事不聽大夫親來賀已不敢變動尊
也玉藻】有慶非君賜不賀【唯君賜為榮也同上】賀取妻者曰某子使某聞子有客使
某羞【謂不在賓客之中使人往者羞進也言進於客古者謂侯為進其禮蓋壺酒束修若犬
也不斥主人昏禮不賀曲禮】

右賀慶

禮書綱目卷十二

卷十三

欽定四庫全書

禮書綱目卷十三 婺源江永撰

士相見禮 賓禮一

經【鄭目錄云士以職位相親始承摯相見之禮雜記會葬禮曰相見也反哭而退朋友虞祔而退士相見於五禮屬賓禮】

士相見之禮贊冬用雉夏用牾左頭奉之曰某也願見無由達某子以命命某見【贊所執以至者君子見於所尊敬必執贊以將其厚意也士贊用雉者取其耿介交有時別有倫也雉必用死者為其不可生服也夏用牾備腐臭也左頭頭陽也無由達言久無因緣以自達也某子今所因緣之姓名也以命者稱述主人之意今文頭為脰】主人對曰某子命某見吾子有辱請吾子之就家也某將走見【有又也某子命某往見今吾子又自辱來序其意也走猶往也今文無走】賓對曰某不足以辱命請終賜見【命謂請吾子之就家】主人對曰某不敢為儀固請吾子之就家也某將走見【不敢為儀言不敢外貌為威儀忠誠欲往也固如故也今文不為非古文云固以請也】賓對曰某不敢為儀固以請【言如故請終賜見也今文不為非】主人對曰某也固辭不得命將走見聞吾子稱贊敢辭贊【不得命者不得見許之命也走猶出也稱舉也辭其贊為其大崇也古文曰某將走見】賓對曰某不以贊不敢見【見於所尊敬而無贊嫌大簡】主人對曰某不足以習禮敢固辭【言不足習禮者不敢當其崇禮來見已】賓對曰某也不依於贊不敢見固以請【言依於贊謙自卑也今文無也】主人對曰某也固辭不得命敢不敬從出迎于門外再拜賓答再拜主人揖入門右賓奉贊入門左主人再拜受賓再拜送贊出【右就右也左就左也受贊於庭既拜受送則出矣不受贊於堂下人君也今文無也】主人請見賓反見退主人送于門外再拜【請見者為賓崇禮來相接以矜莊歡心未交也賓反見則燕矣下云凡燕見於君至凡侍坐于君子博記反見之燕義臣初見於君再拜奠贊而出】

右請見【凡賓主相見之儀附載於下】記聞始見君子者辭曰某固願聞名於將命者【君子卿大夫若有異德者固如故也將猶奉也即君子之門而云願以名聞於奉命者謙遠之也重則云固奉命傳辭出入】不得階主【階上進者言賓之辭不得指斥主人】敵者曰某固願見【敵當也願見願見於將命者謙也】罕見曰聞名【罕希也希相見雖於敵者猶為尊主之辭如於君子】亟見曰朝夕【亟數也於君子則曰某願朝夕聞名於將命者於敵者則曰某願朝夕見於將命者】瞽曰聞名【瞽無目也以無目辭不稱見 少儀】同國始相見主人拜其辱【自外來而拜拜見也自內來而拜拜辱也 曲禮】凡非弔喪非見國君無不答拜者【禮尚往來喪賓不答拜不自賓客也國君見士不答其拜士賤同上】凡與客入者每門讓於客【下賓也敵者迎于大門外聘禮】

【曰君近賓於大門內】客至於寢門則主人請入為席【為猶敷也雖君亦然】然後出迎客客固辭【又讓先入】主人肅客而入【肅進也進客謂道之】主人入門而右客入門而左【右就其右左就其左】主人就東階客就西階客若降等則就主人之階【降下也謂大夫於君士於大夫也不敢輒由其階卑統於尊不敢自專】主人固辭然後客復就西階【復其正】主人與客讓登主人先登客從之拾級聚足【拾當為涉聲之誤也級等也涉等聚足謂前足躡一等後足從之併】連步以上【重蹉跌也連步謂足相隨不相過也】上於東階則先右足上於西階則先左足【近於相鄉敬同上】席南鄉北鄉以西方為上東鄉西鄉以南方為上【布席無常此其順之也上謂席端也坐在陽則上左坐在陰則上右】若非飲食之客則布席席間函丈【謂講問之客也函猶容也講問宜相對容丈足以指畫也飲食之客布席於牖前丈或為杖】主人跪正席【雖來講問猶以客禮待之異於弟子】客跪撫席而辭【撫之者答主人之親正席】客徹重席主人固辭【徹去也去重席謙也再辭曰固】客踐席乃坐【客安主人乃敢安也講問宜坐】主人不問客不先舉【客自外來宜問其安否無恙及所為來故同上】始入而辭曰辭矣即席曰可矣【可猶止也謂擯者為賓主之節也始入則告之辭至就席則止其辭少儀】汜埽曰埽埽席前曰拊拊席不以鬣執箕膺搗【鬣謂帚也帚恒埽地不潔清也膺親也搗舌也持箕將去糞者以舌自鄉同上】其未有燭而後至者則以在者告道瞽亦然【為其不見意欲知之也師冕見及階子曰階也及席子曰席也皆坐子告之曰某在斯某在斯同上】請見不請退【去止不敢自由同上】

主人復見之以其贄曰屨者吾子辱使某見請還贄於將命者【復見之者禮尚往來也以其贄謂屨時所執來者也屨屨也將猶傳也傳命者謂擯相者】主人對曰某也既得見矣敢辭【讓其來答已也】賓對曰某也非敢求見請還贄於將命者【言不敢求見嫌褻主人不敢當也今文無也】主人對曰某也既得見矣敢固辭【固如故也】賓對曰某不敢以聞固以請於將命者【言不敢以聞又益不敢當】主人對曰某也固辭不得命敢不從【許受之也異日則出迎同日則否】賓奉贄入主人再拜受賓再拜送贄出主人送于門外再拜

右復見

士見於大夫終辭其贄於其入也一拜其辱也賓退送再拜【終辭其贄以將不親答也凡不答而受其贄唯君於臣耳大夫於士不出迎入一拜正禮也送再拜尊賓】

右士見大夫記大夫士相見雖貴賤不敵主人敬客則先拜客客敬主人則先拜主人【尊賢】士見於大夫大夫拜其辱【曲禮】

士於尊者先拜進面答之拜則走【士往見卿大夫卿大夫出迎答拜亦辟也玉藻】

若嘗為臣者則禮辭其贄曰某也辭不得命不敢固辭【禮辭一辭其贄而許也將不答而聽其以贄入有臣道也】賓入奠贄再拜主人答壹拜【奠贄尊卑異不親授也古文壹為一】賓出使擯者還其贄于門外曰某也使某還贄【還其贄者辟正君也】賓對曰某也既得見矣敢辭【辭君還其贄也今文無也】擯者對曰某也命某某非敢為儀也敢以請【還贄者請使受之】賓對曰某也夫子之賤私不足以踐禮敢固辭【家臣稱私踐行也言某臣也不

足以行賓客禮賓客所不答者不受贊】擯者對曰某也使某不敢為儀也固以請【言使某尊君也或言命某傳言耳】賓對曰某固辭不得命敢不從再拜受【受其贊而去之】

右嘗為臣者見 記大夫於其臣雖賤必答拜之【辟正君曲禮】

下大夫相見以鴈飾之以布維之以索如執雉【鴈取知時飛翔有行列也飾之以布謂裁縫衣其身也維謂繫聯其足】上大夫相見以羔飾之以布四維之結于面左頭如麋執之【上大夫卿也羔取其從帥羣而不黨也面前也繫聯四足交出背上於胸前結之也如麋執之者秋獻麋有成如之或曰麋孤之摯也其禮蓋謂左執前足右執後足今文頭為脰】如士相見之禮【大夫雖贊異其儀猶如士】

右大夫相見【本文此下有始見於君若他邦之人及燕見於君三條今並入曲禮臣禮篇】

凡言非對也妥而後傳言【凡言謂已為君言事也妥安坐也傳言猶出言也若君問可對則對不待安坐也古文妥為綏】與君言言使臣與大人言言事君與老者言言使弟子與幼者言言孝弟于父兄與衆言言忠信慈祥與居官者言言忠信【博陳燕見言語之儀也言使臣者使臣之禮也大人卿大夫也言事君者臣事君以忠也祥善也居官謂士以下】

右言

凡與大夫言始視面中視抱卒視面毋改衆皆若是【始視面謂觀其顏色可傳言未也中視抱容其思之且為敬也卒視面察其納己言否也毋改謂傳言見答應之間當正容體以待之毋自變動為嫌解惰不虛心也衆謂諸卿大夫同在此者皆若是其視之儀無異也古文毋作無今文衆為終】若父則遊目毋上於面毋下於帶【子於父主孝不主敬所視廣也因觀安否何如也今文父為甫古文毋為無】若不言立則視足坐則視膝【不言則伺其行起而已】

右視【凡賓主飲食之禮本經不具今以他記附于下】 記凡進食之禮左殽右胾食居人之左羹居人之右【皆便食也殽骨體也胾切肉也食飯屬也居人左右明其近也殽在俎胾在豆】膾炙處外醯醬處內【殽胾之外內也近醯醬者食之主膾炙皆在豆】蔥醢處末【醢烝蔥也處醯醬之左言末者殊加也醢在豆】酒漿處右【處羹之右此言若酒若漿耳兩有之則左酒右漿此大夫士與賓客燕食之禮其禮食則宜放公食大夫禮云】以脯脩置者左胸右末【亦便食也屈中曰胸曲禮】羞濡魚者進尾【擗之由後鯁肉易離也乾魚進首擗之由前理易析也】冬右腴【陽氣在下腴腹下也】夏右鰭【陽氣在上鰭脊也】祭臠【臠大臠謂剝魚腹讀如辱 少儀】 客若降等執食興辭【辭者辭主人之臨已食若欲食於堂下然】主人興辭於客然後客坐【復坐】主人延客祭【延道也祭祭先也君子有事不忘本也客不降等則先祭】祭食祭所先進【主人所先進先祭之所後進後祭之如其次】殽之序徧祭之【謂胾炙會也以其本出于牲體也公食禮魚腊醢醬不祭也 曲禮】 凡羞有俎者則於俎內祭【俎於人為橫不得祭於間也 少儀】

唯水漿不祭若祭為已僕卑【水漿非盛饌也已猶大也祭之為大有所畏迫臣於君則祭之玉藻】三飯主人延客食截然後辯殽【先食截後食殽殽尊也凡食殽辯於肩食肩則飽也】主人未辯客不虛口【俟主人也虛口謂醕也客自敵以上其醕不待主人飽主人不先飽也】侍食於長者主人親饋則拜而食【勸長者食耳雖賤不得執食興辭拜而已示敬也】主人不親饋則不拜而食【以其禮於已不隆】共食不飽【謙也謂共羹飯之大器也】共飯不澤手【謂汗生不潔也澤謂挾莎也禮飯以手澤或為擇】毋搏飯【為欲致飽不謙】毋放飯【去手餘飯於器中人所穢】毋流歡【大歡嫌欲疾】毋咤食【嫌薄之】毋齧骨【為有聲響不敬】毋反魚肉【為已歷口人所穢】毋投與狗骨【為其賤飲食之物】毋固獲【為其不廉也欲專之曰固爭取曰獲】毋揚飯飯黍毋以箸毋嚙羹【亦嫌欲疾也嚙為不嚼菜】毋絮羹【為其詳於味也絮猶調也】毋刺齒【為其弄口也口容止】毋歡醢【亦嫌詳於味也歡者為其淡故】客絮羹主人辭不能亨客歡醢主人辭以簋【優賓】濡肉齒決【決猶斷也】乾肉不齒決【堅宜用手】毋嘬炙【為其貪食甚也嘬謂一舉盡爓特牲少牢嘬之加于俎】卒食客自前跪徹飯齊以授相者【謙也自從也齊醬屬也相者主人贊饌者公食大夫禮賓卒食北面取梁與醬以降也】主人興辭於客然後客坐【不聽親徹曲禮】侍食於先生異爵者後祭先飯【謙也】客祭主人辭曰不足祭也【祭者盛主人之饌也】客殮主人辭以疏【殮者美主人之食也疏之言麤也】主人自置其醬則客自徹之【敬主人也徹奠於序端玉藻】客自徹辭焉則止【主人辭其徹少儀】

凡侑食不盡食食於人不飽【謙也玉藻】

孔子食於季氏不辭不食肉而殮【以其待已及饌非禮也同上】孔子曰吾食於少施氏而飽少施氏食我以禮【言貴其以禮待已而為之飽也時人倨慢若季氏則不以禮矣少施氏魯惠公子施父之後】吾祭作而辭曰疏食不足祭也吾殮作而辭曰疏食也不敢以傷吾子【雜記案家語孔子食於季氏食祭主人不辭不食亦不飲而殮子夏問曰禮也孔子曰非禮也從主人也吾食於少施氏而飽云云主人不以禮客不敢盡禮主人盡禮則客不敢不盡禮也】有盛饌必變色而作【敬主人之禮非以其饌也鄉黨】凡飲酒為獻主者執燭抱燠客作而辭然後以授人【為宵言也主人親執燭敬賓示不倦也言獻主者客君使宰夫也未爇曰燠】執燭不讓不辭不歌【以燭繼晝禮殺少儀】

凡侍坐於君子君子欠伸問日之早晏以食具告改居則請退可也【君子謂卿大夫及國中賢者也志倦則欠體倦則伸問日晏近於久也具猶辯也改居謂自變動也古文伸作信早作蚤】夜侍坐問夜膳葷請退可也【問夜問其時數也膳葷謂食之葷辛物蔥薤之屬食之以止卧古文葷作薰】

右請退【本文此下有君賜之食一條今入臣禮篇】

若先生異爵者請見之則辭辭不得命則曰某無以見辭不得命將走見先見之【先生致仕者也異爵謂卿大夫也辭辭其自降而來走猶出也先見之者出先拜也曲禮曰主人敬賓則先拜賓】

右長者請見【本文此下有非以君命使一條今入通禮名器上篇凡執幣執玉一條今入曲

禮篇】記士於大夫不敢拜迎而拜送【禮不敵始來拜則士辟也玉藻】

士相見義 賓禮二

補記

自天子至于庶人皆有摯摯者致也所以致其志也天子之摯鬯諸侯玉卿羔大夫鴈士雉鬯也者言德之遠聞也玉也者言一度不易也羔也者言柔而有禮也鴈也者言進退知時也雉也者言死其節也故天子以遠德為志諸侯以一度為志卿以有禮為志大夫以進退為志士以死節為志明乎志之義而天下治矣故執斯摯者致志者也君之摯以事神臣之摯以養人唯君受摯者唯君受養也非其君則辭摯不敢當養也古者非其君不仕非其師不學非其人不友非其大夫不見士相見之禮必依於介紹以言其不苟合者也必依於摯以言其道可親也苟而合唯小人無恥者能之君子可見也不可屈也可親也不可狎也可遠也不可疎也賓至門主人三辭見賓稱摯主人三辭摯所以致尊嚴也大夫以禮相接士以禮相諭庶人以禮相同然而爭奪興於末者未之有也人苟悅而相若者未必爭苟簡而相親者未必怨是故士相見禮者人道之大也所以使人重其身而毋遽於辱也所以使人慎其交而毋遽於禍也唯仕於君者召而往未仕而見於君者冠而奠摯在邦曰市井之臣在野曰草莽之臣君雖召不往也是故雖有南面之貴千乘之富士之所以結者禮義而已矣利不足稱焉刑罰行於國所誅者好利之人未有好利而其俗不亂者也無介而相見君子以為諂故諸侯大國九介次國七介小國五介【劉敞補白虎通義見邇禮名器下】子曰無辭不相接也無禮不相見也欲民之母相褻也【辭所以通情也禮謂摯也春秋傳曰古者諸侯有朝聘之事號辭必稱先君以相接也表記】子云禮之先幣帛也欲民之先事而後祿也【此禮謂所執之贄以見者也既相見乃奉幣帛以修好也或云禮之先辭而後幣帛】先財而後禮則民利【財幣帛也利猶貪也】無辭而行情則民爭【辭辭讓也情主利欲也】故君子於有饋者弗能見則不視其饋【饋遺也不能見謂有疾也不視猶不內也】以此坊民民猶貴祿而賤行【行猶事也言務得其祿不務其事坊記】

禮書綱目卷十三

卷十四

欽定四庫全書

禮書綱目卷十四 婺源江永撰

聘禮 賓禮三

經【鄭目錄云大問曰聘諸侯相於久無事使卿相問之禮小聘使大夫周禮曰凡諸侯之邦交歲相問也殷相聘也世相朝也聘於五禮屬賓禮】

聘禮

右篇目 周禮大行人凡諸侯之邦交歲相問也殷相聘也世相朝也【小聘曰問殷中也久無事又於殷朝者及而相聘也父死子立曰世凡君即位大國朝焉小國聘焉鄭司農云春秋傳孟僖子如齊殷聘 秋官】 記久無事則聘焉【事謂盟會之屬 本經記】諸侯使大夫問於諸侯曰聘【聘禮今存曲禮】 文公元年穆伯如齊始聘焉禮也【穆伯公孫敖】 凡君即位卿出竝聘踐修舊好要結外援【踐猶履行也】 好事鄰國以衛社稷忠信卑讓之道也忠德之正也信德之固也卑讓德之基也【傳因此發凡以明諸侯諒闇則國事皆用吉禮】 襄公元年衛子叔晉知武子來聘禮也凡諸侯即位小國朝之【小事大】 大國聘焉【大字小】 以繼好結信謀事補闕禮之大者也【闕猶過也禮以安國家利民人為大】 昭公九年孟僖子如齊殷聘禮也【自叔老聘齊至今二十年禮意久曠今修盛聘以無忘舊好故曰禮 並左氏傳】

君與卿圖事【圖謀也謀聘故及可使者謀事者必因朝其位君南面卿西面大夫北面士東面】 遂命使者【遂猶因也既謀其人因命之也聘使卿】 使者再拜稽首辭【辭以不敏】 君不許乃退【退反位也受命者必進】 既圖事戒上介亦如之【既已也戒猶命也已謀事乃命上介難於使者易於介】 宰命司馬戒衆介衆介皆逆命不辭【宰上卿貳君事者也諸侯謂司徒為宰衆介者士也士屬司馬周禮司馬之屬司士掌作士適四方使為介逆猶受也】

右圖事命使介 記大夫有所往必與公士為賓也【謂聘也大聘使上大夫小聘使下大夫公士為賓謂作介也往之也 玉藻】

宰書幣【書聘所用幣多少也宰又掌制國之用】 命宰夫官具【宰夫宰之屬也命之使衆官具幣及所宜齎】

右具齎幣 司儀凡諸侯之交各稱其邦而為之幣以其幣為之禮【幣享幣也於大國則豐小

國則殺主國禮之如其豐殺謂賄用束紡禮用玉帛乘皮及贈之屬 秋官】記多貨則傷于德【貨天地所化生謂玉也君子於玉比德焉朝聘之禮以為瑞節重禮也多之則是主於貨傷敗其為德】幣美則沒禮【幣人所造成以自覆幣謂束帛也愛之斯欲衣食之君子之情也是以享用幣所以副忠信美之則是主於幣而禮之本意不見也 本經記】既受行出遂見宰問幾月之資【資行用也古者君臣謀密草創未知所之遠近問行用當知多少而已古文資作齎同上】

及期夕幣【及猶至也夕幣先行之日夕陳幣而視之重聘也】使者朝服帥衆介夕【視其事也古文帥皆作率】管人布幕於寢門外【管猶館也館人謂掌次舍帷幕者也布幕以承幣寢門外朝也古文管作官今文布作敷】官陳幣皮北首西上加其奉于左皮上馬則北面奠幣于其前【奉所奉以致命謂束帛及玄纁也馬言則者此享主用皮或時用馬馬入則在幕南皮馬皆乘古文奉為卷今文無則】使者北面衆介立于其左東上【既受行同位也位在幕南】卿大夫在幕東西面北上【大夫西面辟使者】宰入告具于君君朝服出門左南鄉【入告入路門而告】史讀書展幣【展猶校錄也史幕東西面讀書賈人坐撫其幣每者曰在必西面者欲君與使者俱見之也】宰執書告備具于君授使者使者授書授上介【史展幣畢以書還授宰宰既告備以授使者其受授皆北面】公揖入【揖禮羣臣】官載其幣舍于朝【待旦行也】上介視載者【監其安處之畢乃出】所受書以行【為當復展】右授使幣

記使者既受行日朝同位【謂前夕幣之間同位者使者北面介立于左少退別其處臣也 本經記】

厥明賓朝服釋幣于禴【告為君使也賓使者謂之賓尊之也天子諸使將出告羣廟大夫告禴而已凡釋幣設洗盥如初】有司筵几于室中祝先入主人從入主人在右再拜祝告又再拜【更云主人者廟中之稱也祝告告以主人將行也】釋幣制玄纁束奠于几下出【祝釋之也凡物十曰束玄纁之率玄居三纁居二朝貢禮云純四只制丈八尺】主人立于戶東祝立于牖西【少頃之間示有俟於神】又入取幣降卷幣實于筭埋于西階東【又入者祝也埋幣必盛以器若藏之然】又釋幣于行【告將行也行者之先其古人之名未聞天子諸侯有常祀在冬大夫三祀曰門曰行曰厲喪禮有毀宗躐行出于大門則行神之位在廟門外西方不言埋幣可知也今時民春秋祭祀有行神古之遺禮乎】遂受命【賓須介來乃受命也言遂者明自是出不復入】上介釋幣亦如之【如其於禴與行】

右釋幣于禴及行

上介及衆介俟于使者之門外【俟待也待於門外東面北上】使者載旛帥以受命于朝【旛旌旗屬也載之者所以表識其事也周禮曰通帛為旛又曰孤卿建旛至於朝門使者北面東上古文旛皆為膳】君朝服南鄉卿大夫西面北上君使卿進使者【進之者使者謙不敢必君之終使已】使者入衆介隨入北面東上君揖使者進之上介立于其左接聞命【進之者有命宜相近也接猶續也】賈人西面坐啟櫝取圭垂纁不起而授宰【賈人在官知物賈者纁所以藉圭也其或拜則奠于其上今文纁作璪】宰執圭屈纁自公左授使者【屈纁者

斂之禮以相變為敬也自公左贊幣之義】使者受圭同面垂纁以受命【同面者宰就使者北面竝授之既授之而君出命矣凡授受者授由其右受由其左】既述命同面授上介【述命者循君之言重失誤】上介受圭屈纁出授賈人衆介不從【賈人將行者在門外北面】受享束帛加璧受夫人之聘璋享玄纁束帛加琮皆如初【享獻也既聘又獻所以厚恩惠也帛今之璧色繒也夫人亦自有聘享者以其與已同體為國小君也其聘用璋取其半圭也君享用璧夫人用琮天地配合之象也圭璋特達瑞也璧琮有加往德也周禮曰瑑圭璋璧琮以覲聘】

右受命于朝 記所以朝天子圭與纁皆九寸剡上寸半厚半寸博三寸纁三采六等朱白蒼【圭所以執以為瑞節也剡上象天圓地方也雜采曰纁以韋衣木版飾以三色再就所以薦玉重慎也九寸上公之圭也古文纁作藻今文作瑱】問諸侯朱綠纁八寸【二采再就降於天子也於天子曰朝於諸侯曰問記之於聘文互相備】皆玄纁繫長尺絢組【采成文曰絢繫無事則以繫玉因以為飾皆用五采組上以玄下以絳為地今文絢作約本經記】凡四器者唯其所寶以聘可也【言國獨以此為寶也四器獨圭璋璧琮 同上】聘禮大夫受命不受辭【以外事不素制不豫設故云爾】出竟有可以安社稷利國家者則專之可也【莊十九年公羊傳】

遂行舍於郊【於此脫舍衣服乃即道也曲禮曰凡為君使已受命君言不宿於家】斂旌【此行道耳未有事也斂藏也】

右遂行 記凡為君使者已受命君言不宿於家【急君使也言謂有故所問也聘禮曰若有言則以束帛如享禮 曲禮】 出祖釋軹祭酒脯乃飲酒于其側【祖始也既受聘享之禮行出國門止陳車騎釋酒脯之奠於軹為行始也詩傳曰軹道祭也謂祭道路之神春秋傳曰軹涉山川然則軹山行之名也道路以險阻為難是以委土為山或伏牲其上使者為軹祭酒脯祈告也卿大夫處者於是餞之飲酒於其側禮畢乘車轡之而遂行舍於近郊矣其牲犬羊可也古文軹作祓 本經記】 問大夫之幣俟于郊為肆又齎皮焉【肆猶陳列也齎猶付也使者既受命宰夫載問大夫之禮待於郊陳之為行列至則以付之也使者初行舍于近郊幣云肆馬云齎因其宜亦互文也不於朝付之者辟君禮也必陳列之者不夕也古文肆為肆 同上】大夫使見日而行逮日而舍【曾子問】 卿行旅從【五百人定四年左氏傳】

若過邦至于竟使次介假道束帛將命於朝曰請帥奠幣【至竟而假道諸侯以國為家不敢直徑也將猶奉也帥猶道也請道已道路所當由】下大夫取以入告出許遂受幣【言遂者明受其幣非為許故也容其辭讓不得命也】餼之以其禮上賓大牢積唯芻禾介皆有餼【凡賜人以牲生曰餼餼猶稟也給也以其禮者尊卑有常差也常差者上賓上介牲用大牢羣介用少牢米皆百筥牲陳于門內之西北面米設于中庭上賓上介致之以束帛羣介則牽羊馬上賓有禾十車芻二十車禾以秣馬】士師没其竟【没盡】誓于其竟賓南面上介西面衆介北面東上史讀書司馬執策立於其後【此使次介假道止而誓也賓南面專威信也史於衆介之前北面讀書以勅告士衆為其犯禮暴掠也禮君行師從卿行旅從司馬主軍法者執策示罰】

右過他國

未入竟壹肆【謂於所聘之國竟也肆習也習聘之威儀重失誤】為壇壇畫階帷其北無宮【壇土象壇也惟其北宜有所鄉依也無宮不壇土畫外垣也】朝服興主無執也【不立主人主人尊也不執玉不敢褻也徒習其威儀而已】介皆與北面西上【入門左之位也古文與作豫】習享士執庭實【士士介也庭實必執之者皮則有攝張之節】習夫人之聘享亦如之習公事不習私事【公事致命者也】

右習儀

及竟張旛誓【及至也張旛明事在此國也張旛謂使人雜之】乃謁關人【謁告也古者竟上為關以譏異服譏異言】關人問從者幾人【欲知聘問且為有司當共委積之具】以介對【以所與受命者對謙也聘禮上公之使者七介侯伯之使者五介子男之使者三介以其代君交於列國是以貴之周禮曰凡諸侯之卿其禮各下其君二等】君使士請事遂以入竟【請猶問也問所為來之故也遂以入因道之】

右及竟

入竟斂旛乃展【復校錄幣重其事斂旛變於始入】布幕賓朝服立于幕東西面介皆北面東上賈人北面坐拭圭【拭清也側幕而坐乃開櫝】遂執展之【持之而立告在】上介北面視之退復位【言退復位則視圭進違位】退圭【圭璋尊不陳之】陳皮北首西上又拭璧展之會諸其幣加于左皮上上介視之退【會合也諸於也古文曰陳幣北首】馬則幕南北面奠幣於其前【前當前幕上】展夫人之聘享亦如之賈人告于上介上介告於賓【展夫人聘享上介不視貶於君也賈人既拭璋琮南面告於上介上介於是乃東面以告賓亦所謂放而文之類】有司展羣幣以告【羣幣私覲及大夫者有司載幣者自展自告】及郊又展如初【郊遠郊也周制天子畿內千里遠郊百里以此差之遠郊上公五十里侯伯三十里子男十里也近郊各半之】及館展幣于賈人之館如初【館舍也遠郊之內有候館可以小休止沐浴展幣不于賓館者為主國之人有勞問己者就焉便疾也】右三展幣【致積禮附見於下】諸公之臣相為國客【謂相聘也】則三積皆三辭拜受【受者受之於庭也侯伯之臣不致積秋官司儀】

賓至于近郊張旛君使下大夫請行反君使卿朝服用束帛勞【請行問所之也雖知之謙不必也士請事大夫請行卿勞彌尊賓也其服皆朝服】上介出請入告賓禮辭迎于舍門之外再拜【出請出門西面請所以來事也入告入北面告賓也每所及至皆有舍其有來者與皆出請入告于此言之者賓彌尊事彌錄】勞者不答拜【凡為人使不當其禮】賓揖先入受于舍門內【不受于堂此主于侯伯之臣也公之臣受勞于堂】勞者奉幣入東面致命【東面鄉賓】賓北面聽命還少退再拜稽首受幣勞者出【北面聽命若君南面然少退象降拜】授老幣【老賓之臣】出迎勞者【欲擯之】勞者禮辭賓揖先入勞者從之乘皮設【設於門內也物四曰乘皮麋鹿皮也】賓用束錦償勞者【言償者賓在公館如家之義亦以來

者為賓】勞者再拜稽首受【稽首尊國賓也】賓再拜稽首送幣【受送拜皆北面象階上】勞者揖皮出乃退賓送再拜【揖皮出東面揖執皮者而出】夫人使下大夫勞以二竹簠方玄被纁裏有蓋【竹簠方者器名也以竹為之狀如簋而方如今寒具筩筥者圓此方耳】其實棗蒸栗擇兼執之以進【兼猶兩也右手執棗左手執栗】賓受棗大夫二手授栗【受授不游手慎之也】賓之受如初禮【如卿勞之儀】僎之如初下大夫勞者遂以賓入【出以束錦授從者因東面釋辭請導之以入然則賓送不拜】

右郊勞 諸公之臣相為國客及大夫郊勞旅擯三辭拜辱三讓登聽命下拜登受賓使者如初之儀及退拜送【登聽命賓登堂也賓當為僎勞用束帛僎用束錦侯伯之臣受勞于庭司儀】記辭曰非禮也敢對曰非禮也敢【辭辭不受也對答問也二者皆卒曰敢言不敢本經記】叔弓聘于晉晉侯使郊勞【聘禮賓至近郊君使卿勞之】辭曰寡君使弓來繼舊好固曰女無敢為賓徹命於執事敝邑弦矣【徹達也】敢辱郊使請辭【辭郊勞昭二年左氏傳 餘見致館章】

至于朝主人曰不腆先君之祧既拊以俟矣【賓至外門下大夫入告出釋此辭主人者公也不言公而言主人主人接賓之辭明至欲受之不敢稽賓也腆猶善也遷主所在曰祧周禮天子七廟文武為祧諸侯五廟則祧始祖也是亦廟也言祧者祧尊而廟親待賓客者上尊者】賓曰俟間【賓之意不欲奄卒主人也且以道路悠遠欲沐浴齋戒俟間未敢聞命】

右至朝

大夫帥至於館卿致館【致至也賓至此館主人以上卿禮致之所以安之也】賓迎再拜卿致命賓再拜稽首卿退賓送再拜【卿不俟設殮之畢以不用束帛致故也不用束帛致之者明為新至非大禮也】

右致館 諸公之臣相為國客致館如初之儀【如郊勞也不僎耳侯伯之臣致館于庭不言致殮者君於聘大夫不致殮也聘禮曰殮不致賓不拜 司儀】記卿館於大夫大夫館于士士館于工商【館者必於廟不館於敵者之廟為大尊也自官師以上有廟有寢工商則寢而已】管人為客三日具沐五日具浴【館人掌客館者也客謂使者下及士介也 本經記】自卿大夫士之家曰私館公館與公所為曰公館【公館若今縣官宮也公所為君所命使舍己者曾子問 雜記公館者公宮與公所為也註公宮為君所作離宮別館也】叔弓聘于晉致館辭曰寡君命下臣來繼舊好好合使成臣之祿也【得通君命則於己為榮祿】敢辱大館【敢不敢】叔向曰子叔子知禮哉吾聞之曰忠信禮之器也卑讓禮之宗也【宗猶主也】辭不忘國忠信也【謂稱舊好】先國後己卑讓也【始稱敝邑之弦先國也次稱臣之祿後己也】詩曰敬慎威儀以近有德夫子近德矣【昭二年左氏傳 辭郊勞見前】

宰夫朝服設殮【食不備禮曰殮詩曰不素殮兮春秋傳曰方食魚殮皆謂是】飪一牢在西鼎九羞鼎三腥一牢在東鼎七【中庭之饌也飪熟也熟在西腥在東象春秋也鼎西九東七凡其鼎實與其陳如陳饗餼羞鼎則陪鼎也以其實言之則曰羞以其陳言之則曰陪】堂上

之饌八西夾六【八六者豆數也凡饌以豆為本堂上八豆八簋六鉶兩簠八壺西夾六豆六簋四鉶兩簠六壺其實與其陳亦如饗饌】門外米禾皆二十車【禾稟實并刈者也諸侯之禮車米視生牢禾視死牢牢十車大夫之禮皆是死牢而已雖有生牢不取數焉米陳門東禾陳門西】薪芻倍禾【各四十車凡此之陳亦如饗饌】上介飪一牢在西鼎七羞鼎三堂上之饌六門外米禾皆十車薪芻倍禾【西鼎七無鮮魚鮮腊】衆介皆少牢【亦飪在西鼎五羊豕腸胃魚腊新至尚孰堂上之饌四豆四簋兩鉶四壺無簠】右設殮記殮不致【不以束帛致命草次饌殮具輕】賓不拜【以不致命】沐浴而食之【自潔清尊主國君賜也記此重者沐浴可知也 本經記】凡諸侯之卿大夫士為國客則如其介之禮以待之【言其特來聘問待之禮如其為介時也然則聘禮凡所以禮賓是亦禮介 秋官掌客】凡侯伯子男之臣以其國之爵相為客而相禮【爵卿也大夫也士也 司儀二條歸饗饌通用】

厥明訝賓于館【此訝下大夫也以君命迎賓謂之訝訝迎也亦皮弁】賓皮弁聘至于朝賓入于次【服皮弁者朝聘主相尊敬也諸侯視朔皮弁服入于次者俟辨也次在大門外之西以帷為之】乃陳幣【有司入于主國廟門外以布幕陳幣如展幣焉圭璋賈人執櫝而俟】卿為上擯大夫為承擯士為紹擯擯者出請事【擯謂主國之君所使出接賓者也紹繼也其位相承繼而出也主君公也則擯者五人侯伯也則擯者四人子男也則擯者三人聘義曰介紹而傳命君子於其所尊不敢質敬之至也既知其所為來之事復請者賓來當與主君為禮為其謙不敢斥尊者啟發以進之於是時賓出次直闌西北面上擯在闌東闌外西面其相去也公之使者七十步侯伯之使者五十步子男之使者三十步此旅擯耳不傳命上介在賓西北東面承擯在上擯東南西面各自次序而下末介末擯旁相去三丈六尺上擯之請事進南面揖賓俱前賓至末介上擯至末擯亦相去三丈六尺止揖而請事還入告于公天子諸侯朝覲乃命介紹傳命耳其儀各鄉本受命反面傳而下及末則鄉受之反面傳而上又受命傳而下亦如之此三丈六尺者門容二轍參个旁加各一步也今文無擯】公皮弁迎賓于大門外大夫納賓【公不出大門降于待其君也大夫上擯也謂之大夫者上序可知從大夫總無所別也於是賓主人皆謁】賓入門左【內賓位也衆介隨入北面西上少退擯者亦入門而右北面東上上擯進相君】公再拜【南面拜迎】賓辟不答拜【辟位逡遁不敢當其禮】公揖入每門每曲揖【每門輒揖者以相人偶為敬也凡君與賓入門賓必後君介及擯者隨之並而鴈行既入則或左或右相去如初玉藻曰君入門介拂闌大夫中楨與闌之間士介拂楨賓入不中門不履闕此賓謂聘卿大夫也門中門之正也不敢與君並由之敬也介與擯者鴈行卑不踰尊者之迹亦敬也賓之介猶主人之擯】及廟門公揖入立于中庭【公揖先入省內事也既則立于中庭以俟賓不復出如此得君行一臣行二於禮可矣公迎賓大門內卿大夫以下入廟門即位而俟之】賓立接西塾【接猶近也門側之堂謂之塾立近塾者已與主君交禮將有出命俟之於此介在幣南北面西上上擯亦隨公入門東東上少進於士】几筵既設擯者出請命【有几筵者以其廟受宜依神也賓至廟門司宮乃于依前設之神尊不豫事也席西上上擯待而出請受賓所以來之命重停賓也至此言命事彌至言彌信也周禮諸侯祭祀席蒲筵續純右彫几】賈人東面坐啟櫝取圭垂纁不起而授上介【賈人鄉入陳幣東面俟於此言之就有事也授圭不起賤不與為禮也不言謁襲者賤不謁也纁有組繫也】上介不襲執圭屈纁授賓【上介北面受圭進西面授賓不襲者以盛禮不在於己也屈纁并

持之也曲禮曰執玉其有籍者則裼無籍者則襲【賓襲執圭【執圭盛禮而又盡飾為其相蔽敬也玉藻曰服之襲也充美也是故尸襲執玉龜襲也】擯者入告出辭玉【擯者上擯也入告公以賓執圭將致其聘命圭贊之重者辭之亦所以致尊讓也】納賓賓入門左【公事自闌西】介皆入門左北面西上【隨賓入也介無事止於此今文無門】三揖【君與賓也八門將曲揖既曲北面又揖當碑揖】至于階三讓【讓升】公升二等【先賓升二等亦欲君行一臣行二】賓升西楹西東面【與君相鄉】擯者退中庭【鄉公所立處退者以公宜親受賓命不用擯相也】賓致命【致其君之命也】公左還北鄉【當拜】擯者進【進阼階西釋辭於賓相公拜也】公當楣再拜【拜貺也貺惠賜也楣謂之梁】賓三退負序【三退三逡遁也不言辟者以執圭將進授之】公側襲受玉于中堂與東楹之間【側猶獨也言獨見其尊賓也佗日公有事必有贊為之者凡襲于隱者公序玷之間可知也中堂南北之中也入堂深尊賓事也東楹之間亦以君行一臣行二】擯者退負東塾而立【反其等位無事】賓降介逆出【逆出由便】賓出【聘事畢】公側授宰玉【使藏之授於序端】裼降立【裼者免上衣見裼衣凡當盛禮者以充美為敬非盛禮者以見美為敬禮尚相變也玉藻曰裘之裼也見美也又曰麕裘青豢褻絞衣以裼之論語曰素衣麕裘皮弁時或素衣其裘同可知也裘者為溫表之為其褻也寒暑之服冬則裘夏則葛凡禮裼者左降立俟享也亦於中庭古文裼皆作賜】

右聘 記卿大夫訝大夫士訝士皆有訝【卿使者大夫上介也士衆介也訝主國君所使迎待賓者如今使者護客】

宗人授次次以帷少退于君之次【主國之門外諸侯及卿大夫之所使者次位皆有常處並本經記】諸公之臣相為國客及將幣旅擯三辭拜逆客

辟三揖每門止一相及廟唯君相入三讓客登拜客三辟授幣下出每事如初之儀【客辟逡巡不答拜也唯君相入客臣也相不入矣拜主君拜客至也客三辟三退負序也每事享及有言司儀】凡侯伯子男之臣以其國之爵相為客而相禮其儀亦如之【爵卿也大夫也士也同上】辭無常孫而說【孫順】辭多則史少則不達【史謂策祝】辭苟足以達義之至也【至極也今文至為砥 本經記】

諸侯使人使於諸侯使者自稱曰寡君之老【繫於君以為尊也此謂諸侯之卿上大夫曲禮】上大夫曰下臣擯者曰寡君之老下大夫自名擯者曰寡大夫【擯者之辭主謂見於他國君下大夫自名於他國君曰外臣某】大夫私事使私人擯則稱名【私事使謂以君命私行非聘也若魯成公時晉侯使韓穿來言汶陽之田歸之于齊之類】公士擯則曰寡大夫寡君之老【謂聘也大聘使上大夫小聘使下大夫玉藻】

賓入不中門不履闕【辟尊者所從也此謂聘客也闕門限】公事自闌西【聘享也同上】大夫見於國君國君拜其辱【自外來而拜拜見也自內來而拜拜辱也曲禮】君若迎拜則還辟不敢答拜【嫌與君抗賓主之禮迎拜謂君迎而先拜之聘禮曰大夫入門再拜君拜其辱同上】惟大聘有几筵【謂受聘享時也小聘輕雖受于廟不為神位 本經】

【記】凡執玉無藉者襲【藉謂纁也纁所以緼藉玉 同上】執玉其有藉者則裼無藉者則襲【藉藻也裼襲文質相變耳有藻為文裼見美亦文無藻為質襲充美亦質圭璋特而襲

璧琮加束帛而裼亦是也 曲禮】 上介執圭如重授賓【慎之也曲禮曰凡執主器執輕如不克】賓入門皇升堂讓將授志趨【皇自莊盛也讓謂舉手平衡也志猶念也念趨謂審行步也孔子之執圭鞠躬如也如不勝上如揖下如授勃如戰色足蹣蹣如有循古文皇皆作王】授如爭承下如送君還而后退【重失隊也而后猶然後也】下階發氣怡焉再三舉足又趨【發氣舍息也再三舉足自安定乃復趨也至此云舉足則志趨卷豚而行也孔子之升堂鞠躬如也屏氣似不息者出降一等逞顏色怡怡如也沒階趨進翼如也】及門正焉【容色復故此皆心變見於威儀】執圭入門鞠躬焉如恐失之【記異說也本經記】

皇且行入門主敬升堂主慎【復記執玉異說同上】凡執主器執輕如不克【重慎之也主君也克勝也】執主器操幣圭璧則尚左手行不舉足車輪曳踵【重慎也尚左手尊左也車輪謂行不絕地 曲禮】執圭鞠躬如也如不勝上如揖下如授勃如戰色足蹣蹣如有循【圭諸侯命圭聘問鄰國則使大夫執以通信如不勝執主器執輕如不克敬謹之至也上如揖下如授謂執圭平衡手與心齊高不過揖卑不過授也戰色戰而色懼也蹣蹣舉足促狹也如有循記所謂舉前曳踵言行不離地如緣物也 鄉黨】

曰子以君命在寡君寡君拜君命之辱【此贊君拜聘享辭也在存也 本經記】楚子使越椒來聘執幣傲【子越椒令尹子文從子傲不敬】叔仲惠伯曰是必滅若敖氏之宗傲其先君神弗福也【十二年傳曰先君之敝器使下臣致諸執事明奉使皆告廟故言傲其先君也為宣四年楚滅若敖氏張本 文九左氏傳】秦伯使西乞術來聘襄仲辭玉曰君不忘先君之好照臨魯國鎮撫其社稷重之以大器寡君敢辭玉【大器圭璋也不欲與秦為好故辭玉】對曰不腆敝器不足辭也【腆厚也】主人三辭賓答曰寡君願徼福于周公魯公以事君【徼要也魯公伯禽也言願事君以并蒙先君之福】不腆先君之敝器使下臣致諸執事以為瑞節【節信也出聘必告廟故稱先君之禮】要結好命所以藉寡君之命結二國之好【藉薦也】是以敢致之襄仲曰不有君子其能國乎國無陋矣厚賄之【賄贈送也

文十二年左傳】衛孫文子來聘公登亦登【禮登階臣後君一等】叔孫穆子相趨進曰諸侯之會寡君未嘗後衛君【敵體竝登】今吾子不後寡君寡君未知所過吾子其少安【安徐也】孫子無辭亦無悛容【悛改也】穆叔曰孫子必亡為臣而君過而不悛亡之本也【襄七左氏傳】晏子聘魯上堂則趨授玉則跪子貢怪之問孔子曰晏子知禮乎孔子曰其有方矣我將問焉俄而晏子至孔子問之晏子對曰夫上堂之禮君行一臣行二今君行疾臣敢不趨乎今君之受幣也卑臣敢不跪乎孔子曰善禮中又有禮賜寡使也何足以識禮 晉侯使荀庚來聘且尋盟衛侯使孫良夫來聘且尋盟公問諸臧宣叔曰中行伯之於晉也其位在三【下卿】孫子之於衛也位為上卿將誰先對曰次國之上卿當大國之中中當其下下當其上大夫【降一等】小國之上卿當大國之下卿中當其上大夫下當其下大夫【降大國二等】上下如是古之制也【古制公為大國侯伯為次國子男為小國】衛在晉不得為次國【春秋時以彊弱為大小故衛雖侯爵猶為小國】晉為盟主其將先之【計等則二人位敵以盟主故先晉】丙午盟晉丁未盟衛禮也【成三年左氏傳】

擯者出請【不必賓事之有無】賓裼奉束帛加璧享擯者入告出許【許受之】庭實皮則攝之毛則內內攝之入設也【皮虎豹之皮攝之者右手并執前足左手並執後足毛在內不欲文之豫見也內攝之者兩手相鄉也入設亦參分庭一在南言則者或以馬凡君於臣臣於君麋鹿皮可也】賓入門左揖讓如初升致命張皮【張者釋外足見文也】公再拜受幣士

受皮者自後右容【自申也從東方來由客後西居其左受皮也執皮者既授亦自前西而出】賓出當之坐攝之【象受於賓】公側授宰幣皮如入右首而東【如入在在前皮右首者變于生也】

右享 記凡庭實隨入左先皮馬相閒可也【隨入不並行也閒猶代也生物有宜君子不以所無為禮畜獸同類可以相代古文閒作干】賓之幣唯馬出其餘皆東【馬出當從廢也餘物皆東藏之內府 本經記】及享發氣焉盈容【發氣舍氣也孔子之於享禮有容色】衆介北面踰焉【容見舒揚同上】

享禮有容色【既聘而享用圭璧有庭實有容色和也儀禮曰發氣滿容鄉黨】若君不見【君有疾若他故不見使者】使大夫受【受聘享也大夫上卿也】自下聽命自西階升受負右房而立賓降亦降【此儀如還圭然而賓大夫易處耳今文無而】不禮【辟正主也古文禮作體 本經記】

聘于夫人用璋享用琮如初禮【如公立于中庭以下】

右聘享夫人 記君以社稷故在寡小君拜【此贊拜夫人聘享辭也言君以社稷故者夫人與君體敵不敢當其惠也其卒亦曰寡君拜命之辱 本經記】

若有言則以束帛如享禮【有言有所告請若有所問也記曰有故則束帛加書以將命春秋臧孫辰告糴于齊公子遂如楚乞師晉侯使韓穿來言汝陽之田皆是也無庭實也】

右有言 記若有故則卒聘束帛加書將命百名以上書於策不及百名書於方【故謂灾患及時事相告請也將猶致也名書文也今謂之字策簡也方版也】主人使人與客請諸門外【受其意既聘享賓出而讀之不於內者人稠處嚴不得審悉主人國君也人內史也書必璽之本經記】

擯者出請事實告事畢【公事畢】賓奉束錦以請覲【覲見也卿將公事是欲交其歡敬也不用羔因使而見非特來】擯者入告出辭【客有大禮未有以待之】請禮賓賓禮辭聽命擯者入告【告賓許也】宰夫徹几改筵【宰夫又主酒食者也將禮賓徹神几改神席更布也賓席東上公食大夫禮曰蒲筵常緇布純加萑席尋玄帛純此筵上下大夫也周禮曰筵國賓于牖前莞筵紛純加纁席畫純左彤几者則是筵孤也孤彤几卿大夫其漆几與】公出迎賓以入揖讓如初【公出迎者己之禮更端也】公升側受几于序端【漆几也今文無升】宰夫內拂几三奉兩端以進【內拂几不欲塵坳尊者以進自東箱來授君】公東南鄉外拂几三卒振 中攝之進西鄉【進就賓也】擯者告【告賓以公授几】賓進訝受几于筵前東面俟【未設也今文訝為梧】公壹拜送【公尊也古文壹作一】賓以几辟【辟位遂遁】北面設几不降階上答再拜稽首【不降以主人禮未成也凡賓左几】宰夫實觶以醴加枲于觶面枋【酌以授君也君不自酌尊也宰夫亦洗升實觶以醴自東箱來不面攬不訝授也】公側受醴【將以飲賓】賓不降壹拜進筵前授醴復位公拜送醴【賓壹拜者醴質以少為貴】宰夫薦籩豆脯醢賓升筵擯者退負東塾【事未畢擯者不退中庭以有宰夫也】

賓祭脯醢以杞祭醴三庭實設【庭實乘馬】降筵北面以杞兼諸觶尚擯坐啐醴【降筵就階上】公用束帛【致幣也言用奠於下也亦受之于序端】建杞北面奠于薦東【糟醴不啐】擯者進相幣【贊以辭】賓降辭幣【不敢當公禮也】公降一等辭【辭賓降也】栗階升聽命【衆階趨君命尚疾不連步】降拜【拜受】公辭【不降一等殺也】升再拜稽首受幣當東楹北面【亦訝受而北面者禮主於己已臣也】退東面俟【俟君拜也不北面者謙若不敢當階然】公壹拜賓降也公再拜【不俟公再拜者不敢當公之盛也公再拜者事畢成禮也】賓執左馬以出【受尊者禮宜親之也效馬者并左右勒授之餘三馬主人牽者從出也】上介受賓幣從者訝受馬【從者士介】

右禮賓 記禮不拜至【以賓不於是始至今文禮為醴 本經記】 醴尊于東箱瓦大一有豐【瓦大瓦尊豐承尊器如豆而卑】薦脯五臠祭半臠橫之【臠脯如版然者或謂之脰皆取直貌焉】祭醴再扱始扱一祭卒再祭【卒謂後扱同上】諸公之臣相為國客及禮再拜稽首君答拜【禮以醴禮客 司儀】主人之庭實則主人遂以出賓之士訝受之【此謂餘三馬也左馬賓執以出矣士士介從者本經記】

賓覲奉束錦總乘馬二人贊入門右北面奠幣再拜稽首【不請不辭鄉時已請也覲用束錦辟享幣也總者總八轡牽之贊者居馬間扣馬也入門而右私事自闌右奠幣再拜以臣禮見也贊者賈人之屬介特覲也】擯者辭【辭其臣】賓出【事畢】擯者坐取幣出有司二人牽馬以從出門西面于東塾南【將還之也贊者有司受馬乃出凡取幣于庭北面】擯者請受【請以客禮受之】賓禮辭聽命【賓受其幣贊者受馬】牽馬右之入設【庭實先設客禮也右之欲人居馬左任右手便也於是牽馬者四人事得申也曲禮曰效馬效羊者右牽之】賓奉幣入門左介皆入門左西上【以客禮入可從介】公揖讓如初升公北面再拜【公再拜者以其初以臣禮見新之也】賓三退反還負序【反還者不敢與授圭同】振幣進授當東楹北面【不言君受略之也】士受馬者自前還牽者後適其右受【自由也適牽者之右而受之也此亦並授者不自前左由便也便其已授而去也受馬自前變於受皮】牽馬者自前西乃出【自由也】賓降階東拜送君辭【拜送幣于階東以君在堂鄉之】拜也君降一等辭【君乃辭之而賓猶拜敬也】擯者曰寡君從子雖將拜起也【此禮固多有辭矣未有著之者是其志而煥乎未敢明說】栗階升公西鄉賓階上再拜稽首【成拜】公少退【為敬】賓降出公側授宰幣馬出【廟中宜清】公降立

右私覲 記私事自闌東【覲面也玉藻】

私覲愉愉焉【容貌和敬】出如舒鴈【威儀自然而有行列舒鴈鷺也 本經記】

私覲愉愉如也【私覲以私禮見也愉愉則又和矣 鄉黨】既覲賓若私獻奉獻將命【時有珍異之物或賓奉之所以自序尊敬也猶以君命致之】擯者入告出禮辭【辭其獻也】賓東面坐奠獻再拜稽首【送獻不入者奉物禮輕】擯者東面坐取獻舉以入告出禮請受【東面坐取獻者以宜竝受也其取之由賓南而自後右客也】賓固辭公答再拜【拜受於賓也固亦衍字】賓者立於闕外以相拜賓辟【相贊也古文闕為蹙】擯者授宰夫於中庭【東藏之既乃介覲】若兄弟之國則問夫人【兄弟謂同姓若婚姻甥舅有親者問猶遺也謂獻也不言獻者變於君也非兄弟獻不及夫人】

本經記】諸公之臣相為國客私面【私面私覲也鄭司農云說私面以春秋傳】

【曰楚公子棄疾見鄭伯以其良馬私面】私獻【既覲則或有私獻者】再拜稽首君答拜

擯者出請上介奉束錦士介四人皆奉玉錦束請覲【玉錦錦之文織縟者也禮有以少文為貴者後言束辭之便也】擯者入告出許上介奉幣儷皮二人贊【儷猶兩也上介用皮變於賓也皮麋鹿皮】皆入門右東上奠幣皆再拜稽首【皆者皆衆介也贊者奠皮出】擯者辭【亦辭其臣】介逆出【亦事畢也】擯者執上幣士執衆幣有司二人舉皮從其幣出請受【此請受請于上介也擯者先即西面位請之釋辭之時衆執幣者隨立門中而俟】委皮南面執幣者西面北上擯者請受【請于上介也上言其次此言其位互約文也】介禮辭聽命皆進訝受其幣【此言皆訝受者嫌擯者一一授之】上介奉幣皮先入門左奠皮【先皮者介隨執皮者而入也入門左介至揖位而立執皮者奠皮以有不敢授之義古文重入】公再拜【拜中庭也不受于堂介賤也】介振幣自皮西進北面授幣退復位再拜稽首送幣【進者北行參分庭一而東行當君乃復北行也】介出宰自公左受幣【不側受介禮輕】有司二人坐舉皮以東擯者又納士介【納者出道入也】士介入門右奠幣再拜稽首【終不敢以客禮見】擯者辭介逆出擯者執上幣以出禮請受賓固辭【禮請受者一請受而聽之也賓為之辭士介賤不敢以言通於主君固衍字當如面大夫也】公答再拜擯者出立于門中以相拜【擯者以賓辭入告還立門中闕外西面公乃遙答拜也相者贊告之】士介皆辟【辟於其東面位逡遁也】士三人東上坐取幣立【俟擯者執上幣來也】擯者進【就公所也】宰夫受幣于中庭以東【使宰夫受于士士介幣輕也受之于公左賓幣公則授宰上介幣宰受于公左士介幣宰夫受于士敬之差】執幣者序從之【序從者以宰夫當一一受之】

右介私覲 記君於士不答拜也非其臣則答拜之【不臣人之臣 曲禮】

擯者出請賓告事畢【賓既告事畢衆介逆道賓而出也】擯者入告公出送賓【公出衆擯亦逆道紹擯及賓竝行間亦六步】及大門內公問君【卿以公禮將事無由問也賓至始入門之位北面將揖而出衆介亦在其右少退西上於此可以問君居處何如序殷勤也時承擯紹擯亦於門東北面東上上擯往來傳君命南面遽伯玉使人於孔子孔子問曰夫子何為此公問君之類也】賓對公再拜【拜其無恙公拜賓亦辟】公問大夫賓對公勞賓賓再拜稽首公答拜【勞以道路之勤】公勞介介皆再拜稽首公答拜賓出公再拜送賓不顧【公既拜客趨辟君命上擯送賓出反告賓不顧於此君可以反路寢矣論語說孔子之行曰君召使擯色勃如也足躩如也賓退必復命曰賓不顧矣】賓請有事於大夫【請問問卿也不言問聘聘亦問也嫌近君也上擯送賓出賓東面而請之擯者反命因告之】公禮辭許【禮辭一辭】賓即館【小休息也即就也】

右公送賓問勞 諸公之臣相為國客出及中門之外問君客再拜對君拜客辟而對君問大夫客對君勞客客再拜稽首君答拜客趨辟【中門之外即大門之內也問君曰君不恙乎對曰使臣之來寡君命臣于庭大夫曰二三子不恙乎對曰寡君命使臣於庭二三子皆在勞客曰

適路悠悠客甚勞勞介則曰二三子甚勞問君客再拜對者為敬慎也 司儀】記大夫士見於國君君若勞之則還辟再拜稽首【謂見君既拜矣而後見勞也聘禮曰君勞使者及介君皆答拜 曲禮】賓即館訝將公命【使已迎待之命】又見之以其摯【又復也復以私禮見者訝將舍於賓館之外宜相親也大夫訝者執鴈士訝者執雉本經記】

卿大夫勞賓賓不見【以已公事未行介以賓辭辭之】上大夫奠鴈再拜上介受【不言卿卿與大夫同執鴈下見于國君周禮凡諸侯之卿見朝君皆執羔】勞上介亦如之

右卿大夫勞 記幣之所及皆勞不釋服【以與賓接於君所賓又請有事于己不可以不速也所不及者下大夫未嘗使者也不勞者以先是賓請有事於己同類既聞彼所禮所及則已往有嫌也所以知及不及者賓請有事固曰某子某子 本經記】

君使卿韋弁歸饗餼五牢【變皮弁服韋弁敬也韋弁韎韠之弁兵服也而服之者皮韋同類取相近耳其服蓋韎布以為衣而素裳牲殺曰饗生曰餼今文歸或為饋】上介請事賓朝服禮辭【朝服示不受也受之當以尊服】有可入陳【入賓所館之廟陳其積】饗【謂飪與腥】飪一牢鼎九設于西階前陪鼎當內廉東面北上上當碑南陳牛羊豕魚腊腸胃同鼎膚鮮魚鮮腊設局鼎腳臠臠蓋陪牛羊豕【陪鼎三牲臠腳臠臠陪之庶羞加也當內廉辟堂塗也腸胃次腊以其出牛羊也膚豕肉也唯燂者有膚此饌先陳其位後言其次重大禮詳其事也宮必有碑所以識日景引陰陽也凡碑引物者宗廟則麗牲焉以取毛血其材宮廟以石用木】腥二牢鼎二七無鮮魚鮮腊設于阼階前西面南陳如飪鼎二列【有腥者所以優賓也】堂上八豆設于戶西西陳皆二以竝東上韭菹其南醯醢屈【戶室戶也東上變于親食賓也醢醢汁也屈猶錯也今文並皆為併】八簋繼之黍其南稷錯【黍在北】六鉶繼之牛以西羊豕豕南牛以東羊豕【鉶羹器也】兩簋繼之粱在北【簋不次簋者粱稻加也凡饌屈錯要相變】八壺設于西序北上二以竝南陳【壺酒尊也酒蓋稻酒粱酒不錯者酒不以雜錯為味】西夾六豆設于西墉下北上韭菹其東醯醢屈六簋繼之黍其東稷錯四鉶繼之牛以南羊豕豕東豕豕以北牛兩簋繼之粱在西皆二以竝南陳六壺西上二以竝東陳【東陳在北墉下統於豆】饌于東方亦如之【東方東夾室】西北上【亦韭菹其東醯醢也】壺東上西陳【亦在北墉下統於豆】醢醢百饗夾碑十以為列醢在東【夾碑在鼎之中央也醢在東醢穀陽也醢肉陰也】餼二牢陳于門西北面東上牛以西羊豕豕西牛羊豕【餼生也牛羊右手牽之豕束之寢右亦居其左】米百筥筥半斛設于中庭十以為列北上黍粱稻皆二行稷四行【庭實固當庭中言當中庭者南北之中也東西為列列當醢醢南亦相變也此言中庭則設碑近如堂深也】門外米三十車車乘有五簋設于門東為三列東陳【大夫之禮米禾皆視死牢乘簋數名也乘有五簋二十四斛也簋讀若不數之數今文數或為逾】禾三十車車三秬設于門西西陳【秬數名也三秬千二百秉】薪芻倍禾【倍禾者以其用多也薪從米芻從禾四者之車皆陳北轡凡此所以厚重禮也聘義曰古之用財不能均如此然而用財如此其厚者言盡之於禮也盡之於禮則內君臣不相陵而外不相侵故天子制之而諸侯務焉爾】賓皮弁迎大夫于外門外再拜大夫不答拜【大夫使者卿也】揖入及廟門賓揖入【賓與使者揖而入使者止執幣賓俟之于門內謙也古者天子之適諸侯必舍于大祖廟諸侯行舍于諸公廟大夫行舍于大夫廟】大夫奉束帛【執其所以將命】入三揖

皆行【皆猶竝也使者尊不後主人】至于階讓大夫先升一等【讓不言三不成三也凡升者主人讓于客三敵者則客三辭主人乃許升亦道賓之義也使者尊主人三讓則許升矣今使者三讓則是主人四讓也公雖尊亦三讓乃許升不可以不下主人也古文亦三讓】賓從升堂北面聽命【北面于階上也】大夫東面致命賓降階西再拜稽首拜餼亦如之【大夫以束帛同致饗餼也賓殊拜之敬也重君之禮也】大夫辭升成拜【尊賓】受幣堂中西北面【趨主君命也堂中西中央之西】大夫降出賓降授老幣出迎大夫【老家臣也賓出迎欲擯之】大夫禮辭許入揖讓如初賓升一等大夫從升堂【賓先升敵也皆北面】庭實設馬乘【乘四馬也】賓降堂受老束錦大夫止【止不降使之餘尊】賓奉幣西面大夫東面賓致幣【不言致命非君命也】大夫對北面當擯再拜稽首【稽首尊君客也致對有辭也】受幣于楹間南面退東面侯【賓北面授尊君之使】賓再拜稽首送幣大夫降執左馬以出【出廟門從者亦訝受之】賓送于外門外再拜明日賓拜于朝拜饗與餼皆再拜稽首【拜謝主君之恩惠于大門外周禮曰凡賓客之治令訝聽之此拜亦皮弁服】上介饗餼三牢飪一牢在西鼎七羞鼎三【飪鼎七無鮮魚鮮腊也賓介皆異館】腥一牢在東鼎七堂上之饌六【六者賓西夾之數】西夾亦如之筯及饗如上賓【凡所不貶者尊介也言如上賓者明此賓客介也】餼一牢門外米禾視死牢牢十車薪芻倍禾凡其實與陳如上賓【凡凡飪以下】下大夫韋弁用束帛致之上介韋弁以受如賓禮【介不皮弁者以其受大禮似賓不敢純如賓也】僎之兩馬束錦士介四人皆餼大牢米百筯設于門外【牢米不入門略之也米設當門亦十為列北上牢在其南西上】宰夫朝服牽牛以致之【執紉牽之東面致命朝服無束帛亦略之上介西面拜迎】士介朝服北面再拜稽首受【受於牢東拜自牢後適宰夫右受由前東面授從者】無僎【既受拜送之矣明日衆介亦各如其受之服從賓拜於朝】

右歸饗餼記聘日致饗【急歸大禮本經記】致饗餼如勞之禮【司儀】十斗曰斛十六斗曰簋十簋曰秉【秉十六斛今江淮之間量名有為簋者今文簋為逾】二百四十斗【謂一車之米秉有五簋】四秉曰筯【此秉謂刈禾盈手之秉也筯稽名也若今來易之間刈稻聚把有名為筯者詩云彼有遺秉又云此有不斂穧】十筯曰稷十稷曰秬四百秉為一秬【一車之禾三秬為千二百秉三百筯三十稷也古文稷作縷本經記】賜饗唯羹飪筮一尸若昭若穆【羹飪謂羹一牢也肉謂之羹唯是祭其先大禮之盛者也筮尸若昭若穆容父在父在則祭祖父卒則祭禰腥餼不祭則士介不祭也士之初行不釋幣于禰不祭可也古文羹為羔飪作臠】僕為祝祝曰孝孫某孝子某薦嘉禮于皇祖某甫皇考某子【僕為祝者大夫之臣攝官也】如饋食之禮【如少牢饋食之禮不言少牢今以大牢也今文無之】假器於大夫【不敢以君之器為祭器】盼肉及廋車【盼猶賦也廋廋人也車巾車也二人掌視車馬之官也賦及之明辯也古文盼作紛同上】士無饗無饗者無僎【謂歸餼也同上】凡賓拜于朝訝聽之【拜拜賜也唯稍不拜同上】歸

大禮之日既受饗餼請觀【聘於是國欲見其宗廟之好百官之富若尤尊大之焉】訝帥之自下門入【帥猶道也從下門外入游觀非正也同上】晉士鞅來聘叔孫為政【叔孫昭子以三命為國政】季孫欲惡諸晉【憎叔孫在已上位欲使得罪於晉】使有司以齊鮑國歸費之禮為士鞅【鮑國歸費在十四年牢禮各如其命數魯人失禮故為鮑國七牢】士鞅怒

曰鮑國之位下而使鞅從其牢禮是卑敝邑也將復諸寡君魯人恐加四牢焉為十一牢【言魯不能以禮事大國且為哀七年吳徵百牢起昭二十一年左氏傳】

賓朝服問卿【不皮弁別於主君卿每國三人】卿受于祖廟【重賓禮也祖王父也】下大夫擯【無士擯者既接於君所急見之】擯者出請事大夫朝服迎于外門外再拜賓不答拜揖大夫先入每門每曲揖及廟門大夫揖入【入者省內事也既而俟于寧也】擯者請命【亦從入而出請不几筵辟君也】庭實設四皮【麋鹿皮也】實奉束帛入三揖皆行至於階讓【皆猶並也古文曰三讓】賓升一等大夫從升堂北面聽命【賓先升使者尊】賓東面致命【致其君命】大夫降階西再拜稽首賓辭升成拜受幣堂中西北面【於堂中央之西受幣趨聘君之命】賓降出大夫降授老幣無償【不償賓辟君也】

右問卿 記聘日致饗明日問大夫【不以殘日問人崇敬也古文曰問夫人也】大夫不敢辭君初為之辭矣【此宜在明日問大夫下本經記】君貺寡君延及二三老拜【此贊拜問大夫之辭貺賜也大夫曰老同上】

擯者出請事賓面如覲幣【面亦見也其謂之面威儀質也】賓奉幣庭實從【庭實四馬】入門右大夫辭【大夫於賓入自階下辭迎之】賓遂左【見私事也雖敵賓猶謙入門右為若降等然曲禮曰客若降等則就主人之階主人因辭于客然後客復就西階】庭實設揖讓如初【大夫至庭中旋並行】大夫升一等賓從之【大夫先升道賓】大夫西面賓稱面【稱舉也舉相見之辭以相接】大夫對北面當楣再拜受幣于楹間南面退西面立【受幣楹間敵也賓亦振幣進北面授】擯當楣再拜送幣降出大夫降授老幣

右賓私面於卿

擯出者請事上介特面幣如覲介奉幣【特面者異于主君士介不從而入也君尊衆介始覲不自別也上賓則衆介皆從之】皮二人贊【亦儷皮也】入門右奠幣再拜【降等也】大夫辭【於辭上介則出】擯者反幣【出還于上介也】庭實設介奉幣入大夫揖讓如初【大夫亦先升一等今文曰入設】介升大夫再拜受【亦於楹間南面而受】介降拜大夫降辭介升再拜送幣【介既送幣降出也大夫亦授老幣】擯者出請衆介面如覲幣入門右奠幣皆再拜大夫辭介逆出擯者執上幣出禮請受賓辭【賓亦為士介辭】大夫答再拜擯者執上幣立于門中以相拜士介皆辟老受擯者幣于中庭士三人坐取羣幣以從之擯者出請事賓出大夫送于外門外再拜賓不顧【不顧言去】擯者退大夫拜辱【拜送也】

右介私面於卿

下大夫嘗使至者幣及之【嘗使至己國則以幣問之也君子不忘舊】上介朝服三介問下大夫下大夫如卿受幣之禮【上介三介下大夫使之禮也】其面如賓面于卿之禮

右賓問嘗使者

大夫若不見【有故也】君使大夫各以其爵為之受如主人受幣禮不拜【各以其爵主人卿也則使卿大夫也則使大夫不拜代受之耳不當主人禮也】右主國大夫有故 記既將公事賓請歸【謂已問大夫事畢請歸不敢自專謙也主國留之饗食燕獻無日數盡殷勤也 本經記】賓既將公事復見訝以其摯【既已也公事聘享問大夫復報也使及上介執鴈羣介執雉各以見其訝 同上】

夕夫人使下大夫韋弁歸禮【夕問卿之夕也使下大夫下君也君使之云夫人者以致辭當稱寡小君】堂上籩豆六設于戶東西上二以竝東陳【籩豆六者下君禮也臣設于戶東又辟饌位也其設脯其南醢屈六籩六豆】壺設于東序北上二以竝南陳醕黍清皆兩壺【醕白酒也凡酒稻為上黍次之粱次之皆有清白以黍間清白者互相備明三酒六壺也先言醕白酒尊先設之】大夫以束帛致之【致夫人命也此禮無牢下朝君也】賓如受饗之禮僎之乘馬束錦上介四豆四籩四壺受之如賓禮【四壺無稻酒也不致牢下於君也】僎之兩馬束錦明日賓拜禮于朝【於是乃言賓拜明介從拜也今文禮為醴】

右夫人歸禮 記聘日致饗明日問大夫夕夫人歸禮【與君異日下之也今文歸作饋 本經記】

大夫餼賓大牢米八筐【其陳於門外黍粱各二筐稷四筐二以竝南陳無稻牲陳於後東上不饌於堂庭辟君也】賓迎再拜老牽牛以致之賓再拜稽首受老退賓再拜送【老室老大夫之貴臣】上介亦如之衆介皆少牢米六筐皆士牽羊以致之【米六筐者又無粱也士亦大夫之貴臣】

右大夫餼賓介 記凡餼大夫黍粱稷筐五斛【謂大夫餼賓上介也器寡而大略 本經記】

公於賓壹食再饗【饗謂享大牢以飲賓也公食大夫禮曰設洗如饗則饗與食互相先後也古文壹皆為一今文饗皆為鄉】燕與羞俶獻無常數【羞謂禽羞鴈鶩之屬成熟煎和也俶始也始獻四時新物聘義所謂時賜無常數由恩意也古文俶作淑】賓介皆明日拜于朝上介壹食壹饗【饗食賓介為介從饗獻矣復特饗之客之也】若不親食使大夫各以其爵朝服致之以賄幣如致饗無僎【君不親食謂有疾及他故也必致之不廢其禮也致之必使同班敵者易以相親敬也致禮於卿使卿致禮於大夫使大夫非必命數也無僎以已本宜往古文侑皆作宥】致饗以酬幣亦如之【酬幣饗禮酬賓勸酒之幣也所用未聞也禮幣束帛乘馬亦不是過也禮器曰琥璜爵蓋天子酬諸侯】

右食饗燕羞獻 記其介為介【饗賓有介者賓尊行敵禮也 本經記】凡致禮皆用其饗之加籩豆【凡致禮謂君不親饗食及上介以酬幣致其禮也其其賓與上介也加籩豆謂其實也亦實於簠筐饗禮今亡】各以其爵朝服【此句宜在凡致禮下 同上】饗食如將幣之儀【饗食亦謂君不親而使大夫以幣致之 司儀】大夫來使無罪饗之【樂與嘉賓為禮】過則餼之【餼之腥致其牢禮也其致之辭不云君之有故耳聘義曰使者聘而誤主君不親饗食所以愧厲之也不言罪者罪將執之 本經記】

有大客後至則先客不饗食致之【卑不與尊者齊禮】無饗者無饗禮【士介無饗禮】燕則上介為賓賓為苟敬【饗食君親為主尊賓也燕私樂之禮崇恩】

【殺敬也賓不欲主君復舉禮事禮已於是辭為賓君聽之從諸公之席命為苟敬苟敬者主人所以小敬也更降迎其介以為賓介大夫也雖為賓猶卑於君君則不與亢禮也主人所以致敬者自敵以上】宰夫獻【為主人代公獻】既致饗旬而稍宰夫始歸乘禽日如其饗餼之數【稍稟食也乘謂乘行之禽也謂鴈鶩之屬其歸之以雙為數其賓與上介也古文既為餼】士中日則二雙【中猶間也不一日一雙大寡不敬也】凡獻執一雙委其餘于面【執一雙以將命也面前也其受之也上介受以入告之士舉其餘從之賓不辭拜受于庭上介執之以相拜于門中乃入授人上介受亦如之士介拜受于門外】禽羞俶獻比【比放也其致之禮如乘禽也禽羞謂成熟有齊和者俶獻四時珍美新物也俶始也言其始可獻也聘義謂之時賜並同上】

大夫於賓壹饗壹食上介若食若饗若不親饗則公作大夫致之以酬幣致食以侑幣【作使也大夫有故君必使其同爵者為之致之列國之賓來榮辱之事君臣同之】

右大夫饗食賓介

君使卿皮弁還玉于館【玉圭也君子於玉比德焉以之聘重禮也還之者德不可取於人相切厲之義也皮弁者始以此服受之不敢不忠也】賓皮弁襲迎于外門外不拜帥大夫以入【迎之不拜示將去不純為主也帥道也今文曰迎于門外古文帥為率】大夫升自西階鉤楹【鉤楹由楹內將南面致命致命不東面以賓在下也必言鉤楹者賓在下嫌楹外也】賓自碑內聽命升自西階自左南面受圭退負右房而立【聽命于下敬也自左南面右大夫且並受也必並受者若鄉君前耳退為大夫降遽遁今文或曰由自西階無南面】大夫降中庭賓降自碑內東面授上介于阼階東【大夫降出言中庭者為賓降節也授于阼階東者欲親見賈人藏之也賓還阼階下西面立】上介出請賓迎大夫還璋如初入【出請請事於外以入告也賓雖將去出入猶東唯升堂由西階凡介之位未有改也】賓裼迎大夫賁用束紼【賁予人財之言也紼紼絲為之今之縛也所以遺聘君可以為衣服相厚之至】禮玉束帛乘皮【禮禮聘君也所以報享也亦言玉璧可知也今文禮皆作醴】皆如還玉禮大夫出賓送不拜右還玉賁禮記賁在聘于賁【賁財也于讀曰為言主國禮賓當視賓之聘禮而為之財也賓客者主人所欲豐也若苟豐之是又傷賁也周禮曰凡諸侯之交各稱其邦而為之幣以其幣為之禮古文賁皆作悔本經記】無行則重賁反幣【無行謂獨來復無所之也必重其賁與反幣者使者歸以得禮多為榮所以盈聘君之意也反幣謂禮玉束帛乘皮所以報聘君之享禮也昔秦康公使西乞術聘于魯辭孫而說襄仲曰不有君子其能國乎厚賁之此謂重賁反幣者也今文曰賁反幣同上】還圭如將幣之儀【還以本圭故云如也司儀】

公館賓【為賓將去親存送之厚殷勤且謝聘君之意也公朝服】賓辟【不敢受主國君見已于此館也此亦不見言辟者君在廟門敬也凡君有事於諸臣之家東造廟門乃下】上介聽命【聽命於廟門中西面如相拜然也擯者每贊君辭則曰敢不承命告于寡君之老】聘

享夫人之聘事問大夫送賓公皆再拜【拜此四事公東面拜擯者北面】公退賓從請命于朝【賓從者實為拜主君之館已也言請命者以己不見不敢斥尊者之意】公辭賓退【辭其拜也退還館裴駕為旦將發也周禮曰賓從拜辱于朝明日客拜禮賜遂行】

右主君就賓館 記客將歸使大夫以其束帛反命于館【為書報也】明日君館之【既報館之書問尚疾也】又拜送【拜送賓也其辭蓋云于將有行寡君敢拜送宜承上君館之下本經記】君館客客辟介受命遂送客從拜辱于朝【君館客者客將去就省之盡殷勤也遂送君拜以送客】明日客拜禮賜遂行如入之積【禮賜謂乘禽君之加惠也如入之積則三積從來至去 司儀】

賓三拜乘禽于朝訝聽之【發去乃拜乘禽明已受賜大小無不識】遂行舍于郊【始發且宿近郊自展軛】

右拜賜遂行 記賓於館堂楹間釋四皮束帛賓不致主人不拜【賓將遂去是館留禮以禮主人所以謝之也不致不拜不以將別崇新敬也本經記】

公使卿贈如覲幣【贈送也所以好送之也言如覲幣見為反報也今文公為君】受于舍門外如受勞禮無償【不入無償明去而宜有己也如受勞禮以贈勞同節】使下大夫贈上介亦如之使士贈衆介如其覲幣大夫親贈如其面幣無償贈上介亦如之使人贈衆介如其面幣士送至于竟

右贈送 凡賓客送逆同禮【謂郊勞郊送之屬 司儀】

齊國莊子來聘自郊勞至于贈賄禮成而加之以敏【迎來曰郊勞送去曰贈賄敏審當于事僖三十三年左氏傳】

使者歸及郊請反命【郊近郊也告郊人使請反命于君也必請之者以已久在外嫌有罪惡不可以入春秋時鄭伯惡其大夫高克使之將兵逐而不納此蓋請而不得入】朝服載旌【行時稅舍于此郊今還至此正其故行服以俟君命敬也古文旌作膳】禋乃入【禋祭名也為行道累歷不祥禋之以除災凶】乃入陳幣于朝西上上賓之公幣私幣皆陳上介公幣陳他介皆否【皆否者公幣私幣皆不陳此幣使者及介所得於彼國君卿大夫之贈賜也其或陳或不陳詳尊而略卑也其陳之及卿大夫處者待之如夕幣其禮於君者不陳上賓使者公幣君之賜也私幣卿大夫之幣也他介士介也言他容衆從者】束帛各加其庭實皮左【不加于其皮上榮其多也】公南鄉【亦宰告于君君乃朝服出門左南鄉】卿進使者使者執圭垂纁北面上介執璋屈纁立于其左【此主于反命士介亦隨入竝立東上】反命曰以君命聘于某君某君受幣于某宮某君再拜以享某君某君再拜【君亦揖使者進之乃進反命也某君某國名也某宮若言桓宮僖宮也某君再拜受也必言此者明彼君敬君已不辱命】宰自公左受玉【亦於使者之東同面竝受也不右使者由便也】受上介璋致命亦如之【變反言致者若云非君命也致命曰以君命聘於某君夫人某君再拜以享於某君夫人某君再拜不言受幣于某宮可知略之】執賄幣以告曰某君使某子賄授宰【某子若言高子國

子凡使者所當以告君者上介取以授之賄幣在外也】禮玉亦如之【亦執束帛加璧也告曰某君使某子禮宰受之士隨自後左士介受乘皮如初上介出取玉束帛士介後取皮也】執禮幣以盡言賜禮【禮幣主國君初禮賓之幣也以盡言賜禮謂自此至于贈】公曰然而不善乎【善其能使於四方而猶女也】授上介幣再拜稽首公答再拜【授上介幣當拜公言也不授宰者當復陳之】私幣不告【亦略卑也】君勞之再拜稽首君答再拜【勞之以道路勤苦】若有獻則曰某君之賜也【言此物某君之所賜予為惠者也其所獻雖珍異不言某為彼君服御物謙也其大夫出反必獻忠孝也】君其以賜乎【不必其當君也獻不拜者為君之答已也】上介徒以公賜告如上賓之禮【徒謂空手不執其幣】君勞之再拜稽首君答拜勞士介亦如之【士介四人旅答壹拜又賤也】君使宰賜使者幣使者再拜稽首【以所陳幣賜之也禮臣子人賜之而必獻之君父不敢自私服也君父因以予之則拜受之如更受賜也既拜宰以上幣授之】賜介介皆再拜稽首【士介之幣皆載以造朝不陳之耳與上介同受賜命俱拜既拜宰亦以上幣授上介】乃退【君揖入皆出去】介皆送至于使者之門【將行俟于門反又送于門與尊長出入之禮也】乃退揖【揖別也】使者拜其辱【隨謝之也再拜上介三拜士介】

右歸反命

釋幣于門【門大門也主于闌布席于闌西闕外東面設洗于門外東方其餘如初于禩時出于行入于門不兩告告所先見也】乃主于禩筵几于室薦脯醢【告反也薦進也】觴酒陳【主人酌進奠一獻也言陳者將復有次也先薦後酌祭禮也行釋幣反釋奠略出謹入也】席于阼【為酢主人也酢主人者祝取爵酌不酢於室異於祭】薦脯醢【成酢禮也】三獻【室老亞獻士三獻也每獻奠輒取爵酌主人自酢也】一人舉爵【三獻禮成更起酒也主人奠之未舉也】獻從者【從者家臣從行者也主人獻之勞之也皆升飲酒于西階上不使人獻之辟國君也】行酬乃出【主人舉奠酬從者下辯室老亦與焉也】上介至亦如之

右禮門及禩

聘遭喪入竟則遂也【遭喪主國君薨也入境則遂國君以國為體士既請事已入境矣關人未告則反】不郊勞【子未君也】不筵几【致命不於席就尸柩於殯宮又不神之】不禮賓【喪降事也】主人畢歸禮【賓所飲食不可廢也禮謂饗餼饗食】賓唯饗餼之受【受正不受加也】不賄不禮玉不贈【喪殺禮為之不備】遭夫人世子之喪君不受使大夫受于廟其他如遭君喪【夫人世子死君為喪主使大夫受聘禮不以凶接吉也其他謂禮所降】遭喪將命于大夫主人長衣練冠以受【遭喪謂主國君薨夫人世子死也此三者皆大夫攝主人長衣素純布衣也去衰易冠不以純凶接純吉也吉時在裏為中衣中衣長衣繼皆掩尺表之曰深衣純袂寸半耳君喪不言使大夫受子未君無使臣義也】

右遭主國喪載季文子求遭喪之禮事 記遭主國之喪不受饗食受牲禮【牲亦當為腥聲之誤也有喪不忍煎亨正禮殮饗餼當孰者腥致之也 掌客】

聘君若薨于後入竟則遂【既接于主國君也】赴者未至則哭于巷衰于館【未至謂赴告主國君者也哭于巷者哭于巷門未可為位也衰于館未可以凶服出見人其聘享之事自若吉也今文赴作訃】受禮【受饗餼也】不受饗食【亦不受加】赴者至則衰而出【禮為鄰國闕於是可以凶服將事也】唯稍受之【稍稟食也】歸執圭復命于殯升自西階不升堂【復命于殯者臣子之于君父存亡同】子即位不哭【將有告請之事宜清淨也不言世子者君薨也諸臣待之亦皆如朝夕哭位】辯復命如聘【自陳幣至于上介以公賜告無勞】子臣皆哭【使者既復命子與羣臣皆哭】與介入北鄉哭【北鄉哭新至別于朝夕】出袒括髮【悲哀變於外臣也】入門右即位踊【從臣位自哭至踊如奔喪禮】

右聘君薨記諸臣在他國為位而哭不敢拜賓【謂大夫士使於列國奔喪】公孫歸父欲去三桓云云遂奔齊【宣一十八年左氏傳】

若有私喪則哭于館衰而居不饗食【私喪謂其父母哭于館衰而居不敢以私喪自聞于主國凶服于君之吉使春秋傳曰大夫以君命出聞喪徐行而不反】歸使衆介先衰而從之【已有齊斬之服不忍顯然趨於往來其在路使介居前歸又請反命已猶徐行隨之君納之乃朝服既反命出公門釋服哭而歸其他亦如奔喪之禮吉時道路深衣】

右私喪大夫以君命出聞喪徐行而不反【聞喪者聞父母之喪不忍疾行又為君當使人追代之以喪喻疾者喪尚不當反況于疾乎宣八年公羊傳】賓客有喪唯芻稍之受【不受饗食饗食加也喪謂父母死也客則又有】

【君焉芻給牛馬稍人廩也其正禮殯饗餼主人致之則受掌客】

賓入竟而死遂也主人為之具而殯【具謂始死至殯所當用】介攝其命【為致聘享之禮也初時上介接聞命】君弔介為主人【雖有臣子親姻猶不為主人以介與賓並命於君尊也】主人歸禮幣必以用【當中奠贈諸喪具之用不必如賓禮】介受賓禮無辭也【介受主國賓已之禮無所辭也以其當陳之以反命也有賓喪嫌其辭之】不饗食歸介復命柩止于門外【門外大門外也必以柩造朝達其忠心】介卒復命出奉柩送之君弔卒殯【卒殯成節乃去】若大夫介卒亦如之【不言上介者小聘上介士也】士介死為之棺斂之【不具他衣物也自以時服也】君不弔焉【主國君使人弔不親往】若賓死未將命則既斂于棺造于朝介將命【未將命謂俟閒之後也以柩造朝以已至朝志在達君命】若介死歸復命唯上介造于朝若介死雖士介賓既復命往卒殯乃歸【往謂送柩】

右賓介卒記其為賓則公館復私館不復其在野則升其乘車之左轂而復【私館卿大夫之家也不於之復為主人之惡喪大記】

凡賓客死致禮以喪用【死則主人為之具而殯矣喪用者饋奠之物掌客】芋尹蓋曰事死如事生禮也於是乎有朝聘而終以尸將事之禮【朝聘道死以尸行事】又有朝聘而遭喪之禮【遭所聘之喪哀十五年左氏傳】

小聘曰問不享有獻不及夫人主人不筵几不禮面不升不郊勞【記貶於聘所以為小也獻私獻也面猶覲也】其禮如為介三介【如為介如為大聘上介】

右小聘

聘義 賓禮四

聘禮上公七介侯伯五介子男三介所以明貴賤也【此皆使卿出聘之介數也大行人職曰凡諸侯之卿其禮各下其君二等】介紹而傳命君子於其所尊弗敢質敬之至也【質謂正自相當】三讓而后傳命三讓而后入廟門三揖而后至階三讓而后升所以致尊讓也【此揖讓主謂賓也三讓而后傳命賓至廟門主人請事時也賓見主人陳擯以大客禮當已則三讓之不得命乃傳其君之聘命也三讓而後入廟門讓主人廟受也小行人職曰凡四方之使者大客則擯小客則受其幣聽其辭】君使士迎于竟大夫郊勞君親拜迎于大門之內而廟受北面拜貺拜君命之辱所以致敬也【貺賜也賓致命公當楣再拜拜聘君之恩惠辱命來聘者也】敬讓也者君子之所以相接也故諸侯相接以敬讓則不相侵陵【君子之相接賓讓而主人敬也】卿為上擯大夫為承擯士為紹擯君親禮賓賓私面私覲致饗餼還圭璋賄贈饗食燕所以明賓客君臣之義也【設大禮則賓客之也或不親而使臣則為君臣也】故天子制諸侯比年小聘三年大聘相厲以禮使者聘而誤主君弗親饗食也所以愧厲之也諸侯相厲以禮則外不相侵內不相陵此天子之所以養諸侯兵不用而諸侯自為正之具也【比年小聘所謂歲相問也三年大聘所謂殷相聘也】以圭璋聘重禮也已聘而還圭璋此輕財而重禮之義也諸侯相厲以輕財重禮則民作讓矣【圭瑞也尊圭璋之類也用之還之皆為重禮禮必親之不可以己之有遙復之也財謂璧琮享幣也受之為輕財者財可遙復重賄反幣是也】主國待客出入三積餼客於舍五牢之具陳于內米三十車禾三十車芻薪倍禾皆陳于外乘禽日五雙羣介皆有餼牢壹食再饗燕與時賜無數所以厚重禮也【厚重禮厚此聘禮也】古之用財者不能均如此然而用財如此其厚者言盡之於禮也盡之於禮則內君臣不相陵而外不相侵故天子制之而諸侯務焉爾【不能均如此言無則從其實也言盡之於禮欲令富者不能過也】聘射之禮至大禮也質明而始行事日幾中而后禮成非彊有力者弗能行也故彊有力者將以行禮也【禮成禮畢也或曰行成】酒清人渴而不敢飲也肉乾人飢而不敢食也日莫人倦齊莊正齊而不敢解惰以成禮節以正君臣以親父子以和長幼此衆人之所難而君子行之故謂之有行有行之謂有義有義之謂勇敢故所貴於勇敢者貴其能以立義也所貴於立義者貴其有行也所貴于有行者貴其行禮也故所貴于勇敢者貴其敢行禮義也故勇敢彊有力者天下無事則用之於禮義天下有事則用之於戰勝用之于戰勝則無敵用之于禮義則順治外無敵內順治此之謂盛德故聖王之貴勇敢彊有力如此也勇敢彊有力而不用之於禮義戰勝而用之于爭鬪則謂之亂人刑罰行于國所誅者亂人也如此則民順治而國安也【勝克敵也或為陳並聘義】聘問之禮所以使諸侯相尊敬也【小聘曰問】聘覲之禮廢則君臣之位失諸侯之行惡而倍畔侵陵之敗起矣【經解】

禮書綱目卷十四

卷十五

<經部,禮類,通禮之屬,禮書綱目

欽定四庫全書

禮書綱目卷十五 婺源江永撰

王朝邦國遣使禮 賓禮五

補

大宗伯以賓禮親邦國時聘曰問殷頹曰視【時聘者亦無常期天子有事乃聘之焉竟外之臣既非朝歲不敢瀆為小禮殷頹謂一服朝之歲以朝者少諸侯乃使卿以大禮衆聘焉一服朝在元年七年十一年 春官】大行人掌大賓之禮及大客之儀以親諸侯【大客謂孤卿】時聘以結諸侯之好殷頹以除邦國之慝【此二事者亦以王見諸侯之臣使來者為文也時聘者亦無常期天子有事諸侯使大夫來聘親以禮見之禮而遣之所以結其思好也天子無事則已殷頹謂一服朝之歲也慝猶惡也一服朝之歲五服諸侯皆使卿以聘禮來頹天子天子以禮見之命以政禁之事所以除其惡行 秋官】諸侯之於天子也比年一小聘三年一大聘【比年每歲也小聘使大夫大聘使卿王制詳見覲禮】典瑞瑑圭璋璧琮繅皆二采一就以覲聘

【璋以聘后夫人以琮享之也大夫衆來曰覲寡來曰聘鄭司農云瑑有圻鄂瑑起 春官】玉人瑑圭璋八寸璧琮八寸以覲聘【瑑文飾也覲視也聘問也衆來曰覲特來曰聘聘禮曰凡四器者唯其所寶以聘可也 考工記】

案十有二寸棗棗大夫純五夫人以勞諸侯【詳見覲禮】

凡賓客卿有大夫訝大夫有士訝士皆有訝【此謂聘問之日王所使迎賓客于館之訝 秋官掌訝】司几筵筵國賓于牖前莞筵紛純加繅席畫純左彤几【國賓諸侯來朝孤卿大夫來聘朝者雕几聘者彤几 春官】凡大國之孤執皮帛以繼小國之君出入三積不問壹勞朝位當車前不交擯廟中無相以酒禮之其他皆眡小國之君【此以君命來聘者也孤尊既聘享更自以其贊見執束帛而已豹皮表之以為飾繼小國之君言次之也朝聘之禮每一國畢乃前不交擯者不使介傳辭交于王之擯親自對擯者也廟中無相介皆入門西上而立不前相禮者聘之介是與以酒禮之酒謂齊酒也和之不用鬱鬯耳其他謂貳車及介牢禮賓主之間擯者將幣裸酢饗食之數】凡諸侯之卿其禮各下其君二等以下及其大夫士皆如之【此亦以君命來聘者也所下其君者介與朝位賓主之間也其餘則自以其爵聘義曰上公七介侯伯五介子男三介是謂使卿之聘之數也朝位則上公七十步侯伯五十步子男三十步與 大行人】凡諸侯之卿大夫士為國客則如其介之禮以待之【言其特來聘問待之禮如其為介時也然則聘禮所以禮賓是亦禮介 秋官掌客】小行人掌邦國賓客之禮籍以待

四方之使者【禮籍各位尊卑之書使者諸侯之使臣來者也】令諸侯春入貢秋獻功王親受之各以其國之籍禮之【貢六服所貢也功考績之功也秋獻之若今計文書斷于九月其舊法】凡四方之使者大客則擯小客則受其幣而聽其辭【擯者擯而見之玉使得親言也受其幣者受之以入告其所為來之事秋官】別國之大夫入天子之國曰某士【亦謂諸侯之卿也三命以下于天子為士曰某士者若晉韓起聘于周擯者曰晉士起】自稱曰陪臣某【陪重也曲禮】次國之上卿位當大國之中中當其下下當其上大夫小國之上卿位當大國之下卿中當其上大夫下當其下大夫【此諸侯使卿大夫覲聘竝會之序也其位爵同小國在下爵異固在上耳】其有中士下士者數各居其上之三分【謂其為介若特行而並會也居猶當也此據大國而言大國之士為上次國之士為中小國之士為下士之數國皆二十七人各三分之上九中九下九以位相當則次國之上士當大國之中中當其下小國之上士當大國之下凡非命士亦無出會之事春秋傳謂士為微王制】

小司徒小賓客令野修道委積【小賓客諸侯之使臣也地官】大行人若有四方之大事則受其幣聽其辭【四方之大事謂國有兵寇諸侯來告急者禮動不虛皆有贊幣以崇敬也受之以其事入告王也聘禮曰若有言則以束帛如享禮秋官】

小臣小賓客掌事如太僕之灋【夏官】候人若有方治則帥而致于朝及歸送之于竟【方治其方來治國事者也春秋傳曰晉欒盈過周王使候人出諸轅轅是其送之同上】象胥掌蠻夷閩貉戎狄之國使掌傳王之言而諭說焉以和親之【謂蕃國之臣來煩聘者】凡軍旅會同受國客幣而賓禮之【謂諸侯以王有軍旅之事使臣奉幣來問秋官】

言諡曰類【使大夫行象聘問之禮也言諡者序其行及諡所宜其禮亡曲禮】

右邦國遣使于王朝【凡周禮通言賓客之事客謂諸侯聘問之臣詳見覲禮篇此不別出當於彼篇考之】晉韓宣子聘于周王使請事【問何事來聘】對曰晉士起將歸時事於宰旅無他事矣【起宣子名禮諸侯大夫入天子國稱士時事四時貢職宰旅冢宰之下士言獻職貢于宰旅不敢斥尊】王聞之曰韓氏其昌阜於晉乎辭不失舊【阜大也傳言周衰諸侯莫能如禮唯韓起不失舊襄二十六年左氏傳】王使來徵聘【徵召也言周徵也徵聘不書徵加諷諭不指斥】孟獻子聘于周王以為有禮厚賄之【宣九 years 左氏傳】晉羊舌肸聘于周發幣于大夫及單靖公靖公享之儉而敬賓禮贈餞視其上而從之燕無私送不過郊語說昊天有成命【國語周語注見饗食燕記篇】

大行人間問以諭諸侯之志歸賑以交諸侯之福賀慶以贊諸侯之喜致禴以補諸侯之裁【此四者王使臣於諸侯之禮也間問者間歲一問諸侯謂存省之屬諭諸侯之志者諭言語諭書名其類也交或往或來者也贊助也致禴凶禮之弔禮禴禮也補諸侯災者若春秋澶淵之會謀歸宋財】王之所以撫邦國諸侯者歲徧存三歲徧覲五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器修灋則【撫猶安也存煩省者王使臣於諸侯之禮所謂間問也歲者巡狩之明歲以為始也屬猶聚也自五歲之後遂間歲徧省也七歲省而召其象胥九歲省而召其瞽史皆聚于天子之宮教習之也故書協辭命作叶詞命鄭司農云象胥譯官也叶當為汁詞當為辭書或為叶辭命玄謂胥讀為謂王制曰五方之民言語不通嗜慾不同達其志通其欲東方曰寄南方曰象西方曰狄韞北方曰譯此官正為象者周始有越重譯而來獻是因通言語之官為象謂云謂謂象之有才知

者也辭命六辭之命也瞽樂師也史大史小史也書名書之字也古曰名聘禮曰百名以上至十一歲又徧省焉度丈尺也量豆區釜也數器銓衡也法八法也則八則也達同成修皆謂齊其法式行至則齊等之也成平也平其僭踰者也秋官】

典瑞珍圭以徵守以恤凶荒【杜子春日珍當為鎮書亦或為鎮以】

【徵守者以徵召守國諸侯若今時徵郡守以竹使符也鎮者國之鎮諸侯亦一國之鎮故以鎮圭徵之也凶荒則民有遠志不安其土故以鎮圭鎮安之玄謂珍圭王使之瑞節制大小當與琬琰相依王使人徵諸侯憂凶荒之國則授之執以往致王命焉如今時使者持節矣恤者闔府庫振救之凡瑞節歸又執以反命】穀圭以和難【穀圭亦王使之瑞節穀善也其飾若粟文然難仇讐和之者若春秋宣公及齊侯平莒及邾晉侯使瑕嘉平戎于王】琬圭以治德以結好【琬圭亦王使之瑞節諸侯有德王命賜之及諸侯使大夫來聘既而為壇會之使大夫執以命事焉大行人職曰時聘以結諸侯之好鄭司農云琬圭無鋒芒故治德以結好】琰圭以易行以除慝【琰圭亦王使之瑞節鄭司農云琰圭有鋒芒傷害征伐誅討之象故以易行以除慝易惡行令為善者以此圭責讓諭告之也玄謂除慝亦于諸侯使大夫來覲既而使大夫執而命事于壇大行人職曰殷覲以除邦國之慝 春官】玉人琬圭九寸而縹以象德【琬猶圓也王使之瑞節也諸侯有德王命賜之使者執琰圭以致命焉縹藉也】琰圭九寸判規以除慝以易行【凡圭琰上寸半琰圭琰半以上又半為瑑飾諸侯有為不義使者征之執以為瑞節也除慝除惡逆也易行去煩苛 考工記】司士作士適四方使為介【士使謂自以王命使也介大夫之介也春秋傳曰天王使石尚來歸脤 夏官】虎賁氏適四方使則從士大夫【虎士從使者】若道路不通有徵事則奉書以使于四方【不通逢兵寇若泥水奉書徵師役也春秋隱七年冬戎伐凡伯于楚丘以歸同上】

內府凡適四方使者共其所受之物而奉之【王所以遺諸侯者 天官】

校人凡國之使者共其幣馬【使者所用私覲 夏官】小行人使適四方協九儀賓客之禮朝覲宗遇會同君之禮也存覲省聘問臣之禮也【適之也協合也】達天下之六節成六瑞【並詳名器下篇】合六幣【詳諸侯相朝篇】若國札喪則令賻補之若國凶荒則令賙委之若國師役則令犒餼之若國有福事則令賀慶之若國有禍裁則令哀弔之凡此五物者治其事故【故書賻作傳犒為藁鄭司農云賻補之謂賻喪家補助其不足也若今時一室二戶則官與之棺也藁當讀為犒謂犒師也玄謂師役者國有兵寇以匱病者也使隣國合會財貨以與之春秋定五年夏歸粟于蔡是也宗伯職曰以禮禮哀圍敗禍裁水火】及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此五物者每國辨異之以反命于王以周知天下之故【慝惡也猶圖也 秋官】行夫掌邦國傳遽之小事媿惡而無禮者凡其使也必以旌節雖道有難而不時必達【傳遽若今時乘傳騎驛而使者也美福慶也惡喪荒也此事之小者無禮行夫主使之道有難謂遭疾病他故不以時至也必達王命不可廢也其大者有禮大小行人使之有故則介傳命不嫌不達】居於其國則掌行人之勞辱事焉使則介之【使謂大小行人也故書曰夷使鄭司農云夷使使於四夷則使行夫主為之介玄謂夷發聲

同上】右王朝遣使于邦國 定王使單襄公聘于宋【單襄公王卿士單朝也聘問也問者王之所以撫萬國存省之】遂假道於陳以聘于楚【假道自宋適楚經陳也是時天子微弱故以諸侯相聘之禮假道也聘禮若過國至于境使次介假道束帛將命于廟】候不在疆【候

候人也掌送迎賓客者疆境也】司空不視塗【司空卿官掌道路也】膳宰不致饌【膳宰膳夫也掌賓客之牢禮生曰饌】司里不授館【司里里宰也掌授客館】國無寄寓【寓亦寄也無寄寓者不為廬舍可以寄羈旅之客】縣無施舍【四甸為縣縣方六十里施舍者所以施舍賓客負任之處】單子歸告王曰陳侯不有大咎國必亡周之秩官有之【秩官周常官篇名】曰敵國賓至關尹以告【敵位敵也關尹司關掌四方賓客叩關則為之告聘禮曰及境謁關人關人問從者幾人遂以入境】行理以節逆之【理吏也逆迎也執瑞節為信而迎之也行理小行人】候人為導【導賓至于朝出送之境】卿出郊勞【聘禮曰賓至于近郊君使卿朝服用束帛勞】門尹除門【門尹司門也除門埽除門處也】宗祝執祀【宗宗伯祝太祝也執祀賓將有事於廟則宗祝執祭祀之禮】司里授館【司里授客所當館次於卿也聘禮卿致館】司徒具徒【具徒役修道路之委積】司空視塗【視險易也】司寇詰姦【禁詰姦盜】虞人入材【虞人掌山澤之官祭祀賓客各供其材】甸人積薪【甸人掌薪蒸之官也】火師監燎【火師司火燎庭燎也】水師監濯【水師掌水監滌濯之事者】膳宰致饗【熟食曰饗】廩人獻餼【生曰餼禾米也】司馬陳芻【司馬掌師圉人養馬故陳芻圉人職屬司馬】上人展車【展省客車補傷敗也】百官官以物至賓入如歸是故小大莫不懷愛【小大謂賓介也】其貴國之賓至則以班加一等益虔【貴國大國也班次也】至于王使則皆官正莅事【正長也莅臨也】上卿監之【監視也】今雖朝也不才有分族於周【朝單子之名有分族王之親族也】承王命以為過賓於陳【假道為過賓】而司事莫至是蔑先王之官也【蔑欺也國語周語】

諸侯相朝禮 賓禮六

補

凡諸侯之邦交世相朝也【父死子立曰世凡君即位大國朝焉小國聘焉此皆所以習禮考義正刑一德以尊天子也必擇有道之國而就修之 秋官大行人】諸侯相見必告于禰【道近或可以不親告祖】朝服而出視朝【朝服為事故也】命祝史告于五廟所過山川【諸侯五廟山川所不過則不告貶于適天子也】亦命國家五官道而出反必親告于祖禰乃命祝史告至于前所告者而後聽朝而入【五官五大夫典事者命者勅之以其職道祖道也反必親告祖禰同出入禮 曾子問】司儀凡諸公相為賓【謂相朝也】主國五積三問皆三辭拜受皆旅擯再勞三辭三揖登拜受拜送【賓所止則積間闊則問行道則勞其禮皆使卿大夫致之從來至去數如此也三辭辭其以禮來於外也積問不言登受之于庭也鄭司農云旅讀為旅于泰山之旅謂九人傳辭相授于上下竟問賓從末上行介還受上傳之玄謂旅讀為鴻臚之臚臚陳之也賓之介九人使者七人皆陳擯位不傳辭也賓之上介出請使者則前對位皆當其末擯焉三揖謂庭中時也拜送送使者】主君郊勞交擯三辭車逆拜辱三揖三辭拜受車送三還再拜【主君郊勞備三勞而親之也鄭司農云交擯三辭謂賓主之擯者俱三辭也車逆主人以車迎賓于館也拜辱賓拜謝辱也玄謂交擯者各陳九介使傳辭也車迎拜辱者賓以主君親來乘車出舍門而迎之若欲遠就之然見之則下拜迎謝其自屈辱來也至去又出車若欲遠送然主君三還辭之乃再拜送之也車送迎之節各以其等則諸公九十步立當車軹也三辭重者先辭辭其以禮來于外後辭辭升堂】致館亦如之【館舍也使大夫

授之君又以禮親致焉】致殯如致積之禮【俱使大夫禮同也殯食也小禮曰殯大禮曰饗餼】及將幣交擯三辭車逆拜辱賓車進答拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再拜賓三還三辭告辟【鄭司農云交擯擯者交也賓車進答拜賓上車進主人乃答其拜也及出車送三請主人三請留賓也三進進隨賓也賓三還三辭告辟賓三還辭謝言已辟去也玄謂既三辭主君則乘車出大門而迎賓見之而下拜其辱賓車乃前下答拜也三揖者相去九十步揖之使前也至而三讓讓入門也相謂主君擯者及賓之介也謂之相者於外傳辭耳入門當以禮詔侑也介紹而傳命者君子于其所尊不敢質敬之至也每門止一相彌相親也君入門介拂闌大夫中根與闌之間士介拂根此為介鴈行相隨也止之者絕行在後耳賓三揖三讓讓升也登再拜授幣授當為受主人拜至且受玉也每事如初謂享及有言也賓當為僎謂以鬱鬯禮賓也上于下曰禮敵者曰僎禮器曰諸侯相朝灌用鬱鬯無籩豆之薦謂此朝禮畢僎賓也三請三進請賓就車也主君每一請車一進欲遠送之也三還三辭主君一請者賓亦一還一辭】致饗餼還主饗食致贈郊送皆如將幣之儀【此六禮者唯饗速賓耳其餘主君親往親往者賓為主人主人為賓君如有故不親饗食則使大夫以酬幣侑幣致之鄭司農云還圭歸其玉也故公子重耳受殯及璧玄謂聘以圭璋禮也享以璧琮財也已聘而還圭璋輕財而重禮贈送以財既贈又送至于郊】賓之拜禮拜饗餼拜饗食【鄭司農云賓之拜禮者因言賓所當拜者之禮也所當拜者拜饗餼拜饗食玄謂賓將去就朝拜謝此三禮三禮禮之重者也賓既拜主君乃至館贈之去又送之于郊】賓繼主君皆如主國之禮【鄭司農云賓繼主君復主人之禮賓也故曰皆如主國之禮玄謂繼主君者僎主君也僎之者主君郊勞致館饗餼還圭致贈郊送之時也如其禮者謂玉帛皮馬也有饌陳之積者不如也若饗食主君及燕亦速焉】諸侯諸伯諸子諸男之相為賓也各以其禮相待也如諸公之儀【賓主相待之儀與諸公同也饗餼饗食之禮則有降殺 秋官】掌客凡諸侯之禮上公五積皆眡殯牽三問皆修羣

介行人牢宰皆有牢殯五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如殯之陳牽四牢米百有二十筥醢醢百有二十饗車皆陳車米眡生牢牢十車車乘有五簋車禾眡死牢牢十車車三秬芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之凡介行人宰史皆有殯饗餼以其爵等為之牢禮之陳數唯上介有禽獻夫人致禮八壺八豆八籩膳大牢致饗大牢食大牢卿皆見以羔膳大牢侯伯四積皆眡殯牽再問皆脩殯四牢食三十有二簋八豆三十有二鉶二十有八壺三十有二鼎簋十有二腥二十有七皆陳饗餼七牢其死牢如殯之陳牽三牢米百筥醢醢百饗皆陳米三十車禾四十車芻薪倍禾皆陳乘禽日七十雙殷膳大牢三饗再食再燕凡介行人宰史皆有殯饗餼以其爵等為之禮唯上介有禽獻夫人致禮八壺八豆八籩膳大牢致饗大牢卿皆見以羔膳特牛子男三積皆眡殯牽壹問以脩殯三牢食二十有四簋六豆二十有四鉶十有八壺二十有四鼎簋十有二牲十有八皆陳饗餼五牢其死牢如殯之陳牽二牢米八十筥醢醢八十饗皆陳米二十車禾三十車芻薪倍禾皆陳乘禽日五十雙壹饗壹食壹燕凡介行人宰史皆有殯饗餼以其爵等為之禮唯上介有禽獻夫人致禮六壺六豆六籩膳眡致饗親見卿皆膳特牛【積皆視殯牽謂所共如殯而牽牲以往不殺也不殺則無鉶鼎簋簋之實其米實于筐豆實實于饗其設筐陳于楹內饗陳于楹外牢陳于門西車米禾芻薪陳于門外壺之有無未聞三問皆修脩脯也上公三問皆脩下句云羣介行人宰史皆有牢君用脩而

臣有牢非禮也蓋著脫字失處且誤耳殯客始至致小禮也公侯伯子男殯皆飪一牢其餘牢則腥食者庶饕美可食者也其設蓋陳于楹外東西不過四列簠稻粱器也公十簠堂上六西夾東夾各二也侯伯八簠堂上四西夾東夾各二子男六簠堂上二西夾東夾各二豆菹醢器也公四十豆堂上十六西夾東夾各十二侯伯三十二豆堂上十二西夾東夾各十子男二十四豆堂上十二西夾東夾各六禮器曰天子之豆二十有六諸公十有六諸侯十有二上大夫八下大夫六以聘禮差之則堂上之數與此同鉶羹器也公鉶四十二侯伯二十八子男十八非衰差也二十八書或為二十四亦非也其于衰公又當三十又為無所據依禮之大數鉶少于豆推其衰公鉶四十二宜為三十八蓋近之矣則公鉶堂上十八西夾東夾各十侯伯堂上十二西夾東夾各八子男堂上十西夾東夾各四壺酒器也其設于堂夾如豆之數鼎牲器也簋黍稷器也鼎十有二者飪一牢正鼎九與陪鼎三皆設于西階前簋十有二堂上八西夾東夾各二合言鼎簋者牲與黍稷俱食之主也牲當為腥聲之誤也腥謂腥鼎也於侯伯云腥二十有七其故腥字也諸侯禮盛腥鼎有鮮魚鮮腊每牢皆九為列設于阼階前公腥鼎三十六腥四牢也侯伯腥鼎二十七腥三牢也子男腥鼎十八腥二牢也皆陳陳列也殯門內之實備于是矣亦有車米禾芻薪公殯五牢米二十車禾三十車侯伯四牢米禾皆二十車子男三牢米十車禾二十車芻薪皆倍其禾饗餼既相見致大禮也大者既兼殯積有生有腥有孰餘又多也死牢如殯之陳亦飪一牢在西餘腥在東也牽生牢也陳于門西如積也米橫陳于中庭十為列每筥半斛公侯伯子男黍粱稻皆二行公稷六行侯伯稷四行子男二行醢醢夾碑從陳亦十為列醢在碑東醢在碑西皆陳于門內者于公門內陳之也言車者衍字耳車米載米之車也聘禮曰十斗曰斛十六斗曰簠十簠曰秉每車秉有五簠則二十四斛也禾稟實并刈者也聘禮曰四秉曰筥十筥曰稷十稷曰秬每車三秬則三十稷也稷猶束也禾米之秉筥字同數異禾之秉手把耳筥讀為棟梠之梠謂一櫟也皆陳橫陳門外者也米在門東禾在門西芻薪雖取數于禾薪從米芻從禾也乘禽乘行羣處之禽謂雉鴈之屬於禮以雙為數殷中也中又致膳示念賓也若弗酌謂君有故不親饗食燕也不饗則以酬幣致之不食則以侑幣致之凡介行人宰史衆臣從賓者也行人主禮宰主具史主書皆有殯饗餼尊其君以及其臣也以其爵等為之牢禮之陳數爵卿也則殯二牢饗餼五牢大夫也則殯大牢饗餼五牢士也則殯少牢饗餼二牢也此降小禮豐大禮也以命數則參差難等略於臣用爵而已夫人致禮助君養賓也籩豆陳於戶東壺陳于東序凡夫人之禮皆使下大夫致之於子男云膳視致饗言夫人致膳于小國君以致饗之禮則是不復饗也饗有壺酒卿皆見者見于賓也既見之又膳之亦所以助君養賓也卿見又膳此聘禮卿大夫勞賓餼賓之類與於子男云親見卿皆膳特牛見讀如卿皆見之見言卿于小國之君有不故造館見者故造館見者乃致膳鄭司農說牽云牲可牽行者也故春秋傳曰餼牽竭矣秬讀為秬秬麻答之秬 同上】君入門介拂闥大夫中楨與闥之間士介拂楨【此謂兩君相見也楨門楔也君入必中門上介夾闥大夫介士介鴈行于後示不相治也君若迎聘客擯者亦然 玉藻】公執桓圭侯執信圭伯執躬圭縹皆三采三就子執穀璧男執蒲璧縹皆二采再就以朝覲宗遇會同于王諸侯相見亦如之【鄭司農云亦執圭璧以相見故邾隱公朝于魯春秋傳曰邾子執玉高其容仰 春官典瑞】小行人合六幣圭以馬璋以皮璧以帛琮以錦琥以繡璜以黼此六物者以和諸侯之好故【合同也六幣所以享也五等諸侯享天子用璧享后用琮其大各如其瑞皆有庭實以馬若皮皮虎豹皮也用圭璋者二王之後也二王後尊故享用圭璋而特之禮器曰圭璋特義亦通於此其於諸侯亦用璧琮耳子男于諸侯則享用琥璜下其瑞也凡二王後諸侯相享之玉大小各降其

瑞一等及使卿大夫覲聘亦如之 秋官】

瑑琮八寸諸侯以享夫人【獻於所朝聘君之夫人也 考工記玉人】 諸侯之席三重【疏曰謂相朝時賓主皆然也尊者須溫厚故多重乃稱也三重則四席也熊氏云三重則三席也 禮器】 諸侯相朝灌用鬱鬯無籩豆之薦【灌獻也同上】 凡禮賓客國新殺禮凶荒殺禮札喪殺禮禍裁殺禮在野在外殺禮【皆為國省用愛費也國新新建國也凶荒無年也禍裁新有兵寇水火也 掌客】 曾子問曰諸侯相見揖讓入門不得終禮廢者幾孔子曰六請問之曰天子崩大廟火日食后夫人之喪雨霑服失容則廢【夫人君之夫人 曾子問】

右相朝 諸侯相朝之禮各執其圭瑞服其服乘其輅建其旌旂施其樊纓從其貳車委積之以其牢禮之數所以別義也介紹而相見君子於其所尊不敢質敬之至也君使大夫迎于境卿勞于道君親郊勞致館及將幣拜迎于大門外而廟受北面拜謁所以致敬也三讓而後升所以致尊讓也敬讓也者君子之所相接也諸侯相接以敬讓則不相侵陵也此天子之所以養諸侯兵不用而諸侯自為正之具也君親致饗既還主饗食致贈郊送所以相與習禮樂也諸侯相與習禮樂則德行修而不流也故天子制之諸侯務焉【大戴禮朝事儀】 君子之於禮也非作而致其情也【作起也敬非已情也所以下彼】 此有由始也【官所法也】 是故七介以相見也不然則已慤三辭三讓而至不然則已蹙【已猶甚也慤蹙愿貌大愿則辭不見情無由至也 禮器】 朝覲大夫之私覲非禮也大夫執圭而使所以申信也【其君親來其臣不敢私見于主國君也以君命聘則有私見】 不敢私覲所以致敬也而庭實私覲何為乎諸侯之庭【非其與君無別】 為人臣者無外交不敢貳君也【私覲是外交也郊特牲】 庭燎之百由齊桓公始也【僭天子也庭燎之差公蓋五十】

【侯伯子男皆三十 同上】 子太叔曰昔文襄之霸也【晉文公襄公】 其務不煩諸侯令諸侯三歲而聘五歲而朝【明王之制歲聘間朝今簡之昭三年左氏傳】 祭伯來來者來朝也其弗謂朝何也襄內諸侯非有天子之命不得出會諸侯不正其外交故弗與朝也【天子畿內大夫有采地謂之襄內諸侯】 聘弓鍬矢不出竟場束脩之肉不行竟中有至尊者不貳之也【聘遺所以結二國之好將彼我之意臣當稟命于君無私朝聘之道 隱元年穀梁傳】 隱公十一年春滕侯薛侯來朝天子無事諸侯相朝正也考禮修德所以尊天子也【事謂巡守崩葬兵革之事 春秋穀梁傳】 滕侯薛侯來朝爭長薛侯曰我先封【薛祖奚仲夏所封在周之前】 滕侯曰我周之卜正也【卜正卜官之長】 薛庶姓也我不可以後之【庶姓非周之同姓】 公使羽父請於薛侯曰君與滕君辱在寡人周諺有之曰山有木工則度之賓有禮主則擇之【擇所宜而行之】 周之宗盟異姓為後【盟載書皆先同姓例在定四年】 寡人若朝于薛不敢與諸任齒【薛任姓齒列也】 君若辱貺寡人則願以滕君為請薛侯許之乃長滕侯【左氏傳】 曹大子來朝【曹伯有疾故使其子來朝】 賓之以上卿禮也【諸侯之適子未誓于天子而攝其君則以皮帛繼子男故賓之以上卿各當其國之上卿 桓九:left氏傳】 文公十五年曹伯來朝禮也諸侯五年再相朝以修王命古之制也【十一年曹伯來朝雖至此乃來亦五年 左氏傳】 介葛盧來朝【介東夷國也葛盧介君名也】 舍于昌行之上公在會饋之芻米禮也【嫌公行不當致饋故曰禮也僖二十九年左氏傳】 子產相鄭伯以如楚舍不為壇【至敵國交除地封土為壇以受郊勞】 外僕言曰昔先大夫相先君適四國未嘗不為壇【外僕掌次舍者】 自是至今亦皆循之今子草舍無乃不可乎子

產曰大適小則為壇小適大苟舍而已焉用壇僑聞之大適小有五美宥其罪戾赦其過失救其菑患賞其德刑【刑法也】教其不及小國不困懷服如歸是故作壇以昭其功宣告後人無怠於德【怠解也】小適大有五惡說其罪戾【自解說】請其不足行其政事【奉行大國之政】共其職貢從其時命【從朝會之命】不然則重其幣帛以賀其福而弔其凶皆小國之禍也焉用作壇以昭其禍所以告子孫無昭禍焉可也【無昭禍以告子孫】

襄二十八年左氏傳】襄公薨之月子產相鄭伯以如晉晉侯以我喪故未之見也子產使盡壞其館之垣而納車馬焉士文伯讓之曰敝邑以政刑之不脩寇盜充斥【充滿斥見言其多】無若諸侯之屬辱在寡君者何是以令吏人完客所館【館舍也】高其閭閥【閥門也】厚其牆垣以無憂客使【無令客使憂寇盜】今吾子壞之雖從者能戒其若異客何以敝邑之為盟主繕完葺牆【葺覆也】以待賓客若皆毀之其何以共命寡君使勾請命【請問毀垣之命】對曰以敝邑小介於大國【介間也】誅求無時【誅責也】是以不敢寧居悉索敝賦以來會時事【隨時來朝會】逢執事之不聞而未得見又不獲聞命未知見時不敢輸幣亦不敢暴露其輸之則君之府實也非薦陳之不敢輸也【薦陳猶獻見也】其暴露之則恐燥濕之不時而朽蠹以重敝邑之罪僑聞文公之為盟主也宮室卑庳無觀臺榭以崇大諸侯之館館如公寢車廡繕修司空以時平易道路【易治也】圻人以時塡館宮室【圻人塗者塡塗也】諸侯賓至甸設庭燎【庭燎設火於庭】僕人巡宮【巡宮行夜】車馬有所【有所處】賓從有代【代客役】巾車脂轄【巾車主車之官】隸人牧圉各瞻其事【瞻視客所當得】百官之屬各展其物【展陳也謂羣官各陳其物以待賓】公不留賓而亦無廢事【賓得速去則事不廢】憂樂同之事則巡之【巡行也】教其不知而恤其不足賓至如歸無寧菑患【言見遇如此寧當復有菑患耶無寧寧也】不畏寇盜而亦不患燥濕今銅鞮之宮數里【銅鞮晉離宮】而諸侯舍于隸人【舍如隸人舍】門不容車而不可踰越【門庭之內迫迮又有牆垣之限】盜賊公行而天譴不戒【譴猶災也言水潦無時】賓見無時命不可知若又勿壞是無所藏幣以重罪也敢請執事將何所命之【問晉命已所止之宜】雖君之有魯喪亦敝邑之憂也【言鄭與魯亦有同姓之憂】若獲薦幣【薦進也】修垣而行【行去也】君之惠也敢憚勤勞文伯復命【反命于晉君】趙文子曰信【信如子產言】我實不德而以隸人之垣以贏諸侯【贏受也】是吾罪也使士文伯謝不敏焉晉侯見鄭伯有加禮【禮加敬】厚其宴好而歸之乃築諸侯之館【襄三十一年左氏傳】鄭伯如晉拜成子游相【子游公子偃】授玉于東楹之東【禮授玉兩楹之間鄭伯行疾故東過】士貞伯曰鄭伯其死乎自棄也已視流而行速不安其位宜不能久【視流不端諦也成六年左傳】定公十五年春邾隱公來朝【邾子益】子貢觀焉邾子執玉高其容仰公受玉卑其容俯【玉朝者之贊】子貢曰以禮觀之二君皆有死亡焉夫禮死生存亡之體也將左右周旋進退俯仰於是乎取之朝祀喪戎於是乎觀之今正月相朝而皆不度【不合法度】心已亡矣嘉事不體何以能久【嘉事朝禮】高仰驕也卑俯替也驕近亂替近疾君為主其先亡乎【為此年公薨哀七年以邾子益歸傳左氏傳】

諸侯未及期相見曰遇相見於郤地曰會【及至也郤間也遇會禮亡曲禮】

右會遇 春齊侯將平宋衛【平宋衛于鄭】有會期宋公以幣請于衛請先相見【宋敬齊命】衛侯許之故遇于犬丘【犬丘垂也衛地隱八年左氏傳】

隱四年公及宋公遇于清註云遇者草次之期二國各簡其禮若道路相逢遇也
定公與齊侯會于夾谷至會所為壇位土階三等以遇禮相見【會遇之禮禮之簡略者也
家語】子太叔曰昔文襄之霸也令諸侯有事而會不協而盟【昭三年左氏傳】楚子合諸
侯于申椒舉言於楚子曰夏啟有鈞臺之享【啟禹子河南陽翟縣南有鈞臺陂蓋啟享諸侯
于此】商湯有景亳之命【河南鞏縣西南有湯亭或言亳即偃師】周武有孟津之誓【將
伐紂也】成有岐陽之蒐【成王歸自奄大蒐於岐山之陽岐山在扶風美陽縣西北】康有
鄠宮之朝【鄠在始平鄠縣東有靈臺康王於是朝諸侯】穆有塗山之會【穆王會諸侯于
塗山塗山在壽春東北】齊桓有召陵之師【在僖四年】晉文有踐土之盟【在僖二十八
年】君其何用王曰吾用齊桓【用會召陵之禮】王使問禮于左師與子產左師曰小國習
之大國用之敢不薦聞【言所聞謙示所未行】獻公合諸侯之禮六【其禮六儀也宋爵公
故獻公禮】子產曰小國共職敢不薦守獻伯子男會公之禮六【鄭伯爵故獻伯子男會公
之禮其禮同所從言之異】君子謂合左師善守先代子產善相小國【昭四年左氏傳】公
會吳于郕【吳欲霸中國】吳來徵百牢子服景伯對曰先王未之有也吳人曰宋百牢我【
是時吳過宋得百牢】魯不可以後宋且魯牢晉大夫過十【晉大夫范鞅也在昭二十一年
】吳王百牢不亦可乎景伯曰晉范鞅貪而棄禮以大國懼敝邑故敝邑十一牢之君若以禮
命於諸侯則有數矣【有常數】若有棄禮則有淫者矣【淫過也】周之王也制禮上物不
過十二【上物天子之牢】以為天之數也【天有十二次故制禮象之】今棄周禮而曰
必百牢亦唯執事吳人弗聽乃與之【哀七:left氏傳】哀公會晉侯及吳子于黃池吳人將
以公見晉侯子服景伯對使者曰王合諸侯則伯帥侯牧以見于王【伯王官伯侯牧方伯】
伯合諸侯則侯帥子男以見於伯【伯諸侯長】自王以下朝聘玉帛不同故敝邑之職貢於
吳有豐於晉無不及焉以為伯也今諸侯會而君將以寡君見晉君則晉成為伯矣敝邑將改
職貢魯賦於吳八百乘若為子男則將半邾以屬於吳【邾三百乘】而如邾以事晉【如
邾六百乘】且執事以伯召諸侯而以侯終之何利之有焉吳人乃止既而悔之【謂景伯欺
之哀十三:left氏傳】僖公二十九年公會王子虎晉狐偃宋公孫固齊國歸父陳轅濤塗秦
小子憖盟于翟泉卿不書罪之也【晉侯始霸翼戴天子諸侯輯睦王室無虞而王子虎下盟
列國以瀆大典諸侯大夫上敵公侯虧禮傷教故貶諸大夫諱公與盟】在禮卿不會公侯會
伯子男可也【大國之卿當小國之君故可以會伯子男諸卿之見貶亦兼有此闕故傳重發
之左氏傳】

卷十六

欽定四庫全書

禮書綱目卷十六 婺源江永撰

覲禮 賓禮七

經【鄭目錄云覲見也諸侯秋見天子之禮春見曰朝夏見曰宗秋見曰覲冬見曰遇朝宗禮備覲遇禮省是以享獻不見焉三時禮亡唯此存爾覲禮於五禮屬賓禮】

覲禮

右篇目【凡言朝見之期與待賓客之禮皆附于下】 舜典五載一巡狩羣后四朝敷奏以言明試以功車服以庸【五載之內天子巡狩者一諸侯來朝者四蓋巡狩之明年則東方諸侯來朝於天子之國又明年則南方之諸侯來朝又明年則西方之諸侯來朝又明年則北方之諸侯來朝又明年則天子復巡狩是則天子諸侯雖有尊卑而一往一來禮無不答是以上下交通而遠近治和也敷陳奏進也周禮曰民功曰庸程子曰敷奏以言者使各陳其為治之說言之善者則從而明考其功有功則賜車服以旌異之其言不善則亦有以告飭之也】 周官六年五服一朝【五服侯甸男采衛也六年一朝會京師】 周禮邦畿方千里其外方五百里謂之侯服歲壹見其貢祀物又其外方五百里謂之甸服二歲壹見其貢嬪物又其外方五百里謂之男服三歲壹見其貢器物又其外方五百里謂之采服四歲壹見其貢服物又其外方五百里謂之衛服五歲壹見其貢財物又其外方五百里謂之要服六歲壹見其貢貨物【要服蠻服也此六服去王城三千五百里相距七千里公侯伯子男封焉其朝貢之歲四方各四分趨四時而來或朝春或宗夏或覲秋或遇冬祀貢者犧牲之屬故書嬪作頻鄭司農云嬪物婦人所為物玄謂絲枲也器物尊彝之屬服物玄纁絺纈也材物八材也貨物龜貝也】 九州之外謂之蕃國世壹見各以其所貴寶為贄【九州之外夷服鎮服蕃服也曲禮曰其在東夷北狄西戎南蠻雖大曰子春秋傳曰杞桓公以夷禮故曰子然則九州之外其君皆子男也無朝貢之歲父死子立及嗣王即位乃一來耳各以其所貴寶為贄則蕃國之君無執王瑞者是謂其君為小賓臣為小客所貴寶見傳者若犬戎獻白狼白鹿是也其餘則周書王會備焉 秋官大行人】 記諸侯之於天子也比年一小聘三年一大聘五年一朝【比年每歲也小聘使大夫大聘使卿朝則君自行然此大聘與朝晉文公時所制也虞夏之制諸侯歲朝周之制侯甸男采衛要服六者各以其服數來朝 王制】 天子無事與諸侯相見曰朝【事謂征伐】 考禮正刑一德以尊于天子【同上】 大宗伯以賓禮親邦國春見曰朝夏見曰宗秋見曰覲冬見曰遇【本文此下云時見曰會殷見曰同此六禮以諸侯見王為文六服之內四方以時分來或朝春或宗夏或覲秋或遇冬名殊禮異更遞而徧朝猶朝也欲來之早宗尊也欲其尊王覲之言勤也欲其勤王之事遇偶也欲其若不期而俱至 春官】 大行人掌大賓之禮及大客之儀以親諸侯【大賓要服以內諸侯大客謂孤卿】 春朝諸侯而圖天下之事秋覲以

比邦國之功夏宗以陳天下之謨冬遇以協諸侯之慮【本文此下云時會以發四方之禁殷同以施天下之政 六事者以王見諸侯為文圖比陳協皆考績之言王者春見諸侯則圖其事之可否秋見諸侯則比其功之高下夏見諸侯則陳其謀之是非冬見諸侯則合其慮之異同六服以其朝歲四時分來更迭如此更迭而徧司馬法曰春以禮朝諸侯圖同事夏以禮宗諸侯陳同謀秋以禮覲諸侯比同功冬以禮遇諸侯圖同慮時以禮會諸侯施同政殷以禮宗諸侯發同禁 秋官】大宰以八統詔王馭萬民八曰禮賓【禮賓賓客諸侯所以示民親仁善鄰】以九式均節財用二曰賓客之式六曰幣帛之式【幣帛所以贈勞賓客者 天官】小宰以官府之六聯合邦治二曰賓客之聯事以灋掌賓客之戒具【法謂其禮法也戒具戒官有事者所當共】令百官府共其財用【同上】
宰夫凡禮事贊小宰比官府之具【比校次之同上】大府邦中之賦以待賓客【同上】大行人以九儀

辨諸侯之命等諸臣之爵以同邦國之禮而待其賓客【九儀謂命者五公侯伯子男也爵者四孤卿大夫士也 秋官】小行人掌邦國賓客之禮籍【詳見王朝邦國遣使禮】司儀凡四方之賓客禮儀辭命餼牢賜獻以二等從其爵而上下之【上下猶豐殺也 秋官】掌客掌四方賓客之牢禮餼獻飲食之等數與其政治【政治邦新殺禮之屬也 同上】掌訝掌邦國之等籍以待賓客【等九儀之差數 同上凡言客者謂諸侯聘問之臣王朝邦國遣使篇當於此考之下皆同】

至于郊【郊謂近郊去王城五十里】

右至郊【諸侯出行及逆積問勞之禮附于下】記孔子曰諸侯適天子必告于祖奠于禩【皆奠幣以告之互文也】冕而出視朝【聽國事也諸侯朝天子必裨冕為將廟受也裨冕者公衮侯伯鷩子男毳】命祝史告于社稷宗廟山川【臨行又徧告宗廟孝敬之心也】乃命國家五官而後行【五官五大夫與事者命者敕之以其職】道而出【祖道也聘禮出祖釋軼祭酒脯也】告者五日而徧過是非禮也【既告不敢久留】凡告用牲幣反亦如之【牲當為制字之誤也制幣一丈八尺 曾子問】諸侯將出宜乎社造乎禩【宜造皆祭名 王制】諸侯將出必以幣帛皮圭告于祖禩遂奉以出載於齊車以行每舍奠焉而後就舍【以脯醢禮神乃敢即安也所告而不以出即埋之 曾子問】諸侯朝天子見日而行逮日而舍奠【舍奠每將舍奠行主 同上】司關凡四方之賓客攸關則為之告【賓客謂朝聘者叩關猶謁關人也鄭司農說以國語曰周之秩官有之曰敵國賓至關尹以告行理以節逆之 地官】蜡氏凡國之大祭祀令州里除不蠲禁刑者任人及凶服者以及郊野大賓客亦如之【蠲讀如吉圭為饕之圭圭潔也刑者黥劓之屬任人司圜所收教罷民也凶服服衰經也此所禁除者皆為不欲見人所穢惡也 秋官】小行人凡諸侯入王則逆勞于畿【鄭司農云入王朝于王也故春秋傳曰宋公不王又曰諸侯有王王有巡狩 同上】訝士邦有賓客則與行人送逆之入于國則為之前驅而辟野亦如之【送逆謂始來及去也入國八野自以時事 同上】掌訝若將有國賓客至則告官修委積與士逆賓於疆為前驅而入【官謂牛人羊人舍人委人之屬士訝士也既戒乃出迎賓】及宿則令聚【令野廬氏】及委則致積【以王命致于賓 同上】環人掌送逆邦國之通賓客以路節達諸

四方【通賓客以常事往來者也路節旌節也四方圻上】舍則授館令聚 有任器則令環之【令令野廬氏也鄭司農云四方人有任器者則環人主令殉環守之】凡門關無幾送逆及疆【鄭司農云門關不得苛留環人也玄謂環人送逆之則賓客出入不見幾 同上】野廬氏若有賓客則令守涂地之人聚 之有相翔者誅之【守涂地之人道所出廬宿旁民也相翔猶昌翔觀伺者也鄭司農云聚 之聚擊 以宿衛之也有奸人相翔于賓客之側則誅之不得令寇盜賓客 同上】

大司徒大賓客令野修道委積【令令遣人使為之也少曰委多曰積皆所以給賓客地官】遂人凡賓客令修野道而委積【委積於廬宿市 同】

【上】遂師賓客則巡其道修庀其委積【巡其道修行治道路也故書庀為比鄭司農云讀為庀庀具也 同上】遣人郊里之委積以待賓客凡賓客掌其道路之委積凡國野之道十里有廬廬有飲食三十里有宿宿有路室路室有委五十里有市市有候館候館有積【廬若今野候徒有房也宿可止宿若今亭有室矣候館樓可觀望者也一市之間有三廬一宿 同上】委人以稍聚待賓客【聚凡畜聚之物也】賓客共其芻薪【同上】牛人凡賓客之事共其積膳之牛【積所以給賓客之用若司儀職曰主國五積者也詳見致饗餼 同上】羊人賓客共其灋羊【注見致饗餼夏官】上公之禮出入五積三問三勞侯伯之禮出入

四積再問再勞子男之禮出入三積壹問壹勞【出入謂從來訖去也每積有牢禮米禾芻薪凡數不同者皆降殺問問不恙也勞謂苦倦之也皆有禮以幣致之大行人】鄉士大賓客則各掌其鄉之禁令帥其屬夾道而蹕【屬中士以下 秋官】司門凡四方之賓客造焉則以告【造猶至也告告于王而止客以俟逆 地官】

王使人皮弁用璧勞侯氏亦皮弁迎于帷門之外再拜【小行人職曰凡諸侯入王則逆勞于畿則郊勞者大行人也皮弁者天子之朝服也璧無束帛者天子之玉尊也不言諸侯言侯氏者明國殊舍異禮不凡之也郊舍狹寡為帷宮以受勞掌舍職曰為帷宮設旌門】使者不答拜遂執玉三揖至于階使者不讓先升侯氏升聽命降再拜稽首遂升受玉【不答拜者為人使不當其禮也不讓先升奉王命尊也升者升壇使者東面致命侯氏東階上西面聽之】使者左還而立侯氏還璧使者受侯氏降再拜稽首使者乃出【左還還南面示將去也立者見侯氏將有事於已俟之也還玉重禮】侯氏乃止使者使者乃入侯氏與之讓升侯氏先升受几侯氏拜送几使者設几答拜【侯氏先升賓禮統焉几者安賓所以崇優厚也上介出止使者則已布席也】侯氏用束帛乘馬僎使者使者再拜受侯氏再拜送幣【僎使者所以致尊敬也拜者各於其階】使者降以左驂出侯氏送于門外再拜侯氏遂從之【駢馬曰驂左驂設在西者其餘三馬侯氏之士遂以出授使者之從者于外從之者遂隨使者以至朝】

右郊勞 小行人及郊勞為承而擯【本文郊勞下有眡館將幣字 眡館致館也承猶丞也王使勞賓於郊致館於賓至將幣使宗伯為上擯皆為之丞而擯之秋官】記案十有二棗案十有二列諸侯純九大夫純五夫人以勞諸侯【純猶皆也鄭司農云案玉案也夫人天子夫人玄謂案玉飾案也夫人王后也記時諸侯猶稱王而夫人之號不別是以同王后於夫人也玉

案十二以為列王后勞朝諸侯皆九列聘大夫皆五列則十有二列者勞二王之後也棗棗實于器乃加于案聘禮曰夫人使下大夫勞以二竹籩方玄被纁裡有蓋實棗蒸棗擇兼執之以進 考工記玉人】

天子賜舍【以其新至道路勞苦未受其禮且使即安也賜舍猶致館也所使者司空與小行人為承擯今文賜作錫】曰伯父女順命于王所賜伯父舍【此使者致館辭】侯氏再拜稽首【受館】儻之束帛乘馬【王使人以命致館無禮猶儻之者尊王使也侯氏授館于外既則儻使者于內】

右賜舍 小行人眡館為承而擯【詳見上章】掌訝至于國賓入館次于舍門外待事于客【次如今官府門外更衣處待事于客通其所求索】凡從者出則使人道之【從者凡介以下也人其屬胥徒也使道賓客之從者營護之】凡訝者賓客至而往詔相其事而掌其治令【秋官】訝士居館則帥其屬而為之蹕誅戮暴客者【同上】司隸邦有賓客之事則役其煩辱之事【煩猶劇也同上】宰夫掌賓賜之殮牽與其陳數【鄭司農云殮夕食也春秋傳曰殮有陪鼎牽牲牢可牽而行者春秋傳曰餼牽竭矣玄謂殮客始至所致禮凡此禮陳數存可見者唯有行人掌客及聘禮公食大夫 天官殮中他物詳見致饗餼】

天子使大夫戒曰某日伯父帥乃初事【大夫者卿為訝者也掌訝職曰凡訝者賓客至而往詔相其事戒猶告也其為告使順循其事也初猶故也】侯氏再拜稽首【受覲日也】

右戒日

諸侯前朝皆受舍于朝同姓西面北上異姓東面北上【言諸侯者明來朝者衆矣顧其入覲不得並耳受舍于朝受次于文王廟門之外聘禮記曰宗人受次次以帷少退于君之次則是次也言舍者尊舍也天子使掌次為之諸侯上介先朝受焉此覲也言朝者覲遇之禮雖簡其來之心猶若朝也分別同姓異姓受之將有先後也春秋傳曰寡人若朝于薛不敢與諸任齒則周禮先同姓】

右受舍【凡王朝戒令皆附見于下】

幕人凡朝覲共其帷幕幄帟綬【共之者掌次當以張詳見會同 天官】

掌次諸侯朝覲則張大次小次【大次亦初往所止居小次即宮待事之處 同上】射人有大賓客則作卿大夫從【作者選使从王見諸侯】戒大史及大夫介【戒戒其當行者覲禮曰諸公奉篋服加命書于其上升自西階東而太史氏右

夏官】司士凡會同作士從賓客亦如之【作士从謂可使从于王者 同上】

諸子賓客作羣子從【从于王同上】大史朝覲以書協禮事【詳見會同篇 春官】

小史大賓客佐大史凡國事之用禮法者掌其小事【同上】雞人大祭祀夜呼旦以 百官凡國之大賓客亦如之【夜夜漏未盡雞鳴時也呼旦以警起百官使夙興 同上】司烜氏凡邦之大事共墳燭庭燎【故書墳為蕢鄭司農云蕢燭麻燭也玄謂蕢大也樹于門外曰大燭

于門內曰庭燎皆所以昭衆為明秋官】

侯氏裨冕釋幣于禰【將覲質明時也裨冕者衣裨衣而冠冕也裨之言埤也天子六服大裘為上其餘為裨以事尊卑服之而諸服亦服焉上公衮無升龍侯伯鷩子男毳孤絺卿大夫玄此差司服所掌也禰謂行主遷主矣而云禰親之也釋幣者告將覲也其釋幣如聘大夫將受命釋幣于禰之禮既則祝藏其幣歸乃埋之于祧西階之東】

右釋幣于禰 記諸侯裨冕以朝【朝天子也裨冕公衮侯伯鷩子男毳也玉藻】

乘墨車載龍旂弧韜乃朝以瑞玉有纁【墨車大夫制也乘之者入天子之國車服不可盡同也交龍為旂諸侯之所建弧所以張繆之弓也弓衣曰韜瑞玉謂公桓圭侯信圭伯躬圭子穀璧男蒲璧纁所以藉玉以韋衣木廣袤各如其玉之大小以朱白蒼為六色今文玉為圭纁或為璵】天子設斧依于戶牖之間左右几【依如今綈素屏風也有繡斧文所以示威也斧謂之黼几玉几也左右者優至尊也其席莞席紛純加纁席畫純加次席黼純】天子衮冕負斧依【衮衣者裨之上也纁之繡之為九章其龍天子有升龍有降龍衣此衣而冠冕南鄉而立以俟諸侯見】嗇夫承命告于天子【嗇夫蓋司空之屬也為末擯承命於侯氏下介傳而上上擯以告天子天子見公擯者五人見侯伯擯者四人見子男擯者三人皆宗伯為上擯春秋傳曰嗇夫馳】天子曰非他伯父實來予一人嘉之伯父其入予一人將受之【言非他者親之辭嘉之者美之辭也上擯又傳此而下至嗇夫侯氏之下介受之傳而上上介以告其君君乃許入今文實作寔嘉作賀】侯氏入門右坐奠圭再拜稽首【入門右執臣道不敢由賓之位也卑者見尊奠摯而不授】擯者謁【謁謂告也上擯告以天子前辭欲親受之如賓客也其辭所易者曰伯父其升】侯氏坐取圭升致命王受之玉侯氏降階東北面再拜稽首擯者延之曰升升成拜乃退【擯者請之侯氏坐取圭則遂左降拜稽首送玉也從後詔禮曰延延進也】

右覲 凡賓客諸侯有卿訝【此謂朝覲之日王所使迎賓于館之訝掌訝】掌訝及將幣為前驅【道之以如朝】至于朝詔其位入復【鄭司農云詔其位告客以其位次也入復客入則掌訝出復其故位也玄謂入復者入告王以客至也 秋官】記偏駕不入王門【在旁與已同曰偏同姓金輅異姓象輅四衛革輅蕃國木輅駕之與王同謂之偏駕不入王門乘墨車以朝是也偏駕之車舍之于館與本經記】

司常日月為常交龍為旂【王畫日月象天明也諸侯畫交】

【龍一象其升朝一象其下復也】凡祭祀各建其旗賓客亦如之【賓客朝覲宗遇王乘金輅建其大常 春官】典瑞公執桓圭侯執信圭伯執躬圭纁皆三采三就子執穀璧男執蒲璧纁皆二采再就以朝覲宗遇于王【三采朱白蒼二采朱綠也鄭司農云以圭璧見于王覲禮曰侯氏入門右坐奠圭再拜稽首 同上】所以朝天子圭與纁皆九寸剡上寸半厚半寸博三寸纁三采六等朱白蒼玄纁繫長尺絢組【聘禮記 詳見聘禮】大行人辨諸侯之命以同邦國之禮上公之禮執桓圭九寸纁藉九寸冕服九章建常九旂樊纓九就貳車九乘介九人其朝位賓主之間九十步立當車軹擯者五人諸侯之禮執信圭七寸纁藉七寸冕服七章建常

七旂樊纓七就貳車七乘介七人朝位賓主之間七十步立當前疾擯者四人諸伯執躬圭其他皆如諸侯之禮諸子執穀璧五寸纁藉五寸冕服五章建常五旂樊纓五就貳車五乘介五人朝位賓主之間五十步立當車衡擯者三人諸男執蒲璧其他皆如諸子之禮【纁藉以五采韋衣板若奠玉則以藉之冕服著冕所服之衣也九章者自山龍以下七章者自華蟲以下五章者自宗彝以下也常旌旂也旂其屬繆垂者也樊纓馬飾也以屬飾之每一處五采備為一就就成也貳副也介輔已行禮者也朝位謂大門外賓下車及王車出迎所立處也王始立大門內交擯三辭乃乘車而迎之齊僕為之節上公立當軹侯伯立當疾子男立當衡王立當軫與鄭司農云車軹軹也前疾謂駟馬車轅前胡下垂挂地者介幾人下有牢禮之數見後饗禮章擯者幾人之下有廟中將幣三享云云見享章有饗食禮見嘉禮饗食燕記篇有積問勞之數見至郊章】凡諸侯之王事辨其位正其等協其禮賓而見之【王事以王之事來也詩云莫敢不來王孟子曰諸侯有王 秋官】凡諸侯之適子誓于天子攝其君則下其君之禮一等未誓則以皮帛繼子男【誓猶命也言誓者明天子既命以為之嗣樹子不易也春秋桓九年曹伯使其世子射姑來朝行國君之禮是也公之子如侯伯而執圭侯伯之子如子男而執璧子男之子與未誓者皆次小國之君執皮帛而朝會焉其賓之皆以上卿之禮焉 春官典命】司服大賓客共其衣服而奉之【奉猶送也送之于王所 春官】校人朝覲毛馬而頒之【毛馬齊其色也頒授當乘之 夏官】典路大祭祀則出路贊駕說大賓客亦如之【亦出路當陳之鄭司農說漢朝上計律陳屬車于庭故曰大賓客亦如之 春官】齊僕掌馭金路以賓【以待賓客 夏官】齊右掌賓客前齊車【齊車金路王自整齊之車也前之者已駕王未乘之時 同上】大司寇凡朝覲前王【秋官】小司寇大賓客前王

而辟【鄭司農云小司寇為王道辟除姦人也若今時執金吾下至令尉奉引矣 同上】旅賁氏賓客則服而趨【服而趨夾王車趨也會同賓客王亦齊服服袞冕則此士之齊服服玄端 夏官】節服氏掌朝覲袞冕六人維王之大常【服袞冕者从王服也維維之以纁王旌十二旒兩兩以纁綴連旁三人持之禮天子旌曳地鄭司農云維持之 同上】司几筵凡大朝覲王位設黼依依前南鄉設莞筵紛純加纁席畫純加次席黼純左右玉几【斧謂之黼其繡白黑采以絳帛為質依其制如屏風然於依前為王設席左右有几優至尊也鄭司農云紛讀為幽又讀為和粉之粉謂白繡也純謂為均服之均純緣也纁讀為藻率之藻次席虎皮為席書顧命曰成王將崩命大保芮伯畢公等被冕服馮玉几玄謂紛如綬有文而狹者纁席削蒲翦展之編以五采若今合歡矣畫為雲氣也次席桃枝席有次列成文 春官】几俟于東廂【王即席乃設之也東箱東夾之前相翔待事之處 本經記】大僕賓客正王之服位詔法儀【詔告也 夏官】大宗

伯朝覲則為上相【相詔王禮也出接賓曰擯入詔禮曰相相者五人卿為上擯 春官】小行人將幣為承而擯【詳見郊勞章】司儀掌九儀之賓客擯相之禮以詔儀容辭令揖讓之節【出接賓曰擯入贊禮曰相以詔者以禮告王】凡行人之儀不朝不夕不正其主面亦不背客【謂擯相傳辭時也不正東鄉不正西鄉常視賓主之前卻得兩鄉之而已 秋官】五官之長曰伯是職方【謂為三公者周禮九命作伯職主也是伯分主東西者春秋傳曰自陝以東周公主之自陝以西召公主之一相處于內是或為氏】其擯于天子也曰天子之吏【

擯者辭也春秋傳曰王命委之三吏謂三公也【天子同姓謂之伯父異姓謂之伯舅【稱之以父與舅親之之辭也】九州之長入天子之國曰牧【每一州之中天子選諸侯之賢者以為之牧也周禮曰乃施典于邦國而建其牧】天子同姓謂之叔父異姓謂之叔舅【牧尊于大國之君而謂之叔父辟二伯也亦以此為尊禮或損之而益謂此類也】其在東夷北狄西戎南蠻雖大曰子【謂九州之外長也天子亦選其諸侯之賢者以為之子子猶牧也入天子之國曰子天子亦謂之子雖有侯伯之地本爵亦無過乎子是以同名曰子】庶方小侯入天子之國曰某人【謂戎狄子男君也】諸侯見天子曰臣某侯某【謂嗇夫承命告天子辭也其為州牧則曰天子之老臣某侯某奉圭請覲某侯者國名某者人名曲禮】君天下曰天子朝諸侯分職授政任功曰予一人【皆擯者辭也天下謂外及四海也漢于蠻夷稱天子于王侯稱皇帝覲禮曰伯父實來予一人嘉之余予古今字同上】凡自稱天子曰予一人【謙自別于人而已】伯曰天子之力臣【伯上公也命分陝】諸侯之于天子曰某土之守臣某其在邊邑曰某屏之臣某【邊邑謂九州之外玉藻】

訝士客出入則道之【出入謂朝覲于王時也春秋傳曰晉侯受策以出出入三覲秋官】天子執冒四寸以朝諸侯【名玉曰冒者言德能覆盖天下也四寸者方以尊接卑以小為貴考工記玉人】天子當依而立諸侯北面而見天子曰覲天子當宁而立諸公東面諸侯西面曰朝【諸侯春見曰朝受摯于朝受享于廟生氣文也秋見曰覲一受之于廟殺氣質也朝者位于內朝而序進覲者寓于廟門外而序入王南面立于依宁而受焉夏宗依春冬遇依春秋時齊侯唁魯昭公以遇禮相見取易略也覲禮今存朝宗遇禮今亡曲禮】

奠圭于纁上【謂釋于地也本經記】掌訝及退亦如之【文承前入復之下

鄭司農云客退復入迎為之前驅至于館也玄謂亦如之如其為前驅秋官】象胥掌蠻夷閩貉戎狄之國使【詳見遣使】若以時入賓則協其禮與其辭言傳之【以時入賓謂其君以世一見來朝為賓者】凡其出入送逆之禮節幣帛辭令而賓相之【從來至去皆為擯而相侑其禮儀同上】曾子問曰諸侯禮見天子入門不得終禮廢者幾【旅衆】孔子曰四請問之曰太廟火日食后之喪雨霑服失容則廢【大廟始祖廟宗廟皆然主于始祖耳】如諸侯皆在而日食則從天子救日各以其方色與其兵【示奉時事將有所討也方色者東方衣青南方衣赤西方衣白北方衣黑兵未聞也】大廟火則從天子救火不以方色與兵【曾子問】舜典輯五瑞既月乃日覲四岳羣牧班瑞于羣后【輯斂瑞信也公執桓圭侯執信圭伯執躬圭子執穀璧男執蒲璧五等諸侯執之以合符于天子而驗其信否也周禮天子執冒以朝諸侯鄭氏註云名玉以冒其德覆冒天下也諸侯始受命天子錫以圭圭頭斜銳其冒下斜刻小大長短廣狹如之諸侯來朝天子以刻處冒其圭頭有不同者即辨其偽也既盡覲見四岳四方之諸侯羣牧九州之牧伯也程子曰輯五瑞徵五等之諸侯也此以上皆正月事至盡此月則四方之諸侯有至者矣遠近不同來有先後故日日見之不如他朝會之同期于一日蓋欲以少接之則得盡其詢察禮意也班頒同羣后即侯牧也既見之後審知非偽則又頒還其瑞以與天子正始也】昔者周公朝諸侯于明堂之位天子負斧依南鄉而立【負之言背也斧展為斧文屏風于戶牖之間按注以天子為周公其說差異今削之】三公中階之前北面東上諸侯之位阼階之東西面北上諸伯之國西階之西東面北上諸子之國門東北面東上諸男之國門西北面東上九夷之國東門之外西面北上八蠻之國南門之外北面東上六戎之國西門之外東面南上五狄之國北門之外南面東上九采之國應門之外北面東上四塞世告至此周公明堂之位也【朝之禮不于此周公權用之也朝位之上上近主位尊也九采

九州之牧典貢職者也正門謂之應門二伯帥諸侯而入牧居外而糾察之也四塞謂夷服鎮服蕃服在四方為蔽塞者新君即位則乃朝周禮侯服歲一見甸服二歲一見男服三歲一見采服四歲一見衛服五歲一見要服六歲一見九州之外謂之蕃國世一見】明堂也者明諸侯之尊卑也【朝于此所以正儀辨等也明堂位】
覲禮天子不下堂而見諸侯【正君臣也】下堂而

見諸侯天子之失禮也由夷王以下【夷王周康王之玄孫之子也時微弱不敢自尊于諸侯郊特牲】

四享皆束帛加璧庭實唯國所有【四當為三古書作三四或皆積畫此篇又多四字字相似由此誤也大行人職曰諸侯廟中將幣皆三享其禮差又無取于四也初享或用馬或用虎豹之皮其次享三牲魚腊籩豆之實龜也金也丹漆絲纁竹箭也其餘無常貨此地物非一國所有唯所有分為三享皆以璧帛致之】奉束帛匹馬卓上九馬隨之中庭西上奠幣再拜稽首【卓讀如卓王孫之卓卓猶的也以素的一馬以為上書其國名後當識其何產也馬必十匹者不敢斥王之乘用成數敬也】擯者曰予一人將受之【亦言王欲親受之】侯氏升致命王撫玉侯氏降自西階東面授宰幣西階前再拜稽首以馬出授人九馬隨之【王不受玉撫之而已輕財也以馬出隨侯氏出授玉人于外也王不使人受馬者至于享王之尊益君侯氏之卑益臣】事畢【三享訖】右享【王禮賓事附于下】

璧琮九寸諸侯以享天子【享獻也聘禮享君以璧享夫人以琮玉人】圭以馬璋以皮璧以帛琮以錦【五等諸侯享天子以璧享后用琮其大各如其瑞皆有庭實以馬若皮皮虎豹皮也用圭璋者二王之後也二王後尊故享用圭璋而特之禮器曰圭璋特義亦通于此詳見諸侯相朝篇小行人】小宗伯大賓客受其將幣之齎【謂所齎來貢獻之財物春官】服不氏賓客之事則抗皮【鄭司農云謂賓客來朝聘布皮帛者服不氏主舉藏之玄謂抗者若聘禮曰有司二人舉皮以東夏官】

校人凡賓客受其幣馬【賓客之幣馬來朝聘而享王者同上】上公之禮廟中將幣三享王禮再裸而酢侯伯之禮廟中將幣三享王禮壹裸而酢子男之禮廟中將幣三享王禮壹裸不酢【廟受命祖之廟也故書裸作果鄭司農云三享三獻也裸讀為灌再灌再飲公也而酢報飲至也玄謂三享皆束帛加璧庭實唯國所有朝士儀曰奉國地所出重物而獻之明臣職也朝先享不言朝者朝正禮不嫌有等也王禮王以鬱鬯禮賓也鬱人職曰凡祭祀賓客之裸事和鬱鬯以實彝而陳之禮者使宗伯攝酌圭瓚而裸王既拜送爵又攝酌璋瓚而裸后又拜送爵是謂再裸再裸賓乃酢王也禮侯伯一裸而酢者裸賓賓酢王而已后不裸也裸子男一裸不酢者裸賓而已不酢王也不酢之禮聘禮禮賓是與大行人】典瑞裸圭有瓚以裸賓客【鄭司農云于圭頭為器可以挹鬯裸祭謂之瓚故詩曰卣彼玉瓚黃流在中國語謂之鬯圭玄謂爵行曰裸漢禮瓚槃大五升口徑八寸下有槃口徑一尺春官】鬱人掌裸器【裸器謂彝及舟與瓚】凡賓客之裸事和鬱鬯以實彝而陳之【築鬱金煮之以和鬯酒鄭司農云鬱草名十葉為貫百二十貫為築以煮之鑊中停于祭前鬱為草若蘭】凡裸玉濯之陳之以贊裸事【裸玉謂圭瓚璋瓚】詔裸將之儀與其節【節謂王奉玉送裸早晏之時】凡裸事沃盥【同上】小臣朝覲沃王盥【夏官】肆師大賓客涖筵几築

鬻【此王所以禮賓客】贊果將【酌鬱鬯授大宗伯載裸 春官】 大宗伯大賓客則攝而載果【載為也果讀為裸代王裸賓客以鬯君無酌臣之禮言為者攝酌獻耳拜送則王也鄭司農云王不親為主 同上】

小宗伯賓客以時將瓚果【將送也猶奉也賓客以時奉而授宗伯天子圭瓚諸侯璋瓚 同上】 小宰凡賓客贊裸凡受爵之事凡受幣之事【唯裸助宗伯其餘皆助大宰王不酌賓客而有受酢大宗伯職曰大賓客則攝而載裸】

內宰凡賓客之裸皆贊【謂王同姓及二王之後來朝覲為賓客者裸之禮亞王而禮賓並天官】

乃右肉袒于廟門之東乃入門右北面立告聽事【右肉袒者刑宜施于右也凡以禮事者左袒入更从右者臣益純也告聽事者告王以國所用為罪之事也易曰折其右肱無咎】 擯者謁諸天子天子辭于侯氏曰伯父無事歸寧乃邦【謁告寧安也乃猶女也】 侯氏再拜稽首出自屏南適門西右請事【有治附見下】 掌訝凡賓客之治令訝訝治之【賓客之治謂欲正其貢賦理國事也以告訝訝為如朝而理之 秋官】 訝士有治則贊之【同上】 大宰待四方之賓客之小治【大事決于王小事冢宰專平 天官】

遂入門左北面立王勞之再拜稽首擯者延之曰升升成拜降出【王辭之不即左者當出隱于屏而襲之也天子外屏勞之勞其道勞也】

右王勞

天子賜侯氏以車服迎于外門外再拜【賜車者同姓以金輅異姓以象輅服則袞也鷩也毳也古文曰迎于門外也】 路先設西上路下四亞之重賜無數在車南【路謂車也凡君所乘車曰路路下四謂乘馬也亞之次車而東也詩云君子來朝何錫予之雖無予之路車乘馬又何予之玄袞及黼重猶善也所加賜善物多少由恩也春秋傳曰重錦三十兩】 諸公奉篋服加命書于其上升自西階東面大史是右【言諸公者王同時分命之而使賜侯氏右讀如周公右王之右是右者始隨入于升東面乃居其右古文是為氏也】 侯氏升西面立太史述命【諸王命書也】 侯氏降兩階之間北面再拜稽首【受命】 升成拜【大史辭之降也春秋傳曰且有後命以伯舅耄老無下拜此辭之類】 大史加書于服上侯氏受【受篋服】 使者出侯氏送再拜僎使者諸公賜服者束帛四馬僎大史亦如之【既云拜送乃云僎使者以勞有成禮略而遂言】 同姓大國則曰伯父其異姓則曰伯舅同姓小邦則曰叔父其異姓小邦則曰叔舅【據此禮云伯父同姓大邦而言】

右賜車服 內府掌受九貢九賦九功之貨賄良兵良器以待邦之大用【大用朝覲之頒賜 天官】 小宗伯掌衣服車旗宮室之賞賜【王以賞賜有功者 春官】 校人飾幣馬執扑而從之【鄭司農云校人主飾之也幣馬以馬遺人當幣處者也聘禮曰馬則北面奠幣于其前士喪禮下篇曰薦馬纓三就入門北面交轡圉人夾牽之馭者執策立于馬後夏官】

圉人凡賓客牽馬而入陳【賓客之馬王所以賜之者詩云雖無予之路車乘馬 同上】 記所謂大輅者天子之車也龍旂九旒天子之旌也青黑緣者天子之寶龜也從之以牛羊之羣則

所以贈諸侯也【贈諸侯謂來朝將去賜之以禮 樂記】 君子來朝何錫予之雖無予之路車乘馬又何予之玄衮及黼【君子諸侯也路車金路以賜同姓象路以賜異姓也玄衮玄衣而畫以卷龍也黼如斧形刺之于裳也 小雅采芣】 韓侯入覲以其介圭入覲于王王錫韓侯淑旂綏章簞弗錯衡玄衮赤舄鉤膺鏤錫鞞鞞淺幘幘革金厄【介圭封圭執之以為贄以合瑞于王也淑善也交龍曰旂綏章染鳥羽或旄牛尾為之注于旂竿之首為表章者也鏤刻金也馬首上飾曰錫今當盧也鞞式中也謂兩較之間橫木可憑者也以鞞持之使牢固也淺虎皮也幘覆式也字一作臂又作幘以有毛之皮覆式上也幘革轡首也金厄以金為環纏轡首也 大雅韓奕】

饗禮【禮謂食燕也王或不親以其禮幣致之略言饗禮互文也掌客職曰上公三饗三食三燕侯伯再饗再食再燕子男一饗一食一燕】

右饗禮【詳見嘉禮饗食燕記篇 致饗餼等經不具附見于下】 宰夫凡朝覲賓客以牢禮之法掌其牢禮委積膳獻飲食【牢禮之法多少之差及其時也三牲牛羊豕具為一牢委積謂牢米薪芻給賓客道用也膳獻禽羞俶獻也飲食燕饗也 天官】

上公之禮禮九牢侯伯禮七牢子男禮五牢【禮大禮饗餼也三牲備為一牢 秋官大行人】 諸侯七介七牢【諸侯七介七牢者周之侯伯也周禮上公九介九牢侯伯七介七牢子男五介五牢 禮器】 賓客之牛角尺【王制】 牛人凡賓客之事共其牢

禮積膳之牛【牢禮殮饗也膳所以間禮賓客若掌客云殷膳大牢 積注見前 地官】 羊人賓客共其法羊【法羊殮饗積膳之羊 夏官】 外饗祭

祀共其脯脩刑膾陳其鼎俎實之牲體魚腊凡賓客之殮饗饗食之事亦如之【殮客始至之禮饗既將幣之禮致禮于客莫盛于饗 天官】

亨人祭祀共鉶羹賓客亦如之【鉶羹加鹽菜矣同上】

酒人凡祭祀共酒以往賓客之陳酒亦如之【謂若歸饗餼之酒亦自有奉之者以酒从往 同上】 饔人凡賓客共其簠簋之實【謂致殮饗地官】 舍人凡祭祀共簠簋實之陳之【方曰簠圓曰簋盛黍稷稻粱器】 賓客亦如之共其禮車米筥米芻禾【禮致饗餼之禮 同上】

舂人賓客共其牢禮之米【謂可以實筐筥 同上】

醢人賓客之禮共醢五十饗【致饗餼時 天官】 醢人賓客之禮共醢五十饗【同上】

典瑞璋

邸射以造贈賓客【璋有邸而射鄭司農云射剡也 春官】 玉人璋邸射素功以致稍餼【邸射剡而出也致稍餼造賓客納稟食也鄭司農云素功無瑑飾也考工記】 庖人共賓客之禽獻【禽獻獻禽于賓客獻古文為獸杜子春云當為獻】 凡令禽獸以法授之其出入亦如之【令令獸人也禽獸不可久處賓客至將獻之庖人乃令獸人取之必書所當獻之數與之及其來致禽亦以此書校數之至于獻賓客又以此書付使者展而行之掌客乘禽于諸侯各如其命之數聘禮乘禽於客日如其饗餼之數士中日則二雙 天官】

漿人共賓客之稍禮【稍禮非殮饗之禮留間王稍所給賓客者漿人所給亦六飲而已】

同上】 內宰致后之賓客之禮【謂諸侯來朝覲及女賓之賓客 同上】

乃歸

右乃歸【還圭附見于下】 諸侯執所受圭與璧朝于天子無過者復得其圭以歸其有過者留其圭能正行者復還其圭三年圭不復少紕以爵【尚書大傳】

訝人與行人送之【詳見至郊章】

掌訝及歸送亦如之【如之者送至于竟如其前驅聚 待事之屬 秋官】

司儀凡賓客送逆同禮【謂郊勞郊送之屬 同上】 環人凡門關無幾送及疆【詳至郊章】

反必告設奠卒斂幣玉藏諸兩階之間乃出【曾子問】 凡告用牲幣反亦如之【詳至郊章】

朝事儀 賓禮八

古者聖王明義以別貴賤以序尊卑以體上下然後民知尊君敬上而忠順之行備矣是故古者天子之官有典命官掌諸侯之儀大行人掌諸侯之儀以等其爵故貴賤有別尊卑有序上下有差也典命諸侯之五儀諸臣之五等以定其爵故貴賤有別尊卑有序上下有差也故朝聘之禮各執其圭瑞服其服乘其輅建其旌旗施其樊纓從其貳車委積之以其牢禮之數所以明別義也然後天子冕而執鎮圭尺有二寸藻藉尺有二寸搢大圭乘大輅建大常十有二旒樊纓十有再就貳車十有二乘率諸侯而朝日東郊所以教尊尊也退而朝諸侯為壇三成宮旁一門天子南鄉見諸侯土揖庶姓時揖異姓天揖同姓所以別親疎外內也公侯伯子男各以其旂就其位諸公之國中階之前北面東上諸侯之國東階之東西面北上諸伯之國西階之西東面北上諸男之國門西北面東上及其將幣也公於上等【按此中當有侯伯于中等子男于下等二句】所以別貴賤序尊卑也奠圭降拜升成拜明臣禮也奉國地所出重物而獻之明臣職也肉袒入門而右以聽事也明臣禮職臣事所以教臣也率而祀天於南郊配以先祖所以教民報德不忘本也率而享祀於大廟所以教孝也與之大射以考其習禮樂而觀其德行與之圖事以觀其能儉而禮之三饗三食三宴以與之習立禮樂是故一朝而近者三年遠者六年有德焉禮樂為之益習德行為之益修天子之命為之益行然後使諸侯世相朝交歲相問殷相聘以習禮考義正刑一德以崇天子故曰朝聘之禮者所以正君臣之義也諸侯附于德服于義則天下太平古者為諸侯不行禮義不修法度不附于德不服于義故使射人以射禮選其德行職方氏大行人以其治國選其能功諸侯之得失治亂定然後明九命之賞以勸之明九伐之法以震威之尚猶有不附于德不服于義者則使掌交說故諸侯莫不附于德服于義者此天子之所以養諸侯兵不用而諸侯自為政之法也【大戴記】 諸侯朝于天子曰述職述職者述所職也一不朝則貶其爵再不朝則削其地三不朝則六師移之【孟子】 朝覲之禮所以明君臣之義也聘覲之禮廢則君臣之位失諸侯之行惡而陪畔侵陵之敗起矣【經解】 殺上者生于不義義所以別貴賤明尊卑也貴賤有別尊卑有序則民莫不尊上而敬長朝聘之禮者所以明義也義必明則民不犯故雖有殺上之獄而無陷刑之民有犯殺上之獄者則飭朝覲之禮【家語】 朝覲然後諸侯知所以臣【樂記】 朝聘以時厚往而薄來所以懷諸侯也【朝謂諸侯見于天子聘謂諸侯使大夫來獻王制比年一小聘三

年一大聘五年一朝厚往薄來謂燕賜厚而納貢薄 中庸】曹劌曰夫禮所以正民也是故先王制諸侯使五年四王一相朝也【賈侍中云王謂王事天子也歲聘以志業間朝以講禮五年之間四聘于王而一相朝者將朝天子先相朝也唐尚書云先王謂堯也五載一巡狩諸侯四朝昭謂以堯典相參義亦似之然此欲以禮正君宜用周制周禮中國凡五服遠者五歲而朝禮記曰諸侯之于天子也比年一小聘三年一大聘五年一朝謂此也晉文公霸時亦取于此禮】終則講於會以正班爵之義【終畢也講習也班次也謂朝畢則習禮于會以正爵位次序尊卑之義】帥長幼之序訓上下之則【帥循也】制財用之節【謂牧伯差國大小使受職貢也】其間無由荒怠【其間朝會之間國語魯語莊公二十三年左氏傳云會以訓上下之則制財用之節朝以正班爵之義帥長幼之序征伐以討其不然諸侯有王王有巡狩以大習之】遠啟彊曰聖王務行禮朝聘有珪【珪以為信】享頰有璋【享饗也頰見也既朝聘而享見也臣為君使執璋】小有述職【諸侯適夫子曰述職】大有巡功【天子巡守曰巡功】設机而不倚爵盈而不飲【言務行禮】宴有好貨【宴飲以貨為好衣服車馬在客所無】殮有陪鼎【熟食為殮陪加也加鼎所以厚殷勤】入有郊勞【賓至逆勞之于郊】出有贈賄【去則贈之以貨賄】禮之至也國家之敗失之道也則禍亂興【失朝聘宴好之道昭五年左氏傳】旅幣無方所以別土地之宜而節遠邇之期也【旅衆也邇】

【近也】龜為前列先知也以鐘次之以和居參之也【鐘金也獻金為作器鐘其大者以金參居庭實之間示和也】虎豹之皮示服猛也束帛加璧往德也【郊特牲】王者不純臣諸侯故朝則迎之於著覲則待之於阼階升降自西郊為庭燎設九賓享禮而後歸是異於衆臣也【白虎通】王者始立諸侯皆見何當受法稟政教也遠近莫不至受命之君天之所興四方莫敢違夷狄咸率服故也【同上】

禮書綱目卷十六

卷十七

欽定四庫全書

禮書綱目卷十七 婺源江永撰

會同禮 賓禮九

補【因覲禮諸侯覲于天子一章補為此篇】

大宗伯以賓禮親邦國時見曰會殷見曰同【時見者言無常期諸侯有不順服者王將有征討之事則既朝覲王為壇于國外合諸侯而命事焉春秋傳曰有事而會不協而盟是也殷猶衆也十二歲王如不巡守則六服盡朝朝禮既畢王亦為壇合諸侯以命政焉所命之政如王巡守殷見四方四時分來歲終則徧 春官】大行人掌大賓之禮時會以發四方之禁殷同以施天下之政【時會即時見也無常期諸侯有不順服者王將有征討之事則既朝王命為壇于國外合諸侯而發禁命事焉禁謂九伐之法殷同則殷見也王十二歲一巡守若不巡守則殷同殷同者六服盡朝既朝王亦命為壇于國外合諸侯而命其政政謂邦國之九法殷同四方四時分來歲終則徧矣九伐九法皆在司馬職】十有二歲王巡守殷國【王巡守諸侯會者各以其時之方書曰遂覲東后是也其殷國則四方四時分來如平時 秋官】

右總要 會以訓上下之則制財用之節【詳見朝事義】

職方氏王將巡守則戒于四方曰各修平乃守考乃職事無敢不敬戒國有大刑及王之所行先道帥其屬而巡戒令【注見巡守】王殷國亦如之【殷猶衆也十二歲王若不巡守則六服盡朝謂之殷國其戒四方諸侯與巡守同 夏官】

右戒令

小宰以法掌會同賓客之戒具【法謂其禮法也戒具戒官有事者所當共】令百官府共其財用治其施舍聽其治訟【施舍謂不給役者

天官】宰夫凡禮事贊小宰比官府之具【比校次之同上】

外府凡會同共其財用之幣齎賜予之財用【齎行道之財用也聘禮曰問幾月之齎 同上】

廩人凡邦有會同之事則治其糧與其食【行道曰糧謂糗也止居曰食謂米也 地官】

遺人會同掌其道路之委積【地官】

右戒具

鄉師大會同正治其徒役與其輦輦戮其犯命者【輦駕馬輦人輓行所以載任器也止以為

藩營司馬法曰夏后氏謂輦曰余車殷曰胡奴車周曰輜輦輦一斧一斤一鑿一耜一鋤周輦加二扳二築又曰夏后氏二十人而輦殷十八人而輦周十五人而輦 地官】縣師若將有會同之戒則受法于司馬以作其衆庶及馬牛車輦會其車人之卒伍使皆備旗鼓兵器以帥而至【受法于司馬者知所當徵寡衆 同上】稍人若有會同之事則以縣師之法作其同徒輦輦帥而以至治其政令以聽於司馬【同徒司馬所調之同凡用役者不必一時皆徧以人數調之使勞逸遞焉 同上】大司馬及師大合軍以行禁令以救無辜伐有罪【師所謂王巡守若會同司馬起師合軍以从所以威天下行其政也不言大者未有敵不尚武 夏官】

右起徒役

射人會同朝覲作大夫介凡有爵者【作讀如作止爵之作諸侯來至王使公卿有事焉則作大夫使之介也有爵者命士以上不使賤者 夏官】

司士凡會同作士從【作士从謂選可使从于王者 同上】諸子會同作羣子從【从于王同上】大司馬大會同則帥士庶子而掌其政令【帥帥以从王 同上】司兵軍事建車之五兵會同亦如之【車之五兵鄭司農所云者是也步卒之五兵則無夷矛而有弓矢鄭司農云五兵者戈殳戟酋矛夷矛 同上】司戈盾會同授貳車戈盾建乘車之戈盾授旅賁及虎士戈盾【乘車王所乘車也會同則金路 同上】

司弓矢會同頒弓弩各以其物從授兵甲之儀【物弓弩矢箠之屬 同上】

校人會同毛馬而頒之【毛馬齊其色也頒授當乘者 同上】牛人會同共其兵車之牛與其牽徬以載公任器【牽徬在轅外輓牛也人御之居其前曰牽居其旁曰徬任猶用也 地官】

戎右會同充革車【會同王雖乘金輅猶以革路從行也充之者謂居左也曲禮曰乘君之乘車不敢曠左 夏官】車僕凡師共革車各以其萃會同亦如之【萃猶副也巡守及兵車之會則王乘戎路乘車之會王雖乘金路猶共以从不失備也 春官】

典路凡會同以路從【王出于事無常王乘一路典路以其餘路从行亦以華國 同上】

司右會同合其車之卒伍而比其乘屬其右【合比屬謂次第相安習也車亦有卒伍 夏官】

齊右會同前齊車【前之者已駕王未乘之時 同上】虎賁氏掌先後王而趨以卒伍會同亦如之【王出將虎賁士居前後雖羣行亦有局分 同上】

旅賁氏會同則服而趨【服而趨夾王車趨也會同賓客王亦齊服服袞】

【冕則此士之齊服服玄端 同上】

師氏會同王舉則從【舉猶行也故書舉為與杜子春云當為與謂王與會同之事 地官】

保氏會同王舉則從【同上】

右從行儀會

大祝大會同造於廟宜于社過大山川則用事焉【用事亦用祭事告行也玉人職有宗祝以黃金勺前馬之禮是謂過大山川與曾子問曰凡告必用牲幣 春官】小宗伯凡王之會同之禱祠肆儀為位【肆習也故書肆為肆儀為義杜子春讀肆當為肆義為儀謂若今時肆司徒府也小宗伯主其位 同上】

右祭告禱

掌舍掌王之會同之舍設桎栳再重【故書栳為桎鄭司農云桎櫜桎也桎受居溜水涑橐者也杜子春讀為桎栳桎栳謂行馬玄謂行馬再重者以周衛有外內列】設車宮轅門【謂王行止宿阻險之處備非常次車以為藩則仰車以其轅表門】為壇壝宮棘門【謂王行止宿平地築壇又委壝土起堦埒以為宮鄭司農云棘門以戟為門杜子春云棘門或作材門】為帷宮設旌門【謂王行晝止有所展肆若食息張帷為宮則樹旌以表門】無宮則共人門【謂王行有所逢遇若住遊觀陳列周衛則立長大之人以表門】凡舍事則掌之【王行所舍止天官】

司戈盾及舍設藩盾行則斂之【舍止也藩盾盾可以藩衛者如今之扶蘇與夏官】

虎賁氏舍則守王閑【舍王出所止宿處閑桎栳也同上】

宮人凡寢中之事埽除執燭共鑪炭凡勞事四方之舍事亦如之【从王適四方及會同所舍天官】

右止舍

士師以五戒先後刑罰二曰誥用之于會同【誥于書則大誥康誥之屬秋官】

右誥戒

諸侯覲于天子為宮方三百步四門壇十有二尋深四尺加方明于其上【四時朝覲受之于廟此謂時會殷同也宮謂壝土為埒以象牆壁也為宮者于國外春會同則于東方夏會同則于南方秋會同則于西方冬會同則于北方八尺曰尋十有二尋則方九十六尺也深謂高也從上曰深司儀職曰為壇三成成猶重也三重者自下差之為三等而上有堂焉堂上方二丈四尺上等中等下等每面十二尺方明者上下四方神明之象也上下四方之神者所謂神明也會同而盟明神鑒之則謂之天之司盟有象者猶宗廟之有主乎王巡守至于方嶽之下諸侯會之亦為此宮以見之司儀職曰將會諸侯則命為壇三成宮旁一門詔王儀南鄉見諸侯也】方明者木也方四尺設六色東方青南方赤西方白北方黑上玄下黃設六玉上圭下璧南方璋西方琥北方璜東方圭【六色象其神六玉以禮之上宜以蒼璧下宜以黃琮而不以者則上下之神非天地之至貴者也設玉者刻其木而著之】上介皆奉其君之旂置于宮尚左公侯伯子男皆就其旂而立【置于宮者建之豫為其君見王之位也諸公中階之前北面東上諸侯東階之東西面北上諸伯西階之西東面北上諸子門東北面東上諸男門西北面東上尚左者建旂公東上侯先伯伯先子子先男而位皆上東方也諸侯入壇門或左或右各就其旂而立王降階南鄉見之士揖庶姓時揖異姓天揖同姓見揖位乃定古文尚作上】四傳擯【王既揖五者升壇設擯升諸侯以會同之禮其奠瑞玉及享幣公拜于上等侯伯于中等子男于下等擯者每延之升堂致命王受玉撫玉降拜于下等及請事勞皆如覲禮是以記之覲云四傳擯者每一位畢擯者以告乃更陳列而升其次公也侯也伯也各一位子男俠門而俱東上亦一位也至庭乃設擯則諸侯初入門王官之伯帥之耳古文傳作傳】天子乘龍載大旆象日月升龍降龍出拜日于東門之外反祀方明【此謂會同以春者也馬八尺以上

為龍大旆大常也王建大常繆首畫日月其下及旒交畫升龍降龍朝事儀曰天子冕而執鎮圭尺有二寸繅藉尺有二寸搢大圭乘大路建大常十有二旒樊纓十有二就貳車十有一乘帥諸侯而朝日于東郊所以教尊尊也退而朝諸侯由此二者言之已祀方明乃以會同之禮見諸侯也凡會同者不協而盟司盟職曰凡邦國有疑會同則掌其盟約之載書及其禮儀北面詔明神既盟則藏之言北面詔明神則明神有象也象者其方明乎及盟時又加于壇上乃以載辭告焉詛祝掌其祝號】禮日于南門外禮月與四瀆于北門外禮山川丘陵于西門外

【此謂會同以夏冬秋者也變拜言禮者客祀也禮月于北郊者月大險之精以為地神也盟神必云日月山川焉者尚著明也詩曰謂予不信有如皞日春秋傳曰縱子忘之山川神祇其忘諸乎此皆用明神為信也此下有祭天燔柴四句見巡守篇覲禮】幕人掌帷幕幄帟綬之事【王出宮則有是事在旁曰帷在上曰幕幕或在地展陳于上帷幕皆以布為之四合象宮室曰幄王所居之帳也鄭司農云帟平帳也綬組綬所以繫帷也玄謂帟主在幕若幄中坐上承塵幄帟皆以繒為之凡四物者以綬連繫焉】凡朝覲會同共其帷幕幄帟綬【共之者掌次當以張天官】掌次朝日祀五帝則張大次小次設重帟重案合諸侯亦如之【次謂幄也大幄初往所止居也小幄既接祭退俟之處合諸侯于壇王亦以時休息重帟複帟重案牀重席也】諸侯朝覲會同則張大次小次【大次亦初往所止居小次即宮待事之處】孤卿有邦事則張幕設案【有邦事謂以事从王若以王命出也孤王之孤三人副三公論道者不言公公如諸侯禮从主合諸侯張大次小次同上】司几筵凡大朝覲王位設黼依依前南鄉設莞筵紛純加繅席畫純加次席黼純左右玉几【注見覲禮】司常日月為常交龍為旂凡祭祀各建其旂會同賓客亦如之置旌門【賓客朝覲宗遇王乘金輅巡守兵車之會王乘戎路皆建其大常掌舍職曰為帷宮設旌門春官】

雞人大祭祀夜呼旦以跽百官會同亦如之【同上】

射鳥氏祭祀以弓矢毆烏鳶凡賓客會同亦如之【烏鳶善鈔盜便污人夏官】

大司寇會同前王【秋官】大史大會同朝覲以書協禮事【亦先習錄之也】及將幣之日執書以詔王【將送也詔王告王以禮事春官】小史大會同佐大史【同上】

大宗伯會同則為上相【相詔玉禮也出接賓曰擯入詔禮曰相相者五人卿為上擯同上】

肆師大朝覲佐賓【為承擯也同上】典瑞公執桓圭侯執信圭伯執躬圭繅皆三采三就子執穀璧男執蒲璧繅皆二采再就以會同于王【注見覲禮】司儀將合諸侯則令為壇三成宮旁一門【合諸侯謂有事而會也為壇于國外以命事宮謂壇土以為牆處所謂為壇壇宮也天子春帥諸侯拜日于東郊則為壇於國東夏禮日於南郊則為壇於國南秋禮山川丘陵于西郊則為壇于國西冬禮月四瀆於北郊則為壇于國北既拜禮而還加方明于壇上而祀焉所以教尊尊也王巡守殷國而同則其為宮亦如此與鄭司農云三成三重也爾雅曰丘一成為敦丘再成為陶丘三成為崑崙丘謂三重】詔王儀南鄉見諸侯土揖庶姓時揖異姓天揖同姓【謂王既祀方明諸侯上介皆奉其君之旂置于宮乃詔王升壇諸侯皆就其旂而立諸公中階之前北面東上諸侯東階之東西面北上諸伯西階之西東面北上諸子門東北面東上諸男門西北面東上王揖之者定其位也庶姓無親者也土揖推手小下之也異姓昏姻也時揖平推手也衛將軍文子曰獨居思仁公言言義其聞詩也一日三復白圭之玷是南宮韜之行也夫子言其仁以為異姓謂妻之也天揖推手小舉之】及其擯之各以其禮公于上等侯伯于中等子男於下等【謂執玉而前見于□也擯之各以其禮者謂擯公者五人侯伯四人子男三人上等中等下等者謂所奠玉處也壇三成深四尺則一等一尺也壇十有二尋

方九十六尺則堂上二丈四尺每等丈二尺與諸侯各于其等奠玉降拜升成拜明臣禮也既乃升堂授王玉【其將幣亦如之其禮亦如之【將幣享也禮謂以鬱鬯裸之也皆於其等之上 秋官】 大宰大朝覲會同贊玉幣玉獻玉凡玉爵【助王受此四者時見曰會殷見曰同大會同或于春朝或于秋覲舉春秋則冬夏可知玉幣諸侯享幣也其合亦如小行人所合六幣云玉獻獻國珍異亦執玉以致之玉几王所依也立而設几優尊者玉爵王禮諸侯之醉爵王朝諸侯立依前南面其禮之于阼階上 天官】 會同主詡【詡謂敏而有勇若齊國佐少儀】

史載筆士載言【謂從於會同各持其職以待事也筆謂書具之屬言謂會同盟要之辭曲禮】 詛祝掌盟詛之祝號【所以告神明也盟詛主于要誓大事曰盟小事曰詛】 作盟詛之載辭以敘國之信用以質邦國之劑信【載辭為辭而載之於策故用牲加書於其上也國謂王之國邦國諸侯國也質正也成也文王修德而虞芮質厥成鄭司農云載辭以春秋傳曰使祝為載書 春官】 封人大盟則飾其牛牲【大盟會同之盟 地官】 玉府若合諸

侯則共珠槃玉敦【敦槃類珠玉以為飾古者以槃盛血以敦盛食合諸侯者必割牛耳取其血歃之以盟珠槃以盛牛耳尸盟者執之故書珠為夷鄭司農云夷槃或為珠槃玉敦歃血玉器 天官】 涖牲曰盟【涖臨也故用牲臨而讀其盟書盟禮亡 曲禮】 司盟掌盟載之灋【載盟辭也盟者書其辭於策殺牲取血坎其牲加書於上而埋之謂之載書春秋傳曰宋寺人惠牆伊戾坎用牲加書為世子痤與楚客盟】 凡邦國有疑會同則掌其盟約之載及其禮儀北面詔明神既盟則貳之【有疑不協也明神神之明察者謂日月山川也覲禮加方明于壇上所以依之也詔之者讀其載書以告之也貳之者寫副當以授六官 秋官】 戎右盟則以玉敦辟盟遂役之【鄭司農云敦器名也辟法也玄謂將歃血者先執其器為衆陳其載辭使心皆開辟也役之者傳敦血授當歃者】 贊牛耳桃茆【鄭司農云贊牛耳者春秋傳所謂執牛耳者故書茆為滅杜子春云滅當為屬玄謂尸盟者割牛耳取血助為之及血在敦中以桃茆沸之又助之也耳者盛以珠槃尸盟者執之桃鬼所畏也茆苕帚所以掃不祥 夏官】 大司寇凡邦之大盟約涖其盟書而登之于天府【涖臨也天府祖廟之藏】 大史內史司會及六官皆受其貳而藏之【六官六卿之官也貳副也秋官】

右會同盟約 禹合諸侯於塗山執玉帛者萬國【諸侯執玉附庸執帛塗山在壽春東北哀七:left氏傳】 夏啟有鈞臺之享商湯有景亳之命周武有孟津之誓成有岐陽之蒐康有鄴宮之朝穆有塗山之會【昭四年左傳詳見諸侯相朝篇】 周室既寧八方會同各以其職來獻欲垂法厥

後作王會成周之會墀上張赤帟陰羽【王城既成大會諸侯及四夷也陰鶴也以羽飾帳也除地曰墀帟帳也】 天子南面立纁無繁露朝服八十物搢挺【繁露冕之所重也所尊敬則有焉八十物大小所服搢插也挺笏也】 唐叔荀叔周公在左太公望在右皆纁亦無繁露朝服七十物搢笏旁天子而立于堂上【唐荀國名皆成王弟故曰叔旁差在後也近天子後故其冕亦無旒也】 堂下之右唐公虞公南面立焉【唐虞二公堯舜後也】 堂下之左殷公夏公立焉皆南面纁有繁露朝服五十物皆搢笏【杞宋二公冕有繁露搢笏則唐虞闕也】 為諸侯之有疾病者阼階之南祝淮氏榮氏次之圭瓚次之皆西面彌宗旁之【淮榮二祝之氏

也彌宗官名次圭瓚南差在後】為諸侯有疾病者之醫藥所居【使侍左右也居則南也】相者太史魚大行人皆朝服有繁露【魚太史名及大行人皆贊相賓客禮儀也】堂下之東面郭叔掌為天子棗幣焉纔有繁露【郭叔號文王弟棗錄諸侯之幣也】內臺西面者正北方應侯曹叔伯舅中舅【內臺中臺也應侯成王弟】比服次之要服次之荒服次之西方東面正北方伯父中子次之【此要服於比服轉遠殊故殊其名非夷狄之四荒也伯父姬姓之國中子於王子中行者也】方千里之外為比服方千里之內為要服三千里之內為荒服是皆朝於內者【此服名因於殷非周制也】堂後東北為赤帑焉浴盆作其中【雖不用而設之敬諸侯也】其西天子車立焉乘六青陰羽鳧旌【鶴鳧羽為旌旌】中臺之外其右泰士臺左彌士【外謂臺之東西也外臺右太士左彌士士言尊王大彌相儀之士也】受贊者八人東面者四人【受賓幣士也四人東面則西面四人也】陳幣當外臺天玄□宗馬十二【陳束帛皮馬於外臺天玄黑□宗尊也】玉玄繚璧綦十二【此下三璧皆玉故自下以至王之玄繚謂之黑組紐之綦玉名有十二綦也】參方玄繚璧豹虎皮十二【參方陳幣三所也璧皮魚陳也】四方玄繚璧琰十二【琰珪也有鋒疾陳之四方所列三也】外臺之四隅張赤帑為諸侯欲息者皆息焉命之曰爻閭【每角張息者隨所近也諸侯稱爻也】周書王會解】成王盟諸侯于岐陽【岐山之陽】楚為荆蠻【荊州之蠻也】置茅蕝設望表與鮮牟守燎【置立也蕝謂束茅而立之所以縮酒望表謂望山川立木以為表表其位也鮮牟東夷國燎庭燎也國語楚語】車攻宣王復古也宣王修車馬備器械復會諸侯於東都【詩序】駕彼四牡四牡奕奕赤芾金舄會同有繹【奕奕連絡布散之貌赤芾諸侯之服金舄赤舄而加金飾亦諸侯之服也時見曰會殷見曰同繹陳列聯屬之貌也此章言諸侯來會朝于東都也小雅】叔向曰明王之制使諸侯歲聘以志業【志識也歲聘以修其職業】間朝以講禮【三年而一朝正班爵之義率長幼之序】再朝而會以示威【六年而一會以訓上下之則制財用之節】再會而盟以顯昭明【十二年而一盟所以昭信義也凡八聘四朝再會王一巡守盟于方嶽之下】志業於好【聘也】講禮於等【朝也】示威於衆【會也】昭明于神【盟也】自古以來未之或失也【昭十二年左右氏傳】

掌客王殷國則國君膳以牲犢令百官百牲皆具從者三公眡上公之禮卿眡侯伯之禮大夫眡子男之禮士眡諸侯之卿禮庶子壹眡其大夫之禮【注見巡守】宰夫凡會同賓客以牢禮之灋掌其牢禮委積膳獻飲食賓賜之殮牽與其陳數【牢禮之法多少之差及其時也三牲牛羊豕具為一牢委積謂牢米薪芻給賓客道用也膳獻禽羞俶獻也飲食燕饗也鄭司農云殮夕食也春秋傳曰殮有陪鼎牽牲牢可牽而行者春秋傳曰餼牽竭矣玄謂殮客始至所致禮凡此禮陳數存可見者唯有行人掌客及聘禮公食大夫天官】

右禮賓

大祝大會同反行舍奠【曾子問曰凡告必用牲幣反亦如之春官】

右反行

小祝小會同掌事焉【疏曰小會同謂諸侯遣臣王使卿大夫與之行會同之禮小祝專掌其

事也春官】小司馬小會同掌其事如大司馬之灋【疏曰謂諸侯使卿大夫來聘王使卿大夫與之會同掌事如大司馬之法亦如大司馬羞魚牲授其祭之等也夏官】

右小會同

巡守 賓禮十

補

歲二月東巡守至于岱宗柴【諸侯為天子守土故稱守巡行之既班瑞之明日乃順春東巡岱宗泰山為四岳所宗燔柴祭天告至】望秩于山川【東岳諸侯境內名山大川如其秩次望祭秩者牲幣祝號之次第如五岳視三公四瀆視諸侯其餘視伯子男】肆覲東后【遂見東方之國君】協時日正月同律度量衡【合四時之節氣月之大小日之甲乙使齊一也律法制及尺丈斛斗斤兩皆均同集傳曰律謂十二律】修五禮五玉【修吉凶賓軍嘉之禮五等諸侯執其玉】三帛二生一死贄【三帛諸侯世子執纁公之孤執玄附庸之君執黃二生卿執羔大夫執鴈一死士執雉玉帛主死所以為贄以見之集傳曰五玉三帛二生一死贄九字當在肆覲東后之下協時月正日之上誤脫在此言東后之覲皆執此贄也】如五器卒乃復【卒終復還也器謂圭璧如五器禮終則還之三帛生死則否集傳曰如五器劉侍講曰如同也五器即五禮之器也卒乃復者舉祀禮覲諸侯一正朔同制度修五禮如五器數事皆畢則不復東行而遂西向且轉而南行也】五月南巡守至于南岳如岱禮【南岳衡山自東岳南巡五月至】八月西巡守至于西岳如初【西岳華山初謂岱宗】十有一月朔巡守至于北岳如西禮【北岳恒山】歸格于藝祖用特【巡守四岳然後歸告至文祖之廟藝文也言祖則考著特一牛】五載一巡守羣后四朝【各會朝于方岳之下凡四處故曰四朝將說敷奏之事故申言之堯舜同道舜攝則然堯又可知集傳四朝說異見覲禮篇舜典】天子五年一巡守【天子以海內為家時一巡省之五年者虞夏之制也周則十一歲一巡守】歲二月東巡守至于岱宗【代宗東嶽】柴而望祀山川【柴祭天告至也】覲諸侯【覲見也】問百年者就見之【就見老人】命大師陳詩以觀民風【陳詩謂采其詩而視之】命市納賈以觀民之所好惡志淫好辟【市典市者賈謂物貴賤厚薄也質則用物貴淫則侈物貴民之志淫邪則其所好者不正】命典禮考時月定日同律禮樂制度衣服正之【同陰律也】山川神祇有不舉者為不敬不敬者君削以地【舉猶祭也】宗廟有不順者為不孝不孝者君絀以爵【不順者謂若逆昭穆】變禮易樂者為不從不從者君流【流放也】革制度衣服者為畔畔者君討【討誅也】有功德於民者加地進律【律法也】五月南巡守至于南嶽如東巡守之禮八月西巡守至于西嶽如南巡守之禮十有一月北巡守至于北嶽如西巡守之禮歸假于祖禰用特【假至也特特牛也祖下及禰皆一牛王制】六年五服一朝【五服侯甸男采衛六年一朝會京師】又六年王乃時巡考制度于四岳【周制十二年一巡守春東夏南秋西冬北故曰時巡考正制度禮法于四岳之下如虞帝巡守然】諸侯各朝于方岳大明黜陟【覲四方諸侯各朝于方岳之下大明考績黜陟之法周官】十有二歲王巡守【王巡守諸侯會者各以其時之方書曰肆覲東后是也秋官大行人】職方氏王將巡守則戒于四方曰各修平乃守考乃職事無敢不敬戒國有大刑【乃猶女也守

謂國境之內職事所當共具】及王之所行先道帥其屬而巡戒令【先道先由王所從道居前行其前日所戒之令 夏官】戎僕掌馭戎車【戎車革路也師出王乘以自將】犯軼如玉路之儀凡巡守亦如之【如在軍同上】

土訓王巡守則夾王車【巡守行視所守也天子以四海為守 地官】

誦訓王巡守則夾王車【同上 土訓誦訓所掌見通禮制國篇】

土方氏王巡守則樹王宮【為之藩羅 夏官】

天子將出類乎上帝宜乎社造乎禰【帝謂五德之帝所祭于南郊者類宜造皆祭名其禮亡王制】天子巡守以遷廟主行載於齊車【齊車金路曾子問】玉人大璋中璋九寸邊璋七寸射四寸厚寸黃金勺青金外朱中鼻寸衡四寸有纁天子以巡守宗祝以前馬【射琰出者也勺故書或作約杜子春云當為勺謂酒尊中勺也鄭司農云鼻謂勺龍頭鼻也衡謂勺柄龍頭也玄謂鼻勺流也凡流皆為龍口也衡古文橫假借字也衡謂勺徑也三璋之勺形如圭瓚天子巡守有事山川則用灌焉於大山川則用大璋加文飾也於中山川用中璋殺文飾也於小山川用邊璋半文飾也其祈沈以馬宗祝亦執勺以先之禮王過大山川則大祝用事焉將有事於四海山川則校人飾黃駒 考工記】校人凡將事于四海山川則飾黃駒【四海猶四方也王巡守過大山川則有殺駒以祈沈禮與玉人職有宗祝以黃金勺前馬之禮 夏官】

天子適四方先柴【書曰歲二月東巡守至于岱宗柴 郊特牲】祭天燔柴祭山丘陵升祭川沈祭地瘞【升沈必就祭者也祭則是謂王巡守及諸侯之盟祭也其盟揭其著明者燔柴升沈瘞祭禮終矣備矣郊特牲曰郊之祭也迎長日之至也大報天而主日也宗伯職曰以實柴祀日月星辰則燔柴祭天謂祭日也柴為祭日則祭地瘞者祭月也日月而云天地靈之也王制曰王巡守至于岱宗柴是王巡守之盟其神主日也春秋傳曰晉文公為踐土之盟而傳云山川之神是諸侯之盟其神主山川也月乃太陰之精上為天使臣道莫貴焉是王官之伯會諸侯而盟其神主月與古文瘞作殫 覲禮】臨諸侯畛於鬼神曰有天王某甫【畛致也祝告致于鬼神辭也曰有天王某甫某甫且字也不名者不親往也周禮大會同過山川則大祝用事焉鬼神謂百辟卿士也畛或為祇 曲禮】

王巡守則君親監之【監祝也周禮王十二歲一巡守 國語周語】天子巡守諸侯待于竟天子先見百年者【問其國君以百年者所在而往見之】八十九十者東行西行者弗敢過西行東行者弗敢過欲言政者君就之可也【弗敢過者謂道經之則見之 祭義】

大宰王眡治朝則贊聽治眡四方之聽朝亦如之【謂王巡守在外時 天官】

天子適諸侯必舍其祖廟【詳見下】掌客王巡守則國君膳以牲犢令百官百姓皆具從者三公眡上公之禮卿眡侯伯之禮大夫眡子男之禮士眡諸侯之卿禮庶子壹眡其大夫之禮

【國君者王所過之國君犢繭栗之犢也以膳天子貴誠也牲孕天子不食也祭帝不用也凡賓客則皆角尺令者掌客令主國也百姓皆具言無有不具備 秋官】入其疆土地辟田野治養老尊賢俊傑在位則有慶慶以地入其疆土地荒蕪遺老失賢掊克在位則有讓【慶賞也益其地以賞之也掊克聚斂也讓責也孟子】古者天子將巡狩必先告於祖禰命史告羣廟及社稷圻內名山大川告者七日而徧親告用牲史告用幣申命冢宰而後清道而出或以遷廟之主行載於齊車每舍奠焉及所經五嶽四瀆皆有牲幣歸反舍於外次三日齋親告於祖禮用特命有司告羣廟社稷及圻內名山大川而復入聽朝【孔叢子巡守】

維元祀巡守四嶽八伯【祀年也元年謂月正元日舜假于文祖之年也巡行也視所守也天

子以天下為守堯始得羲和命為六卿主其春夏秋冬者并掌方嶽之事是為四嶽出則為伯後稍死□咎共工等代之乃分置八伯】壇四奧【奧內也安也四方之內人所安居也為壇祭之謂祭四方之帝四方之神也】沈四海【祭水曰沈】封十有二山【祭者必封封亦壇也十有二山十有二州之鎮也】兆十有二州【兆域也為營域以祭十二州之分星也壇沈封兆皆因所宜為之名】濬川樂正定樂名【樂正樂官之長周禮曰大司樂】元祀代泰山貢兩伯之樂焉【元始也歲二月東巡守始祭代氣泰山也東稱代書曰至于岱宗柴】東嶽陽伯之樂舞侏離其歌聲比余謠名曰皙陽【陽伯猶曰春伯春官秩宗也伯夷掌之侏離舞曲名言象物生育離根株也徒歌謂之謠其聲清濁比如余謠然後應律也皙當為析春厥民析皙陽樂正所定名也是時契為司徒掌地官矣後又舉禹掌天官】儀伯之樂舞鼈哉其歌聲比大謠名曰南陽【儀當為義義仲後也鼈動貌哉始也言象物應雷而動始出見也南任也】中祀大交霍山貢兩伯之樂焉【中仲也古字通春為元夏為仲五月南巡守仲祭大交氣于霍山也南交稱大交書曰宅南交也】夏伯之樂舞謾或其歌聲比中謠名曰初慮【夏伯夏官司馬也棄掌之謾猶曼也或長貌言象物之滋曼或然也初慮陽上極陰始謀也謾或為謗】義伯之樂舞將陽其歌聲比大謠名曰朱于【義伯義叔之後也將陽言象物之秀實動搖也于大也】秋祀柳穀華山貢兩伯之樂焉【八月西巡守祭柳穀之氣於華山也柳聚也齊人語】秋伯之樂舞蔡俶其歌聲比小謠名曰苓落【秋伯秋官士皋陶掌之蔡猶衰也俶始也言象物之始衰也】和伯之樂舞玄鶴其歌聲比中謠名曰歸來【和伯和仲之後也玄鶴言象陽鳥之南也歸來言反其本也】幽都弘山祀貢兩伯之樂焉【弘山恒山也十有一月朔巡守祭幽都之氣於恒山互言之者明祭山北稱幽都也】冬伯之樂舞齊落【冬伯冬官司空也垂掌之齊落終也言象物之終也齊或為聚】歌曰縵縵并論八音四會【此上下有脫辭其說未聞】歸假于禰祖用特五載一巡守羣后德讓貢正聲而九族具成【族當為奏言諸侯貢其正聲而天子九奏之樂乃具成也尚書大傳】

時邁巡守告祭柴望也【詩序】般巡守而祀四岳河海也【詩序】於皇時周陟其高

山墮山喬嶽允猶翕河敷天之下裒時之對時周之命【高山泛言山耳墮則其狹而長者喬高也嶽則其高而大者允猶未詳或曰允信也猶與由同翕河河善泛濫今得其性故翕而不為暴也裒聚也對答也言美哉此周也其巡守而登此山以柴望又道于河以周四嶽凡以敷天之下莫不有望於我故聚而朝之方嶽之下以答其意耳並周頌】惟周王撫萬邦巡侯甸四征弗庭綏厥兆民六服羣辟罔不承德【庭直也葛氏曰弗庭弗庭來者六服侯甸男采衛并畿內為六服也周官】

晏子曰天子適諸侯曰巡狩巡狩者巡所守也【巡所守巡行諸侯所守之土也孟子】王者所以巡狩者何巡者循也狩牧也為天下循行守牧民也道德太平恐遠近不同化幽隱有不得所考禮義正法度同律歷協時月皆為民也所以四時出何當承宗廟故不踰時也以夏之仲月者同律度當得其中也二月八月晝夜分五月十一月陰陽終所以五歲巡狩何為太煩也過五年為太疎也因天道時有所生歲有所成三歲一閏天道小備五歲再閏天道大備故五歲一巡狩三年小備二伯出述職黜陟一年物有終始歲有所成方伯行國時有所生諸侯行邑王者出一公以其屬守二公以其屬從也【白虎通】

天子非展義不巡守【天子巡守所以宣布德義莊二十七左傳】鄭石渠曰先王卜征五年【先征五年而卜吉凶也征謂巡守征行】而歲習其祥祥習則行【五年五卜皆同吉乃

巡守】不習則增修德而改卜【不習謂卜不吉 襄十三年左氏傳】
天子無客禮莫敢為主焉君適其臣升自阼階不敢有其室也【明饗君非禮也 郊特牲】 天子四海之內無客禮莫敢為王焉故君適其臣升自阼階即位于堂示民不敢有其室也【臣亦統于君 坊記】 天子適諸侯必舍其祖廟而不以禮籍入是謂天子壞法亂紀【以禮籍入謂大史典禮執簡記奉諱惡也天子雖尊舍人宗廟猶有敬焉自拱敕也 禮運】 天子適諸侯諸侯膳用犢諸侯適天子天子賜之禮大牢貴誠之義也故天子牲孕弗食也【犢者誠慤未有牝牡之情是以小為貴也孕任子也易曰婦孕不育 郊特牲】 有以少為貴者天子適諸侯諸侯膳以犢【疏曰諸侯事天子如天子事天天子事天既用一牛故天子巡守過諸侯境土諸侯奉膳亦止一牛而已 禮器】

禮書綱目卷十七

卷十八

<經部,禮類,通禮之屬,禮書綱目

欽定四庫全書

禮書綱目卷十八 婺源江永撰

喪禮 凶禮一

經【鄭目錄云天子以下死而相喪衣服年月親疎隆殺之禮不忍言死而言喪喪者棄亡之辭若全存居於彼焉已亡之耳喪服於五禮屬凶】子夏傳【疏曰傳者不知是誰人所作人皆云孔子弟子卜商字子夏所為按公羊傳是公羊高所為公羊高是子夏弟子今案公羊傳有云者何何以曷為孰為之等今此傳亦有之必為子夏作也其傳內更云傳者是子夏引他舊傳以證已義】

喪服

右篇目 小宗伯辨吉凶之服【五服王及公卿大夫士之服 春官】

斬衰裳苴經杖絞帶冠繩纓菅屨者【者者明為下出也凡服上曰衰下曰裳麻在首在腰皆曰經經之言實也明孝子有忠實之心故為制此服焉首經象緇布冠之缺項腰經象大帶又有絞帶象革帶齊衰以下用布】

傳曰斬者何不緝也苴經者麻之有蕢者也苴經大搗左本在下去五分一以為帶齊衰之經斬衰之帶也去五分一以為帶大功之經齊衰之帶也去五分一以為帶小功之經大功之帶也去五分一以為帶緦麻之經小功之帶也去五分一以為帶苴杖竹也削杖桐也杖各齊其心皆下本杖者何爵也無爵而杖者何擔主也非主而杖者何輔病也童子何以不杖不能病也婦人何以不杖亦不能病也【盈手曰搗搗抗也中人之挖圍九寸以五分一為殺者象五服之數也爵謂天子諸侯卿大夫士也無爵謂庶人也擔猶假也無爵者假之以杖尊其為主也非主謂衆子也】絞帶者繩帶也冠繩纓條屬右縫冠六升外畢鍛而勿灰衰三升菅屨者菅菲也外納【屬猶著也通屈一條繩為武垂下為纓著之冠也布八十縷為升升字當為登登成也今之禮皆以登為升俗誤已行久矣雜記曰喪冠條屬以別吉凶三年之練冠亦條屬右縫小功以下左縫外畢者冠前後屈而出縫于武也】居倚廬寢苦枕塊哭晝夜無時歆粥朝一溢米夕一溢米寢不脫經帶既虞剪屏挂楣寢有席疏食水飲朝一哭夕一哭而已既練舍外寢始食菜果飯素食哭無時【二十四兩曰溢為米一升二十四分升之一楣謂之梁挂楣所謂梁闇舍外寢于中門之外屋下壘壘為之不塗墍所謂堊室也素猶故也謂復平時食也斬衰不書受月者天子諸侯卿大夫既虞卒哭異數】

三年之喪二十五月而畢【詳見喪服義】
三年之喪達乎天子父母之喪無貴賤一也【中庸】

父

傳曰為父何以斬衰父至尊也 記事親有隱而無犯【隱謂不稱揚其過失也無犯不犯顏而諫論語曰事父母幾諫】左右就養無方【左右謂扶持之方猶常也子則然無常人】服勤至死致喪三年【勤勞辱之事也致謂戚容稱其服也凡此以恩為制 檀弓】

本章為人後者齊衰三年章父卒為母通用【父母之喪無貴賤一也【詳見上又本章為人後者齊衰三年章父卒為母齊衰杖期章父在為母通用】 大夫為其父母兄弟之未為大夫者之喪服如士服士為其父母兄弟之為大夫者之喪服如士服【大夫雖尊不以其服服父母兄弟嫌若踰之也士謂大夫庶子為士者也已卑又不敢服尊者之服今大夫喪禮逸與士異者未得而備聞也春秋傳曰齊晏桓子卒晏嬰釐衰斬苴經帶杖菅履食粥居倚廬寢苦枕草其老曰非大夫禮也曰唯卿為大夫此平仲之謙也言已非大夫故為父服士服耳釐衰斬者其縷在齊斬之間謂縷如三升半而三升不緝也斬衰以三升為正微細則屬于釐也然則士與大夫為父服異者有釐衰斬枕草矣其為母五升縷而四升為兄弟六升縷而五升乎唯大夫以上乃能備儀盡飾士以下則以臣服君之斬衰為其父以臣从君而服之齊衰為其母與兄弟亦以勉人為高行也大夫以下大夫士服同】 大夫之適子服大夫之服【仕至大夫賢著而德成適子得服其服亦尊其適象賢】 大夫之庶子為大夫則為其父母服大夫服其位與未為大夫者齒【雖庶子得服其服尚德也使齒于士不可不宗適雜記】

本章為人後者齊衰三年章父卒為母齊衰杖期章父在為母通用【

大夫降其庶子其孫不降其父【祖不厭孫也大夫為庶子大功 喪服小記】 齊晏桓子卒晏嬰釐衰斬【斬不緝之也縷在胸前釐三升布】苴經帶杖菅履【以苴為經及帶杖竹杖也禮記云苴杖竹也】食鬻居倚廬寢苦枕草【此禮與士喪禮略同其異唯枕草耳然枕草亦非喪服正文】其老曰非大夫之禮也【時之所行士及大夫衰服各有不同晏子為大夫而行士禮其家臣不解故語之】曰唯卿為大夫【晏子惡直已以斥時失禮故孫辭略答家老哀十七年左氏傳】

諸侯為天子

傳曰天子至尊也 記方喪三年【詳見君條】 君為天子三年夫人如外宗之為君也【外宗君外親之婦也其夫與諸侯為兄弟服斬妻從服期諸侯為天子服斬夫人亦從服期喪大記曰外宗□中南面】 世子不為天子服【遠嫌也不服與畿外之民同也 服問】
司服凡喪為天王斬衰【疏曰云凡喪者諸侯諸臣皆為天王斬衰 春官】

君

傳曰君至尊也【天子諸侯及卿大夫有地者皆曰君】 事君有犯而無隱【既諫人有問其國政者可以語其得失若齊晏子為晉叔向言之】 左右就養有方【不可侵官】 服勤至死

方喪三年【方喪資于事父凡此以義為制 檀弓】

公之喪諸達官之長杖【謂君所命雖有官職不達于君則不服斬 同上】與諸侯為兄弟者服斬【諸卿大夫以下也與尊者為親不敢以輕服服之言諸侯者明雖在異國猶來為三年也 小記】大夫之適子為君夫人大子如士服【大夫不世子不嫌也士為國君斬小君期大子君服斬臣从服期 服問】外宗為君夫人猶內宗也【皆謂嫁于國中者也為君服斬夫人齊衰不敢以其親服服至尊也外宗謂姑姊妹之女舅之女及从母皆是也內宗五屬之女也其無服而嫁于諸臣者从為夫之君嫁于庶人者从為國君 雜記】不杖朝章為夫之君齊衰三月章庶人為國君通用】

父為長子【不言嫡子通上下也亦言立嫡以上】

傳曰何以三年也正體于上又乃將所傳重也庶子不得為長子三年不繼祖也【此言為父後者然後為長子三年重其當先祖之正體又以其將代已為宗廟主也庶子為父後者之弟言庶者遠別之也 小記曰不繼祖與禰此但言祖不言禰容祖禰共廟】記庶子不為長子斬不繼祖與禰也【詳見喪服義又大傳庶子不得為長子三年一條亦同】

為人後者

傳曰何以三年也受重者必以尊服服之何如而可為之後同宗則可為之後何如而可以為人後支子可也為所後者之祖父母妻妻之父母昆弟昆弟之子若子【若子者為所為後之親如親子】記於所為後之兄弟之子若子【本經記】為人後者為之子【詳見喪通禮主後章父條致喪三年父母之喪無貴賤一也大夫為其父母並此條通用當互考】

為殤後者以其服服之【言為後者據承之也殤無為人父之道以本親之服服之 小記】孔子曰宗子為殤而死庶子弗為後也【族人以其倫代之明不序昭穆立之廟其祭之就其祖而已代之者主其禮 曾子問】

妻為夫

傳曰夫至尊也 記婦人不為主而杖者姑在為夫杖【姑不厭婦 小記】

妾為君

傳曰君至尊也【妾謂夫為君者不得體之加尊也雖士亦然】

女子子在室為父【女子子者子女也別于男子也言在室者關已許嫁】布總箭笄髻衰三年【此妻妾女子子喪服之異于男子者總束髮謂之總者既束其本又總其末箭笄篠竹髻露紛也猶男子之括髮斬衰髻髮以麻則髻亦用麻也以麻者自項而前交于額上卻繞紛如著慘頭焉 小記曰男子冠而婦人笄男子免而婦人髻凡服上曰衰下曰裳此但言衰不言裳婦人不殊裳衰如男子衰下如深衣深衣則衰無帶下又無衽】

傳曰總六升長六寸箭筭長尺吉筭尺二寸【總六升者首飾象冠數長六寸謂出紒後所垂為飾也】記女子子在室為父母其主喪者不杖則子一人杖【女子子在室亦童子也無男昆弟使同姓為攝主不杖則子一人杖謂長女也許嫁及二十而筭筭為成人成人正杖也小記齊衰三年章父卒為母齊衰杖期章父在為母通用】

子嫁反在父之室為父三年【謂遭喪後而出者始服齊衰期出而虞則受以三年之喪受既虞而出則小祥亦如之既除喪而出則已凡女行於大夫以上曰嫁行于士庶人曰適人】記為父母喪未練而出則三年既練而出則已未練而反則期既練而反則遂之【小記齊衰三年章父卒為母通用】

公士大夫之衆臣為其君布帶繩屨【士卿士也公卿大夫厭于天子諸侯故降其衆臣布帶繩屨貴臣得伸不奪其正】

傳曰公卿大夫室老士貴臣其餘皆衆臣也君謂有地者也衆臣杖不以即位近臣君服斯服矣繩屨者繩菲也【室老家相也士邑宰也近臣閭寺之屬君嗣君也斯此也近臣从君喪服無所降也繩菲今時不借也】

右斬衰三年

疏衰裳齊牡麻經冠布纓削杖布帶疏屨三年者【疏猶麤也】傳曰齊者何緝也牡麻者枲麻也牡麻經右本在上冠者沽功也疏屨者蕭蒯之菲也【沽猶粗也冠尊加其麤功大功也】齊衰之經斬衰之帶也去五分一以為帶【見斬衰章】

削杖桐也【同上】

父卒則為母【尊得伸也】

記穆公之母卒【穆公魯哀公之曾孫】使人問于曾子曰如之何【問居喪之禮曾子曾參之子名申】對曰申也聞諸申之父曰哭泣之哀齊斬之情餽粥之食自天子達【子喪父母尊卑同檀弓齊衰杖期章父在為母通用】

繼母如母

傳曰繼母何以如母繼母之配父與因母同故孝子不敢殊也【因猶親也】

慈母如母

傳曰慈母者何也傳曰妾之無子者妾子之無母者父命妾曰女以為子命子曰女以為母若是則生養之終其身慈母死則喪之三年如母貴父之命也【此主謂大夫士之妾妾子之無

母父命為母子者其使養之不命為母子則亦服庶母慈已者之服可也大夫之妾子父在為母大功則士之妾子為母期矣父卒則皆得伸也【記為慈母後者為庶母可也為祖庶母可也【謂父命之為子母者也即庶子為後此皆子也傳重而已不先命之與適妻使為母子也緣為慈母後之義父之妾無子者亦可命已庶子為後

小記】子游問曰喪慈母如母禮與【如母謂父卒三年也子游意以為國君亦】

【當然禮所云者乃大夫以下父所使妾養妾子】孔子曰非禮也古者男子外有傳內有慈母君命所使教子也何服之有【言無服也此指諸國君之子也大夫士之子為庶母慈已者服小功父卒乃不服】昔者魯昭公少喪其母有慈母良及其死也公弗忍也欲喪之有司以聞曰古之禮慈母無服【據國君也良善也謂之慈母固謂之善國君之妾子于禮不服也昭公年三十乃喪齊歸猶無感容是不少孤又安能不忍于慈母此非昭公明矣未知何公也】今也君為之服是逆古之禮而亂國法也若終行之則有司將書之以遺後世無乃不可乎公曰古者天子練冠以燕居公弗忍也遂練冠以喪慈母喪慈母自魯昭公始也【公之言又非也天子練冠以燕居蓋謂庶子王為其母 曾子問】

母為長子

傳曰何以三年也父之所不降母亦不敢降也【不敢降者不敢以已尊降祖禰之正體】

記母為長子削杖【嫌服男子當杖竹也母為長子服不可重于子為已也 小記】

妾為君之長子與女君同【不敢以恩輕輕服君之正統 同上】

妾為女君君之長子惡笄有首布總【本經記】妾從女君而出則不為女君之子服【妾為女君之黨服得與女君同而今俱出女君猶為子期妾于義絕無施服 小記】

右齊衰三年

疏衰裳齊牡麻經冠布纓削杖布帶疏屨期者

傳曰問者曰何冠也曰齊衰大功冠其受也總麻小功冠其衰也帶緣各視其冠【問之者見斬衰有三其冠同今齊衰有四章不知其冠之異同爾緣如深衣之緣今文無冠布纓】

父在為母

傳曰何以期也屈也至尊在不敢伸其私尊也父必三年然後娶達子之志也【斬衰父條父母之喪無貴賤一也大夫為其父母為人後者條為所後者之妻若子女子子在室為父條為父母主喪者不杖則子一人杖齊衰三年章穆公之母卒並此條通用當互考】記公子為其母練冠麻衣縗緣為其妻縗冠葛經帶麻衣縗緣皆既葬除之【公子君之庶子也其或為母謂妾子也麻者總麻之經帶也此麻衣者如小功布深衣為不制衰裳變也詩云麻衣如雪縗淺絳也一染謂之縗練冠而麻衣縗緣三年練之受飾也檀弓曰練練衣黃裏縗緣諸侯之妾子厭于父為母不得伸權為制此服不奪其恩也為妻縗冠葛經帶妻輕】傳曰何以不在

五服之中也君之所不服子亦不敢服也君之所為服子亦不敢不服也【君之所不服謂妾與庶婦也君之所為服謂夫人與適婦也諸侯之妾貴者視卿賤者視大夫皆三月而葬本經記】王子有其母死者其傅為之請數月之喪公孫丑曰若此者何如也曰是欲終之而不可得也雖加一日愈于已謂夫莫之禁而弗為者也【詳見喪服義】

妻

傳曰為妻何以期也妻至親也【適子父在則為妻不杖以父為之主也服問曰君所主夫人妻大子適婦父在子為妻以杖即位謂庶子】

記為妻父母在不杖【尊者在不敢盡禮于私喪也 詳見喪通禮拜拱章】

世子不降妻之父母其為妻也與大夫之適子同【見不杖期章大夫之適子為妻條】

公子為其妻緇冠葛經帶麻衣緇緣既葬除之【詳見上條】

出妻之子為母【出猶去也】

傳曰出妻之子為母期則為外祖父母無服傳曰絕族無施服親者屬【在旁而及曰施親者屬母子至親無絕道】出妻之子為父後者則為出母無服傳曰與尊者為一體不敢服其私親也 記為父後者為出母無服【不敢以已私廢父所傳重之祭祀小記】

孔氏之不喪出母自子思始也【詳見喪服義】

父卒繼母嫁從為之服報

傳曰何以期也貴終也【嘗為母子貴終其思】

右齊衰杖期

不杖麻屨者【此亦齊衰言其異于上】

記期之喪達乎大夫【期之喪達乎大夫者謂旁親所降在大功者其正統之期天子諸侯猶不降也大夫所降天子諸侯絕之不為服所不臣乃服之也 中庸】

祖父母

傳曰何以期也至尊也 記父卒然後為祖父後者服斬【詳見本章為君之祖父母條】

祖父卒而后為祖母後者三年【祖父在則其服如父在為母也 小記】

世父母叔父母

傳曰世父叔父何以期也與尊者一體也然則昆弟之子何以亦期也旁尊也不足以加尊焉

故報之也父子一體也夫妻一體也昆弟一體也故父子首足也夫妻牝合也昆弟四體也故昆弟之義無分然而有分者則辟子之私也子不私其父則不成為子故有東宮有西宮有南宮有北宮異居而同財有餘則歸之宗不足則資之宗世母叔母何以亦期也以名服也【宗者世父為小宗典宗事者也資取也為姑在室亦如之】

為人後者為所後者之昆弟若子【詳見斬衰章為人後者條】記縣子瑱曰吾聞之古者不降上下各以其親【古謂殷時也上不降遠下不降卑】滕伯文為孟虎齊衰其叔父也為孟皮齊衰其叔父也【伯文殷時滕君也爵為伯名文 檀弓】

大夫之適子為妻

傳曰何以期也父之所不降子亦不敢降也何以不杖也父在則為妻不杖【大夫不以尊降適婦者重適也凡不降者謂如其親服服之降有四品君大夫以尊降公子大夫之子以厭降公之昆弟以旁尊降為人後者女子子嫁者以出降】記世子不降妻之父母其為妻也與大夫之適子

同【世子天子諸侯之適子也不降妻之父母為妻故親之也為妻亦齊衰不杖者君為之主子不得伸也主言與大夫之適子同據喪服之成文也本所以正見父在為妻不杖于大夫適子者明大夫以上雖尊猶為適婦為主 小記】

昆弟【昆兄也為姊妹在室亦如之】

記大夫為其兄弟之未為大夫者士為其兄弟之為大夫者如士服【詳見斬衰父條】成人有其兄死而不為衰者聞子臯將為成宰遂為衰成人曰蠶則績而蟹有匡范則冠而蟬有綏兄則死而子臯為之衰【啗兄死者言其衰之不為兄死如蟹有匡蟬有綏不為蠶之績范之冠也范蜂也蟬蛭也綏為蛭喙長在腹下 檀弓】

為衆子【衆子者長子之弟及妾子女子在室亦如之士謂之衆子未能遠別也大夫則謂之庶子降之為大功天子國君不服之內則曰冢子未食而見必執其手適子庶子已食而見必循其首】

記大夫降其庶子【詳見斬衰章父條】

昆弟之子

傳曰何以期也報之也【檀弓曰喪服兄弟之子猶子也蓋引而進之】

記喪服兄弟之子猶子也【詳見喪服義】

古者不降滕伯文為孟皮齊衰其叔父也【詳見上世父母叔父母條】

大夫之庶子為適昆弟【兩言之者適子或為兄或為弟】

傳曰何以期也父之所不降子亦不敢降也【大夫雖尊不敢降其適重之也適子為庶昆弟庶兄弟相為亦如大夫為之】

適孫

傳曰何以期也不敢降其適也有適子者無適孫孫婦亦如之【周之道適子死則立適孫是適孫將上為祖後者也長子在則皆為庶孫耳孫婦亦如之適婦在亦如庶孫之婦凡父于將為後者非長子皆期也】

為人後者為其父母報

傳曰何以期也不貳斬也何以不貳斬也特重于大宗者降其小宗也為人後者孰後後大宗也曷為後大宗大宗者尊之統也禽獸知母而不知父野人曰父母何算焉都邑之士則知尊禰矣大夫及學士則知尊祖矣諸侯及其大祖天子及其始祖之所自出尊者尊統上卑者尊統下大宗者尊之統也大宗者收族者也不可以絕故族人以支子後大宗也適子不得後大宗【都邑之士則知尊禰近政化也大祖始封之君始祖者咸神靈而生若稷契也自由也及始祖之所由出謂祭天也上猶遠也下猶近也收族者謂別親疎序昭穆大傳曰繼之以姓而弗別綴之以食而弗殊雖百世昏姻不通者周道然也】記夫為人後者其妻為舅姑大功【不二降小記】

女子子適人者為其父母昆弟之為父後者

傳曰為父何以期也婦人不貳斬也婦人不貳斬者何也婦人有三從之義無專用之道故未嫁從父既嫁從夫夫死從子故父者子之天也夫者妻之天也婦人不貳斬者猶曰不貳天也婦人不能二尊也為昆弟之為父後者何以亦期也婦人雖在外必有歸宗曰小宗故服期也【从者从其教令歸宗者父雖卒猶自歸宗其為父後特重者不自絕于其族類也曰小宗者言是乃小宗也小宗明非一也小宗四丈夫婦人之為小宗各如其親之服辟大宗】記女子子適人者為其父母婦為舅姑惡筭有首以髻卒哭子折筭首以筭布總【言以髻則髻有著筭者明矣】傳曰筭有首者惡筭之有首也惡筭者櫛筭也折筭首者折吉筭之首也吉筭者象筭也何以言子折筭首而不言婦終之也【櫛筭者以櫛之木為筭或曰櫛筭有首者若今時刻鏤摘頭矣卒哭而喪之大事畢女子子可以歸于夫家而著吉筭折其首者為其大飾也吉筭尊變其尊者婦人之義也據在夫家宜言婦終之者終子道于父母之恩】女君死則妾為女君之黨服攝女君則不為先女君之黨服【妾于女君之親若其親然雜記後凡女君之黨通用】

繼父同居者

傳曰何以期也傳曰夫死妻釋子幼子無大功之親與之適人而所適者亦無大功之親所適者以其貨財為之築宮廟歲時使之祀焉妻不敢與焉若是則繼父之道也同居則服齊衰期

異居則服齊衰三月必嘗同居然後為異居未嘗同居則不為異居【妻穉謂年未滿五十子幼謂年十五以下子無大功之親謂同財者也為之築宮廟于家門之外神不歆非族妻不敢與馬恩雖至親族已絕矣天不可二此以恩服爾未嘗同居則不服之】記繼父不同居也者必嘗同居皆無主後同財而祭其祖禰為同居有主後者為異居【錄恩服深淺也見同財則期同居異財故同居今異居及繼父有子亦為異居則服齊衰三月未嘗同居則不服小記】

為夫之君

傳曰何以期也從服也【斬衰章君條外宗為君夫人猶內宗也此條通用當互考】

姑姊妹女子子適人無主者姑姊妹報

傳曰無主者謂其無祭主者也何以期也為其無祭主故也【無主後者人之所哀憐不忍降之】

為君之父母妻長子祖父母

傳曰何以期也從服也父母長子君報斬妻則小君也父卒然後為祖後者服斬【此為君矣而有父若祖之喪者謂始封之君也若是繼體則其父若祖有廢疾不立父卒者父為君之孫宜嗣位而早卒今君受國于曾祖】司服凡喪為王后齊衰【王后小君也諸侯為之不杖期春官】記大夫之適子為君夫人大子如士服【詳見斬衰章君條】

外宗為夫人猶內宗也【同上】君之母非夫人則羣臣無服唯近臣及僕驂乘從服唯君所服服也【妾先君所不服也禮庶子為後為其母總言唯君所服伸君也春秋之義有以小君服之者時若小君在則益不可服問】

妾為女君

傳曰何以期也妾之事女君與婦之事舅姑等【女君君適妻也女君于妾無服報之則重降之則嫌】記妾為女君惡笄有首布總【詳見齊衰母為長子條】

婦為舅姑

傳曰何以期也從服也

記婦為舅姑惡笄有首以髻【詳見上女子子適人者為其父母昆弟之為父後者條】

婦當喪而出則除之【當喪當舅姑之喪也出除喪絕族也小記】叔仲皮學子柳【叔仲皮魯叔孫氏之族學教也子柳仲皮之子】叔仲皮死其妻魯人也衣衰而繆經【衣當為齊壞字也繆讀為木樛垂之樛士妻為舅姑之服也言雖魯頓其于禮勝學】叔仲衍以告【告子柳言此非也衍蓋皮之弟衍或為皮】請總衰而環經【總衰小功之縷而四升半之衰環經弔服之經時婦人好輕細而多服此者衍既不知禮之本子柳亦以為然使其妻為舅服之】

曰昔者吾喪姑姊妹亦如斯末吾禁也【衍答子柳也姑姊妹在室齊衰與婦為舅姑同末無也言無禁我欲其言行】退使其妻總衰而環經【婦以諸侯之大夫為天子之衰弔服之經服其舅非檀弓】夫為人後者其妻為舅姑大功【詳見為人後者為其父母降】有從輕而重公子之妻為其皇姑【詳見喪服義妾服見大功章大夫之妾為君之庶子條】

夫之昆弟之子【男女皆是】

傳曰何以期也報之也【妾服見大功章大夫之妾為君之庶子條】

公妾大夫之妾為其子

傳曰何以期也妾不得體君為其子得遂也【此言二妾不得从于女君尊降其子也女君與君一體唯為長子三年其餘以尊降之與妾子同也】

女子子為祖父母

傳曰何以期也不敢降其祖也【經似在室傳似已嫁明雖有出道猶不降】

大夫之子為世父母叔父母子昆弟昆弟之子姑姊妹女子子無主者為大夫命婦者唯子不報【命者加爵服之名自士至上公凡九等君命其夫則后夫人亦命其妻矣此所為者凡六命夫六命婦】

傳曰大夫者其男子之為大夫者也命婦者其婦人之為大夫妻者也無主者命婦之無祭主者也何以言唯子不報也女子子適人者為其父母期故言不報也言其餘皆報也何以期也父之所不降子亦不敢降也大夫曷為不降命婦也夫尊於朝妻貴于室矣【無主者命婦之無祭主謂姑姊妹女子子也其有祭主者如衆人唯子不報男女同不報爾傳唯據女子子似失之矣大夫曷為不降命婦據大夫于姑姊妹女子子既以出降大功其適士者又以尊降在小功也夫尊于朝與已同妻貴于室从夫爵也】

大夫為祖父母適孫為士者

傳曰何以期也大夫不敢降其祖與適也【不敢降其祖與適則可降其旁親也】

公妾以及士妾為其父母

傳曰何以期也妾不得體君得為其父母遂也【然則女君有以尊降其父母者與春秋之義雖為天王后猶曰吾季姜是言子尊不加于父母此傳似誤矣禮妾从女君而服其黨服是嫌不自服其父母故以明之】

右齊衰不杖期

疏衰裳齊牡麻經無受者【無受者服是服而除不以輕服受之不著月數者天子諸侯葬異月也小記曰齊衰三月與大功同者繩屨】

記齊衰三月與大功同者繩屨【雖尊卑異于恩有可同也 小記】

寄公為所寓【寓亦寄也為所寄之國君服】

傳曰寄公者何也失地之君也何以為所寓服齊衰三月也言與民同也【諸侯五月而葬而服齊衰三月者三月而藏其服至葬又反服之既葬而除之】

丈夫婦人為宗子宗子之母妻【婦人女子子在室及嫁歸宗者也宗子繼別之後百世不遷所謂大宗也】

傳曰何以服齊衰三月也尊祖也尊祖故敬宗敬宗者尊祖之義也宗子之母在則不為宗子之妻服也記宗子孤為殤大功衰小功衰皆三月親則月算

如邦人【言孤有不孤者不孤則族人不為殤服服之也不孤謂父有廢疾若年七十而老子代主宗事者也孤為殤長殤中殤大功衰下殤小功衰皆如殤服而三月謂與宗子絕屬者也親謂在五屬之內算數也月數如邦人者與宗子有期之親者成人服之齊衰期長殤大功衰九月中殤大功衰七月下殤小功衰五月有大功之親者成人服之齊衰三月卒哭受以大功衰九月其長殤中殤大功衰五月下殤小功衰三月有小功之親者成人服之齊衰三月卒哭受以小功衰五月其殤與絕屬者同有緦麻之親者成人及殤皆與絕屬者同 本經記】

為舊君君之母妻

傳曰為舊君者孰謂也仕焉而已者也何以服齊衰三月也言與民同也君之母妻則小君也【仕焉而已者謂老若有廢疾而致仕者也為小君服者恩深于民】

庶人為國君【不言民而言庶人庶人或有在宮者天子畿內之民服天子亦如之斬衰君條外宗為君夫人猶內宗也此條通用當互考】

大夫在外其妻長子為舊國君【在外待放已去者】

傳曰何以服齊衰三月也妻言與民同也長子言未去也【妻雖從夫而出古者大夫不外娶婦人歸宗往來猶民也春秋傳曰大夫越境逆女非禮君臣有合離之義長子去可以無服】
記違諸侯之大夫不反服違大夫之諸侯不反服【其君尊卑異也違猶去也去諸侯仕諸侯去大夫仕大夫乃得為舊君服雜記】

仕而未有祿者違而君薨弗為服也【以其恩輕也違】

【去也檀弓】孔子曰管仲遇盜取二人焉上以為公臣曰其所與遊辟也可人也【言此人可也但居惡人之中使之犯法】管仲死桓公使為之服宦于大夫者之為之服也自管仲始也有君命焉爾也【亦記失禮所由也善桓公不忘賢者之舉宦猶仕也此仕于大夫更升于公與違大夫之諸侯同爾禮不反服 雜記】

繼父不同居者【嘗同居今不同】

記異居則服齊衰三月必嘗同居然後為異居未嘗同居則不為異居【詳見不杖期章繼父同居條】有主後者為異居【同上】

曾祖父母

傳曰何以齊衰三月也小功者兄弟之服也不敢以兄弟之服服至尊也【正言小功者服之數盡于五則高祖宜總麻曾祖宜小功也據祖期則曾祖宜大功高祖宜小功也高祖曾祖皆有小功之差則曾孫玄孫為之服同也重其衰麻尊尊也減其日月恩殺也】為所後者之祖父母若子【詳見斬衰章為人後者條】

大夫為宗子

傳曰何以服齊衰三月也大夫不敢降其宗也

舊君【大夫待放未去者】

傳曰大夫為舊君何以服齊衰三月也大夫去君歸其宗廟故服齊衰三月也言與民同也何大夫之謂乎言其以道去君而猶未絕也【以道去君謂三諫不從待放于郊未絕者言爵祿尚有一列于朝出入有詔于國妻子自若民也】

曾祖父母為士者如衆人

傳曰何以齊衰三月也大夫不敢降其祖也

女子子嫁者未嫁者為曾祖父母

傳曰嫁者其嫁于大夫者也未嫁者其成人而未嫁者也何以服齊衰三月不敢降其祖也【言嫁于大夫者明雖尊猶不降也成人謂年二十已笄者也此著不降明有所降妾為女君之黨服見不杖期章女子子適人者為其父母條】

右齊衰三月

大功布衰裳牡麻經無受者【大功布者其鍛治之功麤沽之】

子女子子之長殤中殤【殤者男女未冠笄而死可殤者女子子許嫁不為殤也】傳曰何以大功也未成人也何以無受也喪成人者其文縵喪未成人者其文不縵故殤之經不縵垂蓋未成人也年十九至十六為長殤十五至十二為中殤十一至八歲為下殤不滿八歲以下為無服之殤無服之殤以日易月以日易月之殤殤而無服故子生三月父名之死則哭之未名則不哭也【縵猶數也其文數者謂變除之節也不縵垂者不絞其帶之垂者雜記曰大功以上散帶以日易月謂生一月者哭之一日也殤而無服者哭之而已為昆弟之子女子子亦如之凡言子者可以兼男女又云女子子者殊之以子關適庶也凡傳記言殤者附于下】
記丈夫冠而不為殤婦人笄而不為殤【言成人也婦人許嫁而笄未許嫁與丈夫同小記】伯姬卒此未適人何以卒【據叔姬不卒】許嫁矣婦人許嫁字而笄之【字者尊而不泄所以遠別也笄者簪也所以繫持髮象男子飾也服此者明繫屬于人所以養貞一也婚禮曰女子許嫁笄而醴之稱字】死則以成人之喪治之【不以殤禮降也許嫁卒者當為諸侯夫人有即貴之漸僖九年公羊傳又丈十六年子叔姬卒傳同】許嫁笄而字之死則以成人之喪治之【女子許嫁不為殤死則以成人之喪治之謂許嫁于諸侯尊同則服大功九月吉笄以象為之刻鏤其首以為飾成人著之穀梁傳】戰于郎【郎魯近邑也哀十一年齊國書師師伐我是也】公叔禺人遇負杖入保者息【遇見也見走辟齊師將入保罷倦加其杖項上兩手掖之休息者保縣邑小城禺人昭公之子春秋傳曰公叔務人】曰使之雖病也【謂時繇役】任之雖重也【謂時賦稅】君子不能為謀也士弗能死也不可【君子謂卿大夫也魯政既惡復無謀臣士又不能死難禺人耻之】我則既言矣【欲敵齊師踐其言】與其鄰重汪錡往皆死焉【奔敵死齊寇鄰鄰里也重皆當為童童未冠者之稱姓汪名錡春秋傳曰童汪錡】魯人欲勿殤童汪錡【見其死君事有士行欲以成人之喪治之言魯人者死君事國為葬歛】問于仲尼仲尼曰能執干戈以衛社稷雖欲勿殤也不亦可乎【善之檀弓】

叔父之長殤中殤

姑姊妹之長殤中殤

昆弟之長殤中殤

夫之昆弟之子女子子之長殤中殤【妾服見大功章大夫之妾為君之庶子條】

適孫之長殤中殤

大夫之庶子為適昆弟之長殤中殤

公為適子之長殤中殤

大夫為適子之長殤中殤【公君也諸侯大夫不降適殤者重適也天子亦如之】

其長殤皆九月纓經其中殤七月不纓經【經有纓者為其重也自大功以上經有纓以一條繩為之小功以下經無纓也】

右殤大功九月七月

大功布衰裳牡麻經纓布帶三月受以小功衰即葛九月者【受猶承也凡天子諸侯卿大夫既虞士卒哭而受服正言三月者天子諸侯無大功主于大夫士也此雖有君為姑姊妹女子子嫁于國君者非內喪也】

傳曰大功布九升小功布十一升【此受之下也以發傳者明受盡于此也又受麻經以葛經間傳曰大功之葛與小功之麻同】司服卿大夫其凶服加以大功小功士其凶服亦如之【喪服天子諸侯齊斬而已卿大夫加以大功小功士亦如之又加總焉 春官】

姑姊妹女子子適人者

傳曰何以大功也出也【出必降之者蓋有受我而厚之者】
記姑姊妹之薄也蓋有受我而厚之者也【詳見喪服義】

從父昆弟【世父叔父之子也其姊妹在室亦如之】

記于所為後之兄弟之子若子【本經記】

為人後者為其昆弟

傳曰何以大功也為人後者降其昆弟也
記為人後者于兄弟降一等報【言報者言其為宗子不降 本經記】

庶孫【男女皆是下殤小功章曰為姪庶孫丈夫婦人同】

適婦【適婦適子之妻】

傳曰何以大功也不降其適也【婦言適者从夫名】記適婦不為舅後者則姑為之小功【謂夫有廢疾他故若死而無子不受重者小功庶婦之服也凡父母于子舅姑于婦將不傳重于適及將所傳重者非適服之皆如衆子庶婦也 小記】

女子子適人者為衆昆弟【父在則同父沒乃為父後者服期也】

記凡妾為私兄弟如邦人【嫌厭降之也私兄弟目其族親也然則女君有以尊降其兄弟者謂士之女為大夫妻與大夫之女為諸侯夫人諸侯之女為天王后者父卒昆弟之為父後者宗子亦不敢降也 本經記 妻為女君之黨服見不杖期章女子子適人者為其父母條】

姪丈夫婦人報【為姪男女服同】

傳曰姪者何也謂吾姑者吾謂之姪【妾為女君黨服見不杖期章女子子適人者為其父母條】

夫之祖父母世父母叔父母

傳曰何以大功也從服也夫之昆弟何以無服也其夫屬乎父道者妻皆母道也其夫屬乎子道者妻皆婦道也謂弟之妻婦者是嫂亦可謂之母乎故名者人治之大者也可無慎乎【道猶行也言婦人棄姓無常秩嫁于父行則為母行嫁于子行則為婦行謂弟之妻為婦者卑遠之故謂之婦嫂者尊嚴之稱是嫂亦可謂之母乎言不可也嫂猶嫂也嫂老人稱也是為序男女之別爾若已以母婦之服服兄弟之妻兄弟之妻以舅子之服服已則是亂昭穆之序也治猶理也父母兄弟夫婦之理人倫之大者可不慎乎大傳曰同姓从宗合族屬異姓主名治際會名著而男女有別 妾服見大功章大夫之妾為君之庶子條】

大夫為世父母叔父母子昆弟昆弟之子為士者【子謂庶子】傳曰何以大功也尊不同也尊同則得服其親服【尊同謂亦為大夫者親服期】記大夫降其庶子【詳見斬衰父條】大夫公之昆弟大夫之子于兄弟降一等【兄弟猶言族親也凡不見者以此求之 本經記】君之所為兄弟服室老降一等【公士大夫之君 同上】

公之庶昆弟大夫之庶子為母妻昆弟【公之庶昆弟則父卒也大夫之庶子則父在也其或為母謂妾子也】

傳曰何以大功也先君餘尊之所厭不得過大功也大夫之庶子則從乎大夫而降也父之所不降子亦不敢降也【言从乎大夫而降則于父卒如國人也昆弟庶昆弟也舊讀昆弟在下其于厭降之義宜蒙此傳也是以上而同之父所不降謂適也】

皆為其從父昆弟之為大夫者【皆者言其互相為服尊同則不相降其為士者降在小功適子為之亦如之】

為夫之昆弟之婦人子適人者【婦人子者女子子也不言女子子者因出見恩疏 妾服見下條】

大夫之妾為君之庶子【下傳曰何以大功也妾為君之黨服得與女君同指為此也妾為君之長子亦三年自為其子期異于女君也士之妾為君之衆子亦期】女子子嫁者未嫁者為

世父母叔父母姑姊妹【舊讀合大夫之妾為君之庶子女子子嫁者未嫁者言大夫之妾為此三人之服也】

傳曰嫁者其嫁于大夫者也未嫁者成人而未嫁者也何以大功也妾為君之黨服得與女君同下言為世父母叔父母姑姊妹者謂妾自服其私親也【此不辭即實為妾遂自服其私親當言其以明之齊衰三月章曰女子子嫁者未嫁者為曾祖父母經與此同足以見之矣傳所云何以大功也妾為君之黨服得與女君同文爛在下爾女子子成人者有出道降旁親及將出者明當及時也 內條內妾為君之黨服得與女君同夫黨服通用】
記妾從女君而出則不為女君之子服【詳見齊衰三年章母為長子條】

大夫大夫之妻大夫之子公之昆弟為姑姊妹女子子嫁于大夫者 君為姑姊妹女子子嫁于國君者傳曰何以大功也尊同也尊同則得服其親服諸侯之子稱公子公子不得禰先君公子之子稱公孫公孫不得祖諸侯此自卑別于尊者也若公子之子孫有封為國君者則世世祖是人也不祖公子此自尊別于卑者也是故始封之君不臣諸父昆弟封君之子不臣諸父而臣昆弟封君之孫盡臣諸父昆弟故君之所為服子亦不敢不服也君之所不服子亦不敢服也【不得禰不得祖者不得立其廟而祭之也卿大夫以下祭其祖禰則世世祖是人不得祖公子者後世為君者祖此受封之君不復祀別子也公子若在高祖以下則如其親服後世遷之乃毀其廟爾因國君以尊降其親故終說此義云】

右大功正服九月

總衰裳牡麻經既葬除之者

傳曰總衰者何以小功之總也【治其縷如小功而成布四升半細其縷者以恩輕也升數少者以服至尊也凡布細而疏者謂之總今南陽有鄧總】

諸侯之大夫為天子

傳曰何以總衰也諸侯之大夫以時接見乎天子【接猶會也諸侯之大夫以時會見于天子而服之則其士庶民不服可知】

右總衰既葬除之

小功布衰裳澡麻帶經五月者【澡者治去莖垢不絕其本也小記曰下殯小功帶澡麻不絕其本屈而反以報之 大功殯章大夫冠而不為殯婦人笄而不為殯此條通用】

叔父之下殯

適孫之下殯

昆弟之下殤

大夫庶子為適昆弟之下殤

為姑姊妹女子子之下殤

為人後者為其昆弟從父昆弟之長殤

傳曰問者曰中殤何以不見也大功之殤中從上小功之殤中從下【問者據从父昆弟下殤在總麻也大功小功皆謂服其成人也大功之殤中从上則齊衰之殤亦中從上也此主謂丈夫之為殤者服也凡不見者以此求之也】

為夫之叔父之長殤【不見中殤者中從下也
妾服見大功章大夫之妾為君之庶子條】昆弟之子女子子夫之昆弟之子女子子之下殤
【妾服見大功章大夫之妾為君之庶子條】

為姪庶孫丈夫婦人之長殤

大夫公之昆弟大夫之子為其昆弟庶子姑姊妹女子子之長殤【大夫為昆弟之長殤小功謂為士者若不仕者也以此知為大夫無殤服也公之昆弟不言庶者此庶服無所見也大夫之子不言庶者關適子亦服此殤也云公之昆弟為庶子之長殤則知公之昆弟猶大夫】

大夫之妾為庶子之長殤【君之庶子】

右小功殤五月

小功布衰裳牡麻經即葛五月者【即就也小功輕三月變麻因改衰以就葛經帶而五月也
閒傳曰小功之葛與總之麻同舊說小功以下吉履無絢也】

司服卿大夫凶服加以大功小功士凶服亦如之【詳見大功章】

從祖祖父母從祖父母報【祖父之昆弟之親】

從祖昆弟【父之从父昆弟之子】

記兄弟皆在他邦加一等不及知父母與兄弟居加一等【皆在他邦謂行仕出遊若辟讐不及知父母父母早卒】傳曰何如則可謂之兄弟傳曰小功以下為兄弟【于此發兄弟傳者嫌大功以上又加也大功以上若皆在他國則親自親矣若不及知父母則固同財矣
本經記】

從父姊妹【父之昆弟之女】

孫適人者【孫者子之子女孫在室亦大功也】

為人後者為其姊妹適人者【不言姑者舉其親者而恩輕者降可知】為外祖父母

傳曰何以小功也以尊加也為所後者妻之父母若子【詳見斬衰章為人後者條】

記庶子為後者為其外祖父母從母舅無服不為後如邦人【本經記】

為母之君母卒則不服【母之君母外祖適母徒从也所从亡則已小記】傳曰母出則為繼母之黨服母死則為其母之黨服為其母之黨服則不為繼母之黨服【雖外親亦無二統服問此條本章从母總章舅舅之子通用】

出妻之子為外祖父母無服【詳見齊衰杖期章出妻之子為母條】

為慈母之父母無服【恩不相及小記】

從母丈夫婦人報【从母母之姊妹】

傳曰何以小功也以名加也外親之服皆總也【外親異姓正服不過總丈夫婦人姊妹之子男女同外祖父母條母出則為繼母之黨服此條通用當互考】記庶子為後者為其從母無服不為後如邦人【詳見上條】夫之所為兄弟服妻降一等【疏曰妻從夫服其族親即上經夫之諸祖】

【父母見于總麻章夫之世叔見于大功章夫之昆弟之子不降嫂叔又無服今言从夫降一等記其不見者當是夫之从母之類乎本經記】

夫之姑姊妹娣姒婦報【夫之姑姊妹不殊在室及嫁者因恩輕略从降妾服見大功章大夫之妾為君庶子條】

傳曰娣姒婦者弟長也何以小功也以為相與居室中則生小功之親焉【娣姒婦者兄弟之妻相名也長婦謂釋婦為娣婦娣婦謂長婦為姒婦】

大夫大夫之子公之昆弟為從父昆弟庶孫姑姊妹女子子適士者【从父昆弟及庶孫亦謂為士者】

記大夫公之昆弟大夫之子于兄弟降一等【詳見大功章大夫為昆弟為士者條】

大夫之妾為庶子適人者【君之庶子女子子也庶女子子在室大功其嫁于大夫亦大功】

庶婦【夫將不受重者】

記適婦不為舅後者則姑為之小功【詳見大功章適婦條】

君母之父母從母【君母父之適妻也从母君母之姊妹】

傳曰何以小功也君母在則不敢不從服君母不在則不服【不敢不服者恩實輕也凡庶子為君母如適子】記為君母後者君母卒則不為君母之黨服【徒从也所从亡則已小記】

君子子為庶母慈已者【君子子者大夫及公子之適妻子】

傳曰君子子者貴人之子也為庶母何以小功也以慈已加也【云君子子者則父在也父沒則不服之矣以慈已加則君子子亦以士禮為庶母總也內則曰異為孺子室于宮中擇于諸母與可者必求其寬裕慈惠溫良恭敬慎而寡言者使為子師其次為慈母其次為保母皆居子室他人無事不往又曰大夫之子有食母庶母慈已者此之謂也其不慈已則總可矣不言師保慈母居中服之可知也國君世子生卜士之妻大夫之妾使食子三年而出見于公宮則劬非慈母也士之妻自養其子】

右小功正服五月

總麻三月者【總麻布衰裳而麻經帶也不言衰經略輕服省文】

傳曰總者十五升抽其半有事其縷無事其布曰總【謂之總者治其縷細如總也或曰有絲朝服用布何衰用絲乎抽猶去也雜記曰總冠縹纓】記童子唯當室總【童子未冠之稱也當室者為父後承家事者為家主與族人為禮於有親者雖恩不至不可以無服也】傳曰不當室則無總服也【本經記】

童子無總服聽事不麻【為幼少不備禮也雖不服總猶免深衣無麻往給事也玉藻】童子不總唯當室總總者其免也當室則免而杖

矣【詳見喪服義】

族曾祖父母 族祖父母 族父母

族昆弟【族曾祖父者曾祖昆弟之親也族祖父者亦高祖之孫則高祖有服明矣】

庶孫之婦

庶孫之中殤【庶孫者成人大功其殤中从上此當為下殤言中殤者字之誤爾又諸言中者皆連上下也】

從祖姑姊妹適人者報

從祖父從祖昆弟之殤【不見中殤者中從下】

外孫【女子子之子】

從父昆弟姪之下殤

夫之叔父之中殤下殤【言中殤者中从下
妾服見大功章大夫之妾為君之庶子條】從母之長殤報

庶子為父後者為其母

傳曰何以總也傳曰與尊者為一體不敢服其私親也然則何以服總也有死于宮中者則為之三月不舉祭因是以服總也【君卒庶子為母大功大夫卒庶子為母三年士雖在庶子為母皆如衆人】

士為庶母

傳曰何以總也以名服也大夫以上為庶母無服

貴臣貴妾【此謂公士大夫之君也殊其臣妾貴賤而為之服貴臣室老士也貴妾姪娣也天子諸侯降其臣妾無服士卑無臣則士妾又賤不足殊有子則為之總無子則已】

傳曰何以總也以其貴也 記悼公之母死【母哀公之妾】哀公為之齊衰有若曰為妾齊衰禮與【譏而問之妾之貴者為之總耳】公曰吾得已乎哉魯人以妻我【言國人皆名之為我妻重服嬖妾文過非也檀弓】

乳母【謂養子者有他故賤者代之慈已】

傳曰何以總也以名服也

從祖昆弟之子【族父母為之服】

曾孫【孫之子】

父之姑【歸孫為祖父之姊妹】

從母昆弟

傳曰何以總也以名服也

【小功章為外祖父母條母出則為繼母之黨服此條通用當互考】

甥【姊妹之子】

傳曰甥者何也謂吾舅者吾謂之甥何以總也報之也

壻【女子子之夫也】

傳曰何以總報之也

妻之父母

傳曰何以總從服也【从于妻而服之】記有從重而輕為妻之父母【詳見喪服義】

世子不降妻之父母【詳見齊衰不杖期章大夫之適子為妻條】

有從有服而無服公子為其妻之父母【詳見喪服義】

姑之子【外兄弟也】

傳曰何以總報之也

舅【母之昆弟】

傳曰何以總從服也【从于母而服之】

小功章為外祖父母條母出則為繼母之黨服此條通用當互考】

為所後者之妻之昆弟若子【詳見斬衰章為人後者條】

記庶子為後者為其舅無服不為後如邦人【詳見小功章外祖父母條】

舅之子【內兄弟也】

傳曰何以總從服也【小功章為外祖父母條母出則為繼母之黨服此條通用當互考】

為所後者妻之昆弟之子若子【詳見斬衰章為人後者條】

夫之姑姊妹之長殤【妾服見大功章大夫之妾為君之庶子條】

夫之諸祖父母報【諸祖父母夫之所為小功从祖祖父母外祖父母或曰曾祖父母曾祖于曾孫之婦無服而云報乎曾祖父母正服小功妻从服總妾服見大功章大夫之妾為君之庶子條】君母之昆弟

傳曰何以總從服也【从于君母而服總也君母在則不敢不从服君母卒則不服也小功章

君母之父母條君母卒不為君母之黨服此條通用當互考】

從父昆弟之子之長殤

昆弟之孫之長殤

為夫之從父昆弟之妻

傳曰何以總也以為相與同室則生總之親焉長殤中殤降一等下殤降二等齊衰之殤中從上大功之殤中從下【同室者不如居室之親也衰齊大功皆明其成人也大功之殤中从下則小功之殤亦中从下也此主謂妻為夫之親服也凡不見者以此求之妾服見大功章大夫之妾為君之庶子條】右總麻三月

禮書綱目卷十八

卷十九

欽定四庫全書

禮書綱目卷十九 婺源江永撰

補服 凶禮二

補【黃氏曰補服有五有見本經傳記者有見它記者有見注疏者又有心喪有弔服悉類而分之以補經文之缺】

父卒為祖後者服斬【詳見不杖期章為君之父母妻長子祖父母條傳】

與諸侯為兄弟者服斬【喪服小記 見斬衰章君條下】

女為父喪未練而出則三年既練而出則已既練而反則遂之【小記

詳見斬衰章子嫁反在父之室為父三年條下

又案不杖期章為君之父母妻長子祖父母疏云天子諸侯父在為祖皆斬衰無期

又云為曾祖後者服斬 斬衰章子嫁反在父之室疏云天子之女嫁于諸侯諸侯之女嫁于大

夫仍為父不降斬衰三年 斬衰章諸侯為天子條下為天王斬衰疏云諸侯諸臣皆為王斬衰

又斬衰章君條下與諸侯為兄弟者服斬疏云凡與諸侯有五屬之親者皆服斬衰諸侯之尊

不可以本親輕服服之又不杖章為君之父母妻長子祖父母條下為王后齊衰疏云士為國

君斬衰 又云大夫之適子為君如士服斬衰 又云天子卿大夫適子為天子當如士服斬衰】

右補斬衰

祖父卒而後為祖母後者三年【小記 詳見不杖章祖父母條】

為所後者之妻若子【詳見斬衰章為人後者傳】 女為母喪未練而出則三年既練而出則

已既練而反則遂之【詳見斬衰章又按不杖期章祖父母條祖父卒而后為祖母後者三年

疏云若祖卒時父在已雖為祖期今父歿祖母亡亦為祖母三年總麻章庶子為父後者為其

母傳注云大夫卒庶子為母三年 又云士雖在庶子為母皆如衆人

斬衰章子嫁反在父之室疏云天子之女嫁于諸侯諸侯之女嫁于大夫仍為母齊衰三年】

右補齊衰三年

為所後者之妻若子【詳見斬衰章為人後者傳 又案不杖章祖父母條下祖父卒而後為祖
母後者三年注云祖父在適孫為祖母服如父在為母齊衰杖期

不杖章大夫之適子為妻注云大夫之庶子為妻杖期 又云大夫之適子父沒後為妻杖期】

右補齊衰杖期

司服凡喪為王后齊衰【王后小君也諸侯為之不杖期 春官】
君為天子三年夫人如外宗之為君也【詳見斬衰章諸侯為天子條】
外宗為君夫人猶內宗也【見斬衰章君條】
大夫之適子為君夫人大子如士服【見斬衰章君條】
女未練而反則期【詳見斬衰章子嫁反在父之室為父三年條】
世子為妻與大夫之適子同【見不杖期章大夫之適子為妻條】
公子之妻為其皇姑【詳見喪服義 又不杖期章世父父母叔父父母傳注及昆弟注並云為姑姊妹在室亦如之為衆子注云女子子在室亦如之黃氏曰姑姊妹女子子服經無明文見于注疏者有此三條蓋姪之為姑兄弟之為姊妹父母之為女子子其服如此則在室姑之為姪在室姊妹之為兄弟在室女子子之為父母及其餘親其服並當與男子服同
齊衰杖期妻傳注云適子父在則為妻不杖
王為適孫適曾孫適玄孫適來孫皆齊衰出司服注疏 又案喪服傳云始封之君不臣諸父昆弟封君之子不臣諸父而臣昆弟天子之義亦當然若虞舜之與漢高皆庶人起為天子蓋亦不臣諸父昆弟而有服也
不杖章為君之父母妻長子祖父母條下為王后齊衰疏云諸侯諸臣皆為王后齊衰
又云士為小君期 又云大子君服斬臣从服期 又云大夫適子為夫人大子如士服期
又云天子卿大夫適子為王后大子如士服期 又斬衰章君條下與諸侯為兄弟者服斬疏云兄弟俱作諸侯則各依本服不杖期大功章大夫之妾為君之庶子注云士之妾為君之衆子亦期 大功章適婦條適婦不為舅後者注云凡父母于子將不傳重于適及將所傳重者非適服之皆如庶子不杖期】

右補齊衰不杖期

宗子孤為殤大功衰小功衰皆三月親則月算如邦人【詳見齊衰三月章丈夫婦人為宗子宗子之母妻條】 為所後者之祖父母若子【詳見斬衰章為人後者傳
又案齊衰三月章曾祖注疏云高祖齊衰三月
斬衰章君條外宗為君夫人猶內宗也疏云內宗五屬之女嫁于庶人从為國君齊衰三月 齊衰三月章庶人為國君注疏云天子圻內之民為天子齊衰三月又總衰章諸侯之大夫為天子疏云圻內為天子齊衰三月則圻外之民不服可知】

右補齊衰三月

夫為人後者其妻為舅姑大功【見齊衰不杖期章為人後者為其父母報條】 公叔木有同母異父之昆弟死問于子游【木當為朱春秋作戍】

【衛公叔文子之子定公十四年奔衛】 子游曰其大功乎【疑所服也親者屬大功是】 狄儀有同母異父之昆弟死問于子夏子夏曰我未之前聞也魯人則為之齊衰狄儀行齊衰今之齊衰狄儀之問也【檀弓】 齊穀王姬之喪【穀當為告聲之誤也王姬周女齊襄公之夫人】 魯莊公為之大功或曰由魯嫁故為之服姊妹之服或曰外祖母也故為之服【春秋周

女由魯嫁卒服之如內女服姊妹是也天子為之無服嫁于王者之後乃服之莊公齊襄公女弟文姜之子當為舅之妻非外祖母也外祖母又小功也 檀弓 又案不杖期章大夫之庶子為適昆弟傳注云大夫適子為庶昆弟大功又云庶昆弟相為亦大功
小功章大夫之妾為庶子適人者注云君之庶女子在室大功嫁于大夫亦大功
大功章皆為从父昆弟之為大夫者注云適子于从父昆弟之為大夫者大功
大功章庶孫注疏云女孫在室大功 又司服疏云天子諸侯為適子之婦大功】

右補大功

適婦不為舅後者則姑為之小功【見大功章適婦條】
為所後者妻之父母若子【詳見斬衰章為人後者傳 又案大功章適婦條下適婦不為舅後者注云舅姑于婦將不傳重于適及將所傳重者非適服之如庶婦小功
又司服疏云天子諸侯為適孫之婦小功】

右補小功

公子之妻為公子之外兄弟【謂為公子之外祖父母从母總
詳見喪服義】為所後者之妻之昆弟若子【詳見斬衰章為人後者傳】
為所後者之妻之昆弟之子若子【同上】 從母之夫舅之妻二夫人相為服君子未之言也
【二夫人猶言此二人也時有此二人同居死相為服者甥居外家而非之】或曰同爨總【
以同居生總之親可 檀弓】
士妾有子而為之總無子則已【士卑妾無男女則不服不別貴賤 小記】 改葬總【為坟墓
以他故崩壞將亡失屍柩也言改葬者明棺物毀敗改設之如葬時也其奠如大歛从廟之廟
从墓之墓禮宜同也服總者臣為君也子為父也妻為夫也必服總者親見屍柩不可以無服
總三月而除之 喪服記】 葬桓王改葬也改葬之禮總舉下緇也【總者五服最下言舉下緇
上从細皆反其故服因葬桓王記改葬之禮不謂改葬桓王當服總也江熙曰葬稱公舉五等
之上改葬禮總舉五服之下以喪緇藐遠天子諸侯易服而葬以為交于神明者不可以純凶
況其緇者乎是故改葬之禮其服惟輕言緇釋所以總也 莊三年春秋穀梁傳
又按喪服小記以五為九疏从父昆弟之孫總麻 又云兄弟之曾孫總麻
總麻章夫之諸祖父母報注疏云夫之从祖祖父母報總麻 又云夫之外祖父母報總麻 又案
凡言報者皆兩相為服以夫之外祖父母報推之則外祖父母為女子子之子之妻總麻又以
夫之从祖祖父母報推之則兄弟之孫婦總麻】

右補總

五世袒免【詳見喪服義】 族之相為也宜免不免有司罰之【詳見弔禮】

右補五世袒免

事師服勤至死心喪三年【心喪戚容如父而無服也凡此以恩義之間為制檀弓】師無當於五服五服弗得不親【當猶主也五服斬衰至總麻之親學記】孔子之喪門人疑所服子貢曰昔者夫子之喪顏淵

若喪子而無服喪子路亦然請喪夫子若喪父而無服【弔服而加麻心喪三年檀弓】孔子之喪二三子皆經而出【尊師也出謂有所之適然則凡弔服加麻者出則變服】羣居則經出則否【羣謂七十二弟子相為朋友服子夏曰吾離羣而索居檀弓】又案家語子游曰吾聞諸夫子喪朋友居則經出則否喪所尊雖經而出可也【孔子沒三年之外門人治任將歸入揖于子貢相嚮而哭皆失聲然後歸子貢反築室于場獨居三年然後歸【三年古者為師心喪三年若喪父而無服也任擔也場冢上之壇場也孟子】孔子葬于魯城北弟子皆家于墓行心喪之禮【家語】又案齊衰杖期章父在為母傳疏云父在為母杖期心喪三年】

右補心喪三年

無服而為位者唯嫂叔及婦人降而無服者麻【雖無服猶弔服加麻袒免為位哭也正言嫂叔尊嫂也兄之于弟之妻則不能也婦人降而無服族姑姊妹嫁者也逸奔喪禮曰無服袒免為位者唯嫂與叔凡為其男子服其婦人降而無服者麻奔喪】傳曰夫之昆弟何以無服也其夫屬乎父道者妻皆母道也其夫屬乎子道者妻皆婦道也謂弟之妻婦者是嫂亦可謂之母乎故名者人治之大者也可無慎乎【詳見大功夫之祖父母世叔父母條】嫂叔之無服也蓋推而遠之也【見喪服義】朋友麻【朋友雖無親有同道之恩相為服總之經帶檀弓曰羣居則經出則否其服弔服也周禮曰凡弔當事則弁經其服有三錫衰也總衰也疑衰也王為三公六卿錫衰為諸侯總衰為大夫士疑衰諸侯及卿大夫亦以錫衰為弔服當事則弁經否則皮弁辟天子也士以總衰為喪服其弔服則疑衰也舊說以為士弔服布上素下或曰素委貌冠加朝服論語緇衣羔裘又曰羔裘玄冠不以弔何朝服之有乎然則二者皆有似也此實疑衰也其弁經皮弁之時則如卿大夫然又改其裳以素辟諸侯也朋友之相為服即士弔服疑衰素裳庶人不爵弁則其冠素委貌喪服篇記】秦莊子死孟武伯問于孔子曰古者同寮有服乎荅曰然同寮有相友之義貴賤殊等不為同官聞諸老聃昔者號叔閔夭太顛散宜生南宮适五臣同寮比德以贊文武號叔死四人者為之服朋友之服古之達禮者行之也【孔叢子】朋友皆在他邦袒免歸則已【謂無親者當為之主每至袒時則袒袒則去冠代之以免舊說云以為免象冠廣一寸已猶止也歸有主則止也主若幼少則未止小記曰大功者主人之喪有三年者則必為之再祭朋友虞祔而已喪服記】又案斬衰章君傳疏云士無臣故僕隸等為之弔服加麻】

右補弔服加麻

司服凡弔事弁經服【弁經者如爵弁而素加環經論語曰羔裘玄冠不以弔經大如總之經其服錫衰總衰疑衰諸侯及卿大夫亦以錫衰為弔服喪服小記曰諸侯弔必皮弁錫衰則變其冠耳喪服舊說以為士弔服素委貌冠朝服此近庶人弔服而衣猶非也士當事弁經疑衰

變其裳以素耳國君于其臣弁經他國之臣則皮弁大夫士有朋友之恩亦弁經故書弁作鄭司農讀 為弁弁而加環經即弁經服春官】 弁師王之弁經弁而加環經諸侯及孤卿大夫之弁經各以其等為之而掌其禁令【詳見制度】 凡弁經其衰侈袂【同上】 司服王為三公六卿錫衰為諸侯總衰為大夫士疑衰其首服皆弁經【同上】 天子之哭諸侯也爵弁經紵衣【服士之祭服以哭之明為變也天子至尊不見尸柩不弔服麻不加于采此言經衍字也時人間有弁經因云之耳周禮王弔諸侯弁經總衰也 檀弓】 公為卿大夫錫衰以居出亦如之當事則弁經大夫相為亦然為其妻往則服之出則否【弁經如爵弁而素加經也不當事則皮弁出謂以他事不至喪所 服問】 諸侯弔必皮弁錫衰所弔雖已葬主人必免主人未喪服則君亦不錫衰【必免者尊人君為之變也未喪服未成服也既殯成服小記】 大夫有私喪之葛則于其兄弟之輕喪則弁經【私喪妻子之喪也輕喪總麻也大夫降焉弔服而往不以私喪之末臨兄弟 雜記】 大夫之哭大夫弁經大夫與殯亦弁經【弁經者大夫錫衰相弔之服也如爵弁而素加環經曰弁經 同上】 大夫弔于命婦錫衰命婦弔于大夫亦錫衰【弔于命婦命婦死也弔于大夫大夫死也小記曰諸侯弔必皮弁錫衰服問曰公為卿大夫錫衰以居出亦如之當事則弁經大夫相為亦然為其妻往則服之出則否】 傳曰錫者何也麻之有錫者也錫者十五升抽其半無事其縷有事其布曰錫【謂之錫者治其布使之滑易也錫者不治其縷衰在內也總者不治其布衰在外也君及卿大夫弔士雖當事皮弁錫衰而已士之相弔則如服友服疑衰素裳凡婦人相弔吉弁無首素總 喪服記】 羔裘玄冠不以弔【喪主素吉主玄吉凶異服論語】 季桓子死魯大夫朝服而弔子游問于孔子曰禮乎夫子不荅他日又問夫子曰始死羔裘玄冠者易之而已汝何疑焉【家語】 曾子襲裘而弔子游楊裘而弔曾子指子游而示人曰夫夫也為習于禮者如之何其楊裘而弔也【曾子蓋知臨喪無飾夫夫猶言此丈夫也子游于時名為習禮】 主人既小斂袒括髮子游趨而出襲裘帶經而入曾子曰我過矣我過矣夫夫是也【于主人變乃變也所弔者朋友 檀弓】 衛司徒敬子死【司徒官氏公子許之後】 子夏弔焉主人未小斂經而往子游弔焉主人既小斂子游出經反哭【皆以朋友之禮往而二人異】 子夏曰聞之也與曰聞諸夫子主人未改服則不經【同上】 魯昭公夫人吳孟子已卒不赴于諸侯孔子既致仕而往弔焉適于季氏季氏不經孔子投經而不拜【以季氏無禮故已亦不成禮】 子游問曰禮與孔子曰主人未成服則弔者不經焉禮也【家語】 又案春秋左氏傳云孔子與弔適季氏季氏不綰放經而拜】 魯婦人之髻而弔也自敗于臺鮐始也【敗于臺鮐魯襄公四年秋也臺當為壺字之誤也春秋傳作狐鮐時家家有喪髻而相弔去纚而紒曰髻禮婦人弔服大夫之妻錫衰士之妻則疑衰與皆吉笄無首素總 檀弓】

右補弔服

禮書綱目卷十九

卷二十

<經部,禮類,通禮之屬,禮書綱目

欽定四庫全書

禮書綱目卷二十 婺源江永撰

喪服變除 凶禮三

補

疾病男女改服【為賓客來問病赤朝服也庶人深衣 喪大記】 養有疾者不喪服遂以主其喪【不喪服求生主吉惡其凶也遂以主其喪謂養者有親也死則當為之主其為主之服如素無喪服】非養者入主人之喪則不易已之喪服【入猶來也謂養者無親于死者不得為主其有親來為主者素有喪服而來為主與素無服者異素無服素有服為今死者當服則皆三日成也】養尊者必易服養卑者否【尊謂父兄卑謂子弟之屬喪服小記】

右疾病改服

親始死雞斯徒跣扱上衽交手哭【親父母也雞斯當為笄纚親始死去冠三日乃去笄纚括髮也徒猶空也上衽深衣之裳前 問喪】 夫子曰始死羔裘玄冠者易之而已【檀弓】 曾子問曰親近女在塗而壻之父母死如之何孔子曰女改服布深衣縞總以趨喪【布深衣縞總婦人始喪未成服之服 曾子問】

巾車王之喪車木車蒲蔽犬 尾囊疏飾小服皆疏【詳見制度】

右始死變服

主人出南面左袒扱諸面之右實米唯盈【取滿而已】 主人襲反位【襲復衣也位在尸東士喪服禮上】

右飯含變服

小斂環經公大夫士一也【雜記詳見喪服制度】 小斂卒斂主人馮之踊主婦亦如之主人袒說髦括髮以麻婦人髻帶麻于房中【士既殯說髦此云小斂蓋諸侯禮也士之既殯諸侯之小斂于死者俱三日也婦人之髻帶麻于房中則西房也天子諸侯有左右房 同上】 卒斂馮尸主人髻髮袒衆主人免于房【始死將斬衰者雞斯將齊衰者素冠今至小斂變髻髮者去笄纚而紛衆主人免者齊衰將袒以免代冠】 婦人髻于室【始死婦人將斬衰者去笄而

纚將齊衰者骨笄而纚今言髻者亦去笄纚而紒也齊衰以上至笄猶髻
士喪禮上】既馮尸主人絞帶衆主人布帶【衆主人齊衰以下 士喪記】
動尸舉柩袒而踊婦人不宜袒【詳見喪禮義】

右小斂變服 叔孫武叔之母死【武叔公子牙之六世孫名州仇毀孔子者】既小斂舉者出
尸出戶袒且投其冠括髮【尸出戶乃變服失哀節冠素委貌】子游曰知禮【啗之檀弓】

男女奉尸俛于堂降拜賓主人即位襲帶經踊【即位阼階之下位也有襲經乃踊尊卑相變
也】母之喪即位而免【記異者禮斬衰括髮齊衰免以至成服而冠為母重初亦括髮既小
斂則免】乃奠【小斂奠也喪大記】動尸舉柩袒而踊【詳見小斂條】
大功以上散帶【小功總輕初而絞之 雜記】
士舉男女奉尸俛于堂主人拜賓即位襲經于序東乃奠【士喪禮上】

右奉尸俛于堂變服

君將大斂子弁經即位于序端【子弁經者未成服弁如爵弁而素大夫之喪子亦弁經喪大
記】主人及親者袒【袒大斂變也不言髻免括髮小斂以來自若矣】卒塗主人復位襲乃
奠【士喪禮上】凡斂者袒遷尸者襲【見小斂章】動尸舉柩袒而踊【同上】
君若視斂主人及衆主人袒

卒塗卒奠君出門主人拜送襲入即位衆主人襲【士喪禮上】既殯主人說髦【既殯置銘
于埧復位時也今文說作稅兒生三月鬻髮為髻男角女羈否】

【則男在女右長大猶為飾存之謂之髦所以順父母幼小之心至此尸柩不見喪無飾可以
去之髦之形象未聞 士喪記】

右大斂殯變服

天子崩三日祝先服【祝佐含斂先病】五日官長服【官長大夫士】七日國中男女服【
庶人】三月天下服【諸侯之大夫 檀弓】
三日授子杖五日授大夫杖七日授士杖【喪服四制】君之喪三日子夫人杖五日既殯授
大夫世婦杖【三日者死之後三日也為君杖不同日人君禮大可以見親疏也】大夫之喪
三日之朝既殯主人主婦室老皆杖士之喪二日而殯三日之朝主人杖婦人皆杖【士之禮
死與往日生與來日此二日于死者亦得三日也婦人杖謂主婦容妾為君女子子之在室者
喪大記】三日成服杖【既殯之明日全三日 士喪禮上】
三日絞垂【成服日絞要經之散垂者士喪記】

右成服

大夫卜宅與葬日有司麻衣布衰布帶因喪屨緇布冠不蕤占者皮弁【有司卜人也麻衣白布深衣而著衰焉及布帶緇布冠此服非純吉亦非純凶也皮弁則純吉之尤者也占者尊于有司卜求吉其服彌吉大夫士朔服皮弁】如筮則史練冠長衣以筮占者朝服【筮者筮宅也謂下大夫若士也筮史筮人也長衣深衣之純以素也長衣練冠純凶服也朝服純吉服也大夫士日朝服以朝也 雜記】 筮宅主人皆往兆南北面免經【兆域也所營之處免經者求吉不敢純凶】 卒筮主人經【士喪禮上】 聽卜有事于尸則去杖【喪大記】

右筮宅卜日變服

丈夫髻散帶垂【為將啟變也此互文以相見耳喪服小記曰男子免而婦人髻士喪禮下】 主人袒啟遷于祖正柩主人襲【同上】 主人袒乃載卒

束襲【袒為載變也 同上】 袒【為將祖變】 商祝御柩乃祖襲【同上】

公贈主人及衆主人袒【尊君命也】 賓出主人送于門外襲【同上】

主人袒乃行【袒為行變也乃行謂柩車行也】 出宮襲【同上】

動尸舉柩袒踊【見小斂章】 非從柩與反哭無免于壙【言喪服出入非此二事皆冠也免所以代冠人子道路不可無飾壙道路 雜記】

右啟殯朝祖柩行變服

屬引主人袒乃窆主人襲贈用制幣玄纁卒袒拜賓襲【士喪禮下】 為兄弟既除喪已及其葬也反服其服【詳見虞變服章】 實土主人拜鄉人襲如初【士喪禮下】 非從柩與反哭無

免于壙【見上柩行章】 遠葬者比反哭者皆冠及郊而後免反哭【墓在四郊之外 小記】

右葬及反哭變服 弁經葛而葬【接神之道不可以純凶天子諸侯變服而葬冠素弁以葛為環經既虞卒哭乃服受服也雜記曰凡弁經其衰侈袂】 周人弁而葬殷人髻而葬【周弁殷髻俱象祭冠而素禮同也 詳見喪禮義】 子墨衰經敗秦師于殽【以凶服從戎故墨之】 遂墨以葬文公晉於是始墨【後遂常以為俗記禮所由變 僖三十三年左氏傳】 魯莊公之喪既葬而經不入庫門【時子般弑慶父作亂閔公不敢居喪葬已吉服而反正君臣欲以防遏之微弱之至】 士大夫既卒哭麻不入【麻猶經也羣臣畢虞卒哭亦除喪也閔公既吉服不與虞卒哭 檀弓】 葬晉悼公【踰月而葬速也】 平公即位【平公悼公子彪】 改服修官烝于曲沃【既葬改葬服曲沃晉祖廟烝冬祭也諸侯五月而葬既葬卒哭作主然後烝嘗于廟今晉踰月葬作主而烝祭傳言晉將有湟梁之會故速葬 襄十六年左氏傳】 王太子壽卒穆后崩既葬除喪以文伯宴叔向曰王一歲而有三年之喪二焉于是乎以喪賓宴樂憂甚矣且非禮也三年之喪雖貴遂服禮也【詳見喪通禮衰戚章】

主人及兄弟如葬服賓執事者如弔服【葬服者既夕曰丈夫髻散垂帶也】 祝免澡葛經帶

布席于室中【澡治也治葛以為首經及帶接神宜也然則士之屬官為其長弔服加麻矣至于既卒哭主人變服則除】主人倚杖入祝近尸一人衰經奉篚哭從尸【一人主人兄弟士虞禮】虞杖不入于室【詳見士虞禮】總小功虞卒哭則免【棺柩已藏嫌恩輕可以不免也言則免者則既殯先啟之間雖有事不免】既葬而不報虞則雖主人皆冠及虞則皆免【有故不得祭虞雖主人皆冠不可久無飾也皆免自主人至總麻】為兄弟既除喪已及其葬也反服其服報虞卒哭則免如不報虞則除之【小功以下小記】有事于尸則去杖【喪大記】

右虞變服

卒哭獻畢乃餞賓出丈夫說經帶于廟門外【既卒哭當變麻受之以葛也夕日則服葛者為祔期今文說為稅】婦人說首經不說帶【不說帶齊斬婦人帶不變也婦人少變而重帶帶下體之上也大功小功者葛帶亦不說者未可以輕文變于主婦之質至祔葛帶以即位士虞記】斬衰三升既虞卒哭受以成布六升冠七升【間傳】衰三升三升有半其冠六升以其冠為受受冠七升【詳見喪服制義】去麻服葛葛帶三重【葛帶三重謂男子也五分去一而四糾之帶輕既變因為飾也婦人葛經不葛帶舊說云三三糾之練而帶去一股去一股則小于小功之經似非也間傳】婦人不葛帶【婦人質不變重者至期除之卒哭變經而已檀弓】婦人

葛經而麻帶【謂既虞卒哭也帶所以自結束也婦人質少變于喪之帶有除而無變少儀】斬衰絞帶【疏曰經帶至虞後變麻服葛絞帶虞後雖不言所變案公士衆臣為君服布帶又齊衰以下亦布帶則絞帶虞後變麻服布于義可也喪服本章】

為母疏衰四升受以成布七升冠八升【間傳】

齊衰四升其冠七升以其冠為受受冠八升【詳見制度】

齊衰大功冠其受也帶緣各視其冠【詳見喪服杖期章】女子子適人者為其父母卒哭子折筭首以筭布總傳曰折筭首者折吉筭之首也吉筭者象筭也何以言子折筭首而不言婦終之也【有首者若今時刻鏤摘頭矣卒哭而喪之大事畢女子子可以歸于夫家而著吉筭折其首者為其大飾也詳見喪服】大功三月受以小功衰即葛九月者傳曰大功布九升小功布十一升【此受之下也以發傳者明受盡于此也又受麻經以葛經間傳曰大功之葛與小功之麻同凡天子諸侯卿大夫既虞士卒哭而受服正言三月者天子諸侯無大功主于大夫士也喪服本章】

大功八升若九升小功十升若十一升【不言七升者主于受服欲其文相值詳見制度】

小功即葛五月【即就也小功輕三月變麻因故衰以就葛經帶而五月也】

【間傳曰小功之葛與總之麻同】

右既虞卒哭受服

總小功卒哭則免報虞卒哭則免【詳見虞變服章】

大夫士既卒哭弁經帶金革之事無辟也【詳見喪通禮動作章】
巾車王之喪車素車芴蔽犬 素飾小服皆素【詳見制度】

右卒哭變服

總衰既葬除之【喪服本章】 公子為其母麻衣為其妻麻衣皆既葬除之【詳見喪服】
既葬各以其服除【卒哭當變衰麻者變之或有除者不視主人 檀弓】

右既葬除服

不杖麻屨【喪服本章】 疏衰無受【無受者服是服而除不以輕服受之】 大功無受傳曰
何以大功也未成人也何以無受也喪成人者其文縵喪未成人者其文不縵故殤之經不縵
垂蓋未成人也【縵猶數也其文數者謂變除之節也】 其長殤皆九月其中殤皆七月
大功即葛九月 小功五月 小功即葛五月 總麻三月【已上喪服】
九月七月之喪三時也五月之喪二時也三月之喪一時也【言喪之節應歲時之氣 小記】
除殤之喪者其祭也必玄【殤無變文不縵玄冠玄端黃裳而祭不朝服未純吉也于成人為
釋禫之服】 除成喪者其祭也朝服縞冠【成成人也縞冠未純吉祭服也既祥祭乃素縞麻
衣同上】 雖諸父昆弟之喪如當父母之喪其除諸父昆弟之喪也皆服其除喪之服卒事反
喪服【雖有親之大喪猶為輕服者除骨肉之恩也唯君之喪不除私服言當者期大功之喪
或終始皆在三年之中小功總麻則不除殤長中乃除雜記】
兄弟之喪內除【詳見大祥除服章】

右不杖以下各以月數除服 閏月葬齊景公閏不書此何以書【據楚子昭卒不書閏】 喪以
閏數也【謂喪服大功以下諸喪當以閏月為數】 喪曷為以閏數【據卒不書閏】 喪數略
也【略猶殺也以月數恩殺故并閏數哀五年春秋公羊傳】

祔杖不升于堂【詳見士虞禮】

有父母之喪尚功衰而祔兄弟之殤則練冠附于殤【詳見並有喪服章】

右祔變服

練筮日筮尸視濯皆要經杖繩屨有司告具而后去杖筮日筮尸有司告事畢而后杖拜送賓
【臨事去杖敬也濯謂溉祭器也 小記】

右練筮日筮尸變服

父母之喪十三月而練冠【喪服四制】 期之喪十一月而練【此謂父在為母也 雜記】
練練衣黃裏縗緣【小祥練冠練中衣以黃為內縗為飾黃之色卑于纁縗纁之類明外除】
葛要經繩屨無絢角瑱【瑱充耳也吉時以玉人君有瑱】 鹿裘衡長祛【衡當為橫字之誤

也祛謂袞緣袂口也練而為袞橫廣之又長之又為祛則先時狹短無祛可知吉時麤袞【祛
裼之可也【裼表袞也有祛而裼之備飾也玉藻曰麤袞青豸袞絞衣以裼之鹿袞亦用絞乎
檀弓】期而小祥練冠繅緣要經不除男子除乎首婦人除乎帶男子何為除乎首也婦人何
為除乎帶也男子重首婦人重帶除服者先重者易服者易輕者【婦人重帶帶在下體之上
婦人重之辟男子也其為帶猶五分經去一耳 間傳】

三年之練冠亦條屬右縫【詳見制度】布總箭筈髻衰三年【喪服】齊衰帶惡筓以終喪
【筓所以卷髮帶所以持身婦人質于喪所以自卷持者有除無變小記】

疏衰杖期【喪服】再期之喪三年也期之喪二年也故期而祭禮也期而除喪道也祭不為
除喪也【此謂練祭也禮正月存親親亡至今而期期則宜祭期天道一變哀惻之情益衰衰
則宜除不相為也 小記】

縞冠玄武子姓之冠也【謂父有喪服子為之不純吉也武冠卷也古者冠卷殊 玉藻】

巾車王之喪車藻車藻蔽鹿淺褊革飾【詳見制度】

右練受服除服 季桓子喪康子練而無衰子游問于孔子曰既服練服可以除衰乎孔子曰無
衰衣者不以見賓何以除焉【家語】古者臣有大喪則君三年不呼其門【重奪孝子之恩
也禮父母之喪三年不从政齊衰大功之喪三月不从政故孔子曰夏后氏三年之喪既殯而
致事殷人既葬而致事周人卒哭而致事故君子不奪人之親亦不可奪親也】已練可以弁
冕【此說時衰正失非謂禮當然弁禮所謂皮弁爵弁皮弁武冠爵弁文冠夏曰收殷曰晳周
曰弁加旒曰冕主所以入宗廟】服金革之事【謂以兵事使之】君使之非也【非古道也
】臣行之禮也【臣順君命亦禮也】閔子【閔子騫以孝聞】要經而服事【禮已練男子
除乎首婦人除乎帶】既而曰若此乎古之道不即人心【既事畢言古者不敢斥君即近也
】退而致事【退退身也致仕還祿位于君】孔子蓋善之也【善其服事外得事君之義致
仕內不失親親之恩 宣元年公羊傳】

大祥吉服而筮尸【凡變除者必服其吉服以即祭事不以凶臨吉也 間傳曰大祥素縞麻衣
小記】

右大祥筮尸變服

父母之喪三年而祥【喪服四制】期之喪十三月而祥【此謂父在為母也 雜記】祥主人
之除也于夕為期朝服祥因其故服【為期為祭期也朝服以期至明日而祥祭亦朝服始即
吉正祭服也喪服小記曰除成喪者其祭也朝服縞冠是也祭酒縞冠未純吉也既祭乃服大
祥素縞麻衣釋禫之禮云玄衣黃裳則是禫祭玄冠矣黃裳者未大吉也既祭乃服禫服朝服
綬冠踰月吉祭乃玄冠朝服既祭玄端而居復平常也 雜記】祥而縞【縞冠素紕也檀弓】
縞冠素紕既祥之冠也【紕緣邊也紕讀為埤益之埤既祥之冠也已祥祭而服之也 間傳曰
大祥素縞麻衣 玉藻】又期而大祥素縞麻衣【喪服小記除成喪者其祭也朝服縞冠此素
縞者玉藻所云縞冠素紕既祥之冠麻衣十五升布深衣也謂之麻者純用布無采飾也大祥
除衰杖 間傳】弃杖者斷而弃之於隱者【杖以喪至尊為人得而褻之也 喪大記】三年
之喪二十五月而畢【詳見喪服義】親喪外除【日月已竟而哀未忘】兄弟之喪內除【

日月未竟而哀已殺 雜記】有父之喪如未沒喪而母死其除父之喪也服其除服卒事反喪服【沒猶竟也除服謂祥祭之服也卒事既祭反喪服服後死者之服 同上】曾子問曰大夫士有私喪可以除之矣而有君服焉其除之也如之何孔子曰有君喪服於身不敢私服又何除焉於是乎有過時而弗除也君之喪服除而後殷祭禮也曾子問曰父母之喪弗除可乎孔子曰先王制禮過時弗舉禮也非弗能勿除也患其過于制也故君子過時不祭禮也【詳見喪變禮並有喪章】巾車王之喪車駟車翟蔽然 髻飾【詳見喪服制度】

右大祥除服 素冠刺不能三年也【詩序】庶見素冠兮棘人欒欒兮勞心博博兮【賦也庶幸也縞冠素紕既祥之冠也黑經白緯曰縞緣邊曰紕棘急也喪事欲其總總耳哀遽之狀也欒欒瘠貌博博憂勞之貌 祥冠祥則冠之禫則除之今人皆不能行三年之喪矣安得見此服乎當時賢者庶幾見之至于憂勞也】庶見素衣兮我心傷悲兮聊與子同歸兮【賦也素冠則素衣矣與子同歸愛慕之辭也】庶見素韠兮我心蘊結兮聊與子如一兮【賦也韠蔽膝也以韋為之冕服謂之韍其餘曰韠韠从裳色素衣素裳則素韠也蘊結思之不解也與子如一甚于同歸矣 檜風】有子蓋既祥而絲履組纓【其早也禮既祥白屨無絢縞冠素紕 檀弓】

中月而禫【自喪至此凡二十七月 士虞記】期之喪十五月而禫【此謂父在為母也 雜記】中月而禫禫而織無所不佩【黑經白緯曰織舊說織冠者采纓也無所不佩紛帨之屬如平常也織或作綬 問傳】巾車王之喪車 車藩蔽豸 雀飾【詳見制度】

右禫易服 惟三祀十有二月朔【湯以元年十一月崩至此二十六月三年服闋】伊尹以冕服奉嗣王歸于亳【冕冠也踰月即吉服 書太甲】

孤子當室冠衣不純采【早喪親雖除喪不忘哀也謂年未三十者三十壯有室有代親之端不為孤也當室適子也深衣曰孤子衣純以素 曲禮】
孤子衣純以素【三十以下無父稱孤深衣】

右既孤易服

曾子問曰父母之喪既引及塗聞君薨如之何孔子曰遂既封改服而往【封亦當為窆改服括髮徒跣布深衣扱上衽不以私喪包至尊
曾子問】父母之喪偕先葬者不虞祔待後事其葬服斬衰【偕俱】

【也謂同月若同日死也先葬者母也曾子問曰葬先輕而後重又曰反葬奠而後辭于殯遂修葬事其虞也先重而後輕待後事謂如此也其葬服斬衰者喪之隆哀宜从重也假令父死在前月而同月葬猶服斬衰不葬不變服也言其葬服斬衰則虞祔各以其服矣及練祥皆然卒事反服重 小記】除服者先重者易服者易輕者【易服謂為後喪所變也】斬衰之喪既虞卒哭遭齊衰之喪輕者包重者特【說所以易輕者之義也既虞卒哭謂齊衰可易斬衰之節也輕者可施于卑服齊衰之麻以包斬衰之葛謂男子帶婦人經也重者宜主于尊謂男子

之經婦人之帶特其葛不變之也此言包特者明于卑可以兩施而尊者不可貳】既練遭大功之喪麻葛重【此言大功可易斬服之節也斬衰已練男子除經而帶獨存婦人除帶而經獨存謂之單單獨也遭大功之喪男子有麻經婦人有麻帶又皆易其輕者以麻謂之重麻既虞卒哭男子帶其故葛帶經期之葛經婦人經其故葛帶期之葛帶謂之重葛】齊衰之喪既虞卒哭遭大功之喪麻葛兼服之【此言大功可易齊衰期服之節也兼猶兩也不言包特而兩言者包特著其義兼者明有經有帶耳不言重者三年之喪既練或無經或無帶言重者以明今皆有期以下固皆有矣兩者有麻有葛耳葛者亦特其重麻者亦包其輕】斬衰之葛與齊衰之麻同齊衰之葛與大功之麻同大功之葛與小功之麻同小功之葛與緦之麻同麻同則兼服之【此章言有上服既虞卒哭遭下服之差也唯大功有變三年既練之服小功以下則于上皆無易焉此言大功之葛與小功之麻同小功之葛與緦之麻同主為大功之殯長中言之】兼服之服重者則易輕者也【服重者謂特之也則者則男子與婦人也凡下服虞卒哭男子反其故葛帶婦人反其故葛經其上服除則固自受以下服之受矣 間傳】除喪者先重者【謂練男子除乎首婦人除乎帶】易服者易輕者【謂大喪既虞卒哭而遭小喪也其易喪服男子易乎帶婦人易乎首 小記】斬衰之葛與齊衰之麻同【經之大俱七寸五分寸之一帶五寸二十五分寸之十九】齊衰之葛與大功之麻同【經之大俱五寸二十五分寸之十九帶四寸百二十五分寸之七十六】麻葛皆兼服之【皆者皆上二事也兼服之謂服麻又服葛也男子則經上服之葛帶下服之麻婦人則經下服之麻固自帶其故帶也所謂易服易輕者也兼服之文主于男子 同上】

麻之有本者變三年之葛【有本謂大功以上也小功以下澡麻斷本 服問】殯長中變三年之葛終殯之月算而反三年之葛是非重麻為其無卒哭之稅下殯則否【謂大功之親為殯在緦小功者也可以變三年之葛正親親也三年之葛大功變既練齊衰變既虞卒哭凡喪卒哭受麻以葛殯以麻終喪之月數非重之而不變為殯未成人文不縵耳下殯則否言賤也男子為大功之殯中从上服小功婦人為之中从下服緦麻 同上】大夫有私喪之葛則于其兄弟之輕喪則弁經【私喪妻子之喪也輕喪緦麻也大夫降焉弔服而往不以私喪之末臨兄弟 雜記】

三年之喪雖功衰不弔自諸侯達諸士如有服而將往哭之則服其服而往【詳見弔禮】有三年之練冠則以大功之麻易之唯杖屨不易【謂既練而遭大功之喪者也練除首經要經葛又不如大功之麻重也言練冠易麻互言之也唯杖屨不易言其餘皆易也屨不易者練與大功俱用繩耳 雜記】既練遇麻斷本者于免經之既免去經每可以經必經既經則去之【雖無變緣練無首經有事則免經如其倫免無不經經有不免其無事則自若練服也】小功不易喪之練冠如免則經其緦小功之經因其初葛帶緦之麻不變小功之葛小功之麻不變大功之葛以有本為稅【稅亦變易也小功以下之麻雖與上葛同猶不變也此要其麻有本者乃變上耳 雜記曰有三年之練冠則以大功之麻易之唯杖屨不易也

服問】三年之喪既練矣有期之喪既葬矣則帶其故葛帶

經期之經服其功衰【帶其故葛帶者三年既練期既葬差相似也經期之葛經三年既練首經除矣為父既練衰七升母既葬衰八升凡齊衰既葬衰或八升或九升服其功衰服粗衰】有大功之喪亦如之【大功之麻變三年之練葛期既葬之葛帶小于練之葛帶又當有經亦反服其故葛帶經期之經差之宜也此雖變麻服葛大小同耳亦服其功衰凡三年之喪既練

始遭齊衰大功之喪經帶皆麻】小功無變也【無所變于大功齊斬之服不用輕累重也同上】如三年之喪則既顙其練祥皆行【言今之喪既服顙乃為前三年者變除而練祥祭也此主謂先有父母之服今又喪長子者其先有長子之服又喪父母其禮亦然然則言未歿喪者已練祥矣顙草名無葛之鄉去麻則用顙 雜記】有父母之喪尚功衰而附兄弟之殯則練冠附于殯【此兄弟之殯謂大功親以下之殯也斬衰齊衰之喪練皆受以大功之衰此謂之功衰以是時而附大功親以下之殯大功親以下之殯輕不易服 同上】

右並有喪服

久而不葬者唯主喪者不除其餘以麻終月數者除喪則已【其餘謂旁親也以麻終月數不葬者喪不變也 小記】

三年而后葬者必再祭其祭之間不同時而除喪【詳見卒哭祔練祥禫記練章】司徒文子曰喪服既除然後乃葬則其服何服子思荅曰三年之喪未葬服不變除何有焉期大功之喪服其所除之服以葬既葬而除之【孔叢子】

右久不葬服

改葬總【謂坟墓以他故崩壞將亡失尸柩也言改葬者明棺物毀敗改葬之如葬時也其奠如大斂从廟之廟從墓之墓禮宜同也服總者臣為君也子為父也妻為夫也必服總者親見尸柩不可以無服總三月而除之喪服記】

右改葬服 葬桓王改葬也改葬之禮總舉下緇也【總者五服最下言舉下緇上从總皆反其故服因葬桓王記改葬之禮不謂改葬桓王當服總也江熙曰葬稱公舉五等之上改葬禮總舉五服之下以喪緇藐遠也天子諸侯易服而葬以為交于神明者不可以純凶況其緇者乎是故改葬之禮其服唯輕言緇釋所以總也 莊三年穀梁傳】司徒文子改葬其叔父問服于子思子思曰禮父母改葬總既葬而除不忍無服送至親也非父母無服無服則弔而加麻【孔叢子】

君弔則復殯服【詳見喪大記殯後受弔章】君弔雖不當免時也主人必免不散麻雖異國之君免也親者皆免【不散麻者自若絞垂為人君變貶于大斂之前既啟之後也親者大功以上也異國之君免或為弔 小記】

諸侯弔所弔雖已葬主人必免【以免者尊人君為之變也 同上】

凡喪服未畢有弔者則為位而哭拜踊【客始來主人不可以殺禮待之 雜記】

主人未除喪有兄弟自他國至則主人不免而為主【親質不崇敬也 小記】子游曰既祥雖不當縞者必縞然後反服【謂有以喪事贈賄來者雖不及時猶變服服祥祭之服以受之重其禮也其于此時始弔者則衛將軍文子之為之是矣反服反素縞麻衣也 雜記】

右受弔變服 晉侯彪卒既葬諸侯之大夫欲因見新君叔向辭之曰大夫之事畢矣【送葬禮畢】而又命孤孤斬焉在衰經之中【既葬未卒哭故猶服斬衰】其以嘉服見則喪禮未畢

其以喪服見是重受弔也大夫將若之何皆無辭以見【昭十年左氏傳】將軍文子之喪既除喪而后越人來弔主人深衣練冠待于廟垂涕洟【主人文子之子簡子瑕也深衣練冠凶服變也待于廟受弔不迎賓也】子游觀之曰將軍文氏之子其庶幾乎亡于禮者之禮也其動也中【中禮之變檀弓】

生不及祖父母諸父昆弟而父稅喪已則否【謂子生于外者也父以他故居異邦而生已已不及此親存時歸見之今其死于喪服年月已過乃聞之父為之服已則否者不責非時之恩于人所不能也當其時則服稅讀如無禮則稅之稅稅喪者喪與服不相當之言】為君之父母妻長子君已除喪而后聞喪則不稅【臣之恩輕也謂卿大夫出聘問以他故久留】降而在總小功則稅之【謂正親在齊衰大功者正親總小功不稅矣曾子曰小功不稅則是遠兄弟終無服也此句補脫誤在是宜承父稅喪已則否】近臣君服期服矣其餘從而服不從而稅【謂君出朝覲不時反而不知喪者近臣閭寺之屬也其餘羣介行人宰史也】君雖未知喪臣服已【从服者所从雖在外自若服也小記】曾子曰小功不稅【據禮而言也日月已過乃聞喪而服曰稅大功以上然小功輕不服】

則是遠兄弟終無服也【言相離遠者聞之恒晚】而可乎【以已意怪之檀弓】

右稅服

席蓋重素不入公門【席蓋截喪車也雜記士輅葦席以為屋蒲席以為裳帷重素衣裳皆素也】苞屨扱衽厭冠不入公門【此皆凶服也苞薦也齊衰薦蒯之菲也問喪曰親始死扱上衽厭猶伏也喪冠厭伏苞或為菲】書方衰凶器不以告不入公門【此謂喪在內不得不入當先告君耳方板也士喪禮下篇曰書贈于方若九若七若五凶器明器也曲禮】三年之喪以衰裳入朝非禮也是謂君與臣同國【臣有喪事而不歸反服其衰裳以入朝是謂君臣同國無尊卑也有喪不歸唯君耳臣有喪當致仕而歸禮運】凡見人無免經雖朝于君無免經唯公門有稅齊衰【詳見喪禮義】季武子寢疾矯固不說齊衰而入見曰斯道也將亡

矣士唯公門說齊衰【季武子魯大夫季孫夙也世為上卿強且專政國人事之如君矯固能守禮不畏之矯失俗也道猶禮也】武子曰不亦善乎君子表微【時無如之何佯若善之表猶明也檀弓】麻者不紳執玉不麻麻不加于采【吉凶不相干也麻謂經也紳大帶也喪以要經代大帶也麻不加于采衣采者不麻謂弁經者必服弔服是也采玄纁之衣雜記】凡帶必有佩玉唯喪否【喪主于哀去飾也凡謂天子以下至士玉藻】小功不說笏當事免則說之【免悲哀哭踊之時不在于記事也小功輕不當】

【事可以摺笏也同上】君之喪子大夫寢門之外杖寢門之內輯之夫人世婦在其次則杖即位則使人執之子有王命則去杖國君之命則輯杖聽卜有事于尸則去杖大夫于君所則輯杖於大夫所則杖【輯斂也斂者謂舉之不以拄地也夫人世婦次于房中即位堂上堂上近尸殯使人執杖不敢自持也子于國君之命輯杖下成君不敢敵之也卜卜葬卜日也凡喪祭虞而有尸大夫于君所輯杖謂與之俱即寢門外位也獨焉則杖君謂子也于大夫所杖俱

為君杖不相下也】大夫之喪大夫有君命則去杖大夫之命則輯杖內子為夫人之命去杖為世婦之命授人杖【大夫有君命去杖此指大夫之子也而云大夫者通實大夫有父母之喪也授人杖與使人執之同也】士之喪于君命夫人之命如大夫于大夫世婦之命如大夫子皆杖不以即位【子謂凡庶子也不以即位與去杖同】大夫士哭殯則杖哭柩則輯杖【哭殯謂既塗也哭柩謂啟後也大夫士之子于父父也尊近哭殯可以杖天子諸侯之子于父父也君也尊遠杖不入廟門 喪大記】父在不敢杖矣尊者在故也堂上不杖辟尊者之處也【父在不杖謂為母喪也尊者在不在杖辟尊者之處不杖有事不趨皆為其感動使之憂戚也 問喪】傳曰公卿大夫室老士貴臣其餘皆眾臣也眾臣杖不以即位【喪服傳】

為長子杖則其子不以杖即位【辟尊者雜記】

為妻父母在不杖不稽顙【尊者在不敢盡禮于私喪也 同上】庶子不以杖即位【下適子也位朝夕哭位也】父不主庶子之喪則孫以杖即位可也【祖不厭孫孫得伸也】父在庶子為妻以杖即位可也【舅不主妾之喪子得伸也 小記】

女未廟見而死壻不杖不菲不次【曾子問】

童子何以不杖不能病也婦人何以不杖亦不能病也【詳見喪服斬衰章】

童子不杖不菲【雜記】古者貴賤皆杖叔孫武叔朝見輪人以其杖關轂而輶輪者于是有爵而后杖也【記庶人失禮所由始也叔孫武叔魯大夫叔孫州仇也輪人作車輪之官 同上】八十齊喪之事弗及也【王制】七十致政唯衰麻為喪【同上】五十不成喪【成猶備也所不能備謂不致毀不散送之屬也】七十唯衰麻在身【言其餘居處飲食與吉時同也 大記】五十不散送【送喪不散麻始衰不備禮 玉藻】

子幼則以衰抱之人為之拜【大記】

童子無總服聽事不麻【皆為幼小不備禮也雖不服總猶免深衣無麻往給事也玉藻】或問曰免者以何為也【怪本所為施也】曰不冠者之所服也禮曰童子不總唯當室總總者其免也當室則免而杖矣【不冠者猶未冠也當室謂無父兄而主家者也童子不杖不杖者不免當室則杖而免免冠之細別以次成人也總者其免也言免乃有總服也 問喪】

婦人不宜袒【同上】禿者不髻偃者不袒【喪服四制】

然則禿者不免偃者不袒跛者不踊非不悲也身有錮疾不可以備禮也【偃背曲也問喪】

右雜記喪服之變

禮書綱目卷二十

卷二十一

欽定四庫全書

禮書綱目卷二十一

喪服制度 凶禮四

補

小宗伯王崩縣衰冠之式于路門之外【制色宜齊同 春官】 大僕縣喪首服之法于宮門【首服之法謂免髻笄總廣狹長短之數縣其書于宮門示四方夏官】
肆師禁外內命男女之衰不中法者且授之杖【不中法違升數與裁制者 春官
詳見喪大記成服章】 司服掌王之吉凶衣服辨其名物與其用事【同上】
衰與其不當物也寧無衰【惡其亂禮不當物謂精粗廣狹不應法制 檀弓】

右總要

司服凡凶事服弁服【服弁喪冠也其服斬衰齊衰
又按弁師注云不言服弁服弁自天子以下無飾無等 此一條總言服制 春官】
斬衰冠六升受冠七升【義服正服其冠皆同】齊衰冠七升受冠八升【喪服記】
齊衰大功冠其受也總麻小功冠其衰也【喪服疏衰杖期傳】
總衰冠八升【喪服記已上言冠之升數】 斬衰冠鍛而勿灰【詳見喪服傳】
齊衰冠傳曰冠者沽功也【詳見喪服本章】
公子為其母練冠為其妻縗冠【公子君之庶子也其或為母謂妾子也
詳見喪服父在為母條 已上言冠制人功之異】
斬衰冠右縫外畢【右縫小功以下左外畢者冠前後屈而出縫于武也 詳見喪服本章】
冠六升外縗【詳見士喪禮成服章】
三年之練冠亦右縫【右縫者又辟而縫之】小功以下左【左辟象吉輕也 雜記】 古者冠
縮縫今也衡縫【縮从也今禮制衡讀為橫今冠橫縫以其辟積多】故喪冠之反吉非古也
【解時人之惑喪冠縮縫古冠耳 檀弓已上論冠縫之制】 斬衰冠繩纓【喪服本章】
疏衰冠布纓【喪服本章】
總冠綵纓【綵當為澡麻帶經之澡聲之誤也謂有事共布以為纓
雜記】冠纓條屬厭【纓條屬者通屈一條繩為武垂下為纓屬之冠厭伏也
詳見士喪禮成服章】 喪冠條屬以別吉凶三年之練冠亦條屬【別吉凶者吉冠不條】

【屬也條屬者通屈一條繩若布為武垂下為纓屬之冠象大古喪事略也吉冠則纓武異材
馬 雜記】 喪冠不綵【去飾 檀弓 已上論纓武綵之制】

委武玄縞而后薙【委武冠卷也秦人曰委齊東曰武玄玄冠縞冠也 雜記】
縞冠玄武子姓之冠也【謂父有喪服子為之不純吉也 玉藻】
縞冠素紕既詳之冠也【詳見變除大祥除服章 已上論玄縞冠制】

右冠制

斬衰苴經傳曰苴經者麻之有蕢者也【喪服本章】
疏衰牡麻經傳曰牡麻者枲麻也【本章】 疏衰期牡麻經【本章】 不杖者【本章】 疏衰牡麻經無受【本章】 大功牡麻經無受【本章】 大功牡麻經【本章】 總衰牡麻經【本章】 小功澡麻帶經【本章】 小功牡麻經【本章】 公子為其母麻為其妻葛經【麻者總麻之經帶也葛經者以葛為經帶詳見喪服父在為母章
以上十一條論首經所用之材及有受無受之別】 苴經大搗去

五分一以為帶齊衰之經斬衰之帶也去五分一以為帶大功之經齊衰之帶也去五分一以為帶小功之經大功之帶也去五分一以為帶總麻之經小功之帶也去五分一以為帶【詳見喪服斬衰傳 此一條論首經大小之異】

苴經大搗左本在下【盈手曰搗搗扼也中人之扼圍九寸 同上】

牡麻經右本在上【詳見喪服齊衰傳】 苴經大搗下本在左牡麻經右本在上【苴經斬衰之經也牡麻經者齊衰以下之經也詳見士喪禮 已上論首經左右本】 其長殤皆九月纓經其中殤皆七月不纓經【經有纓者謂其重也自大功已上經有纓以一條繩為之小功以下經無纓也 詳見喪服大功章】 大功牡麻經纓【本章 此兩條論首經有纓無纓之別】

右首經制

司服凡弔事弁經服【弁經者如爵弁而素加環經經大如總之經 春官】

錫衰總衰疑衰其首服皆弁經【詳見錫衰總衰疑衰章】 弁師王之弁經弁而加環經【弁經王弔所服也其弁如爵弁而素所謂素冠也而加環經環經者大如總之麻經纏而不糾司服職曰凡弔事弁經服】 諸侯及孤卿大夫之弁經各以其等為之而掌其禁令【各以其等如其命數也弁經之弁其辟積如冕纁之就然庶人弔者素委貌士弁經之弁不辟積 夏官】

右弁經制

親始死雞斯【雞斯當為笄纁聲之誤也 此條論笄纁】

小斂卒斂主人括髮以麻【詳見變除】 卒斂主人髻髮【髻髮去笄纁而紒 詳見士喪禮 此兩條論括髮】 男子冠而婦人笄男子免而婦人髻【別男女也小記 此條論笄免髻】

斬衰括髮以麻為母括髮以麻免而以布【母服輕至免可以布代麻也為母又哭而免 小記】 卒斂衆主人免于房【衆主人免者齊衰將袒以免代冠冠服之尤尊不以袒也免之制未聞舊說以為如冠狀廣一寸喪服小記曰斬衰括髮以麻免而以布此用麻布為之狀如今之著慘頭矣自項中而前交于額上卻繞紒也 士喪禮】

此兩條論括髮免】卒斂主人說髦【喪大記】
既殯主人說髦【既殯置銘于殯復位時也】

【兒生三月鬻髮為髻男角女羈否則男左女右長大猶為飾存之謂之髦所以順父母幼小之心至此尸柩不見喪無飾可以去之髦之形象未聞 士喪禮】 親沒不髦【去為子之飾玉藻 此三條論髦】

右笄纚髻髮免髦之制

女改服布深衣縞總以趨喪【詳見變除始死變服章】 布總箭笄髻【此妻妾女子子喪服之異于男子者總束髮謂之總者既束其本又總其末箭笄篠竹髻露紒也猶男子之括髮斬衰括髮以麻則髻亦用麻以麻者自項而前交于額上卻繞紒如著幘頭焉小記曰男子冠而婦人笄男子免而婦人髻】 傳曰總六升長六寸箭笄長尺吉笄尺二寸【總六升者首飾象冠數長六尺謂出紒後所垂為飾也 喪服】

齊衰帶惡笄以終喪【笄所以卷髮帶所以持身也婦人質于喪所以自卷持者有除無變小記】 箭笄終喪三年【亦于喪所以自卷持者有除無變 同上】 女子子適人者為其父母婦為舅姑惡笄有首以髻【言以髻則髻有著笄者明矣】 傳曰笄有首者惡笄之有首也惡笄者櫛笄也【櫛笄者以櫛之木為笄或曰榛笄

喪服】 妾為女君君之長子惡笄有首布總【詳見齊衰母為長子條】 南宮縶之妻之姑之喪【南宮縶孟僖子之子南宮閱也字子容其妻孔子兄女】 夫子誨之髻曰爾母從從爾爾母扈扈爾【誨教也爾女也从從謂大高扈扈謂大廣爾語助】 蓋榛以為笄長尺而總八寸【總束髮垂為飾齊衰之總八寸 檀弓】 男子冠而婦人笄男子免而婦人髻【小記】

右婦人笄總髻制

司服掌王之吉凶衣服凡凶事服弁服【其服斬衰齊衰詳見冠制章】 衰三升三升有半其冠六升以其冠為受受冠七升

【衰斬也或曰三升半者義服也其冠六升齊衰之下也斬衰正服變而受之此服也三升三升半其受冠皆同以服至尊宜少差也】 齊衰四升其冠七升以其冠為受受冠八升【言受以大功之上也此謂為母也齊衰正服五升其冠八升義服六升其冠九升亦以其冠為受凡不著之者服之首主于父母】 總衰四升有半其冠八升【此謂諸侯之大夫為天子總衰也服在小功之上者欲著其纓之精粗也升數在齊衰之中者不敢以兄弟之服服至尊也】 功八升若九升小功十升若十一升【此以小功受大功之差也不言七升者主于受服欲其文相值言服降而在大功者衰七升正服衰八升其冠皆十升義服九升其冠十一升亦皆以其冠為受也斬衰受之以下大功受之以正者重者輕之輕者从禮聖人之意然也其降而在小功者衰十升正服衰十一升義服衰十二升皆以即葛及總麻無受也此大功不言受者其章既著之 喪服記】 斬衰三升齊衰四升五升六升大功七升八升九升小功十升十一升十二升總麻十五升去其半有事其纓無事其布曰總【此齊衰多二等大功小功多一等服主于

受是極列衣服之差也 閒傳】 斬衰裳【凡服上曰衰下曰裳】 傳曰衰三升【喪服本章】
疏衰裳齊三年【疏猶粗也】 疏衰裳齊期【本章】 不杖者【本章】
疏衰裳齊無受者【本章】 大功布衰裳無受者【本章】 大功布衰裳【本章】
總衰裳傳曰總衰者何以小功之總也【本章】 小功布衰裳五月者【本章】
小功布衰裳【本章】 總麻三月者傳曰總者十五升抽其半有事其縷無事其布曰總【謂之總者治其縷細如絲也抽猶去也本章】 朝服十五升去其半而總加灰錫也【總精粗與朝服同去其半則六百縷而疏也又無事其布不灰焉 雜記 已上論衣裳升數之異】 公子為其母麻衣為其妻麻衣【此麻衣者如小功布深衣為不制衰裳變也詩云麻衣如雪練冠而麻衣縗緣三年練之受飾也檀弓練練衣黃裏縗緣諸侯之妾子厭于父為母不得伸權為制此服不奪其恩也 詳見喪服父在為母條】 斬衰裳傳曰斬者何不緝也【本章】
疏衰裳齊傳曰齊者緝也【本章】 凡衰外削幅裳內削幅幅三袿【削猶殺也大古冠布衣布先知為上外殺其幅以便體也後知為下內殺其幅稍有飾也後世聖人易之以此為喪服袿者謂辟兩側空中央也祭服朝服辟積無數凡裳前三幅後四幅也】 若齊裳內衰外【齊緝也凡五服之衰一斬四緝緝裳者內展之緝衰者外展之】 負廣出于適寸【負在背上者也適辟領也負出于辟領外旁一寸】 適博四寸出于衰【博廣也辟領廣四寸則與濶中八寸也兩之為尺六寸也出于衰者旁出衰外不著寸數者可知也】 衰長六寸博四寸【廣袤當心也前有衰後有負版左右有辟領孝子哀戚無所不在】 衣帶下尺【衣帶下尺者要也廣尺足以掩裳上際也】 衽二尺有五寸【衽所以掩裳際也二尺五寸與有司紳齊也上正一尺燕尾二尺五寸凡用布三尺五寸】 袂屬幅【屬猶連也連幅謂不削】 衣二尺有二寸【此謂袂中也言衣者明與身參齊二尺二寸其袖足以容中之肱也衣自領至腰二尺二寸倍之四尺四寸加辟領八寸而又倍之凡衣用布一丈四寸】 祛尺二寸【祛袖口也尺二寸足以容中之併兩手也吉時拱尚左手喪時拱尚右手 喪服記已上論裁造衣裳之制】 端衰喪車皆無等【喪者衣衰及所乘之車貴賤同孝子于親一也衣衰言端者玄端吉時當服喪之衣衰當如之 雜記】 苴衰不補【喪服四制 此兩條通論衰裳之制】
縣子曰綌衰總裳非古也【非時尚輕涼慢禮 檀弓此論衰裳非古】
練練衣黃裏縗緣鹿裘衡長祛祛裼之可也【詳見變除練受服章此論練衣裳之制】

右衰裳制

女子子在室為父衰三年【凡服上曰衰下曰裳此但言衰不言裳婦人不殊裳衰如男子衰下如深衣深衣則衰無帶下又無衽 喪服】

右婦人衰制

斬衰苴經傳曰苴經大搗去五分一以為帶齊衰之經斬衰之帶也去五分一以為帶大功之經齊衰之帶也去五分一以為帶小功之經大功之帶也去五分一以為帶總麻之經小功之帶也去五分以為帶【詳見首經章】 疏衰牡麻經【本章】

小功澡麻帶經【澡者治去莖垢不絕其本也 本章】 經殺五分而去一【小記】

公子為其母麻為其妻葛經【麻者總麻之經帶也其為妻葛經帶妻輕

詳見喪服父在為母條 此已上論腰經所用之材及大小制】 苴經大鬲下本在左要經小焉散帶垂長三尺牡麻經右本在上亦散帶垂【苴經斬衰之經也牡麻經者齊衰以下之經也士喪禮】大功牡麻經傳曰殤之經不樛垂蓋未成人也【樛垂者不絞其帶之垂者雜記曰大功以上散帶 本章】 大功以上散帶【詳見變除】 下殤小功帶澡麻不絕本詘而反以報之【報猶合也下殤小功本齊衰之親其經帶澡率治麻為之帶不絕其本屈而上至要中合而糾之明親重也凡殤散帶垂 小記 已上論腰經制造之異也】
斬衰苴絞帶傳曰絞帶者繩帶也【本章】 疏衰布帶【本章】
疏衰期傳曰齊衰大功冠其受也緦麻小功冠其衰也帶緣各視其冠【詳見冠制章】
公士大夫之衆臣為其君布帶【詳見喪服斬衰章已上論絞帶之制】
斬衰疏衰既虞卒哭去麻服葛帶三重【詳見變除既虞卒哭受服章】
練葛要經【詳見練受服章】

右要經帶制

婦人之帶牡麻結本【婦人亦有苴經但言帶者記其異此齊衰婦人斬衰婦人亦苴經也士喪禮 此論婦人要經之制】 婦人葛經而麻帶【詳見變除既虞卒哭受服章】

【此論婦人虞卒哭要經之制】

右婦人要經帶制

司服王為三公六卿錫衰為諸侯緦衰為士大夫疑衰【君為臣服弔服也鄭司農云錫麻之滑易者十五升去其半有事其布無事其縷緦亦十五升去其半有事其縷無事其布疑衰十四升衰玄謂無事其縷衰在內無事其布衰在外疑之言擬也擬于吉 春官
此條論錫緦疑衰之等】 凡弁經其衰侈袂【侈猶大也弁經服者弔服也其衰錫也緦也疑也袂之言小者二尺二寸大者半而益之則侈袂三尺三寸 雜記 此論弔服之制】 錫者何也麻之有錫者也錫者十五升抽其半無事其縷有事其布曰錫【謂之錫者治其布使之滑易也錫者不治其縷衰在內也緦者不治其布衰在外也 詳見補弔服 此條論錫衰之制】

布錫衰緦衰疑衰之制

曾子問曰親迎女在塗而壻之父母死則如之何曰女改服布深衣縞總以趨喪【詳見變除】 夫子曰始死羔裘玄冠者易之而已【詳見變除 此論始死深衣之服】
齊衰大功冠其受也緦麻小功冠其衰也帶緣各視其冠【緣如深衣之緣喪服傳 此論齊衰大小功緦麻初喪中衣之制】
公子為其母麻衣縗緣為其妻麻衣縗緣【麻衣者如小功布深衣為不制衰裳變也 詳見喪服父在為母條 此論公子為母妻麻衣之制】
大祥素縞麻衣【麻衣十五升布深衣也謂之麻者純用布無采飾也 詳見變除此論大祥麻衣之制】

右深衣麻衣長衣中衣之制

斬衰苴杖傳曰苴杖竹也削杖桐也【喪服本章】 疏衰削杖【本章】 母為長子削杖【嫌服男子當杖竹也母為長子服不可以重于子為己也】
小記】杖各齊其心皆下本【喪服傳】杖下本竹桐一也【順其性也 士喪記】
經殺五分而去一杖大如經【如要經也 小記此言杖體所用及大小之制】

右杖制

斬衰菅屨傳曰菅屨者菅菲也外納【喪服本章】 屨外納【喪服記】
疏衰疏屨三年傳曰疏屨者薦蒯之菲也【本章】 疏衰疏屨期【本章】
不杖麻屨【此亦齊衰言其異于上 本章】 齊衰三月與大功同者繩屨【小記】
小功【舊說小功以下吉屨無絢也 本章】
公士大夫之衆臣為其君布帶繩屨傳曰繩屨者繩菲也【繩菲今時不借也】
喪服斬衰章以上八條論屨制輕重之別】 練繩屨無絢【檀弓此論練屨之制】 屨人掌王及后之服屨素屨葛屨【屨有絢有纁有純者飾也素屨者非純吉有凶去飾言葛屨明有用皮時】 辨外內命夫命婦之散屨【散屨亦謂去飾】 凡四時之祭祀以宜服之【祭祀而有素屨散屨者唯大祥時 此條論大祥素屨 天官】 不履總屨【總屨喪屨也縷不灰治曰總 士冠禮 此條因冠禮見總屨之制】

右屨制

巾車王之喪車五乘木車蒲蔽犬禭尾 疏飾小服皆疏【木車不 者鄭司農云蒲蔽謂羸蘭車以蒲為蔽天子喪服之車漢儀亦然犬禭以犬皮為覆答故書疏為揅杜子春讀揅為沙玄謂蔽車旁禦風塵者犬白犬皮既以皮為覆答又其尾為戈戟之弣粗布飾二物之側為之緣若緝服云服讀為箠小箠刀劍短兵之衣此始遭喪所乘為君之道尚微備姦臣也書曰以虎賁百人逆子釗亦為備焉】 素車芴蔽犬禭素飾小服皆素【素車以白土堊車也芴讀為煩煩麻以為蔽其禭服以素繒為緣此卒哭所乘為君之道益著在車可去戈戟】 藻車藻蔽鹿淺禭革飾【故書藻作 杜子春讀 為華藻之藻玄謂藻水草蒼色以蒼土堊車以蒼繒為蔽也鹿淺禭以鹿夏皮為覆答又以所治去毛者緣之此既練所乘】 駟車萑蔽然 髹飾【故書駟作龍髹為□杜子春云龍讀為駟□讀為黍垸之黍直謂髹黍也玄謂駟車邊側有漆飾也萑細葦席也以為蔽者漆則成藩即吉也然果然也髹赤多黑少之色韋也此大祥所乘】 漆車藩蔽豸 雀飾【漆車黑車也藩今時小車藩漆席以為之豸胡犬雀黑多赤少之色韋也此禫所乘 春官】 主人乘惡車【詳見士喪禮】
端衰喪車皆無等【喪車惡車也喪者衣衰及所乘之車貴賤同孝子于親一也 雜記】

右喪車之制

禮書綱目卷二十一

卷二十二

欽定四庫全書

禮書綱目卷二十二 婺源江永撰

喪服義 凶禮五

補

凡禮之大體體天地法四時則陰陽順人情故謂之禮訾之者是不知禮之所由生也【禮之言體也故謂之禮言本有法則而生也口毀曰訾】夫禮吉凶異道不得相干取之陰陽也【吉禮凶禮異道謂衣服容貌及器物也】喪有四制變而從宜取之四時也有恩有理有節有權取之人情也恩者仁也理者義也節者禮也權者知也仁義禮知人道具矣【取之四時謂其數也取之人情謂其制也】其恩厚者其服重故為父斬衰三年以恩制者也【服莫重斬衰也】門內之治恩揜義門外之治義斷恩資于事父以事君而敬同貴貴尊尊義之大者也故為君亦斬衰三年以義制者也【資猶操也貴貴為大夫君也尊尊謂為天子諸侯也】三日而食三月而沐期而練毀不滅性不以死傷生也喪不過三年苴衰不補墳墓不培祥之日鼓素琴告民有終也以節制者也資于事父以事母而愛同天無二日土無二王國無二君家無二尊以一治之也故父在為母齊衰期者見無二尊也【食食粥也沐謂將虞祭時也補培猶治也鼓素琴始存樂也三年不為樂樂必崩】杖者何也爵也三日授子杖五日授大夫杖七日授士杖或曰擔主或曰輔病婦人童子不杖不能病也百官備百物具不言而事行者扶而起言而後事行者杖而起身自執事而後行者面垢而已禿者不髻偃者不袒跛者不踊老病不止酒肉凡此八者以權制者也【五日七日授杖謂為君喪也扶而起謂天子諸侯也杖而起謂大夫士也面垢而已謂庶民也髻婦人也男子免而婦人髻或為免】始死三日不怠三月不解期悲哀三年憂恩之殺也聖人因殺以制節【不怠哭不絕聲也不解不解衣而居不倦息也】此喪之所以三年賢者不得過不肖者不得不及此喪之中庸也王者之所常行也書曰高宗諒闇三年不言善之也【諒古作梁楣曰梁闇讀如鶉鷃之鷃闇謂廬也廬有梁者所謂柱楣也】王者莫不行此禮何以獨善之也曰高宗者武丁武丁者殷之賢王也繼世即位而慈良于喪當此之時殷衰而復興禮廢而復起故善之善之故載之書中而高之故謂之高宗三年之喪君不言書云高宗諒闇三年不言此之謂也然而曰言不文者謂臣下也【言不文者謂喪事不辨所當共也孝經說曰言不文者指士民也】禮斬衰之喪唯而不對齊衰之喪對而不言大功之喪言而不議緦小功之喪議而不及樂【此謂與賓客也唯而不對侑者為之應耳言謂先發口也】父母之喪衰冠繩纓菅屨三日而食粥三月而沐期十三月而練冠三年而祥比終茲三節者仁者可以觀其愛焉知者可以觀其理焉強者可以觀其志焉禮以治之義以正之孝子弟弟貞婦皆可得而察焉【仁有恩者也理義也察猶知也喪服四制】再期之喪三年也期之喪二年也九月七日之喪三時也五月之喪二時也三月之喪一時也【言喪之節應歲時之氣】故期而祭禮也期而除喪道也祭不為除喪也【此

謂練祭也禮正月存親親亡至今而期期則宜祭期天道一變哀惻之情益衰衰則宜除不相為也喪服小記】三年之喪何也曰稱情而立文因以飾羣別親疏貴賤之節而弗可損益也故曰無易之道也【稱情而立文稱人之情輕重而制其禮也羣謂親之黨也無易猶不易也】創鉅者其日久痛深者其愈遲三年者稱情而立文所以為至痛極也斬衰苴杖居倚廬食粥寢苦枕塊所以為至痛飾也【飾情之章表也】三年之喪二十五月而畢哀痛未盡思慕未忘然而服以是斷之者豈不送死有已復生有節也哉【復生除喪反生者之事也】凡生天地之間者有血氣之屬必有知有知之屬莫不知愛其類今是大鳥獸則失喪其羣匹越月踰時焉則必反巡過其故鄉翔回焉鳴號焉蹢躅焉踟躕焉然後乃能去之小者至于燕雀猶有啁噍之頃焉然後乃能去之故有血氣之屬者莫知于人故人于其親也至死不窮【匹偶也言燕雀之恩不如大鳥獸大鳥獸不如人含血氣之類人最有知而恩深也于其五服之親念之至死無止已也】將由夫患邪淫之人與則彼朝死而夕忘之然而從之則是曾鳥獸之不若也夫焉能相與羣居而不亂乎【言惡人薄于恩死則忘之其相與聚處必失禮也】將由夫修飾之君子與則三年之喪二十五月而畢若駟之過隙然而遂之則是無窮也【駟之過隙喻疾也遂之謂不時除也】故先王焉為之立中制節壹使足以成文理則釋之矣【立中制節謂服之年月也釋猶除也去也】然則何以至期也【言三年之義如此則何以有降至于期也期者謂為人後者父在為母也】曰至親以期斷【言服之正雖至親皆期而除也】是何也【謂服斷于期之義也】曰天地則已易矣四時則已變矣其在天地之中者莫不更始焉以是象之也【法此變易可以期也】然則何以三年也【言法此變易可以期何以乃三年為】曰加隆焉爾也焉使倍之故再期也【言于父母加隆其恩使倍期也下焉猶然】由九月以下何也曰焉使弗及也【言使其恩不若父母】故三年以為隆總小功以為殺期九月以為閒上取象于天下取法于地中取則于人人之所以羣居和壹之理盡矣【取象于天地謂法其變易也自三年以至總皆歲時之數也言既象天地又足以盡人聚居純厚之恩也】故三年之喪人道之至文者也夫是之謂至隆【言三年之喪喪禮之最隆盛也】是百王之所同古今之所壹也未有知其所由來者也【不知其從來喻此三年之喪前世行之久矣】孔子曰子生三年然後免于父母之懷夫三年之喪天下之達喪也【達謂自天子至于庶人三年間】滕定公薨世子謂然友曰昔者孟子嘗與我言於宋於心終不忘今也不幸至于大故吾欲使子問于孟子然後行事【定公文公父也然友世子之傅也大故大喪也事謂喪禮】然友之鄒問于孟子孟子曰不亦善乎親喪固所自盡也曾子曰生事之以禮死葬之以禮祭之以禮可謂孝矣諸侯之禮吾未之學也雖然吾嘗聞之矣三年之喪齊疏之服飭粥之食自天子達于庶人三代共之【當時諸侯莫能行古喪禮而文公獨能以此為問故孟子善之又言父母之喪固人子之心所自盡者蓋悲哀之情痛疾之意非自外至宜乎文公于此有所不能自己也但所引曾子之言本孔子告樊遲者豈曾子嘗論之以告其門人歟三年之喪者子生三年然後免于父母之懷故父母之喪必以三年也齊衣下縫也不緝曰斬衰緝之曰齊衰疏粗也粗布也飭麤也喪禮三日始食粥既葬乃疏食此古今貴賤通行之禮也】然友反命定為三年之喪父兄百官皆不欲曰吾宗國魯先君莫之行吾先君亦莫之行也至于子之身而反之不可且志曰喪祭從先祖曰吾有所受之也【父兄同姓老臣也滕與魯俱文王之後而魯祖周公為長兄弟宗之故滕謂魯為宗國也然謂二國不行三年之喪者乃其後世之失非周公之法本然也志記也引志之言而釋其意以為所以如此者蓋為上世以來有所傳受雖或不同不可改也然志所言本謂先王之世舊俗所傳禮文小異而可以通行者

耳不謂後世失禮之甚者也】謂然友曰吾他日未嘗學問好馳馬試劍今也父兄百官不我足也恐其不能盡于大事子為我問孟子然友復之鄒問孟子孟子曰然不可以他求者也孔子曰君薨聽于冢宰歆粥面深墨即位而哭百官有司莫敢不哀先之也上有好者下必有甚焉者矣君子之德風也小人之德草也草尚之風必偃是在世子【不我足謂不以我滿足其意也然者然其不我足之言不可他求者言當責之于己冢宰六卿之長也歆飲也深墨甚黑色也即就也尚加也論語作上古字通用偃仆也孟子言但在世子自盡其哀而已】然友反命世子曰然是誠在我五月居廬未有命戒百官族人可謂曰知及至葬四方來觀之顏色之戚哭泣之哀弔者大悅【諸侯五月而葬未葬居倚廬于中門之外居喪不言故未有命令教戒也可謂曰知疑有闕誤或曰皆謂世子之知禮也林氏曰孟子之時喪禮既壞然三年之喪惻忍之心痛疾之意出于人心之所固有者初未嘗忘也惟其溺于流俗之弊是以喪其良心而不自知耳文公見孟子而聞堯舜性善之說則固有以啟發其良心矣是以此而哀痛之誠心發焉及其父兄百官皆不欲行則亦反躬自責悼其前行之不足以取信而不敢有非其父兄百官之心雖其資質有過人者而學問之力亦不可誣也及其斷然行之而遠近見聞無不悅服則以人心之所同然者自我發之而彼之心悅誠服亦有所不期然而然者人性之善豈不信哉孟子】宰我問三年之喪期已久矣【期周年也】君子三年不為禮禮必壞三年不為樂樂必崩【恐居喪不習而崩壞也】舊穀既沒新穀既升鑽燧改火期可已矣【沒盡也升登也燧取火之木也改火春取榆柳之火夏取棗杏之火夏季取桑柘之火秋取柞櫟之火冬取槐檀之火亦一年而周也已止也言期年則天運一周時物皆變喪至此可止也尹氏曰短喪之說下愚且耻言之宰我親學聖人之門而以是為問者有所疑于心而不敢強焉爾】子曰食夫稻衣夫錦于女安乎曰安【禮父母之喪既殯食粥粗衰既葬疏食水飲受以成布期而小祥始食菜果練冠緇緣要經不除無食稻衣錦之理夫子欲宰我反求諸心自得其所以不忍者故問之以此而宰我不察也】女安則為之夫君子之居喪食旨不甘聞樂不樂居處不安故不為也今女安則為之【此夫子之言也旨亦甘也初言女安則為之絕之之辭又發其不忍之端以警其不察而再言汝安則為之以深責之】宰我出子曰予之不仁也子生三年然後免于父母之懷夫三年之喪天下之通喪也予也有三年之愛于其父母乎【宰我既出夫子懼其真以為可安而遂行之故深探其本而斥之言由其不仁故愛親之薄如此也懷抱也又言君子所以不忍于親而喪必三年之故使之問之或能反求而終得其本心也范氏曰喪雖止于三年然賢者之情則無窮也特以聖人為之中制而不敢過故必俯而就之非以三年之喪為足以報其親也所謂三年然後免于父母之懷特以責宰我之無恩欲其有以跂而及之爾論語】齊宣王欲短喪公孫丑曰為菽之喪猶愈于已乎【已猶止也】孟子曰是猶或紓其兄之臂子謂之姑徐徐云爾亦教之孝弟而已矣【紓戾也教之以孝弟之道則彼當自知兄之不可戾而喪之不可短矣孔子曰子生三年然後免于父母之懷予也有三年之愛于其父母乎所謂教之以孝弟者如此蓋示之以至情之不能已者非強之也】王子有其母死者其傅為之請數月之喪公孫丑曰若此者何如也【陳氏曰王子所生之母厭于嫡母而不敢終喪其傅為請于王欲使得行數月之喪也時又適有此事丑問如此者是非何如按儀禮公子為其母練冠麻衣緇緣既葬除之疑當時此禮已廢或既葬而未忍即除故請之也】曰是欲終之而不可得也雖加一日愈于已謂夫莫之禁而弗為者也【言王子欲終喪而不可得其傅為請雖止得加一日猶勝不加我前所譏乃謂夫莫之禁而自不為者耳此章言三年通喪天經地義不容私意有所短長示之至情則不肖者有以企而及之矣

孟子】

喪父三年喪君三年示民不疑也【不疑于君之尊也君無骨肉之親不重其服至尊不明坊記】天子之與后猶父之與母也故為天王服斬衰服父之義也后服資衰服母之義也【父母者施教令于婦子者也故其服同資當為齊聲之誤也昏義】君之喪所以取三年何也曰君者治辨之主也文理之原也情貌之盡也相率而致隆之不亦可乎【治辨謂能治人使人辨別也文理法理條貫也原本也情忠誠也貌恭敬也致志也言人所施忠敬無盡于君者則臣下相率服喪而至于三年不亦可乎】詩曰愷悌君子民之父母彼君子者固有為民父母之說焉父能生之不能養之【養謂哺乳之也養或為食】母能食之不能教誨之君者已能食之矣又善教誨之者也【食謂祿廩教誨謂制命也】三年畢矣哉【君者兼父母之恩以三年報之猶未畢也】乳母飲食之者也而三月慈母衣被之者也而九月君曲備之者也三年畢乎哉【曲備謂兼飲食衣被】得之則治失之則亂文之至也【文謂法度也治亂所繫是有法度之至也】得之則安失之則危情之至也【情謂忠厚又使人去危就安是忠厚之至也】兩至者俱積焉以三年事之猶未足也直無由進之耳【直但也荀子】穆公問于子思曰為舊君反服古與【仕焉而已者穆公魯哀公之曾孫】子思曰古之君子進人以禮退人以禮故有舊君反服之禮也今之君子進人若將加諸膝退人若將隊諸淵母為戎首不亦善乎又何反服之禮之有【言放逐之臣不服舊君也為兵主來攻伐曰戎首檀弓】子思居衛魯穆公卒縣子使乎衛謂子思曰子雖未臣魯父母之國也先君宗廟在焉奈何不服子思曰吾豈愛乎禮不得也臣而去國君不歸其宗廟則為之服寄公寓乎是國而為國服吾既無列于魯而祭在衛吾何服哉是寄臣而服所寄之君則舊君無服明不二君之義也【孔叢子】齊宣王曰禮為舊君有服何如斯可為服矣【儀禮曰以道去君而未絕者服齊衰三月王疑孟子之言太甚故以此禮為問】曰諫行言聽膏澤下於民有故而去則君使人導之出疆又先于其所往去三年不反然後收其田里此之謂三有禮焉如此則為之服矣【導之出疆防剽掠也先于其所往稱道其賢欲其收用之也三年而後收其田祿里居前此猶望其歸也】今也為臣諫則不行言則不聽膏澤不下于民有故而去則君一執之又極之于其所往去之日遂收其田里此之謂寇讎寇讎何服之有【極窮也窮之于其所往之國如晉錮欒盈也潘興嗣曰孟子告齊王之言猶孔子對定公之意也而其言有迹不若孔子之渾然也蓋聖賢之別如此楊氏曰君臣以義合者也故孟子為齊王深言報施之道使知為君者不可不以禮遇其臣耳若君子之自處則豈處其薄乎孟子曰王庶幾改之予日望之君子之言蓋如此孟子】親親尊尊長長男女之有別人道之大者也【言報之所以隆殺喪服小記】親親以三為五以五為九上殺下殺旁殺而親畢矣【已上親父下親子三也以父親祖以子親孫五也以祖親高祖以孫親玄孫九也殺謂親益疏者服之則輕

同上】傳曰罪多而刑五喪多而服五上附下附列也【列等比也服問】服術有六一曰親親二曰尊尊三曰名四曰出入五曰長幼六曰從服【術猶道也親親父母為首尊尊君為首名世母叔母之屬也出入女子子嫁者及在室者長幼成人及殤也从服若夫為妻之父母妻為夫之黨服】從服有六有屬從【子為母之黨】有徒從【臣為君之黨】有從有服而無服【公子為其妻之父母】有從無服而有服【公子之妻為公子之外兄弟】有從重而輕【夫為妻之父母】有從輕而重【公子之妻為其皇姑】自仁率親等而上之至於祖名曰輕自義率祖順而下之至于禰名曰重一輕一重其義然也【自猶用也率循也用恩則父母重而祖輕用義則祖重而父母輕恩重者為之三年義重者為之齊衰然如是也大傳】有從

輕而重公子之妻為其皇姑【皇君也諸侯妾子之妻為其君姑齊衰與為小君同舅不厭婦也】有從重而輕為妻之父母【妻齊衰而夫從總麻不降一等言非服差】有從無服而有服公子之妻為公子之外兄弟【謂為公子之外祖父母從母總麻】有從有服而無服公子為其妻之父母【凡公子厭于君降其私親女君之子不降也服問】從服者所從亡則已【謂若為君母之父母昆弟从母也】屬從者所從雖沒也服【謂若自為己之母黨】妾從女君而出則不為女君之子服【妾為女君之黨服得與女君同而今俱出女君猶為子期妾于義絕無施服小記】庶子不為長子斬不繼祖與禰故也【尊先祖之正體不二其統也言不繼祖禰則長子不必五世同上】庶子不得為長子三年不繼祖也【大傳】

為父後者為出母無服無服也者喪者不祭故也【適子正體于上當祭祀也小記】子上之母死而不喪【子上孔子曾孫子思伋之子名白其母出】門人問諸子思曰昔者子之先君子喪出母乎曰然【禮為出母期父卒為父後者不服耳】子之不使白也喪之何也子思曰昔者吾先君子無所失道道隆則從而隆道污則從而污【污猶殺也有隆有殺進退如禮】伋則安能【自予不能及】為伋也妻者是為白也母不為伋也妻者是不為白也母故孔子之不喪出母自子思始也【記禮所由廢非之檀弓】喪服兄弟之子猶子也蓋引而進之也嫂叔之無服也蓋推而遠之也【或引或推重親遠別】姑姊妹之薄也蓋有受我而厚之者也【欲其一心于厚之者姑姊妹嫁大功夫為妻期同上】四世而總服之窮也五世祖免殺同姓也六世親屬竭矣【四世共高祖五世高祖昆弟六世以外親盡無屬大傳】

絕族無移服【族昆弟之子不相為服】親者屬也【有親者服各以其屬親疏同上】喪紀以服之輕重為序不奪人親也【紀猶事也】公族之罪刑于隱者不與國人慮兄弟也弗弔弗為服哭于異姓之廟為忝祖遠之也素服居外不聽樂私喪之也骨肉之親無絕也【文王世子】弟子為師服者弟子有君臣父子朋友之道也故生則尊敬而親之死則哀痛之恩深義重故為之隆服入則經出則否【白虎通】哀公問曰紳委章甫【委曲貌章甫冠名也】有益于仁乎孔子作色而對曰君胡然焉衰麻苴杖者志不存乎樂非耳弗聞服使然也【家語】斬衰三升齊衰四升五升六升大功七升八升九升小功十升十一升十二升總麻十五升去其半有事其無事其布曰總此哀之發于衣服者也【詳見喪服制度】

斬衰何以服苴苴惡貌也所以首其肉而見諸外也【問傳】經也者實也【所以表哀戚檀弓】或問曰冠者不肉袒何也【怪冠衣之相為也】曰冠至尊也不居肉袒之體也故為之免以代之也【言身無飾者不敢冠冠為褻尊服肉袒則著免免狀如冠而廣一寸】然則禿者不免偃者不袒跛者不踊非不悲也身有錮疾不可以備禮也故曰喪禮唯哀為主矣女子哭泣悲哀擊胸傷心男子哭泣悲哀稽顙觸地無容哀之至也【將踊先袒先免此三疾俱不踊不袒不免顧其所以否者各為一耳擊胸傷心稽顙觸地不踊者若此而可或曰男女哭踊】或問曰免者以何為也【怪本所為施也】曰不冠者之所服也禮曰童子不總唯當室總總者其免也當室則免而杖矣【不冠者猶未冠也當室謂無父兄而主家者也童子不杖不杖者不免當室則杖而免免冠之細別以次成人也總者其免也言免乃有總服也問喪】男子冠而婦人笄男子免而婦人髻其義為男子則免為婦人則髻【別男女也小記】或問曰杖者何也【怪其各異義】曰竹桐一也故為父苴杖苴杖竹也為母削杖削杖桐也【言所以杖者義一也顧所用異耳】或問曰杖者以何為也【怪所為施】曰孝子喪親哭泣無數服勤三年身體病羸以杖扶病也【言得杖乃能起也數或為時】則父在不敢杖矣尊者在故也堂上不杖辟尊者之處也堂上不趨示不遽也此孝子之志也人情之實也禮義之經

也非從天降也非從地出也人情而已矣【父在不杖辟尊者之處不杖有事不趨皆為其感動使之憂戚也 問喪】 裘之裼也見美也弔則襲不盡飾也【喪非所以見美 玉藻】 玄冠不以弔者不以吉服臨人凶示助哀也【白虎通】 凡見人無免經雖朝于君無免經唯公門有稅齊衰傳曰君子不奪人之喪亦不可奪喪也【見人謂行求見人也無免經經重也稅猶免也古者說或作稅有免齊衰謂不杖齊衰也于公門有免齊衰則大功有免經也 服問】 男子除乎首婦人除乎帶男子何為除乎首也婦人何為除乎帶也男子重首婦人重帶【詳見變除練受服除服章】 不能三年之喪而總小功之察此之謂不知務【孟子】

禮書綱目卷二十二

卷二十三

<經部,禮類,通禮之屬,禮書綱目

欽定四庫全書

禮書綱目卷二十三 婺源江永撰

士喪禮上 凶禮六

經【鄭目錄云士喪其父母自始死至于既殯之禮士喪于五禮屬凶】

士喪禮

右篇目 周禮黨正凡其黨之喪紀教其禮事掌其戒禁【地官】 記恤由之喪哀公使孺悲之孔子學士喪禮士喪禮于是乎書【時人轉而僭上士之喪禮已廢矣孔子以教孺悲國人乃復書而存之 雜記】

死於適室幬用歛衾【適室正寢之室也疾者齊故于正寢焉疾時處北牖下死而遷之南牖下有 衽幬覆也歛衾大歛所并用之衾衾被也小歛之衾當陳喪大記曰始死遷尸于牀幬用歛衾去死衣】

右始死 記士處適寢寢東首于北牖下【將有疾乃寢于適室今文處為居于為於】有疾疾者齊【正情性也適寢者不齊不居其室】養者皆齊徹琴瑟【去樂】疾病外內皆埽【為有賓客來問也疾甚曰病】徹褻衣加新衣【故衣垢污為來人穢惡之】御者四人皆坐持體【為不能自轉側御者今時侍从之人】男女改服【為賓客來問病亦朝服庶人深衣】屬纊以俟絕氣【為其氣微難節也纊新絮】男子不絕於婦人之手婦人不絕於男子之手【備褻】乃行禱于五祀【盡孝子之情五祀博言之士二祀曰門曰行 本經記

按本經記本在既夕篇末】 疾病廢牀御者持體體一人【詳見喪大記】

士疾君一問之【同上】 乃卒【卒終也】 主人啼兄弟哭【哀有甚有否于是始去冠而笄纊服深衣檀弓曰始死羔裘玄冠者易之

本經記】 婦人哭踊凡哭尸于室者主人二手承衾而哭【詳見喪大記】

親始死雞斯徒跣扱上衽交手哭【詳見喪禮義】

始死充充如有窮【詳見喪通禮哀戚章】 始死皇皇如有求而弗得【同上】

三日而食【詳見喪禮義】 水漿不入于口者三日【同上】

士之妻皆死于寢【詳見喪大記】 衾死而後制【詳見本篇陳小歛衣章】 孔子蚤作【作起】 負手曳杖消搖于門【欲人之怪己】 歌曰泰山其頽乎【泰山衆山所仰】 梁木其壞乎【梁木衆木所放】 哲人其萎乎【哲人亦衆人所仰放也以上二句喻之萎病也詩云無

木不萎】既歌而入當戶而坐【蚤作急見人也】子貢聞之曰泰山其頽則吾將安仰梁木其壞哲人其萎則吾將安放夫子殆將病也【覺孔子歌意殆幾也】遂趨而入夫子曰賜爾來何遲也【坐則望之】夏后氏殯于東階之上則猶在阼也殷人殯於兩楹之間則與賓主夾之也周人殯于西階之上則猶賓之也【以三王之禮占已夢】而丘也殷人也予疇昔之夜夢坐奠于兩楹之間【是夢坐兩楹之間而見饋食也言奠者以為凶象疇發聲也昔猶前也】夫明王不興而天下其孰能宗予予殆將死也【孰誰也宗尊也兩楹之間南面鄉明人君聽治正坐之處今無明王誰能尊我以為人君乎是我殷家奠殯之衆以此自知將死】盖寢疾七日而沒【明聖人知命 檀弓】曾子有疾召問弟子曰啓予足啓予手詩云戰戰兢兢如臨深淵如履薄冰而今而後吾知免夫小子【啓開也曾子平日以為身體受于父母不敢毀傷故于此使弟子開其衾而視之詩小旻之篇戰戰恐懼兢兢戒謹臨淵恐隊履冰恐陷也曾子以其所保之全示門人而言其所以保之之難如此至于將死而後知其得免于毀傷也小子門人也語畢而又呼之以致反覆丁寧之意其警之也深矣 論語】曾子有疾孟敬子問之【孟敬子魯大夫仲孫氏名捷問之者問其疾也】曾子言曰鳥之將死其鳴也哀人之將死其言也善【言自言也鳥畏死故鳴哀人窮反本故言善此曾子之謙辭欲敬子知其所言之善而識之也】君子所貴乎道者三動容貌斯遠暴慢矣正顏色斯近信矣出辭氣斯遠鄙倍矣籩豆之事則有司存【貴猶重也容貌舉一身而言暴粗厲也慢放肆也信實也正顏色而近信則非色莊也辭言語氣聲氣也鄙凡陋也倍與背同謂背理也籩竹豆木豆言道雖無所不在然君子所重者在此三事而已是皆修身之要為政之本學者所當操存省察而不可有造次顛沛之違者也若夫籩豆之事器數之末道之全體固無不該然其分則有司之守而非君子之所重矣 同上】曾子疾病【疾困曰病】曾元抑首曾華抱足【元華其子】曾子曰人之生也百歲之中有疾病焉有老幼焉故君子思其不可復者而先施焉親戚既歿雖欲孝誰為孝年既耆艾雖欲弟誰為弟故孝有不及弟有不時其此之謂與【大戴記】曾子寢疾病【病謂疾困】樂正子春坐于牀下【子春曾子弟子】曾元曾申坐于足【元申曾參之子】童子隅坐而執燭【隅坐不與成人坐】童子曰華而睨大夫之簀與【華畫也簀謂 第也說者以睨為刮節目字或為刮】子春曰止【以病困不可動】曾子聞之瞿然曰呼【呼虛憊之聲】曰華而睨大夫之簀與曾子曰然斯季孫之賜也我未之能易也元起易簀【未之能易以病故也】曾元曰夫子之病革矣不可以變幸而至于旦請敬易之【言夫子者曾子親歿之後齊嘗聘以為卿而不為也革意也變動也幸覲也】曾子曰爾之愛我也不如彼【彼童子也】君子之愛人也以德【成己之德】細人之愛人也以姑息【息猶安也言苟容取安也】吾何求乎哉吾得正而斃焉斯已矣【斃仆也】舉扶而易之反席未安而沒【言病雖困猶勤于禮 檀弓】子張病召申祥而語之曰君子曰終小人曰死【申祥子張子欲使執喪成己志也死之言漸也事卒為終消盡為漸大史公傳曰子張姓顓孫今日申祥周秦之聲二者相近未聞孰是】吾今日其庶幾乎【言易成也同上】

復者一人以爵弁服簪裳于衣左何之扱領于帶【復者有司招魂復魄也天子則夏采祭僕之屬諸侯則小臣為之爵弁服純衣纁裳也禮以冠名服簪連也】升自前東榮中屋北面招以衣曰臯某服三降衣于前【北面招求諸幽之義也臯長聲也某死者之名也復反也降衣下之也喪大記曰凡復男子稱名婦人稱字】受用筐升自阼階以衣戶【受者受之于庭也復者其一人招則受衣亦一人也人君則司服受之衣尸者覆之若得魂反之】復者降自後

西榮【不由前降不以虛反也降因徹西北扉若云此室凶不可居然也自是行死事】

右復 記復者朝服左執領右執要招而左【衣朝服服未可以變本經記】士以爵弁士妻以稅衣皆升自東榮中屋履危北面三號捲衣投于前司服受之降自西北榮復衣不以衣尸不以歛婦人復不以裋凡復男子稱名婦人稱字唯哭先復復而後行死事【詳見喪大記】復與書銘自天子達于士其辭一也男子稱名婦人書姓與伯仲不知姓則書氏【同上】邾婁復之以矢蓋自戰于升陘始也【戰于升陘魯僖二十二年秋也時師雖勝死傷亦甚無衣可以招魂 檀弓】復楔齒綴足飯設飾帷堂並作【設飾謂遷尸又加新衣 同上】

楔齒用角枳【為將含恐其口閉急也】綴足用燕几【綴猶拘也為將屨恐其辟戾也今文綴為對】

右楔齒綴足【案復與楔齒綴足之間有遷尸一節經文不具以附記見于下】記設牀第當牖衽下莞上簟設枕【病卒之間廢牀至是設之事相變衽卧席古文第為茨】遷尸【徙于牖下也于是無用歛衾 本經記】始死遷尸于牀幬用歛衾去死衣小臣楔齒用角枳綴足用燕几君大夫士一也【詳見喪大記】楔貌如輶上兩末【事便也今文輶作厄】綴足用燕几按在南御者坐持之【按脛也尸南首凡脛在南以拘足則不得辟戾矣古文按為枝 本經記】掘中霤而浴毀竈以綴足及葬毀宗躐行出于大門殷道也【明不復有事于此周人浴不掘中霤葬不毀宗躐行毀宗毀廟門之西而出行神之位在廟門之外】學者行之【學于孔子者行之倣殷禮 檀弓】

奠脯醢醴酒升自阼階奠于尸東【鬼神無象設奠以憑依之】帷堂【事小訖也】右始死奠帷堂

記即牀而奠當謁用吉器若醴若酒無巾枳【謁肩頭也用吉器器未變也或卒無醴用新酒 本經記】曾子曰始死之奠其餘閣也與【不容改新閣庋藏食物 檀弓】

乃赴于君主人西階東南面命赴者拜送【赴告也臣君之股肱耳目死當有恩】有賓則拜之【賓僚友羣士也其位猶朝夕哭矣】

右命赴拜賓

記赴曰君之臣某死赴母妻長子則曰君之臣某之某死【赴走告也今文赴作訃 本經記】士訃于同國大夫曰某死訃于士亦曰某死訃于他國之君曰君之外臣某死訃于大夫曰吾子之外私某死訃于士亦曰吾子之外私某死【詳見喪大記】五廟之孫祖廟未毀雖為庶人死必赴練祥則告【赴告于君也實四廟孫而言五廟者容顯考為始封子也 文王世子】

入坐于牀東衆主人在其後西面婦人俠牀東面【衆主人庶昆弟也婦人謂妻妾子姓也亦適妻在前】親者在室【謂大功以上父兄姑姊妹子姓在此者】衆婦人戶外北面衆兄弟堂下北面【衆婦人衆兄弟小功以下】

右室中位 記室中唯主人主婦坐兄弟有命夫命婦在焉亦坐【別尊卑也本經記】
既正尸主人父兄子姓皆坐于東方主婦姑姊妹子姓皆坐于西方【詳見喪大記】

君使人弔徹帷主人迎于寢門外見賓不哭先入門右北面【使人士也禮使人必以其爵使者至使人入將命乃出迎之寢門內門也徹帷屨之事畢則下之】弔者入升自西階東面主人進中庭弔者致命【主人不升賤也致命曰君聞子之喪使某如何不淑】主人哭拜稽顙成踊【稽顙頭觸地成踊三者三】賓出主人拜送于外門外

右君使人弔 記尸在室有君命衆主人不出【不二主 本經記】
凡主人之出也徒跣扱衽拊心降自西階【詳見喪大記 以下君使人弔凡主人出並通用】

君使人弔徹帷主人如初弔者左執領右執要入升致命【弔之言遺也衣被曰弔致命曰君使某弔】主人拜如初弔者入衣尸出主人拜送如初唯君命出升降自西階遂拜賓有大夫則特拜之即位于西階下東面不踊大夫雖不辭入也【唯君命出以明大夫以下時來弔弔不出也始喪之日哀戚甚在室故不出拜賓也大夫則特拜別于士旅拜也即位西階下未忍在主人位也不踊但哭拜而已不辭而主人升入明本不為賓出成禮也】

右君使人弔 記士于大夫親弔則與之哭不逆于門外【詳見喪大記】
以下凡大夫弔並通用凡主人之出已見君使人弔章當互考】

親者弔不將命以即陳【大功以上有同財之義也不將命不使人將之致于主人也即陳陳在房中】庶兄弟弔使人以將命于室主人拜于位委衣于尸東牀上【庶兄弟即衆兄弟也將命曰某使某弔拜于位室中位也】朋友弔親以進主人拜委衣如初退哭不踊【親以進親之恩也退下堂反賓位也主人徒哭不踊別于君弔也】徹衣者執衣如弔以適房【凡于弔者出有司徹衣】右親友弔
記弔者委衣于牀不坐【牀高由便】其弔于室戶西北面致命【始死時也本經記】

為銘各以其物亡則以緇長半幅經末長終幅廣三寸書銘于末曰某氏某之柩【銘明旌也雜帛為物大夫之所建也以死者為不可別故以其旗識識之愛之斯錄之矣亡無也無旌不命之士也半幅一尺終幅二尺在棺為柩今文銘皆為名物為旆也】竹杠長三尺置于宇西階上【杠銘槨也宇柩也】

右為銘 記復與書銘自天子達于士其辭一也【詳見本篇復章】

甸人掘坎于階間少西為塋于西牆下東鄉【甸人有司主田野者塋塊灶西牆中庭之西今文鄉為面】新盆槃瓶廢敦重鬲皆濯造于西階下【新此瓦器五種者重死事盆以盛水槃承湏濯瓶以汲水也廢敦敦無足者所以盛米也重鬲鬲將縣于重者也濯滌漑也造至也猶饌也以造言之喪事遽】陳襲事于房中西領南上不結【襲事謂衣服也結讀為絳絳屈也襲事少上陳而下不屈江河之間謂繫收繩索為絳古文結皆為精】明衣裳用布【所以親

身為圭絜也】髻笄用桑長四寸纓中【桑之為言喪也用為笄取其名也長四寸不冠故也纓笄之中央以安髮】布巾環幅不鑿【環幅廣袤等也不鑿者士之子親含反其巾而已大夫以上賓為之含當口鑿之嫌有惡古文環作還】掩練帛廣終幅長五尺析其末【掩裹首也析其末為將結于頤下又還結于項中】瑱用白纁【瑱充耳纁新綿】幘目用緇方尺二寸經裏著組繫【幘目用覆面者也幘讀若詩曰葛藟縈之之縈經赤也箸充之以絮也組繫為可結也古文幘為涓】握手用玄纁裏長尺二寸廣五寸牢中旁寸著組繫【牢讀為樓樓謂削約掘之中央以安手也今文樓為纓旁為方】決用正王棘若櫟棘組繫纁極二【決猶闔也挾弓以橫執弦詩云決拾既伙正善也王棘與櫟棘善理堅刃者皆可以為決極猶放弦也以沓指放弦令不挈指也生者以朱韋為之而三死用纁又二明不用也古文王為三今文櫟為澤世俗謂王棘砭鼠】冒緇質長與手齊經殺掩足【冒韜尸者制如直囊上曰質下曰殺質正也其用之先以殺韜足而上後以質韜首而下齊手上玄下纁象天地也喪大記曰君錦冒黼殺綴旁七大夫玄冒黻殺綴旁五士緇冒經殺綴旁三凡冒質長與手齊殺三尺】爵弁服純衣【謂生時爵弁所衣之服也純衣者纁裳古者以冠名服死者不冠】皮弁服【皮弁所衣之服也其服白布衣素裳也】祿衣【黑衣裳赤緣之謂之緣祿之言緣也所以表袍者也喪大記曰衣必有裳袍必有表不禪謂之一稱古文祿為緣】緇帶【黑緇之帶】韎韐【一命緇韐】竹筩【筩所以書思對命者玉藻曰筩天子以璆玉諸侯以象大夫以魚須文竹士以竹本象可也又曰筩度二尺有六寸其中博三寸其殺六分而去一又曰天子搢珽方正于天下也諸侯荼前詘後直讓于天下也大夫前詘後詘無所不讓今文筩作忽】夏葛屨冬白屨皆纁緇純組綦繫于踵【冬皮屨變言白者明夏時用葛亦白也此皮弁之屨士冠禮曰素積白屨以魁紩之緇絢纁純純博寸綦屨係也所以拘止屨也綦讀如馬絆綦之綦】庶綦繼陳不用【庶衆也不用不用襲也多陳之為榮少納之為貴】貝三實于笄【貝水物古者以為貨江水出焉笄竹器名】稻米一豆實于筐【豆四升】沐巾一浴巾二皆用綌于笄【巾所以拭污垢浴巾二者上體下體異也綌粗葛】櫛于簞【簞葦笥】浴衣于篋【浴衣已浴所衣之衣以布為之其制如今通裁】皆饌于西序下南上【皆者皆貝以下東西牆謂之序中以南謂之堂】

右陳沐浴襲飯含之具 記掘坎南順廣尺輪二尺深三尺南其壤【南順統于堂輪从也今文掘為圻】塋用塊【塊塋也古文塋為役】明衣裳用幕布袂屬幅長下膝【幕布帷幄之布升數未聞也屬幅不削幅也長下膝又有裳于蔽下體深也】有前後裳不辟長及蔽【不辟積也蔽足跗也凡他服短無見膚長無被土】緇綈絺【一染謂之緇今紅也飾裳在幅曰綈在下曰絺】緇純【七入為緇緇黑色也飾衣曰純謂領與袂衣以緇裳以緇象天地也

本經記】掘中霤而浴殷道也【詳見楔齒綴足章】

士緇冒經殺綴旁三凡冒質長與手齊殺三尺【詳見喪大記】

冒死而後制【詳見陳小斂衣章】袍必有表不禪衣必有裳謂之一稱【詳見喪大記】

率帶士二采【同上】士飯三貝【同上】士併瓦盤無冰設牀檀第有枕含一牀襲一牀遷尸于堂又一牀皆有枕席君大夫士一也【同上】

管人汲不說緇屈之【管人有司主館舍者不說緇將以就祝濯米屈縈也】祝淅米于堂南面用盆【祝夏祝也淅沃也】管人盥階不升堂受潘煮于塋用重鬲【盥階三等之上喪大

記曰管人受沐乃煮之甸人取所徹廟之西北扉薪用爨之【祝盛米于敦奠于貝北【復于筐處也】士有水用夷槃可也【謂夏月而君加賜水也夷槃承尸之槃喪大記曰君設大槃造水焉大夫設夷槃造水焉士併瓦槃無水設牀檀第有枕】外御受沐入【外御小臣侍从者沐管人所煮潘也】主人皆出戶外北面【象平生沐浴裸裎子孫不在旁主人出而檀第】乃沐櫛拑用巾【拑晞也清也古文拑皆作振】浴用巾拑用浴衣【用巾用拭之也喪大記曰御者二人浴浴水用盆沃水用料】湔濯棄于坎【沐浴餘潘水巾櫛浴衣亦并棄之古文湔作緣荆 之間語】蚤揃如他日【蚤讀為爪斷爪揃鬚也人君則小臣為之他日平生時】髻用組乃筭設明衣裳【用組束髮也古文髻皆為括】

右沐浴 記夏祝淅米差盛之【差擇之】御者四人抗衾而浴檀第【抗衾為其裸裎蔽之也檀袒也袒簣去席盪水便】其母之喪則內御者浴髻無筭【內御女御也無筭猶丈夫之不冠也】設明衣婦人則設中帶【中帶者今之禪褌 本經記】管人汲不說繻屈之盡階不升堂授御者御者入浴小臣四人抗衾御者二人浴浴水用盆沃水用料浴用絺巾拑用浴衣如他日小臣爪足浴餘水棄于坎其母之喪則內御者抗衾而浴管人汲授御者御者差沐于堂上君沐梁大夫沐稷士沐梁甸人為塋于西牆下陶人出重鬲管人授沐乃煮之甸人取所徹廟西北扉薪用爨之管人授御者沐乃沐沐用瓦盤拑用巾如他日小臣爪手翦須濡濯棄于坎【詳見喪大記】

曾子之喪浴于爨室【見曾元之辭易簣矯之以謙讓也禮死于適室檀弓】

主人入即位【已設明衣可以入也】商祝襲祭服祿衣次【商祝祝習商禮者商人教之以敬于接神宜襲布衣牀上祭服爵弁服皮弁服皆从君助祭之服大蜡有皮弁素服而祭送終之禮也襲衣于牀牀次含牀之東衽如初也喪大記曰含一牀襲一牀遷尸于堂又一牀】主人出南面左袒扱諸面之右盥于盆上洗貝執以入宰洗柩建于米執以從【俱入戶西鄉也今文宰不言執】商祝執巾從入當牖北面徹枕設巾徹楔受貝奠于尸西【當牖北面值尸南也設巾覆面為飯之遺落米也如商祝之事位則尸南首明矣】主人由足西牀上坐東面【不敢从首前也祝受貝米奠之口實不由足也】祝又受米奠于貝北宰從立于牀西在右【米在貝北便扱者也宰立牀西在主人之右當佐飯事】主人左扱米實于右三實于貝左中亦如之又實米唯盈【于右尸口之右唯盈取滿而已】主人襲反位【襲復衣也位在尸東】商祝掩瑱設幙目乃屨綦結于跗連紉【掩者先結頤下既瑱幙目乃還結項也跗足上也紉屨飾如刀衣鼻在屨頭上以餘組連之止足圻也】乃襲三稱【遷尸于襲止而衣之凡衣死者左衽不紐襲不言設牀又不言遷尸于襲上以其俱當牖無大異】明衣不在算【算數也不在數明衣禪衣不成稱也】設鞶帶撝笏【鞶帶韎鞶緇帶不言韎緇者省文亦欲見鞶自有帶鞶帶用革撝插也插于帶之右旁古文鞶為合也】設決麗于擊自飯持之設幄乃連擊【麗施也擊手後節中也飯大擘指本也決以韋為之籍有彊彊內端為紐外端有橫帶設之以紐攬大擘本也因否其彊以橫帶貫紐結于擊之表也設幄者以綦繫鉤中指由手表與決帶之餘連結之此謂右手也古文麗亦為連擊作挽】設冒囊之撫用衾【囊韜盛物者取事名焉衾者始死時歛衾今文囊為囊】巾舄髻蚤埋于坎【坎至此築之也將襲辟奠既則反之】

右飯含襲 記飯于牖下【詳見喪禮義】 卒洗貝反于笄實貝柱右顙左顙【象齒堅】 夏祝徹餘飯【徹去鬻】 瑱塞耳【塞充室本經記】 設握裏親膚繫鉤中指結于擊【擊掌後節中也手無決者以握擊一端繞擊還从上自貫反與其一端結之】 甸人築圻坎【築實土其中堅之穿坎之名又曰圻】 隸人湣廁【隸人罪人也今之徒役作者也湣塞也為人復往褻之又亦鬼神不用 同上】 髻爪土埋之【詳見喪大記】 司士賁告于子游曰請襲于牀子游曰諾縣子聞之曰汰哉叔氏專以禮許人【叔氏子游別字 檀弓】 鑿巾以飯公羊賈為之也【記士失禮之所由始也士親飯必發其巾大夫以上賓為飯焉則有鑿巾雜記】 既襲宵為燎于中庭【宵夜本經記】

重木刊鑿之甸人置重于中庭叁分庭一在南【木也縣物焉曰重刊斲治鑿之為縣簪孔也士重木長三尺】 夏祝鬻餘飯用二鬲于西牆下【夏祝祝習夏禮者也夏人教以忠其于養宜鬻餘飯以飯尸餘米為鬻也重主道也士二鬲則大夫四諸侯六天子八與簋同差】 冪用疏布久之繫用幹縣于重冪用葦席北面左衽帶用幹賀之結于後【久讀為灸謂以蓋塞鬲口也幹竹密也以席覆重辟屈而反兩端交于後左衽西端在上賀加也今文冪皆作密】 祝取銘置于重【祝習周禮者也】

右設重置銘

厥明陳衣于房南領西上綯絞橫三縮一廣終幅析其末【綯屈也絞所以收束衣服為堅急者也以布為之縮從也橫者三幅從者一幅析其末者令可結也喪大記曰絞一幅為三】 緇衾禭裏無紃【紃被識也斂衣或倒被無別于前後也衾制同皆五幅也】 祭服次【爵弁服皮弁服】 散衣次【祿衣以下袍繭之屬】 凡十有九稱【祭服與散衣】 陳衣繼之【庶綯】 不必盡用【取稱而已不務多】 饌于東堂下脯醢醴酒冪奠用功布實于簞在饌東【功布鍛濯灰治之布也凡在東西堂下者南齊坵古文奠為尊】 設盆盥于饌東有巾【為奠設盥也喪事略故無洗也】 苴經大鬲下本在左要經小焉散帶垂長三尺牡麻經右本在上亦散帶垂皆饌于東方【苴經斬衰之經也苴麻者其貌苴以為經服重者尚粗惡經之言實也鬲盥也中人之手盥圍九寸經帶之差自此出焉下本在左重服統于內而本陽也要經小焉五分去一牡麻經者齊衰以下之經也牡麻經者其貌易服輕者宜差好也右本在上輕服本于陰而統于外散帶之垂者男子之道文多變也饌于東方東坵之南苴經為上】 婦人之帶牡麻結本在房【婦人亦有苴經但言帶者記其異此齊衰婦人斬衰婦人亦苴經也】 牀第夷衾饌于西坵南【第簣也夷衾覆尸之衾喪大記曰自小斂以往用夷衾夷衾質殺之裁猶冒也】 西方盥如東方【為舉者設盥也如東方者亦用盆布巾饌于西堂下】 陳一鼎于寢門外當東塾少南西面其實特豚四髧去蹄兩肱脊肺設局鬲鬲西末素俎在鼎西西順覆匕東柄【髧解也四解之殊肩髧而已喪事略去蹄去其甲為不絜清也肱脅也素俎喪尚質既饌將小斂則辟襲奠今文髧為剔肱為迫古文鬲為密】

右陳小斂衣經帶奠 記小斂于戶內大斂于阼土以葦席【詳見喪大記】 厥明滅燎陳衣【記節】 凡絞紼用布倫如朝服【凡凡小斂大斂也倫比也今文無紼古文倫為輪 本經記】 小斂布絞縮者一橫者三士緇衾一衣十有九稱士陳衣于房中皆西領北上絞紼不在列小

歛之衣祭服不倒君無禭大夫士畢主人之祭服親戚之衣受之不以即陳君大夫士皆用複衣複衾【詳見喪大記】袍必有表不禪衣必有裳謂之一稱凡陳衣者

實之篋取衣者亦以篋升降自西階凡陳衣不詘非列采不入絺綌紵不入【同上】
絞紵衾冒死而後制【王制 大歛章通用】設於東堂下南順齊于坵饌于其上兩甌醴酒酒在南篋在東南順實角觶四木枵二素勺二豆在甌北二以並籩亦如之【於今之輦也角觶四木枵二素勺二為夕進醴酒兼饌之也勺二醴酒各一也豆籩二以併則是大歛饌也記于此者明其他與小歛同陳古文角觶為角枵】凡籩豆實具設皆巾之【籩豆偶而為具具則于饌巾之巾之加飾也明小歛一豆一籩不巾】觶俟時而酌枵覆加之面枋及錯建之【時朝夕也檀弓曰朝奠日出夕奠逮日 本經記 陳大歛奠通用】喪不剥奠也與祭肉也與【剥猶裸也有牲肉則中之為其久設塵埃加也脯醢之奠不巾檀弓 後殷奠通用】喪服先散帶【詳見喪禮義】批以桑長三尺或曰五尺【批所以載牲體者此謂喪祭也吉祭批用】

【棘】畢用桑長三尺刊其柄與末【畢所以助主人載者刊猶削也 雜記大歛及凡喪祭陳鼎者通用】奠以素器【詳見喪禮義後凡奠通用】

士盥二人以並東面立于西階下【立俟舉尸也今文並為併】布席于戶內下莞上簟【有司布歛席也】商祝布絞衾散衣祭服祭服不倒美者在中【歛者趨方或慎倒衣裳祭服尊不倒之也美善也善衣後布于歛則在中也既後布祭服而又言善者在中明每服非一稱也】士舉遷尸反位【遷尸于服上】設牀第于兩楹之間衽如初有枕【衽亦寢之席也亦下莞上簟】卒歛徹帷【尸已飾】主人西面馮尸踊無算主婦東面馮亦如之【馮服膺之】主人髻髮袒衆主人免于房【始死將斬衰者雞斯將齊衰者素冠今至小歛變又將初變服也髻髮者去笄纚而紛衆主人免者齊衰將袒以免代冠冠服之尤尊不以袒也免之制未聞舊說以為如冠狀廣一寸喪服小記曰斬衰髻髮以麻免而以布此用麻布為之狀如今之著慘頭矣自項中而前交于額上卻繞紛也于房于室釋髻髮宜于隱者今文免皆作纚古文髻作括】婦人髻于室【始死婦人將斬衰者去笄而纚將齊衰者骨笄而纚今言髻者亦去笄纚而紛也齊衰以上至笄猶髻髻之異于髻髮者既去纚而以髮為大紛如今婦人露紛其象也檀弓曰南宮縚之妻之姑之喪夫子誨之髻曰爾母縱縱爾爾母扈扈爾其用麻布亦如著慘頭然】

右小歛【髻髮髻】記夏后氏尚黑【以建寅之月為正物生尚黑】大事歛用昏【昏時亦黑此大事謂喪事也】殷人尚白【以建丑之月為正物牙色白】大事歛用日中【日中時亦白】周人尚赤【以建子之月為正而物萌色赤】大事歛用日出【日出時亦赤 檀弓 大歛章通用】小歛辟奠不出室【未忍神遠之也辟襲奠以辟歛既歛則不出于室設于序西南畢事而去 本經記】小歛而徹帷【詳見喪禮義】
無踊節【其喪未可節也】既馮尸主人袒髻髮絞帶衆主人布帶【衆主人齊衰以下 本經記】小歛主人即位于戶內主婦東面乃歛卒歛主人馮之踊主婦亦如之主人袒脫髻括髮以麻婦人髻帶麻于房中凡歛者袒遷尸者襲士之喪胥為侍士是歛小歛大歛祭服不

倒皆左衽結紱不紐歛者既歛必哭士與其執事則歛歛焉則為之壹不食凡歛者六人鋪紱紼踊鋪衾踊鋪衣踊遷尸踊歛衣踊歛衾踊歛紱紼踊士馮父母妻長子庶子庶子有子則父母不馮其尸凡馮尸者父母先妻子後父母于子執之子于父母馮之婦于舅姑奉之舅姑于婦撫之妻于夫拘之夫于妻于昆弟執之馮尸不當君所凡馮尸興必踊【詳見喪大記】嫂不撫叔叔不撫嫂【遠別也雜記】君不撫僕妾【同上凡歛者袒至此大歛章通用】

士舉男女奉尸俛于堂幬用夷衾男女如室位踊無算【俛之言尸也夷衾覆尸柩之衾也堂謂楹間牀第上也今文俛作夷】主人出于足降自西階衆主人東即位婦人阼階上西面主人拜賓大夫特拜士旅之即位踊襲經于序東復位【拜賓鄉賓位拜之也即位踊東方位襲經于序東東夾前】

右奉尸俛于堂拜賓襲經記徹帷男女奉尸夷于堂降拜士拜卿大夫于位于士旁三拜士妻特拜命婦汜拜衆賓于堂上主人即位襲帶經踊母之喪即位而免哭尸于堂上主人在東方由外來者在西方諸婦南鄉婦人迎客送客不下堂下堂不哭男子出寢門見人不哭其無女主則男主拜女賓于寢門內其無男主則女主拜男賓於阼階下子幼則以衰抱之人為之拜在竟內則俟之在竟外則殯葬可也喪有無後無無主【詳見喪大記】大夫弔當事而至則辭焉【辭猶告也擯者以主人有事告也主人無事則為大大出檀弓】士之喪於大夫不當歛則出【詳見喪大記】士妻不當歛則為命婦出【同上】當袒大夫至雖當踊絕踊而拜之反改成踊乃襲【尊大夫至則拜之不待事已也更成踊者新其事也】于士既事成踊襲而后拜之不改成踊【于士士至也事謂大小歛之屬雜記】大夫弔之雖總必稽顙【小記】小歛大歛啓皆辯拜【嫌當事來者終不拜故明之也此既事皆拜雜記大夫弔以下大歛章通用】

乃奠【祝與執事為之】舉者盥右執卻之左執俎橫攝之入阼階前西面錯錯俎北面【舉者盥出門舉鼎者右人以右手執左人以左手執俎因其便也攝持也西面錯錯鼎于此宜西面錯俎北面俎宜西順之】右人左執匕抽局予左手兼執之取鼎委于鼎北加局不坐【抽局取鼎加局于鼎上皆右手今文局為鉉古文予為于鼎為密】乃枅載兩髀于兩端兩肩亞兩肱亞脊肺在于中皆覆進抵執而俟【乃枅以枅次出牲體右人也載受而載于俎左人也亞次也凡七體皆覆為塵抵本也進本者未異于生也骨有本末古文枅為匕髀為脾今文肱為迫抵皆為抵】夏祝及執事盥執醴先酒脯醢俎從升自阼階丈夫踊甸人徹鼎巾待于阼階下【執事者諸執奠事者巾功布也執者不升已不設祝既錯醴將受之】奠于尸東執醴酒北面西上【執醴酒者先升尊也立而俟後錯要成也】豆錯俎錯于豆東立于俎北西上醴酒錯于豆南祝受巾巾之由足降自西階婦人踊奠者由重南東丈夫踊【巾之為塵也東反其位】賓出主人拜送于門外【廟門外也】乃代哭不以官【代更也孝子始有親喪悲哀憔悴禮防其以死傷生使之更哭不絕聲而已入君以官尊卑士賤以親疎為之三日之後哭無時周禮挈壺氏凡喪縣壺以代哭】

右小歛奠記小歛之奠子游曰于東方曾子曰于西方歛斯席矣【曾子以俗說非又大歛奠于堂乃有席】小歛之奠在西方魯禮之未失也【末世失禮之為】

檀弓】士代哭不以官【詳見喪大記】

有禭者則將命擯者出請入告主人待于位【喪禮略于威儀既小歛擯者乃用辭出請之辭曰孤某使某請事】擯者出告須以賓入【須亦待也出告之辭曰孤某須矣】賓入中庭北面致命主人拜稽顙賓升自西階出于足西面委衣如于室禮降出主人出拜送朋友親禭如初儀西階東北面哭踊三降主人不踊【朋友既委衣又還哭于西階上不背主人】禭者以褶則必有裳執衣如初徹衣者亦如之升降自西階以東【帛為褶無絮雖複與禪同有裳乃成稱不用表也以東藏以待事也古文褶為襲】

右有禭者

宵為燎于中庭【宵夜也燎大燹】

右設燎 記土堂上一燭下一燭【詳見喪大記】

厥明滅燎陳衣于房南領西上綯絞紵衾二君禭祭服散衣庶禭凡三十稱紵不在算不必盡用【紵單被也衾二者始死歛衾今又復制也小歛衣數自天子達大歛則異矣喪大記曰大歛布絞縮者三橫者五】東方之饌兩瓦甗其實醴酒角觶木栖駢豆兩其實葵菹芋羸醢兩籩無滕布巾其實栗不擇脯四脰【此饌但言東方則亦在東堂下也駢白也齊人或名全菹為芋滕緣也詩云竹芻綯滕布巾籩巾也籩豆具而有巾盛之也特牲饋食禮有籩巾今文羸為蜗古文膳為甸】奠席在饌北歛席在其東【大歛奠而有席彌神之】掘殯見衽【殯埋棺之坎也掘之于西階上衽小要也喪大記曰君殯用楯攢至于上畢塗屋大夫殯以幬攢置于西序塗不暨于棺士殯見衽塗上幬之又曰君盖用漆三衽三束大夫盖用漆二衽二束士盖不用漆二衽二束】棺入主人不哭升棺用軸盖在下【軸軼軸也軼狀如牀軸其輪輓而行】熬黍稷各二筐有魚腊饌于西坵南【熬所以惑蚍蜉令不至棺旁也為舉者設盆盥于西】陳三鼎于門外北上豚合升魚鱠鮓九腊左胖髀不升其他皆如初【合升合左右體升于鼎其他皆如初謂豚體及匕俎之陳如小歛時合升四鬯亦相互耳】

右陳大歛衣奠及殯具 記生與來日死與往日【與猶數也生數來日謂成服杖以死明日數也死數往日謂殯歛以死日數也此士禮貶于大夫者大夫以上皆以來日數士喪禮曰死日而襲厥明而小歛又厥明大歛而殯則死三日而更言三日成服杖似異日矣喪大記曰士之喪二日而殯三日之朝主人杖二者相推其然明矣

曲禮】大歛於阼士以葦席【詳見喪大記】大歛布絞縮者三橫者五布紵二衾君大夫士一也士陳衣于序東三十稱西領南上絞紵如朝服絞一幅為三不辟紵五幅無紵大歛君大夫士祭服無算君褶衣褶衾大夫士猶小歛也【同上】

士棺六寸裏棺不綠盖不用綠二衽二束【同上】后木曰喪吾聞諸縣子曰夫喪不可不深長思也【后木魯孝公子惠伯鞏之後】買棺外內易我死則亦然【此孝子之事非所托檀弓】有虞氏瓦棺【始不用薪也有虞氏尚陶】夏后氏塋周【火熟曰塋燒土冶以周于棺也或謂之土周田是也弟子職曰右手折塋】殷人棺槨【槨大也以木為之言槨大于棺

也殷人上梓】周人牆置翬【翬柳衣也凡此言後王之制文】周人以殷人之棺槨葬長殤以夏后氏之塋周葬中殤下殤以有虞氏之瓦棺葬無服之殤【略未成人同上】孔子初仕為中都宰【中都魯邑】制為養生送死之節為四寸之棺五寸之槨因丘陵為墳不封【不聚土以起墳】不樹【不樹松柏】行之一年而西方之諸侯則焉【魯國在東方故西方諸侯皆法則】家語案陳小斂衣章必有表陳衣取衣絞衾死而後制斂酒醴籩豆喪不剥奠批以桑奠以素器凡六條並此章通用當互考】

燭俟于饌東【燭燹也饌東方之饌有燭者堂雖明室有闇大在地曰燎執之曰燭】祝徹盥于門外入升自阼階丈夫踊【祝徹祝與有司當徹小斂之奠者小斂設盥于饌東有巾大斂設盥于門外彌有威儀】祝徹巾授執事者以待【授執巾者于尸東使先待于阼階下為大斂奠又將巾之祝還徹醴也】徹饌先取醴酒北面【北面立相待俱降】其餘取先設者出于足降自西階婦人踊設于序西南當西榮如設于堂【為求神于庭孝子不忍使其親須臾無所憑依也堂謂尸東也凡奠設于序西南者畢事而去之】醴酒位如初執事豆北南面東上【如初者如其醴酒北面西上也執醴尊不為便事變位】乃適饌【東方之新饌】帷堂【徹事畢】

右徹小斂奠帷堂

婦人尸西東面主人及親者升自西階出于足西面袒【袒大斂變也不言髻免髻髮小斂以來自若矣】士盥位如初【亦既盥並立西階下】布席如初【亦下莞上簟鋪于阼階上于楹間為少南】商祝布絞紵衾衣美者在外君綖不倒【至此乃用君綖主人先自盡】有大夫則告【後來者則告以方斂非斂時則當降拜之】士舉遷尸復位主人踊無算卒斂徹帷主人馮如初主婦亦如之

右大斂 記大斂于阼【未忍便離主人位也主人奉尸斂于棺則西階上賓之 本經記】士之喪將大斂君不在其餘禮猶大夫也【詳見喪大記】大夫升自西階階東北面東上【視斂】既馮尸大夫逆降復位【中庭西面位 本經記 案小斂章夏后氏尚黑一條及凡斂者袒至君不撫僕妾又奉尸夷于堂章大夫弔當事而至則辭皆此章通用當互考】

主人奉尸斂于棺踊如初乃蓋【棺在殯中斂尸焉所謂殯也檀弓曰殯于客位】主人降拜大夫之後至此北面視殯【北面于西階東】衆主人復位婦人東復位【阼階上下之位】設熬旁一筐乃塗踊無算【以木覆棺上而塗之為火備】卒塗祝取銘置于殯主人復位踊襲【為銘設柩樹之殯東】

右殯 記死三日而殯【詳見卒哭祔練祥禫記】士庶人三日而殯【王制】士殯見衽塗上帷之熬二種四筐加魚腊焉【詳見喪大記】君于士有賜帟【帟幕之小者所以承塵賜之則張于殯上大夫以上幕人職供焉 檀弓】既殯主人說髦【既殯置銘于殯復位時也今文說皆作稅兒生三月翦髮為髻男角女羈否則

男左女右長大猶為飾存之謂之髦所以順父母幼小之心至此尸柩不見喪無飾可以去之髦之形象未聞 本經記】 親沒不髦【去為子之飾 玉藻】

乃奠燭升自阼階祝執巾席從設于奧東面【執燭者先升堂照室自是不復奠于尸祝執巾與執席者從入為安神位室中西南隅謂之奧執燭南面巾委于席右】祝反降及執事執饌【東方之饌】士盥舉鼎入西面北上如初載魚左首進鬯三列腊進柢【如初如小斂舉鼎執匕俎局鼎杞載之儀魚左首設而在南鬯脊也左首進鬯亦未異于生也凡未異于生者不致死也古文首為手鬯為耆】祝執醴如初酒豆籩俎從升自阼階丈夫踊甸人徹鼎【如初祝先升】奠由楹內入于室醴酒北面【亦如初】設豆右菹菹南栗栗東脯豚當豆魚次腊特于俎北醴酒在籩南巾如初【右菹菹在醴南也此左右之異于魚者載者統于執設者統于席醴當栗南酒當脯南】既錯者出立于戶西西上祝後闔戶先由楹西降自西階婦人踊奠者由重南東丈夫踊【為神馮依之也】賓出婦人踊主人拜送于門外入及兄弟北面哭殯兄弟出主人拜送于門外【小功已下至此可以歸異門大功亦存焉】衆主人出門哭止皆西面于東方闔門右大斂奠

記巾奠執燭者滅燭出降自阼階由主人之北東【巾奠而室事已 本經記】 曾子問曰大功之喪可以與於饋奠之事乎【饋奠在殯時也】孔子曰豈大功耳自斬衰以下皆可禮也曾子曰不以輕服而重相為乎【怪以重服而為人執事】孔子曰非此之謂也【非謂為人謂于其所為服也】天子諸侯之喪斬衰者奠【為君服者皆斬衰唯主人不奠】大夫齊衰者奠【服斬衰者不奠辟正君也齊衰者其兄弟】士則朋友奠不足則取大功以下者不足則反之【服齊衰者不奠辟大夫也言不足者謂殷奠時 曾子問 朔月奠等通用】

主人揖就次【次謂斬衰倚廬齊衰堊室也大功有帷帳小功緦麻有牀第可也】

右喪次 記居倚廬【倚牀為廬在中門外東方北戶】寢苦枕塊【苦編藁塊塼也】不說經帶【衰戚不在於安】哭晝夜無時【哀至則哭非必朝夕】非喪事不言【不忘所以為親】歠粥朝一溢米夕一溢米不食菜果【不在于飽與滋味粥麩也二十兩曰溢為米一升二十四合升之一實在木曰果在地曰蓏 本經記

凡喪次居處之節它記所見者別見喪通禮居處章】

君有賜焉則視斂既布衣君至【賜恩惠也斂大斂君視大斂皮弁服襲裘主人成服之後往則錫衰】主人出迎于外門外見馬首不哭還入門右北面及衆主人袒【不哭厭于君不敢伸其私恩】巫止于廟門外祝代之小臣二人執戈先二人後【小臣掌正君之法儀者周禮男巫王弔則與祝前喪祝王弔則與巫前檀弓曰君臨臣喪以巫祝桃茢執戈以惡之所以異于生也皆天子之禮諸侯臨臣之喪則使祝代巫執茢居前下天子也小臣君行則在前後君升則俠阼階北面凡宮有鬼神曰廟】君釋采入門主人辟【釋采者祝為君禮門神也必禮門神者明君無故不來也禮運曰諸侯非問疾弔喪而入諸臣之家是謂君臣為讎】君升自阼階西鄉祝負墉南面主人中庭【祝南面房中東鄉君牆謂之墉主人中庭進益北】君哭主人哭拜稽顙成踊出【出不敢必君之卒斂事】君命反行事主人復位【大斂事】君升主人主人西楹東北面【命主人使之升】升公卿大夫繼主人東上乃斂【公大國之孤四

命也春秋傳曰吾公在壑谷】卒公卿大夫逆降復位主人降出【逆降者後升者先降位如朝夕哭弔之位】君反主人主人中庭君坐撫當心主人拜稽顙成踊出【撫手案之凡馮尸興必踊今文無成】君反之復初位衆主人辟于東壁南面【以君將降也南面則當坫之東】君降西鄉命主人馮尸主人升自西階由足西面馮尸不當君所踊主婦東面馮亦如之【君必降者欲孝子盡其情】奉尸歛于棺乃盖主人降出君反之入門左視塗【殯在西階上入門左由便趨疾不敢久留君】君升即位衆主人復位卒塗主人出君命之反奠入門右【亦復中庭位】乃奠升自西階【以君在阼】君要節而踊主人從踊【節謂執奠始升階及既奠由重南東時也】卒奠主人出哭者止【以君將出不敢謹聽聒尊者也】君出門廟中哭主人不哭辟君式之【辟逡遁辟位也古者立乘式謂小俛以禮主人也曲禮曰立視五羈式視馬尾】二車畢乘主人哭拜送【二車副車也其數各視其命之等君出使異姓之士乘之在後君弔盖乘象路曲禮曰乘君之乘車不敢曠左左必式】襲人即位衆主人襲拜大夫之後至者成踊【後至布衣而後來者】賓出主人拜送【自賓出以下如君不在之儀】

右君視歛 記君于土既殯而往為之賜大歛焉【詳見喪大記】
君視歛若不待奠加盖而出不視歛則加盖而至卒事【為有他故及辟忌也 本經記】
大夫士若君不戒而往不具殷奠君退必奠【詳見喪大記】

三日成服杖【既殯之明日全三日始歠粥矣曲禮曰生與來日】

右成服 記生與來日【詳見上陳大歛章】 三日絞垂【成服日絞要經之散垂者】冠六升外緹纓條屬厭【緹謂縫著于武也外之者外其餘也纓條屬者通屈一條繩為武垂下為纓屬之冠厭伏也】衰三升【衣與裳也】屨外納【納收餘也】杖下本竹桐一也【順其性也本經記】

拜君命及衆賓不拜棺中之賜【禮尊者加惠明日必往拜謝之棺中之賜不施已也】

右拜君命及賓 記主人乘惡車【拜君命拜衆賓及有故行所乘也雜記曰端衰喪車皆無等然則此惡車王喪之木車也古文惡作塋】白狗臂【未成豪狗臂覆笭也以狗皮為之取其膻也白于喪飾宜古文臂為𠂔】蒲蔽【蔽藩】御以蒲菽【不在于驅馳蒲菽牡蒲莖也古文菽作𦵏】犬服【笭間兵服以犬皮為之取堅也亦白】木鐃【取少聲今文鐃為鐃】約綏約轡【約繩綏所以引升車】木鑣【亦取少聲古文鑣為苞】馬不齊髦【齊翦也今文髦為毛主人之惡車如王之木車則齊衰以下其乘素車纁車駟車漆車與】主婦之車亦如之疏布褌【褌者車裳幃于蓋弓垂之】貳車白狗攝服【貳副也攝猶緣也狗皮綠服差飾】其他皆如乘車【如所乘惡車 本經記】端衰喪車皆無等【詳見喪服制度】
喪公弔之必有拜者【往謝之】雖朋友州里舍人可也【謂無主後檀弓】

朝夕哭不辟子卯【既殯之後朝夕及哀至乃哭不代哭也子卯桀紂亡日凶事不辟吉事闕焉】婦人即位于堂南上哭丈夫即位于門外西面北上外兄弟在其南南上賓繼之北上門東北面西上門西北面東上西方東面北上主人即位辟門【外兄弟異姓有服者也辟開也】

凡廟門有事則開無事則閉】婦人拊心不哭【方有事止謹囂】主人拜賓旁三右還入門哭婦人踊【先西面拜乃南面拜東面拜也】主人堂下直東序西面兄弟皆即位如外位卿大夫在主人之南諸公門東少進他國之異爵者門西少進敵則先拜他國之賓凡異爵者拜諸其位【賓皆即此位乃哭盡哀止主人乃右還拜之如外位矣兄弟齊哀大功者主人哭則哭小功緦麻亦即位乃哭上言賓此言卿大夫明其亦賓爾少進前于列異爵卿大夫也他國卿大夫亦前于列尊之拜諸其位就其位特拜】

右朝夕哭 記朝夕哭不帷【緣孝子之心欲見殯肆也既出則施其廬鬼神尚幽闇也 雜記】帷殯非古也自敬姜之哭穆伯始也【穆伯魯大夫季悼子之子公甫靖也敬姜穆伯之妻文伯歟之母也禮朝夕哭不帷 檀弓】

徹者盥于門外燭先入升自阼階丈夫踊【徹者徹大斂之宿奠】祝取醴北面取酒立于其東取豆籩俎南面西上祝先出酒豆籩俎序從降自西階婦人踊【序次也】設于序西南直西榮醴酒北面西上豆西面錯立于豆北南面籩俎既錯立于執豆之西東上酒錯復位醴錯于西遂先由主人之北適饌【遂先者明祝不復位也適饌適新饌將復奠】

右徹大斂奠

乃奠醴酒脯醢升丈夫踊入如初設不巾【入入于室也如初設者豆先次籩次酒次醴也不巾無菹無栗也菹栗具則有俎有俎乃巾之】錯者出立于戶西西上滅燭出祝闔戶先降自西階婦人踊奠者由重南東丈夫踊賓出婦人踊主人拜送【哭止乃奠奠則禮畢矣今文無拜】衆主人出婦人踊出門哭止皆復位闔門主人卒拜送賓揖衆主人乃就次

右朝夕奠 記朝奠日出夕奠逮日【陰陽之交庶幾遇之 檀弓】

朔月奠用特豚魚腊陳三鼎如初東方之饌亦如之【朔月月朔日也自大夫以上月半又奠如初者謂大斂時】無籩有黍稷用瓦敦有盖當籩位【黍稷併于甌北也于是始有黍稷死者之于朔月月半猶平常之朝夕大祥之後則四時祭焉】主人拜賓如朝夕哭卒徹【徹宿奠也】舉鼎入升皆如初奠之儀卒柝釋匕于鼎俎行柝者逆出甸人徹鼎其序醴酒菹醢黍稷俎【俎行者俎後執執俎者行鼎可以出其序升入之次】其設于室豆錯俎錯腊特黍稷當籩位敦啟會卻諸其南醴酒位如初【當籩位俎南黍黍東稷會盖也今文無敦】祝與執豆者巾乃出【共為之也】主人要節而踊皆如朝夕哭之儀月半不殷奠【殷盛也士月半不復如朔盛奠下尊者】有薦新如朔奠【薦五穀若時果物新出者】徹朔奠先取醴酒其餘取先設者敦啟會面足序出如入【啟會徹時不復盖也面足執之令足間鄉前也敦有足則敦之形如今酒敦】其設于外如于室【外序西南】

右朔月奠薦新 記朔月童子執帚卻之左手奉之【童子隸子弟若內豎寺人之屬執用左手卻之示未用】從徹者而入【童子不專禮事】比奠舉席埽室聚諸爨布席如初卒奠埽者執帚垂末內鬣從執燭者而東【比猶先也室東南隅謂之爨】燕養饋羞湯沐之饌如他日

【燕養平常所用供養也饋朝夕食也羞四時之珍異湯沐所以洗去汙垢內則曰三日具沐五日具浴孝子不忍一日廢其事親之禮于下室日設之如生存也進徹之時如其頃】朔月若薦新則不饋于下室【以其殷奠有黍稷也下室如今之內堂正寢聽朝事 本經記】

有薦新如朔奠【重新物謂之殷奠 檀弓】

陳小歛章喪不剥奠柩畢用桑奠以素器大歛奠章曾子問條當互考】

筮宅冢人營之【宅葬居也冢人有司掌墓地兆域者營猶度也詩云經之營之】掘四隅外其壤掘中南其壤【為葬將北首故也】既朝哭主人皆往兆南北面免經【兆域也新營之處免經者求吉不敢純凶】命筮者在主人之右【命尊者宜由右出也少儀曰贊幣自左詔辭自右】筮者東面抽上韞兼執之南面受命【韞藏筴之器也兼與筴執之今文無兼】命曰哀子某為其父某甫筮宅度茲幽宅兆基無有後艱【某甫某字也若言山甫孔甫矣宅居也度謀也茲此也基始也言為其父筮葬居今謀此以為幽冥居北域之始得無後將有艱難乎艱難謂有非常若崩壞也孝經曰卜其宅兆而安厝之古文無兆基作期】筮人許諾不述命右還北面指中封而筮卦者在左【述循也既受命而申言之曰述不述者士禮略凡筮因會命筮為述命中封中央壤也卦者識爻卦畫地者古文述皆作術】卒筮執卦以示命筮者命筮者受視反之東面旅占卒進告于命筮者與主人占之曰從【卒筮卦者寫卦示主人乃受而執之旅衆也反與其屬共占之謂掌連山歸藏周易者从猶吉也】主人經哭不踊若不從筮擇如初儀【更擇地而筮之】歸殯前北面哭不踊【易位而哭明非常】

右筮宅 記筮宅冢人物土【物猶相也相其地可葬者乃營之 本經記】如筮則史練冠長衣以筮占者朝服【筮者筮宅也長衣深衣之純以素也長衣練冠純凶服也朝服純吉服也大夫士日朝服以朝也 雜記】祔葬者不筮宅【宅葬地也前人葬既筮之 小記】

大司徒以本俗六安萬民二曰族墳墓【族猶類也同宗者生相近死相迫 地官】墓地不請【受于公民不得私也請求也 王制】

既井椁主人西面拜工左還椁反位哭不踊婦人哭于堂【既已也匠人為椁刊治其材以井構于殯門外也反位拜位也既哭之則往施之窆中矣主人還椁亦以既朝哭矣】

右井椁 記既殯旬而布材與明器【木工宜乾腊且豫成材椁材也 檀弓】

士雜木椁棺椁之間容甌不虞筐【詳見喪大記】有子問于曾子曰問喪于夫子乎【有子孔子弟子有若也夫子卒後問此庶有異聞也喪謂仕失位也魯昭公孫于齊曰喪人其何稱】曰聞之矣喪欲速貧死欲速朽有子曰是非君子之言也【貧朽非人所欲】曾子曰參也聞諸夫子也有子又曰是非君子之言也曾子曰參也與子游聞之有子曰然然則夫子有為言之也曾子以斯言告于子游子游曰甚哉有子之言似夫子也昔者夫子居于宋見桓司馬自為石椁三年而不成【桓司馬宋向戌之孫向魋】夫子曰若是其靡也【靡侈也】死不如速朽之愈也死之欲速朽為桓司馬言之也南宮敬叔反必載寶而朝【敬叔魯孟僖子之子仲孫閱蓋嘗失位去魯得反載其寶來朝于君】夫子曰若是其貨也喪不如速貧之愈也喪之欲速貧為敬叔言之也曾子以子游之言告于有子有子曰然吾固曰非夫子之言也曾子曰子何以知之有子曰夫子制于中都四寸之棺五寸之椁以斯知不欲速朽也【中都

魯邑也孔子嘗為之宰為民作制孔子由中都宰為司空由司空為司寇】昔者夫子失魯司寇將之荆【將應聘于楚】盖先之以子夏又申之以冉有以斯知不欲速貧也【言汲汲於仕得祿檀弓】顏淵死顏路請子之車以為之槨子曰才不才亦各言其子也鯉也死有棺而無槨吾不徒行以為之槨以吾從大夫之後不可徒行也【胡氏曰孔子遇舊館人之喪曾脫驂以賻之矣今乃不許顏路之請何也葬可以無棺驂可以脫而復求大夫不可以徒行命車不可以與人而鬻諸市也且為所識窮乏者得我而勉強以副其意豈誠心與直道哉 論語】

獻材于殯門外西面北上綯主人徧視之如哭槨獻素獻成亦如之【材明器之材視之亦拜工左還形法定為素飾治畢為成】

右獻明器 記既殯旬而布材與明器【詳見上章】竹不成用瓦不成味木不成斲琴瑟張而不平竽笙備而不和有鐘磬而無簨簴【詳見喪禮義】
夏后氏用明器殷人用祭器周人兼用之【同上】

卜日既朝哭皆復外位卜人先奠龜于西塾上南首有席楚燂置于燂在龜東【楚荆也荆燂所以鑽灼龜者燂炬也所以燃火者也周禮蕤氏掌共燂挈以待卜事凡卜以明火熬燂遂灼其煖契以授卜師遂以役之】族長涖卜及宗人吉服立于門西東面南上占者三人在其南北上卜人及執燂席者在塾西【族長有司掌族人親疏者也涖臨也吉服服玄端也占者三人掌玉兆瓦兆原兆者也在塾西者南面東上】闔東扉主婦立于其內【扉門扉也】席于闔西闔外【為卜者也古文闔作 闔作蹙】宗人告事具主人北面免經左擁之涖卜即位于門東西面【涖卜族長也更西面當代主人命卜】卜人抱龜燂先奠龜西首燂在北【既奠燂又執龜以待之】宗人受卜人龜示高【以龜腹甲高起所當灼處示涖卜也】涖卜受視反之宗人還少退受命【受涖卜命授龜宜近受命宜卻也】命曰哀子某來日卜葬某父某甫考降無有近悔【考登也降下也言卜此日葬魂神上下得無近于咎悔者乎】許諾不述命還即席西面坐命龜興授卜人龜負東扉【宗人不述命亦士禮略凡卜述命命龜異龜重威儀多也負東扉俟龜之兆也】卜人坐作龜興【作猶灼也周禮卜人凡卜事示高揚火以作龜致其墨興起也】宗人受龜示涖卜涖卜受視反之宗人退東面乃旅占卒不釋龜告于涖卜與主人占曰某日從【不釋龜復執之也古文曰為日】授卜人龜告于主婦主婦哭【不執龜者下主人也】告于異爵使人告于眾賓【眾賓僚友不來者也】卜人徹龜宗人告事畢主人經入哭如筮宅賓出拜送若不從卜擇如初儀

右卜葬日 記大夫士庶人三月而葬【王制】
凡卜筮日旬之外曰遠某日喪事先遠日【喪事葬與練祥也
曲禮】祝稱卜葬虞子孫曰哀夫曰乃兄弟曰某卜葬

其兄弟曰伯子某【祝稱卜葬虞者卜葬卜虞祝稱主人之辭也孫謂為祖後者稱曰哀孫某卜葬其祖某甫夫曰乃某卜葬其妻某氏兄弟相為卜稱名而已 雜記】
卜日吉告從于主婦主婦哭主婦升堂哭者皆止【事畢本經記】

禮書綱目卷二十三

卷二十四

<經部,禮類,通禮之屬,禮書綱目

欽定四庫全書

禮書綱目卷二十四 婺源江永撰

士喪禮下【本名既夕】

經【鄭目錄云既夕禮士喪禮之下篇也既已也謂先葬二日已夕之時與葬間一日凡朝廟日請啟期必容焉此諸侯之下士一廟其上士二廟則既夕哭先葬前三日別錄名士喪禮下篇】

既夕哭【既已也謂出門哭止復外位時】請啟期告于賓【將葬當遷柩于祖有司于是乃請啟殯之期于主人以告賓賓宜知其時也今文啟為開】

右請啟期

夙興設盥于祖廟門外【祖王父也下士祖禰共廟】陳鼎皆如殯東方之饌亦如之【皆皆三鼎也如殯如大斂既殯之奠】俛牀饌于階間【俛之言尸也朝正柩用此牀】

右陳朝祖奠具 記夷牀輶軸饌于西階東【明階間者位近西也夷牀饌于祖廟輶軸饌于殯宮其二廟者于禰亦饌輶軸焉古文輶或作拱】其二廟則饌于禰廟如小斂奠乃啟【祖尊禰卑也士事祖禰上士異廟下士共廟 本經記
上篇陳小斂章喪不剥奠批畢用桑奠以素器大斂奠章大功與饋奠當互考】

二燭俟于殯門外【早闇以為明也燭用蒸】丈夫髻散帶垂即位如初【為將啟變也比互文以相見耳髻婦人之變喪服小記曰男子死而婦人髻男子冠而婦人笄如初朝夕哭門外位】婦人不哭主人拜賓入即位袒【此不蒙如初者以男子入門不哭也不哭者將有事止讙囂也】商祝免袒執功布入升自西階盡階不升堂聲三啟三命哭【功布灰治之布也執之以接神使有所拂仿也聲三三有聲存神也啟三三言啟告神也舊說以為聲噫興也今文免作紼】燭入【照徹與啟殯者】祝降與夏祝交于階下取銘置于重【祝降者祝徹宿奠降也與夏祝交事相接也夏祝取銘置于重為啟殯遷之吉事交相左凶事交相右今文銘皆作名】踊無算【主人也】商祝拂柩用功布撫用夷衾【拂去塵也撫覆之為其形露】

右啟 記啟之所外內不哭【將有事為其讙囂既啟命】 啟辯拜【詳見小斂章】

遷于祖用軸【遷徙也徙于祖朝祖廟也檀弓曰殷朝而殯于祖周朝而遂葬盖象平生時將出必辭尊者軸軼軸也軸狀如轉轆刻兩頭為軼軼狀如長 穿程前後著金而關軸焉大夫諸侯以上有四周謂之輶天子畫之以龍】重先奠從燭從柩從燭從主人從【行之序也主人从者大夫由右婦人由左以服之親疎為先後各从其昭穆男賓在前女賓在後】升自西階【柩也猶用子道不由阼也】奠俟于下東面北上【俟正柩也】主人從升婦人升東面衆人東即位【東方之位】正柩于兩楹間用俛牀【兩楹間象鄉戶牖也是時柩北首】主人柩東西面置重如初【如殯宮時也】席升設于柩西奠設如初巾之升降自西階【席設于柩之西直柩之西當西階也以奠設如初東面也不統于柩神不西面也不設柩東東非神位也巾之者為禦當風塵】主人踊無算降拜賓即位踊襲主婦及親者由足西面【設奠時婦人皆室戶西南面奠畢乃得東面親者西面堂上迫疏者可以居房中】薦車直東榮北轡【薦進也進車者象生時將行陳駕也今時謂之魂車輶輶也車當東榮東陳西上于中庭】質明滅燭【質正也】徹者升自阼階降自西階【徹者辟新奠不設序西南已再設為褻】乃奠如初升降自西階【為遷祖奠也奠升不由阼階柩北首辟其足】主人要節而踊【節升降】薦馬纓三就入門北面交轡圉人夾牽之【駕車之馬每車二疋纓今馬鞅也就成也諸侯之臣飾纓以三色而三成此三色者盖條絲也其著之如屬然天子之臣如其命數王之革路條絲圉人養馬者在左右曰夾既奠乃薦馬者為其踐污廟中也凡入門參分庭一在南】御者執策立于馬後哭成踊右還出【主人于是乃哭踊者薦車之禮成于薦馬】賓出主人送于門外

右朝祖廟車設奠薦馬 記朝于禰廟重止于門外之西東面柩入升自西階正柩于兩楹間奠止于西階之下東西北上主人升柩東西面衆主人東即位婦人從升東面奠升設于柩西升降自西階主人要節而踊【重不入者主于朝祖而行若過之矣門西東面待之便也】燭先入者升堂東楹之南西面後入者西階東北面在下【照正柩者先先柩者後後柩者適祖時燭亦然互記于此】主人降即位徹乃奠升自西階主人踊如初【如其降拜賓至于要節而踊不薦車不从此行】祝及執事舉奠巾席從而降柩從序從如初適祖【此謂朝禰明日舉奠適祖之序也此祝執醴先酒脯醢俎从之巾席為後既正柩席升設設奠如初祝受巾巾之凡喪自卒至殯自啟至葬主人之禮其變同則此日數亦同矣序从主人以下今文無从本經記】既正柩賓出遂匠納車于階間【遂匠遂人匠人也遂人主引徒役匠人主載柩窆職相左右也車載柩車周禮謂之蜃車雜記謂之團或作輅或作 聲讀皆相附耳未聞孰正其車之輦狀如 中央有輶前後出設前後輅輦上有四周下則前後有軸以輅為輪許叔重說有輅曰輪無輅曰輅 同上】薦乘車鹿淺幣干笄革鞅載旛載皮弁服纓轡貝勒縣于衡【士乘棧車鹿淺鹿夏毛也幣覆芑玉藻曰士齊車鹿幣豹犢干盾也笄矢箛也鞅輶也旛旌旗之屬通帛為旛孤卿之所建亦攝焉皮弁服者視朔之服貝勒貝飾勒有干無兵有箛無弓矢明不用古文鞅為殺旛為膳】道車載朝服【道車朝夕及燕出入之車朝服日視朝之服也玄衣素裳】橐車載簑笠【橐猶散也散車以田以鄙之車蓑笠備兩服今文藁為潦凡道車橐車之纓轡及勒亦縣于衡也 同上】祥車曠左【空神位也祥車葬之乘車 曲禮】士葬用國車【詳見喪大記】士喪有與天子同者三其終夜燎及乘人專道而行【乘人謂使人執引也專道人辟之 雜記】

有司請祖期【亦因在外位請之當以告賓每事畢輒出將行而飲酒曰祖祖始也】曰日側【側昞也謂將過中之時】

右請祖期

主人入袒乃載踊無算卒束襲【袒為載變也舉柩卻下而載之束束棺于柩車賓出遂匠納車于階間謂此車】降奠當前束【下遷祖之奠也當前束猶當尸牖也亦在柩車西束有前後也】

右載

記將載祝及執事舉奠戶西南面東上卒束前而降奠席于柩西【將于柩西當前束設之本經記】君若載而后弔之則主人東面而拜門右北面而踊出待反而後奠【主人拜踊于賓位不敢迫君也君即位車東出待不必君留也君反之使奠雜記】

商祝飾柩一池紐前經後緇齊三采無貝【飾柩為設牆柳也巾奠乃牆謂此也牆有布帷柳有布荒池者象宮室之承霤以竹為之狀如小車答衣以青布一池縣于柳前士不揄絞紐所以聯帷荒前赤後黑因以為飾左右面各有前後齊居柳之中央若今小車蓋上蕤矣以三采繪為之上朱中白下蒼著以絮元士以上有貝】設披【披輅柳棺車貫結于載人居旁牽之以備傾虧喪大記曰士戴前纁後緇二披用纁今文披皆為藩】屬引【屬猶著也引所以引柩車在軸輻曰紼古者人引柩春秋傳曰坐引而哭之三】

右飾柩 記巾奠乃牆【牆飾柩也本經記】池視重霤【如堂之有承霤也承霤以木為之用行水亦宮之飾也柳宮象也以竹為池衣之青布縣銅魚焉今宮中有承霤云以銅為之檀弓】飾棺土布帷布荒一池揄絞纁紐二緇紐二齊三采一貝畫翣二皆戴綏士戴前纁後緇二披用纁【詳見喪大記】周人牆置翣【詳見上篇陳殯具章】子張之喪公明儀為志焉【志亦謂章識】褚幕丹質【以丹布幕為褚葬覆棺不牆不翣】蟻結于四隅【畫褚之四角其文如蟻行往來相交錯蟻蚍蜉也殷之蟻結似今蛇文畫】殷士也【學于孔子倣殷禮檀弓】

陳明器于乘車之西【明器藏器也檀弓曰其曰明器神明之也言神明者異于生器竹不成用瓦不成味木不成斲琴瑟章而不平竽笙備而不和有鐘磬而無筍簴陳器于乘車之西則重北也】折橫覆之【折猶屐也方鑿連木為之蓋如牀而縮者三橫者五無簣窆事畢加之壙上以承抗席橫陳之者為苞筭以下紵于其北便也覆之見善面也】抗木橫三縮二【抗禦也所以禦止土也其橫與縮各足掩壙】加抗席三【席所以禦塵】加茵用疏布緇剪有幅亦縮二橫三【茵所以藉棺者剪淺也幅緣之亦者亦抗木也及其用之木三在上茵二在下象天三合地二人藏其中焉今文剪作淺】器西南上綌【器目言之也陳明器以西行南端為上綌屈也不容則屈而反之】茵【茵在抗木上陳器次而北也】苞二【所以裹奠羊豕之肉】筭三黍稷麥【筭畚種類也其容蓋與簋同一轂也】甕三醯醢屑罍用疏布【甕瓦器其容亦蓋一轂屑簋桂之屑也內則曰屑桂與薑罍覆也今文罍皆作密】甗二醴酒罍

用功布【甗亦瓦器也古文甗皆作廡】皆木桁久之【桁所以履苞筭甗甗也久當為灸灸謂以盖案塞其口每器異桁】用器弓矢耒耜兩敦兩杆槃匱匱實于槃中南流【此皆常用之器也杆盛湯漿槃匱盥器也流匱口也今文杆為梓】無祭器【士禮略也大夫以上兼用鬼器人器也】有燕樂器可也【與賓客燕飲用樂之器也】役器甲冑干竿【此皆師役之器甲鎧冑兜鍪干楯竿矢箛】燕器杖笠翣【燕居安體之器也笠竹 盖也翣扇】

右陳器 記抗木刊【剝削之古文刊為竿】茵著用荼實綏澤焉【荼茅秀也綏廉薑也澤澤蘭也皆取其香且御濕】葦苞長三尺一編【用便易也】菅筭三其實皆淪【米麥皆湛之湯未知神之所享不用食道所以為敬 本經記】弓矢之新沽功【設之宜新沽示不用今文沽作古】有弭飾焉【弓無緣者謂之弭弭以骨角為飾】亦可張也【亦使可張】有秘【秘弓槃弛則縛之于弓裏備損傷以竹為之詩云竹秘緄膝古文秘作柴】設衣撻焉【依纏弦也撻弣側矢道也皆以韋為之今文撻為鈇】有鞬【鞬弓衣也以緇布為之】猴矢一乘骨鏃短衛【猴猶候也候物而射之矢也四矢曰乘骨鏃短衛亦示不用也生時猴矢金鏃凡為矢五分筭長而羽其一】志矢一乘軒鞬中亦短衛【志猶擬也習射之矢書云若射之有志鞬 也無鏃短衛亦示不用生時志矢骨鏃凡為矢前重後輕也 同上】 陳器之道多陳之而省納之可也省陳之而盡納之可也【多陳之謂賓客之就器也以多為榮省陳之謂主人之明器也以節為禮 小記】

徹奠巾席俟于西方主人要節而踊【巾席俟于西方祖奠將用焉要節者未象升丈夫踊去象降婦人踊徹者由明器北西面既徹由重南東不設于序西南者非宿奠也宿奠必設者為神憑依之義也】袒【為將袒變】商祝御柩【亦執功布居前為還柩車為節】乃祖【還柩鄉外為行始】踊襲少南當前束【主人也柩還則當前東南】婦人降即位于階間【為柩將去有時也位束上】祖還車不還器【祖有行漸車亦宜鄉外也器之陳自己南上】祝取銘置于茵【重不藏故于此移明加于茵上】二人還重左還【重與車馬還相反由便也】布席乃奠如初主人要節而踊【車已祖可以為之奠也是之謂祖奠】薦馬如初【柩動車還宜新之也】賓出主人送

右祖奠薦馬 記祖于庭【詳見喪禮義】

祖還車不易位【為鄉外耳未行】執披者旁四人【前後左右各二人 本經記】

祝饌祖奠于主人之南當前輅北上巾之【言饌于主人之南當前輅則既祖祝乃饌 同上】

曾子弔于負夏主人既祖填池推柩而反之降而後行禮【詳見喪禮義】

有司請葬期【亦因在外位時】入復位【主人也自死至于殯自啟至于葬主人及兄弟恒在內位】

右請葬期

公贈玄纁束馬兩【公國君也贈所以助主人送葬也兩馬士制也春秋傳曰宋景公卒魯季康子使冉求贈之以馬曰其可以稱旌繁乎】擯者出請入告主人釋杖迎于廟門外不哭先

入門右北面及衆主人袒【尊君命也衆主人自若西面】馬入設【設于庭在重南】賓奉幣由馬西當前輅北面致命【賓使者幣玄纁也輅轅縛所以屬引由馬西則亦當前輅之西于是北面致命得鄉柩與奠柩車在階間少前三分庭之北輅有前後】主人哭拜稽顙成踊賓奠幣于棧左服出【棧謂柩車也凡士車制無漆飾左服象授人授其右也服車箱今文棧作輅】宰由主人之北舉幣以東【柩東主人位以東藏之】士受馬以出【此士謂胥徒之長也有勇力者受馬聘禮曰皮馬相間可也】主人送于外門外拜襲入復位杖

右公賵

賓賵者將命【賓卿大夫士也】擯者請入告出告須【不迎告曰孤某須】馬入設賓奉幣擯者先入賓從致命如初【初公使者】主人拜于位不踊【柩車東位也既啟之後與在室同】賓奠幣如初舉幣受馬如初擯者出請【賓出在外請之為其復有事】若奠【賓敬可以奠也】入告出以賓入將命如初士受羊如受馬又請【士亦為胥徒之長又復也】若賵【賵之言補也助也貨財曰賵】入告主人出門左西面賓東面將命【主人出者賵主施于主人】主人拜賓坐委之宰由主人之北東面舉之反位【坐委之明主人哀戚志不在受人物反位反主人之後位】若無器則拊受之【謂對相授不委地】又請賓告事畢拜送入贈者將命【贈送】擯者出請納賓如初【如其入告出告須】賓奠幣如初【亦于棧左服】若就器則坐奠于陳【就猶善也贈無常唯玩好所有陳明器之陳】凡將禮必請而后拜送【雖知事畢猶請君子不必人意】兄弟賵奠可也【兄弟有服親者可且賵且奠許其厚也賵奠于死生兩施】所知則賵而不奠【所知通問相知也降于兄弟奠施于死者為多故不奠】知死者贈知生者賵【各主于所知】書賵于方若九若七若五【方板也書賵奠賵贈之人各與其物于板每板若九行若七行若五行】書遣于策【策簡也遣猶送也謂所當藏物茵以下】乃代哭如初【棺柩有時將去不忍絕聲也初謂既小斂時】宵為燎于門內之右【為哭者為明】

右親賓賵奠賵贈 記凡贈幣無常【賓之贈也玩好曰贈在所有 本經記】

孟獻子之喪司徒旅歸四布夫子曰可也【詳見喪通禮財用章】子碩欲以賵布之餘具祭器子柳曰不可君子不家于喪請班諸兄弟之貧者【檀弓他賵贈事詳見弔禮贈喪章】

厥明陳鼎五于門外如初【鼎五羊豕魚腊鮮獸各一鼎也士禮特牲三鼎盛葬奠加一等用少牢也如初如大斂奠時】其實羊左胖【反吉祭也言左胖者體不殊骨也】髀不升【周貴肩賤髀古文髀作脾】腸五胃五【亦盛之也】離肺【離攄】豕亦如之豚解無腸胃【如之如羊左胖脾不升離肺也豚解解之如解豚亦前肩後肫脊脅而已無腸胃者君子不食溷腴】魚腊鮮獸皆如初【鮮新殺者士腊用兔加鮮獸而無膚者豕既豚解略之】東方之饌四豆脾析蜺醢葵菹羸醢【脾讀為雞脾肫之脾脾析百葉也蜺蜺也今文羸為蝸】四簋棗糗栗脯【糗以豆糗粉餌】醴酒【此東方之饌與祖奠同在主人之南當前輅北上巾之】陳器【明器也夜斂藏之】滅燎執燭俠輅北面【照徹與葬奠也】賓入者拜之【明自啟至此主人無出禮】

右陳遣奠 記凡糗不煎【以膏煎之則褻非敬本經記
上篇陳小歛奠章喪不剥奠批畢用桑奠以素器大歛奠章大功與饋奠當互考】

徹者入丈夫踊設于西北婦人踊【猶阼階升時也亦既盥乃入入由重東而主人踊猶其升也自重北西面而徹設于柩車西北亦猶序西南】徹者東【由柩車北東適葬奠之饌】鼎入【舉人陳之也陳之盖于重東北西面北上如初】乃奠豆南上結籩羴醢南北上結【籩羴醢南辟醴酒也】俎二以成南上不結特鮮獸【成猶併也不結者魚在羊東腊在豕東古文特為俎】醴酒在籩西北上【統于豆也】奠者出主人要節而踊【亦以往來為節奠由重北西既奠由重南東】

右遣奠

甸人抗重出自道道左倚之【還重不言甸人抗重言之者重既虞將埋之言其宮使守視之抗舉也出自道出从門中央也不由闌東西者重不反變于恒出入道左主人位今時有死者鑿木置食其中樹于道左由此】薦馬馬出自道車各從其馬駕于門外西面而俟南上【南上使其行也行者乘車在前道稟序从】徹者入踊如初徹巾苞牲取下體【苞者象既饗而歸賓俎者也取下體者脛骨象行又俎實之終始也士苞三個前脛折取臂肱後脛折取骼亦得俎釋三個雜記曰父母而賓客之所以為哀】不以魚腊【非正牲也】行器【目葬行明器在道之次】茵苞器序從【如其陳之之先後】車從【次器】徹者出踊如初【于是廟中當行者唯柩車】

右重出車馬奠器從

記載糗有子曰非禮也【糗米糧也】喪奠脯醢而已【言死者不食糧也遣奠本無黍稷雜記】

主人之史請讀贈執算從柩車當前東西面不命母哭哭者相止也唯主人主婦哭燭在右南面【史北面請既而與執算西面于主人之前讀書釋算燭在右南面炤書便也古文算皆為筭】讀書釋算則坐【必釋算者榮其多】卒命哭滅燭書與算執之以逆出【卒已也】公史自西方東面命母哭主人主婦皆不哭讀遣卒命哭滅燭出【公史君之典禮書者遣者入壙之物君使史來讀之成其得禮之正以終也燭俠輅】

右讀贈 記讀贈曾子曰非古也是再告也【曾子言非禮祖而讀贈賓致命將行主人之史又讀贈所以存錄之 檀弓】

商祝執功布以御柩執披【居柩車之前若道有低仰傾虧則以布為抑揚左右之節使引者執披者知之士執披八人今文無以】主人袒乃行踊無算【袒為行變也乃行謂柩車行也凡从柩者先後左右如遷于祖之序】出宮踊襲【哀次】

右柩行 記士葬二綍無碑比出宮御棺用功布【詳見喪大記】

士喪有與天子同者乘人專道而行【詳見朝祖章】

及葬毀宗躋行出于大門殷道也學者行之【祥見上篇楔齒綴足章】孔子在衛有送葬者而夫子觀之曰善哉為喪乎足以為法矣小子識之子貢曰夫子何善爾也曰其往也如慕其反也如疑【慕謂小兒隨父母啼呼疑者哀親之在彼】子貢曰豈若速反而虞乎【速疾】子曰小子識之我未之能行也【哀戚本也祭祀末也檀弓】曾子曰葬引至于壙日有食之則有變乎且平乎【壙道也變謂異禮】孔子曰昔者吾從老聃助葬于巷黨及壙日有食之老聃曰丘止柩就道右止哭以聽變既明反而后行曰禮也【巷黨黨名也就道右者行相左也變日食也反復也】反葬而丘問之曰夫柩不可以反者也日有食之不知其已之遲數則豈如行哉【已止也數讀為速】老聃曰諸侯朝天子見日而行逮日而舍奠大夫使見日而行逮日而舍【舍奠每將舍奠行主】夫柩不蚤出不莫宿【侵晨夜則近姦寇】見星而行者唯罪人與奔父母之喪者乎日有食之安知其不見星也【為無日而慝作豫止也】且君子行禮不以人之親戚患【店病也以人之父母行禮而恐懼其有患害不為也】吾聞諸老聃云【曾子問】

至于邦門公使宰夫贈玄纁束【邦門城門也贈送也】主人去杖不哭由左聽命賓由右致命【柩車前輅之左右也當時止柩車】主人哭拜稽顙賓升實幣于盖降主人拜送復位杖乃行【升柩車之前實其幣于棺盖之柳中若親授之然復位反柩車後】

右公使人贈記唯君命止柩于壙其餘則否【不敢留神也壙道也曾子問曰葬既引至于壙本經記】

至于壙陳器于道東西北上【統于壙】茵先入【當藉柩也元士則葬用輶軸加茵焉】屬引【于是說載除飾更屬引于緘耳古文屬為燭】主人袒衆主人西面北上婦人東面皆不哭【俠羨道為位】

右至壙記車至道左北面立東上【道左墓道東先至者在東】柩至于壙歛服載之【柩車至壙祝說載除飾乃歛乘車道車槨車之服載之不空之以歸送形而往迎精而反亦禮之宜本經記】衛司徒敬子之喪孔子相及墓男子西面婦人東面殷道也【詳見喪禮義】國昭子之母死問于子張曰葬及墓男子婦人安位【國昭子齊大夫】子張曰司徒敬子之喪夫子相男子西鄉婦人東鄉【夾羨道為位夫子孔子也】曰噫毋【噫不寤之聲母禁止之辭】曰我喪也斯沾【斯盡也沾讀曰覘覘視也國昭子自謂齊之大家有事人盡視之欲人觀之法其所為】爾專之賓為賓焉主為主焉【專猶同也時子張相】婦人從男子皆西鄉【非也檀弓】

乃窆主人哭踊無算【窆下棺也今文窆為封】襲贈用制幣玄纁束拜稽顙踊如初【丈八尺曰制二制合之束十制五合】卒袒拜賓主婦亦拜賓即位拾踊三襲【主婦拜賓拜女賓也即位反位也】賓出則拜送【相問之賓也凡弔賓有五去皆拜之此舉中焉】藏器于旁加見【器用器役器也見棺飾也更謂之見者加此則棺柩不復見矣先言藏器乃云加見者器在見內也內之者明君子之于事終不自逸也檀弓曰周人牆置嬰】藏苞匭于旁【于旁

者在見外也不言甕甗饌相次可知四者兩兩而居喪大記曰棺槨之間君容柩大夫容壺士容甗【加折卻之加抗席覆之加抗木【宜次也】實土三主人拜鄉人【謝其勤勞】即位踊襲如初【哀親之在斯】

右窆 記父為大夫子為士葬以大夫祭以士父為士子為大夫葬以士祭以大夫【周公制為禮法以及天下使葬用死者之爵祭用生者之祿 中庸】

並有喪葬先輕而後重【詳見喪變禮】 大司徒令四閭為族使之相葬【地官】

族師四閭為族八閭為聯使之相保以相葬埋【同上】 墓大夫掌凡邦墓之地域為之圖【凡邦中之墓地萬民所葬地】 令國民族葬而掌其禁令【族葬各从其親】 正其位掌其度數【位謂昭穆也度數爵等之大小】 使皆有私地域【古者萬民墓地同處分其地使各有區域得以族葬後相容】 凡爭墓地者聽其獄訟【爭墓地相侵區域】 帥其屬而巡墓厲居其中之室以守之【厲塋限遮列處鄭司農云居其中之室有官寺在墓中春官】

既封主人贈【詳見士虞禮】

魯人之贈也三玄二纁廣尺長終幅【言失之也士喪禮下篇曰贈用制幣玄纁束 雜記】 疏布綳四面有章置于四隅【綳其蓋也四面皆有章蔽以隱翳牢肉四隅槨中之四隅 雜記】 醴者稻醴也甕甗笄衡實見間而后折入【此謂葬時藏物也衡當為桁所以戢甕甗之屬聲之誤也實見間藏于見外槨內也折承席也同上】 庶人縣封葬不為兩止不封不樹【縣封當為縣窆縣窆者至卑不得引紼下棺雖兩猶葬以其禮儀少封謂聚土為墳不封之不樹之無飾也周禮曰以爵等為丘封之地與其樹數則士以上乃皆封樹 王制】

孔子為中都宰制為養生送死之節因丘陵為墳不封不樹【詳見陳殯具章】

為宮室不斬于丘木【廣敬鬼神也丘壟也

曲禮】 易墓非古【易謂芟治草木不易者丘陵也 檀弓】 墳墓不培【詳見喪服義】 國子高曰葬也者藏也欲人之弗得見也是故衣足以飾身棺周于衣槨周于棺土周于槨反壤樹之哉【詳見喪禮義】 舜葬于蒼梧之野【舜征有苗而死因留葬焉書說舜曰陟方乃死蒼梧于周南越之地今為郡】 蓋三妃未之從也【古者不合葬帝嚳而立四妃矣象后妃四星其一明者為正妃餘三小者為次妃帝堯因焉至舜不告而取不立正妃但三妃而已謂之三夫人離騷所歌湘夫人舜妃也夏后氏增以三三而九合十二人春秋說云天子取十二即夏制也以虞夏及周制差之則殷人又增以三九二十七合三十九人周人上法帝嚳立正妃又三二十七為八十一人以增之合百二十人其位后也夫人也嬪也世婦也女御也五者相參以定尊卑】 季武子曰周公蓋附【附謂合葬合葬自周公以來 檀弓】 孔子曰衛人之祔也離之【祔謂合葬也離之有以間其槨中】 魯人之祔也合之善夫【善夫善魯人也祔葬當合也 同上】 孔子少孤不知其墓殯于五父之衢【殯于家則知之者無由怪已欲發問端五父衢名蓋聊曼父之鄰也】 人之見之者皆以為葬也【見柩行于路】 其慎也蓋殯也【慎當作引禮家讀然聲之誤也殯引飾棺以綳葬引飾棺以柳窆孔子是時以殯引不以葬引時人見者為不知禮】 問于聊曼父之母然後得合葬于防【曼父之母與孔子之母微在與鄰相善 同上】 孔子既得合葬于防【言既得者少孤不知其墓】 曰吾聞之古也墓而不墳【墓謂兆域今之封塋也土之高者曰墳】 今丘也東西南北之人也不可以弗識也于是封之崇四尺【東西南北言居無常也聚土曰封封之周禮也周禮曰以爵等為丘封之度崇高也高四尺蓋周之士制】 孔子先反【當修虞事】 門人後雨甚至【後待封也】 孔子問焉

曰爾來何遲也曰防墓崩【言所以遲者修之而來】孔子不應【以其非禮】三【三言之以孔子不聞】孔子泫然流涕曰吾聞之古不修墓【脩猶治也同上】孔子之喪有自燕來觀者舍于子夏氏子夏曰聖人之葬人與人之葬聖人也子何觀焉【與及也】昔者夫子言之曰吾見封之若堂者矣【封築土為壟堂形四方而高】見若防者矣【坊形旁殺平上而長】見若覆夏屋者矣【覆謂茨瓦也夏屋今之門廡也其形旁廣而卑】見若斧者矣【斧形旁殺刃上而長】從若斧者焉【孔子以為刃上難登狹又易為功】馬鬣封之謂也【俗間名】今日而三斬板而已封【板盖廣二尺長六尺斬板謂斷其縮也三斷上之旁殺盖高四尺其廣袤未聞詩云縮版以載】尚行夫子之志乎哉【尚庶幾也同上】孔子葬于魯城北泗水上藏入地不及泉而封

乃為偃斧之形高四尺樹松柏為志焉【家語】季武子成寢【武子魯公子季友之曾孫季孫宿】杜氏之葬在西階之下請合葬焉許之入宮而不敢哭武子曰合葬非古也自周公以來未之有改也【自見夷人冢墓以為宅欲文過】吾許其大而不許其細何居命之哭【記此善其不奪人之恩檀弓】曾子問曰下殤土周葬于園輿機而往塗邇可也【土周塋周也周人以夏后氏之塋周葬下殤于園中以其去成人遠不就墓也機輿尸之牀也以繩絙其中央又以繩从兩旁鉤之禮以機舉尸輿之以就園而斂葬焉塗近故耳輿機或為餘機】今墓遠則其葬也如之何【今人斂下殤于宮中而葬于墓與成人同墓塗乃遠其葬當輿其棺乎載之也問禮之變也】孔子曰吾聞諸老聃曰昔者史佚有子而死下殤也墓遠【盖欲葬墓如長殤從成人也也長殤有送葬車者則棺載之之矣史佚成王時賢史也賢猶有所不知】召公謂之曰何以不棺斂于宮中【欲其斂于宮中如成人也斂于宮中則葬當載之】史佚曰吾敢乎哉【畏知禮也】召公言于周公【為史佚問】周公曰豈不可【言是豈于禮不可不許也】史佚行之【失指以為許也遂用召公之言】下殤用棺衣棺自史佚始也【棺謂斂于棺曾子問】延陵季子適齊于其反也其長子死葬于贏博之間其坎深不至于泉其斂以時服既葬而封廣輪掩坎其高可隱也【詳見喪禮義】

乃反哭入升自西階東面衆主人堂下東面北上【西階東面反諸其所作也反哭者于其祖廟不於阼階西面西方神位】婦人入丈夫踊升自阼階【辟主人也】主婦入于室踊出即位及丈夫拾踊三【入于室反諸其所養也出即位堂上西面也拾更也】賓弔者升自西階曰如之何主人拜稽顙【賓弔者衆賓之長也反而亡焉失之矣于是為甚故弔之弔者北面主人拜于位不北面拜賓東者以其亦主人位也古文無弔字】賓降出主人送于門外拜稽顙遂適殯宮皆如啟位拾踊三【啟位婦人入升堂丈夫即中庭之位】兄弟出主人拜送【兄弟小功以下也異門大功亦可以歸】衆主人出門哭止闔門主人揖衆主人乃就次【次倚廬也】猶朝夕哭不奠【是日也以虞易奠】

右反哭 記卒窆而歸不驅【孝子往如慕反如疑為親之在彼 本經記】

既封而歸殷道也【詳見喪禮義】

無柩者不帷【謂既葬也棺柩已去鬼神在室堂無事焉遂去帷 雜記】

反哭升堂主婦入于室【詳見喪禮義】 升自客階受弔于客位【同上】

其反也如疑【詳見柩行章】

禮書綱目卷二十四

卷二十五

欽定四庫全書

禮書綱目卷二十五 婺源江永撰

士虞禮 凶禮六

經【鄭目錄云虞安也士既葬父母迎精而反日中而祭之于殯宮以安之虞于五禮屬凶】

士虞禮

右篇目 記士三虞【詳見喪大記虞祭章】

始虞用柔日再虞如初三虞卒哭他用剛日【詳見本篇饗神章】既封主人贈而祝宿虞尸既反哭主人與有司視虞牲有司以几筵舍奠于墓左反日中而虞葬日虞是日也以虞易奠

【詳見喪禮義】婦之喪虞卒哭其夫若子主之祔則舅主之【婦謂凡適婦庶婦也虞卒哭祭婦非舅事也祔于祖廟尊者宜主焉喪服小記】

凡主兄弟之喪雖疏亦虞之【喪事虞祔乃畢 雜】

【記】士祭不足則取于兄弟大功以下者【詳見喪大記祭章】虞沐浴不櫛【沐浴者將祭自潔清不櫛未在于飾也唯三年之喪不櫛期以下櫛可也今文曰沐浴 本經記】

凡喪小功以上非虞祔練祥無沐浴【言不有飾事則不沐浴 雜記】

自天子達于庶人喪從死者祭從生者【詳見喪大記篇首】報葬者報虞三月而后卒哭【報讀為赴疾之赴謂不及期而葬也既葬即虞虞即安神也卒哭之祭待哀殺也小記】

並有喪虞先重而後輕【詳見喪變禮】

父母之喪偕先葬者不虞祔待後事其葬服斬衰【詳見喪服變除並有喪服章】父母之喪將祭而昆弟死既殯而祭如同宮則雖臣妾葬而后祭祭主人之升降散等執事者亦散等雖虞祔亦然【詳見卒哭祔練祥禫記練章】朋友虞祔而已【詳見喪通禮主後章】

朋友虞祔而退【詳弔禮會葬章】

特豕饋食【饋猶歸也】側亨于廟門外之右東面【側亨亨一胖也亨于爨用鑊不于門東未可以吉也是日也以虞易奠祔而以吉祭易喪祭鬼神所在則曰廟尊言之】魚腊爨亞之北上【爨灶】饌爨在東壁西面【炊黍稷曰饌饌北上上齊于屋宇于虞有亨饌之爨彌吉】設洗于西階西南水在洗西篚在東【反吉也亦當西榮南北以堂深】尊于室中北牖下當戶兩甌醴酒酒在東無禁罍用絺布加勺南枋【酒在東上醴也絺布葛屬】素几葦席在西序下【有几始鬼神也】苴刈茅長五寸束之實于篚饌于西牀上【苴猶藉也】饌兩豆菹醢于西楹之東醢在西一鉶亞之【醢在西南面取之得左取菹右取醢便其設之】從獻豆兩亞之四簋亞之北上【豆從王人獻祝簋从主婦獻尸祝北上菹與棗不東陳別于正】

饌黍稷二敦于階間西上藉用葦席【藉猶薦也古文藉為席】匱水錯于盤中南流在西階之南簞巾在其東【流匱吐水口也】陳三鼎于門外之右北面北上設局鼎【門外之右門西也今文局為鉉】匕俎在西塾之西【不饌於塾上統於鼎也塾有西者是室南鄉】羞燔俎在內西塾上南順【南順于南面取縮執之便也肝俎在燔東】

右陳饌具 記虞而立尸有几筵【疏曰有几筵者未葬之前殯宮雖有酺醢之奠不立几筵其大斂之奠雖有殯宮但有席而已亦無几也此席素席故前云奠以素器其下室之內有吉几筵今葬訖既設虞祭有素几筵雖大斂之時已有至于虞祭更立筵與几相配 檀弓】 陳牲于廟門外北首西上寢右【言牲腊在其中西上變吉寢右者當升左肸也腊用櫨檀弓曰既反哭主人與有司視虞牲】日中而行事【朝葬日中而虞君子舉事必用辰正也再虞三虞皆質明】殺于廟門西主人不視豚解【主人視牲不視殺凡為喪事略也豚解解前後脛脊脊而已孰乃體解升于鼎也今文無廟】羹飪升左肩臂臠肫骼脊脊離肺膚祭三取諸左臠上肺祭一實于上鼎【肉謂之羹飪熟也脊脊正脊正脊也喪祭略七體耳離肺舉肺也少牢饋食禮曰舉肺一長終肺祭肺三皆刊臠胹肉也古文曰左股上字从肉从殳殳矛之殳聲】升魚鱠九實于中鼎【差減之】升腊左肸髀不升實于下鼎【腊亦七體牲之類】皆設局鼎陳之【嫌既陳乃設局鼎也今文局作鉉古文鼎作密】鉶芼用苦若薇有滑夏用葵冬用苡有杞【苦苦茶也苡苳類也乾則滑夏秋用生葵冬春用乾苡古文苦為楷今或作竿】豆實葵菹菹以西羸醢籩棗蒸栗擇【棗烝栗擇則菹刊也棗蒸栗擇則豆不揭籩有籩也並本經記 土喪禮上篇陳小斂奠章批畢用桑大斂奠章小功與饋奠以下當互考】祝俎髀胹脊脊離肺陳于階間敦東【不升于鼎賤也統于敦明神惠也祭以離肺下尸同上】

主人及兄弟如葬服賓執事者如弔服皆即位于門外如朝夕臨位婦人及內兄弟服即位于堂亦如之【葬服者既夕曰丈夫髻散帶垂也賓執事者賓客來執事也】祝免澡葛經帶布席于室中東面右几降出及宗人即位于門西東面南上【祝亦執事免者者祭祀之禮祝所親也澡治也治葛以為首經及帶接神宜變也然則土之屬官為其長弔服如麻矣至于既卒哭主人變服則除右几于席近南也】

右門外位【布席室中】

宗人告有司具遂請拜賓如臨入門哭婦人哭【臨朝夕哭】主人即位于堂衆主人及兄弟賓即位于西方如反哭位【既夕曰哭反哭入門升自西階東面衆主人堂下東面北上異于朝夕】祝入門左北面【不與執事同位接神尊也】宗人西階前北面【當詔主人及賓之事】

右門內位

祝盥升取苴降洗之升入設于几東席上東縮降洗觶升止哭【縮从也古文縮為蹙】主人倚杖入祝從在左西面【主人北旋倚杖西序乃入喪服小記曰虞杖不入于室】贊薦菹醢

醢在北【主婦不薦齊斬之服不執事也曾子問曰士祭不足則取于兄弟大功以下者】佐食及執事盥出舉長在左【舉舉鼎也長在左在西方位也凡事宗人詔之】鼎入設于西階前東面北上匕俎從設左人抽扃鼎匕佐食及右人載【載載于俎佐食載則亦在右矣今文扃為鉉古文鼎為密】卒杞者逆退復位【復賓位也】俎入設于豆東魚亞之腊特【亞次也今文無之】贊設二敦于俎南黍其東稷【簋實尊黍也】設一鉶于豆南【鉶菜羹也】佐食出立于戶西【饌已也今文無于戶西】贊者徹鼎【反于門外】祝酌醴命佐食啓會佐食許諾啓會郤于敦南復位【會合也謂敦蓋也復位出立于戶西今文啟為開】祝奠饌于鉶南復位【復位復主人之左】

右設饌 記虞杖不入于室祔杖不升于室【哀益衰敬彌多也虞于寢祔于祖廟 小記】載猶進柩魚進髻【猶猶士喪既夕言未可以吉也柩本也髻脊也今文柩為眡古文髻為耆 本經記】主人在室則宗人升戶外北面【當詔主人室事】佐食無事則出戶負依南面【室中尊不空立戶牖之間謂之依 同上】

主人再拜稽首祝饗命佐食祭【饗告神饗也此祭祭于苴也饗神辭記所謂哀子某哀顯相夙興夜處不寧下至適爾皇祖某甫饗是也】佐食許諾鉤袒取黍稷祭于苴三取膚祭祭如初祝取奠饌祭亦如之不盡益反奠之主人再拜稽首【鉤袒如今擗衣也苴所以藉祭也孝子始將納尸以事其親為神疑于其位設苴以定之耳或曰苴主道也則特牲少牢當有主象而無可乎】祝祝卒主人拜如初哭出復位【祝祝者釋孝子祭辭】

右饗神【謂陰厭】周禮喪祝掌喪祭祝號【喪祭虞也】記始虞用柔日【葬之日日中虞欲安之柔日陰取其靜】曰哀子某哀顯相夙興夜處不寧【曰辭也祝祝之辭也喪祭稱哀顯相助祭者也顯明也相助也詩云於穆清廟肅雍顯相不寧悲思不安】敢用絜牲剛鬣【敢昧冒之辭豕曰剛鬣】香合【黍也大夫士于黍稷之號合言普淖而已此言香合蓋記者誤耳辭次黍又不得在薦上】嘉薦普淖【嘉薦菹醢也普淖黍稷也普大也淖和也德能大和乃有黍稷故以為號云】明齊澣酒【明齊新水也言以新水澣釀此酒也郊特牲曰明水澣齊貴新也或曰當為明視謂兔腊也今文曰明粢粢稷也皆非其次今文澣為醴】哀薦祫事【始虞謂之祫事者主欲其祫先祖也以與先祖合為安今文曰古事】適爾皇祖某甫【爾女也女死者告之以適皇祖所以安之也皇君也某甫皇祖字也若言尼甫】饗【勸強之也】再虞皆如初曰哀薦虞事【丁日葬則已日再虞其祝辭異者一言耳】三虞卒哭他用剛日亦如初曰哀薦成事【當祔于祖廟為神安于此後虞改用剛日剛日陽也陽取其動也士則庚日三虞壬日卒哭其祝辭異者亦一言耳他謂不及時而葬者喪服小記曰報葬者報虞三月而後卒哭然則虞卒哭之間有祭事者亦用剛日其祭無名謂之他者假設言之文不在卒哭上者以其非常也令正者自相亞也檀弓曰葬日中而虞弗忍一日離也是日也以虞易奠卒哭曰成事是日也以吉祭易喪祭明日祔于祖父如是虞為喪祭卒哭為吉祭今文他為它 本經記】喪稱哀子哀孫【詳見卒哭祔練祥禫記】

祝迎尸一人衰經奉篋哭從尸【尸主也孝子之祭不見親之形象心無所繫立尸而主意焉一人主人兄弟檀弓曰既封主人贈而祝宿虞尸】尸入門丈夫踊婦人踊【踊不同文者有

先後也尸入主人不降者喪事主哀不主敬【淳尸盥宗人授巾【淳沃也沃尸盥者賓執事者也】尸及階祝延尸【延進也告之以升】尸升宗人詔踊如初【言詔踊如初則凡踊宗人詔之】尸入戶踊如初哭止【哭止尊尸】婦人入于房【辟執事者】主人及祝拜妥尸尸拜遂坐【妥妥坐也】

右迎尸 記尸服卒者之上服【上服者如特牲士玄端也不以爵弁服為上者祭于君之服非所以自配鬼神士之妻則宵衣耳】男男尸女女尸必使異姓不使賤者【異姓婦也賤者謂庶孫之妾也尸配尊者必使適也】尸入祝從尸【祝在主人前也嫌如初時主人倚杖入祝從之初時主人之心尚若親存宜自親之今既接神視當詔侑尸也】尸坐不說屨【侍神不敢燕惰也今文說為稅】淳尸盥執槃西面執匱東面執巾在其北東面宗人授巾南面【槃以盛棄水為淺汚人也執巾不授巾早也 本經記】祭成喪者必有尸尸必以孫孫幼則使人抱之無孫則取于同姓可也【人以有子孫為成人子不殤父義由此也 曾子問】

從者錯篚于尸左席上立于其北【北席北也】尸取奠左執之取菹擣于醢祭于豆間祝命佐食墮祭【下祭曰墮墮之猶言墮下也周禮曰既祭則藏其墮謂此也今文墮為綏特牲少牢或為羞失古正矣齊魯之間謂祭為墮】佐食取黍稷肺祭授尸尸祭之祭奠祝祝主人拜如初尸嘗醴奠之【如初亦祝祝卒乃再拜稽首】佐食舉肺脊授尸尸受振祭嚙之左手執之【右手將有事也尸食之時亦奠肺脊于豆】祝命佐食邇敦佐食舉黍錯于席上【邇近也】尸祭鉶嘗鉶【右手也少牢曰以醢祭羊鉶遂以祭豕鉶嘗羊鉶】黍羹清自門入設于鉶南截四豆設于左【博異味也清肉汁也截切肉也】尸飯播餘于篚【不反餘也古者飯用手吉時播餘于會古文播為半】三飯佐食舉幹尸受振祭嚙之實于篚【飯間啗肉安食氣】又三飯舉脰祭如初佐食舉魚腊實于篚【尸不受魚腊以喪不備味】又三飯舉肩祭如初【後舉肩者貴要成也】舉魚腊俎俎釋三个【釋猶遺也遺之者君子不盡人之歡不竭人之忠个猶枚也今俗或名枚曰個音相近此腊亦七體如其牲也】尸卒食佐食受肺脊實于篚反黍如初設【九飯而已士禮也篚猶吉祭之有胾俎】

右尸食 記饗辭曰哀子某圭為而哀薦之饗【饗辭勸強尸之辭也圭潔也詩曰吉圭為饗凡吉祭饗尸曰孝子 本經記】

主人洗廢爵酌酒醑尸尸拜受爵主人北面答拜尸祭酒嘗之【爵無足曰廢爵醑安食也主人北面以醑酢變吉也凡異者皆變吉古文醑作酌】賓長以肝從實于俎縮右塩【縮从也从實肝炙于俎也喪祭進祗右塩于俎近北便尸取之也縮執俎言右塩則肝鹽併也】尸左執爵右取肝擣塩振祭嚙之加于俎賓降反俎于西塾復位【取肝右手也加于俎从其牲體也以喪不志于味】尸卒爵祝受不相爵主人拜尸答拜【不相爵喪祭于禮略相爵者特牲曰送爵皇尸卒爵】

右主人醑尸

祝酌授尸尸以醋主人主人拜受爵尸答拜【醋報】主人坐祭卒爵拜尸答拜

右尸醋主人

筵祝南面【祝接神尊也筵用萑席】主人獻祝祝拜坐受爵主人答拜【獻祝因反西南位】薦菹醢設俎祝左執爵祭薦奠爵興取肺坐祭臠之興加于俎祭酒嘗之肝從祝取肝擣塩振祭臠之加于俎卒爵拜主人答拜祝坐授主人【今文無擣塩】

右主人獻祝

主人酌獻佐食佐食北面拜坐受爵主人答拜佐食祭酒卒爵拜主人答拜受爵出實于篚升堂復位【篚在庭不復入事已也亦因取杖乃東面立】

右主人獻佐食

主婦洗足爵于房中酌亞獻尸如主人儀【爵有足輕者飾也昏禮曰內洗在北堂直室東隅】自反兩籩棗栗設于會南棗在西【尚棗棗美】尸祭籩祭酒如初賓以燔從如初尸祭燔卒爵如初

右主婦亞獻

酌獻祝籩燔從獻佐食皆如初以虛爵入于房【初主人儀】

右主婦獻祝佐食

賓長洗纒爵三獻燔從如初儀【纒爵口足之間有篆又彌飾】婦人復位【復堂上西面位事已尸將出當哭踊】

右賓長三獻

祝出戶西面告利成主人哭【西面告告主人也利猶養也成畢也言養禮畢也不言養禮畢于尸間嫌】皆哭【丈夫婦人于主人哭斯哭矣】

右祝告利成

祝入尸謦【祝入而無事尸則知起矣不告尸者無遣尊者之道也古文謦或為休】從者奉篚哭如初【初哭從尸】祝前尸出戶踊如初降堂踊如初出門亦如之【前道也如初者出如入降如升三者之節悲哀同】

右尸出 記尸謦祝前鄉尸【前道也祝道尸必先鄉之為之節】還出戶又鄉尸還過主人又鄉尸還降階又鄉尸【過主人則西階上不言及階明主人見尸有踧踖之敬】降階還及門

如出戶【及至也言還至門明其間無節也降階如升時將出門如出戶時皆還向尸也每將還必有辟退之容凡前尸之禮儀在此 本經記】

祝反入徹設于西北隅如其設也几在南屏用席【改設饌者不知鬼神之節改設之庶幾歆饗所以為厭飫也几在南變吉文明東面不南面漸也屏隱也于屏隱之處從其幽暗】祝薦席徹入于房祝自執其俎出【徹薦席者執事者祝薦席則自房來】贊闔牖戶【鬼神尚居幽闇或者遠人乎贊佐食者】

右陽厭

記尸出祝反入門左北面復位然後宗人詔降【謂祝復位宗人乃詔主人降以其無事故也 本經記】

主人降賓出【宗人詔主人降賓則出廟門】主人出門哭止皆復位【門外未入位】宗人告事畢賓出主人送拜稽顙【送拜者明于大門外也賓執事畢者皆去即徹室中之饌者兄弟也】

右事畢【案經言立尸之禮記有無尸之文經載其常記述其變今附見于下】記無尸則禮及薦饌皆如初【無尸謂無孫列可使者也殤亦是也禮謂衣服即位升降】既饗祭于苴祝祝卒【記異者之節】不綏祭無泰羹涪戠從獻【不綏言獻記終始也事尸之禮始于綏祭終于从獻綏當為墮】主人哭出復位【于祝祝卒】祝闔牖戶降復位于門西【門西北面位也】男女拾踊三【拾更也三更踊】如食間【隱之如尸一食九飯之頃也】祝升止哭聲三啓戶【聲者噫歆也將啓戶驚覺神也今文啟為開】主人入【親之】祝從啓牖鄉如初【牖先闔後啓扇在內也鄉牖一名也如初者主人入祝从在左】主人哭出復位【堂上位也】卒徹祝佐食降復位【祝復門西北面位佐食復西方位不復設西北隅者重閉牖戶褻也】宗人詔降如初【初贊闔牖戶宗人詔主人降之本經記】重既虞而埋之【就所倚處理之 雜記】

禮書綱目卷二十五

卷二十六

欽定四庫全書

禮書綱目卷二十六 婺源江永撰

喪大記上 凶禮九

補

大宗伯以凶禮哀邦國之憂以喪禮哀死亡【哀謂親者服焉疏者含禭】朝覲會同則為上相大喪亦如之【相詔王禮也大喪王后及世子也】小宗伯掌五禮之禁令與其用等肆師凡卿大夫

之喪相其禮 職喪掌諸侯之喪及卿大夫士凡有爵者之喪以國之喪禮涖其禁令序其事【國之喪禮喪服士喪既夕士虞今存者其餘則亡事謂小斂大斂葬也 並春官】自天子達於庶人喪從死者祭從生者【從死者謂衣衾棺槨從生者謂奠祭之牲器 王制】

右總要

疾病外內皆埽【為賓客將來問病也疾困曰病】君大夫徹縣士去琴瑟【聲音動人病者欲靜也凡樂器天子宫縣諸侯軒縣大夫判縣士特縣去琴瑟者不命之士】寢東首於北牖下【為君來視之時也病者恒居北牖下或為北墉下】廢牀徹褻衣加新衣體一人【廢去也人始生在地去牀庶其生氣反徹褻衣則所加者新朝服矣互言之也加朝服者明其終於正也體手足也四人持之為其不能自屈伸也】男女改服【為賓客來問病亦朝服也庶人深衣】屬纊以俟絕氣【纊今之新絛易動搖置口鼻之上以為候】男子不死於婦人之手婦人不死於男子之手【君子重終為其相褻 喪大記】扶君卜人師扶右射人師扶左【謂君疾時也卜當為僕聲之誤也僕人射人皆平時贊正君服位者】君薨以是舉【不忍變也周禮射人大喪與僕人遷尸 檀弓】君於大夫疾三問之士疾一問之【詳見殯後受弔章】卿大夫疾君問之無算士一問之【雜記】君夫人卒於路寢大夫世婦卒於適寢內子未命則死於下室遷尸于寢士之妻皆死于寢【言死者必皆於正處也寢室通耳其尊者所不燕焉君謂之路寢大夫謂之適寢士或謂之適室此變命婦言世婦者明尊卑同也世婦以君下寢之上為適寢內子卿之妻也下室其燕處也 喪大記】始卒主人啼兄弟哭婦人哭踊【悲哀有淺深也若嬰兒中路失母能勿啼乎同上】凡哭尸于室者主人二手承衾而哭【承衾哭者哀慕若欲攀援 同】

【上】

右始死二十有八載帝乃殂落【殂落死也堯年十六即位七十載求禪試舜二載自正月上日至崩二十八載堯凡壽一百一十七歲】百姓如喪考妣【考妣父母言百官感德思慕】三載四海遏密八音【遏絕密靜也八音金石絲竹匏土草木四夷絕音三年則華夏可知言盛德恩化所及者遠 舜典】惟四月哉生魄王不懌【成王崩年之四月始生魄月十六日王有疾故不悅懌】甲子王乃洮頽水相被冕服憑玉几【王發大命臨羣臣必齋戒沐浴今疾病故但洮盥頽面扶相者被以冠冕加朝服憑玉几以出命】乃同召太保奭芮伯彤伯畢公衛侯毛公【同召六卿下至御治事太保畢毛稱公則三公矣此先後次第冢宰第一召公領之司徒第二芮伯為之宗伯第三彤伯為之司馬第四畢公領之司寇第五衛侯為之司空第六毛公領之召芮彤畢衛毛皆國名入為天子公卿】師氏虎臣百尹御事【師氏大夫官虎臣虎賁氏百尹百官之長及諸御治事者】王曰嗚呼疾大漸惟幾【自歎其疾大進篤惟危殆】病日臻既彌留恐不獲誓言嗣茲予審訓命汝【病日至言困甚已久留言無瘳恐不得結信出言嗣續我志以此故我詳審教命汝】昔君文王武王宣重光奠麗陳教則肆【言昔先君文武布其重光累聖之德定天命施陳教則勤勞】肆不違用克達殷集大命【文武定命陳教雖勞而不違道故能通殷為周成其大命】在後之侗敬迓天威嗣守文武大訓無敢昏逾【在文武後之侗稚成王自斥敬迓天之威命言奉順繼守文武大教無敢昏亂逾越言戰慄畏懼】今天降疾殆弗興弗悟爾尚明時朕言【今天下疾我身甚危殆不起不悟言必死汝當庶幾明是我言勿忽略】用敬保元子釗弘濟于艱難【用奉我言敬安太子釗釗康王名大濟於艱難勤德政】柔遠能邇安勸小大庶邦【言當和遠又能和近安小大衆國勸使為善】思夫人自亂于威儀爾無以釗冒貢于非幾【羣臣皆宜思夫人夫人自治正于威儀有威可畏有儀可象然後足以率人汝無以釗冒進于非危之事】茲既受命還【此羣臣已受顧命各還本位】出綴衣于庭【綴衣幄帳羣臣既退徹出幄帳於庭王寢於北牖下東首反初生】越翼日乙丑王崩太保命仲桓南宮毛【冢宰攝政故命二臣桓毛名】俾爰齊侯呂伋以二千戈虎賁百人逆子釗於南門之外【臣子皆侍左右將正太子之尊故出於路寢門外使桓毛二臣各執干戈於齊侯呂伋索虎賁百人更新逆門外所以殊之伋為天子虎賁氏】延入翼室恤宅宗【明室路寢延之使居憂為天下宗主 顧命】隱公十有一年冬十有一月壬辰公薨公薨不地故也【不地不書路寢之比】隱之不忍地也【隱猶痛也 春秋穀梁傳】莊公三十二年八月癸亥公薨于路寢路寢正寢也寢疾居正寢正也男子不絕於婦人之手以齊終也【齊絜也 同上又成十八年公薨于路寢傳同】僖公三十有三年公薨于小寢公如齊反薨于小寢即安也【小寢夫人寢也譏公就所安不終於路寢 左氏傳】小寢非正也【非路寢穀梁傳】文公十有八年二月丁丑公薨于臺下臺下非正也【同上】襄公三十有一年公薨于楚宮楚宮非正也【楚宮別宮名非路寢 同上】定公十有五年公薨于高寢【高寢宮名】高寢非正也【同上】

唯哭先復復而後行死事【氣絕則哭哭而復復而不蘇可以為死事 喪大記】夏采掌大喪以冕服復于大祖以乘車建綏復于西郊【求之王平生常所有事之處乘車玉路於大廟以冕服不出宮也四郊以綏出國門此行道也夏采天子之官故以冕服復於大祖以乘車建綏復於西郊天子之禮也大祖始祖廟也故書綏為 杜子春云當為綏 非是也玄謂明堂位曰凡四代之服器魯兼用之有虞氏之旂夏后氏之綏則旂旂有是綏者當作綏字之誤也綏

以旄牛尾為之綴于櫨上所謂注旄於干首者王祀四郊乘玉路建太常今以復去其旄異之于生亦因先王有徒綏者士冠桂及玉藻冠綏之字故書亦多作綏者今禮家定作蕤 天官】祭僕大喪復于小廟【小廟高祖以下也始祖曰大廟春秋僖八年秋七月禘于大廟】

隸僕大喪復于小寢大寢【小寢高祖以下廟之寢也始祖曰大寢 並夏官】

君復於小寢大寢小祖大祖庫門四郊【尊者求之備也亦他日所嘗有事 檀弓】 復有林麓則虞人設階無林麓則狄人設階【復招魂復魄也階所乘以升屋者虞人主林麓之官也狄人樂吏之賤者階梯也箕虞之類】 小臣復復者朝服君以卷夫人以屈狄大夫以玄纁世婦以禮衣士以爵弁士妻以稅衣皆升自東榮中屋履危北面三號捲衣投于前司服受之降自西北榮【小臣君之近臣也朝服所以事君之衣也用朝服而復之者敬也復用死者之祭服以其求於神也君以卷謂上公也夫人以屈狄互言耳上公以袞則夫人用禮衣侯伯以鷩其夫人用揄狄子男以毳其夫人乃用屈狄矣纁赤也玄衣赤裳所謂卿大夫自玄冕而下之服也其世婦亦以禮衣榮屋翼升東榮者謂卿大夫士也天子諸侯言東霤危棟上也號若云臯某復也司服以篋待衣於堂前 喪大記】

復西上【北面而西上陽長左也復者多少各如其命之數 雜記】 玉府大喪共復衣裳【鄭司農云復招魂也衣裳生時服招魂復魄于大廟至四郊玄謂復于四郊以綏 天官】 司服大喪共其復衣服皆掌其陳序【春官】 復諸侯以襲衣冕服爵弁服【復招魂復魄也冕服者上公五侯伯四子男三襲衣亦始命為諸侯及朝覲見加賜之衣也襲猶進也】 夫人稅衣揄狄狄稅素紗【言其招魂用稅衣上至揄狄也狄稅素紗言皆以白紗縠為裏】 內子以鞠衣襲衣素紗下大夫以禮衣其餘如士【內子卿之適妻也春秋傳曰晉趙姬請逆叔隗於狄趙衰以為內子而已下之是也下大夫謂下大夫之妻禮周禮作展王后之服六唯上公夫人亦有禮衣侯伯夫人自揄狄而下子男夫人自闕狄而下卿妻自鞠衣而下大夫妻自展衣而下士妻稅衣而已素紗若今紗縠之帛也六服皆袍制不禪以素紗裏之如今袿袍襜褕重繒矣襲衣者始為命婦見加賜之衣也其餘如士之妻則亦用稅衣 雜記】

婦人復不以衾【衾婦嫁時上服而非事鬼神之衣 喪大記】 復衣不以衣尸不以斂【不以衣尸謂不以襲也復者庶其生也若其以衣襲斂是用生施死於義相反士喪禮云以衣衣尸浴而去之 同上】 復與書銘自天子達於士其辭一也男子稱名婦人書姓與伯仲如不知姓則書氏【此謂殷禮也殷質不重名復則臣得名君周之禮天子崩復曰臯天子復諸侯薨復曰臯某甫復其餘及書銘則同喪服小記】 凡復男子稱名婦人稱字【婦人不以名行 喪大記】 天子崩復曰天子復矣【始死時呼魄辭也不呼名臣不名君也諸侯呼字】 諸

侯復曰某甫復矣【某甫且字曲禮】

右復 衛將軍文子之內子死復者曰臯媚女復子思聞之曰此女氏之字非夫氏之名也婦人於夫氏以姓氏稱禮也【孔叢子】

司士作士掌事【事謂奠斂之屬 疏曰始死則有奠 夏官】

右始死奠

鼓人大喪則詔大僕鼓【始崩及窆時也 地官】

大僕大喪始崩戒鼓傳達於四方【戒鼓擊鼓以警衆也故書戒為駭 夏官】 小宰以官府之六聯合邦治三曰喪荒之聯事【大宰贊贈玉含玉司徒率六卿之衆庶屬其六引宗伯為上相司馬平士大夫司寇前王此所謂官聯 天官】

大宗伯朝覲會同則為上相大喪亦如之【注見總要】

大司寇凡朝覲會同前王大喪亦如之【大喪所前或嗣王 秋官】

師氏喪紀王舉則從【舉猶行也故書舉為與杜子春云當為與謂王與喪紀之事】

保氏喪紀王舉則從【並地官】 大司馬大喪平士大夫【鄭司農云平一其服也玄謂平者正其職與其位】 小司馬小喪紀掌其事如大司馬之法 司士大喪

作士掌事【事謂奠斂之屬】 射人大喪作卿大夫掌事【並夏官】 宰夫大喪小喪掌小官之戒令帥執事而治之【大喪王后世子小喪夫人以下小官士也其大官則冢宰掌其戒令治謂共辦】 小宰以法掌賓客之戒具喪亦如之【戒官有事所當共法謂有舊法施行並天官】 鷄人大祭祀夜嘑旦以 百官【夜夜漏未盡鷄鳴時也呼旦以警起百官使夙興】 喪紀亦如之【春官】

司隸邦有喪紀之事則役其煩辱之事【煩猶劇也士喪禮下篇曰隸人湣廁 秋官】 宰夫三公六卿之喪與職喪帥官有司而治之凡諸大夫之喪使其旅帥有司而治之【旅冢宰下士 天官】 虎賁氏國有大故則守王門大喪亦如之【非常之難要在門】

旅賁氏喪紀則衰葛執戈盾【葛葛經武士尚輕】

司士國有故則致士而頒其守【故非喪則兵災 並夏官】

大司徒若國有大故則致萬民於王門令無節者不行於天下【大故謂王崩及寇兵 地官】

司險國有故則藩塞阻路而止行者以其屬守之唯有節者達之【有故喪災及兵也閉塞要害之道備姦寇也 夏官】 天子崩巷市七日諸侯薨巷市三日【徙市者庶人之喪禮檀弓】

右戒臣民

射人大喪與僕人遷尸【僕人大僕也僕人與射人俱掌王之朝位也王崩小斂大斂遷尸于室堂朝之象也檀弓曰扶君卜人師扶右射人師扶左君薨以是舉 夏官 始死章扶君條此章通用】 玉府大喪共角枕角枅【角枕以枕尸鄭司農云角枅角匕也以楔齒士喪禮曰楔】

【齒用角枅楔齒者令可飯含 天官】 始死遷尸于牀幬用斂衾去死衣小臣楔齒用角枅綴足用燕几君大夫士一也【牀謂所設牀第當牖者也士喪禮曰士死於適室幬用斂衾去死衣病時所加新衣及復衣也去之以俟沐浴

喪大記】 幕人大喪共帷幕帟綬【詳見陳殯具章】 委人喪紀共其木材【木材給張事 地官此兩條陳殯具章通用】

右遷尸楔齒綴足帷堂

父兄命赴者【謂大夫以上也士主人親命之 檀弓】

天子崩告喪曰天王登假【告赴也登上也假已也上已者若僊去云耳 曲禮】 凡訃於其君曰君之臣某死【訃或皆作赴赴至也臣死其子使人至君所告之】 父母妻長子曰君之臣某之某死【此臣於其家喪所主者】 君訃於他國之君曰寡君不祿敢告於執事夫人曰寡小君不祿大子之喪曰寡君之適子某死【君夫人不稱薨告他國君謙也】 大夫訃於同國適者曰某不祿訃於士亦曰某不祿訃於他國之君曰君之外臣寡大夫某死訃於適者曰吾子之外私寡大夫某不祿使某實訃於士亦曰吾子之外私寡大夫某不祿使某實【適讀為匹敵之敵謂爵同者也實當為至此讀周秦之人聲之誤也】 士訃於同國大夫曰某死訃於士亦曰某死訃於他國之君曰君之外臣某死訃於大夫曰吾子之外私某死訃於士亦曰吾子之外私某死【雜記】

右命赴 君氏卒【隱不敢從正君之禮故亦不敢備禮於其母】 聲子也不赴於諸侯不反哭于寢不祔于姑故不曰薨不稱夫人故不言葬【夫人喪禮有三薨則赴于同盟之國一也既葬日中自墓反虞于正寢所謂反哭于寢二也卒哭而祔於祖姑三也若此則書曰夫人某氏薨葬我小君某氏此備禮之文也今聲子三禮皆闕 隱三年春秋左氏傳】 滕侯卒不書名未同盟也凡諸侯同盟於是稱名故薨則赴以名告終稱嗣也【盟以名告神故薨亦以名告同盟告亡者之終稱嗣位之主】 以繼好息民謂之禮經【隱七 years 左氏傳】 葬蔡宣公卒何以名而葬不名卒從正【卒當赴告天子君前臣名故從君臣之正義言也】 而葬從主人【葬者有常月可知不赴告天子故從臣子辭稱】 卒何以日而葬不日卒赴【赴天子也緣天子閔傷欲其知之】 而葬不告【不告天子也隱八年公羊傳】

唯天子之喪有別姓而哭【使諸侯同姓異姓庶姓相從而為位別於朝覲來時朝覲爵同同位 檀弓】 象胥凡國之大喪詔相國客之禮儀而正其位【客謂諸侯使臣來弔者 秋官】

諸子大喪正羣子之服位【夏官】 肆師大喪令外內命婦序哭【序使相次秩】

內宗大喪序哭者【次序外內宗及命婦哭王 並春官】

九嬪若有賓客則從后大喪帥叙哭者亦如之【亦從后帥猶道也后哭衆之次叙者乃哭天官 唯天子之喪別姓而哭及諸子以下四條皆朝夕哭通用】

司士凡士之有守者令哭無去守【守官不可空也夏官】 既正尸子坐于東方卿大夫父兄子姓立于東方有司庶士哭于堂下北面夫人坐于西方內命婦姑姊妹子姓立于西方外命婦率外宗哭于堂上北面【正尸者謂遷尸牖下南首也子姓謂衆子孫也姓之言生也其男子立于主人後女子立于夫人後世婦為內命婦卿大夫之妻為外命婦外宗姑姊妹之女】 大夫之喪主人坐于東方主婦坐于西方其有命夫命婦則坐無則皆立【命夫命婦來哭者同宗父兄子姓姑姊妹子姓也凡此哭者尊者坐卑者立】 士之喪主人父兄子姓皆坐于東方主婦姑姊妹子姓皆坐于西方【士賤同宗尊卑皆坐 喪大記】

右哭位

小宰喪受其含綖幣玉之事【王喪諸侯諸臣有致含綖幣玉之事 天官】

右受含櫨幣玉

司常大喪共銘旌【銘旌王則大常也士喪禮曰為銘各以其物 春官】

書銘自天子達於士其辭一也男子稱名婦人書姓與伯仲如不知姓則書氏【詳見復章】

右為銘

鬯人大喪之大湭設斗共其鬯鬯【斗所以沃尸也鬯尸以鬯酒使之香美者鄭司農云鬯讀為徽】 鬱人大喪之湭共其肆器【肆器陳尸之器喪大記曰君設大盤造冰焉大夫設夷盤造冰焉士併瓦盤無冰設牀檀第有枕此之謂肆器天子亦用夷盤】

肆師大喪大湭以鬯則築鬻【築香草煮以為鬯以浴尸香草鬱也 並春官】

典絲喪紀共其絲纁組文之物【以給線縷著吁口綦握之屬青與赤謂之文】

內司服后之喪共其衣服凡內具之物【內具紛衾線纁鞶裘之屬

並天官此兩條陳小斂大斂衣通用】 公襲卷衣一玄端一朝服一素積一

纁裳一爵弁二玄冕一褻衣一朱綠帶申加大帶於上【朱綠帶者襲衣之帶飾之雜以朱綠異於生也此帶亦以素為之申重也重於革帶也革帶以佩韍必言重加大帶者明雖有變必備此一帶也士襲三稱子羔襲五稱今公襲九稱是尊卑襲數不同矣諸侯七稱天子十二稱與雜記】 君錦冒黼殺綴旁七大夫玄冒黼殺綴旁五士緇冒緋殺綴旁三凡冒質長與手齊殺三尺【冒者既襲所以韜尸重形也殺冒之下帛韜足上行者也 喪大記】 袍必有表不禪衣必有裳謂之一稱【袍褻衣必有以表之乃成稱也雜記曰子羔之襲繭衣裳與稅衣纁衾為一是也論語曰當暑袷絺綌必表而出之亦為其褻也 同上】 率帶諸侯大夫皆五采士二采【此謂襲尸之大帶率繅也繅之不加箴功大夫以上更飾以五采士以朱綠襲事成于帶變之所以異於生 雜記】 復衣不以衣尸【詳見復章】 凌人大喪共夷槃冰【夷之言尸也實冰于夷槃中置之尸牀之下所以寒尸尸之槃曰夷槃牀曰夷牀衾曰夷衾移尸曰夷于堂皆依尸而為言者也漢禮器制度大槃廣八尺長丈二尺深三尺漆赤中 天官】 君設大盤造冰焉大夫設夷盤造冰焉士併瓦盤無冰設牀檀第有枕【造猶內也檀第袒簣也謂無席如浴時牀也禮自仲春之後尸既襲既小斂先內冰盤中乃設牀于其上不施席而遷尸焉秋涼而止士不用冰以瓦為盤併以盛水耳漢禮大槃廣八尺長丈二深三尺赤中夷盤小焉周禮天子夷盤士喪禮君賜冰亦用夷盤然則其制宜同之 喪大記】 典瑞大喪共飯玉含玉【飯玉碎玉以雜米也含玉柱左右顙及在口中者雜記曰含者執璧將命則是璧形而小耳 春官】 玉府大喪共含玉【天官】 舍人喪紀共飯米【飯所以實口不忍虛】

【也君用梁大夫用稷士用粱皆四升實者為盈 地官】

天子飯九貝諸侯七大夫五士三【此蓋夏時禮也周禮天子飯含用玉 雜記】

含一牀襲一牀遷尸于堂又一牀皆有枕席君大夫士一也【喪大記】

右陳沐浴襲飯含之具 申豐曰古者日在北陸而藏冰西陸朝覲而出之其出之也朝之祿位賓客喪祭於是乎用之【昭四年左氏傳】

小宗伯王崩大肆以柩鬯泚【鄭司農云大肆大浴也杜子春讀泚為泯以柩鬯浴尸玄謂大肆始陳尸伸之】

大祝大喪始崩以肆鬯泚尸【肆鬯所為陳尸設鬯也鄭司農云泚尸以鬯浴尸】

小祝大喪贊泚【故書泚為灑杜子春云當為泚泚謂浴尸並春官】

女御大喪掌沐浴【王及后之喪 天官】 管人汲不說繻

屈之盡階不升堂授御者入浴小臣四人抗衾御者二人浴浴水用盆沃水用料浴用絺巾拒用浴衣如它日小臣爪足浴餘水棄于坎其母之喪則內御者抗衾而浴【抗衾者蔽上重形也拒拭也爪足斷足爪也】 管人汲授御者御者差沐于堂上君沐梁大夫沐稷士沐梁甸人為盥于西墻下陶人出重鬲管人受沐乃煮之甸人取所徹廟之西北扉薪用爨之管人授御者沐乃沐沐用瓦盤拒用巾如它日小臣爪手翦須濡濯棄于坎【差淅也淅飯米取其潘以為沐也浴沃用料沐於盤中文相變也士喪禮沐稻此云士沐梁蓋天子之士也以差率而上之天子沐黍與 喪大記】

右沐浴

大祝大喪相飯【春官】 大宰大喪贊含玉【助王為之也含玉死者口實天子以玉雜記曰含者執璧將命曰寡君使某含則諸侯含以璧鄭司農云含玉璧琮 天官】

右飯含襲 子羔之襲也繭衣裳與稅衣纁衽為一素端一皮弁一爵弁一玄冕一曾子曰不襲婦服【繭衣裳者若今大襦也纁為繭緼為袍表之以稅衣乃為一稱爾稅衣若玄端而連衣裳者也大夫而以纁為之緣非也唯婦人纁衽禮以冠名服此襲其服非襲其冠曾子譏襲婦服而已玄冕又大夫服未聞子羔曷為襲之玄冕或為玄冠或為玄端 雜記】 孔子之喪公西掌殯葬焉含以踈米二貝【踈硬米也禮記曰稻曰嘉疏】 襲衣十有一稱加朝服一冠章甫之冠珮象環徑五寸而緹組紱【緹雜色組紱所以繫象環 家語】

君之喪未小斂為寄公國賓出大夫之喪未小斂為君命出土之喪於大夫不當斂則出【父母始死悲哀非所尊不出也出者或至庭或至門國賓聘大夫不當斂其來非斂時】 凡主人之出也徒跣扱衽拊心降自西階君拜寄公國賓于位大夫於君命迎于寢門外使者升堂致命主人拜于下士於大夫親弔則與之哭不逆於門外【拜寄公國賓於位者於庭鄉其位而拜之此時寄公位在門西國賓位在門東皆北面小斂之後寄公東面國賓門西北面士於大夫親弔謂大夫身來弔士也與之哭既拜之即位西階東面哭大夫特來則北面 喪大記】 世婦凡王后有拜事於婦人則詔相【鄭司農云謂爵婦人玄謂拜拜謝之也喪大記曰夫人亦拜寄公婦人於堂上 春官】 夫人為寄公夫人出命婦為夫人之命出土妻不當斂則為命婦出【出拜之於堂上也此時寄公夫人命婦位在堂上北面小斂之後尸西東面 喪大記】 大夫之喪庶子不受弔【不以賤者為有爵者主 檀弓此條後凡受弔通用又奉尸夷于堂章有婦人迎客送客一條殯後受弔章有君弔見尸柩而後踊皆此章通用】

右受弔 鄭皇武子曰宋先代之後也於周為客天子有事禘焉【有事祭宗廟也禘祭肉尊之

故賜以祭胙】有喪拜焉【宋弔周喪王特拜謝之 僖二十四年左氏傳
小斂後殯後受弔通用】

小斂於戶內大斂於阼君以簟席大夫以蒲席士以葦席【簟細葦席也三者下皆有莞
喪大記】司服大喪共其斂衣服掌其陳序【春官
陳大斂衣通用陳襲衣章內典絲內司服二條此章通用】小斂布絞縮者一橫者三君錦衾
大夫縞衾士緇衾皆一衣十有九稱君陳衣於序東大夫士陳衣于房中皆西領北上絞紵不
在列【絞既斂所用束堅之者縮從也衣十有九稱法天地之終數也士喪禮小斂陳衣于房
中南領西上與大夫異今此同亦蓋天子之士也絞紵不在列以其不成稱不連數也小斂無
紵因絞不在列見之也或曰縮者三】
君無綈大夫士畢主人之祭服親戚之衣受之不以即陳【無綈者不陳不以斂】
斂君大夫士皆用複衣複衾【喪大記】凡陳衣者實之篋取衣者亦以篋升降自西階【取
猶受也】凡陳衣不詘非列采不入絺綌紵不入【不詘謂舒而不卷也列采謂正服之色也
絺綌紵者當著之褻服也襲尸重形冬夏用袍及斂則用正服同上 陳大斂衣通用】
復衣不以斂【詳見復章】
封人凡喪紀則飾其牛牲【地官】牛人喪事共其奠牛【謂殷奠遣奠也喪所薦饋曰奠
同上】 圉人喪

紀共其生獸死獸之物【同上】獸人凡喪紀共其死獸生獸【共其完者】
腊人喪紀共其脯腊凡乾肉之事 人喪紀共其魚之鱻
醢人凡祭祀共其薦羞之豆實喪紀亦如之【並天官
以上八官並陳大斂奠至祖奠遣奠通用】

右陳小斂衣奠 季康子之母死陳褻衣【褻衣非上服陳之將以斂】敬姜曰婦人不飾不敢
見舅姑將有四方之賓來褻衣何為陳於斯命徹之【言四方之賓嚴於舅姑敬姜者康子從
祖母檀弓】

小斂主人即位于戶內主婦東面乃斂【喪大記
始死章卜人右射人左遷尸章射人僕人遷尸並此章通用】小宗伯王崩及執事泣大斂小
斂帥異族而佐【執事大祝之屬泣臨也親斂者蓋事官之屬為之喪大記曰小斂衣十九稱
君大夫士一也大斂君百稱大夫五十稱士三十稱異族佐斂疏者可以相助】
大祝大喪贊斂 喪祝凡卿大夫之喪掌事而斂飾棺焉【並春官】君之喪大胥是斂衆胥佐
之大夫喪大胥侍之衆胥是斂士之喪胥為侍士是斂【胥樂官也不掌喪事胥當為祝字之
誤也侍猶臨也大祝之職大喪贊斂喪祝卿大夫之喪掌斂士喪禮商祝主斂】
凡斂者袒遷尸者襲【袒者於事便也】士與其執事則斂斂焉則為之壹不食凡斂者六人
【斂者必使所與執事者不欲妄人褻之執或為 】【
小斂之衣祭服不倒【尊祭服也斂者要方散衣有倒】
小斂大斂祭服不倒皆左衽結紵不紐【左衽衽鄉左反生時也】
自小斂以往用夷衾夷衾質殺之裁猶冒也【小斂又覆以夷衾裁猶制也字或為材】

鋪絞紵踊鋪衾踊鋪衣踊遷尸踊斂衣踊斂衾踊斂絞紵踊【目孝子踊節】斂者既斂必哭君撫大夫撫內命婦大夫撫室老撫姪娣【撫以手案之也內命婦君之世婦】君大夫馮父母妻長子不馮庶子士馮父母妻長子庶子有子則父母不馮其尸凡馮尸者父母先妻子後【目於其親所馮也馮謂扶持服膺】君於臣撫之父母於子執之子於父母馮之婦於舅姑奉之舅姑於婦撫之妻於夫拘之夫於妻於昆弟執之【此恩之淺深尊卑之儀也馮之類必當心】馮尸不當君所【不敢與尊者所馮同處】凡馮尸興必踊【悲哀之至馮尸必坐並喪大記】君不撫僕妾【略於賤也 雜記 自小宗伯至此十三條大斂章通用】君於大夫世婦為之賜則小斂焉夫人於世婦為之賜小斂焉【詳見殯後受弔章】卒斂主人馮之踊主婦亦如之主人袒說髦括髮以麻婦人髻帶麻于房中【士既殯說髦此云小斂蓋諸侯禮也士之既殯諸侯之小斂於死者俱三日也婦人之髻帶麻於房中則西房也天子諸侯有左右房 喪大記】

右小斂

徹帷男女奉尸夷于堂降拜【夷之言尸也於遷尸主人主婦而下從而奉之孝敬之心降拜拜賓也】君拜寄公國賓大夫士拜卿大夫於位於士旁三拜夫人亦拜寄公夫人於堂上大夫內子士妻特拜命婦汜拜衆賓於堂上【衆賓謂士妻也尊者皆特拜拜士與其妻皆旅之喪大記 始死章卜人右射人左遷尸章射人與大僕遷尸並此章通用】哭尸于堂上主人在東方由外來者在西方諸婦南鄉【由外來者謂奔喪者也無奔喪者婦人由東面】婦人迎客送客不下堂下堂不哭男子出寢門見人不哭【婦人所有事自堂及房男子所有事自堂及門非其事處而哭猶野哭也出門見人謂迎賓也】其無女主則男主拜女賓于寢門內其無男主則女主拜男賓于阼階下子幼則以衰抱之人為之拜為後者不在則有爵者辭無爵者人為之拜在竟內則俟之在竟外則殯葬可也喪有無後無無主【拜者皆拜賓於位也為後者有爵攝主為之辭於賓耳不敢當尊者禮也 喪大記此條殯後迎賓拜賓通用其婦人迎送不下堂一節未小斂受弔亦通用】

右奉尸夷于堂拜賓

大祝大喪徹奠【疏曰此文承大喪之下故奠為始死之奠小斂大斂奠並大祝徹之 春官】

右徹始死奠

主人即位襲帶經踊【即位阼階之下位也有襲經乃踊尊卑相變也】母之喪即位而免【記異者禮斬衰括髮齊衰免以至成服而冠為母重初亦括髮既小斂則免】乃奠【小斂奠也】弔者襲裘加武帶經與主人拾踊【始死弔者朝服裼裘如吉時也小斂則改襲而加武與帶經矣武吉冠之卷也加武者明不改冠亦不免也檀弓曰主人既小斂子游趨而出襲裘帶經而入】賓出徹帷【君與大夫之禮也士卒斂則徹帷徹或為廢 並喪大記 未小斂受弔有庶子不受弔宋成公如鄭二條奉尸夷于堂有婦人迎送不下堂一條又殯後受弔章有君弔見尸柩而後踊皆此章通用】

右襲帶經小斂奠

挈壺氏凡喪縣壺以代哭者皆以水火守之分以日夜【鄭司農云縣壺以為漏玄謂代更也禮未大斂代哭以水守壺者為沃漏也以火守壺者夜則視刻數也分以日夜者異晝夜漏也漏之箭晝夜共百刻冬夏之間有長短焉大史立成法有四十八箭夏官】君喪虞人出木角狄人出壺雍人出鼎司馬縣之乃官代哭【代更也未殯哭不絕聲為其罷倦既小斂可以為漏刻分時而更哭也】大夫官代哭不縣壺【下君也】士代哭不以官【自以親疏哭也喪大記】

右代哭

委人喪紀共其薪蒸木材【薪蒸給炊及燎木材給張事麤者曰薪細者曰蒸地官】司烜氏凡邦之大事共墳燭庭燎【墳大也樹於門外曰大燭於門內曰

庭燎夏官】君堂上二燭下二燭大夫堂上一燭下二燭士堂上一燭下一燭【燭所以照饌也滅燎而設燭喪大記】

右設燎

大斂於阼【詳見陳小斂衣章陳小斂本章有君以簟席并司服共斂衣服及陳襲衣章內典絲共絲纁內司服共衣服皆此章通用】大斂布絞縮者三橫者五布紵二衾君大夫士一也君陳衣于庭百稱北領西上大夫陳衣于序東五十稱西領南上士陳衣于序東三十稱西領南上絞紵如朝服絞一幅為三不辟紵五幅無紵【二衾者或覆之或薦之如朝服者謂布精麤朝服十五升小斂之絞也廣終幅析其末以為堅之強也大斂之絞一幅三析用之以為堅之急也紵以組類為之綴之領側若今被識矣生時禪被有識死者去之異于生也士喪禮大斂亦陳衣於房中南領西上與大夫異今此士陳衣與大夫又同亦蓋天子之士紵或為點】大斂君大夫士祭服無算君褶衣褶衾大夫士猶小斂也【褶衾也君衣尚多去其著也喪大記陳小斂衣章凡陳衣者實之篋以下此章通用】典瑞駟圭璋璧琮琥璜之渠眉疏璧琮以斂尸【鄭司農云駟外有捷盧也駟讀為駟疾之駟疏讀為沙謂圭璋璧琮琥璜皆為開渠為眉琬沙除以斂尸令汁得流去也玄謂以斂尸者於大斂焉加之也駟讀為組與組馬同聲之誤也渠眉玉飾之溝琬也以組穿聯六玉溝琬之中以斂尸圭在左璋在右琥在右璜在足璧在背琬在腹蓋取象方明神之也疏璧琮者通於天地春官】君即位而為棨【棨謂柩棺親尸者棨堅著之言也若天子棨內又有水犀革棺】歲壹漆之【若未成焉】藏焉【虛之不合檀弓】天子之棺四重【尚深邃也諸公三重諸侯再重大夫一重士不重】水兕革棺被之其厚三寸【以水牛兕牛之革以為棺被革各厚三寸合六寸也此為一重】柩棺一【所謂棨棺也爾雅曰椁柩】梓棺二【所謂屬與大棺】四者皆周【周币也凡棺因能溼之物】棺束縮二衡三衽每束一【衡亦當為橫衽今小要衽或作漆或作髹同上】君大棺八寸屬六寸棨四寸上大夫大棺八寸屬六寸下大夫棺六寸屬四寸士棺六寸【大棺棺之在表者也檀弓曰天子之棺四重水兕革棺被之其厚三寸柩棺一梓棺二四者皆周此以內

說而出也然則大棺及屬用梓槨用柅以是差之上公革棺不被三重也諸侯無革棺再重也大夫無槨一重也士無屬不重也庶人之棺四寸上大夫謂列國之卿也趙簡子云不設屬槨時僭也】君裏棺用朱綠用雜金鐸大夫裏棺用玄綠用牛骨鐸士不綠【鐸所以琢著裏喪大記】舍人喪紀共熬穀【熬穀者錯於棺旁所以惑蚍蜉也喪大記曰熬君四種八筐大夫三種六筐士二種四筐加魚腊焉地官】熬君四種八筐大夫三種六筐士二種四筐加魚腊焉【熬者煎穀也將塗設於棺旁所以惑蚍蜉使不至棺也士喪禮曰熬黍稷各二筐又曰設熬旁一筐大夫三種加以梁君四種加以稻四筐則手足皆一其餘設於左右喪大記】幕人大喪共帷帟綬【為賓客飾也帷以帷堂或與幕張之於庭帟在柩上】三公

及卿大夫之喪共其帟【唯士無帟王有惠則賜之檀弓曰君於士有賜帟】掌次凡喪王則張帟三重諸侯再重孤卿大夫不重【張帟柩上承塵並天官帷堂章委人共木材此章通用上一條始死帷堂及柩行通用】司几筵凡喪事設葦席右素几其栢席用萑蒲純諸侯則分純每敦一几【喪事謂凡奠也萑如葦而細者鄭司農云柏席迫地之席葦居其上或曰柏席載黍稷之席玄謂柏棹字磨滅之餘棹席藏中神坐之席也敦讀曰燾燾覆也棺在殯則棹燾既窆則加見皆謂覆之周禮雖合葬及同時在殯皆異几體實不同祭於廟同几精氣合】凡凶事仍几【故書仍為乃鄭司農云乃讀為仍仍因也因其質謂無飾也書顧命曰翼日乙丑成王崩癸酉牖間南鄉西序東鄉東序西鄉皆仍凡玄謂凶事謂凡奠几朝夕相因喪禮略春官此條大斂奠朝夕奠朔月奠以後凡奠並通用陳小斂奠章內有封人飾牛牲牛人共奠牛圉人獸人共獸腊人共乾肉人共蠡羹醢人共豆實竝此章通用】右陳大斂衣及殯奠具凡諸侯薨于朝會加一等死王事加二等於是乎有以袞斂【詳喪變禮道有喪】季平子卒將以君之璵璠斂贈以珠玉孔子初為中都宰聞之歷級而救焉【歷級遽登階不聚足】曰送而以寶玉是猶曝尸於中原也其示民以姦利之端而有害於死者安用之且孝子不順情以危親忠臣不兆姦以陷君【兆姦為姦之兆成也】乃止【家語】宋文公卒棺有翰檜君子謂華元樂舉於是乎不臣【詳見窆章】齊姜薨初穆姜使擇美檜【檜梓之屬】以自為櫬與頌琴【櫬棺也頌琴琴名猶言雅琴皆欲以送終】季文子取以葬君子曰非禮也禮無所逆婦養姑者也虧姑以成婦逆莫大焉【穆姜成公母齊姜成公婦襄二左氏傳】定姒薨不殯于廟無櫬不虞【櫬親身棺季氏以定姒本賤既無器備議其喪制欲殯不過廟又不反哭】匠慶謂季文子【匠慶魯大匠】曰子為正卿而小君之喪不成【謂如季孫所議則為夫人禮不成】不終君也【慢其母是不終事君之道】君長誰受其咎【言襄公長將責季孫】初季孫為已樹六檜於蒲圃東門之外【季文子樹檜欲自為櫬】匠慶請木【為定姒作櫬】季孫曰略【不以道取為略】匠慶用蒲圃之檜季孫不御【御止也傳言遂得成禮故經無異文】君子曰志所謂多行無禮必自及也其是之謂乎【襄四年左氏傳】宋元公將如晉乃召六卿曰寡人不佞不能事父兄【父兄謂華向】以為二三子憂若以羣子之靈獲保首領以沒唯是楸柩所以藉幹者【楸柩棺中笊牀也幹骸骨也】請無及先君仲幾對曰宋國之法死生之度先君有命矣羣臣以死守之弗敢失隊臣之失職常刑不赦臣不忍其死君命祇辱宋公遂行已亥卒于曲葬宋元公如先君禮也【昭二十五年左氏傳】孔子之喪公西赤掌殯葬焉桐棺四寸柏棹五寸【家語】

大祝大喪徹奠【見始死奠章】

右徹小斂奠

君將大斂子弁經即位于序端卿大夫即位于堂廉楹西北面東上父兄堂下北面夫人命婦尸西東面外宗房中南面小臣鋪席商祝鋪絞紵衾衣士盥于盤上士舉遷尸于斂上卒斂宰告子馮之踊夫人東面亦如之【子弁經者未成服弁如爵弁而素大夫之喪子亦弁經喪大記 雜記文同但夫人東面下有坐馮之興踊五字注云此喪大記脫字重著于是 始死章有卜人扶右射人扶左遷尸章有射人僕人遷尸小斂章自小宗伯蒞斂以下十三條皆此章通用】大夫之喪將大斂既鋪絞紵衾衣君至主人迎先入門右巫止于門外君釋菜祝先入升堂君即位于序端卿大夫即位于堂廉楹西北面東上主人房外南面主婦尸西東面遷尸卒斂宰告主人降北面于堂下君撫之主人拜稽顙君降升主人馮之命主婦馮之【先入門右者入門而右也巫止者君行必與巫巫主辟凶邪也釋菜禮門神也必禮門神者禮君非問疾弔喪不入諸臣之家也主人房外南面大夫之子尊得升視斂也】士之喪將大斂君不在其餘禮猶大夫也【其餘謂卿大夫及主婦之位 同上】公視大斂公升商祝鋪席乃斂【喪大記曰大夫之喪將大斂既鋪絞紵衾衣君止此君升乃鋪席則君至為之改始新之也 雜記】君於大夫世婦大斂焉於士為之賜大斂焉夫人於世婦大斂焉於諸妻為之賜大斂焉【詳見殯後受弔章】

右大斂

天子七日而殯諸侯五日而殯大夫三日而殯【尊者疏卑者速王制始死章有卜人右射人左遷尸章有射人僕人遷尸並此章通用】 君大夫髻爪

實子綠中土埋之【綠當為角聲之誤也角中謂棺內四隅也髻亂髮也將實爪髮棺中必為小囊盛之此綠或為簍 喪大記】 君蓋用漆三衽三束大夫蓋用漆二衽二束士蓋不用漆二衽二束【用漆者塗合牡牝之中也衽小要也 同上】 天子之殯也菆塗龍輅以椁【菆木以周龍輅如椁而塗之天子殯以輅車畫轅為龍】加斧于椁上畢塗屋【斧謂之黼白黑文也以刺繡於繡幕加椁以覆棺已乃屋其上盡塗之】天子之禮也【檀弓】 君殯用輅轎至于上畢塗屋大夫殯以幬轎置于西序塗不暨于棺【轎猶菆也屋殯上覆如屋者也幬覆也暨及也此記參差以檀弓參之天子之殯居棺以龍輅轎木題湊象椁上四注如屋以覆之盡塗之諸侯輅不盡龍轎不題湊象椁其他亦如之大夫之殯廢輅置棺西牆下就牆轎其三面塗之不及棺者言轎中狹小裁取容棺然則天子諸侯差寬大矣】士殯見衽塗上帷之【士不轎掘地下棺見小要耳帷之鬼神尚幽暗也上達於天子皆然幬或作鎔或作塿 喪大記】 甸師喪事代王受眚哉【燔盛者祭祀之主也今國遭大喪若云此黍稷不馨使鬼神不逞于王既殯大祝作禱辭授甸人使以禱籍田之神受眚哉弭後殃 天官】 大祝大喪言甸人讀禱【鄭司農云甸人主設復梯大祝主言問其具梯物玄謂言猶語也禱六辭之屬禱也甸人喪事代王受眚哉大祝為禱辭語之使以禱于籍田之神也 春官】 小祝設熬置銘【銘今書或作名鄭司農云銘書死者名於旌今謂之柩玄謂熬者棺既蓋設于其旁所以惑蚍蜉也喪大記曰熬君四種八筐大夫三種六筐士二種四筐加魚腊焉士喪禮曰熬黍稷各二筐有魚腊饌于西坵南又曰設熬旁一筐乃塗 同上】 右殯 布幕衛也繡幕魯也【詳見喪禮義】 孺子

薨之喪【魯哀公之少子】哀公欲設撥【撥可撥引輶車所謂紼】問於有若曰其可也君之三臣猶設之【猶尚也以臣況子也三臣仲孫叔孫季孫氏】顏柳曰天子龍輶而棹幃【輶殯車也畫輶為龍幃覆也殯以棹覆棺而塗之所謂敢塗龍輶以棹】諸侯輶而設幃【輶不畫龍】為榆沈故設撥【以水澆榆白皮之汁有急以播地於引輶車滑】三臣者廢輶而設撥竊禮之不中者也而君何學焉【止其學非禮也廢去也紼繫於輶三臣於禮去輶今有紼是用輶僭禮也殯禮大夫敢置西序士掘堊見衽檀弓】帷殯非古也自敬姜之哭穆伯始也【穆伯魯大夫敬姜穆伯妻文伯歆之母也禮朝夕哭不帷同上】

天子諸侯之喪斬衰者奠大夫齊衰者奠【詳見士喪禮大斂奠章】

右大斂奠

小宗伯辨吉凶之五服

司服掌王之吉凶衣服【並春官】大僕喪紀正王之服位詔法儀【夏官】內司服凡祭祀

賓客共后之衣服及九嬪世婦凡命婦共其衣服共喪衰亦如之

追師掌王后之首服為九嬪及外內命婦之首服以待祭祀賓客喪紀共弁經亦如之內宰凡喪事佐后使治外內命婦正其服位【使其屬之上士內命婦謂九嬪世婦女御鄭司農云外命婦卿大夫之妻王命其夫后命其婦玄謂士妻亦為命婦並天官】

諸子大喪正羣子之服位【夏官】肆師禁外內命男女之衰不中法者且授之杖【外命男六鄉以出也內命男朝廷卿大夫士也其妻為外命女喪服為夫之君齊衰不杖內命女王之三夫人以下不中法違升數與裁制者鄭司農云三日授子杖五日授大夫杖七日授士杖此舊說也喪大記曰君之喪三日子夫人杖五日既殯授大夫世婦杖無七日授士杖文玄謂授杖日數王喪依諸侯與七日授士杖四制云春官】天子崩三日祝先服【祝佐含斂先病】五日官長服【官長大夫士】七日國中男女服【庶人】三月天下服【諸侯之大夫檀弓】君之喪三日子夫人杖五日既殯授大夫世婦杖【三日者死之後三日也為君杖不同日人君禮大可以見親疏也】大夫之喪三日之朝既殯主人主婦室老皆杖士之喪二日而殯三日之朝主人杖婦人皆杖【士二日而殯者下大夫也士之禮死與往日生與來日此二日於死日亦得三日也婦人皆杖謂主婦容妾為君女子子在室者】子皆杖不以即位【子謂凡庶子也不以即位與去杖同喪大記】

公之喪諸達官之長杖【謂君所命雖有官職不達於君則不服斬檀弓】

右成服

君於大夫世婦大斂焉為之賜則小斂焉【為之賜謂有恩惠也】於外命婦既加蓋而君至【於臣之妻略也】於士既殯而往為之賜大斂焉夫人於世婦大斂焉為之賜小斂焉於諸妻為之賜大斂焉於大夫外命婦既殯而往大夫士既殯而君往焉使人戒之主人具殷奠之禮俟于門外見馬首先入門右巫止于門外祝代之先君釋菜於門內祝先升自阼階負墉南面君即位于阼小臣二人執戈立于前二人立于後【殷猶大也朝夕小奠至月朔則大奠君

將來則具大奠之禮以待之榮君之來也祝負墉南面直君北房戶東也小臣執戈先後君君升而夾階立大夫殯即成服成服則君亦成服錫衰而往弔之【擯者進【當贊主人也始立門東北面】主人拜稽顙若稱言視祝而踊主人踊【稱言舉所以來之辭也視祝而踊祝相君之禮當節之也】大夫則奠可也士則出俟于門外命之反奠乃反奠卒奠主人先俟于門外君退主人送于門外拜稽顙【迎不拜拜送者拜迎則為君之答已】君於大夫疾三問之在殯三往焉士疾一問之在殯一往焉【所以致殷勤也】君弔則復殯服【復反也反其未殯未成服之服新君事也謂臣喪既殯後君始來弔也復或為服】夫人弔于大夫士主人出迎于門外見馬首先入門右夫人入升堂即位主婦降自西階拜稽顙于下夫人視世子而踊奠如君至之禮夫人退主婦送于門內拜稽顙主人送于大門之外不拜【視世子而踊世子從夫人以為節也世子之從夫人位如祝從君也】大夫君不迎于門外入即位于堂下主人北面衆主人南面婦人即位于房中若有君命命夫命婦之命四鄰賓客其君後主人而拜【入即位于下不升堂而位阼階之下西面下正君也衆主人南面于其北婦人即位于房中君雖不升堂猶辟之也後主人而拜者將拜賓使主人陪其後而君前拜不俱拜者主人無二也】君弔見尸柩而後踊【塗之後雖往不踊也】

此一節未小斂既小斂受弔通用【大夫士若君不戒而往不具殷奠君退必奠【榮君之來喪大記】

未小斂受弔章有庶子不受弔宋成公如鄭又奉尸夷于堂後迎賓送賓皆此章通用】

右殯後受弔

天府凡國之玉鎮大寶器藏焉若有大祭大喪則出而陳之既事藏之【玉鎮大寶器玉瑞玉器之美者禘祫及大喪陳之以華國顧命陳寶赤刀火訓弘璧琬琰在西序大玉夷玉天球河圖在東序胤之舞衣大貝鼗鼓在西房兌之戈和之弓垂之竹矢在東房此其行事見於經春官】典路若有大祭祀則出路贊駕說大喪亦如之【亦出路當陳之鄭司農說以書顧命曰成王崩康王既陳先王寶器又曰大路在賓階面綴路在阼階面先路在左塾之前次路在右塾之前同上】

右陳寶器 乙丑王崩丁卯命作冊度【三日命史為冊書法度傳顧命於康王】越七日癸酉伯相命士須材【邦伯為相則召公於丁卯七日癸酉石公命士致材木須待以供喪用】狄設黼辰綴衣【狄下土辰屏風畫為斧文置戶牖間復設幄帳象平生所為】牖間南嚮敷重篋席黼純華玉仍几【篋桃枝竹白黑雜繒緣之華彩色華玉以飾憑几仍因也因生時几不改作此見羣臣覲諸侯之坐】西序東嚮敷重底席綴純文貝仍几【東西廂謂之序底蒨萃綴雜彩有文之貝飾几此旦夕聽事之坐】東序西嚮敷重豐席畫純彫玉仍几【豐莞彩色為畫彫刻鏤此養國老饗羣臣之坐】西夾南嚮敷重筓席玄紛純漆仍几【西廂夾室之前筓蒨竹玄紛黑綬此親屬私宴之坐故席几質飾】越玉五重陳寶【於東西序坐北列玉五重又陳先王所寶之器物】赤刀大訓弘璧琬琰【寶刀赤刀削大訓虞書典謨大璧琬琰之珪為二重】大玉夷玉天球河圖在東序【三玉為三重夷常也球雍州所貢河圖八卦伏羲氏王天下龍馬出河遂則其文以畫八卦謂之河圖歷代傳寶之】胤之舞衣大貝鼗鼓在西房【胤國所為舞者之衣皆中法大貝如車渠鼗鼓長八尺商周傳寶之西房西夾室東】兌

之戈和之弓垂之竹矢在東房【兌和古之巧人垂舜共工所為皆中法故亦傳寶之東房東廂夾室】大輅在賓階面綴輅在阼階面【大輅玉綴輅金面前皆南向】先輅在左塾之前次輅在右塾之前【先輅象次輅木金玉象皆以飾車木則無飾皆在路寢門內左右塾前北面凡陳列皆象成王生時華國之事所以重顧命】二人雀弁執惠立于畢門之內【士衛殯與在廟同故雀韋弁惠三隅矛路寢門一名畢門】四人綦弁執戈上刃夾兩階阼【綦文鹿子皮弁亦士堂廉曰阼士所立處】一人冕執劉立于東堂一人冕執鉞立于西堂【冕皆大夫也劉鉞屬立于東西廂之前堂】一人冕執戣立于東垂一人冕執瞿立于西垂【戣瞿皆戟屬立于東西下之階上】一人冕執銳立于側階【銳矛屬也側階北下立階上】王麻冕黼裳由賓階躋【王及羣臣皆吉服用西階升不敢當主】卿士邦君麻冕蟻裳入即位【公卿大夫及諸侯皆同服亦廟中之禮蟻裳名色玄】太保太史太宗皆麻冕彤裳【執事各異裳彤纁也太宗上宗即宗伯也】太保承介圭上宗奉同瑁由阼階躋【大圭尺二寸天子守之故奉以奠康王所位同爵名瑁所以冒諸侯圭以齊瑞信方四寸邪刻之用阼階升由便不嫌】太史秉書由賓階躋御王册命【太史持册書顧命進康王故同階】曰皇后憑玉几道揚末命命汝嗣訓【大君成王憑玉几所道稱揚終命所以感動康王命汝繼嗣其道】臨君周邦率循大卞【用是道臨君周國率羣臣循大法】燮和天下用答揚文武之光訓【言用和道和天下用對揚聖祖文武之大教叙成王意】王再拜興答曰眇眇予末小子其能而亂四方以敬忌天威【言微微我淺末小子其能如父祖治四方以敬忌天威德乎謙辭託不能】乃受同瑁王三宿三祭三咤【王受瑁為主受同以祭禮成於三故酌者實三爵於王王三進爵三祭酒三奠爵告已受羣臣所傳顧命】上宗曰饗【祭必受福讚王曰饗福酒】太保受同降【受王所饗同下堂反於筐】盥以異同秉璋以酢【太保以盥手洗異同實酒秉璋以酢祭半圭曰璋臣所奉王已祭太保又祭報祭曰酢】授宗人同拜王答拜【宗人小宗伯佐太宗者太宗供王宗人供太保拜白已傳顧命故授宗人同拜王答拜尊所受命】太保受同祭嘒【太保既拜而祭既祭受福嘒至齒則王亦至齒王言饗太保言嘒互相備】宅受宗人同拜王答拜【太保居其所授宗人同拜白成王以事畢王答拜敬所白】太保降收【太保下堂立王下可知有司於此盡收徹】諸侯出廟門俟【言諸侯則卿士以下亦可知殯之所處故曰廟皆待王後命顧命】王出在應門之內【出畢門立應門之中庭南面】太保率西方諸侯入應門左畢公率東方諸侯入應門右【二公為二伯各率其所掌諸侯隨其方為位皆北面】皆布乘黃朱【諸侯皆陳四黃馬朱鬣以為庭實】賓稱奉圭兼幣曰一二臣衛敢執壤奠【賓諸侯也舉奉圭兼幣之辭言一二見非一也為蕃衛故曰臣衛來朝而遇國喪遂因見新王敢執壤地所出而奠贊也】皆再拜稽首王義嗣德答拜【諸侯拜送幣而首至地盡禮也康王以義繼先人明德答其拜受其幣】太保暨芮伯咸進相揖皆再拜稽首【不言諸侯以內見外】曰敬告天子皇天改大邦殷之命惟周文武誕受賚若克恤西土【言文武大受天道而順之能憂我西土之民本其所起】惟新陟王畢協賞罰戡定厥功用敷遺後人休今王敬之哉張皇六師無壞我高祖寡命【言當張大六師之衆無壞我高德之祖寡有之教命】王若曰庶邦侯甸男衛【不言羣臣以外見內】惟予一人釗報誥昔君文武丕平富不務咎【言先君文武道大政化平美不務咎惡】底至齊信用昭明于天下【致行至中信之道用顯明於天下言聖德洽】則亦有熊羆之士不二心之臣保乂王家用端命于上帝皇天用訓厥道付畀四方【君聖臣良用受端直之命於上天天用順其道付與四方之國王天下】乃命建侯樹屏在我後之人【言文武乃施政令立諸侯樹以為藩屏傳王業在我

後之人謂子孫】今予一二伯父尚胥暨顧綏爾先公之臣服于先王【天子稱同姓諸侯曰伯父言今我一二伯父庶幾相與顧念文武之道安汝先公之臣服於先王而法循之】雖爾身在外乃心罔不在王室用奉恤厥若無遺鞠子羞【當各用心奉憂其所行順道無自荒怠遺我稚子之羞辱】羣公既皆聽命相揖趨出王釋冕反喪服【康王之誥】惟元祀十有二月乙丑伊尹祠于先王【此湯崩踰月太甲即位奠殯而告】奉嗣王祇見厥祖侯甸羣后咸在百官總已以聽冢宰【伊尹訓百官以三公攝冢宰 伊訓】毛伯來求金何以不稱使【據南季稱使】當喪未君也【時王新有三年之喪】踰年矣何以謂之未君【據崩在八年踰年即位】即位矣而未稱王也未稱王何以知其即位以諸侯之踰年即位亦知天子之踰年即位也【俱繼體其禮不得異】以天子三年然後稱王亦知諸侯於其封內三年稱子也【各信恩於其下】踰年稱公矣則曷為於其封內三年稱子緣民臣之心不可一日無君緣終始之義一年不二君【故君薨稱子某既葬稱子明繼體以繫民臣之心】不可曠年無君【故踰年稱公】緣孝子之心則三年不忍當也【孝子三年志在思慕不忍當父位故雖即位猶於其封內三年稱子文九年公羊傳】文公元年春王正月公即位【先君未葬而公】

【即位不可曠年無君】定公元年夏六月癸亥公之喪至自乾侯戊辰公即位【諸侯薨五日而殯殯則嗣子即位癸亥昭公喪至五日殯于宮定公乃即位並左氏春秋】癸亥公之喪至自乾侯則曷為以戊辰之日然後即位正棺於兩楹之間然後即位【正棺者象既小斂夷於堂昭公死於外不得以君臣禮治其喪故示盡始死之禮禮始死于北牖下浴於中霤飯含於牖下小斂於戶內夷於兩楹之間大斂于阼階殯于西階之上祖於庭葬于墓奪孝子之恩動以遠也禮天子五日小斂七日大斂諸侯三日小斂五日大斂卿大夫二日小斂三日大斂夷而經殯而成服故戊辰然後即位 公羊傳】正君乎國然後即位也【諸侯五日而殯今以君始死之禮治之故須殯而後言即位】沈子曰正棺乎兩楹之間然後即位也【兩楹之間南面之君所治之處】內之大事曰即位君之大事也其不日何也以年決者不以日決也此則其日何也踰年即位厲也【厲危也公喪在外踰年六月乃得即位危故日之】於厲之中又有義焉【先君未殯則後君不得即位】未殯雖有天子之命猶不敢況臨諸臣乎【以輕喻重也雖為天子所召不敢背殯而往況君喪未殯而行即位之禮以臨諸臣乎】周人有喪魯人有喪周人弔魯人不弔周人曰固吾臣也使人可也魯人曰吾君也親之者也使大夫則不可也君至尊也去父之殯而往弔猶不敢況未殯而臨諸臣乎【穀梁傳】月正元日舜格于文祖【月正正月元日上日也舜服堯喪三年畢將即政故復至文祖廟告文祖者堯文德之祖廟 舜典】惟三祀十有二月朔伊尹以冕服奉嗣王歸于亳【詳見變除篇禫易服】

居倚廬不塗君為廬宮之大夫士禴之【廬倚廬也舍堊室也親者貴者居倚廬疎者賤者居堊室雜大記曰大夫居廬士居堊室 天官】射人大喪比其廬不敬者苛罰之【苛謂詰問之夏官】

右居廬 高宗居廬三年不言此之謂梁闇【詳見喪禮義】
滕定公薨世子五月居廬未有命戒【詳見喪服義】

外宗大喪則敘外內朝莫哭者【內內外宗及外命婦 春官】世婦大喪比外內命婦之朝莫

哭不敬者而苛罰之【苛譴也春官哭位章有天子之喪別姓而哭肆師令序哭內宗序哭九嬪帥叙哭並此章通用】朝夕哭不

帷【緣孝子心欲見殯殯也既出則施其扃鬼神尚幽闇也 雜記】
士備入而后朝夕踊【備猶盡也國君之喪嫌主人哭入則踊 檀弓】

右朝夕哭

大祝徹奠【見始死奠章】

右徹大斂奠

司服大喪共其奠衣服【奠衣服今坐上魂衣也 春官陳小斂奠章有封人飾牛牲等七官又陳大斂章有司几筵設葦席素几皆此章所通用此條後凡奠通用】

右朝夕奠

籩人喪事共其薦籩羞籩【喪事之籩謂殷奠時 天官陳小斂奠章有封人等七官陳大斂章有司几筵設葦席素几朝夕奠章司服共奠衣服皆此章通用此條凡後殷奠通用】
天子諸侯之喪斬衰者奠大夫齊衰者奠【詳見大斂奠章】
外饗凡小喪紀陳其鼎俎而實之【謂喪事之奠祭 天官】

右朔月月半殷奠

小宗伯及執事祔葬獻器遂哭之卜葬兆甫窆亦如之【兆墓塋域甫始也鄭大夫讀窆皆為穿杜子春讀窆為毳謂葬穿壙也今南陽名穿地為窆聲如腐脆之粹春官】冢人掌公墓之地辨其兆域而為之圖先王之葬居中以昭穆為左右【公君也圖為畫其地形及丘壟所處而藏之先王造塋者昭居左穆居右夾處東西】凡諸侯居左右以前卿大夫士居後各以其族【子孫各就其所出王以尊卑處其前後而亦併昭穆】凡死於兵者不入兆域【戰敗無勇投諸塋外以罰之】凡有功者居前【居王墓之前處昭穆之中央】以爵等為丘封之度與其樹數【別尊卑也王公曰丘諸侯曰封漢律曰列侯墳高四丈關內侯以下至庶人各有差】大喪既有日請度甫窆遂為之尸【甫始也請量度所始窆之處地為尸者成葬為祭墓地之尸也鄭司農云既有日既有葬日也始窆時祭以告后土冢人為之尸】及窆以度為丘隧【隧羨道也度丘與羨道廣袤所至】凡諸侯及諸臣葬於墓者授之兆【同上】
葬於北方北首【檀弓】龜人若有祭事則奉龜以往喪亦如之【春官】大卜凡喪事命龜【重喪禮次大祭祀也土喪禮則筮宅卜日天子卜葬兆凡大事大卜陳龜貞龜命龜眡高其他以差降焉 同上】大夫卜宅與葬日有司麻衣布衰布帶因喪屨緇布冠不蕤占者皮弁【有司卜人也麻衣白布深衣而著衰焉及布帶緇布冠此服非純吉亦非純凶也皮弁則純吉之尤者也占者尊於有司卜求吉其服彌吉大夫士朔服皮弁】如筮則史練冠長衣以筮占

者朝服【筮者筮宅謂下大夫若士也筮史筮人也長衣深衣之純以素也長衣練冠純凶服也朝服純吉服也大夫士曰朝服以朝也 雜記】大夫之喪大宗人相小宗人命龜卜人作龜【卜葬及日也相相主人禮也命龜告以所問事作龜謂揚火灼之以出兆 同上 龜人以下四條卜葬日通用】

右卜宅 周公在豐【致政老歸】將沒欲葬成周公薨成王葬于畢【書序 又案尚書大傳曰周公生欲事宗廟死欲聚葬於畢畢者文王之墓地故周公死成王不葬於周而葬之於畢】大公封於營丘比及五世皆反葬於周【詳見喪禮義】成子高寢疾【成子高齊大夫國成伯高父也】慶遺入請曰子之病革矣如至乎大病則如之何【觀其意革急也遺慶封之族】子高曰吾聞之也生有益於人死不害於人吾縱生無益於人吾可以死害於人乎哉我死則擇不食之地而葬我焉【不食謂不墾耕 檀弓】公叔文子升於瑕丘蘧伯玉從【二子衛大夫文子獻公之孫名】

【拔】文子曰樂哉斯丘也死則我欲葬焉蘧伯玉曰吾子樂之則瑗請前【刺其欲害人良田瑗伯玉名 同上】

虞人致百祀之木可以為棺槨者斬之不至者廢其祀芻其人【虞人掌山澤之官百祀畿內百縣之祀也以為棺槨作棺槨也斬伐也 檀弓】

柏槨以端長六尺【以端題湊也其方蓋一尺 同上】君松槨大夫柏槨士雜木槨【槨謂周棺者也天子柏槨以端長六尺夫子制於中都使庶人之槨五寸五寸謂端方也此謂尊者用大材卑者用小材耳自天子諸侯卿大夫士庶人六等其槨長自六尺而下其方自五寸而上未聞其差所定也抗木之厚蓋與棺方齊天子五重上公四重諸侯三重大夫再重士一重】棺槨之間君容柩大夫容壺士容甗【間可以藏物因以為節】君裏槨虞筐大夫不裏槨士不虞筐【裏槨之物虞筐之文未聞也 喪大記】

右井槨 顧命越七日癸酉伯相命士須材【詳見陳寶器章】

宋元公卒用蜃灰槨有四阿君子謂華元樂舉於是乎不臣【詳見窆章】晉魏舒合諸侯之大夫于狄泉將以城成周魏獻子屬役於韓簡子及原壽過而田於大陸焚焉還卒於甯范獻子去其柏槨以其未復命而田也【范獻子代魏子為政去其柏槨示貶之 定元年左右氏傳】昔者夫子居於宋見桓司馬自為石槨三年而

不成夫子曰若是其靡也死不如速朽之愈也【詳見士喪禮】

小宗伯王崩及執事祇葬獻器遂哭之【執事蓋梓匠之屬至將葬獻明器之材又獻素獻成皆於殯門外王不親哭有官代之 春官 後陳明器一章並此章通用】

右獻明器

天子崩七月而葬諸侯五月而葬大夫三月而葬【禮器】士三月而葬是月也卒哭大夫三

月而葬五月而卒哭諸侯五月而葬七月而卒哭【尊卑恩之差也天子至土葬即反虞 雜記卜宅章龜人以下四條並此章通用】

右卜葬日 癸未葬宋繆公葬者曷為或日或不日不及時而日渴葬也【渴喻急也乙未葬齊孝公是也】不及時而不日慢葬也【慢薄不能以禮葬也八月葬蔡宣公是也】過時而日隱之也【隱痛也痛賢君不得以時葬丁亥葬齊桓公是也】過時而不日謂之不能葬也【解緩不能以時葬夏四月葬衛桓公是也】當時而不日正也【六月葬陳惠公是也】當時而日危不得葬也【隱三年公羊傳】
宣公八年葬敬嬴禮卜葬先遠日辟不懷也【懷思也左氏傳】

禮書綱目卷二十六

卷二十七

<經部,禮類,通禮之屬,禮書綱目

欽定四庫全書

禮書綱目卷二十七 婺源江永撰

喪大記下 凶禮十

補

世婦掌喪紀之事帥女宮而濯概為盥盛【概式也為猶差擇天官】內豎若有喪紀之事則為內人蹕【內人從世婦于廟者內豎為六宮蹕】

【者以其掌內小事 同上 小斂章有封人等七官大斂章有司几筵設几席朝夕奠章有司服共奠衣服朔月月半奠章有籩人共薦籩羞籩外饗實鼎俎天子喪斬衰者奠諸侯喪齊衰者奠皆此章通用此兩條祖奠遣奠通用】

右陳朝祖奠

喪祝及辟令啟【鄭司農云辟謂除菽塗椁也令啟謂喪祝主命役人開之也檀弓曰天子之殯也菽塗龍輅加斧于椁上畢塗屋天子之禮也】小喪亦如之【春官】

右啟

閭人喪紀之事設門燎蹕宮門廟門【燎地燭也蹕止行者廟在中門之外地官設燎章內有委人共薪蒸司烜氏共墳燭庭燎君堂上二燭並此章通用】士師諸侯

為賓則帥其屬而蹕於王宮大喪亦如之【秋官】

內豎王后之喪遷於宮中則前蹕【喪遷者將葬朝于廟 天官】

大司寇前王大喪亦如之【大喪所前或嗣王】

小司寇大賓客前王而辟后世子之喪亦如之【並秋官】

閭胥凡喪紀之數聚衆庶【喪紀大喪之事】大司徒大喪帥六鄉之衆庶屬其六引而治其政令【衆庶所致役也鄭司農云六引謂喪車索也六鄉主六引六遂主六紼】遂人大喪帥六遂之役而致之及葬帥而屬六紼及窆陳役【致役致于司徒給墓上事及窆也紼舉棺索也葬舉棺者謂載與說時也用紼旁六執之者天子其千人與陳役者主陳列之耳匠師帥監之鄉師以斧泣焉大喪之正棺殯啟朝及引六鄉役之載及窆六遂役之亦即遠相終始也鄭

司農云窆謂下棺時遂人主陳役也禮記謂之封春秋謂之塋皆葬下棺也聲相似】

小司徒大喪帥邦役治其政教【喪役正棺引窆覆土】

鄉師大喪用役則帥其民而至遂治之【治謂監督其事 並地官

已上五條柩行通用內遂人小司徒二條並窆通用】 喪祝及朝御匱【鄭司農云朝謂將葬朝于祖考之廟而後行則喪祝為御柩也檀弓曰喪之朝也順死者之孝心也其哀離其室也故至于祖考之廟而後行殷朝而殯于祖周朝而遂葬故春秋傳曰凡夫人不殯于廟不祔于姑則弗致也晉文公卒將殯于曲沃就宗廟晉宗廟在曲沃故曰曲沃君之宗也又曰丙牛入于曲沃丁未朝于武宮】小喪亦如之【春官】 升正柩諸侯執紼五百人四紼皆銜枚司馬執鐸左八人右八人匠人執羽葆御柩大夫之喪其升正柩也執引三百人執鐸者左右各四人御柩以茅【升正柩者謂將葬朝于祖正棺于廟也五百人謂一黨之民諸侯之大夫邑有三百戶之制紼引同耳廟中曰紼在塗曰引互言之御柩者居前道正之大夫士皆二紼二雜記】 喪祝乃奠【玄謂乃奠朝廟奠】小喪亦如之【春官】 天府凡吉凶之事祖廟之中沃盥執燭【吉事四時祭也凶事王后喪朝于祖廟之奠 同上】

遂師大喪共蜃車之役【蜃車柩路也柩路載柳四輪造地而行有似于蜃因取名焉】 稍人大喪帥蜃車與其役以至掌其政令以聽於司徒【蜃車及役遂人共之稍人者野監是以帥而致之既夕禮曰既正柩賓出遂匠納車于階間則天子以至于士柩路皆從遂來 並地官】

巾車小喪共匱路【柩路載柩車也春官】 祥車曠左【空神位也祥車葬之乘車

曲禮已上四條柩行通用又至壙章陳車窆章喪不以制此章通用】 圉人凡喪紀牽馬而入陳【喪紀之馬啟後所薦馬】 廐馬亦如之【廐馬遣車之馬人捧之亦牽而入陳夏官柩行通用廐馬一節陳明器通用】

士喪有與天子同者三其終夜燎其乘人專道而行【詳見士喪禮朝祖】

右朝祖奠薦車馬 叔孫豹卒杜洩將以路葬且盡卿禮季孫使杜洩舍路不可曰夫子受命於朝而聘於王【在襄二十四年】 王思舊勲而賜之路【感其有禮以念其先人】 復命而致之君【豹不敢自乘】 君不敢逆王命而復賜之使三官書之吾子為司徒實書名【謂季孫也書名定位號】 夫子為司馬與工正書服【謂叔孫也服車服之器工正所書】 孟孫為司空以書勲【勲功也】 今死而弗以是棄君命也書在公府而弗以是廢三官也若命服生弗敢服死又不以將焉用之遂使以葬【昭四年左氏傳】 鄭公孫蠆卒赴於晉晉侯善於伐秦也六月晉侯請於王王追賜之大路使以行禮也【大路天子所賜車之總名以行葬禮傳言大夫有功則賜服路襄十九年左氏傳】

喪禮及祖飾棺乃載【祖為行始其序載而後飾】小喪亦如之【春官】

右載

縫人喪縫棺飾焉【孝子既啟見棺猶見親之身既載飾而以行遂以葬若存時居于帷幕而加文繡喪大記曰飾棺君龍帷云云故書焉為馬杜子春云當為焉】 衣衾柳之材【必先纏衣其材乃以張飾也柳之言聚諸飾之所聚書曰分命和仲度西曰柳穀 天官】 飾棺君龍帷三池振容黼荒火三列黻三列素錦褚加偽荒纁紐六齊五采五貝黼衾二黻衾二畫衾二皆

戴圭魚躍拂池君纁戴六纁披六大夫畫帷二池不振容畫荒火三列黻三列素錦褚纁紐二玄紐二齊三采三貝黻翬二畫翬二皆戴綏魚躍拂池大夫戴前纁後玄披亦如之士布帷布荒一池揄絞纁紐二緇紐二齊三采一貝畫翬二皆戴綏士戴前纁後緇二披用纁【飾棺者以華道路及壙中不欲衆惡其親也荒蒙也在旁曰帷在上曰荒皆所以衣柳也士布帷布荒者白布也君大夫加文章焉黼荒緣邊為黼文畫荒緣邊為雲氣火黻為列于其中耳偽當為帷或作于聲之誤也大夫以上有褚以襯覆棺乃加帷荒于其上紐所以結連帷荒者也池以竹為之如小車笭衣以青布柳象宮室縣池于荒之爪端若承霤然云君大夫以銅為魚縣于池下揄揄翟也青質五色畫之于絞繒而垂之以為振容象水草之動搖行則又魚上拂池雜記曰大夫不揄絞屬于池下是不振容也士則去魚齊象車蓋蕤縫合雜采為之形如瓜分然綴貝落其上及旁戴之言值也所以連繫棺束與柳材使相值因而結前後披也漢禮翬以木為筐廣三尺高二尺四寸方兩角高衣以白布畫者畫雲氣其餘各如其象柄長五尺車行使人持之以從既窆樹于壙中檀弓曰周人牆置翬是也綏當作綏讀如冠蕤之蕤盖五采羽注于翬首也 喪大記】大夫不揄絞屬於池下【謂柳飾也揄揄翟也采青黃之間曰絞屬猶繫也人君之柳其池繫絞繒于下而畫雉翟焉名曰振容又有銅魚在其間大夫去振容士去魚此無人君及士亦爛脫 雜記】天子七月而葬五重八翬諸侯五月而葬三重六翬大夫三月而葬再重四翬【注見陳明器章 禮器】有虞氏之綏夏后氏之綢練殷之崇牙周之璧翬【綏亦旌旗之綏也夏綢其杠以練為之旒殷又刻繒為重牙以飾其側亦飾彌多也湯以武受命恒以牙為飾也此旌旗及翬皆喪葬之飾周禮大喪葬巾車執蓋從車持旌御僕持翬旌從遣車翬夾柩路左右前後天子八翬皆戴璧垂羽諸侯六翬皆戴圭大夫四翬士二翬皆戴綏孔子之喪公西赤為志亦用此焉爾雅說旌旌曰素錦綢杠纁帛縵素升龍于縵練旒九明堂位】巾車小喪共匱路與其飾【匱路載柩車也飾棺飾也 春官】喪祝凡卿大夫之喪掌事而飾棺焉【詳見小斂章】

右飾棺【翬披旌旗】孔子之喪公西赤為志焉【公西赤孔子弟子志謂章飾】飾棺牆【牆之障柩猶垣牆障家】置翬【牆柳衣翬以布衣木如褊與】設披周也設崇殷也綢練設旒夏也【夫子雖殷人兼用三王之禮尊之披柩行夾引棺者崇牙旗旌飾也綢練以練綢旌之杠此旌葬乘車所建者旌之旒緇飾廣充幅長尋曰旒爾雅說旌旗曰素錦綢杠 檀弓】

司服大喪共其廡衣服【故書廡為淫鄭司農云淫讀為廡廡陳也玄謂廡衣服所藏于椁中 春官 自衣服以下並獻明器章通用】

司常大喪建廡車之旌及葬亦如之【葬云建之時行廡車解說之】

車僕大喪廡革車【言興革車則遣車不徒戎路廣闕萃輕皆有焉】巾車大喪飾遣車遂廡之行之【廡興也謂陳駕之行之使人以次舉之以如墓也遣車一曰鸞車 並春官】司裘大喪廡裘飾皮車【皮車遣車之革路故書廡為淫鄭司農云淫裘陳裘也玄謂廡與也若詩之興謂象似而作之凡為神之偶衣物必沾而小耳 天官】

校人大喪飾遣車之馬及葬埋之【言埋之則是馬塗車之芻靈 夏官】

柩行章內有豕人鸞車象人此章通用】圉人凡喪紀廡馬【詳見朝祖奠章】遣車視牢具【言車多少各如所包遣奠牲體之數也然則遣車載所包遣奠而藏之者與遣奠天子大牢包九箇諸侯亦大牢包七箇大夫亦大牢包五箇士少牢包三箇大夫以上乃有遣車雜記】

君之適長殯車三乘公之庶長殯車一乘大夫之適長殯車一乘【皆不成人也自士而下降殺以兩成人遣車五乘長殯三乘下殯一乘尊卑以此差之庶子言公卑遠之傳曰大功之殯中從上 檀弓】天子五重諸侯三重大夫再重【天子葬五重者謂抗木與茵也葬者抗木在上茵在下士喪禮下篇陳器曰抗木橫三縮二加抗席三加茵用疏布緇翦有幅亦縮二橫三此士之禮一重者以此差之上公四重禮器】澤虞喪紀共其葦蒲之事【葦以闔壙蒲以為席】 掌荼掌以時

聚荼以共喪事【共喪事者以著物也既夕禮曰茵著用荼 並地官】 司兵大喪廡五兵【故書廡為淫鄭司農云淫陳也淫讀為廡玄謂廡興也興作明器之役器五兵也士喪禮下篇有甲冑干笮】 司弓矢大喪共明弓矢【弓矢明器之用器也士喪禮下篇曰用器弓矢並夏官】 司干大喪廡舞器 樂司凡喪陳樂器則帥樂官【帥樂官往陳之】 大司樂大喪涖廡樂器【涖臨也廡興也臨笙師鏞師之屬興謂作之也】 眡瞭大喪廡樂器笙師大喪廡其樂器【廡興也興謂作之】 鏞師大喪廡其樂器 籥師大喪廡其樂器典庸器大喪廡筍虞【廡興也興謂作之 並春官】

右陳明器 曾子曰晏子可謂知禮也已恭敬之有焉【言禮者敬而已矣】有若曰晏子一狐裘三十年遣車一乘及墓而反國君七個遣車七乘大夫五个遣車五乘晏子焉知禮【言其大儉逼下非之及墓而反言其既窆則歸不留賓客有事也人臣賜車馬者乃得有遣車遣車之差大夫五諸侯七則天子九諸侯不以命數喪數略也个謂所包遣奠牲體之數也雜記曰遣車視牢具】曾子曰國無道君子恥盈禮焉國奢則示之以儉國儉則示之以禮【時齊方奢矯之是也檀弓】宋襄公葬其夫人醯醢百甕曾子曰既曰明器矣而又實之【言名之為明器而與祭器皆實之是亂鬼器與人器同上】

喪祝及祖飾棺遂御【鄭司農云祖謂將葬祖于庭象生時出則祖也故曰事死如事生禮也檀弓曰飯于牖下小斂于戶內大斂于阼殯于客位祖于庭葬于墓所以即遠也祝時喪祝主飾棺乃載遂御之喪祝為柩車御也或謂及祖至祖廟也玄謂祖為行始飾棺設柳池紐之屬其序載而後御既飾當還車鄉外喪祝御之御之者執翣居前卻行為節度】小喪亦如之【春官 小斂章有封人等七官大斂章司几筵設葦席朝夕奠章司服共奠衣服朔月月半奠章籩人共薦籩羞籩外饗實鼎俎天子喪斬衰者奠諸侯喪齊衰者奠啟章世婦濯摝為盥盛內堅為內人蹕皆祖奠所通用】

右祖奠

大師大喪帥瞽而廡作匱諡【廡興也興言王之行謂諷誦其治功之詩故書廡為淫鄭司農云淫陳也陳其生時行迹為作諡】 瞽矇諷誦詩世奠繫鼓琴瑟【玄謂諷誦詩主謂廡作柩諡時也諷誦王治功之詩以為諡世之而定其繫謂書于世本也雖不歌猶鼓琴瑟以播其音美之】 小師大喪與廡【從大師】 大祝作六辭以通上下親疏遠近六曰誄【鄭司農云誄謂積累生時德行以賜之命主為其辭也春秋傳曰孔子卒哀公誄之旻天不弔不憖遺一老俾屏余一人以在位攸攸予在疚嗚呼哀哉尼父無自律此皆有文雅辭令難為者也故大祝

主作六辭或曰誄論語所謂誄曰禱爾於上下神祇】大史大喪遣之日讀誄【遣謂祖廟之庭大奠將行時也人之道終于此累其行而讀之大師又帥瞽矇之而作謚瞽史知天道使共其事言王之誄謚成于天道】凡喪事考焉【為有得失】小喪賜謚【小喪卿大夫也】小史大喪佐大史卿大夫之喪賜謚讀誄【其讀誄亦以大史賜謚為節事相成也並春官】惟周公旦太公望開嗣王業建功於牧野及終將葬乃制謚遂叙謚法謚者行之迹號者功之表【古者有大功則賜之善號以為稱也】車服者位之章也是以大行受大名細行受細名行出於己名生於人【名謂謚號】民無能名曰神【不名一善】一德不懈曰簡【一不委曲】靖民則法曰皇【靖安】平易不訾曰簡【不信訾毀】德象天地曰帝【同于天帝】尊賢貴義曰恭【尊事賢人 貴義士】仁義所往曰王【民往歸之】敬事供上曰恭【供奉也】立志及衆曰公【志無私也】尊賢敬讓曰恭【敬有德讓有功】執應八方曰侯【所執行八方應之】既過能改曰恭【言自知也】賞慶刑威曰君【能行四者】執事堅固曰恭【守正不移】從之成羣曰君【民從之】愛民悌長曰恭【順長自下】揚善賦簡曰聖【所稱得人所善得實所敷得簡】執禮御賓曰恭【迎待賓也】敬祀享禮曰聖【既敬于祀能通神道】芘親之闕曰恭【脩德以益之】照臨四方曰明【以明照之】尊賢讓善曰恭【不專己善推之于人】譖愬不行曰明【逆知之故不行】威儀悉備曰欽【威則可畏儀則可象】經緯天地曰文【成其道】大慮慈民曰定【思樹德】道德博聞曰文【無不知】純行不差曰定【行一不傷】勤學好問曰文【不恥下問】安民大慮曰定【以慮安民】慈惠愛民曰文【惠以成政】安民法古曰定【不失舊意】愍民惠禮曰文【惠而有禮】關土有德曰襄【取之以義】賜民爵位曰文【與同升】甲冑有勞曰襄【亟征伐】綏柔士民曰德【安民以居安土以事】小心畏忌曰僖【思所當忌】諫爭不威曰德【不以威距諫】有伐而還曰釐【知難而退】剛強直理曰武【剛無欲強無撓直正直理忠恕】質淵受諫曰僖【深故能受】威強敵德曰武【與有德者敵】溫柔賢善曰懿【性能純善】克定禍亂曰武【以兵往故能定】心能制義曰度【制事得宜】刑民克服曰成【法以正民能使服也】聰明睿哲曰獻【有通知之聰】夸志多窮曰武【大志行兵多所窮極】智質有聖曰獻【有所通而無蔽】安民立政曰成【政以安民】五宗安之曰孝【五世之宗】淵源流通曰康【性無忌】慈惠愛親曰孝【周愛親族】溫年好樂曰康【好豐年勤民事】協時肇享曰孝【協和肇始當如初】秉德不回曰孝【順于德而不違】安樂撫民曰康【無四方之虞】令民安樂曰康【富而教之】執心克莊曰齊【能自嚴】布德執義曰穆【舜典四門穆穆】輕輜供就曰齊【輜有所輕而供成 輕輜周書作輔輕史記正義作資輔就共曰齊註云資輔佐而共成】中情見貌曰穆【性心露也】甄心動懼曰頃【甄情 史註作甄精】容儀恭美曰昭【有儀可象行恭可美】敏以敬慎曰頃【疾于所敬】昭德有勞曰昭【能勞謙】柔德考衆曰靜【成衆使安】聖善周聞曰宣【通于善道聲教宣聞 按此句後有之周書及史記正義云聖聞周達曰昭註聖聖通合】恭己鮮言曰靖【恭己正身少言而中】治而無青曰平【無災罪也】寬樂令終曰靖【性寬樂義以善自終】執事有制曰平【不任意】威德剛武曰圉【禦亂患】布綱治紀曰平【施之政事】彌年壽考曰胡【久其年】由義而濟曰景【用義而成】保民耆艾曰胡【六十耆七十艾】耆意大慮曰景【耆強也】彊毅果敢曰剛【釐于義致志固】布義行剛曰景【以剛行義】追補前過曰剛【勤善以補過】清白守節曰貞【行清白執志固】猛以剛果曰威【猛則少寬果敢行】大慮克就曰貞【幹事能成 史註能大慮非正而何】不隱無屏曰貞【史屏

作屈註恒然無私又此句上有猛以彊果曰威註彊甚于剛】彊毅執正曰威【史註問正言無邪註有誤字又周書執作信亦非】闢土服遠曰桓【以武力征四夷】治典不殺曰祈【秉常不衰史作祁】克敬勤民曰桓【敬以使之】大慮行節曰孝【言成其節】闢土兼國曰桓【兼人故啟土】治民克盡曰使【克盡恩惠】能思辯衆曰元【別之使各有次】好和不爭曰安【坐在少斷 史註作生而少斷】行義說民曰元【民說其義】道德純一曰思【道大而德一】始建國都曰元【非善之長何以始之】大省兆民曰思【大親民而不侈】主義行德曰元【以義為主史註有行德政字】外内思索曰思【言求義】聖善周聞曰宣【聞謂所聞善事】追悔前過曰思【思而能改】兵革亟作曰壯【以數征為嚴】行見中外曰愬【表裏如一】睿圉克服曰壯【禁圉敵人能使服之 睿字誤史註通邊圉使能服】狀古述今日譽【史註立言之稱】勝敵克亂曰壯【勝敵故能克亂 史作勝敵志彊曰莊註不撓故勝又上下諸壯字皆作莊】昭功寧民曰商【商度事宜所以安民史註明有功者】死於原野曰壯【非嚴何以死難】克殺秉正曰夷【秉正不任賢史正作政】屢征殺伐曰壯【以嚴整之】安民好靜曰夷【周書史記民皆作心註不爽政】武而不遂曰壯【武功不成】執義揚善曰懷【稱人之善】柔質慈民曰惠【賑孤惇加施惠史註云知其性】慈仁短折曰懷【短未六十折未三十】愛民好與曰惠【與謂】

【施】述義不克曰丁【欲立志義而弗能成】夙夜敬戒曰敬【敬身急戒周書史記作警戒】述事不弟曰丁【不孫弟】夙興恭事曰敬【敬以莅事】有功安民曰烈【以武立功】象方益平曰敬【法常而知】秉德尊業曰烈【業以通德為而能尊】令善典法曰敬【非敬何以善之】剛克為伐曰翼【伐功也】剛德克就曰肅【成其敬使為終】思慮深遠曰翼【好遠思不任亂史註小心翼翼】執心決斷曰肅【言嚴果】外内貞復曰白【正而復約始一 史註正而復始終一】不生其國曰聲【生于外家】不勤成名曰靈【任本性不見賢思齊】未家短折曰傷【未嫁未娶】死而志成曰靈【上志不恡命 史註志事不????命】愛民好治曰戴【愛治其民天下戴仰】死見神能曰靈【有鬼不為厲】典禮不倦曰戴【倦過 史作不愆註云無過】亂治不損曰靈【不能以治損亂 周書史記作亂而】短折不成曰殤【幼稚而夭殤】好祭鬼交曰靈【瀆鬼神不致遠周書交作神史記作怪】隱拂不成曰隱【不以隱拂改其性】極知鬼事曰靈【其智能聰徹之 史事作神】不顯尸國曰隱【以間主國】見美堅長曰隱【美過其令】殺戮無辜曰厲官人應實曰知【能官人】愾很遂過曰刺【去諫曰愾反是曰很】肆行勞祀曰悼【放心勞于淫祀言不脩德也】不思忘愛曰刺【忌甚史註忌其愛已者本註忌甚字即忘其之誤】年中蚤夭曰悼【年不稱志】早孤短折曰哀【早未知人事 周書史記此下云恐懼從處曰悼註從處言險圯又云恭仁短折曰哀註體恭質仁功未施】凶年無穀曰糠【不務稼穡史糠作荒】好變動民曰躁【好改舊以勞動民史註數移徙】外内從亂曰荒【家不治官不治】不悔前過曰戾【知而不改】好樂怠政曰荒【淫于聲樂怠于政事】怙威肆行曰醜【肆意行威】在國遭憂曰愍【仍多大喪】雍遏不通曰幽【權臣擅命故令不達】在國逢難曰愍【兵寇之事】早孤銷位曰幽【銷位即位而卒 銷當作殞周書作有史記作鋪皆誤也】禍亂方作曰愍【史註國無政動長亂】動祭亂常曰幽【易神之班】使民悲傷曰愍【妨政賊害 史註妨作苛】柔質受諫曰慧【或作惠 受諫以為慧】

史註以虛受人】貞心大度曰匡【心正而名察 史註心正而用察少】名實不爽曰質【名實內外相應不差】德正應和曰莫【史註正其德應其和】溫良好樂曰良【言其人可好可樂】施勤無私曰惠【史惠作類註無私唯義所在周書云勤政無私曰類】慈和徧服曰順【史註能使人皆服其慈和】思慮果敢曰邁【周書無此句史記云思慮果遠曰明註自任多近于專】博聞多能曰憲【雖多能不至于大道 周書無此句】嗇於施與曰愛【史註言貪悞】滿志多窮曰惑【自足者必不足】危身奉上曰忠【險不辭難】思慮不爽曰原【不差所思而得 周書作愿史記作厚】克威捷行曰魏【有威而敏行】好內遠禮曰煬【淫于家不奉禮】克威順禮曰魏【雖威不逆禮周書史記順作惠】好內怠政曰煬【內則淫朋外則怠政】怠政外交曰攜【不自明而博外交】去禮遠衆曰煬【史註不率禮不親長】教誨不倦曰長【史註以道教之】疏遠繼位曰遠【周書史遠作紹】肇敏行成曰直【史註始疾行成言不深】彰義揜過曰堅【史註明義以盖前過】內外賓服曰正【史註言以正服之】華言無實曰夸【史註恢誕】好廉自克曰節【廉儉不傷財不害民史註自勝其情欲】逆天虐民曰炆【史作抗註背尊大而逆之】好更改舊曰易【變故改常】名與實爽曰繆【史註言名美而實傷】愛民在刑曰克【道之以政齊之以法】擇善而從曰比【比方善而從之】除害去虐曰湯亂而不損為靈【貪亂宜亡而神靈之曲也】隱哀之方也景武之方也施德為文除惡為武辟地為襄服遠為桓剛克為發柔克為懿履正為莊有過為僖施而不私為宣【雲行雨施日月無私】鄉惠無內德為獻【無內德謂惠不成也 史作惠無內德為平】由義而濟為景矢志無輔則以其明餘皆象也【以其明所及為諡象其事也 諡法解】賤不誅貴幼不誅長禮也【誅累也累列生時行述讀之以作諡諡當由尊者成】唯天子稱天以誅之【以其無尊焉春秋公羊說以為讀誅制諡于南郊若云受之于天然】諸侯相誅非禮也【禮當言誅于天子也天子乃使大史賜之諡曾子問】幼名冠字五十以伯仲死諡周道也【檀弓】古者五十而后爵死而諡今也古者生無爵死無諡

【古謂殷以前也大夫以上乃謂之爵死有諡也周制爵及命士雖及之猶不諡耳今記時死則諡之非禮也郊特牲】諸侯言諡曰類【詳見喪通禮名位章】

右諡誅【人臣之喪有錫命附見于下】

莊公元年王使榮叔來錫桓公命【追命桓公褒稱其德若昭七年王追命衛襄之比 左氏春秋】衛侯惡卒告喪于周且請命王使成簡公如衛弔【簡公王卿士也】且追命襄公曰叔父陟恪在我先王之左右以佐事上帝【陟降也恪敬也帝天也叔父謂襄公如今之哀冊】余敢忘高圉亞圉【二圉周之先也為殷諸侯亦受殷王追命者 昭七年左氏傳】楚子疾告大夫曰不穀不德少主社稷生十年而喪先君未及習師保之教訓而應受多福【多福謂為君】是以不德而亡師于鄢【鄢在成十六年】以辱社稷為大夫憂其弘多矣【弘大也】若以大夫之靈獲保首領以沒于地唯是春秋窀穸之事【窀厚也穸夜也厚夜猶長夜春秋謂祭祀長夜謂葬埋】所以從先君于禰廟者【從先君代為禰廟】請為靈若厲【欲受惡諡以歸先君也亂而不損曰靈戮殺不辜曰厲】大夫擇焉莫對及五命乃許秋卒子囊謀諡大夫曰君有命矣子囊曰君命以共若之何毀之赫赫楚國而君臨之撫有蠻夷奄征南海以屬諸夏而知其過可不謂恭乎請諡之共大夫從之【傳言子囊之善 襄十三年左氏傳】閔馬甫曰周共王能庇昭穆之闕而為恭【恭王周昭王之孫穆王之子

也昭王南征而不反穆王欲肆其心皆有闕失言恭王能庇覆之故為恭也】楚恭王能知其過而為恭【國語魯語】公叔文子卒【文子衛獻公之孫名拔或作發】其子戍請諡于君曰日月有時將葬矣請所以易其名者【諡者行之迹有時猶言有數也大夫士三月而葬】君曰昔者衛國凶饑夫子為粥與國之餓者是不亦惠乎【君靈公也】昔者衛國有難夫子以其死衛寡人不亦貞乎【難謂魯昭公二十年盜殺衛侯之兄縶也時齊豹作亂公如死焉】夫子聽衛國之政脩其班制以與四鄰交衛國之社稷不辱不亦文乎【班制謂尊卑之差】故謂夫子貞惠文子【後不言貞惠者文足以兼之也 檀弓】魯哀公誅孔丘曰天不遺耆老莫相予位焉嗚呼哀哉尼父【誅其行以為諡也莫無也相佐也言孔子死無佐助我處位者尼父因其字以為之諡 同上】孔丘卒公誅之曰旻天不弔不憖遺一老俾屏余一人以在位矻矻余在疚嗚呼哀哉尼父無自律【疚病也律法也言喪尼父無以自為法】子貢曰夫子之言曰禮失則昏名失則愆失志為昏失所為愆生不能用死而誅之非禮也稱一人非名也君兩失之【哀十六年左氏傳】魯莊公及宋人戰于乘丘【十年夏】縣賁父御卜國為右【縣卜皆氏也凡車右勇力者為之】馬驚敗績【驚奔失列】公隊佐車授綏【戎車之貳曰佐受綏秉公】公曰末之卜也【末之猶微哉言卜國無勇】縣賁父曰他日不敗績而今敗績是無勇也【公他日戰其御馬未嘗驚奔】遂死之【二人赴敵而死】圉人浴馬有流矢在白肉【圉人掌馬者白肉股裏肉】公曰非其罪也【流矢中馬非御與右之罪】遂誅之【誅其赴敵之功以為諡】士之有誅自此始也【記禮失所由來也周雖以士為爵猶無諡也殷大夫以上為爵 檀弓】

大司馬喪祭奉詔馬牲【王喪之以馬祭者蓋遣奠也奉猶送也送之至墓告而藏之】小司馬小喪紀掌其事如大司馬之法【並夏官】司尊

彝大喪存奠彝【存省也謂大遣時奠者朝夕乃徹也】

鬱人大喪及葬共其裸器遂狸之【遣奠之彝與瓚也狸之于祖廟階間明奠終于此】小祝大喪及葬設道齋之奠分禱五祀【杜子春云齋當為粢道中祭也漢武每街路輒祭玄謂齋猶送也送道之奠猶遣奠也分其牲體以祭五祀告王去此宮中不復反故興祭祀也王七祀五者司命大厲平生出入不以告 並春官凡祖奠所通用者皆遣奠通用】

右大遣奠

量人掌喪祭奠竈之俎實【竈亦有俎實謂所包遣奠士喪禮下篇曰藏苞筭于旁夏官】大夫之喪既薦馬薦馬者哭踊出乃包奠而讀書【嫌與士異記之也既夕禮曰包牲取下體又曰主人之史請讀贈 雜記】

右包奠讀贈

遂師大喪帥其屬以幄帟先道野役【使以幄帟先者大宰也其餘司徒也幄帟先所以為葬窆之間先張神坐也道野役帥以至墓也 地官 陳殯具章幕人掌次此章通用朝祖章閭胥聚衆庶大司徒帥六鄉屬六引遂人屬六紼小司徒帥邦役鄉師帥民又薦車馬陳明器兩章並

此章通用】鄉士大喪紀各掌其鄉之禁令帥其屬夾道而蹕【屬中士以下 秋官】

方相氏大喪先匱【葬使之道夏官】

喪祝及葬御匱出宮乃代【喪祝二人相與更也】小喪亦如之【春官】鄉師及葬執纛以與匠師御匱而治役【匠師事官之屬其于司空若鄉師之于司徒也鄉師主役匠師主衆匠共主葬引翺羽葆幢也爾雅曰纛翳也以指麾挽柩之役正其行列進退 地官】司士作六軍之士執披【作謂使之也披柩車行所以披持棺者有紐以結之謂之戴鄭司農云披者扶持棺險者也天子旁十二諸侯旁八大夫六士四玄謂結披必當棺東于束繫紐天子諸侯戴柩三束大夫士二束喪大記曰君纁披六大夫披四前纁後玄士二披用纁人君禮文欲其數多圍數兩旁言六耳其實旁三夏官】喪祝掌大喪勸防之事【鄭司農云勸旁引柩也杜子春云防當為披玄謂勸猶倡帥前引者防謂執披備傾虧】小喪亦如之

大史大喪執法以泣勸防【鄭司農云勸防引六紼】巾車大喪及葬執蓋從車持旌【從車隨柩路持蓋與旌者王平生時車建旌兩則有蓋今蜃車無蓋執而隨之所執者銘旌

並春官】御僕大喪持翣【翣棺飾也持之者夾蜃車 夏官】

女御后之喪持翣【翣棺飾也持而從柩車 天官】冢人大喪及葬言鸞車象人【鸞車巾車所飾遣車也亦設鸞旗鄭司農云象人謂以芻為人言言問其不如法度者玄謂言猶語也語之者告當行若于生存者于是巾車行之孔子謂為芻靈者善謂為俑者不仁非作象人者不殆于用生乎 春官】虎賁氏及葬從遣車而哭【遣車王之魂魄所馮依 夏官】

內豎王后之喪及葬執褻器以從遣車【褻器振飾頽沐之器 天官】君葬用輜四綍二碑御棺用羽葆大夫葬用輜二綍二碑御棺用茅士葬用國車二綍無碑比出宮用功布【大夫廢輜此言輜非也輜皆當為載以輅車之輅聲之誤也輅字或作團是以又誤為國輅車柩車也尊卑之差也在棺曰綍行道曰引至壙將窆又曰綍而設碑是以連言之碑桓楹也御棺居前為節度也士言比出宮用功布則出宮而止至壙無矣綍或為率 喪大記 朝祖為車章遂師共蜃車稍人帥蜃車巾車共匱路祥車曠左此章通用此條四綍二碑窆章通用】

鄉士三公若有邦事則為之前驅而辟其喪亦如之

遂士六卿有邦事則為之前驅而辟其喪亦如之

縣士大夫有邦事則為之前驅而辟其喪亦如之【並秋官】

士喪有與天子同者三其終夜燎及乘人專道而行【詳見士喪朝祖章】

右柩行 鄭簡公卒將為葬除【除葬道】及游氏之廟【游氏子太叔族】將毀焉子大叔使其除徒執用以立而無庸毀【用毀廟具】曰子產過女而問何故不毀乃曰不忍廟也諾將毀矣【教毀廟者之辭】既如是子產乃使辟之司墓之室有當道者【簡公別營葬地不在鄭先君舊墓故道有臨時迂直也司墓之室鄭之掌公墓大夫徙屬之家】毀之則朝而墮弗毀則日中而墮子太叔請毀之曰無若諸侯之賓何【不欲久留賓】子產曰諸侯之賓能來會吾喪豈憚日中無損于賓而民不害何故不為遂弗毀日中而葬君子謂子產於是乎知禮禮無毀人以自成也【昭十二年左右氏傳】

葬敬嬴早無麻始用葛苒【記禮變之所由苒所以引柩殯則有之以備火葬則以下柩

宣八左右氏傳】叔孫豹卒公使杜洩葬叔孫叔仲子謂季孫曰帶受命于子叔孫曰葬鮮者自西門【不以壽終為鮮西門非魯朝正門】季孫命杜洩【命使從西門】杜洩曰卿喪自朝魯禮也【從生存朝覲之正路】吾子為國政未改禮而又遷之【遷易也】羣臣懼死不

敢自也【自從也】既葬而行【善杜洩能辟禍昭五年左氏傳】季子臯葬其妻犯人之禾
【季子臯孔子弟子高柴孟氏之邑成宰或氏季犯躐也】申祥以告曰請庚之【申祥子張
子庚償也】子臯曰孟氏不以是罪予【時僭侈】朋友不以是弃予【言非大故】以吾為
邑長于斯也買道而葬後難繼也【恃寵虐民非也 檀弓】
吳伐齊將戰公孫夏命其徒歌虞殯【虞殯送葬歌曲哀十一年左傳】

巾車大喪及墓嚆啟關陳車【關墓門也車貳車也士喪禮下篇曰車至道左北面立東上春
官】方相氏大喪及墓入壙以戈擊四隅馭方良【壙穿地中也方良罔兩也天子之椁柏黃
腸為裏而表以石焉國語曰木石之怪夔罔兩 夏官】喪祝及壙說載除飾【鄭司農云壙謂
穿中也說載下棺也除飾去棺飾也四踞之屬令可舉移安錯之玄謂除飾使其窆爾周人之
葬牆置踞】小喪亦如之【春官】掌蜃掌斂互物蜃物以共闡壙之蜃【互物蚌蛤之屬闡
猶塞也將井椁先塞下以蜃禦濕也鄭司農說以春秋傳曰始用蜃炭言僭天子也】
稻人喪紀共其葦事【葦以闡壙禦濕之物】澤虞喪紀共其葦蒲之事【詳見陳明器章
並地官】

右至壙

冢人共喪之窆器【下棺豐碑之屬喪大記凡封用紼去碑負引君封以衡大夫士以咸 春官
朝祖章小司徒帥邦役遂人及窆陳役並此章通用】凡封用紼去碑負引君封以衡大夫士
以咸君命母誥以鼓封大夫命母哭士哭者相止也【封周禮作窆窆下棺也此封或皆作斂
檀弓曰公輸若方小斂般請以機封謂此斂也然則棺之入坎為斂與斂尸相似記時同之耳
咸讀為緘凡柩車及壙說載除飾而屬紼於棺之緘又樹碑於壙之前後以紼繞碑間之鹿盧
輓棺而下之此時棺下窆使輓者皆繫紼而繞要負引舒縱之備失脫也用紼去碑者謂縱下
之時也衡平也人君之喪又以木橫貫緘耳居旁持而平之又擊鼓為縱舍之節大夫士旁牽
緘而已庶人縣窆不引紼也禮唯天子葬有隧今齊人謂棺屬為緘繩咸或為緘 喪大記
柩行章君葬四紼二碑此章通用】鼓人大喪詔大僕鼓【詳見戒臣民章】大僕大喪始崩
戒鼓窆亦如之【鄭司農云窆謂葬下棺也春秋傳所謂日中而 禮記謂之封皆葬下棺也
音相似窆讀如慶封汜祭之汜 夏官】遂師大喪及窆抱磨共丘籠及蜃車之役【丘籠之役
竊復主也其器曰籠蜃車柩路也柩路載柳四輪迫地而行有似于蜃因取名焉行至壙乃說
更復載以龍輜蜃禮記或作樽或作輶役謂執紼者鄭司農云抱磨磨下車也玄謂磨者適歷
執紼者名也遂人主陳之而遂師以名行校之】鄉師及窆執斧以涖匠師【匠師主豐碑之
事執斧以涖之使成其事也故書涖作立立讀為涖涖謂臨視 並地官】冢人及窆執斧以涖
【臨下棺也】遂入藏凶器【凶器明器】正墓位蹕墓域守墓禁【位謂丘封所居前後也
禁所為塋限】司常建廡車之旌及葬亦如之【詳更陳明器章】
樂師凡喪陳樂器則帥樂官及序哭亦如之【哭此樂器亦帥之】
大司樂涖廡樂器及葬藏樂器亦如之笙師廡其樂器及葬奉而藏之【奉猶送】
鐃師廡其樂

器奉而藏之 籥師廡其樂器奉而藏之 司干廡舞器及葬奉而藏之【並春官】

校人飾遣車之馬及葬埋之【詳見陳明器章】

典瑞大喪共贈玉【贈玉盖璧也贈有束帛六幣璧以帛

春官】大宰大喪贊贈玉【助王為之也贈玉既窆所以送先王 天官】小宗伯成葬而祭墓為位【成葬丘已封也天子之冢盖不一日而畢位壇位也先祖形體託于此地祀其神以安之冢人職曰大喪既有日請度甫窆遂為之尸】冢人凡祭墓為尸【祭墓為尸或禱祈焉鄭司農云為尸冢人為尸】凡諸侯及諸臣葬于墓者為之蹕均其禁【並春官】

大夫廢其事終身不仕死以士禮葬之【以不任大夫也王制】

右窆 晉文公既定襄王于邲【邲洛邑王城之地】王勞之以地辭【辭不受也】請隧焉【賈侍中云隧王之葬禮闕地路通曰隧】王弗許曰昔我先王之有天下也亦惟是死生之服物采章【采章采色文章也】以臨長百姓而輕重布之王何異之有【輕重布之貴賤各有等也王何異之有言帝王皆然】若不然叔父有地而隧焉【自制以為隧也】余安能知之文公遂不敢請受地而還【國語 又僖二十五年左氏傳曰晉侯朝王請隧弗許曰王章也未代德而有二王亦叔父之所惡也】宣公八年冬十月己丑葬我小君敬嬴雨不克葬禮也禮卜葬先遠日辟不懷也【懷思也左氏傳】葬既有日不為雨止禮也雨不克葬喪不以制

也【徐邈曰案經文是己丑之日葬喪既出而遇雨若未及己丑而卻期無為逆書此日禮喪事有進無退又士喪禮未潦車載簣笠則人君之張設固兼備矣禮先遷柩于廟其明昧爽而引既及葬日之晨則祖行遣奠之禮設矣故雖雨猶終事不敢停柩久次 穀梁傳】定公十有五年秋九月丁巳葬我君定公雨不克襄事禮也【襄成也雨而成事若汲汲于欲葬左氏傳】葬既有日不為雨止禮也雨不克葬喪不以制也戊午日下稷乃克葬【稷炆也下炆乃晡時】乃急辭也不足乎日之辭也【穀梁傳】昭公之喪至自乾侯季孫使役如闕公氏將溝焉【闕魯羣公墓所在也季孫惡昭公欲溝絕其兆域不使與先君同】榮駕鵠曰生不能事死又離之以自旌也【駕鵠魯大夫榮成伯也旌章也】乃止葬昭公于墓道南孔子之為司寇也溝而合諸墓【明臣無貶君之義 定元年左氏傳】

許穆公卒于師葬之以侯禮也【詳見喪變禮道有喪】宋文公卒始厚葬用蜃炭益車馬始用殉重器備椁有四阿棺用翰檜【燒蛤為炭以瘞壙多埋車馬用人從葬四阿四注椁也翰旁飾檜上飾皆王禮】君子謂華元樂舉於是乎不臣臣治煩去惑者也是以伏死而爭今二子者君生則縱其惑死又益其侈是棄君於惡也何臣之為【成二年左氏傳】臧僖伯卒公曰叔父有憾于寡人【諸侯稱同姓大夫長曰伯父少曰叔父有恨恨諫觀魚不聽】寡人弗敢忘葬之加一等【加命服之等 隱五年左氏傳】季康子之母死公輸若方小【公輸若匠師方小言尚幼未知禮也】斂般請以機封【斂下棺于椁般若之族多技巧者見若掌斂事而年尚幼請代之而欲嘗其技巧】將從之【時人服般之巧】公肩假曰不可夫魯有初【初謂故事】公室視豐碑【言視者時僭天子也豐碑斲大木為之形如石碑于椁前後四角樹之穿中于間為鹿盧下棺以絳繞天子六絳四碑前後各重鹿盧也】三家視桓楹【時僭諸侯諸侯下天子也斲之形如大楹耳四植謂之桓諸侯四絳二碑碑如桓矣大夫二絳二碑士二絳無碑】般爾以人之母嘗巧則豈不得以【以己字言寧有強使女者與僭于禮有似作機巧非也以與己字本同】其母以嘗巧者乎則病者乎【母無也于女寧有病苦與止之】噫【不寤之聲】弗果從【檀弓】陳乾昔寢疾屬其兄弟而命其子尊己曰如我死必大

為我棺使吾二婢子夾我【婢子妾也】陳乾昔死其子曰以殉葬非禮也況又同棺乎弗果殺【善尊己不陷父于不義 同上】陳子車死于衛其妻與其家大夫謀以殉葬【子車齊大夫】定而后陳子亢至以告曰夫子疾莫養于下請以殉葬【子亢子車之弟孔子弟子下地下】子亢曰以殉葬非禮也雖然則彼疾當養者孰若妻與宰得已則吾欲已不得已則吾欲以二子者之為之也【度諫之不能止以斯言拒之已猶止也】於是弗果用【果決也同上】秦伯任好卒【任好秦穆公名】以子車氏之三子奄息仲行鍼虎為殉【子車秦大夫氏也以人從葬為殉】皆秦之良也國人哀之為之賦黃鳥君子曰秦穆公之不為盟主也宜哉死而棄民先王違世猶詒之法而況奪之善人乎君子是以知秦之不復東征也【文十年左氏傳】

周反哭而弔【檀弓 詳見喪禮義】

右反哭 君氏卒不反哭于寢【詳見命赴章】

士三虞大夫五諸侯七【尊卑恩之差也天子至士葬則反虞 雜記】小宗伯王崩既葬詔相喪祭之禮【喪祭虞祔也檀弓曰葬日虞弗忍一日離也是日也以虞易奠卒哭曰成事是日也以吉祭易喪祭明日祔于祖父 春官】職喪掌諸侯之喪及卿大夫士凡有爵者之喪凡其喪祭詔其號治其禮【鄭司農云號謂諡號玄謂告以牲號齎號之屬當以祝之】凡公有司之所共職喪令之趣其事【令令其當供物者給事之期也有司或言公或言國言國者由其君所來居其官曰公 同上】

司巫祭祀則共菹館【館所以承菹謂若今筐也士虞禮苴刈茅長五寸實于筐饌于西玷上 同上】甸師祭祀共蕭茅【詳見祭物薪茅章】鄉師大祭祀共茅菹【同上】

庖人共喪紀之庶羞【喪紀喪事之祭謂虞祔也 天官 陳小斂奠章圉人獸人腊人魚人醢人所共祭物朔月月半奠章籩人共籩外饗實鼎俎並此章通用】上大夫之虞也少牢卒哭成事祔皆大牢下大夫之

虞也牲卒哭成事祔皆少牢【卒哭成事祔言皆則卒哭成事祔與虞異矣下大夫虞以牲牲與士虞禮同與 雜記】喪祝掌喪祭祝號【喪祭虞也檀弓曰葬日虞不忍一日離也是日也以虞易奠卒哭曰成事是日也以吉祭易喪祭 春官】

右虞祭 曾子問曰小功可以與於祭乎【祭謂虞卒哭時】孔子曰何必小功耳自斬衰以下與祭禮也曾子曰不以輕喪而重祭乎【怪使重者執也】孔子曰天子諸侯之喪祭也不斬衰者不與祭大夫齊衰者與祭士祭不足則取於兄弟大功以下者【曾子問】

措之廟立之主曰帝【同之天神春秋傳曰凡君卒哭而祔祔而作主 曲禮】右作主 殷主綴重焉周主重徹焉【詳喪禮義】文公元年夏四月丁巳葬僖公緩【按此下傳文誤在僖公三十三年之末】作主非禮也【文二年乃作主遂因葬文通議之】凡君薨卒哭而祔祔而作主特祀於主【既葬反虞則免喪故曰卒哭哭止也以新死者之神祔之於祖尸柩已遠孝子思慕故造木主立几筵特用喪禮祭祀于寢不同之于宗廟凡君者謂諸侯以上不

通于卿大夫】烝嘗禘於廟【冬祭曰烝秋祭曰嘗新主既特祀于寢則宗廟四時常祀自如舊也三年禮畢又大禘乃皆同于吉】二年二月丁丑作僖公主書不時也【過葬十月故曰不時 左氏傳】作僖公主者何為僖公作主也【主狀正方穿中央達四方天子長尺二寸諸侯長一尺】主者曷用虞主用桑【禮平明而葬日中而反反虞猶安神也用桑者取其名與其粗犷所以副孝子之心禮虞祭天子九諸侯七卿大夫五士三其奠處猶吉祭】練主用栗【謂期年練祭也埋虞主于兩階之間易用栗也夏后氏以松殷人以柏周人以栗松猶容也想見其容貌而事之主人正之意也柏猶迫也親而不遠主地正之意也栗猶戰栗謹敬貌主天正之意也禮士虞記曰桑主不文吉主皆刻而諡之蓋為禘祫時別昭穆也虞主三代同者用意尚粗犷未暇別也】用栗者藏主也【藏于廟室中堂所當奉事也質家藏于室】作僖公主何以書譏何譏爾不時也其不時奈何欲久喪而後不能也【禮作練主當以十三月文公亂聖人制欲服喪三十六月十九月作練主又不能卒竟故以二十五月也日者重失禮鬼神 公羊傳】立主喪主於虞【其主用桑】吉主於練【其主用栗】作僖公主譏其後也【僖公薨至此已十五月】作主壞廟有時日於練焉壞廟壞廟之道易檐可也改塗可也【祖過高祖則毀其廟以次而遷將納新神故示有所加 穀梁傳】

禮書綱目卷二十七

卷二十八

欽定四庫全書

禮書綱目卷二十八 婺源江永撰

卒哭祔練祥禫記【吉祭忌日附】

補

死三日而殯三月而葬遂卒哭【謂士也雜記曰大夫三月而葬五月而卒哭諸侯五月而葬七月而卒哭此記更從死起異人之間其義或殊 士虞記】 士三月而葬是月也卒哭大夫三月而葬五月而卒哭諸侯五月而葬七月而卒哭【詳見喪大記卜葬日章】
卒哭他用剛日【詳見士虞禮】將旦而祔則薦【薦謂卒哭之祭 士虞記】
是日也以吉祭易喪祭【卒哭吉祭檀弓】 婦之喪卒哭夫若子主之【詳見士虞禮】
祭成喪者必有尸【詳見士虞禮】 男男尸女女尸【同上 已上兩條祔練祥禫通用】
用嗣尸【虞祔尚質未暇筮尸 士虞記 祔通用】 庖人共喪紀之庶羞【詳見喪大記虞章】
圉人獸人共獸腊人共乾肉魚人共鱻菹醢人共豆【詳見喪大記陳小斂奠章】 籩人共籩【詳見朔月月半奠章】 自天子達於庶人祭從生者【詳見士虞禮】
子為士祭以士子為大夫葬以大夫【同上 以上三條祔練祥禫通用】 上大夫之虞也少牢卒哭成事附皆大牢下大夫之虞也牲牲卒哭成事附皆少牢【詳見喪大記虞章】
祭稱孝子孝孫喪稱哀子哀孫【名以其義稱 雜記祔練祥禫通用】
卒哭曰成事【詳喪禮義】 曰哀薦成事【詳見士虞禮】 卒辭曰哀子某來日某濟附爾于皇祖某甫尚饗【卒辭卒哭之祝辭濟升也尚庶幾也不稱饌明主為告祔也今文濟為齊】
女子曰皇祖妣某氏【女孫祔于祖母】 婦曰孫婦于皇祖姑某氏【不言爾曰孫婦婦差疏也】 其他辭一也【來日某濟祔尚饗 士虞記】
饗辭曰哀子某主為而哀薦之饗【詳見士虞禮】 獻畢未徹乃餞【卒哭之祭既三獻也餞送行者之酒詩云出宿于沛飲餞于禰尸旦將始祔于皇祖是以餞送之古文餞為薦】 尊兩甌于廟門外之右少南水尊在酒西勺北枋【少南將有事于北有玄酒即吉也此在西尚凶也言水者喪質無鬯不久陳古文甌為庶也】 洗在尊東南水在洗東篚在西【在門之左又少南】 饌籩豆脯四脰【酒宜脯也古文脰為挺】 有乾肉折俎二尹縮祭半尹在西塾【乾肉腊體之脯也如今涼州烏翅矣折以為俎實優尸也尹正也雖其折之必使正縮以也古文縮為蹙】 尸出執几從席從【祝入亦告利成入前尸尸乃出几席素几葦席也以几席从執事也】 尸出門右南面【俟設席也】 席設于尊西北東面几在南賓出復位【將入臨之位士賓禮賓繼兄弟北上門東北面西上門西北面東上西方東面北上】 主人出即位于門東少南婦人出即位于主人之北皆西面哭不止【婦人重餞尸】 尸即席坐唯主人不哭洗廢爵酌獻尸尸拜受主人拜送哭復位薦脯醢設俎于薦東胸在南【胸脯及乾肉之屈也屈者在南變于吉】 尸在執爵取脯擣醢祭之佐食授膾【授乾肉之祭】 尸受振祭膾反之祭酒

卒爵奠于南方【反之反于佐食佐食反之于俎尸奠爵禮有終】主人及兄弟踊婦人亦如之主婦洗足爵亞獻如主人儀無從踊如初賓長洗纒爵三獻如亞獻踊如初佐食取俎實于筐尸謦從者奉筐哭從之祝前哭者皆從及大門內踊如初【男女從尸男由左女由右及至也從尸不出大門者由廟門外無事尸之禮也古文謦作休】尸出門哭者止【以餞于外大門猶廟門】賓出主人送拜稽顙【送賓拜于大門外】主婦亦拜賓【女賓也不言出不言送拜之于闔門之內闔門如今東西掖門】丈夫說經帶于廟門外【既卒哭當變麻受之以葛也夕日則服葛者為祔期今文說為稅】入徹主人不與【入徹者兄弟大功以下言主人不與則知丈夫婦人在其中古文與為豫】婦人說首經不說帶【不說帶齊斬婦人帶不說也婦人少變而重帶帶下體之上也大功小功者葛帶時亦不說者未可以輕文變于主婦之質至祔葛帶以即位檀弓曰婦人不葛帶】無尸則不餞猶出几席設如初拾踊三【以餞尸者本為送神也丈夫婦人亦從几席而出古文席為筵】哭止告事畢賓出【士虞記】
脯曰尹祭【曲禮 祔通用】父母之喪既虞卒哭疏食水飲不食菜果柱楣翦屏竿翦不納【詳見喪通禮飲食居處章】天子崩國君薨則祝取羣廟之主而藏諸祖廟禮也

卒哭成事而后主各反其廟【藏諸主于祖廟象有凶事者聚也卒哭成事先祔之祭名也曾子問】卒哭而諱【諱辟其名】生事畢而鬼事始已【謂不復饋食于下室而鬼神祭之已辭也】既卒哭宰夫執木鐸以命于宮曰舍故而諱新【故謂高祖之父當遷也者易說帝乙曰易之帝乙為成湯書之帝乙六世王天之錫命疏可同名】自寢門至於庫門【百官所在庫門宮外門明堂位曰庫門天子臯門 檀弓】卒哭而諱【自此而鬼神事之尊而諱其名】王父母兄弟世父叔父姑姊妹子與父同諱【父為其親諱則子不敢不從諱也謂王父母以下之親諱是謂士也天子諸侯諱羣祖】母之諱宮中諱妻之諱不舉諸其側與從祖昆弟同名則諱【母之所為其親諱子孫于宮中不言妻之所為其親諱夫于其側亦不言也孝子聞名心瞿凡不言人諱者亦為其相感動也子與父同諱則子可盡曾祖之親也從祖昆弟在其中于父輕不為諱與母妻之親同名則諱之 雜記】卒哭乃諱【敬鬼神之名也諱辟也生者不相辟名衛侯名惡大夫有名惡君臣同名春秋不非】禮不諱嫌名二名不偏諱【為其難諱也嫌名謂音聲相近若禹與雨丘與區同偏謂二名不一一諱也孔子之母名徵在言在不稱徵言徵不稱在】逮事父母則諱王父母不逮事父母則不諱王父母【逮及也謂幼孤不及識父母恩不至于祖名孝子聞名心瞿諱之由心此謂庶人適士以上廟事祖雖不逮事父母猶諱祖】君所無私諱【謂臣言于君前不辟家諱尊無二】大夫之所有公諱【辟君諱也】詩書不諱臨文不諱【為其失事正】廟中不諱【為有事于高祖則不諱曾祖以下尊無二也于下則諱上】夫人之諱雖質君之前臣不諱也【臣于夫人之家恩遠也質猶對也】婦諱不出門【婦親遠于宮中言辟之】大功小功不諱【曲禮】

大夫士諸父兄弟之喪既卒哭而歸【詳見喪通禮居處章】

公之喪大夫俟練士卒哭而歸【同上】小功既卒哭可以冠取妻下殯之小功則不可【大功卒哭可以冠子小功卒哭可以取妻下殯小功齊衰之親除喪而後可為昏禮凡冠者其時當冠則因喪而冠之 雜記】喪者不遺人人遺之雖酒肉受也從父昆弟以下既卒哭遺人可也【言齊衰之喪重志不在施惠于人 同上】期之喪卒哭而從政【詳見喪通禮動作章】君既卒哭而服王事大夫士既卒哭弁經帶金革之事無辟也【同上】

右卒哭 申繻曰周人以諱事神名終將諱之【禮既卒哭以木鐸徇曰舍故而諱新謂舍親盡之祖而諱新死者故言以諱事神名終將諱之自父至高祖皆不敢斥言桓六年左氏傳】子夏曰三年之喪卒哭金革之事無辟者禮與孔子曰昔者魯公伯禽有為為之也【詳見喪禮義】

明日以其班祔【卒哭之明日也班次也喪服小記曰祔必以其昭穆亡則中一以上凡祔已復于寢如既祔主反其廟練而後遷廟古文班或為辨辨氏姓或然今文為胖 士虞記 按既夕篇末明日以其班祔注云班次也祔卒哭之明日祭名祔猶屬也祭昭穆之次而屬之】明日祔于祖父【祭告于其祖之廟】其變而之吉祭也比至于祔必於是日也接【詳見喪禮義】小宗伯既葬詔相喪祭之禮【詳見喪大記虞章】

大祝付練詳掌國事【付當為祔祭于先王以祔後死者掌國事辨護之 春官】

凡主兄弟之喪雖疏亦虞之【喪事虞祔乃畢詳見士虞禮】

婦之喪祔則舅主之【詳見士虞禮】

主妾之喪則自祔至於練祥皆使其子主之其殯祭不於正室【祔自為之者以其祭于祖廟雜記】姑姊妹其夫死而夫黨無兄弟使夫之族人主喪妻之黨雖親弗主夫若無族矣則前後家東西家無有則里尹主之或曰主之而附于夫之黨【詳見喪通禮主後章】

沐浴櫛搔翦【彌自飾也搔當為爪今文曰沐浴搔翦或為蚤揃揃或為髻 士虞禮記】

凡喪小功以上非虞祔練祥無沐浴【詳見士虞禮】

祔杖不升于堂【哀益衰敬彌多也小記】

卒哭而祔祔而作主特祀於主【詳見喪大記作主章 卒哭章有用嗣尸三條此章通用】用專膚為折俎取諸脰臠【專猶厚也折俎謂主婦以下俎也體盡人多折骨以為之今以脰臠貶于純吉今文字為折俎而說以為胙俎亦甚誣矣古文脰臠為頭啗也】其他如饋食【如特牲饋食之事或云以左胖虞右胖祔今此如饋食則尸俎胙俎皆有肩臂豈復用虞臂乎其不然明矣 士虞記】外饗凡小喪紀陳其鼎俎而實之【詳見喪大記虞章

卒哭章庖人以下三條此章通用】上大夫祔大牢下大夫祔少牢【詳見卒哭章】大夫附於士士不附於大夫附於大夫之昆弟無昆弟則從其昭穆雖王父母在亦然【附皆讀為祔大夫祔于士不敢以已尊自殊于其祖也士不祔于大夫自卑別于尊也大夫之昆弟謂為士者也從其昭穆中一以上祖又祖而已祔者祔于先死者】婦附于其夫之所附之妃則亦從其昭穆之妃妾附于妾祖姑無妾祖姑則亦從其昭穆之妾【夫所附之妃于父則祖姑】男子附於王父則配女子附於王母則不配【配謂并祭王母不配則不祭王父也有事于尊者可以及卑有事于卑者不敢援尊配與不配祭饌如一祝辭異不言以某妃配某氏耳女子謂未嫁者嫁未三月而死猶歸葬于女氏之黨】公子附於公子【不敢戚君雜記】士大夫不敢祔於諸侯祔於諸祖父之為士大夫者其妻祔於諸祖姑妾祔於妾祖姑亡則中一以上而祔祔必以其昭穆【士大夫謂公子公孫為士大夫者不得祔于諸侯卑別也既卒哭各就其先君為祖者兄弟之廟而祔之中猶間也 小記】

諸侯不得祔於天子天子諸侯大夫可以祔於士【人莫敢卑其祖也

同上】婦祔於祖姑祖姑有三人則祔於親者【謂舅之母死而又有繼母】

【二人也親者謂所生】其妻為大夫而卒而后其夫不為大夫而祔於其妻則不易牲妻卒

而后夫為大夫而祔於其妻則以大夫牲【妻為大夫夫為大夫時卒不易牲也此謂始來仕無廟者無廟者不祔宗子去國乃以廟從】

士祔於大夫則易牲【不敢以卑牲祭尊也大失少牢也】

妾無妾祖姑者易牲而祔於女君可也【女君適祖姑也易牲而祔則凡妾下女君一等並小記】王父死未練祥而孫又死猶是祔於王父也【未練祥嫌未祫祭序于昭穆爾王父既附則孫可附焉猶當為由由用也附皆當作祔 雜記】庶子不祭殤與無後者殤與無後者從祖祔食【不祭殤者父之庶也不祭無後者祖之庶也此二者當從祖祔食而已不祭無所食之池共其牲物而宗子主其禮焉祖庶之殤則自祭之凡所祭殤者唯適子耳無後者謂昆弟諸父也宗子之諸父無後者為墀祭之 小記】

女未廟見而死不遷於祖不祔於皇姑【詳見喪變禮】有父母之喪尚功衰而附昆弟之殤則練冠附于殤稱陽童某甫不名神也【此兄弟之殤謂大功親以下之殤也斬衰齊衰之喪練皆受以大功之衰此謂之功衰以是時而祔大功親以下之殤大功親以下之殤輕不易服冠而兄為殤謂同年者也兄十九而死已明年因喪而冠陽童謂庶殤也宗子則曰陰童童未成人之稱也某甫且字也尊神不名為之造字 雜記】曰孝子某孝顯相夙興夜處小心畏忌不惰其身不寧【稱孝者吉祭】用尹祭【尹祭脯也大夫士祭無云脯者今不言牲號而云尹祭亦記者誤矣】嘉薦普淖普薦漻酒【普薦鉶羹不稱牲記其異者今文漻為醑】適爾皇祖某甫以醢祔爾孫某甫尚饗【欲其附合兩告之曾子問曰天子崩國君薨則祝取羣廟之主而藏諸祖廟禮也卒哭成事而後主各反其廟然則士之皇祖於卒哭亦反其廟無主則反廟之禮未聞以其幣告之乎 士虞記 卒哭章祭稱孝子孝孫脯曰尹祭兩條此章通用】父母之喪偕先葬者不虞祔待後事【詳見變除並有喪服章】祔練曰告【此致祭祀之餘于君子也攝主言致福申其辭也自祭言膳謙也祔練言告不敢以為福膳也 少儀】朋友虞祔而已【詳見喪通禮主後章】朋友虞祔而退【詳見弔禮會葬章】

右祔 殷練而祔周卒哭而附孔子善殷【期而神之人情檀弓】

君氏卒不祔於姑【詳見喪大記命赴章】 姒氏卒不

稱夫人不赴且不祔也【赴同祔姑夫人之禮二者皆闕故不曰夫人 定十五年左右氏傳】

朞而小祥【小祥祭名祥祭也檀弓曰歸祥肉古文朞皆作基 士虞記】

期而練【詳見喪服義】 十三月而練【同上】

期之喪十一月而練十三月而祥十五月而禫【此謂父在為母也 雜記】

凡卜筮日喪事先遠日【詳見士喪禮卜葬日章 大祥通用】 練筮日筮尸視濯皆要經杖繩屨有司告具而后去杖筮日筮尸有司告事畢而后杖拜送賓【詳見變除練章】

大祝練掌國事【詳見祔章】

大功者主人之喪有三年則必為之再祭【詳見喪通禮主後章 大祥通用】

主妾之喪則練使其子主之【詳見祔章】

五廟之孫祖廟未毀雖為庶人練則告【詳見士喪禮命赴章】

凡喪小功以上非練無沐浴【詳見祔章】 練而慨然【詳見喪通禮哀戚章】

練主用栗【詳見喪大記作主章】 吉主于練【同上】 作主壞廟有時日於練焉壞廟壞廟

之道易檐可也改塗可也【同上】

卒哭章祭成喪者必有尸以下二條又庖人以下三條又祭稱孝子孝孫並此章通用】

曰薦此常事【祝辭之異者言常者晷而祭禮也古文常為祥 士虞記

祔章饗辭此章所通用】 自諸侯達諸士小祥之祭主人之酢也嘑之衆賓兄弟則皆啐之大祥主人啐之衆賓兄弟皆飲之可也【嘑啐皆嘗也嘑至齒啐入口 雜記】

大夫士父母之喪既練而歸朔月忌日則歸哭於宗室【詳見通禮居處章】

婦人喪父母既練而歸【同上】 公之喪大夫俟練士卒哭而歸【同上】

既練舍外寢始食菜果飯素食哭無時【詳見喪服斬衰章】

既練居堊室不與人居君謀國政大夫士謀家事【詳見喪通禮居處動作章】 期而小祥居堊室寢有席【詳見喪通禮居處章】 三年之喪練不羣立不旅行【詳見弔禮弔章】

三年之喪雖功衰不弔【同上】

如三年之喪則既顯其練祥皆行【詳見變除並有喪變服章】 父母之喪將祭而昆弟死既殯而祭如同宮則雖臣妾葬而后祭祭主人之升降散等執事亦散等雖虞祔亦然【將祭謂練祥也言若同宮則是昆弟異宮古者兄弟異居同財有東宮有南宮有北宮有父母之喪當在殯宮而在異宮者疾病或歸者主人適子散等栗階為新喪略威儀 雜記

此條前祔後大祥皆通用】 君之喪服除而后殷祭禮也【詳見喪變禮並有喪章】 三年而後葬者必再祭其祭之間不同時而除喪【再祭練祥也間不同時者當異月也既祔明月練而祭又明月祥而祭必異月者以葬與練祥本異歲宜異時也而除喪已祥則除不禫 小記 殷祭以下二條大祥通用】 祔練曰告【詳見祔章】

右練【祔章殷練而祔此章通用】 曾子問曰祭如之何則不行旅酬之事矣孔子曰聞之小祥者主人練祭而不旅奠酬於賓賓弗舉禮也【奠無尸虞不致爵小祥不旅酬大祥無無算爵彌吉】 昔者魯昭公練而舉酬行旅非禮也孝公大祥奠酬弗舉亦非禮也【孝公隱公之祖父 曾子問】

又晷而大祥【又復也 士虞記】

父母之喪三年而祥【詳見喪服義】 三年之喪二十五月而畢【同上】

期之喪十三月而祥

【雜記 練章喪事先遠日此章通用】 大祝祥掌國事【詳見祔章】

五廟之孫祖廟未毀雖為庶人祥必告【詳見練章】

主妾之喪則自祔至於祥皆使其子主之【詳見祔章】

練章大功者主人之喪為之再祭此章通用】 曰薦此祥事【變言祥事亦是常事也 士虞記 祔章饗辭此章通用】 自諸侯達諸士大夫主人啐之衆賓兄弟皆飲之可也【詳是練章】

如三年之喪則既顯其練祥皆行【詳見練章 練章有父母之喪將祭又君之喪服除而后殷祭又三年而后葬者必再祭三條皆此章所通用】

祥而廓然【詳見喪通禮哀戚章】 既祥黝堊【詳見喪通禮居處章】

又期而大祥有醯醬居復寢

素縞麻衣【詳見變除】 祥而外無哭者禫而內無哭者樂作矣故也【外無哭者於門外不哭也內無哭者入門不哭也禫踰月而可作樂樂作無哭者
喪大記】 祥之日鼓素瑟【詳見喪服義】 喪復常讀樂章【曲禮】 三年

之喪祥而從政【詳見喪通禮動作章】 曾子曰廢喪服可以與於饋奠之事乎孔子曰說衰與奠非禮也以擯相可也【詳見喪變禮】

右大祥 孝公大祥奠酬弗舉亦非禮也【詳見練章】 孔子既祥五日彈琴而不成聲【哀未忘也】 十日而成笙歌【踰月且異旬也祥亦凶事用遠日五日彈琴十日笙歌除由外也琴以手笙歌以氣 檀弓】 子夏既除喪而見【見于孔子】 予之琴和之而不和彈

之而不成聲【樂由人心】 作而曰哀未忘也先王制禮而弗敢過也【作起】 子張既除喪而見予之琴和之而和彈之而成聲作而曰先王制禮不敢不至焉【雖情異善其俱順禮同上】 魯人有朝祥而莫歌者子路笑之【笑其為樂速】 夫子曰由爾責於人終無已夫三年之喪亦已久矣夫【為當時如此人行三年喪者希抑子路以善彼】 子路出夫子曰又多乎哉踰月則其善也【又復也同上】

顏淵之喪饋祥肉【饋遣也】 孔子出受之入彈琴而後食之【彈琴以散哀也同上】

中月而禫【中猶間也禫祭名也與大祥間一月自喪至此凡二十七月禫之言澹澹然平安意也古文禫或為導士虞記】 為父母妻長子禫【目所為禫者也 小記】

庶子在父之室則為其母不禫【妾子父在厭也】 宗子母在為妻禫【宗子之妻尊也同上】 期之喪十五月而禫【詳見練章 卒哭章天子諸侯之喪不斬衰者不與祭一條祭成喪者必有尸下二條庖人以下三條祭稱孝子孝孫一條又祔章饗辭皆此章所通用】 月中而禫禫而飲醴酒始飲酒者先飲醴酒始食肉者先食乾肉【先飲醴酒食乾肉者不忍發御厚味 間傳】 禫而牀【詳見喪通禮居處章】

禫而從御吉祭而復寢【從御御婦人也復寢不復宿殯宮也

喪大記】 禫而內無哭者樂作矣故也【詳見祥章】 是月禫徙月樂

【言禫明月可以用樂 檀弓】

右禫 孟獻子禫縣而不樂比御而不入【可以御婦人矣尚不復寢孟獻子魯大夫仲孫蔑】 夫子曰獻子加於人一等矣【加猶踰也檀弓】

是月也吉祭猶未配【是月是禫月也當四時之祭月則祭猶未以某妃配某氏哀未忘也少牢饋食禮祝祝曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尚饗 士虞記】 吉祭而復寢【詳見禫章】

右吉祭 僖公八年秋七月禘於大廟用致夫人【禘三年大祭之名大廟周公廟致者致新死之主于廟而列之昭穆夫人淫而與殺不薨于寢于禮不應致故僖公疑其禮歷三禘今果行

之嫌異常故書之】禘而致哀姜焉非禮也凡夫人不薨于寢不殯于廟不赴于同不祔于姑則弗致也【寢小寢同同盟將葬又不以殯過廟據經哀姜薨葬之文則為殯廟赴同祔姑今當以不薨于寢不得致也 春秋左氏傳】 閔公二年夏五月乙酉吉禘于莊公【三年喪畢致新死者之主于廟廟之遠主當遷入祧因是大祭以審昭穆謂之禘莊公喪制未闋時別立廟廟成而吉祭又不于大廟故詳書以示譏】速也【左氏傳】 其言吉何【據禘于大廟不言吉】言吉者未可以吉也【都未可以吉祭經舉重不書禘于大廟嫌獨莊公不當禘于大廟可禘者故加吉明大廟皆不當】曷為未可以吉未三年也【禮禘祫從先君數朝聘從合君數三年喪畢遭禘則禘遭祫則祫】三年矣曷為謂之未三年三年之喪實以二十五月【時莊公薨至是適二十二月所以必二十五月者取期再期恩倍漸三年也孔子曰子生三年然後免於父母之懷夫三年之喪天下之通喪禮士虞記曰期而小祥曰薦此常事又期而大祥曰薦此祥事中月而禫是月也吉祭猶未配是月者二十七月也傳言二十五月者在二十五月外可不譏】其言于莊公何【據禘于大廟不言周公祫僖公不言僖宮】未可以稱宮廟也曷為未可以稱宮廟在三年之中矣【當思慕悲哀未可以鬼神事之】吉禘于莊公何以書譏何譏爾譏始不三年也【與託始同義公羊傳】吉禘者不吉者也喪事未畢而舉吉祭故非之也【莊公薨至此方二十二月喪未畢穀梁傳】 襄公十五年冬十一月晉悼公卒十六年冬穆叔如晉聘且言齊故【言齊再伐魯】 晉人曰以寡君之未禘祀【禘祀三年喪畢之吉祭】不然不敢忘【左氏傳】

小史若有事則詔王之忌諱【鄭司農云先王死日為忌名為諱玄謂王有事所祭于其廟春官】 大夫士父母之喪既練而歸忌日則歸哭于宗室【詳見練章】 君子有終身之喪忌日之謂也忌日不用【詳見喪禮義】 忌日不樂【同上】

右忌日 文王之祭也事死者如事生思死者如不欲生忌日必哀稱諱如見親【思死者如不欲生言思親之深也祭義】

禮書綱目卷二十八

卷二十九

<經部,禮類,通禮之屬,禮書綱目

欽定四庫全書

禮書綱目卷二十九 婺源江永撰

喪通禮 凶禮十二

補

凡喪父在父為主【與賓客為禮宜使尊者】父沒兄弟同居各主其喪【各為其妻子之喪為主也祔則宗子主之】親同長者主之【父母沒如昆弟之喪宗子主之】不同親者主之【從父昆弟之喪奔喪】

君所主夫人妻大子適婦【言妻見大夫以下亦為此三人為喪主也 服問】

諸侯弔於異國之臣則其君為主【君為之主弔臣恩為己也子不敢當主中庭北面哭不拜喪服小記】士之子為大夫則其父母弗能主也使其子主之無子則為之置後【大夫之子得用大夫之禮而于士不得也置猶立也 雜記】

婦之喪虞卒哭其夫若子主之祔則舅主之【詳見士虞禮】主妾之喪則自祔至於練祥皆使其子主之其殯祭不於正室【詳見卒哭祔練祥禫記祔章】大功者主人之喪有三年者則必為之再祭朋友虞祔而已【謂死者之從父昆弟來為喪主有三年者謂妻若子幼少大功為之再祭則小功緦麻為之練祭可也 小記】

凡主兄弟之喪雖疏亦虞之【詳見士虞禮】

男主必使同姓婦主必使異姓【謂為無主後者為主也異姓同宗之婦也婦人外成 小記】其無女主則男主拜女賓於寢門內其無男主則女主拜男賓於阼階下子幼則以衰抱之人為之拜為後者不在則有爵者辭無爵者人為之拜在竟內則俟之在竟外則殯葬可也喪有無後無無主【詳見喪大記奉尸夷于堂拜賓章】姑姊妹其夫死而夫黨無兄弟使夫之族人主喪妻之黨雖親弗主【此謂姑姊妹無子寡而死也夫黨無兄弟無緦之親也其主喪不使妻之親而使夫之族人婦人外成主必宜得夫之姓類】夫若無族人則前後家東西家無有則里尹主之【喪無無主也里尹閭胥里宰之屬王度記曰百戶為里里一尹其祿如庶人在官者里或為士諸侯弔于異國之臣則其君為主里尹主之亦斯義也】或曰主之而附於夫之黨【妻之黨自主之非也夫之黨其祖姑也 雜記】

大夫不主士之喪【士之喪雖無主不敢攝大夫以為主 小記】

士不攝大夫士攝大夫唯宗子【士之喪雖無主不敢攝大夫以為主宗子尊可攝之 同上】

大夫之喪庶子不受弔【詳見喪大記未小斂受弔章】

宗子為殤而死庶子弗為後也【詳見喪服為人後者條】

養有疾者不喪服遂以主其喪非養者入主人之喪則不易己之喪服【詳見變除改服章】

右主後 曾子問曰喪有二孤廟有二主禮與【怪時有之】孔子曰天無二日土無二王嘗禘郊社尊無二上【尊踰卑也神雖多猶一一祭之】未知其為禮也昔者齊桓公亟舉兵作偽主以行及反藏諸祖廟廟有二主自桓公始也【偽猶假也舉兵以遷廟主行無則主命為假主非也】喪之二孤則昔者衛靈公適魯遭季桓子之喪衛君請弔哀公辭不得命公為主客入弔康子立於門右北面公揖讓升自東階西鄉客升自西階弔公拜興哭康子拜稽顙於位有司弗辨也今之二孤自季康子之過也【辨猶正也若康子者君弔其臣之禮也鄰國之君弔君為之主主人拜稽顙非也當哭踊而已靈公先桓子以魯哀公二年夏卒桓公以三年秋卒是出公也 曾子問】公儀仲子之喪檀弓免焉【故為非禮以非仲子也禮朋友皆在他邦乃袒免】仲子舍其孫而立其子【此其所立非也公儀蓋魯同姓周禮適子死立適孫為後】檀弓曰何居我未之前聞也【居讀為姬姓之姬齊魯之間語助也前猶故也】趨而就子服伯子於門右曰仲子舍其孫而立其子何也【去賓位就主人兄弟之賢者而問之子服伯子蓋仲孫蔑之玄孫子服景伯蔑魯大夫】伯子曰仲子亦猶行古之道也昔者文王舍伯邑考而立武王微子舍其孫腓而立衍也夫仲子亦猶行古之道也【伯子為親者隱耳立子非也文王之立武王權也微子適子死立其弟衍殷禮也】子游問諸孔子孔子曰否立孫【據周禮檀弓】司寇惠子之喪【惠子衛將軍文子彌牟之弟惠叔蘭也生虎者】子游為

之麻衰牡麻經【惠子廢適立庶為之重服以譏之麻衰以吉服之布為衰】文子辭曰子辱與彌牟之弟游【謝其存時】又辱為之服敢辭【止之服也】子游曰禮也文子退反哭【子游名習禮文子亦以為當然未覺其所譏】子游趨而就諸臣之位【深譏之大夫之家臣位在賓後】文子又辭曰子辱與彌牟之弟游又辱為之服又辱臨其喪敢辭【止之在臣位】子游曰固以請【再不從命】文子退扶適子南面而立曰子辱與彌牟之弟游又辱為之服又辱臨其喪虎也敢不復位【覺所譏也虎適子名文子親扶而辭敬子游也南面而立則諸臣位在門內北面明矣】子游趨而就客位【所譏行同上】石駘仲卒【駘仲衛大夫石碯之族】無適子有庶子六人卜所以為後者【莫適立也】曰沐浴佩玉則兆【言齊絜則得吉兆】五人者皆沐浴佩玉石祁子曰孰有執親之喪而沐浴佩玉者乎不沐浴佩玉【心正且知禮】石祁子兆衛人以龜為有知也【同上】成公十有五年仲嬰齊卒仲孫嬰齊者何【疑仲遂後故問之】公孫嬰齊也【未見于經為公孫嬰齊今為大夫死見于經為仲嬰齊】曷為謂之仲嬰齊為兄後也為兄後則曷為謂之仲嬰齊【據本公孫】為人後者為之子也【更為公孫之子故不得復氏公孫】其稱仲何孫以王父字為氏也【謂諸侯子也顧興滅繼絕故紀族明所出】嬰齊孰後後歸父也歸父使于晉而未反何以後之叔仲惠伯傅子赤公子遂殺叔仲惠伯弑子赤而立宣公宣公死成公幼臧宣叔者相也君死不哭聚諸大夫而問焉曰昔者叔仲惠伯之事孰為之皆曰仲氏也於是遣歸父之家然後哭歸父使晉還至櫓聞君薨家遣墯帷哭君成踊反命於介自是走之齊魯人徐傷歸父之無後也於是使嬰齊後之也【弟無後兄之義為亂昭穆之序失父子之親故不言仲孫明不與子為父孫春秋公羊傳】

商祝辨乎喪禮故後主人【辨猶別也正也 樂記】

大宗伯大喪則為上相【詳見喪大記總要章】

小宗伯既喪詔相喪祭之禮【詳見喪大記虞祭章】

世婦大喪凡王后有 事於婦人則詔相【詳見喪大記受弔章】
大行人若有大喪則詔相諸侯之禮【詔相左右教告之也秋官】
象胥凡國之大喪詔相國客之禮儀而正其位【客謂諸侯使臣來弔者 秋官】內小臣若有
喪紀則擯詔后之禮事相九嬪之禮事正內人之禮事【為后傳辭有所求為詔相正者異尊
卑也天官】肆師凡卿大夫之喪相其禮【相其適子春官】

右祝相 有若之喪悼公弔焉【悼公魯哀公之子】子游擯由左【擯相侑喪禮者喪禮廢亡
時人以為此儀當如詔辭而皆由右相是善子游正之孝經說曰以身擯侑 檀弓】泄柳之母
死相者由左泄柳死其徒由右相由右相泄柳之徒為之也【亦記失禮所由始也泄柳魯繆
公時賢人也相相主人之禮 雜記】杜橋之母之喪宮中無相以為沽也【沽猶略也同上】
孔子在衛司徒敬子卒夫子弔焉主人不哀夫子哭不盡聲而退蘧伯玉請曰衛鄙俗不習喪
禮煩吾子辱相焉孔子許之【詳見喪禮義】

君天下曰天子崩曰天王崩【史書策辭】復曰天子復矣【始死時呼魄辭也不呼名臣不
名君也諸侯呼字】告喪曰天王登假【告赴也登上也假已也上已者若仙去云爾】措之
廟立之主曰帝【詳見喪大記】天子未除喪曰予小子【謙未敢稱一人春秋傳曰以諸侯
之踰年即位亦知天子之踰年即位以天子三年然後稱王亦知諸侯于其封內三年稱子】
生名之死亦名之【生名之曰小子王死亦曰小子王也晉有小子侯是僭取天子號也】諸
侯在凶服曰適子孤【凶服亦謂未除喪】死曰薨【亦史書策辭】復曰某甫復矣【某甫
且字】既葬見天子曰類見【代父受國類猶象也執皮帛象諸侯之禮見也其禮亡】言謚
曰類【使大夫行象聘問之禮也言謚者序其行及謚所宜其禮亡】天子死曰崩諸侯曰薨
大夫曰卒士曰不祿庶人曰死【異死名者為人褻其無知若猶不同然也自上顛壞曰崩薨
顛壞之聲卒終也不祿不終其祿死之言漸也精神漸盡也】在牀曰尸【尸陳也言形體在
】在棺曰柩【柩之言究也】死寇曰兵【異于凡人當饗祿其後】生曰父曰母曰妻死曰
考曰妣曰嬪【嬪婦人有法度之稱也周禮九嬪掌婦學之法教九御婦德婦言婦容婦功】
壽考曰卒短折曰不祿【謂有德行任為大夫士而不為者老而死從大夫之稱少而死從士
之稱 並曲禮】

高曰崩【梁山崩】厚曰崩【沙鹿崩】尊曰崩天子之崩以尊也【隱三年穀梁傳】
大凡生於天地之間皆曰命其萬物死皆曰折人死曰鬼此五代之所不變也【祭法】復與
書銘自天子達於士其辭一也男子稱名婦人書姓與伯仲如不知姓則書氏【詳見喪大記
復章】君存稱世子【明當世父位為君】君薨稱子某【緣民臣之心不可一日無君故稱
子某明繼父也名者尸柩尚存猶以君前臣名也】既葬稱子【不名者無所屈也緣始終之
義一年不二君故稱子也】踰年稱公【不可曠年無君莊三十二年公羊傳】
君薨大子號稱子待猶君也【謂未踰年也雖稱子】

【與諸侯朝會如君矣春秋魯僖公九年夏葵丘之會宋襄公稱子而與諸侯序待或為侍
雜記】未沒喪不稱君示民不爭也故魯春秋記晉喪曰殺其君之子奚齊及其君卓【沒終
也春秋傳曰諸侯于其封內三年稱子至臣子踰年則謂之君矣 坊記】春秋不稱楚越之王
喪禮君不稱天大夫不稱君恐民之惑也【楚越之君僭號稱王不稱其喪記不書葬也春秋

傳曰吳楚之君不書葬辟其僭號也坊記】祭稱孝子孝孫喪稱哀子哀孫【詳見卒哭祔練祥禫記】有父母之喪尚功衰而附兄弟之殯則練冠附於殯

稱陽童某甫不名神也【詳見附練祥禫記】

祝稱卜葬虞子孫曰哀夫曰乃兄弟曰某卜葬其兄弟曰伯子某【詳見士喪禮卜葬日章】既正尸子坐於東方卿大夫父兄子姓立於東方有司庶士哭於堂下北面夫人坐於西方內命婦姑姊妹子姓立於西方外命婦率外宗哭於堂上北面【詳見喪大記】庶子之正於公族者其公大事則以其喪服之精麤

為序雖於公族之喪亦如之以次主人【正者政也庶子司馬之屬掌國子之倅為政于公族者大事謂死喪也其為君雖皆斬衰序之必以本親也主人主喪者次主人者主人恒在上主人雖有父兄猶不得下齒文王世子】

喪紀以服之輕重為序不奪人親也【紀猶事也同上】

哭泣之位皆如其國之故謹脩其法而審行之【詳見喪禮義】大夫之庶子為大夫則為其父母服大夫服其位與未為大夫者齒【詳見喪服斬衰章父條】

凡婦人從其夫之爵位【婦人無專制生禮死事以夫為尊卑雜記】

右名位宋桓公卒未葬而襄公會諸侯故曰子凡在喪王曰小童公侯曰子【在喪未葬也小童者童蒙幼末之稱子者繼父之辭公侯位尊上連王者下絕伯子男周康王在喪稱予一人釗禮稱亦不言小童或所稱之辭各有所施此謂王自稱之辭非諸下所得書故經無其事傳通取舊典之文以事相接僖九年左氏傳】葬蔡平公葬太子朱失位位在卑【不在適子位以長幼齒】大夫送葬者歸見昭子昭子問蔡故以告昭子昭子歎曰蔡其亡乎若不亡是君也必不終詩曰不解于位民之攸墜【詩大雅墜息也】今蔡侯始即位而適卑身將從之【為蔡侯朱出奔傳昭二十一年左氏傳】曾子曰小功不為位也者是委巷之禮也【譏之也位謂以親疏叙別哭也委巷猶街里委曲所為也】子思之哭嫂也為位【善之也禮嫂叔無服】婦人倡踊【有服者娣姒婦小功倡先也】申祥之哭言思也亦然【檀弓】

喪用三年之仂【喪大事用三歲之什一】喪祭用不足曰暴有餘曰浩【暴猶耗也浩猶饒也王制】大宰以九式均節財用三曰喪荒之式【式謂用財之節度荒凶年也天官】小宰以法掌祭祀朝覲會同賓客之戒具喪荒亦如之令百官府共其財用【法謂其禮法也戒具戒官有事者所當共同上】大府山澤之賦以待喪紀【同上】

外府喪紀共其財用【同上】封人凡喪紀則飾其牛牲牛人喪事共其奠牛圉人喪紀共其生獸死獸之物獸人凡喪紀共其死獸生獸腊人喪紀共其脯腊凡乾肉之事人喪紀共其魚之鱸醢醢人凡祭祀共薦羞之豆實喪紀亦如之【詳見喪大記陳小斂奠章】籩人喪事共其薦籩羞籩外饗凡小喪紀陳其鼎俎而實之【詳見喪大記朔月月半殷奠章】

掌客凡禮賓客札喪殺禮凡賓客死致禮以喪用【詳見變禮道有喪章】六十歲制七十時制八十月制九十日脩唯絞紵衾冒死而後制【絞紵衾冒一日二日而可為者王制】喪具君子恥具【辟不懷也喪具棺衣之屬】一日二日而可為也者君子弗為也【謂絞紵衾冒檀弓】大司徒以荒政十有二聚萬民八曰殺哀【殺哀謂省凶禮地官】鄉師正歲稽其鄉

器比其吉凶二服族共喪器鄉共吉凶禮樂之器【吉服祭服也凶服弔服也比長主集為之喪器者夷槃素俎楬豆軼軸之屬族師主集為之此三者民所以相共也凶器若族喪器者也此鄉器者旁使相共則民無廢事上下相補則禮行而教成 同上】

閭師凡庶民不樹者無椁不績者不衰【同上】

司市國凶荒札喪則市無征而作布【同上】

泉府凡賒者喪紀無過三月【鄭司農云賒貰也以祭祀喪紀故從官貰買物

同上】鄭長以時校登其夫家比其衆寡以治其喪紀祭祀之事【同上】

土均禮俗喪紀祭祀皆以其地媿惡為輕重之法而行之掌其禁令【同上】朝士若邦凶荒札喪則令邦國都家縣鄙慮刑貶【慮謀也貶猶減也謂當謀緩刑且減國用為民困也所貶視時為多少之法秋官】小行人若國札喪則令賻補之【謂賻喪家補助其不足也同上】

右財用 武氏子來求賻喪事無求求賻非禮也【詳見弔禮賻章】毛伯來求金【求金以共葬事】非禮也【天子不私求財故曰非禮】不書王命未葬也【文九:left氏傳】

子思曰有其禮無其財君子弗行也有其禮有其財無其時君子弗行也【詳見喪禮義】

孔子曰斂手足形還葬而無椁稱其財斯之謂禮【同上】子柳之母死子碩請具【具葬之器用子柳魯叔仲皮之子子碩兄】子柳曰何以哉【言無其財】子碩曰請粥庶弟之母【粥謂嫁之也妾賤取之曰買】子柳曰如之何其粥人之母以葬其母也不可【忠恕】既葬子碩欲以賻布之餘具祭器【古者謂錢為泉布所以通布貨財】子柳曰不可吾聞之也君子不家於喪【惡因死者以為利】請班諸兄弟之貧者【以分死者所矜地祿多財與鄰里鄉黨 檀弓】孟獻子之喪【獻子魯大夫仲孫蔑】司徒旅歸四布【旅下士也司徒使下士歸四方之賻布】夫子曰可也【時人皆貪善其能廉 同上】

喪事主哀【少儀】君子以喪過乎哀【易小過】子曰喪與其易也寧戚【論語】曾子曰吾聞諸夫子人未有自致者也必也親喪乎【致盡其極也盖人之真情所不能自己者】子游曰喪致乎哀而止【致極其哀不尚文飾也 並論語】子路曰吾聞諸夫子喪禮與其哀不足而禮有餘也不若禮不足而哀有餘也【詳見喪禮義】

子曰臨喪不哀吾何以觀之哉【論語】始死充充如有窮既殯瞿瞿如有求而弗得既葬皇皇如有望而弗至練而慨然祥而廓然【皆憂悼在心之貌也求猶索物 檀弓】

縣子曰三年之喪如斬期之喪如剡【言其痛之惻怛有淺深也 雜記】子貢曰請問兄弟之喪子曰兄弟之喪則存乎書策矣【言疏者如禮行之未有加也齊斬之喪哀容之體經不能載矣】君子不奪人之喪【重喪禮也】亦不可奪喪也【不可以輕之于已也 同上】

居喪不言樂【居喪者居父母之喪也曲禮】聞樂不樂【論語】

孔子曰衰麻苴杖者志不存乎樂非耳弗聞服使然也【家語】父有服宮中子不與於樂母有服聲聞焉不舉樂妻有服不舉樂於其側【宮中子與父同宮者也禮由命士以上父子異宮不與于樂謂出行見之不得觀也】大功將至辟琴瑟【亦所以助哀也至來也】小功至不絕樂【雜記】

大司樂諸侯薨令去樂大臣死凡國之大憂令弛縣【弛釋之若今休兵鼓之為 春官】

天子哭諸侯為之不以樂食【盖謂殯斂之間 檀弓】

君於卿大夫比卒哭不舉樂為士比殯不舉樂【雜記】

節哀順變也【詳見喪禮義】毀不滅性【同上】

右哀戚 孔子曰少連大連善居喪三日不怠三月不解期悲哀三年憂東夷之子也【言其生于夷狄而知禮也怠惰也解倦也 雜記】 顏丁善居喪【顏丁魯人】始死皇皇然如有求而弗得及殯望望然如有從而弗及既葬慨然如不及其反而息【從隨也慨慊貌 檀弓】 高子臯之執親之喪也【子臯孔子弟子名柴】泣血三年【言泣無聲如血出】未嘗見齒【言笑之微】君子以為難【言人不能然 同上】

孟獻子禫縣而不樂比御而不入夫子曰獻子加於人一等矣【詳見卒哭祔練祥禫記】

孔子既祥五日彈琴而不成聲十日而成笙歌【同上】 衛定公卒夫人姜氏既哭而息見大子之不哀也不內酌飲歎曰是夫也將不唯衛國之敗其必始於未亡人【定姜言獻公行無禮必從已始 成十四年左氏傳】 立公子稠【昭公名】 穆叔不欲曰是人也居喪而不哀在戚而有嘉容是謂不度不度之人鮮不為患武子不聽卒立之比及葬三易哀哀衽如故哀【言其嬉戲無度】於是昭公十九年矣猶有童心君子是以知其不能終也【為昭二十五年公孫于齊傳 襄三十一年左氏傳】 九月葬齊歸公不戚晉士之送葬者歸以語史趙史趙曰不思親祖不歸也【言不思親則不為祖考所歸祐】 叔向曰魯公室其卑矣君有大喪國不廢蒐【謂蒐比蒲】有三年之喪而無一日之感國不恤喪不忌君也【忌畏也】君無感容不顧親也國不忌君君不顧親能無卑乎殆其失國【為二十五年公孫于齊傳

昭十一年左氏傳】 衛石共子卒【石買】悼子不哀【買之子石惡】孔成子曰是謂蹙其本【蹙猶拔也】必不有其宗【為二十八年石惡出奔傳 襄十九年左氏傳】 孔子之故人曰原壤其母死夫子助之沐椁【沐浴也】原壤登木曰久矣予之不託于音也【木椁材也託寄也謂叩木以作音】歌曰狸首之斑然執女手之卷然【說人辭也】夫子為弗聞也者而過之【佯不知】從者曰子未可以已乎【已猶止也】夫子曰丘聞之親者毋失其為親也故者毋失其為故也【檀弓】 六月王太子壽卒秋八月王穆后崩【太子壽之母也】 晉

荀躒如周葬穆后籍談為介既葬除喪以文伯宴樽以魯壺【文伯荀躒也魯壺魯所獻壺樽】王曰伯氏諸侯皆有以鎮撫王室晉獨無有何也【感魯壺而言也鎮撫王室謂貢獻之物】籍談歸以告叔向叔向曰王其不終乎王一歲而有三年之喪二焉【天子絕期唯服三年故后雖期通謂之三年喪】於是乎以喪賓宴又求彝器樂憂甚矣且非禮也三年之喪雖貴遂服禮也【天子諸侯除喪須在卒哭今王既葬而除故譏其不遂】王雖弗遂宴樂以早亦非禮也【言今雖不能遂服猶當靜嘿而便宴樂又失禮也 昭十五年左氏傳】 吳公子札自衛如晉宿于戚【戚孫文子之邑】聞鐘聲焉曰夫子獲罪于君以在此【孫文子以戚畔】懼猶不足而又何樂夫子之在此猶燕之巢於幕上【言至危】君又在殯而可以樂乎【獻公卒未葬】遂去之【不止宿】文子聞之終身不聽琴瑟【聞義能改

襄二十九年左氏傳】 知悼子卒未葬【悼子晉大夫荀盈魯昭九年卒】平公飲酒【與羣臣宴平公晉侯彪】師曠李調侍【侍與君飲也燕禮記曰請旅侍臣】鼓鐘【樂作也燕禮賓入門奏肆夏既獻而樂闋獻君亦如之】杜蕢自外來聞鐘聲曰安在【怪之也杜蕢或作屠蒯】曰在寢【燕于寢】杜蕢入寢歷階而升酌曰曠飲斯又酌曰調飲斯又酌堂上北面坐飲之降趨而出【三酌皆罰】平公呼而進之曰爾飲曠何也曰子卯不樂【紂以甲子死桀以乙卯亡王者謂之疾日不以舉樂為吉事所以自戒懼】知悼子在堂斯其為子卯也大

矣【言大臣喪重于疾日也雜記曰君于卿大夫比葬不食肉比卒哭不舉樂】曠也大師也不以詔是以飲之也【詔告也大師典奏樂】爾飲調何也曰調也君之褻臣也為一飲一食忘君之疾是以飲之也【言調食酒食褻嬖也近臣亦當規君疾憂】爾飲何也曰蕢也宰夫也非刀 是共又敢與知防是以飲之也【防禁放溢】平公曰寡人亦有過焉酌而飲寡人【聞義則復】杜蕢洗而揚觶【舉爵于君也禮揚作騰揚舉也騰送也揚近得之】公謂侍者曰如我死則必毋廢斯爵也【欲後世以為戒】至于今既畢獻斯揚觶謂之杜舉【此爵遂因杜蕢為名畢獻獻賓與君 檀弓】昭公十五年二月癸酉有事于武宮籥入叔弓卒去樂卒事君在祭樂之中聞大夫之喪則去樂卒事禮也【祭樂者君在廟中祭作樂】君在祭樂之中大夫有變以聞可乎【變謂死喪】大夫國體也【君之卿佐是謂股肱故曰國體】古之人重死君命無所不通【死者不可復生重莫大焉是以君雖在祭樂之中大夫死以聞可也穀梁傳】襄公三十一年公薨于楚宮立胡女敬歸之子子野【胡歸姓之國敬歸襄公妾】次于季氏秋九月癸巳卒毀也【過哀毀瘠以致滅性 左氏傳】

居倚廬哭晝夜無時既虞朝一哭夕一哭而已既練哭無時【詳見喪服斬衰傳】父母之喪哭無時使必知其反也【謂既練或時為君服金革之事反必有祭 檀弓】斬衰之哭若往而不反齊衰之哭若往而反大功之喪三曲而偯小功緦麻哀容可也此哀之發于聲音者也【三曲一舉聲而三折也偯聲餘從容也 間傳】曾申問于曾子曰哭父母有常聲乎曰中路嬰兒失其母焉何常聲之有【嬰猶驚彌也言其若小兒亡母啼號安得常聲乎所謂哭不偯 雜記】無事不辟廟門【鬼神尚幽闇也廟殯宮】哭皆于其次【無時哭也有事則入即位小記】童子哭不偯不踊不杖不菲不廬【未成人者不得備禮也當】

【室則杖 雜記】祥而外無哭者禫而內無哭者【詳見卒哭祔練祥禫記】國禁哭則止朝夕之奠即位自因也【禁哭謂大祭祀時不哭猶朝夕】

【奠自因自用故事 雜記】祭之日喪者不哭【郊特牲】孔子惡野哭者【為其變衆周禮銜枚氏掌禁野叫呼歎鳴于國中者行歌哭于國中之道者 檀弓】公七踊大夫五踊婦人居間士三踊婦人皆居間【公君也始死及小斂大斂而踊君大夫士一也則皆三踊矣君五日而殯大夫三日而殯士二日而殯士小斂之朝不踊君大夫大斂之朝乃不踊婦人居間者踊必拾主人踊婦人踊賓乃踊 雜記】士備入而後朝夕踊【備禮盡也國君之喪嫌主人哭入則踊 檀弓】孔子曰伯母叔母疏衰踊不絕地姑姊妹之大功踊絕於地如知此者由文矣哉由文矣哉【由用也言如此踊絕地不絕地之情者能用禮文哉能用禮文哉美之也伯母叔母義也姑姊妹骨肉也 雜記】戚斯嘆嘆斯辟辟斯踊矣品節斯斯之謂禮【詳見喪禮義】跛者不踊【詳見喪服義】

右哭踊 弁人有其母死而孺子泣者孔子曰哀則哀矣而難為繼也夫禮為可傳也為可繼也故哭踊有節【詳見喪禮義】子蒲卒哭者呼滅【滅蓋子蒲名】子臯曰若是野哉【非之也唯復呼名子臯孔子弟子高柴】哭者改之【檀弓】伯魚之母死期而猶哭【伯魚孔子子也名鯉猶尚也】夫子聞

之曰誰與哭者門人曰鯉也夫子曰嘻其甚也【嘻悲恨之聲】伯魚聞之遂除之【同上】
穆伯之喪敬姜晝哭文伯之喪晝夜哭孔子曰知禮矣【喪夫不夜哭嫌思情性也同上】文
伯之喪敬姜據其牀而不哭曰昔者吾有斯子也吾以將為賢人也【蓋見其有才藝】吾未
嘗以就公室【未嘗與到公室觀其行也季氏魯之宗卿敬姜有會見之禮】今及其死也朋
友諸臣未有出涕者而內人皆行哭失聲斯子也必多曠于禮矣夫【內人妻妾同上】
華周杞梁之妻善哭其夫而變國俗【孟子】

保氏養國子以道教六儀四曰喪紀之容【鄭司農云喪紀之容涕涕翔翔玄謂喪紀之容纍
纍顛顛地官】斬衰貌若苴齊衰貌若冢大功貌若止小功總麻容貌可也此哀之發于容聲
者也【有大憂者面必深黑止謂不動于喜樂之事冢或為似間傳】喪容纍纍【羸憊貌也
】色容顛顛【憂思貌也】視容瞿瞿梅梅【不審貌也】言容繭繭【聲氣微也玉藻】
君子衰經則有哀色【表記】

喪紀之志漻然憂以愀喪紀之容恻然懔然若不還喪紀之視下忤垂綳【賈誼容經】喪事
欲其縱縱爾【趨事貌縱讀如總領之總】吉事欲其折折爾【安舒貌詩云好人提提】故
喪事雖遽不陵節吉事雖止不怠【陵躐也止立俟事時也怠惰也】故騷騷爾則野【謂大
疾】鼎鼎爾則小人【謂大舒】君子蓋猶猶爾【疾舒之中檀弓】

居喪之禮毀瘠不形視聽不衰【為其廢喪事形謂骨見曲禮】

視不明聽不聰行不正不知哀君子病之【詳見飲食章】孔子曰身有則浴首有創則沐
病則飲酒食肉毀瘠為病君子弗為也毀而死君子謂之無子【毀而死是不重親雜記】子
貢問喪子曰敬為上哀次之瘠為下顏色稱其情戚容稱其服【問喪問居父母之喪也喪尚
哀言敬為上者疾時尚不能敬也容威儀也孝經曰容止可觀同上】

毀不危身【詳見喪禮義】毀不減性【同上】五十不致毀六十不毀【詳見飲食章】

三月而沐【詳見喪服義】凡喪小功以上非虞祔練祥無沐浴【詳見士虞禮】

妻視叔父母姑姊妹視兄弟長中下殯視成人【視猶比也所比者哀容居處也雜記】

右容貌

大祝辨九拜五曰吉拜六曰凶拜【吉拜拜而後稽顙謂齊衰不杖以下者言吉者此殷之凶
拜周以其拜與頓首相近故謂之吉拜凶拜稽顙而後拜謂三年服者春官】為父母長子稽
顙【喪尊者及正體不敢不盡禮】大夫弔之雖總必稽顙【尊大夫不敢以輕待之】婦人
為夫與長子稽顙其餘則否【恩殺于父母】

小記】為妻父母在不杖不稽顙【尊者在不敢盡于私喪也】母在不稽

顙稽顙者其贈也拜【言獨母在于贈拜得稽顙則父在贈拜不得稽顙雜記】婦人吉事雖
有君賜肅拜為尸坐則不手拜肅拜為喪主則不手拜【肅拜拜低頭也手拜手至地也婦人
以肅拜為正凶事乃手拜耳為尸為祖姑之尸也士虞禮曰男男尸女女尸為喪主不手拜者
為夫與長子當稽顙也其餘亦手拜而已雖或為唯或曰喪為主則不手拜肅拜也少儀】非
為人喪問與賜與【此上滅脫未聞其首云何】三年之喪以其喪拜非三年之喪以吉拜【
謂受問受賜者也稽顙而後拜曰喪拜拜而後稽顙曰吉拜雜記】孔子曰拜而後稽顙頹乎

其順也稽顙而後拜順乎其至也三年之喪吾從其至者【詳見喪禮義】右拜拱 秦穆公使人弔公子重耳重耳稽顙而不拜穆公曰稽顙而不拜則未為後也故不成拜【詳見奔喪】孔子與門人立拱而尚右二三子亦皆尚右【倣孔子也】孔子曰二三子之嗜學也【嗜食】我則有姊之喪故也二三子皆尚左【復正也喪尚右右陰也吉尚左左陽也 檀弓】

斬衰唯而不對齊衰對而不言大功言而不議小功緦麻議而不及樂此哀之發于言語者也【議謂陳說非時事也 間傳】三年之喪言而不語對而不問【言言己事也為人說為語 雜記】

父母之喪寢苦枕塊非喪事不言既葬與人立君言王事不言國事大夫士言公事不言家事既練君謀國政大夫謀家事【此常禮也喪大記】言容繭【詳見容貌章】言若不足喪紀之言也【賈誼容經】居喪不言樂【非其時也曲禮】子張問曰書云高宗三年不言言乃讙有諸【時人君無行三年之喪禮者問有此與怪之也讙喜說也言乃喜說則臣民望其言久】仲尼曰胡為其不然也古者天子崩王世子聽于冢宰三年【冢宰天官卿貳王事者三年之喪使之聽朝 檀弓】三年之喪君不言書云高宗諒闇三年不言此之謂也然而曰言不文者謂臣下也【詳見喪服義】百官備百物具不言而事行者扶而起言而後事行者杖而起身自執事而後行者面垢而已【同上】子夏問于孔子曰居君之母與妻之喪如之何孔子曰居處言語飲食術爾於喪所則稱其服而已【家語】

右言語

斬衰藺屨杖而歔粥者志不在于飲食【大戴禮】

歔粥朝一溢米夕一溢米既虞疏食水飲既練始食菜果飯素食【詳見喪服斬衰章】斬衰三日不食齊衰二日不食大功三不食小功緦麻再不食士與斂焉則一不食故父母之喪既殯食粥朝一溢米莫一溢米齊衰之喪疏食水飲不食菜果大功之喪不食醯醬小功緦麻不飲醴酒此哀之發於飲食者也父母之喪既虞卒哭疏食水飲不食菜果期而小祥食菜果又期而大祥有醯醬中月而禫禫而飲醴酒始飲酒者先飲醴酒始食肉者先食乾肉【先飲醴酒食乾肉者不忍發御厚味 間傳】三日而食【詳見喪服義】

功衰食菜果飲水漿無鹽酪不能食食鹽酪可也【功衰斬衰之末也酪酢載雜記】

膳夫王日一舉大喪則不舉【天官】君之喪子大夫公子衆士皆三日不食子大夫公子衆士食粥納財朝一溢米莫一溢米食之無算士疏食水飲食之無算夫人世婦諸妻皆疏食水飲食之無算【納財謂食穀也二十兩曰溢于粟米之法一溢為米一升二十四分升之一諸妻御妾也同言無算則是皆一溢米或粥或飯】大夫之喪主人室老子姓皆食粥衆士疏食水飲妻妾疏食水飲【室老其貴臣也衆士所謂衆臣】士亦如之【如其子食粥妻妾疏食水飲】既葬主人疏食水飲不食菜果婦人亦如之君大夫士一也練而食菜果祥而食肉【果瓜桃之屬】食粥於盛不盥食於簋者盥食菜以醯醬始食肉者先食乾肉始飲酒者先飲醴酒【盛謂今時杯杆也簋竹筥也歔者不盥手飯者盥簋或作簋】期之喪三不食食疏食水飲不食菜果三月既葬食肉飲酒期終喪不食肉不飲酒父在為母為妻九月之喪食飲猶期之喪也食肉飲酒不與人樂之【食肉飲酒亦謂既葬】五月三月之喪壹不食再不食可

也比葬食肉飲酒不與人樂之叔母世母故主宗子食肉飲酒【義服恩輕也故主謂舊君也主故主者關大夫及君也】不能食肉羹之以菜可也【謂性不能者可食飯菜羹】有疾食肉飲酒可也【為其氣微】五十不成喪【成猶備也所不能備謂不致毀不散送之屬也】七十唯衰麻在身【言其餘居處飲食與吉時同也喪大記】居喪之禮頭有創則沐身有則浴有疾則飲酒食肉疾止復初不勝喪乃比於不慈不孝【勝任也】五十不致毀六十不毀七十唯衰麻在身飲酒食肉處于內【所以養衰老人五十始衰也曲禮】喪食唯惡必充饑饉而廢事非禮也飽而忘哀亦非禮也視不明聽不聰行不正不知哀君子病之故有病飲酒食肉五十不致毀六十不毀七十飲酒食肉皆為疑死【病猶憂也疑猶恐也雜記】曾子曰喪有疾食肉飲酒必有草木之滋焉【增以香味為其疾不嗜食】以為薑桂之謂也【為記者正曾子所云草木之滋者謂薑桂檀弓】既葬若君食之則食之大夫父之友食之則食之矣不辟梁肉若有酒醴則辭【尊者之前可以食美也變于顏色亦不可喪大記】有服人召之食不往大功以下既葬適人人食之其黨也食之非其黨弗食也【往而見食則可食也為食而往則不可黨猶親也非親而食則食于人無數也雜記】三年之喪如或遺之酒肉則受之必三辭主人衰絰而受之【受之必正服明不苟于滋味】如君命則不敢辭受而薦之【薦于廟貴君之禮】喪者不遺人人遺之雖酒肉受也從父昆弟以下既卒哭遺人可也【言齊斬之喪重志不在施惠于人同上】視君之母與妻比諸兄弟發諸顏色者亦不飲食也【言小君服輕亦內除也發于顏色謂醴美飲食使人醉飽同上】居君之母與妻之喪飲食術爾【詳見言語章】君於卿大夫葬不食肉【雜記】

右飲食曾子謂子思曰伋吾執親之喪也水漿不入於口者七日【言己以疾時禮之不如】子思曰先王之制禮也過之者俯而就之不至焉者跂而及之故君子之執親之喪也水漿不入於口者三日杖而後能起【為曾子言難繼以禮抑之檀弓】樂正子春之母死五日而不食曰吾悔之【勉強過禮子春曾子弟子】自吾母而不得吾情吾惡乎用吾情【惡乎猶於何也同上】悼公之喪季昭子問於孟敬子曰為君何食【悼公魯哀公之子昭子康子之曾孫名強敬子武伯之子名捷】敬子曰食粥天下之達禮也吾三臣者之不能居公室也四方莫不聞矣【言鄰國皆知吾等不能居公室以臣禮事君也三臣仲孫叔孫季孫氏】勉而為瘠則吾能毋乃使人疑夫不以情居瘠者乎哉我則食食【傷時不盡忠喪又不盡禮非也孔子曰喪事不敢不勉同上】三月鄭簡公卒夏齊侯衛侯鄭伯如晉朝嗣君也【晉昭公新立】晉侯享諸侯子產鄭伯辭於享請免喪而後聽命【簡公未葬】晉人許之禮也【善晉不奪孝子之情昭十二年左氏傳】

宮正大喪則授廬舍辨其親疏貴賤之居【詳見喪大記】射人比其廬不敬者苛罰之【苛謂詰問之夏官】哭皆於其次【詳見哭踊章】居倚廬寢苦枕塊既虞翦屏拄楣寢有席既練舍外寢【詳見喪服斬衰傳】童子不廬【詳見哭踊章】父母之喪居倚廬寢苦枕塊不說經帶齊衰之喪居堊室芻剪不納大功之喪寢有席小功緦麻牀可也此哀之發於居處者也父母之喪既虞卒哭拄楣翦屏芻剪不納期而小祥居堊室寢有席又期而大祥居復寢中月而禫禫而牀【芻若今之蒲草也間傳】三年之喪廬堊室之中不與人坐焉在堊室之中非時見乎母也不入門【在堊室之中以時事見乎母乃復入門則居廬時不入門】疏衰皆居堊室不廬廬嚴者也【言廬哀

敬之處非有其實則不居雜記】父母之喪居倚廬不塗寢苦枕由非喪事不言君為廬宮之大夫士檀之【宮謂圍障之也檀袒也謂不障】既葬拄楣塗廬不於顯者君大夫士皆宮之【不於顯者不塗見面】凡非適子者自未葬以於隱者為廬【不欲人屬目盖廬于東南角既葬猶然】既練居堊室不與人居既祥黝堊【黝堊堊室之飾也地謂之黝牆謂之堊】禪而從御吉祭而復寢【從御御婦人也復寢不復宿殯宮也】期居廬終喪不御於內者父在為母為妻齊衰期者大功布衰九月者皆三月不御於內婦人不居廬不寢苦喪父母既練而歸期九月者既葬而歸【歸謂歸夫家也】公之喪大夫俟練士卒哭而歸【此公公士大夫有地者也其大夫士歸者謂素在君所食都邑之臣】大夫士父母之喪既練而歸朔月忌日則歸哭於宗室諸父兄弟之喪既卒哭而歸【歸謂歸其宮也忌日死日也宗室宗子之家謂殯宮也禮命士以上父子異宮】父不次於子兄不次於弟【謂不就其殯宮為次而居喪大記】父不為衆子次於外【于庶子略自若居寢小記】大夫次於公館以終喪士練而歸士次於公館【公館公宮之舍也練而歸之士謂邑宰也練而猶處公館朝廷之士也唯大夫三年無歸也】大夫居廬士居堊室【謂未練時也士居堊室亦謂邑宰也朝廷之士亦居廬雜記】有憂者側席而坐【側猶特也憂不在接人不布他面席】有喪者專席而坐【降居處也專猶單也曲禮】夫晝居於內問其疾可也【似有疾】夜居於外弔之可也【似有喪】是故君子非有大故不宿於外【大故謂喪憂】非致齊也非疾也不晝夜居於內【內正寢之中檀弓】居君之母與妻之喪居處衍爾【詳見言語章】

右居處

居喪之禮升降不由阼階出入不當門隧【常若親存隧道也曲禮】齊衰不以邊坐大功不以服勤【為褻喪服邊偏倚也檀弓】居

喪未葬讀喪禮既葬讀祭禮喪復常讀樂章【為禮各于其時曲禮】

大功廢業或曰大功誦可也【許其口習故也檀弓】

男女非祭非喪不相授器【祭嚴喪遽不嫌也內則】疏衰之喪既葬人請見之則見不請見人小功請見人可也大功不以執摯唯父母之喪不辟涕泣而見人【言重喪不行求見人爾人來求見已亦可以見之矣不辟涕泣言至哀無飾也雜記】

既練君謀國政大夫士謀家事【練後漸輕故得自謀已國家事也喪大記】君既葬王政入於國既卒哭而服王事大夫士既葬公政入於家既卒哭弁絰帶金革之事無辟也【此權禮也弁絰帶者變喪服而弔服輕可以即事也同上】

父母之喪使必知其反也【詳見哭踊章】庶人喪不貳事【貳之言二也庶人終事無二事不使從政也喪大記曰大夫士既葬公政入于家既卒哭弁絰帶金革之事無辟也王制】

父母之喪三年不從政齊衰大功之喪三月不從政【同上】三年之喪祥而從政期之喪卒哭而從政九月之喪既葬而從政小功總之喪既殯而從政【以王制言之此謂庶人也從政從為政者教令謂給繇役雜記】

右動作 僖公九年公會齊侯宋子衛侯鄭伯許男曹伯于葵丘宋其稱子何也未葬之辭也禮柩在堂上孤無外事今背殯而出會以宋子為無哀矣【櫨木如椁塗之曰殯殷人殯于兩楹

之間周人殯于西階之上宋殷後也 穀梁傳】 文公十六年秋八月夫人姜氏薨【僖公夫人】 毀泉臺喪不貳事貳事緩喪也【喪事主哀而復毀泉臺是以喪為緩 同上】 昭公十一年五月齊歸薨大蒐于比蒲非禮也孟僖子會邾莊公盟于祿祥脩好禮也【蒐非存亡之由故臨喪不宜為之盟會以安社稷故喪盟謂之禮 左氏傳】 子夏曰金革之事無辟也者非與孔子曰吾聞諸老聃曰昔者魯公伯禽有為為之也【詳見喪禮義】 子墨衰絰敗秦師于殽【詳見變除】 古者臣有大喪則君三年不呼其門已練可以

弁冕服金革之事君使之非也臣行之禮也閔子要絰而服事既而曰若此乎古之道不即人心退而致仕孔子蓋善之也【詳見變除】

禮書綱目卷二十九

卷三十

欽定四庫全書

禮書綱目卷三十 婺源江永撰

奔喪 凶禮十三

補經【鄭目錄云名曰奔喪者以其居他國聞喪奔赴之禮此于別錄屬喪服之禮實逸曲禮之正篇也漢興後得古文而禮家又貪其說因合于禮記耳奔喪禮屬凶禮也】

奔喪之禮始聞親喪以哭答使者盡哀問故又哭盡哀【親父母也以哭答使者驚怛之哀無辭也問故問親喪所由也雖非父母聞喪而哭其禮亦然也】遂行日行百里不以夜行【雖有哀戚猶辟害也晝夜之分別于昏明哭則遂行者不為位】唯父母之喪見星而行見星而舍【侵晨冒昏彌益促也言唯著異也】若未得行則成服而后行【謂以君命有為者也成喪服得行則行】過國至竟哭盡哀而止【感此念親】哭辟市朝【為驚衆也】望其國竟哭【斬衰者也自是哭且遂行】至于家入門左升自西階殯東西面坐哭盡哀括髮袒【括髮袒者去飾也未成服者素委貌深衣已成服者固自喪服矣】降堂東即位西鄉哭成踊【已殯者位在下】襲經于序東絞帶反位拜賓成踊【襲服衣也不于又哭乃經者發喪已踰日節于是可也其未小斂而至與在家同耳不散帶者不見尸柩凡拜賓者就其位既拜反位哭踊】送賓反位有賓後至者則拜之成踊送賓皆如初衆主人兄弟皆出門出門哭止闔門相者告就次【次倚廬也】于又哭括髮袒成踊于三哭猶括髮袒成踊【又哭至明日朝也三哭又其明日朝也皆升堂括髮袒如始至必又哭三哭者象小斂大斂時也雜記曰士三踊其夕哭从朝夕哭不括髮不袒不踊不以為數】三日成服拜賓送賓皆如初【三日三哭之明日也既哭成其喪服杖于序東】

右奔親喪 記老聃曰見星而行者唯罪人與奔父母之喪者乎【曾子問】

奔父之喪括髮于堂上袒降踊襲經于東方【詳見奔母喪章】凡奔喪有大夫至袒拜之成踊而后襲于土襲而后拜之【主人袒降哭而大夫至因拜之不敢成已禮乃禮尊者或曰大夫後至者袒拜之為之成踊 本篇記】

奔喪者非主人則主人為之拜賓送賓奔喪者自齊衰以下入門左中庭北面哭盡哀免麻于序東即位袒與主人哭成踊【不升堂哭者非父母之喪統于主人也麻亦經帶也于此言麻者明所奔喪雖有輕者不至喪所無改服也凡袒者于位襲于序東袒襲不相因位此麻乃袒變于為父母也】於又哭三哭皆免袒有賓則主人拜賓送賓【又哭三哭亦入門左中庭北面如始至時也】丈夫婦人之待之也皆如朝夕哭位無變也【待奔喪者無變嫌賓客之也于賓客以哀變為敬此骨肉哀則自哀矣于此乃言待之明奔喪者至三哭猶不以序入也】右奔齊衰以下喪 記凡喪父在父為主【與賓客為禮宜使尊者】父沒兄弟同居各主其喪

【各為其妻子之喪為主也祔則宗子主之】親同長者主之【父母沒如昆弟之喪宗子主之】不同親者主之【从父昆弟之喪 本篇記】

齊衰望鄉而哭大功望門而哭小功至門而哭總麻即位而哭【奔喪哭親疏遠近之差也同上】聞兄弟之喪大功以上見喪者之鄉而哭【雜記】凡異居始聞兄弟之喪唯以哭對可也【惻怛之情不以辭言為禮也】其始麻散帶經【與居家同也凡喪小斂而麻】未服麻而奔喪及主人之未成經也疏者與主人皆成之親者終其麻帶經之日數【疏者謂小功以下也親者大功以上也疏者及主人之節則用之其不及者亦自用其日數 同上】有殯聞遠兄弟之喪雖總必往【親骨肉也檀弓】

奔母之喪西面哭盡哀括髮袒降堂東即位西鄉哭成踊襲免經于序東拜賓送賓皆如奔父之禮于又哭不括髮【為母于又哭而免輕於父也其他則同】

右奔母喪 記奔父之喪括髮于堂上袒降踊襲經于東方奔母之喪不括髮袒于堂上降踊襲免于東方經即位成踊出門哭止三日而五哭三袒【凡奔喪謂道遠已殯乃來也為母不括髮以至成服一而已貶于父也即位以下于父母同也三日五哭者始至訖夕反位哭乃出就次一哭也與明日又明日之朝夕而五哭三袒者始至袒與明日又明日之朝而三也喪服小記】

婦人奔喪升自東階殯東西面坐哭盡哀東髻即位與主人拾踊【婦人謂姑姊妹女子子也東階東面階也婦人入者由闔門東髻髻于東序不髻于房變于在室者也去纓大紒曰髻拾更也主人與之更踊賓客之】

右婦人奔喪 記婦人非三年之喪不踰封而弔如三年之喪則君夫人歸【奔父母喪也】夫人其歸也以諸侯之弔禮其待之也若待諸侯然【謂夫人行道車服主國致禮】夫人至入自闔門升自側階君在阼其他如奔喪禮然【女子子不自同于女賓也宮中之門曰闔門為相通者也側階亦旁階也他謂哭踊髻麻闔門或為帷門 雜記】

奔喪者不及殯先之墓北面坐哭盡哀主人之待之也即位于墓左婦人墓右成踊盡哀括髮東即主人位經絞帶哭成踊拜賓反位成踊相者告事畢【主人之待之謂在家者也哭于墓為父母則袒告事畢者于此後無事也】遂冠歸入門左北面哭盡哀括髮袒成踊東即位拜賓成踊賓出主人拜送有賓後至則拜之成踊送賓如初衆主人兄弟皆出門出門哭止相者告就次于又哭括髮成踊于三哭猶括髮成歸三日成服于五哭相者告事畢【又哭三哭不袒者哀戚已久殺之也逸奔喪禮說不及殯日于又哭猶括髮即位不袒告事畢者五哭而不復哭也成服之朝為四哭此謂既期乃後歸至者也其末期猶朝夕哭不止于五哭】為母所以異于父者壹括髮其餘免以終事他如奔父之禮【壹括髮者謂婦入門哭時也于此乃言為母異于父者明及殯不及殯其異者同】

右奔喪不及殯

齊衰以下不及殯先之墓西面哭盡哀【不北面者亦統于主人】免麻于東方即位與主人哭成踊襲有賓則主人拜賓送賓賓有後至者拜之如初相者告事畢【不言袒言襲者容齊衰親者或袒可】遂冠歸入門左北面哭盡哀免袒成踊東即位拜賓成踊賓出主人拜送于又哭免袒成踊于三哭猶免袒成踊三日成服于五哭相者告事畢【于父于又哭括髮而不袒此又哭三哭皆言袒袒衍字也】

右奔齊衰以下喪不及殯 記奔兄弟之喪先之墓而後之家為位而哭所知之喪則哭于宮而後之墓【兄弟先之墓骨肉之親不由主人也宮故殯宮也 小記】

聞喪不得奔喪哭盡哀問故又哭盡哀乃為位括髮袒成踊襲經絞帶即位【聞父母喪而不得奔謂以君命有事不然者不得為位位有鄭列之處如于家朝夕哭位矣不于又哭乃經者喪至此踰日節于是可也】拜賓反位成踊賓出主人拜送于門外反位若有賓後至者拜之成踊送賓如初于又哭括髮袒成踊于三哭猶括髮袒成踊三日成服于五哭拜賓送賓如初【不言就次者當從其事不可以喪服廢公職也其在宮亦告就次言五哭者以迫公事五日哀殺亦可以止】

右聞親喪不得奔 記凡為位不奠【以其精神不存乎是 本篇記 後凡為位通用】 晉獻公之喪秦穆公使人弔公子重耳【獻公殺其世子申生重耳辟難出奔是時在翟就弔之】且曰寡人聞之亡國恒于斯得國恒于斯【言在喪代之際】雖吾子儼然在憂服之中喪亦不可久也時亦不可失也孺子其圖之【勸其反國意欲納之喪謂亡失位孺釋也】以告舅犯【舅犯重耳之舅狐偃也字子犯】舅犯曰孺子其辭焉喪人無寶仁親以為寶【寶謂善道可守者仁親親行仁義】父死之謂何又因以為利【欲反國求為後是利父死】而天下其孰能說之孺子其辭焉【說猶解也】公子重耳對客曰君惠弔亡臣重耳身喪父死不得與于哭泣之哀以為君憂【謝之】父死之謂何或敢有他志以辱君義稽顙而不拜哭而起起而不私【他志謂利心】子顯以致命于穆公【使者公子繫也盧氏云古者名字相配顯當作轡】穆公曰仁夫公子重耳夫稽顙而不拜則未為後也故不成拜哭而起則愛父也起而不私則遠利也【檀弓】 曾子與客立于門側其徒趨而出【徒謂客之旅】曾子曰爾將何之曰吾父死將出哭于巷【以為不可發凶于人館】曰反哭于爾次【次舍也禮館人使專之若其自有然】曾子北面而弔焉【同上】

若除喪而后歸則之墓哭成踊東括髮袒經拜賓成踊送賓反位又哭盡哀遂除于家不哭【東東即主人位如不及殯者也遂除除于墓而歸】主人之待之也無變于服與之哭不踊【無變于服自若時服也亦即位于墓左婦人墓右】自齊衰以下所以異者免麻

右除喪後奔喪

凡為位非親喪齊衰以下皆即位哭盡哀而東免經即位袒成踊【謂無君事又無故可得奔喪而以己私未奔者也唯父母之喪則不為位其哭之不離聞喪之處齊衰以下更為位而哭皆可行乃行】襲拜賓反位哭成踊送賓反位相者告就次三日五哭卒主人出送賓衆主人

兄弟皆出門哭止相者告事畢成服拜賓【卒猶止也三日五哭者始聞喪訖夕為位乃出就次一哭也與明日又明日之朝夕而五哭不五朝哭而數朝夕備五哭而止者亦為急奔喪已私事當畢亦明日乃成服凡云五哭者其後有賓亦與之哭而拜之】若所為位家遠則成服而往【謂所當奔者外喪也外喪緩而道遠成服乃行容待齋也】

右齊衰以下為位 記凡為位者壹袒【謂于禮正可為位而哭也始聞喪哭而袒其明日則否父母之哭自若三袒也 本篇記】 子思之母死于衛【嫁母也姓庶氏】赴于子思子思哭于廟門人至曰庶氏之母死何為哭于孔氏之廟乎【門人弟子也嫁母與廟絕】子思曰吾過矣吾過矣遂哭于他室【檀弓】

曾子曰小功不為位也者是委巷之禮也【詳見哭無服章】

有殯聞遠兄弟之喪哭于側室【嫌哭殯】無側室哭于門內之右【近南者為之變位檀弓】有殯門外喪哭之他室【明所哭者異也哭之為位】入奠卒奠出改服即位如始即位之禮【謂後日之哭朝入奠于其殯乃更即位就他室如始哭之情 雜記】聞遠兄弟之喪既除喪而后聞喪免袒成踊拜賓則尚左手【小功緦麻不稅者也雖不服猶免袒尚左手吉拜也逸奔喪禮曰凡拜吉喪皆尚左手 本篇記】

哭父之黨于廟母妻之黨于寢師于廟門外朋友于寢門外所識于野張帷【此因五服聞喪而哭列人恩諸所當哭者也黨謂族類無服者也逸奔喪禮曰哭父族與母黨于廟妻之黨于寢朋友于寢門外一哭而已不踊言一哭而已則不為位矣】所識者弔先哭于家而后之墓皆為之成踊從主人北面而踊【從主人而踊拾踊也北面自外來便也主人墓在西面】無服而為位者唯嫂叔及婦人降而無服者麻【雖無服猶弔服加麻袒免為位哭也正言嫂叔尊嫂也兄公于弟之妻則不能也婦人降而無服族姑姊妹嫁者也逸奔喪禮曰無服袒免為位者唯嫂與叔凡為其男子服其婦人降而無服者麻】

右哭無服 記妻之昆弟為父後者死哭之適室【以其正也】子為主袒免哭踊【親者主之】夫入門右【北面辟正主】使人立于門外告來者狎則入哭【狎相習知者】父在哭于妻之室【不以私喪干尊】非為父後者哭諸異室【檀弓】曾子曰小功不為位也者是委巷之禮也【譏之也位謂以親疏叙別哭也委巷猶街里委曲所為也】子思之哭嫂也為位【善之也禮嫂叔無服】婦人倡踊【有服者娣姒婦小功倡先也】申祥之哭言思也亦然【說者曰言思子游之子申詳妻之昆弟亦無服過此以往獨哭不為位 同上】

哭朋友者于門外之右南面【變于有親者也門外寢門外 小記】伯高死于衛赴于孔子【赴告也凡有舊恩者則使人告之】孔子曰吾惡乎哭諸【以其交會尚新】兄弟吾哭諸廟父之友吾哭諸廟門之外【別親疏也】師吾哭諸寢朋友吾哭諸寢門之外所知吾哭諸野【別輕重也】于野則已疏于寢則已重【已猶大也】夫由賜也見我吾哭諸賜氏【本于恩哭于子貢寢門之外】遂命子貢為之主【明恩所由】曰為爾哭也來者拜之知伯高而來者勿拜也【異于正主檀弓】孔子哭子路于中庭【寢中庭也與哭師同親之】有人弔者而夫子拜之【為之主也】既哭進使者而問故【使者自衛來赴者故謂死之意狀】使者曰醢之矣【時衛世子蒯聵篡輒而立子路死之醢之者示欲啗食以怖衆】遂命覆醢【覆弃之不忍食 同上】曾子曰朋友之墓有宿草而不哭焉【宿草謂陳根也為師】

【心喪三年于朋友期可 同上】 陳莊子死赴于魯魯人欲勿哭【君無哭鄰國大夫之禮陳莊子齊大夫陳恒之後名伯】繆公召縣子而問焉縣子曰古之大夫束脩之間不出竟雖欲哭之安得而哭之【以其不外交】今之大夫交政于中國雖欲勿哭焉得而弗哭【言時君弱臣強政在大夫專盟會以交接】且臣聞之哭有二道有愛而哭之有畏而哭之【以權微勸之】公曰然則如之何而可縣子曰請哭諸異姓之廟【明不當哭】於是與哭諸縣氏【同上】

哭天子九諸侯七卿大夫五士三【此臣聞君喪而未奔為位而哭尊卑日數之差也士亦有屬吏賤不得君臣之名】大夫哭諸侯不敢拜賓【此謂在他國聞喪者哭其舊君不敢拜賓辟為主】諸臣在他國為位而哭不敢拜賓【謂大夫士使于列國】

右臣哭君

與諸侯為兄弟亦為位而哭【族親婚姻在異國者】

右哭諸侯【天子哭諸侯附見此下】周禮大宗伯朝覲會同則為上相哭諸侯亦如之【相詔王禮也哭諸侯者謂薨于國為位而哭之檀弓曰天子之哭諸侯也爵弁經紼衣 春官】記天子之哭諸侯也爵弁經紼衣【詳見補服】或曰使有司哭之【非也哀戚之事不可虛】為之不以樂食【蓋謂殯斂之間 檀弓】 吳子壽夢卒臨于周廟禮也【文王廟也周公出文王魯立其廟】凡諸侯之喪異姓臨于外【于城外向其國】同姓于宗廟【所出王之廟】同宗于祖廟【始封君之廟】同族于禰廟【父廟也同族謂高祖以下】是故魯為諸姬臨于周廟【諸姬同姓國】為邢凡蔣茅胙祭臨于周公之廟【即祖廟也六國皆周公之支子別封為國共祖周公 襄十二:left氏傳】

喪變禮

補

大夫聞君之喪攝主而往【臣聞君之喪義不可以不行故使兄弟若宗人攝行主事而往不廢祭】大夫聞大夫之喪尸事畢而往【賓尸事畢而往也 昭十五年公羊傳】君在祭樂之中大夫有變以聞可乎大夫國體也古之人重死君命無所不通【詳喪通禮哀戚】

右聞喪【諸親聞喪或奔或否已見上篇】

曾子問曰並有喪如之何何先何後【並謂父母若親同者同月死】孔子曰葬先輕而後重其奠也先重而後輕禮也自啟及葬不奠【不奠務于當葬者】行葬不哀次【不哀次輕于在殯者】反葬奠而后辭于殯遂修葬事【殯當為賓聲之誤也辭于賓謂告將葬啟期也】其虞也先重而后輕禮也【曾子問】

父母之喪偕先葬者不虞祔待後事其葬服斬衰【詳見變除並有喪變服章】

有父之喪如未沒喪而母死其除父之喪也服其除服卒事反喪服【同上】
如三年之喪則既顯其練祥皆行【同上】曾子問曰君未殯而臣有父母之喪則如之何孔子曰歸殯反于君所有殷事則歸朝夕否【其哀雜主于君】大夫室老行事士則子孫行事【大夫士其在君所之時則攝其事】大夫內子有殷事亦之君所朝夕否【謂夫之君既殯而有舅姑之喪者內子大夫妻也妻為夫之君如婦為舅姑服齊衰】曾子問曰君薨既殯而臣有父母之喪則如之何孔子曰歸居于家有殷事則之君所朝夕否【居家者因其哀後隆于父母殷事朔月月半薦新之奠也】君既啟而臣有父母之喪則如之何孔子曰歸哭而反送君【言送君則既葬而歸也歸哭者服君服而歸不敢私服也】曾子問曰君之喪既引聞父母之喪如之何孔子曰遂既封而歸不俟子【遂遂送君也封當為窆子嗣君也】曾子問曰父母之喪既引及塗聞君薨如之何孔子曰遂既封改服而往【封亦當為窆改服括髮徒跣布深衣扱上衽不以私喪包至尊】曾子問曰大夫士有私喪可以除之矣而有君服焉其除之也如之何孔子曰有君喪服于身不敢私服又何除焉【重喻輕也私喪家之喪也喪服四制曰門外之治義斷恩】於是乎有過時而弗除也君之喪服除而後殷祭禮也【謂主人也支子則否】曾子曰父母之喪弗除可乎【以其有終身之憂】孔子曰先王制禮過時弗舉禮也非弗能勿除也患其過于制也故君子過時不祭禮也【言制禮以為民中過其時則不成禮並曾子問】雖諸父昆弟之喪如當父母之喪其除諸父昆弟之

喪也皆服其除喪之服卒事反喪服【詳見變除】父母之喪將祭而昆弟死既殯而祭如同宮則雖臣妾葬而後祭祭主人之升降散等執事者亦散等雖虞祔亦然【詳見卒哭祔練祥禫記練章】有殯聞外喪哭之他室入奠卒奠出改服即位如始即位之禮【詳見奔喪】有殯聞遠兄弟之喪雖總必往非兄弟雖鄰不往【詳見弔禮】王父死未練祥而孫又死猶是附于王父也【詳見卒哭祔練祥禫記】

右並有喪周人有喪魯人有喪周人弔魯人不弔【詳見弔禮】

諸侯行而死于館則其復如于其國如于道則升其乘車之左轂以其綏復【館主國所致舍復招魂復魂如于其國主國館賓與使有之得升屋招魂用褻衣也如于道道上廬宿也升車左轂象升屋東榮綏當為綏讀如蕤賓之蕤字之誤也綏謂旌旗之旄也去其旒而用之異于生也】其輅有褻緇布裳帷素錦以為屋而行【輅載柩將殯之車飾也輅取名于褻與蒨讀如蒨旆之蒨褻棺也蒨染赤色者也將葬載柩之車飾曰柳褻謂鼈甲邊緣緇布裳帷圍棺者也裳帷用緇則輅用赤矣輅象宮室屋其中小帳褻覆棺者若未大斂其載尸而歸車飾皆如之】至於廟門不毀牆遂入適所殯唯輅為說于廟門外【廟所殯宮牆裳帷也適所殯謂兩楹之間去輅乃入廟門以其入自有宮室也毀或為徹凡柩自外來者正棺于兩楹之間尸亦俛之于此皆因殯焉異者柩入自闕升自西階尸入自門升自阼階其殯必于兩楹之間者以其死不于室而自外來留之于中不忍遠也】大夫死于道則升其乘車之左轂以其綏復如于館死則其復如于家【綏亦綏也大夫復于家以玄冕士以爵弁服】大夫以布為輅而行至于家而說輅載以輅車入自門至於阼階下而說車舉自阼階升適所殯【大夫輅言用布白布不染也言輅者達名也不言裳帷俱用布無所別也至門亦說輅乃入言載以輅車入自門明車不易也輅讀為軫或作搏許氏說文解字曰有輻曰輪無輻曰輅周禮又有啓車天子

以載柩唇輅聲相近其制同乎輅崇蓋半乘車之輪諸侯言不毀牆大夫士言不易車互相明也不易者不易以輅也廟中有載柩以輅之禮此不耳】士輅葦席以為屋蒲席以為裳帷【言以葦席為屋則無素錦為帳 雜記】其為賓則公館復私館不復其在野則升其乘車之左轂而復【私館卿大夫之家也不于之復為生人之惡 喪大記】為君使而死公館復私館不復公館者公宮與公所為也私館者自卿大夫以下之家也【公宮謂君所作離宮別館也 雜記】曾子問曰為君使而卒于舍禮曰公館復私館不復

凡所使之國有司所授舍則公館已何謂私館不復也【復始死招魂】孔子曰善乎問之也【善其問難明也】自卿大夫士之家曰私館公館與公所為曰公館公館復此之謂也【公館若今縣官宮也公所為君所命使舍已者】曾子問曰君出疆以三年之戒以輅從君薨其入如之何【其出有喪備疑喪入必異也戒猶也謂衣衾親身棺曰輅其餘可死乃具也】孔子曰共殯服【此謂君已斂殯服謂布深衣苴絰散帶垂殯時主人所服共之以待其來也其餘殯事亦皆具焉】則子麻弁絰疏衰菲杖【棺柩未安不忍成服于外也麻弁絰者布弁而加環絰也布弁如爵弁而用布杖者為已病】入自闕升自西階【闕謂毀宗也棺毀宗而入異于生也升自西階亦異于生也所毀宗殯宮門西也于此正棺而服殯服既塗而成服股柩出毀宗周柩入毀宗禮相變也】如小斂則子免而從柩【謂君已小斂也主人布深衣不括髮者行遠不可無飾】入自門升自阼階【親未在棺不忍異于生使知生來反】君大夫士一節也【並曾子問】

掌客凡賓客死致禮以喪用【死則主人為之具而殯矣喪用者饋奠之物 秋官】

右道有喪 許穆公卒于師葬之以侯禮也【男而以侯禮加一等】凡諸侯薨于朝會加一等【諸侯命有三等公為上等侯伯為中等子男為下等】死王事加二等【謂以死勤王事】於是有以袞斂【袞衣公服也謂加二等僖七年左氏傳】

曾子問曰將冠子冠者至揖讓而入聞齊衰大功之喪如之何孔子曰內喪則廢外喪則冠而不體徹饌而埽即位而哭如冠者未至則廢如將冠子而未及期日而有齊衰大功之喪則因喪服而冠曾子曰除喪不改冠乎孔子曰天子賜諸侯大夫冕弁服于大廟歸設奠服賜服于斯乎有冠醺無冠醺父沒而冠則已冠埽地而祭于禰已祭而見伯父叔父而后饗冠者【注見冠昏記】曾子問曰昏禮既納幣有吉日女之父母死則如之何孔子曰壻使人弔如壻之父母死則女之家亦使人弔父喪稱父母喪稱母父母不在則稱伯父世母壻已葬壻之伯父致命女氏曰某之子有父母之喪不得嗣為兄弟使某致命女氏許諾而弗敢嫁禮也壻免喪女之父母使人請壻弗取而后嫁之禮也女之父母死壻亦如之 曾子問曰親迎女在塗而壻之父母死如之何孔子曰女改服布深衣縞總以趨喪女在塗而女之父母死則女反如壻親迎女未至而有齊衰大功之喪則如之何孔子曰男不入改服于外次女入改服于內次然後即位而哭曾子問曰除喪則不復昏禮乎孔子曰祭過時不祭禮也又何反于初 曾子問曰女未廟見而死則如之何孔子曰不遷于祖不祔于皇姑壻不杖不菲不次歸葬于女氏之黨示未成婦也 曾子問曰取女有吉日而女死如之何孔子曰壻齊衰而弔既葬而除之夫死亦如之【注並見冠昏記】曾子問曰天子嘗禘郊社五祀之祭簠簋既陳天子崩后之喪如之何孔子曰廢曾子問曰諸侯之祭社稷俎豆既陳聞天子崩后之

喪君薨夫人之喪如之何孔子曰廢自薨比至于殯自啓至于反哭奉帥天子 曾子問曰大夫之祭鼎俎既陳籩豆既設不得成禮廢者幾孔子曰九請問之曰天子崩后之喪君薨夫人之喪君之大廟火日食三年之喪齊衰大功皆廢外喪自齊衰以下行也其齊衰之祭也尸入三飯不侑醕不酢而已矣大功酢而已矣小功總室中之事而已矣士之所以異者總不祭所祭于死者無服則祭【注並見祭通禮廢祭章】大夫士將與祭于公既視濯而父母死則猶是與祭也次于異宮既祭釋服出公門外哭而歸其他如奔喪之禮如未視濯則使人告告者反而后哭【猶亦當為由次于異宮不可以吉與凶同處也使者反而后哭不敢專已于君命也】如諸父昆弟姑姊妹之喪則既宿則與祭卒事出公門釋服而后歸其他如奔喪之禮如同宮則次于異宮【宿則與祭出門乃解祭服皆為差緩也 雜記】曾子問曰卿大夫將為尸于公受宿矣而有齊衰內喪則如之何孔子曰出舍于公館以待事禮也【吉凶不可以同處 曾子問 雜記作出舍乎公宮注重受宿則不得哭內喪同宮也】曾子問曰諸侯旅見天子入門不得終禮廢者幾孔子曰四請問之曰太廟火日食后之喪雨霑服失容則廢曾子問曰諸侯相見揖讓入門不得終禮廢者幾孔子曰六請問之曰天子崩大廟火日食后夫人之喪雨霑服失容則廢【注見覲禮及諸侯相朝禮】聘君若薨于後入竟則遂赴者未至則哭于巷衰于館受禮不受饗食赴者至則衰而出唯稍受之歸執圭復命于殯升自西階不升堂子即位不哭辯復命如聘子臣皆哭與介入北鄉哭出袒括髮入門右即位踊若有私喪則哭于館衰而居不饗食歸使衆介先衰而從之【注見聘禮】掌客賓客有喪唯芻稍之受【同上】大夫以君命出聞喪徐行而不反【同上】聘遭喪入竟則遂也不郊勞不筵几不禮賓主人畢歸禮賓唯饗餼之受不賄不禮玉不贈遭夫人世子之喪君不受使大夫受于廟其他如遭君喪遭喪將命于大夫主人長衣練冠以受【同上】掌客遭主國之喪不受饗食受牲禮【同上】賓入竟而死遂也主人為之具而殯介攝其命君弔介為主人主人歸禮幣必以用介受賓禮無辭也不饗食歸介復命柩止于門外介卒復命出奉柩送之君弔卒殯若大夫介卒亦如之士介死為之棺斂之君不弔焉若賓死未將命則既斂于棺造于朝介將命若介死歸復命唯上介造于朝若介死雖士介賓既復命往卒殯乃歸【注並見聘禮】

右因吉而凶【冠昏祭朝聘】仲遂卒于垂壬午猶繹萬入去籥【春秋經在宣八年仲遂魯莊公之子東門襄仲先日辛巳有事于大廟而仲遂卒明日而繹非也萬干舞也籥籥舞也傳曰去其有聲者廢其無聲者】仲尼曰非禮也卿卒不繹【檀弓】季文子將聘于晉求遭喪之禮以行【季孫行父也聞晉侯疾故】其人曰將焉用之文子曰 豫不虞古之善教也求而無之實難【難卒得】過求何害【所謂文子三思】八月晉侯驩卒【文六年左氏傳】公孫歸父【襄仲子】欲去三桓以張公室與公謀而聘于晉欲以晉人去之冬公薨逐東門氏【襄仲居東門故曰東門氏】子家還及笙【子家歸父字】壇帷復命于介【除地為壇而張帷介副也將去使介反命于君】既復命袒括髮【以麻約髮】即位哭三踊而出【依在國喪禮設哭位公薨故】遂奔齊【宣十八年左氏傳】楚子西子期伐吳陳侯使公孫貞子弔焉及良而卒將以尸入吳子使大宰嚭勞且辭曰以水潦之不時無乃廩然隕大夫之尸以重寡君之憂寡君敢辭上介芋尹蓋對曰寡君聞楚為不道荐伐吳國寡君使弔君之下吏無祿使人逢天之感大命隕隊絕世于良廢日共積【廢行道之日以共具殯斂所積聚之用】一日遷次【一日便遷次不敢留君命】今君命逆使人曰無以尸造于門是我寡君之命

委于草莽也且臣聞之曰事死如事生禮也於是乎有朝聘而終以尸將事之禮【朝聘道死以尸行事】又有朝聘而遭喪之禮若不以尸將命是遭喪而還也無乃不可乎吳人內之【傳言芋尹蓋知禮哀十五年左右氏傳】

以喪冠者雖三年之喪可也既冠于次入哭踊三者三乃出【言雖者明齊衰以下皆可以喪冠也始遭喪以其冠月則喪服因冠矣非其冠月待變除卒哭而冠次廬雖或為唯 雜記】大功之末可以冠子可以嫁子父小功之末可以冠子可以嫁子可以取婦已雖小功既卒哭可以冠取妻下殤之小功則不可【此皆謂可用吉禮之時父大功卒哭而可以冠子嫁子小功卒哭而可以取婦已大功卒哭而可以冠子小功卒哭而可以取妻必偕祭乃行也下殤小功齊衰之親除喪而後可為昏禮凡冠者其時當冠則因喪而冠之 同上】
喪三年不祭唯祭天地社稷為越紼而行事【不敢以卑廢尊越猶躐也紼輶車索王制】天子崩未殯五祀之祭不行既殯而祭其祭也尸入

三飯不侑醕不酢而已矣自啟至于反哭 五祀之祭不行已葬而祭祀畢獻而已 其齊衰之祭也尸入三飯不侑醕不酢而已矣大功酢而已矣小功總室中之事而已矣士之所以異者總不祭所祭于死者無服則祭【並曾子問】 曾子問曰相識有喪服可以與于祭乎【問已有喪服可以助相識者祭否】 孔子曰總不祭又何助于人曾子問曰廢喪服可以與于饋奠之事乎【謂新除喪服也】 孔子曰說衰與奠非禮也【執事于人之神為其忘哀戚也】以擯相可也 曾子問曰君薨而世子生如之何孔子曰卿大夫士從攝主北面于西階南【變于朝夕哭位也攝主上卿代君聽國政】大祝裨冕執束帛升自西階盡等不升堂命母哭【將有事宜清淨也裨冕者接神則祭服也諸侯之卿大夫所服裨冕絺飾也玄冕也士服爵弁服大祝裨冕則大夫】祝聲三告曰某之子生敢告【聲噫歆警神也某夫人之氏也】升奠幣于殯東几上哭降【几筵于殯東明繼體也】衆主人卿大夫士房中皆哭不踊【衆主人君之親也房中婦人】盡一哀反位遂朝奠【反朝夕哭位】小宰升舉幣【所主也舉而下埋之階間】三日衆主人卿大夫士如初位北面【三日負子曰也初告生時】大宰大宗大祝皆裨冕少師奉子以衰祝先子從宰宗人從入門哭者止【宰宗人詔贊君事者】子升自西階殯前北面祝立于殯東南隅祝聲三曰某之子某從執事敢見子拜稽顙哭【奉子者拜哭】祝宰宗人衆主人卿大夫士哭踊三者三降東反位皆袒子踊房中亦踊三者三襲衰杖【踊襲衰杖成子禮也】奠出【亦為朝奠】大宰命祝史以名徧告于五祀山川【因負子名之喪于禮略也】曾子問曰如已葬而世子生則如之何孔子曰大宰大宗從大祝而告于禩【告生也】三月乃名于禩以名徧告及社稷宗廟山川【並曾子問】

右因凶而吉【冠昏祭世子生】 文公二年公子遂如齊納幣納幣不書此何以書譏何譏爾譏喪娶也娶在三年之外則何譏乎喪娶【據逆在四年】三年之內不圖婚【僖公以十二月薨至此未滿二十五月又禮必先納采問名問吉乃納幣此四者皆在三年之內故云爾】娶者大吉也以為有人心焉者則宜于此焉變矣【變者變動哭泣也 公羊傳】

禮書綱目卷三十

卷三十一

<經部,禮類,通禮之屬,禮書綱目

欽定四庫全書

禮書綱目卷三十一 婺源江永撰

弔禮 凶禮十五

補

宰夫凡邦之弔事掌其戒令【詳見贈喪章】喪祝王弔則與巫前【鄭司農云喪祝與巫以桃茢執戈在王前檀弓曰君臨臣喪以巫祝桃茢執戈惡之也所以異于生也春秋傳曰楚人使公親禭公使巫以桃茢先祓殯楚人弗禁既而悔之君臨臣喪之禮故悔之春官】男巫王弔則與祝前【巫祝前王也故書前為先鄭司農云為先非也】典路凡弔于四方以路從【王乘一路典路亦以餘路從行亦以華國並春官】大司馬若師不功王弔勞士庶子則相【師敗王親弔士庶子之死者勞其傷者則相王之禮庶子卿大夫之子從軍者或謂之庶士】大僕掌三公孤卿之弔勞【王使往】小臣掌士大夫之弔勞【此亦王使往】御僕掌羣吏之逆及庶民之復與其弔勞【羣吏府史以下並夏官】女巫若王后弔則與祝前【女巫與祝前后如王禮春官】女御從世婦而弔于卿大夫之喪【從之數蓋如使者之介云天官】鬯人凡王弔臨共介鬯【以尊適卑曰臨春秋傳曰照臨敝邑鄭司農云鬯香草王行弔喪被之故曰介玄謂曲禮曰摯天子鬯王至尊介為摯致之以禮于鬼神與檀弓曰臨諸侯眡于鬼神曰有天王某甫此王適四方舍諸侯祖廟祝告其神之辭介于是進鬯】內宗凡卿大夫之喪掌其弔臨【王后弔臨諸侯而已是以言掌卿大夫云並春官】世婦掌弔臨于卿大夫之喪【王使往弔天官】寺人凡內人弔臨于外則帥而往立于其前而詔相之【從世婦所弔若哭其族親立其前者賤也賤而必詔相之者出入于王宮不可以闕于禮同上】內宗大喪序哭者【次序外內宗及命婦哭王】哭諸侯亦如之外宗大喪則叙外內朝莫哭者哭諸侯亦如之【內內外宗及外命婦並春官】君臨臣喪以巫祝桃茢執戈【詳見喪禮義】先王之制諸侯之喪士弔大夫送葬【詳見會葬章】弔者即位于門西東面其介在其東南北面西上西于門主孤西面上客臨客立于門西介立于其左東上孤降自阼階拜之【並雜記黃氏曰諸侯使人弔含禭贈臨同日畢事其序則弔在前臨在後今以弔臨為哀死者之事含禭贈是贈死者之事故舉弔臨兩條之略于此其全文則詳見贈喪章列于含禭贈之先後庶有以見禮之序云】君使

人弔徹帷主人迎于寢門外見賓不哭【詳見士喪禮】大夫之喪將大斂既鋪絞紵衾衣君至【詳見喪大記大斂章】

士之喪將大斂君不在其餘禮猶大夫也【同上】君于大夫世婦大斂焉為之賜則小斂焉【詳見喪大記殯後受弔章】大夫士既殯而君往焉【同上】君若有賜則視斂【詳見士喪禮君視斂章】君弔見尸柩而后踊【詳見喪大記殯後受弔章】

諸侯非問疾弔喪而入諸臣之家是謂君臣為讌【詳見喪禮義】

喪公弔之曰寡君承事【示亦為執事來】主人曰臨【君辱臨其臣之喪 檀弓】

諸侯弔于異國之臣則其君為主【君為之主弔臣恩為己也子不敢當主中庭北面哭不拜 小記】賓入竟而死遂也主人為之具而殯君弔介為主人【詳見喪變禮】

君遇柩于路必使人弔之【君于臣民有父母之恩

檀弓】夫人弔于大夫士主人出迎于門外【詳見喪大記】大夫

君不迎于門外入即位于堂下【同上】五廟之孫祖廟未毀雖為庶人死必赴練祥則告族之相為也宜弔不弔宜免不免有司罰之【弔謂六世以往免謂五世】至于贈賻承含皆有正焉【承讀為贈聲之誤也正正禮也 文王世子】敬弔臨賻贈睦友之道也【同上 二條含襚贈通用】

公族之罪刑于隱者弗弔弗為服哭于異姓之廟為忝祖遠之也【同上】知生者弔知死者傷知生而不知死弔而不傷知死而不知生傷而不弔【人恩各施于所知也弔傷皆謂致命辭也雜記曰諸侯使人弔辭曰寡君聞君之喪寡君使某如何不淑此施于生者傷辭未聞也說者有弔辭云皇天降灾子遭罹之如何不淑此施于死者盖本傷辭辭畢退皆哭 曲禮】弔於是日不樂【君子哀樂不同日子於是日哭則不歌】行弔之日不

飲酒食肉焉【以全哀也檀弓】弔生不及哀非禮也【詳見賵章】凡非弔喪非見國君無不答拜者【禮尚往來喪賓不答拜不自賓客也國君見士不答其拜士賤 曲禮】

入臨不翔【哀傷之無容樂 同上】有殯聞遠兄弟之喪同國則往哭之【喪無外事檀弓】哭日不歌【曲禮】喪俟事不惰弔【亦不敢故煩動也事朝夕哭時 少儀】

齊者不樂不弔【為哀樂則失正散其思也 檀弓】三年之喪雖功衰不弔自諸侯達諸士如有服而將往哭之則服其服而往【功衰既練之服諸侯服新死者之服而往哭謂所不臣也 雜記】

練則弔【父在為母功衰可以弔人者以父在故輕于出也然則凡齊衰十一月皆可以出矣 同上】既葬大功弔哭而退不聽事焉【聽猶待也事謂襲斂執紼之屬】期之喪未葬弔于鄉人哭而退不聽事焉功衰弔待事不執事【謂為姑姊妹無主殯不在己族者】小功總執事不與于禮【禮具奠也同上】曾子問曰三年之喪弔乎子曰三年之喪練不羣立不旅行【為其苟語忘哀也】君子禮以飾情三年之喪而弔哭不亦虛乎【為彼哀則不專于親也為親哀則是妄弔 曾子問】有殯聞遠兄弟之喪雖總必往【親骨肉也】非兄弟雖鄰不往【疏無親也】所識其兄弟不同居者皆弔【就其家弔之成恩舊也 檀弓】

檀弓】婦人不越疆而弔人【不通于外檀弓】婦人非三年之喪

不踰封而弔【詳見奔喪】五十無車者不越疆而弔人【氣力始衰檀弓】
死而不弔者三【謂輕身忘孝也】畏【人或時以非罪攻己己不能有以說而死】

【之者孔子畏于匡】壓【行止危險之下】溺【不乘橋船同上】
其國有君喪不敢受弔【辟其痛傷己之親如君 雜記】
大夫之喪庶子不受弔【不以賤者為有爵者主檀弓】

右弔【臨哭附】周人有喪魯人有喪周人弔魯人不弔周人曰固吾臣也使人可也魯人曰吾君也親之者也使大夫則不可也故周人弔魯人不弔以其下成康為未久也【周道尚明無愧于不往 定元年穀梁傳】邾婁子來奔喪奔喪非禮也【禮天子崩諸侯奔喪會葬諸侯薨有服者奔喪無服者會葬魯與邾婁無服故以非禮書 定十五年公羊傳】
卒孝公卒有齊怨不廢喪紀禮也【弔贈之數不有廢 僖二十七:left氏傳】
文襄之霸也君薨大夫弔卿共葬事夫人士弔大夫送葬【詳見會葬章】滕成公之喪使子叔敬叔弔進書【子叔敬叔魯宣公弟叔肸之曾孫叔弓也進書奉公弔書】子服惠伯為介【惠伯慶父玄孫之子名椒介副也】及郊為懿伯之忌不入【郊滕之近郊也懿伯惠伯之叔父忌怨也敬叔有怨于懿伯難惠侑也春秋傳曰敬叔不入】惠伯曰政也不可以叔父之私不將公事【政君命所為敬叔于昭穆以懿伯為叔父】遂入【惠伯強之乃入檀弓】
衛穆公卒晉三子自役弔焉哭于大門之

外【師還過衛故因弔之未復命故不敢成禮】衛人逆之【逆于門外設喪位】婦人哭于門內【喪位婦人哭于堂賓在門外故移在門內】送亦如之遂常以葬【至葬行此禮 成二年左氏傳】季康子卒公弔焉降禮【禮不備也言公之多妄 哀二十七:left氏傳】
季文子卒大夫入斂公在位【在阼階西鄉 襄五年左氏傳】公子益師卒公不與小斂故不書曰【禮卿佐之喪小斂大斂君皆親臨之崇恩厚也始死情之所篤禮之所崇故以小斂為文隱元:left氏傳】季孫之母死哀公弔焉曾子與子貢

弔焉閹人為君在弗內也【閹人守門者】曾子與子貢入于其廄而脩容焉【更莊飾】子貢先入閹人曰鄉者已告矣【既不敢止以言下之】曾子後入閹人辟之【見兩賢相隨彌益敬也】涉內雷卿大夫皆辟位公降一等而揖之【禮之】君子曰盡飾之道斯其行者遠矣【檀弓】公行子有子之喪右師往弔入門有進而與右師言者有就右師之位而與右師言者【公行子齊大夫右師王驪也】孟子不與右師言右師不悅曰諸君子皆與驪言孟子獨不與驪言是簡驪也【簡略也】孟子聞之曰禮朝廷不歷位而相與言不踰階而相揖也我欲行禮子敖以我為簡不亦異乎【是時齊卿大夫以君命弔各有位次若周禮凡有爵者之喪禮則職喪蒞其禁令序其事故云朝廷也歷更涉也位他人之位也右師未就位而進與之言則右師歷已之位矣右師已就位而就與之言則已歷右師之位矣孟子右師之位又不同階孟子不敢失此禮故不與右師言也 孟子】顏回死魯定公弔焉使人訪于孔子孔子對曰凡在封內皆臣子也禮君弔其臣升自東階向尸而哭其恩賜之施不有筴也【筴計也又竹器也 家語】衛靈公適魯遭季桓子之喪衛君請弔哀公辭不得命公為主客入弔康子立于門右北面公揖讓升自東階西鄉客升自西階弔公拜興哭康子拜稽顙于位有司弗辯也

今之二孤自季康子之過也【曾子問】哀公使人弔蕢尚遇諸道辟于路畫宮而受弔焉【哀公魯君也畫宮畫地為宮象】曾子曰蕢尚不如杞梁之妻之知禮也【行弔禮于野非】齊莊公襲莒于奪杞梁死焉【魯襄二十一年齊侯襲莒是也春秋傳曰杞殖華還載甲夜入且于之綈綈奪聲近或為兌梁即殖也】其妻迎其柩於路而哭之哀莊公使人弔之對曰君之臣不免于罪則將肆諸市朝而妻妾執【肆陳尸也大夫以上于朝士以下于市執拘也】君之臣免于罪則有先人之敝廬在君無所辱命【無所辱命辭不受也春秋傳曰齊侯弔諸其室檀弓】魯人有同姓死而弗弔者人曰在禮當免不免當弔不弔有司罰之如之何子之無弔也答曰吾以其疏遠也子思聞之曰無恩之甚也昔者季孫問于夫子曰【季孫季康子肥】百世之宗有絕道乎子曰繼之以姓義無絕也故同姓為宗合族為屬雖國子之尊【國子諸侯卿大夫之子】不廢其親所以崇愛也是以綴之以食序列昭穆萬世婚姻不通忠篤之道然也【孔叢子】顏淵死子曰噫天喪予天喪予【噫傷痛聲悼道無傳若天喪已也】顏淵死子哭之慟從者曰子慟矣曰有慟乎【哀傷之至不自知也】非夫人之為慟而誰為【夫人謂顏淵言其死可惜哭之宜慟非他人之比也胡氏曰痛惜之至施當其可皆性情之正也】子張死曾子有母之喪齊衰而往哭之或曰齊衰不以弔【以其無服非之】曾子曰我弔也與哉【于朋友哀痛甚而往哭之非若凡事檀弓】琴張聞宗魯死將往弔之仲尼曰齊豹之盜而孟縶之賊女何弔焉【言齊豹所以為盜孟縶所以見賊皆由宗魯昭二十五年左氏傳】齊人歸公孫敖之喪為孟氏且國故也【孟氏公孫敖家慶父為長庶故或稱孟氏敖卒則惠叔請之至今期年而猶未已為惠叔毀請且國之公族故聽其歸殯而書之】襄仲欲勿哭【怨敖取其妻】惠伯曰喪親之終也雖不能始善終可也史佚有言曰兄弟致美【各盡其美義乃終】救乏賀善弔災祭敬喪哀情雖不同母絕其愛親之道也襄仲說帥兄弟以哭之【文十五年左右氏傳】鄭人殺良霄伯有死于羊肆【羊肆市列】子產綈之枕之股而哭之斂而殯諸伯有之臣在市側者既而葬諸斗城【斗城鄭地名】子駟氏欲攻子產子皮怒之曰禮國之幹也殺有禮禍莫大焉乃止【斂葬伯有為有禮襄三十左右氏傳】陽門之介夫死【陽門宋國門名介夫甲衛士】司城子罕入而哭之哀【宋以武公諱司空為司城子罕戴公子樂甫衍之後樂喜也】晉人之覘宋者反報于晉侯曰陽門之介夫死而子罕哭之哀而民說殆不可伐也【覘闚視也】孔子聞之曰善哉覘國乎【善其知微】詩云凡民有疾扶服救之【救猶助也】雖微晉而已天下其孰能當之【微猶非也檀弓】

小宰受其含綈幣玉之事【詳見喪大記】

大宗伯以喪禮哀死亡【哀謂親者服焉疏者含綈春官】宰夫凡邦之弔事掌其戒令與其幣器財用凡所共者【弔事弔諸侯諸臣幣所用賻也器所致明器也凡喪始死弔而含綈葬而贈贈其間加恩厚則有賻焉春秋譏武氏子來求賻天官】

大府凡邦國之貢以待弔用【此九貢之財所給也給弔用給凶禮之五事同上】職喪凡國有司以王命有事焉則詔贊主人【有事謂含綈贈賻之屬詔贊者以告主人佐其受之鄭司農云凡國謂諸侯國有司謂王有司也以王命有事職喪主詔贊主人玄謂凡國有司有司從王國以王命佐】凡公有司之所共職喪令之趣其事【令令其當共物者給事之期也有司或言公或言國言國者由其君所來居其官曰公謂遣使奉命有贈之物各從其官出職喪當催督也春官】

諸侯使人弔其次含禭臨皆同日而畢事者也其次如此也【言五者相次同時 雜記】弔者即位于門西東面其介在其東南北面西上西于門【賓立門外不當門】主孤西面【主于阼階下】相者受命曰孤某使某請事客曰寡君使某如何不淑【受命受主人命以出也不言擯者喪無接賓也淑善也如何不善言君痛之甚使某弔】相出入告出曰孤某須矣【稱其君名者君薨稱子某使人知適嗣也須矣不出迎也】弔者入主人升堂西面弔者升自西階東面致命曰寡君聞君之喪寡君使某如何不淑子拜稽顙弔者降反位【子孤子也出反位者出反門外位無出字脫】含者執璧將命曰寡君使某含相者入告出曰孤某須矣【含玉為璧制其分寸大小未聞】含者入升堂致命子拜稽顙含者坐委于殯東南有葦席既葬蒲席降出反位【言降出反位則是介也春秋有既葬歸含贈禭無譏焉皆受之于殯宮】宰夫朝服即喪屨升自西階西面坐取璧降自西階以東【朝服告鄰國之禮也即就也以東藏于內也】禭者曰寡君使某禭相者入告出曰孤某須矣禭者執冕服左執領右執要入升堂致命曰寡君使某禭子拜稽顙委衣于殯東【亦于席上所委璧之北順其上下】禭者降受爵弁服于門內霤將命子拜稽顙如初受皮弁服于中庭自西階受朝服自堂受玄端將命子拜稽顙皆如初禭者降出反位【授禭者以服者賈人】宰人五人舉以東降自西階其舉亦西面【亦西面者亦禭者委衣時】上介贈執圭將命曰寡君使某贈相者入告反命曰孤某須矣陳乘黃大路于中庭北轡執圭將命客使自下由路西子拜稽顙坐委于殯東南隅宰舉以東【轡轅也自率也下謂馬也馬在路之下覲禮曰路下四亞之客給使者也入設乘黃于大路之西客入則致命矣使或為史】凡將命鄉殯將命子拜稽顙西面而坐委之宰舉璧與圭宰夫舉禭升自西階西面坐取之降自西階【凡者說不見者也鄉殯將命則將命時立于殯之西南宰夫宰之佐也此言宰舉璧與圭則上宰夫朝服衍夫字】贈者出反位于門外【乃著言門外明禮畢將更有事】上客臨曰寡君有宗廟之事不得承事使一介老某相執綽【上客弔者也臨視也言欲入視喪所不足而給助之謙也其實為哭耳】相者反命曰孤某須矣臨者入門右介者皆從之立于其左東上【入門右不自同于賓客】宗人納賓升受命于君降曰孤敢辭吾子之辱請吾子之復位客對曰寡君命某毋敢視賓客敢辭宗人反命曰孤敢固辭吾子之辱請吾子之復位客對曰寡君命某毋敢視賓客敢固辭宗人反命曰孤敢固辭吾子之辱請吾子之復位客對曰寡君命使臣某毋敢視賓客是以敢固辭固辭不獲命敢不敬從【賓三辭而稱使臣為恭也為恭者將從其命】客立于門西介立于其左東上孤降自阼階拜之升哭與客拾踊三【拜客謝厚意】客出送于門外拜稽顙【不迎而送喪無接賓之禮 雜記】族之相為也贈賻承含皆有正焉

敬弔臨贈賻睦友之道也【並詳見弔章】貨財曰賻輿馬曰贈衣服曰禭玩好曰贈玉貝曰含賻贈所以佐生也贈禭所以送死也送死不及柩尸弔生不及悲哀非禮也故贈賻及事禮之大也【荀子詳見喪禮義】諸侯相禭以後路與冕服先路與襖衣不以禭【不以己之正者施于人以彼不以為正服所用也後路貳車貳車行在後也 雜記】臣致禭于君則曰致廢衣于賈人【言廢衣不必其以斂也賈人知物善惡也周禮玉府掌凡王之獻金玉兵器文織良貨賄之物受而藏之有賈八人】敵者曰禭【少儀】

君無禭大夫士畢主人之祭服親戚之衣受之不以即陳【詳見喪大記】

君使人禭徹帷主人如初禭者左執領右執要入升致命【詳見士喪禮】

親者禭不將命以即陳【同上】

庶兄弟禭使人以將命于室主人拜于位委衣于尸東牀上【同上】

朋友綏親以進【同上】親者兄弟不以綏進【不執將命者以即陳而已少儀】有綏者則將命擯者出請入告主人待于位朋友親

綏如初儀綏者以摺則必有裳執衣如初升降自西階以東【詳見士喪禮】

臣為君喪納貨貝于君則曰納甸於有司【甸謂田野之物少儀】賵馬入廟門【以其主于死者】賵馬與其幣大白兵車不入廟門【以其主于生人也兵車革路也雖為死者來陳之于外戰伐田獵之服非盛者也周禮革路建大白以即戎】賵者既致命坐委之擯者舉之主人無親受也【喪者非尸柩之事不親也舉之舉以東同上】

若賵入告主人出門主西面賓東面將命主人拜賓坐委之【詳見士喪禮】

知生者賵【同上】弔喪弗能賵不問其所費【曲禮】

公賵玄纁束馬兩擯者出請入告主人釋杖迎于廟門外不哭

賓賵者將命擯者出請入告出告須馬入設賓奉幣兄弟賵奠可也所知則賵而不奠

書賵于方若九若七若五主人之史請讀賵若奠入告出以賓入將命如初士受羊如受馬

賵者將命擯者出請納賓如初賓奠幣如初若就器則坐奠于陳凡將禮必請而後拜送

至于邦門公使宰夫賵玄纁束主人去杖不哭由左聽命賓由右致命

知死者贈凡贈幣無常【並詳見士喪禮】右贈喪【含綏賵賵贈】文公四年夫人風氏

薨五年春王正月王使榮叔歸含且賵【珠玉曰含含口實車馬曰賵】禮也【成風莊公之

妾天子以夫人禮賵之明母以子貴故曰禮春秋左氏傳】含者何口實也【孝子所以實親

口也緣生以事死不忍虛其口天子以珠諸侯以玉大夫以碧士以貝春秋之制也文家加飯

以稻米】其言歸含且賵何【據宰咺歸兩賵不言且也連賵何之者嫌據賵言歸】兼之兼

之非禮也【且兼辭以言且知譏兼之也含言歸者時主持含來也去天者含者臣子職以至

尊行至卑事失尊之義也不從含晚言來者本不當含也主書者從含也公羊傳】含一事也

賵一事也兼歸之非正也【禮含賵綏各異人】其曰且志兼也其不言來不周事之用也【

何休曰四年夫人風氏薨九年秦人來歸僖公成風之綏最晚矣何以言來鄭君釋之曰秦自

敗于殽之後與晉為仇兵無休時乃始免繆公之喪而來君子原情不責晚用或作辭】賵以

早【乘馬曰賵乘馬所以助葬成風未葬故書早】而含已晚【已殯故言晚國有遠近皆令

及事理不通也雜記曰含者執璧將命曰寡君使某含相者入告出曰孤某須矣含者入升堂

致命子拜稽顙含者坐委于殯東南明君之于臣有含賵之義所以助喪盡恩含不必用示有

其禮穀梁傳】諸侯伐秦曹桓公卒于會【魯成十三年曹伯廬卒于師廬諡宣言桓聲之誤

也】諸侯請含【以朋友有相啖食之道】使之襲【非也襲賤者之事】襄公朝于荆康王

卒【在襄二十八年楚言荆者州言之】荆人曰必請襲【欲使襄公衣之】魯人曰非禮也

荆人強之【欲尊康王】巫先拂柩荆人悔之【巫祝桃茢君臨臣喪之禮】邾婁考公之喪

【考公隱公益之曾孫考或為定】徐君使容居來弔【弔且含】曰寡君使容居坐含進侯

玉其使容居以含【欲親含非也含不使賤者君行則親含大夫歸含耳言侯玉者時徐僭稱

王自比天子】有司曰諸侯之來辱敝邑者易則易于則于易于雜者未之有也【容居以臣

欲行君禮徐君自比天子使大夫敵諸侯有司拒之並檀弓】

王有姻喪晉使趙成如周弔且致綏【昭九 years 左氏傳】秦人來歸僖公成風之綏禮也【秦

慕諸夏欲通敬于魯因有翟泉之盟故追贈僖公并及成風本非魯方嶽同盟無有相赴弔之

制故不譏其緩而以接好為禮】諸侯相弔賀也雖不當事苟有禮焉書也以無忘舊好【送

死不及尸故曰不當事 文九:left氏傳】

其言僖公成風何兼之兼之非禮也【禮主于敬當各使一使所以別尊卑 公羊傳】 衛有大史曰柳莊寢疾獻公曰若疾革雖當祭必告【革急也】公再拜稽首請于尸曰有臣柳莊也者非寡人之臣社稷之臣也聞之死請往【急弔賢者】不釋服而往遂以綹之【脫君祭服以綹臣親賢也所以此綹之者以其不用襲也凡綹以歛 檀弓】 齊侯伐晉夷儀敝無存先登求自門出死于雷下【既入城夷儀人不服故鬪死于門屋雷下也】得其尸公三綹之【綹衣也比殯三加綹深禮厚之】與之犀軒與直盖【犀軒卿車直盖高盖】而先歸之坐引者以師哭之【停喪車以盡哀也君方為位而哭故挽喪者不敢立】親推之三【齊侯自推喪車輪三轉 定九:left氏傳】 武氏子來求賻喪事無求求賻非禮也盖通于下【嫌天子財多不當求下財少可求之故明皆不當求之

隱三年公羊傳】 歸死者曰賁歸生者曰賻曰歸之者正也求之

者非正也周雖不求魯不可以不歸魯雖不歸周不可以求之求之為言得不得未可知之辭也交譏之【穀梁傳】 伯高之喪孔氏之使者未至【謂賻賁者】冉子攝束帛乘馬而將之孔子曰異哉徒使我不誠于伯高【徒猶空也禮所以副忠信也忠信而無禮何傳乎】孔子之衛遇舊館人之喪【前日君所使舍己】入而哭之哀出使子貢說驂而賻之【賻助喪用也驂馬曰驂】子貢曰於門人之喪未有所說驂說驂于舊館無乃已重乎【言說驂大重比于門人恩為偏頗】夫子曰予鄉者入而哭之遇于一哀而出涕【遇見也舊館人恩雖輕我入哭見主人為我盡一哀是以厚恩待我我為出涕恩重宜有施惠】予惡夫涕之無從也小子行之【客行無他物可以易之者使遂以往

並檀弓】 隱公元年秋七月天王使宰咺來歸惠公仲子

之賁【宰官咺名仲子者桓公之母婦人無諡故以字配姓】賁死不及尸【尸未葬之通稱】弔生不及哀【諸侯已上既葬則縗麻除無哭位諒闇終喪】豫凶事非禮也【仲子在而來贈故曰豫凶事 左氏傳】 仲子者桓之母也喪事有賁賁者盖以馬以乘馬束帛【此道周制也以馬者謂士不備四也禮既夕曰公賁玄纁兩馬是也乘馬者謂大夫以上備四也禮大夫以上至天子皆乘四馬所以通四方也天子馬曰龍高七尺以上諸侯曰馬高六尺以上卿大夫士曰駒高五尺以上束帛謂玄三纁二玄三法天纁二法地因取足以共事】車馬曰賁貨財曰賻衣被曰綹【此道春秋制也賁猶覆也賻猶助也皆助生送死之禮綹遺也遺是助死之禮知生者賁賻知死者贈綹 公羊傳】

賁者何也乘馬曰賁衣衾曰綹貝玉曰含錢財曰賻【四馬曰乘含口實 穀梁傳】 宋景曹卒【景曹宋元公夫人小邾女季桓子外祖母】季康子使冉有弔且送葬曰以肥之得備彌甥也【彌遠也康子父之舅氏故稱彌孫】有不腆先人之產焉使求薦夫人之宰其可以稱旌繁乎【求冉有名稱舉也繁馬飾繁纓也哀二十三年左氏傳】

天子諸侯之喪斬衰者奠大夫齊衰者奠士則朋友奠不足則取于大功以下者不足則反之【詳見士喪禮陳大斂奠章】曾子問曰廢喪服可以與于饋奠之事乎孔子曰說衰與奠非禮也以擯相可也【詳見喪變禮】 天子諸侯之喪祭也不斬衰者不與祭大夫齊衰者與祭士祭不足則取於兄弟大功以下者【詳見喪大記虞祭章】

卒哭獻畢尸出門入徹主人不與【詳見卒哭祔練祥禫記】
賓執事者如弔服皆即位于門外如朝夕臨位【詳見士虞禮】
朋友虞祔而退【詳見會葬章】曾子問曰相識有喪服可以與于祭乎孔子曰總不

祭又何助于人【詳見喪變禮】

凡侍祭喪者告賓祭薦而不食【薦脯醢也吉祭告賓祭薦賓既祭而食之喪祭賓不食
雜記】宰夫三公六卿之喪與職喪帥官有司而治之凡諸大夫之喪使其旅帥有司而治之
【詳見喪大記戒臣民章】適有喪者曰比【適之也曰某願比于將命者比猶比方俱給事
】童子曰聽事【曰某願聽事于將命者童子未成人不敢當相見之禮】適公卿之喪則曰
聽役于司徒【喪憂戚無賓主之禮皆為執事來也
少儀】童子無總服聽事不麻無事則立主人之北南面【皆為】

【幼少不備禮也雖不服總猶免深衣無麻往給事也 玉藻】
士之喪胥為侍士是斂【詳見喪大記】助葬必執紼【曲禮】

右執事【助奠助祭治事】孔子之故人曰原壤其母死夫子助之沐椁【檀弓】
孔子之喪公西赤為志焉子張之喪公明儀為志焉【同上】

送葬不由徑送葬不辟塗潦【曲禮】

會葬之禮于鄙上【從竟至墓主為送葬來文五年穀梁傳】相趨也出宮而退相揖也哀次
而退相問也既封而退相見也反哭而退朋友虞祔而退【此弔者恩厚薄去遲速之節也相
趨謂相聞姓名來會喪事也相揖嘗會于他也相問嘗相惠遺也相見嘗執摯相見也附當為
祔 雜記】天子七月而葬同軌畢至【言同軌以別四夷之國】諸侯五月同盟至【同在方
嶽之盟】大夫三月同位至【古者行役不踰時】士踰月外姻至【姻猶親也
隱元年左氏傳】君若載而後弔之則主人東面而拜門右北面而踊待反而後奠【詳見士
喪禮】君于大夫將葬弔于宮及出命引之三步則止如是

者三君退朝亦如之哀次亦如之【以義奪孝子宮殯宮出謂柩已在路退去也三命引之凡
移九步君弔不必于宮朝喪朝廟也次他日賓客所受大門外舍也孝子至此而哀君或于是
弔焉檀弓】適兄弟之送葬者弗及遇主人于道則遂之於墓【詳見奔喪】

望柩不歌【曲禮】

弔于葬者必執引若從柩及壙皆執紼【示助之以力車曰引棺曰紼從柩羸者 檀弓】
臨喪則必有哀色執紼不笑【曲禮】助葬必執紼【同上】臨喪不笑【同上】弔非從
主人也四十者必執紼【言弔者必助主人之事從猶隨也成人二十以上至四十丁壯時】
鄉人五十者從反哭四十者待盈坎【非鄉人則長少皆反優遠也雜記】

乃反哭賓弔自西階曰如之何【詳見士喪禮】右會葬 文公九年二月叔孫得臣如京師辛
丑葬襄王王者不書葬此何以書不及時書過時書【重錄失時】我有往者則書【謂使大
大夫往也惡文公不自往故書葬以起大夫會之公羊傳】

天子志崩不志葬舉天下而葬一人其道不疑也志葬危不得葬也【不得備禮葬穀梁傳】

文公四年冬夫人風氏薨五年王使榮叔歸含且贈葬我小君成風王使召伯來會葬禮也【成風莊公之妾天子以夫人禮贈之明母以子貴故曰禮 左氏傳】

襄公三十有一年滕子來會葬 葬晉頃公鄭游吉弔且送葬魏獻子使士景伯詰之曰悼公之喪子西弔之蟯送葬【在襄十五年】今吾子無貳何故【弔葬共使】對曰先王之制諸侯之喪士弔大夫送葬唯嘉好聘享之事于是乎使卿晉之喪事敝邑之間先君有所助執紼矣

【紼輓索也禮送葬必執紼】若其不問雖士大夫有所不獲數矣【不得如先王禮數】靈王之喪【在襄二十九年】我先君簡公在楚我先大夫印段實往敝邑之少卿也【少年少也】王吏不討恤所無也今大夫曰女盍從舊舊有豐有省不知所從從其豐則寡君幼弱是以不共從其省則吉在此矣唯大夫圖之晉人不能詰【傳言大叔之敏 昭三十年左氏傳】文襄之霸也其務不煩諸侯君薨大夫弔卿共葬事夫人士弔大夫送葬【先王之制諸侯之喪士弔大夫送葬蓋時俗過制故文襄雖節之猶過于古 昭三年左氏傳】

齊姜薨齊侯使諸姜宗婦來送葬【宗婦同姓大夫之婦婦人越疆送葬非禮

襄二年左氏傳】葬楚康王公及陳侯鄭伯許男送葬至于西門之外諸侯之大夫皆至于墓【襄二十九:left氏傳】

凡民有喪匍匐救之【箋云匍匐言盡力也凡民于有凶禍之事鄰里尚盡力往救之況我于君子家事之難易乎 邶風谷風】凡民有喪扶服救之無服之喪也【孔子閒居】

親始死三日不舉火故鄰里為之糜粥以飲食之【詳見喪禮義】鄰有喪舂不相里有殯不巷歌【助哀也相謂送杵聲檀弓註皆所以助哀也相謂以音聲相勸 曲禮檀弓】

有死于宮中者則為之

三月不舉祭【詳見喪服總麻章】適墓不登壟【為其不敬壟冢也墓塋域 曲禮】

適墓不歌【非樂所也同上】

右哀有喪 子食于有喪者之側未嘗飽也【臨喪哀不能甘也】子于是日哭則不歌【哭謂弔哭一日之內餘哀未忘自不能歌也謝氏曰學者于此二者可見聖人性情之正也能識聖人之情性然後可以學道 論語】

子見齊衰者雖狎必變【孔子曰狎者素親狎】凶服者式之【凶服送死之衣服】

子見齊衰者冕衣裳者與瞽者見之雖少必作過之必趨【並論語】襄公十九年晉士匄帥師侵齊至穀聞齊侯卒乃還還者何善辭也何善爾大其不伐喪也此受命乎君而伐齊則何大乎其不伐喪大夫以君命出進退在大夫也【公羊傳】杞孝公卒晉悼夫人喪之【悼夫人晉平公母杞孝公姊妹】平公不徹樂非禮也【徹去也】禮為鄰國闕【禮諸侯絕期故以鄰國責之 襄二十三年左氏傳】季武子之喪曾點倚其門而歌【明已不興也 檀弓】

禮書綱目卷三十一

卷三十二

欽定四庫全書

禮書綱目卷三十二 婺源江永撰

喪禮義 凶禮十六

補

喪者亡人死謂之喪言其亡不可復得見也不直言喪何為孝子心不忍言尚書曰武王既喪知摭死者稱喪也生者哀痛之亦稱喪孝經曰孝子之喪親也是施生者也天子下至庶人俱言喪何欲言身體髮膚俱受之父母其痛一也【白虎通】

夫禮必本于天殽于地列于鬼神達于喪祭【禮運】

喪祭之禮所以明臣子之恩也喪祭之禮廢則臣子之恩薄而倍死忘生者衆矣【經解】凡不孝生于不仁愛也不仁愛生于喪祭之禮不明喪祭之禮所以教仁愛也致愛故能致喪祭春秋祭祀之不絕致思慕之心也夫祭祀致饋養之道也死且思慕饋養況于生而孝乎故曰喪祭之禮明則民孝矣故有不孝之獄則飭喪祭之禮【大戴記】

曾子曰慎終追遠民德歸厚矣【論語】

先王有大事必有禮以哀之哀樂之分皆以禮終【大事謂死喪也 樂記】先王之制禮樂人為之節哀麻哭泣所以節喪紀也【同上】喪禮忠之至也【謂哭踊袒襲也】備服器仁之至也【謂小斂大斂之衣服葬之明器】賓客之用幣義之至也【謂來賻贈禮器】孟子曰養生者不足以當大事惟送死可以當大事【事生固當愛敬然亦人道之常耳至於送死則人道之大變孝子之事親舍是無以用其力矣故尤以為大事而必誠必信不使少有後日之悔也】子路曰吾聞諸夫子喪禮與其哀不足而禮有餘也

不若禮不足而哀有餘也【喪主哀檀弓】

禮也者反本脩古不忘其初者也故凶事不詔【哭泣由中非由人也 禮器】親始死雞斯徒跣扱上衽交手哭惻怛之心痛疾之意傷腎乾肝焦肺水漿不入口三日不舉火故鄰里為之糜粥以飲食之【親父母也雞斯當為笄纚聲之誤也親始死去冠三日乃去笄纚括髮也今時始喪者邪巾緇頭笄纚之存象也徒猶空也上衽深衣之裳前五藏者腎在下肝在中肺在上舉三者之焦傷而心脾在其中矣五家為鄰五鄰為里】夫悲哀在中故形變於外也痛疾在心故口不甘味身不安美也【言人情之中外相應】三日而斂在牀曰尸在棺曰柩動尸舉柩哭踊無數惻怛之心痛疾之意悲哀志慙氣盛故袒而踊之所以動體安心下氣也婦人不宜袒故發臂擊心爵踊殷殷田田如壞牆然悲哀痛疾之至也故曰辟踊哭泣哀以送之送形而往迎精而反也【故袒而踊之言聖人制法故使之然也爵踊足不絕地辟拊心也哀以送之謂葬時也迎其精神而反謂反哭及日中虞也】其往送也望望然汲汲然如有追而弗

及也其反哭也皇皇然若有求而弗得也故其往送也如慕其反也如疑【望望瞻望之貌也慕者以其親之在前疑者不知神之來否】求而無所得之也入門而弗見也上堂又弗見也入室又弗見也亡矣喪矣不可復見已矣故哭泣辟踊盡哀而止矣【說反哭之義也】心悵焉愴焉愴焉愴焉心絕志悲而已矣祭之宗廟以鬼饗之徼幸復反也【說虞之義】成壙而歸不敢入處室居于倚廬哀親之在外也寢苦枕塊哀親之在土也【言親在外在土孝子不忍反室自安也入處室或為入宮】故哭泣無時服勤三年思慕之心孝子之志也人情之實也【勤謂憂勞問喪】喪禮哀戚之至也節哀順變也君子念始之者也【始猶生也念父母生己不欲傷其性】復盡愛之道也有禱祠之心焉【復謂招魂且分禱五祀庶幾其精氣之反】望反諸幽求諸鬼神之道也【鬼神處幽闇望其從鬼神所來】北面求諸幽之義也【鄉其所從來也禮復者升屋北面】拜稽顙哀戚之至隱也稽顙隱之甚也【隱痛也稽顙者觸地無容】飯用米貝弗忍虛也不以食道用美焉耳【尊之也食道褻米貝美】銘明旌也【神明之旌】以死者為不可別已故以其旌識之【不可別形貌不見】愛之斯錄之矣敬之斯盡其道焉耳【謂重與奠】重主道也【始死未作主以重主其神也重既虞而埋之乃後作主春秋傳曰虞主用喪練主用栗】殷主綴重焉【綴猶聯也殷人作主而聯其重縣諸廟也去顯考乃埋之】周主重徹焉【周人作主徹重埋之】奠以素器以生者有哀素之心也【哀素言哀痛無飾也凡物無飾曰素】唯祭祀之禮主人自盡焉爾豈知神之所饗亦以主人有齊敬之心也【哀則以素敬則以飾禮由人心而已】辟踊哀之至也有算為之節文也【算數也】袒括髮變也愴哀之變也去飾去美也袒括髮去飾之甚也有所袒有所襲哀之節也弁經葛而葬與神交之道也【接神之道不可以純凶天子諸侯變服而葬冠素弁以葛為環經既虞卒哭乃服受服也雜記曰凡弁經其衰侈】有敬心焉【踰時哀衰而敬生敬則服有飾大夫士三月而葬未踰時】周人弁而葬殷人舁而葬【周弁殷舁俱象祭冠而素禮同也】歆主人主婦室老為其病也君命食之也【尊者奪人易也歆歆粥也】反哭升堂反諸其所作也【親所行禮之處】主婦入于室反諸其所養也【親所饋食之處】反哭之弔也哀之至也反而亡焉失之矣于是為甚【哀痛甚】殷既封而弔周反哭而弔【封當為謂下棺也】孔子曰殷已慤吾從周【慤者得哀之始未見其甚】葬于北方北首三代之達禮也之幽之故也【北方國北也】既封主人贈而祝宿虞尸【贈以幣送死者于壙也于主人贈祝先歸】既反哭主人與有司視虞牲【日中捋虞省其牲】有司以几筵舍奠于墓左反日中而虞【所使奠墓有司來歸乃虞也舍奠墓左為父母形體在此禮其神也周禮冢人凡祭墓為尸】葬日虞弗忍一日離也【弗忍其無所歸】是日也以虞易奠【虞喪祭也】卒哭曰成事【既虞之後卒哭而祭其辭盖曰哀薦成事成祭事也祭以吉為成】是日也以吉祭易喪祭【卒哭吉祭】明日祔于祖父【祭告于其祖之廟】其變而之吉祭也比至于祔必於是日也接不忍一日未有所歸也【未無也日有所用接之虞禮所謂他用剛日者其祭祝曰哀薦曰成事】殷練而祔周卒哭而祔孔子善殷【期而神之人情檀弓】子曰孝子之喪親也哭不偯【氣竭而息聲不委曲】禮無容【觸地無容】言不文【不為文飾】服美不安【不安美飾故服緘麻】聞樂不樂【悲哀在心故不樂也】食旨不甘【旨美也不甘美味故疏食水飲】此哀戚之情也【謂上五句】三日而食教民無以死傷生毀不滅性此聖人之政也【不食三日哀毀過情滅性而死皆虧孝道故聖人制禮施教不令其殞滅】喪不過三年示民有終也【三年之喪天下達禮使不肖企及賢者俯從夫孝子有終身之憂聖人以三年為制者使人知有愛敬之限也】為之棺槨衣衾而舉之【周尸為棺周棺

為槨衣謂斂衣衾被也舉謂舉屍內于棺也】陳其簠簋而哀戚之【簠簋祭器也陳奠素器而不見親故哀戚也】擗踊哭泣哀以送之【男踊女擗祖載送之】卜其宅兆而安厝之【宅墓穴也兆塋域也葬事大故卜之】為之宗廟以鬼饗之【立廟祔祖之後則以鬼禮饗之】春秋祭祀以時思之生事愛敬死事哀戚生民之本盡矣死生之義備矣孝子之事親終矣【愛敬哀戚孝敬之始終也備陳死生之義以盡孝子之情】
孝經】禮者謹于治生死者也【謹嚴】生人之始也死人之終也

終始俱善人道畢矣故君子敬始而慎終終始如一是君子之道禮義之文也夫厚其生而薄其死是敬其有知而慢其無知也是姦人之道而倍叛之心也君子以倍叛之心接臧穀猶且羞之而況以事其所隆親乎【莊子曰臧與穀相與牧羊音義云孺子曰穀或曰穀讀為鬪穀於菟之穀穀乳也謂哺乳小兒也所隆親所厚之親也】故死之為道也一而不可得再復也臣之所以致重其君子之所以致重其親于是盡矣【以其死不可再復臣子于極重之道不可不盡也】故事生不忠厚不敬文謂之野【忠厚忠心篤厚敬文恭敬有文飾野野人不知禮者也】送死不忠厚不敬文謂之瘠【瘠薄】君子賤野而羞瘠故天子棺槨十重諸侯五重大夫三重士再重【禮記云天子之棺四重今云十重蓋以棺槨與抗木合為十重也諸侯已下與禮記多少不同未詳也】然後皆有衣衾多少厚薄之數皆有翣萋文章之等【翣萋當為萋萋鄭康成云萋萋棺之牆飾也】以敬飾之使生死終始若一足以為人願是先王之道忠臣孝子之極也【生死如一則人願皆足忠孝之極在此也】天子之喪動四海屬諸侯諸侯之喪動通國屬大夫大夫之喪動一國屬脩士脩士之喪動一鄉屬朋友【屬謂付託之使主喪也通國謂通好之國也一國謂同在朝之人也脩士士之進脩者謂上士也一鄉謂一鄉內之姻族也春秋傳曰天子七月而葬同軌畢至諸侯五月同盟至大夫三月同位至士踰月外姻至】庶人之喪合族黨動州里刑餘罪人之喪不得合族黨獨屬妻子棺槨三寸衣衾三領不得飾棺不得書行以昏殯凡緣而往埋之【墨子曰桐棺三寸葛以為緘趙簡子亦云然則厚三寸刑人之棺也喪大記云陳衣于序東三十稱今云三領亦貶損之甚也殯道死人也詩曰行有死人尚或殯之以昏殯如掩道路之死人惡之甚也凡常也緣因也言其妻子如常日所服而埋之不更經杖也】反無哭泣之節無衰麻之服無親疎月數之等夫是之謂至辱【此蓋論墨子薄葬是以至辱之道奉君父也 荀子禮論】禮者謹于吉凶不相厭者也絰續聽息之時則夫忠臣孝子亦知其閔已【絰讀為注注續即屬續也言此時知其必至于憂閔也】然而殯斂之具未有求也垂涕恐懼然而幸生之心未已持生之事未輟也卒矣然後作具之【作之具之】故雖備家必踰日然後能殯三日而成服【備豐足也】然後告遠者出矣備物者作矣故殯久不過七十日速不損五十日【此皆據士喪禮首尾三月也損減也】是何也曰遠者可以至矣百求可以得矣百事可以成矣其忠至矣其節大矣其文備矣【忠誠也節人子之節也文器用儀制也】然後月朝卜日月夕卜宅然後葬也【月朝月初也月夕月末也先卜日知其期然後卜宅此大夫之禮也士喪禮先筮宅後卜日此云月朝卜日月夕卜宅未詳也】當是時也其義止誰得行之其義行誰得止之【聖人為之節制使賢者抑情不肖者企及】故三月之葬其貌以生設飾死者也殆非直留死者以安生也【貌象也言其象以生之所設器用飾死者三月乃能備也】是致隆思慕之義也【同上】喪禮者以生者飾死者也大象其生以送其死也故如死如生如存如亡終始一也【不以死異于生亡異于存】始卒沐浴齎體飲含象生執也【儀禮齎用組體謂爪揃之屬象生時所執持之事

】不沐則濡櫛三律而止不浴則濡巾三式而止【律理髮也今秦俗猶以批髮為栗濡濕也式與拭同士喪禮尸無有不沐浴者此云盖末世多不備禮也】充耳而設瑱【士喪禮瑱用白纁】飯以生稻含以槁骨反生術矣【生稻米也槁枯也槁骨貝也術法也前說象其生此以下說反于生之法】設褻衣襲三稱搢紳而無鈎帶矣【縉與搢同扱也紳大帶也搢紳謂扱笏于帶鈎鈎帶帶之鈎所用弛張也今不復解脫故不設鈎也設衣親身之衣也士喪禮飯含後乃襲三稱明衣不在算設鞶帶搢笏禮記曰季康子之母死陳褻衣鄭玄云褻衣非上服陳之將以斂】設掩面儼目髻而不冠笄矣【士喪禮掩用練帛廣終幅長五尺儼與還同繞也士喪禮幙目用緇幙讀如縈縈與還義同但髻髮而已不加冠及笄也】書其名置于其重則名不見而柩獨明矣【士喪禮記取銘置于重案銘皆有名而此云無盖後世禮變今猶然也】薦器則冠有釐而無縱【明器之冠有加兜釐加首之形而無韜髮之縱也】甕廡虛而不實有簟席而無牀第【此言棺中不施牀第大斂小斂則皆有也】木器不成斲陶器不成物薄器不成內【薄器竹葦之器不成內謂有其外形內不可用也】竽笙具而不和琴瑟張而不均輿藏而馬反告不用也【禮記君葬用輅四綽二碑大夫葬用輅二綽二碑士葬用國車皆至葬時埋之】具生器以適墓象徙之道也【生器用器也弓矢盤盂之屬徙遷改也徙道其生時之道器當在家今以適墓以象人行不徙常行之道更徙他道也】略而不盡貌而不功趨輿而藏之金革轡靽而不入明不用也【略而不盡謂簡略而不盡備也貌形也但有形貌不加功精好也趨輿而藏之謂以輿趨于墓而藏之趨者速也速藏之意也金謂和鸞革車鞅也說文云靽所以引軸者也杜元凱云靽在馬胷或曰貌讀為邈象也】象徙道又明不用也是皆所以重哀也故生器文而不功明器貌而不用凡禮事生飾歡也送死節哀也祭祀飾敬也師旅飾威也是百王之所同古今之所一也未有知其所由來者也故壙壟其貌象室屋也【壙墓中壙冢也禮記曰適墓不登壟貌猶意也言其意以象生時也或音邈】棺槨其貌象版蓋斯象拂也【版謂車上障蔽者盖車盖也斯未詳象衍字拂即弗也爾雅釋器云輿革前謂之革後謂之弗郭云以葦為車軾及後戶也】無帟絲葛縷髮其貌以象菲帷幬尉也【無讀為幬幬覆也所以覆尸者也士喪禮幬用夷衾是也帟與褚同禮記曰素錦褚又曰褚幕丹質鄭云所以覆棺也絲葛未詳盖亦喪車之飾也或曰絲讀為綏禮記曰畫髮二皆載綏鄭云以采羽注于髮首也葛讀為魚謂以銅魚懸于池下禮記曰魚躍拂池縷讀為柳蔓字誤為縷耳菲謂編草為蔽盖古人所用障蔽門戶者今貧者猶然或曰菲當為扉隱也謂隱奧之處也或曰菲讀為扉戶扇也幬讀為幬帳之幬尉讀為尉尉網也帷帳如網也】抗折其貌以象撓茨番閼也【既夕禮陳明器于乘車之西折橫復之抗木橫三縮者五無簣窆車畢加之壙上以承抗席抗禦也所以禦止土者撓扞也茨盖屋也撓茨猶墜茨也番讀為藩籬也閼為門戶壅閼風塵者抗所以禦土折所以承抗者皆不使外物侵內有象于撓茨藩閼也】故喪禮者無他焉明死生之義送以哀敬而終周藏也故葬埋敬葬其形也祭祀敬事其神也其銘誄繫世敬傳其名也事生飾始也送死飾終也終始具而孝子之事畢聖人之道備矣刻死而附生謂之墨刻生而附死謂之惑【刻損減附增益也墨子之法惑謂惑亂其法也】殺生而送死謂之賊大象其生以送其死使死生終始莫不稱宜而好善是禮之法式也儒者是矣【同上】喪禮之凡【凡謂常道】變而飾【謂殯歛每加飾】動而遠【禮記子游曰飯于牖下小斂于戶內大斂于阼殯于客位祖于庭葬于墓所以即遠也】久而平【久則哀殺如平常也】故死之為道也不飾則惡惡則不哀尔則翫【尔與邇同翫戲狎也】翫則厭厭則忘忘則不敬一朝而喪其嚴親而所以送葬之者不哀不敬則嫌于禽獸矣君子耻之故變而飾

所以滅惡也動而遠所以遂敬也【遂成也邇則懼敬不成也】久而平所以優生也【優生養生也謂送死有禮復生有節也同上】穆公之母卒【穆公魯哀公之曾孫】使人問于曾子曰如之何【問居喪之禮曾子曾參之子名申】對曰申也聞諸申之父曰哭泣之哀齊斬之情饘粥之食自天子達【子喪父母尊卑同】布幕衛也繆幕魯也【幕所以覆棺上也繆繆也繆讀如綃衛諸侯禮魯天子禮兩言之者儻已久矣幕或為辟檀弓】君子行禮不求變俗【求猶務也不務變其故俗重本也謂去先祖之國居他國】祭祀之禮居喪之服哭泣之位皆如其國之故謹修其法而審行之【其法謂其先祖之制度若夏殷曲禮】孔子在衛司徒敬子卒夫子弔焉主人不哀夫子哭不盡聲而退 伯玉請曰衛鄙俗不習喪禮煩吾子辱相焉孔子許之掘中霤而浴【室中】毀竈而綴足襲于牀及葬毀宗而□行也【明不復有事于此也綴足不欲令僻戾葬毀宗廟而出行神位在廟門之外也】出于大門及墓男子西面婦人東面既封而歸殷道也孔子行之子游問曰君子行禮不求變俗夫子變之矣孔子曰非此之謂也喪事則從其質而已矣【家語】人死必沐浴于中霤何示潔淨反本也禮檀弓曰死于牖下沐浴于中霤飯含于牖下小斂于戶內大斂于阼階殯于客位祖于庭葬于墓所以即遠奪孝子之恩以漸也 所以有飯含何緣生食今死不欲虛其口故含用珠寶物何也有益死者形體故天子飯以玉諸侯以珠大夫以米士以貝也【並白虎通】冒者何也所以揜形也自襲以至小斂不設冒則形是以襲而後設冒也【言設冒者為其形人將惡之也襲而設冒言后衍字耳雜記】曾子曰尸未設飾故帷堂小斂而徹帷仲梁子曰夫婦方亂故帷堂小斂而徹帷【斂者動搖尸帷堂為人褻之言方亂非也仲梁子魯人也 檀弓】子曰饋奠之禮所以仁死喪也【仲尼燕居】貴本之謂文親用之謂理【文謂修飾理謂合宜】始卒之未小斂

也一也【一謂一于古也此以象太古時貴本之意故云一也謂未有威儀節文象太古時也】喪服之先散麻也一也【士喪禮始死主人散帶垂長三尺】三年之喪哭之不文也一也【不文謂無曲折也禮記曰斬衰之哭長往而不反 荀子】或問曰死三日而後斂者何也曰孝子親死悲哀志慙故匍匐而哭之若將復生然安可奪而斂之也故曰三日而後斂者以俟其生也三日而不生亦不生矣孝子之心亦盡哀矣家室之計衣服之具亦可以成矣親戚之遠者亦可以至矣是故聖人為之斷決以三日為之禮制也【匍匐猶顛蹙或作扶服問喪】崩薨三日乃小斂何奪孝子之恩以漸也一日之時屬續于口上以候氣絕二日之時尚冀其生三日之時魂氣不還終不可奈何故禮曰天子諸侯三日小斂大夫士二日小斂 尸柩者何謂也尸之為言失也陳也失氣亡神形體獨陳柩之為言究也久也不復章也 夏后氏殯于阼階殷人殯于兩楹之間周人殯于西階之上何夏后氏教以忠忠者厚也曰生吾親也死亦吾親也主人宜在阼殷人教以敬曰死者將去又不敢容也故置之兩楹之間賓主共夾而敬之周人教以文曰死者將去不可又得故賓客之也 天子七日而殯諸侯五日而殯事有大小所供者不等 所以必居倚廬何孝子哀不欲聞人之聲又不欲居故處居中門之外倚木為廬質反古也不在門外何戒不虞故也王者崩臣下服之有先後何恩有深淺遠近故制有

日月 禮庶人國君服齊衰三月王者崩京師之民喪三月何民賤故恩淺故三月而已禮不下庶人所以為民制何禮不下庶人者尊卑制度也服者恩從內發故為之制也 喪禮必制衰麻

何以副意也服以飾情情貌相配中外相應故吉凶不同服歌哭不同聲所以表中誠也腰經者以代紳帶也所以結之何思慕腸若結也必再結之何明思慕無已所以必杖者孝子失親悲哀哭泣三日不食身體羸病故杖以扶身明不以死傷生也以竹杖何取其名也竹者蹙也桐者痛也父以竹母以桐何竹者陽也桐者陰也竹何以為陽竹斷而用之質故為陽桐削而用之加人功文故為陰也【並白虎通】孔子曰拜而后稽顙頽乎其順也【此殷之喪拜也頽順也先拜賓順于事也】稽顙而后拜頽乎其至也【此周之喪拜也頽至也先觸地無容哀之至】三年之喪吾從其至者【重其尚哀戚自期如殷可】檀弓按家語子張有父之喪公明儀相焉問稽顙于孔子孔子答之如此【有子與子游立見孺子慕者有子謂子游曰予豈不知夫喪之踊也予欲去之久矣情在于斯其是也夫【喪之踊猶孺子之號慕】子游曰禮有微情者【節哭踊】有以故興物者【衰經之制】有直情而徑行者戎狄之道也【哭踊無節衣服無制】禮道則不然【與戎狄異】人喜則斯陶【陶鬱陶也】陶斯咏【咏謳也】咏斯猶【猶當為搖聲之誤也秦人猶搖聲相近】猶斯舞【手舞之】舞斯愠【愠猶怒也】愠斯戚【戚憤悲】戚斯歎【歎吟息】歎斯辟【辟拊心】辟斯踊矣【踊躍】品節斯斯之謂禮【舞踊皆有節乃成禮】人死斯惡之矣無能也斯倍之矣【無能心謂之無所復能】是故制絞衾設萎嫔為使人勿惡也【絞衾尸之飾萎嫔棺之牆飾周禮萋作柳】始死脯醢之奠將行遣而行之既葬而食之【將行將葬也葬有遣奠食反虞之祭】未有見其饗之者也自上世以來未之有舍也為使人勿倍也【舍猶廢也】故子之所刺于禮者亦非禮之訾也【訾病也】弁人有其母死而孺子泣者【言聲無節】孔子曰哀則哀矣【此誠哀】而難為繼也【失禮中】夫禮為可傳也為可繼也故哭踊有節曾子謂子思曰伋吾執親之喪也水漿不入于口者七日【言已以疾時禮而不如】子思曰先王之制禮也過之者俯而就之不至焉者跂而及之故君子之執親之喪也水漿不入于口者三日杖而后能起【為曾子言難繼以禮抑之並檀弓】天子大斂之後稱王者明臣不可一日無君也故尚書曰王麻冕黼裳此斂之後也何以知從後加王也以尚書言迎子釗不言迎王王者既殯而即繼體之位何緣民臣之心不可一日無君故先君不可得見則後君繼體矣尚書曰再拜興對乃受同明為繼體君也緣始終之義一年不可有二君也故尚書曰王釋冕反喪服吉冕受同稱王以接諸侯明已繼體為君也釋冕藏同反喪明未稱王以統事也不曠年無君故逾年乃即位改元名元年年以紀事君統其事矣而未發號令也何以言逾年即位謂改元位春秋傳曰以諸侯逾年即位亦知天子逾年即位也春秋曰元年春王正月公即位改元位也王者改元年即事天地諸侯改元即事社稷王制曰夫喪三年不祭唯祭天地社稷為越紼而行事春秋傳曰天子三年而後稱王者謂稱王統事發號令也尚書高宗諒陰三年是也論語君薨百官總已聽於冢宰三年緣孝子之心則三年不當也故三年除喪乃即位統事即位踐祚為主南面朝臣下稱王以發號令也故天子諸侯凡三年即位終始之義乃備【白虎通】子張曰書云高宗諒陰三年不言何謂也【高宗商王武丁也諒陰天子居喪之名未詳其義】子曰何必高宗古之人皆然君薨百官總已以聽于冢宰三年【言君薨則諸侯亦然總已謂總攝已職冢宰大宰也百官聽于冢宰故君得以三年不言也胡氏曰位有貴賤而生于父母無以異者故三年之喪自天子達子張非疑此也殆以為人君三年不言則臣下無所稟命禍亂或由以起也孔子告以聽于冢宰則禍亂非所憂矣論語】書曰高宗梁闇三年不言何謂梁闇也傳曰高宗居凶廬三年不言百官總已以聽于冢宰而莫之違此之謂梁闇子張曰何謂也孔子曰古者君薨王世子聽于冢宰三年不敢服先王之服履先

王之位而聽焉以民臣之義則不可一日無君矣不可一日無君猶不可一日無天也以孝子之隱乎則孝子三年弗居矣故曰義者彼也隱者此也遠彼而近此則孝子之道備矣【尚書大傳】喪禮不言者何思慕盡情也言不文者指謂士民不言而事成者國君卿大夫杖而謝賓財少恃力面垢作身不言而事具者故號哭盡情【白虎通】春秋不稱楚越之王喪禮君不稱天大夫不稱君恐民之惑也【楚越之君僭號稱王不稱其喪謂不書葬也春秋傳曰吳楚之君不書葬辟其僭號也坊記】子云升自客階受弔于賓位教民追孝也【謂反哭時既葬矣猶不由阼階不忍即父位也】未沒喪不稱君示民不爭也故魯春秋記晉喪曰殺其君之子奚齊及其君卓【沒終也春秋傳曰諸侯于其封內三年稱子至其臣子踰年則謂之君矣奚齊與卓子皆獻公之子也獻公卒其年奚齊殺明年而卓子殺矣同上】臣死亦赴告于君何此君哀痛于臣子也欲聞之加賻贈之禮諸侯薨赴告鄰國何緣鄰國欲有禮也諸侯夫人薨告天子者不敢自廢政事天子亦欲知之當有禮也諸侯薨使臣歸瑞珪於天子何諸侯以瑞珪為信今死矣嗣子諒闇三年之後乃當更爵命故歸之推讓之義禮曰諸侯薨使臣歸瑞珪于天子天子聞諸侯薨哭之何慘怛發中哀痛之至也使大夫弔之追遠重終之義也故禮檀弓曰天子哭諸侯爵弁純衣又曰遣大夫弔詞曰皇天降災子遭離之難嗚呼哀哉天王使臣某弔臣子死君往弔之何親與之共治民恩深義重厚欲躬見之【並白虎通】君臨臣喪以巫祝桃茢執戈惡之也【為有凶邪之氣在側君聞大夫之喪去樂卒事而往來襲也其已襲則止喪用桃茢桃鬼所惡茢萑苕可埽不祥】所以異于生也【生人無凶邪】喪有死之道焉【言人之死有如鳥獸死之狀鳥獸之死人賤之】先王之所難言也【聖人不明說為人甚惡之檀弓】三年之喪與新有昏者期不使以衰裳入朝非

禮也是謂君與臣同國【臣有喪昏之事而不歸反服其衰裳以入朝是謂君臣共國無尊卑也有喪昏不歸唯君耳臣有喪昏當致仕而歸】諸侯非問疾弔喪而入諸臣之家是謂君臣為讌【無故而相之是戲讌也陳靈公與孔寧儀行父數如夏氏以取殺焉禮運】郊之祭也喪者不敢哭凶服者不敢入國門敬

之至也【祭者吉禮不欲聞見凶人祭義】

大夫使受命而出聞父母之喪非君命不反者蓋重君也

凶服不敢入公門者明尊朝廷吉凶不相干

臣下有大喪不呼其門者使得終其孝道成其大禮【並白虎通】貨財曰賻輿馬曰贈衣服曰綖玩好曰贈玉貝曰含【此與公羊穀之說同玩好謂明器琴瑟笙竽之屬何休曰此皆春秋之制也賻猶覆也贈猶助也皆助生送死之禮綖猶遺也遺是助死者之禮也知生則賻賻知死則綖含之也】賻贈所以佐生也贈綖所以送死也送死不及柩尸弔生不及悲哀非禮也【皆謂葬事】故吉行五十犇喪百里賻贈及事禮之大也【即說弔贈及事因明奔喪亦宜行遠也禮記奔喪曰日行百里不以夜行荀子】贈綖何謂也贈之為言稱也玩好曰贈綖之為言遺也衣被曰綖知死者則贈綖所以助生送死追恩重終副至意也贈賻者助也所以相佐給不足也故弔辭曰知死則賻貨財曰賻車馬曰贈有不弔三何為人臣子常懷恐懼深思遠慮志在全身今乃畏厭溺死用為不義故不弔也檀弓曰不弔三畏厭溺也畏者兵死也禮曾子記曰大辱加于身皮體毀傷即君不臣士不交祭不得為昭穆之尸食不得昭穆之牲死不得葬昭穆之域也【並白虎通】三月之殯何也【此殯謂葬也】曰大之也重之也所

致隆也所致親也將舉錯之遷徙之離宮室而歸丘陵也先王恐其不文也是以繇其期足之日也【所至厚至親將徙而歸丘陵不可急遽無文飾故由其期足之日然後葬也繇讀為由由從也】故天子七月諸侯五月大夫士三月皆使其須足以容事事足以容成成足以容文文足以容備曲容備物之謂道矣【須待也謂所待之期也事喪具也道者委曲容物備物者也】齊衰苴杖居廬食粥席薪枕塊是君子之所以為憊詭其所哀痛之文也【憊變也詭異也感動其所哀痛而不可無文飾故制為齊衰苴杖之屬言本皆因于感動也】卜筮視日齊戒修塗几筵饋薦告祝如或饗之賓出主人拜送反易服即位而哭如或去之【此雜說喪祭也易服易祭服反喪服也賓出祭事畢即位而哭如神之去然也】哀夫敬夫事死如事生事亡如事存狀乎無形影然而成文【狀類也言祭祀不見鬼神有類乎無形影者然而足以成人道之節文也荀子】子思曰喪三日而殯凡附于身者必誠必信勿

之有悔焉耳矣三月而葬凡附於棺者必誠必信勿之有悔焉耳矣【言其日月欲以盡心修備之附于身謂衣衾附于棺謂明器之屬】三年以為極亡【去已久遠而除其喪】則弗之忘矣【則之言會】故君子有終身之憂【念其親】而無一朝之患【毀不滅性】故忌日不樂【謂死日言忌日不用舉吉事檀弓】喪之朝也順死者之孝心也【朝為遷柩于廟】其哀離其室也故至于祖考之廟而后行殷朝而殯於祖周朝而遂葬孔子謂為明器者知喪道矣備物而不可用也【神與人異道則不相傷】哀哉死者而用生者之器也不殆于用殉乎哉【殆幾也殺人以衛死者曰殉用其器者漸幾于用人】其曰明器神明之也【神明死者異于生人】塗車芻靈自古有之【芻靈束茅為人馬謂之靈者神之類】明器之道也【言與明器同】孔子謂為芻靈者善謂為俑者不仁不殆于用人乎哉【俑偶人也有面目機發有似生人孔子善古而非周】孔子曰之死而致死之不仁而不可為也之死而致生之不知而不可為也【之往也死之生之謂無知與有知也為猶行也】是故竹不成用瓦不成味木不成斲【成猶善也竹不可善用謂邊無膝味當作沫沫醢也】琴瑟張而不平竽笙備而不和【無宮商之調】有鐘磬而無簨簴【不縣之也橫曰簨直曰簴】其曰明器神明之也【言神明死者也神明者非人所知故其器如此】仲憲言于曾子曰【仲憲孔子弟子原憲】夏后氏用明器示民無知也【所謂致死之】殷人用祭器示民有知也【所謂致生之】周人兼用之示民疑也【言使民疑于無知與有知】曾子曰其不然乎其不然乎【非其說之非也】夫明器鬼器也祭器人器也夫古之人胡為而死其親乎【言仲憲之言三者皆非此或用鬼器或用人器並同上】或問于曾子曰夫既遣而包其餘猶既食而裹其餘與君子既食則裹其餘乎【言遣既奠而又包之是與食于人已而裹其餘將去何異與君子寧為是乎言傷廉也】曾子曰吾子不見大饗乎夫大饗既饗卷三牲之俎歸于賓館父母而賓客之所以為哀也子不見大饗乎【既饗歸賓俎所以厚之也言父母家之主今賓客之是孝子哀親之去也雜記】曾子弔于負夏【負夏衛地】主人既祖填池【祖謂移柩車去載處為行始也填池當為奠徹聲之誤也奠徹謂徹遣奠設祖奠】推柩而反之【反于載處榮曾子弔欲更始】降婦人而後行禮【禮既祖而婦人降今反柩而婦人辟之復升堂矣柩無反而反之而又降婦人蓋欲矜賓于此婦人皆非】從者曰禮與【怪之】曾子曰夫祖者且也【且未定之辭】且胡為其不可以反宿也從者又問諸子游曰禮與【疑曾子言非】子游曰飯于牖下小斂于戶內大斂于阼殯于客位祖于庭葬于墓所以即遠也故喪事有進而無退【明反柩非】曾子聞之曰多矣乎予出祖者【善子游言且服檀弓】子云喪禮每加以遠浴

于中霤飯于牖下小斂于戶大斂于阼殯于客位祖于庭葬于墓所以示遠也【遠之所以崇敬也阼或為堂】殷人弔于壙周人弔于家示民不偯也【既葬哀而哭踊于是弔之】子云死民之卒事也吾從周【周于送死尤備】以此坊民諸侯猶有薨而不葬者【坊記】喪祭械用皆有等宜【械器也皆有等級各當其可也】夫是之謂復古是王者之制也【荀子】祖于庭何盡孝子之恩也祖者始也始載于庭也乘軸車辭祖禰故名為祖載也【白虎通】禮有以多為貴者天子崩七月而葬五重八襲諸侯

五月而葬三重六襲大夫三月而葬再重四襲此以多為貴也【詳見喪大記飾棺章】有以大為貴者棺槨之厚丘封之大此以大為貴也【禮器】死乃諡之何言人行終始不能若一故據其終始後可知也士冠經曰死而諡之今也所以臨葬而諡之何因衆會欲顯揚之也天子崩臣下至南郊諡之者何以為人臣之義莫不欲褒大其君掩惡揚善者也故之南郊明不得欺天也諸侯薨世子赴告天子天子遣大夫會其葬而諡之何幼不誅貴諸侯相誅非禮也臣當受諡于君也卿大夫老歸死有諡何諡者別尊卑彰有德也卿大夫歸無過猶有祿位故有諡也夫人無諡者何無爵故無諡或曰夫人有諡夫人一國之母修閨門之內羣下亦化之故設諡以彰其善惡春秋傳曰葬宋恭姬傳曰其稱諡何賢也傳曰哀姜者何莊公夫人也卿大夫妻無諡何賤也八妾所以無諡何卑賤無所能務猶士卑小不得有諡也太子夫人無諡何本婦人隨夫太子無諡其夫人不得有諡也天子太子元士也士無諡知太子亦無諡也附庸所以無諡何卑小無爵也王制曰爵祿凡五等附庸本非爵也后夫人于何所諡之以為于朝廷朝廷本所以治政之處臣子共審諡白之于君然後加之婦人天夫故但白君而已王者巡狩崩于道歸葬何夫太子當為喪主天下皆來奔喪京師四方之中也即如是舜葬蒼梧禹葬會稽于時尚質故死則止葬不重煩擾也【並白虎通】古之葬者厚衣之以薪葬之中野不封不樹喪期無數後世聖人易之以棺槨蓋取之大過【取其過厚易】孟子自齊葬于魯反于齊止于嬴充虞請曰前日不知虞之不肖使虞敦匠事嚴虞不敢請今願竊有請也木若以美然【充虞孟子弟子嘗董治作棺之事者也嚴急也木棺木也以已通以美太美也】曰古者棺槨無度中古棺七寸槨稱之自天子達于庶人非直為觀美也然後盡于人心【度厚薄尺寸也中古周公制禮也槨稱之與棺相稱也欲其堅厚久遠非特為人觀視之美而已】不得不可以為悅無財不可以為悅得之為有財古之人皆用之吾何為獨不然【不得謂法制所不當得得之為有財言得之而又為有財也或曰為當作而】且比化者無使土親膚于人心獨無慼乎【比猶為也化者死者也慼快也言為死者不使土近其肌膚于人子之心豈不快然無所恨乎】吾聞之也君子不以天下儉其親【送終之禮所當得為而不自盡是為天下愛惜此物而薄於吾親也孟子】魯平公將見孟子嬖人臧倉曰孟子之後喪踰前喪君無見焉公曰諾【孟子前喪父後喪母踰過也言其厚母薄父也】樂正子入見曰君奚為不見孟軻也曰或告寡人曰孟子之後喪踰前喪是以不往見也曰何哉君所謂踰者前以士後以大夫前以三鼎而後以五鼎與曰否謂棺槨衣衾之美也曰非所謂踰也貧富不同也【同上】喪不慮居【謂賣宅舍以奉喪】毀不危身【謂憔悴將滅性】喪不慮居為無廟也毀不危身為無後也【檀弓】子游問喪具夫子曰稱家之有無子游曰有無惡乎齊【惡乎齊問豐省之比】夫子曰有毋過禮苟無矣斂首足形【形體】還葬【還之言便也言已斂即葬不待三月】縣棺而封【不設碑繹不備禮封當為窆下棺也春秋傳作塋】人豈有非之者哉【不責于人所不能】子思之母死于衛【子思孔子孫伯魚之子伯魚卒其妻

嫁于衛】柳若謂子思曰子聖人之後也四方于子乎觀禮子蓋慎諸【柳若衛人也見子思欲為嫁母服恐其失禮戒之嫁母齊衰期】子思曰吾何慎哉吾聞之有其禮無其財君子弗行也【謂時可行而財不足以備禮】有其禮有其財無其時君子弗行也【謂財足以備禮而時不得行者】吾何慎哉【時所止則止時所行則行無所疑也喪之禮如子贈襚之屬不踰主人】子路曰傷哉貧也生無以為養死無以為禮也孔子曰啜菽飲水盡其歡斯之謂孝斂首足形還葬而無槨稱其財斯之謂禮【還猶疾也謂不足其日月並檀弓】墨者夷之因徐辟而求見孟子孟子曰吾聞夷子墨者墨之治喪也以薄為其道也夷子思以易天下豈以為非是而不貴也然而夷子葬其親厚則是所以所賤事親也【莊子曰墨子生不歌死無服桐棺三寸而無槨是墨之治喪以薄為道也易天下謂移易天下之風俗也夷子學于墨氏而不從其教其心必有所不安者故孟子因以詰之】徐子以告夷子夷子曰儒者之道古之人若保赤子此言何謂也之則以為愛無差等施由親始徐子以告孟子孟子曰夫夷子信以為人之親其兄之子為若親其鄰之赤子乎彼有取爾也赤子匍匐將入井非赤子之罪也且天之生物也使之一本而夷子二本故也【若保赤子周書康誥篇文此儒者之言也夷子引之蓋欲援儒而入于墨以拒孟子之非已又曰愛無差等施由親始則推墨而附于儒以釋已所以厚葬其親之意皆所謂遁辭也孟子言人之愛其兄子與鄰之子本有差等書之取譬本為小民無知而犯法如赤子無知而入井耳且人物之生必各本于父母而無二乃自然之理若天使之然也故其愛由此立而推以及人自有差等今如夷子之言則是視其父母本無異于路人但其施之之序姑自此始耳非二本而何哉然其于先後之間猶知所擇則又其本心之明有終不得而息者此所以卒能受命而自覺其非也】蓋上世嘗有不葬其親者其親死則舉而委之于壑他日過之狐狸食之蠅蚋姑嘬之其類有泚睨而不視夫泚也非為人泚中心達于面目蓋歸反藁槨而掩之掩之誠是也則孝子仁人之掩其親亦必有道矣【因夷子厚葬其親而言此以深明一本之意上世謂太古也委棄也壑山水所趨也蚋蚊屬姑語助聲或曰螻蛄也嘬攢共食之也藁額也泚泚然汗出之貌睨邪視也視正視也不能不視而又不忍止視哀痛迫切不能為心之甚也非為人泚言非為他人見之而然也所謂一本者于此見之尤甚親切蓋惟至親故如此在他則雖有不忍之心而其哀痛迫切不至若此之甚矣反覆也藁土籠也槨土輦也于是歸而掩覆其親之尸此葬埋之禮所由起也此掩其親者若所當然則孝子仁人所以掩其親者必有其道而不以薄為貴矣】徐子以告夷子夷子慙然為間曰命之矣【慙然茫然自失之貌為間者有頃之間也

孟子】古之喪禮貴賤有儀上下有等天子棺槨七重諸侯

五重大夫三重士再重今墨子獨生不歌死不服桐棺三寸而無槨以為法式以此教人恐不愛人以此自行固不愛也【物皆以任力稱情為愛今以勤儉為法而為之太過雖欲饒天下更非所以為愛也】未敗墨子道【墨子是一家之事故不可以敗也崔云未壞其道】雖然歌而非歌哭而非哭樂而非樂是果類乎其生也勤其死也薄其道大轂【轂郭李皆云無閏也】使人憂使人悲其行難為也恐其不可以為聖人之道反天下之心天下不堪墨子雖獨能任奈天下何離于天下其去王遠矣【莊子】世俗之為說者曰太古薄葬棺厚三寸衣衾三領葬田不妨田故不掘也【此蓋言古之人君也三領三稱也禮記君陳衣于序東西領南上故以領言葬田不妨田言所葬之地不妨農耕也殷已前平葬無丘隴之識】亂今厚葬飾棺故掘也是不及知治道而不察于扣不扣者之所言也【謂發冢也】凡人之盜也必有

為【其意必有云為也】聖王之生民也皆使厚優而不得有餘過度【皆使寬泰知足又不得以有餘過度】故曰天下有道盜其先變乎【衣食足知榮辱】夫亂今而後反是上以無法使下以無度行知者不得慮能者不得治賢者不得使于是桀紂羣居而盜賊擊奪以危上矣【言在上位者如桀紂也】若是則有何尤扣人之墓抉人之口而求利矣哉【抉挑也抉人口取其珠也】夫太古薄葬故不扣也亂今厚葬故扣也是特姦人之誤于亂說以欺愚者夫是之謂大姦【是時墨子之徒說薄葬以惑當世故以此譏之荀子】國子高曰葬也者藏也藏也者欲人之弗得見也是

故衣足以飾身棺周于衣槨周于棺土周于槨【言皆所以為深邃人難發見之也國子高成子高也成諡也】反壤樹之哉【反復也怪不如太古也而又封樹之意在于儉非周禮也檀弓】葬于城郭外何死生別處終始異居易曰葬之中野所以絕孝子之思慕也傳曰作樂于廟不聞于墓哭泣于墓不聞于廟所以于北方何就陰也有虞氏瓦棺今以木何虞尚質故用瓦夏后氏益文故易之以塋周謂塋木相周無膠漆之用也殷人棺槨有膠漆之用周人浸文牆置翬加巧飾喪葬之禮緣生以事死生時無死亦不敢造太古之時穴居野處衣皮帶革故死衣之以薪內藏不飾中古之時有宮室衣服故衣之幣帛藏以棺槨封樹識表體以象生夏殷彌文齊之以器械至周大文緣夫婦生時同室死同葬之合葬者所以固夫婦之道也【並白虎通】大公封于營丘比及五世皆反葬于周【齊太公受封留為太師死葬于周子孫生焉不忍離也五世之後乃葬于齊齊曰營丘】君子曰樂樂其所自生禮不忘其本【言其似禮樂之義】古之人有言曰狐死正丘首仁也【正丘首正首丘也仁恩也】延陵季子適齊于其反也其長子死葬于贏博之間【季子名札魯昭二十七年吳公子札聘于上國是也季子讓國居延陵因號焉春秋傳謂延陵延州來贏博齊地今泰山縣是也】孔子曰延陵季子吳之習于禮者也往而觀其葬焉【往弔之】其坎深不至于泉【以生怨死】其斂以時服【以行時之服不改制節】既葬而封廣輪掩坎其高可隱也【亦節也輪從也隱據也封可手據謂高四尺所】既封左袒右還其封且號者三曰骨肉歸復于土命也若魂氣則無不之也無不之也【還圍也號哭且言也命猶性也】而遂行【行去也】孔子曰延陵季子之于禮也其合矣乎【並檀弓】子貢問于孔子曰殷人既定而弔于壙周人反哭而弔于家如之何孔子曰反哭之弔也喪之至也反而忘矣失之矣于斯為盛故弔之死人卒事也殷以慤吾從周殷人既練之明日而祔于祖周既卒哭之明日祔于祖祔祭神之始事也周以戚吾從殷【戚猶促也家語】子夏問曰三年之喪卒哭金革之事無辟也者禮與初有司與【疑有司初使之然】孔子曰夏后氏三年之喪既殯而致事殷人既葬而致事【致事還其職位于君周卒哭而致事】記曰君子不奪人之親亦不可奪親也此之謂乎【二者恕也孝也】子夏曰金革之事無辟也者非與【疑禮當有然】孔子曰吾聞諸老聃曰昔者魯公伯禽有為為之也【伯禽周公子封于魯有徐□作難喪卒哭而征之急王事也征之作費誓】今以三年之喪從其利者吾弗知也【時多攻取之兵言非禮也 曾子問】子夏問于夫子曰凡喪小功以上虞祔練祥之祭皆沐浴于三年之喪子則盡其情矣孔子曰豈徒祭而已哉三年之喪身有瘍則浴首有瘡則沐病則飲酒食肉毀瘠而病君子不為也毀則死者君子謂之無子且祭之沐浴為齊潔也非為飾也【家語】子路問于孔子曰魯大夫練而牀禮邪孔子曰吾不知也【練小祥也禮記日期而小祥居堊室寢有席又期而大祥居復寢中月而禫禫而牀也】子路出謂子貢曰吾以夫子為無所不知夫子徒有所不知子貢曰女何問哉子路曰由問魯

大夫練而牀禮邪夫子曰吾不知也子貢曰吾將為汝問之子貢問曰練而牀禮邪孔子曰非禮也子貢出謂子路曰女為夫子為有所不知乎夫子徒無所不知汝問非也禮居是邑不非其大夫【懼于訕上荀子】免喪之外行于道路見似目瞿聞名心瞿弔死而問疾顏色戚容必有以異于人也如此而后可以服三年之喪其餘則直道而行之是也【惻隱之心能如是則其餘齊衰以下直道而行盡自得也似謂容貌似其父母也名與親同 雜記】子夏既除喪而見【見于孔子】予之琴和之而不和彈之而不成聲【樂由人心】作而曰哀未忘也先王制禮而弗敢過也【作起】子張既除喪而見予之琴和之而和彈之而成聲作而曰先王制禮不敢不至焉【雖情異善同按家語云子夏三年之喪畢見于孔子孔子與之琴使之絃侃侃而樂作而曰先王制禮不敢不及子曰君子也閔子三年之喪畢見于孔子孔子與之琴使之絃切切而悲作而曰先王制禮弗敢過也子曰君子也子貢曰閔子哀未盡夫子曰君子也子夏哀已盡又曰君子也二者殊情而俱曰君子賜也惑敢問之孔子曰閔子哀未忘能斷之以禮子夏哀已盡能引之及禮雖均之君子不亦可乎孔子曰無體之禮敬也無服之喪哀也無聲之樂歡也】子路有姊之喪可以除之矣而弗除也孔子曰何弗除也子路曰吾寡兄弟而弗忍也孔子曰先王制禮行道之人皆弗忍也【行道猶行仁義】子路聞之遂除之【檀弓】子夏喪其子而喪其明【明目精】曾子弔之曾子哭子夏

亦哭曰天乎予之無罪也【怨天罰無罪】曾子怒曰商乎女何無罪也吾與女事夫子於洙泗之間【言有師也洙泗魯水名】退而老于西河之上【西河龍門至華陰之地】使西河之民疑女于夫子爾罪一也【言其不稱師也】喪爾親使民未有聞焉爾罪二也【言居親喪無異稱】喪爾子喪爾明爾罪三也【言隆于妻子】而曰女何無罪與子夏投其杖而拜曰吾過矣吾過矣【謝之且服罪也】吾離羣而索居亦已久矣【羣謂同門朋友也索猶散也同上】君子有終身之喪忌日之謂也忌日不用非不祥也言夫日志有所至而不敢盡其私也【忌日親亡之日忌日者不用舉他事如有時日之禁也祥善也志有所至至于親以此日亡其哀心如喪時 祭義】曾子曰父母既沒慎行其身不遺父母惡名可謂能終矣又曰父母既沒必求仁者之粟以祀之此之謂禮終【祭義詳見孝經附】

禮書綱目卷三十二

卷三十三

<經部,禮類,通禮之屬,禮書綱目

欽定四庫全書

禮書綱目卷三十三 婺源江永撰

災變禮 凶禮十七

補

膳夫大喪則不舉大荒則不舉大札則不舉天地有災則不舉邦有大故則不舉【大荒凶年大札疫癘天災日月晦食地災崩動大故寇戎之事鄭司農云大故刑殺也春秋傳曰司寇行戮君為之不舉 天官】 司服大札大荒大災素服【大荒饑饉也大災水火為害君臣素服縞冠若晉伯宗哭梁山之崩】 大司樂凡日月食四鎮五嶽崩大傀異裁諸侯薨令去樂【四鎮山之重大者謂揚州之會稽青州之沂山幽州之醫無閭冀州之霍山五嶽岱在兗州衡在豫州嶽在雍州恒在并州傀猶怪也大怪異裁謂天地奇變若星辰奔竄及震裂為害者去樂藏之也春秋傳曰壬午猶繹萬入去籥萬言入則去者不入藏之可知】 大札大凶大裁大臣死凡國之大憂令弛縣【札疫癘也凶凶年也裁水火也弛釋下之若今休兵鼓之為 並春官】

右總要 天反時為裁【寒暑易節】 地反物為妖【羣物失性】 民反德為亂亂則妖裁生故文反正為乏【文字 宣十五年左右氏傳】

小宗伯凡天地之大裁類社稷宗廟則為位【禱祈禮輕類者依其正禮而為之 春官】 鼓人救日月則詔王鼓【救日月食王必親擊鼓者聲大異春秋傳曰非日月之眚不鼓 地官】 大僕軍旅甸役贊王鼓救日月亦如之【日月食時春秋傳曰非日月之眚不鼓 夏官】 日食則天子素服而脩六官之職蕩天下之陽事月食則后素服而脩六官之職蕩天下之陰事【食者見道有虧傷也蕩蕩滌去惡穢也 昏義】 諸侯旅見天子入門日食則廢【旅衆】 如諸侯皆在而日食則從天子救日各以其方色與其兵【示奉時事將有所討也方色者東方衣青南方衣赤西方衣白北方衣黑兵未聞也】 諸侯相見揖讓入門日食則廢當祭而日食接祭而已矣如牲至未殺則廢【接祭而已不迎尸也】 大夫之祭鼎俎既陳籩豆既設日食廢【曾子問】

右天地大裁 惟時義和畔官離次俶擾天紀遐棄厥司乃季秋月朔辰弗集于房【辰日月所會房所舍之次集合也不合則日食可知】 瞽奏鼓嗇夫馳庶人走【凡日食天子伐鼓于社責上公瞽樂官樂官進鼓則伐之嗇夫主幣之官馳取幣禮天神衆人走供救日食之百役也】 義和尸厥官罔聞知【主其官而無聞知于日食之變異所以罪重】 昏迷于天象以干先

王之誅【闇錯天象言昏亂之甚干犯也胤征】莊公二十五年六月辛未朔日有食之鼓用牲于社【鼓伐鼓也用牲以祭社傳例曰非常也】非常也【非常鼓之月長歷推之辛未實七月朔置閏失所故致月錯】唯正月之朔慝未作【正月夏之四月周之六月謂正陽之月今書六月而傳云唯者明此月非正陽月也慝陰氣】日有食之于是乎用幣于社伐鼓于朝【日食歷之常也然食于正陽之月則諸侯用幣于社請救于上公伐鼓于朝退而自責以明陰不宜侵陽臣不宜掩君以示大義左氏傳】日食則曷為鼓用牲于社【據日食在天】求乎陰之道也【求責求也】以朱絲營社或曰脅之或曰為闇恐人犯之故營之【或曰者或人辭其義各異也或曰脅之與責求同義社者土地之主也月者土地之精也上繫于天而犯日故鳴鼓而攻之脅其本也朱絲營之助陽抑陰也或曰為闇者社者土地之主尊也為日光盡天闇冥恐人犯歷之故營之然此說非也記或傳者示不欲絕異記爾先言鼓後言用牲者明先以尊命責之後以臣子禮接之所以為順也不言鼓于社用牲者與禘于太廟用致夫人同嫌起用牲為非禮書者善內感懼天裁應變得禮也是後夫人遂不制通于二叔殺二嗣子也公羊傳】言日言朔食正朔也鼓用牲于社鼓禮也用牲非禮也天子救日置五麾陳五兵五鼓【麾旌旛也五兵矛戟鉞楯弓矢】諸侯置三麾陳三鼓三兵大夫擊門士擊柝言充其陽也【凡有聲皆陽事以壓陰氣柝兩木相擊充實也穀梁傳】文公十五年六月辛丑朔日有食之鼓用牲于社【傳例曰非禮也】非禮也【得常鼓之月而于社用牲為非禮】日有食之天子不舉【去盛饌】伐鼓于社【責羣陰伐猶擊也】諸侯用幣于社【社尊于諸侯故請救而不敢責之】伐鼓于朝【退自責】以昭事神訓民事君【天子不舉諸侯用幣所以事神尊卑異制所以訓民】示有等威古之道也【等威威儀之等差左氏傳】昭公十七年六月甲戌朔日有食之祝史請所用幣【禮正陽之月日食當用幣于社故請之】昭子曰日有食之天子不舉【不舉盛饌】伐鼓于社【責羣陰】諸侯用幣于社【請上公】伐鼓于朝【退自責】禮也平子禦之【禦止也】曰止也唯正月朔慝未作日有食之于是乎有伐鼓用幣禮也其餘則否大史曰在此月也【正月謂建巳正陽之月也于周為六月于夏為四月慝陰氣也四月純陽用事陰氣未動而侵陽災重故有伐鼓用幣之禮也平子以為六月非正月故大史答言在此月也】日過分而未至【過春分而未夏至】三辰有災【三辰日月星也日月相侵又犯是宿故三辰皆為災】于是乎百官降物【降物素服】君不舉辟移時【辟正寢過日食時】樂奏鼓【伐鼓】祝用幣【用幣于社】史用辭【用辭以自責】故夏書曰辰不集于房【逸書也集安也房舍也日月不安其舍則食】瞽奏鼓【瞽樂師】嗇夫馳庶人走【車馬曰馳步曰走為救日食備也】此月朔之謂也當夏四月是謂孟夏【言此六月當夏家之四月】平子弗從昭子退曰夫子將有異志不君君矣【安君之災故曰有異志同上】日食必救之何陰侵陽也故用牲于社社者衆陰之主以朱絲縈之鳴鼓攻之以陽責陰也所以必用牲者社地別神也尊之故不敢虛責也日食大水則鼓用牲于社大旱則雩祭水雨非苟虛也勅陽責下求陰道也月食救之者陰失明也救之者謂夫人擊鏡傳人擊杖庶人之妻楔搔【白虎通】梁山崩【記異也梁山在馮翊夏陽縣北】晉侯以傳召伯宗絳人曰國主山川【主謂所主祭】故山崩川竭君為之不舉【去盛饌】降服【損盛服】乘縵【車無文】徹樂【息八音】出次【舍于郊】祝幣【陳玉帛】史辭【自罪責】以禮焉【禮山川】其如此而已遂以告而從之【成五年左氏傳國語詳見因祭篇】

年不順成則天子素服乘素車食無樂【自貶損也】至于八月不雨君不舉【為旱變也此

謂建子之月不雨盖建未月也春秋之義周之春夏無雨未能成災至其秋秀實之時而無雨則雩雩而得之則書雩喜祀有益也雩而不得則書旱明災成也】年不順成君衣布搢本關梁不租山澤列而不賦土功不興大夫不得造車馬【皆為凶年變也君衣布者謂若衛文公大布之衣大帛之冠是也搢本去斑茶珮士笏也士以竹為笏飾本以象關梁不租此周禮也殷則關恒譏而不征列之言遮列也雖不賦猶為之禁不得非時取也造謂作新也並玉藻】五穀不升為大饑【升成也】一穀不升謂之嗛【嗛不足貌】二穀不升謂之饑三穀不升謂之饑四穀不升謂之康【康虛】五穀不升謂之大侵【侵傷】大侵之禮君食不兼味臺榭不塗【塗堊飾】弛侯廷道不除【弛廢也侯射侯也廢侯不燕射廷內道路不脩除】百官布而不制【官職脩列不可闕廢不更有造作】鬼神禱而不祀【周書曰大荒有禱而無祀】此大侵之禮也【襄二十四年穀梁傳】歲凶年穀不登【登成也】君膳不祭肺馬不食穀馳道不除祭事不縣大夫不食梁士飲酒不樂【皆自為貶損憂民也禮食殺牲則祭先有虞氏以首夏后氏以心殷人以肝周人以肺不祭肺則不殺也天子食日少牢朔月大牢諸侯食日特牲朔月少牢除治也不治道為妨民取蔬食也縣樂器鐘磬之屬也加食也不樂去琴瑟曲禮】國家靡敝則車不雕幾甲不組滕食器不刻鏤君子不履絲屨馬不常秣【靡敝賦稅亟也雕畫也幾附纏為沂鄂也組滕以組飾之及紵帶也詩云公徒三萬貝冑朱綬亦鎧飾也少儀】大宗伯以凶禮哀邦國之憂【哀謂救患分裁凶禮之別有五】以荒禮哀凶札【荒人物有害也曲禮曰歲凶年穀不登君膳不祭肺馬不食穀馳道不除祭事不縣大夫不食梁士飲酒不樂札讀為截截謂疫癘春官】小行人若國札喪則令賻補之若國凶荒則令賻委之【鄭司農云賻補之謂賻喪家補助其不足也若今時一室二尸則官與之棺也秋官】小宰荒受其幣玉之事【凶荒有幣玉者賓客所賻委之禮天官】

右凶札禮國有饑人人主不飧國有凍人人主不裘報囚之日人主不舉樂歲凶殺不登臺扉榭徹于侯馬不食穀馳道不除食減膳饗祭有闕故禮自行之義養民之道也孔子在齊齊大旱春饑景公問於孔子曰如之何孔子曰凶年則乘駑馬力役不興馳道不脩【馳道君行之道】祈以幣玉【君所祈請用幣及玉不用牲也】祭事不縣【不作樂也】祀以下牲【當用大牢者用少牢】此則賢君自貶以救民之禮也【家語】夏大旱公欲焚巫尪【巫尪女巫也主祈禱請雨者或以為尪非巫也瘠病之人其病上向俗謂天哀其病恐雨入其鼻故為之旱是以公欲焚之】臧文仲曰非旱備也脩城郭貶食省用務穡勸分【穡儉也勸分有無相濟】此其務也巫尪何為【僖二十一年左氏傳】歲旱穆公召縣子而問然【然之言焉也凡穆或作繆】曰天久不雨吾欲暴尪而奚若【尪者面向天覬天哀而雨之】曰天則不雨而暴人之疾子虐母乃不可與【錮疾人之所哀暴之是虐】然則吾欲暴巫而奚若曰天則不雨而望之愚婦人於以求之母乃已疏乎【已猶甚也巫主接神亦覬天哀而雨之春秋傳說巫曰在女曰巫在男曰覲周禮女巫旱暵則舞雩】徙市則奚若曰天子崩巷市七日諸侯薨巷市三日為之徙市不亦可乎【徙市者庶人之喪禮今徙市是憂戚于旱若喪檀弓】隱公六年冬京師來告饑公為之請糴于宋衛齊鄭禮也【告饑不以王命故傳言京師而不書于經也雖非王命而公共以稱命己國不足旁請鄰國故曰禮也傳見隱之賢左氏傳】

有焚其先人之室則三日哭【謂人燒其宗廟哭者哀精神之有虧傷】故曰新宮火亦三日哭【火人火也新宮火在魯成三年檀弓】諸侯旅見天子入門大廟火則廢【大廟始祖廟

宗廟皆然主于始祖耳】大廟火則從天子救火不以方色與兵諸侯相見揖讓入門大廟火則廢當祭而大廟火接祭而已矣如牲至未殺則廢大夫之祭鼎俎既陳籩豆既設君之大廟火廢【曾子問】大宗伯以凶禮哀邦國之憂以弔禮哀禍哉【禍哉謂遭水火宋大水魯莊公使人弔焉曰天作淫雨害于粢盛如何不弔廡焚孔子拜鄉人為火來者士一大夫再亦相弔之道春官】小行人若國有禍災則令哀弔之【禍災水火】大行人致

禴以補諸侯之裁【致禴凶禮之弔禮禴禮也補諸侯裁者若春秋澶淵之會謀歸宋財並秋官】

右水火成公三年二月甲子新宮災三日哭【杜曰三年喪畢宣公神主新入廟故謂之新宮書三日哭善得禮宗廟親之神靈所馮居而遇災故哀而哭之春秋】宮公之宮也【以無新宮知宣公之宮廟】曷為謂之新宮不忍言也【親之精神所依而災孝子隱痛不忍正言也謂之新宮者因新入宮易其西北角示昭穆相繼代有斷改更也】其言三日哭何【據桓僖宮災不言三日哭】廟災三日哭禮也【善得禮痛傷鬼神無所依歸故君臣素縞哭之公羊傳】新宮者禰宮也三日哭哀也其哀禮也【宮廟親之精神所馮居而遇災故以哀哭為禮】迫近不敢稱諡恭也【迫近言親禰也桓僖遠祖則稱諡】其辭恭且哀以成公為無譏矣【穀梁傳】哀公三年司鐸火【司鐸宮名】火踰公宮桓僖災【桓公僖公廟】救火者皆曰顧府【言常人愛財】南宮敬叔至命周人出御書俟于宮【敬叔孔子弟子南宮閱周人司周書典籍之官御書進于君者也使待命于宮】曰庀女而不在死【庀具也】子服景伯至命宰人出禮書【景伯子服何也宰人冢宰之屬】以待命命不共有常刑【待求之命】校人乘馬巾車脂轄【校人掌馬巾車掌車乘馬使四四相從為駕之易】百官官備府庫慎守官人肅給【國有火災恐有變難故慎為備】濟濡帷幕鬱攸從之【鬱攸火氣也濡物于水出用為濟】蒙葺公屋【以濡物冒覆公屋】自大廟始外內以悛【悛次也先尊後卑以次救之】助所不給有不用命則有常刑無赦公父文伯至命校人駕乘車【乘車公車】季桓子至御公立于象魏之外【象魏門闕】命救火者傷人則止財可為也命藏象魏【周禮正月縣教令之法于象魏使萬民觀之故謂其書為象魏】曰舊章不可亡也富父槐至曰無備而官辦者猶拾藩也【槐富父終生之後藩汁也言不備而責辦不可得】於是乎去表之橐【表火道風所向者去其橐積】道還公宮【開除道周市公宮使火無相連】宋災樂喜為司城以為政【樂喜子罕也為正卿知將有火災素戒為備火之政】使伯氏司里【伯氏宋大夫司里里宰】火所未至徹小屋塗大屋【大屋難徹就塗之】陳畚揭具綆缶【畚箕籠揭土輦綆汲索缶汲器】備水器【盆之屬】量輕重【計人力所在】蓄水潦積土塗巡丈城繕守備【巡行也丈度也繕治也行度守備之處恐因災有亂】表火道【火起則從其所趨標表之】使華臣具正徒【華臣華元子為司徒正徒役徒也司徒之所主也】令隧正納郊保奔火所【隧正官名也五縣為隧納聚郊野保守之民使隨火所起往救之】使華閱討右官官庀其司【亦華元子代元為右師討治也庀具也使具其官屬】向戌討左亦如之【向戌左師】使樂遄庀刑器亦如之【樂遄司寇刑器刑書】使皇郈命校正出馬工正出車備甲兵庀武守【皇郈皇父充石之後校正主馬工正主車使各備其官】使西鉏吾庀府守【鉏吾大宰也府六官之典】令司宮巷伯儆宮【司宮奄臣巷伯寺人皆掌宮內之事】二師令四鄉正敬享【二師左右師也鄉正鄉大夫享祀也】祝宗用馬于四墉祀盤

庚于西門之外【祝大祝宗宗人墉城也用馬祭于四城以禳火盤庚殷王宋之遠祖城積陰之氣故祀之凡天災有幣無牲用馬祀盤庚皆非禮 襄九年】 昭公十八年五月壬午宋衛陳鄭災火作子產辭晉公子公孫于東門【晉人新來未入故辭不使前也】使司寇出新客【新來聘者】禁舊客勿出于宮【為其知國情不欲令去】使子寬子上巡羣屏攝至于大宮【二子鄭大夫屏攝祭祀之位大宮鄭祖廟巡行宗廟不得使火及之】使公孫登徙大龜【登開卜大夫】使祝史徙主祔于周廟告于先君【祔廟主石函周廟厲王廟也有火災故合羣主于祖廟易救護】使府人庫人各敬其事【儆備火也】商成公儆司宮【商成公鄭大夫司宮巷伯寺人之官】出舊宮人寘諸火所不及【舊宮人先公宮女】司馬司寇列居火道【備非常也】行火所煥【煥炙也】城下之人伍列登城【為部伍登城備姦也】明日使野司寇各保其徵【野司寇縣士也火之明日四方乃聞災故戒保所徵役之人】郊人助祝史除于國北【為祭處于國北者就太陰禳火】禳火于玄冥回祿【玄冥水神回祿火神】祈于四墉【墉城也城積土陰氣所聚故祈祭之以禳火之餘災】書焚室而寬其征與之材【征賦稅也】三日哭國不市【示憂戚不會市】使行人告于諸侯宋衛皆如是陳不救火許不弔災君子是以知陳許之先亡也【不義所以亡】七月鄭子產為火故大為社【為治也】祓禳于四方振除火災禮也【振棄也 並左氏傳】 襄公三十年五月宋災冬十月晉人齊人宋人衛人鄭人曹人莒人邾人滕人薛人杞人小邾人會于澶淵宋災故【會未有言其事者此言宋災故以惡宋人不克己自責而出會求財】

春秋】為宋災故諸侯之大夫會以謀歸宋財既而無歸于宋故不書其人【左氏傳】 莊公十一年秋宋大水公使弔焉曰天作淫雨害于粢盛若之何不弔【不為天所愍弔】對曰孤實不敏天降之災又以為君憂拜命之辱【謝辱厚命】臧文仲曰宋其興乎禹湯罪已其興也悖焉【悖盛貌】桀紂罪人其亡也忽焉【忽速貌】且列國有凶稱孤禮也【列國諸侯無凶則常稱寡人】言懼而名禮其庶乎【言懼罪已名禮稱孤其庶幾于興】既而聞之曰公子御說之辭也【宋莊公子】臧孫達曰是宜為君有恤民之心【左氏傳】 廋焚孔子拜鄉人為火來者【拜謝之】拜之士壹大夫再亦相弔之道也【言拜之者為其來弔已宗伯職曰以弔禮哀禍災雜記 家語云孔子為大司寇國廋焚子退朝而之火所鄉人有自為火來者則拜之士一大夫再子貢曰敢問何也孔子曰其來者亦相弔之道吾為有司故拜之】

小祝有寇戎之事則保郊祀于社【故書祀或作禋鄭司農云謂保守郊祭諸祀及社無令寇侵犯之杜子春讀禋為祀書亦或為祀玄謂保祀互文郊社皆守而祀之彌裁兵】

都宗人若有寇戎之事則保羣神之壇【守山川丘陵墳衍之壇域】 大宗伯以凶禮哀邦國之憂以禴禮哀圍敗【同盟者合會財貨以更其所喪春秋襄三十年冬會于澶淵宋災故是其類】以恤禮哀寇亂【恤憂也鄰國相憂兵作于外為寇作于內為亂 並春官】 大行人致禴以補諸侯之裁【注見上章】小行人若國有師役則令槁禴之【故書槁為槁鄭司農云槁當為槁謂槁師也玄謂師役者國有兵寇以匱病者也使鄰國合會財貨以與之春秋定五年夏歸粟于蔡是也宗伯職曰以禴禮合圍敗並秋官】

右兵寇 狄人滅衛衛立戴公以廬于曹【廬舍也曹衛下邑戴公名申立其年卒而立文公】齊侯使公子無虧帥車三百乘甲士三千人以戍曹【無虧齊桓公子武孟也車甲之賦異于常故傳別見之】歸公乘馬祭服五稱牛羊豕雞狗皆三百與門材【歸遺也四馬曰乘衣單

復具曰稱門材使先立門戶】歸夫人魚軒【魚軒夫人車以魚皮為飾】重錦三十兩【重錦錦之熟細者以二丈雙行故曰兩三十兩三十疋也 閔二年左氏傳】

昭公六年冬叔弓如楚聘且弔敗也【弔為吳所敗】

定公五年夏歸粟于蔡【蔡為楚所圍饑乏故魯歸之粟】以周亟矜無資【亟急也】哀公二十年越圍吳趙孟降于喪食【趙孟襄子無恤時有父簡子之喪】楚隆曰三年之喪親暱之極也主又降之無乃有故乎【楚隆襄子家臣】趙孟曰黃池之役先主與吳王有質【黃池在十三年先主簡子質盟信也】曰好惡同之今越圍吳嗣子不廢舊業而敵之【嗣子襄子自謂欲敵越救吳】非晉之所能及也吾是以為降【並左氏傳】

國亡大縣邑公卿大夫士皆厭冠哭于大廟三日君不舉【軍敗失地以喪歸也厭冠今喪冠其服未聞】或曰君舉而哭于后土【后土社也檀弓】

國君去其國止之曰柰何去社稷也大夫曰柰

何去宗廟也士曰柰何去墳墓也【皆民臣殷勤之言】國君死社稷【死其所受于天子也謂見侵伐也春秋傳曰國滅君死之正也】大夫死衆士死制【死其所受于君衆謂君師制謂君教令所使為之曲禮】國有患君死社稷謂之義大夫死宗廟謂之變【變當為辯聲之誤也辯猶正也君守社稷臣衛君宗廟者患謂見圍入禮運】

右亡邑失國【鄰國國滅君出奔附見于下】楚人滅江秦伯為之降服出次不舉過數【降服素服也出次辟正寢不舉去盛饌鄰國之有禮數今秦伯過之】大夫諫公曰同盟滅雖不能救敢不矜乎吾自懼也【秦江同盟不告故不書 文四年左氏傳】衛侯出奔齊公使厚成叔弔于衛曰寡君使瘠聞君不撫社稷而越在他竟【越遠也瘠厚成叔名】若之何不弔以同盟之故使瘠敢私于執事【執事衛諸大夫】曰有君不弔【弔恤也】有臣不敏【敏達也】君不赦宥臣亦不帥職增淫發洩其若之何衛人使大叔儀【大叔儀衛大夫】對曰羣臣不佞得罪于寡君寡君不以即刑而悼棄之以為君憂君不忘先君之好辱弔羣臣又重恤之【重恤謂愍其不達也】敢拜君命之辱重拜大貺【謝重恤之賜 襄十四年左氏傳】盜殺衛侯之兄縶公如死鳥【死鳥衛地】齊侯使公孫青聘于衛遂從諸死鳥請將事辭曰亡人不佞失守社稷越在草莽吾子無所辱君命賓曰寡君命下臣于朝曰阿下執事【阿比也命已使比衛臣下】臣不敢貳【貳違命也】主人曰君若惠顧先君之好照臨敝邑鎮撫其社稷則有宗祧在【言受聘當在宗廟也】乃止【止不行聘事】衛侯固請見之【欲與青相見】不獲命以其良馬見【以為相見之禮】為未致使故也【未致使故不敢以客禮見】賓將擗【擗行夜】主人辭曰亡人之憂不可以及吾子草莽之中不足以辱從者敢辭賓曰寡君之下臣君之牧圉也若不獲扞外役是不有寡君也【有相親有】臣懼不免于戾請以除死親執鐸終夕與於燎【設火燎以備守 昭二十一年左氏傳】昭公走之齊齊侯唁公于野井【弔亡國曰唁弔死國曰弔弔喪主曰傷弔所執紼曰紼】曰柰何去魯國之社稷昭公曰喪人【自謂亡人】不佞【不善】失守魯國之社稷執事以羞【謙自比齊下執事言以羞及君】再拜頹【頹者猶今叩頭矣謝見唁也】高子執簞食【簞 器也圓曰簞方曰筥食即下所致糗也】與四脰脯【屈曰胸申曰脰】國子執壺漿【壺禮器腹方口圓曰壺反之曰方壺有爵飾】曰吾寡君聞君在外餽饗未就【餽熟食饗熟肉未就未成也解所以致

糗意】敢致糗于從者【糗糒也謙不敢斥魯侯故言從者】昭公曰君不忘先君延及喪人錫之以大禮再拜稽首以衽受【衽衣下裳當前者乏器謙不敢求索】高子曰有夫不祥【猶曰人皆有夫不善】君無所辱大禮【禮臣受君錫答拜謂之辱高子見昭公拜辱大卑故曰君無辱大禮】昭公蓋祭而不嘗【食必祭者謙不敢便嘗示有所先不嘗者待禮讓故也】景公曰寡人有不腆先君之服未之敢服【腆厚也服謂齊侯所著衣服也言未敢服者見魯侯乃敢服之謙辭也禮天子朝皮弁夕玄端朝服以聽朝玄端以燕皮弁以征不義取禽獸行射諸侯朝朝服夕深衣玄端以燕裨冕以朝天子以祭其祖禰卿大夫冕服而助君祭朝服祭其祖禰士爵弁黻衣裳以助公祭玄端以祭其祖禰】有不腆先君之器【器謂上所執簠壺】未之敢用敢以請【請行禮】昭公曰喪人不佞失守魯國之社稷執事以羞敢辱大禮敢辭【不敢當大禮故敢辭】景公曰寡人有不腆先君之服未之敢服有不腆先君之器未之敢用敢固以請昭公曰以吾宗廟之在魯也【以我守宗廟在魯時】有先君之服未之能以服有先君之器未之能以出敢固辭【已有時未能以事人今已無有義不可以受人之禮】景公曰寡人有不腆先君之服未之敢服有不腆先君之器未之敢用請以饗乎從者【欲令受之故益謙言從者】昭公曰喪人其何稱【行禮賓主當各有所稱時齊侯以諸侯遇禮接昭公昭公自謙失國不敢以故稱自稱故執謙問之】景公曰孰君而無稱【猶曰誰為君者而豈無所稱乎昭公非君乎】昭公於是噉然而哭【噉然哭聲貌感景公言而自傷】諸大夫皆哭【魯諸大夫從昭公者】既哭以人為菑【菑周埒坦也所以分別內外衛威儀今大學辟雍作側字】以幣為席【幣車覆芑】以輦為几以遇禮相見【以諸侯出相遇之禮相見】孔子曰其禮與其辭足觀矣【言昭公素能如此禍不至是昭二十五年公羊傳】

大史典禮執簡記奉諱惡【簡記策書也諱先王名惡忌日若子卯王制】

諸侯子卯稷食菜羹【忌日貶也玉藻】

子卯不樂【紂以甲子死桀以乙卯死王者謂之疾日不以舉樂為吉事所以自戒懼檀弓】辰在子卯謂之疾日【疾惡也紂以甲子喪桀以乙卯亡故國君以為忌日】君徹宴樂學人舍業為疾故也【昭九:left氏傳】朝夕哭不辟子卯【子卯桀紂亡日凶事不辟吉事闕焉士喪禮】右子卯莊公二十有二年春王正月肆大省肆者何跌也【跌過度】大省者何災省也【謂子卯日也夏以卯日亡殷以子日亡先王常以此日省吉事不忍舉又大自省勅得無獨有此行乎常若聞災自省故曰災省也】肆大省何以書譏何譏爾譏始忌省也【時魯有夫人喪忌省日不哭省日本以忌吉事不以忌凶事故禮哭不辟子卯所以專孝子之思也不與念母而譏忌省者本不事母則已不當忌省公羊傳】

禮書綱目卷三十三

卷三十四

欽定四庫全書

禮書綱目卷三十四 婺源江永撰

祭法 吉禮一

補

祭法有虞氏禘黃帝而郊嚳祖顓頊而宗堯夏后氏亦禘黃帝而郊鯀祖顓頊而宗禹殷人禘嚳而郊冥祖契而宗湯周人禘嚳而郊稷祖文王而宗武王【禘郊祖宗謂祭祀以配食也此禘謂祭昊天於圜丘也祭上帝於南郊曰郊祭五帝五神於明堂曰祖宗祖宗通言爾下有禘郊祖宗孝經曰宗祀文王於明堂以配上帝明堂月令春曰其帝太昊其神句芒夏曰其帝炎帝其神祝融中央曰其帝黃帝其神后土秋曰其帝少昊其神蓐收冬曰其帝顓頊其神玄冥有虞氏以上尚德禘郊祖宗配用有德者而已自夏以下稍用其姓代之先後之次有虞氏夏后氏宜郊顓頊殷人宜郊契郊祭一帝而明堂祭五帝小德配寡大德配衆亦禮之殺也】燔柴於泰壇祭天也瘞埋於泰折祭地也用騂犢【壇折封土為祭處也壇之言坦也坦明貌也折照晢也必為炤明之名尊神也地陰祀用黝牲與天俱用犢連言爾】埋少牢於泰昭祭時也相近於坎壇祭寒暑也王宮祭日也夜明祭月也幽宗祭星也雩宗祭水旱也四坎壇祭四方也山林川谷丘陵能出雲為風雨見怪物皆曰神有天下者祭百神諸侯在其地則祭之亡其地則不祭【昭明也亦謂壇也時四時也亦謂陰陽之神也埋之者陰陽出入於地中也凡此以下皆祭用少牢相近當為禳祈聲之誤也禳猶卻也祈求也寒暑不時則或禳之或祈之寒於坎暑於壇王宮曰壇王君也日稱君宮壇營域也夜明亦謂月壇也宗皆當為祭字之誤也幽祭亦為星壇也星以昏始見祭之言祭也雩祭亦為水旱壇也雩之言吁嗟也春秋傳曰日月星辰之神則雪霜風雨之不時于是乎祭之山川之神則水旱厲疫之不時于是乎祭之四方即謂山林川谷丘陵之神也祭山林丘陵於壇川谷於坎每方各為坎為壇怪物雲氣非常見者也有天下謂天子也百者假成數也】大凡生於天地之間者皆曰命其萬物死皆曰折人死曰鬼此五代之所不變也【生時形體異可同名至死腐為野土異其名嫌同也折棄敗之言也鬼之言歸也五代謂黃帝堯舜禹湯周之禮樂所存法也】七代之所更立者禘郊宗祖其餘不變也【七代通數顓頊及嚳也所不變者則數其法而已變之則通數所不法為記者之微意也少昊氏脩黃帝之書後王無所取焉 祭法】 大宗伯之職掌建邦之天神人鬼地示之禮以佐王建保邦國【建立也立天神地祇人鬼之禮者謂祀之祭之享之禮吉禮是也保安也所以佐王立安邦國者主謂凶禮賓禮軍禮嘉禮也曰吉禮于上承以立安邦國者互以相成明尊鬼神重人事】以吉禮事邦國之鬼神示【事謂祀之祭之享之故書吉或為告杜子春云書為告禮者非是當為吉禮書亦多為吉禮吉禮之別十有二】以禋祀祀昊天上帝以實柴祀日月星辰以樛燎祀司中司命飆師雨師【禋之言煙周人尚臭煙氣之臭聞者樛積也詩曰芼芼棫樸薪之樛之三祀皆積柴實牲體焉或有玉帛燔燎而升煙所以報陽

也鄭司農云昊天上帝也昊天上帝樂以雲門實柴實牛柴上也故書實柴或為賓柴司中三能三階也司命文昌宮星風師箕也雨師畢也玄謂昊天上帝冬至於圜丘所祀天皇大帝星謂五緯辰謂日月所會十二次司中司命即文昌第五第四星或曰中能上能也祀五帝亦用實柴之禮云】以血祭祭社稷五祀五嶽以貍沈祭山林川澤以鬴辜祭四方百物【不言祭地此皆地祇祭地可知也陰祀自血起貴氣臭也社稷土穀之神有德者配食焉共工氏之子曰句龍食於社有厲山氏之子曰柱食於稷湯遷之而祀棄故書祀作禋鬴為罷鄭司農云禋當為祀書亦或作祀五祀五色之帝於王者宮中曰五祀罷辜披磔牲以祭若今時磔狗祭以止風玄謂此五祀者五官之神在四郊四時迎五行之氣於四郊而祭五德之帝亦食此神焉少昊氏之子曰重為句芒食於木該為蓐收食於金脩及熙為玄冥食於水顓頊氏之子曰犁為祝融后土食於火土五嶽東曰岱宗南曰衡山西曰華山北曰恒山中曰嵩高山不見四寶者四寶五嶽之匹或省文祭山林曰貍川澤曰沈順其性之含藏鬴鬴牲胷也鬴而磔之謂磔攘及蜡祭郊特牲曰八蜡以祀四方四方年不順成八蜡不通以謹民財也又曰蜡之祭也主先嗇而祭司嗇也祭百種以報嗇也饗農及郵表畷禽獸仁之至義之盡也】以肆獻裸享先王以饋食享先王以祠春享先王以禴夏享先王以嘗秋享先王以烝冬享先王【宗廟之祭有此六享肆獻裸饋食在四時之上則是祫也禘也肆者進所解牲體謂薦孰時也獻獻醴謂薦血腥也裸之言灌灌以鬱鬯謂始獻尸求神時也郊特牲曰魂氣歸於天形魄歸於地故祭所以求諸陰陽之義也殷人先求諸陽周人先求諸陰灌是也祭必先灌乃後薦腥薦孰於祫逆言之者與下共文明六享俱然祫言肆獻裸禘言饋食者著有黍稷互相備也魯禮三年喪畢而祫於太祖明年春禘於羣廟自爾以後五年而再殷祭一祫一禘春官】天子祭天地祭四方祭山川祭五祀歲徧諸侯方祀祭山川祭五祀歲徧大夫祭五祀歲徧士祭其先【祭四方謂祭五官之神於四郊也句芒在東祝融后土在南蓐收在西玄冥在北詩云來方禋祀方祀者各祭其方之官而已五祀戶竈中霤門行也此盖殷時制也祭法曰天子立七祀諸侯立五祀大夫立三祀士立二祀謂周制也曲禮】天子祭天地諸侯祭社稷大夫祭五祀【五祀謂司命也中霤也門】

【也行也厲也此祭謂大夫有地者其無地祭三耳】天子祭天下名山大川五嶽視三公四瀆視諸侯【視視其牲器之數】諸侯祭名山大川之在其地者【魯人祭泰山晉人祭河是也】天子諸侯祭因國之在其地而無主後者【謂所因之國先王先公有功德宜享世祀今絕無後為之祭主者昔夏后氏郊鯀至杞為夏後而更郊禹晉侯夢黃熊入國而祀夏郊此其禮也王制】禮不王不禘王者禘其祖之所自出以其祖配之諸侯及其大祖大夫士有大事省于其君于祫及其高祖【大傳詳見天子諸侯廟享篇】天下有王分地建國置都立邑設廟祧壇墀而祭之乃為親疏多少之數是故王立七廟一壇一墀曰考廟曰王考廟曰皇考廟曰顯考廟曰祖考廟皆月祭之遠廟為祧有二祧享嘗乃止去祧為壇去壇為墀壇墀有禱焉祭之無禱乃止去墀曰鬼諸侯立五廟一壇二墀曰考廟曰王考廟曰皇考廟皆月祭之顯考廟祖考廟享嘗乃止去祖為壇去壇為墀壇墀有禱焉祭之無禱乃止去墀為鬼大夫立三廟二壇曰考廟曰王考廟曰皇考廟享嘗乃止顯考祖考無廟有禱焉為壇祭之去壇為鬼適士二廟一壇曰考廟曰王考廟享嘗乃止顯考無廟有禱焉為壇祭之去壇為鬼官師一廟曰考廟王考無廟而祭之去王考為鬼庶士庶人無廟死曰鬼【祭法詳見宗廟篇】天子七廟三昭三穆與大祖之廟而七諸侯五廟二昭二穆與大祖之廟而五大夫三廟一昭一穆與大祖

之廟而三士一廟庶人祭於寢【王制詳見宗廟篇】天子植祫禘祫嘗祫烝諸侯祫則不禘禘則不嘗嘗則不烝烝則不祫諸侯祫植禘一植一祫嘗祫烝祫【王制詳見廟享篇】武王末受命周公成文武之德追王大王王季上祀

先公以天子之禮斯禮也達乎諸侯大夫及士庶人父為大夫子為士葬以大夫祭以士父為士子為大夫葬以士祭以大夫【末猶老也追王大王王季者以王迹起焉先公組紃以上至后稷也斯禮達于諸侯大夫士庶人者謂葬之從死者之爵祭之用生者之祿也 中庸】父為士子為天子諸侯則祭以天子諸侯其尸服以士服【祭以天子諸侯養以子道也尸服士服父本無爵子不敢以己爵加之嫌於卑之】父為天子諸侯子為士祭以士其尸服以士服【謂父以罪誅尸服以士服不成為君也天子之子當封為王者後以祀其受命之祖云為士則擇其宗之賢者若微子者不必封其子為王者後及所立為諸侯者祀其先君以禮卒者尸服天子諸侯之服如遂無所封立則尸也祭也皆如士不敢僭用尊者衣物 喪服小記】自天子達於庶人喪從死者祭從生者支子不祭【從死者謂衣衾棺槨從生者謂奠祭之牲器 王制】支子不祭祭必告於宗子【不敢自專謂宗子有故支子當攝而祭者也五宗皆然 曲禮】庶子不祭祖【小兒詳見祭義】庶子不祭禩【同上】庶子不祭殤與無後者殤與無後者從祖祔食【不祭殤者父之庶也不祭無後者祖之庶也此二者當從祖祔食而已不祭祖無所食之也共其牲物而宗子主其禮焉祖庶之殤則自祭之凡所祭殤者惟適子耳無後者謂昆弟諸父也宗子之諸父無後者為禩祭之小記】若富則具二牲獻其賢者於宗子【賢猶善也】夫婦皆齊而宗敬焉【當助祭於宗子之家】終事而后敢私祭【祭其祖禩 內則】曾子問曰宗子為士庶子為大夫其祭也如之何孔子曰以上牲祭於宗子之家【貴祿重宗也上牲大夫少牢】祝曰孝子某為介子某薦其常事【介副也不言庶使若可以祭然】若宗子有罪居於他國庶子為大夫其祭也祝曰孝子某使介子某執其常事【此之謂宗子攝大夫】攝主不厭祭不旅不假不綏祭不配【皆辟正主厭厭飫神也厭有陰有陽迎尸之前祝酌奠奠之且饗是陰厭也尸謏之後徹薦俎敦設於西北隅是陽厭也此不厭者不陽厭也不旅不旅酬也假讀為嘏不嘏不嘏主人也不綏祭謂今主人也綏周禮作墮不配者祝辭不言以某妃配某氏】布奠於賓賓奠而不舉【布奠謂主人酬賓奠饌於薦北賓奠謂取饌奠於薦南也此酬之始也奠之不舉止旅】不歸肉【且俎也諸與祭者留之共燕】其辭於賓曰宗兄宗弟宗子在他國使某辭【辭猶告也宿賓之辭與宗子為列則曰宗兄若宗弟昭穆異者曰宗子而已其辭若云宗兄某在他國使某執其常事使某告曾子問】曾子問曰宗子去在他國庶子無爵而居者可

以祭乎孔子曰祭哉【有子孫存不可以乏先祖之祀】請問其祭如之何孔子曰望墓而為壇以時祭【不祭於廟無爵者賤遠辟正主】若宗子死告於墓而後祭於家【言祭於家容無廟也】宗子死稱名不言孝【孝宗子之稱不敢與之同其辭但言子某薦其常事】身沒而已【至子可以稱孝】子游之徒有庶子祭者以此【以用也用此禮祭也】若義也【若順】今之祭者不首其義故誣於祭也【首本也誣猶妄也 同上】王下祭殤五適子適孫適曾孫適玄孫適來孫諸侯下祭三大夫下祭二適士及庶人祭子而止【祭適殤者重適也祭適殤於廟之奧謂之陰厭王子公子祭其適殤於其黨之廟大夫以下庶子祭其適殤於宗子之家皆當室之白謂之陽厭凡庶殤不祭 祭法】孔子曰有陰厭有陽厭【言祭殤之禮有於

陰厭之者有於陽厭之者】曾子問曰殤不附祭何謂陰厭陽厭【耐當為備聲之誤也言殤乃不成人祭之不備禮而云陰厭陽厭乎此失孔子指也祭成人始設奠於奧迎尸之前謂之陰厭尸饗之後改饌於西北隅謂之陽厭殤則不備】孔子曰宗子為殤而死庶子弗為後也【族人以其倫代之明不序昭穆立之廟其祭之就其祖而已代之者主其禮】其言祭特性【尊宗子從成人也凡殤則特豚自卒哭成事之後為吉祭】祭殤不舉無胾無玄酒不告利成【此其無尸及所降也其他如成人舉肺脊胾利成禮之施於尸者】是謂陰厭【是宗子而殤祭之於奧之禮小宗為殤其祭禮亦如之】凡殤與無後者祭於宗子之家當室之白尊於東房是謂陽厭【凡殤謂庶子之適也或昆弟之子或從父昆弟無後者如有昆弟及諸父此則今死者皆宗子大功之內親共祖禰者言祭於宗子之家者為有異居之道也無廟者為墮祭之親者共其牲物宗子皆主其禮當室之白尊於東房異於宗子之為殤當室之白謂西北隅得尸明者也明者曰陽凡祖廟在小宗之家小宗祭之亦然宗子之適亦為凡殤過此以往則不祭也祭適者天子下祭五諸侯下祭三大夫下祭二士以下祭子而止 曾子問】慈母與妾母不世祭也【以其非正春秋傳曰於子祭於孫止 小記】王為羣姓立社曰大社王自為立社曰王社諸侯為百姓立社曰國社諸侯自為立社曰侯社大夫以下成羣立社曰置社【詳見地示篇】王為羣姓立七祀曰司命曰中霤曰國門曰國行曰泰厲曰戶曰竈王自為立七祀諸侯為國立五祀曰司命曰中霤曰國門曰國行曰公厲諸侯自為立五祀大夫立三祀曰族厲曰門曰行適士立二祀曰門曰行庶士庶人立一祀或立戶或立竈【同上】夫聖王之制祭祀也法施於民則祀之以死勤事則祀之以勞定國則祀之能禦大災則祀之能捍大患則祀之是故厲山氏之有天下也其子曰農能殖百穀夏之衰也周棄繼之故祀以為稷共工氏之霸九州也其子曰后土能平九州故祀以為社帝嚳能序星辰以著衆堯能賞均刑法以義終舜勤衆事而野死鯀障鴻水而殛死禹能脩鯀之功黃帝正名百物以明民共財顓頊能脩之契為司徒而民成冥勤其官而水死湯以寬治民而除其虐文王以文治武王以武功去民之菑此皆有功烈於民者也及夫日月星辰民所瞻仰也山陵川谷丘陵民所取財用也非此族也不在祀典【春秋傳曰封為上公祀為大神厲山氏炎帝也起於厲山或曰有烈山氏棄后稷名也共工氏無錄而王謂之霸在大昊炎帝之間著衆謂使民興事知休作之期也賞善謂禪舜封禹稷等也能刑謂去四凶義終於既禪二十八載乃死也野死謂征有苗死於蒼梧也殛死謂不能成其功也明民謂使之衣服有章也民成謂知五教之禮也冥契六世之孫也其官玄冥水官也虐菑謂桀紂也烈業也族猶類也祀典謂祭祀也祭法】凡祭有其廢之莫敢舉也有其舉之莫敢廢也【為其瀆神也廢舉謂若殷廢農祀棄後不可復廢棄祀農也後有德者繼之不嫌也】非其所祭而祭之名曰淫祀淫祀無福【妄祭神不饗曲禮】

海鳥曰爰居止於魯東門之外二日【爰居禚縣也東門城東門也】臧文仲使國人祭之【文仲不知以為神也】展禽曰越哉臧孫之為政也【越迂也言其迂濶不知政要】夫祀國之大節也【節制也】而節政之所成也【言節所以成政】故慎制祀以為國典【典法也】今無故而加典非政之宜也【加益也謂以祭鳥益國法也】夫聖人之制祀也法施於民則祀之【謂五帝殷契周文也】以死勤事則祀之【殷冥水死周棄山死是也】以勞定國則祀之【虞幕夏杼殷上甲微周高圉大王也】能禦大災則祀之【夏禹是也】能扞大患則祀之【殷湯周武是也】非是族也不在祀典【族類也】昔烈山氏之有天下也【烈山

氏炎帝之號也起於烈山祭法以烈山為厲山】其子曰柱能殖百穀百蔬【柱為后稷自夏以上祀之草實曰蔬】夏之興也周棄繼之故祀以為稷【夏之興謂禹也棄能繼柱之功自商以來祀之】共工氏之伯九有也【共工氏伯者在戲農之間有域也】其子曰后土能平九土【其子共工之裔子勾龍佐黃帝為土官九土九州之土也后君也使君土官故曰后土】故祀以為社【社后土之神也】黃帝能成命百物以明民共財【黃帝少典之裔子帝軒轅也命名也】顓頊能修之【顓頊黃帝之孫昌意之子帝高陽也能修黃帝之功】帝嚳能序三辰以固民【固安也帝嚳黃帝之曾孫玄囂之孫蟜極之子帝高辛也三辰日月星也謂能次序三辰以治歷明時教民稼穡以安之】堯能單均刑法以儀民【堯帝嚳之庶子陶唐氏放勳也單盡也均平也儀善也】舜勤民事而野死【舜顓頊之後六世有虞帝重華也野死謂征有苗死於蒼梧之野】鯀障洪水而殛死【殛誅也鯀顓頊之後禹之父也堯使治水障防百川績用不成堯用殛之於羽山禹為天子而郊之取其勤事而死】禹能以德修鯀之功【鯀功雖不成禹亦有所因故曰修鯀之功】契為司徒而民輯【契殷之祖為堯司徒能敬敷五教輯和也】冥勤其官而水死【冥契後六世孫根圉之子也為夏水官勤於其職而死於水】湯以寬治民而除其邪【湯冥後九世主癸之子為夏諸侯以寬得民除其邪謂放桀扞大患也】稷勤百穀而山死【稷周棄也勤播百穀死於黑水之山毛詩傳云】文王以文昭【文王演易又有文德周語曰文王質文】武王去民之穢【穢謂紂也】故有虞氏禘黃帝而祖顓頊郊堯而宗舜【賈侍中云有虞氏舜後在夏殷為二主後故有禘郊宗祖之禮也昭謂此上四者謂祭天以配饗也祭昊天於圜丘曰禘祭五帝於明堂曰祖宗祭上帝於南郊曰郊有虞氏出自黃帝顓頊之後故禘黃帝而祖顓頊舜受禪於堯故郊堯禮祭法有虞氏郊嚳而宗堯與此異者舜在時則宗堯舜崩而子孫宗舜郊堯】夏后氏禘黃帝而祖顓頊郊鯀而宗禹【虞夏俱黃帝顓頊之後也故禘祖之禮同虞以上上德夏以下親親故夏郊鯀也】商人禘舜而祖契郊冥而宗湯【舜當為嚳字之誤也禮祭法曰商人禘嚳嚳契父商之先故禘之鄭後司農云商人宜郊契也】周人禘嚳而郊稷【嚳稷之父稷周始祖也】祖文王而宗武王【此與孝經異者商家祖契周公初時亦祖后稷而宗文王至武王雖承文王之業有伐紂定天下之功其廟不可以毀故先推后稷以配天而後更祖文王而宗武王】幕能帥顓頊者也有虞氏報焉【幕舜之後虞思也為夏諸侯帥循也顓頊有虞氏之祖也報報德之祭也】杼能帥禹者也夏后氏報焉【杼禹後七世少康之子季杼也能興夏道者】上甲微能帥契者也商人報焉【上甲微契後八世湯之先也】高圉大王能帥稷者也周人報焉【高圉后稷後十世公非之子也大王高圉之曾孫古公亶父也】凡禘郊宗祖報此五者國之典祀也【典法也】加之以社稷山川之神皆有功烈於民者也及前哲令德之人所以為明質也【質信也以其有德於民而祭之所以信之於民心】及天之三辰民所以瞻仰也及地之五行所以生殖也【殖長也五行五祀金木水火土】及九州名山川澤所以出財用也非是不在祀典今海鳥至已不知而祀之以為國典難以為仁且智矣夫仁者講功【講論也仁者心平故可論功也】而知者處物【處名也】無功而祀之非仁也【言鳥無功】不知而不問非知也今茲海其有災乎夫廣川之鳥獸恒知而避其災也是歲也海多大風冬煥【爰居之所避也】文仲聞柳下季之言【柳下展禽之邑季字也】曰信吾過也季子之言不可不法也使書以為三策【策簡書也三策三卿卿一通謂司馬司徒司空也國語魯語】衛遷於帝丘衛成公夢康叔曰相奪予享【相夏后啟之孫居帝丘享祭也】公命祀相甯武子不可曰鬼神非其族類不歆其祀【歆猶饗也】杞鄫何事【言杞鄫夏後自當祀相】相之不

享於此久矣非衛之罪也【言帝丘久不祀相非衛所絕】不可以間成王周公之命祀【諸侯受命各有常祀】請改祀命【改祀相之命 僖三十一年左氏傳】九月考仲子之宮考者成之也成之為夫人也【立其廟世祭之成夫人之禮】禮庶子為君為其母築宮使公子主其祭也【公當奉宗廟故不得自主也公子者長子之弟及妾之子】於子祭於孫止【貴賤之序】仲子者惠公之母隱孫而脩之非隱也【非責也 隱五年穀梁傳】

禮書綱目卷三十四

卷三十五

欽定四庫全書

禮書綱目卷三十五 婺源江永撰

天神 吉禮二

補

天子祭天地歲徧【曲禮 此條通言一歲祭天】 大宗伯以禋祀祀昊天上帝【禋之言煙周人尚臭煙氣之臭聞者鄭司農云昊天天也上帝玄天也昊天上帝樂以雲門玄謂昊天上帝冬至於圜丘所祀天皇大帝 詳見祭法 此條通言祀天禮】

郊之祭迎長至之日【詳見祭義然註說亦誤 此條冬至祀天】

郊之祭大報天而主日配以月【主日者以其光明天之神可見者莫著焉 祭義

此條主日配月】 有虞氏郊嚳夏后氏郊鯀殷人郊冥周人郊稷【祭上帝於南郊曰郊有虞氏以上尚德配用有德者自夏以下稍用其姓代之先後之次有虞氏夏后氏宜郊顓頊殷人宜郊契 詳見祭法】 周公郊祀后稷以配天【后稷周之始祖郊謂圜丘祀天也周公攝政因行郊天之】

【祭乃尊始祖以配之也 孝經 此兩條郊祀以祖配】 大宗伯以玉作六器以禮天地四方

【禮謂始告神時薦於神坐書曰周公植璧秉圭是也】 以蒼璧禮天【此禮天以冬至謂天皇大帝在北極者也禮神者必象其類璧圓象天】 牲幣放其器之色【幣以從爵若人飲酒有酬幣此條祀天玉幣 春官】 季夏命四監大合百縣之秩芻以養犧牲令民無不咸出其力以共皇天上帝以為民祈福【皇天北辰耀魄寶冬至所祭於圜丘也上帝大微五帝 詳見祭物】

仲秋命宰祝循行犧牲視全具案芻豢瞻肥瘠察物色必比類量小大視長短皆中度五者備當上帝其饗【詳見祭物】 祭天特性【禮器】 郊特性

牲孕祭帝弗用【犢者誠慤未有牝牡之情是以小為貴也孕任子也 詳見祭義】

牲用騂用犢【尚赤者周也 同上】 帝牛不吉以為稷牛【養牲必養二也】 帝牛必在滌三月稷牛唯具【滌牢中所搜除處也唯具遭時又選可用也 詳見祭義】

牧人凡陽祀用騂牲毛之【詳見祭物】 用騂犢【祭法】 祭天地之牛角繭栗【王制】

郊禘不過繭栗【詳見祭義】

禘郊之事則有全胥【全胥全其牲體而升之也凡禘郊皆血腥也 國語周語

已上十二條犧牲】

酒人以法共五齊三酒以實八尊大祭三貳唯齊酒不貳【大祭者王服大裘袞冕所祭也

詳見祭物】 冪人以疏布巾冪八尊【以疏布者天地之神尚質 並天官】

犧尊疏布鼎罍杓【鼎或作冪罍杓白理也 禮器】 鬯人掌共秬鬯而飾之【詳見祭物】

天子親耕粢盛秬鬯以事上帝【疏曰案小宰注云天地大神至尊不裸此祭上帝有秬鬯者

凡鬯有二若和之以鬱謂之鬱鬯鬱人所掌是也祭宗廟而灌也若不和鬱謂之秬鬯鬯人所掌是也謂五齊之酒以秬黍為之以芬芳調暢故言鬱鬯故得以事上帝 表記】

天子親春禘郊之盛【帥后春之 國語 已上六條酒齊粢盛】

蒲越藁鞹之尚【蒲越藁鞹籍神席也郊特牲

禮器藁鞹之段註穗去實曰鞹禹貢三百里納鞹服】 器用陶匏【詳見祭義】

印盛于豆于豆于登其香始升上帝居歆胡臭亶時【木曰豆瓦曰登豆薦菹醢也于登薦大羹也箋云祀天用瓦豆陶器質也 大雅生民】

鼎聖人亨以享上帝【程傳鼎之為器極其用之大則聖人亨以享上帝聖人古之聖王也 易已上四條器具】 典瑞四圭有邸以祀天【鄭司農云於中央為璧圭著其四面一玉俱成爾雅曰邸本也圭本著於璧故四圭有邸圭末四出故也或說四圭有邸有四角也邸讀為抵欺之抵上帝玄天玄謂祀天夏正郊天也 春官】

玉人四圭尺有二寸以祀天【郊天所以禮其神也典瑞職曰四圭有邸以祀天旅上帝考工記 此二條圭玉】

司裘掌為大裘以共王祀天之服【鄭司農云大裘黑羔裘服以祀天示質 天官】

司服王祀昊天上帝則服大裘而冕【鄭司農云大裘黑羔裘也 春官】

天子大裘以黼之【家語郊問詳見祭義】

王被袞【謂有日月星辰之章】戴冕璫十有二旒【天之大數不過十二 詳見祭義以上四條冕服】

巾車玉路錫樊纓十有再就建大常十有二旂以祀【詳見祭通禮出路章】

大馭掌馭玉路以祀【同上】

乘素車旂十有二旒龍章而設日月【素車殷路也設日月畫於旂上 詳見祭義】

大路素【疏曰大路殷祭天之車也禮器

已上四條車旗】大司樂乃奏黃鍾歌大呂舞雲門以祀天神【以黃鍾之鍾大】

【呂之聲為均者黃鍾陽聲之首大呂為之合奏之以祀天神尊之也天神謂五帝及日月星辰也王者又各以夏正月祀其所受命之帝於南郊尊之也孝經說曰祭天南郊就陽位是也】凡樂園鍾為宮黃鍾為角大簇為徵姑洗為羽鼗鼓鼗鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣【本文此下有地示人鬼二節 此三者皆禘大祭也天神則主北辰地祇則主崑崙人鬼則主后稷先奏是樂以致其神禮之以玉而裸焉乃後合樂而祭之大傳曰王者必禘其祖之所自出祭法曰周人禘嚳而郊稷謂此祭天圜丘以嚳祀之圜鍾夾鍾也夾鍾生於房心之氣房心為大辰天帝之明堂以此為宮用聲類求之天宮夾鍾陰聲其相生從陽數其陽無射無射上生中呂中呂與地宮同位不用也中呂上生黃鍾黃鍾下生林鍾林鍾地宮又不用林鍾上生大簇大簇下生南呂南呂與無射同位又不用南呂上生姑洗鄭司農云鼗鼓鼗鼗皆謂六面有革可擊者也雲和地名也玄謂鼗鼓鼗鼗八面孤竹竹特生者雲和山名 詳見樂制篇 春官】

鼓人以鼗鼓鼓神祀【鼗鼓八面鼓也神祀祀天神也 地官 此二條樂舞】 大宰祀五帝則掌百官之誓戒與其具脩【祀五帝謂四郊及明堂誓戒要之以重刑失禮也明堂位所謂各揚其職百官廢職服大刑是其辭之略也具所當共脩掃除糞洒】 前期十日帥執事而卜日

遂戒【前期前所諏之日也十日容散齊七日致齊三日執事宗伯大卜之屬既卜又戒百官以始齊】及執事眡滌濯【執事初為祭事前祭日之夕滌濯謂溉祭器及甗甗之屬】及納亨贊王牲事【納亨納牲將告殺謂鄉祭之晨既殺以授亨人凡大祭祀君親牽牲大夫贊之】及祀之日贊玉幣爵之事【日旦明也玉幣所以禮神玉與幣各如其方之色爵所以獻齊酒不用玉爵尚質也三者執以從王至而授之】祀大神示亦如之【大神祇謂天地天官】大宗伯凡祀大神帥執事而卜日宿眡滌濯位玉鬯省牲鑊奉玉盥詔大號治其大禮詔相王之大禮【執事諸有事於祭者宿申戒也滌濯溉祭器也玉禮神之玉也始涖之祭又奉之鑊亨牲器也大號六號之大者以詔太祝以為祝辭治猶簡習也豫簡習大禮至祭當以詔相王羣臣禮為小禮故書涖作立鄭司農讀為涖涖視也】

春官】郊用辛卜郊受命於祖廟作龜於禰宮【受命謂告之退而卜】卜

之日王立於澤親聽誓命【澤澤宮也所以擇賢之宮也既卜必到澤宮擇可與祭祀者因誓勅之以禮也禮記曰舉賢而置之聚衆而誓之是也】獻命庫門之內戒百官大廟之命戒百姓【王自澤宮而還以誓命重相申勅也庫門在雉門之外入庫門則至廟門外矣大廟者祖廟也百官公卿以下也百姓王之親也入廟戒親親也王自此還齊路寢之室庫或為廐】祭之日王皮弁以聽祭報【報猶白也夙興朝服以待白祭事者乃後服祭服而行事也周禮祭之日小宗伯逆粢省鑊告時於王告備於王也】喪者不哭不敢凶服汜埽反道鄉為田燭【謂郊道之民為之也反道剗令新土在上也田燭田首為燭也郊特牲詳見祭義】夏后氏祭其闇殷人祭其陽周人祭日以朝及闇【闇昏時也陽讀為日雨日暘之暘謂日中時也朝日出時也夏后氏大事以昏殷人大事以日中周人大事以日出亦謂此郊祭也以朝及闇謂終日有事祭義】

祭之日王被袞戴冕十有二旒乘素車旂十有二旒龍章而設日月【詳見祭義】節服氏郊祀袞冕二人執戈送逆尸從車【袞冕者亦從尸服也袞大袞也凡尸服卒者之上服從車從尸車送逆之往來春秋傳曰晉祀夏郊董伯為尸夏官】大宗伯以禋祀祀昊天上帝【本文此下云以實柴祀日月星辰以燔燎祀司中司命飗師雨師禋之言煙周人尚臭煙氣之臭聞者燔積也三祀皆積柴實牲體焉或有玉帛燔燎而升煙所以報陽也詳見祭法春官】燔柴於泰壇祭天也【壇封土為祭處也壇之言坦也坦明貌也祭法】

祭天曰燔柴【既祭積薪燒之爾雅】至敬不壇掃地而祭【疏曰此謂祭五方之天初則燔柴於大壇燔柴訖於壇下掃地而設正祭此周法也禮器】

郊血【郊祭天也血腥爛孰遠近備古今也尊者先遠詳見祭義禮器】大祝大禋祀隋黷逆牲逆尸令鐘鼓右亦如之【隋黷謂薦血也凡血祭曰黷既隋黷後言逆牲容逆鼎右讀亦當為侑】大祝辨六號一曰神號【神號若云皇天上帝】凡大禋祀則執明水火而號祝【明水火司烜所共日月之氣以給蒸亨執之如以六號祝明此圭潔也禋祀祭天神也春官】皇皇上天照臨下土集地之靈降甘風雨【禮運曰地秉陰竅於山川】庶物羣生各得其所靡今靡古【言覆施均】維予一人某敬拜皇天之祐【古祝辭則云嗣王某或曰一人某王者親告之辭也】維某年某月上日【年謂太歲所在月正月也大戴禮】

大祝既祭令徹【春官已上祭天禮節】凡以神仕者以冬至致天神人鬼【天人陽也陽氣升而祭鬼神致人鬼于祖廟盖用祭天明日詳見百神春官此條祭天明日】

凡祀啟蟄而郊【啟蟄夏正建寅之月祀天南郊詳見祭通禮時日卜筮章桓五年左氏傳】

孟春天子乃以元日祈穀于上帝【謂以上辛郊祭天也春秋傳曰夫郊祀后稷以祈農事是故啟蟄而郊郊而後耕上帝大微之帝也月令】郊祀后稷以祈農事【詳見本章傳已上三條孟春祈穀】龍見而雩【龍見建巳之月蒼龍宿之體昏見東方萬物始盛待雨而大故祭天遠為百穀祈膏雨桓五年左氏傳】仲春命樂師脩鞀鞀鼓均琴瑟管簫執干戚戈羽調竽笙箛篪飭鐘磬祝敔【為將大雩帝習樂也脩均執調飭者治其器物習其事之言】命有司為民祈祀山川百源大雩帝用盛樂乃命百縣雩祀百辟卿士有益於民者以祈穀實【陽氣盛而常旱山川百源能興雲雨者也衆水始所出為百源必先祭其本乃雩雩吁嗟求雨之祭也雩帝謂為壇南郊之旁雩五精之帝配以先帝也自鞀鞀至祝敔皆作曰盛樂凡他雩用歌舞而已百辟卿士古者上公若勾龍后稷之類也春秋傳曰龍見而雩雩之正當以四月凡周之秋三月之中而旱亦脩雩禮以求雨因著正雩此月失之矣天子雩上帝諸侯以下雩上公周冬及春夏雖旱禮有禱無雩月令此二條夏大雩】季秋上丁命樂正入學習吹【為將饗帝也春夏重】

【舞秋冬重吹也】大饗帝【言大饗者徧祭五帝也曲禮曰大饗不問卜謂此也】嘗犧牲告備於天子【嘗者謂嘗羣神也天子親嘗帝使有司祭於羣神禮畢而告焉月令】大饗不問卜【祭五帝於明堂莫適卜也郊特牲曰郊血大饗腥】不饒富【富之言備也備而已勿多於禮也曲禮】周公宗祀文王於明堂以配上帝【明堂天子布政之堂也周公因祀五方上帝於明堂乃尊文王以配之也孝經已上三條秋季大饗】昔者周公旦有勲勞於天下周公既沒成王康王追念周公之所以勲勞者而欲尊魯故賜之以重祭外祭則郊社是也【詳見祭義】成王以周公為有勲勞於天下【王功曰勲事功曰勞】命魯公世世祀周公以天子之禮樂【同之於周尊之也魯公謂伯禽】是以魯君孟春乘大路載弧韞旂十有二旒日月之章祀帝於郊配以后稷天子之禮也【孟春建子之月魯之始郊日以至大路殷之祭天車也弧旌旗所以張幅也其衣曰韞天子之旌旗畫日月帝謂蒼帝靈威仰也昊天上帝魯不祭明堂位】魯人將有事於上帝必先有事於顓宮【上帝周所郊祀之帝謂蒼帝靈威仰也魯以周公之故得郊祀上帝與周同先有事於顓宮告后稷也告之者將以配天先仁也顓宮郊之學也詩所謂顓宮也字或為郊宮禮器已上三條魯之郊】杞之郊也禹也宋之郊也契也【詳下傳此條杞宋之郊】

右祀天郊者并百王於上天而祭之也【百王百神也或神字誤為王言社稷唯祭一神至郊天則兼祭百神以喻君兼父母者也荀子】因天事天因地事地因名山川升中於天因吉土以饗帝於郊升中於天而鳳凰降龜龍格饗帝於郊而風雨節寒暑時【詳見祭義】雷出地奮豫先王以作樂崇德殷薦之上帝以配祖考【本義曰雷出地奮和之至也先王作樂既象其聲又取其義殷盛也易】維十有三祀帝乃稱王而入唐郊猶以丹朱為尸【舜承堯猶子承父雖已改禮易樂猶祭天於唐郊以丹朱為尸至十三年天下既知已受堯位之意矣將自止郊而以丹朱為王者後欲天下昭然知之然後為之故稱王也晉祀夏郊以董伯為尸】於時百執事咸昭然乃知王世不絕爛然必自有繼祖守宗廟之君【知當以丹朱為王者後使祭其郊也祖或為體尚書大傳】噫嘻春夏祈穀於上帝也【朱子曰序誤】我將祀文王于明堂也【並詩序】僖公三十一年夏四月四卜郊不從乃免牲【龜曰卜不從不吉也卜郊不吉故免牲免猶縱也】猶三望【三望分野之星國中山川皆因郊祀望而

祭之魯廢郊天而脩其小祀故曰猶猶者可止之辭】卜郊不從乃免牲非禮也【諸侯不得郊天魯以周公故得用天子禮樂故郊為魯常祀】猶三望亦非禮也禮不卜常祀【必其時】而卜其牲日【卜牲與日知吉凶】牛卜日曰牲【既得吉日則牛改名曰牲】牲成而卜郊上怠慢也【怠於古典慢瀆龜策】望郊之細也不郊亦無望可也【左氏傳】曷為或言三卜或言四卜三卜禮也四卜非禮也三卜何以禮四卜何以非禮【據俱卜也】求吉之道三【三卜吉凶必有相奇者可以決疑故求吉必三卜】禘嘗不卜郊何以卜【禘比禘為大嘗比四時祭為大故據之】卜郊非禮也【禮天子不卜郊】卜郊何以非禮【據上言三卜禮】魯郊非禮也【以魯郊非禮故卜爾昔武王既沒成王幼少周公居攝行天子事制禮作樂致太平有大功周公薨成王以王禮葬之命魯使郊以彰周公之德非王故卜三卜吉則用之不吉則免牲謂之郊者天人相與交接之意也不言郊天者謙不敢斥尊】魯郊何以非禮【據成公乃不郊惡之】天子祭天【郊者所以祭天也天子所祭莫重於郊居南郊者就陽位也稟席玄酒器用陶匏大珪不瑑大羹不和為天至尊物不可悉備故惟質以事之】諸侯祭土【土謂社也諸侯所祭莫重於社卿大夫祭五祀士祭其先祖】天子有方望之事【方望謂郊時所望祭四方羣神日月星辰風伯雨師五嶽四瀆及餘山川凡三十六所】無所不通【盡八極之內天之所覆地之所載無所不至故得郊也】諸侯山川有不在其封內者則不祭也【故魯郊非禮也】曷為或言免牲或言免牛免牲禮也【魯卜郊不吉免之禮卜郊不吉則為牲作玄衣纁裳使有司玄端放之於南郊明本為天不敢留天牲】免牛非禮也免牛何以非禮傷者曰牛【養牲不謹敬有災傷天不饗用不得復為天牲故以本牛名之非禮者非天牲不當復見免但內自省責而已】三望者何望祭也然則曷祭祭泰山河海曷為祭泰山河海【據郊者主為祭天】山川有能潤於百里者天子秩而祭之【此皆助天宣氣布功故祭天及之秩者隨其大小尊卑高下所宜禮祭天牲角繭栗社稷宗廟角握六宗五嶽四瀆角尺其餘山川視卿大夫天燎地瘞日月星辰布山縣水沈風磔雨升燎者取俎上七體與其珪寶在辨中置於柴上燒之】觸石而出膚寸而合【側手為膚案指為寸言其觸石理而出無有膚寸而不合】不崇朝而徧雨乎天下者唯泰山爾【崇重也不崇朝言一朝也】河海潤於千里【亦能通氣致雨潤澤及於千里韓詩傳曰湯時大旱使人禱於山川是也郊望非一獨祭三者魯郊非禮故獨祭其大者】猶者何通可以已也【已止】何以書譏不郊而望祭也【譏尊者不食而卑者獨食書者惡失禮也魯至是郊者僖公賢君欲尊明其先祖之功德不就廢之譏者春秋不見事不書皆從事舉可知也不吉言不從者明己意汲汲欲郊而卜不從耳所以見事鬼神當加精神 公羊傳】宣公三年春王正月郊牛之口傷改卜牛牛死乃不郊猶三望【牛不稱牲未卜日言牛雖傷死當更改卜取其吉者郊不可廢也前年冬天王崩未葬而郊者不以王者廢天事禮記曾子問天子崩未殯五祀不行既殯而祭自啟至於反哭五祀之祭不行已葬而祭】望郊之屬也不郊亦無望可也【已有例在僖三十一年復傳者嫌牛死與卜不從異 左氏傳】其言之何【據食角不言之】緩也【辭間容之故為緩不若食角急也別天牲主以角書者譏宣公養牲不謹敬不潔清而災重事至尊故詳錄其簡甚】曷為不復卜【據定十五年牛死改卜牛】養牲養二卜【二卜語在下】帝牲不吉【帝皇天大帝在北辰之中主總領天地五帝羣神也不吉者有災】則扳稷牲而卜之【先卜帝牲養之有災更引稷牲卜之以為天牲養之凡當二卜爾復不吉不復郊】帝牲在於滌三月【滌宮名養帝牲三牢之處也謂之滌者取其蕩滌潔清三牢者各主一月取三月一時足以充其天牲】於稷者唯具是視【祖其身體具無災害而已不特養於滌宮所以降稷尊

帝】郊則曷為必祭稷【據郊者主為祭天】王者必以其祖配【祖謂后稷周之始祖姜嫄履大人迹所生配配食也】王者則曷為必以其祖配【據方父事天】自內出者無匹不行【匹合也無所與會合則不行】自外至者無主不止【必得主人乃止者天道闇昧故推人道以接之不以文王配之者重本尊始之義也故孝經曰郊祀后稷以配天宗祀文王於明堂以配上帝五帝在大微之中迭生子孫更王天下書改卜者善其應變得禮公羊傳】之口緩辭也傷自牛作也【牛自傷口非備災之道不至也故以緩辭】

【言之】改卜牛牛死乃不郊事之變也【牛無故自傷其口易牛改卜復死乃廢郊禮此事之變異】乃者亡乎人之辭也【譏宣公不恭致天變穀梁傳】成公七年春王正月鼯鼠食郊牛角改卜牛鼯

鼠又食其角乃免牛【杜曰稱牛未卜日免放也免牛可也不郊非禮也】夏五月不郊猶三望【書不郊間有事三望非禮】不言日急辭也【辭中促迫不容日】過有司也郊牛日展斛角而知傷展道盡矣其所以備災之道不盡也【有司展察牛而即知傷是展察之道盡不能防災禦患致使牛傷故不書日以顯有司之過斛球球然角貌】改卜牛鼯鼠又食其角又有繼之辭也【前已食故曰繼】其緩辭也曰亡乎人矣非人之所能也所以免有司之過也【至此復食乃知國無賢君天災之爾非有司之過也故言其以赦之】乃免牛乃者亡乎人之辭也免牲者為之緇衣纁裳有司玄端奉送至於南郊免牛亦然免牲不曰不郊免牛亦然【郊者用牲今言免牲則不郊顯矣若言免牛亦不郊而經復書不郊者蓋為三望起爾言時既不郊而猶三望明失禮穀梁傳】成公十年夏四月五卜郊不從乃不郊【杜曰卜常祀不郊皆非禮故書】夏四月不時也【郊時極於三月】五卜強也【穀梁傳】成公十七年九月辛丑用郊【杜曰九月郊祭非禮明矣書用郊從史文】用者不宜用也九月非所用郊也【周之九月夏之七月天氣上升地氣下降又非郊時故加用之】然則郊曷用郊用正月上辛【魯郊博卜春三月言正月者因見百王正所當用也三王之郊一用夏正言正月者春秋之制也正月者歲首上辛猶始新皆取其首月之辛日者明用辛例不郊則不日】或曰用然後郊【或曰用者先有事存后稷神名也晉人將有事於河必先有事於惡池齊人將有事於泰山必先有事於蜚林魯人將有事於天必先有事於頓宮九月郊尤悖禮故言用小大盡譏之以不郊乃譏三望知郊不得譏小也又夕牲告牲后稷當在日上不得在日下公羊傳】夏之始可以承春以秋之末承春之始蓋不可矣【郊春事也僖三十一年夏四月四卜郊不從傳曰四月不時今言可者方明秋末之不可故以是為猶可也】九月用郊用者不宜用也宮室不設不可以祭衣服不脩不可以祭車馬器械不備不可以祭有司一人不備其職不可以祭祭者薦其時也薦其敬也薦其美也非享味也【穀梁傳】襄公七年夏四月三卜郊不從乃免牲【稱牲既卜日也卜郊又非禮也】孟獻子曰吾乃今而後知有卜筮夫郊祀后稷以祈農事也【郊祀后稷以配天后稷周始祖能播殖者】是故啟蟄而郊郊而後耕今既耕而卜郊宜其不從也【啟蟄夏正建寅之月耕謂春分左氏傳】

襄公十一年夏四月四卜郊不從乃不郊夏四月不時也四卜郊非禮也【穀梁傳】定公十五年春王正月鼯鼠食郊牛牛死改卜牛【杜曰不言所食處舉死重也改卜禮也】曷為不書其所食漫也【公羊傳】

不敬莫大焉【不言所食食非一處而至死定公不敬最大故天災最甚穀梁傳】

夏五月辛亥郊【杜曰書過】曷為以夏五月郊三卜之運也【公羊傳】哀公元年春王正月饔飩食郊牛角改卜牛【按左氏無角字】夏四月辛巳郊此該郊之變而道之也【該備也春秋書郊終於此故於此備說郊之變變謂郊非其時或牲被災害】於變之中又有言焉【於災變之中又有可善而言者】饔飩食郊牛角改卜牛志不敬也郊牛日展斛角而知傷展道盡矣【展道雖盡所以備災之道不盡譏哀公不敬故致天災】郊自正月至於三月郊之時也夏四月郊不時也五月郊不時也夏之始可以承春以秋之末承春之始蓋不可矣【凱曰不時之中有差劇也夏始承春方秋之末猶可為也】九月用郊用者不宜用也【在成十七年】十郊三卜禮也【以十二月下辛卜正月上辛如不從則以正月下辛卜二月上辛如不從則以二月下辛卜三月上辛所謂三卜也鄭嗣曰謂卜辛而三也求吉之道三故曰禮也】四卜非禮也【僖三十一年襄十一年皆四卜】五卜強也【成十年五卜】卜免牲者吉則免之不吉則否牛傷不言傷之者傷自牛作也故其辭緩【宣三年郊牛之口傷以牛自傷故加之言緩辭】全曰牲傷曰牛未牲曰牛其牛一也其所以為牛者異【已卜日成牲而傷之曰牛未卜日未成牲之牛二者不同】有變而不郊故卜免牛也已牛矣其尚卜免之何也【災傷不復以郊怪復卜免之】禮與其亡也寧有【於禮有卜之與無卜寧當有卜】嘗置之上帝矣故卜而後免之不敢專也【當置之滌宮名之為上帝牲故不敢擅放也】卜之不吉則如之何不免安置之繫而待六月上甲始庀牲然後左右之【庀具也待具後牲然後左右前牛在我用之不復須卜已有新牲故也周禮曰司門掌授管鍵以啟閉國門祭祀之牛牲繫焉然則未左右時監門者養之】子之所言者牲之變而曰我一該郊之變而道之何也我以六月上甲始庀牲十月上甲始繫牲十一月十二月牲雖有變不道也【牲有變則改卜牛以不妨郊事故不言其變】待正月然後言牲之變此乃所以該郊【至郊時然後言其變重其妨郊也十二月不道自前可知也至正月然後道則二月三月亦可知也此所以該郊言其變道盡】郊享道也貴其時大其禮其養牲雖小不備可也【享者飲食之道牲有變則改卜牛郊日已逼庀繫之禮雖小不備合時得禮用之可也】子不志三月卜郊何也【三月謂十二月正月二月也】郊自正月至於三月郊之時也【有變乃志常事不書】我以十二月下辛卜正月上辛如不從則以正月下辛卜二月上辛如不從則以二月下辛卜三月上辛如不從則不郊矣【意欲郊而卜不吉故曰不從郊必用上辛者取其新潔莫先也穀梁傳】哀公十三年公會吳晉盟吳人囚子服景伯景伯謂大宰曰魯將以十月上辛有事於上帝先王季辛而畢何世有職焉【有職於祭事左氏傳】孔子曰嗚呼哀哉我觀周道幽厲傷之吾舍魯何適矣【政亂禮失以為魯尚愈】魯之郊禘非禮也周公其衰矣【非猶失也魯之郊牛口傷饔飩食其角又有四卜郊不從是周公之道衰矣言子孫不能奉行興之】杞之郊也禹也宋之郊也契也是天子之事守也【先祖法度子孫所當守】故天子祭天地諸侯祭社稷【禮運】桓公五年秋大雩書不時也凡祀龍見而雩【註見上】過則書【卜日有吉否過次節則書以譏慢也左氏傳】定公元年九月大雩雩月雩之正也秋大雩非正也冬大雩非正也秋大雩之為非正何也【冬禾稼既成猶雩則非禮可知秋禾稼始苗嫌當須雨故問也】毛澤未盡人力未竭未可以雩也【邵曰凡地之所生者謂毛公羊傳曰錫之不毛之地是也言秋百穀之潤澤未盡也人力未盡謂耕耘之功未畢】雩月雩之正也月之為雩之正何也其時窮人力盡然後雩雩之正也何謂其時窮人力盡是月不雨則無及矣是年不艾則無食矣是其時時窮人力盡也雩之必待其時窮人力盡何也雩者為早求者也求者請也古之人重請何重乎請人之所以為人者讓也請道去讓也則是舍其所以為人也是以重之焉請

哉請應乎上公古之神人有應上公者通乎陰陽君親帥諸大夫道之而以請焉【道之謂君必為先也其禱辭曰方今大旱野無生稼寡人當死百姓何謗不敢煩民請命願撫萬民以身塞無狀禱亦請也此即請辭也】夫請者非可詒託而往也必親之者也是以重之【詒託猶假寄穀梁傳】成公七年冬大雩雩不月而時非之也冬無為雩也【穀梁傳】

小宗伯兆五帝於四郊【兆為壇之營域五帝蒼曰靈威仰大昊食焉赤曰赤熛怒炎帝食焉黃曰含樞紐黃帝食焉白曰白招拒少昊食焉黑曰叶光紀顓頊食焉黃帝亦於南郊 春官】因吉土以饗帝於郊【吉土王者所卜而居之土也饗帝於郊以四時所兆祭於四郊者也今漢亦四時迎氣其禮則簡 禮器 此兩條五帝神位】春其帝大皞其神句芒【此蒼精之君木官之臣自古以來著德立功者也大皞宓戲氏句芒少昊氏之子曰重為木官】夏其帝炎帝其神祝融【此赤精之君火官之臣自古以來著德立功者也炎帝大庭氏也祝融顓頊氏之子曰犁為火官】中央土其帝黃帝其神后土【此黃精之君土官之臣自古以來著德立功者也黃帝軒轅氏也后土亦顓頊氏之子曰犁兼為土官】秋其帝少皞其神蓐收【此白精之君金官之臣自古以來著德立功者也少昊金天氏蓐收少皞氏之子曰該為金官】冬其帝顓頊其神玄冥【此黑精之君水官之臣自古以來著德立功者也顓頊高陽氏也玄冥少皞氏之子曰脩曰熙為水官月令 此條配帝及帝臣】大宗伯以玉作六器以禮天地四方【禮謂始告神時薦於神坐書曰周公植璧秉圭是也】以青圭禮東方以赤璋禮南方以白琥禮西方以玄璜禮北方【禮東方以立春謂蒼精之帝而大皞句芒食焉禮南方以立夏謂赤精之帝而炎帝祝融食焉禮西方以立秋謂白精之帝而少昊蓐收食焉禮北方以立冬謂黑精之帝而顓頊玄冥食焉禮神者必象其類圭銳象春物初生半圭曰璋象夏物半死琥猛象秋嚴肅半璧曰璜象冬閉藏地上無物唯天半見】皆有牲幣各放其器之色【幣以從爵若人飲酒有酬幣 春官】充人掌繫祭祀之牲牲祀五帝則繫於牢芻之三月【牢閑也必有閑者防禽獸觸齧養牛羊曰芻三月一時節氣成地官】司服王祀昊天上帝則服大裘而冕祀五帝亦如之【注見祀天春官】掌次祀五帝則張大次小次設重轡重案【祀五帝於四郊次謂幄也大幄初往所止居也小幄既接祭退俟之處祭義曰周人祭日以朝及闇雖有強力孰能支之是以退俟與諸臣代有事焉重轡複轡重案牀重席也鄭司農云五帝五色之帝天官】大司樂乃奏黃鍾歌大呂舞雲門以祀天神【注見祀天春官 已上祀五帝禮物舞樂】大宰祀五帝則掌百官之誓戒與其

具脩前期十日帥執事而卜日遂戒及執事眡滌濯及納亨贊王牲事及祀之日贊王幣爵之事【注見祀天天官】大司寇若禋祀五帝則戒之日涖誓百官戒于百族【戒之日卜之日也百族謂府史以下也郊特牲曰卜之日王立於澤親聽誓命受教諫之義也獻命庫門之內戒百官也大廟之內戒百姓也】及納亨前王祭之日亦如之【納亨致牲】奉其明水火【明水火所取于日者】

小司寇凡禋祀五實鑊水納亨亦如之【納亨致牲也其時鑊水當以洗解牲體肉】士師祀五帝則沃戶及王盥泊鑊水【泊謂增其沃汁 並秩官】大司徒祀五帝奉牛牲羞其肆【牛能任載地類也奉猶進也鄭司農云羞進也肆陳骨體也玄謂進所解骨體士喪禮曰肆解去蹄 地官 已上祀五帝禮節】先立春三日大史謁之天子曰某日立春盛德在木

天子乃齊【大史禮官之屬掌正歲年以序事謂告也】立春之日天子親帥三公九卿諸侯大夫以迎春於東郊還反賞公卿諸侯大夫於朝【迎春祭蒼帝靈威仰於東郊之兆也王居明堂禮曰出十五里迎歲盖殷禮也周迎郊五十里賞謂有功德者有以顯賜之也朝大寢門外】命相布德和令行慶施惠下及兆民【相謂三公相王之事也德謂善教也令謂時禁也慶謂休其善也惠謂恤其不足也天子曰兆民】慶賜遂行母有不當【遂猶達也言使當得者皆得得者無非其人】先立夏三日大史謁之天子曰某日立夏盛德在火天子乃齊立夏之日天子親帥三公九卿大夫以迎夏于南郊還反行賞封諸侯慶賜遂行無不欣悅【迎夏祭赤帝赤熛怒于南郊之兆也不言帥諸侯而云封諸侯諸侯時或無在京師者空其文也祭統曰古者于禘也 爵賜服順陽義也于嘗也出田邑 秋政順陰義也今此行賞可也而封諸侯則違于古封諸侯出土地之事于時未可似失之】先立秋三日大史謁之天子曰某日立秋盛德在金天子乃齊立秋之日天子親帥三公九卿諸侯大夫以迎秋于西郊還反賞軍帥武人于朝【迎秋者祭白帝白招拒于西郊之兆也軍帥諸將也武人謂環人之屬有勇力者】先立冬三日大史謁之天子曰某日立冬盛德在水天子乃齊立冬之日天子親帥三公九卿大夫以迎冬于北郊還反賞死事恤孤寡【迎冬者祭黑帝叶光紀于北郊之兆也死事謂以國事死者若公叔禹人顏涿聚者也孤寡其妻子也有以惠賜之大功加賞 月令此條四時迎氣】季冬乃畢祀帝之大臣天之神祇【四時之功成于冬孟月祭其宗至此可以祭其佐也帝之大臣句芒之屬天之神祇司中司命風師雨師月令 此條祀帝臣】

右祀五帝及五人帝五人神 季康子問于孔子曰舊聞五帝之名而不知其實請問何謂五帝孔子曰昔丘也聞諸老聃曰天有五行水火金木土分時化育以成萬物【一歲三百六十日五行各主七十二日也化生長育一歲之功萬物莫敢不成】其神謂之五帝【五帝五行之神佐天生物者而後世讖緯皆為之名字亦為妖怪妄言】古之王者易代而改號取法五行五行更王終始相生亦象其義【法五行更王終始相生始以木德王天下其次以生之行轉相成而諸說乃謂五精之帝下生王者其義或無可言者】故其生為明王者而死配五行是以太皞配木炎帝配火黃帝配土少皞配金顓頊配水康子曰太皞氏其始之木何如孔子曰五行用事先起於木木東方萬物之初皆出焉是故王者則之而君以木德王天下其次則以所生之行轉相承也【木生火火生土之屬】康子曰吾聞句芒為木正祝融為火正蓐收為金正玄冥為水正后土為土正此五行之主而不亂稱曰帝者何也孔子曰凡五正者五行之官名五行佐成上帝而稱五帝太皞之屬配焉亦云帝從其號【天至尊物不可以同其號亦兼稱上帝上得包下五行佐成天事謂之五帝以地有五行而其精神在上故亦為之上帝黃帝之屬故亦稱帝盖從天五帝之號故王者雖號稱五帝而不得稱天帝而曰天子者言天子與天其尊卑相去遠矣曰天王者言乃天下之王也】昔少皞氏之子有四叔曰重曰該曰脩曰熙實能金木及水使重為句芒該為蓐收脩及熙為玄冥顓頊氏之子曰黎為祝融共工氏之子曰句龍為后土此五者各以其所能業為官職【各以一行之官為職業之事】生為上公死為貴神別稱五祀不得同帝【五祀上公之神故不得稱帝也其序則五正不及五帝五帝不及天地而不知者以祭社為祭地不亦失之遠矣且土與火水俱為五行是地之子也以子為母不亦顛倒失尊卑之序也】康子曰陶唐有虞夏后殷周獨不得配五帝意者德不及上古耶將有限乎孔子曰古之平治水土及播殖百穀者衆矣唯句龍兼食於社【兼猶配也】而棄為稷神易代奉之無敢益者明不可與等故自太皞以降逮於顓頊其應五行而王數

非徒五而配五帝是其德不可以多也【家語】蔡墨曰有五行之官是謂五官實列受氏姓封為上公【爵上公】祀為貴神社稷五祀是尊是奉【五官之君長能脩其業者死皆配食於五行之神為王者所尊奉】木正曰句芒【正官長也取木生句曲而有芒角也其祀重焉】火正曰祝融【祝融明貌其祀犁焉】金正曰蓐收【秋物摧辱而可收也其祀該焉】水正曰玄冥【水陰而幽冥其祀脩及熙焉】土正曰后土【土為羣物主故稱后也其祀句龍焉在家則祀中霤在野則為社】獻子曰社稷五祀誰氏之五官也【問五官之長皆是誰】對曰少皞氏有四叔【少皞金天氏】曰重曰該曰脩曰熙實能金木及水【能治其官】使重為句芒【木正】該為蓐收【金正】脩及熙為玄冥【二子相代為水正】世不失職遂濟窮桑此其三祀也【窮桑少昊之號也四子能治其官使不失職濟成少昊之功死皆為民所祀窮桑地在魯北】顓頊氏有子曰犁為祝融【犁為火正】共工氏有子曰句龍為后土此其二祀也【昭二十九:left氏傳】

王宮祭日也夜明祭月也【王宮日壇王君也日稱君宮壇營域也夜明亦謂月壇也祭法】祭日於壇祭月於坎祭日於東祭月於西【詳見祭義】掌次朝日則張大次小次設重轡重案【朝日春分拜日於東門之】

【外次謂幄也大幄初往所止居也小幄既接祭退俟之處重轡複轡重案牀重席也天官】天子玄端而朝日於東門之外【端當為冕字之誤也玄衣而冕冕服之下朝日春分之時也東門謂國門也玉藻】典瑞王晉大圭執鎮圭纁藉五采五就以朝日【纁有五采文所以薦玉木為中榦用韋衣而畫之就成也王朝日者示有所尊訓民事君也天子常春分朝日秋分夕月覲禮曰拜日於東門之外故書鎮作瑱鄭司農云晉讀為搢紳之搢謂插之於紳帶之間若帶劍也瑱讀為鎮玉人職曰大圭長三尺攄上終葵首天子服之鎮圭尺有二寸天子守之纁讀為藻率之藻五就五帀也一帀為一就春官】天子大采朝日與三公九卿祖識地德【禮天子以春分朝日示有尊也虞說云大采袞織也祖習也識知也地德所以廣生昭謂禮玉藻天子玄冕以朝日玄冕冕服之下則大采非袞職也周禮王搢大圭執鎮圭藻藉五采五就以朝日則大采謂此也言天子與公卿因朝日以脩陽政而習地德因夕月以治陰教而糾天刑日照晝月照夜各因其明以脩其事也】少采夕月與大史司載糾虔天刑【夕月以秋分糾恭也虔敬也刑法也或云少采黼衣也昭謂朝日以五采則夕月其三采也載天文也司天文謂馮相氏保章氏與大史相儷偶也此因夕月而恭敬觀天法考行度以知妖祥也國語魯語】

大宗伯以實柴祀日月星辰【實柴實牛柴上也春官】

羊人凡積共其羊牲【積積柴禋祀燔燎實柴疏曰祭天用犢其日月以下有用羊者夏官】

典瑞圭璧以祀日月星辰【圭其邸為璧取殺於上帝春官】

圭璧五寸以祀日月星辰【禮其神也圭其邸為璧取殺於上帝考工記玉人】

大司樂乃奏黃鐘歌大呂舞雲門以祀天神【天神謂五帝及日月星辰也詳見祀天春官】

迎日之辭曰維某年月上日明光於上下勤施於四方旁作穆穆維予一人某敬拜迎日東郊

【尚書大傳按大戴禮亦有此辭已上祀日月之正禮已下因事而祀日月】

郊之祭大報天而主日配以月【主日者以其光明天之神可見者莫著焉祭義

此因郊而祀】諸侯覲於天子天子乘龍載大旆象日月升龍降龍出拜日於東門之外【此謂會同以春者也馬八尺以上為龍大旆大常也王建大常繆首畫日月其下及旒交畫升龍

降龍朝事儀曰天子冕而執鎮圭尺有二寸纁藉尺有二寸搢大圭乘大路建大常十有二旒樊纓十有二就貳車十有一乘帥諸侯而朝日於東郊所以教尊尊也】禮曰於南門外禮月與四瀆於北門外【此謂會同以夏冬者也變拜言禮者容祀也禮月於北郊者月大陰之精以為地神也 觀禮

此因會同而祀】孟冬天子乃祈來年於天宗【此周禮所謂蜡祭也天宗謂日月星辰也月令此因蜡而祀】

日月星辰之神則雪霜風雨之不時於是乎祭之【周禮四曰禋祭為營攢用幣以祈福祥昭元年左氏傳 此因禋而祀】

右祀日月 莊公十八年日有食之不言日不言朔夜食也何以知其夜食也曰王者朝日【王制曰天子玄冕而朝日於東門之外故日始出而有虧傷之處是以知其夜食也何休曰春秋不言月食日者以其無形故闕疑其夜食何緣書乎鄭君釋之曰一日一夜合為一日今朔日月始出其食虧傷之處未復故知此日以夜食夜食則亦屬前月之晦故穀梁不以為疑】故雖為天子必有尊也貴為諸侯必有長也故天子朝日諸侯朝朔【穀梁傳】

大宗伯以實柴祀星辰【星為五緯辰謂日月所會十二次】

典瑞圭璧以祀日月星辰【詳見上章並春官】圭璧五寸以祀日月星辰【詳見上章】

祭星曰布【布散祭於地 爾雅】大司樂乃奏黃鐘歌大呂舞雲門以祀天神【詳見祀天

已上祀星辰正禮以下因事而祀】孟冬天子乃祈來年於天宗【詳見上章】幽宗祭星也

【宗皆當為禋字之誤也幽禋亦謂星壇也星以昏始見禋之言營也春秋傳曰日月星辰之神則雪霜風雨之不時於是乎祭之

祭法】日月星辰之神則雪霜風雨之不時於是乎祭之【星辰之神若實沈者昭元年左氏傳】

右祀星辰【祭司民司祿見百神篇】古之火正或食於心或食於昧以出內火是故昧為鶉火心為大火【謂火正之官配食於火星建辰之月鶉火星昏在南方則令民放火建戌之月大火星伏在日下夜不得見則令民內火禁放火】陶唐氏之火正閼伯居商丘【陶唐堯有天下號閼伯高辛氏之子傳曰遷閼伯於商丘主辰辰大火也今為宋星然則商丘在宋地】

祀大火而火紀時焉【謂出內火時】相土因之故商主大火【相土契孫商之祖也始代閼伯之後居商丘祀大火 襄九年左氏傳】遷閼伯於商丘主辰【商丘宋地主祀辰星辰大火也】商人是因【商人湯先相土封商丘因閼伯故國祀星辰】遷實沈於大夏主參【大夏今晉陽縣】唐人是因【唐人若劉累之等累遷魯縣此在大夏

詳見因祭疾病章昭元年左氏傳 按通典云周制仲秋之月祭靈星於國之東南秋分日享壽星於南郊此皆不見於經典又絲衣詩序引高子曰靈星之尸也朱子謂高子尤誤今附載於此】

大宗伯以粢燎祀司中司命觋師雨師【粢積也詩曰芄芃棫樸薪之粢之積柴實牲體焉燔燎而升煙所以報陽也鄭司農云司中三能三階也司命文昌宮星風師箕也雨師畢也玄謂司中司命文昌第五第四星或曰中能上能也 春官】

祭風曰磔【今俗當大道中磔狗云以止風此其象 爾雅】
季冬乃畢祀天之神祇【天之神祇司中司命風師雨師月令 按通典云周制立春後丑日祭
風師於國城東北立夏後申日祀雨師於國城西南立冬後亥日祀】

【司中司命司民司祿於國城西北亦未知何據】

右祀司中司命飊師雨師

禮書綱目卷三十五

卷三十六

<經部,禮類,通禮之屬,禮書綱目

欽定四庫全書

禮書綱目卷三十六 婺源江永撰

地示 吉禮三

補

天子祭天地歲徧【曲禮 此條通言一歲祭地】 大宗伯以黃琮禮地【禮地以夏至謂神在崑崙者也禮神者必象其類琮八方象地】 牲幣放其器之色【幣以從爵若人飲酒有酬幣春官 此條祀地玉幣】 牧人陰祀用黝牲毛之【詳見祭物犧牲】
祭天地之牛角繭栗【同上】 犬人祭祀共犬牲用牲物瘞亦如之【同上 此三條犧牲】
典瑞兩圭有邸以祀地【兩圭者以象地數二也儻而同邸祀地謂所祀於北郊神州之神春官】 玉人兩圭五寸有邸以祀地【邸謂之柢有邸儻共本也 考工記 此兩條圭玉
酒齊粢盛器席車旗並如禮天之禮】 大司樂乃奏大簇歌應鍾舞咸池以祭地示【大簇陽聲第二應鍾為之合咸池大咸也地示所祭於北郊謂神州之神及社稷】 凡樂函鍾為宮大簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏日至於澤中之方丘奏之若樂八變則地示皆出可得而禮矣【地祇則主崑崙先奏是樂以致其神禮之以玉乃後合樂而祭之 詳見樂制 此條樂舞】 大宰祀五帝則掌百官之誓戒與其具脩前期十日帥執事而卜日遂戒及執事眡滌濯及納亨贊王牲事及祀之日贊玉幣爵之事【詳見天神祀五帝】 祀大示亦如之【疏曰祀大祇謂夏至祭地於方澤 天官】 大宗伯祭大示帥執事而卜日宿眡滌濯泣玉鬯省牲鑊奉玉盥詔大號治其大禮詔相王之大禮【詳見天神】 瘞埋於泰折祭地也【折炤哲也必為炤明之名尊神也 祭地】 祭地曰瘞埋【既祭埋藏之爾雅】 大祝辨六號三曰示號【祇號若云后土地祇】 凡祭示則執明水火而號祝【詳見天神】 薄薄之土承天之神【薄旁薄也乃順承天也】 興甘風雨庶卉百穀莫不茂者既安且寧維予一人某敬拜下土之靈維某年某月上日【大戴禮 已上祭地禮節其與祀天同者詳見前篇】 凡以神仕者以夏日至致地示物彪【地物陰也陰氣升而祭地祇物】

【彪致物彪於壇壇盖用祭地之明日而物之神曰彪 詳見百神 此條祭日明日】

右祭地

王為羣姓立社曰大社王自為立社曰王社諸侯為百姓立社曰國社諸侯自為立社曰侯社大夫以下成羣立社曰置社【羣衆也大夫以下至庶人也大夫不得特立社與民族居百家

以上則共立一社今時里社是也郊特牲曰唯為社事單出里 祭法】
小宗伯掌建國之神位右社稷左宗廟【庫門內雉門外之左右 春官】
匠人營國左社右社【王宮所居也考工記】
乃建大社於周中其壇東青土南赤土西白土北驪土中央疊以黃土【汲冢周書作雒解】
封人掌設王之社壇【壇謂壇及墉埒也不言稷者稷社之細也 地官】
天子大社必受霜露風雨【大社王為羣姓所立 郊特牲】 小子掌珥於社稷【鄭司農云珥
社稷以牲頭祭也玄謂珥讀為岬釁禮之事也用毛牲曰刳羽牲曰岬岬社稷謂始成其宮兆
時也秋官士師職曰凡刳珥則奉大牲此刳岬正字與 夏官】
內宰凡建國佐后立市祭之以陰禮【祭之以陰禮者市中之社先后所立社也 天官】
諸侯祭社稷【王制】 小司徒凡建邦國立其社稷
封人凡封國設其社稷之壇【封國建諸侯 並地官 已上天子諸侯大夫社稷之制】 大司
徒設其社稷之壇而樹之田主各以其野之所宜木遂以名其社與其野【社稷后土及田正
之神壇壇與墉埒也田主田神后土田正之所依也詩人謂之田祖所宜木謂若松柏栗也若
以松為社者則名松社之野以別方面 地官】 小宗伯若大師則帥有司而立軍社奉主車【
有司大祝也王出軍必先有事於社及遷廟而以其主行社主曰軍社遷主曰祖春秋傳曰軍
行祓社釁鼓祝奉以從曾子問曰天子巡守以遷廟主行載於齊車言必有尊也書曰用命賞
于祖不用命戮于社社之主盖用石為之奉謂將行 春官 已上社木社主】 厲山氏之有天下
也其子曰農能殖百穀夏之衰也周棄繼之故祀以為稷共工氏之霸九州也其子曰后土
能平九州故祀以為社【厲山氏炎帝也起於厲山或曰有烈山氏棄后稷名也共工氏無錄
而王謂之霸在大昊炎帝之間 祭法】 共工氏有子曰句龍為后土【共工在大昊後神農前
以水名官者其子句龍能平水土故死而見祀】 后土為社【方答社稷故明言為社】 稷田
正也【掌播殖也】 有烈山氏之子曰柱為稷【烈山氏神農世為諸侯】 自夏以上祀之【
祀柱】 周棄亦為稷【棄周之始祖能播百穀湯既勝夏廢柱而以棄代之】 自商以來祀之
【昭二十九年左氏傳已上社稷配祭】 季夏命四監大合百縣之秩芻以養犧牲令民無不
咸出其力以祠社稷之靈以為民祈福季冬乃命大史次諸侯之烈賦之犧牲以共社稷之饗
凡在天下九州之民者無不咸獻其力以共社稷之祀【詳見祭物犧牲】
天子社稷皆大牢諸侯社稷皆少牢【王制】
牧人陰祀用黝牲毛之【陰祀祭地北郊及社稷也鄭司農云黝讀為幽黑也 地官】
大司馬中春教振旅遂以蒐田獻禽以祭社【春田主祭社者土方施生也 夏官】
鬯人凡祭祀社壇用大壘【壇謂委土為墀壇所以祭也大壘瓦壘】
司服祭社稷則希冕【希刺粉米無畫也其衣一章裳二章凡三也 並春官】
大司樂乃奏大簇歌應鍾舞咸池以祭地示【詳見祭地】
鼓人以靈鼓鼓社祭【靈鼓六面鼓也社祭祭地祇也】
舞師教帔舞帥而舞社稷之祭祀【疏曰帔舞用五色繒 並地官已上禮物樂舞】
封人令社稷之職【將祭之時令諸有職事於社稷者也郊特牲曰】

【唯為社事單出里唯為社田國人畢作唯社丘乘共粢盛所以報本反始也 地官】
春社【春田祭社大司馬職云明堂位】 社祭土日用甲【國中之神莫貴於社】 君南鄉於
北墉下【墉謂之墉北墉社內北牆郊特牲 詳見祭義】 大宗伯以血祭祭社稷【不言祭地

此皆地祇祭地可知也陰祀自血起貴氣臭也社稷土穀之神有德者配食焉共工氏之子曰句龍食於社有厲山氏之子曰柱食於稷湯遷之而祀棄 春官】三獻文【謂祭社稷五祀禮器】三獻燭【疏曰社又降於宗廟故用燭燭人稍近味 郊特牲】

肆師社之日涖卜來歲之稼【社祭土為取財焉卜者問後歲稼所宜 春官

已上祭社稷禮節】喪國之社屋之薄社北牖【絕其陽通其陰而已薄社殷之社殷始都薄 郊特牲 詳見祭義】喪祝掌勝國邑之社稷之祝號以祭祀禱祠焉【勝國邑所誅討者社稷者若亳社是已存之者重神也蓋奄其上而棧其下為北牖 春官】

士師若祭勝國之社稷則為之尸【以刑官為尸略之也周謂亡殷之社為亳社 秋官 已上勝國社稷】

仲春擇元日命民社【社后土也使民祀焉神其農業也祀社日用甲月令】

州長若以歲時祭祀州社則屬其民而讀法凡

州之大祭祀涖其事【大祭祀謂州社稷也涖臨也】

閭胥凡春秋之祭祀聚衆庶既比則讀法【祭祀謂州社黨祭族酺也 並地官】肆師若國有大故則令國人祭【大故謂水旱凶荒所令祭者社及祭酺】歲時之祭祀亦如之【月令仲春命民社此一隅 春官】唯為社事單出里唯為社田國人畢作唯社丘乘共粢盛【單出里皆往祭社於都鄙二十五家為里畢作人則盡行非徒羨也丘十六井也四丘六十四井曰甸或謂之乘乘者以千車賦出長轂一乘乘或為鄰郊特牲 詳見祭義 已上民社】

右祭社稷 湯既勝夏欲遷其社不可作夏社【湯承堯舜禪代之後順天應人逆取順守而有慙德故革命創制改正易服變置社稷而後世無及句龍者故不可而止 書序】迺立豕土戎醜攸行【豕土大社也亦大王所立而後因以為天子之制也戎醜大衆也起大事動大衆必有事乎社而後出謂之宜 大雅緜】哀公問社於宰我宰我對曰夏后氏以松殷人以柏周人以栗曰使民戰栗【宰我孔子弟子名予三代之社不同者古者立社各樹其土之所宜木以為主也戰栗恐懼貌宰我又言周所以用栗之意如此豈以古者戮人於社故附會其說與】子聞之曰成事不說遂事不諫既往不咎【遂事謂事雖未成而勢不能已者孔子以宰我所對非立社之本意又啓時君殺伐之心而其言已出不可復救故歷言此以深責之欲使謹其後也尹氏曰古者各以所宜木名其社非取義於木也宰我不知而妄對故夫子責之 論語】尚書亡篇曰太社唯松東社唯柏南社唯梓西社唯栗北社唯槐春秋文義曰天子之社稷廣五丈諸侯半之春秋傳曰天子有大社焉東方青土南方赤土西方白土北方黑土上冒以黃土故將封東方諸侯青土苴以白茅【白虎通】春社天子之祭也【春田祭社明堂位】

載芟春藉田而祈社稷也 良耜秋報社稷也【並詩序】以我齊明與我犧羊以社以方【齊與粢同曲禮曰稷曰明粢此言齊明便文以協韻耳犧羊純色之羊也社后土也以句龍氏配方秋祭四方報成萬物周禮所謂羅弊獻禽以祀祫是也小雅甫田】曾子問曰諸侯之祭社稷俎豆既陳聞天子崩后之喪君薨夫人之喪如之何孔子曰廢自薨比至於殯自啟至於反哭奉帥天子【詳見祭通禮廢祭章】孟子曰民為貴社稷次之君為輕【社土神稷穀神建國則立壇壝以祀之蓋國以民為本社稷亦為民而立而君之尊又係於二者之存亡故其輕重如此】諸侯危社稷則變置【諸侯無道將使社稷為人所滅則當更立賢君是君輕於社稷也】犧牲既成粢盛既潔祭祀以時然而旱乾水溢則變置社稷【祭祀不失禮而土穀之

神不能為民禦災捍患則毀其壇壝而更置之亦年不順成八蜡不通之意是社稷雖重於君而輕於民也】鄭子產伐陳入之陳侯免擁社【免喪服擁社抱社主示服襄二十五年左氏傳】哀公四年六月辛丑亳社災【杜曰天火也亳社殷社諸侯有之所以戒亡國范曰殷都於亳武王克紂而班列其社於諸侯以為亡國之戒劉向曰災亳社戒人君縱恣不能警戒之象春秋】亳社者亳之社也亳亡國也【亳即殷也殷都於亳故國謂之亳社】亡國之社以為廟屏戒也【立亳之社於廟之外以為屏蔽取其不得通天人君瞻之而致戒心】其屋亡國之社不得達上也【必為之作屋不使上通天也緣有屋故言災穀梁傳】蒲社災蒲社者何【據鼓用牲於社不言蒲】亡國之社也【蒲社者先世之亡國在魯竟】社者封也【封土為社】其言災何【據封土非火所能燒】亡國之社盖撝之撝其上而柴其下【故火得燒之撝柴之者絕不得使通天地四方以為有國者戒】蒲社災何以書記災也【戒社者先王之所以威示教戒諸侯使事上也災者象諸侯背天子是後宋事彊吳齊晉前驅滕薛俠穀魯衛驂乘故天去戒社若曰王教滅絕云耳公羊傳】莊公如齊觀社【莊公二十三年齊因祀社蒐軍實以示客公往觀之】曹劌諫曰不可夫齊棄大公之法而觀民於社【大公齊始祖大公望也】君為是舉【舉動也】而往觀之非故業也【業事也】何以訓民土而社助時也【土春分也周語曰土乃脈社者助時求福為農始也】收攬而烝納要也【攬拾也冬祭曰烝因祭社以納五穀之要休農夫也月令曰孟冬祀於天宗大祀於公社及門閭】今齊社而往觀旅非先王之訓也【旅衆也】天子祀上帝【上帝上天也】諸侯會之受命焉【助祭受政命也】諸侯祀先王先公【先王謂若宋祖帝乙鄭祖厲王之屬也先公先君也】卿大夫佐之受事焉【事職事也】臣不聞諸侯之相會祀也祀又不法【不法謂觀民也國語魯語】

王為羣姓立七祀曰司命曰中霤曰國門曰國行曰泰厲曰戶曰竈王自為立七祀諸侯為國立五祀曰司命曰中霤曰國門曰國行曰公厲諸侯自為立五祀大夫立三祀曰族厲曰門曰行適士立二祀曰門曰行庶士庶人立一祀或立戶或立竈【此非大神所祈報大事者也小神居人之間司察小過作譴告者爾樂記曰明則有禮樂幽則有鬼神鬼神謂此與司命主督察三命中霤主堂室居處門戶主出入行主道路行作厲主殺伐竈主飲食之事明堂月令春曰其祀戶祭先脾夏日其祀竈祭先肺中央曰其祀中霤祭先心秋曰其祀門祭先肝冬曰其祀行祭先腎聘禮曰使者出釋幣於行歸釋幣於門士喪禮曰疾病禱於五祀司命與厲其時不著今時民家或春秋祀司命行神山神門戶竈在旁是必春祠司命秋祠厲也或者合而祠之山即厲也民惡言厲巫祝以厲山為之謬乎春秋傳曰鬼有所歸乃不為厲祭法】小子掌祈於五祀【故書祀作禋鄭司農云禋讀為祀書亦或為祀玄謂祈或為剗用毛牲曰剗剗者釁禮之事也剗五祀謂始成其宮兆時也夏官】天子祭五祀歲徧諸侯祭五祀歲徧大夫祭五祀歲徧【五祀戶竈中霤門行也此盖殷時制也祭法曰天子立七祀諸侯立五祀大夫立三祀士立二祀謂周制也曲禮】

大夫祭五祀【五祀謂司命也中霤也門也行也厲也此祭謂大夫有地者其無地祭三耳王制】春祀戶祭先脾【春陽氣出祀之於戶內陽也祀之先祭脾者春為陽中於藏直脾脾為尊凡祭五祀於廟用特牲有主有尸皆先設席於奧祀戶之禮南面設主於戶內之西乃制脾及腎為俎奠於主北又設盛於俎西祭黍稷祭肉祭醴皆三祭肉脾一腎再既祭徹之更陳鼎俎設饌於筵前迎尸略如祭宗廟之儀】夏祀竈祭先肺【夏陽氣盛熱於外祀之於竈從

熱類也祀之祭先肺者陽位在上肺亦在上肺為尊也竈在廟門外之東祀竈之禮先席於門之奧東面設主於竈陁乃制肺及心肝為俎奠於主西又設盛於俎南亦祭黍三祭肺心肝各一祭醴三亦既祭徹之更陳鼎俎設饌於筵前迎尸如祀戶之禮【中央祀中霤祭先心【中霤猶中室也土主中央而神在室古者複穴是以名室為霤云祀之先祭心者五藏之次心次肺至此心為尊也祀中霤之禮設主於牖下乃制心及肝肺為俎其祭肉心肺肝各一他如祀戶之禮】秋祀門祭先肝【秋陰氣出祀之於門外陰也祀之先祭肝者秋為陰中於藏直肝肝為尊也祀門之禮北面設主於門左樞乃制肝及肺心為俎奠於主南又設盛於俎東其他皆如祭竈之禮】冬祀行祭先腎【冬陰盛寒於水祀之於行從辟除之類也祀之先祭腎者陰位在下腎亦在下腎為尊也行在廟門外之西為輶壤厚二寸廣五尺輪四尺祀行之禮北面設主於輶上乃制腎及脾為俎奠於主南又設盛於俎東祭肉腎一脾再其他皆如祀門之禮月令】大宗伯以血祭祭五祀【陰祀自血起貴氣臭也故書祀作禩鄭司農云禩當為祀書亦或作祀五祀五色之帝於王者宮中曰五祀玄謂此五祀者五官之神在四郊四時迎五行之氣於四郊而祭五德之帝亦食此神焉少昊氏之子曰重為句芒食於木該為蓐收食於金脩及熙為玄冥食於水顓頊氏之子曰黎為祝融后土食於火土】司服祭五祀則希冕【注見祭社稷章春官】三獻文【謂祭社稷五祀禮器】司門凡歲時之門受其餘【鄭司農云受祭門之餘地官】孟冬臘五祀【臘謂以田獵所得禽祭也五祀門戶中霤竈行也月令】

右祭五祀天子崩未殯五祀之祭不行既殯而祭其祭也尸入三飯不侑醕不酢而已矣自啟至於反哭五祀之祭不行已葬而祭祝畢獻而已【既葬彌吉畢獻祝而後止郊社亦然唯嘗禘宗廟俟吉也曾子問】

小宗伯兆五帝於四郊四望亦如之【鄭司農云四望道氣出入玄謂四望五嶽四鎮四寶春官】牧人望祀各以其方之色牲毛之【望祀五嶽四鎮四瀆也地官】司服祀四望則毳冕【毳畫虎蜺謂宗彝也其衣三章裳二章凡五也】典瑞兩圭有邸旅四望【注見祭地並春官】玉人兩圭五寸有邸旅四望【注見祭地考工記】大司樂乃奏姑洗歌南呂舞大磬以祀四望【姑洗陽聲第三南呂為之合四望五嶽四鎮四寶】大祝國將有事於四望則前祝【前祝者王出也歸也將有事於此神大祝居前先以祝辭告之並春官】五獻瘞【瘞明也謂祭四望山川也禮器】

右祀四望三正記曰郊後必有望僖公三十一年夏四月四卜郊不從乃免牲猶三望【三望分野之星國中山川皆因郊祀望而祭之魯廢郊天而脩其小祀故曰猶猶者可止之辭】猶三望亦非禮也望郊之細也不郊亦無望可也【春秋左氏傳宣三年傳云望郊之屬也】天子有方望之事【方望謂郊時所望祭四方羣神日月星辰風伯雨師五嶽四瀆及餘山川凡三十六所】無所不通【盡八極之內天之所覆地之所戴無所不至故得郊也】諸侯山川有不在其封內者則不祭也【故魯郊非禮也】三望者何望祭也然則曷祭祭泰山河海曷為祭泰山河海山川有能潤於百里者天子秩而祭之【此皆助天宣氣布功故祭天及之秩者隨其大小尊卑高下所宜禮祭天牲角繭栗社稷宗廟角握六宗五嶽四瀆角尺其餘山川

視卿大夫天燎地瘞日月星辰布山縣水沈風磔雨升燎者取俎上七體與其珪寶在辨中置於柴上燒之】觸石而出膚寸而合【側手為膚案指為寸言其觸石理而興無有膚寸而不合】不崇朝而徧雨乎天下者唯泰山爾【崇重也不重朝言一朝也】河海潤於千里【亦能通氣致雨潤澤及於千里韓詩說曰湯時大旱使人禱山川是也郊望非一獨祭三者魯郊非禮故獨祭其大者】猶者何通可以已也何以書譏不郊而望祭也【譏尊者不食而卑者獨食書者惡失禮也 公羊傳】楚昭王曰三代命祀祭不越望【諸侯望祀竟內山川星辰】江漢睢章楚之望也【四水在楚界 詳見因祭疾病章 哀六年左氏傳】

小宗伯兆山川丘陵墳衍各因其方【順其所在春官】天子諸侯祭山川歲徧【曲禮】天子祭天下名山大川五嶽視三公四瀆視諸侯【視視其牲器之數 尚書大傳云五嶽視三公四瀆視諸侯其餘山川視伯小者視子男注云謂其牲幣粢盛籩豆爵獻之數非謂尊卑】諸侯祭名山大川之在其地者【魯人祭泰山晉人祭河是也 王制】孟春命祀山林川澤犧牲毋用牝【為傷妊生之類】仲冬天子命有司祈祀四海大川名源淵澤井泉【順其德盛之時祭之也 今月令淵為深】季冬乃畢山川之祀【四時之功成於冬孟月祭其宗至此可以祭其佐也】命宰歷卿大夫至於庶民土田之數而賦犧牲以共山林名川之祀【此所與卿大夫庶民共者也歷猶次也卿大夫采地亦有大小其非采地以其邑之名多少賦之 並月令】羊人凡沈共其羊牲小子凡沈飾其牲【鄭司農云沈謂祭川爾雅曰祭川曰浮沉 並夏官】犬人掌犬牲凡沈用駟可也【駟謂不純色也 秋官】司服祀山川則毳冕【注見祀四望】典瑞璋邸射以祀山川【璋有邸而射取殺於四望鄭司農云射剡也 並春官】玉人璋邸射素功以祀山川【邸射剡而出也鄭司農云素功無飾也 考工記】鬯人凡山川用蜃【蜃畫為蜃形蚌曰含漿尊之象 春官】大司樂乃奏蕤賓歌函鐘舞大夏以祭山川【蕤賓陽聲第四函鐘為之合函鐘一名林鐘同上】舞師掌教兵舞帥而舞山川之祭祀山虞若祭山林則為主而脩除且蹕【為主主辨護之也脩除治道路場壇 並春官】大宗伯以血祭祭五嶽以貍沈祭山川澤【陰祀自血起貴氣臭也五嶽東曰岱宗南曰衡山西曰華山北曰恒山中曰嵩高山不見四寶者四寶五嶽之匹或省文祭山林曰埋川澤曰沈順其性之含藏 春官】祭山曰瘞縣【或瘞或縣置之於山山海經曰縣以吉玉是也】祭川曰浮沈【投祭水中或浮或沈 爾雅】三王之祭川也皆先河而後海【學記】五獻察【注見四望禮】

【器】山川之神則水旱癘疫之災於是乎禱之【詳見因祭疾病】右祭山川周公祀泰山召公為尸【白虎通】晉人將有事於河必先有事於惡池【惡當為呼聲之誤也呼池嘔夷并州川】齊人將有事於泰山必先有事於配林【配林林名禮器】季氏旅於泰山子謂冉有曰女弗能救與對曰

不能子曰嗚乎曾謂泰山不如林放乎【旅祭名泰山山名在魯地禮諸侯祭封內山川季氏祭之僭也冉有孔子弟子名求時為季氏宰救謂救其陷於僭竊之罪嗚呼歎辭言神不享非禮欲季氏知其無益而自止又進林放以厲冉有也 論語】

禮書綱目卷三十六

卷三十七

欽定四庫全書

禮書綱目卷三十七 婺源江永撰

百神 吉禮四

補

有天下者祭百神【詳祭法】凡以神仕者以冬日至致天神人鬼以夏日至致地示物彪以禴國之凶荒民之札喪【天人陽也地物陰也陽氣升而祭人鬼陰氣升而祭地祇物彪所以順其為人與物也致人鬼於祖廟致物彪於壇壇盖用祭天地之明日百物之神曰彪春秋傳曰魍魎魍魎杜子春云禴除也玄謂此禴讀如潰癰之潰春官】

右總要

埋少牢於泰昭祭時也相近於坎壇祭寒暑也王宮祭日也夜明祭月也幽宗祭星也雩宗祭水旱也【鄭注見祭法案孔安國王肅皆以此為六宗】

右六宗 禋于六宗【精意以享謂之禋宗尊也所尊祭者其祀有六謂四時也寒暑也日也月也星也水旱也祭亦以攝告 舜典】 宰我曰敢問禋于六宗何謂也孔子曰所宗者六皆潔祀之也埋少牢於太昭所以祭時也祖迎於坎壇所以祭寒暑也主於郊宮所以祭日也夜明所以祭月也幽祭所以祭星也雩祭所以祭水旱也禋于六宗此之謂也【孔叢子】

天子祭四方歲徧諸侯方祀歲徧【祭四方謂祭五官之神於四郊也句芒在東祝融后土在南蓐收在西玄冥在北詩云來方禋祀方祀者各祭其方之官而已 曲禮】 四坎壇祭四方也【四方即謂山林川谷丘陵之神也祭山林丘陵於壇川谷於坎每方各為坎為壇祭法】 大司馬中春教治兵遂以獮田致禽以祀祊【祊當為方聲之誤也秋田主祭四方報成萬物詩曰以社以方 夏官】 季秋天子乃厲飭執弓挾矢以獵命主祠祭禽於四方【以所獲禽祀四方之神也司馬職曰羅弊致禽以祀方 夏官】

鬯人凡四方用蜃【蜃漆尊也畫為蜃形蚌曰含漿尊之象 春官】 舞師教羽舞帥而舞四方之祭祀【羽析羽為之形如帟也四方之祭祀】

【謂四望也地官】

右四方

以我齊明與我犧羊以社以方【方秋祭四方報成萬物周禮所謂羅弊獻禽以祀祊是也】

來方禋祀以其騂黑與其黍稷【曾孫之來又禋祀四方之神而賽禱焉四方各用其方色之牲此言騂黑舉南北以見其餘也 並小雅】 方社不莫【方祭四方也 大雅】

小宗伯兆五帝於四郊四類亦如之【兆為壇之祭域鄭司農云四類三皇五帝九皇六十四民咸祀之玄謂四類日月星辰運行無常以氣類為之位兆日於東郊兆月與風師於西郊兆司中司命於南郊兆雨師於北郊 春官】

右四類

司民三年大比以萬民之數詔司寇司寇及孟冬祀司民之日獻其數於王王拜受之登於天府【鄭司農云文昌宮三能屬軒轅角相與為體近文昌為司命次司中次司祿次司民玄謂司民軒轅角也天府主祖廟之藏者】 小司寇孟冬祀司民獻民數於王王拜受之【司民星名謂軒轅角也小司寇於祀司民而獻民數於王重民也 並秋官】 天府若祭天之司民司祿而獻民數穀數則受而藏之【司民軒轅角也司祿文昌第六星或曰下能也祿之言穀也年穀登乃後制祿祭此二星者以孟冬既祭之而上民穀之數於天府 春官】

右司民司祿

季春天子乃薦鞠衣於先帝【為將蠶求福祥之助也鞠衣黃桑之服先帝大皞之屬月令】

右先帝

凡始立學者必釋奠於先聖先師及行事必以幣【謂天子命之教始立學官者也先聖周公若孔子】 凡釋奠者必有合也【國無先聖先師則所釋奠者當與鄰國合也】 有國故則否【若唐虞有夔伯夷周有周公魯有孔子則各自奠之不合也陳氏曰凡行釋奠之禮必有合樂之事若國有凶喪之故則雖釋奠不合樂也】 始立學者既興器用幣【興當為釁字之誤也禮樂之器成則釁之又用幣告先聖先師以器成】 然後釋菜【告先聖先師以器成有時將用也】 不舞不授器【釋菜禮輕也釋奠則舞舞則授器司馬之屬司兵司戈盾祭祀授舞者兵也】 乃退儐於東序一獻無介語可也【言乃退者謂得立三代之學者釋菜於虞庠則儐賓於東序魯之學有米廩東序瞽宗也 文王世子】 大司樂掌成均之法凡有道者有德者使教焉死則以為樂祖祭於瞽宗【成均五帝學名道多才藝者德能躬行者若舜命夔典樂教胄子是也死則以為樂之祖神而祭之鄭司農云瞽樂人樂人所共宗也或曰祭於瞽宗祭於廟中明堂位曰瞽宗殷學也泮宮周學也以此觀之祭於學宮中 春官】

祀先賢於西學【西學周小學也先賢有道德王所使教國子者 祭義】 凡學春官釋奠於其先師秋冬亦如之【官謂禮樂詩書之官周禮曰凡有道者有德者使教焉死則以為樂祖祭於瞽宗此之謂先師之類也若漢禮有高堂生樂有制氏詩有毛公書有伏生億可以為之也不言夏夏從春可知也釋奠者設薦饌酌奠而已無迎尸以下之事文王世子】 大胥春入學舍菜合舞【春始以學士入學宮而學之合舞等其進退使應節奏鄭司農云舍菜謂舞者皆持芬香之菜或曰古者士見於君以雉為摯見於師以菜為摯菜直謂蔬食菜羹之菜或曰學

者皆人君卿大夫之子衣服采飾舍采者減損解釋盛服以下其師也月令仲春之月上丁命樂正習舞釋采仲丁又命樂正入學習樂玄謂舍即釋也采讀為菜始入學必釋菜禮先師也菜蘋蘩之屬】秋頒學合聲【春使之學秋頒其才藝所為合聲亦等其曲折使應節奏春官】孟春命樂正入學習舞【為仲春將釋菜】仲春上丁命樂正習舞釋菜【樂正樂官之長也合習舞者順萬物始出地鼓舞也將舞必釋菜於先師以禮之夏小正曰丁亥萬用入學】天子乃帥三公九卿諸侯大夫親往視之【順時達物也並月令】天子視學大昕鼓徵【早昧爽擊鼓以召衆也周禮凡用樂大胥以鼓徵學士】衆至然後天子至乃命有司行事興秩節祭先師先聖焉【興猶舉也秩常也節猶禮也使有司攝其事舉常禮祭先師先聖不親祭之者視學觀禮耳非為彼報也】有司卒事反命【告祭畢也祭畢天子乃入】始之養也【又之養老之處凡大合樂必遂養老是以養焉言始始立學也】適東序釋奠於先老【親奠之者已所有事也養老東序則是視學於上庠文王世子】

右先聖先師

大學始教皮弁祭菜示敬道也【皮弁天子之朝服也祭菜禮先聖先師菜謂芹藻之屬學記】

司勳凡有功者銘書於王之大常祭於大烝司勳詔之【銘之言名也生則書於王旌以識其人與其功也死則於烝先王祭之詔謂告其神以辭也盤庚告其卿大夫曰茲予大享于先王爾祖其從與享之是也今漢祭功臣於廟庭夏官】

右有功 盤庚曰古我先王暨乃祖乃父胥及逸勤予敢動用非罰世選爾勞予不掩爾善茲予大享于先王爾祖其從與享之【古者天子錄功臣配食於廟大享烝嘗也所以不掩汝善尚書】書曰茲予大享于先王爾祖其從與享之季桓子問曰此何謂也孔子曰古之王者臣有大功死則必祀之於廟所以殊有績勸忠勤也盤庚舉其事以厲其世臣故稱焉桓子曰天子之臣有大功者則既然矣諸侯之臣有大功者可以如之乎孔子曰勞能定國功加於民大臣死難雖食之公廟可也桓子曰其位次如何孔子曰天子諸侯之臣生則有列於朝死則有位於廟其序一也【孔叢子】周公曰今王即命曰記功宗以功作元祀【功宗功之尊顯者祭法曰聖王之制祭祀也法施於民則祀之以死勤事則祀之以勞定國則祀之能禦大災則祀之能捍大患則祀之盖功臣皆祭於大烝而勳勞之最尊顯者則為之冠故謂之元祀洛誥】

天子諸侯祭因國之在其地而無主後者【謂所因之國先王先公有功德宜享世祀今絕無後為之祭主者昔夏后氏郊鯀至杞為夏後而更郊禹晉侯夢黃熊入國而祀夏郊此其禮也王制】

右無主後

仲春玄鳥至至之日以大牢祠于高禩天子親往【玄鳥燕也燕以施生時來巢人堂宇而孚乳嫁娶之象也媒氏之官以為候高辛氏之世玄鳥遺卵蜃簡吞之而生契後王以為媒官嘉

祥而立其祠焉變媒言禱神之也】后妃帥九嬪御【御謂從往侍祠周禮天子有夫人有嬪有世婦有女御獨云帥九嬪舉中言也】乃禮天子所御帶以弓韉授以弓矢於高禩之前【天子所御謂今有娠者於祠大祝酌酒飲於高禩之庭以神惠顯之也帶以弓韉授以弓矢求男之祥也王居明堂禮曰帶以弓韉禮之禱下其子必得天材月令】右高禩厥初生民時維姜嫄生民如何克禋克祀以弗無子履帝武敏歆攸介攸止載震載夙載生載育時維后稷【民人也謂周人也時是也姜嫄炎帝後姜姓有邠氏女名嫄為高辛之世妃精意以享謂之禋祀祀郊禩也弗之言祓無子求有子也古者立郊禩蓋祭天於郊而以先媒配也變媒言禱者神之也其禮以玄鳥至之日用大牢祀之天子親往后率九嬪御乃禮天子所御帶以弓韉授以弓矢于郊禩之前也履踐也帝上帝也武迹敏拇歆動也猶驚異也介大震娠夙肅也生子者及月辰居側室也育養也姜嫄出祀郊禩見大人跡而履其拇遂歆歆然如有人道之感於是即其所大所止之處而震動有娠乃周人所由以生之始也大雅生民】

古者大史順時視土【視視也】陽瘳憤盈土氣震【瘳厚也憤積也盈滿也震動也起也】農祥晨正【農祥房星也晨正謂立春之日晨中於午也農事之候故曰農祥】日月底於天廟【底至也天廟營室也孟春之月日月皆在營室】土乃脈【脈理也農書曰春土冒橛陳根可拔耕者急】先時九日【先先立春日也】太史告稷曰自今至於初吉【初吉二月朔日也詩云二月初吉】陽氣俱烝土膏其動【烝升也膏土潤也其動潤澤欲行】弗震弗渝麥其漏胥穀乃不殖【震動也渝變也胥災也言陽氣俱升土膏欲動當即動變寫其氣不然則脈滿氣結更為災病穀乃不殖】稷以告【以太史之言告王】王曰史帥陽官以命我司事【史太史陽官春秋司事主農事官】曰距今九日土其俱動【距去也】王其祗祓監農不易【祗敬也祓齊戒祓除也不易不易物土之宜】王乃使司徒咸戒公卿百吏庶民【吏百官也庶民甸師氏所掌之民主耕耨王之藉田者】司空除壇於藉【司空掌地也】命農大夫咸戒農用【農大夫田畯也農用田器也】先時五日【先耕時也】瞽告有協風至【瞽樂太師知風聲者協和也風氣和時候至也立春曰融風】王即齊宮【所齊之宮】百官御事各即其齊三日【御治也】王乃淳濯饗醴【淳沃也濯溉也饗飲也謂王沐浴飲醴酒】及期【期耕日也】鬱人薦鬯【鬱鬱金香草宜以和鬯酒也周禮鬱人掌裸器凡祭祀賓客和鬱鬯以實彝而陳之共王之齊鬯】犧人薦醴【犧人司尊也掌共酒醴者】王裸鬯饗禮乃行【裸灌也灌鬯飲醴皆所以自香潔】百吏庶民畢從及藉后稷監之【監察也】膳夫農正陳藉禮【膳夫土土也掌王之飲食膳羞之饋食農正田大夫主敷陳藉禮而祭其神為農祈也】太史贊王【贊導也】王敬從之王耕一壠【一壠一耜之壠也王無耦以一耜耕】班三之【班次也三下各二其人王一壠公三卿九大夫二十七】庶人終於千畝【終盡耕也】其后稷省功太史監之司徒省民太師監之【國語周語】

右藉田

籥章凡國祈年於田祖歆豳雅擊土鼓以樂田畯【祈年祈豐年也田祖始耕田者謂神農也豳雅亦七月也七月又有于耜舉趾饁彼南畝之事是亦歌其類謂之雅者以其言男女之正鄭司農云田畯古之先教田者爾雅曰畯農夫也春官】

右田祖 琴瑟擊鼓以御田祖以祈甘雨【御迎也田祖先嗇也謂始耕田者即神農也
小雅甫田】

天子大蜡八【所祭有八神也】歲十二月合聚萬物而索饗之也【歲十二月周之正數謂建亥之月也饗者祭其神也萬物有功加於民者神使為之也祭之以報焉造者配之也】主先嗇而祭司嗇也【先嗇若先農者司嗇后稷是也】饗農及郵表畷禽獸【農田畷也郵表畷謂田畷所以督約百姓於井間之處也詩云為下國畷郵禽獸服不氏所教擾禽獸也】迎猫迎虎【迎其神也】祭坊與水庸【水庸溝也】曰土反其宅水歸其壑昆蟲無作草木歸其澤【此蜡祝辭也若辭同則祭同處可知矣壑猶坑也昆蟲暑生寒死螟螽之屬為害者也】皮弁素服葛帶榛杖黃衣黃冠而祭【言祭以息民服象其時物之色季秋而草木黃落祭謂既蜡臘先祖五祀也於是勞農以休息之論語曰黃衣狐裘】八蜡以記四方【四方方有祭也】四方年不順成八蜡不通【其方穀不孰則不通於蜡焉使民謹於用財蜡有八者先嗇一也司嗇二也農三也郵表畷四也猫虎五也坊六也水庸七也昆蟲八也】順成之方其蜡乃通既蜡而收民息已【收謂收斂聚積也息民與蜡異則黃衣黃冠而祭為臘必矣郊特性 詳見祭義此掇其大要】孟冬天子乃祈來年於天宗大割祠於公社及門閭臘先祖五祀【此周禮所謂蜡祭也天宗謂日月星辰也大割大殺羣牲割之也臘謂以田獵所得禽祭也五祀門戶中霤竈行也或言祈或言大割或言臘互文】勞農以休息之【黨正屬民飲酒正齒位是也 月令】籥章國祭蜡則歛豳頌擊土鼓以息老物【故書蜡為蠶杜子春】

【曰蠶當為蜡郊特性曰天子大蜡八伊耆氏始為蜡歲十二月合聚萬物而索饗之也蜡之祭也主先嗇而祭司嗇也黃衣黃冠而祭息田夫也既蜡而收民息已玄謂十二月建亥之月也求萬物而祭之者萬物助天成歲事至此為其老而勞乃祀而老息之於是國亦養老焉月令孟冬勞農以休息之是也豳頌亦七月也七月又有穫稻作酒躋彼公堂稱彼兕觥萬壽無疆之事是亦歌其類也謂之頌者以其言歲終人功之成
春官】黨正國索鬼神而祭祀則以禮屬民而飲酒於序以

正齒位【國索鬼神而祭祀謂歲十二月大蜡之時建亥之月也正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者為民三時務農將闕於禮至此農隙而教之尊長養老見孝弟之道也黨正飲酒禮亡以此事屬於鄉飲酒之義微失少矣凡射飲酒此鄉民雖為鄉大夫必來觀禮鄉飲酒鄉射記大夫樂作不入土既旅不入是也 地官】大宗伯以鬴辜祭四方百物【鄭司農云罷辜披磔牲以祭若今時磔狗祭以止風玄謂鬴鬴牲胷也鬴而磔之謂磔禳及蜡祭郊特性曰八蜡以記四方四方年不順成八蜡不通以謹民財也又曰蜡之祭也主先嗇而祭司嗇也祭百種以報嗇也饗農及郵表畷禽獸仁之至義之盡也】大宗伯凡六樂者一變而致羽物及川澤之示再變而致羸物及山林之示三變而致鱗物及丘陵之示四變而致毛物及墳衍之示五變而致介物及土示六變而致象物及天神【變猶更也樂成則更奏也此謂大蜡索鬼神而致百物六樂奏而禮畢東方之祭則用太蔭姑洗南方之祭則用蕤賓西方之祭則用夷則無射北方之祭則用黃鍾為均焉每奏有所感致和以來之凡動物敏疾者地祇高下之甚者易致羽物既飛又走川澤有孔竅者蛤蟹走則遲墳衍孔竅則小矣是其所以舒疾之分土祇原隰及平地之神

也象物有象在天所謂四靈者天地之神四靈之知非德至和則不至禮運曰何謂四靈麟鳳龜龍謂之四靈龍以為畜故魚鮪不淦鳳以為畜故鳥不喬麟以為畜故獸不狘龜以為畜故人情不失 並春官】

鼓人凡祭祀百物之神鼓兵舞帔舞者【兵謂干戚也帔列五采繪為之有秉皆舞者所執地官】鬯人凡鬯事用散【漆尊無飾曰散 春官】右蜡及百物

伊耆氏始為蜡【詳祭義】

秋省而遂大蜡天子之祭也【省讀為獮秋田名也大蜡歲十二月索鬼神而祭之疏曰此明魯得祭之事 明堂位】昔者仲尼與於蜡賓【蜡者索也歲十二月合聚萬物而索饗之亦祭宗廟時孔子仕魯在助祭之中 禮運】子貢觀於蜡【詳嘉事雜記鄉飲章】

埋少牢於泰昭祭時也相近於坎壇祭寒暑也【昭明也亦謂壇也時四時也亦謂陰陽之神也埋之者陰陽出入於地中也凡此以下皆祭用少牢相近當為攘祈聲之誤也攘猶卻也祈求也寒暑不時則或攘之或祈之寒於坎暑於壇 祭法】籥章掌土鼓豳籥【杜子春云上鼓以瓦為匡以革為兩面可擊也鄭司農云豳籥豳國之地竹豳詩亦如之玄謂豳籥豳人吹籥之聲章明堂位曰上鼓蒯桴葦籥伊耆氏之樂】中春晝擊土鼓歛豳詩以逆暑【豳詩豳風七月也吹之者以籥為之聲七月言寒暑之事迎氣歌其類也此風也而言詩時摠名也迎暑以晝求諸陽】中秋夜迎寒亦如之【迎寒以夜求諸陰 春官】

右時及寒暑

古者日在北陸而藏冰【陸道也謂夏十二月日在虛危冰堅而藏之】西陸朝覲而出之【謂夏三月日在昴畢蟄蟲出而用水春分之中奎星朝見東方】其藏冰也黑牡秬黍以享司寒【黑牡黑牲也秬黑黍也司寒玄冥北方之神故物皆用黑有事於冰故祭其神】其出之也桃弧棘矢以除其災【禳除凶邪將御至尊故】祭寒而藏之【享司寒】獻羔而啟之【謂二月春分獻羔祭韭始開冰室 昭四年左氏傳】仲春天子乃鮮羔開冰先薦寢廟【鮮當為獻聲之誤也獻羔謂祭司寒也祭司寒而出冰薦於宗廟乃始賦之 月令】

右司寒 二之日鑿冰冲冲三之日納于凌陰四之日其蚤獻羔祭韭【冰盛水腹則命取冰於山林冲冲鑿冰之意凌陰冰室也箋云古者日在北陸而藏冰西陸朝覲而出之祭司寒而藏之獻羔而啟之其出之也朝之祿位賓食喪祭於是乎用之月令仲春天子乃獻羔開冰先薦寢廟周禮凌人之職夏頒冰掌事秋刷上章備寒故此章備暑后稷先公禮教備也 豳風七月】

方相氏狂夫四人【方相猶言放想可畏怖之貌】掌蒙熊皮黃金四目玄衣朱裳執戈揚盾帥百隸而時難以索室毆疫【蒙冒也冒熊皮者以驚毆疫癘之鬼如今魃頭也時難四時作方相氏以難卻凶惡也月令季冬命國難索廋也 夏官】占夢遂令始難 疫【令令方相氏也難謂執兵以有難卻也方相氏蒙熊皮黃金四】

【目玄衣朱裳執戈揚盾帥百隸為之毆疫癘鬼也故書難或為儺杜子春難讀為難問之難

其字當作儺月令季春之月命國儺九門磔攘以畢春氣仲秋之月天子乃儺以達秋氣季冬之月命有司大儺旁磔出土牛以送寒氣春官】季春命國難九門磔攘以畢春氣【此難難陰氣也陰寒至此不止害將及人所以及人者陰氣右行此月之中日行歷 有大陵積尸之氣氣佚則厲鬼隨而出行命方相氏帥百隸索室毆疫以逐之又磔牲以攘於四方之神所以畢止其災也王居明堂禮曰季春出疫於郊以攘春氣】仲秋天子乃難以達秋氣【此難難陽氣也陽著至此不衰害亦將及人所以及人者陽氣左行此月宿直 畢 畢亦得大陵積尸之氣氣佚則厲鬼亦隨而出行於是亦命方相氏帥百隸而難之王居明堂禮曰仲秋九門磔攘以 陳氣禦止疾疫】季冬命有司大難旁磔出土牛以送寒氣【此難難陰氣也難陰始於此者陰氣右行此月之中日歷虛危虛危有墳墓四司之氣為厲鬼將隨強陰出害人也旁磔於四方之門磔攘也出猶作也作土牛者土為牛牛可牽止也送猶畢也 並月令】

右難 鄉人儺朝服而立於阼階【儺所以逐疫周禮方相氏掌之阼階東階也儺雖古禮而近於戲亦必朝服而臨之者無所不用其誠敬也或曰恐其驚先祖五祀之神欲其依已而安之也 此一節記孔子居鄉之事 鄉黨】 鄉人禘【傷強鬼也謂時儺索室毆疫逐強鬼也禘或為獻或為儺】孔子朝服立於阼存室神也【神依人也郊特性】

射人祭侯則為位【祭侯獻服不服不以祭侯為位為服不受獻之位也天射曰服不侯西北三步北面拜受爵 夏官】 梓人祭侯之禮以禮脯醢【謂司馬實爵而獻獲者於侯薦脯醢折俎獲者執以祭侯】其辭曰惟若寧侯【若猶女也寧安也謂先有功德其鬼有神】母或若女不寧侯不屬於王所故抗而射女【或有也若如也屬猶朝會也抗舉也張也】強飲強食貽女曾孫諸侯百福【貽遺也曾孫諸侯謂女後世為諸侯者考工記】司馬正洗散遂實爵獻服不【言服不者著其官尊大侯也服不司馬之屬掌養猛獸而教擾之者洗酌皆西面】服不侯西北三步北面拜受爵【近其所為獻】宰夫有司薦庶子設折俎【宰夫有司宰夫之吏也鄉射記曰獲者之俎折脊脅肺】卒錯獲者適右个薦俎從之【不言服不言獲者國君大侯服不負侯其徒居乏待獲變其文容二人也司馬正皆獻之薦俎已錯乃適右个明此獻已將歸功於侯也適右个由侯內鄉射記曰東方謂之右个】獲者左執爵右祭薦俎二手祭酒【祭俎不奠爵不備禮也二手祭酒者獲者南面於俎北當為侯祭於豆間爵反注為一手不能正也此薦俎之設如於北面人焉天子祝侯曰唯若寧侯無或若女不寧侯不屬於王所故抗而射女彊飲彊食貽女曾孫諸侯百福諸侯以下祝辭未聞】適左个祭如右个中亦如之【先祭个後中者以外即之至中若神在中鄉射禮曰獻獲者俎與薦皆三祭】卒祭左个之西北三步東面【北鄉受獻之位也不北面者嫌為侯卒爵】設薦俎立卒爵【大射儀】

右侯

司燿凡祭祀則祭燿【報其為明之功禮如祭燿 夏官】尸卒食而祭饔饔雍饔【雍孰肉以尸享祭竈有功也舊說云宗婦祭饔饔亨者祭雍饔用黍肉而已無籩豆俎禮器曰燔燎于饔夫饔者老婦之祭盛於盆尊於瓶 特性記】

右燿爨 孔子曰臧文仲安知禮燔柴於奧【奧當為爨字之誤也或作竈禮尸卒食而祭饔爨饗爨也時人以為祭火神乃燔柴】夫奧者老婦之祭也盛於盆尊於瓶【老婦先炊者也盆瓶炊器也明此祭先炊非祭火神燔柴似失之 禮器案家語云竈者老婦之所祭王肅註老婦主其祭】

大馭掌馭玉路以祀及犯軼王自左馭馭下祝登受轡犯軼遂驅之【行山曰軼犯之者封土為山象以菩芻棘柏為神主既祭之以車轢之而去喻無險難也春秋傳曰跋涉山川自由也王由左馭禁制馬使不行也故書軼作罰杜子春云罰當為軼軼讀為別異之別謂祖道轢軼磔犬也詩云載謀載惟取蕭祭脂取羝以軼詩家說曰將出祖道犯軼之祭也聘禮曰乃舍軼飲酒于其側禮家說亦謂道祭】及祭酌僕僕左執轡右祭兩軹祭軌乃飲【杜子春云軹謂兩轡也軌當作軹謂車前軹也】戎僕掌馭戎車【戎車革路也師出王乘以自將】犯軼如玉路之儀凡巡守及兵車之會亦如之【如在軍也竝夏官】聘禮又釋幣于行【告將行也行者之先其古人之名未聞天子諸侯有常祀在冬大夫三祀曰門曰行曰厲喪禮有毀宗躐行出于大門則行神之位在廟門外西方不言埋幣可知也今時民春秋祭祀有行神古之遺禮乎】出祖釋軼祭酒脯乃飲酒于其側【祖始也既受聘享之禮行出國門止陳車騎釋酒脯之奠於軼為行始也詩傳曰軼道祭也謂祭道路之神春秋傳曰軼涉山川然則軼山行之名也道路以險阻為難是以委土為山伏牲其上使者為軼祭酒脯祈吉也卿大夫處者於是餞之飲酒於其側禮畢乘車轢之而遂行舍於近郊矣其牲犬豕可也

聘禮記】右行及軼【行神常祀見祭五祀】

取羝以軼【羝牡羊也軼祭行道之神也大雅生民】仲山甫出祖【祖行祭也烝民】

韓侯出祖【既覲而反國必祖者尊其所往去則如始行焉 韓奕】

龜人上春釁龜祭祀先卜【鄭司農云祭祀先卜者卜其日與其牲玄謂先卜始用卜筮者言祭言祀尊焉天地之也世本作曰巫咸作筮卜未聞其人也 春官】

右先卜

天府季冬陳玉以貞來歲之嫩惡【問事之正曰貞問歲之嫩惡謂問於龜大卜職大貞之屬陳玉陳禮神之玉凡卜筮實問於鬼神龜筮能出其卦兆之占耳龜有天地四方則玉有六器者與言陳者既事藏之不必貍之也鄭司農云貞問也易曰師貞丈人吉問於丈人國語曰貞於陽卜 春官】

右貞卜

校人春祭馬祖【馬祖天駟也孝經說曰房為農馬】夏祭先牧【先牧始養馬者其人未聞】秋祭馬社【馬社始乘馬者世本作曰相土作乘馬】冬祭馬步【馬步神為災害馬者】廋人及祭馬祖祭閑之先牧【玄謂閑之先牧先牧制閑者 並夏官】

甸祝禱牲禱馬皆掌其祝號【杜子春云禱禱也為馬禱無疾為田禱多獲禽牲詩云既伯既

禱爾雅曰既伯既禱馬祭也玄謂禱讀如伏誅之誅今侏大字也為牲祭求肥充為馬祭求肥健春官】

右牲馬 吉日維戊既伯既禱【維戊順類乘牡也伯馬祖也重物慎微將用馬力必先為之禱其祖禱禱獲也箋云戊剛日也故乘牡為順類也 小雅】
既伯既禱馬祭也【伯祭馬祖也將用馬力必先祭其祖 爾雅】

掌正及四時之孟月吉日則屬民而讀邦法以糾戒之春秋祭禋亦如之【禋謂雩祭水旱之神盖亦為壇位如祭社稷云】凡其黨之祭祀教其禮事掌其戒禁【其黨之民】族師月吉則屬民而讀邦法春秋祭酺亦如之【酺者為人物裁害之神也故書酺或為步杜子春云當為酺玄謂校人職又有冬祭馬步則未知此世所云蜎螟之酺與神鬼之步與盖亦為壇位如雩祭云族長無飲酒之禮因祭酺而與其民以長幼相獻酬焉 並地官】肆師若國有大故則令國人祭【大故謂水旱凶荒所令祭者社及祭酺】歲時之祭祀亦如之【月令仲春命民社此其一隅 春官】

右祭酺

禮書綱目卷三十七

卷三十八

欽定四庫全書

禮書綱目卷三十八 婺源江永撰

宗廟 吉禮五

補

君子將營宮室宗廟為先廡庫為次居室為後【重先祖及國之用 曲禮】 匠人營國左祖右社【祖宗廟】夏后氏世室【世室者宗廟也】殷人重屋【重屋者王宮正堂若大寢也】周人明堂【明堂者明政教之堂此三者或舉宗廟或舉王寢或舉明堂互言之以明其同制考工記詳見通禮名器下】 小宗伯掌建國之神位右社稷左宗廟【詳見祭通禮神位章】 天子不卜處大廟【卜可建國之處吉則宮廟吉可知表記已上四條論營建宗廟】 小宗伯辨廟祧之昭穆【祧遷主所藏之廟自始祖之後父曰昭子曰穆 春官】 天子七廟三昭三穆與大祖之廟而七【此周制七者大祖及文王武王之祧與親廟四大祖后稷殷則六廟契及湯與二昭二穆夏則五廟無大祖禹與二昭二穆而已】 諸侯五廟二昭二穆與大祖之廟而五【大祖始封之君王者之後不為始封之君廟】 大夫三廟一昭一穆與大祖之廟而三【大祖別子始爵者大傳曰別子為祖謂此雖非別子始爵者亦然】 士一廟【謂諸侯之中士下士名曰官師者上士二廟】 庶人祭於寢【寢適寢也 王制】 天下有王分地建國置都立邑設廟祧壇墠而祭之乃為親疏多少之數是故王立七廟一壇一墠曰考廟曰王考廟曰皇考廟曰顯考廟曰祖考廟皆月祭之遠廟為祧有二祧享嘗乃止去祧為壇去壇為墠壇墠有禱焉祭之無禱乃止去墠曰鬼諸侯立五廟一壇一墠曰考廟曰王考廟曰皇考廟皆月祭之顯考廟祖考廟享嘗乃止去祖為壇去壇為墠壇墠有禱焉祭之無禱乃止去壇為鬼大夫立三廟二壇曰考廟曰王考廟曰皇考廟享嘗乃止顯考祖考無廟有禱焉為壇祭之去壇為鬼適士二廟一壇曰考廟曰王考廟享嘗乃止顯考無廟有禱焉為壇祭之去壇為鬼官師一廟曰考廟王考無廟而祭之去王考為鬼庶士庶人無廟死曰鬼【建國封諸侯也置都立邑為卿大夫之采地及賜士有功者之地廟之言貌也宗廟者先祖之尊貌也祧之言超也超上去意也封土曰壇土地曰墠書曰三壇用墠王皇皆君也顯明也祖始也名先人以君明始者所以尊本之意也天子遷廟之主以昭穆合藏於二祧之中諸侯無祧藏於祖考之廟中聘禮曰不腆先君之祧是謂始祖廟也享嘗謂四時之祭天子諸侯為壇墠所禱謂後遷在祧者也既事則反其主於祧鬼亦在祧顧遠之於無事祫乃祭之爾春秋文二年秋大事於大廟傳曰毀廟之主陳於大祖未毀廟之主皆升合食於大祖是也魯煬公者伯禽之子也至昭公定公久已為鬼而季氏禱之而立其宮則鬼之主在祧明矣唯天子諸侯有主禘祫大夫有祖考者亦鬼其百世不禘祫無主爾其無祖考者庶士以下鬼其考王考官師鬼其皇考大夫適士鬼其顯考而已大夫祖考謂別子也凡鬼者薦而不祭王制曰大夫士有田則祭無田則薦適士上士也官師中士下士庶士府史之屬此適士云顯考無廟非也當為皇考字之誤 祭法

已上三條論立廟昭穆之制多少之數】山節藻梲復廟重檐刮楹達鄉反坫出尊崇坫康圭疏屏天子之廟飾也【山節刻栴盧為山也藻梲畫侏儒柱為藻文也復廟重屋也重檐重承壁材也刮刮摩也鄉牖屬謂夾戶窻也每室八窻為四達反坫反爵之坫也出尊當尊南也唯兩君為好既獻反爵於其上禮君尊於兩楹之間崇高也康讀為亢龍之亢又為高坫亢所受圭奠於上焉屏謂之樹今浮思也刻之為雲氣蟲獸如今闕上為之矣明堂位】廟門容大扃七个【大扃牛鼎之扃長三尺每扃為一个七个二丈一尺】闔門容小扃參个【廟中之門曰闔小扃腳鼎之扃長二尺參个六尺考工記匠人】閉謂之門【詩曰祝祭于祊】廟中路謂之唐【詩曰中唐有甃】堂途謂之陳【堂下至門徑也】室有東西廂曰廟【夾室前堂】無東西廂有室曰寢【但有大寢爾雅】寢不踰廟【王制已上四條論廟中制度】守祧奄八人【遠廟為祧周為文王武王廟遷主藏焉奄如今之宦】

【者天子七廟三昭三穆】掌守先王先公之廟祧【詳見下守藏章】若將祭祀其廟則有司脩除之其祧則守祧黝堊之【廟祭此廟也祧祭遷主有司宗伯也脩除黝堊互言之有司恒主脩除守祧恒主黝堊鄭司農云黝讀為幽黑也堊白也爾雅曰地謂之黝牆謂之堊春官】隸僕掌五寢之掃除糞洒之事【五寢五廟之寢也周天子七廟唯祧無寢詩云寢廟繹繹相連貌也前曰廟後曰寢汜埽曰埽埽席前曰拚洒灑也鄭司農云洒當為灑玄謂論語曰子夏之門人當洒掃應對】祭祀脩寢【於廟祭寢或有事焉月令凡新物先薦寢廟夏官】仲春寢廟畢備【畢猶皆也凡廟前曰廟後曰寢月令已上三條論修廟】國君下齊牛式宗廟【疏曰案齊右職凡有牲事則前馬注引曲禮曰國君下宗廟式】

【齊牛鄭注周官與此文異者熊氏云此文誤當以周禮注為正曲禮】太子過廟則趨【過則下望廟則趨大戴禮此二條恭敬宗廟】公若有出疆之政【謂朝覲會同也】庶子以公族之無事者守於公宮正室守太廟【正室適子也大廟大祖之廟】諸父守貴宮貴室【謂守路寢】諸子諸孫守下宮下室【下宮親廟也下室燕寢或言宮或言廟通異語文王世子此條守宗廟】有焚其先人之室則三日哭【謂人燒其宗廟哭者哀精神之有虧傷】故曰新宮火亦三日哭【火人火也新宮火在魯成三年檀弓此條廟災】

右廟制周公作大邑成周於土中乃位五宮太廟宗宮考宮路寢明堂【五宮宮府寺也太廟后稷二宮祖考廟也路寢王所居也明堂在國南者也】咸有四阿反坫重亢重郎常累復格升藻梲設移旅楹燹常畫【咸皆也廟四下曰阿反坫外向室也重亢累棟也重郎累屋也常累系也復格累之櫺也升藻梲畫梁柱也承屋曰移旅列也燹謂藻升之飾也言皆畫列柱為之也】內階玄階堤唐山廡【以黑石為階唐中庭道堤謂為高之也山廡謂畫山雲汲冢周書】孔子適周歷郊社之所考明堂之則察廟朝之度於是喟然曰吾乃今知周公之聖與周之所以王也【家語】衛莊公改舊制變宗廟易朝市高子罕問於孔子曰周禮繹祭於祊祊在廟門之西前朝而後市今衛君更之如之何孔子曰繹之於庫門內祊之於東方市朝於西方失之矣【同上】大廟天子明堂【言廟如天子之制也明堂位】子貢觀於魯廟之北堂出而問孔子曰鄉者賜觀於太廟之北堂吾亦未輟還復瞻被九蓋皆繼彼有說邪匠過絕邪【北堂神主所在也輟止也九當為北被當為彼傳寫誤耳蓋音盍戶扇也繼謂其

材木斷絕相接繼也子貢問北楹皆繼續彼有說邪匠過誤而遂絕之也 按家語作還瞻北楹皆繼焉彼有說邪匠過之也注觀北面之楹皆斷絕也】孔子曰太廟之堂亦嘗有說【言舊曾說今則無也】官致良工因麗節文【致極也官致良工謂初造太廟之時官極其良工良工則因隨其木之美麗節文而裁制之所以斷絕家語作官致良工之匠匠致良材盡其功巧蓋貴文也】非無良材也蓋曰貴文也【非無良材大木不斷絕者蓋所以貴文飾也此蓋明夫子之博識也 荀子】魯公之廟文世室也武公之廟武世室也【此二廟象周有文王武王之廟也世室者不毀之名也魯公伯禽也武公伯禽之玄孫也名敖 明堂位】文公十三年大室屋壞【大廟之室】書不共也【簡慢宗廟使至傾頽故書以見臣子不共春秋左氏傳】世室屋壞世室魯公之廟也【魯公周公子伯禽】

周公稱大廟魯公稱世室羣公稱宮【少差異其下者所以上尊周公】此魯公之廟也曷為謂之世室世室猶世室也世世不毀也【魯公始封之君故不毀也】周公何以稱大廟于魯【據魯公始封也】封魯公以為周公也【為周公故語在下 公羊傳】大室屋壞者有壞道也譏不脩也大室猶世室也【世世有是室故言世室】周公曰大廟【爾雅曰室有東西廂曰廟】伯禽曰大室羣公曰宮【爾雅曰宮謂之室室謂之宮然則其實一也蓋尊伯禽而異其名】禮宗廟之事君親割【割牲】夫人親舂【舂粢盛也】敬之至也為社稷之主而先君之廟壞極稱之志不敬也【極稱言屋壞不復依違其文穀梁傳】莊公二十三年秋丹桓宮楹【桓公廟也楹柱也】二十四年春王三月刻桓宮桷【刻鏤也桷椽也將逆夫人故為盛飾】皆非禮也【并非丹楹故言皆】御孫諫曰臣聞之儉德之共也侈惡之大也【御孫魯大夫】先君有共德而君納諸大惡無乃不可乎【以不丹楹刻桷為共 左氏傳】天子諸侯黝堊【黝堊黑色】大夫蒼土黻【黻黃色】丹楹非禮也天子之桷斲之斲之加密石焉【以細石磨之】諸侯之桷斲之斲之大夫斲之士斲本刻桷非正也【非正謂刻桷丹楹也 穀梁傳】成公六年二月辛巳立武宮【魯人自鞏之功至今無患故築武軍】

【又作先君武公宮以告成事欲以示後世】季文子以鞏之功立武宮非禮也【宣十二年潘黨勸楚子立武軍楚子答以武有七德非己所堪其為先君宮告成事而已今魯倚晉之功又非霸主而立武宮故譏之 左氏傳】武宮者何武公之宮也【在春秋前】立者不宜立也立武宮非禮也【禮天子諸侯立五廟受命始封之君立一廟至於子孫過高祖不得復立廟周家祖有功宗有德立后稷文武廟至於子孫自高祖已下而七廟天子卿大夫三廟元士二廟諸侯之卿大夫比元士二廟諸侯之士一廟立武宮者蓋時衰多廢人事而好求福於鬼神故重而書之臧孫許伐齊有功故立武宮 公羊傳】立武宮立者不宜立也【舊說曰武公之宮廟毀已久矣故傳曰不宜立也禮記明堂位曰魯公之廟文世室也武公之廟武世室也言世室則不毀也則義與此違穀梁傳】定公元年立煬宮【煬公伯禽子也其廟已毀季氏禱之而立其宮書以譏之】昭公出故季平子禱于煬公九月立煬宮【平子逐公懼而請禱於煬宮昭公死於外自以為獲福故立其宮 左氏傳】

煬宮者何煬公之宮也【春秋前煬公也】立者不宜立也立煬宮非禮也【公羊傳】立煬宮立者不宜立者也【煬宮伯禽子廟毀已久穀梁傳】成公三年二月甲子新宮災三日哭【杜曰三年喪畢宣公神主新入廟故謂之新宮書三日哭善得禮宗廟親之神靈所馮居而遇災故哀而哭之春秋】宣公之宮也【以無新宮知宣公之宮廟】曷為謂之新宮不

忍言也【親之精神所依而災孝子隱痛不忍正言也謂之新宮者因新入宮易其西北角示昭穆相繼代有斷改更也】其言三日哭何【據桓僖宮災不言三日哭】廟災三日哭禮也【善得禮痛傷鬼神無所依歸故君臣素縞哭之公羊傳】新宮者禰宮也三日哭哀也其哀禮也【宮廟親之神靈所馮居而遇災故以哀哭為禮】迫近不敢稱諡恭也【迫近言親禰也桓僖遠祖則稱諡】其辭恭且哀以成公為無譏矣【穀梁傳】
哀公三年桓宮僖宮災孔子在陳聞火曰其桓僖乎【言桓僖親盡而廟不毀宜為天所災左氏傳家語孔子曰禮祖有功而宗有德故不毀其廟焉今桓僖之親盡矣又功德不足以存其廟而魯不毀是以天災加之】此皆毀廟也其言災何復立也曷為不言其復立春秋見者不復見也【公羊傳】凡邑有宗廟先君之主曰都無曰邑【周禮四縣為都四井】

【為邑然宗廟所在則雖邑曰都尊之也莊二十八年左氏傳】諸侯不敢祖天子大夫不敢祖諸侯而公廟之設於私家非禮也由三桓始也【言仲孫叔孫季孫氏皆立桓公廟魯以周公之故立文王廟三家見而僭焉郊特性】衛將軍文子將立三軍之廟於其家使子羔訪於孔子孔子曰公廟設於私家非古禮之所及吾弗知【家語】震夷伯之廟夷伯魯大夫也因此以見天子至于士皆有廟【明夷伯之廟過制故因此以言禮】天子七廟諸侯五大夫三士二故德厚者流光德薄者流卑【雍曰德厚者位尊道隆者爵重故天子遠及七世士祭祖而已】是以貴始德之本也始封必為祖【若契為殷祖棄為周祖穀梁傳】
子大叔之廟在道南其寢在道北【昭十八年左氏傳】

大司樂乃奏夷則歌小呂舞大濩以享先妣【先妣姜嫄也姜嫄履大人跡感神靈而生后稷是周之先母也周立廟祀后稷為始祖姜嫄無所祀是以特立廟而祭之謂之閼宮閼神之詳見祭物樂舞章】

右妣廟

有虞氏祖顓頊而宗堯夏后氏祖顓頊而宗禹殷人祖契而宗湯周人祖文王而宗武王【詳見祭法】

右祖宗 正月上日受終於文祖【文祖者堯始祖之廟
舜典】正月朔旦受命于神宗【神宗堯廟也大禹謨】伊尹曰

七世之廟可以觀德【天子七廟三昭三穆與太祖之廟七七廟親盡則遷必有德之主則不祧毀故曰七世之廟可以觀德咸有一德】子羔問曰祭典云昔者有虞氏祖顓頊而宗堯夏后氏亦祖顓頊而宗禹殷人祖契而宗湯周人祖文王而宗武王此四祖四宗或乃異代或其考祖之有功德其廟可也若有虞宗堯夏祖顓頊皆異代之有功德者也亦可以存其廟乎孔子曰善如汝所問也如殷周之祖宗其廟可以不毀其他祖宗者功德不殊雖在殊代亦可以無疑矣詩云蔽芾甘棠勿剪勿伐召伯所憩周人之於召公也愛其人猶敬其所舍之樹況祖宗其功德而可以不尊奉其廟乎【家語】魯公之廟文世室也武公之廟武世室也【詳見上章】宋祖帝乙鄭祖厲王猶上祖也【詳見下章】

措之廟立之主曰帝【同之天神春秋傳曰凡君卒哭而祔祔而作主曲禮】右廟主葬僖公緩作主非禮也凡君薨卒哭而祔祔而作主特祀於主烝嘗禘於廟【詳見凶禮喪大記下作主章】文公二年春王二月丁丑作僖公主書不時也【同上】作僖公主者何為僖公作主也主者曷用虞主用桑練主用栗用栗者藏主也作僖公主何以書譏不時也其不時奈何欲久喪而後不能也【同上】立主喪主於虞吉主於練作僖公主譏其後也作主壞廟有時日於練焉壞廟壞廟之道易檐可也改塗可也【同上】曾子問曰喪有二孤廟有二主禮與【怪時有之】孔子曰天無二日土無二王嘗禘郊社尊無二上未知其為禮也【尊喻卑也神雖多猶一一祭之】昔者齊桓公亟舉兵作偽主以行及反藏諸祖廟廟有二主自桓公始也【偽有假也舉兵以遷廟主行無則主命為假主非也】曾子問曰古者師行必以遷廟主行乎孔子曰

天子巡守以遷廟主行載于齊車言必有尊也今也取七廟之主以行則失之矣【齊車金路】當七廟五廟無虛主虛主者唯天子崩諸侯薨與去其國與祫祭於祖為無主耳吾聞諸老聃曰天子崩國君薨則祝取羣廟之主而藏諸祖廟禮也卒哭成事而后主各反其廟【老聃古壽考者之號也與孔子同時藏諸主於祖廟象有凶事者聚也卒哭成事先祔之祭名也】君去其國大宰取羣廟之主以從【鬼神依人者也】祫祭於祖則祝迎四廟之主【祝接神者也】主出廟入廟必蹕【蹕止行也】老聃云【同上】文公二年八月丁卯大事於大廟躋僖公【大事禘也躋升也僖公閔公庶兄繼閔而立廟坐宜次閔下今升在閔上故書而譏之時未應吉禘而於大廟行之其譏已明徒以逆祀故特大其事異其文】逆祀也【僖是閔兄不得為父子嘗為臣位應在下今居閔上故曰逆祀】於是夏父弗忌為宗伯【宗伯掌宗廟昭穆之禮】尊僖公且明見曰吾見新鬼大故鬼小【新鬼僖公既為兄死時年又長故鬼閔公死時年少弗忌明言其所見】先大後小順也躋聖賢明也【又以僖公為聖賢】明順禮也君子以為失禮禮無不順祀國之大事也而逆之可謂禮乎子雖齊聖不先父食久矣【齊肅也臣繼君猶子繼父】故禹不先鯀湯不先契【鯀禹父契湯十三世祖】文武不先不窋【不窋后稷子】宋祖帝乙鄭祖厲王猶上祖也【帝乙微子父厲王鄭桓公父二國不以帝乙厲王不肖而猶尊尚之】是以魯頌曰春秋匪懈享祀不忒皇皇后帝皇祖后稷【忒差也皇皇美也后帝天也詩頌僖公郊祭上天配以后稷】君子曰禮謂其后稷親而先帝也【先稱帝也】詩曰問我諸姑遂及伯姊【詩邶風也衛女思歸而不得故願至問於姑姊】君子曰禮謂其姊親而先姑也【僖親文公父夏父弗忌從阿時君先其所親故傳以此二詩深責其意】仲尼曰臧文仲其不仁者三不知者三下展禽【展禽柳下惠也文仲知柳下惠之賢而使在下位非己欲立而立人之道】廢六關【塞關陽關之屬凡六關所以禁絕末遊而廢之】妾織蒲三不仁也【家人販席言其與民爭利】作虛器【謂居蔡山節藻梲也有其器而無其位故曰虛】縱逆祀【聽夏公躋僖公】祀爰居三不知也【海鳥曰爰居止于魯東門外文公以為神命國人祀之左氏傳】夏父弗忌為宗【弗忌魯大夫夏父展之後也宗宗伯掌國祭祀之禮】烝將躋僖公【躋升也賈侍中云烝進也謂夏父弗忌進言於公將升僖公於閔公上也唐尚書云烝祭也昭謂此魯文公三年喪畢祫祭先君於太廟升羣廟之主序昭穆之時也經曰八月丁卯大事於大廟躋僖公是也僖閔之兄繼閔而立凡祭秋曰嘗冬曰烝此八月而言烝用烝禮也凡四時之祭烝為備傳曰大事者祫祭也毀廟之主陳于太祖未毀廟之主皆升合食于太祖躋僖公逆祀也逆祀者先禰而後祖也】宗有司曰非昭穆【

宗有司宗官司事臣也非昭穆謂非昭穆之次也父為昭子為穆僖為閔臣子一例而升閔上故曰非昭穆也【曰我為宗伯明者為昭其次為穆何常之有【明言僖有明德當為昭閔次之當為穆也】有司曰夫宗廟之有昭穆也以次世之長幼而等胄之親疎也【長幼先後也等齊也胄裔也】夫祀昭孝也【昭明也明孝道也】各致齊敬於其皇祖昭孝之至也【皇大也】故工史書世【工瞽師官也史太史也世世次先後也工誦其德史書其言】宗祝書昭穆【宗宗伯祝太祝也宗掌其禮祝掌其位】猶恐其踰也今將先明而後祖【以僖為明而升之是先禰而後祖】自玄王以及主癸莫若湯【玄王契也主癸湯父也】自稷以至王季莫若文武【稷棄也王季文王父】商周之烝也未嘗躋湯與文武為不踰也【不使相踰】魯未若商周而改其常無乃不可乎弗聽遂躋之展禽曰夏父弗忌必有殃夫宗有司之言順矣僖又未有明焉【未有明德】犯順不祥以逆訓民亦不祥易神之班亦不祥不明而躋之亦不祥犯鬼道二【二易神之班躋不明也】犯人道二【犯順以逆訓民也】能無殃乎【魯語】躋者何升也何言乎升僖公【據禘于太廟不道所升】譏何譏爾逆祀也其逆祀奈何先禰而後祖也【升謂西上禮昭穆指父子近取法春秋惠公與莊公當同南面西上隱桓與閔僖公亦當同北面西上繼閔者在下文公緣僖公於閔公為庶兄置僖公於閔公上失先後之義故譏之傳曰後祖者僖公以臣繼閔公猶子繼父故閔公於文公亦猶祖也自先君言之隱桓及閔僖各當為兄弟顧有貴賤耳自繼代言之有父子君臣之道此恩義逆順各有所施也不言吉祿者就不三年不復譏略為下張本 公羊傳】躋升也先親而後祖也逆祀也【舊說僖公閔公庶兄故文公升僖公之主於閔公之上耳僖公雖長已為臣矣閔公雖小已為若矣臣不可以先君猶子不可以先父故以昭穆父子為喻甯曰即之於傳則無以知其然若引左氏以釋此傳則義雖有似而於文不辨高宗殷之賢王猶祭豐於禰以致雉雒之變然後率修常禮文公顛倒祖考固不足多怪矣親謂僖祖謂莊】逆祀則是無昭穆也無昭穆則是無祖也無祖則無天也故曰文無天無天者是無天而行也【祖人之始也人之所仰天也】君子不以親親害尊尊此春秋之義也【尊卑有序不可亂也 穀梁傳】孔子曰臧文仲安知禮夏父弗綦逆祀而弗止也【文仲魯公子驅之曾孫臧孫辰也莊文之間為大夫於時為賢是以非之不正禮也文二年八月丁卯大事于大廟躋僖公始逆祀是夏父弗綦為宗人之為也 禮器】定公八年從祀先公【從順也先公閔公僖公也將正二公之位次所順非一親盡故通言先公】陽虎欲去三桓冬十月順祀先公而祈焉【將作大事故以順祀取媚】辛卯禘于僖公【辛卯十月二日不於大廟者順祀之義當退僖公懼於僖神故於僖廟行順祀 左氏傳】從祀者何順祀也【復文公之逆祀】文公逆祀去者三人【諫不從而去之】定公順祀叛者五人【諫不以禮而去曰叛去與叛皆不言者微也不書禘者後祫亦順非獨禘也言祀者無已長久之辭不言僖公者閔公亦得其順 公羊傳】

從祀先公貴復正也【文公逆祀今還順 穀梁傳】僖公八年秋七月禘于大廟用致夫人【禘三年大祭之名大廟周公廟致者致新死之主於廟而列之昭穆夫人淫而與殺不薨於寢於禮不應致故僖公疑其禮歷三禘今果行之嫌異常故書之】禘而致哀姜焉非禮也凡夫人不薨於寢不殯於廟不赴於同不祔於姑則弗致也【寢小寢同同盟將葬又不以殯過廟據經哀姜薨葬之文則為殯廟赴同祔姑今當以不薨於寢不得致也 左氏傳】鄭火使祝史徙主祔於周廟告于先君【祔廟主石函周廟厲王廟也有火災故合羣主於祖廟易救護 昭十八年左氏傳】

衛孔悝出奔宋使貳車反祔於西圃【使副車還取廟主西圃孔氏廟所在祔藏主石函

哀十六年左氏傳】

守祧掌守先王先公之廟祧其遺衣服藏焉【廟謂大祖之廟及三昭三穆遷主所藏曰祧先公之遷主藏于后稷之廟先王之遷主藏于文武之廟遺衣服大斂之餘也故書祧作濯鄭司農濯讀為祧此王者之宮而有先公謂大王以前為諸侯】若將祭祀則各以其服授尸【尸當服卒者之上服以象生時】既祭則藏其隋與其服【鄭司農云隋謂神前所沃灌器名玄謂隋尸所祭肺脊黍稷之屬藏之以依神】天府掌祖廟之守藏與其禁令【祖廟始祖后稷之廟其寶物世傳守之若魯寶玉大弓者】凡國之玉鎮大寶器藏焉若有大祭大喪則出而陳之既事藏之【玉鎮大寶器玉瑞玉器之美者禘祫及大喪陳之以華國也故書鎮作瑱鄭司農云瑱讀為鎮】上春釁寶鎮及寶器【上春孟春也釁謂殺牲以血血之鄭司農云釁讀為徽或曰釁鼓之釁】若遷寶則奉之【奉猶送也並春官】

右守藏 孔子適周觀乎明堂覩四門墉有堯舜之容桀紂之象而各有善惡之狀興廢之誠焉又有周公相成王抱之負斧戣南面以朝諸侯之圖焉遂入大祖后稷之廟廟堂右階之前有金人焉三緘其口而銘其背曰古之慎言人也【家語】 桓公二年三月公會齊侯陳侯鄭伯于稷以成宋亂【成平也宋有弑君之亂故為會欲以平之稷宋地】夏四月取郕大鼎于宋戊申納于大廟非禮也【宋以鼎賂公大廟周公廟也始欲平宋之亂終于受賂故備書之】臧哀伯諫曰【臧哀伯魯大夫僖伯之子】君人者將昭德塞違以臨照百官猶懼或失之故昭令德以示子孫今滅德立違【謂立華督違命之臣】而寘其賂器於大廟以明示百官百官象之其又何誅焉國家之敗由官邪也官之失德寵賂章也郕鼎在廟章孰甚焉公不聽【春秋左氏傳】 桓內弑其君外成人之亂受賂而退以事其祖非禮也其道以周公為弗受也【穀梁傳】 孔子觀於魯桓公之廟有欹器焉夫子問於守廟者曰此謂何器對曰此蓋為宥坐之器孔子曰吾聞宥坐之器虛則欹中則正滿則覆明君以為至誠故常置之於坐側【家語】 齊侯滅萊獻萊宗器于襄宮【襄宮齊襄公廟襄六年左氏傳】

禮書綱目卷三十八

卷三十九

欽定四庫全書

禮書綱目卷三十九 婺源江永撰

特牲饋食禮 吉禮六

經【鄭目錄云特牲饋食之禮謂諸侯之士祭祖禰非天子之士而于五禮屬吉禮】

特牲饋食之禮【祭祀自孰始曰饋食饋食者食道也】

右篇目 記士祭其先【曲禮】 適士二廟一壇曰考廟曰王考廟享嘗乃止顯考無廟有禱焉為壇祭之去壇為鬼官師一廟曰考廟王考無廟而祭之去王考為鬼庶士庶人無廟死曰鬼【王制曰大夫士有田則祭無田則薦適士上士也官師中士下士庶士府史之屬此適士云顯考無廟非也當為皇考字之誤祭法詳見宗廟篇】
士一廟【謂諸侯之中士下士名曰官師者上士二廟 王制】

士以羊豕【疏曰天子之士也若諸侯之士則用特牲 曲禮】 大夫士宗廟之祭有田則祭無田則薦【有田者既祭又薦新祭以首時薦以仲月士薦牲用特豚 王制詳見祭物犧牲章】
惟士無田則亦不祭【孟子】 父為天子諸侯子為士祭以土其尸服以土服【詳見祭法】
父為大夫子為士葬以大夫祭以土【中庸】

不諏日【諏謀也士賤職褻時至事暇可以祭則筮其日矣不如少牢大夫先與有司于廟門諏丁巳之日】及筮日主人冠端玄即位于門外西面【冠端玄玄冠玄端下言玄者玄冠有不玄端者門謂廟門】子姓兄弟如主人之服立于主人之南西面北上【所祭者之子孫言子姓者子之所生小宗祭而兄弟皆來與焉宗子祭則族人皆侍】有司羣執事如兄弟服東面北上【士之屬吏也】席于門中闌西闕外【為筮人設之也古文闌作 闕作蹙】筮人取筮于西塾執之東面受命于主人【筮人官名也筮問也取其所用問神明者謂蓍也】宰自主人之左贊命命曰孝孫某筮來日某諏此某事適其皇祖某子尚饗【宰羣吏之長自由也贊佐也達也贊命由左者為神求變也士祭曰歲事此言某事又不言妃者容大祥之後禫月之吉祭皇君也言君祖者尊之也某子者祖字也伯子仲子也尚庶幾也】筮者許諾還即席西面坐卦者在左卒筮寫卦筮者執以示主人【士之筮者坐蓍短由便卦者主畫地識爻爻備以方寫之】主人受視反之【反還】筮者還東面長占卒告于主人占曰吉【長占以其年之長幼旅占之】若不吉則筮遠日如初儀【遠日旬之外日】宗人告事畢

右筮日

記凡卜筮日旬之外曰遠某日旬之內曰近某日吉事先近日【吉事祭祀冠娶之屬也】

曲禮】

前期三日之朝筮尸如求日之儀命筮曰孝孫某諷此某事適其皇祖某子筮某之某為尸尚饗【三日者容宿賓視濯也某之某者字尸父而名尸連言其親庶幾其馮依之也大夫士以孫之倫為尸】

右筮尸 記祭成喪者必有尸尸必以孫孫幼則使人抱之無孫則取于同姓可也【詳見祭通禮尸章】

乃宿尸【宿讀為肅肅進也進之者使知祭日當來凡宿或作速記作肅周禮亦作宿】主人立于尸外門外子姓兄弟立于主人之後北面東上【不東面者來不為賓客子姓立于主人之後上當其後】尸如主人服出門左西面【不敢南面當尊】主人辟皆東面北上【順尸】主人再拜尸答拜【主人先拜尊尸】宗人擯辭如初卒曰筮子為某尸占曰吉敢宿【宗人擯者釋主人之辭如初者如宰贊命筮尸之辭卒曰者著其辭所見】祝許諾致命【受宗人辭許之傳命于尸始宗人祝北面至于傳尸皆西面受命東面釋】尸許諾主人再拜稽首【其許亦宗人受于祝而告主人】尸入主人退【相揖而去尸不拜送尸尊】

右宿尸

宿賓賓如主人服出門左西面再拜主人東面答再拜宗人擯曰某薦歲事吾子將涖之敢宿【薦進也涖臨也言吾子將臨之知賓在有司中今特宿之尊賓耳】賓曰某敢不敬從主人再拜賓答拜主人退賓拜送

右宿賓

厥明夕陳鼎于門外北面北上有牖【厥其也宿賓之明日夕門外北面當門也古文牖為密】楸在其南南順實獸于其上東首【順猶從也楸之制如今大木舉矣上有四周下無足獸腊也】牲在其西北首東足【其西楸西也東足者尚右也牲不用楸以其生】設洗于阼階東南壺禁在東序豆籩鉶在東房南上几席兩敦在西堂【東房房中之東當夾北西堂西夾室之前近南耳】主人及子姓兄弟即位于門東如初【初筮位也】賓及衆賓即位于門西東面北上【不言如初者以宰在而宗人祝不在】宗人祝立于賓西北東面南上【事彌至位彌異宗人祝於祭宜近廟】主人再拜賓答再拜三拜衆賓衆賓答再拜【衆賓再拜者士賤旅之得備禮也】主人揖入兄弟從賓及衆賓從即位于堂下如外位【為視濯也】宗人升自西階視壺濯及豆籩反降東北面告濯具【濯溉也不言敦鉶者省文也東北面告緣賓意欲聞也言濯具不言絜以有几席】賓出主人出皆復外位【為視牲也】宗人視牲告充雍正作豕【充猶肥也雍正官名也北面以策動作豕視聲氣】宗人舉獸尾告備舉鼎牖告絜【備具】請期曰羹飪【肉謂之羹飪孰也謂明日質明時而曰肉孰重豫勞賓宗人既得期西北面告賓有司】告事畢賓出主人拜送

右視濯視牲告期 記設洗南北以堂深東西當東榮【榮屋翼也】水在洗東【祖天地之左海】篚在洗西南順實二爵二觚四觶一角一散【順從也言南從統於堂也二爵者為賓獻爵止主婦當致也二觚長兄弟酬衆賓長為加爵二人班同迎接並也四觶一酌奠其三長兄弟酬賓卒受者與賓弟子兄弟弟子舉觶於其長禮殺事相接禮器曰貴者獻以爵賤者獻以散尊者舉觶卑者舉角舊說云爵一升觚二升觶三升角四升散五升】壺於禁饌于東序南順覆兩壺焉蓋在南明日卒奠冪用綌即位而徹之加勺【覆壺者盥瀝水且為其不宜塵冪用綌以其堅絜禁言於者祭尚厭飫得與大夫同器不為神戒也本經記】

夙興主人服如初立于門外東方南面視側殺【夙早也興起也主人服如初則其餘有不玄端者側殺殺一牲也】主婦視饌饌于西堂下【炊黍稷曰饌宗婦為之饌竈也西堂下者堂之西下也近西壁南齊于坵古文饌作糒周禮作 亨于門外東方西面北上【亨煮也煮豕魚腊以鑊各一饌詩云誰能亨魚漑之釜鬻】

右視殺 記特牲饋食其服皆朝服玄冠緇帶緇鞶【於祭服此也皆者謂賓及兄弟筮日筮尸視濯亦玄端至祭而朝服朝服者諸侯之臣與其君日視朝之服大夫以祭今賓兄弟緣孝子欲得嘉賓尊客以事其祖禰故服之緇鞶者下大夫之臣夙興主人服如初則固玄端】唯尸祝佐食玄端玄裳黃裳雜裳可也皆爵鞶【與主人同服周禮士之齊服有玄端素端然則玄裳上士也黃裳中士雜裳下士本經記】 牲饌在廟門外東南魚腊饌在其南皆西面饌饌在西壁【饌炊也西壁堂之西牆下舊說云南北直屋栢稷在南同上】

羹飪實鼎陳于門外如初【初視濯也】尊于戶東玄酒在西【戶東室戶東玄酒在西尚之凡尊酌者在左】實豆籩鉶陳于房中如初【如初者取而實之既而反之】執事之俎陳于階間二列北上【執事謂有司及兄弟二列者因其位在東西祝主人主婦之俎亦存焉不升鼎者異於神】盛兩敦陳于西堂藉用萑几席陳于西堂如初【盛黍稷者宗婦也萑細葦古文用為于】尸盥匱水實于槃中簞巾在門內之右【設盥水及巾尸尊不就洗又不揮門內右象洗在東統于門東西上凡鄉內以入為左右鄉外以出為左右】祝筵几于室中東面【為神敷席也至此使祝接神】主婦纁笄宵衣立于房中南面【主婦主人之妻雖姑存猶使之主祭祀纁笄首服宵綺屬也此衣染之以黑其繒本名曰宵詩有素衣朱宵記有玄宵衣凡婦人助祭者同服也內則曰舅沒則姑老豕婦所祭祀賓客每事必請於姑】主人及賓兄弟羣執事即位于門外如初宗人告有司具【具猶辯也】主人拜賓如初揖入即位如初【初視濯也】佐食北面立于中庭【佐食賓佐尸食者立于宗人之西】

右陳設即位 記籩巾以綌也纁裹棗烝栗擇【籩有巾者果實之物多皮核優尊者可烝裹之也烝擇互文舊說云纁裹者皆玄被】鉶芼用苦若薇皆有滑夏葵冬苣【苦苦茶也苣葍屬乾之冬滑於葵詩云周原膾膾苣茶如飴本經記】

佐食當事則戶外南面無事則中庭北面【當事將有事而未至 同上】

主人及祝升祝先入主人從西面于戶內【祝先入接神宜在前也少牢饋食禮曰祝盥于洗升自西階主人盥升自阼階祝先入南面】主婦盥于房中薦兩豆葵菹蜎醢醢在北【主婦

盥盥于內洗昏禮婦洗在北堂直室東隅】宗人遣佐食及執事盥出【命之盥出當助主人及賓舉鼎】主人降及賓盥出主人在右及佐食舉牲鼎賓長在右及執事舉魚腊鼎除鼎【及與也主人在右統於東主人與佐食者賓尊不載少牢饋食禮魚用鮒腊用麋士腊用兔】宗人執畢先入當阼階南面【畢狀如又蓋為其似畢星取名焉主人親舉宗人則執畢導之既錯又以畢臨匕載備失脫也雜記曰枇用桑長三尺畢用桑三尺刊其本與末枇畢同材明矣今此枇用棘心則畢亦用棘心】鼎西面錯右人抽扃委于鼎北【右人謂主人及賓既錯皆西面俟也】贊者錯俎加匕【贊者執俎及匕從鼎入者其錯俎東縮加匕東柄既則退而左人北面也】乃枇【右人也尊者於事指使可也左人載之】佐食升所俎鼎之設于阼階西【所謂心舌之俎也郊特牲曰所之為言敬也言主人之所以敬尸之俎古文鼎皆作密】卒載加匕于鼎【卒已也已載畢亦加焉】主人升入復位俎入設于豆東魚次腊特于俎北【入設俎載者腊特饌要方也凡饌必方者明食味人之牲所以正】主婦設兩敦黍稷于俎南西上及兩鉶芼設于豆南南陳【宗婦不贊敦鉶者以其少可親之芼菜也】祝洗酌奠奠于鉶南遂命佐食啓會佐食啓會卻于敦南出立于西南面【酌奠奠其爵觶少牢饋食禮啓會乃奠之】主人再拜稽首祝在左【稽首服之甚者祝在左當為主釋辭於神也祝祝曰孝孫某敢用剛鬣嘉薦普淖用薦某事於皇祖某子尚饗】卒祝主人再拜稽首

右設陰厭 記棘心匕刻【刻若今龍頭本經記】所俎心舌皆去本末午割之實于牲鼎載心立舌縮俎【午割從橫割之亦勿沒立縮順其性心舌知食味者欲尸之饗此祭是以進之同上】凡祝呼佐食許諾【呼猶命也同上】

祝迎尸于門外【尸自外來代主人接之就其次而請不拜不敢與尊者為禮周禮掌次凡祭祀張尸次】主人降立于阼階東【主人不迎尸成尸尊尸所祭者之孫也祖之尸則主人乃宗子禰之尸則主人乃父道事神之禮廟中而已出迎則為厭】尸入門左北面盥宗人授巾【待盥者執其器就之執簞者不授巾賤也宗人授巾庭長尊少牢饋食禮曰祝先入門右尸入門左】尸至于階祝延尸尸升入祝先主人從【延進在後詔侑曰延禮器所謂詔宥武方者也少牢饋食禮曰尸升自西階入祝從主人升自阼階祝先入主人從】尸即席坐主人拜妥尸【妥安坐也】尸答拜執奠祝饗主人拜如初【饗勸彊之也其辭取于士虞記則宜云孝孫某圭為孝薦之饗舊說云明薦之】祝命挹祭尸左執觶右取菹揔于醢祭于豆間【命詔尸也挹祭祭神食也士虞禮古文曰祝命佐食隨祭周禮曰既祭則藏其墮墮與挹讀同耳揔醢者染於醢】佐食取黍稷肺祭授尸尸祭之祭酒啐酒告旨主人拜尸奠觶答拜【肺祭刊肺也旨美也祭酒穀味之芬芳者齊敬共之唯恐不美告之美達其心明神享之】祭鉶嘗之告旨主人拜尸答拜【鉶肉味之有菜和者曲禮曰客絮羹主人辭不能亨】祝命爾敦佐食爾黍稷于席上【爾近也近之便尸之食也】設大羹淲于醢北【大羹淲煮肉汁也不和貴其質設之所以敬尸也不祭不啐大羹不為神非盛者也士虞禮曰太羹淲自門入今文淲皆為汁】舉肺脊以授尸尸受振祭啐之左執之【肺氣之主也脊正體之貴者先食啗之所以導食通氣】乃食食舉【舉言食者明凡解體皆連肉】主人羞所俎于腊北【所俎主於尸主人親羞敬也神俎不親設者貴得賓客以神事其先】尸三飯告飽祝侑主人拜【三飯告飽禮一成也侑勸也或曰又勸之使又食少牢饋食禮侑辭曰皇尸未實侑也】佐食舉幹尸受振祭啐之佐食受加于所俎舉獸幹魚一亦如之【幹長脅也獸腊其體數與牲同】尸

實舉于菹豆【為將食庶羞舉謂肺脊】佐食羞庶羞四豆設于左南上有醢【庶衆也衆羞以豕肉所以為異味四豆者醢炙載醢南上者以醢炙為上以有醢不得爭也】尸又三飯告飽祝侑之如初【禮再成也】舉骼及獸魚如初尸又三飯告飽祝侑之如初【禮三成獸魚如初者獸骼魚一也】舉肩及獸魚如初【不復飯者三三者士之禮大成也舉先正脊後肩自上而卻下絳而前終始之次也】佐食盛胾俎俎釋三个【佐食取牲魚腊之餘盛于胾俎將以歸尸俎釋三个為改饌于西北隅遺之所釋者牲腊則正脊一骨長脅一骨及臠也魚則三頭而已个猶枚也今俗言物數有若干個者此讀然】舉肺脊加于胾俎反黍稷于其所【尸授佐食佐食受而加之反之也肺脊初在菹豆】

右迎尸正祭 記尸入主人及賓皆辟位【辟位逡遁 本經記】沃尸盥者一人奉槃者東面執匱者西面淳沃執巾者在匱北【匱北執匱之北亦西面每事各一人淳沃稍注之今文淳作激】宗人東面取巾振之三南面授尸卒執巾者受【宗人代授巾庭長尊 同上】尸俎右肩臂臠肫胾正脊二骨橫脊長脅二骨短脅【尸俎神俎也士之正祭禮九體貶於大夫有併骨二亦得十一之名合少牢之體數此所謂放而不致者凡俎實之數奇脊無中脅無前貶於尊者不貶正脊不奪正也正脊二骨長脅二骨者將舉於尸尸食未飽不欲空神俎】膚三【為簋用二厭飫一也】離肺一【離猶揢也小而長午割之亦不提心謂之舉肺】剗肺三【為尸主人主婦祭今文剗為切】魚十有五【魚水物以頭枚數陰中之物取數於月十有五而盈少牢饋食禮亦云十有五而俎尊卑同此所謂經而等也】腊如牲骨【不但言體以有一骨二骨者

同上】尸卒食而祭饔飧雍饔【雍孰肉以尸享祭竈有功也舊說云宗婦祭饔】

【饔亨者祭雍饔用黍肉而已無籩豆俎禮器曰燔燎于饔夫饔者老婦之祭盛於盆尊於瓶同上】

主人洗角升酌醕尸【醕猶衍也是獻尸衍也云醕者尸既卒食又欲頤衍養樂之不用爵者下大夫也因父子之道質而用角角加人事略者今文醕皆為酌】尸拜受主人拜送尸祭酒啐酒賓長以肝從尸左執角右取肝揆于鹽振祭嚙之加于菹豆卒角祝受尸角曰送爵皇尸卒爵主人拜尸答拜【曰送爵者節主人拜】

右主人醕尸

祝酌授尸尸以醕主人【醕報也祝酌不洗尸不親酌尊尸也古文醕作酢】主人拜受角尸拜送主人退佐食授授祭【退者進受爵反位尸將嘏主人佐食授之授祭亦使祭尸食也其授祭亦取黍稷肺祭】主人坐左執角受祭祭之祭酒啐酒進聽嘏【聽猶待也受福曰嘏嘏長也大也待尸授之以長大之福也】佐食搏黍授祝祝授尸尸受以菹豆執以親嘏主人【獨用黍者食之主其辭則少牢饋食禮有焉】主人左執角再拜稽首受復位詩懷之實于左袂挂于季指卒角拜尸答拜【詩猶承也謂奉納之懷中季小也實于左袂挂祛以小指者便卒角也少牢饋食禮曰興受黍坐振祭嚙之】主人出寫嗇于房祝以籩受【變黍言嗇因事託戒欲其重稼嗇嗇者農力之成功】

右尸醑主人【親嘏】

筵祝南面【主人自房還時】主人酌獻祝祝拜受角主人拜送設菹醢俎【行神惠也先獻祝以接神尊之菹醢皆主婦設之佐食設俎】祝左執角祭豆興取肺坐祭臠之興加于俎坐祭酒啐酒以肝從祝左執角右取肝擗于鹽振祭臠之加于俎卒角拜主人答拜受角酌獻佐食佐食北面拜受角主人拜送佐食坐祭卒角拜主人答拜受角降反于簠升入復位

右主人獻祝佐食 記祝俎髀脰脊二骨脅二骨【凡接於神及尸者俎不過牲三體以特性約加其可併者二亦得奇名少牢饋食禮羊豕各三體】膚一離肺一
佐食俎殽折脊脅【三體卑者從正】膚一離肺一

主婦洗爵于房酌亞獻尸【亞次也文猶貳主婦貳獻不夾拜者士祭儀簡耳】尸拜受主婦北面拜送【北面拜者辟內子也大夫之妻拜於主人北西面】宗婦執兩籩戶外坐主婦受設于敦南【兩籩棗栗棗在西】祝贊籩祭尸受祭之祭酒啐酒【籩祭棗栗之祭其祭之亦於豆祭】兄弟長以燔從尸受振祭臠之反之【燔炙肝也】羞燔者受加于胾出【出者俟後事也】尸卒爵祝受爵命送如初【送者送卒爵】

右主婦亞獻尸 記宗婦贊薦者執以坐于戶外授主婦

酢如主人儀【尸酢主婦如主人儀者自祝酌至尸拜送如酢主人也不易爵辟內子】主婦適房南面佐食授祭主婦左執爵右撫祭祭酒啐酒入卒爵如主人儀【撫授祭示親祭佐食不授而祭于地亦儀簡也入室卒爵於尊者前成禮明受惠也】

右尸酢主婦

獻祝籩燔從如初儀及佐食如初卒以爵入于房【及佐食如初如其獻佐食則拜主人之北西面也】

右主婦獻祝佐食

賓三獻如初燔從如初爵止【初亞獻也尸止爵者三獻禮成欲神惠之均於室中是以奠而待之】

右賓三獻尸尸奠爵

席于戶內【為主人鋪之西面席自房來】主婦洗爵酌致爵于主人主人拜受爵主婦拜送爵【主婦拜於北面也今文曰主婦洗酌爵】宗婦贊豆如初主婦受設兩豆兩籩【初贊亞獻也主婦薦兩豆籩東面也】俎入設【佐食設之】主人左執爵祭薦宗人贊祭奠爵興取肺坐絕祭臠之興加于俎坐挽手祭酒啐酒【絕肺祭之者以離肺長也少儀曰牛羊之肺

離而不提心豕亦然挽拭也挽手者為絕肺染汙也忖肺不挽手古文挽皆作說】肝從左執爵取肝揆于鹽坐振祭嘑之宗人受加于俎燔亦如之興席末坐卒爵拜【於席末坐卒爵敬也一酌而備再從而次之亦均】主婦答拜受爵酌醋左執爵拜主人答拜坐祭立飲卒爵拜主人答拜右主婦致爵于主人記阼俎臂正脊二骨橫脊長脅二骨短脅【主人尊欲其體得祝之加數五體又於加其可併者二亦得奇名臂左體臂】膚一離肺一

主婦出反于房主人降洗酌致爵于主婦席于房中南面主婦拜受爵主人西面答拜宗婦薦豆俎從獻皆如主人主人更爵酌醋卒爵降實爵于筐入復位【主人更爵自酢男子不承婦人爵也祭統曰夫婦相授受不相襲處酢必易爵明夫婦之別】

右主人致爵于主婦記主婦俎殽折【殽後足折分後右足以為佐食俎不分左臠折辟大夫妻】其餘如阼俎【餘謂脊脅膚肺】

三獻作止爵【賓也謂三獻者以事命之作起也舊說云賓入尸北面向皇尸請舉爵】尸卒爵酢酌獻祝及佐食洗爵酌致于主人主婦燔從皆如初更爵酌于主人卒復位【洗乃致爵為異事新之燔從皆如初者如亞獻及主人主婦致爵也凡獻佐食皆無從其薦俎獻兄弟以齒設之賓更爵自酢亦不承婦人爵】

右賓終三獻

主人降阼階西面拜賓如初洗【拜賓而洗爵為將獻之如初視濯時主人再拜賓答拜三拜衆賓衆賓答再拜】賓辭洗卒洗揖讓升酌西階上獻賓賓北面拜受爵主人在右答拜【就賓拜者此禮不主於尊也賓卑則不專階主人在右統於其位】薦脯醢設折俎【凡節解者皆曰折俎不言其體略云折俎非貴體也上賓略衆賓儀公有司設之】賓左執爵祭豆奠爵興取肺坐絕祭嘑之興加于俎坐挽手祭酒卒爵拜主人答拜受爵酌酢奠爵拜賓答拜【主人酌自酢者賓不敢敵主人主人達其意】主人坐祭卒爵拜賓答拜揖執祭以降西面奠于其位位如初薦俎從設【位如初復其位東面少牢饋食禮宰夫執薦以從設于祭東司士執俎以從設于薦東是則皆公有司為之與】衆賓升拜受爵坐祭立飲薦俎設于其位辯主人備答拜焉降實爵于筐【衆賓立飲賤不備禮鄉飲酒記曰立卒爵者不拜既爵備盡盡人之答拜】右主人獻賓及衆賓

記賓與長兄弟之薦自東房其餘在東堂【東堂東夾之前近南】賓略長兄弟及宗人折其餘如佐食俎【略左骼也賓俎全體尊賓不用尊體為其已甚卑而全之其宜可也長兄弟及宗人折不言所分略之】衆賓及衆兄弟內賓宗婦若有公有司私臣皆殽胥【又略此所折骨直破折餘體可殽者升之俎一而已不備三者賤祭禮接神者貴凡骨有肉曰殽祭統曰凡為俎者以骨為主貴者取貴骨賤者取賤骨貴者不重賤者不虛示均也俎者所以明惠之必均也善為政者如此故曰見政事之均焉公有司亦士之屬命於君者也私臣自己所辟除者】膚一離肺一宗人獻與旅齒於衆賓【尊庭長齒從其長幼之次】公有司門西北面東上獻次衆賓私臣門東北面西上獻次兄弟升受降飲【獻在後者賤也祭祀有上事者貴之亦皆與旅】

尊兩壺于阼階東加勺南枋西方亦如之【為酬賓及兄弟行神惠不酌上尊卑異之就其位尊之兩壺皆酒優之先尊東方示惠由近禮運曰澄酒在下】主人洗觶酌于西方之尊西階前北面酬賓賓在左【先酌西方者尊賓之義】主人奠觶拜賓答拜主人坐祭卒觶拜賓答拜主人洗觶賓辭主人對卒洗酌西面賓北面拜【西面者鄉賓位立於西階之前賓所答拜之東北】主人奠觶于薦北【奠酬於薦左非為其不舉行神惠不可同於飲酒】賓坐取觶還東面拜主人答拜卒奠觶于薦南揖復位【還東面就其位薦西奠觶薦南明將舉】

右主人酬賓

主人洗爵獻長兄弟于阼階上如賓儀【酬賓乃獻長兄弟者獻之禮成於酬先成賓禮此主人之義亦有薦胥設于位私人為之與】洗獻眾兄弟如眾賓儀【獻卑而必為之洗者顯神惠此言如眾賓儀則如眾賓洗明矣】

右主人獻兄弟 記賓與長兄弟之薦自東房其餘在東堂【詳見上獻賓章】長兄弟折其餘如佐食俎眾兄弟私臣皆殺胥膚一離肺一【同上】私臣門東北面西上獻次兄弟【同上】

洗獻內兄弟于房中如獻眾兄弟之儀【內兄弟內賓宗婦也如眾兄弟如其拜受坐祭立飲設薦俎于其位而立內賓位在房中之尊北不殊其長略婦人者也有司徹曰主人洗獻內賓于房中南面拜受爵】主人西面答拜更爵酢卒爵降實爵于篚入復位【爵辯乃自酢以初不殊其長也內賓之長亦南面答拜】

右主人獻內賓宗婦 記內賓宗婦皆殺胥膚一離肺一【詳見獻賓章】
內賓宗婦之位見下旅酬無算爵章】

長兄弟洗觶為加爵如初儀不及佐食洗致如初無從【大夫士三獻而禮成多之為加也不及佐食無從殺也致致於主人主婦】

右長兄弟為加爵

眾賓長為加爵如初爵止【尸爵止者欲神惠之均於在庭】

右眾賓長為加爵尸奠爵

嗣舉奠盥入北面再拜稽首【嗣主人將為後者舉猶飲也使嗣子飲奠者將傳重累之者大夫之嗣子不舉奠辟諸侯】尸執奠進受復位祭酒啐酒尸舉肝舉奠左執觶再拜稽首進受肝復位坐食肝卒觶拜尸備答拜焉【食肝受尊者賜不敢餘也備猶盡也每拜答之以尊者與卑者為禮略其文耳古文備為復】舉奠洗酌入尸拜受舉奠答拜尸祭酒啐酒奠之舉奠出復位【啐之者答其欲酢已也奠之者復神之奠觶嗣齒於子姓凡非主人升降自西階】

右嗣舉奠 記嗣舉奠佐食設豆鹽【肝宜鹽也本經記】

兄弟弟子洗酌于東方之尊阼階前北面舉觶于長兄弟如主人酬賓儀【弟子後生也】

右弟子舉觶于長兄弟

宗人告祭胥【胥俎也所告者衆賓兄弟內賓也獻時設薦俎于其位至此禮又殺告之祭使成禮也其祭皆離肺不言祭豆可知】乃羞【羞庶羞也下尸載醢豆而已此所羞者自祝主人至於內賓無內羞】

右告祭設羞

賓坐取觶阼階前北面酬長兄弟長兄弟在右【薦南奠觶】賓奠觶拜長兄弟答拜賓立卒觶酌于其尊東面立長兄弟拜受觶賓北面答拜揖復位【其尊長兄弟尊也此受酬者拜亦北面】長兄弟西階前北面衆賓長左受旅如初【旅行也受行酬也初賓酬長兄弟】長兄弟卒觶酌于其尊西面立受旅者拜受長兄弟北面答拜揖復位衆賓及衆兄弟交錯以辯皆如初儀【交錯猶言東西】為加爵者作止爵如長兄弟之儀【於旅酬之間言作止爵明禮殺並作】長兄弟酬賓如賓酬兄弟之儀以辯卒受者實觶于筐【長兄弟酬賓亦坐取其奠觶此不言交錯以辨賓之酬不言卒受者實觶于筐明其相報禮終於此其文省】賓弟子及兄弟弟子洗各酌于其尊中庭北面西上舉觶于其長奠觶拜長皆答拜舉觶者祭卒觶拜長皆答拜舉觶者洗各酌于其尊復初位長皆拜舉觶者皆奠觶于薦右【奠觶進奠之于薦右非神惠也今文曰奠于薦右】長皆執以興舉觶者皆復位答拜長皆奠觶于其所皆揖其弟子弟子皆復其位【復其位者東西面位弟子舉觶于其長所以序長幼教孝弟凡堂下拜亦皆北面】爵皆無算【算數也賓取觶酬兄弟之黨長兄弟取觶酬賓之黨唯已所欲亦交錯以辯無次第之數因今接會使之交恩定好優勸之】

右旅酬無算爵【旅酬間衆賓長終加爵】

記宗人獻與旅齒於衆賓【見獻賓章】佐食於旅齒於兄弟【本經記】尊兩壺于房中西墉下南上【為婦人旅也其尊之節亞西方】內賓立于其北東面南上宗婦北堂東面北上【二者所謂內兄弟內賓姑姊妹也宗婦族人之婦其夫屬于所祭為子孫或南上或北上宗婦宜統於主婦主婦南面北堂中房而北】主婦及內賓宗婦亦旅西面【西面者異於獻也男子獻于堂上旅於堂下婦人獻於南面旅於西面內賓象衆賓宗婦象兄弟其節與其儀依男子也主婦酬內賓之長酌奠于薦左內賓之長坐取奠于右宗婦之姊妹舉觶於其姊妹亦如之內賓之長坐取奠觶酬宗婦之姊妹交錯以辯宗婦之姊妹亦取奠觶酬內賓之長交錯以辯內賓之少者宗婦之姊妹各舉奠於其長並行交錯無算其拜及飲者皆西面主婦之東南同上】

利洗散獻于尸酢及祝如初儀降實散于筐【利佐食也言利以今進酒也更言獻者以利事尸禮將終宜一進酒嫌於加酒亦當三也不致爵禮又殺也】

右利獻尸及祝

主人出立于戶外西面【事尸禮畢】祝東面告利成【利猶養也供養之禮成不言禮畢於尸間之嫌】尸謖祝前主人降【謖起也前猶導也少牢饋食禮曰祝入尸謖主人降立于阼階東西面祝先尸從遂出于廟門前尸之儀士虞禮備矣】祝反及主人入復位命佐食徹尸俎俎出于廟門【俎所以載胾俎少牢饋食禮曰有司受歸之】右告利成尸出記尸入主人及賓皆辟位出亦如之賓從尸俎出廟門乃反位【賓從尸送尸也士之助祭終其事也俎尸俎也賓既送尸復入乃反位者宜與主人為禮乃去之】

徹庶羞設于西序下【為將餽去之庶羞主為尸非神饌也尚書傳曰宗室有事族人皆侍終日大宗已侍於賓奠然後燕私燕私者何也已祭而與族人飲也此徹庶羞置西序下者為將以燕飲與然則自尸祝至於兄弟之庶羞宗子以與族人燕飲於堂內賓宗婦之庶羞主婦以燕飲於房】筵對席佐食分簋鉶【為將餽分之也分簋者分敦黍於會為有對也敦有虞氏之器也周制士用之變敦言簋容同姓之士得從周制耳祭統曰餽者祭之末也不可不知也是故古之人有言曰善終者如始餽其是已故古之君子曰尸亦餽鬼神之餘惠術也可以觀政矣】宗人遣舉奠及長兄弟盥立于西階下東面北上祝命嘗食者舉奠許諾升入東面長兄弟對之皆坐佐食授舉各一膚【命告也士使嗣子及兄弟其惠不過族親古文皆作餽】主人西面再拜祝曰有以也兩奠舉于俎許諾皆答拜【以讀如何其久也必有以也之以祝告釋辭以戒之言女此當有所以也以先祖有德而享于此祭其坐餽其餘亦當以之也少牢饋食禮不戒者非親昵也舊說曰主人拜下席南】若是者三【丁寧戒之】皆取舉祭食祭舉乃食祭鉶食舉【食乃祭鉶禮殺】卒食主人降洗爵宰贊一爵主人升酌醕上上拜受爵主人答拜醕下亦如之【少牢饋食禮曰贊者洗三爵酌主人受于戶內以授次舊說云主人北面授下爵】主人拜祝曰醕有與也如初儀【主人復拜為戒也與讀如諸侯以禮相與之與言女醕此當有所與也與者與兄弟也既知似先祖之德亦當與女兄弟謂教化之】兩執爵拜【答主人也】祭酒卒爵拜主人答拜兩皆降實爵于篚上洗爵升酌酢主人主人拜受爵【下復兄弟位不復升也】上即位坐答拜【既授爵戶內乃就坐】主人坐祭卒爵拜上答拜受爵降實于篚主人出立于戶外西面【事餽者禮畢】

右

祝命徹阼俎豆籩設于東序下【命命佐食阼俎主人之俎宗婦不徹豆籩徹禮略各有為而已設于東序下亦將燕也】祝執其俎以出東面于戶西【俟告利成少牢下篇曰祝告利成乃執俎以出】宗婦徹祝豆籩入于房徹主婦薦俎【宗婦既並徹徹其卑者士虞禮曰祝薦席徹入于房】

右徹俎

佐食徹尸薦俎敦設于西北隅几在南扉用筵納一尊佐食闔牖戶降【扉隱不知神之所在

或諸遠人乎尸謬而改饌為幽闇庶其饗之所以為厭飫少牢饋食禮曰南面如饋之設此所謂當室之白陽厭也則尸未入之前為陰厭矣曾子問曰殤不備祭何謂陰厭陽厭也】祝告利成降出主人降即位宗人告事畢賓出主人送于門外再拜【拜送賓也凡去者不答拜】佐食徹阼俎堂下俎畢出【記俎出節兄弟及衆賓自徹而出唯賓俎有司徹歸之尊賓者】

右陽厭事畢

禮書綱目卷三十九

卷四十

<經部,禮類,通禮之屬,禮書綱目

欽定四庫全書

禮書綱目卷四十 婺源江永撰

少牢饋食禮上 吉禮七

經【鄭目錄云諸侯之卿大夫祭其祖禰於廟之禮於五禮屬吉禮】

少牢饋食之禮【禮將祭祀必先擇牲繫于牢而芻之羊豕曰少牢諸侯之卿大夫祭宗廟之牲】右篇目記大夫三廟一昭一穆與大祖之廟而三【大祖別子始爵者大傳曰別子為祖謂此雖非別子始爵者亦然王制】大夫立三廟二壇曰考廟曰王考廟曰皇考廟享嘗乃止顯考祖考無廟有禱焉為壇祭之去壇為鬼【大夫祖考謂別子也祭法詳見宗廟篇】

大夫不敢祖諸侯【郊特牲】

大夫有大事省于其君干祿及其高祖【詳天子諸侯廟享篇】

大夫以索牛【索求得而用之疏曰天子大夫也若諸侯大夫則用少牢曲禮】大夫士宗廟之祭有田則祭無田則薦【詳見祭物犧牲章】父為士子為大夫葬以士祭以大夫【中庸】曾子問曰宗子為士庶子為大夫其祭也如之何孔子曰以上牲祭於宗子之家祝曰孝子某為介子某薦其常事若宗子有罪居於他國庶子為大夫其祭也祝曰孝子某使介子某執其常事攝主不厭祭不旅不假不綏祭不配布奠于賓賓奠而不舉不歸肉其辭于賓曰宗兄宗弟宗子在他國使某辭【詳見祭法篇】

日用丁巳【內事用柔日必丁巳者取其令名自丁寧自變改皆為謹敬必先諏此日明日乃筮】筮旬有一日【旬十日也以先月下旬之巳筮來月上旬之巳】筮於廟門之外主人朝服西面於門東史朝服左執筮右抽上韝兼與筮執之東面受命於主人【史家臣主筮事者】主人曰孝孫某來日丁亥用薦歲事于皇祖伯某以某妃配某氏尚饗【丁未必亥也直舉一日以言之耳禘于大廟禮曰不得丁亥則己亥辛亥亦用之無則苟有亥焉者可也薦進也進歲時之祭事也皇君也伯某其字也大夫或因字為諡春秋傳曰魯無駭卒請諡與族公命之以字為展氏是也其仲叔季亦曰仲某叔某季某也某妃某妻也合食曰配某氏若言姜氏子氏也尚庶幾饗歆也】史曰諾西面于門西抽下韝左執筮右兼執韝以擊筮【將問吉凶焉故擊之以動其神易曰蓍之德圓而神】遂述命曰假爾大筮有常孝孫某來日丁亥用薦歲事于皇祖伯某以某妃配某氏尚饗【述循也重以主人辭告筮也假借也言因蓍之靈以問之常吉凶之占繇】乃釋韝立筮【卿大夫之蓍長五尺立筮由便】卦者在左坐卦以木卒筮乃書卦于木示主人乃退占【卦者史之屬也卦以木者每一爻畫地以識之六爻備書於板史受以示主人退占東面旅占之】吉則史韝筮史兼執筮與卦以告于主人占曰從【

從者求吉得吉之言】乃官戒宗人命滌宰命為酒乃退【官戒戒諸官也當共祭祀事者使之具其物且齊也滌漑濯祭器埽除宗廟】若不吉則及遠日又筮日如初【及至也遠日後丁若後已】

右筮日

宿【宿讀為肅進也大夫尊儀益多筮日既戒諸官以齊戒矣至祭前之日又戒以進之使知祭日當來古文宿皆作𠂔】前宿一日宿戒尸【皆肅諸官之日又先肅尸者重所用為尸者又為將筮】明日朝筮尸如筮日之禮命曰孝孫某來日丁亥用薦歲事于皇祖伯某以某妃配某氏以某之某為尸尚饗筮卦占如初【某之某者字尸父而名尸也字尸父尊鬼神也不前期三日筮尸者大夫下人君祭之朝乃視濯與士異】吉則乃遂宿尸祝擯【筮尸又遂肅尸重尸也既肅尸乃肅諸官及執事者祝為擯者尸神象】主人再拜稽首祝告曰孝孫某來日丁亥用薦歲事于皇祖伯某以某妃配某氏敢宿【告以主人為此事來】尸拜許諾主人又再拜稽首主人退尸送揖不拜【尸不拜者尸尊】若不吉則遂改筮尸【即改筮之不及遠日】

右筮尸宿尸及宿諸官

既宿尸反為期于廟門之外【為期肅諸官而皆至定祭早晏之期為期亦夕時也言既肅尸反為期明大夫尊肅尸而已其為賓及執事者使人肅之】主人門東南面宗人朝服北面曰請祭期主人曰比於子【比次早晏在於子也主人不西面者大夫尊於諸官有君道也為期亦唯尸不來也】宗人曰旦明行事主人曰諾乃退【旦明旦日質明】

右為期

明日主人朝服即位于廟門之外東方南面宰宗人西面北上牲北首東上司馬刲羊司士擊豕宗人告備乃退【刲擊皆謂殺之此實既省告備乃殺之文互者省文也尚書傳羊屬火豕屬水】雍人概鼎匕俎于雍饔饔在門東南面北上【雍人掌割烹之事者饔饔也在門東南統於主人北上羊豕魚腊皆有竈竈西有鑊凡概者皆陳之而後告絜】廩人概甗甗匕與敦于廩饔饔在雍饔之北【廩人掌米入之藏者甗如甗一孔匕所以匕黍稷者也古文甗為烝】司宮概豆籩勺爵觚觶几洗筐于東堂下勺爵觚觶實于筐卒概饌豆籩與筐于房中放于西方設洗于阼階東南當東榮【放猶依也大夫攝官司宮兼掌祭器也】

右視殺視濯

羹定雍人陳鼎五三鼎在羊鑊之西二鼎在豕鑊之西【魚腊從羊膚從豕統於牲】司馬升羊右胖髀不升肩臂臠膊骼正脊一脰脊一橫脊一短脅一正脅一代脅一皆二骨以並腸三胃三舉肺一祭肺三實于一鼎【升猶上也上右胖周所貴也髀不升近竈賤也肩臂臠肱骨膊骼股骨脊從前為正脅旁中為正脊先前脅先後屈而反猶器之絳也並併也脊脅骨多六

體各取二骨併之以多為貴舉肺一尸食所先舉也祭肺三為尸主人主婦古文胖皆作辯髀皆作脾今文並皆為併】司士升豕右胖髀不升肩臂臠膊骼正脊一脰脊一橫脊一短脊一正脊一代脊一皆二骨以並舉肺一祭肺三實于一鼎【豕無腸胃君子不食溷腴】雍人倫膚九實于一鼎【倫擇也膚革肉擇之取美者】司士又升魚腊魚十有五而鼎腊一純而鼎腊用麋【司士又升副俎者合升左右胖曰純純猶全也】卒胥皆設局鼎乃舉陳鼎于廟門之外東方北面上【北面北上鄉內相隨古文鼎皆為密】司宮尊兩甒于房戶之間同櫨皆有冪甒有玄酒【房戶之間房西室戶東也櫨無足禁者酒戒也大夫去足改名優尊者若不為之戒然古文甒皆作廡今文冪作鼎】司宮設罍水于洗東有枓設匱于洗西南肆【枓盥水器也凡設水用罍沃水用枓禮在此也】改饌豆籩于房中南面如饋之設實豆籩之實【改更也為實之更之威儀多也如饋之設如其陳之左右也饋設東面】小祝設槃匱與篚巾于西階東【為尸將盥】

右陳設

主人朝服即位于阼階東西面【為將祭也】司宮筵于奧祝設几于筵上右之【布陳神坐也室中西南隅謂之奧席東面近南為右】主人出迎鼎除鼎士盥舉鼎主人先入【道之也主人不盥不舉】司宮取二勺于匱洗之兼執以升乃啟二尊之蓋冪奠于櫨上加二勺于尊覆之南柄【二尊兩甒也】鼎序入雍正執一匕以從雍府執四匕以從司士合執二俎以從司士贊者二人皆合執二俎以相從入【相助】陳鼎于東方當序南于洗西皆西面北上膚為下匕皆加于鼎東枋【膚為下以其加也南于洗西陳於洗西南】俎皆設于鼎西西肆胙俎在羊俎之北亦西肆【胙俎在北將先載也異其設文不當鼎】宗人遣賓就主人皆盥于洗長枌【長枌者長賓先次賓後也主人不枌言就主人者明親臨之古文枌作匕】佐食上利升牢心舌載于胙俎心皆安下切上牛割勿沒其載于胙俎末在上舌皆切本末亦牛割勿沒其載于胙橫之皆如初為之于爨也【牢羊豕也安平也平割其下於載便也凡割本末食必正也牛割使可絕勿沒為其分散也胙之為言敬也所以敬尸也周禮祭尚肺事尸尚心舌心舌知滋味今文切皆為刂】佐食遷胙俎于阼階西西縮乃反佐食二人上利升羊載右胖髀不升肩臂臠膊骼正脊一脰脊一橫脊一短脊一正脊一代脊一皆二骨以並腸三胃三長皆及俎拒舉肺一長終肺祭肺三皆切肩臂臠膊骼在兩端脊脊肺肩在上【升之以尊卑載之以體次各有宜也拒讀為介距之距俎距脛中當橫節也凡牲體之數及載備於此】下利升豕其載如羊無腸胃體其載于俎皆進下【進下變於食生也所以交於神明不敢以食道敬之至也鄉飲酒禮進腍羊次其體豕言進下互相見】司士三人升魚腊膚魚用鮓十有五而俎縮載右首進腴【右首進腴亦變於食生也有司載魚橫之少儀曰羞濡魚者進尾】腊一純而俎亦進下肩在上【如羊豕凡腊之體載禮在此】膚九而俎亦橫載革順【列載於俎令其皮相順亦者亦其骨體】卒胥祝盥于洗升自西階主人盥升自阼階祝先入南面主人從戶內西面【將納祭也】主婦被錫衣侈袂薦自東房韭菹醯醢坐奠于筵前主婦贊者一人亦被錫衣侈袂執葵菹羸醢以授主婦主婦不興遂受陪設于東韭菹在南葵菹在北主婦興入于房【被錫讀為髮髻古者或剔賤者刑者之髮以被婦人之紒為飾因名髮髻焉此周禮所謂次也不纚笄者大夫妻尊亦衣綃衣而侈其袂耳侈者蓋半士妻之袂以益之衣三尺三寸袼尺八寸韭菹醯醢朝事之豆也而饋食用之豐大夫禮葵菹在絳今文髻為紒羸為

蝸】佐食上利執羊俎下利執豕俎司土三人執魚腊膚俎序升自西階相從入設俎羊在豆東豕亞其北魚在羊東腊在豕東特膚當俎北端【相助也】主婦自東房執一金敦黍有蓋坐設于羊俎之南婦贊者執敦稷以授主婦主婦興受坐設于魚俎南又興受贊者敦黍坐設于稷南又興受贊者敦稷坐設于黍南敦皆南首主婦興入于房【敦有首者尊者器飾也飾蓋象龜周之禮飾器各以其類龜有上下甲今文曰主婦入于房】祝酌奠遂命佐食啟會佐食啟會蓋二以重設于敦南【酌奠酌酒為神奠之後酌者酒尊要成也特性饋食禮曰祝洗酌奠奠于鉶南重累之】主人西面祝在左主人再拜稽首祝祝曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尚饗主人又再拜稽首【羊曰柔毛豕曰剛鬣嘉薦菹醢也普淖黍稷也普大也淖和也德能大和乃有黍稷春秋傳曰奉盛以告曰絜粢豐盛謂其三時不害而民和年豐也】

右舉鼎載俎設陰厭

祝出迎尸于廟門之外主人降立于阼階東西面祝先入門右尸入門左【主人不出迎尸伸尊也特性饋食禮曰尸入主人及賓皆辟位出亦如之祝入門右者辟尸盥也既則後尸】宗人奉槃東面于庭南一宗人奉匱水西面于槃東一宗人奉簞巾南面于槃北乃沃尸盥于槃上卒盥坐奠簞取巾興振之三以授尸巾【庭南沒霤】祝延尸尸升自西階入祝從【由後詔相之曰延延進也周禮曰大祝相尸禮祝從從尸升自西階】主人升自阼階祝先入主人從【祝接神先入宜也】尸升筵祝主人西面立于戶內祝在左【主人由祝後而居右尊也祝從尸尸即席乃卻居主人左】祝主人皆拜妥尸尸不言尸答拜遂坐【拜妥尸拜之使安坐也尸自此答拜遂坐而卒食其間有不啐奠不嘗鉶不告旨大夫之禮尸彌尊也不告旨者為初亦不饗所謂曲而殺】祝反南面【未有事也墮祭爾敦官各肅其職不命】尸取韭菹辯擗于三豆祭于豆間上佐食取黍稷于四敦下佐食取牢一切肺于俎以授上佐食上佐食兼與黍以授尸尸同受祭于豆祭【牢羊豕也同合也合祭於菹豆之祭也黍稷之祭為墮祭將食神餘尊之而祭之今文辯為徧】上佐食舉尸牢肺正脊以授尸上佐食爾上敦黍于筵上右之【爾近也或曰移也右之便尸食也重言上佐食明更起不相因】主人羞肝俎升自阼階置于膚北【羞進也肝敬也親進之主人敬尸之加】上佐食羞兩鉶取一羊鉶于房中坐設于韭菹之南下佐食又取一豕鉶于房中以從上佐食受坐設于羊鉶之南皆芼皆有柶尸扱以柶祭羊鉶遂以祭豕鉶嘗羊鉶【芼菜也羊用苦豕用薇皆有滑】食舉【舉牢肺正脊也先飲啗之以為道也】三飯【食以黍】上佐食舉尸牢幹尸受振祭臠之佐食受加于肝【幹正脊也古文幹為肝】上佐食羞載兩瓦豆有醢亦用瓦豆設于薦豆之北【設于薦豆之北以其加也四豆亦絳羊載在南豕載在北無臠醢者尚牲不尚味】尸又食食載上佐食舉尸一魚尸受振祭臠之佐食受加于肝橫之【又復也或言食或言飯食大名小數曰飯魚橫之者異於肉】又食上佐食舉尸腊肩尸受振祭臠之上佐食受加于肝【腊魚皆一舉者少牢二牲略之腊必舉肩以肩為終也別舉魚腊崇威儀】又食上佐食舉尸牢骼如初【如舉幹也】又食【不舉者卿大夫之禮不過五舉須侑尸】尸告飽祝西面于主人之南獨侑不拜侑曰皇尸未實侑【侑勸也祝獨勸者更則尸飽實猶飽也祝既侑復反南面】尸又食上佐食舉尸牢肩尸受振祭臠之佐食受加于肝【四舉牢體始於正脊終於肩尊於終始】尸不飯告飽祝西面于主人之南【祝當贊主人辭】主人不言拜侑【祝言而不拜主人

不言而拜親疏之宜】尸又三飯【為祝一飯為主人三飯尊卑之差凡十一飯下人君也】上佐食受尸牢肺正脊加于胾【言受者尸授之也尸授牢幹而實舉于菹豆食畢操以授佐食焉】

右迎尸正祭

主人降洗爵升北面酌酒乃醕尸尸拜受主人拜送【醕猶羨也既食之而又飲之所以樂之古文醕作酌】尸祭酒啐酒賓長羞牢肝用俎縮執俎肝亦縮進末鹽在右【羞進也縮從也鹽在肝右便尸揔之古文縮為蹙】尸左執爵右兼取肝揔于俎鹽振祭嚙之加于菹豆卒爵主人拜祝受尸爵尸答拜【兼兼羊豕】

右主人醕尸

祝酌授尸尸醕主人主人拜受爵尸答拜主人西面奠爵又拜【主人受酢酒俠爵拜彌尊尸】上佐食取四敦黍稷下佐食取牢一切肺以授上佐食上佐食以綏祭【綏或為揆揆讀為墮將受嘏亦尊尸餘而祭之古文墮為胾】主人左執爵右受佐食坐祭之又祭酒不興遂啐酒【右受佐食右手受墮於佐食也至此言坐祭之者明尸與主人為禮也尸恒坐有事則起主人恒立有事則坐】祝與二佐食皆出盥于洗入二佐食各取黍于一敦上佐食兼受之以授尸尸執以命祝【命祝以嘏辭】卒命祝祝受以東北面于戶西以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之【嘏大也予主人以大福工官也承猶傳也來讀曰釐釐賜也耕種曰稼勿猶無也替廢也引長也言無廢止時長如是也古文嘏為格祿為福眉為微替為袂袂或為裁裁替聲相近】主人坐奠爵興再拜稽首興受黍坐振祭嚙之詩懷之實于左袂挂于季指執爵以興坐卒爵執爵以興坐奠爵拜尸答拜執爵以興出宰夫以籩受嗇黍主人嘗之納諸內【詩猶承也實于左袂便右手也季猶小也出出戶也宰夫掌飲食之事者收斂曰嗇明豐年乃有黍稷也復嘗之者重之至也納猶入也古文挂作卦】

右尸醕主人【命祝嘏】

主人獻祝設席南面祝拜于席上坐受【室中迫狹】主人西面答拜【不言拜送下尸】薦兩豆菹醢【葵菹羸醢】佐食設俎牢髀橫脊一短脅一腸一胃一膚三魚一橫之腊兩髀屬于尻【皆升下體祝賤也魚橫者四物共俎殊之也腊兩髀屬于尻尤賤不殊】祝取菹揔于醢祭于豆間祝祭俎【大夫祝俎無肺祭用膚遠下尸不嚙之膚不盛】祭酒啐酒肝牢從祝取肝揔于鹽振祭嚙之不興加于俎卒爵興【亦如佐食授爵乃興不拜既爵大夫祝賤也】主人酌獻上佐食上佐食戶內牖東北面拜坐受爵主人西面答拜佐食祭酒卒爵拜坐授爵興【不啐而卒爵者大夫之佐食賤禮略】俎設于兩階之間其俎折一膚【佐食不得成禮于室中折者擇取牢正體餘骨折分用之有胥而無薦亦遠下尸】主人又獻下佐食亦如之其胥亦設于階間西上亦折一膚【上佐食既獻則出就其俎特性記曰佐食無事則中庭北面謂此時】

右主人獻祝佐食

有司贊者取爵于篚以升授主婦贊者于房中【男女不相因特牲饋食禮曰佐食卒角主人受角降反于篚】婦贊者受以授主婦主婦洗于房中出酌入戶西面拜獻尸【入戶西面拜由便也不北面者辟人君夫人也拜而後獻者當俠拜也昏禮曰婦洗在北堂直室東隅】尸拜受主婦主人之北西面拜送爵【拜於主人之北西面婦人位在內此拜於北則上拜於南矣由便也】尸祭酒卒爵主婦拜祝受尸爵尸答拜易爵洗酌授尸【祝出易爵男女不同爵】主婦拜受爵尸答拜上佐食綏祭主婦西面于主人之北受祭祭之其綏祭如主人之禮不嘏卒爵拜尸答拜【不嘏夫婦一體綏亦當為授古文為𠄎】主婦以爵出贊者受易爵于篚以授主婦于房中【贊者有司贊者也易爵亦以授婦贊者婦贊者受房戶外入授主婦】主婦洗酌獻祝祝拜坐受爵主婦答拜於主人之北卒爵不興坐授主婦【不俠拜下尸也今文曰祝拜受】主婦受酌獻上佐食于戶內佐食北面拜坐受爵主婦西面答拜祭酒卒爵坐授主婦主婦獻下佐食亦如之主婦受爵以入于房【不言拜於主人之北可知也爵奠於內篚】

右主婦亞獻

賓長洗爵獻于尸尸拜受爵賓戶西北面拜送爵尸祭酒卒爵賓拜祝受尸爵尸答拜祝酌授尸賓拜受爵尸拜送爵賓坐奠爵遂拜執爵以興坐祭遂飲卒爵執爵以興坐奠爵拜尸答拜賓酌獻祝祝拜坐受爵賓北面答拜祝祭酒啐酒奠爵于其筵前【啐酒而不卒爵祭事畢示醉也不獻佐食將饋尸禮殺】

右賓長三獻

主人出立于阼階上西面祝出立于西階上東面祝告曰利成【利猶養也成畢也孝子之養禮畢】祝入尸謾主人降立于阼階東西面【謾起也謾或作休】祝先尸從遂出于廟門【事尸之禮訖於廟門外】

右告利成尸出廟

祝反復位于室中主人亦入于室復位祝命佐食徹胾俎降設于堂下阼階南【徹胾俎不出門將饋尸也胾俎將以饋尸者其本為不反魚肉耳不云尸俎未歸尸】司宮設對席乃四人【大夫禮四人餽明惠大也】上佐食盥升下佐食對之賓長二人備【備四人餽也三餽亦盥升】司士進一敦黍于上佐食又進一敦黍于下佐食皆右之于席上【右之者東面在南西面在北】資黍于羊俎兩端兩下是餽【資猶減也減置于羊俎兩端則一賓長在上佐食之北一賓長在下佐食之南今文資作齎】司士乃辯舉 者皆祭黍祭舉【舉舉膚今文辯為徧】主人西面三拜 者 者奠舉于俎皆答拜皆反取舉【三拜旅之示徧也言反者拜時或去其席在東而席者東面拜在西面席者皆南面拜】司士進一鉶于上 又進一鉶于次 又進二豆滫于兩下乃皆食食舉【滫肉汁也】卒食主人洗一爵升酌以授上 贊

者洗三爵酌主人受于戶內以授次 若是以辯皆不拜受爵主人西面三拜 者 者奠爵
皆答拜皆祭酒卒爵奠爵皆拜主人答一拜【不拜受爵者大夫餽者賤也答一拜略也古文
一為壹也】 者三人興出【出降實爵于筐反賓位】上 止主人受上 爵酌以醋于戶
內西面坐奠爵拜上 答拜坐祭酒啐酒【主人自酢者上 獨止當尸位尊不酌也】上
親嘏曰主人受祭之福胡壽保建家室【親嘏不使祝授之亦以黍】主人興坐奠爵拜執爵
以興坐卒爵拜上 答拜上 興出主人送乃退【送佐食不拜賤】

右徹胾俎行

禮書綱目卷四十

卷四十一

欽定四庫全書

禮書綱目卷四十一 婺源江永撰

少牢饋食禮下 吉禮八

經【舊篇名有司徹鄭目錄云少牢之下篇也大夫既祭饗尸於堂之禮祭畢禮尸於室中天子諸侯之祭明日而繹有司徹於五禮屬吉】

有司徹【徹室中之饋及祝佐食之俎卿大夫既祭而饗尸禮崇也饗尸則不設饌西北隅以此薦俎之陳有祭象而亦足以厭飫神天子諸侯明日祭於祊而繹春秋傳曰辛巳有事于大廟仲遂卒于垂壬午猶繹是也爾雅曰繹又祭也】埽堂【為賓尸新之少儀曰汎埽曰埽埽席前曰拚】司宮攝酒【更洗益整頓之今文攝為聶】乃燂尸俎【燂溫也溫尸俎於爨所亦溫焉獨言溫尸俎則祝與佐食不與饗尸之禮古文燂皆作尋記或作燂春秋傳曰若可尋也亦可寒也】卒燂乃升羊豕魚三鼎無腊與膚乃設局鼎陳鼎于門外如初【腊為庶羞膚從豕去其鼎者饗尸之禮殺於初如初者如廟門之外東方北面北上今文局為鉉古文鼎為密】

右將饗尸徹饌燂尸俎 記三家者以雍徹【詳樂類樂歌】

乃議侑于賓以異姓【議猶擇也擇賓之賢者可以侑尸必用異姓廣敬也是時主人及賓有司已復內位古文侑皆作宥】宗人戒侑【戒猶告也南面告於其位戒曰請子為侑】侑出俟于廟門之外【俟待也待於外當與尸更入主人興禮事尸極敬心也】

右議侑

司宮筵于戶西南面【為尸席也】又筵于西序東面【為侑席也】尸與侑北面于廟門之外西上【言與殊尊卑北面者賓尸而尸益卑西上統於賓客】主人出迎尸宗人擯【賓客尸而迎之主人益尊擯贊】主人拜尸答拜主人又拜侑侑答拜主人揖先入門右【道尸】尸入門左侑從亦左揖乃讓【沒霤相揖至階又讓】主人先升自阼階尸侑升自西階西楹西北面東上【東上統於其席】主人東楹東北面拜至尸答拜主人又拜侑侑答拜【拜至喜之】

右主人迎尸

乃舉【舉舉鼎也舉者不盥殺也】司馬舉羊鼎司士舉豕鼎舉魚鼎以入陳鼎如初【如初

如阼階下西面北上】雍正執一匕以從雍府執二匕以從司士合執二俎以從司士贊者亦合執二俎以從匕皆加于鼎東枋二俎設于羊鼎西西縮二俎皆設于二鼎西亦西縮【雍正羣吏掌辨體名肉物者府其屬凡三匕鼎一匕四俎為尸侑主人主婦其二俎設于豕鼎魚鼎之西陳之宜具也古文縮皆為蹙】雍人合執二俎陳于羊俎西並皆西縮覆二疏匕于其上皆縮俎西枋【並併也其南俎司馬以羞羊匕滫羊肉滫其北俎司士以養豕匕滫豕肉滫豕胥滫魚疏匕匕柄有刻飾者古文並皆作併】

右鼎俎入

主人降受宰几尸侑降主人辭尸對【几所以坐安體周禮大宰掌贊玉几玉爵】宰授几主人受二手橫執几揖尸【獨揖尸几禮主於尸】主人升尸侑升復位【位阼階賓階上位】主人西面左手執几縮之以右袂推拂几三二手橫執几進授尸于筵前【衣袖謂之袂推拂去塵示新】尸進二手受于手間【受從手間謙也】主人退尸還几縮之右手執外廉北面奠于筵上左之南縮不坐【左之者異於鬼神生人陽長左鬼神陰長右不坐奠之者几輕】主人東楹東北面拜【拜送几也】尸復位尸與侑皆北面答拜【侑拜者從於尸】

右主人授尸几

主人降洗尸侑降尸辭洗主人對卒洗揖主人升尸侑升尸西楹西北面拜洗主人東楹東北面奠爵答拜降盥尸侑降主人辭尸對卒盥主人揖升尸侑升主人坐取爵酌獻尸尸北面拜受爵主人東楹東北面拜送爵【降盥者為土汚手不可酌】主婦自東房薦韭菹醢坐奠于筵前菹在西方婦贊者執昌菹醢以授主婦主婦不興受陪設于南昌在東方興取籩于房饔蕢坐設于豆西當外列饔在東方婦贊者執白黑以授主婦主婦不興受設于初籩之南白在西方興退【昌昌本也韭菹醢醢昌本麋鬱饔熬麥也蕢熬臠實也白熬稻黑熬黍此皆朝事之豆籩大夫無朝事而用之儋尸亦豐大夫之禮主婦取籩興者以饌異親之當外列辟鉶也退退入房也】

右主人獻尸

乃升【升牲體於俎也】司馬牝羊亦司馬載載右體肩臂肫骼臠正脊一脰脊一橫脊一短脅一正脅一代脅一腸一胃一祭肺一載于一俎【言燂尸俎復序體者明所舉肩骼存焉亦著脊脅皆一骨也臠在下者折分之以為肉滫俎也一俎謂司士所設羊鼎西第一俎】羊肉滫臠折正脊一正脅一腸一胃一膾肺一載于南俎【肉滫肉在汁中者以增俎實為尸加也必為臠折上所折分者膾肺離肺也南俎雍人所設在南者此以下十一俎俟時而載於此歷說之爾今文滫為汁】司士牝豕亦司士載亦右體肩臂肫骼臠正脊一脰脊一橫脊一短脅一正脅一代脅一膚五膾肺一載于一俎【臠在下者順羊也俎謂雍人所設在北者】侑俎羊左肩左肫正脊一脅一腸一胃一切肺一載于一俎侑俎豕左肩折正脊一脅一膚三切肺一載于一俎【侑俎用左體侑賤其羊俎過三體有肫尊之加也豕左肩折折分為長兄弟俎也切肺亦祭肺互言之爾無羊滫下尸也豕又祭肺不膾肺不備禮俎司士所設羊鼎西之北

俎也豕俎與尸同】阼俎羊肺一祭肺一載于一俎羊肉涪臂一脊一脅一腸一胃一膾肺一載于一俎豕胛臂一脊一脅一膚三膾肺一載于一俎【阼俎主人俎無體遠下尸也以肺代之肺尊也加羊肉涪而有體崇尸惠亦尊主人臂左臂也侑用肩主人用臂下之也不言左臂者大夫尊空其文也降於侑羊體一而增豕膚三有所屈有所申亦所謂順而撫也阼俎司土所設豕鼎西俎也其涪俎與尸俎同豕俎又與尸豕俎同】主婦俎羊左臠脊一脅一腸一胃一膚一膾羊肺一載于一俎【無豕體而有膚以主人無羊體不敢備也無祭肺有膾肺亦下侑也祭肺尊言膾羊肺者文承膚下嫌也膚在羊肺上則羊豕之體名同相亞也其俎司土所設在魚鼎西者】司土杞魚亦司土載尸俎五魚橫載之侑主人皆一魚亦橫載之皆加臠祭于其上【橫載之者異於牲體彌變於神臠讀如殷尋之 剝魚時割其腹以為大臠也可用祭也其俎又與尸豕俎同】

右載俎

卒升【卒已也已載尸羊俎】賓長設羊俎于豆南賓降尸升筵自西方坐左執爵右取韭菹揔于三豆祭于豆間尸取饔飧宰夫贊者取白黑以授尸尸受兼祭于豆祭【賓長上賓】雍人授次賓疏匕與俎受于鼎西左手執俎左廉縮之卻右手執匕枋縮于俎上以東面受于羊鼎之西司馬在羊鼎之東二手執挑匕枋以挹涪注于疏匕若是者三【挑謂之敵讀如或春或枕之枕字或作挑者秦人語也此二匕者皆有淺升狀如飯糝挑長枋可以杼物於器中者注猶寫也今文挑作枕挹皆為扱】尸興左執爵右取肺坐祭之祭酒興左執爵【肺羊祭肺】次賓縮執匕俎以升若是以授尸尸卻手受匕枋坐祭膾之興覆手以授賓賓亦覆手以受縮匕于俎上以降【膾涪者明涪肉加耳嘗之以其汁尚味】尸席末坐啐酒興坐奠爵拜告旨執爵以興主人北面于東楹東答拜【旨美也拜告酒美答主人意古文曰東楹之東】司馬羞羊肉涪縮執俎尸坐奠爵興取肺坐絕祭膾之興反加于俎司馬縮奠俎于羊涪俎南乃載于羊俎卒載俎縮執俎以降【絕祭絕肺末以祭周禮曰絕祭涪使次賓肉使司馬大夫禮多崇敬也】尸坐執爵以興次賓羞羊燔縮執俎縮一燔于俎上鹽在右尸左執爵受燔揔于鹽坐振祭膾之興加于羊俎賓縮執俎以降【燔炙】尸降筵北面于西楹西坐卒爵執爵以興坐奠爵拜執爵以興主人北面于東楹東答拜主人受爵尸升筵立于筵末

右尸卒爵

主人酌獻侑侑西楹西北面拜受爵主人在其右北面答拜【不洗者俱獻間無事也主人就右者賤不專階】主婦薦韭菹醢坐奠于筵前醢在南方婦贊者執二籩饔飧以授主婦主婦不興受之奠饔于醢南蕢在饔東主婦入于房【醢在南方者立侑為尸使正饌統焉】侑升筵自北方司馬橫執羊俎以升設于豆東侑坐左執爵右取菹揔于醢祭于豆間又取饔飧同祭于豆祭興左執爵右取肺坐祭之祭酒興左執爵次賓羞羊燔如尸禮侑降筵自北方北面于西楹西坐卒爵執爵以興坐奠爵拜主人答拜【答拜拜於侑之右】

右主人獻侑

尸受侑爵降洗侑降立于西階西東面主人降自阼階辭洗尸坐奠爵于筐興對卒洗主人升尸升自西階主人拜洗尸北面于西楹西坐奠爵答拜降盥主人降尸辭主人對卒盥主人升尸升坐取爵酌【酌者將酢主人】司宮設席于東序西面主人東楹東北面拜受爵尸西楹西北面答拜主婦薦韭菹醢坐奠于筵前菹在北方婦贊者執二簋饗主婦不興受設饗于菹西北蕢在饗西主人升筵自北方主婦入于房【設簋于菹西北亦辟鉶】長賓設羊俎于豆西主人坐左執爵祭豆簋如侑之祭興左執爵右取肺坐祭之祭酒興次賓羞匕涪如尸禮席末坐啐酒執爵以興司馬羞羊肉涪縮執俎主人坐奠爵于左興受肺坐絕祭膾之興反加于涪俎司馬縮奠涪俎于羊俎西乃載之卒載縮執虛俎以降【奠爵于左者神惠變於常也言受肺者明有授言虛俎者羊涪俎訖於此虛不復用】主人坐取爵以興次賓羞燔主人受如尸禮主人降筵自北方北面于阼階上坐卒爵執爵以興坐奠爵拜執爵以興尸西楹西答拜主人坐奠爵于東序南【不降奠爵於筐急崇酒】侑升尸侑皆北面于西楹西【見主人不反位知將與已為禮】主人北面于東楹東再拜崇酒【崇充也拜謝尸侑以酒薄充滿】尸侑皆答再拜主人及尸侑皆升就筵

右尸酢主人

司宮取爵于筐以授婦贊者于房東以授主婦【房東房戶外之東】主婦洗爵于房中出實爵尊南西面拜獻尸尸拜于筵上受【尊南西面拜由便也】主婦西面于主人之席北拜送爵入于房取一羊鉶坐奠于韭菹西主婦贊者執豕鉶以從主婦不興受設于羊鉶之西興入于房取糗與股脩執以出坐設之糗在蕢西脩在白西興立于主人席北西面【飲酒而有鉶者祭之餘鉶無黍稷殺也糗糗餌也股脩擣肉之脯今文股為斷】尸坐左執爵祭糗脩同祭于豆祭以羊鉶之杞搗羊鉶遂以搗豕鉶祭于豆祭祭酒次賓羞豕匕涪如羊匕涪之禮尸坐啐酒左執爵嘗上鉶執爵以興坐奠爵拜主婦答拜執爵以興司士羞豕胥尸坐奠爵興受如羊肉涪之禮坐取爵興次賓羞豕燔尸左執爵受燔如羊燔之禮坐卒爵拜主婦答拜受爵酌獻侑侑拜受爵主婦主人之北西面答拜【酌獻者主婦今文無西面】主婦羞糗脩坐奠糗于饗南脩在蕢南侑坐左執爵取糗脩兼祭于豆祭司士縮執豕胥以升侑興取肺坐祭之司士縮奠豕胥于羊俎之東載于羊俎卒乃縮執俎以降侑興【豕胥無涪於侑禮殺】次賓羞豕燔侑受如尸禮坐卒爵拜主婦答拜

右主婦獻尸及侑

受爵酌以致于主人主人筵上拜受爵主婦北面于阼階上答拜【主婦易位拜于阼階上辟併敬】主婦設二鉶與糗脩如尸禮主人共祭糗脩祭鉶祭酒受豕匕涪拜啐酒皆如尸禮嘗鉶不拜【主人如尸禮尊也其異者不告旨】其受豕胥受豕燔亦如尸禮坐卒爵拜主婦北面答拜受爵

右主婦致爵于主人

尸降筵受主婦爵以降【將酢主婦】主人降侑降主婦入于房主人立于洗東北西面侑東

面于西階西南【俟尸洗】尸易爵于筐盥洗爵【易爵者男女不相襲爵】主人揖尸侑【將升】主人升尸升自西階侑從主人北面立于東楹東侑西楹西北面立【俟尸酌】尸酌主婦出于房西面拜受爵尸北面于侑東答拜主婦入于房司宮設席于房中南面主婦立于席西【設席者主婦尊今文曰南面立于席西】婦贊者薦韭菹醢坐奠于筵前菹在西方婦人贊者執醢蕢以授婦贊者婦贊者不興受設醢于菹西蕢在醢南【婦人贊者宗婦之少者】主婦升筵司馬設羊俎于豆南主婦坐左執爵右取菹揔于醢祭于豆間又取醢蕢兼祭于豆祭主婦奠爵興取肺坐絕祭臠之興加于俎坐挽手祭酒啐酒【挽手者于帨帨佩巾內則曰婦人亦左佩紛帨古文挽作說】次賓羞羊燔主婦興受燔如主人之禮主婦執爵以出于房西面于主人席北立卒爵執爵拜尸西楹西北面答拜主婦入立于房尸主人及侑皆就筵【出房立卒爵宜鄉尊不坐者變於主人也執爵拜變於男子也】

右尸酢主婦

上賓洗爵以升酌獻尸尸拜受爵賓西楹西北面拜送爵尸奠爵于薦左賓降【上賓賓長也謂之上賓以將獻異之或謂之長賓奠爵爵止也】

右賓長三獻尸尸奠爵

主人降洗爵尸侑降主人奠爵于筐辭尸對卒洗揖尸升侑不升【侑不升尸禮益殺不從】主人實爵酬尸東楹東北面坐奠爵拜尸西楹西北面答拜坐祭遂飲卒爵拜尸答拜降洗尸降辭主人奠爵于筐對卒洗主人升尸升主人實爵尸拜受爵主人反位答拜尸北面坐奠爵于薦左【降洗者主人】

右主人酬尸

尸侑主人皆升筵乃羞宰夫羞房中之羞于尸侑主人主婦皆右之司士羞庶羞于尸侑主人主婦皆左之【二羞所以盡歡心房中之羞其饔則糗餌粉餐其豆則醢食糝食庶羞羔臠豕臠皆有醢醢房中之羞內羞也內羞在右陰也庶羞在左陽也】

右設羞

主人降南面拜衆賓于門東三拜衆賓門東北面皆答壹拜【拜于門東明少南就之也三拜者衆賓賤旅之也衆賓一拜賤也卿大夫尊賓賤純臣也位在門東今文壹為一】主人洗爵長賓辭主人奠爵于筐興對卒洗升酌獻賓于西階上長賓升拜受爵主人在其右北面答拜宰夫自東房薦脯醢醢在西司士設俎于豆北羊胾一腸一胃一切肺一膚一【羊胾羊左胾上賓一體賤也薦與設俎者既則俟于西序端古文胾為胾】賓坐左執爵右取肺揔于醢祭之執爵興取肺坐祭之祭酒遂飲卒爵執以興坐奠爵拜執爵以興主人答拜受爵賓坐取祭以降西面坐委于西階西南【成祭於上尊賓也取祭以降反下位也反下位而在西階西南已獻尊之祭脯肺】宰夫執爵以從設于祭東司士執俎以從設于薦東衆賓長升拜受爵主

人答拜坐祭立飲卒爵不拜既爵【既盡也長賓升者以次第升受獻言衆賓長拜則其餘不拜】宰夫贊主人酌若是以辯【主人每獻一人奠空爵于楸宰夫酌授于尊南今文若為如辯皆為徧】辯受爵其薦脯醢與胥設于其位其位繼上賓而南皆東面其胥體儀也【徧獻乃薦略之亦宰夫薦司士胥儀者尊體盡儀度餘骨可用而用之尊者用尊體卑者用卑體而已亦有切肺膚今文儀皆為 或為議】乃升長賓主人酌酢于長賓西階上北面賓在左【主人酌自酢序賓意賓卑不敢酢】主人坐奠爵拜執爵以興賓答拜坐祭遂飲卒爵執爵以興坐奠爵拜賓答拜賓降【降反位】

右主人獻賓辯

宰夫洗觶以升主人受酌降酬長賓于西階南北面賓在左主人坐奠爵拜賓答拜坐祭遂飲卒爵拜賓答拜【宰夫授主人觶則受其虛爵奠于筐古文酌為爵】主人洗賓辭主人坐奠爵于筐對卒洗升酌降復位賓拜受爵主人拜送爵賓西面坐奠爵于薦左

右主人酬賓

主人洗升酌獻兄弟于阼階上兄弟之長升拜受爵主人在其右答拜坐祭立飲不拜既爵皆若是以辯【兄弟長幼立飲賤不別大夫之賓尊於兄弟宰夫不贊酌者兄弟以親昵來不以官待之】辯受爵其位在洗東西面北上升受爵其薦胥設于其位【亦辯獻乃薦既云辯矣復言升受爵者為衆兄弟言也衆兄弟升不拜受爵先著其位於上乃後云薦胥設于其位明位初在是也位不繼於主人而云洗東卑不統於尊此薦胥皆使私人】其先生之胥折脅一膚一【先生長兄弟折豕左肩之折】其衆儀也

右主人獻兄弟

主人洗獻內賓于房中南面拜受爵主人南面于其右答拜【內賓姑姊妹及宗婦獻于主婦之席東主人不西面尊不與為賓主禮也南面于其右主人之位恒左人】坐祭立飲不拜既爵若是以辯亦有薦胥【亦設薦胥於其位特牲饋食禮記曰內賓立于房中西墉下東面南上宗婦北堂東面北上】

右主人獻內賓

主人降洗升獻私人于阼階上拜于下升受主人答其長拜乃降坐祭立飲不拜既爵若是以辯宰夫贊主人酌主人於其羣私人不答拜其位繼兄弟之南亦北上亦有薦胥【私人家臣已所自謁除也大夫言私人明不純臣也士言私臣明有君之道北上不敢專其位亦有薦胥初亦北面在衆賓之後爾言繼者以爵既獻為文凡獻位定】主人就筵【古文曰升就筵】

右主人獻私人

尸作三獻之爵【上賓所獻爵不言三獻作之者賓尸而尸益卑可以自舉】司士羞清魚縮執俎以升尸取膾祭祭之祭酒卒爵【不羞魚匕清略小味也羊有正俎羞匕清肉清豕無正俎魚無匕清隆污之殺】司士縮奠俎于羊俎南橫載于羊俎卒乃縮執俎以降尸奠爵拜三獻北面答拜受爵酌獻侑侑拜受三獻北面答拜司馬羞清魚一如尸禮卒爵拜三獻答拜受爵【司馬羞清魚變於尸】酌致主人主人拜受爵三獻東楹東北面答拜【賓拜於東楹東以主人拜受於席就之】司士羞一清魚如尸禮卒爵拜三獻答拜受爵尸降筵受三獻爵酌以酢之【既致主人尸乃酢之遂賓意】三獻西楹西北面拜受爵尸在其右以授之尸升筵南面答拜坐祭遂飲卒爵拜尸答拜執爵以降實于筐

右賓長終三獻

二人洗觶升實爵西楹西北面東上坐奠爵拜執爵以興尸侑答拜坐祭遂飲卒爵執爵以興坐奠爵拜尸侑答拜皆降【三獻而禮小成使二人舉爵序殷勤於尸侑】洗升酌反位尸侑皆拜受爵舉觶者皆拜送侑奠觶于右【奠于右者不舉也神惠右不舉變於飲酒】尸遂執觶以興北面于阼階上酬主人主人在右【尸拜於阼階上酬禮殺】坐奠爵拜主人答拜不祭立飲卒爵不拜既爵酌就于阼階上酬主人【言就者主人立待之】主人拜受爵尸拜送【酬不奠者急酬侑也】尸就筵主人以酬侑于西楹西侑在左坐奠爵拜執爵興侑答拜不祭立飲卒爵不拜既爵酌復位侑拜受主人拜送【言酌復位明授於西階上】主人復筵乃升長賓侑酬之如主人之禮【遂旅也言升長賓則有贊呼之】至于衆賓遂及兄弟亦如之皆飲于上【上西階上】遂及私人拜受者升受下飲【私人之長拜於下升受兄弟之爵下飲之】卒爵升酌以之其位相酬辯【其位兄弟南位亦拜受拜送升酌由西階】卒飲者實爵于筐【未受酬者雖無所旅猶飲】乃羞庶羞于賓兄弟內賓及私人【無房中之羞賤也此羞同時羞則酌房中亦旅其始主婦舉酬於內賓遂及宗婦】

右旅酬

兄弟之後生者舉觶于其長【後生年少也古文觶皆為爵延景中詔校書定作觶】洗升酌降北面立于阼階南長在左坐奠爵拜執爵以興長答拜【長在左辟主人】坐祭遂飲卒爵執爵以興坐奠爵拜執爵以興長答拜洗升酌降長拜受于其位舉爵者東面答拜爵止【拜受答拜不北面者儼尸禮殺長賓言奠兄弟言止互相明相待也】

右兄弟舉觶于長兄弟

賓長獻于尸如初無清爵不止【賓長者賓之長次上賓者非即上賓也如初如其獻侑酌致主人受尸酢也無清爵不止別不如初者不使兄弟不稱加爵大夫尊也不用觚大夫尊者也】

右衆賓長獻

賓一人舉爵于尸如初亦遂之於下【一人次賓長者如初如二人洗觶之為也遂之于下者遂及賓兄弟下至于私人故言亦遂之于下也上言無涓爵不止互相 明】

右更為旅酬

賓及兄弟交錯其酬皆遂及私人爵無算【算數也長賓取觶酬兄弟之黨長兄弟取觶酬賓之黨唯己所欲無有次第之數也】

右無算爵

尸出侑從主人送于廟門之外拜尸不顧【拜送之】拜侑與長賓亦如之衆賓從【從者不拜送也】司士歸尸侑之俎【尸侑尊送其家】主人退【反於寢也】有司徹【徹堂上下之薦俎也外賓尸雖堂上婦人不徹】

右送尸

若不賓尸【不賓尸謂下大夫也其牲物則同不得備其禮耳舊說云謂大夫有疾病攝昆弟祭曾子問曰攝主不厭祭不旅不假不綏祭不配布奠于賓賓奠而不舉而此備有似失之矣】則祝侑亦如之【謂尸七七飯時】尸食【八飯】乃盛俎臠臂肫脰脊橫脊短脅代脅皆牢【盛者盛于胾俎也此七體羊豕其脊脅皆取一骨也與所舉正脊幹骼凡十矣肩未舉既舉而俎猶有六體焉】魚七【盛半也魚十有五而俎其一已舉必盛半者魚無足翼於牲象脊脅而已】腊辯無髀【亦盛半也所盛者右體也脊屬焉言無髀者云一純而俎嫌有之古文髀作脾】卒盛乃舉牢肩尸受振祭嚙之佐食受加于胾【卒已】佐食取一俎于堂下以入奠于羊俎東【不言魚俎東主于尊】乃摭于魚腊俎俎釋三个其餘皆取之實于一俎以出【个猶枚也魚摭四枚腊摭五枚其所釋者腊則短脅正脅代脅魚三枚而已古文摭為揲】祝主人之魚腊取于是【祝主人主婦俎之魚腊取於此者大夫之禮文待神餘也三者各取一魚其腊主人臂主婦臠祝則骼也與此皆於鼎側更載焉不言主婦未聞】尸不飯告飽主人拜侑不言尸又三飯【凡十一飯士九飯大夫十一飯其餘有十三飯十五飯】佐食受牢舉如儋【舉肺脊】

右不賓尸正祭【以下皆下大夫不賓尸之禮】

主人洗酌醕尸賓羞肝皆如儋禮卒爵主人拜祝受尸爵尸答拜祝酌授尸尸以醋主人亦如儋其綏祭其嘏亦如儋【肝牢肝也綏皆當作揲揲讀為藏其隋之隋古文為揲】其獻祝與二佐食其位其薦胥皆如儋

右主人獻

主婦其洗獻于尸亦如儋【自尸侑不飯告飽至此與儋同者在上篇】主婦反取籩于房中

執棗糗坐設之棗在稷南糗在棗南婦贊者執栗脯主婦不興受設之栗在糗東脯在棗東主婦興反位【棗饋食之籩糗羞籩之實雜用之下賓尸也栗脯加籩之實也反位反主人之北拜送爵位】尸左執爵取棗糗祝取栗脯以授尸尸兼祭于豆祭祭酒啐酒次賓羞牢燔用俎鹽在右尸兼取燔揔于鹽振祭嘑之祝受加于肸卒爵主婦拜祝受尸爵尸答拜【自主婦反取籩至祝受加于肸此異于饋】祝易爵洗酌授尸尸以醋主婦主婦主人之北拜受爵尸答拜主婦反位又拜上佐食綏祭如饋卒爵拜尸答拜【主婦夾爵拜為不賓尸降崇敬今文醋曰酢】主婦獻祝其酌如饋拜坐受爵主婦主人之北答拜【自尸卒爵至此亦與饋同者亦在上篇】宰夫薦棗糗坐設棗于菹西糗在棗南祝左執爵取棗糗祭于豆祭祭酒啐酒次賓羞燔如尸禮卒爵【內子不薦籩祝賤使官可也自宰夫薦至賓羞燔亦異于饋】主人受爵酌獻二佐食亦如饋主婦受爵以入于房

右主婦獻

賓長洗爵獻于尸尸拜受賓尸西北面答拜爵止【尸止爵者以三獻禮成欲神惠之均於室中是以奠而待之】主婦洗于房中酌致于主人主人拜受主婦尸西北面拜送爵司宮設席【拜受乃設席變於土也】主婦薦韭菹醢坐設于席前菹在北方婦贊者執棗糗以從主婦不興受設棗于菹北糗在棗西佐食設俎臂脊脅肺皆牢膚三魚一腊臂【臂左臂也特牲五體此三者以其牢與腊臂而七牢腊俱臂亦所謂腊如牲體】主人左執爵右取菹揔于醢祭于豆間遂祭籩奠爵興取牢肺坐絕祭嘑之興加于俎坐挽手祭酒執爵以興坐卒爵拜【無從者變於土也亦所謂順而撫也】主婦答拜受爵酌以醋戶內北面拜【自酢不更爵殺】主人答拜卒爵拜主人答拜主婦以爵入于房尸作止爵祭酒卒爵賓拜祝受爵尸答拜【作止爵乃祭酒亦變於土自爵止至作止爵亦異於饋】祝酌授尸賓拜受爵尸拜送坐祭遂飲卒爵拜尸答拜獻祝及二佐食洗致爵于主人【洗致爵者以承佐食賤新之】主人席上拜受爵賓北面答拜坐祭遂飲卒爵拜賓答拜受爵酌致爵于主婦主婦北堂司宮設席東面【北堂中房以北東面者變於土妻賓尸不變者賓尸禮異矣內子東面則宗婦南面西上內賓自若東面南上】主婦席北東面拜受爵賓西面答拜【席北東面者北為下】婦贊者薦韭菹醢菹在南方婦人贊者執棗糗授婦贊者婦贊者不興受設棗于菹南糗在棗東【婦人贊者宗婦之弟婦也】佐食設俎于豆東羊臠豕折羊脊脅祭肺一膚一魚一腊臠【豕折豕折骨也不言所折略之特牲主婦殺折豕無脊脅下主人羊豕四體與腊臠而五】主婦升筵坐左執爵右取菹揔于醢祭之祭籩奠爵興取肺坐絕祭嘑之興加于俎坐挽手祭酒執爵興筵北東面立卒爵拜【立飲拜既爵者變於大夫】賓答拜賓受爵易爵于筐洗酌醋于主人尸西北面拜主人答拜卒爵拜主人答拜賓以爵降奠于筐【賓獻及二佐食至此亦異於饋】乃羞宰夫羞房中之羞司士羞庶羞于尸祝主人主婦內羞在右庶羞在左

右賓長獻【中間尸止爵主婦致爵于主人】

主人降拜衆賓洗獻衆賓其薦胥其位其酬醋皆如饋禮主人洗獻兄弟與內賓與私人皆如饋禮其位其薦胥皆如饋禮卒乃羞于賓兄弟內賓及私人辯【自乃羞至私人之薦胥此亦與饋同者在此篇不賓尸則祝猶侑耳卒已也乃羞者羞庶羞】

右主人獻衆賓兄弟內賓私人

賓長獻于尸尸醕獻祝致醕賓以爵降實于筐【致謂致爵于主人主婦不言如初者爵不止又不及佐食】

右次賓長獻

賓兄弟交錯其醕無算爵【此亦與儻同者在此篇】

右無算爵

利洗爵獻于尸尸醕獻祝祝受祭酒啐酒奠之【利獻不及主人殺也此亦異於儻】

右利獻

主人出立于阼階上西面祝出立于西階上東面祝告于主人曰利成祝入主人降立于阼階東西面尸謖祝前尸從遂出于廟門祝反復位于室中祝命佐食徹尸俎佐食乃出尸俎于廟門外有司受歸之徹阼薦俎【自主人出至此與儻雜者也先 徹主人薦俎者變于士特性饋食禮曰徹阼俎豆籩設于東序下】乃 如儻【謂上篇自司宮設對席至此餽興出也古文 作餽】

右告利成尸出徹俎

卒 有司官徹饋饌于室中西北隅南面如饋之設右几扉用席【官徹饋者司馬司士舉俎宰夫取敦及豆此於尸謖改饌當室之白孝子不知神之所在庶其饗之於此所以為厭飫不令婦人改徹饌敦豆變於始也尚使官也佐食不舉羊豕俎親餽尊也扉隱也古文右作侑扉作蒹】納一尊于室中【陽厭殺無玄酒】司宮埽祭【埽豆間之祭舊說云埋之西階東】主人出立于阼階上西面祝執其俎以出立于西階上東面司宮闔牖戶【閉牖與戶為鬼神或者欲幽闇】祝告利成乃執俎以出于廟門外有司受歸之衆賓出主人拜送于廟門外乃反【拜送賓也者亦拜送其長不言長賓者下大夫無尊賓也】婦人乃徹【徹祝之薦及房中薦俎不使有司者下上大夫之禮】徹室中之饌【有司饌之婦人徹之外內相兼禮殺】

右陽厭事畢

禮書綱目卷四十一

卷四十二

欽定四庫全書

禮書綱目卷四十二 婺源江永撰

天子諸侯廟 吉禮九

補

自天子達於庶人祭從生者【詳見祭法】王者禘其祖之所自出以其祖配之【禘大祭也始祖感天神靈而生祭天則以祖配之自外至者無主不止】而立四廟【高祖以下與始祖而五】庶子王亦如之【世子有廢疾不可立而庶子立其祭天立廟亦如世子之立也春秋時衛侯元有兄縶 喪服小記】

父為士子為天子諸侯則祭以天子諸侯其尸服以士服【詳見祭法】

諸侯不敢祖天子【詳見宗廟】有天疾者不得入乎宗廟【昭公二十年穀梁傳】右祭主武王末受命周公成文武之德追王大王王季上祀先公以天子之禮斯禮也達乎諸侯大夫及士庶人【詳見祭法】

有虞氏禘黃帝夏后氏亦禘黃帝殷人禘嚳周人禘嚳【詳見祭法】

此條論四代禘祭始祖所自出【禮不王不禘王者禘其祖之所自出以其祖配之【凡大祭曰禘自由也大祭其先祖所由生謂郊祀天也王者之先祖皆感大微五帝之精以生蒼則靈威仰赤則赤熛怒黃則含樞紐白則白招拒黑則汁光紀皆用正歲之正月郊祭之盖特尊焉孝經曰郊祀后稷以配天配靈威仰也宗祀文王於明堂以配上帝汎配五帝也】諸侯及其大祖【大祖受封君也】大夫士有大事省於其君干祿及其高祖【大事寇戎之事也省善也善於其君謂免於大難也干猶空也空祿謂無廟祿祭之於壇墠 大傳趙伯循曰禮記大傳云禮不王不禘王者禘其祖之所自出以其祖配之又喪服小記曰王者禘其祖之所】

【自出又下云禮不王不禘正與大傳同則諸侯不得禘禮明矣是以祭法云有虞氏禘黃帝舜祖顓頊顓頊出於黃帝則所為禘其祖之所自出也而郊嚳祖顓頊而宗堯夏后氏亦禘黃帝義同舜也而郊鯀祖顓頊而宗禹殷人禘嚳殷祖契出自嚳而郊冥祖契而宗湯周人禘嚳義與殷同而郊稷祖文王而宗武王禘者帝王立始祖之廟猶謂未盡其追遠尊先之義故又推尋始祖所出之帝而追祀之以其祖配之者謂於始祖廟祭之而便以始祖配祭也此祭不兼羣廟之主為其疏遠不敢褻狎也鄭玄注祭法云禘為配祭昊天上帝於圜丘也盖見祭法所說文在郊上謂為郊之最大者故為此說耳祭法所論禘郊祖宗者謂六廟之外永世不絕者有四種耳非關配祭也禘之所及最遠故先言之爾何關圜丘哉然則春秋書魯之禘何也曰成王追寵周公故也祭統云成王追念周公賜之重祭郊社禘嘗是也魯之用禘盖於周公廟而上及文王即周公之所出故也】

諸侯及其大祖天子及其始祖之所自出【喪服傳詳見祭義 已上二條論不王不禘】 大宗伯以肆獻裸享先王以饋食享先王【肆獻裸饋食在四時之上則是祫也禘也肆者進所解牲醴謂薦熟時也獻獻體謂薦血腥也裸之言灌灌以鬱鬯謂始獻尸求神時也郊特牲曰魂氣歸於天形魄歸於地故祭以求諸陰陽之義也殷人先求諸陽周人先求諸陰灌是也祭必先灌乃後薦腥薦熟於祫逆言之者與下共文明六享俱然祫言肆獻裸禘言饋食者著有黍稷互相備也魯禮三年喪畢而祫於大祖明年春禘於羣廟自爾以後率五年而再殷祭一祫十禘 春官 按鄭氏謂祫大於禘故先祫而後禘後儒謂禘大於祫故以肆獻裸為禘饋食為祫其實禘亦有饋食祫亦有肆獻裸故兼載之下章倣此 此條周禮通言禘兼及祫】 司尊彝凡四時之間祀追享朝享裸用虎彝蜚彝皆有舟其朝踐用兩大尊其再獻用兩山尊皆有壘諸臣之所昨也【鄭司農云追享朝享謂禘祫也在四時之間故曰間祀大尊大古之瓦尊山尊山壘也明堂位曰泰有虞氏之尊也山壘夏后氏之尊玄謂追享謂追祭遷廟之主以事有所請禱朝享謂朝受政於廟春秋傳曰閏月不告朔猶朝於廟雖禹屬印鼻而長尾山壘亦刻而畫之為山雲之形 同上 今按追享朝享先鄭說是】

郊禘不過繭栗【角如繭栗郊禘祭天也 國語楚語 按註說非是】 天子禘郊之事必自射其牲王后必自舂其粢天子親舂禘郊之盛王后親縹其服【同上詳見祭義】

禘郊之事則有全烝【注見天神篇】

周語】天府掌祖廟之守藏凡國之玉鎮大寶器藏焉若有

大祭則出而陳之既事藏之【禘祫陳之以華國也 詳見宗廟 春官 祫通用】 大司樂凡樂黃鍾為宮大呂為角大蕤為徵應鍾為

羽路鼓路鼗陰竹之管龍門之琴瑟九德之歌九磬之舞於宗廟之中奏之若樂九變則人鬼可得而禮矣【本文凡樂上有天神地示二節 此三者皆禘大祭也天神則主北辰地祇則主崑崙人鬼則主后稷先奏是樂以致其神禮之以玉而裸焉乃後合樂而祭之大傳曰王者必禘其祖之所自出祭法曰周人禘嚳而郊稷謂此祭天圜丘以嚳配之 詳見祭物 同上 按注以禘為祭天非是 此已上禘祭禮物樂舞之略其禮節與時祭同者詳見後】

右禘【魯禘見下】 禘大祭也【五年一大祭 爾雅】 昔者周公旦有勲勞於天下周公既沒成王康王追念周公之所以勲勞者而欲尊魯故賜之以重祭內祭則大嘗禘是也夫大嘗禘升歌清廟下而管象朱干玉戚以舞大武八佾以舞大夏此天子之樂也康周公故以賜魯也【詳見祭義】 成王以周公為有勲勞於天下命魯公世世祀周公以天子之禮樂季夏六月以禘禮祀周公於大廟牲用白牡尊用犧象山壘鬱尊用黃目灌用玉瓚大圭薦用玉豆雕簋爵用玉琖仍雕加以璧散璧角俎用梡嶽升歌清廟下管象朱干玉戚冕而舞大武皮弁素積裼而舞大夏昧東夷之樂也任南蠻之樂也納夷蠻之樂於大廟言廣魯於天下也【季夏建巳之月也禘大祭也周公曰大廟魯公曰世室羣公稱宮白牡殷牲也尊酒器也犧尊以沙羽為畫飾象骨飾之鬱鬯之器也黃彝也灌酌鬱尊以獻也瓚形如槃容五升以大圭為柄是謂圭瓚簋籩屬也以竹為之雕刻飾其直者也爵君所進於尸也仍因也因爵之形為之飾也加加爵也散角皆以璧飾其口也梡始有四足也嶽為之距清廟周頌也象謂周頌武也以管播之朱干赤大盾也戚斧也冕冠名也諸公之服自袞冕而下如王之服也大舞周舞也大夏

夏舞也周禮昧師掌教昧樂詩曰以雅以南以簫不僭廣大也】君卷冕立于阼夫人副褱立于房中君肉袒迎牲于門夫人薦豆籩卿大夫贊君命婦贊夫人各揚其職百官廢職服大刑【副首飾也今之步搖是也詩云副笄六珈周禮追師掌王后之首服為副褱王后之上服唯魯及王者之後夫人服之諸侯夫人則自揄翟而下贊佐也命婦於內則世婦也於外則大夫之妻也祭祀世婦以下佐夫人揚舉也大刑重罪也明堂位】閔公二年夏五月乙酉吉禘于莊公【三年喪畢致新死者之主於廟廟之遠主當遷入祧因是大祭以審昭穆謂之禘莊公喪制未闋時別立廟廟成而吉祭又不於大廟故詳書以示譏】速也【春秋左氏傳】言吉者未可以吉也【都未可以吉祭經舉重不書禘於大廟嫌獨莊公不當禘於大廟可禘者故加吉明大廟皆不當】曷為未可言吉【據三年也】未三年也【禮禘祫從先君數朝聘從今君數三年喪畢遭禘則禘遭祫則祫公羊傳】

吉禘者不吉者也喪事未畢而舉吉祭故非之也【莊公薨至此方二十二月喪未畢穀梁傳】僖公八年秋七月禘于大廟用致夫人【禘三年大祭之名大廟周公廟致者致新死之主於廟而列之昭穆夫人淫而與殺不薨於寢於禮不應致故僖公疑其禮歷三禘今果行之嫌異常故書之春秋傳詳見宗廟篇】

定公八年冬十月順祀先公而祈焉辛卯禘于僖公【詳見宗廟】孟獻子曰正月日至可以有事於上帝七月日至可以有事於祖七月而禘獻子為之也【記魯失禮所由也孟獻子魯大夫仲孫蔑也魯以周公之故得以正月日至之後郊天亦以始祖后稷配之獻子欲尊其祖以郊天之月對月禘之非也魯之宗廟猶以夏時之孟月耳明堂位曰季夏六月以禘禮祀周公於大廟雜記】孔子曰魯之郊禘非禮也周公其衰矣【詳見天神】子曰禘自既灌而往者吾不欲觀之矣【趙伯循曰禘王】

【者之大祭也王者既立始祖之廟又推始祖所自出之帝祀之於始祖之廟而以始祖配之也成王以周公有大勲勞賜魯重祭故得禘於周公之廟以文王為所出之帝而周公配之然非禮矣灌者方祭之始用鬱鬯之祭灌地以降神也魯之君臣當此之時誠意未散猶有可觀自此以後則浸以懈怠而無足觀矣蓋魯祭非禮孔子本不欲觀至此而失禮之中又失禮焉故此歎也八佾】

大祫毀廟之主陳于大祖未毀廟之主皆升合食于大祖五年而再殷祭【詳見本章傳此條論大祫陳主】大宗伯以肆獻裸享先王以饋食享先王【注見上章此條周禮論祫祭兼論禘】司尊彝凡四時之間祀朝享裸用虎彝蜼彝皆有舟其朝踐用兩大尊其再獻用兩山尊皆有鬯諸臣之所昨也【詳見上章】大饗腥【大饗祫祭先王也禮器】大饗之禮尚玄酒而俎腥魚大羹不和【詳見祭義】大享尚玄尊俎生魚先大羹大享尚玄尊而用酒食先黍稷而飯稻粱祭饗大羹而飽乎庶羞【同上】大饗三牲魚腊籩豆之薦內金束帛加璧龜為前列金次之丹漆絲纁竹箭其餘無常貨各以國之所有其出也肆夏而送之【同上】小史大祭祀讀禮法史以書序昭穆之俎簋【讀禮法者大史與羣執事史此小史也言讀禮法者小史叙俎簋以為節故書簋或為几鄭司農云几讀為軌書亦或為簋古文也大祭祀小史主叙其昭穆以其主定繫世祭祀史主叙其昭穆次其俎簋故齊景公疾欲誅於祝史玄謂俎簋牲與黍稷以書次之校比之春官】天子之席五重【疏曰熊氏云天子祫祭席五重此文是也禘則宜四重也時祭三重司几筵職是也受神酢席亦然禮器

今按姑依舊說載於此若以祫小於禘差之禘當五重祫當四重也】
周旅酬六尸【使之相酌也后稷之尸不受旅禮器
已上祫祭禮節之略其與時祭同者詳見後禘章天府陳寶器此章通用】

右祫 周旅酬六尸曾子曰周禮其猶醯與【詳見祭通禮】 文公二年八月丁卯大事于大廟
大事者何大祫也【以言大與有事異又從僖八年禘數之知為大祫】 大祫者何合祭也其
合祭奈何毀廟之主陳于大祖【毀廟謂親過高祖毀其廟藏其主于大祖廟中禮取其廟室
筴以為死者炊沐大祖周公之廟陳者就陳列大祖前大祖東鄉昭南鄉穆北鄉其餘孫從王
父父曰昭子曰穆昭取其鄉明穆取其北面尚敬】 未毀廟之主皆升合食于大祖【自外來
曰升】 五年而再殷祭【殷盛也謂三年祫五年禘禘所以異於祫者功臣皆祭也祫猶合也
禘猶諦也審禘無所遺失禮天子特禘特祫諸侯禘則不祫祫則不嘗大夫有賜於君然後祫
其高祖 公羊傳】 大事者何大是事也著祫嘗【祫合也嘗秋祭】 祫祭者毀廟之主陳于大
祖未毀廟之主皆升合祭于大祖【祫祭者皆合祭諸廟已毀未毀者之主於大祖廟中以昭
穆為次序父為昭子為穆昭南鄉穆北向孫從王父坐也祭畢則復還其廟穀梁傳】

天子禴祫祫嘗祫烝【禴猶一也祫合也天子諸侯之喪畢合先君之主於祖廟而祭之
謂之祫後因以為常天子先祫而後時祭諸侯先時祭而後祫凡祫之歲春一祫而已不祫以
物無成者不殷祭周改夏祭曰祫以禘為殷祭也魯禮三年喪畢而祫於大祖明年春禘于羣
廟自爾之後五年而再殷祭一祫一禘】 諸侯禴禴【互明禴祫文】 禘一禴一祫【下天子
也祫歲不禘】 嘗祫烝祫【王制】
祫祭于祖則祝迎四廟之主【祝接神者也】 主出廟入廟必蹕【蹕止行也曾子問】

右時祫

天子諸侯宗廟之祭春曰祫夏曰禘秋曰嘗冬曰烝【此蓋夏殷之祭名周則改之春曰祠夏
曰祫以禘為殷祭詩小雅曰祫祠烝嘗于公先王此周四時祭宗廟之名】 諸侯祫則不禘禘
則不嘗嘗則不烝烝則不祫【虞夏之制諸侯歲朝廢一時祭 王制】 大宗伯以祠春享先王
以禴夏享先王以嘗秋享先王以烝冬享先王【上有以肆獻裸享先王以饋食享先王二句
宗廟之祭有此六享祭必先灌乃後薦腥薦熟於祫逆言之者與下共文明六享俱然 春官】
春祭曰祠【祠之言食】 夏祭曰祫【新菜可汙】 秋祭曰嘗【嘗新穀】 冬祭曰烝【進品
物也爾雅】 始殺而嘗【建酉之月陰氣始殺嘉穀始熟故薦嘗於宗廟】 閉蟄而烝【建亥
之月昆蟲閉戶萬物皆成可薦者衆故烝祭宗廟釋例論之備矣 桓五年左氏傳】
禘有樂而嘗無樂【詳見祭義】 古者於禘發爵賜服於嘗出田邑發秋政【同上】
嘗之日發公室【同上】 肆師嘗之日蒞卜來歲之芟【芟芟草除田也古之始耕者除田種
穀嘗者嘗新穀此芟之功也卜者問後歲宜芟不詩云載芟載柞其耕澤澤
春官已上四時正祭】 大司馬中夏以苗田獻禽以享祫【祫宗廟之夏祭也冬夏田主于祭
宗廟者陰陽始起象神之在內 疏曰此祭因田獵獻禽為祭若正祭自在孟月】 中冬以狩田
入獻禽以享烝【入又以禽祭宗廟夏官 此條因獻禽享祭】

右時享 戊辰王在新邑烝祭歲文王騂牛一武王騂牛一王命作冊逸祝冊惟告周公其後王賓殺禋咸格王入太室裸【戊辰十二月之戊辰日也是日成王在洛舉烝祭之禮日歲云者歲舉之祭也周尚赤故用騂宗廟禮大牢此用特牛者命周公留後于洛故舉盛禮也逸史佚也作冊者冊書也逸祝冊者史逸為祝冊以告神也惟告周公其後者祝冊所載更不他及惟告周公留守其後之意重其事也王賓猶虞賓 宋之屬助祭諸侯也諸侯以王殺牲禋祭祖廟故咸至也太室清廟中央室也裸灌也以圭瓚酌秬鬯灌地以降神也】王命周公後作冊逸誥在十有二月【逸誥者史逸誥周公治洛留後也在十有二月者明戊辰為十二月日也洛誥】夏禘秋嘗冬烝天子之祭也【不言春祠魯在東方王東巡守以春或闕之 明堂位】桓公八年春正月己卯烝春曰祠【薦尚韭卯祠猶食也猶繼嗣也春物始生孝子思親繼嗣而食之故曰祠因以別死生】夏曰禴【薦尚麥魚麥始熟可禴故曰禴】秋曰嘗【薦尚黍肫嘗者先辭也秋穀成者非一黍先熟可得薦故曰嘗】冬曰烝【薦尚稻鴈烝衆也氣盛貌冬萬物備成所薦衆多芬芳備具故曰烝無牲而祭謂之薦天子四時四薦諸侯三祭三薦大夫士再祭再薦祭於室求之於幽祭於堂求之於明祭於祊求之於遠皆孝子博求之意也大夫求諸明士求諸幽尊卑之差也殷人先求諸明周人先求諸幽質文之義也禮天子諸侯卿大夫牛羊豕凡三牲曰大牢天子元士諸侯之卿大夫羊豕凡二牲曰牢諸侯之士特豕天子之牲角握諸侯角尺卿大夫索牛】常事不書此何以書譏亟也【亟數也屬十二月已烝今復烝也不異烝祭名而言烝者取冬祭所薦衆多可以包四時之物】亟則黷黷則不敬【黷渫黷也】君子之祭也敬而不黷【君子生則敬養死則敬享故將祭宮室既脩牆屋既繕百物既備序其禮樂具其百官散齊七日致齊三日夫婦齊戒沐浴盛服君牽牲夫人奠酒君親獻尸夫人薦豆卿大夫相君命婦相夫人洞洞乎屬屬乎如弗勝如將失之濟濟乎致其敬也愉愉乎盡其忠也勿勿乎其欲饗之也文王之祭事死如事生孝子之至也】疏則怠怠則忘【怠解】士不及茲四者則冬不裘夏不葛【禮本下為士制茲此也四者四時祭也疏數之節靡所折中是故君子合諸天道感四時物而思親也祭必於夏之孟月者取其見新物之日也裘葛者禦寒暑之美服士有公事不得及此四時祭者則不敢美其衣服蓋思念親之至也故孔子曰吾不與祭如不祭 春秋公羊傳】烝冬事也春興之志不時也夏五月丁丑烝烝冬事也春夏興之黷祀也志不敬也【穀梁傳】

古者天子諸侯必有養獸之官及歲時齊戒沐浴而躬朝之犧牲祭牲必於是取之君召牛納而視之擇其毛而卜之吉然後養之君皮弁素積朔月月半君巡牲【歲時齊戒沐浴而躬朝之謂將祭祀卜牲君朔月月半巡視之君召牛納而視之更本擇牲意 祭義】

牧人凡陽祀用騂牲毛之【陽祀祭天於南郊及宗廟 地官】

宗廟之牛角握【握謂長不出膚 王制】烝嘗不過把握【握長不出把者國語楚語】充人掌繫祭祀之牲牲祀五帝則繫于牢芻之三月享先王亦如之【三月一時節氣成 地官】牛人凡祭祀共其享牛求牛以授職人而芻之【享獻也獻神之牛謂所以祭者也求終也終事之牛謂所以繹者也同上】

右養牲【凡通用者詳見祭物犧牲章】

大事有時日【大事有事於大神有常時常日也】內事用柔日【事之外內別乎四郊表記

少牢篇注引禘于大廟禮曰不得丁亥則己亥辛亥亦用之無則苟有亥焉者可也】大宰

祀五帝前期十日帥執事而卜日享先王亦如之【前期前所諏之日也十日容散齊七日致齊三日執事宗伯大卜之屬天官】大宗伯享大鬼帥執事而卜日【執事諸有事於祭者春官少牢筮日主人朝服疏曰主人朝服者為祭而筮還服祭服是以特牲筮亦服祭服玄端以此而言天子諸侯為祭卜筮亦服祭服案司服云享先王則衮冕祭義云易抱龜南面天子衮冕北面雖有明知之心必進斷其志焉是為祭而服還服祭服則諸侯為祭卜筮服祭服可知】

右卜日【凡通用省詳見祭通禮卜筮章】

大宰祀五帝前期十日帥執事而卜日遂戒享先王亦如之【既卜又戒百官以始齊天官】及時將祭君子乃齊散齊七日致齊三日【詳見祭義】致齊於內散齊於外齊之日思其居處思其笑語思其志意思其所樂思其所嗜齊三日乃見其所為齊者【致齊思此五者也散齊七日不御不樂不弔耳見其所為齊者思之熟也所嗜素所欲飲食也春秋傳曰屈到嗜芰祭義】世婦掌女宮之宿戒【女宮刑女給宮中事者宿戒當給事豫告之齊戒也春官】先期旬有一日宮宰宿夫人夫人亦散齊七日致齊三日【宮宰守宮官也宿讀為肅肅猶戒也戒輕肅重也】君致齊於外夫人致齊於內【祭統】

右齊戒【凡通用者詳見祭通禮齊戒章又大祭前有習射擇土之禮詳見通禮擇土章】

大宰祀五帝掌百官之誓戒與其具脩享先王亦如之【誓戒要之以刑重失禮也明堂位所謂各揚其職百官廢職服大刑是其辭之略也具所當共脩埽除糞洒天官】世婦及祭祀比其具【比次也具所濯摝及粢盛之饗鄭司農讀比為庀庀具也】帥六宮之人共盥盛【帥世婦女御春官】寺人若有祭祀之事則帥女宮而致於有司【有司謂公卿世婦天官】諸侯宗廟之事夫人必自舂其盛【國語楚語】春秋脩其祖廟【脩謂埽糞也中庸】掌蜃祭祀共白盛之蜃【盛猶成也謂飾牆使白之蜃也地官】將祭祀其廟則有司脩除之其祧則守祧黝堊之【詳見宗廟】隸僕祭祀脩寢【詳見宗廟】

右戒具脩廟【凡通用者詳見通禮戒具章及祭物粢盛庶羞酒齊祭器薪茅祭服等章】

孫為王父尸所使為尸者於祭者子行也【子行猶子列也祭祖則用孫列皆取於同姓之適孫也祭統特牲疏云天子諸侯宗廟之祭亦用孫之倫為尸但天子諸侯雖用孫之倫取卿大夫有爵者為之故鳧鷖詩祭尸之等皆言公尸又曾子問云卿大夫將為尸於公尸服見祝迎尸章】為君尸者大夫士見之則下之君知所以為尸者則自下之【尊尸也下下車也國君或時幼少不能盡識羣臣有以告者乃下之】尸必式【禮之】乘必以几【尊者慎也曲禮】

右卜尸【表記不違卜筮疏云特牲少牢大夫士筮尸則天子諸侯有卜尸少牢疏云天子諸侯前期十日卜得吉日則戒諸官散齊至祭前三日卜尸得吉又戒宿諸官使之致齊士卑不嫌得與人君同三日筮尸但下人君不得散齊七日耳大夫尊不敢與人君同直散齊九日前祭一日筮尸并宿諸官致齊也 按本章曲禮疏古者致齊各於其家散齊猶出在路故有君臣於路見尸之禮然則天子諸侯卜尸當在散齊之日而此疏謂祭前三日卜尸未知孰是 又按卜尸既吉則遂宿尸曾子問云卿大夫將為尸於公受宿矣是也少牢疏云特牲宿尸使宗人擯主人辭又有祝其傳命士卑不嫌兩有與人君同此大夫尊下人君故闕之唯有祝擯而已 按此則天子宿尸當使大宗伯擯辭而大祝為之傳命也】
齊嘗于大公之廟麻嬰為尸【為公尸 襄二十八年左氏傳】

世婦掌祭祀之事帥女宮而濯概為盥盛【概拭也為猶差擇
天官】女御凡祭祀贊世婦【助其師涖女宮 同上】寺人佐世婦治

禮事【世婦二十七世婦 同上此二條祭日陳設通用】封人凡祭祀飾其牛牲設其楅衡置其絃【飾謂刷治絜清之也鄭司農云楅衡所以楅持牛也絃著牛鼻繩所以牽牛者皆謂夕牲時也 地官】陳其犧牲【疏曰謂將祭之夕省牲之時及祭日之旦迎牲而入麗於碑案特牲禮陳鼎于門外北面獸在鼎南東首牲在獸西西上北首其天子諸侯夕省牲之時亦陳于廟門外橫行西上祭日陳設通用】備其鼎俎【按此句疏引少牢皆據烹牲及舉鼎匕載時其實祭前夕亦當陳之以待視濯故兩載之】列其琴瑟管磬鍾鼓【疏曰琴瑟在堂而登歌故書云搏拊琴瑟以詠是也管磬鍾鼓堂下之樂書云下管鼗鼓笙鏞以間是也其歌鍾歌磬亦在堂下 按琴瑟不先列升歌時工荷之而入此連言之耳 禮運】
典庸器祭祀帥其屬而設筭簋【設筭簋視瞭當以縣樂器焉 春官】
大司樂大祭祀宿縣遂以聲展之【叩聽其聲具陳次之以知完否 同上】大宰祀五帝及執事眡滌濯享先王亦如之【執事初為祭事祭前日之夕滌濯謂溉祭器及甗甗之屬
天官】大宗伯享大鬼宿眡滌濯【滌濯溉祭器也 春官】
小宗伯大祭祀省牲眡滌濯【同上】
充人展牲則告牲【展牲若今夕牲也特牲饋食之禮曰宗人視牲告充舉獸尾告備近之地官】

右祭前夕滌濯陳設省眡【凡通用者詳見通禮省眡章又視濯省牲後有為期一節附見下章注】

雞人大祭祀夜嘑旦以 百官【夜夜漏未盡雞鳴時也呼旦以警起百官使夙興】凡國事為期則告之時【象雞知時也告其有司主事者少牢曰宗人朝服北面曰請祭期主人曰比於子宗人曰旦明行事告時者至此旦明而告之 春官】掌次凡祭祀張其旅幕張尸次【旅衆也公卿夕下即位所祭祀之門外以待事為之張大幕尸則有幄鄭司農云尸次祭祀之尸所居更衣帳 按上文朝日祀五帝則張大次小次設重轡重案注云大幄初往所止居小幄既接祭退俟之處此宗廟之祭宜亦有之 天官】小宗伯毛六牲辨其名物而頒之於五官使共奉之【毛擇毛也鄭司農云司徒主牛宗伯主雞司馬主馬及羊司寇主犬司空主豕

按宗廟不用馬牲則用五牲而已 春官 上章陳其犧牲此條通用】

封人凡祭祀飾其牛牲設其楅衡置其絃【見上章】共其水盥【水盥給殺牲時洗薦牲也地官】牛人凡祭祀共其牛牲之互與其盆簋以待事【鄭司農云互謂楅衡之屬盆簋皆器名盆所以盛血簋受肉籠也玄謂互若今屠家縣肉格同上】小宗伯辨六彝之名物以待果將【六彝雞彝鳥彝斚彝黃彝虎彝蜼彝果讀為裸】辨六尊之名物以待祭祀【待者有事則給之鄭司農云六尊獻尊象尊壺尊著尊大尊山尊 春官】

肆師及果築鬻【果築鬻者所築鬻以裸也鄭司農云築煮築香草煮以為鬻 同上】鬱人掌裸器【裸器謂彝及舟與瓚】凡祭祀之裸事和鬱鬻以實彝而陳之【築鬱金煮之以和鬻酒鄭司農云鬱草名十葉為貫百二十貫為築以煮之鑊中停於祭前鬱為草若蘭】凡灌玉濯之陳之【裸玉謂圭瓚璋瓚同上 裸器詳見裸章】司尊彝掌六尊六彝之位詔其酌辨其用與其實【位所陳之處酌沛之使可酌各異也用四時祭祀所用亦不同實鬱及醴齊之屬】凡六彝六尊之酌鬱齊獻酌醴齊縮酌盞齊況酌凡酒脩酌【凡此四者裸用鬱齊朝用醴齊饋用盞齊諸臣自酢用凡酒唯大事于太廟備五齊三酒 注詳見祭物同上】玄酒在室醴醑在戶粢醑在堂澄酒在下【粢讀為齊】

【聲之誤也周禮五齊一曰泛齊二曰醴齊三曰盞齊四曰醑齊五曰沈齊字雖異醑與盞澄與沈盖同物也奠之不同處重古略近也 禮運 今按玄酒以配齊尊當各陳於齊尊之西而此列於室內近北者賈氏曰謂鬱鬻在室中而玄酒即明水也以配鬱鬻故在室疑此說是又按此不及泛齊者或省文或時祫用此四齊疏謂禘用四齊恐不然也又按設尊之法約注疏諸家之說春夏雞彝鳥彝陳室內近北獻尊陳戶內象尊陳戶外秋冬斚彝黃彝陳室內近北著尊陳戶內壺尊陳戶外其罍尊皆陳堂下凡尊皆南面明水玄酒在西】廟堂之上罍尊在阼犧尊在西【犧周禮作獻 疏曰罍尊在阼謂夫人所酌也犧尊在西謂君所酌也熊氏云此謂諸侯時祭所用之禮故罍尊夫人所酌也若天子之祭則罍尊在堂下故禮運云澄酒在下酒謂三酒司尊彝云皆有罍諸臣之所酢則后不酌罍也 禮器

按下文君西酌犧象則西階上更有象尊此不言者省文也】酒正凡祭祀以灋共五齊三酒以實八尊大祭三貳皆有酌數唯齊酒不貳【大祭王服大裘袞冕所祭也謂就三酒之尊而益之也益之者以飲諸臣 詳見祭物 天官

今按時祭共二齊三酒以實五尊并明水玄酒尊為十尊】

冪人以畫布巾冪六彝【宗廟可以文畫者畫其雲氣與 同上 按禮運與其越席疏布以冪疏曰越席謂蒲席疏布謂麤布若依周禮越席疏布是祭天之物此經云君與夫人則宗廟之禮也此盖記者雜陳夏殷諸侯之禮故雖宗廟而用越席疏布也】

典庸器祭祀陳庸器【庸器伐國所獲之器若崇鼎貫鼎及以其兵物所鑄銘也 春官】

陳其宗器【宗器祭器也 朱子曰宗器先世所藏之重器若周之赤刀大訓天球河圖之屬也中庸】世婦及祭之日涖陳女宮之具凡內羞之物【涖臨也內羞房中之羞天官

上章女御寺人兩條此條通用】內豎若有祭祀之事則為內人蹕【內人從世婦有事於廟者內豎為六宮蹕者以其掌內小事 同上】

大宗伯享大鬼涖玉鬯省牲鑊奉玉盞【鑊烹牲器也 春官】

小宗伯大祭祀祭之日逆盥【逆盥受饁人之盛以入 同上】小祝大祭祀逆盥盛【同上按此條逆盥盛在迎尸之上小宗伯云祭之日逆盥省鑊告時於王告備於王肆師云祭之日表

盥盛告絜展器陳告備據此諸文逆盥當在嚮祭之晨而此疏云饋獻後尸將入室乃迎盥恐不然也】舍人凡祭祀共簋簋實之陳之【方曰簋圓曰簋盛黍稷稻粱器地官按簋盛黍稷為正饌簋盛稻粱為加饌天子八簋諸侯六簋簋之數未聞凡賓客之禮簋皆少於簋則祭時宜亦倣此天子蓋四簋諸侯蓋二簋天子用六粢有麥苽蓋盛之於簋】肆師祭之日表粢盛告絜展器陳告備【粢六穀也在器亦盛陳陳列也故書表為剽剽表皆謂徽識也春官】鋪筵設同几【同之言詞也祭者以其妃配亦不特几也祭統】司几筵凡大朝覲王設莞筵紛純加纁席畫純加次席黼純左右玉几【純緣也紛如綬有文而狹者纁席削蒲翦展之編以五采若今合歡矣畫謂雲氣也次席桃枝席有次列成文】祀先王亦如之【疏曰祀先王謂宗廟六享皆用上三種席】諸侯祭祀席蒲筵纁純加莞席紛純右雕几【纁畫文也不莞席加纁者纁柔礪不如莞清堅又於鬼神宜】凡吉事變几【吉事王祭宗廟裸於室饋食於堂釋於祊每事易几神事文示新之也

春官】大宰享先王贊玉几【玉几所以依神天子左右玉几天官已上三條朝踐章坐尸於堂通用】司巫祭祀則共匱主及道布及菹館【道布者為神所設中中霽禮曰以功布為道布屬于几也菹之言藉也祭食有當藉者館所以承菹謂若今筐也主先匱菹後館互言之者明共主以匱共菹以筐大祝取其主菹陳之器則退也士虞禮曰苴刺茅長五寸實于筐饌于西坵上又曰祝盥取直降洗之升入設于几東席上東縮春官按士虞禮疏云天子吉祭亦有茅苴以藉祭】小宗伯告時於王告備於王【時薦陳之晚早備謂饌具同上】

右祭日陳設【禮運疏用酒之法崔氏云周禮大祫於太廟則備五齊三酒朝踐王酌泛齊后酌醴齊饋食王酌盎齊后酌醢齊朝獻王酌泛齊因朝踐之尊再獻后酌醢盥因饋食之尊諸侯為賓則酌沈齊尸酢王與后皆還用所獻之齊賓長醑尸酢用清酒加爵亦用三酒大禘則用四齊三酒者醴齊以下悉用之朝踐王酌醴齊后酌盎齊饋食王酌醢齊后酌沈齊朝獻王酌醴齊再獻后還酌沈齊亦尊相因也諸侯為賓亦酌沈齊用三酒之法如祫禮也四時之祭唯二齊三酒則自祫禘以下至四時祭皆通用也二齊醴盎也朝踐王酌醴齊后亦酌醴齊饋食王酌盎齊后亦酌盎齊朝獻王還用醴齊再獻后還用盎齊亦尊相因也諸侯為賓亦酌盎齊三酒同於祫魯及王者之後大祫所用與王祫同若禘與王四時同侯伯子男祫禘皆用二齊醴盎而已三酒則並用用二齊之法朝踐君夫人酌醴齊饋食君夫人酌盎齊朝獻君還酌醴齊再獻夫人還酌盎齊諸臣為賓酌盎齊尸酢君夫人用昔酒酢諸臣用事酒加爵皆清酒時祭用一齊故禮器云君親制祭夫人薦盎君親割牲夫人薦酒其行之法朝踐君制祭則夫人薦盎進熟時君親割夫人薦酒朝獻時君酌盎齊以醑尸再獻時夫人還酌酒賓獻皆酒加爵如禘祫之禮天子諸侯酌奠皆用齊卿大夫之祭酌奠皆用酒祫祭在秋案司尊彝秋嘗用兩著尊饋獻用兩壺尊則泛齊醴齊各以著尊盛之盎齊醢齊沈齊各以壺尊盛之又五齊各有明水之尊凡十尊三酒各加玄酒凡六尊通罍彝盛明水黃彝盛鬱鬯此有十八尊其明水玄酒陳之各在五齊三酒之上禘祭在夏醴齊盎齊盛以犧尊醢齊沈齊盛以象尊時祭用二齊者春夏用犧尊盛醢齊用象尊盛沈齊秋冬用著尊盛醴齊用壺尊盛盎齊是一齊用一尊司尊彝皆云兩者以一尊盛明水也按前說謂時祭惟用醴盎二齊後又謂春夏用醢沈秋冬用醴盎自相牴牾覽者詳之其言祫禘用齊之差及所用尊彝之異亦恐未必然鄭司農謂追享朝享為禘祫則禘祫彝當用虎雉尊當用犬山耳】

司服王之吉服享先王則衮冕享先公則鷩冕【詳見祭物】追師掌王后之首服為副追衡筭【副服之以從王祭祀 詳見祭物】內司服掌王后之服褱衣揄狄闕狄素紗【從王祭先王則服褱衣祭先公則服揄狄詳見祭物】

闔人大祭祀之事設門燎蹕宮門廟門【燎地燭也蹕止行者廟在中門之外 天官】 宮正凡邦之事蹕宮中廟中則執燭【事祭事也邦之祭社稷七祀於宮中祭先公先王於廟中隸僕掌蹕止行者宮正則執燭以為明春秋傳曰有大事於大廟又曰有事于武宮 同上】 大司樂大祭祀王出入則令奏王夏【疏曰王出入謂王將祭祀初入廟門及祭訖出廟門皆令奏王夏也 春官】 大僕祭祀正王之服位詔灋儀【詔告也夏官】 內宰正后

之服位【位謂房中戶內及阼所立處 天官 按婦人入廟當由闔門】
君夫人會於大廟君純冕立於阼夫人副褱立於東房【大廟始祖廟也
祭統】君在阼夫人在房【人君尊東也天子諸侯有左右房 禮器】 大史祭之

日執書以次位常【謂校呼之教其所當居之處 春官】
祭有昭穆有事於大廟則羣昭羣穆咸在而不失其倫【昭穆咸在同宗父子皆來 祭統】 公族其在外朝則以官其在宗廟之中則如外朝之位宗人授事以爵以官【宗人掌禮及宗廟也以爵貴賤異位也以官官有所掌也若司徒奉牛司馬奉羊司空奉豕 文王世子 按特牲記公有司門西北面東上獻次衆賓私臣門東北面西上獻次兄弟疏云天子諸侯祭祀其位無文此公有司在門西北面東上私臣在門東北面西上天子諸侯祭祀可依此位矣同姓無爵者在阼階前西面北上卿西階前東面北上大夫在門東北面士門西北面旅食在其後少牢下篇云衆賓位在門東北面既獻在西階西南衆賓繼上賓而南天子諸侯之賓其位或依此與案祭統云凡賜爵昭為一穆為一昭與昭齒穆與穆齒又文王世子云其在外朝則以官其在宗廟之中則如外朝之位宗人授事以爵以官以此差之知同姓無爵者從昭穆有爵者則以官矣】

右入廟即位 宗廟之禮所以序昭穆也序爵所以辨貴賤也序事所以辨賢也【詳見祭義】

春秋設其裳衣【裳衣先祖之遺衣服也設之當以授尸也 中庸】 守祧掌守先王先公之廟祧其遺衣服藏焉【遺衣服大斂之餘也】 若將祭祀則各以其服授尸【尸當服卒者之上服以象生時 春官】 小祝大祭祀逆尸【同上】 大司樂尸出入則令奏肆夏【同上】 大祝凡肆享逆尸令鍾鼓【肆享祭宗廟也】 相尸禮【延其出入詔其坐作同上 相尸禮後諸章通用】
小祝沃尸盥【疏曰沃尸盥者尸尊不就洗案特牲尸入廟門盥于槃其時小祝沃水同上】 天府凡吉凶之事祖廟之中沃盥執燭【吉事四時祭也 同上】
按王將裸有鬱人沃盥故小臣沃王盥入朝踐章】

右祝迎尸 君迎牲而不迎尸【詳見祭義】

春祠夏禴裸用雞彝鳥彝皆有舟秋嘗冬烝裸用斚彝黃彝皆有舟【裸謂以圭瓚酌鬱鬯始

獻尸也后於是以璋瓚酌亞裸郊特牲曰周人尚臭灌用鬯臭鬱合鬯臭陰達於淵泉灌以圭璋用玉氣也既灌然後迎牲致陰氣也鷄彝鳥彝謂刻而畫之為雞鳳凰之形鄭司農云舟尊下臺若今時承盤罍讀如稼稼彝畫禾稼也黃彝黃目尊也春官司尊彝】典瑞裸圭有瓚以肆先王【鄭司農云於圭頭為器可以挹鬯裸祭謂之瓚故詩曰瑟彼玉瓚黃流在中國語謂之鬯圭以肆先王灌先王祭也玄謂肆解牲體以祭因以為名爵行曰裸漢禮瓚盤大五升口徑八寸下有盤口徑一尺春官】裸圭尺有二寸有瓚以祀廟【裸之言灌也或作裸或作果謂始獻酌奠也瓚如盤其柄用圭有流前注考工記玉人】鬱人凡裸玉濯之陳之以贊裸事【裸玉謂圭瓚璋瓚】詔裸將之儀與其節【節謂王奉玉送裸早晏之時】凡裸事沃盥【春官】小宰凡祭祀贊裸將之事【將送也裸送送裸謂贊王酌鬱鬯以獻尸謂之裸裸之言灌也明不為飲主以祭祀唯人道宗廟有裸天地大神至尊不裸莫稱焉凡鬱鬯受祭之啐之奠之天官】

小宗伯凡祭祀以時將瓚果【將送也猶奉也祭祀以時奉而授王天子圭瓚諸侯璋瓚春官】內宰大祭祀后裸則贊【謂祭宗廟王既裸而出迎牲后乃從後裸也祭統曰君執圭瓚裸尸大宗執璋瓚亞裸此大宗亞裸謂夫人不與而攝耳天官】君執圭瓚裸尸大宗執璋瓚亞裸【圭瓚璋瓚裸器也以圭璋為柄酌鬱鬯曰裸大宗亞裸容夫人有故攝焉祭統】諸侯賜圭瓚然後為鬯未賜圭瓚則資鬯於天子【圭瓚鬯爵也鬯秬酒也王制按尚書大傳云諸侯之有德者三命以秬鬯不得賜鬯者資於天子然後祭】

右裸【按宗廟有作樂下神一節或云時祭無之已見禘章】有虞氏之祭也尚用氣血腥爛殷人尚聲臭味未成滌蕩其聲樂三闋然後出迎牲周人尚臭灌用鬯臭鬱合鬯灌以圭璋既灌然後迎牲【詳見祭義】王度記曰天子鬯諸侯薰大夫芑蘭庶人艾秬者黑黍一稔二米鬯者以百草之香鬱金合而釀之成為鬯陽達於牆屋陰入於淵泉所以灌地降神也玉瓚者器名也所以灌鬯之器也以圭飾其柄灌鬯貴玉氣也【白虎通】祭之屬莫重於裸【祭統】王在新邑烝祭歲王入大室裸【詳見時享章】

既灌然後迎牲【郊特牲

按迎牲之節內宰與司尊彝二注少異而賈疏以司尊彝注為正今從之】

坐尸於堂【謂朝事時也朝事延尸於戶西南面布主席東面特尸薦以籩豆同上按內宰及司尊彝疏延尸出戶在二灌訖王出迎牲之時禮運疏在血毛詔於室之後今從賈氏疏盖尸主在堂而血毛詔於室下文所謂求而未之得也又按此注尸南面而主東面未知何據或約漢禮而知之然祫祭則尸主同面主在尸右疑時祭亦尸主同面也是時堂上別設席室內之席不動祭日陳設章鋪筵設同几以下三條及迎尸章大祝相尸禮並此條通用】

朝事之豆其實韭菹醯醢昌本麋鬱菁菹鹿鬱菹麋鬱【天官醢人注詳祭物

朝事解見下文豆先籩設故先載此條】朝事之籩其實醴蕡白黑形鹽臠鮑魚鱸【鄭司農云朝事謂清朝未食先進寒具口實之籩玄謂以司尊彝之職參之朝事謂祭宗廟薦血腥之事籩人詳祭物按此疏及內宰司尊彝疏后薦朝事豆籩在延尸在戶迎牲未入之時禮運疏在升首之後薦腥之前今從賈疏盖尸出在堂席前不可空故先設豆籩】

外宗掌宗廟之祭祀佐王后薦玉豆眡豆籩【視視其實春官】

九嬪凡祭祀贊后薦豆籩【本文云贊后薦徹豆籩天官兩條饋獻章薦饋食豆籩通用】

內宰詔其禮樂之儀【本文云正后之服位而詔其禮樂之儀 薦徹之禮當與樂相應 按秦漢之樂乾豆上登歌猶古清廟之歌疏謂薦時歌清廟其說蓋本此樂歌之事詳見祭物樂舞章】贊九嬪之禮事【助九嬪贊后之事九嬪者贊后薦玉盥薦徹豆籩 同上】內小臣若有祭祀則擯詔后之禮事相九嬪之禮事正內人之禮事【擯為后傳辭有所求為詔相正者異尊卑也同上】

世婦詔王后之禮事【薦徹之節】相外內宗之禮事【同姓異姓之女有爵佐后者 春官 內宰以下三條饋獻章薦饋食豆籩薦熟章羞盥徹章徹豆籩通用相內宗之禮事又為再獻章薦加豆籩通用】大宗伯凡大祭祀王后不與則攝而薦豆籩【薦豆籩王后之事 同上】

外宗王后不與則贊宗伯【后有故不與祭宗伯攝其事 同上 此兩條饋食豆籩通用】夫人薦豆執校執醴授之執鐙【校豆中央直者也執醴授醴之人授夫人以豆則執鐙鐙豆下跗也 祭統 饋食豆通用】大司樂牲出入則令奏昭夏【疏曰牲出入謂二灌後王出迎牲及爛肉與體其犬豕是牲出入皆令奏昭夏 春官 饋獻薦熟通用】大宰祀五帝及納亨贊王牲事享先王亦如之【納亨納牲將告殺謂鄉祭之晨既殺以授亨人凡大祭祀君親牽牲大夫贊之 天官】大司徒奉牛牲【牛能任載地類也奉猶進也 疏曰謂初牽入時地官】鄉師大祭祀羞牛牲【疏曰鄉師佐大司徒 同上】

大司寇大祭祀奉犬牲【奉猶進也秋官】及迎牲君執紼卿大夫從士執芻【紼所以牽牲也周禮作綏芻謂藁也殺牲時用薦之周禮封人祭祀飾牲共其水藁天子諸侯之祭禮先有裸尸之事乃後迎牲 祭統】君親牽牲大夫贊幣而從【納牲於庭時也當用幣告神而殺牲禮器】祭之日君牽牲穆答君卿大夫序從【祭謂祭宗廟也穆子姓也答對也序以次第從也序或為豫】既入廟門麗于碑【麗猶繫也祭義】封人歌舞牲【謂君牽牲入時隨歌舞之言其肥香以歆神也鄭司農云封人主歌舞其牲云傳碩肥腍 地官】

充人碩牲則贊【贊助也君牽牲入將致之助持之也春秋傳曰故奉牲以告曰博碩肥腍 同上】納牲詔於庭【疏曰詔吉也牲入在庭以幣告神禮器】

奉牲以告曰博碩肥腍【博廣也碩大也桓六年左傳】司弓矢凡祭祀共射牲之弓矢【射牲示親殺也殺牲非尊者所親唯射為可國語曰禘郊之事天子必自射其牲 夏官】射人祭祀則贊射牲【烝嘗之禮有射豕者國語曰禘郊之事天子必自射其牲今立秋有獮劉云 同上】大僕贊王牲事【牲事殺割匕載之屬 同上 此章割牲薦熟匕載時通用】

諸侯宗廟之事必自射其牛剗羊擊豕【剗刺也擊殺也國語楚語】

用牲於庭【謂殺之時郊特性】薦其血毛【疏曰朝踐時延尸在堂祝以血毛告於室也禮運】血毛詔於室【疏曰謂殺牲取血及毛入以告神於室 禮器】

大祝凡肆享隋釁令鍾鼓【肆享祭宗廟也隋釁謂薦血也凡血祭曰釁 春官】卿大夫袒而毛牛尚耳鸞刀以剗取腍膋乃退【毛牛尚耳以耳毛為上也腍膋血與腸間脂也 祭義】

取腍膋燔燎【郊特性 按此句在升首之上似謂朝踐時燔腍膋而注疏以饋食時熱蕭釋之下條祭義疏又謂一祭有兩度熱蕭指此文為朝踐時事前後牴牾今存其本文於此而注附見後章】建設朝事燔燎羶薌見以蕭光【朝事謂薦血腥時也見當為瞷字之誤也羶當為馨聲之誤也燔燎馨香覲以蕭光取牲祭脂也光猶氣也 祭義】

詔祝於室【本文云詔祝於室坐尸於堂 謂朝事時也朝事延尸於戶西南面布主席東面取牲腍膋燔于爐炭洗肝于鬱鬯而燔之入以詔神於室又出以墮于主前主人親制其肝所謂制祭也時尸薦以籩豆至薦孰乃更延主于室之奧尸來升席自此方坐于主北焉郊特性】

君親制祭【親制祭謂朝事進血膋時所制者制肝洗於鬱鬯以祭於室及主】卿

大夫從君【疏曰謂制祭之時則卿大夫從君 禮器】升首【文承取胙膋燔燎之下疏曰朝踐時祝取胙膋燎於爐炭入以告神於室出以綏於主前又升首於室 郊特性】升首於室【制祭之後升牲首於北墉下尊首尚氣也 同上】

羊人祭祀割羊牲登其首【登升也升首報陽也升首於室 夏官】

腥其俎【文承薦其血毛之下腥其俎謂豚解而腥之及血毛皆所以法於大古也 禮運】

司士帥其屬而割牲羞俎豆【割牲制體也羞進也 夏官 饋獻薦熟二章通用】大司徒祀五帝奉牛牲羞其肆享先王亦如之【鄭司農云羞進也肆陳骨體也玄謂進所肆解骨體土喪禮曰肆解去蹄 地官】小子掌祭祀羞羊肆【鄭司農云羞進也羊肆體薦全烝也玄謂肆讀為鬻羊鬻者所謂豚解也 夏官】設祭於堂【設祭之饌於堂人君體然 禮器 饋獻通用】祭腥【祭義 詳見下章】

小臣大祭祀沃王盥【疏曰王將獻尸先盥手洗爵乃酌獻故小臣為王沃水盥手也 夏官】御僕大祭祀相盥【詳見薦熟章】春祠夏禴其朝踐用兩獻尊【朝踐謂薦血腥酌醴始行祭事后於是薦朝事之豆籩既又酌獻鄭司農云獻讀為犧犧尊飾以翡翠故書踐作餞杜子春云餞當為踐 司尊彝 按朝獻與朝踐尊相因秋嘗冬烝朝踐用兩著尊】

大宰享先王贊玉爵【宗廟獻用玉爵 天官】小宰凡祭祀贊爵之事【又從大宰助王也 同上 兩條凡王獻通用】量人凡祭祀制其從獻脯燔之數量【鄭司農云從獻者肉殽從酒也玄謂燔從於獻酒之肉炙也數多少也量長短也 夏官】

此數量殺牲訖即制之載於此者欲見有從獻之事不言肝而言脯豈天子禮異與

饋獻朝獻再獻通用】內宰后獻則贊【獻謂王薦腥薦熟后亦從後獻也 天官

饋獻章后獻通用】外宗王后以樂羞盥則贊【見薦熟章】凡王后之獻亦如之【獻獻酒於尸】王后不與則贊宗伯【注見前 春官 饋獻再獻章后獻通用】醴醢以獻薦其燔炙君與夫人交獻【疏曰醴醢以獻者朝踐之時用醴饋食之時用醢薦其燔炙者謂燔肉炙肝案特性禮主人獻尸賓長以肝從主婦獻尸賓長以燔從則此君薦用炙夫人薦用燔也第一君獻第二夫人獻第三君獻第四夫人獻是君與夫人交錯而獻也 禮運

饋獻通用但不用醴】君西酌犧象夫人東酌罍尊【象日出東方而西行也月出西方而東行也周禮曰春祠夏禴裸用雞彝鳥彝皆有舟其朝踐用兩獻尊其再獻用兩象尊皆有罍諸臣之所酢 按此據諸侯□九獻之禮者言但設尊不於戶而於階夫人不酌犧象而酌罍皆變於天子然疑罍尊太卑不當施於朝踐饋獻夫人酌罍豈謂再獻酌尸與】禮交動乎上樂交應乎下【言交乃和 禮器 饋獻朝獻再獻通用饋獻君酌象朝獻君酌犧再獻夫人酌罍】

大司樂乃奏無射歌夾鍾舞大武以享先祖【無射陽聲之下也夾鍾為之合夾鍾一名函鍾先祖謂先王先公 春官 杜佑曰時堂上以夾鍾之調歌堂下以無射之調作大武之樂 饋獻朝獻再獻通用】鼓人以路鼓鼓鬼享【路鼓四面鼓也 地官 凡獻作樂通用

凡樂事宗廟通用者詳見祭物樂舞】

宗婦執盥從夫人薦浣水【浣盥齊也盥齊浣酌也几尊有明水因兼去水耳 祭統】

夫人薦盥【本文承君親制祭之下 疏曰此謂殺牲已畢進血腥之時斷制牲肝洗以鬱鬯入以祭神於室於此之時夫人薦盥齊以獻之侯伯子男之君朝踐君不獻故夫人薦盥】命婦從夫人【疏曰謂薦盥之時 禮器】

右朝踐 祭以清酒從以騂牡享于祖考執其鸞刀以啟其毛取其血膋【清酒清潔之酒鬱鬯之屬也騂赤色周所尚也祭禮先以鬱鬯灌地求神於陰然後迎牲執者主人親執也鸞刀刀有鈴也膋脂膏也啟其毛以告純也取其血以告殺也取其膋以升臭也合之黍稷實之於蕭而燔之以求神於陽也 小雅信南山】秋而載嘗夏而楅衡白牡騂剛犧尊將將毛炰

載羹籩豆大房萬舞洋洋孝孫有慶【嘗秋祭名楅衡施於牛角所以止觸也周禮封人云凡祭飾其牛牲設其楅衡是也秋將嘗而夏楅衡其牛言夙戒也白牡周公之牲也騂剛魯公之牲也白牡殷牲也周公有王禮故不敢與文武同魯公則無所嫌故用騂剛犧尊畫牛於尊腹也或曰尊作牛形鑿其背以受酒也毛炰周禮封人祭祀有毛炰之豚注云燂去其毛而炰之也載切肉也羹大羹鉶羹也大羹大古之羹湑煮肉汁不和盛之以登貴其質也鉶羹肉汁之有菜和者也盛之鉶器故曰鉶羹大房半體之俎足下有跗如堂房也萬舞名
魯頌閟宮】聲莫重於升歌舞莫重於武宿夜【武宿夜武曲名也
祭統】古者帝王升歌清廟【清廟樂章名】大琴練弦達越大

瑟朱弦達越以韋為鼓謂之搏拊何以也【練弦朱弦互文也越下孔也凡練弦達越搏拊者象其德寬和】君子有大人聲不以鍾鼓竽瑟之聲亂人聲清廟升歌者歌先人之功烈德澤也故欲其清也【烈業也】其歌之呼也【呼出聲也】曰於穆清廟於者歎之也穆者敬之也清者欲其在位者徧聞之也故周公升歌文王之功烈德澤苟在廟中見文王者愀然如見文王故書曰搏拊琴瑟以詠祖考來假此之謂也【尚書大傳】諸侯三命者皆受天子之樂以祀其宗廟所以褒有功而章有德之義也未命者不得用天子之樂祀其宗廟【同上】

內饗凡宗廟之祭祀掌割亨之事【天官】小宗伯祭之日省鑊【省鑊視亨腥孰 春官兩條薦孰通用】孰其殽【謂體解而燂之此以下皆所以法於中古也 禮運上章司士帥其屬割牲羞俎豆大司樂牲出入令奏昭夏皆此條通用】饋食之豆其實葵菹羸醢脾析麇醢蜃蜆醢豚拍魚醢【醢人詳見祭物】饋食之籩其實棗棗桃乾榛榛實【饋食薦孰也今吉禮存者特性少牢】

【諸侯之大夫士祭禮也不裸不薦血腥而自薦孰始是以皆云饋食之禮 籩人詳見祭物上章外宗佐王后薦玉豆以下七條並此二條通用】

小子掌祭祀羞羊殽【鄭司農云羊殽體解節折也 夏官薦孰通用】

君執鸞刀羞齊夫人薦豆【齊齊肺祭肺之屬也君以鸞刀割制之 祭統

上章夫人薦豆執校條此條通用】君親割牲夫人薦酒【親割謂進牲孰體時 疏曰謂薦孰時君親割牲體於時君亦不獻故夫人薦酒】卿大夫從君命婦從夫人【疏曰謂割牲薦酒之時 禮器】秋嘗冬烝其饋獻用兩壺尊【其變再獻為饋獻者亦尊相因饋獻謂薦孰時后於是薦饋食之豆籩鄭司農云壺者以壺為尊春秋傳曰尊以魯壺 司尊彝

按再獻與饋獻尊相因春祠夏禴饋獻用兩象尊

上章大宰贊玉爵以下至鼓人凡九條並此條通用】燂祭而退【本文燂祭下有祭腥字見上章燂祭祭腥祭燂肉腥肉也湯肉曰燂燂祭祭腥或為合祭腥泄臠孰也 祭義

上章設祭於堂此條通用】

右饋獻【按饋獻一節禮運疏謂在尸入室之後周禮疏以孰其殽當饋獻節在尸未入室之前今考司几筵吉事變几鄭注有饋食於堂之語當以賈疏為正若尸既入室則當食舉矣豈先獻然後食乎又按禮運以薦血腥法上古孰其殽法中古其下文醴醢以獻薦其燔炙君與夫人交獻云云皆在未合亨之前獻醴即朝踐也獻薦即饋獻也然則饋獻不在陰厭之後亦明矣故今所次皆從賈疏之說】

然後退而合亨【此謂薦今世之食也 疏曰前薦爛既未孰今至饋食乃退取臠爛肉更合亨之令孰擬更薦尸又尸俎惟載右體其餘不載者及左體等亦於鑊中亨煮之故云合亨 禮運朝踐章大司樂牲出入令奏昭夏上章內饗掌割亨小宗伯省鑊並此條通用】 備其鼎俎【疏曰牲煮於鑊鑊在廟門外鼎隨鑊設各陳於鑊西取牲體以實其鼎而入設於阼階下南北陳之俎設於鼎西以次載於俎也案少牢陳鼎於廟門之外東方北面北上又云鼎入陳於東方當序西面北上俎皆設于鼎西是也 禮運按天子九鼎九俎諸侯七鼎七俎其牲無明文以諸經約之天子九者牛一羊二豕三犬四雞五魚六腊七】

【鮮魚八鮮腊九諸侯七者無鮮魚鮮腊也】

大祝肆享逆牲令鍾鼓【本文逆牲在隋轡之下 既隋轡後言逆牲容逆鼎 春官朝踐章大司樂令奏昭夏此條通用】 御僕大祭祀相盥而登【相盥者謂奉槃授巾與登謂為王登牲體於俎特牲饋食禮主人降盥出舉入乃匕載 夏官

朝踐章大僕贊王牲事此條通用 按特牲少牢匕載時先升心舌為胙俎至正祭時主人親進之尸食舉皆加于胙又取餘體盛于胙祭畢以此俎歸之于尸天子諸侯亦當有之】

諸子大祭祀正六牲之體【正謂匕載之 同上】

體其犬豕牛羊實其簠簋籩豆鉶羹【體其犬豕牛羊謂分別骨肉之貴賤以為眾俎也 禮運朝踐章司士割牲羞俎豆此條通用】 大司馬大祭祀羞牲魚【詳見下】

小子祭祀贊羞【夏官 又上章羞羊殽此條通用】 羹定詔於堂【肉謂之羹 疏曰定孰肉也謂煮肉既孰將欲迎尸主入室乃先以俎盛之告神于堂是薦熟未食之前也 禮器】 春秋薦其時食【時食四時祭也 中庸】

九嬪凡祭祀贊玉盥【玉盥玉敦受黍稷器后進之而不徹故書玉為王杜子春讀為玉 天官】 外宗王后以樂羞盥則贊【贊猶佐也 春官 按羹定詔於堂之後乃延主于室徙堂上朝踐饋食豆籩入室設于尸席前俎入設于豆東后乃薦玉盥設于俎南

朝踐章內宰內小臣世婦三條此二條通用】

亨人祭祀共鉶羹【鄭司農云大羹不致五味鉶羹加鹽菜矣天官 按特牲鉶羹設于豆南】

小祝贊奠【本文在贊徹下奠奠爵也祭祀奠先徹後反言之者明所佐大祝非一 疏曰大祝酌酒奠于鉶南則郊特牲注天子奠罍】

【諸侯奠角小祝其時贊之 春官按禮運疏天子諸侯酌奠皆用齊】 蕭合黍稷既奠然後炳蕭合羶薌【奠謂薦孰時也特牲饋食所云祝酌奠于鉶南是也蕭薌蒿也染以脂合黍稷燒之詩云取蕭祭脂羶當為馨聲之誤也奠或為薦

又取腍脊燔燎注云腍脊腸間脂也與蕭合燒之亦有黍稷也郊特牲】 大祝辨六號二曰鬼號【鬼號若云皇祖伯某】 凡肆享則執明水火而號祝【明水火司烜所共日月之氣以給

烝享孰之如以六號祝明此圭絜也春官】直祭祝于主【謂薦孰時也如特牲少牢饋食之為也直正也祭以孰為正則血腥之屬盡敬心耳郊特牲】祝以孝告【疏曰案少牢祝曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尚饗是祝以孝告禮運按尸未入而先設饌饗神曾子問所謂陰厭】

天子踐阼臨祭祀內事曰孝王某諸侯臨祭祀內事曰孝子某侯某【詳見通禮祝號】舉罍角詔妥尸【妥安坐也尸始入舉奠罍若奠角將祭之祝則詔主人拜安尸使之坐尸即至尊之坐或時不自安則以拜妥之也天子奠罍諸侯奠角郊特牲按陰厭後尸入室禮器注所謂尸來升席自北方坐于王北謂此時也迎尸章大祝相尸禮亦此條通用又按特牲主人拜妥尸尸答拜執奠祝饗主人拜如初尸乃按祭祭黍稷肺祭酒啐酒告旨主人拜尸奠觶答拜注云饗勸強之也其辭取于士虞記則宜云孝孫某主為而孝薦之饗少牢無執奠祝饗啐奠告旨等事賈氏云士賤不嫌得與人君同大夫尊嫌與人君同故初不饗後亦不告旨據此則天子諸侯妥尸後當有執奠祝饗等事】小祝贊隋【隋尸之祭也春官】薦黍稷羞肝肺首心見間以俠鬴【薦黍稷所謂饋食也見間當為覲字之誤也有虞氏祭首夏后氏祭心殷祭肝周祭肺覲以俠鬴謂雜之兩鬴醴酒也祭義按醴酒疑謂祝酌奠于鉶南之酒俠鬴併明水尊言之】祭黍稷加肺【祭黍稷加肺謂綏祭也郊特牲按此文下云祭齊加明水疏謂不專指綏】

【祭時詳見祭義】亨人祭祀共大羹【大羹肉湑天官按特牲大羹設于醯北不祭不嚙】小子羞肉豆【鄭司農云羞進也肉豆者切肉也夏官按肉豆庶羞也特牲少牢尸食舉之時佐食羞庶羞四豆設于左尸食之】大司馬大祭祀羞牲魚授其祭【牲魚魚牲也祭謂尸所以祭也鄭司農云大司馬主進魚牲同上按特牲少牢魚十有五正祭時尸以一魚振祭嚙之少牢儋尸加膾祭于其上賓長三獻時司士羞湑魚尸取膾祭祭之此言授其祭亦通正祭釋祭言之】大祝逆尸令鍾鼓右亦如之【右讀亦當為侑按大祝辨九拜以享右祭祀注云享獻也謂朝獻饋獻也右讀為侑侑勸尸食而拜按特牲尸三飯告飽祝侑主人拜舉幹舉獸幹魚一尸又三飯告飽祝侑之如初舉酪及獸魚尸又三飯告飽祝侑之如初舉肩及獸魚尸不復飯少牢上大夫禮尸食七飯告飽祝西面于主人之南獨侑不拜侑曰皇尸未實侑尸又飯舉牢肩尸不飯告飽祝西面于主人之南主人不言拜侑尸又三飯注云為祝一飯為主人三飯尊卑之差凡十一飯下人君也疏云此與特牲皆有尸飯法天子諸侯亦當有之故大祝九拜之下云以享侑祭祀注云侑勸尸食而拜若然士三飯即告飽而侑大夫七飯告飽而侑諸侯九飯告飽而侑天子十一飯而侑案此疏則天子諸侯尸告飽之後亦祝與主人更侑尸為祝一飯為主人三飯也又下大夫不賓尸尸七飯時祝侑亦如之尸食舉牢肩尸不飯告飽主人拜侑不言尸又三飯注云凡十一飯士九飯大夫十一飯其餘有十三飯十五飯疏云士禮九飯上下大夫同十一飯士大夫既不分命數為尊卑則五等諸侯同十三飯天子十五飯可知春官】

右薦熟

索祭祝于祊【索求神也廟門曰祊謂之祊者以於繹祭名也郊特牲】

右祝祭于祊【按禮記索祭祝于祊文承直祭祝于主之下未知當在何時或云在祭末然以楚茨詩考之第二章云祝祭于祊祀事孔明文承或剝或亨或肆或將之下其三章始言獻酬交錯四章始言俎賚孝孫則祭祊不在祭末今次於薦熟之後其行事或在尸未食之前或在尸卒食之後皆不可知也】

秋嘗冬烝其朝獻用兩著尊【其變朝踐為朝獻者尊相因也朝獻謂尸卒食王醕之鬱人職曰受舉斚之卒爵而飲之則王醕尸以玉爵也鄭司農云著尊者著略尊也或曰著尊著地無足明堂位曰著股尊也司尊彝按朝獻因朝踐之尊春祠夏禴朝獻用兩獻尊

朝踐章大宰小宰量人大司樂鼓人五條及禮器君西酌犧並此條通用】司几筵王設莞筵紛純加纁席畫純加次席黼純【詳見祭日陳設章又案此條疏云受酢度未必有几故下文祀先王酢席亦如之及諸侯酢席皆不云几也】祀先王昨席亦如之【鄭司農云昨席於主階設席王所坐也玄謂昨讀曰酢謂祭祀反王受酢之席尸卒食王醕之卒爵祝受之又酌授尸尸酢王於是席王於戶內后諸臣致爵乃設席按司尊彝疏云王醕尸用朝踐之尊醴齊尸酢王還用醴齊又王受尸酢有俎見徹章】諸侯昨席莞筵紛純加纁席畫純【昨亦讀曰酢春官】嘏以慈告【祝以孝告嘏以慈告各首其義也禮運按楚茨詩既齊既稷既匡既勅箋云嘏之禮祝徧取黍稷牢肉魚於俎以授尸孝孫前就尸受之天子使宰夫受之以筐祝則釋嘏辭以勅之天子嘏辭與大夫同也】鬱人大祭祀與量人受舉斚之卒爵而飲之【斚受福之嘏聲之誤也王醕尸尸嘏王此其卒爵也少牢饋食禮主人受嘏詩懷之卒爵執爵以興出宰夫以籩受嗇黍主人嘗之乃還獻祝此鬱人受王之卒爵亦王出房時也必與量人者鬱人贊裸尸量人制從獻之脯醢事相成春官】量人凡宰祭與鬱人受斚歷而皆飲之【言宰祭者豕宰佐人祭亦容攝祭鄭司農云斚讀如嫁娶之嫁是器名明堂位曰爵夏后氏以琖股以斚周以爵玄謂斚讀如嘏尸之嘏宰豕宰夏官少牢注云不啐而卒爵者大夫之佐食賤禮略疏曰天子諸侯禮雖亡或可對天子諸侯佐食啐乃卒爵貴故也】

右朝獻

祭之日一獻君降立于阼階之南南鄉所命北面史右君右執策命之再拜稽首受書以歸而舍奠于其廟【一獻醕尸也舍當為釋聲之誤也非時而祭曰奠祭統】

右因祭策命賚大封于廟也

加豆之實芹菹兔醢深蒲醢醢箔菹鴈醢筍菹魚醢【醢人詳見祭物】加籩之實菱芡棗脯菱芡棗脯【加籩謂尸既食后亞獻尸所加之籩重言之者以四物為八籩籩人詳見祭物】內宗掌宗廟之祭祀薦加豆籩【加爵之豆籩故書為籩豆鄭司農云謂婦人所薦杜子春云當為豆籩春官朝踐章世婦相內宗之禮事此條通用】春祠夏禴其再獻用兩象尊【再獻者王醕尸之後后酌亞獻諸臣為賓又次后酌盞齊備卒食三獻也於后亞獻內宗薦加豆籩明堂位曰灌用玉瓚大圭爵用玉琖加用璧角璧散又鬱人職曰受舉斚之卒爵而飲之則王醕尸以玉爵也王醕尸用玉爵而再獻者用璧角璧散可知也鄭司農云象尊以象鳳凰或曰以象骨飾尊司尊彝按再獻因饋獻之尊秋嘗冬烝再獻用兩壺尊本章諸臣獻通用】

內宰后裸獻則贊瑤爵亦如之【瑤爵謂尸卒食王既醕尸后亞獻之其爵以瑤為飾 天官按少牢主婦入戶西面拜獻尸注云不北面者辟人君夫人也則夫人當北面拜 朝踐章外宗贊王后之獻后不與則贊宗伯量人制從獻禮器夫人東酌罍尊及大司樂鼓人並此條通用】尸酢夫人執柄夫人受尸執足【疏曰爵如雀形以尾為柄夫人獻尸尸酢夫人則執爵尾授夫人夫人受酢於尸則執爵足 按博古圖爵有鋈為柄疏說非是祭統按司尊彝疏云后醕尸用饋獻之尊盞齊尸酢后還用盞齊又后受尸酢有俎見徹章又按后受尸酢後諸臣為賓者再獻其尊已見上其爵用璧散見禘章樂舞見朝踐章】夫婦相授受不相襲處酢必易爵【疏曰襲因也謂夫婦交相致爵之時其執之物不相因故處酢必易爵者謂致爵之時主人受主婦之酢易換其爵故特牲主人受主婦之酢更爵酢注云主人更爵自酢男子不承婦人爵即引此文為證也 同上 按特牲賓長三獻尸爵止於是主婦入戶致爵于主人受爵酢主人入房致爵於主婦更爵酢此人君禮亦當諸臣獻尸尸止爵而後夫婦致爵也又后致爵乃設席見朝獻章司几筵注】春祠夏禴皆有罍諸臣之所昨也秋嘗冬烝皆有罍

諸臣之所昨也【昨讀為酢字之誤也諸臣獻者酌罍以自酢不敢與王之神靈共尊鄭司農云罍臣之所飲也詩曰瓶之罄矣維罍之恥司尊彝按特牲少牢賓長獻尸後致尊於主人主婦而酢于主人天子諸侯禮亦當有之】羞籩之實糗餌粉飧【羞籩謂若少牢主人酬尸宰夫羞房中之羞于尸侑主人主婦皆右之者籩人詳見祭物】羞豆之實醢醢食糝食【醢人詳見祭物按此皆內羞別有庶羞蓋夏官小子設之】

右再獻【已上九獻之正禮也疏家論行禮先後次第及獻數降殺不同並著之以備參考禮運疏云大禘祭日之旦王服袞冕而入尸亦袞冕祝在後侑之王不出迎尸故祭統云君不迎尸所以別嫌也尸入室乃作樂降神故大司樂云凡樂圜鍾為宮九變而致人鬼是也乃灌故書王入大室裸當灌時衆尸皆同在太廟中依次而灌所灌鬱鬯小宰注云尸祭之啐之奠之是為一獻也王乃出迎牲后從灌二獻也迎牲而入至於庭故禮器云納牲詔於庭王親執鸞刀啟其毛而祝以血毛告於室故禮器云血毛詔於室凡牲則廟各別牢故公羊傳云周公白牲魯公辟糝案逸禮云毀廟之主昭共一牢穆共一牢於是行朝踐之事尸出於室太祖之尸坐於戶西南面其主在右昭在東穆在西相對坐主各在其右故鄭注祭統云天子諸侯之祭朝事延尸於戶外是以有北面事尸之禮祝乃取牲胙膋燎于爐炭入以詔神於室又出以墮於主前郊特牲云詔祝於室坐尸於堂是也王乃洗肝於鬱鬯而燔之以制於主前所謂制祭次乃升牲首於室中置於北墉下后薦朝事之豆籩乃薦腥於尸主之前謂之朝踐即此禮運薦其血毛腥其俎是也王乃以玉爵酌著尊泛齊以獻尸三獻也后又以玉爵酌著尊醴齊以亞獻四獻也乃退而合亨至薦孰之時陳於堂故禮器云設饌於堂乃後延主入室大祖東面昭在南面穆在北面徙堂上之饌於室內坐前祝以鬯爵酌奠於饌南故郊特牲注云天子奠鬯諸侯奠角即此之謂也既奠之後又取腸間脂炳蕭合馨薌郊特牲注云奠謂薦孰時當此大合樂也自此以前謂之按祭乃迎尸入室舉此奠鬯主人拜以妥尸故郊特牲云舉鬯角拜妥尸是也后薦饋獻之豆籩王乃以玉爵酌壺尊盞齊以獻尸為五獻也后又以玉爵酌壺尊醴齊以獻尸是六獻也於是尸食十五飯訖王以玉爵因朝踐之尊泛齊以醕尸為七獻也故

鄭云變朝踐云朝獻尊相因也朝獻謂此王醑尸因朝踐之尊也后乃薦九豆籩尸酌酢主人主人受嘏王可以獻諸侯於是后以瑶爵酌醑食壺尊醑齊以醑尸為八獻也鄭注司尊彝云變再獻為饋獻者亦尊相因也再獻后醑尸獻謂饋食時后之獻也於時王可以瑶爵獻卿也諸侯為賓者以瑶爵酌壺尊醑齊以獻尸為九獻九獻之後謂之加爵

按此論行禮先後次第與今所次間有不同覽者詳之

特牲疏曰天子大祫十有二獻四時與禘唯有九獻上公亦有九獻侯伯七獻子男五獻按天子合諸侯而饗禮諸侯長十有再獻則大祭宜亦有十二獻但禮文殘缺不可考以意推之豈天子及后諸臣醑尸各兩爵與禮運疏又云天子祫禘時祭皆九獻其魯及王者之後皆九獻其行之法與天子同侯伯七獻朝踐及饋獻時君皆不獻於九獻之中減二故為七獻也禮器云君親制祭夫人薦盥君親割牲夫人薦酒是也子男五獻者亦以薦腥饋孰時君皆不獻醑尸之時君但一薦而已九獻之中去其四故為五此皆崔氏之說今案特牲少牢尸飲之後主人主婦及賓備行三獻主婦因獻而得受酢今子男尸食之後但得一獻夫人不得受酢不如卿大夫理亦不通蓋子男饋孰以前君與夫人並無獻也食後行三獻通二灌為五也禮器所云者據侯伯七獻之制也

按五獻之說孔氏得之禮器七獻神注謂祭先公疏曰驚冕七章享先公故知七獻祭先公也按侯伯七獻朝踐饋獻皆夫人獻而君不獻通裸與醑尸數之主人二獻而主婦四獻事亦可疑案禮有放而不致之例豈天子七獻朝踐饋獻皆王獻而后不獻侯伯避王故特異其禮與】

尸飲五君洗玉爵獻卿尸飲七以瑶爵獻大夫尸飲九以散爵獻士及羣有司皆以齒【尸飲五謂醑尸五獻也大夫士三獻而獻賓祭統司尊彝注云此凡九酌王及后各四諸臣一祭之正也以今祭禮特牲少牢言之二裸為奠而尸飲七矣王可以獻諸臣祭統曰尸飲五君洗玉爵獻卿是其差也按賈孔二疏論獻卿先後不同孔謂祭統據備九獻者言至主人醑尸而及飲五賈謂祭統據侯伯七獻者言至諸臣再獻而尸飲五以司尊彝注推之當以賈疏為正若如孔說則賓未獻尸而君先獻賓失其序矣其言飲七飲九皆誤蓋尸飲五正獻已畢飲七飲九皆正獻之後加爵也特牲士禮長兄弟衆賓長再加爵祭末又有利獻尸則侯伯有四加宜矣又以司尊彝注推之則備九獻者尸飲九而獻大夫尸飲十一而獻士及羣有司可知也諸臣致爵乃設席見朝獻章司几筵注】宗廟之祭貴者獻以爵賤者獻以散【凡觴一升曰爵二升曰觚三升曰觶四升曰角五升曰散禮器】

右獻諸臣及加爵【禮運疏曰特牲有三加則天子以下加爵之數依尊卑不止三加也】凡為俎者以骨為主骨有貴賤殷人貴髀周人貴肩凡前貴於後貴者取貴骨賤者取賤骨貴者不重賤者不虛【詳見祭義】

及入舞君執干戚就舞位君為東上冕而總干率其羣臣以樂皇尸【君為東上近主位也皇君也言君尸者尊之祭統】

右樂尸【按注疏不言樂尸當何時通典次於加爵之後今姑從之未知其是否也】

其登獻受爵則以上嗣【本文登下有餽字 上嗣君之適長子以特牲饋食禮言之受爵謂上嗣舉奠也獻謂舉奠洗爵酌入也餽謂宗人遣舉奠盥祝命之餽也大夫之嗣無此禮辟君也文王世子】

右上嗣舉奠

司士凡祭祀及賜爵呼昭穆而進之【賜爵神惠及下也此所賜王之子姓兄弟祭統曰凡賜爵昭為一穆為一昭與昭齒穆與穆齒凡羣有司皆以齒此之謂長幼有序 夏官】凡賜爵昭為一穆為一昭與昭齒穆與穆齒凡羣有司皆以齒【昭穆猶特牲少牢饋食之禮衆兄弟也羣有司猶衆賓下及執事者君賜之爵謂若酬之 祭統】

旅酬下為上【謂若特牲饋食之禮賓弟子兄弟之子各舉觶於其長也 中庸】右旅酬無算爵【按特牲堂下設尊旅酬無算爵並行少牢上下大夫或行或否參差不等疏云大夫當辟國君士賤不嫌與君同故得備禮然則天子諸侯廟中旅酬無算爵並行略如士禮也】

肆師凡祭祀禮成則告事畢【春官 按儀禮疏云特牲祝戶外告利成少牢階上告利成以尊者稍遠於尸若天子諸侯禮畢於堂下告利成故詩楚茨云孝孫徂位工祝致告鄭注云祭禮畢孝孫往位堂下西面位祝於是致孝孫之意告尸以利成也】小祝送尸【同上】

大司樂尸出入則令奏肆夏【見祝迎尸章】

右禮畢送尸

尸謖君與卿四人餽君起大夫六人餽大夫起士八人餽士起各執其具以出陳於堂下百官進徹之【進當為餽聲之誤也百官謂有事於君祭者也既餽乃徹之而去】凡餽以四簋黍【疏曰諸侯之祭有六簋今云以四簋者以二簋留為陽厭之祭故以四簋而餽簋有黍稷特云黍者見其美舉黍稷可知也 祭統 詳見祭義】其登餽則以上嗣【見上嗣舉奠章 按尸謖君與卿四人餽則上嗣初不得與餽也下云君起大夫六人餽豈上嗣與五大夫對餽與】

右餽

大祝既祭令徹【春官】小祝贊徹【同上】樂師及徹帥學士而歌徹【學士國子也鄭司農云謂將徹之時自有樂故帥學士而歌徹玄謂徹者歌雍雍在周頌臣工之什同上】

小師徹歌【於有司徹而歌雍 同上】

小子受徹焉【夏官】九嬪贊后徹豆籩【詳見朝踐章】

外宗佐王后薦王豆眡豆籩及以樂徹亦如之【春官】

內宗及以樂徹則佐傳豆籩【佐傳佐外宗 同上 朝踐章內宰以下三條通用】

大宗伯凡大祭祀王后不與則攝而徹【本文云則攝而薦豆籩徹 薦徹豆籩王后之事同上】膳夫凡王祭祀則徹王之胾俎【膳夫親徹胾俎胾俎最尊也其餘則其屬徹之天官】

內小臣徹后之俎【俎謂后受尸之爵飲于房中之俎 同上】

右徹【按上章祭統疏云諸侯祭有六簋以四簋餼以二簋留為陽厭然則天子諸侯徹俎後亦當改饌西北隅為陽厭也】

楚茨【朱子曰此詩述公卿有田祿者力於農事以奉宗廟之祭小雅】

為祊乎外【祊祭之明日繹祭也謂之祊者於廟門之旁因名焉其祭之禮既設祭於室不事尸於堂孝子求神非一處也周禮曰夏后氏世室門堂三之二室三之一詩頌絲衣曰自堂徂基禮器】君牽牲夫人奠盎君獻尸夫人薦豆卿大夫相君命婦相夫人【奠盎設盎齊之奠也此時君牽牲將薦毛血君獻尸而夫人薦豆謂繹日也儋尸主人獻尸主婦自東房薦韭菹醢祭義】

牛人凡祭祀共其求牛【求終也終事之牛謂所以繹者也宗廟有繹者孝子求神非一處地官】

右繹 開謂之門【詩曰祝祭于祊爾雅】繹又祭也【祭之明日尋繹復祭】周曰繹【春秋經曰壬午猶繹】商曰彤【書曰高宗彤日】夏曰復胙【未見義所出同上】

鳧鷖【朱子曰祭之明日繹而賓尸之樂大雅】絲衣繹賓尸也【周頌序】詩曰明不寐有懷二人文王之詩也祭之明日明發不寐饗而致之又從而思之【詳見祭義】宣公八年六月辛巳有事于大廟仲遂卒于垂壬午猶繹【繹又祭陳昨日之禮所以賓尸】繹者祭之旦日之享賓也【春秋穀梁傳】繹者何祭之明日也【禮繹繼昨日事但不灌地降神爾天子諸侯曰繹大夫曰賓尸士曰宴尸去事之殺也必繹者尸屬昨日配先祖食不忍輒忘故因以復祭禮則無有誤敬慎之至殷曰彤周曰繹繹者據今日道昨日不敢斥尊言之文意也彤者彤彤不絕據昨日道今日斥尊言之質意也祭必有尸者節神也禮天子以卿為尸諸侯以大夫為尸卿大夫以下以孫為尸夏立尸殷坐尸周旅酬六尸公羊傳】孔子曰繹之於庫門內祊之於東方失之矣【祊之禮宜於廟門外之西室繹又於其堂神位於西也此二者同時而大名曰繹其祭禮簡而事尸禮大郊特牲案家語云衛莊公改舊制變宗廟易朝市高子罍問於孔子曰周禮繹祭于祊祊在廟門之西前朝而後市今衛君更之如之何孔子曰繹之於庫門內祊之於東方市朝於西方失之矣】

幕能帥顓頊者也有虞氏報焉【幕舜之後虞思也為夏諸侯帥循也顓頊有虞氏之祖也報報德之祭也】杼能帥禹者也夏后氏報焉【杼禹後七世少康之子季杼也能興夏道者】上甲微能帥契者也商人報焉【上甲微契後八世湯之先也】高圉大王能帥稷者也周人報焉【高圉后稷後十世公非之子也大王高圉之曾孫古公亶父也國語魯語】

右報祭 書曰惟高宗報上甲微【案竹書紀年武丁十二年報祀上甲微】定公問曰此何謂也孔子對曰此謂親盡廟毀有功而不及祖有德而不及宗故於每歲之大嘗而報祭焉所以昭其功德也公曰先君僖公功德前行可以與於報乎孔子曰丘聞昔虞夏商周以帝王行此禮者則有矣自此以下未之知也【孔叢子論書】

王立七廟曰考廟曰王考廟曰皇考廟曰顯考廟曰祖考廟皆月祭之諸侯立五廟曰考廟曰王考廟曰皇考廟皆月祭之【祭法】

古者先王日祭月享【日祭于祖考月祭于曾高】諸侯舍日【有月祭也國語楚語】甸服者祭【供日祭也】侯服者祀【供月祀也】日祭【日祭于祖考謂上食也近漢亦然】月祀【月祀於曾高周語】

右月告之祭【案玉藻疏云天子諸侯行告朔禮訖然後祭於諸廟謂之朝享又謂之朝正又謂之月祭是月祭即朝廟朝正也今以朝廟事附見於下但周禮司尊彝四時間祀有朝享本謂大祫也疏家亦指為月祭則誤矣】

文公六年閏月不告月猶朝于廟【疏曰朝享即月祭是也 春秋】

人春獻王鮪【王鮪鮪之大者月令季春薦鮪于寢廟 天官】仲春天子乃鮮羔開冰先薦寢廟【鮮當為獻聲之誤也獻羔謂祭司寒也祭司寒而出冰薦於宗廟乃後賦之春秋傳曰古者日在北陸而藏冰西陸朝覲而出之其藏冰也深山窮谷固陰沍寒於是乎取之其出之也朝之祿位賓食喪祭於是乎用之其藏之也黑牡秬黍以享司寒其出之也桃弧棘矢以除其災其出入也時食肉之祿冰皆與焉大夫命婦喪浴用水祭寒而藏之獻羔而啟之公始用之火出而畢賦自命夫命婦至於老疾無不受冰】

季春天子始乘舟薦鮪于寢廟【進時美物】孟夏農乃登麥天子乃以彘嘗麥先薦寢廟【登進也麥之新氣尤盛以彘食之散其熟也彘水畜】仲夏農乃登黍天子乃以雛嘗黍羞以含桃先薦寢廟【此嘗雛也而云以嘗黍不以牲主穀也必以黍者黍火穀氣之主也含桃櫻桃也】孟秋農乃登穀天子嘗新先薦寢廟【黍稷之屬於是始熟】仲秋以犬嘗麻先薦寢廟【麻始熟也】季秋天子乃以犬嘗稻先薦寢廟【稻始熟也】季冬命漁師始漁天子乃嘗魚先薦寢廟【天子必親往視漁明漁非常事重之也此時魚絜美 已上月令】未嘗不食新【嘗謂薦新物于寢廟 少儀】

右薦新 潛季冬薦魚春獻鮪也【周頌詩序】古者大寒降土蟄發水虞於是乎講罟罟罾取名魚登川禽而嘗之寢廟行諸國人【國語魯語】四之日其蚤獻羔祭韭【豳風】

天子玄端聽朔于南門之外諸侯皮弁以聽朔于大廟【詳見朝廷禮】

右告朔【詳見王朝禮】

王下祭殤五適子適孫適曾孫適玄孫適來孫諸侯下祭三【祭適殤也重適也祭適殤於廟之奧謂之陰厭凡庶殤不祭 祭法】

右祭

禮書綱目卷四十二

卷四十三

欽定四庫全書

禮書綱目卷四十三 婺源江永撰

諸侯遷廟 吉禮十

補經【此篇出大戴禮】

成廟將遷之新廟君前徙三日齊祝宗人及從者皆齊【謂親過高祖則毀廟以昭穆遷之】

右將遷齊 記作王壞廟有時日於練焉壞廟壞廟之道易檐可也改塗可也【禮過高祖則毀其廟以次而遷將納新神示有所加 文公二年穀梁傳】

徙之日君玄服從者皆玄服從至于廟【廟殯宮】羣臣如朝位【列於廟門外如路門之位】君入立于阼階下西向有司如朝位【立於門內如門外之位】宗人擯舉手曰有司其請升君升祝奉幣從在左北面【祝王辭故在左神將遷故出在戶牖間南面矣】再拜興祝聲三曰孝嗣侯某敢以嘉幣告于皇考某侯【言嗣以遷代不言國未忍有之也】成廟將徙敢告【卒不奠幣者禮畢矣於此將有事於新廟】君及祝再拜興

右殯宮告遷

祝曰請導君降立于階下奉衣服者皆奉以從祝【不言奉主而稱奉衣服者以毀易祖考誠人神之不忍徙祝者祝所以導神也言皆者衣服非一稱周禮守祧職曰掌先王先公之廟祧其遺衣服藏焉】奉衣服者降堂君及在位者皆辟也奉衣服者至碑君從有司皆以次從出廟門奉衣服者升車乃步君升車從者皆就車也【皆就車謂乘貳車者】凡出入門及大溝渠祝下擯【神車祝為左故於步處則下】至于新廟筵于戶牖間【始自外來故先於堂】樽于西序下【四時之祭在室筵奧中在堂筵序下是以設樽恒於東方今惟布南面之席故置樽於西以因其便矣】脯醢陳于房中【房西房也諸侯左右房也】設洗當東榮南北以堂深【記因卿士當言東霤】有司皆先入如朝位祝導奉衣服者乃入君從奉衣服者入門左【門左門西】在位者皆辟也奉衣服者升堂皆反位君從升奠衣服于席上祝奠幣于几東君北向祝在左

右奉主入新廟

贊者盥升適房薦脯醢君盥酌奠于薦西反位君及祝再拜興祝聲三曰孝嗣侯某敢用嘉幣告于皇考某侯今月吉日可以徙于新廟敢告再拜君就東廂西面祝就西廂東面【東西俟

也祝就西廂因其便也】在位者皆反走辟如食間【走疾趨也】擯者舉手曰請反位君反位祝從在左卿大夫及衆有司諸在位者皆反位祝聲三曰孝嗣侯某潔為而明薦之享【詩云潔蠲為饔是用孝享】君及祝再拜君反位【東廂之位】祝徹反位【西廂之位】

右祭告

擯者曰遷廟事畢請就燕君出廟門卿大夫有司執事者皆出廟門告事畢【事謂內主藏衣服斂幣徹几筵之等】乃曰擇日而祭焉【所以安神】

右事畢

諸侯釁廟 吉禮十一

補經【亦出大戴禮】

成廟釁之以羊【廟新成而釁者尊而神之祭器名者成則釁之以豕也】君玄服立于寢門內南向祝宗人宰夫雍人皆玄服【以神事故亦同爵弁小戴君朝服者謂不與也】宗人曰請令以釁某廟君曰諾遂入雍人拭羊【拭挽】乃行入廟門碑南北面東上【居上者宰夫也宰夫攝主也】雍人舉羊升屋自中中屋南面剗羊血流于前乃降門以雞有司當門北面【有司宰夫祝宗人也】雍人割雞屋下當門夾室割雞于室中有司亦北面也【夾室門夾之室一曰東西廂也釁東西室有司猶北面統於廟也案小戴割雞亦於屋上記者不同耳】既事宗人告事畢皆退反命于君君寢門中南向宗人曰釁某廟事畢君曰諾宗人請就宴君揖之乃退

記成廟則釁之其禮祝宗人宰夫雍人皆爵弁純衣【廟新成必釁之尊而神之也宗人先請於君曰請令以釁某廟君諾之乃行】雍人拭羊宗人祝宰夫北面于碑南東上【居上者宰夫也宰夫攝主也拭靜也】雍人舉羊升屋自中中屋南面剗羊血流于前乃降門夾室皆用雞先門而後夾室其岬皆於屋下割雞門當門夾室中室【自由也岬謂將剗割牲以釁先滅耳旁毛薦之耳聽聲者告神欲其聽之周禮有剗岬】有司皆鄉室而立門則有司當門北面【有司宰夫祝宗人】既事宗人告事畢乃皆退【告者告宰夫】反命于君曰釁某廟事畢反命于寢君南鄉于門內朝服既反命乃退【君朝服者不至廟也】路寢成則考之而不釁釁屋者交神明之道也【言路寢者生人所居不釁者不神之也考之者設盛食以落之爾檀弓曰晉獻文子成室諸大夫發焉是也】凡宗廟之器其名者成則釁之以豕豚【宗廟名器謂尊彝之屬 雜記】

禮書綱目卷四十三

卷四十四

<經部,禮類,通禮之屬,禮書綱目

欽定四庫全書

禮書綱目卷四十四 婺源江永撰

祭通禮

補

大宗伯之職掌建邦之天神人鬼地示之禮以佐王建保邦國以吉禮事邦國之鬼神示【詳見祭法】凡祀大神享大鬼祭大示詔大號治其大禮詔相王之大禮【大號六號之大者以詔大祝以為祝辭治猶簡習也豫簡習大禮至祭當以詔相王羣臣禮為小禮】乃頒祀于邦國都家鄉邑【頒讀為班班其所當祀及其禮都家之鄉邑謂王子弟及公卿大夫所食采地】小宗伯掌四時祭祀之序事與其禮【序事卜日省牲視滌濯饗饔之事次序之時】凡祭祀詔相祭祀之小禮凡大禮佐大宗伯【小禮羣臣之禮】小祭祀掌事如大宗伯之禮肆師之職掌立國祀之禮以佐大宗伯【詳見祭物總要】以祭時序其祭祀及其祈珥【序第次其先後大小詳見因祭釁章】

大祝建邦國禁督逆祝命者【督正也正王之所命諸侯之所祀有逆者則刑罰焉】

小祝掌小祭祀凡事佐大祝【唯大祝所有事】凡外內小祭祀掌事焉【並春官】女祝掌王后之內祭祀凡內禱祠之事【內祭祀六宮之中竈門戶禱疾病求瘳也祠報福也】小宰以官府之六職辨邦治三曰禮職以事鬼神以官府之六聯合邦治一曰祭祀之聯事【鄭司農云大祭祀大宰贊玉幣司徒奉牛牲宗伯視滌濯涖玉鬯省牲鑊奉玉盥司馬羞魚牲奉馬牲司寇奉明水火玄謂奉牲者其司空奉豕與

並天官】司隸邦有祭祀之事則役其煩辱之事【煩猶劇也秋官】

大宰以八則治都鄙一曰祭祀以馭其神【都鄙公卿大夫之采邑王子弟所食也祭祀其先君社稷五祀天官】都宗人掌都祭祀之禮【都或有山川及因國無主九皇六十四氏之祀王子弟則立其祖王之廟其祭祀王皆賜禽鳥主其禮者警戒之糾其戒具其來致福則帥而以造祭僕】家宗人掌家祭祀之禮【大夫采地之所祀與都同若先王之子孫亦有祖廟並春官】大司徒施十有二教一曰以祀禮教敬則民不苟

小司徒掌建邦之教法與其祭祀之禁令土均和邦國都鄙之政令與其禮俗祭祀以地嫩惡為輕重之法而行之掌其禁令【並地官】孟春乃修祭典【重祭禮歲始省錄也月令】喪祭從先祖【志所言本謂先王之世舊俗所傳禮文小異而可以通行者耳不謂後世失禮之甚者也孟子】

君子行禮不求變俗祭祀之禮皆如其國之故謹修其法而審行之【曲禮】

右總要

小宗伯之職掌建國之神位右社稷左宗廟【詳見地示及宗廟】兆五帝於四郊四望四類亦如之【詳見天神地示】兆山川丘陵墳衍各因其方【詳見地示】辨廟祧之昭穆【詳見宗廟】肆師掌兆中廟中之禁令【兆壇瑩域】典祀掌外祀之兆守皆有域掌其禁令【外祀謂所祀於四郊者域兆表之瑩域】若以時祭祀則帥其屬而修除徵役于司隸而役之【屬其屬胥徒也脩除芟掃之徵召也役之作使之】及祭帥其屬而守其厲禁而蹕之【鄭司農云遮列禁人不得令入】凡以神仕者掌三辰之法以猶鬼神示之居辨其名物【猶圖也居謂坐也天者羣神之精日月星辰其著位也以此圖天神人鬼地示之坐者謂布祭衆寡與其居句孝經說郊祀之禮曰燔燎埽地祭牲繭栗或象天酒旗坐星厨倉具黍稷布席極敬心也言郊之布席象五帝坐禮祭宗廟序昭穆亦又有似虛危則祭天圜丘象北極祭地方澤象后妃及社稷之席皆有明法焉國語曰古者民之精爽不攜貳者而又能齊肅中正其知能上下比義其聖能光遠宣朗其明能光照之其聰能聽徹之如是則神明降之在男曰覲在女曰巫是以使制神之處位次主而為之牲器時服巫既知神如此又能居以天法是以聖人用之今之巫祝既闇其義何明之見何法之行正神不降或於淫厲苟貪貨食遂誣人神令此道滅痛矣】小祝有寇戎之事則保郊祀于社【故書祀或作禩鄭司農云謂保守郊祭諸祀及社無令寇侵犯之杜子春讀禩為祀書亦或為祀玄謂保祝互文郊社皆守而祀之弭戡兵】都宗人若有寇戎之事則保羣神之壇【守山川丘陵墳衍之壇域並春官】過祀則下【居者主於敬檀弓】

右神位

男男尸女女尸必使異姓不使賤者【異姓婦也賤者謂庶孫之妾也尸配尊者必使適也士虞禮】

禮曰君子抱孫不抱子此言孫可以為王父尸子不可以為父尸【以孫與祖昭穆同曲禮】孫為王父尸所使為尸者於祭者子行也父北面而事之【子行猶子列也祭祖則用孫列皆取于同姓之適孫也天子諸侯之祭朝事延尸於戶外是以有北面事尸之禮詳見祭統】曾子問曰祭必有尸乎【言無益無用為】若厭祭亦可乎【厭時無尸】孔子曰祭成喪者必有尸尸必以孫孫幼則使人抱之無孫則取於同姓可也【人以有子孫為成人子不殤父義由此也】祭殤必厭蓋弗成也【厭飫而已不成其為人】祭成喪而無尸是殤之也【與不成人同曾子問】無祿者稷饋【庶人無常牲故以稷為主】稷饋者無尸無尸者厭也【大戴】為人子者祭祀不為尸【尊者之處為其失子道然則尸卜筮無父者曲禮】為君尸者大夫士見之則下之君知所以為尸者則

自下之【尊尸也下下車也國君或時幼少不能盡識羣臣有以告者乃下之】尸必式【禮之】乘必以几【尊者慎也同上】孔子曰尸弁冕而出【為君尸或弁者先祖或有為大夫士者故服士大夫之服也】卿大夫士皆下之【見而下車】尸必式【小俛禮之】必有前驅【為辟道曾子問】酌尸之僕如君之僕【當其為尸則尊】其在車則左執轡右受爵祭左右軌范乃飲【周禮大御祭兩軹祭軌乃飲軌與軹於車同謂轆頭也范與範聲同謂軹前

也少儀】服之襲也充美也是故尸襲【尸尊玉藻】君迎牲而不迎尸【詳見祭義】當其為尸則弗臣也【尸主也為祭主也學記】曾子問曰卿大夫將為尸於公受宿矣而有齊衰之內喪則如之何孔子曰出舍於公宮以待事禮也【尸重受宿則不得哭內喪同宮也雜記曾子問作出舍於公館注云吉凶不可同處】

右尸維十有三祀帝乃稱王而入唐郊丹朱為尸【詳見天神】
晉平公祀郊董伯為尸【詳見因祭疾病章】周公祀泰山召公為尸
齊嘗于太公之廟麻嬰為尸【襄二十八年左氏傳】

司巫掌羣巫之政令大祝掌六祝之辭以事鬼神示【詳見祝號】掌六祈以同鬼神示【詳因祭祈禳章】作六辭以通上下親疏遠近【詳祝號】辨六號【詳祝器】辨九祭【詳見事尸章】辨九以享右祭祀【詳曲禮】凡大禋祀肆享祭示則執明水火而號祝【明水火司烜所共日月之氣以給烝享執之如以六號祝明此主絜也禮記祭天神也肆享祭宗廟也故書祇為祊杜子春云祊當為祇】隋釁逆牲逆尸令鍾鼓右亦如之【隋釁謂薦血也凡血祭曰釁既隋釁後言逆牲容逆鼎右讀亦當為侑】來瞽令臯舞【臯讀為卒嗶呼之嗶來嗶者亦皆呼之入】相尸禮【延其出入詔其坐作】既祭令徹小祝掌小祭祀將事侯禋禱祠之祝號【詳見因祭祈禳章】大祭祀逆盥盛送逆尸沃尸盥贊隋贊徹贊奠【隋尸之祭也奠奠爵也祭祀奠先徹後反言之者明所佐大祝非一】凡事佐大祝【惟大祝所有事並春官】女祝掌王后之內祭祀凡內禱祠之事【詳總要章】天子出戶而巫覡有事出門而宗祝有事【出戶謂出門內也女曰巫男曰覡有事祓除不祥出門謂車駕出國門宗者主祭祀之官有事謂祭行神也荀子】
宗祝辨乎宗廟之禮故後尸【辨猶別也後尸居後贊禮儀樂記】

右巫祝楚昭王問於觀射父曰【昭王楚平王之子昭王熊軫也觀射父楚大夫也】周書所謂重黎實使天地不通者何也【周書謂周穆王之相甫侯所作呂刑也重黎顓頊掌天地之臣也呂刑曰乃命重黎絕地天通謂少皞之末民神雜揉不可方物顓頊受之乃命南正重司天以屬神火正黎司地以屬民謂絕地與天相通之道也】若無然民將能登天乎【若重黎不絕天地民豈能上天乎】對曰非此之謂也古者民神不雜【雜會也謂司民司神之官各異】民之精爽不攜貳者而又能齊肅衷正【爽明也攜離也貳二也齊一也肅敬也衷中也】其智能上下比義【義宜也】其聖能光遠宣朗【聖通也朗明也】其明能光照之其聰能聽徹之【徹達也】如是則明神降之【降下也】在男曰覡在女曰巫【巫覡見鬼者周禮男亦曰巫】是以使制神之處位次主【處居也位祭位也次主次其尊卑先後也】而為之牲器時服【牲牲之毛色小大也器所當用也時服四時服色所宜也】而後使先聖之後之有光烈【烈明也】而能知山川之號【號名位也】高祖之主【高祖廟之先也】宗廟之事昭穆之世【父昭子穆先後之次也春秋躋僖公謂之逆祀】齊敬之勤【齊莊也】禮節之宜威儀之則容貌之崇【崇節也】忠信之質【質誠也】禋潔之服【潔祀曰禋】而敬恭明神者以為之祝【祝太祝也掌祈福祥】使名姓之後能知四時之生【名姓謂舊俗若伯夷炎帝之後為堯秩宗生嘉穀韭卵之屬】犧牲之物玉帛之類采服之儀彝器之量【彝六彝器俎豆量大小也】次主之度【疏數之度】屏攝之位【周氏云屏者并攝主人之

位昭謂屏屏風也攝形如今要扇皆所以分別尊卑為祭祀之位近漢亦然】壇場之所【除地曰場】上下之神氏姓之出【所自出也】而心率舊典者為之宗【宗宗伯也掌祭祀之禮】於是乎有天地神民類物之官謂之五官【類物謂別善惡利器用之官】各司其序不相亂也民是以能有忠信神是以能有明德【明德謂降福祥不為災孽也】民神異業【業事也】敬而不瀆故神降之嘉生【嘉生善物也】民以物享禍災不至求用不匱及少皞之衰也九黎亂德【少皞黃帝之子金天氏也九黎黎氏九人也】民神雜揉不可方物【同位故雜揉方猶別也物名也】夫人作享家為巫史【夫人人人也享祀也巫主接神史次位序言人人自為之】無有要質【質誠也】民匱乎祀而不知其福【言民因匱於祭祀而不獲其福】烝享無度民神同位民瀆齊盟無有嚴威【齊同也嚴敬也威畏也】神伸民則不蠲其為【伸習也則法也蠲絜也其為所為也】嘉生不降無物以享禍災荐臻莫盡其氣【荐重也臻至也氣壽命之氣】顓頊受之【少皞氏沒顓頊氏作受承也】乃命南正重司天以屬神【南陽位正長也司主也屬會也所以會羣神使各有分序不相干亂周禮則宗伯掌祭祀】命火正黎司地以屬民【唐尚書云火當為北北陰位也周禮則司徒掌土地人民也】使復舊掌無相侵瀆【侵犯也】是謂絕地天通【絕地民與天神相通之道】其後三苗復九黎之德【其後高辛氏之季年也三苗九黎之後也高辛氏衰三苗為亂行其凶德如九黎之為也堯興而誅之】堯復育重黎之後不忘舊者使復典之【育長也堯繼高辛氏平三苗之亂紹育重黎之後使復典天地之官羲和氏是也】以至於夏商故重黎氏世叙天地而別其分主者也【叙次也分位也】其在周程伯休父其後也當宣王時失其官守而為司馬氏【程國也伯爵也休父名也失官守謂失天地之官而以諸侯為大司馬詩曰王謂尹氏命程伯休父是也】寵神其祖以取威于民曰重實上天黎實下地【寵尊也言休父之後世尊神其祖以威耀其民言重能舉上天黎能抑下地令相遠故不復通也】遭世之亂而莫之能禦也【亂謂幽平以下也禦止也】不然夫天地成而不變【言天地體成不復改變也】何比之有【言不相比近也國語楚語】劉文公合諸侯于召陵【文公王官伯也】將會衛靈公使祝佗從【祝佗大祝子魚】辭曰臣展四體以率舊職猶懼不給而煩刑書若又共二【共二職】徼大罪也且夫祝社稷之常隸也【隸賤名也】社稷不動祝不出竟官之制也【社稷動謂國遷】君以軍行祓社釁鼓【師出先有事祓禱於社謂之宜社於是殺牲以血塗鼓釁為釁鼓】祝奉以從【奉社主也】於是乎出竟若嘉好之事【謂朝會】君行師從【二千五百人】卿行旅從【五百人】臣無事焉【定四年左氏傳】

凡祀啟蟄而郊【言凡祀通下三句天地宗廟之事也啟蟄夏建寅之月祀天南郊】龍見而雩【龍見建巳之月蒼龍宿之體昏建東方萬物始盛待雨而大故祭天遠為百穀祈膏雨】始殺而嘗【建酉之月陰氣始殺嘉穀始熟故薦嘗於宗廟】閉蟄而烝【建亥之月昆蟲閉戶萬物皆成可薦者衆故烝祭宗廟釋例論之備矣】過則書【卜日有吉否過次節則書以譏慢也桓五年左氏傳】昔三代明王皆事天地之神明無非卜筮之用不敢以其私褻事上帝【言動任卜筮也神明謂羣神也】是故不犯日月不違卜筮【日月謂冬至夏至正月及四時也所不違者日與牲尸也】卜筮不相襲也【襲因也大事則卜小事則筮】大事有時日【大事有事於大神有常時常日也】小事無時日有筮【有事於小神無常時常日有筮臨有事筮之】外事用剛日內事用柔日【順陰陽也陽為外陰為內事之外內別乎四郊表記】凡卜筮日旬之外曰遠某日旬之內曰近某日【旬卜日也】喪事先遠日吉事先近

日【孝子之心喪事葬與練祥也吉事祭祀冠娶之屬也】日為日假爾泰龜有常假爾泰筮有常【命龜筮辭龜筮於吉凶有常大事卜小事筮】卜筮不過三【求吉不過三魯四卜郊春秋譏之】卜筮不相襲【卜不吉則又筮筮不吉則又卜是瀆龜筮也晉獻公卜取驪姬不吉公曰筮之是也 曲禮】

筮人凡國之大事先筮而後卜【當用卜者先筮之即事有漸也於筮之凶即止不卜 春官】太宰祀五帝前期十日帥執事而卜日【前期前所諏之日也十日容散齋七日致齋三日執事宗伯大史之屬】祀大神示亦如之享先王亦如之【大神示謂天地 天官】

大宗伯凡祀大神享大鬼祭大示帥執事而卜日【執事諸有事於祭者】

大史大祭祀與執事卜日【執事大卜之屬與之者當視墨】

肆筮凡祭祀之卜日宿為期詔相其禮【宿先卜祭之日】

龜人若有祭祀則奉龜以往旅亦如之【奉猶送也送之於所當卜】大卜大祭祀則眡高命龜【命龜告龜以所卜之事不親作龜者大祭祀輕於大貞也士喪禮曰宗人即席西面坐命龜並春官】

右時日卜筮

不違龜筮子曰牲牷禮樂齊盛是以無害乎鬼神無怨乎百姓【牷猶純也表記】

天子將祭必先習射於澤澤者所以擇士也已射於澤而后射於射宮射中者得與於祭不中者不得與於祭【澤宮名也士謂諸侯朝者及所貢士也皆先令習射於澤已乃射於射宮課中否也】古者天子之制諸侯歲獻貢士於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭【歲歲獻國事之事及計偕物也三歲而貢士舊說云大國三人次國二人小國一人 並射義】

右擇士

大宰祀五帝則掌百官之誓戒與其具脩【祀五帝謂四郊及明堂誓戒要之以刑重失禮也明堂位所謂各揚其職百官廢職服大刑是其辭之略也具所當共脩埽除糞洒】祀大神示亦如之享先王亦如之

小宰以法掌祭祀之戒具【法謂其禮法也戒具戒官有事者所當共】

宰夫以式法掌祭祀之戒具與其薦羞【薦脯醢也羞庶羞內羞 並天官】射人諸侯在朝若有國事則掌其戒令詔相其事【謂王有祭祀之事諸侯當助其薦獻者也戒令告以齊與期】掌其治達【謂諸侯因與王射及助祭而有所治受而達之於王王有命又受而下之】司士凡祭祀掌士之戒令詔相其法事【並夏官】大史大祭祀戒及宿之日與羣執事讀禮書而協事【協合也合謂習錄所當共之事也故書協作叶杜子春云叶協也書亦或為協或為汙 春官】遂師凡國祭祀審其誓戒【審亦聽也地官】條狼氏凡誓執鞭以趨于前且命之誓大夫曰敢不關鞭五百誓師曰三百誓邦之大史曰殺誓小史曰墨【前謂所誓衆之行前也有司讀誓辭則大言其刑以警所誓也誓者謂出軍及將祭祀時也郊特牲說祭祀之誓曰卜之日王立于澤親聽誓命受教諫之義也師樂師也大夫小史主禮之事者鄭司農云誓大夫曰敢不關謂不關於君也玄謂大夫自受命以出則其餘事莫不復請 秋官】

右戒具

王即齊宮百官御事各即其齊三日王乃淳濯饗禮及期鬱人薦鬯犧人薦醴王裸鬯饗醴乃行【詳見朝廷禮】膳夫王齊日三舉【鄭司農云齊必變食】

王府王齊則共食玉【玉是陽精之純者食之以禦水氣鄭司農云王齊當食玉屑並天官】鬯人凡王之齊事共其秬鬯【給淬浴春官】大宰祀五帝前期十日帥執事而卜日遂戒【既卜又戒百官以始齊】祀大神亦如之享先王亦如之【天官】齊必有明衣布【齊必沐浴浴竟即著明衣所以明潔其體也以布為之】必有寢衣長一身有半【齊主於敬不可解衣而寢又不可著明衣而寢故別有寢衣其半蓋以覆足】齊必變食居必遷坐【變食謂不飲酒不茹葷遷坐易常處也此一節記孔子謹齊之事楊氏曰齊所以交神故致潔變以盡敬論語鄉黨】

玄冠丹組纓諸侯之齊冠也玄冠綦組纓士之齊冠也【言齊時所服比四命以上齊祭異冠玉藻】周弁殷冏夏收【齊所服而祭也郊特牲】

齊則綰結佩而爵韞【綰屈也結又屈之思神靈不在事也玉藻】司服士之服其齊服有玄端素端【士齊有素端者亦為札荒有所請禱變素服言素端者明異制春官】君羔辟虎犢【辟覆芩也犢讀皆如直道而行之直犢謂緣也此君齊車之飾】大夫鹿辟豹犢朝車士之齊車鹿辟豹犢【臣之朝車與齊車同飾玉藻】齊者不樂不弔【為哀樂則失正散其思也曲禮】君子非致齊也非疾也不晝夜居於內【內正寢之中檀弓】

八十齊喪之事弗及也【八十不齊則不祭也子代之祭是謂宗子不孤王制】

右齊戒齊之為言齊也齊不齊以致齊者也是故君子非有大事也非有恭敬也則不齊不齊則於物無防也嗜欲無止也及其將齊也防其邪物訖其嗜欲耳不聽樂心不苟慮必依於道手足不苟動必依於禮專致其精明之德也故散齊七日以定之致齊三日以齊之【詳見祭義】

七日戒三日宿慎之至也【戒散齊也宿致齊也將有祭祀之事必先敬慎如此不敢切也禮器】雖有惡人齊戒沐浴則可以祀上帝【惡人醜貌者也孟子】不飲酒不茹葷此祭祀之齊也【莊子】端衣玄裳

紕而乘路志不在於食葷【端衣玄裳即士玄端也紕與冕同鄭云端者衣之正也士之衣袂皆二尺二寸而屬幅是廣袤等也其袪尺二寸大夫已上侈之侈之者蓋半而益一焉則袂三尺三寸袪尺八寸路人君之車亦車之通名舍人注爾雅云路車之大者葷葱韭之屬也荀子】齊之玄也以陰幽思也故君子三日齊必見其所祭者【齊三日者思其居處思其笑語思其志意思其所樂則見之也

郊特牲】大古冠布齊則緇之【齊則緇之者鬼神尚幽闇也唐虞以上曰大古也】

【同上】子之所慎齊【論語】季桓子將祭齊三日而二日鐘鼓之音不絕冉有問於孔子曰孝子之祭也散齊七日慎思其事三日致齊而一用之【積一而用之也】猶恐其不敬也而二日伐鼓何居焉【家語郊特牲云孔子曰三日齊一日用之猶恐不敬二日伐鼓何居焉鄭注居讀為姬語之助也何居怪之也伐猶擊也齊者止樂而二日擊鼓則是成一日齊也】

鄉士大祭祀則各掌其鄉之禁令帥其屬夾道而蹕【屬中士以下】
野廬氏凡國之大事比脩除道路者【比較治道者名若今次金叙大功】 蜡氏凡國之大祭祀令州里除不蠲禁刑者任人及凶服者以及郊野【蠲讀如吉圭惟饕之圭潔也刑者黥劓之屬任人司圜所收教罷民也凶服衰經也此所禁除者皆為不欲見人所蔑惡也】
銜枚氏國之大祭祀令禁無囂【令令主祭祀者 並秋官】
射鳥氏祭祀以弓矢毆鳥鳶【鳥鳶善鈔盜便汙人 夏官】

右禁令

夏后氏大事用昏【昏時以黑此大事謂喪事也】 殷人大事用日中【日中時亦白】 周人大事用日出【日出時亦赤 黃氏曰鄭注祭義殷人祭其闇云夏后氏大事以昏殷人大事以日中周人大事以日出亦謂此郊祭也彼疏亦云檀弓大事非止是喪亦兼諸祭與此不同當以祭義為正檀弓】 雞人大祭祀夜嘑旦以 百官【夜夜漏未盡雞鳴時也呼旦以警起百官使夙興】 凡國事為期則告之時【象雞知時也告其有司主事者少牢曰宗人朝服北面曰請祭期主人曰比於子宗人曰旦明行事告時者至此旦明而告之】 巾車大祭祀鳴鈴以應雞人【雞人主呼旦鳴鈴以和之聲且警衆必使鳴鈴者車有和鸞相應和之象故書鈴或作軫杜子春云當為鈴】 小宗伯祭之日告時于王告備于王【時薦陳之早晚備謂饌具 並春官】

右為期 子路為季氏宰【宰治邑吏也】 季氏祭逮闇而祭日不足繼之以燭【謂舊時也】 雖有強立之容肅敬之心皆倦怠矣【以其久也】 有司跛倚以臨祭其為不敬大矣【偏任為跛依物為倚】 他日祭子路與室事交乎戶堂事交乎階質明而始行事晏朝而退【室事祭時堂事饋尸】 孔子聞之曰誰謂由也而不知禮乎【多其知禮禮器】

大宗伯凡祀大神享大鬼祭大示宿眡滌濯涖玉鬯省牲鑊【宿申戒也滌濯溉祭器也玉禮神之玉也始涖之祭又奉之鑊烹牲器也】

小宗伯大祭祀省牲眡滌濯祭之日逆盥省鑊【逆盥受饕人之盛以入省鑊視烹腥熟 並春官】 大宰及執事眡滌濯【執事初為祭事祭前日之夕滌濯謂溉祭器及甑□之屬】 宰夫從大宰而眡滌濯【並天官】 肆師眡滌濯詔相其禮祭之日表粢盛告潔展器陳告備【粢六穀也在器曰盛陳陳列也故書表為剽剽表皆謂徽識也 春官】

右省眡

巾車王之五路一曰王路錫樊纓十有再就建大常十有二旂以祀【王在焉曰路玉路以玉飾諸末錫馬面當盧刻金為之所謂鏤錫也樊讀如鞶帶之鞶謂今馬大帶也鄭司農云纓謂當胸士喪禮下篇曰馬纓三就禮家說曰纓當胸以削革為之三就三重三匝也玄謂纓今馬鞅玉路之樊及纓皆以五采屬飾之十二就就成也大常九旗之畫日月者正幅為繡旒則屬焉】 典路若有大祭祀則出路贊駕說【出路王當乘之贊駕說贊僕與趣馬也 並春官】 校人凡大祭祀毛馬而頒之【毛馬齊其色也頒授當乘之 夏官】 司常日月為常交龍為旂

通帛為旛雜帛為物【通帛謂大赤從周正色無飾雜帛者以帛素飾其側白殷之正色凡旗之帛皆用絳】王建大常諸侯建旂孤卿建旛大夫士建物【自王以下治民者旂畫成物之象王畫日月象天明也諸侯畫交龍一象其升朝一象其下復也孤卿不畫言奉王之政教而已大夫士雜帛言以先王正道佐職也】凡祭祀各建其旗【王祭祀之車則玉路 春官】節服氏掌祭祀袞冕六人維王之大常【服袞冕者從王服也維維之以纁王旌十二旒兩兩以纁綴連旁三人持之禮天子旌曳地鄭司農云維持之】諸侯則四人其服亦如之【夏官】大馭掌馭玉路以祀及犯軼王自左馭馭下祝登受轡犯軼逐驅之【行山曰軼犯之者封土為山象以菩芻棘柏為神主既祭之以車轢之而去喻無險難也春秋傳曰跋涉山川自由也王由左馭禁止馬使不行也故書軼作罰杜子春云罰當為軼軼讀為別異之別謂祖道轢軼磔犬也詩云載謀載惟取蕭祭脂取羝以軼詩家說曰將出左道犯軼之祭也聘禮云乃舍軼飲酒于其側禮家說亦謂道祭】及祭酌僕僕左執轡右祭兩軼祭軌乃飲【故書軼為駟軌為範杜子春云文當如此左不當重重非是書亦或如杜子春言又云斬當作軼軼謂兩轡也其或言軼亦非是又云軌當作軌謂車前軼也或讀 為簪笄之笄 同上】旅賁氏凡祭祀則服而趨【服而趨夾王車趨也王齊服服袞冕則此士之齊服服玄端】齊右掌祭祀前齊車王乘則持馬行則陪乘【齊車金路王自】

【整齊之車也前之者已駕王未乘之時陪乘參乘謂車右也齊右則齊僕同車而有祭祀之事則兼玉路之右然則戎右兼田右與】凡有牲事則前馬【王見牲則拱而式居馬前却行備驚奔也曲禮曰國君下宗廟式齊牛 並夏官】師氏凡祭祀王舉則從【舉猶行也故書舉為與杜子春云當為與謂王與祭祀之事】保氏凡祭祀王舉則從【並地官】

右出路

大僕祭祀正王之服位詔法儀【詔告也】王出入則自左馭而前驅【前驅如今道引也道而居左自馭不參乘辟王也亦有車右焉】小臣大祭祀沃王盥小祭祀掌事如大僕之法 御僕大祭祀相盥而登【相盥者謂奉槃授巾與登謂王為登牲體於俎特牲饋食禮主人降盥出舉入乃匕載 並夏官】大祝辨九 一曰稽首二曰頓首三曰空首四曰振動五曰吉 六曰凶 七曰奇 八曰褒 九曰肅 以享右祭祀【注詳曲禮春官】凡祭於室中堂上無跣【祭不跣者主敬也天子諸侯祭有坐尸於堂之禮祭所尊在室少儀】大史大祭祀祭之日執書以次位常【謂校呼之敬其所當居之處】辨事者攷焉不信者誅之【謂抵冒其職事】大宗伯凡祀大神享大鬼祭大示涖玉鬯奉玉盥治其大禮詔相王之大禮【玉禮神之玉也始涖之祭又奉之治猶簡習也豫簡習大禮至祭當以詔相王羣臣禮為小禮 並春官】大宰祀五帝及納亨贊玉牲事及祀之日贊玉幣爵之事【納亨納牲將告殺謂禱祭之晨既殺以授亨人凡大祭祀君親牽牲大夫贊之日旦明也玉幣所以禮神玉與幣各如其方之色爵所以獻齊酒不用玉爵尚質也三者執以從王至而授之】祀大神示亦如之享先王亦如之贊玉几玉爵【玉几所以依神天子左右玉几宗廟獻用玉爵】小宰凡祭祀贊玉幣爵之事【又從大宰助王也 並天官】射人祭祀相孤卿大夫之法儀

司士凡祭祀掌士之戒令詔相其法事【並夏官】肆師祭之日相治小禮誅其慢怠者大祝凡大禋

祀肆享祭示隋鬯逆牲逆尸令鐘鼓右亦如之【隋鬯謂薦血也凡血祭曰鬯既隋鬯後言逆牲容逆鼎右當讀為侑】來瞽令皋舞【皋讀為卒嗥呼之嗥來嗥者皆謂呼之入並春官】封人歌舞牲反毛炮之豚【謂君牽牲入時隨歌舞之言其肥香以歆神也毛炮豚者爛去其毛而炮之以備八珍鄭司農云封人主歌舞其牲云博碩肥腍】充人展牲則告牲【展牲若今夕牲也特牲饋食之禮曰宗人視牲則告充舉獸尾告備近之】碩牲則贊【贊助也君牽牲入將致之助持之也春秋傳曰故奉牲以告曰博碩肥腍並地官】射人祭祀則贊射牲【烝嘗之禮有射豕者國語曰禘郊之事天子必自射其牲今立秋有獮劉云】大僕贊王牲事【牲事殺割已載之屬】司士帥其屬而割牲羞俎豆【割牲制體也羞進也並夏官】鄉師大祭祀羞牛牲大司徒祀五帝奉牛牲羞其肆【牛能任載地類也奉猶進也鄭司農云羞進也肆陳骨體也玄謂進所肆解骨體土喪禮曰肆解去蹄】享先王亦如之小司徒凡小祭祀奉牛牲羞其肆【小祭祀王玄冕所祭並地官】羊人祭祀割羊牲登其首【登升也升首報陽也升首于室】小子掌祭祀羞羊肆羊殽肉豆【鄭司農云羞進也羊肆體薦全烝也羊體體解節折也肉豆者切肉也玄謂肆讀為鬻羊鬻者所謂脉解也並夏官】大司寇大祭祀奉犬牲【奉猶進也】小司寇小祭祀奉犬牲【並秋官】諸子大祭祀正六牲之體【正謂載之】大司馬大祭祀羞牲魚授其祭【牲魚魚牲也祭謂司所以祭也鄭司農云大司馬主進魚牲】小司馬小祭祀掌其事如大司馬之法小子祭祀贊羞量人凡祭祀制其從獻脯醢之數量【鄭司農云從獻者肉殽從酒也玄謂燔從於獻酒之肉炙也數多少也量長短也並夏官】小宗伯祭之日逆盥省鑊【逆盥受饔人之盛以入省鑊視烹腥熟】小祝大祭祀逆盥盛贊奠【本文贊奠在贊徹之下注云奠奠爵也祭祀奠先徹後反言之者明所佐大祝非一並春官】

右臨祭

保氏教國子六儀一曰祭祀之容【少儀云祭祀之容濟濟皇皇地官】祭祀之美齊齊皇皇【美當為儀字之誤也少儀】祭祀之志諭然思以和祭祀之容遂遂然粥粥然敬以婉祭祀之視視如有將祭祀之言文言有序【賈誼容經】凡祭容貌顏色如見所祭者【如覩其人在此玉藻】臨祭不惰【為無神也】祭事不言凶【並曲禮】堂上觀乎室堂下觀乎上【謂祭時肅敬之威儀也坊記】右容貌祭如在祭神如神在【程子曰祭祭先祖也祭神祭外神也祭先主於孝祭神主於敬愚謂此門人記孔子祭祀之誠意論語】仲尼嘗奉薦而進其親也慤其行也趨趨以數【詳見祭義】季氏祭有司跛倚以臨祭【詳見期章】

大祝相尸禮【延其出入詔其坐作】

小祝大祭祀逆尸沃尸盥贊隋【隋尸之祭也並春官】舉鬯角詔妥尸【妥安坐也尸始入

舉奠奠罍若奠角將祭之祝則詔主人拜安尸使之坐尸即至尊之坐或時不自安則以拜安之也天子奠罍諸侯奠角
郊特性】其有折俎者取祭反之不坐燔亦如之【亦為柄尺之類也燔炙也】

【鄉射曰賓奠爵于薦西興取肺坐絕祭左手齊之興加于俎坐悅手】尸則坐【尸尊也少牢饋食禮曰尸左執爵右兼取肺肺擣于俎鹽振祭齊之加于俎豆 少儀】大祝辨九祭一曰命祭二曰衍祭三曰炮祭四曰周祭五曰振祭六曰擣祭七曰絕祭八曰繚祭九曰共祭【杜子春云命祭祭有所主命也振祭振讀為慎禮家讀振為振旅之振擣祭擣讀為虞芮之芮鄭司農云衍祭羨之道中如今祭殤無所主命周祭四面為坐也炮祭燔柴也爾雅曰祭天曰燔柴擣祭以肝肺菹擣鹽醢中以祭也繚祭以手從肺本循之至於末乃絕以祭也絕祭不循其本直絕肺以祭也重肺賤肝故初祭絕肝以祭謂之絕祭至祭之末禮殺之後但擣肝鹽中振之擬之若祭狀弗祭謂之振祭特性饋食禮曰取菹擣于醢祭于豆間鄉射禮曰取肺坐絕祭鄉飲酒禮曰右取肺左卻手執本坐弗繚右絕末以祭少牢曰取肝擣于鹽振祭玄謂九祭皆謂祭食者命祭者玉藻曰君若賜之食而君客之則命之祭然後祭是也衍字當為延炮字當為包聲之誤也延祭者曲禮曰客若降等執食興辭於客然後客坐主人延祭是也包猶兼也兼祭者有司曰宰夫贊者取白黑以授尸尸受兼祭于豆祭是也周猶徧也徧祭者曲禮曰殽之序徧祭之是也振祭擣祭本同不食者擣則祭之將食者既擣必振乃祭也絕祭繚祭亦本同禮多者繚之禮略者絕則祭之共猶授也王祭食宰夫授祭孝經說曰共綏執授春官】君與尸行接武【尊者尚徐蹈半跡】大夫繼武【迹間容迹】徐趨皆用

是【君大夫士之徐行也皆如尸行之節也 玉藻】

右事尸 古者尸無事則立有事而后坐也【古謂夏時也 郊特性】三代之禮一也民共由之周坐尸詔侑武方其禮亦然其道一也【言此亦周所因於殷也武當為無聲之誤也方猶常也告尸行節勸尸飲食無常若孝子之為也孝子就養無方詔侑或為韶囿】夏立尸而卒祭【夏禮尸有事乃坐】殷坐尸【無事猶坐】周旅酬六尸【使之相酌也后稷之尸 爵不受旅】曾子曰周禮其猶醕與【合錢飲酒為醕旅酬相酌似之也王后明堂之禮仲秋乃命國醕 禮器】有虞氏祭首夏后氏祭心殷祭肝周祭肺【氣主盛也明堂位】

郊血大饗腥三獻燂一獻孰【血腥燂祭用氣 郊特性】一獻質【謂祭羣小祀也】三獻文【謂祭社稷五祀】五獻察【察明也謂祭四望山川也】七獻神【謂祭先公禮器】尸飲五君洗玉爵獻卿尸飲七以瑤爵獻大夫

尸飲九以散爵獻士及羣有司皆以齒【尸飲五謂醕尸五獻也大夫士祭三獻而獻賓祭統】

右獻數

大祝掌六祝之辭以事鬼神示祈福祥求永貞一曰順祝二曰年祝三曰吉祝四曰化祝五曰

瑞祝六曰筴祝【永長也貞正也求多福歷年得正命也鄭司農云順祝順豐年也年祝求永貞也吉祝祈福祥也化祝彌災兵也瑞祝道時雨寧風旱也筴祝遠罪疾】辨六號一曰神號二曰鬼號三曰示號四曰牲號五曰齎號六曰幣號【號謂尊其名更為美稱焉神號若云皇天上帝鬼號若云皇祖伯某祇號若云后土地祇幣號若玉云嘉玉幣云量幣鄭司農云牲號為犧牲皆有名號曲禮曰牛曰一元大武豕曰剛鬣羊曰柔毛雞曰翰音粢號謂黍稷皆有名號也曲禮曰黍曰薌合粱曰香其稻曰嘉蔬少牢饋食禮曰敢用柔毛剛鬣土虞禮曰敢用絜牲剛鬣香合】凡大禋祀肆享祭示則執明水火而號祝【明水火司烜所共日月之氣以給烝亨執之如以六號祝明此圭潔也禮祀祭天神也肆享祭宗廟也】建邦國頒祭號於邦國都鄙【祭號六號春官】踐阼臨祭祀內事曰孝王某外事曰嗣王某【皆祝辭也唯宗廟稱孝天地社稷祭之郊內而曰嗣王不敢同內外】諸侯臨祭祀內事曰孝子某侯某外事曰曾孫某侯某【稱國者遠辟天子曲禮】祭稱孝子孝孫【雜記】祭王父曰皇祖考王母曰皇祖妣父曰皇考母曰皇妣夫曰皇辟【更設稱號尊神異於人也皇君也考成也言其德行之成也妣之言嬀也嬀於考也辟法也妻所取法也曲禮】凡祭宗廟之禮牛曰一元大武豕曰剛鬣豚曰腍肥羊曰柔毛雞曰翰音犬曰羹獻雉曰疏趾兔曰明視脯曰尹祭稟魚曰商祭鮮魚曰脰祭水曰清滌酒曰清酌黍曰薌合粱曰香其稷曰明粢稻曰嘉蔬韭曰豐本鹽曰鹹鹺玉曰嘉玉幣曰量幣【號牲物者異於人用也元頭也武迹也腍亦肥也春秋傳作腍充貌也翰猶長也羹獻食人之餘也尹正也商猶量也脰直也其辭也嘉善也稻菰蔬之屬也豐茂也大鹹曰鹺今河東云幣帛也同上】

凡祭不諱廟中不諱【謂祝嘏之辭中有先君之名者也凡祭祭羣神廟中上不諱下玉藻】大宗伯凡祀大神享大鬼祭大示詔大號【大號六號之大者以】

【詔大祝以為祝辭 春官】

右祝號 后稷之祀易富也其辭恭其欲儉其祿及子孫【富之言備也以傳世之祿共儉者之祭易備也】詩曰后稷兆祀庶無罪悔以迄于今【兆四郊之祭處也迄至也言祀后稷于郊以配天庶幾其無罪悔乎福祿傳世以至于今表記】祝嘏辭說藏於宗祝巫史非禮也是謂幽國【藏於宗祝巫史言君不知有也幽闇也國闇者君與大夫俱不明也禮運】隨季梁曰祝史正辭信也【正辭不虛稱君美】今祝

史矯舉以祭臣不知其可也【詐稱功德以欺鬼神】公曰吾牲牷肥腍粢盛豐備何則不信【牲牛羊豕也牷純色完全也腍亦肥也黍稷曰粢在器曰盛】對曰夫民神之主也【言鬼神之情依民而行】是以聖王先成民而後致力於神故奉牲以告曰博碩肥腍謂民力之普存也【博廣也碩大也】謂其畜之碩大蕃滋也謂其不疾癘蠹也謂其備腍咸有也【雖告神以博碩肥腍其實皆當兼此謂民力適完則六畜既大而滋也皮毛無疥癬兼備而無有所闕】奉盛以告曰潔粢豐盛謂其三時不害而民和年豐也【三時春夏秋】奉酒醴以告曰嘉栗旨酒【嘉善也栗敬謹也】謂其上下皆有嘉德而無違心也所謂馨香無譌慝也【馨香之遠聞 桓六年左氏傳】

鬱人大祭祀與量人受舉斚之卒爵而飲之【斚受福之斚聲之誤也王酌尸尸嘏王比其卒

爵也少牢饋食禮主人受嘏詩懷之卒爵執爵以興出宰夫以籩受嗇 主人嘗之乃還獻祝此鬱人受王之卒爵亦王出房時也必與量人者鬱人贊裸尸量人制從獻之脯籩事相成春官】量人凡宰祭與鬱人受鬯歷而皆飲之【言宰祭者家宰佐王祭亦】

【容攝祭鄭司農云鬯讀如嫁娶之嫁是器名明堂位曰爵夏后氏以琖殷以鬯周以爵玄謂鬯讀如嘏尸之嘏宰冢宰夏官】

右受爵

膳夫凡王祭祀則徹王之胾俎【膳夫親徹胾俎胾俎最尊也其餘則其屬徹之天官】大祝既祭令徹 小祝大祭祀贊徹【並春官】 小

子祭祀受徹焉

凡祭於公者必自徹其俎【臣不敢煩君使也大夫以下或使人歸之祭於公助祭於君也曲禮】

右徹

肆師先祭祀禮成則告事畢 小祝大祭祀逆尸【並春官】

右禮畢送尸

司巫凡祭事守瘞【謂若祭地祇有埋牲玉者也守之者以祭禮未畢若有事然祭禮畢則去之春官】

右守瘞

大宗伯以脰膾之禮親兄弟之國【脰膾社稷宗廟之肉以賜同姓之國同福祿也兄弟有共先王者魯定公十四年天王使石尚來歸脰 春官】

大行人歸脰以交諸侯之福【交或往或來者也 秋官】 都宗人掌都祭祀之禮凡都祭祀致福於國【都或有山川及因國無主九皇六十四氏之祀王子弟則立其祖王之廟其祭祀王皆賜禽焉主其禮者警戒之糾其戒具其來致福則帥而以造祭僕】

家宗人掌家祭祀之禮凡祭祀致福【大夫采地之所祀與都同若先王之子孫亦有祖廟 並春官】為人祭曰致福為已祭而致膳於君子曰膳耐練曰告【此皆致祭祀之餘於君子也攝主言致福申其辭也自祭言膳謙也耐練言告不敢以為福膳也】凡膳告於君子主人展之以授使者于阼階之南【展省具也】南面再拜稽首送反命主人又再拜稽首其禮大牢則以牛左肩臂臠折九箇少牢則以羊左肩七箇犴豕則以豕左肩五箇【折斷分之也皆用左者右以祭也羊豕不言臂臠因牛序之可知 少儀】 祭僕凡祭祀致福者展而受之【臣有祭事必致祭肉於君所謂歸胾也展謂錄視其牲體數體數者大牢則以牛左肩臂臠折九箇

少牢則以羊左肩七箇特牲則以豕左肩五箇 夏官】膳夫凡祭祀之致福者受而膳之【致福謂諸臣祭祀進其餘肉歸胙于王鄭司農云膳夫受之以給王膳 天官】

右致福 定公十四年天王使石尚來脤【脤祭肉天子祭畢以之賜同姓諸侯親兄弟之國與之共福】脤者何也俎實也祭肉也生曰脤熟曰胙其辭石尚士也【辭猶書也】何以知其士也天子之大夫不名石尚欲書春秋【欲著名於春秋】諫曰久矣周之不行禮於魯也請行脤貴復正也【穀梁傳】僖公九年夏會于葵丘王使宰孔賜齊侯胙【胙祭】

【肉尊之比二王後】曰天子有事于文武【有祭事也】使孔賜伯舅胙【天子謂異姓諸侯曰伯舅】齊侯將下拜孔曰且有後命天子使孔曰以伯舅耄老加勞賜一級無下拜【七十曰耄級等也】對曰天威不遠顔咫尺【言天鑒察不遠威嚴常在顔面之前八寸曰咫】小白余敢貪天子之命無下拜【小白齊侯名余身也】恐隕越于下【隕越顛隊也據天王在上故言恐顛隊于下】以遺天子羞敢不下拜下拜登受【拜堂下受胙於堂上 左氏傳】宋先代之後也於周為客天子有事胙焉【有事祭宗廟也胙祭肉尊之故賜以祭胙 僖二十四年左氏傳】子產曰孔張君之昆孫子孔之嗣也喪祭有職【有所主】受脤歸脤【受胙謂君祭以肉賜大夫歸脤謂大夫祭歸肉於公皆社之戎祭也 昭十六年左氏傳】孔子為魯司寇不用從而祭燔肉不至不脫冕而行不知者以為為肉也其知者以為為無禮也【孟子】祭於公不宿肉祭肉不出三日出三日不食之矣【助祭於公所得胙肉歸即頒賜不俟經宿者不留神惠也家之祭肉則不過三日皆以分賜蓋過三日則肉必敗而人不食之是褻鬼神之餘也但比君所賜胙可少緩耳】朋友之饋雖車馬非祭肉不拜【朋友有通財之義故雖車馬之重不拜祭肉則拜者敬其祖考同於己親也此一節記孔子交朋友之義並論語】

大宗伯若王不與祭祀則攝位【王有故代行其祭事】凡大祭祀王后不與則攝而薦豆籩徹【薦徹豆籩王后之事 春官】祭僕掌受命于王以眡祭祀而警戒祭祀有司糾百官之戒具【謂王有故不親祭也祭祀有司有事於祭祀者糾謂校錄所當具之牲物】既祭帥羣有司而反命以王命勞之誅其不敬者凡祭祀王之所不與則賜之禽都家亦如之【鄭司農云王之所不與謂非郊廟尊祭祀則王不與也則賜之禽公卿自祭其先祖則賜之禽也玄謂王所不與同姓有先王之廟 夏官】

右不與祭 君子之祭也必身親蒞之有故則使人可也【祭統】孔子曰吾不與祭如不祭【又記孔子之言以明之言已當祭之時或有故不得與而使他人攝之則不得致其如在之誠故雖已祭而此心缺然如未嘗祭也論語】

祭過時不祭 曾子問曰天子嘗禘郊社五祀之祭簠簋既陳天子崩后之喪如之何孔子曰廢【既陳謂夙興陳饌牲器時也天子七祀言五者關中言之】曾子問曰當祭而日食大廟火其祭也如之何孔子曰接祭而已矣如牲至未殺則廢【接祭而已不迎尸也】天子崩未殯五祀之祭不行既殯而祭其祭也尸入三飯不侑醕不酢而已矣自啟至於反哭五祀之祭不行已葬而祭祝獻畢而已【既葬弥吉畢獻祝而後止郊社亦然唯嘗禘宗廟俟吉也】

並曾子問】

喪三年不祭惟祭天地社稷為越紼而行事【不敢以卑廢尊越猶躐也紼輶車索 王制】 曾子問曰諸侯之祭社稷俎豆既陳聞天子崩后之喪君薨夫人之喪如之何孔子曰廢【亦謂夙興陳饌牲器時也】自薨比至於殯自啟至於反哭奉帥天子【帥循也所奉循如天子者謂五祀之祭也社稷亦然】 曾子問曰大夫之祭鼎俎既陳籩豆既設不得成禮廢者幾孔子曰九請問之曰天子崩后之喪君薨夫人之喪君之大廟火日食三年之喪齊衰大功皆廢外喪自齊以下行也【齊衰異門則祭】其齊衰之祭也尸入三飯不侑醕不酢而已矣大功酢而已矣小功總室中之事而已矣【室中之事謂賓長獻】土之所以異者總不祭【然則土不得成禮者十一】所祭於死者無服則祭【謂若舅舅之子從母昆弟 已上曾子問】 大夫士將與祭於公既視濯而父母死則猶是與祭也次於異宮既祭釋服出公門外哭而歸其他如奔喪之禮如未視濯則使人告告者反而后哭【猶亦當為由次於異宮不可以吉與凶同處也使告反而後哭不敢專已於君命也】如諸父昆弟姑姊妹之喪則既宿則與祭卒事出公門釋服而后歸其他如奔喪之禮如同宮則次于異宮【宿則與祭出門乃解祭服皆謂差緩也 雜記】

右廢祭 宣公八年夏六月辛巳有事于大廟仲遂卒于垂壬午猶繹萬入去籥【有事祭也仲遂卒與祭同日略書有事為繹張本繹又祭陳昨日之禮所以賓尸萬舞名籥管也猶者可止之辭魯人知卿佐之喪不宜作樂而不知廢繹故內舞去籥惡其聲聞】有事于大廟襄仲卒而繹非禮也【春秋左氏傳】 仲尼曰非禮也卿卒不繹【檀弓】 萬者何干舞也籥者何籥舞也其言萬入去籥何去其有聲者【不欲令人聞之也】廢其無聲者【廢置也置者不去也齊人語】存其心焉爾存其心焉爾者何知其不可而為之也【明其心猶存于樂知其不可故去其有聲者而為之】猶者何通可以已也【禮大夫死為廢一時之祭有事于廟而聞之者去樂卒事卒事而聞之者廢繹日者起明日也言入者據未奏去籥時書凡祭自三年喪已下各以日月廢時祭唯郊社越紼而行事 公羊傳】聞大夫之喪則去樂卒事【去籥萬卒祭事言今不然】壬午猶繹猶者何可以已之辭也繹者祭之旦日之享賓也萬入去籥以其為之變譏之也【內舞去籥惡其聲聞此為卿變于常禮是知其不可而為之 穀梁傳】 昭公十五年二月癸酉有事于武宮籥入叔弓卒去樂卒事【略書有事為叔弓卒起也武宮魯武公廟成六年復立之】禘叔弓泄事籥入而卒去樂卒事禮也【大臣卒故為之去樂 左氏傳】其言去樂卒事何禮也【以加錄卒事即非禮但當言去樂而已若去籥矣總言樂者明悉去也】君有事于廟聞大夫之喪去樂【恩痛不忍舉】卒事【畢其祭事】大夫聞君之喪攝主而往【主謂已主祭者臣聞君之喪義不可以不即行故使兄弟若宗人攝行主事而往不廢祭者古禮也古有分土無分民大夫不世己父未必為今君臣也孝經曰資於事父以事君而敬同】大夫聞大夫之喪尸事畢而往【賓尸事畢而往也 公羊傳】君在祭樂之中聞大夫之喪則去樂卒事禮也【祭樂者君在廟中祭作樂】君在祭樂之中大夫有變以聞可乎【變謂死喪】大夫國體也【君之卿佐是謂股肱故曰國體】古之人重死君命無所不通【死者不可復生重莫大焉是以君雖在祭樂之中大夫死以聞可也 穀梁傳】衛有大史曰柳莊寢疾公曰若疾革雖當祭必

告【革急也】公再拜稽首請於尸曰有臣柳莊也者非寡人之臣社稷之臣也聞之死請往

【急弔賢者】不釋服而往遂以禭之與之邑裘氏與縣潘氏書而納諸棺曰世世萬子孫毋變也【脫君祭服以禭臣親賢也所以此禭之者以其不用襲也凡禭以歛所以厚賢也裘縣潘邑名檀弓】

諸侯之宮縣而祭以白牡擊玉磬朱干設錫冕而舞大武乘大路諸侯之僭禮也【言此皆天子之禮也宮縣四面縣也干盾也錫傳其背如龜也武萬舞也白牡大路天子之禮也

郊特牲】大夫具官祭器不假聲樂皆具非禮也是謂亂國【臣之奢富擬於國君敗亂之國也孔子謂管仲官事不攝焉得儉】祝嘏辭說藏於宗祝巫史非禮也是謂幽國【藏於宗祝巫史言君不知有也幽闇也國闇者君與大夫俱不明也】醯醢及尸君非禮也是謂僭君【僭君之禮也醯醢先王之爵也唯魯與王者之後得用之耳其餘諸侯用時王之器而已

禮運】右失禮高宗彤日越有雉雉【彤祭明日又祭之名殷曰彤周曰繹雉鳴也於彤日雉雉之異蓋祭禰廟也序言湯廟者非是】祖己曰惟先格王正厥事【格正也猶格其非心之格詳下文高宗祀豐于昵昵者禰廟也豐于昵失禮之正故有雉雉之異祖己自言當先格王之非心然後正其所失之事惟天監民以下格王之言王司敬民以下正事之言也】乃訓於王曰惟天監下民典厥義降年有永有不永非天天民民中絕命【典主也義者理之當然行而宜之之謂言天監視下民其禍福予奪惟主義如何爾降年有永有不永者義則永不義則不永非天天折其民民自以非義而中絕其命也意高宗之祀必有祈年請命之事如漢武帝五時祀之類祖己言永年之道不在禱祠在於所行義與不義而已禱祠非永年之道也言民而不言君者不敢斥也】民有不若德不聽罪天既孚命正厥德乃曰其如台【不若德不順於德不聽罪不服其罪謂不改過也孚命者以妖孽為符信而譴告之也言民不順德不服罪天既以妖孽為符信而譴告之欲其恐懼修省以正德民乃曰孽祥其如我何則天必誅絕之矣祖己意謂高宗當因雉雉以自省不可謂適然而恕夫數祭豐昵徼福於神不若德也黷於祭祀傳說常以進戒意或吝改不聽罪也雉雉之異是天既孚命正厥德矣其可謂妖孽其如我何耶】嗚呼王司敬民罔非天胤典祀無豐于昵【司主胤嗣也王之職主於敬民而已徼福于神非王之事也況祖宗莫非天之嗣主祀其可獨豐於昵廟乎高宗彤日】初平王之東遷也【周幽王為犬戎所殺平王嗣位故東遷洛邑】辛有適伊川見被髮而祭於野者【辛有周大夫伊川周地伊水也】曰不及百年此其戎乎其禮先亡矣【被髮而祭有象夷狄】春秦晉遷陸渾之戎于伊川【允姓之戎居陸渾在秦晉西北誘而徙之伊川遂從戎號至今為陸渾縣也計此去辛有過百年而云不及百年傳舉其事驗不必其年信

僖二十二年左氏傳】孔子曰昔臧文仲安知禮夏父弗綦逆祀而不止燔柴於竈以祀焉夫竈者老婦之所祭【謂祭竈報其功老婦主祭也】盛於瓮尊於瓶非所祭也【家語】孔子曰晏平仲祀其先人豚肩不揜豆賢大夫也而難為下也【言其偪士庶人也豚俎實豆徑尺言并豚兩肩不能覆豆喻小也雜記】

卷四十五

<經部,禮類,通禮之屬,禮書綱目

欽定四庫全書

禮書綱目卷四十五 婺源江永撰

因祭

補

小宗伯國大貞則奉玉帛以詔號【號神號幣號鄭司農云大貞謂卜立君卜大封】

大祝建邦國先告后土用牲幣【后土神社神也】

大宗伯王大封則先告后土【后土土神也黎所食者並春官】內宰凡建國佐后立市祭之以陰禮【市朝者君所以建國也建國者必面朝後市王立朝而後立市陰陽相成之義鄭司農云佐后立市者始立市后立之也祭之以陰禮者市中之社先后所立社也陰禮婦人之祭禮天官】

右立君建國 正月上日受終于文祖【上日朔日也終謂堯終帝位之事文祖者堯文德之祖廟】肆類于上帝【堯不聽舜讓使之攝位舜察天文考齊七政而當天心故行其事肆遂也類謂攝位事類遂以攝告天及五帝】禋于六宗【精意以享謂之禋宗尊也所尊祭者其祀有六謂四時也寒暑也日也月也星也水旱也祭亦以攝告】望于山川徧于羣神【九州名山大川五岳四瀆之屬皆一時望祭之羣神謂丘陵墳衍古之聖賢皆祭之 舜典】正月朔旦受命于神宗【受命終事之命神宗文祖之宗廟言神尊也】率百官若帝之初【順舜初攝帝位故事奉行之 大禹謨】惟一月癸巳王朝步自周于征伐商【一月周之正月步行也武王以正月三日行自周往征伐商二十八日渡孟津】厥四月哉生明王來自商至于豐【其四月哉始也始生明月三日與死魄互言】丁未祀于周廟邦甸侯衛駿奔走執豆籩【四月丁未告祭后稷以下文考文王以上七世之祖駿大也邦國甸侯衛服諸侯皆大奔走於廟執事】越三日庚戌柴望大告武成【燔柴郊天望祀山川先祖後郊自近始 武成】惟二月既望【周公攝政七年二月十五日日月相望因紀之】越六日乙未王朝步自周則至于豐【於已望後六日二十一日成王朝行從鎬京則至于豐以遷都之事告文王廟告文王則告武王可知以見祖考】惟太保先周公相宅【太保三公官名召公也召公於周公前相視洛居周公後往】越若來三月惟丙午朏越三日戊申太保朝至于洛卜宅【朏明也月三日明生之名於順來三月丙午朏於朏三日三月五日召公早朝至于洛邑相卜所居】厥既得卜則經營【其已得吉卜則經營規度城郭郊廟朝市之位處】越三日庚戌太保乃以庶殷攻位于洛汭越五日甲寅位成【於戊申三日庚戌以衆殷之民治都邑之位於洛水北今河南城也於庚戌五日所治之位皆成言衆殷本其所由來】若翼日乙卯周公朝至于洛【周公順

位成之明日而朝至于洛汭【則達觀于新邑營【周公通達觀新邑所營言周徧】越三日丁巳用牲于郊牛二【於乙卯三日用牲告立郊位于天以后稷配故二牛后稷貶於天有羊豕不見可知】越翼日戊午乃社于新邑牛一豕一羊一【告立社稷之位用太牢也共工氏子曰句龍能平水土祀以為社周祖后稷能殖百穀祀以為稷共牢 召誥】 周公曰王肇稱殷禮祀于新邑咸秩無文【言王當始舉殷家祭祀以禮典祀於新邑皆次秩不在禮文者而祀之 洛誥】

歲二月東巡守至于岱宗【岱宗東嶽】柴而望祀山川【柴祭天告至也】五月南巡守至于南嶽如東巡守之禮八月西巡守至于西嶽如南巡守之禮十有一月北巡守至于北嶽如西巡守之禮歸假于祖禰用特【詳見巡守】 天子將出類乎上帝宜乎社造乎禰【同上】 天子適四方先柴【同上】 祭山丘陵升祭川沈祭地瘞【同上】 校人凡將事于四海山川則飾黃駒【同上】 玉人大璋中璋九寸邊璋七寸射四寸厚寸黃金勺青金外朱中鼻寸衡四寸有縑天子以巡守宗祝以前馬【同上】 臨諸侯畛於鬼神曰有天王某甫【同上】 天子遊不出封圻不告祖廟【周禮方千里曰王圻詩曰邦圻千里維民所止 尚書大傳】

右巡守 維元祀巡守四嶽八伯壇四奧沈四海封十有二山兆十有二州元祀代泰山貢兩伯之樂焉中祀大交霍山貢兩伯之樂焉秋祀柳穀華山貢兩伯之樂焉幽都弘山祀貢兩伯之樂焉歸假于禰祖用特【詳見巡守】 時邁巡守告祭柴望也【詩序】 般巡守而祀四岳河海也【詩序】 隱公八年鄭伯

請釋泰山之祀而祀周公以泰山之祊易許田三月鄭伯使宛來歸祊不祀泰山也【成王營王城有遷都之志故賜周公許田以為魯國朝宿之邑後世因而立周公別廟焉鄭桓公周宣王之母弟封鄭有助祭泰山湯沐之邑在祊鄭以天子不能復巡守故欲以祊易許田各從本國所近之宜恐魯以周公別廟為疑故云已廢泰山之祀而欲為魯祀周公孫辭以有求也許田近許之田 左氏傳】 邠者何鄭湯沐之邑也天子有事于泰山諸侯皆從泰山之下諸侯皆有湯沐之邑焉【有事者巡守祭天告至之禮也當沐浴潔齋以致其敬故謂之湯沐邑也所以尊待諸侯而供其費也禮四井為邑邑方二里東方二州四百里十國凡為邑廣四十里袤四十二里取足舍止共稟穀而已歸邠書者甚惡鄭伯無尊事天子之心專以湯沐浴歸魯背叛當誅也錄使者重尊湯沐邑也王者所以必巡守者天下雖平自不親見猶恐遠方獨有不得其所故三年一使三公黜陟五年親自巡守巡猶循也守猶守也循行守視之辭亦不可國至人見為煩擾故至四嶽足以知四方之政而已 公羊傳】 許田者魯朝宿之邑也邠者鄭伯之所受命而祭泰山之邑也用見魯之不朝于周而鄭之不祭泰山也【朝天子所宿之邑謂之朝宿泰山非鄭境內從天王巡守受命而祭也擅相換易則知朝祭並廢 桓元年穀梁傳】

大祝大會同造于廟宜于社過大山川則用事焉反行舍奠【詳見會同】 小宗伯凡王之會同之禱祠肆儀為位【同上】 諸侯將出宜乎社造乎禰【王制】 孔子曰諸侯適天子

必告于祖奠于禩冕而出視朝命祝史告于社稷宗廟山川乃命國家五官而後行道而出告者五日而徧過是非禮也凡告用牲幣反亦如之諸侯相見必告于禩朝服而出視朝命祝史告于五廟所過山川亦命國家五官道而出反必親告于祖禩乃命祝史告至于前所告者而後聽朝而入【詳見覲禮及諸侯相朝禮】諸侯將出必以幣帛皮圭告于祖禩遂奉以出載于齊車以行每舍奠焉而后就舍反必告設奠卒斂幣玉藏諸兩階之間乃出蓋貴命也【詳見覲禮】覲禮侯氏裨冕釋幣于禩【詳見覲禮】諸侯覲于天子為宮方三百步四門壇十有二尋深四尺加方明于其上方明者木也方四尺設六色東方青南方赤西方白北方黑上玄下黃設六玉上圭下璧南方璋西方琥北方璜東方圭天子乘龍載大旆象日月升龍降龍出拜日於東門之外反祀方明禮日於南門外禮月與四瀆於北門外禮山川丘陵於西門外【詳見會同】聘禮賓朝服釋幣于禩有司筵几于室中祝先入主人從入主人在右再拜祝告又再拜釋幣制玄纁束奠于几下出主人立于戶東祝立于牖西又入取幣降卷幣實于筭埋于西階東又釋幣于行上介釋幣亦如之【詳見聘禮】賜饗唯羹飪筮一尸若昭若穆僕為祝祝曰孝孫某孝子某薦嘉禮于皇祖某甫皇考某子如饋食之禮假器於大夫盼肉及廋車【詳見聘禮】使者歸及郊請反命禩乃入【同上】釋幣于門乃至于禩筵几于室薦脯醢酒陳席于阼薦脯醢三獻一人舉爵獻從者行酬乃出上介至亦如之【同上】

右朝會【大夫聘】桓公二年冬公至自唐告于廟也凡公行告于宗廟反行飲至舍爵策勲焉禮也【爵飲酒器也既飲置爵則書勲勞於策言速紀有功也左氏傳】襄公十三年公至自晉孟獻子書勞於廟禮也【書勲勞于策也桓公二年傳曰公至自唐告于廟也凡公行告于宗廟反行飲至舍爵策勲焉禮也桓十六年傳又曰公至自伐鄭以飲至之禮也然則還告廟及飲至及書勞三事徧行一禮則亦書至悉闕乃不書傳因獻子之事以發明凡例釋例詳之左氏傳】

天子將出征類乎上帝宜乎社造乎禩禩於所征之地受命於祖受成於學出征執有罪反釋奠于學以訊馘告【詳見征伐】

大祝大師宜于社造于祖設軍社類上帝國將有事于四望及軍歸獻于社則前祝【同上】小宗伯若大師則帥有司而立軍社奉主車若將軍有事則與祭有司將軍于四望凡王之軍旅之禱祀肆儀為位【同上】大司馬若師有功則左執律右秉鉞以先愷樂獻于社若師不功則厭而奉主車【同上】肆師凡師用牲于社宗則為位類造上帝封于大神祭兵于山川亦如之凡師不功則助牽主車【同上】

小祝大師掌釁祈號祝【詳征伐】有寇戎之事則保郊祀于社【詳祭通禮神位章】曾子問曰古者師行必以遷廟主行乎孔子曰天子巡狩以遷廟主行載于齊車言必有尊也今也取七廟之主以行則失之矣曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禩遂奉以出載于齊車以行每舍奠焉而后就舍反必告設奠卒斂幣玉藏諸兩階之間乃出蓋貴命也【詳見征伐】興兵以討不義乃告于皇天上帝日月星辰禱于后土四海神祇山川冢社乃造于先王【詳見征伐】先期五日大史誓于祖廟擇吉日齊戒告于郊社稷宗廟既筮則獻兆于天子使有司以特牲告社告以所征之事而受命焉舍奠于帝學以受成然後乃類上帝柴於郊以出以齊車載遷廟之主及社主行大司馬職奉之無遷廟主則以幣帛皮圭告于祖禩謂之主命亦載齊車凡行主皮圭幣

帛皆每舍奠焉而後就館主車止于中門之外外門之內廟主居於道左社主居於道右其所經名山大川皆告祭焉戰日有司讀誥誓既卒遂禱戰祈克於上帝然後即敵已克敵史擇吉日復禱于所征之地柴於上帝祭社奠祖以告克者不頓兵傷士也戰不克則不告也凡類禱皆用甲丙戊庚壬之剛日鳴金振旅有司徧告捷于時所有事之山川既至舍于國外三日齊以特牛親格于祖禩然後入設奠以反主若主命則卒歛玉埋之于廟兩階間反社主如初迎之禮舍奠于帝學以訊馘告大亨于羣吏用備樂享有功于祖廟舍爵策勲焉謂之飲至此天子親征之禮也【詳見征伐】天子命將出征親絜齊盛服設奠于祖以詔之然後告大社冢宰執蜃宜于社之右南面授大將大將北面稽首再拜而受承所頒賜于軍吏其出不類其克不禱戰之所在有大山川則祈焉禱克于五帝捷則報之振旅復命簡異功勤親告廟告社而後適朝祈勝之禮命勇謀之將以禦敵先使迎於適所從來之方為壇祈克于上帝衣服隨其方色服事人數從其方之數牲則用其方之牲祝史告于社稷宗廟邦域之內名山大川君親素服誓衆于大廟既誓將帥勤士卒陳于廟之右君立大廟之庭祝史立于社百官各警其事御于君以待命乃大鼓于廟門詔將帥命卒習射三發擊刺三行告廟用兵于敵也五兵備効乃鼓而出以即敵此諸侯應敵之禮也【並孔叢子】

帥師者受命于廟受脤于社【脤宜社之肉盛以脤器 閔二年左氏傳】

公族其在軍則守於公禩【謂從軍者公禩行主也行以遷主言禩在外親也 文王世子】是類是禱師祭也【師出征伐類於上帝禱於所征之地爾雅】

右行師 敢用玄牡敢昭告于上天神后請罪有夏【明告天問桀百姓有何罪而加虐乎 湯誥】王曰予小子夙夜祇懼受命文考類于上帝宜于冢土以爾有衆底天之罰【祭社曰宜冢土地也言我畏天之威告文王廟以事類告天祭社用汝衆致天罰於紂泰誓】底商之罪告于皇天后土所過名山大川【致商之罪謂伐紂之時后土社也名山華岳大川河】曰惟有道曾孫周王發將有大正於商【告天地山川之辭大正以兵征之也】今商王受無道【無道德】暴殄天物害虐烝民【暴絕天物言逆天也逆天害民所以為無道】為天下逋逃主萃淵藪【逋亡也天下罪人逃亡者而紂為魁主窟聚淵府藪澤言大姦】予小子既獲仁人敢祇承上帝以遏亂略【仁人謂太公周召之徒略路也言誅紂敬承天意以絕亂路】華夏蠻貊罔不率俾惟爾有神尚克相予以濟兆民無作神羞【神庶幾助我渡民危害無為神羞辱 武成】王升舟入水鐘鼓亞觀臺亞將舟亞宗廟亞【惡皆謂亞亞次也觀臺大史知天時占候者也宗廟行主 尚書大傳】牧之野武王之大事也既事而退柴於上帝祈於社設奠於牧室【柴祈奠告天地及先祖也牧室牧野之室也古者郊關皆有館焉先祖者行主也】遂率天下諸侯執豆籩逡奔走【逡疾也疾奔走言勸事也周頌曰逡奔走在廟】追王大王亶父王季歷文王昌不以卑臨尊也【不用諸侯之號臨天子也文王稱王早矣於周猶為諸侯於是著焉 大傳】桓講武類禱也【詩序】莊公八年春王正月甲午

治兵治兵于廟禮也【治兵于廟習戰令將以圍郕 春秋左氏傳】諸侯從劉康公成肅公會晉侯伐秦成子受脤于社不敬【脤宜社之肉也盛以脤器故曰脤宜出兵祭社之名】劉子曰國之大事在祀與戎祀有執燔【燔祭肉】戎有受脤神之節也【交神之節】今成子惰棄其命矣【惰則失中和之氣】其不反乎【為成肅公卒于瑕張本成十三年左氏傳】秦伯伐晉以璧祈戰于河【禱求勝 文十二年左氏傳】晉侯伐齊將濟河獻子以朱絲

係玉二穀【雙玉曰穀】而禱曰齊環怙恃其衆負其衆庶【環齊靈公名負依也】棄好背盟陵虐神主【神主民也謂數伐魯殘民人】曾臣彪將率諸侯以討焉【彪晉平公名稱臣者明上有天子以謙告神曾臣猶末臣】其官臣偃實先後之【守官之臣偃獻子名】苟捷有功無作神羞【羞恥也】官臣偃無敢復濟【偃信巫言故以死自誓】唯爾有神裁之沈玉而濟【襄十八年左氏傳】晉伐鄭楚子救鄭遇於鄢陵楚子登巢車以望晉軍大宰伯州犂侍于王後王曰乘而左右皆下矣曰戰禱也【禱請於鬼神成十六年左氏傳】晉趙鞅帥師及鄭罕達帥師戰于鐵將戰衛太子禱曰曾孫蒯聵敢昭告皇祖文王【周文王皇大也】烈祖康叔【烈顯也】文祖襄公【繼業守文故曰文祖蒯聵襄公之孫】鄭勝亂從【勝鄭聲公名釋君助臣為從於亂】晉午在難【午晉定公名】不能治亂使鞅討之蒯聵不敢自佚備持矛焉【戎右持矛】敢告無絕筋無折骨無面傷以集大事無作三祖羞【集成也】大命不敢請佩玉不敢愛【不敢愛故以祈禱哀公二年左氏傳】楚子敗晉師于邲祀于河作先君宮告成事而還【傳言楚莊有禮所以遂興宣十二:left氏傳】

大司馬中春教振旅遂以蒐田有司表貉獻禽以祭社中夏教芟舍遂以苗田獻禽以享礡中秋教治兵遂以獮田致禽以祀祊中冬教大閱遂以狩田有司表貉于陳前致禽饁獸于郊入獻禽以享烝【詳田役篇】

肆師凡四時之大甸獵祭表貉則為位凡甸用牲于社宗則為位【同上】

司几筵甸役則設熊席右漆几【同上】甸祝掌四時之田表貉之祝號舍奠于祖廟禴亦如之師甸致禽于虞中乃屬禽及郊饁獸舍奠於祖禴乃斂禽禴牲禴馬皆掌其祝號【同上】

小宗伯若大甸則帥有司而饁獸于郊遂頒禽凡王之甸役之禱祠肆儀為位【同上】

季秋天子乃教於田獵命主祠祭禽於四方【同上】

右田獵吉日維戊既伯既禱【戊剛日也伯馬祖也謂天駟房星之神也此亦宣主之詩言田獵將用馬力故以吉日祭馬祖而禱之小雅】

太子生有司齊肅端冕見之南郊見於天也【詳教太子】

立世子太史以告太祝太祝以告太祖太宗與社稷【賈誼新書】

右生子立嗣

婦人先嫁三月祖廟未毀教于公宮祖廟既毀教于宗室教成祭之牲用魚芼之以蘋藻【詳昏義】士昏禮凡行事受諸禴廟【士昏記納采章主人筵於戶西西上右几注云主人女父也筵為神布席也將以先祖之遺體許人故受其禮於禴廟親迎章主人筵于戶西西上右几疏云以先祖之遺體許人將告神故女父先於廟設神席乃迎壻也】齊戒以告鬼神以厚其別也【詳昏義】遣女於禴廟者重先人之遺支體也不敢自專故告禴也【同上】

三月而廟見稱來婦也擇日而祭於禴成婦之義也【同上】

右婚嫁鄭公子忽如陳逆婦媯陳鍼子送女先配而後祖鍼子曰是不為夫婦誣其祖矣非禮

也何以能育【詳冠昏記】楚公子圍聘于鄭且妻於公孫段氏伯州犂曰君辱貺寡大夫圍謂圍將使豐氏撫有而室圍布几筵告于莊公之廟而來【同上】

大祝掌六祈以同鬼神示一曰類二曰造三曰禴四曰禋五曰攻六曰說【析噪也謂為有災變號呼告神以求福天神人鬼也祇不和則六癘作見故以祈禮同之故書造作竈杜子春讀竈為造次之造書亦或為造造祭於祖也鄭司農云類造禴禋攻說皆祭名也類祭於上帝詩曰是類是禱爾雅曰是類是禱師祭也又曰乃立冢土戎醜攸行爾雅曰起大事動大衆必先有事乎社而後出謂之宜故曰大師宜於社造於祖設軍社類上帝司馬法曰將用師乃告於皇天上帝日月星辰以禱於后土四海神祇山川冢社乃造于先王然後冢宰徵師於諸侯曰某國為不道征之以某年某月某日師至某國祭日月星辰山川之祭也春秋傳曰日月星辰之神則雪霜風雨之不時於是乎祭之山川之神則水旱癘疫之災於是乎祭之玄謂類造加誠肅求如志禴禴告之以時有災變也攻說則以辭責之祭如日食以朱絲縈社攻如其鳴鼓然董仲舒救日食祝曰昭昭大明熾滅無光奈何以陰侵陽以卑侵尊是之謂說也禴未聞焉造類禴禴皆有牲攻說用幣而已】作六辭五曰禱【鄭司農云禱謂禱於天地社稷宗廟主為其辭也春秋傳曰鐵之戰衛太子禱曰曾孫蒯聵敢昭告皇祖文王烈祖康叔文祖襄公鄭勝亂從晉午在難不能治亂使鞅討之蒯聵不敢自佚備持矛焉敢告無絕筋無破骨無面夷無作三祖羞大命不敢請佩玉不敢愛若此之屬玄謂禱賀慶言福祚之辭晉趙文子成室晉大夫發焉張老曰美哉輪焉美哉奐焉歌於斯哭於斯聚國族於斯文子曰武也得歌於斯哭於斯聚國族於斯是全要領以從先大夫於九京也北面再拜稽首君子謂之善頌善禱是祝辭】小祝掌小祭祀將事侯禋禱祠之祝號以祈福祥順豐年逆時雨寧風旱彌裁兵遠臯疾【侯之言候也候嘉慶祈祥之屬禋禱郤凶咎寧風旱之屬順豐年而順為之祝辭逆迎也彌讀曰救救安也】詛祝掌盟詛類造攻說禴禴之祝號【詳盟詛】大宗伯國有大故則旅上帝及四望【故謂凶災旅陳也陳其祭事以祈焉禮不如祀之備也上帝五帝也鄭司農云四望日月星海玄謂四望五嶽四鎮四瀆】

典瑞四圭有邸以旅上帝兩圭有邸以旅四望【大宗伯職曰國有大故則旅上帝及四望並春官】玉人兩圭五寸有邸以旅四望【邸謂之抵有邸儼共本也考工記】

職金旅于上帝則共其金版【金鉞謂之版此版所施未聞

秋官】掌次王大旅上帝則張氈案設皇邸【大旅上帝祭天於圓丘國有故】

【而祭亦曰旅此以旅見祀也張氈案以氈為床於幄中鄭司農云皇羽覆上邸後版也玄謂後版屏風與染羽象鳳皇羽色以為之天官】

典瑞大旅共其玉器而奉之【玉器謂圭圭裸圭之屬春官】

司尊彝大喪存奠彝大旅亦如之【旅者國有大故之祭也亦存其奠彝則陳之不即徹】

眡瞭大喪廡樂器大旅亦如之【旅非常祭於時乃興造其樂器】

笙師大喪廡其樂器大旅則陳之【陳於饌處而已不泄其縣】

龜人若有祭事則奉龜以往旅亦如之 大卜凡旅陳龜【陳龜於饌處也士喪禮曰卜人先奠龜于西塾上南首是也不親貞龜亦以卜旅祭非常輕於大遷大師】小宗伯大裁及執事禱祠于上下神示【執事大祝及男巫女巫也求福曰禱得求曰祠謚曰禱爾于上下神祇鄭司農云小宗伯與執事共禱祠】大祝國有大故天裁彌祀社稷禱祠【大故兵寇也天裁疫癘

水旱也彌猶徧也徧祀社稷及諸所禱既則祠之以報焉】喪祝掌勝國邑之社稷之祝號以祭祀禱祠焉【勝國邑所誅討者社稷者若亳社是矣存之者重神也蓋奄其上而棧其下為北牖】小宗伯凡王之會同軍旅甸役之禱祠肆儀為位有

禍裁亦如之【謂有所禱祠肆習也】肆師與祝侯禳于畺及郊【侯禳小祝職也畺五百里遠郊百里近郊五十里】若國有大故則令國人祭【大故謂水旱凶荒所令祭者社及禴醢】都宗人國有大故則令禱祠反命祭亦如之【以王命令禱祠歸白王於獲福又以王命令祭之還又反命並春官】小子凡侯禳飾其牲【侯禳者候四時惡氣禳去之也】

羊人凡侯禳共其羊牲【並夏官】

牧人凡毀事用𦍋可也【𦍋謂雜色不純毀謂副辜侯禳毀除殃咎之屬地官】

雞人凡面禳共其雞牲【面禳四面禳也】男巫掌管望祀

望衍授號旁招以茅【杜子春云望衍謂衍祭也授號以所祭之名號授之旁招以茅招四方之所望祭者玄謂衍讀為延聲之誤也望祀謂有牲粢盛者延進也謂但用幣致其神二者詛祝所授類造攻說禴祭之神號男巫為之招】冬堂贈無方無算【杜子春云堂贈謂逐疫也無方四方為可也無算道里無數遠益善也玄謂冬歲終以禮送不祥及惡夢皆是也其行必由堂始巫與神通言當東則東當西則西可近則近可遠則遠無常數】

女巫掌歲時祓除釁浴【歲時祓除如今三月上巳如水上之類釁浴謂以香薰草藥沐浴】

占夢季冬乃舍萌于四方以贈惡夢【杜子春讀萌為明又云其字當為明明謂毆疫也謂歲竟逐疫置四方書亦或為明玄謂舍讀為釋舍萌猶釋采也古書釋采釋奠多作舍字萌采始生也贈送也欲以新善去故惡】眡祓掌安宅叙降【宅居也降下也人見妖祥則不安主安其居處也次叙其凶禍所下謂禳移之】正歲則行事【占夢以季冬贈惡夢此正月而行安宅之事所以順民並春官】庶氏掌除毒蠱以攻說禴之【毒蠱毒物而害病人者攻說祈名祈其神求去之也鄭司農云禴除也玄謂此禴讀如潰癰之潰】

翦氏掌除蠹物以攻禳攻之【蠹物穿食人器物者蠹魚亦是也攻禳祈名並秋官】

右祈禳 梁州蔡蒙旅平【蔡蒙二山名祭山曰旅旅平者治功畢而旅祭也】雍州荆岐既旅【荆岐二山名】九州攸同九山刊旅【九州之山槎木通道已可祭告禹貢】昭公十八年夏五月鄭火子產使祝史徙主祔於周廟告於先君【祔廟主石函周廟厲王廟也有火災故合羣主於祖廟易救護】明日使郊人助祝史除於國北【為祭處於國北者就大陰禳火】禳火于玄冥回祿【玄冥水神回祿火神】祈于四鄘【鄘城也城積土陰氣所聚故祈祭之以禳火之餘災】七月子產為火故大為社【為治也】祓禳於四方振除火災禮也【振棄也左氏傳】宋災二師令四鄉正敬享【二師左右師也鄉正鄉大夫享祀也】祝宗用馬于四墉祝盤庚于西門之外【祝大祝宗宗人墉城也用馬祭于四城以禳火盤庚殷王宋之遠祖城積陰之氣故祀之凡天災有幣無牲用馬祀盤庚皆非禮襄九年左氏傳】惠王十五年有神降于莘【惠王十五年魯莊公二十二年降下也下者言自上而下有聲象以接人莘號地】王問于內史過曰是何故固有之乎【故事也固猶常也】對曰有之國之將興明神降之觀其政德而均布福焉國之將亡神亦往焉觀其苛慝而降之禍是以或見神以興亦或以亡昔夏之興也融降于崇山【融祝融也崇崇高山也夏居陽城崇高所近】其亡也回祿信

於聆遂【回祿火神再宿為信聆遂地名】商之興也禱机次於丕山【禱机繇也過信曰次丕大邳山在河東】其亡也夷羊在牧【夷羊神獸牧商郊牧野】周之興也鸞鸞鳴於岐山【三君云鸞鸞鳳之別名也詩云鳳皇鳴矣于彼高岡其在岐山之脊乎】其衰也杜伯射王于鄩【鄩鄩京也杜國伯爵陶唐氏之後周春秋曰宣王殺杜伯而不辜後三年宣王會諸侯田于圃日中杜伯起於道左衣朱衣朱冠操朱弓朱矢射宣王中心折脊而死】是皆明神之志者也【志記也見記錄在史籍者】王曰今是何神也對曰昔昭王娶於房曰房后【房國名】實有爽德協于丹朱【爽二也協合也丹朱堯子】丹朱馮身以儀之生穆王焉【馮依也儀匹也詩云實維我儀言房后之行有似丹朱馮依其身而匹偶之生穆王滿】若由是觀之其丹朱之神乎王曰其誰受之對曰在虢土【言神在虢虢其受之】王曰吾其若之何對曰使大宰以祝史帥狸姓奉犧牲粢盛玉帛往獻焉【大宰上卿掌祭祀之式玉幣之事祝大祝掌祈福祥史大史掌次主位狸姓丹朱之後神不歆非類故帥以往也純色曰犧】無有祈也【祈求也勿有求請禮之而已左氏傳云對曰以其物享之其至之日亦其物也彼注云享祭也若以甲乙日至祭先脾玉用蒼服上青以此類祭之】王使大宰忌父帥傅氏及祝史【傅氏狸姓也在周為傅氏】奉犧牲玉鬯往獻焉【玉鬯鬯酒之圭長尺二寸有瓚所以灌地降神之器】內史過從至虢虢公亦使祝史請事焉內史過歸告王曰虢必亡矣不禋於神而求福焉神必禍之十九年晉取虢【國語周語】楚共王無豕適【豕大也】有寵子五人無適立焉乃大有事于羣望【羣望星辰山川】而祈曰請神擇於五人者使主社稷乃徧以璧見於羣望曰當璧而拜者神所立也誰敢違之既乃與巴姬密埋璧於大室之庭【巴姬共王妾大室祖廟昭十三年左氏傳】

小宗伯凡天地之大裁類社稷宗廟則為位【詳災變禮】鼓人救日月則詔王鼓【同上】大僕軍旅旬役贊王鼓救日月亦如之【同上】

右天地大裁莊公二十五年六月辛未朔日有食之鼓用牲于社非常也唯正月之朔慝未作日有食之於是乎用幣于社伐鼓于朝【詳災變禮】日食則曷為鼓用牲于社求乎陰之道也以朱絲營社或曰脅之或曰為闇恐人犯之故營之【同上】言日言朔食正朔也鼓用牲于社鼓禮也用牲非禮也天子救日置五麾陳五兵五鼓諸侯置三麾陳三鼓三兵大夫擊門士擊柝言充其陽也【同上】文公十五年六月辛丑朔日有食之鼓用牲于社非禮也日有食之天子不舉伐鼓于社諸侯用幣于社伐鼓于朝以昭事神訓民事君示有等威古之道也【同上】昭公十七年六月甲戌朔日有食之祝史請所用幣昭子曰日有食之天子不舉伐鼓于社諸侯用幣于社伐鼓于朝禮也平子禦之曰止也唯正月朔慝未作日有食之於是乎有伐鼓用幣禮也其餘則否大史曰在此月也日過分而未至三辰有災于是乎百官降物君不舉辟移時樂奏鼓祝用幣史用辭故夏書曰辰不集于房瞽奏鼓嗇夫馳庶人走此月朔之謂也當夏四月是謂孟夏平子弗從昭子退曰夫子將有異志不君君矣【同上】昭公十七年冬有星孛於大辰西及漢【夏之八月辰星見在天漢西今孛星出辰西光芒東及天漢】鄭裨竈言於子產曰宋衛陳鄭將同日火若我用瓚鬯玉瓚鄭必不火【瓚圭也鬯玉爵也瓚勺也欲以禳火】子產弗與【以為天災流行非禳所息故也】十八年夏五月火始昏見【火心星】壬午宋衛陳鄭皆火裨竈曰不用吾言鄭又將火【前年裨竈欲用瓚鬯禳火子產不聽今復請用之】鄭人請用之子產曰天道遠人道邇非所及也何以知之竈焉知天道是

亦多言矣豈不或信【多言者或時有中】遂不與亦不復火【傳言天道難明雖裨竈猶不足以盡知之左氏傳】哀公六年有雲如衆赤鳥夾日以飛三日楚子使問諸周大史周大史曰其當王身乎【日為人君妖氣守之故以為當王身雲在楚上唯楚見之故禍不及他國】若禳之可移於令尹司馬【禳禳祭】王曰除腹心之疾而實諸股肱何益不穀不有大過天其夭諸有罪受罰又焉移之遂弗禳【左氏傳】昭公二十六年齊有彗星【出齊之分野不書魯不見】齊侯使禳之【祭以禳除之】晏子曰無益也祇取誣焉【誣欺也】天道不諂【諂疑也】不貳其命若之何禳之且天之有彗也以除穢也若無穢德又何禳焉若德之穢禳之何損公說乃止【左氏傳】梁山崩【梁山晉望也崩在魯成五年】以傳召伯宗【傳驛也伯宗晉大夫孫伯糾之子】絳人曰夫國主山川【主為山川之主也孔子曰夫顓臾為東蒙主】故川涸山崩君為之降服出次【涸竭也川竭則山崩降服縞素也出次出於郊也】乘縵不舉策於上帝【縵車無文也不舉不舉樂也策於上帝以簡策之文告於上帝周禮曰鎮五嶽崩命去樂】國三日哭以禮焉【以禮於神也周禮國有大災三日哭案成五年左氏傳云山崩川竭君為之不舉降服乘縵徹樂出次祝幣史辭以禮焉與此小異】雖伯宗亦然如是而已伯宗及絳以告君從之【國語晉語】

維王后元祀【王謂禹也后君也祀年也禹始居攝為君之年也】帝命大禹步于上帝【帝舜也步推也于於也上帝天也帝令禹推演天道謂觀得失反覆也】維時洪祀六沴用咎於下【用此時禹始大祀六沴之用咎于下者用極昭格神靈以明其祀之盛大也】是用知不畏而神之怒【而乃也舜任禹禹能治其民撫其神舜知其弭神之怒可知也】若六沴作見若是共禦帝用不差神則不怒【若是順也共讀曰恭禦止也差疑也舜見禹知人善任故命之無復疑也】五福乃降用章于下【降下也章明也】若六沴作見若不共禦六伐既侵六極其下【侵陵也庶幾奉天行罰殺萬物也極凶也不共禦則必見凶也】禹乃共辟厥德受命休令【辟明也厥其也休美也禹於是恭明其德維日孳孳受舜之美令奉行之】爰用五事建用王極【王極或皆為皇極也】長事【長猶君也】一曰貌貌之不恭是為不肅【肅敬也君貌不恭則是不能敬其事也】厥咎狂【君臣不敬則倨慢如狂矣】厥罰恒雨【貌曰木木主春春氣生生氣失則踰其節故恒雨也】厥咎惡【生氣失故於人則為惡】時則有服妖【服貌之飾】時則有龜孽【龜蟲之生於水而游於春者也屬木】時則有雞禍【雞畜之有冠翼者也屬木】時則有下體生於上之痾【痾病也貌氣失之病也】時則有青眚青祥【青木色也眚生於此祥自外來也】唯金沴水【沴殄也凡貌言視聽思忿一事失則逆人之心人心逆則怨木金水土火氣為之傷傷則衝勝來乘殄之於是神怒人怨將為禍亂故五行先見變異以譴告人也及妖孽禍痾眚祥皆其氣類暴作非常時為怪者也各以物象為之占也】二曰言言之不從是謂不又厥咎僭厥罰恒暘厥極憂時則有詩妖時則有介蟲之孽時則有大禍時則有口舌之痾時則有白眚白祥唯木沴金三曰視視之不明是謂不哲厥咎舒厥罰恒燠厥極疾時則有草妖時則有羸蟲之孽時則有羊禍時則有目痾時則有赤眚赤祥唯水沴火四曰聽聽之不聰是謂不謀厥咎急厥罰恒寒厥極貧時則有鼓妖時則有魚孽時則有豕禍時則有耳痾時則有黑眚黑祥唯火殄水五曰思思之不睿是謂不聖厥咎繇厥罰恒風厥極凶短折時則有脂夜之妖時則有華孽時則有牛禍時則有心腹之痾時則有黃眚黃祥維金木水火沴土六月王極王之不極是謂不建厥咎眊厥罰恒陰厥極弱時則有射妖時則有龍蛇之孽時則有馬禍時則有下人伐上之痾【夏侯勝說伐宜為代書亦

或作代陰陽之神曰魂魄君行不由常俯張無度則魂魄傷也王氣失之病也不中之人恒耆其味厚其毒增以為病將以開賢代之也春秋傳所謂奪伯有魄者是也不名疾疾不著於身體也】時則有日月亂行星辰逆行【亂謂薄食鬬並是逆謂盈縮反明經天守舍之類也不言沴天天至尊無能沴之者離逢非沴維鮮之功謂此也】維五位復建辟厥沴【人君失五事則五行相沴違其位復立之者當明其變異則知此為貌邪輒改過以共禦之至司之月又必齊肅祭祀以撫其神則咎除矣不言六位天不違其位】曰二月三月維貌是司四月五月維視是司六月七月維言是司八月九月維聽是司十月十一月維思心是司十二月與正月維王極是司【司主也此盖用夏數也夏數得天之正玄或疑焉此用王事之次則四月五月主視六月七月主言非也用五行王相之次則八月九月主聽十月十一月主思心亦非也子駿傳曰二月三月維貌是司四月五月維視是司六月七月維思心是司八月九月維言是司十月十一月維聽是司十二月與正月維王極是司於四時之氣以近其正也】凡六沴之作歲之朝月之朝日之朝則后王受之歲之中月之中日之中則公卿受之歲之夕月之夕日之夕則庶民受之【自正月盡四月為歲之朝自五月盡八月為歲之中自九月盡十二月為歲之夕上旬為月之朝中旬為月之中下旬為月之夕平旦至食時為日之朝禺中至日昃為日之中晡時至黃昏為日之夕受之受其凶咎也】其二辰以次相將其次受【二辰謂日月也假令歲之朝也日月中則上公受之日月夕則下公受之日月朝大夫受之歲之夕也日月朝則上士受之日月中則下士受之其餘差以尊卑多少則悉矣】星辰莫同【莫夜也星辰之變夜見亦與晝同初昏為朝夜半為中將晨為夕或曰將晨為朝初昏為夕也】是離逢非沴維鮮之功【離憂也逢見也是謂憂見之象非沴也言王行事能沴天者也鮮殺也功成也維凶咎之殺已成故天垂變異以示人也】禦貌於喬忿【止貌之失者在於去驕忿也驕忿者不恭之刑也驕忿謂若傲很明德忿類無期之類也】以其月從其禮祭之參乃從【從順也三祭之其神乃順不怒也】禦言於訖衆以其月從其禮祭之參乃從【訖止也止言之失者在於去止衆止衆者是不從之刑也止衆謂若周厲王弭謗以障民口之類也】禦視於忽似以其月從其禮祭之參乃從【止視之失者在於去忽似忽似者是不明之刑也忽似謂若亂於是非象恭滔天及不辨鹿馬之類也】禦聽於怵攸以其月從其禮祭之參乃從【怵讀曰獸不狘之狘攸讀為風雨所漂颶之颶止聽之失者在於去怵攸者是不聰之刑也怵攸謂若老夫嚙嚙小子蠕蠕誨爾純純聽我眊眊之類】禦思心於有尤以其月從其禮祭之參乃從【尤過也止思心之失者在於去欲有所過欲者是不睿之刑也欲有所過欲若昭公不知禮而習小儀不脩政而欲誅季氏之類也】禦王極於宗始以其月從其禮祭之參乃從【宗尊也止王極之失者在於尊用始祖之法度不言其惡者人性備於五德得失在斯王不極則五事皆失非一惡也大者易姓小者滅身其能宗始則錄延其受命之君承天制作猶天之教命也故掌祖廟之藏者謂之天府也】六沴之禮散齊七日致齊新器絜祀用赤黍三日之朝於中庭祀四方從東方始卒於北方【禮志致齊三日周禮凡祭祀前期十日宗伯帥執事卜日是為齊一旬乃祀也今此致齊即祀者欲得容三祀也蓋八日為致齊明九日朝而初祀者一旬有一日事乃畢也新器赤黍改過之宜也中庭明堂之庭也或曰朝庭之庭也此祀五精之神其器牲粢盛有常禮記其異者也不祀天非正月亦以此禮祀此神也】其祀禮曰格祀【篇名也今亡】曰某也方祀曰播國率相行祀【篇中大祝贊主人辭也某也天子名也方祀祀四方也播讀曰藩藩國謂諸侯相助也言諸侯率其常事來即助行祭之禮也】其祀也【大祝告神以君悔過之辭也周禮大祝掌六祝之辭以事鬼神祇祈福祥求永貞也】曰若爾

神靈洪祀六沴是作【神靈謂木精靈威仰火精赤熛怒土精含樞紐金精白招拒水精叶光紀及木帝大皞火帝炎帝土帝黃帝金帝少皞水帝顓頊木官勾芒火官祝融土官后土金官蓐收水官玄冥皆是也生勤其事死在祀典配其神而食作猶為也六沴是神靈所為】無差無傾無有不正【言神靈正直無比類所謂沴皆是也】若民有不敬事則會批之六沴【言民廣及天下有過者也事六事也會合也批推也言天下有過神靈亦合推內于六沴天子以天下為任者】六事之機以縣示我【六事貌言視聽思心王極也機天文也天文運轉以縣見六事之變異示我我謂天子】我民人無敢不敬事上下王祀【我與民人無敢不敬畏六事上下君祀之所縣示變異者言皆悔過也上君祀靈威仰下君祀大皞之屬也尚書大傳】

右六沴

大司徒荒政十有二聚萬民十有一曰索鬼神【荒凶年也鄭司農云救饑之政十有二品索鬼神求廢祀而修之雲漢之詩所謂靡神不舉靡受斯牲者也地官】司巫若國有大旱則帥巫而舞雩【雩旱祭也天子於上帝諸侯於上公之神鄭司農云魯僖公欲焚巫尪以其舞雩不得雨】國有大災則帥巫而造巫恒【杜子春云司巫帥巫官之屬會聚常處以待命也玄謂恒久也巫久者先巫之故事造之當案視所施為】女巫旱暵則舞雩【使女巫舞旱祭崇陰也鄭司農云求雨以女巫故檀弓曰歲旱繆公召縣子而問焉曰吾欲暴巫而奚若曰天則不雨而望之愚婦人無乃已疏乎】凡邦之大災歌哭而請【有歌者有哭者冀以悲哀感神靈也竝春官】舞師教皇舞帥而舞旱暵之事【旱暵之事謂雩也暵熱氣也鄭司農云皇舞蒙羽舞皇或為翌玄謂皇析五采羽為之亦如帔】

稻人旱暵共其雩斂【稻人共雩斂稻急水者也鄭司農云雩事所發斂竝地官】右凶旱湯之時大旱七年雒水竭煎沙爛石於是使人以三足鼎祝山川教之祝曰政不節耶使人疾耶苞苴行耶謀夫昌耶宮室營耶女謁盛耶何不雨之極也蓋言未已而天大雨夫天之應人如影之隨形響之効聲者也【東漢鍾離意傳注云帝王紀曰成湯大旱七年齊戒翦髮斷爪以已為犧牲禱於桑林以六事自責說苑】倬彼雲漢昭回于天王曰於乎何辜今之人天降喪亂饑饉薦臻靡神不舉靡愛斯牲圭璧既卒寧莫我聽【賦也雲漢天河也昭光回轉也于天其光隨天而轉也薦荐通重也臻至也靡神不舉所謂國有凶荒則索鬼神而祭之也圭璧禮神之玉也卒盡寧猶何也舊說以為宣王承厲王之烈內有撥亂之志遇災而懼側身修行欲消去之天下喜於王化復行百姓見憂故仍叔作此詩以美之言雲漢者夜晴則天河明故述王仰訴於天之辭如此也】旱既大甚蘊隆蟲蟲不殄禋祀自郊徂宮上下奠瘞靡神不宗后稷不克上帝不臨耗斃下土寧丁我躬【賦也蘊蓄隆盛也蟲蟲熱氣也殄絕也郊祀天地也宮宗廟也上祭天下祭地奠其禮瘞其物宗尊也克勝也言后稷欲救此旱災而不能勝也臨享也稷以親言帝以尊言也斃敗丁當也何以當我之身而有是災也或曰與其耗斃下土寧使裁害當我身也亦通大雅雲漢】齊大旱景公召羣臣問曰天不雨久矣吾使人卜之祟在高山廣水寡人欲少賦斂以祠靈山可乎晏子曰不可夫靈山以石為身以草木為髮天久不雨髮將焦身將熱彼獨不欲雨乎祠之無益景公曰吾欲祠河伯可乎晏子曰不可夫河伯以水為國以魚鼈為民天久不雨水泉將下百川竭國將亡民將滅矣彼獨不用雨乎祠之何益景公曰今為之奈何晏子曰君誠避宮殿暴露與靈山河伯共憂其幸而雨乎於是景公出野暴露三日天果大雨【說苑】衛大旱卜有事於山川不吉【有祭事也】甯莊子曰昔周

饑克殷而年豐今邢方無道諸侯無伯【伯長也】天其或者欲使衛討邢乎從之師興而雨【僖十九年左氏傳】鄭大旱使屠擊祝款豎柎有事於桑山【三子鄭大夫有事祭也】斬其木不雨子產曰有事於山藝山林也【藝養護令繁植】而斬其木其罪大矣奪之官邑【昭十六年左氏傳】歲旱穆公召縣子而問然【然之言焉也凡穆或作繆】曰天久不雨吾欲暴尫而奚若【奚若何如也尫者面鄉天覬天哀而雨之】曰天則不雨而暴人之疾子虐母乃不可與【錮疾人之所哀暴之是虐】然則吾欲暴巫而奚若曰天則不雨而望之愚婦人於以求之母乃已疏乎【已猶甚也巫主接神亦覬天哀而雨之春秋傳說巫曰在女曰巫在男曰覲周禮女巫旱暵則舞雩】徙市則奚若曰天子崩巷市七日諸侯薨巷市三日為之徙市不亦可乎【徙市者庶人之喪禮今徙市是憂戚於旱若喪檀弓】莊公二十五年秋大水鼓用牲于社于門亦非常也【失常禮】凡天災有幣無牲【天災日月食大水也祈請而已不用牲也】非日月之眚不鼓【眚猶災也月侵日為眚陰陽逆順之事賢聖所重故特鼓之春秋左氏傳】

高下有水災曰大水既戒鼓而駭衆用牲可以已矣救日以鼓兵救水以鼓衆【穀梁傳】于社禮也于門非禮也【公羊傳】鄭大水龍鬬于時門之外洧淵【時門鄭城門也洧水出滎陽密縣東南至潁川長平入潁】國人請為禋焉子產弗許曰我鬬龍不我覲也【覲見也】龍鬬我獨何覲焉禋之則被其室也【淵龍之室】吾無求於龍龍亦無求於我乃止也【傳言子產之知昭十九年左氏傳】

女祝掌王后之內祭祀凡內禱祠之事【內祭祀六宮之中竈門戶禱疾病求瘳也祠報福】掌以時招梗禴禴之事以除疾殃【鄭大夫讀梗為亢玄謂梗禦未至也除災害曰禴禴猶刮去也卻變異曰禴禴攘也四禮唯禴其遺象今存天官】男巫春招弭以除疾病【招招福也杜子春讀弭如彌兵之彌玄謂弭讀為救字之誤也救安也安凶禍也招救皆有祀衍之禮春官】疾病乃行禱五祀【盡孝子之情五祀博言之士二祀曰門曰行士喪禮記】

右疾病既克商二年王有疾弗豫【伐紂明年武王有疾不悅豫】二公曰我其為王穆卜【集傳二公太公召公也李氏曰穆卜猶言敬卜也】周公曰未可以戚我先王【戚憂惱之意未可以武王之疾而憂惱我先王也蓋卻二公之卜】公乃自以為功為三壇同墠為壇於南方北面周公立焉植璧秉珪乃告太王王季文王【功事也築土曰壇除地曰墠三壇三王之位皆南向三壇之南別為一壇北向周公所立之地也植置也珪璧所以禮神】史乃冊祝曰惟爾元孫某邁厲虐疾若爾三王是有丕子之責于天以旦代某之身【元孫某武王也邁遇厲惡虐暴也不子元子也武王為天元子三王當任其保護之責于天不可命其死也】予仁若考能多材多藝能事鬼神乃元孫不若旦多材多藝不能事鬼神今我即命于元龜爾之許我我其以璧與珪歸俟爾命爾不許我我乃屏璧與珪【即就也屏藏也】乃卜三龜一習吉啟籥見書乃并是吉【卜筮必立三人以相參考三龜者三人所卜之龜也習重也】公曰體王其罔害【體兆之體也】公歸乃納冊于金匱之匱中王翼日乃瘳【匱藏卜書之匱金匱以金緘之也金匱】夷王愆于厥身【夷王厲王父也愆惡疾也】諸侯莫不竝走其望以祈王身【昭十六年左氏傳】宋公享晉侯于楚丘請以桑林【桑林殷天子之樂名】荀偃辭【辭讓之】荀偃士會曰諸侯宋魯於是觀禮魯有禘樂賓祭用之宋以桑林享君不亦可乎【言其天子樂也】舞師題以旌夏【師樂師也旌夏大旌也題識也以大旌表識其行列】

】晉侯懼而退入于房【旌夏非常卒見之人心偶有所畏】去旌卒享而還及著雍疾【晉侯疾也著雍晉地】卜桑林見【崇見於卜兆】荀偃士句欲奔請禱焉【奔走還宋禱謝】荀罃不可曰我辭禮矣彼則以之【以用之】猶有鬼神於彼加之【言自當加罪於宋】晉侯有間【間疾差也襄十年左氏傳】鄭簡公使公孫成子來聘【成子子產之諡】平

公有疾韓宣子贊授客館【贊導也】客問君疾對曰寡君之疾久矣上下神祇無不徧諭也【諭謂祭祀告謝也】而無除今夢黃熊入于寢門【夢公夢也注云熊似羆】不知人殺乎抑厲鬼邪【人殺主殺人厲鬼惡鬼也】子產曰以君之明子為大政其何厲之有【大政美大之政】僑聞之昔者鯀違帝命殛之於羽山【帝堯也殛放而殺之】化為黃熊以入于羽淵【羽山之淵鯀既死而神化也】實為夏郊【禹有天下而郊祀之】三代舉之【舉謂不廢其祀】夫鬼神之所及【吉凶所及】非其族類則紹其同位【紹繼也殷周祀之是也】是故天子祀上帝【上帝天也】公侯祀百辟【以死勤事功施於民者】自卿以下不過其族【族親族也】今周室少卑晉實繼之【謂為盟主統諸侯也】其或者未與夏郊邪宣子以告祀夏郊【為周祀也】董伯為尸【董伯晉大夫神不歆非類則董伯其姒姓乎尸主也國語晉語】晉侯有疾鄭伯使公孫僑如晉聘且問疾叔向問焉曰寡君之疾病卜人曰實沈臺駘為祟史莫之知敢問此何神也子產曰昔高辛氏有二子伯曰閼伯季曰實沈【高辛帝嚳】居于曠林不相能也【曠林地闕】日尋干戈以相征討【尋用也】后帝不臧【后帝堯也臧善也】遷閼伯于商丘主辰【商丘宋地主祀辰星辰大火也】商人是因故辰為商星【商人湯先相土封商丘因閼伯故國祀辰星】遷實沈于大夏主參【大夏今晉陽縣】唐人是因以服事夏商【唐人若劉累之等累遷魯縣此在大夏】其季世曰唐叔虞【唐人之季世其君曰叔虞】當武王邑姜方震大叔【邑姜武王后齊太公之女懷胎為震大叔成王之弟叔虞】夢帝謂己余命而子曰虞【帝天取唐君之名】將與之唐屬諸參而蕃育其子孫及生有文在其手曰虞遂以命之及成王滅唐而封大叔焉故參為晉星【叔虞封唐是為晉侯】由是觀之則實沈參神也昔金天氏有裔子曰昧為玄冥師生允格臺駘【金天氏帝少皞裔遠也玄冥水官昧為水官之長】臺駘能業其官【纂昧之業】宣汾洮【宣猶通也汾洮二水名】障大澤【陂澤障之】以處大原【大原晉陽也臺駘之所居】帝用嘉之封諸汾川【帝顓頊】沈姒蓀黃實守其祀【四國臺駘之後】今晉主汾而滅之矣【滅四國】由是觀之則臺駘汾神也抑此二者不及君身山川之神則水旱厲疫之災於是乎祭之【有水旱之災則祭山川之神若臺駘者周禮四曰祭為營攢用幣以祈福祥】日月星辰之神則雪霜風雨之不時於是乎祭之【星辰之神若實沈者】若君身則亦出入飲食哀樂之事也山川星辰之神又何為焉【言實沈臺駘不為君疾昭元年左氏傳】齊侯疥遂痼【痼瘡疾】期而不瘳諸侯之賓問疾者多在【多在齊】梁丘據與裔款【二子齊嬖大夫】言於公曰吾事鬼神豐於先君有加矣今君疾病為諸侯憂是祝史之罪也諸侯不知其謂我不敬君盍誅於祝固史嚚以辭賓【欲殺嚚固以辭謝來問疾之賓】公說告晏子晏子曰若有德之君外內不廢【無廢事】上下無怨動無違事其祝史薦信無愧心矣【君有功德祝史陳說之無所愧】是以鬼神用饗國受其福祝史與焉【與受國福】其所以蕃祉老壽者為信君使也其言忠信於鬼神其適遇淫君外內頗邪上下怨疾動作辟違從欲厭私【使私情厭足】高臺深池撞鐘舞女斬刈民力輸掠其聚【掠奪取也】以成其違不思謗讟不憚鬼神神怒民痛無悛於心其祝史薦信是言罪也【以實白神是為言君之罪】其蓋失數

美是矯誣也【蓋掩也】進退無辭則虛以求媚【作虛辭以求媚於神】是以鬼神不饗其國以禍之祝史與焉所以天昏孤疾者為暴君使也其言僭慢於鬼神公曰然則若之何對曰不可為也【言非誅祝史所能治】民人苦病夫婦皆詛祝有益也詛亦有損聊攝以東【聊攝東西界也平原聊城縣東北有攝城】姑尤以西【姑尤齊東界也姑水尤水皆在城陽郡東南入海】其為人也多矣雖其善祝豈能勝億兆人之詛【萬萬曰億萬億曰兆】君若欲誅於祝史脩德而後可公說使有司寬政毀關去禁薄歛已責【除逋責】十二月齊侯田于沛【言疾愈行獵沛澤名昭二十一年左氏傳】楚昭王有疾卜曰河為祟王弗祭大夫請祭諸郊王曰三代命祀祭不越望【諸侯望祀竟內山川星辰】江漢睢漳楚之望也【四水在楚界】禍福之至不是過也不穀雖不德河非所獲罪也遂弗祭【哀六年左氏傳】子疾病子路請禱子曰有諸子路對曰有之誄曰禱爾于上下神祇子曰丘之禱久矣【禱謂禱於鬼神有諸問有此理否誄者哀死而述其行之辭也上下謂天地天曰神地曰祇禱者悔過遷善以祈神之佑也無其禮則不必禱既曰有之則聖人未嘗有過無善可遷其素行固已合於神明故曰丘之禱久矣又士喪禮疾病行禱五祀蓋臣子迫切之至情有不能自己者初不請於病者而後禱也故孔子之於子路不直拒之而但告以無所事禱之意 論語】

小祝大喪及葬設道齋之奠分禱五祀【杜子春云齋當為粢道中祭也漢儀每街路輒祭玄謂齋猶送也送道之奠謂遣奠也分其牲體以祭五祀告王去此宮中不復反故興祭祀也王七祀祀五者司命大厲平生出入不以告 春官】

右喪祭

詛祝作盟詛類造攻說禴祭之祝號【八者之辭皆所以告神明也盟詛主於要誓大事曰盟小事曰詛】作盟詛之載辭以叙國之信用以質邦國之劑信【載辭為辭而載之於策坎用牲加書於其上也國謂王之國邦國諸侯國也質正也成也文王脩德而虞芮質厥成鄭司農云載辭以春秋傳曰使祝為載書 春官】司盟掌盟載之灋【載盟辭也盟者書其辭於策殺牲取血坎其牲加書於上而埋之謂之載書春秋傳曰宋寺人惠牆伊戾坎用牲加書為世子痤與楚客盟】凡邦國有疑會同則掌其盟約之載及其禮儀北面詔明神既盟則貳之【有疑不協也明神神之明察者謂日月山川也覲禮加方明于壇上所以依之也詔之者讀其載書以告之也貳之者寫副當以授六官】盟萬民之犯命者詛其不信者亦如之【盟詛者欲相與共惡之也犯命犯君教令也不信違約者也春秋傳曰臧紇犯門斬關以出乃盟臧氏又曰鄭伯使卒出貍行出犬雞以詛射穎考叔者】凡民之有約齊者其貳在司盟【貳之者檢其自相違約】有獄訟者則使之盟詛【不信則不敢聽此盟詛所以省獄訟】凡盟詛各以其地域之衆庶共其牲而致焉既盟則為司盟共祈酒脯【使其邑閭出牲而來盟已又使出酒脯司盟為之祈明神使不信者必凶 秋官】封人大盟則飾其牛牲【大盟會同之盟地官】戎右盟則以玉敦辟盟遂役之【鄭司農云敦器名也辟法也玄謂將敵血者先執其器為衆陳其載辭使心皆開辟也役之者傳敵血授當敵者】贊牛耳桃茢【鄭司農云贊牛耳春秋傳所謂執牛耳者故書茢為滅杜子春云滅當為厲玄謂尸盟者割牛耳取血助為之及血在敦中以桃茢拂之又助之也耳者盛以珠盤尸盟者執之桃鬼所畏也茢莠帶所以埽不祥 夏官】

右盟詛 涖牲曰盟【涖臨也次用牲臨而讀其盟書盟禮亡曲禮】成王盟諸侯于岐陽【岐山之陽】楚為荊蠻【荊州之蠻也】置茅蒨設望表與鮮卑守燎【置立也蒨謂束茅而立之所以縮酒望表謂望祭山川立木以為表表其位也鮮卑東夷國燎庭燎也國語晉語】隱公八年秋七月庚午宋公齊侯衛侯盟于瓦屋外盟不日此其日何也諸侯之參盟於是始故謹而日之也【世道交喪盟詛滋彰非可以經世軌訓故存日以記惡蓋春秋之始也】誥誓不及五帝【五帝謂黃帝顓頊帝嚳帝堯帝舜也誥誓尚書六誓七誥是其遺文五帝之世道化淳備不須誥誓而信自著】盟詛不及三王【三王謂夏殷周也夏啟有鈞臺之享商湯有景亳之命周武有盟津之會衆所歸信不盟詛也】交質子不及二伯【二伯謂齊桓晉文齊桓有召陵之師晉文有踐土之盟諸侯率服不質任也穀梁傳】五伯桓公為盛葵丘之會諸侯束牲載書而不敵血初命曰誅不孝無易樹子無以妾為妻再命曰尊賢育才以彰有德三命曰敬老慈幼無忘賓旅四命曰士無世官官事無攝取士必得無專殺大夫五命曰無曲防無遏籬無有封而不告曰凡我同盟之人既盟之後言歸于好【按春秋傳僖公九年葵丘之會陳牲而不殺讀書加于牲上壹明天子之禁孟子】晉文公伐衛楚師救衛戰于城濮楚師敗績晉師還至于衡雍作王宮于踐土王子虎盟于王庭【踐土宮之庭書踐土別于京師】要言曰皆獎王室無相害也有渝此盟明神殛之俾隊其師無克祚國及而玄孫無有老幼【獎助也渝變也殛誅也俾使也隊隕也克能也僖二十八:left氏傳】諸侯伐鄭鄭人恐乃行成【與晉成也】同盟于戲將盟鄭六卿公子駟【子駟】公子發【子國】公子嘉【子孔】公孫輒【子耳】公孫蠆【子蟈】公孫舍之【子展】及其大夫門子皆從鄭伯【門子卿之適子】晉士莊子為載書【莊子士弱載書盟書】曰自今日既盟之後鄭國而不唯晉命是聽而或有異志者有如此盟【如違盟之罰】公子駟趨進曰天禍鄭國使介居二大國之間【介猶間也】大國不加德音而亂以要之【謂以兵亂之力強要鄭】使其鬼神不獲歆其禋祀其民人不獲享其土利夫婦辛苦墊隘無所底告【墊隘猶委頓底至也】自今日既盟之後鄭國而不唯有禮與彊可以庇民者是從而敢有異志者亦如之【亦如此盟】荀偃曰改載書【子駟亦以所言載於策故欲改之】公孫舍之曰昭大神要言焉【要誓以告神】若可改也大國亦可叛也知武子謂獻子曰我實不德而要人以盟豈禮也哉非禮何以主盟姑盟而退脩德息師而來終必獲鄭何必今日乃盟而還【遂兩用載書】楚子伐鄭【與晉成故】子駟將及楚平子孔子蟈曰與大國盟口血未乾而背之可乎子駟子展曰吾盟固云唯彊是從今楚師至晉不我救則楚彊矣盟誓之言豈敢背之且要盟無質神弗臨也【質主也】所臨唯信信者言之瑞也【瑞符也】善之主也是故臨之【神臨也】明神不蠲要盟【蠲潔也】背之可也乃及楚平【襄九:left氏傳】諸侯伐鄭鄭人懼乃行成同盟于亳載書曰凡我同盟毋蘊年【蘊積年穀而不分災】毋壅利【專山川之利】毋保姦【藏罪人】毋留慝【速去惡】救災恤禍亂同好惡獎王室【獎助也】或問茲命司慎司盟名山名川【二司天神】羣臣羣祀【羣祀在祀典者】先王先公【先王諸侯之大祖宋祖帝乙鄭祖厲王之比也先公始封君】七姓十二國之祖【七姓晉魯衛鄭曹滕姬姓邾小邾曹姓宋子姓齊姜姓莒己姓杞姒姓薛任姓實十三國言十二誤也】明神殛之【殛誅也】俾失其民隊命亡氏踣其國家【襄十一:left氏傳】宋華元克合晉楚之成晉士燮會楚公子罷許

偃盟于宋西門之外曰凡晉楚無相加戎好惡同之同恤菑危備救凶患若有害楚則晉伐之

在晉楚亦如之交贊往來道路無壅【贊幣也】謀其不協而討不庭【討背叛不來在王庭者】有渝此盟明神殛之俾隊其師無克胙國【成十二年左右氏傳】崔杼弑齊君立景公而相之慶封為左相盟國人於大宮【大宮大公廟】曰所不與崔慶者晏子仰天歎曰嬰所不唯忠於君利社稷者是與有上帝乃歆【盟書云所不與崔慶者有上帝讀書未終晏子抄荅易其辭因自歆襄二十五年左氏傳】晉師將盟衛侯于鄆澤衛人請執牛耳【盟禮尊者涖牛耳主次盟者衛侯與晉大夫盟自以當涖牛耳故請】成何曰衛吾溫原也焉得視諸侯【言衛小可比晉縣不得從諸侯禮定八年左右氏傳】公會齊侯于夾谷孔丘相【相會儀也】將盟齊人加於載書曰齊師出竟而不以兵車三百乘從我者有如此盟【如此盟詛之禍】孔丘使茲無還揖對【無還魯大夫】曰而不反我汶陽之田吾以共命者亦如之【須齊歸汶陽田乃當共齊命於是孔子以公退賤者終其事要盟不絜故略不書】齊人來歸鄆讎龜陰之田【定十年左氏傳】哀公會吳于橐皋吳子使大宰嚭請尋盟公不欲使子貢對曰盟所以周信也【周固】故心以制之【制其義】玉帛以奉之【奉贊明神】言以結之【結其信】明神以要之【要以禍福】寡君以為苟有盟焉弗可改也已若猶可改日盟何益今吾子曰必尋盟若可尋也亦可寒也【尋重也寒歇也】乃不尋盟【哀十二年左右氏傳】哀公會齊侯盟于蒙武伯問於高柴曰諸侯盟誰執牛耳【執牛耳尸盟者】季羔曰鄆衍之役吳公子姑曹【季羔高柴也鄆衍在七年】發陽之役衛石魋【發陽鄆也在十二年石魋石曼姑之子】武伯曰然則彘也【彘武伯名也鄆衍則大國執發陽則小國執據時執者無常故武伯自以為可執哀十七年左右氏傳】鄭伯將伐許授兵於大宮【大宮鄭祖廟】公孫闕與潁考叔爭車【公孫闕鄭大夫】潁考叔挾輶以走【輶車輶也】子都拔棘以逐之【子都公孫闕棘戟也】及大逵弗及子都怒【逵道方九軌也】傳于許【傳于許城下】潁考叔取鄭伯之旗螯弧以先登【螯旗名】子都自下射之顛【顛隊而死】鄭伯使卒出貍行出犬雞以詛射潁考叔者【百人為卒二十五人為行行亦卒之行列疾射潁考叔者故令卒及行間皆詛之】君子謂鄭莊公失政刑矣政以治民刑以正邪既無德政又無威刑是以及邪【大臣不睦又不能用刑於邪人】邪而詛之將何益矣【隱十一年左氏傳】季武子將作三軍盟諸僖閼【僖宮之門】詛諸五父之衢【五父衢道名在魯國東南詛以禍福之言相要襄十一年左氏傳】

成廟則釁之以羊門夾室皆用雞宗廟之器其名者成則釁之以豝豚【雜記詳見釁廟篇】肆師以歲時序其祭祀及其祈珥【序次第其先後大小故書祈為幾杜子春讀幾當為祈珥當為餌玄謂祈當為進禋之禋珥當為餌禋餌者釁禮之事雜記曰成廟則釁之雍人舉羊升屋自中中屋南面剗羊血流於前乃降門夾室皆用雞其餌皆於屋下割雞門當門夾室中室然則是禋謂羊血也小子職曰掌珥于社稷祈于五祀是也亦謂其宮兆始成時也春秋僖十九年夏邾人執鄆子用之傳曰用之者何蓋叩其鼻以餌社也春官】小子掌珥于社稷祈于五祀【故書祀作禋鄭司農云禋讀為祀書亦或為祀珥社稷以牲頭祭也玄謂珥讀為餌祈或為刳刳餌者釁禮之事也用毛牲曰刳羽牲曰餌餌刳社稷五祀謂始成其宮兆時也春官肆師職祈或作幾秋官士師職曰凡刳珥則奉大牲此刳餌正字與】釁邦器及軍器【邦器謂禮樂之器及祭器之屬雜記曰凡宗廟之器其名者成則釁之以豝豚】圉師春除蓐釁廐【蓐馬茲也馬既出而除之新釁焉神之也竝夏官】始立學者既興器用幣【興當為釁字之悞也禮樂之器成則釁之又用幣告先聖先師以器成文王世子】天府

上春釁寶鎮及寶器【上春孟春也釁謂殺牲以血血之鄭司農云釁讀為徽或曰釁鼓之釁】龜人上春釁龜【釁者殺牲以血之神之也玄謂上春者夏正建寅之月月令孟冬云釁祠龜策相互矣秦以十月建亥為歲首則月令秦世之書亦或欲以歲首釁龜耳並春官】孟冬命大史釁龜筮占兆審卦吉凶【筮著也占兆龜之繇文也周禮龜人上春釁龜謂建寅之月也秦以其歲首使大史釁龜筮與周禮異矣卦吉凶謂易也審省錄之而不釁筮筮短賤於兆也今月令曰釁祠祠衍字月令】大司馬若大師帥執事涖釁主及軍器【大師王出征伐也涖臨也主謂遷廟之主及社主在軍者也軍器鼓鐸之屬凡師既受甲迎主于廟及社主祝奉以從殺牲以血塗主及軍器皆神之夏官】君以軍行故社釁鼓【師出先有事祓禱於社謂之宜社於是殺牲以血塗鼓鼗為釁鼓】祝奉以從【奉社主也定四年左氏傳】小祝大師掌釁祈號祝【鄭司農云釁謂釁鼓也春秋傳曰君以軍行祓社釁鼓祝】

【奉以從春官】司約若有訟者則珥而辟藏【鄭司農云謂有爭訟罪罰刑書謬誤不正者為之開藏取本刑書以正之當開時先祭之玄謂訟訟約若宋仲幾薛宰者也辟藏開府視約書珥讀為岬謂殺雞取血釁其戶秋官】羊人凡祈珥釁積共其羊牲【共猶給也夏官】士師凡刳珥則奉大牲【珥讀為岬刳岬釁禮之事用牲毛者曰刳羽者曰岬】犬人凡幾珥用駟可也【鄭司農云駟謂不純色也玄謂幾讀為刳珥當為岬刳岬者釁禮之事並秋官】雞人凡釁共其雞牲【釁釁廟之屬釁廟以羊門夾室皆用雞春官】

右釁齊宣王坐於堂上有牽牛而過堂下者王見之曰牛何之對曰將以釁鐘王曰舍之吾不忍其觶觶若無罪而就死地對曰然則廢釁鐘與曰何可廢也以羊易之【釁鐘新鑄鐘成而殺牲取血以塗其釁郤也觶觶恐懼貌孟子】邾人執鄫子用之用之者叩其鼻以岬社

也【岬者釁也取鼻血以釁祭社器僖十九年穀梁傳】

禮書綱目卷四十五

卷四十六

<經部,禮類,通禮之屬,禮書綱目

欽定四庫全書

禮書綱目卷四十六 婺源江永撰

祭物 吉禮十四

補

冢宰制國用必於歲之杪【制國用如今度支經用杪末也】祭用數之仂【筭今年一歲經用之數用其什一】喪祭用不足曰暴有餘曰浩【暴猶耗也浩猶饒也】祭豐年不奢凶年不儉【常用數之仂 王制】太宰以九式均節財用一曰祭祀之式【式謂用財之節度】以九貢致邦國之用一曰祀貢【鄭司農云祀貢犧牲包茅之屬 天官】大行人侯服歲壹見其貢祀物男服三歲壹見其貢器物采服四歲壹見其貢服物【祀物犧牲之屬器物尊彝之屬服物玄纁絺纈也 秋官】季冬凡在天下九州之民者無不咸獻其力以共皇天上帝社稷寢廟山林名川之祀【民非神之福不生雖有其邦國采地此賦要由民出 月令】大府邦都之賦以待祭祀【邦都五百里賦口率出泉也 天官】小宰以法掌祭祀之戒具令百官府共其財用【法謂其禮法也戒具戒官有事者所當共同上】宰夫凡禮事贊小宰比官府之具【同上】外府凡

祭祀共其財用【疏曰祭祀財用皆外府供其帛也 同上】肆師之職掌立國祀之禮以佐大宗伯【佐助也】立大祀用玉帛牲牷立次祀用牲幣立小祀用牲【鄭司農云大祀天地次祀日月星辰小祀司命已下玄謂大祀又有宗廟次祀又有社稷五祀五嶽小祀又有司中風師雨師山川百物 春官】小宗伯掌五禮之禁令與其用等【用等牲器尊卑之差 同上】泉府凡賒者祭祀無過旬日【鄭司農云賒貰也以祭祀故从官貰買物 地官】

右總要 孟子曰禮曰諸侯耕助以供粢盛夫人蠶繅以為衣服犧牲不成粢盛不潔衣服不備不敢以祭惟土無田則亦不祭牲殺器皿衣服不備不敢以祭則不敢以宴【禮曰諸侯為藉百畝冕而青紘躬秉耒以耕而庶人助以終畝收而藏之御廩以供宗廟之粢盛使世婦蠶于公桑蠶室奉繭以示于君遂獻于夫人夫人副禕受之繅三盆手遂布于三宮世婦使繅以為黼黻文章而服以祀先王先公又曰土有田則祭無田則薦黍稷曰粢在器曰盛牲殺牲必特殺也皿所以覆器者 孟子】祭公謀父曰甸服者祭侯服者祀賓服者享要服者貢荒服者王日祭月祀時享歲貢終王先王之訓也【詳見財賦】

天子以犧牛諸侯以肥牛大夫以索牛士以羊豕【犧純毛也肥養于滌也索求得而用之

曲禮】天子社稷皆大牢諸侯社稷皆少牢大夫士宗廟之祭有田則祭無田則薦【有田者既祭又薦新祭以首時薦以仲月士薦牲用特豚大夫以上用羔所謂羔豚而祭百官皆足詩曰四之日其早獻羔祭韭】庶人春薦韭夏薦麥秋薦黍冬薦稻韭以卵麥以魚黍以豚稻以鴈【庶人無常牲取與新物相宜而已】祭天地之牛角繭栗宗廟之牛角握【握謂長不出膚】諸侯無故不殺牛大夫無故不殺羊士無故不殺犬豕庶人無故不食珍【故謂祭饗王制】

夏后氏尚黑牲用玄【玄黑類也】殷人尚白牲用白周人尚赤牲用騂【騂赤類檀弓】夏后氏牲尚黑殷白牡周騂剛【順正色也騂剛赤色明堂位】季夏命四監大合百縣之秩芻以養犧牲令民無不咸出其力【四監主山林川澤之官百縣鄉遂之屬地有山林川澤者也秩常也百縣給國養犧牲之芻多少有常民皆當出力為艾之今月令四為田】以共皇天上帝名山大川四方之神以祠宗廟社稷之靈以為民祈福【牲以供祀神靈為民求福明使民艾芻是不虛取也皇皇天北辰耀魄寶冬至所祭于圓丘也上帝大微五帝】季冬乃命大史次諸侯之列賦之犧牲以共皇天上帝社稷之饗【此所與諸侯共者也列國有大小也賦之犧牲大者出多小者出少饗獻也】乃命同姓之邦共寢廟之芻豢【此所以與同姓共也芻豢猶犧牲】命宰歷卿大夫至于庶民土田之數而賦犧牲以共山林名川之祀【此所與卿大夫庶民共者也歷猶次也卿大夫采地亦有大小其非采地以其邑之民多少賦之】凡在天下九州之民者無不咸獻其力以共皇天上帝社稷寢廟山林名川之祀【民非神之福不生雖有其邦國采地此賦要由民出】仲秋乃命宰祝循行犧牲視全具案芻豢瞻肥瘠察物色必比類量小大視長短皆中度五者備當上帝其饗【於鳥獸肥充之時宜省羣牲也宰祝大宰大祝主祭祀之官也養牛羊曰芻犬豕曰豢五者謂所視也所案也所瞻也所察也所量也此皆得其正則上帝饗之上帝饗之而無神不饗也】

孟春命祀山林川澤犧牲毋用牝【為傷妊生之類】仲春祀不用犧牲用圭璧更皮幣【為季春將選而合騰之也更猶易也當祀者告以玉帛而已並月令】

宗廟之事脂者膏者以為牲【脂牛羊屬膏豕屬致美味也考工梓人】

牲不及肥大【詳見祭義】遂人凡國祭祀共野牲【共野牲入于牧人以待事也】

遂師凡國祭祀共其野牲牧人掌牧六牲而阜蕃其物以共祭祀之牲牷【六牲謂牛馬羊豕犬雞鄭司農云牷純也玄謂牲體完具】凡陽祀用騂牲毛之陰祀用黝牲毛之望祀各以其方之色牲毛之【騂牲赤色毛之取純毛也陰祀祭地北郊及社稷也望祀五嶽四鎮四瀆也鄭司農云陽祀春夏也黝讀為幽幽黑也玄謂陽祀祭天于南郊及宗廟】凡時祀之牲必用牷物【時祀四時所常祀謂山川以下至四方百物】凡外祭毀事用髡可也【外祭謂表貉及王行所過山川用事者故書毀為髡髡作庖杜子春云髡當為毀庖當為髡髡謂雜色不純毀謂副辜侯毀除殃咎之屬】凡祭祀共其犧牲以授充人繫之【犧牲毛羽完具也授充人者當殊養之周景王時賓起見雄雞自斷其尾曰雞憚其為犧】凡牲不繫者共奉之【謂非時而祭祀者並地官】

羊人若牧人無牲則受布于司馬使其賈買牲而共之【布泉夏官】牛人掌養國之公牛以待國之政令【公猶官也】凡祭祀共其享牛求牛以授職人而芻之【鄭司農云享牛前祭一日之牛也求牛禱于鬼神祈求福之牛也玄謂享獻也獻神之牛謂所以祭者也求終也牛事之牛謂所以繹者也宗廟有繹者孝子求神非一處職讀為機機謂之杙可以繫牛機人者謂牧人充人與芻牲之芻牛人擇于公牛之中而以授養之】凡祭祀共其牛牲之互與其盆

簠以待事【鄭司農云互謂楅衡之屬盆簠皆器名盆所以盛血簠受肉籠也玄謂互若今屠家縣肉格地官】肆師大祭祀展犧牲繫于牢頒于職人【展省閱也職讀為櫜櫜可】

【以繫牲者此櫜人謂充人及監門人春官】充人掌繫祭祀之牲牲祀五帝則繫于牢芻之三月【牢閑也必有閑者防禽獸觸齧養牛羊曰芻三月一時節氣成】享先王亦如之凡散祭祀之牲繫于國門使養之【散祭祀謂司中司命山川之屬國門謂城門司門之官鄭司農云使養之使守門者養之】展牲則告牲【鄭司農云展具也具牲若今時選牲也充人主以牲牲告展牲者也玄謂展牲若今夕牲也特牲饋食之禮曰宗人視牲告充舉獸尾告備近之】碩牲則贊【贊助也君牽牲入將致之助持之也春秋傳曰故奉牲以告曰博碩肥腍】

司門祭祀之牛牲繫焉監門養之【監門門徒】

藁人掌豢祭祀之犬【養犬豕曰豢不于人言其共至尊雖其潘瀾芟餘不可褻也並地官】犬人掌犬牲凡祭祀共犬牲用牲物伏瘞亦如之【鄭司】

【農云牲純也物色也伏謂伏犬以王車轅之瘞謂埋祭也爾雅曰祭地曰瘞埋】凡幾珥沈辜用駟可也【故書駟作龍鄭司農云幾讀為廋爾雅曰祭山曰廋縣祭川曰浮沈大宗伯職曰以埋沈祭山林川澤以罷辜祭四方百物龍讀為駟謂不純色也玄謂幾讀為刳珥當為岬刳岬者釁禮之事秋官】雞人掌共雞牲辨其物【物謂毛色也辨之者陽祀用騂陰祀用黝】凡祭祀面禋釁共其雞牲【釁釁廟之屬釁廟以羊門夾室皆用雞鄭司農云面禋四面禋也釁讀為徵】小宗伯毛六牲辨其名物而頒之于五官使共奉之

【毛擇毛也鄭司農云司徒主牛宗伯主雞司馬主馬及羊司寇主犬司空主豕】大祭祀省牲祭之日省鑊【省鑊視亨腥孰並春官】封人凡祭祀飾其牛牲設其楅衡置其絃共其水藁【飾謂刷治潔清之也鄭司農云楅衡所以楅持牛也絃著牛鼻繩所以牽牛者今時謂之雉與古者名同皆謂夕牲時也杜子春云楅衡所以持牛令不得抵觸人玄謂楅設于角衡設于鼻如椳狀也水藁給殺時洗薦牲也絃字當以豸為聲】歌舞牲及毛炮之豚【謂君牽牲入時隨歌舞之言其肥香以歆神也毛炮豚也爛去其毛而炮之以備八珍鄭司農云封人主歌舞其牲云博碩肥腍地官】

羊人掌羔牲凡祭祀飾羔【羔小羊也詩曰四之日其早獻羔祭韭】司弓矢凡祭祀共射牲之弓矢【射牲示親殺也殺牲非尊者所親唯射為可國語曰禘郊之事天子必自射其牲並夏官】古者天子諸侯必有養牲之官及歲時齊戒沐浴而躬朝之犧牲祭牲必於是取之君召牛納而視之擇其毛而卜之吉然後養之君皮弁素積朔月月半君巡牲【詳見祭義】犧牲不粥于市【王制】牲死則埋之【注見祭器】

右犧牲聖人為天地主為山川主為鬼神主為宗廟主【鬼神百神也因外說故在宗廟之上也】序五牲之先後貴賤【五牲牛羊豕犬雞先後謂四時所尚也】諸侯之祭牛曰太牢【天子之大夫亦太牢太牢天子之牲角握諸侯角尺大夫索牛也】大夫之祭牲羊曰少牢【天子之士亦少牢也】士之祭牲特豕曰饋食【不言特牲其文已著又與大夫互相足也】無祿者稷饋【庶人無常牲故以稷為主】稷饋者無尸無尸者厭也宗廟曰芻豢【牛羊曰芻犬豕曰豢】山川曰犧牲【色純曰犧體完曰牲宗廟言豢山川言牲互文也山川謂岳瀆】

以方色角入其餘用戾索之】割列禴瘞【割割牲列臠辜禴面禴瘞瘞埋】于是有五牲【大載禮】上牲損則用下牲下牲損則祭不備物以其舛之為不樂也【說苑】子期祀平王祭以牛俎于王王問于觀射父曰祀牲何及對曰祀加于舉天子舉以大牢祀以會諸侯舉以特牛祀以大牢卿舉以少牢祀以特牛大夫舉以特牲祀以少牢士食魚炙祀以特牲庶人食菜祀以魚上下有序則民不慢王曰其小大何如對曰郊禘不過繭栗烝嘗不過把握王曰芻豢幾何對曰遠不過三月近不過浹日【詳見祭義】魯祭周公何以為牲【據廟異也】周公用白牡【白牡殷牲也周公死有王禮謙不敢與文武同也不以夏黑牲者嫌改周之文當以夏辟嫌也】魯公用騂犂【騂犂赤脊周牲也魯公以諸侯不嫌故从周制以脊為差】羣公不毛【不毛不純色所以降于尊祖 文十三年公羊傳】魯公索氏將祭而亡其牲孔子聞之曰公索氏不及二年必亡今過朞而亡夫子何以知其然孔子曰夫祭者孝子所以自盡于其親將祭而亡其牲則其餘所亡者多矣若此而不亡者未之有也【家語】晏平仲祀其先人豚肩不揜豆君子以為隘矣【雜記注云豚俎實豆徑尺言并豚兩肩不能覆豆喻小也禮器】宋公使邾文公用鄫子于次睢之社欲以

屬東夷【睢水受汴東京陳留梁譙沛彭城縣入泗此水次有妖神東夷皆社祠之蓋殺人而用祭】司馬子魚曰古者六畜不相為用【司馬子魚公子目夷也六畜不相為用謂若祭馬先不用馬】小事不用大牲而況敢用人乎祭祀以為人也民神之主也用人其誰饗之【僖十九年左氏傳】

天子為藉千畝冕而朱紘躬秉耒諸侯為藉百畝冕而青紘躬秉耒以事天地山川社稷先古以為醴酪齊盛于是乎取之【詳見祭義】

天子親耕于南郊以共齊盛諸侯耕于東郊亦以共齊盛【同上】甸師掌帥其屬而耕耨王藉以時入之以共齋盛【其屬府史胥徒也耨芸芋也王以孟春躬耕帝藉天子三推三公五推卿諸侯九推庶人終于千畝庶人謂徒三百人藉之言借也王一耕之而使庶人芸芋終之齋盛祭祀所用穀也粢稷也穀者稷為長是以名云在器曰盛 天官】季秋藏帝藉之收于神倉祇敬必飭【重粢盛之委也帝藉所耕千畝也藏祭祀之穀為神倉祇亦敬也 月令】小宗伯辨六齋之名物與其用使六宮之人共奉之【齋讀為粢六粢謂六穀黍稷稻粱麥苽 春官】天子禘郊之事王后必自舂其粢【器實曰粢】諸侯宗廟之事夫人必自舂其盛【在器曰盛上言粢下言盛互其文也】天子親舂禘郊之盛【帥后舂之 楚語詳見祭義】廩人大祭祀則共其接盛【接讀為壹扱再祭之扱扱以授舂人舂之大祭祀之穀藉田之收藏于神倉也者不以給小用】

舂人祭祀共其齋盛之米【齋盛謂黍稷稻粱之屬可盛以為簠簋實】

饎人掌凡祭祀共盛【盛炊而共之】

舍人凡祭祀共簠簋實之陳之【方曰簠圓曰簋盛黍稷稻粱器 並地官】

肆師祭之日表齋盛告絜【粢六穀也在器曰盛故書表為剽剽表皆謂徽識也 春官】

右粢盛【耕藉之禮詳見通禮朝廷禮】米廩有虞氏之庠也【庠之言詳也于以考禮詳事也魯謂之米廩虞帝上孝今藏粢盛之委焉 明堂位】魯祭周公何以為盛【據牲異也】周公盛【盛者新穀】魯公燾【燾者冒也故上以新也】羣公廩【廩者連新于陳上財令半

相連爾此謂上禘祭之時序昭穆之差 文十三年公羊傳】 桓公十四年秋八月壬申御廩灾
【御廩公所親耕以奉粢盛之倉也天火曰灾例在宣十六年】 乙亥嘗【先其時亦過也既
戒日致齊御廩雖灾苟不害嘉穀則祭不應廢故書以示法】 書不害也【灾其屋救之則息
不及穀故曰書不害左氏傳】 御廩之灾不志【以其微】 此其志何也以為唯未易灾之餘
而嘗可也志不敬也【鄭嗣曰唯以未易灾之餘而嘗然後可志也用火焚之餘以祭宗廟非
人子所以盡其心力不敬之大也】 天子親耕以共粢盛【天子親耕其禮三推黍稷曰粢在
器曰盛】 王后親蠶以共祭服【王后親蠶齊戒躬桑夫人三纁遂班三宮朱綠玄黃以為黼
黻文章既成君服以祀之】 國非無良農女工也以為人之所盡事其祖禰不若以己所自親
者也【凱曰夫治人之道莫急于禮禮有五經莫重于祭祭者非物自外至者也由中出者身
致其誠信然後可以交于神明祭之道也】 何用見其未易灾之餘而嘗也曰甸粟而內之三
宮三宮米而藏之御廩【甸甸師掌田之官也三宮三夫人也宗廟之禮君親割夫人親舂】
夫嘗必有兼甸之事焉【夫人親舂是兼甸之事】 壬申御廩灾乙亥嘗以為未易灾之餘而
嘗也【鄭嗣曰壬申乙亥相去四日言用日至少而功多明未足及易而嘗 穀梁傳】 御廩粢
盛委之所藏也【黍稷曰粢在器曰盛委積也御者謂御用于宗廟廩者擇治穀名禮天子親
耕東田千畝諸侯百畝后夫人親西郊采桑以共粢盛祭服躬行孝道以先天也】 御廩灾不
如勿嘗而已矣【當廢一時祭自責以奉天灾也知不以不時者書本不當嘗也 公羊傳】 敬
姜曰天子日入監九御使潔奉禘郊之粢盛【監視也九御九嬪之官主粢盛祭服者】 而後
即安【即就也國語魯語】

天子諸侯無事則歲三田一為乾豆【乾豆謂腊之以為祭祀豆實也 王制】
服不氏凡祭祀共猛獸【謂中膳羞者獸人冬獻狼春秋傳曰熊蹯不孰 夏官】
圉人祭祀共其生獸死獸之物【地官】 獸人凡祭祀共其死獸生獸【共其完者天官】
掌畜祭祀共卵鳥【其卵可薦之鳥夏官】 人凡祭祀共其魚之鱻鼈鼈人祭祀共麇

羸蜚以授醢人【羸蜚蜚鄭司農云麇蛤也杜子春云麇蚌也蜚蛾子國語曰蟲舍蜚蜚
並天官】 甸衡祭祀共甸奠【甸奠籩豆之實魚鱸蜃蛤之屬】
澤虞凡祭祀共澤物之奠【澤物之奠亦籩豆之實芹茆蒹芡之屬 並地官】
庖人共祭祀之好羞【謂四時所為膳羞若荊州之鯪魚青州之蟹胥雖非常物進之孝也
天官】 甸人凡祭祀共其果蓏享亦如之【享納性地官】
甸師共野果蓏之薦【甸在遠郊之外郊外曰野果桃李之屬蓏瓜瓞之屬】 籩人掌四籩之
實【籩竹器如豆者其容實皆四升】 朝事之籩其實糒蕡白黑形鹽臠鮑魚鱸【蕡棗實也
鄭司農云朝事謂清朝未食先進寒具口實之籩熬麥曰糒麻曰蕡稻曰白黍曰黑粢鹽以為
虎形謂之形鹽故春秋傳曰鹽虎形玄謂以司尊彝之職參之朝事謂祭宗廟薦血腥之事形
鹽鹽之似虎者臠臠生魚為大臠鮑者于楅室中糗乾之出于江淮也鱸者析乾之出東海王
者備物近者腥之遠者乾之因其宜也今河間以北煮種麥賣之名曰逢燕人膾魚方寸切其
腴以啗所貴】 饋食之籩其實棗棗桃乾榛榛實【饋食薦孰也今吉禮存者特牲少牢諸侯
之大夫士祭禮也不裸不薦血腥而自薦孰始是以皆云饋食之禮乾榛乾梅也有桃諸梅諸
是其乾者榛似栗而小】 加籩之實蒹芡棗脯蒹芡棗脯【加籩諸尸既食后亞獻尸所加之
籩重言之者以四物為八籩蒹芡也芡雞頭也栗與饋食同鄭司農云蒹芡脯脩】 羞籩之實

糗餌粉飧【羞籩謂若少牢主人酬尸宰夫羞房中之羞于尸侑主人主婦皆右之者故書飧作茨鄭司農云糗熬大豆與米也粉豆屑也茨字或作飧謂乾餌餅之也玄謂此二物皆粉稻米黍米所為也合蒸曰餌餅之曰飧糗者擣粉熬大豆為餌飧之黏著以粉之耳餌言糗飧言粉互相足】凡祭祀共其籩薦羞之實【薦羞皆進也未食未飲曰薦既食既飲曰羞】醯人掌四豆之實朝事之豆其實韭菹醯醢昌本麋臠菁菹鹿臠茆菹麋臠【醯肉汁也昌本昌蒲根切之四寸為菹三臠亦醯也作醯及臠者必先膊乾其肉乃後莖之雜以粱麴及塩漬以美酒塗置甑中百日則盛矣鄭司農云麋臠麋肝髓醢或曰麋臠醬也有骨為臠無骨為醢菁菹韭菹鄭大夫謂茆為茅茆菹初生或曰茆水草杜子春讀茆為卯玄謂菁蔓菁也茆鳧葵也凡菹醢皆以氣味相成其狀未聞】饋食之豆其實葵菹羸醢脾析麇醢蜃蜃醢豚拍魚醢【羸蜃蜃大蛤蜃蜃子鄭司農云脾析牛百葉也蜃蛤也鄭大夫杜子春皆以拍為膊謂脇也或曰豚拍肩也今河間名豚脊聲如鍛鑄】加豆之實芹菹兔醢深蒲醢醢落菹鴈醢筍菹魚醢【芹楚葵也鄭司農云深蒲蒲莢入水深故曰深蒲或曰深蒲桑耳醢醢肉醬也落水中魚衣故書鴈或為鶉杜子春云當為鴈玄謂深蒲蒲始生水中子落箭萌筍竹萌】羞豆之實醢食糝食【鄭司農云醢食以酒醢為餅糝食菜餽蒸玄謂醢也內則曰取稻米舉糝漚之小切狼臠膏以與稻米為一又曰糝取牛羊豕之肉三如一小切之與稻米稻米二肉一合以為餌煎之】凡祭祀共薦羞之豆實醢人掌共五齊七菹凡醢物以共祭祀之齊菹凡醢醬之物【齊菹醬屬醢人者皆須醢成味】塩人祭祀共其苦塩散塩【杜子春讀苦為鹽謂出塩直用不凍治鄭司農云散塩凍治者玄謂散塩鬻水為塩】

宰夫以式法掌祭祀之戒具與其薦羞【薦脯塩也羞庶羞內羞】腊人凡祭祀共豆脯薦脯膾胖凡腊物【脯非豆實豆當為羞聲之誤也鄭司農云膾膾肉鄭大夫云胖讀為判杜子春讀胖為版又云膾胖皆謂夾脊肉又云禮家以胖為半體玄謂公食大夫禮曰庶羞皆有大者此據肉之所擬祭者也又引有司曰主人亦一魚加膾祭于其上者此據主人擬祭者膾與大亦一也內則曰麋鹿田豕麇皆有胖足相參正也大者截之大臠膾者魚之反覆膾又詁曰大二者同矣則是膾亦腠肉大臠胖宜為脯而腥胖之言片也析肉意也禮固有腥臠爛雖其有為孰之皆先制乃亨

並天官】量人凡祭祀制其從獻脯燔之數量【鄭司農云从獻者肉殽从酒也】

【玄謂燔从于獻酒之肉炙也數多少也量長短也 夏官】外饗掌外祭祀之割亨共其膾脩刑膾陳其鼎俎實之牲體魚腊【脩鍛脯也鄭司農云刑膾謂夾脊肉或曰膾肉也玄謂刑鉶羹也膾腠肉大臠所以祭者】

亨人祭祀共大羹鉶羹【大羹肉湑鄭司農云大羹不致五味鉶羹加鹽菜矣 並天官】

庶羞不踰牲【祭以羊則不以牛肉為羞 王制】

右庶羞 鳥獸之肉不登于俎則公不射【隱五年左氏傳】水草之菹陸產之醢小物備矣三牲之俎八簋

之實美物備矣昆蟲之異草木之實陰陽之物備矣【詳見祭義】薦不美多品【禮器】苟有明信澗谿沼沚之毛【谿亦澗也沼池也沚小渚也毛草也】蘋蘩蕒藻之菜【蘋大萍也蘩皤蒿蕒藻聚藻也】筐筥錡釜之器【方曰筐圓曰筥無足曰釜有足曰錡】潢汙行潦之

水【潢汙渟水行潦流潦】可薦于鬼神【隱三年左氏傳】里革曰古者大寒降土蟄發水虞于是乎講罍罍取名魚登川禽而嘗之寢廟鳥獸成水蟲孕水虞于是乎禁罍罍設罍鄂以實廟庖【詳見通禮政事下】屈到嗜芰【屈到楚卿屈蕩子子夕也芰菱也】有疾召其宗老而屬之【家臣曰老宗老為宗人者】曰祭我必以芰及祥【祥祭也】宗老將薦芰屈建命去之【建屈到之子子木也】宗老曰夫子屬之【夫子屈到也】子木曰不然夫子承楚國之政【承奉也】其法刑在民心而藏在王府上之可以比先王下之可以訓後世雖微楚國諸侯莫不譽【微無也雖使無楚國之稱諸侯猶皆譽之以為善也】其祭典有之曰國君有牛享【諸侯有大牢也】大夫有羊饋【羊饋少牢也】士有豚犬之饋【士以特牲】庶人有魚炙之薦【庶人祀以魚】籩豆脯醢則上下共之【共之以多少為差也】不羞珍異不陳庶侈【羞進也庶衆也侈猶多也】夫子不以其私欲干國之典遂不用【干犯也國語楚語】豐卷將祭請田焉子產弗許【田獵也】曰唯君用鮮【鮮野獸】衆給而已【衆臣祭以芻豢為足襄三十年左氏傳】

夏后氏尚明水殷尚醴周尚酒【此皆其時之用耳言尚非也明堂位】司烜氏掌以夫遂取明火于日以鑒取明水于月以共祭祀之明盥明燭共明水【夫遂陽遂也鑒鏡屬取水者世謂之方諸取日之火月之水欲得陰陽之絜氣也明燭以照饌陳明水以為玄酒鄭司農云夫發聲明謂以明水滌滌粢盛黍稷

秋官】酒人掌為五齊三酒祭祀則共奉之以役世婦【世婦謂宮】

【卿之官掌女宮之宿戒及祭祀比其具酒人共酒因留與其奚為世婦役亦官聯】凡祭祀共酒以往【不言奉小祭祀】酒正辨五齊之名一曰泛齊二曰醴齊三曰盎齊四曰緹齊五曰沈齊【泛者成而滓浮泛泛然如今宜成醪矣醴猶體也成而汁滓相將如今恬酒矣盎猶翁也成而翁翁然蔥白色如今酇白矣緹者成而紅赤如今下酒矣沈者成而滓沈如今造清矣自醴以上尤濁縮酌者盎以下差清其象類則然古之法式未可盡聞杜子春讀齊皆為粢又禮器曰緹酒之用玄酒之尚玄謂齊者每有祭祀以度量節作之】辨三酒之物一曰事酒二曰昔酒三曰清酒【鄭司農云事酒有事而飲也昔酒無事而飲也清酒祭祀之酒玄謂事酒酌有事者之酒其酒則今之醴酒也昔酒今之酋久白酒所謂舊醴者也清酒今中山冬釀接夏而成】凡祭祀以法共五齊三酒以實八尊大祭三貳中祭再貳小祭壹貳皆有酌數唯齊酒不貳皆有器量【酌器所用注尊中者數量之多少未聞鄭司農云三貳三益副之也大祭天地中祭宗廟小祭五祀齊酒不貳為尊者質不敢副益也杜子春云齊酒不貳謂五齊以祭不益也其三酒人所飲者益也弟子職曰周旋而貳唯嘽之視玄謂大祭者王服大裘衮冕所祭也中祭者王服鷩冕毳冕所祭也小祭者王服希冕玄冕所祭也三貳再貳壹貳者謂就三酒之尊而益之也禮運曰玄酒在室醴醑在戶粢醑在堂澄酒在下澄酒是三酒也益之者以飲諸臣若今常滿尊也祭祀必用五齊者至敬不尚味而貴多品並天官】司尊彝掌六尊六彝之位詔其酌辨其用與其實【位所陳之處酌沛之使可酌各異也用四時祭祀所用亦不同實鬱及醴齊之屬】凡六彝六尊之酌鬱齊獻酌醴齊縮酌盎齊況酌凡酒脩酌【故書縮為數齊為盥鄭司農云獻讀為儀儀酌有威儀多也況酌者況拭勺而酌也脩酌者以水洗勺而酌也盥讀皆為齊和之齊杜子春云數當為縮齊讀皆為粢玄謂禮運曰玄酒在室醴醑在戶粢醑在堂澄酒在下以五齊次之則醑酒盎齊也郊特牲曰縮酌用茅明酌也醑酒況于

清汁獻況于醴酒猶明清與醴酒于舊澤之酒也此言轉相沛成也獻讀為摩莎之莎齊語聲之誤也煮鬱和秬鬯以醴酒摩莎沛之出其香汁也醴齊尤濁和以明酌沛之以茅縮去滓也盎齊差清和以清酒沛之而已其餘三齊泛从醴醴沈从盎凡酒謂三酒也脩讀為滌濯之滌滌酌以水和而沛之今齊人命浩酒曰滌明酌酌取事酒之上也澤讀曰醴明酌清酒醴酒沛之皆以舊醴之酒凡此四者稌用鬱齊朝用醴齊饋用盎齊諸臣自酢用凡酒唯大事于大廟備五齊三酒 春官】 祭齊加明水明水況齊縮酌用茅明酌也醴酒況于清汁獻況于醴酒猶明清與醴酒于舊澤之酒也【詳見祭義】

右酒齊

典瑞大祭祀共其玉器而奉之【玉器謂四圭裸圭之屬 春官】 泰有虞氏之尊也山罍夏后氏之尊也著殷尊也犧象周尊也【泰用瓦著著地無足】 爵夏后氏以琖殷以斚周以爵【畫禾稼也詩曰洗爵奠 】 灌尊夏后氏以雞夷殷以 周以黃目其勺夏后氏以龍勺殷以疏勺周以蒲勺【夷讀為彝周禮春祠夏禴裸用雞彝鳥彝秋嘗冬烝裸用 彝黃彝龍龍頭也疏通刻其頭蒲合蒲如鳧頭也 明堂位】 小宗伯辨六彝之名物以待果將【六彝雞彝鳥彝 彝黃彝虎彝蜚彝果讀曰裸】 辨六尊之名物以待祭祀【待者有事則給之鄭司農云六尊獻尊象尊壺尊著尊大尊山尊】 司尊彝春祠夏禴裸用雞彝鳥彝皆有舟其朝踐用兩獻尊其再獻用兩象尊皆有罍諸臣之所昨也秋嘗冬烝裸用斚彝黃彝皆有舟其朝獻用兩著尊其饋獻用兩壺尊皆有罍諸臣之所昨也凡四時之間祀追享朝享裸用虎彝蜚彝皆有舟其朝踐用兩大尊其再獻用兩山尊皆有罍諸臣之所昨也【詳見天子諸侯廟享】 鬯人掌共秬鬯而飾之【秬鬯不和鬱者飾之謂設巾】 凡祭祀社壇用大罍【壇謂委土為壇壇所以祭也大罍瓦罍】 祭門用瓢齋【祭謂營鄼所祭門國門也春秋傳曰日月星辰之神則雪霜風雨之不時于是乎祭之山川之神則水旱癘疫之不時于是乎祭之魯莊二十五年秋大水鼓用牲于門故書瓢作剽鄭司農云讀剽為瓢杜子春讀齋為粢瓢謂瓠蠡也粢盛也玄謂齋謂為齊取甘瓠割去柢以齊為尊】 廟用脩凡山川四方用蜃凡裸事用概凡鬯事用散【裸當為埋字之誤也故書蜃或為謨杜子春云謨當為蜃書亦或為蜃蜃水中蜃也鄭司農云脩模概散皆器名玄謂廟用脩者謂始禘時自饋食始脩蜃概散皆漆尊也脩讀曰卣卣中尊謂獻象之屬尊者彝為上罍為下蜃畫為蜃形蚌曰合漿尊之象概尊以朱帶者無飾曰散 並春官】 宗廟之祭貴者獻以爵賤者獻以散尊者舉觶卑者舉角【凡觶一升曰爵二升曰觶三升曰觶四升曰角五升曰散 禮器】 有虞氏之兩敦夏后氏之四璉殷之六瑚周之八簋【皆黍稷器制之異同未聞】 俎有虞氏以梲夏后氏以鴈殷以楬周以房俎【梲斷木為四足而已鴈之言鑿也謂中足為橫鉅之象周禮謂之距楬之言枳楬也謂曲橈之也房謂足下跗也上下兩間有似于堂房魯頌曰籩豆大房】 夏后氏以楬豆殷玉豆周獻豆【楬無異物之飾也獻疏刻之齊人謂無髮為禿楬 明堂位】 司巫祭祀則共匱主及道布及菹館【杜子春云菹讀為鉏匱器名主謂木主也道布新布三尺也鉏藉也館神所館止也書或為菹館或為租飽或曰布者以為席也租飽茅裹肉也玄謂道布者為神所設巾中霽禮曰以功布為道布屬于几也菹之言藉也祭食有當藉者館所以承菹謂若今筐也主先匱菹後館互言之者明共主以匱共菹以筐大祝取其主菹陳之器則退也士虞禮曰苴苴茅長五寸實于筐饌于西牀上又曰祝盥取苴降洗之升入設于几東席上束縮 春官】

暢白以掬杵以梧【所以擣鬱也掬拍也 雜記】 掌蜃祭祀共蜃器之蜃【飾祭器之屬也鬯人職曰凡四方山川用蜃器春秋定十四年秋天王使石尚來歸蜃蜃之器以蜃飾因名焉鄭司農云蜃可以白器令色白 地官】 淩人祭祀共冰鑑【鑑如甄大口以盛水 天官】 司几筵掌五几五席之名物辨其用與其位【五几左右玉彫彤漆書五席莞藻次蒲熊用位所設之席及其處】 凡大朝覲大饗射凡封國命諸侯王位設黼依依前南鄉設莞筵紛純加纁席黼純左右玉几【斧謂之黼其繡白黑采以絳白為質依其制如屏風然于依前為王設席左右有几優至尊也鄭司農云紛讀為幽又讀為和粉之粉謂白繡也純讀為均服之均純緣也纁讀為藻率之藻次席虎皮為席書顧命曰成王將崩命大保芮伯畢公等被冕服馮玉几玄謂紛如綬有文而狹者纁席削蒲翦展之編以五采若今合歡矣畫謂雲氣也次席桃枝席有次列成文者】 祀先王昨席亦如之【鄭司農云昨席于主階設席王所坐也玄謂昨讀曰酢謂祭祀及王受酢之席尸卒食王醕之卒爵祝受之又酌授尸尸酢王于是席王于戶內后諸臣致爵乃設席】 諸侯祭祀席蒲筵纁純加莞席紛純右彫几【纁畫文也不莞席加纁者纁柔嚙不如莞清堅又于鬼神宜】 昨席莞筵紛純加纁席畫純【昨讀亦曰酢】 甸役則設熊席右漆几【謂王甸有司祭表貉所設席 春官】 鬼神之祭單席【禮器】 冢人掌共巾冢【共巾可以覆物】 祭祀以疏布巾冢八尊【以疏布者天地之神尚質】 以畫布巾冢六彝【宗廟可以文畫者畫其雲氣與 天官】 伊耆氏掌國之大祭祀共其杖咸【咸讀為函老臣雖杖于朝事鬼神尚敬去之有司以此函藏之既事乃授之 秋官】 鄉師正歲稽其鄉器閭共祭器鄉共吉凶禮禮樂之器【祭器者簠簋鼎俎之屬閭胥主集為之吉器若閭祭器者也 地官】

孟冬命工師效功陳祭器案度程【主于祭器祭器尊也度謂制大小也程謂器所容也 月令】 凡家造祭器為先犧賦為次養器為後【大夫稱家謂家始造事犧賦以賦出牲】 無田祿者不設祭器有田祿者先為祭服【祭器可假祭服宜自有】 君子雖貧不粥祭器雖寒不衣祭服【廣敬鬼神也粥賣也 曲禮】 四命受器【鄭司農云受祭器為上大夫玄謂此公之孤始得有祭器者也禮運曰大夫具官祭器不假聲樂皆具非禮也王之下大夫亦四命 春官大宗伯】 大夫祭器不假祭器未成不造燕器【造為也王制】 大夫士去國祭器不踰竟【此用君祿所作取以出竟恐辱親也】 大夫寓祭器于大夫士寓祭器于士【寓寄也與得用者言寄覬已後還 曲禮】 宗廟之器不粥于市【王制】 君子敬則用祭器【謂朝聘待賓客崇敬不敢用燕器也 表記】 祭服敝則焚之祭器敝則埋之【此皆不欲人褻之也焚之必已不用埋之不知鬼神之所為 曲禮】

右祭器 大夫祭器不假非禮也【臣之奢富擬于國君敗亂之國也禮運】

內牢中春詔后帥外內命婦始蠶于北郊以為祭服【天官】 王后蠶于北郊以共純服夫人蠶于北郊以共冕服

【祭統 親蠶之禮詳見內治篇】

季夏命婦官染采黼黻文章必以法故無或差貸以給郊廟祭祀之服【詳月令】 典 凡祭祀共黼畫組就之物【以給衣服冕旒及依盟巾之屬白與黑謂之黼采色一成曰就

天官】弁師掌王之五冕【詳見名器上篇】司服掌王之吉凶衣服

辨其名物與其用事【用事祭祀視朝甸凶弔之事衣服各有所用】王之吉服祀昊天上帝則服大裘而冕祀五帝亦如之享先王則袞冕享先公饗射則鷩冕祀四望山川則毳冕祭社稷五祀則希冕祭羣小祀則玄冕【詳見名器】公之服自袞冕而下如王之服侯伯之服自鷩冕而下如公之服子男之服自毳冕而下如侯伯之服孤之服自希冕而下如子男之服卿大夫之服自玄冕而下如孤之服士之服自皮弁而下如大夫之服其齊服有玄端素端【詳見名器】凡大祭祀共其衣服而奉之【奉猶送也送之于王所 春官】

追師掌王后之首服為副編次追衡笄為九嬪及外內命婦之首服以待祭祀【詳見名器】內司服掌王后之六服褱衣揄狄闕狄鞠衣展衣緣衣素沙辨外內命婦之服鞠衣展衣緣衣素紗凡祭祀共后之衣服及九嬪世婦凡命婦共其衣服【詳見名器】

王后褱衣夫人揄狄君命屈狄再命褱衣一命褱衣士祿衣【詳見名器】屨人掌王及后之服屨為赤舄黑舄赤纁黃纁青句素屨葛屨辨外內命夫命婦之命屨功屨散屨凡四時之祭祀以宜服之【詳見名器】天子玉藻十有二旒前後邃延龍卷以祭玄端而朝日于東門之外聽朔于南門之外諸侯玄端以祭皮弁以聽朔于太廟【詳見名器及朝廷禮】大夫冕而祭于公弁而祭于已士弁而祭於公冠而祭于已士弁而親迎然則士弁而祭于已可也【詳見名器】

少牢饋食之禮主人朝服主婦被錫衣侈袂主婦贊者亦被錫衣侈袂【詳見少牢】

特牲饋食之禮主人冠端玄子姓兄弟如主人之服有司羣執事如兄弟服【詳見特牲】特牲饋食其服皆朝服玄冠緇帶緇鞶唯尸祝佐食玄端玄裳黃裳雜裳可也皆爵鞶【同上】

主婦纁笄宵衣【同上】

有虞氏皇而祭夏后氏收而祭殷人鬐而祭周人冕而祭【詳見名器】

玄冠丹組纁諸侯之齊冠也玄冠綦組纁士之齊冠也【詳見祭通禮齊戒章】

周弁殷鬐夏收【同上】有虞氏服韍夏后氏山殷火周龍章【詳見名器】

一命緼韍幽衡再命赤韍幽衡三命赤韍蔥衡【同上】

鄉師比共吉凶二服【吉服者祭服也比長主集為之地官】

有田祿者先為祭服君子雖寒不衣祭服【詳見祭器】

祭服敝則焚之【同上】燕衣不踰祭服【王制】

右祭服

大司樂以六律六同五聲八音六舞大合樂以致鬼神示乃分樂而序之以祭以享以祀乃奏黃鍾歌大呂舞雲門以祀天神乃奏大簇歌應鍾舞咸池以祭地示乃奏姑洗歌南宮舞大磬以祀四望乃奏蕤賓歌函鍾舞大夏以祭山川乃奏夷則歌小呂舞大濩以享先妣乃奏無射歌夾鍾舞大武以享先祖凡六樂者文之以五聲播之以八音凡六樂者一變而致羽物及川澤之示再變而致羸物及山林之示三變而致鱗物及丘陵之示四變而致毛物及墳衍之示五變而致介物及土示六變而致象物及天神凡樂圖鍾為宮黃鍾為角太簇為徵姑洗為羽靈鼓靈鼗孤竹之管雲和之琴瑟雲門之舞冬日至于地上之圜丘奏之若樂六變則天神皆降可得而禮矣凡樂函鍾為宮太簇為角姑洗為徵南宮為羽靈鼓靈鼗孫竹之管空桑之琴

瑟咸池之舞夏日至于澤中之方丘奏之若樂八變則地示皆出可得而禮矣凡樂黃鍾為宮大呂為角大簇為徵應鍾為羽路鼓路鼗陰竹之管龍門之琴瑟九德之歌九磬之舞于宗廟之中奏之若樂九變則人鬼可得而禮矣凡樂事大祭祀宿縣遂以聲展之王出入則令奏王夏尸出入則令奏肆夏牲出入則令奏昭夏帥國子而舞【詳見樂制】典庸器掌藏樂器及祭祀則帥其屬而設筍虞【詳見樂器】鐘師凡祭祀奏燕樂
鐃師凡祭祀鼓其金奏之樂笙師凡祭祀共其鐘聲之樂
磬師凡祭祀奏縵樂大師大祭祀帥瞽登歌令奏擊拊下管播樂器令奏

鼓輅 小師大祭祀登歌擊拊下管擊應鼓徹歌凡小祭祀小樂事鼓輅 樂師凡國之小事用樂者令奏鐘鼓凡樂成則告備詔來瞽臯舞及徹帥學士而歌徹令相【已上並詳見樂制】
鼓人以鼙鼓鼓神祀以靈鼓鼓社祭以路鼓鼓鬼享【詳見樂器】
大胥凡祭祀之用樂者以鼓徵學士【詳見樂制】 籥師祭祀則鼓羽籥之舞
司干掌舞器祭祀舞者既陳則授舞器既舞則受之 司兵祭祀授舞者兵
司戈盾祭祀授旅賁戍故士戈盾授舞者兵亦如之 舞師掌教兵舞帥而舞山川之祭祀教帔舞帥而舞社稷之祭祀教羽舞帥而舞四方之祭祀教皇舞帥而舞旱暵之事凡野舞則皆教之凡小祭祀則不興舞 旄人掌教舞散樂舞夷樂凡四方之以舞仕者屬焉凡祭祀舞其燕器 韡師掌教韡樂祭祀則帥其屬而舞之
鞀韞氏掌四夷之樂與其聲歌祭祀則歛而歌之【並詳見歌舞】

右樂舞 昔者周公旦有勲勞于天下周公既没成王康王追念周公之所以勲勞者而欲尊魯故賜之以重祭外祭則郊社是也內祭則大嘗禘是也大夫嘗禘升歌清廟下而管象朱干玉戚以舞大武八佾以舞大夏此天子之樂也康周公故以賜魯也子孫纂之至于今不廢所以明周公之德而又以重其國也【詳見祭義】 季夏六月以禘禮祀周公于太廟升歌清廟下管象朱干玉戚冕而舞大武皮弁素積裼而舞大夏昧東夷之樂也任南蠻之樂也納夷蠻之樂于大廟言廣魯于天下也【詳見廟享禘章】 荀偃士句曰魯有禘樂賓祭用之【詳見歌舞】 隱公五年考仲子之宮將萬焉公問羽數于衆仲對曰天子用八諸侯用六大夫四士二夫舞所以節八音而行八風故自八以下公從之于是初獻六羽始用六佾也【同上】 昭公將禘于襄公萬者二人其衆萬于季氏臧孫曰此之謂不能庸先君之廟【同上】 孔子謂季氏八佾舞于庭是可忍也孰不可忍也
三家者以雍徹子曰相維辟公天子穆穆奚取于三家之堂【並詳見歌舞】

季冬乃命四監收秩薪柴共郊廟及百祀之薪燎【四監主山林川澤之官也大者可析謂之薪小者合束謂之柴薪施炊爨柴以給燎春秋傳曰其父析薪
月令】 遂人凡國祭祀令野職【野職薪炭之屬 地官】 委人以式法共祭祀之薪蒸木材【式法故事之多少也薪蒸給炊及燎粗者曰薪細者曰蒸木材給張事同上】 司烜氏掌以夫遂取明火于日共祭祀之明燭凡邦之大事共墳燭庭燎【故書墳為蕢鄭司農云蕢燭麻燭也玄謂墳大也樹于門外曰大燭于門內曰庭燎皆所以照衆為明 秋官】 甸師祭祀共蕭茅【鄭大夫云蕭字或為茜茜讀為縮束茅立之祭前沃酒其上酒滲下去若神飲之故謂之縮縮浚也故齊桓公責楚不貢包茅王祭不共無以縮酒杜子春讀為蕭蕭香蒿也玄謂詩所云

取蕭祭脂郊特牲云蕭合黍稷臭陽達于墻屋故既薦然後炳蕭合馨香合馨香者是蕭之謂也茅以共祭之苴亦以縮酒苴以藉祭縮酒沛酒也醴齊縮酌 天官】鄉師大祭祀共茅菹【杜子春云菹當為苴以茅為苴若葵苴也鄭大夫讀菹為藉謂】

【祭前藉也易曰藉用白茅无咎玄謂菹土虞禮所謂苴刈茅長五寸束之者是也祝設于几東席上食佐食取黍稷祭于苴三取膚祭祭如初此所以承祭既祭蓋束而去之守祧職云既祭藏其隋是與地官】

掌蜃祭祀共白盛之蜃【盛猶成也謂飾牆使白之蜃也今東萊用蛤謂之又灰云

同上】幕人凡祭祀共其帷幕幄帟綬【共之者掌次當以張】掌次凡祭祀張其旅幕張尸次【旅衆也公卿以下即位所祭祀之門外以待事為之張大幕尸則有幄鄭司農云尸次祭祀之尸所居更衣帳 同上】

右薪茅雜物 齊桓公伐楚曰爾貢包茅不入王祭不共無以縮酒寡人是徵【包裹束也茅青茅也束茅而灌之以酒為縮酒尚書包匭菁茅茅之為異未審 僖四年左傳】

五穀不升謂之大侵【侵傷】大侵之禮禱而不祀【周書曰大荒有禱無祀 襄二十四年穀梁傳】

凶年則乘鵩馬祀以下牲【自貶損亦取易供也鵩馬六種最下者下牲少牢若特豕特豚也 雜記】閭師凡庶人不畜者祭無牲不耕者祭無盛【掌罰其家事也盛黍稷也 地官】

右殺禮 孔子在齊齊大旱春飢景公問于孔子曰如之何孔子曰凶年則乘鵩馬力役不興馳道不修【馳道君行之路】祈以幣玉【君所祈請用幣及玉不用牲也】祭祀不縣【不作樂也】祀以下牲【當用大牢者用少牢】此賢君自貶以救民之禮也【家語】鄭公孫黑肱有疾歸邑于公【黑肱子張】召室老宗人立段【段子石黑肱子】而使黜官薄祭【黜官無多受職】祭以特羊殷以少牢足以供祀【四時祀一羊三年盛祭以羊豕殷盛也 襄二十二年左氏傳】

禮書綱目卷四十六

卷四十七

欽定四庫全書

禮書綱目卷四十七 婺源江永撰

祭義

夫禮必本于天殽于地列于鬼神【聖人則天之明因地之利取法度于鬼神以制禮下教令也既又祀之教民嚴上也鬼者精魂所歸神者引物而出謂祖廟山川五祀之屬也】達于喪祭【民知嚴上則此禮達于下也 禮運】夫政必本于天殽以降下【降下也殽天之氣以下教令天有運移之期陰陽之節也】命降于社之謂殽地【謂教令由社下者也社土地之主也周禮土會之法有五地之物生】降于祖廟之謂仁義【謂教令由祖下者大傳曰自禰率而上至于祖遠者輕仁也自祖率而下至于禰高者重義也】降于山川之謂興作【謂教令由山川下者也山川有草木禽獸可作器物共國事】降于五祀之謂制度【謂教令由五祀下者五祀有□雷門戶灶行之神此始為宮室制度 同上】先王患禮之不達于下也【患下不信也】故祭帝于郊所以定天位也祀社于國所以列地利也祖廟所以本仁也山川所以儋鬼神也五祀所以本事也【此所以達禮于下也教民尊神也】故禮行于郊而百神受職焉禮行于社而百貨可極焉禮行于祖廟而孝慈服焉禮行于五祀而正法則焉【言信得其禮則神物與天皆應之百神列宿也百物金玉之屬】故自郊社祖廟山川五祀義之脩而禮之藏也【脩猶飾也藏若其城郭然 同上】天地之祭宗廟之事倫也【倫之言順也】社稷山川之事鬼神之祭體也【天地人之別體也 禮器】祀帝于郊敬之至也【言就而祭之不敢致也】宗廟之祭仁之至

也【仁恩也父子主恩也 同上】子曰郊社之義所以仁鬼神也嘗禘之禮所以仁昭穆也【仁猶存也凡存此者所以善全之道也郊社嘗禘存死之善者也郊有后稷社有句龍】明乎郊社之義嘗禘之禮治國其如指諸掌而已乎【治國指諸掌言易知也郊社嘗禘尊卑之事有治國之象焉 仲尼燕居】昔先王之制禮也因其財物而致其義焉爾故作大事必順天時【大事祭祀也春秋傳曰啟蟄而郊龍見而雩始殺而嘗閉蟄而烝】為朝夕必放于日月【日出東方月生西方】為高必因丘陵【謂冬至祭天于圓丘之上】為下必因川澤【謂夏至祭地于方澤之中】是故天時雨澤君子達亹亹焉【達猶皆也亹亹勉勉也君子愛物見天雨澤皆勉勉勸樂】是故昔先王尚有德尊有道任有能舉賢而置之聚衆而誓之【古者將有大事必選賢誓衆重事也】是故因天事天【天高因高者以事也】因地事地【地下因下者以事也】因名山升中于天【名猶大也升上也中猶成也謂巡守至于方嶽燔柴祭天告以諸侯之成功也孝經說曰封乎泰山考績燔燎禘乎梁甫刻石紀號也】因吉土以享帝于郊【吉土王者所卜而居之土也饗帝于郊以四時所兆祭于四郊者也今漢亦四時迎氣其禮則簡】升中于天而鳳凰降龜龍假【功成而太平陰陽氣和而致象物】饗帝于郊而風雨節寒暑時【五帝主五行五行之氣和而庶徵得其序也五行木為雨金為暘火為燠

水為寒土為風】是故聖人南面而立而天下大治【南面立者視朝 禮器】郊之祭也迎長日之至也【易說曰三王之郊一用夏正夏正建寅之月也此言迎長日者建卯而晝夜分而日長也家語王肅註曰周人始以日至之月冬至而日長】大報天而主日也【大猶徧也天之】

【神日為尊】兆于南郊就陽位也【日太陽之精也 家語云兆丘于南所以就陽位也于郊故謂之郊焉王曰兆丘于南謂之圜丘兆之于南郊也然則郊之名有三焉築為圜丘以象天自然故謂之圜丘圜丘人之所造故謂之泰壇于南郊在南說學者謂南郊與圜丘異若是則詩易尚書謂之圜丘也又不通泰壇之名或乃謂周官圜丘虛妄之言皆不通典制也】掃地而祭於其質也【王曰地圜丘之地掃焉而祭貴其質也】器用陶匏以象天地之性也【觀天下之物無可以稱其德 王曰人之作物無可稱之故取天地之性以自然也】于郊故謂之郊牲用騂尚赤也用犢貴誠也【尚赤者周也 王曰犢質慤貴誠之美也】郊之用辛也周之始郊日以至【言日以周郊天之月而至陽氣新用事順之而用辛日此說非也郊天之月而日至魯禮也三王之郊一用夏正魯以無冬至祭天于圜丘之事是以建子之月郊天示先有事也用辛日者凡為人君當齊戒自新耳周衰禮廢儒者見周禮盡在魯因推魯禮以言周事家語云周之始郊其月以日至其日用上辛至于啟蟄之月則又祈穀于上帝此二者天子之禮也魯無冬至大郊之事降殺于天子是以不同也王曰祈求也為農求穀于上帝月令孟春之月乃以元日祈穀于上帝魯無仲冬大郊之事至于祈農與天子同故春秋傳曰夫郊祀后稷以祈農事也是故啟蟄而郊郊而後耕而學者不知推經禮之指歸皮膚妄說乃至顛倒神祇變易時日遷改兆位良可痛心者也】卜郊受命于祖廟作龜于禰宮尊祖親考之義也【受命謂告之退而卜 王曰禰宮父廟也受祭天之命于祖而作龜于父廟】卜之日王立于澤親聽誓命受教諫之義也【澤澤宮也所以擇賢之宮也既卜必到擇宮擇可與祭祀者因誓勅之以禮也禮器曰舉賢而置之聚眾而誓之是也 王曰誓命祭天所以威儀也王親受之故曰受教諫之義】獻命庫門之內戒百官也大廟之命戒百姓也【王自澤宮而還以誓命重相申勅也庫門在雉門之外入庫門則至廟門外矣大廟者祖廟也百官公卿以下也百姓王之親也入廟戒親親也王自此還齊路寢之室庫或為廐】祭之日王皮弁以聽祭報示民嚴上也【報猶白也夙興朝服以待白祭事者乃後服祭服而行事也周禮祭之日小宗伯逆盥省鑊告時于王告備于王也】喪者不哭不敢凶服汜埽反道鄉為田燭【謂郊道之民為之也反道剗令新土在上也田燭田首為燭也】弗命而民聽上【化王嚴上】祭之日王被袞以象天【謂有日月星辰之章此魯禮也周禮王祀昊天上帝則服大裘而冕祀五帝亦如之魯侯之服自袞冕而下也家語云天子大裘以黼之被袞象天又云既至泰壇王脫袞矣服袞以臨燔柴王曰大裘為黼文也言被之】

【大裘其有象天之文故被之道路至大壇而脫之】戴冕璪十有二旒則天數也【天之天數不過十二】乘素車貴其質也旒十有二旒龍章而設日月以象天也【設日月畫于旒上素車殷路也魯公之郊用殷禮也】天垂象聖人則之郊所以明天道也【明謂則之以示人也】帝牛不吉以為稷牛【養牲必有二也】帝牛必在滌三月稷牛唯具所以別事天神與人鬼也【滌牢中所搜除處也唯具遭時又選可用也】萬物本乎天人本乎祖此所以配上帝也【言俱本可以配】郊之祭也大報本反始也【郊特牲】有以下為貴者至敬不壇埽

地而祭有以素為貴者至敬無文大路素而越席犧尊疏布甬棹杓【明堂位曰大路殷路也甬或作幕棹木白理也 禮器】禮不盛服不充【禮盛者服充大事不崇曲敬】故大裘不裼乘路車不式【謂祭天也周禮王祀昊天上帝則服大裘而冕乘玉路或曰乘兵車不式玉藻】郊之祭也喪者不敢哭凶服者不敢入國門敬之至也【祭者吉禮不欲聞見凶人 祭義】子曰孝莫大于嚴父【萬物資始于乾人倫資父為天故孝行之大莫過于尊嚴其父也】嚴父莫大於配天則周公其人也【謂父為天雖無貴賤然以父配天之禮始自周公故曰其人也】昔者周公郊祀后稷以配天【后稷周之始祖也郊謂圜丘祀天也周公攝政因行郊天之祭乃尊始祖以配之也】宗祀文王於明堂以配上帝【明堂天子布政之堂也周公因祀五方上帝于明堂乃尊文王以配之也】是以四海之內各以其職來祭【君行嚴配之禮則德教刑于四海海內諸侯各脩其職來助祭也 孝經】郊則曷為必祭稷王者必以其祖配王者則曷為必以其祖配自內出者無匹不行自外至者無主不止【公羊傳詳見天神篇】祀乎明堂所以教諸侯之孝也【祀乎明堂宗祀文王 祭義】古者先王既有天下又崇立于上帝明神而敬事之【崇尊也立立其祀也上帝天也明神日月也】于是乎有朝日夕月以教民事君【禮天子以春分朝日以秋分夕月拜日于東門之外然則夕月在西門之外必矣 國語周語】古者帝王躬率有司百執事而以正月朝迎日于東郊所以為萬物先而尊事天也祀上帝于南郊所以報天德【堯典曰寅賓出日此之謂也 尚書大傳】三代之禮天子春朝朝日秋暮夕月所以明有別也【祭日東壇祭月西壇故以別內外以端其位 大戴禮】祭日于壇祭月于坎以別幽明以制上下【幽明者謂日照晝月照夜】祭日于東祭月于西以別外內以端其位【端正】日出于東月生于西陰陽長短終始相巡以致天下之和【巡讀如沿漢之沿謂更相从道 祭義】

雖為天子必有尊也貴為諸侯必有長也故天子朝日諸侯朝朔【穀梁傳詳見天神篇】天子冕而執鎮圭率諸侯而朝日東郊所以教尊尊也【大戴禮】社祭土而主陰氣也君南鄉于北墉下答陰之義也【墉謂之墉北墉社內北墉】日用甲日之始也【國中之神莫貴于社】天子大社必受霜露風雨以達天地之氣也【大社王為群姓所立】是故喪國之社屋之不受天陽也薄社北墉使陰明也【絕其陽通其陰而已薄社殷之社殷始都薄】社所以神地之道也地載萬物天垂象取財于地取法于天是以尊天而親地也故教民美報焉家主中霤而國主社宗本也【中霤亦土神也】唯為社事單出里唯為社田國人畢作唯社丘乘共粢盛所以報本反始也【單出里皆往祭社于都鄙二十五家為里畢作人則盡行非徒羨也丘十六井也四丘六十四井曰甸故謂之乘乘者以于車賦出長轂一乘乘或為鄰】季春出火為焚也【謂焚萊也凡出火以火出建辰之月火始出】然後簡其車賦而歷其卒伍而君親誓社以習軍旅左之右之坐之起之以觀其習變也【簡歷謂算具陳列之也君親誓社誓吏士以習軍旅既而遂田以祭社也言祭社則此是仲春之禮也仲春以火田田止弊火然後獻禽至季春出火而民乃用火今云季春出火乃誓社記者誤也社或為省】而流示之禽而塩諸利以觀其不犯命也【流猶行也行行田也塩讀為豔行田示之以禽使歆豔之觀其用命否也謂禽為利者凡田大獸公之小禽私也】求服其志不貪其得【失伍而獲猶為犯命】故以戰則克以祭則受福【郊特牲】王者所以有社稷何為天下求福報功人非土不立非穀不食土地廣博不可徧敬也五穀衆多不可一一而祭也故封土立社示有土尊稷五穀之長故封稷而祭之也王者諸侯俱兩社何俱有土之君太社為天下報功王社為京師報功大夫有民其有社稷者亦為報功也社稷在中門之外外門之內何尊而親之與先祖同

也不置中門內何敬之示不褻瀆也社稷所以有樹何尊而識之使民人望見師敬之又所以表功也尚書亡篇曰太社唯松東社唯柏南社唯梓西社唯栗北社唯槐王者自親祭社稷何社者土地之神也土生萬物天下之所主也尊重之故自祭也其壇大何如春秋文義曰天子之社稷廣五丈諸侯半之其色如何春秋傳曰天子有太社焉東方青色南方赤色西方白色北方黑色上冒以黃土故將封東方諸侯青土苴以白茅謹敬潔清也王者諸侯必有誠社何示有存亡也明為善者得之惡者失之禮曰亡國之社稷必以為宗廟之屏示賦之也【白虎通】五祀者何謂也謂門戶井灶中霤也所以祭何人之所處出入所飲食故為神而祭之祭五祀所以歲一徧何順五行也故春祭戶戶者人所出入春亦萬物始觸戶而出也夏祭灶者火之生人所以自養也夏亦火王長養萬物秋祭門門以閉藏自固也秋亦萬物成熟內備自守也冬祭井井者水之生藏在地中冬亦水王萬物伏藏六月祭中霤中霤者象土在中央也六月亦土王也天子諸侯以牛卿大夫以羊因四時牲也一說戶以羊灶以雉中霤以豚門以犬井以豕或曰中霤用牛其餘不得用豚井以魚【同上】王孫賈問曰與其媚于奧寧媚于竈何謂也【王孫賈衛大夫媚親順也室西南隅為奧灶者五祀之一夏所祭也凡祭五祀皆先設主而祭于其所然後迎尸而祭于奧略如祭宗廟之儀如祀灶則設主于灶陞祭畢而更設饌于奧以迎尸也故時俗之語因以奧有常尊而非祭之主灶雖卑賤而當時用事喻自結于君不如阿附權臣也賈衛之權臣故以此諷孔子】子曰不然獲罪于天無所禱也【天即理也其尊無對非奧灶之可比也逆理則獲罪于天矣豈媚于奧灶所能禱而免乎言但當順理非特不當媚灶亦不可媚于奧也

謝氏曰聖人之言遜而不迫使王孫賈而知此意不為無益使其不知亦非所以取禍 論語】五嶽者何謂也泰山東嶽也霍山南嶽也華山西嶽也常山北嶽也嵩高山中嶽也五嶽何以視三公能大布雲雨也能大斂雲雨也雲觸石而出膚寸而合不崇朝而雨天下施德博大故視三公也四瀆者何謂也江河淮濟也四瀆何以視諸侯能蕩滌垢濁焉能通百川于海焉能出雲雨千里焉為施甚大故視諸侯也山川何以視子男也能出物焉能潤澤物焉能生雲雨為恩多然品類以百數故視子男也【說苑】天子大蜡八【所祭有八神也】伊耆氏始為蜡【伊耆氏古天子號也】蜡也者索也【謂求索也】歲十二月合聚萬物而索饗之也【歲十二月周之正數謂建亥之月也享者祭其神也萬物有功加于民者神使為之也祭之以報焉造者配之也】蜡之祭也主先嗇而祭司嗇也【先嗇若神農者司嗇后稷是也】祭百種以報嗇也【嗇所樹藝之功使盡饗之】饗農及郵表畷禽獸仁之至義之盡也【農田畷也郵表畷謂田畷所以督約百姓于井間之處也詩云為下國畷郵禽獸服不氏所教擾猛獸也】古之君子使之必報之迎貓為其食田鼠也迎虎為其食田豕也迎而祭之也【迎其神也】祭坊與水庸事也【水庸溝也】曰土反其宅水歸其壑昆蟲毋作草木歸其澤【此蜡祝辭也若辭同則祭同處可知矣壑猶坑也昆蟲暑生寒死螟螽之屬為害者也】皮弁素服而祭素服以送終也葛帶榛杖喪殺也蜡之祭仁之至義之盡也【送終喪殺所謂老物也素服衣裳皆素】黃衣黃冠而祭息田夫也【祭謂既蜡臘先祖五祀也于是勞農以休息之論語曰黃衣狐裘】野夫黃冠黃冠草服也【言祭以息民服象其時物之色季秋而草木黃落】大羅氏天子之掌鳥獸者也諸侯貢屬焉草笠而至尊野服也【諸侯于蜡使使者戴草笠貢鳥獸也詩云彼都人士臺笠緇撮又曰其餉伊黍其笠伊糾皆言野人之服也】羅氏致鹿與女而詔客告也以戒諸侯曰好田好女者亡其國【詔使者使歸以此告其君所以戒之】天子樹瓜華不斂藏之種也【華果蓏也又詔以天子樹瓜蓏而已戒諸侯以蓄藏蘊財利也

】八蜡以記四方【四方方有祭也】四方年不順成八蜡不通以謹民財也【其方穀不熟則不通于蜡者使民謹于用財蜡有八者先嗇一也司嗇二也農三也郵表畷四也貓虎五也坊六也水庸七也昆蟲八也】順成之方其蜡乃通以移民也【移之言羨也詩頌豐年曰為酒為醴烝畀祖妣以洽百禮此其羨之與】既蜡而收民息已故既蜡君子不興功【收謂收斂積聚也息民與蜡異則黃衣黃冠而祭為臘必矣 郊特性】

祀先賢于西學所以教諸侯之德也【西學周小學也先賢有道德王所使教國子者 祭義】祭有祈焉【祈猶求也謂祈福祥求永貞也】有報焉【謂若穫禾報也】有由辟焉【由用也辟讀為弭謂弭災兵遠罪疾也 郊特性】君子曰禮之近人情者非其至者也【近人情者褻而遠之者敬】郊血大饗腥三獻爛一獻孰【郊祭天也大饗祫祭先王也三獻祭社稷五祀一獻祭羣小祀也爛沈肉于湯也血腥爛孰遠近備古今也尊者先遠差降而下至小祀孰而已 禮器】郊血大饗腥三獻爛一獻孰至敬不饗而貴氣臭也【血腥爛祭用氣 郊特性】孔子曰誦詩三百不足以一獻一獻之禮不足以大饗大饗之禮不足以大旅大旅具矣不足以饗帝【誦詩三百喻習多言而不學禮也大旅祭五帝也饗帝祭天】毋輕議禮【謂若誦詩者不可以強言禮 禮器】

禮有以多為貴者天子七廟諸侯五大夫三士一此以多為貴也【同上】王者天太祖諸侯不敢懷大夫士有常宗所以別貴始德之本也郊止天子社止諸侯道及士大夫所以別尊卑尊者事尊卑者事卑宜鉅者鉅宜小者小也故有天下者事七世有國者事五世有五乘之地者事三世有三乘之地者事二世待年而食者不得立宗廟所以別積厚積厚者流澤光也積薄者流澤卑也【大戴禮】清廟茅屋昭其儉也【以茅飾屋著儉也清廟肅然清靜之稱 桓二年左氏傳】王者所以立宗廟何緣生以事死敬亡若存故以宗廟而事之此孝子之心也宗者尊也廟者貌也象先祖之尊貌也【白虎通】子羔問曰祭典云昔者有虞氏祖顓頊而宗堯夏后氏亦祖顓頊而宗禹殷人祖契而宗湯周人祖文王而宗武王此四祖四宗或乃異代或其考祖之有功德其廟可也若有虞宗堯夏祖顓頊皆異代之有功德者也亦可以存其廟乎孔子曰善如汝所問也如殷周之祖宗其廟可以不毀其他祖宗者功德不殊雖在殊代亦可以無疑矣詩云蔽芾甘棠勿剪勿伐召伯所憩周人之於召公也愛其人猶敬所舍之樹況祖宗其功德而可以不尊奉其廟乎【家語】親親故尊祖尊祖故敬宗敬宗故收族收族故宗廟嚴宗廟嚴故重社稷【收族序以昭穆也嚴猶尊也孝經曰孝莫大于嚴父 大傳】庶子不祭明其宗也【明猶尊也一統焉族人上不戚君下又辟宗乃後能相序 同上】庶子不祭祖者明其宗也【明其尊宗以為本也禰則不祭矣言不祭祖者主謂宗子庶子俱為適士得立祖禰廟者也凡正體在乎上者謂下正猶為庶也 喪服小記】

庶子不祭禰者明其宗也【謂宗子庶子其為下士得立禰廟也雖庶人亦然 同上】或問禘之說子曰不知也知其說者之于天下也其如示諸斯乎指其掌【先王報本追遠之意莫深于禘非仁孝誠敬之至不足與以此非或人之所及也而不王不禘之法又魯之所當諱者故以不知答之示與視同指其掌弟子記夫子言此而自指其掌言其明且易也蓋知禘之說則理無不明誠無不格而治天下不難矣聖人于此豈真有所不知也哉 八佾】禽獸知母而不知父野人曰父母何算焉都邑之士則知尊禰矣大夫及學士則知尊祖矣諸侯及其大祖天子及其始祖之所自出尊者尊統上卑者尊統下【都邑之士則知尊禰近政化也大祖始封之君始祖者感神靈而生若稷契也自由也及始祖之所由出謂祭天也上猶遠也下猶近也今案天子及其始祖之所自出謂若虞夏禘黃帝殷周禘帝嚳是也注說非是 喪服子夏傳】

三歲一禘五歲一禘禘者合也禘者諦也禘者大合祭于祖廟也禘者諦昭穆而差優劣也【說苑】大饗其王事與【盛其饌與貢謂禘祭先王】三牲魚腊四海九州之美味也籩豆之薦四時之和氣也【此饌諸侯所獻】內金示和也【此所貢也內之庭實先設之金从革性和荆揚二州貢金三品】束帛加璧尊德也【貢享所執致命者君子于玉比德焉】龜為前列先知也【龜知事情者陳于庭在前荆州納錫大龜】金次之見情也【金炤物金有兩義先入後設】丹漆 續竹箭與衆共財也【萬民皆存此物荆州貢丹兗州貢漆 豫州貢續揚州貢篠簜】其餘無常貨各以其國之所有則致遠物也【其餘謂九州之外夷服鎮服蕃服蕃服之國周禮九州之外謂之蕃國世一見以其所貴寶為摯周穆王征犬戎得白狼白鹿近之】其出也肆夏而送之蓋重禮也【出謂諸侯之賓也禮畢而出作樂以節之肆夏當為陔夏 禮器】大饗之禮尚玄酒而俎腥魚大羹不和有遺味者矣【大享禘祭先王以腥魚為俎實不膈熟之大羹肉滷不調以塩菜遺猶餘也 樂記】大享尚玄尊俎生魚先大羹貴飲食之本也大享尚玄尊而用酒食先黍稷而飯稻粱祭饗大羹而飽乎庶羞貴本而親用也【大戴禮】凡祭有四時春祭曰禘夏祭曰禘秋祭曰嘗冬祭曰烝【謂夏殷時禮也】禘禘陽義也嘗烝陰義也禘者陽之盛也嘗者陰之盛也故曰莫重于禘嘗【夏者尊卑著而秋萬物成】古者於禘也祭爵賜服順陽義也于嘗也出田邑發秋政順陰義也【言爵命屬陽國地屬陰】故記曰嘗之日發公室示賞也草艾則墨未發秋政則民弗敢草也【發公室出賞物也草艾謂艾取草也秋草木成可艾艾給釁享時則始行小刑也】故曰禘嘗之義大矣治國之本也不可不知也明其義者君也能其事者臣也不明其義君人不全不能其事為臣不全【全猶具也】夫義者所以濟志也諸德之發也是故其德盛者其志厚其志厚者其義章其義章者其祭也敬祭敬則竟內之子孫莫敢不敬矣【濟成也發謂機發也竟內之子孫萬人為子孫】是故君子之祭也必身親蒞之有故則使人可也雖使人也君不失其義者君明其義故也【蒞臨也君不失其義者言君雖不自親祭祭禮無闕于君德不損也】其德薄者其志輕疑于其義而求祭使之必敬也弗可得已祭而不敬何以為民父母矣【祭統】享禘有樂而食嘗無樂陰陽之義也凡飲養陽氣也凡食養陰氣也故春禘而秋嘗春享孤子秋食耆老其義一也而食嘗無樂飲養陽氣也故有樂食養陰氣也故無聲凡聲陽也【言義同而或用樂而或不用樂也此禘嘗為禴字之誤也王制曰春禴夏禘 郊特牲】祭不欲數數則煩煩則不敬祭不欲疏疏則怠怠則忘是故君子合諸天道春禘秋嘗【忘與不敬違禮莫大焉合于天道因四時之變化孝子感時念親則以此祭之也春禘者夏殷禮也周以禘為殷祭更為春祭曰祠】霜露既降君子履之必有悽愴之心非其寒之謂也春雨露既濡君子履之必有怵惕之心如將見之【非其寒之謂謂悽愴及怵惕皆為感時念親也霜露既降禮說在秋此無秋字蓋脫耳】樂以迎來哀以送往故禘有樂而嘗無樂【迎來而樂樂親之將來也送去而哀哀其享否不可知也小言之則為一祭之間孝子不知鬼神之期推而廣之放其去來于陰陽祭義】宰我曰吾聞鬼神之名不知其所謂子曰氣也者神之盛也魄也者鬼之盛也合鬼與神教之至也【氣謂噓吸出入者也耳目之聰明為魄合鬼神而祭之聖人之教致之也】衆生必死死必歸土此之謂鬼骨肉斃于下陰為野土【陰讀為依蔭之蔭言人之骨肉蔭于地中為土壤】其氣發揚于上為昭明焄蒿悽愴此百物之精也神之著也【焄謂香臭也蒿謂氣烝出貌也上言衆生此言百物明其與人同也不如人貴爾蒿或為蕪】因物之精制為之極明命鬼神以為黔首則百衆以畏萬民以服【明命謂尊名也尊極于鬼神不可復加也黔首謂民也則法也為民作法使民亦事其祖禰鬼神民所畏服】聖人以是為未足也築為

宮室設為宗祧以別親疏遠邇教民復古復始不忘其所由生也衆之服自此故聽且速也【自由也言人由此服于聖人之教也聽謂順教令也速疾也】二端既立報以二禮建設朝事燔燎羶薌見以蕭光以報氣也此教衆反始也薦黍稷羞肝肺首心見間以俠鬴加以鬱鬯以報魄也教民相愛上下用情禮之至也【二端既立謂氣也魄也更有尊名云鬼神也二禮謂朝事與薦黍稷也朝事謂薦血腥時也薦黍稷所謂饋食也見及見間皆當為覲字之誤也羶當為馨聲之誤也燔燎馨香覲以蕭光取牲祭脂也光猶氣也有虞氏祭首夏后氏祭心殷祭肝周祭肺覲以俠鬴謂雜之兩鬴醴酒也相愛用情謂此以人道祭之也報氣以氣報魄以實各首其類】君子復古復始不忘其所由生也是以致其敬發其情竭力從事以報其親不敢勿盡也【從事謂脩薦可以祭者也】是故昔者天子為藉千畝冕而朱紘躬秉耒諸侯為藉百畝冕而青紘躬秉耒以事天地山川社稷先古以為醴酪齊盛于是乎取之敬之至也【藉藉田也先古先祖】古者天子諸侯必有養獸之官及歲時齊戒沐浴而躬朝之犧牲祭牲必于是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也【歲時齊戒沐浴而躬齊之謂將祭祀卜牲君朔月月半巡視之君召牛納而視之更本擇牲意】古者天子諸侯必有公桑蠶室近川而為之築宮仞有三尺棘墻而外閉之及大昕之朝君皮弁素積卜三宮之夫人世婦之吉者使入蠶于蠶室奉種浴于川桑于公桑風戾以食之【大昕季春朔日之朝也諸侯夫人三宮半王后也風戾之者及早涼脆采之風戾之使露氣燥乃以食蠶蠶性惡濕】歲既單矣世婦卒蠶奉繭以示于君遂獻繭于夫人夫人曰此所以為君服與遂副禕而受之因少牢以禮之【歲單謂三月月盡之後也言歲者蠶歲之大功事畢于此也副禕王后之服而云夫人記者容二王之後與禮之禮奉繭之世婦】古之獻繭者其率用此與【問者之辭】及良日夫人纁三盆手遂布于三宮夫人世婦之吉者使纁遂朱綠之玄黃之以為黼黻文章服既成君服以祀先王先公敬之至也【三盆手者三淹也凡纁淹大總而手振之以出緒也同上】凡治人之道莫急于禮禮有五經莫重于祭【禮有五經謂吉禮凶禮賓禮軍禮嘉禮也莫重于祭謂之吉禮為首也大宗伯職曰以吉禮事邦國之鬼禮祇】夫祭者非物自外至者也自中出生于心也心而奉之以禮是故唯賢者能盡祭之義【感念親之貌也或為述】賢者之祭也必受其福非世所謂福也福者備也備者百順之名也無所不順者之謂備言內盡于已而外順于道也忠臣以事其君孝子以事其親其本一也【世所謂福者謂受鬼神之祐助也賢者之所謂福者謂受大順之顯名也其本一者言忠孝俱由順出也】上則順于鬼神外則順于君長內則以孝于親如此之謂備唯賢者能備能備然後能祭是故賢者之祭也致其誠信與其忠敬奉之以物道之以禮安之以樂參之以時明薦之而已矣不求其為此孝子之心也【明猶潔也為謂福祐為己之報】祭者所以追養繼孝也孝者畜也順于道不逆于倫是之謂畜【畜謂順于德教】是故孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此三道者孝子之行也【沒終也】既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之本也【言玉者美言之也君子于玉比德焉】夫祭也者必夫婦親之所以備內外之官也官備則具備【具備所共衆物】水草之菹陸產之醢小物備矣三牲之俎八簋之實美物備矣昆蟲之異草木之實陰陽之物備矣【水草之菹芹之屬陸產之醢蜚蜋之屬天子之祭八簋昆蟲謂濕生寒死之蟲也內則可食之物有蜩范草木之實菱芡榛栗之屬】凡天之所生地之所長苟可薦者莫不咸在示盡物也外則盡物內則盡志此祭之心也【咸皆也】是故天子親耕于南郊

以共齊盛王后蠶于北郊以共純服諸侯耕于東郊亦以共齊盛夫人蠶于北郊以共冕服天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也【純服亦冕服也互言之爾純以見繒色冕以著祭服東郊少陽諸侯象也夫人不蠶于西郊婦人禮少變也齊盛作粢祭統】天子親耕以共粢盛王后親蠶以共祭服國非無良農工女也以為人之所盡事其祖禰不若以己所自親者也【穀梁傳詳見祭物粢盛章】三月繫七日戒三日宿慎之至也【繫繫牲于牢也戒散齊也宿致齊也將有祭祀之事必先敬慎如此不敢切也禮器】齊之玄也以陰幽思也故君子三日齊必見其所祭者【齊三日者思其居處思其笑語思其志意思其所樂則見之也郊特牲】及時將祭君子乃齊齊之為言齊也齊不齊以致齊者也是故君子非有大事也非有恭敬也則不齊不齊則于物無防也嗜欲無止也及其將齊也防其邪物訖其嗜欲耳不聽樂故記曰齊者不樂言不敢散其志也心不苟慮必依于道手足不苟動必依于禮【訖猶止也】是故君子之齊也專致其精明之德也故散齊七日以定之致齊三日以齊之定之之謂齊齊者精明之至也然後可以交于神明也【定者定其志意】是故先期旬有一日宮宰宿夫人夫人亦散齊七日致齊三日【宮宰守宮官也宿讀為肅肅猶戒也輕肅重也】君致齊于外夫人致齊于內然後會于太廟君純冕立於阼夫人副禕立於東房君執圭瓚裸尸大宗報璋瓚亞裸及迎牲君執紼卿大夫從士執芻宗婦執盎從夫人薦浼水君執鸞刀羞膋夫人薦豆此之謂夫婦親之【大廟始祖廟也圭瓚璋瓚裸器也以圭璋為柄酌鬱鬯曰裸大宗亞裸容夫人有故攝焉紼所以牽牲也周禮作紼芻謂藁也殺牲時用薦之周禮封人祭祀飾牲共其水藁浼盎齊也盎齊浼酌也凡尊有明水因兼云水耳膋膋肺祭肺之屬也君以鸞刀割制之天子諸侯之祭禮先有裸尸之事乃後迎牲芻或為糲祭統】致齊于內散齊于外齊之日思其居處思其笑語思其志意思其所樂思其所嗜齊三日乃見其所為齊者【致齊思此五者也散齊七日不御不樂不弔耳見所為齊者思之孰也所嗜素所欲食也春秋傳曰屈到嗜芰】祭之日入室僾然必有見乎其位周還出戶肅然必有聞乎其容聲出戶而聽愀然必有聞乎其歎息之聲【周還出戶謂薦設時也無尸者闔戶若食間則有出戶而聽之】是故先王之孝也色不忘乎目聲不絕乎耳心志嗜欲不忘乎心致愛則存致愍則著著存不忘乎心夫安得不敬乎【存著則謂其思念也】君子生則敬養死則敬享思終身弗辱也【享猶祭也享也祭義】唯聖人為能享帝孝子為能享親【謂祭之能使之饗也帝天】

【也】享者鄉也鄉之然後能享焉【言中心鄉之乃能使其祭見享也上享或謂相】是故孝子臨尸而不怍君牽牲夫人奠盎君獻尸夫人薦豆卿大夫相君命婦相夫人齊齊乎其敬也愉愉乎其忠也勿勿諸其欲其饗之也【色不和曰怍奠盎設盎齊之奠也此時君牽牲將薦毛血君獻尸而夫人薦豆謂繹日也僾尸主人獻尸主婦自東房薦韭菹醢勿勿猶勉勉也愍愛之貌】文王之祭也事死者如事生思死者如不欲生忌日

必哀稱諱如見親祀之忠也如見親之所愛如欲色然其文王與【思死者如不欲生言思親之深也如欲色者以時人于色厚假以喻之】詩云明發不寐有懷二人文王之詩也祭之明日明發不寐享而致之又從而思之祭之日樂與哀半饗之必樂已至必哀【明祭不寐謂夜而至旦也祭之明日謂繹日也言繹之夜不寐也二人謂父母容尸侑也】仲尼嘗奉薦而進其親也愍其行也趨趨以數【嘗秋祭也親為身親執事時也愍與趨趨言少威儀也趨讀如

促數之言速也】已祭子貢問曰子之言祭濟濟漆漆然今子之祭無濟濟漆漆何也子曰濟濟者容也遠也漆漆者容也自反也容以遠若容以自反也夫何神明之及交夫何濟濟漆漆之有乎【漆漆讀如朋友切切自反猶言自脩整也容以遠言非所以接親親也容以自反言非孝子所以事親也及與也此皆非與神明交之道】反饋樂成薦其薦俎序其禮樂備其百官君子致其濟濟漆漆夫何慌惚之有乎【天子諸侯之祭或從血腥始至反饋是進熟也薦俎豆與俎也慌惚思念益深之時也言祭事既備使百官助已祭然而見其容而自反是無慌惚之思念】夫言豈一端而已夫各有所當也【豈一端言不可以一槩也禮各有所當行祭宗廟者賓客濟濟漆漆主人慤而趨趨並祭義】孝子將祭慮事不可以不豫比時具物不可以不備虛中以治之【比時猶先時也虛中言不兼念餘事】宮室既脩牆屋既設百物既備夫婦齊戒沐浴盛服奉承而進之洞洞乎屬屬乎如弗勝如將失之其孝敬之心至也與【脩設謂掃除及黜堊】薦其薦俎序其禮樂備其百官奉承而進之【百官助主人進之】于是諭其志意以其慌惚以與神明交庶或饗之庶或饗之孝子之志也【諭其志意謂使祝祝享及侑尸也或猶有也言想見其彷彿來】孝子之祭也盡其慤而慤焉盡其信而信焉盡其敬而敬焉盡其禮而不過失焉進退必敬如親聽命則或使之也【言當盡已而已如居父母前將受命而使之】孝子之祭可知也其立之也敬以詘其進之也敬以愉其薦之也敬以欲退而立如將受命已徹而退敬齊之色不絕于面【詘充詘形容喜貌也進之謂進血腥也愉顏色和貌也薦之謂進孰也欲婉順貌齊謂齊莊】孝子之祭也立而不詘固也進而不愉疏也薦而不欲不愛也退立而不如受命敖也已徹而退無敬齊之色而忘本也如是而祭失之矣【固猶質陋也而忘本而衍字】孝子之有深愛者必有和氣有和氣者必有愉色有愉色者必有婉容【和氣謂立而詘】孝子如執玉如奉盈洞洞屬屬然如弗勝如將失之嚴威儼恪非所以事親也成人之道也【成人既冠者然則孝子不失其孺子之心也同上】孝子將祭祀必有齊莊之心以慮事以具服物以脩宮室以治百事【謂齊之前後也】及祭之日顏色必溫行必恐如懼不及愛然【如懼不及見其所愛者】其奠之也容貌必溫身必詘如語焉而未之然【奠之謂酌尊酒奠之及醑之屬也如語焉而未之然如有所以語親而未見答】宿者皆出其立卑靜以正如將弗見然【宿者皆出謂賓助祭者事畢出者也如將弗見然祭事畢而不知親所在思念之深如不見出也】及祭之後陶陶遂遂如將復入然【思念既深如覩親將復入也陶陶遂遂相隨行之貌】是故慤善不違身耳目不違心思慮不違親結諸心形諸色而術省之孝子之志也【術當為述聲之誤也同上】聖主將祭必潔齊精思若親之在方興未登惛惛憧憧專一想親之容貌仿佛此孝子之誠也四方之助祭空而來者滿而反虛而至者實而還皆取法則焉【說苑】祭之為言察也察者至也至者人事至也人事至然後祭【禮志曰齊之日思其居處思其笑語思其志意思其所樂思其所嗜齊三日乃見其所為齊者祭之日入室慤然必有見乎其位周還其戶肅然必有聞乎其容聲出戶而聽愀然必有聞乎其歎息之聲是之謂至】祭者薦者也薦之為言在也在也者在其道也【禮志曰君子生則敬養死則致享思終身不忘是之謂在其道尚書大傳】祭者志意思慕之情也惓詭喁優而不能無時至焉【惓變也詭異也皆謂變異感動之貌悒優氣不舒憤鬱之貌爾雅云悒悒也郭云鳴悒短氣也言人感動與憤鬱不能無時而至言有時而至也】故人之歡欣和合之時則夫忠臣孝子亦惓詭而有所至矣【歡欣之時忠臣孝子則感動而思君親之不得同樂也】彼其所至者甚大動也【言所至之情甚大感動也】案屈然已則其于志意之情者惓然不嘽其于禮節者闕然不具【屈竭也屈然空然也惓然悵然也嘽足也言若無祭

祀之禮空然而已則忠臣孝子之情悵然不足禮節又闕然不具也】故先王案為之立文尊尊親親之義至矣【文謂祭禮節文】故曰祭者志意思慕之情也忠信愛敬之至矣禮節文貌之盛矣苟非聖人莫之能知也聖人明之士君子安行之官人以為守百姓以成俗其在君子以為人道也其在百姓以為鬼事也【以為人道則安而行之以為鬼事則畏而奉之】故鍾鼓管磬琴瑟笙簧韶夏濩武洵桓簡象是君子之所以為憚詭其所喜樂之文也【因說祭遂廣言喜樂哀痛敦惡之意本皆因于感動而為之文飾也喜樂不可無文飾故制為鍾鼓韶夏之屬】齊衰苴杖居廬食粥席薪枕塊是君子之所以為憚詭其所哀痛之文也【感動其所哀痛而不可無文飾故制為齊衰苴杖之屬言本皆因于感動也】師旅有制刑法有等莫不稱罪是君子之所以為憚詭其所敦惡之文也【師旅所以討有罪制謂人數也有等輕重異也敦厚也厚惡深惡也或曰敦讀為頓困躓也本因感動敦惡故制師旅刑罰以為文飾】卜筮視日齊戒脩塗几筵饋薦告祝如或饗之【視日之吉凶史記周文為項燕視日脩塗謂脩自宮至廟之道途也几筵謂祝筵几于室中東面也饋獻牲體也薦進黍稷也告祝謂尸命祝以嘏于主人曰皇尸命工祝承致多福無疆于汝孝孫來汝孝孫使汝受祿于天宜稼于田眉壽萬年勿替引之如或歆饗其祝然也】物取而皆祭之如或嘗之【物取每物皆取也謂祝命按祭尸取菹揄于醢祭于豆間佐食取黍稷肺授尸尸受膾之又取肝揄于塩坐振祭膾之是也如或嘗之謂尸啐膾之如神之親嘗然也】母利舉爵【當云無舉利爵即上文云利爵之不醺也】主人有尊如或觴之【謂主人設尊酌以獻尸尸飲之如神飲其觴然】賓出主人拜送反易服即位而哭如或去之【此雜說喪祭也易服易祭服反喪服也賓出祭事畢即位而哭如神哀之去然也】哀夫敬夫事死如事生事亡如事存狀乎無形影然而成文【狀類也言祭祀不見鬼神有類乎無形影者然而足以成人道之節文也 荀子禮論】夫禮之初始諸飲食其燔黍捭豚汙尊而抔飲蕢桴而土鼓猶若可以致其敬于鬼神【言其物雖質略有齊敬之心則可以薦羞于鬼神鬼神享德不享味也中古未有釜甗釋米捭肉加于燒石之上而食之耳今北狄猶然汙尊鑿地為尊也抔飲手掬之也蕢讀為 聲之誤也 埴也謂搏土為桴也土鼓築土為鼓也】及其死也升屋而號告曰臯某復【招之于天】然後飯腥而苴孰【飯以稻米上古未有火化苴孰取遺奠有火利也苴或為菹】故天望而地藏也體魄則降和氣在上【地藏為葬】故死者北首【首陰也】生者南鄉【鄉陽也】皆從其初【謂今行之然也】昔者先王未有宮室冬則居營窟夏則居橧巢【寒則累土暑則聚薪柴居其上】未有火化【食腥也】食草木之實鳥獸之肉飲其血茹其毛未有麻 衣其羽皮【此上古之時也】後聖有作【作起】然後脩火之利【孰治萬物】范金【鑄作器用】合土【瓦瓴甕及甔大】以為臺榭宮室牖戶【榭器之所藏也】以炮【裹燒之也】以燔【加于火上】以亨【煮之釜也】以炙【貫之火上】以為醴酪【烝釀之也酪酢馘】治其麻 以為布帛以養生送死以事鬼神上帝皆從其朔【朔亦初也亦謂今行之然】故玄酒在室醴醢在戶粢醢在堂澄酒在下陳其犧牲備其鼎俎列其琴瑟管磬鍾鼓脩其祝嘏以降上神與其先祖以正君臣以篤父子以睦兄弟以齊上下夫婦有所謂承天之祐【此言今禮饌具所因于古及其事義也粢讀為齊聲之誤也周禮五齊一曰泛齊二曰醴齊三曰盎齊四曰醢齊五曰沈齊字雖異醢與盎澄與沈蓋同物也奠之不同處重古略近也祝祝為主人享神辭也嘏祝為尸致福于主人之辭也祐福也福之言備也】作其祝號玄酒以祭薦其血毛腥其俎孰其殽與其越席疏布以冪衣其滌帛醴醢以獻薦其燔炙君與夫人交獻以嘉魂魄是謂合莫【此謂薦上古中古之食也周禮祝號有六一曰神號二曰鬼號三曰祗號

四曰牲號五曰盞號六曰幣號號者所以尊神顯物也腥其俎謂豚解而腥之及血毛皆所以法于大古也孰其殽謂體解而爛之此以下皆所以法于中古也越席剪蒲席也冪覆尊也澣帛練染以為祭服嘉樂也莫虛無也孝經說曰上通無莫【然後退而合亨體其犬豕牛羊實其簠簋籩豆鉶羹祝以孝告嘏以慈告是謂大祥【此謂薦今世之食也體其犬豕牛羊謂分別骨肉之貴賤以為衆俎也祝以孝告嘏以慈告各首其義也祥善也今世之食于人道為善也】此禮之大成也【解子游以禮所成也 禮運】 祭之日君牽牲穆答君卿大夫序從【祭謂祭宗廟也穆子姓也答對也序以次第從也序或為豫】既入廟門麗于碑卿大夫袒而毛牛尚耳鸞刀以割取腍膋乃退燔祭祭腥而退敬之至也【麗猶繫也毛牛尚耳以耳毛為上也腍膋血與腸間脂也燔祭祭腥祭燔肉腥肉也湯肉曰爛爛祭祭腥或為合祭腥泄腊孰也祭義】大廟之內敬矣君親牽牲大夫贊幣而從【納牲于庭時也當用幣告神而殺牲】君親致祭夫人薦盞【親制祭謂朝事進血膋時所制者制肝洗于鬱鬯以祭于室及主】君親割牲夫人薦酒【親割謂進牲孰體時】卿大夫從君命婦從夫人洞洞乎其敬也屬屬乎其忠也勿勿乎其欲其饗之也【勿勿猶勉勉也】納牲詔于庭血毛詔于室羹定詔于堂三詔皆不同位蓋道求而未之得也【肉謂之羹道猶言也】設祭于堂【設祭之饌于堂人君禮然】為祔乎外【祔祭之明日之釋祭也謂之祔者于廟門之旁因名焉其祭之禮既設祭于室而事尸于堂孝子求神非一處也周禮曰夏后氏世室門堂三之二室三之一詩頌 衣曰自堂徂基】故曰于彼乎于此乎【不知神之所在也 禮器】有虞氏之祭也尚用氣血腥燔祭用氣也【尚謂先薦之燔或為臠】殷人尚聲臭味未成滌蕩其聲樂三闋然後出迎牲聲音之號所以詔告于天地之間也【滌蕩猶搖動也】周人尚臭灌用鬯臭鬱合鬯臭陰達于淵泉灌以圭璋用玉氣也既灌然後迎牲致陰氣也蕭合黍稷臭陽達于牆屋故既奠然後炳蕭合羶薌【灌謂以圭瓚酌鬯始獻神也已乃逆牲于庭殺之天子諸侯之禮也奠謂薦孰時也特牲饋食所云祝酌奠于鉶南是也蕭薌蒿也染以脂合黍稷燒之詩云取蕭祭脂羶當為馨聲之誤也奠或為薦】凡祭慎諸此魂氣歸于天形魄歸于地故祭求諸陰陽之義也殷人先求諸陽周人先求諸陰【此其所以先後異也】詔祝于室坐尸于堂【謂朝事時也朝廷延尸于戶西南面布主席東面取牲腍膋燎于爐炭洗肝于鬱鬯而燔之入以詔神于室又出以墮于主前主人親制其肝所謂制祭也時尸薦以籩豆至薦孰乃更延主于室之奧尸來升席自北方坐于主北焉】用牲于庭【謂殺之時】升首于室【制祭之後升牲首于北牖下尊首尚氣】直祭祝于主【謂薦孰時也如特牲少牢饋食之為也直正也祭以孰為正則血腥之屬盡敬心耳】索祭祝于祔【索求神也廟門曰祔謂之祔者以于釋祭名也】不知神之所在乎彼乎于此乎【室與堂與】或諸遠人乎祭于祔尚曰求諸遠者與【尚庶幾也】祔之為言倂也【倂猶索也倂或為諒】斫之為言敬也【為尸有斫俎此訓也】富也者福也【人君嘏辭有富此訓之也或曰福也者備也】首也者直也【訓所以升首祭也直或為植也】相饗之也【相謂詔侑也詔侑尸者欲使饗此饌也特牲饋食禮曰主人拜妥尸尸答拜執奠祝饗】嘏長也大也【主人受祭福曰嘏此訓也】尸陳也【尸或詁為主此尸神象當從主訓之言陳非也】毛血告幽全之物也【幽謂血也】告幽全之物者貴純之道也【純謂中外皆善】血祭盛氣也祭肺肝心貴氣主也【氣主氣之所舍也周祭肺殷祭肝夏祭心】祭黍稷加肺祭齊加明水報陰也【祭黍稷加肺謂綏祭也明水司烜所取于月之水也齊五齊也五齊加明水則三酒加玄酒也】取腍膋燔燎升首報陽也【腍膋腸間脂也與蕭合燒之亦有黍稷也】明水澆齊貴新也【澆猶清也五齊濁沛之使清謂之澆齊乃取明水

皆貴新也周禮慌氏以浼水漚 浼齊或為汎齊】凡浼新之也【新之者敬也】其謂之明水也由主人之潔著此水也【著猶成也言主人齊潔此水乃成可得也】君再拜稽首肉袒親割敬之至也敬之至也服也拜服也稽首服之甚也肉袒服之盡也【割解牲體】祭稱孝孫孝子以其義稱也【謂事祖稱】稱曾孫某謂國家也【謂諸侯事五廟也于曾祖以上稱曾孫而已】祭祀之相主人自致其敬盡其嘉而無與讓也【相謂詔侑尸也嘉善也】腥肆爛臠祭豈知神之所饗也主人自盡其敬而已矣【治肉曰肆臠孰也爛或為臠】舉斚角詔妥尸古者尸無事則立有事而后坐也尸神象也祝將命也【妥安坐也尸始入舉奠斚若奠角將祭之祝則詔主人拜安尸使之坐尸即至尊之坐或時不自安則以拜安之也天子奠斚諸侯角古謂夏時也】縮酌用茅明酌也【謂沛醴齊以明酌也周禮曰醴齊縮酌五齊醴尤濁和之以明酌沛之以茅縮去滓也明酌者事酒之上也名曰明者事酒今之醪酒皆新成也春秋傳曰爾貢包茅不入王祭不共無以縮酒酌猶斟也酒已沛則斟之以實尊彝昏禮曰酌玄酒三注于尊凡行酒亦為酌也】醑酒浼于清【謂沛醑酒以清酒醑酒盍齊差清和之以清酒沛之而已沛盍齊必和以清酒者皆久味相得】汁獻浼于醑酒【謂沛柶鬯以醑酒也獻讀當為莎齊語聲之誤也柶鬯者中有煮鬱和以盍齊摩莎沛之出其香汁因謂之汁莎不以三酒沛柶鬯者柶鬯尊也】猶明清與醑酒于舊澤之酒也【猶若也澤讀為醪舊醪之酒謂昔酒也沛醴齊以明酌沛醑酒以清酒沛汁獻以醑酒天子諸侯之禮也天子諸侯禮廢時人或聞此而不審也一若今明酌清酒與醑酒以舊醪之酒沛之矣就其所知以曉之也沛清酒以舊醪之酒者為其味厚腊毒也 郊特牲】天道至教聖人至德【目下事也】廟堂之上壘尊在阼犧尊在西廟堂之下縣鼓在西應鼓在東【禮樂之器尊西也小鼓謂之應犧周禮作獻】君在阼夫人在房【人君尊東也天子諸侯有左右房】大明生于東月生于西此陰陽之分夫婦之位也【大明日也】君西酌犧象夫人東酌壘尊【象日出東方而西行也月出西方而東行也周禮曰春祠夏禴裸用雞彝鳥彝皆有舟其朝踐用兩獻尊其再獻用兩象尊皆有壘臣之所酢】禮交動乎上樂交動乎下和之至也【言交乃和禮器】夫祭有十倫焉見事鬼神之道焉見君臣之義焉見父子之倫焉見貴賤之等焉見親疏之殺焉見爵賞之施焉見夫婦之別焉見政事之均焉見長幼之序焉見上下之際焉此之謂十倫【倫猶義也】鋪筵設同几為依神也詔祝于室而出于祊此交神明之道也【同之言詞也祭者以其妃配亦不特几也詔祝告事于尸也出于祊謂索祭也】君迎牲而不迎尸別嫌也尸在廟門外則疑于臣在廟中則全于君君在廟門外則疑于君入廟門則全于臣全於子是故不出者明君臣之義也【不迎尸者欲全其尊也尸神象也鬼神之尊在廟中人君之尊出廟門則伸】夫祭之道孫為王父尸所使為尸者於祭者子行也父北面而事之所以明子事父之道也此父子之倫也【子行猶子列也祭祖則用孫列皆取于同姓之適孫也天子諸侯之祭朝事延尸于戶外是以有北面事尸之禮】尸飲五君洗玉爵獻卿尸飲七以瑤爵獻大夫尸飲九以散爵獻士及羣有司皆以齒明尊卑之等也【尸飲五謂醕尸五獻也大夫士祭三獻而獻賓】夫祭有昭穆昭穆者所以別父子遠近長幼親疏之序而無亂也是故有事于大廟則羣昭羣穆咸在而不失其倫此之謂親疏之殺也【昭穆咸在同宗父子皆來】古者明君爵有德而祿有功必賜爵祿于大廟示不敢專也故祭之日一獻君降立于阼階之南南鄉所命北面史由君右執策命之再拜稽首受書以歸而舍奠于其廟此爵賞之施也【一獻醕尸也舍當為釋聲之誤也非時而祭曰奠】君卷冕立于阼夫人副褱立于東房夫人薦豆執校執醴授之執鐙尸酢夫人執柄夫人受尸執足夫婦相授受不相襲處酢必易爵明夫婦之別也【校

豆中央直者也執醴授醴之人授夫人以豆則執鐙鐙豆下跗也】凡為俎者以骨為主骨有貴賤殷人貴髀周人貴肩凡前貴于後俎者所以明祭之必有惠也是故貴者取貴骨賤者取賤骨貴者不重賤者不虛示均也惠均則政行政行則事成事成則功立功之所以立者不可不知也俎者所以明惠之必均也善為政者如此故曰見政事之均焉【殷人貴髀為其厚也周人貴肩為其顯也凡前貴于後謂脊脅臂臑之屬】凡賜爵昭為一穆為一昭與昭齒穆與穆齒凡羣有司皆以齒此之謂長幼有序【昭穆猶特性少牢饋食之禮衆兄弟也羣有司猶衆賓下及執事者君賜之爵謂若酬之】夫祭有畀煇胞翟閹者惠下之道也唯有德之君為能行此明足以見之仁足以與之畀之為言與也能以其餘畀其下者也煇者甲吏之賤者也胞者肉吏之賤者也翟者衆吏之賤者也閹者守門之賤者也古者不使刑人守門此四守者吏之至賤者也尸又至尊以至尊既祭之末而不忘至賤而以其餘畀之是故明君在上則竟內之民無凍餒者矣此之謂上下之際【明足以見之見此卑者也仁足以與之與此卑者也煇周禮作鞀謂鞀磬皮革之官也翟謂教羽舞者也古者不使刑人守門謂夏殷時祭統】祭祀之有尸也宗廟之有主也示民有事也脩宗廟敬祀事教民追孝也【有事有所尊事也】以此坊民民猶忘其親【坊記】尸飲三衆賓飲一示民有上下也【上下猶尊卑也主人主婦主賓獻尸乃後主人降洗爵獻賓同上】七日戒三日齋承一人焉以為尸過之者趨走以教敬也【戒謂散齋也承猶事也】醴酒在室醢酒在堂澄酒在下示民不淫也【淫猶貪也澄酒清酒也三酒尚質不尚味】因其酒肉聚其宗族以教民睦也【言祭有酒肉羣昭羣穆皆至獻而酬之咸有薦俎同上】宗廟之中以爵為位崇德也【崇高也】宗人授事以官尊賢也【官各有能】登餼受爵以上嗣尊祖之道也【上嗣之正統文王世子】天子有善讓德於天諸侯有善歸諸天子卿大夫有善薦於諸侯士庶人有善本諸父母存諸長老祿爵慶賞成諸宗廟所以示順也【薦進也成諸宗廟于宗廟命之祭統有十倫六曰見爵賞之施焉祭統】及入舞君執干戚就舞位君為東上冕而總干率其羣臣以樂皇尸是故天子之祭也與天下樂之諸侯之祭也與竟內樂之冕而總干率其羣臣以樂皇尸此與竟內樂之之義也【君為東上近主位也皇君也言君尸者尊也】夫祭有三重焉獻之屬莫重於裸聲莫重于升歌舞莫重于武宿夜此周道也【武宿夜武曲名也周道猶周之禮】凡三道者所以假于外而以增君子之志也故與志進退志輕則亦輕志重則亦重輕其志而求外之重也雖聖人弗能得也是故君子之祭也必身自盡也所以明重也道之以禮以奉三重而薦諸皇尸此聖人之道也【祭統】夫祭有餼餼者祭之末也不可不知也是故古之人有言曰善終者如始餼其是已也故古之君子曰尸亦餼鬼神之餘也惠術也可以觀政矣【術猶法也為政尚施惠盡美能知能惠詩云維此惠君民人所瞻】是故尸饗君與卿四人餼君起大夫六人餼臣餼君之餘也大夫起士八人餼賤餼貴之餘也士起各執其具以出陳于堂下百官進徹之下餼上之餘也【進當為餼聲之誤也百官謂有事于君祭者也既餼乃徹之而去所謂自卑至賤進徹或俱為餼】凡餼之道每變以衆所以別貴賤之等而興施惠之象也是故以四簋黍見其脩于廟中也廟中者竟內之象也【鬼神之惠徧廟中如國君之惠徧竟內也】祭者澤之大者也是故上有大澤則惠必及下顧上先下後耳非上積重而下有凍餒之民也是故上有大澤則民夫人待于下流知惠之必將至也由餼見之矣故曰可以觀政矣【鬼神有祭不獨享之使人餼之恩澤之大者也國君有蓄積不獨食之亦以施惠于竟內也同上】子曰武王周公其達孝矣乎夫孝者善繼人之志善述人之事者也春秋脩其祖廟陳其宗器設其裳衣薦其時食【脩謂掃糞也宗器祭器也裳衣先祖之遺衣服也設之當以授尸也時食四時

祭也】宗廟之禮所以序昭穆也序爵所以辨貴賤也序事所以辨賢也旅酬下為上所以逮賤也燕毛所以序齒也【序猶齒也爵謂公卿大夫士也事謂薦羞也以辨賢者以其事別所能也若司徒奉牛宗伯共雞牲矣文王世子曰宗廟之中以爵為位崇德也宗人授事以官尊賢也旅酬下為上者謂若特牲饋食之禮賓弟子兄弟之子各舉觶于其長也逮賤者宗廟之中以有事為榮也燕毛既祭而燕也燕以毛髮為坐祭時尊賢也至燕親親也齒亦年也】踐其位行其禮奏其樂敬其所尊愛其所親事死如事生事亡如事存孝之至也【踐猶升也其者其先祖也踐或為纘】郊社之禮所以事上帝也宗廟之禮所以祀乎其先也【社祭地神不言后土者節文】明乎郊社之禮禘嘗之義治國其如示諸掌乎【示讀如寘諸河干之寘寘置也物而在掌中易為寘力者也序爵辨賢尊尊親親治國之要 中庸】書曰乃女其悉自學功悉盡也學効也傳曰當其効功也於卜洛邑營成周改正朔立宗廟序祭祀易犧牲制禮樂一統天下合和四海而致諸侯皆莫不依紳端冕以奉祭祀者【紳大帶也】其下莫不自悉以奉其上者莫不自悉其祭祀者此之謂也盡其天下諸侯之志而効天下諸侯之功也廟者貌也其以貌言之也宮室中度衣服中制犧牲中辟【辟法也】殺者中死割者中理擗弁者為文【擗弁或為振非當言帚】爨灶者有容桷杙者有數【杙者繫牲者也】大廟之中纘乎其猶模繡也【言文章之可觀也模所桷文章之範】天下諸侯之悉來進受命于周公而退見文武之尸者千七百七十三諸侯【八州州二百一十國畿內九十三國此周所因于殷九州諸侯之數】皆莫不磬折玉音金聲玉色【玉音金聲言弘殺之調也】然後周公與升歌而弦文武【與諸侯升歌文王武王之德又以琴瑟播之】侯在廟中者伋然淵其志和其情【伋讀曰播播然變動貌】愀然若復見文武之身然後曰嗟子乎此蓋吾先君文武之風也乎【子成王也】及執俎抗鼎執刀執匕者負膺而歌憤于其情發于中而樂節文【卑賤者尚然而況尊貴者乎】故周人追祖文王而宗武王也【尚書大傳】君子曰祭祀不祈【祈求也祭祀不為求福也詩云自求多福福由己耳】不麾蚤【麾之言快也祭有時不以先之為快也齊人所善曰麾】不樂葆大【謂器幣也葆之言褒也】不善嘉事【嘉事之祭致大夫是也禮宜告見于先祖耳不善之而祭】牲不及肥大薦不美多品【以禮之義有以小少為貴也 禮器】郊特牲而社稷大牢天子適諸侯諸侯膳用犢諸侯適天子天子賜之禮大牢貴誠之義也故天子牲孕弗食也祭帝弗用也【犢者誠慤未有牝牡之情是以小為貴也孕任子也易曰婦妊不育 郊特牲】羔豚而祭百官皆足大牢而祭不必有餘此之謂稱也【足猶得也稱稱牲之大小而為俎此指謂助祭者耳而云百官喻衆也 禮器】君子大牢而祭謂之禮匹士大牢而祭謂之攘【君子謂大夫以上攘盜竊也 同上】已有三牲必田狩者孝子之意以為己之所養不如天地自然之牲逸豫肥美【尚書大傳】子期祀平王【子期楚平王之子結也平王恭王子昭父也】祭以牛俎于王【致牛俎于昭王】王問于觀射父曰祀牲何及【王感俎肉而問牲何所及】對曰祀加于舉【加增也舉人君朔望之盛饌】天子舉以太牢祀以會【太牢羊牛豕也會會三太牢舉四方之貢】諸侯舉以特牛祀以太牢【特一也】卿舉以少牢祀以特牛【少牢羊豕】大夫舉以特牲祀以少牢【特牲豕也】士食魚炙祀以特牲庶人食菜祀以魚上下有序民則不慢王曰其小大何如對曰郊禘不過繭栗【角如繭栗郊禘祭天也】烝嘗不過把握【握長不出把者】王曰何其小也對曰夫神以精明臨民者也故求備物不求豐大【備物體具而精潔者】是以先王之祀也以一純二精【一純心純一而潔二精玉帛也】三牲四時五色六律七事八種【七事天地民四時之務也八種八音】九祭十日十二辰以致之【九祭九州助祭也十

日甲至癸也十二辰子至亥也擇其吉日令辰】百姓千品萬官億醜兆民經入畝數以奉之【百姓百官受氏姓也千品姓有徹品十為千品五物之官陪屬萬為萬官官有十醜為億醜天子之田九畝以食兆民王取經入以食萬官也】明德以昭之【昭昭孝敬也】和聲以聽之【中和之聲使神聽之】以告徧至則無不受休【至神至也休慶也】毛以示物【物色也】血以告殺【明不因故也】接誠拔取以獻具為齊敬也【接誠于神也拔毛取血獻其備物也齊潔也詩曰執其鸞刀以啟其毛取其血膋】敬不可久民力不堪故齊肅以承之【肅疾也承奉也】王曰芻豢幾何【草食曰芻穀食曰豢】對曰遠不過三月近不過浹日【遠謂三牲近謂雞鶩之屬浹日十日也】王曰祀不可以已乎【已止也】對曰祀所以昭孝息民【昭孝養使民蕃息也】撫國家定百姓也不可以已夫民氣縱則底【氣志氣也縱放也底著也】底則滯滯久不震【滯廢也震懼也言無祭祀則民無所畏忌無所畏忌則志放縱志放縱則遂廢滯難復恐懼也】生乃不殖【生人物也殖長也不長神不降以福也】是用不從【不從上令】其生不殖不可以封【封國也】是以古者先王日祭月享時類歲祀【以事類曰類日祭于祖考月祭于曾高時類于二祧歲祀于壇墠】諸侯舍日【有月享也】卿大夫舍月【有時祭也】士庶人舍時【歲乃祭也】天子徧祀羣神品物【品物謂若八蜡所祭貓虎昆蟲之類也】諸侯祀天地三辰及其土之山川【三辰日月星也祀天地謂二王後也非二王後祭分野星山川而已】卿大夫祀其禮【禮謂五祀及祖所自出】士庶人不過其祖【祖王父也】日月會于龍【龍尾也謂周十二月夏十月也日月合辰于尾上月令曰孟冬日在尾】土氣含收【含收收縮萬物含藏也】天明昌作【昌盛也作起也謂天氣上也是月純坤用事】百嘉備舍【嘉善也時物畢成舍入室也】群神頻行【頻並也並行欲求食也】國于是乎烝嘗家于是乎嘗祀【烝冬祭也嘗嘗百物也月令孟冬大飲烝傳曰閉蟄而烝】百姓夫婦擇其令辰【辰十二辰也】奉其犧牲敬其蠶盛潔其糞除慎其采服禋其酒醴帥其子姓【禋潔也子姓同姓也】從其時享虔其宗祀【宗主祭祀祀主祝祈也】道其順辭以昭祀其先祖肅肅濟濟如或臨之于是乎合其州鄉朋友婚姻比爾兄弟親戚【合會也比親也】於是乎弭其百苛姦其讒慝【弭止也苛虐也姦覆也止覆謂解怨除恨之辭】合其嘉好結其親暱【合結也謂于此更深固之】億其上下【億安也】以申固其姓上所以教民虔也下所以昭事上也天子禘郊之事必自射其牲【牲牛也】王后必自舂其粢【器實曰粢】諸侯宗廟之事必自射其牛剗羊繫豕【剗刺也繫殺也】夫人自舂其盛【在器曰盛上言粢下言盛互其文也】況其下之人其誰敢不戰戰兢兢以事百神天子親舂禘郊之盛【帥后舂之】王后親繰其服【服祭服也祭義曰夫人繰三盆則王后其一盆與周語曰王耕一墦班三之】自公以下至于庶人其誰敢不齊肅恭敬致力於神民所以攝固者也若之何其舍之也【攝持也舍廢也國語楚語】隨季梁曰夫民神之主也【言鬼神之情依民而行】是以聖王先成民而後致力于神故奉牲以告曰博碩肥腍謂民力之普存也【博廣也碩大也】謂其畜之碩大蕃滋也謂其不疾癘蠹也謂其備腍咸有也【雖告神以博碩肥腍其實皆當兼此謂民力適完則六畜既大而滋也皮毛無疥癬兼備而無有所闕】奉盛以告曰絜粢豐盛謂其三時不害而民和年豐也【三時春夏秋】奉酒醴以告曰嘉栗旨酒【嘉善也栗謹敬也】謂其上下皆有嘉德而無違心也所謂馨香無讒慝也【馨香之遠聞】故務其三時脩其五教【父義母慈兄友弟恭子孝】親其九族以致其禋祀【禋絜敬也九族謂外祖父外祖母从母子及妻父妻母姑之子姊妹之子女子之子并己之同族皆外親有服而異族者也】於是乎民和而神降之福【桓六年左氏傳】恒豆

之菹水草之和氣也其醢陸產之物也加豆陸產也其醢水物也【此謂諸侯也天子朝事之豆有昌本麋饔 菹麋饔饋食之豆有蔡菹羸醢豚拍魚醢其餘則有雜錯云也】籩豆之薦水土之品也不敢用常褻味而貴多品所以交于神明之義也非食味之道也【言禮以異為敬】先王之薦可食也而不可耆也卷冕路車可陳也而不可好也武壯而不可樂也宗廟之威而不可安也宗廟之器可用也而不可便其利也所以交于神明者不可以同于所安樂之義也【武萬舞也】酒醴之美玄酒明水之尚貴五味之本也黼黻文繡之美疏布之尚反女功之始也莞簟之安而蒲越橐鞾之尚明之也大羹不和貴其質也大圭不琢美其質也丹漆雕幾之美素車之乘尊其樸也貴其質而已矣所以交于神明者不可同于所安褻之甚也如是而后宜【尚質貴本其至如是乃得交于神明之宜也明水司烜以陰鑑所取于月之水也蒲越橐鞾藉神席也明之者神明之也琢當為 字之誤也幾謂漆飾沂鄂也】鼎俎奇而籩豆偶陰陽之義也【牲陽也庶物陰也】黃目鬱氣之上尊也黃者中也目者氣之清明者也言酌于中而清明于外也【黃目黃彝也周所重于諸侯為上也】祭天掃地而祭焉於其質而已矣醢醢之美而煎塩之尚貴天產也割刀之用而鸞刀之貴貴其義也聲和而后斷也鼎俎奇而籩豆偶陰陽之義也籩豆之實水土之品也【水土之品言非人之常食】不敢用褻味而貴多品所以交于神明之義也【旦當為神篆字之誤也 並郊特牲】王制曰賜圭瓚然後為鬯未賜鬯者資于天子圭瓚瓚宗廟之盛禮故孝道備而賜之瓚鬯所以極著孝道孝道純備故內和外榮玉以象德金以配情芬香條鬯以通神靈玉飾其本君子之性金飾其中君子之道君子有黃中通理之道美素之德金者精和之至也玉者美德之至也鬯者芬香之至也君子有玉瓚瓚者以配道德也其至矣合天下之極美以通其志也其為玉瓚瓚乎【白虎通】有以小為貴者宗廟之祭貴者獻以爵賤者獻以散尊者舉觶卑者舉角此以小為貴也【凡觴一升曰爵二升曰觚三升曰觶四升曰角五升曰散禮器】夫鼎有銘銘者自名也自名以稱揚其先祖之美而明著之後世者也為先祖者莫不有美焉莫不有惡焉銘之義稱美而不稱惡此孝子孝孫之心也唯賢者能之【銘謂書之刻之以識事者也自名謂稱揚其祖之德著已名于下】銘者論譔其先祖之有德善功烈勲勞慶賞聲名列于天下而酌之祭器自成其名焉以祀其先祖者也顯揚先祖所以崇孝也身比焉順也明示後世教也【烈業也王功曰勲事功曰勞酌之祭器言斟酌其美傳著於鍾鼎也身比焉謂自著名于下也順也自著名以稱揚先祖之德孝順之行也教也所以教後世】夫銘者壹稱而上下皆得焉耳矣是故君子之觀于銘也既美其所稱又美其所為【美其所為美此人為此銘】為之者明足以見之仁足以與之知足以利之可謂賢矣賢而勿伐可謂恭矣【明足以見之見其先祖之美也仁足以與之與其先祖之銘也非有仁恩君不使與之也知足以利之利己名得比于先祖】故衛孔悝之鼎銘曰六月丁亥公假于大廟【孔悝衛大夫也公衛莊公蒯聵也德孔悝之立已依禮褒之以靜國人自固假至也至于大廟謂以夏之孟夏禘祭】公曰叔舅乃祖莊叔左右成公成公乃命莊叔隨難于漢陽即宮于宗周奔走無射【公曰叔舅者公為策書尊呼孔悝而命之也乃猶汝也莊叔悝七世之祖衛大夫孔達也隨難者謂成公為晉文公所伐出奔楚命莊叔從焉漢楚之川也即宮于宗周後反得國坐殺弟叔武晉人執而歸之于京師寘之深室也射厭也言莊叔常奔走至勞苦而不厭倦也周既去鎬京猶名王城為宗周也】啟右獻公獻公乃命成叔纂乃祖服【獻公衛侯衎成公曾孫也亦失國得反言莊叔之功流于後世啟右獻公使得反國也成叔莊叔之孫成子烝鉏也右助也纂繼也服事也獻公反國命成子繼女祖莊叔之事欲其忠如孔達也】乃考文叔興舊耆欲作率慶士躬恤衛國

其勤公家夙夜不解民咸曰休哉【文叔者成叔之曾孫文子圉即惲父也作起也率循也慶善也士之言事也言文叔能興行先祖之舊德循其善事】公曰叔舅予女銘若纂乃考服【若乃猶女也公命惲予女先祖以銘以尊顯之女繼女父之事欲其忠如文子也成公獻公莊公皆失國得反言孔氏世有功焉寵之也】惲拜稽首曰對揚以辟之【對遂也辟明也言遂揚君命以明我先祖之德也】勤大命施于烝彝鼎【施猶著也言我將行君之命又刻著于烝祭之彝鼎彝尊也周禮大約劑書于宗彝】此衛孔惲之鼎銘也【言銘之類衆多也略取此一以言之】古之君子論譔其先祖之美而明著之後世者也以比其身以重其國家如此【如莊公命孔惲之為也莊公孔惲雖無令德以終其事于禮是行之非】子孫之守宗廟社稷者其先祖無美而稱之是誣也有善而弗知不明也知而弗傳不仁也此三者君子之所恥也昔者周公旦有勲勞于天下周公既沒成王康王追念周公之所以勲勞者而欲尊魯故賜之以重祭外祭則郊社是也內祭則大嘗禘是也【言此者王室所銘若周公之功】夫大嘗禘升歌清廟下而管象朱干玉戚以舞大武八佾以舞大夏此天子之樂也康周公故以賜魯也【清廟頌文王之詩也管象吹管而舞武象之樂也朱干赤盾戚斧也此武象之舞所執也佾猶列也大夏禹樂文舞也執羽籥文武之舞皆八列互言之耳康褒大也易晉卦曰康侯用錫馬】子孫纂之至於今不廢所以明周公之德而又以重其國也【不廢不廢其此禮樂也重猶尊也祭統】傳說曰黷于祭祀時謂弗欽禮煩則亂事神則難【祭不欲數數則黷黷則不敬事神禮煩則亂而難行高宗之祀特豐數近廟故說因以戒之說命】子曰非其鬼而祭之諂也【非其鬼謂非其所當祭之鬼諂求媚也為政】季路問事鬼神子曰未能事人焉能事鬼【先進】子路曰吾聞諸夫子祭禮與其敬不足而禮有餘也不若禮不足而敬有餘也【祭主敬檀弓】

禮書綱目卷四十七

卷四十八

<經部,禮類,通禮之屬,禮書綱目

欽定四庫全書

禮書綱目卷四十八 婺源江永撰

兵制 軍禮一

補

黃帝始立丘井之法因以制兵【李靖語】殷周以兵定天下天下既定戢藏干戈教以文德而猶立司馬之官設六軍之衆【顏師古曰司馬夏官卿掌邦政軍旅屬焉萬二千五百人為軍王則六軍也】因井田而制軍賦地方一里為井井十為通通十為成成方十里成十為終終十為同同方百里同十為封封十為畿畿方千里有稅有賦【稅者田租也賦謂發賦歛財也】稅以足食賦以足兵故四井為邑四邑為丘丘十六井也有戎馬一匹牛三頭四丘為甸六十四井也有戎馬四匹兵車一乘牛十二頭甲士三人步卒七十二人干戈備具是謂乘馬之法【鄭氏曰甲士在車上也】一同百里提封萬井【李奇曰提舉也舉四封之內也】除山川沈斥城池邑居園囿術路三千六百井【臣瓚曰沈斥水田舄鹵也如淳曰術大道也顏曰川謂水之通流者也沈謂居深水之下也斥鹹鹵之地】定出賦六千四百井戎馬四百匹兵車百乘此卿大夫采地之大者也【采官也因官食地故曰采地爾雅曰采寮官也】是謂百乘之家一封三百一十六里提封十萬井定出賦六萬四千井戎馬四千匹兵車千乘此諸侯之大者也是謂千乘之國天子畿方千里提封百萬井定出賦六十四萬井戎馬四萬匹兵車萬乘故稱萬乘之主戎馬車徒干戈素具五國為屬屬有長十國為連連有帥三十國為卒卒有正二百一十國為州州有牧連帥比年簡車【比年頻年也】卒正三年簡徒【徒人衆】羣牧五載大簡車徒此先王為國立武足兵之大略也【前漢刑法志】小司徒乃會萬民之卒伍而用之五人為伍五伍為兩四兩為卒五卒為旅五旅為師五師為軍以起軍旅以作田役以比追胥以令貢賦【用謂使民事之伍兩卒旅師軍皆衆之名兩二十五人卒百人旅五百人師二千五百人軍二萬二千五百人此皆先王所因農事而定軍令者也欲其恩足相恤義足相救服容相別音聲相識作為也役功力之事追逐寇也胥伺捕盜賊也鄉之田制與遂同】乃均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人凡起徒役毋過家一人以其餘為羨惟田與追胥竭作【一家男女七人以上則授之以上地所養者衆也男女五人以下則授之以下地所養者寡也可任謂丁彊任力役之事者鄭司農云羨饒也田謂獵也追逐寇賊也竭作盡行】乃經土地而井牧其田野九夫為井四井為邑四邑為丘四丘為甸四甸為縣四縣為都以任地事而令貢賦【此謂造都鄙也賦謂出車徒給繇役也司馬法曰六尺為步步百為晦晦百為夫夫三為屋屋三為井井十為通通為匹馬三十家士一人徒二人通十為成成百井三百家

革車一乘士十人徒二十人十成為終終千井三千家革車十乘士百人徒二百人十終為同方百里萬井三萬家革車百乘士千人徒二千人注詳見井田地官】大司馬凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人【賦給軍用者也令邦國之賦亦以地之美惡民之衆寡為制如六遂矣鄭司農云上地謂肥美田也食者參之二假令一家有三頃歲種二頃休其一頃下地食者參之一田薄惡者所休多夏官】凡制軍萬有二千五百人為軍王六軍大國三軍次

國二軍小國一軍軍將皆命卿二千有五百人為師師帥皆中大夫五百人為旅旅帥皆下大夫百人為卒卒長皆上士二十五人為兩兩司馬皆中士五人為伍伍皆有長【軍師旅卒兩伍皆衆名也伍一比兩一間卒一旅旅一黨師一州軍一鄉家所出一人將帥長司馬者其師吏也言軍將皆命卿則凡軍帥不特置選於六官六鄉之吏自卿以下德任者使兼官焉鄭司農云王六軍大國三軍次國二軍小國一軍春秋傳曰成國不過半天子之軍周為六軍諸侯之大者三軍可也詩大雅常武曰赫赫明明王命卿士南仲大祖大師皇父整我六師以脩我戎既倬既戒惠此南國大雅文王曰周王于邁六師及之此周為六軍之見於經也春秋傳曰王使虢公命曲沃伯以一軍為晉侯此小國一軍之見於傳也百人為卒二十五人為兩故春秋傳曰廣有一卒卒偏之兩同上】六十不與服戎【與及也王制】

右民兵 篤公劉其軍三單【三單未詳大雅公劉】五伍二十五曰元卒【伍兵名】一卒居前曰開一卒居後曰敦【開謂啟敦謂服】左右一卒曰閭四卒成衛曰伯【皆陣名伯卒名】三伯一長曰佐三佐一長曰右【右伯卒也】三右一長曰正三正一長曰卿三卿一長曰辟【伯卒則右千卒則正三千卒則卿萬卒舉令之於君辟君也此謂諸侯三軍數起於伍故不正相當也汲冢周書武順解】司徒司馬司空【三卿也武王是時尚為諸侯故未備六卿牧誓

泰誓王乃大巡六師集傳曰是時武王未備六軍牧誓叙三卿可見此曰六師者史臣之辭也已上周初兵制】成王以周公為有勲勞於天下是以封周公於

曲阜地方七百里革車千乘【革車兵車也千乘成國之賦也

明堂位】魯人三郊三遂【國外曰郊郊外曰遂天子六軍則六鄉六遂大國三軍故魯三】

【郊三遂也費誓】公車千乘朱英綠滕二矛重弓公徒三萬貝胄朱綬烝徒增增【千乘大國之賦也成方十里出革車一乘甲士三人左持弓右持矛中人御步卒七十二人將重車者二十五人千乘之地則三百十六里有奇也朱英所以飾矛綠滕所以約弓也二矛夷矛酋矛也重弓備折壞也徒步卒也三萬舉成數也車千乘法當用十萬人而為步卒者七萬二千人然大國之賦適滿千乘苟盡用之是舉國而行也故其用之大國三軍而已三軍為車三百七十五乘三萬七千五百人其為步卒不過二萬七千人舉其中而以成數言故曰三萬也貝胄貝飾胄也朱綬所以綴也增增衆也魯頌閟宮】成公元年三月作丘甲【周禮九夫為井四井為邑四邑為丘丘十六井出戎馬一匹牛三頭四丘為甸甸六十四井出長轂一乘戎馬四匹牛十二頭甲士三人步卒七十二人此甸所賦今魯使丘出之譏重斂故書】為齊難故作丘甲【前年魯乞師於楚欲以伐齊楚師不出故懼而作丘甲春秋左氏傳】襄公十一年春

王正月作三軍【增立中軍萬二千五百人為軍】季武子將作三軍【魯本無中軍唯上下二軍皆屬於公有事三卿更帥以征伐季氏欲專其民人故假立中軍因以改作】告叔孫穆子曰請為三軍各征其軍【征賦稅也三家各征其軍之家屬】穆子曰政將及子子必不能【政者霸國之政令禮大國三軍魯次國而為大國之制貢賦必重故憂不能堪】武子固請之穆子曰然則盟諸【穆子知季氏將復變易故盟之】乃盟諸僖閔【僖宮之門】詛諸五父之衢【五父衢道名在魯國東南詛以禍福之言相要】正月作三軍三分公室而各有其一【三分國民衆】三子各毀其乘【壞其軍乘分以足成三軍】季氏使其乘之人以其役邑入者無征【使軍乘之人率其邑役入季氏者無公征】不入者倍征【不入季氏者則使公家倍征之設利病欲驅使入己故昭五年傳曰季氏盡征之民辟倍征故盡屬季氏】孟氏使半為臣若子若弟【取其子弟之半也四分其乘之人以三歸公而取其一】叔孫氏使盡為臣【盡取子弟以其父兄歸公】不然不舍【制軍分民不如是則三家不舍其故而改作也此蓋三家盟詛之本言 春秋左氏傳】季武子為三軍【為作也武子魯卿季文子之子季孫夙也周禮天子六軍諸侯大國三軍魯伯禽之封舊有三軍其後削弱二軍而已武子欲專公室故益中軍以為三三家各征其一事在魯襄十一年】叔孫穆子曰不可天子作師公帥之以征不德【師謂三軍之衆也公謂諸侯為王卿士者也周禮軍將皆命卿詩云周公東征周公時為二伯而東征則亦上公為元帥也】元侯作師卿帥之以承天子【元侯大國之君也師三軍之衆也大國三卿皆命於天子承天子謂從王師征不義也孔子曰天下有道則禮樂征伐自天子出】諸侯有卿無軍帥教衛以贊元侯【諸侯謂次國之君也有卿有命卿也二卿命於天子一卿命於其君無軍無三軍也若元侯有事則令卿帥其所教武衛之士以佐元侯禮所謂次國二軍小國一軍謂以賦出軍從征伐也贊佐也】自伯子男有大夫無卿【無卿無命卿也王制曰小國二卿皆命於其君】帥賦以從諸侯【賦國中出兵車甲士以從大國諸侯也】是以上能征下下無姦慝【征正也慝惡也】今我小侯也【言小侯者削弱之日久矣】處大國之間【大國齊楚也】繕貢賦以共從者猶懼有討【猶懼以不給見誅討也】若為元侯之所【之所謂作三軍元侯所為】以怒大國無乃不可乎弗從遂作中軍【言中者明已有上下軍也】自是齊楚代討於魯【代更也】襄昭皆如楚【襄襄公昭昭公也如楚朝事楚也事在襄二十九年昭七年 國語魯語】作三軍非正也【昭五年經曰舍中軍傳曰貴復正也然則魯有二軍今云作三軍增置中軍爾魯為次國於此為明穀梁傳】昭公五年春王正月舍中軍卑公室也【罷中】

【軍季氏稱左師孟氏稱右師叔孫氏則自以叔孫為軍名】毀中軍于施氏成諸臧氏【季氏不欲親其議勅二家會諸大夫發毀置之計又取其令名】初作中軍三分公室而各有其一【三家各有一軍家屬】季氏盡征之【無所入於公】叔孫氏臣其子弟【以父兄歸公】孟氏取其半焉【復以子弟之半歸公】及其舍之也四分公室季氏擇二【簡擇取二分】二子各一皆盡征之而貢於公【國人盡屬三家三家隨時獻公而已 春秋左氏傳】舍中軍貴復正也【魯次國舊二軍襄十一年立三軍今毀之故曰復正 穀梁傳】八年秋大蒐于紅自根牟至于商衛革車千乘【言千乘明大蒐且見魯衆之大數也 左氏傳】哀公十二年春用田賦【詳見通禮財賦篇已上魯兵制】齊桓公曰定民之居若何管子對曰制國以為二十一鄉桓公曰善管子於是制國以為二十一鄉【二千家為一鄉二十一鄉凡四萬二千家此管仲所制非周法也】工商之鄉六【工商各三也二者闕 役也】

】士鄉十五【唐尚書云士與農共十五鄉昭謂此士軍士也十五鄉合三萬人是為三軍農野處而不暱不在都邑之數則下所云五鄙是也】公帥五鄉焉【五鄉萬人是謂中軍公所帥也】國子帥五鄉焉高子帥五鄉焉【國子高子皆齊上卿各帥五鄉為左右軍也詳見通禮政事上篇】桓公曰吾欲從事於諸侯其可乎【欲行伯道討不義也】管子對曰未可君若正卒伍脩甲兵【周禮五人為伍伯人為卒今管子亦以五人為伍而以二百人為卒】則大國亦將正卒伍脩甲兵則難以速得志矣君有攻伐之器小國諸侯有守禦之備則難以速得志矣君若欲速得志於天下諸侯則事可以隱令可以寄政【事戎事也隱匿也寄託也匿軍令託於國政若有征伐鄰國不知也】桓公曰為之若何管子曰作內政而寄軍令焉【內政國政也因治政以寄軍令也】桓公曰善管子於是制國五家為軌軌為之長【軌中一人為之長也】十軌為里里有司【為立有司】四里為連連為之長十連為鄉鄉有良人焉【賈侍中云良人鄉士也昭謂良人鄉大夫也】以為軍令【為軍掌令】五家為軌故五人為伍軌長帥之【居則為軌出則為伍所謂寄政也】十軌為里故五十人為小戎里有司帥之【小戎兵車也此有司之所乘故曰小戎詩云小戎伐收古者戎車一乘步卒七十二人今齊五十人】四里為連故二百人為卒連長帥之十連為鄉故二千人為旅鄉良人帥之五鄉一帥故萬人為一軍五鄉之帥帥之【五鄉每一軍為五鄉也鄉帥鄉也萬人為軍齊制也周則萬二千五百人為軍帥長也】三軍故有中軍之鼓有國子之鼓有高子之鼓春以搜振旅【春田曰搜振整也旅衆也周禮仲春教振旅遂以獮田也】秋以獮治兵【秋田曰獮周禮仲秋教治兵遂以獮田也】是故卒伍整於里軍旅整於郊內教既成令勿使遷徙【遷徙猶改更也】伍之人祭祀同福死喪同恤【恤憂也】禍災共之人與人相疇家與家相疇【疇匹也】世同居少同游故夜戰聲相聞足以不乖晝戰目相視足以相識其歡欣足以相死【致死以相救也】居同樂行同和死同哀是以守則同固戰則同彊君有此士也三萬人以方行於天下【方猶橫也】以誅無道以屏周室【屏猶蕃也】天下大國之君莫之能禦也【禦當也齊語】齊有革車八百乘【賈侍中云謂一國之賦八百乘也乘七十五人凡甲士六萬人昭謂此周制耳齊法五十人為小戎車八百乘有四萬人又上管仲制齊為三軍軍萬人下又曰君有是士三萬人以方行於天下而車數多者其副貳陪從之車乎或者八當為六同上】齊侯伐衛先驅穀榮御王孫揮召揚為右【先驅前鋒軍】申驅成秩御莒恒申鮮虞之傅摯為右【申驅次前車傅摯申鮮虞之子】曹開御戎晏父戎為右【公御右也】貳廣上之登御邢公盧蒲癸為右【貳廣公副軍】啟牢成御襄罷師狼遽疏為右【左翼曰啟】肱商子車御侯朝桓跳為右【右翼曰肱】大殿商子游御夏之御寇崔如為右【大殿後軍】燭庸之越駟乘【四人共乘殿車也傳具載此言莊公廢舊臣任武力襄二十三年左氏傳已上齊兵制】

王使虢公命曲沃伯以一軍為晉侯【曲沃武公遂并晉國僖王因就命為晉侯小國一軍莊十六年左氏傳】晉獻公十六年公作二軍【獻公十六年魯閔之元年魯嚴十六年王命晉武公以一軍為晉侯至此初作二軍軍有上下】公將上軍大子將下軍士蒺言於公曰夫大子君之貳也而帥下軍無乃不可乎公曰下軍上軍之貳也寡人在上申生在下不亦可乎士蒺對曰下不可以貳上【猶足不可以貳手也手足左右各自為貳也】故古之為軍也軍有左右闕從補之【左右左右部也闕缺也】成而不知是以寡敗【不知敵不知有闕也】若以下貳上闕而不變敗弗能補也【變更也】變非聲章弗能移也【聲金鼓也章旌旗也移動也】聲章過數則有釁有釁則敵入【釁隙也軍法進退旗鼓有數過數則有隙敵見隙

而犯己】敵入而凶救敗不暇誰能退敵【凶猶凶凶恐懼也退卻也】敵之如志國之憂也可以陵小難以征大【以下軍貳上可以侵陵小國難以征伐大國也 晉語】秦獲晉惠公呂甥曰征繕以輔孺子【征賦也繕治也孺子太子圉】庶有益乎衆說晉於是乎作州兵【五黨為州州二千五百家也因此又使州長各繕甲兵 僖十五年左右氏傳】晉文公蒐于被廬【晉常以春蒐禮改政令敬其始也被廬晉地】作三軍【閔元年晉獻公作二軍今復大國之禮】使卻縠將中軍卻縠佐之使狐偃將上軍讓於狐毛而佐之【狐毛偃之兄】使欒枝將下軍先軫佐之【僖二十七左右氏傳】戰於城濮晉軍七百乘輶靽鞅鞞【五萬二千五百人在背曰輶在胷曰靽在腹曰鞅在後曰鞞言駕乘脩備 僖二十八左右氏傳】晉侯作三行以禦狄荀林父將中行屠擊將右行先蔑將左行【晉置上中下三軍今復增置三行以辟天子六軍之名三行無佐疑大夫帥 同上年左氏傳】晉蒐于清原作五軍以禦狄【二十八年晉作三行今罷之更為上下新軍河東聞喜縣北有清原 僖三十一年左氏傳】晉蒐于夷舍二軍【僖三十一年晉蒐清原作五軍今舍二軍復三軍之制夷晉地前年四卿卒故蒐以謀軍帥 文六左右氏傳】晉作六軍【為六軍僭王也萬二千五百人為軍】韓厥趙括鞏朔韓穿荀騅趙旃皆為卿【韓厥為新中軍趙括佐之鞏朔為新上軍韓穿佐之荀騅為新下軍趙旃佐之晉舊自有三軍今增此故為六軍 成三年左氏傳】戰于鄢陵卻至佐新軍【於是卻犇代趙旃將新軍新上下軍罷矣成十六左右氏傳】晉侯蒐於縣上以治兵【為將命軍帥也必蒐而命】

【之所以與衆共】新軍無帥【將佐皆遷】晉侯難其人使其什吏率其卒乘官屬以從於下軍禮也【得慎舉之禮 襄十三左右氏傳】晉師歸自伐秦晉侯舍新軍禮也成國不過半

天子之軍【成國大國】周為六軍諸侯之大者三軍可也於是新軍無帥故舍之【襄十四左右氏傳】楚蒍啟彊曰韓賦七邑皆成縣也【成縣賦百乘也】羊舌四族皆彊家也【四族銅鞮伯華叔向叔魚叔虎兄弟四人】十家九縣【韓氏七羊舌氏四而言十家舉大數也羊舌四家共二縣故但言彊家】長轂九百【長轂戎車也縣百乘】其餘四十縣遺守四千【計遺守國者尚有四千乘 昭五左右氏傳】

晉治兵于邾南甲車四千乘【三十萬人】遂合諸侯于平【昭十三左右氏傳 已上晉兵制】楚武王荆尸授師子焉以伐隨【尸陳也荆亦楚也更為楚陳兵之法揚雄方言子者戟也然則楚始於此參用戟為陳 莊四左右氏傳】楚子使子玉去宋曰無從晉師子玉請戰王怒少與之師唯西廣東宮與若敖之六卒實從之【楚有左右廣又太子有宮甲分取以給之若敖楚武王之祖父葬若敖者子玉之祖也六卒子玉宗人之兵六百人言不悉師以益之】子玉以若敖之六卒將中軍子西將左子上將右戰於城濮楚師敗績【僖二十八左右氏傳】隨武子曰楚蒍敖為宰擇楚國之令典【宰令尹蒍敖孫叔敖】軍行右轅左追蓐【在車之右者挾轅為戰備在左者追求草蓐為宿備傳曰令尹南轅又曰改乘轅楚陳以轅為主】前茅慮無【慮無如今軍行前有斥 蹕伏皆持以絳及白為幡見騎賊舉絳幡見步賊舉白幡備慮有無也茅明也或曰時楚以茅為旌識】中權後勁【中軍制謀後以精兵為殿】百官象物而動軍政不戒而備【物猶類也戒勅令】欒武子曰其君之戎分為二廣【君之親兵】廣有一卒卒偏之兩【十五乘為一廣司馬法百人為卒二十五人為兩車十五乘為大偏今廣十五乘亦用舊偏法復以二十五人為承副】右廣初駕數及日中左則受

之以至于昏【宣十二:left氏傳】楚子為乘廣三十乘分為左右右廣鷄鳴而駕日中而說【說舍也】左則受之日入而說邲之戰王乘左廣遂出陳工尹齊將右拒卒以逐下軍【工尹齊楚大夫右拒陳名】使潘黨率游闕四十乘【游車補闕者】從唐侯以為左拒以從上軍王見右廣將從之乘屈蕩尸之曰君以此始亦必以終【尸止軍中易乘則恐軍人惑】自是楚之乘廣先左【以乘左得勝故同上年左氏傳】楚蒍掩為司馬子木使庀賦【庀治】數甲兵【閱數之】蒍掩書土田度山林鳩藪澤辨京陵表淳鹵數疆潦規偃豬町原防牧隰臯井衍沃【注見通禮井田篇】量入脩賦【量九土之所入而治理其賦稅】賦車籍馬【籍疏其毛色歲齒以備軍用】賦車兵【車兵甲士】徒兵【步卒】甲楯之數【使器械有常數】既成以授子木禮也【得治國之禮傳言楚之所以興襄二十五年左氏傳】楚子使然丹簡上國之兵於宗丘且撫其民【上國在國都之西西方居上流故謂之上國】分貧振窮【分與也振救也】長孤幼養老疾收介特【介特單身民也收養不使流散】救災患宥孤寡【寬其賦稅】赦罪戾詰姦慝【詰責問也】舉淹滯【淹滯有才德而未效者】禮新叙舊【新羈旅也】祿勲合親【勲功也親九族】任良物官【物事也】使屈罷簡東國之兵於召陵【兵在國都之東者】亦如之【如然丹昭十四年左氏傳已上楚兵制】王以諸侯伐鄭鄭伯禦之鄭子元請為左拒以

當蔡人衛人【拒方陳】為右拒以當陳人曼伯為右拒祭仲足為左拒原繁高渠彌以中軍奉公為魚麗之陳先偏後伍伍承彌縫【司馬法車戰二十五乘為偏以車居前以伍次之承偏之隙而彌縫闕漏也五人為伍此蓋魚麗陳法】戰于繻葛【繻葛鄭地】命二拒曰旆動而鼓【旆旆也通帛為之蓋今大將之麾也執以為號令】王卒大敗【桓五年左氏傳】鄭子產作丘賦【丘十六井當出馬一匹牛三頭今子產別賦其田如魯之田賦】國人謗之子產曰苟利社稷死生以之【以用也】渾罕曰國氏其先亡乎君子作法於涼其敝猶貪【涼薄也】作法於貪敝將若之何【言不可久行昭四年左氏傳已上鄭兵制】楚申公巫臣適晉請使於吳吳子壽夢

說之乃通吳於晉【壽夢季札父】以兩之一卒適吳舍偏兩之一焉【司馬法百人為卒二十五人為兩車九乘為小偏十五乘為大偏蓋留九乘車及一兩二十五人令吳習之】與其射御教吳乘車教之戰陳教之叛楚【前是吳常屬楚】吳是以始大通吳於上國【上國諸夏成七:left氏傳】吳王夫差會晉公午于黃池【事在魯哀十三年】昏乃戒令秣馬食士夜中乃令服兵擐甲【夜中夜半也服執也擐貫也甲鎧也】係馬舌出火竈【係縛也縛馬舌恐有聲也出火於竈外以自燭】陳士卒百人以為徹行百行【徹通也以百人通為一行百行為萬人謂之方陳】行頭皆官帥鐸拱稽【即擁字官帥大夫也昭謂下言十行一嬖大夫此一行宜為士周禮百人為卒卒長皆上士抱也拱執言抱鐸者亦恐有聲也唐尚書云稽戟也鄭後司農以為稽計兵民籍也周禮聽師田以簡稽】建肥胡奉文犀之渠【肥胡幡也文犀之渠謂楯也文犀犀之有文理者】十行一嬖大夫【十行千人嬖下大夫也子產謂子南曰子皙上大夫汝嬖大夫】建旌提鼓【折羽為旌提挈也】挾經秉枹【在掖曰挾經兵書也秉執也】十旌一將軍【十旌萬人也將軍命卿也】載常建鼓挾經秉枹【日月為常鼓晉鼓也周禮將軍執晉鼓建謂為之楹而樹之】為萬人以為方陳【百行故曰萬人正四方也】皆白常白旂素甲白羽之矰望之如荼【交龍為旂素申白甲也矰矢名以

白羽為衛荼茅秀也】王親秉鉞載白旗以中陳而立【熊虎為旗此王所御中軍】左軍亦如之【亦如中軍載常建鼓挾經秉枹之屬】皆赤常赤旗丹甲朱羽之矜望之如火【鳥隼為旗尚赤左陽也丹彤也朱羽染為朱色】右軍亦如之皆玄常玄旗黑甲烏羽之矜望之如墨【黑漆甲也尚黑右陰也】為帶甲三萬【帶甲衿鎧】以勢攻雞鳴乃定【吳語已上吳兵制】越王勾踐伐吳中分其師以為左右軍以其私卒君子六千人為中軍【私卒君子王所親近有志行者猶吳所謂賢良齊所謂士也 吳語 此條越兵制】王法年二十受兵何重不絕人嗣也師行不必勝故須其有世嗣年六十歸兵者何不忍並鬪人父子也【白虎通】

宮正掌王宮之戒令糾禁以時比宮中之官府次舍之衆寡【時四時比校次其人之在否官府之在宮中者若膳夫王府內宰內史之屬次諸吏直宿若今部署諸廬者舍其所居守】為之版以待【版其人之名籍待待戒令及比】夕擊柝而比之【夕莫也莫行夜以比直宿者為其有懈惰離部署鄭司農云柝戒守者所擊也】國有故則令宿其比亦如之【鄭司農云故謂禍災令令宿衛王宮春秋傳曰忘守必危況有災乎玄謂故凡非常也文王世子曰公有出疆之政庶子以公族之無事者守於公宮正室守大廟諸父守貴宮貴室諸子諸孫守下宮下室此謂諸侯也王之庶子職掌國子之倅國有大事則帥國子而致於天子唯所用之者令宿之事蓋亦存焉】會其什伍而教之道藝【五人為伍二伍為什會之者使之輩作輩學相勸帥且寄宿衛之令 詳見通禮內治篇】凡邦之大事令于王宮之官府次舍無去守而聽政令【使居其處待所為 天官】宮伯掌王宮之士庶子凡在版者【鄭司農云庶子宿衛之官版名籍也以版為之今時鄉戶籍謂之戶版玄謂王宮之士謂王宮中諸吏之適子也庶子其支庶也】掌其政令行其秩叙作其徒役之事【秩祿廩也叙才等也作徒役之事天子所用】授八次八舍之職事【衛王宮者必居四角曰中於徼 便也鄭司農云庶子衛王宮在內為次在外為舍玄謂次其宿衛所在舍其休沐之處】若邦有大事作宮衆則令之【謂王宮之士庶子於邦有大事或選當行】月終則均秩歲終則均叙以時頒其衣裘掌其誅賞【頒讀為班班布也衣裘若今賦冬夏衣 同上】小司徒大故致餘子【大故謂災寇也鄭司農云餘子謂羨也玄謂餘子卿大夫之子當守於王宮者也 地官 已上官吏士庶子之衛】虎賁氏掌先後王而趨以卒伍【王出將虎賁士居前後雖羣行亦有局分】軍旅會同亦如之舍則守王閑【舍王出所止宿處閑桎梏】王在國則守王宮【為周衛】國有大故則守王門大喪亦如之【非常之難要在門】適四方使則則從士大夫【虎士從使者】若道路不通有徵事則奉書以使於四方【不通逢兵寇若泥水奉書徵師役也春秋隱七年冬戎伐凡伯于楚 以歸 虎士八百人見通禮設官上篇 夏官】旅賁氏掌執戈盾夾王車而趨左八人右八人車止則持輪【夾王車者其下士也下士十有六人中士為之帥焉】凡祭祀會同賓客則服而趨【服而趨夾王車趨也會同賓客王亦齊服服袞冕則此士之齊服服玄端】喪紀則衰葛執戈盾【葛葛經武士尚輕】軍旅則介而趨【介被甲同上】天子有虎賁習武訓諸侯有旅賁禦災害【訓教也虎賁掌先後王而趨舍則守王閑在國則守宮門所以習武教也禦禁也旅賁掌執戈盾夾車而趨車止則持輪所以備非常禁災害也 國語魯語 已上虎賁旅賁之衛】師氏使其屬帥四夷之隸各以其兵服守王之門外且蹕【兵服旃布弓劍不同也門外中門之外蹕止行人不得迫王宮也故書隸或作肆鄭司農云讀為隸】朝在野外則守內列【內列藩營之在內者也其屬亦帥四夷之隸守之如守王宮 地官】保氏使其屬守王闈【闈宮中之巷門同上】司隸掌五隸之法辨其物而掌其政令【五隸

謂罪隸四翟之隸也物衣服兵器之屬】掌帥四翟之隸使之皆服其邦之服執其邦之兵守王宮與野舍之厲禁【野舍王者所止舍也厲遮列也秋官】
罪隸其守王宮與其厲禁者如蠻隸之事【今按此文】

【當屬閩隸】蠻隸其在王宮者執其國之兵以守王宮在野外則守厲禁
閩隸【今按此職當有其守王宮與其厲禁者如蠻隸之事十四字誤脫在罪隸之下】夷隸其守王宮者與其守厲禁者如蠻隸之事貉隸其守王宮者與其守厲禁者如蠻隸之事【並同上】

【已上夷翟四隸之衛】

右衛兵 武王戎車三百乘虎賁三百人與受戰于牧野【書序 孟子作虎賁三千人】
裨冕摺笏而虎賁之士說劒也【裨冕衣裨衣而冠冕也裨衣袞之屬也摺猶插也賁憤怒也樂記】周公戒于王曰王左右常伯常任準人綴衣虎賁周公曰嗚呼休茲知恤鮮哉【言五等官職之美而知憂其得人者少也虎賁周禮之虎賁氏也】文王武王虎賁綴衣庶常吉士【言在文武之廷無非常德吉士也 立政】成王不懌乃同召太保奭芮伯彤伯畢公衛侯毛公師氏虎臣百尹御事【同召六卿下至御治事者師氏大夫官虎臣虎賁士】王崩太保命仲桓南宮毛俾爰齊侯呂伋以二千戈虎賁百人逆子釗於南門之外延入翼室恤宅宗【桓毛二臣名伋太公望子為天子虎賁氏太保以冢宰攝政命桓毛二臣使齊侯呂伋以二千戈虎賁百人逆太子釗於路寢門外引入路寢翼室為憂居宗主也】二人雀弁執惠立于畢門之內四人綦弁執戈上刃夾兩階彤一人冕執劉立于東堂一人冕執鉞立于西堂一人冕執戣立于東垂一人冕執瞿立于西垂一人冕執銳立于側階【弁士服雀弁赤色弁也綦弁以文鹿子皮為之惠三隅矛路寢門一名畢門上刃刃外嚮也堂廉曰彤冕大夫服劉鉞屬戣瞿皆戟屬銳當作鉞說文曰鉞侍臣所執兵從金允聲周書曰一人冕執鉞讀若允東西堂路寢東西廂之前堂也東西垂路寢東西序之階上也側階北陛之階上也呂氏曰古者執戈戟以宿衛王宮皆士大夫之職無事而奉燕私則從容養德而有膏澤之潤有事而司禦侮則堅明守義而無腹心之虞下及秦漢陛楯執戟尚餘一二此制既廢人主接士大夫者僅有視朝數刻而周廬陛楯或環以椎埋嚚悍之徒有志於復古者當深繹也 顧命】
晉文公獻楚俘於王王策命晉侯為侯伯賜之虎賁三百人【僖二十八年左氏傳】秦伯送衛於晉三千人實紀綱之僕【新有呂卻之難國未輯睦故以兵衛文公諸門戶僕隸之事皆秦卒共之為之紀綱 僖二十四年左氏傳】
楚穆王立潘崇為大師且掌環列之尹【環列之尹宮衛之官列兵而環王宮 文元年左氏傳】

大司馬中春教振旅平列陳如戰之陳若大師及戰巡陳眡事而賞罰【事謂戰功也 夏官】

右陳法 風后握機文曰天陳地陳風陳雲陳虎翼陳蛇蟠陳飛龍陳鳥翔陳八陳四為正四為奇【公孫弘曰世有八卦陳法其中既不用奇正似非風后所傳未可參用】餘奇為握奇或總稱之先出遊軍定兩端天有衝圓地有軸前後有衝風附於天雲附於地衝有重列各四隊

前後之衝各二隊風居四維故有圓軸單列各三隊前後之衝各三隊雲居四角故有方天居兩端地居中間總為八陳陳訖遊軍從後躡敵或驚其左或驚其右聽音望麾以出四奇天地之前衝為虎翼風為蛇蟠圍繞之義也虎居於中張翼以進蛇居兩端向敵而蟠以應之天地之後衝為飛龍雲為鳥翔突擊之義也龍居於中張翼以進鳥掖兩端向敵而翔以應之虛實二壘皆逐天文氣候向背山川利害隨時而行以正合以奇勝金鼓旌旗數角音二初警衆未收衆革音五一持兵二結陳三行四趨走五急鬪金音五一緩鬪二止鬪三退四背五急背麾法五一玄二黃三白四青五赤旗法八一天玄二地黃三風青四雲白五天前【上玄下赤】六天後【上玄下白】七地前【上玄下赤】八地後【上黃下青】二革二金為天三革三金為地二革三金為風三革二金為雲四革三金為龍三革四金為虎四革五金為鳥五革四金為蛇此八陳各用金鼓之制其金革之間加一角音者在天為兼風在地為兼雲在龍為兼鳥在虎為兼蛇加二角音者全師進東加三角音者全師進南加四角音者全師進西加五角音者全師進北鞞音不止者行伍不整金革既息而角音不止者師並旋三十二隊天衝八隊天前衝八隊天後衝十六隊風二十四隊地軸十二隊地前衝十二隊地後衝十六隊雲以天地前衝為虎翼天地後衝為飛龍風為蛇蟠雲為翔鳥天地以下八重以列或曰握機望敵即引其後以掎角前列不動【公孫弘曰傳項氏陳法依此而前列先進以次之】或合而為一因離而為八各隨師之多少觸類而長天或圓布不動前為右後為左天地四望之屬是也天居兩端其次風其次雲左右相向是也【公孫弘曰此為靜】地方布風雲各在前後衝之前天居兩端其次地居中間兩地為北是也【公孫弘曰此為動為從天陳變為地陳或即張形布軌破敵攻圍不定其形故為動也】縱布天一天二次之縱布地四次於天後縱布四風挾天地之左右天地前衝居其右後衝居其左雲居兩端虛實二壘則此是也【公孫弘曰人多傳韓信註釋天或圓布以下與此微有差異而范蠡樂毅之說相雜今亦錯綜於其中其部隊或三或五或三十或五十陳之如此變通由人一本自或五十以下云變通之理寄之明哲不復備載近古以來其文不滿尺多憑口訣以相傳授予今於難解之處增字以發明之 握機經朱子曰按此法六十四陳天衝十六陳居兩端地軸十二陳居中間天前衝四陳居右後衝四陳居左地前衝六陳居前後衝六陳居後風八陳附天雲八陳附地合為八陳天衝并前後衝二十四陳合風八陳為三十二陽地軸并前後衝二十四陳合雲八陳為三十二陰遊軍二十四陳在六十四陳之後凡行軍結陳合戰設疑補闕全在遊兵天地之前衝為虎翼風為蛇蟠兵家先陰以右為前又風從虎虎與蛇皆陰類同位西北也天地之後衝為飛龍雲為鳥翔兵家後陽以左為後又雲從龍龍與鳥皆陽類同位東南也以天地風雲為四正以龍虎與蛇為四奇所謂八陳也每以二陳相從一陳之中又有兩陳一戰一守故又有三十二隊天衝二十四隊地軸等數也中外有輕重之權陰陽有剛柔之節彼此有虛實之地主客有先後之數輕重之權剛柔之節者家計也以實擊虛以先奪後者合變也我易而敵常險我簡而敵常繁兵法所謂致人而不致於人此其機要也】

王以諸侯伐鄭鄭伯禦之為魚麗之陳先偏後伍伍承彌縫【詳見民兵章】楚子田孟諸宋公為右孟鄭伯為左孟【孟田獵陳名】期思公復遂為右司馬【復遂楚期思邑公】子朱及文之無畏為左司馬【將獵張兩甄故置二左司馬然則右司馬一人當中央文十年左氏傳】晉中行穆子敗無終及羣狄于大原【無終山戎】崇卒也【崇聚也】將戰魏舒曰彼徒我車所遇又阨【地險不便車】以什共車必克【更增十人以當一車之用】困諸阨又克【車每困於阨道今去車故為必克】請皆卒【去車為步卒】自我始乃毀

車以為行【魏舒先自毀其屬車為步陳】五乘為三伍【乘車者車三人五乘十五人今改去車更以五人為伍分為三伍】荀吳之嬖人不肯即卒斬以徇【魏舒輒斬之荀吳不恨所以能立功】為五陳以相離兩於前伍於後專為右角參為左角偏為前拒【皆臨時處置之名】以誘之翟人笑之【笑其失常】未陳而薄之大敗之【傳言荀吳能用善謀

昭元年左氏傳】

公子城以晉師救宋與華氏戰于赭兵鄭翩願為鶴其御願為鶩【鄭翩華氏黨鶴鶩皆陳名昭二十一年左氏傳】

禮書綱目卷四十八

卷四十九

欽定四庫全書

禮書綱目卷四十九 婺源江永撰

武備 軍禮二

補

夏后氏尚黑戎事乘驪【戎兵也馬黑色曰驪爾雅曰騄牝驪牡玄】殷人尚白戎事乘翰【翰白色馬也易曰白馬翰如】周人尚赤戎事乘騂【騂駟馬白腹檀弓】
夏小正四月執陟攻駒五月頒馬【大戴禮】校人掌王馬之政【政謂差擇養乘之數也月令曰班馬政】辨六馬之屬種馬一物戎馬一物齊馬一物道馬一物田馬一物駑馬一物【種謂上善似母者以次差之玉路駕種馬戎路駕戎馬金路駕齊馬象路駕道馬田路駕田馬駑馬給宮中之役】凡頒良馬而養乘之乘馬一師四圉三乘為皐皐一趣馬三皐為繫繫一馭夫六繫為廐廐一僕夫六廐成校校有左右駑馬三良馬之數麗馬一圉八麗一師八師一趣馬八趣馬一馭夫【良善也善馬五路之馬鄭司農云四匹為乘養馬為圉故春秋傳曰馬有圉牛有牧玄謂二耦為乘師趣馬馭夫僕夫帥之名也趣馬下士馭夫中士則僕夫上士也自乘至廐其數二百一十六匹易乾為馬此應乾之策也至校變為言成者明六馬各一廐而王馬小備也校有左右則良馬一種者四百三十二匹五種合二千一百六十匹駑馬三之則為千二百九十六匹五良一駑凡三千四百五十六匹然後王馬大備詩云騄牝三千此謂王馬之大數與麗耦也駑馬自圉至馭夫凡馬千二十四匹與三良馬之數不相應八皆宜為六字之誤也師十二匹趣馬士十二匹則馭夫四百三十二匹然後而三之既三之無僕夫者不駕於五路卑之也】天子十有二閑馬六種邦國六閑馬四種家四閑馬二種【降殺之差每廐為一閑諸侯有齊馬道馬田馬大夫有田馬各一閑其駑馬則皆分為三焉】凡馬特居四之一【欲其乘之性相似也物同氣則心一鄭司農云四之一者三牝一牡】春祭馬祖執駒【馬祖天駟也孝經說曰房為農馬鄭司農云執駒無令近母猶攻駒也二歲曰駒三歲曰駢玄謂執猶拘也春通淫之時駒弱血氣未定為其乘匹傷之】夏祭先牧頒馬攻特【先牧始養馬者其人未聞夏通淫之後攻其特為其蹄齧不可乘用鄭司農云攻特謂騷之】秋祭馬社臧僕【馬社始乘馬者世本作曰相土作乘馬鄭司農云臧僕謂簡練馭者令皆善也玄謂僕馭五路之僕】冬祭馬步獻馬講馭夫【馬步神為災害馬者獻馬見成馬於王也馭夫馭貳車從車使車者講猶簡習】凡大祭祀朝覲會同毛馬而頒之【毛馬齊其色也頒授當乘之】凡軍事物馬而頒之【物馬齊其力】等馭夫之祿【馭夫於趣馬僕夫為中舉中見上下】宮中之稍食【師圉府史以下也鄭司農云稍食曰廩夏官】趣馬掌贊正良馬而齊其飲食簡其六節【贊佐也佐正者謂校人臧僕講馭夫之時簡差也節猶量也差擇王馬以為六等】掌駕說之頒【用馬之第次】辨四時之居治以聽馭夫【居謂牧房所處治謂執駒攻特之屬同上】巫馬掌養疾馬而乘治之相醫而藥攻馬疾受財於

校人【乘謂驅步以發其疾知所疾處乃治之相助也】馬死則使其賈粥之入其布于校人【布泉也鄭司農云賈謂其屬官小吏賈一人粥賣也 同上】牧師掌牧地皆有厲禁而頒之【頒馬授圉者所牧處】孟春焚牧【焚牧地以除陳生新草也】中春通淫【中春陰陽交萬物生之時可以合馬之牝牡也月令季春乃合累牛騰馬遊牝于牧秦時書也秦地寒涼萬物後動】掌其政令【同上】廋人掌十有二閑之政教以阜馬佚特教駢攻駒及祭馬祖祭閑之先牧及執駒散馬耳【九者皆有政教焉阜盛壯也詩云四牡孔阜杜子春云佚當為逸鄭司農云馬三歲曰駢二歲曰駒散讀為中散大夫之散謂聒馬耳毋令善驚也玄謂逸者用之不使甚勞安其血氣也教駢始乘習之也攻駒駢其蹄齧者閑之先牧先牧制閑者散馬耳以竹括押其耳頭動搖則括中物後遂串習不復驚】正校人員選【校人謂師圉也正員選者選擇可備員者平之】馬八尺以上為龍七尺以上為騊六尺以上為馬【大小異名爾雅曰騊牝牡玄駒牡騊鄭司農云以月令曰駕蒼龍 同上】圉師掌教圉人養馬春除蓐釁廐始牧夏序馬冬獻馬茨牆則翦鬣【蓐馬茲也馬既出而除之新釁焉神之也春秋傳曰凡馬日中而出日中而入故字序為訝鄭司農云當為序玄謂序廐也廐所以庇馬者也茨蓋也鬣苦也翦鬣圉人所習也 同上】圉人掌養馬芻牧之事以役圉師【役者圉師使令焉 同上】蠻隸掌役校人養馬【秋官】馭夫掌馭貳車從車使車【二車象輅之副也從車戎路田路之副也使車驅逆之車】分公馬而駕治之【乘調六種之馬夏官】馬質掌質馬馬量三物一曰戎馬二曰田馬三曰駑馬皆有物賈【此三馬買以給官府之使無種也鄭司農云皆有物賈皆有物色及賈直】綱惡馬【鄭司農云綱讀為以亢其讎之亢書亦或為亢亢御也禁也禁去惡馬不畜也玄謂綱以縻索維綱狎習之】凡受馬於有司者書其齒毛與其賈馬死則旬之內更旬之外入馬耳以其物更其外否【鄭司農云更謂償也玄謂旬之內死者償以齒毛與賈受之日淺養之惡也旬之外死入馬耳償以毛色不以齒賈任之過其任也其外否者旬之外踰二十日而死不任用非用者罪】馬及行則以任齊其行【識其所載輕重及道里齊其勞逸乃復用之】若有馬訟則聽之【訟謂賣買之言相負】禁原蠶者【原再也天文辰為馬蠶書蠶為龍精月直大火則浴其種是蠶與馬同氣物莫能兩大禁再蠶者為傷馬與 同上】季春乃合累牛騰馬遊牝于牧【累騰皆乘匹之名是月所合牛馬謂繫在廐者其牝欲遊則就牧之牡而合之】犧牲駒犢舉書其數【以在牧而校數書之明出時無他故至秋當錄內且以知其息之多少也】仲夏游牝別羣【孕妊之欲止也】則繫騰駒【為其壯氣有餘相蹄齧也】班馬政【馬政謂養馬之政教也廋人職曰掌十有二閑之政教以阜馬佚特教駢攻駒此之謂也 月令】大宰以九式均節財用七曰芻秣之式【芻秣養牛馬禾穀也 天官】四郊之賦以待稍秣【待猶給也稍秣即芻秣也謂之稍稍用之物也 天官大府】

右馬【民馬見兵制篇】王來自商至于豐乃偃武脩文歸馬于華山之陽放牛於桃林之野示天下弗服【山南曰陽桃林今華陰縣潼關也 武成】秦之先有造父以善御得幸於周穆王得驥溫驪驊騮耳之駒西巡狩樂而忘歸其後又有非子居犬 好馬及畜善養息之犬人言之周孝王孝王召使主馬于汧渭之間馬犬蕃息於是孝王曰昔伯翳為舜主畜畜多息故有土賜姓嬴今其後世亦為朕息朕其分土為附庸邑之秦使復續嬴氏之祀【史記】魯莊公二十九年春新作延廐書不時也凡馬日中而出日中而入【日中春秋分也治廐當以秋分因馬向入而脩之今以春作故曰不時 左氏傳】延廐者法廐也【周禮天子十二閑

馬六種邦國六閑馬四種每廐一閑言法廐者六閑之舊制也【其言新有故也【言改故而新之穀梁傳】定之方中美衛文公也【詩序】匪直也人秉心塞淵駉牝三千【非獨此人所以操其心者誠實而淵深也蓋其所畜之馬七尺而牝者亦已至于三千之衆矣蓋人操心誠實而淵深則無所為而不成其致此富盛宜矣記曰問國君之富數馬以對今言駉牝之衆如此則生息之蕃可見而衛國之富亦可知矣鄘風】晉惠公與秦戰于韓乘小駉鄭入也【鄭所獻馬名小駉】慶鄭曰古者大事必乘其產生其水土而知其人心安其教訓而服習其道唯所納之無不如志今乘異產以從戎事及懼而變將與人易【變易人意】亂氣狡憤陰血周作張脈僨興外彊中乾【狡戾也僨動也氣狡憤於外則血脈必周身而作隨氣張動外雖有彊形而內實乾竭】進退不可周旋不能君必悔之弗聽及戰晉戎馬還泞而止【泞泥也還便旋也小駉不調故陷泥中】秦獲晉侯以歸【僖十五年左右氏傳】晉程鄭為乘馬御六駉屬焉使訓羣駉知禮【程鄭荀氏別族乘馬御乘車之僕也六駉六閑之駉周禮諸侯有六閑馬乘車尚禮容故訓羣駉使知禮成十八年左右氏傳】鬬且曰古者聚馬不害民之財用國馬足以行軍【國馬民馬也十六井為一戎馬一匹牛三頭足以行軍也】公馬足以稱賦【公馬公之戎馬稱舉也賦兵賦也】不是過也【國語楚語】

玉府掌王之兵器凡王之獻兵器受而藏之【謂百工為王所作可以獻遺諸侯天官】內府掌受良兵良器凡四方之幣獻之兵器入焉【諸侯朝聘所獻國珍同上】職金入其金錫於為兵器之府【為兵器者攻金之工六也】掌受土之金罰入於司兵【給治兵秋官】戎器不粥於市兵車不中度不粥於市【王制】

右兵器總要萃君子以除戎器戒不虞【除者修而聚之之謂萃象傳】密須之鼓與其大路文所以大蒐也【密須姑姓國也在安定陰密縣文王伐之得其鼓路以蒐】闕鞶之甲武所以克商也【闕鞶國所出鎧】唐叔受之【昭十五年左右氏傳】越棘大弓天子之戎器也【越國名也棘戟也春秋傳曰子都拔棘明堂位】

車有六等之數【車有天子之象人在其中焉六等之數法易之三材六畫】車珍四尺謂之一等戈柅六尺有六寸既建而迤崇於軫四尺謂之二等人長八尺崇於戈四尺謂之三等戈長尋有四尺崇於人四尺謂之四等車戟常崇於戈四尺謂之五等酋矛常有四尺崇於戟四尺謂之六等【此所謂兵車也軫與後橫木崇高也八尺曰尋倍尋曰常戈長丈二戈戈戟矛皆插車軸鄭司農云迤讀為倚移從風之移謂著戈於車邪倚也酋發聲直謂矛】車謂之六等之數【申言數也考工記】革路龍勒條纓五就建大白以即戎【革路挽之以革而漆之無他飾龍駉也以白黑飾韋雜色為勒條讀為條其樊及纓以條絲飾之而五成不言樊字蓋脫爾大白殷之旗猶周大赤蓋象正色也即戎謂兵事春官巾車】車僕掌戎路之萃廣車之萃闕車之萃萃車之萃輕車之萃【萃猶副也此五者皆兵車所謂五戎也戎路王在軍所乘也廣車橫陳之車也闕車所用補闕之車也萃猶屏也所用對敵自蔽隱之車也輕車所用馳敵致師之車也春秋傳曰公喪戎路又曰其君之戎分為二廣則諸侯戎路廣車也又曰帥旂闕四十乘孫子八陳有萃車之陳又曰馳車十乘五者之制及萃數未盡聞也書曰武王戎車三百輛故書革作平杜子春云萃車當為駟車其字當為萃書亦或為萃】凡師共革車各以其萃【五戎者共其一以為王優尊者所乘也而萃各從其元焉春官】

戎僕掌馭戎車掌王倅車之政【詳見征伐篇】右車【民車見兵制篇】

夏后氏曰鉤車先正也殷曰寅車先疾也周曰元戎先良也【司馬法】以爾鉤援與爾臨衝以伐崇墉【鉤援鉤梯也所以鉤引上城所謂雲梯者也臨衝車也在上臨下者也衝衝車也從旁衝突者也皆攻城之具也崇國名墉城也大雅皇矣】

武王戎車三百兩武賁三百人與受戰于牧野【書序】元戎十乘以先啓行【元大也戎戎車也軍之前鋒也啓開行道也】戎車既安如輕如軒【輕車之覆而前也軒車之却而後也凡車從後視之如輕從前視之如軒然後適調也小雅六月】小戎伐收五檠梁輶游環脅驅陰鞀鋈續文茵暢轂【小戎兵車也伐淺也收軫也謂車前後兩端橫木所以收斂所載者也凡車之制廣皆六尺六寸其平地任載者為大車則軫深八尺兵車則軫深四尺四寸故曰小戎伐收也五五束也檠歷錄然文章之貌也梁輶從前軫以前稍曲而上至衡則向下鉤之橫衡於輶下而輶形穹隆上曲如屋之梁又以皮革五處束之其文章歷錄然也游環鞀環也以皮為環當兩服馬之背上游移前却無定處引兩驂馬之外轡貫其中而執之所以制驂馬使不得外出左傳曰如驂之有韁是也脅驅亦以皮為之前係於衡之兩端後係於軫之兩端當服馬脅之外所以驅驂馬使不得內入也陰揜軌也軌在軾前而以板橫側揜之以其陰映此軌故謂之陰也鞀以皮二條前係驂馬之頸後係陰板之上也鋈續陰板之上有續鞀之處消白金沃灌其環以為飾也蓋車衡之長六尺六寸止容二服驂馬之頸不當於衡故別為二鞀以引車亦謂之韁左傳曰兩鞀將絕是也文茵車中所坐虎皮褥也暢長也轂者車輪之中外持輻內受軸者也大車之轂一尺有半兵車之轂長三尺二寸故兵車曰暢轂】又曰龍盾之合鋈以鰲軾【盾干也畫龍於盾合而載之以為車上之衛必載二者備破毀也鰲環之有舌者軾內轡也置鰲於軾前以繫軾故謂之鰲軾亦消沃白金以為飾也秦風小戎】

潘黨率游闕四十乘【游車補闕者宣十二年左傳】

楚子登巢車以望晉軍【巢車車上為櫓成十六年左傳】

車者軍之羽翼也所以陷堅陳要強

敵遮北走也易戰之法一車當步卒八十人八十人當一車一車當六騎六騎當一車十乘敗千人百乘敗萬人此其大數也置車之吏數五車而一長十車而一吏五十車而一卒百乘而一將易戰之法五車為列前後相去四十步左右十步險戰之法車必循道十里為聚二十車為屯前後相去二十步左右六步隊間三十六步五車一長縱橫相去一里各返故道選車士之法取年四十以下長七尺五寸已上走能逐馬及馳而乘之前後左右上下周旋能超乘旌旗力穀八石弩射前後皆便習者武車之士不可不厚也【六韜】

函人為甲犀甲七屬兕甲六屬合甲五屬【屬讀如灌注之注謂上旅下旅札續之數也革堅者札長鄭司農云合甲削革裏肉但取其表合以為甲】犀甲壽百年兕甲壽二百年合甲壽三百年【革堅者又支久】凡為甲必先為容【服者之形容也鄭司農云容謂象式】然後制革【裁制札之廣袤】權其上旅與其下旅而重若一【鄭司農云上旅謂要以上下旅謂要以下】以其長為之圍【圍謂札要廣厚】凡甲鍛不摯則不堅已敝則撓【鄭司農云鍛鍛革也摯謂質也鍛革大孰則革敝無強曲撓也玄謂摯之言致】凡察革之道眡其鑽空欲其窻也【鄭司農云窻小孔貌窻讀為宛彼北林之宛】眡其裏欲其易也【無敗蔑也】眡其朕欲其直也【鄭司農云朕謂革制】囊之欲其約也【鄭司農云謂卷置囊中也春秋傳

曰橐甲而見子南】舉而眡之欲其豐也【豐大】衣之欲其無齟也【鄭司農云齟謂如齒齟】眡其鑽空而窓則革堅也眡其裏而易則材更也眡其朕而直則制善也橐之而約則周也舉之而豐則明也衣之無齟則變也【周密致也明有光耀鄭司農云更善也變隨人身便利考工記】司甲【闕夏官】

右甲 成公元年作丘甲【周禮九夫為井四井為邑四邑為丘丘十六井甲鎧也】作為也丘為甲也【使丘之民皆作甲】 甲國之大事也 作甲非正也古者立國家百工具農工皆有職以事上古者有四民有士民【學習道藝者】有商民【通四方之貨者】有農民【播殖耕稼者】有工民【巧心勞手以成器物者】夫甲非人人之所能為也【各有業也】丘作甲非正也【穀梁傳】

五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之大刃之齊【凡金多錫則忍白 考工記】 冶氏戈廣二寸內倍之胡三之援四之【戈今句子戟也或謂之雞鳴或謂之擁頸內謂胡以內接秘者也長四寸胡六寸援八寸鄭司農云援直刃也胡其子】已倨則不入己句則不決長內則折前短內則不疾【戈句兵也主於胡也已倨謂胡微直而邪多也以啄人則不入己句謂胡曲多也以啄人則創不決胡之曲直鋒本必橫而取圜於磬折前謂援也內長則援短援短則曲於磬折曲於磬折則引之與胡並鈎內短則援長援長則倨於磬折倨於磬折則引之不疾】是故倨句外博【博廣也倨之外胡之裏也句之外胡之表也廣其本以除四病而使用也俗謂之曼胡似此】重三鈐【鄭司農云鈐量名也讀為刷玄謂許叔重說文解字云鈐鍤也今東萊稱或以大半兩為鈐十鈐為環環重六兩大半兩鍤鈐似同矣則三鈐為一斤四兩】戟廣寸有半寸內三之胡四之援五之倨句中矩與刺重三鈐【戟今三鋒戟也內長四寸半胡長六寸援長七寸半三鋒者胡直中矩言正方也鄭司農云刺謂援也玄謂刺者著秘直前如鑕者也戟胡橫貫之胡中矩則援之外句磬折與 同上】廬人為廬器戈秘六尺有六寸彘長尋有四尺車戟

常酋矛常有四尺夷矛三尋【秘猶柄也八尺曰尋倍尋曰常酋夷長短名酋之言適也酋近夷長矣】凡兵無過三其身過三其身弗能用也而無已又以害人【人長八尺與尋齊進退之度三尋用兵力之極也而無已不徒止耳】故攻國之兵欲短守國之兵欲長攻國之人衆行地遠食飲飢且涉山林之阻是故兵欲短守國之人寡食飲飽行地不遠且不涉山林之阻是故兵欲長【言罷羸宜短兵壯健宜長兵】凡兵句兵欲無彈刺兵欲無蜎是故句兵棹刺兵搏【句兵戈戟屬刺兵矛屬故書彈或作但蜎或作絹鄭司農云彈讀為彈丸之彈絹讀為悁悁之悁悁謂橈也棹讀為鼓鼙之鼙玄謂蜎亦掉也讀為井中蟲蜎之蜎齊人謂柯斧柄為棹則棹隋圜也搏圜也】????兵同強舉圍欲細細則校刺兵同強舉圍欲重重欲傳人傳人則密是故侵之【改句言????容受無刃同強上下同也舉謂手操鄭司農云校讀為絞而婉之絞重欲傳人謂矛柄之大者在人手中者侵之能敵也玄謂校疾也傳近也密審也正也人手操細以????則疾操重以刺則正然則為矜句兵堅者在後刺兵堅者在前】凡為彘五分其長以其一為之被而圍之參分其圍去一以為晉圍五分其晉圍去一以為首圍凡為酋矛參分其長二在前一在後而圍之五分其圍去一以為晉圍參分其晉圍去一以為刺圍【被把中也圍之圍之也大小未聞凡矜八觚鄭司農云晉謂矛戟下銅鑕也刺謂矛刃胷也玄謂晉讀如

王搢大圭之搢矜所捷也首受上鐔也為戈戟之矜所圍如受夷矛如酋矛】凡試廬事置而搖之以眡其蜎也炙諸牆以眡其橈之均也橫而搖之以眡其勁也【置猶樹也炙猶柱也以柱兩牆之間輓而肉之本末勝負可知也正於牆牆踴】六建既備車不反覆謂之國工【六建五兵與人也反覆猶軒輶 同上】桃氏為劒臘廣二寸有半寸【臘謂兩刃】兩從半之【鄭司農云謂劒脊兩面殺趨鏐】以其臘廣為之莖圍長倍之【鄭司農云莖謂劒夾人所握鐔以上也玄謂莖在夾中者莖長五寸】中其莖設其後【鄭司農云謂穿之也玄謂從中以卻稍大之也後大則於把易制】參分其臘廣去一以為首廣而圍之【首圍其徑一寸三分寸之二】身長五其莖長重九鈞謂之上制上士服之身長四其莖長重七鈞謂之中制中士服之身長三其莖長重五鈞謂之下制下士服之【上制長三尺重三斤十二兩中制長二尺五寸重二斤十四兩三分兩之二下制長二尺重二斤一兩三分兩之一此今之匕首也人各以其形貌大小帶之此士謂國勇力之士能用五兵者也樂記曰武王克商裨冕搢笏而虎賁之士說劒 同上】司兵掌五兵五盾各辨其物與其等以待軍事【五盾干櫓之屬其名未盡聞也等謂功沽上下鄭司農云五兵者戈殳戟酋矛夷矛】及授兵從司馬之法以頒之及其受兵輸亦如之及其用兵亦如之【從司馬之法令師旅卒兩人數所用多少也兵輸謂師還有司還兵也用兵謂出給衛守】軍事建車之五兵會同亦如之【車之五兵鄭之司農云者是也步卒之五兵則無夷矛而有弓矢 夏官】司戈盾掌戈盾之物而頒之【分與授用】軍旅會同授貳車戈盾建乘車之戈盾授旅賁及虎士戈盾【乘車王所乘車也軍旅則革路會同則金路】及舍設藩盾行則斂之【舍止也藩盾盾可以藩衛者如今之扶蘇與 同上】

右兵 二矛重英【二矛酋矛夷矛也英以朱羽為矛飾也酋矛長二丈夷矛長二丈四尺並建於車上則其英重疊而見】又曰二矛重喬【矛之上句曰喬所以懸英也英敝而盡所存者喬而已 鄭風清人】龍盾之合【注見前】又曰公矛鋈錡蒙伐有苑【公矛三隅矛也鋈錡以白金沃矛之下端平底者也蒙雜也伐中干也盾之別名苑文貌畫雜羽之文於盾上也 秦風小戎】吳建肥胡奉文犀之渠【肥胡幡也文犀之渠謂楯也文犀犀之有文理者 吳語】兵革藏於私家非禮也是謂脅君【刼脅之君也兵革君之武衛及軍器也 禮運】

稟人掌受財于職金以齎其工【齎其工者給市財用之直】弓六物為三等弩四物亦如之【三等者上中下人各有所宜弓人職曰弓長六尺六寸謂之上制上士服之弓長六尺三寸謂之中制中士服之弓長六尺謂之下制下士服之弩及矢箠長短之制未聞】矢八物皆三等箠亦如之春獻素秋獻成【矢箠春作秋成】書其等以饗工【鄭司農云書工功拙高下之等以制其饗食也玄謂饗酒肴勞之也上工作上等其饗厚下工作下等其饗薄】乘其事試其弓弩以下上其食而誅賞【鄭司農云乘計也計其事之成功也故書試為考玄謂考之而善則上其食尤善又賞之否者反此】乃入功于司弓矢及繕人【功成】凡齎財與其出入皆在稟人以待會而攷之亡者闕之【皆在稟人者所齎工之財及弓弩矢箠出入其簿書稟人藏之闕猶除也弓弩矢箠棄亡者除之計今現在者 夏官】弓人為弓取六材必以其時【取幹以冬取角以秋絲漆以夏筋膠未聞】六材既聚巧者和之【聚猶具也】幹也者以為遠也角也者以為疾也筋也者以為深也膠也者以為和也絲也者以為固也漆也者以為受霜露也【六材之力相得而足】凡取幹之道七柘為上櫟次之檿桑次之橘次之木瓜次之荆次之竹為下【鄭司農云櫟讀為億萬之億爾雅曰柘櫟又曰檿桑山桑國語曰檿弧箕

服】凡相幹欲赤黑而陽聲赤黑則鄉心陽聲則遠根【陽猶清也木之類近根者奴】凡析幹射遠者用執射深者用直【鄭司農云執謂形執假令木性自曲則當反其曲以為弓故曰審曲面執玄謂曲執則宜薄薄則力少直則可厚厚則力多】居幹之道菑栗不迤則弓不發【鄭司農云菑讀為不菑而奮之菑栗讀為榛栗之栗謂以鋸副析幹迤讀為倚移從風之移謂邪行絕理者弓發之所從起玄謂栗讀為裂襦之裂】凡相角秋綱者厚春綱者薄釋牛之角直而澤老牛之角紆而昔【鄭司農云紆讀為拊縛之紆昔讀為交錯之錯謂牛角牴理錯也玄謂昔讀履錯然之錯】疾疾險中【牛有久病則角裏傷】瘠牛之角無澤【少潤氣】角欲青白而豐末【豐大也】夫角之本蹙於 而休於氣是故柔柔故欲其執也白也者執之徵也【蹙近也休讀為煦鄭司農云欲其形之自曲反以為弓玄謂色白則執】夫角之中恒當弓之畏畏也者必橈橈故欲其堅也青也者堅之徵也【故書畏作威杜子春云當為威威謂弓淵角之中央與淵相當玄謂畏讀如秦師入隈之隈】夫角之末遠於 而不休於氣是故脆脆故欲其柔也豐末也者柔之徵也【末之大者 氣及煦之】角長二尺有五寸三色不失理謂之牛戴牛【三色本白中青末豐鄭司農云牛戴牛角直一牛】凡相膠欲朱色而昔昔也者深瑕而澤紆而搏廉【搏圓也廉瑕嚴利也】鹿膠青白馬膠赤白牛膠火赤鼠膠黑魚膠餌犀膠黃【皆謂煮用其皮或用角餌色如餌】凡昵之類不能方【鄭司農云謂膠善戾故書昵或作機杜子春云機讀為不義不昵之昵或為黏黏也玄謂機脂膏臚敗之臚臚亦黏也】凡相筋欲小簡而長大結而澤小簡而長大結而澤則其為獸必剽以為弓則豈異於其獸【剽疾也鄭司農云簡讀為???然登捭之???玄謂讀如簡札之簡謂筋條也】筋欲敝之敝【鄭司農云嚼之當孰】漆欲測【鄭司農云測讀為惻隱之惻玄謂測讀如測度之測測猶清也】絲欲沈【如在水中時色】得此六材之全然後可以為良【全無瑕病良善也】凡為弓冬析幹而春液角夏治筋秋合三材【三材膠漆絲鄭司農云液讀為譯】寒奠體【奠讀為定至冬膠堅內之槩中定往來體】冰析灋【大寒中下於槩中復內之】冬析幹則易【理滑致】春液角則合【合讀為洽】夏治筋則不煩【煩亂】秋合三材則合【合堅密也】寒奠體則張不流【流猶移也】冰析灋則審環【審猶定也】春被弦則一年之事【朞歲乃可用】析幹必倫【順其理也】析角無邪【亦正之】斲目必荼【鄭司農云荼讀為舒徐徐也目幹節目】斲目不荼則及其大修也筋代之受病【脩猶久也】夫目也者必強強者在內而摩其筋夫筋之所由斲恒由此作【摩猶噤也故書筋或作薊鄭司農云當為筋斲讀為車斲之斲玄謂斲絕起也】故角三液而幹再液【重醴治之使相稱】厚其帑則木堅薄其帑則需【需謂不充滿鄭司農云帑讀為襦有衣絮之絮帑謂弓中裨】是故厚其液而節其帑【厚猶多也節猶適也】約之不皆約疏數必侔【不皆約纏之纏不相次也皆約則弓帑侔猶均也】斲摯必中膠之必均【摯之言致也中猶均也】斲摯不中膠之不均則及其大修也角代之受病夫懷膠於內而摩其角夫角之所由挫恒由此作【幹不均則角蹴折也】凡居角長者以次需【當弓之隈也長短各稱其幹短者居簫】恒角而短是謂逆橈引之則縱釋之則不校【鄭司農云恒讀為綰繩之繩玄謂恒讀為桷桷竟也竟其角而短于淵幹引之角縱不用力若欲反橈然校疾也既不用力放之又不疾】恒角而達辟如終繼非弓之利也【達謂長于淵幹若達於簫頭繼弓鞞角過淵接則送矢大疾若見繼於鞞矣弓有鞞者為發弦時備頓傷詩云竹鞞緄鞞】今夫茭解中有變焉故校【鄭司農云茭讀為激發之激茭謂弓槩也校讀為絞而婉之絞玄謂茭讀如齊人名手足擊為骹之骹茭解謂接中也變謂簫臂用力異校疾也】於挺臂中有柎焉故剽【挺直也柎側骨剽亦疾

也鄭司農云剽讀為湖漂絮之漂】恒角而達引如終繼非弓之利【重明達角之不利變譬言引字之誤】撝幹欲孰於火而無羸撝角欲孰於火而無燂引筋欲盡而無傷其力鬻膠欲孰而水火相得然則居旱亦不動居溼亦不動【羸過孰也燂炙爛也不動者謂弓也故書燂或作朕鄭司農云字從燂】苟有賤工必因角幹之溼以為之柔善者在外動者在內雖善於外必動於內雖善亦弗可以為良矣【苟愉也溼猶生也】凡為弓方其峻而高其柎長其畏而薄其敝宛之無已應【宛謂引之也引之不休止常應弦言不罷需也峻謂簫也鄭司農云敝讀為蔽塞之蔽謂弓人所握持者】下柎之弓末應將興【末猶簫也興猶動也發也弓柎卑簫應弦則柎將動】為柎而發必動於綱【綱接中】弓而羽綱末應將發【羽讀為扈扈緩也接中動則緩緩簫應弦則角幹將發】弓有六材焉維幹強之張如流水【無難易也】維體防之引之中參【體謂內之於檠中定其體防深淺所止謂體定張之弦居一尺引之又二尺】維角堂之欲宛而無負弦引之如環釋之無失體如環【負弦辟戾也負弦則不如環如環亦謂無難易鄭司農云堂讀如掌距之掌車掌之掌】材美工巧為之時謂之參均角不勝幹幹不勝筋謂之參均量其力有三均均者三謂之九和【有三讀為又參量其力又參均者謂若幹勝一石加角而勝二石被筋而勝三石引之中三尺假令弓力勝三石引之中三尺弛其弦以繩緩擗之每加物一石則張一尺故書勝或作稱鄭司農云當言稱謂之不參均玄謂不勝無負也】九和之弓角與幹權筋三侔膠三鈐絲三邸漆三𧮛上工以有餘下工以不足【權平也侔猶等也角幹既平筋三而又與角幹等也鈐鍍也邸𧮛輕重未聞】為天子之弓合九而成規為諸侯之弓合七而成規大夫之弓合五而成規士之弓合三而成規【材長則句少也】弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下士服之【人各以其形貌大小服此弓】凡為弓各因其君之躬志慮血氣【又隨其人之性情】豐肉而短寬緩以茶若是者為之危弓危弓為之安矢骨直以立忿疾以奔若是者為之安弓安弓為之危矢【言損羸濟不足危奔若疾也骨直謂強毅茶古文舒假借字鄭司農云茶讀為舒】其人安其弓安其矢安則莫能以速中且不深【故書速或作數鄭司農云字從速速疾也三舒不能疾而中言矢行短也中又不能深】其人危其弓危其矢危則莫能以愿中【愿慤也三疾不能慤而中言矢行長也長謂過去】往體多來體寡謂之夾與之屬利射侯與弋【射遠者用執夾與之弓合五而成規侯非必遠顧執弓者材必薄薄則弱弱則矢深不中侯不落大夫士射侯矢落不獲弋繳射也故書與作其杜子春云當為與】往體寡來體多謂之王弓之屬利射革與質【射深者用直此又直焉於射堅宣也王弓合九而成規弧弓亦然革謂干盾質木楯天子射侯亦用此弓大射曰中離維綱揚觸梱復君則釋獲其餘則否】往體來體若一謂之唐弓之屬利射深【射深用直唐弓合七而成規大弓亦然春秋傳曰盜竊寶玉大弓】大和無灋其次筋角皆有灋而深其次有灋而疏其次角無灋【大和尤良者也深謂灋在中央兩邊無也角無灋謂隈裏】合灋若背手文【弓表裏灋合處若人合手背文相應鄭司農云如人手背文理】角環灋牛筋蕢灋麋筋斥蠖灋【蕢臬實也斥蠖屈蟲也】和弓????摩【和猶調也????拂也將用弓必先調之拂之摩之大射禮曰小射正授弓大射正以袂順左右隈上再下一】覆之而角至謂之句弓【句於三體材敝惡不用之弓也覆猶察也謂用射而察之至猶善也但角善則矢雖疾而不能遠】覆之而幹至謂之侯弓【射侯之弓也幹又善則矢疾而遠】覆之而筋至謂之深弓【射深之弓也筋又善則矢既疾而遠又深考工記】五分其金而錫居二謂之削殺矢之齊【同上】

冶氏為

殺矢刃長寸圍寸銚十之重三垓【殺矢與戈戟異齊而同工似補脫誤在此也殺矢用諸田獵之矢也銚讀如麥秀銚之銚鄭司農云銚箭足入橐中者也垓量名讀為丸同上】矢人為矢銚矢參分莠矢參分一在前二在後【參訂之而平者前有鐵重也司弓矢職莠當為殺鄭司農云一在前謂箭橐中鐵莖居參分殺一以前】兵矢田矢五分二在前三在後【鐵差短小也兵矢謂枉矢絜矢也此二矢亦可以田田矢謂矰矢】殺矢七分三在前四在後【鐵又差短小也司弓矢職殺當為莠】參分其長而殺其一【矢橐長三尺殺其前一尺令趣銚也】五分其長而羽其一【羽者六寸】以其筈厚為之羽深【筈讀為橐謂矢幹古文假借字厚之數未聞】水之以辨其陰陽【辨猶正也陰沉而陽浮】夾其陰陽以設其比夾其比以設其羽【夾其陰陽者弓矢比在橐兩旁弩矢比在上下設羽於四角鄭司農云比謂括也】參分其羽以設其刃【刃二寸】則雖有疾風亦弗之能憚矣【故書憚或作但鄭司農云讀當為憚之以威之憚謂風不能驚憚箭也】刃長寸圍寸銚十之重三垓【刃長寸脫二字銚一尺】前弱則俛後弱則翔中弱則紆中強則揚羽豐則遲羽殺則趨【言幹羽之病使矢行不正俛低也翔迴顧也紆曲也揚飛也豐大也趨旁掉也】是故夾而搖之以眡其豐殺之節也【今人以指夾矢儼衛是也】撓之以眡其鴻殺之稱也【撓搦其幹】凡相筈欲生而搏同搏欲重同重節欲疏同疏欲橐【相猶擇也生謂無瑕蠹也搏讀如搏黍之搏謂圓也鄭司農云欲橐欲其色如橐也同上】司弓矢掌六弓四弩八矢之灋辨其名物而掌其守藏與其出入【法曲直長短之數】中春獻弓弩中秋獻矢箛【弓弩成於和矢箛成於堅箛盛矢器也以獸皮為之】及其頒之王弓弧弓以授射甲革楯質者夾弓庾弓以授射豸侯鳥獸者唐弓大弓以授學射者使者勞者【王弧夾庾唐大六者弓異體之名也往體寡來體多曰王弧往體多來體寡曰夾庾往體來體若一曰唐大甲革革甲也春秋傳曰蹲甲而射之質正也樹楯以為射正射甲與楯試弓習武也豸侯五十步及射鳥獸皆近射也近射用弱弓則射大侯者用王弧射參侯者用唐大矣學射者弓用中後習強弱則易也使者勞者弓亦用中遠近可也勞者勤勞王事若晉文侯文公受王弓矢之賜者故書楯為鞬鄭司農云楯字或為鞬非是也圉師職曰射則充楯質又此司弓矢職曰澤共射楯質之弓矢言射楯質自有弓謂王弧弓也以此觀之言鞬質者非】其矢箛皆從其弓【從弓數也每弓者一箛百矢】凡弩夾庾利攻守唐大利車戰野戰【攻城壘者與其自守者相迫近弱弩疾也車戰野戰進退非強則不及弩無王弧王弧恒服弦往體少者使矢不疾】凡矢枉矢絜矢利火射用諸守城車戰殺矢銚矢用諸近射田獵矰矢莠矢用諸弋射恒矢痺矢用諸散射【此八矢者弓弩各有四焉枉矢殺矢矰矢恒矢弓所用也絜矢銚矢莠矢痺矢弩所用也枉矢者取名變星飛行有光今之飛矛是也或謂之兵矢絜矢象焉二者皆可結火以射敵守城車戰前於重後微輕行疾也殺矢言中則死銚矢象焉銚之言候也二者皆可以司候射敵之近者及禽獸前尤重中深而不可遠也結繳於矢謂之矰矰高也莠矢象焉莠之言荆也二者皆可以弋飛鳥荆羅之也前於重又微輕行不低也詩云弋鳬與雁恒矢安居之矢也痺矢象焉二者皆可以散射也謂禮射及習射也前後訂其行平也凡矢之制枉矢之屬五分二在前三在後殺矢之屬參分一在前二在後矰矢之屬七分三在前四在後恒矢之屬軒輶中所謂志也鄭司農云痺矢讀為人罷短之罷玄謂痺讀如痺病之痺痺之言倫比】天子之弓合九而成規諸侯合七而成規大夫合五而成規士合三而成規句者謂之弊弓【體往來之衰也往體寡來體多則合多往體多來體寡則合少而圓弊猶惡也句者惡則直善矣】凡師役會同頒弓弩各以其物從授兵甲之儀【物弓弩矢箛之屬】凡亡矢者弗用則更【更償也用而棄之則不償夏官】繕人

掌王之用弓弩矢箛矰弋挾拾【鄭司農云挾者所以縱弦也拾者所以引弦也詩云挾拾既飲詩家說或謂挾謂引弦彊也拾謂構扞也玄謂挾挾矢時所以持弦飾也著右手巨指士喪禮曰挾用正王棘若櫟棘則天子用象骨與構扞著左臂裏以韋為之】凡乘車充其籠箛載其弓弩【充籠箛以盛矢】既射則歛之【歛藏之也詩云彤弓弭兮受言藏之】無會計【亡敗多少不計同上】

右弓矢 虎韞鏤膺交韞二弓竹閉緹縢【虎韞以虎皮為弓室也鏤膺鏤金以飾馬當胷帶也交韞交二弓於韞中謂顛倒安置之必二弓以備壞也閉弓檠也儀禮作鞬緹縢約也以竹為閉而以繩約之於弛弓之裏檠弓體使正也 秦風小戎】象弭魚服【象弭以象骨飾弓弣也魚獸名似猪東海有之其皮背上斑文腹下純青可為弓韃矢服也小雅采芣】

鼓人以鼗鼓鼓軍事【大鼓謂之鼗鼗鼓長八尺】以金鐃和鼓以金鐃節鼓以金鐃止鼓以金鐃通鼓【鐃鐃于也圓如碓頭大上小下樂作鳴之與鼓相和鐃鉦也形如小鐘軍行鳴之以為鼓節司馬職曰軍行鳴鐃如鈴無舌有秉執而鳴之以止擊鼓司馬職曰鳴鐃且卻鐃大鈴也振之以通鼓司馬職曰司馬振鐃 地官】大司馬中春教振旅辨鼓鐃鐃之用王執路鼓諸侯執賁鼓軍將執晉鼓師帥執提旅帥執鼙卒長執鐃兩司馬執鐃公司馬執鐃【提謂馬上鼓有曲木提持立馬髦上者故謂之提 詳見田役篇】司常掌九旗之物名各有屬以待國事日月為常交龍為旂通帛為旛雜帛為物熊虎為旗鳥隼為旟龜蛇為旐全羽為旞析羽為旟及國之大閱贊司馬頒旗物王建大常諸侯建旂孤卿建旛大夫士建物師都建旗州里建旗縣鄙建旐道車載旞旒車載旌皆畫其象焉官府各象其事州里各象其名家各象其號【詳見通禮名器下】大司馬中秋教治兵辨旗物之用王載大常諸侯載旂軍吏載旗師都載旛鄉遂載物郊野載旐百官載旗各書其事與其號焉【詳見田役篇】

巾車革路建大白以即戎【詳見車章】

右金鼓旌旗 宣子曰伐備鐘鼓聲其罪也【以聲彰其罪也】戰以鐃于丁寧儆其民也【鐃于形如碓頭與鼓相和丁寧謂鉦也儆戒也唐尚書云鐃于鐃也非也鐃與鐃于各異物 國語晉語】會于黃池吳王秉枹親就鳴鐘鼓丁寧鐃于振鐃【吳語】旂夏后氏玄首人之執也殷白天之義也周黃地之道也章夏后氏以日月尚明也殷以虎尚威也周以龍尚文也【司馬法】

小宰軍旅令百官府共其財用【天官】

外府軍旅共其財用之幣齎賜予之財用【齎行道之財用也 同上】遣人師役掌其道路之委積凡國野之道十里有廬廬有飲食三十里有宿宿有路室路室有委五十里有市市有候館候館有積【委積者廩人倉人計九穀之數足國用以其餘共之少曰委多曰積廬若今野候徙有房也宿可止宿若今亭有室矣候館樓可以觀望者也一市之間有三廬一宿 地官】委人軍旅共其委積薪芻凡疏財共野委兵器與其野囿財用【委積薪芻者委積之薪芻也軍旅又有疏財以助禾粟野委謂廬宿止之薪芻也其兵器謂守衛陳兵之器也野囿之財用者苑囿藩籬之材】凡軍旅之賓客館焉【館舍也必舍此者就牛馬之用 同上】

廩人凡邦有師役之事則治其糧與其食【行道曰糧謂糒也止居曰食謂米也同上】

倉人凡國之大事共道路之穀積食飲之具【大事謂喪戎 同上】

牛人軍事共其犒牛【鄭司農云犒師之牛 同上】

外饗師役則掌共其獻賜脯肉之事【獻謂酌其長帥 天官】

右財用

掌固掌修城郭溝池樹渠之固頒其士庶子及其衆庶之守【樹謂枳棘之屬有刺者也衆庶民遞守固者也鄭司農說樹以國語曰城守之木於是乎用之】設其飾器【兵甲之屬今城郭門之器亦然】分其財用均其稍食【財用國以財所給守吏之用也稍食祿廩】任其萬民用其財器【任謂以其任使之也民之材器其所用塹築及為藩落】凡守者受法焉以通守政有移甲與其役財用唯是得通與國有司帥之以贊其不足者【凡守者士庶子及他要害之守吏通守政者兵甲役財難易多少轉移相給也其他非是不得妄離部署國有司掌固也其移之者又與掌固帥致之贊佐也】晝三巡之夜亦如之【巡行也行守者為衆庶之解惰】夜三鼙以號戒【杜子春云讀鼙為造次之造謂擊鼓行夜戒守也春秋傳所謂賓將趣者與趣與造音相近故曰終夕與燎玄謂鼙擊鼙警守鼓也三巡之間又三擊鼙】若造都邑則治其固與其守法【都邑亦為城郭】凡國都之竟有溝樹之固郊亦如之【竟界也】民皆有職焉【職謂守與任】若有山川則因之【山川若穀皋河漢 夏官】司險掌九州之圖以周知其山林川澤之阻而達其道路【周猶徧也達道路者山林之阻則開鑿之川澤之阻則橋梁之】設國之五溝五涂而樹之林以為阻固皆有守禁而達其道路【五溝遂溝洫澮川也五涂徑畛涂道路也樹之林作藩落也】國有故則藩塞阻路而上行者以其屬守之唯有節者達之【有故喪災及兵也閉絕要害之道備姦宄也 同上】掌疆【闕 同上】鑄師凡軍之夜三鼙皆鼓之守鼙亦如之【守鼙備守鼓也鼓之以鼗鼓杜子春云一夜三擊備守鼙也春秋傳所謂賓將趣者音聲相似 春官】

典瑞牙璋以治兵守【牙璋亦王使之瑞節兵守用兵所守若齊人戍遂諸侯戍周 同上】

司土國有故則致士而頒其守【故非喪則兵災 夏官】大司徒國有大故則致萬民於王門令無節者不行於天下【大故謂王崩及寇兵也節六節有節乃得行防姦私 地官】小司徒大故致餘子【注見兵制】鄉大夫國有大故則令民各守其閭以待政令【使民皆聚】

【於閭胥所治處】以旌節輔令則達之【民雖以徵會行其將之者無節則不得通 同上】脩閭氏邦有故則令守其閭互唯執節者不幾【令者令其】

【閭內之閭胥里宰之屬 互謂行馬所以障互禁止人也 秋官】

職金凡國有大故而用金石則掌其令【主其取之令也用金石者作檜雷椎桴之屬 同上】

孟冬坏城郭戒門閭修鍵閉慎管籥固封疆備邊境完要塞謹關梁塞徯徑【坏益也鍵牡閉牝也管籥搏鍵器也固封疆謂使有司循其溝樹及其衆庶之守法也要塞邊城要害處也梁橋橫也徯徑禽獸之道也今月令疆或為璽 月令】公若有出疆之政【謂朝覲會同也】庶子以公族之無事者守於公宮正室守太廟【正室適子也太廟太祖之廟】諸父守貴宮貴室【謂守路寢】諸子諸孫守下宮下室【下宮親廟也下室燕寢或言宮或言廟通異語 文王世子】

右守禦 天險不可升也地險山川丘陵也王公設險以守其國險之時用大矣哉【坎彖傳】
欒武子曰楚軍內官序當其夜【內官近官序次也】以待不虞不可謂無備【宣十二年左氏傳】
晉侯使申公巫臣如吳假道于莒與渠丘公立於池上【渠丘公莒子朱也池城池也渠丘邑名莒縣有蘧里】曰城已惡莒子曰辟陋在夷其孰以我為虞【虞度也】對曰夫狡焉【狡猾之人】思啓封疆以利社稷者何國蔑有唯然故多大國矣唯或思或縱也【世有思開封疆者有縱其暴掠者莒人當唯此為命】勇夫重閉況國乎【為明年莒潰傳成八年左氏傳】
十一月楚子重伐莒圍渠 渠 城惡衆潰奔莒戊申楚入渠 楚師圍莒莒城亦惡庚申莒潰楚遂入郕莒無備故也【終巫臣之言】君子曰恃陋而不備罪之大者也備豫不虞善之大者也莒恃其陋而不修城郭浹辰之間而楚克其三都無備也夫【浹辰十二日也】詩曰雖有絲麻無棄菅蒯雖有姬姜無棄蕉萃凡百君子莫不代匱言備之不可以已也【逸詩也姬姜大國之女蕉萃陋賤之人成九年左氏傳】
楚囊瓦為令尹【囊瓦子囊之孫子常也代陽句】城郢【楚用子囊遺言已築郢城矣今畏吳復增修以自固】沈尹戌曰子常必亡郢苟不能衛城無益也古者天子守在四夷【德及遠】天子卑守在諸侯【政卑損】諸侯守在四鄰【鄰國為之守】諸侯卑守在四竟【裁自完】慎其四竟結其四援【結四鄰之國為援助】民狎其野【狎安習也】三務成功【春夏秋三時之務】民無內憂而又無外懼國焉用城今吳是懼而城於郢守已小矣卑之不獲能無亡乎【不獲守四竟】昔梁伯溝其公宮而民潰【在僖十八年】民棄其上不亡何待夫正其疆場修其土田險其走集【走集邊竟之壘壁】親其民人明其伍【使民有部伍相為候望】信其鄰國慎其官守守其交禮【交接之禮】不僭不貪不懦不耆【懦弱也耆強也】完其守備以待不虞又何畏矣詩曰無念爾祖聿修厥德【詩大雅無念念也聿述也義取念祖考則述治其德以顯之】無亦監乎若敖蚡冒至於武文【四君皆楚先君之賢者】土不過同【方百里為一同言未滿一圻】慎其四竟猶不城郢今土數圻【方千里為圻】而郢是城不亦難乎【言守若是難以為安也為定四年吳入楚傳昭二十三年左氏傳】
諸侯之大夫盟于宋【盟在魯襄二十七年晉楚始盟以弭諸侯之兵】是行也以蕃為軍【藩籬落也不設壘壁】攀輦即利而舍【攀引也輦輦車也即就也言人引車就水草便利之地而舍之】
遮扞衛不行【望也遮遮罔也晝則 遮夜則扞衛扞衛謂羅闌狗附也張羅闌去壘五十步而陳周軍中前後左右彊弓注矢以誰何謂之羅闌又二十人為曹輦去壘三百步畜犬其中或視前後或視左右謂之狗附皆昏而設明而罷 遮二十人居狗附處以視聽 望明而設昏而罷不行者不設之也 國語晉語】

卷五十

<經部,禮類,通禮之屬,禮書綱目

欽定四庫全書

禮書綱目卷五十 婺源江永撰

征伐 軍禮三

補

大宗伯以軍禮同邦國【同謂威其不協僭差者軍禮之別有五】大師之禮用衆也【用其義勇春官】

一不朝則貶其爵再不朝則削其地三不朝則六師移之是故天子討而不伐【孟子】先王之治順天之道設地之宜官民之德而正名治物立國辨職以爵分祿諸侯說懷海外來服獄弭而兵寢聖德之至也其次賢王制禮樂法度乃作五刑興甲兵以討不義巡狩省方會諸侯考不同其有失命亂常背德逆天之時而危有功之君徧告於諸侯彰明有罪乃告於皇天上帝日月星辰禱於后土四海神祇山川塚社乃造於先王然後冢宰徵師于諸侯曰某國為不道征之以某年月日師至於某國會天子正刑冢宰與百官布令于軍曰入罪人之地無暴神祇無行田獵無毀土功無燔牆屋無伐林木無取六畜禾黍器械見其老幼奉歸勿傷雖遇壯者不校勿敵敵若傷之醫藥歸之既誅有罪王及諸侯修正其國舉賢立明正復厥職【司馬法】天下有道禮樂征伐自天子出必以歲之孟秋賞軍帥武人於朝簡練傑俊任用有功命將選士以誅不義於是孟冬以級授軍司徒搢扑北面而誓之【以等級授其鞭扑】誓于社以習其事先期五日大史誓於祖廟擇吉日齋戒告於郊社稷宗廟既筮則獻兆於天子天子使有司以特牲告社告以所征之事而受命焉舍奠于帝學以受成【成謂師律已成定】然後乃類上帝柴于郊以出以齊車遷廟之主及社主行大司馬職奉之【言以大司馬奉所遷廟社之主】無遷廟主則以幣帛皮圭告于祖禰謂之主命亦載齊車凡行主皮圭幣帛皆每舍奠焉而後就館【言廟社行主及皮圭幣帛之主命每所至之地則先舍奠而後就館示有尊也舍當作釋音與釋同】主車止于中門之外外門之內廟主居於道左社主居於道右其所經名山大川皆祭告焉及至敵所將戰太史卜戰日卜右御先期三日有司明以敵人罪狀告之史史定誓命戰日將帥陳列車甲卒伍于軍門之前有司讀誥誓使周定三令五申既畢遂禱戰祈克于上帝然後即敵將士戰全已克敵史擇吉日復禱於所征之地【禱師祭名也】柴於上帝祭社奠祖以告克者不頓兵傷士也戰不克則不告也凡類禱皆用甲丙戊庚壬之剛日有司簡功行賞不稽于時其用命者則加爵受賜于祖奠之前其奔北犯令者則加刑罰戮于社主之前【書稱用命則賞于祖弗用命則戮于社】然後鳴金振旅有司徧告捷于時所有事之山川既至舍于國外三日齊以特牛親格於祖禰然後入設奠以反主【設奠反其主於廟於社】若主命則卒奠歛玉埋之于廟兩階間【言埋玉則幣帛焚之】反社主如

初迎之禮舍奠於帝學以訊馘告大享於羣吏用備樂饗有功於祖廟舍爵策勲焉謂之飲至此天子親征之禮也【孔叢子問軍禮】

右天子親征總叙

大卜大師則貞龜【正龜於卜位也士喪禮曰卜人抱龜燋先奠龜西面是也又不親命龜大師輕於大祭祀也 春官】大司馬若大師則掌其戒令涖大卜【大師王出征伐也涖臨也臨大卜卜出兵吉凶也司馬法曰上卜下謀是謂參之 夏官】

右卜出軍

典瑞牙璋以起軍旅【鄭司農云牙璋瑑以為牙牙齒兵象故以牙璋發兵若今時以銅虎符發兵玄謂牙璋亦王使之瑞節 春官】玉人牙璋中璋七寸射二寸厚寸以起軍旅【二璋皆有鉏牙之飾於琰側先言牙璋有文飾也 考工記】大司徒大軍旅以旗致萬民而治其徒庶之政令【旗畫熊虎者也徵衆刻日樹旗期于其下】小司徒凡國之大事致民【大事謂戎事也鄭司農云國有大事當徵召會聚百姓則小司徒召聚之】大軍旅帥其衆庶【帥帥而致於大司徒】鄉師大軍旅正治其徒役與其輦輦戮其犯命者【輦駕馬輦人輓行所以載任器也止以為藩營司馬法曰夏后氏謂輦曰余車殷曰胡奴車周曰輶輦輦一斧一斤一鑿一耜一鋤周輦加二版二築又曰夏后氏二十人而輦殷十八人而輦周十五人而輦】州長若國作民而師田行役之事則帥而致之掌其戒令與其賞罰【致之致之於司徒也掌其戒令賞罰則是於軍因為師帥】

黨正凡作民而師田行役則以其法治其政事【亦於軍因為旅帥】族師若作民而師田行役則合其卒伍簡其兵器以鼓鐸旗物帥而至掌其治令戒禁刑罰【亦於軍因為卒長】縣師若將有軍旅之戒則受法於司馬以作其衆庶及牛馬車輦會其車人之卒伍使皆備旗鼓兵器以帥而至【受法於司馬者知所當徵衆寡】遂人若起野役則令各帥其所治之民而至以遂之大旗致之其不用命者誅之【役謂師田若有功作也遂之大旗熊虎】凡事致野役而師田作野民帥而至掌其政治禁令遂師軍旅平野民掌其禁令比叙其事而賞罰【平謂正其行列部伍也鄭司農云比讀為庀】縣正若將用野民師田行役則帥而至治其政令鄙師凡作民則掌其戒令【作民謂起役也】鄼長若作其民而用之則以旗鼓兵革帥而至稍人若有師田行役之事則以縣師之法作其同徒輦輦帥而以至治其政令以聽於司馬【有軍旅會同田役之戒縣師受法於司馬邦國都鄙稍甸郊里唯司馬所調以其法作其衆庶及馬牛車輦會其車人之卒伍使皆備旗鼓兵器以帥而至是以書令之耳其所謂若在家邑小都大都則稍人用縣師所受司馬之法作之帥之以致於司馬也同徒司馬所調之同凡用役者不必一時皆徧以人數調之使勞逸遞焉 並地官】大司馬及致建大常比軍衆誅後至者【比或作庀鄭司農云致謂聚衆也庀具也玄謂致鄉師致民於司馬比較次之也 夏官】司常凡軍事建旌旗及致民置旗弊之【始置旗以致民民至仆之】

【誅後至者春官】都司馬掌都之士庶子及其衆庶車馬兵甲之戒令【庶子卿大夫士之子車馬兵甲備軍發卒】以聽國司馬【聽者受行其所徵為也國司馬大司馬之屬皆是】

家司馬亦如之【大夫家臣為司馬者春秋傳曰叔孫氏之司馬饒戾夏官】 宮伯掌王宮之士庶子若邦有大事作宮衆則令之【謂王宮之士庶子於邦有大事或選當行天官】 諸子掌國子之倅國有大事則帥國子而致於天子唯所用之若有兵甲之事則授之車甲合其卒伍置其有司以軍法治之司馬弗正【軍法百人為卒五人為伍弗不也國子屬天子司馬雖有軍事不賦之】 凡國正弗及【夏官】

有發則命大司徒教士以車甲【乘兵車衣甲之儀有發謂有軍師發卒王制】

右起師

天子將出征類乎上帝宜乎社造乎禰禡於所征之地【禡師祭也為共禱其禮亦亡】 受命於祖【告祖也】 受成於學【定兵謀也王制】 大祝大師宜於社造于祖設軍社類上帝則前祝【鄭司農說設軍社以春秋傳曰所謂君以師行祓社釁鼓祝奉以從者也則前祝大祝自前祝也玄謂前祝者王出也歸也將有事於此神大祝居前先以祝辭告之 春官】 起大事動大衆必先有事乎社而後出謂之宜【有事祭也周官所謂宜乎社 爾雅】

右告祭 敢用玄牡敢昭告于上天神后請罪有夏【玄牡夏尚黑未變其禮也神后后土也 湯誥】

司兵掌五兵五盾及授兵從司馬之法以頒之【從司馬之法令師旅卒兩人數所用多少也】 司戈盾掌戈盾之物而頒之【分與受用】 軍旅授貳車戈盾建乘車之戈盾授旅賁及虎士戈盾【乘車王所乘車也軍旅則革路】

司弓矢凡師役頒弓弩各以其物從授兵至之儀【物弓弩矢箠之屬】 大司馬帥執事涖釁主及軍器【主謂遷廟之主及社主在軍者也軍器鼓鐸之屬凡師既受甲迎主於廟及社主祝奉以從殺牲以血塗主及軍器皆神之並夏官】

小祝大師掌釁祈號祝【鄭司農云釁謂釁鼓也春秋傳曰君以軍行祓社釁鼓祝奉以從 春官】

右授兵釁主器

野廬氏凡國之大事比修除道路者【比校治道者名若今次金叙大功】 邦之大師則令埽道路且以幾禁行作不時者不物者【不時謂不夙則暮者也不物謂衣服操持非比常人也幾禁之者備姦人內賊及反間】 蜡氏凡國之大祭祀令州里除不蠲禁刑者任人及凶服者以及郊野大師亦如之【注見天神並秋官】 牛人軍旅行役共其兵車之牛與其牽徬以載公任器【牽徬在轅外輓牛也人御之居其前曰牽居其旁曰徬任猶用也 地官】

校人凡軍事物馬而頒之【物馬齊其力

夏官】 車僕掌戎路之萃廣車之萃闕車之萃革車之萃輕

車之萃【注見武備】 凡師共革車各以其萃【五戎者共其一以為王優尊者所乘也而萃各從其元焉 春官】 司兵軍事建車之五兵【詳武備】

雞人大祭祀夜嘑旦以 百官軍旅亦如之【注見祭通禮】

伊耆氏軍旅授有爵杖【別吏卒且以扶尊者將軍杖鉞 秋官】小宗伯若大師則帥有司而立軍社奉主車【有司大祝也王出軍必先有事於社及遷廟而以其主行社主曰軍社遷主曰祖春秋傳曰軍行祓社釁鼓祝奉以從曾子問曰天子巡守以遷廟主行載於齊車言必有尊也書曰用命賞於祖不用命戮於社社之主蓋用石為之奉謂將行】大師大師執同律以聽軍聲而詔吉凶【大師大起軍師兵書曰王者行師出軍之日授將弓矢士卒振旅將張弓大呼大師吹律合音商則戰勝軍士疆角則軍擾多變失士心宮則軍和士卒同心徵則將急數怒軍士勞羽則兵弱少威明鄭司農云以師曠曰吾驟歌北風又歌南風南風不競多死聲楚必無功】大史大師抱天時與大師同車【鄭司農云大出師則大史主抱式以知天】

【時處吉凶史官主知天道故國語曰吾非瞽史焉知天道春秋傳曰楚有雲如衆赤鳥夾日以飛楚子使問諸周大史大史主天道小史大軍旅佐大史玄謂瞽即大師大師瞽官之長】司服凡兵事韋弁服【韋弁以韠韋為弁又以為衣裳春秋傳曰晉郤至衣韠韋之附注是也今時五伯緹衣古兵服之遺色】巾車革路龍勒條纓五就建大白以即戎【詳名器下並春官】前有水則載青旌前有塵埃則載鳴鳶前有車騎則載飛鴻前有士師則載虎皮前有摯獸則載貔貅【載謂舉於旌首以警衆也禮君行師從卿行旅從前驅舉此則士衆知所舉各以其類象青青雀水鳥鳶鳴則將風鴻取飛有行列也士師謂兵衆虎取其有威勇也貔貅亦摯獸也書曰如虎如貔士或為仕】行前朱鳥而後玄武左青龍而右白虎招搖在上急繕其怒【以此四獸為軍陳象天也急猶堅也繕讀曰勁又畫招搖星於旌旗上以起居堅勁軍之威怒象天帝也招搖星在北斗杓端主指者 曲禮】戎僕掌馭戎車【戎車革路也師出王乘以自將】掌王倅車之政正其服【倅副也服謂衆乘戎車者之衣服】犯軼如王路之儀掌凡戎車之儀【凡戎車衆之兵車也書序曰武王戎車三百輛】

射人大師令有爵者乘王之倅車【倅車戎車之副】

虎賁氏掌先後王而趨以卒伍軍旅亦如之【王出將虎賁士居前後雖羣行亦有局分】

旅賁氏軍旅則介而趨【介被甲並夏官】

典路凡軍旅以路從【王出於事無常王乘一路典路以其餘路從行亦以華國 春官】司右掌羣右之政令【羣右戎右齊右道右】凡軍旅合其車之卒伍而比其乘屬其右【合比屬謂次第相安習也車亦有卒伍】凡國之勇力之士能用五兵者屬焉掌其政令【勇力之士屬焉者選右當於中司馬法曰弓矢圍殳矛守戈戟助凡五兵長以衛短短以救長 夏官】師氏軍旅王舉則從【舉猶行也】保氏軍旅王舉則從【並地】

【官】鄉士大軍旅則各掌其鄉之禁令帥其屬夾道而蹕【屬中士以下】

遂士若邦有大事聚衆庶則各掌其遂之禁令帥其屬而蹕【大事王所親也 並秋官】

右師行 曾子問曰古者師行必以遷廟主行乎孔子曰天子巡守以遷廟主行載於齊車言必有尊也今也取七廟之主以行則失之矣【齊車全路】曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禰遂奉以出載于齊車以行每舍奠焉而后就舍【以醢醢禮神乃敢即安也所告而不以出即埋之】反必告設奠卒歛幣玉藏諸兩階之間乃出蓋貴命也【曾子問】

武王載木主號為文王東伐紂【史記】王升舟入水鐘鼓亞觀臺亞將舟亞宗廟亞【惡皆謂亞亞次也觀臺大史知天時占候者也宗廟廟主尚書大傳】

王者征伐所以必皮弁素積何伐者凶事素服示有悽愴也伐者質故依古服【白虎通】

大祝大師國將有事于四望則前祝【疏曰謂軍行所過山川造祭乃過春官】

右祭告山川底商之罪告于皇天后土所過名山大川【致商之罪謂伐紂之時后土社也名山華岳大川河】曰惟有道曾孫周王發將有大正于商【告天地山川之辭大正以兵征之也】今商王受無道【無道德】暴殄天物害虐烝民【暴絕天物言逆天也逆天害民所以為無道】為天下逋逃主萃淵藪【逋亡也天下罪人逃亡者而紂為魁主窟聚淵府藪澤言大姦】予小子既獲仁人敢祗承上帝以遏亂略【仁人謂太公周召之徒略路也言誅紂敬承天意以絕亂路】華夏蠻貊罔不率俾【集傳曰俾廣韻曰從也仁人既得則可以敬承上帝而遏絕亂謀內而華夏外而蠻貊無不率從矣】惟爾有神尚克相予以濟兆民無作神羞【神庶幾助我渡民危害無為神羞辱武成】

量人營軍之壘舍量其市朝州涂軍社之所里【軍壁曰壘鄭司農云量其市朝州涂還市朝而為道也玄謂州一州之衆二千五百人為師每師一處市也朝也州也皆有道以相之軍社社主在軍者里居也夏官】鼓人凡軍旅夜鼓鼙【鼙夜戒守鼓也司馬法曰昏鼓四通為大鼙夜半三通為晨戒旦明五通為發昀地官】鐃師凡軍之夜三鼙皆鼓之【鼓之以鼗鼓春官】挈壺氏掌挈壺以令軍井挈轡以令舍挈畚以令糧【鄭司農云挈壺以令軍井謂為軍穿井井成挈壺縣其上令軍中士衆皆望見知此下有井壺所以盛飲故以壺表井挈轡以令舍亦縣轡於所當舍止之處使軍望見知當舍止於此轡所以駕舍故以轡表舍挈畚以令糧亦縣畚于所當稟假之處令軍望見知當稟假於此下也畚所以盛糧之器故以畚表稟軍中人多車騎雜會謹囂號令不能相聞故各以其物為表省煩趨疾於事便也】凡軍事縣壺以序聚【鄭司農云縣壺以為漏以序聚以次更聚擊備守也玄謂擊兩木相敲行夜時也夏官】環人察軍慝【慝陰姦也視軍中有為慝者則執之】環四方之故【卻其以事謀來侵伐者所謂折衝禦侮】巡邦國搏諜賊【諜賊反間為國賊同上】司烜氏軍旅修火禁【秋官】

右軍中

士師五禁五曰軍禁【今軍有囂謹夜行之禁秋官】

大宰作大事則戒於百官贊王命【助王為教令春秋傳曰國之大事在祀與戎天官】

士師五戒一曰誓用之於軍旅【於書則甘誓湯誓秋官】

幕人軍旅共其帷幕幄帟綬【共之者掌次當以張】掌次師田則張幕設重帟重案【不張幄者於是臨誓衆王或回顧占察】諸侯師田則張幕設案【鄭司農云師田謂諸侯相與師田玄謂此掌次張之諸侯從王而師田者】孤卿有邦事則張幕設案【有邦事謂以事從王告以王命出也孤王之孤三人副三公論道者不言公公如諸侯禮從王師田亦張幕設案並天官】訝士凡邦之大事聚衆庶則讀其誓禁布憲凡邦之大事合衆庶則以刑禁號令

條狼氏凡誓執鞭以趨於前且命之誓僕右曰殺誓馭曰車轅誓大夫曰敢不關鞭五百誓師曰三百誓邦之大史曰殺誓小史曰墨【前謂所誓衆之行前也有司讀誓辭則大言其刑以警所誓也誓者謂出軍及將祭祀時也出軍之誓誓左右及馭則書之甘誓備矣郊特牲說祭祀之誓曰卜之日王立于澤親聽誓命受教諫之義也車轅謂車裂也師樂師也大史小史主禮事者鄭司農云誓大夫曰敢不關謂不關於君也玄謂大夫自受命以出則其餘事莫不復請】鄉士大軍旅則各掌其鄉之禁令遂士若邦有大事聚衆庶則各掌其遂之禁令縣士若邦有大役聚衆庶則各掌其縣之禁令方士凡都家之大事聚衆庶則各掌其方之禁令【方士十六人言各掌其方者四人而主一方也其方以王之事動衆則為班禁令焉並秋官】

右誓禁 有虞氏戒于國中欲民體其命也夏后氏誓于軍中欲民先成其慮也殷誓於軍門之外欲民先意以待事也周將交刃而誓之致以民志也夏后氏正其德也未用兵之刃故其兵不雜殷義也始用兵之刃矣周力也盡用兵之刃矣【司馬法】帝曰咨禹惟時有苗弗率汝徂征禹乃會羣后

誓于師曰濟濟有衆咸聽朕命蠢茲有苗昏迷不恭侮慢自賢反道敗德君子在野小人在位民棄不保天降之咎肆予以爾衆士奉辭伐罪爾尚一乃心力其克有勲【會徵會也誓戒也軍旅曰誓有會有誓自唐虞時已然禮言商作誓周作會非也大禹謨】大戰于甘乃召六卿【甘地名有扈氏國之南郊也六卿六鄉之卿也按周禮鄉大夫每鄉卿一人六鄉六卿平居無事則各掌其鄉之政教禁令而屬於大司徒有事出征則各率其鄉之一萬二千五百人而屬於大司馬所謂軍將皆卿者是也意夏制亦如此古者四方有變專責之方伯方伯不能討然後天子親征之天子之兵有征無戰今啓既親率六軍以出而又書大戰于甘則有扈之怙強稔惡敢與天子抗衡豈特孟子所謂六師移之者書曰大戰蓋所以深著有扈不臣之罪而為天下後世諸侯之戒也】王曰嗟六事之人予誓告汝【重其事故嗟歎而告之六事者非但六卿有事於六軍者皆是也】有扈氏威侮五行怠棄三正天用勦絕其命今予惟恭行天之罰【威暴殄之也侮輕忽之也鯀汨五行而殛死況於威侮之者乎三正子丑寅之正也夏正建寅怠棄者不用正朔也有扈氏暴殄天物輕忽不敬廢棄正朔虐下背上獲罪于天天用勦絕其命今我伐之惟敬行天之罰而已】左不攻于左汝不恭命右不攻于右汝不恭命御非其馬之正汝不恭命【左車左右車右也攻治也古者車戰之法甲士三人一居左以主射一居右以主擊刺御者居中以主馬之馳驅也左傳宣公十二年楚許伯御樂伯攝叔為右以致晉師樂伯曰吾聞致師者左射以菽是車左主射也攝叔曰吾聞致師者右入壘折馘執俘而還是車右主擊刺也御非其馬之正猶王良所謂詭遇也蓋左右不治其事與御非其馬之正皆足以致敗故各指其人以責其事而欲各盡其職而不敢忽也】用命賞于祖不用命戮于社予則孥戮汝【戮殺也禮曰天子巡守以遷廟主行左傳軍行祓社釁鼓然則天子親征必載其遷廟之主與其社主以行以示賞戮之不敢專也祖左陽也故賞于左社右陰也故戮于社孥子也孥戮與上戮字同義言若不用命不但戮及汝身將并汝妻子而戮之戰危事也不重其法則無以整肅其衆而使赴功也或曰戮辱也孥戮猶秋官司厲孥男子以為罪隸之孥古人以辱為戮謂戮辱之以為孥耳古者罰弗及嗣孥戮之刑非三代之所宜有也按此說固為有理然以上句考之不應一戮而二義蓋罰弗及嗣者常刑也予則孥戮者非常刑也常

刑則愛克厥威非常刑則威克厥愛盤庚遷都尚有剽殄滅之無遺育之語則啓之誓師豈為過哉 甘誓】王曰格爾衆庶悉聽朕言非台小子敢行稱亂有夏多罪天命殛之【夏桀暴虐湯往征之亳衆憚於征役故湯諭以弔伐之意蓋興師之時而誓於亳都者也王曰者史臣追述之稱也格至台我稱舉也以人事言之則臣伐君可謂亂矣以天命言之則所謂天吏非稱亂也】今爾有衆汝曰我后不恤我衆舍我穡事而割正夏予惟聞汝衆言夏氏有罪予畏上帝不敢不正【穡刈穫也割斷也亳邑之民安于湯之德政桀之虐焰所不及故不知夏氏之罪而憚伐桀之勞反謂湯不恤亳邑之衆舍我刈穫之事而斷正有夏湯言我亦聞汝衆論如此然夏桀暴虐天命殛之我畏上帝不敢不往正其罪也】今汝其曰夏罪其如台夏王率遏衆力率割夏邑有衆率怠弗協曰時日曷喪予及汝皆亡夏德若茲今朕必往【遏絕也割剽割夏邑之割時是也湯又舉商衆言桀雖暴虐其如我何湯又應之曰夏王率為重役以窮民力嚴刑以殘民生民厭夏德亦率皆怠于奉上不和于國疾視其君指日而曰是日何時而亡乎若亡則吾寧與之俱亡蓋苦桀之虐而欲其亡之甚也桀之惡德如此今我之所以必往也桀嘗自言吾有天下如天之有日日亡吾乃亡耳故民因以日目之】爾尚輔予一人致天之罰予其大賚汝爾無不信朕不食言爾不從誓言予則孥戮汝罔有攸赦【賚與也食言言已出而反吞之也禹之征苗止曰爾尚一乃心力其克有勲至啓則曰用命賞于祖不用命戮于社予則孥戮汝此又益以朕不食言罔有攸赦亦可以觀世變矣 湯誓】惟十有三年春大會于孟津【泰誓上】惟戊午王次于河朔羣后以師畢會王乃徇師而誓【泰誓中】時厥明王乃大巡六師明誓衆士【泰誓下】時甲子昧爽王朝至于商郊牧野乃誓王左杖

黃鉞右秉白旄以麾曰逖矣西土之人【甲子二月四日也昧冥爽明也昧爽將明未明之時也牧地名在朝歌南即今衛州治之南也鉞斧也以黃金為飾王無自用鉞之理左杖以為儀耳旄軍中指麾白則見遠麾非右手不能故右秉白旄也按武成言癸亥陳于商郊則癸亥之日周師已陳牧野矣甲子昧爽武王始至而誓師焉曰者武王之言也逖遠也以其行役之遠而慰勞之也】王曰嗟我友邦冢君御事司徒司馬司空亞旅師氏千夫長百夫長【司徒司馬司空三卿也武王是時尚為諸侯故未備六卿唐孔氏曰司徒主民治徒庶之政令司馬主兵治軍旅之誓戒司空主土治壘壁以營軍亞次旅衆也大國三卿下大夫五人士二十七人亞者卿之貳大夫是也旅者卿之屬士是也師氏以兵守門者猶周禮師氏王舉則從者也千夫長統千人之帥百夫長統百人之帥也】及庸蜀羌髳微盧彭濮人【左傳庸與彭濮伐楚庸濮在江漢之南羌在西蜀髳微在巴蜀盧彭在西北武王伐紂不期會者八百國今誓師獨稱八國者蓋八國近周西都素所服役乃受約束以戰者若上文所言友邦冢君則泛指諸侯而誓者也】稱爾戈比爾干立爾矛予其誓【稱舉戈戟干楯矛亦戟之屬長二丈唐孔氏曰戈短人執以舉之故言稱楯則並以扞敵故言比矛長立之於地故言立器械嚴整則士氣精明然後能聽誓命】王曰古人有言曰牝雞無晨牝雞之晨惟家之索【索蕭索也牝雞而晨則陰陽反常是為妖孽而家道索矣將言紂惟婦言是用故先 此】今商王受惟婦言是用昏棄厥肆祀弗答昏棄厥遺王父母弟不迪乃惟四方之多罪逋逃是崇是長是信是使是以為大夫卿士俾暴虐于百姓以茲宄于商邑【肆陳答報也婦姐己也列女傳云紂好酒淫樂不離姐己姐己所舉者貴之所憎者誅之惟姐己之言是用故顛倒昏亂祭所以報本也紂以昏亂棄其所當陳之祭祀而不報昆弟先王之 也紂以昏亂棄其王父母弟而不以道遇之廢宗廟之禮無宗族之義乃惟四方多罪逃亡之人尊崇而信使之以為大夫卿士使暴虐于

百姓姦宄于商邑蓋紂惑于妲己之嬖背常亂理遂至流毒如此也】今予發惟恭行天之罰今日之事不愆于六步七步乃止齊焉夫子勗哉【愆過勗勉也步進趨也齊齊整也今日之戰不過六步七步乃止而齊此告之以坐作進退之法所以戒其輕進也】不愆于四伐五伐六伐七伐乃止齊焉夫子【伐擊刺也少不下四五多不過六七而齊此告之以攻殺擊刺之法所以戒其輕殺也上言夫子勗哉此言勗哉夫子者反覆成文以致丁寧勸勉之意下倣此】尚桓桓如虎如貔如熊如羆于商郊弗迓克奔以役西土勗哉夫子【桓桓威武貌貔執夷也虎屬欲將士如四獸之猛而奮擊于商郊也迓迎也能奔來降者勿迎擊之以勞役我西土之人此勉其武勇而戒其殺降也】爾所弗勗其于爾躬有戮【弗勗謂不勉于前三者愚按此篇嚴肅而溫厚與湯誓誥相表裏真聖人之言也泰誓武成一篇之中以非盡出于一人之口豈獨此為全書乎讀者其味之 牧誓】

小宗伯若軍將有事則與祭有司將事于四望【軍將有事將與之合戰也鄭司農云則與祭謂軍祭表禡軍社之屬小宗伯與其祭事玄謂與祭有司謂大祝之屬蓋司馬之官實典焉】凡王之軍旅之禱祠肆儀為位【肆習也春官】封人凡軍旅則飾其牛牲【地官】肆師凡師用牲于社宗則為位【社軍社也尚書傳曰王升舟入水鼓鐘亞觀臺亞將舟亞宗廟亞故書位為涖杜子春云涖當為位書亦或為位宗謂宗廟 春官】禡於所征之地【詳見告祭章】小祝掌釁祈號祝【詳授兵章】

右祈禱

環人掌致師【致師者致其必戰之志古者將戰先使勇力之士犯敵焉春秋傳曰楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致師者左射以菑代御執轡御下 馬掉鞅而還攝叔曰吾聞致師者右入壘折馘執俘而還皆行其所聞而復之】訟敵國【敵國兵來則往之與訟曲直若齊國佐如師】揚軍旅【為之威武以觀敵詩云維師尚父時維鷹揚】降圍邑【圍邑欲降者受而降之春秋傳曰齊人降障】戎右掌戎車之兵革使【使謂王使以兵有所誅斬也春秋傳曰戰于穀晉梁弘御戎萊駒為右戰之明日襄公縛秦囚使萊駒以戈斬之】詔贊王鼓【既告王當鼓之節又助擊之】傳王命於陳中【為王大言之也】大僕凡軍旅贊王鼓【王通鼓佐擊其餘面 並夏官】鼓人以鼗鼓鼓軍事以金鐃和鼓以金鐃節鼓以金鐃止鼓以金鐃通鼓【注見武備】軍動則鼓其衆【動且行地官】銜枚氏軍旅令銜枚【為其言語以相誤秋官】

小子凡師斬牲以左右徇陳【示犯誓必殺之】

大司馬及戰巡陳眡事而賞罰【事謂戰功也並夏官】

進退有度【度謂伐與步數】左右有局各司其局【局部分也曲禮】

右戰陳

肆師凡師用牲于社宗則為位類造上帝封于大神祭兵于山川亦如之【造猶即也為兆以類禮即祭上帝也類禮依郊祀而為之者封謂壇也大神社及方嶽也山川蓋軍之所依止大傳曰牧之野武王之大事也既事而退柴於上帝祈於社設奠於牧室春官】

右告克 牧之野武王之大事也既事而退柴於上帝祈於社設奠於牧室【柴祈奠告天地及先祖也牧室牧野之室也古者郊關皆有館焉先祖者行主也】遂率天下諸侯執豆籩逡奔走【逡疾也疾奔走言勸事也周頌曰逡奔走在廟 大傳】丁未祀于周廟邦甸侯衛駿奔走執豆籩越三日庚戌柴望大告武成【武王以克商之事祭告祖廟近而邦甸遠而侯衛皆駿奔走執事以助祭祀既告祖廟燔柴祭天望祀山川以告武功之成由近而遠由親而尊也武成】

司勳掌六鄉賞地之法以等其功戰功曰多【尅敵出奇若韓信陳平司馬法曰上多前虜夏官】大司寇大軍旅涖戮于社【社謂社主在軍者也鄭司農說以書曰用命賞于祖不用命戮于社】士師大師帥其屬而禁逆軍旅者與犯師禁者而戮之【逆軍旅反將命也犯師禁干行陳也】鄉士凡國有大事則戮其犯命者 遂士凡郊有大事則戮其犯命者 縣士凡野有大事則戮其犯命者【野距王城二百里以外及都鄙】掌戮掌斬殺凡軍旅斬殺刑戮亦如之【戮謂膊焚辜肆】禁暴氏凡國聚衆庶則戮其犯禁者以徇【並秋官】右賞戮

大司馬若師有功則左執律右秉鉞以先愷樂獻于社【功勝也律所以聽軍聲鉞所以為將威也先猶道也兵樂曰愷獻于社獻功于社也司馬法曰得意則愷樂愷歌示喜也鄭司農云故城濮之戰春秋傳曰振旅愷以入于晉 夏官】

大祝及軍歸獻于社則前祝【注見告祭章】大司樂王師大獻則令奏愷樂【大獻獻捷于祖愷樂獻功之樂鄭司農說以春秋晉文公敗楚于城濮傳曰振旅以入于晉】樂師凡軍大獻教愷歌遂倡之【故書倡為昌鄭司農云樂師主倡也昌當為倡書亦或為倡】眡瞭賓射皆奏其鐘鼓鼈愷獻亦如之【愷獻獻功愷樂也杜子春云讀鼈為憂戚之戚謂戒守鼓也擊鼓聲疾數曰戚】鈞師軍大獻則鼓其愷樂【並春官】出征執有罪反釋奠于學以訊馘告【釋菜奠幣禮先師也訊馘所生獲斷耳者詩曰執訊獲醜又曰在頤獻馘馘或為國 王制】

右師有功歸 常武【宣王自將以伐淮北之夷詩人作此以美之 大雅】

大司馬若師不功則厭而奉主車【鄭司農云厭謂厭冠喪服也軍敗則以喪禮故秦伯之敗于殽也春秋傳曰秦伯素服郊次向師而哭玄謂厭伏冠也奉猶送也送主歸於廟與社】王弔勞士庶子則相【師敗王親弔士庶子之死者勞其傷者則相王之禮庶子卿大夫之子從軍者或謂之庶士 夏官】肆師凡師不功則助牽主車【助助大司馬也故書功為工鄭司農云工讀為功古者工與功同字謂師無功肆師助牽之恐為敵所得 春官】軍有憂則素服哭于庫門之外【憂謂為敵所敗也素服者縞冠也】赴車不載橐輶【兵不戢示當報也以告喪之辭言之謂還告於國橐甲衣輶弓衣 檀弓】

右師不功歸

天子命將出征親絜齊盛服設奠于祖以詔之【詔告之】大將先入軍吏畢從皆北面再拜稽首而受【受所命】天子當階南面命授之節鉞大將受【謂受所賜節鉞】天子乃東向

西面而揖之【謂轉南面自東遂西面而揖】示弗御也【謂既揖已則不御坐】然後告太社冢宰執蜃宜於社之右【左傳云戎有受脤脤祭社之肉盛以蜃器】南面授大將大將北面稽首再拜而受之承所頒賜于軍吏其出不類其克不禡戰之所在有大山川則祈焉禱克于五帝捷則報之振旅復命簡異功勤親告廟告社而後適朝【孔叢子】

師帥者受命於廟受脤於社【脤宜社之肉盛以蜃器閔二年左氏傳】

小司徒小軍旅巡役治其政令【巡役小力役之事則巡行之地官】

小祝小軍旅掌事焉【春官】小司馬小師掌其事如大司馬之法【夏官】

小司寇小師涖戮【小師王不自出之師

秋官】將居軍中之禮介冑在身執銳在列雖君父不拜若

不幸軍敗則駟騎赴告不載囊輶【大雅曰載囊弓矢囊輶也輶弓衣】天子素服哭于庫門之外三日大夫素服哭于社亦如之亡將失城則皆哭七日【軍敗三日哭將亡城失則七日哭蓋輕重之差】天子使使迎于軍命將帥無請罪然後將帥結草自縛袒右肩而入蓋喪禮也【孔叢子】

右命將出征大夫將兵出必不御者欲盛其威使士卒一意繫心也故但聞將軍令不聞君命也明進退在大夫也春秋傳曰此受命于君如伐齊則還何大其不伐喪也何大其不伐喪大夫以君命出進退在大夫也天子遣將軍必於廟何示不敢自專也獨於祖廟何制法度者祖也【白虎通】惟仲康肇位四海胤侯命掌六師羲和廢厥職酒荒于厥邑胤侯承王命徂征【註見軍通禮】

六月【玁狁內侵逼近京邑宣王命尹吉甫帥師伐之有功而歸詩人作歌以叙其事】

采芑【宣王之時蠻荊背叛王命方叔南征軍行采芑而食故賦其事以起興並小雅】

江漢【宣王命召穆公平淮南之夷詩人美之大雅】

諸侯賜弓矢然後征【得其器乃敢為其事王制】諸侯賜弓矢者得專征不得專征者以兵屬於得專征之國諸侯得專征者鄰國有臣弑其君孽伐其宗雖有請於天子而征之可也征而歸其地於天子【孽支子也宗適子也征伐也尚書大傳】祈勝之禮命勇謀之將以禦敵先使之迎于適所從來之方為壇祈克於五帝衣服隨其方色執事人數從其方之數【從其方之數則北方七人南方九人東方十一人西方十三人】牲則用其方之牲祝史告于社稷宗廟邦域之內名山大川君親素服誓衆于太廟曰某人不道侵犯大國二三子尚皆同心比力死而守將帥稽首再拜受命既誓將帥勒士卒陳于廟之右君立太廟之庭祝史立于社百官各警其事御于君以待命乃大鼓于廟門詔將帥命卒習射三發擊刺三行告廟用兵于敵也五兵備效乃鼓而出以即敵此諸侯應敵之禮也【孔叢子】君以軍行祓社釁鼓【師出先有事祓禱於社謂之宜社於是殺牲以血塗鼓釁為釁鼓】禮奉以從【奉社主也定四年左氏傳】公族其在軍則守於公禰【謂從軍者公禰行主也行以遷主言禰在外親也】

【文王世子】凡侯伯救患分災討罪禮也【侯伯州長也分穀帛僖元年左氏傳】

右諸侯伐國應敵公曰嗟人無譁聽命徂茲淮夷徐戎並興【漢孔氏曰徐戎淮夷並起寇魯

伯禽為方伯帥諸侯之師以征歎而敕之使無喧譁欲其靜聽誓命蘇氏曰淮夷叛已久矣及伯禽就國又脅徐戎並起故曰徂茲淮夷徐戎並興徂茲者猶曰往者云】善穀乃甲冑敵乃干無敢不弔備乃弓矢鍛乃戈矛礪乃鋒刃無敢不善【穀縫完也縫完其甲冑勿使斷毀敵鄭氏云猶繫也王肅云敵楯當有紛繫持之弔精至也鍛淬礪磨也甲冑所以衛身弓矢戈矛所以克敵先自衛而後攻人亦其序也】今惟淫舍牯牛馬杜乃獲斂乃奔無敢傷牯牯之傷汝則有常刑【淫大也牯閑牧也獲機檻也斂塞也師既出牛馬所舍之閑牧大布于野當窒塞其獲奔一或不謹而傷閑牧之牛馬則有常刑此令軍在所之居民也舉此例之凡川梁藪澤險阻屏匿有害于師屯者皆在矣此除道路之事】馬牛其風臣妾逋逃無敢越逐祇復之我商賚汝乃越逐不復汝則有常刑無敢寇攘踰垣牆竊馬牛誘臣妾汝則有常刑【謂人賤者男曰臣女曰妾馬牛風逸臣妾逋亡不得越軍壘而逐之失主雖不得逐而人得風馬牛逃臣妾者又當敬還之我商度多寡以賞汝如或越逐而失伍不復而攘取皆有常刑有故竊奪踰垣牆竊人牛馬誘人臣妾者亦有常刑此嚴部伍之事】甲戌我惟征徐戎峙乃糗糧無敢不逮汝則有大刑魯人三郊三遂峙乃楨榦甲戌我惟築無敢不供汝則有無餘刑非殺魯人三郊三遂峙乃芻茭無敢不多汝則有大刑【甲戌用兵之期也峙儲備也糗糧食也不逮若今之乏軍興淮夷徐戎並起今所攻獨徐戎者蓋量敵之堅瑕緩急而攻之也國外曰郊郊外曰遂天子六軍則六鄉六遂大國三軍故魯三郊三遂也楨榦板築之木題曰楨牆端之木也旁曰榦牆兩邊障土者也以是日征是日築者彼方禦我之攻勢不得擾我之築也無餘刑非殺者刑之非一但不至於殺耳芻茭供軍牛馬之用軍以期會芻糧為急故皆服大刑楨榦芻茭獨言魯人者地近而致使也費誓】鄭伯將伐許五月甲辰授兵於大宮【大宮鄭祖廟隱十一年左傳】宋人弑昭公趙宣子請師於靈公以伐宋發令於太廟召軍吏而戒樂正【正長也軍吏主師旅樂正主鐘鼓】令三軍之鐘鼓必備趙同曰國有大役不鎮撫民而備鐘鼓何也宣子曰大罪伐之小罪憚之【憚懼也】襲侵之事陵也【輕曰襲無鐘鼓曰侵陵以大陵小也】是故備鐘鼓聲其罪也【以聲張其罪】戰以錡于丁寧儆其民也【錡于形如碓頭與鼓角相和丁寧者謂鉦也儆戒也唐尚書云錡于鐻也非也鐻與錡于各異物】襲侵密聲為慝事也【慝其無備也】今宋人弑其君罪莫大焉明聲之猶恐其不聞也吾備鐘鼓為君故也【為欲尊明君道】乃使旁告于諸侯治兵振旅鳴鐘鼓以至于宋【國語晉語】齊侯來獻戎捷非禮也凡諸侯有四夷之功則獻于王王以警于夷【以警懼夷狄】中國則否諸侯不相遺俘【雖夷狄俘猶不以相遺莊三十一年左氏傳】晉侯及楚人戰于城濮楚師敗績獻楚俘于王駟介百乘徒兵千【駟介四馬被甲徒兵走卒僖二十八年左氏傳】晉侯使鞏朔獻齊捷于周王弗見使單襄公辭焉曰蠻夷戎狄不式王命【式用也】淫湎毀常王命伐之則有獻捷王親受而勞之所以懲不敬勸有功也兄弟甥舅侵敗王略【兄弟同姓國甥舅異姓國略經略法度】王命伐之告事而已不獻其功所以敬親暱【告伐事而不厭囚俘】禁淫慝也【淫慝謂醜掠百姓取囚俘也】今叔父克遂有功于齊【克能也】而不使命卿鎮撫王室所使來撫余一人而鞏伯實來未有職司於王室【鞏朔上軍大夫非命卿名位不達於王室】又奸先王之禮【謂獻齊捷】余雖欲於鞏伯【欲受其獻】其敢廢舊典以忝叔父夫齊甥舅之國也而大師之後也【齊世與周昏故曰甥舅】寧不亦淫從其欲以怒叔父抑豈不可諫誨士莊伯不能對【莊伯鞏朔成二年左氏傳】戰于邲晉師敗績楚潘黨曰君盍築武軍【築軍營以彰武功】而收晉尸以為京觀【積尸封土其上謂之京觀】楚子曰古者明王伐不敬取其鯨鯢而封之以為大戮於是乎有京觀以懲淫慝【鯨鯢大

魚名以喻不義之人吞食小國】今罪無所【晉罪無所犯也】而民皆盡忠以死君命又可以為京觀乎祀于河作先君宮告成事而還【傳言楚莊有禮所以遂興宣十二年左右氏傳】

禮書綱目卷五十

卷五十一

欽定四庫全書

禮書綱目卷五十一 婺源江永撰

軍通禮 軍禮四

補

大宗伯以軍禮同邦國【同謂威其不協僭差者軍禮之別有五】小宰以官府之六聯合邦治四曰軍旅之聯事以法掌軍旅之戒具令百官府共其財用治其施舍聽其治訟【天官】班朝治軍蒞官行法非禮威嚴不行【曲禮】以之軍旅有禮故武功成也若無禮軍旅武功失其制【仲尼燕居】

右總要

帝曰皐陶蠻夷猾夏寇賊姦宄汝作士【舜典】大戰于甘乃召六卿【六卿六鄉之卿也按周禮鄉大夫每鄉卿一人六鄉六卿平居無事則各掌其鄉之政教禁令而屬於大司徒有事出征則各率其鄉之一萬二千五百人而屬於大司馬所謂軍將皆卿者是也意夏制亦如此甘誓】惟仲康肇位四海胤侯命掌六師【仲康太康之弟胤侯胤國之侯命掌六師命為大司馬也仲康始即位即命胤侯以掌六師次年方有征羲和之命必本始而言者蓋史臣善仲康肇位之時已能收其兵權故羲和之征猶能自天子出也胤征】司馬掌邦政統六師平邦國【詳見職官】乃立夏官司馬使帥其屬而掌邦政以佐王平邦國大司馬卿一人小司馬中大夫二人軍司馬上士八人行司馬中士十有六人萬有二千五百人為軍軍將皆命卿二千有五百人為師師帥皆中大夫五百人為旅旅帥皆下大夫【同上】大司馬以九伐之法正邦國【諸侯有違王命即出兵以征伐之所以正之也諸侯之於國如樹木之有根本是以言伐云】馮弱犯寡則眚之【馮猶乘陵也言不字小而侵侮之眚猶人眚瘦也王霸記曰四面削其地】賊賢害民則伐之【春秋傳曰粗者曰侵精者曰伐又曰有鐘鼓曰伐則伐者兵入其境鳴鐘鼓以往所以聲其罪】暴內陵外則壇之【內謂其國外謂諸侯壇讀如同墀之墀王霸記曰置之空墀之地鄭司農云壇讀從憚之以威之憚書亦或為墀玄謂置之空墀以出其君更立其次賢者】野荒民散則削之【荒蕪也田不治民不附削其地明其不能有】負固不服則侵之【負猶恃也固險可依以固者也不服不事大也侵之者兵加其竟而已用兵淺者詩曰密人不恭敢距大邦】賊殺其親則正之【正之者執而治其罪王霸記曰正殺之也春秋僖公二十八年冬晉人執衛侯歸之於京師坐殺其弟叔武】放殺其君則殘之【放逐也殘殺也王霸記曰殘滅其為惡】犯令陵政則杜之【令猶命也王霸記曰犯令者違命也陵政者輕政法不循也杜之者杜塞使不得與鄰國交通】外內亂鳥獸行則滅之【王霸記曰悖人倫外內無以異于禽獸不可親百姓則誅滅去之也曲

禮曰夫唯禽獸無禮故父子聚麀】小司馬之職掌【闕】軍司馬【闕】輿司馬【闕】行司馬【闕】都司馬掌都之士庶子及其衆庶車馬兵甲之戒令

【庶子卿大夫士之子車馬兵甲備軍發卒】家司馬亦如之【大夫家臣為司馬者春秋傳曰叔孫氏之司馬鬬戾 並夏官】

右兵柄 孔子曰天下有道則禮樂征伐自天子出天下無道則禮樂征伐自諸侯出【論語】孟子曰天下討而不伐諸侯伐而不討五霸者撻諸侯以伐諸侯者也故曰五霸者三王之罪人也【討者出命以討其罪而使方伯連帥帥諸侯以伐之也伐者奉天子之命聲其罪而伐之也撻牽也五霸牽諸侯以伐諸侯不用天子之命也】

孟春不可以稱兵稱兵必天殃兵戎不起不可從我始母變天之道母絕地之理母亂人之紀仲春母作大事以妨農之事季夏不可以起兵動衆 孟秋立秋之日天子親帥三公九卿諸侯大夫以迎秋於西郊還反賞軍帥武人於朝天子乃命將帥選士厲兵簡練桀俊專任有功以征不義詰誅暴慢以明好惡順彼遠方仲秋凡舉大事母逆大數必順其時慎因其類【並詳月令】伐不踰時戰不逐奔誅不填服【來服者不復填壓之】苞人民

牛馬曰侵斬樹木壞宮室曰伐【制其人民 其牛馬賊去之後則可還反樹木斬不復生宮室壞不自成故其為害重也

隱五年穀梁傳】凡師有鐘鼓曰伐【聲其罪】無曰侵【鐘鼓無聲】輕曰襲【掩其不備莊二十九年左氏傳】師出不正反戰不正勝【不正者不正自謂出當復反戰當必勝僖二十六年公羊傳】善為國者不師【道之以德齊之以禮江熙曰鄰國望我歡若親戚何師之為】善師者不陳【師衆素嚴不須耀軍列陳江熙曰上兵伐謀何乃至陳】善陳者不戰【軍陳嚴整敵望而畏之莫敢戰】善戰者不死【投兵勝地故無死者江熙曰辟實攻虛則不死】善死者不亡【民盡其命無奔背散亡者也江熙曰見危授命義存君親雖沒猶存莊八年穀梁傳】戎昭果毅以聽之之謂禮【聽謂常存於耳著於心想聞其正令】殺敵為果致果為毅易之戮也【易反易 宣二年左氏傳】

見可而進知難而退軍之善政也兼弱攻昧武之善經也【昧昏亂經法也

宣十二:left氏傳】仁人之兵聚則成卒散則成列【卒卒伍列行列言動皆有備也】延則若莫邪之長刃嬰之者斷兌則若莫邪之利鋒當之者潰【兌猶聚也與隊同謂聚之使短潰壞散也新序作銳則若莫邪之利鋒也】圜居而方正則若盤石然觸之者角摧【圜居方正謂不動時也則如大石之不可移動也】王者之軍制將死鼓【死謂不棄之而奔亡也左傳曰師之耳目在吾旗鼓也】御死轡百吏死職士大夫死行列聞鼓聲而進聞金聲而退順命為上有功次之【軍之所重在順命故有功次之】令不進而進猶令不退而退也其罪惟均【令教令也言使之不進而進猶令不退而退其罪同也】不殺老弱不獵禾稼【獵與躡同踐也】服者不禽格者不舍犇命者不獲【服謂不戰而退者不追禽之格謂相拒捍者奔命謂奔走來歸其命者不獲之為囚俘也】凡誅非誅其百姓也誅其亂百姓者也百姓有扞其賊則是亦賊也【謂為賊之扞蔽也】以故順刃者生蘇刃者死犇命者貢【順刃謂不戰偕之而走者蘇讀為倏倏向也謂相向格鬪者貢謂來歸命者獻於上將也】王者有誅而無戰

城守不攻兵革不擊【德義未加所以敵人不服故不攻擊也且恐傷我之士卒也】上下相喜則慶之【敵人上下相愛悅即慶賀之況侵我乎】不屠城【屠謂毀其城殺其民若屠者然也】不潛軍不留衆【不久留暴露于外也】師不越時【古者行役不踰時也】故亂者樂其政不安其上欲其至也【東征西怨之意並荀子】古者戍軍三年不興觀民之勞也上下相報若此和之至也得意則愷歌示喜也偃伯靈臺答民之勞示休也古者以仁為本以義治之之謂正正不獲意則權權出於戰不出於中人是故殺人安人殺之可也攻其國愛其民攻之可也以戰止戰雖戰可也故仁見親義見說智見恃勇見方信見信內得愛焉所以守也外得威焉所以戰也戰道不違時不歷民病所以愛吾民也不加喪不困凶所以愛夫其民也冬夏不興師所以兼愛民也故國雖大好戰必亡天下雖安亡戰必危天下既平天子大愷春蒐秋獮諸侯春振旅秋治兵所以不忘戰也古者逐奔不過百步縱綏不過三舍是以明其禮也不窮不能而哀憐傷病是以明其仁也成列而鼓是以明其信也爭義不爭利是以明其義也又能舍服是以明其勇也知終知始是以明其智也六德以時合教以為民紀之道也自古之政也天子之義必純取法天地而觀於先聖士庶之義必奉於父母而正於君長故雖有明君士不先教不可用也古之教民必立貴賤之倫經使不相陵德義不相踰材技不相掩勇力不相犯故力同而意和也古者國容不入軍軍容不入國故德義不相踰上貴不伐之士上之器也苟不伐則無求無求則不爭國中之聽必得其情軍旅之聽必得其宜故材技不相掩從命為士上賞犯命為士上戮故勇力不相犯既致教其民然後謹選而使之事極修則百官給矣教極省則民興良矣習貫成則民體俗矣教化之至也古者逐奔不遠縱綏不及不遠則難誘不及則難陷以禮為固以仁為勝既勝之後其教可復是以君子貴之也【並司馬法】古者師出不踰時者為怨思也王者有三年之喪夷狄有內侵伐之者重天誅為宗廟社稷也誅不避親戚何所以明善善惡惡之義也諸侯有三年之喪有罪且不誅何君子恕己哀孝子之思慕不忍加刑罰也【白虎通】

右用兵 穆王將征犬戎【穆王周康王之孫昭王之子穆王滿也征正也上討下之稱犬戎西戎之別名在荒服】祭公謀父諫曰【祭畿內之國周公之後為王卿士謀父字也傳曰凡蔣邢茅胙祭周公之胤也】先王耀德不觀兵【耀明也觀示也明德尚道化也不示兵者有大罪惡然後致誅不以小小而示威武】夫兵戢而時動動則威【戢聚也威畏也時動謂三時務農一時講武守則有財征則有威】觀則玩玩則無震【玩黷也震懼也】夫先王之制邦內甸服邦外侯服侯衛賓服蠻夷要服戎翟荒服甸服者祭侯服者祀賓服者享要服者貢荒服者王日祭月祀時享歲貢終王先王之訓也【注見封建及財賦篇】有不祭則修意【意志意也謂邦甸之內有違闕不供日祭者先修意以自責畿內近知王意也】有不祀則修言【言號令也】有不享則修文【文典法也】有不貢則修名【名謂尊卑職貢之名號晉語曰信於名則上下不干】有不王則修德【遠人不服則修文德以來之】序成而有不至則修刑【序成謂上五者次序也已成而有不至則有刑誅】於是乎有刑不祭伐不祀征不享讓不貢【讓譴責也】告不王【謂以文辭告曉之地遠者舉輕也】於是乎有刑罰之辟【刑不祭也】有攻伐之兵【伐不祀也】有征討之備【征不享也】有威讓之令【讓不貢也】有文告之辭【告不王也】布令陳辭而又不至則又增修於德無勤民於遠【勤勞也】是以近無不聽遠無不服今自大畢伯仕之終也【大畢伯仕犬戎氏之二君終卒也】犬戎氏以其職來王【以其職謂其嗣子以其貴珪來見王也】天子曰予必以不享征之且觀

之兵【享賓服之禮以責犬戎而示之兵非也】其無乃廢先王之訓而王幾頓乎【幾危也頓敗也】王不聽遂征之得四白狼四白鹿以歸【白狼白鹿犬戎所貢】自是荒服者不至【穆王責犬戎以非禮暴兵露師傷威毀信故荒服者不至周語】宋襄公及楚人戰于泓宋人既成列楚人未既濟【未盡渡泓水】司馬曰【子魚也】彼衆我寡及其未既濟也請擊之公曰不可既濟而未成列又以告公曰未可既陳而後擊之宋師敗績公傷股門官殲焉【門官守門者師行則在君左右殲盡也】國人皆咎公公曰君子不重傷不禽二毛【二毛頭白有二色】古之為軍也不以阻隘也【不因阻隘以求勝】寡人雖亡國之餘【宋商紂之後】不鼓不成列【耻以詐勝】子魚曰君未知戰勅敵之人隘而不列天贊我也【勅強也言楚在險隘不得陳列天所以佐宋】阻而鼓之不亦可乎猶有懼焉【雖因阻擊之猶恐不勝】且今之勅者皆吾敵也雖及胡裔獲則取之何有於二毛【今之勅者謂與吾競者胡裔元老之稱】明耻教戰求殺敵也【明設刑罰以耻不果】傷未及死如何勿重【言尚能害己】若愛重傷則如勿傷愛其二毛則如服焉【言苟不欲傷殺敵人則本可不須鬪】三軍以利用也【為利興】金鼓以聲氣也【鼓以佐士衆之聲氣】利而用之阻隘可也聲盛致志鼓儼可也【儼巖未整陳僖二十二年左氏傳】吳侵陳斬祀殺厲【祀神位有屋樹者厲疫病吳侵陳以魯哀元年秋】師還出竟陳太宰嚭使於師夫差謂行人儀曰是夫也多言盍嘗問焉師必有名人之稱斯師也者則謂之何【大宰行人官名也夫差吳子光之子盍何不也嘗猶試也夫差修舊怨庶幾其師有善名】大宰嚭曰古之侵伐者不斬祀不殺厲不獲二毛【獲謂係虜之二毛鬢髮斑白】今斯師也殺厲與其不謂之殺厲之師與【欲微切之故其言似若不審然正言殺厲重人】曰反爾地歸爾子則謂之何【子謂所獲民臣】曰君王討敝邑之罪又矜而赦之師與有無名乎【又微勸之終其意吳楚僭稱王號檀弓】工尹商陽與陳弃疾追吳師及之【工尹楚官名弃疾楚公子弃疾也以魯昭八年帥師滅陳縣之楚人善之因號之焉至十二年楚子狩于州來使蕩侯潘子司馬督囂尹午陵尹喜圍徐以懼吳於時有吳師陳或作陵楚人聲】陳弃疾謂工尹商陽曰王事也子手弓而可手弓子射諸【商陽仁不忍傷人以王事勸之】射之斃一人韞弓【不忍復射斃仆也韞韞也】又及謂之又斃二人每斃一人揜其目止其御曰朝不坐燕不與殺三人亦足以反命矣【朝燕於寢大夫坐於上士立於下然則商陽與御者皆士也兵車參乘射者在左戈盾在右御在中央】孔子曰殺人之中又有禮焉【善之同上】子路拂然進曰人臣之節當君大事唯力所及死而後已夫子何善此子曰然如汝言也吾取其有不忍殺人之心而已【家語】晉士匄帥師侵齊至穀聞齊侯卒乃還【詳錄所至及還者善得禮】聞喪而還禮也【禮之常不必待君命襄十九年左氏傳】還者何善辭也何善爾大其不伐喪也此受命乎君而伐齊則何大乎其不伐喪大夫以君命出進退在大夫也【禮兵不從中御外臨事制宜當敵為帥唯義所在士匄聞齊侯卒引師而去恩動孝子之心義服諸侯之君是後兵寢數年故起時善之言乃者士匄有難重廢君命之心故見之言至穀者未侵齊也言聞者在竟外舉侵者張本公羊傳】受命而誅生死無所加其怒不伐喪善之也【穀梁傳】

保氏養國子以道教六儀五曰軍旅之容【軍旅之容暨暨詒詒地官】戎容暨暨【果毅貌也】言容詒詒【教令嚴也】色容厲肅【儀形貌也】視容清明【察於事也玉藻】軍旅之志怫然愠然精以厲軍旅之容渥然肅然固以猛軍旅之視固植虎張屏氣折聲軍旅之言也【賈誼新書容經】介冑則有不可犯之色【貌與事宜相配介甲也曲禮】

勃然充滿者兵革之色 介者不拜為其拜而夔拜【夔則失容節夔猶詐也 曲禮】 乘兵車出先刃入後刃【不以刃鄉國也】 軍尚左【左陽也陽主生將軍有廟勝之策左將軍為上貴不敗績】 卒尚右【右陰也陰主殺卒之行伍以右為上示有死志 少儀】 兵車不式【尚威武不崇敬】 武車綏旌【盡飾也綏謂垂舒之也武車亦兵車 曲禮】 禮介者不拜兵車不式不顧不言反抑式以應武容也兵車之容也【容經】 野外軍中無摯以纓拾矢可也【非為禮之處用時物相禮而已纓馬繁纓也拾謂射韝 曲禮】

軍旅什伍同爵則尚齒而弟達乎軍旅矣【什伍士卒部曲也少儀曰軍尚左卒尚右祭義】 軍旅思險隱情以虞【險阻出奇覆諛之處也隱意也思也虞度也當思念已情之所能以度彼之將然否 少儀】 古者國容不入軍軍容不入國軍容入國則民德廢國容入軍則民德弱故在國言文而語溫在朝恭以遜修己以待人不召不至不問不言難進易退在軍抗而立行遂而果介者不拜兵車不式城上不趨危事不齒故禮與法表裏也文與武左右也【司馬法】

右軍容 卻至三遇楚子之卒見楚子必下免胄而趨風【疾如風】 楚子使工尹襄問之以弓【問遺也】 曰方事之殷也【殷盛也】 有韎韐之跗注君子也【韎赤色跗注戎服若袴而屬於跗與袴連】 識見不穀而趨無乃傷乎【恐其傷】 卻至見客免胄承命曰君之外臣至從寡君之戎事以君之靈閒蒙甲胄【閒猶近也】 不敢拜命【介者不拜】 敢告不寧君命之辱【以君辱賜命故不敢自安】 為事之故敢肅使者【言君辱命來問以有軍事不得答故肅使者肅手至地若今擗】 三肅使者而退【成十六年左氏傳】

用命賞于祖不用命戮于社【詳征伐誓禁章】

司勳掌六卿賞地之法以等其功戰功曰多【尅敵出奇若韓信陳平司馬法曰上多前虜夏官】 古者賢王明民之德盡民之善故無廢德無簡民賞

無所生罰無所試有虞不賞不罰而民可用至德也夏賞而不罰至教也殷罰而不賞至威也周以賞罰德衰也賞不踰時欲民速得為善之利也罰不遷列欲民速覩為不善之害也大捷不賞上下皆不伐善上苟不伐善則不驕矣下苟不伐善必亡等矣上下不伐善若此讓之至也大敗不誅上下皆以不善在已上苟以不善在已必悔其過下苟以不善在已必遠其罪上下分惡若此讓之至也【司馬法】

右賞罰 桓公二年冬公至自唐告於廟也凡公行告于宗廟反行飲至舍爵策勳焉禮也【爵飲酒器也既飲置爵則書勳勞於策言速紀有功也 左氏傳】 晉侯入曹令無入僖負羈之宮而免其族魏驪顛頡熱僖負羈氏【熱燒也】 殺顛頡以徇于師立舟之僑以為戎石【舟之僑故虢臣閔二年奔晉以代魏驪為先歸張本】 城濮之戰晉中軍風于澤【牛馬因風而走皆失之】 亡大旆之左旃【大旆旗名繫旆曰旆通帛曰旃】 祁瞞奸命【掌此三事而不修為奸軍令】 司馬殺之以徇于諸侯師還濟河舟之僑先歸秋七月丙申振旅愷以入于晉【愷樂也】 獻俘授馘飲至大賞【授數也獻楚俘于廟】 殺舟之僑以徇于國民於是大服君子謂文公其能刑矣三罪而民服【三罪顛頡祁瞞舟之僑】 詩云惠此中國以綏四方不失

刑賞之謂也【詩大雅言賞刑不失則中國受惠四方安靖 僖二十八年左氏傳】 晉侯之弟揚干亂行於曲梁【行陳次】魏絳戮其僕【僕御也】晉侯怒魏絳至授僕人書【僕人晉侯御僕】將伏劒公讀其書曰日君乏使使臣斯司馬【斯此也】臣聞師衆以順為武【順莫敢違】軍士有死無犯為敬【守官行法雖死不敢有違】君合諸侯臣敢不敬君師不武執事不敬罪莫大焉臣懼其死以及揚干無所逃罪【懼自犯不正不敬之罪】不能致訓至於用钺【用钺斬揚干之僕】臣之罪重敢有不從以怒君心【言不敢不從戮】請歸死於司寇【致尸於司寇使戮之】公跣而出曰寡人之言親愛也吾子之討軍禮也寡人有弟弗能教訓使干大命寡人之過也子毋重寡人之過【聽絳死為重過】敢以為請【請使無死】晉侯以魏絳為能以刑佐民矣反役與之禮食使佐新軍【羣臣旅會今欲顯絳故特為設禮食襄三年左氏傳】 子路問於孔子曰臧武仲率師與邾

人戰于狐貍遇敗焉師人多喪而無罰古之道然與孔子曰凡謀人之軍師敗則死之謀人之國邑危則亡之【利已亡衆非忠也言亡之者雖辟賢非義退】古之正也其君在焉者有詔則無討【詔君之教也有君教則臣無討】古之為軍也軍有左右闕從補之【左右左右部也闕缺也】成而不知是以寡敗【不知敵不知有闕】若以下貳上闕而不變敗弗補也【變更也】變非聲章弗能移也【聲金鼓也章旌旗也移動也】聲章過數則有釁有釁則敵入【釁隙也軍法進退旂鼓有數過則有隙敵見隙而犯已也】敵入而凶救敗不暇誰能退敵敵之如志國之憂也可以陵小難以征大【以下貳上可以侵陵小國難以征大國 孔叢子】 鄭伯賞入陳之功享子展賜之先路三命之服【先路次路皆王所賜車之總名蓋請之于王】先八邑【以路及命服為邑先八邑三十二井】賜子產次路再命之服先六邑子產辭邑曰自上以下隆殺以兩禮也臣之位有四【上卿子展次卿子西十一年良霄見經十九年乃立子產為卿故位在四】且子展之功也臣不敢及賞禮請辭邑【賞禮以禮見賞謂六邑也】公固予之乃受三邑【位次當受二邑以公固予之故受三邑 襄二十六:left氏傳】 晉趙鞅帥師及鄭罕達帥師戰于鐵簡子誓曰克敵者上大夫受縣下大夫受郡【周書作雒篇千里百縣縣有四郡】士田十萬【十萬畝也】庶人工商遂【得遂進仕】人臣隸圉免【去廝役】志父無罪君實圖之【志父趙簡子之一名也言已事濟君當圖其賞】若其有罪絞縊以戮【絞所以縊人物】桐棺三寸不設屬辟【屬辟棺之重數王棺四重君再重大夫一重】素車樸馬【以載柩】無入于兆【兆葬域】下卿之罰也【為衆設賞自設罰所以能克敵 哀二:left氏傳】

卷五十二

<經部,禮類,通禮之屬,禮書綱目

欽定四庫全書

禮書綱目卷五十二 婺源江永撰

田役 軍禮五

補

大宗伯以軍禮同邦國大田之禮簡衆也【古者因田習兵閱其車徒之數】大役之禮任衆也【築宮邑所以事民力強弱 春官】小宰以官府之六聯合邦治五曰田役之聯事以法掌祭祀之戒具田役亦如之令百官府共其財用治其施舍聽其治訟【詳見通禮職官下篇】宰夫凡禮事贊小宰比官府之具【同上】

士師以五戒先後刑罰三曰禁用諸田役【禁則軍禮曰無干車無自後射此其類也秋官】

右通言田役

春獵為蒐【搜索取不任者】夏獵為苗【為苗稼除害】秋獵為獮【順殺氣也】冬獵為狩【得獸取之無所擇】宵田為獠【管子曰獠獵畢弋今江東亦呼獵為獠或曰即今夜獵載鑪照也】火田為狩【放火燒草獵亦為狩 爾雅】大司馬中春教振旅司馬以旗致民平行列陳如戰之陳【以旗者立旗期民於其下也兵者守國之備孔子曰以不教民戰是謂棄之兵者凶事不可空設因蒐狩而習之凡師出曰治兵入曰振旅皆習戰也四時各教民以其一焉春習振旅兵入收衆專於農平猶正也】辨鼓鐸鐃之用以王執路鼓諸侯執賁鼓軍將執晉鼓師帥執提旅帥執鼙卒長執鐃兩司馬執鐸公司馬執鐃【鼓人職曰以路鼓鼓鬼享以賁鼓鼓軍事以晉鼓鼓金奏以金鐃止鼓以金鐸通鼓以金鐃節鼓鄭司農云辨鼓鐸鐃之用謂鉦鐸之屬鐃讀如濁其源之濁鐃讀如謹曉之曉提讀如攝提之提謂馬上鼓有曲木提持立馬髦上者故謂之提杜子春云公司馬謂五人為伍伍之司馬也玄謂王不執賁鼓尚之於諸侯也伍長謂之公司馬者雖卑同其號】以教坐作進退疾徐疏數之節【習戰法】遂以蒐田有司表貉誓民鼓遂圍禁火弊獻禽以祭社【春田為蒐有司大司徒也掌大田役治徒庶之政令表貉立表而貉祭也誓民誓以犯田法之罰也誓曰無干車無自後射立旌遂圍禁旗弊爭禽而不審者罰以假馬禁者虞衡守禽之厲禁也既著令鼓而圍之遂蒐田火弊火止也春田主用火因焚萊除陳草皆殺而火止獻猶致也屬也田止虞人植旌衆皆獻其所獲禽焉詩云言私其獮獻豸于公春田主祭社者土方施生也鄭司農云貉讀為禡禡謂師祭也書亦或為禡】中夏教芟舍如振旅之陳羣吏撰車徒讀書契辨號名之用以帥以門名縣鄙各以其名家以號名鄉以州名野以邑名百官各象其事以辨軍之夜事其他皆如振旅【芟讀

如萊沛之沛芟舍草止之也軍有草止之法撰讀曰算算車徒謂數擇之也讀書契以簿書校錄軍實之凡要號名者徽識所以相別也鄉遂之屬謂之名家之屬謂之號百官之屬謂之事在國以表朝位在軍又象其制而為之被之以備死事帥謂軍將及師帥旅舍至伍長也以門名者所被徽識如其在門所樹者也凡此言以也象也皆謂其制同耳軍將皆命卿古者軍將蓋為營治於國門魯有東門襄仲宋有桐門右師皆上卿為軍將者也縣鄙謂縣正鄙師至鄰長也家謂食采地者之臣也鄉以州名亦謂州長至比長也野謂公邑大夫百官以其職從王者此六者皆書其官與名氏焉門則襄仲右師明矣鄉則南鄉甄東鄉為人是也其他象此云某某之名某某之號某某之事而已未盡聞也鄉遂大夫文錯不見以其素信於民不為軍將或為諸帥是以闕焉夜事戒夜守之事草止者慎於夜於是主別其部職】遂以苗田如蒐之法車弊獻禽以享祔【夏田為苗擇取不孕任者若治苗去不秀實者云車弊驅獸之車止也夏田主用車示所取物希者皆殺而車止王制曰天子殺則下大綏諸侯殺則下小綏大夫殺則止佐車佐車止則百姓田獵祔宗廟之夏祭也冬夏田主於祭宗廟者陰陽始起象神之在內】中秋教治兵如振旅之陳辨旗物之用王載大常諸侯載旂軍吏載旗師都載旛鄉遂載物郊野載旐百官載旗各書其事與其號焉其他皆如振旅【軍吏諸軍帥也師都遂大夫也鄉遂鄉大夫也或載旛或載物衆屬軍吏無所將也郊謂鄉遂之州長縣正以下也野謂公邑大夫載旐者以其將羨卒也百官鄉大夫也載旗者以其屬衛王也凡旌旗有軍衆者書異物無者帛而已書當如畫事也號也皆畫以雲氣】遂以獮田如蒐田之法羅弊致禽以祀祔【秋田為獮獮殺也羅弊罔止也秋田主用罔中殺者多也皆殺而罔止祔當為方聲之誤也秋田主祭四方報成萬物詩曰以社以方】中冬教大閱【春辨鼓鐸夏辨號名秋辨旗物至冬大閱簡軍實凡頒旗物以出軍之旗則如秋以尊卑之常則如冬司常佐司馬時也大閱備軍禮而旌旗不如出軍之時空辟實】前期羣吏戒衆庶脩戰法【羣吏鄉師以下】虞人萊所田之野為表百步則一為三表又五十步為一表田之日司馬建旗于後表之中羣吏以旗物鼓鐸鑼各帥其民而致質明弊旗誅後至者乃陳車徒如戰之陳皆坐【鄭司農云虞人萊所田之野芟除其草萊令車得驅馳詩曰田卒污萊玄謂萊芟除可陳之處後表之中五十步表之中央表所以識正行列也四表積二百五十步左右之廣當容三軍步數未聞致致之司馬質正也弊仆也皆坐當聽誓】羣吏聽誓于陳前斬牲以左右徇陳曰不用命者斬之【羣吏諸軍帥也陳前南面鄉表也月令季秋天子執於田獵以習五戎司徒搢朴北面以誓之此大閱禮實正歲之中冬而說季秋之政於周為中冬為月令者失之矣斬牲者小子也凡誓之大略耳誓湯誓之屬是也】中軍以鼙令鼓鼓人皆三鼓司馬振鐸羣吏作旗車徒皆作鼓行鳴鑼車徒皆行及表乃止三鼓攬鐸羣吏弊旗車徒皆坐【中軍中軍之將也天子六軍三三而居一徧羣吏既聽誓各復其部曲中軍之將令鼓鼓以作其士衆之氣也鼓人者中軍之將師帥旅帥也司馬兩司馬也振鐸以作衆作起也既起鼓人擊鼓以行之伍長鳴鑼以節之伍長一曰公司馬及表自後表前至第二表也三鼓者鼓人也鄭司農云攬讀如弄玄謂如涿鹿之鹿掩上振之為攬攬者止行息氣也司馬法曰鼓聲不過閭鼙聲不過闕鐸聲不過琅】又三鼓振鐸作旗車徒皆作鼓進鳴鑼車驟徒趨及表乃止坐作如初【趨者赴敵尚疾之漸也春秋傳曰先人有奪人之心及表自第二前至第三】乃鼓車馳徒走及表乃止【及表自第三前至前表】鼓戒三闕車三發徒三刺【鼓戒戒攻敵鼓壹闕車壹轉徒壹刺三而止象服敵】乃鼓退鳴鑼且卻及表乃止坐作如初【鑼所以止鼓軍退卒長鳴鑼以和衆鼓人為止之也退自前表至後表鼓鐸則同習戰之禮出入一也異者廢鑼而鳴鑼】遂以狩田以旌為

左右和之門羣吏各帥其車徒以叙和出左右陳車徒有司平之旗居卒間以分地前後有屯百步有司巡其前後險野人為主易野車為主【冬田為狩言守取之無所擇也軍門曰和今謂之壘門立兩旗以為之叙和出用次第出和門也左右或出而左或出而右有司平之鄉師居門正其出入之列也旗軍吏所載分地謂其部曲疏數前後有屯百步車徒異羣相去之數也車徒畢出和門鄉師又巡其行陳鄭司農云險野人為主人居前易野車為主車居前】既陳乃設驅逆之車有司表貉于陳前【驅驅出禽獸使趨田者也逆逆要不得令走設此車者田僕也】中軍以鼙令鼓鼓人皆三鼓羣司馬振鐸車徒皆作遂鼓行徒銜枚而進大獸公之小禽私之獲者取左耳【羣司馬謂兩司馬也枚如箸銜之有繯結項中軍法止語為相疑惑也進行也鄭司農云大獸公之輸之於公小禽私之以自畀也詩云言私其獋獻肩于公一歲為獋二歲為羆三歲為特四歲為肩五歲為慎此明其獻大者於公自取其小者玄謂慎讀為麇爾雅曰豕生三曰獋豕牡曰羆麇牝曰麇獲得也得禽獸者取左耳當以計功】及所弊鼓皆馘車徒皆譟【鄭司農云及所弊至所弊之處玄謂至所弊之處田所當於止也天子諸侯蒐狩有常至其常處吏士鼓譟象攻敵剋勝而喜也疾雷擊鼓曰馘譟謹也書曰前師乃鼓鼙譟亦謂喜也】徒乃弊致禽饁獸于郊入獻禽以享蒸【徒乃弊徒止也冬田主用衆物多衆得取也致禽饁獸于郊聚所獲禽因以祭四方神於郊月令季秋天子既田命主祠祭禽四方是也入又以禽祭宗廟 夏官】鄉師凡四時之田前期出田法于州里簡其鼓鐸旗

物兵器脩其卒伍【田法人徒及所當有】及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟【司徒致衆庶者以熊虎之旗此又以之明為司徒致之大夫致衆當以鳥隼之旗陳之以旗物以表正其行列辨別異也故書巡作述屯或為臀鄭大夫讀屯為課殿杜子春讀為在後曰殿謂前後屯兵也玄謂前後屯車徒異部也今書多為屯從屯

地官】山虞若大田獵則萊山田之野及弊田植虞旗於中

致禽而珥焉【萊除其草萊也弊田田者止也植猶樹也田止樹旗令獲者皆致其禽而校其耳以知獲數也山虞有旗以其主山得畫熊虎其仞數則短也鄭司農云珥者取禽左耳以效功也大司馬職曰獲者取左耳】澤虞若大田獵則萊澤野及弊田植虞旌以屬禽【屬禽猶致禽而珥焉澤虞有旌以其主澤澤鳥所集故得注析羽 並同上】

牧師凡田事贊焚萊【焚萊者山澤之虞 夏官】

大司徒火田役以旗致萬民而治其徒庶之政令【旗畫熊虎者也徵衆刻日樹旗期於其下地官】小司徒惟田與追胥竭作【詳見下章】

州長若國作民而師田行役之事則帥而致之掌其戒令與其賞罰

黨正凡作民而師田行役則以其法治其政事

族師若作民而師田行役則合其卒伍簡其兵器以鼓鐸旗物帥而至掌其治令戒禁刑罰 縣師若將有田役之戒則受法於司馬以作其衆庶及牛馬車輦會其車人之卒伍使皆備旗鼓兵器以帥而至 遂人若起野役則令各帥其所治之民而至以遂之大旗至之其不用令者誅之師田作野民帥而至掌其政治禁令 遂師田獵平野民掌其禁令比叙其事而賞罰

縣正若將用野民師田行役則帥而至治其政令 鄙師凡作民則掌其戒令 鄆長若作其民而用之則以旗鼓兵革帥而至稍人若有師田行役之事則以縣師之法作其同徒輦輦帥而以

至治其政令以聽於司馬【已上注並見征伐篇】司常凡軍事建旌旗及致民置旗弊之【始置旗以致民民至仆之誅後至者】甸亦如之【春官】
幕人凡田役共其帷幕幄帟綬【共之者掌次當以張天官】
掌次師田則張幕設重帟重案諸侯師田則張

幕設案孤卿有邦事則張幕設案【注見征伐】

司弓矢田弋充籠箠矢兵矦矢【籠竹箠也矦矢不在箠者為其相繞亂將用乃共之 夏官】
司常及國之大閱贊司馬頒旗物王建大常諸侯建旗孤卿建旛大夫士建物師都建旗州里建旗縣鄙建旛道車載旛旂車載旗【仲冬教大閱司馬主其禮自王以下治民者旗畫成物之象王畫日月象天明也諸侯畫交龍一象其升朝一象其下復也孤卿不畫言奉王之政教而已大夫士雜帛言以先王正道佐職也師都六鄉六遂大夫也謂之師都都民所聚也畫熊虎者鄉遂出軍賦象其守猛莫敢犯也州里縣鄙鄉遂之官互約言之鳥隼象其勇捷也龜蛇象其扞難辟害也道車象路也王以朝夕燕出入旂車木路也王以田以鄙全羽析羽五色象其文德也大閱王乘戎路建大常焉玉路金路不出】皆畫其象焉官府各象其事州里各象其名家各象其號【事名號者徽識所以題別衆臣樹之於位朝各就焉覲禮曰公侯伯子男皆就其旂而立此其類也或謂之事或謂之名或謂之號異外內也三者旌旗之細也士喪禮曰為銘各以其物亡則以緇長半幅頰末長終幅廣三寸書名于末此蓋其制也徽識之書則云某某之事某某之名某某之號今大閱禮象而為之兵凶事若有死事者亦當以相別也杜子春云畫當為書玄謂畫畫雲氣也異於在國軍事之飾 春官】

巾車木路前樊鵠纓建大麾以田【詳見通禮名器下篇】司服凡甸冠弁服【甸由獵也冠弁委貌其服緇布衣亦積素以為裳諸侯視朝之服詩國風曰緇衣之宜兮謂王服此以田 春官】小子凡師田斬牲以左右徇陳【示犯誓必殺之 夏官】

鄉士凡國有大事則戮其犯命者 遂士凡郊有大事則戮其犯命者

縣士凡野有大事則戮其犯命者【野距王城二百里以外及縣都】掌戮掌斬殺凡田役斬殺刑戮亦如之【戮謂膊焚辜肆】禁暴氏凡國聚衆庶則戮其犯禁者以徇【並秋官】校

人田獵則帥驅逆之車【帥猶將也 夏官】田僕掌馭田路以田以鄙【田路木路也田田獵也鄙循行縣鄙】掌佐車之政【佐亦副】設驅逆之車【驅驅禽獸使前趨獲逆衙還之使不出圍】令獲者植旌【以告獲也植樹也】及獻比禽【田弊獲者各獻其禽比種物相從次數也】凡田王提馬而走諸侯晉大夫馳【提猶舉也晉猶抑也使人扣而舉之抑之皆止奔也馳放不扣 同上】甸祝掌四時之田表貉之祝號【杜子春讀貉為百爾所思之百書亦或為禡貉兵祭也甸以講武兵故有兵祭詩曰是類是禡爾雅曰是類是禡師祭也玄謂田者習兵之禮故亦禡祭禱氣執之十百而多獲】舍奠于祖廟禡亦如之【舍讀為釋釋奠者告將時田若時征伐鄭司農云禡父廟】師甸致禽于虞中乃屬禽及郊鎡獸舍奠于祖禡乃歛禽禡馬皆掌其祝號【師田謂起大衆以田也致禽於虞中使獲者各以其禽來致於所表之處屬禽別其種類鎡饋也以所獲獸饋於郊薦於四方羣兆入又以奠於祖禡薦且告反也歛禽謂取三十入腊人焉杜子春云禡禱也為馬禱無疾為田禱多獲禽牲詩云既伯既禱爾雅曰既伯既禱馬祭也玄謂禡讀如伏誅之誅今侏大字也為牲祭求肥充為馬祭求肥健 春官】肆師凡四時之大甸獵祭表貉則為位【貉師祭也貉讀為十百之百於所立表之處

為師祭造軍法者禱氣勢之增倍也其神蓋蚩尤或曰黃帝 同上】

司几筵甸役則設熊席右漆几【謂王甸有司祭表貉所設席 同上】

小宗伯凡王之甸役之禱祠肆儀為位【注見征伐】

肆師凡甸用牲于社宗則為位【注見征伐】大僕田役贊王鼓【王通鼓佐擊其餘面

夏官】鼓人軍動則鼓其衆田役亦如之【地官】銜枚氏田役令銜枚【為其言語以相誤

秋官】獸人時田則守罟【備獸觸攫】及弊田令禽注于虞中【弊仆也仆而田止鄭司農

云弊田讀春火弊夏車弊秋羅弊冬徒弊虞中謂虞人釐所田之野及弊田植虞旗於中致禽

而珥焉獸人主令田衆得禽者置虞人所立虞旗之中當以給四時社廟之祭故曰春獻禽以

祭社夏獻禽以享禴秋獻禽以祀祫冬獻禽以享烝又曰大獸公之小禽私之公之謂輸之於

虞中珥焉者取左耳以致功若斬首折馘故春秋傳曰以數軍實 天官】小宗伯若大甸則帥

有司而饁獸于郊遂頒禽【甸讀曰田有司大司馬之屬饁饋也以禽饋四方之神於郊郊有

羣神之兆頒禽謂以予羣臣詩傳曰禽雖多擇取三十焉其餘以予大夫士以習射於澤宮而

分之 春官】

肆師獮之日涖卜來歲之戒【秋田為獮始習兵戒不虞也卜者問後歲兵寇之備 同上】迹

人掌邦田之地政為之厲禁而守之【田之地若今苑也】凡田獵者受令焉【令謂時與處

也】禁麇卵者與其毒矢射者【為其天物且害必多也麇麋鹿子 地官】天子諸侯無事則

歲三田【三田者夏不田蓋夏時也周禮春曰蒐夏曰苗秋曰獵冬曰狩】一為乾豆二為賓

客三為充君之庖【乾豆謂腊之以為祭祀豆也庖今之厨也】無事而不田曰不敬田不以

禮曰暴天物【不敬者簡祭祀略賓客】天子不合圍諸侯不掩羣【為盡物也】天子殺則

下大綏諸侯殺則下小綏【綏當為綏綏有虞氏之旌旗也下謂弊之】大夫殺則止佐車佐

車止則百姓田獵【佐車驅逆之車】豺祭獸然後田獵昆蟲未蟄不以火田【取物必順時

侯也昆明也明蟲者得陽而生得陰而藏】不麇不卵不殺胎不殀夭【重傷未成物殀斷殺

少長曰夭 王制】王田不取羣【不盡羣也易曰王用三驅失前禽也 國語周語】

國君春田不圍澤大夫不掩羣士不取麇卵【生乳之時重傷其類 曲禮】孟夏毋大田獵

季秋天子乃教於田獵以習五戎班馬政命僕及七騶咸駕載旒授車以級整設於屏外司徒

摯扑北面誓之天子乃厲飾執弓挾矢以獵命主祠祭禽于四方

孟冬天子乃命將帥講武習射御角力【注並見月令】

十一月王狩陳筋革嗇人不從【夏小正】

大宰以八則治都鄙八曰田役以馭其衆【詳見封建】

唯為社田國人畢作【畢作人則盡行非徒羨也 郊特牲】

右田 以之田獵有禮故戎事閑也若無禮田獵戎事失其策【策謀也 仲尼燕居】季春出

火為焚也【謂焚萊也凡出火以火出建辰之月火始出】然後簡其車賦而歷其卒伍而君

親誓社以習軍旅左之右之坐之起之以觀其習變也【簡歷謂算具陳列之君親誓社誓吏

士以習軍旅既而遂田以祭社也言祭社則此是仲春之禮也仲春以火田田止弊火然後獻

禽至季春火出而民乃用火今云季春出火乃誓社記者誤也社或為省】而流示之禽而鹽

諸利以觀其不犯命也【流猶行也行行田也鹽讀為豔行田示之以禽使歆豔之觀其用命

不也謂禽為利者凡田大獸公之小禽私也】求服其志不貪其得【失伍而獲猶為犯命】

故以戰則克以祭則受福【郊特牲】因蒐狩以習用武事禮之大者也艾蘭以為防【蘭香

草也防謂田之大限】置旃以為轅門【旃旌旗之名周禮通帛為旃轅門印車以其轅表門】以葛覆質以為【質椹也 門中臬葛或為褐】流旁握御轂者不得入【流旁握謂車兩轆頭各去門邊空握握四寸也轂挂則不得入門】車軌塵【車不出塵】馬候蹄【發足相應遲疾相投】揜禽旅【揜取衆禽】御者不失其馳然後射者能中【不失馳騁之節】過防弗逐不從奔之道也【戰不逐奔之義】面傷不獻【嫌誅降】不成禽不獻【惡虐幼小】禽雖多天子取三十焉其餘與十衆以習射於射宮【取三十以共乾豆賓客君之庖射宮澤宮】射而中田不得禽則得禽田得禽而射不中則不得禽是以知古之貴仁義而賤勇力也【射以不爭為仁揖讓為義昭八年蒐于紅穀梁傳】
田者大艾草以為防【言田獵者必大芟殺野草】

【以為防限作田獵之場擬殺圍之處】或舍其中【或復止舍其中謂未田之前誓士戒衆故發示戰法當在其間止舍也其防之廣狹無文】褐纏旃以為門【既為防院當設周衛而立門焉乃以織毛褐布纏通帛旃之竿以為門之兩傍其門蓋南開並為二門用四旃四褐也】裘纏質以為□【又以裘纏椹質以為門中之闌闌車軌之裏兩邊約車輪者】閒容握驅而入擊則不得入【其門之廣狹兩軸頭去旃竿之間各容一握握人四指為四寸是門廣於軸八寸也入此門當馳走而入不得徐也以教戰試其能否故令驅焉若驅之其軸頭擊著門傍旃竿則不入也所以罰不工也】左者之左右者之右然後焚而射焉【以天子六軍分為左右雖同舍防內令三軍各在一方取左右相應其屬左者之左門屬右者之右門不得越離部伍以此故有二門也教戰既畢士出和乃分地為屯既陳車驅卒奔驅禽內之於防然後焚燒此防草在其中而射之】天子發然後諸侯發諸侯發然後大夫士發天子發抗大綏諸侯發抗小綏獻禽於其下【發謂發矢射之也其天子發則先抗舉其大綏諸侯發則舉其小綏必舉此綏為表天子諸侯殺時因獻其禽于其下也抗綏謂既射舉之因置虞旗於其中受而致禽焉受禽獵止則弊之故王制曰天子殺則下大綏諸侯殺則下小綏註云下謂弊之是殺禽已訖田止而弊綏也各舉始終之一故與此不同也】故戰不出頃田不出防不逐奔走古之道也【戰不出所期之頃田不出所芟之防不逐奔走謂出於頃防者不逐之 詩毛傳】古之道五十不為甸徒頒禽隆諸長者而弟達乎獫狁矣【四井為邑四邑為比四比為甸甸六十四井也以為軍田出役之法五十始衰不從力役之事也頒之言分也隆猶多也及田者分禽多其老者謂竭作未五十者春獵為獫冬獵為狁也 祭義】臧僖伯曰凡物不足以講大事【臧僖伯公子彊也僖諡也大事祀與戎】其材不足以備器用則君不舉焉【材謂皮革齒牙骨角毛羽也器用軍國之器】君將納民於軌物者也故講事以度軌量謂之軌取材以章物采謂之物不軌不物謂之亂政亂政亟行所以敗也【言器用衆物不入法度則為不軌不物亂敗之所起】故春蒐夏苗秋獮冬狩【蒐索擇取不孕者苗為苗除害也獮殺也以殺為名順秋氣也狩圍守也冬物畢成獲則取之無所擇也】皆於農隙以講事也【各隨時事之間】三年而治兵入而振旅【雖四時講武猶復三年而大習出曰治兵始治其事入曰振旅治兵禮畢振旅而還振整也旅衆也】歸而飲至以數軍實【飲於廟以數車徒器械及所獲也】昭文章【車服旌旗】明貴賤辨等列【等列行伍】順少長【出則少者在前還則在後所謂順也】習威儀也鳥獸之肉不登於俎【俎祭宗廟器】皮革齒牙骨角毛羽不登於器【謂以飾法度之器】則君不射古之制也若夫山林川澤之實器用之資阜隸之事官司之守非君所及也【士臣阜阜臣輿輿臣隸言取此雜猥之物以資器備是小臣有司之職

非諸侯之所親也 隱五年左氏傳】 出為治兵尚威武也【幼賤在前貴勇力】 入為振旅反尊卑也【尊老在前復常儀也爾雅】 已有三牲必田狩者孝子之意以為已之

所養不如天地自然之性逸豫肥美禽獸多則傷五穀因習兵事又不空設故因以捕禽獸所以共承宗廟示不忘武備又因以為田除害鮮者何也秋取嘗也【取禽嘗祭】秋取嘗何以也習鬪也習鬪也者男子之事也然而戰鬪不可不習故於搜狩閑之也閑之者貫之也貫之也者習之也已祭取餘獲陳於澤【澤射宮也】然後卿大夫相與射命中者雖不中取也命不中者雖中不取何以也所以貴揖讓之取而賤勇力之取也羈之取於囿中勇力之取也今之取於澤揖讓之取也【尚書大傳】 春曰蒐夏曰苗秋曰獮冬曰狩苗者謂何曰苗者毛也取之不圍澤不擯羣取大禽不麝不卵不殺孕重者春蒐者不殺小麝及孕重者冬狩皆取之百姓皆出不失其時不抵禽不詭遇逐不出防此苗獮蒐狩之義也故苗獮蒐狩之禮簡其戎事也故苗者毛取之蒐者搜索之狩者守留之夏不田何也曰天地陰陽盛長之時猛獸不攫鷙鳥不搏蝮蠆不螫鳥獸蟲蛇且知應天而況人乎哉是以古者必有參牢其謂之畋何聖人舉事必反本五穀者以奉宗廟養萬民也去禽獸害稼穡者故以田言之聖人作名號而事義可知也【賈誼新書】 湯見祝網者置四面其祝曰從天墜者從地出者從四方來者皆離吾網湯曰嘻盡之矣非桀其孰為此湯乃解其三面置其一面更教之祝曰昔蛛蝥作網今之人循序欲左者左欲右者右欲高者高欲下者下吾取其犯命者其憚害物也如是漢南之國聞之曰湯之德及禽獸矣四十國歸之【同上】 昔周辛甲之為大史也命百官官箴王闕【辛甲周武王太史闕過也使百官各為箴辭戒王過】於虞人之箴【虞人掌田獵】曰芒芒禹迹畫為九州【芒芒遠貌畫分也】經啓九道【啓開九州之道】民有寢廟獸有茂草各有攸處德用不擾【人神各有所歸故德不亂】在帝夷羿冒於原獸【冒貪也】亡其國恤而思其麇牡【言但念獵】武不可重【重猶數也】用不恢於夏家【羿以好武雖有夏家而不能恢大之】獸臣司原敢告僕夫【獸臣虞人告僕夫不敢斥尊 襄四年左氏傳】

虢文公諫宣王曰三時務農而一時講武故征則有威守則有財【詳通禮朝廷禮】 車攻宣王復古也宣王能內修政事外攘夷狄復文武之竟土修車馬備器械復會諸侯於東都因田獵而選車徒焉【詩序】我車既攻我馬既同四牡龐龐駕言徂東【攻堅同齊也傳曰宗廟齊豪尚純也戎事齊力尚強也田獵齊足尚疾也龐龐充實也東東都洛邑也 周公相成王營洛邑為東都以朝諸侯周室既衰久廢其禮至於宣王內修政事外攘夷狄復文武之境土修車馬備器械復會諸侯於東都因田獵而選車徒焉故詩人作此以美之首章汎言將往東都也】田車既好四牡孔阜東有甫草駕言行狩【田車田獵之車好善也阜盛大也甫草甫田也後為鄭地今開封府中牟縣西圃田澤是也宣王之時未有鄭國圃田屬東都畿內故往田也 此章指言將往狩于圃田也】之子于苗選徒囂囂建旄設旄搏獸于敖【之子有司也苗狩獵之通名也選數也囂囂聲衆盛也數車徒者其聲囂囂則車徒之衆可知且車徒不譁而惟數者有聲又見其靜治也敖近滎陽地名也 此章言至東都而選徒以獵也】駕彼四牡四牡奕奕赤芾金舄會同有繹【奕奕連絡布散之貌赤芾諸侯之服金舄赤舄而加金飾亦諸侯之服也時見曰會殷見曰同繹陳列聯屬之貌也 此章言諸侯來會朝於東都也】決拾既飲弓矢既調射夫既同助我舉柴【決以象骨為之著於左手大指所以鉤弦開體拾以皮為之著於左臂以遂弦故亦名遂飲比也調謂弓強弱與矢輕重相得也射夫蓋諸侯來會者同協也柴說文作桴謂積禽也使諸侯之人助而舉之言獲多也 此章言既會同而田獵也】四

黃既駕兩驂不猗不失其馳舍矢如破【猗偏倚不正也馳驅之法也舍矢如破巧而力也蘇氏曰不善射御者詭遇則獲不然不能也今御者不失其馳驅之法而射者舍矢如破則可謂善射御矣此章言田獵而見其射御之善也】蕭蕭馬鳴悠悠旆旌徒御不驚大庖不盈【蕭蕭悠悠皆閑暇之貌徒步卒也御御車也驚如漢書夜軍中驚之驚不驚言比卒事不喧譁也大庖君庖也不盈言取之有度不極欲也蓋古者田獵獲禽面傷不獻踐毛不獻不成禽不獻擇取三等自左膘而射之達于右膊為上殺以為乾豆奉宗廟達右耳本者次之以為賓客射左髀達于右肱為下殺以充君庖每禽取三十焉每等得十其餘以與士大夫習射於澤宮中者取之是以獲雖多而君庖不盈也張子曰饌雖多而無餘者均及於衆而有法耳凡事有法則何患乎不均也舊說不驚驚也不盈盈也亦通此章言其終事嚴而頒禽均也】之子于征有聞無聲允矣君子展也大成【允信展誠也聞師之行而不聞其聲言至肅也信矣其君子也誠哉其大成也此章總叙其事之始終而深美之也小雅】吉日美宣王田也【詩序】吉日維戊既伯既禱田車既好四牡孔阜升彼大阜從其羣醜【戊剛日也伯馬祖也謂天駟房星之神也醜衆也謂禽獸之羣衆也此亦宣王之詩言田獵將用馬力故以吉日祭馬祖而禱之既祭而車牢馬健於是可歷險而從禽也以下章推之是日也其戊辰與】吉日庚午既差我馬獸之所同麇鹿麇麇漆沮之從天子之所【庚午亦剛日也差擇齊其足也同聚也鹿牝曰麇麇衆多也漆沮水名在西都畿內涇渭之北所謂洛水今自延韋流入鄜坊至同州入河也戊辰之日既禱矣越三日庚午遂擇其馬而乘之視獸之所聚麇鹿最多之處而從之惟漆沮之旁為盛宜為天子田獵之所也】瞻彼中原其祁孔有儻儻俟俟或羣或友悉率左右以燕天子【中原原中也祁大也趨則儻儻行則俟俟獸三曰羣二曰友燕樂也言從王者視彼禽獸之多於是率其同事之人各共其事以樂天子也】既張我弓既挾我矢發彼小豝殪此大兕以御賓客且以酌醴【發發矢也豝牝曰豝一矢而死曰殪兕野牛也言能中微而制大也御進也醴酒名周官五齊二曰醴齊注曰醴成而汁滓相將如今甜酒也言射而獲禽以為俎實進於賓客而酌醴也東萊呂氏曰車政吉日所以為復古者何也蓋蒐狩之禮可以見王賦之復焉可以見軍實之盛焉可以見師律之嚴焉可以見上下之情焉可以見綜理之周焉欲明文武之功業者此亦足以觀矣同上】桓公四年春正月公狩于郎【冬獵曰狩行三驅之禮得田狩之時故傳曰書時禮也周之春夏之冬也田狩從夏時郎非國內之狩地故書地】書時禮也【郎非狩地故唯時合禮左氏傳】狩者何田狩也【田者蒐狩之總名也古者肉食衣服捕禽者故謂之田取獸于田故曰狩易曰結繩罔以田魚】春曰蒐【蒐毛也明當見物取未懷妊者】秋曰蒐【蒐簡擇也簡擇幼穉取其大者】冬曰狩【狩猶獸也冬時禽獸長大遭獸可取不以夏田者春秋制也以為飛鳥未去於巢走獸未離於穴恐傷害於幼穉故於苑囿中取之】常事不書此何以書譏何譏爾遠也【以其地遠禮諸侯田狩不過郊】諸侯曷為必田狩【據有囿也】一曰乾豆二曰賓客三曰充君之庖【一者第一之殺也自左膘射之達於右膊中心死疾鮮潔故乾而豆之以薦於宗廟豆祭器名狀如鐙天子二十有六諸公十有六諸侯十有二卿上大夫八下大夫六士二二者第二之殺也自左膘射之達於右脾遠心死難故以為賓客充備也庖廚也三者第三之殺也自左膘射之達於右中腸汚泡死遲故以充君之庖廚已有三牲必田狩者孝子之意以為已之所養不如天地自然之牲逸豫肥美禽獸多則傷五穀因習兵事又不空設故因以捕禽獸所以共承宗廟示不忘武備又因以為田除害狩例時此月者譏不時也周之正月夏之十一月陽氣始施鳥獸懷任草木萌芽非所以養微公羊傳】四時之田皆為宗廟之事也春曰田【取

獸於田】夏曰苗【因為苗除害故曰苗】秋曰蒐【蒐擇之舍小取大】冬曰狩【狩圍狩也冬物畢成獲則取之無所擇】四時之田用三焉唯其所先得一為乾豆【上殺中心死速乾之以為豆實可以祭祀】二為賓客【次殺射髀骼死差遲】三為充君之庖【下殺中腸汚泡死最遲先宗廟次賓客後庖廚尊神敬客之義 穀梁傳】桓公六年秋八月壬午大閱【齊為大國以戎事徵諸侯之戎嘉美鄭忽而忽欲以有功為班怒而訴齊魯人懼之故以非時簡車馬】簡車馬也【左氏傳】大閱者何簡車徒也【大簡閱兵車使可任用而習之】何以書蓋以罕書也【罕希也孔子曰以不教民戰是謂棄之故比年簡徒謂之蒐三年簡車謂之大閱五年大簡車徒謂之大蒐存不忘亡安不忘危 公羊傳】大閱者何簡兵車也【閱為簡練】修教明諭國道也【修先】

【王之教以明達於民治國之道】平而修戎事非正也【邵曰禮因四時田獵以習用戎事存不忘亡安不忘危之道平謂不因田獵無事而修之 穀梁傳】

莊公八年春王正月甲午治兵【治兵於廟習號令將以圍郕

公羊作祠兵】治兵于廟禮也【左氏傳】出曰祠兵【禮兵不徒使故將出必祠于近郊陳兵習戰殺牲饗士卒】入曰振旅【五百人曰旅】其禮一也皆習戰也【言與祠兵禮如一將出不嫌不習故以祠兵言之將入嫌於廢之故以振訊士衆言之互相見也祠兵壯者在前難在前振旅壯者在後復長幼且衛後也 公羊傳】晉侯始入而教其民二年欲用之子犯曰民未知禮未生其共於是乎大蒐以示之禮【蒐順少長明貴賤 僖二十七左氏傳】昭公八年秋蒐于紅【革車千乘不言大者經文闕也紅魯地】大蒐于紅自根牟至于商衛革車千乘【大蒐數軍實簡車馬也根牟魯東界琅邪陽都縣有牟鄉商宋地魯西境接宋衛也言千乘明大蒐且見魯衆之大數也 左氏傳】蒐者何簡車徒也【徒衆 公羊傳】

秋蒐于紅正也【常事不書而此書者以後比年大蒐失禮因此以見正 穀梁傳餘見上】昭公十一年五月齊歸薨大蒐于北蒲非禮也【蒐非存亡之由故臨喪不宜為之】叔向曰魯公室其卑乎君有大喪國不廢蒐不忌君也【忌畏也 左氏傳】

二十二年大蒐于昌閒秋而曰蒐此春也其曰蒐何也以蒐事也【穀梁傳】

小司徒稽國中及四郊都鄙之夫家九比之數以辨其貴賤老幼廢疾凡征役之施舍【稽猶考也夫家猶言男女也鄭司農云九比謂九夫為井玄謂九比者冢宰職出九賦者之人數也貴謂為卿大夫賤謂占會販賣者廢疾謂癰病也施當為弛】乃均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人凡起徒役毋過家一人以其餘為羨惟田與追胥竭作【一家男女七人已上則授之以上地所養者衆也男女五人已下則授之以下地所養者寡也可任謂丁強任力役之事者鄭司農云羨饒也田謂獵也追追寇賊也竭作盡行】凡用衆庶則掌其政教與其戒禁聽其辭訟施其賞罰誅其犯命者【命所以誓告之】鄉師以國比之法以時稽其夫家衆寡辨其老幼貴賤廢疾馬牛之物辨其可任者與其施舍者大役則帥民徒而至治其政令既役則受州里之役要以攷司空之辟以逆其役事【而至至作部曲也既已也役要所遣民徒數辟功作章程逆猶鈎攷也鄭司農云辟法也】凡邦事令作秩叙【事功力之事秩常也叙猶次也事有常次則不偏置】鄉大夫以歲時登其夫家之衆寡辨其可任者國中自七尺以及六十野自六尺以及六十有五皆征之其舍者國中貴者賢者能者服公事者老者疾者皆舍以歲

時入其書【登成也定也國中城郭中也晚賦稅而早免之以其所居復多役少野早賦稅而晚免之以其復少役多鄭司農云征之者給公上事也舍者謂有復除舍不收役事也貴者謂若今宗室及關內侯皆復也服公事者謂若令吏存復除也老者謂若今八十九十復羨卒也疾者謂若今癰不可事者復之玄謂入其書者言於大司徒】族師以邦比之法帥四閭之吏以時屬民而校登其族之夫家衆寡辨其貴賤老幼廢疾可任者及其六畜車輦均人均人民牛馬車輦之力政【力征人民則治城郭涂巷溝渠牛馬車輦則轉委積之屬】凡均力政以歲上下豐年則公旬用三日焉中年則公旬用二日焉無年則公旬用一日焉【豐年人食四鬴之歲也人食三鬴為中歲人食二鬴為無歲歲無贏儲也公事也旬均也讀為營營原隰之營易坤為均今書亦有作旬者】凶札則無力政【無力政恤其勞也】三年大比則大均【有年無年大平許之若久不脩則數或闕】遂人凡治野以下劑致甿【變民言甿異外內也甿猶懵懵無知貌也致猶會也民雖受上田中田下田及會之以下劑為率謂可任者家二人】以歲時登其夫家之衆寡及其六畜車輦辨其老幼廢疾與其施舍者以起政役【政役出土徒役】若起野役則令各帥其所治之民而至以遂之大旗致之其不用命者誅之【役謂師田若有功作也遂之大旗熊虎】凡事致野役帥而至掌其政治禁令遂師以時登其夫家之衆寡六畜車輦辨其施舍與其可任者【施亦讀為弛】作役事則聽其治訟遂大夫以歲時稽其夫家之衆寡六畜田野辨其可任者與其可施舍者【施亦讀為弛】縣正若將用野民移執事則帥而至治其政令【移執事移用其民鄭司農云謂轉相佐助】既役則稽功會事而誅賞載師凡民無職事者出夫家之征【詳見通禮財賦篇】鼓人以鼙鼓鼓役事【鼙鼓長丈二尺並地官】大司馬大役與慮事屬其植受其要以待攷而賞誅【大役築城邑也鄭司農云國有大役大司馬與謀慮其事也植謂部曲將吏故宋城春秋傳曰華元為植巡功屬謂聚會之也要者簿書也攷謂攷校其功玄謂慮事者封人也於有役司馬與之植築城植也屬賦丈尺與其用人數夏官】用民之力歲不過三日【治宮室城郭道渠王制】凡使民任老者之事食壯者之食【寬其力饒其食同上】五十不從力政【力稍衰也力政城道之役也】八十者一子不從政

九十者其家不從政【按內則云瞽亦如之】廢疾非人不養者一人不從政【廢廢於人事】父母之喪三年不從政齊衰大功之喪三月不從政將徙於諸侯三月不從政自諸侯來徙家期不從政【自從也同上】旅師凡新甿使無征役【新民新徙來者也使無征役復之也王制曰自諸侯來徙家期不從政地官】孟夏毋起土功毋發大衆季夏不可以興土功毋舉大事以搖養氣毋發令而待以妨神農之事也水潦盛昌神農將持功舉大事則有天殃孟秋脩宮室坏牆垣補城郭仲秋可以築城郭建都邑穿竇窖脩囷倉季秋命有司曰寒氣總至民力不堪其家入室季冬歲且更始專而農民毋有所使【注並見通禮月令】

右役單子曰夫辰角見而雨畢天根見而水涸火見而清風戒寒故先王之教曰雨畢而除道水涸而成梁清風至而修城郭宮室故夏令曰九月除道十月成梁其時敝曰收而場功侍而畚揭營室之中土功其始火之初見期於司里【詳見通禮夏小正篇】隱公七年夏城中丘書不時也【左氏傳】莊公二

十九年春新延廡古之君人者必時視民之所勤民勤於力則功築罕【罕希】民勤於財則貢賦少民勤於食則百事廢矣【凶荒殺禮】冬築微春新延廡以其用民力為已悉矣【悉盡穀梁傳】冬十有二月城諸及防書時也凡土功龍見而畢務戒事也【謂今九月周十一月龍星角亢晨見東方三務始畢戒民以土功事】火見而致用【大火心星次角亢見者致築作之物】水昏正而栽【謂今十月定星昏而中於是樹板幹而興作】日至而畢【日南至微陽始動故土功息左氏傳】僖公二十年春新作南門書不時也【失土功之時】凡啟塞從時【門戶道橋謂之啟城郭牆塹謂之塞皆官門之開閉不可一日而闕故特隨壤時而始之今僖公修飾城門非開閉之急故以土功之制譏之傳嫌啟塞皆從土功之時故別起從時之例同上】襄公十三年冬城防書事時也【土功雖有常節通以事間為時】於是將早城臧武仲請俟畢農事禮也【同上】宋皇國父為大宰為平公築臺妨於農收【周十一月今九月收斂時】子罕請俟農功之畢公弗許築者謳曰澤門之皙實興我役【澤門宋東城南門也皇國父白皙而居近澤門】邑中之黔實慰我心【子罕黑色而居邑中】子罕聞之親執扑【扑杖】以行築者而扶其不勉者曰吾儕小人皆有闔廬以辟燥濕寒暑【闔謂門戶閉塞】今君為一臺而不速成何以為役【役事也】謳者乃止或問其故子罕曰宋國區區而有詛有祝禍之本也【傳善子罕分謗襄十七年左氏傳】
昭公九年冬築郎囿書時也季平子

欲其速成也叔孫昭子曰詩曰經始勿亟庶民子來【詩大雅言文王始經營靈臺非急疾之衆民自以子義來勸樂為之】焉用速成其以勸民也【勸勞也】無囿猶可無民其可乎【左氏傳】土彌牟營成周計丈數【計所當城之丈數】揣高卑【度高曰揣】度厚薄仞溝洫【度深曰仞】物土方議遠邇【物相也相取土之方面遠近之宜】量事期【知事幾時畢】計徒庸【知用幾人功】慮材用【知費幾財用】書餼糧【知用幾糧食】以命役于諸侯屬役賦丈【付所當城尺丈】書以授帥【帥諸侯之大夫】而效諸劉子【效致也】韓簡子臨之以為成命【臨履其事以命諸侯經所以不書魏舒昭三十二年左氏傳】楚令尹蒍艾獵城沂【艾獵孫叔敖也沂楚邑】使封人慮事【封人其時主築城者慮事謀慮計功】以授司徒【司徒掌役】量功命日【命作日數】分財用【財用築作具】平板榦【榦楨也】稱畚築【量輕重畚盛土器】程土物【為作程限】議遠邇【均勞逸】略基趾【趾城足略行也】具餼糧【餼乾食也】度有司【謀監主】事三旬而成【十日為旬】不愆於素【不過素所慮之期也傳言叔敖之能使民宣十一年左氏傳】
時使薄斂所以勸百姓也【中庸】孔子曰擇可勞而勞之又誰怨【論語】
子夏曰君子信而後勞其民不信則以為厲已也【同上】

大宗伯以軍禮同邦國大均之禮恤衆也【均其地政地守地職之賦所以憂民】大封之禮合衆也【正封疆溝塗之固所以合聚其民春官】均人三年大比則大均【注見上章】

右大均大封

禮書綱目卷五十二

卷五十三

欽定四庫全書

禮書綱目卷五十三 婺源江永撰

歷數 通禮一

補

黃帝迎日推策【晉灼曰策數也迎數之也瓚曰日月朔望未來而推之故曰迎日】順天地之紀幽明之占旁羅日月星辰【旁羅大戴禮作歷離 史記】少皞氏以鳥名官【少皞金天氏黃帝之子巳姓之祖也】鳳鳥氏歷正也【鳳鳥知天時故以名歷正之官】玄鳥氏司分者也【玄鳥燕也以春分來秋分去】伯趙氏司至者也【伯趙伯勞也以夏至鳴冬至止】青鳥氏司啓者也【青鳥鶡鶩也以立春鳴立夏止】丹鳥氏司閉者也【丹鳥鷩雉也以立秋來立冬去入大水為蜃上四鳥皆歷正之屬官昭十七年左氏傳】帝顓頊載時以象天帝嚳歷日月而迎

送之【史記】帝嚳能序星辰以著衆【著衆謂使民興事知休作之期也 祭法】堯乃命羲和欽若昊天歷象日月星辰敬授人時【集傳曰羲氏和氏主歷象授時之官若順也吳廣大之意歷所以紀數之書象所以觀天之器如下篇璣衡之屬是也日陽精一日而繞地一周月陰精一月而與日一會星二十八宿衆星為經金木水火土五星為緯皆是也辰以日月所會分周天之度為十二次也人時謂耕穫之候凡民事早晚之所關也其說詳見下文】分命羲仲宅嵎夷曰暘谷寅賓出日平秩東作日中星鳥以殷仲春厥民析鳥獸孳尾【此下四節言歷既成而分職以頒布且考驗之恐其推步之或差也或曰上文所命蓋羲伯和伯此乃分命其仲叔未詳是否也宅居也嵎夷即禹貢嵎夷既略者也曰暘谷者取日出之義羲仲所居官次之名蓋官在國都而測候之所則在於嵎夷東表之地也寅敬也賓禮接之如賓客也亦帝嚳歷日月而迎送之意出日方出之日蓋以春分之旦朝方出之日而識其初出之景也平均秩序作起也東作春月歲功方興所當作起之事也蓋以歷之節氣早晚均次其先後之宜以授有司也日中者春分之刻於夏永冬短為適中也晝夜皆五十刻舉晝以見夜故曰日星鳥南方朱鳥七宿唐一行推以鶉火為春分昏之中星也殷中也春分陽之中也析分散也先時冬寒民聚於隩至是則以民之散處而驗其氣之溫也乳化曰孳交接曰尾以物之生育而驗其氣之和也】申命羲叔宅南交平秩南訛敬致日永星火以正仲夏厥民因鳥獸希革【申重也南交南方交趾之地陳氏曰南交下當有曰明都三字訛化也謂夏月時物長盛所當變化之事也史記索隱作南為謂所當為之事也敬致周禮所謂冬夏致日蓋以夏至之日中祠日而識其景如所謂日至之景尺有五寸謂之地中者也永長也日永晝六十刻也星火東方蒼龍七宿火謂大火夏至昏之中星也正者夏至陽之極午為正陽位也因析而又析以氣愈熱而民愈散處也希革鳥獸毛希而革易也】分命和仲宅西曰昧谷寅餞納日平秩西成宵

中星虛以殷仲秋厥民夷鳥獸毛毳【西謂西極之地也曰昧谷者以日所入而名也餞禮送行者之名納日方納之日也蓋以秋分之莫夕方納之日而識其景也西成秋月物成之時所當成就之事也宵夜也宵中者秋分夜之刻於夏冬為適中也晝夜亦各五十刻舉夜以見日故曰宵星虛北方玄武七宿之虛星秋分昏之中星也亦曰殷者秋分陰之中也夷平也暑退而人氣平也毛毳鳥獸毛落更生潤澤鮮好也】申命和叔宅朔方曰幽都平在朔易日短星昴以正仲冬厥民隩鳥獸氄毛【朔方北荒之地謂之朔者朔之為言蘇也萬物至此死而復蘇猶月之晦而有朔也日行至是則淪於地中萬象幽暗故曰幽都在察也朔易冬月歲事已畢除舊更新所當改易之事也日短晝四十刻也星昴西方白虎七宿之昴宿冬至昏之中星也亦曰正者冬至陰之極子為正陰之位也隩室之內也氣寒而民聚於內也氄毛鳥獸生栗毳細毛以自溫也蓋既命羲和造歷制器而又分方與時使各驗其實以審夫推步之差聖人之敬天勤民其謹如此是以術不違天而政不失時也又按此冬至日在虛昏中昴今冬至日在斗昏中壁中星不同者蓋天有三百六十五度四分度之一歲有三百六十五日四分日之一天度四分之一而有餘歲日四分之一而不足故天度常平運而舒日道常內轉而縮天漸差而西歲漸差而東此歲差之由唐一行所謂歲差者是也古歷簡易未立差法但隨時占候修改以與天合至東晉虞喜始以天為天以歲為歲乃立差以追其變約以五十年退一度何承天以為太過乃倍其年而又反不及至隋劉焯取二家中數七十五年為近之然亦未為精密也因附著於此】帝曰咨汝羲暨和朞三百有六旬有六日以閏月定四時成歲允釐百工庶績咸熙【咨嗟也嗟歎而告之也暨及也朞猶周也允信釐治工官庶衆績功咸皆熙廣也天體至圓周圍三百六十五度四分度之一繞地左旋常一日一周而過一度日麗天而少遲故日行一日亦繞地一周而在天為不及一度積三百六十五日九百四十分日之二百三十五而與天會是一歲日行之數也月麗天而尤遲一日常不及大十三度十九分度之七積二十九日九百四十分日之四百九十七而與日會十二會得全日三百四十八餘分之積又五千九百八十八如日法九百四十而一得六不盡三百四十八通計得日三百五十四九百四十分日之三百四十八是一歲月行之數也歲有十二月月有三十日三百六十者一歲之常數也故日與天會而多五日九百四十分日之二百三十五者為氣盈月與日會而少五日九百四十分日之五百九十二者為朔虛合氣盈朔虛而閏生焉故一歲閏率則十日九百四十分日之八百二十七三歲一閏則三十二日九百四十分日之六百單一五歲再閏則五十四日九百四十分日之三百七十五十有九歲七閏則氣朔分齊是為一章也故三年而不置閏則春之一月入於夏而時漸不定矣子之一月入於丑而歲漸不成矣積之之久至於三失閏則春皆入夏而時全不定矣十二失閏子皆入丑歲全不成矣其名實乖戾寒暑反易農桑庶務皆失其時故必以此餘日置閏月於其間然後四時不差而歲功得成以此信治百官而衆功皆廣也堯典】舜在璿璣玉衡以齊七政【在察也美珠謂之璿璣機也以璿飾璣所以象天體之運轉也衡橫也謂衡簫也以玉為管橫而設之所以窺璣而齊七政之運行猶今之渾天儀也七政日月五星也七者運行於天有遲有速有順有逆猶人君之有政事也此言舜初攝位整理庶務首察璣衡以齊七政蓋歷象授時所當先也按渾天儀者天文志云言天體者三家一曰周髀二曰宣夜三曰渾天宣夜絕無師說不知其狀如何周髀之術以為天似覆盆蓋以斗極為中中高而四邊下日月旁行遶之日近而見之為晝日遠而不見為夜蔡邕以為考驗天象多所違失渾天說曰天之形狀似鳥卵地居其中天包地外猶卵之裹黃圓如彈丸故曰渾天言其形體渾渾然也其術以為天半覆地上半在地下其天居地上見者一百八十

二度半強地下亦然北極出地上三十六度南極入地下亦三十六度而嵩高正當天之中極南五十五度當嵩高之上又其南十二度為夏至之日道又其南二十四度為春秋分之日道又其南二十四度為冬至之日道南下去地三十一度而已是夏至日北去極六十七度春秋分去極九十一度冬至去極一百一十五度此其大率也其南北極持其兩端其天與日月星宿斜而迴轉此必古有其法遭秦而滅至漢武帝時落下閎始經營之鮮于妄人又量度之至宣帝時耿壽昌始鑄銅而為之象宋錢樂又鑄銅作渾天儀衡長八尺孔徑一寸璣徑八尺圓周二丈五尺強轉而望之以知日月星辰之所在即璿璣玉衡之遺法也】巡守協時月正日【時謂四時月謂月之大小日謂日之甲乙諸侯之國其有不齊者則協而正之也 舜典】洪範次四曰協用五紀【五紀曰協所以合天也】四五紀一曰歲二曰月三曰日四曰星辰五曰歷數【歲者序四時也月者定晦朔也日者正 度也星經星緯星辰日月所會十二次也歷數者占步之法所以紀歲月日星辰也 洪範】太史正歲年以序事頒之於官府及都鄙【中數曰歲朔數曰年中朔大小不齊正之以閏若今時作歷日矣定四時以次序授民時之事春秋傳曰閏以正時時以作事事以厚生生民之本於是乎在】頒告朔於邦國【天子頒朔於諸侯諸侯藏之祖廟至朔朝於廟告而受行之鄭司農云頒讀為班班布也以十二月朔布告天下諸侯 春官】馮相氏掌十有二歲十有二月十有二辰十有八星之位辨其叙事以會天位【歲謂太歲歲星與日同次之月斗所建之辰樂說說歲星與日常應太歲月建以見歲日月星辰宿之位謂方面所在辨其叙事若謂仲春辨秩東作仲夏辨秩南訛仲秋辨秩西成仲冬辨在朔易會天位者合此歲日月星辰宿五者以為時事之候若今歷日太歲在某月某日某甲朔日值某也】冬夏致日春秋致月以辨四時之序【冬至日牽牛景丈三尺夏至日在東井景尺五寸此長短之極極則氣至冬無???陽夏無伏陰春分日在婁秋分日在角而月弦於牽牛東井亦以其景知氣至否春秋冬夏氣皆至則是四時之叙正矣 同上】土圭尺有五寸以致日【致日度景至否夏日至之景尺有五寸冬日至之景丈有三尺 考工記玉人】典瑞土圭以致四時日月【以致四時日月者度其景至不至以知其行得失也冬夏以致日春秋以致月 春官】孟春乃命太史守典奉法司天日月星辰之行宿離不貸毋失經紀以初為常【典六典法八法也離讀如儷偶之儷宿儷謂其屬馮相氏保章氏掌天文者相與宿偶當審候伺不得過差也經紀謂天文進退度數 月令】

右治歷 澤中有火革君子以治歷明時【四時之變革之大者象傳】聖人慎守日月之數以察星辰之行以序四時之順逆謂之歷截十二管以宗八音之上下清濁謂之律也律居陰而治陽【因地主氣】歷居陽而治陰【因天主事】律歷迭相治也【歷以治時律以候氣】其間不容髮【其致一也大戴禮】桓公十七年冬十月朔日有食之【甲乙者歷之紀也晦朔者日月之會也日食不可以不存晦朔晦朔須甲乙而可推故日食必以書朔日為例】不書日官失之也天子有日官諸侯有日御【日官日御典歷數者】日官居卿以底日禮也【日官天子掌歷者不在六卿之數而位從卿故言居卿也底平也謂平歷數】日御不失日以授百官於朝【日官平歷以班諸侯諸侯奉之不失天時以授百官 左傳】文公元年於是閏三月非禮也【於歷法閏當在僖公末年誤於今年三月置閏蓋時達歷者所譏】先王之正時也履端於始舉正於中歸餘於終【步履之始以為術之端首朞之日三百六十有六日日月之行又有遲速而必分為十二月舉中氣以正月有餘日則歸之於終積而為閏故言歸餘於終】履端於始序則不愆【四時無愆過】舉正於中民則不惑【斗建不失其次寒暑不

失其常故無疑惑】歸餘於終事則不悖【四時得所則事無悖亂】六年閏月不告朔非禮也【經稱告月傳稱告朔明告月必以朔】閏以正時【四時漸差則致閏以正之】時以作事【順時命事】事以厚生【事不失時則年豐】生民之道於是乎在矣不告閏朔棄時政也何以為民襄公二十七年十一月乙亥朔日有食之辰在申司歷過也再失閏矣【謂斗建指申周十一月今之九月斗當建戌而在申故知再失閏也又十一年三月甲子至今年七十一歲應有二十六閏今長歷推得二十四閏通計少再閏釋例言之詳矣】哀公十二年冬十有二月蝻【周十二月今十月是歲應置閏而失不置雖書十二月實今之九月司歷誤一月九月之初尚溫故得有蝻】季孫問諸仲尼仲尼曰丘聞之火伏而後蟄者畢【火心星也火伏在今十月】今火猶西流司歷過也【猶西流言未盡沒知是九月歷官失一閏釋例論之備明年經書十有二月蝻注云前年季孫雖聞仲尼之言而不正歷失閏至此年故復十二月蝻實十一月並同上】

洪範次八曰念用庶徵【庶徵曰念所以省驗也】八庶徵曰雨曰暘曰燠曰寒曰風曰時五者來備各以其叙庶草蕃廡【徵驗也廡豐茂所驗者非一故謂之庶徵雨暘燠寒風各以時至故曰時也備者無缺少也叙者應節候也五者備而不失其叙庶草且蕃廡矣則其他可知也雨屬水暘屬火燠屬木寒屬金風屬土吳仁傑曰易以坎為水北方之卦也又曰雨以潤之則雨為水矣離為火南方之卦也又曰日以烜之則暘為火矣小明之詩首章云我征徂西二月初吉二章云昔我往矣日月方燠夫以二月為燠則燠之為春為木明矣漢志引狐突金寒之言顏師古謂金行在西故謂之寒則寒之為秋為金明矣又按稽疑以雨屬水以霽屬火霽暘也則庶徵雨之為水暘之為火類例抑又甚明蓋五行乃生數自然之叙五事則本於五行庶徵則本於五事其條理次第相為貫通有秩然而不可紊亂者也】一極備凶一極無凶【極備過多也極無過少也唐孔氏曰雨多則澇雨少則旱是極備亦凶極無亦凶餘準是】曰休徵曰肅時雨若曰乂時暘若曰哲時燠若曰謀時寒若曰聖時風若曰咎徵曰狂恒雨若曰僭恒暘若曰豫恒燠若曰急恒寒若曰蒙恒風若【狂妄僭差豫怠急迫蒙昧也在天為五行在人為五事五事修則休徵各以類應之五事失則咎徵各以類應之自然之理也然必曰某事得則某休徵應某事失則某咎徵應則亦膠固不通而不足與語造化之妙矣天人之際未易言也失得之機應感之微非知道者孰能識之哉】曰王省惟歲卿士惟月師尹惟日【歲月日以尊卑為徵也王者之失得其徵以歲卿士之失得其徵以月師尹之失得其徵以日蓋雨暘燠寒風五者之休咎有係一歲之利害有係一月之利害有係一日之利害各以其大小言也】歲月日時無易百穀用成乂用明俊民用章家用平康【歲月日三者雨暘燠寒風不失其時則其效如此休徵所感也】日月歲時既易百穀用不成乂用昏不明俊民用微家用不寧【日月歲三者雨暘燠寒風既失其時則其害如此咎徵所致也休徵言歲月日者總於大也咎徵言日月歲者著其小也】庶民惟星星有好風星有好雨日月之行則有冬有夏月之從星則以風雨【民之麗乎土猶星之麗乎天也好風者箕星好雨者畢星漢志言軫星亦好雨意者星宿皆有所好也日有中道月有九行中道者黃道也北至東井去極近南至牽牛去極遠東至角西至婁去極中是也九行者黑道二出黃道北赤道二出黃道南白道二出黃道西青道二出黃道東并黃道為九行也日極南至於牽牛則為冬至極北至於東井則為夏至南北中東至角西至婁則為春秋分月立春春分從青道立秋秋分從白道立冬冬至從黑道立夏夏至從赤道所謂日月之行則有冬有夏也月行東北入於箕則多風月行西南入於

畢則多雨所謂月之從星則以風雨也民不言省者庶民之休咎係乎上人之得失故但以月之從星以見所以從民之欲者如何爾夫民生之衆寒者欲衣饑者欲食鰥寡孤獨者之欲得其所此王政之所先而卿士師尹近民者之責也然星雖有好風好雨之異而日月之行則有冬有夏之常以月之常行而從星之異好以卿士師尹之常職而從民之異欲則其從民者非所以徇民矣言日月而不言歲者有冬有夏所以成歲功也言月而不言日者從星惟月為可見耳洪範】保章氏掌天星以志星辰日月之變動以觀天下之遷辨其吉凶【志古文識識記也星謂五星辰日月所會五星有贏縮園角日有薄食暈珥月有虧盈朏側匿之變七者右行列舍天下禍福變移所在皆見焉】以星土辨九州之地所封封域皆有分星以觀妖祥【星土星所主土也封猶界也鄭司農說星土以春秋傳曰參為晉星商主大火國語曰歲之所在則我有周之分野之屬是也玄謂大界則曰九州中諸國中之封域於星亦有分焉其書亡矣堪輿雖有郡國所入度非古數也今其存可言者十二次之分也星紀吳越也玄枵齊也娵訾衛也降婁魯也大梁趙也實沈晉也鶉首秦也鶉火周也鶉尾楚也壽星鄭也大火宋也析木燕也此分野之妖祥主用客星慧孛之氣為象】以十有二歲之相觀天下之妖祥【歲謂太歲歲星與日同次之月斗所建之辰也歲星為陽右行於天太歲為陰左行於地十二歲而小周其妖祥之占甘氏歲星經其遺象也鄭司農云太歲所在歲星所居春秋傳曰越得歲而吳伐之必受其凶之屬是也】以五雲之物辨吉凶水旱降豐荒之祲象【物色也視日旁雲氣之色降下也知水旱所下之國鄭司農云以二至二分觀雲氣青為蟲白為喪赤為兵荒黑為水黃為豐故春秋傳曰凡分至啓閉必書雲物為備故也故曰凡此五物以詔救政】以十有二風察天地之和命乖別之妖祥【十有二辰皆有風吹其律以知和不其道亡矣春秋襄十八年楚師伐鄭師曠曰吾驟歌北風又歌南風南風不競多死聲楚必無功是時楚師多凍其命乖別審矣】凡此五物者以詔救政訪序事【訪謀也見其象則當豫為之備以詔王救其政且謀今歲天時占相所宜次序其事春官】眡祲掌十輝之法以觀妖祥辨吉凶【妖祥善惡之徵鄭司農云輝謂日光炁也】一曰祲二曰象三曰鑷四曰監五曰闇六曰眚七曰彌八曰叙九曰躋十曰想【故書彌作迷躋作資鄭司農云祲陰陽氣相侵也象者如赤烏也鑷謂日旁氣四面反鄉如輝狀也監雲氣臨日也闇日月食也眚日月眚眚無光也彌者白虹彌天也叙者雲有次序也如山在日上也躋者升氣也想者輝光也玄謂鑷讀如童子佩鑷之鑷謂日旁氣刺目也監冠珥也彌氣貫日也躋虹也詩云朝躋於西想雜氣有似可形想】掌安宅叙降【宅居也降下也人見妖祥則不安主安其居處也次序其凶禍所下謂禳移也】正歲則行事【占夢以季冬贈惡夢此正月而行安宅之事所以順民】歲終則弊其事【弊斷也謂計其吉凶然否多少同上】

右占候 僖公五年春王正月辛亥朔日南至【周正月今十一月冬至之日日南極】公既視朔遂登觀臺以望而書禮也【視朔親告朔也觀臺臺上構屋可以遠觀者也朔旦冬至歷數之所始治歷者因此則可以明其術數審別陰陽叙事訓民魯君不能常修此禮故善公之得禮】凡分至啓閉必書雲物【分春秋分也至冬夏至也啓立春立夏閉立秋立冬雲物氣色災變也傳重申周典不言公者日官掌其職】為備故也【素察妖祥逆為之備左氏傳】十六年王正月戊申朔隕石於宋五【隕落也聞其隕視之石數之五各隨其聞見先後而記之莊七年星隕如雨見星之隕而隊於四遠若山若水不見在地之驗此則見在地之驗而不見始隕之星史各據事而書】是月六鷁退飛過宋都【是月隕石之月重言是月嫌同日鷁水

鳥高飛遇風而退宋人以為災告於諸侯故書春秋隕石于宋五隕星也【但言星則嫌星使石隕故傳言隕星】六鷁退飛過宋都風也【六鷁遇迅風而退飛風高不為物害故不記風之異】周内史叔興聘于宋宋襄公問焉曰是何祥也吉凶焉在【祥吉凶之先見者襄公以為石隕鷁退能為禍福之始故問其所在】對曰今茲魯多大喪【今茲此歲】明年齊有亂君將得諸侯而不終【魯喪齊亂宋襄公不終別以政刑吉凶他占知之】退而告人曰君失問是陰陽之事非吉凶所生也【言石隕鷁退陰陽錯逆所為非人所生襄公不知陰陽而問人事故曰君失問叔興自以對非其實恐為有識所譏故退而告人】吉凶由人吾不致逆君故也【積善餘慶積惡餘殃故曰吉凶由人君問吉凶不敢逆之故假他占以對左氏傳】晉公子重耳適齊齊侯妻之姜氏言於公子曰吾聞晉之始封也【始封謂唐叔虞】歲在大火閼伯之星也實紀商人【商殷也自氐五度至尾九度為大火之次閼伯陶唐氏之火正居于商丘祀大火死以配食相土因之故商主大火實紀商之吉凶也】商之饗國三十一王【自湯至紂】瞽史之記曰唐叔之世將如商數【瞽史知天道者】今未半也【自唐叔至惠公十四世故曰未半】子必有晉若何懷安【國語晉語】秦伯納公子董因迎公於河【董因晉大夫周大史辛有之後也傳曰辛有之二子董之晉故晉有董史】公問焉曰吾其濟乎對曰歲在大梁將集天行元年始受實沈之星也【歲在大梁謂魯僖公二十三年歲星在大梁之次也集成也行道也言公將成天道也公以辰出晉祖唐叔所以封也而以參入晉星也元年謂文公即位之年魯僖二十四年歲星去大梁在實沈之次受受於大梁也自胃七度至畢十二度為大梁自畢十三度至東井十五度曰實沈】實沈之墟晉人是居所以興也【墟次也是居居其分次以主祀也傳曰高辛氏有子季曰實沈遷於大夏主祀參唐人是因成王滅唐而封叔虞南有晉水子燮改為晉侯故參為晉星】今君當之無不濟矣【當歲星在實沈之虛故無不成】君之行也歲在大火大火閼伯之星也是謂大辰【君之行謂魯僖公五年重耳出奔時歲在大火大火大辰也傳曰高辛氏有子曰閼伯遷於商丘祀大火】辰以成善后稷是相唐叔以封【成善謂辰為農祥周先后稷之所經緯以成善道相視也謂祀農祥以戒農事封者唐叔封之時歲在大火】瞽史記曰嗣續其祖如穀之滋必有晉國【瞽史記云唐叔之世將如商數今言嗣續其祖明趣同也言晉子孫將繼續其先祖如穀之蕃滋故必有晉國】且以辰出而以參入皆晉祥也【辰大火也參伐也參在實沈之次】而天之大紀也【所以大紀天時也傳曰大火為大辰伐亦為大辰辰時也】濟且秉成必霸諸侯【秉執也】子孫賴之【同上】文公十四年秋七月有星孛入於北斗【孛彗也既見而移入北斗非常所有故書之春秋】周内史叔服曰不出七年宋齊晉之君皆將死亂【後三年宋弑昭公五年齊弑懿公七年晉弑靈公史服但言事徵而不論其占固非末學所得詳言左氏傳】襄公九年春宋災晉侯問於士弱【弱士渥濁之子莊子】曰吾聞之宋災於是乎知有天道何故【問宋何故自知天道將災】對曰古之火正或食於心或食於味以出內火是故味為鶉火心為大火【謂火正之官配食於火星建辰之月鶉火星昏在南方則令民放火建戌之月大火星伏在日下夜不得見則令民內火禁放火】陶唐氏之火正閼伯居商丘【陶唐堯有天下號閼伯高辛氏之子傳曰遷閼伯於商丘主辰辰大火也今為宋星然則商丘在宋地】祀大火而火紀時焉【謂出內火時】相土因之故商主大火【相土契孫商之祖也始伐閼伯之後居商丘祀大火】商人閱其禍敗之釁必始於火是以日知其有天道也【閱猶數也商人數所更歷恒多火災宋是殷商之後故知天道之災必火】公曰可必乎對曰在道國亂無象不可知也【言國無道則災變亦殊故不可必知】十八年冬十月諸侯同伐齊十二

月楚師伐鄭信於城下而還【信再宿也】楚師多凍役徒幾盡晉人聞有楚師師曠曰不害吾驟歌北風又歌南風南風不競【歌者吹律以詠八風南風音微故曰不競也師曠唯歌南北風者聽晉楚之強弱】多死聲楚必無功董叔曰天道多在西北【歲在豕韋月又建亥故曰多在西北】南師不時必無功【不時謂觸歲月】叔向曰在其君之德也【言天時地利不如人和】二十八年春無冰梓慎曰今茲宋鄭其饑乎【梓慎魯大夫今年鄭游吉宋向戌言之明年饑甚傳乃詳其事】歲在星紀而淫於玄枵【歲歲星也星紀在丑斗牛之次玄枵在子虛危之次十八年晉董叔曰天道多在西北是歲歲星在亥至此年十一歲故在星紀明年乃當在玄枵今已在玄枵淫行失次】以有時菑陰不堪陽【時菑無冰也盛陰用事而溫無冰是陰不勝陽地氣發洩】蛇乘龍【蛇玄武之宿虛危之星龍歲星歲星木也木為青龍失次出虛危下為蛇所乘】龍宋鄭之星也【歲星本位在東方東方房心為宋角亢為鄭故以龍為宋鄭之星】宋鄭必饑玄枵虛中也【玄枵三宿虛星在其中】枵耗名也土虛而民耗不饑何為【歲為宋鄭之星今失常淫入虛耗之次時復無冰地氣發洩故曰土虛民耗】裨竈曰今茲周王及楚子皆將死【裨竈鄭大夫】歲棄其次而旅於明年之次以害烏帑周楚惡之【旅客處也歲星棄星紀之次客在玄枵歲星所在其國有福失次於北禍衝在南南為朱鳥鳥尾曰帑鶉火鶉尾周楚之分故周王楚子受其咎俱論歲星過次梓慎則曰宋鄭饑裨竈則曰周楚王死傳故備舉以示卜占惟人所在】十一月癸巳天王崩十二月楚康王卒昭公六年三月鄭人鑄刑書【鑄刑書於鼎以為國之常法】士文伯曰火見鄭其火乎【火心星周五月昏見】火未出而作火以鑄刑器【刑器鼎也】藏爭辟焉火如象之不火何為【象類也同氣相求火未出而用火相感而致災】六月丙戌鄭災【終士文伯之言】七年夏四月甲辰朔日有食之晉侯問於士文伯曰誰將當日食對曰魯衛惡之【受其凶惡】衛大魯小公曰何故對曰去衛地如魯地【衛地豕韋也魯地降婁也日食於豕韋之末及降婁之始乃息故禍在衛大在魯小周四月今二月故曰在降婁】於是有災魯實受之【災發於衛而魯受其餘禍】其大咎其衛君乎魯將上卿【八月衛侯卒十一月季孫宿卒】公曰詩所謂彼日而食于何不臧者何也【感日食而問詩】對曰不善政之謂也國無政不用善則自取謫於日月之災【謫譴也】故政不可不慎也八月衛襄公卒十一月季武子卒晉侯謂伯瑕【伯瑕士文伯】曰吾所問日食從矣可常乎【衛侯武子皆卒故】對曰不可六物不同【各異時】民心不壹【政教殊】事序不類【有變易】官職不則【治官居職非一法】同始異終胡可常也公曰何謂六物對曰歲時日月星辰是謂也公曰多語寡人辰而莫同何謂辰對曰日月之會是謂辰【一歲日月十二會所會謂之辰】故以配日【謂以子丑配甲乙】八年冬十月壬午楚師滅陳晉侯問於史趙曰陳其遂亡乎對曰未也公曰何故對曰陳顓頊之族也【陳祖舜舜出顓頊】歲在鶉火是以卒滅陳將如之【顓頊氏以歲在鶉火而滅火盛而水滅】今在析木之津猶將復由【箕斗之間有天漢故謂之析木之津由用也】且陳氏得政於齊而後陳卒亡【物莫能兩盛】自幕至於瞽瞍無違命【幕舜之先瞽瞍舜父從幕至瞽瞍間無違天命廢絕者】舜重之以明德實德於遂【遂舜後盖殷之興存舜之後而封遂言舜德乃至於遂】遂世守之及胡公不淫故周賜之姓使祀虞帝【胡公滿遂之後也事周武王賜姓曰姁封諸陳紹舜後】臣聞盛德必百世祀虞之世數未也繼守將在齊其兆既存矣【言陳氏興盛於齊形兆已見】九年夏四月陳災鄭裨竈曰五年陳將復封封五十二年而遂亡子產問其故對曰陳水屬也【陳顓頊之後故為水屬】火水妃也【火畏水故為之妃】而楚所相也【相治也楚之先祝融為高辛氏火正主治火事】今火出而

火陳【火心星也火出於周為五月而以四月出者以長歷推前年誤置閏】逐楚而建陳也【水得妃而興陳興則楚衰故曰逐楚而建陳】妃以五成故曰五年【妃合也五行各相配合得五而成故五歲而陳復封為十三年陳侯吳歸于陳傳】歲五及鶉火而後陳卒亡楚克有之天之道也故曰五十二年【是歲歲在星紀五歲及大梁而陳復封自大梁四歲而及鶉火後四周四十八歲凡五及鶉火五十二年天數以五為紀故五及鶉火火盛水衰】十年春王正月有星出於婺女【客星也不書非孛】鄭裨竈言於子產曰七月戊子晉君將死今茲歲在顓頊之虛【歲歲星也顓頊之虛謂玄枵】姜氏任氏實守其地【姜齊姓任薛姓齊薛二國守玄枵之地】居其維首而有妖星焉告邑姜也【客星居玄枵之維首邑姜齊太公女晉唐叔之母星占婺女為既嫁之女織女為處女邑姜齊之既嫁女妖星在婺女齊得歲故知禍歸邑姜】邑姜晉之妣也天以七紀【二十八宿面七】戊子逢公以登星斯於是乎出【逢公殷諸侯居齊地者逢公將死妖星出婺女時非歲星所在故齊自當禍而以戊子日卒】吾是以譏之【為晉侯彪卒傳】秋七月戊子晉平公卒【如裨竈之言】十一年春景王問於萇弘曰今茲諸侯何實吉何實凶【萇弘周大夫】對曰蔡凶此蔡侯般弑其君之歲也歲在豕韋【襄三十年蔡世子般弑其君歲在豕韋至今十三歲歲復在豕韋般即靈侯也】弗過此矣【言蔡凶不過此年】楚將有之然壅也【蔡近楚故知楚將有之楚無德而享大利所以壅積其惡】歲及大梁蔡復楚凶天之道也【楚靈王弑立之歲歲在大梁到昭十三年歲復在大梁美惡周必復故知楚凶】楚子召蔡靈侯殺之十一月楚子滅蔡十五年春將禘于武公戒百官【齊戒】梓慎曰禘之日其有咎乎吾見赤黑之祲非祭祥也喪氛也【祲妖氛也蓋見於宗廟故以為非祭祥也氛惡氛也】其在泄事乎【泄臨也】二月癸酉禘叔弓泄事籥入而卒十七年冬有星孛於大辰西及漢【大辰房心尾也夏之八月辰星見在天漢西今孛星出辰西光芒東及天漢】申胥曰彗所以除舊布新也【申胥魯大夫】天事恆象【天道恆以象類告示人】今除於火火出必布焉諸侯其有火災乎【今火向伏故知當須火出乃布散為災】梓慎曰往年吾見之是其徵也【徵始有形象而微也】火出而見【前年火出時】今茲火出而章必火入而伏【隨火沒也】其居火也久矣【歷三年】其與不然乎【言必然也】火出於夏為三月【謂昏見】於商為四月於周為五月夏數得天【得天正】若火作其四國當之在宋衛陳鄭乎宋大辰之虛也【大辰大火宋分野】陳太皞之虛也【太皞居陳木火所自出】鄭祝融之虛也【祝融高辛氏之火正居鄭】皆火房也【房舍也】星孛及漢漢水祥也【天漢水也】衛顓頊之虛也故為帝丘【衛今濮陽縣昔帝顓頊居之其城內有顓頊冢】其星為大水【衛星營室營室水也】水火之牡也【牡雄也】其以丙子若壬午作乎水火所以合也【丙午火壬子水水火合而相薄水少而火多故水不勝火】若火入而伏必以壬午【尚未知今孛星當復隨火星俱伏不故言若】不過其見之月【火見周之五月】鄭裨竈言於子產曰宋衛陳鄭將同日火若我用瓘鬯玉瓚鄭必不火【瓘圭也鬯玉爵也瓚勺也欲以禳火】子產弗與【以為天災流行非禳所息故也為明年宋衛陳鄭災傳】十八年夏五月火始昏見【火心星】丙子風梓慎曰是謂融風火之始也【東北曰融風融風木也木火母故曰火之始】七日其火作乎【從丙子至壬午七日壬午水火合之日故知當火作】戊寅風甚壬午火甚宋衛陳鄭皆火梓慎登大庭氏之庫以望之【大庭氏古國名在魯城內魯於其處作庫高顯故登以望氣參近占以審前年之言】曰宋衛陳鄭也數日皆來告火【言經所以書】裨竈曰不用吾言鄭又將火【前年裨竈欲用瓘鬯禳火子產不聽今復請用之】鄭人請用之【信竈言】子產不可曰天道遠人道邇非

所及也何以知之竈焉知天道是亦多言矣豈不或信【多言者或時有中】遂不與亦不復火【傳言天道難明雖裨竈猶不足以盡知之】鄭之未災也里析告子產曰將有大祥【里析鄭大夫祥變異之氣】民震動國幾亡吾身泯焉弗良及也【言將先災死】國遷其可乎子產曰雖可吾不足以定遷矣【子產知天災不可逃非遷所免故託以知不足】及火里析死矣二十年春王二月己丑日南至【是歲朔旦冬至之歲也當言正月己丑朔日南至時史失閏閏更在二月後故經因史而書正月傳更具二月記日南至者以正歷也】梓慎望氛【氛氣也時魯侯不行登臺之禮使梓慎望氛】曰今茲宋有亂國幾亡三年而後弭蔡有大喪【為宋華向出奔蔡侯卒傳】叔孫昭子曰然則戴桓也【戴族華氏桓族向氏】汰侈無禮已甚亂所在也【傳言妖由人興】二十一年秋七月壬午朔日有食之公問於梓慎曰是何物也禍福何為【物事也】對曰二至二分【二至冬至夏至二分春分秋分】日有食之不為災日月之行也分同道也至相過也【二分日夜等故言同道二至長短極故言相過】其他月則為災陽不克也故常為水【陰侵陽是陽不勝陰】於是叔輒哭日食【意在於憂災】昭子曰子叔將死非所哭也八月叔輒卒二十四年夏五月乙未朔日有食之梓慎曰將水【陰勝陽故曰將水】昭子曰旱也日過分而陽猶不克克必甚能無旱乎【過春分陽氣盛時而不勝陰陽將猥出故為旱】陽不克莫將積聚也【陽氣莫然不動乃將積聚】秋八月大雩旱也【終如叔孫之言】三十一年十二月辛亥朔日有食之是夜也趙簡子夢童子嬴而轉以歌【轉宛轉也】旦占諸史墨曰吾夢如是今而日食何也【簡子夢適與日食會謂咎在巳故問之】對曰六年及此月也吳其入郢乎終亦弗克【史墨知夢非日食之應故釋日食之咎而不釋其夢】入郢必以庚辰【庚日有變日在辰尾故曰以庚辰定四年十一月庚辰吳入郢】日月在辰尾【辰尾龍尾也周十二月今之十月日月合朔於辰尾而食】庚午之日始有謫火勝金故弗克【謫變氣也庚午十月十九日去辛亥朔四十一日雖食在辛亥更以始變為占也午南方楚之位也午火庚金也日以庚午有變故災在楚楚之仇敵唯吳故知入郢必吳火勝金者金為火妃食在辛亥亥水也水數六故六年也】三十二年夏吳伐越始用師於越也【自此之前雖疆事小爭未嘗用大兵】史墨曰不及四十年越其有吳乎【存亡之數不過三紀歲星三周三十六歲故曰不及四十年哀二十二年越滅吳至此三十八歲】越得歲而吳伐之必受其凶【此年歲在星紀星紀吳越之分也歲星所在其國有福吳先用兵故反受其殃】哀公六年楚昭王卒是歲也有雲如衆赤鳥夾日以飛三日楚子使問諸周大史周大史曰其當王身乎【日為人君妖氣守之故以為當王身雲在楚上唯楚見之故禍不及他國】若禳之可移於令尹司馬【禳禳祭】王曰除腹心之疾而寘諸股肱何益不穀不有大過天其弑諸有罪受罰又焉移之遂弗禳孔子曰楚昭王知大道矣其不失國也宜哉【並左氏傳】

挈壺氏凡軍事縣壺以序聚 凡喪縣壺以代哭者皆以水火守之分以日夜【鄭司農云縣壺以為漏以序聚 以次更聚擊 備守也玄謂擊 兩木相敲行夜時也代亦更也禮未大斂代哭以水守壺者為沃漏也以火守壺者夜則視刻數也分以日夜者異晝夜漏也漏之箭晝夜共百刻冬夏之間有長短焉大史立成法有四十八箭】及冬則以火爨鼎水而沸之而沃之【鄭司農云冬水凍漏不下故以火炊水沸以沃之謂沃漏也 夏官】雞人凡國事為期則告之時【象雞知時也告其有司主事者少牢曰宗人朝服北面曰請祭期主人曰比於子宗人曰旦明行事告時者至此旦明而告之 春官】右壺漏

東方未明刺無節也朝廷興居無節號令不時挈壺氏不能掌其職焉【挈壺氏掌漏刻者
詩齊風序】

禮書綱目卷五十三

卷五十四

<經部,禮類,通禮之屬,禮書綱目

欽定四庫全書

禮書綱目卷五十四 婺源江永撰

夏小正 通禮二

補【大戴禮補】

傳曰何以謂之小正以小著名也

夏以十三月為正平旦為朔殷以十二月為正鷄鳴為朔周以十一月為正夜半為朔【尚書大傳】王者受命必改朔何明易姓示不相襲也明受之於天不受之於人所以變易民心革其耳目以助化也故喪服大傳曰王始起改正朔易服色殊徽號異器械別衣服也是以舜禹雖繼太平猶宜改以應天正朔有三何本天有三統謂三微之月也明王者當奉順而成之故受命各統一正也禮三正記曰正朔三而改文質再而復也三微者何謂也陽氣始於黃泉萬物動微而未著也十一月之時陽氣始養根株黃泉之下萬物皆赤赤者盛陽之氣也故周為天正色尚赤也十二月之時萬物始芽而白白者陰氣故殷為地正色尚白也十三月之時萬物始達孚甲而出皆黑人得加功故夏為人正色尚黑不以二月後為正者萬物不齊莫適所統故必以三微之月也【白虎通】有扈氏威侮五行怠棄三正【三正子丑寅之正也夏正建寅怠棄者不用正朔也今按此章則三正迭建其來久矣舜協時月正日亦所以一正朔也子丑之建唐虞之前當已有之甘誓】顏淵問為邦子曰行夏之時【夏時謂以斗柄初昏建寅之月為歲首也天開於子地闢於丑人生於寅故斗柄建此三辰之月皆可以為歲首而三代迭用之夏以寅為人正商以丑為地正周以子為天正也然時以作事則歲月自當以人為紀故孔子嘗曰吾得夏時焉而說者以為謂夏小正之屬蓋取其時之正與其令之善而於此又以告顏子也論語】縣子問子思曰顏回問為邦夫子曰行夏之時若時殷周異正為非乎【縣子瑣言夏以建寅為正夫子是之則商周以子丑為正乃非乎】子思曰夏數得天堯舜之所同也【夏以寅為正得天數之全故堯舜亦然】殷周王征伐革命以應乎天因改正朔若云天時之改爾故不相因也【湯武革命所以應天故變其正朔蓋言若受天命然】夫受禪於人者則襲其統【夏因人心之歸以受舜禪故亦因其朔不改】受命於天者則革之所以神其事如天道之變然也三統之義夏得其正是以夫子云【孔叢子】孔子曰我欲觀夏道【欲行其禮觀其所成】是故之杞【杞夏后氏之後也】而不足徵也【徵成也無賢君不足與成也】吾得夏時焉【得夏四時之書也其書存者有小正禮運】

正月啟蟄鴈北鄉雉震响魚陟負冰農緯厥耒初歲祭耒始用暢時有俊風寒日滌凍塗田鼠

出農率均田獺祭魚鷹則為鳩農及雪澤初服於公田采芸鞠則見初昏參中斗柄縣在下柳稊梅杏桺桃則華緹縞雞桴粥傳曰正月啟蟄言始發蟄也鴈北鄉先言鴈而後言鄉者何也見鴈而後數其鄉也鄉者何也鄉其居也鴈以北方為居何以謂之為居生且長焉爾九月遘鴻鴈先言遘而後言鴻鴈何也見遘而後數之則鴻鴈也何不謂南鄉也曰非其居也故不謂南鄉記鴻鴈之遘也如不記其鄉何也曰鴻不必當小正之遘者也雉震响震也者鳴也响也者鼓其翼也正月必雷雷不必聞唯雉為必聞之何以謂之雷則雉震响相識以雷魚陟負冰陟升也負冰云者言解蟄也農緯厥耒緯束也束其耒云爾者用是見君之亦有耒也初歲祭耒始用暢也暢也者終歲之用祭也其曰初云爾也者言是月之始用之也初者始也或曰祭韭也圃有見韭圃也者園之燕者也時有俊風俊者大也大風南風也何大於南風也曰合冰必於南風解冰必於南風生必於南風收必於南風故大之也寒日滌凍塗滌也者變也變而煖也凍塗者凍下而澤上多也田鼠出田鼠者噉鼠也記時也農率均田率者循也均田者始除田也言農夫急除田也獺祭魚【傳本獺下有獸字】其必與之獻【與疑作謂獻傳作獸】何也曰非其類也祭也者得多也善其祭而後食之十月豺祭獸謂之祭獺祭魚謂之獻【傳作獸祭】何也豺祭其類獺祭非其類故謂之獻【傳作獸】大之也鷹則為鳩鷹也者其殺之時也鳩也者非其殺之時也善變而之仁也故具言之也曰則盡其辭也鳩為鷹變而之不仁也故不盡其辭也農及雪澤言雪澤之無高下也初服於公田古者有公田焉者古言先服公田而後服其田也采芸【舊注云似邪蒿可食】為廟采也鞠則見鞠也者何也星名也鞠則見者歲再見爾初昏參中蓋記時也云斗柄縣在下言斗柄者所以著參之中也柳稊稊也者發孚也梅杏桺桃則華桺桃山桃也緹縞緹也者莎隨也縞也者其實也先言緹而後言縞者何也緹先見者也雞桴粥粥也者相粥之時也或曰桴軀伏也粥養也

二月往耒耜禘初俊羔助厥母粥綏多女士丁亥萬用入學祭鮪榮莖采繫昆小蟲抵蜺來降燕乃睇剝鰾有鳴倉庚榮芸時有見稊始收

傳曰二月往耒耜禘禘單也初俊羔助厥母粥俊也者大也粥也者養也言大羔能食草木而不食其母也羊羔非其子而後養之善養而繼之也或曰夏【大戴作憂】有煮祭祭者用羔是時也不足喜樂喜【傳本作善】羔之為生也而記之與牛羊【傳云舊註作羔羊】腹時也綏多女士綏安也冠子娶婦之時也丁亥萬用入學丁亥者吉日也萬也者干戚舞也入學也者太學也謂今時大舍采也祭鮪祭不必記記鮪何也鮪之至有時美物也鮪者魚之先至者也而其至有時謹記其時榮莖采繫莖采也繫由胡由胡由者繫母也繫旁勃也皆豆實也故記之昆小蟲抵蜺昆者衆也由魂魂也者動也小蟲動也其先言動而後言蟲者何也萬物至是動而後著抵猶推也蜺蜺卵也為祭醢也取之則必推之推之不必取取必推而不言取來降燕乃睇燕乙也降者下也言來者何也莫能見其始出也故曰來降言乃睇何也睇者眄也眄者視可為室者也百鳥皆曰巢穴取與之室何也摻泥而就家入人內也剝鰾以為鼓也有鳴倉庚倉庚者商庚也商庚者長股也榮芸時有見稊始收有見稊而後始收是小正序也小正之序時也皆若是也稊者所為豆實

三月參則伏攝桑委楊犂羊 則鳴蜩冰采識妾子始蠶執養宮事祈麥實越有小旱田鼠化為鴽拂桐芭鳴鳩

傳曰三月參則伏伏者非亡之辭也星無時而不見我有不見之時故曰伏云攝桑攝而記之急桑也委【一作萎】楊楊則花而後記之犛羊有相還之時其類犛然記變爾或曰犛羝也則鳴天螻也頒冰頒冰者分冰以授大夫也采識識草也妾子始蠶先妾而後子何也曰事有漸也言自卑事者始也【傳本云當云事自卑者始或無也字】執養宮事執操也養長也祈麥實麥實者五穀之先見者故急祈而記之也越有小旱越于也記是時恒有小旱田鼠化為鴛鴦也變而之善故盡其辭也鴛為鼠變而之不善故不盡其辭也拂桐芭拂也者拂也桐芭之時也或曰言桐芭始生貌拂拂然也鳴鳩言始相命也先鳴而後鳩何也鳩者鳴而後知其鳩也

四月昴則見初昏南門正鳴札囿有見杏鳴蜮王萑莠取荼莠幽越有大旱執陟攻駒

傳曰四月昴則見初昏南門正南門者星也歲再見壹正蓋大正所取法也鳴札札者寧縣也鳴而後知之故先鳴而後札囿有見杏囿者山之燕者也鳴蜮蜮也者或曰屈造之屬也王萑莠取荼荼也者以為君薦蔣也莠幽越有大旱記時爾執陟攻駒執也者始執駒也始執駒也者離之去母也執而升之君也攻駒也者教之服車數舍之也

五月參則見浮游有殷鳩則鳴時有養日乃瓜良蜩鳴匱之興五日翕望乃伏啟灌藍蓼鳩為鷹唐蜩鳴初昏大火中煮梅蓄蘭菽糜頒馬

傳曰五月參則見參也者伐星也故盡其辭也浮游有殷殷衆也浮游者渠略也朝生而暮死稱有何也有見也鳩則鳴鳩者百鷦也鳴者相命也其不辜之時也是善之故盡其辭也時有養日養長也一則在本一則在末故其記曰時養日云也乃瓜【傳本瓜上有衣字】乃【傳云一本有衣字】者急瓜【傳云一作衣】之辭也【傳云一本有衣也者始創衣也】瓜也者始食瓜也良蜩鳴良蜩也者五采具匱之興五日翕望乃伏其不言生而稱興何也不知其生之時故曰興以其興也故言之興五日翕也望也者月之望也而伏云者不知其死也故謂之伏五日也者十五日也翕也者合也伏也者入而不見也啟灌藍蓼啟者別也陶而疏之也灌者聚生者也記時也鳩為鷹唐蜩鳴唐蜩鳴者匱也初昏大火中大火者心也心中種黍菽糜時也煮梅為豆實也蓄蘭為沐浴也菽糜以在經中矣又言之時何也是食短關而記之頒馬分夫婦【一作大夫鄉】之駒也將問諸則或取離駒納之則法也

六月初昏斗柄正在上煮桃鷹始摯

傳曰六月初昏斗柄正在上五月大火中六月斗柄正在上用此見斗柄之不在當心也蓋當依依尾也煮桃桃也者柰桃也柰桃也者山桃也煮以為豆實也【傳本柰作柰註云按爾雅柰檇郭璞云白檇也樹似白楊而古今字書有柰而無柰亦無有訓山桃者爾雅檇桃山桃音斯唐韻亦云此書柰桃者山桃也當作檇蓋傳寫之誤】鷹始摯始摯而言之何也諱煞之辭也【傳本有言字】摯云

七月莠藿葦裡子肇肆湟潦生萃爽死萃莠漢案戶寒蟬鳴初昏織女正東鄉時有霖雨灌荼

斗柄縣在下則旦

傳曰七月莠藿葦未莠則不為藿葦莠然後為藿葦故先言莠裡子肇肆肇始也肆遂也言其始遂也其或曰肆殺也湟潦生萃湟下處也有湟然後有潦有潦而後有萃草也爽死爽也者猶疏也萃莠萃也者有馬帚也漢案戶漢也者河也【大戴無此三字】案戶也者直戶也言正南北也寒蟬鳴蟬也者蜺也初昏織女正東鄉時有霖雨灌荼灌聚也荼灌葦之莠【傳本有也字】為蔣楮之也藿未秀為莢葦未秀為蘆【傳本秀皆作莠】斗柄縣在下則旦

八月剝瓜玄校剝棗 零丹鳥羞白鳥辰則伏鹿人從鴛為鼠參中則旦

傳曰八月剝瓜剝瓜也者畜瓜之時也玄校玄也者黑也校也者若綠色然婦人未嫁者衣之剝棗剝也者取也 零零也者降也零而後取之故不言剝也丹鳥羞白鳥丹鳥者謂丹良也白鳥者謂蚊蚋也其謂之鳥也重其養者也有翼者為鳥羞也者進也不盡食也辰則伏辰也者謂星也伏也者入而不見也鹿人從鹿人從者從羣也鹿之養也離羣而善而【傳本無此而字】之離而生非所知時也故記從不記離君子之居幽也不言或曰人從【大戴無此從字】人從也者大者於外小者於內率之也鴛為鼠參中則旦

九月內火遘鴻鴈主夫出火陟玄鳥蟄熊罷貉貉鼪鼪則穴榮鞠樹麥王始裘辰繫於日雀入于海為蛤

傳曰九月內火內火也者大火也大火也者心也遘鴻雁遘往也主夫出火主夫也者主以時縱火也陟玄鳥蟄陟升也玄鳥者鷦也先言陟而後言蟄何也陟而後蟄也熊罷貉貉鼪鼪則穴若蟄而榮鞠樹麥【大戴無樹麥字傳云或曰傳文也】鞠草也鞠榮而樹麥時之急也王始裘王始裘者何也衣裘之時也辰繫於日雀入於海為蛤蓋有矣非常入也

十月豺祭獸初昏南門見黑鳥浴時有養夜玄雉入於淮為蜃織女正北鄉則旦

傳曰十月豺祭獸善其祭而後食之也初昏南門見南門者星名也及此再見矣黑鳥浴黑鳥者何也鳥也浴也者飛乍高乍下也時有養夜時有養夜者養長也若日之長也玄雉入於淮為蜃蜃者蒲蘆也織女正北鄉則旦織女星名也

十有一月王狩陳筋革嗇人不從隕麋角

傳曰十有一月王狩狩者言王之時田冬獵為狩陳筋革陳筋革者省甲兵也嗇人不從不從者弗行於時月也萬物不通隕麋角隕墜也日冬至陽氣至始動諸向生皆蒙蒙符矣故麋角隕記時焉爾

十有二月鳴弋玄駒賁納卵蒜虞人入梁隕麋角傳曰十有二月鳴弋弋也者禽也先言鳴而後言弋者何也鳴而後知其弋也玄駒賁玄駒也者螳也賁者何也走於地中也納卵蒜卵蒜

也者本如卵者也納者何也納之君也虞人入梁虞人官也梁者主設罔罟者也隕麋角蓋陽氣旦睹也故記之也

單子曰夫辰角見而雨畢【辰角大辰蒼龍之角角星名也見者朝見東方建戌之初寒露節也雨畢者殺氣日至而雨氣盡也】天根見而水涸【天根亢氏之間涸竭也謂寒露雨畢之後五日天根朝見水潦盡竭也月令仲秋水始涸天根見乃盡竭也】本見而草木節解【本氏也謂寒露之後十日陽氣盡草木之枝節皆理解也】駟見而隕霜【駟天駟房星也隕落也謂建戌之中霜始降】火見而清風戒寒【謂霜降之後清風先至所以戒人為寒備也】故先王之教曰雨畢而除道水涸而成梁【教謂月令之屬也九月雨畢十月水涸也】草木節解而備藏【備故藏也月令季秋農事畢收】隕霜而冬裘具【孟冬天子始裘故九月可以具】清風至而修城郭宮室【謂火見之後建亥之初也】故夏令曰九月除道十月成梁【夏令夏后氏之令周所因也除道所以便行旅成梁所以便民使不涉也】其時倣曰收而場功倣而畚揭【時倣時以倣告其民也收而場功使人修困倉也倣具也畚器名土籠也揭昇土之器具爾畚揭以築作也】營室之中土功其始【定謂之營室也建亥小雪中定星昏正於午土功可以始故詩云定之方中作於楚宮也】火之初見期於司里【期會也致其築作之具會於司里之官也】此先王所以不用財賄而廣施德於天下者也【施德謂因時警戒謹蓋藏成築功也 國語周語】

周月 通禮三

補

周月維一月既南至昏昴畢見日短極基踐長微陽動於黃泉陰降慘於萬物是月斗柄建子始昏北指陽氣虧草木萌蕩日月俱起於牽牛之初右回而行月周天起一次而與日合宿日行月一次而周天歷舍於十有二辰終則復始是謂日月權輿與周正歲道數起於時一而成於十次一為首其義則然凡四時成歲歲有春夏秋冬各有孟仲季以名十有二月月中氣以著時應春三中氣雨水春分穀雨夏三中氣小滿夏至大暑秋三中氣處暑秋分霜降冬三中氣小雪冬至大寒閏無中氣斗指兩辰之間萬物春生夏長秋收冬藏天地正四時之極不易之道夏數得天百王所同其在商湯用師於夏除民之災順天革命改正朔變服殊號一文一質示不相沿以建丑為正易民之眊若天時大變亦一代之時亦越我周王致伐於商改正異械以垂三統至於敬授民時巡狩祭享猶自夏焉是謂周月以紀於政【汲冢周書周月解】

大史正歲年以序事頒之於官府及都鄙【中數曰歲朔數曰年中朔大小不齊正之以閏若今時作歷日矣定四時以次序授民時之事春秋傳曰閏以正時時以作事事以厚生生民之本於是乎在 春官】鄉師凡四時之徵令有常者以木鐸徇於市朝【徵令有常者謂田狩及正月命修封疆二月令雷且發聲 地官
以上歲時常命】族師月吉則屬民而讀邦法書其孝弟睦婣有學者【月吉每月朔日也 地官此條每月吉日】小宰月終則以官府之叙受羣吏之要【主每月之小計】宰夫月終則令正月要 宮正月終則會其稍食 宮伯月終則均秩 酒正酒正之出日入其成

月入其要小宰聽之【出謂授酒材及用酒之多少也受用酒者日言其計於酒正酒正月盡言於小宰 並天官 以上月終】 黨正及四時之孟月吉日則屬民而讀邦去以糾戒之【以四孟之月朔日讀法者彌親民者於教亦彌數地官 此條四孟月吉日】

宮正春以木鐸修火禁【火星以春出以秋入因天時而以戒】 庖人凡用禽獻春行羔豚膳膏香【用禽獻謂煎和之以獻王鄭司農云膏香牛脂也以牛脂和之】

獸人春獻獸物【獸物凡獸皆可獻也及狐狸】

人春獻王鮪【王鮪鮪之大者月令季春薦鮪於寢廟】 鼈人春獻鼈蜃凌人掌冰春始治鑑【鑑如甄大口以盛冰置食物於中以禦溫氣春而始治之為二月將獻羔而啓冰】 掌皮春獻之【皮革踰歲乾久乃可用獻之獻其良者於王以入司裘給王用】 遂以式法頒皮革於百工【式法作物所用多少故事 並天官】

州長春以禮會民而射於州序【序州黨之學也】

黨正春祭禘讀邦法【禘謂雩祭水旱之神】

族師春祭酺讀邦法【酺者為人物裁害之神也 並地官】 大宗伯以祠春享先王 大胥春入學舍采合舞【春始以學士入學宮而學之合舞等其進退使應節奏舍即釋也采讀為菜始入學必釋菜禮先師也菜蘋蘩之屬】 男巫春招弭以除疾病【招招福也弭讀為救救安也安凶禍也招救皆有祀衍之禮並春官】 稟人春獻素

校人春祭馬祖執駒【焉祖天駟也執猶拘也春通淫之時駒弱血氣未定為其乘匹傷之】

圉師春除蓐鬻廐始牧【蓐馬茲也馬既出而除之新鬻焉神之也 並夏官】 雍氏春令為阱獲溝瀆之利於民者【阱穿地為塹所以禦禽獸其或超踰則陷焉世謂之陷阱獲柞鄂也堅地阱淺則設柞鄂於其中】 薙氏掌殺草春始生而萌之【萌之者以茲其斫其生者】

大行人

春朝諸侯而圖天下之事【王者春見諸侯則圖其事之可否】

小行人令諸侯春入貢【貢六服所貢也 並秋官 以上春】 小宰正歲帥治官之屬而觀治象之法徇以木鐸曰不用法者國有常刑【正歲謂夏之正月得四時之正以出教令者審也古者將有新令必奮木鐸以警衆使明聽也木鐸木舌也文事奮木鐸武事奮金鐸】 乃退以宮刑憲禁於王宮【憲謂表縣之若今新有法令云】 令於百官府曰各修乃職攷乃法待乃事以聽王命其有不共則國有大刑【乃猶女也】 宰夫正歲則以法警戒羣吏令修宮中之職事【警勅戒之言鄭司農云正歲夏之正月以法戒勅羣吏】 內宰正歲均其稍食施其功事憲禁令於王之北宮而糾其守【均猶調度也施猶賦也北宮后之六宮謂之北宮者繫於王言之明用王之禁令令之守宿衛者 並天官】 大司徒正歲令於教官曰各共爾職修乃事以聽王命其有不正則國有常刑【正歲夏正月朔日】 小司徒正歲則帥其屬而觀教象之法徇以木鐸曰不用法者國有常刑令羣吏憲禁令修法糾職以待邦治【憲表縣之】

鄉師正歲稽其鄉器 鄉大夫正歲命羣吏攷法於司徒以退各憲之於其所治

州長正歲則讀教法如初【雖以正月讀之至正歲猶復讀之因此四時之正重申之】 黨正正歲屬民讀法而書其德行道藝【書記之】 遂大夫正歲簡稼器修稼政【簡猶閱也稼器耒耜鎡基之屬稼政孟春之月令所云皆修封疆審端經術善相丘陵阪險原隰土地所宜五穀所殖以教道民必躬親之 並地官】

眡祲正歲則行事【占夢以季冬贈惡夢此正月而行安宅之事所以順民 春官】

訓方氏正歲則布而訓四方【布告以教天下使知世所善惡 夏官】 小司寇正歲帥其屬而觀刑象令以木鐸曰不用法者國有常刑令羣士【羣士遂士以下】乃宣布于四方憲刑禁【宣徧也憲表也謂縣之也刑禁士師之五禁】乃命其屬入會乃致事【得其屬之計乃令致之於王】 士師正歲帥其屬而憲禁令于國及郊野【去國百里為郊郊外謂之野 並秋官以上正歲】 內宰上春詔王后帥六宮之人而生種稑之種而獻之於王【六宮之人夫人以下分居后之六宮者古者使后宮藏種以其有傳類蕃孳之祥必生而獻之示能育之使不傷敗且以佐王耕事共禘郊也鄭司農云先種後熟謂之種後種先熟謂之稑王當以耕種於藉田 天官】 天府上春釁寶鎮及寶器【上春孟春也釁謂殺牲以血釁之】 龜人上春釁龜祭祀先卜【釁者殺牲以血之神之也先卜始用卜筮者言祭言祀尊焉天地之也世本作曰巫咸作筮卜未聞其人也是上春者夏正建寅之月月令孟冬云釁祠龜策相互矣秦以十月建亥為歲首則月令秦世之書亦或欲以歲首釁龜耳】 籒人上春相籒【相謂更選擇其著也著龜歲易者與 並春官】 牧師孟春焚牧【焚牧地以除陳生新草也 夏官 以上孟春】 內宰中春詔后帥外內命婦治蠶於北郊以為祭服【蠶於北郊婦人以純陰為尊郊必有公桑蠶室焉】 媒氏中春之月令會男女【中春陰陽交以成昏禮順天時也】 於是時也

奔者不禁【重天時權許之也】若無故而不用令者罰之【無故謂無喪禍之變也有喪禍者娶得用非中春之月 並地官】 籒章中春晝擊土鼓獻豳詩以逆暑【豳詩豳風七月也吹之者以籒為之節七月言寒暑之事迎氣歌其類也此風也而言詩詩總名也迎暑以晝求諸陽】 馮相氏春致月【春分日在婁而月絃於東井亦以其景知氣至不 並春官】 大司馬中春教振旅【凡師出曰治兵入曰振旅皆習戰也四時各教民以其一焉春習振】

【旅兵入收衆專於農】遂以蒐田【春田為蒐】 羅氏中春羅春鳥獻鳩以養國老行羽物【春鳥鵲而始出者若今南郡黃雀之屬是時鷹化為鳩鳩與春鳥變舊為新宜以養老助生氣行謂賦賜】 司弓矢中春獻弓弩【弓弩成於和】 牧師中春通淫【中春陰陽交萬物生之時可以合馬之牝牡也月令季春乃合累牛騰馬遊牝於牧秦時書也秦地寒涼萬物後動 並夏官】 司烜氏中春以木鐸修火禁於國中【為季春將出火也火禁謂】

【用火之處及備風燥秋官 以上中春】 司燿季春出火民咸從之【火所以用陶冶民隨國而為之鄭人鑄刑書火星未出而出火後有災鄭司農云以三月本時昏心星見於辰上使民出火 夏官此條季春】 庖人夏行脔鱠膳膏臊【鄭司農云脔乾雉鱠乾魚杜子春云膏臊犬膏】 獸人夏獻麋【麋膏散散則涼】 凌人夏頒冰掌事【暑氣盛王以冰頒賜則主】

【為之春秋傳曰古者日在北陸而藏冰西陸朝覲而出之 並天官】 稻人凡稼澤夏以水殄草而芟蕘之【殄病也絕也將以澤地為稼者必於夏六月之時大雨時行以水病絕草之後生者至秋水涸芟之明年乃稼 地官】 大宗伯以禴夏享先王【春官】 校人夏祭先牧頒馬攻特【先牧始養馬者其人未聞夏通淫之後攻其特為其蹄齧不可乘用鄭司農云攻特謂騷之】 圉師夏庠馬【庠廡也廡所以庇馬者也 並夏官】 大行人夏宗以陳天下之謨【夏見諸侯則陳其謀之是非 秋官 以上夏】 大司馬中夏教

芟舍【芟舍草止之也軍有草止之法】遂以苗田【夏田為苗擇取不孕任者若治苗去不秀實 夏官】 馮相氏夏致日【夏至日在東井景尺五寸】

大司樂函鍾為宮夏日至於澤中之方丘奏之【詳見吉禮】 凡以神土者以夏日至致地示物彪【地物陰也陰氣升而祭地示物彪致物彪於壇壇蓋用祭地之明日百物之神曰彪 並春官】 山虞中夏斬陰木【陰木生山北者 地官】

柞氏夏日至令刊陽木而火之【生山南為陽木火之使其肄不生】

雉氏夏日至而夷之【夷之以鉤鎌迫地芟之也若今取茭矣 秋官 以上中夏】

宮正秋以木鐸修火禁庖人秋行犢膳膳膏腥【膏腥雞膏也】 獸人秋獻獸物

鼈人秋獻龜魚 凌人秋刷【刷清也秋涼冰不用可以清除其室】 掌皮掌秋斂皮 典婦功凡授嬪婦功及秋獻功辨其苦良比其小大而賈之物書而楬之【授當為受聲之誤也國中嬪婦所作成即送之不須獻功時賈之者物不正齊當以泉計通功鄭司農苦讀為鹽謂分別其縑帛與布紵之麤細皆比方其大小書其賈數而著其物若今時題署物並天官】

州長秋以禮會民而射於州序 黨正秋祭祭讀邦法 族師秋祭酺讀邦法【並地官】

大宗伯以嘗秋享先王

大胥秋頒學合聲【春使之學秋頒其才藝所為合聲亦等其曲折使應節奏並春官】

稟人秋獻成【矢箠春作秋成】 校人秋祭馬社臧僕【馬社始乘】

【馬者世本作曰相土作乘馬鄭司農云臧僕謂簡練馭者令皆善也玄謂僕馭五路之僕 並夏官】 雍氏秋令塞阱杜獲【秋而杜塞阱獲收刈之時謂其陷害人也】

雉氏秋繩而芟之【含實曰繩芟其繩則實不成熟】

大行人秋覲以比邦國之功【秋見諸侯則比其功之高下】

小行人令諸侯秋獻功【功考績之功也秋獻之若今計文書斷於九月其舊法並秋官 以上秋】 司裘中秋獻良裘王乃行羽物【良善也中秋鳥獸毛毼因其良時而用之鄭司農云良裘王所服也行羽物以羽物飛鳥賜羣吏玄謂良裘玉藻所謂黼裘與此羽物小鳥鶉雀之屬鷹所擊者中秋鳩化為鷹中春鷹化為鳩順其始殺與其將止而大班羽物天官】

籥章中秋夜迎寒亦如之【迎寒以夜求諸陰】

馮相氏秋致月【秋分日在角而月弦於牽牛 並春官】

大司馬中秋教治兵遂以獮田【秋田為獮獮殺也】 司弓矢中秋獻矢箠【矢箠成於堅 並夏官 以上中秋】

司裘季秋獻功裘以待頒賜【功裘人功微羶謂狐青羶裘之屬鄭司農云功裘卿大夫所服 天官】 司燿季秋內火民亦如之【鄭司農云九月本黃昏心星伏在戌上使民內火 夏官 以上季秋】 庖人冬行蠶羽膳膏羶【杜子春云鮮魚也羽鴈也膏羶羊脂也】

獸人冬獻狼【狼膏聚聚則溫】 掌皮冬斂革

染人春暴練夏纁玄秋染夏冬獻功【注見名器篇並天官】 大宗伯以烝冬享先王 男巫冬堂贈無方無算【冬歲終以禮送不祥及惡夢皆是也其行必由堂始巫與神通言當東則東當西則西可近則近可遠則遠無常數並春官】 校人冬祭馬步獻馬講馭夫【馬步神為災害馬者獻馬見成馬於王也馭夫馭貳車從車使車者講猶簡習】 圉師冬獻馬【並夏官】 大行人冬遇以協諸侯之慮【冬見諸侯則合其慮之異同 秋官 以上冬】 小司寇孟冬祀司民獻民數於王王拜受之以圖國用而進退之【司民星名謂軒轅角也小司寇於祀司民

而獻民數於王重民也進退猶損益也國用民衆則益民寡則損】司民以萬民之數詔司寇司寇及孟冬祀司民之日獻其數於王王拜受之登於天府內史司會冢宰貳之以贊王治【詳見政事上篇並秋官】籥章國祭蜡則歛豳頌擊土鼓以息老物【十二月建亥之月也求萬物而祭之者萬物助天成歲事至此為其老而勞乃祀而老息之於是國亦養老焉月令孟冬勞農以休息之是也豳頌亦七月也七月又有穫稻作酒躋彼公堂稱彼兕觥萬壽無疆之事是亦歌其類也謂之頌者以其言歲終人功之成春官】

羅氏蜡則作羅襦【詳見政事下篇夏官已上孟冬】大宰正月之吉始和布治於邦國都鄙乃縣治象之法於象魏使萬民觀治象挾日而斂之【正月周之正月吉謂朔日大宰以正月朔日布王治之事於天下至正歲又書而縣於象魏振木鐸以徇之使萬民觀焉小宰亦帥其屬而往皆所以重治法新王事也凡治有故言始和者若改造云爾鄭司農云象魏闕也故魯災季桓子御公立於象魏之外命藏象魏曰舊章不可忘從甲至甲謂之挾日凡十日天官】大司徒正月之吉始和布教於邦國都鄙乃縣教象之法於象魏使萬民觀教象挾日而斂之【正月之吉周正月朔日也司徒以布五教至正歲又書教法而縣焉】鄉大夫正月之吉受教法於司徒退而頒之於其鄉吏使各以教其所治以攷其德行察其道藝【其鄉吏州長以下】州長正月之吉各屬其州之民而讀法以攷其德行道藝而勸之以糾其過惡而戒之【屬猶合也聚也因聚衆而勸戒之者欲其善並地官】大司馬正月之吉始和布政於邦國都鄙乃縣政象之法於象魏使萬民觀政象挾日而斂之【以正月朔日布王政於天下至正歲又縣政法之書挾日十日也夏官】大司寇正月之吉始和布刑於邦國都鄙乃縣刑象之法於象魏使萬民觀刑象挾日而斂之【正月朔日布五刑於天下正歲又縣其書重之】布憲正月之吉執旌節以宣布於四方而憲邦之刑禁以詰四方邦國及其都鄙達於四海【詳見刑辟並秋官】

大司馬中冬教大閱【大閱簡軍實】遂以狩田【冬田為狩言守取之無所擇也夏官】馮相氏冬致日【冬至日在牽牛景丈三尺】大司樂圜鍾為宮冬日至於地上之圜丘奏之【詳見吉禮】凡以神士者以冬至致天神人鬼【天人陽也陽氣升而祭鬼神致人鬼於祖廟蓋用祭天之明日並春官】山虞中冬斬陽木【陽木生山南者

地官】柞氏冬至至令剝陰木而水之【生山北為陰木水之使其肄不生】雒氏冬至至而耜之【耜之以耜側凍土剗之並秋官以上中冬】凌人正歲十有二月令斬冰三其凌【正歲季冬火星中大寒冰方盛之時春秋傳曰火星中而寒暑退凌冰室也三之者為消釋度也天官】天府季冬陳玉以貞來歲之惡【問事之正曰貞問歲之美惡謂問於龜大卜職大貞之屬陳玉陳禮神之玉凡卜筮實問於鬼神龜筮能出其卦兆之占耳龜有天地四方則玉有六器者與言陳者既事藏之不必貍之也鄭司農云貞問也易曰師貞丈人吉問於丈人國語曰貞於陽卜】

占夢季冬聘王夢獻吉夢於王王拜而受之乃舍萌於四方以贈惡夢【注見卜筮篇春官】遂令始難疫【令令方相氏也難謂難兵以有難卻也注詳見吉禮百神篇春官以上季冬】太宰歲終則令百官府各正其治受其會【正正處也會大計也】

聽其致事而詔王廢置【平其事來至者之功狀而奏白王】

小宰歲終則令羣吏致事【使齊歲盡文書來至若今上計】

宰夫歲終則令羣吏正歲會【歲終自周季冬正猶定也】

宮正歲終則會其行事【行事吏事也】 宮伯歲終則均叙
膳夫歲終則會【其頒賜諸臣則計之】 庖

人歲終則會 醫師歲終則稽其醫事以制其食【食祿也】 酒正歲終則會以酒式誅賞【誅
賞作酒之善惡者】 大府歲終

則以貨賄之入出會之 外府歲終則會 職幣歲終則會其出 司裘歲終則會 掌皮歲終則會
其財賚【財斂財本數及餘見者賚所給予人以物曰賚令時詔書或曰賚計吏鄭司農云賚
或為資】 內宰歲終則會內人之稍食稽其功事【內人主謂九御】

典絲歲終則各以其物會之【種別為計鄭司農云各以其所飾之物計會傳著之】

典枲歲終則各以其物會之【並天官】 大司徒歲終則令教官正治而致事【歲終自周季
冬也教官其屬六十正治明處其文書致事上其計簿】

小司徒歲終則攷其屬官之治成而誅賞【治成治事之計】 令羣吏正要會而致事

鄉師歲終則攷六鄉之治以詔廢置 鄉大夫歲終則令六鄉之吏皆會政致事【會計也致事
言其歲盡文書】 州長歲終則會其州之政令 黨正歲終則會其黨

政帥其吏而致事 族師歲終則會政致事

泉府歲終則會其出入而納其餘【會計也納入也入餘於職幣】 遂大夫令為邑者歲終則
會政致事【不言其遂之吏而言為邑者容公邑及公卿大夫王子弟之采邑政令戒禁遂大
夫亦施焉】 鄙師歲終則會其鄙之政而致事【並地官】

眡祲歲終則弊其事【弊斷也謂計其吉凶然否多少 春官】 小司寇歲終則令羣士計獄弊
訟登中於天府【上其所斷獄訟之數】 士師歲終則令正要會【定計簿 並秋官

以上歲終】 太史閏月

詔王居門終月【門謂路寢門也鄭司農云月令十二月分在青陽明堂總章玄堂左右之位
唯閏月無所居居於門故於文王在門謂之閏 春官 此條閏月】

禮書綱目卷五十四

卷五十五

欽定四庫全書

禮書綱目卷五十五 婺源江永撰

月令【附呂氏春秋十二月紀淮南子時則訓通典唐月令】通禮四

補【鄭目錄云名曰月令者以其記十二月政之所行也本呂氏春秋十二月紀之首章也以禮家好事抄合之後人因題之名曰禮記言周公所作其中官名時事多不合周法此於別錄屬明堂陰陽記】

孟春之月日在營室昏參中旦尾中【孟長也日月之行一歲十二會聖王因其會而分之以為大數焉觀斗所建命其四時此云孟春者日月會於娵訾而斗建寅之辰也凡記昏明中星者為人君南面而聽天下視時候以授人事淮南子時則訓篇無日在營室字有招搖指寅字唐本作正月之節日在虛昏昴中曉心中斗建寅位之初】其日甲乙【乙之言軋也日之行春東從青道發生萬物月為之佐時萬物皆解孚甲自抽軋而出因以為日名焉乙不為月名者君統臣功也淮此上有其位東方下有盛德在木字】其帝大皞其神句芒【此蒼精之君木官之臣自古以來著德立功者也大皞宓戲氏句芒少皞氏之子曰重為木官淮無此二句】其蟲鱗【象物孚甲將解鱗龍蛇之屬】其音角【謂樂器之聲也三分羽益一以生角角數六十四屬木者以其清濁中民象也春氣和則角聲調樂記曰角亂則憂其民怨几聲尊卑取象五行數多者濁數少者清大不過宮細不過羽】律中大簇【律候氣之管以銅為之中猶應也孟春氣至則大簇之律應應謂吹灰也大簇者林鍾之所生三分益一律長八寸凡律空圍九分周語曰大簇所以金奏贊陽出滯】其數八【數者五行佐天地生物成物之次也易曰天一地二天三地四天五地六天七地八天九地十而五行自水始火次之木次之金次之土為後木生數三成數八但言八者舉其成數唐此下有其性仁其事貌字】其味酸其臭羶【木之味臭也凡酸羶者皆屬焉】其祀戶祭先脾【春陽氣出祀之於戶內陽也祀之先祭脾者春為陽中於藏直脾脾為尊凡祭五祀於廟用特牲有主有尸皆先設席於奧祀戶之禮南面設主於戶內之西乃制脾及腎為俎奠於主北又設盛於俎西祭黍稷祭肉祭醴皆三祭肉脾一腎再既祭徹之更陳鼎俎設饌於筵前迎尸略如祭宗廟之儀】東風解凍蟄蟲始振魚上冰獺祭魚鴻鴈來【皆記時候也振動也夏小正正月啓蟄魚陟負冰漢始亦以驚蟄為正月中此時魚肥美獺將食之先以祭也鴈自南方來將北反其居今月令鴻皆為候呂氏春秋及淮鴻鴈來皆作候鴈北淮振下有蘇字上下有負字唐云立春之日東風解凍後五日蟄蟲始振後五日魚上冰仍以獺祭魚鴻鴈來兩句入後章】天子居青陽左个乘鸞路駕倉龍載青旂衣青衣服倉玉食麥與羊其器疏以達【皆所以順時氣也青陽左个大寢東堂北偏鸞路有虞氏之車有鸞和之節而飾之以青取其名耳春言鸞冬夏言色互文馬八尺以上為龍凡所服玉謂冠飾及所佩者之衡璜也麥實有孚甲屬木羊火畜也時尚寒食之以安性也器疏者刻鏤之象物當貫土而出也凡此車馬衣服皆所取於殷時而有變焉非周制

也周禮朝祀戎獵車服各以其事不以四時為異又玉藻曰天子龍袞以祭玄端而朝日皮弁以日視朝與此皆殊 呂路作輅倉龍作蒼龍倉玉作青玉 淮此一節作天子衣青衣乘蒼龍服蒼玉建青旗食麥與羊服八風水饗柘燧火東宮御女青色衣青衣鼓琴瑟其兵矛其畜羊朝於青陽左个以出春令命相布德施惠行慶賞省徭賦 唐鸞作青路作輅倉並作蒼】是月也以立春先立春三日太史謁之天子曰某日立春盛德在木天子乃齋【太史禮官之屬掌正歲年以序事謁告也呂唐齊皆作齋 淮無是月至此一節唐無是月也以立春字太史下有以先立春三日字之作於】立春之日天子親帥三

公九卿諸侯大夫以迎春於東郊還反賞公卿諸侯大夫於朝【迎春祭倉帝靈威仰於東郊之兆也王居明堂禮曰出十五里迎歲蓋殷禮也周近郊五十里賞謂有功德者有以顯賜之也朝大寢門外 呂淮唐帥皆作率唐無三九字呂淮並無諸侯字淮迎春作迎歲于作於無還反至於朝一節呂唐反皆作乃】命相布德和令行慶施惠下及兆民【相謂三公相王之事也德謂善教也令謂時禁也慶謂休其善也惠謂恤其不足也天子曰兆民唐民作人篇內並同】慶賜遂行母有不當【遂猶達也言使當得者皆得得者無非其人呂唐母皆作無篇內並同 淮以命相至此一節屬上文】乃命太史守典奉法司天日月星辰之行宿離不貸母失經紀以初為常【典六典法八法也離讀如儷偶之儷宿儷謂其屬馮相氏保章氏掌天文者相與宿偶當審候伺不得過差也經紀謂天文進退度數 呂貸作忒 淮無乃命至此一節 唐云命太史司天歷候無之行字為常下又有是月也命有司祭風師是月也命有司釁龜筮占兆審卦吉凶下又別分一章云正月中氣日在危昏畢中曉尾中斗建寅位之中雨水之日獺祭魚復五日鴻鴈來後五日草木萌動天子乃命有司布農事舍東郊修封疆端徑術善相丘陵阪險原隰土地所宜五穀所殖以教導人必躬親之田事既飭先定準直農乃不惑】是月也天子乃以元日祈穀於上帝【謂以上辛郊祭天也春秋傳曰夫郊祀后稷以祈農事是故啟蟄而郊郊而後耕上帝大微之帝也 唐無是月也字】乃擇元辰天子親載耒耜措之于參保介之御間帥三公九卿諸侯大夫躬耕帝籍天子三推三公五推卿諸侯九推【元辰蓋郊後吉辰也耒耜之上曲也保介車右也置耒耜於車右與御者之間明已勸農非農者也人君之車必使勇士衣甲居右而參乘備非常也保猶衣也介甲也帝籍為天神借民力所治之田也 呂于參作參於帥作率帝籍作籍田侯下有大夫字 唐措作置無于參保介之御間字有車右字無三九字帥及帝籍同呂本】反執爵於大寢三公九卿諸侯大夫皆御命曰勞酒【既耕而宴飲以勞羣臣也大寢路寢御侍也 呂無大夫皆字 淮無是月至此一節 唐反作還執爵作讌飲于作於無三九字】是月也天氣下降地氣上騰天地和同【唐無此一節】草木萌動【此陽氣蒸達可耕之候也農書曰土長冒橛陳根可拔耕者急發 呂萌作繁】王命布農事命田舍東郊皆修封疆審端徑術【田謂田畯主農之官也舍東郊順時氣則居以命其事也封疆田首之分職術周禮作遂遂上有徑遂小溝也步道曰徑今尚書曰分命羲仲宅嵎夷也 呂王下無命字】善相丘陵阪險原隰土地所宜五穀所殖以教道民必躬親之【相視也】田事既飭先定準直農乃不惑【說所以命田舍東郊之意也準直謂封疆徑遂也夏小正曰農率均田 淮無是月至此一節 唐屬上文】是月也命樂正入學習舞【為仲春將釋菜 淮無此一節 唐無入學字】乃修祭典【重祭禮歲始省錄也淮作修除祠位】命祀山林川澤犧牲毋用牝【為傷妊之類 淮作幣禱鬼神犧牲用牝 唐山林川澤作岳鎮海瀆】禁止伐木【盛德所在淮無止字】毋覆巢毋殺孩蟲胎天飛鳥毋麝毋卵【為傷萌幼之類】

淮巢下無母字及孩蟲飛鳥字唐無母覆至飛鳥字】母聚大衆母置城郭【為妨農之始淮無大字及下母字】掩骼埋胔【為死氣逆生也骨枯曰骼肉腐曰胔 埋胔呂作霾骸淮作穢骸】是月也不可以稱兵稱兵必天殃【逆生氣 呂唐必下有有字】兵戎不起不可從我始【為客不利主人則可呂可下有以字】母變天之道【以陰政犯陽】母絕地之理【易剛柔之宜】母亂人之紀【仁之時而舉義事淮無是月至此一節】孟春行夏令則雨水不時【已之氣乘之也四月於消息為乾 呂淮雨水竝作風雨】草木蚤落【生日促 呂淮唐蚤竝作早篇內竝同呂落作槁】國時有恐【以火訛相驚 呂淮時作乃】行秋令則其民大疫【申之氣乘之也七月始殺 呂無其字】焱風暴雨摠至【正月宿值尾箕箕好風其氣逆也回風為焱 呂焱作疾摠作數淮唐焱作飄 淮摠作總】藜莠蓬蒿竝興【生氣亂惡物茂】行冬令則水潦為敗雪霜大摠首種不入【亥之氣乘之也舊說首種謂稷 淮雪作雨摠作雹種作稼句下有正月宮司空其樹楊】仲春之月日在奎昏弧中旦建星中【仲中也仲春者日月會於降婁而斗建卯之辰也弧在輿鬼南建星在斗上呂弧作孤 淮無日在奎字有招搖指卯字 唐作二月之節日在營室昏東井中曉箕中斗建卯位之初】律中夾鍾【夾鍾者夷則之所生三分益一律長七寸二千一百八十七分寸之千七十五仲春氣至則夾鍾之律應周語曰夾鍾出四隙之細 諸本上下竝與孟春文同今從唐本刪後放此】始雨水桃始華倉庚鳴鷹化為鳩【皆記時候也倉庚黃鸝也鳩布穀也漢始以雨水為二月節 呂始作李淮作桃李始華 唐無始雨水字作驚蟄之日桃始華後五日倉庚鳴後五日鷹化為鳩】天子居青陽大廟【青陽太廟東堂當大室 淮居作朝於】是月也安萌芽養幼少存諸孤【助生氣也淮以此一節屬下文】擇元日命民社【社后土也使民祀焉神其農業也祀社日用甲 淮唐皆以此屬下文】命有司省囹圄去桎梏毋肆掠止獄訟【順陽寬也省減也囹圄所以禁守繫者若今別獄矣桎梏今械也在手曰桎在足曰梏肆謂死刑暴尸也周禮曰肆之三日掠謂極治人 淮肆作答下有養幼小存孤獨以通句萌擇元日令民社十六字】是月也【唐此下有命樂正習舞上】

【丁釋奠於國學天子乃率公卿諸侯親往視之命有司上戊釋奠於太公廟是月也擇元日命人社又分此下別為一章云二月中氣日在奎昏東井中曉南斗中斗建卯位之中春分之日玄鳥至後五日雷乃發聲後五日始電是月也祀朝日於東郊天子獻羔開冰先薦寢廟是月也日夜分則同度量平權衡】玄鳥至至之日以大牢祠於高禩天子親往【玄鳥燕也燕以施生時來巢人堂宇而孚乳嫁娶之象也媒氏之官以為候高辛氏之世玄鳥遺卵蜃簡吞之而生契後王以為媒官嘉祥而立其祠焉變媒言禩神之也 呂祠作祀唐此上別有是月也字無下至字】后妃帥九嬪御【御謂從往侍祠周禮天子有夫人有嬪有世婦有女御獨云九嬪舉中言也 呂唐帥作率】乃禮天子所御帶以弓韉授以弓矢於高禩之前【天子所御謂今有娠者於祠大祝酌酒飲於高禩之庭以神惠顯之也帶以弓韉授以弓矢求男之祥也王居明堂禮曰帶以弓韉禮之禩下其子必得天材 淮無是月也至此節唐此下有是月也命有司祭馬祖九字】是月也日夜分雷乃發聲始電蟄蟲咸動啓戶始出【又記時候發猶出也 呂啓作開 淮乃作始無始電字動下有蘇字無啓戶始出字 唐以此一節屬上文無蟄蟲以下八字】先雷三日奮木鐸以命兆民曰雷將發聲有不戒其容止者生子不備必有凶災【主戒婦人有

娠者也容止猶動靜呂淮竝無木字將竝作且呂命下有於字淮奮作振命下有於字唐無此一節】日夜分則同度量鈞衡石角斗甬正權概【因晝夜等而平當平也同角正皆謂平之也丈尺曰度斗斛曰量三十斤曰鈞稱上曰衡百二十斤曰石甬今斛也稱錘曰權概平斗斛者呂甬作桶淮無日夜分則字有令官市字甬作稱正作端唐此一節屬上文】是月也耕者少舍乃修闔扇寢廟畢備【舍猶止也因蟄蟲啓戶耕事少閒而治門戶也用木曰闔用竹葦曰扇畢猶皆也凡廟前曰廟後曰寢淮無此一節】毋作大事以妨農之事【大事兵役之屬呂淮唐竝無之字呂淮事作功淮以此句屬下文】是月也毋竭川澤毋漉陂池毋焚山林【順陽養物也畜水曰陂穿地通水曰池淮無是月也字有毋作大事以妨農功八字】天子乃鮮羔開冰先薦寢廟【鮮當為獻聲之誤也獻羔謂祭司寒也祭司寒而出冰薦於宗廟乃後賦之春秋傳曰古者日在北陸而藏冰西陸朝覲而出之其藏冰也深山窮谷固陰沍寒於是乎取之其出之也朝之祿位賓食喪祭於是乎用之其藏之也黑牡秬黍以享司寒其出之也桃弧棘矢以除其災其出入也時食肉之祿冰皆與焉大夫命婦喪浴用冰祭寒而藏之獻羔而啓之公始用之火出而畢賦自命夫命婦至於老疾無不受冰呂鮮作獻淮無此一節唐屬上文】上丁命樂正習舞釋菜【樂正樂官之長也命習舞者順萬物始出地鼓舞也將舞必釋菜於先師以禮之夏小正曰丁亥萬舞入學】天子乃帥三公九卿諸侯大夫親往視之【順時達物也】仲丁又命樂正入學習樂【為季春將合樂也習樂者習歌與八音呂習作入釋作舍帥作率無大夫字仲作中淮無上丁以下至此一節唐入前章】是月也祀不用犧牲用圭璧更皮幣【為季春將選而合騰之也更猶易也當祀者告以玉帛而已】仲春行秋令則其國大水寒氣摠至【酉之氣乘之也八月宿直昴畢畢好雨淮摠作總】寇戎來征【金氣動也畢又為邊兵】行冬令則陽氣不勝麥乃不孰【子之氣乘之也十一月為大陰諸本孰皆作熟篇內皆同】民多相掠【陰姦衆也淮掠作殘】行夏令則國乃大旱煖氣早來【午之氣乘之也呂淮煖作煥淮國乃作其國】蟲螟為害【暑氣所生為災害也淮此下有二月官倉其樹杏】

季春之月日在胃昏七星中旦牽牛中【季少也季春者日月會於大梁而斗建辰之辰淮無日在胃字有招搖指辰字唐作三月之節日在婁昏柳中曉南斗中斗建辰位之初】律中姑洗【姑洗者南呂之所生也三分益一律長七寸九分才之一季春氣至則姑洗之律應國語曰姑洗所以修潔百物考神納賓諸本見仲春章】桐始華田鼠化為鴽虹始見萍始生【皆記時候也鴽鴽母蟬螻謂之虹萍萍也其大者曰蘋呂淮唐萍作萍唐云清明之日桐始華後五日田鼠化為鴽後五日虹始見又分萍始生入下章】天子居青陽右个【青陽右个東堂南偏諸本見仲春章】是月也天子乃薦鞠衣於先帝【為將蠶求福祥之助鞠衣黃桑之服先帝太皞之屬呂無乃字淮無此一節】命舟牧覆舟五覆五反乃告舟備具於天子焉【舟牧主舟之官也覆反舟者備傾側也呂淮皆無命字唐舟牧作有司淮告作言無舟備焉字】天子始乘舟薦鮪于寢廟【進時美物淮子下有乃字于作於】乃為麥祈實【於含秀求其成也不言所祈承寢廟可知唐無此句】是月也生氣方盛陽氣發泄句者畢出萌者盡達不可以內【時可宣出不可收斂也句屈生者芒而直曰萌呂句作芽】天子布德行惠命有司發倉廩賜貧窮振乏絕【振猶救也淮無布德行惠字倉作困廩作倉賜作助呂倉作窳】開府庫出幣帛周天下勉諸侯聘名士禮賢者【周謂給不足也勉猶勸也聘問也名士不仕者淮無周天下字勉作使唐分此下別

為一章云三月中氣日在胃昏張中曉南斗中斗建辰位之中穀雨之日萍始生後五日鳴鳩】

【拂其羽後五日戴勝降于桑】是月也命司空曰時雨將降下水上騰循行國邑周視原野修利隄防道達溝瀆開通道路毋有障塞【廣平曰原國也邑也平野也溝瀆與道路皆不得通所以除水潦便民事也古者溝上有路淮無是月也字道達作導通開通道路作達路除道無毋有障塞字有從國始至境止字 唐命司空作天】

【子命有司循作巡】田獵置罟羅罔畢翳餒獸之藥毋出九門【為鳥獸方孚乳傷之逆天時也獸罟曰罟罟鳥罟曰羅罔小而柄長謂之畢翳射者所以自隱也凡諸罟及毒藥禁其出九門明其常有時不得用耳天子九門者路門也應門也雉門也庫門也臯門也城門也近郊門也遠郊門也關門也今月令無罟翳為弋 呂罔作網呂淮獵下有畢弋字無畢翳字呂唐九竝作國淮罔作罟獸作毒】是月也命野虞母伐桑柘【愛蠶食也野虞謂主田及山林之官淮無是月也字命作乃禁 唐野虞作有司】鳴鳩拂其羽戴勝降于桑【蠶將生之候也鳴鳩飛且翼相擊趨農急也戴勝織紵之鳥是時常在桑言降者若時始自天來重之也淮拂作奮勝作鴛 唐屬上文】具曲植籩筐【時所以養蠶器也曲薄也植槌也 呂曲植籩作狹曲蒙淮作樸曲筥唐作乃修蠶器】后妃齊戒親東鄉躬桑禁婦女毋觀省婦使以勸蠶事【后妃親採桑示帥先天下也東鄉者鄉時氣也是明其不常留養蠶也留養者所卜夫人與世婦婦謂世婦及諸臣之妻也內宰職曰仲春詔后帥外內命婦治蠶於北郊女外內女子也夏小正曰妾子治蠶執養宮事毋觀去容飾也婦使縫線組紃之事 呂勸作力淮無親字躬作親無禁婦女毋觀字無以字 唐親東鄉躬桑作享先蠶而躬桑無禁婦女毋觀省婦使字】蠶事既登分繭稱絲効功以共郊廟之服無有敢惰【登成也敕往蠶者蠶畢將課功以勸戒之 呂惰作墮淮無此一節】是月也命工師令百工審五庫之量金鐵皮革筋角齒羽箭幹脂膠丹漆毋或不良【工師司空之屬官也五庫藏此諸物之舍也量謂物善惡之舊法也幹器之木也凡輶幹有當用脂良善也 呂淮或竝作有淮無是月也字命工師至之量作命五庫令百官審無齒羽字】百工咸理監工日號毋悖於時毋或作為淫巧以蕩上心【咸皆也於百工皆理治其事之時工師則監之日號令之戒之以此二事也悖猶逆也百工作器物各有時逆之則不善時者若弓人春液角夏治筋秋合三材冬定體之屬也淫巧謂偽飾不如法也蕩謂動之使生奢泰也今月令無于時作為為詐偽 呂為作偽呂唐于作於唐無或為字】是月之末擇吉日大合樂天子乃率三公九卿諸侯大夫親往視之【大合樂者所以助陽達物風化天下也其禮亡今天子以大射郡國以鄉射禮代之 淮無是月之末字唐之末作也淮擇下有下旬字樂下有致歡欣字無天子以下十六字唐屬下文】是月也乃合累牛騰馬遊牝於牧【累騰皆乘匹之名是月所合牛馬謂繫在廐者其牝欲遊則就牧之牡而合之 呂累作纍 淮無是月也累作纍】犧牲駒犢舉書其數【以在牧而校數書之明出時無他故至秋當錄內且以知其息之多少也 淮無此八字 唐此下云是月也擇吉日大合樂天子乃率公卿諸侯大夫親往視之】命國難九門磔攘以畢春氣【此難難陰氣也陰寒至此不止害將及人所以及人者陰氣右行此月之中日行歷昂昂有大陵積尸之氣氣佚則厲鬼隨而出行命方相氏帥百隸索室毆疫以逐之又磔牲以攘於四方之神所以畢止其災也王居明堂禮曰季春出疫于郊以攘春氣】

呂無命字國下有人字此下有行之是令甘雨至三旬呂淮唐難並作儼

淮命作令此下有行是月令甘雨至三旬唐命上有是月也字】季春行冬令則寒氣時發草木皆肅【丑之氣乘之也肅謂枝葉縮栗】國有大恐【以水訛相驚】行夏令則民多疾疫時雨不降【未之氣乘之也六月宿直鬼鬼為天尸時又有暑也】山陵不收【高者嘆於熱也淮收作登】行秋令則天多沈陰淫雨蚤降【戌之氣乘之也九月多陰淫霖也雨三日以上為霖今月令曰衆雨】兵革竝起【陰氣勝也淮此下有三月官鄉其樹李】

孟夏之月日在畢昏翼中旦婺女中【孟夏者月月會於實沈而斗建巳之辰呂作旦須女中淮無日在畢字有招搖指己字唐作四月之節日在昴昏翼中曉牽牛中斗建己位之初】其日丙丁【丙之言炳也日之行夏南從赤道長育萬物月為之佐時萬物皆炳然著見而強大又因以為日名焉易曰齊乎巽相見乎離淮此上有其位南方字下有盛德在火字唐丙作景】其帝炎帝其神祝融【此赤精之君火官之臣自古以來著德立功者也炎帝大庭氏也祝融顓頊氏之子曰黎為火官淮無此二句】其蟲羽【象物從風鼓葉飛鳥之屬】其音徵【三分宮去一以生徵徵數五十四屬火者以其微清事之象也夏氣和則徵聲調樂記曰徵亂則哀其事勤】律中中呂【孟夏氣至則中呂之律應中呂者無射之所生三分益一律長六寸萬九千六百八十三分寸之萬二千九百七十四周語曰中呂宣中氣

諸本中皆作仲】其數七【火生數二成數七但言七者亦舉其成數唐此下有其性禮其事視】其味苦其臭焦【火之臭味也凡苦焦者皆屬焉】其祀竈祭先肺【夏陽氣盛熱於外祀之於竈從熱類也祀之先祭肺者陽位在上肺亦在上肺為尊也竈在廟門外之東祀竈之禮先席於門之奧東面設主於竈陞乃制肺及心肝為俎奠于主西又設盛於俎南亦祭黍三祭肺心肝各一祭醴三亦既祭徹之更陳鼎俎設饌於筵前迎尸如祀戶之禮】螻蟈鳴蚯蚓出王瓜生苦菜秀【皆記時候也螻蟈蛙也王瓜葇挈也今月令云王萑生夏小正云王萑秀未聞孰是呂瓜作善淮矧作蟻唐云立夏之日螻蟈鳴後五日丘矧出後五日王瓜生而分苦菜秀入後章】天子居明堂左个乘朱路駕赤駟載赤旂衣朱衣服赤玉食菽與雞其器高以粗【明堂左个大寢南堂東偏也菽實孚甲堅合屬水雞木畜時熟食之亦以安性也粗猶大也器高大者象物盛長呂唐路作輅淮此一節作天子衣赤衣乘赤騮服赤玉建赤旗食菽與雞服八風水爨柶燧火南宮御女赤色衣赤采吹竽笙其兵戟其畜雞朝於明堂左个以出夏令唐雞作雉】是月也以立夏先立夏三日大史謁之天子曰某日立夏盛德在火天子乃齊【謁告也淮無是月也至此一節唐無是月也以立夏六字太史下云以先立夏三日謂於】立夏之日天子親帥三公九卿大夫以迎夏於南郊還反行賞封諸侯慶賜遂行無不欣說【迎夏祭赤帝赤熛怒於南郊之兆也不言帥諸侯而云封諸侯諸侯時或無在京師者空其文也祭統曰古者於禘也發爵賜服順陽義也於嘗也出田邑發秋政順陰義也今此行賞可也而封諸侯則違於古封諸侯出土地之事於時未可似失之諸本帥竝作率反竝作乃呂無行及諸字淮迎夏作迎歲行賞作賞賜無慶賜以下八字

唐無三九字賞下無封字有公卿字侯下有大夫於朝字】乃命樂師習合禮樂【為將飲酎

淮作修禮樂饗左右唐以此一節屬下文】命太尉贊桀俊遂賢良舉長大【助長氣也贊猶出也桀俊能者也遂猶進也三王之官有司馬無太尉秦官則有大尉今俗人皆云周公作月令未通於古呂尉作封淮遂作選長大作孝弟唐太尉作相桀作傑朱子曰後章養壯俊字當屬此長大之下蓋簡錯也】行爵出祿必當其位【使順之也淮必當其位作佐天長養唐此下有是月也命樂正習盛樂大雩帝命有司禱祀山川百辟卿士有益於人者以祈穀實是

月也命有司祀雨師又別分一章云四月中氣日在畢昏軫中曉須女中斗建巳位之中小滿之日苦菜秀後五日靡草死後五日小暑至挺重囚出輕繫】是月也繼長增高【謂草木盛蕃廡淮無是月也長作修】母有壞墮【亦為逆時氣
呂淮墮作隳】母起土功母發大衆【為妨蠶農之事
淮起作興無母發大衆字】母伐大樹【亦為逆時氣】是月也天子始絺【初服暑服
淮無此一節 唐作天子初衣暑服】命野虞出行田原為天子勞農勸民毋或失時【重敕之
呂無為天子字淮唐同 淮命作令無出字勞農勸民作勸農事無毋或失時字 唐野虞出作有
司巡勸民作勉人】命司徒巡行縣鄙命農勉作母休於都【急趨於農也縣鄙鄉遂之屬主
民者也王居明堂禮曰母宿於國今月令休為伏 呂巡作循 淮唐竝無此一節】是月也驅獸
毋害五穀【淮無是月也字獸下有畜字母害亦作勿令害】毋大田獵【為傷蕃廡之氣淮
無此句】農乃登麥天子乃以彘嘗麥先薦寢廟【登進也麥之新氣尤盛以彘食之散其熱
也彘水畜呂登作升 淮無農乃登麥一句無乃字
唐嘗麥下有羞以含桃字】是月也聚畜百藥【蕃廡之時毒氣盛 呂畜作蓄 淮無是月也字
唐以屬下章】靡草死麥秋至斷薄刑決小罪【舊說云靡草薺葶藶之屬祭統曰草艾則墨
謂立秋後也刑無輕於墨者今以純陽之月斷刑決罪與母有壞墮自相違似非
呂靡作糜無決小罪一句 淮無斷薄刑決小罪二句 唐已見上文】出輕繫【崇寬
呂淮竝無此句 唐已見上文】蠶事畢后妃獻繭乃收繭稅以桑為均貴賤長幼如一以給郊
廟之服【后妃獻繭者內命婦獻繭於后妃收繭稅者收於外命婦外命婦雖就公桑蠶室而
蠶其夫亦當有祭服以助祭收以近郊之稅耳貴賤長幼如一國服同
呂無蠶事畢字長幼作少長之下有祭字 淮無此一節 唐作是月也蠶事既登】是月也天子
飲酎用禮樂【酎之言醇也謂重釀之酒也春酒至此始成與羣臣以禮樂飲之於朝正尊卑
也孟冬云大飲烝此言用禮樂互其文 呂無用禮樂字有行之是令甘雨至三句字 淮無此一
節】孟夏行秋令則苦雨數來五穀不滋【申之氣乘之也苦雨白露之類時物得雨傷】四
鄙入保【金氣為害也鄙界上邑小城曰保 淮鄙作鄰】行冬令則草木蚤枯【長日促】後
乃大水敗其城郭【亥之氣乘之也淮敗作壞】行春令則蝗蟲為災暴風來格【寅之氣乘
之也必以蝗蟲為災者寅有啓蟄之氣行於初暑則當蟄者大出矣格至也
呂淮災作敗】秀草不實【氣更生之不得成也 淮此下有四月官田其樹桃】
仲夏之月日在東井昏亢中旦危中【仲夏者日月會於鶉首而斗建午之辰也
淮無日在東井字有招搖指午字 唐作五月之節日在參昏角中曉危中斗建午位之初】律
中蕤賓【蕤賓者應鍾之所生三分益一律長六寸八十一分寸之二十六仲夏氣至則蕤賓
之律應周語曰蕤賓所以安靜神人獻酬交錯 諸本上下與孟夏同今從唐本】小暑至【唐
已見上章】螳螂生鵙始鳴反舌無聲【皆記時侯也螳螂鵙蛸母也鵙伯勞也反舌百舌鳥
唐作芒種之日螳螂生後五日鵙始鳴後五日反舌無聲】天子居明堂大廟【明堂大廟南
堂當大室也諸本下與孟夏文同今從唐本刪】養壯佼【助長氣也 朱子曰此句當屬上章
舉長大之下】是月也命樂師修鞀鞀鼓均琴瑟管簫執干戚戈羽調竽笙笛箏箏鐘磬祝敔
【為將大雩帝習樂也修均執調飭者治其器物習其事之言 呂笛箏作埙箏
呂淮無是月也及鼓字鞀字作鞀無均字執干戚戈羽在鐘磬下無笙箏字笛作箏無祝敔字
唐無此一節】命有司為民祈祀山川百源大雩帝用盛樂乃命百縣雩祀百辟卿士有益於
民者以祈穀實【陽氣盛而常旱山川百源能興雲雨者也衆水始所出為百源必先祭其本

乃雩雩吁嗟求雨之祭也雩帝謂為壇南郊之旁雩五精之帝配以先帝也自鞞鞞至祝敵皆作曰盛樂凡他雩用歌舞而已百辟卿士古者上公若句龍后稷之類也春秋傳曰龍見而雩雩之正當以四月凡周之秋三月之中而旱亦修雩禮以求雨因著正雩此月失之矣天子雩上帝諸侯以下雩上公周冬及春夏雖旱禮有禱無雩 呂淮源作原呂縣雩下有祭字淮無乃命百縣以下 唐已見上章】農乃登黍【登進也 淮唐無此句】是月也天子乃以雛嘗黍羞以含桃先薦寢廟【此嘗雛也而云嘗黍不以牲主穀也必以黍者黍火穀氣之主也含桃櫻桃也 呂雛作雞 淮無是月也雛作雉 唐無此一節】令民毋艾藍以染【為傷長氣也此月藍始可別夏小正曰五月啓灌藍蓼 淮令作禁】毋燒灰【為傷火氣也火之氣於是為盛火之滅者為灰 呂灰作炭】毋暴布【不以陰功干太陽之事 唐無此一節】門閭毋閉關市毋索【順陽敷縱不難物】挺重囚益其食【挺猶寬也 淮此下有存孤寡振死事六字唐門上有是月也字又以挺重囚入上章而無益其食三字】游牝別羣【孕妊之欲止也】則繫騰駒【為其北氣有餘相蹄齧也呂淮無則字繫作執】班馬政【馬政謂養馬之政教也庾人職曰掌十有二閑之政教以阜馬佚特教駢攻駒此之謂也呂政作正 唐此下云是月也聚蓄百藥又別分一章云五月中氣日在東井昏亢中曉營室中斗建午位之中夏至之日鹿角解後五日蝸始鳴後五日半夏生是月也祀皇地祇於方丘】是月也日長至陰陽爭死生分【爭者陽方盛陰欲起也分猶半也 呂日長至作長至日 淮無是月也字長作短】君子齊戒處必掩身毋躁【掩猶隱翳也躁猶動也今月令毋躁為欲靜呂身下有欲靜字 淮無處必字掩作慎】止聲色毋或進【進猶御見也聲謂樂也易樂及春秋說夏至人主與羣臣從八能之士作樂五日今止之非其道也 淮止作節無毋或進字 朱子曰止聲色蓋亦處必掩身毋躁之義若以止樂言則拘矣月令之說固多有未安而此難以為非也注文蓋失其指矣】薄滋味毋致和【為其氣異此時傷人 淮無此句】節耆欲定心氣【微陰扶精不可散也 呂節作退呂唐耆欲作嗜慾 淮無此二句】百官靜事毋刑【罪罰之事不可以聞今月令刑為徑 淮刑作徑】以定晏陰之所成【晏安也陰稱安】鹿角解蟬始鳴半夏生木堇榮【又記時候也半夏藥草木堇王蒸也 唐上三句已見上文而無下一句此下有是月也命有司祭先牧九字】是月也毋用火南方【陽氣盛又用火於其方害微陰也 淮作禁民無發火】可以居高明可以遠眺望可以升山陵可以處臺榭【順陽在上也高明謂樓觀也閣者謂之臺有木者謂之榭 淮無下三可以字升作登】仲夏行冬令則雹凍傷穀【子之氣乘之也陽為雨陰起脅之凝為雹 呂淮凍作霰】道路不通暴兵來至【盜賊攻劫亦雹之類】行春令則五穀晚孰【卯之氣乘之也生日長 淮晚作不】百螽時起其國乃饑【螽蝗之屬言百者明衆類並為害 唐饑作虛】行秋令則草木零落【酉之氣乘之也八月宿值昂畢為天獄主殺】果實早成【生日短 淮早作蚤】民殃於疫【大陵之氣來為害也 淮此下有五月官相其樹榆】季夏之月日在柳昏火中旦奎中【季夏者日月會於鶉火而斗建未之辰也 淮無日在柳字有招搖指未字 呂淮作昏心中 唐作六月之節日在東井昏氐中曉東壁中斗建未位之初】律中林鐘【林鐘者黃鐘之所生三分去一律長六寸季夏氣至則林鐘之律應周語曰林鐘和展百物俾莫不任肅純恪 淮林作百高誘云百鐘者林鐘也諸本見仲夏章但淮云其位中央其日戊巳盛德在土其蟲羸其音宮律中百鐘其數五其味甘其臭香其祀中霽祭先心】溫風始至蟋蟀居壁鷹乃學習腐草為螢【皆記時候也鷹學習謂攫搏也夏

小正曰六月鷹始鷺蜚蟲熒火也

呂壁作字螢下有蜚字呂淮草下有化字淮字作輿螢作熒唐云小暑之日溫風至後五日蟋蟀居壁後五日鷹乃學習而以腐草為螢入下章】天子居明堂右个【明堂右个南堂西偏也諸本見仲夏章但淮云天子衣純黃乘黃騮服黃玉建黃旗食稷與牛服八風水饗柘燧火中宮御女黃色衣黃采其兵劔其畜牛朝于中宮】命漁師伐蛟取鼃登龜取鼃【四者甲類秋乃堅成周禮曰秋獻龜魚又曰凡取龜用秋時是夏之秋也作月令者以為此秋據周之時也周之八月夏之六月因書於此似誤也蛟言伐者以其有兵衛也龜言登者尊之也鼃鼃言取羞物賤也鼃皮又可以冒鼓今月令漁師為撈人

呂命上有是月也字命作令無登龜字淮師作人

唐屬後九月章】命澤人納材葦【蒲葦之屬此時柔又可取作器物也呂命上】

【有乃字澤作虞納作入淮命作令澤作滂唐無此一節】是月也命四監大合百縣之秩芻以養犧牲令民無不咸出其力【四監主山林川澤之官百縣鄉遂之屬地有山林川澤者也秩常也百縣給國養犧牲之芻多少有常民皆當出力為艾之今月令四為田呂淮命作令大下有夫字淮無令民以下八字】以共皇天上帝名山大川四方之神以祠宗廟社稷之靈以為民祈福【牲以供祠神靈為民求福明使民艾芻是不虛取皇天北辰耀魄寶冬至所祭於圓丘也上帝大微五帝呂淮共作供淮無以祠之靈以字福下有行惠令弔死問疾存視長老行桴鬻厚席蓐以送萬物歸也二十二字唐無是月至此一節】是月也命婦官染采黼黻文章必以法故無或差貸【婦官染人也采五色呂無染字貸作忒

淮無是月也及必以以下八字唐婦官作有司采作綵】黑黃倉赤莫不質良無敢詐偽【質正也良善也所用染者當得真采正善也呂無作勿詐偽作偽詐呂唐倉竝作蒼淮黑作青倉作白赤作黑無無敢詐偽字】以給郊廟祭祀之服以為旗章以別貴賤等給之度【旗章旌旗及章識也呂唐給作級淮郊作宗無祭祀及以為旗章以下十二字而服下有必宣以明字唐此下別分一章云六月中氣日在柳昏尾中曉奎中斗建未位之中大暑之日腐草為螢後五日土潤溽暑後五日大雨時行】是月也樹木方盛乃命虞人入山行木毋有斬伐【為其未堅紉也呂命作令有作或淮無乃命至行木八字母有作勿敢

唐虞人作有司】不可以興土功不可以合諸侯不可以起兵動衆【土將用事氣欲靜

淮無不可以興土功字侯下有起土功字無不可以字起兵動衆作動衆興兵唐自是月也樹木至此屬下文】毋舉大事以搖養氣【大事興繇役以有為呂養作蕩下有於字】毋發令而待以妨神農之事也【發令而待謂出繇役之令以預驚民也民驚則心動是害土神之氣土神稱曰神農者以其主於稼穡呂待作干下有時字無也字】水潦盛昌神農將持功舉大事則有天殃【言土以受天雨澤安靜養物為功動之則致害也孝經說曰地順受澤謙虛開張含泉任萌滋物歸中呂無昌字下有命字持作循淮無毋舉大事至舉大事一節則作必唐與淮同并無則有天殃四字】是月也土潤溽暑【潤溽謂涂濕也

淮唐無是月也字餘已見上文諸本辱作溽】大雨時行【唐已見上文】燒薙行水利以殺草如以熱湯【薙謂迫地芟草也此謂欲稼萊地先薙其草草乾燒之至此月大雨流水潦畜於其中則草死不復生而地美可稼也薙人掌殺草職曰夏日至而薙之又曰如欲其化也則以水火變之淮無燒薙行水如以熱湯字唐燒上有乃字無如以熱湯字】可以糞田疇可以美土疆【土潤辱膏澤易行也糞美互文耳土疆強樂之地淮無兩可以字美作肥

呂此下有行之是令是月甘雨三至三旬二日唐此下有是月也樹木方盛乃命有司入山行水無有斬伐不可以興土功不可以合諸侯不可以起兵動衆】季夏行春令則穀實鮮落國多風欬【辰之氣乘之也未屬巽辰又在巽位二氣相亂為害諸本鮮皆作解淮無國字】民乃遷徙【象風轉移物也】行秋令則丘隰水潦【戌之氣乘之也九月宿值奎奎為溝瀆與此月大雨并而高下皆水】禾稼不孰【傷於水也呂禾稼作稼穡】乃多女災【含任之類敗也】行冬令則風寒不時【丑之氣乘之也呂風寒作寒氣】鷹隼蚤□【得疾癘之氣也呂唐竝作鷩淮作摯】四鄙入保【象鳥雀之走竄也都邑之城曰保

淮此下有六月官少內其樹梓】中央土【火休而盛德在土也】其日戊巳【戊之言茂也已之言起也日之行四時之間從黃道月為之佐至此萬物皆枝葉茂盛其含秀者抑屈而起故因以為日名焉】其帝黃帝其神后土【此黃精之君土官之臣自古以來著德立功者也黃帝軒轅氏也后土亦顓頊氏之子曰黎兼為土官】其蟲倮【象物露見不隱藏虎豹之屬恒淺毛呂倮作螺】其音宮【聲始於宮宮數八十一屬土者以其最濁君之象也季夏之氣和則宮聲調樂】

【記曰宮亂則荒其君驕】律中黃鐘之宮【黃鐘之宮最長也十二律轉相生五聲具終於六十焉季夏之氣至則黃鐘之宮應禮運曰五聲六律十二管還相為宮】其數五【土生數五成數十但言五者土以生為本唐此下有其性信其事思】其味甘其臭香【土之臭味也凡甘香者皆屬之】其祀中霤祭先心【中霤猶中室也土主中央而神在室古者複冗是以名室為霤云祀之先祭心者五臟之次心次肺至此心為尊也祀中霤之禮設主於牖下乃制心及肺肝為俎其祭肉心肺肝各一他皆如祀戶之禮唐此下有是月也祀黃帝於南郊】天子居大廟大室乘大路駕黃駟載黃旂衣黃衣服黃玉食稷與牛其器鬲以閼【大廟大室中央室也大路殷路也車如殷路之制而飾之以黃稷五穀之長牛土畜也器鬲者象土周帀於四時閼讀如紘紘謂中寬象土含物呂鬲作高閼作揜淮無此章文並見季夏章唐大路作黃路駟作龍】孟秋之月日在翼昏建星中旦畢中【孟秋者日月會於鶉尾而斗建】

【申之辰也呂之月下其有長日至四旬六日字建星作斗畢中下有則立秋字淮無日在翼字有招搖指申字建星亦作斗唐作七月之節日在張昏尾中曉婁中斗建申位之初】其日庚辛【庚之言更也辛之言新也日之行秋西從白道成熟萬物月為之佐萬物皆肅然改更秀實新成人因以為日名焉淮此上有其位西方字下有盛德在金字】其帝少皞其神蓐收【此白精之君金官之臣自古以來著德立功者也少皞金天氏蓐收少皞氏之子曰該為金官淮無此二句】其蟲毛【象物應涼氣而備寒狐貉之屬生旃毛也】其音商【三分徵益一以生商商數七十二屬金者以其濁次宮臣之象也秋氣和則商聲調樂記曰商亂則陂其官壞】律中夷則【孟秋氣至則夷則之律應夷則者大呂之所生也三分去一律長五寸七百二十九分寸之四百五十一周語曰夷則所以詠歌九則平民無二】其數九【金生數四成數九但言九者亦舉其成數唐此下有其性義其事言】其味辛其臭腥【金之臭味也凡辛腥者皆屬焉】其祀門祭先肝【秋陰氣出祀之於門外陰也祀之先祭肝者秋為陰中於藏直肝肝為尊也祀門之禮北面設主於門左樞乃制肝及肺心為俎奠於主南又設盛於俎東其他皆如祭竈之禮】涼風至白露降寒蟬鳴鷹乃祭鳥用始行戮【皆記時候也寒蟬寒蜩謂蜺也鷹祭鳥者將食之示有先也既祭之後不必盡食若人君行刑戮之而

已唐作立秋之日涼風至後五日白露降後五日寒蟬鳴以鷹乃祭鳥屬後章無用始行戮一句】天子居總章左个乘戎路駕白駱載白旂衣白衣服白玉食麻與犬其器廉以深【總章左个大寢西堂南偏戎路兵車也制如周革路而飾之以白白馬黑鬣曰駱麻實有文理属金犬金畜也器廉以深象金傷害物入藏淮此一節云天子衣白衣乘白輅服白玉建白旗食麻與犬服八風水爨柘燧火西宮御女白色衣白衣撞白鐘其兵戈其畜狗朝於總章左个以出秋令求不孝不悌戮暴傲悍而副之以助損氣唐戎路作白輅麻作酒犬作魚】是月也以立秋先立秋三日太史謁之天子曰某日立秋盛德在金天子乃齊【淮無是月至此一節唐無是月也以立秋字太史下有以先立秋三日字之作於】立秋之日天子親帥三公九卿諸侯大夫以迎秋於西郊還反賞軍帥武人於朝【迎秋者祭白帝白招拒於西郊之兆也軍帥諸將也武人謂環人之屬有勇力者諸本帥皆作率反作乃淮無諸侯字於作于唐無三九字】天子乃命將帥選士厲兵簡練桀俊專任有功以征不義【征之言正也伐也呂淮無乃字帥作率淮唐無天子字淮士作卒唐厲作勵桀作傑俊作雋】詰誅暴慢以明好惡順彼遠方【詰謂問其罪窮治之也順猶服也呂順作巡淮無以明好惡字遠作四唐此下別分一章云七月中氣日在張昏箕中曉昴中斗建申位之中處暑之日鷹乃祭鳥後五日天地始肅後五日禾乃登】是月也命有司修法制繕囹圄具桎梏

【呂繕作謹淮無是月也及其桎梏字唐此下有斷薄刑決小罪字】禁止姦慎罪邪務執【順秋氣政尚嚴淮無止罪字慎作塞無務搏執三字】命理瞻傷察創視折【理治獄官也有虞氏曰士】

【夏曰大理周曰大司寇創之淺者曰傷淮無此一節】審斷決獄訟必端平【端猶正也呂端作正淮無斷字獄下有平詞訟字無必端平字】戮有罪嚴斷刑【淮無此六字唐無】

【禁止至此三節】天地始肅不可以羸【肅嚴急之言也羸猶解也淮地作墜後並同】是月也農乃登穀天子嘗新先薦寢廟【黍稷之屬於是始孰呂淮登作升淮無也字乃作始唐月也下有築場圃字】命百官始收斂【順秋氣收斂物呂無收字】

【唐作是月也命有司納材葦】完隄防謹壅塞以備水潦【備者備八月也八月宿值畢畢好雨淮壅作障唐無此一節】修宮室坏墻垣補城郭【象秋收斂物當藏也淮作修城郭繕宮室無坏墻垣字呂坏作坏修上有是月也字無補城郭字】是月也母以

封諸侯立大官母以割地行大使出大幣【古者於嘗出田邑此其月也而禁封諸侯割地失其義呂淮無諸字呂以割地作割土地淮無母以割地字呂淮下有二句並作行重幣出大使呂此下有行之是令而涼風至三句淮此下有行是月令涼風至三句唐無此一節】孟秋行冬令則陰氣大勝【亥之氣乘之也】介蟲敗穀【介甲也甲蟲屬冬敗穀者稻蟹之屬】戎兵乃來【十月宿值營室營室之氣為害也營室主武士】行春令則其國乃旱【寅之氣乘之也雲雨以風除也】陽氣復還五穀無實【陽氣能生而不能成實呂復作後無作不】行夏令則國多火災【巳之氣乘之也淮作冬多

唐作其國】寒熱不節民多瘡疾【瘡疾寒熱所為也今月令瘡疾為厲疫

淮熱作暑此下有七月官庫其樹棟】

仲秋之月日在角昏牽牛中旦觜觿中【仲秋者日月會於壽星而斗建酉之辰也

淮無日在角字有招搖指酉字呂淮觿皆作雥唐作八月之節日在翼昏南斗中曉畢中斗建酉位之初】律中南呂【南呂者大簇之所生三分去一律長五寸三分寸之一仲秋氣至則南呂之律應周語曰南呂者贊陽秀物諸本上下與孟秋同今從唐本】盲風至鴻鴈來玄鳥歸羣鳥養羞【皆記時候也盲風疾風也玄鳥燕也歸謂去蟄也凡鳥隨陰陽者不以中國為居羞謂所食也夏小正曰九月丹鳥羞白鳥說曰丹鳥也者謂丹良也白鳥也者謂閏蚘也其謂之鳥者重其養者也有翼為鳥養也者不盡食也二者又異羣鳥丹良未聞孰是

呂淮盲作涼鴻作候淮養作翔無羞字唐作白露之日鴻鴈來後五日玄鳥歸後五日羣鳥養羞無盲風至三字】天子居總章大廟【總章大廟西堂當大室也淮居作朝于諸本孟秋同今從唐本】是月也養衰老授几杖行糜粥飲食【助老氣也行猶賜也淮以此一節屬下文】乃命司服飭衣裳文繡有恒制有大小度有長短【此謂祭服也文謂畫也祭服之制畫衣而繡裳呂恒作常】衣服有量必循其故【此謂朝燕及他服凡此為寒益至也詩云七月流火九月授衣於是作之可也】冠帶有常【因制衣服而作之也淮無乃命至此一節唐以屬季秋章】乃命有司申嚴百刑斬殺必當毋或枉撓枉撓不當反受其殃【申重也當謂值其罪諸本皆無乃字淮枉撓作決獄下有是月也養長老授几杖行糴鬻飲食唐命有上有是月也必當下有無留有罪仍以此一節屬後章】是月也乃命宰祝循行犧牲視全具案芻豢瞻肥瘠察物色必比類量大小視長短皆中度五者備當上帝其饗【於鳥獸肥充之時宜省羣牲也宰祝大宰大祝主祭祀之官也養牛羊曰芻犬豕曰豢五者謂所視也所案也所瞻也所察也所量也此皆得其正則上帝饗之上帝饗之而無神不饗也呂循作巡饗作享淮無是月也循視全具字瞻肥瘠作視肥癯全粹必作謂長短作少長皆作莫不無五者以下八字唐無乃字宰祝作有司】天子乃難以達秋氣【此難難陽氣也陽暑至此不衰害亦將及人所以及人者陽氣左行此月宿直昂畢昂畢亦得大陵積尸之氣氣佚則厲鬼亦隨而出行於是亦命方相氏帥百隸而難之王居明堂禮曰仲秋九門磔攘以發陳氣禦止疾疫諸本難作儼呂儼下有禦佐疾字達作通淮達作御唐天子上有是月也字此下有是月也命樂正習吹上丁釋奠於國學天子乃率公卿諸侯大夫親往視之是月也命有司上戊釋奠於太公廟是月也擇元日命人社此下又別分一章云八月中氣日在軫昏南斗中曉東井中斗建酉位之中秋分之日雷乃收聲後五日蟄蟲壞戶後五日水始涸是月也祝夕月于西郊是月也命有司享壽星於南郊】以犬嘗麻先薦寢朝【麻始孰也唐以此屬下文】是月也可以築城郭建都邑穿竇窖修囷倉【為民將入物當藏也穿竇窖者入地圓曰竇方曰窖王居明堂禮曰仲秋命庶民畢入于室曰時殺將至毋罹其災呂窖作窰

淮無也字】乃命有司趣民收斂務畜菜多積聚【始為禦冬之備呂畜作蓄淮無務字菜作采唐無是月至此二節】乃勸種麥毋或失時其有失時行罪無疑【麥者接絕續乏之穀尤重之呂其有作其或淮無乃字種下有宿字無毋或失時字其有作若或唐以此一節屬下文】是月也日夜分雷始收聲蟄蟲壞戶殺氣浸盛陽氣日衰水始涸【又記時候也雷始收聲在地中動內物也壞益也蟄蟲益戶謂稍小之也涸竭也此甫八月中氣雨未止而云水竭非也周語曰辰角見而雨畢天根見而水涸又曰雨畢而除道水涸而成梁辰角見九月本也天根見九月末也王居明堂禮曰季秋除道致梁以利農也

呂淮雷下有乃字無聲字呂坏作俯戶淮坏作培 唐以屬上文】日夜分則同度量平權衡正鈞石角斗甬【呂淮同作壹甬作齊斗作升淮無則字甬作稱唐無正鈞石角斗甬別有是月也命有司祭馬社天子嘗麻先薦寢廟命有司申嚴百刑斬殺必當無留有罪無或枉撓枉撓不當反受其殃是月也勸人種麥無或失時四十八字】是月也易關市來商旅納貨賄以便民事四方來集遠鄉皆至則財不匱上無乏用百事乃遂【易關市謂輕其稅使民利之商旅賈客也匱亦乏也遂猶成也 呂集作雜 淮無是月也及則字易作理賄作財呂淮納作入則財下有物字】凡舉大事毋逆大數必順其時慎因其類【事謂興土功合諸侯舉兵衆也季夏禁之孟秋始征伐此月築城郭季秋教田獵是以於中為之戒焉呂無大字大作天慎作乃此下有行之是令白露降三旬 淮無此一節 唐無是月以下至此一節】仲秋行春令則秋雨不降【卯之氣乘之也卯宿直房心心為大火】草木生榮【應陽動也】國乃有恐【以火訛相驚 呂淮乃有作有火】行夏令則其國乃旱蟄蟲不藏五穀復生【午之氣乘之也 呂無乃字 淮穀下有皆字】行冬令則風災數起收雷先行【子之氣乘之也北風殺物先猶蚤也冬至閉藏】草木蚤死【寒氣盛也 淮此下有八月官尉其樹柘】季秋之月日在房昏虛中旦柳中【季秋者日月會於大火而斗建戌之辰也 淮無日在房字有招搖指戌字 唐作九月之節日在角昏牽牛中曉東井中斗建戌位之初】律中無射【無射者夾鐘之所生三分去一律長四寸六千五百六十一分寸之六千五百二十四季秋氣至則無射之律應周語曰無射所以宣布喆人之令德示民軌儀諸本見仲秋章】鴻鴈來賓爵入大水為蛤鞠有黃華豺乃祭獸戮禽【皆記時候也來賓言其客止未去也大水海也戮猶殺也 呂淮鴻作候鞠作菊呂乃作則淮爵作雀 唐作寒露之日鴻鴈來賓後五日雀入大水為蛤後五日菊有黃華豺乃以下入後章】天子居總章右个【總章右个西堂北偏 淮居作朝于餘見中秋章】是月也申嚴號令【申重 淮唐是月也竝作命有司】命百官貴賤無不務內以會天地之藏無有宣出【內謂收斂入之也會猶聚也 呂淮無命字內作入 唐此月有是月也命有司伐蛟取鼃登龜取鼃又分此下別為一章云九月中氣日在氐昏須女中曉柳中斗建戌位之中霜降之日豺乃祭獸後五日草木黃落後五日蟄蟲咸俯】乃命冢宰農事備收【備猶盡也呂無乃字唐屬下文】舉五穀之要【定其租稅之簿呂穀作種】藏帝籍之收於神倉祇敬必飭【重粢盛之委也帝籍所耕千畝也藏祭祀之穀為神倉祇亦敬也 呂無之收字 淮無祇敬必飭字唐屬下文】是月也霜始降則百工休【寒而膠漆之作不堅好也 淮無則字】乃命有司曰寒氣總至民力不堪其皆入室【總猶猥卒唐總作摠此下有是月也命有司具飭衣裳文繡有恒衣服有量冠帶有常必循其故是月也天子嘗稻先】

【薦寢廟乃命有司農事備收舉五穀之要藏帝籍於神倉祇敬必飭是月也命有司合秩芻以養犧牲以供皇天上帝名山大川四方之神以祠宗廟社稷之靈為人祈福】上丁命樂正入學習吹【為將饗帝也春夏重舞秋冬重吹也 唐無上丁入學字】是月也大饗帝【言大饗者遍祭五帝也曲禮曰大饗不問卜謂此也 淮唐無是月也字唐帝下有於明堂字】嘗犧牲告備於天子【嘗者謂嘗羣神也天子親嘗帝使有司祭於羣神禮畢而告焉 淮無告備於天子 唐此上有命有司此下有是月也趣人收斂務畜菜十字】合諸侯制百縣為來歲受朔日與諸侯所稅於民輕重之法貢職之數以遠近土地所宜為度以給郊廟之事無有所私【秦以建亥之月為歲首於是歲終使諸侯及鄉遂

之官受此法焉合諸侯制者定其國家宮室車旗衣服禮儀也諸侯言合制百縣言受朔日互文也貢職謂所入天子凡周之法以正月和之正歲而縣於象魏淮職作賦地作墜無以給下十字唐無此一節】是月也天子乃教於田獵以習五戎班馬政【教於田獵因田獵之禮教民以戰法也五戎謂五兵弓矢殳矛戈戟也政謂齊其色度其力使同乘也校人職曰凡軍事物馬而頒之呂班作復無政字淮無天子班馬政字】命僕及七驪咸駕載旌旐授車以級整設於屏外【僕戎僕及御夫也七驪謂趣馬在為諸官駕稅者也既駕之又為之載旌旗司馬職曰仲秋教治兵如振旅之陳辨旗物之用王載太常諸侯載旂軍吏載旗師都載旛鄉遂載物郊野載旐百官載旟是也級等次也整正列也設陳也屏所田之地門外之蔽

呂旌作旐旐下有與字授作受

淮命下有火字載作戴旌作旌無旐字整作皆正】司徒搢扑北面誓之【誓衆以軍法也呂淮面作嚮以淮誓作贊】天子乃厲飾執弓挾矢以獵【厲飾謂戎服尚威武也今月令獵為射呂厲下有服厲字淮有服廣字呂淮挾作操呂獵作射】命主祠祭禽於四方【以所獲禽祀四方之神也司馬職曰羅弊致禽以祀祊呂于作於淮無于字

唐無是月也以下至此一節】是月也草木黃落乃伐薪為炭【伐木必因殺氣淮無也字

唐無是月也字草木黃落已見上文】蟄蟲咸俯在內皆墜其戶【墜為塗閉之辟殺氣

呂內作穴淮俯作俛無下六字唐上四字見上文亦無下六字】

乃趣獄刑毋留有罪【殺氣已至有罪者即決也呂趣作決唐無此一節】收祿秩之不當供養之不宜者【天地殺而萬物收藏可以去之也祿秩之不當恩所加增也供養之不宜欲所貪者熊蹯之屬非常食呂當下有者字供作共

淮此下有通路除道從境始至國而後已十二字

唐無此一節】是月也天子乃以犬嘗稻先薦寢廟【稻始熟也呂無以犬字淮稻作麻唐已見上文】季秋行夏命則其國大水冬藏殃敗民多飢【未之氣乘之也六月宿值東井氣多暑雨呂淮作窒】行冬令則國多盜賊邊境不寧土地分裂【丑之氣乘之也極陰為外邊境之象也大寒之時地隆拆也】行春令則煖風來至民氣解惰【辰之氣乘之也巽為風呂煖作煖惰作墮】師興不居【辰宿值角角主兵不居象風行不休止也

呂興不居作旅必興淮此下有九月官候其樹槐】

孟冬之月日在尾昏危中旦七星中【孟冬者日月會於析木之津而斗建亥之辰也

淮無日在尾字有招搖指亥字唐作十月之節日在房昏虛中曉張中斗建亥位之初】其日壬癸【壬之言任也癸之言揆也日之行冬北從黑道閉藏萬物月為之佐時萬物懷任於下揆然萌芽人因以為日名焉淮此上有其位北方字下有盛德在水字】其帝顓頊其神玄冥

【此黑精之君水官之臣自古以來著德立功者也顓頊高陽氏也玄冥少皞氏之子曰修曰熙為水官淮無此二句】其蟲介【介甲也象物閉藏地中龜鼈之屬】其音羽【三分商去一以生羽羽數四十八屬水者以為最清物之象也冬氣和則羽聲調樂記曰羽亂則危其財匱】律中應鐘【孟冬氣至則應鐘之律應應鐘者姑洗之所生三分去一律長四寸二十七分寸之二十周語曰應鐘均利器用俾應復】其數六【水生數一成數六但言六者亦舉其成數唐此下有其性智其事聽】其味鹹其臭朽【水之臭味也凡鹹朽者皆屬焉氣若有若無為朽淮朽作腐】其祀行祭先腎【冬陰盛寒於水祀之於行從辟除之類也祀之先祭腎者陰位在下腎亦在下腎為尊也行在廟門外之西為軼壤厚二寸廣五尺輪四尺祀行之禮北面設主於軼上乃制腎及脾為俎奠于主南又設盛於俎東祭肉腎一脾再其他皆如祀門

之禮

【淮行作井】水始冰地始凍雉入大水為蜃虹藏不見【皆記時候也大水淮也大蛤曰蜃唐作立冬之日水始冰後五日地始凍後五日野雞入大水為蜃而以下四字屬後章】天子居玄堂左个乘玄路駕鐵驪載玄旂衣黑衣服玄玉食黍與彘其器閔以奄【玄堂左个北堂西偏也鐵驪色如鐵黍秀舒散屬火寒時食之亦以安性也彘水畜也器閔而奄象物閉藏也今月令曰乘軫路似當為軫字之誤也呂奄作弇淮此一節作天子衣黑衣乘玄驪服玄玉建玄旗食黍與彘服八風水饗松燧火北宮御女黑色衣黑衣擊磬石其兵鍛其畜彘朝於玄堂右个以出冬令命有司修羣禁禁外徙閉門閭大搜客斷罰刑殺當罪阿上亂法者誅

諸本路皆作輅唐黑作玄彘作鴈】是月也以立冬先立冬三日大史謁之天子曰某日立冬盛德在水天子乃齊立冬之日天子親帥三公九卿大夫以迎冬於北郊還反賞死事恤孤寡【迎冬者祭黑帝叶光紀於北郊之兆也死事謂以國事死者若公叔禹人顏涿聚者也孤寡其妻子也有以惠賜之大功加賞呂無以字帥作率反作乃

淮無是月至乃齊一節冬於作歲于

唐無是月也以立冬字大史下有先立冬三字無三九字有諸侯字淮唐帥反字並同呂本】是月也命大史釁龜筮占兆審卦吉凶【筮蓍也占兆龜之繇文也周禮龜人上春釁龜謂建寅之月也秦以其歲首使大史釁龜筮與周異矣卦吉凶謂易也審省錄之而不釁筮筮短賤於兆也今月令曰釁祠祠衍字呂史作卜釁作禱祠呂淮筮作策無占兆字卦下有兆以察字淮無也字史作祝釁作禱祀下又有神位占字

唐以此一節屬孟春章】是察阿黨則罪無有掩蔽【阿黨謂治獄吏以私恩曲撓相為也呂是上有于字黨作上下有亂法者罪下有之字淮無此一節唐無是字蔽下有是月也可以築城郭造宮室穿竇窖修囷倉】是月也天子始裘【九月授衣至此可以加裘

淮是月也作于是唐此下有是月也祭神州地祇于北郊是月也命有司祭司寒是月也命有司祭司中司命司人司祿此下又別分為一章云十月中氣日在尾昏危中曉翼中斗建亥位之中】命有司曰天氣上騰地氣下降天地不通閉塞而成冬【使有司助閉藏之氣門戶可閉閉之窗牖可塞塞之呂無塞字淮無此一節唐云小雪之日虹藏不見後五日天氣上騰地氣下降後五日閉塞而成冬無天地不通字】命百官謹蓋藏【謂府庫囷倉有藏物

呂命作令唐百官作有司】命司徒循行積聚無有不斂【謂芻木薪蒸之屬

淮無循字及無有不斂字唐無命司徒字】坏城郭戒門閭修鍵閉慎管籥固封疆備邊境完要塞謹關梁塞溪徑【坏益也鍵牡閉牝也管籥搏鍵器也固封疆謂使有司循其溝樹及其衆庶之守法也要塞邊城要害處也梁橋橫也溪徑禽獸之道也今月令疆或為璽

呂坏作埒管作閔呂淮鍵作鍵疆作璽溪作蹊淮坏作脩戒作警備作修無梁字塞作絕唐無慎至疆六字及完要塞三字溪作蹊】飭喪紀辨衣裳審棺槨之薄厚塋丘壟之小大高卑厚薄之度貴賤之等級【此亦閉藏之具順時飭正之也辨衣裳謂襲斂尊卑所用也所用又有多少呂喪作哀淮無辨衣裳字槨下有衣衾字卑作庠度下云使貴賤尊卑各有等級】是月也命工師効功陳祭器案度程母或作為淫巧以蕩上心必功致為上【霜降而百工休至此物皆成也工師工官之長也効功錄見百工所作器物也主于祭器祭器尊也度謂制大小也程謂器所容也淫巧謂奢偽怪好也蕩謂搖動生其奢淫呂淮無命字呂唐無或為必字淮程作呈無母或至心必十一字功作堅】物勒工名以考其誠【勒刻也刻工姓名於其器以察其信知其不功致

淮無此一節】功有不當必行其罪以窮其情【功不當者取材美而器不堅也 呂功作工 淮云功事若慢作為淫巧必行其罪與唐皆無以窮其情四字】是月也大飲烝【十月農事畢天子諸侯與其羣臣飲酒於大學以正齒位謂之大飲別之于他其禮亡今天子以燕禮羣國以鄉飲酒禮代之烝為有牲體為俎也黨正職曰國索鬼神而祭祀則以禮屬民而飲酒于序以正齒位亦謂此時也詩云十月滌場朋酒斯饗曰殺羔羊躋彼公堂稱彼兕觥受福無疆是頌大飲之詩 呂淮烝作蒸】天子乃祈來年于天宗大割祠于公社及門閭臘先祖五祀【此周禮所謂蜡祭也天宗謂日月星辰也大割大殺羣牲割之也臘謂以田獵所得禽祭也五祀門戶中霤竈行也或言祈年或言大割或言臘互文 呂割下有牲字臘作饗禱

淮無乃字割作禱祠作祭無及門閭字臘作畢饗無五祀字

唐無此一節】勞農以休息之【黨正屬民飲酒正齒位是也 呂淮農下有夫字】天子乃命將帥講武習射御角力【為仲冬將大閱簡習之亦因營室主武事也凡田之禮唯狩最備夏小正十一月王狩呂帥作率習作肄 淮無天子乃字力下有勁字唐無此一節而有是月也易關市來征旅納貨賄以便人事四方來集遠鄉皆至則財不匱上無乏用百事乃遂】是月也乃命水虞漁師收水泉池澤之賦毋或敢侵削衆庶兆民以為天子取怨于下其有若此者行罪無赦【因盛德在水收其稅 淮無是月也及敢字削作平又無衆庶以下二十一字 唐水虞漁師作有司無泉池字或作令亦無衆庶字赦下有是月也乃命有司秬稻必齊麴蘖必時湛熾必絜水泉必香淘器必良火齊必得兼用六物酒官監之無有差貸四十字】孟冬行春令則凍閉不密地氣上泄【寅之氣乘之也呂淮上並作發】民多流亡【象蟄蟲動】行夏令則國多暴風方冬不寒蟄蟲復出【巳之氣乘之也立夏巽用事巽為風 淮無國字】行秋令則雪霜不時【申之氣乘之也】小兵時起土地侵削【申陰氣尚微申宿值參伐為兵 淮此下有十月官司馬其樹檀】

仲冬之月日在斗昏東辟中旦軫中【仲冬者日月會于星紀而斗建子之辰也呂辟作壁 淮無日在斗字有招搖指子字無東字 唐作十一月之節日左箕昏營室中曉軫中斗建子位之初】律中黃鍾【黃鍾者律之始也九寸仲冬氣至則黃鍾之律應周語曰黃鍾所以宣養六氣九德 諸本上下與孟冬同今從唐本】冰益壯地始坼鷦鷯不鳴虎始交【皆記時候也鷦鷯旦求旦之鳥也交猶合也 呂淮旦作鳴淮鷦鷯作鴉唐無冰益壯地始坼字作大雪之日鷦鷯不鳴後五日武始交後五日荔挺生】天子居玄堂大廟【玄堂大廟北堂當大室

諸本上下與孟冬同今從唐本】飭死事【飭軍事戰必有死志 呂淮唐並無此三字今按三字衍文當從唐本】命有司曰土事毋作慎毋發蓋毋發室屋及起大衆以固而閉地氣沮泄是謂發天地之房諸蟄則死民必疾疫又隨以喪命之曰暢月【而猶女也暢猶充也大陰用事尤重閉藏 呂無慎字蓋下有藏字無發室屋及字閉下有發蓋藏起大衆字沮作且必作多 淮無慎蓋字屋作居無以固至沮泄八字房作藏又作有喪下有急捕盜賊誅淫佚詐偽之又無之字暢作暢 唐無曰慎蓋字沮作且無命之曰暢月字】是月也命奄尹申宮令審門閭謹房室必重閉【奄尹主領奄豎之官也于周則為內宰掌治王之內政宮令譏出入及開閉之屬重閉外內閉也 淮無是月也字 唐奄尹作內宰】省婦事毋得淫雖有貴戚近習毋有不禁【省婦事所以靜陰類也淫為女工奢偽怪好物也貴戚謂姑姊妹之屬近習天子所親幸者 淮無毋得以下十三字 唐無省婦以下六字】乃命大酋秬稻必齊麴蘖必時湛熾必絜水泉必香陶器必良火齊必得兼用六物大酋監之毋有差貸【酒孰曰酋大酋者酒官之長也于周則為酒人秬稻必齊謂孰成也湛漬也熾炊也火齊生孰之調也物猶事也差貸謂失誤有

善有惡也古者穫稻而瀆米麴至春而為酒詩云十月穫稻為此春酒以介眉壽

呂熾作熾無兼用以下八字 唐此一節見前章】天子命有司祈祀四海大川名源淵澤井泉

【順其德盛之時祭之也今月令淵為深 呂淮子下有乃字呂源作原淮唐無祈字淮無源淵井泉字唐無天子字無淵澤字又分此下別為一章云十一月中氣日在南斗昏東壁中曉角中斗建子位之中冬至之日蚯蚓結後五日麋角解後五日水泉動是月也祀昊天上帝於圓丘】是月也農有不收藏積聚者馬牛畜獸有放佚者取之不詰【此收斂尤急之時人有取者不罪所以警懼其主也王居明堂禮曰孟冬之月命農畢積聚繫收牛馬呂淮馬牛作牛馬佚作失淮無上者字唐畜作禽佚作逸】山林藪澤有能取蔬食田獵禽獸者野虞教道之其有相侵奪者罪之不赦【務收斂野物也大澤曰藪草木之實為蔬食 諸本道皆作導呂淮蔬作疎淮無下者字唐野虞作有司此下有是月也命有司祭馬步是月也伐木取竹箭】是月也日短至陰陽爭諸生蕩【爭者陰方盛陽欲起也蕩謂物動將萌芽也 淮無諸生蕩字】君子齊戒處必掩身身欲寧去聲色禁耆欲安形性事欲靜以待陰陽之所定【寧安也聲謂樂也易及樂春秋說云冬至人主與羣臣從八能之士作樂五日此言去聲色又相反

諸本並無一身字耆皆作嗜 呂揅作弇

淮君子上有是月也字寧作靜欲作慾下又有寧身體字無事欲以下十字 唐欲靜作無躁】芸始生荔挺出蚯蚓結麋角解水泉動【又記時候也芸香草也荔挺馬薺也水泉動潤上行淮作荔挺出芸始生蚓作蟧

唐無芸始生三字餘見上文】日短至則伐木取竹箭【此其堅成之極時

淮無日短至三字伐下有樹字 唐已見上文】是月也可以罷官之無事去器之無用者【謂先時權所建作者也天地閉藏而萬物休可以去之

淮無以去字】塗闕庭門閭築圉圉此以助天地之閉藏也【順時氣也 呂淮此作所淮無藏也字唐無此一節】仲冬行夏令則其國乃旱【午之氣乘之也】氛霧冥冥【霜露之氣散相亂也呂氛作氣】雷乃發聲【震之動也午屬震】行秋令則天時雨汁瓜瓠不成【酉之氣乘之也酉宿直昴畢畢好雨雨汁者水雪雜下也子宿值虛危虛危內有瓜瓠淮天作其汁作水】國有大兵【兵亦畢之氣】行春令則蝗蟲為敗【當蟄者出卯之氣乘之也

呂淮並作蟲螟 唐作蟲蝗】水泉咸竭【大火為旱】民多疥癘【疥癘之病孚甲象也

呂淮疥作疾 淮此下有十一月官都尉其樹棗】

季冬之月日在婺女昏婁中旦氐中【季冬者日月會于玄枵而斗建丑之辰也 淮無日在婺女字有招搖指丑字唐作十二月之節日在南斗昏奎中曉亢中斗建丑位之初】律中大呂【大呂者蕤賓之所生也三】

【分益一律長八寸二百四十三分寸之百四季冬氣至則大呂之律應周語曰大呂助陽宣物 諸本見仲冬章】鴈北向鵲始巢雉雊雞乳【皆記時候也雉雊鳴也詩云雉之朝雊尚求其雌呂雉雊雞乳作乳雉雊 淮始作加雉雊雞乳作雉雊雞呼卵 唐云小寒之日鴈北鄉後五日鵲始巢後五日野雉始雊】天子居玄堂右个【玄堂右个北堂東偏 諸本見仲冬章 唐此下有命將帥講武習射御角力乃教田獵以習五戎班馬政命僕及七驪咸駕載旌旄授車以級整設於屏外有司搢扑北面以誓之天子乃厲飾執弓挾矢以獵命有司修祭禽之禮天子乃禋百神于南郊為來年祈福于天宗又分此下別為一章云十二月中氣日在須女昏婁中曉氐中斗建丑位之中大寒之日雞始乳後五日鶯鳥厲疾後五日水澤腹堅】命有司大難

旁磔出土牛以送寒氣【此難難陰氣也難陰始於此者陰氣右行此月之中日歷虛危虛危有墳墓四司之氣為厲鬼將隨強陰出害人也旁磔于四方之門磔攘也出猶作也作土牛者丑為牛牛可牽止也送猶畢也 諸本難作儺 淮無以送寒氣字

唐屬下文】征鳥厲疾【殺氣當極也征鳥題肩也齊人謂之擊征或名曰鷹仲春化為鳩 唐見上文】乃畢山川之祀及帝之大臣天之神祇【四時之功成于冬孟月祭其宗至此可以祭其佐也帝之大臣句芒之屬天之神祇司中司命風師雨師 呂畢下有行字天下有地字 淮唐無此一節】是月也命漁師始漁天子親往乃嘗魚先薦寢廟【天子必親往視漁明漁非常事重之也此時魚絜美淮無是月也字嘗作射淮唐無乃字唐漁師作有司】冰方盛水澤腹堅命取冰【腹厚也此月日在北陸冰堅厚之時也北陸謂虛也今月令無堅 呂淮腹作復唐水澤腹堅已見上文此但云命取而藏之】冰以入命告民出五種【冰既入而令田官告民出五種明大寒氣過農事將起也 淮無冰方至以入十三字又無告字

唐以作已】命農計耦耕事修耒耜具田器【耜者耒之金也廣五寸田器鉉耒之屬 命下作有司字 淮命作令 唐無事字此下又有命有司出土牛以示農耕之早晚】命樂師大合吹而罷【歲將終與族人大飲作樂于大寢以綴恩也言罷者此用禮樂於族人最盛後年若時乃復然也凡用樂必有禮用禮則有不用樂者王居明堂禮季冬命國為酒以合三族君子說小人樂唐以此一節屬下文】乃命四監收秩薪柴以共郊廟及百祀之

薪燎【四監主山林川澤之官也大者可析謂之薪小者合束謂之柴薪施炊爨柴以給燎春秋傳曰其父析薪今月令無及百祀之薪燎 呂淮共作供郊作寢淮無柴字唐以此一節屬下文】是月也日窮於次月窮於紀星回於天數將幾終【言日月星辰運行於此月皆周帀於故處也次舍也紀會也 呂回作迴 淮回作周無數將幾終字】歲且更始專而農民毋有所使【而猶女也言專一女農民之心令之豫有志於耕稼之事不可徭役徭役之則志散失業也 呂淮且作將呂而作于淮專作令而作靜唐而作其】天子乃與公卿大夫共飭國典論時令以待來歲之宜【飭國典者和六典之法也周禮以正月為之建寅而縣之今用此月則所因於夏殷也 呂無公字淮無共字來作嗣 唐此下有是月也合諸侯制百縣為來歲受朔日與諸侯所稅於人輕重之法貢職之數以遠近土宜為度以給郊廟之事無有所私】乃命大史次諸侯之列賦之犧牲以共皇天上帝社稷之饗【此所與諸侯共者也列國有大小也賦之犧牲大者出多小者出少饗獻也 諸本共並作供 淮饗作芻享唐大史作有司無皇天上帝社稷之享八字而有享祀二字】乃命同姓之邦共寢廟

之芻豢【此所與同姓共者也芻豢猶犧牲 呂淮邦作國共作供】命宰歷卿大夫至於庶民土田之數而賦犧牲以共山林名川之祀【此所與卿大夫庶民共者也歷猶次也卿大夫采地亦有大小其非采地以其邑之民多少賦之 呂命作令歷作磨賦下有之字共作供 淮無命宰歷三字卿下有土字無土田至犧牲以九字 唐無此一節】凡在天下九州之民者無不咸獻其力以共皇天上帝社稷寢廟山林名川之祀【民非神之福不生雖有其邦國采地此賦要由民出 呂此下有行之是令此謂一終二句二日 淮無此一節 唐無者字共作供 名川作川澤此下又有命樂正大合吹而罷乃命有司收秩薪柴以供郊廟及百祀之薪燎命有司大儺旁磔以送寒氣】季冬行秋令則白露早降介蟲為妖【戌之氣乘之也九月初尚有白露月中乃為霜丑為鼃蟹】四鄙入保【畏兵辟寒象呂鄙作鄰】行春令則胎夭多傷

【辰之氣乘之也天少長也此月物甫萌芽季春乃句者畢出萌者盡達胎天多傷者生氣早至不充其性 淮無多字】國多固疾【生不充性有久疾也】命之曰逆【衆害莫大于此】行夏令則水潦敗國時雪不降冰凍稍釋【未之氣乘之也季夏大雨時行淮此下有十二月官獄其樹櫟】

禮書綱目卷五十五

卷五十六

<經部,禮類,通禮之屬,禮書綱目

欽定四庫全書

禮書綱目卷五十六 婺源江永撰

制國 通禮五

補

昔黃帝方制天下立為萬國及少皞氏之衰其後制度無聞若顓頊之所建帝嚳受之創制九州雍荆豫梁徐冀青兗揚統領萬國至堯遭洪水而天下分絕使禹平水土還為九州如舊制【杜佑通典】禹敷土隨山刊木奠高山大川【敷分也分別土地以為九州也奠定也定高山大川以別州境也若兗之濟河青之海岱揚之淮海雍之黑水西河荆之荆衡徐之海岱淮豫之荆河梁之華陽黑水是也方洪水橫流不辨區域禹分九州之地隨山之勢相其便宜斬木通道以治之又定其山之高者與其川之大者以為之紀綱此三者禹治水之要也】冀州【冀州帝都之地三面距河兗河之西雍河之東豫河之北周禮職方河內曰冀州是也八州皆言疆界而冀不言者以餘州所至可見晁氏曰亦所以尊京師示王者無外之意】濟河惟兗州【兗州之域東南據濟西北距河】海岱惟青州【青州之域東北至海西南距岱岱泰山也】海岱及淮惟徐州【徐州之域東至海南至淮北至岱而西不言濟者岱之陽濟東為徐岱之北濟東為青言濟不足以辨故略之也爾雅濟東曰徐州者商無青并青于徐也周禮正東曰青州者周無徐并徐于青也】淮海惟揚州【揚州之域北至淮東南至於海】荆及衡陽惟荊州【荊州之域北距南條荆山南盡衡山之陽唐孔氏曰荊州以衡山之陽為至者蓋南方惟衡山為大以衡陽言之見其地不止此山而猶包其南也】荊河惟豫州【豫州之域西南至南條荆山北距大河】華陽黑水惟梁州【梁州之境東距華山之南西據黑水】黑水西河惟雍州【雍州之域西據黑水東距西河謂之西河者主冀都而言也禹貢】肇十有二州封十有二山濬川【肇始也十二州冀兗青徐荆揚豫梁雍幽并營也中古之地但為九州曰冀兗青徐荆揚豫梁雍禹治水作貢亦因其舊及舜即位以冀青地廣始分冀東恒山之地為并州其東北醫無閭之地為幽州又分青之東北遼東等處為營州而冀州止有河內之地今河東一路是也封表也封十二山者每州封表一山以為一州之鎮如職方氏言揚州其山鎮曰會稽之類濬川濬導十二州之川也然舜既分十有二州而至商時又但言九圍九有周禮職方氏亦止列為九州有揚荆豫青兗雍幽冀并而無徐梁營也則是為十二州蓋不甚久不知其自何時復合為九也舜典】兩河間曰冀州【自東河至西河】河南曰豫州【自南河至漢】河西曰雍州【自西河至黑水】漢南曰荊州【自漢南至衡山之陽】江南曰揚州【自江南至海】濟河間曰兗州【自河東至濟】濟東曰徐州【自濟東至海】燕曰幽州【自易水至北狄】齊曰營州【自岱東至海此蓋殷制爾雅】自恒山至於南河千

里而近【冀州域】自南河至於江千里而近【豫州域】自江至於衡山千里而遙【荊州域】自東河至於東海千里而遙【雍州域】自東河至於西河千里而近【亦冀州域】自西河至於流沙千里而遙【雍州域】西不盡流沙南不盡衡山東不盡東海北不盡恒山凡四海之內斷長補短方三千里【王制】職方氏掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九穀六畜之數要周知其利害【天下之圖如今司空輿地圖也鄭司農云東方曰夷南方曰蠻西方曰戎北方曰貉狄玄謂閩蠻之別也國語曰閩芋蠻矣四八七九五六周之所服國數也財用泉穀貨賄也利金錫竹箭之屬害神姦鑄鼎所象百物也爾雅曰九夷八蠻六戎五狄謂之四海】乃辨九州之國使同貫利【貫事也】東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸其穀宜稻【鎮名山安地德者也會稽在山陰大澤曰藪具區五湖在吳南浸可以為陂灌溉者錫鑛也箭篠也鳥獸孔雀鸞鵠犀象之屬故書箭為晉杜子春曰晉當為箭書亦或為箭】正南曰荊州其山鎮曰衡山其澤藪曰雲夢其川江漢其浸潁澨其利丹銀齒革其民一男二女其畜宜鳥獸其穀宜稻【衡山在湘南雲夢在華容潁出陽城宜屬豫州在此非也澨未聞齒象齒也革犀兕革也杜子春云澨讀當為人名澨之澨澨或為淮】河南曰豫州其山鎮曰華山其澤藪曰圃田其川滎雒其浸波澨其利林漆絲枲其民二男三女其畜宜六擾其穀宜五種【華山在華陰圃田在中牟滎兗水也出東垣入於河洸為滎滎在滎陽波讀為播禹貢曰滎播既都春秋傳曰楚子除道梁澨營軍臨隨則澨宜屬荊州在此非也林竹木也六擾馬牛羊豕犬雞五種黍稷菽麥稻】正東曰青州其山鎮曰沂山其澤藪曰望諸其川淮泗其浸沂沭其利蒲魚其民二男二女其畜宜雞狗其穀宜稻麥【沂山沂水所出也在蓋望諸明都也在睢陽流出東莞二男二女數等似誤也蓋當與兗州同二男三女鄭司農云淮或為睢沭或為洙】河東曰兗州其山鎮曰岱山其澤藪曰大野其川河沔其浸廬維其利蒲魚其民二男三女其畜宜六擾其穀宜四種【岱山在博大野在鉅野廬維當為雷雍字之誤也禹貢曰雷夏既澤雍沮會同雷夏在陽城四種黍稷稻麥】正西曰雍州其山鎮曰嶽山其澤藪曰弦蒲其川涇汭其浸渭洛其利玉石其民三男二女其畜宜牛馬其穀宜黍稷【嶽吳嶽也弦蒲在涇涇出涇陽汭在豳地詩大雅公劉曰芮鞠之即洛出懷德鄭司農云弦或為涇蒲或為浦】東北曰幽州其山鎮曰醫無閭其澤藪曰獫狁其川河沔其浸菑時其利魚鹽其民一男三女其畜宜四擾其穀宜三種【醫無閭在遼東獫狁在長廣菑出萊蕪時出般陽四擾馬牛羊豕三種黍稷稻杜子春讀獫為奚】河內曰冀州其山鎮曰霍山其澤藪曰揚紆其川漳其浸汾潞其利松柏其民五男三女其畜宜牛羊其穀宜黍稷【霍山在彘揚紆所在未聞漳出長子汾出汾陽潞出歸德】正北曰并州其山鎮曰恒山其澤藪曰昭餘祁其川虜池嘔夷其浸涑易其利布帛其民二男三女其畜宜五擾其穀宜五種【恒山在土曲陽昭餘祁在鄆虜池出鹵城嘔夷出平舒涑出廣昌易出故安五擾馬牛羊犬豕五種黍稷菽麥稻也凡九州及山鎮澤藪言曰者以其非一曰其大者耳此州界揚荊豫兗雍冀與禹貢略同青州則徐州地也幽并則青冀之北也無徐梁夏官】大司徒之職掌建邦之土地之圖與其人民之數以佐王安擾邦國【土地之圖若今司空郡國輿地圖】以天下土地之圖周知九州之地域廣輪之數辨其山林川澤丘陵墳衍原隰之名物【周猶徧也九州揚荊豫青兗雍幽冀并也輪從也積石曰山竹木曰林注瀆曰川水鍾曰澤土高曰丘大阜曰陵水崖曰墳下平曰衍高平曰原下濕曰隰名物者十等之名與所生之物】而辨其邦國都鄙之數制其畿疆而溝封之【千里曰畿疆猶界也春秋傳曰吾子疆理天下溝穿地為阻固也封起

土界也】以土會之法辨五地之物生一曰山林其動物宜毛物其植物宜阜物其民毛而方二曰川澤其動物宜鱗物其植物宜膏物其民黑而津三曰丘陵其動物宜羽物其植物宜覈物其民專而長四曰墳衍其動物宜介物其植物宜莢物其民皙而瘠五曰原隰其動物宜羸物其植物宜叢物其民豐肉而庠【會計也以上計貢稅之法因別此五者也毛物貂狐貉貉之屬縟毛者也鱗物魚龍之屬津潤也羽物翟雉之屬核物李桃之屬專園也介物龜鼈之屬水居陸生者莢物薺莢王棘之屬皙白也瘠也羸物虎豹貔□之屬淺毛者叢物萑葦之屬豐猶厚也庠猶短也杜子春讀生為性鄭司農云植物根生之屬阜物柞栗之屬今世間謂柞實為阜斗膏物謂楊柳之屬理致且白如膏玄謂膏當為橐字之誤也蓮莢之實有橐韜地官】

量人邦國之地與天下之涂數皆書而藏之【書地謂方圓山川之廣狹書涂謂支湊之遠近夏官】山師掌山林之名辨其物與其利害而頒之於邦國使致其珍異之物【山林之名與物若岱畎絲枲嶧陽孤桐矣利其中人用者害毒物及螫噬之蟲獸同上】川師掌川澤之名辨其物與其利害而頒之於邦國使致其珍異之物【川澤之物與名若泗濱浮磬淮夷蠙珠暨魚澤之萑蒲同上】邋師掌四方之地名辨其丘陵墳衍邋隰之名【地名謂東原大陸之屬】物之可以封邑者【物之謂相其土地可以居民立邑同上】土訓掌道地圖以詔地事【道說也說地圖九州形勢山川所宜告王以施其事也若云荆揚地宜稻幽并地宜麻】道地憲以辨地物而原其生以詔地求【地憲若瘴蠱然也辨其物者別其所有所無原其生有時也以此二者告王之求也地所無及物未生則不求也鄭司農云地憲地所生惡物害人者若虺蜮之屬地官】誦訓掌道方志以詔觀事【說四方所識久遠之事以告王觀博古所識若魯有大庭氏之庫穀之二陵】掌道方憲以詔辟忌以知地俗【方憲四方言語所惡也不辟其忌則其方以為苟於言語也知地俗博事也鄭司農云以詔辟忌不違其俗也曲禮曰君子行禮不求變俗同上】

右分土

惟王建國【建立也周公居攝而作六典之職謂之周禮營邑于土中七年致政成王以此禮授之使居維維邑治天下司徒職曰日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉】辨方正位【辨別也鄭司農云別四方正君臣之位君南面臣北面之屬玄謂考工匠人建國水地以縣置以縣視以景為規識日出之景與日入之景晝參諸日中之景夜考之極星以正朝夕是別四方召誥曰越三日戊申太保朝至於維維卜宅厥既得卜則經營越三日庚戌太保乃以庶殷攻位于維維汭越五日甲寅位成正位謂此定宮廟】體國經野【體猶分也經謂為之里數鄭司農云營國方九里國中九經九緯左祖右社面朝後市野則九夫為井四井為邑之屬是也】設官分職【鄭司農云置冢宰司徒宗伯司馬司寇司空各有所職而百事舉】以為民極【極中也令天下之人各得其中不失其所五官篇首同】大司徒以土圭之法測土深正日景以求地中日南則景短多暑日北則景長多寒日東則景夕多風日西則景朝多陰【土圭所以致四時日月之景也云測猶度也不知廣深故曰測故書求為救杜子春云當為求鄭司農云測土深謂南北東西之深也日南謂立表處大東近日也日北謂立表處大北遠日也景夕謂日昃景乃中立表處大東近日也景朝謂日未中而景中立表處大西遠日也玄謂晝漏半而置土圭表

陰陽審其南北景短于土圭謂之日南是地于日為近南也景長于土圭謂之日北是地于日為近北也東于土圭謂之日東是地于日為近東也西于土圭謂之日西是地于日為近西也如是則寒暑陰風偏而不和是未得其所求凡日景于地千里而差一寸】日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之【景尺有五寸者南戴日下萬五千里地與星辰四遊升降于三萬里之中是以半之得地之中也畿方千里取象於日一寸為正樹樹木溝上所以表助阻固也鄭司農云土圭之長尺有五寸以夏至之日立八尺之表其景適與土圭等謂之地中今潁州陽城地為然地官】封人為畿封而樹之【畿上有封若今時界矣同上】匠人建

國【立王國若邦國者】水地以縣【于四角立植而縣以水望其高下高下既定乃為位而平地】置以縣眡以景【故書或作弋杜子春云當為弋讀為杙玄謂古文臬假借字於所平之地中央樹八尺之臬以縣正之眡之以其景將以正四方也爾雅曰在牆者謂之杙在地者謂之臬】為規識日出之景與日入之景【日出日入之景其端則東西正也又為規以識之者為其難審也自日出而畫其景端以至日入既則為規測景兩端之內規之規之交乃審也度兩交之間中屈之以指臬則南北正】畫參諸日中之景夜考之極星以正朝夕【日中之景最短者也極星謂北辰考工記】匠人營國方九里旁三門【營謂丈尺其大小天子十二門通十二子】國中九經九緯經涂九軌【國中城內也經緯謂涂也經緯之涂皆容方九軌軌謂轍廣乘車六尺六寸旁加七寸凡八尺是謂轍廣九軌積七十二尺則此涂十一步也旁加七寸者輻內二寸半輻廣三寸半綆三分寸之二金轄之間三分寸之一】左祖右社面朝後市【王宮所居也祖宗廟面猶鄉也王宮當中經之涂也】市朝一夫【方各百步】夏后氏世室殷人重屋周人明堂【詳見名器下篇】室中度以几堂上度以筵宮中度以尋野度以步涂度以軌【周文者各因物宜為之數室中處謂四壁之內】王宮門阿之制五雉宮隅之制七雉城隅之制九雉【阿棟也宮隅城隅謂角浮思也雉長三丈高一尺度高以高度廣以廣】經涂九軌環涂七軌野涂五軌【度狹之差也故書環或作輶杜子春云當為環環涂謂環城之道同上】量人掌建國之法以分國為九州營國城郭營后宮量市朝道巷門渠【建立也立國有舊法式若匠人職云分國定天下之國分也后君也言君容王與諸侯夏官】內宰凡建國佐后立市【市朝者君所以建國也建國者必面朝後市王立朝而后立市陰陽相承之義天官】邑外謂之郊郊外謂之牧牧外謂之野野外謂之林林外謂之坰【邑國都也假令百里之國五十里之界界各十里也爾雅】

右建國武王既克商曰我南望三塗北望嶽鄙顧詹有河粵詹洛伊毋遠天室營周居於洛邑而後去【史記】惟二月既望越六日乙未王朝步自周則至於豐【日月相望謂之望既望十六日也乙未二十一日也周鎬京也去豐二十五里文武廟在焉成王至豐以宅洛之事告廟也】惟太保先周公相宅越若來三月惟丙午朏越三日戊申太保朝至於洛卜宅厥既得卜則經營【成王在豐使召公先周公行相視洛邑越若來古語辭言召公於豐迤邐而來也朏孟康曰日出也三日明生之名戊申三月五日也卜宅者用龜卜宅都之地既得吉卜則經營規度其城郭宗廟郊社朝市之位】越三日庚戌太保乃以庶殷攻位於洛汭越五日甲寅位成【庶殷殷之衆庶也用庶殷者意是時殷民已遷於洛故就役之也位成者左祖右社前

朝後市之位成也】若翼日乙卯周公朝至於洛則達觀於新邑營【周公至則徧觀新邑所經營之位】越三日丁巳用牲於郊牛二越翼日戊午乃社於新邑牛一羊一豕一【郊祭天地也故用二牛社祭用太牢禮也皆告以營洛之事】越七日甲子周公乃朝用書命庶殷侯甸男邦伯【書役書也春秋傳曰士彌牟營成周計丈數揣高低度厚薄仞溝洫物土方議遠邇量事期計徒庸慮材用書餼糧以令役於諸侯亦此意王氏曰邦伯者侯甸男服之邦伯也庶邦冢君咸在而獨命邦伯者公以書命邦伯而邦伯以公命命諸侯也】厥既命殷庶庶殷丕作【丕作者言皆趨事赴功也殷之頑民若未易役使者然召公率以攻位而位成周公用以書命而丕作殷民之難化者猶且如此則其悅以使民可知也 召誥】周公將致政乃作大邑成周於土中【王城也於天下土為中】城方千七百二十丈郭方七十里南繫於洛水北因於邽山以為天下之大湊【郭郭也繫因皆連接也湊會也】制郊甸方六百里國西土為方千里【西土岐周通為圻內】分以百縣縣有四郡郡有四鄙大縣城方王城三之一小縣立城方王城九之一【三三九分居其一】都鄙不過百室以便野事【耕桑之事】農居鄙得以庶士士居國家得以諸公大夫【居治也治鄙以農治國家以大夫】凡工賈胥市臣僕州里俾無交為【工賈百胥市人臣僕各異州里而居不相雜交也胥待也】乃設丘兆於南郊【設築壇城內郊南郭也】諸侯受命於周乃建大社於周中【受封也】乃位五宮太廟宗宮考宮路寢明堂【五宮宮府寺也太廟后稷二宮祖考廟也路寢王所居也明堂在國南者也】咸有四阿反坫重亢重郎常累復格升藻梲設移旅楹燹常畫【咸皆也廟四下曰阿反坫外向室也重亢累棟也重郎累屋也常累系也復格累之櫺也升藻梲畫梁柱也承屋曰移旅列也燹謂藻升之飾也言皆畫列柱為之也】內階玄階墀唐山廡【以黑石為墀唐中庭道墀謂為高之也山廡謂畫山雲】應門庫臺玄闔【門首皆有臺於庫門見之後可知也又以黑石為門限也 汲冢周書作雒解】惟三月哉生魄周公初基作新大邑於東國洛四方民大和會侯甸男邦采衛百工播民和見士於周周公咸勤乃洪大誥治【三月周公攝政七年之三月也始生魄十六日也百工百官也土說文曰事也詩曰勿土行枚蘇氏曰此洛誥之文當在周公拜手稽首之上 康誥】周公拜手稽首曰朕復子明辟【此下周公授使者告卜之辭也拜手稽首者史記周公遣使之禮也復如復逆之復成王命周公往營成周周公得卜復命于王也謂成王為子者親之也謂成王為明辟者尊之也周公相成王尊則君親則兄之子也明辟者明君之謂】王如弗敢及天基命定命予乃胤保大相東土其基作民明辟【凡有造基之而後成成之而後定基命所以成始也定命所以成終也言成王幼冲退託如不敢及知天之基命定命予乃繼太保而往大相洛邑其庶幾為王始作民明辟之地也洛邑在鎬京東故曰東土】予惟乙卯朝至於洛師我卜河朔黎水我乃卜澗水東瀍水西惟洛食我又卜瀍水東亦惟洛食佅來以圖及獻卜【乙卯即召誥之乙卯也洛師猶言京師也河朔黎水河北黎水交流之內也澗水東瀍水西王城也朝會之地瀍水東下都也處商民之地王城在澗瀍之間下都在瀍水之外其地皆近洛水故兩云惟洛食也食者史先定墨而灼龜之兆正食之墨也佅使也圖洛之地圖也獻卜獻其卜之兆辭也】王拜手稽首曰公不敢不敬天之休來相宅其作周匹休公既定宅佅來視予卜休恒吉我二人共貞公其以予萬億年敬天之休拜手稽首誨言【此王授使者復公之辭也王拜手稽首者成王尊異周公而重其禮也匹配也公不敢不敬天之休命來相宅為周匹休之地言卜洛以配周命于無窮也視示也示我以卜之休美而恒吉者也二人成王周公也貞猶當也十萬曰億言周公宅洛規模宏遠以我萬億年敬天休命故又拜手稽首以謝周公之誨言 洛誥】王來紹上帝自服於土中旦曰其

作大邑其自時配皇天毖祀於上下其自時中乂王厥有成命治民今休【洛邑天地之中故謂之土中王來洛邑繼天出治當自服行於土中是時洛邑告成成王始政故召公以自服土中為言又舉周公嘗言作此大邑自是可以對越上天可以饗答神祇可以宅中圖治成命者天之成命也成王而能紹上帝服土中則庶幾天有成命治民今即休美也 召誥】王使富辛與石張如晉請城成周【子朝之亂其餘黨多在王城敬王畏之徙都成周成周狹小故請城之】天子曰昔成王合諸侯城成周以為東都崇文德焉【作成周遷殷民以為京師之東都所以崇文王之德】今我欲徼福假靈於成王修成周之城俾成人無勤諸侯用寧螫賊遠屏晉之力也【螫賊喻災害】范獻子謂魏獻子曰與其成周不如城之魏獻子曰善使伯音對【伯音韓不信】曰天子有命敢不奉承以奔告於諸侯遲速衰序【衰差也序次也】於是焉在【在周所命】冬十一月晉魏舒韓不信如京師合諸侯之大夫於狄泉尋盟且令城成周【尋平丘盟】己丑士彌牟營成周計丈數【計所當城之丈數也】揣高卑【度高曰揣】度厚薄仞溝洫【度深曰仞】物土方議遠邇【物相也相取土之方面遠近之宜】量事期【如事幾時畢】計徒庸【知用幾人功】慮材用【知費幾材用】書餼糧【知用幾糧食】以令役於諸侯屬役賦丈【付所當城尺丈】書以授帥【帥諸侯之大夫】而效諸劉子【效致也】韓簡子臨之以為成命【臨履其事以命諸侯經所以不書魏舒 昭三十二年】定公元年春王正月庚寅栽【栽設板築】城三旬而畢乃歸諸侯之戍【左氏傳】

小司寇掌外朝之政以致萬民而詢焉二曰詢國遷【國遷謂徙都改邑也 秋官】大卜國大遷則貞龜【正龜於卜位也土喪禮曰卜人抱龜燋先奠龜西面是也又不親命龜亦太遷輕於大祭祀也 春官】

大史大遷國抱法以前【法司空營國之法也抱之以前當先王至知諸位處 同上】天府若遷寶則奉之【奉猶送也同上】

右遷國 盤庚既遷奠厥攸居乃正厥位綏爰有衆【盤庚既遷新邑定其所居正君臣上下之位慰勞臣民遷徙之勞以安有衆之情也

盤庚下】篤公劉匪居匪康廼場廼疆廼積廼倉廼裹餼

糧于橐于囊思戢用光弓矢斯張干戈戚揚爰方啟行【賦也篤厚也公劉后稷之曾孫也居安康寧也場疆田畔也積露積也餼食糧糗也無底曰橐有底曰囊輯和戚斧揚鉞方始也 舊說召康公以成王將蒞政當戒以民事故詠公劉之事以告之曰厚哉公劉之於民也其在西戎不敢寧居治其田疇實其倉廩既富且強於是裹其餼糧思以輯和其民人而光顯其國家然後以其弓矢斧鉞之備爰始啟行而遷都於豳焉蓋亦不出其封內也】篤公劉于胥斯原既庶既繁既順廼宣而無永嘆陟則在巘復降在原何以舟之維玉及瑤鞞琫容刀【賦也胥相也庶繁謂居之者衆也順安宣徧也言居之徧也無永歎得其所不思舊也巘山頂也舟帶也鞞刀鞘也琫刀上飾也容刀容飾之刀也或曰容刀如言容臭謂鞞琫之中容此刀耳 言公劉至豳欲相土以居而帶此劍佩以上下於山原也東萊呂氏曰以如是之佩服而親如是之勞苦斯其所以為厚於民也歟】篤公劉逝彼百泉瞻彼溇原廼陟南岡乃覲于京京師之野于時處處于時廬旅于時言言于時語語【賦也溇大觀見也京高丘也師衆也京師高丘而衆居也董氏曰所謂京師者蓋起於此其後世因以所都為京師也時是也處處居室也廬寄

也旅賓旅也直言曰言論難曰語 此章言營度邑居也自下觀之則往百泉而望廣原自上觀之則陟南岡而觀于京於是為之居室於是廬其賓旅於是言其所言於是語其所語無不於斯焉】篤公劉于京斯依蹢蹢濟濟俔筵俔几既登乃依乃造其曹執豕于牢酌之用匏食之飲之君之宗之【賦也依安也蹢蹢濟濟羣臣有威儀貌俔使也使人為之設筵几也登登筵也依依几也曹羣牧之處也以豕為穀用匏為爵儉以質也宗尊也主也嫡子孫主祭祀而族人尊之以為主也 此章言宮室既成而落之既以飲食勞其羣臣而又為之君為之宗焉東萊呂氏曰既饗燕而定經制以整屬其民上則皆統于君下則皆統於宗蓋古者建國立宗其事相須楚執戎蠻子而致邑立宗以誘其遺民即其事也】篤公劉既溥既長既景廼岡相其陰陽觀其流泉其軍三單度其隰原徹田為糧度其夕陽幽居允荒【賦也溥廣也言其芟夷墾辟土地既廣而且長也景考日景以正四方也岡登高以望也相視也陰陽向背寒暖之宜也流泉水泉灌溉之利也三單未詳徹通也一井之田九百畝八家皆私百畝同養公田耕則通力而作收則計畝而分也周之徹法自此始其後周公蓋因而修之耳山西曰夕陽允信也荒大也 此言辨土宜以授所徙之民定其軍賦與其税法又度山西之田以廣之而幽人之居於此益大矣】篤公劉于豳斯館涉渭為亂取厲取鍛止基乃理爰衆爰有夾其皇澗遡其過澗止旅廼密芮鞠之即【賦也館客舍也亂舟之截流橫渡者也厲砥鍛鐵止居基定也理疆理也衆人多也有財足也遡鄉也皇過二澗名芮水名出吳山西北東入涇周禮職方作芮鞠水外也 此章又總叙其始終言其始來未定居之時涉渭取材而為舟以來往取厲取鍛而成宮室既止基於此矣乃疆理其田野則日益繁庶富足其居有夾澗者有遡澗者其止居之衆日以益密乃復即芮鞠而居之而幽地以廣矣 大雅公劉】 古公亶父來朝走馬率西水滸至于岐下爰及姜女聿來胥宇【賦也朝早也走馬避狄難也滸水厓也漆沮之側也岐下岐山之下也姜女太王妃也胥相宇宅也】周原膴膴萑茶如飴爰始爰謀爰契我龜曰止曰時築室于茲【賦也周地名在岐山之南廣平曰原膴膴肥美貌萑烏頭也茶苦菜蓼屬也飴飴也契所以然火而灼龜者也儀禮所謂楚焯是也或曰以刀刻龜甲欲鑽之處也 言周原土地之美雖物之苦者亦甘於是大王始與幽人之從己者謀居之又契龜而卜之既得吉兆乃告其民曰可以止於是而築室矣或曰時謂土功之時也】廼慰廼止廼左廼右廼疆廼理廼宣廼畝自西徂東周爰執事【賦也慰安止居也左右東西列之也疆謂畫其大界理謂別其條理也宣布散而居也或曰導其溝洫也畝治其田疇也自西徂東自西水滸而徂東也周徧也言靡事不為也】乃召司空乃召司徒俾立室家其繩則直縮版以載作廟翼翼【賦也司空掌營國邑司徒掌徒役之事繩所以為直凡營度位處皆先以繩正之既正則束版而築也縮束也載上下相承也言以索束版投土築訖則升下而上以相承載也君子將營宮室宗廟為先廩庫為次居室為後翼翼嚴正也】揅之陳陳度之薨薨築之登登削屢馮馮百堵皆興磬鼓弗勝【賦也揅盛土於器也陳陳衆也度投土於版也薨薨衆聲也登登相應聲削屢牆成而削治重複也馮馮牆堅聲五版為堵興起也此言治宮室也磬鼓長一丈二尺以鼓役事弗勝者言其樂事勸功鼓不能止也】廼立皋門皋門有伉廼立應門應門將將廼立冢土戎醜攸行【賦也傳曰王之郭門曰皋門伉高貌王之正門曰應門將將嚴正也大王之時未有制度特作二門其名如此及周有天下遂尊以為天子之門而諸侯不得立焉冢土大社也亦大王所立而後因以為天子之制也戎醜大衆也起大事動大衆必有事乎社而後出謂之宜 大雅縣】 文王受命有此武功既伐于崇作邑于豐文王烝哉【賦也作邑徙都也豐即崇國之地在今鄠縣杜陵西南】築城伊瀋作豐伊匹匪棘其欲遙追來孝王后烝哉【賦也瀋城

溝也方十里為成成間有溝深廣各八尺匹稱棘急也王后亦指文王也言文王營豐邑之城因舊溝為限而築之其作邑居亦稱其城而不侈大皆非急成已之所欲也特追先人之志而來致其孝耳】鎬京辟廱自西自東自南自北無思不服皇王烝哉【賦也鎬京武王所營也在豐水東去豐邑二十五里張子曰周家自后稷居邠公劉居豳太王邑岐而文王則遷於豐至武王又居於鎬當是時民之歸者日衆其地有不能容不得不遷也此言武王徙居鎬京講學行禮而天下自服也】考卜維王宅是鎬京維龜正之武王成之武王烝哉【賦也考稽宅居正決也成之作邑居也大雅文王有聲】

周之東遷晉鄭焉依【幽王為犬戎所殺平王東徙晉文侯鄭武公左右王室故曰晉鄭焉依隱六年左氏傳】邾文公卜遷於繹【繹邾邑魯國鄒縣北有繹山】史曰利於民而不利於君邾子曰苟利於民孤之利也天生民而樹之君以利之也民既利矣孤必與焉左右曰命可長也君何弗為邾子曰命在養民死之短長時也民苟利矣遷也吉莫如之【左右以一人之命為言文公以百姓之命為主一人之命各有短長不可如何百姓之命乃傳世無窮故徙之】遂遷於繹五月邾文公卒君子曰知命【文十三年左氏傳】晉人謀去故絳【晉復命新田為絳故謂此故絳】諸大夫皆曰必居郇瑕氏之地【郇瑕古國名河東解縣西北有郇城】沃饒而近鹽【鹽塩也猗氏縣塩池是】國利君樂不可失也韓獻子曰不可郇瑕氏土薄水淺【土薄地下】其惡易覲【惡疾疢覲成也】易覲則民愁民愁則墊隘【墊隘羸困也】於是乎有沈溺重膂之疾【沈溺濕疾重膂足腫】不如新田【今平陽絳邑縣是】土厚水深居之不疾【高燥故】有汾澮以流其惡【汾水出太原經絳北西南入河澮水出平陽絳縣南西入汾惡垢穢】且民從教【無灾患】十世之利也夫山澤林鹽國之寶也國饒則民驕佚【財易致則民驕侈】近寶公室乃貧不可謂樂【近寶則民不務本】公說從之遷於新田【成六年左氏傳】

禮書綱目卷五十六

卷五十七

欽定四庫全書

禮書綱目卷五十七 婺源江永編

職官上 通禮六

補

郊子來朝叔孫昭子問焉曰少皞氏鳥名官何故也【少皞金天氏黃帝之子己姓之祖也問何故以鳥名官】郊子曰吾祖也我知之昔者黃帝氏以雲紀故為雲師而雲名【黃帝軒轅氏姬姓之祖也黃帝受命有雲瑞故以雲紀事百官師長皆以雲為名號縉雲氏蓋其一官也】炎帝氏以火紀故為火師而火名【炎帝神農氏姜姓之祖也亦有火瑞以火紀事名百官】共工氏以水紀故為水師而水名【共工氏以諸侯霸有九州者在神農前大皞後亦受水瑞以水名官】大皞氏以龍紀故為龍師而龍名【大皞伏羲氏風姓之祖也有龍瑞故以龍命官】我高祖少皞氏之立也鳳鳥適至故紀於鳥為鳥師而鳥名鳳鳥氏歷正也【鳳鳥知天時故以名歷正之官】玄鳥氏司分者也【玄鳥燕也以春分來秋分去】伯趙氏司至者也【伯趙伯勞也以夏至鳴冬至止】青鳥氏司啟者也【青鳥鶡鴒也以立春鳴立夏止】丹鳥氏司閉者也【丹鳥鷩雉也以立秋來立冬去入大水為蜃上四鳥皆歷正之屬官】祝鳩氏司徒也【祝鳩鷦鷯也鷦鷯孝故為司徒主教民】鵲鳩氏司馬也【鵲鳩王鳩也鷩而有別故為司馬主法制】鳴鳩氏司空也【鳴鳩鵲鳩也鳴鳩平均故為司空平水土】爽鳩氏司寇也【爽鳩鷹也鷩故為司寇主盜賊】鵲鳩氏司事也【鵲鳩鵲鳩也春來冬去故為司事】五鳩鳩民者也【鳩聚也治民生聚故以鳩為正】五雉為五工正【五雉雉有五種西方曰鷩雉東方曰鷦雉南方曰翟雉北方曰鷩雉伊洛之南曰翬雉】利器用正度量夷民者也【夷平也】九扈為九農正【扈有九種也春扈鵲鷩夏扈鷩玄秋扈鷩藍冬扈鷩黃棘扈鷩丹行扈鷩喈喈宵扈鷩鷩桑扈鷩脂老扈鷩鷩以九扈為九農之號各隨其宜以教民事】扈民無淫者也【扈止也止氏使不淫放】自顓頊以來不能紀遠乃紀於近為民師而命以民事則不能故也【顓頊氏代少皞氏德不能致遠瑞而以民事命官 昭十七年左氏傳】蔡墨曰有五行之官是謂五官實列受氏姓封為上公【爵上公】祀為貴神社稷五祀是尊是奉【五官之君長能修其業者死皆配食於五行之神為王者所尊奉】木正曰句芒【正官長也取木生句曲而有芒角也其祀重焉】火正曰祝融【祝融明貌其祀犁焉】金正曰蓐收【秋物權蓐而可收也其祀該焉】水正曰玄冥【水正而幽冥其祀修及熙焉】土正曰后土【土為羣物主故稱后也其祀句龍焉在家則祀中霤在野則為社 昭二十九年左氏傳】

右上古官 仲尼聞之見於郊子而學之【於是仲尼年二十八】既而告人曰吾聞之天子失官學在四夷猶信【失官官不修其職也傳言聖人無常師 昭十七年左氏傳】 蔡墨曰少皞

氏有四叔【少皞金天氏】曰重曰該曰修曰熙實能金木及水【能治其官】使重為句芒【木正】該為蓐收【金正】修及熙為玄冥【二子相代為水正】世不失職遂濟窮桑【窮桑少皞之號也四子能治其官使不失職濟成少皞之功死皆為民所祀窮桑地在魯北】顓頊氏有子曰犁為祝融【犁為火正】共工氏有子曰句龍為后土【共工在大皞後神農前以水名官者其子句龍能平水土故死而見祀】稷田正也【掌播殖也】有烈山氏之子曰柱為稷【烈山氏神農世諸侯】周棄亦為稷【棄周之始祖昭二十九年左氏傳】觀射父曰【觀射父楚大夫】古者民神不雜【雜會也謂司民司神之官各異】民之精爽不貳者而又能齊肅衷正【爽明也 離也貳二也齊一也肅敬也衷中也】其知能上下比義【義宜也】其聖能光遠宣朗【聖通也朗明也】其明能光昭之其聰能聽徹之【徹達也】如是則神明降之【降下也】在男曰覲在女曰巫【巫覲見鬼者周禮男亦曰巫】是使制神之處位次主【處居也位祭位也次主次其尊卑先後也】而為之牲器時服【牲牲之毛色大小也器所當用也時服四時服色所宜也】而後使先聖之後之有光烈【烈明也】而能知山川之號【號名位也】高祖之主【高祖廟之先也】宗廟之事昭穆之世【父昭子穆先後之次也春秋齊僖公謂之逆祀】齊敬之勤【齊莊也】禮節之宜威儀之則容貌之崇【崇飾也】忠信之質【質誠也】禋服之服【潔祀曰禋】而敬恭明神者以為之祝【祝太祝也掌其福祥】使名姓之後能知四時之生【名姓謂舊族若伯夷炎帝之後為堯秩宗生嘉穀韭卯之屬】犧牲之物玉帛之類采服之儀彝器之量【彝六彝器俎豆量大小也】次主之度【疏數之度】屏攝之位【周氏云屏者并攝主人之位昭謂屏屏風也攝形如今要扇皆所以分別尊卑為祭祀之位近漢亦然】壇場之所【除地曰場】上下之神氏姓之出【所自出也】而心率舊典者為之宗【宗宗伯也掌祭祀之官】於是乎有天地神民類物之官謂之五官【類物謂別善惡利器用之官】各司其序不相亂也及少皞之衰也九黎亂德【少皞黃帝之子金天氏也九黎黎氏九人也】民神雜糅不可方物【同位故雜糅方猶別也物名也】顓頊受之【少皞氏沒顓頊氏作受承也】乃命南正重司天以屬神【南陵位正長也司主也屬會也所以會羣神使各有分序不相干亂也周禮則宗伯掌祭祀】命火正黎司地以屬民【唐尚書云火當為北北陰位也周禮則司徒掌土地人民也】其後三苗復九黎之德【其後高辛氏之季年也三苗九黎之後也高辛氏衰三苗為亂行其凶德如九黎之為也堯興而誅之】堯復育重黎之後不忘舊者使復典之【育長也堯繼高辛氏平三苗之亂繼育重黎之後使復典天地之官羲氏和氏是也】以至於夏商故重黎氏世叙天地而別其分主者也【叙次也分位也】其在周程伯休父其後也當宣王時失其官守而為司馬氏【程國也伯爵也休父名也失官守謂失天地之官而以諸侯為大司馬詩曰王謂尹氏命程伯休父是也 國語楚語】古者大撓作甲子黔如作慮首容成作歷羲和作占日尚儀作占月后益作占歲胡曹作衣夷羿作弓祝融作市狄儀作酒高元作室虞姁作舟伯益作井赤冀作臼乘雅作駕寒衰作御王冰作服牛史皇作圖巫彭作醫巫咸作筮此二十官者聖王之所以治天下也聖王不能二十官之事然而使二十官盡其巧畢其能聖王在上故也【聖王在上官使人人故盡畢其巧能也】聖王之所不能也所以能之也【用其人得其任故所以能】其不知也所以知之也【老子曰不知乃知之此之謂也】養其神修其德而已矣【無所思慮勞神是養神也無狀而能化育萬物謂之德】豈必勞形愁弊耳目哉【呂氏春秋】

唐虞稽古建官惟百內有百揆四岳外有州牧侯伯【堯舜考古以建百官內置百揆四岳象天之有五行外置州牧十二及五國之長上下相維外內咸治言有法】庶政惟和萬國咸寧【官職有序故衆政惟和萬國皆安所以為至治】夏商官倍亦克用乂【禹湯建官二百亦能用治言不及唐虞之清要 周官】有虞氏官五十夏后氏官百殷二百周三百【周之六卿其屬各六十周三百六十官也此云三百者記時冬官亡矣昏義曰天子立六官三公九卿二十七大夫八十一元士凡百二十蓋謂夏時也以夏周推前後之差有虞氏官宜六十夏后氏宜百二十殷宜二百四十不得如此記也 明堂位】記曰虞夏商周有師保有疑丞【記所云謂天子也取以成記】設四輔及三公不必備唯其人語使能也【語言也得能則用之無則已不必備其官也小人處其位不如且闕文王世子】古者天子必有四鄰前曰疑後曰丞左曰輔右曰弼天子有問無以對責之疑可志而不志責之丞可正而不正責之輔可揚而不揚責之弼其爵視卿其祿視次國之君也【尚書大傳】天子三公九卿二十七大夫八十一元士【此夏制也明堂位曰夏后氏之官百舉成數也 王制】古者天子后立六宮三夫人九嬪二十七世婦八十一御妻以聽天下之內治天子立六官三公九卿二十七大夫八十一元士以聽天下之外治【天子六寢而六宮在後六官在前所以承副施外內之政也三夫人以下百二十人周制也三公以下百二十人似夏時也合而言之取其相應有象天數也 昏義】天子建天官先六大曰大宰大宗大史大祝大士大卜典司六典【典法也此蓋殷時制也周則大宰為天官大宗曰宗伯宗伯為春官大史以下屬焉大士以神士者】天子之五官曰司徒司馬司空司土司寇典司五衆【衆謂羣臣也此亦殷時制也周則司土屬司馬大宰司徒宗伯司馬司寇司空為六官】天子之六府曰司土司木司水司草司器司貨典司六職【府主藏六物之稅者此亦殷時制也周則皆屬司徒司土土均也司木山虞也司水川衡也司草稻人也司器角人也司貨尹人也】天子之六工曰土工金土工木工獸工草工典制六材【此亦殷時制也周則皆屬司空土工陶旂也金工築冶鳧臬鍛桃也石工玉人磬人也木工輪輿弓廬匠車梓也獸工函鮑鞞韋裘也唯草工職亡蓋謂作萑葦之器 曲禮】五官之長曰伯【謂為三公者周禮九命作伯】是職方【職主也是伯分主東西者春秋傳曰自陝以東周公主之自陝以西召公主之一相處乎內是或為氏同上 詳見名器上】千里之外設方伯八伯各以其屬屬於天子之老人分天下以為左右曰二伯【老謂上公周禮曰九命作伯春秋傳曰自陝以東周公主之自陝以西召公主之 詳見封建】天子使其大夫為三監監於方伯之國國三人【使佐方伯領諸侯 王制】立太師太傅太保茲惟三公論道經邦燮理陰陽【師天子所師法傅傳相天子保保安天子於德義者此惟三公之任佐王論道以經緯國事和理陰陽言有德乃堪之】官不必備惟其人【三公之官不必備員惟其人有德乃以處之】少師少傅少保曰三孤【此三官名曰三孤孤特也言卑於公尊於卿特置此三者】貳公弘化寅亮天地弼予一人【副貳三公弘大道化敬信天地之教以輔我一人之治】冢宰掌邦治統百官均四海【天官卿稱大宰主國政治統理百官均平四海之內邦國言任大】司徒掌邦治敷五典擾兆民【地官卿司徒主國教化布五常之教以安和天下衆民使小大協和】宗伯掌邦禮治神人和上下【春官卿宗廟官長主國禮治天地神祇人鬼之事及國之吉凶軍賓嘉五禮以和上下尊卑等列】司馬掌邦政統六師平邦國【夏官卿主戎馬之事掌國征伐統正六軍平治王邦四方國之亂者】司寇掌邦禁詰姦慝刑暴亂【秋官卿主寇賊法禁治姦惡刑強暴作亂者夏司馬討惡助長物秋司寇刑姦順時殺】司空掌邦土居四民時地利【冬官卿主國邦土以居民士農工商

四人使順天時分地利授之土能吐生百穀故曰土】六卿分職各率其屬以倡九牧阜成兆民【六卿各率其屬官大夫士治其所分之職以倡道九州牧伯為政大成兆民之性命皆能其官則政治周官】內有九室九嬪居之外有九室九卿朝焉【內路寢之裏也外路門之表也九室如今朝堂諸曹治事處九嬪掌婦學之法以教九御六卿三孤為九卿】九分其國以為九分九卿治之【九分其國分國之職也三孤佐三公論道六卿治六官之屬考工記匠人】大宰乃施法於官府而建其正立其貳設其攷陳其殷置其輔【正謂冢宰司徒宗伯司馬司寇司空也貳謂小宰小司徒小宗伯小司馬小司寇小司空也考成也佐成事者謂宰夫鄉師肆師軍司馬士師也司空亡未聞其考天官】

右歷代官制之略堯命羲和欽若昊天【羲氏和氏主歷象授時之官堯】命舜以位慎徽五典【慎美也五典五常也此蓋使為司徒之官也】納于百揆【百揆者揆度庶政之官惟唐虞有之猶周之冢宰也】賓于四門【四門四方之門古者以賓禮親邦國諸侯各以方至而使主焉故曰賓此蓋又兼四岳之官也舜典】舜咨十有二牧【牧養民之官十二牧十二州之牧也】咨四岳有

能奮庸熙帝之載使宅百揆亮采惠疇僉曰伯禹作司空帝曰俞咨禹汝平水土惟時懋哉【四岳官名一人而聽四岳諸侯之事也舜言有能奮起事功以廣帝堯之事者使居百揆之位以明亮庶事而順成庶類也四岳及諸侯言伯禹作司空可宅百揆舜然其舉而咨禹使仍作司空而兼行百揆之事以司空兼百揆如周以六卿兼三公後世以他官平章事知政事者亦此類也】棄汝后稷【后君也有爵土之稱稷田正官】契汝作司徒皐陶汝作士【士理官也】咨垂汝共工【共工官名】咨益汝作朕虞【虞掌山澤之官周禮分為虞衡屬於地官】咨伯汝作秩宗【秩宗主釁次百神之官而專以秩宗名之者蓋以宗廟為主也】夔命汝典樂教胄子龍命汝作納言【納言官名舜典】大戰于甘乃召六卿【六卿六鄉之卿也甘誓】實維阿衡實左右商王【阿衡伊尹官號也商頌長發】薛之皇祖奚仲居薛以為夏車正【奚仲為夏掌掌車服大夫】仲虺居薛以為湯左相【仲虺奚仲之後定元年左氏傳】成王幼在襁褓之中召公為大保周

公為大傅大公為大師保保其身體傳傳之德義師道之教訓所謂三公也於是為置三少皆上大夫也曰少保少傅少師是與大子宴也【詳見保傳】天子三公稱公王者之後稱公天子三公者何天子之相也【相助也】天子之相則何以三【據經但有祭公周公】自陝而東者周公主之自陝而西者召公主之一相處乎內【陝者蓋今弘農陝縣是也禮司馬主兵司徒主教司空主土春秋撥亂世以黜陟為本故舉絀陟以所主者言之隱五年公羊傳】古者天子三公每一公三卿佐之每一卿三大夫佐之每一大夫三士佐之故天子三公九卿二十七大夫八十一元士所與為天下者若此而已【自三公至元士凡百二十此夏時之官周之官三百六十禮志曰有虞氏之官五十夏后百殷二百周三百近之未得其實也據夏周推其差則有虞氏之官六十夏后氏百二十殷二百四十周三百六十為有所法尚書大傳】王者所以立三公九卿何曰天雖至神必因日月之光地雖至靈必有山川之化聖人雖有萬人之德必須俊賢三公九卿二十七大夫八十一元士以順天成其道司馬主兵司徒主人司空主地王者受命為天地人之職故分職以置三公各主其一以効其功一公置三卿故九卿也

天道莫不成於三三公九卿二十七大夫八十一元士凡百二十官下應十二子【白虎通】
襄王曰內官不過九御【九御九嬪】外官不過九品【九品九卿周禮內有九室九嬪居之
外有九室九卿朝焉】足以供給神祇而已【言卿與嬪主祭祀也魯語曰日入監九御使潔
奉禘郊之粢盛國語周語】觀射父曰民之徹官百【徹達也自以名達於上者有百官也】
王公之子弟之質能言能聽徹其官者【質有賢質也能言能言其官職也】而物賜之姓以
監其官是為百姓【物事也以功事賜之姓官有世功則有官族若司馬太史之屬是也】姓
有徹品十於王謂之千品【謂一官之職其寮屬徹於王者有十品百官故有千品也】五物
之官陪屬萬為萬官【五物謂天地神民類物之官也臣之臣為陪屬謂有寮屬轉陪貳相佐
助復有十等千品故萬官也】官有十醜為億醜【醜類也以十醜承萬為十萬十萬曰億古
數也今人乃以萬萬為億】天子之田九畝以食兆民【九畝九州之內有畝數也食兆民耕
而食其中也天子曰兆民】王取經入焉以食萬官【經常也常入征稅也
楚語】芋尹無宇曰天有十日【甲至癸】人有十等【王至臺】下

所以事上上所以共神也故王臣公公臣大夫大夫臣士士臣阜阜臣興興臣隸隸臣僚僚臣
僕僕臣臺馬有圉牛有牧【養馬曰圉養牛曰牧】以待百事【昭七年左氏傳】

惟王建國辨方正位體國經野設官分職以為民極【注詳見制國】乃立天官冢宰使帥其
屬而掌邦治以佐王均邦國【掌主也邦治主佐王治邦國也佐猶助也鄭司農云邦治謂總
六官之職也故大宰職曰掌建邦之六典以佐王治邦國六官皆總屬於冢宰故論語曰君薨
百官總已以聽於冢宰言冢宰於百官無所不主爾雅曰冢大也冢宰大宰也天官冢宰鄭目
錄云象天所立之官冢大也宰者官也天者統理萬物天子立冢宰使掌邦治亦所以總御眾
官使不失職不言司者大宰總御眾官不主一官之事也】治官之屬大宰卿一人小宰中
大夫二人宰夫下大夫四人上士八人中士十有六人旅下士三十有二人【變冢言大進退異
名也百官總馬則謂之冢列職於王則稱大冢大之上也山項曰冢旅眾也下士治眾事者自
大宰至旅下士轉相副貳皆王臣也王之卿六命其大夫四命士以三命而下為差】府六人
史十有二人【府治藏史掌書者凡府史皆其官長所自辟除】胥十有二人徒百有二十人
【此民給徭役者若今衛士矣胥讀如謂謂其有才知為什長】宮正上士二人中士四人下
士八人府二人史四人胥四人徒四十人【正長也宮正主宮中官之長】

宮伯中士二人下士四人府一人史二人胥二人徒二十人【伯長也】膳夫上士二人中士
四人下士八人府二人史四人胥十有二人徒百有二十人【膳之言善也今時美物曰珍膳
膳夫食官之長也鄭司農以詩說之曰仲允膳夫】庖人中士四人下士八人府二人史四人
賈八人胥四人徒四十人【庖之言苞也裹肉曰苞苴賈主市買知物賈】內饔中士四人下
士八人府二人史四人胥十人徒百人【饔割烹煎和之稱內饔所主在內】

外饔中士四人下士八人府二人史四人胥十人徒百人【外饔所主在外】

甸師下士四人府一人史二人胥五人徒五十人【主為外內饔煮肉者】甸師下士二人府
一人史二人胥三十人徒三百人【郊外曰甸師猶長也甸師主共野物官之長】

獸人中士四人下士八人府二人史四人胥四人徒四十人

人中士二人下士四人府二人史四人胥三十人徒三百人

鼈人下士四人府二人史二人徒十有六人 腊人下士四人府二人史二人徒二十人【腊之

言夕也】醫師上士二人下士四人府二人史二人徒二十人【醫師衆醫之長】
食醫中士二人【食有和齊藥之類】疾醫中士八人瘍醫下士四人【瘍創癰也】
獸醫下士四人【獸牛馬之類】

酒正中士四人下士八人府二人史八人胥八人徒八十人【酒正酒官之長】酒人奄十人女酒三十人奚三百【奄精氣閉藏者今謂之宦人月令仲冬其器閔以奄女酒女奴曉酒者古者從坐男女没入縣官為奴其少才知以為奚今之侍史官婢或曰奚宦女】

漿人奄五人女漿十有五人奚百五十人【女漿女奴曉漿者】凌人下士二人府二人史二人胥八人徒八十人【凌冰室也詩人二之日鑿冰沖沖三之日納于凌陰】籩人奄一人女籩十人奚二十人【竹曰籩女籩女奴之曉籩者】醯人奄一人女醯二十人奚四十人【醯豆實也不謂之豆此主醯豆不盡于醯也女醯女奴曉醯者】醢人奄二人女醢二十人奚四十人【女醢女奴曉醢者】鹽人奄二人女鹽二十人奚四十人【女鹽女奴曉鹽者】

冪人奄一人女冪十人奚二十人【以巾覆物曰冪女冪女奴曉冪者】宮人中士四人下士八人府二人史四人胥八人徒八十人掌舍下士四人府二人史四人徒四十人【舍行所解止之處】幕人下士一人府二人史二人徒四十人【幕帷覆上者】

掌次下士四人府四人史二人徒八十人【次自修止之處】大府下大夫二人上士四人下士八人府四人史八人賈十有六人胥八人徒八十人【大府為王治藏之長若今司農矣】

玉府上士二人中士四人府二人史二人工八人賈八人胥四人徒四十有八人【工能攻玉者】內府中士二人府一人史二人徒十人【內府王良貨賄藏在內者】

外府中士二人府一人史二人徒十人【外府主泉藏在外者】司會中大夫二人下大夫四人上士八人中士十有六人府四人史八人胥五人徒五十人【會大計也司會主天下之大計計官之長若今尚書】

司書上士二人中士四人府二人史四人徒八人【司書主計會之簿書】職內上士二人中士四人府二人史四人徒二十人【職內主入也若今之泉所入謂之少內】

職歲上士四人中士八人府四人史八人徒二十人【主歲計以歲斷】

職幣上士二人中士四人府二人史四人賈四人胥二人徒二十人

司裘中士二人下士四人府二人史四人徒四十人掌皮下士四人府二人史四人徒四十人內宰下大夫二人上士四人中士八人府四人史八人胥八人徒八十人【內宰宮官之長】

內小臣奄上士四人史二人徒八人【奄稱士者異其賢】閹人王宮每門四人囿游亦如之【閹人司昏晨以啟閉者刑人墨者使守門囿御苑也游離宮也】

寺人王之正內五人【寺之言侍也詩云寺人孟子正內路寢】

內豎倍寺人之數【豎未冠者之官名】九嬪【嬪婦也昏義曰古者天子后立六宮三夫人九嬪二十七世婦八十一御妻以聽天下之內治以明章婦順故天下內和而家理也不列夫人于此官者夫人之於后猶三公之於王坐而論婦禮無官職】

世婦【不言數者君子不苟於色有婦德者充之無則闕】

女御【昏義所謂御妻御猶進也侍也】女祝四人奚八人【女祝女奴曉祝事者】

女史八人奚十有六人【女史女奴曉書者】典婦功中士二人下士四人府二人史四人工四人賈四人徒二十人【典主也典婦功者主婦人絲枲功官之長】典絲下士二人府二人史二人賈四人徒十有二人典枲下士二人府二人史二人徒二十人內司服奄一人女御二

人奚八人【內司服主宮中裁縫官之長有女御者以衣服進或當於王廣其禮使無色過】
縫人奄二人女御八人女工八十人奚三十人【女工女奴曉裁縫者】
染人下士二人府二人史二人徒二十人
追師下士二人府一人史二人工二人徒四人【追治玉石之名】
屨人下士二人府一人史一人工八人徒四人 夏采下士四人史一人徒四人【夏采夏翟羽
色禹貢徐州貢夏翟之羽有虞氏以為綏後世或無故染鳥羽象而用之謂之夏采】

右周禮天官之屬

惟王建國辨方正位體國經野設官分職以為民極乃立地官司徒使師其屬而掌邦教以佐
王安擾邦國【教所以親百姓訓五品有虞氏五而周十有二焉擾亦安也言饒衍之地官司
徒鄭月錄云象地所立之官司徒主衆徒地者載養萬物天子立司徒掌邦教亦所以安擾萬
民】教官之屬大司徒卿一人小司徒中大夫二人鄉師下大夫四人上士八人中士十有六
人旅下士三十有二人府六人史十有二人胥十有二人徒百有二十人【師長也司徒掌六
鄉鄉師分而治之二人者共三鄉之事相左右也】鄉老二鄉則公一人鄉大夫每鄉卿一人
州長每州中大夫一人黨正每黨下大夫一人族師每族上士一人閭胥每閭中士一人比長
五家下士一人【老尊稱也王置六卿則公有三人也三公者內與王論道中參六官之事外
與六卿之教其要為民是以屬之鄉焉州黨族閭比鄉之屬別正師胥皆長也正之言政也師
之言帥也胥有才知之稱載師職曰以官田牛田賞田牧田任遠郊之地司勲職曰掌六鄉之
掌地六鄉地在遠郊之內則居四同鄭司農云百里內為六鄉外為六遂】封人中士四人下
士八人府二人史四人胥六人徒六十人【聚土曰封謂墳壙圻及小封疆也】

鼓人中士六人府二人史二人徒二十人

舞師下士二人胥四人舞徒四十人【舞徒給繇役能舞者以為之】牧人下士六人府一人
史二人徒六十人【牧人養牲於野田者詩云爾牧來思荷蓑荷笠或負其鰕三十維物爾牲
則具】牛人中士二人下士四人府二人史四人胥二十人徒二百人【主牧公家之牛者詩
云誰謂爾無牛九十其牉者九十其餘多矣】

充人下士二人史二人胥四人徒四十人【充猶肥也養繫牲而肥之】載師上士二人中士
四人府二人史四人胥六人徒六十人【載之言事也事民而稅之禹貢曰冀州既載載師者
閭師縣師遺人均人官之長】閭師中士二人史二人徒二十人【主徵六鄉賦貢之稅者鄉
官有州黨族閭此止言閭者徵民之稅宜督其親民者凡其賦貢入大府穀入倉人】縣師上
士二人中士四人府二人史四人胥八人徒八十人【主天下土地人民已下之數徵野賦貢
也名曰縣師者自六鄉以至邦國縣居中焉鄭司農云四百里曰縣】遺人中士二人下士四
人府二人史四人胥四人徒四十人【鄭司農云遺讀如詩曰棄予如遺之遺玄謂以物有所
饋遺】均人中士二人下士四人府二人史四人胥四人徒四十人【均猶平也主平土地之
力政者】師氏中大夫一人府二人史二人胥十有二人徒百有二十人【師教人以道者之
稱也保氏司諫司救官之長鄭司農云詩云樛維師氏】保氏下大夫一人中士二人府二人
史二人胥六人徒六十人【保安也以道安人者也書叙曰周公為師召公為保相成王為左
右聖賢兼此官也】司諫中士二人史二人徒二十人【諫猶正也以道正人行】

司救中士二人史二人徒二十人【救猶禁也以禮防禁人之過者也】

調人下士二人史二人徒十人【調猶和合也】

媒氏下士二人史二人徒十人【媒之言謀也謀合異類使和成者今齊人名麴麯曰媒】司市下大夫二人上士四人中士八人下士十有六人府四人史八人胥十有二人徒百有二十人【司市市官之長】

質人中士二人下士四人府二人史四人胥二人徒二十人【質平也主平定物賈者】廛人中士二人下士四人府二人史四人胥二人徒二十人【故書廛為壇杜子春讀壇為廛說云市中空地玄謂廛民居區域之稱】胥師二十肆則一人皆二史賈師二十肆則一人皆二史司勦十肆則一人司稽五肆則一人胥二肆則一人肆長每肆則一人【自胥師以及司稽皆司市所自辟除也胥及肆長市中給繇役者胥師領羣胥賈師定物賈司暴禁暴亂司稽察留連不時去者】泉府上士四人中士八人下士十有六人府四人史

八人賈八人徒八十人【鄭司農云故書泉或作錢】司門下大夫二人上士四人中士八人下士十有六人府二人史四人胥四人徒四十人每門下士二人府一人史二人徒四人【司門若今城門校尉主王城十二門】司關上士二人中士四人府二人史四人胥八人徒八十人每關下士二人府一人史二人徒四人【關界上之門】

掌節上士二人中士四人府二人史四人胥二人徒二十人【節猶信也行者所執之信】遂人中大夫二人遂師下大夫四人上士八人中士十有六人旅下士三十有二人府四人史十有二人胥十有二人徒百有二十人【遂人主六遂若司徒之於六鄉也六遂之地自遠郊以達于畿中有公邑家邑小都大都焉鄭司農云遂謂王國百里外】遂大夫每遂中大夫一人縣正每縣下大夫一人鄙師每鄙上士一人鄧長每鄧中士一人里宰每里下士一人鄰長五家則一人【縣鄙鄧里鄰遂之屬別也】旅師中士四人下士八人府二人史四人胥八人徒八十人【主斂縣師所徵野之賦穀者也旅猶處也六遂之官里宰之師也正用里宰者亦斂民之稅宜督其親民】稍人下士四人史二人徒十有二人【主為縣師令都鄙丘甸之政也距王城三百里曰稍家邑小都大都自稍以出焉】

委人中士二人下士四人府二人史四人徒四十人【主斂甸稍芻薪之賦以共委積者也】土均上士二人中士四人下士八人府二人史四人胥四人徒四十人【均猶平也主平土地之政令者也】草人下士四人史二人徒十有二人【草除草】

稻人上士二人中士四人下士八人府二人史四人胥十人徒百人土訓中士二人下士四人史二人徒八人【鄭司農云訓讀為馴謂以遠方土地所生異物告道王也爾雅云訓道也玄謂能訓說土地善惡之勢】

誦訓中士二人下士四人史二人徒八人【能訓說四方所誦習及人所作為久時事】山虞每大山中士四人下士八人府二人史四人胥八人徒八十人中山下士六人史二人胥六人徒六十人小山下士二人史一人徒二十人【虞度也度知山之大小及所生者】林衡每大林麓下士十有二人史四人胥十有二人徒百有二十人中林麓如中山之虞小林麓如小山之虞【衡平也平林麓之大小及所生者竹木生平地曰林山足曰麓】川衡每大川下士十有二人史四人胥十有二人徒百有二十人中川下士六人史二人胥六人徒六十人小川下士二人史一人徒二十人【川流水也禹貢曰九川滌源】澤虞每大澤大藪中士四人下士八人府二人史四人胥八人徒八十人中澤小藪如中川之衡小澤小藪如小川之衡【澤水所鍾也水希曰藪禹貢曰九澤既陂爾雅有八藪】迹人中士四人下士八人史二人徒四十

人【迹之言跡知禽獸處】 人中士二人下士四人府二人史二人胥四人徒四十人【人言礦也金玉未成器曰礦】 角人下士二人府一人徒八人 羽人下士二人府一人徒八人 掌葛下士二人府一人史一人胥二人徒二十人 掌染草下士二人府一人史二人徒【染草藍蒨象斗之屬】 掌炭下士二人史二人徒二十人 掌荼下士二人府一人史一人徒二十人【荼茅莠】 掌蜃下士二人府一人史一人徒八人【蜃大蛤月令孟冬雉入大水為蜃】 圉人中士四人下士八人府二人胥八人徒八十人【圉今之苑】 場人每場下士二人府一人史一人徒二十人【場築地為墀季秋除圉中為之詩云九月築場圃十月納禾稼】 廩人下大夫二人上士四人中士八人下士十有六人府八人史十有六人胥三十人徒三百人【藏米曰廩廩人舍人倉人司祿官之長】 舍人上士二人中士四人府二人史四人胥四人徒四十人【舍猶宮也主平宮中用穀者也】 倉人中士四人下士八人府二人史四人胥四人徒四十人 司祿中士四人下士八人府二人史四人徒四十人【主班祿】 司稼下士八人史四人徒四十人【種穀曰稼如嫁女以有所生】 舂人奄二人女舂扈二人奚五人【女舂扈女奴能舂與扈者扈抒臼也詩曰或舂或扈】 饔人奄二人女饔八人奚四十人【鄭司農云饔人主炊官也特牲饋食禮曰主婦視饔饔故書饔作 】 稟人奄八人女稟每奄二人奚五人【鄭司農云稟讀如犒師之犒主亢食者故謂之犒】

右地官之屬

惟王建國辨方正位體國經野設官分職以為民極乃立春官宗伯使帥其屬而掌邦禮以佐王和邦國【禮謂曲禮五吉凶賓軍嘉其別三十有六鄭司農云宗伯主禮之官故書堯典曰帝曰咨四岳有能典朕三禮僉曰伯夷帝曰俞咨伯汝作秩宗宗官又主鬼神故國語曰使名姓之後能知四時之生犧牲之物玉帛之類采服之宜彝器之量次主之度屏攝之位壇場之所上下之神祇氏姓之所出而率舊典者為之宗春秋禘于大廟躋僖公而傳曰夏父弗忌為宗人又曰使宗人釁夏獻其禮禮特牲曰宗人升自西階視壺濯及豆籩然則唐虞歷三代以宗官典國之禮與其祭祀漢之大常是也 春官宗伯鄭目錄云象春所立之官也宗尊也伯長也春者出生萬物天子立宗伯使掌邦禮典禮以事神為上亦所以使天下報本反始不言司者鬼神示人之所尊不敢主之故也】 禮官之屬大宗伯卿一人小宗伯中大夫二人肆師下大夫四人上士八人中士十有六人旅下士三十有二人府六人史十有二人徒百有二十人【肆猶陳也肆師佐宗伯陳列祭祀之位及牲器粢盛】 鬱人下士二人府二人史一人徒八人【鬱鬱金香草宜以和鬯】 鬯人下士二人府二人史一人徒八人【鬯釀秬為酒芬芳條暢於上下也秬如黑黍一稊二米】 雞人下士一人史一人徒四人 司尊彝下士二人府四人史二人胥二人徒二十人【彝亦尊也鬱鬯曰彝彝法也言為尊之法也】 司几筵下士二人府二人史一人徒八人【筵亦席也鋪陳曰筵藉之曰席然其言之筵席通矣】 天府上士一人中士二人府四人史二人胥二人徒二十人【府物所藏言天府尊此所藏若天物然】 典瑞中士二人府二人史二人胥一人徒十人【瑞節信也典瑞若今符璽郎】 典命中士二人府二人史二人胥一人徒十人【命謂王遷秩羣臣之書】 司服中士二人府二人史一人胥一人徒十人

典祀中士二人下士四人府二人史二人胥四人徒四十人 守祧奄八人女祧每廟二人奚四人【遠廟曰祧周為文王武王廟遷主藏焉奄如今之宦者女祧女奴有才知者天子七廟三昭三穆奚女奴也】 世婦每宮卿二人下大夫四人中士八人女府二人女史二人奚十有六人【世婦后宮官也王后六宮漢使大長秋詹事中】 內宗凡內女之有爵者【內女王同姓之女謂之內宗有爵其嫁於大夫及士者凡無常數之言】

外宗凡外女之爵者【外女王諸姑姊妹之女謂之外宗】 冢人下大夫二人中士四人府二人史四人胥十有二人徒百有二十人【冢封上為丘壠象冢而為之】 墓大夫下大夫二人中士八人府二人史四人胥二十人徒二百人【墓冢塋之地孝子所思慕之處】

職喪上士二人中士四人下士八人府二人史四人胥四人徒四十人【職主也】 大司樂中大夫二人樂師下大夫四人上士八人下士十有六人府四人史八人胥八人徒八十人【大司樂樂官之長】 大胥中士四人小胥下士八人府二人史四人徒四十人【胥有才知之稱禮記文王世子曰小樂正學干大胥贊之】 大師下大夫二人小師上士四人瞽矇上瞽四十人中瞽百人下瞽百有六十人眡瞭三百人府四人史八人胥十有二人徒百有二十人【凡樂之歌必使瞽矇為焉命其賢知者以為大師小師晉杜蒯云曠也大師也眡讀為虎眡之眡瞭目明者鄭司農云無目眡謂之瞽有目眡而無見謂之矇有目無眸子謂之瞍】 典同中士二人府一人史一胥二人徒二十人【同陰律也不以陽律名官者因其先言耳書曰協時月正日同律度量衡大師職曰執同律以聽軍聲】 磬師中士四人下士八人府四人史二人胥四人徒四十人 鍾師中士四人下士八人府二人史二胥六人徒六十人

笙師中士二人下士四人府二人史二人胥一人徒十人

鐃人中士二人下士四人府二人史二人胥二人徒二十人【鐃如鍾而大】 鞀師下士二人府一人史一人舞者十有六人【鄭司農云以明堂位曰鞀東夷之樂讀如味飲食之味杜子春云鞀為蒹莖著之蒹玄讀謂如鞀韜之鞀】 旄人下士四人舞者衆寡無數府二人史二人胥二人徒二十人【旄旄牛尾舞者所持以指麾】 籥師中士四人府二人史二人胥二人徒二十人【籥舞者所吹春秋宣八年壬午猶繹萬入去籥傳曰去其有聲者廢其無聲者詩云左手執籥右手秉翟】

籥章中士二人下士四人府一人史一人胥二人徒二十人【籥章吹籥以為詩章】 鞀鞀氏下士四人府一人史一人胥二人徒二十人【鞀讀如履也鞀履四夷舞者所屣也今時倡蹋鼓沓行者自有屣】 典庸器下士四人府四人史二人胥八人徒八十人【庸功名鄭司農云庸器有功者鑄器銘其功春秋傳曰以所得於齊之兵作林鍾而銘魯功焉】

司干下士二人府二人史二人徒二十人【干舞者所持謂楯也春秋傳曰萬者何干舞也】

大卜下大夫二人卜師上士四人卜人中士八人下士十有六人府二人史二人胥四人徒四十人【問龜曰卜大卜卜筮官之長】

龜人中士二人府二人史二人工四人胥四人徒四十人【工取龜攻龜】

菴氏下士二人史一人徒八人【燠煖用荆菴之類】

占人下士八人府一人史二人徒八人【占蓍龜之卦兆吉凶】

籥人中士二人府一人史二人徒四人【問蓍曰筮其占易】 占夢中士二人史二人徒四人 眡祲中士二人史二人徒四人【祲陰陽彘相侵漸成祥者魯史梓慎曰吾見赤黑之祲】 大祝下大夫二人上士四人小祝中士八人下士十有六人府二人史四人胥四人徒四十人【大祝祝官之長】 喪祝上士二人中士四人下士八人府二人史二人胥四人徒四十人

甸祝下士二人府一人史一人徒四人【甸之言田也田狩之祝】
詛祝下士二人府一人史一人徒四人【詛謂祝之使沮敗也】
司巫中士二人府一人史一人胥一人徒十人【司巫巫官之長】男巫無數女巫無數其師
中士四人府二人史四人胥四人徒四十人【巫能制神之處位次主者】
大史下大夫二人上士四人小史中士八人下士十有六人府四人史八人

胥四人徒四十人【大史史官之長】馮相氏中士二人下士四人府二人史四人徒八人【馮乘也相視也世登高臺以視天文之次序天文屬大史月令曰乃命大史守典奉法司天日月星辰之行宿離不貸】

保章氏中士二人下士四人府二人史四人徒八人【保守也世守天文之變】內史中大夫一人下大夫二人上士四人中士八人下士十有六人府四人史八人胥四人徒四十人
外史上士四人中士八人下士十有六人胥二人徒二十人御史中士八人下士十有六人其史百有二十人府四人胥四人徒四十人【御猶侍也進也其史百有二十人以掌贊書人多也】巾車下大夫二人上士四人中士八人下士十有六人府四人史八人工百人胥五人徒五十人【巾猶衣也巾車車官之長】

典路中士二人下士四人府二人史二人胥二人徒二十人【路王之所乘車】

車僕中士二人下士四人府二人史二人胥二人徒二十人

司常中士二人下士四人府二人史二人胥四人徒四十人【司常主王旌旗】都宗人上士二人中士四人府二人史四人胥四人徒四十人【都謂王子弟所封及公卿所食邑】

家宗人如都宗人之數【家謂大夫所食采邑】凡以神士者無數以其藝為之貴賤之等【以神士者男巫之後有學問才知者藝謂禮樂射御書數高者為上士次之為中士又次之為下士】

右春官之屬

惟王建國辨方正位體國經野設官分職以為民極乃立夏官司馬使帥其屬而掌邦政以佐王平邦國【政正也政所以正不正者也孝經說曰政者正也正德名以行道夏官司馬鄭曰錄云象夏所立之官馬者武也言為武者也夏整齊萬物天子立司馬共掌邦政政可以平諸侯正天下故曰統六師平邦國】政官之屬大司馬卿一人小司馬中大夫二人軍司馬下大夫四人輿司馬上士八人行司馬中士十有六人旅下士三十有二人府六人史十有六人胥三十有二人徒三百有二十人【嶼衆也行謂軍行列晉作穴軍而有三行取名於此】凡制軍萬有二千五百人為軍王六軍大國三軍次國二軍小國一軍軍將皆命卿二千有五百人為師師帥皆中大夫五百人為旅旅帥皆下大夫百人為卒卒長皆上士二十五人為兩兩司馬皆中士五人為伍伍皆有長【軍師旅卒兩伍皆衆名也伍一比兩一閭卒一旅旅一黨師一州軍一鄉家所出一人將帥長司馬者其帥吏也言軍將皆命卿則凡軍帥不特置選於六官六卿之吏自卿以下德任者使兼官焉鄭司農云王六軍大國三軍次國二軍小國一軍故春秋傳有大國次國小國又曰成國不過半天子之軍周為六軍諸侯之大者三軍可也詩大雅常武曰赫赫明明王命卿士南仲大祖大師皇父整我六師以修我戎既敬既戒惠此南國大雅文王曰周王于邁六師及之此周為六經之見於經也春秋傳曰王使虢公命曲沃伯以

一軍為晉侯此小國一軍之見於傳也百人為卒二十五人為兩故春秋傳曰廣有一卒卒偏之兩】一軍則二府六史胥十人徒百人 司勲上士二人下士四人府二人史四人胥二人徒二十人【故書勲作勳鄭司農云勳讀為勲勲功也此官主功賞故曰掌六卿賞地之法以等其功】馬質中士二人府一人史二人賈四人徒八人【質平也主買馬平其大小之賈直】量人下士二人府一人史四人徒八人【量猶度也謂以丈尺度地】

小子下士二人史一人徒八人【小子主祭祀之小事】

羊人下士二人史一人賈二人徒八人 司燿下士二人徒六人【故書燿為爇杜子春云爇當為燿書或亦為燿燿為私火玄謂燿讀如予若觀火之觀今燕俗名湯熱為觀則燿火謂熱火與】掌固上士二人下士八人府二人史四人胥四人徒四十人【固國所依阻者也國曰固野曰險易曰王公設險以守其國】司險中士二人下士四人史二人徒四十人

掌疆中士八人史四人胥十有六人徒百有六人【疆界也】

侯人上士六人下士十有二人史六人徒百有二十人【侯侯迎賓客之來者】

環人下士六人史二人徒十二人【環猶卻也以勇力卻敵】挈壺氏下士六人史二人徒十有二人【挈讀如絜髮之絜壺盛水器也世主挈壺水以為漏】

射人下大夫二人上士四人下士八人府二人史四人胥二人徒二十人

服不氏下士一人徒四人【服不服不服之獸者】射鳥氏下士一人徒四人

羅氏下士一人徒八人【能以羅罔搏鳥者郊特牲曰大羅氏天子之掌鳥獸者】

掌畜下士二人史二人胥二人徒二十人【畜謂斂而養之】

司士下大夫二人中士六人下士十有二人府二人史四人胥四人徒四十人 諸子下大夫二人中士四人府二人史二人胥二人徒二十人【諸子主公卿大夫士之子者或及庶子】

司右上士二人下士四人府四人史四人胥八人徒八十人【右謂有勇力之士充王軍右】

虎賁氏下大夫二人中士十有二人府二人史八人胥八十人虎士八百人【不言徒曰虎士則虎士徒之選有勇力者】旅賁氏申士二人下士十有六人史二人徒八人

節服氏下士八人徒四人【世為王節所衣服】

方相氏狂夫四人【方相猶言放想可畏怖之貌】大僕下大夫二人小臣上士四人祭僕中士六人御僕下士十有二人府二人史四人胥二人徒二十人【僕侍御於尊者之名大僕其長也】隸僕下士二人府一人史二人胥四人徒四十人【此吏而曰隸以其事褻】

弁師下士二人工四人史二人徒四人【弁者古冠之大稱委貌緇布曰冠】司甲下大夫二人中士八人府四人史八人胥八人徒八十人【甲今之鎧也司甲兵戈盾官之長】司兵中士四人府二人史四人胥二人徒二十人司戈盾下士二人府一人史二人徒四人【戈今時句子戟】司弓矢下大夫二人中士八人府四人史八人胥八人徒八十人【司弓矢弓弩矢箛官之長】

繕人上士二人下士四人府一人史二人胥二人徒二十人【繕之言勁也善也】橐人中士四人府二人史四人胥二人徒二十人【鄭司農云橐讀為芻橐之橐箭幹謂之橐此官主弓弩箭矢故謂之橐人】戎右中大夫二人上士二人【右者參乘此充戎路之右田獵亦為之右焉】齊右

下大夫二人【充玉路金路之右】道右上士二人【充象路之右】

大馭中大夫二人【馭之最尊】戎僕中大夫二人【馭言僕者此亦侍御於車】

齊僕下大夫二人【古者王將朝覲會同必齊所以敬宗廟及神明】
道僕上士十有二人【王朝夕在朝主御王以與諸臣行先王之道】 田僕上士十有二人
馭夫中士二十人下士四十人 校人中大夫二人上士四人下士十有六人府四人史八人胥
八人徒八十人【校之為言校也主馬者必仍校視之校人馬官之長】
趣馬下士皂一人徒四人【趣馬趣養馬者也鄭司農說以詩曰蹶維趣馬】 巫馬下士二人
醫四人府一人史二人賈二人徒二十人【巫馬知馬祖先牧馬社馬步之神者馬疾若有犯
馬則知之是以使與醫同職】 牧師下士四人胥四人徒四十人【主牧放馬而養之】
廋人下士閑二人史二人徒二十人【廋之言數】 圉師乘一人徒二人圉人良馬匹一人駑
馬麗一人【養馬曰圉四馬為乘良善也麗耦也】 職方氏中大夫四人下大夫八人中士十
有六人府四人史十有六人胥十有六人徒百有六十人【職主也主四方之職貢者職方氏
主四方官之長】 土方氏上士五人下士十人府二人史五人胥五人徒五十人【土方氏主
四方邦國之土地】
懷方氏中士八人府四人史四人胥四人徒四十人【懷來也主來四方之民及其物】
合方氏中士八人府四人史四人胥四人徒四十人【合方氏主合同四方之事】
訓方氏中士四人府四人史四人胥四人徒四十人【訓道也主教道四方之氏】 形方氏【
士察也主察獄訟之事者鄭司農說以論語曰柳下惠為士師鄉士主六鄉之獄】 府六人史
十有二人胥十有二人徒百有二十人 遂士中士十有二人府六人史十有二人胥十有二人
徒百有二十人【遂士主六遂之獄者】 縣士中士三十有二人府八人史十有六人胥十有
六人徒百有六十人【距王城三百里至四百里曰縣縣士主縣之獄者】 方士中士十有六
人府八人史十有六人胥十有六人徒百有六十人【方士主四方都家之獄者】
訝士中士八人府四人史八人胥八人徒八十人【訝迎也士官之迎四方賓客】 朝士中士
六人府三人史六人胥六人徒六十人【朝士主外朝之法】 司民中士六人府三人史六人
胥三人徒三十人【司民主氏數】 司刑中士二人府一人史二人胥二人徒二十人司刺下
士二人府一人史二人徒四人【刺殺也三訊罪定則殺之】 司約下士二人府一人史二人
徒四人【約言語之約束】 司

盟下士二人府一人史二人徒四人【盟以約辭告神殺牲歃血明著其信也曲禮曰涖牲曰
盟】 職金上士二人下士四人府二人史四人胥八人徒八十人【職主也】
司厲下士二人史一人徒十有二人【犯政為惡曰厲厲士主盜賊之兵器及其奴者】
犬人下士二人府一人史二人賈四人徒十六人 司圜中士六人下士十有二人府三人史六
人胥十有六人徒百有六十人【鄭司農云圜謂圜土也圜土謂獄城也今獄城圜司圜職中
言凡圜土之刑人也以此知圜謂圜土也又大司寇職曰以圜土聚教罷民故司圜職曰掌收
教罷民】
掌囚下士十有二人府六人史十有二人徒百有二十人【囚拘也主拘繫當刑殺之者】
掌戮下士二人史一人徒十有二人【戮猶辱也既斬殺又辱之】 司隸中士二人下士十有
二人府五人史十人胥二十人徒二百人【隸給勞辱之役者漢始置司隸亦使將徒治道溝
渠之役後稍尊之使主官府及近郡】 罪隸百有二十人【盜賊之家為奴者】
蠻隸百有二十人【征南夷所獲】 閩隸百有二十人【閩南蠻之別】 夷隸百有二十人【
征東夷所獲】 貉隸百有二十人【征東北夷所獲凡隸衆矣此其選以為役員其餘謂之隸

】布憲中士二人下士四人府二人史四人胥四人徒四十人【憲表也主表形禁者】
禁殺戮下士二人史一人徒十有二人【禁殺戮者禁民不得相殺戮】禁暴氏下士六人史
三人胥六人徒六十人野廬氏下士六人胥十有二人徒百有二十人【廬賓客行道所舍】
蜡氏下士四人徒四十人【蜡骨肉腐臭蠅蟲所蜡也月令曰揜骼埋骹此官之職也蜡讀如
狙司之狙】雍氏下士二人徒八人【雍謂隄防止水者也】萍氏下士二人徒八人【鄭司
農云萍讀為蜉或為萍號起雨之萍玄謂今天問萍號作萍爾雅曰萍萍其大者蘋讀如小子
言平之平萍氏主水禁萍之草無根而浮取名於其不沈溺】司寤氏下士二人徒八人【寤
覺也主夜覺者】司烜氏下士

六人徒十有六人【烜火也讀如衛侯燬之燬故書燬為垣鄭司農云當為烜】條狼氏下士
六人胥六人徒六十人【杜子春云條當為滌器之滌玄謂滌除也狼狼扈道上】修閭氏下
士二人史一人徒十有二人【閭謂里門】冥氏下士二人徒八人【鄭司農云冥讀謂冥氏
春秋之冥玄謂冥方之冥以繩縻取禽獸之名】

庶氏下士一人徒四人【庶讀如藥煮之煮驅除毒蟲之言書不作蟲者字從聲】

穴氏下士一人徒四人【穴搏蟄獸所藏者】

翬氏下士二人徒八人【翬鳥翮也鄭司農云翬讀謂翹翼之翹】柞氏下士二人徒八人【
柞除木之名除木者必先枝剝之鄭司農云柞讀為聲音啗啗之啗屋竿之竿】薙氏下士二
人徒二十人【書薙或作夷鄭司農云掌殺草故春秋傳曰如農夫之務去草芟夷蘊崇之又
今俗間謂麥下為夷下言芟夷其麥以其下種禾豆也玄謂薙讀如鬚小兒頭之鬚書或作夷
此皆剪草也字從類耳月令曰燒薙行水謂燒所芟草乃水之】哲族氏下士一人徒二人【
鄭司農云哲讀為撻族讀為爵族之族謂巢也玄謂哲古字從石折聲】

剪氏下士一人徒二人【剪斷滅之言也主除蟲蠹者詩云實始剪商】

赤友氏下士一人徒二人【赤友猶言捋拔也主除蟲豸自埋者】蠃氏下士一人徒二人【
鄭司農云蠃讀為蜮蜮蝦蟇也月令曰螻蠃鳴故曰掌去鼃黽鼃黽蝦蟇屬書或為掌去蝦蟇
玄謂蠃今御所食蛙也字從虫國聲也蜮乃短狐輿】壺涿氏下士一人徒二人【壺謂瓦鼓
涿擊之也故書涿為獨鄭司農云獨讀為濁其源之濁音與涿相近書亦或為濁】

庭氏下士一人徒二人【庭氏主射妖鳥令國中絜清如庭者也】

銜枚氏下士二人徒八人【銜枚止言語囂譟也枚狀如箸橫銜之為之繡結於項】伊耆氏
下士一人徒二人【伊耆古王者號始為蜡以息老物此主王者之齒杖使王識伊耆氏之舊
德而以名官與今姓有伊耆氏】大行人中大夫二人小行人下大夫四人司儀上士八人中
士十有六人行夫下士三十有二人府四人史八人胥八人徒八十人【行夫主國使之禮】

環人中士四人史四人胥四人徒四十人【環猶圍也主圍賓客任器為之守衛】象胥每翟
上士一人中士二人下士八人徒二十人【通夷狄之言者曰象胥其有才知者也此類之本
名東方曰寄南方曰象西方曰狄韞北方曰譯今總名曰象者周之德先致南方也】掌客上
士二人下士四人府一人史二人胥二人徒二十人掌訝中士八人府二人史四人胥四人徒
四十人【訝迎也賓客來主迎之鄭司農云訝讀為跛者訝跛者之訝】

掌交中士八人府二人史四人徒三十有二人【主交通結諸侯之合】

掌察四方中士八人史四人徒十有六人掌貨賄下士十有六人史四人徒三十有二人朝大
夫每國上士二人下士四人府一人史二人庶子八人徒二十人【此王之士也使主都家之

國治而命之朝大夫云】都則中士一人下士二人府一人史二人庶子四人徒八十人【都則主都家之八則者也當言每都如朝大夫及都司馬云】都士中士二人下士四人府二人史四人胥四人徒

四十人家士亦如之【都家之士主治都家吏民之獄訟以告方士者也亦當言每都】

右秋官之屬

冬官其屬六十掌邦事【天官小宰】

右冬官【冬官考工記鄭目錄云象冬所立官也是官名司空者冬閉藏萬物天子立司空使掌邦事亦所以富國家使民無空者也司空之篇亡漢興購求千金不得此前世識其事者記錄以備大數古周禮六篇畢矣古周禮六篇者天子所專秉以治天下諸侯不得用焉六官之記可見者堯育重黎之後羲和及其仲叔四子掌天地四時夏書亦云乃召六卿商周雖稍增改其職名六官之數則同矣】攻木之工輪輿弓廬匠車梓攻金之工築冶鼂桌段桃攻皮之工函鮑鞞韋裘設色之工畫績鍾筐幌刮摩之工玉柳雕矢磬搏埴之工陶旒【事官之屬六十此識其五材三十工略記其事耳其曰某人者以其事名官也其曰某氏者官有世功若族有世業以氏名官者也考工記 詳見政事上篇工政章】

禮書綱目卷五十七

卷五十八

<經部,禮類,通禮之屬,禮書綱目

欽定四庫全書

禮書綱目卷五十八 婺源江永撰

職官下 通禮七

補

大宰乃施典於邦國而建其牧立其監設其參傳其伍陳其殷置其輔【乃者更申勅之以侯伯有功德者加命作州長謂之牧所謂八命作牧者監謂公侯伯子男各監一國書曰王啓監厥亂為民參謂卿三人伍謂大夫五人鄭司農云殷治律輔為民之平也玄謂殷衆也謂衆士也王制諸侯上士二十七人其中士下士各居其上之三分輔府史庶人在官者天官】大國三卿皆命於天子下大夫五人上士二十七人

次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人【命於天子者天子選用之如今詔書除吏是矣小國亦三卿一卿命於天子二卿命於其君此文似誤脫耳或者欲見畿內之國二卿與王制】次國之上卿位當大國之中中當其下下當其上大夫小國之上卿位當大國之下卿中當其上大夫下當其下大夫【此諸侯使卿大夫覲聘並會之序也其位爵同小國在下爵異固在上耳】其有中士下士者數各居其上之三分【謂其為介若特行而並會也居猶當也此據大國而言大國之士為上次國之士為中小國之士為下士之數國皆二十七人各三分之上九中九下九以位相當則次國之上士當大國之中中當其下小國之上士當大國之下凡非命士亦無出會之事春秋傳謂士為微同上】

右侯國之官 司徒司馬司空亞旅【司徒司馬司空三卿也武王是時尚為諸侯故未僭六卿唐孔氏曰司徒主民治徒庶之政令司馬主兵治軍旅之誓戒司空主土治壘壁以營軍亞次旅衆也大國三卿下大夫五人士二十七人亞者卿之貳大夫是也旅者卿之屬士是也牧誓】

六命賜官【此王六命之卿賜官者使得自置其臣治家邑如諸侯 春官大宗伯】大宰乃施則於都鄙而建其長立其兩設其伍陳其殷置其輔【長謂公卿大夫王子弟食采邑者兩謂兩卿不言三卿者不足於諸侯鄭司農云兩謂兩丞天官】仕於家者出鄉不與士齒【亦賤王制】

右大夫之官 大夫具官非禮也是謂亂國【臣之奢富擬於國君敗亂之國也孔子謂管仲官事不攝焉得儉】仕於公曰臣仕於家曰僕與家僕雜居齊齒非禮也是謂君與臣同國【臣與僕相等輩而處是謂君臣共國無尊卑也僕不可與士齒 禮運】
管仲官事不攝焉得儉【攝兼也家臣不能具官一人常兼數事管仲不然皆言其侈 論語】

王者之制祿爵公侯伯子男凡五等諸侯之上大夫卿下大夫上士中士下士凡五等【二五象五行剛柔十日祿所受食爵秩次也上大夫曰卿王制】制三公一命卷若有加則賜也不過九命次國之君不過七命小國之君不過五命【卷俗讀也其通則曰袞三公八命矣復加一命則服龍袞與王者之後同多於此則賜非命服也虞夏之制天子服有日月星辰周禮曰諸公之服自袞冕而下如王之服】大國之卿不過三命下卿再命小國之卿與下大夫一命【不著次國之卿者以大國之下互明之此卿命則異大夫皆同周禮公侯伯之卿三命其大夫再命子男之卿再命其大夫一命 同上】大宗伯以九儀之命正邦國之位【每命異儀貴賤之位乃正春秋傳曰名位不同禮亦異數】壹命受職【始見命為正吏謂列國之士於子男為大夫王之下士亦一命鄭司農云受職治職事】再命受服【鄭司農云受服受祭衣服為上士玄謂此受玄冕之服列國之大夫再命於子男為卿卿大夫自玄冕而下如孤之服王之中士亦再命則爵弁服】三命受位【鄭司農云受下大夫之位玄謂此列國之卿始有列位於王為王之臣也王之上士亦三命】四命受器【鄭司農云受祭器為上大夫玄謂此公之孤始得有祭器者也禮運曰大夫具官祭器不假聲樂皆具非禮也王之下大夫亦四命】五命賜則【鄭司農云則者法也出為子男玄謂則地未成國之名王之下大夫四命出封加一等五命賜之以方百里二百里之地者方三百里以上為成國王莽時以二十五成為則方五十里合今俗說子男之地獨劉子駿等識古有此制焉】六命賜官【鄭司農云子男入為卿治一官也玄謂此王六命之卿賜官者使得自置其臣治家邑如諸侯春秋襄十九年冬晉侯以諸侯圍齊荀偃為君禱河既陳齊侯之罪而曰曾臣彪將帥諸侯以討焉其官臣偃實先後之】七命賜國【王之卿六命出封加一等者鄭司農云出就侯伯之國】八命作收【謂侯伯有功德者加命得專征伐於諸侯鄭司農云一州之牧王之三公亦八命】九命作伯【上公有功德者加命為二伯得征五侯九伯者鄭司農云長諸侯為方伯 春官】典命掌諸侯之五儀諸臣之五等之命【五儀公侯伯子男之儀五等謂孤以下四命三命再命一命不命也或言儀或言命互文也故書儀作義鄭司農義讀為儀】上公九命為伯其國家宮室車旗衣服禮儀皆以九為節侯伯七命其國家宮室車旗衣服禮儀皆以七為節子男五命其國家宮室車旗衣服禮儀皆以五為節【上公謂王之三公有德者加命為二伯二王之後亦為上公國家國之所居謂城方也公之城蓋方九里官方九百步侯伯之城蓋方七里官方七百步子男之城蓋方五里官方五百步大行人職則有諸侯圭藉冕服建常樊纓貳車介牢禮朝位之數焉】王之三公八命其卿六命其大夫四命及其出封皆加一等其國家宮室車旗衣服禮儀亦如之【四命中下大夫也出封出畿內封於八州之中加一等褒有德也大夫為子男卿為侯伯其在朝廷則亦如命數耳王之上士三命中士再命下士一命】凡諸侯之適子誓於天子攝其君則下其君之禮一等未誓則以皮帛繼子男【誓猶命也言誓者明天子既命以為之嗣樹子不易也春秋桓九年曹伯使其世子射姑來朝行國君之禮是也公之子如侯伯而執圭侯伯之子如子男而執璧子男之子與未誓者皆次小國之君執皮帛而朝會焉其賓之皆以上卿之禮焉】公之孤四命以皮帛繼小國之君其卿三命其大夫再命其士壹命

其宮室車旗衣服禮儀各視其命之數侯伯之卿大夫士亦如之子男之卿再命其大夫壹命其士不命其宮室車旗衣服禮儀各視其命之數【視小國之君者列於卿大夫之位而禮如子男也鄭司農云九命上公得置孤卿一人春秋傳曰列國之卿當小國之君固周制也玄謂王制曰大國三卿皆命於天子下大夫五人上士二十七人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人同上】大宗伯王命諸侯則儋【注見封建】內史凡命諸侯及孤卿大夫則策命之【鄭司農說以春秋傳曰王命內史興父策命晉侯為侯伯策謂以簡策書王命其文曰王謂叔父敬服王命以綏四國糾逖王慝晉侯三辭從命受策以出春官】小宗伯賜卿大夫士爵則儋【賜猶命也儋之如命諸侯之儀春秋文元年天王使毛伯來錫公命傳曰錫者何賜也命者何加我服也同上】五十而爵【賢者命為大夫王制】五十命為大夫服官政【統一官之政也內則】天子之田方千里公侯田方百里伯七十里子男五十里不能五十里者不合於天子附於諸侯曰附庸天子之三公之田視公侯天子之卿視伯天子之大夫視子男天子之元士視附庸【註見封建】制農田百畝百畝之分上農夫食九人其次食八人其次食七人其次食六人下農夫食五人庶人在官者其祿以是為差也【農夫皆受田於公田肥瘠有五等收入不同也庶人在官謂府史之屬官長所除不命於天子國君者分或為糞】諸侯之下士視上農夫祿足以代其耕也中士倍下士上士倍中士下大夫倍上士卿四大夫祿君十卿祿次國之卿三大夫祿君十卿祿小國之卿倍大夫祿君十卿祿【此班祿尊卑之差王制】諸侯之下士祿食九人中士食十八人上士食三十六人下大夫食七十二人卿食二百八十八人君食二千八百八十人次國之卿食二百一十六人君食二千一百六十人小國之卿食一百四十四人君食一千四百四十人次國之卿命於其君者如小國之卿天子之大夫為三監監於諸侯之國者其祿視諸侯之卿其爵視次國之君其祿取之於方伯之地方伯為朝天子皆有湯沐之邑於天子之縣內視元士【給齊戒自潔清之用浴用湯沐用潘】諸侯世子世國【象賢也】大夫不世爵使以德爵以功【謂縣內及列國諸侯為天子大夫者不世爵而世祿辟賢也】未賜爵視天子之元士以君其國【列國及縣內之國也】諸侯之大夫不世爵祿【同上】內史王制祿則贊為之以方出之【贊為之為之辭也鄭司農云以方出之以方版書而出之上農夫食九人其次食八人其次食七人其次食六人下農夫食五人庶人在官者其祿以是為差諸侯之下士視上農夫祿足以代其耕也中士倍下士上士倍中士下大夫倍上士卿四大夫祿君十卿祿杜子春云方直謂今時牘也玄謂王制曰王之三公視公侯卿視伯大夫視子男元士視附庸】賞賜亦如之【春官】司祿【闕地官】季秋收祿秩之不當者【祿秩之不當恩所加增也月令】大宰以八柄詔王馭羣臣一曰爵以馭其貴二曰祿以馭其富【詳見下章】司士以德詔爵以功詔祿以能詔事以久奠食凡邦國三歲則稽士任而進退其爵祿【同上】任官然後爵之位定然後祿之【同上】

右爵祿北宮錡問曰周室班爵祿也如之何【北宮姓錡名衛人班列也】孟子曰其詳不可得聞也諸侯惡其害已也而皆去其籍然而軻也嘗聞其略也【當時諸侯兼并僭竊故惡周制妨害已之所為也】天子一位公一位侯一位伯一位子男同一位凡五等也君一位卿一位大夫一位上士一位中士一位下士一位凡六等【此班爵之制也五等通於天下六等施於國中】天子之制地方千里公侯皆方百里伯七十里子男五十里凡四等不能五十里不

達於天子附於諸侯曰附庸【此以下班祿之制也不能猶不足也小國之地不足五十里者不能自達於天子因大國以姓名通謂之附庸若春秋邾儀父之類是也】天子之卿受地視侯大夫受地視伯元士受地視子男【視比也徐氏曰王畿之內亦制都鄙受地也元士上士也】大國地方百里君十卿祿卿祿四大夫大夫倍上士上士倍中士中士倍下士下士與庶人在官者同祿祿足以代其耕也【十十倍之也四四倍之也倍加一倍也徐氏曰大國君田三萬二千畝其入可食二千八百八十人卿田三千二百畝可食二百八十八人大夫田八百畝可食七十二人上士田四百畝可食三十六人中士田二百畝可食十八人下士與庶人在官者田百畝可食九人至五人庶人在官府史胥徒也愚按君以下所食之祿皆助法之公田藉農夫之力以耕而收其租土之無田與庶人在官者則但受祿於官如田之入而已】次國地方七十里君十卿祿卿祿三大夫大夫倍上士上士倍中士中士倍下士下士與庶人在官者同祿祿足以代其耕也【三謂三倍之也徐氏曰次國君田二萬四千畝可食二千一百六十人卿田二千四百畝可食二百十六人】小國地方五十里君十卿祿卿祿二大夫大夫倍上士上士倍中士中士倍下士下士與庶人在官者同祿祿足以代其耕也【二即倍也徐氏曰小國君田一萬六千畝可食千四百四十人卿田一千六百畝可食百四十四人】耕者之所獲一夫百畝百畝之糞上農夫食九人上次食八人中食七人中次食六人下食五人庶人在官者其祿以是差【獲得也一夫一婦佃田百畝加之以糞糞多而力勤者為上農其所收可供九人其次用力不齊故有此五等庶人在官者其受祿不同亦有此五等也愚按此章之說與周禮王制不同蓋不可考闕之可也程子曰孟子之時去先王未遠載籍未經秦火然而班爵祿之制已不聞其詳今之禮書皆掇拾於煨燼之餘而多出於漢儒一時之傳會奈何欲盡信而句為之解乎然則其事固不可一二追復矣孟子】
爵人於朝與士共之【必共之者所以審慎之也王制】
古者於禘也發爵賜服順陽氣也【言爵命屬陽】

【祭統】古者明君爵有德而祿有功必賜爵祿於大廟示不敢專也故祭之日一獻君降立於阼階之南南鄉所命北面史由君右執策命之再拜稽首受書以歸而舍奠於其廟此爵賞之施也【一獻一醑尸也舍當為釋聲之誤也非時而祭曰奠同上】
祿爵慶賞成諸宗廟所以示順也【成諸宗廟於宗廟命之祭統有十倫六曰見爵賞之施焉祭義】天子者爵稱也爵所以稱天子何王者父天母地為天之子也帝王之德有優劣所以俱稱天子者何以其俱命於天而主治五千里內也所以名之為公侯者何公者通也公正無私之意也侯者候也候逆順也春秋傳曰王者之後稱公其餘大國稱侯小國稱伯子男也伯者百也子者孳也孳孳無已也男者任也公卿大夫者何謂也公之為言公正無私也卿之為言章善明理也大夫之為言扶進人者也故傳曰進賢達能謂之大夫也士者事也任事之稱也故傳曰通古今辨然否謂之事天子之士獨稱元士何士賤不得體君之尊故加元以別諸侯之士也王者太子亦稱士何舉從下升以為人無生得貴者莫不由士起禮士冠經天子之元子士也爵人於朝者示不私人以官與眾共之也大夫功成未封而死不得追爵賜之者以其未當股肱也春秋穀梁傳曰追賜死者非禮也世子三年喪畢必上受爵命於天子何明爵士者天子之有也臣無自爵之義童子當受父爵命使大夫就其國命之明王者不與童子為禮也【白虎通】文王之治岐也仕者世祿【世祿者先王之世仕者之子孫皆教之教之而成材則官之如不足用亦使之不失其祿蓋其先世嘗有功德於民故報之如此忠厚之至也】

孟子】武王克殷庶士倍祿【倍祿復其紂時薄者也 樂記】秦后子來仕【避景公仕于晉】其車千乘【從車千乘】楚公子干來仕其車五乘【子干恭王之庶子公子比也魯昭元年楚公子圍殺郟敖子干奔晉】叔向為太傅實賦祿韓宣子問二公子之祿焉【宣子韓起也代趙文子為政】對曰大國之卿一旅之田【公之孤四命五百人為旅為田五百頃】上大夫一卒之田【上大夫一命百人為卒為田百頃】夫二公子者上大夫也皆一卒可也宣子曰秦公子富若之何其鈞之也【鈞同也】對曰夫爵以建事【事職事也】祿以食爵【隨爵尊卑】德以賦之功庸以稱之【稱副也】若何其以富賦祿也夫絳之富商韋藩木槌以過於朝【韋藩韋蔽前後木槌木檐也】唯其功庸少也【言無功庸雖富不得服其尊服過於朝無位爵故也】而能金玉其車文錯其服【文文織錯錯鏤也言富商之財足以金玉其車文錯其服以其無位爵故不得為耳則止為韋藩木槌是也】能行諸侯之賄【言其財賄足以交於諸侯】而無尋尺之祿無大績於民故也【績功也八尺曰尋】乃均其祿【國語晉語 左氏傳叔向曰底祿以德德鈞以年年同以尊公子以國不聞以富】

三載考績三考黜陟幽明庶績咸熙【考核實也三考九載也九載則人之賢否事之得失可見於是陟其明而黜其幽賞罰明信人人力於事功此所以庶績咸熙也此言舜命二十二人之後立此考績黜陟之法以時舉行而卒言其效如此也

舜典】建官惟賢位事惟能【建官惟賢不肖者不得進位事惟能不才者不能任 武成】大宰以八灋治官府一曰官屬以舉邦治二曰官職以辨邦治三曰官聯以會官治四曰官常以聽官治五曰官成以經邦治六曰官灋以正邦治七曰官刑以糾邦治八曰官計以弊邦治【百官所居曰府弊斷也鄭司農云官屬謂六官其屬各六十若今博士大史大宰大祝大樂屬大常也小宰職曰以官府之六屬舉邦治一曰天官其屬六十是也官職謂六官之職小宰職曰以官府之六職辨邦治官聯謂國有大事一官不能獨供則六官共舉之聯讀為連古書連作聯聯謂連事通職相佐助也小宰職曰以官府之六聯合邦治官常謂各自領其官之常職非連事通職所共也官成謂官府之成事品式也小宰職曰以官府之八成經邦治官法謂職所主之法度官職主祭祀朝覲會同賓客者則皆自有其法度小宰職曰以法掌祭祀朝覲會同賓客之戒其官刑謂司刑所掌墨臯劓臯宮臯剕臯殺臯也官計謂三年則大計羣吏之治而誅賞之玄謂官刑司寇之職五刑其四曰官刑上能糾職官計謂小宰之六計所以斷羣吏之治】以八則治都鄙二曰灋則以馭其官三曰廢置以馭其吏四曰祿位以馭其士【法則其官之制度廢猶退也退其不能者舉賢而置之祿若今月奉也位爵次也鄭司農云士謂學士 詳見封建】以八柄詔王馭羣臣一曰爵以馭其貴二曰祿以馭其富三曰予以馭其幸四曰置以馭其行五曰生以馭其福六曰奪以馭其貧七曰廢以馭其罪八曰誅以馭其過【柄所秉執以起事者也詔告也助也爵謂公侯伯子男卿大夫士也詩云誨爾序爵言教王以賢否之第次也班祿所以富臣下書曰凡厥正人既富方穀幸謂言行偶合於善則有以賜予之以勸後也生猶養也賢臣之老者王有以養之成王封伯禽于魯曰生以養周公死以為周公後是也五福一曰壽奪謂臣有大罪沒入家財者六極四曰貧廢猶放也舜殛鯀于羽山是也誅責讓也曲禮曰齒路馬有誅凡言馭者所以馭之內之于善 天官】小宰以官府之六叙正羣吏一曰以叙正其位二曰以叙進其治三曰以叙作其事四曰以叙制其食五曰以叙受其會六曰以叙聽其情【叙秩次也謂先尊後卑也治功狀也食祿之多少情爭訟之辭也】以官府之六屬舉邦治一曰天官其屬六十掌邦治大事則從其長小事則專達二曰地官其屬

六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十掌邦事大事則從其長小事則專達【大事從其長若庖人內外饗與膳夫共王之食小事專達若宮人掌舍各為一官六官之屬三百六十象天地四時日月星辰之度數天道備焉前此者成王作周官其志有述天授位之義故周公設官分職以法之】以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物【懷亦安也賓客來共其委積所以安之聚百物者司馬主九畿職方制其貢各以其所有】以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯【鄭司農云大祭祀太宰贊玉幣司徒奉牛牲宗伯視滌濯涖玉鬯省牲鑊奉玉盥司馬羞魚牲奉馬牲司寇奉明水火大喪大宰贊贈玉含玉司徒帥六卿之衆庶屬其六糾宗伯為上相司馬平士大夫司寇前王此所謂官聯杜子春弛讀為施玄謂荒政弛力役及國中貴者賢者服公事者老者疾者皆舍不以力役之事奉牲者其司空奉豕與】以聽官府之六計弊羣吏之治一曰廉善二曰廉能三曰廉敬四曰廉正五曰廉灋六曰廉辨【聽平治也平治官府之計有六事弊斷也既斷以六事又以廉為本善善其事有辭譽也能政令行也敬不解于位也正行無傾邪也法守法不失也辨辨然不疑惑也杜子春云廉辨或為廉端】以灋掌祭祀朝覲會同賓客之戒具軍旅田役喪荒亦如之【法謂其禮法也戒具戒官有事者所當共】七事者令百官府共其財用治其施舍聽其治訟【七事謂先四如之者三也施舍不給役者七事故書為小事杜子春云當為七事書亦為七事 同上】宰夫掌百官府之徵令辨其八職一曰正掌官灋以治要二曰師掌官成以治凡三曰司掌官灋以治目四曰旅掌官常以治數五曰府掌官契以治藏六曰史掌官書以贊治七曰胥掌官叙以治叙八曰徒掌官命以徵令【別異諸官之八職以備王之徵召所為正辟於治官則冢宰也治要若歲計也師辟小宰宰夫也治凡若月計也司辟上士中士治目若今日計也旅辟下士也治數每事多少異也治藏藏文書及器物贊治若今起文書草也治叙次序官中如今侍曹伍伯傳吏朝也徵令趨走給招呼 同上】內史掌王之八枋之灋以詔王治一曰爵二曰祿三曰廢四曰置五曰殺六曰生七曰予八曰奪【大宰既以詔王內史又居中貳之 春官】御史凡數從政者【自公卿以下至胥徒凡數及其見在空闕者鄭司農讀言掌贊書數書數者經禮三百曲禮三千法度皆在玄以為不辭故改之云 同上】司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數【損益謂用功過黜陟者縣鄙鄉遂之屬故書版為班鄭司農云班書或為版版名籍】以詔王治【告王所當進退】以德詔爵以功詔祿以能詔事以久奠食【德謂賢者食稍食也賢者既爵乃祿之能者事成乃食之王制曰司馬辨論官材論進士之賢者以告於王而定其論論定然後官之任官然後爵之位定然後祿之】惟賜無常【賜多少由王不如祿食有常品】掌國中之士治凡其戒令【國中城中】凡邦國三歲則稽士任而進退其爵祿【任其所掌治 夏官】凡官民材必先論之【論謂考其德行道藝】論辨然後使之【辨謂考問】

【得其定也易曰問以辨之】任事然後爵之【爵謂正其秩次】位定然後祿之【與之以

常食王制】司馬辨論官材【辨其論觀其材觀其所長】論進士之賢者以告於王而定其論【各署其所長】論定然後官之【使之世守】任官然後爵之【命之】位定然後祿之大夫廢其事終身不仕死以士禮葬之【以不任大夫也】凡執技論力適四方贏股肱決射御【謂擐衣出其臂脛使之射御決勝負見勇力】凡執技以事上者祝史射御醫卜及百工【言技謂此七者】凡執技以事上者不貳事不移官【欲專其事亦為不德】出鄉不與士齒【賤也於其鄉中則齒親親也】仕於家者出鄉不與士齒【亦賤同上】五官致貢曰享【貢功也享獻也致其歲終之功於王謂之獻也周禮大宰歲終則令百官府各正其治受其會聽其致事而詔王廢置曲禮】司會以歲之成質於天子【司會冢宰之屬掌計要者成計要也質平也平其計要】冢宰齊戒受質【贊王受之】大樂正大司寇市三官以其成從質於天子【大樂正於周宗伯之屬市司市也於周司徒之屬從從於司會也】大司徒大司馬大司空齊戒受質百官各以其成質於三官大司徒大司馬大司空以百官之成質於天子【百官此三官之屬】百官齊戒受質【受平報也】然後休老勞農【饗養之】成歲事【斷計要也】制國用【王制】大宰歲終則令百官府各正其治受其會【正正處也會大計也】聽其致事而詔王廢置【平其事來至者之功狀而奏白王】三歲則大計羣吏之治而誅賞之【事久則聽之大無功不徒廢必罪之大有功不徒置必賞之鄭司農云三載考績天官】小宰月終則以官府之叙受羣吏之要【主每月之小計】贊冢宰受歲會歲終則令羣吏致事【使齎歲盡文書來至若今上計】正歲帥治官之屬而觀治象之灋徇以木鐸曰不用灋者國有常刑【正歲謂夏之正月得四時之正以出教令者審也古者將有新令必奮木鐸以警衆使明聽也木鐸木舌也文事奮木鐸武事奮金鐸】乃退以宮刑憲禁於王宮【憲謂表縣之若今新有法令云】令於百官府曰各修乃職考乃灋待乃事以聽王命其有不共則國有大刑【乃猶女也同上】宰夫歲終則令羣吏正歲會月終則令正月要旬終則令正日成而以攷其治治不以時舉者以告而誅之【歲終自周季冬正猶定也旬十日也治不時舉者謂違時令失期會】正歲則以灋警戒羣吏令修宮中之職事【警勅戒之言鄭司農云正歲夏之正月以法戒勅羣吏】書其能者與其良者而以告於上【良猶善也上謂小宰大宰也鄭司農云若今時舉孝廉賢良方正茂才異等同上】司會掌邦之六典八灋八則之貳以逆邦國都鄙官府之治【逆受而鉤考之】掌國之官府郊野縣都之百物財用凡在書契版圖者之貳以逆羣吏之治而聽其會計【郊四郊去國百里野甸稍也甸去國二百里稍三百里縣四百里都五百里書謂簿書契其最凡也版戶籍也圖上地形象田地廣狹】以參互考日成以月要考月成以歲會攷歲成【參互謂司書之要貳與職內之入職歲之出故書互為巨杜子春讀為參互】以周知四國之治以詔王及冢宰廢置【周猶徧也言四國者本逆邦國之治亦鉤考以告同上】大司徒歲終則令教官正治而致事【歲終自周季冬也教官其屬六十正治明處其文書致事上其計薄】正歲今於教官曰各共爾職修乃事以聽王命其有不正則國有常刑【正歲夏正月朔日地官】小司徒歲終則考其屬官之治成而誅賞【治成治事之計】令羣吏正要會而致事正歲則帥其屬而觀教象之灋徇以木鐸曰不用灋者國有常刑令羣吏憲禁令修灋糾職以侍邦治【憲表縣之同上】鄉師歲終則考六鄉之治以詔廢置若國大比則考教察辭稽器展事以詔誅賞【考教視賢能以知道藝與不察辭視吏言事知其情實不展猶整具

同上】鄉大夫歲終則命六鄉之吏皆會政致事【會計也致事言其歲盡文書

同上】州長歲終則會其州之政令【同上】黨正歲終則會其黨政帥其吏而致事族師歲

終則會政致事【同上】遂大夫令為邑者歲終則會政致事【不言其遂之吏而言為邑者容公邑及公卿大夫王子弟之采邑政令戒禁遂大夫亦施焉】三歲大比則帥其吏而興眡明其有功者屬其地治者【興眡舉民賢者能者如六鄉之為也屬猶聚也又因舉吏治有功者而聚勅其餘以職事】凡為邑者以四達戒其功事而誅賞廢興之【四達者治民之事大通者有四夫家衆寡也六畜車輦也稼穡耕耨也旗鼓兵革也 同上】鄙師歲終則會其鄙之政而致事【同上】天府凡官府鄉州及都鄙之治中受而藏之以詔王察羣吏之治【察察其當黜陟者鄭司農云治中謂其治職簿書之要 春官】

內史執國灋及國令之貳以考政事以逆會計【國法六典八法八則 同上】

小司寇乃命其屬入會乃致事【得其屬之計乃令致之於王 秋官】

士師歲終則令正要會【定計簿同上】仲冬可以罷官之無事【謂先時權所建者

月令】右任官 帝曰咨汝二十有二人欽哉惟時亮天功【二十二人四岳九官十二牧也周官言內有百揆四岳外有州牧侯伯蓋百揆者所以統庶官而四岳者所以統十二牧也既分命之又總告之使之各敬其職以相天事也曾氏曰舜命九官新命者六人命伯禹命伯夷咨四岳而命者也命垂命益泛咨而命者也命夔命龍因人之讓不咨而命者也夫知道而後可宅百揆知禮而後可典三禮知道知禮非人人所能也故必咨於四岳若予工若上下草木鳥獸則非此之比故泛咨而已禮樂命令其體雖不若百揆之大然其事理精微亦非百工庶物之可比伯夷既以四岳之舉而當秩宗之任則其所讓之人必其中於典樂納言之選可知故不咨而命之也若稷契皋陶之不咨者申命其舊職而已又按此以平水土若百工各為一官而周制同領於司空此以土一官兼兵刑之事而周禮分為夏秋兩官蓋帝王之法隨時制宜所謂損益可知者以此 舜典】昔高陽氏有才子八人【高陽帝顓頊之號八人其苗裔】蒼舒隤敷檮戴大臨彤降庭堅仲容叔達【此即垂益禹皋陶之倫庭堅即皋陶字】齊聖廣淵明允篤誠天下之民謂之八愷【齊中也淵深也允信也篤厚也愷和也】高辛氏有才子八人【高辛帝嚳之號八人亦其苗裔】伯翳仲堪叔獻季仲伯虎仲熊叔豹季貍【此即稷契朱虎熊羆之倫】忠肅共懿宣慈惠和天下之民謂之八元【肅敬也懿美也宣徧也元善也】此十六族也世濟其美不隕其名【濟成也隕墜也】以至於堯堯不能舉舜臣堯舉八愷使主后土【后土地官禹作司空平水土即土地之官】以揆百事莫不時序地平天成【揆度也成亦平也】舉八元使布五教於四方【契作司徒五教在寬故知契在八元之中】父義母慈兄友弟共子孝內平外成【內諸夏外夷狄 文十八年左氏傳】皋陶曰都亦行有九德亦言其人有德乃言曰載采采禹曰何皋陶曰寬而栗柔而立愿而恭亂而敬擾而毅直而溫簡而廉剛而塞彊而義彰厥有常吉哉【亦總也亦行有九德者總言德之見於行者其凡有九也亦言其人有德者總言其人之有德也載行采事也總言其人有德必言其行某事某事為可信驗也禹曰何者問其九德之目也寬而栗者寬弘而莊栗也柔而立者柔順而植立也愿而恭者謹愿而恭恪也亂治也亂而敬者有治才而敬畏也擾馴也擾而毅者馴擾而果毅也直而溫者徑直而溫和也簡而廉者簡易而廉隅也剛而塞者剛健而篤實也彊而義者彊勇而好義也而轉語辭也正言而反應者所以明其德之不偏皆指其成德之自然非以彼濟此之謂彰著也成德著之於身而又始終有常其吉士哉】日宣三德夙夜浚明有家日嚴祗敬六德亮采有邦翕受敷施九德咸事俊乂在官百僚師師百工惟時撫于五辰庶績其凝【宣明也三德六德者九德之中有其三有其六也浚治也亮亦明也有家大夫也有邦諸侯也浚明亮采皆言家邦政事明治之義氣象則有大小之不同三德而為大夫六德而為諸侯

以德之多寡職之大小槩言之也夫九德有其三必日宣而充廣之而使之益以著九德有其六尤必日嚴而祇敬之而使之益以謹也翕合也德之多寡雖不同人君惟能合而受之布而用之如此則九德之人咸事其事大而千人之俊小而百人之又皆在官使以天下之才任天下之治唐虞之朝下無遺才而上無廢事者良以此也師師相師法也言百僚皆相師法而百工皆及時以趨事也百僚百工皆謂百官言其人之相師則曰百僚言其人之趨事則曰百工其實一也撫順也五辰四時也木火金水旺於四時而土則寄旺於四季也禮運曰播五行於四時者是也凝成也言百工趨時而衆功皆成也 皐陶謨】 周公若曰拜手稽首告嗣天子王矣用咸告于王曰王左右常伯常任準人綴衣虎賁周公曰嗚呼休茲知恤鮮哉【周公帥羣臣進戒于王贊之曰拜手稽首告嗣天子王矣羣臣用皆進戒曰王左右之臣有收民之長曰常伯有任事之公卿曰常任有守法之有司曰準人三事之外掌服器者曰綴衣執射御者曰虎賁皆任用之所當謹者周公於是歎自言曰美矣此官然知憂恤者鮮矣言五等官職之美而知憂其得人者少也吳氏曰綴衣虎賁近臣之長也葛氏曰綴衣周禮司服之類虎賁周禮之虎賁氏也】 古之人廸惟有夏乃有室大競籲俊尊上帝迪知忱恂于九德之行乃敢教厥后曰拜手稽首后矣曰宅乃事宅乃牧宅乃準茲惟后矣謀面用丕訓德則乃宅人茲乃三宅無義民【古之人有行此道者惟有夏之君當王室大強之時而求賢以為事天之實也廸知者蹈知而非苟知也忱恂者誠信而非輕信也言夏之臣蹈知誠信于九德之行乃敢告教其君曰拜手稽首后矣云者致敬以尊其為君之名也曰宅乃事宅乃牧宅乃準茲惟后矣云者致告以叙其為君之實也茲者此也言如此而后可以為君也即皐陶與禹言九德之事謀面者謀人之面貌也言非廸知忱恂于九德之行而徒謀之面貌用以為大順于德乃宅而任之如此則三宅之人豈復有賢者乎蘇氏曰事則向所謂常任也牧則向所謂常伯也準則向所謂準人也一篇之中所論宅俊者參差不齊然大要不出此三者其餘則皆小臣百執事也】 桀德惟乃弗作往任是惟暴德罔後【夏桀惡德弗作往昔先王任用三宅而作任者乃惟暴德之人故桀以喪亡無後】 亦越成湯陟丕釐上帝之耿命乃用三有宅克即宅曰三有俊克即俊嚴惟丕式克用三宅三俊其在商邑用協于厥邑其在四方用丕式見德【亦越者繼前之辭也耿光也湯自七十里升為天子典禮命討昭著于天下所謂陟丕釐上帝之光命也三宅謂居常伯常任準人之位者三俊謂有常伯常任準人之才者克即者言湯所用三宅實能就是位而不曠其職所稱三俊實能就是德而不浮其名也三俊說者謂他日次補三宅者詳宅以位言俊以德者意其儲養待用或如說者所云也惟思式法也湯於三宅三俊嚴思而丕法之故能盡其宅俊之用而宅者得以効其職俊者得以著其才賢智奮庸登于至治其在商邑用協於厥邑近者察之詳其情未易齊畿甸之協則純之至也其在四方用丕式見德遠者及之難其德未易徧觀法之同則大之至也至純至大治道無餘蘊矣】 亦越文王武王克知三有宅心灼見三有俊心以敬事上帝立民長伯【三宅三俊文武克知灼見皆曰心者即所謂廸知忱恂而非謀面也三宅已授之位故曰克知三俊未任以事故曰灼見以是敬事上帝則天職修而上有所承以是立民長伯則體統立而下有所寄人君位天人之兩間而俯仰無忤者以是也夏之尊帝商之丕釐周之敬事其義一也長如王制所謂五國以為屬屬有長伯如王制所謂二百一十國以為州州有伯是也】 立政任人準夫牧作三事【言文武立政三宅之官也任人常任也準夫準人也牧常伯也以職言故曰事】 虎賁綴衣趣馬小尹左右攜僕百司庶府【此侍御之官也趣馬掌馬之官小尹小官之長攜僕攜持僕御之人百司若司裘司服庶府若內府大府之屬也】 大都小伯藝人表臣百司太史尹伯庶常吉士【此都邑

之官也呂氏曰大都小伯者謂大都之伯小都之伯也大都言都不言伯小伯言伯不言都互見之也藝人者卜祝巫匠執技以事上者表臣百司表外也表對裏之詞上文百司蓋內百司若內府內司服之屬所謂裏臣也此百司蓋外司若外府外司服之屬所謂表臣也太史者史官也尹伯者有司之長如庖人內饗膳夫則是數尹之伯也鐘師尹鐘磬師尹磬太師司樂則是數尹之伯也凡所謂官吏莫不在內外百司之中至于特見其名者則皆有意焉虎賁綴衣趣馬小尹左右攜僕以扈衛親近而見庶府以冗賤人所易忽而見藝人恐其或興淫巧機詐以蕩上心而見太史以奉諱惡公天下後世之是非而見尹伯以大小相維體統所係而見若大都小伯則分治郊畿不預有司之數者既條陳歷數文武之衆職而總結之曰庶常吉士庶衆也言在文武之廷無非常德吉士也】司徒司馬司空亞旅【此諸侯之官也司徒主邦教司馬主邦政司空主邦土餘見牧誓言諸侯之官莫不得人也諸侯之官獨舉此者以其名位通於天子歟】夷微盧烝三亳阪尹【此王官之監於諸侯四夷者也微盧見經亳見史三亳蒙為北亳穀熟為南亳偃師為西亳丞或以為衆或以夷名阪未詳古者險危之地封疆之守或不以封而使王官治之參錯於五服之間是之謂尹地志載王官所治非一此時舉其重者耳自諸侯三卿以降惟列官名而無他語承上庶常吉士之文以內見外也夫上自王朝內而都邑外而諸侯遠而夷狄莫不皆得人以為官使何其盛歟】文王惟克厥宅心乃克立茲常事司牧人以克俊有德【文王惟能其三宅之心能者能之也知之至信之篤之謂故能立此常任常伯用能俊有德也不言準人者因上章言文王用人而克申知三有宅心之說故略之也】文王罔攸兼于庶言庶獄庶慎惟有司之牧夫是訓用違【庶言號令也庶獄獄訟也庶慎國之禁戒儲備也有司有職主者牧夫牧人也文王不敢下侵庶職惟于有司牧夫訓勅用命及違命者而已漢孔氏曰勞於求才逸於用賢】庶獄庶慎文王罔敢知于茲【上言罔攸兼則猶知之時不兼其事耳至此罔敢知則若未嘗知有其事蓋信任之益專也上言庶言此不及者號令出於君有不容不知者故也】亦越武王率惟敕功不敢替厥義德率惟謀從容德以並受此丕丕基【率循也敕功安天下之功義德義德之人容德容德之人蓋義德者有撥亂反正之才容德者有休休樂善之量皆成德之人也周公上文言武王率循文王之功而不敢替其所用義德之人率循文王之謀而不敢違其容德之士意如虢叔閎夭散宜生太顛南宮括之徒所以輔成王業者文用之于前武任之於後故周公於君奭言五臣克昭文王受有殷命武王惟茲四人尚廸有祿正猶此叙文武用人而言並受此丕丕基也】嗚呼孺子王矣繼自今我其立政立事準人牧夫我其克灼知厥若丕乃俾亂相我受民和我庶獄庶慎時則勿有間之【我者指王而言若順也周公既述文武基業之大歎息而言曰孺子今既為王矣繼此以往王其於立政立事準人牧夫之任當能明知其所順順者其心之安也孔子曰察其所安人焉庾哉察其所順者知人之要也夫既明知其所順采正而不他然後推心而大委任之使展布四體以為治相助左右所受之民和調均齊獄慎之事而又戒其勿以小人間之使得終始其治此任人之要也民而謂之受者言民者乃受之於天受之於祖宗非成王之所自有也立政】惟周王撫萬邦巡侯甸四征弗庭綏厥兆民六服羣辟罔不承德歸于宗周董正治官【此書之本序也董督也治官凡治事之官也言成王撫臨萬國巡狩侯甸四方征討不庭之國以安天下之民六服諸侯之君無不奉承周德成王歸于鎬京督正治事之官外攘之功舉而益嚴內治之修也】王曰若昔大猷制治於未亂保邦於未危【若昔大道之世制治保邦於未亂未危之前即下文明王立政是也】曰唐虞稽古建官惟百內有百揆四岳外有州牧侯伯庶政惟和萬國咸寧夏商官倍亦克用又明王立政不惟其官惟其人【百揆無

所不總者四岳總其方岳者州牧各總其州者侯伯次州牧而總諸侯者也百揆四岳總治於內州牧侯伯總治於外內外相承體統不紊故庶政惟和而萬國咸安夏商之時世變事繁觀其會通制其繁簡官數加倍亦能用治明王立政不惟其官之多惟其得人而已】今予小子祇勤于德夙夜不逮仰惟前代時若訓迪厥官【逮及時是若順也成王祇勤于德早夜若有所不及然蓋修德者任官之本也】立太師太傅太保茲惟三公論道經邦燮理陰陽官不必備惟其人【立始辭也三公非始於此立為周家定制則始于此也賈誼曰保者保其身體傳者傳之道義師道之教訓此所謂三公也陰陽以氣言道者陰陽之理恒而不變者也易曰一陰一陽之謂道是也論者講明之謂經者經綸之謂燮理者和調之也非經綸天下之大經參天地之化育者豈足以任此責故官不必備惟其人也】少師少傅少保曰三孤貳公弘化寅亮天地弼予一人【孤特也三少雖三公之貳而非其屬官故曰孤天地以形言化者天地之用運而無迹者也易曰範圍天地之化是也弘者張而大之寅亮者敬而明之也公論道弘化公燮理陰陽孤寅亮天地公論於前孤弼於後公孤之分如此】冢宰掌邦治統百官均四海【冢大宰治也天官卿治官之長是為冢宰內統百官外均四海蓋天子之相也百官異職管攝使歸于一是之謂統四海異宜調劑使得其平是之謂均】司徒掌邦教敷五典擾兆民【擾馴也地官卿主國教化敷君臣父子夫婦長幼朋友五者之教以馴擾兆民之不順者而使之順也唐虞司徒之官固已職掌如此】宗伯掌邦禮治神人和上下【春官卿主邦禮治天神地祇人鬼之事和上下尊卑等列春官於四時之序為長故其官謂之宗伯成周合樂於禮官謂之和者蓋以樂而言也】司馬掌邦政統六師平邦國【夏官卿主戎馬之事掌國征伐統御六軍平治邦國平謂強不得陵弱衆不得暴寡而人皆得其平也軍政莫急於馬故以司馬名官何莫非政獨戎政謂之政者用以征伐而正彼之不正王政之大者也】司寇掌邦禁詰姦慝刑暴亂【秋官卿主寇賊法禁羣行攻劫曰寇詰姦慝刑強暴作亂者掌刑不曰刑而曰禁者禁於未然也呂氏曰姦慝隱而難知故謂之詰推鞠窮詰而求其情也暴亂顯而易見直刑之而已】司空掌邦土居四民時地利【冬官卿主國邦土以居士農工商四民順天時以興地利按周禮冬官則記考工之事與此不同蓋本闕冬官漢儒以考工記當之也】六卿分職各率其屬以倡九牧阜成兆民【六卿分職各率其屬官以倡九州之牧自內達之於外政治明教化洽兆民之衆莫不阜厚而化成也按周禮每卿六十屬六卿三百六十屬也呂氏曰冢宰相天子統百官則司徒以下無非冢宰所統乃均列一職而併數之為六者綱在綱中也乾坤之與六子並列於八方冢宰之與五卿並列於六職也】六年五服一朝又六年王乃時巡考制度于四岳諸侯各朝于方岳大明黜陟【五服侯甸男采衛也六年一朝會京師十二年王一巡狩時巡者猶舜之四仲巡狩也考制度者猶】

【舜之協時月正日同律度量衡等事也諸侯各朝方岳者猶舜之肆覲東后也大明黜陟者猶舜之黜陟幽明也疏數異時繁簡異制帝王之治因時損益者可見矣】王曰嗚呼凡我有官君子欽乃攸司慎乃出令令出惟行弗惟反以公滅私民其允懷【建官之體統前章既訓迪之矣此則居守官職者咸在曰凡有官君子者合尊卑小大而同訓之也反者令出不可行而壅逆之謂言敬汝所主之職謹汝所出之令令出欲其行不欲其壅逆而不行也以天下之公理滅一己之私情則令行而民莫不敬信懷服矣】學古入官議事以制政乃不迷其爾典常作之師無以利口亂厥官蓄疑敗謀怠忽荒政不學牆面莅事惟煩【學古學前代之古也制裁度也迷錯謬也典常當代之法也周家典常皆文武周公之所講畫至精至備凡莅官者

謹師之而已不可喋喋利口更改而紛亂之也積疑不決必敗其謀怠惰忽略必荒其政人而不學其猶正牆面而立必無所見而舉錯煩擾也】戒爾卿士功崇惟志業廣惟勤惟克果斷乃罔後艱【此下申戒卿士也王氏曰功以志崇業以仁廣斷以勇克此三者天下之達道也呂氏曰功者業之成也業者功之積也崇其功者存乎志廣其業者存乎勤勤由志而生志待勤而遂雖有二者當幾而不能果斷則志與勤虛用而終蹈後艱矣】位不期驕祿不期侈恭儉惟德無載爾偽作德心逸日休作偽心勞日拙【貴不與驕期而驕自至祿不與侈期而侈自至故居是位當知所以恭饗是祿當知所以儉然恭儉豈可以聲音笑貌為哉當有實得於已不可從事於偽作德則中外惟一故心逸而日休休焉作偽則揜護不暇故心勞而日著其拙矣】居寵思危罔不惟畏弗畏入畏【居寵盛則思危辱當無所不致其祇畏苟不知祇畏則入于可畏之中矣後之患失者與思危相似然思危者以寵利為憂患失者以寵利為樂所存大不同也】推賢讓能庶官乃和政靡舉能其官惟爾之能稱匪其人惟爾不任【賢有德者也能有才者也王氏曰道二義利而已推賢讓能所以為義大臣出于義則莫不出於義此庶官所以不爭而和蔽賢害能所以為利大臣出於利則莫不出於利此庶官所以爭而不和庶官不和則政必雜亂而不理矣稱亦舉也所舉之人能修其官是亦爾之所能舉非其人是亦爾不勝任古者大臣以人事君其責如此】王曰嗚呼三事暨大夫敬爾百官亂爾有政以佑乃辟永康兆民萬邦惟無斁【三事即立政三事也亂治也篇終歎息上自三事下至大夫而申戒勅之也其不及公孤者公孤德尊位隆非有待於戒勅也周官按此篇與今周禮不同如三公三孤周禮皆不載或謂公孤兼官無正職故不載然三公論道經邦三孤貳公弘化非職乎職任之大無踰此矣或又謂師氏即太師保氏即太保然以師保之尊而反屬司徒之職亦無是理也又此言六年五服一朝而周禮六服諸侯有一歲一見者二歲一見者三歲一見者亦與此不合是固可疑然周禮非聖人不能作也意周公方條治事之官而未及師保之職所謂未及者鄭重而未及言之也書未成而公亡其間法制有未施用故與此異而冬官亦缺要之周禮首末未備周公未成之書也惜哉讀書者參互而考之則周公經制可得而論矣】王若曰伯冏惟予弗克于德嗣先人宅丕后忱惕惟厲中夜以興思免厥愆【伯冏臣名穆王言我不能于德繼前人居大君之位恐懼危厲中夜以興思所以免其咎過】昔在文武聰明齊聖小大之臣克懷忠良其侍御僕從罔匪正人以旦夕承弼厥辟出入起居罔有不欽發號施令罔有不臧下民祇若萬邦咸休【侍給侍左右者御車御之官僕從太僕羣僕凡從王者承承順之謂弼正救之謂雖文武之君聰明齊聖小大之臣咸懷忠良固無待於侍御僕從之承弼者然其左右奔走皆得正人則承順正救亦豈小補哉】惟予一人無良實賴左右前後有位之士匡其不及繩愆糾謬格其非心俾克紹先烈【無良言其質之不善也匡輔助也繩直糾正也非心非僻之心也先烈文武也】今予命汝作大正正于羣僕侍御之臣懋乃后德交修不逮【大正太僕正也周禮太僕下大夫也羣僕謂祭僕隸僕戎僕齊僕之類穆王欲伯冏正其羣僕侍御之臣以勉進君德而交修其所不及或曰周禮下大夫不得為正漢孔氏以為太御中大夫蓋周禮太御最長卞又有羣僕與此所謂正于羣僕者合且與君同車最為親近也】慎簡乃僚無以巧言令色便辟側媚其惟吉士【巧好令善也好其言善其色外飾而無質實者也便者順人之所欲辟者避人之所惡側者姦邪媚者諛說小人也吉士君子也言當謹擇汝之僚佐無任小人而惟用君子也又按此言慎簡乃僚則成周之時凡為官長者皆得自舉其屬不特辟除府史胥徒而已】僕臣正厥后克正僕臣諛厥后自聖后德惟臣不德惟臣【自聖自以為聖也僕臣之賢否係君德之輕重如此呂氏曰自古小人之敗君德

為昏為虐為侈為縱曷其有極至於自聖猶若淺之為害穆王獨以是蔽之者蓋小人之蠱其君必使之虛美熏心傲然自聖則謂人莫已若而欲予言莫之違然後法家拂士日遠而快意肆情之事亦莫或齟齬其間自聖之證既見而百疾從之昏虐侈縱皆其枝葉而不足論也】爾無昵于憊人充耳目之官迪上以非先王之典【汝無比近小人充我耳目之官導君上以非先王之典蓋穆王自量其執德未固恐左右以異端進而蕩其心也】非人其吉惟貨其吉若時瘝厥官惟爾大弗克祗厥辟惟予汝辜【戒其以貨賄任羣僕也言不于其人之善而惟以貨賄為善則是曠厥官汝大不能敬其君而我亦汝罪矣】王曰嗚呼欽哉永弼乃后于彝憲【彝憲常法也呂氏曰穆王卒章之命望於伯冏者深且長矣此心不繼造父為御周遊天下將必有車轍馬跡導其侈者果出於僕御之間抑不知伯冏猶在職乎否也穆王豫知所戒憂思深長猶不免躬自蹈之人心操捨之無常可懼哉呂氏曰陪僕御之臣後世視為賤品而不之擇者曾不知人主朝夕與俱氣體移養常必由之潛消默奪於冥冥之中而明爭顯諫於昭昭之際抑末矣白周公作立政而歎綴衣虎賁知恤者鮮則君德之所繫前此知之者亦罕矣周公表而出之其選始重穆王之用太僕正特作命書至與大司徒略等其知本哉伯冏】官盛任使所以勸大臣也忠信重祿所以勸士也【官盛任使謂官屬衆盛足任使令也蓋大臣不當親細事故所以優之者如此忠信重祿謂待之誠而養之厚蓋以身體之而知其所賴乎上者如此也中庸】葵丘之會四命曰士無世官官事無攝取士必得無專殺大夫【士世祿而不世官恐其未必賢也官事無攝當廣求賢才以充之不可以闕人廢事也取士必得必得其人也無專殺大夫有罪則請命于天子而後殺之也孟子】尹氏卒尹氏者何天子之大夫也其稱尹氏何貶曷為貶譏世卿【世卿者父死子繼也貶去名著氏者起其世也若曰世世尹氏也】世卿非禮也【禮公卿大夫士皆選賢而用之卿大夫任重職大不當世為其秉政久恩德廣小人居之必奪君之威權故尹氏世立王子朝齊崔氏世弑其君光君子疾其末則正其本見譏于卒者亦不可造次無故驅逐必因其過卒絕之明君案見勞授賞則衆譽不能進無功案見惡行誅則衆讒不能退無罪隱三年公羊傳】齊崔氏出奔衛稱崔氏譏世卿世卿非禮也【復見譏者嫌尹氏王者大夫職重不當世諸侯大夫任輕可世也因齊大國禍著故就可以為法戒明王者尊莫大於周室彊莫大於齊國世卿猶能危之宣十年公羊傳】晉悼公即位使魏相士魴魏頡趙武為卿【相魏錡子魴士會子頡魏顆子武趙朔子此四人其父祖皆有勞於晉國】荀家荀會欒黶韓無忌為公族大夫使訓卿之子弟共儉孝弟【無忌韓厥子】使士渥濁為大傅使修范武子之法【渥濁士貞于武子為景公大傅】右行辛為司空使修士蒍之法【辛將右行因以為氏士蒍獻公司空也】弁糾御戎校正屬馬【弁糾欒糾也校正主馬官】使訓諸御知義【戎士尚節義】荀賓為右司士屬焉【司士車右之官】使訓勇力之士時使【勇力皆車右也勇力多不順命故訓之以供時之使】卿無共御立軍尉以攝之【省卿戎御令軍尉攝御而已】祁奚為中軍尉羊舌職佐之魏絳為司馬【魏犢子也】張老為候奄鐸遏寇為上軍尉籍偃為之司馬【偃籍談父為上軍司馬】使訓卒乘親以聽命【相親以聽上命】程鄭為乘馬御六驕屬焉使訓羣驕知禮【程鄭荀氏別族乘馬御乘車之僕也六驕六閑之驕周禮諸侯有六閑馬乘車尚禮容故訓羣驕使知禮】凡六官之長皆民譽也【大國三卿晉時置六卿為軍帥故總舉六官則知羣官無非其人】舉不失職官不易方【官守其業無相踰易】爵不踰德【量德授爵】師不陵正旅不偪帥【正軍將命卿也師二千五百人之帥也旅五百人之帥也言上下有禮不相陵偪】民無謗言所以復霸也【此以上通言悼公所行未必皆在即位之年成十八年

左氏傳】楚公子午為令尹【代子囊】公子罷戎為右尹蒍子馮為大司馬【子馮叔敖從子】公子囊師為右司馬公子成為左司馬屈到為莫敖【屈到屈蕩子】公子追舒為箴尹【追舒莊王子子南】屈蕩為連尹養由基為宮廄尹以靖國人君子謂楚於是乎能官人官人國之急也能官人則民無覬覦心【無覬覦以求幸】詩云嗟我懷人寘彼周行能官人也【詩周南也寘置也行列也周徧也詩人嗟嘆言我思得賢人置之徧于列位是后妃之志以官人為急】王及公侯伯子男甸采衛大夫各居其列所謂周行也【言自王以下諸侯大夫各任其職則是詩人周行之志也甸采衛五服之名也天子所居千里曰圻其外曰侯服次曰甸服次曰男服次曰采服次曰衛服五百里為一服不言侯男略舉也 襄十五年左右氏傳】

禮書綱目卷五十八

卷五十九

欽定四庫全書

禮書綱目卷五十九 婺源江永撰

封建 通禮八

補

五百里甸服【規方千里之內謂之甸服為天子服治田去王城面五百里】百里賦納總【甸服內之百里近王城者禾稔曰總入之供飼國馬】二百里納銍【銍刈謂禾穗】三百里納秸服【秸稔也服稔役】四百里粟五百里米【所納精者少蠹者多】五百里侯服【甸服外之五百里侯也斥而服事】百里采【侯服內之百里供王事而已不主一】二百里男邦【男任也仕王者事】三百里諸侯【三百里同為王者斥故合三為一名】五百里綏服【綏安也侯服外之五百里安服王者政教】三百里揆文教【揆度也度王者文教而行之三百里皆同】二百里奮武衛【文教外之二百里奮武衛天子所以安】五百里要服【綏服外之五百里要束以文教】三百里夷【守平常之教事王者而已】二百里蔡【蔡法也法三百里而差簡】五百里荒服【要服外之五百里言荒又簡略】三百里蠻【以文德蠻來之不制以法】二百里流【流移也言政教隨其俗凡五服相距為方五千里】東漸于海西被于流沙朔南暨聲教【漸入也被及也此言五服之外皆與王者聲教而朝見】訖于四海【禹貢】千里之內曰甸【服治田出穀稅】千里之外曰采【九州之內地取其美物以當穀稅】曰流【謂九州之外也夷狄流移或貢或不貢禹貢荒服之外三百里蠻二百里流王制】方千里之內為比服方二千里之內為要服方三千里之內為荒服【此服名因於殷非周制也周書王會解】大司馬以九畿之籍施邦國之政職方千里曰國畿其外方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰藩畿【畿猶限也自王城以外五千里為界有分限者九籍其禮差之書也政職所共王政之職謂賦稅也故書畿為近鄭司農云近當言畿春秋傳曰天子一畿列國一同詩殷頌曰邦畿千里維民所止夏官】職方氏乃辨九服之邦國方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰藩服【服服事天子也詩云侯服于周同上】邦畿方千里其外方五百里謂之侯服又其外方五百里謂之甸服又其外方五百里謂之男服又其外方五百里謂之采服又其外方五百里謂之衛服又其外方五百里謂之要服【要服蠻服也此六服去王城三千五百里相距七千里公侯伯子男封焉】九州之外謂之蕃國【九州之外夷服鎮服蕃服也秋官大行人】

右畿服之制 祭公謀父曰先王之制邦內甸服【邦內謂天子畿內千里之地商頌曰邦畿千里維民所止王制曰千里之內曰甸京邑在其中故夏書曰五百里甸服則古今同矣甸王田也服服其職業也自商以前并畿內為五服武王克殷周公致太平因禹所弼除畿內更制天下為九服千里之內謂之王畿王畿之外曰侯服侯服之外曰甸服今謀父諫穆王稱先王之制猶以王畿為甸服者甸古名世俗所習也故周襄王謂晉文公曰昔我先王之有天下也規方千里以為甸服是也周禮亦以蠻服為要服足以相況也】邦外侯服【邦外邦畿之外也方五百里之地謂之侯服侯服侯圻也言諸侯之近者歲一來見也】侯衛賓服【此總言之也侯侯圻也衛衛圻也言自侯圻至衛圻其間凡五圻圻五百里五五二千五百里中國之界也謂之賓服常以服貢賓見於王也五圻者侯圻之外曰甸圻甸圻之外曰男圻男圻之外曰采圻采圻之外曰衛圻周書康誥曰侯甸男采衛是也凡此服數諸家之說皆紛錯不同唯賈君近之】蠻夷要服【蠻蠻圻也夷夷圻也周禮衛圻之外曰蠻圻去王城三千五百里九州之界也夷圻去王城四千里周禮行人職曰衛圻之外謂之要服此言蠻夷要服則夷圻朝貢或與蠻圻同也要者要結好信而服從也】戎狄荒服【戎狄去王城四千五百里至五千里也四千五百里為鎮圻五千里為蕃圻在九州之外荒裔之地與戎狄同俗故謂之荒荒忽無常之言也】甸服者祭【供日祭也此采地之君其見無數】侯服者祀【供月祀也堯舜及周侯服皆歲見】賓服者享【供時享也享獻也周禮甸圻二歲而見男圻三歲而見采圻四歲而見衛圻五歲而見其見必以所貢助祭於廟孝經所謂四海之內各以其職來祭者是也】要服者貢【供歲貢也要服六歲一見也】荒服者王【王王事天子也周禮九州之外謂之蕃國世一見各以其所貴寶為贄故詩云自彼氐羌莫敢不來王國語周語】襄王曰昔我先王之有天下也規方千里以為甸服【規規盡而有之】以供上帝山川百神之祀【以其職貢供王祭也上帝天神五帝也山川五嶽河海也百神丘陵墳衍之神也】以備百姓兆民之用以待不庭不虞之患【百姓百官有世功者用財用也庭直也虞度也不直猶不道也不度不億度而至之患】其餘以均分公侯伯子男【其餘甸服之外地也均平也周禮公之地方五百里侯四百里伯三百里子二百里男百里】使各有寧宇【寧安也宇居也同上】

天子之田方千里【象日月之大亦取略同也此謂縣內以祿公卿大夫元士】公侯田方百里伯七十里子男五十里不能五十里者不合於天子附於諸侯曰附庸天子之三公之田視公侯天子之卿視伯天子之大夫視子男天子之元士視附庸【皆象星辰之大小也不合謂不朝會也小城曰附庸附庸者以國事附於大國未能以其名通也視猶比也元善也善士謂命士也此地殷所因夏爵三等之制也殷有鬼侯梅伯則殷爵三等者公侯伯也周武王初定天下更立五等之爵增以子男而猶因殷之地以九州之界尚狹也周公攝政致太平斥大九州之界制禮成武王之意封王者之後為公及有功之諸侯大者地方五百里其次侯四百里其次伯三百里其次子二百里其次男百里所因殷之諸侯亦以功黜陟之其不合者皆益之地為百里焉是以周世有爵尊而國小爵卑而國大者唯天子畿內千里不增以祿羣臣不主為治民王制】凡四海之內九州州方千里州建百里之國三十七十里之國六十五十里之國百有二十凡二百一十國名山大澤不以封其餘以為附庸閒田八州州二百一十國【建立也立大國三十三公也立次國六十十六卿也立小國百二十二十二小卿也名山大澤不以封者與民同財不得障管亦賦稅之而已此大界方三千里三三而九方千里者九也其一為縣內餘八各立一州此殷制也周公制禮九州大界方七千里七七四十九方千里者四

十有九也其一為畿內餘四十八八州各有方千里者六設法一州封地方五百里者不過四謂之大國又封方四百里者不過六又封方三百里者不過十一謂之次國又封方二百里者不過二十五及餘方百里者謂之小國盈上四等之數并四十九一州二百一十國則餘方百里者百六十四也凡處地方千里者五方百里者五十九其餘方百里者四十一附庸地也】天子之縣內方百里之國九七十里之國二十有一五十里之國六十有三凡九十三國名山大澤不以盼其餘以祿土以為閒田【縣內夏時天子所居州界名也殷曰畿詩殷頌曰邦畿千里維民所止周亦曰畿畿內大國九者三公之田三為有致仕者副之為六也其餘三待封王之子弟次國二十一者卿之田六亦為有致仕者副之為十二又三為三孤之田其餘六亦待封王之子弟小國六十三大夫之田二十七亦為有致仕者副之為五十四其餘九亦以待封王之子弟三孤之田不副者以其無職佐公論道耳雖有致仕猶可即而謀焉盼讀為班】凡九州千七百七十三國天子之元士諸侯之附庸不與【不與不在數中也春秋傳曰禹會諸侯於塗山執玉帛者萬國言執玉帛則是唯謂中國耳中國而言萬國則是諸侯之地有方百里有方七十里方五十里者禹承堯舜而然矣要服之內地方七千里乃能容之夏末既衰夷狄內侵諸侯相并土地減國數少殷湯承之更制中國方三千里之界亦分為九州而建此千七百七十三國焉周公復唐虞之舊域分其五服為九其要服之內亦方七千里而因殷諸侯之數廣其土增其禹耳孝經說曰周千八百諸侯布列五千里內此又改周之法關盛衰之中三七之間以為說也終此說之意五五二十五方千里者二十五也其一為畿內餘二十四州各有方千里者三其餘諸侯之地大小則未得而聞也】方千里者為方百里者百封方百里者三十國其餘方百里者七十又封方七十里者六十為方百里者二十九方十里者四十其餘方百里者四十方十里者六十又封方五十里者百二十為方百里者三十其餘方百里者十方十里者六十名山大澤不以封其餘以為附庸閒田諸侯之有功者取於閒田以祿之其有削地者歸之閒田天子之縣內方千里者為方百里者百封方百里者九其餘方百里者九十一又封方七十里者二十一為方百里者十方十里者二十九其餘方百里者八十方十里者七十一又封方五十里者六十三為方百里者十五方十里者七十五其餘方百里者六十四方十里者九十六【並同上】列爵惟五分土惟三【列爵惟五公侯伯子男也分土惟三公侯百里伯七十里子男五十里之三等也武成】大司徒凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一【土其地猶言度其地鄭司農云土其地但為正四方耳其食者半公所食租稅得其半耳其半皆附庸小國也屬天子參之一者亦然故魯頌曰錫之山川土田附庸奄有龜蒙遂荒大東至於海邦論語曰季氏將伐顓臾孔子曰先王以為東蒙主且在邦域之中是社稷之臣此非七十里所能容然則方五百里四百里合於魯頌論語之言諸男食者四之一適方五十里獨此與今五經家說合耳地官】凡邦國千里封公以方五百里則四公方四百里則六侯方三百里則七伯方二百里則二十五子方百里則百男以周知天下【以此率編知四海九州邦國多少之數方千里者為方百者百以方三百里之積以九約之得十一有奇云七伯者字之誤也周九州之界方七千里七七四十九方十里者四十九其一為畿內餘四十八八州各有方千里者六周公變殷湯之制雖小國地皆方百里是每事言則者設法也設法者以待有功而大其封一州之中以其千里封公則可四又以其千里封侯則可六又以其千里封伯則可十一又以其千里封子則可二十五又以其千里封男則可百公侯伯子

男亦不是過也州二百一十國以男備其數焉其餘以為附庸四海之封黜陟之功亦如之雖有大國爵稱子而已鄭司農云此制亦見大司徒職曰諸公之地方五百里諸侯之地方四百里諸伯之地方三百里諸子之地方二百里諸男之地方百里夏官職方氏】

右分封之制禹合諸侯於塗山執玉帛者萬國【諸侯執玉附庸執帛塗山在壽春東北哀公七年在傳】子產曰昔天子之地一圻【方千里】列國一同【方百里】自是以衰【衰差降】今大國多數圻矣【襄二十五年左氏傳】孟子曰天子之地方千里不千里不足以待諸侯諸侯之地方百里不百里不足以守宗廟之典籍【待諸侯謂待其朝覲聘問之禮宗廟典籍祭祀會同之常制也】周公之封於魯為方百里也地非不足而儉於百里太公之封於齊也亦為方百里也地非不足也而儉於百里【二公有大勲勞於天下而其封國不過百里儉止而不過之意也】王者立三公九卿二十七大夫足以教道照幽隱必復封諸侯何重民之至也善惡比而易知故擇賢而封之使治其民以著其德極其才上以尊天子備藩輔下以子養百姓施行其道開賢者之路謙不自專故裂土封賢因而象之象賢重民也諸侯封不過百里象雷震百里所潤雨同也七十里五十里差功德也天子所治方千里此平土三千并數邑居山川至五十里名山大澤不以封者與百姓共之不使一國獨專也山木之饒水泉之利千里相通所均有無贍其不足制土三等何因土地有高下中王者即位先封賢者憂人之急也故列土為疆非為諸侯張官設府非為卿大夫皆為民也天下太平乃封親屬者示不私也即不私封之何普天之下莫非王土率土之濱莫非王臣海內之衆已盡得使之不忍使親屬無短足之居一人使封之親親之義也【白虎通】

唐虞建官外有州牧侯伯【州牧各總其州者侯伯次州牧而總諸侯者也周官】弼成五服至於五千州十有二師外薄四海咸建五

長【五服甸侯綏要荒也言非特平治水土又因地域之遠近以輔成五服之制也五千者每服五百里五服之地東西南北相距五千里也十二師者每州立十二諸侯以為之師使之相牧以糾羣后也薄迫也九州之外迫於四海每方各建五人以為之長而統率之也聖人經理之制其詳內略外者如此益稷】千里之外設方伯五國以為屬屬有長十國以為連連有帥三十國以為卒卒有正二百一十國以為州州有伯【屬連卒州猶聚也伯帥正猶長也凡長皆因賢侯為之殷之州長曰伯虞夏及周皆曰牧】八州八伯五十六正百六十八帥三百三十六長八伯各以其屬屬於天子之老二人分天下以為左右曰二伯【老謂上公周禮曰九命作伯春秋傳曰自陝以東周公主之自陝以西召公主之】天子使其大夫為三監監於方伯之國國三人【使佐方伯領諸侯王制】天子之大夫為三監監於諸侯之國者其祿視諸侯之卿其爵視次國之君其祿取之於方伯之地方伯為朝天子皆有湯沐之邑於天子之縣內視元士【給齊戒日潔清之用浴用湯沐用潘同上】五官之長曰伯是職方其擯於天子也曰天子之吏天子同姓謂之伯父異姓謂之伯舅自稱於諸侯曰天子之老於外曰公於其國曰君九州之長入天子之國曰牧天子同姓謂之叔父異姓謂之叔舅於外曰侯於其國曰君【注見名器上篇曲禮】大宰施典於邦國而建其牧立其監【以侯伯有功德者加命作州長謂之牧所謂八命作牧者監謂公侯伯子男各監一國書曰王啓監厥亂為民天官】大司馬建牧立監以維邦國【詳見治邦國章】八命作牧【謂侯伯有功德者加命得專征伐

於諸侯鄭司農云一州之牧王之三公亦八命】

九命作伯【上公有功德者加命為二伯得征五侯九伯者鄭司農云長諸侯為方伯春官大宗伯】右牧伯之制王者必立牧方三人使窺遠牧衆也遠方之民有饑寒而不得衣食有獄訟而不平其冤失賢而不舉者入告乎天子天子於其君之朝也揖而進之曰意朕之政教有不得爾者邪何如乃有饑寒而不得衣食有獄訟而不平其冤失賢而不舉然後其君退而與其卿大夫謀之遠方之民聞之皆曰誠天子也夫我居之僻見我之近也我居之幽見我之明也可欺乎哉故牧者所以明四目達四聰也【尚書大傳】州伯者何謂也伯長也選擇賢良使長一州故謂之伯也唐虞謂之牧何尚質使大夫往來牧諸侯故謂之牧方立三人凡十二人王者所以有二伯者分職而授政欲其亟成也春秋公羊傳曰自陝以東周公主之自陝以西召公主之不分南北何東方被聖人化日少西方被聖人化日久故分東西使聖人主其難者賢者主其易者乃俱致太平也又欲令同有陰陽寒暑之節共法度也【白虎通】舜咨十有二牧曰食哉惟時柔遠能邇惇德允元而難任人蠻夷率服【牧養民之官十二牧十二州之牧也王政以食為首農事以時為先舜言足食之道惟在於不違農時也柔者憲而撫之也能者擾而習之也遠近之勢如此先其略而後其祥也惇厚允信也德有德之人也元仁厚之人也難拒絕也任古又作壬包藏凶惡之人也言當厚有德信仁人而拒姦惡也凡此五者處之各得其宜則不特中國順治雖蠻夷之國亦相率而服從矣舜與】羊客問子思曰周自后稷封為王者後子孫據國至大王王季文王此固世為諸侯矣焉得為西伯乎子思曰吾聞諸子夏古之帝王中分天下使二公治之謂之二伯殷王帝乙之時王季以功九命作伯【禮九命一命受職再命受服三命受位四命受器五命受則六命受官七命受國八命受牧九命作伯】受圭瓚鬯之賜【禮九錫一曰車馬二曰衣服三曰樂器四曰納陛五曰虎賁六曰朱戶七曰斧鉞八曰弓矢九曰圭瓚】故文王因之得專征伐此以諸侯為伯猶周召之君為伯也【周召之地在雍州岐山之陽古公亶父避狄自豳始徙於此修德以建王業故商王帝乙命其子季歷以為西伯至紂又命文王為西伯蓋商之州長曰伯謂以文王為伯而在西也故文王行化而雍梁荆豫徐揚之人咸被其德而從之故語曰三分天下有其二以服事殷惟冀青兗一分屬紂矣文王受命作邑于豐而岐陽周召之地已空故分賜周公召公以為采邑施大王王季之化於已所職之國傳記言分陝而治者蓋此也孔叢子】管仲曰昔召康公命我先君大公【召康公周大保召公奭也】曰五侯九伯女實征之以夾輔周室【五等諸侯九州之伯皆得征討其罪齊桓因此命以夸楚】賜我先君履東至于海西至于河南至于穆陵北至于無棣【穆陵無棣皆齊境也履所踐履之界齊桓又因以自言其盛僖四年左氏傳】自陝而東者周公主之自陝而西者召公主之【陝者蓋今弘農陝縣是也隱五年公羊傳】襄王命尹氏及王子虎內史叔興父策命晉侯為侯伯【以策書命晉侯為伯僖二十八年左氏傳】

典瑞士圭封國則以土地【土地猶度地也封諸侯以土圭度日景觀分寸長短以制其域所封也春官】土方氏掌土圭之灋以土地相宅而建邦國【土地猶度地知東西南北之深而相其可居者宅居也夏官】小司徒凡建邦國立其社稷正其畿疆之封【畿九畿地官】封人凡封國設其社稷之壇封其四疆【封國建諸侯立其國之封同上】量人掌建國之灋營國城郭營后宮量市朝道巷門渠【建立也立國有舊法式若匠人職云后君也言君容王

與諸侯 夏官】古者百里之國三十里之遂二十里之郊九里之城三里之宮七十里之國二十里之遂九里之郊三里之城一里之宮五十里之國九里之遂三里之郊一里之城以城為宮遂郊之門執禁以譏異服譏異言【玄或疑焉匠人營國方九里謂天子城也今大國九里則與天子同春秋傳曰中五之一小九之一以此推說小國大都之地方百步中都之城六十步小都之城三十二步三分之一非也然則大國七里之城小國三里之城焉為近可也盛者天子十二里之城諸侯大國九里次國七里小國五里 尚書大傳】匠人王宮隅之制七雉【宮隅城隅謂角浮思也雉長三丈高一丈度高以高度廣以廣】環塗七軌【環塗謂環城之首】宮隅之制以為諸侯之城制【諸侯畿以外也其城隅制高七丈宮隅門阿皆五丈禮器曰天子諸侯臺門】環塗以為諸侯經塗【經亦謂城中道諸侯環塗五軌野塗三軌 考工記】大宗伯王大封則先告后土【后土土神也黎所食者 春官】大祝建邦國先告后土用牲幣【后土土神也 同上】司几筵凡封國命諸侯王位設黼依依前南鄉設莞

筵紛純加纁席畫純加次席黼純左右玉几【斧謂之黼其繡白黑采以絳帛為質依其制如屏風然於依前為王設席左右有几優至尊也鄭司農云紛讀為幽又讀為和粉之粉謂白繡也純讀為均服之均純緣也纁讀為藻率之藻次席虎皮為席書顧命曰成王將崩命大保芮伯畢公等被冕服憑玉几玄謂紛如綬有文而狹者纁席削蒲翦展之編以五采若今合歡矣盡謂雲氣也次席桃枝席有次列成文 同上】大宗伯王命諸侯則儐【儐進之也王將出命假祖廟立依前南鄉儐者進當命者延之命使登內史由王右以策命之降再拜稽首登受策以出此其略也諸侯爵祿其臣則於祭焉 同上】內史凡命諸侯則策命之【詳見職官下篇】巾車金路鉤樊纁九就建大旂同姓以封象路朱樊纁七就建大赤異姓以封革路龍勒條纁五就建大白以封四衛木路前樊鵠纁建大麾以封蕃國【同姓以封謂王子母弟率以功德出封雖為侯伯其盡服猶如上公若魯衛之屬其無功德各以親疏食采畿內而已異姓王甥舅四衛四方諸侯守衛者蠻服以內蕃國謂九州之外夷服鎮服蕃服 詳見名器下篇 春官】罪隸凡封國若家牛助為牽傍【鄭司農云凡封國若家謂建諸侯立大夫家也牛助為牽傍此官主為送致之也玄謂牛助國以牛助轉徙也罪隸牽傍之在前曰牽在旁曰傍 秋官】

右封國之禮 古者於嘗出田邑順陰義也【國地屬陰祭統】諸侯受命於周乃建大社於周中【受封也】其

壇東青土南赤土西白土北驪土中央壘以黃土將建諸侯鑿取其方一面之土苞以黃土苴以白茅以為土封故曰受則土於周室【其方謂建東方諸侯以青土而覆茅苴裏土封之以為社也 汲冢周書作雒解】乃命魯公俾侯于東錫之山川土田附庸【魯公伯禽也附庸猶屬城也小國不能自達於天子而附於大國也魯頌閟宮】周公何以稱大廟于魯封魯公以為周公也周公拜乎前魯公拜乎後【始受封時拜於文王廟也尚書曰用命賞於祖是也父子俱拜者明以周公之功封魯公也】曰生以養周公【生以魯國供養周公】死以為周公主【如周公死當以魯公為祭祀主加曰者成王始授其茅土之辭禮記明堂位曰封周公於曲阜地方七百里革車千乘蓋以為有王功故半天子也文十三年公羊傳】

魯人三郊三遂【國外曰郊郊外曰遂天子六軍則六鄉六】

【遂大國三軍故魯三郊三遂也 費誓】 衛子魚曰武王克商成王定之選建明德以蕃屏周故周公相王室以尹天下【尹正也】於周為睦【睦親厚也以盛德見親厚】分魯公以大路大旂【魯公伯禽也此大路金路錫同姓諸侯車也交龍為旂周禮同姓以封】夏后氏之璜【璜美玉名】封父之繁弱【封父古諸侯也繁弱大弓名】殷民六族條氏徐氏蕭氏索氏長勺氏尾勺氏使帥其宗氏輯其分族將其類醜【醜衆也】以法則周公用即命于周【即就也使六族就周受周公之法制】是使之職事于魯【共魯公之職事】以昭周公之明德【昭顯也】分之土田陪敦【陪增也敦厚也】祝宗卜史【大祝宗人大卜大史凡四官】備物典策【典策春秋之制】官司彝器【官司百官也彝器常用器】因商奄之民【商奄國名也與四國流言或迸散在魯皆令即屬魯懷柔之】命以伯禽【伯禽周公世子時周公惟遣伯禽之國故皆以付伯禽】而封於少皞之虛【少皞虛曲阜也在魯城內】分康叔【康叔衛之祖】以大路少帛綌苳旃旌【少帛雜帛也綌苳大赤取染草名也通帛為旃析羽為旌】大呂【鐘名】殷民七族陶氏施氏繁氏錡氏樊氏饑氏終葵氏封畛土略自武父以南及圃田之北竟【畛塗所徑也略界也武父衛北界圃田鄭藪名】取於有閭之土以共王職【有閭衛所受朝宿邑蓋近京畿】取於相土之東都以會王之東蒐【為湯沐邑王東巡守以助祭泰山】聃季授土【聃季周公弟司空】陶叔授民【陶叔司徒】命以康誥而封於殷虛【康誥周書殷虛朝歌也】皆啟以商政疆以周索【皆魯衛也啟開也居殷故地因其風俗開用其政疆理土地以周法索法也】分唐叔【唐叔晉之祖】以大路密須之鼓【密須國名】闕鞶【甲名】姑洗【鐘名】懷姓九宗職官五正【懷姓唐之餘民九宗一姓為九族職官五正五官之長】命以唐誥而封於夏虛【唐誥誥命篇名也夏虛大夏今大原晉陽也】啟以夏政【亦因夏風俗開明其政】疆以戎索【大原近戎而寒不與中國同故自以戎法】三者皆叔也而有令德故昭之以分物不然文武成康之伯猶多而不獲是分也唯不尚年也【定四年左氏傳】肅慎氏貢楛矢石磐其長尺有咫【肅慎北夷也楛木名磐鏃也以石為之八寸曰咫】先王欲昭其令德之致遠也以示後人使永監焉【監視也】故銘其栝曰肅慎氏之貢矢【刻曰銘栝箭羽之閒也】以分大姬配虞胡公而封諸陳【分予也大姬武王元女胡公舜後虞遏父之子胡滿也】古者分同姓以珍玉展親也【展重也玉謂若夏后氏之璜】分異姓以遠方之職貢使無忘服也故分陳以肅慎氏之貢【陳媯姓也國語魯語】

天子存二代之後猶尊賢也尊賢不過二代【過之遠難法也二或為三郊特性】

右封帝王後 虞舜以堯子丹朱為賓曰虞賓而不臣之夏禹封丹朱於唐舜子商均於虞皆有疆土以奉先祀服其服禮樂如之以客禮不臣也【杜佑通典】武王克殷反商未及下車而封黃帝之後於蓊封帝堯之後於祝封帝舜之後於陳下車而封夏后氏之後於杞投殷之後於宋【反當為及字之誤也及商謂至紂都也牧誓曰至於商郊牧野封謂故無土地者也投舉徙之辭也時武王封紂子武庚於殷墟所徙者微子也後周公更封而大之 樂記】子產曰昔虞闕父為周陶正以服事我先王【闕父舜之後當周之興闕父為武王陶正】我先王賴其利器用也與其神明之後也【舜聖故謂之神明】庸以元女大姬配胡公【庸用也元女

武王之長女胡公闕父之子滿也】而封諸陳以備三恪【周得天下封夏殷二王後又封舜後謂之恪并二王後為三國其禮轉降示敬而已故曰三恪 襄二十五年左氏傳】王者所以存二王之後何也所以尊先王通天下之三統也明天下非一家之有謹敬謙讓之至也故封之百里使得服其正色用其禮樂永事先祖詩曰厥作裸將常服黼黻言微子服殷之冠助祭於周也周頌曰有客有客亦白其馬此微子朝周也【白虎通】

大宰掌建邦之六典以佐王治邦國【詳見政事上篇】乃施典於邦國【詳職官下篇】凡治以典待邦國之治以九貢致邦國之用【詳財賦篇】以九兩繫邦國之民【詳政事上篇】典命掌諸侯之五儀【詳職官下】大宗伯以九儀之命正邦國之位【詳職官下】以玉作六瑞以等邦國【詳名器下】以凶禮哀邦國之憂【詳凶禮】以賓禮親邦國【詳賓禮】以軍禮同邦國【詳軍禮】以賑膳之禮親兄弟之國以賀慶之禮親異姓之國【詳嘉禮嘉事雜記篇】乃頒祀於邦國【詳吉禮祭通禮】

大祝禁督逆祀命者頒祭號於邦國【同上】大史頒告朔於邦國【詳王朝禮】

大司樂凡建國禁其淫聲過聲凶聲慢聲【注見樂】大司馬之職掌建邦國之九法以佐王平邦國【平成也正也】制畿封國以正邦國【封謂五封於疆為界】設儀辨位以等邦國【儀謂諸侯及諸臣之儀辨別也別尊卑之位】進賢興功以作邦國【興猶舉也作起也起其勸善樂業之心使不惰廢】建牧立監以維邦國【牧州牧也監監一國謂君也維猶聯結也】制軍詰禁以糾邦國【詰猶窮治也糾猶正也】施貢分職以任邦國【職猶賦稅也任猶事也事以其力之所堪】簡稽鄉民以用邦國【簡謂比數之稽猶計也】均守平則以安邦國【諸侯有土地者均之尊者守大卑者守小則法也】比小事大以和邦國【比猶親使大國親小國小國事大國相合和也 夏官】職方氏凡邦國小大相維【大國比小國小國事大國各有屬相維聯也】王設其牧【選諸侯之賢者為牧使牧理之】制其職各以其所能【牧監參伍之屬用能所任秩次】制其貢各以其所有【國之地物所有 同上】合方氏掌達天下之道路【津梁相湊不得陷絕】通其財利【茂遷其有】

【無】同其數器【權衡不得有輕重】壹其度量【尺丈釜鍾不得有大小】除其怨惡【怨惡邦國相侵虐】同其好善【所好所善謂風俗所高尚】形方氏掌制邦國之地域而正其封疆無有華離之地【杜子春云離當為雜書亦或為雜玄謂華讀為 咼之 正之使不 邪離絕】使小國事大國大國比小國【比猶親也易比象曰先王以建萬國親諸侯】匡人掌達灋則匡邦國而觀其慝使無敢反側以聽王命【法則八法八則也邦國之官府都鄙亦用焉慝姦偽之惡也反側猶背違法度也書曰無反無側王道正直】擇人掌誦王志道國之政事以巡天下之邦國而語之【道猶言也以王之志與政事論說諸侯使不迷惑】使萬民和說而正王面【面猶鄉也使民之心曉而正鄉王 並同上】大行人王之所以撫邦國諸侯者歲徧存三歲徧覲五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器修灋則十有二歲王巡守殷國【注見賓禮王侯聘問遣使及巡守會同篇】小行人若國札喪則令賻補之若國凶荒則令賙委之若國師役則令槁襚之若國有福事則令慶賀之若國有禍裁則令哀弔之凡此五物者治其事故及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此五物者每國辨異之以反命于王以周

知天下之故【注見王侯聘問遣使】掌交掌以節與幣巡邦國之諸侯及其萬民之所聚者道王之德意志慮使咸知王之所好惡辟行之【節以為行信幣以見諸侯也咸皆也辟讀如辟忌之辟使皆知王之所好者而行之知王所惡者辟而不為】使和諸侯之好【有欲相與修好者則為和合之】達萬民之說【說所喜也達者達之于王若其國君】掌邦國之通事而結其交好【通事謂朝覲聘問也】以諭九稅之利九禮之親九牧之維九禁之難九戎之威【諭告曉也九稅所稅民九職也九禮九儀之禮九牧九州之牧九禁九法之禁九戎九伐之戎秋官】大司寇掌建邦之三典以佐王刑邦國詰四方一曰刑新國用輕典二曰刑平國用中典三曰刑亂國用重典【注見刑辟】天子之縣內諸侯祿也【選賢置之於位其國之祿如諸侯不得世】外諸侯嗣也【有功乃封之使之世也冠禮記曰繼世以立諸侯象賢也王制】繼絕世舉廢國治亂持危朝聘以時厚往而薄來所以懷諸侯也【中庸】

右治邦國之法祭公謀父曰甸服者祭【供日祭也此采地之君其見無數】侯服者祀【供月祀也堯舜及周侯服皆歲見】賓服者享【供時享也享獻也周禮甸圻二歲而見男圻三歲而見采圻四歲而見衛圻五歲而見其見也皆以所貢助祭於廟孝經所謂四海之內各以其職來祭】要服者貢【供歲貢也要服六歲一見】荒服者王【王王事天子也周禮九州之外謂之蕃國世一見各以其所貴寶為贄詩曰自彼氐羌莫敢不來王】日祭【日祭祭於祖考謂上食也近漢亦然】月祀【月祀於高曾】時享【時享於二祧】歲貢【歲貢於壇墀】終王【終謂世終也朝嗣王及即位而來見】先王之訓也有不祭則修意【意志意也謂邦國之內有一違闕不供日祭者先修志意以自責也圻內近知王意】有不祀則修言【言號令也】有不享則修文【文典法也】有不貢則修名【名謂尊卑職供之名號也晉語曰信於名則上下不干也】有不王則修德【遠人不服則修文德以來之】序成而有不至則修刑【序成謂上五者次序已成而有不至則有刑誅】於是乎有刑不祭伐不祀征不享讓不貢【讓譴責也】告不王【謂以文辭告曉之也地遠者罪輕】於是乎有刑罰之辟【刑不祭也】有攻伐之兵【伐不祀也】有征討之備【征不享也】有威讓之令【讓不貢也】有文告之辭【告不王也】布令陳辭而又不至則又增修於德無勤民於遠【勤勞也】是以近無不聽遠無不服【國語周語】芋尹無宇曰天子經略【經營天下略有四海故曰經略】諸侯正封【封疆有定分】古之制也【昭七年左氏傳】

繼世以立諸侯象賢也【象法也為子孫行法先祖之賢故使之繼世也士冠記】始封諸侯無子死不得與兄弟者何古者象賢也弟非賢者子孫至繼體諸侯無子得及親屬者以其俱賢者子孫也重其先祖之功故得及之禮服傳曰大宗不可絕同宗則可以為後繼世諸侯無子又無弟但有諸父庶兄當推與庶兄推親之序也王者受命而作興滅國繼絕世何為先王無道妄殺無辜及嗣子幼弱為強臣所奪子孫皆無罪因而絕重其先人之功故復立之誅君之子不立者義無所繼也諸侯世位象賢也今親被誅絕也春秋傳曰誅君之子不立君見弑其子得立何以尊君防篡弑也【白虎通】

鄭伯以璧假許田非假而曰假諱易地也禮天子在上諸侯不得以地相與也

書曰三載考績三考黜陟幽明其訓曰三歲而小考者正職而行事也九歲而大考者黜無職而賞有功也其賞有功也諸侯賜弓矢者得專征賜鈇鉞者得專殺賜圭瓚者得為鬯以祭不得專征者以兵屬於得專征之國【春秋傳曰魯賦八百邾賦六百以兵屬於晉由是也】不

得專殺者以獄屬於專殺之國不得賜圭瓚者資鬯於天子之國然後祭【資取尚書大傳】天子賜諸侯樂則以祝將之賜伯子男樂則以戠將之【將謂執以致命祝戠皆所以節樂】諸侯賜弓矢然後征賜鈇鉞然後殺賜圭瓚然後為鬯未賜圭瓚則資鬯於天子【得其器乃敢為其事圭瓚鬯爵也鬯秬酒也 王制】小宗伯掌衣服車旗宮室之賞賜【注見名器上】內史王制祿則贊為之以方出之【注見職官下】賞賜亦如之【春官】司勳掌六鄉賞地之灋以等其功【賞地賞田也在遠郊之內屬六鄉焉等猶差也以功大小為差】王功曰勳【輔成王業若周公】國功曰功【保全國家若伊尹】民功曰庸【法施於民若后稷】事功曰勞【以勞定國若禹】治功曰力【制法成治若咎繇】戰功曰多【尅敵出奇若韓信陳平司馬法曰上多前虜】凡有功者銘書於王之大常祭於大烝司勳詔之【銘之言名也生則書於王旌以識其人與其功也死則於烝先王祭之詔謂告其神以辭也盤庚告其卿大夫曰茲予大享於先王爾祖其從與享之是也今漢祭功臣於朝廷】大功司勳藏其貳【貳猶副也功書藏於天府又副於此者以其主賞】掌賞地之政令【政令謂役賦】凡賞無常輕重眡功【無常者功之大小不可豫】凡頒賞地參之一食【鄭司農云不以美田為采邑玄謂賞地之稅參分計稅王食其一也二全入於臣】惟加田無國正【加田既賞之又加賜以田所以厚恩也鄭司農云正謂稅也祿田亦有給公家之賦貢若今時侯國有司農少府錢穀矣獨加賞之田無正耳 夏官】夔始制樂以賞諸侯【夔欲舜與天下之君共此樂也】德盛而教尊五穀時孰然後賞之以樂【樂記】諸侯敵王所愾而獻其功【敵猶當也愾恨怒也】王於是乎賜之彤弓一彤矢百玃弓矢千以覺報宴【覺明也謂諸侯有四夷之功王賜之弓矢又為歌彤弓以明報功宴樂 大四年左氏傳】大司馬以九伐之灋正邦國馮弱犯寡則眚之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令陵政則杜之外內亂鳥獸行則滅之【注見軍禮】一不朝則貶其爵再不朝則削其地三不朝則六師移之【移之者誅其人而變置之也 孟子】諸侯得專征者鄰國有臣弑其君孽伐其宗者弗請於天子征之而歸其地于天子可也【孽支子也宗適子也征伐也】諸侯之有不率正者天子紂之【率循也正正也】一紂少紂以爵【謂三年明也言少紂明以漸也】再紂少紂以地【謂六年時也】三紂而爵地畢【尚書大傳】諸侯之有功者取於閒田以祿之其有削地者歸之閒田【王制】古者天子之制諸侯歲獻貢土於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭數與於祭而君有慶數不與於祭而君有讓數有慶而益地數有讓則削地【注見嘉禮射義】

右黜陟【巡守而行黜陟見賓禮巡守篇】諸侯所以考黜何王者所以勉賢抑惡重民之至也禮記九錫車馬衣服樂朱戶納陛虎賁鈇鉞弓矢秬鬯皆隨其德可行而賜車馬能安民者賜衣服能使民和樂者賜以樂民衆多者賜以朱戶能進善者賜以納陛能退惡者賜以虎賁能誅有罪者賜以鈇鉞能征不義者賜以弓矢孝道備者賜以秬鬯能安民故賜車馬以著其功德安其身能使人富足衣食倉廩實故賜衣服以彰其體能使民和樂故賜之樂以事其先也禮曰未賜樂者不得以時王之樂事其宗廟也朱盛色戶所以紀民數故民衆多賜朱戶也古者人君下賢降階一等而禮之故進賢賜之納陛以優之也既能進善當能戒惡故賜虎賁虎賁者所以戒不虞而距惡距惡當斷刑故賜之鈇鉞所以斷大刑刑罰既中則能征不義故賜弓矢弓矢所以征不義伐無道也圭瓚秬鬯宗廟之盛禮故孝道備而賜之秬鬯所以極著

孝道孝道純備故內和外榮玉以象德金以配情芬香條鬯以通神靈玉飾其本君子之性金飾其中君子之道也所以三歲一考績何三年有成故於是賞有功黜不肖何以知始考輒黜之尚書曰三年一考少黜以地書所言三考黜陟者謂爵土異也小國考之有功增土進爵後考無功削黜後考有功正而賜之矣五十里不過五賜而進爵土七十里不過七賜而進爵土能有小大行有進退也一說盛德始封百里者賜三等得征伐專殺斷獄七十里伯始封賜二等至虎賁百人後有功賜弓矢復有功賜鉅鬯增爵為侯益土百里復有功入為三公五十里子男始封賜一等至樂復有功稍賜至虎賁增爵為伯復有功稍賜至鉅鬯增爵為侯未賜鈇鉞者從大國連帥方伯而斷獄受命之王致太平之主美羣臣上下之功故盡封之及中興征伐大功皆封所以著大功盛德之士亦封之所以尊有德也以德封者必試之必附庸三年有功因而封五十里元士有功者亦為附庸世其位大夫功成封五十里卿功成封七十里公功成封百里士有功德遷為大夫大夫有功德遷為卿卿有功德遷為公故爵主有德封主有功也三公功成當封而死得立其子為附庸賢者之體能否一也百里公一削為七十里侯再削為七十里伯三削為寄公七十里伯一削為五十里伯二削為五十里子三削地盡五十里子一削為三十里子再削為三十里男三削地盡五十里男一削為三十里男再削為三十里附庸三削爵盡所以至三削何禮成於三三而不改雖反無益也先削地後黜爵者何爵者尊號也地者人所任也今不能治廣土衆民故先削其土地也君幼稚唯考不黜者何君子不備責童子也二王後不貶黜者何尊賓客重先王也以其當公也罪惡足以絕之即絕更立其次周公誅祿甫立微子諸侯暗聾跛躄惡疾不免黜者何尊人君也世子有惡疾廢者何以其不可承先祖也【白虎通】平王曰父義和【晉文侯仇字】用賚爾鉅鬯一卣彤弓一彤矢百盧弓一盧矢百馬四匹【黑黍曰鉅釀以鬯草不言圭瓚可知卣中罇也當以錫命告其始祖故賜鬯彤赤虛黑也馬四匹曰乘書文侯之命】齊桓公會諸侯于葵丘王使宰孔賜齊侯胙【胙祭肉尊之比二王後】賞服大路龍旂九旒渠門赤旂【大路謂金路鉤樊纓九就龍旂畫交龍於繆也正幅為繆旁屬為旒鉤婁領之鉤樊馬大帶纓當胸削革為之皆以五采屬飾之九就就成也渠門兩旗所建以為軍門若今牙門也國語齊語】晉文公以諸侯之師及楚人戰於城濮楚師敗績獻楚俘於王駟介百乘徒兵千人【駟介四馬被甲徒兵步卒】王命尹氏及王子虎內史叔興父策命晉侯為侯伯【以策書命晉侯為伯也周禮九命作伯尹氏王子虎皆王卿士也叔興父大夫也三官命之以寵晉】賜之大輅之服戎輅之服【人輅金輅戎輅戎車二輅各有服】彤弓一彤矢百旅弓矢千【彤赤弓旅黑弓弓一矢百則矢千弓十矣諸侯賜弓矢然後專征伐】鉅鬯一卣【鉅黑黍鬯香酒所以降神卣器名】虎賁三百人曰王謂叔父敬服王命以綏四國糾逖王慝【逖遠也有惡於王者糾而遠之】晉侯三辭從命曰重耳敢再拜稽首奉揚天子之丕顯休命【稽首首至地丕大也休美也】受策以出出入三覲【出入猶去來也從來至去凡三見王僖二十八年左氏傳】文公元年天王使毛伯來錫公命錫者何賜也命者何加我服也【古者三載考績三考黜陟幽明文公新即位功未足施而賜之非禮也公羊傳】禮有受命無來錫命錫命非正也【穀梁傳】襄王使大宰文公及內史興賜晉文公命【大宰文公卿士王子虎也內史興周內史叔興父晉文公獻公之子惠公異母兄重耳也命命服也諸侯七命冕服七章】上卿逆於境【逆迎也】晉侯郊勞【郊迎用辭勞也】館諸宗廟【館舍也舍於宗廟尊王命也】饋九牢【牛羊豕為一牢上公饗餼九牢】設庭燎【設大燭於庭謂之庭燎】及期命於武宮【期將事之日也武宮文公之祖武公之廟也命受王之命】設桑主布几筵【主獻公之主也練主用栗虞主用桑

禮既葬而虞虞而作主天子於是爵命世子世子即位受命服也獻公死已久於此設之者文公不欲繼於惠愷故立獻公之主自以子繼父之位行未踰年之禮筵席也【大宰涖之晉侯端委以入【說云玄玄端冠委貌諸侯祭服也昭謂上士服也諸侯之子未受爵命服士服也】大宰以王命命冕服【冕大冠也服鷩衣也】內史贊之三命而後即冕服【贊道也三命三以王命命文公文公三讓後就】既畢賓饗贈餞如公命侯伯之禮而加之以宴好【賓者主人所以接賓致飧饗之屬饗饗食之禮贈致贈賄之禮餞謂郊送飲酒之禮如公命侯伯之禮者如公受王命以侯伯待之之禮而又加之以宴好也大宰上卿也而言公者兼之】內史興歸以告王曰晉不可不善也其君必霸逆王命敬【謂上卿逆於境晉侯郊勞】奉禮義成【謂三讓賓饗之屬皆加禮 國語周語】

諸侯失國而後託於諸侯禮也【古者諸侯出奔他國食其廩餼謂之寄公 孟子】諸侯不臣寓公故古者寓公不繼世【寓寄也寄公之子非賢者世不足尊也寓或為託郊特性】

右寓公

土方氏掌土圭之灋以土地相宅而建都鄙【夏官】大司徒凡造都鄙制其地域而封溝之【詳見井田】縣師凡造都邑量其地辨其物而制其域【物謂地所有也名山大澤不以封 地官】封人凡封國封其四疆造都邑之封域者亦如之【同上】量人營國城郭營后宮量市朝道巷門渠造都邑亦如之【夏官】匠人王宮門阿之制五雉野涂五軌門阿之制以為都城之制【都四百里外距五百里王子弟所封其城隅高五丈宮隅門阿皆三丈】野涂以為都經涂【經亦謂城中道都環涂野涂皆三軌 考工記】掌固若造都邑則治其固與其守灋【都邑亦為城郭 夏官】小司徒乃經土地而井牧其田野【詳見井田】載師以公邑之田任甸地以家邑之田任稍地以小都之田任縣地以大都之田任畺地【詳見井田】凡任地甸稍縣都皆無過十二【詳見財賦】大宰以八則治都鄙一曰祭祀以馭其神二曰灋則以馭其官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八曰田役以馭其衆【都之所居曰鄙則亦法也典法則所用異異其名也都鄙公卿大夫之采邑王子弟所食邑周召毛聃畢原之屬在畿內者祭祀其先君社稷五祀法則其官之制度廢猶退也退其不能者舉賢而置之祿若今月奉也位爵次也賦口率出泉也貢功也九職之功所稅也禮俗昏姻喪紀舊所行也鄭司農云士謂學士】乃施則於都鄙【詳職官下】凡治以則待都鄙之治【天官】都宗人掌都宗祀之禮凡都祭祀致福於國【注見吉禮祭通禮】正都禮與其服【注見名器上】若有寇戎之事則保羣神之壇【注見祭通禮】國有大故則令禱祠既祭反命於國【注見因事之祭篇春官】家宗人掌家祭祀之禮凡祭祀致福【注見祭通禮】國有大故則令禱祠反命祭亦如之【注見因事之祭】掌家禮與其衣服宮室車旗之禁令【掌亦正也不言寇戎保羣神之壇則都家自保之都宗人所保者謂王所祀明矣 同上】都司馬掌都之士庶子及其衆庶車馬兵甲之戒令【庶子卿大夫士之子車馬兵甲備軍發卒】以國灋掌其政學【政謂賦稅也學修德學道】以聽國司馬【聽者受行其

所徵為也國司馬大司馬之屬皆是】家司馬亦如之【大夫家臣為司馬者春秋傳曰叔孫氏之司馬鬬戾夏官】方士掌都家聽其獄訟之辭【詳見刑辟】凡都家之大事聚衆庶則各掌其方之禁令以時修其縣灋若歲終則省之而誅賞焉【詳政事上】凡都家之士所上治則主之【注見刑辟秋官】朝大夫掌都家之國治【都家王子弟公卿及大夫之采地也主其國治者平理其來文書於朝者】日朝以聽國事故以告其君長【國事故天子之事當施於都家者也告其君長使知而行之也君謂其國君長使卿大夫也】國有政令則令其朝大夫【使以告其都家之吏】凡都家之治於國者必因其朝大夫然後聽之唯大事弗因【謂以小事文書來者朝大夫先平理之乃以告有司也大事者非朝大夫所能平理】凡都家之治有不及者則誅其朝大夫【不及謂有稻殿之】在軍旅則誅其有司【有司都司馬家司馬同上】都則【闕】都士【闕】家士【闕並同上】

右都邑 天子有田以處其子孫諸侯有國以處其子孫大夫有采以處其子孫是謂制度【言今不然也春秋昭元年秦伯之弟鍼出奔晉刺其有千乘之國不能容其母弟禮運】子云貧而好樂富而好禮衆而以寧者天下其幾矣【言如此者寡也寧安也大族衆家恆多作亂】故制國不過千乘都城不過百雉家富不過百乘以坊民諸侯猶有畔者【古者方十里其中六十四井出兵車一乘此兵賦之法也成國之賦千乘雉度名也高一丈長三丈為雉百雉為長三百丈方五百步子男之城方五里百雉者此謂大都三闕之一坊記】大夫功成未封子得封者善善及子孫也諸侯入為公卿大夫得食兩家采不曰有能然後居其位德加於人然後食其祿所以尊賢重有德也今以盛德入輔佐兩食之何王制曰天子之縣內諸侯祿也外諸侯嗣也天子太子食采者儲君嗣主也當有土以尊之也太子食百里與諸侯封同故禮曰公士大夫子子也無爵而在大夫上故知百里也公卿大夫皆食采者示與民同有無也【白虎通】鄭武公取武姜生莊公及共叔段姜氏愛段莊公即位為之請京使居之謂之京城大叔祭仲曰都城過百雉國之害也【方丈曰堵三堵曰雉一雉之牆長三丈高一丈侯伯之城方五里徑三百雉故其大都不得過百雉】先王之制大都不過三國之一【三分國城之一】中五之一小九之一今京不度非制也【不合法度非先王制】君將不堪其後大叔完聚【完城郭聚人民】繕甲兵具卒乘將襲鄭公伐之大叔出奔共【隱元年左氏傳】魯惠公之二十四年晉始亂故封桓叔於曲沃【晉文侯卒子昭侯元年危不自安封成師為曲沃伯】師服曰吾聞國家之立也本大而末小是以能固故天子建國【立諸侯也】諸侯立家【卿大夫稱家】卿置側室【側室衆子也得立此一官】大夫有貳宗【適子為小宗次者為貳宗以相輔貳】士有隸子弟【士卑自以其子弟為僕隸】庶人工商各有分親皆有等衰【庶人無復尊卑以親疏為分別也衰殺也】是以民服事其上而下無覬覦【下不冀望上位】今晉甸侯也而建國本既弱矣其能久乎【諸侯而在甸服者桓二年左氏傳】辛伯諗周桓公【諗告也事在桓十八年】云大都耦國亂之本也【閔公二年左傳】楚靈王城陳蔡不羹【襄城縣東南有不羹城定陵西北有不羹亭】使棄疾為蔡公王問於申無宇曰棄疾在蔡何如對曰擇子莫如父擇臣莫如君鄭莊公城櫟而寘子元焉使昭公不立【子元鄭公子莊公寘子元於櫟桓十五年屬公因之以殺櫟大夫檀伯遂居櫟卒使昭公不安位而見殺】齊桓公城穀而寘管仲焉至於今賴之【城穀在莊三十二年】臣聞五大不在邊五細不在庭【上古金木水火土謂之五官玄鳥氏丹鳥氏亦有五又以五鳩鳩民五雉為五工正蓋立官之本也末世隨事施職是以官無常數今無宇稱習古言故云五大也言五官之長

專盛過節則不可居邊細弱不勝任亦不可居朝廷】親不在外羈不在內今棄疾在外鄭丹在內【襄十九年丹奔楚】君其少戒王曰國有大城何如對曰鄭京櫟實殺曼伯【曼伯檀伯也厲公得櫟又并京】宋蕭亳實殺子游【在莊十二年】齊渠丘實殺無知【在莊九年渠丘今齊國西安縣也齊大夫雍廩邑】衛蒲戚實出獻公【蒲甯殖邑戚孫林父邑出獻公在襄十四年】若由是觀之則害於國末大必折【折其本】尾大不掉君所知也【為十三年陳蔡作亂傳昭十一年左氏傳】孔子言於定公曰家不藏甲邑無百雉之城古之制也今三家過制請皆損之乃使季氏宰仲由隳三都【家語】仲由為季氏宰將墮三都【三都費邠成也疆盛將為國害故仲由欲毀之】於是叔孫氏墮邠季氏將墮費公山不狃叔孫輒帥費人以襲魯【不狃費宰也輒不得志於叔孫氏】仲尼命申句須樂頎下伐之【二子魯大夫仲尼時為司寇】費人北二子奔齊【二子不狃叔孫輒】遂墮費將墮成公斂處父謂孟孫墮成齊人必至於北門【成在魯北竟故】且成孟氏之保障也無成是無孟氏也子偽不知【佯不知】我將不墮公圍成弗克【定十二年左右氏傳】

禮書綱目卷五十九

卷六十

欽定四庫全書

禮書綱目卷六十 婺源江永撰

內治 通禮九

補

古者天子后立六宮三夫人九嬪二十七世婦八十一御妻以聽天下之內治以明章婦順故天下內和而家理天子立六官三公九卿二十七大夫八十一元士以聽天下之外治以明章天下之男教故外和而國治故曰天子聽男教后聽女順天子理陽道后治陰德天子聽外治后聽內治教順成俗外內和順國家理治此之謂盛德【天子六寢而六宮在後六官在前所以承嗣施外內之政也三夫人以下百二十人周制也三公以下百二十人似夏時也合而言之取其相應有象天數也內治婦學之法也陰德謂主陰事陰令也】是故男教不修陽事不得適見於天曰為之食婦順不修陰事不得適見於天月為之食是故日食則天子素服而修六官之職蕩天下之陽事月食則后素服而修六宮之職蕩天下之陰事故天子之與后猶日之與月陰之與陽相須而后成者也【適之言責也食者見道有虧傷也蕩蕩滌去穢惡也】天子修男教父道也后修女順母道也故曰天子之與后猶父之與母也故為天王服斬衰服父之義也為后服資衰服母之義也【父母者施教令於婦子者也故其服同資當為齊聲之誤也 昏義】

右通論

小宰之職掌建邦之官刑以治王宮之政令凡宮之糾禁【杜子春云宮皆當為官玄謂宮刑在王宮中者之刑建明布告之糾猶割也察也若今御史中丞】正歲以宮刑憲禁于王宮【憲謂表縣之若令新有法令云 天官】 宰夫正歲則以灋警戒羣吏令修宮中之職事【警戒勅之言鄭司農云正歲夏之正月以法戒勅羣吏 同上】 宮正掌王宮之戒令糾禁【糾猶割也察也】以時比宮中之官府次舍之衆寡【時四時比校次其人之在否官府之在宮中者若膳夫玉府內宰內史之屬次謂吏直宿若今部署諸廬者舍其所居守】為之版以待【鄭司農云為官府次舍之版圖也待待比也玄謂板其人之名籍待待戒令及比】夕擊柝而比之【夕莫也莫行夜以比直宿者為其有解惰離部署鄭司農云柝戒守者所擊也易曰重門擊柝以待暴客春秋傳曰魯擊柝聞於邾】國有故則令宿其比亦如之【鄭司農云故謂禍灾令宿宿衛王宮春秋傳曰忘守必危況有災乎玄謂故凡非常也文王世子曰公有出疆之政庶子以公族之無事者守於公宮正室守大廟諸父守貴宮貴室諸子諸孫守下宮下室此謂諸侯也王之庶子職掌國子之倅國有大事則帥國子而致於大子唯所用之者令宿之事蓋亦存焉】辨外內而時禁【鄭司農云分別外人內人禁其非時出入】稽其功緒糾其德

行【稽猶考也計也功吏職也緒其志業】幾其出入均其稍食【鄭司農云幾其出入若今時宮中有罪禁止不能出亦不得入及無引籍不得入宮司馬殿門也玄謂幾呵其衣服持操及疏數者稍食祿廩】丟其淫怠與其奇衰之民【民宮中吏之家人也淫放濫也怠懈慢也奇衰譎觚非常】會其什伍而教之道藝【五人為伍二伍為什會之者使之輩作輩學相勸帥且寄宿衛之令鄭司農云道謂先生所以教道民者藝謂禮樂射御書數】月終則會其稍食歲終則會其行事【行事吏職也】

同上】宮伯掌王宮之士庶子凡在版者【鄭司農云庶子宿衛之官版名籍也】

【以版為之今時鄉戶籍謂之戶版玄謂王宮之士謂王宮中諸吏之適子也庶子其支庶也同上】士師掌國之五禁之灋一曰宮禁【宮王宮也今宮門有簿籍秋官】閹人掌守王宮之中門之禁【中門於外內為中若今宮闕門鄭司農云王有五門外曰皋門二曰雉門三曰庫門四曰應門五曰路門路門一曰畢門玄謂雉門三門也春秋傳曰雉門災及兩觀】喪服凶器不入宮潛服賊器不入宮奇服怪民不入宮【喪服衰經也凶器明器也潛服若衷甲者賊器盜賊之任器兵物皆有刻識奇服衣非常春秋傳曰彪奇無常怪民狂易】凡內人公器賓客無帥則幾其出入【三者之出入當須使者符節乃行鄭司農云公器將持公家器出入者幾謂無將帥引之者則呵其出入】以時啟閉【時漏盡】凡外內命夫命婦出入則為之關【辟行人使無干也內命夫鄉大夫士之在宮中者】掌埽門庭【門庭門相當之地天官】宮人掌王之六寢之修【六寢者路寢一小寢五玉藻曰朝辨色始入君日出而視朝退適路寢聽政使人視大夫大夫退然後適小寢釋服是路寢以治事小寢以時燕息焉春秋書魯莊公薨于路寢僖公薨于小寢是則人君非一寢明矣】為其井匱除其不蠲去其惡臭【井漏井所以受水潦蠲猶潔也詩云吉蠲為饎鄭司農云匱路廁也玄謂匱豬謂霑下之池受畜水而流之者】共王之沐浴【沐浴所以自潔清】凡寢中之事埽除執燭共鑪炭凡勞事【勞事勞褻之事】四方之舍事亦如之【從王適四方及會同所舍同上】玉府掌王之燕衣服衽席牀第凡褻器【燕衣服者巾絮寢衣袍襪之屬皆良貨賄所成第簀也鄭司農云衽席單席也褻器清器虎子之屬同上】

隸僕掌蹕宮中之事【宮中有事則蹕鄭司農云蹕謂止行者清道若今時徹蹕夏官】

右王宮

內宰掌書版圖之灋以治王內之政令均其稍食分其人民以居之【版謂宮中閹寺之屬及其子弟錄籍也圖王及后世子之宮中吏官府之形象也政令謂施閹寺者稍食吏祿廩也人民吏子弟分之使眾者就寡均宿衛】以陰禮教六宮【鄭司農云陰禮婦人之禮六宮後五前一玄謂六宮謂后也婦人稱寢曰宮宮隱蔽之言后象王立六宮而居之亦正寢一燕寢五教者不敢斥言之謂之六宮若今稱皇后為中宮矣昏禮母戒女曰夙夜毋違宮事】以陰禮教九嬪【教以婦人之禮不言教夫人世婦者舉中省文】以婦職之灋教九御使各有屬以作二事正其服禁其奇衰展其功緒【婦職謂織紵組紃縫線之事九御女御也九九而御於王因以號焉使之九九為屬同時御又同事也正其服止踰侈奇衰若今媚道展猶錄也緒業也故書二為三杜子春云當為二二事謂絲枲之事】歲終則會內人之稍食稽其功事【內人主謂九御】佐后而受獻功者比其小大與其麤良而賞罰之【獻功者九御之屬鄭司農

云烝而獻功玄謂典婦功曰及秋獻功】會內宮之財用【計夫人以下所用財】正歲均其稍食施其功事憲禁令於王之北宮而糾其守【均猶調度也施猶賦也北宮后之六宮謂之北宮者繫於王言之明用王之禁令令之守宿衛者 天官】內小臣掌王后之命正其服位【命謂使令所為或言王后或言后通耳】后出入則前驅【道之】后有好事於四方則使往有好令於卿大夫則亦如之【后於其族親所善者使往問遺之】掌王之陰令【陰令王所求為於北宮 同上】寺人掌王之內人及女宮之戒令相道其出入之事而糾之【內人女御也女宮刑女之在宮中者糾猶糾察也 同上】內豎掌內外之通令凡小事【內后六宮外卿大夫也使童豎通王內外之命給小事者以其無與為禮出入便疾內外以大事聞王則俟朝而自復 同上】九嬪掌婦學之灋以教九御婦德婦言婦容婦功【婦德謂貞順婦言謂辭令婦容謂婉婉婦功謂絲枲自九嬪以下九九而御於王所九嬪者既習於四事又備於從人之道是以教女御也 同上】女御以歲時獻功事【絲枲成功之事 同上】女史掌王后之禮職掌內治之貳以詔后治內政【內治之法本在內宰書而貳之】逆內宮【鉤攷六宮之計】書內令【后之令】凡后之事以禮從【亦如大史之從於王 同上】

凡內事有達於外官者世婦掌之【主通之使相共授 春官世婦】

內宗王后有事則從【春官】典婦功掌婦式之灋以授嬪婦及內人女功之事齋【婦式婦人事之模範法其用財舊數嬪婦九嬪世婦言及以殊之者容國中婦人賢善工於事者事齋謂以女功之事來取絲枲故書齋為資杜子春讀為資鄭司農云內人謂女御女功事資謂女功絲枲之事】凡授嬪婦功及秋獻功辨其苦良比其小大而賈之物書而楬之【授書為受聲之誤也國中嬪婦所作成即送之不須獻功時賈之者物不正齊當以泉計通功鄭司農苦讀為鹽謂分別其縑帛與布紵之麤細皆比方其大小書其賈數而著其物若今時題署物】以共王及后之用頒之於內府【天官】縫人掌王宮之縫線之事以役女御以縫王及后之衣服【女御裁縫王及后之衣服則為役助之宮中餘裁縫事則專為焉鄭司農云線縷也】掌凡內之縫事【同上】染人掌凡染事【同上】仲冬命奄尹申宮令審門閭謹房室必重閉【奄尹主領奄豎之官也於周則為內宰掌治王之內政宮令譏出入及開閉之屬重閉外內閉也】省婦事毋得淫雖有貴戚近習毋有不禁【省婦事所以靜陰類也淫謂女功奢偽怪好物也貴戚謂姑姊妹之屬近習天子所親幸者 月令】

右內事 公父文伯朝其母其母方績文伯曰以獨之家而主猶績【言家有寵祿不當績】懼干季孫之怒也【季孫康子也位尊又為大宗】其母曰王后親織玄紱【說云紱冠之垂前後者昭謂紱所以縣瑱當耳者】公侯之夫人加之以紃紃【既織紱又加之以紃紃也冕曰紃紃纓之無紃者也從下而上不結紃冕上之覆也】卿之內子為大帶【鄉之適妻曰內子大帶緇帶也】命婦成祭服【命婦大夫之妻也祭服玄衣纁裳】列士之妻加之以朝服【列士元士也既成祭服又加之以朝服也朝服天子之士皮弁素積諸侯之士玄端委貌】自庶士以下皆衣其夫【庶士下士也下至庶人】社而賦事烝而獻功【社春分祭社也事農桑之屬也冬祭曰烝烝而獻五穀布帛之功也】男女効績愆則有辟古之制也【績功也辟罪也 國語魯語】

內宰中春詔后帥外內命婦始蠶於北郊以為祭服【蠶於北郊婦人以純陰為尊郊必有公桑蠶室焉 天官】季春鳴鳩拂其羽戴勝降於桑【蠶將生之候也鳴鳩飛且翼相擊趨農急

也戴勝織紵之鳥是時恒在桑言降者若時始自天來重之也】具曲植簠簋【時所以養蠶器也曲簿也植槌也】后妃齊戒親東鄉躬桑禁婦女毋觀省婦使以勸蠶事【后妃親採桑示帥先天下也東鄉者鄉時氣也是明其不常留養蠶也留養者所卜夫人與世婦婦謂世婦及諸臣之妻也內宰職曰仲春詔后帥外內命婦始蚕于北郊女外內子女也夏小正曰妾子治蠶執養宮事毋觀去容飾也婦使縫線組紃之事】蠶事既登分繭稱絲効功以共郊廟之服無有敢惰【登成也敕往蠶者蠶畢將課功以勸戒之】孟夏蠶事畢后妃獻繭乃收繭稅以桑為均貴賤長幼如一以給郊廟之服【后妃獻繭者內命婦獻繭於后妃收繭稅者收於外命婦外命婦雖就公桑蠶室而蠶其夫亦當有祭服以助祭收以近郊之稅耳貴賤長幼如一國服同月令】王后蠶於北郊以共純服夫人蠶於北郊以共冕服【純服亦冕服也互言之爾純以見繒色冕以著祭服夫人不蠶於西郊婦人禮少變也祭統】古者天子諸侯必有公桑蠶室近川而為之築宮仞

有三尺棘牆而外閉之及大昕之朝君皮弁素積卜三宮之夫人世婦之吉者使入蠶於蠶室奉種浴於川桑於公桑風戾以食之【大昕季春朔日之朝也諸侯夫人三宮半王后也風戾之者及早涼脆采之風戾之使露氣燥乃以食蠶蠶性惡濕】歲既單矣世婦卒蠶奉繭以示於君遂獻繭於夫人夫人曰此所以為君服與遂副禕而受之因少牢以禮之【歲單謂三月月盡之後也言歲者蠶歲之大功事畢於此也副禕王后之服而云夫人記者容二王之後與禮之禮奉繭之世婦】古之獻繭者其率用此與【問者之辭】及良日夫人纁三盆手遂布於三宮夫人世婦之吉者使纁遂朱綠之玄黃之以為黼黻文章服既成君服以祀先王先公敬之至也【三盆手者三淹也凡纁淹大總而手振之以出緒也祭義】

右親蠶

君命屈狄再命禕衣一命褱衣士祿衣【君女君也此子男之夫人及其卿大夫士之妻命服也禮天子諸侯命其臣后夫人亦命其妻以衣服所謂夫尊於朝妻榮於室】唯世婦命於奠繭【奠猶獻也凡世婦已下蠶事畢獻繭乃命之以其服玉藻詳見名器上】右命臣妻夫人之不命於天子自魯昭公始也【亦記魯失禮所由也周之制同姓百世昏姻不通吳大伯之後魯同姓昭公取於吳謂之吳孟子不告於天子自此後取者遂不告於天子天子亦不命之雜記】

易曰正其本萬物理失之毫釐差之千里故君子慎始也春秋之元詩之關雎禮之冠婚易之乾《》皆慎始敬終云爾素誠繁成【朱子曰四字未詳恐有闕誤賈誼新書無誠繁二字】謹為子孫娶婦【賈誼新書作婚娶嫁女】必擇孝悌世世有行義者如是則其子孫慈孝不敢姪暴黨無不善三族輔之故曰鳳皇生而有仁義之意虎狼生而有貪戾之心兩者不等各以其母嗚呼戒之哉無養乳虎將傷天下故曰素成胎教之道書之玉板藏之金匱置之宗廟以為後世戒【大戴禮】右慎始周襄王將以翟女為后富辰諫曰不可夫婚姻禍福之階也【階梯也】利內則福由之利外則取禍今王外利矣【樹利於翟】其無乃階禍乎昔摯疇之國也由大任【摯疇二國任姓奚仲仲虺之後大任之家也大任王季之妃文王之母詩云摯仲氏任又曰思齊大任文王之母】杞繒由大姒【杞繒二國姒姓夏禹之後大姒之家也大

妣文王妃武王之母也】齊許申呂由大姜【四國皆姜姓四岳之後大姜之家也大姜大王之妃王季之母】陳由大姬【陳嬀姓舜後大姬周武王之女成王之姊傳曰以元女大姬配虞胡公而封諸陳】是皆能內利親親者也【內利內行七德親親以親固其家】昔鄢之亡也由仲任【鄢云姓之國仲任氏之女為鄢夫人唐尚書云鄢為鄭武公所滅非取任氏而亡也昭謂幽王為西戎所殺而詩言褒姒滅之明禍有所由也】密須由伯姑【伯姑密須之女也傳曰密須之鼓闕鞏之甲此則文王所滅而獲鼓甲也大雅云密人不恭敢距大邦不由嫁女而亡世本云密須姑姓】鄩由叔妘【鄩妘姓之國叔妘同姓之女為鄩夫人昭謂公羊傳曰先鄭伯有善乎鄩公者通於夫人以取其國此之謂也】聃由鄭姬【聃姬姓文王之子聃季之國鄭女為聃夫人同姓相娶猶魯公娶於吳亦其瀆姓所以亡也】息由陳嬀【息姬姓之國陳嬀陳女為息侯夫人蔡哀侯亦娶於陳息嬀將歸過蔡蔡哀侯止而見之弗賓嬀以告息侯導楚伐蔡蔡侯怨因稱息嬀之美於楚子楚子遂滅息以息嬀歸】鄧由楚曼【鄧曼姓楚曼鄧女為楚武王夫人生文王過鄧而利其國遂滅鄧而兼之】羅由季姬【羅熊姓之國季姬姬氏之女為羅夫人】廬由荊嬀【廬嬀姓之國荊嬀廬女為荊夫人荊楚也】是皆外利離親者也【外利行淫辟求利於外不能親親以亡其國】夫翟隗姓也無列於王室【列位次也】豺狼之德不可厭也禮新不聞舊【間代也】王以翟女間姜任非禮且棄舊也【姜氏任氏之女世為王妃嬪今以翟女代之為棄舊也】其無乃禍階乎王弗聽【國語周語】

古者后夫人將侍君前息燭後舉燭至於房中釋朝服襲燕服然後入御於君【朝服展衣君在堂】雞鳴大師奏雞鳴於陛下【奏白也陛階也】然後夫人鳴佩玉於房中告去也然後應門擊柝告辟也【應門朝門辟啓也】然後少師奏質明於陛下【質正也】然後夫人入庭立君出朝【尚書大傳】庭內小臣掌王之陰事【陰事羣妃御見之事若今掖庭令晝漏不盡八刻日錄所記推當御見者天官】九嬪各帥其屬而以時御叙於王所【教各帥其屬者使亦九九相與從於王所息之燕寢御猶進也勸也進勸王息亦相次叙凡羣妃御見之法月與后妃其象也卑者宜先尊者宜後女御八十一人當九夕世婦二十七人當三夕九嬪九人當一夕三夫人當一夕后當一夕亦十五日而徧云自望後反之孔子云日者天之明月者地之理陰契制故月上屬為天使婦從夫放月紀同上】

女御掌御叙於王之燕寢【言掌御叙防上之專妒者於王之燕寢則王不就后宫息同上】右后夫人侍君 劉向曰自古聖王必正妃匹妃匹正則興不正則亂昔夏之興也以塗山其亡也以末喜殷之興也以有娀其亡也以妲己周之興也以太姒其亡也以褒姒此其著者也詩云關關雎鳩在河之洲窈窕淑女君子好逑言后妃說樂君子之德無不和諧又不淫其色慎固幽深若雎鳩之有別焉然後可以風化天下也夫雎鳩之鳥猶未嘗見其乘居而匹處也鳥獸尚然而況於人乎故夫婦有別則父子親父子親則君臣敬君臣敬則朝廷正朝廷正則王化成君臣父子夫婦三者天下之大綱紀也三者治則治三者亂則亂此關雎以為詩首重人道之始於此也【列女傳】匡衡曰妃匹之際生民之始萬福之原婚姻之禮正然後品物遂而天命全【遂成也】孔子論詩以關雎為始言太上者民之父母【太上居尊上之位者】后夫人之行不侔乎天地則無以奉神靈之統而理萬物之宜【侔等也】故詩曰窈窕淑女君子好仇【窈窕幽閒也仇匹也】言能致其貞淑不貳其操情欲之感無介乎容儀【介繫也言不以情欲繫心而著於容儀也】宴私之意不形乎動靜【形見也】夫然後可

以配至尊而為宗廟主此綱紀之首王教之端也自上世以來三代興廢未有不由此者也【匡衡傳】周宣姜后賢而有德事非禮不言行非禮不動宣王嘗早卧而晏起后夫人不出於房姜后既出乃脫簪珥待罪於永巷使其傅母通言於王曰妾不才妾之淫心見矣至使君王失禮而晏朝以見君王之樂色而忘德也夫苟樂色必好奢好奢必窮樂窮樂者亂之所興也原亂之興從婢子起婢子生亂當服其辜敢請婢子之罪唯君王之命王曰寡人不德寔自生過從寡人起非夫人之罪也遂復姜后而勤於政事早朝晏退繼文武之迹興周室之業卒成中興之名為周世宗【列女傳】雞既鳴矣朝既盈矣匪雞則鳴蒼蠅之聲【賦也言古之賢妃御於君所至於將旦之時必告君曰雞既鳴矣會朝之臣既已盈矣欲令君早起而視朝也然其實非雞之鳴也乃蒼蠅之聲也蓋賢妃當夙興之時心常恐晚故聞其似者而以為真非其心存警畏而不留於逸欲何以能此故詩人叙其事而美之也】東方明矣朝既昌矣匪東方則明月出之光【賦也東方明則日將出矣昌盛也此再告也】蟲飛薨薨甘與子同夢會且歸矣無庶於子憎【賦也蟲飛夜將旦而百蟲作也甘樂會朝也此三告也言當此時我豈不樂與子同寢而夢哉然羣臣之會於朝者俟君不出將散而歸矣無乃以我之故而并以子為憎乎齊風雞鳴】宋伯姬者魯宣公之女成公之妹也既嫁於恭公十年恭公卒伯姬寡三十五年至景公時伯姬之宮夜失火左右曰夫人少避火伯姬曰婦人之義保傅不俱夜不下堂待保傳來也保母至矣傅母未至也左右又曰夫人少避火伯姬曰婦人之義傅母不至夜不可下堂越義求生不如守義而死遂逮於火而死【列女傳】楚昭貞姜者齊侯之女楚昭王之夫人也王出遊留夫人於漸臺之上而去王聞江水大至使使者迎夫人曰王與宮人約令召宮人必以符今使者不持符妾不敢行使者曰水方大至還而取符則恐後矣夫人曰妾聞之貞女之義不犯約勇者不畏死守一節而已妾知從使者必生留必死也然棄約越義而求生不若留而死耳於是使者反取符未還則水大至臺崩夫人流而死【同上】齊孝孟姬者華氏之長女齊孝公之夫人也公遊於琅邪華孟姬從車奔姬墮車碎孝公使駟馬立車載姬以歸姬使侍御者舒帷以自障蔽而使傅母應使者曰妾聞妃后踰闕必乘安車輜輶下堂必從傅母保阿進退則鳴玉環珮內飾則結紐綢繆野處則帳裳壅蔽所以正心壹意自斂制也今立車無輶非所敢受命也野處無衛非所敢久居也二者失禮多矣夫無禮而生不若早死使者馳以告公更安車及則已自經矣【同上】

青史氏之記曰古者胎教王后腹之七月而就宴室【宴室夾室次宴寢也亦曰側室自王后已下有子曰震女史皆以金環止御王后比七月就宴室夫人婦嬪即以三月就其側室皆閉房而處也王后以七月為節者君聽天下之內政自諸侯以下同之也賈誼新書腹作有身宴室作蓐室】太師持銅而御戶左太宰持升而御戶右【太師瞽者宗伯之屬下大夫太宰膳夫也冢宰之屬上士二人言太宰因諸侯之稱也樂為陽故在左飲食為陰故在右升所以斟新書升作斗此下有太卜持蓍龜而御堂下諸官皆以其職御於門內二句】比及三月者王后所求聲音非禮樂則太師緼瑟而稱不習【謂逆序若淫聲新書緼瑟作撫樂】所求滋味者非正味則太宰倚升而言曰不敢以待王太子【新書升作斗下有不敢煎調四字大戴禮保傳】

右胎教【太任邑姜事見下章】

太子生而泣太師吹銅曰聲中其律太宰曰滋味上某太卜曰命云某然後為王太子【大戴無太卜曰十二字 賈誼新書】懸弧之禮東方之弧以梧其牲以雞南方之弧以柳其牲以狗中央之弧以桑其牲以牛西方之弧以棘其牲以羊北方之弧以棗其牲以彘五弧五分矢東方射東方南方射南方中央射中央西方射西方北方射北方皆三射其四弧具其餘各二分矢懸諸國四通門之左中央之弧亦具餘二分矢懸諸社稷門之左【大戴無此一段】然後卜王太子名上母取於天下母取於地中母取於名山通谷母悖於鄉俗【同上】國君世子生告於君接以大牢宰掌具【接讀為捷捷勝也謂食其母使補虛彊氣也】三日卜士負之吉者宿齊朝服寢門外詩負之射人以桑弧蓬矢六射天地四方【詩之言承也桑弧蓬矢本太古也天地四方男子所有事也】保受乃負之【代士也保保母】宰醴負子賜之束帛【醴當為禮聲之誤也禮以一獻之禮酬之以幣也】卜士之妻大夫之妾使食子【食之不使君妾適妾有敵義不相褻以勞辱事也士妻大夫之妾謂時自有子】凡接子擇日【雖三日之內尊卑必皆選其吉焉】冢子則大牢【天子世子也冢大也冢子猶言長子通於下也】國君世子大牢【皆謂長子】其非冢子則皆降一等【謂冢子之弟及衆妾之子生也天子諸侯少牢】異為孺子室於宮中【特埽一處以處之】擇於諸母與可者必求其寬裕慈惠溫良恭敬慎而寡言者使為子師其次為慈母其次為保母皆居子室【此人君養子之禮也諸母衆妾也可者傳御之屬也子師教示以善道者慈母知其嗜欲者保母安其居處者士妻食乳之而已】他人無事不往【為兒精氣微弱將驚動也】三月之末擇日翦髮為髻男角女羈否則男左女右【髻所遺髮也夾囟曰角午達曰羈也】世子生則君沐浴朝服夫人亦如之皆立于阼階西鄉世婦抱子升自西階君名之乃降【子升自西階則人君見世子於路寢也見妾子就側室凡子生皆就側室諸侯夫人朝於君次而祿衣也】適子庶子見於外寢撫其首咳而名之禮帥初無辭【此適子謂世子弟也庶子妾子也外寢君燕寢也無辭辭謂欽有帥記有成也】公庶子生就側室三月之末其母沐浴朝服見於君擯者以其子見君所有賜君名之衆子則使有司名之【擯者傳姆之屬也人君尊雖妾不抱子有賜於君有恩惠也有司臣有事者也魯桓公名子問於申繻也 內則】冢子未食而見必執其右手適子庶子已食而見必循其首【天子諸侯尊別世子雖同母禮則異矣未食已食急正緩庶之義也同上】食子者三年而出見於公宮則劬【劬勞也士妻大夫之妾食國君之子三年出歸其家君有以勞賜之 同上】

養公者必以其子入養【不離人母子因以娛公也昭三十一年公羊傳】

右生子 天子太子使士負子於南郊以桑弧蓬矢六射者何也此男子之事也故先表其事然後食其祿保傅曰太子生舉之以禮使士負之有司齊肅綏之南郊見於天韓詩內傳曰太子生以桑弧蓬矢六射上下四方明當有事天地四方也【白虎通】周太姜者王季之母有郃氏之女也太王娶以為妃生太伯仲雍王季至於成童靡有過失太王謀事必於太姜遷徙必與太姜君子謂太姜廣於德教太任者文王之母摯任氏之中女也王季娶以為妃太任之性敦一誠莊惟德之行及其有娠目不視惡色耳不聽淫聲口不出敖言生文王而明聖太任教之以一而識百卒為周宗君子謂太任能胎教太姒者武王之母禹後有莘姒氏之女也在郃之陽在渭之涘仁而明道文王嘉之親迎于渭造舟為梁及入太姒思媚太姜太任旦夕勤勞以進婦道太姒號曰文母文王治外文母治內太姒生十男長曰伯邑考次曰武王發次周公旦次管叔鮮次蔡叔度次曹叔振鐸次霍叔武次成叔處次康叔封次珣季載太姒之所以教

誨扶持十子者自少及長未嘗見邪僻之事常以正道檢押之及其長文王繼而教之卒成武王周公之德武王后曰邑姜太公之女也妊成王於身立而不跛坐而不差笑而不諠獨處而不倨雖怒而不詈胎教之謂也【列女傳】 桓公六年九月丁卯子同生【桓公子莊公也十二公唯子同是適夫人之長子備用太子之禮故史書之於策不稱太子者書始生也】以大子生之禮舉之接以大牢【大牢牛羊豕也以禮接夫人重適也】卜士負之士妻食之【禮世之生三日卜士負之射人以桑弧蓬矢射天地四方卜士之妻為乳母】公與文姜宗婦命之【世子生三月君夫人沐浴於外寢立於阼階西鄉世婦抱子升自西階君命之乃降蓋同宗之婦】公問名於申繻對曰名有五有信有義有象有假有類【申繻魯大夫】以名生為信【若唐叔虞魯公子友】以德命為義【若文王名昌武王名發】以類命為象【若孔子首象尼丘】取於物為假【若伯魚生人有饋之魚因名之曰鯉】取於父為類【若子同生有與父同者】不以國【國君之子不自以本國為名也】不以官不以山川不以隱疾【隱痛疾患辟不祥也】不以畜牲【畜牲六畜】不以器幣【幣玉帛】周人以諱事神名終將諱之【君父之名固非臣子所斥然禮既卒哭以木鐸徇曰舍故而諱新謂舍親盡之祖而諱新死者故言以諱事神名終將諱之自父至高祖皆不敢斥言】故以國則廢名【國不可易故廢名】以官則廢職以山川則廢主【改其山川之名】以畜牲則廢祀【名豬則廢豬名羊則廢羊】以器幣則廢禮晉以僖侯廢司徒【僖公名司徒廢為中軍】宋以武公廢司空【武公名司空廢為司城】先君獻武廢二山【二山具敖也魯獻公名具武公名敖更以其鄉名山】是以大物不可以命公曰是其生也與吾同物命之曰同【物類也謂同日春秋左氏傳】

古之聖帝將立世子則帝自朝服升自阼階上西鄉妃抱世子自房出東鄉太史奉書而上堂當兩階之間北面立曰世子名曰某者三帝執禮稱辭命世子曰授太祖太宗與社稷於子者三其命也妃曰不敢者再於三命曰謹受命拜而退太史以告太祝太祝以告太祖太宗與社稷太史出以告太宰太宰以告州伯州伯命藏之州府凡諸貴以下至於百姓男女無敢與世子同者【賈誼新書】

右立世子 勢明則民定而出於一道故人皆爭為宰相而不姦為世子非宰相尊而世子卑也不可以智求不可以力爭也今以為知子莫如父故疾死置後者恣父之所以比使親戚不相親兄弟不相愛亂天下之紀使天下之俗失聞尊敬而不讓其道莫經於此疾死置後復以適長子如此則親戚相愛也兄弟不爭此天下之至義也以此防民百姓猶有爭為君者【賈誼新書】 君在立太子者防篡煞壓臣子之亂也君薨嫡夫人無子有育遺腹必待其產立之何專適重正也曾子問曰立適以長不以賢何以言為賢不肖不可知也立子以貴不以長防愛憎也【白虎通】 王子朝曰昔先王之命曰王后無適則擇立長年鈞以德德鈞以卜【此所謂先王之經】王不立愛公卿無私古之制也【昭公十六年左氏傳】 穆公問於子思曰立太子有常乎答曰有之在周公之典【言周典有之】公曰昔文王舍適而立其次【文王舍其適長伯邑考而立次子武王發】微子舍孫而立其弟【微子舍其孫腓而立其弟衍微仲】是何法也子思曰殷人質而尊其尊故立弟周人文而親其親故立子亦各其禮也文質不同其禮則異文王舍適立次權也【以武王賢故用權而立之】公曰苟得行權豈唯聖人唯賢與愛立也子思曰聖人不以權教【權者見機而作非可為常教】故立制垂法順之為貴

若必欲犯何有於異【脫不順其法違而犯之亦何有異於用權】公曰舍賢立聖舍愚立賢何如【言或舍其賢子而立其聖子舍其愚子而立其賢子如何】子思曰唯聖立聖其文王乎不及文王者則各賢其所愛不殊於適何以限之【言有不及文王者能推其所愛之賢者而立之亦無殊於立適矣】必不能審賢愚之分請父兄羣臣卜於祖廟亦權之可也【脫不能審其賢愚則於廟卜其吉而立之亦權之義也 孔叢子】子野卒立敬歸之娣齊歸之子公子稠【齊諡稠昭公名】穆叔不欲曰大子死有母弟則立之無則立長【立庶子則以年】年鈞擇賢義鈞則卜古之道也【先人事後卜筮也義鈞謂賢等】非適嗣何必娣之子【言子野非適嗣襄三十一年左氏傳】

世子之記曰朝夕至於大寢之門外問於內豎曰今日安否何如【朝夕朝朝暮夕也日中又朝文王之為世子非禮之制也世子之禮亡言此存其義】內豎曰今日安世子乃有喜色其有不安節則內豎以告世子世子色憂不滿容【色憂憂淺也不及文王行不能正履】內豎言復初然後亦復初朝夕之食上世子必在視寒煖之節食下問所膳羞必知所進以命膳宰然後退【羞必知所進必知親所食】若內豎言疾則世子親齊玄而養【親猶自也養疾者齊玄玄冠玄端也】膳宰之饌必敬視之【疾者之食齊和所欲或異】疾之藥必親嘗之【試毒味也】嘗饌善則世子亦能食【善謂多於前】嘗饌寡世子亦不能飽【又不及武王一飯再飯】以至於復初然後亦復初【復常所膳文王世子】

右世子事君父 文王之為世子朝於王季日三【三皆曰朝以其禮同】雞初鳴而衣服至於寢門外問內豎之御者曰今日安否何如【內豎小臣之屬掌外內之通命者御如今小史直日矣】內豎曰安文王乃喜【孝子恒兢兢】及日中又至亦如之【又復也】及莫又至亦如之【莫夕也】其有不安節則內豎以告文王文王色憂行不能正履【節謂居處故事履蹈地也】王季復膳【飲食安也】然後亦復初【憂解】食上必在視寒煖之節【在察也】食下問所膳【問所食者】命膳宰曰未有原應曰諾然後退【未猶勿也原再也勿有所再進為其失飪臭味惡也退反其寢】武王帥而行之不敢有加焉【庶幾程式之帥循也】文王有疾武王不說冠帶而養【言常在側】文王一飯亦一飯文王再飯亦再飯【欲知氣力箴藥所勝】旬有二日乃間【間猶瘳也文王世子】晉里克曰大子奉冢祀社稷之粢盛【冢大也】以朝夕視君膳者也【膳厨膳】故曰冢子君行則守有守則從從曰撫軍守曰監國古之制也【閔二年左氏傳】許悼公瘡飲大子止之藥卒【止獨進藥不由醫】大子奔晉書曰弑其君君子曰盡心力以事君舍藥物可也【藥物有毒當由醫非凡人所知譏止不舍藥物所以加弑君之名 昭十九年左氏傳】子云孝以事君弟以事長示民不貳也故君子有君不謀仕唯卜之日稱二君【不貳不自貳於尊者也自貳謂若鄭叔段者也君子有君謂君之子父在者也不謀仕嫌遲為政也卜之日謂君有故而為之卜也二當為貳唯卜之時辭得曰君之貳某爾晉惠公獲於秦命其大夫歸擇立君曰其卜二圉也 坊記】

齊桓公葵丘之會諸侯初命曰誅不孝母易樹子母以妾為妻【僖公九年葵丘之會陳牲而不殺讀書加於牲上壹明天子之禁樹立也已立世子不得擅易初命三事所以修身正家之要也 孟子】

右齊家 周公欲弑莊王而立王子克【莊王桓王太子王子克莊王弟子儀】辛伯告王遂與王殺周公黑肩王子克奔燕【辛伯周大夫】初子儀有寵於桓王桓王屬諸周公辛伯諫曰竝后【妾如后】匹嫡【庶如嫡】兩政【臣擅命】耦國【都如國】亂之本也周公弗從故及【及於難也 桓十八年左氏傳】 晉獻公欲以驪姬為夫人卜之不吉弗聽立之生奚齊其娣生卓子及將立奚齊既與中大夫成謀姬謂大子曰君夢齊姜必速祭之【齊姜太子母言求食】大子祭於曲沃歸胙於公【胙祭之酒肉】公田姬寘諸宮六日公至毒而獻之【毒酒經宿輒敗而經六日明公之惑】公祭之地地墳與犬犬斃與小臣小臣亦斃姬泣曰賊由大子大子奔新城【新城曲沃 僖四年左氏傳】公子重耳謂之曰子盍言子之志於公乎【盍何不也重耳申生異母弟欲使言見譖之意】世子曰不可君安驪姬是我傷公之心也【言其意則驪姬必誅也】曰然則盍行乎【行猶去也】世子曰不可君謂我欲弑君也天下豈有無父之國哉吾何行如之【言人有父則皆惡欲弑父者】使人辭於狐突曰申生有罪不念伯氏之言也以至於死申生不敢愛其死【辭猶告也狐突申生之傳舅犯之父也前此者獻公使申生伐東山臯落氏狐突謂申生欲使之行今言此者謝之伯氏狐突別氏】雖然吾君老矣子少國家多難【子謂奚齊】伯氏不出而圖吾君【圖猶謀也不出為君謀國家之政然則自臯落氏反後狐突懼乃稱疾】伯氏苟出而圖吾君申生受賜而死【賜猶惠也】再拜稽首乃卒【既告狐突乃雉經】是以為恭世子也【言行如此可以為恭於孝則未之有 檀弓】 魯公子荆之母嬖【荆哀公庶子】將以為夫人使宗人鬻夏獻其禮【宗人禮官也】對曰無之公怒曰女為宗司立夫人國之大禮也何故無之對曰周公及武公娶於薛【武公敖也】孝惠娶於商【孝公稱惠公弗皇商宋也】自桓以下娶於齊【桓公始娶文姜】此禮也則有若以妾為夫人則固無其禮也公卒立之而以荆為大子國人始惡之【惡公哀二十四年左氏傳】 僖公八年秋七月禘於大廟用致夫人【劉白曰夫人成風也致之於大廟位之以為夫人】用者不宜用者也致者不宜致者也言夫人必以其氏姓言夫人而不以氏姓非夫人也立妾之辭也非正也【夫人者正嫡之稱謂非崇妾之嘉號以妾體君則上下無別雖尊其母是卑其父故曰非正也禮有君之母非夫人者又庶子為後為其母總是妾不為夫人明矣】一則以宗廟臨之而後貶焉【臣無貶君之義故於大廟云夫人氏姓以明君之非正】一則以外之弗夫人而見正焉【秦人來歸僖公成風之襚不言夫人 穀梁傳】

卷六十一

<經部,禮類,通禮之屬,禮書綱目

欽定四庫全書

禮書綱目卷六十一 婺源江永撰

朝廷禮 通禮十

補

天子者與天地參故德配天地兼利萬物與日月竝明明照四海而不遺微小其在朝廷則道仁聖禮義之序燕處則聽雅頌之音行步則有環佩之聲升車則有鸞和之音居處有禮進退有度百官得其宜萬事得其序詩云淑人君子其儀不忒其儀不忒正是四國此之謂也【道猶言也環珮環珮玉也所以為行節也玉藻曰進則揖之退則揚之然後玉鏘鳴也環取其無窮止玉則比德焉孔子佩象環五寸人君之環未聞也鸞和皆鈴也所以為車行節也韓詩內傳曰鸞在衡和在式故升車則馬動馬動則鸞鳴鸞鳴則和應居處朝廷與燕也進退行步與升車也】發號出令而民說謂之和上下相親謂之仁民不求其所欲而得之謂之信除去天地之害謂之義義與信和與仁霸王之器也有治民之意而無其器則不成【器謂所操以作事者也義信和仁皆存乎禮記經解】三代之禮天子春朝朝日秋暮夕月【祭日東壇祭月西壇故以別內外以端其位】所以明有別也春秋入學坐國老執醬而親饋之【仲春舍菜合舞仲秋班學合聲】所以明有孝也行中鸞和步中采齊趨中肆夏【車亦應樂節步又中佩聲互言之也】所以明有度也於禽獸見其生不食其死聞其聲不嘗其肉故遠庖厨所以長恩且明有仁也食以禮徹以樂失度則史書之工誦之三公進而讀之宰夫減其膳是天子不得為非也【大戴禮保傳】

右通論

師氏掌以媯詔王【告王以善道也文王世子曰師也者教之以事而諭諸德者也地官】保氏掌諫王惡【諫者以禮義正之文王世子曰保也者慎其身以輔翼之而歸諸道者也同上】君之所不臣於其臣者二當其為尸則弗臣也

當其為師則弗臣也大學之禮雖詔於天子無北面所以尊師也【尊師重道焉不使處臣位也武王踐阼召師尚父而問焉曰昔黃帝顓頊之道存乎意亦忽不可得見與師尚父曰在丹書王欲聞之則齊矣王齊三日端冕師尚父亦端冕奉書而入負屏而立王下堂南面而立師尚父曰先王之道不北面王行西折而南東面而立師尚父西面道書之言學記】天子不論先聖王之德不知國君畜民之道不見禮義之正不察應事之理不博古之典傳不閑於威儀

之數詩書禮樂無經學業不法凡是其屬太師之任也天子無恩於父母不惠於庶民無禮於大臣不中於制獄無經於百官不哀於喪不敬於祭不信於諸侯不誠於戎事不誠於賞罰不厚於德不強於行賜與侈於近臣鄰愛於疏遠卑賤不能懲忿窒慾【言不勝其情易曰君子以懲忿窒慾】不從太師之言凡是之屬太傅之任也天子處位不端受業不敬言語不序聲音不中律【聲有準乃中律】進退節度無禮【節度或為節序】升降揖讓無容周旋俯仰視瞻無儀安顧咳唾趨行不得【趨或為走】色不比順隱琴瑟【隱據也言按禮樂之器】凡此其屬太保之任也天子宴饗廢其學【少師與天子宴者也朱子曰饗本作瞻又無廢字今以學記利補】左右之習反其師【左右所習不順於師也朱子曰此即學記所謂燕朋逆其師者也】答遠方諸侯不知文雅之辭應對羣臣左右不知已諾之正簡聞小誦不傳不習凡此其屬少師之任也天子居處出入不以禮冠帶衣服不以制御器在側不以度縱上下雜采不以章【惑於朱紫不以典章】忿怒說喜不以義賦與集讓不以節【朱子曰集疑當作譙】凡此其屬少傅之任也天子宴私安如易【自放縱也朱子曰如而古通用】樂而湛【過於樂也】飲酒而醉食肉而餒【過其性也】飽而強【強猶強也】飢而憊【憊貪殘也】暑而暍【暍傷暑也】寒而寢而莫宥坐而莫侍行而莫先莫後天子自為開門戶取玩好自執器皿亟顧環面【環旋也】御器之不舉不藏凡此之屬少保之任也號呼歌謠聲音不中律宴樂雅誦迭樂序【輕用雅誦也凡禮不同樂各有迭苟從所好亂其次聲樂之失任在太史者樂應天也國語曰吾非瞽史焉知天道也】不知日月之時節不知先王之諱與大國之忌【周禮小史職曰若有事則詔王之忌諱也】不知風雨雷電之眚凡此其屬太史之任也【大戴保傳】古者天子必有四鄰前曰疑後曰丞左曰輔右曰弼天子有問無以對責之疑可志而不志責之丞可正而不正責之輔可揚而不揚責之弼【尚書大傳】每歲孟春適人以木鐸徇于路官師相規工執藝事以諫其或不恭邦有常刑【適人司令之官木鐸金口木舌施政教時所振以警衆也官以職言師以道言規正也相規云者胥教誨也工百工也百工技藝之事至理存焉理無往而不在故言無微而可略也孟子曰責難於君謂之恭書胤征】天子聽政使公卿至於列士獻詩【獻詩以風也列士上士也】瞽獻典【無目曰瞽瞽樂師與樂典也】史獻書【史外史也周官外史掌三皇五帝之書】師箴【師小師也箴箴刺王闕以正得失】賦【無眸子曰賦賦公卿列士所獻詩也】矇誦【有眸子而無見曰矇周禮矇主弦歌風誦誦箴諫之語也】百工諫【百工執技以事上者執藝事以諫謂若匠師慶諫魯莊公丹楹刻桷者】庶人傳語【庶人卑賤見時得失不得進傳以語之也】近臣盡規【近臣謂驂僕之屬也盡規盡其規以告王也】親戚補察【補補過察察政也傳曰自王以下有父兄子弟以補察其過】瞽史教誨【瞽樂太師史太史也掌陰陽天時禮法之書以相教誨者單襄公曰吾非瞽史焉知天道】耆艾修之【耆艾師傅也修之理瞽史之教以聞於王】而後王斟酌焉【斟酌取也酌行也】是以事行而不悖【悖送也國語周語】古之王者政德既成又聽於民【詢於葛藟聽謗譽也】於是乎使工誦諫於朝【工矇也誦誦讀前世箴諫之語】在列者獻詩使勿兜【列位也謂公卿至於列士獻詩以風也兜惑也】風聽臚言於市【風采也臚傳也采聽商旅所傳善惡之言】辨妖祥於謠【辨別也妖惡也祥善也行歌曰謠丙之辰檠弧箕服之類是也】考百事於朝【百官職事】問謗譽於路有邪而正之盡戒之術也【術道也晉語】有君而為之貳【貳卿佐】使師保之勿使過度是故天子有公諸侯有卿卿置側室【側室支子之官】大夫有貳宗【貳宗宗子之副貳者】士有朋友庶人工商皁隸牧圉皆有親暱以相輔佐也善則賞之【賞謂宣

揚】過則匡之【匡正也】患則救之【救其難也】失則革之【革更也】自王以下各有父子兄弟以補察其政【補其愆過察其得失】史為書瞽為詩工誦箴諫大夫規誨士傳言庶人謗商旅於市百工獻藝故夏書曰適人以木鐸徇於路【逸書適人行令之官也木鐸木古金鈴徇于路求歌謠之言】官師相規【官師大夫自相規正】工執藝事以諫【所謂獻藝】正月孟春於是乎有之諫失常也【有道人徇路 襄公十四年左氏傳】天子有爭臣七人雖無道不失其天下諸侯有爭臣五人雖無道不失其國【孝經】卒食玄端而居【天子服玄端燕居也】動則左史書之言則右史書之【其書春秋尚書其存者】御瞽幾聲之上下【瞽樂人也幾猶察也察其哀樂玉藻】太史典禮執簡記奉諱惡【簡記策書也諱先王名惡忌日若子卯】天子齋戒受諫【歲終羣臣奏歲事諫王當所改為也 王制】小史掌邦國之志奠繫世辨昭穆若有事則詔王之忌諱【鄭司農云志謂記也春秋傳所謂周志國語所謂鄭書之屬是也史官主書故韓宣子聘於魯觀書太史氏繫世謂帝繫世本之屬是也小史主定之瞽矇諷誦之先王死日為忌名為諱故書奠為帝杜子春云帝當為奠奠讀為定書亦或為奠玄謂王有事所祭於其廟 春官】宗祝在廟三公在朝三老在學王前巫而後史卜筮瞽侑皆在左右王中心無為也以守至正【此所以達禮於下也教民慎居處也宗宗人也瞽樂人也侑四輔也禮運】天子出戶而巫覡有事出門而宗祝有事【出戶謂門內也女曰巫男曰覡有事祓除不祥出門謂車駕出國門宗者主祭祀之官有事謂祭行神也 荀子】太僕掌正王之服位【服王舉動所當衣也位立處也 夏官】

小臣正王之燕服位【謂燕居時也玉藻曰王卒食玄端而居 同上】訓方氏掌道四方之政事與其上下之志【道猶言也為王說之四方諸侯也上下君臣也】誦四方之傳道【傳道世世所傳說往古之事也為王誦之若今論聖德堯舜之道矣故書傳為傳杜子春云傳當為傳書亦或為傳 同上】右師保【凡規諫侍御之法皆在此】魯哀公問於子夏曰必學而後可以安國保民乎子夏曰不學而能安國保民者未之有也哀公曰然則五帝有師乎子夏曰有臣聞神農學乎悉老黃帝學乎大真【一作墳】顓頊學乎綠【一作綠圖一作伯夷父】帝嚳學乎赤松子【一作伯招】堯學乎尹壽【一作務成子跼一作子州父】舜學乎務成跼【一作尹壽一作許由】禹學乎西王國【一作大成執】湯學乎威子伯【一作貸子相一作小臣】文王學乎鉸時【一作錫疇子斯】武王學乎郭叔【一作太公一作文王武王學太公望周公旦】周公學乎太公【一作號叔】仲尼學乎老聃此十一聖人未遭此師則功業不著於天下名號不傳乎千世夫不學不明古道而能安國家者未之有也【新序】武王踐阼三日【既王之後】召士大夫而問焉曰惡有藏之約行之行萬世可以為子孫恆者乎【惡猶於何也言於何有約言而行之乃行萬世而猶得其福】諸大夫對曰未得聞也然後召師尚父而問焉曰黃帝顓頊之道存乎意亦忽不可得見與【言忽然謂不可得見】師尚父曰在丹書王欲聞之則齊矣三日王端冕師尚父亦端冕奉書而入負屏而立【端正也樹謂之屏】王下堂南面而立師尚父曰先王之道不北面王行西折而南東面而立師尚父西面道書之言曰敬勝怠者吉怠勝敬者滅義勝欲者從欲勝義者凶凡事不強則枉【凡事不能自強去執於此則枉也 朱子曰去執二字恐誤蓋強者以力自矯謂若徇其所偏不自矯揉則終於枉而已】弗敬則不正枉者滅廢敬者萬世藏之約行之行可以為子孫恆者此言之謂也【問先帝之道庶聞要約之旨故對此而已】王聞書之言惕若恐懼而為戒書【託於物以自警戒也】於席之四端為銘焉於几為銘焉於鑑為銘焉於盥槃為銘焉於楹為銘焉於杖為銘焉於帶為銘焉於履屨為銘焉於觴豆為銘焉於戶為銘焉於牖為銘焉於劒為

銘焉於弓為銘焉於矛為銘焉席前左端之銘曰安樂必敬【安不忘危】前右端之銘曰無行可悔【當恭敬朝夕故以懷安為悔也】後左端之銘曰一反一側亦不可以忘【言雖反側之間不可以忘道也】後右端之銘曰所監不遠視邇所代【周監不遠近在有殷之世】几之銘曰皇皇惟敬口生咥【咥恥也言為君子榮辱之主可不慎乎咥咥詈也】口戕口【言口能害口也几者人君出令所依故以言語為戒也】鑑之銘曰見爾前慮爾後盥槃之銘曰與其溺於人也寧溺於淵溺於淵猶可游也溺於人不可救也【日知所亡學者之功溺於民庶大人之禍故或以自新取戒或以游溺為鑑也】楹之銘曰毋曰胡殘其禍將然毋曰胡害其禍將大毋曰胡傷其禍將長【夫為室者慎其楹君天下者難其相也朱子曰此亦泛言未必指楹為相也】杖之銘曰惡乎危於忿戇【惡乎何也忿者危之道怒甲及乙又危之甚杖危故以危戒也】惡乎失道於嗜慾【杖依道而行之】惡乎相忘於富貴【言身杖相資也因失道相忘乃嗜慾安樂之戒也】帶之銘曰火滅修容慎戒必恭恭則壽【雖夜解息其容不可以苟帶於寢先釋故因言之也】履履之銘曰慎之勞勞則富【行慎躬勞躬勞終福論慎履亦財不費也履在下尤勞辱因為此戒勞與富音義兩施互取焉】觴豆之銘曰食自杖食自杖戒之僬僬則逃【無求醉飽自杖而已】戶之銘曰夫名難得而易失無懃弗志而曰我知之乎無懃弗及而曰我杖【一本作枝】之乎【志識也杖立不能懲其驚息而自謂杖成功無可就故終失其名也】擾阻以泥之【朱子曰無懃弗志至此皆所未詳要必有害於戶者】若風將至必先搖搖【搖搖無所託言有風則先困朱子曰此謂戶不固閉而動搖也】雖有聖人不能為謀也【論人行論亦然】牖之銘曰隨天之時【任也】以地之財【質也】敬祀皇天敬以先時【先祭時而敬齋朱子曰牖下齊祭之處也】劒之銘曰帶之以為服動必行德行德則興倍德則崩【以順誅也】弓之銘曰屈伸之義廢興之行無忘自【一本作息】過【言得時也】矛之銘曰造矛造矛少間弗忍終身之羞【重言造矛見造矛之不易也言少間之不忍則為終身羞以君子於殺之中禮恕存焉】予一人所聞以戒後世子孫【貽厥孫謀以燕翼子武王之詩也大戴踐阼】昔周辛甲之為大史也命百官官箴王闕【辛甲周武王太史闕過也使百官各為箴辭戒王過左傳】明堂之位曰篤仁而好學多聞而道慎天子疑則問應而不窮者謂之道道者導天子以道者也常立於前是周公也誠立而敢斷輔善而相義者謂之充充者充天子之志也常立於左是太公也絜廉而切直匡過而諫邪者謂之弼弼者拂天子之過者也常立於右是召公也博聞強記接給而善對者謂之承承者承天子之遺忘者也常立於後是史佚也【史佚周太史尹佚也】故成王中立而聽朝則四聖維之是以慮無失計而舉無過事殷周之前以長久者其輔翼天子有此具也【大戴保傳】衛武公年數九十有五矣【武公衛僖公之子共伯之弟武公和也】猶箴傲於國【箴刺也傲戒也】曰自卿以下至於師長士【師長大夫士衆士也】苟在朝者無謂我老耄而舍我【舍謂不諫戒也】必恭恪於朝朝夕以交戒我聞一二之言必誦志而納之以訓道我【言謗譽之言也志記也】在輿有旅賁之規【規規諫也旅賁勇力之士掌執戈楯夾車而趨車止則持輪】位宁有官師之典【中庭之左右謂之位門屏之間謂之宁師長也典常也】倚几有誦訓之諫【誦訓工師所誦之諫書之於几也】居寢有御之箴【近也】臨事有瞽史之道【事戎祀也瞽樂太師掌詔吉凶史太史也掌詔禮事】宴居有師工之誦【師樂師工瞽矇也誦謂箴諫也】史不失書矇不失誦以訓御之【御進也】於是乎作懿戒以自儆也【三家云懿戒書也昭謂懿戒詩大疋抑之篇也懿讀曰抑毛詩敘曰抑衛武公刺厲王亦以自儆也】及其沒也謂之叡聖武公【叡明也書曰叡作聖諡法威強叡德曰武

楚語】荀子曰國將興必貴師而重傳貴師而重傳則法度存國將衰必賤師而輕傳賤師而輕傳則人有快【人肆其意】人有快則法度壞【荀子大略】

天子皮弁以日視朝【玉藻】眡朝則皮弁服【視朝視內外朝之事皮弁之服十五升白布衣積素以為裳王受諸侯朝覲於廟則袞冕 春官司服 此二條王視朝之服】象路朱樊纓七就建大赤以朝【象路以象飾諸末象路無鈎以朱飾勒而已其樊及纓以五采屬飾之而七成大赤九旗之通帛以朝以日視朝 春官巾車 此條王視朝車旗】司士正朝儀之位辨其貴賤之等王南鄉三公北面東上孤東面北上卿大夫西面北上王族故士虎士在路門之右南面東上大僕大右大僕從者在路門之左南面西上【此王日視朝事於路門外之位王族故士故為士晚退晉宿衛者未嘗仕雖同族不得在王宮大右司右也大僕從者小臣祭僕御僕隸僕】司士擯【詔王出揖公卿特揖大夫以下朝者也】特揖大夫以其等旅揖士旁三揖王還揖門左揖門右【特揖一一揖之旅衆也大夫爵同者衆揖之公及孤卿大夫始入門右皆北面東上王揖之乃就位羣士及故士大僕之屬發在其位羣士位東面王西南鄉而揖之三揖者士有上中下王揖之皆逡巡既復位鄭司農云卿大夫士皆君之所揖禮春秋傳所謂三揖在下】大僕前【前正王視朝之位】王入內朝皆退【王入路門也王入路門內朝朝者皆退反其官府治處也王之外朝則朝士掌焉玉藻曰朝服以日視朝於內朝朝辨色始入君日出而視之退適路寢聽政使人視大夫大夫退然後適小寢謂諸侯也王日視朝皮弁服其禮則同夏官】宰夫之職掌治朝之法以正王及三公六卿大夫羣吏之位掌其禁令【治朝在路門外其位司士掌焉宰夫察其不如儀天官】

大僕王眡朝則前正位而退入亦如之【前正位而退道王王既立退居路門左待朝畢 夏官】諸子掌國子之倅辨其等正其位【鄭司農云國子謂諸侯卿大夫士之子也玄謂四民之業而士者亦世焉國子者是公卿大夫士之副貳位朝位同上】

大宰王眡治朝則贊聽治【治朝在路門外羣臣治事之朝王視之則助王平斷天官】師氏居虎門之左司王朝【虎門路寢門也王日視朝於路寢門外畫虎焉以明勇猛於守室也司猶察也察王之視朝若有善道可行者則當前以詔王 地官 以上六條天子治朝】諸侯朝服以日視朝於內朝【朝服冠玄端素裳也此內朝路寢門外之正朝也天子諸侯皆三朝】朝辨色始入【羣臣也入入應門也辨猶正也別也】君日出而視之退適路寢聽政使人視大夫大夫退然後適小寢釋服【小寢燕寢也釋服服玄端 玉藻】公族其在外朝則以官司士為之【外朝路寢門之外庭司士亦司馬之屬也掌羣臣之班正朝儀之位也 文王世子】諸侯視朝大夫特士旅之【大夫特士旅之謂君揖之禮器 以上三條諸侯治朝】大僕王眡燕朝則正位掌擯相【燕朝朝於路寢之庭王圖宗人之嘉事則燕朝】王不眡朝則辭於三公及孤卿【辭謂以王不視朝之意告之春秋傳曰公有疾不視朝 夏官】

此條天子燕朝及辭不視朝】公族其朝於公內朝則東面北上臣有貴者以齒【內朝路寢庭】庶子治之雖有三命不踰父兄【治之治公族之禮也唯於內朝則然其餘會聚之事則與庶姓同 文王世子 此條諸侯燕朝又羣臣之位見燕禮大射禮】朝士掌建邦外朝之法左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆庶在其後左嘉石平罷民焉右肺石達窮民焉【樹棘以為位者取其赤心而外刺象以赤心三刺也槐之言懷也懷來人於此欲與之謀羣吏謂府吏也州長鄉遂之官鄭司農云王有五門外曰皋門二曰雉門三曰庫門四曰應門五曰路門路門一曰畢門外朝在路門外

內朝在路門內左九棘右九棘故易曰係用徽纆寘于叢棘玄謂明堂位說魯公宮曰庫門天子皋門雉門天子應門言魯用天子之禮所名曰庫門者如天子皋門所名曰雉門者如天子應門此名別二兼四則魯無皋門應門矣檀弓曰魯莊公之喪既葬而經不入庫門言其除喪而反由外來是庫門在雉門外必矣如是王五門雉門為中門雉門設兩觀與今之宮門同閤人幾出入者窮民蓋不得入也郊特牲譏繹於庫門內言遠當於廟門廟在庫門之內見於此矣小宗伯職曰建國之神位右社稷左宗廟然則外朝在庫門之外皋門之內與今司徒府有天子以下大會殿亦古之外朝哉周天子諸侯皆有三朝外朝一內朝二內朝之在路門內者或謂之燕朝】帥其屬而以鞭呼趨且辟【趨朝辟行人執鞭以威之】禁慢朝錯立族談者【慢朝謂臨朝不肅敬也錯立族談違其位傳語也 秋官】小司寇之職掌外朝之政以致萬民而詢焉一曰詢國危二曰詢國遷三曰詢立君【外朝在雉門之外者也國危謂有兵荒之難國遷謂徙都故邑也立君謂無冢適選於庶也鄭司農云致萬民聚萬民也詢謀也詩曰詢於芻蕘書曰謀及庶人】其位王南鄉三公及州長百姓北面羣臣西面羣吏東面【羣臣卿大夫士也羣吏府吏也其孤不見者孤從羣臣卿大夫在公後】小司寇擯以敘進而問焉以衆輔志而弊謀【擯謂揖之使前也敘更也輔志者尊王賢明也 同上】鄉大夫大詢於衆庶則各帥其鄉之衆寡而致於朝【大詢者詢國危詢國遷詢立君鄭司農云大詢於衆庶洪範所謂謀及庶民 地官 已上三條天子外朝】

大宰王眡朝則贊聽治眡四方之聽朝亦如之【謂王巡守在外朝 天官】

師氏王舉則從聽治亦如之【謂王舉於野外以聽朝 地官】

保氏王舉則從聽治亦如之【同上已上三條天子有外聽朝】

朝玄端夕深衣【謂大夫士也 玉藻此一條大夫士視私朝】右朝儀 離也者明也萬物皆相見南方之卦也聖人南面而聽天下嚮明而治蓋取諸此也【易說卦傳】君之南鄉答陽之義也臣之北面答君也【答對也】

【郊特牲】公父文伯之母如季氏【如之也】康子在其朝【自其外朝也】與之言弗應從之及寢門弗應而入【入康子之家】康子辭於朝而入見【辭其家臣入見敬姜】曰肥也不得聞命無乃罪乎【得無有罪乎】曰子弗聞乎天子及諸侯合民事於外朝【言與百官考合民事於外朝也】合神事於內朝【神事祭祀也內朝在路門內】自卿以下合官職於外朝【外朝君之公朝】合家事於內朝【家大夫也內朝家朝也】寢門之內婦人治其業焉上下同之【寢門在室之門上下天子以下也】夫外朝子將業君之官職焉內朝子將庀季氏之政焉【庀治也】皆非吾所敢言也【國語魯語】

天子左五鐘右五鐘【凡律呂十二各一鐘天子宮縣黃鐘蕤賓在南北其餘則在東西】天子將出則撞黃鐘右五鐘皆應【黃鐘在陽陽氣動西五鐘在陰陰氣靜君將出故以動告靜靜者皆和也】馬鳴中律步者皆有容駕者皆有文御者皆有數步者中規折還中矩立則磬折拱則抱鼓【言聲合於樂體比於禮也】然後太師奏登車告出也【周禮王出入奏王夏】入則撞蕤賓左五鐘皆應【蕤賓在陰東五鐘在陽君入故以靜告動動者則亦皆和之也】以治容貌在內者皆玉色在外者皆金聲【玉色反其正性也金聲其事殺】然後少師奏登堂就席告入也【少師佐成大師之事者也 尚書大傳】樂師教樂儀行以肆夏趨以采齊車亦如之環拜以鐘鼓為節【教樂儀教王以樂出入於大寢朝廷之儀故書趨作踰鄭司農

云路當為趨書亦或為趨肆夏采齊皆樂名或曰皆逸詩謂人君行步以肆夏為節趨疾於步則以采齊為節若今時行禮於太學罷出以鼓陔為節環謂旋也拜直拜也玄謂行者謂於大寢之中趨謂於朝廷爾雅曰堂上謂之行門外謂之趨然則王出既服至堂而肆夏作出路門而采齊作其反入至應門路門亦如之此謂步迎賓客王如有車出之事登車於大寢西階之前及降於阼階之前尚書大傳曰天子將出撞黃鐘之鐘右五鐘皆應入則撞蕤賓之鐘左五鐘皆應大師於是奏樂 春官】大馭掌馭玉路以祀凡馭路行以肆夏趨以采齊【凡馭路謂五路也肆夏采齊樂章也行謂大寢至路門趨謂路門至應門】凡馭路儀以鸞和為節【舒疾之法也鸞在衡和在軾皆以金為鈴 夏官】齊僕掌馭金路以賓【以待賓客同上】道僕掌馭象路以朝夕燕出入其法儀如齊車【朝夕朝朝其夕】掌貳車之政令【貳亦副同上】齊右掌祭祀會同賓客前齊車王乘則持馬行則陪乘【齊車金路王自整齊之車也前之者已駕王未乘之時陪乘參乘謂車右也齊右與齊僕同車而有祭祀之事則兼王路之右然則戎右兼田右與】凡有牲事則前馬【王見牲則拱而式居馬前卻行備驚奔也曲禮曰國君下宗廟式齊牛 同上】道右掌前道車王出入則持馬陪乘如齊車之儀【道車象路也王行道德之車】自車上諭命於從車【自由】詔王之車儀【顧式之屬】王式則下前馬王下則以盖從【以盖從表尊 同上】隸僕王行洗乘石【鄭司農云乘石王所登以上車之石也詩云有扁斯石履之卑兮謂】

【上車所登之石 同上】大僕王出入則自左馭而前驅【前驅如今道引也道而居左自馭不參乘辟王也亦有車右焉 同上】小臣詔相王之王小法儀【小法儀趨行拱揖之容】王之燕出入則前驅【燕出入若今遊於諸觀苑

同上】虎賁氏掌先後王而趨以卒伍【王出將虎賁士居前後雖羣行亦有局分 同上】旅賁氏掌執戈盾夾王車而趨左八人右八人車止則持輪【夾王車者其下士也下士十有六人中士為之帥焉 同上】節服氏掌祭祀朝覲袞冕六人維王之大常【服袞冕者從王服也維維之以縷王旌十二旒兩兩以縷綴連旁三人持之禮天子旌曳地鄭司農云維持之】諸侯則四人其服亦如之【同上】條狼氏掌執鞭以趨辟王出入則八人夾道公則六人侯伯則四人子男則二人【趨辟趨而辟行人若今卒辟車之為也孔子曰富而可求雖執鞭之士吾亦為之言士之賤也 秋官】大司寇凡邦之大事使其屬蹕【屬士師以下也故書蹕作避杜子春云避當為辟謂辟除姦人也玄謂蹕止行也

同上】小司寇大賓客前王而辟【鄭司農云小司寇為王道辟除姦人也若今時執金】

【吾下至令尉奉引矣】凡國之大事使其屬蹕【屬士師以下 同上】

士師王燕出入則前驅而辟【道王且辟行人 同上】鄉士大祭祀大喪紀大軍旅大賓客則各掌其鄉之禁令帥其屬夾道而蹕【屬中士以下】三公若有邦事則為之前驅而辟【鄭司農云鄉士為三公道也若今時三公出城郡督郵盜賊道也 同上】遂士若邦有大事聚衆庶則各掌其遂之禁令帥其屬而蹕【大事王所親也】六卿若有邦事則為之前驅而辟【同上】縣士若大夫有邦事則為之前驅而辟【同上】

右出入僕從之儀 穆王曰昔在文武侍御僕從罔非正人出入起居罔有不欽【問命】號之會【諸侯之大夫尋宋之盟也在昭元年】楚公子圍二人執戈先焉【楚公子圍恭王之庶

子靈王熊虔也時為令尹先謂使二人執戈在前導也】叔孫穆子曰天子有虎賁習武訓也【穆子魯卿叔孫豹也訓教也虎賁掌先後王而趨舍則守王閑在國則守宮門所以習武教也】諸侯有旅賁禦災害也【禦禁也旅賁掌執戈盾夾車而趨車止則持輪所以備非常禁災害也】大夫有貳車備承事也【貳副也承奉也事使也】士有陪乘告奔走也【陪猶重也奔走使令也】今大夫而設諸侯之服有其心矣【有篡國之心也國語魯語】

帝曰龍朕聖讒說殄行震驚朕師命汝作納言夙夜出納朕命惟允【聖疾殄絕也殄行者謂傷絕善人之事也師衆也謂其言之不正而能變亂黑白以駭衆聽也納言官名命令政教必使審之既允而後出則讒說不得行而矯偽無所託矣敷奏復逆必使審之既允而後入則邪僻無自進而功緒有所稽矣周之內史漢之尚書魏晉以來所謂中書門下者皆此職也舜典】宰夫敘羣吏之治以待賓客之令諸臣之復萬民之逆【恒次敘諸吏之職事三者之來則應使辨理之鄭司農云復請也逆迎受王命者宰夫主諸臣萬民之復逆故詩人重之曰家伯冢宰玄謂復之言報也反也反報於王謂於朝廷奏事自下而上曰逆逆謂上書天官】內史掌敘事之法受納訪以詔王聽治【叙六敘也納訪】

【納謀於王也六敘六曰以敘聽其情】凡命諸侯及孤卿大夫則策命之【鄭司農說以春秋傳曰王命內史興父策命晉侯為侯伯策謂以簡策書王命其文曰王謂叔父敬服王命以綏四國糾逖王慝晉侯三辭從命受策以出】凡四方之事書內史讀之【若今尚書入省事】王制祿則贊為之以方出之【贊為之為之辭也鄭司農云以方出之以方板書而出之】賞賜亦如之內史掌書王命遂貳之【副寫藏之春官】外史掌書外令【王令下畿外】若以書使於四方則書其令【書王令以授使者同上】御史掌贊書【王有命當以書致之則贊為辭若今尚書作說文同上】大僕出入王之大命【出大命王之教也入大命羣臣所奏行】掌諸侯之

復逆【鄭司農云復謂奏事也逆謂受下奏】建路鼓于大寢之門外而掌其政【大寢路寢也其門外則內朝之中如今宮殿端門下矣政鼓節與早晏】以待達窮者與遽令聞鼓聲則速逆御僕與御庶子【鄭司農云窮謂窮冤失職則來擊此鼓以達於王若今時上變事擊鼓矣遽傳也若今時驛馬軍書當急聞者亦擊此鼓令聞此鼓聲則速逆御僕與御庶子也大僕主令此二官使速逆窮遽者玄謂達窮者謂司寇之屬朝士掌以肺石達窮民聽其辭以告於王遽令郵驛上下程品御僕御庶子直事鼓所者大僕聞鼓聲則速逆此二官當受其事以聞夏官】小臣掌王之王命【小命時事所勅問也】掌三公及孤卿之復逆【同上】御僕掌羣吏之逆及庶民之復【羣吏府史以下】掌王之燕令

【燕居時之令】以序守路鼓【序更同上】振木鐸於朝天子之政也【天子將發號令必以木鐸警衆明堂位】

右號令復逆天下有風姁后以施命誥四方【易】王言如絲其出如綸王言如綸其出如紵【言言出彌】

【大也綸今有秩嗇夫所佩也綽引棺索也】故大人不倡游言【游猶浮也不可用之言也緇衣】穆王曰昔在文武發號施令罔有不臧【罔命】成王與弟叔虞戲削桐葉為珪以與叔虞曰以此封若史佚因請擇日立叔虞成王曰吾與之戲耳史佚曰天子無戲言言則史書之禮成之樂歌之於是遂封叔虞於唐【史記】王命仲山甫式是百辟纘戎祖考王躬是保出納王命王之喉舌賦政于外四方爰發【賦也式法戎汝也王躬是保所謂保其身體者也然則仲山甫蓋以冢宰兼大保而大保抑其世官也與出承而布之也納行而復之也喉舌所以出言也發發而應之也大雅烝民】

大宰以九式均節財用四曰羞服之式【羞飲食之物也

天官】大府闢市之賦以待王之膳服【膳服即羞服也 同上】膳夫掌王之食飲膳羞以養王及后世子【食飯也飲酒漿也膳牲肉也羞有滋味者凡養之具大略有四】凡王之饋食用六穀膳用六牲飲用六清羞用百二十品珍用八物醬用百有二十饔【進物於尊者曰饋此饋之盛者王舉之饌也六牲馬牛羊豕犬雞也羞出於牲及禽獸以備滋味謂之庶羞公食大夫禮內則下大夫十六上大夫二十其物數備馬天子諸侯有其數而物未得盡聞珍謂淳熬淳母炮豚炮牂擣珍漬熬肝膋也醬謂醯醢也王舉則醢人共醢六十饔以五壺七醢七菹三饔實之醢人共壺菹醢物六十饔鄭司農云羞進也六穀稌黍稷粱麥苽苽彫胡也六清水漿醴醢醫醢】王日一舉鼎十有二物皆有俎【殺牲盛饌曰舉王日一舉以朝食也后與王同庖鼎十有二牢鼎九陪鼎三物謂牢鼎之實亦九俎】以樂侑食膳夫授祭品嘗食王乃食【侑猶勸也祭謂刲肺脊也禮飲食必祭示有所先品者每物皆嘗之道尊者也】卒食以樂徹于造【造作也鄭司農云造謂食之故所居處也己食徹置故處】王齊日三舉【鄭司農云齋必變食】大喪則不舉【大荒凶年大札疫癘也天裁日月晦食地裁崩動也大故寇戎之事鄭司農云大故刑殺也春秋傳曰司寇行戮君為之不舉】王燕食則奉膳贊祭【燕食謂日中與夕食奉膳奉朝之餘膳所祭者牢肉】凡王之稍事設薦脯醢【鄭司農云稍食謂非日中大舉時而問食謂之稍事膳夫主設薦脯醢玄謂稍事有小事而飲酒】掌后及世子之膳羞【亦主其饌之數不饋之耳】凡肉脩之頒賜皆掌之【鄭司農云脩脯也】凡祭祀之致福者受而膳之【致福謂諸臣祭祀進其餘肉歸胙于王鄭司農云膳夫受之以給王膳】以摯見者亦如之【鄭司農云以羔鴈雉為摯見者亦受以給王膳】歲終則會唯王及后世子之膳不會【不會計多少優尊者其頒賜諸臣則計之 同上】食醫掌和王之六食六飲六膳百羞百醬八珍之齊【和調也】凡食齊眠春時【飯宜溫】羹齊眠夏時【羹宜熱】醬齊眠秋時【醬宜涼】飲齊眠冬時【飲宜寒】凡和春多酸夏多苦秋多辛冬多鹹調以滑甘【各尚其時味而甘以成之猶水火金木之載於土內則曰棗栗飴蜜以甘之菹苴粉榆兔薮滸瀧以滑之】凡會膳食之宜牛宜稌羊宜黍豕宜稷犬宜粱鴈宜麥魚宜【會成也謂其味相成鄭司農云稌稷也爾雅曰稌稻 彫胡也】凡君子之食恒放焉【放猶依也同上】饔人共王及后之六食【六食六穀之飯 地官】春天子

食麥與羊【麥實有孚甲屬木羊火畜也時尚寒食之以安性也】夏食菽與雞【菽實孚甲堅合屬水雞木畜時熟食之亦以安性也】中央土食稷與牛【稷五穀之長牛土畜也】秋食麻與犬【麻實有文理屬金犬金畜也】冬食黍與彘【黍秀舒散屬火寒時食之亦以安性也彘水畜也 月令】酒正掌酒之政令以式灋授酒材【式法作酒之法式作酒既有米麴

之數又有功沽之巧月令曰乃命大酋秫稻必齊麴蘖必時湛餽必潔水泉必香陶器必良火齊必得鄭司農云授酒人以其材】辨三酒之物一曰事酒二曰昔酒三曰清酒【鄭司農云事酒有事而飲也昔酒無事而飲也清酒祭祀之酒玄謂事酒酌有事者之酒其酒則今之醴酒也昔酒今之酋久白酒所謂舊醴者也清酒今中山冬釀接夏而成】辨四飲之物一曰清二曰醫三曰漿四曰醕【清謂醴之沛者醫內則所謂或以醕為醴凡醴濁釀醕為之則少清矣醫之字從毆從西省也漿今之截漿也醕今之粥內則有黍醕醕飲粥稀者之清也鄭司農說以內則曰飲重醴稻醴清 黍醴清 梁醴清 或以醕為醴漿水臆後致飲于賓客之禮有醫醕糟糟音聲與 相似醫與臆亦相似文字不同記之者各異耳此皆一物】掌其厚薄之齊以共王之四飲三酒之饌及后世子之飲與其酒【后世子不言饌其饋食不必具設之五齊正用醴為飲者取醴恬與酒味異也其餘四齊味皆似酒】掌酒之賜頒皆有法以行之【法尊卑之差】唯王及后之飲酒不會以酒式誅賞【誅賞作酒之善惡者 天官】酒人凡事共酒而入于酒府【入于酒正之府者是王燕飲之酒酒正當奉之 同上】漿人掌共王之六飲水漿醴涼醫醕入於酒府【王之六飲亦酒正當奉之醴醴清也鄭司農云涼以水和酒也玄謂涼今寒粥若糗飯雜水也酒正不辨水涼者無厚薄之齊 同上】仲冬乃命大酋秫稻必齊麴蘖必時湛熾必絜水泉必香陶器必良火齊必得兼用六物大酋監之母有差貸【酒熟曰酋大酋者酒官之長也於周則為酒人秫稻必齊謂孰成也湛漬也熾炊也火齊腥孰之調也物猶事也差貸謂失誤有善有惡也古者穫稻而漬米麴至春而為酒詩云十月穫稻為此春酒以介眉壽 月令】庖人掌共六畜六獸六禽辨其名物【六畜六牲也始養之曰畜將用之曰牲春秋傳曰卜曰牲鄭司農云六獸麋鹿熊麋野豕兔六禽雁鵠鷄雉鳩鵠玄謂獸人冬獻狼夏獻麋又內則無熊則六獸當有狼而熊不屬六禽於禽獻及六摯宜為羔豚犢麋雉雁凡鳥獸未孕曰禽司馬臈曰大獸公之小禽私之】凡其死生蠹薨之物以共王之膳與其薦羞之物及后世子之膳羞【凡計數之薦亦進也備品物曰薦致滋味乃為羞王言薦者味以不褻為尊鄭司農云鮮謂生肉羹謂乾肉】凡用禽獻春行羔豚膳膏香夏行腍鱸膳膏臊秋行犢麋膳膏腥冬行蠹羽膳膏羶【用禽獻謂煎和之以獻王鄭司農云膏香牛脂也以牛脂和之腍乾雉鱸乾魚膏臊豕膏也以豕膏和之杜子春云膏臊犬膏膏腥豕膏也鮮魚也羽雁也膏羶羊脂也玄謂膏腥雞膏也羔豚物生而肥犢與麋物成而充腍鱸燠而乾魚雁水涸而性定此八物者得四時之氣尤盛為人食之弗勝是以用休廢之脂膏煎和膳之牛屬司徒土也雞屬宗伯木也犬屬司寇金也羊屬司馬火也】歲終則會唯王及后之膳禽不會【膳禽四時所膳禽獻如世子可以會之 天官】內饗掌王及后世子膳羞之割亨煎和之事辨體名肉物辨百品味之物【割肆解肉也亨煮也煎和齊以五味體名脊脊肩臂臠之屬肉物載燔之屬百品味庶羞之屬言百舉成數】王舉則陳其鼎俎以牲體實之【取於鑊以實鼎取於鼎以實俎實鼎曰胥實俎曰載】選百羞醬物珍物以俟饋【先進食之時恒選擇其中御者】共后及世子之膳羞【膳夫掌之是乃共之】辨腥臊羶香之不可食者牛夜鳴則庖羊冷毛而毳羶犬赤股而躁臊鳥鵪色而沙鳴豕盲眊而交睫腥馬黑脊而般臂螻【腥臊羶香可食者是別其不可食者則所謂者皆臭味也冷毛毛長總結也鵪失色不澤美也沙漸也交睫腥腥當為星聲之誤也肉有如米者似星般臂臂毛有文鄭司農云瘠朽木臭也螻蛄臭也杜子春云盲眊當為望視】凡宗廟之祭祀掌割亨之事凡燕飲食亦如之凡掌共羞脩刑膾胖骨鱠以待共膳【掌共共當為具羞庶羞也脩鍛脯也胖如脯而腥者鄭司農云刑膾謂夾脊肉或曰膾肉也骨鱠謂骨有肉者玄謂刑鉶羹也膾腍肉大臠所以祭者

骨牲體也鱸乾魚】凡王之好賜肉脩則饗入共之【好賜王所善而賜也同上】亨人掌共鼎鑊以給水火之齊【鑊所以煮肉及魚腊之器就孰乃胥于鼎齊多少之量】職外內饗之饗亨煮辨膳羞之物【職主也饗今之竈主於其饗煮物同上】獸人掌罍田獸辨其名物【罍罔也以罔所當田之獸】冬獻狼夏獻麋春秋獻獸物【狼膏聚麋膏散聚則溫散則涼以救時之苦也獸物凡獸皆可獻也及狐狸同上】人掌以時為梁【月令季冬命漁師為梁鄭司農云梁水偃也偃水為關空以笱承其空詩曰敝笱在梁】辨魚物為鱸鼈以共王膳羞【鮮生也鼈乾也同上】腊人掌乾肉凡田獸之脯腊臠胖之事【大物解肆乾之謂之乾肉若今涼州鳥翅矣薄析曰脯捶之而施薑桂曰鍛脩腊小物全乾同上】

掌畜共膳獻之鳥【雉及鶉鴛之屬夏官】司士掌擯士者膳其摯【擯士告見初為士者於王也鄭司農云膳其摯者王食其所執羔雁之摯玄謂膳者入於王之膳人同上】廛人凡珍異之有滯者斂而入於膳府【珍異四時食物也不售而在廛久則將瘦臞腐敗為買之入膳夫之府所以紓民事而官不失實地官】

籩人為王及后世子共其內羞【於其飲食以共房中之羞天官】醯人為王及后世子共其內羞王舉則共醯六十饗

以五齊七醯七菹三饗實之【齊當為壺五壺昌本脾析蜃豚拍深蒲也七醯醯羸□蜺魚免雁醯七菹韭菁茆葵芹落筍菹三饗麋鹿麇饗也凡醯饗所和細切為壺全物若臠為菹少儀曰麋鹿為菹野豕為軒皆臠而不切麋為辟雞兔為宛脾皆臠而切之切葱若薤實之醯以柔之由此言之則壺菹之稱菜肉通同上】

醯人王舉則共齊菹醯物六十饗共后及世子之醬齊菹【同上】

天子之豆二十有六【謂天子朔食禮器】鹽人掌鹽之政令以共百事之鹽【政令謂受入教所處置求者所當得】王之膳羞共飴鹽后及世子亦如之【飴鹽鹽之甜者今戎鹽有焉】凡齊事鬻監以待戒令【齊事和五味之事鬻監凍治之天官】凌人掌冰春始治鑑【鑑如甄大口以盛冰置食物于中以禦溫氣春而始治之為二月將獻羔而啟冰】凡外內饗之膳羞鑑焉凡酒漿之酒醴亦如之【酒醴見溫氣亦失味酒漿酒人漿人也同上】冢人掌共巾冢【共巾可以覆物】凡王巾皆黼【四飲三酒皆畫黼周尚武其用文德則黻可同上】大司樂王大食三宥皆令奏鐘鼓【大食朔月月半以樂宥食時也宥猶勸也春官】天子皮弁以日視朝遂以食日中而餽奏而食日少牢朔月大牢【餽食朝之餘也奏奏樂也】五飲上水漿酒醴醕【上水水為上餘其次之】卒食玄端而居年不順成天子食無樂【自貶損也】諸侯又朝服以食特牲三俎祭肺【食必復朝服所以敬養身也三俎豕魚腊】夕深衣祭牢肉【祭牢肉異於始殺也天子言日中諸侯言夕天子言餽諸侯言祭牢肉互相挾】朔月少牢五俎四簋【五俎加羊與其腸胃也朔月四簋則日食梁稻各一簋而已】子卯稷食菜羹【忌日貶也】夫人與君同庖【不特殺也】君無故不殺牛大夫無故不殺羊士無故不殺犬豕【故謂祭祀之屬】君子遠庖厨凡有血氣之類弗身踐也【踐當為剪聲之誤也剪殺也】至于八月不雨君不舉【為旱變也此謂建子之月不雨盡建未月也春秋之義周之春夏無雨未能成災至其秋秀實之時而無雨則雩雩而得之則書雩喜祀有益也雩而不得則書旱明災成也玉藻】歲凶年穀不登君膳不祭肺大夫不食梁士飲酒不樂【皆自為貶損憂民也禮食殺牲則祭先有虞氏以首夏后氏以心殷人以肝周人以肺不祭肺則不殺也天子食日少牢朔月大牢諸侯食日特牲朔月少牢梁加食也不樂去琴瑟】

曲禮】大侵之禮君食不兼味【襄二十四年穀梁傳】司寇行戮【司寇刑官】

君為之不舉【去盛饌莊二十:left氏傳】

天子一食諸侯再大夫士三食力無數【一食再食三食謂告飽也食力謂工商農也禮器】大夫燕食有膾無脯有脯無膾士不貳羹載庶人耆老不徒食【尊卑差也內則】羹食自諸侯以下至於庶人無等【羹食食之主也庶羞亦異耳】大夫無秩膳【謂五十始命未甚老也秩常也】大夫七十而有閣【有秩膳也閣以板為之度食物也】天子之閣左達五右達五公侯伯於房中五大夫於閣三士於坵一【達夾室大夫言於閣與天子同處天子二五倍諸侯也五者三牲之肉及魚膳也同上】飯【目諸飯也】黍稷稻粱白黍黃粱稗糲【孰穫曰稗生穫曰稗黍黃黍也】膳【目諸膳也】腳臠臠醢牛炙醢牛胾醢牛膾羊炙羊胾醢豕炙醢豕胾芥醬魚膾雉兔鶉鷄【此上大夫之禮庶羞二十豆也以公食大夫禮校之則臠牛炙間不得有醢醢衍字也又以鷄為鴛也】飲【目諸飲也】重醴稻醴清糟黍醴清糟梁醴清糟【重倍也糟醇也清沛也致飲有醇者有沛者陪設之也】或以醢為醴【醴粥為醴】黍醢【醢粥】漿【酢載】水【清耕】醢【梅漿】濫【以諸和水也以周禮六飲校之則濫涼也紀莒之間名諸為濫】酒【目諸酒也】清白【白事酒昔酒也】羞【目諸羞也】糗餌粉醢【糗擣熬穀也以為粉餌與糝此記似脫周禮羞籩之實粉餌粉糝羞豆之實醢食慘食此醢當為餼以稻米與狼臠膏為餼是也】食【食飯也日人君燕食所用也】蝸醢而苾食雉羹麥食脯羹雞羹折稌犬羹兔羹和糝不蓼【苾彫胡也稌稻也几羹齊宜五味之和米屑之糝蓼則不矣此脯所謂析乾牛羊肉也】濡豚包苦實蓼濡雞醢醬實蓼濡魚卵醬實蓼濡鼈醢醬實蓼【凡濡謂亨之以汁和也苦苦茶也以包豚殺其氣讀為鯢鯢魚子或作櫟也】脍脍蜆醢【脍脍捶脯施薑桂也蜆蚶子也】脯羹兔醢麋膚魚醢魚膾芥醬麋腥醢醬桃諸梅諸卵監【自蝸醢至此二十六物似皆人君燕所食也其饌則亂膚切肉也膚或為胖卵鹽大鹽也】凡食齊視春時【飯宜溫也】羹齊視夏時【羹宜熱也】醬齊視秋時【醬宜涼也】飲齊視冬時【飲宜寒也】凡和春多酸夏多苦秋多辛冬多醢調以滑甘【多其時味以養氣也】牛宜稌羊宜麥豕宜稷犬宜粱雁宜麥魚宜苽【言宜氣味相成也】春宜羔豚膳膏薺夏宜腍鱸膳膏臊秋宜犢麋膳膏腥冬宜鮮羽膳膏膾【此八物四時肥美也為其大盛煎以休廢之膏節其氣也牛膏薺犬膏臊雞膏腥羊膏膾腍乾雉也鱸乾魚也鮮生魚也羽雁也】牛脩鹿脯田豕脯麋脯麋鹿田豕麋皆有軒雉兔皆有芼【脯皆析乾其肉也軒讀為憲謂藿葉切也芼謂菜醢也軒或為胖】爵鷄蜩范【蜩蟬也范蜂也】芝栴蓨棊棗栗榛柿瓜桃李梅杏棊梨薑桂【蓨芰也棊枳棋也棊梨之不臧者自牛脩至此三十一物皆人君燕食所加庶饈也周禮天子羞用百有二十品記者不能次錄】膾春用蔥秋用芥豚春用韭秋用蓼【芥芥醬也】脂用蔥膏用飴【脂肥凝者釋者曰膏】三牲用藪和用醢【藪煎茱萸也漢律會稽獻焉爾雅謂之楸和用醢者畜與家物自相和也】獸用梅【亦野物自相和】鶉羹雞羹鴛醢之蓼【醢謂切雜之也鴛在羹下烝之不羹也】魴鱖烝雛燒雉薺無蓼【薺蘇荏之屬也燒烟於火中也自膾用蔥至此言調和菜醢之宜也】不食雛鼈狼去腸狗去腎狸去正脊兔去尻狐去首豚去腦魚去乙鼈去醜【皆為不利人也雛鼈伏乳者乙魚體中害人者名也今東海鰈魚有骨名乙在目傍狀如篆乙食之鰈人不可少醜謂鼈竅也】肉曰脫之魚曰作之棗曰新之栗曰撰之桃曰膽之棊梨曰攢之【皆治擇之名也】牛夜鳴則庖羊冷毛而毳羶狗赤股而躁臊鳥臠色而沙鳴鬱豕望視而交睫腥馬黑脊而般

臂漏雛尾不盈握弗食舒雁翠鵠鵝胖舒鳧翠雞肝雁腎鵠奧鹿胃【亦皆為不利人也庖惡臭也春秋傳曰一薰一蕕冷毛毳毛別聚於不解者也赤般股襄無毛也鵠色毛變色也沙猶嘶也鬱腐臭也望視遠視也腥當為星聲之誤也星肉中如米者般臂前腥般般然也漏當為螻如蛄螻臭也舒雁鵠也翠尾肉也鵠鵝胖謂脅側薄肉也舒鳧鵠也鵠奧脾胝也鵠或為鵠也】肉腥細者為膾大者為軒【言大切細切異名也膾者必先軒之所謂聶而切之也】或曰麋鹿魚為菹麋為辟雞野豕為軒兔為宛脾切蔥若齏實諸醢以柔之【此軒辟雞宛脾皆菹類也釀菜而柔之以醢殺腥肉及其氣今益州有鹿□者近由此為之矣菹軒聶而不切辟雞宛脾聶而切之軒或為胖宛或作鬱同上】淳熬煎醢加於陸稻上沃之以膏曰淳熬【淳沃也熬亦煎也沃煎成之以為名】淳母煎醢加於黍食上沃之以膏曰淳母【母讀曰模模象也作此象淳熬】炮取豚若將剗之剗之實棗於其腹中編萑以苴之塗之以謹塗炮之塗皆乾擘之濯手以摩之去其皽為稻粉糴之以為醢以付豚煎諸膏膏必滅之鉅鑊湯以小鼎薺脯於其中使其湯母滅鼎三日三夜母絕火而后調之以醢醢【炮者以塗燒之為名也將當為胖牝羊也剗剗博異語也謹當為瑾聲之誤也瑾塗塗有穰草也皽謂皮肉之上魄草也糴亦博異語也糴讀與滌澆之滌同薺脯謂煮豚若羊於小鼎中使之香美也謂之脯者既去皽則解析其肉使薄如為脯然唯豚全耳豚羊入鼎三日乃內醢醢可食也】擣珍取牛羊麋鹿麋之肉必胾每物與牛若一捶反側之去其餌孰出之去其皽柔其肉【胾脊側肉也捶擣之也餌筋腠也柔之為汁和也汁和亦醢醢與】漬取牛肉必新殺者薄切之必絕其理湛諸美酒期朝而食之以醢若醢醢【湛亦漬也】為熬捶之去其皽編萑布牛肉焉屑桂與薑以酒諸上而鹽之乾而食之施羊亦如之施麋施鹿施麋皆如牛羊欲濡肉則釋而煎之以醢欲乾肉則捶而食之【熬於火上為之也今之火脯似矣欲濡欲乾人自由也醢或為醢此七者周禮八珍其一肝膋是也】糝取牛羊豕之肉三如一小切之與稻米稻米二肉一合以為餌煎之【此周禮糝食也】肝膋取狗肝一幪之以其膋濡炙之舉燠其膋不蓼【膋腸間脂舉或為巨】取稻米舉糴之小切狼臠膏以與稻米為醢【狼臠膏臠中膏也以煎稻米則似今膏矣此周禮醢食也此醢當從餼同上】

右膳羞王者所以日食何明有四方之物食四時之功也四方不平四時不順有徹樂之法焉所以鳴至尊著法戒也王平居中央制御四方平旦食少陽之始也晝食太陽之始也晡食少陰之始也暮食太陰之始也論語曰亞飯干適楚三飯繚適蔡四飯缺適秦諸侯三飯卿大夫再飯尊卑之羞也禮保傳曰王失度宰夫徹其膳宰所以徹膳何陰陽不調五穀不熟故王者為不盡味而食之禮曰一穀不升不備雞鶩二穀不升不備三牲【白虎通】

天子玄端聽朔於南門之外閏月則闔門左扉立于其中【端當為冕字之誤也玄衣而冕冕服之下南門謂國門也天子廟及路寢皆如明堂制明堂在國之陽每月就其時之堂而聽朔焉卒事反宿路寢亦如之閏月非常月也聽其朔於明堂門中還處路寢門終月凡聽朔必以特牲告其帝及神配以文王武王玉藻】孟春天子居青陽左个【青陽左个大寢東堂北偏】仲春天子居青陽大廟【青陽大廟東堂大室】季春天子居青陽右个【青陽右個東堂南偏】孟夏天子居明堂左个【明堂左个大寢南堂東偏也】仲夏天子居明堂大廟【南堂大廟南堂當大室也】季夏天子居明堂右个【明堂右個南堂西偏也】中央土天子居大廟大室【大廟大室中央室也】孟秋天子居總章左个【總章左个大寢西堂南偏】仲

秋天子居總章大廟【總章大廟西堂當大室也】季秋天子居總章右个【總章右个西堂北偏】孟冬天子居玄堂左个【玄堂左个北堂西偏也】仲冬天子居玄堂大廟【玄堂大廟北堂當大室】季冬天子居玄堂右个【玄堂右个北堂東偏月令】太史頒告朔于邦國【天子頒朔于諸侯諸侯藏之祖廟至朔朝于廟告而受行之鄭司農云頒讀為班班布也以十二月朔布告天下諸侯故春秋傳曰不書日官失之也】閏月詔王居門終月【門謂路寢門也鄭司農云月令十二月分在青陽明堂總章玄堂左右之位惟閏月無所居居于門故于文王在門謂之門春官】諸侯皮弁以聽朔于大廟【皮弁下天子也玉藻】

右聽朔文公六年閏月不告月猶朝於廟【杜曰諸侯每月必告朔聽政因朝宗廟文公以閏非常月故闕不告朔怠慢政事雖朝于廟則如勿朝故曰猶猶者可止之詞何曰諸侯受十二月朔政于天子藏于大祖廟每月朔朝廟使大夫南面奉天子命君北面而受之此時使有司先告朔慎之至也受于廟者子歸美先君不敢自專也言朝者緣生以事死親在朝朝暮夕已死不敢渫鬼神故也必於朔者感月始生而朝也春秋】閏月不告朔非禮也【經稱告月傳稱告朔明告月必以朔】閏以正時【四時漸差則置閏以正之】時以作事【順時命事】事以厚生【事不失時則年豐】生民之道於是乎在矣不告閏朔弃時政也何以為民【左氏傳】曷為不告朔【据具月也】天無是月也何以謂之天無是月非常月也【所在無常故無政也】猶者何通可以已也【朝者因視朔政爾無政而朝故曰猶不言朔者閏月無告朔禮也不言公者內事可知公羊傳】不告月者不告朔也【禮天子以十二月朔政班告于諸侯諸侯受於禰廟孝子尊事先君不敢自專也言朝者緣生以事死親存朝朝暮夕不敢泄鬼神故事畢感月始而朝之】不告朔則何為不言朔也閏月者附月之餘日也積分而成於月者也【一歲三百六十日餘六日又有小月六積五歲得六十日而再閏積衆月之餘分以成此月】天子不以告朔而喪事不數也【閏是叢殘之數非月之正故吉凶大事皆不用也】猶之為言可以已也【郊然後三望告朔然後朝廟俱言猶義相類也既廢其大而行其細故譏之穀梁傳】文公十六年夏五月公四不視朔【諸侯每月必告朔聽政因朝于廟今公以疾闕不得視二月三月四月五月朔也春秋十二公以疾不視朔非一也義無所取故特舉此以表行事因明公之實有疾非詐齊春秋】疾也【左氏傳】公曷為四不視朔【據無事也】公有疾也【以不諱舉公知有疾公有疾乃復舉公是也】何言乎公有疾不視朔【據有疾無惡也】自是公無疾不視朔也【有疾無惡不當書又不言有疾者欲起公自是無疾不視朔也】然則曷為不言公無疾不視朔有疾猶可言也無疾不可言也【言無疾大惡不可言也是後公不復視朔政事委任公子遂公羊傳】天子告朔于諸侯諸侯受乎禰廟禮也【每月天子以朔政班于諸侯諸侯受而納之禰廟告廟以羊今公自二月不視朔至於五月是後視朔之禮遂廢故子貢欲去其羊】公四不視朔公不臣也以公為厭政已甚矣【天子班朔而公不視是不臣穀梁傳】

襄公二十九年春王正月公在楚釋不朝正于廟也【釋解也告朔在楚解公所以不朝正春秋左氏傳】子貢欲去告朔之犧羊【告朔之禮古者天子常以季冬頒來歲十二月之朔于諸侯諸侯受而藏之祖廟月朔則以時羊告廟請而行之犧生牲也魯自文公始不視朔而有司猶供此羊故子貢欲去也】子曰賜也爾愛其羊我愛其禮【愛猶惜也子貢蓋惜其無實而妄費然禮雖廢羊存猶得以識之而可復焉若并去其羊則此禮遂亡矣孔子所以惜之楊氏曰告朔諸侯所以稟命於君親禮之大者魯不視朔矣然羊存則告朔之名未泯而其實

自可舉此夫子所以惜之也 論語】

舍人以歲時縣種槁之種以供王后之春獻禮【縣之者欲其風氣燥達也鄭司農云春王當耕于籍則后獻其種也后獻其種見內宰職 地官】內宰上春詔王后帥六宮之人而生種槁之種而獻之于王【六宮之人夫人以下分居后之六宮者古者使后宮藏種以其有傳類蕃孳之祥必生而獻之示能育之使不傷敗且以佐王耕事共禘郊也鄭司農云先種後孰謂之種後種先孰謂之槁王當以耕種于藉田玄謂詩云黍稷種槁是也夫人以下分居后之六宮者每宮九嬪一人世婦三人女御九人其餘九嬪三人世婦九人女御二十七人從后唯其所燕息焉從后者五日而沐浴其次又上十五日而徧云夫人如三公從容論婦禮 天官】孟春乃擇元辰天子親載耒耜措之于參保介之御間帥三公九卿諸侯大夫躬耕帝藉天子三推三公五推卿諸侯九推【元辰蓋郊後吉辰也耒耜之上曲也保介車右也置耒於車右與御者之間明已勸農非農者也人君之車必使勇士衣甲居右而參乘備非常也保猶衣也介甲也帝藉為天神借民力所治之田也】反執爵于大寢三公九卿諸侯大夫皆御命曰勞酒【既耕而宴欲以勞羣臣也大寢路寢御侍也 月令】甸師掌帥其屬而耕耨王藉以時入之以共蠶盛【其屬府史胥徒也耨芸芋也王以孟春躬耕帝藉天子三推三公五推卿諸侯九推庶人終於千畝庶人謂徒三百人藉之言借也王一耕之而使庶人芸芋終之蠶盛祭祀所用穀也粢稷也穀者稷為長是以名云在器曰盛 天官】季秋乃命冢宰農事備收【備猶盡也】舉五穀之要【定其祖稅之薄】藏帝藉之收於神倉祇敬必飭【重黍稷之委也帝藉所耕千畝也藏祭祀之穀為神倉祇亦敬也 月令】天子親耕以共粢盛【天子親耕其禮三推黍稷曰粢在器曰盛】甸粟而內之三宮三宮米而藏之御廩【甸甸師掌田之官也三宮三夫人也宗廟之禮君親割夫人親舂 桓十四年穀梁傳】天子為藉千畝冕而朱紘躬秉耒諸侯為藉百畝冕而青紘躬秉耒以事天地山川社稷先古以為醴酪齊盛於是乎取之【藉藉田先古先祖 祭義】天子親耕於南郊以共齊盛諸侯耕於東郊亦以共齊盛【齊或作粢東郊少陽諸侯象祭統】

右耕藉 耕藉然後諸侯知所以敬【耕藉藉田也 樂記】耕藉所以教諸侯之養也【祭義】王者所以親耕后親桑何所以率天下農蠶也耕於東郊何東方少陽農事始起桑於西郊西方少陰女功所成故曾子問曰天子耕東田而三反之【白虎通】天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也【祭統】宣王即位不藉千畝【藉借也借民力以為之天子藉田千畝諸侯百畝自厲王之流藉田禮廢宣王即位不復遵古】號文公諫曰【賈侍中云文公文王母弟號仲之後為王卿士昭謂號叔之後西號也宣王都鎬在畿內】不可夫民之大事在農【穀民之命故農為大事】上帝之粢盛於是乎出【出於農也器實曰粢在器曰盛】民之蕃庶於是乎生【蕃息也庶衆也】事之共給於是乎在【共具也給足也】和協輯睦於是乎興【協合也輯聚也睦親也】財用蕃殖於是乎始【殖長也】敦龐純固於是乎成【敦厚也龐大也】是故稷為大官【民之大事在農故稷之職為大官】古者大史順時視土【視視也】陽瘳憤盈土氣震發【瘳厚也憤積也盈滿也震動也發起也】農祥晨正【農祥房星也晨正謂立春之日晨中於午也農事之候故曰農祥】日月底於天廟【底至也天廟營室也孟春之月日月皆在營室】土乃脈登【脈理也農書曰春土冒□陳根可拔耕者急發】先時九日【先先立

春日也】太史告稷曰自今至於初吉【初吉二月朔日也詩云二月初吉】陽氣俱蒸土膏其動【蒸升也土膏潤也其動潤澤欲行】弗震弗渝脈其滿眚穀乃不殖【震動也渝變也眚災也言陽氣俱升土膏欲動當即發動變寫其氣不然則脈滿氣結更為災病穀乃不殖】稷以告【以大史之言告王】王曰史帥陽官以命我司事【史大史陽官春官司事主農事官也】曰距今九日土其俱動【距去也】王其祗祓監農不易【祗敬也祓齊戒祓除也不易不易物土之宜】王乃使司徒咸戒公卿百吏庶民【百吏百官也庶民甸師氏所掌之民主耕耨王之藉田者】司空除壇于藉【司空掌地也】命農大夫咸戒農用【農大夫田畯也農用田器也】先時五日【先耕時也】瞽告有協風至【瞽樂大師知風聲者協和也風氣和時候至也立春曰融風】王即齋宮【所齋之宮】百官御事各即其齋三日【御治也】王乃淳濯饗醴【淳沃也濯溉也饗飲也謂王沐浴飲醴酒】及期【期耕日也】鬱人薦鬯【鬱鬱金香草宜以和鬯酒也周禮鬱人掌裸器凡祭祀賓客和鬱鬯以實彝而陳之共王之齊鬯】犧人薦醴【犧人司尊也掌共酒醴者】王裸鬯饗醴乃行【裸灌也灌鬯飲醴皆所以自香絜】百吏庶民畢從及藉后稷監之【監察也】膳夫農正陳藉禮【膳夫上士也掌王之飲食膳羞之饋食農正田大夫主敷陳藉禮而祭其神為農祈也】太史贊王【贊道也】王敬從之王耕一壠【一壠一耜之壠也王無耦以一耜耕】班三之【班次也三之下各三其上也王一壠公三卿九大夫二十七】庶人終于千畝【終盡耕也】其后稷省功大史監之司徒省民大師監之畢宰夫陳饗膳宰監之【宰夫下大夫也膳宰膳夫也】膳夫贊王王歆大牢【歆饗也】班嘗之【公卿大夫也】庶人終食【終畢也】是日也瞽帥音官以省風土【音官樂官也風土以音律省土風風氣和則土氣養】廩于藉東南鍾而藏之【廩御廩一名神倉東南生長之處鍾聚也謂為廩以藏王所藉田以奉蠶盛】而時布之于農【布賦也】稷則徧戒百姓紀農協功【紀猶綜理也協同也】

曰陰陽分布震雷出滯【陰陽分日夜同也滯蟄蟲

也明堂月令曰日夜分雷乃發聲始電蟄蟲咸動啟戶始出】

土不備墾辟在司寇【墾發也辟臯也在司寇司寇行其臯】乃命其旅曰徇【旅衆也徇行也】農師一之【一之先之也農師上士】農正再之【農正后稷之佐田畯也故次農師】后稷三之【后稷農官之長故次農正】司空四之【司空主道路溝洫故次后稷】司徒五之【司徒省民故次司空】大保六之大師七之【大保大師天子三公佐王論道汜監衆官不特掌事故次司徒】大史八之【太史掌逆官府之治故次大師】宗伯九之【宗伯卿官掌相王之大禮若王不與祭則攝位故次太史】王則大徇【大徇率公卿大夫親行農也】耨穫亦如之【如之如耕時也】民用莫不震動恪恭于農【用謂田器也】修其疆畔日服其耨不解于時【疆境也畔界也耨鋤屬】財用不乏民用和同是時也王事唯農是務無有求利於其官以干農功【求利謂變易役使干亂農功】三時務農而一時講武【三時春夏秋一時冬也講習也】故征則有威守則有財若是乃能媚於神【媚說也】而和於民矣則享祀時至而布施優裕也【優饒也裕緩也】今天子欲修先王之緒而棄其大功匱神之祀而困民之財【匱神之祀不耕藉也困民之財取財用也】將何以求福用民王弗聽三十九年戰于千畝王師敗績于姜氏之戎【言宜王不納練務農無以事神使民以致弱敗之咎國語周語】仲山甫曰王治農于藉【藉藉於千畝田也】耨穫亦於藉【言王亦至於藉考課之】是皆習民數者也【習簡習也同上】

禮書綱目卷六十一

卷六十二

欽定四庫全書

禮書綱目卷六十二 婺源江永撰

政事上 通禮十一

補

洪範九疇次三曰農用八政【八政曰農所以厚生也】三八政一曰食二曰貨三曰祀四曰司空五曰司徒六曰司寇七曰賓八曰師【食者民之所急貨者民之所資故食為首而貨次之食貨所以養生也祭祀所以報本也司空掌上所以安其居也司徒掌教所以成其性也司寇掌禁所以治其姦也賓者禮諸侯遠人所以往來交際也帥者除殘禁暴也兵非聖人之不得已故居末也 洪範】司徒齊八政以防淫八政飲食衣服事為異別度量數制【飲食為上衣服次之事為百工技藝也異別五方用器不同也度丈尺也量斗斛也數百十也制布帛幅廣狹也 王制】乃立天官冢宰使帥其屬而掌邦治以佐王均邦國【掌主也邦治王所以治邦國也佐猶助也鄭司農云邦治謂總六官之職也故太宰職曰掌建邦之六典以佐王治邦國六官皆總屬於冢宰故論語曰君薨百官總已以聽於冢宰言冢宰於百官無所不主爾雅曰冢大也冢宰大宰也】大宰之職掌建邦之六典以佐王治邦國一曰治典以經邦國以治官府以紀萬民二曰教典以安邦國以教官府以擾萬民三曰禮典以和邦國以統百官以諧萬民四曰政典以平邦國以正百官以均萬民五曰刑典以詰邦國以刑百官以糾萬民六曰事典以富邦國以任百官以生萬民【大曰邦小曰國邦之所居亦曰國典常也經也法也王謂之禮經常所秉以治天下也邦國官府謂之禮法常所守以為法式也常者其上下通名擾猶馴也統猶令也詰猶禁也書曰度作詳刑以詰四方任猶傳也生猶養也鄭司農云治典冢宰之職故立其官曰使帥其屬而掌邦治以佐王均邦國教典司徒之職故立其官曰使帥其屬而掌邦教以佐王安擾邦國禮典宗伯之職故立其官曰使帥其屬而掌邦禮以佐王和邦國政典司馬之職故立其官曰使帥其屬而掌邦政以佐王平邦國刑典司寇之職故立其官曰使帥其屬而掌邦禁以佐王刑邦國此三時皆有官惟冬無官又無司空以三隅反之則事典司空之職也司空之篇亡小宰職曰冬官其屬六十掌邦事】以八法治官府一曰官屬以舉邦治二曰官職以辨邦治三曰官聯以會官治四曰官常以聽官治五曰官成以經邦治六曰官法以正邦治七曰官刑以糾邦治八曰官計以弊邦治【注見職官下篇】以八則治都鄙一曰祭祀以馭其神二曰法則以馭其官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八曰田役以馭其衆【注見封建】正月之吉始和布治于邦國都鄙乃縣治象之法于象魏使萬民觀治象挾日而斂之【注見周月】乃施典于邦國【詳見職官下】施則于都鄙【詳見職官下】施灋于官府【詳見職官上】凡治以典待邦國之治以則待都鄙之治以法待官府之治以官成待萬民之治以禮待賓客之治【成八成禮賓禮也】凡邦之小治則冢宰聽之【大事決於王小事冢宰專平天

官】

小宰掌邦之六典八法八則之貳以逆邦國都鄙官府之治【逆迎受之鄭司農云貳副也同上】司會掌邦之六典八法八則之貳以逆邦國都鄙官府之治【逆受而鉤考之同上】司書掌邦之六典八法八則九職九正九事【注見財賦篇同上】大史掌建邦之六典以逆邦國之治掌法以逆官府之治掌則以逆都鄙之治【典則亦法也逆迎也六典八法八則冢宰所建以治百官大史又建焉以為王迎受其治也大史日官也春秋傳曰天子有日官諸侯有日御日官居卿以底日禮也日御不失日以授百官于朝居猶處也言建六典以處六卿之職】凡辨法者考焉不信者刑之【謂邦國都鄙官府以法爭訟來正之者春官】

內史執國法及國令之貳以考政事以逆會計【國法六典八法八則同上】御史掌邦國都鄙及萬民之治令以贊冢宰【王所以治之令冢宰掌王治】凡治者受法令焉【為書寫其治之法令來受則授之同上】

匡人掌達法則匡邦國【法則八法八則也邦國之官府都鄙亦用焉夏官】

大行人十有一歲修法則【法八法也則八則也周官】凡為天下國家有九經曰脩身也尊賢也親親也敬大臣也體羣臣也子庶民也來百工也柔遠人也懷諸侯也【經常也體謂設以身處其地而察其心也子如父母之愛其子也柔遠人所謂無忘賓旅者也此列九經之目也呂氏曰天下國家之本在身故脩身為九經之本然必親師取友然後修身之道進故尊賢次之道之所進莫先其家故親親次之由家以及朝廷故敬大臣體羣臣次之由朝廷以及其國故子庶民來百工次之由其國以及天下故柔遠人懷諸侯次之此九經之序也視羣臣猶吾四體視百姓猶吾子此視臣視民之別也中庸】

右總要 聖人南面而聽天下所宜先者五民不與焉【宜先言未遑餘事】一曰治親二曰報功三曰舉賢四曰使能五曰存愛【功功臣也存察也察有仁愛也】五者一得於天下民無不足無不瞻者五者一物紕繆民莫得其死【物猶事也紕繆猶錯也五事得則民足一事失則民不得其死明政之難】聖人南面而治天下必自人道始矣【人道謂此五事大傳】孔子侍坐於哀公哀公曰敢問人道誰為大孔子對曰人道政為大公曰敢問何謂為政孔子對曰政者正也君為政則百姓從政矣君之所為百姓之所從也君所不為百姓何從【言君當務於攻】公曰敢問為政如之何孔子對曰夫婦別父子親君臣嚴三者正則庶物從之矣【庶物猶衆事也】公曰寡人雖無似也願聞所以行三言之道可得聞乎【無似猶言不肖】孔子對曰古之為政愛人為大所以治愛人禮為大所以治禮敬為大敬之至矣大昏為大大昏至矣大昏既至冕而親迎親之也親之也者親之也是故君子興敬為親舍敬是遺親也弗愛不親弗敬不正愛與敬其政之本與【大昏國君取禮也至矣言至大也興敬為親言相敬則親】孔子遂言曰昔三代明王之政必敬其妻子也有道妻也者親之主也敢不敬與子也者親之後也敢不敬與君子無不敬也敬身為大身也者親之枝也敢不敬與不能敬其身是傷其親傷其親是傷其本傷其本枝從而亡三者百姓之象也身以及身子以及子妃以及妃君行此三者則愾乎天下矣大王之道也如此則國家順矣【愾猶至也大王居豳為狄所伐乃曰土地所以養人也君子不以其所養害所養乃去之岐是言百姓之身猶吾身也百姓之妻子猶吾妻子也不忍以土地之故而害之去之岐而王迹興焉】公曰敢問何謂敬身孔子對曰君子過言則民作辭過動則民作則君子言不過辭動不過則百姓不命而敬恭如是則能敬其身能敬其身則能成其親矣【則法也民者化若者也君之言雖過民猶稱其辭君之

行雖過民猶以為法】公曰敢問何謂成親孔子對曰君子也者人之成名也百姓歸之名謂之君子之子是使其親為君子也是為成其親之名也已孔子遂言曰古之為政愛人為大不能愛人不能有其身不能有其身不能安土不能安土不能樂天不能樂天不能成其身【有猶保也不能保身者言人將害之也不能安土動移失業也不能樂天不知已過而怨天也】公曰敢問何謂成身孔子對曰不過乎物【物猶事也】仁人不過乎物孝子不過乎物是故仁人之事親也如事天事天如事親是故孝子成身【物猶事也事親事天孝敬同也孝經曰事父孝故事天明舉無過事以孝事親是所以成身哀公問】衛文公大布之衣大帛之冠【大布粗布大帛厚繒盖用諸侯諒闇之服】務財訓農通商惠工【加惠於百姓賞其利器用】敬教勸學授方任能【方百事之宜也】元年革車三十乘季年乃三百乘【革車兵車季年在僖二十五年盖招懷逃散故能致十倍之衆】閔二年左傳】晉文公屬百官賦職任功【屬會也賦授也授職事任有功也】棄

責薄斂施舍分寡【棄責除宿責也施德也舍舍禁也分寡分少財也】救乏振滯匡困資無【救乏救乏絕也振拯也拯淹滯之士匡正也正困窮之人資無子無財者】輕關易道通商寬農【輕關輕其稅也易道除盜賊也通商利商旅也寬農寬其政不奪其時】茂穡勸分省用足財【茂穡勉稼穡也勸分勸有分無也省用減國用也足財備凶年也】利器明德以厚民性【利器利器用也明德明德教也厚民性厚其情性】舉善授能官方定物【方常也物事也立其常官以定百事】正名育類【正名正上下服位之名育長也類善也】昭舊族【昭明也舊族舊臣有功者之族】愛親戚明賢良【明顯也】尊貴寵【國之貴臣尊寵之】賞功勞事耆老禮賓旅【旅客也】友故舊【故舊為公子時也】胥籍狐箕欒郤伯先羊舌董韓實掌近官【十一族晉之舊姓近官朝廷者】諸姬之良掌其中官【諸姬同姓也中官內官也】異姓之能掌其遠官【遠官縣鄙也】公食貢大夫食邑士食田【受公田也】庶人食力【各食其力】工商食官【工百工商官賈也周禮府藏皆有賈人以知物賈食官官廩之】阜隸食職【士臣阜阜臣與與臣隸食職各以其職大小食祿也】官宰食加【官宰家臣也加大夫之家田也論語曰原憲為家邑宰】政平民阜財用不匱【阜安也國語晉語】趙宣子為國政【宣趙盾諡】制事典【典常也】正法罪【輕重當】辟刑獄【辟猶理也】董逋逃【董督也】由質要【由用也質要券契也】治舊洿【治理洿穢】本秩禮【貴賤不失其本】續常職【脩廢官】出滯淹【拔賢能也】既成以授大傅陽子與大師賈佗使行諸晉國以為常法【文六年左氏傳】晉悼公即位於朝始命百官【始為政】施舍已責【施恩惠舍勞役止逋責】逮鰥寡【惠及微】振廢滯【起舊德】匡乏困救災患【匡亦救也】禁淫慝薄賦斂宥罪戾【宥寬也】節器用【節省也】時用民【使民以時】欲無犯時【不縱私欲】舉不失職官不易方【官守其業無相踰易】爵不踰德【量德授爵】師不陵正旅不偪師【正軍將命卿也師二千五百人之帥也旅五百人之帥也言上下有禮不相陵偪】民無謗言所以復霸也【成十八年左傳】子產為政使都鄙有章【國都及邊鄙車服尊卑各有分部】上下

有服【公卿大夫服不相踰】田有封洫【封疆也洫溝也】廬井有伍【廬舍也九夫為井使五家相保】大人之忠儉者【謂卿大夫】從而與之汰侈者因而斃之【因其有罪而斃之】從政一年輿人誦之曰取我衣冠而褚之【褚畜也奢侈者畏法故畜藏】取我田疇

而伍之孰殺子產吾其與之【並畔為疇】及三年又誦之曰我有子弟子產誨之我有田疇子產殖之【殖生也】子產而死誰其嗣之【嗣續也傳言鄭所以興襄三十年左傳】孔子初仕為中都宰制為養生送死之節長幼異食強弱異任男女別塗路無拾遺器不雕偽為四寸之棺五寸之槨因丘陵為墳不封不樹行之一年而四方諸侯則焉定公謂孔子曰學子此法以治魯國何如孔子對曰雖天下可也何但魯國而已哉【家語】

大宰以八統詔王馭萬民一曰親親二曰敬故三曰進賢四曰使能五曰保庸六曰尊貴七曰達吏八曰禮賓【統所以合率以等物也親親若堯親九族也敬故不慢舊也晏平仲久而敬之賢有善行也能多才藝者保庸安有功者尊貴尊天下之貴者孟子曰天下之達尊者三曰爵也德也齒也祭義曰先王之所以治天下者五貴有德貴貴貴老敬長慈幼達吏察舉勤勞之小吏也禮賓賓客諸侯所以示民親仁善鄰】以九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂疏材九曰閒民無常職轉移執事【任猶傳也鄭司農云三農平地山澤也九穀黍稷秬稻麻大小豆大小麥八材珠曰切象曰瑳玉曰琢石曰磨木曰刻金曰鏤革曰剥羽曰析閒民謂無事業者轉移為人執事若今傭賃也玄謂三農原隰及平地九穀無秬大麥而有粱瓜樹果蓏曰園圃其樊也虞衡掌山澤之官主山澤之民者澤無水曰藪牧牧田在遠郊皆畜牧之地行曰商處曰賈阜盛也金玉曰貨布帛曰賄嬪婦人之美稱也堯典曰釐降二女嬪于虞臣妾男女貧賤之稱晉惠公卜懷公之生日將生一男一女男為人臣女為人妾生而名其男曰圉女曰妾及懷公質於秦妾為宦女焉疏材百草根實可食者蔬不熟曰藿】以九兩繫邦國之民一曰牧以地得民二曰長以貴得民三曰師以賢得民四曰儒以道得民五曰宗以族得民六曰主以利得民七曰吏以治得民八曰友以任得民九曰藪以富得民【兩猶耦也所以協耦萬民繫聯綴也牧州長也九州各有封域以居民也長謂侯也一邦之貴民所仰也師諸侯師氏有德行以教民者儒諸侯保氏有六藝以教民者宗繼別為大宗收族者鄭司農云主謂公卿大夫世世食采不絕民稅薄利之玄謂利讀如上思利民之利謂以政教利之吏小吏在鄉邑者友謂同井相合耦耨作者孟子曰鄉田同井出入相友守望相助疾病相扶持則百姓親睦藪亦有虞掌其政令為之厲禁使其地之民守其材物以時入于王府頒其餘於萬民富謂藪中材物天官】大司徒以保息六養萬民一曰慈幼二曰養老三曰振窮四曰恤貧五曰寬疾六曰安富【保息謂安之使蕃息也慈幼謂愛幼少也產子三人與之母二人與之餼十四以下不從征養老七十養於鄉五十異糧之屬振窮拊捄天民之窮者也窮者有四曰矜曰寡曰孤曰獨恤貧貧無財業稟貸之寬疾若今癰不可事不算卒可事者半之也安富平其繇役不專取】以本俗六安萬民一曰宮室二曰族墳墓三曰聯兄弟四曰聯師儒五曰聯朋友六曰同衣服【本猶舊也媿善也謂約榘攻堅風雨攸除各有攸字族猶類也同宗者生相近死相迫聯猶合也兄弟昏姻嫁娶也師儒鄉里教以道藝者同師曰朋同志曰友同猶齊也民雖有富者衣服不得獨異】頒職事十有二于邦國都鄙使以登萬民一曰稼穡二曰樹藝三曰作材四曰阜蕃五曰飭材六曰通財七曰化材八曰斂材九曰生材十曰學藝十有一曰世事十有二曰服事【鄭司農云稼穡謂三農生九穀也樹藝謂園圃毓草木作材謂虞衡作山澤之材阜蕃謂藪牧養蕃鳥獸飭材謂百工飭化八材通財謂商賈阜通貨賄化材謂嬪婦化治絲枲斂材謂臣妾聚斂疏材生材謂閒民無常職轉移執事學藝謂學道藝世事謂以世事教能則民不失職服事謂為公家服事者玄謂生材養竹

木者 地官】土均掌平土地之政以均地守以均地事以均地貢【政讀為征所平之稅邦國都鄙也地守虞衡之屬地事農圃之職地貢諸侯之九貢】以和邦國都鄙之政令刑禁與其施舍禮俗喪紀祭祀皆以地 惡為輕重之法而行之掌其禁令【施讀為弛也禮俗邦國都鄙民之所行先王舊禮也君子行禮不求變俗隨其土地厚薄為之制豐省之節耳禮器曰禮也者合於天時設於地財順於鬼神合於人心理於萬物 同上】

右通言民政 禹曰德惟善政政在養民水火金木土穀惟脩正德利用厚生惟和九功惟叙九叙惟歌戒之用休董之用威勸之以九歌俾勿壞【德非徒善而已惟當有以善其政政非徒法而已在乎有以養其民下文六府三事即養民之政也水火金木土穀惟脩者水克火火克金金克木木克土而生五穀或相制以洩其過或相助以補其不足而六者無不脩矣正德者父慈子孝兄友弟恭夫義婦聽所以正民之德也利用者工作什器商通貨財之類所以利民之用厚生者衣帛食肉不飢不寒之類皆所以厚民之生也六者既脩民生始遂不可以逸居而無教故為之惇典敷教以正其德通功易事以利其用制節謹度以厚其生使皆當其理而無所乖則無不和矣九功合六與三也叙者言九者各順其理而不汨陳以亂其常也歌者以九功之叙而詠之歌也言九者既已脩和各由其理民享其利莫不歌詠而樂其生也然始勤終怠者人情之常恐安養既久怠心必生則已成之功不能必其久而不廢故當有以激勵之如下文所云也董督也威古文作畏其勤於是者則戒喻而休美之其怠於是者則督責而懲戒之然又以事之出於勉強者不能久故復即其前日歌詠之言協之律呂播之聲音用之鄉人用之邦國以勸相之使其歡欣鼓舞趨事赴功不能自已而前日之成功得以久存而不壞此周禮所謂九德之歌九韶之舞而太史公所謂佚能思初安能惟始沐浴膏澤而歌詠勤苦者也 大禹謨】

大司徒以土宜之灋辨十有二土之名物以相民宅而知其利害以阜人民以蕃鳥獸以毓草木以任土事【十二土分野十二邦上繫十二次各有所宜也相占視也阜猶盛也蕃蕃息也育生也任謂任地所生因民所能地官】司空掌邦土居四民時地利【冬官卿主國空土以居民士農工商四人使順天時分地利授之土能吐生百穀故曰土 周官】司空執度度地【司空冬官卿掌邦事者度丈尺也】居民山川沮澤時四時【觀寒煖燥濕沮謂萊沛】量地遠近【制邑井之處】興事任力【事謂築邑廬宿市也】凡居民材必因天地寒煖燥濕【使其材藝堪地氣也】廣谷大川異制【謂其形象】民生其間者異俗【謂其所好惡】剛柔輕重遲速異齊【謂其情性緩急】五味異和【謂香臭與鹹苦】器械異制【謂作務之用】衣服異宜【謂氈裘與絺綌】脩其教不易其俗齊其政不易其宜【教謂禮義政謂刑禁 王制】凡居民量地以制邑度地以居民地邑民居必參相得也【得猶足也】無曠土無游民食節事時民咸安其居樂事勸功尊君親上然後興學【立小學大學 同上】

右居民 昔聖王之處民也擇瘠土而處之【磽确為瘠】勞其民而用之故長王天下【瘠土利薄又勞而用之使不淫逸不淫逸則向義故長王天下也】夫民勞則思思則善心生【民勞於事則思儉約故善心生】逸則淫淫則忘善忘善則惡心生沃土之民不材淫也【沃肥善也不材器能少也】瘠土之民莫不嚮義勞也【善心生故嚮義也 國語魯語】聖王所以順山者不使居川不使渚者居中原而弗敝也【小洲曰渚廣平曰原山者利其禽獸渚者利

其魚鹽中原利其五穀使各居其所安不易其利勞敝之也民失其業則窮窮則濫 禮運】管仲曰昔者聖王之治天下也參其國而伍其鄙【參三也國郊以內也伍五也鄙郊以外也謂三分國都以為三軍五分其鄙以為五屬聖王謂若湯武也】定民之居成民之事【謂使四民各居其職所也若工就官府農就田野所以成其事也】陵為之終【以為葬也】而慎用其六柄焉【柄本也六柄生殺貧富貴賤也】桓公曰成民之事若何對曰四民者勿使雜處【四民謂士農工商】雜處則其言咙其事易【咙亂貌易變易也】公曰處士農工商若何對曰昔聖王之處士也使就閒燕【士講學道藝者閒燕猶清淨也】處工就官府處商就市井處農就田野今夫士羣萃而州處【萃集也處聚也】閒燕則父與父言義子與子言孝其事君者言敬其幼者言悌少而習焉其心安焉不見異物而遷焉【物事也遷移也】是故其父兄之教不肅而成【肅疾也】其子弟之學不勞而能夫是故士之子恒為士今夫工羣萃而州處審其四時【言四時各有其宜也謂死生凝釋之時也】辨其功苦【辨別也功牢也苦脆也】權節其用【權平也視其平沈之均也節節其大小輕重也】論比協材【論擇也比比其善惡也協和也和其剛柔也】旦莫從事施於四方【施其物用於四方也】以飭其子弟【飭教也】相語以事相示以巧相陳以功【陳亦示也功成功也功善則有賞】少而習焉其心安焉不見異物而遷焉是故其父兄之教不肅而成其子弟之學不勞而能夫是故工之子恒為工今夫商羣萃而州處察其四時【四時所用者預資之也】而監其鄉之資【監視也資財也視其貴賤有無】以知其市之賈負任擔荷【背曰負肩曰擔任抱也荷揭也】服牛輶馬【服謂牛服車也輶馬車也詩云晄彼牽牛不以服箱】以周四方【周徧也】以其所有易其所無市賤鬻貴【市取也鬻賣也】旦莫從事於此以飭其子弟相語以利相示以賴【賴贏也】相陳以知賈【賈知物價相與陳說】少而習焉其心安焉不見異物而遷焉是故其父兄之教不肅而成其子弟之學不勞而能夫是故商之子恒為商今夫農羣萃而州處察其四時【四時樹藝各有宜也】權節其用耒耜枷芟【權平也平節其器用小大倨句之宜也枷拂也所以擊草也芟大鎌所以芟草也】及寒擊萁除田【寒謂季冬大寒之時也萁枯草也】以待時耕【時耕謂立春之後】及耕深耕而疾耰之以待時雨【疾速也耰摩平也時雨至當種之也】時雨既至挾其槍刈耨鎛【在掖曰挾槍耨也刈鎌也耨鎛鎛也鎛鉏也】以旦莫從事於田野脫衣就功首戴茅蒲身衣襍褌【脫解也茅蒲蓆笠也襍褌蓑蓆衣也茅或作萌竹萌之皮所以為笠也】霑體塗足【霑濡也】暴其髮膚盡其四支之敏【敏猶材也】以從事於田野少而習焉其心安焉不見異物而遷焉是故其父兄之教不肅而成其子弟之學不勞而能是故農之子恒為農野處而不暱【暱近也】其秀民之能為士者必足賴也【秀民民之秀出者也賴恃也】有司見而不以告其罪五【有司掌民之官也罪在五刑也】有司已於事而竣【已畢也竣退伏也】桓公曰定民之居若何對曰制國以為二十一鄉【唐尚書曰四民之所居也昭謂國國都城郭之域也惟士工商而已農不在焉】桓公曰善管子於是制國以為二十一鄉【二千家為一鄉二十一鄉凡四萬二千家此管仲所制非周法也】工商之鄉六【工商各三也二者不從戎役也】士鄉十五【唐尚書云士與農共十五鄉昭謂此士軍士也十五鄉合三萬人是為三軍農野處而不暱不在都邑之數則下所云伍鄙是也】公帥五鄉焉【五鄉萬人是謂中軍公所帥也】國子帥五鄉焉高子帥五鄉焉【國子高子皆齊上卿各帥五鄉為左右軍也】參國起按以為三官【參三也按界也分國事以為三也】臣立三宰【三宰三卿也使掌羣臣也】工立三族【族屬也晉趙盾為旄車之族上言工商之鄉六則各三也】市立三鄉【市商也商處市井故曰市】

澤立三虞【周禮有澤虞之官虞度也掌度知川澤之大小及所生育者】山立三衡【周禮有山虞林衡之官衡平也掌平其政也】桓公曰伍鄙若何【管子上言參其國而伍其鄙內政既備故復問伍鄙之事】管子對曰制鄙三十家為邑邑有司【制野鄙之政也此以下與郊內之制異也】十邑為卒卒有卒帥十卒為鄉鄉有鄉帥三鄉為縣縣有縣帥十縣為屬屬有大夫五屬故立五大夫各使治一屬焉【五屬四十五萬家也】立五正【正長也】各使聽一屬焉是故正之政聽屬【正五正也聽大夫之治也】牧政聽縣【牧五屬大夫也聽縣帥之治】下政聽鄉【下政縣帥也聽鄉帥之治也】桓公曰各保治爾所無或淫怠而不聽治者【國語齊語】

司民掌登萬民之數自生齒以上皆書于版辨其國中與其都鄙及其郊野異其男女歲登下其死生【登上也男八月女七月而生齒板令戶籍也下猶去也每歲更著生去死】及三年大比以萬民之數詔司寇司寇及孟冬祀司民之日獻其數于王王拜受之登于天府內史司會冢宰貳之以贊王治【鄭司農云文昌宮三能屬軒轅角相與為體近文昌為司命次司祿次司民玄謂司民軒轅角也天府主祖廟之藏者贊佐也三官以貳佐王治者當以民多少黜陟主民之吏 秋官】小司寇及大比登民數自生齒以上登于天府【大比三年大數民之衆寡也人生齒而體備男八月而生齒女七月而生齒】內史司會冢宰貳之以制國用【人數定而九賦可知國用乃可制耳】孟冬祀司民獻民數於王王拜受之以圖國用而進退之【司民星名謂軒轅角也小司寇於祀司民而獻民數於王重民也進退猶損益也國用民衆則益民寡則損 同上】

天府若祭天之司民司祿而獻民數穀數則受而藏之【注見吉禮天神】

右民數 受計之禮主所親拜者二聞生民之數則拜之聞登穀則拜之【賈誼新書】宣王既喪南國之師【喪亡也敗於姜戎氏時所亡也南國江漢之間也詩曰滔滔江漢南國之紀】乃料民于大原【料數也大原地名】仲山甫諫曰民不可料也夫古者不料民而知其少多司民協孤終【司民掌登萬民之數自生齒以上皆書於版協合也無父曰孤終死也合其名籍以登于王也】司商協名姓【司商掌賜族受姓之官商金聲清謂人始生吹律合之定其姓名】司徒協旅【司徒掌合師旅之衆也】司寇協姦【司寇刑官掌合姦民以知死刑之數】牧協職【周禮牧人掌牧養犧牲合其物色之數】工協革【工百工之官革更也更制度者合其數也】場協入【場人掌場圃委積珍物斂而藏之也】廩協出【廩人掌九穀出用之數也】是則少多死生出入往來者皆可知也於是乎又審之以事【事謂因藉田與蒐狩以簡知其數也】王治農於藉【藉藉於千畝田也】撝於農隙【春田曰撝撝擇也禽獸懷妊未著撝而取之也農隙仲春既耕之後隙間也】耨穫亦於藉【言王亦至於藉考課之】獮於既蒸【秋田曰獮獮殺也順時始殺也烝升也月令孟秋乃升穀天子嘗新既升謂仲秋也】狩於畢時【冬田曰狩圍守而取之畢時時務之畢也】是皆習民數者也又何料焉【習簡習也】不謂其少而大料之是示少而惡事也【言王不謂其衆少而大料數之是示以寡少又厭惡政事不能修之意也】臨政示少諸侯避之【示天下寡弱諸侯將避遠王室不親附也】治民惡事無以賦令【言厭惡政事無以賦令也】且無故而料民天之所惡也【故事也天道清淨也】害於政而妨於後嗣【害政戕為政之道也妨後嗣謂將有禍亂也】王卒料之及幽王乃廢滅【國語周語】趙簡子使尹鐸為晉陽【尹鐸簡子家臣也晉陽

趙氏邑為治也】請曰以為繭絲乎抑為保障乎【繭絲賦稅保障蔽扞也小城曰保禮記曰遇入保者】簡子曰保障哉尹鐸損其戶數【損其戶則民優而稅少晉語】

大司徒令五家為比使之相保五比為閭使之相受四閭為族使之相葬五族為黨使之相救五黨為州使之相賙五州為鄉使之相賓【此所以勸民者也使之者皆謂立其長而教令使之保猶任也救救凶災也賙賙客其賢者故書受為授杜子春云當為受謂民移徙所到則受之所去則出之又云賙當為糾謂糾其惡玄謂受者宅舍有故相受寄記也賙者謂禮物不備相給足也閭二十五家族百家黨五百家州二千五百家鄉萬二千五百家地官】小司徒之職掌建邦之教法以稽國中及四郊都鄙之夫家九比之數以辨其貴賤老幼廢疾凡征役之施舍與其祭祀飲食喪紀之禁令【稽猶考也夫家猶言男女也鄭司農云九比謂九夫為井玄謂九比者冢宰職出九賦者之人數也貴謂為卿大夫賤謂占會販賣者廢疾謂癰疾也施當為弛】乃頒比法於六鄉之大夫使各登其夫家衆寡六畜車輦辨其物以歲時入其數以施政教行徵令【登成也成猶定也衆寡民之多少物家中之財歲時入其數若今四時言事】及三年則大比大比則受邦國之比要【大比謂使天下更簡閱民數及其財物也受邦國之比要則亦受鄉遂矣鄭司農云五家為比故以比為名今時八月案比是也要謂其簿】歲終則考其屬官之治成而誅賞【治成治事之計】令羣吏正要會而致事正歲則帥其屬而觀教象之法徇以木鐸曰不用法者國有常刑令羣吏憲禁令修法糾職以待邦治【憲表縣之】及大比六鄉四郊之吏平教治正政事考夫屋及其衆寡六畜兵器以待政令【四郊之吏吏在四郊之內主民事者夫三為屋屋三為井出地貢者三三相任】鄉師之職各掌其所治鄉之教而聽其治【聽謂平察之】以國比之法以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟歲終則考六鄉之治以詔廢置正歲稽其鄉器比共吉凶二服閭共祭器族共喪器黨共射器州共賓器鄉共吉凶禮樂之器【吉服祭服也凶服弔服也比長主集為之祭器者簠簋鼎俎之屬閭胥主集為之喪器者夷槃素俎楬豆軼軸之屬族師主集為之此三者民所以相共也射器者弓矢楅中之屬黨正主集為之為州長或時射於此黨也賓器者尊俎笙瑟之屬州長主集為之為鄉大夫或時賓賢能於此州也吉器若閭祭器者也凶器若族喪器者也禮樂之器若州黨賓射之器者鄉大夫備集此四者為州黨族閭有故而不共也此鄉器者旁使相共則民無廢事上下相補則禮行而教成】若國大比則考教察辭稽器展事以詔誅賞【考教視賢能以知道藝與不察辭視吏言事知其情實否展猶整具】鄉大夫之職各掌其鄉之政教禁令正月之吉【謂建子之十一月也】受教法於司徒退而頒之於其鄉吏使各以教其所治【詳見學校】以歲時登其夫家之衆寡辨其可任者【詳見禮田役篇】歲終則令六鄉之吏皆會政致事【會計也致事言其歲盡文書】正歲令羣吏考法於司徒以退各憲之於其所治州長各掌其州之教治政令之法凡州之大祭祀大喪皆蒞其事【大祭祀謂州社稷大喪鄉老大夫於是卒者蒞臨也】歲終則會其州之政令三年大比則大考州里以贊鄉大夫廢興【廢興所廢退所興進也】黨正各掌其黨之政令教治凡其黨之祭祀喪紀昏冠飲酒教其禮事掌其禁戒【其黨之民】歲終則會其黨政帥其吏而致事以歲時蒞校比【蒞臨也鄭司農云校比族師職所謂以時屬民而校登其族之夫家衆寡辨其貴賤老幼廢疾可任者及其六畜車輦如今小案比】及大比亦如之族師各掌其族之戒令政事【政事邦政之事】以邦比之法帥四閭之吏以時屬民而校登其族之夫家衆寡辨其貴賤老幼廢疾可任者及其六畜車輦五家為

比十家為聯五人為伍十人為聯四閭為族八閭為聯使之相保相受刑罰慶賞相及相共以受邦以役國事以相葬埋【相共猶相救相調】歲終則會政致事閭胥各掌其閭之徵令以歲時各數其閭之衆寡辨其施舍比長各掌其比之治五家相受相和親有臯奇衰相

及【衰猶惡也】徙於國中及郊則從而授之【徙謂不使其居也或國中之民出徙郊或郊民入徙國中皆從而付所處之吏明無罪惡】若徙於他則為之旌節而行之【徙於他謂出居異鄉也授之者有節乃達】若無授無節則唯園土內之【鄉中無授出鄉無節過所則呵問繫之園土考辟之也園土獄城也獄必園者規主仁以仁心求其情古之治獄閱於出之】閭師掌國中及四郊之人民六畜之數【詳財賦篇】縣師掌邦國都鄙稍甸郊里之地域而辨其夫家人民田萊之數及其六畜車輦之稽三年大比則以考羣吏而以詔廢置【郊里郊所居也自邦國以及四郊之內是所主數周天下也萊休不耕者郊內謂之易郊外謂之萊善言近】遂人掌邦之野【郊外曰野此野謂甸稍縣都】以土地之圖經田野造縣鄙形體之法五家為鄰五鄰為里四里為鄴五鄴為鄙五鄙為縣五縣為遂皆有地域溝樹之使各掌其政令刑禁以歲時稽其人民而授之田野簡其兵器教之稼穡【經形體皆謂制分界也鄰里鄴鄙縣遂猶郊內比閭族黨州鄉也鄭司農云田野之居其比伍之名與國中異制故五家為鄰玄謂異其名者示相變耳遂之軍法追胥起徒役如六鄉】凡治野以下劑致甿以田里安甿以樂昏擾甿以土宜教甿稼穡以興勸利甿以時器勸甿以彊予任甿以土均平政【變民言甿異外內也甿猶懵懵無知貌也致猶會也民雖受上田中田下田及會之以下劑為率謂可任者家二人樂昏勸其昏姻如媒氏會男女也擾順也時器鑄作耒耜錢鎛之屬彊予謂民有餘力復予之田若餘夫然政讀為征土均掌均平其稅鄭大夫讀勸為藉杜子春讀勸為助謂起民人令相佐助】以歲時登其夫家之衆寡及其六畜車輦辨其老幼廢疾與其施舍者以頒職作事以令貢賦以令師田以起政役【職謂民九職也分其農牧衡虞之職使民為其事也載師職云以物地事授地職互言矣貢九貢也賦九賦也政役出土徒役】遂師各掌其遂之政令戒禁以時登其夫家之衆寡六畜車輦辨其施舍與其可任者經牧其田野辨其可食者周知其數而任之以徵財征【施讀亦弛也經牧制田界與井也可食謂今年所當耕者也財征賦稅之事】遂大夫各掌其遂之政令以歲時稽其夫家之衆寡六畜田野辨其可任者與其可施舍者以教稼穡以稽功事掌其政令戒禁聽其治訟【施亦讀為弛功事九職之事民所以為功業】令為邑者歲終則會政致事【不言其遂之吏而言為邑者容公邑及公卿大夫王子弟之采邑政令戒禁遂大夫亦施焉】三歲大比則帥其吏而興甿明其有功者屬其地治者【興甿舉民賢者能者如六鄉之為也興猶舉也屬猶聚也又因舉吏治有功者而聚勸其餘以職事】凡為邑者以四達戒其功事而誅賞廢興之【四達者治民之事大通者有四夫家衆寡也六畜車輦也稼穡耕耨也旗鼓兵革也】縣正各掌其縣之政令徵比以頒田里以分職事掌其治訟趨其稼事而賞罰之【徵徵召也比案比】鄙師各掌其鄙之政令祭祀【祭祀祭禋也】以時數其衆庶而察其媿惡而誅賞【時四時也】歲終則會其鄙之政而致事鄴長各掌其鄴之政令以時校登其夫家比其衆寡以治其喪紀祭祀之事【校猶數也】若歲時簡器與有司數之【簡器簡稼器也兵器亦存焉有司遂大夫】凡歲時之戒令皆聽之【聽之受而行之也】里宰掌比其邑之衆寡與其六畜兵器治其政令【邑猶里也】以歲時合耦於耨以治稼穡趨其耕耨行其秩叙以待有司之政令而徵斂其財賦【注見下章】鄰長掌相糾相受【相糾相舉察】凡邑中之政相贊【長短使相補助】徙於

他邑則從而授之【從猶隨也授猶付也 並地官】 士師掌鄉合州黨族閭比之聯與其人民之什伍使之相安相受以比追胥之事以施刑罰慶賞【鄉合鄉所合也追追寇也胥讀如宿偕之偕偕謂司搏盜賊也 秋官】 鄉士掌國中【鄭司農云謂國中至百里郊也玄謂其地則距王城百里內也言掌國中此主】

【國中獄也六鄉之獄在國中】 各掌其鄉之民數而糾戒之【鄉士八人言各者四人而分主三鄉】 遂士掌四郊【鄭司農云謂百里外至三百里也玄謂其地則距王城百里以外至二百里言掌四郊者此主四郊獄也六遂之獄在四郊】 各掌其遂之民數而糾其戒令【遂士十二人言各者二人而分主一遂】 縣士掌野【鄭司農云掌三百里至四百里大夫所食晉韓須為公族大夫食縣玄謂地距王城二百里以外三百里曰野三百里以外至四百里曰縣四百里以外至五百里曰都都縣野之地其邑非王子弟公卿大夫之采地則皆公邑也謂之縣縣士掌其獄焉言掌野者郊外曰野大總言之也獄居近野之縣獄在二百里上縣之縣獄在三百里上都之縣獄在四百里上】 各掌其縣之民數糾其戒令 方士掌都家【鄭司農云掌四百里至五百里公所食魯季氏食於都玄謂都王子弟及公卿之采地家大夫之采地大都任畺地小都任縣地家邑任稍地不言掌其民數民不純屬王】 凡都家之大事聚衆庶則各掌其方之禁令【方士十六人言各掌其方者四人而主一方也其方以王之事動衆則為班禁令焉】 以時修其縣法若歲終則省之而誅賞焉【縣法縣師之職也其職掌邦國都鄙稍甸郊野之地域而辨其夫家人民田萊之數及其六畜車輦之稽方士以四時修此法歲終又省之則與掌民數亦相近 並秋官】

右鄉邑之政

神農氏作斲木為耜揉木為耒耒耨之利以教天下盖取諸益【二體皆木上入下動天下之益莫大於此 繫辭傳】 少皞氏以鳥名官九扈為九農正扈民無淫者也【注見職官】 帝曰棄黎民阻飢汝后稷播時百穀【阻厄后君也有爵土之稱播布也穀非一種故曰百穀此因禹之讓而申命之使仍舊職以終其事也 舜典】

大宰以九職任萬民一曰三農生九穀七曰嬪婦化治絲枲【詳見民政篇】 大司徒辨十有二壤之物而知其種以教稼穡樹藝【壤亦土也變言耳以萬物自生焉則言土土猶吐也以人所耕而樹藝焉則言壤壤和緩之貌詩曰樹之榛栗又曰我藝黍稷藝猶蒔也

地官】 土方氏以辨土宜土化之法而授任地者【土宜謂九穀植穡所】

【宜也土化地之輕重糞種所宜用也任地者載師之屬 夏官】 草人掌土化之法以物地相其宜而為之種【土化之法化之使美若汜勝之術也以物地占其形色為之種黃白宜以種禾之屬】 凡糞種騂剛用牛赤緹用羊墳壤用麋渴澤用鹿鹹澗用狽勃壤用狐埴壚用豕彊藥用蕢輕燹用犬【凡所以糞種者皆謂煮取汁也赤緹鵝色也渴澤故水處也澗鹵也狽貓也勃壤粉解者埴壤黏疏者強藥強堅者輕燹輕脆者故書騂為挈墳作盆杜子春挈讀為騂謂地色赤而土剛強也鄭司農云用牛以牛骨汁漬其種也謂之糞種墳壤多盆鼠也壤白色蕢麻也玄謂墳壤潤解 地官】 稻人掌稼下地【以水澤之地種穀也謂之稼者有似嫁女相生】 以潞畜水以防止水以溝蕩水以列舍水以澮寫水以涉揚其芟作田【鄭司農說潞防

以春秋傳曰町原防規偃潏以列舍水列者非一道以去水也以涉楊其芟以其水寫故得行其田中舉其芟鉤也杜子春讀蕩為和蕩謂以溝行水也玄謂偃潏者畜流水之陂也防潏旁隄也遂田首受水小溝也列田之畦畷也澮田尾去水大溝作猶治也開遂舍水於列中因涉之揚去前年所芟之草而治田種稻】凡稼澤夏以水殄草而芟夷之【殄病也絕也鄭司農說芟夷以春秋傳曰芟夷蕞崇之今時謂禾下麥為黃下麥言芟刈其禾於下種麥也玄謂將以澤地為稼者必於夏六月之時大雨時行以水病絕草之後生者至秋水涸芟之明年乃稼】澤草所生種之芒種【鄭司農云澤草之所生其地可種芒種芒種稻麥也】司稼掌巡邦野之稼而辨種稂之種周知其名與其所宜地以為法而縣於邑閭【周猶徧也徧知種所宜之地縣以示民後年種穀用為法也】

遂人以歲時稽其人民而授之田野教之稼穡【詳見上章】遂師巡其稼穡而移用其民以救其時事【移用其民使轉相助救時急事也四時耕耨斂艾芟地之宜晚早不同而有天期地澤風雨之急】遂大夫以歲時稽其夫家之衆寡以教稼穡以稽功事【詳見上章】正歲簡稼器修稼政【簡猶閱也稼器耒耜鎡基之屬稼政孟春之月令所云皆脩封疆審端徑術善相丘陵阪險原隰土地所宜五穀所殖以教道民必躬親之】

縣正趨其稼事而賞罰之【詳見上章】鄼長趨其耕耨稽其女功【女功絲枲之事】里宰以歲時合耦于耤以治稼穡趨其耕耨行其秩叙【考工記曰耜廣五寸二耜為耦此言兩人相助耦而耕也鄭司農云耤讀為藉杜子春云耤讀為助謂相佐助也玄謂耤者里宰治處也若今街彈之室於此合耦使相佐助因放而為名月令季冬命農師計耦耕事修耒耜具田器是其歲時與合人耦則牛耦亦可知也秩叙受耦相佐助之次第並地官】車人為耒底長尺有一寸中直者三尺有三寸上句者二尺有二寸【鄭司農云耒謂耕耒底讀為其類有底之底謂耒下岐玄謂底讀為棘刺之刺耒下前曲接耜】自其底緣其外以至於首以弦其內六尺有六寸與步相中也【緣外六尺有六寸內弦六尺應一步之尺數耕者以田器為度宜耜異材不在數中】堅地欲直底柔地欲句底直底則利推句底則利發倨句磬折謂之中地【中地之耒其底與直者如磬折則調矣調則弦六尺考工記】

段氏為鑄器【鑄器田器錢鑄之屬同上】雍氏掌溝瀆澮池之禁凡害於國稼者春令為阱獲溝瀆之利於民者秋令塞阱杜獲【溝瀆澮田間通水者也池謂陂障之水道也害於國稼謂水潦及禽獸也阱穿地為所以禦禽獸其或超踰則陷焉世謂之陷阱獲柞鄂也堅地阱淺則設柞鄂于其中秋而杜塞阱獲收刈之時為其限害人也書費誓曰□乃獲斂乃阱時秋也伯禽以出師征徐戎秋官】載師凡宅不毛者有里布凡田不耕者出屋粟凡民無職事者出夫家之征【鄭司農云宅不毛者謂不種桑麻也玄謂宅不毛者罰以一里二十五家之泉空田者罰以三家之稅粟以共吉凶二服及喪器也民有間無職事者出夫稅家稅也夫稅者百畝之稅家稅者出土徒車輦給繇役地官】閭師凡庶民不畜者祭無牲不耕者祭無盛不樹者無槨不蠶者不帛不績者不衰【掌罰其家事也盛黍稷也槨周棺也不帛不得衣帛也不衰不得衣衰也皆所以耻不免同上】旅師凡用粟春頒而秋斂之【困時施之饒時收之同上】春省耕而補不足秋省斂而助不給【春秋巡行郊野察民之所不足而補助之孟子】孟春天氣下降地氣上騰天地和同草木萌動王命布農事命田舍東郊皆修封疆審端徑術善相丘陵阪險原隰土地所宜五穀所殖以教道民必躬親之田事既飭先定準直農乃不惑毋聚大眾毋置城郭仲春耕者少舍乃脩閭扇毋作大事以妨農之事季春命司空曰時雨將降下水上騰循行國邑周視原野脩利隄防道達溝瀆開通道路毋有障塞

孟夏毋起土功毋發大衆 命野虞出行田原為天子勞農勸民毋或失時命司徒巡行縣鄙命農勉作毋休于都驅獸毋害五穀毋大田獵農乃登麥 仲夏農乃登黍 季夏毋發令而待以妨神農之事是月也土潤溽暑大雨時行燒薙行水利以殺草如以熱湯可以糞田疇可以美土疆 孟秋農乃登穀命百官始收斂完隄防謹壅塞以備水潦 仲秋乃命有司趣民收斂務畜菜多積聚乃勸種麥毋或失時其有失時行罪無疑 季秋乃命冢宰農事備收舉五穀之要 仲冬農有不收藏積聚者馬牛畜獸有放佚者取之不詰 季冬冰以入令告民出五種命農計耦耕事修耒耜具田器【注並詳月令篇】

右農政【宣公十四年公羊傳何休注云聖人制井田之法而口分之一夫一婦受田百畝以養父母妻子種穀不得種一穀以備災害田中不得有樹以妨五穀還廬舍種桑荻襍菜畜五母雞兩母豕瓜果種疆畔女工蠶織老者得衣帛焉得食肉焉死者得葬焉在田曰廬在邑曰里一里八十戶八家共一巷中里為校室選其耆老有高德者名曰父老其有辯護伉健者為里正皆受倍田得乘馬父老比三老孝弟官屬里正比庶人在官之吏民春夏出田秋冬入保城郭田作之時春父老及里正旦開門坐塾上晏出後時者不得出莫不持樵者不得入五穀畢入民皆居宅里正促緝績男女同巷相從夜績至於夜中故女功一月得四十五日作從十月盡正月止】神農之法曰丈夫丁壯而不耕天下有受其飢者婦人當年而不織天下有受其寒者故身自耕妻親織以為天下先【淮南子】五畝之宅樹墻下以桑匹婦蠶之則老者足以衣帛矣五母雞二母彘母失其時老者足以無失肉矣百畝之田匹夫耕之八口之家可以無飢矣【此文王之政也一家養母雞五母彘二也】所謂西伯善養老者制其田里教之樹畜導其妻子使養其老五十非帛不煖七十非肉不飽不煖不飽謂之凍餒文王之民無凍餒之老者此之謂也【田謂百畝之田里謂五畝之宅樹謂耕桑畜謂雞彘也趙氏曰善養老者教導之使可以養其老耳非家賜而人益之也孟子】
嗟嗟臣工敬爾在公王釐爾成來咨來茹

【嗟嗟重嘆以深勅之也臣工羣臣百官也公公家也釐賜也成成法也茹度也 此戒農官之詩先言王有成法以賜汝汝當來咨度也】嗟嗟保介維莫之春亦又何求如何新畝於皇來牟將受厥明明昭上帝迄用康年命我衆人痔乃錢鏹奄觀銍艾【保介見月令呂覽其說不同然皆為藉田而言蓋農官之副也莫春斗柄建辰夏正之三月也畝三歲田也於皇歎美之詞來牟麥也明上帝之明賜也言麥將熟也迄至也康年猶豐年也衆人甸徒也痔具錢鏹鏹鉏皆田器也銍鑿禾短鎌也艾穫也 此乃言所戒之事言三月則當治其新畝矣今如何哉然麥已將熟則可以受上帝之明賜而此明昭之上帝又將賜我新畝以豐年也於是命甸徒具農器以治其新畝而又將忽見其收成也 周頌臣工】噫嘻成王既昭假爾率時農夫播厥百穀駿發爾私終三十里亦服爾耕十千維耦【噫嘻亦歎辭也昭明假格也爾田官也時是駿大發耕也私私田也三十里萬夫之地四旁有川內方三十三里有奇言三十里舉成數也耦二人並耕也 此連上篇亦戒農官之詞昭假爾猶言格爾衆庶蓋成王始置田官而嘗戒命之也爾當率時農夫播其百穀使之大發其私田皆服其耕事萬人為耦而並耕也蓋耕本以二人為耦今合一川之衆為言故云萬人畢出并力齊心如合一耦也此必鄉遂之官司稼之屬其職以萬夫為界者溝洫用貢法無公田故皆謂之私蘇氏曰民曰雨我公田遂及我私而君

曰駿發爾私終三十里其上下之間交相忠愛如此周頌噫嘻】宣王即位不藉千畝號文公諫曰不可王事唯農是務無有求利於其官以干農功三時務農而一時講武故征則有威守則有則【詳見王朝禮】單襄公假道於陳以聘於楚歸告定王曰陳侯不有大咎國必亡周制有之曰民無縣耜【言常用也入土曰耜耜柄曰耒】野無奧草【皆墾辟也奧深也】不奪民時不蔑民功【蔑棄也】有優無匱有逸無罷國有班事【國城邑也班次也執事有次】縣有序民【縣鄙之民從事有序】今陳國道路不可知田在草間【不懇者多】功成而不收【野場若棄也】民罷於逸樂【罷於為國君作逸樂之事】是棄先王之法制者也【周語】

少皞氏以鳥名官五雉為五工正利器用正度量夷民者也【注見職官】帝曰疇若予工兪曰垂哉帝曰兪咨垂汝共工垂拜稽首讓於殳斨暨伯與帝曰兪往哉汝諧【若順其理而治之也曲禮六工有土工金工石工木工獸工草工周禮有攻木之工攻金之工攻皮之工設色之工搏埴之工皆是也帝問誰能順治予百工之事者垂臣名有巧思莊子曰儷工倕之指即此也殳斨伯與三臣名也殳以積竹為兵建兵車者斨方鋈斧也古者多以其所能為名殳斨豈能為二器者歟往哉汝諧者往哉汝和其職也 舜典】有虞氏上陶夏后氏上匠殷人上梓周人上輿【官各有所尊王者相變也舜至質貴陶器甗大瓦棺是也禹治洪水民降丘宅土卑宮室盡力乎溝洫而尊匠湯放桀疾禮樂之壞而尊梓武王誅紂疾上下失其服飾而尊輿考工記】天子之六工曰土工金工石工木工獸工草工典制六材【此亦殷時制也周則皆屬司空土工陶旆也金工築冶鳧桌鍛桃石工玉人磬人也木工輪輿弓廬匠車梓也獸工函鮑鞞韋裘也惟草工職亡盖謂作萑葦之器 曲禮】

大宰以九職任萬民五曰百工飭化八材【詳見民政章】凡攻木之工七攻金之工六攻皮之工五設色之工五刮摩之工五搏埴之工二【攻猶治也搏之言拍也埴黏土也故書七為十刮作掞鄭司農云十當為七掞摩之工謂玉工也掞讀為刮其事亦是也】攻木之工輪輿弓廬匠車梓攻金之工築冶鳧桌段桃攻皮之工函鮑鞞韋裘設色之工畫績鍾筐幌刮摩之工玉柳雕矢磬搏埴之工陶旆【事官之屬六十此識其五材三十工略記其事耳其曰某人者以其事名官也其曰某氏者官有世功若族有世業以氏名官者也廬矛戟矜秘也國語曰侏儒扶廬梓榎屬也故書雕或為舟鄭司農云輪輿弓廬匠車梓此七者攻木之工官別名也孟子曰梓匠輪輿鮑讀為鮑魚之鮑書或為鞞蒼頡篇有鮑苑鞞讀為歷運之運慌讀為芒芒禹迹之芒柳讀如巾櫛之櫛旆讀為甫始之甫埴書或為植杜子春云雕或為舟者非也玄謂旆讀為放於此乎之放 考工記】攻金之工築氏執下齊冶氏執上齊鳧氏為聲桌氏為量段氏為鑄器桃氏為刃【多錫為下齊大刃削殺氏鑿燧也少錫為上齊鐘鼎斧斤戈戟也聲鍾鐸于之屬量豆區鬴也鑄器田器錢鑄之屬刃大刃刀劍之屬】金有六齊【目和金之品數】六分其金而錫居一謂之鐘鼎之齊五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之削殺矢之齊金錫半謂之鑿燧之齊【鑿燧取水火於日月之器也鑿亦鏡也凡金多錫則忍白且明也 同上】凡鑄金之狀【故書狀作壯杜子春云當為狀謂鑄金之形狀】金與錫黑濁之氣竭黃白次之黃白之氣竭青白次之青白之氣竭青氣次之然後可鑄也【消涑金錫精麤之候 同上】季春命工師令百工審五庫之量金鐵皮革筋角齒羽箭幹脂膠丹漆母或不良百工咸理監工日號毋悖於時母或作為淫巧以蕩上心季秋霜始降則令百工休 孟冬命工師效功陳祭

器案度程毋或作為淫巧以蕩上心必功致為上物勒工名以考其誠功有不當必行其罪以窮其情【注並見月令篇】來百工則財用足【來百工則通功易事農末相資故財用足】日省月試既

稟稱事所以勸百工也【既讀曰餼餼稟稍食也稱事如周禮藁人職曰考其弓弩以上下其食是也 中庸】

右工政 國有六職百工與居一焉【百工司空事官之屬於天地四時之職亦處其一也司空掌營城郭建都邑立社稷宗廟造宮室車服器械監百工者唐虞以上曰共工】或坐而論道或作而行之或審曲面勢以飭五材以辨民器或通四方之珍異以資之或飭力以長地財或治絲麻以成之【言人德能事業之不同者也論道謂謀慮治國之政令也作起也辨猶具也資取也操也鄭司農云審曲面勢審察五材曲直方面形勢之宜以治之及陰陽之向背是也春秋傳曰天生五材民並用之謂金木水火土也故書資作齊杜子春云齊當為資讀為冬資絺綌之資玄謂此五材金木皮玉土】坐而論道謂之王公【天子諸侯】作而行之謂之士大夫【親受其職居其官也】審曲面勢以飭五材以辨民器謂之百工【五材各百工言百衆言之也】通四方之珍異以資之謂之商旅【商旅販賣之客也易曰至日商旅不行】飭力以長地財謂之農夫【三農受夫田也】治絲麻以成之謂之婦功【布帛婦官之事】粵無鎛燕無函秦無廬胡無弓車【此四國者不置是工也鎛田器詩云猗乃錢鎛又曰其鎛斯攸鄭司農云函讀為國君含垢之含函鎛也孟子曰矢人豈不仁於函人哉矢人惟恐不傷人函人惟恐傷人廬讀為繡謂矛戟柄竹櫜秘或曰摩鐳之器胡今匈奴】粵之無鎛也非無鎛也夫人而能為鎛也燕之無函也非無函也夫人而能為函也秦之無廬也非無廬也夫人而能為廬也胡之無弓車也非無弓車也夫人而能為弓車也【言其大夫人人皆能作是器不須國工粵地塗泥多草蕨而山出金錫鑄冶之業田器尤多燕近強胡習作甲冑秦多細木善作矜秘匈奴無屋宅田獵畜牧逐水草而居皆知為弓車】知者創物【謂始闢端造器物若世本作者是也】巧者述之守之世謂之工【父子世以相教】百工之事皆聖人之作也【事無非聖人所為也】爍金以為刃凝土以為器作車以行陸作舟以行水此皆聖人之所作也【凝堅也故書舟作周鄭司農云周當作舟】天有時地有氣材有美工有巧合此四者然後可以為良【時塞溫也氣剛柔也良善也】材美工巧然而不良則不時不得地氣也【不時不得天時】橘踰淮而北為枳鸛不踰濟貉踰汶則死此地氣然也【鸛鸛鳥也春秋昭二十五年有鸛來巢傳曰書所無也鄭司農云不踰齊無妨於中國有之貉或為獫謂善緣木之獫也汶水在魯北】鄭之刀宋之斤魯之削吳粵之劒遷乎其地而弗能為良地氣然也【去此地而作之則不能使良也】燕之角荆之幹胡之筈吳粵之金錫此材之美者也【荆荆州也幹柘也可以為弓弩之幹胡胡之國在楚旁筈矢幹也禹貢荆州貢柘幹枯柏及箇籊故書筈為筈杜子春云胡讀為焚咸丘之焚書或為邠胡地名也筈當為筈筈讀為稟謂箭稟】天有時以生有時以殺草木有時以生有時以死石有時以泐水有時以凝有時以澤此天時也【言百工之事當審其時也鄭司農云泐讀如再扞而後掛之扞扞謂石解散也夏時盛暑大熱則然 考工記】

卷六十三

<經部,禮類,通禮之屬,禮書綱目

欽定四庫全書

禮書綱目卷六十三 婺源江永撰

政事下 通禮十二

補

神農氏日中為市致天下之民聚天下之貨交易而退各得其所蓋取諸噬嗑【日中為市上明而下動又借噬為市嗑為合也 繫辭傳】古者市廛而不稅【詳見財賦】匠人營國面朝後市市朝一夫【詳見制國】內宰凡建國佐后立市設其次置其叙正其肆陳其貨賄出其度量淳制祭之以陰禮【市朝者君所以建國也建國者必面朝後市王立朝而后立市陰陽相承之義次思次也叙介次也陳猶處也度丈尺也量豆區之屬鄭司農云佐后立市者始立市后立之也祭之以陰禮者市中之社先后所立杜也故書淳為敦杜子春讀敦為純純謂幅廣也制謂四長玄謂純制天子巡守禮所云制幣丈八尺純四 與陰禮婦人之祭禮 天官】大宰以九職任萬民六曰商賈阜通貨賄【詳見上篇】司市掌市之治教政刑量度禁令【量豆區斗斛之屬度丈尺也】以次敘分地而經市【次謂吏所治舍思次介次也若今市亭然敘肆行列也經界也】以陳肆辨物而平市【陳猶列也辨物物異肆也肆異則市平】以政令禁物靡而均市【物靡者易售而無用禁之則市均鄭司農云靡謂侈靡也】以商賈阜貨而行布【通物曰商居賣物曰賈阜猶盛也鄭司農云布謂泉也】以量度成賈而徵價【徵召也價買也物有定賈則買者來也】以質劑結信而止訟【質劑謂兩書一札而別之也】以賈民禁偽而除詐【賈民胥師賈師之屬必以賈民為之者知物之情偽與實詐】以刑罰禁醵而去盜【刑罰憲徇扑】以泉府同貨而斂賒【同共也同者謂民貨不售則為斂而買之民無貨則賒貰而予之】大市日昃而市百族為主朝市朝時而市商賈為主夕市夕時而市販夫販婦為主【市雜聚之處言主者謂其多者也百族必容來去商賈家於市城販夫販婦朝資夕賣因其便而分為三時之市所以了物極衆鄭司農云百族百姓也】凡市入則胥執鞭度守門市之羣吏平肆展成奠賈上旌於思次以令市市師涖焉而聽大治大訟胥師賈師涖於介次而聽小治小訟【凡市入謂三時之市市者入也胥守門察偽詐也必執鞭度以威正人衆也度謂受也因刻丈尺耳羣吏胥師以下也平肆平賣物者之行列使之正也展之言整也成平也會平成市物者也奠讀為定整飭會者使定物價防誑豫也上旌者以為衆望也見旌則知當市也思次若今市亭也市師司市也介次市亭之屬別小者也鄭司農云思辭也次市中侯樓也玄謂思當為司聲之誤也】凡萬民之期於市者辟布者量度者刑戮者各於其地之敘【期謂欲賣買期決於市也量度者若今處斗斛及丈尺也故書辟為辭鄭司農云辭布辭訟泉物者也玄謂辟布市之羣吏考實諸泉入及有遺忘】凡得

貨賄六畜者亦如之三日而舉之【得遺物者亦使置其地貨於貨之肆馬於馬之肆則主求之易也三日而無識認者舉之沒入官】凡治市之貨賄六畜珍異亡者使有利者使阜害者使亡靡者使微【利利於民謂物實厚者害害於民謂物行苦者使有使阜起其賈以徵之也使亡使微抑其賈以卻之也侈靡細好使富民好奢微之而已鄭司農云亡者使有無此物則開利其道使之有】凡通貨賄以璽節出入之【璽節印章如今斗檢封矣使人執之以通商】國凶荒札喪則市無征而作布【有災害物貴市不稅為民之乏困也金銅無凶年因物貴大鑄泉以饒民】凡市偽飾之禁在民者十有二在商者十有二在賈者十有二在工者十有二【玄謂王制曰用器不中度不粥於市兵車不中度不粥於市布帛精麤不中數幅廣狹不中量不粥於市姦色亂正色不粥於市五穀不時果實未熟不粥於市木不中伐不粥於市禽獸魚鼈不中殺不粥於市亦其類也】市刑小刑憲罰中刑徇罰大刑扑罰其附於刑者歸於士【徇舉以示其地之衆也朴撻也鄭司農云憲罰播其肆也】國君過市則刑人赦夫人過市罰一幕世子過市罰一帑命夫過市罰一盖命婦過市罰一帷【謂諸侯及夫人世子過其國之市大夫內子過其都之市也市者人所交利而行刑之處君子無故不遊觀焉若遊觀則施惠以為說也國君則赦其刑人夫人世子命夫命婦則使之出罰異尊卑也此王國之市而說國君以下過市者諸侯之於其國與王同以其足以互明之】凡會同師役市司帥賈師而從治其市政掌其賣儋之事【市司司市也儋買也會同師役必有市者大衆所在來物以備之】質人掌成市之貨賄人民牛馬兵器珍異【成平也會者平物賈而來主成其平也人民奴婢也珍異四時食物】凡賣儋者質劑焉大市以質小市以劑【玄謂質劑者為之券藏之也大市人民牛馬之屬用長券小市兵器珍器之物用短券】掌稽市之書契同其度量壹其淳制巡而考之犯禁者舉而罰之【稽猶考也治也書契取予市物之券也其券之象書兩扎刻其側杜子春云淳當為純純謂幅廣制謂匹長也皆當中度量】凡治質劑者國中一旬郊二旬野三旬都三月邦國朞期內聽期外不聽【謂齎券契者來訟也以期內來則治之後期則不治所以絕民之好訟且息文書也郊遠郊也野甸稍也都小都大都】廛人掌斂市歛布總布質布罰布而入於廛府【布泉也鄭司農云歛布列肆之稅布杜子春云總當為儻謂無肆立持者之稅玄謂總讀如租之布謂守斗斛銓衡者之稅也質布者質人之所罰犯質劑者之泉也罰布者犯市令者之泉也廛布者貨賄諸物邸舍之稅】凡屠者斂其皮角筋骨入於玉府【以當稅給作器物也】凡珍異之有滯者斂而入於膳府【珍異四時食物也不售而在廛久則將瘦臞腐敗為買之入膳夫之府所以紓民事而官不失實】胥師各掌其次之政令而平其貨賄憲刑禁焉【憲表縣之】察其詐偽飾行儋慝者而誅罰之【鄭司農云儋賣也慝惡也謂行且賣姦偽惡物者玄謂飾行儋慝謂使人行賣惡物于市巧飾之令欺誑置者】聽其小治小訟而斷之賈師各掌其次之貨賄之治辨其物而均平之展其成而奠其賈然後令市凡天患禁貴儋者使有恒賈【恒常也謂若□米穀棺木而睹久雨疫病者貴賣之因天災害阨民使之重困】四時之珍異亦如之【薦宗廟之物】凡國之賣儋各帥其屬而嗣掌其月【儋買也故書賣為買鄭司農云謂官有所斥賣賈師帥其屬而更相代直月為官賣之均勞逸】凡師役會同亦如之司翫掌憲市之禁令禁其鬪蹶者與其蹶亂者出入相陵犯者以屬遊飲食於市者若不可禁則搏而戮之【蹶蹶也鄭司農云屬遊飲食羣飲食者】司稽掌巡市而察其犯禁者與其不物者而搏之【不物衣冠視瞻不與衆同及其操物不如品式】掌執市之盜賊以徇且刑之胥各掌其所治之政執鞭度而巡其前掌其坐作出入之禁令襲其不正者【杜子春云當為襲謂掩捕其不正者】凡有罪者撻戮而罰之【罰

之使出布】肆長各掌其肆之政令陳其貨賄名相近者相遠也實相近者相邇也而平正之【邇亦近也俱是物也使惡者遠善善自相近鄭司農云謂若珠玉之屬俱名為珠俱名為玉而賈或百萬或數萬恐農夫愚民見欺故別異令相遠使賈人不得雜亂以欺人】斂其總布掌其戒禁【杜子春云總當為□】泉府掌以市之征布斂市之不售貨之滯於民用者以其賈買之物揭而書之以待待不時而買者買者各從其抵都鄙從其主國人郊人從其有司然後予之【鄭司農云不時買者謂急求者也抵故買也主者別治大夫也然後予之為封符信然後予之玄謂抵實抵字抵本也本謂所屬吏主有司是也】凡賒者祭祀無過旬日喪紀無過三月【鄭司農云賒賁也以祭祀喪紀故從官賒買物】凡民之貸者與其有司辨而授之以國服為之息【有司所屬吏也與之別其貸民之物定其賈以與之鄭司農云貸者謂從官借本賈也故有息使民弗利以其所賈之國所出為息也假令其國出絲絮則以絲絮償其國出絺葛則以絺葛償玄謂以國服為之息以其於國服事之稅為息也於國事受園廩之田而貸萬泉者則其出息五百王莽時民貸以治產業者但計贏所得受息無過歲什一】凡國之財用取具焉歲終則會其出入而納其餘【會計也納入也入餘於職幣並地官】遺人凡國野之道三十里有市市有侯館侯館有積【詳下道路章】有圭璧金璋不粥於市命服命車不粥於市犧牲不粥於市戎器不粥於市【尊物非民所宜有戎器軍器也粥賣也】用器不中度不粥於市兵車不中度不粥於市布帛精麤不中數幅廣狹不中量不粥於市姦色亂正色不粥於市【凡以其不可用也用器弓矢耒耜飲食器也度丈尺也數升縷多少】錦文珠玉成器不粥於市衣服飲食不粥於市【不示民以奢與貪也成猶善也】五穀不時果實未孰不粥於市【物未成不利人】木不中伐不粥於市【伐之非時不中用周禮仲冬斬陽木仲夏斬陰木】禽獸魚鼈不中殺不粥於市【殺之非時不中用月令季冬始漁周禮春獻鼈蜃王制】

右布政 衛莊公改舊制易朝市高子宰問於孔子曰周禮前朝而後市今衛君更之如何孔子曰朝市於西方失之矣【家語】孟子曰市廛而不征法而不廛則天下之商皆悅而願藏於其市矣【廛市宅也張子曰或賦其市地之廛而不征其貨或治之以市官之法而不賦其廛蓋逐末者多則廛以抑之少則不必廛也 孟子】

古者關譏而不征【詳見財賦】關執禁以譏禁異服識異言【關竟上門譏呵察王制】司門掌授管鍵以啟閉國門【鄭司農云鍵讀為蹇管謂籥也鍵謂牡】幾出入不物者正其貨賄凡財物犯禁者舉之【不物衣服視瞻不與衆同及所操物不如品式者正讀為征征稅也犯禁謂商所不資者舉之沒入官】以其財養死政之老與其孤【財所謂門關之委積也死政之老死國事者之父母也孤其子】司關掌國貨之節以聯門市【貨節謂商本所發司市之璽節也自外來者則案其節而書其貨之多少通之國門國門通之司市自內出者司市為之璽節通之國門國門通之關門參相聯以檢猾商】司貨賄之出入者掌其治禁與其征廛【征廛者貨賄之稅與所止邸舍也關下亦邸有客舍其出布如市之廛】凡貨不出於關者與其貨罰其人【不出於關謂從私道出辟稅者則沒其貨而撻其人】凡所達貨賄者則以節傳出之【商或取貨於民間無璽節者至關關為之璽節及傳出之其有璽節亦為之傳傳如今移過所文書】國凶札則無關門之征猶幾【無租稅猶幾猶苛察不得令奸人出入】有外內之送令則以節傳出內之【有送令謂奉貢獻及文書以常事往來環人之職所送

迎通賓客來至關則為之節與傳以通之】 掌節門關用符節【詳名器下並地官】

仲夏門閭毋閉關市無索

仲秋易關市來商旅納貨賄以便民事四方來集遠鄉皆至則財不匱上無乏用百事乃遂

孟冬戒門閭脩鍵閉慎管籥謹關梁【並詳月令】

右門關之政 文王之治岐也關市譏而不征【孟子】 仲尼曰臧文仲不仁者三廢六關不仁也【塞關陽關】

【之屬凡六關所以禁絕末遊而廢之 按家語作置六關王注云六關關名魯本無此關文仲置之以稅行者故為不仁傳曰廢六關非也二說未知孰是 文二年左氏傳】 孟子曰關譏而不征則天下之旅皆悅而願出於其路矣又曰古之為關也將以禦暴【譏察非常】 今之為關也將以為暴【征税出入 范氏曰古之耕者什一後世或收大半之稅此以賦斂為暴也文王之囿與民同之齊宣王之囿為阱國中此以園囿為暴也後世為暴不止於關若使孟子用於諸侯必行文王之政凡此之類皆不終日而改也】

剡木為舟剡木為楫舟楫之利以濟不通致遠以利天下蓋取諸渙【木在水上也致遠以利天下疑衍 繫辭傳】 天子造舟【比船為橋】 諸侯維舟【維連四船】 大夫方舟【併兩船】 士特舟【單船】 庶人乘泚【併木以渡爾雅】 匠人營國經涂九軌環涂七軌野涂五軌環涂以為諸侯經涂野涂以為都經涂【詳見制國】 司險掌九州之圖以周知其山林川澤之阻而達其道路設國之五溝五涂而樹之林以為阻固皆有守禁而達其道路【詳軍禮武備】 合方氏掌達天下之道路【津梁相湊不得陷絕 夏官】 野廬氏掌達國道路至於四畿

【達謂巡行通之使不陷絕也去王城五百里為畿】 比國郊及野之道路宿息井樹【比猶較也宿息廬之屬賓客所宿及晝止者也井共飲食樹為藩蔽】 若有賓客則令守涂地之人聚 之有相翔者誅之【守涂地之人道所出廬宿旁民也相翔猶昌翔觀伺者也鄭司農云聚 聚擊 以宿衛之也有姦人相翔於賓客之側則誅之不得令寇盜賓客】 凡道路之舟車輶互者序而行之【舟車輶互謂於迫隘處也車有輶輶坻閣舟有砥柱之屬其過之者使以次叙之】 凡有節者及有爵者至則為之辟【辟辟行人亦使守涂地者】 禁野之橫行徑踰者【皆為防姦也橫行妄繇田中徑踰射邪趣疾越隄渠也】 凡國之大事比脩除道路者

【比校治道者名若今次金叙大功】 掌凡道禁【禁謂若今絕蒙布巾持兵杖之屬秋官】 掌節道路用旌節凡通達於天下者必有節以傳輔之無節者有幾則不達【詳名器下】 候人各掌其方之道治與其禁令以設候人【道治治道也國語曰候不在竟譏不居其方也禁令猶姦寇也以設候人者選士卒以為之詩云彼候人兮何戈與祲】 若有方治則帥而致於朝及歸送之於竟【方治其方來治國事者也春秋傳曰晉欒盈過周王使候人出諸輶輶是其送之 夏官】 遺人野鄙之委積以待羈旅【羈旅過行寄止者】 凡國野之十里有廬廬有飲食三十里有宿宿有路室路室有委五十里有市市有候館候館有積【廬若今野候徒有房也宿可止宿若今亭有室矣候館樓可以觀望者也一市之間有三廬一宿 地官】

委人以甸聚待羈旅【聚凡畜聚之物也 同上】 季春命司空曰時雨將降下水上騰循行國邑周視原野脩利隄防道達溝瀆開通道路毋有障塞【詳月令】 柔遠人則四方歸之【柔遠人則天下之旅皆悅而願出於其塗故四方歸】 送往迎來嘉善而矜不能所以柔遠人也

【往則為之授節以送之來則豐其委積以迎之 中庸】

右道路之政 單襄公假道于陳以聘于楚火朝覲矣道弗可行也【火心星也覲見也草穢塞路謂弗朝見謂夏正十月晨見於辰】候不在疆【候候人也掌送迎賓客也疆境也】司空不視塗【司空鄉官掌道路也】澤不陂【陂障也古不寶澤故障之】川不梁【流曰川梁渠梁古不防川故梁之】野有庾積【唐尚書云十六斛曰庾昭謂此庾露積穀也詩云曾孫之庾如坻如京是也】場功未畢【治場未畢也詩云九月築場圃】道無列樹【古者列樹以表道且為城守之用】墾田若藝【發田曰墾藝猶蒔也言其稀少猶若藝物】膳宰不致餼【膳宰膳夫也掌賓客之牢禮生曰餼】司里不授館【司里里宰也掌授客館】國無寄寓【寓亦寄也無寄寓者不為廬舍可以寄羈旅之客】縣無施舍【四甸為縣縣方六十里施舍者所以施舍賓客負任之處】單子歸告王曰陳侯不有大咎國必亡夫辰角見而雨畢【辰角大辰蒼龍之角角星名也見者朝見東方建戌之初寒露節也雨畢者殺氣日盛雨氣盡也】天根見而水涸【天根亢氏之間也涸竭也謂寒露雨畢之後五日天根朝見水潦盡竭也月令仲秋水始涸天根見乃盡竭也】本見而草木節解【本氏也謂寒露之後十日陽氣盡草木之枝節皆理解之】駟見而隕霜【駟天馬房星也隕落也謂建戌之中霜始降】火見而清風戒寒【謂霜降之後清風先至所以戒人為寒備也】故先王之教曰雨畢而除道水涸而成梁【教謂月令之屬也九月雨畢十月水涸】草木節解而備藏【備收藏也月令季秋農事畢收】隕霜而冬裘具【孟冬則天子始裘故九月可以具之】清風至而脩城郭宮室【謂火見之後建亥之初也】故夏令曰九月除道十月成梁【夏令夏后氏之令周所因也除道所以便行旅成梁所以便民使不涉也】其時倅曰收而場功待而畚揭【時倅時所以倅告其民也收而場功使人脩困倉也待具也畚器名土籠也揭昇土之器具汝畚揭將以築作也】營室之中土功其始【定謂之營室謂建亥小雪之中定星昏正於午土功可以始也詩定之方中作於楚宮】火之初見期於司里【期會也致其築作之具會於司里之官】此先王之所以不用財賄而廣施德於天下者也【施德謂因時警戒謹蓋藏成築功也】今陳國火朝覲矣而道路若塞野場若棄澤不陂障川無舟梁【舟梁以舟為梁也】是廢先王之教也周制有之曰列樹以表道立鄙食以守路【制法也表識也鄙四鄙十里有廬廬有飲食】國有郊牧【國外曰郊牧放牧之地】疆有寓望【疆境也境界之上有寄寓之舍候望之人】藪有圃草【澤無水曰藪圃大也必有茂大之草以備財用】囿有林池【囿苑也林積木也池積水也】所以禦災也【禦備也災飢兵也】今陳國道路不可知【上下文互見農政章】是棄先王之法制者也【國語周語】子產聽鄭國之政以其乘輿濟人於湊洧【子產鄭大夫公孫僑也湊洧二水名也子產見人有徒涉此水者以其所乘之車載而渡之】孟子曰惠而不知為政【惠謂私恩小利政則有公平正大之體綱紀法度之施焉】歲十一月徒杠成十二月輿梁成民未病涉也【杠方橋也徒杠可通徒行者梁亦橋也輿梁可通車輿者周十一月夏九月也周十二月夏十月也夏令曰十月成梁蓋農功已畢可用民力又時將寒洧水有橋梁則民不患於徒涉亦王政之一事也】君子平其政行辟人可也焉得人人而濟之【辟辟除也如周禮閹人為之辟之辟言能平其政則出行之際辟除行人使之辟已亦不為過況國中之水當涉者衆豈能悉以乘輿濟之哉】故為政者每人而悅之日亦不足矣【言每人皆欲致私恩以悅其意則人多日少亦不足於用矣諸葛武侯嘗言治世以大德不以小惠得孟子之意矣 孟子】葵丘之會三命曰無忘賓旅【賓賓客也旅行旅也】

皆當有以待之不可忽忘也同上】

懷方氏掌來遠方之民致方貢致遠物而送逆之達之以節【遠方之民四夷之民也諭德延譽以來之遠物九州之外無貢法而王者達民以旌節達貢物以璽節】治其委積館舍飲食【續食其往來 夏官】中國戎夷五方之民皆有性也不可推移【地氣使之然】東方曰夷被髮文身有不火食者矣南方曰蠻雕題交趾有不火食者矣【雕文謂刻其肌以丹青涅之交趾足相鄉然浴則同川卧則偃不火食地氣煖不為病】西方曰戎被髮衣皮有不粒食者矣北方曰狄衣羽毛穴居有不粒食者矣【不粒食地氣寒少五穀】中國夷蠻戎狄皆有安居和味宜服利用備器【其事雖異各自足】五方之民言語不通嗜欲不同達其志通其欲東方曰寄南方曰象西方曰狄鞮北方曰譯【皆俗間之名依其事類耳鞮之言知也今冀部有言狄鞮者 王制】

右懷遠之政 三旬苗民逆命班師振旅帝乃誕敷文德舞干羽于兩階七旬有苗格【班還振整也謂振旅以歸也誕大也文德文命德教也干楯羽翳也皆舞者所執也兩階賓主之階也七旬七十日也格至也大禹謨】

大司徒以荒政十有二聚萬民一曰散利二曰薄征三曰緩刑四曰弛力五曰舍禁六曰去幾七曰眚禮八曰殺哀九曰蕃樂十曰多昏十有一曰索鬼神十有二曰除盜賊【荒凶年也鄭司農云救飢之政十有二品散利貸種食也弛力息繇役也去幾關市不幾也眚禮掌客職所謂凶荒殺禮者也多昏不備禮而娶昏者多也索鬼神求廢祀而脩之雲漢之詩所謂靡神不舉靡愛斯牲者也除盜賊急其刑以除之饑饉則盜賊多不可不除也杜子春讀蕃樂為藩樂謂閉藏樂器而不作玄謂去幾去其稅耳舍禁若公無禁利眚禮謂殺吉禮也殺哀謂省凶禮】大荒大札則令邦國移民通財舍禁弛力薄征緩刑【大荒大凶年也大札大疫病也移民辟災就賤其有守不可移者則輸之穀春秋定五年夏歸粟於蔡是也】

遺人縣都之委積以待凶荒 均人凶札則無力政無財賦【無力政恤其勞也無財賦恤其乏困也財賦九賦也】不收地守地職不均地政【不收山澤及地稅亦不平計地稅也非凶札之歲當收稅乃均之耳】司救凡歲時有天患民病則以節巡國中及郊野而以王命施惠【天患謂災害也節旌節也施惠調恤之】司市國凶荒札喪則市無征而作布 賈師凡天患

禁貴儻者使有恒賈【並詳市政章】司關國凶札則無門關之征猶幾【詳門關章】

廩人若食不能人二鬴則令邦移民就穀詔王殺邦用

倉人若穀不足則止餘法用有餘則藏之以待凶而頒之【並詳財賦並地官】士師若邦凶荒則以荒辯之灋治之【鄭司農云辯讀為風別之別救荒之政十有二而士師別受其教條是為荒別之法玄謂辯當為貶聲之誤也遭飢荒則刑罰國事有所貶損作權時法也朝士職曰若邦凶荒札喪寇戎之故則令邦國都家縣鄙慮刑貶】令移民通財糾守緩刑【移民就賤救困也通財補不足也糾守衛盜賊也緩刑紓民心也 秋官】朝士若邦凶荒札喪寇戎之故則令邦國都家縣鄙慮刑貶【故書慮為憲貶為窆杜子春云窆當為禁憲為幡書以明之玄謂慮謀也貶猶減也謂當圖謀緩刑且減國用為民困也所貶視時為多少之法 同上】古者有災者謂之厲君一時素服使有司弔死問疾憂以巫鑿匍匐以捄之湯粥以方之善者先

乎矜寡孤獨及疾不能相養死無以葬埋者葬埋之

右凶札之政【凶札之禮詳災變禮因凶札祈禳詳因祭】

莊公二十八年冬大無麥禾臧孫辰告糴於齊【春秋】魯饑臧文仲言於嚴公曰夫為四隣之援【援所攀援以為助也】結諸侯之信重之以婚姻申之以盟誓【申重也】固國之艱急是為【艱難也是為為難急也】鑄名器【名器鍾鼎也】藏寶財【寶財玉帛也】固民之殄病是待【殄絕也病飢也】今國病矣君盍以名器請糴於齊【盍何不也市穀曰糴】公曰誰使對曰國有饑饉卿出告糴古之制也【告請也】辰也備卿辰諸如齊文仲以鬯圭與玉磬如齊告糴【鬯圭裸鬯之圭長尺二寸有瓚以祀廟玉磬鳴璫也】曰天災流行戾於敝邑饑饉荐降民羸幾卒【戾至也荐重也降下也羸病也幾近也卒盡也】大懼殄周公太公之命祀【賈唐二君云周公為太宰太公為太師皆掌命諸侯之國所當祀也或云命祀謂命祀二公也昭謂傳曰衛成公祀夏后相甯武子曰不可以間成王周公之命祀如此賈唐得之】職貢業事之不共而獲戾【戾罪也】不腆先君之敝器【腆厚也】敢告滯積以紓執事【滯久也紓緩也執事齊有司也穀久積則將朽敗執事所憂也請之所以緩執事】以救敝邑使能共職豈唯寡君與二三臣實受君賜其周公太公及百辟神祇實永饗而賴之【辟君也賴蒙也天曰神地曰祇百辟謂百君卿士有益於民者】齊人歸其玉而予之糴【魯語】國無三年之畜曰國非其國也一年不升告糴諸侯告請也不正故舉臧孫辰以為私行也【為內諱故不稱使使若私行】國無九年之畜曰不足無六年之畜曰急無三年之畜曰國非其國也諸侯無粟諸侯相歸粟正也臧孫辰告糴于齊告然後與之言內之無外交也古者稅什一豐年補敗【敗謂凶年】不外求而上下皆足也雖累凶年民弗病也一年不艾而百姓饑君子非之【穀梁傳】僖公二十一年夏大旱公欲焚巫尪【巫尪女巫也主祈禱請雨者或以為尪非巫也瘠病之人其面上向俗謂天哀其病恐雨入其鼻故為之旱是以公欲焚之】臧文仲曰非旱備也脩城郭貶食省用務穡勸分【穡儉也勸分有無相濟】此其務也巫尪何為天欲殺之則如勿生若能為旱焚之滋甚公從之是歲也飢而不害【不傷害民左氏傳】

大司徒以保息六養萬民三曰賑窮四曰恤貧五曰寬疾【詳見上篇】

朝士掌建邦外朝之法右肺石達窮民焉【詳朝廷禮】大司寇以肺石達窮民【肺石赤石也窮民天民之窮而無告者】凡遠近惇獨老幼之欲有復於上而其長弗達者立於肺石三日士聽其辭以告於王而罪其長【無兄弟曰惇無子孫曰獨復猶報也上謂王與六卿也報之者若上書詣公府言事矣長謂諸侯若鄉遂大夫秋官】大僕建路鼓於大寢之門外而掌其政以待達窮者與遽令聞鼓聲則速逆僕與御庶子【詳朝廷禮】少而無父者謂之孤老而無子者謂之獨老而無妻者謂之矜老而無夫者謂之寡此四者天民之窮而無告者也皆有常餼【餼廩也】瘠聾跛躄斷者侏儒百工各以其器食之【斷謂支節絕也侏儒短人也器能也王制】鄉師以歲時巡國及野而調萬民之糶阨以王命施惠【歲時者隨其事之時不必四時也糶阨飢乏也鄭司農云調讀為周急之周】遺人鄉里之委積以恤民之糶阨門關之委積以養老孤【鄉里鄉所居也糶阨猶困乏也門關以養老孤人所出入易以取餼廩也】旅師掌聚野之勑粟屋粟間粟【註見財賦】而用之以質劑致民平頒其興積施其惠散其利而均其政令【而讀為若聲之誤也若用之謂恤民之糶阨委積於野如道人於鄉里】

也以質劑致民案入稅者名會而貸之興積所興之積謂三者之粟也平頒之不得偏頗有多少縣官徵聚物曰興今云軍興是也是粟縣師徵之旅師斂之而用之以調衣食曰惠以作事業曰利均其政令者皆以國服為之息】凡用粟春頒而秋斂之【困時施之饒時收之】司稼掌均萬民之食而調其急而平其興【均謂度其多少調廩其糴阨興所徵賦並地官】季春天子布德行惠命有司發倉廩賜貧窮振乏絕【詳月令】

右恤窮之政 老而無妻曰鰥老而無夫曰寡老而無子曰獨幼而無父曰孤此四者天下之窮民而無告者也文王發政施仁必先斯四者詩云哿矣富人哀此鰥獨【孟子】文公曰柰夫八疾何【八疾籛篠至僂昏】胥臣曰官師之所材也【師長也材古裁字】戚施直縛【戚施倭人直主擊縛縛鍾也】籛篠蒙璆【籛篠偃人蒙戴也璆玉磬也不能俛故使之戴磬】侏儒扶盧【侏儒短者扶緣也盧戈戟之秘緣之以為戲】矇瞍修聲【有眸子而無見曰矇無眸子曰瞍無目於音聲審故使修之】聾聵司火【耳不別五聲之和曰聾生而聾曰聵耳無聞於視則審故使主火】僂昏【僂無知也昏闇亂也】嚚瘖【口不道忠信之言為嚚瘖不能言者】僬僂【長三尺】官師所不材也【所不能材用也】以實裔土【裔荒裔也國語晉語】齊師將興陳成子屬孤子三日朝【屬會死事者之子使朝三日以禮之哀二十七年左氏傳】晏子曰春省耕而補不足秋省斂而助不給景公說大戒於國出舍於郊於是始興發補不足【戒告命也出舍自責以省民也興發發倉廩也孟子】

醫師掌醫之政令聚毒藥以共醫事【毒藥藥之辛苦者藥之物恒多毒孟子曰若藥不瞑眩厥疾不瘳】凡邦之有疾病者疢瘍者造焉則使醫分而治之【疢頭亦謂禿也身傷曰分之者醫各有能】歲終則稽其醫事以制其食十全為上十失一次之十失二次之十失三次之十失四為下【食祿也全猶愈也以失四為下者五則半矣或不治自愈】疾醫掌養萬民之疾病四時皆有癘疾春時有疔首疾夏時有痒疥疾秋時有瘧寒疾冬時有上氣疾【癘疾氣不和之疾病瘧酸削也首疾頭痛也欬也上氣逆喘也五行傳曰六癘作見】以五味五穀五藥養其病【養猶治也病由氣勝負而生攻其贏養其不足者五味醯酒醢蜜薑鹽之屬五穀麻黍稷麥豆五藥草木蟲石穀也其治合之齊則存乎神農子儀之術云】以五氣五聲五色眡其死生【三者劇易之徵見於外者五氣五藏所出氣也肺氣熱心氣次之肝氣涼脾氣溫腎氣寒五聲言語宮商角徵羽也五色面貌青赤白黑黃也察其盈虛休王吉凶可知審用此者莫若扁鵲倉公】兩之以九竅之變參之以九藏之動【兩參之者以觀其死生之驗竅之變謂開閉非常陽竅七陰竅二藏之動謂脉至與不至正藏五藏又有胃膀胱大腸小腸脉之大候要在陽明寸口能專是者其唯秦和乎岐伯榆□則兼彼數術者】凡民之有疾病者分而治之死終則各書其所以而入於醫師【少者曰死老者曰終所以謂治之不愈之狀也醫師得以制其祿且為後治之戒】瘍醫掌腫瘍潰瘍金瘍折瘍之祝藥劑殺之齊【腫癰而上生創者潰瘍癰而含膿血者金瘍刀創也折瘍踣跌者祝當為注讀如注病之注聲之誤也注謂附著藥劑刮去膿血殺謂以藥食其惡肉】凡療瘍以五毒攻之【止病曰療攻治也五毒五藥之有毒者今醫方有五毒之藥作之合黃堊置石膽丹砂雄黃礬石慈石其中燒之三日夜其煙上著以雞羽掃取之以注創惡肉破骨則盡出】以五氣養之以五藥療之以五味節之【既刮殺而攻盡其宿肉乃養之也五氣當為五穀節節成其藥之力】凡藥以酸養骨以辛養筋以鹹養脉以苦養氣以甘養肉以滑養竅【以類相養也酸木味木根立地

中似骨辛金味金之纏合異物似筋鹹水味水之流行地中似脉苦火味火出入無形似氣甘土味土含載四者似肉滑滑石也凡諸滑物通利往來似竅】凡有瘍者受其藥焉【並天官】 孟夏聚畜百藥【詳月令】

右醫藥之政

蜡氏掌除骹【曲禮四足死者曰漬故書骹作脊鄭司農云脊讀為漬謂死人骨也月令曰掩骼埋胔骨之尚有肉者也及禽獸之骨皆是】若有死於道路者則令埋而置楬焉書其日月焉縣其衣服任器於有地之官以待其人【有地之官主此地之吏也其人其家人也鄭司農云楬欲令其識取之今時楬槨是也有地之官有郡界之吏今時鄉亭是也】掌凡國之骹禁【禁謂孟春掩骼埋胔之屬 秋官】 孟春掩骼埋胔【詳月令】

右恤死之政

墓地不請【王制】 大司徒以本俗六安萬民二曰族墳墓五族為黨使之相葬【地官】 墓大夫掌凡邦墓之地域為之圖令國民族葬而掌其禁令正其位掌其度數使皆有私地域凡爭墓地者聽其獄訟帥其屬而巡墓厲居其中之室以守之【春官 注並見士喪禮下】 孟冬飭喪紀辨衣裳審棺槨之厚薄塋丘壟之大小高卑厚薄之度貴賤之等級【詳月令】

右坟墓之政 管仲曰聖王治天下定民之居成民之事陵為之終【以為葬也齊語】 孔子初仕為中都宰制為養生送死之節為四寸之棺五寸之槨因丘陵為墳不封不樹【家語】

夏小正九月內火主夫出火【大戴禮】 司燿掌行火之政令四時變國火以救時疾【行猶用也變猶易也鄭司農云以鄒子曰春取榆柳之火夏取棗杏之火季夏取桑柘之火秋取柞櫟之火冬取槐檀之火】季春出火民咸從之季秋內火民亦如之【火所以用陶冶民隨國而為之鄭人鑄刑書火星未出而出火後有災鄭司農云以三月本時昏心星見於辰上使民出火九月本黃昏心星伏在戌上使民內火故春秋傳曰以出內火】時則施火令【焚萊之時】凡國失心野焚萊則有刑罰焉【野焚萊民擅放火

夏官】 司烜氏中春以木鐸修火禁於國中【為季春將出火也火禁謂用火之處及備風燥 秋官】 宮正春秋以木鐸修火禁【火星以春出以秋入因天時而以戒 天官】

右火政 火正曰祝融【祝融明貌其祀犁焉】 顓頊氏有子曰犁為祝融【犁為火正 昭二十九年左氏傳】 宋災晉侯問於士弱曰吾聞之宋災於是乎知有天道何故【問宋何故自知天道將災】對曰古之火正或食於心或食於昧以出內火是故昧為鶉火心為大火【謂火正之官配食於火星建辰之月鶉火星昏在南方則令民放火建戌之月大火星伏在日下夜不得見則令民內火禁放火】陶唐氏之火正閼伯居商丘【陶唐堯有天下號閼伯高辛氏之子傳曰遷閼伯於商丘主辰辰大火也今為宋星然則商丘在宋地】祀大火而火紀時焉【謂出內火時】相土因之故商主大火【相土契孫商之祖也始代閼伯之後居商丘祀大火】商人閱其禍敗之釁必始於火是以日知其有天道也【閱猶數也商人數所更

歷恒多火災宋是殷商之後故知天道之災必火 襄九:left氏傳】三月鄭人鑄刑書士文伯曰火見鄭其火乎【火心星周五月昏見】火未出而作火以鑄刑器【刑器鼎也】藏爭辟焉火如象之不火何為【象類也同氣相求火未出而用火相感而致災】六月丙戌鄭災【終士文伯之言昭六年左氏傳】

凌人掌冰正歲十有二月令斬冰三其凌【正歲季冬火星中大寒冰方盛之時春秋傳曰火星中而寒暑退凌冰室也三之者為消釋度也故書正為政鄭司農云掌冰政主藏冰之政也杜子春讀掌冰為主冰也政當為正謂夏正三其凌三倍其冰】春始治鑑【鑑如甄大口以盛冰置食物以禦溫氣春始治之為二月將獻羔而啓冰】凡外內饗之膳羞鑑焉凡酒漿之酒醴亦如之【酒醴見溫氣亦失味酒漿酒人漿人也】祭祀共冰鑑賓客共冰【不以鑑往嫌使停膳羞】大喪共夷盤冰【夷之言尸也實冰於夷盤中置尸牀之下所以寒尸尸之槃曰夷盤牀曰夷牀衾曰夷衾移尸曰夷於堂皆依尸而為言者也漢禮器制度大槃廣八尺長丈二尺深三尺漆赤中】夏頒冰掌事【暑氣盛王以冰頒賜則主為之春秋傳曰古者日在北陸而藏冰西陸朝覲而出之】秋刷【刷清也鄭司農云刷除冰室當更納新冰玄謂秋涼冰不用可以清除其室天官】季冬冰方盛水澤腹堅命取冰冰以入仲春天子乃鮮羔開冰【並詳月令】

右冰政 二之日鑿冰冲冲三之日納于凌陰四之日其蚤獻羔祭韭【鑿冰謂取冰于山也冲冲鑿冰之意周禮正歲十二月令斬冰是也納藏也藏冰所以避暑也凌陰冰室也豳土寒多正月風未解凍故冰猶可藏也蚤蚤朝也韭菜名獻羔祭韭而後啓之月令仲春獻羔開冰先薦寢廟是也蘇氏曰古者藏冰發冰以節陽氣之盛夫陽氣之在天地譬如火之著于物也故常有以解之十二月陽氣蘊伏涸而未發其盛在下則納冰於地中至於二月四陽作蟄蟲起陽始用事則亦始啟冰而廟薦之至於四月陽氣畢達陰氣將絕則冰于是大發食肉之祿老病喪浴冰無不及是以冬無愆陽夏無伏陰春無淒風秋無苦雨雷出不震無災霜雹癘疾不降民不夭札也胡氏曰藏冰開冰亦聖人輔相調變之一事耳不專恃此以為治也豳風七月】昭公四年大雨雹季武子問於申豐曰雹可禦乎【禦止也申豐魯大夫】對曰聖人在上無雹雖有不為災古者日在北陸而藏冰【陸道也謂夏十二月日在虛危冰堅而藏之】西陸朝覲而出之【謂夏三月日在昴畢蟄蟲出而用冰春分之中奎星朝見東方】其藏冰也深山窮谷固陰沍寒於是乎取之【沍閉也必取積陰之冰所以道達其氣使不為災】其出之也朝之祿位賓食喪祭於是乎用之【言不獨共公】其藏之也黑牡秬黍以享司寒【黑牡黑牲也秬黑黍也司寒玄冥北方之神故物皆用黑有事於冰故祭其神】其出之也桃弧棘矢以除其災【桃弧棘箭所以禳除凶邪將御至尊故】其出入也時食肉之祿冰皆與焉【食肉之祿謂在朝廷治其職事就官食者】大夫命婦喪浴用冰【命婦大夫妻】祭寒而藏之【享司寒】獻羔而啟之【謂二月春分獻羔祭韭始開冰室】公始用之【公先用優尊】火出而畢賦【火星昏見東方謂三月四月中】自命夫命婦至於老疾無不受冰【老致仕在家者】山人取之縣人傳之【山人虞官縣人遂屬】輿人納之隸人藏之【輿隸皆賤官】夫冰以風壯【冰因風寒而堅】而以風出【順春風而散用】其藏之也周【周密也】其用之也徧【及老疾】則冬無愆陽【愆過也謂冬寒】夏無伏陰【伏陰謂夏寒】春無淒風【淒寒也】秋無苦雨【霖雨為人所患苦】雷出不震【震霆也】無

災霜雹癘疾不降【癘惡氣也】民不夭札【短折為夭夭死為札】今藏川池之冰棄而不用【既不藏深山窮谷之冰又火出不畢賦有餘則棄之】風不越而殺雷不發而震【越散也言陰陽失序雷風為害】雹之為災誰能禦之七月之卒章藏冰之道也【七月詩豳風卒章曰二之日鑿冰冲冲謂十二月鑿而取之三之日納於凌陰凌陰冰室也四之日其蚤獻羔祭韭謂二月春分蚤開冰室以薦宗廟左傳】

萍氏幾酒【苛察沽買過多及非時者】謹酒【使民節用酒也書酒誥曰有政有事無彝酒秋官】右酒政王若曰明大命於妹邦【商受酗酒天下化之妹土商之都邑其染惡尤甚武王以其地封康叔故作書誥教之妹土即詩所謂沫鄉篇首稱妹邦者誥命專為妹邦發也】乃穆考文王肇國在西土厥誥毖庶邦庶士越少正御事朝夕曰祀茲酒惟天降命肇我民惟元祀【穆敬也詩曰穆穆文王是也或曰文王世次為穆亦通毖戒謹也少正官之副貳也文王朝夕勅戒之曰惟祭祀則用此酒天始令民作酒者為大祭祀而已西土庶邦遠去商邑文王誥毖亦諄諄以酒為戒則商邑可知矣文王為西伯故得誥毖庶邦云】天降威我民用大亂喪德亦罔非酒惟行越小大邦用喪亦罔非酒惟辜【酒之禍人也而以為天降威者禍亂之成是亦天爾箕子言受酗酒亦曰天毒降災正此意也民之喪德君之喪邦皆由於酒喪德故言行喪邦故言辜】文王誥教小子有正有事無酒越庶國飲惟祀德將無醉【小子少子之稱以其血氣未定尤易縱酒喪德故文王專誥教之有正有官守者有事有職業者無毋同彝常也毋常於酒其飲惟于祭祀之時然亦必以德將之無至于醉也】惟曰我民迪小子惟土物愛厥心臧聰聰祖考之訓越小大德小子惟一【文王言我民亦常訓導其子孫惟土物之愛勤稼穡服田畝無外慕則心之所守者正而善日生為子孫者亦當聰聽其祖父之常訓不可以謹酒為小德小德大德小子惟一視之可也】妹土嗣爾股肱純其藝黍稷奔走事厥考厥長肇牽車牛遠服賈用孝養厥父母厥父母慶自洗腆致用酒【此武王教妹土之民也嗣續純大肇敏服事也言妹土民當嗣續汝四肢之力無有怠惰大修農功服勞田畝奔走以事其父兄或敏於貿易牽車牛遠事賈以孝養其父母父母喜慶然後可自洗腆致用酒洗以致其潔腆以致其厚也】庶士有正越庶伯君子其爾典聽朕教爾大克羞耇惟君爾乃飲食醉飽丕惟曰爾克永觀省作稽中德爾尚克羞饋祀爾乃自介用逸茲乃永惟王正事之臣茲亦惟天若元德永不忘在王家【此武王教妹土之臣也伯長也曰君子者賢之也典常也羞養也言其大能養老也惟君未詳丕惟曰大言也介助也用逸者用以宴樂也言爾能常常反觀內省使念慮之營為之際悉稽乎中正之德而無過不及之差則德全於身而可以交於神明矣如是則庶幾能進饋祀爾亦可自副而用宴樂也如此則信為王治事之臣如此亦惟天順元德而永不忘在王家矣按上文父母慶則可飲酒克羞耇則可飲酒羞饋祀則可飲酒本欲禁絕其飲今乃反開其端者不禁之禁也聖人之教不迫而民從者此也孝養羞耇饋祀皆因其良心之發而利導之人果能盡此三者且為成德之士矣而何憂其湎酒也哉】王曰封我西土棐徂邦君御事小子尚克用文王教不腆于酒故我至于今克受殷之命【徂往也輔佐文王往日之邦君御事小子也言文王毖酒之教其大如此】王曰封我聞惟曰在昔殷先哲王迪畏天顯小民經德秉哲自成湯咸至于帝乙成王畏相惟御事厥棐有恭不敢自暇自逸矧曰其敢崇飲【以商君臣之不暇逸者告康叔也殷先哲王湯也迪畏者畏之而見於行也畏天之明命畏小民之難保經其德而不變所以處已也秉其哲而不惑所以用人也湯之垂統如此故自湯至於帝乙賢聖之君六七作雖世代不同而皆能成就君德敬畏輔

相故當時御事之臣亦皆盡忠輔翼而有責難之恭自暇自逸猶且不敢況曰其敢尚飲乎】越在外服侯甸男衛邦伯越在內服百僚庶尹惟亞惟服宗工越百姓里居罔敢湏于酒不惟不敢亦不暇惟助成王德顯越尹人祗辟【自御事而下在外服則有侯甸男衛諸侯與其長伯在內服則有百僚庶尹惟亞惟服宗工國中百姓與夫里居者亦皆不敢沈湎于酒不惟不敢亦不暇不敢者有所畏不暇者有所勉惟欲上以助成君德而使之昭著下以助尹人祗辟而使之益不怠耳成王顧上文成王而言祗辟顧上文有恭而言呂氏曰尹人者百官諸侯之長也指上文御事而言】我聞亦惟曰在今後嗣王酣身厥命罔顯于民祗保越怨不易誕惟厥縱淫佚于非彝用燕喪威儀民罔不蠹傷心惟荒腆于酒不惟自息乃逸厥心疾很不克畏死辜在商邑越殷國滅無罹弗惟德馨香祀登聞於天誕惟民怨庶羣自酒腥聞在上故天降喪於殷罔愛於殷惟逸天非虐惟民自速辜【以商受荒腆于酒者告康叔也後嗣王受也受沈酣其身昏迷于政命令不著于民其所祗保者惟在于作怨之事不肯悛改大惟縱淫佚于非彝泰誓所謂奇技淫巧也燕安也用安逸而喪其威儀史記受為酒池肉林使男女裸而相逐其威儀之喪如此此民所以無不痛傷其心悼國之將亡也而受方且荒怠益厚于酒不思自息其逸力行無度其心疾很雖殺身而不畏也辜在商邑雖滅國而不憂也弗事上帝無馨香之德以格天大惟民怨惟群酗醒穢之德以聞于上故上天降喪於殷無有眷愛之意者亦惟受縱逸故也天豈虐殷惟殷人酒自速其辜爾曰民者猶曰先民君臣之通稱也】王曰封予不惟若茲多誥古人有言曰人無于水監當于民監今惟殷墜厥命我其可不大監撫於時【我不惟如此多言所以言湯言受如此其詳者古人謂人無于水監水能監人之妍醜而已當于民監則其得失可知今殷民自速辜既墜厥命矣我其可不以殷民之失為大監戒以撫安斯時乎】予惟曰汝劓毖殷獻臣侯甸男衛矧太史友內史友越獻臣百宗工矧惟爾事服休服采矧惟若疇圻父薄違農父若保宏父定辟矧汝剛制于酒【劓用力也汝當用力戒謹殷之賢臣與鄰國之侯甸男衛使之不湏于酒也毖殷獻臣侯甸男衛與文王毖庶邦御士同義殷之賢臣諸侯固欲知所謹矣況太史掌六典八法八則內史掌八柄之法汝之所友者及其賢臣百僚大臣可不謹于酒乎太史內史獻臣百宗工固欲知所謹矣況爾之所事服休坐而論道之臣服采起而作事之臣可不謹於酒乎曰友曰事者國君有所友有所事也然盛德有不可友者故孟子曰古之人曰事之云乎豈曰友之云乎服休服采固欲知所謹矣況爾之疇匹而位三卿者若圻父迫逐違命者乎若農父之順保萬民者乎若宏父之制其經界以定法者乎皆不可不謹於酒也圻父政官司馬也主封圻農父教官司徒也主農宏父事官司空也主廓地居民謂之父者尊之也先言圻父者制殷人湏酒以政為急也圻父農父宏父固欲知所謹矣況汝之身所以為一國之視儆者可不謹于酒乎故曰矧汝剛制于酒剛制亦劓毖之意剛果用力以制之也此章自遠而近自卑而尊等而上之則欲其自康叔之身始以是為治孰能禦之而況毖於酒德也哉】厥或誥曰羣飲汝勿佚盡執拘以歸于周予其殺【羣飲者商民羣聚而飲為姦惡者也佚失也其者未定辭也蘇氏曰予其殺者未必殺也猶今法曰當斬者皆具獄以待命不必死也然必立法者欲人畏而不敢犯也羣飲蓋亦當時之法有羣聚飲酒謀為大姦者其詳不可得而聞矣如今之法有日夜聚曉散者皆死罪蓋聚而為妖逆者也使後世不知其詳而徒聞其名凡民夜相過者輒殺之可乎】又惟殷之迪諸臣惟工乃湏于酒勿庸殺之姑惟教之【殷受導迪為惡之諸臣百工雖湏于酒未能遽革而非羣聚為姦惡者無庸殺之且惟教之】有斯明享乃不用我教辭惟我一人弗恤弗蠲乃事時同于殺【有者不忘之也斯此也指教辭而言享上享下之享言殷諸臣百工不忘教辭不湏于酒

我則明享之其不用我教辭惟我一人不恤于汝弗潔汝事時則同汝於羣飲誅殺之罪矣】王曰封汝典聽朕毖勿辯乃司民涵于酒【辨治也乃司有司也即上文諸臣百工之類言康叔不治其諸臣百工之涵酒則民之涵酒者不可禁矣 酒誥】

帝曰疇若予上下草木鳥獸僉曰益哉帝曰兪咨益汝作朕虞益拜稽首讓於朱虎熊羆帝曰兪往哉汝諧【上下山林澤藪也虞掌山澤之官周禮分為虞衡屬于地官朱虎熊羆四臣名也 舜典】大宰以九職任萬民二曰園圃毓草木三曰虞衡作山澤之材四曰藪牧養蕃鳥獸【詳上篇】山虞掌山林之政令物為之厲而為之守禁【物為之厲每物有蕃界也為之守禁為守者設禁令也守者謂其地之民占伐林木者也鄭司農云厲遮列守之】仲冬斬陽木仲夏斬陰木【鄭司農云陽木春夏生者陰木秋冬生者若松柏之屬玄謂陽木生山南者陰木生山北者冬斬陽夏斬陰堅濡調】凡服耜斬季材以時入之【季猶穉也服與耜宜用穉材尚柔刃也服牝服車之材】令萬民時斬材有期日【時斬材斬材之時也有期日入出有日數為久盡物】凡邦工入山林而掄材不禁【掄猶擇也不禁者山林國之有不拘入也】春秋之斬木不入禁【非冬夏之時不得入所禁之中斬木也斬四野之木可】凡竊木者有刑罰【竊盜也】林衡掌巡林麓之禁令而平其守【平其守者平其地之民守林麓之部】

【分】以時計林麓而賞罰之【計林麓者計其守之功也林麓蕃茂民不盜竊則有賞不則罰之】若斬木材則受法於山虞而掌其政令【法萬民入出時日之期】川衡掌巡川澤之禁令而平其守以時舍其守犯禁者

執而誅罰之【舍其守者時按視守者於其舍申戒之】澤虞掌國澤之政令為之厲禁使其地之人守其財物以時入之於玉府頒其餘於萬民【其地之人占取澤物者因以部分使守之以時入之於玉府謂皮革珠貝也入之以當邦賦然後得取其餘以自為也入出亦有時日之期 並地官】獸人掌罟田獸辨其名物【罟網也以網搏所當田之獸】冬獻狼夏獻麋春秋獻獸物【狼膏聚麋膏散聚則溫散則涼以救時之苦也獸物凡獸皆可獻也及狐狸】凡獸入於腊人【當乾之】皮毛筋角入於玉府【給作器物】凡田獸者掌其政令 人掌以時 為梁【月令季冬命漁師為梁鄭司農云梁水偃也偃水為關空以笱承其空詩云敝笱在梁】春獻王鮪【王鮪鮪之大者月令季春薦鮪于寢廟】凡 者掌其政令凡 征入於玉府【鄭司農云 征漁者之租稅漁人主收之入于玉府】鼈人掌取互物【鄭司農云互物謂有甲兩胡龜鼈之屬】以時簞魚鼈龜蜃凡貍物【蜃大蛤鄭司農云簞謂以杈刺泥中取之貍物龜鼈之屬自貍藏伏于泥中者玄謂貍物亦謂鱗刀含漿之屬】春獻鼈蜃秋獻龜魚【此其在淺處可得之時魚亦謂自貍藏】掌凡邦之簞事 獸醫掌療獸病療獸【畜獸之疾病及 療同醫】凡療獸病灌而行之以節之以動其氣觀其所發而養之【療畜獸必灌行之者為其病狀難知灌以緩之且強其氣也節趨聚之節也氣謂脈氣既行之乃以脈視之以知所病】凡療獸 灌而剗之以發其惡然後藥之養之食之【亦先攻之而後養之】凡獸之有病者有 者使療之死則計其數以進退之【並天官】迹人禁麇卵者與其毒矢射者【為其天物且害必多也麇麋鹿子】囿人掌囿游之獸禁【囿游囿之離宮小苑觀處也養獸以宴樂視之禁者其蕃衛也鄭司農云囿游之獸囿牧之獸】牧百獸【備養衆物也今掖庭有鳥獸自熊虎孔雀至於狐狸鳧鶴備焉】場人掌國之場

圃而樹之果蓏珍異之物以時斂而藏之【果棗李之屬蓏瓜瓠之屬珍異蒲萄枇杷之屬並地官】服不氏掌養猛獸而教擾之【猛獸虎豹熊羆之屬擾馴也教習使之馴服王者之教無不服】射鳥氏掌射鳥【鳥謂中膳羞者鳧雁鵠鴉之屬】羅氏掌羅鳥【鳥謂卑居鵠之屬】蜡則作羅襦【作猶用也鄭司農云蜡謂十二月大祭萬物也郊特牲曰天子大蜡謂歲十二月合聚萬物而索饗之襦細密之羅襦讀為縐有衣袂之縐玄謂蜡建亥之月此時火伏蟄者畢矣既祭獸可以羅網圍取禽也王制曰祭獸然後田又曰昆虫已蟄可以火田今俗放火張羅其遺教】中春羅春鳥獻鳩以養國老行羽物【春鳥蟄而始出者若今南郡黃雀之屬是時鷹化為鳩鳩與春鳥變舊為新宜以養老助生氣行謂賦賜】掌畜掌養鳥而阜蕃教擾之【阜猶盛也蕃蕃息也鳥之可養使盛大蕃息者謂鷺鷥之屬】歲時貢鳥物【鷺鷥之屬以四時來並夏官】閩隸掌役畜養鳥而阜蕃教擾之掌子則取隸

焉【杜子春云子當為祀玄謂掌子者王立世子置臣使掌其家事而以閩隸役之按王氏云子謂鳥所生也】夷隸掌役牧人養牛馬與鳥言【鄭司農云夷狄之人或曉鳥獸之言故春秋傳曰介葛盧聞牛鳴曰是生三犧皆用之矣】貉隸掌役服不氏而養獸而教擾之掌與獸言【不言阜蕃者猛獸不可服又不生乳于圈檻也】雍氏禁山之為苑澤之沈者【為其就禽獸魚鼈自然之居而害之鄭司農云不得擅為苑囿於山也澤之沉者謂毒魚及水蟲之屬】萍氏掌國之水禁【水禁謂水中害人之處及入水捕魚鼈不時】冥氏掌設弧張【弧張罝罽之屬所以局絹禽獸】為阱獲以攻猛獸以靈鼓之【靈鼓六面鼓之使驚趨阱獲】若得其獸則獻其皮革齒須備【鄭司農云須謂頤下須備謂搔也】庶氏掌除毒蠱以攻說禴之嘉草攻之【毒蠱毒物而病害人者賊律曰敢蠱人及教令者棄市攻說祈名祈其神求去之也嘉草藥物其狀未聞攻之謂燠之鄭司農云禴除也玄謂此禴謂如潰癰之潰】凡蠱則令之比之【使為之又校次之】穴氏掌攻蟄獸各以其物火之【蟄獸熊羆之屬冬藏者也將攻之必先燒其所食之物於穴外以誘出之乃可得之】以時獻其珍異皮革翬氏掌攻猛鳥各以其物為媒而掎之【猛鳥鷹隼之屬置其所食之物於絹中鳥下來則掎其脚】以時獻其羽翮柞氏掌攻草木及林麓【林人所養者山足曰麓】夏日至令刊陽木而火之冬日至令剥陰木而水之【刊剥互言耳皆謂斫去次地之皮生山南為陽木生山北為陰木火之水之則使其肄不生】若欲其化也則春秋變其水火【化猶生也謂時以種穀也變其水火者乃所火則水之所水則火之則其土和美】凡攻木者掌其政令【除木有時】薙氏掌殺草春始生而萌之夏日至而夷之秋繩而芟之冬日至而耜之【故書萌作薨杜子春云薨當為萌謂耕反其萌芽書亦或為萌玄謂萌之者以鉏基斫所生者夷之以鉤鎌迫地芟之也若今取芟矣含實曰繩芟其繩則實不成耜之以耜側凍土剗之】若欲其化也則以水火變之【謂以火燒其所芟萌之草已而水之則其土亦和美矣月令季夏燒薙行水利以殺草如以湯是其一時著之】掌凡殺草之政令哲族氏掌覆夭鳥之巢【覆猶毀也夭鳥惡鳴之鳥若鴞鵂】以方書十日之號十有二辰之號十有二月之號十有二歲之號二十有八星之號縣其巢上則去之【方版也日謂從甲至癸辰謂從子至亥月謂從娵至茶歲謂從攝提格至赤奮若星謂從角至軫夭鳥見此五者而去其詳未聞】翦氏掌除蠹物以攻崇攻之以莽草熏之【蠹物穿食人器物者蠹魚亦是也攻崇祈名莽草藥物殺蟲者以熏之則死故書蠹為囊杜子春云囊當為蠹】凡庶蠱之事【庶除蟲毒者蠱亦蠹之類也或熏以莽草則去】赤友氏掌除墻屋以蜃炭攻之洒毒之【洒灑也除墻屋者除蟲豸藏逃

其中者蜃大蛤也擣其炭以坩之則走淳 以灑之則死故書蜃為晨鄭司農云晨當為蜃書亦或為蜃】凡隙屋除其狸蟲【狸蟲蜃肌蜃之屬】蠃氏掌去鼃鼃焚牡蘘以 洒之則死【牡蘘蘘不華者齊魯之間謂鼃為蠃鼃耿鼃也蠃與耿鼃尤怒鳴為聒人耳去之】以其煙被之則凡水蟲無聲【杜子春云假令風從東方來則於水東面為煙令煙西行被之水上】壺涿氏掌除水蟲以炮土之鼓 之以焚石投之【水蟲狐蜃之屬故書炮作泡杜子春讀炮為苞有苦葉之苞玄謂燔之炮之炮土之鼓瓦鼓也焚石投之使驚去】若欲殺其神則以牡槀午貫象齒而沈之則其神死淵為陵【神謂水神龍罔象故書槀為梓午為五杜子春云梓當為槀槀讀為枯枯榆木名或為樗又云五貫當為午貫】庭氏掌射國中之夭鳥若不見其鳥獸則以救日之弓與救月之矢射之【不見鳥獸謂夜來鳴呼為怪者獸狐狼之屬鄭司農云救日之弓救月之矢謂日月食所作弓矢玄謂日月之食陰陽相勝之變也於日食則射大陰月食則射太陽與】若神也則以大陰之弓與枉矢射之【神謂非鳥獸之聲若或叫于宋太廟譖譖出出者大陰之弓救月之弓枉矢救日之矢與不言救月之弓與救日之矢者互言之救日用枉矢則救月以恒矢可知也 並秋官】獺祭魚然後虞人入澤梁 祭獸然後田獵鳩化為鷹然後設罝羅草木零落然後入山林昆蟲未蟄不以火田【取物必順時候也梁絕水取魚者罝小網也昆明也明蟲者得陽而生得陰而藏】不麝不卵不殺胎不殀夭【重陽未成物殀斷殺少長曰夭】不覆巢【覆敗也王制】孟春命祀山林川澤犧牲毋用牝禁止伐木毋覆巢毋殺孩蟲胎夭飛鳥毋麝毋卵仲春安萌芽養幼少存諸孤毋竭川澤毋漉波池毋焚山林 季春生氣方盛陽氣發泄句者畢出萌者盡達不可以內田獵 罝羅網畢翳餒獸之藥毋出九門 孟夏毋伐大樹毋大田獵季夏命漁師伐蛟取鼃登龜取鼃樹木方盛命虞人入山行木毋有斬伐季秋草木黃落乃伐薪為炭仲冬山林藪澤有能取蔬食田獵禽獸者野虞教道之其有相侵奪者罪之不赦季冬命漁師始漁【並詳月令】路馬死埋之以帷【路馬君所乘者其他狗馬不能以帷蓋檀弓】

右草木禽獸之政 文王之治岐也澤梁無禁【澤謂潞水梁謂漁梁與民同利不設禁也孟子】莊公二十八年冬築微【微魯邑】山林藪澤之利所以與民共也虞之非正也【虞典禽獸之官言規固而築之又置官司以守之是不與民同利也 穀梁傳成十八年築鹿囿傳同注云築牆為鹿地之苑】宣公夏濫於泗淵【濫漬也漬 於泗水之淵以取魚也泗在魯城北又曰在南門】里革斷其 而棄之【 網也】曰古者大寒降土蟄發【降下也寒氣初下謂季冬建丑之月大寒之後也土蟄發謂孟春建寅之月蟄始震也月令孟春蟄蟲始震魚上冰獺祭魚】水虞於是乎講罝罟取名魚登川禽而嘗之寢廟行諸國人助宣氣也【水虞漁師也掌川澤之禁令講習也罝罟漁網也罝筍也名漁大魚也川禽鼈蜃之屬諸之也是時陽氣起魚涉負冰故令國人取之所以助宣氣也月令季冬始漁乃嘗魚先薦寢廟唐云孟春誤矣】鳥獸孕水蟲成【孕懷子也此謂春時】獸虞於是乎禁 羅罝魚鼈以為夏槁【獸虞掌鳥獸之禁令 兔 網鳥 也禁禁不得施也稽 也槁乾也夏不得取故於此時 刺魚鼈以為夏儲】助生阜也【阜長也鳥獸方孕故取魚鼈助生物也】鳥獸成水蟲孕水虞於是乎禁 罝設罝鄂【 當為罝罝罝小網也鄂作格所以誤獸也謂立夏鳥獸已成水蟲懷孕之時禁魚鼈之網設取獸之物也】以實廟庖畜功用也【以獸實

宗廟庖厨也而長魚鼈畜四時功足國財用也】且夫山不槎蘖【槎斫也以株生曰蘖】澤不伐夭【草木未成曰夭】魚禁鯤鰠【鯤魚子也鰠未成魚也】獸長麇麋【鹿子曰麇麋子曰麋】鳥翼鷇卵【翼成也生哺曰鷇未乳曰卵】蟲舍蜺蜚【蜺蜚子也可以為醢蜚蝻蝻也可食舍不取也】蕃庶物也古之訓也【蕃息也】今魚方別孕不教魚長又行網 貪無藝也【別別於雄而懷子也藝極也
國語魯語】定公以孔子為司空乃別五土之性而物各得

其所生之宜咸得厥所【家語】晏子曰山林之木衡鹿守之澤之萑蒲舟鮫守之藪之薪蒸虞侯守之海之鹽蜃祈望守之【衡鹿舟鮫虞侯祈望皆官名也言公專守山澤之利不與民共昭二十一年左氏傳】孟子曰不違農時穀不可勝食也數 不入洿池魚鼈不可勝食也斧斤以時入山林材木不可勝用也穀與魚鼈不可勝食材木不可勝用是使民養生喪死無憾也養生喪死無憾王道之始也【農時謂春耕夏耘秋收之時凡有興作不違此時至冬乃役之也不可勝食言多也數密也 也洿窰下之地水所聚也古者網 必用四寸之目魚不滿尺市不得粥人不得食山林川澤與民共之而有厲禁草木零落然後斧斤入焉此皆為治之初法制未備且因天地自然之利而樽節愛養之事也然飲食宮室所以養生祭祀棺槨所以送死皆民所急而不可無者今皆有以資之則人無所恨矣王道以得民心為本故以此為王道之始 孟子】禮聖主之於禽獸也見其生不食其死聞其聲不嘗其肉隱弗忍也故遠庖厨仁之至也不合圍不掩羣不射宿不涸澤豺不祭獸不田獵獺不祭魚不設 鷹隼不鷙睦而不逮不出穎羅草木不零落斧斤不入山林昆蟲不蟄不以火田不麝不卵不剝胎不夭魚肉不入廟門鳥獸不成毫毛不登庖厨取之有時用之有節則物莫不多 詩曰王在靈囿麇鹿攸伏麇鹿濯濯白鳥皤皤王在靈沼於仞魚躍言德志也聖主所以在魚鼈禽獸猶得其心況於人民乎故仁人行其禮則天下安而萬理得矣逮至德渥澤洽調和大暢則天清澈地富煖物時熟民心不挾詐賊氣脉淳化攫齧搏繫之獸鮮毒蠱猛虻之蟲密毒山不蕃草木少薄矣鑠乎大仁之化也【並賈誼新書】

重門擊柝以待暴客蓋取諸豫【豫備之意繫辭傳】司寤氏掌夜時以星分夜以詔夜士夜禁【夜時謂夜晚早若今甲乙至戊夜士主行夜徼候者如今都候之屬】禦晨行者禁宵行者夜遊者【備其遭寇害及謀非公事禦亦禁也謂遏止之無刑法也晨先明也宵定昏也書曰宵中星虛春秋傳曰夜中星隕如雨 秋官】脩閭氏掌比國中宿互 者與其國粥而比其追胥者而賞罰之【國中城中也粥養也國所遊養謂羨卒也追逐寇也胥讀為偁故書互為巨鄭司農云宿謂宿衛也巨當為互謂行馬所以障互禁止人也 謂夜行擊 】【禁徑逾者與以兵革趨行者與馳騁於國中者【皆為其惑衆】銜枚氏掌司蹕【察蹕謹者為其聒亂在朝者之言語】禁 呼歎鳴於國中者行歌哭於國中之道者【為其惑衆相感動鳴吟也】野廬氏禁野之橫行徑踰者【皆為防姦也橫行妄繇田中徑逾射邪趨疾越隄渠也】萍氏禁川遊者【備波洋卒至沈溺也 並秋官】媒氏禁遷葬者與嫁殤者【遷葬謂生時非夫婦死既葬遷之使相從也殤十九已下未嫁而死者生不以禮相接死而合之是亦亂人倫者也鄭司農云嫁殤者謂嫁死人也今時娶會是也地官】馬質禁原 者【原再也天文辰為馬 書 為龍精月直大火則浴其種是 與馬同氣物莫能兩大禁原 者為傷馬與 夏官】朝士凡得獲貨賄人民六畜者委於朝告於士旬而舉之大者公之小者庶民私之【

俘而取之曰獲委於朝十日待來識之者人民謂刑人奴隸逃亡者鄭司農云若今時得遺物及放失六畜持諸鄉亭縣庭大者公之大物沒入公家也小者私之小物自畀也玄謂人民之小者未亂七歲以下】凡民同貨財者令以國灋行之犯令者刑罰之【鄭司農云同貨財者謂合錢共賈者也以國法行之司市為節以遺之玄謂同貨財者富人蓄積者多時收斂之乏時以國服之法出之雖有騰躍其贏不得過此以利出者與取者過此則罰之若今時加貴取息坐贓並秋官】

右雜禁令

禮書綱目卷六十三

卷六十四

欽定四庫全書

禮書綱目卷六十四 婺源江永撰

井田 通禮十三

補

昔黃帝始經土設井以塞爭端立步制 以防不足使八家為井井開四道而分八宅鑿井於中一則不 地氣二則無費一家三則同風俗四則齊巧拙五則通財貨六則存亡更守七則出入相司八則嫁娶相媒九則無有相貸十則疾病相救是以性情可得而親生產可得而均均則欺陵之路塞親則鬪訟之心弭既牧之於邑故井一為鄰鄰三為朋朋三為里里五為邑邑十為都都十為師師七為州夫始分於井則地著計之於州則數詳及乎夏殷不易其制【杜氏通典】禹曰予決九川距四海濬畎澮距川【九川九州之川也距至濬深也周禮一之間廣尺深尺曰畎一同之間廣二尋深二仞曰澮畎澮之間有遂有溝有洫皆通田間水道以小注大言畎澮而不及遂溝洫者舉大小以包其餘也先決九川之水使各通於海次濬畎澮之水使各通於川也 益稷】周文王在岐用平土之法以為治人之道地著為本【地著謂安土也】故建司馬法六尺為步步百為 百為夫夫三為屋屋三為井井十為通通十為成成十為終終十為同同方百里同十為封封十為畿畿方千里【通典】小司徒乃經土地而牧其田野九夫為井四井為邑四邑為丘四丘為甸四甸為縣四縣為都以任地事而令貢賦凡稅斂之事【此謂造都鄙也采地制井田異於鄉遂重立國小司徒為經之立其五溝五塗之界其制似井之字因取名焉孟子曰夫仁政必自經界始經界不正井地不均穀祿不平是故暴君姦吏必慢其經界經界既正分田制祿可坐而定也鄭司農云井牧者春秋傳所謂井衍沃牧隰臯者也玄謂隰臯之地九夫為牧二牧而當一井今造都鄙授民田有不易有一易有再易通率二而當一是之謂井牧昔夏少康在虞思有田一成有衆一旅一旅之衆而田一成則井牧之法先古然矣九夫為井者方一里九夫所治之田也此制小司徒經之匠人為之溝洫相包乃成耳邑丘之屬相連比以出田稅溝洫為除水害四井為邑方二里四邑為丘方四里四丘為甸甸之言乘地讀如衷甸甸方八里旁加八里則方十里為一成積百井九百夫其中六十四井五百七十六夫出田稅三十六井三百二十四夫治洫四甸為縣方二十里四縣為都方四十里四都方八十里旁加二十里乃得方百里為一同地積萬井九萬夫其四千九十六井三萬六千八百六十四夫出田稅二千三百四井二萬七百三十六夫治洫三千六百井三萬二千四百夫治澮井田之法備於一同今止於都者采地食者皆四之一其制三等百里之國凡四都一都之田稅入於王五十里之國凡四縣一縣之田稅入於王二十五里之國凡四甸甸一甸之田稅入於王地事謂農牧衡虞也貢謂九穀山澤之材也賦謂出車徒給徭役也司馬法曰六尺為步步百為晦晦百為夫夫三為屋屋三為井井十為通通為匹馬三十家士一人徒二人通十為成成百井三百家革車一乘士十人徒二十人十成為終終

千井三千家革車十乘士百人徒二百人十終為同同方百里萬井三萬家革車百乘士千人徒二千人 地官】遂人凡治野夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路以達於畿【十夫二鄰之田百夫一鄣之田千夫二鄙之田萬夫四縣之田遂溝洫澮皆所以通水於川也遂廣深各二尺溝倍之洫倍溝澮廣二尋深二仞徑畛涂道路皆所以通車徒於國都也徑容牛馬畛容大車涂容乘車一軌道容二軌路容三軌都之野涂與環涂同可也萬夫者方三十三里少半里九而方一同以南畝圖之則遂從溝橫洫從澮橫九澮而川周其外焉去山陵林麓川澤溝瀆城郭宮室涂巷三分之制其餘如此以至於畿則中雖有都鄙遂人盡主其地 同上】匠人為溝洫【主通利田間之水道】耜廣五寸二耜為耦一耦之伐廣尺深尺謂之 田首倍之廣二尺深二尺謂之遂【古者耜一金兩人併發之其壟中曰 上曰伐伐之言發也 畎也今之耜岐頭兩金象古之耦也田一夫之所佃百畝方百步地遂者夫間小溝遂上亦有徑】九夫為井井間廣四尺深四尺謂之溝方十里為成成間廣八尺深八尺謂之洫方百里為同同間廣二尋深二仞謂之澮【此畿內采地之制九夫為井井者方一里九夫所治之田也采地制井田異於鄉遂及公邑三夫為屋屋具也一井之中三屋九夫三三相具以出賦稅共治溝也方十里為成成中容一甸甸方八里出田稅緣邊一里治洫方百里為同同中容四都六十四成方八十里出田稅緣邊十里治澮采地者在三百里四百里五百里之中載師職曰園廛二十而一近郊十一遠郊二十而三甸稍縣都皆無過十二謂田稅也皆就夫稅之輕近重遠耳 文公問為國於孟子孟子曰夏后氏五十而貢殷人七十而助周人百畝而徹其實皆什一也徹者徹也助者藉也龍子曰治地莫善於助莫不善於貢貢者校數歲之中以為常文公又問井田孟子曰請野九一而助國中什一使自賦卿以下必有圭田圭田五十畝餘夫二十五畝死徙無出鄉鄉田同井出入相友守望相助疾病相扶持則百姓親睦方里而井井九百畝其中為公田八家皆私百畝同養公田公事畢然後敢治私事所以別野人也又曰詩云雨我公田遂及我私惟助為有公田由此觀之雖周亦助也魯哀公問於有若曰年飢用不足如之何有若對曰盍徹乎曰二吾猶不足如之何其徹也春秋宣公十五年秋初稅畝傳曰非禮也穀出不過藉以豐財也此數者世人謂之錯而疑焉以載師職及司馬法論之周制畿內用夏之貢法稅夫無公田以詩春秋論語孟子論之周制 國用殷之助法制公田不稅夫貢者自治其所受田貢其稅穀助者借民之力以治公田又使收斂焉畿內用貢法者鄉遂及公邑之吏旦夕從民事為其促之以公使不得恤其私 國用助法者諸侯專一國之政為其貪暴稅民無藝周之畿內稅有輕重諸侯謂之徹者通其率以什一為正孟子云野九夫而稅一國中什一是邦國亦異外內之法耳圭之言珪潔也周謂之士田鄭司農說以春秋傳曰有田一成又曰列國一同】專達於川各載其名【達猶至也謂澮直至于川復無所注入載其名者識水所從出】凡天下之地勢兩山之間必有川焉大川之上必有涂焉【通其壅塞】凡溝逆地防謂之不行水屬不理孫謂之不行【溝謂造溝防謂脉理屬讀為注孫順也不行謂決溢也禹鑿龍門播九河為此逆防與不理孫也】稍溝三十里而廣倍【謂不懇地之溝也鄭司農云稍讀為桑螵蛸之蛸蛸謂水漱齧之溝故三十里而廣倍】凡行奠水磬折以參伍【坎為弓輪水行欲紆曲也鄭司農云奠讀為停謂行停水溝形當為磬直行三折行五以引水者疾焉】欲為淵則句於矩【大曲則流轉流轉則其下成淵】凡溝必因水勢防必因地勢善溝者水漱之善防者水淫之【漱猶齧也鄭司農云淫讀為廐謂水淤泥土留著助之為厚玄謂淫讀為淫液之淫】凡為防廣與崇方其綱參分去一【崇高也方猶等也綱者薄其上】大防外綱【又薄其

上厚其下】凡溝防必一日先深之以為式【程人功也溝防為葺為防也】里為式然後可以傳衆力【里讀為己聲之誤也】凡任索約大汲其版謂之無任【故書汲作沒杜子春云當為汲玄謂約縮也汲引也築防若墻者以繩縮其版大引之言板橈也板橈築之則鼓土不堅矣詩云其繩則直縮版以載又曰約之格格掇之橐橐 考工記】稍人掌令丘乘之政令【丘乘四丘為甸甸讀如維禹隤之之隤同其訓曰乘由是改云是掌令都鄙修治井邑丘甸縣都之溝涂云丘甸者舉中言之溝涂之人井別邑異則民之家數存焉 地官】方一里者為田九百畝【一里方三百步】方十里者為方一里者百為田九萬畝方百里者為方十里者百為田九十億畝【億今十萬】方千里者為方百里者百為田九萬億畝【萬億今萬萬也】凡四海之內斷長補短方三千里為田八十萬億一萬億畝【九州之大計】方百里者為田九十億畝山陵林麓川澤溝瀆城郭宮室塗巷三分去一其餘六十億畝【以一大國為率其餘所以授民也山足曰麓】古者以周尺八尺為步今以周尺六尺四寸為步古者百畝當今東田百四十六畝三十步古者百里當今百二十一里六十步四尺二寸二分【周尺之數未詳聞也案禮制周以十寸為尺蓋六國時多變亂法度或言周尺八寸則步更為八八六十四寸以此計之古者百畝當今百五十六畝二十五步古者百里當今百二十五里 王制】

右經界 禹卑宮室而盡力乎溝洫【溝洫田間水道以正疆界備旱潦者也 論語】少康逃奔有虞而邑諸綸【綸虞邑】有田一成有衆一旅【方十里為成五百人為旅 哀元年左右氏傳】畇畇原隰曾孫田之我疆我理南東其畝【畇畇懇關貌疆者為之大界也理者定其溝塗也畝壟也長樂劉氏曰其遂東入于溝則其畝南矣其遂南入于溝則其畝東矣小雅信南山】晉人欲使齊之封內盡東其畝【使壟畝東西行】對曰先王疆理天下物土之宜而布其利【疆界也理正也物土之宜播殖之物各從土宜】故詩曰我疆我理南東其畝【詩小雅或南或東從其土宜】今吾子疆理諸侯而曰盡東其畝而已唯吾子戎車是利【晉之伐齊循壟東行易】無顧土宜其無乃非先王之命也乎【成公二左右氏傳】楚蒍掩書土田【書土地之所宜】度山林【度量山林之材以共國用】鳩藪澤【鳩聚也聚成藪澤使民不得焚燎之欲以備田獵之處】辨京陵【辨別也絕高曰京大阜曰陵別之以為冢墓之地】表淳鹵【淳鹵埆薄之地表異輕其賦稅】數疆潦【疆界有流潦者計數減其租入】規偃豬【偃豬下濕之地規度其受水多少】町原防【廣平曰原防隄也隄防間地不得方正如井田別為小頃町】牧隰皋【隰皋水涯下濕為芻牧之地】井衍沃【衍沃平美之地則如周禮制以為井田六尺為步步百為畝畝百為夫九夫為井 襄二十五年左氏傳】鄭子駟為田洫司氏堵氏侯氏子師氏皆喪田焉【洫田畔也子駟為田洫以正封疆而侵四族田 襄十年左氏傳】子產為政田有封洫【封疆也洫溝也】廬井有伍【廬舍也九夫為井使五家相保 襄三十年左氏傳】滕文公使畢戰問井地孟子曰夫仁政必自經

界始經界不正井地不均穀祿不平是故暴君汙吏必慢其經界經界既正分田制祿可坐而定也【井地即井田也經界謂治地分田經畫其溝塗封植之界也此法不修則田無定分而豪彊得以兼并故井地有不均賦無定法而貪暴得以多取故穀祿有不平此欲行仁政者之所以必從此始而暴君汙吏則必欲慢而廢之也有以正之則分田制祿可不勞而定矣】請野九一而助國中什一使自賦【此分田制祿之常法所以治野人使養君子也野郊外都鄙

之地也九一而助為公田而行助法也國中郊門之內鄉遂之地也田不井授但為溝洫使什而自賦其一盖用貢法也周所謂徹法者盖如此以此推之當時非惟助法不行其貢亦不止什一矣】卿以下必有圭田圭田五十畝【此世祿常制之外又有圭田所以厚君子也圭潔也所以奉祭祀也不言世祿者滕已行之但此未備耳】餘夫二十五畝【程子曰一夫上父母下妻子以五口八口為率受田百畝如有弟是餘夫也年十六別受田二十五畝俟其壯而有室然後更受百畝之田愚按此百畝常制之外又有餘夫之田以厚野人也】死徙無出鄉鄉田同井出入相友守望相助疾病相扶持則百姓親睦【死謂葬也徙謂徙其居也同井者八家也友猶伴也守望防寇盜也】方里而井井九百畝其中為公田八家皆私百畝同養公田公事畢然後敢治私事所以別野人也【此詳言井田形體之制乃周之助法也公田以為君子之祿而私田野人之所受先公後私所以別君子野人之分也不言君子據野人而言省文耳上言野及國中二法此獨詳於治野者國中貢法當世已行但取之過於什一耳 孟子】秦孝公用商鞅廢井田開阡陌【漢志】

夏后氏五十而貢殷人七十而助周人百畝而徹【孟子】大司徒凡造都鄙制其地域而封溝之以其室數

制之不易之地家百畝一易之地家二百畝再易之地家三百畝【都鄙王子弟公卿大夫采地其界曰都鄙所居也王制曰天子之縣內方百里之國九七十里之國二十有一五十里之國六十有三此盖夏時采地之數周末聞矣春秋傳曰遷鄭焉而鄙留城郭之宅曰室詩云嗟我婦子曰為改歲入此室處以其室數制之謂制五甸之屬王制曰凡居民量地以制邑度地以居民地邑民居必參相得鄭司農云不易之地歲種之地美故家百畝一易之地休一歲乃復種地薄故家二百畝再易之地休二歲乃復種故家三百畝】乃分地職奠地守制地貢而頒職事焉以為地法而待政令【分地職分其九職所宜也定地守謂衡麓虞候之屬制地貢謂九職所稅也頒職事者分命使各為其所職之事 地官】小司徒上地家七人中地家六人下地家五人【一家男女七人已上則授之以上地所養者衆也男女五人已下則授之以下地所養者寡也 詳見軍禮田役篇】遂人掌邦之野【郊外曰野此野為甸稍縣官】以土地之圖經田野以歲時稽其人民而授之田野辨其野之土上地中地下地以頒田里上地夫一廛田百畝萊五十畝餘夫亦如之中地夫一廛田百畝萊百畝餘夫亦如之下地夫一廛田百畝萊二百畝餘夫亦如之【萊謂休不耕者鄭司農云戶計一夫一婦而賦之田其一戶有數口者餘夫亦受此田也廛居也揚子雲有田一廛謂百畝之居也玄謂廛城邑之居孟子所云五畝之宅樹之以桑者也六遂之民奇受一廛雖上地皆有萊皆所以饒遠也王莽時城郭中宅不樹者為不毛出三夫之布 地官】大司馬上地食者參之二中地食者半下地食者參之一【鄭司農云上地謂肥美田也食者參之二假令一家有三頃歲種二頃休其一頃下地食者參之一田薄惡者所休多 詳見軍禮兵制】制農田百畝百畝之分上農夫食九人其次食八人其次食七人其次食六人下農夫食五人【農夫皆受田於公田肥磽有五等收入不同也 王制】耕者之所獲一夫百畝百畝之糞上農夫食九人上次食八人中食七人中次食六人下食五人【獲得也一夫一婦佃田百畝加之以糞糞多而力勤者為上農其所收可供九人其次用力不齊故有此五等 孟子】民受田上田夫百畝中田夫二百畝下田夫三百畝歲耕種者為不易上田休一歲者為一易中田休二歲者為再易下田三歲更耕之自爰其處【

孟康曰爰於也更互也】農民戶人已受田其家衆男為餘夫亦以口受田如比【師古曰比例也】土農商家受田五口乃當農夫一人此謂平土可以為法者也若山林藪澤原陵淳鹵之地【晉灼曰淳盡也鹵鹵之田不生五穀也】各以肥磽多少為差民年二十受田六十歸田七十以上上所養也十歲以下上所長也十一以上上所強也【師古曰勉強勸之令習事也 前漢食貨志】載師以廛里任國中之地以場圃任園地以宅田土

田賈田任近郊之地以官田牛田賞田牧田任遠郊之地以公邑之田任甸地以家邑之田任稍地以小都之田任縣地以大都之田任疆地【鄭司農云廛市中空地未有肆城中空地未有宅者民宅曰宅宅田者以備益多也土田者士大夫之子得而耕之田也賈田者吏為縣官賣財與之田官田者公家之所耕田牛田者以養公家之牛賞田者賞賜之田牧田者牧六畜之田司馬法曰王國百里為郊二百里為州三百里為野四百里為縣五百里為都杜子春云五十里為近郊百里為遠郊玄謂廛里者若今云邑里居矣廛民居之區域也里居也圃樹果蓏之屬季秋於中為場樊圃謂之園宅田致仕者之家所受田也土相見禮曰宅者在邦則曰市井之臣在野則曰草茅之臣土讀為仕仕者亦受田所謂圭田也孟子曰自卿以下必有圭田圭田五十畝賈田在市賈人其家所受田也官田庶人在官者其家所受田也牛田牧田畜牧者之家所受田也公邑謂六遂餘地天子使大夫治之自此以外皆然二百里三百里其上大夫如州長四百里五百里其下大夫如縣正是以或謂二百里為州四百里為縣云遂人亦監焉家邑大夫之采地小都卿之采地大都公之采地王子弟所食邑也疆五百里王畿界也皆言任者地之形實不方平如圖受田邑者遠近不得盡如制其所生育賦貢取正於是爾以廛里任國中而遂人職授民田夫一廛田百畝是廛里不謂民之邑居在都城者與凡王畿內方千里積百同九百萬夫之地也有山陵林麓川澤溝瀆城郭宮室涂巷三分去一餘六百萬夫又以不易一易再易上中下相通定受田者三百萬之家也遠郊之內地居四同三十六萬夫之地也三分去一其餘二十四萬夫六鄉之民七萬五千家通不易一易再易一家受二夫則十五萬夫之地其餘九萬夫廛里也場圃也宅田也土田也賈田也官田也牛田也賞田也牧田也九者亦通受一夫焉則半農人也定受田十二萬家也食貨志云農民戶一人已受田其家衆男為餘夫亦以口受田如比土農商家受田五口乃當農夫一人今餘夫在遂地之中如此則土工商以事入在官而餘夫以力出耕公邑甸稍縣都合居九十六同八百六十四萬夫之地城郭宮室差少涂巷又狹於三分所去六而存一焉以十八分之十三率之則其餘六百二十四萬夫之地通上中下六家而受十三夫定受田二百八十八萬家也其在甸七萬五千家為六遂餘則公邑 地官】旅師凡新甿之治皆聽之使無征役以地之 惡為之等【新民新徙來者也治謂有所求乞也使無征役復之也王制曰自諸侯來徙家期不從政以地美惡為之等七人以上授以上地六口授以中地五口以下授以下地與舊民同旅師掌斂地稅而又施惠散利是以屬用新民焉 同上】夫圭田無征【夫猶治也征稅也孟子曰卿以下必有圭田治圭田者不稅所以厚賢也此則周禮之士田以任近郊之地稅什一 王制】司勲唯加田無國正【加田既賞之又加賜以田所以厚恩也鄭司農云正謂稅也祿田亦有給公家之賦貢若今時侯國有司農少府錢穀矣獨加賞之田無正耳 夏官】田里不粥【皆受於公民不得私也粥賣也 王制】

右授田

禮書綱目卷六十四

卷六十五

欽定四庫全書

禮書綱目卷六十五 婺源江永撰

財賦 通禮十四

夏后氏五十而貢殷人七十而助周人百畝而徹其實皆什一也【夏時一夫受田五十畝而每夫計其五畝之入以為貢商人始為井田之制以六百三十畝之地畫為九區區七十畝中為公田其外八家各受一區但借其力以助耕公田而不復稅其私田周時一夫授田百畝鄉遂用貢法十夫有溝都鄙用助法八家同井耕則通力而作收則計畝而分故謂之徹其實皆什一者貢法固以十分之一為常數惟助法乃是九一而商制不可考周制則公田百畝中以二十畝為廬舍一夫所耕公田實計十畝通私田百畝為十一分而取其一蓋又輕於什一矣竊料商制亦當似此而以十四畝為廬一夫實耕公田七畝是亦不過什一也孟子】古者公田藉而不稅【藉之言借也借民力治公田美惡取於此不稅民之所自治也孟子曰夏后氏五十而貢殷人七十而助周人百畝而徹則所云古者謂殷時王制】

右三代田稅 龍子曰治地莫善於助莫不善於貢貢者校數歲之中以為常樂歲粒米狼戾多取之而不為虐則寡取之凶年糞其田而不足則必取盈焉為民父母使民盼盼然將終歲勤動不得以養其父母又稱貸而益之使老稚轉乎溝壑惡在其為民父母也【龍子古賢人狼戾猶狼藉言多也糞壅也盈滿也盼恨視也勤動勞苦也稱舉也貸借也取物於人而出息以償之也益之以足取盈之數也稚幼子也孟子】孟子曰徹者徹也助者藉也【徹通也均也藉借也】詩云雨

我公田遂及我私惟助為有公田由此觀之雖周亦助也【詩小雅大田之篇雨降雨也言順天雨於公田而遂及私田先公而後私也當時助法盡廢典籍不存惟有此詩可見故引之也同上】篤公劉度其隰原徹田為糧【徹通也一井之田九百畝八家皆私百畝同養公田耕則通力而作收則計畝而分也周之徹法自此始其後周公蓋因而修之耳大雅】文王之治岐也耕者九一【九一者井田之制也方一里為一井其田九百畝中畫井字界為九區一區之中為田百畝中百畝為公田外八百畝為私田八家各受私田百畝而同養公田是九分而稅其一也孟子】倬彼甫田歲取十千【倬明貌甫大也十千謂一成之田地方十里為田九萬畝而以其萬畝為公田蓋九一之法也小雅】

秦許晉平晉於是乎作爰田【分公田之稅應入公者爰之於所賞之衆僖十五年左右氏傳】宣公十五年初稅畝【公田之法十取其一今又履其餘畝復十收其一故哀公曰二吾猶不足遂以為常故曰初】非禮也穀出不過藉【周法民耕百畝公田十畝借民力而治之稅不

過此】以豐財也【左氏傳】譏始履畝而稅也【時宣公無恩信于民民不肯盡力於公田故履踐案行擇其善畝穀最好者稅取之】古者什一而藉【什一以借民力以什與民自取其一為公田】什一者天下之中正也多乎什一大桀小桀【奢泰多取于民比於桀也】寡乎什一大貉小貉【蠻貊無社稷宗廟百官制度之費稅薄】什一者天下之中正也什一行而頌聲作矣【頌聲者太平歌頌之聲帝王之高致也公羊傳】古者什一【一夫一婦佃田百畝以共五口父母妻子也又受田十畝以為公田公田】

【在內私田在外此一夫一婦為耕百一十畝】藉而不稅【藉此公田而收其入言不稅民】初稅畝非正也古者三百步為里名曰井田井田九百畝公田居一【出除公田八十畝餘八百二十畝故井田之法八家共一井八百畝餘二十畝家各二畝半為廬舍】私田稼不善則非吏【非責也吏田峻也言吏急民使不得營私田】公田稼不善則非民【民勤私也】初稅畝者非公之去公田而履畝十取一也以公之與民為已悉矣【悉謂盡其力】古者公田為居【八家共居】井竈蔥韭盡取焉【損其廬家作一園以種五菜外種楸桑以備養生送死穀梁傳】季康子欲以田賦【杜預曰丘賦之法因其田財通出馬一疋牛三頭今欲別其田及家財各為一賦故言田賦韋昭曰田賦以田出賦也賈侍中云田一井也周制十六井賦戎馬一疋牛三頭一井之田而欲出十六井之賦也昭謂此數甚多似非也下雖云收田一井凡數從夫井起故云井耳】使冉有訪於仲尼仲尼曰丘不識也三發【杜曰三發問】卒曰【杜曰卒終也】子為國老待子而行若之何子之不言也仲尼不對【杜曰不公荅】而私於冉有曰【按此下以外傳補】求來汝不聞乎先王制土藉田以力而砥其遠邇【韋曰制土制其肥磽以為差也藉田謂稅也以力謂三十者受田百畝二十者受五十畝六十還田也砥平也平遠近遠近有差也周禮近郊十一遠郊二十而三甸稍縣都皆無過十二也】賦里以入而量其有無【里廛也謂商賈所居之區域也以入計其利入多少而量其財業有無以為差也周禮國宅無征園廛二十而一漆林二十而五】任力以夫而議其老幼【力謂徭役以夫以夫家為數也議其老幼則有復除也】於是乎有鰥寡孤疾【又議其鰥寡孤疾不役也疾癡疾也】有軍旅之出則徵之無則已【徵徵鰥寡孤疾之賦也已止也無軍旅之出則止不賦】其歲收田一井出稷米秉芻缶米不是過也【其歲有軍旅之歲也缶也聘禮曰十六斗曰一十曰秉秉一百六十斗也四秉曰筥十筥曰稷稷六百四十斛也】先王以為足【足供用也】君子之行也【杜曰行政事按此下從左傳】施取其厚事舉其中斂從其薄如是則以丘亦足矣【杜曰丘十六井出戎馬一疋牛三頭是賦之常法】若不度於禮而貪冒無厭則雖以田賦將又不足且子季孫若欲行而法則周公之典在【國語云則有周公之藉矣韋曰藉田之法周公所制】若欲苟而行又何訪焉【杜曰為明年用田賦傳左傳國語通修】哀公十有二年春用田賦【直書之者以示改法重賦春秋】譏始用田賦也【田謂一井之田賦斂取其財物也言用田賦者若今漢家斂民錢以田為率矣不言井者城郭里巷亦有井嫌悉賦之禮稅民公田不過什一軍賦十井不過一乘言公外慕彊吳空盡國儲故復用田賦過什一公羊傳】古者公田什一用田賦非正也【古者五口之家受田百畝為官】

【田十畝是為私得其什而官稅其一故曰什一周謂之徹殷謂之助夏謂之貢其實一也皆通法也今乃棄中平之法而財田並賦言其賦民甚矣穀梁傳】哀公問於有若曰年饑用不

足如之何【稱有若者君臣之辭用謂國用公意蓋欲加賦以足用也】有若對曰盍徹乎【徹通也均也周制一夫受田百畝而與同溝共井之人通力合作計畝均收大率民得其九公取其一故謂之徹魯自宣公稅畝又逐畝什取其一則為什而取二矣故有若請但專行徹法欲公節用以厚民也】曰二吾猶不足如之何其徹也【二即所謂什二也公意有若不喻其旨故言此以示加賦之意】對曰百姓足君孰與不足百姓不足君孰與足【民富則君不至獨貧民貧則君不能獨富有若深言君民一體之意以止公之厚斂為人生者所宜深念也楊氏曰仁政必自經界始經界正而後井地均穀祿平而軍國之需皆量是以為出焉故一徹而百度舉矣上下寧憂不足乎以二猶不足而教之徹疑若迂矣然什一天下之中正多則桀寡則貉不可改也後世不究其本而唯末之圖故征斂無藝費出無經而上下困矣又惡知盍徹之當務而不為迂乎 論語】孟子曰耕者助而不稅則天下之農皆悅而願耕於其野矣【但使出力以助耕公田而不稅其私田也 孟子】白圭曰吾欲二十而取一何如【白圭名丹周人也欲更稅法二十分而取其一 分林氏曰按史記白圭能薄飲食忍嗜欲與童僕同苦樂樂觀時變人棄我取人取我與以此居積致富其為此論蓋欲以其術施之國家也】孟子曰子之道貉道也【貉北方夷狄之國名也】萬室之國一人陶則可乎曰不可器不足用也【孟子設喻以詰圭而圭亦知其不可也】曰夫貉五穀不生惟黍生之無城郭宮室宗廟祭祀之禮無諸侯幣帛饗殮無百官有司故二十取一而足也【北方地寒不生五穀黍早 故生之饗殮以飲食饋客之禮也】今居中國去人倫無君子如之何其可也【無君臣祭祀交際之禮是去人倫無百官有司是無君子】陶以寡且不可以為國況無君子乎【因其辭而折之】欲輕之於堯舜之道者大貉小貉也欲重之於堯舜之道者大桀小桀也【什一而稅堯舜之道也多則桀寡則貉今欲輕重之則是小貉小桀而已 同上】

禹別九州隨山濬川任土作貢【書序 蔡氏曰上之所取謂之賦下之所供謂之貢是篇有貢有賦而獨以貢名篇者孟子曰夏后氏五十而貢貢者校數歲之中以為常則貢又夏后氏田賦之總名】冀州厥土惟白壤【漢孔氏曰無塊曰壤顏氏曰柔土曰壤夏氏曰周官大司徒辨十有二壤之物而知其種以教稼穡樹藝以土均之法辨五物九等制天下之地征則夫教民樹藝與因地制貢固不可不先於辨土也然辨土之宜有二白以辨其色壤以辨其性也益草人糞壤之法駢剛用牛赤緹用羊墳壤用麋渴澤用鹿糞治田疇各因色性而辨其所當用也曾氏曰冀州之土豈皆白壤云然者土會之法從其多者論也】厥賦惟上上錯厥田惟中中【賦田所出穀米兵車之類錯雜也賦第一等而錯出第二等也田第五等也賦高于田四等者地廣而人稠也林氏曰冀州先賦後田者冀王畿之地天子所自治併與場圃園田漆林之類而征之如周官載師所載賦非盡出於田也故以賦屬于厥土之下餘州皆田之賦也故先田而後賦又按九等之賦皆每州歲入總數以九州多寡相較而為九等非以是等田而責其出是等賦也冀獨不言貢筐者冀天子封內之地無所事於貢筐也】兗州厥土黑墳【墳土脉墳起也如左氏所謂祭之地地墳是也】厥田惟中下厥賦貞作十有三載乃同【田第六等賦第九等貞正也兗賦最薄言君天下者以薄賦為正也作十有三載乃同者兗當河下流之衝水激而湍悍地平而土疎被害尤劇今水患雖平而卑濕沮洳未必盡去土曠人稀生理鮮少必作治十有三載然後賦法同於他州此為田賦而言故其文屬於厥賦之下先儒以為禹治水所歷之年且謂此州治水最在後畢州為第九成功因以上文厥賦貞者謂賦亦第九與州正為相當殊無意義其說非是】青州厥土白墳海濱廣斥【濱涯也海涯之地廣漠

而斥鹵許慎曰東方謂之斥西方謂之鹵斥鹵鹹地可煮為鹽者也】厥田惟上下厥賦中上【田第三賦第四也】徐州厥土赤埴墳【土黏曰埴埴膩也黏泥如脂之膩也周有傳埴之工老氏言埴埴以為器惟土惟黏膩細密故可搏可埴也】厥田惟上中厥賦中中【田第二等賦第五等也】揚州厥土惟塗泥【塗泥水泉濕也下地多水其土淖】厥田惟下下厥賦下上上錯【田第九等賦第七等雜出第六等也言下上上錯者以本設賦九等分為三品下上與中下異品故變文言下上上錯也】荊州厥土惟塗泥厥田惟下中厥賦上下【荊州之土與揚州同故田比揚只加一等而賦為第三等者地潤而人工修也】豫州厥土惟壤下土墳壚【土不言色者其色雜也壚疏也顏氏曰玄而疏者謂之壚其土有高下之不同故別言之】厥田惟中上厥賦錯上中【田第四等賦第二等雜出第一等也】梁州厥土青黎【黎黑也】厥田惟下上厥賦下中三錯【田第七等賦第八等雜出第七等第九等也按賦雜出他等者或以為歲有豐凶或以為戶有增減皆非也意者地力有上下年分不齊如周官田一易再易之類故賦之等第亦有上下年分冀之正賦第一等而間歲第二等也揚之正賦第七等而間歲第六等也豫之正賦第二等而間歲第一等也梁之正賦第八等而間歲出第七等第九等也當時必有條目詳具今不存矣書之所載特凡例若歲之豐凶戶之增減則九州皆然何獨於冀揚豫梁四州言哉】雍州厥土惟黃壤【黃者土之正色林氏曰物得其常性者最貴雍州之土最貴故其田非他州所及】厥田惟上上厥賦中下【田第一等而賦第六等者地狹而人功少也】六府孔修庶土交正底慎財賦咸則三壤成賦中邦【孔大也水火金木土穀皆大修治也土者財之自生謂之庶土則非特穀土也庶土有等當以肥瘠高下名物交相正焉以任土事底致也因庶土所出之財而致謹其財賦之入如周大司徒以土宜之法辨十有二土之名物以任土事之類咸皆也則品節之也九州穀土又皆品節之以上中下三等如周大司徒辨十有二壤之名物以教稼穡之類中邦中國也盖土賦或及于四夷而田賦則止于中國而已故曰成賦中邦】五百里甸服百里賦納總二百里納銍三百里納秸服四百里粟五百里米【甸服畿內之地也甸田服事也以皆田賦之事故謂之甸服五百里者王城之外四面皆五百里也禾全本曰總刈禾曰銍半藁也半藁去皮曰秸謂之服者三百里內去王城為近非惟納總銍秸而又使之服輸將之事也獨于秸言之者總前二者而言也粟穀也內百里為最近故并禾本總賦之外百里次之只刈禾半藁納也外百里又次之去藁麤皮納也外百里為遠去其穗而納穀外百里為尤遠去其穀而納米盖量其地之遠近而為納賦之輕重精麤也此分甸服五百里而為五等者也 已上賦法】冀州島夷皮服【海曲曰島海島之夷以皮服來貢也】夾右碣石入于河【碣石地志在北平郡驪城縣西南河口之地今平州之南也冀州北方貢賦之來自北海入河南向西轉而碣石在其右轉屈之間故曰夾右也程氏曰冀為帝都東西南三面距河他州貢賦皆以達河為至故此三方亦不必書而其北境則漢遼東西右北平漁陽上谷之地其水如遼濡滹易皆中高不與河通故必自北海然後能達河也】兗州厥貢漆絲厥篚織文【貢者下獻其土所有于上也兗地宜漆宜桑故貢漆絲也篚竹器篚屬也古者幣帛之屬則盛之以筐篚而貢焉經曰筐厥玄黃是也織文者織而有文錦綺之屬也以非一色故以織文總之林氏曰有貢又有篚者所貢之物入于篚也】浮于濟漯達于河【舟行水曰浮漯者河之支流也兗之貢賦浮濟浮漯以達于河也帝都冀州三面距河達河則達帝都矣又按地志曰漯水出東郡東武陽至千乘入海程氏以為此乃漢河與漯殊異然亦不能明言漯河所在未詳其地也】青州厥貢鹽絺海物惟錯岱畎絲枲鉛松怪石萊夷作牧厥篚檿絲【鹽斥地所出絺細葛也錯雜也海物非一種故曰錯林氏曰既

總謂之海物則固非一物矣此與揚州齒革羽毛惟木文勢正同錯蓋別為一物如錫貢磬錯之錯理或然也畎谷也岱山之谷也臬麻也怪石怪異之石也林氏曰怪石之貢誠為可疑意其必須以為器用之飾而有不可闕者非特貢其怪異之石以為玩好也萊夷顏師古曰萊山之夷齊有萊侯萊人即今萊州之地作牧者言可牧放夷人以畜牧為生也檿山桑也山桑之絲其鞞中琴瑟之弦蘇氏曰惟東萊為有此絲以之為繒其堅韌異常萊人謂之山繭】浮于汶達于濟【汶水出泰山郡萊蕪縣原山今襲慶府萊蕪縣也西南入濟在今鄆州中都縣也蓋淄水出萊蕪原山之陰東北而入海汶水出萊蕪原山之陽西南而入濟不言達河者因于兗也】徐州厥貢惟土五色羽畎夏翟嶧陽 桐泗濱浮磬淮夷蠙珠暨魚厥篚玄纁綺【徐州之土雖赤而五色之土亦間有之故制以為貢周書作雒曰諸侯受命于周乃建大社于國中其壇東青土南赤土西白土北驪土中央豐以黃土將建諸侯鑿其方取面之土苞以黃土苴以白茅以為土封故曰受削土于周室此貢土五色意亦為是用也羽畎羽山之谷也夏翟雉具五色其羽中旌旄者也染人之職秋染夏鄭氏曰染夏者染五色也林氏曰古之車服器用以雉為飾者多不但旌旄也曾氏曰山雉具五色出于羽山之畎則其名山以羽者以此歟嶧山名地志云東海郡西有葛嶧山古文以為嶧山下邳今淮陽軍下邳縣也陽者山南也桐特生之桐其材中琴瑟詩曰梧桐生矣于彼朝陽蓋草木之生以向日為貴也泗水名出魯國卞縣桃墟西北陪尾山源有泉四四泉俱導因以為名西南過彭城又東南過下邳入淮卞縣今襲慶府泗水縣也濱水旁也浮磬石露水濱若浮于水然或曰非也泗濱非必水中泗水之旁近浮者石浮生土中不根著者也今下邳有石磬山或以為古取磬之地曾氏曰不謂之石者成磬而後貢也淮夷淮之夷也蠙蚌之別名也暨及也珠為服飾魚用祭祀今濠泗楚皆貢淮白魚亦古之遺制歟夏翟之出于羽畎 桐之生于嶧陽浮磬之出于泗濱珠魚之出于淮夷各有所產之地非他處所有故詳其地而使貢也玄赤黑色幣也武成曰篚厥玄黃纁綺皆繒也禮曰及期而大祥素縞麻衣中月而禫禫而纁記曰有虞氏縞衣而養老則知纁綺皆繒之名也曾氏曰玄赤而有黑色以之為袞所以祭也以之為端所以齊也以之為冠以為首服也黑經白緯曰纁纁也縞也皆去凶即吉之所服也】浮于淮泗達于河【許慎曰汴水受陳留浚義陰溝至蒙為澠水東入于泗則淮泗之可以達于河者以澠至于泗也許慎又曰泗受沛水東入淮蓋泗水至大野而合沛然則泗之上源自沛亦可以通河也】揚州厥貢惟金三品瑤琨篠簜齒革羽毛惟木島夷卉服厥篚織貝厥包橘柚錫貢【三品金銀銅也瑤琨玉石名詩曰何以舟之惟玉及瑤琨說文云石之美似玉者取之可以為禮器篠之材中于矢之筴簜之材中于樂之管簜亦可為符節周官掌節有英簜象有齒犀兕有革鳥有羽獸有毛木梗梓豫章之屬齒革可以成車甲羽毛可以為旌旄木可以備棟宇器械之用也島夷東南海島之島卉草也葛越木綿之屬織貝錦名織為貝文詩曰貝錦是也今南夷木綿之精好者亦謂之吉貝海島之夷以卉服來貢而織貝之精者則入篚焉包裹也小曰橘大曰柚錫者必待錫命而後貢非歲貢之常也張氏曰必錫命乃貢者供祭祀燕賓客則詔之口腹之欲則難于出令也】沿于江海達于淮泗【順流而下曰沿沿江入海自海而入淮泗不言達于河者因于徐也禹時江淮未通故沿于海至吳始開邗溝隋人廣之而江淮舟船始通也孟子言排淮泗而注之江記者之誤也】荊州厥貢羽毛齒革惟金三品柁榦栝柏礪砥磬丹惟箇籛栝三邦底貢厥名包匭菁茅厥篚玄纁璣組九江納錫大龜【荊之貢與揚州大抵多同然荊先言羽毛者漢孔氏所謂善者為先也按職方氏揚州其利金錫荊州其利丹銀齒革則荊揚所產不無優劣矣柁栝柏三木名也柁木似樗而可謂弓幹栝木栝葉松身礪砥皆磨石砥以細密

為名礪以麤糲為稱磬者中矢鏃之用肅慎氏貢石磬者是也丹丹砂也籥簞竹名栝木名皆可以為矢董安于之治晉陽也公宮之垣皆以荻蒿苦楚廩之其高丈餘趙襄子發而試之其堅則籥簞不能過也則籥簞盖竹之堅者其材中矢之筈栝肅慎氏貢栝矢者是也三邦未詳其地底致也致貢籥簞栝之有名者也匭匣也菁茅有刺而三脊所以供祭祀縮酒之用既包而又匣之所以示敬也齊桓公責楚貢包茅不入王祭不供無以縮酒又管子云江淮之間一茅而三脊名曰菁茅菁茅一物也孔氏謂菁以為菹者非也今辰州麻陽縣包茅山出包茅有刺而三脊纁周禮染人夏纁玄纁絳色幣也璣珠不圓者組綬類大龜尺有二寸所謂國之守龜非可常得故不為常貢若偶得之則使之納錫于上謂之納錫者下與上之辭重其事也】浮于江沱潛漢逾于洛至于南河【江沱潛漢其水道之出入不可詳而大勢則自江沱而入潛漢也逾越也漢與洛不通故舍舟而陸以達于洛自洛而至于南河也程氏曰不逕浮江漢兼用沱潛者隨其貢物所出之便或由經流或循枝????期于便事而已】豫州厥貢漆臬絺紵厥篚織纊錫貢磬錯【杜氏曰周官載師漆林之征二十有五周以為征而此乃貢者盖豫州在周為畿內故載師掌其征而不制貢禹時豫在畿外故有貢也推此義則冀不言貢者可知顏師古曰織紵以為布及練然經但言貢臬與紵成布與未成布不可詳也纊細綿也磬錯治磬之錯也非所常用之物故非常貢必待錫命而後納也與揚州橘柚同然揚州先言橘柚而此先言錫貢者橘柚言包則於厥篚之文無嫌故言錫貢在後磬錯則與厥篚之文嫌于相屬故言錫貢在前盖立言之法也】浮于洛達于河【豫州去帝都最近豫之東境徑自入河豫之西境則浮于洛而後至河也】梁州厥貢璆鐵銀鏤磬磬熊羆狐貉織皮【璆玉磬鐵柔鐵也鏤剛鐵可以刻鏤者也磬石磬也言鐵而先于銀者鐵之利多于銀也後世蜀之卓氏程氏以鐵冶富擬封君則梁之利尤在于鐵也織皮者梁州之地山林為多獸之所走熊羆狐貉四獸之皮製之可以為裘其毳毛織之可以為罽也林氏曰徐州貢浮磬此州既貢玉磬又貢石磬豫州又貢磬錯以此觀之則知當時樂器磬最為重豈非以其聲角而在清濁大小之間最難得其和者哉】西傾因桓是來浮于潛逾于沔入于渭亂于河【西傾山名地志在隴西郡臨洮縣西今洮州臨潭縣西南桓水名水經曰西傾之南桓水出焉蘇氏曰漢始出為漾東南流為沔至漢中東行為漢沔酈道元曰自西傾而至葭萌浮于西漢西漢即潛水也自西漢溯流而屆于晉壽界阻棧枝津南歷岡北迤邐接漢沔歷漢川至于褒水逾褒而暨于衙嶺之南溪灌于斜川屆于武功而北以入于渭漢武帝時人有上書欲通褒斜道及漕事下張湯問之云褒水通沔斜水通渭皆可以漕從南陽上沔入褒褒絕水至斜間百餘里以車轉從斜下渭如此則漢中穀可致經言沔渭而不言褒斜者因大以見小也褒斜之間絕水百餘里故曰逾然于經文則當曰逾于渭今日逾于沔此又未可曉也絕河而渡曰亂】雍州厥貢惟球琳琅玕【球琳美玉也琅玕石之似珠者爾雅曰西北之美者有崐崙虛之球琳琅玕今南海有青琅玕珊瑚屬也】浮于積石至于龍門西河會于渭汭【積石地志在金城郡河關縣西南羌中今鄯州龍支縣界也龍門山地志在馮翊夏陽縣今河中府龍門縣也西河冀之西河也雍之貢道有二其東北境則自積石至于西河其西南境則會于渭汭言渭汭不言河者蒙梁州之文也他州貢賦亦當不止一道發此例以互見耳】織皮崐崙析支渠搜西戎即敘【崐崙即河源所出在臨羌析支在河關西千餘里渠搜水經曰河從朔方東轉經渠搜縣故城北盖近朔方之地也三國皆貢皮衣故以織皮冠之皆西方戎落故以西戎總之即就也雍州水土既平而餘功及于西戎故附于末已上貢法及貢道禹貢】

右虞夏賦貢

古者【謂殷時】市廛而不稅【廛市物邸舍稅其舍不稅其物】關譏而不征【譏譏異服譏異言征亦稅也周禮國凶札則無門關之征猶譏也】林麓川澤以時入而不禁【麓山足也王制此條殷賦法】大司徒以土均之法辨五物九等制天下之地征以作民職以令地貢以斂財賦以均齊天下之政【均平也五物五地之物也九等駢剛赤緹之屬征稅也民職九職也地貢貢地所生謂九穀財謂泉穀賦謂九賦及軍賦地官】土均掌平土地之政以均地守以均地事【政讀為征所平之稅邦國都鄙也地守虞衡之屬地事農圃之職同上

此二條財賦通制】大宰以九賦斂財賄一曰邦中之賦二曰四郊之賦三曰邦甸之賦四曰家削之賦五曰邦縣之賦六曰邦都之賦七曰關市之賦八曰山澤之賦九曰幣餘之賦【財泉穀也鄭司農云邦中之賦二十而稅一各有差也幣餘百工之餘玄謂賦口率出泉也今之筭錢民或謂之賦此其舊名與鄉大夫以歲時登其夫家之衆寡辨其可任者國中自七尺以及六十野自六尺以及六十有五皆征之遂師之職亦云以徵其財征皆謂此賦也邦中在城郭者四郊去國百里邦甸二百里家削三百里邦縣四百里邦都五百里此平民也關市山澤謂占會百物幣餘謂占賣國中之斥幣皆未作當增賦者若今賈人倍算矣自邦中以至幣餘各入其所有穀物以當賦泉之數每處為一書所待異也天官此條九等賦法】

載師掌任土之法以物地事授地職而待

其政令【任土者任其力勢所能生育且以制貢賦也物物色之以知其所宜之事而授農牧衡虞使職之】以廛里任國中之地以場圃任園地以宅田土田賈田任近郊之地以官田牛田賞田牧田任遠郊之地以公邑之田任甸地以家邑之田任稍地以小都之田任縣地以大都之田任疆地【注見井田篇】凡任地國宅無征園廛二十而一近郊十一遠郊二十而三甸稍縣都皆無過十二惟其漆林之征二十而五【征稅也鄭司農云任地謂任土地以起稅賦也玄謂國宅凡官所有宮室吏所治者也國稅輕近而重遠近者多役也園廛亦輕之者廛無穀園少利也古之宅必樹而疆場有瓜地官此條任地定賦之法】閭師凡任民任農以耕事貢九穀任圃以樹事貢草木任工以飭材事貢器物任商以市事貢貨賄任牧以畜事貢鳥獸任嬪以女事貢布帛任衡以山事貢其物任虞以澤事貢其物【貢草木謂葵韭果蓏之屬】凡無職者出夫布【獨言無職者掌其九賦同上此任民出賦之法】小司徒乃分地域而辨其守施其職而平其政【分地域謂建邦國造都鄙制鄉遂也辨其守謂衡虞之屬職謂九職政當作征稅也】閭師掌國中及四郊之人民六畜之數以任其力以待其政令以時徵其賦【國中及四郊是所主數六鄉之中自廛里至遠郊也掌六畜數者農事之本也賦謂九賦及九貢】縣師以歲時徵野之賦貢【野謂甸稍縣都也所徵賦貢與閭師同】

遂師入野職野賦于玉府【民所入貨賄以當九職九賦中玉府之用者】

里宰待有司之政令而徵斂其財賦旅師掌聚野之勑粟屋粟間粟【野謂遠郊之外也勑粟民相助作一井之中所出九夫之稅粟也屋粟民有田不耕所罰九夫之稅粟間粟閒民無職事者所出一夫之征粟】載師凡宅不毛者有里布凡田不耕者出屋粟凡民無職事者出夫家之征【鄭司農云宅不毛者謂不樹桑麻也布泉也玄謂宅不毛者罰以一里二十五家之泉空田者罰以三家之稅粟以共吉凶二服及喪器也民有閒無職事者出夫稅家稅也夫稅者百畝之稅家稅者出土徒車輦給繇役】以時徵其賦

司稼巡野觀稼以年之上下出斂法【斂法者豐年從正凶荒則損若今十傷二三實除減半並地官】

司書凡稅斂掌事者受法焉及事成則入要貳焉【法猶數也應當稅者之數成猶畢也天官】

大宰以八則治都鄙五曰賦貢以馭其用【賦口率出泉也貢功也九職之功所稅也同上】大司徒以荒政十有二聚萬民二曰薄征六曰

去幾【去幾去其稅耳地官】均人掌均地政均地守均地職【政讀為征地征謂地守地職之稅也地守衡虞之屬地職農圃之屬】凶札則無財賦不收地守地職不均地政【無財賦恤其乏困也財賦九賦也不收山澤及地稅亦不平計地稅也非凶札之歲當收稅乃均之耳同上】年不順成關梁不租山澤列而不賦【關梁不租此周禮也殷則關恒譏而不征列之言遮列也雖不賦猶為之禁不得非時取也玉藻已上征免之法】

廛人掌斂市歛布總布質布罰布廛布而入於泉府凡屠者斂其皮角筋骨入於玉府肆長斂其總布司市國凶荒札喪則市無征而作布司關司貨賄之出入者掌其治禁與其征廛凡貨不出於關者舉其貨罰其人國凶札則無關門之征【註並見政事下篇

已上關市之賦】委人掌斂野之賦斂薪芻凡疏材木材凡畜聚之物【野謂遠郊以外也所斂野之賦謂野之園圃山澤之賦也凡疏材革木有實者也凡畜聚之物瓜瓠葵芋禦冬之具也野之農賦旅師斂之工商嬪婦遂師以入玉府其牧則遂師又以共野牲】山虞掌山林之政令物為之厲而為之守禁令萬民時斬材有期日春秋之斬木不入禁凡竊木者有刑罰林衡掌巡林麓之禁令而平其守以時計林麓而賞罰之若斬木材則受灋於山虞而掌其政令川衡掌巡川澤之禁令而平其守以時舍其守犯禁者執而誅罰之澤虞掌國澤之政令為之厲禁使其地之人守其財物以時入之於玉府頒其餘於萬民【並地官】

人凡者掌其政令凡征入于玉府【天官注並見政事下篇】什人掌金玉錫石之地而為之厲禁以守之【錫釧也】若以時取之則物其地圖而授之【物地占其形色知鹹淡也授之教取者之處】巡其禁令【行其禁明其令地官】職金掌凡金玉錫石丹青之戒令【青空青也】受其入征者辨其物之惡與其數量楬而璽之入其金錫於為兵器之府【為兵器者攻金之工六也守藏者玉府內府也鄭司農云受其入征者謂主受采金玉錫石丹青者之租稅也璽而楬之者楬書其數量以著其物也璽者印也既楬書掄其數量又以印封之今時之書有所表識謂之楬櫟】入其要【要凡數也入之於大府秋官】角人掌以時徵齒角凡骨物於山澤之農以當邦賦之政令【山澤出齒角骨物大者犀象其小者麋鹿】以度量受之以共財用【骨入漆浣者受之以量其餘以度度所中】羽人掌以時徵羽翮之政於山澤之農以當邦賦之政令【翮羽本】凡受羽十羽為審百羽為十為縛【審搏縛羽數束名也爾雅曰一羽謂之箴十羽為之縛百羽為之緝其名音相近也一羽則有名蓋失之矣】掌葛掌以時徵絺綌之材於山農凡葛征徵草貢之

材於澤農以當邦賦之政令【草貢出澤蒺紵之屬可緝績者】以權度受之【以知輕重長短也故書受或為授杜子春云當為受】掌染草掌以春秋斂染草之物【染草茅蒐橐蘆豕首紫荊之屬】以權量受之以待時而頒之【謹量以知輕重多少時染夏之時】掌炭掌灰物炭物之徵令以時入之【灰炭皆山澤之農所出也灰給澣練炭之所共多】以權量受之

以共邦之用凡炭灰之事 掌荼掌以時聚荼以共喪事【共喪事者以著物也既夕禮曰茵著用荼】徵野疏材之物以待邦事凡畜聚之物【荼茅蒨疏材之類也因使掌焉徵者徵于山澤入于委人】 掌蜃掌斂互物蜃物【互物蚌蛤之屬 並地官】 孟冬乃命水虞漁師收水泉池澤之賦毋或敢侵削衆庶兆民以為天子取怨於下其有若此者行罪無赦【因盛德在水收其稅月令 已上山澤之賦】

右殷周賦法 古之為市者以其所有易其所無者有司者治之耳有賤丈夫焉必求龍斷而登之以左右望而罔市利人皆以為賤故從而征之征商自此賤丈夫始矣【治之謂治其爭訟左右望者欲得此而又取彼也罔謂罔羅取之也從而征之謂人惡其專利故就征其稅後世緣此遂征商人也 孟子】 文王之治岐也關市譏而不征澤梁無禁【關謂道路之關市謂都邑之市譏察也征稅也關市之吏察異服異言之人而不征商賈之稅也澤謂瀦水梁謂魚梁與民同利不設禁也 同上】 周公曰繼自今嗣王以萬民惟正之供【無逸】

叔向曰齊其何如晏子曰此季世也民參其力二入於公而衣食其一【言公重賦斂 昭三年左氏傳】 齊侯疾不瘳欲誅祝史晏子曰不可為也【言非誅祝史所能治】 山林之木衡鹿守之澤之萑蒲舟鮫守之藪之薪蒸虞候守之海之鹽蜃祈望守之【衡鹿舟鮫虞候祈望皆官名也言公專守山澤之利不與民共】 縣鄙之人入從其政偪介之關暴征其私【介隔也迫近國都之關言邊鄙既入服政役又為近關所征稅枉暴奪其私物】 承嗣大夫強易其賄【承嗣大夫世位者】 布常無藝【藝法制也言布政無法制】 徵斂無度宮室日更淫樂不違【違去也】 內寵之妾肆奪於市【肆放也】 外寵之臣僭令於鄙【詐為教令於邊鄙】 私欲養求不給則應【養長也所求不給則應之以罪】 民人苦病夫婦皆詛祝有益也詛亦有損聊攝以東【聊攝齊西界也平原聊城縣東北有攝城也】 姑尤以西【姑尤齊東界也姑水尤水皆在城陽郡東南入海】 其為人也多矣雖其善祝豈能勝億兆人之詛【萬萬曰億萬億曰兆】 君若欲誅於祝史修德而後可公說使有司寬政毀關去禁薄斂已責【除逋責 昭二十一年左氏傳】 孟子曰有布縷之征粟米之征力役之征君子用其一緩其二用其二而民有殍用其三而父子離【征賦之法歲有常數然布縷取之于夏粟米取之於秋力役取之于冬當各以其時若并取之則民力有所不堪矣今兩稅三限之法亦此意也尹氏曰言民為邦本取之無度則其國危矣】 又曰市廛而不征法而不廛則天下之商皆悅而願藏於其市矣關譏而不征則天下之旅皆悅而願出於其路矣廛無夫里之布則天下之民皆悅而願為之氓矣【周禮宅不毛者有里布民無職事者出夫家之征鄭氏謂宅不種桑麻者罰之使出一里二十五家之布民無常職者罰之使出一夫百畝之稅一家力役之征也今戰國時一切取之市宅之民已賦其廛又令出此夫里之布非先王之法也氓民也 孟子】 戴盈之曰什一去關市之征今茲未能請輕之以待來年然後已何如【盈之亦宋大夫也什一井田之法也關市之征商賈之稅也已止也】 孟子曰如知其非義斯速已矣何待來年【同上】

大宰以九貢致邦國之用一曰祀貢二曰嬪貢三曰器貢四曰幣貢五曰材貢六曰貨貢七曰服貢八曰旂貢九曰物貢【嬪故書作賓鄭司農云祀貢犧牲包茅之屬賓貢皮帛之屬器貢宗廟之器幣貢繡帛材貢木材也貨貢珠貝自然之物也服貢祭服旂貢羽物物貢九州之外各以其所貴為摯肅慎氏貢楛矢之屬是也玄謂嬪貢絲枲器貢銀鐵石磬丹漆也幣貢玉馬

皮帛也材貢晇幹栝柏篠簜也貨貢金玉龜貝也服貢絺紵也旂讀如囿游之游旂貢燕好珠璣琅玕也物貢襍物魚鹽橘柚 天官】大行人邦畿方千里其外方五百里謂之侯服歲壹見其貢祀物又其外方五百里謂之甸服二歲壹見其貢嬪物又其外方五百里謂之男服三歲壹見其貢器物又其外方五百里謂之采服四歲壹見其貢服物又其外方五百里謂之衛服五歲壹見其貢材物又其外方五百里謂之要服六歲壹見其貢貨物九州之外謂之蕃國世壹見各以其所貴寶為摯【秋官注見賓禮覲禮】小行人令諸侯春入貢【貢六服所貢也同上】大司馬施貢分職以任邦國【職謂職稅也任猶事也事以其力之所堪 夏官】

職方氏凡邦國制其貢各以其所有【國之地物所有 同上】

土均掌平土地之政以均地貢【地貢諸侯之九貢地官】掌貨賄【職闕地官】

內府凡四方之幣獻之金玉齒革兵器凡良貨賄入焉【諸侯朝聘所獻國珍 天官】山師掌山林之名辨其物與其利害而頒之於邦國使致其珍異之物【山林之名與物若岱畎絲枲嶧陽孤桐矣利其中人用者害毒物及螫噬之蟲獸 夏官】川師掌川澤之名辨其物與其利害而頒之於邦國使致其珍異之物【川澤之名與物若泗濱浮磬淮夷蠙珠暨魚澤之萑蒲 同上】懷方氏致方貢致遠物【遠物九州之外無貢法而至者 同上】

右貢法 文王不敢盤于遊田以庶邦惟正之供【遊田國有常制文王不敢盤遊無度上不濫費故下無過取而能以庶邦惟正之供於常貢正數之外無橫斂也言庶邦則民可知文王為西伯所統庶邦皆有常供春秋貢于霸主者班班可見至唐猶有送使之制則諸侯之供方伯舊矣 無逸】祭公謀父曰先王之制邦內甸服邦外侯服侯衛賓服蠻夷要服戎狄荒服【注見封建】甸服者祭【供日祭也此采地之君其見無數】侯服者祀【供月祀也堯舜及周侯服皆歲見】賓服者享【供時享也享獻也周禮甸圻二歲而見男圻三歲而見采圻四歲而見衛圻五歲而見其見也皆以所貢助祭于廟孝經所謂四海之內各以其職來祭】要服者貢【供歲貢也要服六歲一見】荒服者王【王王事天子也周禮九州之外謂之蕃國世一見各以其所貴寶為摯詩曰自彼氐羌莫敢不來王】日祭【日祭祭于祖考謂上食也近漢亦然】月祀【月祀於曾高】時享【時享於二祧】歲貢【歲貢於壇墠】終王【終謂垂終也朝嗣王及即位而來見】先王之訓也【國語周語】惟克商遂通道于九夷八蠻西旅底貢厥獒大保乃作旅獒用訓于王【九夷八蠻多之稱也職方言四夷八蠻爾雅言九夷八蠻但言其非一而已武王克商之後威德廣被九州之外蠻夷戎狄莫不梯山航海而至曰通道云者蓋蠻夷來王則道路自通非武王有意于開四夷而斥大境土也西旅西方蠻夷國名犬高四尺曰獒按說文曰犬知人心可使者大保召公奭也此旅獒之本序】曰明王慎德四夷咸賓無有遠邇畢獻方物惟服食器用【方物方土所生之物明王謹德四夷咸賓其所貢獻惟服食器用而已言無異物也】王乃昭德之致于異姓之邦無替厥服分寶玉于伯叔之國時庸展親人不易物惟德其物【德之致謂上文所貢方物也昭示方物于異姓之諸侯使之無廢其職分寶玉于同姓之諸侯使之益厚其親如分陳以肅慎氏之矢分魯以夏后氏之璜之類王者以其德所致方物分賜諸侯故諸侯亦不敢輕易其物而以德視其物也 旅獒】昔武王克商通道于九夷百蠻【九夷東夷九國百蠻蠻有百邑也】使各以其方賄來貢【方賄各以所居之方所出貨賄為貢也】使無忘職業於是肅慎氏貢楛矢石砮其長尺有咫【肅慎北夷之國傳曰肅慎燕亳吾北土也楛木也砮鏃也以石為之八寸曰咫】先王欲昭其令德之致遠也以示後之人使永監焉【監視也】故銘其栝曰肅慎氏之貢矢【

國語魯語】齊桓公以諸侯之師伐楚管仲曰爾貢包茅不入王祭不供無以縮酒寡人是徵【包裹束也茅菁茅也束茅而灌之以酒為縮酒尚書包匭菁茅茅之為異未審】對曰貢之不入寡君之罪也敢不共給【僖四年左氏傳】

齊侯脩禮於諸侯諸侯官受方物【諸侯官司各于齊受其方所貢天子之物

僖七 years 左氏傳】同盟於平丘子產爭承【承貢賦之次】曰昔天子班貢輕重以列【列位也】列尊貢重周之制也【公侯地廣故所貢者多】卑而貢重者甸服也【甸服謂天子畿內共職貢者】鄭伯男也而使從公侯之貢【言鄭國在甸服外爵列伯子男不應出公侯之貢】懼弗給也敢以為請諸侯靖兵好以為事【靖息也】行理之命【行理使人通聘問者】無月不至貢之無藝【藝法制】小國有闕所以得罪也諸侯脩盟存小國也貢獻無極亡可待也存亡之制將在今矣自日中以爭至于昏晉人許之【昭十三年左氏傳】

天子之六府曰司土司木司水司草司器司貨典司六職【府主藏六物之稅者此亦殷時制也周則皆屬司徒司土土均也司木山虞也司水川衡也司草稻人也司器角人也司貨什人也曲禮】冢宰制國用必於歲之杪五穀皆入然後制國用【制國用如今度支經用杪末也】用地小大視年之豐耗【小國大國豐凶之年各以歲之收入制其用多少多不過禮少有所殺】以三十年之通制國用量入以為出【通三十年之率當有九年之蓄出謂所當給者】祭用數之仂【算今年歲一經用之數用其什一】喪用三年之仂【喪大事用三歲之什一】喪祭用不足曰暴有餘曰浩【暴猶耗也浩猶饒也】祭豐年不奢凶年不儉【常用數之仂】國無九年之蓄曰不足無六年之蓄曰急無三年之蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色然後天子食日舉以樂【菜色食菜之色民無食菜之飢色天子乃日舉樂以食王制】大宰以九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂疏材九曰閒民無常職轉移職事【注見政事上篇】以九賦斂財賄【詳見上賦法章】以九式均節財用一曰祭祀之式二曰賓客之式三曰喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好用之式【式謂用財之節度荒凶年也羞飲食之物也工作器物者幣帛所以贈勞賓客者芻秣養牛馬禾穀也鄭司農云匪分也頒讀為班布之班謂班賜也玄謂王所分賜羣臣也好用燕好所賜予】以九貢致邦國之用【詳見上章】小宰執邦之九貢九賦九式之貳以均財節邦用以灋掌祭祀朝覲會同賓客之戒具軍旅田役喪荒亦如之【法謂其禮法也戒具戒官有事者所當共】七事者令百官府共其財用治其施舍聽其治訟【七事謂先四如之者三也施舍不給役者】宰夫掌治灋以攷百官府羣都縣鄙之治乘其財用之出入凡失財用物辟名者以官刑詔冢宰而誅之其足用長財善物者賞之【羣都諸采邑也六遂五百家為鄙五鄙為縣言縣鄙而六鄉州黨亦存焉乘猶計也財泉穀也用貨賄也物畜獸也辟名詐為書以空作見文書與實不相應也官刑在司寇五刑第四者】大府掌九貢九賦九功之貳以受其貨賄之入頒其貨於受藏之府頒其賄於受用之府【九功謂九職也受藏之府若內府也受用之府若職內也凡貨賄皆藏以給用耳良者以給王之用其餘以給國之用或言受藏或言受用又雜言貨賄皆互文】凡官府都鄙之吏及執事者受財用焉凡頒財以式法授之關市之賦以待王之膳服邦中之賦以待賓客四郊之賦以待稍秣家削之賦以待匪頒邦甸之賦以待工事邦縣之賦以待幣帛邦都之賦以待祭祀山澤之賦以待

喪紀幣餘之賦以待賜予【待猶給也此九賦之財給九式者膳服即羞服也稍秣即芻秣也謂之稍稍用之物也喪紀即喪荒也賜予即好用也鄭司農云幣餘使者有餘來還也玄謂幣餘占賣國之斥幣】凡邦國之貢以待弔用【此九貢之財所給也給弔用給凶事之五禮】凡萬民之貢以充府庫【此九職之財充猶足】凡式貢之餘財以共玩好之用【謂先給九式及弔用足府庫而有餘則乃可以共玩好明玩好非治國之用言式言貢互文】凡邦之賦用取具焉【賦用用賦】歲終則以貨賄之入出會之玉府掌王之金玉玩好兵器凡良貨賄之藏【良善也凡此皆式貢之餘財所作其不良又有受而藏之者】凡王之獻金玉兵器文織良貨賄之物受而藏之【謂百工為王所作可以獻遺諸侯古者致物于人尊之則曰獻通行曰饋春秋曰齊侯來獻戎捷尊魯也文織畫及繡錦】凡王之好賜共其貨賄內府掌受九貢九賦九功之貨賄良兵良器以待邦之大用【大用朝覲之頒賜】凡四方之幣獻之金玉齒革兵器凡良貨賄入焉【諸侯朝聘所獻國珍】凡適四方使者共其所受之物而奉之【王所以遺諸侯者】凡王及冢宰之好賜予則共之【冢宰待四方賓客之小治或有所善亦賜予之】外府掌邦布之入出以共百物而待邦之用凡有法者【布泉也布讀為宣布之布其藏曰泉其行曰布取名于水泉其流行無不徧入出謂受之復出之共百物者或作之或買之待猶給也有法百官之公田也泉始蓋一品周景王鑄大泉而有二品後數變易不復識本制至漢惟有五銖久行王莽改貨而異作泉布多至十品今存於民間多者有貨布大泉貨泉貨布長二寸五分廣寸首長八分有奇廣八分其圓好徑二分半足枝長八分其右丈曰貨左丈曰布重二十五銖直貨泉二十五大原徑一寸二分重十二銖丈曰大泉直十五貨泉貨泉徑一寸重五銖右丈曰貨左丈曰泉直一也】共王及后世子之衣服之用凡祭祀賓客喪紀會同軍旅共其財用之幣齎賜予之財用【齎行道之財用也聘禮曰問幾月之齎鄭司農云齎或為資今禮家定齎作資玄謂齎資同耳其字以齊次為聲從貝變易古字亦多或】凡邦之小用皆受焉【皆來受】歲終則會唯王及后之服不會司會掌邦之六典八法八則之貳以逆邦國都鄙官府之治【逆受而鉤考之】以九貢之法致邦國之財用以九賦之法令田野之財用以九功之法令民職之財用以九式之法均節邦之財用掌國之官府郊野縣都之百物財用凡在書契版圖者之貳以逆羣吏之治而聽其會計【郊四郊去國百里野甸稍也甸去國二百里稍三百里縣四百里都五百里書謂簿書契其最凡也版戶籍也圖土地形象田地廣狹】以參互考日成以月要考月成以歲會考歲成【參互謂司書之要貳與職內之入職歲之出故書互為巨杜子春讀為參互】以周知四國之治以詔王及冢宰廢置【周猶徧也言四國者本逆邦國之治亦鉤考以告】司書掌邦之六典八法八則九職九正九事邦中之版土地之圖以周知入出百物以敘其財受其幣使入於職幣【九正謂九賦九貢正稅也九事謂九式變言之者重其職明本而掌之非徒相副貳也叙猶比次也謂鉤考其財幣所給及其餘見為之簿書故書受為授鄭司農云授當為受謂受財帛之簿書也玄謂亦受錄其餘幣而為之簿書使之入于職幣幣物當以時用之久藏將朽蠹】凡上之用財用必考於司會【上謂王與冢宰王雖不會亦當知多少而闕之司會以九式均節邦之財用】三歲則大計羣吏之治以知民之財器械之數以知田野夫家六畜之數以知山林川澤之數以逆羣吏之徵令【械猶兵也逆受而鉤考之山林川澤童枯則不稅】凡稅斂掌事者受法焉及事成則入要貳焉【法猶數也應當稅者之數成猶畢也】凡邦治考焉【考其法於司書】職內掌邦之賦入辨其財用之物而執其總以貳官府都鄙之財入之數以逆邦國之賦用【辨財用之物處之使種類相從總謂簿書之種別與大凡官府之有財入若關市之屬】凡受財者

受其貳令而書之【受財受於職內以給公用者貳令謂若今御史所寫下本奏王所可者書之若言某月某日某甲詔書出其物若干給某官某事】及會以逆職歲與官府財用之出【亦參互鉤考之】而敘其財以待邦之移用【亦鉤考今歲中餘見為之簿移用謂轉運給他】職歲掌邦之賦出以貳官府都鄙之財出賜之數以待會計而考之【以貳者亦如職內書其貳令而編存之】凡官府都鄙羣吏之出財用受式法於職歲【百官之公用式法多少職歲掌出之舊用事存焉】凡上之賜予以敘與職幣授之【叙受賜者之尊卑】及會以式法贊逆會【助司會鉤考羣吏之計】職幣掌式法以斂官府都鄙與凡用邦財者之幣【幣謂給公用之餘凡用邦財者謂軍旅】振掌事者之餘財【振猶拊也檢也掌事謂以王命有所作為先言斂幣後言振財互文】皆辨其物而奠其錄以書楬之以詔上之小用賜予【奠定也故書錄為祿杜子春云祿當為錄定其錄籍鄭司農云楬之若今時為書以著其幣】歲終則會其出凡邦之會事以式法贊之【並天官】遺人掌邦之委積以待施惠鄉里之委積以恤民之難阨門關之委積以養老孤郊里之委積以待賓客野鄙之委積以待羈旅縣都之委積以待凶荒【委積者廩人倉人計九穀之數足國用以其餘共之所謂餘法用也職內邦之移用亦如此也皆以餘財共之少曰委多曰積鄉里鄉所居也難阨猶困乏也門關以養老孤人所出入易以取餼廩也羈旅過行寄止者待凶荒謂邦國所當通給者也故書難阨作權阨羈作寄杜子春云權阨當為艱阨寄當為羈】凡委積之事巡而比之以時頒之委人以稍聚待賓客以甸聚待羈旅【聚凡畜聚之物也】凡其余聚以待頒賜【余當為餘聲之誤也餘謂縣都畜聚之物】廩人掌九穀之數以待國之匪頒調賜稍食【匪讀為分分頒謂委人之職諸委積也調賜謂王所賜予給好用之式也稍食祿廩】以歲之上下數邦用以知足否以詔穀用以治年之凶豐【數猶計也】凡萬民之食食者人四鬴上也人三鬴中也人二鬴下也【此皆謂一月食米也六斗四升曰鬴】若食不能人二鬴則令邦移民就穀詔王殺邦用【就穀就都鄙之有者殺猶減也】舍人掌平宮中之政分其財守以法掌其出入【政謂用穀之政也分其財守者計其用穀之數分送宮正內宰使守而頒之也而行出于廩人其有空缺則計之還入】掌米粟之出入辨其物【九穀六米別為書】歲終則會計其政【政用穀之多少】倉人掌粟入之藏【九穀盡藏焉以粟為主】辨九穀之物以待邦用若穀不足則止餘法用有餘則藏之以待凶而頒之【止猶殺也殺餘法用謂道路之委積所以豐優賓客之屬】春人掌共米物【米物言非一米】掌凡米事稟人掌共外內朝冗食者之食【外朝司寇斷獄弊訟之朝也今司徒府中】

【有百官朝會之殿云天子與丞相舊決大事焉是外朝之存者與內朝路門外之朝也冗食者謂留治文書若今尚書之屬諸直上者並地官】酒正掌酒之賜頒皆有法以行之【法尊卑之差】凡有秩酒者以書契授之【鄭司農云有秩酒者給事中予之酒秩常也常受酒者國語曰至于今秩之玄謂所秩者謂老臣王制曰七十不俟朝八十月告存九十日有秩】酒正之出日入其成月入其要小宰聽之【出謂授酒材及用酒之多少也受用酒者日言其計于酒正酒正月盡言于小宰】歲終則會唯王及后之飲酒不會司裘凡邦之皮事掌之歲終則會唯王之裘與其皮事不會掌皮掌秋斂皮冬斂革春獻之【皮革踰歲乾久乃可用獻之獻其良者于王以入司裘給王用】遂以式法頒皮革於百工【式法作物所用多少故事】共其毳毛為氊以待邦事【當用氊則共之毳毛毛細縛者】歲終則會其財賁【財斂財本數及餘見者賁所給予人以物曰賁今時詔書或曰賁計吏鄭司

農云齋或為資】

內宰歲終則會內人之稍食【內人主謂九御】會內宮之財用【計夫人已下所用財】典絲掌絲入而辨其物以其賈楬之【絲入謂九職之嬪婦所貢絲】掌其藏與其出以待興功之時【絲之貢少藏之出之可同官也時者若溫暖宜縑帛清涼宜文繡】頒絲於外內工皆以物授之【外工外嬪婦也內工女御】凡上之賜予亦如之【王以絲物賜人】及獻功則受良功而藏之辨其物而書其數以待有司之政令上之賜予【良當為苦字之誤受其麓鹽之功以給有司之公用其良功者典婦功受之以共王及后之用鄭司農云良功絲功縑帛】凡飾邦器者受文織絲組焉【謂茵席屏風之屬】歲終則各以其物會之【種別為計鄭司農云各以其所飾之物計會傳著之】典枲掌布總縷紵之麻草之物以待時頒功而授齋【總十五升布抽其半者白而細疏曰紵雜言此數物者以著其類衆多草葛蒺之屬故書齋作資】及獻功受苦功以其賈楬而藏之以待時頒【其良功亦入於典婦功以共王及后之用鄭司農云苦功謂麻功布紵】頒衣服授之賜予亦如之【授之授受頒者帛言待有司之政令布言頒衣服互文】歲終則各以其物會之【並天官】天子百里之內以共官千里之內以為御【謂此地之田稅所給也官謂其文書財用也御謂衣食王制】

右財用 厲王說榮夷公【說好也榮國名夷諡也】芮良夫曰【芮良夫周大夫芮伯也】王室其將卑乎【卑微也】夫榮公好專利而不知大難【專擅也】夫利百物之所生也【利生於物也專利是專百物】天地之所載也【載成也地受天氣以成百物】而或專之其害多矣【害謂惡害榮公者多也孔子曰放於利而行多怨】天地百物皆將取焉胡可專也【天地成百物民皆將取用之何可專其利】夫王人者將導利而布之上下者也【導開也布賦也上謂天神下謂人物】使神人百物無不得其極【極中也】猶曰怵惕懼怨之來也【怵惕恐懼也】今王學專利其可乎【國語周語】子云君子不盡利以遺民【不與民爭利也】故君子仕則不稼田則不漁食時不力珍大夫不坐羊士不坐犬【食時謂食四時之膳也力猶務也天子諸侯有秩膳古者殺牲食其肉坐其皮是不無故殺之】以此坊民民猶忘義而爭利以亡其身【坊記】君子先慎乎德有德此有人有人此有土有土此有財有財此有用【先慎乎德承上文不可不謹而言德即所謂明德有人謂得衆有土謂得國有國則不患無財用矣】德者本也財者末也【本上文而言】外本內末爭民施奪【人君以德為外以財為內則是爭鬪其民而施之以劫奪之教也蓋財者人之所同欲不能絜矩而欲專之則民亦起而爭奪矣】是故財聚則民散財散則民聚【外本內末故財聚爭民施奪故民散反是則有德而有人矣】是故言悖而出者亦悖而入貨悖而入者亦悖而出【悖逆也此以言之出入明貨之出入也自先慎乎德以下又因財貨以明能絜矩與不能者之得失也】生財有大道生之者衆食之者寡為之者疾用之者舒則財恒足矣【呂氏曰國無遊民則生者衆矣朝無幸位則食者寡矣不奪農時則為之疾矣量入為出則用之舒矣愚按此因有土有財而言以明足國之道在乎務本而節用非必外本內末而後財可聚也自此以至終篇皆一意也】仁者以財 身不仁者以身 財【發猶起也仁者散財以得民不仁者亡身以殖貨】未有上好仁而下不好義者也未有好義其事不終者也未有府庫財非其財者也【上好仁以愛其下則下好義以忠其上所以事必有終而府庫之財無悖出之患也】孟獻子曰畜馬乘不察於雞豚伐冰之家不畜牛羊百乘之家不畜聚斂之臣與其有聚斂之臣寧有盜臣此謂國不以利為利以義為利也【孟獻子魯之賢大夫仲孫蔑也畜馬乘士初試為大夫者也】

伐冰之家卿大夫以上喪祭用冰者也百乘之家有采地者也君子寧亡己之財而不忍傷民之力故寧有盜臣而不畜聚斂之臣此謂以下釋獻子之言也】長國家而務財用者必自小人矣彼為善之小人之使為國家菑害並至雖有善者亦無如之何矣此謂國不以利為利以義為利也【自由也言由小人導之也此一節深明以利為利之害而重言以結之其丁寧之意切矣 並大學】 孟子曰無政事則財用不足【生之無道取之無度用之無節故也】 鬬且曰古者聚貨不妨民衣食之利聚馬不害民之財用【貨珠玉之屬自然物也貨馬多則養求者衆妨財用力也】國馬足以行軍【國馬民馬也十六井為丘有戎馬一匹牛三頭足以行軍也】公馬足以稱賦【公馬公之戎馬稱舉也賦兵賦也】不是過也公貨足以賓獻【賓饗獻貢也】家貨足以共用【家大夫也】不是過也【楚語】 古者稅什一豐年補敗【敗謂凶年】不外求而上下皆足也雖累凶年民弗病也【莊二十八年穀梁傳】 天子不言多少諸侯不言利害大夫不言得喪【皆謂言貨財也】士不通貨財【士賤雖得言之亦不得貿遷如商賈也】有國之君不息牛羊【息蕃育也】錯質之臣不息雞豚【錯置也質讀為贄孟子曰出疆必載質蓋古字通耳置贄謂執贄而置于君士相見禮曰大夫奠贄于君再拜稽首禮記曰畜馬乘者不察於雞豚或曰置贄猶言委質也言凡委質為人臣則不得與下爭利】冢卿不脩幣大夫不為場園【冢卿上卿不修幣謂不修財幣販息之也治稼穡曰場樹菜蔬曰園謂若公儀子不奪園夫工女之利也】從士以上皆羞利而不與民爭業樂分施而恥積藏然後民不困財貧窶者有所竄其手【竄容也謂有所容其手而力作也】多積財而羞無有【羞貧】重民任而誅不能【使民不能勝任而復誅之】此邪行之所以起刑罰之所以多也上好羞則民闇飾矣【好羞貧而事奢侈則民闇自修飾也】上好富則民死利矣二者亂之衢也【衢道】民語曰欲富乎忍恥矣傾絕矣絕故舊矣與義分背矣【忍恥不顧廉恥傾絕謂傾身絕命而求也分背如人分背而行】上好富則人民之行如此安得不亂【荀子】

司市國凶荒札喪則市無征而作布【詳見政事下】 外府掌邦布之入出以共百物而待邦之用凡有法者【詳見上章】廛人掌斂市歛布總布質布罰布廛布而入於泉府【詳見政事下】 泉府掌以市之征布斂市之不售貨之滯於民用者【同上】

右泉幣 湯七年旱禹五年水人之無 有賣子者湯以莊山之金鑄幣而贖人之無 賣子者禹以歷山之金鑄幣以救人之困夫玉起於禹氏金起於汝漢珠起於赤瑩東西南北去周七八千里水絕壤斷舟車不能通為其途之遠其至之難故託用於其重以珠玉為上幣以黃金為中幣以刀布為下幣三幣握之則非有補於暖也食之則非有補於飽也先王以守財物以御人事而平天下也是以命之曰衡衡者使物一高一下不得有調也【管子】 太公為周立九府圜法【師古曰周官太府玉府內府外府泉府天府職內職金職幣皆掌財幣之官故云九府圜謂均而通也】黃金方寸而重一斤錢圜函方【孟康曰外圜而內孔方也】輕重以銖【師古曰言黃金以斤為名錢則以銖為重也】布帛廣二尺二寸為幅長四丈為匹故貨寶於金利於刀【如淳曰名錢為刀者以其利於民也】流於泉【如淳曰流行如泉也】布於布【如淳曰布於民間】束於帛【李奇曰束聚也】太公退又行之於齊【前漢食貨志】 景王二十一年將鑄大錢【景王周靈王之子景王貴也二十一年魯昭之十八年也錢者金幣之名所以買賣物通財用也古曰泉後轉曰錢賈侍中云虞夏商周金幣三等或赤或白

或黃黃為上幣銅鐵為下幣大錢者大于舊其賈重也唐尚書云大錢重十二銖文曰大泉五十鄭司農說周禮云錢始蓋一品也周景王鑄大錢而有二品後數變易不識本制至漢唯五銖久行王莽時錢乃有十品今存于民多者有貨布大泉貨泉大泉徑寸二分重十二銖文曰大泉五十則唐君所謂大泉者乃莽時泉非景王所鑄明矣又景王至赧王十三世而周亡後有戰國秦漢幣物改轉不相因先師所不能紀或云大錢文曰寶貨皆非事實又單穆公云古者有母權子子權母而行然則二品之來古而然矣鄭君云錢始一品至景王有二品考之不詳耳】單穆公曰不可【穆公王卿士單靖公之曾孫】古者天災降戾【降下也戾至也災謂水旱蟲螟之類】於是乎量資幣權輕重以振救民【量猶度也資財也權稱也振拯也】民患輕則為之作重幣以行之【民患幣輕而物貴則作重幣以行其輕也】於是乎有母權子而行民皆得焉【重曰母輕曰子以子貿物物輕則子獨行物重則以母權而行之子母相通民皆得其欲】若不堪重則多作輕以行之亦不廢重於是乎有子權母而行小大利之【堪任也不任之者幣重物輕妨其用也故作輕幣雜而用之以重貿其貴以輕貿其賤子權母者母不足則以子平而行之故錢小大民皆以為利也】今王廢輕而作重民失其資能無匱乎【廢輕而作重則本竭而末寡故民失其資也】若匱王用將有所乏【民財匱無以供上故王用將乏也】乏則將厚取於民【厚取厚斂也】民不給將有遠志是離民也【給供也遠志逋逃也】且絕民用以實王府【絕民用謂廢小錢斂而鑄大也】猶塞川原而為潢汚也其竭也無日矣【大曰潢小曰汚竭盡也無日無日數也】王其圖之王弗聽卒鑄大錢【國語周語】

卷六十六

<經部,禮類,通禮之屬,禮書綱目

欽定四庫全書

禮書綱目卷六十六 婺源江永撰

學制 通禮十五

補

有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶老於左學周人養國老於東膠養庶老於虞庠虞庠在國之西郊【皆學名也異者四代相變耳或上西或上東或貴在國或貴在郊上庠右學大學也在西郊下庠左學小學也在國中王宮之東東序東膠亦大學在國中王宮之東西序虞庠亦小學也在西郊膠之言糾也庠之言養也周之小學為有虞氏之庠制是以名庠云其立鄉學亦如之膠或作絀 王制】天子設四學【四學謂周四郊之虞庠也 祭義】

夏曰校殷曰序周曰庠學則三代共之【詳見學記】天子命之教然後為學小學在公宮南之左大學在郊【學所以學士之宮尚書傳曰百里之國二十里之郊七十里之國九里之郊五十里之國三里之郊此小學大學殷之制】天子曰辟廱諸侯曰頤宮【尊卑學異名辟明也廱和也所以明和天下頤之言班也所以班政教也 朱子曰辟與璧同廱和也天子之學水旋丘如璧故謂之辟廱頤亦作泮諸侯之學東西南方有水形如半璧以其半於辟廱故曰泮宮詩曰鎬京辟廱記曰泮宮周學也 王制】米廩有虞氏之庠也序夏后氏之序也瞽宗殷學也頤宮周學也【庠序亦學也庠之言詳也於以考禮詳事也魯謂之米廩虞帝上孝今藏棗盛之委焉序次王事也瞽宗樂師瞽矇之所宗也古者有道德者使教焉死則以為樂祖于此祭之頤之言班也于以班政教也 明堂位】

古之教者家有塾黨有庠術有序國有學【詳見學記】

右設學 學禮曰帝入東學上親而貴仁則親疏有序而恩相及矣帝入南學上齒而貴信則長幼有差而民不誣矣帝入西學上賢而貴德則聖智在位而功不匱矣帝入北學上貴而尊爵則貴賤有等而下不踰矣【成王年十五亦入諸學觀禮布政四學者東序瞽宗虞庠及四郊之學也春氣溫養故上親夏物盛小大殊故上齒秋物成實故貴德冬時物藏於地唯象於天半見也故尚爵】帝入太學承師問道退習而考於太傅太傅罰其不則而達其不及【則法也】則德智長而治道得矣此五學者既成於上則百姓黎民化輯於下矣【大戴禮】於論鼓鐘於樂辟廱【辟璧通廱澤也辟廱天子之學大射行禮之處也水旋丘如璧以節觀者故曰辟廱 大雅靈臺】鎬京辟廱自西自東自南自北無思不服【鎬京武王所營也張子曰靈臺辟廱文王之學也鎬京辟廱武王之學也至此始為天子之學也此言武王徙居鎬京講學

行禮而天下自服也大雅文王有聲】思樂泮水薄采其芹魯侯戾止言觀

其旂【泮水泮宮之水也諸侯之學鄉射之宮謂之泮宮其東西南方有水形如半璧以其半於辟廱故曰泮水而宮亦以名也】既作泮宮淮夷攸服矯矯虎臣在泮獻馘淑問如臯陶在泮獻囚【矯矯武貌馘所割者之左耳也淑善也問訊囚也囚所虜獲者蓋古者出兵受成於學及其反也釋奠於學而以訊囚告故詩人因魯侯在泮而願其有是功也魯頌泮水】天子立辟雍何所以行禮樂宣德化也辟者璧也象璧圓又以法天於雍水側象教化流行也諸侯曰泮宮者半於天子宮也明尊卑有差所以少也半者象璜也獨南面禮儀之方有水耳明不得化四方也鄉曰庠里曰序庠者庠禮義也序者序長幼也【白虎通】鄭人游于鄉校【鄉之學校】以論執政【論其得失】然明謂子產曰毀鄉校如何【患人於中謗議國政】子產曰何為夫人朝夕退而游焉以議執政之善否其所善者吾則行之其所惡者吾則改之是吾師也若之何毀之【襄三十一年左氏傳】

帝曰夔命汝典樂教胄子直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和【胄長也自天子至卿大夫之適子也栗莊敬也上二無字與母同凡人直者必不足於溫故欲其溫寬者必不足於栗故欲其栗所以慮其偏而輔翼之也剛者必至於虐故欲其無虐簡者必至於傲故欲其無傲所以防其過而戒禁之也教胄子者欲其如此而其所以教之之具則又專在於樂如周禮大司樂掌成均之法以教國子弟而孔子亦曰興於詩成於樂蓋所以蕩滌邪穢斟酌飽滿動盪血脉流通精神養其中和之德而救其氣質之偏者也舜典】朴作教刑【夏楚二物學校之刑也同上】使公卿之大夫士之適子十有三年始入小學見小節焉踐小義焉二十入大學見大節焉踐大義焉故入小學知父子之道長幼之序入大學知君臣之義上下之位故為君則君為臣則臣為父則父為子則子【尚書大傳】師氏以三德教國子一曰至德以為道本二曰敏德以為行本三曰孝德以知逆惡教三行一曰孝行以親父母二曰友行以尊賢良三曰順行以事師長【德行內外之稱在心為德施之為行至德中和之德覆燾持載含容者也孔子曰中庸之為德其至矣乎敏德仁義順時者也說命曰敬孫務時敏厥修乃來孝德尊祖愛親守其所以生者也孝在三德之下三行之上德有廣於孝而行莫尊焉國子公卿大夫之子弟師氏教之而世子亦齒焉學君臣父子長幼之道朱子曰至德者誠意正心端本清原之事道則天人性命之理事物當然之則修身齊家治國平天下之術也敏德者強志力行蓄德廣業之事行則理之所當為日可見之跡也孝德者尊祖愛親不忘其所由生之事知逆惡則以得於己者篤實深固有以真知彼之逆惡而自不忍為者也】居虎門之左司王朝【虎門路寢門也王日視朝於路寢門外畫虎焉以明勇猛於守宜也司猶察也察王之視朝若有善道可行者則當前以詔王】掌國中失之事以教國子弟【教之者使識舊事也中中禮者也失失禮者也故書中為得杜子春云當為得記君得失若春秋是也】凡國之貴遊子弟學焉【貴遊子弟王公之子弟遊無官師者地官】保氏養國子以道乃教之六藝一曰五禮二曰六樂三曰五射四曰五馭五曰六書六曰九數乃教之六儀一曰祭祀之容二曰賓客之容三曰朝廷之容四曰喪紀之容五曰軍旅之容六曰車馬之容【養國子以道者以師氏之德行審諭之而後教之以藝儀也五禮吉凶賓軍嘉也六樂雲門大咸大韶大夏大濩大武也鄭司農云五射白矢參連剡注襄尺井儀也五馭鳴和鸞逐水曲過君表舞交衢逐禽左六書象形會意轉注處事假借諧聲

也九數方田粟米差分少廣商功均輸方畧贏不足旁要今有重差夕桀句股也玄謂祭祀之容齊齊皇皇賓客之容穆穆皇皇朝廷之容濟濟翔翔喪紀之容纍纍顛顛軍旅之容暨暨詒詒車馬之容匪匪翼翼同上】大司樂掌成均之法以治建國之學政而合國之子弟焉【鄭司農云均調也樂師主調其音大司樂主受此成事已調之樂玄謂董仲舒云成均五帝之學成均之法者其遺禮可法也國之子弟公卿大夫之子弟當學者謂之國子文王世子曰於成均以及取爵於上尊則周人立此學之宮】凡有道者有德者使教焉死則以為樂祖祭於瞽宗【道多才藝者德能躬行者若舜命夔典樂教胄子是也死則以為樂之祖神而祭之鄭司農云瞽樂人樂人所共宗也或曰祭於瞽宗祭於廟中明堂位曰瞽宗殷學也泮宮周學也以此觀之祭於學宮中】以樂德教國子中和祗庸孝友【中猶忠也和剛柔適也祗敬庸有常也善父母曰孝善兄弟曰友】以樂語教國子興道諷誦言語【興者以物喻事道讀曰導導者言古以剴今也倍文曰諷以聲節之曰誦發端曰言答述曰語】以樂舞教國子舞雲門大卷大咸大磬大夏大濩大武【此周所存六代之樂黃帝曰雲門大卷黃帝能成名萬物以明民共財言其德如雲之所出民得以有族類大咸咸池堯樂也堯能殫均刑法以儀民言其德無所不施大磬舜樂也言其德能紹堯之道也大夏禹樂也禹治水敷土言其德能大中國也大濩湯樂也湯以寬治民而除其邪言其德能使天下得其所也大武武王樂也武王伐紂以除其害言其德能成武功】樂師掌國學之政以教國子小舞【謂以年幼少時教之舞內則曰十三舞勺成童舞象二十舞大夏】大胥掌學士之版以待致諸子【鄭司農云學士謂卿大夫諸子學舞者版籍也今時鄉戶籍世謂之戶版大胥主此籍以待當召聚學舞者卿大夫之諸子則案此籍以召之漢大樂律曰卑者之子不得舞宗廟之酎除吏二千石到六百石及關內侯到五大夫子先取適子高七尺已上年二十到年三十顏色和順身體修治者以為舞人與古用卿大夫子同義】春入學合采合舞【春始以學士入學宮而學之合舞等其進退使應節奏鄭司農云采謂舞者皆持芬香之采或曰古者士見於君以雉為摯見於師以菜為摯菜直謂蔬食菜羹之菜月令仲春之月上丁命樂正習舞釋采仲丁又命樂正入學習樂玄謂舍即釋也采讀為菜始入學必釋菜禮先師也菜蘋藻之屬】秋頒樂合聲【春使入學秋頒其才藝所為合聲亦等其曲折使應節奏】小胥掌學士之徵令而比之鬴其不敬者【比猶校也不敬謂慢期不時至也鬴罰爵也詩云兕觥其觶】巡舞列而撻其怠慢者【撻猶扶也扶以荆】大司樂掌教國子舞羽吹籥【文舞有持羽吹籥者所謂籥舞也文王世子曰秋冬學羽籥詩云左手執籥右手秉翟並春官】凡學世子及學士必時【四時各有宜學士謂司徒論俊選所升於學者】春夏學干戈秋冬學羽籥皆於東序【干盾也戈勾子戟也干戈萬舞象武也用動作之時學之籥舞象文也用安靜之時學之詩云左手執籥右手秉翟】小樂正學干大胥贊之籥師學戈籥師丞贊之【四人皆樂官之屬也通職秋冬亦學以羽籥小樂正樂師也周禮樂師掌國學之政教國子小舞大胥掌學士之版春入學舍菜合舞秋頒學合聲籥師掌教國子舞羽吹籥】胥鼓南【南南夷之樂也胥掌以六樂之會正舞位旄人教夷樂則以鼓節之詩云以雅以南以籥不僭】春誦夏弦大師詔之瞽宗秋學禮執禮者詔之冬讀書典書者詔之禮在瞽宗書在上庠【誦謂歌樂也弦謂以絲播詩陽用事則學之以聲陰用事則學之以事因時順氣於功易成也立三代之學學書於有虞氏之學典謨之教所興也學舞於夏后氏之學文武中也學禮樂於殷之學功成治定與已同也】凡祭與養老乞言合語之禮皆小樂正詔之於東序【學以三者之威儀也養老乞言養老人之賢者因從乞善言可行者也合語謂鄉射鄉飲酒大射燕射之屬也鄉射記曰古者於旅也語】大樂正學舞

干戚語說命乞言皆大樂正授數【學以三者之義也戚斧也語說合語之說也數篇數】大司成論說在東序【論說課其義之深淺才能優劣此云樂正司業父師司成則大司成司徒之屬師氏也師氏掌以美詔王教國子以三德三行及國中失之事也】凡侍坐於大司成者遠近間三席可以問【間猶容也容三席則得指畫相分別也席之制廣三尺三寸三分則是所謂亟丈也】終則負牆【卻就後席相辟】列事未盡不問【錯尊者之語不敬也文王世子】樂正崇四術立四教【樂正樂官之長掌國子之教虞書曰夔命汝典樂教胄子崇高】

【也高尚其術以作教也幼者教之於小學長者教之於大學尚書傳曰年十五始入小學十八入大學】順先王詩書禮樂以造士【順此四術而教以成是士也】春秋教以禮樂冬夏教以詩書【春夏陽也詩樂者聲聲亦陽也秋冬陰也書禮者事事亦陰也互言之者皆以其術相成】王太子王子羣后之太子卿大夫元士之適子國之俊選皆造焉【皆以四術成之王子王之庶子也羣后公及諸侯】凡入學以齒【皆以長幼受學不用尊卑王制】諸子掌國子之倅掌其禁令與其教治【故書倅為卒鄭司農云卒讀如物有副倅之倅國子謂諸侯卿大夫士之子也燕義曰古者周天子之官有庶子官與周官諸子職同文玄謂四民之業而士者亦世焉國子者是公卿大夫士之副貳戒令致於太子之事教治修德學道也】凡國之政事國子在遊倅使之修德學道春合諸學秋合諸射以攷其藝而進退之【遊倅倅之未仕者學大學射射宮也王制曰春秋教以禮樂冬夏教以詩書王太子王子羣后之太子卿大夫元士之適子國之俊選皆造焉夏官】

庶子之正於公族者教之以孝弟睦友子愛明父子之義長幼之序【詳見五宗】都司馬掌都之士庶子【庶子卿大夫士之子】以國法掌其政學【政謂賦稅也學修德學道夏官】比年入學中年考校一年視離經辨志三年視敬業樂羣五年視博習親師七年視論學取友謂之小成九年知類通達強立而不反謂之大成【詳見學記】將出學小胥大胥小樂正簡不帥教者以告於大樂正大樂正以告於王【出學謂九年大成而出也此所簡者謂王太子王子羣后之太子卿大夫元士之適子也大胥小胥皆樂官屬也】王命三公九卿大夫元士皆入學不變王親視學【亦謂使習禮以化之不變王又親為之臨視重棄賢者子孫此習禮皆於大學也】不變王三日不舉【去食樂重棄人】屏之遠方西方曰棘東方曰寄終身不齒【棘當為熨熨之言偈使之偈寄於夷戎不屏於南北謂其大遠王制】

右國學之教

凡始立學者必釋奠于先聖先師及行事必以幣【謂天子命之教始立學宮者也先聖周公若孔子】凡釋奠者必有合也【國無先聖先師則所釋奠者當與隣國合也】有國故則不【若唐虞有夔伯夷周有周公魯有孔子則各自奠之不合也文王世子】始立學者既興器用幣【興當為釁字之誤也禮樂之器成則釁之】

【又用幣告先聖先師以器成】然後釋菜【告先聖先師以器成有時將用也】不舞不授器【釋菜禮輕也釋奠則舞舞則授器司馬之屬司兵司戈司盾祭祀授舞者兵也】乃退儻于東序一獻無介語可也【言乃退者謂得立三代之學者釋菜於虞庠則儻賓於東序魯之學有米廩東序瞽宗也同上】大學始教皮弁祭菜【詳見學記】凡學春官釋奠于其先

師秋冬亦如之【官謂禮樂詩書之官周禮曰凡有道者有德者使教焉死則以為樂祖祭於瞽宗此之謂先師之類也若漢禮有高堂生樂有制氏詩有毛公書有伏生億可以為之也不言夏夏從春可知也釋奠者設薦饌酌奠而已無迎尸以下之事 文王世子】

大胥春入學舍采合舞【詳見上章】孟春命樂正入學習舞【為仲春將釋菜】仲春上丁命樂正習舞釋菜【樂正樂官之長也合習舞者順萬物始出地鼓舞也將舞必釋菜於先師以禮之夏小正曰丁亥萬用入學】天子乃帥三公九卿諸侯大夫親往視之【順時達物也月令】天子視學大昕鼓徵衆至然後天子至乃命有司行事興秩節祭先師先聖焉有司卒事反命始之養也適東序釋奠於先老【詳見嘉禮養老】出征執有罪反釋奠于學以訊馘告【釋菜奠幣禮先師也訊馘所生】

【獲斷耳者詩曰執訊獲醜又曰在頤獻馘馘或為國 王制】

大司樂凡有道者有德者使教焉死則以為樂祖祭於瞽宗【詳見上章】

祀先賢於西學【西學周小學也先賢有道德王所使教國子者 祭義】

右釋奠釋菜

放勳曰勞之來之匡之直之輔之翼之使自得之又從而振德之【放勳本史臣贊堯之辭孟子因以為堯號也德猶惠也堯言勞者勞之來者來之邪者正之枉者直之輔以立之翼以行之使自得其性矣又從而提撕警覺以加惠焉不使其放逸怠惰而或失之蓋命契之辭也 孟子】

帝曰契百姓不親五品不遜汝作司徒敬敷五教在寬【親相親睦也五品父子君臣夫婦長幼朋友五者之名位等級也遜順也司徒掌教之官敷布也五教父子有親君臣有義夫婦有別長幼有序朋友有信以五者當然之理而為教令也敬敬其事也聖賢之於事雖無所不敬而此又事之大者故特以敬言之寬裕以待之也蓋五者之理出於人心之本然非有強而後能者自其拘於氣質之偏溺於物欲之蔽始有味於其理而不相親愛不相遜順者於是因禹之讓又申命契仍為司徒使之敬以敷教而又寬裕以待之使之優柔浸漬以漸而入則其天性之真自然呈露不能自己而無無恥之患矣 舜典】

大宰以九兩繫邦國之民三曰師以賢得民四曰儒以道得民【詳見政事上】大夫七十而致仕老其鄉里大夫為父師士為少師【所謂里庶尹也鄭曰古者仕焉而已者歸教於閭里】耄鉏已藏祈樂已入歲事已畢【祈樂當為新穀】餘子皆入學年十五始入小學見小節踐小義焉年十八始入大學見大節踐大義焉【餘子猶衆子也古者適子恒代父而仕也】距冬至四十五日始出學傳農事【立春學止】上老平明坐於右塾庶老坐於左塾餘子畢出然後皆歸夕亦如之【上老父師也庶老少師也】餘子皆入父之齒隨行兄之齒雁行朋友不相踰輕任并重任分頒白者不提攜出入皆如之【尚書大傳宣十四年公羊傳何休注云在邑曰里一里八十戶八家共一巷中里為校室選其耆老有高德者名曰父老十月事訖父老教於校室八歲者學小學十五者學大學】乃立地官司徒使帥其屬而掌邦教以佐王安擾邦國【教所以親百姓訓五品有虞氏五而周十有二焉擾亦安也言饒衍之】大司徒辨五地之物生山林川澤丘陵墳衍原隰【詳見制國】因此五物者民之常而施十有二教焉一曰以祀禮教敬則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰以儀辨等則民不越六曰以俗教安則民不偷七曰以刑教中則

民不競八曰以誓教恤則民不怠九曰以度教節則民知足十曰以世事教能則民不失職十有一曰以賢制爵則民慎德十有二曰以庸制祿則民興功【陽禮謂鄉射飲酒之禮也陰禮謂男女之禮婚姻以時則男不曠女不怨儀謂君南面臣北面父坐子伏之屬俗謂土地所生習也偷謂朝不謀夕恤謂災危相憂民有凶患憂之則民不懈怠度謂宮室車服之制世事士農工商之事少而習焉其心安焉因教以能不易其業慎德謂矜其善德勸為善也庸功也爵以顯賢祿以賞功故書儀或為義杜子春讀為儀謂九儀】正月之吉始和布教于邦國都鄙乃縣教象之法于象魏使萬民觀教象挾日而歛之乃施教法于邦國都鄙使之各以教其所治民【正月之吉周正月朔日也司徒以布五穀至正歲又書教法而縣焉】令五家為比使之相保五比為閭使之相受四閭為族使之相葬五族為黨使之相救五黨為州使之相調五州為鄉使之相賓【詳政事上】以鄉三物教萬民而賓興之一曰六德知仁聖義忠和二曰六行孝友睦婣任恤三曰六藝禮樂射御書數【物猶事也興猶舉也民三事教成鄉大夫舉其賢者能者以飲酒之禮賓客之既則獻其書於王矣知明於事仁愛人以及物聖通而先識義能斷時宜忠言以中心和不剛不柔善於父母為孝善於兄弟為友睦親於九族婣親於外親任信於友道恤振憂貧者禮五禮之義樂六樂之歌舞射五射之法御五御之節書六書之品數九數之計】以鄉八刑糾萬民一曰不孝之刑二曰不睦之刑三曰不婣之刑四曰不弟之刑五曰不任之刑六曰不恤之刑七曰造言之刑八曰亂民之刑【糾猶割察也不弟不敬師長造言訛言惑衆亂民亂名改作執左道以亂政也鄭司農云任謂朋友相任恤謂相憂】以五禮防萬民之偽而教之中【禮所以節止民之侈偽使其行得中鄭司農云五禮謂吉凶軍賓嘉】以六樂防萬民之情而教之和【樂所以蕩正民之情思使其心應和也鄭司農云六樂謂雲門咸池大韶大夏大濩大武】

小司徒之職掌建邦之教法與其祭祀飲食喪紀之禁令【詳政事上】

鄉師之職各掌其所治鄉之教而聽其治【聽謂平察之】鄉大夫之職各掌其鄉之政教禁令正月之吉【謂建子之月一日也】受教法於司徒退而頒之於其鄉吏使各以教其所治以攷其德行察其道藝【其鄉吏州長以下】州長各掌其州之教治政令之法正月之吉各屬其州之民而讀法以攷其德行道藝而勸之以糾其過惡而戒之【屬猶合也聚也因聚衆而勸戒之者欲其善】若以歲時祭祀州社則屬其民而讀法亦如之春秋以禮會民而射於州序【序州黨之學也會民而射所以正其志也射義曰射之為言釋也釋者各釋己之志】正歲則讀教法如初【雖以正月讀之至正歲猶復讀之因此四時之正重申之】黨正各掌其黨之政令教治及四時之孟月吉日則屬民而讀邦法以糾戒之【以四孟之月朔日讀法者彌親民者於教亦彌數】春秋祭禘亦如之【禘謂雩祭水旱之神蓋亦為壇位如祭社稷云】國索鬼神而祭祀則以禮屬民而飲酒於序以正齒位壹命齒於鄉里再命齒於父族三命而不齒【詳見嘉禮嘉事雜記】凡其黨之祭祀喪紀昏冠飲酒教其禮事掌其禁戒【其黨之民】正歲屬民讀法而書其德行道藝【書記之】族師各掌其族之戒令政事月吉則屬民而讀邦法書其孝弟睦婣有學者【月吉每月朔日也故書上句或無事字杜子春云當為正月吉書亦或為戒令政事月吉則屬民而讀邦法】春秋祭酺亦如之【酺者為人物裁害之神也故書酺或為步杜子春云當為酺玄謂校人職又有冬祭焉步則未知此世所云蜚蜮之酺與人鬼之步與蓋亦為壇位如雩祭云族長無飲酒之禮因祭酺而與其民以長幼相獻酬焉】閭胥凡春秋之祭祀役政喪紀之數聚衆庶既比則讀法書其敬敏任恤者【祭祀謂州社黨禘族酺也役田役也政若州社黨飲酒也喪紀大喪之事也四者及比皆會聚衆民

因以讀法以勅戒之故書既為暨杜子春讀政為征暨為既】凡事掌其比釁撻罰之事【釁撻者失禮之罰也釁用酒其爵兕角為之撻扑也】

比長各掌其比之治五家相受相和親有臯奇衰則相及【衰猶惡也】司諫掌糾萬民之德而勸之朋友正其行而強之道藝巡問而觀察之以時書其德行道藝【朋友相切磋以善道也強猶勸也學記曰強而弗抑則易巡問行問民間也】司救掌萬民之衰惡過失而誅讓之以禮防禁而救之【衰惡謂侮慢長老語言無忌而未麗于罪者過失亦由衰惡訇鬻好訟若抽拔兵器誤以行傷害人麗于罪者誅誅責也古者重刑且責怒之未即罪也並地官】司徒修六禮以節民性明七教以興民德齊八政以防淫一道德以同俗養耆老以致孝恤孤獨以逮不足上賢以崇德簡不肖以紕惡【司徒地官卿掌邦教者逮及也簡差擇也】六禮冠昏喪祭鄉相見【鄉鄉飲酒鄉射】七教父子兄弟夫婦君臣長幼朋友賓客八政飲食衣服事為異別度量數制【飲食為上衣服次之事為謂百工技藝也異別五方用器不同也度丈尺也量斗斛也數百十也制布帛幅廣狹也】命鄉簡不帥教者以告【帥循也不循者謂敖狠不孝弟者司徒使鄉簡擇以告者鄉屬司徒】耆老皆朝於庠元日習射上宮習鄉上齒大司徒帥國之俊士與執事焉【將習禮以化之使之觀焉耆老致仕及鄉中老賢者朝猶會也此庠謂鄉學也鄉謂飲酒也鄉禮春秋射國蜡而飲酒養老】不變命國之右鄉簡不帥教者移之左命國之左鄉簡不帥教者移之右如初禮【中年考校而又不變使轉徙其居覲其見新人有所化也亦復習禮於鄉學使之觀焉】不變移之郊如初禮【郊鄉界之外者也稍出遠之後中年又為之習禮於郊學】不變移之遂如初禮【遠郊之外曰遂遂大夫掌之又中年復移之使居遂又為之習禮於遂學】不變屏之遠方終身不齒【遠方九州之外齒猶錄也並王制】

右鄉學之教

敷納以言明庶以功車服以庸【敷納以言而觀其蘊明庶以功而考其成旌能命德以厚其報益稷】鄉大夫三年則大比攷其德行道藝而興賢者能者鄉老及鄉大夫帥其吏與其衆寡以禮禮賓之【賢者有德行者能者有道藝者衆寡謂鄉人之善者無多少也鄭司農云興賢者謂若今舉孝廉興能者謂若今舉茂才賓敬也敬所舉賢者能者玄謂變舉言興者謂合衆而尊寵之以鄉飲酒之禮禮而賓之】厥明鄉老及鄉大夫羣吏獻賢能之書於王王再拜受之登於天府內史貳之【厥其也其賓之明日也獻猶進也王拜受之重得賢者王上其書於天府天府掌祖廟之寶藏者內史副寫其書者當詔王爵祿之時】退而以鄉射之禮五物詢衆庶一曰和二曰容三曰主皮四曰和容五曰興舞【以用也行鄉射之禮而以五物詢於衆庶鄭司農云詢謀也問于衆庶寧復有賢能者和謂閨門之內行也容謂容貌也主皮謂善射射所以觀士也故書舞為無杜子春讀和容為和頌謂能為樂也無讀為舞謂能為六舞玄謂和載六德容包六行庶民無射禮因田獵分禽則有主皮主皮者張皮射之無侯也主皮和容興舞則六藝之射與禮樂與當射之時民必觀焉因詢之也孔子射於矍相之圃蓋觀者如堵墻射至於司馬使子路執弓矢出誓射者又使公罔之裘序點揚觶而語詢衆庶之儀若是乎】此謂使民興賢出使長之使民興能入使治之【言為政以順民為本也】州長三年大比則大攷州里以贊鄉大夫廢興【廢興所廢退所興進也】遂大夫三歲大比則帥其吏而興甿【興甿舉民賢者能者如六鄉之】

【為也】司諫辨其能而可任於國事者【可任於國事任吏職並地官】命鄉論秀士升之司徒曰選士【移名於司徒也秀士鄉大夫所考有德行道藝者】司徒論選士之秀者而升之學曰俊士【可使習禮者學大學】升於司徒者不征於鄉升於學者不征於司徒曰造士【不征不給其繇役造成也能習禮則為成士】大樂正論造士之秀者以告於王而升諸司馬曰進士【移名於司馬司馬夏官卿主邦政者進士可進受爵祿也】司馬辨論官材【辨其論官其材觀其所長】論進士之賢者以告於王而定其論【各署其所長】論定然後官之【使之世守】任官然後爵之【命之】位定然後祿之【王制】

大宰以八則治都鄙四曰祿位以馭其士【鄭司農云士謂學士天官】禮諸侯三年一貢士於天子命與諸侯輔助為政所以通賢共治示不獨專重民之至大國舉三次國舉二人小國舉一人一適謂之好德再適謂之賢賢三適謂之有功一不適謂之過【謂三年時也】再不適謂之傲【謂六年時也】三不適謂之誣【謂九年時也尚書大傳】古者天子之制諸侯歲獻貢士於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭數與於祭而君有慶數不與於祭而君有讓數有慶而益地數有讓則削地【詳見射義宣十一年公羊傳何休注云其有秀者移於鄉學鄉學之秀者移於庠序庠序之秀者移於國學學於小學諸侯歲貢小學之秀者於天子學於大學其有秀者命曰造士行同而能偶別之以射然後爵之】

司士凡邦國三歲則稽士任而進退其爵祿【任其所掌治夏令】季春聘名士禮賢者孟春命大尉贊傑俊遂賢良舉長大行爵出祿必當其位【並詳月令】凡語於郊者【語謂論說於郊學】必取賢斂才焉或以德進或以事舉或以言揚【大樂正論造士之秀者升諸司馬曰進士謂此矣】曲藝皆誓之【曲藝為小技能也誓謹也皆使謹習其事】以待又語【又語為後復論說也】三而一有焉【三說之中有一善則取之以有曲藝不必盡善】乃進其等【進於衆學者】以其序【又以其藝為次】謂之郊人遠之【俟事官之缺者以待之遠之者不曰俊選曰郊人賤技藝】於成均以及取爵於上尊也【董仲舒曰五帝名大學曰成均則虞庠近是也天子飲酒於虞庠則郊人亦得酌于上尊以相旅文王世子】

右選舉正月之朝鄉長復事【鄉長鄉大夫也復白也周禮正月之吉鄉大夫受法於司徒退班于鄉吏以考其行】君親問焉曰於子之鄉有居處好學慈孝於父母聰慧質仁【慧解瞭也質性也】發聞於鄉里者有則以告有而不以告謂之蔽明其罪五有司已於事而竣【竣退伏也】公又問焉曰於子之鄉有拳勇股肱之力秀出於衆者【脛本曰股肱臂也大勇為拳詩云無拳無勇】有則以告有而不以告謂之蔽賢其罪五有司已於事而竣桓公又問曰於子之鄉有不慈孝於父母不長弟於鄉里驕躁淫暴不用上令者【上君長也】有則以告有而不以告謂之下比【比阿黨也】其罪五有司已於事而竣是故鄉長退而修德進賢桓公親見之遂使役官【役為也】令官長期而書伐【官長長官也期期年也伐功也書其所掌在官有功者也】以告且選其官之賢者而復用之【復白也】公召而與之語訾相其質【訾量也相視也】足以比成事【比輔也足以輔其官成其事也】升以為上卿之贊【贊佐也】謂之三選【三選謂鄉長所進官長所造公所訾相也】國子高子退而修鄉鄉退而修連連退而修里里退而修軌軌退而修伍伍退而修家及五屬大夫復事公問之如初五屬大夫於是退而修屬屬退而修縣縣退而修鄉鄉退而修卒卒退而修邑邑退而修家是故匹夫有善可得而舉也匹夫有不善可得而誅也【國語齊語】

禮書綱目卷六十六

卷六十七

欽定四庫全書

禮書綱目卷六十七 婺源江永撰

學記 通禮十六

補

發慮憲求善良足以誨聞不足以動衆【憲法也言發計慮當擬度於法式也誨之言小也朱子曰動衆謂聳動衆聽蓋守常法用中材其效不足以致大譽】就賢體遠足以動衆未足以化民【就謂躬下之體猶親也朱子曰遠謂疎遠之士下賢親遠足以聳動衆聽使知貴德而尊士然未有聞導誘掖之方也故未足以化民】君子如欲化民成俗其必由學乎【所學者聖人之道在方冊朱子曰此言唯教學可以化民使成美俗】玉不琢不成器人不學不知道是故古之王者建國君民教學為先【謂內則設師保以教使國子學焉外則有大學庠序之官】兌命曰念終始典于學其此之謂乎【典經也言學之不舍業也兌當為說字之誤也】雖有嘉肴弗食不知其旨也雖有至道弗學不知其善也【旨美也】是故學然後知不足教然後知困【學則覩己行之所短教則見己道之所未達】知不足然後能自反也知困然後能自強也故曰教學相長也【自反求諸己也自強修業不敢倦張子曰困者益之基也學之病正在於不知困矣自以為知而問之不能答用之不能行者多矣】兌命曰學學半其此之謂乎【言學人乃益己之學半】古之教者家有塾黨有庠術有序國有學【術當為遂聲之誤也古者仕焉而已者歸教於閭里朝夕坐於門門側之堂謂之塾周禮五百家為黨萬二千五百家為遂黨屬於鄉遂在遠郊之外】比年入學【學者每歲來入也】中年考校【中猶間也鄉遂大夫間歲則考學者之德行道藝周禮三歲大比乃考焉】一年視離經辨志三年視敬業樂羣五年視博習親師七年視論學取友謂之小成九年知類通達強立而不反謂之大成【離經斷句絕也辨志謂別其心意所趣向也知類知事義之比也強立臨事不惑也不反不違失師道張子曰離經離析經之章句也事師而至於親敬則學之篤而信其道也論學取友能講論其學而取友必端也知類通達比物醜類是也九年者言其大略人性有遲敏氣有昏明豈可齊也強立而不反可與立也學至於立則自能不息以至於聖人而教者可以無恨矣朱子曰按鄭注張說皆是也辨志者能分別其心所趨向如為善為利為君子為小人也敬業者專心致志以事其業也樂羣者樂於取益以輔其仁也博習者積累精專次第該徧也親師者道同德合愛敬兼盡也論學者知言而能論學之是非取友者知人而能識人之賢否也知類通達聞一知十而觸類貫通也強立不反知止有定而物不能移也蓋考較之法逐節之中先觀其學業之淺深徐察其志行之虛實讀者宜深味之乃見進學之驗】夫然後足以化民易俗近者說服而遠者懷之此大學之道也【懷來也安也】記曰蛾子時術之其此之謂乎【蛾蚍蜉也蚍蜉之子微蟲耳時術蚍蜉之所為其功乃復成大垤】大學始教皮弁祭菜示敬道也【皮弁天子之朝朝服也祭菜禮先聖先師菜謂芹藻之屬】宵雅肄三官其始

也【宵之言小也肄習也習小雅之三謂鹿鳴四牡皇皇者華也此皆君臣宴樂相勞苦之詩為始學者習之所以勸之以官且取上下相和厚】入學鼓篋孫其業也【鼓篋擊鼓警衆乃發篋出所治經業也孫猶恭順也】夏楚二物收其威也【夏慠也楚荆也二者所以扑撻犯禮者收謂收斂整齊之威威儀也】未卜禘不視學游其志也【禘大祭也天子諸侯既祭乃視學考校以游暇學者之志意】時觀而弗語存其心也【使之悱悱憤憤然後啟發也朱子曰觀示也謂示以所學之端緒語告也】幼者聽而弗問學不躐等也【學教也教之長釋】此七者教之大倫也【倫理也自大學始教至此其義七也】記曰凡學官先事士先志其此之謂乎【官居官者也士學士也】大學之教也時教必有正業退息必有居【有居有常居也】學【朱子曰上句鄭注孔疏讀時字居字句絕而學字自為一句恐非文意當以也字學字為句絕時教如春夏禮樂秋冬詩書之類居學謂居其所學如易之言居業蓋常時所習如下文操縵博依興藝藏修息遊之類所以學者能安其學而信其道】不學操縵不能安弦【操縵雜弄】不學博依不能安詩【博依廣譬喻也依或為衣張子曰依聲之依永者也】不學雜服不能安禮【雜服冕服皮弁之屬雜或為雅張子曰服事也雜服洒掃應對投壺沃盥細碎之事又曰道本至樂古之教人先使有以樂之者如操縵博依雜服如此己心樂樂則道義生今無此以致樂專義理自得以為樂然學者太苦思不從容第恐進銳退速苦其難而不知其益莫能安樂也】不興其藝不能樂學【興之言喜也歆也藝謂禮樂射御書數張子曰禮樂之文如琴瑟笙磬古人皆能之以中制節射御亦必合於禮樂之文如不失其馳舍矢如破騶虞和鸞動必相應也書數其用雖小但施於簡策然莫不出於學故人有倦時又用此以游其志所以使之樂學也】故君子之於學也藏焉修焉息焉遊焉【藏謂懷抱之修習也息謂作勞休止於之息游謂閒暇無事於之遊】夫然故安其學而親其師樂其友而信其道是以雖離師輔而不反也兌命曰敬孫務時敏厥修乃來其此之謂乎【敬孫敬道孫業也敏疾也厥其也學者務及時而疾其所修之業乃來張子曰孫其志於仁則得仁孫其志於義則得義惟其敏而已】今之教者呻其佔畢多其訊【呻吟也佔視也簡謂之畢訊猶問也言今之師自不曉經之義但吟誦其所法簡之文多其難問也呻或為慕訊或為訾】言及於數【其發言出說不首其義動云有所法象而已朱子曰數謂刑名度數言及於數欲以是窮學者之未知非求其本也注疏法象之說恐非若小學之教蓋將使之馴習乎埽灑應對之節與今之教言及於數者其意不同】進而不顧其安【務其所誦多不惟其未曉】使人不由其誠【由用也使學者誦之而為之說不用其誠】教人不盡其材【材道也謂師有所隱也易曰兼三材而兩之謂天地人之道張子曰人未安之又進之未喻之又告之徒使人生此節目不盡其材不顧安不由誠皆是施之妄也教人至難必盡人之材乃不誤人觀可及處然後告之聖人之明直若庖丁之解牛皆知其隙刃投餘地無全牛矣故使人必由其誠教人必盡其材人之材足以有為但以其不由於誠則不盡其材若曰勉率而為之則豈有由其誠者哉】其施之也悖其求之也佛【教者言非則學者失問】夫然故隱其學而疾其師苦其難而不知其益也【隱不稱揚也不知其益若無益然朱子曰隱其學謂以其學為幽隱而難知如曰二三子以我為隱之意】雖終其業其去之必速【速疾也學不心解則忘之易】教之不刑其此之由乎【刑猶成也】大學之法禁於未發之謂豫【未發情慾未生謂年十五時朱子曰此但謂預為之防其事不一不必皆謂十五時也】當其可之謂時【可謂年二十成人時朱子曰此當其可謂適當其可告之時事亦不一不當以年為斷】不陵節而施之謂孫【不陵節謂不教長者才者以小教幼者鈍者以大也施猶教也孫順也】相觀而善之謂摩【不並

問則教者思專也摩相切磋也朱子曰此但謂觀人之能而於己有益如以兩物相摩而各得其助也】此四者教之所由興也【興起也】發然後禁則扞格而不勝【教不能勝其情慾格讀如凍之扞堅不可入之貌】時過然後學則勤苦而難成【時過則思放也】雜施而不孫則壞亂而不修【小者不達大者難識學者所惑也】獨學無友則孤陋而寡聞【不相觀也】燕朋逆其師【燕猶褻也褻其朋友朱子曰大戴保傳篇作左右之習反其師朋此燕朋是私褻之友所謂損者三友之類注說非也】燕辟廢其學【褻師之譬喻朱子曰以上文推之注亦非是燕辟但謂私褻之談無益于學而反有所害也】此六者教之所由廢也【廢弛】君子既知教之所由興又知教之所由廢然後可以為人師也故君子之教喻也道而弗牽強而弗抑開而弗達【道示之以道塗也抑猶推也開為發頭角】道而弗牽則和強而弗抑則易開而弗達則思和易以思可謂善喻矣【思而得之則深】學者有四失教者必知之人之學也或失則多或失則寡或失則易或失則止此四者心之莫同也【失於多謂才少者失於寡謂才多者失於易謂好問不識者失於止謂好思不問者張子曰為人則多好問則寡不察則易苦難則止】知其心然後能救其失也【救其失者多與易則抑之寡與止則進之】教也者長善而救其失也善歌者使人繼其聲善教者使人繼其志【言為之善者則後人樂放倣朱子曰注說非是繼聲繼志皆謂微發其端而不究其說使人有所玩索而自得之也】其言也約而達微而臧罕譬而喻可謂繼志矣【師說之明則弟子好述之其言少而解臧善也朱子曰三者皆不務多言而使人自得之意】君子知至學之難易而知其美惡然後能博喻能博喻然後能為師能為師然後能為長能為長然後能為君【美惡說之是非也長達官之長張子曰知學者至於學之難易又知其資質才性之美惡也】故師也者所以學為君也【弟子學於師學為君朱子曰詳上文此但謂能為師以教人則能為君以治人耳】是故擇師不可不慎也【師善則善朱子曰此言能為師者其人難得故不可不擇也】記曰三王四代唯其師此之謂乎【四代虞夏商周】凡學之道嚴師為難【嚴尊敬也】師嚴然後道尊道尊然後民知敬學是故君之所不臣於其臣者二當其為尸則弗臣也當其為師則弗臣也【尸主也為祭主也】大學之禮雖詔於天子無北面所以尊師也【尊師重道焉不使處臣位也武王踐阼召師尚父而問焉曰昔黃帝顓頊之道存乎意亦忽不可得見與師尚父曰在丹書王欲聞之則齊矣王齊三日端冕師尚父亦端冕奉書而入負屏而立王下堂南面而立師尚父曰先王之道不北面王行西折而南東面而立師尚父西面道書之言】善學者師逸而功倍又從而庸之不善學者師勤而功半又從而怨之【從隨也庸功也功之受其道有功於己】善問者如攻堅木先其易者後其節目及其久也相說以解不善問者反此【言先易後難以漸入】善待問者如撞鐘叩之以小者則小鳴叩之以大者則大鳴待其從容然後盡其聲不善答問者反此【從讀如富父春戈之春春容謂重撞擊也始者一聲而已學者既開其端意進而復問乃極說之如撞鐘之成聲矣從或為松朱子曰注說非是從容正謂聲之餘韻從容而將盡者也言必答盡所問之意然後止也】此皆進學之道也【此皆善問善答也】記問之學不足以為人師【記問謂豫誦雜難雜說至講時為學者論之此或時師不心解或學者所未能問】必也其聽語乎【必待其問乃說之】力不能問然後語之語之而不知雖舍之可也【舍之須後】良冶之子必學為裘【仍見其家錮補穿鑿之器也補器者其金柔乃合有似於為裘】良弓之子必學為箕【仍見其家撓角幹也撓角幹者其材宜調調乃三體相勝有似於為楊柳之箕】始駕馬者反之車在馬前【以言仍見則貫即事易也】君子察於此三者可以有志於學矣【仍讀先王之道則為來事不惑】

古之學者比物醜類【以事相況而為之醜猶比也醜或為訃朱子曰詳文意此句合屬上章仍有闕文】鼓無當於五聲五聲弗得不和水無當於五色五色弗得不章學無當於五官五官弗得不治師無當於五服五服弗得不親【當猶主也五服斬衰至緦麻之親】君子曰大德不官【謂君也朱子曰注說非是但言大德者不但能專一官之事若荀子所謂精於道者兼物物也】大道不器【謂聖人之道不如器施於一物】大信不約【謂若胥命於蒲無盟約朱子曰注說亦非此謂如天地四時不言而信者也】大時不齊【或時以生或時以死】察於此四者可以有志於本矣【本立而道生言以學為本則其德於民無不化於俗無不成】三王之祭川也皆先河而後海或源也或委也此之謂務本【源泉所出也委流所聚也始出一勺卒成不測朱子曰疏云源則河也委則海也申明先河後海之義也今詳此言所以先河後海者以其或是源故先之或是委故後之疏有二說此說是也並學記】孟子曰人之有道也飽食煖衣逸居而無教則近於禽獸聖人有憂之使契為司徒教以人倫父子有親君臣有義夫婦有別長幼有序朋友有信【人之有道言其皆有秉彝之性也然無教則亦放逸怠惰而失之故聖人設官而教以人倫亦因其固有者而道之耳書曰天叙有典勅我五典五惇哉此之謂也】又曰設為庠序學校以教之庠者養也校者教也序者射也夏曰校殷曰序周曰庠學則三代共之皆所以明人倫也人倫明於上小民親於下【庠以養老為義校以教民為義序以習射為義皆鄉學也學國學也共之無異名也倫序也父子有親君臣有義夫婦有別長幼有序朋友有信此人之大倫也庠序學校皆以明此而已】又曰謹庠序之教申之以孝悌之義頒白者不負戴於道路矣【庠序皆學名也申重也丁寧反覆之意善事父母為孝善事兄長為悌頒與班同老人頭半白黑者也負任在背戴任在首夫民衣食不足則不暇治禮義而飽煖無教則又近於禽獸故既富而教以孝悌則人知愛親敬長而代其勞不使之負戴於道路矣】孔子曰興於詩【興起也詩本性情有邪有正其為言既易知而吟詠之間抑揚反覆其感人又易入故學者之初所以興起其好善惡惡之心而不能自己者必於此而得之】立於禮【禮以恭敬辭遜為本而有節文度數之詳可以固人肌膚之會筋骸之束故學者之中所以能卓然自立而不為事物之所搖奪者必於此而得之】成於樂【樂有五聲十二律更唱迭和以為歌舞八音之節可以養人之性情而蕩滌其邪穢消融其渣滓故學者之終所以至於義精仁熟而自和順於道德者必於此而得之是學之成也按內則十歲學幼儀十三學樂誦詩二十而後學禮則此三者非小學傳授之次乃大學終身所得之難易先後淺深也程子曰天下之英才不為少矣特以道學不明故不得有所成就夫古人之詩如今之歌曲雖閭里童稚皆習聞之而知其說故能興起今雖老師宿儒尚不能曉其義況學者乎是不得興于詩也古人自洒埽應對以至冠昏喪祭莫不有禮今皆廢壞是以人倫不明治家無法是不得立於禮也古人之樂聲音所以養其耳采色所以養其目歌詠所以養其性情舞蹈所以養其血脈今皆無之是不得成於樂也是以古之成材也易今之成材也難】子思曰夫子之教必始於詩書而終於禮樂雜說不與焉【孔叢子】葬曹平公往者見周原伯魯焉【原伯魯周大夫】與之語不說學歸以語閔子馬閔子馬曰周其亂乎夫必多有是說而後及其大人【國亂俗壞言者適多漸以及大人夫人在位者】大人患失而惑又曰可以無學無學不害【患有學而失道者以惑其意】不害而不學則苟而可【以為無害遂不學則皆懷苟且】於是乎下陵上替能無亂乎夫學殖也不學將落原氏其亡乎【殖生長也言學之進德如農之殖苗日新日益昭十八年左氏傳】

大學 通禮十七

補【自有朱子章句今止存其篇目】

中庸 通禮十八

補【自有朱子章句今亦但存其篇目】

禮書綱目卷六十七

卷六十八

欽定四庫全書

禮書綱目卷六十八 婺源江永撰

教太子 通禮十九

補

帝曰夔命汝典樂教胄子【詳見學制】古者王子年八歲而出就外舍學小藝焉履小節焉束髮而就大學學大藝焉履大節焉【小學謂虎闥師保之學也大學王宮之東者束髮謂成童白虎通曰八歲入小學十五入大學是也此太子之禮尚書大傳曰公卿之太子大夫元士嫡子年十三始入小學見小節而踐小義年二十入大學見大節而踐大義此王子入學之期也又曰十五年入小學十八入大學者謂諸子姓既成者至十五入小學其早成者十八入大學內則曰十年出就外傳住宿於外學書計者謂公卿以下教子於家也朱子曰虎闥見周禮師氏居虎門之左教國子弟保氏掌養國子守王闥一作庠門者非是又按姓孫也或恐當作性既或恐當作晚】居則習禮文行則鳴佩玉升車則聞和鸞之聲是以非僻之心無自入也【大戴禮】天子設四學當入學而太子齒【四學謂周四郊之虞庠也文王世子曰行一物而三善皆得者唯世子而已其齒於學之謂也祭義】凡學世子及學士必時【詳見學制】凡三王教世子必以禮樂樂所以修內也禮所以修外也禮樂交錯於中發形於外是故其成也懌恭敬而溫文【中心中也懌悅懌】立大傅少傅以養之欲其知父子君臣之道也【養猶教也言養者漬浸成長之】大傅審父子君臣之道以示之【謂為之行其禮】少傅奉世子以觀大傅之德行而審喻之【為說其義】大傅在前少傅在後【謂其在學時】入則有保出則有師【謂燕居出入時】是以教諭而德成也【以有四人維持之】師也者教之以事而喻諸德者也保也者慎其身以輔翼之而歸諸道者也【慎其身者謹安護之】記曰虞夏商周有師保有疑丞【記所云謂天子也取以成說】設四輔及三公不必備唯其人語使能也【語言也得能則用之無則已不必備其官也小人處其位不如且闕】君子曰德德成而教尊教尊而官正官正而國治君之謂也【文王世子】周文王使太公望傅太子發嗜鮑魚而太公弗與曰禮鮑魚不登於俎豈有非禮而可以養太子哉【賈誼新書】成王幼不能蒞阼【蒞視也不能視阼階行人君之事】周公相踐阼而治【踐履也代成王履阼階攝王位治天下也】抗世子法於伯禽欲令成王之知父子君臣長幼之道也【抗猶舉也謂舉以世子之法使與成王居而學之】成王有過則撻伯禽所以示成王世子之道也【以成王之過擊伯禽則足以感喻焉 文王世子】仲尼曰昔者周公攝政踐阼而治抗世子法於伯禽所以善成王也聞之曰為人臣者殺其身有益於君則為之況于其身以善其君乎周公優為之【聞之者聞之於古也于讀為迂迂猶廣也大也】是故知為人子然後可以為人父知為人臣然後可以為人君知事人然後能使人成王幼不能蒞阼以為世子則無為也【以為世子若為世子時】是故抗世子法於伯禽使之與成王居【亦學此禮於成王側】欲令成王之

知父子君臣長幼之義也君之於世子也親則父也尊則君也有父之親有君之尊然後兼天下而有之是故養世子不可不慎也【處君父之位覽海內之上而近不能教其子則其餘不足觀矣】行一物而三善皆得者唯世子而已其齒於學之謂也【物猶事也】故世子齒於學國人觀之曰將君我而與我齒讓何也曰有父在則禮然然而衆知父子之道矣其二曰將君我而與我齒讓何也曰有君在則禮然然而衆著於君臣之義也其三曰將君我而與我齒讓何也曰長長也然而衆知長幼之節矣故父在斯為子君在斯謂之臣居子與臣之節所以尊君親親也故學之為父子焉學之為君臣焉學之為長幼焉【學教】父子君臣長幼之道得而國治語曰樂正司業父師司成一有元良萬國以貞世子之謂也【司主也一一人也元大也良善也貞正也同上】

賈誼曰古之王者太子迺生固舉以禮【大戴禮保傅篇迺作乃後同以作之 鄭曰古即殷周時也】使士負之【鄭曰卜其吉也】有司齊肅端冕見之南郊見于天也【大戴齊肅作參夙興鄭曰參職謂三月朝也朱子曰參乃齊字之誤其下當脫一字而注文職字亦誤】過闕則下【鄭曰敬君典法之處】過廟則趨【鄭曰逕闕故下望廟則趨】孝子之道也故自為赤子而教固已行矣【大戴而作時已作以 顏曰赤子言其新生未有眉髮其色赤】昔者成王幼在襁褓之中召公為太保周公為太傅太公為太師保其身體【鄭曰保謂安守之顏曰保安也】傳傳之德義【大戴之作其

鄭曰傳猶敷也顏曰傳輔也】師導之教訓【大戴訓作順 鄭曰師傅之教大同也師上於訓道傳即受而述之書叙曰周公為師召公為保相成王為左右也】此三公之職也【鄭曰今尚書說三公司馬司徒司空也尚書及周禮說古文與此同故先儒論者多依此為說也】於是為置三少皆上大夫也【鄭曰卿也謂之孤也】曰少保少傅少師是與太子宴者也【鄭曰記者因成王幼稚周公居攝又以王少漸聖賢之訓長終封禪之美故據其成事同於太子而始末叙之取明殷周之隆師友為先也顏曰宴謂安居】故迺孩提有識三公三少固明孝仁禮義以導習之【大戴無迺有識三字之下有也字顏曰孩小兒也提謂提撕之】逐去邪人不使見惡行於是皆選天下之端士孝悌博聞有道德者以衛翼之使與太子居處出入【大戴皆作比下下無之字博聞作閑博衛作輔使下有之字】故太子乃生而見正事聞正言行正道【大戴無生而二字有目字】左右前後皆正人也【大戴左右下皆有視字人下無也字】夫習與正人居之不能毋正猶生長於齊不能不齊言也【大戴居下無之字母作不正下有也字】習與不正人居之不能毋不正猶生長於楚不能不楚言也故擇其所耆必先受業迺得嘗之擇其所樂必先有習迺得為之【鄭曰恐其懈惰故以所味好而誘之】孔子曰少成若天性【大戴無天字】習貫如自然【大戴如自然作之為常下又有此殷周之所以長有常道也十一字 鄭曰言人性本或有所不能少教成之若天性自然也周書曰習之為常自血氣始顏曰貫亦習也】及太子少長知妃色【顏曰妃色妃匹之色】則入于學【大戴作小學又引學禮一段今見學制篇】及太子既冠成人免於保傅之嚴則有記過之史【大戴記作司 顏曰有過則記】徹膳之宰【大戴有有字徹下有虧字宰下云太子有過史必書之史之義不得不書過不書過則死過書而宰徹去膳夫膳宰之義不得不徹膳不徹膳則死】進善之旌【大戴旌作旂 鄭曰堯置之令進善者立於旂下也】誹謗之木【鄭曰堯設之使書政之愆失也】敢諫之鼓【鄭曰舜置之使諫者擊之以自聞也】瞽史誦詩【顏曰瞽無目者也】工誦箴諫【大戴箴作正 鄭曰工樂人也瞽官長誦謂隨其過誦詩以諷】大夫進謀【大戴無此四字】士傳民語習與智長故切而不媿【大戴媿作穰

鄭曰量知受業故雖勞能授也漢書作媿顏曰每被切磋故無大過可耻媿之事朱子曰此文漢書為是而顏說亦非其意但謂習聞規誨與智俱長故諫之雖切亦能受之而不媿恨也】

化與心成故中道若性【鄭曰觀心施化故變善如性也

朱子曰此言教化與心俱成故所為皆合於道如性自然也 大戴下有是殷周所以長有道也九字又漢書大戴皆有三代之禮一段今見朝廷禮篇】夫三代之所以長久者以其輔翼太子有此具也【大戴三代作殷周之前者下無以字太作天下同又漢書大戴皆有及秦不然一段今刪去】天下之命懸於太子太子之善在於早諭教與選左右【顏曰諭曉告也與猶及也】開於道術知義理之指則教之力也【大戴力作功】若其服習積貫則左右而已【大戴其作夫無而字】胡粵之人生而同聲嗜欲不異及其長而成俗累數譯而不能相通行者有雖死而不能相為者則教習然也【大戴粵作越俗下有也字累作參有雖作雖有死下無而字者下無則字 鄭曰生而同聲及其長也重譯而曉之不能使言語相通嗜欲不異至於成俗其所行雖有死之可畏猶不能相為者皆習使之然也蘇林曰言其人之行不能易事相為處 朱子曰行有雖死而不能相為者鄭說誤蘇說是也承上文言習俗之殊終身不變雖至於死而不能相放倣猶老子言民至老死不相往來也】故曰選左右早諭教最急夫教得而左右正【大戴再有左右正三字】則太子正矣太子正而天下定矣【鄭曰孟子曰君正莫不正也君正而國定也】書曰一人有慶兆民賴之此之謂也【漢書賈誼傳】楚莊王使士亹傳太子箴【莊王楚君名旅也士亹楚大夫箴恭王名也】問

於申叔時【叔時楚賢大夫申公】叔時曰教之春秋而為之聳善而抑惡焉以戒勸其心【以天時紀人事謂之春秋聳獎也抑貶也】教之世而為之昭明德而廢幽昏焉【世謂先王之世系也昭顯也幽闇也昏亂也為之陳有明德者世顯而闇亂者世廢也】以休懼其動【休嘉也動行也使之嘉顯而懼廢也】教之詩而為之導廣顯德以耀明其志【導開也顯德謂若成湯文武周召僖公之屬諸詩所美者也】教之禮使知上下之則教之樂以疏其穢而鎮其浮【則法也疏滌也樂者所以移風易俗蕩滌人之邪穢也鎮重也浮輕也】教之令使訪物官【令謂先王官法時令也訪議也物事也使議知百官之事業】教之語使明其德而知先王之務用明德於民也【語治國之善語】教之故志使知廢興者而戒懼焉【故志謂所記前世成敗之書】垂之訓典使知族類行比義焉【訓典五帝之書族類謂若惇叙九族比義義之與比也】若是而不從【不見從也】動而不悛【悛改也】則文詠物以行之【文文辭也詠風也謂以文辭風記事物以動行之】求賢良以翼之【翼輔也】悛而不攝則身勤之【攝固也勤勤身以勗勉之】多訓典刑以納之【刑法也】務慎惇篤以固之攝而不徹【徹通也】則明施舍以導之忠【施己所欲原心舍過謂之忠恕】明久長以導之信【有信然後可以長久】明度量以導之義【義宜也言度量所宜也】明等級以導之禮【等級貴賤之品】明恭儉以導之孝【恭儉所以事親】明敬戒以導之事【敬戒於事則無敗功】明慈愛以導之仁明昭利以導之文【昭明也明利言利人及物】明除害以導之武【除害去暴亂也】明精意以導之罰【明盡精意斷之以情】明正德以導之賞【正德謂不私於所愛】明齊肅以耀之臨【齊壹也肅敬也耀明也臨臨事也】若是而不濟不可為也【濟成也謂為師傅也國語楚語】司馬侯對晉悼公曰諸侯之為日在君側【為行也】以其善行以其惡戒可謂德義矣公曰孰能對曰羊舌肸習於春秋【肸叔向之名春秋紀人事之善惡而目以天時謂之春秋周史之法也時孔子未作春秋】乃召叔嚮使傳太子彪【

彪平公也晉語】

書數 通禮二十

補

大司徒以鄉三物教萬民而賓興之三曰六藝禮樂射御書數【詳見學制】

保氏養國子以道乃教之六藝五曰六書六曰九數【同上】

八年出就外傳居宿於外學書計【外傳教學之師也 內則】

上古結繩而治後世聖人易之以書契百官以治萬民以察蓋取諸夬【明決之意繫辭傳】

黃帝之史蒼頡見鳥獸蹏迒之迹知分理之可相別異也初造書契百工以乂萬品以察蒼頡之初作書蓋依類象形故謂之文其後形聲相益即謂之字字者言孳乳而浸多也著於竹帛謂之書書者如也以迄五帝三王之世改易殊體封於泰山者七十有二代靡有同焉周禮八歲入小學保氏教國子先以六書一曰指事指事者視而可識察而可見上下是也二曰象形象形者畫成其物隨體詰詘日月是也三曰形聲形聲者以事為名取譬相成江河是也四曰會意會意者比類合意以見指撝武信是也五曰轉註轉註者建類一首同意相受考老是也六曰假借假借者本無其字依聲託事令長是也及宣王太史籀著大篆十五篇與古文或異至孔子書六經左丘明述春秋傳皆以古文厥意可得而說其後諸侯力政不統於王惡禮樂之害己而皆去其典籍分為七國田疇異疇車涂異軌律令異法衣冠異制言語異聲文字異形秦始皇帝初兼天下丞相李斯乃奏同之罷其不與秦文合者斯作蒼頡篇中車府令趙高作爰歷篇太史令胡毋敬作博學篇皆取史籀大篆或頗省改所謂小篆者也是時秦燒滅詩書滌除舊典大發隸卒興役戍官獄職務繁初有隸書以趣約易而古文由此絕矣【許慎說文解字序】 小史掌邦國之志【鄭司農云志謂記也春秋傳所謂周志國語所謂鄭書之屬是也史官主書故韓宣子聘於魯觀書太史氏 春官】 外史掌四方之志【志記也謂若魯之春秋晉之乘楚之檮杌】 掌三王五帝之書【楚靈王所謂三墳五典】 掌達書名于四方【謂若堯典禹貢達此名使知之或曰古曰名今曰字使四方知書之文字得能讀之 同上】 大行人王之所以撫邦國諸侯者九歲屬瞽史諭書名【書名書之字也古曰名聘禮曰百名以上 秋官】 非天子不考文【文書名】 今天下書同文【今子思自謂當時也 中庸】 韓宣子來聘觀書於太史氏見易象與魯春秋曰周禮盡在魯矣【易象上下經之象辭魯春秋史記之策書春秋遵周公之典以序事故曰周禮盡在魯矣】 吾乃今知周公之德與周之所以王也【易象春秋文王周公之制當此時儒道廢諸國多闕唯魯備故宣子適魯而說之 昭二年左氏傳】 楚左史倚相是良史也是能讀三墳五典八索九丘【皆古書名 昭十二左氏傳】 九數一方田以御田疇界域二粟布以御交質變易三衰分以御貴賤稟稅四少廣以御積羣方圓五商功以御功程積實六均輸以御遠近勞費七盈朒以御隱雜互見八方程以御雜糅正負九勾股以御高深廣遠【九章算術】

禮書綱目卷六十八

卷六十九

欽定四庫全書

禮書綱目卷六十九 婺源江永撰

五宗 通禮二十一

補

別子為祖【諸侯之世子別為後世為始祖也謂之別子者公子不得禰先君 大傳註云別子謂公子若始來在此國者後世以為祖也】繼別為宗【別子之世長子為其族人為宗所謂百世不遷之宗 大傳注別子之世適也族人尊之謂之大宗是宗子也】繼禰者為小宗【別子庶子之長子為】

【其昆弟為宗也謂之小宗者以其將遷也 大傳注父之適也兄弟尊之謂之小宗 喪服小記大傳同】有百世不遷之宗有百世則遷之宗【遷猶變易也 大傳】

右宗法 百世不遷者別子之後也宗其繼別子之所自出也百世不遷者也宗其繼高祖者五世則遷者也尊祖故敬宗敬宗尊祖之義也【繼別子別子之世適也繼高祖者亦小宗也先言繼禰者據別子子弟之子也以高祖與禰皆有繼者則曾祖亦有也則小宗四與大宗凡宗 大傳】有五世而遷之宗其繼高祖者也【謂小宗也小宗有四或繼高祖或繼曾祖或繼祖或繼禰皆至五世則遷】是故祖遷於上宗易於下尊祖故敬宗敬宗所以尊祖禰也【宗者祖禰之正體 小記】有小宗而無大宗者有大宗而無小宗者有無宗亦莫之宗者公子是也【公子有此三事也公子謂先君之子今君昆弟】公子有宗道公子之公為其士大夫之庶者宗其士大夫之適者公子之宗道也【公子不得宗君君命適昆弟為之宗使之宗之是公子之宗道也所宗者適則如大宗死為之齊衰九月其母則小君也為其妻齊衰三月無適而宗庶則如小宗死為之大功九月其母妻無服公子唯己而已則無所宗亦莫之宗 大傳】宗者何謂也宗尊也為先祖主也宗人之所尊也古者所以必有宗何也所以長和睦也大宗能率小宗小宗能率羣弟通其有無所以統理族人者也宗其為始祖後者為大宗此百世不遷之宗也宗其為高祖後者五世而遷者也高祖遷於上宗則易於下宗其為曾祖後者為曾祖宗其為祖後者為祖宗宗其為父後者為父宗以上至高祖宗皆為小宗以其轉遷別於大宗也別子者自與其子孫為祖繼別者各自為宗小宗有四大宗有一凡有五宗人之親所以備矣【白虎通】諸侯尊宗明尊者宜之大夫不得尊宗何曰諸侯世世傳子孫故尊宗大夫不傳子孫故不尊宗也【同上】

丈夫婦人為宗子宗子之母妻【婦人女子子在室及嫁歸宗者也宗子繼別之後百世不遷所謂大宗也 喪服齊衰三月章】宗子孤為殤大功衰小功衰皆三月親則月算如邦人【言

孤有不孤者不孤則族人不為殤服服之也不孤謂父有廢疾若年七十而老子代主宗事者也孤為殤長殤中殤大功衰下殤小功衰皆如殤服而三月謂與宗子絕屬者也親謂在五屬之內算數也月數如邦人者與宗子有期之親者成人服之齊衰期長殤大功衰九月中殤大功衰七月下殤小功衰五月有大功之親者成人服之齊衰三月卒哭受以大功衰九月其長殤中殤大功衰五月下殤小功衰三月有小功之親者成人服之齊衰三月卒哭受以小功衰五月其殤與絕屬者同有總麻之親者成人及殤皆與絕屬者同 喪服記】 大夫為宗子【齊衰三月章】 女子子適人者為其昆弟之為父後者【齊衰不杖期章】 為人後者【斬衰三年章】

為殤後者以其服服之【言為後者據承之也殤無為人父之道以本親之服服之 小記】 為人後者為其父母報【齊衰不杖期章】 為人後者為其昆弟【大功九月章】 為人後者於兄弟降

一等報【言報者嫌其為宗子不降 喪服記】 庶子不為長子斬【小記】 右宗支服制 丈夫婦人為宗子宗子之母妻傳曰何以服齊衰三月也尊祖也尊祖故敬宗敬宗者尊祖之義也宗子之母在則不為宗子之妻服也 大夫為宗子何以服齊衰三月也大夫不敢降其宗也女子子適人者為昆弟之為父後者何以亦期也婦人雖在外必有歸宗曰小宗故服期也【歸宗者父雖卒猶自歸宗其為父後服重者不自絕於其族類也曰小宗者言是乃小宗也小宗明非一也小宗有四丈夫婦人之為小宗各如其親之服辟大宗】 為人後者何以三年也受重者必以尊服服之何如而可為之後同宗則可為之後何如而可以為人後支子可也為所後者之祖父母妻妻之父母昆弟昆弟之子若子【若子者為所為後之親如親子】 為人後者為其父母報何以期也不貳斬也何以不貳斬也特重於大宗者降其小宗也為人後者孰後後大宗也曷為後大宗大宗者尊之統也禽獸知母而不知父野人曰父母何算焉都邑之士則知尊禰矣大夫及學士則知尊祖矣諸侯及其大祖天子及其始祖之所自出尊者尊統上卑者尊統下大宗者尊之統也大宗者收族者也不可以絕故族人以支子後大宗也適子不得後大宗【都邑之士則知尊禰近政化也大祖始封之君始祖者感神靈而生若稷契也自由也及始祖之所由出謂祭天也上猶遠也下猶近也收族者謂別親疎序昭穆大傳曰繼之以姓而弗別綴之以食而弗殊雖百世而昏姻不通者周道然也】 為人後者為其昆弟何以大功也為人後者降

其昆弟也【並喪服傳】 庶人不為長子斬不繼祖與禰故也【尊先祖之正體不二其統也言不繼祖禰別長子不必五世 小記】 庶人不得為長子三年不繼祖也【大傳】

支子不祭祭必告於宗子【不敢自專謂宗子有故支子當攝而祭者也五宗皆然曲禮】 庶人不祭殤與無後者殤與無後者從祖祔食【不祭殤者父之庶也不祭無後者祖之庶也此二者當從祖祔食而已不祭祖無所食之也共其牲物而宗子主其禮焉祖庶之殤則自祭之凡所祭殤者唯適子耳無後者謂昆弟諸父也宗子之諸父無後者為禋祭之 小記】

右宗支祭法 庶子不祭明其宗也【明猶尊也一統焉族人上不祫君下又辟宗乃後能相序 大傳】 庶子不祭祖者明其宗也【明其尊宗以為本也禰則不祭矣言不祭祖者主謂宗子

庶子俱為適士得立祖禰廟者也凡正體在乎上者謂下正猶為庶也 小記】
庶子不祭禰者明其宗也【謂宗子庶子俱為下士得立禰廟也雖庶人亦然 同上】 曾子問曰宗子為士庶子為大夫其祭也如之何孔子曰以上牲祭於宗子之家【貴祿重宗也上牲大夫少牢】祝曰孝子某為介子某薦其常事【外副也不言庶使若可以祭然】若宗子有罪居于他國庶子為大夫其祭也祝曰孝子某使介子某執其常事【此之謂宗子攝大夫】攝主不厭祭不旅不假不綏祭不配【皆辟正主厭厭飫神也厭有陰有陽迎主之前祝酌奠奠之且饗是陰厭也尸謖之後徹薦俎敦設於西北隅是陽厭也此不厭者不陽厭也不旅不旅酬也假讀為嘏不嘏不嘏主人也不綏祭謂今主人也綏周禮作墮不配者祝辭不言以某妃配某氏】布奠於賓賓奠而不舉【布奠謂主人酬賓奠饌於薦北賓奠謂取饌奠於薦南也此酬之始也奠之不舉止旅】不歸肉【肉俎也謂與祭者留之共燕】其辭於賓曰宗兄宗弟宗子在他國使某辭【辭猶告也宿賓之辭與宗子為列則曰宗兄若子弟昭穆異者曰宗子而已其辭若云宗兄某在他國使某執其常事使某告 曾子問】 曾子問曰宗子去在他國庶子無爵而居者可以祭乎孔子曰祭哉【有子孫存不可以乏先祖之祀】請問其祭如何孔子曰望墓而為壇以時祭【不祭於廟無爵者賤遠辟正主】若宗子死告於墓而後祭於家【言祭於家容無廟也】宗子死稱名不言孝【孝宗子之稱不敢與之同其辭但言子某薦其常事】身沒而已【至子可以稱孝】子游之徒有庶子祭者以此【以用也用此禮祭也】若義也【若順】今之祭者不首其義故誣於祭也【首本也誣猶妄也 同上】孔子曰有陰厭有陽厭【言祭殯之禮有於陰厭之者有於陽厭之者】曾子問曰殯不祔祭何謂陰厭陽厭【祔當為備聲之誤也言殯乃不成人祭之不備禮而云陰厭陽厭乎此失孔子指也祭成人始設奠於奧迎尸之前謂之陰厭尸謖之後改饌於西北隅謂之陽厭殯則不備】孔子曰宗子為殯而死庶子弗為後也【族人以其倫代之明不序昭穆立之廟其祭之就其祖而已代之者主其禮】其吉祭特性【尊宗子從成人也凡殯則特豚自卒哭成事之後為吉祭】祭殯不舉肺無胾俎無玄酒不告利成【此其無尸及所降也其他始成人舉肺脊胾俎利成禮之施於尸者】是謂陰厭【是宗子而殯祭之於奧之禮小宗為殯其祭禮亦如之】凡殯與無後者祭於宗子之家當室之白尊于東房是謂陽厭【凡殯與庶子之適也或昆弟之子或從父昆弟無後者如有昆弟及諸父此則今死者皆宗子大功之內親共祖禰者言祭於宗子之家者為有異居之道也無廟者為殯祭之親者共其牲物宗子皆主其禮當室之白尊於東房異於宗子之為殯當室之白謂西北隅得戶明者也明者白陽凡祖廟在小宗之家小宗祭之亦然宗子之適亦為凡殯過此以往則不祭也祭適者天子不祭五諸侯不祭三大夫下祭二士以下祭子而止 同上】

適子庶子祇事宗子宗婦【祇敬也宗子大宗】雖貴富不敢以貴富入宗子之家雖衆車徒舍於外以寡約入【入謂入宗子家】子弟猶歸器衣服裘衾車馬則必獻其上而后敢服用其次也【猶若也子弟若有功德以物見饋賜當以善者與宗子也】若非所獻則不敢以入於宗子之門【謂非宗子之爵所當服也】不敢以貴富加於父兄宗族【加猶高也】若富則具二牲獻其賢者於宗子【賢猶善也】夫婦皆齊而宗敬焉【當助祭於宗子之家】終事而後敢私祭【祭其祖禰內則】 右事宗之禮

孔子曰宗子雖七十無主婦【族人之婦不可無統】非宗子雖無主婦可也【曾子問】傳曰子不私其父則不成為子故有東宮有西宮有南宮有北宮異居而同財有餘則歸之宗

不足則資之宗【宗者世久為小宗典宗事者也資取也喪服傳】宗室有事族人皆待終日大宗已待於賓奠然後燕私【謂卿大夫以下宗室大宗子之家也禮志云別子為祖繼別為大宗繼禰為小宗賓僚友助祭也】燕私者何也祭已而與族人飲不醉而出是不親也醉而不出是渫宗也【出猶去也】出而不止是不忠也【忠厚】親而甚敬忠而不倦若是則兄弟之道備備者成也成者成於宗室也故曰飲而醉者宗室之意也德將無醉族人之志也是故祀禮有讓德施有復義之至也【復反尚書大傳】

大宰以八統詔王馭萬民一曰親親【親親若堯親九族也】以九兩繫邦國之民五曰宗以族得民【宗繼別為大宗收族者天官】大宗伯以嘉禮親萬民以飲食之禮親宗族兄弟【親者使之相親人君有食宗族飲酒之禮所以親之也文王世子曰族食世降一等大傳曰繫之以姓而弗別綴之以食而弗殊百世而昏姻不通者周道然也春官】小宗伯掌三族之別以辨親疎其正室皆謂之門子掌其政令【三族謂父子孫人道之正名喪服小記曰親親以三為五以五為九正室適子也將代父當門者也政令謂後守之事同上】大司徒以本俗六安萬民二曰族墳墓三曰聯兄弟【族猶類也同宗者生相近死相迫聯猶合也兄弟昏姻嫁娶也地官】小司寇以八辟麗邦灋附刑罰一曰議親之辟【鄭司農云若今時宗室有罪先請是也】凡王之同族有罪不即市【鄭司農云刑諸甸師氏禮記曰刑于隱者不與國人慮兄弟秋官】庶子之正於公族者教之以孝弟睦友子愛明父子之義長幼之序【正者故也庶子司馬之屬掌國子之倅為政於公族者】其朝於公內朝則東面北上臣有貴者以齒【內朝路寢庭】其在外朝則以官司士為之【外朝路寢門之外庭司士亦司馬之屬也掌羣臣之班正朝儀之位也】其在宗廟之中則如外朝之位宗人授事以爵以官【宗人掌禮及宗廟也以爵貴賤異位也以官官各有所掌也若司徒奉牛司馬奉羊司空奉豕】其登餼獻受爵則以上嗣【上嗣君之適長子以特牲饋食禮言之受謂上嗣舉奠也獻謂舉奠洗爵酌入也餼謂宗人遣舉奠盥祝命之餼也大夫之嗣無此禮辟君也】庶子治之雖有三命不踰父兄【治之治公族之禮也唯於內朝則然其餘會聚之事則與庶姓同一命齒於鄉里再命齒於父族三命不齒不齒者特為位不在父兄行列中】其公大事則以其喪服之精麤為序雖於公族之喪亦如之以次主人【大事謂死喪也其為君雖皆斬衰序之必以本親也主人主喪者次主人者主人恒在上主人雖有父兄猶不得不齒】若公與族燕則異姓為賓【同宗無相賓客之道】膳宰為主人【君尊不獻酒】公與父兄齒【親親也】族食世降一等【親者稠疎者稀】其在軍則守於公禰【謂從軍者公禰行主也所以遷主言禰在外親也】公若有出疆之政【謂朝覲會同也】庶子以公族之無事者守於公宮正室守大廟【正室適子也大廟大祖之廟】諸父守貴宮貴室【謂守路寢】諸子諸孫守下宮下室【下宮親廟也下室燕寢或言宮或言廟通異語】五廟之孫祖廟未毀雖為庶人冠取妻必告死必赴練祥則告【赴告於君也實四廟孫而言五廟者容顯考為始封子也】族之相為也宜弔不弔宜免不免有司罰之【弔謂六世以往免謂五世】至于贈賻承含皆有正焉【承讀為贈聲之誤也正正禮也】公族其有死罪則磬于甸人【不於市朝者隱之也甸人掌郊野之官縣縊殺之曰磬】其刑罪則纖剝亦告於甸人【纖讀為殲刺也剝割也宮割臍墨剝刑皆以刀鋸刺割人體也告讀為鞠讀書用法曰鞠】公族無官刑【宮割淫刑】獄成有司讞于公其死罪則曰某之罪在大辟其刑罪則曰某之罪在小辟【成平也讞之言白也辟亦罪也】公曰宥之【宥寬也欲寬其罪出於刑也】有司又曰在辟公又曰宥之【又復也】有司

又曰在辟及三宥不對走出致刑于甸人【對答也先者君每言宥則答之以將更寬之至於三罪定不復答走往刑之為君之恩無已】公又使人追之曰雖然必赦之有司對曰無及也【罪既正不可宥乃欲赦之重刑殺其類也】反命於公【白已刑殺】公素服不舉為之變如其倫之喪無服【素服於凶事為吉於吉事為凶非喪服也君雖不服卿大夫死則皮弁錫衰以居往弔當事則弁經於士蓋疑衰同姓則總衰以弔之今無服者不往弔也倫謂親疎之比也素服亦皮弁矣】親哭之【不往弔為位哭之而已君於臣使有司哭之文王世子】君有合族之道族人不得以其戚戚君位也【君恩可以下施而族人皆臣也不得以父兄子弟之親自戚於君伍謂齒列也所以尊君別嫌也 大傳】諸侯之尊兄弟不得以屬通【禮非始封之君則臣諸父昆弟兄弟匹敵之稱人臣不可以敵君故不得以屬通所以遠別貴賤尊君卑臣之義 隱七年穀梁傳】右親親 帝堯克明峻德以親九族九族既睦【九族高祖至元孫之親舉近以該遠五服異姓之親亦在其中也 堯典】凡為天下國家有九經曰親親也親親則諸父昆弟不怨尊其位重其祿同其好惡所以勸親親也【中庸】上治祖禰尊尊也下治子孫親親也旁治昆弟合族以食序以昭繆別之以禮義人道竭矣【治猶正也繆讀為穆聲之誤也竭盡也】立權度量考文章改正朔易服色殊徽號異器械別衣服此其所得與民變革者也【權秤也度丈尺也量斗斛也文章禮法也服色車馬也徽號旌旗之名也器械禮樂之器及甲兵也衣服吉凶之制也徽或作輝】其不可得變革者則有矣親親也尊尊也長長也男女有別此其不可得與民變革者也【四者人道之常 大傳】四世而總服之窮也五世袒免殺同姓也六世親屬竭矣【四世其高祖五世高祖昆弟六世以外親盡無屬名】其庶姓別於上而戚單於下昏姻可以通乎【問之也元孫之子姓別於高祖五世而無服姓世所由生】繫之以姓而弗別綴之以食而弗殊雖百世而昏姻不通者周道然也【周之禮所建者長也姓正姓也始祖為正姓高祖為庶姓繫之弗別謂若今宗室屬籍也周禮小史定繫世辨昭穆 同上】親親以三為五以五為九上殺下殺旁殺而親畢矣【已上親父下親子三也以父親祖以子親孫五也以祖親高祖以孫親元孫九也殺謂親益疎者服之益輕 喪服小記】自仁率親等而上之至於祖自義率祖順而下之至于禰是故人道親親也【言先有恩】親親故尊祖尊祖故敬宗敬宗故收族收族故宗廟嚴宗廟嚴故重社稷重社稷故愛百姓愛百姓故刑罰中刑罰中故庶民安庶民安故財用足財用足故百志成百志成故禮俗刑禮俗刑然後樂【收族序以昭穆也嚴猶尊也孝經曰孝莫大於嚴父百志人之志意所欲也刑猶成也】詩云不顯不承無斁於人斯此之謂也【斁厭也言文王之德不顯乎不承成先人之業乎言其顯且承之人樂之無厭也 大傳】諸侯之子稱公子公子不得禰先君公子之子稱公孫公孫不得祖諸侯此自卑別於尊者也若公子之子孫有封為國君者別世世祖是人也不祖公子此自尊別於卑者也是故始封之君不臣諸父昆弟封君之子不臣諸父而臣昆弟封君之孫盡臣諸父昆弟【喪服子夏傳】公族朝於內朝內親也【謂以宗族事會】雖有貴者以齒明父子也外朝以官體異姓也【體猶連結也】宗廟之中以爵為位崇德也【崇高也】宗人授事以官尊賢也【官各有能】登餼受爵以上嗣尊祖之道也【上嗣祖之正統】喪紀以服之輕重為序不奪人親也【紀猶事也】公與族燕則以齒而孝弟之道達矣【以至尊不自異於親之列】其族食世降一等親親之殺也【殺差也】戰則守於公禰孝愛之深也【行主君父之象】正室守太廟尊宗室而君臣之道著矣【以其不敢以庶守君所重】諸父諸兄守貴室子弟守下室而讓道達矣【以其貴者守貴賤者守賤上言父子孫此言兄弟互相備也】五廟之孫祖廟未毀雖及庶人冠取妻必告死必赴不忘親

也親未絕而列於庶人賤無能也敬弔臨賻賵睦友之道也古者庶子之官治而邦國有倫邦國有倫而衆鄉方矣【鄉方言知所鄉】公族之罪雖親不以犯有司正術也所以體百姓也【犯猶干也術法也】刑于隱者不與國人慮兄弟也弗弔弗為服哭於異姓之廟為忝祖遠之也素服居外不聽樂私喪之也骨肉之親無絕也公族無官刑不翦其類也【翦割截也文王世子】魯人有同姓死而弗弔者人曰在禮當免不免當弔不弔有司罰之如之何子之無弔也答曰吾以其疏遠也子思聞之曰無恩之甚也昔者季孫問於夫子曰百世之宗有絕道乎子曰繼之以姓義無絕也故同姓為宗合族為屬雖國子之尊【國子諸侯卿大夫之子】不廢其親所以崇愛也是以綴之以食序列昭穆萬世婚姻不通忠篤之道然也【孔叢子】有若問於孔子曰國君之於同姓如之何孔子曰皆有宗道焉故雖國君之尊猶百世不廢其親所以崇愛也雖於族人之親而不敢戚君所以謙也【戚親也尊敬君不敢如其親也家語】宣王欲得國子之能導訓諸侯者【賈侍中云國子諸侯之嗣子或云國子諸侯之子欲使訓導子也昭謂國子同姓諸姬也凡王子弟謂之國子導訓諸侯謂為州伯者也】樊穆仲曰魯侯孝【穆仲仲山甫之諡猶魯叔孫穆子謂之穆叔】王曰何以知之對曰肅恭明神而敬事耆老【耆凍梨也】賦事行刑必問於遺訓【遺訓先王之教也】而咨於故實【咨謀也故實故事之是者】不干所問不犯所咨王曰然則能訓治其民矣乃命魯孝公於夷宮【命為侯伯也夷宮宣王祖父夷王之廟古者爵命必於祖廟國語魯語】周襄王將以狄伐鄭富辰諫曰不可【富辰周大夫】大上以德撫民【無親疎也】其次親親以相及也【先親以及疎推恩以成義】昔周公弔二叔之不咸故封建親戚以藩屏周【弔傷也咸同也周公傷夏殷之叔世疎其親戚以至滅亡故廣封其兄弟】管蔡邲霍魯衛毛聃郕雍曹滕畢原酈郇文之昭也【十六國皆文王子也管國在滎陽京縣東北蔡在今汝南上蔡縣邲國東平剛父縣西南有邲鄉霍國今在永安縣東北有霍太山魯在兗州曲阜縣衛國在汲郡朝歌縣郕國濟陰城武縣東南有北郕城雍國在河內山陽縣西曹國在今濟陰定陶縣滕國在沛國公丘縣東南畢國在長安縣西北原國在沁水縣西酈國在始平鄠縣東郇國解縣西北有郇城毛聃闕】邲晉應韓武之穆也【四國皆武王子河內野王縣西北有邲城晉國在太原晉陽縣河東聞喜縣應國在襄王城父縣西南韓國在河東郡界】凡蔣邢茅胙祭周公之胤也【胤嗣也凡汲郡共縣東南有凡城蔣在弋陽期思縣邢國在東平襄國縣高平昌邑縣西有茅鄉東郡燕縣西南有胙亭祭闕】召穆公思周德之不類故糾合宗族于成周而作詩【類善也糾收也召穆公周卿士名虎召采地扶風雍縣東南有召亭周厲王之時周德衰微兄弟道缺召穆公于東都收會宗族特作此周公之樂歌常棣詩屬小雅】曰常棣之華鄂不韡韡凡今之人莫如兄弟【常棣棣也不豈不也鄂鄂然華外發韡韡光明貌此燕兄弟之樂歌故言常棣之華則其鄂然而外見者豈不韡韡乎凡今之人則豈有如兄弟者乎此朱子說】其四章曰兄弟鬩於牆外禦其侮【鬩訟爭貌言內雖不和猶宜外扞異族之侵侮】如是則兄弟雖有小忿不廢懿親【懿美也】今天子不忍小忿以棄鄭親其若之何庸勲親親暱近尊賢德之大者也【庸用也暱親也】即聾從昧與頑用嚚姦之大者也棄德崇姦禍之大者也【崇聚也】鄭有平惠之勲【平王東遷晉鄭是依惠王出奔號鄭納之是其勲也】又有厲宣之親【鄭始封之祖桓公友周厲王之子宣王之母弟】棄嬖寵而用三良【七年殺嬖臣申侯十六年殺寵子子華也三良叔詹堵叔師叔所謂尊賢】於諸姬為近【道近當暱之】四德具矣耳不聽五聲之和為聾目不別五色之章為昧心不則德義之經為頑口不道忠信之言為嚚狄皆則之四姦具矣周之有懿德也猶曰莫如兄弟故封建之【當周公時故言周

之有懿德】其懷柔天下也猶懼有外侮扞禦侮者莫如親親故以親屏周召穆公亦云【周公作詩召公歌之故言亦云】今周德既衰於是乎又渝周召以從諸姦無乃不可乎【變周召親兄弟之道】民未忘禍王又興之【前有子頹之亂中有叔帶召狄故曰民未忘禍】其若文武何【言將廢文武之功業】王弗聽【僖二十四年左氏傳】晉麗姬之亂詛無畜羣公子【詛盟誓】自是晉無公族【無公子故廢公族之官】及成公即位乃宦卿之適而為之田以為公族【宦位也為置田邑以為公族大夫】又宦其餘子亦為餘子【餘子適子之母弟也亦治餘子之政】其庶子為公行【庶子妾子也掌率公戎行】晉於是有公族餘子公行【皆官名宣二年左氏傳】欒伯請公族大夫【欒伯欒武子公族大夫掌公族與卿之子弟】公曰荀家惇惠【荀家晉大夫】荀會文敏【荀會荀家之族】黶也果敢【黶欒書之子桓子】無忌鎮靜【無忌韓厥之子公族穆子鎮重也靜安也】使茲四人者為之【茲此也】夫膏粱之性難正也【膏肉之肥者粱食之精者言食肥美者率多驕放其性難正】故使惇惠者教之【教之道藝】使文敏者導之【導其志行】使果敢者諗之【諗告也告得失】使鎮靜者修之【修治其氣性】惇惠者教之則徧而不倦【倦懈也】文敏者導之則婉而入【婉順也】果敢者諗之則過不隱鎮靜者修之則壹【壹均一也】使茲四人者為公族大夫【國語晉語】宋昭公將去羣公子樂豫曰不可公族公室之枝葉也若去之則本根無所庇蔭矣葛藟猶能庇其本根【葛之能藟蔓繁滋以本支蔭庇之多】故君子以為比【謂詩人取以喻九族兄弟】況國君乎此諺所謂庇焉而縱尋斧焉者也【縱放也】必不可君其圖之親之以德皆股肱也誰敢攜貳若之何去之不聽穆襄之族率國人以攻公【穆公襄公之子孫昭公所欲去者文七年左氏傳】

錫土姓【錫之土以立國錫之姓以立宗左傳所謂天子建德因生以賜姓胙之土而命之氏者也禹貢】天子建德因生以賜姓胙之土而命之氏諸侯以字為諡因以為族官有世功則有官族邑亦如之【詳見下】右姓氏仲山父曰古者司商協名姓【司商掌賜族受姓之官商金聲清謂人始生吹律合之定其姓名國語周語】司空季子曰黃帝之子二十五人其同姓者二人而已唯青陽與夷鼓皆為己姓【其二人相與同德故俱為己姓青陽金天氏帝少昊也】青陽方雷氏之甥也夷鼓彤魚氏之甥也【方雷西陵氏之姓也彤魚國名帝繫曰黃帝娶於西陵氏之子曰嫫祖實生青陽姊妹之子曰甥】其同生而異姓者四母之子別為十二姓凡黃帝之子二十五宗【唐尚書曰繼別為小宗非也繼別為大宗別子之庶姓乃為小宗耳】其得姓者十四人為十二姓【得姓以德居官而賜之姓也謂十四人而二人為姬二人為己故十二姓】姬西祁已滕箴任荀僖媯偃依是也唯青陽與倉林氏同於黃帝故皆為姬姓【二十五宗唯青陽與倉林德及黃帝同姓為姬也】同德之難也如是【言德自黃帝同之難也如是】昔少典取於有蟠氏生黃帝炎帝【賈侍中云少典黃帝炎帝之先有蟠諸侯也炎帝神農也虞唐云少典黃帝炎帝之父昭謂神農三皇也在黃帝前黃帝滅炎帝滅其子孫耳明非神農可知也言生者謂二帝本所生出也內傳高陽高辛氏各有才子八人謂其裔子耳賈君得之】黃帝以姬水成炎帝以姜水成【姬姜水名也成謂所生長以成功也】成而異德故黃帝為姬炎帝為姜二帝用師以相濟也異德之故也【濟當為擠擠滅也傳曰黃帝戰於阪泉是也】異姓則異德異德則異類雖近男女相及以生民也【近謂有屬名也相及相嫁取也】同姓則同德同德則同心同心則同志同志雖遠男女不相及畏黷敬也【畏褻瀆其類也國語晉語】無駭卒羽父請諡與族公問族於衆仲衆仲對曰天子建德【立

有德以為諸侯】因生以賜姓【因其所由生以賜姓謂若舜由媯汭故陳為媯姓】胙之土而命之氏【報之以土而命氏曰陳】諸侯以字【諸侯位卑不得賜姓故其臣因氏其王父字】為諡因以為族【或便即先人之諡稱以為族】官有世功則有官族邑亦如之【謂取其舊官舊邑之稱以為族皆稟之時君】公命以字為展氏【諸侯之子稱公子公子之子稱公孫公孫之子以王父字為氏無駭公子展之孫故為展氏隱八:left氏傳】人所以有姓者何所以崇恩愛厚親親遠禽獸別婚姻也故世別類使生相愛死相哀同姓不得相娶者皆為重人倫也姓生也人所稟天氣以生者也尚書曰平章百姓姓所以百何以為古者聖人吹律定姓以記其族人含五常而生身有五音宮商角徵羽轉而相雜五五二十五轉生四時故百而異也所以有氏者何所以貴功德賤伎力或氏其官或氏其事問其氏則可知其德所以勉人為善也或氏王父字何所以別諸侯之後為興滅國繼絕世也諸侯之子稱公子公子之子稱公孫公孫之子各以其王父字為氏故魯有仲孫季孫叔孫楚有昭屈景齊有高國崔也人必有名何所以吐情自紀尊事人者也子生三月則父名之於祖廟於祖廟者謂子之親廟也明當為宗廟主也一說名之於燕寢名者幼少卑賤之親也寡略故於燕寢人所以有字何冠德明功敬成人也所以五十乃稱伯仲者長幼之序也稱號所以有四何法四時用事先後長幼兄弟之象也故以時長幼號曰伯仲叔季也適長稱伯伯禽是也庶長稱孟魯大夫孟氏是也男女異長各自有伯仲法陰陽各自有終始也婦姓以配字何明不娶同姓也【白虎通】

親屬記 通禮二十二

補【即爾雅釋親篇】

父為考母為妣【禮記云生曰父母妻死曰考妣嬪今世學者從之按書曰大傷厥考心事厥考厥長聰聽祖考之訓蒼頡篇曰考妣延年書曰嬪于虞詩曰聿嬪于京周禮有九嬪之官明此非死生之異稱矣其義猶今謂兄為舅妹為媢即是此例也】父之考為王父父之妣為王母【加王者尊之】王父之考為曾祖王父王父之妣為曾祖王母【曾猶重也】曾祖王父之考為高祖王父曾祖王父之妣為高祖王母【高者言最在上】父之世父叔父為從祖祖父父之世母叔母為從祖祖母【從祖而別世統異故】父之舅弟先生為世父後生為叔父【世有為嫡者嗣世統故也】男子先生為兄後生為弟男子謂女子先生為姊後生為妹父之姊妹為姑父之從父舅弟為從祖父父之從祖舅弟為族父從祖父之子相謂為從祖舅弟族父之子相謂為族舅弟族兄弟之子相謂為親同姓【同姓之親無服屬】兄之子弟之子相謂為從父舅弟【從父而別】子之子為孫【孫猶後也】孫之子為曾孫【曾猶重也】曾孫之子為元孫【元者言親屬微昧也】元孫之子為來孫【言有往來之親】來孫之子為舅孫【舅後也汲冢竹書曰不窟之舅孫】舅孫之子為仍孫【仍亦重也】仍孫之子為雲孫【言輕遠如浮雲】王父之姊妹為王姑曾祖王父之姊妹為曾祖王姑高祖王父之姊妹為高祖王姑父之從父姊妹為從祖姑父之從祖姊妹為族祖姑父之從父舅弟之母為從祖王母父之從祖舅弟之母為族祖王母父之兄妻為世母父之弟妻為叔母父之從父舅弟之妻為從祖母父之從祖舅弟之妻為族祖母父之從祖祖父為族曾王父父之從祖祖母為族曾王母父之妾為庶母祖王父也舅弟也【今江東人通言舅】

右宗族

母之考為外王父母之妣為外王母母之王考為外曾王父母之王妣為外曾王母【異姓故言外】母之舅弟為舅母之從父舅弟為從舅母之姊妹為從母從母之男子為從母舅弟其女子子為從母姊妹

右母黨

妻之父為外舅妻之母為外姑【謂我舅者吾謂之甥然則亦宜呼壻為甥孟子田帝館甥于貳室是也】姑之子為甥舅之子為甥妻之舅弟為甥姊妹之夫為甥【四人體敵故更相為甥甥猶生也今人相呼蓋依此】妻之姊妹同出為姨【同出謂俱已嫁詩曰邢侯之姨】女子謂姊妹之夫為私【詩衛風碩人篇曰覃公維私】男子謂姊妹之子為出【春秋公羊傳曰蓋舅出】女子謂舅弟之子為姪【春秋左氏傳曰姪其從姑】謂出之子為離孫謂姪之子為歸孫女子子之子為外孫女子同出謂先生為姒後生為娣【同出謂俱嫁事一夫公羊傳曰諸侯娶一國二國往媵之以姪娣從娣者何弟也此即其義也】女子謂兄之妻為嫂弟之妻為婦【猶今言新婦也】長婦謂稚婦為娣婦娣婦謂長為姒婦【今相呼先後或云妯娌】

右妻黨

婦稱夫之父曰舅稱夫之母曰姑姑舅在則曰君舅君姑沒則曰先舅先姑【國語魯語曰吾聞之先姑】謂夫之庶母為少姑夫之兄為兄弟【今俗呼兄鍾語之誤耳】夫之弟為叔夫之姊為女公夫之女弟為女妹【今謂之女妹是也】子之妻為婦長婦為嫡婦衆婦為庶婦女子子之夫為壻壻之父為姻婦之父為婚父之黨為宗族母與妻之黨為兄弟婦之父母壻之父母相謂為婚姻兩壻相謂為亞【詩曰瑣瑣姻亞今江東人呼為僚壻】婦之黨為婚兄弟壻之黨為姻兄弟【古者皆謂婚姻為兄弟】嬪婦也【書曰嬪于虞】謂我舅者吾謂之甥也

右婚姻 同姓從宗合族屬異姓主名治際會名著而男女有別【合合之宗子之家序昭穆也異姓謂來嫁者也主於母與父之名耳際會婚禮交接之會也著明也母婦之名不明則人倫亂也亂者若衛宣公楚平王為子取而自納焉】其夫屬乎父道者妻皆母道也其夫屬乎子道者妻皆婦道也【言母婦無昭穆於此統於夫耳母焉則尊之婦焉則卑之尊之卑之明非已倫以厚別也】謂弟之妻婦者是嫂亦可謂之母乎【言不可也謂之婦與嫂者以其在己之列以名遠之耳復謂嫂為母則令昭穆不明昆弟之妻夫之昆弟不相為服不成其親也男女無親則遠於相見】名者人治之大者也可無慎乎【人治所以正人大傳】族者何也族者湊也聚也謂恩愛相流湊也生相親愛死相哀痛有會聚之道故謂之族族所以九何九之為言究也親疎恩愛究竟也謂父族四母族三妻族二父族四者謂父之姓一族也父女昆弟適人有子為二族也身女昆弟適人有子為三族也身女子適人有子為四族也母族三者母之父母一族也母之昆弟二族也母昆弟子三族也妻族二者妻之父為一族妻之母為二族

妻之親略故父母各一族禮曰惟是三族之不虞尚書曰以親九族義同也【白虎通】三綱者何謂也謂君臣父子夫婦也六紀者何謂也謂諸父兄弟族人諸舅師長朋友也故君為臣綱父為子綱夫為妻綱敬諸父兄六紀道行諸舅有義族人有序昆弟有親師長有尊朋友有舊何謂綱紀綱者張也紀者理也大者為綱小者為紀所以張理上下整齊人道也人皆懷五常之性有親愛之心是以綱紀為化若羅網之有綱紀而萬目張也君臣父子夫婦六人也所以稱三綱何一陰一陽謂之道陽得陰而成陰得陽而序剛柔相配故六人為三綱六紀者為三綱之紀者也師長君臣之紀也以其皆成己也諸父兄弟父子之紀也以其有親恩連也諸舅朋友夫婦之紀也以其皆有同志為紀助也君臣者何謂也君羣也下之所歸心臣者彊堅也屬志自堅固父子者何謂也父者矩也以法度教子子者孳孳無已也夫婦者何謂也夫者扶也以道扶接也婦者服也以禮屈服朋友者何謂也朋者黨也友者有也同門曰朋同志曰友謂之舅姑何舅者舊也姑者故也舊故之者老人之稱也謂之姊妹何姊者恣也妹者末也謂之兄弟何兄者況也況父法也弟者悌也心順行篤也稱夫之父母謂之舅姑何尊如父而非父者舅也親如母而非母者姑也故稱夫之父母為舅姑也【同上】

禮書綱目卷六十九

卷七十

<經部,禮類,通禮之屬,禮書綱目

欽定四庫全書

禮書綱目卷七十 婺源江永撰

名器上 通禮二十三

補

小宗伯掌五禮之禁令與其用等【用等牲器尊卑之差鄭司農云五禮吉凶賓軍嘉】辨吉凶之五服車旗宮室之禁【五服王及公卿大夫士之服】掌衣服車旗宮室之賞賜【王以賞賜有功者書曰車服以庸 春官】典命上公九命為伯其國家宮室車旗衣服禮儀皆以九為節侯伯七命其國家宮室車旗衣服禮儀皆以七為節子男五命其國家宮室車旗衣服禮儀皆以五為節王之三公八命其卿六命其大夫四命及其出封皆加一等其國家宮室車旗衣服禮儀亦如之公之孤四命其卿三命其大夫再命其士一命其宮室車旗衣服禮儀各眡其命之數大夫士亦如之子男之卿再命其大夫一命其士不命其宮室車旗衣服禮儀各眡其命之數【詳職官爵祿章】

都宗人正都禮與其服【禁督其違失者服謂衣服及宮室車旗

春官】家宗人掌家禮與其衣服宮室車旗之禁令【掌亦正也 同】

【上】

右總要 臧哀伯曰【臧哀伯魯大夫僖伯之子】清廟茅屋【以茅飾屋著儉也清廟肅然清靜之稱也】大路越席【大路玉路祀天車也越席結草】大羹不致【大羹肉汁不致五味】粢食不鑿【黍稷曰粢不精鑿】昭其儉也【此四者皆示儉】袞冕黻珽【袞畫衣也冕冠也黻韋蹕以蔽膝也珽玉笏也若今吏之持簿】帶裳幅舄【帶革帶也衣下曰裳幅若今行膝者舄複履】衡紃紃紃【衡維持冠者紃冠之垂者紃纓從下而上者紃冠上覆】昭其度也【尊卑各有制度】藻率鞞鞶【藻率以韋為之所以藉玉也王五采公侯伯三采子男二采鞞佩刀鞶上飾鞞下飾】鞶厲游纓【鞶紳帶也一名大帶厲大帶之垂者游旌旗之游纓在馬膺前如索羣】昭其數也【尊卑各有數】火龍黼黻【火畫火也龍畫龍也白與黑謂之黼形若斧黑與青謂之黻兩已相戾】昭其文也【以文章明貴賤】五色比象昭其物也【車服器械之有五色皆以比象天地四方以示器物不虛設】錫鸞和鈴昭其聲也【錫在馬額鸞在鑣和在衡鈴在旂動皆有鳴聲】三辰旂旗昭其明也【三辰日月星也畫於旂旗象天之明】夫德儉而有度登降有數【登降謂上下尊卑】文物以紀之聲明以發之以臨照百官百官於是乎戒懼而不敢易紀律【桓二年左氏傳】諸侯之宮縣而祭以白牡擊

玉磬朱干設錫冕而舞大武乘大路諸侯之僭禮也【言此皆天子之禮也宮縣四面縣也干盾也錫傳其背如龜也武萬舞也白牡大路殷天子禮也】臺門而旅樹反坫繡黼丹朱中衣大夫之僭禮也【言此皆諸侯之禮也旅道也屏謂之樹樹所以蔽行道管氏樹塞門塞猶蔽也禮天子外屏諸侯內屏大夫以簾士以帷反坫反爵之坫也蓋在尊南兩君相見主君既獻於反爵焉繡黻丹朱以為中衣領緣也繡讀為綃綃繒名也詩云素衣朱綃又云素衣朱襮繡黼領也】故天子微諸侯僭大夫強諸侯脅於此相貴以等相覲以貨相賂以利而天下之禮亂矣【言僭所由郊特牲】子云君不與同姓同車與異姓同車不同服示民不嫌也以此坊民猶得同姓以弑其君【同姓者謂先王先公子孫有繼及之道者也其非此則無嫌也僕右恒朝服君則各以時事唯在軍同服于坊記】昭公將弑季氏【傳言弑者從昭公之辭】告子家駒曰季氏

為無道僭於公室久矣【諸侯稱公室】吾欲弑之何如【昭公素畏季氏意者以為如人君故言弑】子家駒曰諸侯僭於天子大夫僭於諸侯久矣昭公曰吾何僭矣哉【失禮成俗不自知也】子家駒曰設兩觀【禮天子諸侯臺門天子外闕兩觀諸侯內闕一觀】乘大路【禮天子大路諸侯路車大夫大車士飾車】朱干玉戚【干楯也以朱飾楯戚斧也以玉飾斧】以舞大夏【大夏夏樂也周所以舞夏樂者王者始起未制作之時取先王之樂與已同者假以風化天下天下大同乃自作樂取夏樂者與周俱文也王者舞六樂于宗廟之中舞先王之樂明有法也舞已之樂明有制也舞四夷之樂大德廣及之也東夷之樂曰柶離南夷之樂曰任西夷之樂曰禁北夷之樂曰昧】八佾以舞大武此皆天子之禮也【昭二十五年公羊傳】衛孫良夫帥師及齊師戰于新築衛師敗績新築人仲叔于奚救孫桓子桓子是以免【于奚守新築大夫】既衛人賞之以邑【賞于奚】辭請曲縣【軒縣也周禮天子樂宮縣四周諸侯軒縣闕南方】繁纓以朝許之【繁纓馬飾皆諸侯之服】仲尼聞之曰惜也不如多與之邑唯器與名不可以假人【器車服名爵號】君之所司也名以出信【名位不愆為民所信】信以守器【動不失信則車服可保】器以藏禮【車服所以表尊卑】禮以行義【尊卑有禮各得其宜】義以生利【得其宜則利生】利以平民政之大節也若以假人與人政也政亡則國家從之弗可止也已【成二年左氏傳】

君天下曰天子朝諸侯分職授政任功曰予一人【皆擯者辭也天下謂外及四海也今漢於蠻夷稱天子於王侯稱皇帝覲禮曰伯父實來余一人嘉之余予古今字】踐阼臨祭祀內事曰孝王某外事曰嗣王某【皆祝辭也唯宗廟稱孝天地社稷祭之郊內而曰嗣王不敢同外內】臨諸侯畛於鬼神曰有天王某甫【畛致也祝告至于鬼神辭也曰有天王某甫某甫且字也不名者下親往也周禮大會同過山川則大祝用事焉鬼神謂百辟卿士也畛或為祇】崩曰天王崩【史書策辭】復曰天子復矣【始死時呼魄辭也不呼名臣不名君也諸侯呼字】告喪曰天王登假【告赴也登上也假已也上已者若仙去云耳】措之廟立之主曰帝【同之天神春秋傳曰凡君卒哭而祔祔而作主】天子未除喪曰予小子【謙未敢稱一人春秋傳曰以諸侯之踰年即位亦知天子之踰年即位以天子三年然後稱王亦知諸侯於其封內三年稱子】生名之死亦名之【生名之曰小子王死亦曰小子王也晉有小子侯是僭取於天子號也】五官之長曰伯【謂為三公者周禮九命作伯】是職方【職主也是伯分主東西者春秋傳曰自陝以來周公主之自陝以西召公主之一相處乎內是或為氏】其擯

於天子也曰天子之吏【擯者辭也春秋傳曰王命委之三吏謂三公也】天子同姓謂之伯父異姓謂之伯舅自稱於諸侯曰天子之老於外曰公於其國曰君【稱之以父與舅親親之辭也外自其私土之外天子畿內】九州之長入天子之國曰牧【每一州之中天子選諸侯之賢者以為之牧也周禮曰乃施典于邦國而建其牧】天子同姓謂之叔父異姓謂之叔舅於外曰侯於其國曰君【牧尊於大國之君而謂之叔父辟二伯也亦以此為尊禮或損之而益謂此類也外自其國之外九州之中曰侯者本爵也二王之後不為牧】其在東夷北狄西戎南蠻雖大曰子【謂九州之外長也天子亦選其諸侯之賢者以為之子猶牧也入天子之國曰子天子亦謂之子雖有侯伯之地本爵亦無過子是同名曰子】於內自稱曰不穀【與民言之稱穀善也】謙於外自稱曰王老【威遠國也外亦其戎狄之中】庶方小侯入天子之國曰某人於外曰子自稱曰孤【謂戎狄自子男君也男者於外亦曰男舉尊言之】諸侯見天子曰臣某侯某【謂嗇夫承命告天子辭也其為州牧則曰天子之老臣某侯某奉圭請覲某侯者國名某者人名】其與民言自稱曰寡人【謙也於臣亦然】其在凶服曰適子孤【凶服亦謂未除喪】臨祭祀內事曰孝子某侯某外事曰曾孫某侯某【稱國者遠辟天子】死曰薨【亦史書策辭】復曰某甫復矣【某甫且字並曲禮】凡自稱天子曰予一人【謙自別於人而已】伯曰天子之力臣

【伯上公九命分陝】諸侯之於天子曰某土之守臣某其在邊邑曰某屏之臣某其於敵以下曰寡人小國之君曰孤擯者亦曰孤【邊邑謂九州之外大國之君自稱曰寡人擯者曰寡君玉藻】君存稱世子【明當世父位為君】君薨稱子某【緣民臣之心不可一日無君故稱子某明繼父也名者尸柩尚存猶以君前名臣也】既葬稱子【不名者無所屈也緣終始之義一年不二君故稱子也】踰年稱公【不可曠年無君莊三十二年公羊傳】天子不言出諸侯不生名君子不親惡【天子之言出諸侯之生名皆有大惡君子所遠出名以絕之春秋傳曰天王出居於鄭衛侯朔入于衛是也】諸侯失地名滅同姓名【絕之曲禮】諸侯使人使於諸侯使者自稱曰寡君之老【繫於君以為尊也此謂諸侯之卿上大夫】列國之大夫入天子之國曰某士【亦謂諸侯之卿也三命以下於天子為士曰某士者若晉韓起聘于周擯者曰晉士起】自稱曰陪臣某【陪重也】於外曰子【子有德之稱魯春秋曰齊高子來盟】於其國曰寡君之老使者自稱曰某【使謂使人於諸侯也某名也同上】上大夫曰下臣擯者曰寡君之老下大夫自名擯者曰寡大夫世子自名擯者曰寡君之適【擯者之辭主謂見于他國君下大夫自名於他國君曰外臣某】公子曰臣孽【孽當作枿聲之誤】士曰傳遽之臣於大夫曰外私【傳遽以車馬給使者也士臣於大夫者曰私人】大夫私事使私人擯則稱名【私事使謂以君命私行非聘也若魯成公時晉侯使韓穿來言汶陽之田歸之于齊之類】公士擯則曰寡大夫寡君之老【謂聘也大聘使上大夫小聘使下大夫玉藻】非以君命使則不稱寡大夫士則曰寡君之老【謂擯贊者辭也不稱寡君不言寡君之某言姓名而已大夫卿士其使則皆曰寡君之某檀弓曰仕而未有祿者君有饋焉曰獻使焉曰寡君之老士相見禮】國君不名卿老世婦大夫不名世臣姪娣士不名家相長妾【雖賓於其國家猶有所尊也卿老上卿也世臣父時老臣】君大夫之子不敢自稱曰余小子【辟天子之子未除喪之名君大夫天子大夫有土地者】大夫士之子不敢自稱曰嗣子某【亦辟其君之子未除喪之名】不敢與世子同名【辟僭傲也其先之生則亦不改世或為大曲禮】天子之妃曰后【后之言後也】諸侯曰夫人【夫之言扶】大夫曰孺人【孺之言

屬】士曰婦人【婦之言服】庶人曰妻【妻之言齊】夫人自稱于天子曰老婦【自稱于天子謂畿內諸侯之夫人助祭若時事見】自稱於諸侯曰寡小君【謂饗來朝諸侯之時】自稱於其君曰小童自世婦以下自稱曰婢子【小童若云未成人也婢之言卑也於其君稱此以接見體敵嫌其當同上】邦君之妻君稱之曰夫人夫人自稱曰小童邦人稱之曰君夫人稱諸異邦曰寡小君異邦人稱之亦曰君夫人【寡寡德謙辭 論語】

右名號 子云天無二日土無二王家無二主尊無二上示民有君臣之別也春秋不稱楚越之王喪禮君不稱天大夫不稱君恐民之惑也【楚越之君僭號稱王不稱其喪謂不書葬也春秋傳曰吳楚之君不書葬辟其僭號也臣者天君稱天子為天王稱諸侯不言天公辟王也大夫有臣者稱之曰主不言君辟諸侯也此四者皆為使民疑惑不知孰者尊也周禮曰主友之讎視從父昆弟 坊記】孔丘卒公誅之曰旻天不弔不憖遺一老婢屏余一人以在位【仁覆閔下故稱旻天弔至也憖且也婢使也屏蔽也】瑩瑩余在疚嗚呼哀哉尼父無自律【疚病也律法也言喪尼父無以自為法】子貢曰君其不歿於魯乎夫子之言曰禮失則昏名失則愆失志為昏失所為愆生不能用死而誅之非禮也稱一人非名也【天子稱一人非諸侯之名】君兩失之【哀十六年左氏傳】

黃帝堯舜垂衣裳而天下治蓋取諸乾坤【乾坤變化而無為 易繫辭傳】帝曰予欲觀古人之象日月星辰山龍華蟲作會宗彝藻火粉米黼黻絺繡以五采彰施于五色作服汝明【象像也日月以下物象是也易曰黃帝堯舜垂衣裳而天下治蓋取諸乾坤則上衣下裳之制創自黃帝而成於堯舜也日月星辰取其照臨也山取其鎮也龍取其變也華蟲雉取其文也會繪也宗彝虎雉取其孝也藻水草取其潔也火取其明也粉米白米取其養也黼若斧形取其斷也黻為兩已相背取其辨也絺鄭氏讀為綈紕也紕以為繡也日也月也星辰也山也龍也華蟲也六者繪之於衣宗彝也藻也火也粉米也黼也黻也六者繡之于裳所謂十二章也衣之六章其序自上而下裳之六章其序自下而上采者青黃赤白黑也色者言施之于繒帛也繪于衣繡于裳皆雜施五采以為五色也汝明者汝當明其大小尊卑之差等也又案周禮以日月星辰畫于旂冕服九章登龍于山登火于宗彝以龍山華蟲火宗彝五者繪于衣以藻粉黼黻四者繡於裳衮冕九章以龍為首鷩冕七章以華蟲為首毳冕五章以虎雉為首蓋亦增損有虞之制而為之耳益稷】

臯陶曰天命有德五服五章哉【五服五等之服自九章以至一】

【章是也言天命有德之人則五等之服以彰顯之 臯陶謨】

禹惡衣服而致美乎黻冕【衣服常服黻蔽膝也以韋為之冕冠也皆祭服也 論語】有虞氏皇而祭深衣而養老夏后氏收而祭燕衣而養老殷人皐而祭縞衣而養老周人冕而祭玄衣而養老【皇冕屬也畫羽飾焉凡冕屬其服皆玄上纁下有虞氏十二章周九章夏殷未聞凡養老之服皆其時與羣臣燕之服有虞氏質深衣而已夏而改之尚黑而黑衣裳殷尚白而縞衣裳周則兼用之玄衣素裳其冠則牟追章甫委貌也諸侯以天子之燕服為朝服燕禮曰燕朝服服是服也王者之後亦以燕服為之魯季康子朝服以縞僭宋之禮也天子皮弁以日視朝也王制】委貌周道也章甫殷道也毋追夏后氏之道也【或謂委貌為玄冠委猶安也言所以安正容貌章明也殷質言以表明丈夫也甫或為父今文為斧毋發聲也追猶堆也夏后

氏質以其形名之三冠皆所常服以行道也其制之異同未之聞】周弁殷冏夏收【弁名出於槃槃大也言所以自光大也冏名出于幬幬覆也言所以自覆飾也收言所以收斂髮也齊所服而祭也其制之異未聞】三王共皮弁素積【質不變土冠禮】顏淵問為邦子曰服周之冕【周冕有五祭服之冠也冠上有覆前後有旒黃帝以來蓋已有之而制度儀等至周始備然其為物小而加於衆體之上故雖華而不為靡雖費而不及奢夫子取之蓋亦以為文而得其中也 論語已上七條歷代服制】弁師掌王之五冕皆玄冕朱裏延紐【冕服有六而言五冕者大裘之冕蓋無旒不聯數也延冕之覆在上是以名焉紐小鼻在武上笄所貫也今時冠卷當簪者廣袤以冠縱其舊象與】五采纁十有二就皆五采玉十有二玉笄朱紘【纁雜文之名也合五采絲為之繩垂于延之前後各十二所謂遽延也就成也繩之每一帀而貫五采玉十二旂則十二玉也每就間蓋一寸朱紘以朱組為紘也紘一條屬兩端於武纁不言皆有不皆者此為衮衣之冕十二旂則用玉二百八十八鷩衣之冕纁九旂用玉二百一十六毳衣之冕七旂用玉百六十八希衣之冕五旂用玉百二十玄衣之冕三旂用玉七十二】諸侯之纁旂九就璫玉三采其餘如王之事纁旂皆就玉填玉笄【侯當為公字之誤也三采朱白蒼也其餘謂延紐皆玄覆朱裏與王同也出此則異纁旂皆就皆三采也每纁九成則九旂也公之冕用玉百六十二玉填塞耳者故書璫作璫鄭司農云纁當為藻纁古字也藻今字也同物同音璫惡玉名】王之皮弁會五采玉璫象邸玉笄【故書會作膾鄭司農云讀如馬會之會謂以五采束髮也土喪禮曰檜用組乃笄檜讀與膾同書之異耳說曰以組束髮乃著笄謂之檜沛國人謂反紒為膾璫讀如綦車轂之綦玄謂會讀如大會之會會縫中也璫讀如薄借綦之綦綦結也皮弁之縫中每貫結五采玉十二以為飾謂之綦詩云會弁如星又曰其弁伊綦是也邸下柢也以象骨為之】諸侯及孤卿大夫之冕韋弁皮弁各以其等為之而掌其禁令【各以其等纁旂玉璫如其命數也冕則侯伯纁七就用玉九十八子男纁五就用玉五十纁玉皆三采孤纁四就用玉三十二三命之卿纁三就用玉十八再命之大夫纁再就用玉八纁玉皆朱綠韋弁皮弁則侯伯璫飾七子男璫飾五玉亦三采孤則璫飾四三命之卿璫飾三再命之大夫璫飾二玉亦二采一命之大夫冕而無旂土變冕為爵弁其韋弁皮弁之會無結飾玉藻曰君未有命不敢即乘服不言冠弁冠弁兼於韋弁皮弁矣夏官】天子玉藻十有二旒前後遽延【雜采曰天子以五采藻為旒旒十有二前後遽延者言皆出冕前後而垂也天子齊肩延冕上覆也玄表纁裏 玉藻】天子之冕朱綠藻十有二旒諸侯九上大夫七下大夫五士三【朱綠似夏殷禮也周禮天子五采藻 禮器】

天子冕而朱紘諸侯冕而青紘【祭義】王后親織玄紘【說云紘冠之垂前後者昭謂紘所以懸璫當耳者也】公侯之夫人加之以紘綖【既織紘復加之紘綖也冕曰紘綖纁之無綖者也從下而上不結綖冕上覆之者也 國語魯語】子曰麻冕禮也今也純儉吾從衆【麻冕緇布冠也純絲也儉謂省約緇布冠以三十升布為之升八十縷則其經二千四百縷矣細密難成不如用絲之省約 論語】有匪君子充耳琇瑩會弁如星【充耳璫也琇瑩美石也天子玉璫諸侯以石會縫也弁皮弁也以玉飾皮弁之縫中如星之明也 衛風淇澳】充耳以素乎而尚之以瓊華乎而【充耳以纁懸璫所謂紘也尚加也瓊華美石似玉者即所以為璫也】充耳以青乎而尚之以瓊瑩乎而【瓊瑩亦美石似玉者】充耳以黃乎而尚之以瓊英乎而【瓊英亦美石似玉者 齊風著】

其弁伊騏【弁皮弁也騏馬之青黑色者弁之色亦如此也書云四人騏弁今作綦 曹風鳴鳩】皮弁笄爵弁笄緇組紘纁邊【笄今之簪有笄者屈組為紘垂為飾無笄者纁而

結其條纁邊組側赤也爵弁者制如冕黑色但無纁耳周禮王之皮弁會五采玉璫象邸玉笄諸侯及孤卿大夫之冕皮弁各以其等為之則士之皮弁又無玉象邸飾士冠禮

以上十條冕弁之制】玄冠朱組纁天子之冠也緇布冠纁綏諸侯之冠【皆始冠之冠也玄冠委貌也諸侯緇布冠有綏尊者飾也纁或作繪綏或作蕤】玄冠丹組纁諸侯之齊冠也玄冠綦組纁士之齊冠也【言齊時所服也四命以上齊祭異冠】縞冠玄武子姓之冠也【謂父喪服子為之不純吉也武冠卷也古者冠卷殊】縞冠素紕既祥之冠也【紕緣邊也紕讀如埤益之埤既祥之冠也已祥祭而服之也閒傳曰大祥素縞麻衣】垂綏五寸惰游之士也

【惰游罷民也亦縞冠素紕凶服之象也垂長綏明非既祥】玄冠縞武不齒之服也【所謂不帥教者】居冠屬武【謂燕居冠也著冠於武少威儀】自天子下達有事然後綏【燕無事者去飾】大帛不綏【帛當為白聲之誤也大帛謂白布冠也不綏凶服去飾玉藻】大白冠緇布之冠皆不蕤委武玄縞而后蕤【不蕤質無飾也大白冠大白之布冠也春秋傳曰衛文公大布之衣大白之冠委武冠卷也秦人曰委齊東曰武玄玄冠也縞縞冠也雜記】

始冠緇布冠自諸侯下達冠而敝之可也【本大古耳非時王之法服也玉藻】始冠之緇布之冠也大古冠布齊則緇之其綏也孔子曰吾未之聞也【大古無飾非時人綏也雜記曰大白緇布之冠不綏大白即大古白布冠今喪冠也齊則緇之者鬼神尚幽闇也唐虞以上曰大古也】冠而敝之可也【此重古而冠之耳三代改制齊冠不復用也以白布冠質以為喪冠也郊特牲】古者冠縮縫今也衡縫【縮從也今禮制衡讀為橫今冠橫縫以其辟積多

檀弓】緇布冠缺項青組纁屬于缺緇纁廣終幅長六尺【缺讀如有頰者弁之頰緇布冠無笄者著頰圍髮際結頂中隅為四綴以固冠也項中有 亦由固頰為之耳今未冠笄者著卷幘頰象之所生也滕薛名薊為頰屬猶著纁今之幘梁也終充也纁一幅長六尺足以韜髮而結之矣緇布冠今小吏冠其遺象也士冠禮】

彼都人士臺笠緇撮【臺夫須也緇撮緇布冠也其制小僅可撮其髻也小雅都人士】黃衣黃冠而祭息田夫也【祭謂既蜡臘先祖五祀也於是勞農以休息之論語曰黃衣狐裘】野夫黃冠黃冠草服也【言祭以息民服象其時物之色季秋而草木黃落郊特牲

已上八條冠制】追師掌王后之首服為副編次追衡笄為九嬪及外內命婦之首服以待祭祀賓客【鄭司農云追冠名士冠禮記曰委貌周道也章甫殷道也母追夏后氏之道也追師掌冠冕之官故並主王后之首服副者婦人之首服祭統曰君卷冕立于阼夫人副褱立于東房衡維持冠者春秋傳曰衡統紘紕玄謂副之言覆所以覆首為之飾其遺象若今步繇矣服之以從王祭祀編編列髮為之其遺象若今假紒矣服之以桑也次次第髮長短為之所謂髮髽服之以見王王后之燕居亦纁笄總而已追猶治也詩云追琢其章王后之衡笄皆以玉為之唯祭服有衡垂于副之兩旁當耳其下以紘懸瑱詩云玼兮玼兮其之翟也鬢髮如雲不屑鬢也玉之瑱也是之謂也笄卷髮者外內命婦衣鞠衣褱衣者服編衣緣衣者服次外內命婦非王祭祀賓客佐后之禮自於其家則亦降焉少牢饋食禮曰主婦髮鬢衣移袂特牲饋食禮曰主婦纁笄綃衣是也昏禮女次純衣攝盛服耳主人爵弁以迎移 緣衣之袂凡諸侯夫人於其國衣服與王后同天官】君子偕老副笄六珈【副祭服之首飾編髮為之笄衡笄也垂于副之兩旁當耳其下以紘懸瑱珈之言加也以玉加于笄而為飾也】玉之瑱也象之掣也【瑱塞耳也象象骨也掣所以摘髮也鄘風君子偕老此二條婦人首服】

喪服布總箭笄傳曰箭笄長尺吉笄尺二寸【喪服】女子適人者為其父母卒哭子折笄首以笄傳曰折笄首者折吉笄之首也吉笄者象笄也【有首者若今時刻鏤摘頭矣同上

此二條因喪服見婦人吉笄之制】司服掌王之吉凶衣服辨其名物與其用事【用事祭祀視朝甸凶弔之事衣服各有所用】王之吉服祀昊天上帝則服大裘而冕祀五帝亦如之享先王則袞冕享先公饗射則鷩冕祀四望山川則毳冕祭社稷五祀則希冕祭羣小祀則玄冕【六服同冕者首飾尊也先公謂后稷之後大王之前不窋至諸鬻饗射饗食賓客與諸侯射也羣小祀林澤墳衍四方百物之屬鄭司農云大裘羔裘也袞卷龍衣也鷩裋衣也毳罽衣也玄謂書曰予欲觀古人之象日月星辰山龍華蟲作績宗彝藻火粉米黼黻希繡此古天子冕服十二章舜欲觀焉華蟲五色之蟲績人職曰鳥獸蛇雜四時五色以章之謂是也希讀為絺或作禘字之誤也王者相變至周而以日月星辰畫於旌旗所謂三辰旌旗昭其明也而冕服九章登龍于山登火於宗彝尊其神明也九章初一日龍次二曰山次三曰華蟲次四曰火次五曰宗彝皆畫以為績次六曰藻次七曰粉米次八曰黼次九曰黻皆希以為繡則袞之衣五章裳四章凡九也鷩畫以雉謂華蟲也其衣三章裳四章凡七也毳畫虎蜼謂宗彝也其衣三章裳二章凡五也希刺粉米無畫也其衣一章裳二章凡三也玄者衣無文裳刺黻而已是以謂玄焉凡冕服皆玄衣纁裳】凡兵事韋弁服【韋弁以韎韋為弁又以為衣裳春秋傳曰晉郤至衣韎韋之跗注是也今時五伯緹衣古兵服之遺色】眡朝則皮弁服【視朝視內外朝之事皮弁之服十五升白布衣積素以為裳王受諸侯朝覲於廟則袞冕】凡甸冠弁服【甸田獵也冠弁委貌其服緇布衣亦積素以為裳諸侯以為視朝之服詩國風曰緇衣之宜兮謂王服此以田王卒食而居則玄端】公之服自袞冕而下如王之服侯伯之服自鷩冕而下如公之服子男之服自毳冕而下如侯伯之服孤之服自希冕而下如子男之服卿大夫之服自玄冕而下如孤之服士之服自皮弁而下如大夫之服其齊服有玄端素端【自公之袞冕至卿大夫之玄冕皆其朝聘天子及助祭之服諸侯非二王後其餘皆玄冕而祭於已雜記曰大夫冕而祭于公弁而祭於已士弁而祭於公冠而祭于已大夫爵弁自祭家廟唯孤爾其餘皆玄冠與士同玄冠自祭其廟者其服朝服玄端諸侯之自相朝聘皆皮弁服此天子日視朝之服士齊有素端者亦為札荒有所禱請變素服言素端者明異制鄭司農云玄有襦裳者為端玄謂端者取其正也士之衣袂皆二尺二寸而屬幅是廣袤等也其祛尺二寸大夫以上侈之侈之者蓋半而益一焉半而益一則其袂三尺三寸祛尺八寸春官】天子玉藻十有二旒前後邃延龍卷以祭【祭先王之服也龍卷畫龍於衣字或作袞疑畫蟠龍故謂之卷】玄端而朝日聽朔【端當為冕字之誤也玄衣而冕冕服之下】皮弁以日視朝遂以食卒食玄端而居【天子服玄端燕居也】諸侯玄端以祭【祭先君也端亦當為冕字之誤也諸侯祭宗廟之服唯魯與天子同】裋冕以朝【朝天子也裋冕公袞侯伯鷩子男毳也】皮弁以聽朔於大廟【皮弁下天子也】朝服以日視朝於內朝【朝服冠玄端素裳也】退適路寢聽政大夫退然後適小寢釋服【釋服服玄端】又朝服以食【食必朝服所以敬養身也】夕深衣祭牢肉【玉藻】制三公一命卷若有加則賜也不過九命【卷俗讀也其通則曰袞三公八命矣復加一命則服龍袞與王者之後同多於此則賜非命服也虞夏之制天子服有日月星辰周禮曰諸公之服自袞冕而下如王之服王制】再命受服【鄭司農云受服受祭衣服為上士玄謂此受玄冕之服列國之大夫再命於子男為卿卿大夫自玄冕而下如孤之服王之中士亦再命則爵弁服春官大宗伯】大夫冕而祭於公弁而祭於已士弁而祭於公冠而祭於已【弁爵弁也冠玄冠也祭於公助君祭也大夫爵弁而祭于已唯孤爾】士弁而親迎然則士弁而祭於已可也【緣類欲許之也親迎雖亦已之事攝盛服爾非常也雜記】少牢饋食之禮主人朝服

特牲饋食之禮主人冠端玄【冠端玄玄冠端端下言玄者玄冠有不玄端者】朝玄端夕深衣【謂大夫士也 玉藻已上八條通論天子諸侯大夫士之服】衣正色裳間色【謂冕服玄上纁下同上】畫繪之事雜五色東方謂之青南方謂之赤西方謂之白北方謂之黑天謂之玄地謂之黃青與白相次也赤與黑相次也玄與黃相次也【此言畫纁六色所象及布采之第次纁以為衣】青與赤謂之文赤與白謂之章白與黑謂之黼黑與青謂之黻五采備謂之繡【此言刺繡采所用繡以為裳】土以黃其象方天時變【古人之象無天地也為此記者見時有之耳子家駒曰天子僭天意亦是也鄭司農云天時變謂畫天隨四時色】火以圓【鄭司農云為圓形似火也玄謂形如半環然在裳】山以章【章讀為獐獐山物也在衣齊人謂麋為獐】水以龍【龍水物在衣】鳥獸蛇【所謂華蟲也在衣蟲之毛鱗有文采者】雜四時五色之位以章之謂之巧【章明也纁繡皆用五采鮮明之是為巧】凡畫繪之事後素功【素白采也後布之謂其易漬汙也不言繡繡以絲也鄭司農說以論語曰纁事後素考工記】禮有以文為貴者天子龍袞諸侯黼大夫黻士

玄衣纁裳【此祭冕服也 禮記】上公冕服九章侯伯冕服七章子男冕服五章【冕服著冕所服之衣也九章者自龍山以下七章者自華蟲以下五章者自宗彝以下也 秋官大行人】覲禮侯氏裨冕【裨冕者衣裨衣而冠冕也裨之為言埤也天子六服大裘為上其餘為裨以事尊卑服之而諸侯亦服焉上公袞無升龍侯伯鷩子男毳孤絺卿大夫玄此差司服所掌也已上五條冕服之制】士冠禮爵弁服纁裳純衣緇帶韎韐【此與君祭之服雜記曰士弁而祭于公爵弁者冕之次其色赤而微黑如爵頭然或謂之緇其布三十升纁裳淺絳裳凡染絳一入謂之緇再入謂之纁三入謂之纁朱則四入與純衣絲衣也餘衣皆用布唯冕與爵弁服用絲耳先裳後衣者欲令下近緇明衣與帶同色韎韐韞韐也士韞韐而幽衡合韋為之士染以茅蒐因以名焉今齊人名蒨為韎韐韐之制似韞冠弁者不與衣陳而言于上以冠名服耳】皮弁服素積緇帶素韠【此與君視朔之服也皮弁者以白鹿皮為冠象上古也積猶辟也以素為裳辟蹙其要中皮弁之衣用布亦十五升其色象焉】玄端玄裳黃裳雜裳可也緇帶爵韠【此莫夕於朝之服玄端即朝服之衣易其裳耳上士玄裳中士黃裳下士雜裳雜裳者前玄後黃易曰夫玄黃者天地之雜也天玄而地黃士皆爵韠為韠其爵同不以玄冠名服者是為緇布冠陳之玉藻曰韠君朱大夫素士爵韠】朝服十五升【雜記】士冠禮筮于席門主人玄冠朝服緇帶素韠【玄冠委貌也朝服者十五升布衣而素裳也 不言色者衣與冠同也緇帶黑繪帶也士帶博二寸再繚四寸屈垂三尺素韠白韠也長三尺上廣一尺下廣二尺其頸五寸肩革帶博三寸天子與其臣玄冕以視朔皮弁以日視朝諸侯與其臣皮弁以視朔朝服以日視朝凡染黑五入為緇七入為緇玄則六入與

已上三條爵弁皮弁玄冠玄端服之制】深衣三祛【三祛者謂要中之數也祛尺二寸圍之為二尺四寸三之七尺二寸】縫齊倍要【縫紩也紩下齊倍要中齊丈四尺四寸縫或為縫或為豐】袷當旁【袷謂裳幅所交裂也凡袷者或殺而下或殺而上是以小要取名焉袷屬衣則垂而放之屬裳則縫之以合前後上下相變】可以回肘【二尺二寸之節】長中繼揜尺【其為長衣中衣則繼 揜一尺若今袷矣深衣則緣而已】袷二寸【曲領也】祛尺二寸【口也】緣廣寸半【飾邊也玉藻】古者深衣蓋有制度以應規矩繩權衡【言聖人制事必有法度】短毋見膚【衣服蔽形】長毋被土【為汙辱也】續衽鉤邊【續猶屬也衽在裳旁者也屬連之不殊裳前後也鉤讀如鳥喙必鉤之鉤鉤邊若今曲裾也續或為裕

】要縫半下【三分要中減一以益下下宜寬也要或為優】格之高下可以運肘【肘不能不出入格衣 當掖之縫也】袂之長短反詘之及肘【屬幅於衣詘而至肘當臂中為節臂骨上下各尺二寸則 肘以前尺二寸肘或為腕】帶下毋厭髀上毋厭脅當無骨者【當骨緩急難為中也】制十有二幅以應十有二月【裳六幅幅分之以為上下之殺】圓以應規【謂胡下也】曲袷如矩以應方【袷交領也古者方領如今小兒衣領】負繩及踝以應直【繩謂袷與後幅相當之縫也踝跟也】下齊如權衡以應平【齊緝】故規者行舉手以為容【行舉手謂揖讓】負繩抱方者以直其政方其義也故易曰坤六二之動直以方也【言深衣之直應易之丈也政或為正】下齊如權衡者以安志而平心也【心平志安行乃止或低或仰則心有異志者與】五法已施故聖人服之【言非法不服】故規矩取其無私繩取其直權衡取其平故先王貴之【貴此衣也】故可以為文可以為武可以擯相可以治軍旅完且弗費善衣之次也【完且弗費言可苦衣而易有也深衣者用十五升布鍛濯灰治純之以采善衣朝祭之服也自士以上深衣為之次庶人吉服深衣而已】具父母大父母衣純以續具父母衣純以青如孤子衣純以素【尊者存以多飾為孝續畫文也三十以下無父稱孤】純 緣純邊廣各寸半【純謂緣之也緣 謂其口也緣緇也緣邊衣裳之側廣各寸半則表裏共三寸矣唯袷廣二寸 深衣 鄭目錄云名曰深衣者以其記深衣之制也深衣連衣裳而純之以采者素純曰長衣有表則謂之中衣大夫以上祭服之中衣用素詩云素衣朱襮玉藻曰以帛裏布非禮也士祭以朝服中衣以布明矣】非帷裳必殺之【朝祭之服裳用正幅如帷要有辟積而旁無殺縫其餘若深衣異半下齊倍要則無辟積而有殺縫矣 論語】以帛裏布非禮也【中外宜相稱也冕服絲衣也中衣用素皮弁服朝服玄端麻衣也中衣用布玉藻】素衣朱襮從子于沃【襮領地諸侯之服繡黼飾而丹朱純也子指桓叔也沃曲沃也】素衣朱繡從子于鵠【朱繡即朱襮也鵠曲沃邑也 唐風揚之水】

繡黼丹朱中衣大夫之僭禮也【詳見總要篇 已上六條深衣長衣中衣之制】司裘掌為大裘以供王祀天之服【鄭司農云大裘黑羔裘服以祀天示質】中秋獻良裘【良善也中秋鳥獸雝雝因其良時而用之鄭司農云良裘王所服也玄謂良裘玉藻所謂黼裘與】季秋獻功裘以待頒賜【功裘人工微纛謂狐青麕裘之屬鄭司農云功裘卿大夫所服】歲終則會唯王之裘不會【天官】唯君有黼裘以誓省大裘非古也【僭天子也天子祭上帝則大裘而冕大裘羔裘也黼裘以羔與狐白雜為黼文也省當為獮獮秋田也國君有黼裘誓獮田之禮時大夫又有大裘也】君衣狐白裘錦衣以裼之【君衣狐白毛之裘則以素錦為衣覆之使可裼也袒而有衣曰裼必覆之者裘褻也詩云衣錦綉衣裳錦綉裳然則錦衣復有上衣明矣天子狐白之上衣皮弁服與凡裼衣象裘色也】君之右虎裘厥左狼裘【衛尊者宜武猛】士不衣狐白【辟君者狐之白者少以少為貴也】君子狐青裘豹褻玄綃衣以裼之【君子大夫士也綃綺屬也染之以玄於狐青裘相宜狐青裘蓋玄衣之裘】麕裘青豻褻絞衣以裼之【豻胡大也絞蒼黃色孔子曰素衣麕裘】羔裘豹飾緇衣以裼之【飾猶褻也孔子曰緇衣羔裘】狐裘黃衣以裼之【黃衣大蜡時臘先祖之服也孔子曰黃衣狐裘】錦衣狐裘諸侯之服也【非諸侯則不用錦衣為裼 玉藻】

羔裘逍遙狐裘以朝【緇衣羔裘諸侯之朝服錦衣狐裘其朝天子之服也 檜風羔裘】羔羊之皮素絲五紵【小曰羔大曰羊皮所以為裘大夫燕居之服素白也紵未詳蓋以絲飾裘之名也】羔羊之革素絲五緇【革猶皮也緇裘之縫界也】羔羊之縫素絲五總【縫縫皮合之以為裘也總亦未詳 召南羔羊】羔裘豹飾孔武有力【飾緣袖也禮君用純物臣下之故

羔裘而以豹皮為飾也豹甚武而有力故服其所飾之裘者如之【羔裘晏兮三英粲兮【晏鮮盛也三英裘飾也未詳其制粲光明也 鄭風羔裘】 緇衣羔裘素衣麕裘黃衣狐裘【緇黑色羔裘用黑羊皮麕鹿子色白狐色黃衣以裼裘欲其相稱】褻裘長短右 【長欲其溫短右 所以便作事】狐貉之厚以居【狐貉毛深溫厚私居取其適體 論語】 犬羊之裘不裼【質略亦庶人無文飾】不文飾也不裼【裼主於有文飾之事】裘之裼也見美也【君子於事以見美為敬】弔則襲不盡飾也【喪非所以見美】君在則裼盡飾也【臣於君所】服之襲也充美也【充猶覆也所敬不主於君則褻】是故尸襲【尸尊】執玉龜襲【重寶瑞也】無事則裼弗敢充也【謂已致龜玉也 玉藻】禮不盛服不充【禮盛者服充大事不崇曲敬】故大裘不裼【謂祭天也周禮】

【王祀昊天上帝則服大裘而冕 同上】

表裘不入公門【表裘外衣也褻當表之乃出】襲裘不入公門【衣裘必當裼也 同上】 執玉其有藉者則裼無藉者則襲【藉藻也裼襲文質相變耳有藻為文裼見美亦文無藻為質襲充美亦質圭璋特而襲璧琮加束帛而裼亦是也 曲禮】 子曰裼襲之不相因也欲民之母相瀆也【不相因者以其或以裼為敬或以襲為敬禮盛者以襲為敬執玉龜之屬也禮不盛者以裼為敬受享是也 表記 已上十一條論裘制兼論裼襲之異】 天子素帶朱裏終辟而素帶終辟大夫素帶辟垂士練帶率下辟居士錦帶弟子縞帶【謂大帶也而素帶終辟謂諸侯也諸侯不朱裏合素為之如今衣帶為之下天子也大夫亦如之率繹也士以下皆禪不合而繹積如今作幪頭為之也辟讀如裨冕之裨裨謂以繒采飾其側人君充之大夫裨其紐及下士裨其末而已居士道藝處士也】并紐約用組三寸長齊于帶紳長至士三尺有司二尺有五寸子游曰參分帶下紳居一焉紳鞶結三齊【三寸謂約帶紐組之廣也長齊于帶與紳齊也紳帶之垂者也言其屈而重也 論語曰子張書諸紳有司府史之屬也三分帶下而長三尺則帶高於紳也結約餘也結或為袷】大夫大帶四寸雜帶君朱綠大夫玄華士緇辟二寸再繅四寸凡帶有率無箴功【雜猶飾也即上之裨也君裨帶上以朱下以綠終之大夫裨垂外以玄內以華華黃色也士裨垂之下外內皆以緇是謂緇帶大夫以上以素皆廣四寸士以練廣二寸再繅之凡帶有司之帶也亦繹之如士帶矣無箴功則不裨之士雖繹帶裨亦用箴功凡帶不裨下士也】肆束及帶勤者有事則收之走則擁之【肆讀為肄肄餘也餘束約組之餘紐也勤謂執勞辱之事也 玉藻 已上大帶之制】革帶博二寸【詳見下鞶制條此一條革帶之制】 有虞氏服韍夏后氏山殷火周龍章【韍冕服之鞶也舜始作之以尊祭服禹湯至周增以畫文後王彌飾也山取其仁可仰也大取其明也龍取其變化也天子備焉諸侯火而下大夫山士韍韋而已韍或作黻 明堂位】

朱芾斯皇室家君王【芾天子純朱諸侯黃朱皇猶煌煌也君諸侯也 小雅斯干】 赤芾金舄會同有繹【赤芾諸侯之服金舄赤舄而加金飾亦諸侯之服也時見曰會殷見曰同繹陳列聯屬之貌也 小雅車攻】 一命緼韍再命赤韍三命赤韍【此玄冕爵弁服之鞶尊祭服異其名耳韍之言亦蔽也緼赤黃之間色所謂韍也周禮公侯伯之卿三命其大夫再命其士一命子男之卿再命其大夫一命其士不命玉藻】 韍韐有奭以作六師【韍茅蒐所染色也韐韍也合韋為之周官所謂韋弁兵事之服也奭赤貌作猶起也六師六軍也天子六軍 小雅瞻彼洛矣】 韠君朱大夫素士爵韋【此玄端服之鞶也韠之言蔽也凡鞶以韋為之必象裳色則天子諸侯玄端朱裳大夫素裳唯士玄裳黃裳雜裳也皮弁服皆素鞶】 圓殺直【

目韞制】天子直【四角直無圓殺】公侯前後方【殺四角使之方變於天子也所殺者去上下各五寸】大夫前方後挫角【圓其上角變於君也韞以下為前以上為後】士前後正【士賤與君同不嫌也正直方之間語也天子之士則直諸侯之士則方】韞下廣二尺上廣一尺長三尺其頸五寸肩革帶博二寸【頸五寸亦謂廣也頸中央肩兩角皆上接革帶以繫之肩與革帶廣同凡佩繫於革帶玉藻】韞長三尺下廣二尺上廣一尺會去上五寸紕以爵韋六寸不至下五寸純以素紃以五采【會謂領上縫也領之所用蓋與紕同在旁曰紕在下曰純素生帛也紕六寸者中執之表裏各三寸也純紕所不至者五寸與會去上同紃施諸縫中若今時條也 雜記】齊則結結佩而爵蹕【爵蹕者齊服玄端 玉藻已上八條載韞之制】笏天子以球玉諸侯以象大夫以魚須文竹士竹本象可也【球美玉也文猶飾也大夫士飾竹以為笏不敢與君並用純物也玉藻】天子御珽諸侯御荼大夫服笏【御服皆器用之名尊者謂之御卑者謂之服珽大圭荼古舒字玉之上圓下方者也 荀子】天子搢珽方正於天下也【此亦笏也謂之珽珽之言珽然無所屈也或謂之大圭長三尺杼上終葵首者於杼上又廣其首方如椎頭是謂無所屈後則恒直相玉書曰珽玉六寸明自炤】諸侯荼前詘後直讓於天子也【荼讀為舒遲之舒舒懦者所畏在前也詘謂圓殺其首不為椎頭唯天子詘焉是以謂笏為荼】大夫前詘後詘無所不讓也【大夫奉君命出入者也上有天子下有已君又殺其下而圓 玉藻】笏度二尺有六寸其中博三寸其殺六分而去一【殺猶杼也天子杼上終葵首諸侯不終葵首大夫士又杼其下首廣二寸半 同上】大圭長三尺杼上終葵首天子服之【注見後玉器章 玉人】王大圭執鎮圭以朝日【詳見後玉器章】天子執玉笏以朝日【管子】年不順成君衣布繒本【搢本去珽荼佩士笏也士以竹為笏飾本以象 玉藻】將適公所史進象笏書思對命【思所思念將以告君者也對所以對君者】

【也命所受君命者也書之於笏為不忘也 同上】見於天子與射無說笏入大廟說笏非禮也【言凡吉事無所說笏也大廟之中唯君當事說笏也】小功不說笏當事免則說之【免悲哀哭踊之時不在於記事也小功輕不當事可以搢笏也】既搢必盥雖有執於朝弗有盥矣【搢笏輒盥為必執事】凡有指畫於君前用笏造受命於君前則書於笏笏畢用也因飾焉【畢盡也 同上 已上十條笏制】古之君子必佩玉【比德焉君子士以上】右徵角左宮羽【玉聲所中也徵角在右事也民也可以勞宮羽在左君也物也宜逸】趨以采齊【路門之外樂節宅門外謂之趨齊當為楚齊之齊】行以肆夏【登堂之樂節】周還中規【反行也宜圓】折還中矩【曲行也宜方】進則揖之退則揚之然後玉鏘鳴也【揖之謂小俛見於前也揚之謂小仰見於後也鏘聲貌】故君子在車則聞鸞和之聲行則鳴佩玉是以非辟之心無自入也【鸞在衡和在式自由也玉藻】上車以和鸞為節下車以佩玉為度上有蔥衡下有雙璜衝牙【衡平也半璧曰璜璜在旁衝牙在中】玼珠以納其間【納於衡璜衝牙之間玼亦作蠚】琚瑀以雜之【總曰玼珠而赤者曰琚白者曰瑀或曰瑀美玉琚石次玉】行以采芡趨以肆夏步環中規折還中矩進則揖之【揖一作厭】退則揚之然後玉鏘鳴也【大戴禮】玉府共王之服玉佩玉珠玉【佩玉者王之所帶者也玉藻曰君子于玉比德焉天子佩白玉而玄組綬詩傳曰佩玉上有蔥衡下有雙璜衝牙蠚珠以納其間鄭司農云服玉冠飾十二玉 天官】君無故玉不去身【故謂災患喪病 曲禮】凡帶必有佩玉唯喪否【喪主於哀去飾也凡謂天子以至士】佩玉有衝牙【居中央以前後觸也】君子無故玉

不去身君子於玉比德焉【故謂喪與災眚】天子佩白玉而玄組綬公侯佩山玄玉而朱組綬大夫佩水蒼玉而純組綬世子佩瑜玉而綦組綬士佩瑀而緼組綬【王有山玄水蒼者祖之文色所似也綬者所以貫佩玉相承受者也純當為緇古文緇字或作絲旁才綦文雜色也緼赤黃】孔子佩象環五寸而綦組綬【謙不比德亦不事也象有文理者也環取可循而無窮玉藻】君在不佩玉左結佩右設佩【謂世子也出所處而君在焉則去德佩而設事佩辟德而示即事也結其左者若於事有未能也結者結其綬不使鳴焉】居則設佩【謂所處而君不在焉】朝則結佩【朝於君亦結左】齊則綰結佩【綰屈也結又屈之思神靈不在事也同上】一命緼韞幽衡再命赤韞幽衡三命赤韞蔥衡【衡佩玉之衡也幽讀為黝黑謂之黝青謂之蔥同上】去喪無所不佩【君子無故玉不去身觸礪之屬亦皆佩之論語】何以舟之維玉及瑤鞞琫容刀【舟帶也鞞刀鞘也琫刀上飾也容刀容飾之刀也或曰容刀如言容臭謂鞞琫之中容此刀耳大雅公劉】

君子至止鞞琫有珌【君子指天子也鞞容刀之鞞今刀鞘也琫上飾珌下飾亦戎服也小雅瞻彼洛矣已上十條佩制】內司服掌王后之六服禕衣揄狄闕狄鞠衣展衣緣衣素沙【鄭司農云禕衣畫衣也祭統曰君卷冕立于阼夫人副禕立于東房揄狄闕狄畫羽飾展衣白衣也喪大記曰復者朝服君以卷夫人以屈狄世婦以禕衣屈者音聲與闕相似禕與展相似皆婦人之服鞠衣黃衣也素沙赤衣也玄謂狄當為翟翟雉名伊雒而南素質五色皆備成章曰翟江淮而南青質五色皆備成章曰搖王后之服刻繒為之形而采畫之綴於衣以為文章禕衣畫翟者揄狄畫搖者闕狄刻而不畫此三者皆祭服從王祭先王則服禕衣祭先公則服揄翟祭羣小祀則服闕翟今世有圭衣者蓋三翟之遺俗鞠衣黃桑服也色如鞠塵象桑葉始生月令三月薦鞠衣于上帝告桑事展衣以禮見王及賓客之服字當為禕禕之言亶亶誠也詩國風曰玼兮玼兮其之翟也下云胡然而天也胡然而帝也言其德當神明又曰瑳兮瑳兮其之展也下云展如之人兮邦之媛也言其行配君子二者之義與禮合矣雜記曰夫人服稅衣揄翟又喪大記曰士妻以祿衣言祿者甚衆字或作稅此祿衣者實作祿衣也祿衣御于王之服亦以燕居男子之祿衣黑則是亦黑也六服備於此矣禕揄狄展聲相近緣字之誤也以下推次其色則闕狄赤揄狄青禕衣玄婦人尚專一德無所兼連衣裳不異其色素沙者今之白縛也六服皆袍制以白縛為裏使之張顯今世有沙縠者名出于此】辨外內命婦之服鞠衣展衣緣衣素沙【內命婦之服鞠衣九嬪也展衣世婦也祿衣女御也外命婦者其夫孤也則服鞠衣其夫卿大夫也則服展衣其夫士也則服緣衣三夫人及公之妻其闕狄以下乎侯伯之夫人揄狄子男之夫人亦闕狄唯三公後禕衣】凡祭祀賓客共后之衣服及九嬪世婦凡命婦共其衣服【凡者凡女御與外命婦也言及言凡殊貴賤也春秋之義王人雖微者猶序乎諸侯之上所以尊尊也臣之命者再命以上受服則下士之妻不共也外命婦唯王祭祀賓客以禮佐后得服此上服自於其家則降焉天官】王后禕衣夫人揄狄【禕讀如翬揄讀如搖翬搖皆翟雉名刻繒而畫之著於衣為飾】

【因以為名也後世作字異耳夫人三夫人亦侯伯之夫人也王者之後夫人亦禕衣】君命屈狄再命禕衣一命禕衣士祿衣【君女君也屈周禮作闕謂刻繒為翟不畫也此子男之夫人及其卿大夫士之妻命服也禕當為鞠字之誤禮天子諸侯命其臣后夫人亦命其妻以衣服所謂夫尊於朝妻榮於室子男之卿再命而妻鞠衣則鞠衣禮衣祿衣者諸侯之臣皆分三等其妻以次受此服公之臣孤為上卿大夫次之侯伯子男之臣卿為上大夫次之士次之祿

或作稅】唯世婦命於奠繭其他則皆從男子【奠猶獻也凡世婦以下蠶事畢獻繭乃命之以其服天子之后夫人九嬪及諸侯之夫人夫在其位妻得服其服 玉藻】少牢饋食之禮主婦被錫衣侈【被錫讀為髮髻古者或剔賤者刑者之髮以被婦人之紒為飾因名髮髻焉此周禮所謂次也不纚笄者大夫妻尊亦衣綃衣而侈其 耳侈者蓋半士妻之 以益之衣三尺三寸 一尺八寸】特牲饋食之禮主婦纚笄宵衣【纚笄者服宵綺屬也此衣染之以黑其繒本名曰宵詩有素衣朱宵記有玄宵衣凡婦人助祭者同服也】士昏禮女次純衣纚衿【次首飾也今時髮也周禮追師掌為副編次純衣絲衣女從者畢袵玄則此衣亦玄矣衿亦緣也衿之言任也以纚緣其衣象陰氣上任也凡婦人不常施衿之衣盛昏禮為此服喪大記曰復衣不以衿明非常】姆纚笄宵衣【纚縹髮笄今時簪也纚亦廣充幅長六尺宵讀為詩素衣朱綃之綃魯詩以綃為綺屬也姆亦玄衣以綃為領因以為名且相別耳】女從者畢袵玄纚笄被纁黼【女從者謂姪娣也袵同也同玄者上下皆玄也纁禪也詩曰素衣朱襮爾雅云黼領謂之襮周禮曰白與黑謂之黼天子諸侯后夫人狄衣卿大夫之妻刺黼以為領如今偃領矣士妻始嫁施禪黻於領上假盛飾耳言被明非常服】婦乘以几姆加景【景之制蓋加明衣加之以為行道禦塵令衣鮮明也景亦明也
已上五條婦人服制】履人掌王及后之服履為赤舄黑舄赤纁黃纁青句

素履葛履【履自明矣必連言服者著服各有履也複下曰舄禪下曰履古人言履以通於複今世言履以通於禪俗易語反與舄履有絢有纁有純者飾也鄭司農云赤纁黃纁以赤黃之絲為下緣士喪禮曰夏葛履冬皮履皆纁緇純禮家說纁亦謂以采絲礫其下玄謂凡履舄各象其裳之色士冠禮曰玄端黑履青句纁純素積白履緇絢纁純爵弁纁履黑絢纁純是也王吉服有九舄有三等赤舄為上冕服之舄也詩云王錫韓侯玄衮赤舄則諸侯與王同下有白舄黑舄王后吉服六唯祭服有舄玄舄為上禕衣之舄也下有青舄赤舄鞠衣以下皆履耳句當作絢聲之誤也絢纁純者同色今云赤纁黃纁青絢雜互言之明舄履衆多反覆以見之凡舄之飾如纁之次赤纁者王黑舄之飾黃纁者王后玄舄之飾青絢者王白舄之飾言纁必有絢純言絢亦有纁純三者相將王及后之赤舄皆黑飾后之青舄白飾凡履之飾如纁次也黃履白飾白履黑飾黑履青飾絢謂之拘著舄履之頭以為行戒纁縫中紃純緣也天子諸侯吉事皆舄其餘唯服冕衣翟著舄耳士爵弁纁履黑絢纁純尊祭服之履飾從纁也素履者非純吉有凶去飾者言葛履明有用皮時】辨外內命夫命婦之命履功履散履【命夫之命履纁履命婦之命履黃履以下功履次命履於孤卿大夫則白履黑履九嬪內子亦然世婦命婦以黑履為功履女御士妻命履而已士及士妻謂再命受服者散履亦謂去飾】凡四時之祭祀以宜服之【祭祀而有素履散履者唯大祥時 天官】履夏用葛玄端黑履青絢纁純純博寸【履者順裳色玄端黑履以玄裳為正也絢之言拘也以為行戒狀如刀衣鼻在履頭纁縫中紃也純緣也三者皆青博廣也】素積白履以魁柎之緇絢纁純純博寸【魁蜃蛤柎注也】爵弁纁履黑絢纁純純博寸【爵弁履以黑為飾爵弁尊其履飾以纁次】冬皮履可也不履總履【總履喪履也縷不灰治曰總 士冠禮】偃履著綦【偃行滕綦履繫也內則】赤芾在股邪幅在下【邪幅偃也邪纏於足如今行滕所以束脛在股下也 小雅采芻】已上四條履及偃制】五色六章十二衣還相為質也【五色六章畫纁事也周禮考工記曰土以黃其象方天時變火以圓山以草水以龍鳥獸蛇雜四時五色之位以章之謂之巧也禮運】春天子衣青衣服倉玉夏衣朱衣服赤玉中央土衣黃衣服黃玉秋衣白衣服白玉冬衣

黑衣服玄玉【凡所服玉謂冠飾及所佩者之衡璜也此衣服取於殷時而有變焉非周制也周禮朝祀戎獵車服各以其事不以四時為異又玉藻曰天子龍衮以祭玄端而朝日皮弁以日視朝與此皆殊月令此二條每月服色】士不衣織【織染絲織之士衣染繪也】無君者不貳采【大夫去位宜服玄端玄裳】非列采不入公門【列采正服】振絺綌不入公門表裘不入公門【振謂為衫衫禪也表裘外衣也二者形且褻皆當表之乃出】襲裘不入公門【注見前】續為繭緼為【衣有著之異名也續謂今之新絲也緼謂今續及舊絮也】禪為紵【有衣裳而無裏】帛為褶【有表裏而無著玉藻】黼領謂之褱【繡刺黼文以褱領】緣謂之純【衣緣飾也】袷謂之袷【衣開孔也】衣皆謂之襟【交領】袪謂之裾【衣後裾也】衿謂之衿【衣小帶】佩衿謂之褱【佩玉之帶二屬】衣蔽前謂之襜【今蔽膝也】婦人之褱謂之縢縢綌也【即今之香纓也褱邪交落帶繫於體因名為褱綌繫也】裳削幅謂之緼【削殺其幅深衣之裳爾雅】衣錦褻衣裳錦褻裳【褻禪也鄭風丰】玉府掌王之燕衣服【燕衣服者巾絮寢衣袍襌之屬皆良貨賄所成天官】君子不以紺緌飾【君子謂孔子紺深青揚赤色齊服也緌絳色三年之喪以飾練服也飾領緣也】紅紫不以為褻服【紅紫間色不正且近於婦人女子之服也褻服私居服也言此則不以為朝祭之服可知】當暑絺綌必表而出之【衫禪也葛之精者曰絺粗者曰綌表而出之謂先著裏衣表絺綌而出之于外欲其不見體也詩所謂蒙彼絺綌是也】羔裘玄冠不以弔【喪主素吉主玄弔必變服所以哀死】齊必有明衣布【齊必沐浴浴竟則著明衣所以明潔其體也以布為之】必有寢衣長一身有半【齊主於敬不可解衣而寢又不可著明衣而寢故別有寢衣其半蓋以覆足論語】士喪禮陳襲事緣衣【黑衣裳赤緣之謂之緣緣之言緣也所以表者也喪大記曰衣必有裳必有表不禪謂之一稱】浴衣於篋【浴衣已浴所衣之衣以布為之其制如今通裁】明衣裳用幕布屬幅長下膝【明衣所以親身為圭潔也幕布帷幕之布升數未聞也屬幅不削幅也長下膝又有裳於蔽下體深也】有前後裳不辟長及鵲【不辟質也鵲足跗也凡他服短毋見膚長無被土】縗綌絰【一染謂之縗今紅也飾裳在幅曰綌在下曰絰】

緇純【七八為緇緇黑色也飾衣曰純謂領與衣以緇裳以縗象天地也士喪記】設明衣婦衣則設中帶【中帶者今之褌褌同上】父母存冠衣不純素【為其有喪象也玉藻曰縗冠玄武子姓之冠也縗冠素紕既祥之冠也深衣曰具父母衣純以青】孤子當室冠衣不純采【早喪親雖除喪不忘哀也謂年未三十者三十壯有室有代親之端不為孤也當室適子也深衣曰孤子衣純以素曲禮】麻者不紳執玉不麻麻不加於采【吉凶不相干也麻謂經也紳大帶也喪以要經代大帶也麻不加於采衣采者不麻謂弁經也必服弔服是也采玄纁之衣雜記已上十條衣服雜制】

童子不衣裘裳【裘大溫消陰氣使不堪苦不衣裳便易曲禮】

童子不裘不帛不縷紉【裘帛溫傷壯氣也紉屨頭飾也玉藻】十年衣不帛襦袴【不用帛為襦袴為大溫傷陰氣也】二十而冠可以衣裘帛【內則】童子之節也緇布衣錦緣錦紳并紐錦束髮皆朱錦也【童子未冠之稱也冠禮曰將冠者采衣紒也玉藻】士冠禮將冠者采衣紒【采衣未冠者所服玉藻曰童子緇布衣錦緣錦紳并紐錦束髮皆朱錦也紒結髮已上五條童子服制】司服大札大荒大裁素服【大札疫病也大荒飢饉也大裁水火為害君臣素服縗冠若晉伯宗哭梁山之崩士素端見前春官】年不順成天子素服【自貶損也】君衣布摺本【君衣布者謂若衛文公大布之衣大帛之冠是也玉藻】大夫士去國素

衣素裳素冠徹緣鞮屨素箴三月而復服【言以喪禮自處也臣無君猶無天也徹猶去也鞮屨無紉之菲也箴覆笥也 曲禮 已上三條素服】

大司徒以本俗六安萬民六曰同衣服【民雖有富者衣服不得獨異地官】仲秋乃命司服具飭衣裳文繡有恒制有大小度有

長短【此謂祭服也文謂畫也祭服之制畫衣而繡裳】衣服有量必循其故【此謂朝燕及他服凡此為寒益至也詩云七月流火九月授衣於是作之可也】冠帶有常【因制衣服而作之也月令】 天子五年一巡守制度衣服正之革制度衣服

者為畔畔者君討【討誅也王制】 作異服以疑衆殺【異服若聚鷁冠瓊弁也】 命服不入於市【尊物非民所宜有】 布帛精麤不中數幅廣狹不中量不粥於市姦色亂正色不粥於市【凡以其不可用也數升縷多少】 錦文珠玉成器不粥於市衣服不粥於市【不示民以奢也】 關執禁以譏禁異服【王制】

子曰長民者衣服不貳從容有常以齊其民則民德壹【二不一也緇衣】

曰國家未道則不充其服焉【謂若衛文公者未道未合於道 玉藻】 君賜衣服服以拜【敬君惠也】 賜君未有命弗敢即服也【謂卿大夫受賜於天子者歸必致於其君君有命乃服之上同】 冕弁藏於私家非禮也是謂脅君【刼脅之君也冕弁君之尊服 禮運】

不學雜服不能安禮【雜服冕服皮弁之屬雜或為雅

學記】 衣服在躬而不知其名為罔【罔猶罔罔無知貌 少儀 已上十條雜論衣】

【服之事】 幌氏涑絲以浼水漚其絲七日去地尺暴之【故書浼作湄鄭司農云湄水溫水也玄謂浼水以灰所浼水也漚漸也楚人曰漚齊人曰淪】 晝暴諸日夜宿諸井七日七夜是謂水涑【宿諸井縣井中】 涑帛以欄為灰渥淳其帛實諸澤器淫之以蜃【渥讀如繒人渥管之渥以欄木之灰漸釋其帛也杜子春云淫當為涅書亦或為湛鄭司農云澤器謂 澤之器蜃謂灰也士冠禮曰素積白屨以魁柎之說曰魁蛤也周官亦有白盛之蜃蜃蛤也玄謂淫薄粉之令帛白蛤今海旁有焉】 清其灰而盪之而揮之【清澄也於灰澄而出盪晞之晞而揮去其蜃】 而沃之而盪之而塗之而宿之【更渥淳之】 明日沃而盪之【朝更沃至夕盪之又更沃至旦盪之亦七日如漚絲也】 晝暴諸日夜宿諸井七日七夜是謂水涑【考工記此一條涑絲帛】 染人掌染絲帛凡染春暴練夏纁玄秋染夏冬獻功【暴練練其素而暴之故書纁作黼鄭司農云黼當讀為纁纁謂絳也夏大也秋乃大染玄謂纁玄者謂始可以染此色者玄纁者天地之色以為祭服石染當及盛暑熱潤始湛研之三月而後可用考工記鍾氏則染纁術也染玄則史傳闕矣染夏者染五色謂之夏者其色以夏狄為飾禹貢曰羽 夏狄是其總名其類有六曰翬曰搖曰 曰笛曰希曰蹲其毛羽五色皆備成章染者擬以為深淺之度是以放而取名焉】 掌凡染事【天官】 鍾氏染羽以朱湛丹秫三月而熾之【鄭司農云湛漬也丹秫赤粟玄謂湛讀如漸車帷裳之漸熾炊也羽所以飾旌旗及王后之車】 淳而漬之【淳沃也以炊下湯沃其熾烝之以漬羽漬猶染也】 三入為纁五入為緇七入為緇【染纁者三入而成又再染以黑則為緇緇今禮俗文作爵言如爵頭色也又復再染以黑乃成緇矣鄭司農云以論語曰君子不以紺緇飾又曰緇衣羔裘爾雅云一染謂之緇再染謂之緇三染謂之纁詩云緇衣之宜兮玄謂此同色耳染布帛者染人掌之凡玄色者在緇緇之間其

六入者與 考工記】一染謂之緇【今之紅也】再染謂之纁【染赤】三染謂之纁【纁絳也】青謂之蔥【淺青】黑謂之黝【黝黑貌周禮曰陰祀用黝牲】斧謂之黼【黼文畫斧形因名云 爾雅】季夏命婦官染采黼黻文章必以法故無或差貸【婦功染人也采五色】黑黃倉赤莫不質良無敢詐偽【質正也良善也所用染者當得真采正善也】以給郊廟祭祀之服以為旗章以別貴賤等級之度【旗章旌旗及章服也月令 已上四條染采】

右衣服 皮弁者所以法古至質冠名也以鹿皮者取其文章也三王共皮弁素積裳也腰中辟積至質不易之服反古不忘本也麻冕者周宗廟之冠也前俛而後仰故謂之冕所以用麻為之者女功之始亦不忘本也垂旒者示不視邪纁塞耳示不聽讒也委貌周朝廷理政事行道之冠委貌者有曲有貌也爵弁者周人宗廟之冠也周之冠色所以爵何為周尚赤所以不純赤但如爵頭何以本制冠者法天天色玄者不失其質故周加赤殷加白夏之冠色純玄聖人所以制衣服何以為絺 蔽形表德勸善別尊卑也以狐羔為裘何取輕暖因狐死首丘明君子不忘本也羔者取跪乳遜順也天子狐白諸侯狐黃大夫倉士羔裘亦因別尊卑也所以必有紳帶示敬謹自約整也紃者蔽也行以蔽前天子朱紃諸侯赤紃以韋為之者反古不忘本也上廣一尺下廣二尺天一地二也長三尺法天地人也【白虎通】狐突曰衣身之章也【章貴賤】佩衷之旗也【旗表也所以表明其中心】故服其身則衣之純【必以純色為服】用其衷則佩之度【衷中也佩玉者士君子常度 閔二年左氏傳】孔子曰生乎今之世志古之道居今之俗服古之服舍此而為非者不亦鮮乎哀公曰然則今夫章甫句屨紳帶而搢笏者此皆賢乎孔子曰否不必然今夫端衣玄裳冕而乘路者志不在於食葷斬衰簡屨杖而歆粥者志不在於飲食故生乎今之世志古之道居今之俗服古之服舍此而為非者雖有不亦鮮乎【大戴記】哀公問於孔子曰夫子之服其儒服與【哀公館孔子見其服與士大夫異又與庶人不同疑為儒服而問之】孔子對曰丘少居魯衣逢掖之衣長居宋冠章甫之冠丘聞之也君子之學也博其服也鄉丘不知儒服【逢猶大也大掖之衣大 禪衣也此君子有道藝者所衣也孔子生魯長而之宋而冠焉宋其祖所出也衣少所居之服冠長所居之冠是之謂鄉言不知儒服非哀公意不在於儒乃今問其服庶人禪衣 三尺二寸袪尺二寸儒行】玄冠紫綬自魯桓公始也【蓋僭宋王者之後服也綬當用纁 玉藻】管仲鏤簋朱紃君子以為濫矣【朱紃天子冕之紃也諸侯青組紃大夫士當緇組紃纁邊】晏平仲澣衣濯冠以朝君子以為隘矣【澣衣濯冠儉不務新 禮器】朝服之以縞也自季康子始也【亦僭宋王者之後】孔子曰朝服而朝卒朔然後服之【謂諸侯與羣臣也諸侯現朔皮弁服 玉藻】季康子朝服以縞曾子問於孔子曰禮乎孔子曰諸侯皮弁以告朔然後服之以視朝若此者禮也【朝服以縞僭宋禮也孔子惡指斥康子但言諸侯之禮而已而諸侯皮弁以告朔卒然後朝服以視朝朝服明不用縞 家語】鄭子華之弟子臧出奔宋【十六年殺子華故】好聚鷩冠【鷩鳥名聚鷩羽以為冠非法之服】鄭伯聞而惡之【惡其服非法】使盜誘之盜殺之于陳宋之間君子曰服之不衷身之災也【衷猶適也】詩曰彼其之子不稱其服【詩曹風刺小人在位言彼人之德不稱其服】子臧之服不稱也夫【僖二十四年左氏傳】子產為政上下有服【公卿大夫服不相踰襄三十年左氏傳】

卷七十一

欽定四庫全書

禮書綱目卷七十一 婺源江永撰

名器下 通禮二十四

補

夏后氏世室堂修二七廣四修一【世室者宗廟也魯廟有世室牲有白牡此用先王之禮修南北之深也夏度以步令堂修十四步其廣益以四分修之一則堂廣十七步半】五室三四步四三尺【堂上為五室象五行也三四步室方也四三尺以益廣也木室於東北火室於東南金室于西南水室於西北其方皆三步其廣益之以三尺土室于中央方四步其廣益之以四尺此五室居堂南北六丈東西七丈】九階【南面三三面各二】四旁兩夾窻【窻助戶為明每室四戶八窻】白盛【蜃灰也盛之言成也以蜃灰堊牆所以飾成宮室】門堂三之二【門堂門側之堂取數於正堂令堂如上制則門堂南北九步二尺東西十一步四尺爾雅曰門側之堂謂之塾】室三之一【兩室與門各居一分】殷人重屋堂修七尋堂崇三尺四阿重屋【重屋者王宮正堂若大寢也其修七尋五丈六尺放夏周則其廣九尋七丈二尺也五室各二尋崇高也四阿若今四柱屋重屋複竿也】周人明堂度九尺之筵東西九筵南北七筵堂崇一筵五室凡室二筵【明堂者明政教之堂周度以筵亦王者相改周堂高九尺殷三尺則夏一尺矣相參之數禹卑宮室謂此一尺之堂與此三者或舉宗廟或舉王寢或舉明堂互言之以明其同制】室中度以几堂上度以筵宮中度以尋【周文者各因物宜為之數室中舉謂四壁之內】廟門容大扃七个【大扃牛鼎之扃長三尺每扃為一个七个二丈一尺】闔門容小扃參个【廟中之門曰闔小扃腳鼎之扃長二尺三个六尺】路門不容乘車之五个【路門者大寢之門乘車廣六尺六寸五个三丈三尺言不容者是兩門乃容之兩門乃容之則此門半之丈六尺五寸】應門二徹參个【正門謂之應門謂廟門也二徹之內八尺三个二丈四尺】內有九室九嬪居之外有九室九卿朝焉【內路寢之裏也外路門之表也九室如今朝堂諸曹治事處九嬪掌婦學之法以教九御六卿三孤為九卿】王宮門阿之制五雉宮隅之制七雉城隅之制九雉【阿棟也宮隅城隅謂角浮思也雉長三丈高一丈度高以高度廣以廣】門阿之制以為都城之制【都四百里外距五百里王子弟所封其城隅高五丈宮隅門阿皆三丈】宮隅之制以為諸侯之城制【諸侯畿以外也其城隅制高七丈宮隅門阿皆五丈禮器曰天子諸侯臺門考工記匠人】

天子之堂九尺諸侯七尺大夫五尺士三尺天子諸侯臺門【禮器】家不臺門【同上】臺門而旅樹反玷大夫之僭禮也【詳總要章】宮謂之室室謂之宮【皆所以通古今之異語明同實而兩名】牖戶之間謂之辰【窻東戶西也禮云斧辰者以其所在處名之】其內謂之家【今人稱家義出於此】東西牆謂之序【所以序別內外】西南隅謂之奧【室中隱奧之處】西北隅謂之屋漏【詩曰尚不愧于屋漏其義未詳】東北隅謂之窻【窻見禮

亦未詳】東南隅謂之窳【禮曰埽室聚窳窳亦隱闇】栱謂之闕【闕門限】椳謂之楔【門兩旁木】楣謂之梁【門戶上橫梁】樞謂之樞【門戶扉樞】樞達北方謂之落時【門持樞者或達北櫨以為固也】落時謂之【道二名也】墀謂之坳【在堂隅坳端也】牆謂之墉【書曰既勤垣墉】鋤謂之朽【泥鋤】地謂之黝【黑飾地也】牆謂之堊【白飾牆也】閣謂之臺【積土四方】有木者謂之榭【臺上起土】宗廟謂之梁【屋大梁也】其上楹謂之桷【侏儒柱也】闕謂之榑【柱上構也亦名栱又曰口】栳謂之桀【即櫨也】棟謂之桴【屋櫨】桷謂之榑【屋椽】桷直而遂謂之闕【謂五架屋際椽正相當】直不受檐謂之交【謂五架屋際椽不直上檐交于櫨上】檐謂之檣【屋栳】屋上薄謂之筵【屋竿】兩階間謂之鄉【人君南鄉當階間】中庭之左右謂之位【羣臣之側位也】門屏之間謂之宁【人君視朝所宁立處】屏謂之樹【小牆當門中】閤謂之門【詩曰祝祭于祊】正門謂之應門【朝門】觀謂之闕【宮門雙闕】宮中之門謂之闔【謂相通小門也】其小者謂之閤小閤謂之閣【大小異名】衙門謂之閤【左傳曰盟諸僖闕衙頭門】門側之堂謂之塾【夾門堂也】櫺謂之闔【門闔】闔謂之扉【公羊傳曰齒著于門闔】所以止扉謂之閤【門辟旁長櫺也左傳曰高其閤閤長 即門槩也】瓠瓠謂之甃【甃甃也今江東呼瓠甃】宮中衙謂之壺【巷門間道】廟中路謂之唐【詩曰中唐有甃】堂途謂之陳【堂下至門徑也】路旅途也【途即道也】一達謂之道路【長道】二達謂之岐旁【岐道旁出】三達謂之劇旁【今南陽冠軍樂鄉數道交錯俗呼之五劇鄉】四達謂之衢【交道四出】五達謂之康【史記所謂康莊之衢】六達謂之莊【左傳曰得慶氏之木百車於莊】七達謂之劇驂【三道交復有一岐出者今北海劇縣有此道】八達謂之崇期【四道交出】九達謂之達【四道交出復有旁通】室中謂之時堂上謂之行堂下謂之步門外謂之趨中庭謂之走大路謂之奔【此皆人行步趨走之處因以名云】室有東西廂曰廟【夾室前堂】無東西廂有室曰寢【但有大寢】無室曰榭【榭即今堂堦】四方而高曰臺陝而脩曲曰樓【脩長也爾雅】葺屋參分瓦屋四分【各分其脩以其一為峻】囷窮倉城逆牆六分【逆猶卻也築此四者六分其高卻一分以為綱囷圓倉穿地曰窮】堂涂十有二分【謂階前若今令甃甃也分其督旁之脩以一分為峻也爾雅曰堂涂謂之陳】竇其崇三尺【宮中水道】牆厚三尺崇三之【高厚以是為率足以相勝匠人】大司徒以本俗六安萬民一曰媿宮室【本猶舊也美善也謂約榘攻堅風雨攸除各有攸宇地官】

右宮室

上古穴居而野處後世聖人易之以宮室上棟下宇以待風雨蓋取諸大壯【壯固之意 易】昔者先王未有宮室冬則居營窟夏則居橧巢【寒則累土暑則聚薪柴居其上】後聖有作【作起】然後修火之利【孰治萬物】范金【鑄作器用】合土【瓦瓠甃及甗大】以為臺榭宮室牖戶【榭器之所藏也 禮運】禹卑宮室【論語】明堂者古有之也【明堂之作其代未得而詳也】凡九室一室而有四戶八牖凡三十六戶七十二牖以茅蓋屋上圓下方明堂者所以明諸侯尊卑外水曰辟雍南蠻東夷北狄西戎【言四海之聚於祭也各以其方列於水外】明堂月令【於明堂之中施十二月之令】赤綴戶也白綴牖也二九四七五三六一八【記用九室謂法龜文故取此數以明其制也】堂高三尺東西九筵南北七筵上圓下方九室十二堂室四戶戶二牖其宮方三百步在近郊近郊三十里【淳于登說明堂在

國之陽三里之外七里之內丙巳之地韓詩說明堂在南方七里之郊然三十里無所取也【此天子之路寢也不齊不居其室【路寢亦為此制】待朝在南宮揖朝出其南門【大戴禮】 迺立臯門臯門有伉迺立應門應門將將【傳曰王之郭門曰臯門伉高貌王之正門曰應門將將嚴正也大王之時未有制度特作二門其名如此及周有天下遂尊以為天子之門而諸侯不得立焉 大雅緜】 大廟天子明堂庫門天子臯門雉門天子應門【言廟及門如天子之制也天子五門臯庫雉應路魯有庫雉路則諸侯三門與臯之言高也詩云乃立臯門臯門有伉乃立應門應門將將 明堂位】 僖公二十年春新作南門何以書譏何譏爾門

有古常也【惡奢泰不奉古制常法 春秋公羊傳】 作為也有加其度也【更加使大】 言新有故也非作也【責其改舊制】 南門者法門也【法門謂天子諸侯皆南面而治法令之所出入故謂之法門 穀梁傳】 西宮災西宮者何小寢也小寢則曷為謂之西宮有西宮則有東宮矣魯子曰以有西宮亦知諸侯之有三宮也【西宮者小寢內室楚女所居也禮諸侯娶三國女以楚女居西宮知二國女於小寢內各有一宮也故云爾禮夫人居中宮少在前右媵居西宮左媵居東宮少在後 僖二十年公羊傳】 定公二年夏五月壬辰雉門及兩觀災其言雉門及兩觀災何【据桓宮僖宮災不言及】 兩觀微也【雉門兩觀皆天子之制門為其主觀為其飾故微也】 何以書記災也【此本子家駒諫昭公所當先去以自正者昭公不從其言卒為季氏所逐定公繼其後宜去其所以失之者故災亦云爾立雉門兩觀不書者僭天子不可言雖在春秋中猶不書】 冬十月新作雉門及兩觀其言新作之何【据俱一門兩觀如改常】 脩大也【天災之當減損如諸侯制而復脩大僭天子之禮故言新作以見脩大也】 脩舊不書此何以書【据西宮災復脩不書】 譏何譏爾不務乎公室也【務勉也不務公室亦可施于久不修亦可施于不務始公室之禮微辭也月者久也當即修之如諸侯禮 公羊傳】 楚靈王為章華之臺【靈王楚恭王之庶子靈王熊虔止章華地名吳語曰乃築臺于章華之上】 與伍舉升焉曰臺美夫對曰先君莊王為匏居之臺【匏居臺名】 高不過望國氛【氛祲氣也】 大不過容宴豆【言宴有折俎籩豆之陳】 木不妨守備【不妨城郭守備之用】 用不煩官府【財用不出府藏】 民不廢時務官不易朝常今君為此臺也國民罷焉財用盡焉年穀敗焉【敗廢民之時務】 百官煩焉【為之徵發】 舉國留之【留治之】 數年乃成臣不知其美也先王之為臺榭也【積土曰臺築室曰榭】 榭不過講軍實【講習也軍實戎士也】 臺不過望氛祥【凶氣為氛吉氣為祥】 故榭度于大卒之居【大卒王士卒也度謂足以臨見之】 臺度于臨觀之高【足以臨下觀上使屋榭不蔽日明而已】 其所不奪穡地【稼穡之地】 其為不匱財用【為作也】 其事不煩官業【業事也】 其日不廢時務【以農隙也】 瘠磽之地於是乎為之【不害穀土也磽确也】 城守之末於是乎用之【城守之餘然後用之】 官寮之暇於是乎臨之【暇間也】 四時之隙於是乎成之【隙空閒時也】 故周詩曰經始靈臺【經謂經度之立其基址也天子曰靈臺】 經之營之庶民攻之不日成之【攻治也不日不程課以時日也】 經始勿亟庶民子來【亟疾也子來如子為父也】 夫為臺榭將以教民利也【臺所以望氛祥而備災害榭所以講軍實而禦寇亂皆所以利民也】 不知其以匱之也【知聞也 國語楚語】 管仲山節而藻梲君子以為濫矣【梲謂之節梁上楹謂之梲宮室之飾士首本大夫達校諸侯斲而礪之天子加密石焉無畫山藻之禮也 禮器】 邦君樹塞門管氏亦樹塞門【屏謂之樹塞猶蔽也設屏於門以蔽內外也 論語】 趙文子為室【室宮也】 斲其椽而礪之【椽榱也礪磨也】 張老夕焉而見之【見見匠人

為之】不謁而歸【謁告也】文子聞之駕而往曰吾不善子亦告我何其速也【速去速也】對曰天子之室斲其椽而礪之加密石焉【密密理石謂砥也先粗礪之加以密砥】諸侯礪之【無密石也】大夫斲之【不礪也】士首之【斲其首也】備其物義也【物備得宜謂之義】從其等禮也【從尊卑之等謂之禮】今子貴而忘義富而忘禮吾懼不免何敢以告文子歸令之勿礪也匠人請皆斲之【通更斲之】文子曰止為後世之見之也【為使也】其斲者仁者之為也其礪者不仁者之為也【晉語】

鸞車有虞氏之路也鉤車夏后氏之路也大路殷路也乘路周路也【鸞有鸞和也鉤有曲輿者也大路木路也乘路玉路也漢祭天乘殷之輅也今謂之桑根車也春秋傳曰大路素鸞或為鸞也】夏后氏駱馬黑鬣殷人白馬黑首周人黃馬蕃鬣【順正色也白馬黑鬣曰駱殷黑首為純白凶也明堂位】顏淵問為邦子曰乘殷之輅【輅者大車之名商輅木輅也周人飾以金玉則過侈而易敗不若商輅樸素渾堅而等威已辨為質而得其中也論語】周人尚輿【武王誅紂疾上下失其服飾而尊輿】故一器而工聚焉者車為多【周所上也】凡察車之道必自載於地者始也是故察車自輪始【先視輪也自從也】凡察車之道欲其樸屬而微至不樸屬無以為完久也不微至無以為威速也【樸屬猶附著堅固貌也齊人有名疾為威者春秋傳曰蓋已操之為已蹙矣速疾也書或為數鄭司農云樸讀如子南僕之僕微之謂輪至地者少言其圓甚著地者微耳著地者微則易轉故不微至無以為威數】輪已崇則人不能登也輪已庳則於馬終古登陲也【已大也甚也崇高也齊人之言終古猶言常也陲阪也輪庳則難引】故兵車之輪六尺有六寸田車之輪六尺有三寸乘車之輪六尺有六寸【此以馬大小為節也兵車革路也田車木路也乘車玉路金路象路也兵車乘車駕國馬田車駕田馬】六尺有六寸之輪軹崇三尺有三寸也加軫與轡焉四尺也人長八尺登下以為節【此車之高者也軹輿也鄭司農云軹害也轡讀為旃僕之僕謂伏兔也玄謂軹轂末也此軹與僕并七寸田車又宜減焉乘車之軌廣取數於此軌廣八尺旁出輿亦七寸也考工記】輪人為輪斬三材必以其時【三材所以為轂幅牙也斬之以時材在陽則仲冬斬之在陰則仲夏斬之今世轂用雜榆輻以檀牙以樗也】三材既具巧者和之【調其鑿內而合之】轂也者以為利轉也輻也者以為直指也牙也者以為固抱也【利轉者轂以無有為用也鄭司農云牙讀如跛者訝跛者之訝謂輪輻也世間或謂之罔書或作輻】輪敝三材不失職謂之完【敝盡而轂輻牙不動】望而眡其輪欲其悞爾而下迤也進而眡之欲其微至也無所取之取諸圓也【輪謂牙也悞均致貌也進猶行也微至至地者少也非有他也圓使之然也鄭司農云微至書或作危至故書圓或作員當為圓】望其輻欲其掣爾而纖也進而眡之欲其肉稱也無所取之取諸易直也【掣纖殺小貌也肉稱弘殺好也鄭司農云掣讀為紛容掣參之掣玄謂如桑螵蛸之蛸】望其轂欲其眼也進而眡之欲其幬之廉也無所取之取諸急也【眼出大貌也幬幔轂之革也革急則裏木廉隅見鄭司農云眼讀如限切之限】眡其綆欲其蚤之正也【蚤當為爪謂輻入牙中者也鄭司農云綆讀為關東言餅之餅謂輪筭也玄謂輪雖筭爪牙必正也】察其菑蚤不齟則輪雖敝不匡【菑謂輻入轂中者也菑與爪不相侔乃後輪敝盡不匡刺也鄭司農云菑讀如雜廁之廁謂建輻也泰山平原所樹立物為菑聲如截博立梟棊亦為菑匡枉也】凡斬轂之道必矩其陰陽【矩謂刻識之也故書矩為距鄭司農云當作矩謂規矩也】陽也者稹理而堅陰也者疏理而柔是故以火養其陰而齊諸其陽則轂雖敝不斲【稹致也火養其陰炙堅之也鄭司農云稹讀為奠祭之奠斲當作耗玄謂斲斲

暴陰柔後必橈減幬革暴起】轂小而長則柞大而短則摯【鄭司農云柞讀為迫啗之啗謂幅間柞狹也摯讀為謂幅危摯也玄謂小而長則菑中弱大而短則轂末不堅】是故六分其輪崇以其一為之牙圍【六尺六寸之輪牙圍尺一寸】參分其牙圍而漆其二【不漆其踐地者也漆者七寸三分寸之一不漆者三寸三分寸之二令牙厚一寸三分寸之二則內外面不漆者各一寸也】桴其漆內而中詘之以為之轂長以其長為之圍【六尺六寸之輪漆內六尺四寸是為轂長三尺二寸圍徑一尺三分寸之二也鄭司農云桴者度兩漆之內相距之尺寸也】以其圍之防捎其藪【捎除也防三分之一也鄭司農云捎讀為桑螵蛸之蛸藪讀為蜂藪之藪謂轂空壺中也玄謂此藪徑三寸九分寸之五壺中當輻菑者也蜂藪者猶言趨也藪者衆輻之所趨也】五分其轂之長去一以為賢去三以為軹【鄭司農云賢大穿也軹小穿也玄謂此大穿徑八寸十五分寸之八小穿徑四寸十五分寸之四大穿甚大似誤矣大穿實五分轂長去二也去二則得六寸五分寸之二凡大小穿皆謂金也今大小穿金厚一寸則大穿穿內徑四寸五分寸之二小穿穿內徑二寸十五分寸之四如是乃與藪相稱也】容轂必直陳篆必正施膠必厚施筋必數幬必負幹【鄭司農去讀容上屬曰軹容玄謂容者治轂為之形容也篆轂約也幬負幹者革轂相應無贏不足】既摩革色青白謂之轂之善【謂丸漆之色而以石摩平之革色青白善之徵也】參分其轂長二在外一在內以置其輻【轂長三尺二寸者令幅廣三寸半則輻內九寸半輻外一尺九寸】凡輻量其鑿深以為輻廣【廣深相應則固足相任也】輻廣而鑿淺則是以大抗雖有良工莫之能固【抗搖動貌】鑿深而輻小則是固有餘而強不足也【言輻弱不勝轂之所任也】故竝其輻廣以為之弱則雖有重任轂不折【言力相稱也弱菑也今人謂蒲本在水中者為弱是其類也鄭司農云竝讀如紘紘之紘謂度之】參分其輻之長而殺其一則雖有深泥亦弗之濂也【殺衰小之也鄭司農云濂讀為黏謂泥不黏著輻也】參分其股圍去一以為骹圍【謂殺輻之數也鄭司農云股謂近轂者也骹謂近牙者也方言股以喻其豐故言骹以喻其細人脛近足者細於股謂之骹羊脛細者亦為骹】揉輻必齊平沈必均【揉謂以火槁之衆輻之直齊如一也平沈平漸也鄭司農云平沈謂浮之水上無輕重】直以指牙牙得則無而固【得謂倨句鑿內相應也鄭司農云櫟也蜀人言櫟曰玄謂讀如涅從木熱省聲】不得則有必足見也【必足見言大也然則雖得猶有但小耳】六尺有六寸之輪綆參分寸之二謂之輪之固【輪算則車行不掉也參分寸之二者出於輻股鑿之數也】凡為輪行澤者欲杼行山者欲倅【杼謂削薄其踐地者倅上下等】杼以行澤則是刀以割塗也是故塗不附【附著也】倅以行山則是搏以行石也是故輪雖敝不齧於鑿【搏圓厚也鄭司農云不齧於鑿謂不動於鑿中也玄謂齧亦敝也以輪之厚石雖齧之不能敝其鑿旁使之動】凡揉牙外不廉而內不挫旁不腫謂之用火之善【廉絕也挫折也腫癰也】是故規之以眡其圓也【輪中規則圓矣】萬之以眡其匡也【等為萬蔓以運輸上輪中萬蔓則不匡刺也故書萬作禹鄭司農云讀為萬書或作矩】縣之以眡其輻之直也【輪輻三十上下相直從旁以繩縣之中繩則鑿正輻直矣】水之以眡其平沈之均也【平漸其輪而無輕重則斷材均矣】量其藪以黍以眡其同也【黍滑而齊以量兩壺無贏不足則同】權之以眡其輕重之倅也【倅等也稱兩輪鈞石同則等矣輪有輕重則引之有難易】故可規可萬可水可縣可量可權也謂之國工【國之名工】輪人為蓋達常圍三寸【圍三寸徑一寸也鄭司農云達常蓋斗柄下入杠中也】桎圍倍之六寸【圍六寸徑二寸足以含達常鄭司農云桎蓋杠也讀如丹桓宮楹之楹】信其桎圍以為部廣部廣六寸【廣謂徑也鄭司農云部蓋斗也】部長二尺【

謂斗柄達常也】桎長倍之四尺者二【桎長八尺謂達常以下也加達常二尺則蓋高一丈立乘也】十分寸之一謂之枚【為下起數也枚一分故書十與上二合為二十字杜子春云當為四尺者二十分寸之一】部尊一枚【尊高也蓋斗上隆高高一分也】弓鑿廣四枚鑿上二枚鑿下四枚【弓蓋橈也廣大也是為部厚一寸】鑿深二寸有半下直二枚鑿端一枚【鑿深對為五寸是以不傷達常也下直二枚者鑿空下正而上低二分也其弓菑則撓之平刻其下二分而內之欲令蓋之尊終平不蒙撓也端內題也】弓長六尺謂之庇軹五尺謂之庇輪四尺謂之庇軫【庇覆也故書庇作祕杜子春云祕當為庇謂覆幹也玄謂軹轂末也輿廣六尺六寸兩轂并六尺四寸旁減軌內七寸則兩軹之廣凡丈一尺六寸也六尺之弓倍之加部廣凡丈二尺六寸有宇曲之減可覆軹不及幹】參分弓長而揉其一【參分之持長撓短短者近部而平長者為宇曲也六尺之弓近部二尺四寸為宇曲】參分其股圍去一以為蚤圍【蚤當為爪以弓鑿之廣為股圍則寸六分也爪圍一寸十五分寸之一】參分弓長以其一為之尊【尊高也六尺之弓上近部平者二尺爪末下於部二尺二尺為句四尺為弦求其股股十二除之面三尺幾半也】上欲尊而宇欲卑【上近部平者也隕下曰宇】上尊而宇卑則吐水疾而霑遠【蓋者主為雨設也乘車無蓋禮所謂潦車謂蓋車與】蓋已崇則難為門也蓋已卑是蔽目也是故蓋崇十尺【十尺其中正也蓋十尺宇二尺而人長八尺卑於此蔽人目】良蓋弗冒弗紘殷畝而馳不隊謂之國工【隊落也善蓋者以橫馳於壟上無衣若無紘而弓不落也】輿人為車輪崇車廣衡長參如一謂之參稱【稱猶等也車輿】

【也衡之長容兩服】參分車廣去一以為隧【兵車之隧四尺四寸鄭司農云隧謂車輿深也讀如鑽燧改火之燧玄謂讀如邃字之邃】參分其隧一在前二在後以操其式【兵車之式深尺四寸三分寸之二】以其廣之半為之式崇【兵車之式高三尺三寸】以其隧之半為之較崇【較兩轆上出式者兵車自較而下凡五尺五寸故書較作椎杜子春云當為較】六分其廣以一為之軫圍【軾與後橫者也兵車之軾圍尺一寸】參分軾圍去一以為式圍【兵車之式圍七寸三分寸之一】參分式圍去一以為較圍【兵車之較圍四寸九分寸之八】參分較圍去一以為軹圍【兵車之軹圍三寸二十七分寸之七軹轆之植者衡者也與轂末同名】參分軹圍去一以為轡圍【兵車之轡圍二寸八十一分寸之十四轡式之植者衡者也鄭司農云轡讀如繫綴之綴謂車輿軻立者也立者為轡橫者為軻書轡或作軻玄謂轡者以其鄉人為名】圓者中規方者中矩立者中縣衡者中水直者如生焉繼者如附焉【治材居材如此乃善也如生如木從地生如附如附枝之弘殺也】凡居材大與小無并大倚小則摧引之則絕【并偏邪相就也用力之時其大并於小者小者強不堪則摧也其小并於大者小者力不堪則絕也】棧車欲弇【為其無革鞅不堅易折壞也士乘棧車】飾車欲侈【飾車謂革鞅輿也大夫以上革鞅輿故書侈作侈杜子春云當為侈】輶人為輶【輶車輶也詩云五檠梁輶】輶有三度軸有三理【目下事度深淺之數】國馬之輶深四尺有七寸【國馬謂種馬戎馬齊馬道馬高八尺兵車乘車軻崇三尺有三寸加軾與轡七寸又并此輶深則衡高八尺七寸也除馬之高則餘七寸為衡頸之間也鄭司農云深四尺七寸謂輶曲中】田馬之輶深四尺【田車軻崇三尺一寸半并此輶深為七尺一寸半今田車七尺衡頸之間亦七寸則軾與轡五寸半則衡高七尺七寸】駑馬之輶深三尺有三寸【輪軻與軾轡大小之減率寸半也則駑馬之車軻崇三尺加軾與轡四寸又并此輶深則衡高六尺七寸也今駑馬六尺除馬之高則衡頸之間亦七寸】軸有三理一者以為嫩也【無節目也】二者以

為久也【堅刃也】三者以為利也【滑密】軌前十尺而策半之【謂輶軌以前之長也策御者之策也十或作七合七為弦四尺七寸為句以求其股股則短矣七非也鄭司農云軌謂式前也書或作 玄謂軌是軌法也謂輿下三面之材輶式之所樹持車正也】凡任木【目車持任之材】任正者十分其輶之長以其一為之圍衡任者五分其長以其一為之圍小於度謂之無任【任正者謂輿下三面材持車正者也輶軌前十尺與隧四尺四寸凡丈四尺四寸則任正之圍尺四寸五分寸之二衡任者謂兩輶之間也兵車乘車衡圍一尺三寸五分寸之一無任言其不勝任】五分其軫間以其一為之軸圍【軸圍亦一尺三寸五分寸之一與衡任相應】十分其輶之長以其一為之當兔之圍【輶當伏兔者也亦圍尺四寸五分寸之二與任正者相應】參分其兔圍去一以為頸圍【頸前持衡者圍九寸十五分寸之九】五分其頸圍去一以為踵圍【踵後承軾者也圍七寸七十五分寸之五十一】凡揉輶欲其孫而無弧深【孫順理也杜子春云弧讀為淨而不汚之汙玄謂弧木弓也凡弓引之中參中參深之極也揉輶之倨句如二可也如三則深傷其力】今夫大車之輶摯其登又難既克其登其覆車也必易此無故唯輶直且無橈也【大車牛車也摯輶也登上阪也克能也】是故大車平地既節軒摯之任及其登阨不伏其輶必縊其牛此無故唯輶直且無橈也【阨阪也故書伏作偈杜子春云偈當作伏】故登阨者倍任者也猶能以登及其下阨也不援其邸必縊其牛後此無故唯輶直且無橈也【倍任用力倍也故書縊作鯁鄭司農云口讀為縊關東謂紂為縊鯁魚字】是故輶欲頌典【頌典堅刃貌鄭司農云頌讀為懇典讀為殄駟車之輶率尺所一縛懇典似謂此也】輶深則折淺則負【揉之大深傷其力馬倚之則折也揉之淺則馬善負之】輶注則利準利準則久和則安【故書準作水鄭司農云注則利水謂輶 上雨注令水去利也玄謂利水重讀似非也注則利謂輶之揉者形如注星則利也準則久謂輶之在輿下者平如準則能久也和則安注與準者和人乘之則安】輶欲弧而無折經而無絕【揉輶大深則折也經亦謂順理也】進則與馬謀退則與人謀【言進退之易與人馬之意相應馬行主於進人則有當退時】終日馳騁左不捷【杜子春云捷讀為蹇左面不便馬苦蹇輶調善則馬不蹇也書捷或作券玄謂券今倦字也輶和則久馳騁載在左者不罷倦尊者在左】行數千里馬不契需【鄭司農云契讀為爰契我龜之契需讀為畏需之需謂不傷蹄不需道里】終歲御衣衽不敝【衽謂裳也】此唯輶之和也【和則安是以然也謂進則與馬謀而下】勸登馬力【登上也輶和勸馬用力】馬力既竭輶猶能一取焉【馬止輶尚能一前取道喻易進】良輶環灋自伏兔不至軌七寸軌中有灋謂之國輶【伏兔至軌蓋如式深兵車乘車式深尺四寸三分寸之二灋下至軌七寸則半有灋也輶有筋膠之被用力均者則灋遠鄭司農云灋讀為灋酒之灋環謂漆沂鄂如環】車人之事半矩謂之宣【矩法也所法者人也人長八尺而大節三頭也腹也脰也以三通率之則矩二尺六寸三分寸之二頭髮皓落曰宣半矩尺三寸三分寸之一人頭之長也柯屬之木頭取名焉易巽為宣髮】一宣有半謂之櫛【櫛斲斤柄長二尺爾雅曰句櫛謂之定】一櫛有半謂之柯【伐木之柯柄長三尺詩云伐柯伐柯其則不遠鄭司農云蒼頡篇有柯櫛】一柯有半謂之磬折【人帶以下四尺五寸磬折立則上俛玉藻曰三分帶下紳居二焉紳長三尺】車人為車柯長三尺博三寸厚一寸有半五分其長以其一為之首【首六寸謂今剛關頭斧柯其柄也鄭司農云柯長三尺謂斧柯因以為度】轂長半柯其圍一柯有半【大車轂徑尺五寸】輻長一柯有半其博三寸厚三之一【輻厚一寸也故書博或為搏杜子春云當為博】渠三柯者三【渠二丈七尺謂罔也其徑九尺鄭司農云渠謂車輶所謂牙】行澤者欲短轂行山者欲長轂短轂則利長

轂則安【澤泥苦其大安山險苦其大動】行澤者反輶行山者仄輶反輶則易仄輶則完【故書仄為側鄭司農云反輶謂輪輶反其木裏需者在外澤地多泥柔也側當為仄山地剛多沙石玄謂仄輶為泥之黏欲得心在外滑仄輶為沙石破碎之欲得表裏相依堅刃】六分其輪崇以其一為之牙圍【輪高輪徑也牙圍尺五寸】柏車轂長一柯其圍二柯其幅一柯其渠二柯者三五分其輪崇以其一為之牙圍【柏車山車輪高六尺牙圍尺二寸】大車崇三柯綆寸牝服二柯有參分柯之二【大車平地載任之車轂長半柯者也綆輪筭牝服長八尺謂較也鄭司農云牝服謂車箱服讀為負】羊車二柯有參分柯之一【鄭司農云羊車謂車羊門也玄謂羊善也善車若今定張車較長七尺】柏車二柯【較六尺也柏車輪崇六尺其綆大半寸】凡為輶三其輪崇參分其長二在前一在後以鑿其鉤徹廣六尺鬲長六尺【鄭司農云鉤鉤心鬲謂輶端厭牛領者竝同上】巾車掌公車之政令辨其用與其旗物而等敘之以治其出入【公猶官也用謂祀賓之屬旗物大常以下等敘之以封同姓異姓之次敘】王之五路一曰玉路錫樊纓十有再就建大常十有二旂以祀【王所御曰路玉路以玉飾諸末錫馬面當盧刻金為之所謂鏤錫也樊讀如鞶帶之鞶謂今馬大帶也鄭司農云纓謂當胸士喪禮下篇曰馬纓三就禮家說曰纓當胸以削革為之三就三重三匝也玄謂纓今馬鞅玉路之樊及纓皆以五采屬飾之十二就就成也大常九旗之畫日月者正幅為繆旂則屬焉】金路鉤樊纓九就建大旂以賓同姓以封【金路以金飾諸末鉤婁頷之鉤也金路無錫有鉤亦以金為之其樊及纓以五采屬飾之而九成大旂九旗之畫交龍者以賓以會賓客同姓以封謂王子母弟率以功德出封雖為侯伯其畫服猶如上公若魯衛之屬其無功德各以親疏食采畿內而已故書鉤為拘杜子春讀為鉤】象路朱樊纓七就建大赤以朝異姓以封【象路以象飾諸末象路無鉤以朱飾勒而已其樊及纓以五采屬飾之而七成大赤九旗之通帛以朝以日視朝異姓王甥舅】革路龍勒條纓五就建大白以即戎以封四衛【革路輓之以革而漆之無他飾龍駟也以白黑飾革雜色為勒條讀為條其樊及纓以條絲飾之而五成不言樊字蓋脫爾以此言條如玉路金路象路飾樊纓皆不用金玉象矣大白殷之旗猶周大赤蓋象正色也即戎謂兵事四衛四方諸侯守衛者蠻服以內】木路前樊鵠纓建大麾以田以封蕃國【木路不輓以革漆之而已前讀為緇翦之翦翦淺黑也木路無龍勒以淺黑飾韋為樊鵠色飾韋為纓不言就數飾與革路同大麾不在九旗中以正色言之則黑夏后氏所建田四時田獵蕃國謂九州之外夷服鎮服蕃服杜子春云鵠或為結】王后之五路重翟錫面朱總厭翟勒面績總安車彫面鷩總皆有容蓋【重翟重翟雉之羽也厭翟次其羽使相迫也勒面謂以如王龍勒之韋為當面飾也彫者畫之不龍其韋安車坐乘車凡婦人車皆坐乘故書朱總為綈鷩或為繫鄭司農云錫馬面錫綈當為總書亦或為總鷩讀為鳬鷩之鷩鷩總者青黑色以繒為之總著馬勒直兩耳與兩鑣容謂幘車山東謂之裳幘或曰幘容玄謂朱總績總其施之如鷩總車衡輅亦宜有焉績畫文也蓋如今小車蓋也皆有容有蓋則重翟厭翟謂蔽也重翟后從王祭祀所乘厭翟后從王賓饗諸侯所乘安車無蔽后朝見於王所乘謂去飾也詩國風碩人曰翟蔽以朝謂諸侯夫人始來乘翟蔽之車以朝見於君盛之也此翟蔽蓋厭翟也然則王后始來乘重翟乎】翟車貝面組總有握【翟車不重不厭以翟飾車之側爾貝面貝飾勒之當面也有握則此無蓋矣如今駟車是也后所乘以出桑】輦車組輓有翬羽蓋【輦車不言飾后居宮中從容所乘但漆之而已為輶輪人輓之以行有翬所以禦風塵以羽作小蓋為翬日也故書翬為駟杜子春云當為翬書亦或為□】服車五乘孤乘夏篆卿乘夏縵大夫乘黑車士乘棧車庶人乘役車【服車服事者之車故書夏篆為夏緣鄭司農云夏赤也

緣綠色或曰夏篆篆讀為圭瑑之瑑夏篆轂有約也玄謂夏篆五采畫轂約也夏縵亦五采畫無瑑爾墨車不畫也棧車不革輓而漆之役車方箱可載任器以共役】凡良車散車不在等者其用無常【給遊燕及恩惠之賜不在等者謂若今輜車後戶之屬作之有功有沽】凡車之出入歲終則會之【計其完敗多少】凡賜闕之【完敗不計】毀折入齎于職幣【計所傷敗入其直杜子春云齎讀為資資謂財也乘官車毀折者入財以償繕治之直】歲時更續共其弊車【故書更續為受讀杜子春云受當為更讀當為續更續更受新共其弊車歸其故幣車也玄謂俱受新耳更易其舊續續其不任用共其弊車巾車既更續之取其弊車共於車人材或有中用之 春官】典路掌王及后之五路辨其名物與其用說【用謂將有朝祀之事而駕之鄭司農云說謂舍車也春秋傳曰雞鳴而駕日中而說用謂所宜用 同上】有以少為貴者大路繁纓一就次路繁纓七就【大輅繁纓一就殷祭天之車也周禮王之五路玉路繁纓十有二就金路九就象路七就革路五就木路翦繁鵠纓 禮器】大路繁纓一就先路三就次路五就【此因小說以少為貴者禮器言次路七就與此異字之誤也 郊特牲】

大路素【大路殷路也 禮器】大輅在賓階面綴輅在阼階面【大輅玉綴路金面前皆南向】先路在左塾之前次輅在右塾之前【先輅象次輅木金玉象皆以飾車木則無飾皆在路寢門內左右塾前北面 顧命】

乘大路諸侯之僭禮也【詳總要章】上公樊纓九就貳車九乘侯伯樊纓七就貳車七乘

子男樊纓五就貳車五乘【繁纓馬飾也以鬬飾之每一處五采備為一就就成也貳副也 秋官大行人】貳車者諸侯七乘上大夫五乘下大夫三乘【此蓋殷制也周禮貳車公九乘侯伯七乘子男五乘卿大夫各如其命之數 少儀】君羔幣虎犢【幣覆笭也犢讀皆如直道而行之直直謂緣也此君齊車之飾】大夫齊車鹿幣豹犢朝車士齊車鹿幣豹犢【臣之朝車與齊車同飾 玉藻】君賜車馬乘以拜【敬君惠也】賜君未有命弗敢即乘也【同上】為人子者三賜不及車馬【三賜三命也凡仕者一命而受爵再命而受衣服三命而受車馬車馬所以尊者備矣卿大夫士之子不受不敢以成尊此踰於父天子諸侯之子不受自卑遠於君 曲禮】年不順成天子乘素車【自貶損也】大夫不得造車馬【造謂作新也

玉藻】國家靡敝則車不雕幾【雕畫也幾附纏為沂鄂也 少儀】有虞氏之旂夏后氏之綏殷之大白周之大赤【四者旌旗之屬也綏當為綏讀如冠蕤之蕤有虞氏當言綏夏后氏當言旂此蓋錯誤也綏謂注旄牛尾於杠首所謂大麾書云武王左杖黃鉞右秉白旄以麾周禮王建大旂以賓建大赤以朝建大白以即戎建大麾以田也 明堂位】素錦綢杠【以白地錦韜旗之竿】纁帛繆【纁帛降也繆衆旒所著】素陞龍于繆【畫白龍於繆令上向】練旒九【練絳練也】飾以組【用綦組飾旒之籜】維以縷【用朱縷維連持之不欲令曳地周禮曰六人維王之大常是也】緇廣充幅長尋曰旐【帛全幅長八尺】繼旐曰旐【帛續旐末為燕尾者義見詩】注旐首曰旐【載旐於竿頭如今之幢亦有旐】有鈴曰旐【縣鈴於竿頭畫交龍於旐】錯革鳥曰旐【此謂合剝鳥皮毛置之竿頭即禮記云載鴻及鳴鳶】因章曰旐【以白練為旐因其文章不復畫之周禮云通帛為旐 爾雅】司常掌九旗之物名各有屬以待國事日月為常交龍為旂通帛為旛雜帛為物熊虎為旗鳥隼為旟龜蛇為旐全羽為旟析羽為旐【物名者所畫異物則異名也屬謂徽識也大傳謂之徽號今城門僕射所被及亭長著絳衣皆其舊象通帛謂大赤從周正色無飾雜帛者以帛素飾其側白殷之正色全羽析羽皆五采繫之於旐旐之上所謂注旐於干首也凡九旗之帛皆用絳】及國之大閱贊

司馬頒旗物王建大常諸侯建旂孤卿建旛大夫士建物師都建旗州里建旗縣鄙建旒道車載旒旂車載旂【仲冬教大閱司馬主其禮自王以下治民者旗畫成物之象王畫日月象天明也諸侯畫交龍一象其升朝一象其下復也孤卿不畫言奉王之政教而已大夫士雜帛言以先王正道佐職也師都六鄉六遂大夫也謂之師都都民所聚也畫熊虎者鄉遂出軍賦象其守猛莫敢犯也州里縣鄙鄉遂之官互約言之鳥隼象其勇捷也龜蛇象其扞難辟害也道車象路也王以朝夕燕出入游車木路也王以田以鄙全羽析羽五色象其文德也大閱王乘戎路建大常焉玉路金路不出】皆畫其象焉官府各象其事州里各象其名家各象其號【事名號者徽識所以題別衆臣樹之於位朝者各就焉覲禮曰公侯伯子男皆就其旂而立此其類也或謂之事或謂之名或謂之號異外內也三者旂旗之細也士喪禮曰為名各以其物亡則以緇長半幅緇末長終幅廣三寸書名於末此蓋其制也徽識之書則云某某之事某某之名某某之號今大閱禮象而為之兵凶事若有死事者亦當以相別也杜子春云畫當為書玄謂畫畫雲氣也異於在國軍事之飾】歲時共更旂【取舊與新春官】

上公建常九旂侯建常七旂子男建常五旂【常旂旗也旂其屬幟垂者也 大行人】武車綏旂【畫飾也綏謂垂舒之也武車亦兵車】德車結旂【不畫飾也結謂收斂之也德車乘車 曲禮】軫之方也以象地也蓋之圓也以象天也輪輻三十以象日月也蓋弓二十有八以象星也【輪象日月者以其運行也日月三十日而合宿】龍旂九旂以象大火也【交龍為旂諸侯之所建也大火蒼龍宿之心其屬有尾尾九星】鳥旗七旂以象鶉火也【鳥隼為旗州里之所建鶉火朱鳥宿之柳其屬有星星七星】熊旗六旂以象伐也【熊虎為旂師都之所建伐屬白虎宿與參連體而六星】龜蛇四旂以象營室也【龜蛇為旒縣鄙之所建營室玄武宿與東壁連體而四星】弧旌枉矢以象弧也【覲禮曰侯氏載龍旂弧韞則旂旗之屬皆有弧也弧以張縵之幅有衣謂之韞又為設矢象 星有矢也妖星有枉矢者蛇行有尾因此云枉矢蓋畫之 考工記】春天子乘鸞路駕蒼龍載青旂【鸞路有虞氏之車有鸞和之節而飾之以青取其名耳春言鸞冬夏言色互文馬八尺以上為龍凡此車馬皆所取於殷時而有變焉非周制也周禮朝祀戎獵車服各以其事不以四時為異】夏天子乘朱路駕赤駟載赤旂中央天子乘大路駕黃駟載黃旂【大路殷路也車如殷路之制而飾之以黃】秋天子乘戎路駕白駟載白旂【戎路兵車也制如周革路而飾之以白白馬黑鬣曰駟】冬天子乘玄路駕鐵驪載玄旂【鐵驪色如鐵 月令】

右車旗 分魯公以大路大旂【魯公伯禽也此大路金路賜同姓諸侯車也交龍為旂周禮同姓以封】分康叔以大路少帛綉茷旂旂【少帛雜帛也綉茷大赤取染草名也通帛為旂析羽為旂 定四年左氏傳】魯君孟春乘大路載弧韞旂十有二旒日月之章祀帝于郊配以稷天子之禮也【大路殷之祭天車也弧旂旗所以張幅也其衣曰韞天子之旂旗畫日月明堂位】衛新築人仲叔于奚救孫桓子請繁纓以朝許之【詳見總要章】鄭公孫蠆卒范宣子言於晉侯以其善於伐秦也【十四年晉伐秦子蟜見諸侯師而勸之濟涇】晉侯請於王王追賜之大路使以行禮也【大路天子所賜車之總名以行葬禮傳言大夫有功則賜服路 襄十九年左氏傳】穆叔如周聘王嘉其有禮也賜之大路【大路天子所賜車之總名為昭四年叔孫以所賜路葬張本 襄二十四年】昭公四年叔孫卒杜洩將以路葬且盡卿禮【路王所賜叔孫車】南遺謂季孫曰叔孫未乘路葬焉用之且冢卿無路介卿以葬不亦左乎【冢孫謂季孫介次也左不便】季孫曰然使杜洩舍路【舍置也】不可曰夫子受命於朝

而聘於王【在襄二十四年夫子謂叔孫】王思舊勲而賜之路【感其有禮以念其先人】復命而致之君【豹不敢自乘】君不敢逆王命而復賜之使三官書之吾子為司徒實書名【謂季孫也書名定位號】夫子為司馬與工正書服【謂叔孫也服車服之器工正所書】孟孫為司空以書勲【勲功也】今死而弗以是棄君命也書在公府而弗以是廢三官也若命服生弗敢服死又不以將焉用之乃使以葬【左氏傳】公會晉師于上鄆賜三帥先路三命之服【三帥卻克士燮欒書已嘗受王先路之賜今改而易新并此車所建所服之物】司馬司空輿師候正亞旅皆受一命之服【晉司馬司空皆大夫輿師主兵車候正主斥候亞旅亦大夫也皆魯侯賜成二年左氏傳】絳之富商韋藩木楫以過於朝唯其功庸少也【韋藩韋蔽前後木楫木檐也言無功庸雖富不得服其尊服過於朝無位爵故也國語晉語詳見職官下篇】孟子曰齊景公田招虞人以旌不至將殺之志士不忘在溝壑勇士不忘喪其元孔子奚取焉取非其招不往也萬章曰敢問招虞人何以曰以皮冠庶人以旃士以旂大夫以旌【皮冠田獵之冠也事見春秋傳然則皮冠者虞人之所有事也故以是招之庶人未仕之臣通帛曰旃士謂已仕者交龍為旂析羽而注於旗干之首曰旌孟子】楚子之為令尹也為王旌以田【析羽為旌王旌游至于軫】芋尹無宇斷之曰一國兩君其誰堪之【昭七:left氏傳】齊欒高氏伐虎門公卜使王黑以靈姑鉞率吉請斷三尺焉而用之【王黑齊大夫靈姑鉞公旗名斷三尺不敢與君同昭十年左氏傳】范宣子假羽毛於齊而弗歸齊人始貳【析羽為旌王者游車之所建齊私有之因謂之羽毛宣子聞而借觀之襄十四年左氏傳】召陵之會晉人假羽旌於鄭鄭人與之【析羽為旌王者遊車之所建鄭私有之因謂之羽旌借觀之】明日或旆以會【或賤者也繼旆曰旆令賤人施其旆執以從會示卑鄭】晉於是乎失諸侯【傳言晉無禮所以遂弱定四年左氏傳】

舜輯五瑞既月乃日覲四岳羣牧班瑞于羣后【輯斂瑞信也公執桓圭侯執信圭伯執躬圭子執穀璧男執蒲璧五等諸侯執之以合符于天子而驗其信否也周禮天子執冒以朝諸侯鄭氏註云名玉以冒以德覆冒天下也諸侯始受命天子錫以圭圭頭斜脫其冒下斜刻小大長短廣狹如之諸侯來朝天子以刻處冒其圭頭有不同者即辨其偽也班頒同既見之後審知非偽則又頒還其瑞以與天下正始也舜典】大宗伯以玉作六瑞以等邦國【等猶齊等也】王執鎮圭【鎮安也所以安四方鎮圭者蓋以四鎮之山為瑑飾圭長尺有二寸】公執桓圭【公二王之後及王之上公雙植謂之桓桓宮室之象所以安其上也桓圭蓋亦以桓為瑑飾圭長九寸】侯執信圭伯執躬圭【信當為身聲之誤也信圭躬圭蓋皆象以人形為瑑飾文有麓縶耳欲其慎行以保身圭皆長七寸】子執穀璧男執蒲璧【穀所以養人蒲為席所以安人二玉蓋或以穀為飾或以蒲為瑑飾璧皆徑五寸不執圭者未成國也】以玉作六器以禮天地四方【禮謂始告神時薦於神座書曰周公植璧秉圭是也】以蒼璧禮天以黃琮禮地以青圭禮東方以赤璋禮南方以白琥禮西方以玄璜禮北方【禮神者必象其類璧圓象天琮八方象地圭銳象春物初生半圭曰璋象夏物半死琥猛象秋嚴半璧曰璜象冬閉藏地上無物唯天半見春官】典瑞掌玉瑞玉器之藏辨其名物與其用事設其服飾【人執以見曰瑞禮神曰器瑞符信也服飾服玉之飾謂纁藉】王晉大圭執鎮圭纁藉五采五就以朝日【纁有五采文所以薦玉木為中幹用韋衣而畫之成就也王朝日者示有所尊訓民事君也天子常春分朝日秋分夕月覲禮曰拜日於東門之外故書鎮作璜鄭司農云晉讀為搢紳之搢謂插于紳帶之間若帶劍也璜讀為鎮玉人職曰大圭長三尺杼上終葵首天子服之

鎮圭尺有二寸天子守之纁讀為藻率之藻五就五帀也一帀為一就】公執桓圭侯執信圭伯執躬圭纁皆三采三就子執穀璧男執蒲璧纁皆二采再就以朝覲宗遇會同于王【三采朱白蒼二采朱綠也鄭司農云以圭璧見于王覲禮曰侯氏入門右坐奠圭再拜稽首侯氏見于天子春日朝夏日宗秋日覲冬日遇時見曰會殷見曰同】諸侯相見亦如之【鄭司農云亦執圭璧以相見故邾隱公朝于魯春秋傳曰邾子執玉高其容仰】瑒圭璋璧琮纁皆二采一就以頍聘【璋以聘后夫人以琮享之也大夫衆來曰頍寡來曰聘鄭司農云瑒有圻鄂瑒起】四圭有邸以祀天旅上帝【鄭司農云於中央為璧圭著其四面一玉俱成爾雅曰邸本也圭本著於璧故四圭有邸圭末四出故也或說四圭有邸有四角也邸讀為抵欺之抵上帝玄天玄謂祀天夏正郊天也上帝五帝所郊亦猶五帝殊言天者尊異之也大宗伯職曰國有大故則旅上帝及四望】兩圭有邸以祀地旅四望【兩圭者以象地數二也儼而同邸祀地謂所祀於北郊神州之神】裸圭有瓚以肆先王以裸賓客【鄭司農云於圭頭為器可以挹鬯裸祭謂之瓚故詩曰卣彼玉瓚黃流在中國語謂之鬯圭以肆先王裸先王祭也玄謂肆解牲體以祭因以為名爵行曰裸漢禮瓚槃大五升口徑八寸下有槃口徑一尺】圭璧以祀日月星辰【圭其邸為璧取殺于上帝】璋邸射以祀山川以造贈賓客【璋有邸而射取殺于四望鄭司農云射琰也】土圭以致四時日月封國則以土地【以致四時日月者度其景至不至以知其行得失也冬夏以致日春秋以致月土地猶度地也封諸侯以土圭度日景觀分寸長短以制其域所封也鄭司農說以玉人職曰土圭尺有五寸以致日以土地以求地中故謂之土圭】珍圭以徵守以恤凶荒【杜子春云珍當為鎮書亦或為鎮以徵守者以徵召守國諸侯若今時徵郡守以竹使符也鎮者國之鎮諸侯亦一國之鎮故以鎮圭徵之也凶荒則民有遠志不安其土故以鎮圭鎮安之玄謂珍圭王使之瑞節制大小當與琬琰相依王使人徵諸侯憂凶荒之國則授之執以往致王命焉如今時使者持節矣恤者闔府庫振救之凡瑞節歸又執以反命】牙璋以起軍旅以治兵守【鄭司農云牙璋瑒以為牙牙齒兵象故以牙璋發兵若今時以銅虎符發兵玄謂牙璋亦王使之瑞節兵守用兵所守若齊人戍遂諸侯戍周】璧羨以起度【鄭司農云羨長也此璧徑長尺以起度量玉人職曰璧羨度尺以為度玄謂羨不圓之貌蓋廣徑八寸袤一尺】穀圭以和難以聘女【穀圭亦王使之瑞節穀善也其飾若粟文然難仇讐和之者若春秋宣公及齊侯平莒及邾晉侯使瑕嘉平戎于王其聘女則以納徵焉】琬圭以治德以結好【琬圭亦王使之瑞節請侯有德王命賜之及諸侯使大夫來聘既而為壇會之使大夫執以命事焉大行人職曰時聘以結諸侯之好鄭司農云琬圭無鋒芒故治德以結好】琰圭以易行以除慝【琰圭亦王使之瑞節鄭司農云琰圭有鋒芒傷害征伐誅討之象故以易行除慝易惡行令為善者以此圭責讓喻告之也玄謂除慝亦於諸侯使大夫求覲既而使大夫執而命事於壇大行人職曰殷覲以除邦國之慝】大祭祀大旅凡賓客之事共其玉器而奉之【玉器謂四圭裸圭之屬】凡玉器出則共奉之【玉器出謂玉所好賜也奉之送以往遠則送於使者同上】玉人之事鎮圭尺有二寸天子守之命圭九寸謂之桓圭公守之命圭七寸謂之信圭侯守之命圭七寸謂之躬圭伯守之【命圭者王所命之圭也朝覲執焉居則守之子守穀璧男守蒲璧不言之者闕耳故書或云命圭五寸謂之躬圭杜子春云當為七寸玄謂五寸者璧文之闕亂存焉】天子執冒四寸以朝諸侯【名玉曰冒者言德能覆蓋天下也四寸者方以尊接卑以小為貴】天子用全上公用龍侯用瓚伯用將【鄭司農云全純色也龍當為彪彪謂雜色玄謂全純玉也瓚讀為之龍瓚將皆雜名也卑者下尊以輕重為差玉多則重石多則輕公侯四玉一石伯子男三玉一石】繼子

男執皮帛【謂公之孤也見禮次子男贊用束帛而以豹皮表之為飾天子之孤表帛以虎皮此說玉及皮帛者遂言見天子之用贊】天子圭中必【必讀如鹿車鐸之鐸謂以組約其中央為執之以備失墜】四圭尺有二寸以祀天【郊天所以祀其神也典瑞職曰四圭有邸以祀天旅上帝】大圭長二尺杼上終葵首天子服之【王所搢大圭也或謂之挺終葵椎也為椎於其杼上明無所屈也杼綱也相玉書曰珽玉六寸明自炤】土圭尺有五寸以致日以土地【致日度景至不夏日至之景尺有五寸冬至之景丈有三尺土猶度也建邦國以度其地而致其域】裸圭尺有二寸有瓚以祀廟【裸之言灌也或作裸或作果裸謂始獻爵奠也瓚如盤其柄用圭有流前注】琬圭九寸而縑以象德【琬猶圓也王使之瑞節也諸侯有德王命賜之使者執琬圭以致命焉縑藉也】琰圭九寸判規以除慝以易行【凡圭琰上寸半琰圭琰半以上又半為瑑飾諸侯有為不義使者征之執以瑞節也除慝誅惡逆也易行去煩苛】璧羨度尺好三寸以為度【鄭司農云羨徑也好璧孔也爾雅曰肉倍好謂之璧好倍肉謂之瑗肉好若一謂之環玄謂羨猶延其袤一尺而廣狹焉】圭璧五寸以祀日月星辰【禮其神也圭其邸為璧取殺於上帝】璧琮九寸諸侯以享天子【享獻也聘禮享君以璧享夫人以琮】穀圭七寸天子以聘女【納徵加於束帛】大璋中璋九寸邊璋七寸射四寸厚寸黃金勺青金外朱中鼻寸衡四寸有縑天子以巡守宗祝以前馬【射琰出者也勺故書或為約杜子春云當為勺謂酒尊中勺也鄭司農云鼻謂勺龍頭鼻也衡謂勺柄龍頭也玄謂鼻勺流也凡流皆為龍口也衡古文橫假借字也衡謂勺徑也三璋之勺形如圭瓚天子巡守有事山川則用灌焉於大山川則用大璋加文飾也於中山川用中璋殺文飾也於小山川用邊璋半文飾也其祈沈以馬宗祝亦執勺以先之禮王過大山川則大祝用事焉將有事於四海山川則校人飾黃駒】大璋亦如之諸侯以聘女【亦納徵加於束帛也大璋者以大璋之文飾之也亦如之者如邊璋七寸射四寸】瑑圭璋八寸璧琮八寸以覲聘【瑑文飾也覲視也聘問也衆來曰覲特來曰聘聘禮曰凡四器者唯其所寶以聘可也】牙璋中璋七寸射二寸厚寸以起軍旅以治兵守【二璋皆有鉏牙之飾於琰側先言牙璋有文飾也】駟琮五寸宗后以為權【駟讀為組以組繫之因名焉鄭司農云以為稱錘以起量】大琮十有二寸射四寸厚寸是謂內鎮宗后守之【如玉之鎮圭也射其外鉏牙】駟琮七寸鼻寸有半寸天子以為權【鄭司農云以為權故有鼻也】兩圭有邸以祀地以旅四望【邸謂之柢有邸儼共本也】瑑琮八寸諸侯以享夫人【獻於所朝聘君之夫人也】案十有二寸棗案十有二列諸侯純九大夫純五夫人以勞諸侯【純猶皆也鄭司農云案玉案也夫人天子夫人玄謂案玉飾案也夫人王后也記時諸侯僭稱王而夫人之號不別是以同王后於夫人也玉案十二以為列王后勞朝諸侯皆九列聘大夫皆五列則十有二列者勞二王之後也棗案實於器乃加于案聘禮曰夫人使下大夫勞以二竹簋方玄被纁裏有蓋實棗烝案擇兼執之以進】璋邸射素功以祀山川以致稍餼【邸射剡而出也致稍餼造賓客納稟食也鄭司農云素功無瑑飾也餼或作氣杜子春云當為餼考工記】小行人成六瑞王用璚圭公用桓圭侯用信圭伯用躬圭子用穀璧男用蒲璧【成平也瑞信也皆朝見所執以為信秋官】贊大行曰圭公九寸侯伯七寸子男五寸博三寸厚半寸剡上左右各寸半玉也藻三采六等【贊大行者書說大行人之禮者名也藻薦玉者也三采六等以朱白蒼畫之再行也子男執璧作此贊者失之矣雜記下】所以朝天子圭與縑皆九寸剡上寸半厚半寸博三寸縑三采六等朱白蒼【圭所執以為瑞節也剡上象天圓地方也雜采曰縑以韋衣木版飾以三色再就所以薦玉重慎也九寸上公之圭也古文縑或作藻今文作瑱】問諸侯朱綠縑八寸【二采再就降於天子也

於天子曰朝於諸侯曰問記之于聘文互相備】皆玄纁繫長尺絢組【采成文曰絢繫無事則以繫玉因以為飾皆用五采組上以玄下以絳為地今文絢作□聘禮】

諸侯以圭為瑞家不藏圭【瑞信也諸侯執瑞孤卿以下執摯禮器】聘人以珪問事以璧召人以瑗絕人以玦反絕以環【聘人以珪謂使人聘他國以圭璋也問謂訪其國事因遺之也衛侯使尹襄問子貢以弓是其類也說文曰瑗者大孔璧也爾雅好倍肉謂之瑗肉倍好謂之璧禮記曰君召臣以三節周禮珍圭以徵守鄭云以徵召守國之諸侯若今徵郡守以竹使符也然則天子以珍圭召諸侯諸侯召臣以瑗歟玦如環而缺肉好若一謂之環古者臣有罪待放于境三年不敢去與之環則還與之則絕皆所以見意也反絕謂反其將絕者此明諸侯以玉接人臣之禮也荀子大略】璵瑞也【詩曰韜韜佩璵璵者玉瑞】玉十謂之區【雙玉曰穀五穀為區】珪大尺二寸謂之玠【詩曰錫爾玠圭】璋大八寸謂之琚【璋半珪也】璧大六寸謂之宣【漢書所云瑱玉是也】肉倍好謂之璧【肉邊也好孔也】好倍肉謂之瑗【孔大于邊也】肉好若一謂之環【邊孔適等】綏綬也【即佩玉之組所以連繫瑞玉者因通謂之綏爾雅】

右玉器子貢問于孔子曰敢問君子貴玉而賤珉者何也為玉之寡而珉之多與【珉石似玉或作玫也】孔子曰非為珉之多故賤之也玉之寡故貴之也夫昔者君子比德於玉焉溫潤而澤仁也【色柔溫潤似仁也潤或作濡】縝密以栗知也【縝緻也栗堅貌】廉而不劌義也【劌傷也義者不苟傷人也】垂之如隊禮也【禮尚謙卑】叩之其聲清越以長其終詘然樂也【樂作則有聲止則無也越猶揚也詘絕止聲也樂記曰止如槁木】瑕不揜瑜瑜不揜瑕忠也【瑕玉之病也瑜其中間美者玉之性善惡不相揜似忠也】孚尹旁達信也【孚讀為浮尹讀為竹箭之筠浮筠謂玉采色也采色旁達不相隱翳似信也孚或作攸或為扶】氣如白虹天也精神見于山川地也【精神亦謂精氣也虹天氣也山川地所以通氣也】圭璋特達德也【特達謂以朝聘也璧琮則有幣有德者無所不達不有須而成也】天下莫不貴者道也【道者人無不由之】詩云言念君子【言我也】溫其如玉故君子貴之也【聘義】何謂五瑞謂珪璧琮璜璋也禮王度記曰玉者有象君之德燥不輕濕不重薄不澆廉不傷疵不揜是以人君寶之天子之純玉尺有二寸公侯九寸四玉一石也伯子男俱三玉一石也五玉各何施蓋以為璜以徵召璧以聘問璋以發兵珪以信質琮以起土功之事也珪以為信者何珪者兌上象物皆生見于上也信莫著于作見故以珪為信而見萬物之始莫不自潔珪之為言潔也上兌陽也下方陰也陽尊故其禮順備也在位東方陽見義于上也璧以聘問何璧者方中圓外象地地道安寧而出財物故以璧聘問也位在中央璧之為言積也中央故有天地之象所以據用也璜所以徵召何璜者半璧位在北方北方陰極而陽始起故象半陰陽氣始施徵召萬物故以徵召也璜之為言光也陽光所及萬物不動也象君之威命所加莫敢不從璋以發兵何璋半珪位在南方南方陽極而陰始起兵亦陰也故以發兵也璋之為言明也賞罰之道使臣當章明也南方之時萬物莫不章故謂之璋琮以起土功發聚衆何琮之為言聚也象萬物之宗聚聖也功之所成故以起土功發衆也位西方西方陽收功於內陰出域于外內圓象陽外直為陰外牙而內湊象聚會也故謂之琮后夫人之財也五玉所施非一不可勝條略舉其大者也【白虎通】

歲二月東巡守肆覲東后五玉三帛二生一死贊【五玉五等諸侯所執者即五瑞也三帛諸

侯世子執纁公之孤執玄附庸之君執黃二生卿執羔大夫執鴈一死士執雉五玉三帛二生一死所以為贄而見者 舜典】 大宗伯以禽作六摯以等諸臣【摯之言至所執以自致】孤執皮帛卿執羔大夫執鴈士執雉庶人執鵷工商執雞【皮帛者束帛而表以皮為之飾皮虎豹皮帛如今璧色繒也羔小羊取其羣而不失其類鴈取其候時而行雉取其守介而死不失其節鵷取其不飛遷雞取其守時而動曲禮曰飾羔鴈者以纁謂衣之以布而又畫之者自雉以下執之無飾士相見之禮卿大夫飾摯以布不言纁者諸侯之臣與天子之臣異也然則天子之孤飾摯以虎皮公之孤飾摯以豹皮與此孤卿大夫士之摯皆以爵不以命數凡摯無庭實 春官】 凡摯天子鬯諸侯圭卿羔大夫鴈士雉庶人之摯匹童子委摯而退【摯之言至也天子無客禮以鬯為摯者所以唯用告神為至也童子委摯而退不與成人為禮也說者以匹為鵷】 野外軍中無摯以纁拾矢可也【非為禮之處用時物相禮而已纁馬繁纁也拾謂射講曲禮】 飾羔鴈者以纁【纁畫也諸侯大夫以布天子大夫以畫 同上】 婦人之摯棗栗脯脩棗栗【婦人無外事見以羞物也棗木名棗枳也有實今邳郟之東食之棗似栗而小同上】

右摯 臣見君所以有贄何贄者質己之誠致己之慙也王者緣臣子之心以為之制差其尊卑以副其意公侯以玉為贄者玉取其燥不輕濕不重公之德全卿以羔者取其羣不黨卿職在盡忠率下不阿黨也大夫以鴈為贄者取其飛成行列大夫職在以奉命之適四方動作當能自正以事君也士以雉為贄者取其不可誘之以食攝之以威必死不可生畜士行威守節死義不當移轉也卿大夫贄古以麇鹿今以羔鴈何以為古者質取其內謂得美草鳴相呼今文取其外謂羔跪乳鴈有行列也私相見亦有贄何所以相尊敬長和睦也朋友之際五常之道有通財之義賑窮告急之意中心好之欲飲食之故財幣者所以副至意也婦人之贄以棗栗脯脩者婦人無專制之義御衆之任交接辭讓之禮職在供養饋食之間其義一也故后夫人以棗栗脯脩者凡肉脩陰也棗取其朝早起栗戰慄自正也【白虎通 劉氏義見士相見義】 齊伐魯晉士鞅趙鞅荀寅救魯公會晉師于瓦范獻子執羔趙簡子中行文子皆執鴈魯公於是始尚羔【獻子士鞅也簡子趙鞅也中行文子荀寅也禮卿執羔大夫執鴈魯則同之今始知執羔之尊也 定公八年左氏傳】

掌節掌守邦節而辨其用以輔王命【邦節者珍圭牙璋穀圭琬圭琰圭也王有命則別其節之用以授使者輔王命者執以行為信】 守邦國者用玉節守都鄙者用角節【謂諸侯於其國中公卿大夫王子弟於其采邑有命者亦自有節以輔之玉節之制以玉為之以命數為小大角用犀角其制未聞】 凡邦國之使節山國用虎節土國用人節澤國用龍節皆金也以英蕩為之【使節卿大夫聘於天子諸侯行道所執之信也土平地也山多虎平地多人澤多龍以金為節鑄象焉必自以其國所多者於以相別為信明也今漢有銅虎符杜子春云蕩皆為帑謂以函器盛此節或曰英蕩畫函】 門關用符節貨賄用璽節道路用旌節皆有期以反節【門關司門司關也貨賄者主通貨賄之官謂司市也道路者主治五涂之官謂鄉遂大夫也凡民遠出至於邦國邦國之民若來入由門者司門為之節由關者司關為之節其商則司市為之節其以徵令及家徙則鄉遂大夫為之節唯時事而行不出關不用節也變司市言貨賄者璽節主以通貨賄貨賄非必由市或資于民家焉變鄉遂言道路者容公邑及小都大都之吏皆主治五涂亦有民也符節者如今宮中諸官詔符也璽節者今之印章也旌節今使者所

擁節是也將送者執此節以送行者皆以道里日時課如今郵行有程矣以防容姦擅有所通也凡節有法式藏於掌節】凡通達於天下者必有節以傳輔之【必有節言遠行無有不得節而出者也輔之以傳者節為信耳傳說所齎操及所適】無節者有幾則不達【圖土內之地官】小行人達天下之六節山國用虎節土國用人

節澤國用龍節皆以金為之道路用旌節門關用符節都鄙用管節皆以竹為之【此謂邦國之節也達之者使之四方亦皆齎法式以齊等之也諸侯使臣行覲聘則以金節授之以為行道之信也虎人龍者自其國象也道路謂鄉遂大夫也都鄙者公之子弟及卿大夫之采地之吏也凡邦國之民遠出至他邦他邦之民若來入由國門者門人為之節由關者關人為之節其以徵令及家徙鄉遂大夫及采地吏為之節皆使人執節將之以達之亦有期以反節管節如今之竹使符也其有商者通之以符節如門關門關者與市聯事節可同也亦所以異於畿內也凡節有天子法式存於國秋官】

右節

崇鼎貫鼎大璜封父龜天子之器也【崇貫封父皆國名文王伐崇古者伐國遷其重器以分同姓大璜夏后氏之璜春秋傳曰分魯公以夏后氏之璜】越棘大弓天子之戎器也【越國名也棘戟也春秋傳曰子都拔棘明堂位】禮有以下為貴者天子諸侯之尊廢禁大夫士楨禁【廢猶去也楨斯禁也謂之楨者無足有似於楨或因名云耳大夫用斯禁士用楨禁如今方按隋長局足高三寸禮器】

大夫側尊用楨士側尊用禁【楨斯禁也無足有似於楨是以言楨玉藻】梓人為飲器勺一升爵一升觚三升獻以爵而酬以觚一獻而三酬則一豆矣【勺尊升也觚豆字聲之誤觚當為觶豆當為斗】食一豆肉餘一豆酒中人之食也【一豆酒又聲之誤當為斗】凡試梓飲器鄉衡而實不盡梓師罪之【鄭司農云梓師罪也衡謂麋衡也曲禮執君器齊衡玄謂衡平也平爵鄉口酒不盡則梓人之長罪於梓人焉考工記】陶人為甗實二鬴厚半寸脣寸盆實二鬴厚半寸脣寸甗實二鬴厚半寸脣寸七穿【量六斗四升曰鬴鄭司農云甗無底甗】鬲實五穀厚半寸脣寸庾實二穀厚半寸脣寸【鄭司農云穀讀為斛穀受三斗聘禮記有斛玄謂豆實三而成穀則穀受斗二升庾讀如請益與之庾之庾同上】瓶人為簋實一穀崇尺厚半寸脣寸豆實三而成穀崇尺【崇高也豆實四升】凡陶甗之事髻墜薛暴不入市【為其不任用也鄭司農云髻讀刮薛讀為藥黃藥之藥暴讀為剝玄謂髻讀為跂墜頓傷也薛破裂也暴墜起不堅緻也】器中膊豆中縣【膊讀如車輶之輶既附泥而轉其均對膊其側以擬度端其器也縣縣繩正豆之柄】膊崇四尺方四寸【凡器高於此則桴不能相勝厚於此則火氣不交因取式焉同上】鼎絕大謂之鼐【最大者】鬲弇上謂之鬲【鼎斂上而小口】附耳外謂之鈇【鼎耳在表】款足者謂之鬲【鼎曲脚也】鼐謂之鬲【詩曰漑之釜鬲爾雅】

右雜器定公八年盜竊寶玉大弓寶者何璋判白【判半也半圭曰璋白藏天子青藏諸侯魯得郊天故錫之白不言璋言玉者起珪璧琮璜五玉盡亡之也傳獨言璋者所以郊事天尤重詩云奉璋峨峨髦士攸宜是也禮珪以朝璧以聘琮以發兵璜以發衆璋以徵召】弓繡質【

質枋也言大者力千斤】龜青純【純緣也謂緣甲頰也千歲之龜青□明于吉凶經不言龜者以先知從寶省文謂之寶者世世寶用之辭此皆魯始封之錫 春秋公羊傳】

巡守同律度量衡【律法制及尺丈斛斗斤兩皆均同 舜典】

謹權量審法度【權稱錘也量斗斛也法度禮樂制度皆是也 論語】 典瑞璧琮以起度【鄭司農云琮長也此璧徑長尺以起度量玉人職曰璧琮度尺以為度玄謂琮不圓之貌蓋廣徑八寸袤一尺

春官】玉人璧琮度尺好三寸以為度【鄭司農云琮徑也好璧孔也爾雅曰肉倍】

【好謂之璧好倍肉謂之琮肉好若一謂之環玄謂琮猶延其袤一尺而廣狹焉 考工記】 桌氏為量【量豆區鬴也】改煎金錫則不耗【消涑之精不復減也桌古文或作歷玄謂量當與鍾鼎同齊工異者大器】不耗然後權之【權謂稱分之也雖異法用金必齊】權之然後準之【準故書或作水杜子春云當為水金器有孔者水入孔中則當重也玄謂準擊平正之又當齊大小】準之然後量之【鑄之於法中也量讀如量人之量】量之以為鬴深尺內方尺而圓其外其實一鬴【以其容為之名也四升曰豆四豆曰區四區曰鬴鬴六斗四升也鬴十則鐘方尺積千寸於今粟米法少二升八十一分升之二十二其數必容鬴此言內方耳圓其外者為之脣】其脣一升其實一豆【故書脣作脣杜子春云當為脣謂覆之其底深一寸也】其耳三寸其實一升【耳在旁可舉也】重一鈞【重三十斤】其聲中黃鐘之宮【應律之首】槩而不稅【鄭司農云令百姓得以量而不租稅】其銘曰時文思索允臻其極【銘刻之也時是也允信也臻至也極中也言是文德之君思求可以為民立法者而作此量信至于道之中】嘉量既成以觀四國【以觀示四方使放象之】永啟厥後茲器維則【永長也厥其也茲此也又長啟道其子孫使法則此器長用之 考工記】 駟駟五寸宗后以為權【駟讀為組以組繫之因名焉鄭司農云以為稱錘以起量】駟駟七寸鼻寸有半寸天子以為權【鄭司農云以為權故有鼻也 玉人】 內宰凡建國佐后立市出其度量淳制【度丈尺也量豆區之屬故書淳為敦杜子春讀敦為純純謂幅廣也制謂匹長玄謂純制天子巡守禮所云制幣丈八尺純四 與 天官】 質人同其度量壹其淳制巡而考之犯禁者舉而罰之【杜子春云淳當為純純謂幅廣制謂匹長也皆當中度量 地官】

合方氏同其數器【權衡不得有輕重】壹其度量【尺丈釜鍾不得有大小 夏官】 大行人王之所以撫邦國諸侯者十有一歲同度量同數器【度丈尺也量豆區釜也數器銓衡也 秋官】 仲春日夜分則同度量鈞衡石角斗甬正權概【因晝夜等而平當平也同角正皆謂平之也丈尺曰度斗斛曰量三十斤曰鈞稱上曰衡百二十斤曰石甬今斛也稱錘曰權概平斗斛者】 仲秋日夜分則同度量平權衡正鈞石角斗甬【月令】 權與物均而生衡衡運生規規圓生矩方生繩繩直生準準正則平衡而鈞權矣是謂五則百工繇焉以定法式輔弼執玉以翼天子以陰陽言之冬權夏衡秋矩春規中央為繩五則揆物有輕重圓方平直陰陽之義四方四時之體五常五行之象厥法有品各順其方而應其行【前漢律歷志】

右度量權衡 明明我祖萬邦之君有典有則貽厥子孫關石和鈞王府則有【我祖禹也關通和平也百二十斤為石三十斤為鈞鈞與石五權之最重者也鈞石之設所以一天下之輕重而立民信者王府亦有之 五子之歌】 晏子曰齊舊四量豆區釜鍾四升為豆各自其四以登

於釜【四豆為區區斗六升四區為釜釜六斗四升登成也】釜十則鍾【六斛四斗】陳氏三量皆登一焉鍾乃大矣【登加也加一謂加舊量之一也以五升為豆五豆為區五區為釜則區二斗釜八斗鍾八斛】以家量貸而以公量收之【貸厚而收薄昭三年左氏傳又昭二十六年晏子對景公曰陳氏雖無大德而有施於民豆區釜鍾之數其取之公也薄其施之民也厚公厚斂焉陳氏厚施焉民歸之矣】

禮書綱目卷七十一

卷七十二

<經部,禮類,通禮之屬,禮書綱目

欽定四庫全書

禮書綱目卷七十二 婺源江永撰

刑辟 通禮二十五

補

象以典刑流宥五刑鞭作官刑扑作教刑金作贖刑眚災肆赦怙終賊刑欽哉欽哉惟刑之恤哉【象如天之垂象以示人而典者常也示人以常刑所謂墨劓剕官大辟五刑之正也所以待夫元惡大憝殺人傷人穿窬淫放凡罪之不可宥者也流宥五刑者流造之使遠去如下文流放竄殛之類也宥寬也所以待夫罪之稍輕雖入于五刑而情可矜法可疑與夫親貴勲勞而不可加以刑者則以此而寬之也鞭作官刑者本末垂革官府之刑也扑作教刑者夏楚二物學校之刑也皆以待夫罪之輕者金作贖刑者金黃金贖贖其罪也蓋罪之極輕雖入於鞭扑之刑而情法猶有可議者也此五句者從重入輕各有條理法之正也肆縱也眚災肆赦者眚謂過誤災謂不幸若人有如此而入於刑則又不待流宥金贖而直赦之也賊殺也怙終賊刑者怙謂有恃終謂再犯若人有如此而入於刑則雖當宥當贖亦不許其宥不聽其贖而必刑之也此三句者或由重而即輕或由輕而即重蓋用法之權衡所謂法外意也聖人立法制刑之本末此七言者大略盡之矣雖其輕重取舍陽舒陰慘之不同然欽哉欽哉惟刑之恤之意則未始不行乎其間也蓋其輕重毫釐之間各有攸當者乃天討不易之定理而欽恤之意行乎其間則可以見聖人好生之本心也據此經文則五刑有流宥而無金贖周禮秋官亦無其文至呂刑乃有五等之罰疑穆王始制之非法之正也蓋當刑而贖則失之輕疑赦而贖則失之重且使富者幸免貧者受刑又非所以為法也 舜典】 帝曰臯陶蠻夷猾夏寇賊姦宄汝作士五刑有服五服三就五流有宅五宅三居惟明克允【猾亂夏明而大也劫人曰寇殺人曰賊在外曰姦在內曰宄士理官也服服其罪也呂刑所謂上服下服是也三就孔氏以為大罪於原野大夫於朝士於市不知何據竊恐惟大辟棄之于市宮辟則下蠶室餘刑亦就屏處蓋非死刑不欲使風中其瘡誤而至死聖人之仁也五流五等象刑之當宥者也五宅三居者流雖有五而宅之但為三等之居如列爵惟五分土惟三也孔氏以為大罪居於四裔次則九州之外次則千里之外雖亦未見其所據然大槩當略近之 同上】

夏有亂政而作禹刑商有亂政而作湯刑周有亂政而作九刑【詳見下】 湯制官刑而儆于有位曰敢有恒舞于宮酣歌于室時謂巫風敢有徇于貨殖恒于遊畋時謂淫風敢有侮聖言逆忠直遠耆德比頑童時謂亂風惟茲三風十愆卿士有一于身家必喪邦君有一于身國必亡臣下不匡其刑墨具訓于蒙士【官刑官府之刑也巫風者常歌常舞若巫覡然也淫過也過而無度也比昵也倒置悖理曰亂好人之所惡惡人之所好也風風化也三風愆之綱也十

愆風之目也卿士諸侯十有一已喪其家亡其國矣墨墨刑也臣下而不能匡正其君則以墨刑加之具詳悉也童蒙始學之士則詳悉以是訓之欲其入官而知所以正諫也劉侍講曰墨即叔向所謂夏書昏墨賊殺皋陶之刑貪以敗官為墨伊訓】周公作誓命曰毀則為賊【誓要信也毀則壞法也】掩則為藏【掩匿也】竊賄為盜【賄財也】盜器為姦【器國用也】主藏之名【以掩賊為名】賴姦之用【用姦器也】為大凶德有常無赦【刑有常】在九刑不忘【誓命以下皆九刑之書九刑之書今亡文十八年左氏傳】

太宰掌建邦之六典五曰刑典以詰邦國以刑百官以糾萬民【天官】乃立秋官司寇使帥其屬而掌邦禁以佐王刑邦國【禁所以防姦者也刑正人之法孝經說曰刑者側也過出罪死】大司寇之職掌建邦之三典以佐王刑邦國詰四方【典法也詰謹也書曰王耄荒度作祥刑以詰四方】一曰刑新國用輕典【新國者新辟地立君之國用輕法者為其民未習于教】二曰刑平國用中典【平國平承守成之國也用中典者常行之法】三曰刑亂國用重典【亂國篡弑叛逆之國用重典者以其化惡伐滅之】以五刑糾萬民【刑亦法也糾猶察異之】一曰野刑上功糾力【功農功力勤力】二曰軍刑上命糾守【命將命也守不失部伍】三曰鄉刑上德糾孝【德六德也善事父母為孝】四曰官刑上能糾職【能其事也職職事修理】五曰國刑上愿糾暴【原慤慎也暴當為恭字之誤也】正月之吉始和布刑于邦國都鄙乃縣刑象之灋于象魏使萬民觀刑象挾日而歛之【正月朔日布五刑於天下正歲又縣其書重之秋官】小司寇正歲帥其屬而觀刑象令以木鐸曰不用灋者國有常刑令羣士【羣士遂士以下】乃宣布于四方憲刑禁【宣徧也憲表也謂縣之也刑禁士師之五禁同上】士師之職掌國之五禁之灋以左右刑罰一曰宮禁二曰官禁三曰國禁四曰野禁五曰軍禁皆以木鐸徇之于朝書而縣于門閭【左右助也助刑罰者助其禁民為非也宮王宮也官官府也國城中也古之禁書亡矣今宮門有簿籍官府有無故擅入城門有離載下帷野有田律軍有躡謹夜行之禁其物可言者】以五戒先後刑罰毋使罪麗于民一曰誓用之于軍旅二曰誥用之于會同三曰禁用諸田役四曰糾用諸國中五曰憲用諸都鄙【先後猶左右也誓誥于書則甘誓湯誓大誥康誥之屬禁則軍禮曰無干車無自後射比其類也糾憲未有聞焉】掌官中之政令【大司寇之官府中也】掌士之八成【鄭司農云八成者行事有八篇若今時法事比】一曰邦汙【鄭司農云汙讀如酌酒尊中之酌國汙者斟酌盜取國家密事若今時刺探尚書事】二曰邦賊【為逆亂者】三曰邦諜【為異國反間】四曰犯邦令【干冒王教令者】五曰撓邦令【稱詐以有為者】六曰為邦盜【竊取國之寶藏者】七曰為邦朋【朋黨相阿使政不平者故書朋作備鄭司農云朋讀如朋友之朋】八曰為邦誣【誣罔君臣使事失實】正歲帥其屬而憲禁令于國及郊野【去國百里為郊郊外謂之野同上】司刑掌五刑之灋以麗萬民之罪墨罪五百劓罪五百宮罪五百剕罪五百殺罪五百【墨黥也先刻其面以墨窒之劓截其鼻也今東西夷或以墨劓為俗古刑人亡逃者之世類與宮者丈夫則割其勢女子閉於宮中若今官男女也剕斷足也周改臚作剕殺死刑也書傳曰決關梁踰城郭而略盜者其刑臚男女不以義交者其刑宮觸易君命革輿服制度姦軌盜攘傷人者其刑劓非事而事之出入不以道義而誦不祥之辭者其刑墨降畔寇賊劫略奪攘撓虐者其刑死此二千五百罪之目略也其刑書則亡夏刑大辟工百臚辟三百宮辟五百劓墨各千周則變焉所謂刑罰世輕世重者也鄭司農云漢孝文帝十三年除肉刑同上】布憲掌憲邦之刑禁正月之吉執旌節以宣布于四方而憲邦之刑禁以詰四方邦國及其都鄙達於四海【憲表也謂縣之也刑禁者國之五禁所以左右刑罰者司寇正月布刑

於天下正歲又縣其書於象魏布憲於司寇布刑則以旌節出宣令之于司寇縣書則亦縣之于門閭及都鄙邦國刑者王政所重故屢丁寧焉詰謹也使四方詳行之爾雅曰九夷八蠻六戎五狄謂之四海】凡邦之大事合衆庶則以刑禁號令【同上】小宰之職掌建邦之官刑以治王宮之政令凡宮之糾禁【杜子春云宮皆當為官玄謂官刑在王宮中者之刑建明布告之糾猶割也察也若今御史中丞天官】大宰以八灋治官府七曰官刑以糾邦治【官刑司寇之職五刑其四曰官刑上能糾職】以八則治都鄙七曰刑賞以馭其威以八柄詔王馭羣臣六曰奪以馭其貧七曰廢以馭其罪八曰誅以馭其過【奪謂臣有大罪沒入家財者六極四曰貧廢猶放也舜殛鯀于羽山是也誅責讓也曲禮曰齒路馬有誅同上】大司徒以鄉八刑糾萬民一曰不孝之刑二曰不睦之刑三曰不婣之刑四曰不弟之刑五曰不任之刑六曰不恤之刑七曰造言之刑八曰亂民之刑【糾猶割察也不弟不敬師長造言訛言惑衆亂民亂名改作執左道以亂政也鄭司農云任謂朋友相任恤謂相憂地官】析言破律亂名改作執左道以亂政殺【析言破律巧賣法令者也亂名改作謂變易官與物之名更造法度左道若巫蠱及俗禁】作淫聲異服奇技奇器以疑衆殺【淫聲鄭衛之屬也異服若聚鷸冠瓊弁也奇技奇器若公輸般請以機窆】行偽而堅言偽而辯學非而博順非而澤以疑衆殺【皆謂虛華捷給無誠者也】假於鬼神時日卜筮以疑衆殺【今時持喪葬築蓋嫁取卜數文書使民倍禮違制】此四誅者不以聽【為其為害大而辭不可習王制】禁殺戮掌司斬殺戮者凡傷人見血而不以告者攘獄者遏訟者以告而誅之【司猶察也察此四者告於司寇罪之也斬殺戮謂吏民相斬相殺相戮者傷人見血見血乃為傷人耳鄭司農云攘獄者距當獄者也遏訟者遏止欲訟者也玄謂攘猶卻也卻獄者言不受也秋官】禁暴氏掌禁庶民之亂暴力正者撓誣犯禁者作言語而不信者以告而誅之【民之好為侵陵稱詐謾誕此三者亦刑所禁也力正以力彊得正也】凡奚隸聚而出入者則司牧之戮其犯禁者【奚隸女奴男奴也其聚出入有所使同上】掌戮掌斬殺賊諜而搏之【斬以欽鉞若今要斬也殺以刀刃若今棄市也諜謂姦賊反間者賊與諜罪大者斬之小者殺之搏當為搏諸城上之膊字之誤也膊謂去衣磔之】凡殺其親者焚之殺王之親者辜之【親總服以內也焚燒也易曰焚如死如棄如辜之言枯也謂磔之】凡殺人者踣諸市肆之三日刑盜于市【踣僵尸也肆猶申也陳也凡言刑盜罪惡莫大焉】凡罪之麗於灋者亦如之【罪二千五百條上附下附刑五而已於刑同科者其刑殺之一也】凡軍旅田役斬殺刑戮亦如之【戮謂膊焚辜肆】墨者使守門【黥者無妨於禁御】劓者使守關【截鼻亦無妨以貌醜遠之】宮者使守內【以其人道絕也今世或然】刖者使守圜【斷足驅衛禽獸無急行】髡者使守積【鄭司農云髡當為完謂但居作三年不虧體者也玄謂此出五刑之中而髡者必王之同族不宮者宮之為翦其類髡頭而已守積積在隱者宜也同上】掌囚掌守盜賊凡囚者上罪梏桎而桎中罪桎梏下罪梏王之同族桎有爵者桎以待弊罪【凡囚者謂非盜賊自以他罪拘者也鄭司農云桎者兩手共一木也桎梏者兩手各一木也玄謂在手曰梏在足曰桎中罪不桎手足各一木耳下罪又去桎王同族及命士以上雖有上罪或桎或梏而已弊猶斷也同上】凡盜賊軍鄉邑及家人殺之無罪【鄭司農云謂盜賊羣輩若軍共攻盜鄉邑及家人者殺之無罪若今時無故入人室宅廬舍上人車船牽引人欲犯法者其時格殺之無罪秋官朝士】調人凡過而殺傷人者以民成之【過無本意也成平也鄭司農云以鄉里之民共解和之春秋傳曰惠伯成之】鳥獸亦如之【過尖殺傷人之畜產者】凡有鬪怒者成之不可成者則書之先動者誅之【鬪怒辨訟者也不可成不可平也地官】司市以刑罰禁讎而去盜【刑罰憲徇

扑】市刑小刑憲罰中刑徇罰大刑扑罰【徇舉以示其地之衆也扑撻也鄭司農云憲罰播其肆也同上】司稽掌執市之盜賊以徇且刑之【同上】

胥凡有罪者撻戮而罰之【罰之使出布同上】司厲掌盜賊之任器貨賄辨其物皆有數量賈而楬之入于司兵【鄭司農云任器貨賄謂盜賊所用傷人兵器及所盜財物貨賄也入于司兵若今時傷殺人所用兵器賊盜贓加責沒入縣官】其奴男子入于罪隸女子入於舂槁

【鄭司農云謂坐為盜賊而為奴者輸于罪隸舂人槁人之官也由是觀之今之為奴婢古之罪人也故書曰予則奴戮汝論語曰箕子為之奴罪隸之奴也故春秋傳曰裴豹隸也著於丹書請焚丹書我殺督戎恥為奴欲焚其籍也玄謂奴從坐而沒入縣官者男女同名】凡有爵者與七十者與未亂者皆不為奴【有爵謂命士以上也亂毀齒也男八歲女七歲而毀齒

秋官】司隸掌五隸之灋辨其物而掌其政令【五隸謂罪隸四翟之隸也物衣服兵器之屬】帥其民而搏盜賊役國中之辱事為百官積任器凡囚執人之事【民五隸之民也鄭司農云百官所當任持之器物此官主為積聚之也玄謂任猶用也】邦有祭祀賓客喪紀之事則役其煩辱之事【煩猶劇也士喪禮下篇曰隸人湣廁同上】

罪隸掌役百官府與凡有守者掌使令之小事【役給其小役同上】大司寇以圜土聚教罷民【圜土獄城也聚罷民其中困苦以教之為善也民不愍作勞有似於罷】凡害人者寘之圜土而施職事焉以明刑恥之【害人謂為邪惡已有過失麗于法者以其不故犯法寘之圜土繫教之庶其困悔而能改也寘置也施職事以所能役使之明刑書其罪惡於大方版著其背】其能改者反于中國不齒三年【反于中國謂舍之還於故鄉里也司圜職曰上罪三年而舍中罪二年而舍下罪一年而舍不齒者不得以年次列於平民】其不能改而出圜土者殺【出謂逃亡】以嘉石平罷民【嘉石文石也樹之外朝門左平成也成之使善】凡萬民之有罪過而未麗于法而害於州里者桎梏而坐諸嘉石役諸司空重罪旬有三日坐舂役其次九日坐九月役其次七日坐七月役其次五日坐五月役其下罪三日坐三月役使州里任之則宥而舍之【有罪過謂邪惡之人所罪過者也麗附也未附於法未著於法也木在足曰桎在手曰梏役諸司空坐日訖使給百工之役也役月訖使其州里之人任之乃赦之宥寬也同上】司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不齒【弗使冠飾也著墨幘若古之象刑與舍釋之也鄭司農云罷民謂惡人不從化為百姓所患苦而未入五刑者也故曰凡害人者不使冠飾任之以事也若今時罰作罪矣】凡圜土之刑人也不虧體其罰人也不虧財【言其刑人但加以明刑罰人但任之以事耳鄭司農云以此知其為民所苦而未入刑者也故大司寇職曰凡萬民之有罪過而未麗于法而害於州里者桎梏而坐諸嘉石役諸司空又曰以嘉石平罷民國語曰罷士無伍罷女無家言為惡無所容入也玄謂圜土所收教者過失害人已麗于法者同上】司救凡民之有衰惡者三讓而罰三罰而士加明刑恥諸嘉石役諸司空【罰謂撻擊之也加明刑者去其冠飾而書其衰惡之狀著之背也嘉石朝士所掌在外朝之門左使坐焉以恥辱之既而役諸司空使事官作之也坐役之數存于司寇】其有過失者三讓而罰三罰而歸于圜土【圜土獄城也過失近罪晝日任之以事而收之夜藏於獄亦加明刑以恥之不使坐嘉石其罪已著未忍刑之地官】

職金掌受士之金罰貨罰入于司兵【給治兵及工直也貨泉貝也罰罰贖也書曰金作贖刑秋官】

右刑制 皋陶曰天討有罪五刑五用哉【皋陶謨】惟呂命王享國百年耄荒度作刑以詰四方【惟呂命與惟說命語意同先此以見訓刑為呂刑之言也耄老而昏亂之稱荒忽也穆王享國百年車轍馬跡徧于天下故史氏以耄荒二字發之亦以見贖刑為穆王耄荒所訓耳】王曰若古有訓蚩尤惟始作亂延及于平民罔不寇賊鴟義姦宄奪攘矯虔【言鴻荒之世渾厚敦龐蚩尤始開暴亂之端驅扇熏炙延及平民無不為寇為賊鴟義者以鴟張跋扈為義矯虔者矯詐虔劉也】苗民弗用靈制以刑惟作五虐之刑曰法殺戮無辜爰始淫為劓刵劓黥越茲麗刑並制罔差有辭【苗民承蚩尤之暴不用善而制以刑惟作五虐之刑名之曰法以殺戮無罪於是始過為劓鼻刵耳劓黥黥面之法於麗法者必刑之并制無罪不復以曲直之辭為差別皆刑之也】民興胥漸泯泯磼磼罔中于信以覆詛盟虐威庶戮方告無辜于上帝上帝監民罔有馨香德刑發聞惟腥【泯泯昏也磼磼亂也民相漸染為昏為亂無復誠信相與反覆詛盟而已虐政作威衆被戮者方各出無罪于天天視苗民無有馨香德而刑戮發聞莫非腥穢】皇帝哀矜庶戮之不辜報虐以威遏絕苗民無世在下【皇帝舜也以書考之治苗民命伯夷禹稷皋陶皆舜之事報苗之虐以我之威絕滅也謂竄與分北之類遏絕之使無繼世在下國】乃命重黎絕地天通罔有降格羣后之逮在下明明棐常鰥寡無蓋【重少昊之後黎高陽之後重即義黎即和也呂氏曰治世公道昭明為善得福為惡得禍民曉然知其所由則不求之眇茫冥昧之間當三苗昏虐民之得罪者莫知其端無所控訴相與聽於神祭非其鬼天地人神之典雜揉瀆亂此妖誕之所以興人心之所以不正也在舜當務之急奠先于正人心首命重黎修明祀典天子然後祭天地諸侯然後祭山川高卑上下各有分限絕地天之通嚴幽明之分焄蒿妖誕之說舉皆屏息羣后及在下之羣臣皆精白一心輔助常道民卒善而得福惡而得禍雖鰥寡之微亦無有蓋蔽而不得自伸者也按國語曰少皞氏之衰九黎亂德民神雜揉家為巫史民瀆齊盟禍災荐臻顓頊受之乃命南正重司天以屬神北正黎司地以屬民使無相侵瀆其後三苗復九黎之德堯復育重黎之後不忘舊者使復典之】皇帝清問下民鰥寡有辭于苗德威惟畏德明惟明【清問虛心而問也有辭聲苗之過也苗以虐為威以察為明帝反其道以德威而天下無不畏以德明而天下無不明也】乃命三后恤功于民伯夷降典折民為刑禹平水土主名山川稷降播種農殖嘉穀三后成功惟殷于民【恤功致憂民之功也典禮也伯夷降天地人之三禮以折民之邪妄蘇氏曰失禮則入刑禮刑一物也伯夷降典以正民心禹平水土以定民居稷降播種以厚民生三后成功而致民之殷盛富庶也吳氏曰二典不載有兩刑官蓋傳聞之謬也愚按皋陶未為刑官之時豈伯夷實兼之歟下文又言伯夷播刑之迪不應如此謬誤】士制百姓于刑之中以教祗德【命皋陶為士制百姓于刑辟之中所以檢其心而教以祗德也吳氏曰皋陶不與三后之列遂使後世以刑官為輕後漢楊賜拜廷尉自以代非法家言曰三后成功惟殷于民皋陶不與蓋吝之也是後世非獨人臣以刑官為輕人君亦以為輕矣觀舜之稱皋陶曰刑期于無刑民協于中時乃功又曰俾予從欲以治四方風動惟乃之休其所繫乃如此是可輕哉呂氏曰呂刑一篇以刑為主故歷叙本末而歸之于皋陶之刑勢不得與伯夷禹稷雜稱言固有賓主也】穆穆在上明明在下灼于四方罔不惟德之勤故乃明于刑之中率乂于民棐彝【穆穆者和敬之容也明明者精白之容也灼于四方者穆穆明明輝光發越而四達也君臣之德昭明如是故民皆觀感動盪為善而不能自己也如是而猶有未化者故士師明于刑之中使無過不及之差率乂于民輔其常性所謂刑罰之精華也】典獄非訖于威惟訖于富敬忌罔有擇言在身惟克天德自作元命配享在下【訖盡也威權勢也富賄賂也當時典獄之官非惟得盡法于權勢之

家亦惟得盡法于賄賂之人言不為威屈不為利誘也敬忌之至無有擇言在身大公至正純乎天德無毫髮不可舉以示人者天德在我則大命自我作而配享在下矣在下者對天之辭蓋推典獄用刑之極功而至於與天為一者如此 呂刑】

商王受罪人以族焚炙忠良剝剔孕婦【泰誓】

紂為炮烙之刑醢九侯脯鄂侯周西伯獻洛西之地以請除炮烙之刑紂許之【史記】

文王治岐罪人不孥【孟子】 臧文仲言於僖公曰刑五而已無有隱者隱巧諱也【隱謂鳩也】

大刑用甲兵【賈侍中云謂諸侯不式王命以六師移之昭謂甲兵謂臣有大逆則被甲聚兵而誅之若今隊軍也】其次用斧鉞【斧鉞軍戮也書曰後至者斬】中刑用刀鋸【割剗用刀斷截用鋸亦有大辟故周語曰兵在其頸】其次用鑕笞【鑕贖刑也笞黥刑也】薄刑用鞭扑以威民也【鞭官刑也扑教刑也】故大者陳之原野【謂甲兵斧鉞也】小者致之市朝【刀鋸以下也其死刑大夫以上尸諸朝士以下尸諸市】五刑三次是無隱也【五刑甲兵斧鉞刀鋸鑕鑿鞭扑也次處也三處朝野市也】婦人無刑【無黥刑之刑】雖有刑不在市朝【謂犯死刑者猶不暴尸 國語魯語】 鄭人鑄刑書【鑄刑書於鼎以為國之常法】

叔向使詔子產書曰【詒遺也】始吾有虞於子【虞度也言準度子產以為己法】今則已矣【已止也】昔先王議事以制不為刑辟懼民之有爭心也猶不可禁禦是故閑之以義

【閑防也】糾之以政【糾舉也】行之以禮守之以信奉之以仁【秦養也】制為祿位以勸其從【勸從教】嚴斷刑罰以威其淫【淫放也】懼其未也故誨之以忠聳之以行【聳懼也】教之以務【時所急】使之以和臨之以敬泄之以彊【施之於事為泄】斷之以剛

【義斷恩】猶求聖哲之上明察之官【上公王也官卿大夫也】忠信之長慈惠之師民於是乎可任使也而不生禍亂民知有辟則不忌於上【權移於法故民不畏上】竝有爭心以徵于書而徵幸以成之【因危文以生爭緣微幸以成其巧偽】弗可為矣【為治也】夏有亂政而作禹刑商有亂政而作湯刑【夏商之亂著禹湯之法言不能議事以制】周有亂政而作九刑【周之衰亦為刑書謂之九刑】三辟之興皆叔世也【言刑書不起於始盛之世】

今吾子相鄭國作封洫【在襄三十年】立謗政【作丘賦在四年】制參辟鑄刑書【制參辟謂用三代之末法】將以靖民不亦難乎詩曰儀式型文王之德日靖四方又曰儀型文王萬邦作孚如是何辟之有【言詩唯以德與信不以刑也】民知爭端矣將棄禮而徵於書

【以刑書為徵】錐刀之末將盡爭之【錐刀末喻小事】亂獄滋豐賄賂並行終子之世鄭其敗乎肸聞之國將亡必多制【數改法】其此之謂乎復書曰若吾子之言【復報也】僑不才不能及子孫吾以救世也既不承命敢忘大惠【以見箴戒為惠昭六年左氏傳】子產有疾謂子大叔曰我死子必為政唯有德者能以寬服民其次莫如猛夫火烈民望而畏之故鮮死焉水懦弱民狎而翫之【狎輕也】則多死焉故寬難【難以治】疾數月而卒大叔為政不忍猛而寬鄭國多盜取人於萑符之澤【萑符澤名於澤中劫人】大叔悔之曰吾早從夫子不及此興徒兵以攻萑符之盜盡殺之盜少止仲尼曰善哉政寬則民慢慢則糾之以猛

【糾猶攝也】猛則民殘殘則施之以寬寬以濟猛猛以濟寬政是以和詩曰民亦勞止汙可小康惠此中國以綏四方施之以寬也【詩大雅汙其也康綏皆安也周厲王暴虐民勞於苛政故詩人刺之欲其施之以寬】母從詭隨【詭人隨人無正心不可從】以謹無良【謹勅慎也】式遏寇虐慘不畏明糾之以猛也【式用也遏止也憎曾也言為寇虐曾不畏明法者亦當用猛政糾治之】柔遠能邇以定我王平之以和也【柔安也邇近也遠者懷附近者各

以能進則王室定】又曰不競不綌不剛不柔【詩殷頌言湯政得中和競彊也綌急也】布

政優優百禄是適【優優和也適聚也】和之至也及子產卒仲尼聞之出涕曰古之遺愛也【子產之愛有古人之遺風 昭二十一年左氏傳】鄭駟黻嗣子大叔為政殺鄭析而用其竹刑【黻駟乞子子然也鄭析鄭大夫欲改鄭所鑄舊制不受君命而私造刑法書之于竹簡故言竹刑 定九年左氏傳】晉趙鞅荀寅帥師城汝濱遂賦晉國一鼓鐵以鑄刑鼎【令晉國各出功力共鼓石為鐵計令一鼓而足因軍役而為之故言遂】著范宣子所為刑書焉仲尼曰晉其亡乎失其度矣夫晉國將守唐叔之所受法度以經緯其民卿大夫以序守之【序位次也】民是以能尊其貴貴是以能守其業貴賤不愆所謂度也文公是以作執秩之官為被廬之法【僖二十七年文公蒐被廬修唐叔之法】以為盟主今棄是度也而為刑鼎民在鼎矣何以尊貴【棄禮徵書故不尊貴】貴何業之守【民不奉上則上失業】貴賤無序何以為國且夫宣子之刑夷之蒐也晉國之亂制也【范宣子所用刑乃夷蒐之法也夷蒐在文六年一蒐而三易中軍帥賈季箕鄭之徒遂作亂故曰亂制】若之何以為法蔡史墨曰范氏中行氏其亡乎【蔡史墨即蔡墨】中行寅為下卿而干上令擅作刑器以為國法是法姦也又加范氏焉易之亡也【范宣子刑書中既廢矣今復興之是成其咎】其及趙氏趙孟與焉然不得已若德可以免【鑄刑鼎本非趙鞅意不得已而從之若能修德可以免禍為定十三年荀寅士吉射入朝歌以叛 昭二十九年左氏傳】楚無宇曰周文王之法曰有亡荒閱【荒大也閱蒐也有亡人當大蒐其衆】所以得天下也吾先君文王【楚文王】作僕區之法【僕區刑書名】曰盜所隱器【隱盜所得器】與盜同罪所以封汝也【行善法故能欲彊北至汝水 昭七左氏傳】冉有問於孔子曰古者三皇五帝不用五刑信乎孔子曰聖人之設防貴其不犯也制五刑而不用所以為至治也凡民之所以為姦邪竊盜靡法妄行者生於不足不足生於無度無度則小者偷惰大者侈靡各不知節是以上有制度則民知所止民知所止則不犯故雖有奸邪賊盜靡法妄行之獄而無陷刑之民不孝者生於不仁不仁者生於喪祭之禮也明喪祭之禮所以教仁愛也能致仁愛則服喪思慕祭祀不懈人子饋養之道【言孝子奉祭祀不敢懈與生時饋養之道同之也】喪祭之禮明則民孝矣故雖有不孝之獄而無陷刑之民殺上者生於不義義所以別貴賤明尊卑也貴賤有別尊卑有序則民莫不尊上而敬長朝聘之禮者所以明義也義必明則民不犯故雖有殺上之獄而無陷刑之民鬪變者生於相陵相陵者生於長幼無序而遺敬讓【遺忘也】鄉飲酒之禮者所以明長幼之序而崇敬讓也長幼必序民懷敬讓故雖有鬪變之獄而無陷刑之民淫亂者生於男女無別男女無別則夫婦失義婚禮聘享者所以別男女明夫婦之義也男女既別夫婦既明故雖有淫亂之獄而無陷刑之民此五者刑獄之所從生各有源焉不豫塞其源而輒繩之以刑是謂為民設筭而陷之也刑罰之源生於嗜慾不節夫禮度者所以禦民之嗜慾而明好惡順天道禮度既陳五教畢修而民猶或未化尚必明其法典以申固之【尚猶也申令固其教也】其犯姦邪靡法妄行之獄者則飭制量之度有犯不孝之獄者則飭喪祭之禮有犯殺上之獄者則飭朝覲之禮有犯鬪變之獄者則飭鄉飲酒之禮有犯淫亂之獄者則飭婚禮聘之禮三皇五帝之所以化民者如此雖有五刑不用不亦可乎【家語】子曰道之以政齊之以刑民免而無恥【道猶引導謂先之也政謂法制禁令也齊所以一之也道之而不從者有刑以一之也免而無恥謂苟免刑罰而無所羞愧蓋雖不敢為惡而為惡之心未嘗忘也】道之以德齊之以禮有恥且格【禮謂制度品節也格至也言躬行以率之則民固有所觀感而興起矣而其淺深厚薄之不一者又有禮以一之則民恥於不善而又有以至於善也一說格至也書曰格其非心 愚謂政者為治之具刑者輔治之法德禮則所以出治之本而德又禮之本也此其相為終始雖不

可以偏廢然政刑能使民遠罪而已德禮之效則有以使民日遷善而不自知故治民者不可徒恃其末又當深探其本也【論語】仲弓問於孔子曰雍聞至刑無所用政至政無所用刑至刑無所用政桀紂之世是也至政無所用刑成康之世是也信乎孔子曰聖人之治化也必政刑相參焉太上以德化民而以禮齊之其次以政言導民以刑禁之刑不刑也化之弗變導之弗從傷義以敗俗於是乎用刑矣【家語】仲弓問古之刑教與今之刑教孔子曰古之刑省今之刑繁其為教古有禮然後有刑是以刑省今無禮以教而齊之以刑刑是以繁書曰伯夷降典折民惟刑【書呂刑之文言堯命伯夷下禮典以教民而斷折以法】謂下禮以教之然後維以刑折之也夫無禮則民無恥而正之以刑故民苟免【孔叢子】孔子適衛衛將軍文子問曰【文子衛卿名彌牟】吾聞魯公父氏【公父氏魯大夫季氏】不能聽獄信乎孔子答曰不知其不能也夫公父氏之聽獄有罪者懼無罪者恥文子曰有罪者懼是聽之察刑之當也無罪者恥何乎孔子曰齊之以禮則民恥矣刑以止刑則民懼矣文子曰今齊之以刑刑猶弗勝何禮之齊孔子曰以禮齊民譬之於御則轡也以刑齊民譬之於御則鞭也執轡於此而動於彼御之良也無轡而用策則馬失道矣【捨轡而用策則馬失道去禮而任刑則民忘生】文子曰以御言之左手執轡右手運策不亦速乎若徒轡無策馬何懼哉孔子曰吾聞古之善御者執轡如組兩驂如舞非策之助也是以先王盛於禮而薄於刑故民從命今也廢禮而尚刑故民彌暴文子曰吳越之俗無禮而亦治何也孔子曰夫吳越之俗男女無別同川而浴民輕相犯故其刑重而不勝由無禮也中國之教為外內以別男女異器服以殊等類故其民篤而法其刑輕而勝由有禮也【同上】孔子曰大罪有五而殺人為下逆天地者罪及五世誣文武者罪及四世逆人倫者罪及三世誣鬼神者罪及二世殺人者罪止其身故曰大罪有五而殺人為下矣【家語】孔子曰五刑之屬三千而罪莫大於大孝要君者無上非聖人者無法非孝者無親此大亂之道也【孝經】傳曰罪多而刑五喪多而服五上附下附列也【列等比也服商】

小宰以官府之八成經邦治一曰聽政役以比居二曰聽師田以簡稽三曰聽閭里以版圖四曰聽稱責以傳別五曰聽祿位以禮命六曰聽取予以書契七曰聽賣買以質劑八曰聽出入以要會【鄭司農云政謂軍政也役謂發兵起徒役也比居謂伍籍也比地為伍因內政寄軍令以伍籍發軍起役者平而無遺脫也簡稽士卒兵器簿書簡猶閱也稽猶計也合也合計其士之卒伍閱其兵器為之要簿也故遂人職曰稽其人民簡其兵器國語曰黃池之會吳陳其兵皆官師擁鐸拱稽版戶籍圖地圖也聽人訟地者以版圖決之司書職曰邦中之版土地之圖稱責謂貸予傳別謂券書也聽訟責者以券書決之傳傳著約束於文書別別為兩兩家各得一也禮命禮九賜也書契符書也質劑謂市中平賈今時月平是也要會謂計最之簿書月計曰要歲計曰會故宰夫職曰歲終則令羣吏正歲會月終則令正月要傳別故書作傳辨鄭大夫讀為符別杜子春讀為傳別玄謂政謂賦也凡其字或作政或作正或作征以多言之宜從征如孟子交征利云傳別謂為大手書於一札中字別之書契謂出予受入之凡要凡簿書之最目獄訟之要辭皆曰契春秋傳曰王叔氏不能舉其契質劑謂兩書一札同而別之長曰質短曰劑傳別質劑皆今之券書也事異異其名耳禮命禮之九命之差等天官】小司徒凡民訟以地比正之【鄭司農云以田畔所與比正斷其訟】地訟以圖正之【地訟爭疆界者圖謂邦國本圖地官】

大史凡辨灋者考焉不信者刑之【謂邦國官府都鄙以法爭訟來正之者春官】大司寇以

兩造禁民訟入束矢於朝然後聽之【訟謂以財貨相告者造至也使訟者兩至既兩至使入束矢乃治之也不至不入束矢則是自服不直者也必入矢者取其直也詩曰其直如矢古者入弓百矢束矢其百个與】以兩劑禁民獄入鈞金三日乃致於朝然後聽之【獄謂相告以罪名者劑今券書也使獄者各齎券書既兩券書使入鈞金又三日乃治之重刑也不券書不入金則是亦自服不直者也必入金者取其堅也三十斤曰鈞】凡諸侯之獄訟以邦典定之【邦典六典也以六典待邦國之治】凡卿大夫之獄訟以邦灋斷之【邦法八法也以八法待官府之治】凡庶民之獄訟以邦成弊之【邦成八成也以官成待萬民之治故書弊為愆鄭司農云愆當為弊邦成謂若今時決事比也弊之斷其獄訟也故春秋傳曰弊獄邢侯】小司寇以五刑聽萬民之獄訟附於刑用情訊之至

於旬乃弊之讀書則用灋【附猶著也故書附作付訊言也用情理言之冀有可以出之者十日乃斷之王制曰刑者侖也侖者成也一成而不可變故君子盡心焉鄭司農云讀書則用灋如今時讀鞫已乃論之】以五聲聽獄訟求民情一曰辭聽【觀其出言不直則煩】二曰色聽【觀其顏色不直則赧然】三曰氣聽【觀其氣息不直則喘】四曰耳聽【觀其聽聆不直則惑】五曰目聽【觀其眸子視不直則眊然】以三刺斷庶民獄訟之中【中謂罪正所定】一曰訊羣臣二曰訊羣吏三曰訊萬民【刺殺也三訊罪定則殺之訊言也】聽民之所刺宥以施上服下服之刑【宥寬也民言殺殺之言寬寬之上服劓墨也下服宮剕也】歲終則令羣士計獄弊訟登中於天府【上其所斷獄訟之數】乃命其屬入會乃致事【得其屬之計乃令致之於王】士師察獄訟之辭以詔司寇斷獄弊訟致邦令【詔司寇若今日聽正法解也致邦令者以法報之】凡以財獄訟者正之以傳別約劑【傳別中別手書也約劑各所持券也故書別為辨鄭司農云傳或為符辨讀為風別之別若今時市買為券書以別之各得其一故訟則案券以正之】歲終則令正要會【定計簿】鄉士掌國中【鄭司農云謂國中至百里郊也玄謂其地則距王城百里內也言掌國中此主國中獄也六鄉之獄在國中】各掌其鄉之民數而糾戒之【鄉士八人言各者四人而分主三鄉】聽其獄訟察其辭【察審也】辨其獄訟異其死刑之罪而要之旬而職聽於朝【辨異謂殊其文書也要之為其罪法之要辭如今効矣十日乃以職事治之於外朝容其自反覆】司寇聽之斷其獄弊其訟於朝羣士司刑皆在各麗其灋以議獄訟【麗附也各附致其法以成議也】獄訟成士師受中協日刑殺肆之三日【受中謂受獄訟之成也鄭司農云士師受中若今二千石受其獄也中者刑罰之中也故論語曰刑罰不中則民無所措手足協日刑殺協合也和也和合支幹善日若今時望後利日也肆之三日故春秋傳曰三日棄疾請尸論語曰肆諸市朝玄謂士師既受獄訟之成鄉士則擇可刑殺之日至其時而往泄之尸之三日乃反也】若欲免之則王會其期【免猶赦也期謂鄉士職聽於朝司寇聽之日王欲赦之則用此時親往議之】遂士掌四郊【鄭司農云謂百里外至三百里也玄謂其地則距王城百里以外至二百里言掌四郊者此主四郊獄也六遂之獄在四郊】各掌其遂之民數而糾其戒令【遂士十二人言各者二人而分主一遂】聽其獄訟察其辭辨其獄訟異其死刑之罪而要之二旬而職聽於朝司寇聽之斷其獄弊其訟於朝羣士司刑皆在各麗其灋以議獄訟獄訟成士師受中協日就郊而刑殺各於其遂肆之三日【就郊而刑殺者遂士也遂士擇刑殺日至其時往泄之如鄉士為之矣言各於其遂者四郊六遂遂處不同】若欲免之則王令三公會其期【令猶命也王欲赦之則用遂士職聽之時命三公往議之】縣士掌野【鄭司農云掌三百里至四百里大夫

所食晉韓須為公族大夫食縣玄謂地距王城二百里以外至三百里曰野三百里以外至四百里曰縣四百里以外至五百里曰都都縣野之地其邑非王子弟公卿大夫之采地則皆公邑也謂之縣縣士掌其獄焉言掌野者郊外曰野大總言之也獄居近野之縣獄在二百里上縣之縣獄在三百里上都之縣獄在四百里上】各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽於朝司寇聽之斷其獄弊其訟於朝羣士司刑皆在各麗其法以議獄訟獄訟成士師受中協日刑殺各就其縣肆之三日【刑殺各就其縣者亦謂縣士也】若欲免之則王命六卿會其期【期亦謂縣士職聽之時】方士掌都家【鄭司農云掌四百里至五百里公所食魯季氏食於都玄謂都王子弟及公卿之采地家大夫之采地大都在疆地小都在縣地家邑在稍地不言掌其民數民不純屬王】聽其獄訟之辭辨其死刑之罪而要之三月而上獄訟於國【三月乃上要者又變朝言國以其自有君異之】司寇聽其成於朝羣士司刑皆在各麗其灋以議獄訟【成平也鄭司農說以春秋傳曰晉邢侯與雍子爭鄙田久而無成】獄訟成士師受中書其刑殺之成與其聽獄訟者【都家之吏自協日刑殺但書其成與治獄之吏姓名備反覆有失實者】凡都家之士所上治則主之【都家之士都士家士也所上治者謂獄訟之小事不附罪者也主之告于司寇聽平之】訝士掌四方之獄訟【鄭司農云四方諸侯之獄訟】諭罪刑於邦國【告曉以麗罪及制刑之本意】凡四方之有治於士者造焉【謂讞疑辨事先來詣乃通之於士也士主謂士師也如今郡國亦時遣主者吏詣廷尉議者】四方有亂獄則往而成之【亂獄謂若君臣宣淫上下相虐者也往而成之猶呂步舒使治淮南獄】朝士凡士之治有期日國中一旬郊二旬野三旬都三月邦國朞期內之治聽期外不聽凡有責者有判書以治則聽【判半分而合者鄭司農云謂別券也玄謂古者出責之息亦如其國服與】凡屬責者以其地傳而聽其辭【鄭司農云謂訟地畔界者田地町畔相比屬故謂之屬責以地傳而聽其辭以其比畔為證也玄謂屬責轉責使人歸之而本主死亡歸受之數相抵冒者也以其地之人相比近能為證者來乃受其辭為治之】司刑若司寇斷獄弊訟則以五刑之灋詔刑罰而以辨罪之輕重【詔刑罰者處其所應不如今律家所署法矣竝秋官】大司徒凡萬民之不服教而有獄訟者與有地治者聽而斷之其附於刑者歸於士【不服教不厭服於十二教貪冒者也爭罪曰獄爭財曰訟有地治者謂鄉州及治都鄙者也士司寇士師之屬鄭司農云與有地治者聽而斷之與其地部界所屬吏共聽斷之士謂主斷刑之官春秋傳曰士榮為大士或謂歸於圜土圜土謂獄也獄城圜】媒氏凡男女之陰訟聽之於勝國之社其附於刑者歸之於士【陰訟爭中冓之事以觸法者勝國亡國也亡國之社奄其上而棧其下使無所通就之以聽陰訟明不當宣露其罪不在赦宥者直歸士而刑之不復以聽士司寇之屬也詩云牆有茨不可埽也中冓之言不可道也所可道也言之醜也】司市上旌于思次以令市市師蒞焉而聽大治大訟胥師賈師蒞于介次而聽小治小訟【思次若今市亭也市師司市也介次市亭之屬別小者也鄭司農云思辭也次市中候樓也玄謂思當為司聲之誤也】其附於刑者歸於士質人凡治質劑者國中一旬郊二旬野三旬都三月邦國朞期內聽期外不聽【謂齎券契者來訟也以期內來則治之後期則不治所以絕民之好訟且息文書也郊遠郊也野甸稍也都大都小都並地官】掌囚及刑殺告刑於王奉而適朝士加明梏以適市而刑殺之【告刑於王告王以今日當行刑及所刑姓名也其死罪則曰某之罪在大辟其刑罪則曰某之罪在小辟奉而適朝者重刑為王欲有所赦且當以付士士鄉士也鄉士加明梏者謂書其姓名及其罪於梏而著之也囚時雖有無梏者至於刑殺皆設之以適市就衆也庶姓無爵者皆刑殺於市秋官】

司寇正刑明辟以聽獄訟【司寇秋官卿掌刑者辟罪也】必三刺【以求民情斷其獄訟之中一曰訊羣臣二曰訊羣吏三曰訊萬民】有旨無簡不聽【簡誠也有其意無其誠者不論以為罪】附從輕【附施刑也求出之使從輕】赦從重【雖有罪可重猶赦之】凡制五刑必即天論【制斷也即就也必即天論言與天意合閔子曰古之道不即人心即或為則論或為倫】郵罰麗於事【郵過也麗附也過人罰人當各附於其事不可假他以喜怒】凡聽五刑之訟必原父子之親立君臣之義以權之【權平也】意論輕重之序慎測淺深之量以別之【意思念也淺深謂俱有罪本心有善惡】悉其聰明致其忠愛以盡之【盡其情】疑獄汜與衆共之衆疑赦之必察小大之比以成之【小大猶輕重已行故事曰比】成獄辭史以獄成告於正正聽之【史司寇吏也正於周鄉師之屬入漢有正平丞秦所置】正以獄成告於大司寇大司寇聽之棘木之下【周禮鄉師之屬辨其獄訟異其死刑之罪而要之職聽於朝司寇聽之朝王之外朝也左九棘孤卿大夫位焉右九棘公侯伯子男位焉面三槐三公位焉】大司寇以獄之成告於王王命三公參聽之【王使三公復與司寇及正共平之重刑也周禮王欲免之乃命公會其期】三公以獄之成告於王王三又然後制刑【又當作宥寬也一宥曰不識再宥曰過失三宥曰遺忘王制】

右聽斷 舜流共工於幽州放驩兜於崇山竄三苗於三危殛鯀於羽山四罪而天下咸服【流遣之遠去如水之流也放置之於此不得他適也竄則驅逐禁錮之殛則拘囚困苦之隨其罪之輕重而異法也共工驩兜鯀事見上篇三苗國名在江南荆揚之間恃險為亂者也幽州北裔之地水中可居曰洲崇山南裔之山在今澧洲三危兩裔之地即雍之所謂三危既宅者羽山東裔之山即徐之蒙羽其藝者服者天下皆服其用刑之當罪也程子曰舜之誅四凶怒在四凶舜何與焉蓋因是人有可怒之事而怒之聖人之心本無怒也聖人以天下之怒為怒故天下咸服之春秋傳所記四凶之名與此不同說者以窮奇為共工渾敦為驩兜饕餮為三苗檮杌為鯀不知其果然否也 舜典】昔帝鴻氏有不才子【帝鴻黃帝】掩義隱賊好行凶德醜類惡物頑嚚不友是與比周【醜亦惡也比近也周密也】天下之民謂之渾敦【謂驩兜渾敦不開通之貌】少皞氏有不才子【少皞金天氏之號次黃帝】毀信廢忠崇飾惡言靖譖庸回服讒蒐慝以誣盛德【崇聚也靖安也庸用也回邪也服行也蒐隱也慝惡也盛德賢人也】天下之民謂之窮奇【謂共工其行窮其好奇】顓頊氏有不才子不可教訓不知話言【話善也】告之則頑【德義不入心】舍之則嚚【不道忠信】傲狠明德以亂天常天下之民謂之檮杌【謂鯀檮杌頑凶無儔匹之類】此三族也世濟其凶增其惡名以至於堯堯不能去【方以宣公比堯行父比舜故言堯亦不能去須賢臣而除之】縉雲氏有不才子【縉雲黃帝時官名】貪於飲食冒於貨賄侵欲崇侈不可盈厭聚斂積實不知紀極不分孤寡不恤窮匱【冒亦貪也盈滿也實財也】天下之民以比三凶【非帝王者子孫故別以比三凶】謂之饕餮【貧財為饕貪食為餮】舜臣堯【為堯臣】賓於四門【闢四門達四聰以賓禮衆賢】流四凶族【按四凶罪狀而流放之】渾敦窮奇檮杌饕餮投諸四裔以禦魑魅【投棄也裔遠也放之四遠使當魑魅之災魑魅山林異氣所生為人害者文十八年左氏傳】帝曰皐陶惟茲臣庶罔或干予正汝作士明於五刑以弼五教期于予治刑期于無刑民協于中時乃功懋哉【干犯正政弼輔也聖人之治以德為化民之本而刑特以輔其所不及而已期者先事取必之謂舜言惟此臣庶無或有干犯我之政者以爾為士師之官能明五刑以輔五品之教而期我以至於治其始雖不免於用刑而實所以期至於無刑】

之地故民亦皆能協於中道初無有過不及之差則刑果無所施矣凡此皆汝之功也】 皋陶曰帝德罔愆臨下以簡御衆以寬罰弗及嗣賞延于世有過無大刑故無小罪疑惟輕功疑惟重與其殺不辜寧失不經好生之德洽於民心茲用不犯于有司【愆過也簡者不煩之謂上煩密則下無所容御者急促則衆擾亂嗣世皆謂子孫然嗣親而世疎也延遠及也父子罪不相及而賞則遠延于世其善善長而惡惡短如此過者不識而誤犯也故者知之而故犯也過誤所犯雖大必宥不忌故犯雖小必刑即上篇所謂眚災肆赦怙終賊刑者也罪已定矣而于法之中有疑其可重可輕者則從輕以罰之功已定矣而于法之中有疑其可輕可重者則從重以賞之辜罪經常也謂法可以殺可以無殺殺之則恐陷於非辜不殺之恐失於輕縱二者皆非聖人至公至平之意而殺不辜者尤聖人之所不忍也故與其殺之而害彼之生寧姑全之而自受失刑之責此其仁愛忠厚之至皆所謂好生之德也蓋聖人之法有盡而心則無窮故其用刑行賞或有所疑則常屈法以申恩而不使執法之意有以勝其好生之德此其本心所以無所壅遏而得行於常法之外及其流衍洋溢漸涵浸漬有以入于民心則天下之人無不愛慕感悅興起於善而自不犯于有司也皋陶以舜美其功故言此以歸功于其上蓋不敢當其褒美之意而自謂己功也 大禹謨】 王曰嗚呼封敬明乃罰人有小罪非眚乃惟終自作不典式爾有厥罪小乃不可不殺乃有大罪非終乃惟眚災適爾既道極厥辜時乃不可殺【此下謹罰也式用適偶也人有小罪非過誤乃其固為亂常之事用意如此其罪雖小乃不可不殺即舜典所謂刑故無小也人有大罪非是故犯乃其過誤出於不幸偶爾如此既自稱道盡輸其情不敢隱匿罪雖大時乃不可殺即舜典所謂有過無大也諸葛孔明治蜀服罪輸情者雖重必釋其既道極厥辜時乃不可殺之意歟】 王曰嗚呼封有叙時乃大明服惟民其勅懋和若有疾惟民其畢棄咎若保赤子惟民其康乂【有叙者刑罰有次序也明者明其罰服者服其民也左氏曰乃大明服已則不明而殺人以逞不亦難乎勅戒勅也民其戒勅而勉於和順也若有疾者以去疾之心去惡也故民皆棄咎若保赤子者以保子之心保善也故民其安治】 非汝封刑人殺人無或刑人殺人非汝封又曰劓刵人無或劓刵人【刑殺者天之所以討有罪非汝封得以刑之殺之也汝無或以己而刑殺之則截耳也刑殺刑之大者劓刵刑之小者兼舉小大以申戒之也又曰當在無或刑人殺人之下又按則周官五刑所無呂刑以為苗民所制】 王曰外事汝陳時臬司師茲殷罰有倫【外事未詳陳氏曰外事有司之事也臬去也為準限之義言汝於外事但陳列是法使有司師此殷罰之有倫者用之爾 呂氏曰外事衛國事也史記言康叔為周司寇司寇王朝之官職任內事故以衛國對言為外事今按篇中言往敷求往盡乃心篇終曰往哉封皆令其之國之辭而未見其留王朝之意但詳此篇康叔蓋深於法者異時成王或舉以任司寇之職而此則未必然也】 又曰要囚服念五六日至于旬時丕蔽要囚【要囚獄詞之要者也服念服膺而念之旬十日時三月為囚求生道也蔽斷也】 王曰汝陳時臬事罰蔽殷彝用其義刑義殺勿庸以次汝封乃汝盡遜曰時敘惟曰未有遜事【義宜也次舍之次遜順也申言敷陳是法與事罰斷以殷之常法矣又慮其泥古而不通又謂其刑其殺必察其宜於時者而後用之既又慮其趨時而徇己又謂刑殺不可以就汝封之意既又慮其刑殺雖已當罪而矜喜之心乘之又謂使法刑殺盡順於義雖曰是有次敘汝當惟謂未有順義之事蓋矜喜之心生乃怠惰之心起刑殺之所由不中也可不戒哉】 已汝惟小子未其有若汝封之心朕心朕德惟乃知【已者語辭之不能已也小子幼小之稱言年雖少而心獨善也爾心之善固朕知之朕心朕德亦惟爾知之將言用罰之事故先發其良心焉】 凡民自得罪寇攘姦宄殺越人于貨啓不畏死罔弗憝【越顛越也盤庚云顛越

不恭啓強慝惡也自得罪非為人誘陷以得罪也凡民自犯罪為盜賊姦宄殺人顛越人以取財貨強狠亡命者人無不憎惡之也用罰而加是人則人無不服以其出乎人之同惡而非即乎吾之私心也特舉此以明用罰之當罪】王曰封元惡大慝矧惟不孝不友子弗祗服厥父事大傷厥考心于父不能字厥子乃疾厥子于弟弗念天顯乃弗克恭厥兄兄亦不念鞠子哀大不友于弟惟弔茲不于我政人得罪天惟與我民彝大泯亂曰乃其速由文王作罰刑茲無赦【大慝即上文之罔弗慝言寇攘姦宄固為大惡而大可惡矣況不孝不友之人而尤為可惡者當商之季禮義不明人紀廢壞子不敬事其父大傷父心父不能愛子乃疾惡其子是父子相夷也天顯猶孝經所謂天明尊卑顯然之序也弟不念尊卑之序而不能敬其兄兄亦不念父母鞠養之勞而大不友其弟是兄弟相賊也父子兄弟至於如此苟不於我為政之人而得罪焉則天之與我民彝必大泯滅而紊亂矣曰者言如此則汝其速由文王作罰刑此無赦而懲戒之不可緩也】不率大戛矧惟外庶子訓人惟厥正人越小臣諸節乃別播敷造民大譽弗念弗庸厥君時乃引惡惟朕慝已汝乃其速由茲義率殺【戛法也言民之不率教者固可大寘之法矣況外庶子以訓人為職與庶官之長及小臣之有符節者乃別布條教違道干譽弗念其君弗用其法以病君上是乃長惡於下我之所深惡也臣之不忠如此刑其可已乎汝其速由此義而率以誅戮之可也按上言民不孝不友則速由文王作罰刑茲無赦此言外庶子正人小臣背上立私則速由茲義率殺其曰刑曰殺若用法峻急者蓋殷之臣民化紂之惡父子兄弟之無其親君臣上下之無其義非繩之以法示之以威殷民孰知不孝不義之不可干哉周禮所謂刑亂國用重典者是也然曰速由文王曰速由茲義則其刑其罰亦仁厚而已矣康誥】乃惟成湯以至於帝乙罔不明德慎罰亦克用勸要囚殄戮多罪亦克用勸開釋無辜亦克用勸【言辟與宥皆足以使人勉於善也多方】周公曰今文子文孫孺子王矣其勿誤於庶獄惟有司之牧夫【始言和我庶獄庶慎時則勿有間之繼言其勿誤於庶獄庶慎惟正是又之至是獨曰其勿誤於庶獄惟有司之牧夫蓋刑者天下之重事挈其重而獨舉之使成王尤知刑獄之可畏必專有司牧夫之任而不可以已誤之也】又曰太史司寇蘇公式敬爾由獄以長我王國茲式有慎以列用中罰【此周公因言慎罰而以蘇公式敬獄之事告之太史使其并書以為後世司獄之式也蘇國名也左傳蘇忿生以溫為司寇周公告太史以蘇忿生為司寇用能敬其所由之訟培植基本以長我王國令於此取法而有謹焉則能以輕重條列用其中罰而無過差之患矣立政】王曰君陳殷民在辟予曰辟爾惟勿辟予曰宥爾惟勿宥惟厥中【言殷民之在刑辟者不可徇君以為生殺惟當審其輕重之中也】有弗若于汝政弗化于汝訓辟以止辟乃辟【其有不順于汝之政不化于汝之訓刑之可也然刑期無刑刑而可以止刑者乃刑之】狃于姦宄敗常亂俗三細不宥【狃習也常典常也俗風俗也狃於姦宄與夫毀敗典常壞亂風俗人犯此三者雖小罪亦不可宥以其所關者大也君陳】王曰嗟四方司政典獄非爾惟作天牧今爾何監非時伯夷播刑之迪其今爾何懲惟時苗民匪察于獄之麗罔擇吉人觀於五刑之中惟時庶威奪貨斷制五刑以亂無辜上帝不綱降咎于苗苗民無辭于罰乃絕厥世【司政典獄漢孔氏曰諸侯也為諸侯主刑獄而言非爾諸侯為天牧養斯民乎為天牧民則今爾何所監懲所當監者非伯夷乎所當懲者非有苗乎伯夷布刑以啟迪斯民捨臯陶而言伯夷者探本之論也麗附也苗民不察於獄辭之所麗又不擇吉人俾觀於五刑之中惟是貴者以威亂政富者以貨奪法斷制五刑亂虐無罪上帝不綱貨而降罰于苗苗民無所辭其罰而遂殄滅之也】王曰嗚呼念之哉伯父伯兄仲叔季弟幼子童孫皆聽朕言庶有格命今爾罔不由慰曰勤爾罔或戒不勤天齊于民俾我一日非

終惟終在人爾尚敬逆天命以奉我一人雖畏勿畏雖休勿休惟敬五刑以成三德一人有慶兆民賴之其寧惟永【此告同姓諸侯也格至也參錯訊鞫極天下之勞者寔若獄苟有豪髮怠心則民有不得其死者矣罔不由慰日勤者爾所用以自慰者無不以日勤故職舉而刑當也爾罔或戒不勤者刑罰之用一成而不可變者也苟頃刻之不勤則刑罰失中雖深戒之而已施者亦無及矣戒固善心也而用刑豈可以或戒也哉且刑獄非所恃以為治也天以是整齊亂民使我為一日之用而已非終即康誥大罪非終之謂言過之當宥者惟終即康誥小罪惟終之謂言過之當辟者非終惟終皆非我得輕重惟在夫人所犯耳爾當敬逆天命以承我一人畏威古通用威辟之也休宥之也我雖以為辟爾惟勿辟我雖以為宥爾惟勿宥惟敬乎五刑之用以成剛柔正直之德則君慶於上民賴于下而安寧之福其永久而不替矣】王曰吁來有邦有土告爾祥刑在今爾安百姓何擇非人何敬非刑何度非及【有民社者皆在所告也夫刑凶器也而謂之祥者刑期無刑民協于中其祥莫大焉及逮也漢世詔獄所逮有至數萬人者審度其所當逮者而後可逮之也曰何曰非問答以發其意以明三者之決不可不盡心也】兩造具備師聽五辭五辭簡孚正于五刑五刑不簡正于五罰五罰不服正于五過【兩造者兩爭者皆至也周官以兩造聽民訟具備者詞證皆在也師衆也五辭麗於五刑之辭也簡核其實也孚無可疑也正質也五辭簡核而可信乃質于五刑也不簡者辭與刑參差不應刑之疑者也罰贖也疑于刑則質于罰也不服者辭與罰又不應也罰之疑者也過誤也疑于罰則質于過而宥免之也】五過之疵惟官惟反惟內惟貨惟來其罪惟均其審克之【疵病也官威勢也反報德怨也內女謁也貨賄賂也來干請也惟此五者之病以出入人罪則以人之所犯坐之審克者察之詳而盡其能也下文屢言以見其丁寧忠厚之至疵於刑罰亦然但言於五過者舉輕以見重也】五刑之疑有赦五罰之疑有赦其審克之簡孚有衆惟貌有稽無簡不聽具嚴天威【刑疑有赦正于五罰也罰疑有赦正于五過也簡核情實可信者衆亦惟考察其容貌周禮所謂色聽是也然聽獄以簡核為本苟無情實在所不聽上帝臨汝不敢有毫髮之不盡也】墨辟疑赦其罰百鍰閱實其罪劓辟疑赦其罰惟倍閱實其罪剕辟疑赦其罰倍差閱實其罪宮辟疑赦其罰六百鍰閱實其罪大辟疑赦其罰千鍰閱實其罪墨罰之屬千劓罰之屬千剕罰之屬五百宮罰之屬三百大辟之罰其屬二百五刑之屬三千上下比罪無僭亂辭勿用不行惟察惟法其審克之【墨刻頹而涅之也劓割鼻也剕則足也宮淫刑也男子割勢婦人幽閉大辟死刑也六兩曰鍰閱視也倍二百鍰也倍差倍而又差五百鍰也屬類也三千總計之也周禮司刑所掌五刑之屬二千五百刑雖增舊然輕罪比舊為多而重罪比舊為減也比附也罪無正律則以上下刑而比附其罪也無僭亂辭勿用不行未詳或曰亂辭辭之不可聽者不行舊有是法而令不行者戒其無差誤於僭亂之辭勿用今所不行之法惟詳明法意而審克之也今按臯陶所謂罪疑惟輕者降一等而罪之耳今五刑疑赦而直罰之以金是大辟宮剕劓墨皆不復降等用矣蘇氏謂五刑疑各入罰不降當因古制非也舜之贖刑宮府學校鞭扑之刑耳夫刑莫輕于鞭扑入于鞭扑之刑而又情法猶有可議者則是無法以治之故使之贖特不欲遽釋之也而穆王之所謂贖雖大辟亦贖也舜豈有是制哉又按漢張敞以討羌兵食不繼建為入穀贖罪之法初亦未嘗及夫殺人及盜之罪而蕭望之等】

【猶以為如此則富者得生貧者獨死恐開科路以傷治化曾謂唐虞之世而有是贖法哉穆王巡遊無度財匱民勞至其末年無以為計乃為此一切權宜之術以斂民財夫子錄之蓋亦

示戒然其一篇之書哀矜惻怛猶可以想見三代忠厚之遺意云爾】上刑適輕下服下刑適重上服輕重諸罰有權刑罰世輕世重惟齊非齊有倫有要【事在上刑而情適輕則服下刑舜之宥過無大康誥所謂大罪非終者是也事在下刑而情適重則服上刑舜之刑故無小康誥所謂小罪非眚者是也若諸罰之輕重亦皆有權焉權者進退推移以求其輕重之宜也刑罰世輕世重者周官刑新國用輕典刑亂國用重典刑平國用中典隨世而為輕重者也輕重諸罰有權者權一人之輕重也刑罰世輕世重者權一世之輕重也惟齊非齊者法之權也有倫有要者法之經也言刑罰雖惟權變是適而齊之以不齊焉至其倫要所在蓋有截然而不可紊者矣此兩句總結上意】罰懲非死人殞于病非佞折獄惟良折獄罔非在中察辭于差非從惟從哀敬折獄明啟刑書胥占咸庶中正其刑其罰其審克之獄成而孚輸而孚其刑上備有并兩刑【罰以懲過雖非致人於死然民重出贖亦甚病矣佞口才也非口才辨給之人可以折獄惟溫良長者視民如傷者能折獄而無不在中也此言聽獄者當擇其人也察辭于差者辭非情實終必有差聽獄之要必於其差而察之非從惟從者察辭不可偏主猶曰不然而然所以審輕重而取中也哀敬折獄者惻怛敬畏以求其情也明啟刑書胥占者言詳明法律而與衆占度也咸庶中正者皆庶幾其無過忒也於是刑之罰之又當審克之也此言聽獄者當盡其心也若是則獄成于下而民信之獄輸于上而君信之其刑上備有并兩刑者言上其斷獄之書當備情節一人而犯兩事罪雖從重亦并兩刑而上之也此言讞獄者當備其辭也】王曰嗚呼敬之哉官伯族姓朕言多懼朕敬于刑有德惟刑今天相民作配在下明清于單辭民之亂罔不中聽獄之兩辭無或私家于獄之兩辭獄貨非寶惟府辜功報以庶尤永畏惟罰非天不中惟人在命天罰不極庶民罔有令政在于天下【此總告之也官典獄之官也伯諸侯也族同族姓異姓也朕之于刑言且多懼況用之乎朕敬于刑者畏之至也有德惟刑厚之至也今天以刑相治斯民汝實任責作配在下可也明清以下敬刑之事也獄辭有單有兩單辭者無證之辭也聽之為尤難明者無一毫之蔽清者無一點之污曰明曰清誠敬篤至表裏洞徹無少私曲然後能察其情也亂治也獄貨鬻獄而得貨也府聚也辜功猶云罪狀也報以庶尤者降之百殃也非天不中惟人在命者非天不以中道待人惟人自取其殃禍之命爾此章文有未詳者姑缺之】王曰嗚呼嗣孫今往何監非德于民之中尚明聽之哉哲人惟刑無疆之辭屬于五極咸中有慶受王嘉師監于茲祥刑【此詔來世也嗣孫嗣世子孫也言今往何所監視非用刑成德而能全民所受之中者乎下文哲人即所當監者五極五刑也明哲之人用刑而有無窮之譽蓋由五刑咸得其中所以有慶也嘉善師衆也諸侯受天子良民善衆當監視于此祥刑申言以結之也

呂刑】溫之會晉人執衛成公歸之于周【溫晉之河陽成公衛文公】

【之子成公鄭也晉文公討不服衛成公恃楚而不從聞楚師敗于城濮衛侯懼出奔使元咺奉弟叔武以受盟于踐土或愬元咺曰立叔武矣衛侯殺其子角咺不廢命奉叔武以守國晉人復衛侯先期入叔武將沐聞君至喜捉髮走出前驅射而殺之元咺出奔晉會于溫討不服衛侯與元咺訟不勝故晉侯執之歸之于京師在魯僖公二十八年】晉侯請殺之王言不可夫政自上下者也【當從王出也】上作政而下行之不逆故上下無怨【言君臣不相怨】今叔父作政而不行無乃不可乎【不行謂不順也言晉侯不行德政而聽元咺之愬欲殺衛侯也】夫君臣無獄【獄訟也無是非曲直之義也】今元咺雖直而不可聽也君臣皆獄父子將獄是無上下也而叔父聽之一逆矣又為臣殺其君其安庸刑【庸用也刑法也】布刑

而不庸再逆矣一合諸侯而有再逆政余懼其無後【無後無以復合諸侯也】不然余何私於衛侯晉人乃歸衛侯【在魯僖三十年也晉侯使醫衍酖衛侯不死魯僖為請納玉於王與晉侯皆十穀於是歸之也周語】晉邢侯與雍子爭鄙田【邢侯楚申公巫臣之子也雍子亦故楚人】久而無成士景伯如楚【士景伯晉理官】叔魚攝理【攝代景伯】韓宣子命斷舊獄罪在雍子雍子納其女於叔魚叔魚蔽罪邢侯【蔽斷也】邢侯怒殺叔魚與雍子於朝宣子問其罪於叔向叔向曰三人同罪施生戮死可也【施行罪也】雍子自知其罪而賂以買直鮒也鬻獄邢侯專殺其罪一也已惡而掠美為昏【掠取也昏亂也】貪以敗官為墨【墨不潔之稱】殺人不忌為賊【忌畏也】夏書曰昏墨賊殺【逸書三者皆死刑】臯陶之刑也請從之乃施邢侯而尸雍子與叔魚於市仲尼曰叔向古之遺直也【言叔向之直有古人遺風】治國制刑不隱於親【謂國之大問已所答當也至于他事則宜有隱】三數叔魚之惡不為末減【末薄也減輕也皆以正言之】曰義也夫可謂直矣【於義未安直則有之】平丘之會數其賄也【謂言瀆貨無厭】以寬衛國晉不為暴歸魯季孫稱其詐也【謂言鮒也能】以寬魯國晉不為虐邢侯之獄言其貪也以正刑書晉不為頗三言而除三惡加三利【三惡暴虐頗也三惡除則三利加】殺親益榮【榮名益已】猶義也夫【三罪唯答宣子問不可以不正其餘則以直傷義故重疑之昭十四年左氏傳】邾婁定公之時有弑其父者【定公獲且也魯文十四年即位】有司以告公瞿然失席曰是寡人之罪也【民之無禮教之罪】曰寡人嘗學斷斯獄矣臣弑君凡在官者殺無赦子弑父凡在官者殺無赦【言諸臣子孫無尊卑皆得殺之其罪無赦】殺其人壞其室洿其宮而豬焉【明其大逆不欲人復處之豬都也南方謂都為豬】蓋君踰月而后舉爵【自貶損檀弓】孔子為魯司寇朝政七日而誅亂政大夫少正卯戮之于兩觀之下尸於朝三日子貢進曰夫少正卯魯之聞人也今夫子為政而始誅之或者為失乎孔子曰天下有大惡者五而竊盜不與焉一曰心逆而險二曰行僻而堅三曰言偽而辨四曰記醜而博五曰順非而澤此五者有一於人則不免君子之誅而少正卯皆兼有之其居處足以撮徒成黨其談說足以飾褒榮衆其強禦足以反是獨立此乃人之姦雄者也不可以不除夫殷湯誅尹諧文王誅潘正周公誅管蔡太公誅華士管仲誅付乙子產誅史何是此七子皆異世而同誅者以七子異世而同惡故不可赦也【家語】孔子為魯司寇有父子訟者孔子同狴執之三月不別其父請止孔子赦之季孫聞之不說曰司寇欺予曩告余曰國家必先以孝余今戮一不孝以教民孝不亦可乎而又赦何哉冉子以告孔子慨然歎曰嗚呼上失其道而殺其下非理也不教其民而聽其訟殺不辜也三軍大敗不可斬也獄犴不治不可刑也何者上教之不行罪不在民故也夫慢令謹誅賊也徵斂無時暴也不教而責成功虐也政無此三者然後刑可即也書云義刑義殺勿庸以即汝心惟曰未有順事言必教而後刑也既陳道德以先服之而猶不可尚賢以勸之又不可即廢之又不可而後以威憚之若是三年而百姓正矣邪民不從然後俟之以刑則民知罪矣詩云天子是毗俾民不迷是以威厲而不試刑錯而不用今世則不然亂其教煩其刑使民迷惑而陷焉又從而制之故刑彌煩而盜不勝也夫三尺之限空車不能登者何哉峻故也百仞之山重載陟焉何哉陵遲故也合世俗之陵遲久矣雖有刑法民能勿踰乎【同上】孔子為魯司寇斷獄訟皆進衆議者而問之曰子以為奚若某以為何若皆曰云云如是然後夫子曰嘗從某子幾是【同上】孟氏之臣叛武伯問孔子曰如之何答曰臣人而叛天下所不容也其將自反子姑待之三旬果自歸孟氏武伯將執之訪於夫子夫子曰無也子之於臣禮意不至是以去子【夫禮不交則意不通意不通則疑所生以疑生則去矣】今其自反罪以反除又何執焉子脩

禮以待之則臣去子將安往武伯乃止【孔叢子】孔子曰民之所以生者衣食也上不教民民匱其生飢寒切於身而不為非者寡矣故古之於盜惡之而不殺也今不先其教而一殺之是以罰行而善不反刑張而罪不省夫赤子知慕其父母由審故也況為政奪其賢者而與其不賢以化民乎知審此二者則上盜先息【上盜猶大盜同上】書曰茲殷罰有倫【周書康誥之文言此殷家刑罰有倫理者亦當兼用之】子張問曰何謂也孔子曰不失其理之謂也今諸侯不同德每君異法折獄無倫以意為限是故知法之難也子張曰古之知法者與今之知法者異乎孔子曰古之知法能遠【能遠者謂能正其源以禮教先之也】今之知法者不失有罪不失有罪其於恕寡矣【既不先禮復不以情惟法為得】能遠則於獄其防深矣寡恕近乎濫防深治乎本書曰惟敬五刑以成三德言敬刑所以為德矣【周書呂刑之文言教以惟敬五刑所以成剛柔正直之三德同上】書曰非從惟從【周書呂刑云察辭于差非從惟從言察囚辭當差錯不可從其偽辭必審從所本之意】孔子曰君子之於人也有不語也無不聽也【有不語則已語則無不聽在審其真偽焉】況聽訟乎必盡其辭矣夫聽訟者或從其情或從其辭辭不可從必斷以情書曰人有小罪非眚乃惟終自作不典式爾有厥罪小乃不可不殺乃有大罪非終乃惟眚災適爾既道極厥辜時乃不可殺【周書康誥之文眚過也災害也典常也式用也適從也既盡也言人有小罪過誤乃惟終自作不常用犯汝厥罪雖小乃不可不殺也乃有大罪非終乃惟過誤雖有其害從汝盡聽訟之道以極其罪是亦不可殺必以罰有倫焉同上】曾子問聽獄之術孔子曰其大法有三焉治必以寬寬之之術歸於察【大寬則民慢慢則姦偽生焉故明之以察】察之之術歸於義【夫察甚則或過乎暴故以義為質】是故聽而不寬是亂也【夫聽太亟則失於詳故事之是否亂焉】寬而不察是慢也察而不中義是私也【私謂刑失其正若私曲然】私則民怨故善聽者雖不越辭辭不越情情不越義【夫善聽者得辭則審之以情得情則斷之以義】書曰上下比罰無僭亂辭【周書呂刑之文言上下比方其罪聽僭亂之辭以自疑也同上】書曰若保赤子【周書康誥之文言愛民若安嬰孩赤子然不使失其欲】子張問曰聽訟可以若此乎孔子曰可哉古之聽訟者惡其意不惡其人【非喜怒其人但疾其意之有險害】求所以生之不得其所以生乃刑之君必與衆共焉愛民而重棄之也【是所謂刑人于市與衆棄之也】今之聽訟者不惡其意而惡其人求所以殺是反古之道也【同上】

雷電皆至豐君子以折獄致刑【取其威照竝行之象】

山上有火旅君子以明慎用刑而不留獄【慎刑如山不留如火】

澤上有風中孚君子以議獄緩死【風感水受中孚之象議獄緩死中孚之意並易】

刑者側也側者成也一成而不可變故君子盡心焉【變更也王制】子曰聽訟吾猶人也必也使無訟乎無情者不得盡其辭大畏民志此謂知本【猶人不異於人也情實也引夫子之言而言聖人能使無實之人不敢盡其虛誕之辭蓋我之明德既明自然有以畏服民之心志故訟不待聽而自無也觀于此言可以知本末之先後矣大學】子曰片言可以折獄者其由也與【片言半言折斷也子路忠信明決故言出而人信服之不待其辭之畢也】子路無宿諾【宿留也急於踐言不留其諾也記者因夫子之言而記此以見子路之所以取信於人者由其養之有素也論語】孟氏使陽膚為士師問於曾子曾子曰上失其道民散久矣如得其情則哀矜而勿喜【陽膚曾子弟子民散謂情義乖離不相維繫謝氏曰民之散也以使之無道教之無素故其犯法也非迫於不得已則陷于不知也故得其情則哀矜而勿喜同上】蔡聲子曰善為國者賞不僭而刑不濫賞僭則懼及淫人刑濫則懼及善人若不幸而過寧僭無

濫與其失善寧其利淫無善人則國從之詩曰人之云亡邦國殄瘁無善人之謂也【詩大雅殄盡也瘁病也】故夏書曰與其殺不辜寧失不經懼失善也【不經不用常法】商頌有之曰不僭不亂不敢怠遑命于下國封建厥福【詩商頌言殷湯賞不僭差刑不溢濫不敢怠解自寬假故能為下國所命為天子】此湯所以獲天福也古之治民者勸賞而畏刑【樂行賞而憚用刑】恤民不倦賞以春夏刑以秋冬【順天時】是以將賞為之加膳加膳則飫賜【飫饜也酒食賜下無不饜足所謂加膳也】此以知其勸賞也將刑為之不舉不舉則徹樂【不舉盛饌】此以知其畏刑也夙興夜寐朝夕臨政此以知其恤民也三者禮之大節也【襄公二十六年左氏傳】孟子謂齊宣王曰左右皆曰可殺勿聽諸大夫皆曰可殺勿聽國人皆曰可殺然後察之見可殺焉然後殺之故曰國人殺之也【此言非獨以此進退人才至于用刑亦以此道蓋所謂天命天討皆非人君所得私也並孟子】刑人於市與衆棄之是故公家不畜刑人大夫弗養士遇之塗弗與言也屏之四方唯其所之不及以政示弗故生也【屏猶放去也已施刑則放棄之役賦不與亦不授之以田困乏及無賙餼也虞書曰五流有宅五宅三居是也周則墨者使守門劓者使守關宮者使守內劓者使守圉髡者使守積王制】

眚災肆赦【詳首章】宥過無大【詳前章】

凡作刑罰輕無赦【法雖輕不赦之為人易犯】凡執禁以齊衆不赦過【亦為人將易犯王制】司刺掌三刺三宥三赦之灋以贊司寇聽獄訟【刺殺也訊而有罪則殺之宥寬也赦舍也】壹刺曰訊羣臣再刺曰訊羣吏三刺曰訊萬民【訊言】壹宥曰不識再宥曰過失三宥曰遺忘【鄭司農云不識謂愚民無所識則宥之過失若今律遇失殺人不坐死玄謂識審也不審若今仇讐當報甲見乙識以為甲面殺之者過失若舉刃欲砍伐而軼中人者遺忘若間帷薄忘有在焉而以兵矢投射之】壹赦曰幼弱再赦曰老旄三赦曰憊愚【憊愚生而癡騃童昏者鄭司農云幼弱老旄若今律今年未滿八歲八十以上者非手殺人他皆不坐】以此三灋者求民情斷民中而施上服下服之罪然後刑殺【上服殺與墨劓下服宮刑也司約職曰其不信者服墨刑凡行刑必先規識所刑之處乃後行之秋官】八十九十曰耄【耄憊忘也春秋傳曰謂老將知耄又及之】七年曰悼【悼憐愛也】悼與耄雖有罪不加刑焉【愛幼而尊老曲禮】小司寇以八辟麗邦灋附刑罰【辟法也杜子春讀麗為羅玄謂麗附也易曰日月麗乎天故書附作付附猶著也】一曰議親之辟【鄭司農云若今時宗室有罪先請是也】二曰議故之辟【故謂舊知也】三曰議賢之辟【鄭司農云若今時廉吏有罪先請是也玄謂賢有德者】四曰議能之辟【能謂有道藝者春秋傳曰夫謀而鮮過惠訓不倦者叔向有焉社稷之固也猶將十世宥之以勸能者今壹不免其身以棄社稷不亦惑乎】五曰議功之辟【謂有大勲勞立功者】六曰議貴之辟【鄭司農云若今時吏墨綬有罪先請是也】七曰議勤之辟【謂憔悴以事國】八曰議賓之辟【謂所不臣者三恪二代之後與】凡命夫命婦不躬坐獄訟【為治獄吏褻尊者也躬身也不身坐者必使其屬若子弟也喪服傳曰命夫者其男子之為大夫者命婦者其婦人之為大夫之妻者春秋傳曰衛侯與元咺訟甯武子為輔鍼莊子為坐士榮為大理】凡王之同族有罪不即市【鄭司農云刑諸甸師氏禮記曰刑于隱者不與國人慮兄弟秋官】掌囚凡有爵者與王之同族奉而適甸師氏以待刑殺【適甸師氏亦由朝乃往也待刑殺者掌戮將自市來也文王世子曰雖親不以犯有司正術也所以體異姓也刑于隱者不與國人慮兄弟也

同上】掌戮唯王之同族與有爵者殺之于甸師氏【同上】甸師王之同姓有辜則死刑焉

【鄭司農云王同姓有罪當刑者斷其獄於甸師之官也文王世子曰公族有死罪則磬於甸人又曰公族無官刑獄成致刑於甸人又曰公族無官刑不踐其類也刑于隱者不與國人慮兄弟 天官】司烜氏邦若屋誅則為明竈焉【鄭司農云屋誅謂夷三族無親屬收葬者故為葬之也三夫為屋一家田為一夫以此知三家也玄謂屋讀如其刑劓之劓劓誅謂所殺不於市而以適甸師氏者也明竈若今揭頭明書其罪法也司烜掌明竈則罪人瘞葬與 秋官】公族其有死罪則磬於甸人其刑罪則纖剗亦告于甸人公族無官刑獄成有司讞于公其死罪則曰某之罪在大辟其刑罪則曰某之罪在小辟公曰宥之有司又曰在辟公又曰宥之有司又曰在辟及三宥不對走出致刑于甸人公又使人追之曰雖然必赦之有司對曰無及也反命于公公素服不舉為之變如其倫之喪無服親哭之【詳見五宗篇】刑不上大夫【不與賢者犯法其犯法則在公議輕重不在刑書 曲禮】

右赦宥八議

雷雨作解君子以赦過宥罪【易大禹謨康誥君陳呂刑論赦宥之法已見上章】書曰哀敬折獄【周書呂刑之文言當哀人之所犯而敬斷其獄】仲弓問曰何謂也孔子曰古之聽訟者察貧哀窮孤獨及鰥寡老弱不肖而無告者雖得其情必哀矜之死者不可生斷者不可屬【屬續也】若老而刑之謂之悖弱而刑之謂之剋不赦過謂之逆【皐陶云宥過無大刑故無小是則過雖大可宥焉此云不赦過為逆德是逆於道矣】率過以小罪謂之枳【枳猶傷也夫過則宜宥若率以為小罪亦傷乎義焉況為之大罪耶】故宥過赦小罪老弱不受刑先王之道也書曰大辟疑赦又曰與其殺不辜寧失不經【孔叢子】公族之罪雖親不以犯有司正術也所以體百姓也刑于隱者不與國人慮兄弟也公族無官刑不翦其類也【詳見五宗篇】冉有問於孔子曰先王制法使刑不上於大夫然則大夫犯罪不可以加刑乎孔子曰不然凡治君子以禮御其心所以厲之以廉恥之節也故古之大夫其有坐不廉汙穢而退放之者不謂之不廉汙穢而退放則曰簠簋不飭【飭整齊也】有坐淫亂男女無別者不謂之淫亂男女無別則曰帷薄不修也有坐罔上不忠者不謂之罔上不忠則曰臣節未著有坐罷軟不勝任者不謂之罷軟不勝任則曰下官不職【言其下官不稱於其職不斥其身也】有坐干國之紀者不謂之干國之紀則曰行事不請【言不請而擅行】此五者大夫既自定有罪名矣而猶不忍斥然正以呼之也既而為之諱所以媿恥之是故大夫之罪其在五刑之域者聞而譴發【譴譴讓也發發始露】則白冠釐纓盤水如劒造乎闕而自請罪君不使有司執縛牽制而加之也其有大罪者聞命則北面再拜跪而自裁君不使人掣引而刑殺之也曰子大夫自取之耳吾遇子有禮矣以刑不上大夫而大夫亦不失其罪者教使然也【家語】春王正月肆大眚肆失也眚災也【易稱赦過宥罪書稱眚災肆赦經稱肆大眚皆放赦罪人蕩滌衆故有時而用之非經國之常制 莊三十二年穀梁傳】晉欒盈出奔楚宣子殺羊舌虎【羊舌虎叔向弟】囚叔向於是祁奚老矣【老去公族大夫】聞之乘駟而見宣子曰詩曰惠我無疆子孫保之【詩周頌也言文武有惠訓之德加於百姓故子孫保賴之】書曰聖有謩勲明徵定保【逸書謩謀也勲功也言聖哲有謀功者當明信定安之】夫謀而鮮過惠訓不倦者叔向有焉【謀鮮過有謩勲也惠訓不倦惠我無疆也】社稷之固也猶將十世宥之以勸能者今壹不免其身【壹以弟故】以棄社稷不亦惑乎鯀殛而禹與【言不以父罪廢其子】伊尹放大甲而相之卒無怨色【大甲湯孫也荒淫失度伊尹放之桐宮三年改悔而復之而無恨心言不以一怨妨大德】管蔡為戮周公右王【言兄弟罪不相及】若之何其

以虎也棄社稷宣子說與之乘以言諸公而免之【共載入見公 襄二十一年左氏傳】

仲春命有司省圜圉去桎梏毋肆掠止獄訟【順陽寬也省減也圜圉所以禁守繫者若今別獄矣桎梏今械也在手曰桎在足曰梏肆謂死刑暴尸也周禮曰肆之三日掠謂捶治人】孟夏斷薄刑決小罪【祭統曰草艾則墨謂立秋後也刑無輕于墨者令以純陽之月斷刑決罪與毋有壞墮自相違似非】出輕繫【崇寬】仲夏挺重囚益其食【挺猶寬也】百官靜事毋刑【罪罰之事不可以聞令月令刑為徑】以定晏陰之所成【晏安也陰猶安】孟秋命有司修法制繕圜圉具桎梏禁止姦愼罪邪務 執【順秋氣政尚嚴】命理瞻傷察創視折【理治獄官也有虞氏曰土夏曰大理周曰大司寇創之淺者曰傷】審斷決獄訟必端平戮有罪嚴斷刑【端猶正也】

仲秋命有司申嚴百刑斬殺必當毋或枉撓枉撓不當反受其殃【申重也當謂值其罪】

季秋乃趣獄刑毋留有罪【殺氣已至有罪者即決也】

孟冬是察阿黨則罪無有掩徹【阿黨謂治獄吏以私恩曲撓相為也】

仲冬築圜圉【順時氣也並月令】

草艾則墨【草艾謂艾取草也秋草木成可芟艾給爨亨時則始行小刑也 祭統】

右順時令

司約掌邦國及萬民之約劑治神之約為上治民之約次之治地之約次之治功之約次之治器之約次之治摯之約次之【此六約者諸侯以下至於民皆有焉劑謂券書也治者理其相抵冒上下之差也神約謂命祀郊社羣望及所祖宗也夔子不祀祀融楚人伐之民約謂征稅遷移仇讐既和若懷宗九姓在晉殷民六族七族在魯衛皆是也地約謂經界所至田萊之比也功約謂王功國功之屬賞爵所及也器約謂禮樂吉凶車服所得用也摯約謂玉帛禽鳥相與往來也】凡大約劑書於宗彝小約劑書于丹圖【大約劑邦國約也書于宗廟之六彝欲神監焉小約劑萬民約也丹圖未聞或有彤器簠簋之屬有圖象者與春秋傳曰斐豹隸也著於丹書今俗語有鐵券丹書豈此舊典之遺與】若有訟者則珥而辟藏其不信者服墨刑【鄭司農云謂有爭訟罪罰刑書謬誤不正者為之開藏取本刑書以正之當開時先祭之玄謂訟訟約若宋仲幾薛宰者也辟藏開府視約書不信不如約也珥讀曰岬謂殺雞取血爨其戶】若大亂則六官辟藏其不信者殺【大亂謂僭約若吳楚之君僭稱王請隧以葬者六官辟藏明罪大也六官初受盟約之貳 秋官】大史凡邦國都鄙及萬民之有約劑者藏焉以貳六官六官之所登【約劑要盟之載辭及券書也貳猶副也藏法與約劑之書以為六官之副其有後事六官又登焉】若約劑亂則辟灋其不信者刑之【謂抵冒盟誓者辟法者考按讀其然否 春官】司盟凡民之有約劑者其貳在司盟【貳之者檢其自相違約】有獄訟者則使之盟詛【不信則不敢聽此盟詛所以省獄訟 秋官】

右約劑

調人掌司萬民之難而諧和之【難相與為仇讐諧猶調也】凡和難父之讐辟諸海外兄弟之讐辟諸千里之外從父兄弟之讐不同國君之讐眡父師長之讐眡兄弟主友之讐眡從父

兄弟【和之使辟於此不得就而仇之主大夫君也】弗辟則與之瑞節而以執之【瑞節玉節之琰圭也和之而不肯辟者是不從王命也王以剡圭使調人執之治其罪】凡殺人有反殺者使邦國交讐之【反復也復殺之者此欲除害弱敵也邦國交讐之明不和諸侯得者即誅之】凡殺人而義者不同國令勿讐讐之則死【義宜也謂父母兄弟師長嘗辱焉而殺之者如是為得其宜雖所殺者人之父兄不得讎也使之不同國而已地官】

朝士凡報仇讐者書於土殺之無罪【謂同國不相辟者將殺之必先言之於土秋官】父之讎弗與共戴天【父者子之天殺己之天與共戴天非孝子也行求殺之乃止】兄弟之讐不反兵【恒執殺之備】交遊之仇不同國【讐不吾辟則殺之交遊或為朋友曲禮】

右復讎 子夏問於孔子曰居父母之仇如之何夫子曰寢苦枕干不仕【雖除喪居處猶若喪也干盾也】弗與共天下也【不可以並生】遇諸市朝不反兵而鬪【言雖適市朝不釋兵】曰請問居昆弟之仇如之何曰仕弗與共國銜君命而使雖遇之不鬪【為負而廢君命】曰請問居從父昆弟之仇如之何曰不為魁主人能則執兵而陪其後【魁猶首也為其負當成之檀弓】父不受誅【不受誅罪不當誅也】子復讎可也【孝經曰資於事父以事君而敬同本取事父之敬以事君而父以無罪為君所殺諸侯之君與王者異於義得去君臣已絕故可也孝經云資於事父以事母莊公不得執讐文姜者母所生雖輕於父重於君也易曰天地之大德曰生故得絕不得殺】父受誅子復讎推刃之道也【子復非當讎復討其子一往一來曰推刃】復讎不除害【取讎身而已不得兼讎子復將恐害己而殺之】朋友相衛而不相迫古之道也【同門曰朋同志曰友相衛不使為讎所勝迫出表辭猶先也不當先相擊刺所以伸孝子之恩定四年公羊傳】子得為父報讎者臣子於君父其義一也忠臣孝子所不能已以恩義不可奪也故曰父之讎不與共天下兄弟之讎不與共國朋友之讎不與同朝族人之讎不共隣故春秋傳曰子不復讎非子父母以義見殺子不復讎者為往來不止也【白虎通】紀侯大去其國不言齊滅之為襄公諱也春秋為賢者諱何賢乎襄公復讎也何讎爾遠祖也哀公享乎周【亨煮而殺之】紀侯譖之襄公將復讎乎紀卜之曰師喪分焉【龜曰卜蓍曰筮分半也師喪亡其半】寡人死之【襄公答卜者之辭】不為不吉也遠祖者幾世乎九世矣九世猶可以復讎乎雖百世可也【百世大言之耳猶詩云嵩高維嶽峻極于天君子萬年】家亦可乎【家謂大夫】曰不可國何以可【據家不可】國君一體也先君之恥猶今君之恥也今君之恥猶先君之恥也【先君謂哀公今君謂襄公言其恥同也】今紀無罪【今紀侯也】此非怒與【怒遷怒齊人語也此非怒其先祖遷之于子孫與】曰非也古者有明天子則紀侯必誅必無紀者紀侯之不誅至今有紀者猶無明天子也古者諸侯必有會聚之事相朝聘之道號辭必稱先君以相接然則齊紀無說焉不可以並立乎天下【無號無說慚也】故將去紀侯者不得不去紀也有明天子則襄公得為若行乎【若如也猶曰得為如此行乎】曰不得也不得則襄公曷為為之上無天子下無方伯【有而無益曰無猶易曰閭其無人】緣恩疾者可也【疾痛也莊四年公羊傳】

卷七十三

<經部,禮類,通禮之屬,禮書綱目

欽定四庫全書

禮書綱目卷七十三 婺源江永撰

卜筮 通禮二十六

補

洪範九疇次七曰明用稽疑【稽疑曰明所以辨惑也】七稽疑擇建立卜筮人乃命卜筮【稽考也有所疑則卜筮以考之龜曰卜蓍曰筮蓍龜者至公無私故能紹天之明卜筮者亦必至公無私而後能傳蓍龜之意必擇是人而建立之然後使之卜筮也】曰雨曰霽曰蒙曰驛曰克【此卜兆也雨者如雨其兆為水霽者開霽其兆為火蒙者蒙昧其兆為木驛者絡繹不屬其兆為金克者交錯有相勝之意其兆為土】曰貞曰悔【此占卦也內卦為貞外卦為悔左傳蠱之貞風其悔山是也又有以遇卦為貞之卦為悔國語貞屯悔豫皆八是也】凡七卜五占用二衍忒【凡七雨霽蒙驛克貞悔也卜五雨霽蒙驛克也占二貞悔也衍推忒過也所以推人事之過差也】立時人作卜筮三人占則從二人之言【凡卜筮必立三人三相參考舊說卜有玉兆瓦兆原兆筮有連山歸藏周易者非是謂之三人非三卜筮也】汝則有大疑謀及乃心謀及卿士謀及庶人謀及卜筮汝則從龜從筮從卿士從庶民從是之謂大同身其康彊子孫其逢吉汝則從龜從筮從卿士逆庶民逆吉卿士從龜從筮從汝則逆庶民逆吉庶民從龜從筮從汝則逆卿士逆吉汝則從龜從筮逆卿士逆庶民逆作內吉作外凶龜筮共違于人用靜吉用作凶【稽疑以龜筮為重人與龜筮皆從是之謂大同固吉也人一從而龜筮不違者亦吉龜從筮逆則可作內不可作外內謂祭祀等事外謂征伐等事龜筮共違則可靜不可作靜謂守常作謂動作也然有龜從筮逆而無筮從龜逆者龜尤聖人所重也故禮記大事卜小事筮傳謂筮短龜長是也自夫子贊易極著蓍卦之德蓍重而龜書不傳云洪範】大卜掌三兆之灋一曰玉兆二曰瓦兆三曰原兆【兆者灼龜于火其形可占者其象似玉瓦原之豐鐻是用名之焉上古以來作其法可用者有三原原田也杜子春云玉兆帝顓頊之兆瓦兆帝堯之兆原兆有周之兆】其經兆之體皆百有二十其頌皆千有二百【頌謂繇也三法體繇之數同其名占異耳百二十謂體十繇體有五色又重之以墨圻五色者洪範所謂曰雨曰濟曰圉曰蠱曰尅】掌三易之灋一曰連山二曰歸藏三曰周易【易者揲蓍變易之數可占者也名曰連山似山出內氣變也歸藏者萬物莫不歸而藏于其中杜子春云連山宓戲歸藏黃帝】其經卦皆八其別皆六十有四【三易卦別之數亦同其名占異也每卦八別者重之數】以邦事作龜之八命一曰征二曰象三曰與四曰謀五曰果六曰至七曰雨八曰瘳【國之大事待蓍龜而決者有八定作其辭於將卜以命龜也鄭司農云征謂征伐人也象謂災變雲物如衆赤鳥之屬有所象似易曰天垂象見吉凶春秋傳曰天事恒象皆是也與謂予

人物也謀謂謀議也果謂事成與不也至謂至不也雨謂雨不也瘳謂疾瘳不也玄謂征亦云行巡守也象謂有所造立也易曰以制器者尚其象與謂所與共事也果謂以勇決為之若吳伐楚楚司馬子魚卜戰令龜曰鮒也以其屬死之楚師繼之尚大克之吉是也】以八命者贊三兆三易三夢之占以觀國家之吉凶以詔救政【鄭司農云以此八事命卜筮蓍龜參之以夢故曰以八命者贊三兆三易三夢之占春秋傳曰筮襲於夢武王所用玄謂贊佐也詔告也非徒占其事吉則為否則止又佐明其繇之占演其意以視國家餘事之吉凶凶則告王救其政】凡國大貞卜立君卜大封則眡高作龜【卜立君君無冢適卜可立者卜大封謂竟界侵削卜以兵征之若魯昭元年秋叔弓帥師疆鄆田是也視高以龜骨高者可灼處示宗伯也大事宗伯涖卜卜用龜之腹骨骨近足者其部高鄭司農云貞問也國有大疑問於蓍龜作龜謂鑿龜令可爇也玄謂貞之為問問於正者必先正之乃從問焉易曰師貞丈人吉作龜謂以火灼之以作其兆也春灼後左夏灼前左秋灼前右冬灼後右士喪禮曰宗人受卜人龜示高涖卜受視反之又曰卜人坐作龜】大祭祀則眡高命龜【命龜告龜以所卜之事不親作龜者大祭祀輕於大貞也士喪禮曰宗人即席西面坐命龜】凡小事涖卜【代宗伯】國大遷大師則貞龜【正龜於卜位也士喪禮曰卜人抱龜燋先奠龜西面是也又不親命龜亦大遷大師輕於大祭祀也】凡旅陳龜【陳龜於饌處也士喪禮曰卜人先奠龜于西塾上南首是也不親貞龜亦以卜旅祭非常輕於大遷大師也】凡喪事命龜【重喪禮次大祭祀也士喪禮則筮宅卜曰天子卜葬兆凡大事大卜陳龜貞龜命龜視高其他以差降焉春官】卜師掌開龜之四兆一曰方兆二曰功兆三曰義兆四曰弓兆【開開出其占書也經兆百二十體今言四兆者分之為四部若易之二篇書金縢曰開籥見書是謂與其云方功義弓之名未聞】凡卜事眡高【示涖卜也】揚火以作龜致其墨【揚猶熾也致其墨者孰灼之明其兆】凡卜辨龜之上下左右陰陽以授命龜者而詔相之【所卜者當各用其龜也大祭祀喪事大卜命龜則大貞小宗伯命龜其他卜師命龜卜人作龜卜人作龜則亦辨龜以授卜師上仰者也下俯者也左左倪也右右倪也陰後弇也陽前弇也詔相告以其辭及威儀】龜人掌六龜之屬各有名物天龜曰靈屬地龜曰繹屬東龜曰果屬西龜曰蠃屬南龜曰獵屬北龜曰若屬各以其方之色與其體辨之【屬言非一也色謂天龜玄地龜黃東龜青西龜白南龜赤北龜黑龜俯者靈仰者繹前弇果後弇獵左倪蠃右倪若是其體也東龜南龜長前後在陽象經也西龜北龜長左右在陰象緯也天龜俯地龜仰東龜前南龜卻西龜左北龜右各從其耦也杜子春讀果為羸】凡取龜用秋時攻龜用春時各以其物入于龜室【六龜各異室也秋取龜及萬物成也攻治也治龜骨以春是時乾解不傷也】上春釁龜祭祀先卜【釁者殺牲以血之神之也鄭司農云祭祀先卜者卜其日與其牲玄謂先卜始用卜筮者言祭言祀尊焉天地之也世本作曰巫咸作筮卜未聞其人也是上春者夏正建寅之月月令孟冬云釁祠龜策相互矣秦以十月建亥為歲首則月令秦世之書亦或欲以歲首釁龜耳】若有祭事則奉龜以往【奉猶送也送之所當於卜】旅亦如之喪亦如之蕙氏掌共燋契以待卜事【杜子春云燋讀為細目燋之燋或曰如薪樵之樵謂所爇灼龜之木也故謂之樵契謂契龜之鑿也詩云爰始爰謀爰契我龜玄謂士喪禮曰楚焯置于燋在龜東楚焯即契所用灼龜也燋謂炬其存火】凡卜以明火爇燋遂歛其燋契以授卜師遂役之【杜子春云明火以陽燧取火於日燋讀為英俊之俊書亦或為俊玄謂燋讀如戈鐃之鐃謂以契柱燋火而吹之也契既然以授卜師用作龜也役之使助之】占人掌占龜以八簪占八頌以八卦占簪之八故以眡吉凶【占人亦占筮言掌占龜者筮短龜長主於長者以八筮占八頌謂將卜八事先以筮筮之言頌者同

於龜占也以八卦占筮之八故謂八事不卜而徒筮之也其非八事則用九筮占人亦占焉】凡卜筮君占體大夫占色史占墨卜人占坼【體兆象也色兆氣也墨兆廣也坼兆釁也體有吉凶色有善惡墨有大小坼有微明尊者視兆象而已卑者以次詳其餘也周公卜武王占之曰體王其無害凡卜象吉色善墨大坼明則逢吉】凡卜筮既事則繫幣以比其命歲終則計其占之中否【杜子春云繫帛者以帛書其占繫之于龜也玄謂既卜筮史必書其命龜之事及兆于策繫其禮神之幣而合藏焉書曰王與大夫盡弁開金滕之書乃得周公所自以為功代武王之說是命龜書】筮人掌三易以辨九筮之名一曰連山二曰歸藏三曰周易九筮之名一曰巫更二曰巫咸三曰巫式四曰巫目五曰巫比六曰巫祠七曰巫參八曰巫環九曰巫目以辨吉凶【此九巫讀皆當為筮字之誤也更謂筮遷都邑也咸猶僉也謂筮衆心歡不也式謂筮制作法式也目謂事衆筮其要所當也易謂民衆不說筮所改易也此謂筮與民和比也祠謂筮牲與日也參謂筮御與右也環謂筮可致師不也】凡國之大事先筮而後卜【當用卜者先筮之即事有漸也於筮之凶則止不卜】上春相筮【相謂更選擇其蓍也蓍龜歲易者與】凡國事共筮【並春官】卜人定龜【謂靈射之屬所當用者】史定墨【視兆坼也】君定體【視兆所得也周公曰體王其無害玉藻】小宗伯若國大貞則奉玉帛以詔號【號神號幣號鄭司農云大貞謂卜立君卜大封春官】天府季冬陳玉以貞來歲之嫩惡【問事之正曰貞問歲之嫩】

【惡謂問於龜大卜職大貞之屬陳玉陳禮神之玉凡卜筮實問於鬼神龜筮能出其卦兆之占耳龜有天地四方則玉有六器者與言陳者既事藏之不必貍之也鄭司農云貞問也易曰師貞丈人吉問於丈人國語曰貞於陽卜同上】孟冬命大史釁龜筮占兆審卦吉凶【筮蓍也占兆龜之繇文也周禮龜人上春釁龜謂建寅之月也秦以其歲首使大史釁龜筮與周異矣卦吉凶謂易也審省錄之而不釁筮筮短賤於兆也今月令曰釁祠祠衍字月令】外事以剛日【順其出為陽也出郊為外事春秋傳曰甲午祠兵】內事以柔日【順其居內為陰】凡卜筮日旬之外曰遠某日旬之內曰近某日【旬十日也】喪事先遠日吉事先近日【孝子之心喪事葬與練祥也吉事祭祀冠取之屬也】日為日假爾泰龜有常假爾泰筮有常【命龜筮辭龜筮於吉凶有常大事卜小事筮】卜筮不過三【求吉不過三魯四卜郊春秋譏之】卜筮不相襲【卜不吉則又筮筮不吉則又卜是瀆龜筮也晉獻公卜取驪姬不吉公曰筮之是也曲禮】天子無筮【謂征伐出師若巡守也天子至尊大事皆用卜也春秋傳曰先王卜征五年歲襲其祥】諸侯有守筮【守筮守國之筮國有事則用之】天子道以筮【始將出卜之道有小事則用筮】諸侯非其國不以筮卜宅寢室【入他國則不筮不敢問吉凶於人之國也諸侯受封乎天子因國而國惟宮室欲改易者得卜之耳】天子不卜處大廟【卜可建國之處吉則宮廟吉可知表記】不貳問【當正己之心以問吉凶於蓍龜不得於正凶則卜筮其權也】問卜筮曰義與志與義則可問志則否【大卜問來卜筮者也義正事也志私意也少儀】

諸侯以龜為寶家不寶龜【古者貨貝寶龜大夫以下有貨耳易曰十朋之龜禮器】龜筮敝則埋之【不欲人褻之也埋之不知鬼神之所為曲禮】

右卜筮 龜為卜筮為筮卜筮者先聖王之所以使民信時日敬鬼神畏法令也所以使民決嫌疑定猶與也故曰疑而筮之則弗非也日而行事則必踐之【弗非無非之者日所卜筮之吉】

日也踐讀曰善聲之誤也筮或為蓍曲禮】子言之昔三代明王皆事天地之神明無非卜筮之用不敢以其私褻事上帝【言動任卜筮也神明謂羣神也】是故不犯日月不違卜筮【日月謂冬夏至正月及四時也所不違者日與牲尸也】卜筮不相襲也【襲因也大事則卜小事則筮】大事有時日【大事有事於大神有常時常日也】小事無時日有筮【有事於小神無常時常日有筮臨有事筮之】外事用剛日內事用柔日【順陰陽也陽為外陰為內事之外內別乎四郊】不違龜筮子曰牲牷禮樂齊盛是以無害乎鬼神無怨乎百姓【牷猶純也表記】昔者聖人建陰陽天地之情立以為易易抱龜南面天子卷冕北面雖有明知之心必進斷其志焉示不敢專以尊天也【立以為易易作易易抱龜易官名周禮曰大卜大卜主三兆三易三夢之占祭義】天子下至士皆有蓍龜者重事決疑示不自專也禮三正記曰天子龜長一尺二寸諸侯一尺大夫八寸士六寸龜陰故數偶也天子蓍長九尺諸侯七尺大夫五尺士三尺蓍陽故數奇也所以先謀及卿士何先盡人事念而不能得思而不能知然後問於蓍龜聖人獨見先睹必問蓍龜何示不自專也或曰清微無端緒非聖人所及聖人亦疑之乾草枯骨衆多非一獨以蓍龜何此天地之間壽考之物故問之也龜之為言久也蓍之為言耆也久長意也不見吉凶于蓍復以卜何蓍者陽道多變變乃成也【白虎通】懿氏卜妻敬仲【懿氏陳大夫龜曰卜】其妻占之曰吉【懿氏妻】是謂鳳皇于飛和鳴鏘鏘【雄曰鳳雌曰凰雄雌俱飛相和而鳴鏘鏘然猶敬仲夫妻相隨適齊有聲譽】有媯之後將育于姜【媯陳姓姜齊姓】五世其昌並於正鄉八世之後莫之與京【京大也】陳厲公生敬仲其少也周史有以周易見陳侯者【周大史也】陳侯使筮之【蓍曰筮】遇觀【坤下巽上觀】之否【坤下乾上否觀六四爻變而為否】曰是謂觀國之光利用賓于王【此周易觀卦六四爻辭易之為書六爻皆有變象又有互體聖人隨其義而論之】此其代陳有國乎不在此其在異國非此其身在其子孫光遠而自他有耀者也坤土也巽風也乾天也風為天于土上山也【巽變為乾故曰風為天自二至四有艮象艮為山】有山之材而照之以天光於是乎居土上【山則材之所生上有乾下有坤故言居土上照之以天光】故曰觀國之光利用賓于王【四為諸侯變而之乾有國朝王之象】庭實旅百奉之以玉帛天地之美具焉故曰利用賓于王【艮為門庭乾為金玉坤為布帛諸侯朝王陳贄幣之象旅陳也百言物備】猶有觀焉故曰其在後乎【因觀文以博占故言猶有觀非在已之言故知其子孫】風行而著於土故曰其在異國乎若在異國必姜姓也姜大嶽之後也【姜姓之先為堯四嶽】山嶽則配天物莫能兩大陳衰此其昌乎【變而象艮故知當興於大嶽之後得大嶽之權則有配天之大功故知陳必衰】及陳之初亡也【昭八年楚滅陳】陳桓子始大於齊【桓子敬仲五世孫陳無宇】其後亡也【哀十七年楚復滅陳】成子得政【成子陳常也敬仲八世孫陳完有禮於齊子孫世不亡德德協于卜故傳備言其終始卜筮者聖人所以定猶豫決疑似因生義教者也尚書洪範通龜筮以同卿士之數南蒯卜亂而遇元吉惠伯答以忠信則可臧會卜僭遂獲其應丘明故舉諸縣驗於行事者以示來世而君子志其善者遠者他皆倣此莊二十二左氏傳】成季之之將生也桓公使卜楚丘之父卜之【卜楚丘魯掌卜大夫】曰男也其名曰友在公之右【在右言用事】間于兩社為公室輔【兩社周社亳社兩社之間朝廷執政所在】季氏亡則魯不昌又筮之遇大有【乾下離上大有】之乾【乾下乾上乾大有六五變而為乾】曰同復于父敬如君所【筮者之辭也乾為君父離變為乾故曰同復于父見敬與君同】及生有文在其手曰友遂以命之【遂以為名閔二左氏傳】晉獻公欲以驪姬為夫人卜之不吉筮之吉公曰從筮卜人曰筮短龜長不如從長【物生而

後有象象而後有滋滋而後有數龜象筮數故象長數短】且其繇曰專之渝攘公之瑜【繇卜兆辭變也攘除也瑜變也言變乃除公之美】一薰一蕕十年尚猶有臭【薰香草蕕臭草十年有臭言善易消惡難除】必不可弗聽【僖四年左氏傳】狐偃言於晉侯曰求諸侯莫如勤王【勤納王也】使卜偃卜之曰吉遇黃帝戰于阪泉之兆【黃帝與神農之後姜氏戰于阪泉之野勝之今得其兆故以為吉】公曰吾不堪也【文公自以為已當此兆故曰不堪】對曰周禮未改今之王古之帝也【言周德雖衰其命未改今之周王自當帝兆不謂晉】公曰筮之筮之遇大有【乾下離上大有】之睽【兌下離上睽大有九三變而為睽】曰吉遇公用享于天子之卦【大有九三爻辭也三為三公而得位變而為兌兌為說得位而說故能為王所宴饗也】戰克而王饗吉孰大焉【言卜筮協吉】且是卦也【方更總言二卦之義不繫于一爻】天為澤以當日天子降心以逆公不亦可乎【乾為天兌為澤乾變為兌而上當離離為日日之在天垂曜在澤天子在上說心在下是降心逆公之象】大有去睽而復亦其所也【言去睽卦還論大有亦有天子降心之象乾尊離卑降尊下同亦其義也】僖二十五年左氏傳】晉趙鞅卜救鄭遇水適火【水火之兆】占諸史趙史墨史龜【皆晉史】史龜曰是謂沈陽【火陽得水故沈】可以興兵【兵陰類也故可以興兵】利以伐姜不利子商【姜齊姓子商謂宋】伐齊則可敵宋不吉史墨曰盈水名也子水位也【趙鞅姓盈宋姓子水盈坎乃行子姓又得北方水位】名位敵不可干也【二水俱盛故言不可干】炎帝為火師【神農有火瑞以火名官】姜姓其後也水勝火伐姜則可史趙曰是謂知川之滿不可游也【既盈而得水位故為如川之滿不可馮游言其波流盛】鄭方有罪不可救也【鄭以嬖寵伐人故以為有罪】救鄭則不吉不知其他【救鄭則當伐宋故不吉也】陽虎以周易筮之遇泰【乾下坤上泰】之需【乾下坎上需泰六五變】曰宋方吉不可與也【不可與戰泰六五曰帝乙歸妹以祉元吉帝乙紂父立為天子故稱帝乙陰而得中有似王者嫁妹得如其願受福祿而大吉】微子啟帝乙之元子也宋鄭甥舅也【宋鄭為婚姻甥舅之國宋為微子之後今卜得帝乙卦故以為宋吉】祉祿也若帝乙之元子歸妹而有吉祿我安得吉焉乃止【吉在彼則我伐之為不吉哀九 years 左氏傳已上兼言卜筮】獻公卜伐驪戎【獻公晉武公之子獻公詭諸也驪戎西戎之別在驪山者也其君男爵姬姓也秦曰驪邑漢高帝徙豐民于驪邑更曰新豐在京兆】史蘇占之【史蘇晉大夫占卜之史也】曰勝而不吉公曰何謂也對曰遇兆挾以銜骨齒牙為猾【遇見也挾猶會也骨所以鯁刺人也猾弄也齒牙謂兆端左右釁折有似齒牙中有從畫故銜骨在口中齒牙弄之以象讒口之為害也禮卜卜師作龜大夫占色史占墨也】戎夏交捽【兆有一畫外象戎內象諸夏夏謂晉也兆端會齒牙交有似捽捽交對也】交捽是交勝也臣故云【言晉勝戎戎復勝晉】且懼有口【齒牙銜骨皆在口也】憯民國移焉【憯離也】公不聽遂伐驪戎克之獲驪姬以歸有寵立以為夫人【驪姬驪戎君之女也】史蘇告大夫曰夫有男戎必有女戎【戎兵也女兵言其禍猶兵也】且其兆云挾以銜骨齒牙為猾我卜伐驪龜往離散以應我【應答也往令告龜辭往伐驪也其兆離散不吉】夫若是賊之兆也非吾宅也【賊賊敗國家之兆也宅居也非吾所安居也】離則有之【國分離也】不跨其國可謂挾乎【跨猶據也言驪姬不據有晉國可謂內外挾乎】不得其君能銜骨乎【言驪姬不得志於其君不能銜骨以害人也】若跨其國而得其君雖逢齒牙以猾其中其誰云弗從【言驪姬若能跨據晉國而得志於君齒牙之猾雖為中害國人逢之其誰有不從言必從也】諸夏從戎非敗而何從政者不可以不戒【國語晉語】鄭皇耳帥師侵衛孫文子卜追之獻兆於定姜姜氏問繇【繇兆辭】

曰兆如山陵有夫出征而喪其雄姜氏曰征者喪雄禦寇之利也衛人追之獲鄭皇耳【襄卜年左氏傳】臧昭伯如晉臧會竊其寶龜僂句【僂句龜所出地名】以卜為信與僭僭吉【僭不信也】臧氏老將如晉問【問昭伯起居】會諸往【代家老行】昭伯問家故盡對【故事也】及內子與母弟叔孫則不對【內子昭伯妻不對若有他故】再三問不對歸及郊會逆問又如初【又不對】至次于外而察之皆無之執而戮之逸奔郕郕魴假使為賈正焉計於季氏【送計簿於季氏】臧氏使五人以戈楯伏諸桐汝之門【桐汝里名】會出逐之反奔執諸季氏中門之外平子怒曰何故以兵入吾門拘藏氏老季臧有惡【相怨惡】及昭伯從公平子立臧會【立以為臧氏後】會曰僂句不余欺也【傳言卜筮之驗善惡由人】昭二十五年左氏傳】衛侯貞卜【正卜夢之吉凶】其繇曰如魚窺尾【窺赤也魚勞則尾赤】衡流而方羊裔焉【橫流方羊不能自安裔水邊言衛侯將若此魚】大國滅之將亡闔門塞竇乃自後踰【此皆繇辭】晉復伐衛衛人出莊公而與晉平衛侯入欲逐石圃未及而難作公閉門而請弗許踰于北方而隊折股【終如卜言乃自後踰哀十七年左氏傳】楚右司馬子國之卜也觀瞻曰如志【子國未為令尹時卜為右司馬得吉兆如其志觀瞻楚開卜大夫觀從之後】故命之【命以為右司馬】及巴師至將卜帥王曰寧如志何卜焉【寧子國也】使帥師而行敗巴師君子曰惠王知志【知用其意】夏書曰官占惟能蔽志昆命于元龜【逸書也官占卜筮之官蔽斷也昆後也言當先斷意後用龜也】其是之謂乎志曰聖人不煩卜筮惠王其有焉【不疑故不卜也】哀十八年左氏傳已上卜】畢萬筮仕於晉遇屯【震下坎上屯】之比【坤下】

【坎上比屯初九變而為比】辛廖占之曰吉【辛廖晉大夫】屯固比入吉孰大焉其必蕃昌【屯險難所以為堅固比親密所以得入】震為土【震變為坤】率從馬【震為車坤為馬】足居之【震為足】兄長之【震為長男】母覆之【坤為母】衆歸之【坤為衆】六體不易【初一爻變有此六義不可易也】合而能固安而能殺公侯之卦也【比合屯固坤安震殺故曰公侯之卦】公侯之子孫必復其始【畢萬公高之後傳為魏之子孫衆多張本閔元年左氏傳】秦伯伐晉卜徒父筮之吉【徒父秦之掌龜卜者卜人而用筮不能通三易之占故據其所見雜占而言之】涉河侯車敗詰之【秦伯之軍涉河則晉侯車敗也秦伯不解謂敗在已故詰之】對曰乃大吉也三敗必獲晉君其卦遇蠱【巽下艮上蠱】曰千乘三去三去之餘獲其雄狐夫狐蠱必其君也【於周易利涉大川往有事也亦秦勝晉之卦也今此所言蓋卜筮書雜辭以狐蠱為君其義欲以喻晉惠公其象未聞】蠱之貞風也其悔山也【內卦為貞外卦為悔巽為風秦象艮為山晉象】歲云秋矣我落其實而取其材所以克也【周九月夏之七月孟秋也艮為山山有木今歲已秋風吹落山木之實則材為人所取】實落材亡不敗何待【僖十五年左氏傳】初晉獻公筮嫁伯姬於秦遇歸妹【兌下震上歸妹】之睽【兌下離上睽歸妹上六變而為睽】史蘇占之曰不吉【史蘇晉卜筮之史】其繇曰土剗羊亦無盍也女承筐亦無貺也【周易歸妹上六爻辭也盍血也貺賜也剗羊土之功承筐女之職上六無應所求不獲故下剗無血上承無實不吉之象也離為中女震為長男故稱土女】西鄰責言不可償也【將嫁女于西而遇不吉之卦故知有責讓之言不可報償】歸妹之睽猶無相也【歸妹女嫁之卦睽乖離之象故曰無相相助也】震之離亦離之震【二卦變而氣相通】為雷為火為嬴敗姬【嬴秦姓姬晉姓震為雷離為火火動熾而害其母女嫁反害其家之象故曰為嬴敗姬】車說其輹火焚其旗不利行師敗于宗丘【輹

車下縛也丘猶邑也震為車離為火上六爻在震則無應故車脫輓在離則失位故火焚旗言皆失車火之用也車敗旗焚故不利行師火還害母故敗不出國近在宗邑】歸妹睽孤寇張之弧【此睽上九爻辭也處睽之極故曰睽孤失位孤絕故遇寇難而有弓矢之警皆不吉之象】姪其從姑【震為木離為火火從木生離為震妹於火為姑謂我姪者我謂之姑謂子圉質秦】六年其逋逃歸其國而棄其家【逋亡也家謂子圉歸懷嬴】明年其死於高梁之墟【惠公死之明年文公入殺懷公于高梁高梁晉地在平陽楊氏縣西南凡筮者用周易則其象可推非此而往則臨時占者或取于象或取于氣或取于時日王相以成其占若盡附會以爻辭則構虛而不經故略言其歸趣他皆放此】及惠公在秦曰先君若從史蘇之占吾不及此夫韓簡侍曰龜象也筮數也物生而後有象象而後有滋滋而後有數先君之敗德及可數乎史蘇是占勿從何益【言龜以象示筮以數告象數相因而生然後有占占所以知吉凶不能變吉凶故先君敗德非筮數所生雖復不從史蘇不能益禍同上】公子重耳親筮之曰尚有晉國【蓍曰筮尚上也命筮之辭也禮曰某子尚享之】得貞屯悔豫皆八也【內曰貞外曰悔震下坎上屯坤下震上豫得此兩卦震在屯為貞在豫為悔八謂震兩陰爻在貞在悔皆不動故曰皆八謂爻無為也】筮史占之皆曰不吉【筮史筮人掌以三易辨九筮之名一夏連山二殷歸藏三周易以連山歸藏占此兩卦皆不吉】閉而不通爻無為也【閉壅也震為動動遇坎坎為險阻閉塞不通無所為也】司空季子曰吉是在易皆利建侯【建立也以周易占之二卦皆吉也屯初九曰利建侯豫大象曰利建侯行師吉】不有晉國以輔王室安能建侯我命筮曰尚有晉國筮告我曰利建侯得國之務也吉孰大焉【務猶趨也】震車也【易坤為大車震為動今云車者車亦動聲象雷其為小車乎】坎水也坤土也屯厚也豫樂也車班外內順以訓之【車雷也班徧也徧外內者謂屯之內有震豫之外亦有震坤順也豫內為坤屯二與四亦為坤】泉原以資之【資財也屯三至五豫二至四皆有艮象豫三至五皆有坎象艮山坎水水在山上為泉源流而不竭也】土厚而樂其實不有晉國何以當之【屯豫皆有坤象重坤故厚豫為樂當應也】震雷也車也坎勞也水也衆也【易以坤為衆坎為水水亦衆之類故云】主雷與車【內為主也】而尚水與衆【坎象皆在上故尚水與衆】車有震武也【震威也東聲軒隆象有威武】衆而順文也【坤為衆為順為文象有文德為衆所歸】文武具厚之至也故曰屯【屯厚也】其繇曰元亨利貞勿用有攸往利建侯【繇卦辭也亨通也貞正也攸所也往之也小人勿用有所之君子則利建侯行師】主震雷長也故曰元【內為主震為長男為雷雷為諸侯故曰元元善之長也】衆而順嘉也故曰亨【嘉善也衆順服善故曰亨亨嘉之會也】內有震雷故利貞【屯內有震也賈侍中云震以動之利也侯以正國貞也利義之和也貞事之幹也】車上水下必伯【車震也水坎也車動而上威也水動而下順也有威而衆從故必伯也】小事不濟壅也故曰勿用有攸往【濟成也小事小人之事也壅震動而遇坎坎為險阻故曰勿用有所往】一夫之行也【一夫一人也易曰震一索而得男故曰一夫又曰震為足故為行也】衆順而有武威故曰利建侯【覆述上事】坤母也震長男也母老子彊故曰豫【豫樂也】其繇曰利建侯行師居樂出威之謂也【居樂母在內也出威震在外也居樂故利建侯出威故利行師】是二者得國之卦也【二者屯豫也】董因迎公於河【董因晉大夫】公問焉曰吾其濟乎對之臣筮之得泰之八【乾下坤上泰遇泰無動爻筮為侯泰三至五震為侯陰爻不動其數皆八故得泰之八與貞屯悔豫皆八義同】曰是謂天地配享小往大來【陽下陰升故曰配享小喻子圉大喻文公陰在外為小往陽在內為大來】今及之矣何不濟之有【晉語】晉成公之歸也晉筮之【成

公晉文之庶子成公黑臀也歸者自周歸于晉趙穿殺靈公趙盾逆公子黑臀于周而立之著曰筮筮立成公】遇乾之否曰配而不終君三出焉【乾上乾下乾坤下乾上否乾初九九二九三變而之否也乾天也君也故曰配配先君也不終子孫不終為君也乾下變為坤坤地也臣也天地不交曰否變有臣象三爻故三世而終上有乾乾天子也五亦天子五體不變因天子國也三爻有三變故君三出于國周語】晉楚遇於鄢陵公筮之史曰吉其卦遇復【震下坤上復無變】曰南國蹇射其元王中厥目【此卜者辭也復陽長之卦陽氣起于南行推陰故曰南國蹇也南國勢蹇則離受其咎離為諸侯又為目陽氣激南飛矢之象故曰射其元王中厥目】國蹇王傷不敗何待【成十六年左氏傳】穆姜薨於東宮【大子宮也穆姜淫僑如欲廢成公故徙居東宮事在成十六年】始往而筮之遇艮之八【艮下艮上艮周禮大卜掌三易然則雜用連山歸藏周易二易皆以七八為占故言遇艮之八】史曰是謂艮之隨【震下兌上隨史疑占易遇八為不利故更以周易占變爻得隨卦而論之】隨其出也【史謂隨非閉固之卦】君必速出姜曰亡【亡猶無也】是於周易曰隨元亨利貞無咎【易筮皆以變者占遇一爻變義異則論彖故姜亦以彖為占也史據周易故指言周易以折之】元體之長也亨嘉之會也利義之和也貞事之幹也體仁足以長人嘉德足以合禮利物足以和義貞固足以幹事然固不可誣也是以雖隨無咎【言不誣四德乃遇隨無咎明無四德者則為淫而相隨非吉事】今我婦人而與於亂固在下位【婦人卑於丈夫】而有不仁不可謂元不靖國家不可謂亨作而害身不可謂利棄位而姤【姤淫之別名】不可謂貞有四德者隨而無咎我皆無之豈隨也哉我則取惡能無咎乎必死於此弗得出矣【傳言穆姜辯而不德襄九:left氏傳】齊棠公之妻東郭偃之姊也棠公死崔武子弔焉見棠姜而美之使偃取之【為已取也】武子筮之遇困【坎下兌上困】之大過【巽下兌上大過困六三變為大過】史皆曰吉【阿崔子】示陳文子文子曰夫從風【坎為中男故曰夫變而為巽故曰從風】風隕妻不可娶也【風能隕落物者變而隕落故曰妻不可娶】且其繇曰困于石據于蒺藜入于其宮不見其妻凶【困六三爻辭】困于石往不濟也【故為險為水水之險者石不可以動】據于蒺藜所恃傷也【坎為險兌為澤澤之生物而險者蒺藜恃之則傷】入于其宮不見其妻凶無所歸也【易曰非所困而困名必辱非所據而據自必危既辱且危死其將至妻其可得見耶今卜昏而遇此卦六三失位無應則喪其妻失其所歸也】崔子曰嫠也何害先夫當之矣【寡婦曰嫠言棠公已當此凶】遂取之【襄二十五:left氏傳】穆子之生也莊叔以周易筮之【莊叔穆子父得臣也】遇明夷【離下坤上明夷】之謙【艮下坤上謙明夷初九變為謙】以示卜楚丘【楚丘卜人姓名】曰是將行【行出奔】而歸為子祀【奉祭祀】以讒人入其名曰牛卒以餒死明夷日也【離為明夷傷也日明傷】日之數十【甲至癸】故有十時亦當十位自王已下其二為公其三為卿【日中當土食時當公平旦為卿雞鳴為士夜半為皁人定為輿黃昏為隸日入為僚晡時為僕日昃為臺隅中日出闕不在第尊王公曠其位】日上其中【日中盛明故以當王】食日為二【公位】旦日為三【卿位】明夷之謙明而未融其當旦乎【融朗也離在坤下日在地中之象又變為謙謙道卑退故曰明而未融日明未融故曰其當旦乎】故曰為子祀【莊叔卿也卜豹為卿故知為子祀】日之謙當鳥故曰明夷于飛【離為日為鳥離變為謙日光不足故當鳥鳥飛行故曰于飛】明而未融故曰垂其翼【於日為未融於鳥為垂翼】象日之動故曰君子于行【明夷初九得位有應君子象也在明傷之世居謙下之位故將辟難而行】當三在旦故曰三日不食【旦位在三又非食時故曰三日不食】離火也艮山也離為火火焚山

山敗【離艮合體故】於人為言【艮為言】敗言為讒【為離所焚故言敗】故曰有攸往主人有言言必讒也【離變為艮故言有所往往而見焚故主人有言言而見敗故必讒言】純離為牛【易離上離下離畜牝牛吉故言純離為牛】世亂讒勝勝將適離故曰其名曰牛【離焚山則離勝譬世亂則讒勝山焚則離獨存故知名牛也豎牛非牝牛故不吉】謙不足飛不翔【謙道冲退故飛不遠翔】垂不峻翼不廣【峻高也翼垂下故不能廣遠】故曰其為子後乎【不遠翔故知不遠去】吾子亞卿也抑少不終【旦日正卿之位莊叔父子世為亞卿位不足以終盡卦體蓋引而致之昭五年左氏傳】衛襄公夫人姜氏無子嬖人嬖始生孟縶孔成子夢康叔謂已立元【成子衛卿孔達之孫烝鉏也元孟縶弟夢時元未生】余使羈之孫圉與史苟相之【羈烝鉏子苟史朝子】史朝亦夢康叔謂已余將命而子苟與孔烝鉏之曾孫圉相元史朝見成子告之夢夢協【協合也】嬖始生子曰元孟縶之足不良弱行【跛也】孔成子以周易筮之曰元尚享衛國主其社稷【令蓍辭】遇屯【震下坎上屯】又曰余尚立縶尚克嘉之【嘉善也】遇屯之比【坤下坎上比屯初九爻變】以示史朝史朝曰元亨又何疑焉【周易曰屯元亨】成子曰非長之謂乎【言屯之元亨謂年長非謂名元】對曰康叔名之可謂長矣【善之長也】孟非人也將不列於宗不可謂長【足跛非全人不可列為宗主】且其繇曰利建侯【繇卦辭】嗣吉何建建非嗣也【嗣子有常位故無所卜又無所建今以位不定卜嗣得吉則當從吉而建之也】二卦皆云【謂再得屯卦皆有建侯之文】子其建之康叔命之二卦告之筮襲於夢武王所用也弗從何為【外傳曰大誓曰朕夢協朕卜襲于休祥戎商必克此武王辭】弱足者居【跛則偏倚居其家不能行】侯主社稷臨祭祀奉民人事鬼神從會朝又焉得居各以所利不亦可乎【孟跛利居元吉利建】故孔成子立靈公【昭七年左氏傳】南蒯將叛枚筮之【不指其事汎卜吉凶】遇坤【坤下坤上坤】之比【坤下坎上比坤六五爻變】曰黃裳元吉【坤六五爻辭】以為大吉也示子服惠伯曰即欲有事何如惠伯曰吾嘗學此矣忠信之事則可不然必敗外彊內溫忠也【坎險故彊坤順故溫彊而能溫所以為忠】和以率貞信也【水和而土安正和正信之本也】故曰黃裳元吉黃中之色也裳下之飾也元善之長也中不忠不得其色【言非黃】下不共不得其飾【不為裳】事不善不得其極【失中德】外內倡和為忠【不相違也】率事以信為共【率猶行也】供養三德為善【三德謂正直剛克柔克也】非此三者弗當【非忠信善不當此卦】且夫易不可以占險將何事也且可飾乎【夫易猶此易謂黃裳元吉之卦問其何事欲令從下之師】中美能黃上姜為元下美則裳參成可筮【參美盡備吉可如筮】猶有闕也筮雖吉未也【有闕謂不參成昭十二年左氏傳已上筮】

大衍之數五十其用四十有九分而為二以象兩掛一以象三揲之以四以象四時歸奇于扚以象閏故再扚而後掛四營而成易十有八變而成卦八卦而小成【詳見下】

右筮法 天一地二天三地四天五地六天七地八天九地十【此簡本在第十章之首程子曰宜在此今從之此言天地之數陽奇陰偶即所謂河圖者也其位一六居下二七居上三八居左四九居右五十居中就此章而言之則中五為衍母次十為衍子次一二三四為四象之位次六七八九為四象之數二老位于西北二少位于東南其數則各以其類交錯於外也】天數五地數五五位相得而各有合天數二十有五地數三十凡天地之數五十有五此所以成變化而行鬼神也【此簡本在大衍之後今按宜在此天數五者一三五七九皆奇也地數五

者二四六八十皆耦也相得謂一與二三與四五與六七與八九與十各以奇耦為類而自相得有合謂一與六二與七三與八四與九五與十皆兩相合二十有五者五奇之積也三十者五耦之積也變化謂一變生水而六化成之二化生火而七變成之三變生水而八化成之四化生金而九變成之五變生土而十化成之鬼神謂凡奇耦生成之屈伸往來者】大衍之數五十其用四十有九分而為二以象兩掛一以象三揲之以四以象四時歸奇于扚以象閏五歲再閏故再扚而後掛【大衍之數五十蓋以河圖中宮天五乘地十而得之至用以筮則又止用四十有九蓋皆出於理勢之自然而非人之知力所能損益也兩謂天地也掛懸其一于左手小指之間也三三才也揲閒而數之也奇所揲四數之餘也扚勒于左手中三指之兩間也閏積月之餘日而成月者也五歲之間再積日而再成月故五歲之中凡有再閏然後別起積分如一掛之後左右各一揲而一扚故五者之中凡有再扚然後別起一掛也】乾之策二百一十有六坤之策百四十有四凡三百有六十當期之日【凡此策數生于四象蓋河圖四面太陽居一而連九少陰居二而連八少陽居三而連七太陰居四而連六揲蓍之法則通計三變之餘去其初掛之一凡四為奇凡八為耦奇圓圍三耦方圍四三用其全四用其半積而數之則為六七八九而第三變揲數策數亦皆符會蓋餘三奇則九而其揲亦九策亦四九三十六是為居一之大陽餘二奇一耦則八而其揲亦八策亦四八三十二是為居二之少陰二耦一奇則七而其揲亦七策亦四七二十八是為居三之少陽三耦則六而其揲亦六策亦四六二十四是為居四之老陰是其變化往來進退離合之妙皆出自然非人之所能為也少陰退而未極乎虛少陽進而未極乎盈故此獨以老陽老陰計乾坤六爻之策數餘可推而知也期周一歲也凡三百六十五日四分日之一此特舉成數而槩言之】二篇之策萬有一千五百二十當萬物之數也【二篇謂上下經凡陽爻百九十二得六千九百一十二策陰爻百九十二得四千六百八策合之得此數】是故四營而成易十有八變而成卦【四營謂分二掛一揲四歸奇也易變易也謂一變也三變成爻十八變則成六爻也】八卦而小成【謂九變而成三畫得內卦也】引而伸之觸類而長之天下之能事畢矣【謂已成六爻而視其爻之變與不變以為動靜則一卦可變而為六十四以定吉凶凡四千九十六卦也】顯道神德行是故可與酬酢可與佑神矣【道因辭顯行以數神酬酢謂應對祐神謂助神化之功】子曰知變化之道者其知神之所為乎【變化之道即上文數法是也皆非人之所能為故夫子歎之而門人加子曰以別上文也此章言天地大衍之數揲蓍求卦之法然亦略矣意其詳具于大卜筮人之官而今不可考耳其可推者啟蒙備之易繫辭傳】朱子曰大衍之數五十而蓍一根百莖可當大衍之數者二故揲蓍之法取五十莖為一握置其一不用以象大極而其當用之策凡四十有九蓋兩儀體具而未分之象也四十有九蓍信手中分各置一手以象兩儀而掛右手一策于左手小指之間以象三才遂以四揲左手之策以象四時而歸其餘數於左手第四指間以象閏又以四揲右手之策而再歸其餘數於左手第三指間以象再閏【五歲之象掛一一也揲左二也扚左三也揲右四也扚右五也】是謂一變其掛扚之數不五則九得五者三所謂奇也【五除掛一即四以四約之為一故為奇即兩儀之陽數也】得九者一所謂偶也【九除掛一即八以四約之為二故為偶即兩儀之陰數也】一變之後除前餘數復合其見存之策或四十或四十四分掛揲歸如前法是謂再變其掛扚者不四則八得四者二所謂奇也【不去掛一餘同前義】得八者二所謂偶也【不去掛一餘同前義】再變之後除前兩次餘數復合其見存之策或四十或三十六或三十二分掛揲歸如前法是謂三變其掛扚者如再變例三變既畢乃合三變視其掛扚之奇偶以分所遇陰陽老少是為一爻三

奇為老陽者十有二掛扐之數十有三除初掛之一為十有二以四約而三分之為一者三一奇象圓而圍三故三一之中各復有三而積三三之數則為九過揲之數三十有六以四約之亦得九焉【掛扐除一四分四十有八而得其一也一其十二而三其四也九之母也過揲之數四分四十八而得其三也三其十二而九其四也九之子也皆徑一而圍三也】即四象太陽居一含九之數也兩奇一偶以偶為主為少陰者凡二十有八掛扐之數十有七除初掛之一為十有六以四約而三分之為一者二為二者一一奇象圓而用其全故二一之中各復有三一偶象方而用其半故一二之中復有二焉而積二二一二之數則為八過揲之數三十有二以四約之亦得八焉【掛扐除一四其四也自一其十二者而進四也八之母也過揲之數八其四也自三其十二者而退四也八之子也】即四象少陰居二含八之數也兩偶一奇以奇為主為少陽者凡二十掛扐之數二十有一除初掛之一為二十以四約而三分之為二者二為一者一二偶象方而用其半故二二之中各復有二一奇象圓而用其全故一一之中復有三焉而積二二一三之數則為七過揲之數二十有八以四約之亦得七焉【掛扐除一五其四也自兩其十二者而退四也七之母也過揲之數七其四也自兩其十二者而進四也七之子也】即四象少陽居三含七之數也三偶為老陰者四掛扐之數二十有五除初掛之一為二十有四以四約而三分之為二者三二偶象方而用其半故三二之中各復有二而積三二之數則為六過揲之數亦二十有四以四約之亦得六焉【掛扐除一六之母也過揲之數六之子也四分四十有八而各得其二也兩其十二而六其四也皆圍四而用半也】即四象大陰居四含六之數也一爻已成再合四十九策復分掛揲歸以成一變每三變而成一爻並如前法【易學啟蒙】凡卦六爻皆不變則占本卦彖辭而以內卦為貞外卦為悔【彖辭為卦下之辭孔成子筮立衛公子元遇屯曰利建侯秦伯伐晉筮之遇蠱曰貞風也其悔山也】一爻變則以本卦變爻辭占【沙隨程氏曰畢萬遇屯之比初九變也蔡墨曰乾之同人九二變也晉文公遇大有之睽九三變也陳敬仲遇觀之否六四變也南蒯遇坤之比六五變也晉獻公遇歸妹之睽上六變也】二爻變則以本卦二變爻辭占仍以上爻為主【經傳無文今以例推之當如此】三爻變則占本卦及之卦之彖辭而以本卦為貞之卦為悔前十卦主貞後十卦主悔【凡三爻變者通二十卦沙隨程氏曰晉公子重耳筮得國遇貞屯悔豫皆八蓋初與四五凡三爻變也初與五用九變四用六變其不變者二三上在兩卦皆為八故云皆八而司空季子占之曰皆利建侯】四爻變則以之卦二不變爻占仍以下爻為主【經傳亦無文今以例推之當如此】五爻變則以之卦不變爻占【穆姜往東宮筮遇艮之八史曰是謂艮之隨蓋五爻皆變惟二得八故不變也法宜以係小子失丈夫為占而史妄引隨之彖辭以對則非也】六爻變則乾坤占二用餘卦占之卦彖辭【蔡墨曰乾之坤曰見羣龍无首吉是也然羣龍无首即坤之牝馬先迷也坤之利永貞即乾之不言所利也】於是一卦可變六十四卦而四千九十六卦在其中矣【同上】

大卜掌三夢之法一曰致夢二曰觭夢三曰咸陟【夢者人精神所寤可占者致夢言夢之所至夏后氏作焉咸皆也陟之言得也讀如王德翟人之德言夢之皆得周人作焉杜子春云觭讀為奇偉之奇其字直當為奇玄謂觭讀如諸戎掎之之掎亦得也亦言夢之所得殷人作焉】其經運十其別九十【運或為緡當為輝是眡祲所掌十輝也王者於天日也夜有夢則畫視日旁之氣以占其吉凶凡所占者十輝每輝九變此術今亡】以八命者贊三兆三易三夢之占【春官】占夢掌其歲時觀天地之會辨陰陽之氣【其歲時今歲四時也天地之會建

厭所處之日辰陰陽之氣休王前後】以日月星辰占六夢之吉凶【日月星辰謂日月之行及合辰所在春秋昭三十一年十二月辛亥朔日食之是夜也晉趙簡子夢童子僕而轉以歌旦而日食占諸史墨對曰六年及此月也吳其入郢手終亦弗克入郢必以庚辰日月在辰尾庚午之日月始有適火勝金故弗克此以日月星辰占夢者其術則今八會其遺象也用占夢則亡】一曰正夢【無所感動平安自夢】二曰噩夢【杜子春云噩當為驚愕之愕謂驚愕而夢】三曰思夢【覺時所思念之而夢】四曰寤夢【覺時道之而夢】五曰喜夢【喜悅而夢】六曰懼夢【恐懼而夢】季冬聘王夢獻吉夢于王王拜而受之【聘問也季冬日窮于次月窮于紀星回于天數將幾終於是發幣而問焉若休慶之云爾因獻羣臣之吉夢於王歸美焉詩云牧人乃夢衆維魚矣旄維旟矣此所獻吉夢】乃舍萌于四方以贈惡夢【杜子春讀萌為明又云其字當為明明謂毆疫也謂歲竟逐疫置四方書亦或為明玄謂舍讀為釋舍萌猶釋菜也古書釋菜釋奠多作舍字萌菜始生也贈送也欲以新善去舊惡 同上】

右占夢 王曰朕夢協朕卜襲于休祥戎商必克【襲重也言我之夢協我之卜重有休祥之應知伐商而必勝之也 泰誓】乃寢乃興乃占我夢吉夢維何維熊維罴維虺維蛇【祝其君安其室居夢兆而有祥亦頌禱之辭也】大人占之維熊維罴男子之祥維虺維蛇女子之祥【大人大卜之屬占夢之官也熊罴陽物在山彊力壯毅男子之祥也虺蛇陰物穴處柔弱隱伏女子之祥也 或曰夢之有占何也曰人之精神與天地陰陽流通故晝之所為夜之所夢其善惡吉凶各以類至是以先王建官設屬使之觀天地之會辨陰陽之氣以日月星辰占六夢之吉凶獻吉夢贈惡夢其於天人相與之際察之詳而敬之至矣故曰王前巫而後史宗祝瞽侑皆在左右王中心無為也以守至正 小雅斯干】 牧人乃夢衆維魚矣旄維旟矣大人占之衆維魚矣實維豐年旄維旟矣室家溱溱【占夢之說未詳溱溱衆也或曰衆謂人也旄郊野所建統人少旟州里所建統人多蓋人不如魚之多旄所統不如旟所統之衆故夢人乃是魚則為豐年旄乃是旟則為人衆 小雅斯干】

禮書綱目卷七十三

卷七十四

欽定四庫全書

禮書綱目卷七十四 婺源江永撰

禮記 通禮二十七

補

五載一巡守修五禮【集傳曰五禮吉凶軍賓嘉也修之所以同天下之風俗 舜典】帝曰咨四岳有能典朕三禮僉曰伯夷帝曰俞咨伯汝作秩宗夙夜惟寅直哉惟清伯拜稽首讓于夔龍帝曰俞往欽哉【典主也三禮祀天神享人鬼祭地祇之禮也伯夷臣名姜姓秩序也宗祖廟也秩宗主叙次百神之官而專以秩宗名之者蓋以宗廟為主也周禮亦謂之宗伯而都家皆有宗人之名以掌祭祀之事亦此意也夙早寅敬畏也直者心無私曲之謂人能敬以直內不使少有私曲則其心潔清而無物欲之污可以交於神明矣夔龍二臣名同上】 臯陶曰天叙有典勅我五典五惇哉天秩有禮自我五禮有庸哉同寅協恭和衷哉【叙者君臣父子兄弟夫婦朋友之倫叙也秩者尊卑貴賤等級隆殺之品秩也勅正惇厚庸常也有庸馬本作五庸衷降衷之衷即所謂典禮也典禮雖天所叙秩然正之使叙倫而益厚用之使品秩而有常則在我而已故君臣當同其寅畏協其恭敬誠一無間融會流通而民彝物則各得其正所謂和衷也 臯陶謨】 宗伯掌邦禮治神人和上下【詳見職官下】 乃立春官宗伯使帥其屬而掌邦禮以佐王和邦國【注見職官上】 大宗伯之職掌建邦之天神人鬼地示之禮以佐王建保邦國【注見祭法】 以吉禮事邦國之鬼神示【事謂祀之祭之享之吉禮之別十有二】 以禋祀祀昊天上帝以實柴祀日月星辰以禋燎祀司中司命飆師雨師以血祭祭社稷五祀五嶽以貍沈祭山林川澤以醯辜祭四方百物以肆獻裸享先王以饋食享先王以祠春享先王以禴夏享先王以嘗秋享先王以烝冬享先王【注並見祭法】 以凶禮哀邦國之憂【哀謂救患分裁凶禮之別有五】 以喪禮哀死亡【注見弔禮】 以荒禮哀凶札以弔禮哀禍裁以禴禮哀圍敗以恤禮哀寇亂【注並見災變禮】 以賓禮親邦國【親謂使之相親附賓禮之別有八】 春見曰朝夏見曰宗秋見曰覲冬見曰遇時見曰會殷見曰同【注見覲禮及會同篇】 時聘曰問殷頤曰視【注見遣使禮】 以軍禮同邦國【同謂威其不協僭差者軍禮之別有五】 大師之禮用衆也【注見征伐】 大均之禮恤衆也大田之禮簡衆也大役之禮任衆也大封之禮合衆也【注並見田役】 以嘉禮親萬民【嘉善也因人心之所善者而為之制嘉禮之別有六】 以飲食之禮親宗族兄弟【注見嘉事雜記】 以冠昏之禮親成男女【注見冠昏記】 以賓射之禮親故舊朋友【注見三射記】 以饗燕之禮親四方之賓客【注見饗食燕記】 以脤膾之禮親兄弟之國以賀慶之禮親異姓之國【注並見嘉事雜記】 小宗伯掌五禮之禁令與其用等【注見名器】 凡國之大禮

佐大宗伯凡小禮掌事如大宗伯之儀 肆師凡國之大事治其禮儀以佐宗伯【治謂如今每

事者更奏白王禮也故書儀為義鄭司農云義讀為儀古者書儀但為義今時所謂義為誼】
凡國之小事治其禮儀而掌其事如宗伯之禮
小史凡國事之用禮法者掌其小事【並春官】
大宰掌建邦之六典三曰禮典以和邦國以統百官以諧萬民【詳政事上】
小宰以官府之六職辨邦治三曰禮職以和邦國以諧萬民以事鬼神【詳職官下】
司徒修六禮以節民性六禮冠昏喪祭鄉相見【詳見學制】
大宰以八則治都鄙五曰禮俗以馭其民【詳見封建】
土均禮俗喪紀祭祀皆以地嫩惡為輕重之法而行之掌其禁令【詳政事上】夫禮始於冠
本於昏重於喪祭尊於朝聘和於射鄉此禮之大體也【始猶根也本猶幹也鄉鄉飲酒
昏義】夫禮者所以定親疎決嫌疑別同異明是非也道德仁義非禮不成教訓正俗非禮不
備分爭辨訟非禮不決君臣上下父子兄弟非禮不定宦學事師非禮不親班朝治軍蒞官行
法非禮威嚴不行禱祠祭祀供給鬼神非禮不誠不莊【分辨皆別也宦仕也班次也蒞臨也
莊敬也學或為御】是以君子恭敬撙節退讓以明禮【撙猶趨也】鸚鵡能言不離飛鳥猩
猩能言不離禽獸今人而無禮雖能言不亦禽獸之心乎夫惟禽獸無禮故父子聚麀【聚猶
共也鹿牝曰麀】是故聖人作為禮以教人使人以有禮知自別于禽獸人有禮則安無禮則
危故曰禮者不可不學也夫禮者自卑而尊人雖負販者必有尊也而況富貴乎【負販者尤
輕佻志利宜若無禮然】富貴而知好禮則不驕不淫貧賤而知好禮則志不懼【懼猶怯惑
並曲禮】孔子曰夫禮先王以承天之道以治人之情故失之者死得之者生是故夫禮必本
於天殽於地列於鬼神【聖人則天之明因地之利取法度於鬼神以制禮下教令也既又祀
之盡其敬也教民嚴上也鬼者精魂所歸神者引物而出謂祖廟山川五祀之屬也】達於喪
祭射御冠昏朝聘【民知嚴上則此禮達於下也】故聖人以禮示之故天下國家可得而正
也【民知禮則易教】禮者君之大柄也所以別嫌明微儆鬼神考制度別仁義所以治政安
君也【疾今失禮如此為言禮之大義也柄所操以治事】故政不正則君位危君位危則大
臣倍小臣竊刑肅而俗敝則法無常法無常而禮無列禮無列則士不事也刑肅而俗敝則民
弗歸也是謂疵國【又為言政失君危之禍敗也肅駿也疵病也】故政者君之所以藏身也
【於此又遂為之言政也藏謂輝光於外而形體不見若日月星辰之】是故夫政必本於天
殽以降命【降下也殽天之氣以下教令天有運移之期陰陽之節也】命降於社之謂殽地
【謂教令由社下者也社土地之主也周禮土會之法有五地之物生】降於祖廟之謂仁義
【謂教令由祖下者大傳曰自稱率而上至於祖遠者輕仁也自祖率而下至於稱高者重義
也】降於山川之謂興作【謂教令由山川而下者也山川有草木禽獸可作器物共國事】
降於五祀之謂制度【謂教令由五祀下者五祀有中霤門戶竈行之神此始為宮室制度】
此聖人所以藏身之固也【政之行如此何用城郭溝池之為】故聖人參於天地並於鬼神
以治政也處其所存禮之序也玩其所樂民之治也【並并也謂比方之也存察也治所以樂
其事居也】故天生時而地生財人其父生而師教之四者君以正用之故君者立於無過之
地也【順時以養財尊師以教民而以治政則無過差矣易曰何以守位曰仁何以聚人曰財
】故君者所明也非明人者也君者所養也非養人者也君者所事也非事人者也故君明人
則有過養人則不足事人則失位【明猶尊也】故百姓則君以自治也養君以自安也事君
以自顯也故禮達而分定故人皆愛其死而患其生【則當為明人之道身治居安名顯則不
苟生也不義而死合義而生是不愛死患生也】聖人耐以天下為一家以中國為一人者非

意之也必知其情辟於其義明於其利達於其患然後能為之【耐古能字傳書世異古字時有存者則亦有今誤矣意心所無慮也辟開也】何謂人情喜怒哀懼愛惡欲七者弗學而能何謂人義父慈子孝兄良弟弟夫義婦聽長惠幼順君仁臣忠十者謂之人義講信修睦謂之人利爭奪相殺謂之人患【極言人事】故聖人之所以治人七情修十義講信修睦尚辭讓去爭奪舍禮何以治之【唯禮可耳】飲食男女人之大欲存焉死亡貧苦人之大惡存焉故欲惡者心之大端也人藏其心不可測度也美惡皆在其心不見其色也欲一以窮之舍禮何以哉【言人情之難知明禮之重】故人者其天地之德陰陽之交鬼神之會五行之秀氣也【言人兼此氣性純也】故天秉陽垂日星【秉猶持也言天持陽氣施生照臨下也】地秉陰竅於山川播五行於四時和而后月生也是以三五而盈三五而闕【竅孔也言地持陰氣出內於山川以舒五行於四時此氣和乃后月生而上配日若臣功成進爵位也一盈一闕屈伸之義也必三五者播五行於四時也一曰水二曰火三曰木四曰金五曰土合為十五之成數也】五行之動迭相竭也五行四時十二月還相為本也五聲六律十二管還相為宮也五味六和十二食還相為質也五色六章十二衣還相為質也【竭猶負載也言五行運轉更相為始也五聲宮商角徵羽也其管陽曰律陰曰呂布十二辰始於黃鍾管長九寸下生者三分去一上生者三分益一終於南呂更相為宮凡六十也五味酸苦辛鹹甘也和之者春多酸夏多苦秋多辛冬多鹹皆有 甘是謂六和五色六章畫績事也周禮考工記曰土以黃其象方天時變火以圜山以章水以龍鳥獸蛇雜四時五色之位以章之謂之巧也】故人者天地之心也五行之端也食味別聲被色而生者也【此言兼氣生之效也】故聖人作則必以天地為本以陰陽為端以四時為柄以日星為紀月以為量鬼神以為徒五行以為質禮義以為器人情以為田四靈以為畜【天地以至於五行其制作所取象也禮義人情其政治也四靈者其徵報也此則春秋始於元終於麟包之矣呂氏說月令而謂春秋事類相近焉量猶分也鬼神謂山川也山川助地通氣之象也器所以操事田人所桴治也禮之位賓主象天地介撰象陰陽四面之位象四時三賓象三光夫婦象日月亦是也】以天地為本故物可舉也【物天地所養生】以陰陽為端故情可睹也【情以陰陽通也】以四時為柄故事可勸也【事以四時成】以日星為紀故事可列也【事以日與星為候興作有次第】月以為量故功有藝也【藝猶才也十二月各有分猶人之才各有所長也藝或為倪】鬼神以為徒故事可守也【山川守職不移】五行以為質故事可復也【事下竟復由上始也】禮義以為器故事行有考也【考成也器利則事成】人情以為田故人以為奧也【奧猶主也田無主則荒】四靈以為畜故飲食有由也【由用也四靈與羞物為羣】先王患禮之不達於下也【患下不信也】故祭帝於郊所以定天位也祀社於國所以列地利也祖廟所以本仁也山川所以儋鬼神也五祀所以本事也故宗祝在廟三公在朝三老在學王前巫而後史卜筮瞽侑皆在左右王中心無為也以守至正【此所以達禮於下也教民尊神慎居處也宗宗人也瞽樂人也侑四輔也】故禮行於郊而百神受職焉禮行於社而百貨可極焉禮行於祖廟而孝慈服焉禮行於五祀而正法則焉【言信得其禮則神物與人皆應之百神列宿也百貨金玉之屬】故自郊社祖廟山川五祀義之修而禮之藏也【修猶飾也藏若其城郭然】是故夫禮必本於大一分而為天地轉而為陰陽變而為四時列而為鬼神其降曰命【聖人象此下之以為教令】其官於天也【官猶法也此聖人所以法於天也】夫禮必本於天【本於大一與天之義】動而之地【後法地也】列而之事【後法五祀五祀所以本事也】變而從時【後法四時】協於分藝【協合也言禮合於月之分猶人之才也】其居人也曰養【養當為義

字之誤也下之則為教令居人身為義孝經說曰義由人出】其行之以貨力辭讓飲食冠昏喪祭射御朝聘【貨摯幣庭實也力筋骸強者也不則偃罷】故禮義也者人之大端也所以講信修睦而固人之肌膚之會筋骸之束也所以養生送死事鬼神之大端也所以達天道順人情之大寶也【寶孔穴也】故唯聖人為知禮之不可以已也故壞國喪家亡人必先去其禮【言愚者之反聖人也】故禮之於人也猶酒之有藥也君子以厚小人以薄【皆得以為美味性善者醇耳】故聖王修義之柄禮之序以治人情【治者去瑕穢養菁華也】故人情者聖王之田也修禮以耕之【和其剛柔】陳義以種之【樹以善道】講學以耨之【存是去非類也】本仁以聚之【合其所盛】播樂以安之【感動使之堅固】故禮也者義之實也協諸義而協【協合也合禮於義則與義合不乖刺】則禮雖先王未之有可以義起也【以其合于義可以義起作】義者藝之分仁之節也【藝猶才也】協於藝講於仁得之者強【有義則人服之也】仁者義之本也順之體也得之者尊【有仁則人仰之也】故治國不以禮猶無耜而耕也【無以入也】為禮不本於義猶耕而弗種也【無由生也】為義而不講之以學猶種而弗耨也【苗不殖草不除】講之以學而不合之以仁猶耨而弗穫也【無以知收之豐荒也】合之以仁而不安之以樂猶穫而弗食也【不知味之甘苦】安之以樂而不達於順猶食而弗肥也【功不見也】四體既正膚革充盈人之肥也父子篤兄弟睦夫婦和家之肥也大臣法小臣廉官職相序君臣相正國之肥也天子以德為車以樂為御諸侯以禮相與大夫以法相序士以信相考百姓以睦相守天下之肥也是謂大順大順者所以養生送死事鬼神之常也【常謂皆有禮用無匱乏也車或為居】故事大積焉而不苑並行而不謬細行而不失深而通而有間連而不相及也動而不相害也此順之至也【言人皆明於禮無有蓄亂滯合者各得其分理順其職也】故明於順然後能守危也【能守自危之道也君子居安如危小人居危如安易曰危者安其位】故禮之不同也不豐也不殺也所以持情而合危也【豐殺謂天子及士名位不同禮亦異數所以拱持其情合安其危】故聖王所以順山者不使居川不使渚者居中原而弗敝也【小洲曰渚廣平曰原山者利其禽獸渚者利其魚鹽中原利其五穀使各居其所安不易其利勞敝之也民失其業則窮窮則濫】用水火金木飲食必時【用水謂漁人以時漁為梁春獻鼈蜃秋獻龜魚也用火謂司爨四時變國火以救時疾及季春出火季秋納火也用金謂卜人以時取金玉錫石也用木謂山虞仲冬斬陽木仲夏斬陰木飲食謂食齊視春時羹齊視夏時醬齊視秋時飲齊視冬時】合男女頒爵位必當年德【謂媒氏令男三十而娶女二十而嫁司士稽上任進退其爵祿也】用民必順【不奪農時】故無水旱昆蟲之災民無凶饑妖孽之疾【言大順之時陰陽和也昆蟲之災螟螽之屬也】故天不愛其道地不愛其寶人不愛其情【言嘉瑞出人情至也】故天降膏露地出醴泉山出器車河出馬圖鳳凰麒麟皆在郊輶龜龍在宮沼其餘鳥獸之卵胎皆可俯而闕也【膏猶甘也器謂若銀鬻丹甌也馬圖龍馬負圖而出也輶聚草也沼池也】則是無故【非有他事使之然也】先王能修禮以達義體信以達順故此順之實也【實猶誠也盡也並禮運】禮器是故大備大備盛德也【禮器言禮使人成器如耒耜之為用也人情以為田修禮以耕之此是也大備自耕至于食之而肥】禮釋回增美質措則正施則行【釋猶去也回邪僻也質猶性也措置也】其在人也如竹箭之有筠也如松柏之有心也二者居天下之大端矣故貫四時而不改柯易葉【箭篠也端本也四物於天下最得氣之本或柔刃於外或和澤於內用此不變傷也人之得禮亦猶然也】故君子有禮則外諧而內無怨【人協服也】故物無不懷仁鬼神饗德【懷歸也】先王之立禮也有本有文忠信禮之本也義理禮

之文也無本不立無文不行【言必外內具也】禮也者合于天時設於地財順於鬼神合于人心萬物者也【鬼神所祀祀有德也】是故天時有生也地理有宜也人官有能也物曲有利也【言皆有異】故天不生地不養君子不以為禮鬼神弗饗【天不生謂非其時物也地不養謂非此地所生】居山以魚鼈為禮居澤以鹿豕為禮君子謂之不知禮【不順其鄉之所有也】故必舉其定國之數以為禮之大經【定國之數謂地物所出多少】禮之大倫以地廣狹【謂貢賦之常差】禮之薄厚與年之上下【用年之豐凶也】是故年雖大殺衆不匡懼則上之制禮也節矣【言用之有節也殺謂穀不熟也匡猶恐也】禮時為大順次之體次之宜次之稱次之【言聖人制禮所先後也】堯授舜舜授禹湯放桀武王伐紂時也【言受命改制度】天地之祭宗廟之事父子之道君臣之義倫也【倫之言順也】社稷山川之事鬼神之祭體也【天地人之別體也】喪祭之用賓客之交義也【義之言宜也人道之宜】羔豚而祭百官皆足大牢而祭不必有餘此之謂稱也【足猶得也稱稱牲之大小而為俎此指謂助祭者耳而云百官喻衆也】諸侯以龜為寶以圭為瑞家不寶龜不藏圭不臺門言有稱也【古者貨貝寶龜大夫以下有貨耳易曰十朋之龜瑞信也諸侯執瑞孤卿以下執摯摯者謂之臺】禮有以多為貴者天子七廟諸侯五大夫三士一天子之豆二十有六諸公十有六諸侯十有二上大夫八下大夫六諸侯七介七牢大夫五介五牢天子之席五重諸侯之席三重大夫再重天子崩七月而葬五重八翼諸侯五月而葬三重六翼大夫三月而葬再重四翼此以多為貴也【豆之數謂天子朝食諸侯相食及食大夫公食大夫禮曰宰夫自東房薦豆六設于醬東北食下大而豆六則其餘著矣聘禮致饗餼於上大夫堂上八豆設于戶西則凡致饗餼堂上之豆數亦如此周禮公之豆四十其東西夾各十有二侯伯之豆三十有二其東西夾各十子男之豆二十有四其東西夾各六諸侯七介七牢者周之侯伯也大夫五介五牢者侯伯之卿使聘者也周禮上公九介七牢侯伯七介七牢子男五介五牢聘義所云上公七介侯伯五介子男三介乃謂其使者也天子葬五重者謂抗木與茵也葬者抗木在上茵在下士喪禮下篇陳器曰抗木橫三縮二加抗席三加茵用疏布緇剪有幅亦縮二橫三此士之禮一重者以此差之上公四重】有以少為貴者天子無介祭天特性天子適諸侯諸侯膳以犢諸侯相朝灌用鬱鬯無籩豆之薦大夫聘禮以脯醢天子一食諸侯再大夫士三食力無數大路繁纓一就次路繁纓七就圭璋特琥璜爵鬼神之祭單席諸侯視朝大夫特士旅之此以少為貴也【天子無介無客禮也灌獻也一食再食三食謂告飽也食力謂工商農也大路繁纓一就殷祭天之車也周禮王之五路王路繁纓十有二就金路九就象路七就革路五就木路翦繁鵠纓圭璋特朝聘以為瑞無幣帛也琥璜爵者天子酬諸侯諸侯相酬以此謂將幣也大夫特士旅之謂君揖之】有以大為貴者宮室之量器皿之度棺槨之厚丘封之大此以大為貴也有以小為貴者宗廟之祭貴者獻以爵賤者獻以散尊者舉觶卑者舉角五獻之尊門外缶門內壺君尊瓦甗此以小為貴也【凡觴一升曰爵二升曰觚三升曰觶四升曰角五升曰散五獻子男之饗禮也壺大一石瓦甗五斗缶大小未聞也易曰尊酒簋贰用缶】有以高為貴者天子之堂九尺諸侯七尺大夫五尺士三尺天子諸侯臺門此以高為貴也有以下為貴者至敬不壇埽地而祭天子諸侯之尊廢禁大夫士櫨禁此以下為貴也【廢猶去也櫨斯禁也謂之櫨者無足有似於櫨或因名云耳大夫用斯禁士用櫨禁如今方按隋長局足高三寸】禮有以文為貴者天子龍衮諸侯黼大夫黻士玄衣纁裳天子之冕朱綠藻十有二旒諸侯九上大夫七下大夫五士三此以文為貴也【此祭冕服也朱綠似夏殷禮也周禮天子五采藻】有以素為貴者至敬無文父黨無容大圭不琢大羹不和大路素而越席犧尊疏

布帛櫛杓此以素為貴也【大圭長三尺杼上終葵首琢當為篆字之誤也明堂位曰大略殷路也帛或作冪櫛木白理也】孔子曰禮不可不省也禮不同不豐不殺此之謂也蓋言稱也【省察也不同意異也】禮之以多為貴者以其外心者也【外心用心於外其德在表也】德發揚詡萬物【詡猶著也徧也】大抵物博如此則得不以多為貴乎故君子樂其發也【發猶見也樂多其外見也】禮之以少為貴者以其內心者也【內心用心於內其德在內】德產之致也精微【致致密也】觀天下之物無可以稱其德者【萬物皆天所生孰可奉薦以稱也】如此則得不以少為貴乎是故君子慎其獨也【少其牲物致誠慤】古之聖人內之為尊外之為樂少之為貴多之為美是故先王之制禮也不可多也不可寡也唯其稱也是故君子大牢而祭謂之禮匹士大牢而祭謂之饗【君子謂大夫以上饗盜竊也】管仲鏤簋朱紘山節藻梲君子以為濫矣【濫亦盜竊也鏤簋謂刻而飾之大夫刻為龜耳諸侯飾以象天子飾以玉朱紘天子冕之紘也諸侯青組紘大夫士當緇組紘纁邊梲謂之節梁上楹謂之梲宮室之飾士首本大夫達棊諸侯斷而礪之天子加密石焉無畫山藻之禮也】晏平仲祀其先人豚肩不掩豆澣衣濯冠以朝君子以為隘矣【隘猶狹陋也祀不以少牢與無田者同不盈禮也大夫士有田則祭無田則薦澣衣濯冠儉不務新】是故君子之行禮也不可不慎也衆之紀也紀散而衆亂【言二大夫皆非也紀絲縷之數有紀】禮也者猶體也【若人身體】體不備君子謂之不成成人設之不當猶不備也禮有大有小有顯有微大者不可損小者不可益顯者不可揜微者不可大也故經禮三百曲禮三千其致一也【致之言至也一謂誠也經禮謂周禮也周禮六篇其官有三百六十曲猶事也事禮謂今禮也禮篇多亡本數未聞其中事儀三千】未有入室而不由戶者【三百三千皆由誠也】君子之於禮也有所竭情盡慎致其敬而誠若【謂以少小下素為貴也若順也】有美而文而誠若【謂以多大高文為貴也】君子之于禮也有直而行也【謂若始死哭踊無節也】有曲而殺也【謂若父在為母期也】有經而等也【謂若天子以下至士庶人為父母三年】有順而討也【討猶去也謂若天子以十二公以九侯伯以七子男以五為節也】有擯而播也【擯之言芟也謂芟殺有所與也若祭者貴賤皆有所得不得使虛也】有推而進也【謂若王者之後得用天子之禮】有放而文也【謂若天子之服服日月以至黼黻】有放而不致也【謂若諸侯自山龍以下】有順而摭也【謂若君沐梁大夫沐稷士沐梁】三代之禮一也民共由之或素或青夏造殷因【一也俱趨誠也由用也素尚白黑尚青者也言所尚雖異禮則相因耳孔子曰殷因於夏禮所損益可知也周因於殷禮所損益可知也變白黑言素青者秦二世時趙高欲作亂或以青為黑黑為黃民言從之至今語猶存也】周坐尸詔侑武方其禮亦然其道一也【言此亦周所因於殷也武當為無聲之誤也方猶常也告尸行節勸尸飲食無常若孝子之為也孝子就養無方詔侑或為詔囿】君子曰禮之近人情者非其至者也【近人情者褻而遠之者敬】郊血大饗腥三獻爛一獻孰【郊祭天也大饗祫祭先王也三獻祭社稷五祀一獻祭羣小祀也爛沈肉於湯也血腥爛孰遠近備古今也尊者先遠差降而下至小祀孰而已】是故君子之于禮也非作而致其情也【作起也敬非已情也所以下彼】此有由始也【有所法也】是故七介以相見也不然則已慤三辭三讓而至不然則已蹙【已猶甚也慤蹙愿貌大愿則辭不見情無由至也】故魯人將有事於上帝必先有事於頓宮【上帝周所郊祀之帝謂蒼帝靈威仰也魯以周公之故得郊祀上帝與周同先有事於頓宮告后稷也告之者將以配天先仁也頓郊之學也詩所謂頓宮也字或為郊宮】晉人將有事於河必先有事於惡池【惡當為呼聲之誤也呼池漚夷并州川】齊人將有事於泰山必先有事於配林【配

林林名】三月繫七日戒三日宿愼之至也【繫繫牲于牢也戒散齋也宿致齋也將有祭祀之事必先敬愼如此不敢切也】故禮有擯詔樂有相步溫之至也【皆為溫藉重禮有擯詔告道賓主者也相步扶工也詔或為紹】禮也者反本修古不忘其初者也故凶事不詔朝事以樂【二者反本也哭泣由中非由人也朝廷養賢以樂樂之也】醴酒之用玄酒之尚割刀之用鸞刀之貴莞簟之安而橐鞬之設【三者古穗去實曰鞬禹貢三百里納鞬服】是故先王之制禮也必有主也【主謂本與古也】故可述而多學也【以本與古求之而已】君子曰無節於內者觀物弗之察矣【節猶驗也】欲察物而不由禮弗之得矣故作事不以禮弗之敬矣出言不以禮弗之信矣故曰禮也者物之致也【致之言至也極至也】祀事於郊敬之至也【言就而祭之不敢致也】宗廟之祭仁之至也【仁恩也父子主恩也】喪禮忠之至也【謂哭踊袒襲也】備服器仁之至也【謂小斂大斂之衣服葬之明器】賓客之用幣義之至也【謂來賻賵】故君子欲觀仁義之道禮其本也【言禮有節于內可以觀也】君子曰甘受和白受采忠信之人可以學禮苟無忠信之人則禮不虛道是以得其人之為貴也【道猶由也從也並禮器】貧者不以貨財為禮老者不以筋力為禮【禮許儉不非無也年五十始杖八十拜君命一坐再至曲禮】天下之禮致反始也致鬼神也致和用也致義也致讓也【因祭之義汎說禮也致之言至也使人勤行至於此也至于反始謂報天之屬也至于鬼神謂祭宗廟之屬也至于和用謂治民之事以足用也】故反始以厚其本也致鬼神以尊上也致物用以立民紀也致義則上下不悖逆矣致讓以去爭也合此五者以治天下之禮也雖有奇邪而不治者則微矣【物猶事也變和言物互文也微猶少也祭義】

恭儉莊敬禮教也禮之失煩其為人也恭儉莊敬而不煩則深於禮者也【經解】禮之於正國也猶衡之於輕重也繩墨之於曲直也規矩之於方圓也故衡誠縣不可欺以輕重繩墨誠陳不可欺以曲直規矩誠設不可欺以方圓君子審禮不可誣以姦詐【衡稱也縣謂錘也陳設謂彈畫也誠猶審也或作成】是故隆禮由禮謂之有方之士不隆禮不由禮謂之無方之民敬讓之道也故以奉宗廟則敬以入朝廷則貴賤有位以處室家則父子親兄弟和以處鄉里則長幼有序孔子曰安上治民莫善於禮此之謂也【隆禮謂盛行禮也方猶道也春秋傳曰教之以義方】故朝覲之禮所以明君臣之義也聘問之禮所以使諸侯相尊敬也喪祭之禮所以明臣子之恩也鄉飲酒之禮所以明長幼之序也昏姻之禮所以明男女之別也夫禮禁亂之所由生猶坊止水之所自來也故以舊坊為無所用而壞之者必有水敗以舊禮為無所用而去之者必有亂患【春見曰朝小聘曰問其篇今亡昏姻謂嫁取也壻曰昏妻曰姻自亦由也】故昏姻之禮廢則夫婦之道苦而淫辟之罪多矣鄉飲酒之禮廢則長幼之序失而爭鬪之獄繁矣喪祭之禮廢則臣子之恩薄而倍死忘生者衆矣聘覲之禮廢則君臣之位失諸侯之行惡而倍畔侵陵之敗起矣【若謂不至不答之屬】故禮之教化也微其止邪也於未形使人日徙善遠罪而不自知也是以先王隆之也易曰君子慎始差若毫釐繆以千里此之謂也【隆謂尊盛之也始謂其微時也同上】哀公問於孔子曰大禮何如君子之言禮何其尊也孔子曰丘也小人不足以知禮【謙不答也】君曰否吾子言之也孔子曰丘聞之民之所由生禮為大非禮無以節事天地之神也非禮無以辨君臣上下長幼之位也非禮無以別男女父子兄弟之親昏姻疏數之交也君子以此之為尊敬然【言君子以此故尊禮】然後以其所能教百姓不廢其會節【君子以其所能於禮教百姓使其不廢此上事之期節】有成事然後治其雕鏤文章黼黻以嗣【上事行於民有成功乃後續以治文飾以為尊卑之差】其順之然後言其喪算備其鼎俎設其豕腊修其宗廟歲時以敬祭祀以序宗族即安其

居節醜其衣服卑其宮室車不雕幾器不刻鏤食不貳味以與民同利昔之君子之行禮者如此【言語也算數也即就也醜類也幾附纏之也言君子既尊禮民以為順乃後語以喪祭之禮就安其居處正其衣服教之節儉與之同利者上下俱足也】公曰今之君子胡莫之行也孔子曰今之君子好實無厭淫德不倦荒怠敖慢固民是盡午其衆以伐有道求得當欲不以其所昔之用民者由前今之用民者由後今之君子莫為禮也【實猶富也淫放也固猶故也午其衆逆其族類也當猶稱也所謂道也由前用上所言由後用下所言 哀公問】 仲尼燕居子貢言游侍縱言至於禮【言游言偃子游也縱言汎說事】子曰居女三人者吾語女禮使女以禮周流無不徧也【居女三人者女三人且坐也使之坐凡與尊者言更端則起】子貢越席而對曰敢問何如【對應也】子曰敬而不中禮謂之野恭而不中禮謂之給勇而不中禮謂之逆子曰給奪慈仁【奪猶亂也巧言足恭之人似慈仁實鮮仁特言是者感子貢也子貢辨近於給】子曰師爾過而商也不及子產猶衆人之母也能食之不能教也【過與不及言敏鈍不同俱違禮也衆人之母言子產慈仁多不矜莊又與子張相反子產當以其乘輿濟冬涉者而車梁不成是慈仁亦違禮】子貢越席而對曰敢問將何以為此中者也子曰禮乎禮夫禮所以制中也【禮乎禮唯有禮也】子貢退言偃進曰敢問禮也者領惡而全好者與子曰然【領猶治也好善也】然則何如子曰郊社之義所以仁鬼神也嘗禘之禮所以仁昭穆也饋奠之禮所以仁死喪也射鄉之禮所以仁鄉黨也食饗之禮所以仁賓客也【仁猶存也凡存此者所以善全之道也郊社嘗禘饋奠存死之善者也射鄉食饗存生之善者也郊有后稷社有句龍】子曰明乎郊社之義嘗禘之禮治國其如指諸掌而已乎是故以之居處有禮故長幼辨也以之閨門之內有禮故三族和也以之朝廷有禮故官爵序也以之田獵有禮故戎事閑也以之軍旅有禮故武功成也是故宮室得其度量鼎得其象味得其時樂得其節車得其式鬼神得其饗喪紀得其哀辯說得其黨官得其體政事得其施加於身而錯於前凡衆之動得其宜【治國指諸掌言易知也郊社嘗禘尊卑之事有治國之象焉辨別也三族父子孫也凡言得者得法於禮也量豆區斗斛也味酸苦之屬也四時有所多及獻所宜也式謂載也所載有尊卑辨禮之說謂禮樂之官教學者黨類也體尊卑異而合同】子曰禮者何也即事之治也君子有其事必有其治治國而無禮譬猶瞽之無相與偃偃乎其何之譬如終夜有求于幽室之中非燭何見若無禮則手足無所錯耳目無所加進退揖讓無所制是故以之居處長幼失其別閨門三族失其和朝廷官爵失其序田獵戎事失其策軍旅武功失其制宮室失其度量鼎失其象味失其時樂失其節車失其式鬼神失其饗喪紀失其哀辯說失其黨官失其體政事失其施加於身而錯於前凡衆之動失其宜如此則無以祖洽於衆也【凡言失者無禮故也策謀也祖始也洽合也言失禮無以為衆倡始無以合和衆】子曰制度在禮文為在禮行之其在人乎【文為文章所為】子貢越席而對曰敢問夔其窮與【見其不達於禮】子曰古之人與古之人也達於禮而不達於樂謂之素達於樂而不達於禮謂之偏夫夔達於樂而不達於禮是以傳於此名也古之人也【素與偏俱不備耳夔達於樂傳世名此賢人也非不能非所謂窮 並仲尼燕居】子云小人窮斯約富斯驕約斯盜驕斯亂【約猶窮也】禮者因人之情而為之節文以為民坊者也故聖人之制富貴也使民富不足以驕貧不至於約貴不慊於上故亂益亡【此節文者謂農有田里之差士有爵命之級慊恨不滿之貌也慊或為嫌】子云夫禮者所以章疑別微以為民坊者也故貴賤有等衣服有別朝廷有位則民有所讓【位朝位也】子云觴酒豆肉讓而受惡民猶犯齒衽席之上讓而坐下民猶犯貴朝廷之位讓而就賤民猶犯君【犯猶僭也齒年也禮六十以上簋豆有加貴秩異者

並坊記】子曰夏道尊命事鬼敬神而遠之近人而忠焉先祿而後威先賞而後罰親而不尊【遠鬼神近人謂外宗廟內朝廷】其民之敝蠢而愚喬而野樸而不文【以本不困於刑罰少詐諛也敝謂政教衰失之時也】殷人尊神率民以事神先鬼而後禮先罰而後賞尊而不親【先鬼後禮謂內宗廟外朝廷也禮者君臣朝會凡以摯交接相施予】其民之敝蕩而不靜勝而無恥【以本狀于鬼神虛無之事令其心於蕩無所定困於刑罰苟勝免而無恥也月令曰無作淫巧以蕩上心】周人尊禮尚施事鬼敬神而遠之近人而忠焉其賞罰用爵列親而不尊【賞罰用爵列以尊卑為差】其民之敝利而巧文而不慙賊而蔽【以本數交接以言辭尊卑多訟獄】子曰夏道未瀆辭不求備不大望於民民未厭其親殷人未瀆禮而求備於民周人強民未瀆神而賞爵刑罰窮矣【未瀆辭者謂時王不尚辭民不褻為也不求備不大望言其政寬貢稅輕也強民言承殷難變之敝也賞爵刑罰窮矣言其繁文備設】子曰虞夏之道寡怨於民殷周之道不勝其敝【勝猶任也言殷周極文民無恥而巧利後世之政難復】子曰虞夏之質殷周之文至矣【言後有王者其作質文不能易之】虞夏之文不勝其質殷周之質不勝其文【言勝者相變質文各有所多並表記】子張問十世可知也【王者易姓受命為一世子張問自此以後十世之事可前知乎】子曰殷因於夏禮所損益可知也周因於殷禮所損益可知也其或繼周者雖百世可知也【馬氏曰所因謂三綱五常所損益謂文質三統愚按三綱謂君為臣綱父為子綱夫為妻綱五常謂仁義禮智信文質謂夏尚質商尚忠周尚文三統謂夏正建寅為人統商正建丑為地統周正建子為天統三綱五常禮之大體三代相繼皆因之而不能變其所損益不過文章制度太過不及之間而其已然之迹今皆可見則自今以往或有繼周而王者雖百世之遠所因所革亦不過此豈但十世而已乎聖人所以知來者蓋如此非若後世纖緯術數之學也胡氏曰子張之問蓋欲知來而聖人言其既往者以明之也夫自修身以至于為天下不可一日而無禮天叙天秩人所共由禮之本也商不能改乎夏周不能改乎商所謂天地之常經也若乃制度文為或太過則當損或不足則當益益之損之與時宜之而所因者不壞是古今之通義也因往推來雖百世之遠不過如此而已矣】子曰夏禮吾能言之杞不足徵也殷禮吾能言之宋不足徵也文獻不足故也足則吾能徵之矣【祀夏之後宋殷之後徵證也文典籍也獻賢也言二代之禮我能言之而二國不足取以為證以其文獻不足故也文獻若足則我能取之以證吾言矣】子曰周監於二代郁郁乎文哉吾從周【監視也二代夏商也言其視二代之禮而損益之郁郁文盛貌尹氏曰二代之禮至周大備夫子美其文而從之並論語】子曰吾說夏禮杞不足徵也吾學殷禮有宋存焉吾學周禮今用之吾從周【三代之禮孔子皆嘗學之而能言其意但夏禮既不可考證殷禮雖存又非當世之法惟周禮乃時王之制今日所用孔子既不得位則從周而已中庸】林放問禮之本【林放魯人見世之為禮者專事繁文而疑其本之不在是也故以為問】子曰大哉問【孔子以時方逐末而放獨有志於本故大其問蓋得其本則禮之全體無不在其中矣】禮與其奢也寧儉喪與其易也寧戚【易治也孟子曰易其田疇在喪禮則節文習熟而無哀痛慘怛之實者也戚則一於哀而文不足耳禮貴得中奢易則過于文儉戚則不及而質二者皆未合禮然凡物之理必先有質而後有文則質乃禮之本也范氏曰夫祭與其敬不足而禮有餘也不若禮不足而敬有餘也喪與其哀不足而禮有餘也不若禮不足而哀有餘也禮夫之奢喪失之易皆不能反本而隨其末故也禮奢而備不若儉而不備之愈也喪易而文不若戚而不文之愈也儉者物之質戚者心之誠故曰禮之本楊氏曰禮始諸飲食故汙尊而坏飲為之簠簋籩豆鬯爵之飾所以文之也則其本儉而已喪不可以徑情而直

行為之衰麻哭踊之數所以節之也則其本戚而已周衰世方以文滅質而林放獨能問禮之本故夫子大之而告之以此】子曰能以禮讓為國乎何有不能以禮讓為國如禮何【讓者禮之實也何有言不難也言有禮之實以為國則何難之有不然則其禮文雖具亦且無如之何矣而況於為國乎】有子曰禮之用和為貴先王之道斯為美小大由之【禮者天理之節文人事之儀則也和者從容不迫之意蓋禮之為體雖嚴然皆出於自然之理故其為用必從容而不迫乃為可貴先王之道此其所以為美而小事大事無不由之也】有所不行知和而和而不以禮節之亦不可行也【承上文而言如此而復有所不行者以其徒知和之為貴而一於和不復以禮節之則亦非復禮之本然矣所以流蕩忘返而亦不可行也程子曰禮勝則離故禮之用和為貴先王之道以斯為美而小大由之樂勝則流故有所不行者知和而和而不以禮節之亦不可行范氏曰凡禮之體主於敬而其用則以和為貴敬者禮之所以立也和者樂之所由生也若有子可謂達禮樂之本矣愚謂嚴而泰和而節此理之自然禮之全體也毫釐有差則失其中正而各倚於一偏其不可行均矣】棘子成曰君子質而已矣何以文為【棘子成衛大夫疾時人文勝故為此言】子貢曰惜乎夫子之說君子也駟不及舌【言子成之言乃君子之意然言出於舌則駟馬不能追之又惜其失言也】文猶質也質猶文也虎豹之鞞猶犬羊之鞞【鞞皮去毛者也言文質等耳不可相無若必盡去其文而獨存其質則君子小人無以辨矣夫棘子成矯當時之弊固失之過而子貢矯子成之弊又無本本輕重之差胥失之矣並論語】子路曰吾聞諸夫子喪禮與其哀不足而禮有餘也不若禮不足而哀有餘也【喪主哀】祭禮與其敬不足而禮有餘也不若禮不足而敬有餘也【祭主敬檀弓】曾子曰晏子可謂知禮也已恭敬之有焉【言禮者敬而已矣】有若曰晏子一狐裘三十年遣車一乘及墓而反國君七個遣車七乘大夫五个遣車五乘晏子焉知禮【言其大儉偪下非之及墓而反言其既窆則歸不留賓客有事也人臣賜車馬者乃得有遣車遣車之差大夫五諸侯七則天子九諸侯不以命數喪數略也个謂所包遣奠牲體之數也雜記曰遣車視牢具】曾子曰國無道君子恥盈禮焉國奢則示之以儉國儉則示之以禮【時齊方奢矯之是也並檀弓】冉有問於孔子曰先王制法禮不下庶人【曲禮鄭注云為其遽於事且不能備物】然則庶人行事不可以治於禮乎孔子曰所謂禮不下庶人者以庶人遽其事而不能充禮故不責之以備禮也【家語】子大叔見趙簡子簡子問揖讓周旋之禮焉對曰是儀也非禮也簡子曰敢問何謂禮對曰吉也聞諸先大夫子產曰夫禮天之經也【經者道之常】地之義也【義者利之宜】民之行也【行者人所履】天地之經而民實則之則天之明【日月星辰天之明也】因地之性【高下剛柔地之性也】生其六氣【謂陰陽風雨晦明】用其五行【金木水火土】氣為五味【酸鹹辛甘苦】發為五色【青黃赤白黑發見也】章為五聲【宮商角徵羽】淫則昏亂民失其性【滋味聲色過則傷性】是故為禮以奉之【制禮以奉其性】為六畜【馬牛羊雞犬豕】五牲【麋鹿麇狼兔】三犧【祭天地宗廟三者謂之犧】以奉五味為九文【謂山龍華蟲藻火粉米黼黻也華若草華藻水草火畫火粉米若白米黼若斧黻若兩已相戾傳曰火龍黼黻昭其文也】六采【畫繪之事雜用天地四方之色青與白赤與黑玄與黃皆相次謂之六色】五章以奉五色【青與赤謂之文赤與白謂之章白與黑謂之黼黑與青謂之黻五色備謂之繡集此五章以奉成五色之用】為九歌八風七音六律以奉五聲【解見二十年】為君臣上下以則地義【君臣有尊卑法則有高下】為夫婦外內以經二物【夫治外婦治內各有其物】為父子兄弟姑姊甥舅昏媾姻亞以象天明【六親和睦以事嚴父若衆星之拱辰極也妻父曰昏重昏曰媾壻父曰姻兩壻相謂

曰亞】為政事庸力行務以從四時【在君為政在臣為事民功曰庸治功曰力行其德教務其時要禮之本也】為刑罰威獄使民畏忌以類其震曜殺戮【雷震電曜天之威也聖人作刑戮以象類之】為溫慈惠和以效天之生殖長育民有好惡喜怒哀樂生於六氣【此六者皆本陰陽風雨晦明之氣】是故審則宜類以制六志【為禮以制好惡哀樂喜怒六志使不過節】哀有哭泣樂有歌舞喜有施舍怒有戰鬪喜生於好怒生於惡是故審行信令禍福賞罰以制死生生好物也死惡物也好物樂也惡物哀也哀樂不失乃能協於天地之性是以長久【協和也】簡子曰甚哉禮之大也對曰禮上下之紀天地之經緯也【經緯錯居以有成者】民之所以生也是以先王尚之故人之能自曲直以赴禮者謂之成人夫不亦宜乎【曲直以弼其性 昭公二十五年左氏傳】 景公曰吾今而後知禮之可以為國也晏子對曰禮之可以為國也久矣與天地並【有天地則禮義興】君令臣共父慈子孝兄愛弟敬夫和妻柔姑慈婦聽禮也君令而不違臣共而不貳父慈而教子孝而箴【箴諫也】兄愛而友弟敬而順夫和而義妻柔而正姑慈而從【從不自專】婦聽而婉【婉順也】禮之善物也公曰善哉寡人今而後聞此禮之上也對曰先王所稟於天地以為其民也是以先王上之【稟受也 昭二十六年左氏傳】 公如晉自郊勞至於贈賄【往有郊勞去有贈賄】無失禮【揖讓之禮】 晉侯謂女叔齊曰魯侯不亦善於禮乎對曰是儀也不可謂禮禮所以守其國行其政令無失其民者也今政令在家【在大夫】不能取也有子家羈弗能用也【羈莊公玄孫懿伯也】 奸大國之盟陵虐小國【謂伐莒取鄆】利人之難【謂往年莒難而取鄆】不知其私【不自知有私難】 公室四分民食於他【他謂三家也言魯君與民無異】思莫在公不圖其終【無為公謀終始者】為國君難將及身不恤其所禮之本末將於此乎在【在恤民與憂國】而屑屑焉習儀以亟【言以習儀為急】言善於禮不亦遠乎君子謂叔孫於是乎知禮【時晉侯亦失政叔齊以此諷諫 昭五年左氏傳】 任人有問屋廬子曰禮與食孰重曰禮重【任國名屋廬子名連孟子弟子也】 色與禮孰重【任人復問也】曰禮重曰以禮食則飢而死不以禮食則得食必以禮乎親迎則不得妻不親迎則得妻必親迎乎屋廬子不能對明日之鄒以告孟子孟子曰於答是也何有【何有不難也】不揣其本而齊其末方寸之木可使高於岑樓【本謂下末謂上方寸之木至卑喻食色岑樓樓之高銳似山者至高喻禮若不取其下之平而升寸木於岑樓之上則寸木反高岑樓反卑矣】金重於羽者豈謂一鈎金與一輿羽之謂哉【鈎帶鈎也金本重而帶鈎小故輕喻禮有輕於食色者羽本輕而一輿多故重喻食色有重於禮者】取食之重者與禮之輕者而比之奚翅食重取色之重者與禮之輕者而比之奚翅色重【禮食親迎禮之輕者也飢而死以滅其性不得妻而廢人倫食色之重者也奚翅猶言何但言其相去懸絕不但有輕重之差而已】往應之曰紵兄之臂而奪之食則得食不紵則不得食則將紵之乎踰東家牆而摟其處子則得妻不摟則不得妻則將摟之乎【紵戾也摟牽也處子處女也此二者禮與食色皆其重者而以之相較則禮為尤重也此章言義理事物其輕重固有大分然於其中又各自有輕重之別聖賢於此錯綜斟酌毫髮不差固不肯枉尺而直尋亦未嘗膠柱而調瑟所以斷之一視於禮之當然而已矣 孟子】 禮起於何也曰人生而有欲欲而不得則不能無求忿而無度量分界則不能不爭爭則亂先王惡其亂故制禮義以分之以養人之欲給人之求使欲必不窮乎物物必不屈乎欲兩者相持而長是禮之所起也故禮者養也芻豢稻粱五味調香所以養口也椒蘭芬苾所以養鼻也雕琢刻鏤黼黻文章所以養目也鐘鼓管絃琴瑟竽笙所以養耳也疏房櫨貌越席牀第几筵所以養體也故禮者養也君子既得其養又好其別曷謂別曰貴賤有等長幼有差貧富輕重皆

有稱者也故天子大路越席所以養體也側載翠芷所以養鼻也前有錯衡所以養目也和鸞之聲步中武象驟中韶濩所以養耳也龍旂九旒所以養信也寢兕持虎鮫口絲末彌龍所以養威也故大路之馬必倍至教順然後乘之所以養安也熟知夫出死要節之所以養生也熟知夫出費用之所養養財也熟知夫恭敬辭讓之所以養安也熟知夫禮義文理之所以養情也故人苟生之為見若者必死苟利之為見若者必害苟怠惰偷懦之為安若者必危苟情說之為樂若者必滅故人一之於禮義則兩得之矣一之於情性則兩喪之矣故儒者將使人兩得之者也墨者將使人兩喪之者也是儒墨之分也禮有三本天地者生之本也先祖者類之本也君師者治之本也無天地惡生無先祖惡出無君師惡治三者偏亡焉無安人故禮上事天下事地尊先祖而隆君師是禮之三本也故王者天太祖諸侯不敢壞大夫士有常宗所以別貴始貴始得之本也郊止乎天子而社至于諸侯道及士大夫所以別尊者事尊卑者事卑宜大者巨宜小者小故有天下者事十世有一國者事五世有五乘之地者事三世有三乘之地者事二世持手而食者不得立宗廟所以表積厚積厚者流澤廣積薄者流澤狹也大饗尚玄尊俎腥魚先大羹貴食飲之本也饗尚玄尊而用酒醴先黍稷而飯稻粱祭齊大羹而飽庶羞貴本而親用也貴本之謂文親用之謂理兩者合而成文以歸太一夫是謂大隆故尊之尚玄酒也俎之尚腥魚也豆之先大羹也一也利爵之不醯也成事之俎不嘗也三臭之不食也大昏之未發齊也大廟之未入尸也始卒之未小斂也一也大路之素未集也郊之麻纁也喪服之先散麻也一也三年之喪哭之不文也清廟之歌一唱而三歎也縣一鍾尚拊之膈朱弦而通越也一也凡禮始乎脫成乎文終乎悅故至備情文俱盡其次情文代勝其下復情以歸大一也天地以合日月以明四時以序星辰以行江河以流萬物以昌好惡以節喜怒以當以為下則順以為上則明萬物變而不亂貳之則喪也禮豈不至矣哉立隆以為極而天下莫之能損益也本末相順終始相應至文以有別至察以有說天下從之者治不從者亂從之者安不從者危小人不能測也禮之理誠深矣堅白同異之察入焉而溺其理誠大矣擅作典制僻陋之說入焉而喪其貌誠高矣暴慢恣睢輕俗之屬入焉而隊故繩墨誠陳矣則不可欺以曲直衡誠縣矣則不可欺以輕重規矩誠施矣則不可欺以方圓君子審於禮則不可欺以詐偽故繩者直之至也衡者平之至也規矩者方圓之至也禮者人道之極也然而不法禮不足禮謂之無方之民法禮足禮謂之有方之士禮之中焉能思索謂之能慮禮之中焉能勿易謂之能固能慮能固加好者焉斯聖人矣故天者高之極也地者下之極也無窮者廣之極也聖人者道之極也禮者以財物為用以貴賤為文以多少為異以隆殺為要文理繁情用省是禮之隆也文理省情用繁是禮之殺也文理情欲相為內外表裏並行而雜是禮之中流也故君子上致其隆下盡其殺而中處其中步驟馳騁厲驚不外是矣是君子之壇宇宮庭也人有是士君子也外是民也於是其中也方皇周挾曲得其次序是聖人也故厚者禮之積也大者禮之廣也高者禮之隆也明者禮之盡也【並荀子禮論】大史公曰洋洋美德乎宰制萬物役使羣衆豈人力也哉余至大行禮官觀三代損益乃知緣人情而制禮依人性而作儀其所由來尚矣人道經緯萬端規矩無所不貫誘進以仁義束縛以刑罰故德厚者位尊祿重者寵榮所以總一海內而整齊萬民也人體安駕乘為之金輿錯衡以繁其飾目好五色為之黼黻文章以表其能耳樂鐘磬為之調諧八音以蕩其心口甘五味為之庶羞酸醎以致其美情好珍善為之琢磨圭璧以通其意故大路越席皮弁布裳朱紱洞達大羹玄酒所以防其淫侈救其彫敝是以君臣朝廷尊卑貴賤之序下及黎庶車輿衣服宮室飲食嫁娶喪祭之分事有適宜物有節文【史記禮書】

禮書綱目卷七十四

卷七十五

欽定四庫全書

禮書綱目卷七十五 婺源江永撰

禮樂記 通禮二十八

補

大宗伯以天產作陰德以中禮防之以地產作陽德以和樂防之【鄭司農云陰德謂男女之情天性生而自然者過時則奔隨先時則血氣未定聖人為制其中令民三十而娶女二十而嫁以防其淫佚令無失德情性隱而不露故謂之陰德陽德謂分地科以致富富者之失不驕奢則吝嗇故以和樂防之樂所以滌蕩邪穢道人之正性者也一說地產謂土地之性各異若齊性舒緩楚性急悍則以和樂防其失令無失德樂所以移風易俗者也此皆露見於外故謂之陽德陽德陰德不失其正則民和而物各得其理故曰以諧萬民以致百物玄謂天產者動物謂六牲之屬地產者植物謂九穀之屬陰德陰氣在人者陰氣虛純之則劣故食動物作之使動過則傷性制中禮以節之陽德陽氣在人者陽氣盈純之則躁故食植物作之使靜過則傷性制和樂以節之如是然後陰陽平性情和而能育其類】以禮樂合天地之化百物之產以事鬼神以諧萬民以致百物【禮濟虛樂損益並行則四者乃得其和能生非類曰化生其種曰產 春官】大司徒以五禮防萬民之偽而教之中【禮所以節止民之侈偽使其行得中鄭司農云五禮謂吉凶賓軍嘉】以六樂防萬民之情而教之和【禮所以蕩正民之情思使其心應和也鄭司農云六樂謂雲門咸池大韶大夏大濩大武 地官】人生而靜天之性也感於物而動性之欲也【言性不見物則無欲】物至知知然後好惡形焉【至來也知知每物來則又有知也言見物多則欲益衆形猶見也】好惡無節於內知誘於外不能反躬天理滅矣【節法度也知猶欲也誘猶道也引也躬猶已也理猶性也】夫物之感人無窮而人之好惡無節則是物至而人化物也人化物也者滅天理而窮人欲者也【窮人欲言無所不為】於是有悖逆詐偽之心有淫佚作亂之事是故強者脅弱衆者暴寡知者詐愚勇者苦怯疾病不養老幼孤獨不得其所此大亂之道也是故先王之制禮樂人為之節【言為作法度以遏其欲】衰麻哭泣所以節喪紀也鐘鼓干戚所以和安樂也昏姻冠笄所以別男女也射鄉食饗所以正交接也【男二十而冠女許嫁而笄成人之禮射鄉大射鄉飲酒也】禮節民心樂和民聲政以行之刑以防之禮樂刑政四達而不悖則王道備矣 樂者為同禮者為異同則相親異則相敬【同謂協好惡也異謂別貴賤也】樂勝則流禮勝則離【流謂合行不敬也離謂析居不和也】合情飾貌者禮樂之事也【欲其並行斌斌然】禮義立則貴賤等矣樂文同則上下和矣好惡著則賢不肖別矣刑禁暴爵舉賢則政均矣仁以愛之義以正之如此則民治行矣【等階級也】樂由中出【和在心也】禮自外作【敬在貌也】樂由中出故靜禮自外作故文【文猶動也】大樂必易大禮必簡【易簡若於清廟大饗然】樂至則無怨禮至則不爭揖讓而治天下者禮樂之謂也【至猶達也行也】暴民不作諸侯賓服兵革不

試五刑不用百姓無患天子不怒如此則樂達矣合父子之親明長幼之序以敬四海之內天子如此則禮行矣【賓協也試用也】大樂與天地同和大禮與天地同節【言順天地之氣與其數】和故百物不失【不失其性】節故祀天祭地【成物有功報焉】明則有禮樂【教人者】幽則有鬼神【助天地成物者也易曰是故知鬼神之情狀與天地相似五帝德說黃帝德曰死而民畏其神者百年春秋傳曰若敖氏之鬼然則聖人之精氣謂之神賢知之精氣謂之鬼】如此則四海之內合敬同愛矣禮者殊事合敬者也樂者異文合愛者也禮樂之情同故明王以相沿也【沿猶因述也孔子曰殷因於夏禮所損益可知也周因於殷禮所損益可知也沿或作緣】故事與時並【舉事在其時也禮器曰堯授舜舜授禹湯放桀武王伐紂時也】名與功偕【為名在其功也偕猶俱也堯作大章舜作大韶禹作大夏湯作大濩武王作大武各因其得天下之功】故鐘鼓管磬羽籥干戚樂之器也屈伸俯仰綴兆舒疾樂之文也簠簋俎豆制度文章禮之器也升降上下周還裊襲禮之文也【綴謂鄼舞者之位也兆其外營域也】故知禮樂之情者能作識禮樂之文者能述【述謂訓其義也】作者之謂聖述者之謂明明聖者述作之謂也樂者天地之和也禮者天地之序也和故百物皆化序故羣物皆別【化猶生也別謂形體異也】樂由天作禮以地制【言法天地也】過制則亂過作則暴【過猶誤也暴失文武之意】明於天地然後能興禮樂也論倫無患樂之情也欣喜勸愛樂之官也【倫猶類也患害也官猶事也】中正無邪禮之質也莊敬恭順禮之制也【質猶本也】若夫禮樂之施於金石越於聲音用於宗廟社稷事乎山川鬼神則此所與民同也【言情官質制先王所專也】王者功成作樂治定制禮【功成治定同時耳功主於王業治主於教民明堂位】

【說周公曰治天下六年朝諸侯于明堂制禮作樂】其功大者其樂備其治辯者其禮具【辯偏也】干戚之舞非備樂也【樂以文德為備若咸池者孔子曰韶盡美矣又盡善也謂武盡美矣未盡善也】孰亨而祀非達禮也【達具也郊特牲曰郊血太饗腥三獻燔一獻孰至敬不饗味而貴氣臭也】五帝殊時不相沿樂三王異世不相襲禮【言其有損益也】樂極則憂禮粗則偏矣【樂人之所好也害在淫侈禮人之所勤也害在倦略】及夫敦樂而無憂禮備而不偏者其唯大聖乎【敦厚也】天高地下萬物散殊而禮制行矣【禮為異也】流而不息合同而化而樂興焉【樂為同也】春作夏長仁也秋歛冬藏義也仁近於樂義近於禮【言樂法陽而生禮法陰而成】樂者敦和率神而從天禮者別宜居鬼而從地【敦和樂貴同也率循也從順也別宜禮尚異也】故聖人作樂以應天制禮以配地禮樂明備天地官矣【官猶事也各得其事】天尊地卑君臣定矣卑高已陳貴賤位矣動靜有常小大殊矣方以類聚物以羣分則性命不同矣在天成象在地成形如此則禮者天地之別也【卑高謂山澤也位矣尊卑之位象山澤也動靜陰陽用事小大萬物也大者常存小者隨陽出入方謂行蟲也物謂殖生者也性之言生也命生之長短也象光耀也形體貌也】地氣上齊天氣下降陰陽相摩天地相蕩鼓之以雷霆奮之以風雨動之以四時煖之以日月而百化興焉如此則樂者天地之和也【齊讀為躋躋升也摩猶迫也蕩猶動也奮迅也百化百物化生也】化不時則不生男女無辨則亂升天地之情也【辨別也升成也樂失則害物禮失則亂人】及夫禮樂之極乎天而蟠乎地行乎陰陽而通乎鬼神窮高極遠而測深厚【極至也蟠猶委也高遠三辰也深厚山川也言禮樂之道上至于天下委于地則其間無所不之】樂著大始而禮居成物【著之言處也大始百物之始生也】著不息者天也著不動者地也【著猶明白也】

息猶休止也易曰天行健君子以自強不息】一動一靜者天地之間也【間謂百物也】故聖人曰禮樂云【言禮樂之法天地也樂靜而禮動其並用事則亦天地之間爾】是故樂之隆非極音也食饗之禮非致味也清廟之瑟朱絃而疏越壹唱而三歎有遺音者矣大饗之禮尚玄酒而俎腥魚太羹不和有遺味者矣是故先王之制禮樂也非以極口腹耳目之欲也將以教民平好惡而反人道之正也夫豢豕為酒非以為禍也而獄訟益繁則酒之流生禍也【以穀食犬豕曰豢為作也言豢豕作酒本以享祀養賢而小人飲之善酗以致獄訟】是故先王因為酒禮壹獻之禮賓主百拜終日飲酒而不得醉焉此先王之所以備酒禍也【壹獻士飲酒之禮百拜以喻多】故酒食者所以合歡也樂者所以象德也禮者所以綴淫也【綴猶止也】是故先王有大事必有禮以哀之有大福必有禮以樂之哀樂之分皆以禮終【大事謂死喪也】樂也者聖人之所樂也而可以善民心其感人深其移風易俗故先王著其教焉【著猶立也謂立司樂以下使教國子】樂也者施也禮也者報也【言樂出而不反而禮有往來也】樂樂其所自生而禮反其所自始樂章德禮報情反始也【自由也】樂也者情之不可變者也禮也者理之不可易者也【理猶事也】樂統同禮辨異【統同同和合也辨異異尊卑也】禮樂之說管乎人情矣【管猶包也】窮本知變樂之情也著誠去偽禮之經也禮樂俛天地之情達神明之德降興上下之神而凝是精粗之體領父子君臣之節【俛猶依象也降下也興猶出也凝成也精粗謂萬物大小也領猶理治也】是故大人舉禮樂則天地將為昭焉【言天地將為之昭然明矣】天地訢合陰陽相得煦嫗覆育萬物然後草木區萌達羽翼奮角觝生蟄蟲昭蘇羽者嫗伏毛者孕鬻胎生者不殯而卵生者不殯則樂之道歸焉耳【訢讀為熹熹猶蒸也氣曰煦體曰嫗屈生曰區無鰓曰觝昭曉也蟄蟲以發出為曉更息曰蘇孕任也鬻生也內敗曰殯殯裂也今齊人語有殯者也】樂者非謂黃鍾大呂弦歌干揚也樂之末節也故童者舞之鋪筵席陳尊俎列籩豆以升降為禮者禮之末節也故有司掌之【言禮樂之本由人君也禮本著誠去偽樂本窮本知變】樂師辨乎聲詩故北面而弦宗祝辨乎宗廟之禮故後尸商祝辨乎喪禮故後主人【辨猶別也正也弦謂鼓瑟琴也後尸居後贊禮儀此言知本者尊知末者卑】是故德成而上藝成而下行成而先事成而後【德三德也行三行也藝才技也先謂位在上也後謂位在下也】是故先王有上有下有先有後然後可以有制於天下也【言尊卑備乃可制作以為治法】君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也【致猶深審也子讀如不子之子油然而生好貌也善心生則寡於利欲寡於利欲則樂矣樂由中出故治心朱子曰韓詩外傳子諒作慈良近是天謂禮性自然神謂神妙不測】致禮以治躬則莊敬莊敬則嚴威【躬身也禮自外作故治身】心中斯須不和不樂而鄙詐之心入之矣【鄙詐入之謂利欲生】外貌斯須不莊不敬而易慢之心入之矣【易輕易也】故樂也者動於內者也禮也者動於外者也樂極和禮極順內和而外順則民瞻其顏色而弗與爭也望其容貌而民不生易慢焉故德輝動於內而民莫不承聽理發諸外而民莫不承順【德輝顏色潤澤也理容貌之進止也】故曰致禮樂之道舉而錯之天下無難矣樂也者動於內者也禮也者動於外者也故禮主其減樂主其盈【禮主其減人所倦也樂主其盈人所欲也】禮減而進以進為文樂盈而反以反為文【進謂自勉強也反謂自抑止也文猶美也善也】禮減而不進則銷樂盈而不反則放故禮有報而樂有反【放淫於聲樂不能止也報讀曰褒猶進也】禮得其報則樂樂得其反則安【得謂曉其義知其吉凶之歸】禮之報樂之反其義一也【俱趨立於中不銷不放也並樂記

】禮也者反其所自生【自由也制禮者本已所由得民心也】樂也者樂其所自成【作樂緣民所樂於已之功舜之民樂其紹堯而作大韶湯武之民樂其濩伐而作濩武】是故先王之制禮也以節事【動反本也】修樂以道志【勸之善也】故觀其禮樂而治亂可知也【國亂禮慢而樂淫也】蘧伯玉曰君子之人達【觀其禮樂則知治亂也蘧伯玉衛大夫也名瑗】故觀其器而知其工之巧觀其發而知其人之知【禮樂亦猶是也】故曰君子慎其所以與人者【將以是觀禮器】孔子曰移風易俗莫善於樂安上治民莫善於禮【孝經】子曰先進於禮樂野人也後進於禮樂君子也【先進後進猶言前輩後輩野人謂郊外之民君子謂賢士大夫也程子曰先進於禮樂文質得宜今反謂之質樸而以為野人後進之於禮樂文過其質今反謂之彬彬而以為君子蓋周末文勝故時人之言如此不自知其過於文也】如用之則吾從先進【用之謂用禮樂孔子既述時人之言又自言其如此蓋欲損過以就中也論語】子曰禮云禮云玉帛云乎哉樂云樂云鐘鼓云乎哉【敬而將之以玉帛則為禮和而發之以鐘鼓則為樂遺其本而專事其末則豈禮樂之謂哉程子曰禮只是一箇序樂只是一箇和只此兩字含蓄多少義理天下無一物無禮樂且如置此兩椅一不正便是無序無序便乖乖便不和又如盜賊至為不道然亦有禮樂蓋必有總屬必相聽順乃能為盜不然則叛亂無統不能一日相聚而為盜也禮樂無處無之學者要須識得同上】子曰人而不仁如禮何人而不仁如樂何【游氏曰人而不仁則人心亡矣其如禮樂何哉言雖欲用之而禮樂不為之用也程子曰仁者天下之正理失正理則無序而不和李氏曰禮樂待人而後行苟非其人則雖玉帛交錯鐘鼓鏗鏘亦將如之何哉然記者序此於八佾雍徹之後疑其為僭禮樂者發也同上】子曰禮也者理也樂也者節也君子無理不動無節不作不能詩於禮繆不能樂於禮素薄於德於禮虛【繆誤也素猶質也歌詩所以通禮意也作樂所以同成禮文也崇德所以實禮行也王制曰樂正崇四術立四教順先王詩書禮樂以造士春秋教以禮樂冬夏教以詩書王太子王子羣后之太子卿大夫元士之適子國之俊選皆造焉則古之人皆知諸侯之禮樂仲尼燕居】子張問政子曰君子明於禮樂舉而錯之而已【言禮樂足以為政也錯猶施行也】子張復問子曰師爾以為必鋪几筵升降酌獻酬酢然後謂之禮乎爾以為必行綴兆興羽籥作鐘鼓然後謂之樂乎言而履之禮也行而樂之樂也君子力此二者以南面而立夫是以天下太平也諸侯朝萬物服體而百官莫敢不承事矣禮之所興衆之所治也禮之所廢衆之所亂也目巧之室則有奧阼席則有上下車則有左右行則有隨立則有序古之義也室而無奧阼則亂於堂室也席而無上下則亂於席上也車而無左右則亂於車也行而無隨則亂於塗也立而無序則亂於位也昔聖帝明王諸侯辨貴賤長幼遠近男女外內莫敢相踰越皆由此塗出也【服體體服也謂萬物之符長皆來為瑞應也衆之所治衆之所以治也衆之所亂衆之所以亂也目巧謂但用巧目善意作室不由法度猶有奧阼賓主之處也自目巧以下古今常事不可廢改也同上】大史公曰夫禮由外入樂自內出故君子不可須臾離禮須臾離禮則暴慢之行窮外不可須臾離樂須臾離樂則姦邪之行窮內【史記】

卷七十六

<經部,禮類,通禮之屬,禮書綱目

欽定四庫全書

禮書綱目卷七十六 婺源江永撰

曲禮 曲禮一

曲禮曰毋不敬【禮主於敬 疏曰云曲禮曰是引儀禮正經今不見者或在三千散亡之中也】儼若思【儼矜莊貌人之坐思貌必儼然】安定辭【審言語也易曰言語者君子之樞機 疏曰鄭氏注云樞謂戶樞機謂弩牙戶樞之發或明或闇弩牙之發或中或否以喻君子之言或榮或辱】安民哉【此上三句可以安民說曲禮者美之云耳 或問敬程子曰主一之謂敬問一曰無適之謂一又曰但整齊嚴肅則心自一一則自無非辟之干矣 呂大臨曰毋不敬者正其心也儼若思者正其貌也安定辭者正其言也三者正則無所往而非正所謂大人正己而物正者也天下至大取諸修身而無不足故曰安民哉此禮之本故於曲禮首章言之】敖不可長欲不可從志不可滿樂不可極【敖五報反長丁丈反從足用反樂音洛四者慢遊之道桀紂所以自禍】賢者狎而敬之畏而愛之【狎習也近也謂附而近之習其所行也月令曰雖有貴賤近習心服曰畏曾子曰吾先子之所畏 朱子曰人之常情與人親狎則敬弛有所畏敬則愛衰惟賢者乃能狎而敬之是以雖安而不慢畏而愛之是以貌恭而情親也】愛而知其惡憎而知其善【謂凡與人交不可以已之愛憎誣人之善惡 朱子曰已之愛憎或出私心而人之善惡自有公論惟賢者存心中正乃能不以此而廢彼也】積而能散【謂已有蓄積見貧窮者則當能散以調救之若宋樂氏 疏曰樂氏事見春秋襄二十九年傳】安安而能遷【謂已今安此之安圖後有害則當能遷晉舅犯與姜氏醉重耳而行近之 疏曰舅犯事見春秋僖二十三年傳 朱子曰此上六句文意大同皆蒙賢者二字為文言皆衆人所不能唯賢者能之耳舊注非是】臨財毋苟得【為傷廉也 為于偽反下同 疏曰非義而取之謂之苟得】臨難毋苟免【難乃旦反為傷義也】狠毋求勝分毋求多【狠胡懇反分扶問反 為傷平也狠闕也謂爭訟也詩云兄弟鬩于牆 闕呼歷反 疏曰小小闕狠當引過歸已不可求勝元是衆人之物當共分之毋得求多入已】禮不妄說人【說音悅為近佞媚也君子說之不以其道則不說也 朱子曰禮有常度不可為佞媚以求說於人世】不辭費【為傷信君子先行其言而後從之 朱子曰辭達則止不貴於多】禮不踰節不侵侮不好狎【好呼報反 為傷敬也凡人習近為好狎 疏曰禮所以辨尊卑別等級使上不逼下下不僭上故不踰越節度禮主於敬自卑而尊人故不侵犯侮慢於人賢者狎而敬之若直近而習之則是好狎】修身踐言謂之善行【行下孟反下同 踐履也言履而行之】行修言道禮之質也【言道言合于道質猶本也禮為之文飾耳】禮聞取於人不聞取人【取於舊七樹反謂趣就師求道也皇如字謂取師之道 謂君人者取於人謂高尚其道取人謂制服其身】禮聞來學不聞往教【尊道藝 朱子曰此

雖兩節其實互明一事也取於人者童蒙求我朋自遠來也取人者好為人師我求童蒙也禮有取於人所以彼有來學無取人所以我無往教也】大上貴德【大音泰大上帝皇之世其民施而不惟報施始鼓反下同疏曰惟思也】其次務施報【三王之世禮始興焉】禮尚往來往而不來非禮也來而不往亦非禮也疑事毋質【質成也彼已俱疑而已成言之終不然則傷知知音智疏曰人多專固未知而為已知故戒之若成言疑事後為賢人所譏則傷已智也】直而勿有【直正也已若不疑則當稱師友而正之謙也疏曰當稱師友所說以正之勿為已有此義也並曲禮】不疑在躬【躬身也不服行所不知使身疑也】不度民械【度大洛反械戶戒反械兵器也不計度民家之器物使已亦有朱子曰為不欲校人之強弱且嫌不審也】不願於大家【大謂富之廣也朱子曰嫌有貪欲汰侈之意】不訾重器【訾子斯反訾思也重猶寶也朱子曰訾猶計度也下毋訾衣服成器字義同此國語云訾相其質漢書云為無訾者又云不訾之身皆此義此言不訾重器者謂不欲量物之貴賤亦避不審也少儀】不窺密【嫌伺人之私也密隱曲處也】不旁狎【妄相服習終或爭訟朱子曰旁泛及也泛與人狎習不恭敬也】不道舊故【言知識之過失損友也孔子曰故舊不遺】

【則民不偷朱子曰舊事既非今日所急且或揚人宿過以取憎惡如陳勝賓客言勝故情為勝所殺之類也】不戲色【暫變傾顏色為非常則人不長失敬也不長丁丈反絕句朱子曰戲色謂嬉笑侮慢之容同上】毋拔來毋報往【拔蒲末反報音赴報讀為赴疾之赴拔赴皆疾也人來往所】

【之當有宿漸不可卒也卒才忽反】毋瀆神【瀆謂數而不敬數色角反】毋循枉【前日之不正不可復遵行當求自伸】毋測未至【測意度也朱子曰孔子所謂逆詐億不信之類也】毋訾衣服成器【訾思也成猶善也思此則疾貧也朱子曰與不訾重器之意同】毋身質言語【質成也聞疑則傳疑若成之則或有所誤也朱子曰即上文疑事毋質之意也此三節十七事皆非謙遜謹厚之道故戒之同上】博聞強識而讓敦善行而不怠謂之君子【識音志行下孟反敦厚】君子不盡人之歡不竭人之忠以全交也【歡謂飲食忠謂衣服之物呂大臨曰君子躬自厚而薄責於人責人厚而莫之應此交之所以難全也歡謂好於我也忠謂盡心於我也好於我者望之不深則不至於倦而難繼酬酒不舉三酌油油而退是也盡心於我者不要其必力致則不至於不能勉而絕詩云每有良朋烝也無戎是也並曲禮】右通言夫禮者所以定親疎決嫌疑別同異明是非也【疏曰五服大功已上服粗者為親小功已下服精者為疏妾為女君期女君為妾若報之則太重降之則有舅姑為婦之嫌故全不服是決嫌孔子之喪門人疑所服子貢請若喪父而無服是決疑本同今異姑姊妹是也本異今同世母叔母及子婦是也主人未歛子游楊裘而弔得禮是也曾子襲裘而弔失禮非也但嫌疑同異是非之屬在禮甚衆各舉一事為證】道德仁義非禮不成教訓正俗非禮不備分爭辨訟非禮不決君臣上下父子兄弟非禮不定宦學事師非禮不親班朝治軍蒞官行法非禮威嚴不行禱祠祭祀供給鬼神非禮不誠不莊【朝直遙反宦音患分辨皆別宦仕也班次也蒞臨也莊敬也學或為御疏曰熊氏云宦謂學仕宦之事學謂習學六藝此二者俱是事師左傳靈輒云宦三年矣服虔云宦學也是學職事為宦也】是以君子恭敬撙節退讓以明禮【撙祖本反撙猶趨也】

疏曰在貌為恭在心為敬搏趨也節法度也言恒趨於法度】鸚鵡能言不離飛鳥猩猩能言不離禽獸今人而無禮雖能言不亦禽獸之心乎夫惟禽獸無禮故父子聚麀【鸚鵡耕反離力智反猩音生麀音憂聚猶共也鹿牝曰麀疏曰通言之鳥不可曰獸獸亦可曰禽】是故聖人作為禮以教人使人以有禮知自別於禽獸【呂大臨曰人所以貴於物者理義也聖人因理義之同然而制之為禮然後父子有親君臣有義男女有別人道所以立而與天地參也縱恣怠放滅天理而窮人欲是果於自暴自棄而不欲齒於人類者乎】人有禮則安無禮則危故曰禮者不可不學也夫禮者自卑而尊人雖負販者必有尊也而況富貴乎【負販者尤輕佻志利宜若無禮然】富貴而知好禮則不驕不淫貧賤而知好禮則志不懾【懾之涉反懾猶怯惑並曲禮】

君子之容舒遲見所尊者齊遯【齊側皆反遯音速謙慤貌也遯猶蹙蹙也疏曰舒遲閒雅也雖尋常舒遲若見所尊者則齊遯齊遯言自斂持不敢寬奢】足容重【舉欲遲也】手容恭【高且正也】目容端【不睇祖也睇大計反】口容止【不妄動也】聲容靜【不噦咳也噦於厥反咳苦代反】頭容直【不傾顧也】氣容肅【似不息也】立容德【如有予也疏曰德得也立則磬折如人授物予己已受得之之形也】色容莊【勃如戰色疏曰常矜莊不乍】

【變動也玉藻】坐如尸【視貌正也玉藻注尸居神位敬慎也】立如齊【齊側皆反磬且聽也齊謂祭祀時疏曰士虞禮主人哭出復位祝闔牖戶如食間是祭時有聽法磬謂屈身如磬之折祭前有齊所以自整齊祭日神前亦當齊則齊是先後通稱此言立如齊非祭前坐齊故云謂祭祀時朱子曰此二句上有若夫二字乃大戴曾子事父母篇文別起下文之義錄者誤并取之也今刪去曲禮】燕居告溫溫【告謂教使也詩云溫溫恭人疏曰燕居色尚和善教人使人之時唯須溫溫不欲嚴慄】凡祭容貌顏色如見所祭者【如睹其人在此】喪容纍纍【纍良追反羸憊貌也羸力皮反憊皮拜反】色容顛顛【顛音田憂思貌也】視容瞿瞿梅梅【瞿紀具反不審貌也疏曰瞿瞿驚遽之貌梅梅猶微微謂微昧也】言容繭繭【繭古典反聲氣微也疏曰繭繭猶緜緜】戎容暨暨【暨其記反果毅貌也】言容詻詻【詻五格反教令嚴也】色容厲厲【義形貌也疏曰以義斷割故嚴威】視容清明【察於事也】立容辨卑毋調【辨彼檢反調音詔辨讀作貶自貶卑謂磬折也調謂傾身以有下也】頭頸必中【頭容直】山立【不搖動也】時行【時而後行也詩云威儀孔時】盛氣顛實揚休【顛音田顛讀為闐揚讀為陽聲之誤也盛身中之氣使之闐滿其息若陽氣之休物也】玉色【色不變也朱子曰自立容以下至此又通言之玉藻】賓客主恭祭祀主敬喪事主

哀會同主詡【詡況矩反恭在貌也而敬又在心詡謂敏而有勇若齊國佐疏曰詡謂敏大言語會同時貴在敏健勇武自光大成二年左傳齊晉戰于鞏齊國佐陳辭以拒晉師是敏而有勇也少儀】喪事欲其縱縱爾【縱音總趨事貌縱讀如總領之總】吉事欲其折折

爾【折大兮反安舒貌詩云好人提提】故喪事雖遽不陵節吉事雖止不怠【陵躓也止立

俟事時也怠惰也】故騷騷爾則野【謂大疾 大音泰下同
疏曰喪事過為急疾則如田野之人急切無禮】鼎鼎爾則小人【謂大舒
疏曰吉事不自嚴敬則如小人然形體寬慢也】君子蓋猶猶爾【疾舒之中 疏曰君子於喪
事得疾之中於吉事得舒之中蓋行禮之時明閑法則志意猶猶然猶猶是曉達之貌 擅弓】
欣然喜樂者鐘鼓之色愀然清靜者縗經之色漻然豐滿者兵甲之色【愀七小反 管子】
君子衰經則有哀色端冕則有敬色甲冑則有不可辱之色【衰七雷反 言色稱其服也
稱尺證反 表記】當食不歎【食或以樂非歎所 疏曰人君吉食則有樂賤者則無故云或
也】臨喪則必有哀色臨樂不歎介冑則有不可犯之色【貌與事相宜配介甲也】故君子
戒慎不失色於人【色厲而內荏貌恭心狠非情者也 荏而審反
朱子曰失色謂失其所當如臨喪不哀軍旅不嚴之類 曲禮】
祭極敬不繼之以樂朝極辨不繼之以倦【樂音洛朝直遙反下同
極猶盡也辨分別政事也祭義曰祭之日樂與哀半饗之必樂 疏曰祭禮極盡於敬不可於終
末繼之以樂而不敬朝禮極盡於分別政事不可於終末繼之以解倦而不分別
表記】言語之美穆穆皇皇朝廷之美濟濟翔翔祭祀之美

齊齊皇皇車馬之美匪匪翼翼鸞和之美肅肅雍雍【美音儀濟子禮反齊如字皇音往匪芳
非反 匪讀如四牡駢駢之駢齊齊皇皇讀如歸往之往美皆當為儀字之誤也周禮教國子六
儀一曰祭祀之容二曰賓客之容三曰朝廷之容四曰喪紀之容五曰軍旅之容六曰車馬之
容 疏曰言語謂賓客言語故鄭注保氏云賓客之容穆穆皇皇皆美人之狀濟濟翔翔謂威儀
厚重寬舒之貌皇謂歸往之往謂心所繫往孝子祭祀威儀嚴正心有繫屬故齊齊皇皇然匪
匪翼翼皆是車馬之形狀故詩云四牡駢駢又云四牡翼翼皆是馬之嚴正也肅肅敬貌雍雍
和貌 少儀】志有四興朝廷之志淵然清以嚴祭祀之志諭然思以和軍旅之志怫然愠然精
以厲喪紀之志漻然憂以湫四志形中四色 外維如志色之經也【怫符勿反愠紆粉反漻
音聊清深也湫即由反】容有四起朝廷之容師師然翼翼然整以敬祭祀之容遂遂然粥粥
然敬以婉軍旅之容喭然肅然固以猛喪紀之容恻然懾然若不還容經也【粥于六反婉紆
晚反喭彼側反恻于求反又於久反懾質涉反】若夫立而跛坐而蹠體怠懈志驕傲趨視數
顧容色不比動靜不以度咳唾疾言嗟氣不順皆禁也【跛彼 反蹠蒲堅反足不正也趨七
含反數音朔比毗志反咳音慨唾吐卧反 並賈誼新書容經】右容節 子曰君子莊敬日強安
肆日偷【肆恣也偷苟且也肆或為褻】君子不以一日使其躬儻焉如不終日【儻在鑑反
又仕鑑反 儻焉可輕賤之貌也如不終日言人而無禮死無時
疏曰君子常行善道不以一日之間使其身儻焉可輕賤如小人不能終竟一日也 表記】正
考父【疏曰家語云宋泯公熙生弗父何何生宋父周周生世子勝勝生正考父考父生孔父
嘉其後以孔為氏孔父生木金父金父生臯夷臯夷生防叔防叔避華氏之偪而奔魯生伯夏
伯夏生叔梁紇梁紇生孔子】佐戴武宣【三人皆宋君】三命茲益共【其音恭下同 三命
上卿也言位高益恭】故其鼎銘云【考父廟之鼎】一命而僂再命而傴三命而俯【僂力
主反傴紆甫反俯共於傴傴共於僂】循牆而走【言不敢安行】亦莫余敢侮【其共如是
人亦莫敢侮】饁於是鬻於是餽余口【饁之然反鬻之六反
於是鼎中為饁鬻饁鬻餽屬言至儉】其共也如是【昭七左氏傳】
諸侯從劉康公成肅公會晉侯伐秦【劉康公王季子】成子受脤于社不敬【脤市軫反

脤宜社之肉也盛以脤器故曰脤宜出兵祭社之名盛音成】劉子曰吾聞之民受天地之中以生所謂命也是以有動作禮義威儀之則以定命也能者養之以福【養威儀以致福】不能者敗以取禍是故君子勤禮小人盡力勤禮莫如致敬盡力莫如敦篤敬在養神篤在守業國之大事在祀與戎祀有執爓【爓音煩爓祭肉】戎有受脤神之大節也【交神之大節】今成子惰棄其命矣【惰則失中和之氣】其不反乎既行成肅公卒于瑕【成公十三年左氏傳】柯陵之會【會在魯成公十七年】晉厲公視遠步高【厲公晉成公之孫景公之子州蒲也視遠望視遠步高舉足高】單襄公曰【單音善襄公王卿士單朝之諡也】夫君子目以定體足以從之是以觀其容而知其心矣【體手足也心不固則容不正】目以處義【義宜也】足以步目今晉侯視遠而足高目不在體【在存也】而足不步目其心必異矣目體不相從何以能久夫合諸侯民之大事也於是乎觀存亡故國將無咎其君在會步言視聽必皆無謫則可以知德矣明年晉弑厲公【國語周語】晉孫談之子周適周事單襄公【談晉襄公之孫惠伯談也周者談之子晉悼公之名晉自獻公用驪姬之讒詛不畜羣公子故孫周適周事襄公】立無跛【跛彼義反跛偏任也】視無還【還音旋晴轉復反為旋】聽無聳【不聳耳而聽】言無遠【遠謂非耳目所及也】晉國有憂未嘗不戚【急其宗也】有慶未嘗不怡【慶福也怡悅也】襄公有疾召頃公而告之【頃公襄公之子】曰必善晉周將得晉國其行也文【行下孟反】能文則得天地天地所胙小而後國【胙才素反胙福也天之所福小則得國大則得天下】且夫立無跛正也視無還端也聽無聳成也【成定也】言無遠慎也為晉休戚不背本也【為于偽反背音佩

休喜也】被文相德非國何取【相悉亮反被服文德又以四行輔助之非國何取言必得也】及晉弑厲公迎而立之是為悼公晉以復霸【復扶又反司上】衛侯在楚北宮文子見令尹圍之威儀言於衛侯曰令尹似君矣將有他志【言語瞻視行步不常】雖獲其志不能終也公曰子何以知之對曰詩云敬慎威儀惟民之則令尹無威儀民無則焉民所不則以在民上不可以終公曰善哉何謂威儀對曰有威而可畏謂之威有儀而可象謂之儀君有君之威儀其臣畏而愛之則而象之故能有其國家令聞長世【聞音問】臣有臣之威儀其下畏而愛之故能守其官職保族宜家順是以下皆如是是以上下能相固也衛詩曰威儀棣棣不可選也【棣直計反選息戀反詩邶風棣棣富而閑也選數也】言君臣上下父子兄弟內外大小皆有威儀也周詩曰朋友攸攝攝以威儀【詩大雅攸所也攝佐也】言朋友之道必相教訓以威儀也故君子在位可畏施舍可愛進退可度周旋可則容止可觀作事可法德行可象聲氣可樂動作有文言語有章以臨其下謂之有威儀也【樂音洛

襄三十一年左氏傳明年令尹圍楚楚子而自立是為靈王後十三年楚人弑之于乾谿】單子會韓宣子于周【單子單成公】視下言徐叔向曰單子其將死乎朝有著定【著定朝內列位常處謂之表著】會有表【有會設表以為位】衣有綬帶有結【結古外反綬領會結帶結也】會朝之言必聞于表著之位所以昭事序也視不過結綬之中所以道容貌也言以命之容貌以明之失則有闕今單子為王官伯而命事於會視不登帶言不過步貌不道容而言不昭矣不道不共不昭不從【貌正曰共言順曰從】無守氣矣十二月單成公卒【昭十一年左氏傳】子贛由其家來謁於孔子孔子正顏舉杖磬折而立曰子之大親母乃不寧乎放杖而立曰子之兄弟亦得無恙乎曳杖倍而行曰妻子家中得母病乎故身之倨佻手之高下顏色聲氣各有宜稱所以明尊卑別疎戚也【折之舌反倨紀具反佻公豆反稱去聲別彼列反賈容經】

天子視不上於袷不下於帶【上時掌反下同袷音劫袷交領也天子至尊臣視之目不過此疏曰此一節論天子以下其臣視君尊卑有異之事袷謂朝祭服之曲領】國君綏視【綏他果反視國君彌高綏讀為妥妥視謂視上於袷疏曰庾氏云妥頽下之貌執器以心為平故以下為妥此視以面為平故妥下於面則上於袷也】大夫衡視【視大夫又彌高也衡平也平視謂視面也】士視五步【士視得旁遊目五步之中也視大夫以上上下下遊目不得勢】凡視上於面則敖【敖五報反敖則仰】下於帶則憂【憂則低】傾則姦【辟頭旁視心不正也傾或為側辟匹亦反疏曰若祖尊者而欹側旁視流目東西則似有姦惡之意也曲禮】凡與大人言始視面中視抱卒視面毋改衆皆若是若父則遊目毋上於面毋下於帶若不言立則視足坐則視膝【詳見士相見篇】坐視膝立視足應對言語視面【士相見云子視父則遊目無上於面無下於帶若不言立則視足坐則視膝鄭云不言則伺其行起而已】立視前六尺而大之【蓋臣於君前視也近視六尺自此而廣之雖遠視而不過三丈六尺曲禮曰立視五雋彼在車上與此不同也荀子】視有四則朝廷之視端平平衡祭祀之視視如有將軍旅之視固植虎張喪紀之視下平垂綱視經也【平古疏字賈容經】

右瞻視之容

並坐不橫肱【為害旁人】授立不跪授坐不立【為煩尊者俛仰受之曲禮】受立授立不坐【由便疏曰坐亦跪也凡尊卑相授乃以跪為敬受立謂尊者立以物與】

【卑者卑者受此尊者之物授立謂尊者立已以物授尊者此皆不坐以尊者立已若坐則尊者屈而低身煩尊者故也】性之直者則有之矣【有之有跪者也謂受授於尊者而尊者短則跪不敢以長臨之疏曰尊者天性直自如此短小若受授尊者之物則有坐以尊者短小若立對之則以長臨尊故也少儀】大祝辨九一曰稽首二曰頓首三曰空首四曰振動五曰吉六曰凶七曰奇八曰褒九曰肅以享右祭祀【大音泰音拜奇居宜反褒音報稽首拜頭至地也頓首拜頭叩地也空首拜頭至手所謂拜手也吉拜拜而後稽顙謂齊衰不杖以下者言吉者此殷之凶拜周以其拜與頓首相近故謂之吉拜云凶拜稽顙而後拜謂三年服者杜子春云振讀為振鐸之振動讀為哀慟之慟奇讀為奇偶之奇謂先屈一膝今雅拜是也或云奇讀曰倚倚拜謂持節持戟拜身倚之以拜鄭大夫云動讀為董書亦或為董振董以兩手相擊奇拜謂一拜也褒讀為報報拜再拜是也鄭司農云褒拜今時持節拜是也肅拜但俯下手今時揖是也介者不拜故曰為事故敢肅使者玄謂振動戰栗變動之拜書曰王動色變一拜答臣下拜再拜拜神與尸享獻也謂朝獻饋獻也右讀為侑侑勸尸食而拜齊音咨擗於至反為事于偽反使所吏反疏曰此九拜之中四種是正拜五者逐事生名還依四者正拜而為之稽首頓首空首此三者相因而為之空首者先以兩手拱至地乃頭至手以其頭不至地故名空首頓首者為空首之時引頭至地首頓地即舉故名頓首稽首者稽稽留之稽頭至地多時則為稽首也此三者正拜也稽首拜中最重臣拜君之拜頓首平敵自相拜之拜空首君答臣下拜知義然者案左傳孟武伯曰非天子寡君無所稽首知武子曰天子在而君辱稽首寡君懼矣郊特牲曰大夫之臣不稽首非尊家臣以辟君也如是則諸侯於天子臣於君稽首禮之正大夫之臣及凡自敵者皆當從頓首之拜也如是差之君拜臣下當從空

首其有敬事亦稽首故洛誥云周公拜手稽首成王拜手稽首此兩相尊敬故皆稽首肅拜者拜中最輕唯軍中有此肅拜婦人亦以肅拜為正其餘五者附此四種正拜振動附稽首吉拜附頓首凶拜亦附稽首奇拜附空首褒拜亦附稽首此九拜不專為祭祀而以祭禮結之者祭事重故舉言之又曰稽首頓首二種拜俱頭至地但稽首至地多時頓首至地即舉故以叩地言之謂若以首叩物然云所謂拜手即尚書拜手稽首也吉拜謂齊衰以下喪拜而云吉者對凶拜為輕此拜先作頓首後作稽顙稽顙還是頓首但觸地無容則謂之稽顙云齊衰不杖以下者以其杖齊衰入凶拜中故雜記云父在為妻不杖不稽顙明知父沒為妻杖而稽顙也云此殷之凶拜者檀弓云拜而後稽顙頹乎其順也稽顙而後拜頹乎其至也三年之喪吾從其至者鄭注云自期如殷可則是齊衰不杖以下用殷之喪拜也云與頓首相近謂拜體相近也凶拜謂三年服者雜記云三年之喪以喪拜非三年喪以吉拜是也杜子春振動奇讀字後鄭皆從之雅拜倚拜二說後鄭皆不從鄭大夫振董之讀兩手相擊之說皆不從云奇拜謂一拜案燕禮大射君於臣有一拜之時後鄭從之云報拜謂再拜後鄭亦從司農持節拜之說後鄭不從肅拜之說案鄉飲酒賓客入門有擗八之法推手曰揖引手曰擗成十六年晉楚戰于鄢陵楚子使工尹襄問卻至以弓卻至云不敢拜命注云介者不拜又云為事故敢肅使者三肅使者而退是軍中有肅拜法後鄭引書王動色變者案今文大誓得火鳥之瑞使上附以周公書報誥于王王動色變雖不見拜文亦當為稽首拜也知再拜拜神與尸者特性祝酌奠主人再拜又獻尸尸拜受主人拜送是也云侑勸尸食而拜者特性少牢尸食祝侑主人皆有拜也朱子曰註疏振動奇拜褒拜之義未詳是否 春官】

凡男拜尚左手【左陽】凡女拜尚右手【右陰也內則】婦人吉事雖有君賜肅拜為尸坐則不手拜肅拜為喪主則不手拜【肅拜拜低頭也手拜手至地也婦人以肅拜為正凶事乃手拜耳為尸為祖姑之尸也士虞禮曰男男尸女女尸為喪主不手拜者為夫與長子當稽顙也其餘亦手拜而已雖或為唯或曰為喪主則不手拜肅拜也 疏曰肅拜如今婦人拜也為尸坐者謂虞祭婦人為祖姑作尸也周禮坐尸嫌婦人或異故明之若平常祭無婦人之尸故設同几而已不手拜肅拜者婦人為尸或答拜時但肅拜而不手拜也又曰手拜以手至地則周禮空首鄭注周禮空首拜頭至手此云手至地者此手拜之法先以手至地而頭來至手故兩注不同其實一也肅拜婦人之常而昏禮拜扱地以其新來為婦盡禮於舅姑故也左傳穆嬴頓首於宣子者有求於宣子非禮之正也 少儀】

介者不拜為其拜而夔拜【為于偽反夔子卧反 夔則失容節夔猶詐也 疏曰著鎧者不為式敬故宜無所拜之也夔挫也戎容暨暨著甲而屈拜則挫損其戎威之容也一云夔詐也言著鎧而拜形儀不足似詐也 朱子曰夔猶言有所枝柱不利屈伸也 曲禮】

揖人必違其位【禮以變為敬 疏曰位已之位也於位而見前人已所宜敬者當離已位而嚮彼遙揖是以燕禮君降階爾卿大夫鄭注云爾近也揖而移近之明雖君臣皆須違位而揖也同上】步中武象趨中韶濩【中丁仲反濩音護 佩玉之聲緩則中武象速則中韶濩也 荀子】

趨以采齊行以肆夏周還中規折還中矩進則揖之退則揚之然後玉鏘鳴也【詳名器上】天子穆穆諸侯皇皇大夫濟濟士蹇蹇庶人僬僬【濟子禮反下同蹇七浪反僬子妙反 皆行容止之貌也聘禮曰賓入門皇又曰皇且行又曰衆介北面鏘鏘焉凡行容尊者體盤卑者體蹇盤步丹反蹇子六反 穆穆威儀多貌也皇皇自莊盛也濟濟徐行有節蹇蹇容貌舒揚也僬僬者卑盡之貌庶人卑賤都無容儀並僬僬行而已凡行容下不得兼上上得兼下皇是諸侯

之容聘禮人臣而云皇者執玉入廟門得進其容亦如其君行禮也若在本國則濟濟衆介士也卑故不得進容猶蹢躅而已曲禮】君與尸行接武【尊者尚徐蹈半迹疏曰君天子諸侯也武迹也接武者二足相躡每蹈於半未得各自成迹也尊者舒遲故君及尸並步遲狹】大夫繼武【迹相及也

疏曰謂兩足跡相接繼也大夫漸卑故與尸行步稍廣遠也】士中武【迹間容迹疏曰中猶間也每徙足間容一足地乃躡之士極卑故及尸行步極廣也】徐趨皆用是【君大夫士之徐行也皆如與尸行之節也】疾趨則欲而手足毋移【疾趨謂直行也疏數目若謂起屨也移之言靡迤也毋移欲其直且正欲或為數數色角反迤羊爾反疏曰謂他事行禮須直身速行時既無所執持欲履頭恒起無復繼接之異其迹或疏或數自若尋常但手足猶宜直正不得邪低靡迤搖動也】圈豚行不舉足齊如流【圈舉遠反又去阮反豚大本反齊音咨圈轉也豚之言若有所循不舉足曳踵則衣之齊如水之流矣孔子執圭則然此徐趨也疏曰圈豚行者言徐趨法曳轉足循地而行也不舉足謂足不離地齊裳下緝也足既不舉身又俯折則裳下委地曳足如水流狀也】席上亦然【尊處亦尚徐也疏曰言在席上未坐其行之時亦如是圈豚行齊如流也】端行頤雷如矢弁行剡剡起履【頤音夷雷力救反弁皮彦反剡以漸反此疾趨也端直也頤或為霫也疏曰端行謂直身而行也頤雷者行既疾身乃小折而頭直俯臨前頤如屋雷之垂也如矢者身趨前進不邪如箭也弁急也既是疾趨宜急行也剡剡身起貌急行欲速而身履恒起也】執龜玉舉前曳踵蹢躅如也【蹢章勇反蹢色六反著徐趨之事疏曰踵足後跟也謂將行之際初舉足前後曳足跟行不離地舉足疾數也】凡行容惕惕【惕音傷惕惕直疾貌也凡行謂道路也疏曰道路雖速疾又不忘於直故其容直而疾也】廟中齊齊【齊才兮反恭慤貌也疏曰齊齊自收持嚴正之貌以對神不敢舒散故也】朝廷濟濟翔翔【莊敬貌也疏曰濟濟有威儀矜莊也翔翔行而張拱也玉藻】帷薄之外不趨【不見尊者行自由不為容也入則容行而張足曰趨疏曰帷幔也薄簾也禮天子外屏諸侯內屏卿大夫以簾士以帷外屏門外為之內屏門內為之邦君樹塞門是也臣先朝君至屏而加肅敬屏外不敬故不趨今言帷薄謂大夫士也其外不趨則內可趨為敬也】堂上不趨【為其迫也堂下則趨】執玉不趨【志重玉也聘禮曰上介授賓玉於廟門外疏曰引聘禮證賓有執玉於堂下時也賓執玉入門內不疾趨而為徐趨玉藻云執龜玉舉前曳踵蹢躅如也注云著徐趨之事是也】堂上接武【武迹也迹相接謂每移足半躡之中人之迹尺二寸疏曰半躡之是每進六寸也】堂下布武【布武謂每移足各自成迹不相躡】室中不翔

【又為其迫也行而張拱曰翔曲禮】執玉執龜策不趨堂上不趨城上不趨【策音策於重器於近尊於迫狹無容也步張足曰趨少儀】凡奉者當心提者當帶【奉芳勇反高下之節疏曰物有宜奉持之者有宜提挈之者奉之者仰手當心奉持其物提之者屈臂當帶而提挈其物帶有二處朝服之屬其帶則高於心深衣之類其帶則下於脇玉藻說大帶云三分帶下紳居二焉紳長三尺而居帶之下三分之二則帶之下去地四尺五寸矣人長八尺為限若帶下四尺五寸則帶上所除止三尺五寸故知朝服等帶則高也深衣云帶下毋厭髀上毋厭脇當毋骨者故知深衣之帶則下也今云提者當帶謂深衣之帶且古人恒著深衣此明平常提奉益可知也】執天子之器則上衡國君則平衡大夫則綏之士則提之凡執主器執輕如不克執主器操幣圭璧則尚左手行不舉足車輪曳踵【詳臣禮篇曲禮】

凡執幣者不趨容彌蹙以為儀【不趨主慎也以進而益恭為威儀耳今文無容疏曰案小行人合六幣玉馬皮圭璧帛皆稱幣下文別云執玉則此幣謂皮馬享幣及禽摯皆是凡趨有二種有疾趨行而張足曰趨是也有徐趨則下文舒武舉前曳踵是也此云不趨者不為疾趨又不為徐趨但疾徐之間為之故以進而益恭為威儀也】執玉者則唯舒武舉前曳踵【唯舒者重玉器尤慎也武迹也舉前曳踵備 跲也今文無者古文曳作挫

音致跲其業反挫以制反疏曰唯舒者案玉藻云執龜玉不趨為重玉器尤慎也此篇直見以禽摯相見之禮無執玉朝聘之事而云執玉者因執贄兼見之也

朱子曰注疏以舒字絕句陸佃曰容彌蹙同唯武則舒然則讀武字絕句矣其說近是士相見禮】固頤正視平肩正背臂如抱鼓足間二寸端面攝纓端股整足體不搖肘曰經立因以微磬曰共立因以磬折曰肅立因以垂佩曰卑立立容也【共音恭下同】坐以經立之容肘不差而足不跌視平衡曰經坐微俯視尊者之膝曰共坐仰首視不出尋常之內曰肅坐廢首 肘曰卑坐坐容也【跌徒結反 與 同】行以微磬之容臂不搖掉肩不下上身似不則從然而任行容也【掉徒弔反】趨以微磬之容飄然翼然肩狀若汭足如射箭趨容也旋以微磬之容其始動也穆如驚□其固復也旄如濯絲跲旋之容也【□式六反跲步般反】跪以微磬之容掄右而下進左而起手有抑揚各尊其紀跪容也拜以磬折之容吉事上左凶事上右隨前以舉項衡以下寧速無遲背項之狀如屋之玄拜容也【玄未詳】拜而未起伏容也【賈 容經】

右坐立拜揖步趨奉持之容 襄公如晉孟獻子相公稽首【相悉亮反相儀也稽首首至地】知武子曰天子在而君辱稽首寡君懼矣【稽首事天子之禮】孟獻子曰以敝邑介在東表密邇仇讎【仇讎謂齊楚與晉爭】寡君將君是望敢不稽首【傳言獻子能固事盟主襄三年左氏傳】哀公會齊侯盟於蒙【齊侯簡公弟平公敖也】孟武伯相齊侯稽首公拜齊人怒武伯曰非天子寡君無所稽首【十七年傳】公及齊侯邾子盟於顧齊人責稽首【責十七年齊侯為公稽首不見答顧齊地】因歌之曰魯人之皋數年不覺使我高蹈【皋緩也高蹈猶遠行也言魯人皋緩數年不知答齊稽首故使我高蹈來為此會】唯其儒書以為二國憂【二國齊邾也言魯據周禮不肯答稽首令齊邾遠至二十一年傳】

大夫之臣不稽首非尊家臣以辟君也【辟音避辟國君也疏曰諸侯稽首於天子大夫稽首於諸侯若大夫之臣又稽首於大夫便是一國兩君故云以避君也大夫得稽首於諸侯不辟天子者諸侯有大功德出封畿外專有其國故大夫得專盡臣禮事之也郊特牲】孔子與門人立拱而尚右二三子亦皆尚右【效孔子也】孔子曰二三子之嗜學也【嗜貪】我則有姊之喪故也二三子皆尚左【復正也喪尚右右陰也吉尚左左陽也檀弓】

君子之居恒當戶【鄉明鄉許亮反】寢恒東首【首手又反首生氣也】若有疾風迅雷甚雨則必變雖夜必興衣服冠而坐【迅音信衣於既反又如字敬天之怒】日五盥沐稷而饋梁櫛用櫛櫛髮晞用象櫛進禡進羞工乃升歌【盥音管饋音悔櫛側乙反櫛章善反禡其既反晞乾也沐饋必進禡作樂盈氣也更言進羞明為羞籩豆之實疏曰盥洗手也沐沐髮也饋洗面也取稷梁之潘汁用將洗面沐髮竝須滑故也然此大夫禮耳人君則沐饋皆梁也櫛白理木也櫛梳也沐髮為除垢膩故用白理澀木以為櫛晞乾燥也沐已燥則已澀故用象牙滑櫛以通之也禡謂酒也少儀注云沐而飲酒曰禡是沐畢必進禡酒又進羞知非廉羞者庶羞

為食而設今進饌則為飲設羞故知是羞 羞豆非庶羞也進羞之後樂工乃升堂以琴瑟而歌以其新沐體虛補益氣也】浴用二巾上絺下綌【絺丑疑反綌去逆反 刷去垢也 刷色劣反】出杆履蒯席連用湯【杆音雫蒯若怪反連力旦反 杆浴器也蒯席澀便於洗足也連猶釋也 疏曰出杆浴竟而出盆也蒯菲草席澀踐之刮去垢也連用湯言釋去足垢用湯瀾也】履蒲席衣晞身乃履進飲【衣於既反 進飲亦盈氣也 玉藻】仲夏之月君子齊戒處必掩身毋躁【齊側皆反 掩猶隱翳也躁猶動也今月令毋躁為欲靜 疏曰毋躁宜靜以安萌陰也】止聲色毋或進【進猶御見也聲謂樂也易及樂春秋說夏至人主與羣臣從八能之士作樂五日今止之非其道也 疏曰歌樂華麗之事為助陰靜故止之毋或進者嬪房不得進御侍夕亦為微陰始動不可動於陰事也鄭必知諸緯文作樂為是者以周禮夏至祭地方澤皆有作樂之文不得云止樂也 朱子曰止聲色蓋亦處必掩身毋躁之義若以止樂言則拘矣月令之說蓋多有未安而此難以為非也注文蓋失其指矣】薄滋味毋致和【和戶卧反 為其氣異此時傷人】節耆欲定心氣【耆市志反 微陰扶精不可散也】仲冬之月君子齊戒處必掩身身欲寧去聲色禁耆慾安形性事欲靜以待陰陽之所定【去起呂反 寧安也聲謂樂也易及樂春秋說云冬至人主與羣臣從八能之士作樂五日此言去樂又相反 月令】

右居處齊潔之事

子之燕居申申如也夭夭如也【燕居閒暇無事之時楊氏曰申申其容舒也夭夭其色愉也 程子曰此弟子善形容聖人處也為申申字說不盡故更著夭夭字今人燕居之時不怠惰放肆必太嚴厲嚴厲時著此四字不得怠惰放肆時亦著此四字不得惟聖人便自有中和之氣述而】齊必有明衣布【齊側皆反 齊必沐浴浴竟即著明衣所以明潔其體也以布為之】必有寢衣長一身有半【長去聲 齊主於敬不可解衣而寢又不可以著明衣而寢故別有寢衣其半蓋以覆足】齊必變食居必遷坐【變食謂不飲酒不茹葷遷坐易常處也 此一節記孔子謹齊之事楊氏曰齊所以交神故致潔變常以盡敬】席不正不坐【謝氏曰聖人心安於正故於位之不正者雖小不處】寢不尸居不容【尸謂偃卧似死人也居居家容容儀范氏曰寢不尸非惡其類於死也惰慢之氣不設於身體雖舒布其四體而亦未嘗肆耳居不容非惰也但不若奉祭祀見賓客而已申申天天是也】迅雷風烈必變【迅疾也烈猛也必變者所以敬天之怒記曰若有疾風迅雷甚雨則必變雖夜必興衣服冠而坐 並鄉黨】

言有四術言敬以國朝廷之言也文言有序祭祀之言也屏氣折聲軍旅之言也言若不足喪紀之言也言經也【賈 容經】君命大夫與士肄在官言官在府言府在庫言庫在朝言朝朝言不及犬馬在朝言禮問禮對以禮【詳臣禮恭敬章】居喪不言樂祭事不言凶公庭不言婦女【非其時也】公事不私議【嫌若姦也曲禮】朝廷曰退【近君為進 疏曰謂於朝廷之中若欲散還則稱曰退】燕遊曰歸【禮褻主於家也】師役曰罷【罷音疲 罷之言罷勞也春秋傳曰師還曰罷 疏曰莊八年秋師還公羊傳曰還者何等辭也此滅同姓何善爾病之也何休云慰勞其罷病也是鄭用公羊為注也 朱子曰易曰或鼓或罷與史記將軍罷休就舍之罷亦同 少儀】凡言非對也妥而後傳言與

君言言使臣與大人言言事君與老者言言使弟子與幼者言言孝弟於父兄與衆言言忠信
慈祥與居官者言言忠信【詳見士相見禮】儼人必於其倫【儼魚起反 儼猶比也倫猶類
也比大夫當於大夫比士當於士不以其類則有所褻】問天子之年對曰聞之始服衣若干
尺矣【既不敢言年又不敢斥至尊所能 疏曰此謂幼少新立之王或有遠方異域人來不知
王年大小問朝廷之臣臣答之必有法則禮齒路馬有誅而至尊體貴故臣不敢輕言君年及
形長短與才技所堪故依違而對也但云聞之謙不敢言見也云始服衣若干尺謂或五尺或
六尺隨長短而言之幼則衣短長則衣長問者聞之則知王之長幼矣古者謂數為若干故儀
禮數射算云若干純若干奇若如也干求也言事本不定當如此求之也】問國君之年長曰
能從宗廟社稷之事矣幼曰未能從宗廟社稷之事也問大夫之子長曰能御矣幼曰未能御
也問士之子長曰能典謁矣幼曰未能典謁也問庶人之子長曰能負薪矣幼曰未能負薪也
【長丁丈反下同 皆言其能則長幼可知御猶主也書曰越乃御事謂主事者謁請也謂能擯
贊出入以事請告也禮四十強而仕五十命為大夫 疏曰國君言所能者辟天子也人君十五
有養子之禮能主國則知十五以上未能主國則知十四以下大夫子年長幼當以二十為限
也御謂主事也官有世功子學父業故有御事之稱典謁主賓客告請之事也少儀士之子長
曰能耕幼曰能負薪未能負薪謂士祿薄子猶以農事為業與此不同者亦當有田無田之異
此士是有田者故子免耕負薪而典謁注引曲禮釋所以問其子之義以大夫士其年既定故
不假問其年而問其子也 曲禮】問國君之子長幼長則曰能從社稷之事矣幼則曰

能御未能御【御謂御事 疏曰幼則曰能御御治也謂已能治事若大幼則曰未能治事此治
事謂尋常小於社稷之事】問大夫之子長幼長則曰能從樂人之事矣幼則曰能正於樂人
未能正於樂人【正樂政也周禮大司樂以樂德教國子中和祇庸孝友以樂語教國子興道
諷誦言語以樂舞教國子舞雲門大卷大咸大韶大夏大濩大武道音導卷音權
疏曰正謂政令以幼者習樂未成但聽政令於樂人受樂人所教】問士之子

長幼長則曰能耕矣幼則曰能負薪未能負薪【士祿薄子以農事為業少儀】問國君之富
數地以對山澤之所出問大夫之富曰有宰食力祭器衣服不假問士之富以車數對問庶人
之富數畜以對【數色主反下數畜同畜許六反皆在其所制以多少對宰邑士也食力謂民
之賦稅 疏曰問國君之富謂問諸侯之臣求知其君封內土地所出也云富者非問其多金帛
是問最所優饒者也不問天子者率土之物莫非王有故不須問也數地廣狹對之又以魚鹽
金錫之屬隨有而對若晉文公謂楚成王曰羽毛齒革君地生焉是也問大夫之富非他國人
問其臣也有宰明有采地食力謂食下民賦稅之力也衣服祭服也四命大夫得自造祭器衣
服故不假若三命以下有田者造而不備則假借也士有地不多亦無邑宰故其屬吏但以其
車數對上士三命則得賜車馬副車隨命中士乘棧車無副車也畜謂雞豚之屬】 弔喪弗能

不問其所費問疾弗能遺不問其所欲見人弗能館不問其所舍賜人者不曰來取與人者
不問其所欲【 音附遺于季反

皆為傷思也見人見行人館舍也與人不問其所欲己物或時非其所欲將不與也 並曲禮】

問品味曰子亟食於某乎問道藝曰子習於某乎子善於某乎【亟去翼反

不斥人謙也道三德三行也藝六藝 疏曰此明賓主相問之事雖先知其所食所習所善及其
問之猶疑而稱乎者謙退之辭是不正指斥人所能也 少儀】

入竟而問禁入國而問俗入門而問諱【竟音境

皆為敬主人也禁謂政教俗謂常所行與所惡也國中城中也 惡烏路反 疏曰諱主人祖先之名宜先知之欲為避之也問諱而以門為限者主人出至大門外迎客客入門方應交接故於門為限也】禮不諱嫌名二名不偏諱【為其難辟也嫌名謂音聲相近若禹與雨丘與區也偏謂二名不一一諱也孔子之母名徵在言在不稱徵言徵不稱在

辟音避下同禹雨並于矩反丘區並去求反 今按區字古音本讀為丘釋文一讀丘于反疏謂丘與區音異義同皆非鄭指今不取】君所無 諱【謂臣言於君前不辟家諱尊無二】大夫之所有公諱【辟君諱也 疏曰於大夫之所止得避公家之諱不得避大夫諱所以然者尊君諱也若兼為大夫諱則君諱不尊也或曰大夫所有公諱者君及大夫諱耳亦無已之私諱見玉藻 玉藻於大夫所有公諱無私諱注云公諱若言語所辟先君之名疏曰謂士與大夫言但諱君家不自私諱父母也】詩書不諱臨文不諱【為其失事正疏曰何胤云詩書謂教學時臨文謂禮義文行事時 今按詩書謂誦讀臨文謂作文 玉藻教學臨文不諱注云為惑不知者】廟中不諱【為有事於高祖則不諱曾祖以下尊無二也於下則諱上】夫人之諱雖質君之前臣不諱也【臣於夫人之家恩遠也質猶對也

疏曰夫人本家所諱臣雖對君前而言語不為諱也】婦諱不出門【婦親遠於宮中言辟之疏曰門謂婦宮門婦家之諱但於婦宮中不言耳若於宮外則不諱也】大功小功不諱【疏曰古者期親則為諱

曲禮】士於君所言大夫沒矣則稱諡若字名士與大夫言名士字大夫【君所大夫存亦名疏曰士於君所言大夫者謂士在君前與君言論及於大夫也沒矣則稱諡若字者君前臣名若大夫生則士呼其名沒則於君前稱彼諡無諡則稱字不呼其名敬貴故也名士者士賤雖已死而此生士與君言猶呼其名也與大夫言名士字大夫者謂士與大夫言論及他生大夫士士賤故呼之名大夫貴故呼之字也若大夫士卒則字士諡大夫 玉藻】

父前子名君前臣名【對至尊無大小皆稱名 疏曰成十六年鄢陵之戰公陷于淖欒書欲載晉侯鍼曰書退鍼是書之子對晉侯而稱書是於君前臣名其父也】君使士射不能則辭以疾言曰某有負薪之憂【射者所以觀德唯有疾可以辭也使士射謂以備耦也憂或為疾 疏曰射法每兩人相對以決勝 名曰耦耦貴賤必對故卿與卿耦大夫與大夫耦或奇餘不足則使士備耦故有使士射之禮若不能不得云不能但當自稱有疾所以然者射以表德士既升朝必宜有德也 薪之憂言已有擔樵之餘勞不堪射也士祿代耕且問庶人子云能 薪而今云士 薪者亦謙辭也兼言昔未為士時經擔樵今猶 動昔日之勞也白虎通云天子病曰不豫諸侯曰 子公羊云 茲未知其說孰是隱義云諸侯曰不茲大夫曰犬馬士曰薪 並曲禮】禮居是邑不非其大夫【懼於訕上荀子】國君去其國止之曰奈何去社稷也大夫曰奈何去

宗廟也士曰奈何去墳墓也【皆民臣殷勤之言 疏曰大夫士去國謂三諫不從或以罪見黜者士雖無臣民而屬吏止之也士亦有廟辟大夫言墳墓亦與大夫互也 曲禮】

右言語之禮 孔子於鄉黨恂恂如也似不能言者【恂相倫反 恂恂信實之貌似不能言者謙卑遜順不以賢知先人也鄉黨父兄宗族之所在故孔子居之其容貌辭氣如此】其在宗廟朝廷便便言唯謹爾【朝直遙反下同便旁連反 便便辨也宗廟禮法之所在朝廷政事之所

出言不可不明辨故必詳問而極言之但謹而不放爾

此一節記孔子在鄉黨宗廟朝廷言貌之不同也】朝與下夫言侃侃如也與上大夫言誾誾如也【侃若旦反誾魚巾反此君未視朝時也王制諸侯上大夫卿下大夫五人許氏說文侃侃剛直也誾誾和悅而諍也】食不語寢不言【答述曰語自言曰言范氏曰聖人存心不他當食而食當寢而】

【寢言語非其時也楊氏曰肺為氣主而聲出焉寢食則氣窒而不通語言恐傷之也亦通並鄉黨】子入大廟每事問或曰孰謂鄒人之子知禮乎

入大廟每事問子聞之曰是禮也【大音泰鄒側留反大廟魯周公廟此蓋孔子始仕之時入而助祭也鄒魯邑名孔子父叔梁紇嘗為其邑大夫孔子自少以知禮聞故或人因此而譏之孔子言是禮者敬謹之至乃所以為禮也尹氏曰禮者敬而已矣雖知亦問謹之至也其為敬莫大於此謂之不知禮者豈足以知孔子哉八佾】孔子曰侍於君子有三愆言未及之而言謂之躁言及之而不言謂之隱未見顏色而言謂之瞽【君子有德位之通稱愆過也瞽無目不能察言觀色尹氏曰時然後言則無三者之患矣季氏】魏中山舍人倉唐使文侯召倉唐而見之曰擊無恙倉唐曰唯唯如是者三乃曰君出太子而封之國君名之非禮也文侯恍然為之變容問曰子之君無恙乎倉唐曰臣來時拜送書於庭文侯指顧左右曰子之君長孰與是倉唐曰禮儼人必於其倫諸侯無偶無所儼之曰長大孰與寡人倉唐曰君賜之外府之裘則能勝之賜之弁帶則不更其造【使色吏反見賢遍反唯于鬼反怵尺律反為于偽反勝音升更音更說苑】君子不以辭盡人【不見人之言語則以為善其餘行或時惡也】故天下有道則行有枝葉天下無道則辭有枝葉【行有枝葉所以益德也言有枝葉是聚虛華也枝葉依幹而生言行亦由禮出】是故君子於有喪者之側不能焉則不問其所費於有病者之側不能饋焉則不問其所欲有客不能館則不問其所舍【皆辟有言而無其實表記】二名不偏諱夫子之母名徵在言在不稱徵言徵不稱在【稱舉也雜記曰妻之諱不舉諸其側檀弓】范獻子聘于魯【范獻子宣子之子士鞅也聘在魯昭二十二年】問具山敖山魯人以其鄉對【言其鄉之山也】獻子曰不為具敖乎對曰先君獻武之諱也【獻伯禽之曾孫微公之子獻公具也武獻公之庶子武公敖也】獻子歸徧告其所知曰人不可以不學吾適魯而名其二諱為笑焉唯不學也【言學則必知諱不見笑也禮入境而問禁入門而問諱】人之有學也如木之有枝葉也木有枝葉猶庇蔭人而況君子之學乎【國語晉語】晉獻文子成室晉大夫焉【文子趙武也作室成晉君獻之謂賀也諸大夫亦禮以往】張老曰美哉輪焉美哉奐焉【心譏其奢也輪輪困言高大奐言衆多】歌於斯哭於斯聚國族於斯【祭祀死喪燕會於此足矣言此者欲防其後復為】文子曰武也得歌於斯哭於斯聚國族於斯是全要領以從先大夫於九京也北面再拜稽首【全要領者免於刑誅也晉卿大夫之墓地在九原京蓋字之誤也當為原】君子謂之善頌善禱【善頌謂張老之言善禱謂文子之言禱求也檀弓】

凡尊必尚玄酒【不忘古也】唯君面尊【面猶鄉也燕禮曰司官尊于東楹之西兩方壺左玄酒公尊瓦大兩有豐在尊南面上】唯饗野人皆酒【飲賤者不備禮玉藻】尊者以酌者之左為上尊【尊者設尊者也酌者鄉尊其左則右尊也】尊壺者面其鼻【鼻在面中言鄉

人也】凡洗必盥【先盥乃洗爵先自潔也盥有不洗也

並少儀】飲玉爵者弗揮【為其寶而脆曲禮】

飲酒者禡者醯者有折俎不坐【折俎尊徹之乃坐也已沐飲曰禡酌始冠曰醯】

取俎進俎不坐【以其有足亦柄尺之類】其有折俎者取祭反之不坐燔亦如之【亦為柄尺之類也燔炙也鄉射曰賓奠爵于薦西取肺坐絕祭左手嚙之興加于俎坐悅手】尸則坐

【尸尊也少牢饋食禮曰尸左執爵右兼取肝肺擣于俎鹽振祭嚙之加于菹豆並少儀】

諸侯無故不殺牛大夫無故不殺羊士無故不殺犬豕庶人無故不食珍【故謂祭饗王制】

牛羊之肺離而不提心【提猶絕也離之不絕中央少者使易絕以祭耳】

君子不食國腴【周禮國作參謂犬豕之屬食未穀者也腴有似於人穢】

羞首者進喙祭耳【耳出見也並少儀】大祝辨九祭一曰命祭二曰衍祭三曰炮祭四曰周

祭五曰振祭六曰擣祭七曰絕祭八曰繚祭九曰共祭【杜子春云命祭祭有所主命也振祭

振讀為慎禮家讀振為振旅之振擣祭擣讀為虞芮之芮鄭司農云衍祭羨之道中如今祭殤

無所主命周祭四面為坐也炮祭燔柴也爾雅曰祭天曰燔柴擣祭以肝肺菹擣鹽醢中以祭

也繚祭以手從肺本循之至於末乃絕以祭也絕祭不循其本直絕肺以祭也重肺賤肝故初

祭絕肺以祭謂之絕祭至祭之末禮殺之後但擣肝鹽中振之擬之若祭狀弗祭謂之振祭特

牲饋食禮曰取菹擣于醢祭于豆間鄉射禮曰取肺坐絕祭鄉飲酒禮曰右取肺左卻手執本

坐弗繚右絕末以祭少牢曰取肝擣于鹽振祭玄謂九祭皆謂祭食者命祭者玉藻曰君若賜

之食而君客之則命之祭然後祭是也衍字當為延炮字當為包聲之誤也延祭者曲禮曰客

若降等執食興辭主人興辭於客然後客坐主人延客祭是也包猶兼也兼祭者有司曰宰夫

贊者取白黑以授尸尸受兼祭于豆祭是也周猶徧也徧祭者曲禮曰殽之序徧祭之是也振

祭擣祭本同不食者擣則祭之將食者既擣必振乃祭也絕祭繚祭亦本同禮多者繚之禮略

者絕則祭之共猶授也王祭食宰夫授祭孝經說曰共綏執授春官】凡齊執之以右居之於

左【齊謂食羹醬飲有齊和者也居於左手之上右手執而正之由便也】凡羞有涪者不以

齊【齊和也並少儀】羹之有菜者用挾其無菜者不用挾【挾猶箸也今人或謂挾為挾提

曲禮】未步爵不嘗羞【步行也少儀】為天子削瓜者副之巾以絺【副析也既削又四析

之乃橫斷之而巾覆焉】為國君者華之巾以綌【華中裂之不四析也】為大夫累之【累

俛也謂不巾覆也】士寘之【不中裂橫斷去寘而已】庶人齧之【不橫斷曲禮】

食棗桃李弗致於核【恭也弗致者謂不置於地】瓜祭上環食中棄所操【上環頭忬也朱

子曰頭忬謂寘頭所切一環也以其所生之本味最甘美又先斷而不污故以為祭中者中環

也亦甘且潔故以奉尊者所操下環為手所持處以其味薄而不潔故棄之而不食也玉藻】

為君子擇葱薤則絕其本末【為有菱乾少儀】一室之人非賓客一人徹【同事合居者也

賓客則各徹其饌也】壹食之人一人徹【壹猶聚也為赴事聚食也】凡燕食婦人不徹【

婦人質不備禮玉藻】

餽餘不祭父不祭子夫不祭妻【食人之餘曰餽餽而不祭唯此類也食尊者之餘則祭盛之

朱子曰禮君賜腥則熟而薦之以為榮若賜熟食則恐是餽餘故不祭妻子雖卑於已然既沒

則以神道接之故亦不以祭也曲禮】

右飲食之禮【凡言賓主之事附相見禮侍食於君者附臣禮事長者附少儀其雜者附此篇

】有虞氏祭首夏后氏祭心殷祭肝周祭肺【氣主盛也明堂位】食不厭精膾不厭細【

食飯也精鑿也牛羊與魚之腥聶而切之為膾食精則能養人膾粗則能害人不厭言以是為善非謂必欲如是也】食饘而餲魚餒而肉敗不食色惡不食 惡不食失飪不食不時不食【饘飯傷熱濕也餲味變也魚爛曰餒肉腐曰敗色惡 惡未敗而色 變也飪烹調生熟之節也不時五穀不成果實未熟之類此 者皆足以傷人故不食】割不正不食不得其醬不食【割肉不方正者不食造次不離於正也漢陸績之母切肉未嘗不正斷葱以寸為度蓋其質美與此暗合也食肉用醬各有所宜不得則不食惡其不備也此二者無害於人但不以嗜味而苟食耳】肉雖多不使勝食氣惟酒無量不及亂【食以穀為主故不使肉勝食氣酒以為人合歡故不為量但以醉為節而不及亂耳程子曰不及亂者非惟不使亂志雖血氣亦不可使亂但浹洽而已可也】沽酒市脯不食【沽市皆買也恐不精潔或傷人也與不啗康子之藥同意】不撤薑食【薑通神明去穢惡故不撤】不多食【適可而止無貪心也】祭於公不宿肉祭肉不出三日出三日不食之矣【助祭於公所得胙肉歸即頒賜不俟經宿者不留神惠也家之祭肉則不過三日皆以分賜蓋過三日則肉必敗而人不食之是褻鬼神之餘也但比君所賜胙可少緩耳】食不語寢不言【答述曰語自言曰言范氏曰聖人存心不他當食而食當寢而寢言語非其時也楊氏曰肺為氣主而聲出焉寢食則氣窒而不通語言恐傷之也亦通】雖疏食菜羹瓜祭必齊如也【古人飲食每種各出少許置之豆間之地以祭先代始為飲食之人不忘本也齊嚴敬貌孔子雖薄物必祭其祭必敬聖人之誠也 此一節記孔子飲食之節謝氏曰聖人飲食如此非極口腹之欲蓋養氣體不以傷生當如此然聖人之所不食窮口腹者或反食之欲心勝而不暇擇也 論語】齊大饑黔敖為食於路以待饑者而食之有餓者蒙袂輯屨貿貿然來【蒙袂不欲見人也輯歛也歛屨力憊不能屨也貿貿日不明之貌】黔敖左奉食右執飲曰嗟來食揚其目而視之曰予唯不食嗟來之食以至於斯也【嗟來食雖閔而呼之非敬辭】從而謝焉終不食而死【從猶就也】曾子聞之曰微與其嗟也可去其謝也可食【微猶無也無與止其狂狷之辭 檀弓】

為人祭曰致福為已祭而致膳於君子曰膳祔練曰告【此皆致祭禮之餘於君子攝主言致福申其辭也自祭言膳謙也祔練言告不敢以為福膳也】凡膳告於君子主人展之以授使者於阼階之南南面再拜稽首送反命主人又再拜稽首【展者具也】其禮大牢則以牛左肩臂臠折九箇少牢則以羊左肩七箇植豕則以豕左肩五箇【折斷分之也皆用左者右以祭也羊豕不言臂臠因牛序之可知】其以乘壺酒束脩一犬賜人若獻人則陳酒執脩以將命亦曰乘壺酒束脩一犬【陳重者執輕者便也乘壺四壺也酒謂清也糟也不言陳犬或無脩者牽犬以致命也於卑者曰賜於尊者曰獻】其以鼎肉則執以將命【鼎肉謂牲體已解可升於鼎】其禽加於一雙則執一雙以將命委其餘【加猶多也】犬則執緹守犬田犬則授擯者既受乃問犬名牛則執紉馬則執鞚皆右之【緹鞚鞚皆所以繫制之者守犬田犬問名畜養者當呼之名謂若韓盧宋鵠之屬右之者執之宜由便也】臣則左之【異於衆物臣謂囚俘】車則說綏執以將命甲若有以前之則執以將命無以前之則袒囊奉冑【甲鎧也有以前之謂他摯幣也囊破鎧衣也冑兜鍪也袒其衣出兜鍪以致命】器則執蓋【謂有表裏】弓則以左手屈韞執拊【韞弓衣也左手屈衣并於拊執之而右手執蕭】劍則啓櫝蓋襲之加夫撓與劍焉【櫝謂劍函也襲卻合之夫撓劍衣也加劍於衣上夫或為煩皆 聲】笏書脩苞苴弓茵席枕凡穎杖琴瑟戈有刃者櫝箴籥其執之皆尚左手【苞苴謂編束蕉葦以裹魚肉也茵著蓐也穎警枕也箴著也籥如笛三孔皆十六物也左手執上上陽也右手執

下下陰也】刀卻刃授穎削授拊【辟用時穎鑲也拊謂杞】凡有刺刃者以授人則辟刃【辟刃不以正鄉人也並少儀】水潦降不獻魚鼈【不饒多也】獻鳥者佛其首【為其喙害人也佛戾也蓋為小竹籠以冒之】畜鳥者則勿佛也【畜養也養則馴】獻車馬者執策綏獻甲者執冑獻杖者執末獻民虜者操右袂獻粟者執右契獻米者操量鼓獻熟食者操醬齊獻田宅者操書致【凡操執者謂手所舉以告者也設其大者舉其小者便也甲鎧也冑兜鍪也民虜軍所獲也操其右袂制之契券要也右為尊量鼓量器名】凡遺人弓者張弓尚筋弛弓尚角【弓有往來體皆欲令其常曲隤然順也遺人無時已定體則張之未定體則弛之】右手執簫左手承弣【簫弣頭也謂之簫簫邪也弣把中】尊卑垂帨【帨佩巾也磬折則佩垂授受之儀尊卑一朱子曰此謂賓主雖或一尊一卑然皆當磬折垂帨也】若主人拜【拜受也】則客還辟辟拜【辟拜謙不敢當】主人自受由客之左接下承弣【由從也從客之左右客尊之接下接客手下也承弣卻手則簫覆手與】鄉與客並然後受【於堂上則俱南面禮敵者並授】進劍者左首【左首尊也】進戈者前其鐔後其刃進矛戟者前其鏃【後刃敬也三兵鐔鏃雖在下猶為首銳底曰鐔取其鐔地平底曰鏃取其鏃地】進几杖者拂之【尊者所馮依拂去塵敬】效馬效羊者右牽之【用右手便效猶呈見】效犬者左牽之【犬齕齧人右手當禁備之】執禽者左首【左首尊】飾羔鴈者以纁【纁畫也諸侯大夫以布天子大夫以畫】受珠玉者以掬【慎也掬手巾】受弓劍者以【敬也】凡以弓劍苞苴簞筥問人者【問猶遺也苞苴裹魚肉或以葦或以茅簞筥盛飯食者圓曰簞方曰筥】操以受命如使之容【謂使者曲禮】君將適他臣如致金玉貨貝於君則曰致馬資於有司敵者曰贈從者【適他行朝會也資猶用也贈送也少儀】凡於尊者有獻而弗敢以聞【此所獻亂也少儀曰君將適他臣若致金玉貨貝於君則曰致馬資於有司是其類也】凡獻於君大夫使宰士親皆再拜稽首送之【敬也】膳於君有葷桃茢於大夫去茢於士去葷皆造於膳宰【膳美食也葷桃茢辟凶邪也大夫用葷桃士桃而已葷薑及辛菜也茢炎帚也造於膳宰既致命而授之葷或作烹】凡賜君子與小人不同曰【慎於尊卑】大夫親賜士士拜

受又拜於其室衣服弗服以拜【異於君惠也拜受又就拜於其家是所謂再拜也】敵者不在拜於其室【謂來賜時不見也見則不復往也】

酒肉之賜弗再拜【輕也受重賜者拜受又拜於其室也並玉藻】

君子於有饋者弗能見則不視其饋【饋遺也不能見謂有疾也不視猶不內也坊記】

右問遺之禮問人於他邦再拜而受之【拜送使者如親見之敬也】康子饋藥拜而受之曰丘未達不敢嘗【范氏曰凡賜食必嘗以拜藥未達則不敢嘗受而不飲則虛人之賜故告之如此然則可飲而飲不可飲而不飲皆在其中矣楊氏曰大夫有賜拜而受之禮也未達不敢嘗謹疾也必告之直也此一節記孔子與人交之誠意】朋友之饋雖車馬非祭肉不拜【朋友有通財之義故雖車馬之重不拜祭肉則拜者敬其祖考同於已親也並論語】陽貨欲見孔子而惡無禮大夫有賜於士不得受於其家則往拜其門陽貨矚孔子之亡也而饋孔子蒸豚孔子亦矚其亡也而往拜之當是時陽貨先豈得不見【欲見孔子欲召孔子來見已也惡無禮畏人以已為無禮也受於其家對使人拜受於家也其門大夫之門也矚窺也陽貨於魯為大夫孔子為士故以此物及其不在而饋之欲其來拜而見之也先謂先來加禮也孟子】吳公子札聘於鄭見子產如舊相識與之縞帶子產獻紵衣焉【大帶也吳地貴縞鄭地貴紵

故各獻已所貴示損已而不為彼貨利 襄二十九年左氏傳】 子思在魯使以書如衛問子上子上北面再拜受書伏讀然後與使者宴遂為復書返中庭北面再拜以授使者既受書然後退使者還魯問子思曰吾子堂上南面立授臣書事畢送臣子上中庭拜授臣書而不送何也子思曰拜而不送敬也使而送之賓也【孔叢子雜訓】 陳臻問曰前日於齊王餽兼金一百而不受於宋餽七十鎰而受於薛餽五十鎰而受前日之不受是則今日之受非也今日之受是則前日之不受非也夫子必居一於此矣【陳臻孟子弟子兼金好金也其價兼倍於常者一百百鎰也】 孟子曰皆是也【皆適於義也】 當在宋也予將有遠行行者必以贐辭曰餽贐予何為不受【贐送行者之禮也】 當在薛也子有戒心辭曰聞戒故為兵餽之予何為不受【時人有欲害孟子者孟子設兵以戒備之薛君以金餽為孟子兵備辭曰聞子之有戒心也】 若於齊則未有處也無處而餽之是貨之也焉有君子而可以貨取乎【無遠行戒心之事是未有所處也取猶致也 尹氏曰君子之辭受取予唯當於理而已 孟子】

國君不乘奇車【出入必正也奇車獵衣之屬】 車上不廣欬【為若自矜廣猶弘也】 不妄指【為惑衆】 立視五禡【立平視也禡猶規也謂輪轉之度禡或為榮】 式視馬尾【小俛】 顧不過轂【為掩在後】 國中以策彗卹勿驅塵不出軌【入國不馳彗竹帚卹勿搔摩也 朱子曰策彗疑謂策之彗若今時鞭末韋帶耳 曲禮】

鸞設於鑣和設於軾馬動而鸞鳴鸞鳴而和應行之節也【鸞和皆鈴也韓詩內傳】 坐乘以經坐之容手撫式視五旅欲無顧顧不過轂小禮動中禮式大禮下坐車之容也立乘以經立之容右持綏而左臂詘存劍之緯欲無顧顧不過轂小禮據中禮式大禮下立車之容也禮介者不拜兵車不式不顧不言反抑式以應武容也兵車之容也【賈 容經】 國君下齊牛式宗廟大夫士下公門式路馬【皆廣敬也疏曰案齊右職注云王見牲則拱而式又引曲禮曰國君下宗廟式齊牛與此文異熊氏云此文誤當以周禮注為正】 君子式黃髮【敬老也】 下卿位【尊賢也卿位卿之朝位也君出過之而上車入未至】

【而下車】 入國不馳【愛人也馳善藺人也】 入里必式【不誣十室並曲禮】 公行下衆【公諸侯也下衆不敢誣衆也禮國君下卿位遇衆則式禮之也 國語周語】 國君撫式大夫下之大夫撫式士下之【撫猶據也據式小俛崇敬也乘車必正立 曲禮】 乘貳車則式佐車則否【貳車佐車皆副車也朝祀之副曰貳戎獵之副曰佐魯莊公敗于乾時公喪戎路傳乘而歸 少儀】 婦人不立乘【異於男子曲禮】 右乘車之容 升車必正立執綏【綏挽以上車之索也范氏曰正立執綏則心體無不正而誠意肅恭矣蓋君子莊敬無所不在升車則見於此也】 車中不內顧不疾言不親指【內顧回視也禮曰顧不過轂三者皆失容且惑人 此一節記孔子升車之容】 凶服者式之式 版者【式車前橫木有所敬則俯而憑之 版持邦國圖籍者式此二者哀有喪重民數也人惟萬物之靈而王者之所天也故周禮獻民數于王王拜受之況其下者敢不敬乎 並論語】

君車將駕則僕執策立於馬前【監駕且為馬行】 已駕僕展軫【展軾具視】 效駕【白已駕】 奮衣由右上取貳綏【奮振去塵也貳副也】 跪乘【未敢立敬也】 執策分轡驅之五步而立【調試之】 君出就車則僕并轡授綏【車上僕所主】 左右攘辟【謂羣臣陪位侍駕者攘卻也或曰攘古讓字】 車驅而騶至於大門君撫僕之手而顧命車右就車門閭溝渠

必步【車右勇力之士備制非常者君行則陪乘君式則下步行】凡僕人之禮必授人綏若僕者降等則受不然則否若僕者降等則撫僕之手不然則自下拘之【撫小止之謙也自下拘之由僕手下取之也僕與已同爵則不受】僕御婦人則進左手後右手【遠嫌】御國君則進右手後左手而俯【敬也曲禮】執君之乘車則坐【執執轡謂守之也君不在車坐示不行也】僕者右帶劍 良綏申之面拖諸臂【面前也臂覆苓也良綏君綏也 之由左肩上入右掖下申之於前覆苓上也】以散綏升執轡然後步【步行也】僕於君子君子升下則授綏始乘則式君子下行然後還立【還車而立以俟其去】酌尸之僕如君之僕【當其為尸則尊】其在車則左執轡右受爵祭左右軌范乃飲【周禮大御祭兩軹祭軌乃飲軌與軹於車同轉頭也軌與范聲同謂軹前也 並少儀】

右僕御之禮

禮從宜【事不可常也晉士句帥帥侵齊聞齊侯卒乃還春秋善之】使從俗【亦事不可常也牲幣之屬則當從俗所出禮器曰天不生地不養君子不以為禮鬼神不饗】君子行禮不求變俗【求猶務也不務變其故重本也謂去其先祖之國居他國】祭祀之禮居喪之服哭泣之位皆如其國之故謹修其法而審行之【其法謂其先祖之制度若夏殷】去國三世爵祿有列於朝出入有詔於國【三世自祖至孫踰久可以變故俗而猶不變者爵祿有列於朝謂君不絕其祖祀復立其族若臧紇奔邾立臧為矣詔告也謂與卿大夫吉凶往來相赴告】若兄弟宗族猶存則反告於宗後【謂無列無詔者反告亦謂吉凶也宗後宗子也】去國三世爵祿無列於朝出入無詔於國唯興之日從新國之法【以故國與已無恩興謂起為卿大夫】貧者不以貨財為禮老者不以筋力為禮【禮許儉不非無也年五十始杖八十拜君命一坐再至 並曲禮】

右從宜從俗

將適舍求母固【謂行而就人館固猶常也求主人物不可以舊常致時乏無周禮土訓辨地物原其生以詔地求其類】將上堂聲必揚【驚內人也】戶外有二屨言聞則入言不聞則不入將入戶視必下入戶奉扃視瞻母回【不干掩人之私也奉扃敬也】戶開亦開戶闔亦闔【不以後來變先】有後入者闔而勿遂【示不拒人】

離坐離立毋往參焉離立者不出中間【為于人私也離兩也 並曲禮】登席不由前為躡席【升必由下也】徒坐不盡席尺【示無所求於前不忘謙也】讀書食則齊豆去席尺【讀書聲當聞尊者食為污席也 玉藻】執虛如執盈入虛如有人【重慎】凡祭於室中堂上無跣燕則有之【祭不跣者主敬也燕則有跣為歡也天子諸侯祭有坐尸於堂之禮祭所尊在室燕所尊在堂將燕降說屨乃升堂 並少儀】登城不指城上不呼【為惑人】

當食不歎【食或以樂非歎所】臨樂不歎

客車不入大門【謙也】犬馬不上於堂【非摯幣也並曲禮】

右雜記 孟子既娶將入私室其婦袒而在內孟子不悅遂去不入婦辭孟母而求去曰妾聞夫婦之道私室不與焉今者妾竊墮在室而夫子見妾勃然不悅是客妾也婦人之義蓋不客宿

請歸父母孟母召孟子而謂之曰夫禮將入門問孰存所以致敬也將上堂聲必揚所以戒人也將入戶視必下恐見人過也今子不察於禮而責禮於人不亦遠乎孟子謝遂留其婦君子謂孟母知禮而明於姑母之道【列女傳】

禮書綱目卷七十六

卷七十七

<經部,禮類,通禮之屬,禮書綱目

欽定四庫全書

禮書綱目卷七十七 蔡源江永撰

內則 曲禮二

補

后王命冢宰降德于衆兆民【后君也德猶教也萬億曰兆天子曰兆民諸侯曰萬民周禮冢宰掌飲食司徒掌十二教今一云冢宰記者據諸侯也諸侯并六卿為二或兼職焉】子事父母雞初鳴咸盥漱櫛縱笄總拂髦冠綏纓端韞紳搢笏【咸皆也縱韞髮者也總束髮也垂後為飾拂髦振去塵著之髦用髮為之象幼時髻其制未聞綏纓之飾也端玄端士服也庶人深衣紳大帶所以自紳約也搢猶扱也扱笏于紳笏所以記事也】左右佩用【自佩也必佩者備尊者使令也】左佩紛帨刀礪小觶金燧【紛帨拭物之巾也今齊人有言紛者刀礪小刀及礪礪也小觶解小結之觶貌如錐以象骨為之金燧可取火於日】右佩玦捍管籥大觶木燧【捍謂拾也言可以捍弦也管筆彊也籥刀韞也木燧鑽火也】偃【偃行膝】屨著綦【綦屨繫也】婦事舅姑如事父母雞初鳴咸盥漱櫛縱笄總衣紳【笄今簪也衣紳衣而著紳】左佩紛帨刀礪小觶金燧右佩箴管線纁施繫袞大觶木燧【繫小囊也繫袞言施明為箴管線纁有之】衿纓綦屨【衿猶結也婦人有纓示繫屬也】以適父母舅姑之所【適之】及所下氣怡聲問衣燠寒疾痛疴癢而敬抑搔之【怡悅也疴疥也抑按瘙摩也】出入則或先或後而敬扶持之【先後之隨時便也】進盥少者奉槃長者奉水請沃盥盥卒受巾【槃承盥水者巾以挽手】問所欲而敬進之柔色以溫之【溫藉也承尊者必和顏色】饔飧酒醴芻蕘菽麥蕢稻黍粱稊唯所欲【飧粥也芻菜也蕢熬臠實】棗栗飴以甘之葍苳粉榆兔薹滫瀡以滑之脂膏以膏之【謂用調和飲食也葍苳類也冬用葍夏用苳榆白曰粉免新生者薹乾也秦人洩曰滫齊人滑曰瀡也】父母舅姑必嘗之而後退【敬也】男女未冠笄者雞初鳴咸盥漱櫛縱拂髦總角衿纓皆佩容【總角收髮結之容臭香物也以纓佩之為迫尊者給小使也】昧爽而朝【後成人也】問何食飲矣若已食則退若未食則佐長者視具【具饌也】凡內外雞初鳴咸盥漱衣服歛枕簟灑埽室堂及庭布席各從其事【歛枕簟者不欲人見已褻也簟席之親身者】孺子蚤寢晏起唯所欲食無時【孺子小子也又後未成人者】由命士以上父子皆異宮昧爽而朝慈以旨甘日出而退各從其事日入而夕慈以旨甘【異宮崇敬也慈愛敬進之日出乃從事食祿不免農也】父母舅姑將坐奉席請何鄉將衽長者奉席請何趾少者執牀與坐【將衽謂更卧處】御者舉几歛席與簟縣衾篋枕歛簟而櫛之【須卧乃敷之也櫛韞也】父母舅姑之衣衾簟席枕几不傳杖屨祇敬之勿敢近【傳移也】敦牟卮匱非餽莫敢用【餽乃用之牟讀曰整也卮匱酒漿器敦牟黍稷器也】

與恒飲食非餽莫之敢飲食【餽乃食之恒常也旦夕之常食】父母在朝夕恒食子婦佐餽【婦皆與夫餽也】既食恒餽【每食進而盡之未有原也】父沒母存冢子御食羣子婦佐餽如初【御侍也謂長子侍母食也侍食者不餽其婦猶皆餽也】旨甘柔滑孺子餽父母在子雖老不坐在父母舅姑之所有命之應唯敬對進退周旋慎齊【齊莊也】升降出入揖遊不敢噦噫嚏咳欠伸跛倚睇視不敢唾洩【睇傾視也易曰明夷睇于左股】寒不敢襲癢不敢搔【襲謂重衣】不有敬事不敢袒裼不涉不蹶【蹶揭衣也】褻衣衾不見裏【為其可穢】父母唾洩不見【輒刷去之】冠帶垢和請漱衣裳垢和請澣【手曰漱足曰澣和漬也】衣裳綻裂紉箴請綴【綻猶解也】五日則燂湯請浴三日具沐其間面垢燂潘請澣足垢燂湯請洗【潘米瀾也】少事長賤事貴共帥時【共猶皆也帥循也時是也禮皆如此也】子婦孝者敬者父母舅姑之命勿逆勿怠【朱子曰此謂不可變節以傷尊者平日慈愛之心也】若飲食之雖不嗜必嘗而待【待後命而去也】加之衣服雖不欲必服而待【待後命釋藏也】加之事人代之已雖弗欲姑與之而姑使之而後復之【朱子曰弗欲者慮以自逸而違命姑與姑使者嫌於怨懟而必爭】子婦有勤勞之事雖甚愛之姑縱之而寧數休之【不可愛此而移苦於彼也】子婦未孝未敬勿庸疾怨【庸之言用也】姑教之若不可教而后怒之【怒譴責也】不可怒子放婦出而不表禮焉【表猶明也猶為之隱不明其犯禮之過也】父母有過下氣怡色柔聲以諫諫若不入起敬起孝說則復諫【子事父母有隱無犯起猶更也】不說與其得罪於鄉黨州閭寧熟諫【子從父之令不可謂孝也周禮曰二十五家為閭四閭為族五族為黨五黨為州五州為鄉也】父母怒不說而撻之流血不敢疾怨起敬起孝【撻擊也】父母有婢子若庶子庶孫甚愛之雖父母沒沒身敬之不衰【婢子所通賤人之子】子有二妾父母愛一人焉子愛一人焉由衣服飲食由執事母敢視父母所愛雖父母沒不衰【由自也】子甚宜其妻父母不說出【宜猶善也】子不宜其妻父母曰是善事我子行夫婦之禮焉沒身不衰

父母雖沒將為善思貽父母令名必果將為不善思貽父母羞辱必不果【貽遺也果決也】舅沒則姑老【謂傳家事於長婦也】冢婦所祭祀賓客每事必請於姑【婦雖受傳猶不敢專行也】介婦請於冢婦【以其代姑之事介婦衆婦】舅姑使冢婦毋怠【雖有勤勞不敢懈倦】不友無禮於介婦【衆婦無禮冢婦不友之也善兄弟為友娣姒猶兄弟也朱子曰此句之義未詳註說恐未然也或疑友當作敢】舅姑若使介婦毋敢敵耦於冢婦【雖有勤勞不敢掉臂】不敢並行不敢並命不敢並坐【下冢婦也命為使令】凡婦不命適私室不敢退【婦侍舅姑者也】婦將有事大小必請於舅姑【不敢專行】子婦無私貨無私畜無私器不敢私假不敢私與【家事統於尊也】婦或賜之飲食衣服布帛佩帨蒞蘭則受而獻諸舅姑舅姑受之則喜如新受賜【或賜之謂私親兄弟】若反賜之則辭不得命如更受賜藏以待乏【待舅姑之乏也不得命者不見許也】婦若有私親兄弟將與之則必復請其故賜而後與之【並內則】凡為人子之禮冬溫而夏清昏定而晨省【定安其牀衽也省問其安否何如】在醜夷不爭【醜衆也夷猶儕也四皓曰陛下之等夷】夫為人子者三賜不及車馬【三賜三命也凡仕者一命而受爵再命而受衣服三命而受車馬車馬而身所以尊者備矣卿大夫士之子不受不敢以成尊比踰於父天子諸侯之子不受自卑遠於君】故州閭鄉黨稱其孝也兄弟親戚稱其慈也僚友稱其弟也執友稱其仁也交遊稱其信也【不敢受重賜者心也如此而五者備有焉】夫為人子者出必告反必面【告面同耳反言面者從外來宜知親之顏色安否】所遊必有常所習必有業【緣親之意欲知之】恒言不稱老【廣敬

】為人子者居不主奧坐不中席行不中道立不中門【謂與父同宮者也不敢當其尊處室中西南隅謂之奧道有左右中門謂棖闌之中央內則曰由命士以上父子皆異宮】食饗不為概【概量也不制待賓客饌具之所有】祭祀不為尸【尊者之處為其失子之道然則尸卜筮無父者】聽於無聲視於無形【恒若親之將有教使然】不登高不臨深不苟訾不苟笑【為其近危辱也人之性不欲見毀訾不欲見笑君子樂然後笑】孝子不服闇不登危懼辱親也【服事也闇冥也不於冥闇之中從事為卒有非常且嫌失禮也男女夜行以燭】父母存不許友以死【為忘親也死為報仇讐】不有私財【並曲禮】

未仕者不敢稅人如稅人則以父兄之命【不專家財也稅謂遺予人檀弓】親在行禮於人稱父人或賜之則稱父拜之【事統】

【於尊玉藻】父子不同席【異尊卑也】父前子名【對至尊無大小皆稱名】子於父母則自名也【名父母所為也】子之事親也三諫而

不聽則號泣而隨之【至親無去志在感動之 並曲禮】父命呼唯而不諾手執業則投之食在口則吐之走而不趨【至敬】親老出不易方復不過時【不可以憂父母也易方為其不信已所處也復反也】親瘠色容不盛此孝子之疏節也【言未為至孝也王季有疾文王色憂行不能正履

玉藻】父母有疾冠者不櫛行不翔【憂不為容也】言不惰【憂不在私好】

琴瑟不御【憂不在樂】食肉不至變味飲酒不至變貌【憂不在味】笑不至矧怒不至詈【憂在心難變也齒本曰矧大笑則見】疾止復故【自若常也】親有疾飲藥子先嘗之【嘗度其所堪】醫不三世不服其藥【慎物齊也 並曲禮】事親有隱而無犯【隱謂不稱揚其過失也無犯不犯顏而諫論語曰事父母幾諫】左右就養無方【左右謂扶持之方猶常也子則然無常人】服勤至死致喪三年【勤勞辱之事也致謂戚容稱其服也凡此以恩為制 檀弓】父沒而不能讀父之書手澤存焉耳母沒而杯圈不能飲焉口澤之氣存焉爾【孝子見親之器物哀惻不忍用也圈屈木所為謂卮匱之屬 玉藻】為人子者父母存冠衣不純素【為其有喪象也純緣也玉藻曰縞冠玄武子姓之冠也縞冠素紕既祥之冠也深衣曰具父母純以青】孤子當室冠衣不純采【早喪親雖除喪不心哀也謂年未三十者三十壯有室有代親之端不為孤也當室適子也深衣曰孤子衣純以素】君子已孤不更名【亦重本】已孤暴貴不為父作諡【子事父無貴賤 並曲禮】

右事親事長【凡聖賢論孝之言詳見孝經篇後】

禮始於謹夫婦為宮室辨外內男子居外女子居內深宮固門閨寺守之男不入女不出【閨掌中門之禁也寺掌內人之禁令也】男不言內女不言外【謂事業之次序】非祭非喪不相授器【祭嚴】

【喪遽不嫌也】其相授則女受以筐其無筐則皆坐奠之而後取之【奠停地也】外內不共井不共湣浴不通寢席不通乞假男女不通衣裳內言不出外言不入【湣浴室也】男子入內不嘯不指夜行以燭無燭則止【嘯讀為叱叱嫌有隱使也】女子出門必擁蔽其面夜行以燭無燭則止【擁猶幃也】道路男子由右女子由左【地道尊右內則】男女不雜坐不同櫨枷不同巾櫛不親授嫂叔不通問諸母不漱裳外言不入於梱內言不出於梱女子許嫁纓非有大故不入其門姑姊妹女子子已嫁而反兄弟弗與同席而坐弗與同器而食【皆謂重別防淫亂不雜坐謂男子在堂女子在房也櫨可以枷衣者通問謂相稱謝也諸母庶母也漱澣也庶母賤可使漱衣不可使漱裳裳賤尊之者亦所以遠別外言內言凡女子職也不出入者不以相問也梱門限也女子許嫁繫纓有從人之端也大故宮中有災變若疾病乃後入也女子有宮者亦謂由命士以上也春秋傳曰羣公子之舍則已卑矣女子十年而不出嫁乃成人可以出矣猶不與男子共席而坐亦遠別也】男女異長【各自為伯季也】男女非有行媒不相知名【謂媒往來傳婚姻之言乃相知姓名】非受幣不交不親【重別有禮乃相纏固】寡婦之子非有見焉弗與為友【辟嫌也有見謂有奇才卓然衆人所知並曲禮】道路男子由右女子由左車從中央【道中三途遠別也王制】男女相答拜也【嫌遠別不相答拜以明之曲禮】

右男女之別男女無媒不交無幣不相見恐男女之無別也【重男女之會所以遠別之於禽獸也有幣者必有媒有媒者不必有幣仲春之月會男女之時不必待幣】以此坊民猶有自獻其身【獻猶進也】禮非祭男女不交爵【交爵謂相獻酢】以此坊民陽侯猶殺繆侯而竊其夫人【同姓也以貪夫人之色至殺君而立其國未聞】故大饗廢夫人之禮【大饗享諸侯來朝者也夫人之禮使人攝】寡婦之子不有見焉則弗友也君子以辟遠也【有見謂睹其才藝也同志為友】故朋友之交主人不在不有大故則不入其門【大故喪疾】以此坊民猶以色厚於德子云好德如好色【此句似不足論語曰未見好德如好色疾時人厚於色之甚而薄於德也】諸侯不下漁色【謂不內取於國中也內取國中為下漁色昏禮始納采謂采擇其可者也國君而內取象捕魚然中網取之是無所擇】故君子遠色以為民紀故男女授受不親【不親者不以手相與也內則曰非祭非喪不相授器其相授則女受以筐其無筐則皆坐奠之而後取之】御婦人則進左手【御者在右前左手則身微偕之】姑姊妹女子子已嫁而反兄弟弗與同席而坐【女子十年而不出也嫁及成人可以出矣猶不與男子共席而坐遠別】寡婦不夜哭【嫌思人道】婦人疾問之不以其疾【嫌媚略之也問增損而已】以此坊民猶淫佚而亂於族【亂族犯非妃匹也坊記】淳于髡曰男女授受不親禮與孟子曰禮也曰嫂溺則援之以手乎曰嫂溺不援是豺狼也男女授受不親禮也嫂溺援之以手者權也【淳于姓髡名齊之辨士授與也受取也古禮男女不親授受以遠別也援救之也權稱錘也稱物輕重而往來以取中者也權而得中是乃禮也孟子】公將有行遂與姜氏如齊【始議行事】申繻曰女有家男有室無相瀆也謂之有禮易此必敗【女安夫之家夫安妻之室違此則為瀆今公將姜氏如齊故知其當致禍亂桓十八年左氏傳】鄭文夫人芊氏姜氏勞楚子于柯澤【楚子還過鄭鄭文公夫人芊氏楚女姜氏齊女也柯澤鄭地名】楚子使師縉示之俘馘【師縉楚樂師也俘所得囚馘所截耳】君子曰非禮也婦人送迎不出門見兄弟不踰闕【闕門限】戎事不邇女器【邇近也器物也言俘馘非近婦人之物僖二十二年左氏傳】孔子適季氏康子晝居內寢孔子問其所疾康子出見之言終孔

子退子貢問曰季孫不疾而問諸疾禮與孔子曰夫禮君子不有大故則不宿於外【大故謂喪憂】非致齊也非疾也則不晝夜處于內是故夜居於外雖弔之可也晝居於內雖問其疾可也【家語】公父文伯之母敬姜者季康子之從祖叔母也

康子往焉闔門而與之言【闔闢也門寢門也】皆不踰闔【闔門限也皆二人也敬姜不踰闔而出康子不踰闔而入傳曰婦人送迎不出門見兄弟不踰闔是也】祭悼子康子與焉【悼子穆伯之父敬姜先舅也與與祭也】酢不受徹俎不宴【禮祭主人獻賓賓酢主人不受敬姜不親受也祭畢徹俎又不與康子宴飲】宗不具不繹【繹又祭也唐尚書云祭之明日也昭謂天子諸侯曰繹以祭之明日卿大夫曰賓尸與祭同日此言繹通言之也賈侍中云宗宗臣主祭祀之禮不具謂宗臣不具在則敬姜不與繹也】繹不盡飫則退【說云飫宴安私飫也昭謂立曰飫坐曰宴言宗具則與繹繹畢而飲不盡飫禮而退恐有醉飽之失皆所以遠嫌也】孔子聞之曰男女之別禮之大經公父氏之婦動中禮趣度于禮矣【國語魯語】

男女不同櫛枷不敢懸于夫之櫛櫛不敢藏于夫之篋笥不敢共湑浴【竿謂之櫛櫛櫛也】夫不在歛枕篋簟席褥器而藏之【不敢褻也】少事長賤事貴咸如之【咸皆也內則】

右夫婦之別 白季使過冀見冀缺耨其妻饁之【白季胥臣也冀晉邑耨鋤也野饋曰饁】敬相待如賓與之歸言諸文公曰敬德之聚也能敬必有德德以治民請用之臣聞之出門如賓【如大賓】承事如祭【常謹敬也】仁之則也【僖三十四年左氏傳】

夫婦之禮唯及七十同藏無間【衰老無嫌及猶至也】故妾雖老年未滿五十必與五日之御【五十始衰不能孕也妾閉房不復出御矣此御謂侍夜勸息也五日一御諸侯制也諸侯取九女姪娣兩兩而御則三日也次兩媵則四日也次夫人專夜則五日也天子十五日而一御】將御者齊漱澣慎衣服櫛縱笄總角拂髦衿纓綦屨【其往如朝也角衍字也拂髦或為縹髮也】雖婢妾衣服飲食必後長者【人貴賤不可以無禮】妻不在妾御莫敢當夕【辟女君之御日也內則】右御妻妾 荀子曰霜降逆女冰泮殺內十日一御【楊倞曰此蓋誤耳當為冰泮逆女霜降殺內故詩曰士如歸妻迨冰未泮殺滅也內謂妾御也十日一御即殺內之義冰泮逆女謂一生之時合男女也霜降殺內謂閉藏之時禁嗜慾也月令在十一月此云霜降荀卿與呂氏所聞異也鄭云歸期謂請期也冰未泮正月中以前二月可成昏矣故曰冰泮逆女朱子曰荀子本文與家語孔子對哀公語同楊氏之說恐未必然然其言霜降閉藏十日一御者似亦有理故特存之】晉平公有疾叔向問于子產子產曰僑聞之君子有四時朝以聽政【聽國政】晝以訪問【問可否】夕以脩令【念所施】夜以安身于是乎節宣其氣【宣散也】勿使有所壅蔽湫底以露其體【湫集也底滯也露羸也壹之則血氣集滯而體羸露】茲心不爽而昏亂百度【茲此也爽明也百度百事之節】今無乃壹之【同四時也】則生疾矣叔向曰善哉肸未之聞也此皆然矣晉侯求醫于秦秦伯使醫和視之曰疾不可為也是謂近女室疾如蠱【蠱惑疾】非鬼非食惑以喪志【惑女色而失志】良臣將死天命不祐【良臣不匡救君過故將死而不為天所祐】公曰女不可近乎對曰節之先王之樂所以節百事也故有五節【五聲之節】遲速本末以相及中聲以降五降之後不容彈矣【此謂先王之樂得中聲聲成五降而息也降罷退】于是有煩手淫聲慆堙心耳乃忘平和

君子弗聽也【五降而不息則雜聲並奏所謂鄭衛之聲】物亦如之【言百事皆如樂不可失節】至於煩乃舍也已無以生疾【煩不舍則生疾】君子之近琴瑟以儀節也非以恣心也【為心之節儀使動不過度】天有六氣【謂陰陽風雨晦明也】降生五味【謂金味辛木味酸水味鹹火味苦土味甘皆由陰陽風雨而生】為五色【辛色白酸色青鹹色黑苦色赤甘色黃 見也】徵為五聲【白聲商青聲角黑聲羽赤聲徵黃聲宮徵驗也】淫生六疾【淫過也滋味聲色所以養人然過則生害】六氣曰陰陽風雨晦明也分為四時序為五節【六氣之化分而序之則成四時得五行之節】過則為菑陰淫寒疾【寒過則為冷】陽淫熱疾【熱過則喘渴】風淫末疾【末四支也風為緩急】雨淫腹疾【雨濕之氣為 注】晦淫惑疾【晦夜也為宴寢過節則心惑亂】明淫心疾【明晝也思慮煩多心勞生疾】女陽物而晦時淫則生內熱惑蠱之疾【女常隨男故言陽物家道常在夜故言晦時】今君不節不時能無及此乎出告趙孟趙孟曰誰當良臣對曰主是謂矣主相晉國於今八年晉國無亂諸侯無闕可謂良矣和聞之國之大臣榮其寵祿任其大節有菑禍興而無改焉【改改行以救菑】必受其咎今君至於淫以生疾將不能圖恤社稷禍孰大焉主不能禦吾是以云也【云主將死】趙孟曰何謂蠱對曰淫溺惑亂之所生也【溺沈没于嗜慾】于文皿蟲為蠱【文字也皿器也器受蠱害者為蠱】穀之飛亦為蠱【穀久積則變為飛蠱名曰蠱】在周易女惑男風落山謂之蠱【巽下艮上蠱巽為長女為風艮為少男為山少男而說長女非匹故惑山木得風而落】皆同物也【物謂類也】趙孟曰良醫也厚其禮而歸之【贈賄之禮 昭元左氏傳】

姬子者寢不側坐不邊立不蹕不食邪味割不正不食席不正不坐目不視邪色耳不聽淫聲夜則令瞽誦詩道政事【列女傳】

右胎教 姬子之時必謹所感心感于物則其子形音肖之故妊者能謹于此則生子形容端正才識必過人矣此之謂胎教【列女傳】

妻將生子及月辰居側室【側室謂夾之室次燕寢也】夫使人日再問之作而自問之妻不敢見使姆衣服而對至於子生夫復使人日再問之【作有感動】夫齊則不入側室之門【若始時使人問】子生男子設弧於門左女子設帨于門右【表男女也弧者示有事于武也帨事人之佩巾也】三日始 子男射女否【始有事也負之謂抱之而使鄉前也】凡接子擇日【雖三日之內尊卑必皆選其吉焉 接字之義見內治篇】冢子則大

牢【天子世子也冢大也冢子猶言長子通于下也】庶人特豚士特豕大夫少牢國君世子大牢【皆謂長子】其非冢子則皆降一等【謂冢子之弟及眾妾之子生也天子諸侯少牢大夫特豕士特豚庶人猶特豚也】異為孺子室於宮中【特埽一處以處之】擇於諸母與可者必求其寬裕慈惠溫良恭敬慎而寡言者使為子師其次為慈母其次為保母皆居子室【此人君養子之禮也諸母眾妾也可者傳御之屬也子師教示以善道者慈母知其嗜慾者保母安其居處者士妻食乳之而已】他人無事不往【為兒精氣微弱將驚動也】大夫之子有食母【選於傳御之中喪服所謂乳母也】士之喪自養其子【賤不敢使人也】三月之末擇日剪髮為髻男角女羈否則男左女右【髻所遺髮也夾凶曰角午達曰羈也】是日

也妻以子見于父貴人則為衣服由命士以下皆漱澣【貴人大夫以上也由自也】男女夙興沐浴衣服具視朔食【朔食天子大牢諸侯少牢大夫特豕士特豚也】夫入門升自阼階立於阼西鄉妻抱子出自房當楣立東面【入門者入側室之門也大夫以下見子就側室見妾子于內寢辟人君也】姆先相曰母某敢用時日祇見孺子【其妻姓若言姜氏也祇敬也或作振】夫對曰欽有師父執子之右手咳而名之【欽敬也帥循也言教之敬使有循也執右手明將授之事也】妻對曰記有成遂左還授師【記猶識也識夫之言使有成也師子師也】子師辯告諸婦諸母名【後告諸母若名成于尊】妻遂適寢【復夫之燕寢】夫告宰名宰辯告諸男名書曰某年某月某日某生而藏之【宰謂屬吏也春秋書桓六年九月丁卯子同生】宰告閭史閭史書為二其一藏諸閭府其一獻諸州史州史獻諸州伯州伯命藏諸州府【四閭為族族百家也閭胥中士一人五黨為州州二千五百家也州長中大夫一人也皆有屬吏獻猶言也】夫入食如養禮【夫入已見子入室也其與妻食如婦始饋舅姑之禮也】凡名子不以國不以日月不以隱疾不以山川【本篇不以國在日月之下無不以山川一句依朱子取曲禮移入此在常語之中為後難諱也春秋傳曰名終將諱之隱疾衣中之疾也謂若黑臀黑肱矣疾在外者雖不得言尚可指摘此則無時可辟俗語云隱疾為醫難也】大夫士之子不敢與世子同名【尊世子也其先世子生亦勿為改】妾將生子及月辰夫使人日一問之子生三月之末漱澣夙齊見於內寢禮之如始入室君已食徹焉使之特餽遂入御【內寢適妻寢也禮謂已見子夫食而使獨餽也如始入室始來嫁時妾餽夫婦之餘亦如之既見子可以御此謂大夫士之妾也凡妾稱夫曰君】庶人無側室者及月辰夫出居羣室其問之也與子見父之禮無以異也【夫雖辟之至問妻及見子禮同也庶人或無妾】凡父在孫見于祖祖亦名之禮如子見父無辭【見子于祖家統于尊也父在則無辭有適子者無適孫與見庶子同也父卒而有適孫則有辭與見冢子同父雖卒而庶孫猶無辭也】由命士以上及大夫之子旬而見【旬當為均聲之誤也有時適妾同時生子子均而見者以生先後見之既見乃食亦辟人君也易說卦坤為均今亦或作旬也朱子曰此說疑鄭失之旬如字謂十日也別記異聞或不待三月也】冢子未食而見必執其右手適子庶子已食而見必循其首【天子諸侯尊別世子雖同母禮則異矣未食已食急正緩庶之義也朱子曰此承上文記大夫禮而又別其冢適庶子之異同也冢子之禮仍與前章同唯適子庶子為異耳並內則】

右生子

幼子常視母誑【視今之示字小未有所知常示以正物以正教之無欺誑幼曲禮】子能食食教以右手能言男唯女俞男鞶革女鞶絲【俞然也鞶小囊盛帨巾者男用韋女用繒有飾緣之則是鞶裂與詩云垂帶如厲紀子帛名裂繻字雖異意實同也】六年教之數與方名【方名東西南北】七年男女不同席不共食【蚤其別也】八年出入門戶及即席飲食必後長者始教之讓【示以廉耻】九年教之數日【朔望與六甲也】十年出就外傳住宿于外學書記衣不帛襦袴禮帥初朝夕學幼儀請肄簡諒【外傳教學師也不用帛為襦袴為太溫傷陰氣也禮帥初遵習先日所為也肄習也諒信也請習簡謂所書篇數也請習信謂應對之言也】十有三年學樂誦詩舞勺成童舞象學射御【先學勺後學象文武之次也成童十五以上】二十而冠始學禮可以衣裘帛舞大夏惇行孝弟博學不教內而不出【大夏樂之文武備者也內而不出謂人之謀慮也】三十而有室始理男事博學無方孫友視志【室猶妻

也男事授田給政役也方猶常也至此無常學在志所好也孫順也順于友視其所志也】四十始仕方物出謀慮道合則服從不可則去【方猶常也物猶事也朱子曰方猶比也】五十命為大夫服官政【統一官之政也】七十致事【致其事於君而告老】凡男拜尚左手【左陽】女子十年不出【恒居內也】姆教婉婉聽從【婉謂言語也婉之言媚也媚謂容貌也】執麻枲治絲繭織紵組紃學女事以共衣服【紃條也】觀於祭祀納酒漿豆菹醢禮相助奠【當及女時而知】十有五年而笄【謂應年許嫁者女子許嫁笄而字之其未許嫁二十則笄】二十而嫁有故二十三年而嫁【故謂父母之喪】聘則為妻【聘問也妻之言齊也以禮聘問則得與夫敵體】奔則為妾【妾之言接也聞彼有禮走而往焉以得接見于君子也奔或為衞】凡女拜尚右手【右陰也內則】

右教子孟軻之母其舍近墓孟子之少也嬉戲為墓間之事踊躍築埋孟母曰此非所以居子也乃去舍市其嬉戲為賈衞孟母曰此非所以居子也乃徙舍學宮之旁其嬉戲乃設俎豆揖讓進退孟母曰此真可以居子矣遂居之孟子幼時問東家殺猪何為母曰欲啖汝既而悔曰吾聞古者胎教今適有知而欺之是教之不信乃買猪肉以食之既長就學遂成大儒【列女傳】

禮書綱目卷七十七

卷七十八

欽定四庫全書

禮書綱目卷七十八 婺源江永撰

孝經 曲禮三

補【依朱子孝經刊誤定】

仲尼居曾子侍子曰先王有至德要道以順天下民用和睦上下無怨【孝者德之至道之要也言先代聖德之王能順天下人心行此至要之化則上下臣人和睦無怨】汝知之乎曾子避席曰參不敏何足以知之【禮師有問避席起答】子曰夫孝德之本也【人之行莫大于孝故為德本】教之所由生也【言教從孝而生】復坐吾語女身體髮膚受之父母不敢毀傷孝之始也【父母全而生之已當全而歸之故不敢毀傷】立身行道揚名於後世以顯父母孝之終也【言能立身行此孝道自然名揚後世光顯其親故行孝以不毀為先揚名為後】夫孝始於事親中於事君終於立身【言行孝以事親為始事君為中忠孝道著乃能揚名榮親故曰終于立身也】愛親者不敢惡於人【博愛也】敬親者不敢慢於人【廣敬也】愛敬盡於事親而德教加于百姓刑于四海【刑法也君行博愛廣敬之道使人皆不慢惡其親則德教加被天下當為四夷之所法則也】盖天子之孝也【盖猶略也孝道廣大此略言之】在上不驕高而不危【諸侯列國之君貴在人上可謂高矣而能不驕則免危也】制節謹度滿而不溢【費用約儉謂之制節慎行禮法謂之謹度無禮為驕奢泰為溢】高而不危所以長守貴也滿而不溢所以長守富也富貴不離其身然後能保其社稷而和其民人【列國皆有社稷其君主而祭之言富貴常在其身則常為社稷之主而人自和平也】盖諸侯之孝也非先王之法服不敢服【服者身之表也先王制五服各有等差言卿大夫遵守禮法不敢僭上偏下】非先王之法言不敢道非先王之德行不敢行【法言謂禮法之言德行謂道德之行若言非法行非德則虧孝道故不敢也】是故非法不言非道不行【言必守法行必遵道】口無擇言身無擇行【言行皆遵法道所以無可擇也】言滿天下無口過行滿天下無怨惡【禮法之言焉有口過道德之行自無怨惡】三者備矣然後能守其宗廟【三者服言行也禮卿大夫立三廟以奉先祖言能備此三者則能長守宗廟之祀】盖卿大夫之孝也資於事父以事母而愛同資於事父以事君而敬同【資取也言愛父與母同敬父與君同】故母取其愛而君取其敬兼之者父也【言事父兼愛與敬也】故以孝事君則忠【移事父孝以事於君則為忠矣】以敬事長則順【移事兄敬以事于長則為順矣】忠順不失以事其上然後能保其祿位而守其祭祀【能盡忠順以事君長則常安祿位永守祭祀】盖士之孝也用天之道【春生夏長秋歛冬藏舉事順時此用天道也】分地之利【分別五土視其高下各盡所宜此分地利也】謹身節用以養父母【身恭謹則遠恥辱用節省則免饑寒公賦既充則私養不闕】此庶人之孝也【庶人為孝唯此而已】故自天子至於庶人孝無終始而患不及者未之有也【始自天子終於庶人尊卑雖殊孝道同致而患不能及者未之有

也言無此理故曰未有】

右經一章【舊本今文分作六章古文作七章 朱子曰此一節夫子曾子問答之言而曾氏門人之所記也疑所謂孝經者其本文正如此其下則或者雜引傳記以釋經文乃孝經之傳也竊嘗考之傳文固多傳會而經文亦不免有離析增加之失顧自漢以來諸儒傳誦莫覺其非至或以為孔子之所自著則又可笑之尤者蓋經之首統論孝之始終中乃敷陳天子諸侯卿大夫士庶人之孝而其末結之曰故自天子以下至於庶人孝無終始而患不及者未之有也其首尾相應次第相承文勢連屬脉絡貫通同是一時之言無可疑者而後人妄分以為六七章又增子曰及引詩書之文以雜乎其間使其文意分斷間隔而讀者不復得見聖言大體大義為害不細故今定此六七章者合為一章而刪去子曰者二引書者一引詩者四凡六十一字以復經文之舊其傳文之失又別論之如左方】

子曰君子之教以孝也非家至而日見之也【言教不必家到戶至日見而語之但行孝于內其化自流于外】教以孝所以敬天下之為人父者也教以悌所以敬天下之為人兄者也【舉孝悌以為教則天下之為人子弟者無不敬其父兄也】教以臣所以敬天下之為人君者也【舉臣道以為教則天下之為人臣者無不敬其君也】詩云愷悌君子民之父母【愷樂也悌易也義取君以樂易之道化人則為天下蒼生之父母也】非至德其孰能順民如此其大者乎

右傳之首章【舊本第十三章

朱子曰此一節釋至德以順天下之意當為傳之首章然所論至德語意亦疎如上章之失云上章謂傳之二章】

子曰教民親愛莫善于孝教民禮順莫善於悌【言教人親愛禮順無加于孝悌也】移風易俗莫善于樂【風俗移易先入樂聲變隨人心正由君德正之與變因樂而彰故曰莫善于樂】安上治民莫善于禮【禮所以正君臣父子之別明男女長幼之序故可以安上化下也】禮者敬而已矣【敬者禮之本也】故敬其父則子悅敬其兄則弟悅敬其君則臣悅敬一人則千萬人悅【居上敬下盡得歡心故曰悅也】所敬者寡而悅者衆此之謂要道右傳之二章【舊本第十二章

朱子曰此一節釋要道之意當為傳之二章但經所謂要道當自己而推之與此亦不同也】

曾子曰甚哉孝之大也【參聞行孝無限高卑始知孝之為大也】子曰夫孝天之經也地之義也民之行也【經常也利物為義孝為百行之首人之常德若三辰運天而有常五土分地而為義也】天地之經而民是則之【天有常明地有常利言人法則天地亦以孝為常行也】則天之明因地之利以順天下是因其教不肅而成其政不嚴而治【法天明以為常因地利以行義順此以施政教則不待嚴肅而成禮也】

右傳之三章【舊本今文第七章 朱子曰此以下皆傳文而此一節蓋釋以順天下之意當為傳之三章而今失其次矣但自其章首以至因地之義皆是春秋左氏傳所載子太叔為趙簡

子道子產之言為易禮字為孝字而文勢反不若彼之通貫條目反不若彼之完備明此襲彼非彼取此無疑也其曰先王見教之可以化民又與上文不相屬故溫公改教為孝乃得粗通而下文所謂德義敬讓禮樂好惡者卻不相應疑亦裂取他書之成文而強加裝綴以為孔子曾子之問答但未見其所出耳然其前段文雖非是而理猶可通存之無害至于後段則文既可疑而謂聖人見孝可以化民而後以身先之于理又已悖矣况先之以博愛亦非立愛惟親之序若之何而能使民不遺其親耶其所引詩亦不親切今定先王見教以下凡六十九字並刪去】

子曰昔者明王之以孝治天下也【言先代聖明之王以至德要道化民是為孝理】不敢遺小國之臣而況於公侯伯子男乎【小國之臣至卑者耳王尚接之以禮況于五等諸侯是廣敬也】故得萬國之歡心以事其先王【萬國舉其多也言行孝道以理天下皆得歡心則各以其職來助祭也】治國者不敢侮于鰥寡而況于士民乎【理國謂諸侯也鰥寡國之微者君尚不敢輕侮况知禮義之士乎】故得百姓之歡心以事其先君【諸侯能行孝理得所統之歡心則皆恭事助其祭享也】治家者不敢失於臣妾而況于妻子乎【理家謂卿大夫臣妾家之賤者妻子家之貴者】故得人之歡心以事其親【卿大夫位以材進受祿養親若能孝理其家則得大小之歡心助其奉養】夫然故生則親安之祭則鬼享之【夫然者上孝理皆得歡心則存安其榮沒享其祭】是以天下和平灾害不生禍亂不作【上敬下歡存安沒享人用和睦以致太平灾害禍亂無因而起】故明王之以孝治天下也如此【言明王以孝為理則諸侯以下化而行之故致如此福應】詩云有覺德行四國順之【覺大也義取天子有大德行則四方之國順而行之】

右傳之四章【舊本今文第八章朱子曰此一節釋民用和睦上下無怨之意為傳之四章其言雖善而亦非經文之正意蓋經以孝而和此以和而孝也引經亦無甚失且其下文語已更端無所隔礙故今且得仍舊耳】

曾子曰敢問聖人之德無以加於孝乎【參問明王孝理以致和平又問聖人德教更有大於孝否】子曰天地之性人為貴【貴其異於萬物也】人之行莫大于孝【孝者德之本也】孝莫大於嚴父【萬物資始于乾人倫資父為天故孝行之大莫過尊嚴其父也】嚴父莫大於配天則周公其人也【謂父為天雖無貴賤然以父配天之禮始自周公故曰其人也】昔者周公郊祀后稷以配天【后稷周之始祖也郊謂圜丘祀天也周公攝政因行郊天之祭乃尊始祖以配之也】宗祀文王于明堂以配上帝【明堂天子布政之宮也周公因祀五方上帝于明堂乃尊文王以配之也】是以四海之內各以其職來祭【君行嚴配之禮則德教刑於四海海內諸侯各修其職來助祭也】夫聖人之德又何以加於孝乎【言無大於孝者】故親生之膝下以養父母日嚴【親猶愛也膝下謂孩幼之時也言親愛之心生於孩幼比及年長漸識義方則日加尊嚴能致敬于父母也】聖人因嚴以教敬因親以教愛【聖人因其親嚴之心敦以愛敬之教故出以就傅趨而過庭以教敬也抑搔痒痛懸衾篋枕以教愛也】聖人之教不肅而成其政不嚴而治【聖人順羣心以行愛敬制禮則以施政教亦不待嚴肅而成理也】其所因者本也【本謂孝也】

右傳之五章【舊本今文通下章為第九章 朱子曰此一節釋孝德之本之意傳之五章也但嚴父配天本因論武王周公之事而贊美其孝之詞非謂凡為孝者皆欲如此也又況孝之所以為大者本自有親切處而非此之謂乎若必如此而後為孝則是使為人臣子者皆有今將之心而反陷于大不孝矣作傳者但見其論孝之大即以附此而不知其非所以為天下之通訓讀者詳之不以文害意焉可也其曰故親生之膝下以下意卻親切但與上文不屬而與下章相近故今文連下二章為一意但下章之首語已更端意亦重複不當通為一章此語當依古文且附上章或自別為一章可也】

子曰父子之道天性也君臣之義也【父子之道天性之常加以尊嚴又有君臣之義】父母生之續莫大焉【父母生子傳體相續人倫之道莫大于斯】君親臨之厚莫重焉【謂父為君以臨于已恩義之厚莫重于斯】故不愛其親而愛他人者謂之悖德不敬其親而敬他人者謂之悖禮【言盡愛敬之道然後施教于人違此則于德禮為悖也】

右傳之六章【舊本今文通上章為第九章無子曰字 朱子曰此一節釋教之所由生之意傳之六章也古文析不愛其親以下別為一章而各冠以子曰今文則合之而又通上章為一章無此子曰二字而于不愛其親之上加故字今詳此章之首語實更端當以古文為正不愛其親語意正與上文相續當以今文為正至君臣之義之下則又當有脫簡焉今不能知其為何事也悖禮以上皆格言但以順則逆以下則又雜取左氏傳所載季文子北宮文子之言與此上文既不相應而彼此得失又如前章所論子產之語今刪去凡九十字】

子曰孝子之事親也居則致其敬【平居必盡其敬】養則致其樂【就養能致其懽】病則致其憂【色不滿容行不正履】喪則致其哀【擗踊哭泣盡其哀情】祭則致其嚴【齊戒沐浴明 不寐】五者備矣然後能事親【五者闕一則為未能】事親者居上不驕【當莊敬以臨下也】為下不亂【當恭敬以奉上也】在醜不爭【醜衆也爭競也當和順以從衆也】居上而驕則亡為下而亂則刑在醜而爭則兵【謂以兵刃相加】三者不除雖日用三牲之養猶為不孝也【三牲太牢也孝以不毀為先言上三事皆可亡身而不除之雖日致太牢之養固非孝也】

右傳之七章【舊本今文第十章

朱子曰此一節釋始於事親及不敢毀傷之意乃傳之七章亦格言也】

子曰五刑之屬三千而罪莫大於不孝【五刑謂墨劓剕宮大辟也條有三千而罪之大者莫過不孝】要君者無上【君者臣之稟命也而敢要之是無上也】非聖人者無法【聖人制禮作樂而敢非之是無法也】非孝者無親【善事父母為孝而敢非之是無親也】此大亂之道也【言人有上三惡豈唯不孝乃是大亂之道】

右傳之八章【舊本今文第十一章

朱子曰此一節因上文不孝之云而繫于此乃傳之八章亦格言也】

子曰君子之事上也【上謂君也】進思盡忠【進見于君則思盡忠節】退思補過【君有過失則思補益】將順其美【將行也君有美善則順而行之】匡救其惡【匡正也救止也君有過惡則正而止之】故上下能相親也【下以忠事上上以義接下君臣同德故能相親】詩云心乎愛矣遐不謂矣中心藏之何日忘之【遐遠也義取臣心愛君雖左右不謂為遠愛君之志恒藏心中無日暫忘也】

右傳之九章【舊本今文第十七章朱子曰此一節釋忠于事君之意當為傳之九章因上章爭臣而誤屬于此耳進思盡忠退思補過亦左傳所載士貞子語然于文理無害引詩亦足以明移孝事忠之意今並存之或云宜為十一章】

子曰昔者明王事父孝故事天明事母孝故事地察【王者父事天母事地言能敬事宗廟則事天地能明察也】長幼順故上下治【君能尊諸父先諸兄則長幼之道順君人之化理】天地明察神明彰矣【事天地能明察則神感至誠而降福祐故曰彰也】故雖天子必有尊也言有父也必有先也言有兄也【父謂諸父兄謂諸兄皆祖考之胤也禮君燕族人與父兄齒也】宗廟致敬不忘親也【言能敬事宗廟則不敢忘其親也】脩身慎行恐辱先也【天子雖無上于天下猶修持其身謹慎其行恐辱先祖而毀盛業也】宗廟致敬鬼神著矣【事宗廟能盡敬則祖考來格享於克誠故曰著也】孝悌之至通於神明光於四海無所不通【能敬宗廟順長幼以極孝悌之心則性通于神明光于四海故曰無所不通】詩云自西自東自南自北無思不服【義取德教流行莫不服義從化也】

右傳之十章【舊本今文第十六章朱子曰此一節釋天子之孝有格言焉當為傳之十章或云宜為十二章】

子曰君子之事親孝故忠可移於君【以孝事君則忠】事兄悌故順可移於長【以敬事長則順】居家理故治可移於官【君子所居則化故可移於官也】是以行成於內而名立於後世矣【修上三德於內名自傳於後代】右傳之十一章【舊本今文第十四章朱子曰此一節釋立身揚名及士之孝傳之十一章也或云宜為九章】

子曰閨門之內具禮矣乎嚴父嚴兄妻子臣妾猶百姓徒役也

右傳之十二章【舊本今文無此章古文有之朱子曰此一節因上章三可移而言傳之十二章也嚴父孝也嚴兄弟也妻子臣妾官也或云宜為十章】

曾子曰若夫慈愛恭敬安親揚名則聞命矣敢問子從父之令可謂孝乎【事親有隱無犯又敬不違故疑而問之】子曰是何言與是何言與【有非而从成父不義理所不可故再言之】昔者天子有爭臣七人雖無道不失其天下諸侯有爭臣五人雖無道不失其國大夫有爭臣三人雖無道不失其家【降殺以兩尊卑之差爭謂諫也言雖無道為有爭臣則終不至失天下亡家國也】士有爭友則身不於令名【令善也益者三友言受忠告故不失其善名】

】父有爭子則身不陷於不義【父失則諫故免陷於不義】故當不義則子不可以不爭於父臣不可以不爭於君【不爭則非忠孝】故當不義則爭之從父之令又焉得為孝乎

右傳之十三章【舊本今文第十五章 朱子曰此不解經而別 一義宜為傳之十三章】

子曰孝子之喪親也【生事已畢死事未見故 此章】哭不偯【氣竭而息聲不委曲】禮無容【觸地無容】言不文【不為文飾】服美不安【不安美飾故服緘麻】聞樂不樂【悲哀在心故不樂也】食旨不甘【甘美也不甘美味故疏食水飲】此哀戚之情也【謂上六句】三日而食教民無以死傷生毀不滅性此聖人之政也【不食三日哀毀過情滅性而死皆虧孝道故聖人制禮施教不令至於殞滅】喪不過三年示民有終也【三年之喪天下達禮使不肖企及賢者俯從夫孝子有終身之憂聖人以三年為制者使人知有終竟之限也】為之棺槨衣衾而舉之【周尸為棺周棺為槨衣謂歛衣衾被也舉為舉尸內於棺也】陳其簠簋而哀感之【簠簋祭器也陳奠素器而不見親故哀感也】擗踊哭泣哀以送之【男踊女擗祖載送之】卜其宅兆而安措之【宅墓穴也兆塋域也葬事大故卜之】為之宗廟以鬼享之【立廟祔祖之後則以鬼禮享之】春秋祭祀以時思之【寒暑變移益用增感以時祭祀展其孝思也】生事愛敬死事哀感生民之本盡矣死生之義備矣孝子之事親終矣【愛敬哀感孝行之始終也備陳死生之義以盡孝子之情】

右傳之十四章【舊本今文第十八章

朱子曰傳之十四章亦不解經而別 一義其語尤精約也】

子曰父在觀其志父沒觀其行三年無改於父之道可謂孝矣【父在子不得自專而志則可知父沒然後其行可見故觀此足以知其人之善惡然又必能三年無改於父之道乃見其孝不然則所行雖善亦不得為孝矣 尹氏曰如其道雖終身無改可也如其非道何待三年然則三年無改者孝子之心有所不 故也游氏曰三年無改亦謂在所當改而可以未改者耳】子曰事父母幾諫見志不從又敬不違勞而不怨【此章】

【與內則之言相表裏幾微也微諫所謂父母有過下氣怡色柔聲以諫也見志不從又敬不違所謂諫若不入起敬起孝悅則復諫也勞而不怨所謂與其得罪於鄉黨州閭寧熟諫父母怒不悅而撻之流血不敢疾怨起敬起孝也】子曰父母在不遠遊遊必有方【遠遊則去親遠而為日久定省曠而音問疎不惟已之思親不置亦恐親之念我不忘也遊必有方如已告云之東則不敢更適西欲親必知己之所在而無憂召已則必至而無失也范氏曰子能以父母之心為心則孝矣】子曰父母之年不可不知也一則以喜一則以懼【知猶記憶也常知父母之年則既喜其壽又懼其衰其於愛日之誠自有不能已者】孟懿子問孝子曰無違【孟懿子魯大夫仲孫氏名何忌無違謂不背於理】樊遲御子告之曰孟孫問孝於我我對曰無違【樊遲孔子弟子名須御為孔子御車也孟孫即仲孫也夫子以懿子未達而不能問恐其失指而以從親之令為孝故語樊遲以 之】樊遲曰何謂也子曰生事之以禮死葬之以禮祭之以禮【生事葬祭事親之始終具矣禮即禮之節文也人之事親自始至終一於禮而不苟其尊親也至矣是時三家僭禮故夫子以是警之然語意渾然又若不專為三家發者所

以為聖人之言也 胡氏曰人之欲孝其親心雖無窮而分則有限得為而不為與不得為而為之均於不孝所謂以禮者為其所得為者而已矣【武伯懿子之子名彘言父母愛子之心無所不至惟恐其有疾病常以為憂也人子體此而以父母之心為心則凡所以守其身者自不容於不謹矣豈不可以為孝乎舊說人子能使父母不以其陷於不義為憂而獨以其疾為憂乃可謂孝亦通】子游問孝子曰今之孝者是謂能養至於犬馬皆能有養不敬何以別乎【子游孔子弟子姓言名偃養謂飲食供奉也犬馬待人而食亦若養然言人畜犬馬皆能有以養之若能養其親而敬不至則與養犬馬者何異甚言不敬之罪所以深警之也 胡氏曰世俗事親能養足矣狎恩恃愛而不知其漸流於不敬則非小失也子游聖門高弟未必至此聖人直恐其愛踰於敬故以是深警 之也】子夏問孝子曰色難有事弟子服其勞有酒食先生饌曾是以為孝乎【色難謂事親之際惟色為難也食飯也先生父兄也饌飲食之也曾猶嘗也蓋孝子之有深愛者必有和氣有和氣者必有愉色有愉色者必有婉容故事親之際惟色為難耳服勞奉養未足為孝也 程子曰告懿子告眾人者也告武伯者以其人多可憂之事子游能養而或失於敬子夏能直養而或少溫潤之色各因其材之高下與其所失而告之故不同也 並論語】子曰立愛自親始教民睦也立敬自長始教民順也【親長父兄也睦和厚也】教以慈睦而民貴有親教以敬長而民貴用命【尊長出教令者】孝以事親順以聽命錯諸天下無所不行【祭義】

子云善則稱親過則稱已則民作孝

子云君子弛其親之過而敬其美【弛猶棄忘也孝子不藏戢父母之過】子云從命不忿微諫不倦勞而不怨可謂孝矣【微諫不倦者子於父母尚和順不用鄂鄂論語曰事父母幾諫見志不從又敬不違內則曰父母有過下氣怡色柔聲以諫諫若不入起敬起孝說則復諫此所謂不倦】子云睦於父母之黨可謂孝矣【睦厚也黨猶親也】故君子因睦以合族【合族謂與族人燕與族人食】子云於父之執可以乘其車不可以衣其衣君子以廣孝也【父之執與父執志同者也可以乘其車車於身差遠也謂今與已位等】子云父母在不稱老言孝不言慈閨門之內戲而不

歎【孝上施言慈則嫌下流也戲謂孺子言笑者也孟子曰舜年五十而不失其孺子之心歎謂有憂感之聲也】君子以此坊民民猶薄於孝而厚於慈 父母在不敢有其身不敢私其財示民有上下也【身及財皆當統於父母也有猶專也】父母在饋獻不及車馬示民不敢專也【車馬家物之重者 並坊記】曾子曰孝子之養老也樂其心不違其志樂其耳目安其寢處以其飲食忠養之孝子之身終終身也者非終父母之身終其身也是故父母之所愛亦愛之父母之所敬亦敬之至於犬馬盡然而況於人乎【賤喻貴也 內則】曾子曰孝有三大孝尊親其次弗辱其下能養公明儀問於曾子曰夫子可以為孝乎曾子曰是何言與是何言與君子之所為孝者先意承志諭父母於道參直養者也安能為孝乎【公明儀曾子弟子】曾子曰身也者父母之遺體也行父母之遺體敢不敬乎居處不莊非孝也事君不忠非孝也涖官不敬非孝也朋友不信非孝也戰陳無勇非孝也五者不遂裁及於親敢不敬乎【遂猶成也】亨孰羶薌嘗而薦之非孝也養也君子之所謂孝也者國人稱願然曰幸哉有子如此所謂孝也已【然猶而也】衆之本教曰孝其行曰養養可能也敬為難敬可能也安為難安可能也卒為難父母既没慎行其身不遺父母惡名可謂能終矣仁者仁此者也禮者履此者也義者宜此者也信者信此者也強者強此者也樂自順此生刑自反此作 曾子曰夫孝置之而

塞乎天地溥之而橫乎四海施諸後世而無朝夕推而放諸東海而準推而放諸西海而準推而放諸南海而準推而放諸北海而準【無朝夕言常行無輟時也放猶至也準猶平也】曾子曰樹木以時伐焉禽獸以時殺焉夫子曰斷一樹殺一獸不以其時非孝也孝有三小孝用力中孝用勞大孝不匱【勞猶功也】思慈愛忘勞可謂用力矣尊仁安義可謂用勞矣博施備物可謂不匱矣【思慈愛忘勞思父母之慈愛已而自忘已之勞苦】父母愛之喜而弗忘父母惡之懼而無怨【無怨無怨於父母之心】父母有過諫而不逆【順而諫之】父母既沒必求仁者之粟以祀之此之謂禮終【雖貧困猶不取惡人物以事亡親】樂正子春下堂而傷其足數月不出猶有憂色門弔子曰夫子之足瘳矣數月不出猶有憂色何也樂正子春曰善如爾之問也善如爾之問也吾聞諸曾子曾子聞諸夫子曰天之所生地之所養無人為大【疏曰言天地生養萬物之中無如人最為大故孝經云天地之性人為貴是也】父母全而生之子全而歸之可謂孝矣不虧其體不辱其身可謂全矣【曾子聞諸夫子述曾子所聞於夫子所言】故君子頃步而弗敢忘孝也今予忘孝之道予是以有憂色也【頃當為跬聲之誤也予我也】壹舉足而不敢忘父母壹出言而不敢忘父母壹舉足而不敢忘父母是故道而不徑舟而不游不敢以先父母之遺體行殆壹出言而不敢忘父母是故惡言不出於口忿言不反於身不辱其身不羞其親可謂全矣【徑步邪趨疾也忿言不反於身人不能無忿怒忿怒之言當由其直直則人服不敢以忿言來也並祭義】單離居問於曾子曰事父母有道乎【單離居曾子弟子也】曾子曰有愛而敬父母之行若中道則從若不中道則諫諫而不用行之如由己【且俯從所行而思諫道也】從而不諫非孝也【同父母之非不匡諫】諫而不從亦非孝也【徒以義諫而行不從】孝子之諫達善而不敢爭辨爭辨者作亂之所由興也【內則曰父母有過下氣怡色柔聲以諫諫若不入起敬起孝說則復諫也】由己為無咎則寧【謂順諫】由己為賢人則亂【謂爭辨賢與無咎互相足】孝子無私樂父母所憂憂之父母所樂樂之孝子唯巧變故父母安之若夫坐如尸立如齊弗訊不言【齊謂祭祀時訊問也】言必齊色【嚴敬其色】此成人之善者也未得為人子之道也【為人父之事】單離居問曰事兄有道乎曾子曰有尊視之以為己望也【謂儀象也】兄事之不遺其言【奉其所令】兄之行若中道則兄事之兄之行若不中道則養之【養猶隱之】養之內不養於外則是越之也養之外不養於內則是疏之也是故君子內外養之也單離居問曰使弟有道乎曾子曰有嘉事不失時也【謂冠娶也】弟之行若中道則正以使之【正以使之以弟道】弟之行若不中道則兄事之【且以兄禮敬之】詘事兄之道若不可然后舍之矣【屈事兄之道然猶不變則怒罰之】曾子曰夫禮大之由也不與小之自也【言大者得自由也】飲食以齒【以長幼也】力事不讓辱事不齒執觴觚杯豆而不醉和歌而不哀【觚器也實之曰觴杯盤盞盆盞之總名也豆醬器以木曰登】夫弟者不衡坐不苟越不干逆色趨翔周旋俛仰從命不見於顏色未成於弟也【大戴禮】

右論孝附

禮書綱目卷七十八

卷七十九

欽定四庫全書

禮書綱目卷七十九 婺源江永撰

少儀 曲禮四

補

人生十年曰幼學【名曰幼時始可學也內則曰十年出就外傳居宿於外學書計】二十曰弱冠三十曰壯有室【有室有妻也妻稱室】四十曰強而仕五十曰艾服官政【艾老也】六十曰耆指使【指事使人也六十不與服戎不親學】七十曰老而傳【傳家事任子孫是謂宗子之父】八十九十曰耄【耄憊忘也春秋傳曰謂老將至耄又及之】七年曰悼【悼憐愛也】悼與耄雖有罪不加刑焉【愛幼而尊老】百年曰期頤【期猶要也頤猶養也不知衣服食味孝子要盡養道而已朱子日期當音居宜反論語期可已矣與暮字同周匝之義也期謂百年已周頤謂當養而已期如上句幼弱耄悼等字頤如上句學冠不刑等字 曲禮】幼名冠字五十以伯仲死諡周道也【檀弓】年長以倍則父事之【謂年二十於四十者人年二十弱冠成人有為人父之端今四十於二十者有子道內則曰年二十惇行孝弟】十年以長則兄事之五年以長則肩隨之【肩隨者謂之並行差退】羣居五人則長者必異席【席以四人為節因宜有所尊 曲禮】

右年齒差等

幼子常視毋誑【註見內則】童子不衣裘裳【裘大溫消陰氣使不堪若不衣裳便易】立必正方不傾聽【習其自端正】長者與之提攜則兩手奉長者之手【習其扶持尊者提攜謂牽將行】劔辟咤詔之【謂置之于背劔謂挾之于旁辟咤詔之謂傾頭與語口旁曰咤】則掩口而對【習其鄉尊者屏氣也 曲禮】童子之節也緇布衣錦緣錦紳并紐錦束髮皆朱錦也【童子未冠之稱也冠禮曰將冠者采衣紒也】童子不裘不帛不履絢無總服聽事不麻無事則立主人之北南面見先生從人而入【皆為幼小不備禮也雖不服總猶免深衣無麻往給事也裘帛溫傷壯氣也絢履頭飾也 玉藻】小子走而不趨舉爵則坐祭立飲【小子弟子也卑不得與賓介俱備禮容也】尊長於己踰等不敢問其年【踰等父兄黨也問年則已恭孫之心不全】燕見不將命【自不用賓主之正來則若子弟然】遇於道見則面【可以隱則隱不敢煩動也】不請所之【尊長所之或卑褻】喪俟事不植弔【亦不敢故煩動也事朝夕哭時】侍坐弗使不執琴瑟不畫地手無容不矜也【端慤所以為敬也尊長或使彈琴瑟則為之可】寢則坐而將命【命有所傳辭也坐者不敢臨之】侍射則約矢【不敢與之拾取也】侍投則擁矢【不敢釋於地也投投壺也投壺坐】勝則洗而以請【洗爵請行觴不敢直飲之】客亦如之【客射若投壺不勝主人亦洗而請之】不角【角謂觥

罰爵也於尊長與客如獻酬之爵】不擢馬【擢去也謂徹也已徹馬嫌勝故薄之 並少儀】
童子委摯而退【不與成人為禮也 曲禮】
適有喪者童子曰聽事【曰某願聽事於將命者童子未成人不敢當相見之禮 少儀】

右品節

汜埽曰埽埽席前曰拊拊席不以鬣執箕膺搗【詳見士相見禮】凡為長者糞之禮必加帚於箕上【如是得兩手奉箕恭也謂初執而往】

【時也弟子職曰執箕膺搗厥中有帚】以袂拘而退其塵不及長者【謂埽時也以袂擁帚之前埽而卻行之】以箕自鄉而扱之【扱讀曰吸謂收糞時也箕去棄物以鄉尊者則不恭】奉席如橋衡【橫奉之令左昂右低如有首尾然橋井上榑棹衡上低昂】請席何鄉請衽何趾【順尊者所安也衽臥席也坐問鄉臥問趾因於陰陽】席南鄉北鄉以西方為上東鄉西鄉以南方為上【布席無常此其順之也上謂席端也坐在陽則上左坐在陰則上右】見父之執不謂之進不敢進不謂之退不敢退不問不敢對【敬父同志如事父】此孝子之行也謀於長者必操几杖以從之【從猶就也】長者問不辭讓而對非禮也【當謝不敏若曾子之為】從於先生不越路而與人言【尊不二也先生老人教學者】遭先生於道趨而進正立拱手【為有教使】先生與之言則對不與之言則趨而退【為其不欲與己並行】從長者而上丘陵則必鄉長者所視【為遠視不察有所問】將即席容毋怍【怍謂顏色變也】兩手摳衣去齊尺【齊謂裳下緝也】衣毋撥【撥 揚貌】足毋蹶【蹶行遽貌】先生書策琴瑟在前坐而遷之戒勿越【廣敬也在前謂當行之前】虛坐盡後【謙也】食坐盡前【為汙席】坐必安執爾顏【執猶守也】長者不及毋僂言【僂猶暫也非類雜】正爾容聽必恭【聽先生之言既說又敬】毋勦說【勦猶摯也謂取人之說以為己說】毋雷同【雷之 聲物無不同時應者人之言當各由己不當然也孟子曰人無是非之心非人也】必則古昔稱先王【言必有依】毋踐履毋踏席摳衣趨隅必慎唯諾【趨隅升席必由下也慎唯諾者不先舉見問乃應】侍坐於先生先生問焉終則對【不敢錯亂尊者之言】請業則起請益則起【尊師重道也起若今摳衣前請也業謂篇卷也益謂受說不解了欲師更明說之子路問政子曰先之勞之請益曰無倦】父召無諾先生召無諾唯而起【應辭唯恭于諾】侍坐于所尊敬毋餘席【必盡其所近尊者之端為有後來者】見同等不起【不為私敬】燭至起【異晝夜】食至起【為饌變】上客起【敬尊者】燭不見跋【跋本也燭盡則去之嫌若燼多有厭倦】尊客之前不叱狗【主人於尊客之前不敢倦嫌若風去之】讓食不唾【嫌有穢惡並曲禮】洗盥執食飲者勿氣有問焉則辟咠而對【示不敢歆 也 少儀】侍坐於君子君子問更端則起而對【離席對敬異事也君子必令復坐】

侍于君子不顧望而對非禮也【禮尚謙也不顧望若子路率爾而對】

長者賜少者賤者不敢辭【不敢亢禮也賤者僮僕之屬】侍坐于君子若有告者曰少間願有復也則左右屏而待【復白也言欲須少空閒有所白也屏猶退也隱也】毋側聽【嫌探人之私也側聽耳屬于垣】毋噉應毋淫視毋怠荒遊毋倨立毋跛坐毋箕寢毋伏歛髮毋髡冠毋免勞毋袒暑毋褰裳【皆為其不敬噉號呼之聲也淫視睥睨也怠荒放散身體也跛偏任也伏覆也髡髮也毋垂餘如髮也免去也褰或為肄】侍坐於長者屨不上于堂【屨賤空

則不陳于尊者之側】解屨不敢當階【為妨後升者】就屨跪而舉之屏於側【謂獨退也就猶著也屏亦不當階】鄉長者而屨跪而遷屨俯而納屨【謂長者送之也不得屏遷之而已俯俛也納內也遷或為還並曲禮】排闥說屨於戶內者一人而已矣【雖衆敵猶有所尊也】有尊長在則否【在在內也後來之衆皆說屨于戶外少儀】凡侍坐於君子君子欠伸問日之早晏以食具告改居則請退可也夜侍坐問夜膳葷請退可也【詳見士相見禮】侍坐於君子君子欠伸撰杖屨視日蚤莫侍坐者請出矣【以君子有倦意也撰猶持也曲禮】侍坐於君子君子欠伸運笏澤劔首還屨問日之蚤莫雖請退可也【以此皆解倦之狀伸頻伸也運笏謂玩弄也金器弄之易以汙澤少儀】請見不請退【去止不敢自由同上】

右灑埽應對進退

燕侍食於君子則先飯而後已【所以勸也】毋放飯毋流歎小飯而亟之【亟疾也備噉噎若見問也】數噉毋為口容【口容弄口少儀】侍食於先生異爵者後祭先飯【謙也玉藻】侍食於長者主人親饋則拜而食【勸長者食耳雖賤不得執食興辭拜而已示敬也】主人不親饋則不拜而食【以其禮於已不隆曲禮】凡食果食者後君子【陰陽所成非人事也】火食者先君子【備火齊不得也玉藻】食棗桃李弗致於核【恭也】瓜祭上環食中棄所操【上環頭忖也同上】侍飲于長者酒進則起拜受於尊所【降席拜受敬也燕飲之禮鄉尊】長者辭少者反席而飲長者舉未釂少者不敢飲【不敢先尊者盡爵曰釂燕禮曰公卒爵而後飲也】御同于長者雖貳不辭【謂侍食于長者饌具與之同也貳謂重殺膳也辭之為長者嫌】偶坐不辭【盛饌不為己並曲禮】

右侍食

弟子職 曲禮五

補【出管子】

先生施教弟子是則溫恭自虛所受是極【必虛其心然後能有所容極謂盡其本原也】見善從之聞義則服溫柔孝弟毋驕恃力【驕而恃力則羝羊觸藩】志無虛邪行必正直游居有常必就有德【虛謂虛偽】顏色整齊中心必式夙興夜寐衣帶必飭【式法也】朝益暮習小心翼翼一此不懈是謂學則

右學則

少者之事夜寐蚤作既拚盥漱執事有恪【埽席前曰拚盥潔手漱滌口】攝衣共盥先生乃作沃盥徹盥汎拚正席【共盥謂共先生之盥器也徹盥謂既盥而徹盥器也汎拚謂廣拚內外不止席前也】先生乃坐出入恭敬如見賓客危坐鄉師顏色毋怍【怍謂變其容貌】

右蚤作

受業之紀必由長始一周則然其餘則否【謂先從長者教之一周之外則不必然】始誦必作其次則已【始誦而作以敬事端也至于次誦則不必然】凡言與行思中以為紀古之將興者必由此始【中者無過不及之名以此為紀綱然後可興也】後至就席狹坐則起【狹坐之人見後至者則當起】若有賓客弟子駿作對客無讓應且遂行趨進受命所求雖不得必以反命【駿作迅起也對客無讓者供給使令不敢亢禮也受命為先生命求雖不得必以反白】反坐復業若有所疑捧手問之師出皆起至于食時

右受業對客

先生將食弟子饌饋攝衽盥漱跪坐而饋置醬醋食陳膳毋悖【饋謂選具其食】凡置彼食鳥獸魚鼈必先菜羹【先菜後肉食之次也】羹載中別載在醬前其設要方【載謂肉之細者遠載近醬食之便也其陳設食器要令成方也】飯是為卒【既飯而食則卒也】左酒右醬【是謂載也禮三反乃食載而辯穀皆畢又用酒以醕用漿以漱故言飯載而食終乃言酒漿明在載外也鄭注二禮兩引此文皆作漿字又此上文已云載在醬前則此醬不應復在載外矣今文誤也】告具而退捧手而立三飯二斗左執虛豆右執挾匕周還而貳唯嚙之視同嚙以齒周則有始柄尺不跪是謂貳紀【三飯食必設二斗也挾猶箸也匕所以載鼎實者貳謂再益也食盡曰嚙視有盡者則益之齒次序也如菜肉同盡則先益菜後益肉也豆有柄長尺則立而進之此是再益之綱紀也】

先生已食弟子乃徹趨走進漱拊前斂祭【既食畢埽席前并搜斂所祭也】

右饌饋

先生有命弟子乃食以齒相要坐必盡席【所謂食坐盡前恐污席也】飯必捧擎羹不以手亦有據膝無有隱肘既食乃飽循咍覆手【不以手當以挾也隱肘則太伏也咍口也覆手而循之所以拭其不潔也】振衽埽席已食者作摳衣而降旋而鄉席各徹其餽如於賓客既徹并器乃還而立【振衽埽席謂振其衣衽以拂席之污賓客食畢亦自徹其餽并謂藏去也】

右乃食

凡拊之道實水于盤攘臂袂及肘堂上則播灑室中握手執箕膺揲厥中有帚【攘袂者恐濕其且不便於事也堂上寬故播散而灑室中隘故握手為掬以灑揲舌也既灑水將拊之故執箕以舌自當而置帚于箕中也】入戶而立其儀不貸執帚下箕倚于戶側【謂倚箕于戶側】凡拊之紀必由奧始【西南隅也】俯仰磬折拊毋有徹【徹動也不得觸動他物也】拊前而退聚於戶內【從前埽而却退聚其所埽穢壤於戶內也】坐板排之以葉適已實帚于箕【板穢時以手排之適已向已也】先生若作乃興而辭【以拊未畢故辭之令止也】坐執而立遂出弃之既拊反立是協是稽【協合也稽考也謂合書考義也】

右灑埽

暮食復禮【謂復朝食之禮】昏將舉火執燭隅坐錯總之法橫于坐所櫛之遠近乃承厥火【總束也古者束薪蒸以為燭故謂之總其未然者則橫于坐之所也櫛謂燭盡察其將盡之遠近乃更以燭承取火也】居句如矩蒸閒容蒸然者處下捧椀以為緒【句曲也舊燭既盡則更使人以新燭繼之一橫一直其兩端相接之處勢曲如矩則方正不邪也蒸細薪也言稍寬其束使其蒸閒可以各容一蒸以通大氣又使已然者居下未然者居上則火易然也緒燭燼也椀所以貯緒也】右手執燭左手正櫛有墮代燭交坐無倍尊者乃取厥櫛遂出是去【先執燭者既捧椀以貯節之餘緒遂以左手正櫛而投其緒於椀中至其櫛漸短有墮而不可執者則後執燭者代之而交坐於其處前執燭者乃取櫛而出弃之也】

右執燭

先生將息弟子皆起敬奉枕席問所欲趾俶衽則請有常則否【俶始也變其衽席則當問其所趾若有常處則不請也】

右請衽

先生既息各就其友相切相磋各長其儀周則復始是謂弟子之紀

右退習 事師無犯無隱左右就養無方服勤至死心喪三年【心喪戚容如父而無服也凡此以恩義之間為制 檀弓】 宦學事師非禮不親【詳見曲禮】

禮書綱目卷七十九

卷八十

欽定四庫全書

禮書綱目卷八十 婺源江永撰

臣禮 曲禮六

補

事君有犯而無隱【既諫人有問其國政者可以語其得失若齊晏子為晉叔向言之】左右就養有方【不可侵官】服勤至死方喪三年【方喪資于事父凡此以義為制檀弓】事君者量而後入不入而後量凡乞假于人為

人從事者亦然然故上無怨而下遠罪也【量量其事意合成否 少儀】為人臣下者有諫而無訕有亡而無疾【亡去也疾惡也】頌而無譏諫而無驕【頌謂將順其美匡救其惡驕謂恃知而慢也】怠則張而相之【怠惰也相助也】廢則埽而更之【廢政教壞亂不可因也】謂之社稷之役【役為也同上】四郊多壘此卿大夫之辱也【辱其謀人之國不能安也壘軍壁也數見侵伐則多壘】地廣大荒而不治此亦士之辱也【辱其親民不能安荒穢也 曲禮】

右通論 子言之事君先資其言拜自獻其身以成其信【資謀也獻猶進也言臣事君必先謀定其言乃後親進為君言也】是故君有責於其臣臣有死于其言故其受祿不誣其受罪益寡【死其言者竭力於其所言之事死而不 於事不信曰誣】子曰事君大言入則望大利小言入則望小利【大言可以立大事也小言可以立小事也入謂君受之利祿賞也入或為人】故君子不以小言受大祿不以大言受小祿【言臣受祿各用其德能也】子曰事君不下達不尚辭非其人弗自【不下達不以私事自通於君也不尚辭不多出浮華之言也弗自不身與相親】子曰邇臣守和宰正百官大臣慮四方【邇近也和謂調和君事者也齊景公曰唯據與我和宰豕宰也豕宰正治百官】子曰事君難進而易退則位有序易進而難退則亂也【亂謂賢否不別】故君子三揖而進一辭而退以遠亂也【進難者為主人之擇已也退速者為君子之倦也】子曰事君三違而不出竟則利祿也人雖曰不要吾弗信也【違猶去也利祿言為貪祿留也臣以道去君至于三而不遂去是貪祿必以其強與君要也】

子曰事君慎始而敬終【輕交易絕君子所恥】

子曰事君可貴可賤可富可貧可生可殺而不可使為亂【亂謂違廢事君之禮】子曰事君軍旅不辟難朝廷不辭賤【言尚忠且謙也】處其位而不履其事則亂也【履猶行也】故君使其臣得志則慎慮而從之否則孰慮而從之終事而退臣之厚也【使謂使之聘問師役之屬也慎慮而從之者此已志也欲其必有成也否謂非已志也孰慮而從之又計於已利害也終事而退非已志者事成則去也事或為身 竝表記】子曰下難知則君長勞【難知有姦

心也】臣儀行不重辭不援其所不及不煩其所不知則君不勞矣【儀當為義聲之誤也言臣義事君則行也重猶尚也援猶引也引君所不及謂必使其君所行如堯舜也不煩以其所不知謂必使其知慮如聖人也凡告諭人當隨其才以誘之 緇衣】

子云善則稱君過則稱已則民作忠【坊記】

子路問事君子曰勿欺也而犯之【犯謂犯顏諫諍

范氏曰犯非子路之所難也而以不欺為難故夫子教以先勿欺而後犯也】子曰事君敬其事而後其食【後與後獲之後同食祿也君子之仕也有官守者修其職有言責者盡其忠皆以敬吾之事而已不可先有求祿之心也

並論語】責難於君謂之恭陳善閉邪謂之敬吾君不能

謂之賊【范氏曰人臣以難事責於君使其君為堯舜之君者尊君之大也開陳善道以禁閉君之邪心惟恐其君或陷于有過之地者敬君之至也謂其君不能行善道而不以告者賊害其君之甚也孟子】史黯曰事君者諫過而賞善【諫過匡救其惡賞善將順其美】薦可而替否【薦進也替去也傳曰君所謂可而有否焉臣獻其否以成其可君所謂否而有可焉臣獻其可以去其否】獻能而進賢擇才而薦之朝夕誦善敗而納之道之以文行之以順勤之以力致之以死【死其難也】聽則進否則退【國語晉語】召公曰夫事君者險而不懼【君諸侯也在危險之中不當懼懼謂若晉慶鄭怨惠公愎諫違卜棄而不戰】怨而不怒【怨怨望也怒作氣也】況事王乎【周語】

司士掌擯士者膳其摯【擯士告見初為士者於王也鄭司農云膳其摯者王食其所執羔鴈之摯玄謂膳者入於王之膳人 夏官】始見于君執摯至下容彌蹙【下謂君所也蹙猶促也促恭慤貌也其為恭士大夫一也】庶人見於君不為容進退走【容謂趨翔】士大夫則奠摯再拜稽首君答壹拜【言君答士大夫一拜則於庶人不答之庶人之摯驚古文壹作一】若他邦之人則使擯者還其摯曰寡君使某還摯賓對曰君不有其外臣臣不敢辭再拜稽首受【士相見禮】

右始見 子曰擇日月以見君恐民之不敬也【擇日月以見君謂臣在邑竟者 表記】臣見君所以有贊何贊者質也質己之誠致己之悃悞也王者因臣之心以為之制差其尊卑以副其意子見父無贊何至親也見無時故無贊臣之事君以義合也得親供養故質己之誠副己之意故有贊也【白虎通】孟子曰在國曰市井之臣在野曰草莽之臣皆謂庶人庶人不傳質為臣不敢見於諸侯禮也【傳通也質者士執雉庶人執鶩相見以自通者也國內莫非君臣但未仕者與執贊在位之臣不同故不敢見也】

將適公所宿齋戒居外寢沐浴史進象笏書思對命【思所思念將以告君者也對所以對君者也命所受君命也書之於笏為不忘也】既服習容觀玉聲【玉佩】乃出揖私朝輝如也登車則有光矣【私朝自大夫家之朝也揖其臣乃行玉藻】

大夫士出入君門由闌右【臣統於君闌門櫺】不踐闕【闕門限也曲禮】

凡有指畫於君前用笏造受命於君前則書於笏【玉藻】輟朝而顧不有異事必有異慮【心不正志不在君輟猶止也】故輟朝而顧君子謂之固【固謂不達於禮也 曲禮】君命召

雖賤人大夫士必自御之【御當為訝訝迎也君雖使賤人來必自出迎之尊君命也春秋傳曰跛者御跛者眇者御眇者皆訝也世人亂之曲禮】凡君召以三節二節以走一節以趨【節所以明信輔君命也使使召臣急則持二緩則持一周禮曰鎮圭以徵守其餘未聞也今漢使者擁節】在官不俟屨在外不俟車【趨君命也必有執隨授之者官謂朝廷治事處也玉藻】

右朝君朝與下大夫言侃侃如也與上大夫言誾誾如也【此君未視朝時也王制諸侯上大夫卿下大夫五人許氏說文侃侃剛直也誾誾和悅而諍也】君在蹕蹕如也與與如也【君在視朝也蹕蹕恭敬不寧之貌與與威儀中適之貌張子曰與與不忘向君也亦通此一節記孔子在朝廷事上接下之不同也】入公門鞠躬如也如不容【鞠躬曲身也公門高大而若不容敬之至也】立不中門行不履闕【中門中於門也謂當棖闌之間君出入處也闕門限也禮士大夫出入君門由闌右不踐闕謝氏曰立中門則當尊行履闕則不恪】過位色勃如也足躩如也其言似不足者【位君之虛位謂門屏之間人君立之處所謂寧也君雖不在過之必敬不敢以虛位而慢之也言似不足不敢肆也】攝齊升堂鞠躬如也屏氣似不息者【攝攝也齊衣下縫也禮將升堂兩手握衣使去地尺恐躡之而傾跌失容也屏藏也息鼻息出入者也近至尊氣容肅也】出降一等逞顏色怡怡如也沒階趨翼如也復其位蹕蹕如也【等階之級也逞放也漸遠所尊舒氣解顏怡怡和悅也沒階下盡階也趨走就位也復位蹕蹕敬之餘也此一節記孔子在朝之容】

吉月必朝服而朝【吉月月朔也孔子在魯致仕時如此】

君命召不俟駕行矣【急趨君命行出而駕車隨之】子曰拜下禮也今拜乎上泰也雖違衆吾從下【臣與君行禮當拜於堂下君辭之乃升成拜泰驕慢也】子曰事君盡禮人以為諂也【黃氏曰孔子於事君之禮非有所加也如是而後盡爾時人不能反以為諂故孔子言之以明禮之當然也竝論語】晉靈公不君趙宣子驟諫公患之使鉏麇賊之【鉏麇晉力士】晨往寢門闢矣盛服將朝尚早坐而假寐【不解衣冠而睡】麇退嘆而言曰不忘恭敬民之主也賊民之主不忠棄君之命不信有一於此不如死也觸槐而死【槐趙盾庭樹宣二年左氏傳】

凡侍於君紳垂足如履齊頤霑垂拱視下而聽上視帶以及袷聽鄉任左【紳垂則磬折也齊裳下緝也袷交領也玉藻】

贊幣自左詔辭自右【自由也謂為君授幣為君傳命也立者尊右少儀】凡燕見于君必辨君之南面若不得則正方不疑君【辯猶正也君南面則臣見正北面君或時不然當正東面若正西面不得疑君所處邪鄉之此謂特見圖事非立賓主之燕也疑度之】君在堂升見無方階辯君所在【升見升堂見于君也君近東則升東階君近西則升西階士相見禮】侍坐則必退席不退則必引而去君之黨【引卻】

【也黨鄉之細者退謂旁側也辟君之親黨也玉藻】君命大夫與士肄【肄習也君有命大夫則與士展習其事謂欲有所為也】在官言官在府言府在庫言庫在朝言朝【唯君命所在就展習之也官謂版圖文書之處府謂寶藏貨賄之處也庫謂車馬兵甲之處也朝謂君臣謀政事之處也】朝言不及犬馬【非公議也】在朝言禮問禮對以禮【於朝廷言無所

不用禮曲禮】君前臣名【詳見曲禮言語】

士於君所言大夫沒矣則稱諡若字名士【同上】君所無私諱【同上】過而舉君之諱則起【舉猶言也起立若失言而變自新】與君之諱同則稱字【謂諸臣之名也雜記】若賜之食而君客之則命之祭然後祭【雖見賓客猶不敢備禮也侍食則正不祭】先飯辯嘗羞飲而俟【俟君食而後食也君將食臣先嘗之忠孝也】若有嘗羞者則俟君之食然後食飯飲而俟【不祭俟食不敢備禮也不嘗羞膳宰存也飯飲利將食也】君命之羞羞近者【辟貪味也】命之品嘗之然後惟所欲【必先徧嘗之】凡嘗遠食必順近食【從近始也】君未覆手不敢殮【覆手以循耳已食也殮勸食也】君既食又飯殮【不敢先君飽】飯殮者三飯也【臣勸君食如是可也】君既徹執飯與醬乃出授從者【食于尊者之前當親徹也】君若賜之爵則越席再拜稽首受登席祭之飲卒爵而俟君卒爵然後授虛爵【不敢先君盡爵】君子之飲酒也受一爵而色洒如也【洒如肅敬貌洒或為察】二爵而言言斯【言言和敬貌斯猶耳也】禮已三爵而油油【油油說敬貌】以退【禮飲過三爵則敬殺可以去矣】退則坐取履隱辟而后履坐左納右坐右納左【隱辟俛逡巡而退著履也玉藻】若君賜之食則君祭先飯徧嘗膳飲而俟君命之食然後食【君祭先飯食其祭食臣先飯示為君嘗食也此謂君與之禮食膳謂進庶羞既嘗庶羞則飲俟君之徧嘗也今云沾嘗膳】若有將食者則俟君之食然後食【將食猶進食謂膳宰也膳宰進食則臣不嘗食周禮膳夫授祭品嘗食王乃食】若君賜之爵則下席再拜稽首受爵升席祭卒爵而俟君卒爵然後授虛爵【受爵者於尊所至於授爵坐授人耳必俟君卒爵者若欲其醕然也今文曰若賜之爵無君也】退坐取履隱辟而后履君為之興則曰君無為興臣不敢辭君若降送之則不敢顧辭遂出【謂君若食之飲之而退也隱辟俛而逡巡興起也辭君興而不敢辭其降于己大崇不敢當也】大夫則辭退下比及門三辭【下亦降也士相見禮】賜果於君前其有核者懷其核【嫌棄尊者物也木實曰果】御食于君君賜餘器之溉者不寫其餘皆寫【重汙辱君之器也溉謂陶梓之器不溉謂萑竹之器也寫者傳已器中乃食之也勸侑曰御曲禮】凡獻于君大夫使宰士親皆再拜稽首送之【敬也】膳於君有葷桃茆於大夫去茆於士去葷皆造于膳宰【膳美食也葷桃茆辟凶邪也大夫用葷桃士桃而已葷薑及辛菜也茆莢帚也造於膳宰既致命而授之葷或作焄】大夫不親拜為君之答已也【不敢變動至尊】凡於尊者有獻而弗敢以聞【此謂獻辭也少儀曰君將適他臣若致金玉貨貝于君則曰致馬資于有司是其類也玉藻】

君將適他臣如致金玉貨貝於君則曰致馬資于有司【適他行朝會也資猶用也少儀】士有獻於國君他日君問之曰安取彼再拜稽首而后對【起敬也曲禮】君賜車馬乘以拜賜衣服服以拜【敬君惠也】賜君未有命弗敢即乘服也【謂卿大夫受賜于天子者歸必致于其君君有命乃服之】君賜稽首據掌致諸地【致首于地據掌以左手覆按右手也】酒肉之賜弗再拜【輕也受重賜者拜受又拜于其室也】大夫拜賜而退士待諾而退又拜弗答拜【小臣受大夫之拜復以入告大夫拜便辟也並玉藻】大夫有獻弗親君有賜不面拜為君之答已也【不面拜于外告小臣小臣受以入也小臣掌三公及孤卿之復逆也郊特牲】有慶非君賜不賀【唯君賜為榮也玉藻】君有疾飲藥臣先

嘗之【嘗度其所堪曲禮】

右侍坐侍食獻賜侍疾 君賜食必正席先嘗之君賜腥必熟而薦之君賜生必畜之【食恐或餽餘故不以祭正席先嘗如對君也言先嘗則餘當以頒賜矣腥生肉熟而薦之祖考榮君賜也畜之者仁君之惠無故不敢殺也】侍食於君君祭先飯【周禮王日一舉膳夫授祭品嘗食王乃食君侍食者君祭則已不祭而先飯若為君嘗食然不敢當客禮也 論語】孔子侍坐於哀公賜之桃與黍焉哀公曰請用孔子先食黍而後食桃左右皆掩口而笑公曰黍者所以雪夫桃非為食之也孔子對曰丘知之矣然夫黍者五穀之長郊禮宗廟以為上盛果屬有六而桃為下祭祀不用不登郊廟丘聞之君子以賤雪貴不聞以貴雪賤今以五穀之長雪果之下者是從上雪下臣以為妨于教害于義故不敢【家語】晏子聘於楚楚王進橘置削晏子不削而并食之楚王曰橘當去剖晏子對曰臣聞之賜人主前者瓜桃不削橘柚不剖今臣無教臣不敢剖臣非不知也【說苑】

凡為君使者已受命君言不 於家【急君使也言謂有故所問也聘禮曰若有言則以束帛如享禮】君言至則主人出拜君言之辱使者歸則必拜送于門外【敬君命也此謂國君問事於其臣】若使人於君所則必朝服而命之使者反則必下堂而受命【此臣有所告請於其君 曲禮】凡自稱于君士大夫則曰下臣宅者在邦則曰市井

之臣在野則曰草茅之臣庶人則曰刺草之臣他國之人則曰外臣【宅者謂致仕者去官而居宅或在國中或在野周禮載師之職以宅田任近郊之地刺猶剷除也今文宅或為託古文茅作苗 士相見禮】振書端書於君前有誅倒筴側龜於君前有誅【臣不豫事不敬也振去塵也端正也倒顛倒也側反側也皆謂甫省視之】龜筴几杖席蓋重素衫絺綌不入公門【龜筴嫌問國家吉凶凡杖嫌自長老席蓋載喪車也雜記曰士輅葦席以為屋蒲席以為裳帷重素衣裳皆素喪服也衫單也孔子曰當暑衫絺綌必表而出之為其形褻】苞屨扱衽厭冠不入公門【此皆凶服也苞薦也齊衰薦蒯之菲也問喪曰親始死扱上衽厭猶伏也喪冠厭伏苞或為菲】書方衰凶器不以告不入公門【此謂喪在內不得內當先告君耳方板也士喪禮下篇曰書贈於方若九若七若五凶器明器也】大夫私行出疆必請反必有獻士私行出疆必請反必告【臣不敢自專也私行謂以已事也士言告者不必有其獻也告反而已】君勞之則拜問其行拜而后對【亦起敬也問行謂道中無恙及所經過】執天子之器則上衡【謂高於心彌敬也此衡謂與心平】國君則平衡大夫則綏之士則提之【綏讀曰妥妥之謂下於心】執主器執輕如不克【重慎之也主君也克勝也】執主器操幣圭璧則尚左手行不舉足車輪曳踵【重慎也尚左手尊左也車輪謂行不絕地】立則磬折垂佩主佩倚則臣佩垂主佩垂則臣佩委【君臣倨仰之節倚謂附于身小倨則垂大倨則委于地】大夫士下公門式路馬乘路馬必朝服載鞭策不敢

授綏左必式步路馬必中道以足蹙路馬芻有誅齒路馬有誅【皆廣敬也路馬君之馬載鞭策不敢執也齒欲年也誅罰也 竝曲禮】祥車曠左【空神位也祥車葬之乘車】乘君之乘車不敢曠左左必式【君存惡空其位同上】乘貳車則式佐車則否【貳車佐車皆副車也朝祀之副曰貳戎獵之副】

【曰佐魯莊公敗于乾時公喪戎路乘傳而歸】有貳車者之乘馬服車不齒【尊有爵之物

廣敬也服車所乘車也車有新舊】觀君子之衣服服劔乘馬弗賈【平尊者之物非敬也少儀】卿非君命不越竟【莊二十七:left氏傳】為人臣者無外交不敢貳君也【詳見賓禮諸侯相朝】

右恭敬 君召使擯色勃如也足躩如也【擯主國之君所使出接賓者勃變色貌躩盤辟貌皆敬君命故也】揖所與立左右手衣前後襜如也【所與立謂同為擯者也擯用命數之半如上公九命則用五人以次傳命揖左人則左其手揖右人則右其手襜整貌】趨進翼如也【疾趨而進張拱端好如鳥舒翼】賓退必復命曰賓不顧矣【紓君敬也 此一節記孔子為君擯相之容】疾君視之東首加朝服拖紳【東首以受生氣也病臥不能著衣束】

【帶又不可以褻服見君故加朝服於身又引大帶於上也 並論語】衛靈公與夫人夜坐聞車聲麟麟至闕而止過闕復有聲公問夫人曰知此為誰夫人曰此蘧伯玉也公曰何以知之夫人曰妾聞禮下公門式路馬所以廣敬也夫忠臣與孝子不為昭昭信節不為冥冥惰行蘧伯玉衛之賢大夫也仁而有智敬于事上此其人必不以闇昧廢禮是以知之公使人視之果伯玉也【列女傳】聘弓鍬矢不出竟場束脩之肉不行竟中有至尊者不貳之也【詳見賓禮諸侯相朝】

為人臣之禮不顯諫【為奪美也顯明也謂明言其君惡不幾微】三諫而不聽則逃之【逃去也君臣有義則合無義則離 曲禮】事君有犯而無隱【詳見首章】右諫諍子曰事君遠而諫則譎也近而不諫則尸利也【尸謂不知人事無辭讓也】子曰事君欲諫不欲陳【陳謂言其過于外也 並表記】孔子曰忠臣之諫君有五義焉一曰譎諫二曰戇諫三曰降諫四曰直諫五曰諷諫唯度主以行之吾從其諷諫乎【家語 按莊二十四年公羊傳何休註云諫有五一曰諷諫二曰順諫三曰直諫四曰爭諫五曰戇諫】齊宣王問卿孟子曰王何卿之問也王曰卿不同乎曰不同有貴戚之卿有異姓之卿王曰請問貴戚之卿曰君有大過則諫反覆之而不聽則易位【大過謂足以亡其國者易位易君之位更立親戚之賢者蓋與君有親親之恩無可去之義以宗廟為重不忍坐視其亡故不得已而至於此也】請問異姓之卿曰君有過則諫反覆之而不聽則去【君臣義合不合則去 此章言大臣之義親疎不同守經行權各有其分貴戚之卿小過非不諫也但必大過而不聽乃可易位異姓之卿大過非不諫也雖小過而不聽已可去矣然三仁貴戚不能行之于紂而霍光異姓乃能行之于昌邑此又委任權力之不同不可以執一論也孟子】臣所以有諫君之義何盡忠納誠也諍不從得去何以屈尊申卑孤惡君也去曰某質性頑鈍言愚不任用請退避賢如是君待之以禮臣待放如不以禮待遂去君待之以禮奈何曰予熟思夫子言未得其道今子不且留聖王之制無塞賢之路夫子欲何之則遣大夫送至于郊必三諫者何以為得君臣之義必待於郊者忠厚之至冀君覺悟能用之所以必三年何古者臣下有大喪君三年不呼其門所以復君恩如以言放者臣為君諱若言有罪放之也臣待於郊君不絕其祿者示不欲去也道不合耳祿參二與之一留與其妻長子使終祭宗廟賜之環則反賜之玦則去明君子重恥也【白虎通】箕子者紂親戚也紂始為象箸箕子歎曰彼為象箸必為玉栝為玉栝則必思遠方珍怪之物而御之矣輿馬宮室之漸自此始不可振也紂為淫佚箕子諫紂不聽而囚之人或曰可以去矣箕子曰為人臣諫不聽而去是彰君之惡而自說於民吾不忍為也乃

被髮佯狂而為奴遂隱而鼓琴以自悲故傳之曰箕子操王子比干者亦紂之親戚也見箕子諫不聽而為奴則曰君有過而不以死爭則百姓何辜乃直言諫紂怒曰吾聞聖人之心有七竅信有諸乎乃遂殺王子比干剖視其心微子曰父子有骨肉而臣主以義屬故父有過子三諫不聽則隨而號之人臣三諫不聽則其義可以去矣於是遂行孔子曰殷有三仁焉【史記微子世家】 晏子曰君所謂可而有否焉臣獻其否以成其可【獻君之否以成君可】 君所謂否而有可焉臣獻其可以去其否是以政平而不干民無爭心【昭二十年左氏傳】

大夫士去國祭器不踰竟【此用君祿所作取以出竟恐辱親也】大夫寓祭器於大夫士寓祭器於士【寓寄也與得用者言寄覬已後還】大夫士去國踰竟為壇位鄉國而哭素衣素裳素冠徹緣鞮屨素箴乘髦馬不蚤鬻不祭食不說人以無罪婦人不當御三月而復服【言以喪禮自處也臣無君猶無天也壇位除地為位也徹猶去也鞮屨無絢之菲也箴覆笭也髦馬不鬻落也蚤讀為爪鬻鬻鬚也不自說於人以無罪嫌惡其君也御接見也三月一時天氣變可以遂去也箴或為幕】君子行禮不求變俗【求猶務也不務變其故俗重本也謂去先祖之國居他國】祭祀之禮居喪之服哭泣之位皆如其國之故謹修其法而審行之【其法謂其先祖之制度若夏殷】去國三世爵祿有列於朝出入有詔於國【三世自祖至孫踰久可以變故俗而猶不變者爵祿有列於朝謂君不絕其祖祀復立其族若臧紇奔邾立臧為矣詔告也謂與卿大夫吉凶往來相赴告】若兄弟宗族猶存則反告於宗後【謂無列無詔者反告亦謂吉凶也宗後宗子也】去國三世爵祿無列於朝出入無詔於國唯興之日從新國之法【以故國與已無恩興謂起為卿大夫並曲禮】

右去國 孔子之去齊接淅而行去魯曰遲遲吾行也去父母國之道也【接猶承也淅漬米水也漬米將炊而欲去之速故以手承水】子路去魯謂顏淵曰何以贈我【贈送】曰吾聞之也去國則哭于墓而后行反其國不哭展墓而入【無君事主於孝哭哀去也展省視之】謂子路曰何以處我【處猶安也】子路曰吾聞之也過墓則式過祀則下【居者主於敬 檀弓】子產曰卿違從大夫之位【謂以禮去者降位一等】罪人以其罪降【罪重則降多】古之制也【昭七年左氏傳】晉放其大夫胥甲父于衛放之者何猶曰無去是云爾【是是衛】然則何言爾近正也此其為近正奈何大夫已去三年待放【古者刑不上大夫蓋以為摘巢毀卵則鳳凰不翔刳胎焚夭則麒麟不至刑之則恐誤刑賢者死者不可復生刑者不可復屬故有罪放之而已所以尊賢者之類也三年者古者疑獄三年而後斷易曰繫用徽墨寘于叢棘三歲不得凶是也自嫌有罪當誅故三年不敢去】君放之非也【曰無去是非也】大夫待放正也【聽君不去衛正也宣元年公羊傳】

國君去其國止之曰奈何去社稷也大夫曰奈何去宗廟也士曰奈何去墳墓也【皆臣民殷勤之言】國君死社稷【死其所受於天子也謂見侵伐也春秋傳曰國滅君死之正也】大夫死衆士死制【死其所受於君衆謂君師制謂君教令所使為之曲禮】君子曰謀人之軍師敗則死之謀人之邦邑危則亡之【利己亡衆非忠也言亡之者雖辟賢非義退檀弓】內亂不與焉外患弗辟也【謂卿大夫也同僚將為亂已力不能討不與而已至于鄰國為寇則當死之也春秋魯公子友如陳葬原仲傳曰君子辟內難而不辟外難雜記】

右死節 武公伐翼殺哀侯【翼晉國都也】止欒共子曰苟無死【欒共子晉哀侯大夫共叔成也初桓叔為曲沃伯共子之父欒賓傅之故止共子使無死也】吾以子見天子令子為上卿制晉國之政【上卿執政命于天子者也】辭曰臣聞之民生于三事之如一【三君父師也如一服勤至死也】父生之師教之君食之【食謂祿也】非父不生非食不長非教不知生之族也故壹事之【族類也壹事之事之如一也】唯其所在則致死焉【在君父為君父在師為師】報生以死報賜以力人之道也【賜惠也以力謂家臣也】臣敢以私利廢人之道【私利謂不死為上卿】君何以訓矣【無以教為忠也】且君知成之從也未知其待於曲沃也【君武公也言君知成將死其君為從臣道也故使止臣未知成不死而待君于曲沃之為貳也】從君而貳君焉用之【貳二心也】遂鬪而死【國語晉語】宋督將弑殤公孔父生而存則殤公不可得而弑也於是先攻孔父之家【大夫稱家父者字也禮臣死君字之以君得字之知先攻孔父之家】殤公知孔父死已必死趨而救之皆死焉孔父正色而立於朝則人莫敢過而致難於其君者孔父可謂義形於色矣【內有其義而外形見於顏色桓二年公羊傳】宋萬搏閔公絕其脰仇牧聞君弑趨而至遇之于門手劍而叱之萬臂檓仇牧碎其首【側手曰檓】齒著于門闔【闔扇】仇牧可謂不畏彊禦矣【莊十二年公羊傳】晉獻公卒里克丕鄭以三公子之徒作亂【三公子申生重耳夷吾】初獻公使荀息傅奚齊公疾召之曰以是藐諸孤【言其幼賤與諸子縣藐】辱在大夫其若之何【欲屈辱荀息使保護之】稽首而對曰臣竭其股肱之力加之以忠貞其濟君之靈也不濟則以死繼之公曰何謂忠貞對曰公家之利知無不為忠也送往事居耦俱無猜貞也【往死者居生者耦兩也送死事生兩無疑恨所謂正也】及里克將殺奚齊先告荀息曰三怨將作【三公子之徒】秦晉輔之子將何如荀息曰將死之里克曰無益也荀叔曰吾與先君言矣不可以貳能欲復言而愛身乎【荀叔荀息也復言言可復也】雖無益也將焉辟之且人之欲善誰不如我我欲無貳而能謂人已乎【言不能止里克使不忠于申生等】里克殺奚齊于次【次喪次】荀息將死之人曰不如立卓子而輔之荀息立公子卓以葬里克殺公子卓于朝荀息死之【僖九:left氏傳】荀息可謂不食其言矣【公羊傳】晉懷公命無從亡人【懷公子圉亡人重耳】期期而不至無赦狐突之子毛及偃從重耳在秦弗召【偃子犯也】懷公執狐突曰子來則免對曰子之能仕父教之忠古之制也策名委贄貳乃辟也【名書於所臣之策屈膝而君事之則不可以貳辟罪也】今臣之子名在重耳有年數矣若又召之教之貳也父教子貳何以事君刑之不濫君之明也臣之願也淫刑以逞誰則無罪臣聞命矣乃殺之【僖二十三年左氏傳】楚子圍宋晉使解揚如宋使無降楚曰晉師悉起將至矣鄭人囚而獻諸楚楚子厚賂之使反其言【反言晉不救】不許三而許之登諸樓車使呼宋人而告之【樓車車上望櫓】遂致其君命楚子將殺之使與之言曰爾既許不穀而反之何故非我無信汝則棄之速即爾刑對曰臣聞之君能制命為義臣能承命為信信載義而行之為利謀不失利以衛社稷民之主也義無二信【欲為義者不行兩信】信無二命【欲行信者不受二命】君之賂臣不知命也受命以出有死無貳【貳廢墜也】又可賂乎臣之許君以成命也【成其君命】死而成命臣之祿也寡君有信臣【已不廢命】下臣獲考【考成也】死又何求楚子舍之以歸【宣十五:left氏傳】衛懿公有臣曰宏演遠使未還翟人攻衛及懿公於滎澤殺之盡食其肉獨捨其肝宏演至報使於肝畢呼天而啼盡哀而止曰臣請為爆因自殺先出其腹內懿公之肝【爆表也納公之肝於其腹中故曰臣請為爆也】桓公聞之曰衛之亡也以為無道也今有臣若此不可不存於是復立衛于楚丘宏演可謂忠矣殺身出生以徇其君

【出去也去生就死以徇從其君】非徒徇其君也又令衛之宗廟復立祭祀不絕可謂有功矣【呂氏春秋】樂毅破齊聞畫邑人王蠋賢令軍中環畫邑三十里無入使人請蠋蠋謝不往燕人曰不來吾且屠畫邑蠋曰忠臣不事二君烈女不更二夫齊王不用吾諫故退而耕於野國破君亡吾不能存而又欲刼之以兵吾與其不義而生不若死遂經其頸於樹枝自奮絕脰而死【通鑑赧王三十一年】齊崔杼弑其君光晏子立于崔氏之門外【聞難而來】其人曰死乎曰獨吾君也乎哉吾死也【言已與衆臣無異】曰行乎曰吾罪也乎哉吾亡也【自謂無罪】曰歸乎曰君死安歸【言安可以歸】君民者豈以陵民社稷是主臣君者豈為其口實社稷是養【言君不徒君民上臣不徒求祿皆為社稷】故君為社稷死則死之為社稷亡則亡之【謂以公義死亡】若為已死而為已亡非其私暱誰敢任之【私暱所親愛也非所親暱無為當其禍】且人有君而弑之吾焉得死之而焉得亡之【言已非正卿見待無異于衆臣故不得死其難也】將庸何歸【將用死亡之義何所歸趣】門啟而入枕尸股而哭【以公尸枕已股】興三踊而出【襄二十五年左氏傳】

父之讎弗與共戴天【父者子之天殺已之天與共戴天非孝子也行求殺之乃止曲禮按君之讎亦猶父也其餘親之讎詳見通禮刑辟】父之讎辟諸海外君之讎

眡父【調人 詳見刑辟】

右復讎 韓魏趙氏殺智伯分其田趙襄子漆智伯之頭以為飲器智伯之臣豫讓欲為之報仇乃詐為刑人挾匕首入襄子宮中塗廁襄子如廁心動索之獲豫讓左右欲殺之襄子曰智伯死無後而此人欲為報仇真義士也吾謹避之耳乃舍之豫讓又漆身為癩吞炭為啞行乞於市其妻不識也行見其友其友識之為之泣曰以子之才臣事趙孟必得近幸子乃為所欲為顧不易邪何乃自苦如此求以報仇不亦愚乎豫讓笑而應之曰不可既已委質為臣而又求殺之是二心也且為先知報後知為故君賊新君大亂君臣之義吾弗為之矣凡吾所以為此者所以明君臣之義雖難不避也襄子出豫讓伏於橋下襄子至橋馬驚索之得豫讓遂殺之【史記通鑑】王孫賈事齊閔王王出走賈失王之處其母曰女朝去而晚來則吾倚門而望女莫出不還則吾倚閭而望女今欲王王出走女不知其處女尚何歸王孫賈乃入市中曰淖齒亂齊國殺閔王欲與我誅齒者袒右市人從之者四百人與誅淖齒刺而殺之【通鑑赧王三十二年】

禮書綱目卷八十

卷八十一

<經部,禮類,通禮之屬,禮書綱目

欽定四庫全書

禮書綱目卷八十一 婺源江永撰

樂制 樂一

補

伏羲樂名扶來亦曰立本神農樂名扶持亦曰下謀【見帝系譜及孝經緯文按隋樂志云伏羲有絢同之詠伊耆有葦籥之音葛天八闋神農五絃事與功偕其來尚矣】黃帝作咸池少皞作大淵【見帝王世紀】顓頊作六莖帝嚳作六英唐堯作大章虞舜作大韶夏禹作大夏【禹命登扶氏為承夏之樂有鐘鼓磬鐸鞀鐘所以記有德鼓所以謀有道磬所以待有憂鞀所以察有說治天下以五聲為銘於簋簠】商湯作大濩周武王作大武周公作勺又有房中之樂以歌后妃之德【杜氏通典】土鼓蕢桴葦籥伊耆氏之樂也【蕢當為出聲之誤也籥如笛三孔伊耆氏古天子有天下之號也今有姓伊耆氏者明堂位】

舜作五弦之琴以歌南風夔始制樂以賞諸侯【詳樂記】夔曰戛擊鳴球搏拊琴瑟以詠祖考來格虞賓在位羣后德讓下管鼗鼓合止祝敔笙鏞以間鳥獸蹠蹠簫韶九成鳳凰來儀【戛擊考擊也鳴球玉磬名也搏至拊循也樂之始作升歌於堂上則堂上之樂惟取其聲之輕清者與人聲相比故曰以詠蓋戛擊鳴球搏拊琴瑟以合詠歌之聲也格神之格思之格虞賓丹朱也堯之後為賓於虞猶微子作賓於周也丹朱在位與助祭群后以德相讓則人無不和可知矣下堂下之樂也管猶周禮所謂陰竹之管孤竹之管孫竹之管也鼗鼓如鼓而小有柄持而搖之則旁耳自擊祝敔郭璞云祝如漆桶方二尺四寸深一尺八寸中有椎柄連底撞之令左右擊敔狀如伏虎背上有二十七鉏鋸刻以籥櫟之籥長一尺以木為之始作也擊祝以合之及其將終也則櫟敔以止之皆節樂之器也笙以匏為之列管於匏中又施簧於管端鏞大鍾也葉氏曰鐘與笙相應者曰笙鐘與歌相應者曰頌鐘頌或謂之鏞詩賁鼓維鏞是也大射禮樂人宿縣于阼階東笙磬西面其南笙鐘西階之西頌磬東面其南頌鐘頌鐘即鏞鐘也上言以詠此言以問相對而言蓋與詠歌迭奏也鄉飲酒禮云歌鹿鳴笙南陔間歌魚麗笙由庚或其遺制也蹠蹠行動之貌言樂音不獨感神人至於鳥獸無知亦且相率而舞蹠蹠然也簫古文作箛舞者所執之物說文云樂名箛韶季札觀周樂見舞韶箛者則箛韶蓋舜樂之總名也今文作簫故先儒誤以簫管釋之九成者樂之九成也功以九敘故樂以九成九成猶周禮所謂九變也孔子曰樂者象成者也故曰成鳳凰羽族之靈者其雄為鳳其雌為凰來儀者來舞而有容儀也戛擊鳴球搏拊琴瑟以詠堂上之樂也下管鼗鼓合止祝敔笙鏞以間堂下之樂也唐孔氏曰樂之作也依上下而遞奏間合而後曲成祖考尊神故言於堂上之樂鳥獸微物故言於堂下之樂九成致鳳尊異靈瑞故別言之非堂上之樂獨致神格堂下之樂偏能

舞獸也或曰笙之形如鳥翼鋪之虞如獸形故於笙鋪以間言鳥獸踴躍風俗通曰舜作簫笙以象鳳蓋因其形聲之似以狀其聲樂之和豈真有鳥獸鳳凰而踴躍來儀者乎曰是未知聲樂蹇通之妙也匏巴鼓瑟而游魚出聽伯牙鼓琴而六馬仰秣聲之致祥召物見於傳者多矣況舜之德致和於上夔之樂召和於下其格神人舞獸鳳豈足疑哉今按季札觀周樂見舞韶箛者曰德至矣盡矣如天之無不覆如地之無不載雖甚盛德蔑以加矣夫韶樂之奏幽而感神則祖考來格明而感人則群后德讓微而感物則鳳儀獸舞原其所以能感召如此者皆由舜之德如天地之無不覆燾也其樂之傳歷千餘載孔子聞之於齊尚且三月不知肉味曰不圖為樂之至於斯則當時感召從可知矣】夔曰於予擊石拊石百獸率舞庶尹允諧【重擊曰擊輕擊曰拊石磬也有大磬有編磬有歌磬磬有大小故擊有輕重八音獨言石者蓋石聲屬角最難諧和記曰磬以立辨夫樂以合為主而石聲獨立辨者以其難和也石聲既和則金絲竹匏土草木七聲無不和者矣詩云既和且平依我磬聲則知言石者總樂之和而言之也或曰玉振之也者終條理之事故舉磬以終焉上言鳥獸此言百獸者考工記曰天下大獸五脂者膏者羸者羽者麟者羽麟總可謂之獸也百獸舞則物無不和可知矣尹正也庶尹者衆百官府之長也允諧者信皆和諧也庶尹諧則人無不和可知矣 益稷】右歷代樂制 樂所由來者尚也【尚曩】必不可廢有節有侈有正有淫矣【節適也侈大也正雅也淫亂也】賢者以昌不肖以亡昔古朱襄氏之治天下也【朱襄氏古天子炎帝之別號】多風而陽氣蓄積萬物散解果實不成故土達作為五絃瑟以來陰氣以定羣生【土達朱襄氏之臣】昔葛天氏之樂三人摯牛尾投足以歌八闋【葛天氏古帝名投足猶蹠足闋終】一曰載民二曰玄鳥三曰遂草木四曰奮五穀五曰敬天常六曰達帝功七曰依地德八曰總萬物之極【樂之八篇名也】昔陶唐氏之始陰多滯伏而湛積【陶唐氏堯之號】水道壅塞不行其原【故有洪水之災】民氣鬱閼而滯著【閼讀曰遏止之遏】筋骨瑟縮不達故作為舞以宣導之【宣通】昔黃帝令伶倫作為律【伶倫黃帝臣】伶倫自大夏之西【大夏西方之山】乃之阮隃之陰【阮隃山名山北曰陰】取竹於嶰谿之谷以生空竅厚鈞者斷兩節間【竹生谿谷者取其厚鈞斷兩節間以為律管】其長三寸九分而吹之以為黃鐘之宮【斷竹長三寸九分吹之音中黃鍾之宮】吹曰舍少次制十二筒【六律六呂各有管故曰十二筒合成舍矣】以之阮隃之下聽鳳凰之鳴以別十二律其雄鳴為六雌鳴亦六以此黃鐘之宮適合【合和諧】黃鐘之宮皆可以生之故曰黃鐘之宮律呂之本【法鳳之雌雄故律有陰陽上下相生故曰黃鐘之宮皆可以生之】黃帝又命伶倫與榮援鑄十二鐘以和五音以仲春之月乙卯之日日在奎始奏之命之曰咸池【奏十二鍾樂名之為咸池】帝顓頊生自若水實處空桑【處居空桑】乃登為帝惟天之合正風乃行【惟天之合德與天合風化也】其音若熙熙淒淒鏘鏘帝顓頊好其音乃令飛龍作效八風之音【八風八卦之風】命之曰承雲以祭上帝【上帝昊天上帝】乃令鰓先為樂倡【倡始也】鰓乃偃浸以其尾鼓其腹【鼓擊】其音英【英和盛貌】帝嚳命咸黑作為聲歌九招六列六英倕作為鼗鼓鐘磬吹苓管壎箎因令鳳鳥天翟舞之帝嚳大喜乃以康帝德【康安】帝堯立乃命質為樂質乃效山林谿谷之音以歌【質當為夔】乃以麋 置缶而鼓之【鼓擊】乃拊石擊石以象上帝玉磬之音以致舞百獸瞽叟乃拌五絃之瑟【拌分】作以為十五絃之瑟命之曰大章以祭上帝舜立仰延乃拌瞽叟之所為瑟益之八絃以為二十三絃之瑟帝舜乃令質修九招六列六英以明帝德【招列英皆樂名也帝謂舜】禹立勤勞天下日夜不懈通大川決壅塞鑿龍門降通澠水以導河【決壅塞故鑿龍門也降大澠水】疏三江五湖注之東海以利黔首於是

命皋陶作為夏籥九成以昭其功【九成九變昭明】殷湯即位夏為無道暴虐萬民侵削諸侯不用軌度天下患之湯於是變六州以討桀之罪功名大成黔首安寧湯乃命伊尹作為大濩歌晨露修九招六列以見其善【大濩晨露九招六列皆樂名善美也】周文王處岐諸侯去殷三淫而翼文王【文王古公亶父之孫王季歷之子也古公避獯鬻之難邑于岐山之陽有周地及受命因為天下號也淫過翼佐三淫謂剖比干之心斲賢士之股剝孕婦之胎故諸侯去之而佐文王也】散宜生曰殷可伐也文王弗許【散宜生文王四臣之一也論語曰文王為西伯三分天下有其二以服事殷故不許】周公旦乃作詩曰文王在上於昭于天周雖舊邦其命維新以繩文王之德武王即位以六師伐殷六師未至以銳兵克之於牧野【未至殷都而勝紂於牧野】歸乃薦俘馘于京大室乃命周公為作大武【大武周樂】成王立殷民反【叛反】王命周公踐伐之【踐往】商人服象為虐于東夷【象獸名也】周公遂以師逐之至于江南乃為三象以嘉其德故樂之所由來者尚矣非獨為一世之所造【三象周公所作樂名嘉美也尚久也自黃帝以來功成作樂故曰非獨為一世之所造也

呂氏春秋古樂】樂者所以象德表功殊名黃帝曰咸池者言大施天下之道而行之天之所生地之所載咸蒙德施也顓頊曰六莖者言和律歷以調陰陽莖者著萬物也帝嚳曰五英者言能調和五聲以養萬物調其英華也堯曰大章者大明天地人之道也舜曰簫韶者言能繼堯之道也禹曰大夏者言禹能順二聖之道而行之故曰大夏也湯曰大濩者言湯承堯能護民之急也周公曰酌合者言周公輔成王能斟酌文武之道而成之也武王曰象者象太平而作樂示已太平也合曰大武者天下始樂周之征伐行武故詩人歌之王赫斯怒爰整其旅當此之時天下樂文王之怒以安天下故樂其武也【白虎通】

顏淵問為邦子曰樂則韶舞【取其盡善盡美論語】子在齊聞韶三月不知肉味曰不圖為樂之至於斯也【史記三月上有學之二字不知肉味蓋心一於是而不及乎他也曰不意舜之作樂至於如此之美則有以極其情文之備而不覺其歎息之深也蓋非聖人不足以及此】孔子至齊郭門之外遇一嬰兒挈一壺相與俱行其視精其心正其行端孔子謂御曰趣驅之趣驅之韶樂方作於是至而聞韶學之三月不知肉味曰不圖為樂之至於此也故樂非獨以自樂也又以樂人非獨以自正也又以正人至矣哉子謂韶盡美矣又盡善也謂武盡美矣未盡善也【韶舜樂武武王樂美者聲容之盛善者美之實也舜紹堯致治武王伐紂救民其功一也故其樂皆盡美然舜之德性之也又以揖讓而有天下武王之德反之也又以征誅而得天下故其實有不同者程子曰成湯放桀惟有慙德武王亦然故未盡善堯舜禹湯其揆一也征伐非其所欲所遇之時然爾論語】賓牟賈侍坐於孔子孔子與之言及樂曰夫武之備戒之已久何也對曰病不得其衆也【武謂周舞也備戒擊鼓警衆病猶憂也以不得衆心為憂憂其難也】咏歎之淫液之何也對曰恐不逮事也【咏嘆淫液歌遲之也逮及也事戎事也】發揚蹈厲之已蚤何也對曰及時事也【時至武事當施也】武坐致右憲左何也對曰非武坐也【言武之事無坐也致謂膝至地也憲讀為軒聲之誤】聲淫及商何也對曰非武音也【言武歌在正其軍不貪商也時人或說其義為貪商也】子曰若非武音則何音也對曰有司失其傳也若非有司失其傳則武王之志荒矣【有司典樂者也傳猶說也荒老耄也言典樂者失其說也而時人妄說也書曰王耄荒】子曰唯丘之聞諸萇弘亦若吾子之言是也【萇弘周大夫】賓牟賈起免席而請曰夫武之備戒之已久則既聞命矣敢問遲之遲而又久何也【遲之遲謂久立於綴】子曰居吾語女夫樂者象成者也摠干而山立武王之事也發揚蹈厲大公之志也武亂皆坐周召之治也【居猶安坐也成謂已成之事也摠干持盾

也山立猶正立也象武王持盾正立待諸侯也發揚蹈厲所以象威武時也武舞象戰鬪也亂謂失行列也失行列則皆坐象周公召公以文止武也】且夫武始而北出再成而滅商三成而南四成而南國是疆五成而分周公左召公右六成復綴以崇【成猶奏也每奏武曲一終為一成始奏象觀兵盟津時也再奏象克商時也三奏象克殷有餘力而反也四奏象南方荆蠻之國侵畔者服也五奏象周公召公分職而治也六奏象兵還振旅也復綴反位止也崇充也凡六奏以充武樂也】天子夾振之而駟伐盛威於中國也【夾振之者王與大將夾舞者振鐸以為節也駟當為四聲之誤也武舞戰象也每奏四伐一擊一刺為一伐牧誓曰今日之事不過四伐五伐】分夾而進事蚤濟也【分猶部曲也事猶為也濟成也舞者各有部曲之列又夾振之者象用兵務於早成也】久立於綴以待諸侯之至也【象武王伐紂待諸侯也】且女獨未聞牧野之語乎【欲語以作武樂之意】武王克殷反商未及下車而封黃帝之後於薊封帝堯之後於祝封帝舜之後於陳下車而封夏后氏之後於杞投殷之後於宋封王子比干之墓釋箕子之囚使之行商容而復其位庶民弛政庶士倍祿濟河而西馬散之華山之陽而弗復乘牛散之桃林之野而弗復服車甲衅而藏之府庫而弗復用倒載干戈包之以虎皮將帥之士使為諸侯名之曰建橐然後天下知武王之不復用兵也【反當為及字之誤也及商謂至紂都也牧誓曰至于商郊牧野封謂故無土地者也投舉徙之辭也時武王封紂子武庚於殷墟所徙者微子也後周公更封而大之積土為封封比干墓崇賢也行猶視也使箕子視商禮樂之官賢者所處皆令反其居也弛政去其紂時苛政也倍祿復其紂時薄者也散猶放也桃林在華山旁甲鎧也衅釁字也包干戈以虎皮明能以武服兵也建讀為鍵字之誤也兵甲之衣曰橐鍵橐言閉藏甲兵也詩曰載橐弓矢春秋傳曰垂橐而入周禮曰橐之欲其約也薊或為續祝或為鑄】散軍而郊射左射貍首右射騶虞而貫革之射息也裨冕搢笏而虎賁之士說劍也祀乎明堂而民知孝朝覲然後諸侯知所以臣耕藉然後諸侯知所以敬五者天下之大教也【郊射為射宮於郊也左東學也右西學也貍首騶虞所以歌為節也貫革射穿甲革也裨冕衣裨衣而冠冕也裨衣衮之屬也搢猶插也賁憤怒也文王之廟為明堂制耕藉藉田也】食三老五更於大學天子袒而割牲執醬而饋執爵而醕冕而揔干所以教諸侯之弟也【三老五更互言之耳皆老人更知三德五事者也冕而揔干親在舞位也周名大學曰東膠】若此則周道四達禮樂交通則夫武之遲久不亦宜乎【言武遲久為重禮樂樂記】武奏大武也【朱子曰大武周公象武王武功之舞歌此詩以奏之禮曰朱干玉戚冕而舞大武然傳以此詩為武王所作則篇內已有武王之諡而其說誤矣】酌告成大武也【朱子曰酌即勺也內則十三舞勺即以此詩為節而舞也然此詩與賁般皆不用詩中字名篇疑取樂節之名如曰武宿夜云爾 竝詩序】

帝曰予欲聞六律五聲八音在治忽以出納五言汝聽【六律陽律也不言六呂者陽統陰也有律而後有聲有聲而後八音得以依據故六律五聲八音言之叙如此也在察也忽治之反也聲音之道與政通故審音以知樂審樂以知政而治之得失可知也五言者詩歌之協於五聲者也自上達下謂之出自下達上謂之納汝聽者言汝當審樂而察政治之得失者也 益稷】帝曰夔命汝典樂教胄子直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和【胄長也自天子至卿大夫之適子也栗莊敬也上二無字與母同凡人直者必不足於溫故欲其溫寬者必不足於栗故欲其栗所以慮其偏而輔翼之也剛者必至於虐故欲其無虐簡者必至於傲故欲其無傲所以防其過而戒禁之也教胄子

者欲其如此而其所以教之之具則又專在於樂如周禮大司樂掌成均之法以教國子弟而孔子亦曰興於詩成於樂蓋所以蕩滌邪穢斟酌飽滿動盪血脉流通精神養其中和之德而救其氣質之偏者也心之所之謂之志心有所之必形於言故曰詩言志既形於言則必有長短之節故曰歌永言既有長短則必有高下清濁之殊故曰聲依永聲者宮商角徵羽也大抵歌聲長而濁者為宮以漸而清且短則為商為角為徵為羽所謂聲依永也既有長短清濁則又必以十二律和之乃能成文而不亂假令黃鍾為宮則太簇為商姑洗為角林鍾為徵南呂為羽蓋以三分損益隔八相生而得之餘律皆然即禮運所謂五聲六律十二管還相為宮所謂律和聲也人聲既和乃以其聲被之八音而為樂則無不諧協而不相侵亂失其倫次可以奏之朝廷薦之郊廟而神人以和矣聖人作樂以養性情育人材事神祇和上下其體用功效廣大深切乃如此今皆不復見矣可勝嘆哉 舜典】大司樂以樂德教國子中和祇庸孝友【中猶忠也和剛柔適也祇敬庸有常也善父母曰孝善兄弟曰友】以樂語教國子興道諷誦言語【興者以善物喻善事道讀曰導導者言古以剴今也倍文曰諷以聲節之曰誦發端曰言答述曰語】以樂舞教國子舞雲門大卷大咸大磬大夏大濩大武【此周所存六代之樂黃帝曰雲門大卷黃帝能成名萬物以明民共財言其德如雲之所出民得以有旅類大咸咸池堯樂也堯能殫均刑法以儀民言其德無所不施大磬舜樂也言其德能紹堯之道也大夏禹樂也禹治水傳土言其德能大中國也大濩湯樂也湯以寬治民而除其邪言其德能使天下得其所也大武武王樂也武王伐紂以除其害言其德能成武功】樂師掌國學之政以教國子小舞【謂以年幼少時教之舞內則曰十三舞勺成童舞象二十舞大夏】

大胥掌學士之版以待致諸子春入學舍采合舞秋頒學合聲【詳歌舞篇】

籥師掌教國子舞羽籥籥【同上 並春官】凡學世子及學士必時【四時各有宜學士謂司徒論俊選所升於學者】春夏學干戈秋冬學羽籥皆於東序【干盾也戈句子戟也干戈萬舞象武也用動作之時學之籥舞象文也用安靜之時學之詩云左手執籥右手秉翟】小樂正學干大胥贊之籥師學戈籥師丞贊之【四人皆樂官之屬也通職秋冬亦學以羽籥小樂正樂師也周禮樂師掌國學之政教國子小舞大胥掌學士之版春入學舍采合舞秋頒學合聲籥師掌教國子舞羽吹籥】胥鼓南【南南夷之樂也胥掌以六樂之會正舞位旄人教夷樂則以鼓節之詩云以雅以南以籥不僭】春誦夏弦大師詔之瞽宗【誦謂歌樂也弦謂以絲播詩陽用事則學之以聲】大樂正學舞干戚【戚斧也 文王世子】大司樂以六律六同五聲八音六舞大合樂以致鬼神示以和邦國以諧萬民以安賓客以說遠人以作動物【六律合陽聲者也六同合陰聲者也此十二者以銅為管轉而相生黃鍾為首其長九寸各因而三分之上生者益一分下生者去一焉國語曰律所以立均出度也古之神瞽考中聲而量之以制度律均鍾言以中聲定律以律立鍾之均大合樂者謂徧作六代之樂以冬日至作之致天神人鬼以夏日至作之致地祇物彪動作羽贏之屬虞書曰夔曰夏擊鳴球搏拊琴瑟以詠祖考來格虞賓在位群后德讓下管鼗鼓合止祝敔笙鏞以間鳥獸蹠蹠簫韶九成鳳凰來儀又曰於予擊石拊石百獸率舞庶尹允諧此其于宗廟九奏效應】乃分樂而序之以祭以享以祀【分謂各用一代之樂】乃奏黃鍾歌大呂舞雲門以祀天神【以黃鍾之鍾大呂之聲為均者黃鍾陽聲之首大呂為之合奏之以祀天神尊之也天神謂五帝及日月星辰也王者又各以夏正月祀其所受命之帝於南郊尊之也孝經說曰祭天南郊就陽位是也】乃奏大簇歌應鍾舞咸池以祭地示【大簇陽聲第二應鍾為之合咸池大咸也地示所祭於北郊謂神州之神及社稷】乃奏姑洗歌南呂舞大磬以祀四望【姑洗陽聲第三南呂為之合四望

五嶽四鎮四瀆此言祀者司中司命風師兩師或亦用此樂歟】乃奏蕤賓歌函鍾舞大夏以祭山川【蕤賓陽聲第四函鍾為之合函鍾一名林鍾】乃奏夷則歌小呂舞大濩以享先妣【夷則陽聲第五小呂為之合小呂一名中呂先妣姜嫄也姜嫄履大人跡感神靈而生后稷是周之先母也周立廟自后稷為始祖姜嫄無所妃是以特立廟而祭之謂之閼宮閼神之也】乃奏無射歌夾鍾舞大武以享先祖【無射陽聲之下也夾鍾為之合夾鍾一名圜鍾先祖謂先王先公】凡六樂者文之以五聲播之以八音【六者言其均皆待五聲八音乃成也播之言被也故書播為藩杜子春云藩當為播讀如后稷播百穀之播】凡六樂者一變而致羽物及川澤之示再變而致羸物及山林之示三變而致鱗物及丘陵之示四變而致毛物及墳衍之示五變而致介物及土示六變而致象物及天神【變猶更也樂成則更奏也此謂大蜡索鬼神而致百物六奏樂而禮畢東方之祭則用大簇姑洗南方之祭則用蕤賓西方之祭則用夷則無射北方之祭則用黃鍾為均焉每奏有所感致和以來之凡動物敏疾者地祇高下之甚者易致羽物既飛又走川澤有孔竅者蛤蠃走則遲墳衍孔竅則小矣是其所以舒疾之分土祇原隰及平地之神也象物有象在天所謂四靈者天地之神四靈之知非德至和則不至禮運曰何謂四靈麟鳳龜龍謂之四靈龍以為畜故魚鮪不淦鳳以為畜故鳥不齧麟以為畜故獸不狘龜以為畜故人情不失】凡樂圜鍾為宮黃鍾為角大簇為徵姑洗為羽鼗鼔鼗鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣凡樂函鍾為宮大簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏日至於澤中之方丘奏之若樂八變則地示皆出可得而禮矣凡樂黃鍾為宮大呂為角大簇為徵應鍾為羽路鼓路鼗陰竹之管龍門之琴瑟九德之歌九磬之舞於宗廟之中奏之若樂九變則人鬼可得而禮矣【此三者皆禘大祭也天神則主北辰地示則主崑崙人鬼則主后稷先奏是樂以致其神禮之以玉而裸焉乃後合樂而祭之大傳曰王者必禘其祖之所自出祭法曰周人禘嚳而郊稷謂此祭天圜丘以嚳配之圜鍾夾鍾也夾鍾生於房心之氣房心為大辰天祭之明堂函鍾林鍾也林鍾生于未之氣未坤之位或曰天社在東井與鬼之外天社地神也黃鍾生於虛危之氣虛危為宗廟以此三者為宮用聲類求之天宮夾鍾陰聲其相生從陽數其陽無射無射上生中呂中呂與地宮同位不用也中呂上生黃鍾黃鍾下生林鍾林鍾地宮又不用林鍾上生太簇太簇下生南呂南呂與無射同位又不用南呂上生姑洗地宮林鍾林鍾上生大簇大簇下生南呂南呂上生姑洗人宮黃鍾黃鍾下生林鍾林鍾地宮又辟之林鍾上生大簇大簇下生南呂南呂與天宮之陽同位又辟之南呂上生姑洗姑洗南呂之合又辟之姑洗下生應鍾應鍾上生蕤賓蕤賓地宮林鍾之陽也又辟之蕤賓上生大呂凡五聲宮之所生濁者為角清者為徵羽此樂無商者祭尚柔商堅剛也鄭司農云雷鼓雷鼗皆謂六面有革可擊者也雲和地名也靈鼓靈鼗四面路鼓路鼗兩面九德之歌春秋傳所謂水火金木土穀謂之六府正德利用厚生謂之三事六府三事謂之九功九功之德皆可歌也謂之九歌也玄謂雷鼓雷鼗八面靈鼓靈鼗六面路鼓路鼗四面孤竹竹特生者孫竹竹枝根之末生者陰竹生於山北者雲和空桑龍門皆山名九磬讀當為大韶字之誤也】凡樂事大祭祀宿縣遂以聲展之【叩聽其聲具陳次之以知完否】王出入則令奏王夏尸出入則令奏肆夏牲出入則令奏昭夏【三夏皆樂章名】帥國子而舞【當用舞者帥以往】大饗不入牲其他皆如祭祀【大饗饗賓客也不入牲牲不入亦不奏昭夏也其他謂王出入賓客出入亦奏王夏肆夏】大射王出入令奏王夏及射令騶虞【騶虞樂章名在召南之卒章王射以騶虞為節】王大食三侑皆令奏鐘鼓【大食朔月月半以樂宥食時也有猶勸也】王

師大獻則令奏愷樂【大獻獻捷於祖愷樂獻功之樂鄭司農云以春秋晉文公敗楚于城濮傳曰振旅愷以入于晉】凡建國禁其淫聲過聲凶聲慢聲【淫聲若鄭衛也過聲失哀樂之節凶聲亡國之聲若桑間濮上慢聲惰慢不恭】樂師凡樂掌其序事治其樂政【序事次序用樂之事】凡國之小事用樂者令奏鐘鼓【小事小祭祀之事】凡樂成則告備【成謂所奏一竟書曰簫韶九成燕禮曰大師告於樂正曰正歌備】詔來瞽臯舞【鄭司農云瞽當為鼓臯當為告呼擊鼓者又告當舞者持鼓與舞俱來也鼓字或作瞽詔來瞽或曰瞽或曰來勅也勅爾鼓率爾衆工奏爾悲誦肅肅雍雍母怠母凶玄謂韶來瞽詔視瞭扶瞽者來入也臯之言號告國子當舞者舞】及徹帥學士而歌徹【學士國子也鄭司農云謂捋徹之時自有樂故帥學士而歌徹玄謂徹者歌雍雍在周頌臣工之什】令相【令視瞭扶工鄭司農云告當相瞽師者言當罷也瞽師盲者皆有相道之者故師冕見及階曰階也及席曰席也皆坐曰某在斯某在斯曰相師之道與】饗食諸侯序其樂事令奏鍾鼓令相如祭之儀樂出入令奏鍾鼓【樂出入謂笙歌舞者及其器】凡樂官掌其政令聽其治訟大胥比樂官【比猶校也杜子春云次比樂官也鄭大夫讀比為庀庀具也錄具樂官】展樂器【展謂陳數之】凡祭祀之用樂者以鼓徵學士【擊鼓以召之文王世子曰大昕鼓徵所以警衆】大師大祭祀帥瞽登歌令奏擊拊【擊拊瞽乃歌也故書拊為付鄭司農云登歌歌者在堂也付字當為拊書亦或為拊樂或當擊或當拊登歌下管貴人聲也玄謂拊形如鼓以韋為之著之以糠】下管播樂器令奏鼓簋【鼓簋管乃作也特言管者貴人氣也鄭司農云下管吹管者在堂下簋小鼓也先擊小鼓乃擊大鼓小鼓為大鼓先引故曰簋簋讀為導引之引玄謂鼓簋猶言擊簋詩云應簋縣鼓】大饗亦如之大射帥瞽而歌射節【射節主歌騶虞】凡國之瞽矇正焉【從大師之政教】小師大祭祀登歌擊拊【亦自有拊擊之佐大師令奏鄭司農云拊者擊石】下管擊應鼓【應鼗也應與簋及朔皆小鼓也其所用別未聞】徹歌【於有司徹而歌雍】大饗亦如之凡小祭祀小樂事鼓簋【如大師鄭司農云簋小鼓名】掌六樂聲音之節與其和【和鐸于】眡瞭掌凡樂事播鼗擊頌磬笙磬【詳見樂器】掌大師之縣【大師當縣則為之】凡樂事相瞽【相謂扶工】賓射皆奏其鐘鼓【擊簋以奏之其登歌大師自奏之】磬師教縵樂燕樂之鐘磬【杜子春讀縵為怠慢之慢玄謂縵讀謂縵錦之縵謂雜聲之和樂者也學記曰不學操縵不能安弦燕樂房中之樂所謂陰聲也二樂皆教其鐘磬】凡祭祀奏縵樂鐘師掌金奏【金奏擊金以為奏樂之節金謂鐘及鐃】凡樂事以鐘鼓奏九夏王夏肆夏昭夏納夏章夏齊夏族夏祴夏驚夏【以鐘鼓者先擊鐘次擊鼓以奏九夏夏大也樂之大歌有九故書納作內杜子春云內當為納祴讀為陔鼓之陔王出入奏王夏尸出入奏肆夏牲出入奏昭夏四方賓來奏納夏臣有功奏章夏夫人祭奏齊夏族人侍奏族夏客醉而出奏陔夏公出入奏驚夏肆夏詩也春秋傳曰穆叔如晉晉侯享之金奏肆夏之三不拜工歌文王之三又不拜歌鹿鳴之三三拜曰三夏天子所以享元侯也使臣不敢與聞肆夏與文王鹿鳴俱稱三謂其三章也以此知肆夏詩也國語曰金奏肆夏繁遏渠天子所以享元侯肆夏繁遏渠所謂三夏矣呂叔玉云肆夏繁遏渠皆周頌也肆夏時邁也繁遏執競也梁思文也肆遂也夏大也言遂於大位謂王位也故時邁曰肆于時夏允王保之繁多也遏止也言福祿止於周之多也故執億曰降福穰穰降福簡簡福祿來反渠大也言以后稷配天王道之大也故思文曰思文后稷克配彼天故國語謂之曰皆昭令德以合好也玄謂以文王鹿鳴言之則九夏皆詩篇名頌之族類也此歌之大者載在樂章樂崩亦從而亡是以頌不能具】凡祭祀饗食奏燕樂【以鐘鼓奏之】掌鼗鼓縵樂【鼓讀如莊王鼓之鼓玄謂作縵樂擊鼗以和之】

笙師凡祭祀饗射共其鍾笙之樂【鍾笙與鐘聲相應之笙】燕樂亦如之
鐃師掌金奏之鼓凡祭祀鼓其金奏之樂饗食賓射亦如之
鞀師掌教鞀樂祭祀則帥其屬而舞之【舞之以東夷之舞】大饗亦如之旄人掌教舞散樂
舞夷樂【散樂野人為樂之善者若今黃門倡矣自有舞夷樂四夷之樂亦皆有聲歌及舞】
凡四方之以舞仕者屬焉凡祭祀賓客舞其燕樂鞀鞀氏掌四夷之樂與其聲歌【四夷之樂
東方曰旄南方曰任西方曰柷離北方曰禁詩云以雅以南是也王者必作四夷之樂一天下
也言與其聲歌則云樂者主於舞】祭祀則歛而歌之【吹之以管籥為之聲】燕亦如之
【並春官】
天子賜諸侯樂則以柷將之賜伯子男樂則以鼗將之【將謂執以將命柷鼗皆所以節樂
王制】

右樂事 雷出地奮豫先王以作樂崇德殷薦之上帝以配祖考【雷出地奮和之至也先王作
樂既象其聲又取其義殷盛也 易】有瞽始作樂而合乎祖也【詩序】有瞽有瞽在周之

庭【瞽樂官無目者也序以此為始作樂而合乎祖之詩兩句總序其事也】設業設虞崇牙
樹羽應田縣鼓鞀鞀祝圉既備乃奏簫管備舉【業虞崇牙見靈臺篇樹羽置五采之羽於崇
牙之上也應小鞀田大鼓也鄭氏曰田當作鞀小鼓也縣鼓周制也夏后氏足鼓殷楹鼓周縣
鼓鞀如鼓而小有柄兩耳持其柄而搖之則旁耳還自擊磬石磬也祝狀如漆桶以木為之中
有椎連底桐之令左右擊以起樂者也圉亦作攷狀如伏虎背上有二十七鉏鈸刻以木長尺
櫟之以止樂者也簫編小竹管為之管如篴併兩而吹之者也】喤喤厥聲肅雝和鳴先祖是
聽我客戾止永觀厥成【我客二王後也觀視也成樂闋也如簫韶九成之成獨言二王後者
猶言虞賓在位我有嘉客蓋尤以是為盛耳 周頌】歌者在堂上舞者在堂下何歌者象德儔
者象功君子上德而下功降神之樂在上何為鬼神舉故書曰戛擊鳴球搏拊琴瑟以詠祖考
來格所以用鳴球搏拊者何鬼神清虛貴淨賤鏗鏘也 王者食所以有樂何樂食天下之太平
富積之饒也明天子至尊非功不食非德不飽樂元語曰受命而六樂樂先王之樂明有法也
與其所自作明有制典四夷之樂明德廣及之也故南夷之樂曰任西夷之樂曰禁北夷之樂
曰昧東夷之樂曰離合觀之樂儔於堂四夷之樂陳於右以文得之持羽毛儔以武得之持干
戚儔也樂元語曰東夷之樂持矛舞助時生也南夷之樂持羽舞助時養也西夷之樂持戟舞
助時煞也北夷之樂持干儔助時藏也先王推行道德和調陰陽覆被夷狄故夷狄安樂來朝
中國於是作樂樂之制夷狄樂不制夷狄禮何以為禮者身當履而行也夷狄之人不能行禮
樂者聖人作為以樂之耳故有夷狄樂也【並白虎通】昧東夷之樂也任南蠻之樂也納夷
蠻之樂於大廟言廣魯於天下也【周禮昧師掌教昧樂詩曰以雅以南以籥不僭廣大也明
堂位】 晉悼公十二年公伐鄭鄭伯嘉來納女工妾三十人女樂二八【嘉鄭僖公子簡公也
女美女工樂師傳曰賂晉以師愷師觸師蠲是也妾給使者工妾凡三十人女樂今伎女也八
人為佾備八音也或云女工有技巧者也與傳相違失之矣賈侍中云妾女樂也下別有女樂
二八則賈君所云似非也】歌鍾二肆【歌鍾歌時所奏肆列也凡縣鍾磬全為肆半為堵】
及寶鐃【鐃小鍾也寶鄭所寶也】公賜魏絳女樂一八歌鍾一肆曰子教寡人和戎翟而正
諸華於今八年七合諸侯寡人無不得志請與子共樂之【國語晉語】魏絳於是乎始有金
石之樂禮也【禮大夫有功則賜樂襄十一年左氏傳】太師摯適齊【太師魯樂官之長摯

其名也】亞飯干適楚三飯繚適蔡四飯缺適秦【亞飯以下以樂侑食之官干繚缺皆名也】鼓方叔入於河【鼓擊鼓者方叔名河河內】播鼗武入於漢【播搖也鼗小鼓兩旁有耳持其柄而搖之則旁耳還自擊武名也漢漢中】少師陽擊磬襄入於海【少師樂官之佐陽襄二人名襄即孔子所從學琴者海海島也 此記賢人之隱遁以附前章然未必夫子之言也張子曰周衰樂廢夫子自衛反魯一嘗治之其後伶人賤工識樂之正及魯益衰三桓僭妄自太師以下皆知散之四方逾河蹈海以去亂聖人俄頃之助功化如此如有用我期月而可豈虛語哉 論語】

禮書綱目卷八十一

卷八十二

欽定四庫全書

禮書綱目卷八十二 婺源江永撰

鍾律 樂二

補

伏羲氏作易紀陽氣之初以為律法【劉昭續後漢志】黃帝使伶倫自大夏之西昆侖之陰【應劭曰大夏西戎之國也】取竹於嶰谿之谷以生而空竅厚薄均者斷兩節間而吹之以為黃鍾之宮【孟康曰嶰谿昆侖之北谷名也灼曰取谷中之竹生而內孔外內厚薄自然均者截以為簫不復加削刮也師古曰黃鍾之宮律之最長者】制十二簫以聽鳳皇之鳴其雄鳴為六雌鳴亦六以比黃鍾之宮而皆可以生之故曰黃鍾律呂之本【師古曰比合也可以生之謂上下相生也十一管皆生於黃鍾之宮故曰律呂之本 前漢律歷志

呂氏春秋與此小異見上篇】大師掌六律六同以合陰陽之聲陽聲黃鍾大簇姑洗蕤賓夷則無射陰聲大呂應鍾南呂函鍾小呂夾鍾皆文之以五聲宮商角徵羽皆播之以八音金石土革絲木匏竹【以合陰陽之聲者聲之陰陽各有合黃鍾子之氣也十一月建焉而辰在星紀大呂丑之氣也十二月建焉而辰在玄枵大簇寅之氣也正月建焉而辰在姬訾應鍾亥之氣也十月建焉而辰在析木姑洗辰之氣也三月建焉而辰在大梁南呂酉之氣也八月建焉而辰在壽星蕤賓午之氣也五月建焉而辰在鶉首林鍾未之氣也六月建焉而辰在鶉火夷則申之氣也七月建焉而辰在鶉尾中呂巳之氣也四月建焉而辰在實沈無射戌之氣也九月建焉而辰在大火夾鍾卯之氣也二月建焉而辰在降婁辰與建交錯質處如表裏然是其合也文之者以調五聲使之相次如錦繡之有文章播猶揚也揚之以八音乃可得而觀之矣金鍾鎛也石磬也土塤也革鼓鼗也絲琴瑟也木祝敔也匏笙也竹管簫也

其言相生之法及十二律之長見後 春官】

右造律

鄭康成曰黃鍾長九寸大呂長八寸二百四十三分寸之一百四大簇長八寸夾鍾長七寸二千一百八十七分寸之千七十五姑洗長七寸九分寸之一中呂長六寸萬九千六百八十三分寸之萬二千九百七十四蕤賓長六寸八十一分寸之二十六林鍾長六寸夷則長五寸七百二十七分寸之四百五十一南呂長五寸三分寸之一無射長四寸六千五百六十一分寸之六千五百二十四應鍾長四寸二十七分寸之二十【周禮大師注月令注同】司馬遷曰黃鍾長八寸七分一【朱子曰七當作十】大呂七寸五分三分一【朱子曰一當作二 蔡元定曰七寸五分三分二強四百五】大簇七寸七分二【朱子曰七當作十】夾鍾六寸一分三分一【朱子曰一當作七 蔡曰六寸七分三分一強一百九十八】姑洗六寸七分四【朱

子曰七當作十】仲呂五寸九分三分二【蔡曰強五百八十一】蕤賓五寸六分三分一【朱子曰一當作二 蔡曰五寸六分三分二強四百八十六】林鍾五寸七分四【朱子曰七當作十】夷則五寸四分三分二【朱子曰四分字衍 蔡曰五寸三分二弱二百一十六】南呂四寸七分八【朱子曰七當作十】無射四寸四分三分二【蔡曰強六百二 今按當云強六百一十八】應鍾四寸二分三分二【史記律書 生鍾分之法見後 朱子曰按鄭氏與太史公說不同太史二說又自為異而今皆取之且以鄭先於馬者鄭氏之言分寸審度之正法也太史之言欲其便於損益而為假設之權制也蓋管律之長以九為本上下相生以三為法而鄭氏所用正法破一寸以為十分而其下破分為釐破釐為毫破毫為絲破絲為忽皆必以十為數則其數中損益之際皆有餘分雖有巧歷終不能盡是以自分而下遂不可析而直以九相乘歷十二管至破一寸以為一萬九千餘分而後略可得而記焉然亦苦於難記而易差終不若太史公之法為得其要而易考也蓋其以子為一而十一三之以至於亥則得十七萬七千一百四十七筭而子為全律之數亥為全律之實可知矣以寅為子之寸數而酉為寸法則其律有九寸可知矣以辰為子之分數而未為分法則其寸有九分可知矣以午為子之釐數而已為釐法則其分有九釐可知矣以申為子之毫數而卯為毫法則其釐有九毫可知矣以戌為絲數而丑為絲法則毫有九絲可知矣下而為忽亦因絲而九之雖出權宜而不害其得乎自然之數以之損益則三分之數整齊簡直易記而不差也其曰黃鍾八寸十分一者亦放此意但以正法之數合其權法之分故不同耳其實則不異也又曰史記律數十誤作七者五皆誤屈其下垂之筆本司馬貞沈括之說其夾蕤夷三律誤字則今以筭得之】朱子曰今依史記生鍾法約定分釐毫絲忽皆以十為九而止黃鍾九寸林鍾六寸太簇八寸南呂五寸三分【凡言分者皆九分寸之一】姑洗七寸一分應鍾四寸六分六釐【凡言釐者皆九分分之一】蕤賓六寸二分八釐大呂八寸三分七釐六毫【凡言毫者皆九分釐之一】夷則五寸五分五釐一毫夾鍾七寸四分三釐七毫三絲【凡言絲者皆九分毫之一】無射四寸八分八釐四毫八絲中呂六寸五分八釐三毫四絲六忽【凡言忽者皆九分絲之一】鄭康成曰凡律空圍九分【月令注 蔡邕月令章句曰黃鍾之管長九寸徑三分其餘皆稱短雖大小圍數無增減又邕銅龠銘曰龠黃鍾之宮長九寸空圍九分又韋昭國語注曰黃鍾之變也管長九寸徑三分圍九分因而九之九九八十一故黃鍾之數立焉 今按蔡邕皆言徑三分誤也邕謂餘律圍數無增減則是孟康註漢書圍皆隨長而減誤也孟說見後篇】朱子曰黃鍾之管長九寸圍九分徑三分四釐六毫【今按此用胡瓊之說然算術亦未密也】蔡元定曰黃鍾長九寸空圍九分積八百一十分【以漢志斛銘文定】

右十二律長圍徑之數【漢志說見後篇】

班固曰太極元氣函三為一行於十二辰始動於子參之於丑得三又參之於寅得九又參之於卯得二十七又參之於辰得八十一又參之於巳得二百四十三又參之於午得七百二十九又參之於未得二千一百八十七又參之於申得六千五百六十一又參之於酉得萬九千六百八十三又參之於戌得五萬九千四十九又參之於亥得十七萬七千一百四十七【漢志】司馬遷生黃鍾術曰置一而九三之以為法實如法得長一寸凡得九寸命曰黃鍾之宮【律書】蔡元定曰子一黃鍾之律丑三為絲法寅九為寸數卯二十七為毫法辰八十一為分數巳二百四十三為釐法午七百二十九為釐數未二千一百八十七為分法申六千五百

六十一為毫數酉一萬九千六百八十三為寸法戌五萬九千四十九為絲數亥一十七萬七千一百四十七黃鍾之實【蔡曰黃鍾九寸以三分為損益故以三歷十二辰得一十七萬七千一百四十七為黃鍾之實其十二辰所得之數在子寅辰午申戌六陽辰為黃鍾寸分釐毫絲之數在亥酉未巳卯丑六陰辰為黃鍾寸分釐毫絲之法其寸分釐毫絲之法皆用九數故九絲為毫九毫為釐九釐為分九分為寸九寸為黃鍾蓋黃鍾之實一十七萬七千一百四十七之數以三約之為絲者五萬九千四十九以二十七約之為毫者六千五百六十一以二百四十三約之為釐者七百二十九以二千一百八十七約之為分者八十一以一萬九千六百八十三約之為寸者九由是三分損益以生十一律焉或曰徑圍之分以十為法而相生之分釐毫絲以九為法何也曰以十為法者天地之全數也以九為法者因三分損益而立也全數者即十而取九相生者約十而為九即十而取九者體之所以立約十而為九者用之所以行體者所以定中聲用者所以生十一律也】又曰十二律之實子黃鍾十七萬七千一百四十七丑林鍾十一萬八千九百八十八寅太簇十五萬七千四百六十四卯南呂十萬四千九百七十六辰姑洗十三萬九千九百六十八巳應鍾九萬三千三百一十二午蕤賓十二萬四千四百一十六未大呂十六萬五千八百八十八申夷則十一萬五百九十二酉夾鍾十四萬七千四百五十六戌無射九萬八千三百四亥仲呂十三萬一千七十二

右黃鍾十一律之實

司馬遷曰生鍾分子一分【蔡元定曰一為九寸

朱子曰黃鍾全律之數凡十七萬七千一百四十七算】丑三分二【蔡曰一為三寸朱子曰以參乘子數得三為子之絲法又三分子數而去一得二為林鍾林鍾未律丑之衝也凡陰律放此凡一十一萬八千九百八十八算】寅九分八【蔡曰一為一寸朱子曰以三乘三得九為子之寸數又三分二而益一得八為太簇凡一十五萬七千四百六十四算】卯二十七分十六【蔡曰三為一寸一為三分朱子曰以三乘寅上數得二十七為子之毫法又三分寅下數而去一得此下數為南呂凡一十萬四千九百七十六算】辰八十一分六十四【蔡曰九為一寸一為一分朱子曰以三乘卯上數得此上數為子之分數又三分卯下數而益一得此下數而為姑洗凡一十三萬九千九百六十八算】巳二百四十三分一百二十八【蔡曰二十七為一寸三為一分一為三釐朱子曰以三乘辰上數得此上數為子之釐法又三分辰下數而去一得此下數為應鍾凡九萬三千三百一十二算】午七百二十九分五百一十二【蔡曰八十一為一寸九為一分一為一釐朱子曰以三乘巳上數得此上數為子之釐數又三分巳下數而益一得此下數為蕤賓凡一十二萬四千四百一十六算】未二千一百八十七分一千二十四【蔡曰二百四十三為一寸二十七為一分三為一釐一為三毫朱子曰以三乘午上數得此上數為子之分法又三分午下數而去一得此下數為大呂凡一十六萬五千】

【八百八十八算】申六千五百六十一分四千九十六【蔡曰七百二十九為一寸八十一為一分九為一釐一為一毫朱子曰以三乘未上數得此上數為子之毫數又三分未下數而益一得此下數為夷則凡一十一萬五百九十二算】酉一萬九千六百八十三分八千一百九十二【蔡曰二千一百八十七為一寸二百四十三為一分二十七為一釐三為一毫一為三絲朱子曰以三乘申上數得此上數為子之寸法又三分申下數而去一得此下數為夾鍾

凡一十四萬七千四百五十六算】戌五萬九千四十九分三萬二千七百六十八【蔡曰六千五百六十一為一寸七百二十九為一分八十一為一釐九為一毫一為一絲朱子曰以三乘酉上數得此上數為子之絲數又三分酉下數而益一得此下數為無射凡九萬八千三百四算】亥十七萬七千一百四十七分六萬五千五百三十六【蔡曰一萬九千六百八十三為一寸二千一百八十七為一分二百四十三為一釐二十七為一毫三為一絲一為三忽朱子曰以三乘戌上數得此上數為子之實又三分戌下數而去一得此下數為仲呂凡一十三萬一千七十二算 律書】

右黃鍾生十一律

司馬遷生黃鍾術曰以下生者倍其實三其法上生者四其實三其法【律書】班固曰黃鍾三分損一下生林鍾三分林鍾益一上生太簇三分太簇損一下生南呂三分南呂益一上生姑洗三分姑洗損一下生應鍾三分應鍾益一上生蕤賓三分蕤賓損一下生大呂三分大呂益一上生夷則三分夷則損一下生夾鍾三分夾鍾益一上生無射三分無射損一下生仲呂【今按大呂夾鍾仲呂三律皆用倍數】陰陽相生自黃鍾始而左旋八八為五【前漢志今按上下相生當以律書漢前後志為正呂氏春秋淮南子鄭玄周禮註韋昭國語註杜佑通典及朱子律寸新舊二法皆云蕤賓夷則無射上生大呂夾鍾仲呂下生與史漢之說不同雖大呂夾鍾仲呂三律用倍數則一然諸家皆以數之多寡為生之上下蔡氏謂其律呂陰陽皆錯亂無倫非相生之本法者其說是也今除史漢以外惟存鄭氏之說以備觀考也他不盡錄】鄭康成曰十二律相生以陰陽六體為之黃鍾初九也下生林鍾之初六林鍾又上生太簇之九二太簇又下生南呂之六二南呂又上生姑洗之九三姑洗又下生應鍾之六三應鍾又上生蕤賓之九四蕤賓又上生大呂之六四大呂又下生夷則之九五夷則又上生夾鍾之六五夾鍾又下生無射之上九無射又上生中呂之上六同位者象夫妻異位者象子母所謂律取妻而呂生子也黃鍾長九寸其實一籥下生者三分去一上生者三分益一五下六上乃一終矣【大師注】

右十二律三分損益上下相生

黃鍾正律十七萬七千一百四十七全九寸半無變律十七萬四千七百六十二【小分四百八十六】全八寸七分八釐一毫六絲二忽不用半四寸三分八釐五毫三絲一忽林鍾正律十一萬八千九十八全六寸半三寸不用

變律十一萬六千五百八【小分三百二十四】全五寸八分二釐四毫一絲一忽三初半二寸八分五釐六毫五絲六初太簇正律十五萬七千四百六十四全八寸半四寸

變律十五萬五千三百四十四【小分四百三十二】全七寸八分二毫四絲四忽七初不用半三寸八分四釐五毫六絲六忽八初南呂正律十萬四千九百七十六全五寸三分半二寸六分不用變律十萬三千五百六十三【小分四十五】全五寸二分三釐一毫六絲一初六秒半二寸五分六釐七絲四忽五初三秒姑洗正律十三萬九千九百六十八全七寸一分半

三寸五分變律十三萬八千八十四【小分六十】全七寸一釐二毫二絲二初二秒不用半
三寸四分五釐一毫一絲一初一秒應鍾正律九萬三千三百一十二全四寸六分六釐半二
寸三分三釐不用變律九萬二千五十六【小分四十】全四寸六分七毫四絲三忽一初四
秒【餘一算】半二寸三分三毫六絲六忽六秒強不用蕤賓正律【已下六律之實並見上
黃鍾十一律之實章】全六寸二分八釐半三寸一分四釐
大呂正律全八寸三分七釐六毫半四寸一分八釐三毫
夷則正律全五寸五分五釐一毫半二寸七分二釐五毫
夾鍾正律全七寸四分三釐七毫三絲半三寸六分六釐三毫六絲
無射正律全四寸八分八釐四毫八絲半二寸四分四釐二毫四絲仲呂正律全六寸五分八
釐三毫四絲六忽半三寸二分八釐六毫二絲三忽【朱子鍾律蔡氏新書參定】

右十二律正變倍半之法杜佑曰十二律長短相生一終於仲呂又制十二鍾以準十二律之
正聲又鳧氏為鍾以律計自倍半以子聲比正聲則正聲為倍以正聲比子聲則子聲為半如
黃鍾之管正聲九寸子聲則四寸半也【朱子曰十二正律各有一定之聲而旋相為宮則五
聲初無定位當高者或下當下者或高則宮商失序而聲不諧和故取其半律以為子聲當上
生而所生者短則下取此聲以為用然以三分損益之法計之則亦適合下生之數而自此律
又以其正律下生則復得其本法而於半律又合上生之數此唯杜氏言之而它書不及也黃
鍾當以四寸半為半律而前以為無者以九分之寸析至初秒終無可紀之數也林南應不用
者相生之不及也此又杜氏所未言故詳著之】又上下相生之法者以仲呂之管長六寸一
萬九千六百八十三分寸之萬二千九百七十四上生黃鍾三分益一【朱子曰不及正律九
寸之數】得八寸五萬九千四十九分寸之五萬一千八百九十六【朱子曰以為黃鍾之變
律】半之得四寸五萬九千四十九分寸之二萬五千九百四十八以為黃鍾【朱子曰以為
黃鍾變律之子聲又曰本數猶用十分之寸計之尚為繁冗今以九分之寸更定見於上而於
此存其本文】又上下相生以至仲呂皆以相生所得之律寸數半之以為子聲之律【朱子
曰蕤賓以下仲呂上生之所不及故無變律而唯黃太姑林南應有之計正變通十八律各有
半聲為三十六聲其間又有八聲雖有而無所用實計二十八聲而已杜氏又言變律上下相
生以至仲呂則是又當增十二聲而合為四十八聲似太過而無所用也今雅樂俗樂皆有四
清聲其原蓋出於此然既欠八聲且無變律則其法又太疎略而用有不周矣覽者詳之】

宮為土為君最下最濁商為金為臣次下次濁角為木為民高下清濁之間徵為火為事次高
次清羽為水為物最高最清【朱子鍾律】

右五聲月令春其音角【謂樂器之聲也三分羽益一以生角角數六十四屬木者以其清濁
中民象也春氣和則角聲調樂記曰角亂則憂其民怨凡聲尊卑取象五行數多者濁數少者
清大不過宮細不過羽】夏其音徵【三分宮去一以生徵徵數五十四屬火者以其微清事
之象也夏氣和則徵聲調樂記曰徵亂則哀其事勤】中央土其音宮【聲始於宮宮數八十
一屬土者以其最濁君之象也季夏之氣和則宮聲調樂記曰宮亂則荒其君驕】秋其音商
【三分徵益一以生商商數七十二屬金者以其濁次宮臣之象也秋氣和則商聲調樂記曰
商亂則陂其官壞】冬其音羽【三分商去一以生羽羽數四十八屬水者以為最清物之象

也冬氣和則羽聲調樂記曰羽亂則危其財匱】

宮為君商為臣角為民徵為事羽為物五者不亂則無怙慝之音矣【詳見樂記】

伶州鳩曰大不踰宮細不過羽夫宮音之主也第以及羽【詳見樂記】

司馬遷曰律數九九八十一以為宮三分去一五十四以為徵三分益一七十二以為商三分去一四十八以為羽三分益一六十四以為角【律書】

右律生五聲 管子曰凡將起五音凡首【謂音之摠先也】先主一而三之四開以合九九【一而三之即四也以是四開合於五音九也又九之為八十一也】以是生黃鍾小素之首以成宮【素本宮八十一數生黃鍾之宮為五音之本】三分而益之以一為百有八為徵【本八十一益以三分之一二十七通前百有八是為徵數 朱子曰百有八半之則為五十四】有三分而去其乘適足以是生商【乘亦三分之一也三分百八而去一餘七十二是商之數也】有三分而復於其所以是成羽【三分七十二而益其一分二十四合為九十六是羽之數也 朱子曰九十六半之則為四十八】有三分而去其乘適足以是成角【三分九十六去其一分餘六十四是角之數管子地員】杜佑曰古之神瞽考律均聲必先立黃鍾之均黃鍾之管以九寸為法故用九自乘為管絃之數其增減之法又以三為度以上生者皆三分益一以下生者皆三分去一宮生徵【三分宮數八十一分各二十七下生去一去二十七餘五十四以為徵故徵數五十四也】徵生商【三分徵數五十四分各十八上生者加一加十八於五十四得七十二以為商故商數七十二也】商生羽【三分商數七十二分各二十四下生者去一去二十四餘四十八以為羽故羽數四十八也】羽生角【三分羽數四十八分各十六上生者益一加十六於四十八得六十四以為角故角數六十四也】此五聲大小之次也是黃鍾為均用五聲之法以下十一辰辰各有五聲其為宮商之法亦如之故辰各有五聲合為六十聲是十二律之正聲也【朱子曰沈括疑史記此說止是黃鍾一均之數非衆律之通法今詳通典云十一辰宮商之法亦如之蓋若以十一律為宮亦用此數以乘本律之分數而損益之如林鍾為均則以八十一為五十四二十七為十八之類也 通典】

變宮聲四十二【小分六 羽後宮前】變徵聲五十六【小分八 角後徵前 鍾律新書參定】

右變聲 漢志引舜曰予欲聞六律五聲八音七始詠

晏子曰五聲六律七音八風九歌以相成也【左氏傳】 韋昭曰周有七音黃鍾為宮太簇為商姑洗為角林鍾為徵南呂為羽應鍾為變宮蕤賓為變徵【國語注

朱子曰後漢志說與此同此說蓋以黃鍾為法餘律準此】 杜佑曰殷已前但有五音自周以來加文武二聲謂之為七音五聲為正二聲為變者是也【通典注】 淮南子曰姑洗生應鍾比於正音故為和應鍾生蕤賓不比於正音故為繆【朱子曰五聲相生至於角位則其數六十有四隔八下生當得宮前一位以為變宮然其數三分損一每分各得二十有一尚餘一分不可損益故五聲之正至此而窮若欲生之則須更以所餘一分析而為九損其三分之一分乃得四十二分餘九分分之六而後得成變宮之數又自變宮隔八上生當得徵前一位其數五十有六餘九分分之八以為變徵正合相生之法自此又當下生則又餘二分不可損益而

其數又窮故立均之法至於是而終焉然而一變但為和繆已不得為正聲矣】

宮商角變徵徵羽變宮

第一宮黃【正】太【正】姑【正】蕤【正】林【正】
南【正】應【正】第二宮林【正】南【正】應【正】大【正半】太【正半】
姑【正半】蕤【正半】第三宮太【正】姑【正】蕤【正】夷【正】南【正】
應【正】大【正半】第四宮
南【正】應【正】大【正半】夾【正半】姑【正半】蕤【正半】夷【正半】第五宮
姑【正】蕤【正】夷【正】無【正】應【正】大【正半】夾【正半】第六宮
應【正】大【正半】夾【正半】
仲【正半】蕤【正半】夷【正半】無【正半】第七宮蕤【正】夷【正】
無【正半】黃【變半】大【正半】夾【正半】仲【正半】第八宮大【正】夾【正】
仲【正】林【變】夷【正】無【正】黃【變半】第九宮夷【正】
無【正】黃【變半】太【變半】夾【正半】仲【正半】林【變半】第十宮夾【正】
仲【正】林【變】南【變】無【正】黃【變半】太【變半】第十一宮無【正】
黃【變半】太【變半】姑【變半】仲【正半】林【變半】南【變半】第十二宮仲【
正】林【變】南【變】應【變】黃【變半】太【變半】姑【變半】右旋宮八十四聲
圖【鍾律新書參定正律墨書正律之半朱書變律朱書變律之半墨書】舜典曰律和聲
五聲六律十二管還相為宮也【疏曰十二辰各自為宮一宮各有五聲十二管相生之次至
中呂而止凡六十聲朱子曰按孔氏以本文但云五聲十二管故不及二變而止為六十聲今
增入二變二十四聲合為八十四聲自唐以來法皆如此云禮運】黃鍾為宮則太蕤姑洗林
鍾南呂皆以正聲應無有忽微不復與他律為役者同心一統之義也非黃鍾而他律雖當其
月自宮者則其和應之律有空積忽微不得其正此黃鍾至尊無與竝也【朱子曰此言黃鍾
唯於本宮用正律若它律為宮則黃鍾之為商角徵羽二變者皆但用其變律而正律不復與
之為役也此與通典變律之說相發明而本志所言有未盡者前漢志】

為宮為商為角為徵為羽【十二管自本律之外為他律之四聲者合其律為調】

黃 於本律於無於夷於中

於夾【以上黃宮五調各用本均七聲而以黃鍾起調黃鍾畢曲餘律放此】大本律應南
蕤姑

太 本律黃無林中

夾 本律大應夷蕤

姑 本律太黃南林

中 本律 夾 大 無 夷

蕤 本律 姑 太 應 南

林 本律 中 夾 黃 無

夷 本律 蕤 姑 大 應

南 本律 林 中 太 黃

無 本律 夷 蕤 夾 大

應 本律 南 林 姑 太

右六十調圖【朱子曰六十調即前旋宮圖內六十聲也其二變二十四聲非五聲之正不可為調故止於六十也】

候氣之法為室三重戶閉塗罃必周密布緹縵室中以木為案每律各一律卑外高從其方位加律其上以葭莖灰抑其內端按歷而候之氣至者灰去其為氣所動者其灰散人及風所動者其灰聚【後漢志】其升陽之數在冬至則黃鍾九寸【升五分一釐三毫】大寒則大呂八寸三分七釐六毫【升三分七釐六毫】雨水則太簇八寸【升四分五釐一毫六絲】春分則夾鍾七寸四分三釐七毫三絲【升三分三釐七毫三絲】穀雨則姑洗七寸一分【升四分五毫四絲三忽】小滿則仲呂六寸五分八釐三毫四絲六忽【升三分三毫四絲六忽】夏至則蕤賓六寸二分八釐【升二分八釐】大暑則林鍾六寸【升三分三釐四毫】處暑則夷則五寸五分五釐五毫【升二分五釐五毫】秋分則南呂五寸三分【升三分四毫一絲】霜降則無射四寸八分八釐四毫八絲【升二分二釐四毫八絲】小雪則應鍾四寸六分六釐【律呂新書】

右候氣

度者分寸尺丈引也所以度長短也本起黃鍾之長以子穀秬黍中者一黍之廣度之九十分黃鍾之長一為一分十分為寸十寸為尺十尺為丈十丈為引而五度審矣【師古曰子穀猶言穀子秬即黑黍也中者不大不小也言取黑黍穀子大小中者率為分寸也 漢志】

右審度

量者龠合升斗斛也所以量多少也本起於黃鍾之龠用度數審其容以子穀秬黍中者千有二百實其龠以井水準其概合龠為合十合為升十升為斗十斗為斛而五量嘉矣【孟康曰概欲其直故以水平之井水清清則平也師古曰概所以概平斗斛之上者也嘉善也】其法

用銅方尺而圓其外旁有庀焉其上為斛其下為斗左耳為升右耳為合龠其狀似爵上三下二參天兩地圓而函方左一右二陰陽之象也其圖象規其重二鈞聲中黃鍾之宮【漢志】

右嘉量

衡權者衡平也權重也衡所以任權而均物平輕重也【權者銖兩斤鈞石也所以秤物平施知輕重也】本起於黃鍾之重一龠容千二百黍重十二銖兩之為兩二十四銖為兩十六兩為斤三十斤為鈞四鈞為石五權之制以義起之以物鈞之其餘小大之差以輕重為宜圓而環之令之肉倍好者【孟康曰謂鍾之形如環也如淳曰體為肉孔為好】周旋無端終而復始無窮已而五權謹矣【漢志】

右謹權衡

鍾律義 樂三

補

管子曰凡聽徵如負豕豕覺而駭凡聽羽如鳴馬在樹【馬疑當作鳥】凡聽宮如牛鳴窳中凡聽商如離羣羊凡聽角如雉登木以鳴音疾以清【以鳴下木字疑衍 地員】司馬遷曰音樂者所以動盪血脈通流精神而和正心也故宮動脾而和正聖商動肺而和正義角動肝而和正仁徵動心而和正禮羽動腎而和正智故聞宮音使人溫舒而廣大聞商音使人方正而好義聞角音使人惻隱而愛人聞徵音使人樂善而好施聞羽音使人整齊而好禮【史記】漢志曰商之為言章也物成熟可章度也角觸也物

觸地而出載芒角也宮中也居中央暢四方唱始施生為四聲綱也徵祉也物盛大而絪祉也羽宇也物聚藏宇覆之也夫聲者中於宮觸於角祉於徵章於商宇於羽故四聲為宮紀也協之五行則角為木五常為仁五事為貌商為金為義為言徵為火為禮為視羽為水為智為聽宮為土為信為思以君臣民事物言之則宮為君商為臣角為民徵為事羽為物唱和有象故言君臣位事之體也五聲之本生於黃鍾之律九寸為宮或損或益以之商角徵羽九六相生陰陽之應也王將鑄無射【王景王也】問律於伶州鳩【律鍾律也】對曰律所以立均出度也【律謂六律六呂也陽為律陰為呂六律黃鍾太簇姑洗蕤賓夷則無射也六呂林鍾中呂夾鍾大呂應鍾南呂也均者均鍾木長七尺有絃繫之以均鍾者度謂鍾之大小清濁也漢大予樂官有之】古之神瞽考中聲而量之以制【神瞽古樂正知天道者也死以為樂祖祭於瞽宗謂之神瞽考合也謂合中和之聲而量度之以制樂也】度律均鍾百官軌儀【均平也軌道也儀法也度律度律呂之長短以平其鍾和其聲以立百事之道法也故曰律度量衡於是乎生】紀之以三【三天地人古者紀聲合樂以舞天神地祇人鬼故能神人以和 朱子曰此疑謂三分損益之法】平之以六【平之以六律也上章曰律以平聲】成於十二【十二律呂也陰陽相扶律取妻而呂生子上下相生之數備也】天之道也【天之大數不過十二】夫六中之色也故名之曰黃鍾【十一月黃鍾乾初九也六者天地之中天有六氣降生

五味天有六母地有五子十一而天地畢矣而六為中故六律六呂而成天道黃鍾初九六律之首故以六律正色為黃鍾之名重元正始之義也黃鍾陽之變也管長九寸徑三分圍九分律長九寸因而九之九九八十一故黃鍾之數立而為宮法云九寸之六得林鍾初六六呂之首陰之變管長六寸六月之律坤之始也故九六陰陽夫婦子母之道是以初九為黃鍾黃中之色也鍾之言陽氣鍾聚于下也朱子曰六字之義注雖粗通然似亦太牽合矣下章漢志正作黃字而其他說亦多出此疑此六字本是黃字劉歆時尚未誤至韋昭作注時乃減其上之半而為六耳又注云九寸之一亦疑有誤當是去其三分之一所以宣養六氣九德也【宣徧也六氣陰陽風雨晦明也九德九功之德水火金木土穀正德利用厚生十一月陽伏于下物始萌于五聲為宮含元處中所以徧養六氣九德之本也】由是第之【由從也第次也次其月也】二曰太簇【正月太簇乾九二也管長八寸法云九分之八太簇言陽氣太簇達於上】所以金奏贊陽出滯也【贊佐也賈唐云太簇正聲為商故為金奏所以佐陽發出滯伏也明堂月令正月蟄蟲始震】三曰姑洗所以修潔百物考神納賓也【三月姑洗乾九三也管長七寸一分律長七寸九分寸之一姑潔也洗濯也考合也言陽氣養生洗濯枯穢改柯易葉也於正聲為角是月百物修潔故用之宗廟合致神人用之享宴可以納賓也】四曰蕤賓所以安靖神人獻酬交酢也【五月蕤賓乾九四也管長六寸三分律長六寸八十一分寸之二十六蕤委蕤柔貌也言陰氣為主委蕤於下陽氣盛長於上有似於賓主故可用之宗廟賓客以安靜神人行酬酢也酬勸酢報也】五曰夷則所以詠歌九則平民無貳也【七月夷則乾九五也管長五寸六分律長五寸七百二十九分寸之四百五十一夷平也則法也言萬物既成可法則也故可以詠歌九功之則成民之志使無疑貳也】六曰無射所以宣布哲人之令德示民軌儀也【九月無射乾上九也管長四寸九分律長四寸六千五百六十一分寸之六千五百二十四宣徧也軌道也儀法也九月陽氣上升陰氣收藏萬物無射見者故可以徧布前哲之令德示民道法也】為之六間以揚沈伏而黜散越也【六間六呂在陽律之間沈滯也黜去也越揚也呂陰律所以侶間陽律成其功發揚滯伏之氣而去散越者也伏則不宣散則不和陰陽序次風雨時至所以生物者也】元間大呂助宣物也【十二月大呂坤六四也管長八寸八分法云三分之二四寸二百四十三分寸之五十二倍之為八寸分寸之一百四下生律元一也陰繫於陽以黃鍾為主故曰元間以陽為首不名其初臣歸功於上之義也大呂助陽宣散物也天氣始于黃鍾萌而赤地受之于大呂牙而白成黃鍾之功也】二間夾鍾出四隙之細也【二月夾鍾坤六五也管長七寸四分律長三寸二千一百八十七分寸之一千五百三十三倍之為七寸分寸之一千七十五隙間也夾鍾助陽鍾聚曲細也四隙四時之間氣微細者春為春中萬物始生四時之氣皆始於春春發而出之三時奉而成之故夾鍾出四時之微氣也】三間中呂宣中氣也【四月中呂坤上六也管長六寸六分律長三寸萬九千六百八十三分寸之六千四百八十七倍之為六寸分寸之萬二千九百七十四陽氣起于中至四月宣散于外純乾用事陰閉藏于內所以助陽成功也故曰正月正陽之月也】四間林鍾和展百事俾莫不任肅純恪也【六月林鍾坤初六也管長六寸律長六寸林衆盛也鍾聚也於正聲為徵展審也俾使也肅速也純大也恪敬也言時務和審百事無有偽詐使莫不任其職事速其功大敬其職事也】五間南呂贊陽秀也【八月南呂坤六二也管長五寸三分律長五寸三分寸之一不榮而實曰秀南任也陰任陽事助成萬物贊佐也】六間應鍾均利器用俾應復也【十月應鍾坤六三也管長四寸七分律長四寸二十七分寸之二十言陰應陽用事萬物鍾聚百嘉具備時務均利百官器用程度庶品使皆應其禮復其常也月令

孟冬命工師効功陳祭器按程度母作淫巧以蕩上心必功致為上也】律呂不易無姦物也【律呂不變易其正各順其時則神無姦行物無害生也】細鈞有鍾無鐃昭其大也【細細聲謂角徵羽也鈞調也鐘大鍾鐃小鍾也昭明也有鍾無鐃為兩細不相和故以鍾為節節明其大者以大平細】大鈞有鐃無鍾【大謂宮商也舉宮商而但有鐃無鍾為兩大不相和故去鍾而用鐃以小平大】甚大無鐃鳴其細也【甚大謂同尚大聲也則又去鐃獨鳴其細細謂絲竹革木】大昭小鳴和之道也【大聲昭小聲鳴和平之道也】龠平則久【久可久樂也】久固則純【固安也可久則安安則純也孔子曰從之純如也】純明則終【終成也書曰簫韶九成】終復則樂【終復終則復奏故樂】所以成政也【言政象樂也】故先王貴之【貴其和平可以移風易俗】王曰七律者何【周有七音王問七音之律意謂七律為音器用黃鍾為宮大簇為商姑洗為角林鍾為徵南呂為羽應鍾為變宮蕤賓為變徵】對曰昔武王伐殷歲在鶉火【歲歲星也鶉火次名周分野也從柳九度至張十七度為鶉火謂武王始發師東行時殷之十一月二十八日戊子於夏為十月是時歲星在張十三度張鶉火也】月在天駟【天駟房星也謂戊子日月宿房五度】日在析木之津【津天漢也析木次名從尾十度至斗十一度為析木其間為漢津謂戊子日日宿箕七度】辰在斗柄【辰日月之會斗柄斗前也謂戊子後三日得周正月辛卯朔於殷為十二月夏為十一月是日月合在斗前一度】星在天竈【星辰星也天竈次名一曰玄枵從須女八度至危十五度為天竈謂周正月辛卯朔二日壬辰辰星始見三日癸巳武王發行二十八日戊午渡孟津距戊子三十一日二十九日己未晦冬至辰星在須女伏天竈之首】星與日辰之位皆在北維【星辰星辰星在須女日在析木之津辰在斗柄故皆在北維北維北方水位也】顓頊之所建也帝嚳受之【建立也顓頊帝嚳所代也帝嚳周之先祖后稷所出也禮祭法曰周人禘嚳而郊稷顓頊水德之王立於北方帝嚳木德故受之於水今周亦木德當受殷之水猶帝嚳之受顓頊也】我姬氏出自天竈【姬氏周姓天竈即玄枵齊之分野也周之皇妣王季之母太姜者逢伯陵之後齊女也故言出於天竈有逢伯陵因之蒲姑氏因之而後大公因之又曰有星出於須女姜氏任氏實守其地】及析木者有建星及牽牛焉【從斗一度至十一度分屬析木日辰所在也建星在牽牛間謂從辰星所在須女天竈之首至析木之分歷建星及牽牛皆水宿言得水類也】則我皇妣太姜之姪伯陵之後逢公之所馮神也【皇君也生曰母死曰妣太姜大王之妃王季之母姜女也女子謂昆弟之子男女皆曰姪伯陵太姜之祖有逢伯陵也逢公伯陵之後太姜之姪殷之諸侯封於齊地齊地屬天竈故祀天竈死而配食為其神主故云馮馮依也言天竈乃皇妣家之所馮依非但合於水木相承而已又我實出於水家周道起於太王故本於太姜】歲之所在則我有周之分野也【歲星在鶉火鶉火周之分野歲星所在利以伐人】月之所在辰馬農祥也【辰馬謂房心星也心星所在大辰之次為天駟駟馬也故曰辰馬言月在房合於農祥也祥猶象也房星晨正而農事起故謂之農祥】我太祖后稷之所經緯也【稷播百穀故農祥后稷之所經緯也晉語曰辰以成善后稷是相】王欲合是五位三所而用之【王武王也五位歲月日星辰也三所逢公所馮神周分野所在后稷所經緯也】自鶉及駟七列也【鶉鶉火之分張十三度駟天駟房五度歲月之所在從張至房七列合七宿謂張翼轸角亢氐房之位】南北之揆七同也【七同合七律也揆度也歲在鶉火午辰星在天竈子鶉火周分野天竈及辰水星周所出自午至子其度七同也】凡神人以數合之以聲昭之【凡凡合神人之樂也以數合之謂取其七也以聲昭之用律調音也】數合聲龠然後可同也【同謂神人相應】故以七同其數而以律龠其聲於是乎有七律【七同其數謂

七列七同七律也律和其聲律有陰陽正變之聲】王以二月癸亥夜陳未畢而雨【二月周二月四日癸亥至牧野之日夜陳師陳師未畢而雨雨天地人神叶同之應也】以夷則之上宮畢之【夷平也則法也夷則所以平民無貳也上宮以夷則為宮聲夷則上宮也故以畢陳周禮大師執同律以聽軍聲而詔吉凶一曰陽氣在上故曰上宮】當辰辰在戌上故長夷則之上宮名之曰羽【長謂先用之也辰時也辰日月之會斗柄也當初陳之時周二月昏斗建丑而斗柄在戌上下臨其時名其樂為羽羽翼其衆也】所以藩屏民則也【屏蔽也羽之義取能藩蔽民使中法則也】王以黃鍾之下宮布戎于牧之野【布戎陳兵也謂夜陳之晨旦甲子昧爽左杖黃鉞右秉白旄時也黃鍾所以宣養氣德使皆自勉尚桓桓也黃鍾在下故曰下宮】故謂之厲所以厲六師也【名此樂為厲者所以厲六軍之衆也】以大簇之下宮布令於商昭顯文德底紂之多臯【商紂都也文文王也底至也既殺紂入商之都發號施令以昭明文王之德致紂之多臯太簇所以贊揚出滯蓋謂釋箕子之囚散鹿臺之財發鉅橋之粟也太簇在下故曰下宮】故謂之宣所以宣三王之德也【三王太王王季文王也】反及嬴內以無射之上宮布憲施舍於百姓【嬴內地名憲法也施惠舍舍臯也無射所以宣布哲人之令德示民軌儀無射在上故曰上宮】故謂之嬴亂所以優柔容民也【亂治也柔安也周語】漢志曰律十有二陽六為律陰六為呂律以統氣類物呂以旅陽宣氣黃鍾黃者中之色君之服也鍾者種也天之中數五【韋昭曰一三在上七九在下】五為聲聲上宮五聲莫大焉地之中數六【韋昭曰二四在上八十在下】六為律律有形有色色上黃五色莫盛焉故陽氣施種於黃泉孳萌萬物【師古曰孳讀與滋同滋益也萌始生】為六氣元也以黃色名元氣律者著宮聲也宮以九唱六【孟康曰黃鍾陽九林鍾陰六言陽唱陰和】變動不居周流六虛始於子在十一月大呂呂旅也言陰大呂助黃鍾宣氣而牙物也位於丑在十二月大簇族奏也言陽氣大奏地而達物也【師古曰奏進也】位於寅在正月夾鍾言陰夾助大簇宣四方之氣而出種物也位於卯在二月姑洗洗潔也言陽氣洗物辜絜之也【孟康曰辜必也必使之絜也】位於辰在三月中呂言微陰始起未成著於其中旅助姑洗宣氣齊物也位於巳在四月蕤賓蕤繼也賓導也言陽始導陰氣使繼養物也位於午在五月林鍾林君也言陰氣受任助蕤賓君主種物使長大楸盛也【師古曰種物種生之物楸古茂字也】位於未在六月夷則則法也言陽氣正法度而使陰氣夷當傷之物也【師古曰夷亦傷】位於申在七月南呂南任也言陰氣旅助夷則任成萬物也位於酉在八月無射射厭也言陽氣究物而使陰氣畢剝落之終而復始亡厭已也位於戌在九月應鍾言陰氣應亡射該臧萬物而雜陽閏種也【孟康曰閏臧塞也陰雜陽氣臧塞為萬物作種也晉灼曰外開曰閏】位於亥在十月【朱子曰十二律之名必有深指然國語漢志所言如此支離附合恐非本真今姑存之不足深究也】

孟子曰師曠之聰不以六律不能正五音聖人既竭耳力焉繼之以六律正五音不可勝用也司馬遷曰細若氣微若聲聖人因神而存之雖妙必効

班固曰至治之世天地之氣合以生風天地之風氣正十二律定

劉昭曰截管為律吹以攷聲列以候氣道之本也【續後漢志】漢志曰易曰參天兩地而倚數天之數始於一終於二十五其義紀之以三故置一得三又二十五分之六凡二十五置終天之數得八十一以天地五位之合終於十者乘之為八百一十分應歷一統千五百三十九歲之章數黃鍾之實也由此之義起十二律之周徑【孟康曰律孔徑三分參天數也圍九分終天數也】地之數始於二終於三十其義紀之以兩故置一得二凡三十置終地之數得六

十以地中六數乘之為三百六十分當期之日林鍾之實也【孟康曰林鍾長六寸圍六分以圍乘長得三百六十分】人者繼天順地序氣成物統八卦調八風理八政正八節諧八音舞八佾監八方被八荒以終天地之功故八八六十四其義極天地之變以天地五位之合終於十者乘之為六百四十分以應六十四卦太簇之實也【孟康曰太簇長八寸圍八分為積六百四十分也 今按十二律之圍徑皆同孟康此註誤也】淮南子曰規始於一一不生故分而為陰陽陰陽合和而萬物生故曰一生二二生三三生萬物天地三月而為一時三參物三三如九黃鍾之九寸而宮音調因而九之九九八十一故黃鍾之數立焉律之數六分為雌雄故曰十二鍾以副十二月十二各以三成故置一而十一三之為積分十七萬七千一百四十七黃鍾大數立焉 後漢志術曰陽以圓為形其性動陰以方為節其性靜動者數三靜者數二以陽生陰倍之以陰生陽四之皆三而一陽生陰曰下生陰生陽曰上生上生不得過黃鍾之清濁下生不得及黃鍾之數實皆參天兩地圓蓋方覆六耦承奇之道也

禮書綱目卷八十二

卷八十三

<經部,禮類,通禮之屬,禮書綱目

欽定四庫全書

禮書綱目卷八十三 婺源江永撰

樂器 樂四

補

大師掌六律六同以合陰陽之聲皆文之以五聲宮商角徵羽皆播之以八音金石土革絲木匏竹【詳見鍾律】典同掌六律六同之和以辨天地四方陰陽之聲以為樂器【陽聲屬天陰聲屬地天地之聲布於四方為作也故書同作銅鄭司農云陽律以竹為管陰律以銅為管竹陽也銅陰也各順其性凡十二律故大師職曰執同律以聽軍聲玄謂律述氣者也同助陽宣氣與之同皆以銅為之】凡聲高聲硯正聲緩下聲肆陂聲散險聲歛達聲羸微聲醵回聲衍侈聲柞弇聲鬱薄聲甄厚聲石【故書硯作硯杜子春讀硯為鏗鏘之鏗高謂鍾形容高也醵讀為闇不明之闇柞讀為行扈咷咷之咷石如磬石之聲鄭大夫讀硯為袞冕之袞陂讀為人短罷之罷醵讀為鶉鷃之鷃鄭司農云鍾形下當蹕正者不高不下鍾形上下正備玄謂高鍾形大上上大也高則聲上藏袞然旋如裏正謂上下正直則聲緩無所動下謂鍾形大下下大也下則聲出去放肆陂讀為險陂之陂陂謂偏侈陂則聲離散也險謂偏弇也險則聲歛不越也達謂其形微大也達則聲有餘若大放也微謂其形微小也醵讀為飛鉗湟醵之醵醵聲小不成也回謂其形微圍也回則其聲淫衍無鴻殺也侈謂中央約也侈則聲迫柞出去疾也弇謂中央寬也弇則聲鬱勃不出也甄讀為甄燿之甄甄猶掉也鍾微薄則聲掉鍾大厚則如石叩之無聲】凡為樂器以十有二律為之數度以十有二聲為之齊量【數度廣長也齊量侈弇之所容】凡和樂亦如之【和謂調其故器也】

小師掌教鼓鼗祝敔塤簫管弦歌【教教瞽矇也出音曰鼓 注詳見後】

瞽矇掌播鼗祝敔塤簫管弦歌【播謂發揚其音】

眡瞭掌凡樂事播鼗擊頌磬笙磬【眡瞭播鼗又擊磬 注詳見後】

磬師掌教擊磬擊編鍾【教教眡瞭也 注詳見後】

笙師掌教敔竽笙塤簫簫箎 管舂牘應雅以教祴樂【教教眡瞭也 注詳見後】

典庸器掌藏樂器【並舂官】

仲夏命樂師脩鞀鞀鼓均琴瑟管簫執干戚戈羽調竽笙箎簧飭鍾磬祝敔【詳見月令】

右總要 八音者何謂也土曰塤竹曰管皮曰鼓匏曰笙絲曰絃石曰磬金曰鍾木曰祝敔此謂八音也法易八卦也樂記曰壘坎音也管艮音也鼓震音也絃離音也鍾兌音也祝敔乾音也一說笙祝鼓簫琴塤鍾磬也如其次笙在北方祝在東北方鼓在東方簫在東南方琴在南方

塤在西南方鍾在西方磬在西北方也聲五音八何聲為本出於五行音為末象八風也【白虎通】聲樂之象鼓大麗鍾統實磬廉制竽笙簫和管籥發猛塤箎博瑟易良琴婦好歌清盡舞意天道兼鼓其樂之君耶故鼓似天鍾似地磬似水竽笙簫管籥似星辰日月鞀柷拊柷柷似萬物曷以知舞之意曰目不自見耳不自聞也然而治俯仰詘信進退遲速莫不廉制盡筋骨之力以要鍾鼓拊會之節而靡有悖逆者衆積譁譁乎【荀子】

垂作鍾【世本山海經云炎帝之孫鼓延始為鍾又傳曰黃帝作五聲以正五鍾一曰青鍾大音二曰赤鍾心聲三曰黃鍾漉光四曰景鍾昧其明五曰黑鍾隱黃帝五聲既調然後作五行】黃帝令伶倫與榮援鑄十二鍾和五音【詳見樂制】

垂之和鍾【垂堯之共工也和謂次序其聲縣也世本作曰垂作鍾明堂位】天子左五鍾右五鍾出撞黃鍾左五鍾皆應告出也入撞蕤賓右五鍾皆應告入也【詳樂縣章】笙鏞以間【詳樂制】

大鍾謂之鏞【書曰笙鏞以間亦名鑄音博】其中謂之剽小者謂之棧【爾雅】

六分其金而錫居一謂之鍾鼎之齊【考工記】鳧氏為鍾兩欒謂之鈇【故書欒作樂杜子春云當為欒書亦或為欒鈇鍾口兩角】鈇間謂之于于上謂之鼓鼓上謂之鉦鉦上謂之舞

【此四名者鐘體也鄭司農云於鍾脣之上祛也鼓所擊處】舞上謂之甬甬上謂之衡【此二名者鍾柄】鍾縣謂之旋旋蟲謂之幹【旋屬鍾柄所以縣之也鄭司農云旋蟲者旋以蟲為飾也玄謂今時旋有蹲熊盤龍獸名辟邪】鍾帶謂之篆篆間謂之枚枚謂之景【帶所以介其名也介在於鼓鉦舞甬衡之間凡四鄭司農云枚鍾乳也玄謂今時鍾乳俠鼓與舞每處有九面三十六】於上之攢謂之隧【攢所擊之處攢弊也隧在鼓中室而生炆有似夫隧】

十分其鈇去二以為鉦以其鉦為之鈇間去二分以為之鼓間以其鼓間為之舞脩去二分以為之舞廣【此言鉦之徑居鈇徑之八而鈇間與鉦之徑相應鼓間又居鈇徑之六與舞脩相應舞脩舞徑也舞上下促以橫為脩從為廣舞廣四分今亦去徑之二分以為之間則舞間之方恒居鈇之四也舞間方四則鼓間六亦其方也鼓六鉦六舞四此鍾口寸者其長十六也鍾之大數以律為度廣長與圓徑假設之耳其鑄之則各隨鍾之制為長短大小也凡言間者亦為從篆以介之鉦間亦當六今時鍾或無鉦間】以其鉦之長為之甬長【并衡數也】以其甬長為之圍參分其圍去一以為衡圍【衡居甬上又小】參分其甬長二在上一在下以設其旋【今衡居一分則參分旋亦二在上一在下以旋當甬之中央是其正】

薄厚之所震動清濁之所由出侈弇之所由興有說【說猶意也故書侈作移鄭司農云當為侈】鐘已厚則石【大厚則聲不發】已薄則播【大薄則聲散】侈則柞【柞讀為咋咋然之咋聲大外也】

弇則鬱【聲不舒揚】長甬則震【鍾掉則聲不正】是故大鍾十分其鼓間以其一為之厚小鍾十分其鉦間以其一為之厚【言若此則不石不播也鼓鉦之間同方六而今宜異又十分之一猶大厚皆非也若言鼓外鉦外則近之鼓外二鉦外一】鐘大而短則其聲疾而短聞

【淺則躁躁易竭也】鍾小而長則其聲舒而遠聞【深則安安難息】為遂六分其厚以其一為之深而圓之【厚鍾厚深謂室之也其室圍故書圓或作圍杜子春云當為圓

同上】鍾師掌金奏【金奏擊金以為奏樂之節金謂鍾及鐃】

鐃師掌金奏之鼓【詳革之屬】磬師掌教擊編鍾【磬亦編於鍾言之者鍾有不編不編者鍾師擊之杜子春讀編書之編並春官】

細鈞有鍾無鐃昭其大也大鈞有鐃無鍾甚大無鐃鳴其細也【詳鍾律義】

徒鼓鍾謂之修【爾雅】鼓人掌教六鼓四金之音聲以金鐃和鼓以金鐃節鼓以金鐃止鼓以金鐃通鼓【鐃鐃于也圓如碓頭大上小下樂作鳴之與鼓相和鐃鉦也形如小鍾軍行鳴之以為鼓節司馬職曰軍行鳴鐃如鈴無舌有秉執而鳴之以止擊鼓司馬職曰鳴鐃且卻鐃大鈴也振之以通鼓司馬職曰司馬振鐃地官】

小師掌六樂聲音之節與其和【和鐃于春官】天子夾振之而駟伐【詳樂記】大司馬教振旅卒長執鐃兩司馬執鐃公司馬執鐃教大【閱司】馬振鐃鼓行鳴鐃三鼓攬鐃鼓退鳴鐃且卻【詳田役】

右金之屬鍾之為言動也陰氣用事萬物動成鍾為氣用金聲也鐃者時之氣聲也節度之所生也君臣有節度則萬物昌無節度則萬物亡亡與昌正相迫故謂之鐃【白虎通】

子夏曰鍾聲鏗鏘以立號號以立橫橫以立武君子聽鍾聲則思武臣【詳樂記】景王二十三年王將鑄無射問律於伶州鳩對曰律所以立均出度也古之神瞽考中聲而量之以制度律均鍾百官軌儀紀之以三平之以六成於十二天之道也【詳鍾律義】王將鑄無射而為之大林【賈侍中云無射鍾名律中無射也大林無射之覆也作無射而為大林以覆之其律中林鍾也或說云鑄無射而加以林鍾之數益之昭謂下言細抑大陵又曰聽聲遠越如此則賈言無射有覆近之矣】單穆公曰不可夫鍾不過以動聲【動聲謂合樂以金奏而八音從之】若無射有林耳不及也【若無射復有大林以覆之無射陽聲之細者林鍾陰聲之大者細抑大陵故耳不能聽及也】夫鍾聲以為耳也耳所不及非鍾聲也【非法鍾之聲也】猶目所不見不可以為目也【若目之精明所不能見亦不可以施目也耳目所不能及而強之則有眩惑之失以生疾也】夫目之察度也不過步武尺寸之間【六尺為步賈君以半步為武】其察色也不過墨丈尋常之間【五尺為墨倍墨為丈八尺為尋倍尋為常】耳之察辭也在清濁之間【清濁律呂之變黃鍾為宮則濁大呂為角則清】其察清濁也不過一人之所勝【勝舉也】是故先王之制鍾也大不出鈞重不過石【鈞所以鈞音之法也以木長七尺有弦繫之以為鈞法百二十斤為石】律度量衡於是乎生【律五聲陰陽之法也度丈尺也量斗斛也衡有斤兩之數生於黃鍾黃鍾之管容秬黍千二百粒粒百為銖是為一龠龠二為合合重一兩故曰律度量衡於是乎生也】小大器用於是乎出【出於鍾也易曰制器者尚其象小謂錙銖分寸大謂斤兩丈尺】故聖人慎之今王作鍾也聽之弗及【耳不及聽其清濁也】比之不度【不度不中鈞石之數】鍾聲不可以知和【耳不能聽故不可以知和】制度不可以出節【節謂法度量衡之節】無益於樂而鮮民財將焉用之夫樂不過以聽耳而美不過以觀目若聽樂而震觀美而眩患莫甚焉夫耳目心之樞機也【樞機發動也心有所欲耳目為之發動】故必聽和而視正聽和則聰視正則明【習於和正則不眩惑也】聰則言聰明則德昭聽言昭德則能思慮純固以言德於民民歆而德之則歸心焉【歆猶喜服也言德以言發德教也】是以作無不濟求無不獲然後能樂若視聽不和而有震眩則味入不精不精則氣佚氣佚則不和【不和無射大林也若聽樂而震視色而眩則味入不精美味入不精美則氣放佚不行於身體】於是乎有狂悖之言有眩惑之明有轉易之名有過慝之度【慝惡也此四者氣佚之所生狂悖眩惑說子朝寵賓孟也轉易過惡嬖子配適將殺大臣也】出令不信【有轉易也】刑政放紛動不順時民無據依不知所力各有離心【不知所為盡力也】上失其民作則不濟求則不獲其何以能樂王弗聽問之伶州鳩【伶司樂官州鳩名也】對曰臣聞之琴瑟尚宮【凡樂輕者從大重者從細故琴瑟尚宮也】鍾尚羽【

鍾聲大故尚羽也】石尚角【石磬也輕於鍾故尚角角清濁之中也】匏竹利制【匏笙也竹簫管也利制以聲音調利為制無所尚也】大不踰宮細不過羽夫宮音之主也第以及羽【宮聲大故為主第次也】故樂器重者從細【重謂金石也從細尚細聲謂鍾尚羽石尚角也】輕者從大【輕瓦絲也從大謂瓦絲尚宮也】是以金尚羽石尚角瓦絲尚宮匏竹尚議【議議從其調利】草木一聲【革鼗鼓也木祝敔也一聲無清濁之變】夫政象樂樂從和和從平【和八音克諧也平細大不踰也故可以平民樂和則諧政和則平也】聲以和樂律以平聲【謂五聲也以式八音而調樂也賈侍中云律黃鍾為宮林鍾為徵太簇為商南呂為羽姑洗為角所以平五聲也】金石以動之【鍾磬所以發動五聲】絲竹以行之【管弦所以行之】詩以道之【道己志也誦之曰詩書曰詩言志】歌以詠之【詠詠詩也書曰歌永言聲依永】匏以宣之【宣發揚也】瓦以贊之【贊助也】草木以節之物得其常曰樂極【物事也極中也】極之所集曰聲【聲會也言中和之所會集曰正聲】聲應相保曰和【保安也】細大不踰曰平【細大之聲不相踰越曰平今無射有大林是不平也】如是而鑄之金【鑄金以為鍾也】磨之石【磨石以為磬也】繫之絲木【繫絲木以為琴瑟也】越之匏竹【越匏竹以為笙管也越謂之孔也樂記曰朱絃而疏越】節之鼓【節其長短大小】而行之以遂八風【遂順也傳曰所以節八音而行八風也正西曰兌為金為閭合風西北曰乾為石為不周風正北曰坎為革為廣莫風東北曰艮為匏為融風正東曰震為竹為明庶風東南曰巽為木為清明風正南曰離為絲為景風西南曰坤為瓦為涼風】於是乎氣無滯陰亦無散陽【滯積也積陰而發則夏有雷電散陽陽不藏冬無冰李梅實之類也】陰陽序次風雨時至嘉生繁祉人民和利物備而樂成上下不罷【罷勞也】故曰樂正今細過其主妨於正【細謂無射也主正也言無射有大林是作細而大過其律妨於正聲】用物過度妨於財【過度用金多也】正害財匱妨於樂【樂從和今正害財匱故妨於樂】細抑大陵不容於耳非和也【細無射也大大林也言大聲陵之細聲抑而不聞不容于耳耳不能容別也】聽聲越遠非平也【越迺也言無射之聲為大林所陵聽之微細迺遠非平也】夫有和平之聲則有蕃殖之財【樂以殖財也】於是乎道之以中德詠之以中音【中德中庸之德舞也中音中和之音也】德音不愆以合神人【合神人謂祭祀享宴也】神是以寧民是以聽【聽從也】若夫匱財用罷民力以逞淫心【逞快也】聽之不蘇比之不度無益於教而離民怒神非臣之所聞也【財匱故民離樂不和故神怒也】王不聽卒鑄大鍾【國語周語】王將鑄無射【無射鍾名律中無射】伶州鳩曰王其以心疾死乎夫樂天子之職也【職所主也】夫音樂之興也【樂因音而行】而鍾音之器也【音由器以發】天子省風以作樂【省風俗作樂以移之】器以鍾之【鍾聚也以器聚音】輿以行之【樂須音而行】小者不窵【窵細不滿】大者不撝【撝橫大不入】則和於物物和則嘉成【嘉樂成也】故和聲入於耳而藏於心心億則樂【億安也】窵則不咸【不充滿人心】撝則不容【心不堪容】心是以感感實生疾今鍾撝矣王心弗堪其能久乎【為明年王崩傳】昭二十一年左氏傳】二十四年鍾成伶人告和【伶人樂人也】二十五年王

崩鍾不和【崩而言鍾不和者明樂人之諛國語】鄭人賂晉侯歌鍾二肆【肆列也縣鍾十六為一肆二肆三十二枚】及其鎛磬【鎛磬皆樂器襄十一年左氏傳晉語云鄭伯嘉納歌鍾二肆及其寶鎛注云歌鍾歌時所奏肆列也凡縣鍾磬全為肆半為堵鎛小鍾也寶鄭所寶】

無句作磬【世本】 叔之離【叔未聞也離謂次序其聲縣也世本作曰無句作磬明堂位】 堯命質為樂乃拊石擊石以象上帝玉磬之音以致

舞百獸【見樂制】

夔曰戛擊鳴球【球玉磬】又曰於予擊石拊石百獸率舞庶尹允諧【詳見樂制】 徐州厥貢泗濱浮磬【浮磬石露水濱若浮於水然或曰非也泗濱非必水中泗水之旁近浮者石浮生土中不根著者也今下邳有石磬山或以為古取磬之地】 豫州錫貢磬錯【磬錯治磬之錯也非所常用之物故非常貢必待錫命而後納也】 梁州厥貢璆磬【璆玉磬磬石磬也林氏曰徐州貢浮磬此州既貢玉磬又貢石磬豫州又貢磬錯以此觀之則知當時樂器磬最為重豈非以其聲角而在清濁小大之間最難得其和者哉 禹貢】

大磬謂之鼗【鼗形似犁鎬以玉石為之 爾雅】 磬氏為磬倨句一矩有半【必先度一矩為句一矩為服而求其弦既而以一矩有半觸其弦則磬之倨句也磬之制有大小此假矩以定倨句非用其度耳】 其博為一【博謂服博也博廣也】 股為二鼓為三參分其股博去一以為鼓博參分其鼓博以其一為之厚【鄭司農云股磬之上大者鼓其下小者所當擊者也玄謂股外面鼓內面也假令磬股廣四寸半者股長九寸也鼓廣三寸長尺三寸半厚一寸】 已上則摩其旁【鄭司農云磬聲太上則摩鑪其旁玄謂太上聲清也薄而廣則濁】 已下則摩其崱【大下聲濁也短而厚則清 考工記】 磬師掌教擊磬【磬亦編】 眡瞭擊頌磬笙磬【磬在東方曰笙笙生也在西方曰頌頌或作庸庸功也大射禮曰樂人宿縣於阼階東笙磬西面其南笙鍾其南鐃皆南陳又曰西階之西頌磬東面其南鍾其南鐃皆南陳 並春官】

大射樂人宿縣於阼階東笙磬西面西階之西頌磬東面【詳樂縣】

天球在東序【球雍州所貢 顧命】 玉磬四代之樂器也【明堂位】

諸侯擊玉磬諸侯之僭禮也【郊特牲】 集大成也者金聲而玉振之也【成者樂之一終書所謂簫韶九成是也金鍾屬聲宣也玉磬也振收也八音之中金石為重故特為衆聲之綱紀又金始振而玉終詘然也故並奏八音則於其未作而先擊鐃鍾以宣其聲俟其既闋而後擊玉磬以收其韻 孟子】 徒鼓磬謂之蹇【未見義所出 爾雅】

右石之屬 磬者夷則之氣也象萬物之盛也其氣磬故曰磬有貴賤焉有親疎焉有長幼焉朝廷之禮貴不讓賤所以有尊卑也鄉黨之禮長不讓幼所以明有年也宗廟之禮親不讓疎所以明有親也此三者行然後王道得王道得然後萬物成天下樂用磬也【白虎通】

子夏曰石聲磬磬以立辨辨以致死君子聽磬聲則思死封疆之臣【詳樂記】

伏羲作琴【琴操 又世本云神農作琴或謂帝俊使晏龍作琴未知孰是】 朱襄氏使士達作五弦瑟堯時鼓□乃梓五弦之瑟作以為十五弦之瑟舜立仰延乃攄瑟之所為瑟益之八絃以為二十三絃之瑟【見樂制 又世本云庖羲作五十絃瑟黃帝使素鼓瑟哀不自勝乃破為二十五絃具二均聲或謂神農晏龍作瑟未知孰是】 舜作五絃之琴以歌南風【樂記】 琴瑟以詠【詳樂制】 大琴大瑟中琴小瑟四代之樂器也【四代虞夏殷周也 明堂位】 大瑟謂之灑【長八尺一寸廣一尺八寸二十七弦】 大琴謂之離【或曰琴大者二十七弦未詳長短廣雅曰琴長三尺六寸六分五弦

爾雅】 大琴練弦達越大瑟朱絃達越【練弦朱弦互文也越下孔也 尚書大傳】 清廟之瑟

朱弦而疎越【清廟謂作樂歌清廟也朱弦練朱弦練則聲濁越瑟底孔】

【也畫疏之使聲遲也 樂記】 大司樂雲和之琴瑟冬日至於地上之圜丘奏之空桑之琴瑟夏日至於澤中之方丘奏之龍門之琴瑟於宗廟之中奏之【詳樂制】

小師掌教弦歌【弦謂琴瑟也歌依詠詩也】 瞽矇掌弦歌【並春官】

徒鼓瑟謂之步【獨作之 爾雅】 士無故不徹琴瑟【憂樂不相干也故謂災患喪病曲禮】

右絲之屬 瑟者嗇也閑也所以懲忿宮商角則宜君父有節臣子有義然後四時和四時和然後萬物生故謂之瑟也琴者禁也所以禁止淫邪正人心也【白虎通】 琴長八尺一寸【朱子曰八尺一寸者是京房內準】 正度也弦大者為宮而居中央君也商張右傍其餘大小相次不失其次序則君臣之位正矣【史記】 子夏曰絲聲哀哀以立廉廉以立志君子聽琴瑟之聲則思志義之臣【詳樂記】 君子之近琴瑟以儀節也非以怡心也【同上】 孔子學琴於師襄子師襄子曰吾雖以擊磬為官然能於琴今子於琴已習可以益矣孔子曰丘未得其數也有問曰已習其數可以益矣孔子曰丘未得其志也有問曰已習其志可以益矣孔子曰丘未得其為人也有問孔子有所繆然思焉【繆然深思貌】 有所睪然高望而遠眺焉【眺見】 曰丘迨得其為人矣【迨近也】 黜而黑頤然長曠如望羊【曠用志廣遠望羊遠視也】 奄有四方【奄同也文王之時三分天下有其二後周有四方文王之功也】 非文王其孰能為此師襄子避席葉拱而對曰【葉拱兩手薄其心也】 君子聖人也其傳曰文王操【家語】 子路鼓琴孔子聞之謂冉有曰甚矣由之不才也夫先王之制音也奏中聲以為節流入於南不歸於北夫南者生育之鄉北者殺伐之域故君子之音溫柔居中以養生育之氣憂愁之感不加於心也暴厲之動不在於體也夫然者乃所謂治安之風也小人之音則不然亢麗微末以象殺伐之氣中和之感不載於心溫和之動不存於體夫然者乃所以為亂之風昔者舜彈五絃之琴造南風之詩其詩曰南風之熏兮可以解吾民之愠兮南風之時兮可以阜吾民之財兮【得其時阜盛也】 唯脩此化故其興也勃焉德如泉流至于今王公大人述而弗忘殷紂好為北鄙之聲其廢也忽然至于今王公大人舉以為誡夫舜起布衣積德含和而終以帝紂為天子荒淫為亂而終以亡非各所修之致乎由今也匹夫之徒曾無意于先王之制而習亡國之聲豈能保其六七尺之體哉冉有以告子路子路懼而自悔靜思不食以至骨立夫子曰過而能改其進矣乎【同上】

舜作簫【世本】 大簫謂之言【編二十三管長尺四寸】 小者謂之箛【十六管長尺二寸簫一名簫】 大管謂之箛【管長尺圍寸併漆之有底賈氏以為如箛六孔】 其中謂之篴小者謂之篴【爾雅】 大司樂孤竹之管冬日至於地上之圜丘奏之孫竹之管夏日至於澤中之方丘奏之陰竹之管於宗廟之中奏之【詳見樂制】 大射籥在建鼓之間【詳樂縣】 聖人作壎篴此德音之音也【詳樂記】 大篴謂之沂【篴以竹為之長尺四寸圍三寸一孔上出一寸三分名翹橫吹之小者尺二寸廣雅云八孔爾雅】 小師掌教簫管【簫編小竹管如今賣飴????所吹者鄭司農云管如箛六空玄謂管如篴而小併兩而吹之今大子樂官有焉】 瞽矇掌播簫管 笙師掌教歛籥籥篴篴管【鄭司農云篴七孔杜子春讀篴為蕩滌之滌今時所吹五空竹篴玄謂籥如篴三空並春官】 葦籥伊耆氏之樂也【詳見樂制】

大簫謂之產【簫如笛三】

【孔而短小廣雅云七孔】其中謂之仲小者謂之箛徒吹謂之和【爾雅】簫師掌教國子舞羽翯簫【詳見樂舞】簫章掌土鼓翯簫

【鄭司農云翯簫翯國之地竹翯詩亦如之玄謂翯簫翯人吹簫之聲章明堂位曰土鼓蒯桴葦簫伊耆氏之樂】中春晝擊土鼓翯翯詩以逆暑中秋夜逆寒亦如之凡國祈年於田祖翯翯雅擊土鼓以樂田畯國祭蜡則翯翯頌擊土鼓以息老物【翯詩翯風七月也吹之者以簫為之聲翯雅翯頌亦七月也注詳見吉禮並春官】笙師春牘應雅以教祴樂【鄭司農云春牘以竹大五六寸長七尺短者一二尺其端有兩孔髹畫以兩手築地應長六尺五寸其中有椎雅狀如漆簫而弇口大二圍長五尺六寸以羊韋輓之有兩紐疏畫玄謂祴樂祴夏之樂牘應雅教其春者謂以築地笙師教之則三器在庭可知矣賓醉而出奏祴夏以此三器築地為之行節明不失禮同上】古樂訊疾以雅【雅亦樂器名也如漆簫中有椎樂記】

右竹之屬簫者中呂之氣萬物生於無聲見於無形僂也肅也故謂之簫簫者以祿為本言承天繼物為民本人力加地道化然後萬物戮也故謂之簫也【白虎通】子夏曰竹聲濫濫以立會會以聚眾君子聽竽笙簫管之聲則思畜聚之臣【詳樂記】

隨作笙女媧作笙簧【世本】

女媧之笙簧【女媧三皇承宓戲者世本作曰女媧作笙簧明堂位】大笙謂之巢【列管匏中施簧管端大者十九簧】小者謂之和【十三簧者鄉射記曰三笙一和而成聲爾雅】笙師掌教翯竽笙【鄭司農云竽三十六簧笙十三簧】凡祭祀享射共其鍾笙之樂【鍾笙與鍾聲相應之笙春官】三笙一和而成聲【三人吹笙一人吹和凡四人也爾雅曰笙小者謂之和鄉射記】右匏之屬匏之言施也在十二月萬物始生而勞笙者太簇之氣象萬物之生故曰笙有七政之節焉有六合之和焉天下樂之故謂之笙【白虎通】

聖人作為壎箎此德音之音也【樂記按詩小雅何人斯云伯氏吹壎仲氏吹箎其序云蘇公刺暴公也鄭氏曰暴蘇皆幾內國名世本云暴辛公作壎蘇成公作箎譙周古史考云古有壎箎尚矣周幽王時二公特善其事耳朱子曰此序不知何所據而得此事世本說尤紕繆譙周又從而傳會之不知適所以章其謬耳】

大壎謂之器【壎燒土為之大如鷺子銳上平底形如稱鍾六孔小者如雞子爾雅】

小師掌教壎【壎燒土為之大如鴈卵】瞽矇掌壎笙師掌教翯壎【並春官】

堯命質為樂乃以麋置缶而鼓之【見樂制】坎其擊缶【缶瓦器可以節樂陳風宛丘又易離卦不鼓缶而歌】禮之初賁桴而土鼓猶若可以致其敬於鬼神【賁讀為缶聲之誤也缶壎也謂搏土為桴也土鼓築土為鼓也禮運】土鼓賁桴伊耆氏之樂也【詳見樂制】簫章掌土鼓【杜子春云土鼓以瓦為匡以革為兩面可擊也】中春晝擊土鼓以逆暑中秋夜逆寒亦如之凡國祈年於田祖擊土鼓以樂田畯國祭蜡擊土鼓以息老物【詳竹之屬】壺涿氏掌除水蟲以炮土之鼓毆之【炮土之鼓瓦鼓也秋官】

右土之屬 壘在十一月壘之為言勲也陽氣於黃泉之下勲蒸而萌【白虎通】

夷作鼓【世本】 帝嚳命垂作鞀鞀【帝王世紀】

聖人作為鞀鼓此德音之音也【詳樂記】 夏后氏之鼓足殷楹鼓周縣鼓【足謂四足也楹謂之柱貫中上出也縣縣之簔簔也殷頌曰植我鼗鼓周頌曰應棘縣鼓 明堂位】

下管鼗鼓【詳樂制】 置我鼗鼓【周頌】 應田縣鼓【詳樂制】 大鼓謂之鼗【鼗長八尺】 小鼓謂之應【詩曰應棘縣鼓在大鼓側】 徒擊鼓謂之鼗【詩云或歌或鼗】 大鼗謂之麻小者謂之料【麻者音概而長也料者聲清而不亂 爾雅】 鼓人掌教六鼓四金之音聲以節聲樂以和軍旅以正田役【音聲五聲合和者】 教為鼓而辨其聲用【教為鼓教擊鼓者大小之數又別其聲所用之事】 以鼗鼓鼓神祀以靈鼓鼓社祭以路鼓鼓鬼享以鼗鼓鼓軍事以鼗鼓鼓役事以晉鼓鼓金奏【雷鼓八面鼓也神祀祀天神也靈鼓六面鼓也社祭祭地祇也路鼓四面鼓也鬼享享宗廟也大鼓謂之鼗鼗鼓長八尺鼗鼓長丈二尺晉鼓長六尺六寸金奏謂樂作擊編鍾 地官】 鞀人為臯陶【鄭司農云鞀書或為鞀臯陶鼓木也玄謂鞀者以臯陶名官也鞀則陶字從革】 長六尺有六寸左右端廣六寸中尺厚三寸【版中廣頭狹為穹隆也鄭司農云謂鼓木一判者其兩端廣六寸而其中更廣尺也如此乃得有腹】 穹者三之一【鄭司農云穹讀為志無空邪之空謂鼓木腹穹隆者居鼓三之一也玄謂穹讀如穹蒼之穹穹隆者居鼓面三分之一則其鼓四尺者版穹一尺三寸三分寸之一也倍之為二尺六寸三分寸之二加鼓四尺穹之徑六尺六寸三分寸之二也此鼓合二十版】 上三正【鄭司農云謂兩頭一平中央一平也玄謂三當為參正直也參直者穹上一直兩端又直各居二尺二寸不弧曲也此鼓兩面以六鼓差之賈侍中云晉鼓大而短近晉鼓也以晉鼓鼓金奏】 鼓長八尺鼓四尺中圍加三之一之鼗鼓【中圍加三之一者加於面之圍以三分之一也面四尺其圍十二尺加以三分一四尺則中圍十六尺徑五尺三寸三分寸之一也今亦合二十版則版穹六寸三分寸之二耳大鼓謂之鼗以鼗鼓鼓軍事鄭司農云鼓四尺謂革所蒙者廣四尺】 鼓長尋有四尺鼓四尺倨句磬折【以臯鼓鼓役事磬折中曲之不參正也中圍與鼗鼓同以磬折為異】 凡冒鼓必以啟蟄之日【啟蟄孟春之中也蟄蟲始聞雷聲而動鼓所取象也冒蒙鼓以革】 良鼓瑕如積環【革調急也】 鼓大而短則其聲疾而短聞鼓小而長則其聲舒而遠聞【考工記】 大司樂鼗鼓鼗鼗冬日至於地上之圜丘奏之靈鼓靈鼗夏日至於澤中之方丘奏之路鼓路鼗於宗廟之中奏之【詳樂制】

大師下管播樂器令奏鼓棘【同上】 小師掌教鼓鼗【鼗如鼓而小持其柄搖之旁耳還自擊】 大祭祀大饗下管擊應鼓凡小祭祀小樂事鼓棘 瞽矇掌播鼗

眡瞭掌凡樂事播鼗賓射皆奏其鍾鼓鼗愷獻亦如之 鍾師掌鼗鼓縵樂【並詳樂制】

鐃師掌金奏之鼓【謂主晉鼓以奏其鍾鐃也然則擊鐃者亦眡瞭也 並春官】

廟堂之下縣鼓在西應鼓在東【禮樂之器尊西也小鼓謂之應 禮器】 大射建鼓在阼階西南鼓應鼗在其西南鼓西階一建鼓在其南東鼓朔鼗在其北一建鼓在西階之東南面【詳樂縣】 鼗鼓在西房【鼗鼓長八尺商周傳寶之 顧命】 大僕建路鼓於大寢之門外以待達窮者與遽令【詳朝廷禮】 大司馬教振旅王執路鼓諸侯執賁鼓軍將執晉鼓師帥執提旅帥執鼗【鄭司農云提謂馬上鼓有曲木提持鼓立馬髦上者故謂之提 詳見田役】

鐃師凡軍之夜三鼗皆鼓之守鼗亦如之【詳見武備】 掌固夜三鼗以戒號【同上】

冥氏攻猛獸以靈鼓毆之【秋官】

鼉鼓逢逢矇瞍奏公【鼉似蜥蜴長丈餘皮可冒鼓逢逢和也 大雅靈臺】
天子賜伯子男樂則以鼗將之【詳樂制】 搏拊【搏拊以韋為之實之以糠以節樂 益稷】
拊搏四代之樂器也【拊搏以韋為之充之以糠形如小鼓 明堂位】
以韋為鼓謂之搏拊【尚書大傳】 架一鍾而尚拊【荀子】
架一磬而尚拊【大戴禮】 大師帥瞽登歌令奏擊拊 小師登歌擊拊【並詳樂制】 右樂會
守拊鼓治亂以相【相即拊也亦以節樂拊者以韋為表裝之以糠糠一名相因以名焉今齊
人或謂糠為相 詳見樂記】

右革之屬 鼓無當於五聲五聲弗得不和【學記】 鼓震音煩氣也萬物憤懣震動而生雷以
動之溫以煖之風以散之雨以濡之奮至德之聲感和平之氣也同聲相應同氣相求神明報
應天地祐之其本乃在萬物之始耶故謂鼓也鞀者震之氣也上應昂星以通王道故謂之鞀
也【白虎通】
子夏曰鼓鼗之聲謹謹以立動動以進衆君子聽鼓鼗之聲則思將帥之臣【詳樂記】

聖人作為柷敔此德音之音也【柷敔謂祝敔也 樂記】
拊擊四代之樂器也【拊擊謂祝梧皆所以節樂者也 明堂位】 戛擊【戛擊祝敔所以作止
樂此舜廟堂之樂】 合止祝敔【堂下樂也上下合止樂各有祝敔 益稷】 所以鼓祝謂之止
【祝如漆桶方二尺四寸深一尺八寸中有椎柄連底捫之令左右擊止者其椎名】 所以鼓
敔謂之鼗【敔如伏虎背上有二十七鉏鈸刻以木長尺櫟之鼗者其名 爾雅】
小師掌教祝敔【鄭司農云祝如漆笛中有椎敔木虎也】 瞽矇掌祝敔【並春官】
天子賜諸侯樂則以祝將之【詳樂制】

右木之屬 祝敔者終始之聲萬物之所生也陰陽順而復故曰祝承順天地序迎萬物天下樂
之故樂用祝祝始也敔終也【白虎通】

夏后氏之龍箎虞殷之崇牙周之壁翬【箎虞所以縣鍾磬也橫曰箎飾之以鱗屬植曰虞飾
之以羸屬羽屬箎以大版為之謂之業殷又於龍上刻畫之為重牙以挂縣紘也周又畫繪為
翬戴以璧垂五采羽於其下樹於箎之角上飾彌多也周頌曰設業設虞崇牙樹羽 明堂位】
梓人為筍虞【樂器所縣橫曰筍植曰虞鄭司農云筍讀為竹筍之筍】 天下之大獸五脂者
膏者羸者羽者鱗者【脂牛羊屬膏豕屬羸者謂虎豹貔 為獸淺毛者之屬羽鳥屬鱗龍蛇
之屬】 宗廟之事脂者膏者以為牲【致美味也】 羸者羽者鱗者以為筍虞【貴野聲也】
外骨內骨卻行仄行連行紆行以脰鳴者以注鳴者以旁鳴者以翼鳴者以股鳴者以胸鳴者
謂之小蟲之屬以為雕琢【刻畫祭器博庶物也外骨龜屬內骨蟹屬卻行蝱衍之屬仄行蟹
屬連行魚屬紆行蛇屬脰鳴鼃黿屬注鳴精列屬旁鳴蝸蛭屬翼鳴發皇屬股鳴蚣蝮動股屬
胸鳴榮原屬】 厚脣弇口出目短耳大胸燿後大體短脰若是者謂之羸屬恒有力而不能走
其聲大而宏有力而不能走則於任重宜聲大而宏則於鍾宜若是者以為鍾虞是故擊其所
縣而由其虞鳴【燿讀為哨頤小也鄭司農云宏讀為紘紘之紘謂聲音大也由若也】 銳喙
決吻數目顧脰小體騫腹若是者謂之羽屬恒無力而輕其聲清陽而遠聞無力而輕則於任
輕宜其聲清陽而遠聞於磬宜若是者以為磬虞故擊其所縣而由是虞鳴【吻口脰也顧長

脰貌故書顧或作慳鄭司農云慳讀為鬻頭無髮之鬻】小首而長搏身而鴻若是者謂之鱗屬以為筍【搏圓也鴻傭也】凡攬網援簪之類必深其爪出其目作其鱗之而【謂筍虞之獸也深猶藏也作猶起也之而頰頰也】深其爪出其目作其鱗之而則於眡必撥爾而怒苟撥爾而怒則於任重宜且其匪色必似鳴矣【匪采色也故書撥作廢匪作飛鄭司農云廢讀為撥飛讀為匪以似為發】爪不深目不出鱗之而不作則必頽爾如委矣苟頽而如委則加任焉則必如將廢措其匪色必似不鳴矣【措猶頓也故書措作厝杜子春云當為措考工記】虞業維樅【虞植木以懸鍾磬其橫者曰枸業枸上大板刻之業如鋸齒者也樅業上懸鍾磬處以采色為崇牙其狀樅樅然者也 大雅靈臺】

設業設虞崇牙樹羽【詳樂制】典庸器祭祀饗食賓射帥其屬而設筍虞【春官】天子左五鍾右五鍾天子將出則撞黃鍾右五鍾皆應然後大師奏登車告出也入則撞蕤賓左五鍾皆應然後少師奏登堂就席告入也【詳樂記】

大司樂大祭祀宿縣遂以聲展之【詳樂制】小胥正樂縣之位王宮縣諸侯軒縣卿大夫判縣士特縣辨其聲【樂縣謂鍾磬之屬縣於筍虞者鄭司農云宮縣四面縣軒縣去其一面判縣又去其一面特縣又去其一面四面象宮室四面有牆故謂之宮縣軒縣三面其形曲故春秋傳曰請曲縣繁纓以朝諸侯之禮也故曰唯器與名不可以假人玄謂軒縣去南面辟王也判縣左右之合又空北面恃縣縣於東方或於階間而已】凡縣鐘磬半為堵全為肆【鍾磬者編縣之二八十六枚而在一虞謂之堵鍾一堵磬一堵謂之肆半之者謂諸侯之卿大夫士也諸侯之卿大夫半天子之卿大夫西縣鍾東縣磬士亦半天子之士縣磬而已鄭司農云春秋傳曰歌鍾二肆 並春官】大射樂人宿縣于阼階東笙磬西面其南笙鍾其南鑄皆南陳【笙猶生也東為陽中萬物以生春秋傳曰太簇所以金奏贊陽出滯姑洗所以脩潔百物考神納賓是以東方鍾磬謂之笙皆編而縣之周禮曰凡縣鍾磬半為堵全為肆有鍾有磬為全鑄如鍾而大奏樂以鼓鑄為節】建鼓在阼階西南鼓應鼗在其東南鼓【建猶樹也以木貫而載之樹之跗也南鼓謂所伐面也應鼗應朔鼗也先擊朔鼗應鼗應之鼗小鼗也在東便其先擊小後擊大也鼓不在東縣南為君也】西階之西頌磬東面其南鍾其南鑄皆南陳一建鼓在其南東鼓朔鼗在其北【言成功曰頌西為陰中萬物之所成春秋傳曰夷則所以詠歌九則平民無忒無射所以宣布哲人之令德示民軌義是以西方鍾磬謂之頌朔始也奏樂先擊西鼗樂為賓所由來也鍾不言頌鼗不言東鼓義同省文也古文頌為庸】一建鼓在西階之東南面【言面者國君於其羣臣備三面爾無鍾磬有鼓而已其為諸侯則軒縣】簨在建鼓之間【簨竹也謂笙簫之屬倚於堂】鼗倚于頌磬西紃【鼗如鼓而小有柄賓至搖之以奉樂也紃編磬繩也設鼗於磬西倚於紃也王制曰天子賜諸侯樂則以祝將之賜伯子男樂則以鼗將之】諸侯之宮縣諸侯之僭禮也【郊特牲】

大司樂大札大凶大烓大臣死凡國之大憂令弛縣【春官】疾病君大夫徹縣【喪大記】大夫無故不徹縣【曲禮】

右樂縣 戰于新築新築人仲叔于奚救孫桓子衛人賞之以邑辭請曲縣【軒縣也周禮天子樂宮縣四周諸侯軒縣闕南方】許之仲尼聞之曰惜也不如多與之邑唯器與名不可以假人【成二年左氏傳詳見名器上】

卷八十四

欽定四庫全書

禮書綱目卷八十四 婺源江永撰

歌舞 樂五

補

詩言志歌永言聲依永律和聲【心之所之謂之志心有所之必形於言故曰詩言志既形於言則必有長短之節故曰歌永言既有長短則必有清濁高下之殊故曰聲依永聲者宮商角徵羽也大抵歌聲長而濁者為宮以漸而清且短則為商為角為徵為羽所謂聲依永也既有長短清濁則又必以十二律和之乃能成文而不亂假令黃鍾為宮則太簇為商姑沈為角林鍾為徵南呂為羽蓋以三分損益隔八相生而得之餘律皆然即禮運所謂五聲六律十二管還相為宮所謂律和聲也 舜典】

戛擊鳴球搏拊琴瑟以詠下管鼗鼓合止祝敔笙鏞以間【詳樂制】大司樂九德之歌於宗廟之中奏之【鄭司農云九德之歌春秋傳所謂水火金木土穀謂之六府正德利用厚生謂之三事六府三事謂之九功九功之德皆可歌也謂之九歌也】大師教六詩曰風曰賦曰比曰興曰雅曰頌【教教瞽矇也風言賢聖治道之遺化也賦之言鋪直鋪陳今之政教善惡比見今之失不敢斥言取比類以言之興見今之美嫌於媚諛取善事以喻勸之雅正也言人之正者以為後世法頌之言誦也容也誦今之德廣以美之鄭司農云古而自有風雅頌之名故延陵季子觀樂於魯時孔子尚幼未定詩書而曰為之歌邶鄘衛曰是其衛風乎又為之歌小雅大雅又為之歌頌論語曰吾自衛反魯然後樂正雅頌各得其所時禮樂自諸侯出頗有謬亂不正孔子正之曰比曰興比者比方於物也興者託事於物】以六德為之本【所教詩必有知仁聖義中和之道然後可教以樂歌】以六律為之音【以律視其人為之音知其宜何歌子貢見帥乙而問曰賜聞樂歌各有宜若賜者宜何歌此問人性也本人之性莫善於律】小師掌教弦歌【弦謂琴瑟也歌依詠詩也】

瞽矇掌播弦歌【播謂發揚其音】掌九德六詩之歌以役大師【役為之使】

鍾師凡樂事以鍾鼓奏九夏【詳樂制】籥章中春敔豳詩以逆暑中秋夜逆寒亦如之凡國祈年于田祖敔豳雅國祭蜡則敔豳頌【詳吉禮百神篇並春官】

徒歌謂之謠【詩曰我歌且謠 爾雅】

右樂歌 昔葛天氏之樂三人摯牛尾投足以歌八闋【葛天氏古帝名投足猶蹠足闋終也】一曰載民二曰玄鳥三曰遂草木四曰奮五穀五曰敬天常六曰達帝功七曰依地德八曰總萬物之極【樂之八篇名也呂氏春秋】禹曰德惟善政政在養民水火金木土穀惟修正德利用厚生惟和九功惟叙九叙惟歌戒之用休董之用威勸之以九歌俾勿壞【此周禮所謂九德之歌 大禹謨】九功之德皆可歌也謂之九歌六府三事謂之九功水火金木土穀謂之

六府正德利用厚生謂之三事【文七:left氏傳】 舜作五絃之琴歌南風之詩詩曰南風之薰兮可以解吾民之愠兮南風之時兮可以阜吾民之財兮【家語】 詩者志之所之也在心為志發言為詩情動於中而形於言言之不足故嗟嘆之嗟嘆之不足故永歌之永歌之不足不知手之舞之足之蹈之也情發於聲聲成文謂之音【發猶見也聲謂宮商角徵羽也聲成文者宮商上下相應】 治世之音安以樂其政和亂世之音怨以怒其政乖亡國之音哀以思其民困故正得失動天地感鬼神莫近於詩先王以是經夫婦成孝敬厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪聞之者足以戒故曰風【風化風刺皆謂譬喻不斥言也主文主與樂之宮商相應也譎諫詠歌依違不直諫】 至於王道衰禮義廢政教失國異政家殊俗而變風變雅作矣國史明乎得失之迹傷人倫之廢哀刑政之苛吟詠情性以風其上達於事變而懷其舊俗者也故變風發乎情止乎禮義發乎情民之正也止乎禮義先王之澤也是以一國之事繫一人之本謂之風言天下之事形四方之風謂之雅雅者正也言王政之所由廢興也政有小大故有小雅焉有大雅焉頌者美盛德之形容以其成功告於神明者也是謂四始詩之至也【始者王道興衰之所由 詩序 鄭康成小雅大雅譜云其用於樂國君以小雅天子以大雅然而饗賓或上取燕或下就天子饗元侯歌肆夏合文王諸侯歌文王合鹿鳴諸侯於鄰國之君與天子於諸侯同天子諸侯燕羣臣及聘問之賓皆歌鹿鳴合卿樂比其著略大校見在書籍禮崩樂壞不可得詳】 吳公子札來聘請觀於周樂【魯以周公故有天子禮樂】 使工為之歌周南召南【此皆各依其本國歌所常用聲曲】 曰美哉【美其聲】 始基之矣【周南召南王化之基】 猶未也【猶有商紂未盡善也】 然勤而不怨矣【未能安樂然其音不怨怒】 為之歌邶鄘衛【武王伐紂分其地為三監三監叛周公滅之更封康叔并三監之地故三國盡被康叔之化】 曰美哉淵乎憂而不困者也【淵深也亡國之音哀以思其民困衛康叔武公德化深遠雖遭宣公淫亂懿公滅亡民猶秉義不至於困】 吾聞衛康叔武公之德如是是其衛風乎【康叔周公弟武公康叔九世孫皆衛之令德君也聽聲以為別故有疑言】 為之歌王【王黍離也幽王遇西戎之禍平王東遷王政不行於天下風俗下與諸侯同故不為雅】 曰美哉思而不懼其周之東乎【宗周隕滅故憂思猶有先王之遺風故不懼】 為之歌鄭【詩第七】 曰美哉其細已甚民弗堪也是其先亡乎【美其有治政之音譏其煩碎知不能久】 為之歌齊【詩第八】 曰美哉泱泱乎大風也哉【泱泱宏大之聲】 表東海者其大公乎【大公封齊為東海之表式】 國未可量也【言其或將復興】 為之歌豳【詩第十五豳周之舊國在新平漆縣東北】 曰美哉蕩乎樂而不淫其周公之東乎【蕩乎蕩然也樂而不淫言有節周公遭管蔡之變東征三年為成王陳后稷先公不敢荒淫以成王業故言其周公之東乎】 為之歌秦【詩第十一後仲尼刪定故不同】 曰此之謂夏聲夫能夏則大大之至也其周之舊乎【秦本在西戎汧隴之西秦仲始有車馬禮樂去戎狄之音而有諸夏之聲故謂之夏聲及襄公佐周平王東遷而受其故地故曰周之舊】 為之歌魏【詩第九魏姬姓國閔元年晉獻公滅之】 曰美哉飭飭乎大而婉險而易行以德輔此則明主也【飭飭中庸之聲婉約也險當為儉字之誤也大而約則儉節易行惜其國小無明君也】 為之歌唐【詩第十唐晉詩】 曰思深哉其有陶唐氏之遺民乎不然何憂之遠也【晉本唐國故有堯之遺風憂深思遠情發於聲】 非令德之後誰能若是為之歌陳【詩第十二】 曰國無主其能久乎【淫聲放蕩無所畏忌故曰國無主】 自鄆以下無譏焉【鄆第十三曹第十四言季子聞此二國歌不復譏論之以其微也】 為之歌小雅【小雅小正亦樂歌之常】 曰美哉思而

不貳【思文武之德無貳叛之心】怨而不言【有哀音】其周德之衰乎【衰小也】猶有先王之遺民焉【謂有殷王餘俗故未大衰】為之歌大雅【大雅陳文王之德以正天下】曰廣哉熙熙乎【熙熙和樂聲】曲而有直體【論其聲】其文王之德乎【雅頌所以詠盛德形容故但歌其美者不皆歌變雅】為之歌頌【頌者以其成功告於神明】曰至矣哉【言道備】直而不倨【倨傲】曲而不屈【屈撓】邇而不偪【謙退】遠而不攜【攜貳】遷而不淫【淫過蕩】復而不厭【常日新】哀而不愁【知命】樂而不荒【節之以禮】用而不匱【德宏大】廣而不宣【不自顯】施而不費【因氏所利而利之】取而不貪【義然後取】處而不底【守之以道】行而不流【制之以義】五聲和【宮商角徵羽謂之五聲】八風平【八方之風謂之八風】節有度守有序【八音克諧節有度也無相奪倫守有序也】盛德之所同也【頌有殷魯故曰盛德之所同 襄二十九年左氏傳】子貢見師乙而問焉曰賜聞聲歌各有宜也如賜者宜何歌也【師樂官也乙名聲歌各有宜氣順性也】師乙曰乙賤工也何足以問所宜請誦其所聞而吾子自執焉【樂人稱工執猶處也】寬而靜柔而正者宜歌頌廣大而靜疏達而信者宜歌大雅恭儉而好禮者宜歌小雅正直而靜廉而謙者宜歌風肆直而慈愛者宜歌商【商宋詩也愛或為哀】溫良而能斷者宜歌齊夫歌者直已而陳德也動已而天地應焉四時和焉星辰理焉萬物育焉【直已而陳德各因其德歌所宜育生也】故商者五帝之遺聲也商人識之故謂之商齊者三代之遺聲也齊人識之故謂之齊明乎商之音者臨事而屢斷明乎齊之音者見利而讓【屢數也數斷事以其肆直也見利而讓以其溫良能斷也斷猶決也】臨事而屢斷勇也見利而讓義也有勇有義非歌孰能保此【保猶安也知也】故歌者上如抗下如隊曲如折止如槁木倨中矩句中鉤纍纍乎端如貫珠【言歌聲之著動人心之審如有此事】故歌之為言也長言之也說之故言之言之不足故長言之長言之不足故嗟嘆之嗟嘆之不足故不知手之舞之足之蹈之也【長言之引其聲也嗟嘆和續之也不知手之舞之足之蹈之歡之至也 樂記】衛甯武子來聘公與之宴為賦湛露及彤弓【非禮之常公特命樂人以示意故言為賦湛露彤弓詩小雅】不辭又不答賦使行人私焉【私問之】對曰臣以為肄業及之也【肄習也魯人失所賦甯武子佯不知此其愚不可及】昔諸侯朝正於王【朝而受政教也】王宴樂之於是乎賦湛露則天子當陽諸侯用命也【湛露曰湛湛露斯匪陽不晞晞乾也言露見日而乾猶諸侯稟天子命而行】諸侯敵王所愾而獻其功【敵猶當也愾恨怒也】王於是乎賜之彤弓一彤矢百旅弓矢千以覺報宴【覺明也謂諸侯有四夷之功王賜之弓矢又為歌彤弓以明報功宴樂】今陪臣來繼舊好【方論天子之樂故自稱陪臣】君辱貺之其敢干大禮以自取戾【貺賜也干犯也戾罪也 文四年左氏傳】叔孫穆子聘於晉【穆子魯卿叔孫得臣之子豹也】晉悼公饗之【以饗禮禮之】樂及鹿鳴之三而後拜樂三【及至也悼公先為穆子作肆夏文王各三篇而不拜至作鹿鳴之三篇而後拜樂三也】晉侯使行人問焉【行人官名掌賓客之禮傳曰韓獻子使行人子員問焉】曰子以君命鎮撫敝邑【鎮重也撫安也】不腆先君之禮以辱從者【腆厚也稱從者謙也】不腆之樂以節之【以樂節禮也】吾子舍其大而加禮於其細敢問何禮也【大謂肆夏文王細謂鹿鳴也】對曰寡君使豹來繼先君之好君以諸侯之故貺使臣以大禮【貺賜也】夫先樂金奏肆夏繁遏渠天子所以饗元侯也【金奏以鍾奏樂也肆夏一名樊韶夏一名遏納夏一名渠此三夏曲也禮有九夏周禮鍾師掌以鍾鼓奏九夏元侯牧伯也鄭司農云九夏皆篇名頌之類也載在樂章樂崩亦從而亡是以頌不能具也】夫歌文王大明縣則兩君相見之樂也【文王大明縣大雅之首文王之三

也此三篇皆美文王武王有聖德天所輔祚其徵應符驗著見於天乃天命非人力也周公欲昭先王之德於天下故兩君相見得以為樂也【皆昭令德以合好也皆非使臣之所敢聞也臣以為肄業及之故不敢拜【肄習也以為樂人自習修其業而及之故不敢拜】今伶簫咏歌及鹿鳴之三【伶伶人樂官也簫樂器編管為之言樂人以簫作此三篇之聲與歌者相應也詩云簫管備舉】君之所以貺使臣臣敢不拜貺夫鹿鳴君之所以嘉先君之好也敢不拜嘉【嘉善也鹿鳴曰我有嘉賓德音孔昭是為嘉善先君之好也】四牡君之所以章使臣之勤也敢不拜章【四牡君勞使臣之樂也章著也言臣奉命勞勤於外述叙其情以歌樂之所以著其勤勞也】皇皇者華君教使臣曰每懷靡及【皇皇者華君遣使臣之樂也皇皇猶煌煌也懷私為每懷靡無也言臣奉使當榮顯其君如華之色煌煌然既受命當思在公每人人懷其私於事將無所及】諏謀度詢必咨於周敢不拜教【此六者皆君之所以教臣也訪問於善為咨忠信為周言諏謀度詢必當咨之於忠信之人】臣聞之曰懷和為每懷【鄭後司農云和當為私】咨才為諏【才當為事傳曰咨事為諏】咨事為謀【事當為難傳曰咨難為謀】咨義為度【咨禮義為度度亦謀也】咨親為詢【詢親戚之謀】忠信為周【言當咨之於忠信之人也詩云周爰咨詢】君貺使臣以大禮重之以六德敢不重拜【六德謂諏也謀也度也詢也咨也周也國語魯語左氏傳詳見嘉禮饗食燕記】

大夫之奏肆夏也由趙文子始也【僭諸侯趙文子晉大夫名武郊特性】三家者以雍徹子曰相維辟公天子穆穆奚取於三家之堂【三家魯大夫孟孫叔孫季孫之家也雍周頌篇名徹祭畢而收其俎也天子宗廟之祭則歌雍以徹是時三家僭而用之相助也辟公諸侯也穆穆深遠之意天子之容也此雍詩之辭孔子引之言三家之堂非有此事亦何取於此義而歌之乎譏其無知妄作以取僭竊之罪程子曰周公之功固大矣皆臣子之分所當為魯安得獨用天子禮樂哉成王之賜伯禽之受皆非也其因襲之弊遂使季氏僭八佾三家僭雍徹故仲尼譏之】子曰吾自衛反魯然後樂正雅頌各得其所【魯哀公十一年冬孔子自衛反魯是時周禮在魯然詩樂亦頗殘缺失次孔子周流四方參互考訂以知其說晚知道終不行故歸而正之】子曰師摯之始關雎之亂洋洋乎盈耳哉【師摯魯樂師名摯也亂樂之卒章也史記曰關雎之亂以為風始洋洋美盛意孔子自衛反魯而正樂適師摯在官之初故樂之美盛如此並論語】

呦【清黃】呦【南】鹿【蕤】鳴【姑】食【南】野【姑】之【太】苹【黃】我【蕤】有【林】嘉【應】賓【南】鼓【林】瑟【南】吹【清黃】笙【林】吹【蕤】笙【林】鼓【南】簠【姑】承【應】筐【清黃】是【姑】將【南】人【林】之【南】好【黃】我【姑】示【林】我【南】周【清太】行【清黃】呦【黃】呦【姑】鹿鳴【姑】食【林】野【南】之【清太】蒿【清黃】我【林】有【南】嘉【應】賓【清黃】德【南】音【蕤】孔【姑】昭【林】視【姑】民【南】不【清黃】忼【姑】君【應】子【清黃】是【姑】則【蕤】是【姑】傲【南】我【林】有【南】旨【黃】酒【姑】嘉【林】賓【南】式【應】燕【南】以【清太】敖【清黃】呦【黃】呦【姑】鹿【太】鳴【黃】食【太】野【黃】之【蕤】芩【姑】我【蕤】有【南】嘉【應】賓【南】鼓【林】瑟【南】鼓【清黃】琴【林】鼓【蕤】瑟【林】鼓【南】琴【姑】和【應】樂【清黃】且【姑】湛【南】我【林】有【南】旨【黃】酒【姑】以【林】燕【南】樂【黃】嘉【應】賓【南】之【清太】心【清黃】

鹿鳴三章章八句黃鍾清宮【俗呼正宮】

四【黃】牡【姑】駢【蕤】駢【姑】周【太】道【黃】倭【蕤】遲【姑】豈【林】
不【南】懷【應】歸【清黃】王【蕤】事【姑】靡【林】盥【南】我【林】心【黃】
傷【應】悲【清黃】四【黃】牡【姑】駢【林】駢【南】嘽【應】嘽【南】駱【
清太】馬【清黃】豈【蕤】不【林】懷【應】歸【南】王【蕤】事【姑】靡【太】
盥【黃】不【林】遑【姑】啓【太】處【黃】翩【清黃】翩【姑】者【林】騅【南】
載【姑】飛【應】載【林】下【南】集【蕤】于【南】苞【蕤】栩【林】王【太】
事【黃】靡【蕤】盥【姑】不【林】遑【南】將【清太】父【清黃】翩【清黃】
翩【姑】者【蕤】騅【姑】載【林】飛【應】載【林】止【南】集【林】于【南】
苞【蕤】杞【姑】王【蕤】事【姑】靡【林】盥【南】不【黃】遑【蕤】將【太】
母【黃】駕【黃】彼【太】四【黃】駱【姑】載【林】驟【南】駸【清黃】駸【林】
豈【林】不【南】懷【應】歸【黃】是【太】用【黃】作【蕤】歌【姑】將【應】
母【黃】來【清太】諗【清黃】

四牡五章章五句黃鍾清宮【俗呼正宮】

皇【黃】皇【南】者【林】華【南】于【林】彼【姑】原【林】隰【南】駢【蕤】
駢【林】征【蕤】夫【姑】每【應】懷【南】靡【清太】及【清黃】我【黃】馬【
姑】維【蕤】駒【姑】六【黃】轡【姑】如【林】濡【南】載【林】馳【南】載【
黃】驅【姑】周【蕤】爰【姑】咨【太】諏【黃】我【清黃】馬【林】維【應】騏
【清黃】六【林】轡【南】如【蕤】絲【姑】載【林】馳【南】載【蕤】驅
周【應】爰【黃】咨【清太】謀【清黃】我【清黃】馬【林】維【應】駱六【蕤】
轡【姑】沃【林】若【南】載【蕤】馳【南】載【蕤】驅【林】周【黃】爰【姑】
咨【太】度【黃】我【黃】馬【南】維【應】駟【清黃】六【清黃】轡【姑】既【
林】均【南】載【林】馳【南】載【黃】驅【姑】周【應】爰【南】咨【清太】詢
【清黃】皇皇者華五章章四句黃鍾清宮【俗呼正宮】

魚【清黃】麗【姑】于【蕤】罟【姑】鰭【太】鯨【黃】君【蕤】子【林】有【應】
酒【南】旨【林】且【南】多【清黃】魚【黃】麗【姑】于【太】罟【清黃】魴
【蕤】鯉【姑】君【蕤】子【林】有【蕤】酒【姑】多【蕤】且【林】旨【黃】魚
【清黃】麗【清太】于【應】罟【清黃】鰻【林】鯉【南】君【蕤】子【姑】有【
林】酒【南】旨【林】且【南】有【清黃】
物【清黃】其【姑】多【應】矣【南】維【蕤】其【姑】嘉【林】矣【南】物【蕤】
其【林】旨【蕤】矣【姑】維【南】其【蕤】偕【姑】矣【林】物【黃】其【太】
有【黃】矣【姑】維【應】其【南】時【太】矣【清黃】

魚麗六章三章章四句三章章二句黃鍾清宮【俗呼正宮】

南【清黃】有【林】嘉【應】魚【南】烝【應】然【南】罩【姑】罩【南】君【林】
子【南】有【蕤】酒【姑】嘉【應】賓【清黃】式【林】燕【南】以【清太】樂
【清黃】南【清黃】有【南】嘉【蕤】魚【姑】烝【蕤】然【姑】汕【林】汕【南】
君【林】子【南】有【黃】酒【姑】嘉【黃】賓【姑】式【太】燕【黃】以【南】
衍【清黃】南【清黃】有【清太】樛【應】木【南】甘【清黃】瓠【林】纍【南】
之【清黃】君【黃】子【太】有【黃】酒【姑】嘉【清太】賓【清黃】式【應】
燕【南】綏【清太】之【清黃】翩【黃】翩【太】者【黃】騅【姑】烝【林】然【
南】來【蕤】思【姑】君【清黃】子【姑】有【林】酒【南】嘉【蕤】賓【姑】式
【太】燕【黃】又【南】思【清黃】

南有嘉魚四章章四句黃鍾清宮【俗呼正宮】

南【清黃】山【太】有【應】臺【南】北【應】山【南】有【清太】萊【清黃】樂
【應】只【清黃】君【應】子【南】邦【林】家【南】之【清黃】基【林】樂【蕤】
只【林】君【南】子【姑】萬【黃】壽【姑】無【太】期【黃】南【黃】山【姑】
有【蕤】桑【姑】北【黃】山【姑】有【太】楊【黃】樂【蕤】只【林】君【應】
】

子【南】邦【林】家【南】之【黃】光【林】樂【應】只【清黃】君【蕤】子【姑】
萬【林】壽【南】無【清太】疆【清黃】南【清黃】山【林】有【應】 【南】
北【林】山【南】有【清太】李【清黃】樂【應】只【清黃】君【應】子【南】民
【南】之【蕤】父【姑】母【林】樂【蕤】只【林】君【蕤】子【姑】德【蕤】音
【姑】不【太】已【黃】南【黃】山【太】有【黃】栲【姑】北【南】山【蕤】有
【姑】杻【林】樂【蕤】只【林】君【應】子【南】遐【林】不【南】眉【清太】
壽【清黃】樂【應】只【清黃】君【蕤】子【姑】德【應】音【南】是【林】茂【
清黃】南【清黃】山【姑】有【蕤】枸【姑】北【應】山【黃】有【清太】楔【清
黃】樂【應】只【清黃】君【應】子【南】遐【南】不【蕤】黃【姑】耆【林】樂
【蕤】只【林】君【蕤】子【姑】保【清黃】艾【南】爾【林】後【清黃】

南山有臺五章章六句黃鍾清宮【俗呼正宮】

右小雅六詩譜 大學始教宵雅肄三官其始也【宵之言小也肆習也習小雅之三謂鹿鳴四
牡皇皇者華也此皆君臣宴樂相勞苦之詩為始學者習之所以勸之以官且取上下相和厚
學記朱子曰按鄉飲酒及燕禮皆歌此三篇笙入奏南陔白華華黍問歌魚麗笙由庚歌南有
嘉魚笙崇邱歌南山有臺笙由儀六笙詩本無辭聲亦不傳】

關【清黃】關【南】雎【林】鳩【南】在【黃】河【姑】之【太】洲【黃】窈【林】
窕【南】淑【清黃】女【姑】君【清黃】子【林】好【南】述【清黃】參【清黃】
差【南】荇【林】菜【南】左【林】右【南】流【無】之【黃】窈【中】窕【林】

】淑【無】女【姑】寤【太】寐【姑】求【太】之【黃】求【清黃】之【南】不【林】得【南】寤【姑】寐【中】思【南】服【林】悠【姑】哉【中】悠【姑】哉【太】輾【清黃】轉【南】反【無】側【清黃】參【清黃】差【無】荇【南】菜【林】左【清太】右【林】采【南】之【清黃】窈【姑】窕【中】淑【林】女【南】琴【林】瑟【姑】友【太】之【姑】參【太】差【黃】荇【姑】菜【林】左【林】右【姑】芼【林】之【南】窈【清黃】窕【南】淑【林】女【清太】鍾【黃】鼓【南】樂【無】之【清黃】關雎三章一章章四句二章章八句無射清商【俗呼越調】

葛【黃】之【太】覃【姑】兮【太】施【太】于【姑】中【太】谷【黃】維【仲】葉【南】萋【無】萋【太】黃【南】鳥【無】于【南】飛【林】集【仲】于【林】灌【無】木【太】其【清黃】鳴【南】喈【無】喈【清黃】葛【清黃】之【清太】覃【林】兮【清黃】施【林】于【南】中【無】谷【清黃】維【林】葉【南】莫【南】

莫是刈是穫【姑】為【林】絺【姑】為【太】綌【姑】服【太】之無【太】斲【黃】言【清黃】告【姑】師【南】氏【林】言【林】告【姑】言【太】歸【黃】薄【黃】汚【姑】我【太】私【姑】薄【姑】澣【仲】我【林】衣【南】害【南】澣【林】害【無】否【太】歸【清黃】寧【南】父【林】母【黃】

葛覃三章章六句無射清商【俗呼越調】

采【清黃】采【姑】卷【林】耳【南】不【林】盈【姑】頃【林】筐【南】嗟【中】我【林】懷【無】人【太】寘【黃】彼【如】周【太】行【黃】陟【清黃】彼【無】崔【南】嵬【林】我【林】馬【姑】虺【南】隤【林】我【中】姑【姑】酌【南】彼【無】金【姑】罍【太】維【清太】以【林】不【南】永【無】懷【清黃】陟【黃】彼【姑】高【南】岡【林】我【林】馬【姑】玄【南】黃【林】我【姑】姑【太】酌【姑】

彼【黃】兕【太】觥【姑】維【清黃】以【林】不【南】永【無】傷【清黃】陟【清黃】彼【南】砠【清黃】矣【林】我【黃】馬【姑】瘠【太】矣【黃】我【中】僕【姑】痛【林】矣【南】云【清黃】何【南】吁【無】矣【清黃】

卷耳四章章四句無射清商【俗呼越調】

維【黃】鵲【姑】有【中】巢【林】維【清黃】鳩【無】居【南】之【林】之【中】子【林】于【無】歸【太】百【清黃】兩【林】御【南】之【清黃】維【黃】鵲【林】有【南】巢【林】維【林】鳩【姑】方【太】之【黃】之【林】子【黃】于【林】歸【姑】百【太】兩【黃】將【太】之【黃】維【清黃】鵲【無】有【南】巢【林】維【南】鳩【林】盈【南】之【清黃】之【清黃】子【南】于【姑】歸【

林】百【清太】兩【林】成【南】之【清黃】

鵲巢三章章四句無射清商【俗呼越調】

于【清黃】以【南】采【林】繁【南】于【林】沼【姑】于【太】沚【姑】于【黃】
【以【姑】用【太】之【姑】公【清黃】侯【南】之【無】事【黃】于【黃】以【
林】采【黃】繁【南】于【太】澗【黃】之【太】中【姑】于【姑】以【南】用【
林】之【南】公【清黃】侯【南】之【清太】宮【黃】被【清黃】之【清太】僅【
南】僅【林】夙【清太】夜【林】在【南】公【清黃】被【黃】之【姑】祁【太】
祁【姑】薄【林】言【南】還【無】歸【黃】

采繁三章章四句無射清商【俗呼越調】

于【黃】以【南】采【林】蘋【南】南【姑】澗【林】之【南】濱【林】于【林】
以【姑】采【仲】藻【林】于彼行潦于以盛之維筐及筥于以湘之維錡及釜
于以奠之宗室牖下誰其尸之有齊季女

采蘋三章章四句無射清商【俗呼越調】

右周南召南六詩譜周南召南正始之道王化之基故用之鄉人焉用之邦國焉【詩序朱子曰鄉飲酒及鄉射禮合樂周南關雎葛覃卷耳召南鵲巢采繁采蘋燕禮亦云遂歌鄉樂亦即此六篇也鄭氏云合樂謂歌樂與衆聲皆作周南召南國風篇也王后國君夫人房中之樂歌也關雎言后妃之德葛覃言后妃之職卷耳言后妃之志鵲巢言國君夫人之德采繁言國君夫人不失職采蘋言卿大夫之妻能修其法度夫婦之道生民之本王政之端此六篇者其教之原也故國君與其臣下及四方之賓燕用之合樂也鄉樂者風也小雅為諸侯之樂大雅頌為天子之樂大戴禮云凡雅二十六篇其八篇可歌鹿鳴貍首鵲巢采繁采蘋伐檀白駒騶虞八篇廢不可歌七篇商齊可歌也三篇問歌晉志云漢末杜夔傳舊雅樂四曲一曰鹿鳴二曰騶虞三曰伐檀四曰文王皆古聲辭朱子曰按大戴禮頗有闕誤其篇目都數皆不可考至漢末年止存三篇而加文王又不知其何自來也其後改作新辭舊典遂廢至唐開元鄉飲酒禮其所奏樂乃有此十二篇之目而其聲今亦莫得聞矣此譜乃趙彥肅所傳云即開元遺聲也古聲亡滅已久不知當時工師何所考而為此也竊疑古樂有唱有嘆唱者發歌句也和者繼其聲也詩詞之外應更有疊字散聲以歎發其趣故漢晉之間舊曲既失其傳則其辭雖存而世莫能補為此故也若但如此譜直以一聲叶一字則古詩篇篇可歌無復樂崩之歎矣夫豈然哉又其以清聲為調似亦非古法然古聲既不可考則姑存此以見聲歌之彷彿俟知樂者考其得失云案儀禮經傳通解以十二詩譜為詩樂篇目錄序題云古亦無此篇而大樂遺聲其絕久矣今取世傳唐開元十二詩譜補之以粗見其彷彿然亦未知其果有以合於古之遺聲否也又案趙彥肅朱子門人字子欽】

簫韶九成鳳凰來儀【簫古文作箛舞者所執之物季札觀周樂見舞韶箛者則箛韶盖舜樂

之總名也今文作簫故先儒誤以簫管釋之功以九叙故樂以九成來儀者來舞而有容儀也益稷】舞干羽于兩階七旬有苗格【干楯羽翳也皆舞者所執也兩階賓主之階也

大禹謨】大司樂以樂舞教國子舞雲門大卷大咸大磬大夏大濩大武【此周所存六代之樂黃帝樂曰雲門大卷黃帝能成名萬物以明民共財言其德如雲之所出民得以有族類大咸咸池堯樂也堯能殫均刑法以儀民言其德無所不施大磬舜樂也言其德能紹堯之道也大夏禹樂也禹治水傳土言其德能大中國也大濩湯樂也湯以寬治民而除其邪言其德能使天下得其所也大武武王樂也武王伐紂以除其害言其德能成武功】乃分樂而序之舞雲門以祀天神舞咸池以祭地示舞大磬以祀四望舞大夏以祭山川舞大濩以享先妣舞大武以享先祖雲門之舞冬日至于地上之圜丘奏之咸池之舞夏日至於澤中之方丘奏之九磬之舞於宗廟之中奏之【詳見樂制】樂師掌國學之政以教國子小舞【謂以年幼少時教之舞內則曰十三舞勺成童舞象二十舞大夏】凡舞有帔舞有羽舞有皇舞有旄舞有干舞有人舞【故書皇作翌鄭司農云帔舞者全羽羽舞者析羽皇舞者以羽冒覆頭上衣飾翡翠之羽旄舞者鼈牛之尾干舞者兵舞人舞者手舞社稷以帔宗廟以羽四方以皇辟廂以旄兵事以干星辰以人翌讀皇玄謂帔析五采繪今靈星舞子持之是也皇雜五采羽如鳳凰色持以舞人舞無所執以手袖為威儀四方以羽宗廟以人山川以干旱暵以皇】詔來瞽臯舞

【注詳樂制】大胥掌學士之版以待致諸子【鄭司農云學士謂卿大夫諸子學舞者版籍也今時鄉戶籍世謂之戶版大胥主此籍以待當召聚學舞者卿大夫之諸子則案此籍以召之漢大樂律曰卑者之子不得舞宗廟之酎除吏二千石到六百石及關內侯到五大夫子先取適子高七尺以上年二十到年三十顏色和順身體修治者以為舞人與古用卿大夫子同義】以六樂之會正其位【大同六樂之節奏正其位使相應也言為大合樂習之】以序出入舞者【以長幼次之使出入不紕錯】凡祭祀之用樂者以鼓徵學士【擊鼓以召之文王世子曰大昕鼓徵所以警衆】小胥掌學士之徵令而比之觶其不敬者【比猶校也不敬謂慢期不時至也觶罰爵也詩云兕觥其觶】巡舞列而撻其怠慢者【撻猶扶也扶以荆扑】籥師掌教國子舞羽籥籥【文舞有特羽吹籥者所謂籥舞也文王世子曰秋冬學羽籥詩云左手執籥右手秉翟】祭祀則鼓羽籥之舞【鼓之者恒為之節】

司干掌舞器【舞器羽籥之屬】祭祀舞者既陳則授舞器既舞則受之【既已也受取藏之並春官】司兵祭祀授舞者兵【授以朱干玉戚之屬】司戈盾祭祀授舞者兵諸子凡樂事正舞位授舞器【位佾處也並夏官】鼓人凡祭祀百物之神鼓兵舞帔舞者【兵謂干戚也帔列五采繪】

【為之有秉皆舞者所執】舞師掌教兵舞帥而舞山川之祭祀教帔舞帥而舞社稷之祭祀教羽舞帥而舞四方之祭祀教皇舞帥而舞旱暵之事【羽析白羽為之形如帔也四方之祭祀謂四望也旱暵之事謂雩也暵熱氣也鄭司農云皇舞蒙羽舞書或為翌玄為皇析五采羽為之亦如帔】凡野舞則皆教之【野舞謂野人欲學舞者】凡小祭祀則不興舞【小祭祀王玄冕所祭者興猶作也並地官】凡學世子及學士必時【四時各有宜學士謂司徒論俊選所升於學者】春夏學干戈秋冬學羽籥皆於東序【干盾也戈句子戟也干戈萬舞象武也用動作之時學之羽籥籥舞象文也用安靜之時學之詩云左手執籥右手秉翟】小樂正學干大胥贊之籥師學戈籥師丞贊之【四人皆樂官之屬也通職秋冬亦學以羽籥小樂正樂師也周禮樂師掌國學之政教國子小舞大胥掌學士之版以待致諸子春入學舍菜合舞

秋頒學合聲籥師掌教國子舞羽吹籥【大樂正學舞干戚【戚斧也文王世子】十有三年舞勺成童舞象【先學勺後學象文武之次也成童十五以上】二十舞大夏【大夏樂之文武備者也三舞今皆亡內則】

右樂舞 吳公子札來聘請觀於周樂見舞象箎南籥者【象箎舞所執南籥以籥舞也皆文王之樂】曰美哉猶有憾【美哉美其容也文王恨不及已致太平】見舞大武者【武王樂】曰美哉周之盛也其若此乎見舞韶濩者【殷湯樂】曰聖人之宏也而猶有慙德聖人之難也【慙於始伐】見舞大夏者【禹之樂】曰美哉勤而不德非禹其誰能脩之【盡力溝洫勤也】見舞韶箎者【舜樂】曰德至矣哉大矣如天之無不幬也【幬覆也】如地之無不載也雖甚盛德其蔑以加於此矣觀止矣若有他樂吾不敢請矣【魯用四代之樂故及韶箎而季子知其終也季札賢明才博在吳雖已涉見此樂歌之文然未聞中國雅聲故請作周樂欲聽其聲然後依聲以參時政知其興衰也聞秦詩謂之夏聲聞頌曰五聲和八風平皆論聲以參政也舞畢知其樂終是素知其篇數 襄二十九年左氏傳】

舞莫重於武宿夜【武宿夜武曲名也 祭義】先鼓以警戒三步以見方再始以著往復亂以飭歸【先鼓將奏樂先擊鼓以警戒衆也三步謂將舞必先三舉足以見其舞之漸也再始以著往武王除喪至盟津之上紂未可伐還歸三年乃遂伐之武舞再更始以明伐時再往也復亂以飭歸謂鳴鐃而退明以整歸也】諸侯德盛而教尊五穀時熟然後賞之以樂故其治民勞者其舞行綴遠其治民逸者其舞行綴短故觀其舞知其德【民勞則德薄鄴相去遠舞人少也民逸則德盛鄴相去近舞人多也 並樂記】諸侯朱干設錫冕而舞大武諸侯之僭禮也【言此皆天子之禮也干盾也錫傳其背如龜也武萬舞也 郊特牲】

王子頹享五大夫樂及徧舞【皆舞六代之樂 莊二十九年左氏傳】

鄭伯享王于闕西辟樂備【闕象魏也樂備備六代之樂 莊三十一年左氏傳】宋公享晉侯于楚丘請以桑林【桑林殷天子之樂名】荀罃辭【辭讓之】荀偃士句曰諸侯宋魯於是觀禮【宋王者後魯以周公故皆用天子禮樂故可觀】魯有禘樂賓祭用之【禘三年大祭則作四代之樂別祭羣公則用諸侯樂】宋以桑林享君不亦可乎【言具天子樂也】舞師題以旌夏【師樂師也旌夏大旌也題識也以大旌表識其行列】晉侯懼而退入於房【旌夏非常卒見之人心偶有所畏】去旌卒享而還【襄十年左氏傳】魯以禘禮祀周公於大廟朱干玉戚冕而舞大武皮弁素積裼而舞大夏【朱干赤大盾也戚斧也冕冠名也諸公之服自衮冕而下如王之服也大武周舞也大夏夏舞也 明堂位】夫大嘗禘升歌清廟下而管象朱干玉戚以舞大武八佾以舞大夏此天子之樂也康周公故以賜魯也【管象吹管而舞武象之樂也朱干赤盾戚斧也此武象之舞所執也佾猶列也大夏禹樂文舞也執羽籥文武之舞皆八列互言之耳康猶褒大也 祭統】隱公五年考仲子之宮初獻六羽【成仲子宮安其主而祭之公問羽數故書羽】考仲子之宮將萬焉【萬舞也】公問羽數於衆仲【問執羽人數】對曰天子用八【八八六十四人】諸侯用六【六六三十六人】大夫四【四四十六人】士二【二二四人士有功賜用樂】夫舞所以節八音而行八風【八音金石絲竹匏土革木也八風八方之風也以八音之器播八方之風手之舞之足之蹈之節其制而序其情】故自八以下【唯天子得盡物數故以八為列諸侯則不敢用八】公從之於是初獻六羽始用六佾也【魯唯文王周公廟得用八而他公遂因仍僭而用之今隱公特立此婦人之廟詳問衆仲衆仲因明大典故傳亦因言始用六佾其後季氏舞八佾于庭知唯在仲子廟用

六 春秋左氏傳】 譏始僭諸公也六羽之為僭奈何天子八佾【佾者列也八人為列也八八六十四人法八風】 諸公六【六人為列六六三十六人法六律】 諸侯四【四人為列四四十六人法四人】 始僭諸公昉於此乎前此矣前此則曷為始乎此僭諸公猶可言也僭天子不可言也【前僭八佾於惠公廟大惡不可言也 公羊傳】 舞夏天子八佾諸公六佾諸侯四佾【夏大也大謂大雉大雉翟雉佾之言列八人為列又有八列八八六十四人也並執翟雉之羽而舞也天子用八象八風諸公用六降殺以兩也】 初獻六羽始僭樂矣【穀梁傳】 萬者何干舞也【干謂楯也能為人扞難而不使害人故聖王貴之以為武樂萬者其篇名武王以萬人服天下民樂之故名之云爾】 籥者何籥舞也【籥所吹以節舞也吹籥而舞文樂之長 宣八年公羊傳】 將禘於襄公萬者二人其衆萬於季氏【禘祭也萬舞也於禘公當三十六人】 臧孫曰此之謂不能庸先君之廟【不能用禮也蓋襄公別立廟 昭二十五年左氏傳】 子家駒曰諸侯僭於天子大夫僭於諸侯久矣

設兩觀乘大路朱干【干楯也以朱飾楯】 玉戚【戚斧也以玉飾斧】 以舞大夏【大夏夏樂也周所以舞夏樂者王者始起未制作之時取先王之樂與已同者假以風化天下天下大同乃自作樂取夏樂者與周俱文也王者舞六樂於宗廟之中舞先王之樂明有法也舞已之樂明有制也舞四夷之樂大德廣及之也東夷之樂曰柷離南夷之樂曰任西夷之樂曰禁北夷之樂曰昧】 八佾以舞大武此皆天子之禮也【昭二十五年公羊傳】 孔子謂季氏八佾舞於庭是可忍也孰不可忍也【季氏魯大夫季孫氏也佾舞列也天子八諸侯六大夫四士二每佾人數如其佾數或曰每佾八人未詳孰是季氏以大夫而僭用天子之禮樂孔子言其此事尚忍為之則何事不可忍為或曰忍容忍也蓋深疾之之辭 范氏曰樂舞之數自上而下降殺以兩而已故兩之間不可以毫髮僭差也孔子為政先正禮樂則季氏之罪不容誅矣謝氏曰君子於其所不當為不敢須臾處不忍故也而季氏忍此矣則雖弑父與君亦何所憚而不為乎 論語】

禮書綱目卷八十四

卷八十五

欽定四庫全書卷

禮書綱目卷八十五 婺源江永撰

樂記 樂六【補】

凡音之起由人心生也人心之動物使之然也感於物而動故形於聲【宮商角徵羽雜比曰音單出曰聲形猶見也】聲相應故生變【樂之器彈其宮則衆宮應然不足樂是以變之使雜也易曰同聲相應同氣相求春秋傳曰若以水濟水誰能食之若琴瑟之專一誰能聽之】變成方謂之音【方猶文章也】比音而樂之及干戚羽旄謂之樂【干盾也戚斧也武舞所執也羽翟羽也旄旄牛尾也文舞所執周禮舞師樂師掌教舞有兵舞有干舞有羽舞有旄舞詩曰左手執籥右手秉翟】樂者音之所由生也其本在人心之感於物也是故其哀心感者其聲噍以殺其樂心感者其聲嘽以緩其喜心感者其聲 以散其怒心感者其聲粗以厲其敬心感者其聲直以廉其愛心感者其聲和以柔六者非性也感於物而后動【言人聲在所見非有常也噍蹶也嘽寬綽貌發猶揚也粗麤也】是故先王慎所以感之者故禮以道其志樂以和其聲政以一其行刑以防其姦禮樂刑政其極一也【極至也】所以同民心而出治道也【此其所謂至也】凡音者生人心者也情動於中故形於聲聲成文謂之音是故治世之音安以樂其政和亂世之音怨以怒其政乖亡國之音哀以思其民困聲音之道與政通矣【言八音和否隨政也玉藻曰御瞽幾聲之上下】宮為君商為臣角為民徵為事羽為物五者不亂則無怙慝之音矣【五者君臣民事物也凡聲濁者尊清者卑怙慝敝敗不和貌】宮亂則荒其君驕商亂則陂其臣壞角亂則憂其民怨徵亂則哀其事勤羽亂則危其財匱五者皆亂迭相陵謂之慢如此則國之滅亡無日矣【君臣民事物其道亂則其音應而亂荒猶散也陂傾也書曰王耄荒易曰無平不陂】鄭衛之音亂世之音也比於慢矣【比猶同也】桑間濮上之音亡國之音也其政散其民流誣上行私而不可止也【濮水之上地有桑間者亡國之音於此之水出也昔殷紂使師延作靡靡之樂已而自沈於濮水後師涓過焉夜聞而寫之為晉平公鼓之是之謂也桑間在濮陽南誣罔也】凡音者生於人心者也樂者通倫理者也【倫猶類也理分也】是故知聲而不知音者禽獸是也知音而不知樂者衆庶是也唯君子為能知樂【禽獸知此為聲耳不知其宮商之變也八音並作克諧曰樂】是故審聲以知音審音以知樂審樂以知政而治通備矣是故不知聲者不可與言音知音者不可與言樂知樂則幾於禮矣禮樂皆得謂之有德德者得也【幾近也聽樂而知政之得失則能正君臣民事物之禮也】是故樂之隆非極音也食饗之禮非致味也【隆猶盛也極窮也】清廟之瑟朱弦而疏越壹倡而三歎有遺音者矣大饗之禮尚玄酒而俎腥魚大羹不和有遺味者矣【清廟謂作樂歌清廟也朱弦練則聲濁越瑟底孔也晝疏之使聲遲也倡發歌句也三歎三人從歎之耳大饗祫祭先王以腥魚為俎實不臠熟之大羹肉滷不調以鹽菜遺猶餘也】是故先王之制禮樂也非以極口腹耳目之欲也將以教民平好惡而反人道之正也【教之使知好惡也】昔者舜作五弦之琴以歌南風夔始制樂以賞諸侯【夔欲舜與天下之君共此

樂也南風長養之風也以言父母之長養已其辭未聞也夔舜時典樂者書曰夔命女典樂故天子之為樂也以賞諸侯之有德者也德盛而教尊五穀時熟然後賞之以樂故其治民勞者其舞行綴遠其治民逸者其舞行綴短【民勞則德薄鄩相去遠舞人少也民逸則德盛鄩相去近舞人多也】故觀其舞知其德聞其謚知其行也【謚者行之迹也】大章章之也【堯樂名也言堯德章明也周禮闕之或作大卷】咸池備矣【黃帝所作樂名也堯增修而用之咸皆也池之言施也言德之無不施也周禮曰大咸】韶繼也【舜樂名也韶之言紹也言舜能繼紹堯之德周禮曰大韶】夏大也【禹樂名也言禹能大堯舜之德周禮曰大夏】殷周之樂盡矣【言盡人事也周禮曰大濩大武】天地之道寒暑不時則疾風雨不節則饑教者民之寒暑也教不時則傷世事者民之風雨也事不節則無功【教謂樂也】然則先王之為樂也以法治也善則行象德矣【以法治以樂為治之法行象德民之行順君之德也】夫民有血氣心知之性而無哀樂喜怒之常應感起物而動然後心術形焉【言在所以感之也術所由也形猶見也】是故志微噍殺之音作而民思憂嘽諧慢易繁文簡節之音作而民康樂粗厲猛起奮末廣賁之音作而民剛毅廉直勁正莊誠之音作而民肅敬寬裕肉好順成和動之音作而民慈愛流辟邪散狄成滌濫之音作而民淫亂【志微意細也吳公子札聽鄭風而曰其細已甚民弗堪也簡節少易也奮末動使四支也賁讀為憤憤怒氣充實也春秋傳曰血氣狡憤肉肥也狄滌往來疾貌也濫僭差也此皆民心無常之斂也肉或為潤】是故先王本之情性稽之度數制之禮義合生氣之和道五常之行使之陽而不散陰而不密剛氣不怒柔氣不懾四暢交於中而發作於外皆安其位而不相奪也【生氣陰陽氣也五常五行也密之言閉也懾猶恐懼也】然後立之學等廣其節奏省其文采以繩德厚【等差也各用其才之差學之廣謂增習之省猶審也文謂節奏合也繩猶度也周禮大司樂以樂語教國子興道諷誦言語以樂舞教國子舞雲門大卷大咸大韶大夏大濩大武】律小大之稱比終始之序以象事行【律六律也周禮典同以六律六同辨天地四方陰陽之聲以為樂器小大謂高聲正聲之類也終始謂始於宮終於羽宗廟黃鍾為宮大呂為角太簇為徵應鍾為羽以象事行宮為君商為臣】使親疎貴賤長幼男女之理皆形見於樂故曰樂觀其深矣【謂同聽之莫不和敬莫不和順莫不和親】土敝則草木不長水煩則魚鼈不大氣衰則生物不遂世亂則禮慝而樂淫是故其聲哀而不莊樂而不安慢易以犯節流湏以忘本廣則容姦狹則思欲感條暢之氣而滅平和之德是以君子賤之也【遂猶成也慝穢也廣謂聲緩也狹謂聲急也感動也動人條暢之善氣使失其所】凡姦聲感人而逆氣應之逆氣成象而淫樂興焉正聲感人而順氣應之順氣成象而和樂興焉倡和有應回邪曲直各歸其分而萬物之理各以類相動也【成象者謂人樂習也】是故君子反情以和其志比類以成其行姦聲亂色不留聰明淫樂慝禮不接心術惰慢邪辟之氣不設於身體使耳目鼻口心知百體皆由順正以行其義【反猶本也術猶道也】然後以聲音而文以琴瑟動以干戚飾以羽旄從以簫管奮至德之光動四氣之和以著萬物之理【奮猶動也動至德之光謂降天神出地祇假祖考著猶成也】是故清明象天廣大象地終始象四時周旋象風雨五色成文而不亂八風從律而不姦百度得數而有常小大相成終始相生倡和清濁迭相為經【清明謂人聲也廣大謂鍾鼓也周旋謂舞者五色五行也八風從律應節至也百度百刻也言日月晝夜不失正也清謂蕤賓至應鍾濁謂黃鍾至中呂】故樂行而倫清耳目聰明血氣和平移風易俗天下皆寧【言樂用則正人理和陰陽也倫謂人道也】故曰樂者樂也君子樂得其道小人樂得其欲以道制欲則樂而不亂以欲忘道則惑而不樂【道謂仁義也欲謂邪淫也】是故君子反情以和其

志廣樂以成其教樂行而民鄉方可以觀德矣【方猶道也】德者性之端也樂者德之華也金石絲竹樂之器也詩言其志也歌咏其聲也舞動其容也三者本於心然後樂氣從之是故情深而文明氣盛而化神和順積中而英華 外唯樂不可以為偽【三者本志也聲也容也言無此本於內則不能為樂也】樂者心之動也聲者樂之象也文采節奏聲之飾也君子動其本樂其象然後治其飾是故先鼓以警戒三步以見方再始以著往復亂以飭歸奮疾而不拔極幽而不隱獨樂其志不厭其道備舉其道不私其欲是故情見而義立樂終而德尊君子以好善小人以聽過故曰生民之道樂為大焉【文采樂之威儀也先鼓將奏樂先擊鼓以警戒衆也三步謂將舞必先三舉足以見其舞之漸也再始以著往武王除喪至盟津之上紂未可伐還歸三年乃遂伐之武舞再更始以明伐時再往也復亂以飭歸謂鳴鐃而退明以整歸也奮疾謂舞者也極幽謂歌者也】夫樂者樂也人情之所不能免也樂必發於聲音形於動靜人之道也聲音動靜性術之變盡於此矣【免猶自止也人道人之所以為也性術言此出於性也盡於此而不可遏】故人不耐無樂樂不耐無形形而不為道不耐無亂【形聲音動靜也耐古書能字也後世變之此獨存焉古以能為三台字】先王恥其亂故制雅頌之聲以道之使其聲足樂而不流使其文足論而不息使其曲直繁瘠廉肉節奏足以感動人之善心而已矣不使放心邪氣得接焉先王立樂之方也【流猶淫放也文篇辭也息猶銷也曲直歌之曲折也繁瘠廉肉聲之鴻殺也節奏闕作進止所應也方道也】是故樂在宗廟之中君臣上下同聽之則莫不和敬在族長鄉里之中長幼同聽之則莫不和順在閨門之內父子兄弟同聽之則莫不和親故樂者審一以定和比物以飾節節奏合以成文所以合和父子君臣附親萬民也是先王立樂之方也【審一審其人聲也比物謂雜金革土匏之屬也以成文五聲八音克諧相應和】故聽其雅頌之聲志意得廣焉執其干戚習其俯仰詘伸容貌得莊焉行其綴兆要其節奏行列得正焉進退得齊焉故樂者天地之命中和之紀人情之所不能免也【綴表也所以表行列也詩云荷戈與綴兆域也舞者進退所至也要猶會也命教也紀總要之名也】夫樂者先王之所以飾喜也軍旅鈇鉞者先王之所以飾怒也故先王之喜怒皆得其儕焉【儕猶輩類】喜則天下和之怒則暴亂者畏之先王之道禮樂可謂盛矣【天子之於天下喜怒節之以禮樂則兆民和從而畏敬之禮樂王者所常興則盛也 以上並樂記】雅頌之聲皆發於辭本於情故君臣以睦父子以親故韶夏之樂也聲浸乎金石潤乎草木今取怨思之聲施之於弦管聞其音者不淫則悲淫則亂男女之辨悲則感怨思之氣豈所謂樂哉故事不本於道德者不可以為儀言不合乎先王者不可以為道音不調乎雅頌者不可以為樂賢人之政降人以體聖人之政降人以心體降可以圖治心降可以保終降體以禮降心以樂所謂樂者非金石絲竹也謂人樂其家謂人樂其族謂人樂其業謂人樂其都邑謂人樂其政令謂人樂其道德如此君人者乃作樂以節之使不失其和故有德之君以樂樂人無德之君以樂樂身樂人者久樂身者不久而亡【三略】先王之樂所以節百事也故有五節【五聲之節】遲速本末以相及中聲以降五降之後不容彈矣【此謂先王之樂得中聲聲成五降而息也降罷退】於是有煩手淫聲悖心耳乃忘平和君子弗聽也【五降而不息則雜聲並奏所謂鄭衛之聲】物亦如之【言百事皆如樂不可失節】至於煩乃舍也已無以生疾【煩不舍則生疾】君子之近琴瑟以儀節也非以悖心也【為心之儀節使動不過度 左氏昭元年】

廣博易良樂教也樂之失奢其為人也廣博易良而不奢則深於樂者也【經解】六律者何黃鍾蕤賓無射太簇夷則姑洗是也故天子左五鍾右五鍾【六律為陽六呂為陰凡律呂十

二各一鍾天子宫縣黃鍾蕤賓在南北其餘則在東西】天子將出則撞黃鍾右五鍾皆應【黃鍾在陽陽氣動西五鍾在陰陰氣靜君將出故以動告靜靜者皆和也】馬鳴中律步者皆有容駕者皆有文御者皆有數步者周還中規折還中矩立則磬折拱則抱鼓【言聲合於樂體比於禮也】然後大師奏登車告出也【周禮王出入奏王夏】入則撞蕤賓左五鍾皆應【蕤賓在陰東五鍾在陽君入故以靜告動動者則亦皆和之也】以治容貌容貌得則氣得氣得則肌膚安肌膚安則色齊矣【入故欲其靜也】蕤賓聲狗吠彘鳴及倮介之蟲皆莫不延頸以聽蕤賓【皆守物及陰之類也】在內者皆玉色在外者皆金聲【玉色反其正性也金聲其事殺】然後少師奏登堂就席告入也【少師佐成太師之事者也】此言至樂相知物動相生同聲相應之義也古者帝王升歌清廟【樂章名】大琴練絃達越大瑟朱絃達越以韋為鼓謂之搏拊何以也【練絃朱絃互文也越下孔也凡練絃達越搏拊者象其德寬和】君子有大人聲不以鍾鼓竽瑟之聲亂人聲清廟升歌者歌先人之功烈德澤也故欲其清也【烈業也】其歌之呼也【呼出聲也】曰於穆清廟於者歎之也穆者敬之也清者欲其在位者徧聞之也故周公升歌文王之功烈德澤苟在廟中嘗見文王者愀然如復見文王故書曰搏拊琴瑟以詠祖考來假此之謂也【尚書大傳】子語魯大師樂曰樂其可知也始作翕如也從之純如也皦如也繹如也以成【語告也大師樂官名時音樂廢缺故孔子教之翕合也從放也純和也皦明也繹相續不絕也成樂之一終也】謝氏曰五音六律不具不足以為樂翕如言其合也五音合矣清濁高下如五味之相濟而後和故曰純如合而和矣欲其無相奪倫故曰皦如然豈宮自宮而商自商乎不相反而相連如貫珠可也故曰繹如也以成論語】子曰師摯之始關雎之亂洋洋乎盈耳哉【師摯魯樂師名摯也亂樂之卒章也史記曰關雎之亂以為風始洋洋美盛意孔子自衛反魯而正樂適師摯在官之初故樂之美盛如此同上】魏文侯問於子夏曰吾端冕而聽古樂則唯恐卧聽鄭衛之音則不知倦敢問古樂之如彼何也新樂之如此何也【魏文侯晉大夫畢萬之後僭諸侯者也端玄衣也古樂先王之正樂也】子夏對曰今夫古樂進旅退旅和正以廣弦匏笙簧會守拊鼓始奏以文復亂以武治亂以相訊疾以雅君子於是語於是道古修身及家平均天下此古樂之發也【旅猶俱也俱進俱退言其齊一也和正以廣無姦聲也會猶合也皆也言衆皆待擊鼓乃作周禮太師職曰大祭祀帥瞽登歌合奏擊拊下管播樂器今奏鼓鞀文謂鼓也武謂金也相即拊也亦以節樂拊者以韋為表裝之以稊稊一名相因以名焉今齊人或謂稊為相雅亦樂器名也狀如漆箛中有椎】今夫新樂進俯退俯姦聲以濫溺而不止及優侏儒獶雜子女不知父子樂終不可以語不可以道古此新樂之一也【俯猶曲也言不齊一也濫濫竊也溺而不止聲淫亂無以治之獶獶猴也言舞者如獶猴戲也亂男女之尊卑獶或為優】今君之所問者樂也所好者音也夫樂者與音相近而不同【言文侯好音而不知樂也鏗鏘之類皆為音應律乃為樂】文侯曰敢問何如【欲知音樂異意】子夏對曰夫古者天地順而四時當民有德而五穀昌疾疢不作而無妖祥此之謂大當然後聖人作為父子君臣以為紀綱紀綱既正天下大定天下大定然後正六律和五聲弦歌詩頌此之謂德音德音之謂樂【當謂樂不失其所】詩云莫其德音其德克明克明克類克長克君王此大邦克順克俾俾于文王其德靡悔既受帝祉施于孫子此之謂也【此有德之音所謂樂也德正應和曰莫照臨四方曰明勤施無私曰類教誨不倦曰長慶賞刑威曰君慈和徧服曰順俾當為比聲之誤也擇善從之曰比施延也言文王之德皆能如此故受天福而延於後世也】今君之所好者其溺音乎【言無文王之德則所好非樂也】文侯曰敢問溺音何從出也【玩習之久不知所由出也】子夏對曰鄭

音好濫淫志宋音燕女溺志衛音趨數煩志齊音敖辟喬志此四者皆淫於色而害於德是以祭祀弗用也【言四國皆出此溺音濫濫竊姦聲也燕安也春秋傳曰懷與安實敗名趨數讀為促速聲之誤也煩勞也祭祀不用淫樂】詩曰肅雍和鳴先祖是聽夫肅肅敬也雍雍和也夫敬以和何事不行【言古樂敬且和故無事而不用溺音無所施】為人君者謹其所好惡而已矣君好之則臣為之上行之則民從之詩云誘民孔易此之謂也【誘進也孔甚也言民從君所好惡進之於善無難】然後聖人作為鞀鼓柷敔壎箴此六者德音之音也【六者為本以其聲質也柷敔謂祝敵也壎箴或為篥箴】然後鍾磬竽瑟以和之干戚旄狄以舞之此所以祭先王之廟也所以獻酬醕酢也所以官序貴賤各得其宜也所以示後世有尊卑長幼之序也【官序貴賤謂尊卑樂器列數有差次】鍾聲鏗鏘以立號號以立橫橫以立武君子聽鍾聲則思武臣【號號令所以警衆也橫充也謂氣作充滿也】石聲磬磬以立辨辨以致死君子聽磬聲則思死封疆之臣【石聲磬磬當為磬字之誤也辨謂分明於節義】絲聲哀哀以立廉廉以立志君子聽琴瑟之聲則思志義之臣【廉廉隔也】竹聲濫濫以立會會以聚衆君子聽竽笙簫管之聲則思畜聚之臣【濫之意猶擘聚也會猶聚也聚或為最】鼓鼙之聲謹謹以立動動以進衆君子聽鼓鼙之聲則思將帥之臣【聞謹囂則人意動作謹或為歡動或為勲】君子之聽音非聽其鏗鏘而已矣彼亦有所合之也【以聲合成己之志樂記】平公說新聲【說樂也新聲者衛靈公將如晉舍于濮水之上聞琴聲焉甚哀使師涓以琴寫之至晉為平公鼓之師曠撫其手而止之曰止此亡國之音也昔師延為紂作靡靡之樂後而自沉于濮水之中聞此聲者必於濮水之上乎】師曠曰公室其將卑乎【師曠晉主樂太師子野】君之明兆於衰矣【兆形也】夫樂以開山川之風【開通也政八音以通八風】以耀德於廣遠也【耀明也】風德以廣之【風宣其德廣之於四方作樂各象其德韶夏濩武是也】風山川以遠之【遠遠其德也周禮每樂一變各有所致謂鱗介毛羽之物山林山澤天地之神祇也】風物以聽之【言風化之動物莫不傾耳而聽】修詩以詠之修禮以節之夫德廣遠而有時節【作之有時動有禮節】是以遠服而邇不遷【國語晉語】太史公曰余每讀虞書至於君臣相敕維是幾安而股肱不良萬事墮壞未嘗不流涕也成王作頌推已懲艾悲彼家難可不謂戰戰恐懼善守善終哉君子不為約則修德滿則棄禮佚能思初安能惟始沐浴膏澤而歌咏勤苦非大德誰能如斯傳曰治定功成禮樂乃興海內人道益深其德益至所樂者亦異滿而不損則溢盈而不持則傾凡作樂者所以節樂君子以謙退為禮以損減為樂樂其如此也以為州異國殊情習不同故博采風俗協比聲律以布短移化助流政教天子躬於明堂臨觀而萬民咸蕩滌邪穢斟酌飽滿以飾厥性故云雅頌之音理而民正嘯噉之聲興而士奮鄭衛之曲動而心淫及其調和諧合鳥獸盡感而況懷五常含好惡自然之勢也又曰夫上古明王舉樂者非以娛心自樂快意恣欲將欲為治也正教者皆始於音音正而行至故音樂者所以動盪血脉流通精神而和正心也故宮動脾而和正聖商動肺而和正義角動肝而和正仁徵動心而和正禮羽動腎而和正智故樂所以內輔正心而外異貴賤也上以事宗廟下以變化黎庶也夫禮由外入樂自內出故君子不可須臾離禮須臾離禮則暴慢之行窮外不可須臾離樂須臾離樂則奸邪之行窮內故樂音者君子之所養義也夫古者天子諸侯聽鍾磬未嘗離於庭卿大夫聽琴瑟之音未嘗離於前所以養行義而防淫佚也夫淫佚生於無禮故聖王使人耳聞雅頌之音目視威儀之禮足行恭敬之容口言仁義之道故君子終日言而邪辟無由入也【史記樂書】

禮書綱目卷八十五

附錄卷上

<經部,禮類,通禮之屬,禮書綱目

欽定四庫全書

禮書綱目附錄卷上 婺源江永撰論蔡氏律書【三條】

論蔡氏律書未盡善

理之在天下至無窮也智者研之而亦有未精愚者思之而或有一得古人發之已謂詳密無可加後人觀之猶謂罅隙有可議雖曲藝小道莫不皆然而況幽深難知如律呂一事乎古之通於音律者別有暗悟神解此誠不可思議若夫薈萃古人成說為之梳櫛其條理闡發其奧與曲暢旁通自成一家之言如蔡西山先生律呂本原證辯二篇固為朱子所極取然而理不厭精學不厭辯誠能於古人成說之外別闢一解別創一法似新奇而實為平易似臆說而又有據依此亦先儒之所不禁也永於律呂一事殫思有年竊疑西山先生之書猶有未盡善者自以管見為書二卷非敢必以為是也將俟當世君子論定焉耳

又論

永少讀蔡氏之書沈潛反覆不能贊一辭中年因讀朱子琴律說見其言管絃同理又謂琴有兩角聲此律呂性情自然之變非人之所能為緣此忽有疑焉使蔡氏之書而至當也宜其證之琴家若合符節胡為律書有二變而琴皆正聲律書唯一角而琴有兩角意蔡氏之書猶有不適於用者乎後觀朱子語有云季通不能琴彈出便不可行乃知蔡氏著書未嘗與琴參證也又因讀前漢律歷志見劉歆有推歷生律一語竊疑律管短長必有與歷冥符者當求管中積分以合於歷日不當執定古人三分損益成法也既而考之益詳思之益密算周髀以求黃鍾之積分推琴徽以求聲律之數度考古人轉絃換調之法訪俗樂工尺上四之粗乃知音律別有精微亦別有法度執蔡氏之律書而求合於管絃無異按圖而索馬刻舟而求劍也蓄之於心二十餘年衆證皆備衆疑盡豁乃敢筆之於書若理未經深思事未加詳考僅據片言譌字便欲盡翻前人窠臼如李文利律呂元聲者則永嘗竊笑之又何敢效焉

又論

從來天下事是非當否當以理為斷不當以人為斷當以目前有據者為定不當以古說久遠者為定如律呂一事欲求至是之歸將以人為斷乎則若西山先生者書無不讀學無不窺人之所難彼之所易朱子稱為老友不敢謂在弟子之列者其所著述尚有考之不詳思之不精貽後人之辯駁者乎且其書實與朱子商確而成蔡氏之書即朱子之書也猶謂不足據信乎如謂以古為定也則蔡氏之書悉本古人成說淮南太史劉歆班固司馬貞孔穎達杜佑皆著

述通人其言前後一揆豈尚有遺議乎若破此拘攣之見以理為衡當別有至是之歸理亦虛而難憑唯以目前有據之物如琴者以決之則此理之是非當否亦不難論定矣蔡氏別有歷書未行於世欲以邵子一元之數為日分恐亦不能與天密合使其書今存豈能舍目前之有據者而唯皇極經世歷是從乎

論五聲【二條】

論五聲之體本於河圖

天地之間氣而已矣氣動而聲發焉或兩氣相軋而聲出於虛或兩形相軋而聲出於實或形軋氣軋形而聲出於虛實之間大小高下皆有數存焉稽之於物金石之屬小而薄者聲濁大而厚者聲清絲絃之屬粗而長張之而緩者聲濁細而短張之而急者聲清聲皆稟於器竹管之屬長而寬吹之而緩者聲濁短而窄吹之而急者聲清聲皆稟於器而器之大小短長粗細寬窄莫不有數存焉品其清濁高下之次第有五最濁為宮次濁為商清濁間為角次清為徵最清為羽太清則噍殺太濁則盎緩五聲者天地之中聲也先王文之而成樂焉月令曰春其音角其數八夏其音徵其數七中央土其音宮其數五秋其音商其數九冬其音羽其數六此即河圖五行之數也五行生出之序一水二火三木四金五土而土又為五行之主四行皆賴之而成故一得五成六二得五成七三得五成八四得五成九五復得五成十而天地之數全矣宮屬土五與十之數也商屬金四與九之數也角屬木三與八之數也徵屬火二與七之數也羽屬水一與六之數也五行根於無形之理故以徵著為次而曰水火木金土五聲稟於有形之器故以大小為次而曰土金木火水試累十數命為宮損一則為九為商又損一則為八為角又損一則為七為徵又損一則為六為羽又損一則為五為少宮於律為黃鍾之宮於琴為中徽然則河圖之數實五聲之原知夫五聲之原根於自然之數則其序唯曰宮商角徵羽而已古法宮生徵徵生商商生羽羽生角意其出於人為而非數之自然者乎【十九八七六五皆迭減一然聲陽也用九而不用十故黃鍾止於九寸寸有九分每聲迭減九分九其九為八十一宮之初也八其九為七十二商之初也七其九為六十三角之初也六其九為五十四徵之初也五其九為四十五羽之初也自是則以九之半乘九得四十零半分為少宮以九之半乘八得三十六為少商與舊法異】

論五聲之用本於琴徽

五聲既以均齊者為體又以參差者為用體者其界限也用者其發聲之處也發聲之處何以驗之當驗之於琴徽琴徽者聲之出於自然者也造化之理有均齊必有參差如人之耳目手足左右相對均齊者也手之五指則有參差矣天之二十八宿四維各七均齊者也井斗度多鬼觜度少則有參差矣琴徽左右相對亦均齊也自龍齏至十三徽四寸五分十三徽至十二徽一寸五分十二徽至十一徽一寸三分十一徽至十徽一寸七分十徽至九徽三寸九徽至八徽二寸六分八徽至七徽三寸四分此參差者也以均齊者布之一聲三寸六分商界在十三徽外九分角界在十一徽外一分徵界在九徽外一寸二分羽界在八徽外二分而用數則發聲於諸徽【詳見下卷論琴】用亦不離乎體之外【皆過界而後發聲】此造化自然之

妙也舊法宮數八十一三分損益以相生商七十二角六十四徵五十四羽四十八以此較今法宮商徵合而角羽則差矣

論黃鍾之宮【一條】

辯前漢志誤刪呂氏春秋

古人造律所以審音制器為作樂之本律必始於黃鍾黃鍾之聲又不易定於是先為黃鍾之宮其管四寸五分其空徑三分寸之一以審定其清聲而後倍之以為黃鍾之全律蓋古之四寸五分當今之二寸八分有奇其管甚短自此以下則太清而不可吹古人能以耳齊聲以此定為黃鍾之宮乃倍為之九寸以生大呂以下十一律焉故律必以黃鍾之宮為本呂氏春秋古樂篇述黃帝命伶倫造律其文甚明但字有譌舛耳其云伶倫取竹嶰谿之谷空竅厚薄均者斷兩節間而吹之其長三寸九分以為黃鍾之宮吹曰舍少此即黃鍾半律也半律當言四寸五分而云三寸九分者古四字疊積四畫因誤為三九字亦與五略相似而譌也唯其黃鍾之宮異於全律是以下文別云次制十二簡以聽鳳凰之鳴云云明其非十二簡中之黃鍾也班孟堅作志時呂覽本三九字已誤疑其三寸九分無當於律遂刪去此句又刪去吹曰舍少句顏師古遂解黃鍾之宮為最長之律既先為最長之律矣復言制十二簡又有最長之黃鍾豈不為重複乎月令亦呂氏之書也季夏中央土律中黃鍾之宮而仲冬之月又曰律中黃鍾明仲冬所中者全律而中央所中者其半律半律居全律之中如琴之七徽有中央之象故季夏未當之其適音篇又云黃鍾之宮聲之本也清濁之衷也此如琴四徽為清全絃為濁七徽則其清濁之衷也合此三處考之其為黃鍾半聲無疑矣班氏采呂覽當存其本文而於寸分之誤加擬議可也率爾刪之豈不大失古人之意乎鄭康成註月令亦誤唯蔡邕月令章句獨以黃鍾之宮為少宮為四寸五分之律管最為得之疏家熊氏亦從此但不當言以此候氣耳今猶見於正義可考也由此言之黃鍾清聲伶倫之所首重後世雖俗樂正宮越調皆必以此起調畢曲譬之人事黃鍾全律人君之象也中央黃鍾之宮帝座之象也尊帝座即所以尊君也皇祐元豐間李照范鎮制樂皆去四清聲則首去此黃鍾之宮矣此聲之最貴者而可去乎蔡氏蔽於通典變律子聲之說謂無黃鍾四寸半之律使其果無伶倫何為首造此耶亦由班氏不能訂呂氏寸分之誤輒刪其文故令後人不復致思耳【莆田李文利作律呂元聲以闕呂覽三寸九分句為主不思三九字之誤又不知其為黃鍾清聲別有全律遂謂黃鍾之長本止如此於是以短而清者為尊長而濁者為卑其說甚謬不足與辨呂覽吹曰舍少四字亦恐有誤一本曰作日又一本舍作舍皆非也竊恐吹字為命字之誤舍字為宮字之誤當作命曰宮少四字宮少即蔡邕所謂少宮也如此則黃鍾之宮為半聲尤明覽者詳之又按管子地員篇云凡將起五音凡首先主一而三之四開以合九九以是生黃鍾小素之首以成宮三分】

【而益之以一為百有八為徵有三分而去其乘適足以是生商有三分而復於其所以是成羽有三分而去其乘適足以是成角此云黃鍾小素之首以成宮亦是黃鍾半律也故其下言三分益一為百有八為徵若是全律則當三分損一為五十四矣全律一百六十二對全律言之故謂之小素其云四開以合九九四當為三亦因古字積畫而誤三開以合九九者三其三為九九其九為八十一也言四開則非矣管子言三分損益雖非是觀此文可知古人起聲律

皆先半黃鍾以為律本正與呂覽之說相發明三之誤為四亦猶四之誤為三又可見三寸九分之為誤文明矣】

論黃鍾之長【一條】

辨蔡邕黃鍾長尺之非

黃鍾長九寸凡聲屬陽陽究於九故不盈十至用以量須用全數故加一寸為尺蔡邕銅龠銘曰黃鍾之宮長九寸空圍九分其月令章句又云管者形長尺圍寸是黃鍾之長與空圍有兩說謂約黃鍾之九寸為十寸可也謂古之尺如黃鍾之長恐不然古之黃鍾九寸大約當今工人尺五寸六分有奇使約九為十則寸狹而分亦狹空圍十分恐管徑太狹吹之不成聲又以此算周髀漢斛所容皆不應矣且古者以八尺為中人之長大約今之五尺也若以九約之僅如今之四尺五寸則今時中人亦不止如此故蔡邕之說未確邢雲路信之謂古法十其寸為尺九其寸為律考之不詳耳

論黃鍾之積【三條】

論律生於歷

聲無形者從陽而法天其數五倍之為十半為清而半為濁律有體者從陰而效地其數六倍之為十二律居陽而呂居陰夫六律六呂之應十二月說者以為埋管於密室隨月氣應而灰飛其事雖未有確驗要之天有十二月律有十二管律歷自然相應則其顯然者矣古人有言曰推歷生律【見前漢律歷志】夫律何以生於歷哉蓋黃鍾之積分冥符歷日之數也天以日為主右行一日一度積之一歲而有三百六十五日四分日之幾一黃鍾之半管積分應之全管則有圓分七百三十分又半分稍弱適符兩歲之期實此律歷所以相通雖未必有氣應灰飛之事而自有默相契合之理猶之人身血脈周流悉應天運而經絡空穴亦有三百六十五數以應天度焉此豈人之所能為哉古今之言律歷相通者皆未思及此漢志雖言推歷生律而以律之八十一分為日法則是因律生歷以數強合并歷亦失之矣邢雲路謂冬至景長測景以定黃鍾不知景隨地異將以何者為準且夏至景短何以蕤賓之律不最短乎

考周髀定黃鍾積分應再葺

黃鍾積分應再葺之日此說千古所未發其數甚渺茫難信幸有因律生量之法見於前漢志又有臬氏之髀尺度淺深之數見於周禮以周髀之容受求黃鍾空圍內之容分兩歲葺實不約而合夫謂容分應再葺非謂十分為寸之分又非以平方分起算以立方分計積也蓋聲音屬陽故黃鍾之寸必九而管體之空必圓寸既以九則分亦當用九而不用十【律以九分為寸史遷以來有此法但假此便於三分損益耳不知其數本如此】管空既圓則分亦當用圓而不用方此自然之理也【范鎮曰古者以竹為律竹形本圓而今以方分置算此律非是算法圓分謂之徑圍方分謂之方斜今圓分而以方法算之此算數非是說正與此合蔡氏謂算

家無用圓分之法不知算家用方分取其整齊易算耳律數精微默契天運未可以算家簡便之法推也】按考工記桌氏為量量之以為鬴深尺內方尺而圓其外其實一鬴其鬻一寸其實一豆【內方尺者虛度之四隅皆抵圍圓其外即方尺之外此皆謂鬴內容受之處鄭註謂圓其外者為之脣非也鬻底也豆即斗字覆其底深一寸容一斗則腹深尺者容十斗可知矣王安石引管子百升成鬴是也鄭注鬴六斗四升非也】此鬴即十斗之斛出於黃鍾之龠內方尺而圓其外既不言有庑旁【庑謂不滿處】則內方四隅皆抵圍以勾股求弦法推之【勾尺自乘百寸股尺亦自乘百寸合勾股冪二百寸平方開之得弦弦即圓徑】其徑一尺四寸一分四釐二毫一秒三忽五微六纖有奇今始以算家十分為寸平方立方法算之凡圓率徑一者周三一四一五九三六【祖沖之密率】以半徑乘半周【徑圍求面冪法】而得面冪七八五三九八四徑十寸者自乘百寸其圓內之冪七十八寸五三九八四今此鬴之徑自乘二百寸則冪亦當倍之為一百五十七寸七分九十六釐八十毫一寸有平方百分凡一萬五千七百七分九十六釐八十毫深一寸有立方一十五萬七千七十九分六八深一尺有立方一百五十七萬七千九百九十六分八十釐此鬴之容方分也因鬴以求黃鍾一鬴之實容黃鍾二千龠【漢志黃鍾兩龠為合十合為升十升為斗十斗為斛故一斛有二千龠】以二千歸立方得黃鍾之積七百八十五分三九八四黃鍾九寸當以九十歸之得面冪八分七二六六四九以面冪求周徑得周一十分四釐七毫一九八徑三分三釐三分釐之一【胡安定以來謂徑三分四釐六毫者未密】此古黃鍾圍徑積冪以十起算之數也較之蔡氏九平方分積八百一十分者不侔矣再以九分為寸并圓分之法推之即前之徑約十為九得一百二十七分二七九二二零六約十為九者以九自乘得八一亦如前法倍之得一六二即為徑冪求圓內之圓分者徑冪即為圓分【如徑十者圓分百】得一萬六千二百為平圓分深一尺者九十分有立圓一百四十五萬八千以二千歸之得黃鍾之積七百二十九个立圓分以八十一歸之空圍有九平圓分徑九分寸之三由此觀之則黃鍾之積豈不適合兩歲之日乎雖兩歲有七百三十零半日弱此積不及一分有奇然此一分有奇者甚微空徑稍寬毫髮即盈其數黃鍾稍寬則鬴徑亦當稍寬【較寬一釐四毫四秒】內方尺之四隅不及抵圍亦當微有庑旁然其數甚微不言亦可且量器取其整齊足以垂法不妨少減庑處以就內方初不必計其毫釐也若王莽之斛雖亦出於黃鍾然其造律或圍徑稍寬於是積分稍多以二千龠登於斛遂有一千六百二十寸其徑一尺四寸三分六釐一毫九秒二忽於是內方四隅不抵圍周不得不有庑旁劉歆謂庑旁九釐五毫而祖沖之以密率計之庑旁一分九毫有奇則漢斛大於周鬴矣蔡氏以漢斛定黃鍾空圍九分積八百一十分豈知黃鍾之積本應再葺合周鬴而且用九用圓布算者乎

論宋儒算術之誤

算術亦律學之一事當講於勾股少廣開方諸法有宋諸儒言律者如胡安定范蜀公蔡西山皆不精於算術其求周徑也不考祖沖之密率但用圍三徑一之法其求積冪也不以密率實算但用圓田簡約之法今所算皆用密率唯數位之後奇零甚微者乃棄之

論十一律【四條】

論律當勻截應節氣

黃鍾半律之容分既當一歲之日則其生大呂以下十一律也亦以四寸有半均勻截之以應月之中氣每律截去三分七釐五毫其中容分三十分有奇猶之自冬至至大寒太陽平行三十度有奇在歷則積而漸多在律則減而漸少至應鍾又截去三分七釐五毫則為黃鍾清聲此天地之氣循環無端之象也舊法以三分損益隔八相生之法生十一律其所生之律忽短忽長無關於歷日之數至於仲呂不能反生黃鍾遂往而不反豈自然之數法哉

又論

今歷節氣亦有短長此因太陽行本輪有高下故視行小有盈縮節氣微有短長在天本皆平行律分應日亦當稍有參差然其數甚微律管不過毫釐之間即謂均勻截之以應太陽平行之平氣亦可也

今律較舊律

今律大呂八寸六分二釐五毫太簇八寸二分五釐夾鍾七寸八分七釐五毫姑洗七寸五分仲呂七寸一分二釐五毫蕤賓六寸七分五釐林鍾六寸三分七釐五毫夷則六寸南呂五寸六分二釐五毫無射五寸二分五釐應鍾四寸八分七釐五毫黃鍾清四寸五分舊律大呂八寸四分一釐七毫有奇少二分七毫有奇太簇八寸少二分五釐夾鍾七寸四分九釐有奇少三分八釐有奇姑洗七寸一分一釐有奇少三分八釐有奇仲呂六寸六分五釐有奇少四分六釐有奇蕤賓六寸三分一釐少四分三釐有奇林鍾六寸少三分七釐五毫夷則五寸六分一釐有奇少三分八釐有奇南呂五寸三分三釐有奇少二分九釐有奇無射四寸九分七釐有奇少二分七釐有奇應鍾四寸七分四釐有奇少一分三釐有奇變黃鍾半律四寸四分三釐有奇少黃鍾清六釐有奇觀舊律皆短於今律夾鍾近姑洗姑洗近仲呂仲呂近蕤賓蕤賓近林鍾林鍾夷則差一律夷則近南呂南呂近無射以歷日較之差多者一月矣其兩律相減大呂減黃鍾五分八釐有奇夾鍾減太簇五分有奇何其疎南呂減夷則二分八釐應鍾減無射二分三釐又何其密豈天地之氣果如是疎密不均乎或曰五聲之用亦有參差而律獨皆均齊何也曰五聲之有參差也驗於琴徽之泛聲而律管之無參差也應乎黃道之宮度各有攸當不可以彼例此也使謂十二律不應十二月則已如其應十二月也安得舍太陽行度一月三十之截然者而從夫三分損益忽疎忽密之數乎

論律呂應日躔斗建

陽律陰呂之相合也有自然之理焉亦有自然之數焉周禮大司樂奏黃鍾歌大呂以祀天神子與丑合也奏太簇歌應鍾以祭地示寅與亥合也奏姑洗歌南呂以祀四望辰與酉合也奏蕤賓歌函鍾以祭山川午與未合也奏夷則歌小呂以享先妣申與巳合也奏無射歌夾鍾以享先祖戌與卯合也此十二辰之六合說者以為本於日躔與斗建如日躔星紀【丑】則斗建元枵【子】日躔析木【寅】則斗建娵訾【亥】是也以今律黃鍾清四寸半合大呂八

寸六分二釐五毫得十三寸一分二釐五毫太簇合應鍾姑洗合南呂蕤賓合林鍾夷則合仲呂無射合夾鍾皆得十三寸一分二釐五毫與大司樂之文及日躔斗建之說不約而合豈非自然之理數不假絲毫智力者乎黃鍾全律獨不與呂合而所合者乃其清聲又隱然有尊君之理寓於律數之間云

論三分損益【八條】

辨三分損益上下相生之非

三分損益上下相生之說始於管子至史記律書而加詳班氏律歷志又因史記推演其數後之言律者皆固守其說不知此法果天為之乎凡數之出於自然如河圖洛書如先天八卦如納音五行如揲蓍如算家勾股乘除諸法是誠非人之所能為若夫聲律之用三分損益竊謂其出於人而非天也律管本應十二月如云黃鍾三分損一下生林鍾安見六月之積日由十一月下生而來如云林鍾三分益一上生太簇安見正月之積日又必由六月上生而至乎明者觀之不待其生至仲呂不能反生黃鍾固已疑其法之非真矣五聲三分損益隔四而相生亦得其近似而非其本然古人見其數之近似也遂立為成法不知小有不合則法已非真如古之算家但知徑一圍三不知有密率古之歷家但知一歲小餘四分日之一不知有歲差其事亦正相類後人於歷算二事已精益求精初不必守古人之定法至言律呂獨相沿不改何其膠柱不知變乎

又論

律之三分損益算之徑一圍三歷之十九歲氣朔分齊皆近似不精之法及細考之歷算二法皆不然律法豈得獨是歷則分明有景可測算則分明有器可量律則分明有琴可考三者皆不可誣雖有羲和之歷隸首之算伶倫之律相傳至今亦當以有據者為斷不當法古法為定如云太史公之說必有所傳則史遷專司星歷其歷書法度當精密不可易矣今太初之法一步不可行又何疑於律乎

又論

細考之古法三分損益其源亦自琴來故謂宮聲為八十一絲商聲為七十二絲皆以琴絃言之琴絃取應聲之法亦略有三分損益之意如初絃第九徽應四絃散聲九徽當絃三分之二似宮聲三分損一而生徵四絃九徽應七絃散聲似徵聲三分損一而生少商益一即是上生商五絃九徽為清角三分益一又似羽聲上生角然太簇八寸不當十三徽則徵生商三分損一而有餘姑洗七寸一分亦不正當十一徽則羽生角三分益一而不足商生羽從十三徽外半寸起算則三分損一得八徽若自十三徽起算則三分損一又有餘以此觀之唯有宮生徵合三分損益之數其餘三聲非太過即不及故三分損一近似而非真徵之於宮也偶合三分損一耳諸聲不可以此為例琴又有時以十徽為角三分損一則復生宮而五聲循環矣然就三分損益之法自前生來終不能使十徽為角也

又論

又以歲日驗之黃鍾當兩歲為四十八氣三分損一為三十二氣除一歲二十四氣餘八氣以八氣減二十四餘十六氣自冬至數之是處暑七月中也而云黃鍾下生林鍾林鍾六月之律已差一月矣又以三十二氣分為九十六候三分益一百二十八候除一歲七十二候餘五十六候以減七十二餘十六候自冬至初候數之是驚蟄二月節後第二候也而云林鍾上生太簇太簇正月之律又差四候矣以此觀之月之三分損一已是隔九及其三分益一亦不正得隔八故歲日總無三分損益之數而律之隔八下生其源已失之於林鍾

又論

或疑聲律三分損益上下相生至其末也復以三分之則有不盡之算而數不行故聲止於五律止於十二此似出於自然曰此亦出於人為也蓋其初先知聲之當五故置一而五三之得八十一為宮之數相生至角六十四三分之不盡一算而數不行設使其初不知聲之當五或置一而四三之以二十七為宮則相生至四位即有三分不盡之算矣或六三之以二百四十三為宮則至六位而後有不盡之算五位猶可分也律亦猶是其初先知律之當有十二故自子至亥以三歷十二辰得十七萬七千一百四十七為黃鍾之實相生至仲呂十三萬一千七十二三分之不盡二算而數不行設使其初不知律之當十二不以三歷十二辰則不盡之算又不如此矣然則此數與法豈果出於自然哉【古歷家謂十九歲七閏無餘分為一章故立法以九百四十分為一日以二百三十五為小餘此二百三十五者一章之月數也不知歷者見其積至十九歲果無餘分遂謂九百四十分之日法出於天然不知其先因章月有二百三十五故立為日法非天道果有此數也後人覺其有差而此數法不可用矣其事正與聲律相類歷則久正之矣律則鮮有覺其非者】

論古時未有三分損益之說

周禮典同曰凡為樂器以十有二律為之數度樂器之長短小大皆以律計其倍半而為之律誠有數有度矣但不知周公以前造律者果如管子史遷之說乎抑別有活法乎伶州鳩曰古之神瞽考中聲而量之以制度律均鍾神瞽目廢而耳聰聲之大小高下自能以耳齊之非專求之度數也即謂度數有成法亦當先為簡徑而後漸為煩曲如今法遞減黃鍾黃均勻截管其法至簡易徑捷而三分損益一律分之至於千萬其數極為迂曲煩難安知古人造律不即如今日簡徑之法至後人加以巧曲始有管子以下諸說乎管子蓋春秋戰國間人撰自此以前未有三分損益之說唯國語伶州鳩之言有紀之以三一語朱子疑其謂三分損益然韋昭解此以三為天地人則亦未必其果如朱子之說也

論後人嘗破三分損益之說

劉宋時何承天嘗增林鍾以下分數使至仲呂反生復得黃鍾謂三分損益者其大略猶歷言斗分四之一此說最為有見然以意增之而涉於牽強則亦難憑明鄭世子謂長律下生短律

左旋隔八短律上生長律右旋隔六以勾股算術布之周而復始不用三分損益其云左旋隔八右旋隔六猶是舊法如朝四暮三實無異也勾股算術與此難通亦牽強布算耳豈出於自然乎總之律應十二月隨月迭減而非隔八相生後人雖有議及三分損益者未嘗思其所以失之之由雖有欲破三分損益者亦不知所以破之之道牽強立法徒勞無當邢雲路既知三分損益猶歷言斗分四之一為大略之數矣又云後人苟有得不當詆古人立論之非此又不然易大傳謂蓍策三百六十當期之日此謂揲法已成其過揲之策猶有一歲常數之象故大略言之不必正與歲實相當若律之三分損益乃是以此立法苟可增損毫釐則此法數非真與蓍策之大槩言相當者不同不可以彼例此也後人果是則古人為非但當論後人所得者果是與否耳不必猶為古人回護也如是言以歷比律歷家謂斗分四之一即漢歷太初四分之術也邢氏何不為之回護而深詆漢人為不知歷乎若曰律分法由來已久不始於漢則殷周之歷不為不久其失與太初四分等亦將謂久者即不當詆乎

論仲呂不能反生黃鍾

天地之運晝夜寒暑終則有始獨於律呂之數往而不反仲呂再生不及黃鍾之九寸此由黃鍾三分損一下生林鍾即已失之六寸當為夷則而林鍾以進而干其位安能使仲呂反生復於其所京房創為六十律之說仲呂再生別名執始轉生四十八律終於南呂殊為穿鑿何承天劉焯譏房之失增林鍾已下十一律之分使仲呂反生還得黃鍾之實又涉牽強總之拘於三分損益其本已失豈能齊其末今法迭減黃鍾順序而生不曰黃鍾生林鍾而曰黃鍾生大呂不曰仲呂生黃鍾而曰應鍾生半黃鍾豈有不能循環者乎蔡氏亦譏房之失而取通典變律子聲之說仲呂生變黃鍾以下有六變律則亦四十八律中執始【子黃】去滅【未林】時息【寅太】結躬【西南】變虞【辰姑】遲內【亥應】之異名耳

論二變聲【二條】

論二變不合於琴

古法五聲之餘於羽宮之間近宮收一聲為變宮角徵之間近徵收一聲為變徵淮南子云姑洗生應鍾比於正音故為和應鍾生蕤賓不比於正音故為謬二變之說其來久矣然以琴考之殊不然琴絃皆正聲六七絃為宮商之清聲非二變也十三徽至十徽一律一徽是角商各二聲皆非如二變之說也論聲律者當以琴為主琴徽出於天然不從三分損益來者也

論七音非古

周景王問伶州鳩七律對以武王伐殷之初歲月日星辰所在自鶉及駟為七列【鶉火午宮張宿至天駟凡七宿天駟房也】南北之揆為七同【自鶉火午至天龍子凡七宮】神人以七同其數而以律和其聲故謂之七律此但言所以用七之故而不言七律為何律後又言武王作四樂曰羽曰厲曰宣曰蕤亂用夷則上宮黃鍾下宮太簇下宮無射上宮又只有四律而不言七此皆不甚分明韋昭註七律云黃鍾為宮太簇為商姑洗為角林鍾為徵南呂為羽應

鍾為變宮蕤賓為變徵武王所用七律果如是乎左傳昭公二十年七音杜預但引國語之文而不用五聲二變之說豈亦有疑於此者乎杜佑則云古有五聲至周以來加文武二聲謂之七音此則琴絃少宮少商之說也竊疑此說得之變宮變徵恐周初未嘗有此京房謂伏羲時已有此七音太無稽矣尚書大傳云予欲聞六律五聲八音七始詠說者謂七始即七音然今文尚書作在治忽史記又作來始滑一文而三處不同始治字相近滑忽音相近七在古音亦相近以文義言之皆不若今文尚書之安則尚書其本文而史記書傳皆誤文也以七始為七音郢書燕說豈足信乎

論變律【二條】

辨變律半律之非

古法十二律之外但有四清聲而已至唐杜佑通典始有變律子聲之說仲呂再生變黃鍾轉生十二律各半之為子聲其律皆短於正律蔡氏取黃太姑林南應六變律各有半聲有用有不用似非自然之理如當用此律則宜用其正律不能用全律則宜用正律之半聲而已何為舍其正者不用必用其近似不正者乎其所以然者但拘於三分損益之說謂從正律生來不得本律故輾轉相生皆殺於本律不知三分損益之法人為之耳豈聲音中果有如是之數默寓其間當用變律時必不宜從正律取聲耶【朱子謂漢志黃鍾不為他律役與通典變律之說相發明然黃鍾自有半律為他宮用亦是不為他律役不必又取變黃鍾之半聲也】

論范馬未檢通典

朱子甚取通典之說謂他書所不及又謂范蜀公馬溫公不知檢通典以今觀之二公之論樂其大者未必得元聲次則十一律之損益未必得本律之正耳至若通典之說尚有可疑用與不用恐於樂皆無加損也【范主房庶私增漢書又去四清聲最為紕謬唯律管當用圓分之說有可取之】

禮書綱目附錄卷上

附錄卷中

欽定四庫全書

禮書綱目附錄卷中 婺源江永撰

論琴

以琴證論古今法【十六條】

三分損益之法其來尚矣今以為不然而別為之法得無無徵而不信乎曰是非無徵也古之樂器流傳於今其最古雅而自然者莫如琴以琴證之則古今二法之離合判然於絃徽之間矣蔡氏之書證之於琴而不合其大者有六按舊法羽宮角徵之間為二變以補其缺始無遼濶之虞使古之為琴者誠慮此宜以二變間於正聲之間胡為舍此不用而命第六絃曰少宮第七絃曰少商此果何說乎其不合者一也【樂工指法或以四絃為蕤賓變徵五絃為林鍾徵六絃為南呂羽七絃為應鍾變宮見陳暘樂書此俗工相傳之誤也古法原以初絃中徽應六絃散聲二絃中徽應七絃散聲】舊法姑洗為黃鍾之角不可稍移易者琴家宮調却按初絃十徽應三絃散聲十徽位近仲呂而非姑洗【此據古律言之今法十徽正當蕤賓】其不合者二也中徽當琴體之半初絃為黃鍾清聲古人所謂黃鍾之宮清濁之衷律呂之本者此也黃鍾正宮調於此起調畢曲泛聲發於此者音獨洪大與他徽異聲以中為貴也蔡氏之書於黃鍾四寸半之下註曰無謂九分之寸奇零不盡仲呂反生所不及而旋宮所不用也使其果無而不用則初絃中徽為虛設矣胡為以泛聲扣之音獨隆隆然乎其不合者三也三分損益所生之律參差不齊以絃比管而計其尺寸初絃唯林鍾當九徽南呂當八徽若太簇則在十三徽之外姑洗則在十一徽之內十三徽則無律二變律則無徽胡為徽律相齟齬乎其不合者四也舊法旋宮一均止用七聲施之編鍾編磬猶可也用之於琴則不然琴每絃皆有三十六聲除太清者不用其餘各因曲調隨宜取聲何嘗限之以七若依蔡氏之法則按徽取聲皆不得出本均之外聲之可用者無幾且黃鍾一均有濁而無清應鍾一均有清而無濁只須彈一兩絃即可成曲調而諸絃諸徽皆無用有是理乎其不合者五也【嘗試以趙彥肅所傳風雅詩譜按聲彈之只須初絃次絃其餘皆無用其聲全濁不成韻調可知詩譜之非真其於鹿鳴諸詩黃鍾太簇用清聲猶賴有此兩聲以濟之稍稍可聽若依蔡氏法此二律并不得用清聲法則密矣其如聲不諧於耳何】琴以聲律為體以徽為用彈者按徽取聲音調自諧次絃以後律漸長而位漸疎至六七絃則半律亦如正律之長故按徽之聲有正當律者有當律之前半後半與中間者如蔡氏之法必須用正用半與夫變律變半律按圖似有條理施之於琴則煩而難用且古琴曲之傳於今者其聲甚美何嘗拘拘蔡氏旋宮之法乎其不合者六也若如今法則五聲用其均齊者以為體取其應徽者以為用諸律則計尺寸而勻布之中徽既為黃鍾清聲矣十徽為四分絃之三於聲之位當角之中於律正當蕤賓猶一歲之夏至也十三徽為八分絃之七於聲之位當商之近前於律正當夾鍾猶一歲之春分也十二徽為六分絃之五於聲之位當商之近後於律則當姑洗九徽為三分絃之二於聲之位為徽之近前於

律則當夷則此皆徽律正相當者也十一徽為角之近初仲呂當之而稍上八徽為羽之近前無射近之而在右此二徽律不正相當者別有其故後論泛聲中詳之七徽與律相當者五徽差者二相當者其常微差者其變亦可知今律脗合於琴者多矣又因徽之自然者以為五聲之用次絃以下隨其調之高下而進退焉此琴家之本法較之拘於三分損益泥於變聲變律者果孰離而孰合乎後之言律呂者當於古雅自然之器精密考之一洗千餘年沿襲之說可也

論琴徽泛聲應先天八卦橫圖

琴有十三徽說者但以為象閏而已然以泛聲彈之【左手微按絃右手擊絃】當徽則泠泠有清音不當徽則啞然無聲則其位置不可分毫移動此必有所以然之理古今未嘗發明永深思之而得四說其一則應先天八卦橫圖也蓋琴絃四倍黃鍾三尺六寸自龍齕至臨岳七徽為中界自臨岳至七徽以四徽為中界七徽至龍齕以十徽為中界又自臨岳至四徽以一徽為中界十徽至龍齕以十三徽為中界自一徽至四徽四寸半為上準象黃鍾子聲四徽至中徽九寸為中準象黃鍾中聲中徽至龍齕一尺八寸為下準象黃鍾濁聲重按之取木聲則自尾至首為三段徽按之取泛聲則自首至尾為四段一至四一段也四至七二段也七至十三段也十至十三四段也中兩段倍於前後段又併一徽內十三徽外凡為四寸半者有八儼然有先天八卦橫圖之象焉一徽內無聲之處乾也一至四兌也四至七離與震也七至十巽與坎也十至十三艮也十三至龍齕無聲之處坤也乾坤老而不用故首尾無聲六子代父母用事故十三徽有聲也首尾雖無聲而聲實出於首尾則乾坤為不用之用猶一家父母雖老畢竟以父母為主也細推之第一徽兌之下畫也二徽兌之中畫也三徽兌之上畫也四徽為兌離之間少女中女相接之處也五徽離之中畫也六徽震之初畫也七徽為震巽之間兩儀大分界之處也七徽內陽主進畫自下而上七徽外陰主退畫自上而下八徽巽之下畫也九徽坎之中畫也十徽為坎艮之間中男少男相接之處也十一徽艮之上畫也十二徽艮之中畫也十三徽艮之下畫也三男三女皆用事發聲而少男少女血氣方充為人道生育之始尤用事故兌艮一畫各發一聲而離震巽坎一卦止發一聲也且其中尤有微妙者焉二五九與十二徽皆居本段三分之一三徽却後二分六徽却後四分八徽却前四分十一徽却前二分不與諸徽均列按之卦畫皆有至理蓋四徽十徽居兩卦之間三徽當兌之上畫一陰為兌之主稍却而後不欲近乎離十一徽當艮之上畫一陽為艮之主稍却而前不欲近乎坎少女中女同居而志不同行少男中男並處而性不相合也且兌金也性畏火之鑠艮土也性惡水之濕故各却少許以避之造化自然之理也五徽正當離之中畫九徽正當坎之中畫若均布之六徽宜當震之中畫八徽宜當巽之中畫然離以中畫之陰為主震以下畫之陽為主故六徽當稍却而後乃得其本位坎以中畫之陽為主巽以下畫之陰為主故八徽當稍却而前乃得其本位也且火以木為體木以水為母故震木稍却而後以就火之炎巽木稍却而前以就水之潤也伏羲八卦橫圖為作易之始其自然之理數乃見之於琴徽吁妙矣哉

論泛聲應六十四卦橫圖

泛聲既應先天八卦橫圖矣由三畫之卦積至六畫為六十四卦橫圖又有自然之應者焉一

徽內十三徽外皆無聲乾坤二宮不用也一徽則承乾宮末之地天泰而接乎兌宮之天澤履也二徽當火澤睽三徽當水澤節四徽則承地澤臨之後而接乎離宮之天火同人也五徽當水火既濟六徽當火雷噬嗑七徽當地雷復與天風姤之間陰陽之大交界也八徽當水風井九徽當火水未濟十徽則承地水師之後而接乎艮宮之天山遯也十一徽當火山旅十二徽當水山蹇十三徽終于地山謙而接乎坤宮之天地否也凡此諸徽當兩宮交界之間者則有乾坤之卦不當交界之間者必有坎離之卦乾坤坎離為四正故當此有聲也始承泰天地交也終接否天地不交也中於復姤陽始長陰始生也界於同人與師火之始水之終也少女少男之宮血氣並充水火皆當之中女少男之宮當其水火之交不交而不當其純卦純則不相為用也長男長女之宮火近震水近巽當其近不當其遠遠者先衰也天地之道陽有餘而陰不足長男猶可生育故六徽當火雷噬嗑泛聲猶有清音長女天癸先絕故八徽當水風井泛聲全濁似無聲也又以卦爻細推之二徽當睽之六五三徽若均布之當節之六三退二位當初九也五徽當既濟之六二六徽若均布之當噬嗑之九四退四位當初九也七徽後爻自上而下八徽若均布之當井之六四却後四位當初六也九徽當未濟之九二也十一徽若均布之當旅之九三却二位當初六也十二徽當蹇之九五也兌巽陰宮遇離而止遇坎而却震艮陽宮遇坎而止遇離而却男女異類宜相避也坎離二宮水火相遇則各止其所矣此又以卦象人事推之皆有自然之妙焉

論泛聲應節氣

泛聲應卦畫既有自然之理矣抑又有微妙者焉全絃猶一歲也三尺六寸二十四分之每分一寸有半當一氣臨岳際則冬至也一徽內四寸半之地有三氣為冬至小寒大寒以其當冬令陽微之時故無聲一徽當立春陽氣出地故有聲二徽雨水也三徽驚蟄也四徽春分也五徽穀雨也六徽小滿也七徽夏至也八徽大暑也九徽處暑也十徽秋分也十一徽寒露也十二徽霜降也十三徽立冬也陽氣將入地故聲終於此自此至龍巖四寸半之地為小雪大雪冬至皆閉藏之時故無聲也自春分至秋分一月而一徽自立春至春分秋分至立冬皆一月而兩徽者春初為萬物之始生秋末為萬物之已成故聲獨多也四立之節唯立春立冬有徽而立夏立秋無徽者立春立冬為陽氣出入之限春夏與夏秋之間陽氣皆在地上非陰陽之大界故無聲也冬至雖無聲而聲皆出於首尾則十三徽之聲皆其聲猶乾元之統天也驚蟄一徽稍却而後寒露一徽稍却而前者驚蟄為木氣之動寒露為金氣之藏陽性常速故未至其地而先有聲陰性常緩故已過其地而後有聲也小滿一徽又却而後大暑一徽又却而前者凡聲音屬金四月金始生畏午火之鑠故却而後六月火氣盛金正伏故却而前皆金之避火也諸徽泛聲亦有不同中徽最洪大其聲隆隆然夏至陽極也諸徽稍不當徽即無聲獨中徽過一指猶有聲陽盛有餘也九徽十徽最清亮其聲空空然金氣正肅清也一二徽聲細陽方長也十二十三徽聲不甚發陽欲藏也八徽聲最不揚似無聲然大暑火盛而金伏也吁造化之理微矣哉抑妙矣哉

論泛聲應納音

泛聲之理以卦畫節氣推之既如此矣又不止是也六十甲子以數定為五行名曰納音其理

與聲音相關以琴徽推之亦有默契者焉蓋十三徽分為四段一段中有甲子一周細推其徽位之相當一為甲子二為甲寅三為壬寅四為甲子五為甲申六為壬寅七復為甲子七徽後左右相對八為壬寅九為甲申十為甲子十一為壬寅十二為甲申十三為甲子納音五行甲子壬寅為金甲申為水當金水則有聲也五行成質者金為清木土則濁矣有氣而未成質者水為清火則濁矣故獨當清者而鳴六十甲子三分之為甲子甲申甲辰若當甲辰則為火其音濁故三徽六徽八徽十一徽皆却至壬寅之位而鳴不與諸徽均列也此泛聲唯金水有聲若於七徽外取本聲則又五行皆全龍齷起甲子十三徽為己卯土十二徽甲申水十一徽戊子火十徽甲午金九徽甲辰火八徽癸丑木七徽甲子金凡二金二火一土一水一木五行之音皆備第八徽若勻布則當甲寅水五行缺一故退一位至癸丑木而五行全造化自然之妙如此

總論泛聲

琴必當徽乃有泛聲一絃十三聲七絃九十一聲正如人身動脈頭手足各三部左右十八處當其部切之乃應手否則不應也古今未有言泛聲所以然者今推之乃有四說八卦也六十四卦也節氣也納音也四者殊途而皆可通朱子所謂萬物各具一理萬理同出一原故推而無不通也既得琴徽之所以然而聲律有確據矣以下乃論取聲布律調絃換調之法

論按徽取五聲

五聲之體雖有定界而五聲之用取諸琴徽初絃十三徽為商十二徽為清商次絃之聲隨調高下而應之下則應十三徽高則應十二徽第十一徽為慢角十徽為正角三絃亦隨調高下而應之下則應十一徽高則應十徽九徽為徵四絃應之八徽為羽五絃應之中徽為少宮六絃應之次絃中徽為少商七絃應之諸徽泛聲本無五聲之序而按徽取本聲則絃於此取應諸調於此轉換有自然之理焉

又論

舊以太簇八寸為商於琴絃三尺二寸在十三徽外半寸然泛聲至十三徽三尺一寸五分而始發聲則當以十三徽為商蓋十三徽外其聲太濁雖三尺二寸四分之地已交商界必更進九分而後有徽舊法三分徽益一上生商其如此處無徽何又舊法以姑洗為角其位在十一徽之內然角聲一發於十一徽一發於十徽彈慢角調商以十一徽為角彈宮調者却以十徽為角猶清商調以十二徽為商也舊法唯有姑洗為角故角徵間相去遠不得不有變徵以補其缺角不能再生宮故有變宮以續其斷證之於琴則不合矣

諸絃布律法

諸絃之律各以今律布之布至少少聲而止法如左一絃
全律【每律減一寸五分】半律【每律減七分五釐】

黄【龍齷散聲】大【三尺四寸五分】太【三尺三寸並十三徽外】
夾【三尺一寸五分十三徽】姑【三尺十二徽】仲【二尺八寸五分十一徽内二分】
蕤【二尺七寸十徽】林【二尺五寸五分十徽九徽之間】夷【二尺四寸九徽】
南【二尺】

【二寸五分八徽外】無【二尺一寸八徽内四分】應【一尺九寸五分七徽外】
黄清【中徽】仲清【一尺四寸二分五釐六徽内】
自七徽以上唯當徽近徽者録之餘從略後倣此】夷清【一尺二寸五徽】

黄清清【九寸四徽】

二絃 全律【每律減一寸七分一釐四毫奇】半律【每律減八分五釐七毫奇】

夾【龍齷散聲】姑【三尺四寸二分八釐奇】仲【三尺二寸五分七釐奇
並十三徽外】蕤【三尺八分五釐奇十三徽内】
林【二尺九寸一分四釐奇十一徽外四分奇】

夷【二尺七寸四分奇十徽外四分奇】南【二尺五寸七分奇十徽内】
無【二尺四寸九徽】應【二尺二寸三分弱九徽八徽之間】黄清【二尺五分七釐奇
八徽内】太清【一尺九寸七分】太清【一尺八寸八分六釐並七徽外】夾清

【中徽】林清【一尺四寸五分七釐六徽内】無清【一尺二寸五徽】
黄清清【一尺二分八釐奇四徽外】

二絃【清商調用】全律【每律減一寸八分】半律【每律減九分】

姑【龍齷散聲】仲【三尺四寸二分】蕤【三尺二寸四分並十三徽外】
林【三尺六分十三徽内】夷【二尺八寸八分十一徽外一分】南【二尺七寸十徽】
無

【二尺五寸二分十徽九徽之間】應【三尺三寸四分九徽内】
黄清【二尺一寸六分八徽外二分】太清【二尺七分】太清【一尺九寸八分】
夾清【一尺八寸九分並七徽外】姑清【中徽】夷清【一尺四寸四分六徽内】
黄清清【一尺】

【八分五徽内】

三絃【慢角調用】全律【每律減一寸八分八釐奇】
半律【每律減九分四釐奇】仲【龍齷散聲借二分】蕤【三尺三寸九分奇】

林【三尺二寸一釐奇並十三徽外】 夷【三尺一分 十二徽外一分】
南【二尺八寸二分奇 十一徽內】 無【二尺六寸】

【三分四釐奇 十徽內六分奇】 應【二尺四寸四分奇 九徽外】
黃清【二尺二寸五分奇 九徽八徽之間】 太清【二尺一寸六分奇 八徽外】
太清【二尺七分弱 八徽內】 夾清【一尺九寸七分奇】 姑清【一尺八寸八分奇
並七徽外】 仲清【一尺七寸八分七釐奇中徽內一分二釐奇】 南清【一尺四寸一分
六徽內】 黃清清【一尺一寸三分弱 五徽內】

三絃【宮調用】 全律【每律減二寸】 半律【每律減一寸】

蕤【龍齷散聲】 林【三尺四寸】 夷【三尺二寸 並十三徽外】
南【三尺十二徽】 無【二尺八寸 十一徽內七分】 應【二尺六寸十徽內】
黃清【二尺四寸九徽】 太清【二尺三寸】 太清【二尺二寸並八徽外】
夾清【二尺一寸八徽內】 姑清【二尺】 仲清【一尺九寸並七徽外】 蕤清【中徽】
南清【一尺】

【五寸 六徽外】 黃清清【一尺二寸五徽】

四絃 全律【每律減二寸二分半】 半律【每律減一寸一分二釐半】

夷【龍齷散聲】 南【三尺三寸七分半 十三徽外】 無【三尺一寸五分 十三徽】
應【二尺九寸二分半 十一徽外】 黃清【二尺七寸十徽】
太清【二尺五寸八分奇】 太清【二尺四寸七分半 並九徽外】 夾清【二尺三寸六分奇
九徽內】 姑

清【二尺二寸五分九徽八徽之間】 仲清【二尺一寸三分奇 八徽】
蕤清【二尺二分半】 林清【一尺九寸一分奇 並七徽外】 夷清【中徽】
應清【一尺四寸一分奇 六徽內】 黃清清【一尺三寸五徽外】

五絃 全律【每律減二寸五分二釐三毫奇】
半律【每律減一寸二分六釐一毫奇】 無【龍齷散聲借六分太】 應【三尺二寸八分奇
十三徽外】 黃清【三尺二寸太十二徽外】 太清【二尺九寸奇十二徽內】
太清【二尺七寸七分奇 十徽外】 夾清【二尺六寸五分十徽內五分】
姑清【二尺五寸二分奇 十徽外】 仲清【二尺三寸九分太 九徽】
蕤清【二尺二寸七分奇九徽八徽之間】 林清【二尺一寸四分奇八徽】
夷清【二尺一分八釐奇】 南清【一尺八寸九分奇
並七徽外】 無清【一尺七寸六分六釐奇 中徽內三分奇】 黃清清【一尺五寸一分奇
六徽外】

五絃【清商蕤賓調皆用】 全律【每律減二寸三分寸之二】
半律【每律減一寸三分寸之一】

無應之間【龍齕散聲】 應【三尺四寸六分奇】
黃清【三尺二寸並十三徽外】 太清【三尺六分奇十二徽外】 太清【二尺九寸三分奇十二徽內】 夾清

【二尺八寸十一徽內】 姑清【二尺六寸六分奇 十徽內】 仲清【二尺五寸三分奇十徽九徽之間】 蕤清【二尺四寸九徽】 林清【二尺二寸六分奇 九徽八徽之間】
夷清【二尺一寸三分奇 八徽】 南清【二尺】 無清【一尺八寸六分奇並七徽外】
應清【一尺七寸三分奇 中徽內】 黃清清【一尺六寸六徽外】

六絃 黃清與一絃諸律位同

六絃【慢宮調用】 半律【每律減一寸四分四釐】
初絃全律位與此同應鍾黃清之間【龍齕散聲】 黃清【三尺四寸五分六釐】
太清【三尺三寸一分二釐】 太清【三尺一寸六分八釐 並十三徽外】
夾清【三尺二分四釐 十二徽外】 姑清【二尺八寸八分十一徽外】
仲清【二尺七寸三分六釐 十徽外】 蕤清【二尺五寸九分二釐十徽九徽之間】
林清【二尺四寸四分八釐 九徽外】 夷清【二尺三寸奇九徽內】 南清【二尺一寸六分八徽外】 無清【二尺一分六釐 八徽內】 應清【一尺八寸七分二釐 七徽】
黃清清【一尺七寸二分八釐七徽內】

七絃 夾清與二絃諸律位同

七絃 姑清與清商調二絃諸律位同

論布律用六十甲子紀分數

諸絃布律大略如前法若欲加密當以六十甲子紀其分數初絃龍齕起甲子之半十三徽當乙卯十二徽當甲申十一徽當乙丑之近前十徽當甲午九徽當甲辰八徽當癸丑之近前七徽復當甲子以後又以六十位布至四徽復當甲子自七徽外一位得三分七徽內一位得一分半次絃以下各以本徽本位起龍齕亦各如其絃而伸之位漸疎分數漸多如此則分數皆可考此未及詳布第言其大略云

論隔絃取聲音

諸絃散而扣之間一絃則應於第十徽而隨調轉絃必有一絃當退一徽至十一徽然後應皆理勢自然如此如宮調五絃十徽應七絃散聲四絃十徽應六絃散聲二絃十徽應四絃散聲

初絃十徽應三絃散聲唯三絃獨退一徽於十一徽應五絃散聲朱子琴律說及答吳元士書皆深疑此事詳為之說似謂獨退一徽常在三絃不知此唯宮調調絃則如此若更一調則退徽又在他絃不常在三絃也宋中興志姜夔樂議其圖說甚明朱子蓋亦考之不詳耳又蔡西山先生謂琴唯黃鍾一均但絀定七絃以彈十一宮朱子謂季通之說不可行考之姜夔圖說琴須轉絃合調蔡氏絀定七絃之說誠誤矣朱子又謂古人隨月調絃若調至應鍾則絃急恐絕此亦不然古法轉絃合調一調但轉兩三絃非盡取七絃而更之也調之高下絃之緊慢上下不過一律非謂由黃鍾而漸緊以至於應鍾也姜夔圖說言簡而明今因其說推之如左

慢角調調絃法

姜夔曰黃鍾大呂並用慢角調故於大絃十一徽應三絃散聲 古大呂比今律短

按慢角調者角絃慢張也此調宮絃退一位取十一徽仲呂角應三絃散聲
三絃仲呂角取十徽內無射羽應五絃散聲 五絃近無射羽取十徽內夾鍾清商應七絃散聲
二絃夾鍾商取十徽外夷則徵應四絃散聲 四絃夷則徵取十徽黃鍾清應六絃散聲此調諸絃如常唯角絃慢故名【凡徽律差數分者聲相近亦得相應後倣此】

清商調調絃法

姜曰太簇夾鍾竝用清商調故於二絃十一徽應四絃散聲 古太簇今在太夾之間古夾鍾今在夾姑之間按清商調者商絃高一律也此調宮絃取十徽蕤賓角應三絃散聲
三絃蕤賓角取十徽無射應鍾之間應五絃散聲
五絃無應間羽取十徽內姑洗清商應七絃散聲 三絃姑洗商取十一徽夷則徵應四絃散聲
四絃夷則徵取十徽黃鍾清應六絃散聲 此調商絃緊而五絃七絃亦隨之

宮調調絃法

姜曰姑洗仲呂蕤賓竝用宮調故於三絃十一徽應五絃散聲
古姑洗今近仲呂古仲呂今近蕤賓古蕤賓今近林鍾

按宮調者以初絃為主也宮絃取十徽蕤賓角應三絃散聲
三絃蕤賓角取十一徽內無射羽應五絃散聲
五絃近無射羽取十徽內夾鍾清商應七絃散聲
二絃夾鍾商取十徽外夷則徵應四絃散聲四絃夷則徵取十徽黃鍾清應六絃散聲

慢宮調調絃法

姜曰林鍾夷則並用慢宮調故於四絃十一徽應六絃散聲
古林鍾今為夷則古夷則今近南呂

按慢宮調者大絃與第六絃慢張下半律也宮絃取十徽仲呂角應三絃三聲
三絃仲呂角取十徽內無射羽應五絃散聲 五絃近無射羽取十徽內夾鍾清商應七絃散聲
二絃夾鍾商取十徽外夷則徵應四絃散聲
四絃夷則徵取十一徽應鍾與黃鍾清間慢宮應六絃散聲
此調宮絃慢角絃亦如之而六絃亦慢

蕤賓調調絃法

姜曰南呂無射應鍾竝用蕤賓故於五絃十一徽應七絃散聲
古南呂今在南無間古無射今在無應間古應鍾今在廣黃間

按蕤賓調者角絃緊當蕤賓位而第五絃亦隨之也此調宮絃取十徽蕤賓角應三絃散聲
三絃蕤賓角取十徽無射應鍾之間應五絃散聲
五絃無應間羽取十一徽內夾鍾清商應七絃散聲
二絃夾鍾商取十徽外夷則徵應四絃散聲 四絃夷則徵取十徽黃鍾清應六絃散聲 古蕤賓
近今林鍾若三絃散聲取今律林鍾則絃太緊恐不可張且二絃夾鍾商太遠而四絃夷則徵
太促又於三絃十徽應五絃散聲五絃羽為應鍾則羽宮之間亦太促矣故三絃取角聲當今
律之蕤賓更不可移而上古名此調為蕤賓與今法若暗合焉 又按宮調三絃亦是蕤賓但取
十一徽應五絃散聲五絃如其位此以十徽應五絃則五絃隨之而緊與宮調異

五調中慢宮調最下慢角調次之宮調為中聲蕤賓調稍高清商調最高【以今律言之黃鍾
大呂太簇用慢角調夾鍾姑洗用清商調仲呂蕤賓林鍾用宮調夷則南呂用慢宮調無射應
鍾用蕤賓調】

論四清聲【二條】

論四清聲不可去

樂有黃鍾大呂太簇夾鍾四清聲尚矣古者編鍾編磬皆十六枚是十二律如四聲也琴之六
七絃雖只少宮少商而諸律清聲皆備且復有少少聲焉又不止四清而已瑟有二十五絃亦
諸清聲皆備也四清者宋樂志以為為夷則以下四律為宮使商角不陵僭宮聲然只有四清
而角以後不妨用全律沈括馮元以為唯臣民不可陵君事物則不必避也黃鍾宮調雖以清
黃起調其間仍用黃鍾全律為君故姑洗角雖用全律亦不為民陵君也古用四清極有調理
原不始於王朴李照范鎮樂皆去四清不知何以成樂編鍾磬可去四枚管絃則清聲自具雖
欲去之安得而去之乎

論陳暘樂書之疎率

陳氏樂書其主意大約以為先王之樂唯有五聲十二律後世乃有二變四清此皆鄭衛之音

凡八音之器皆當去二變四清以復古此耳食之學粗率之見未嘗深思細考其故者也二變誠非自然之理然欲去二變當先去三分損益之說如琴絃之用正聲則二變不待去而自去若不考其所以用二變之由而仍泥三分損益之說則角徵與羽宮之間安得不用二變以補其缺乎至欲去四清尤為不思之甚無論旋宮避陵犯四清不當去即欲去之而勢亦不可得而去如琴初絃中徽內皆是清聲次絃中徽外已有清聲五絃則十三徽以內皆是清聲試問彈琴者唯取全律濁聲乎陳氏謂七絃琴為害理必去二絃以復舜之五絃試問五絃果無清聲乎不唯五絃即一絃至中徽已是清聲矣如其說雖孫登之一絃琴尚多一半為無用寧有是理乎宋太宗加二絃有九絃琴清聲皆具陳氏謂當益一絃取其倍五聲獨不思五聲加倍清聲不已居半乎竹聲中簫管箎笛之屬凡七孔九孔者陳氏皆惡之五孔六孔八孔者陳氏皆取之謂五孔合五聲六孔合六律八孔合八音此但欲以數目比擬無異兒童之見不知管笛之屬黃鍾宮聲皆出中管【諸孔皆閉】五孔者四孔為商角徵羽餘一孔即是半宮聲六孔者五孔具十一律上一孔必是黃鍾清非五孔即為五聲六孔即為六律也八孔則四清皆具矣乃以應八音取之試問一器與八音有何交涉乎陳氏徒嘖嘖於四清其粗率不思如此彼所據以為說者但以周禮有凡為樂器以十有二律為之數度一語耳不知半律清聲亦是本律之半未嘗出於十二律之外也善乎翰林學士馮元之駁李照曰前聖制樂取法非一故有十三管之和十九管之巢三十六簧之竽二十五絃之瑟十二絃之箏九絃七絃之琴十六枚之鍾磬各自取義寧有一之於律呂專為十二之數也四清聲之說正為臣民相避以為尊卑今若止用十二數旋相考擊至夷則以下四管為宮之時臣民相越則陳氏犯之音作此甚不可者也楊徐之破范鎮曰編鍾編磬十六其來遠矣不獨見於周禮小胥之說漢成帝時犍為郡於水濱得古磬十六枚帝因是陳禮樂雅頌之聲以風化天下其事載於禮樂志漢承秦秦未嘗制禮作樂其稱古磬十六者乃二帝三王之遺法也王朴樂內編鍾編磬以其聲律太高歌者難逐故四清聲置而不用及神宗朝下二律則四清皆用而諧協矣今鎮所製匏竹之器簫必十六管是四清在其間矣自古無十二管之簫豈簫韶九成之樂已有鄭衛之聲乎此皆說之不可易者李范二家已屬謬見陳氏徒悅乎去鄭復雅之名而不察其實以二家之識為高其未之深思乎

論旋宮【一條】

論旋宮有活法

十二律旋相為宮古有是言後人論律講於此者詳矣一均七聲有用正律者有用半律者有用變律與變半律者以此布為八十四聲六十調甚易及其被之管絃施之金石常齟齬而難行竊意旋宮當別有活法或一均不必限以七聲或徵羽二聲之律不必短於本宮此當與知音者參定未可執一定之圖說膠柱而鼓瑟也

論樂調【三條】

辯黃鍾全律起調畢曲之非

樂之有調其理甚微其勢皆出於自然如初一聲為某聲其尾亦是此聲其中曲折皆隨初一聲之高下而抑揚焉調平者衆聲皆隨之而平調高者衆聲皆隨之而高調下者衆聲皆隨之而下大約太濁太清之聲不可以起調如初一聲太下則其後遇當下之聲更不能抑而管無可吹絃無可彈歌者亦無其聲矣或初一聲太高則其後遇當高之聲更不能揚而管無可吹絃無可彈歌者亦不能及此聲矣故起調之聲必在清濁之間其前更有下於此者其後更有高於此者然後可以抑揚曲折而成曲調焉儒家論樂不知此理謂黃鍾一均皆用正律更無清聲變律雜其間為最純粹是謂初一聲即用黃鍾全律起調如此則太簇以下六律皆短聲皆高但有揚而無抑豈能成曲調乎試以管絃驗之笛家曾有以中管之合字為調首琴家曾有以初絃之散聲為調首者乎凡雅樂所謂黃鍾清宮俗樂所謂正宮者皆以半黃鍾清聲起調而非以全律濁聲起調也黃鍾清聲起調其後更有清聲可以揚其前皆下於調首可以抑是以能成調也以今笛家俗樂驗之有所謂上字調者其調平下五孔皆開更高焉則為六字調字譜皆移上二聲或一聲更下焉則為尺字調字譜皆移下一聲若過乎六字尺字則太高太下不能成調矣雅樂亦相似也宋時雅樂俗樂皆無徵角調但有宮商羽三調而已宮者清宮商者清商皆不用黃鍾大呂太簇夾鍾四濁聲也徽宗使人強為徵調但能以徵聲起而不以徵聲終【見朱子語類】此不知何故或由風氣使然乎由此觀之雅樂起調之聲未甚下者即不能為焉有黃鍾最濁之聲而可為者乎【朱子論樂初亦以為黃鍾五調皆以黃鍾正律起調畢曲其後云古人亦用黃鍾清聲為調前說非是見朱子語類九十二卷輔廣錄注中然則朱子後亦自覺其誤矣蔡氏不習於音不知樂調有自然之理當時趙彥肅傳得唐時鄉飲酒風雅十二詩譜小雅六詩為黃鍾清宮調二南六詩為無射清商調皆以清黃起調畢曲雖其譜未必盡是而用清黃為調自是勢不得不然蔡氏想當見之蔽於黃鍾無半律之說故不肯信耳】

再論樂調

或問黃鍾全律既不可起調徵角二聲又不能為調然則十二律之能為調者鮮矣不知隋之萬寶常唐之祖孝孫何以皆能為八十四調乎且周禮三大祭樂但無商調而有宮角徵羽齊景公時有徵招角招郢中曲有流徵高漸離易水擊筑有變徵此又何以說乎曰樂聲有流變而為樂有活法考古者當以意會可也凡樂皆氣也人亦氣也同在鴻濛一氣之中不得不隨氣運而遷流如詩文為人聲亦樂之類古之詩文後人不能作則後世不能為此樂調古人能為之又何足怪乎且古人為樂當有活法未必如後人之律書一均定用七聲而徵羽皆不可過宮商也齊之徵招角招未知其聲何如若郢中之流徵易水之變徵亦俗樂之類後世宴樂固自有徵調亦不為異也若萬寶常史言其撰樂譜論八音旋宮之法為八十四調百四十四律其聲淡雅不為時所好何妥易之今不可考祖孝孫作唐雅樂為四十八曲八十四調亦不知其果皆應律否大約古人之能為諸調者當必有活法若如儒家之說即一琴已不能易一均而況八音皆能旋宮乎

論龜茲琵琶七調

隋史言龜茲人蘇祇婆善琵琶調有七種以其七調勘校七音宜若符契一曰婆陁力華言平

聲即宮聲也二曰雞識華言長聲即商聲也三曰沙識華言質直聲即角聲也四曰沙侯加濫華言應聲即變徵聲也五曰沙臘華言應聲即徵聲也六曰般瞻華言五聲即羽聲也七曰侯利華言斛牛聲即變宮聲也鄭譯因習而彈之始得七聲之正按此則西域亦有七音然其語與華異未必果合於五聲二變也琴家却只有五調慢宮慢角之類張琴有緊慢何以不能為七調乎慢宮調有似於變宮蕤賓調却是角聲之高者不得謂之變徵然則西域之七調未必果合七音其所謂沙侯加濫調安知非角聲之高者乎

論造律【三條】

論造律以聲和為主

制律求聲氣之元事之最難者也黃鍾之管冥符天道若不可以毫釐差然其分數甚微非人所能察使有天生自然之律管則可若出於人為安能使其無毫釐之差竊謂造律必須善審音者聽之聲和為主聲既和矣雖有小差於樂亦無大害譬如工人製琴製笙製簫笛者其分寸豈能畫一哉吹之彈之而聲和焉斯為善器矣邢雲路論之最當特載之【邢曰古樂既亡欲求聲器者宜何施而可亦唯依古以千二百黍求長九寸空圍九分之管使其和也則已如有不和必其黍之顆與管之分未當也則惟本吾之平其心易其氣徐聽人聲之高下上下考之以求其中聲蓋人之聲無古今一也古尺之分寸與黍之大小不可考矣即今上黨之黍有大者次者不一安知古所用者為何等黍又安知其律之分寸視後代何尺為當哉但以人聲察之以耳聽審之以九寸千二百黍約之斯可矣程子曰黃鍾之聲亦不難定世自有知音者將上下聲考之既得正便將黍實其管看管實得幾粒然後推而定法可也張子曰律呂有可求之理德性淳厚者必能知之朱子曰樂之為教今無師授當立一學樂學使士大夫習之必有精通者出三說皆探本之論也】

論人身取律寸法

古之尺寸雖出於律而制字之意則皆本於人身人身中指第二節其內兩紋相距為寸醫家鍼灸量人穴道所謂同身寸者取諸此也今人伸大指與食指為五寸張兩手為五尺古法以張兩手為一尋然則今之五尺當古之八尺今之五寸當古之八寸而古之一尺當今工人尺六寸二分五釐也以中指第二節內紋為一寸者度之自中指端至掌後第二節橫紋而九寸至第三節橫紋而一尺然則古之黃鍾九寸即今人中指端至掌後第二節橫紋之度也雖人有高下手指有長短以中人量之相去蓋不甚遠是則一伸掌而黃鍾之廣瞭然如在目前矣夫律寸天生也人身之寸亦天生也二者當不約而同與其求之於古尺古器求之於縱黍橫黍荒遠者無稽紛紜者難信曷若求之中人之手腕指節為最近而可據者乎夫律數精微雖未可執此一途以求合唯以人身之寸為主而更以古器古法參互而審定之雖不中或亦不遠乎

論人聲合管聲

人聲之有宮商角徵羽也其別有四有一韻具五聲者字音出於喉為宮出於舌為商出於牙為角出於齒為徵出於唇為羽即切韻三十六字母之分屬喉舌牙齒唇與半舌半齒是也有一韻屬一聲者其韻合口呼之為宮開口呼之為商張牙呼之為角齊齒呼之為徵聚吻呼之為羽如公韻屬宮岡韻屬商是也又一韻之中重濁之字為宮商輕清之字為角徵羽如彈琴操者遇重濁之字則彈重濁之聲以應之遇輕清之字則彈輕清之聲以應之是也又有同是一字隨其曲調之高下而歌之遇高調則此字聲高遇平調則此字聲平遇低調則此字聲低則一字皆可為宮商角徵羽也樂以人聲為主人聲出於喉猶管聲出於管中造律者欲求聲氣之元既酌乎分寸之度空圍之量更以人聲參定之可也

論候氣【二條】

論候氣不可信

律管固有冥符天道之理然欲埋之於地以候氣恐不可信天氣一而地氣殊雖使律之長短廣狹皆如法其能一一氣應灰飛耶事未經目驗不敢臆斷也邢雲路亦深疑此事云

錄袁黃候氣法

明袁黃號了凡通律歷之學所著有歷法新書關中李世達為之作序中間有與張江陵論候氣五不合之說頗有理此事史不載又不見於他書僅見此序而已永恐久而失墜特錄之以備言律學者考覈其言依法候之而飛灰皆應未知果有此否也【李序云昔張江陵傲睨一世無所許可獨折節於了凡延為諸子師江陵自謂深明律學命官依占法造三層密室又依蔡氏多截管以候氣不應請袁往視之復命曰候之室宜擇清靜間曠之地今瓦礫叢積則地氣不清一不合也築室三層專固地氣耳故外室之牆掘地三尺而築之二層木室之坂宜入地一尺六寸三層室入地七寸六分今皆不然止可封地上之氣而不可封地中之氣二不合也外室之門宜向子第二層門宜向午第三層門復向子所以反復而固氣也今皆向午三不合也聲氣之元奇之象數厥有自然之理必心探造化之秘者始可制器諧聲不然求之累黍酌之古器皆不可廢今觀所截諸管大小不倫四不合也天地之形常相參差故天之午常偏於丙上二分五釐今日圭所測是也地之午常偏午上二分五釐冬至候黃鍾之宮宜埋壬子之中一室只有一位豈可多截管乎五不合也由是託之擇地於天壇之南隅依法候之而飛灰皆應張甚喜欲委之正樂袁請先改歷法語不合遂稱疾求歸歸未幾而張變作矣】

律呂餘論【四條】

聲音自有流變

凡聲氣也人亦氣也同在一氣之中其勢自有流變非人之所能禦古樂之變為新聲亦猶古禮之易為俗習其勢不得不然今人行古禮有不安於心者則聽古樂亦豈能諧於耳乎耳不諧則神不治神不治則氣不和不洽和亦何貴於樂若曰樂者所以事神非徒以悅人則亦不

然凡神依人而行人之所不欣暢者神聽亦未必其和平也故古樂難復亦無庸強復但當於今樂中去其粗厲高急繁促淫蕩諸聲節奏紆徐曲調和雅稍近乎周子之所謂淡者焉則所以歡暢神人移風易俗者在此矣若不察乎流變之理而欲高言復古是猶以人心不安之禮強人以必行也豈所謂知時識勢者哉

俗樂可求雅樂

俗樂以合四一上勾尺工凡五六十字為譜十二律與四清聲皆在其中隨其調之高下而進退焉所謂雅樂亦當不出乎此為雅樂者必深明乎俗樂之理而後可求雅樂即不能肆及於此者亦必與俗樂工之稍知義理者參合而圖之未有徒考器數虛談聲律而能成樂者也宋世制樂諸賢惟劉几知俗樂常與伶人善笛者遊其餘諸君子既未嘗肆其事又鄙伶工為賤技不足與謀則亦安能深知樂中之曲折哉判雅俗為二途學士大夫不與伶工相習此亦從來作樂者之通患也

樂器不必泥古

聲寓於器器不古雅則聲亦隨之然天下事今不如古者固多古不如今者亦不少古之笙用匏今之笙用木匏音劣於木則何必拘於用匏而謂八音不可缺一乎古之木聲用祝敵後世節樂用拍板而雅樂猶用祝敵祝敵之音粗厲拍板之音清越則亦何必不用拍板乎後世諸部樂器中擇其善者用之可也

度量權衡不必泥古

古法度量權衡皆受法於黃鍾天下皆欲其齊同古之度量權衡相去不甚遠故齊之猶易後世度長量大權重與古懸殊民間用之既久勢難改易千里之內三者必不能同而民俗便之遠方之懋遷者正因度量衡之同而計其錙銖以收贏餘之利則不同不足為病正所以為利也宋政和間作大晟樂以律尺及斗斛秤新式頒行天下限以月日令天下盡毀舊器不從令者許民首告其擾民不已甚乎後之作樂者律成而制三器藏之內府以備他日之校勘可也若民間所用固當聽從民便毋斤斤於法古似亦事勢之宜焉已

禮書綱目附錄卷中

附錄卷下

欽定四庫全書

禮書綱目附錄卷下 婺源江永撰深衣考誤

深衣

鄭氏曰深衣連衣裳而純之以采者 孔氏正義曰所以稱深衣者以餘服則上衣下裳不相連此深衣衣裳相連被體深邃故謂之深衣

【永】按深衣之義鄭注孔疏皆得之獨其裳衽之制裁布之法與續衽鉤邊之文鄭氏本不誤而疏家皇氏熊氏孔氏皆不能細繹鄭說遂失其制度後儒承譌襲舛或以臆為之考辯愈詳而誤愈甚其失自玉藻疏始今為考訂如左

玉藻曰深衣三祛縫齊倍要【縫音逢齊音咨要一遙反】

鄭氏曰三祛者謂要中之數也祛尺二寸圍之為二尺四寸三之七尺二寸縫紕也紕下齊倍要中齊丈四尺四寸

疏曰祛謂袂末言深衣之廣三倍於袂末齊謂裳之下畔要謂裳之上畔言縫下畔之廣倍於要中之廣謂齊廣一丈四尺四寸要廣七尺二寸又曰云三之七尺二寸者按深衣云幅十有二以計之幅廣二尺二寸一幅破為二四邊各去一寸餘有一尺八寸每幅交解之濶頭廣尺二寸狹頭廣六寸此寬頭嚮下狹頭嚮上要中十二幅廣各六寸故為七尺二寸下齊十二幅各廣尺二寸故為一丈四尺四寸

【永】按深衣者聖賢之法服衣用正幅裳之中幅亦以正裁惟衽在裳旁始用斜裁古者布幅濶二尺四寸深衣裳用布六幅裁為十二幅其當裳之前後正處者以布四幅正裁為八幅上下皆廣一尺一寸各邊去一寸為縫一幅上下皆正得九寸八幅七尺二寸其在上者既足要中之數矣下齊當倍於要又以布二幅斜裁為四幅狹頭二寸寬頭二尺各去一寸為縫狹頭成角寬頭得一尺八寸皆以成角者向上以廣一尺八寸者向下則四幅下廣亦得七尺二寸合於齊得一丈四尺四寸此四幅連屬於裳之兩旁別名為衽下文衽當旁是也深衣裳裁縫之法本如此玩下文鄭注可見疏家不得其說妄謂六幅皆用交解狹頭去邊縫廣六寸濶頭去邊縫廣一尺二寸於是裳之前後惟中縫正直其餘皆成奇袷不正之縫可謂服之不衷曾謂聖賢法服而有是哉下文衽當旁疏及續衽鉤邊諸說之紛挐皆由六幅皆交解之說誤之耳

衽當旁

鄭氏曰衽謂裳幅所交裂也凡衽者或殺而下或殺而上是以小要取名焉衽屬衣則垂而放之屬裳則縫之以合前後上下相變

【永】按衽者斜殺以掩裳際之名深衣裳前後當中者不名衽唯當旁而斜殺者名衽故經云衽當旁明其不當中也當中則前襟而後裾是也鄭云衽謂裳幅所交裂也玩所之一字明其唯在裳旁而名衽者交裂其餘幅不交裂也交裂者以布二幅交解為四幅狹頭二寸去邊縫成角寬頭二尺去邊縫一尺八寸也又云凡衽者或殺而下或殺而上此廣解凡裳之衽也衽有二朝服祭服喪服皆用帷裳前三幅後四幅裳際不連有衽掩之用布交解寬頭在上合縫之狹頭在下如燕尾之形即喪服篇衽二尺有五寸是也此衽之殺而下者也深衣之衽當裳旁亦交解而以狹頭向上寬頭向下此衽之殺而上者也云是以小要取名焉者謂棺上合縫之木亦名為衽也喪大記曰君蓋用漆三衽三束鄭注云衽小要也蓋小要之形上下廣而中狹以掩棺蓋合縫之際上半則殺而下下半則殺而上似衣衽之上殺下殺以掩裳際是有衽之名此借衣衽名小要故鄭連及之也云衽屬於衣則垂而放之謂朝祭喪服之衽云屬於裳則縫之以合前後即此深衣之衽也其縫之以合前後者唯左旁為然若右旁則不能縫合別有鉤邊見深衣篇鄭亦略言之耳此經與鄭注甚明又以他文證之問喪云扱上衽謂裳之兩角插於帶間也論語云左衽謂夷俗衽掩於左其縫合者在右也皆衽當旁之證也而疏家忽之并失小要之義

疏曰衽謂裳幅所交裂也者裳幅下廣尺二寸上濶六寸狹頭嚮上交裂一幅而為之【按裳幅不皆交裂孔氏誤謂二二幅皆交裂是未繹所字之意】云凡衽者或殺而下或殺而上者皇氏云言凡衽非一之辭非獨深衣也或殺而下謂喪服之衽廣頭在上狹頭在下【按朝祭服亦如喪服之制皇氏不及朝祭服非也】或殺而上謂深衣之衽寬頭在下狹頭在上云是以小要取名焉者謂深衣與喪服相對為小要兩旁皆有此衽【按小要者棺上合縫之木也皇說誤】熊氏大意與皇氏同或殺而下謂朝祭之服耳【按熊氏又不及喪服亦非也合皇熊二說乃備】云衽屬衣則垂而放之者謂喪服及熊氏朝祭之衽【按此說是】云屬裳則縫之以合前後者謂深衣之衽云上下相變者上體是陽陽體舒散故垂而下體是陰陰主收斂故縫而合之【按此皆得之】今刪定深衣之上獨得衽名不應假他餘服相對為衽何以知之深衣衣下屬幅而下裳下屬幅而上相對為衽【按喪服篇明言衽二尺有五寸孔氏乃謂深衣獨得衽名何耶殺上殺下明是與他服相對孔氏乃謂深衣衣下屬幅而下裳下屬幅而上相對為衽衣下屬幅何以謂之殺耶且下文衽屬衣則垂而放之豈得謂深衣之衽耶刪定之說大夫鄭注之意也】鄭注深衣鉤邊今之曲裾則宜兩邊而有也【按鉤邊別是一物此經未及深衣疏一旁有曲裾此云宜兩邊有與彼疏亦自相牴牾】但此等無文言之且從先儒之業

深衣云續衽鉤邊

鄭氏曰續猶屬也衽在裳旁者也屬連之不殊裳前後也鉤讀如烏喙喙必鉤之鉤鉤邊若今曲裾也【永】按續衽謂裳之左旁縫合其衽也鉤邊謂裳之右旁別用一幅布斜裁之綴於右後衽之上使鉤而前也漢時謂之曲裾蓋裳後為裾綴於裾曲而前故名曲裾也所以必用

鉤邊去裳之右畔前後衽不合若無鉤邊則其行步之際露則後衽之裏有鉤邊而後可揜裳際也鄭氏特引孝經援神契烏喙必鉤之鉤讀如之明其為鉤曲之義使非別綴一幅曲而前不得謂之鉤也裳十二幅象十二月又有鉤邊其以象閏歟鄭氏不言左續衽右鉤邊者衣裳自左揜右左可連右不可連其事易明故不必言左右也續衽鉤邊之義鄭注分明疏家汨之後儒之說并鉤邊失之詳見後

疏曰衽為深衣之裳以下濶上狹謂之為衽【按裳幅不皆下濶上狹說已見前】接續此衽而鉤其旁邊即今之朝服有曲裾而在旁者是也【按此說似合續衽鉤邊而一之若兩旁皆續衽而鉤邊者其說誤矣】又曰衽當旁者凡深衣之裳十二幅皆寬頭在下狹頭在上【按此說甚誤前已辨之】皆似小要之衽【按小要上半殺而下半殺而上須合他衽之殺而下者方似小要】是前後左右皆有衽也今云衽當旁者謂所續之衽當身之一旁非謂餘衽悉當旁也【按裳幅當前後者不名衽安得有餘衽經明言衽當旁安得謂前後左右皆有衽】云屬連之不殊裳前後也若喪服其裳前三幅後四幅各自為之不相連也今深衣裳一旁則連之相著一旁則有曲裾掩之與相連無異故云屬連之不殊裳前後也【按一旁連之相著謂在左者也一旁有曲裾掩之謂在右者也此二句分明最為得之然又云與相連無異故云屬連之不殊裳前後恐非鄭注之意續衽鉤邊鄭氏分別言之右邊曲裾掩裳際不可謂屬連之也】云若今曲裾也鄭以後漢之時裳有曲裾故以續衽鉤邊似漢時曲裾今時朱衣朝服從後漢時帝所為則鄭云今曲裾者是今朝服之曲裾也【按孔氏玉藻疏謂曲裾兩邊宜有似唐時朝服有兩曲裾然一以經文釋之一邊既續衽則曲裾惟宜施於右耳】

家禮深衣制度云衣全四幅其長過脇下屬於裳註云用布云幅中屈下垂前後共為四幅如今之直領衫但不裁破腋下其下過脇而屬於裳處約圍七尺二寸每幅屬裳三幅

【永】按深衣之領自左而掩於右前襟亦自左掩右右襟有表有裏則前後當有五幅如後世之袍制而家禮謂衣前後四幅如今之直領衫恐誤矣家禮深衣圖亦是兩襟相掩既相掩則領不直而衣不止四幅豈朱子未定之說乎又云每幅屬裳三幅亦沿舊說之誤前後四幅每幅屬裳二幅而衽之四幅在兩旁衽之上頭但有角屬於衣前襟之裏一幅則有曲裾屬之耳

裳交解十二幅上屬於衣其長及踝

註云用布六幅每幅裁為二幅一頭廣一頭狹狹頭當廣頭之半以狹頭向上而連其縫以屬於衣其屬衣處約圍七尺二寸每三幅屬衣一幅其下邊及踝處約圍丈四尺四寸

【永】按孔氏誤釋玉藻裳幅皆交解家禮遂承其誤當以玉藻衽當旁鄭注為正又按深衣篇制十有二幅以應十有二月鄭注云裳六幅幅分之以為上下之殺此注亦略言裳以六幅分為十二幅下齊廣於要中耳其為上下之殺者在當旁之衽非謂十二幅皆殺也

又云方領

註云兩襟相掩衽在腋下則兩領之會自方

【永】按深衣云曲袷如矩以應方注袷交領也古者方領如今小兒衣領孔疏云鄭以漢時領皆向下交垂方領似今擁咽故云若小兒衣領但方折之也司馬溫公引後漢馬援傳朱勃衣方領能矩步註謂頸下別施一衿映所交領使之方正又引後漢儒林傳服方領註方領直領也左傳衣有袷註袷領會也曲禮註袷交領也謂領之交會處自方即謂袷疑更無他物朱子此說蓋從溫公後說也鄭氏謂如今小兒衣領豈漢時小兒衣領亦但曲之而自方非如孔氏擁咽之說乎但領既交會則不直而在右之前襟必有表裏前謂布四幅不知何以制之也

曲裾

註云用布一幅如裳之長交解裁之如裳之制但以廣頭向上布邊向外左掩其右交映垂之如燕尾狀又稍裁其內旁大半之下令漸如魚腹而末為烏喙內向綴於裳之右旁禮記深衣續衽鉤邊鄭註鉤邊若今曲裾

【永】按曲裾別用一幅布裁之綴於裳之右旁是已然謂交解裁之廣頭向上左右交映垂之如燕尾狀則似朝服祭服喪服之衽非鉤邊之制也鄭注讀如烏喙必鉤之鉤此引孝經緯文明鉤字之義非謂末為烏喙也此條朱子後自有說

蔡氏淵曰司馬所載方領與續衽鉤邊之制引證雖詳而不得古意先生病之常以理玩經文與身服之宜而得其說謂方領者只是衣領既交自有如矩之象謂續衽鉤邊者只是連續裳旁無前後幅之縫左右交鉤即為鉤邊非有別布一幅裁之如鉤而綴於裳旁也方領之說先生已修之家禮矣而續衽鉤邊則未及修焉

【永】按續衽鉤邊朱子前後有三說謂別布一幅裁之如鉤綴於裳之右旁此家禮之說也謂左邊既合縫了再覆縫以合縫者為續衽覆縫為鉤邊此衣圖之說也謂是連續裳旁無前後幅之縫左右交鉤即為鉤邊此蔡氏所聞之說也三說似皆未確其源皆由孔氏釋玉藻誤之使其不謂六幅皆交解則當旁之衽左邊連屬之右邊必須有別布一幅為曲裾以掩之非如合縫覆縫左右交鉤之說矣其有別布一幅也亦但綴於裳之後裾鉤曲而前非如交裁為燕尾之說矣

楊氏復曰深衣制度唯續衽鉤邊一節難考按玉藻深衣疏皇氏熊氏孔氏三說皆不同皇氏以喪服之衽廣頭在上深衣之衽廣頭在下喪服與深衣二者相對為衽孔氏以衣下屬幅而下裳上屬而上衣裳二者相對為衽此其不同者一也【按二說孔氏失之皇氏但失不兼朝祭服耳】皇氏以衽為裳之兩旁皆有孔氏以衽為裳之一邊所有此其不同者二也【按孔氏謂所續之衽當身之一旁非謂衽為裳之一邊所有也】皇氏所謂廣頭在上為喪服之衽者熊氏又以此為朝祭服之衽一以為吉服之衽一以為凶服之衽此其不同者三也【按此非不同也皇熊各舉一邊耳】家禮以深衣續衽之制兩廣頭向上似與皇氏喪服之衽熊氏朝祭服之衽相類此為可疑是以先生晚歲所服深衣去家禮舊說曲裾之制而不用【按鄭

氏解鉤邊為曲裾分明別有一物但非如燕尾下垂耳去而不用恐乖鄭義】蓋有深意恨未得聞其說之詳也及得蔡淵所聞始知先師所以去舊說曲裾之意後又取禮記深衣篇熟讀之始知鄭注續衽二字文義甚明特疏家亂之耳【按續衽與鉤邊是二事鄭注分言之而楊氏即以續衽當鉤邊是誤讀鄭注耳】按鄭注曰續猶屬也衽在裳旁者也屬連之不殊裳前後也【按鄭註別解鉤邊為曲裾此獨刪去何也】鄭註之意蓋謂凡裳前三幅後四幅夫既分前後則其旁兩幅分開而不相屬唯深衣裳十二幅交裂裁之皆名為衽【按此沿孔疏之誤】見玉藻衽當旁註【按鄭註衽謂裳幅所交裂也言唯衽之四幅交裂其餘八幅則不交裂也楊氏亦未細釋鄭註耳】所謂續衽者指在裳旁兩幅言之謂屬連裳旁兩幅不殊裳前後也【按屬連之者裳之左旁也若右旁兩幅各開是以別有曲裾以掩裳際楊氏但言裳旁不辨左右則右邊豈可屬連乎】疏家不詳考其文義但見衽在裳旁一句意謂別用布一幅裁之如鉤而垂於裳旁妄生穿鑿紛紛異同愈多愈亂【按孔疏深衣裳一旁連之相著一旁則有曲裾掩之二句最分明的確鄭註既解鉤邊為曲裾則安得混鉤邊於續衽而謂非別用一幅布為之乎】自漢至今二千餘年讀者皆求之於別用一幅布之中而註之本義為其掩蓋而不可見【按鉤邊別用一幅布正得鄭註之意唯玉藻疏誤謂深衣裳皆名衽十二幅皆交解於是註之本義為其掩蓋而不可見耳】夫疏所以釋註也今推尋鄭註本文其義如此而皇氏熊氏等所釋其謬如彼皆可以一掃而去之矣【按皇熊之說未嘗謬】先師晚歲知疏家之失而未及修定愚故著鄭註於家禮深衣曲裾之下以破疏家之謬且以見先師晚歲已定之說云

【永】按楊氏之說雖謂以鄭註破疏家之謬而玉藻衽當旁之經文及鄭註衽謂裳幅所交裂也所字之意未嘗細玩又引深衣續衽鉤邊之註但及其釋續衽者而遺其曲裾之說於是疏說本不誤者以為誤而其真誤如孔氏所謂裳幅皆交解者反忽之甚矣註疏亦未易讀也深衣裳之誤已久以聖賢法而反類於奇衰不正是以詳為之考俟當世君子論定焉

禮書綱目附錄卷下